

Le Devleskero Lav Andre Romaňi Čhib

Eastern Slovak Romani New Testament

© The Word for the
World International
and The Word for the
World Slovakia, 2019.

This Bible is copyrighted by The Word for the World (twftw.org) and is produced at cost by the Digital Bible Society (dbs.org). This translation is made available to you under the terms of the Creative Commons Attribution-Noncommercial-No Derivatives license 4.0.

This Bible, and many others, are available for free download in a variety of digital formats at dbs.org/bibles.

1. MOJŽIŠOSKERO	4	RIMANENGE.....	458
2. MOJŽIŠOSKERO	41	1. KORINŤANENGE	471
4. MOJŽIŠOSKERO	71	2. KORINŤANENGE	483
5. MOJŽIŠOSKERO	102	GALAŤANENGE.....	491
JOZUA	128	EFEŽANENGE	496
SUDCENGERO.....	145	FILIPANENGE	501
RUT	163	KOLOŠANENGE.....	505
1. SAMUELOSKERO	166	1. TESALONIČANENGE.....	508
2. SAMUELOSKERO	190	2. TESALONIČANENGE.....	511
1. KRALENGERO	211	1. TIMOTEOSKE	513
2. KRALENGERO	234	2. TIMOTEOSKE	517
1. KRONIKENGERO	257	TITOSKE.....	520
2. KRONIKENGERO	279	FILEMONOSKE.....	522
EZDRAŠ.....	304	ŽIDENGE.....	523
NEHEMIAŠ.....	312	JAKOB.....	532
ESTER.....	324	1. PETER.....	536
JONAŠ	330	2. PETER.....	540
MATUŠ	332	1. JAN	543
MAREK.....	361	2. JAN	547
LUKAŠ	379	3. JAN	548
JAN	409	JUDA.....	549
SKUTKI.....	430	ZJAVEŇJE	551

1. MOJŽIŠOSKERO

Sar o Del stvorindā o svetos

¹ Ešebnovarestar (peršovarestar) o Del stvorindā o ņebos the e phuv. ² Pre phuv na sas nič a na dičholas ņisar avri. O kalipen zaučharelās o paña a o Duchos le Devleskero pes hazdelas upral o paña.

O ešebno džives

³ O Del phendā: "Mi el o svetlos!" A sas o svetlos. ⁴ O Del dikhļa, hoj o svetlos hino lačho, a rozulađa (oddělindā) o svetlos le kalipnastar. ⁵ O Del diña le svetloske nav "džives" a le kalipnaske diña nav "rat". Sas rat a sas tosara – o ešebno džives.

O dujto džives

⁶ O Del phendā: "Mi el andro luftos (vzduchos) oda, so rozulavela o paña upral the telal." ⁷ Avke pes oda the ačhiļa. ⁸ Ole bare thaneske andro luftos diña o Del nav "ņebos". Sas rat a sas tosara – o dujto džives.

O trito džives

⁹ O Del phendā: "O paña, so hine tel o ņebos, pes mi zdžan pre jekh than a mi sikavel pes e šuki phuv." Avke pes oda the ačhiļa. ¹⁰ O Del la šuka phuvake diña nav "phuv" a ole pañenge, so pes zgele pre jekh than, diña nav "moros". O Del dikhļa, hoj oda hin mištes.

¹¹ Akor o Del phendā: "Mi barol pre phuv savore rastlini, so anena o semena, the ovocna stromi, so dena sako peskero ulipen." Avke pes oda the ačhiļa. ¹² Pre phuv barile avri o rastlini, so anenas o semena, the ovocna stromi, so chudle te del peskero ulipen. O Del dikhļa, hoj oda hin mištes. ¹³ Sas rat a sas tosara – o trito džives.

O štarto džives

¹⁴ O Del phendā: "Mi en o svetli pro ņebos, hoj te rozulaven o džives la račatar, a mi sikaven o časi prekal o čhona, dživesa the berša. ¹⁵ Mi labon pro ņebos a mi el o vidņišagos pre phuv." Avke the sas. ¹⁶ O Del kerđa duj bare svetli: O kham, hoj te labol prekal o džives, the o čhon prekal e rat. Kerđa the o čercheña. ¹⁷ O Del len thoda pro ņebos, hoj te švicinen pre phuv ¹⁸ prekal o džives the prekal e rat a te rozulaven (oddělinen) o svetlos le kalipnastar. O Del dikhļa, hoj oda hin mištes. ¹⁹ Sas rat a sas tosara – o štarto džives.

O pandžto džives

²⁰ O Del phendā: "Mi pheraren pes o paña but ribenca the avre džvirinenca a o ņebos le čiriklenca." ²¹ Avke o Del stvorindā savore moroskere džvirini the ribi, hoj te dživen andro moros, a stvorindā the savore čiriklen. A o Del dikhļa, hoj oda hin mištes. ²² O Del len požehņindā a phendā: "Zdžan pes a mi ulol tumendar buter a pheraren o paña andro moros. The le čiriklendar mi ulol buter pre phuv!" ²³ Sas rat a sas tosara – o pandžto džives.

O šovto džives

²⁴ O Del phendā: "Mi pheraren e phuv savore džide džvirini, o gurmņa the o bakre, ola, so pes cirden pal e phuv, the savore dzive džvirini. Mi el dojekhestar buter." Avke pes the ačhiļa. ²⁵ O Del stvorindā savore džide džvirinen, le gurmņen, le bakren, olen, so pes cirden pal e phuv, the savore dzive džvirinen. O Del dikhļa, hoj oda hin mištes.

²⁶ Palis o Del phendā: "Džas akana te kerel manušes pre amaro obrazis, hoj te el ajso sar amen. Mi en o raja upral o moroskere ribi, upral o ņeboskere čirikle, upral savore džvirini, so pes čhalaven a cirden pal e phuv."

²⁷ Avke o Del stvorindā manušes ajses sar ov, pre peskero obrazis. Kerđa len sar muršes the džuvļa. ²⁸ O Del len požehņindā a phendā lenge: "Mi ulon tumenge but čhave a pheraren e phuv. Zabešen pes pal cali phuv! Aven o raja upral o moroskere ribi, ņeboskere čirikle the upral savore dzive džvirini." ²⁹ Palis o Del phendā: "Pre cali phuv diňom tumenge pro chaviben savore rastlini, so den o semena, the savore stromi, so anen peskero ovocje. ³⁰ A dav pro chaviben savore zelena rastlini le džvirinenge, ņeboskere čiriklenge the savorenge, so pes čhalaven pal e phuv a andre kaste hin o dichos." Avke pes the ačhiļa. ³¹ O Del dikhļa, hoj savoro, so kerđa, sas igen mištes. Sas rat a sas tosara – o šovto džives.

2 Avke sas dokerdo o ņebos, e phuv the savoro, so andre sas.

O eftato džives

² Pro eftato džives o Del dokerđa savoro a geļa peske te odpočovinel savore peskere bučendar. ³ O Del požehņindā o eftato džives a kerđa lestar sentno, bo andre oda džives peske odpočovindā, bo savoro sas dokerdo. ⁴ Kavke sas stvorimen o ņebos the e phuv.

E bar Eden

Sar o RAJ o Del stvorindā o űebos the e phuv, ⁵ na sas pre phuv űisavi rastlina a na barolas űiĉ avri, bo o RAJ, o Del, mek na diűa brišind pre phuv, a na sas ode aűi manuš, savo kerđahas buĉi pre maĉa, ⁶ ale o teluno paűi, so avelas avri andral e phuv, cindārelas caĉi phuv. ⁷ Akor o RAJ, o Del, kerđā le manušes la phuvakere prachostar, phurdűa leske andro nakh o dichos le dživipnaskero a o manuš akor chudĉa te dživel.

⁸ O RAJ, o Del, kerđā e bar (zahrada) andro Eden pro vichodos a thođā andre le manušes, saves kerđā.

⁹ Paĉis o RAJ, o Del, diűa te barol avri savore stromi, so sas pro jakha igen šukar a pro chaviben igen laĉhe. Maškar e bar diűa te barol avri o stromos, so del o dživipen, the o stromos, so del o prindžaripen, so hin laĉho a so nalaĉho.

¹⁰ Andral o Eden džalas avri o paűi, hoj te cindārel e bar. Ole paűestār pes rozđžanas štar bare paűa. ¹¹ O ešebno (peršo) paűi pes viĉinel Pišon a predžal prekal caĉi phuv Chavila, kaj hin o somnakaj. ¹² O somnakaj andral odi phuv hin igen žužo. Hin ode o voűava veci the o dragane bara. ¹³ O dujto paűi pes viĉinel Gichon a džal pašal caĉi phuv Kuš. ¹⁴ O trito paűi hin Tigris a džal pro vichodos la phuvatar Aššur. O štarto paűi pes viĉinel Euftrat.

¹⁵ O RAJ, o Del, iĉa le manušes a thođā les andre bar Eden, hoj te kerel buĉi a pre late te merkinel. ¹⁶ A o RAJ, o Del, prikazindā le manušeske: “Šaj chas pal savore stromi, so hin andre bar, ¹⁷ ale ma cha ole stromostar, so del o prindžaripen, so hin laĉho a so nalaĉho, bo andre oda džives, sar lestar chaha, ĉaĉes mereha.”

O Del kerel la džuvĉa

¹⁸ Paĉis o RAJ o Del phendā: “Nane mištes le manušeske te el korkoro. Kerava leske varekas, ko ela leha a pomožinela leske.” ¹⁹ O Del kerđā la phuvatar savori maĉakeri džvirina the savore űeboskere ĉiriklen. Paĉis andā len ko manuš, bo kamĉa te dikhel, savo len dela nav. Sar diűa o manuš le džide džvirinen nav, avke pes the viĉinenas. ²⁰ O manuš diűa nav savore ĉiriklenge the savore džvirinenge, ale na arakhĉa űikas ajses sar ov, hoj te el leha a te pomožinel leske. ²¹ Avke o RAJ o Del mukĉa zoralo soviben pro manuš a sar zasuča, iĉa avri jekh leskere pašvarendar a oda than zakerdā andre le maseha. ²² A ole pašvarestar, so iĉa avri o RAJ, o Del, le manušestar, kerđā la džuvĉa a andā la pašleste. ²³ Akor o manuš phendā: “Kada imar hin akana o kokalos mire kokalendar a o tēlos mire tēlostar! A viĉinela pes roműi, bo avĉa avri le romestar.” ²⁴ Vašoda omukela o murš peskera da the le dades, ela jekhetane la roműaha a sodujđžene ena jekh. ²⁵ O murš the leskeri roműi sas lange a na ladžanas pes.

O ešebno binos

3 O sap sas nekogđaveder savore dzive džvirinen-dar, saven stvorindā o RAJ, o Del. O sap phendā la

džuvĉake: “ĉaĉes tumenge o Del phendā, hoj našti chan pal savore stromi, so hin andre bar (zahrada)?”

² E džuvĉi leske odphendā: “Pal o stromi, so hin andre bar, šaj chas, ³ ale pal o stromos, so hin maškar e bar, phendā o Del: ‘Ma chan lestar, aűi pes lestar ma chuden, bo te oda kerena, ĉaĉes merena.’”

⁴ “Na, oda nane ĉaĉo, tumen na merena,” phendā o sap la džuvĉake. ⁵ “Se o Del džanel, hoj oda džives, sar lestar chana, pes tumenge phundravena o jakha a avena sar o Del; sprindžarena, so hin laĉho a so nalaĉho.”

⁶ Sar dikhlā e džuvĉi, savo šukar hin oda stromos a save laĉhe ovocje pre leste hin, kamelas lendar te chal, hoj te prilel o godaveripen. Avke iĉa oda ovocje a chudĉa te chal. Paĉis diűa the peskere romes, savo sas paš late, a chaĉa the ov. ⁷ Sar chale, phundrade pes sodujenge o jakha a sprindžarde, hoj hine lange. Akor ile o prajti pal o figovűikos a zagarude pes lenca.

⁸ Paĉis, sar šunde, hoj pes o RAJ, o Del, predžal pal e bar ke raĉate, garude pes o manuš the leskeri roműi le RAJESKE, le Devleske, maškar o stromi. ⁹ Akor o RAJ, o Del, viĉindā pro murš a phuĉĉa lestar: “Kaj sal?”

¹⁰ “Šundom tut, sar phires andre bar, a daravas man, bo som lango, a vašoda man garuđom,” odphendā.

¹¹ Paĉis lestar o Del phuĉĉa: “Ko tuke phendā, hoj sal lango? Na chaĉal tu pal oda stromos, pal savo tuke phendom, hoj te na chas?”

¹² O manuš leske odphendā: “Odi roműi, sava mange tu diűal, man diűa pal oda stromos a me chaĉom.”

¹³ Avke o RAJ, o Del, phendā la džuvĉake: “So oda tu kerđal?”

“O sap man pre oda cirdűa a me chaĉom,” odphendā leske.

¹⁴ Avke o RAJ o Del phendā le sapeške:

“Vašoda, hoj oda kerđal, aveha prekošlo buter sar savore džvirini. ĉa tu korkoro calo tiro dživipen pes cirdeha pro per a chaha o prachos la phuvakero.

¹⁵ Kerava, hoj džana tu the e džuvĉi jekh pre aver a tiro potomkos † the lakero potomkos ena űeprijaĉeĉa.

Ov tuke rozmarela o šero a tu leske dukhaveha leskeri peta.”

¹⁶ La džuvĉake phendā:

“Ela tut buter pharipen, sar aĉheha khabűi, a andre bare dukha tuke uĉona o ĉhave.

Igen tuke džala pal tiro rom, ale ov ela o raj upral tu.”

¹⁷ Le muršeske phendā:

“Vašoda, hoj šundal tira roműa

a chaĉal pal o stromos, pal savo tuke phendom, hoj te na chas, ela prekal tu e phuv prekošĉi.

Calo tiro dživipen mušineha te kerel phares buĉi, hoj latar te chas.

¹⁸ O kandre the o koĉaka tuke barona andral e phuv a tiro chaben ela o maĉakere rastlini.

† E Hebrejiko ĉhib: *semenos*

¹⁹ Andre phari buči the andro potos chaha tiro chaben,
medik na džaha pale andre phuv,
bo la phuvatar salas kerdo
a andre phuv džaha pale.”

O Adam la Evaha avričhido andral e bar

²⁰ O Adam diña peskera romňake nav Eva, bo sas daj savore manuŝenge. ²¹ O RAJ, o Del, kerđa le Adamoske the la Evake cipune gada a urđa len. ²² Palis o RAJ o Del phendā: “O manuŝ hino akana sar jekh amendar, bo imar prindžarel, so hin lačho a so nalačho. Ča akana te na lel mek pal o stromos le džživpnaskero, te na chal lestar a te na dživel pro furt.” ²³ Avke o RAJ, o Del, les čhida avri andral e bar Eden, hoj te kerel buči pre odi phuv, savatar sas kerdo. ²⁴ Tradňa avri le manuŝes andral o Eden a pro vichodos le rajostar ačhađa le cheruben † the e bliŝtaco jagali ŝabla, hoj te stražinen o drom, so džal ko stromos le džživpnaskero.

O Kain the o Abel

4 O Adam geľa ke peskeri romňi †† ke Eva a oj ačhiľa khabňi. Uliľa lake muršoro, saveske diña nav Kain, bo phendā: “Chudlōm muršes le Rajestar.” ² Palis lake uliľa dujto muršoro, saveske diña nav Abel. O Abel sas pastjeris le bakrorengenge, ale o Kain kerelas buči pre maľa.

³ Pal varesavo časos o Kain skidňa o ulipen andral e phuv a andā sar obeta le RAJESKE. ⁴ Palis the o Abel murdarđa le bakrores, so leske ešebno (peršo) uliľa, a andā o žiros sar obeta le RAJESKE. O Abel the leskeri obeta sas le RAJESKE pre dzeka, ⁵ ale le Kain the leskeri obeta na priiľa. Akor o Kain sas igen choľamen a ačhiľa chmuravo.

⁶ O RAJ phendā le Kainoske: “Soske sal ajsjo choľamen? Soske hin o muj tuke chmuravo? ⁷ Te kereha miŝtes, či na prilava tut? Ale te na kereha miŝtes, akor o binos tut užarela paš o vudar. Kamela te el raj upral tu, ale tu av raj upral leste!”

⁸ Akor o Kain phendā peskere phraleske Abeloske: “Av, džas avri pre maľa!” Sar imar ode sas, chučila o Kain pro Abel a murdarđa les.

⁹ Palis o RAJ phučľa le Kainostar: “Kaj hino tiro phral o Abel?”

“Me na džanav. So, me majinav te merkinel pre peskero phral?” odphendā o Kain.

¹⁰ Pale lestar o RAJ phučľa: “Oda, so tu kerďal? O rat tire phraleskero vičinel ke ma andral e phuv! ¹¹ Akana tu aveha prekošlo a avričhido andral e phuv, pre savi čuliľa le phraleskero rat andral tiro vast. ¹² Sar džaha te sadzinel vareso andre phuv, na barola tuke nič avri. Phireha upre tele a na arakheha pre phuv than, kaj te aves andro smirom.”

¹³ O Kain phendā le RAJESKE: “Miro trestos hino bareder, sar birinav te zľidžal. ¹⁴ Tu man čhives avri andral e phuv, hoj te avav dur tutar. Avava ajsjo manuŝ,

savo phirel upre tele, a na arakhela űikhaj smirom. Sako, ko man arakhela, man kamela te murdarel.”

¹⁵ “Na, oda pes tuke na ačhela,” phendā leske o RAJ, “bo sako, ko tut murdarđahas, ela eftavar goreder mardo vaŝ tute.” Akor o RAJ thođa pro Kain znakos, hoj űiko, ko les arakhela, les te na murdarel. ¹⁶ Avke o Kain geľa dur le RAJESTAR a beŝelas andre phuv Nod ‡, pro vichodos le Edenostar.

Le Kainoskero čhave

¹⁷ O Kain pes zgeľa peskera romňaha, savi ačhiľa khabňi a uliľa lake muršoro, savo pes vičinelas Henoch. O Kain ačhađa foros a diña leske nav pal peskero čhavo Henoch. ¹⁸ O Henoch sas dad le Iradoske, o Irad sas dad le Mechujaeloske, o Mechujael sas dad le Metuŝaeloske a o Metuŝael sas dad le Lamechoske.

¹⁹ O Lamech peske iľa duje romňijen. Jekhake sas Ada a dujtonake sas Cilla. ²⁰ La Adake uliľa o Jabal. Ov sas prapapus olenge, save dživen andro stani a likerem gurumňen the bakren. ²¹ Leskero phral pes vičinelas Jubal: Ov ačhiľa o prapapus savorengenge, save bašaven pro harfi the pro piŝtalki. ²² La Cillake uliľa o Tubal-Kain. Ov sas kovačis a kerelas o sersami le bronzostar the le trastestar. Le Tubal-Kainoskeri pheň pes vičinelas Naama. ²³ O Lamech phendā peskere romňenge:

“Ado the Cillo, ŝunen man!
Murdardōm jekhe muršes, savo man dukhađa,
terne muršes, savo man demađa.

²⁴ Te oda hin avke, hoj vaŝ o džživipen le Kainoskero pes lela pale eфта džživipena,
avke vaŝ o Lamech pes lela pale
eftavardeŝ the eфта (77) džživipena.”

O Ŝet the o Enoŝ

²⁵ O Adam pes pale paŝliľa la romňaha. Uliľa lake muršoro a diña leske nav Ŝet, bo phendā: “O RAJ, o Del, man diña avre čhavores vaŝ o Abel, saves murdarđa o Kain.” ²⁶ The le Ŝetoske uliľa muršoro a diña leske nav Enoŝ.

Andre oda časos o manuŝa chudle te laŝarel le RAJES.

Le Adamoskere čhave dži ko Noach

5 Kada hin le Adamoskero rodokmeňos.
Sar o Del kerelas le manuŝes, stvorinđa les ajses sar ov, pre peskero obrazis. ² Sar muršes the džuvľa len stvorinđa, požeňinđa len a diña len nav “manuŝ”.

³ Le Adamoske sas ŝel the tranda (130) berŝ, sar uliľa leske čhavo, savo sas ajsjo sar ov, a diña leske nav Ŝet. ⁴ Sar uliľa o Ŝet, dživelas o Adam palis mek ochto ŝel (800) berŝ a sas les muršora the čhajora. ⁵ O Adam dživelas eňa ŝel the tranda (930) berŝ a palis muľa.

⁶ Le Ŝetoske sas ŝel the pandž (105) berŝ, sar leske uliľa čhavo o Enoŝ. ⁷ Sar leske uliľa o Enoŝ, dživelas o Ŝet palis mek ochto ŝel the eфта (807) berŝ a sas les

† Abo: aňjelen †† E Hebrejiko čhib: sprindžarda la

‡ Oda hin: “Te phirel upre tele.”

muršora the čhajora. ⁸ Sas leske eña šel the dešuduj (912) berš, sar muľa.

⁹ Le Enošiske sas eňavardeš (90) berš, sar leske uliľa o Kenan. ¹⁰ Sar leske uliľa o Kenan, dživelas o Enoš palis mek ochto šel the dešupandž (815) berš a sas les muršora the čhajora. ¹¹ O Enoš muľa, sar leske sas eña šel the pandž (905) berš.

¹² Le Kenanoske sas eftavardeš (70) berš, sar leske uliľa o Mahalalel. ¹³ Sar leske uliľa o Mahalalel, dživelas o Kenan palis mek ochto šel the saranda (840) berš a sas les muršora the čhajora. ¹⁴ Sas leske eña šel the deš (910) berš, sar muľa.

¹⁵ Sar le Mahalaleloske sas šovardeš the pandž (65) berš, uliľa leske čhavo o Jared. ¹⁶ Sar leske uliľa o Jared, dživelas o Mahalalel palis mek ochto šel the tranda (830) berš a sas les muršora the čhajora. ¹⁷ O Mahalalel muľa, sar leske sas ochto šel the eňavardeš the pandž (895) berš.

¹⁸ Le Jaredoske sas šel the šovardeš the duj (162) berš, sar leske uliľa o Enoch. ¹⁹ Sar leske uliľa o Enoch, dživelas o Jared palis mek ochto šel (800) berš a sas les muršora the čhajora. ²⁰ Sar o Jared muľa, sas leske eña šel the šovardeš the duj (962) berš.

²¹ Le Enochoske sas šovardeš the pandž (65) berš, sar leske uliľa čhavo o Matuzalem. ²² Palis o Enoch mek dživelas trin šel (300) berš. Sas les muršora the čhajora a phirelas le Devleha. ²³ O Enoch dživelas trin šel the šovardeš the pandž (365) berš ²⁴ a calo peskero dživipen phirelas le Devleha a jekhvareste našliľa, bo les o Del iľa ke peste.

²⁵ Sar sas le Matuzalemoske šel the ochtovardeš the efa (187) berš, uliľa leske o Lamech. ²⁶ Sar leske uliľa o Lamech, dživelas o Matuzalem palis mek efa šel the ochtovardeš the duj (782) berš a sas les muršora the čhajora. ²⁷ Sar o Matuzalem muľa, sas leske eña šel the šovardeš the eña (969) berš.

²⁸ Le Lamechoske sas šel the ochtovardeš the duj (182) berš, sar leske uliľa muršoro. ²⁹ O Lamech phendā: "Leskero nav ela Noach, bo ov amen dela o radišagos a odlela o pharipen la bučatar, so keras amare vastenca pre kadi phuv, so o RAJ prekošľa."

³⁰ Sar leske uliľa o Noach, dživelas o Lamech palis mek pandž šel the eňavardeš the pandž (595) berš a sas les muršora the čhajora. ³¹ Le Lamechoske sas efa šel the eftavardeš the efa (777) berš, sar muľa.

³² Sar sas le Noachoske pandž šel (500) berš, uliľa leske trin čhave: o Šem, o Cham the o Jafet.

O nalače manuša

6 Sar o manuša sas furt buter pre phuv a ulonas lenge the čhaja, ² o nalače aňjela † dikhle, hoj le manušengere čhaja hine igen šukar. Lenas peske lendar avri romňijen a ačhenas lenca te dživel. ³ O RAJ phendā: "Miro dichos na ačhela furt andro manuš, bo ov hino ča telos a leskero dživipen likerela ča šel the biš (120) berš."

† E Hebrejiko čhib: le Devleskere čhave

⁴ Andre ola dživesa the paloda, sar pašlonas ola aňjela le manušengere čhajenca, ulonas lenge čhave, save sas o Nefilimi. On sas igen uče, zorale murša a bare anglo jakha le manušengere imar čirlastar.

⁵ O RAJ dikhľa, save nalače hine o manuša pre phuv a hoj lengere jile the lengere gondolišagi hine sako džives visarde ko nalačo. ⁶ Vašoda igen bajinelas, hoj kerđa le manušes, a dukhalas les o jilo. ⁷ Palis o RAJ phendā: "Khosava avri la phuvatar le manušen, saven kerđom, dojekha džvirina, le čiriklen the olen, so pes cirden pal e phuv, bo bajinav, hoj len kerđom." ⁸ Ale o Noach sas le RAJESKE pre dzeka.

Pal o Noach

⁹ Kada hin pal o Noach: O Noach sas čačipnaskero the pačivalo maškar o manuša, save dživenas leha, a phirelas le Devleha. ¹⁰ Ufile leske trin čhave: o Šem, Cham the Jafet. ¹¹ Ale angle Devleskere jakha o manuša pre phuv sas igen previsarde a furt maškar peste pes marenas. ¹² O Del dikhľa, hoj e phuv hiňi nalači, bo savore manuša dživenas namištes. ¹³ Avke o Del phendā le Noachoske: "Phendom mange, hoj na kamav imar nič le manušenca. Zřičinava savore manušen, save kerđom, the e phuv, bo furt maškar peste pes marenas."

Pal o baro korabos

¹⁴ "Ker tuke baro korabos le lače kaštestar. Ker andre ohradzimen thana a makh la andral the avral la smolaha. ¹⁵ Avke la ačhaveha: Ela džindardī šel the tranda the trin (133) metri, buchli bišuduj (22) metri a uči dešutrin (13) metri. ¹⁶ Ačhav o pados a prekal o luftos muk avri phundrado than saranda the štar (44) centimetri tel calo pados. O vudar thoveha pre sera le koraboske. Kereha la le poschodenca, so ena telal, maškaral the upral. ¹⁷ Me dava baro paňi pre phuv, hoj te zřičinav savoro, andre kaste hin o dichos le dživipnaskero – savoro, so hin tel o ňebos, the savoro, so hin pre phuv. ¹⁸ Ale tuha kerava e zmluva a andro korabos džaha tu, tiri romňi the tire čhave le romňenca. ¹⁹ Savore džide džvirinendar leha tuha po duj, samcos the samica, hoj te ačhen džide. ²⁰ Džana tuha andro korabos jekh para savore čiriklendar, savore džvirinendar the savorendar, so pes cirden pal e phuv, hoj te dživen. ²¹ Savore chabenestar skide ke tute a odthov oda prekal tu the prekal lende."

²² O Noach kerđa sa avke, sar leske oda o Del prikazinda.

O Noach džal andro baro korabos

7 O RAJ phendā le Noachoske: "Dža čaľa tira famelijaha andro korabos, bo dikhľom, hoj ča tu sal jekh maškar savore manuša čačipnaskero angle ma. ² Le tuha po efa pari savore žuže džvirinendar, ale le nažuže džvirinendar le ča po jekh para. ³ Le mek po efa pari le čiriklendar andral dojekh rodos. Ker oda, hoj te predživen a hoj te el lendar pale buter. ⁴ Mek efa

dživesa a palis mukava pre phuv baro brišind, so likerela saranda (40) dživesa the saranda rača, a zničina-va pre phuv savoro džido, so stvorindom.”

⁵ O Noach kerđa savoro avke, sar leske o RAJ prikazindā.

⁶ Le Noachoske sas šov šel (600) berš, sar avla e popota pre phuv. ⁷ Andro korabos geľa anglal oda paňi ov la romňaha the leskere čhave le romňijenca. ⁸⁻⁹ Le Noachoha gele andro korabos andro pari savore žuže the nažuže džvirinendar, samcos the samica, le čiriklendar the savorestar, so pes cirdel pal e phuv, avke sar leske prikazindā o Del.

O bare paňa

¹⁰ Pal o efa dživesa avle o bare paňa pre phuv.

¹¹ Ačhiľa pes pro dešueftato (17.) džives andro dujto čhon, sar sas le Noachoske šov šel (600) berš. Savore paňa chudle te demel avri andral e phuv a phundrađa pes o űeboskere oblaki a chudľa te del o zoralo brišind. ¹² Pre phuv delas o brišind saranda (40) dživesa the saranda rača.

¹³ Mek oda džives gele andro korabos o Noach la romňaha the leskere čhave o Šem, o Cham the o Jafet peskere romňijenca. ¹⁴ Gele lenca savore dzive the maľakere džvirini, the ola, so pes cirden pal e phuv, a mek savore le čiriklendar. ¹⁵ Ko Noach andro korabos gele po duj savore džvirinendar, so dichinelas. ¹⁶ Gele andre o samcos the e samica savorestar, so dživel, avke, sar leske prikazindā o Del. Palis o RAJ pal lende phandľa o vudar.

¹⁷ O paňa pre phuv furt buter baronas saranda (40) dživesa a hazdle o korabos upre la phuvatar. ¹⁸ O paňa igen baronas a učharenas andre savoro, so sas pre phuv, a o korabos plavinelas upral o paňa. ¹⁹ O paňa avke zorales baronas pre phuv, hoj zaučharde andre savore nekbareder verchi tel o űebos. ²⁰ O paňa mek barile a prebaronas o nekbareder verchi efa metri. ²¹ Avke muľa savoro, so pes čhalavelas the cirdelas pre phuv: dojekh džvirina, dojekh čiriklo, the dojekh manuš. ²² Savoro pre šuki phuv, so dichinelas, muľa avri. ²³ Avke o Del iľa o dživipen savorenge, so dživenas pre phuv: le manušenge, le džvirinenge, le čiriklengle the olenge, so pes cirden pal e phuv. Ačhiľa ča o Noach the ola, ko sas leha andre lođa.

²⁴ O paňa likerenas pre phuv šel the penda (150) dživesa.

O Del zaačhavel o paňi

8 O Del peske leperđa pro Noach the pre savore dzive džvirini the pro dobitkos, so sas leha andro korabos. O Del bičhađa pre phuv e balvaj a o paňa pre phuv džanas tele. ² E űeboskeri oblaka the o paňa telal e phuv pes phandle andre a preačhiľa andral o űebos te del o brišind. ³ O paňa džanas tele šel the penda (150) dživesa ⁴ a andro eftato čhon pro dešueftato (17.) džives zaačhiľa o korabos pro verchos Ararat. ⁵ O paňa

džanas tele a sikade pes o agora le verchengere pro ešebno (peršo) džives andro dešto čhon.

⁶ Sar pregeľa saranda (40) dživesa, o Noach phundrađa pre lođa e upruňi oblaka, so kerđa, ⁷ a mukľa avri le krkavcos, ale ov letinelas furt ade a ode, medik o paňa pre phuv na šučile avri. ⁸ Palis mukľa avri the la holubica, hoj te džanel, či o paňa upral e phuv imar gele tele. ⁹ Ale e holubica na arakhľa pre phuv than, kaj te thovel o pindre tele, bo o paňa sas mek pal caľi phuv, vašoda avľa pale ke leste andro korabos. Akor o Noach nacirdľa peskero vast ke holubica a iľa la andro korabos. ¹⁰ Užarelas mek aver efa dživesa, avke pale mukľa la holubica avri. ¹¹ Sar zaračila, avľa e holubica ke leste pale a andro zobakos anelas čerstvo olivakeri prajti. Avke sprindžarda o Noach, hoj o paňa pal e phuv imar gele tele. ¹² Užarelas mek aver efa dživesa a mukľa avri la holubica, ale imar ke leste na avľa pale.

¹³ Sar sas le Noachoske šov šel the jekh (601) berš, pro ešebno džives ešebne čhonestar, o paňa šučile avri pal e phuv. Akor o Noach otkerđa e chev pro pados a dikhľa, hoj e phuv imar šučiľa avri. ¹⁴ Caľi phuv sas šuki andro bišueftato (27.) džives andro dujto čhon.

¹⁵ Palis o Del phendā le Noachoske: ¹⁶ “Av avri andral o korabos tira romňaha, tire čhavenca the le borijenca. ¹⁷ An avri savore džvirinen the olen, so pes cirden pal e phuv, le čiriklen, so hine tuha, hoj pes te zdžan a te uľon lendar buter pre phuv.”

¹⁸ Avke o Noach geľa avri andral o korabos la romňaha, le čhavenca the le borijenca. ¹⁹ Savore džvirini, savore čirikle the ola, so pes cirden pal e phuv, gele avri andral o korabos – dojekh pal peskero rodos.

²⁰ Palis o Noach ačhađa le RAJESKE oltaris a iľa savore žuže džvirinendar the savore žuže čiriklendar po jekh a andā len sar labardi obeta pro oltaris. ²¹ E saga la obetakeri sas le RAJESKE igen pre dzeka a phendā peske: “Imar šoha (ňikda) na prekošava e phuv vaš oda, so o manuša kerena. Choc te džanav, hoj le manušengero jilo imar terňipnastar cirdel ko nalačo, imar šoha na murdarava savoro, so dživel, avke sar oda akana kerđom.

²² Medik likerela e phuv, na preačhela o časos te sadzinel aňi o časos te skidel upre, o šil aňi o tačipen, o űilaj aňi o jevend, o džives aňi e rat.”

Le Devleskeri zmluva le Noachoha

9 Akor o RAJ požehňindā le Noach the leskere čhaven a phendā: “Mi uľon tumenge but čhave, hoj te pheraren caľi phuv! ² Dojekh džvirina, savore űeboskere čirikle, ola, so pes cirden pal e phuv, the savoro, so hin andro moros, pes tumendar darana. Oda savoro dav tumenge tel tumari zor. ³ Diňom tumenge angloda o zelena rastlini pro chaviben. Akana tumenge dav te chal the savoro, so pes čhalavel a hin džido. ⁴ Ale o mas, andre save hin o rat, našti chan, bo

andro rat hin o dživipen. ⁵ Marava dojekha džvirina, so lela le manušeske o dživipen. The le manušes, savo murdarela le manušes, marava.

⁶ Oda, ko murdarela le manušes, ela murdardo avre manušestar, bo o Del les kerđa pre peskero obrazis.

⁷ A mi ufon tumenge but čhave, hoj te bešen pal cali phuv!"

⁸ O Del mek phenda le Noachoske the leskere čhavage: ⁹ "Phandav zmluva tumenca the tumare čhavenca. ¹⁰ Phandav la the savore dzive džvirinenca, the le maľakere džvirinenca, the le űeboskere čiriklencica, so hine tumenca, the savorencica, so avle avri andral o korabos. ¹¹ Kadi hiűi miri zmluva, so tumenca phandav: Imar űoha (űikda) na domukava o bare paňa, hoj te murdarel savoro, so dživel pre phuv; imar űoha o bare paňa na zűiĉinena cali phuv."

¹² O Del phenda: "Kada hino znameűje la zmluvakero, so phandav tumenca the savorencica, so dživen, the tumare čhavigere čhavenca pro furt: ¹³ Miri duha thoďom pro chmari sar o znameűje, hoj hin e zmluva maľkar mande the maľkar e phuv. ¹⁴ Sar biĉhavava o chmari upral e phuv a pro űebos maľkar o chmari pes sikavela e duha, ¹⁵ furt leperava mange pre miri zmluva, so phandľom tumenca the savore džvirinenca. űoha imar na zűiĉinava le paňeha sa, so dživel pre phuv. ¹⁶ Te pes sikavela pro űebos e duha, dikhava pre late a leperava mange pre miri zmluva, so hin maľkar mande the maľkar savoro, so dživel pre phuv."

¹⁷ Avke o Del phenda le Noachoske: "Kada hin oda znameűje, hoj hin e zmluva maľkar mande the maľkar savoro, so dživel pre phuv."

O Noach the leskeri famelija

¹⁸ Le Noachoskere čhave, save avle avri andral o korabos, sas o űem, o Cham the o Jafet. (O Cham sas dad le Kanaanoske.) ¹⁹ Kala trin sas le Noachoskere čhave a lendar ulile savore manuša, save pes rozgele pal cali phuv.

²⁰ O Noach kerelas buĉi pre maľa a ov eľebno (peršo) sadzinelas e viňica. ²¹ Sar jekhvar piľa mol a maĉiľa, geľa peske te paľľol lango andre peskero stanos. ²² Sar o Cham, o dad le Kanaanoskero, dikhľa peskere dades langes, geľa oda te phenel avri peskere duje phralenge. ²³ Avke o űem the o Jafet ile o plašťos a thode peske les pro phiko, dźanas ke leste le dumeha a zagarude les andre. O muja visarde, hoj te na dikhen le dades langes. ²⁴ Sar o Noach pes prekerďa la molatar a dodźanľa pes pal oda, so leske kerďa o nekterneder ĉhavo, ²⁵ phenda:

"Av prekoľo, Kanaan!

Aveha nekĉikneder le otrokendar tire phralenge!"

²⁶ A mek phenda:

"Mi el barardo o RAJ, o Del le űemoskero!

O Kanaan mi el le űemoskero otrokos.

²⁷ Mi del o Del buter phuva le Jafet;

mi beľel andro stani le űemoskere;

o Kanaan leske mi el otrokos!"

²⁸ Pal e potopa o Noach dživelas mek trin űel the penda (350) berľ. ²⁹ Le Noachoske sas eňa űel the penda (950) berľ, sar muľa.

Le Noachoskere ĉhave

10 Kala hine o kmeňi le Noachoskere: Leskere ĉhave sas o űem, o Cham the o Jafet. Pal e potopa lenge ulile ĉhave.

Le Jafetoskere ĉhave

² Le Jafetoskere ĉhave sas o Gomer, o Magog, o Madaj, o Javan, o Tubal, o Meľech the o Tiras. ³ O ĉhave le Gomeroskere sas o Aľkenaz, o Rifat the o Togarmah. ⁴ O ĉhave le Javanoskere sas o Eliľah, o Tarľiľ, o Kittana the o Dodana. ⁵ Kala manuša, save dživenas paľ o brehos le moroskero the pro ostrovi andre peskere phuva, pes rozulade pal peskere kmeňi the narodi a dojekhes sas peskeri ĉhib.

Le Chamoskere ĉhave

⁶ O ĉhave le Chamoskere sas o Kuľ, o Micrajim †, o Put the o Kanaan. ⁷ O ĉhave le Kuľeskere sas o Sebas, o Chavilah, o Sabtas, o Raemah the o Sabtechas. Le Raemoskere ĉhave sas o űebah the o Dedan. ⁸ Le Kuľoske uliľa ĉhavo o Nimrod, savo aĉiľa nekzoraleder murľ pre phuv. ⁹ Ov sas anglo Del zoralo lovcos, vaľoda pes vakerelas: "Mi kerel tutar o RAJ ajse bares lovcos sar o Nimrod!" ¹⁰ Eľebne (perše) fori leskere kraliľagostar sas o Babilon, o Erech, o Akkad the o Kalne andre phuv űinar. ¹¹ Odarik geľa andre phuv Aľľur a ode aĉhaďa o foros Ninive, o Rechobot-Ir the Kelach. ¹² Avke aĉhaďa the o Resen maľkar o foros Ninive the o baro foros Kelach.

¹³ O Micrajim sas prapapus le Ludenge, le Anamenge, le Lehabenge, le Naftuchenge, ¹⁴ le Patrusenge the le Kasluchenge, savendar hine o Filiľtinci, the o Kaftora.

¹⁵ O eľebno (peršo) ĉhavo le Kanaanoskero sas o Sidon a palis o Chet. ¹⁶ O Kanaan sas o prapapus le Jebusejenge, le Amorejenge, le Girgaľejenge, ¹⁷ le Chivijenge, le Arkijenge, le Sinejenge, ¹⁸ le Arvadejenge, le Cemarejenge the le Chamatajenge.

Palis pes rozulade o Kanaaňike kmeňi. ¹⁹ E Kanaaňiko phuv chudelas le Sidonostar ko Gerar dźi ke Gaza the ke Sodoma, ke Gomora, ke Adma the ko Cebojim, dźi ke Laľa.

²⁰ Kala hine le Chamoskere ĉhave pal peskere kmeňi, ĉhiba, phuva the narodi.

Le űemoskere ĉhave

²¹ O űem sas phureder phral le Jafetoske. The le űemoske ulile ĉhave a sas prapapus le Eberiskere †† kmeňenge. ²² Le űemoskere ĉhave sas o Elam, o Aľľur, o Arpachľad, o Lud the o Aram. ²³ Le Aramoskere ĉhave sas o Uc, o Chul, o Geter the o Maľ ‡. ²⁴ Le

† Oda hin o Egipt. †† Abo: le Hebrejiskere ‡ Abo: Meľech

Arpachšadoske uliľa o Šelach a le Šelachoske uliľa o Eber. ²⁵ Le Eberiske ulile duj čhave: Jekheske diňa nav Paleg, bo sar ov dživelas, o manuša pes rozgele pal cali phuv. Leskere phraleske diňa nav Joktan. ²⁶ Le Joktanoske ulile o Almodad, o Šelef, o Chacarmavet, o Jerach ²⁷ o Hadoram, o Uzal, o Diklah, ²⁸ o Obal, o Abimael, o Šebah, ²⁹ o Ofir, o Chavilah the o Jobab. Kala savore hine le Joktanoskere čhave.

³⁰ Lengere thana, kaj bešenias, chudenas la Mešatar dži ko Sefar paš e verchengeri phuv pro vichodos.

³¹ Kala hine le Šemoskere čhave pal peskere kmeňi, čhiba the narodi, save bešenias andre peskere phuva.

³² Kala hine o kmeňi le Noachoskere čhavengere pal peskere fajti the narodi. Lendar pes rozgele pal e potopa savore narodi pal cali phuv.

E Babiloňiko veža

11 Akor savore manuša pre calo svetos vakerenas jekha čhibaha the jekhe lavenca.

² Sar pes mukle o manuša te džal le vichodostar, arakhle lačni phuv bi o brehi andre Šinar a ode pes thode te bešel. ³ Phende peske: "Aven, keras peske valki a labaras len avri. O valki použinenas sar o bar a e smola sar e malta." ⁴ Palis phende: "Aven, ačhavas peske foros the veža, so peskere špicoha dochudela dži andro ňebos. Aleha ela amaro nav barardo, hoj te na avas rozčhide pal cali phuv."

⁵ Avke o RAJ avľa tele, hoj te dikhel o foros the e veža, so ačhavenas o manuša, ⁶ a phendä: "Hine jekh narodos a savore vakeren jekha čhibaha. Kada hin oda, so mek ča chudle te kerel; imar akana len ňiko na začhavela te kerel savoro, so peske zagondolinena.

⁷ Aven, džas tele a previsaras maškar lende o čhiba, hoj pes jekh aver te na achalon." ⁸ Avke len o RAJ odarik rozulađa pal cali phuv a preačhile te ačhavel o foros. ⁹ Vašoda chudľa oda foros nav Babel, bo ode o RAJ previsardä le manušenge e čhib. Odarik len rozčhidä pal cali phuv.

Le Šemoskere čhave

¹⁰ Kala hine le Šemoskere čhave: Pro dujto berš pal e potopa, sar sas le Šemoske šel (100) berš, uliľa leske o Arpachšad. ¹¹ Sar o Arpachšad uliľa, o Šem dživelas mek pandž šel (500) berš a ulile leske muršora the čhajora.

¹² Le Arpachšadoske sas tranda the pandž (35) berš, sar uliľa leske o Šelach. ¹³ Palis o Arpachšad dživelas mek štar šel the trin (403) berš a ulile leske muršora the čhajora.

¹⁴ Le Šelachoske sas tranda (30) berš, sar uliľa leske o Eber. ¹⁵ Palis o Šelach dživelas mek štar šel the trin (403) berš a ulile leske muršora the čhajora.

¹⁶ Le Eberiske sas tranda the štar (34) berš, sar leske uliľa o Paleg. ¹⁷ Palis o Eber mek dživelas štar šel the tranda (430) berš a ulile leske muršora the čhajora.

¹⁸ Le Palegoske tranda (30) berš, sar leske uliľa o Reu. ¹⁹ Palis o Paleg mek dživelas duj šel the eňa (209) berš a ulile leske muršora the čhajora.

²⁰ Le Reusiske tranda the duj (32) berš, sar leske uliľa o Serug. ²¹ Palis o Reu dživelas mek aver duj šel the eňa (207) berš a ulile leske muršora the čhajora.

²² Le Serugoske sas tranda (30) berš, sar leske uliľa čhavo o Nachor. ²³ Palis o Serug dživelas mek duj šel (200) berš a ulile leske muršora the čhajora.

²⁴ Le Nachoriske bišueňa (29) berš, sar leske uliľa čhavo o Terach. ²⁵ Palis o Nachor dživelas mek šel the dešueňa (119) berš a ulile leske muršora the čhajora.

²⁶ Sar le Terachoske imar sas eftavardeš (70) berš, uliľa leske o Abram, o Nachor the o Haran.

Le Abrahamoskero rodokmeňos

²⁷ Kala hine le Terachoskere čhave:

Le Terachoske uliľa o Abram, o Nachor the o Haran. Le Haranoske uliľa o Lot. ²⁸ O Haran muľa sigeder sar leskero dad o Terach andre phuv, kaj uliľa, andre Chaldejiko foros Ur. ²⁹ O Abram the o Nachor peske ile romňijen. Le Abramoskeri romňi sas e Saraj a le Nachoriskeri romňi sas e Milka. E Milka the e Jiska sas o čhaja le Haranoskere. ³⁰ La Saraj našti sas čhave.

³¹ O Terach iľa peskere čhas le Abram, le Haranoskere čhas le Lot the peskera bora la Saraj, savi sas le Abramoskeri romňi, a iľa len avri andral o Chaldejiko foros Ur, hoj te džan te bešel andro Kanaan. Avle andro Charan a ode ačhile te bešel.

³² Le Terachoske sas duj šel the pandž (205) berš, sar muľa andro Charan.

O RAJ vičinel le Abram

12 O RAJ phendä le Abramoske: "Dža avri andral tiri phuv the tire dadeskere kherestar the la famelijatar a dža andre odi phuv, kaj me tuke sikavava.

² Kerava tutar igen baro narodos a požehňinava tut!

Kerava tiro nav baro

a prekal tute ena aver požehňimen.

³ Požehňinava olen, ko tuke žehňinen,

a olen, save tut košena, prekošava.

Prekal tute ena požehňimen savore manuša pre phuv."

⁴ O Abram kerďa avke, sar leske o RAJ phendä. The o Lot geľa leha. Le Abramoske sas eftavardeš the pandž (75) berš, sar geľa avri andral e phuv Charan. ⁵ Avke o Abram iľa peskera romňa la Saraj, le phraleskere čhas le Lot, savoro barvalipen the le služobňiken, saven peske dochudľa andral o Charan a džanas andre phuv Kanaan.

Sar avle andro Kanaan, ⁶ o Abram pregeľa prekal odi phuv dži ko sentno than andro Šichem, paš o Morehoskero baro stromos. Andre oda časos mek furt bešenias o Kanaančana andre odi phuv. ⁷ Le Abramoske pes sikađa o RAJ a phendä leske: "Kadi

phuv dava tire čhavenge." Avke o Abram ačhađa oltaris ode, kaj pes leske o RAJ sikađa.

⁸ Odarik džalas ko verchos pro vichodos le Betelostar a ode peske rozthoda o stanos. Khatar leste sas o Betel pro zapados a o foros Aj pro vichodos. Ode ačhađa le RAJESKE oltaris a lašarelas le RAJESKERO nav.

⁹ Palis o Abram džalas dureder le dromeha andre pušťa Negev.

O Abram andre phuv Egipt

¹⁰ Sar andre odi phuv avľa e bokh, o Abram džalas tele andro Egipt, hoj ode sikra te bešel, bo e bokh sas igen bari. ¹¹ Sar imar sas pašes paš o Egipt, phendã peskera romňake la Sarajake: "Me džanav, hoj sal igen šukar džuvľi. ¹² Sar tut dikhena o Egiptãna, phenena peske: 'Kadi hiňi leskeri romňi.' Man murdarena a tut mukena te dživel. ¹³ Ale tu lenge phen, hoj sal miri pheň, avke ela mange vaš tute mištes a mukena man te dživel."

¹⁴ Sar o Abram the e Saraj avle andro Egipt, dikhle o Egiptãna, savi hiňi šukar. ¹⁵ Dikhle la the le Faraonoskere uradňika a ašarelas la anglo Faraonos. Avke la ligende andre leskero palacis. ¹⁶ O Faraonos sas lačno ko Abram vaš e Saraj a diňa les bakre, gurnumňa, somara, tãvi, sluhi the služki.

¹⁷ Ale o RAJ marelas le Faraonos the leskero kher phare nasvalipnaha vaš le Abramsker romňi Saraj. ¹⁸ Avke peske vičinda o Faraonos le Abram a phendã leske: "So mange kerďal? Soske mange na phendã, hoj hiňi tiri romňi? ¹⁹ Soske phendã, hoj tuke hiňi pheň? Vašoda mange la ilom romňake! Kade hiňi tiri romňi, le tuke la! Dža het!" ²⁰ Palis o Faraonos les diňa peskere muršenge a on les bičhade het peskera romňaha the savoreha, so les sas.

O Abram the o Lot pes rozdžan

13 Avke o Abram geľa avri andral o Egipt peskera romňaha the savoreha, so les sas, a geľa andre pušťa Negev. The o Lot geľa leha. ² O Abram sas igen barvalo, sas les gurnumňa the bakre, rup the somnakaj.

³ Palis o Abram džalas dureder le dromeha la pušťatar Negev. Džalas than thanestar ko Betel, dži maškar o Betel the Aj, kaj peske sas angloda o stanos ⁴ a kaj ešebnovar (peršovar) ačhađa o oltaris. Ode lašarelas le RAJESKERO nav.

⁵ The le Lot, savo džalas le Abramoha, sas bakre, gurnumňa the stani. ⁶ Pre odi phuv sas frima than, hoj te bešen jekhetane peha, bo sas len igen but džvirini a kampelas lenge buter chaviben. ⁷ A avľa o vesekedišagos maškar o pastjera le Abramsker the Lotoskere. Akor bešen as andre odi phuv o Kanaančana the o Perizeja.

⁸ Vašoda phendã o Abram le Lotoske: "Našti domukas, hoj amen the amare pastjera pes te vesekedinas maškar peste. Se sam famelija! ⁹ Či nane anglal tu cali phuv? Vašoda tut mangav, džas het jekh avrestar! Te tu džaha pre baľogňi (ľavo) sera, me džava pre čači

(pravo) sera; te tuke leha avri e čači sera, me džava pre baľogňi sera."

¹⁰ O Lot pes rozdikhľa a dikhľa, hoj cali phuv le Jordanostar dži ko Coar hin cindãrdi sar le RAJESKERI bar Eden abo sar o Egipt. Oda sas mek sigeder, sar o RAJ zňičinda e Sodoma the e Gomora. ¹¹ Vašoda peske o Lot iľa avri cali phuv paš o Jordan a geľa pro vichodos. Kavke pes rozgele jekh avrestar. ¹² O Abram bešelas andre phuv Kanaan a o Lot pes likerelas maškar o fori ola phuvake a prelidžalas peskere stani dži paš e Sodoma. ¹³ O manuša andral e Sodoma sas nalačne a anglo RAJ kerenas bare bini.

¹⁴ Sar imar le Abramostar o Lot geľa het, o RAJ phendã le Abramoske: "Rozdikh tut odarik, kaj sal! Dikh pro severos, pro juhos, pro vichodos the pro zapados. ¹⁵ Cali phuv, so dikhes, dava tuke the tire potomkenge pro furt. ¹⁶ Dava tut ajci but potomken sar o prachos la phuvakero. Te vareko šaj zgenela o prachos la phuvakero, zgenela the tire potomken. ¹⁷ Akana dža a predikh tuke cali phuv, bo me tuke la dav!"

¹⁸ Avke o Abram iľa peskere stani a geľa te bešel andro foros Hebron pašes paš o Mamroskere bare stro-mi a ode ačhađa oltaris le RAJESKE.

O Abram pes marel vaš o Lot

14 Andre oda časos o štar kraľa – o Šinariko kralis Amrafel, o Ellasariko kralis Arjoch, o Elamiko kralis Kedorlaomer the o Gojimiko kralis Tidal – ² gele pro mariben pro pandž kraľa: pro kralis Beras andral e Sodoma, pro Biršah andral e Gomora, pro Šinab andral e Adma, pro Šemeber andral o Cebojim the pro kralis andral e Bela, so hin o foros Coar. ³ Kala pandž kraľa pes dothode a zgele pes jekhetane andro Siddim maškar o brehi, kaj hin akana o Londo Moros †.

⁴ Dešuduj (12) berš o kralis Kedorlaomer sas upral lende, ale andro dešutrito (13.) berš pes vzburiinde.

⁵ Andro dešuštartu (14.) berš geľa o Kedorlaomer the o kraľa, save sas leha, a domarde le Refajen andro foros Aštarot-Karnajim, the le Zuzimčanen andro Ham the le Emimčanen andro Šave-Kirjatajim. ⁶ Domarde the le Choričanen paš o Seirike brehi a tradle len dži ko El-Paran paš e pušťa. ⁷ Palis pes visarde a doavle ko En-Mišpat – oda hin ko Kadeš – a ňerinde (zvitazinde) upral cali phuv le Amalekengeri the upral o Amoreja, save dživenas andro Chacecon-Tamar.

⁸ Akor avle o kraľa andral e Sodoma, andral e Gomora, andral e Adma, andral o Cebojim the andral e Bela – so hin o Coar – a zgele pes jekhetane pro mariben andre dolina Siddim. ⁹ Zgele pes pro mariben pro Elamiko kralis Kedorlaomer, pro Gojimiko kralis Tidal, pro Šinariko kralis Amrafel the pro Ellasariko kralis Arjoch – pandž kraľa džanas pro štar. ¹⁰ Andre oda than Siddim maškar o brehi sas igen but smolakere cheva. Sar denašenas o kraľa andral e Sodoma the Gomora, pele andre ola cheva, ale ola aver denašle pro brehi.

¹¹ A ola štar kraľa, save ňerinde, ile andral e Sodoma the Gomora savoro barvalipen the savoro chaben a

† Oda hin o Mulo Moros.

džanas het. ¹² Ile the le Abramoskere phraleskere čhas le Lot the leskero barvalipen, bo bešelas andre Sodoma.

¹³ Jekh olendar, savo denašļa, avļa oda te phenel le Hebrejske le Abramoske, savo bešelas paš o bare stromi le Mamroskere. O Mamre sas Amorejcos a sas phral le Eškolske the le Aneriske. Kalen sas zmluva le Abramoha, hoj te ačhen jekhetane. ¹⁴ Sar o Abram šunđa, hoj leskere phraleskere čhas ile het, akor vičindā peskere trin šel the dešuochto (318) muršen, save uřile andre leskero kher a save sas avrisikade pro mariben, a džalas pre lende dži ko Dan. ¹⁵ Rači ačhađa pre lende peskere služobņiken a ņerindā upral lende. Džalas pal lende dži ke Choba, so hin pro severos le forostar Damaskus. ¹⁶ Akor o Abram andā pale savoro barvalipen the peskere phraleskere čhas, le Lot, leskere barvalipnaha, le džuvřen the avre manušen.

O Abram the o Melchisedek

¹⁷ Sar avelas pale o Abram, avke palis, sar ņerindā upral o kralis Kedorlaomer the aver kraļa, save sas leha, avļa ke leste o Sodomiko kralis pro than Šave maškar o brehi – oda hin le Kraliskeri Dolina.

¹⁸ Ode o Šalemiko kralis Melchisedek leske andā maro the mol, bo sas rašaj le Nekbareder Devleske.

¹⁹ Požehņindā le Abram a phendā:

“Av požehņimen le Nekbaredere Devlestar,
Oda, savo kerđa o ņebos the e phuv.

²⁰ Mi el lašardo o Nekbareder Del,
savo tuke diņa, hoj te ņerines upral tire ņeprijaťeļa.”
Akor o Abram diņa le Melchisedekoske o dešto kotor savorestar.

²¹ O Sodomiko kralis phendā le Abramoske: “Muk tuke savoro, so iřal, ale mire manušen de pale!”

²² Ale o Abram leske odphendā: “Lav bari vera a hazdav mire vasta ke miro RAJ, ko Nekbareder Del, savo kerđa o ņebos the e phuv, ²³ hoj na lava mek aņi o thav, aņi o sirimocis pal e sandalka a ņiř olestar, so hin tiro, hoj te na phenes: ‘Me som jekh olendar, savo kerđom le Abram barvales.’” ²⁴ Na mukav mange ņiř olestar, ča oda, so imar chale mire manuša. Ale ola, ko avle manca – o Aner, o Eškol the o Mamre – mi chuden peskero kotor olestar.”

Le RAJESKERI zmluva le Abramoha

15 Pal oda savoro, so pes ačhiļa, sas le Abram videņje a šunelas, sar leske o RAJ phenel:

“Ma dara tut, Abram,
me som tiro štitos,
tiro baro počniřben (odmena).”

² Ale o Abram phendā: “Ó, Adonaj, RAJEJA, so man kames te del? Se čhave man nane a o dedičos mire khereske ela o Eliezer andral o Damaskus.” ³ O Abram mek phendā: “Na diřal man ņisave čhave a o sluhas mire kherestar ela miro dēdičos.”

⁴ Ale o RAJ leske phendā: “Ov na ela tiro dēdičos, ale o čhavo, savo avela tutar.” ⁵ Iřa les avri a phendā leske:

“Dikh pro ņebos a pro čercheņa a zgen len, te len šaj zgenes. Ajci ena but tire čhavengere čhave.”

⁶ O Abram pačandīļa le RAJESKE a o RAJ leske oda rachinelas sar spravodliřagos.

⁷ Palis leske o RAJ phendā: “Me som o RAJ, savo tut iřom avri andral o Chaldejiko Ur, te dav tuke kadi phuv, so ela tiri.”

⁸ Ov phendā: “Ó, Adonaj, RAJEJA, pal soste prindžarava, hoj ela miri?”

⁹ “An mange trinberšengera terņa gurumņora, la koza, le bakres, la hrdlička the le cikne holubos,” phendā leske o RAJ.

¹⁰ Sar oda savoro andā, rozčindā len a savorestar o jepaš thođa pre jekh sera a o dujto jepaš pašes paš aver sera, ale le čiriklen na rozčindā. ¹¹ Akor o dzive čirikle letinas tele pro mule džvirini, ale o Abram len tradelas het.

¹² Sar zagaļa o kham, o Abram zorales zasuča a avļa pre leste o kalipen la bara daraha. ¹³ O RAJ phendā le Abramoske: “Mušines čačes te džanel, hoj tire čhavengere čhave bešena andre aver phuv, so nane lengeri. Ode lendar kerena otroka a štar šel (400) berš kerena lenca namištes. ¹⁴ Ale me marava ole narodos, kaske ena otroka, a on odarik avena avri bare barvalipnaha. ¹⁵ Ale tu džaha andro smirom ke peskere dada a parunena tut andre šukar bare berša. ¹⁶ Andro štarto pokoleņje pes pale visarena tire čhavengere čhave, bo mek na avļa oda časos, hoj te zničinav le Amorejen vaš lengere bini.”

¹⁷ Sar zagaļa o kham a avļa baro kalipen, sikađa pes baro thuv sar andral e bov the e jagali paca, so predžalas maškar o rozčinde kotora la džvirinakere.

¹⁸ Oda džives phandļa o RAJ zmluva le Abramoha a phendā leske: “Tire čhavage dava kadi phuv le Egiptske paņestar dži ko baro paņi Eufat, ¹⁹ the o phuva, kaj bešen o Keniti, o Kenizzeja, o Kadmonci, ²⁰ o Chetitana, o Perizeja the o Refaja, ²¹ o Amoreja, o Kanaančana, o Girgašeja the o Jebuseja.”

E Hagar the o Izmael

16 E Saraj našti delas čhaven peskere romes le Abram, ale sas la služka Egiptanka, savi pes vičinelas Hagar. ² Avke phendā e Saraj le Abramoske: “Dikh, o RAJ na domukļa, hoj te el man čhave. Dža, pašľuv mira služkaha. Šaj el, hoj latar man ela čhavoro.” A o Abram priiļa o lava la Sarajakere. ³ Avke leskeri romņi e Saraj iřa peskera služka, la Egiptanka Hagar, a diņa la peskere romeske le Abramoske. Oda pes ačhiļa, sar o Abram imar bešelas andro Kanaan deš berš. ⁴ O Abram pašľiļa la Hagaraha a oj ačhiļa khabņi. Sar sprindžarda, hoj hiņi khabņi, hazdelas pes upral peskeri raņi.

⁵ E Saraj phendā le Abramoske: “Oda, so me cerpinav, hin sa vaš tute. Diņom tuke mira služka, hoj laha te pašľuves, ale sar sprindžarda, hoj hiņi khabņi, oj man imar na ľikerel vaš ņisoske. O RAJ mi phenel, kaskero hin o čačipen, či tiro vaj miro.”

⁶ Avke o Abram phendā la Sarajake: "Dikh, tiri služka hiñi andre tire vasta. Ker laha avke, sar ča tu kames!" Sar chudla laha e Saraj te kerel igen namištes, akor e Hagar latar denašla het.

⁷ Sar la o aňjelos le RAJESKERO arakhla pre pušta paš e chaňig paš o drom, so džalas ko Šur, ⁸ phendā lake: "Hagar, Sarajakeri služka, khatar aves a kaj džas?"

Oj odphendā: "Denašav het mira raňatar la Sarajatar."

⁹ O aňjelos le RAJESKERO lake phendā: "Visar pes pale ke peskeri raňi a podde tut lake!"

¹⁰ Palis lake mek phendā: "Kerava tire potomstvostar ajci but, hoj len našti zgeneha.

¹¹ Dikh, ačhiľal khabňi

a uľola (narodzinela pes) tuke čhavoro.

Deha leske nav Izmael,

bo o RAJ šundā tiro pharipnaskero roviben.

¹² Ov ela sar dzivo somaris;

džala pre savorende

a savore džana pre leste;

ela o ñeprijateľis peskere phralenge."

¹³ E Hagar diňa nav le RAJESKE, savo ke late prevakerđā, El-Roi, bo oj phendā: "Tu sal o Del, savo pre ma dikhes." ¹⁴ Vašoda pes odi chaňig vičinel Beer-Lachaj-Roi †. Kadi chaňig hiñi maškar o foros Kadeš the Bered.

¹⁵ Avke la Hagarake the le Abramoske uliľa čhavoro a o Abram diňa leske nav Izmael. ¹⁶ Sar lake ov uliľa, le Abramoske sas ochtovarđeš the šov (86) berš.

E zmluva the o občhindipen

17 Sar sas le Abramoske eňavardeš the eňa (99) berš, sikađa pes leske o RAJ a phendā leske: "Me som o Del Nekzoraleder ††, šun man a dživ angle ma andro žužipen! ² Phandava e zmluva maškar mande the tute a dava tut igen but čhaven."

³ Akor o Abram bandiľa le mujeha ke phuv a o RAJ leske phendā: ⁴ "Kadi hiñi miri zmluva tuha: Ačheha dad igen but narodenge. ⁵ Imar pes na vičineha Abram, ale tiro nav ela Abraham, bo aveha dad but narodenge. ⁶ Dava tut igen but čhaven, savendar ena narodi. The o kraľa tutar avena avri. ⁷ Tut, tire čhaven the savore lengere potomken dav kada lav sar zmluva, so ačhel pro furt: Avava tiro Del the Del savore tire potomkenge. ⁸ Tuke the tire čhavage dava kadi phuv, kaj sal sar cudzincos. Cali phuv Kanaan lenge dav, hoj te el lengeri pro furt, a me avava lengero Del."

⁹ O Del palis phendā le Abrahamoske: "Ča doliker miri zmluva tu, tire čhave the le čhavengere čhave the savore, save mek avena. ¹⁰ Kadi hiñi miri zmluva maškar mande the tumende, so mušinena te dolikerel: Dojekh manuš khatar tumende, savo hino murš, ela občhindo (obrezimen). ¹¹ Dena peske te občhinel le muršeskere garude kotorestar e cipa. Palis pes džanela, hoj hin e zmluva maškar mande the tumende. ¹² Kale dživesestar dojekh muršoro, savo uľola (narodzinela pes), pro ochtoto džives ela občhindo.

† E Chaňig le Džideskeri, so Dikhel pre Ma †† E Hebrejiko čhib: El Šaddaj

Keren oda, či uľola andral tiri famelija vaj ela cindo avre manušendar sar otroka a na ela tire čhavendar. ¹³ Mušinel te el občhindo dojekh le čhavorendar andral tiri famelija the oda, savo ela cindo vaš o love. Kada znakos pre tumaro telos sikavela, hoj miri zmluva tumenca hiñi pro furt. ¹⁴ Dojekh murš, saveske na ela občhindo le kotorestar e cipa, mi el avričhido khatar peskere manuša, bo na dolikerđā miri zmluva."

¹⁵ Akor o Del phendā le Abrahamoske: "Peskeri romňa, la Saraj, imar na vičineha Saraj, bo lakero nav ela Sara. ¹⁶ Me la požehňinava a dava tut latar čhas. Požehňinava la a ačhela latar daj le narodengeri. Latar avena avri the o kraľa."

¹⁷ O Abraham bandiľa le mujeha pre phuv, asandiľa andre peste a phendā: "Šaj le muršeske, saveske hin šel (100) berš, uľol čhavoro? A la Sarake, savake hin eňavardeš (90) berš, šaj uľol čhave?" ¹⁸ O Abraham phendā le Devleske: "Kada požehňaje našti el le Izmaeloske?"

¹⁹ O Del leske pale phendā: "Na! Tiri romňi e Sara tut dela čhavores a deha leske nav Izak. Leha the leskere čhavengere čhavenca phandava e zmluva, so ela pro furt. ²⁰ Me tut šundom, sar tut mangehas vaš o Izmael. Požehňinava les igen but čhavenca. Ela dad dešuduje (12) princenge a kerava lestar baro narodos. ²¹ Ale me phandava e zmluva tire čhaha le Izakoha, savo uľola la Sarake a oda kale časostar pal o berš." ²² Sar o Del preačhiľa te vakerele le Abrahamoha, odgeľa lestar.

²³ Mek oda džives o Abraham iľa peskere čhas le Izmael the savore muršen, save uliľe andre leskero kher, the mek savoren, saven peske cinda, a občhinda lenge e cipa le garude kotorestar avke, sar leske phendā o Del. ²⁴ Le Abrahamoske sas eňavardeš the eňa (99) berš, sar sas občhindo, ²⁵ a le Izmaeloske sas dešutrin (13) berš. ²⁶ Andre oda džives, sar sas o Abraham the o Izmael občhinde, ²⁷ sas lenca občhinde the savore leskere murša, save uliľe andre leskero kher, the ola, ko sas cinde avre manušendar sar otroka.

O Abraham presikavel pačiv

18 O RAJ pes jekhvar sikađa le Abrahamoske paš le Mamroskere bare stromi andro časos pal o dilos, sar hin baro tačipen. O Abraham bešelas paš o vudar le stanoskero. ² Sar pes obdikhľa, nadur lestar ačhenas trin murša. Soča len dikhľa, denašelas sigo ke lende khatar peskero stanos, bandiľa angal lende dži pre phuv ³ a phendā: "Rajeja, te tuke som pre dzeka, ma obdža tire služobňikos. ⁴ Dava te anel sikra paňi, thovena (omorena) peske o pindre a bešena peske tele paš kada stromos. ⁵ Anava varesavo chaben, zoraľarena pes a avke šaj džana dureder. Se avľan ke peskero služobňikos."

On odphende: "Mištes, ker avke, sar phenes."

⁶ O Abraham sidarelas andro stanos ke Sara a phendā: "Sigo dža, le jekh gonoro ‡ ole nekfeder arestar a pek mare."

‡ E Hebrejiko čhib: trin sea arestar

⁷ Palis o Abraham denašla ko stados a ila avri terňa thula gurumňora. Diňa le sluhasko a ov sidarelas la te kerel. ⁸ Palis thoda šutlo thud the gulo thud a la gurumňora, so imar kerđa, anglal lende. Sar on chanas, o Abraham ačhelas paš lende tel o stromos.

⁹ Phučle lestar: "Kaj hiňi tiri romňi e Sara?"

"Andro stanos," odphenda.

¹⁰ Jekh lendar, savo sas o RAJ, phenda: "Pal o berš, andre kajso časos, me avava pale ke tu a tira romňa la Sara ela muršoro."

E Sara oda sa šunelas paš o vudar le stanoskero. ¹¹ O Abraham the e Sara sas phure, sas lenge but berš a e Sara sas andre ola berša, so le džuvlen imar našti el čhave. ¹² Vašoda e Sara andre peste zaasandila a phenda peske: "Akana, te imar som phuri, majinel man te el vareso mire romeha? Se the miro raj hin imar phuro!"

¹³ O RAJ phenda le Abrahamoske: "Soske e Sara asal a phenel peske: 'Či čačes man šaj el akana čhave, sar imar som phuri?' ¹⁴ Či hin vareso ajso, so o RAJ našti kerel? Pal o berš, andre kajso časos, avava pale ke tu a la Sara ela muršoro."

¹⁵ Ale e Sara andre dar klaminelas a phenda: "Me na asavas."

"He, tu čačes asahas," phenda lake o RAJ.

O Abraham pes mangel vaš e Sodoma

¹⁶ O murša odarik palis gele het a džanas ke Sodoma. O Abraham len odligenda. ¹⁷ O RAJ phenda: "Šaj me garuvav anglo Abraham oda, so kamav te kerel? ¹⁸ Le Abrahamostar ela čačes baro a zoralo narodos a andre leste ena požehňimen savore narodi pre phuv. ¹⁹ Bo mange les ilom avri, hoj te phenel peskere čhavege a savore peskere potomkenge, hoj pes te likerem pal miro drom a te keren pal o čačipen a pal o pravos. Te oda kerena, kerava le Abrahamoske savoro avke, sar leske oda phendom."

²⁰ O RAJ phenda: "Oda, so šundom pre Sodoma the Gomora, hin imar igen but a o binos lengero hin igen džungalo. ²¹ Džav tele te dikhel, či čačes keren vaj na keren oda, so šundom pal lende. Kamav oda te džanel."

²² Ola duj murša odarik odgele a gele andre Sodoma, ale o Abraham mek furt ačhelas anglo RAJ. ²³ O Abraham avla pašeder a phučla: "Čačes kames te murdarel avri le čačipnaskeres jekhetane le binošne manušeha? ²⁴ Te ulahas andro foros penda (50) čačipnaskere manuša, murdareha len a na odmukeha ole foroske vaš ola penda (50) čačipnaskere manuša, save hine ode? ²⁵ Vareso ajso kames te kerel? Le binošnes kames te murdares le čačipnaskere manušeha? Či hin o čačipnaskero manuš sar o binošno? Mi el oda dur tutar! Či o sudcas cała phuvakero na majindahas te kerel oda, so hin čačipnaskero?"

²⁶ O RAJ leske phenda: "Te arakhava andro foros Sodoma penda (50) čačipnaskere manušen, prekal lende ole cale foroske odmukava."

²⁷ O Abraham odphenda: "Domuklom mange te vakerele mire RAJEHA, choc džanav, hoj som ča prachos the popolos. ²⁸ So te ode ena le pendendar pandž frimeder čačipnaskere manuša? Murdareha avri calo foros, te arakheha ča ole saranda the pandž (45) manušen?"

"Na murdarava len avri, te ode arakhava saranda the pandž," odphenda o RAJ.

²⁹ Ale o Abraham vakerelelas mek dureder a phučla:

"So te ode ena ča saranda (40)?"

"Prekal ola saranda oda na kerava," odphenda o RAJ.

³⁰ "Ma ruš pre ma, RAJEJA, hoj mange pale domukav tutar te phučel," phenda o Abraham a phučla: "So te lendar ena ča tranda (30)?"

O RAJ odphenda: "Te len ode arakhava tranda, na murdarava avri oda foros."

³¹ O Abraham leske pale phenda: "Imar te mange domuklom tuha te vakerele, RAJEJA miro. So te ode ena ča biš (20) džene?"

O RAJ leske odphenda: "Vaš ola biš oda foros na žičinava."

³² "RAJEJA, mangav tut," phenda o Abraham, "ma av pre ma cholamen, hoj mek jekhvar man tutar phučav! So te ode ena ča deš?"

O RAJ leske odphenda: "Vaš ola deš džene, oda foros na murdarava avri."

³³ Sar o RAJ preačičila te vakerele le Abrahamoha, odgeľa a o Abraham geľa khere.

O džungipen andre Sodoma

19 Sar ke račate avenas duj aňjela andre Sodoma, o Lot bešelas andre foroskeri brana. Soča len zadikhla, uštifa, geľa anglal lende a bandila pre phuv le mujeha. ² Phenda lenge: "Mangav tumen, rajale mire, aven andro kher tumare služobňikoske. Ode peske šaj thovena (omorena) o pindre a presovena. Tosara šaj džana tumare dromeha."

"Na," odphende leske, "amen presovaha avri paš e brana."

³ Ale ov pes lenge ajci mangelas, hoj gele ke leste. Sar gele andre leskero kher, kerđa lenge hoscina, diňa te pekel mare bi o droždi a chanas. ⁴ Sigeder, sar peske kamle te pašlol, savore murša andral e Sodoma, le terendar dži ko phure, ačhenas anglo kher pal dojekh sera. ⁵ Vičinde peske le Lot a phučle lestar: "Kaj hine ola murša, save avle kadi rat ke tu? De amenge len, hoj lenca te pašluvas."

⁶ Akor o Lot geľa avri ke lende, ale o vudar pal peste phandla. ⁷ Phenda: "Mangav tumen, phralale mire, ma keren ajso džungipen! ⁸ Dikhen, hin man duj čhaja, savem mek na sas nič le muršenca. Anava tumenge len avri a keren peske lenca, so ča tumen kamen. Ale kale muršenge ma keren nič, bo on hine mire hosci, save avle andre miro kher!"

⁹ Ale on les na šunde a phende: "Dža adarik het!" A dureder vriskinenas: "Tu korkoro kade avlal sar cudzincos a kames amenge tu te dovakerel? Akana mek goreder dopereha sar on!" A džanas igen zoraha pro Lot a kamenas te rozmarel o vudar. ¹⁰ Androda ola duj

murša peskere vastenca cirdle le Lot andro kher a phandle andre o vudar. ¹¹ Olen, saven sas avri, le ter-nendar dži ko phure, dukhavenas le koripnaha a našti arakhenas o vudar.

O Lot denašel andral e Sodoma

¹² Palis o murša phende le Lotoske: "Hin kade mek vareko tirendar? Džamutre, čhave, čhaja abo mek vareko andral kada foros? Le len adarik het. ¹³ Zničina-ha kada foros, bo o avriphendipen pre leste hino anglo RAJ igen baro. Bičhađa amen o RAJ, hoj les te zničinas."

¹⁴ Avke o Lot geľa avri a phendā le muršenge, save majinde peske te lel leskere čhajen vaš o romňa: "Uštēn, džan het andral kada foros, bo o RAJ les kamel te zničinel!" Ale on peske gondolinas, hoj kerel pheras.

¹⁵ Sar avľa o vidnišagos, o aňjela dovakerenas le Lotoske a phende: "Sigo ušti! Le la romňa the soduje čhajen, save hine kade, hoj te na meres, sar o RAJ zničinel kada foros." ¹⁶ Ale o Lot na kamelas takoj te džal, avke ola duj murša chudle les, leskera romňa the soduje čhajen vastestar, bo o RAJ na kamelas, hoj on te meren. Lígende les avri andral o foros a ode les mukle. ¹⁷ Sar len ligenenas avri, jekh lendar phendā: "Denaš, bo šaj mereha! Ma obdikh tut a aňi ņikhaj pre kada than maškar o brehi tut na zaačhav. Denaš pro verchos, hoj te na aven murdardel!"

¹⁸ O Lot lenge phendā: "Na, rajeja, mangav tut! ¹⁹ Se tiro sluhas chudľa tiri pačiv a baro hin tiro lačhipen, so mange presikadāl, sar mange zachraňindāl o dživipen. Ale me imar na birinav te denašel pro verchos, zachudela man kada baro bibachtalipen a merava. ²⁰ Dikh, kade nadur hin gav, kaj šaj denašav. Nane igen baro. Či ode man na zachraňinava? Hino cikno, ale me ode predživava."

²¹ Ov leske phendā: "Mištes, the andre kada tuke kerava pre dzeka a o gav, vaš savo pes privakeres, na zničinava. ²² Sigo tut ode garuv, bo našti kerav nič, medik ode na dodžaha." Vašoda pes o foros vičinel Coar.

O Del bičhavel e jag pre Sodoma the Gomora

²³ Sar o Lot dogeľa andro Coar, o kham avelas avri upral odi phuv. ²⁴ O RAJ bičhađa pre Sodoma the Gomora andral o ņebos sira la jagaha, so perelas sar brišind. ²⁵ Zničindā ola fori, calo oda than, savore manušen ode the savoro, so upre barolas. ²⁶ Le Lotoskeri romňa pes obdikhľa pale a čerindā pes pro londo slupos.

²⁷ O Abraham uštiľa sig tosara upre a geľa pro than, kaj angle oda ačhelas anglo RAJ. ²⁸ Dikhľa tele pre Sodoma the Gomora a dikhľa, hoj odarik avel baro thuv sar andral e bov. ²⁹ Avke, sar o Del zničinelas o fori pre oda than, kaj bešel as o Lot, leperdā peske pro Abraham a mukľa le Lot te denašel odarik avri.

Le Lotoskere čhaja

³⁰ O Lot daralas te ačhel andro foros Coar, avke iľa peskere duje čhajen a geľa lenca te bešel pro brehos andre jaskiňa. ³¹ Akor e phureder leskere čhajendar phendā la ternederake: "Amaro dad hin imar phuro a na ačhiľa pre kadi phuv ņisavo murš, kas peske iľamas vaš o rom a uľahas amen čhave avke, sar pes oda kerel pal calo svetos. ³² Av, maťaras le dades la moľaha a pašľuvas leha, hoj amen lestar te el čhave."

³³ Odi rat dine te pijel le dades mol. Palis geľa ke leste e phureder a pašľiľa leha. Ale ov aňi na džanelas, kana peske pašľiľa a kana odgeľa.

³⁴ Pre aver džives e phureder phendā la ternederake: "Dikh, me imar sučom le dadeha idž. Av, das les the kadi rat te pijel mol a pašľuveha tu leha akanake, hoj te el amen lestar čhave." ³⁵ Avke dine te pijel odi rat peskere dades mol, pašľiľa peske paš leste e terneder čhaj a suča leha. Ov the avke mek na džanelas, kana ke leste geľa a kana odgeľa.

³⁶ Avke soduj pheňa ačhile khabne peskere dadestar le Lotostar. ³⁷ La phurederake uliľa čhavo, saveske diňa nav Moab. Ov hin o prapapus adadživeseskere Moabčanenge. ³⁸ The la ternederake uliľa čhavo a diňa les nav Ben-Ammi. Ov hin o prapapus adadživeseskere Ammončanenge.

E Sara ko Abimelech

20 Odarik o Abraham džalas andre pušta Negev. Zaačhađa pes maškar o Kadeš the Šur a varesa-vo časos ačhiľa andro Gerar. ² O Abraham akor pal peskeri romňa Sara vakerelas: "Kadi hiňi miri pheň." Akor o Gerariko kralis, o Abimelech, bičhađa pal e Sara a iľa peske la.

³ Sar o Abimelech rači sovelas, o Del andro suno avľa ke leste a phendā leske: "Tu čačes mereha, bo iľal tuke romňa, sava hin rom."

⁴ Ale le Abimelech mek laha na sas nič a phendā: "Rajeja, či murdares the le čačipnaskere manušen?" ⁵ Či mange ov korkoro na phendā: 'Kadi hin miri pheň?' Se the oj mange phendā: 'Kada hin miro phral.' Me na džanavas ņisostar, mire vasta hine žuže."

⁶ O Del leske phendā andro suno: "Me olestar džanav, hoj tu na kamľal nič nalačo te kerel, a vašoda tuke na domukľom, hoj pes latar te chudes a kaleha te keres binos anglal ma. ⁷ De pale la romňa lakere romeske, bo ov hin prorokos. Ov pes vaš tu privakerela, hoj te džives. Sar la na deha pale, phenav tuke, čačes mereha savore tire manušenca."

⁸ Palis o Abimelech sig tosara uštiľa a vičindā savore peskere uradňiken. Sar lenge vakerelas savoro, so pes ačhiľa, igen predarandile. ⁹ O Abimelech vičindā le Abraham a phendā leske: "S'oda tu amenge kerďal? So tuke kerďom ajsa nalačo, hoj andal pre mande the pre miro krališagos ajsa baro binos? Kerďal mange vareso, so na majindāl te kerel!" ¹⁰ O Abimelech mek

phučla le Abrahamostar: "So tuke avla pre godi kavke pes te likerel?"

¹¹ O Abraham odphenda: "Phendom mange: 'Pre kada than čačes nane dar anglo Del a vaš miri romni man murdarena.' ¹² Ale oj mange hihi čačes pheň, bo hihi mire dadeskeri čhaj, ale nane mira dakeri, vašoda oj ačhiła miri romni. ¹³ Sar man o Del bičhađa avri andral le dadeskero kher andre aver phuv, me lake akor phendom: 'Te man kames, akor phen vřadzik, kaj džaha, hoj som tuke phral.' "

¹⁴ Palis iła o Abimelech le bakren, le gurumnen, le otroken the le služken a diňa len le Abrahamoske. Diňa leske pale the leskera romňa la Sara. ¹⁵ O Abimelech leske phenda: "Dikh, anglal tute hin miri phuv, beř tuke, kaj ča tu kames." ¹⁶ A la Sarake phenda: "Tire phraleske diňom ezeros (1 000) rup, hoj te sprindžaren savore, hoj tu na kerďal nič nalačo."

¹⁷ Palis o Abraham pes mangelas ko Del a o Del sastardđa le Abimelech, leskera romňa the le služken, hoj len te el pale o čhave. ¹⁸ Bo vaš e Sara, le Abrahamoskeri romni, o RAJ phandla dojekha džuvľakero dživipen andre le Abimelechoskero kher, hoj te na el čhave.

Sar o Izak uliła

21 O RAJ sas ke Sara lačhejleskero a dolikerďa peskero lav, so la diňa. ² E Sara ačhiła khabni a diňa le Abraham čhavores andre leskero phuripen andre oda časos, pal savo leske o Del phenda. ³ O Abraham diňa nav Izak peskere čhaske, savo uliła (narodzinda pes) la Sarake, ⁴ a pro ochtoto džives o Abraham občhinda peskere čhas le Izak avke, sar leske phenda o Del. ⁵ Le Abrahamoske sas řel (100) berř, sar leske uliła o Izak. ⁶ Akor e Sara phenda: "O Del kerďa, hoj te asav, a sako, ko pal oda řunela, asala." ⁷ A mek phenda: "Ko phendahas le Abrahamoske, hoj e Sara mek dela te pijel andral e kolin le čhaven? A the avke les diňom čhavores andre leskero phuripen." ⁸ Andre oda džives, sar o čhavoro bariła avri avke, hoj na muřinelas imar e daj les te del te pijel, o Abraham kerďa bari hoscina.

E Hagar bičhadř het

⁹ Sar e Sara dikhla, hoj o čhavoro, savo uliła le Abrahamoske la Hagaratar, savi sas Egipťanka, asalas lakere čhavorestar. ¹⁰ Phenda le Abrahamoske: "Trade avri ola služka the lakere čhas, bo o čhavoro kala služkakero nařti chudel nič ole barvalřpnastar, so hin mire čhaskero le Izakoskero." ¹¹ Le Abraham kada igen zadukhandřla andro jilo, bo o Izmael sas leskero čhavo. ¹² O Del phenda le Abrahamoske: "Ma phager tuke o řero upral o čhavo aňi upral e služka. řun la Sara andre savoreste, so tuke phenda, bo prekal o Izak avena o čhave, pal save tuke phendom." ¹³ The la služkakere čhastar kerava baro narodos, bo the ov hino tiro čhavo."

¹⁴ Sig tosara o Abraham iła o chaben the o cipuno gonoro le paňeha a diňa oda la Hagarake. Thodř lake le čhas pro dumo a premukřla la. Oj odgeřa a phirelas upre tele pal e puřta Beer-řeba.

¹⁵ Sar imar lake dogeřa o paňi andral o cipuno gonoro, thodř le čhas tel jekh krakos. ¹⁶ Geřa lestar dureder te beřel ajse řel (100) metri a phenda peske: "Nařti dikhav pre oda, sar mange merel o čhavoro." Sar ode beřelas, chudřa zorales te rovel.

¹⁷ Ale o Del řundř le čhavoreskero hangos a le Devleskero aňjelos vičinda andral o řebos pre Hagar a phenda lake: "So hin tute, Hagar? Ma dara tut, bo o Del řundřa tire čhas, sar rovel ode, kaj hino. ¹⁸ Uřti, le le čhavores a liker les zorales andro vasta, bo kerava lestar baro narodos." ¹⁹ Androda o Del lake phundradřa o jakha a oj dikhřa e chaňig. Avke geřa te pherarel o cipuno gonoro le paňeha a diňa te pijel peskere čhas. ²⁰ O Del sas le čhavoreha, sar barolas avri. Beřelas pre puřta a sas lestar lukostrelcos. ²¹ Sar beřelas pre puřta Paran, iła leske e daj romňa andral o Egipť.

Le Abrahamoskeri zmluva le Abimelechoha

²² Andre oda časos o Abimelech the o veliteľis Pichol, savo řidžalas leskere slugađen, phende le Abrahamoske: "O Del hin tuha andre savoreste, so keres.

²³ Vařoda le kade vera pro Del, hoj na thoveha manca avri, aňi ole dženeha, ko avela pal ma, aňi mire potomkenca. A sar me man pačivalones likerďom ke tu, avke the tu pes likeraha ke mande andre phuv, kaj sal cudzincos."

²⁴ Avke o Abraham phenda: "Lav vera."

²⁵ Palis o Abraham phenda le Abimelechoske: "Tire sluhi peske zaile jekh miri chaňig."

²⁶ "Na džanav, ko oda kerďa," odphenda leske o Abimelech. "Se aňi tu mange pal oda na phenda a mekča adadžives pal oda řundřom."

²⁷ Akor o Abraham iła le bakren the le gurumnen, diňa len le Abimelechoske a sodujđzene phandle peha e zmluva. ²⁸ Palis o Abraham iła eřta bakren peskere stadostar. ²⁹ O Abimelech lestar phučla: "So kames te sikavel ole eřta bakrenca, so thodřal pre sera?"

³⁰ "Le tuke mandar kale eřta bakren sar svedectvo, hoj me kopalindřom avri e chaňig," odphenda leske.

³¹ A vašoda pes oda than vičinel Beer-řeba, bo sodujđzene ode phandle vera.

³² Palis, sar peha phandle e zmluva andre Beer-řeba, o Abimelech the leskero veliteľis o Pichol gele pale andre Filiřtiniko phuv. ³³ O Abraham sadzinda andre Beer-řeba stromos tamariřka a lařarelas ode le RAJES, le Devles, savo hino pro furt. ³⁴ O Abraham but dživelas andre Filiřtiniko phuv.

O Abraham džal te obetinel le Izak

22 Pal varesavo časos o Del probalřinelas (skuřinelas) le Abraham a phenda leske: "Abraham!"

"Kade som," odphenda.

²“Le tire jekhore čhas le Izak, saves igen kames, a dža andre phuv Morija,” phendā o Del. “Ode les obetin sar labardī obeta pro verchos, pal savo tuke phenava.”

³O Abraham sig tosara thođa o sedlos pro somaris a iľa peha duje sluhē the peskere čhas le Izak. Sar kere-las o štīpki pre labardī obeta, džalas pro than, pre savo leske phendā o Del. ⁴Pro trito džives o Abraham dural dikhľa pre oda than. ⁵Phendā peskere sluhenge: “Ačhen kade le somariha. Me džava ode le čhavoreha, lašaraha le Devles a avaha pale ke tumende.”

⁶O Abraham iľa kašta pre labardī obeta a thođa len pre peskero čhavo Izak. Ov korkoro lidžalas e jag the e čhuri. Sar avke džanas jekhetane, ⁷o Izak phendā peskere dadeske le Abrahamoske: “Dado!”

“So kames, čhavoro miro?” odphendā o Abraham.

“Dikh, e jag the o kašta hine kade, ale kaj hin o bakroro pre labardī obeta?” phučľa o Izak.

⁸O Abraham leske phendā: “Čhavoro miro, o Del peske arakhela bakrores pre labardī obeta.” Avke džanas sodujđžene dureder.

⁹Sar imar avle pre oda than, pal savo leske o Del phendā, o Abraham ačhadā oltaris a rakindā upre o kašta. Sphandľa peskere čhas le Izak a thođa les pro oltaris, pro kašta. ¹⁰Palīs o Abraham iľa andro vast e čhuri, hoj te murdarel le čhas. ¹¹Akor andral o ņebos pre leste vičindā o aňjelos le RAJESKERO: “Abraham, Abraham!”

“Kade som,” ov odphendā.

¹²“Zaačhi!” phendā leske o aňjelos. “Ma thov pre leste o vast! Ma ker leske nič! Akana džanan, hoj tut daras le Devlestar, bo mange na sajindāl te del aňi peskere jekhore čhas.”

¹³Sar o Abraham pes obdikhľa, dikhľa andro kraki bakres zachudle le rohenca. O Abraham geľa, iľa le bakres a obetindā les vaš peskero čhavo sar labardī obeta. ¹⁴O Abraham ole thaneske diňa nav “O RAJ pes starinela.” Avke dži akana pes vakere: “Pro verchos le RAJESKERO pes starinela.”

¹⁵Le RAJESKERO aňjelos pale vičindā andral o ņebos pro Abraham ¹⁶a phendā: “Vašoda, hoj oda kerđal a na sajindāl mange peskere jekhore čhas, lav vera korkoro pre peste, phenel o RAJ: ¹⁷Čačes tut požehňinava a dava tut ajci igen but potomken sar o čercheňa pro ņebos the sar e pošī pro moroskero brehos; on ņerinena (zvitāzinena) upral peskere ņeprijatēľa ¹⁸a prekal tiro čhavo ena požehňimen savore narodi pre phuv, bo šundāl miro lav.”

¹⁹Palīs o Abraham geľa pale ke peskere sluhi a savore jekhetane gele andre Beer-Šeba, kaj ov bešelas.

Le Nachoriskere čhave

²⁰Pal varesavo časos le Abrahamoske pes phendā, hoj e Milka, le Nachoriskeri romňi, imar hiňi daj. Uľile lake ochto čhave: ²¹O ešebno (peršo) sas o Uc, leskero phral o Buz the o Kemuel, savo sas dad le Aramoske, ²²palīs o Kesed, o Chazo, o Pildaš, o Jidlaf the o Betuel. ²³O Betuel sas dad la Rebekake. Kale ochto čhaven andā pro svetos e Milka le Abrahamoskere phraleske,

le Nachoriske. ²⁴Sas les the romňi-služka e Reuma. Lake uľila o Tebach, o Gacham, o Tachaš the o Maachah.

La Sarakero meriben

23 E Sara dživelas šel the bišuefta (127) berš.

²Muľa andre Kirjat-Arba, so hin o foros Hebron andro Kanaan. O Abraham geľa andre bari žaľa te rov-el pal late.

³Palīs uštīľa peskera muľa romňatar a phendā le Chetitanenge: ⁴“Me som maškar tumende ča cudzincos, savo avľom kade te bešel. Mangav tumen, den man prekal e famelija hroboskero than, kaj šaj parunav mira romňa.”

⁵O Chetitana phende le Abrahamoske: ⁶“Šun amen, rajeja. Tu sal prekal amende sar le Devleskero princos! Parun tira romňa la Sara andre nekfeder amaro hrobos. ņiko amendar tut na zaačhavela, te andre leskero hroboskero than parunes peskera muľa.”

⁷Avke o Abraham uštīľa upre a bandīľa anglo manuša andral odi phuv, anglo Chetitana, a phendā: ⁸“Te tumen domuken, hoj mira romňa te parunav kade, ta akor šunen man avri a privakeren pes vaš ma ko Efron, savo hin le Cochariskero čhavo. ⁹Mi bikenel mange anglal tumende prekal famelijakero hrobos e jaskiňa Machpela, so hiňi pro agor leskera maľatar, vaš ajci rup, keci mola.”

¹⁰O Efron akor bešelas maškar o Chetitana a ov phendā le Abrahamoske anglal savore Chetitana, save avle paš e foroskeri brana: ¹¹“Na avke, rajeja miro! Šun man! E maľa tuke dav the e jaskiňa, so hiňi pre late. Dav tuke la anglal mire manuša. Parun ode tira romňa.”

¹²O Abraham pale bandīľa anglo Chetitana ¹³a phendā le Efronoske anglal lende: “Šun avri ešeb (peršo) man. Vaš e maľa tuke počinava ajci, keci mol rup. Le mandar oda, hoj te šaj ode parunav mira romňa.”

¹⁴O Efron odphendā le Abrahamoske: ¹⁵“Šun tu man, rajeja miro! E phuv mol štar šel (400) rupune. So hin oda prekal amende? Ča dža, parun tuke tira romňa.”

¹⁶O Abraham priiľa oda, so phendā o Efron, a počindā leske štar šel rupune. Thođa o rup pre vaha anglo Chetitana, avke sar o manuša furt maškar peste bikenenas. Diňa ajci, keci angle lende phendā, hoj dela.

¹⁷Avke o Abraham cindā le Efronoskeri maľa Machpela paš o Mamre. Cindā e maľa le stromenca the e jaskiňa pre late. ¹⁸O Abraham preiľa odi phuv anglo Chetitana, save pes zgele paš e brana le foroskeri.

¹⁹Palīs o Abraham parundā peskera romňa la Sara andre jaskiňa pre maľa Machpela paš o Hebron, paš o Mamre andre phuv Kanaan. ²⁰Avke preiľa o Abraham le Chetitanendar e maľa la jaskiňaha, hoj les te el e than, kaj te parunel la famelija.

O Izak the e Rebeka

24 O Abraham sas imar phuro, sas leske igen but berš a o RAJ les andre savoreste požehñinelas. ² O Abraham phendá peskere nekphuredere slufhaske, saveske diña te lidžal calo peskero barvalipen: "Thov tiro vast pre mire čanga! ³ Le vera andro nav le RAJESKERO, savo hino Del pro űebos the pre phuv, hoj na leha mire čhaske romña le čhajendar andral o kmeños Kanaan, maškar save bešav. ⁴ Ale džaha andre miri phuv ke miri famelija a odarik leha romña mire čhaske le Izakoske." ⁵ O slufhas leske odphendá: "A te odi džuvli na kamela te avel manca andre kadi phuv? Akor mušnav te lidžal tire čhas andre odi phuv, khatar tu avlál avri?" ⁶ O Abraham leske phendá: "Na! Ma lidža mire čhas ode! ⁷ O RAJ, o Del le űeboskero, man iła avri andral o kher mire dadeskero, mira phuvatar, kaj ulilom, a diña man vera: 'Kadi phuv dava tire potomkenge.' Ov bičhavela anglal tu peskere añjelos, hoj odarik tu te les avri romña mire čhaske. ⁸ Te odi džuvli tuha na kamela te avel, kala veraha imar na aveha phandlo, ča mire čhas ode pale ma lidža!" ⁹ Akor o slufhas thođa o vast pro čanga peskere rajeske le Abrahamoske a phandla leha vera. ¹⁰ Avke o slufhas iła andral peskere rajeskero stados deše řaven a iła mek but lače dari peskere rajestar a geła het. Avke geła andro Aram-Naharajim andro foros le Nachoriskero. ¹¹ A mukla le řaven te pašol anglo foros paš e chañig. Oda sas ke račate, andre ajso časos, kana o džuvla peske furt džanas te cirdel pañi, ¹² O slufhas phendá: "Ó, RAJEJA, o Del mire rajeskero le Abrahamoskero! De, hoj adadžives te doperel sa mištes, a presikav o lačhipen mire rajeske le Abrahamoske. ¹³ Dikh, me ačhav kade paš e chañig a o čaha le foroskere aven peske te cirdel o pañi. ¹⁴ Te phenava jekhake olendar: 'De man te pijel andral o džbanos pañi,' a oj odphenela: 'Le, pi! Me dava the tire řaven te pijel,' ta mi el oj odi, sava kidnal avri tire služobñikoske le Izakoske. Pal oda džanava, hoj presikadał o lačhejileskeriben mire rajeske." ¹⁵ Mek añi oda na dophendá a dikhla, sar avelas e Rebeka le džbanoha pro phiko. Oj sas e čhaj le Betueliske, savo sas o čhavo le Abrahamoskere phraleske le Nachoriske the la Milkake. ¹⁶ E Rebeka sas igen šukar čhaj a mek na sas la nič le muršeha. Geła tele paš o pañi te pherarel peske o džbanos. Sar pes odarik visarelas pale, ¹⁷ o slufhas denašelas ke late a phendá: "De man te pijel sikra pañi andral tiro džbanos!" ¹⁸ Oj takoj iła tele o džbanos le pañeha a diña les te pijel. ¹⁹ Sar les imar diña te pijel, phendá: "Dava the tire řaven ajci pañi, keci pijena." ²⁰ Avke geła sigo te čhivel avri o pañi andral o džbanos andro řlabos a denašelas pale ke chañig te cirdel pañi, hoj te pijen savore leskere řavi. ²¹ Ov pre late cichones dikhelas, hoj te rozprindžarel, či o RAJ diña leskere dromeske e bach, vaj na. ²² Sar o řavi imar pile, o slufhas iła avri igen dragane veci: E dragañi somnakuñi angrusi lake thođa andro nakh a thođa pre lakere vasta duj bare somnakune

naramki. ²³ Phučla latar: "Phen mange, kaskeri sal tu čhaj? Hin varesavo than andre tire dadeskero kher, kaj ačhilamas te presovel?" ²⁴ Odphendá leske: "Som e čhaj le Betueliskeri, savo hin o čhavo le Nachoriske the la Milkake." ²⁵ Mek phendá: "Hin amen but phusa the chaben a the than pro soviben." ²⁶ O murš bandila tele dži ke phuv anglo RAJ ²⁷ a phendá: "Mi el lašardo o RAJ, o Del mire rajeskero le Abrahamoskero, savo dolikerel o lav a na preačhila te presikavel peskero lačhejileskeriben mire rajeske. O RAJ man anda andro kher ke famelija mire rajeskeri." ²⁸ Palis odi čhaj denašla andro kher peskera dakero a rozvakerđa savoreng e savoro, so pes ačhila. ²⁹ La Rebeka sas phral o Laban. Ov denašelas ko murš paš e chañig, ³⁰ bo dikhla e angrusi andro nakh the o lancici pro vasta peskera pheñake a šundá la te vakerel, so lake o murš phendá. Avla ko murš, savo mek ačhelas paš o řavi paš e chañig, ³¹ a phendá: "Soske ačhes avri, tu, savo sal požehñimen le RAJESTAR? Av manca! Me imar pririchtindom o than prekal tu the prekal o řavi."

³² Avke o murš geła andro kher a o Laban iła tele pal o řavi savore veci, so sas pre lende a diña len phusa the chaben. A le slufhaske the leskere muršenge diña pañi te thovel (te morel) o pindre. ³³ Ale sar anglal leste thođa o chaben, phendá: "Me na chava, medik na phenava, soske avlom." O Laban phendá: "Vaker!" ³⁴ Avke chudla te vakerel: "Me som le Abrahamoskero slufhas. ³⁵ O RAJ igen bares požehñinda mire rajes, vašoda hino barvalo. Diña les bakre the gurumña, rup the somnakaj, sluhlen the služken, řaven the somaren. ³⁶ Sar sas miri rajeskeri romñi e Sara imar phuri, ulila lake muršoro a miro raj leske diña savoro, so les hin. ³⁷ Miro raj man phandla kala veraha: 'Na leha mire čhaske romña le čhajendar andral kadi phuv Kanaan. ³⁸ Ale džaha andro kher mire dadeskero a an prekal miro čhavo romña andral miri famelija.' ³⁹ Palis phučlom mire rajestar: 'So te odi džuvli na kamela te avel manca?' ⁴⁰ Phendá mange: 'O RAJ, anglal kaste dživav pačivalones, bičhavela peskere añjelos tuha, hoj tiro drom te el bachtalo a te anes mire čhaske romña andral miri dadeskeri famelija. ⁴¹ Kada hin ča jekh drom, prekal savo šaj aves premuklo mira veratar a oda avke: Sar džaha ke miri famelija a te on tuke la na dena.' ⁴² Sar avlom adadžives paš e chañig, phendom: 'Ó, RAJEJA, o Del mire rajeskero le Abrahamoskero, mangav tut, de man bach andre oda, so džav te kerel! ⁴³ Dikh, som paš e chañig. Sar avela e čhaj te cirdel o pañi, phenava lake: "De man te pijel sikra pañi andral o džbanos," ⁴⁴ a te oj phenela: "Le, pi! Me dava the tire řaven te pijel," mi el oj odi romñi, sava peske o RAJ kidna avri prekal miro rajeskero čhavo.' ⁴⁵ Mek añi oda na dophendom a imar avelas e Rebeka le džbanoha pro phiko ke chañig. Sar peske cirdna o pañi, phendom lake: 'Mangav tut, de man te pijel pañi!' ⁴⁶ Oj sigo iła tele o džbanos pal o phiko a phendá: 'Le, pi! Dava the tire řaven te pijel!' ⁴⁷ Palis latar phučlom: 'Kaskeri sal tu čhaj?' Oj odphendá: 'Miro dad hin o Betuel, o čhavo le Nachoriske the la Milkake.' Palis lake prithodom andro

nakh e angrusi the pro vasta o naramki. ⁴⁸ Bandiřom pro khoča anglo RAJ a lařaravas le RAJES, savo hin o Del miro rajeskero le Abrahamoskero, bo řidřalas man pal o lačo drom ke famelija mire rajeskeri, hoj te anav lengera čha prekal leskero čhavo. ⁴⁹ Akana phenen, či kamen mire rajeske te presikavel o jileskeriben the e pačiv. Te na, ta phenen mange a visarava man pale." ⁵⁰ O Laban the o Betuel odphende: "Te hin kada le RAJESTAR, so amen řaj phenas? ⁵¹ Dikh, kade hiři e Rebe-ka. Le la a džal! Mi ačhel romři tire rajeskere čhaske, avke sar oda phenda o RAJ." ⁵² Sar oda řunda o sluhas le Abrahamoskero, bandiřa anglo RAJ dži pre phuv. ⁵³ Palis iřa avri rupune a somnakune řperki the gada a diņa len la Rebekake. Diņa tiř o dragane dari lakere phrales the lakera da. ⁵⁴ Palis o sluhas le murřenca, save sas leha, chanas the pijenas a ačhile ode te presovel. Sar tosara uřtile, o sluhas phenda: "Muken man, mi džav pale ke miro raj." ⁵⁵ Ale la Rebekakero phral the e daj leske phende: "Mi ačhel e Rebeka mek amenca ajse deř dživesa a palis řaj džal." ⁵⁶ O sluhas lenge odphenda: "Ma zřikeran man, te imar o RAJ pořehņinda miro drom. Muken man, mi džav pale ke miro raj." ⁵⁷ On leske odphende: "Vičinas la a řunaha, so oj phenela." ⁵⁸ Vičinde la Rebeka a phučle latar: "Kames akana te džal het kale murřeha?" Oj odphenda: "He, džava."

⁵⁹ Akor mukle te džal peskera pheņa la Rebeka the la sluřka, savi la bararelas avri, the le Abrahamskere sluhas peskere murřenca. ⁶⁰ Pořehņinde la Rebeka a phende lake: "Pheņe amari, av daj le čhavage ezera-ezerenge a tire potomki mi prelen o fori peskere řpri-jatěfenge!" ⁶¹ E Rebeka the o sluřki pes priřichtinde a gele te beřel pro řavi, hoj te džan ole murřeha. Avke o sluhas iřa la Rebeka a džanas het.

O Izak peske lel la Rebeka

⁶² O Izak avelas pale khatar e čaņig Beer-Lachaj-Roi a beřelas pre puřća Negev. ⁶³ Ke račate, sar pes o Izak geřa te predřal pre mařa, obdikhřa pes a dikhřa, sar aven o řavi. ⁶⁴ The e Rebeka dikhřa le Izak. Geřa tele pal e řava ⁶⁵ a phučřa le sluhastar: "Ko hin oda murř, savo predřal prekal e mařa a savo avel ke amende?" O sluhas odphenda: "Oda hin miro raj." Akor oj iřa o khosno a garuđa o muj.

⁶⁶ Palis o sluhas chudřa le Izakoske te vakerele pal savoro, so kerđa. ⁶⁷ Avke o Izak řigenda la Rebeka andro stanos la Sarakero peskera dakero a iřa peske la romņake. O Izak kamelas la Rebeka a arakhřa andre late o smirom pal o meriben peskera dakero.

Le Abrahamskere aver čhave

25 O Abraham peske iřa dujtona romņa, savi pes vičinelas Ketura. ² Oj les diņa čhaven le Zimran, Jokřan, Medan, Midijan, Jiřbak the le řuach. ³ Le Jokřan sas duj čhave, o řebah the o Dedan. Le Dedanskere čhave sas o Ařřurim, o Letuřim the o Leummim. ⁴ Le Midijanskere čhave sas o Efah, o Efer, o Chanoch, o

Abidas the o Eldaah. Savore kala sas la Keturakere čhave.

⁵ O Abraham diņa savoro peskero barvalipen le Izakoske. ⁶ Ale le čhavage, save les sas le romņenca-sluřobņičkenca, diņa dari, a mek sar dživelas, bičhađa len het peskere čhastar le Izakostar andre phuv pro vi-chodos.

Le Abrahamskero meriben

⁷⁻⁸ O Abraham muřa andre řukar lače phuripnaskere berřa, sar leske sas řel the eftavardeř the pandř (175) berř. Sas parumen a geřa pař peskere phure dada, save mule. ⁹ Leskere čhave o Izak the o Izmael les parunde pařes pař o Mamre andre jaskiņa Machpela pre le Efronoskeri mařa. O Efron sas o čhavo le Chetitoskero le Cochariskero. ¹⁰ Odi mařa cinda o Abraham le Chetitanendar a ode sas parumen o Abraham pař peskeri romři Sara. ¹¹ Pal o meriben le Abrahamskero, o Del pořehņinda leskere čhas le Izak. O Izak beřelas pař e čaņig Beer-Lachaj-Roi.

Le Izmaeloskere čhave

¹² Kada hin o rodokmeņos le Izmaeloskero le Abrahamskero čhaskero:

O Izmael sas čhavo le Abrahamskero la Hagaratar, savi sas la Sarakeri sluřka andral o Egipt.

¹³ Kala hine o nava le Izmaeloskere čhavengere pal o nava the kmeři: Le Izmaeloskero eřebno (perřo) čhavo sas o Nebajot, palis o Kedar, o Adbeel, o Mibsam ¹⁴ o Miřmas, o Dumah, o Massas ¹⁵ o Chadad, o Temas, o Jetur, o Nafiř the o Kedemah. ¹⁶ Kala hine le Izmaeloskere čhave. On sas upral o deřuduj (12) kmeři a pal lende dine o nava le gavage the thanenge, kaj beřenas. ¹⁷ Le Izmaeloske sas řel the tranda the eřta (137) berř, sar muřa a geřa pař peskere phure dada, save mule. ¹⁸ Leskere čhavengere čhave beřenas la Chavilatar dži ko řur, pařes pař o Egipt, sar pes džal ke Asirija. Beřenas avri savore peskere phralendar pro vi-chodos.

O Ezav the o Jakob

¹⁹ Kada hin o rodokmeņos le Abrahamskero čhaskero le Izakoskero:

Le Abrahamske uliřa o Izak. ²⁰ Sar sas le Izakoske saranda (40) berř, iřa peske la Rebeka romņake. E Rebeka sas e čhaj le Aramejoskeri le Betueliskeri andral e phuv Paddan-Aram a sas pheņ le Aramejoskeri le Labanoskeri.

²¹ O Izak mangelas le RAJES vař peskeri romři, bo nařti la sas čhave. Avke o RAJ les řunda avri a leskeri romři e Rebeka ačhiřa khabři. ²² Sar o čhave andro per jekh avres ispidenas, phenda: "Oda, so hin kada?" Vařoda pes geřa te phučel le RAJESTAR.

²³ O RAJ lake phenda: "Andre tute hin duj narodi, ale kala duj narodi pes rozđzana. Jekh lendar ela zoraleder sar oda dujto

a o terneder ela upral o phureder."

²⁴ Sar avla pre late o časos, ulile lake duj čhave. ²⁵ O ešebno, savo ulila, sas lole balengero a calo zabarardo sar kožuchos, avke dine leske nav Ezav. ²⁶ Palis, sar ulila leskero phral, chudelas le Ezavoskeri peta, vašoda leske dine nav Jakob. Le Izakoske sas šovardeš (60) berš, sar ulile.

O Ezav bikenel peskero pravos

²⁷ O muršora barile avri a o Ezav sas baro lovcos, savo rado džalas avri pre maľa, ale o Jakob sas cicho murš, savo radeder ačhelas khere. ²⁸ O Izak kamelas radeder le Ezav, bo anelas leske te chal la džvirinatar, sava murdarelas, ale e Rebeka kamelas buter le Jakob.

²⁹ Jekh džives, sar o Jakob tavelas chaben, o Ezav avla ke leste bokhalo pal e maľa ³⁰ a phendā le Jakoboske: "Som bokhalo dži pro meriben! De man ole lole chabenestar!" Kavke chudla o Ezav aver nav: Edom †.

³¹ O Jakob phendā: "Ale ešeb mange biken peskero pravos, so tut hin sar ešebne čhas!"

³² "Mištes!" odphendā o Ezav. "Se the avke maj mera-va! Pre soste mange hin kada pravos?"

³³ O Jakob leske phendā: "Le akana angle ma vera." Avke o Ezav ila pre peste vera a bikendā peskero pravos, so les sas sar ešebne čhas.

³⁴ O Jakob palis diňa le Ezav maro the tadi šošovica. Ov chaľa a piľa. Palis uštila a geľa het. Kavke o Ezav na likerelas vaš nisoske peskero pravos, so les sas sar ešebne čhas.

O Izak the o Abimelech

26 Andre odi phuv avla bokh, ale na ajsi, savi sas andro časos le Abrahamoskero. O Izak geľa te bešel andre phuv Gerar ko Filištíniko kralis Abimelech. ² O RAJ pes leske sikađa a phendā: "Ma dža andro Egipt. Ačh andre odi phuv, pal savi tuke phenava. ³ Beš ode sar cudzincos a me avava tuha a požehņinava tut. Tuke the tire čhavengere čhavage dava savore kala phuva. Kavke dolikerava e vera, saveha man phandlom tire dadeha le Abrahamoha: ⁴ 'Kerava tire potomken ajci but sar ņeboskere čercheňa a dava lenge savore kala phuva. Prekal tire čhave ena savore narodi pre phuv požehņimen.' ⁵ Bo o Abraham man šunelas a dolikerelas savore mire prikazaňja a zakoni, so leske phendom a diňom avri." ⁶ Avke o Izak ačila te dživel andro foros Gerar.

⁷ Sar o murša odarik phučenat pal leskeri romņi, phendā: "Oj hiňi miri pheň." Ov daralas te phenel, hoj leske hiňi romņi, bo andre peste gondolinelas: "Kala murša adarik man šaj murdaren, bo e Rebeka hiňi igen šukar."

⁸ Sar imar ode dživelas buter časos, jekhvar o Filištíniko kralis o Abimelech dikhla avri prekal e oblaka, sar pes chudenas o Izak la Rebekaha. ⁹ Avke o Abimelech vičinda peske le Izak a phendā leske: "Oj mušinel

† Oda hin Lolo.

te el tiri romņi! Soske mange phendā, hoj hiňi tiri pheň?"

O Izak odphendā: "Phendom oda vašoda, hoj te na avav murdardo vaš late."

¹⁰ "So tu amenge kerđal?" phendā o Abimelech. "Imar ča sikra chibalinelas a varesavo murš pašlilahas tira romňaha. Kaleha amen andalas andro baro binos!"

¹¹ Avke o Abimelech phendā savore manušenge: "Te kerela vareko vareso kale muršeske the leskera romňake, oda čačes mušinela te merel!"

O vesekeđišagi vaš o chaňiga

¹² O Izak chudla andre odi phuv te sadzinel a andre oda berš o ulipen sas šelvar buter sar oda, so sadzinda, bo o RAJ les požehņinda. ¹³ Leskero barvalipen mek buter barolas a ačila lestar igen barvalo murš.

¹⁴ Sas les but stadi bakre the gurunňa, the igen but sluhi. Vašoda les o Filištinci našti avri ačhenas. ¹⁵ Avke o Filištinci začhide la pošaha savore chaňiga, so kopalinde avri o sluhi, sar mek dživelas le Izakoskero dad o Abraham.

¹⁶ Akor o Abimelech phendā le Izakoske: "Dža het amendar, bo sal zoraleder sar amen!"

¹⁷ Avke o Izak odarik geľa het andre Gerariko dolina, kaj pes palis rozthođa a ačila ode te bešel. ¹⁸ O Izak pale kopalinda avri o chaňiga peskere dadeskere, so o Filištinci začhide pal o meriben le Abrahamoskero, a diňa lenge ola nava, so lenge diňa leskero dad.

¹⁹ Sar le Izakoskere sluhi kopalinenas andre Gerariko phuv, arakhle chaňig lačhe paňeha. ²⁰ Ale o Gerariko pastjera pes vesekeđinenas le Izakoskere pastjerenca a vakerenas: "Oda hin amaro paňi!" Vašoda pes odi chaňig vičinel Esek, so hin Vesekeđišagos, bo pes lenca vesekeđinenas. ²¹ Avke kopalinde avri dujto chaňig, ale the vaš odi pes vesekeđinenas, vašoda dine lake nav Sitna ††. ²² Sar o Izak odarik odgeľa, kopalinda aver chaňig, vaš savi pes imar na vesekeđinenas, a diňa lake nav Rechobot ‡. Phendā: "Akana amen o RAJ diňa than, kaj amendar šaj el buter."

²³ Odarik o Izak geľa te bešel andre Beer-Šeba. ²⁴ Ode o RAJ pes leske sikađa rači a phendā: "Me som Del tire dadeskero le Abrahamoskero. Ma dara tut, bo me som tuha! Prekal miro služobņikos Abraham tut požehņinava a tire potomki ena furt buter." ²⁵ O Izak ode ačhađa o oltaris a lašarelas le RAJES. Palis peske rozthođa o stanos a leskere sluhi ode kopalinde avri aver chaňig.

E zmluva maškar o Izak the Abimelech

²⁶ O Abimelech avla andral o Gerar peskere gođaver muršeha le Achuzzatoha the le Picholoha, savo sas o veliteľis le slugađenge, hoj te dikhen le Izak. ²⁷ Akor lenge o Izak phendā: "Soske avlan ke ma, te man našti avri ačhenas a tradňan man het pestar?"

²⁸ Odphende leske: "Amen dikhas, hoj čačes tuha hin o RAJ, a vašoda peske phendā, hoj majindamas peha te phandel bari vera, amen tuha a tu amenca, ²⁹ hoj

†† Oda hin: Te džal jekh pre aver. ‡ Oda hin: Bareder Than

amenge na kereha nič nalačo, avke sar aňi amen tuke na kerđam nič nalačo. Se presikavahas tuke ča o lačo a muklam tut te džal andro smirom. Akana pre tu dičhol, hoj sal le RAJESTAR požehňimen."

³⁰ Palis o Izak lenge kerđa hoscina a on chale a pile.

³¹ Tosara uštile a phandle peha vera. Avke len o Izak mukla, hoj te džan andro smirom.

³² Mek oda džives avle le Izakoskere sluhi a phende leske pal e chaňig, so kopalinde avri: "Arakhlam paňi!"

³³ O Izak diňa ole paňeske nav Šibe, so hin "e Vera".

Vašoda pes dži akana vičinel oda foros Beer-Šeba.

O romňa le Ezavoskere

³⁴ Sar sas le Ezavoske saranda (40) berš, iľa peske romňa la Judita, la čha le Chetitoskere le Beerihoskera, the la Basemat, la čha le Chetitoskere Elonoskera.

³⁵ On kerenas ča pharipen le Izakoske the la Rebekake.

O Jakob čorel le Ezavoske o požehnaňje

27 Sar o Izak sphurila a pro jakha na birinelas te dikhel, vičinda ke peste peskere phuredere čhas le Ezav a phenda: "Čhavo miro!" Ov leske odphenda: "Kade som." ² Prevakerđa ke leste: "Dikh, som imar phuro a na džanav, kana šaj merav." ³ Le tire veci pro lovos, o tulcos † le lukoha. Dža pre maľa a chude mange vareso. ⁴ Olestar mange ker chaben. Se džanes, so rado chav. An mange oda, hoj te chav, a požehňinava tut sigeder, sar merava."

⁵ Sar o Izak vakerelas le Ezavoha, e Rebeka oda sa šunđa. Soča o Ezav odgeľa pre maľa, hoj vareso te murdarel a te anel, ⁶ e Rebeka phenda le Jakoboske: "Šunđom sar tiro dad phenda tire phraleske le Ezavoske: ⁷ An mange olestar, so chudľal, a ker mange oda chaben, so me rado chav. Sar dochava, požehňinava tut anglo RAJ mek sigeder, sar merava." ⁸ Vašoda čhavo miro, šun man andre savoreste, so tuke phenava! ⁹ Dža ko stados a an mange odarik duje šukare kozicen. Tire dadeske kerava lendar lačo chaben, so rado chal. ¹⁰ Palis oda lidžaha le dadeske, hoj te chal a te požehňinel tut sigeder, sar merela." ¹¹ Ale o Jakob phenda peskera dake la Rebekake: "Miro phral o Ezav hino zabarardo, ale me na som. ¹² So te o dad pes mandar kamela te chudel? Palis gondolnela peske pal ma, hoj leha kamav avri te thovel. Kaleha anava pre ma o prekošiben a na o požehnaňje." ¹³ Ale e daj leske odphenda: "Čhavo miro, oda prekošiben mi perel pre ma! Ča šun man, dža a an mange len."

¹⁴ Avke ov geľa, andä len peskera dake a oj kerđa o lačo chaben, so rado chalas leskero dad. ¹⁵ Palis e Rebeka iľa o gada le phuredere čhastar le Ezavostar, ola nekfeder, so sas ke late, a urđa len le ternedere čhaske le Jakoboske. ¹⁶ Le cipenca pal o kozici leske učharda o vasta the e meň. ¹⁷ Oda chaben, so rado chalas, the o maro, so pekľa, thođa peskere čhaske le Jakoboske andro vast. ¹⁸ Sar geľa ko dad, phenda: "Dado miro!" Ov odphenda: "Kade som. Ko sal tu, čhavo miro?" ¹⁹ O

† Oda hin o gonoro le šipenca.

Jakob phenda peskere dadeske: "Me som o Ezav, tiro ešebno (peršo). Kerđom avke, sar mange phendal. Mangav tut, hazde tut. Beš a cha olestar, so me chudľom. Avke šaj man požehňines." ²⁰ Ale o Izak le čhaske phenda: "Sar šaj avke sig vareso arakhlal, čhavo miro?" Ov odphenda: "O RAJ, tiro Del, mange diňa, hoj te arakhav." ²¹ O Izak phenda le Jakoboske: "Av pašes, čhavo miro. Mi chudav man tutar. Sal tu čačes miro čhavo, o Ezav, abo na?" ²² O Jakob geľa paš peskero dad ko Izak, savo pes lestar chudľa a phenda: "O hangos hin le Jakoboskero, ale o vasta hine le Ezavoskere." ²³ Na sprindžarda les, bo leskere vasta sas zabararde sar o vasta leskere phraleskere le Ezavoskere. O Izak les požehňinda ²⁴ a phučľa lestar: "Tu sal čačes miro čhavo o Ezav?" Ov odphenda: "Som." ²⁵ Avke leske o Izak phenda: "Pode mange olestar, so chudľal, hoj te chav, čhavo miro, hoj tut te požehňinav." Diňa leske o chaben a chalas. Andä leske the mol a piľa. ²⁶ O dad leske palis phenda: "Av ke ma, čhavo miro, čumide man!" ²⁷ Ov geľa a čumidľa les. Sar zašunđa e saga leskere gadendar, požehňinda les a phenda:

"Dikh, e saga mire čhaskeri hiňi sar e saga la maľakeri, so požehňinda o RAJ.

²⁸ Mi del tut o Del la ňeboskera rosatar a le phuvakere barvalipnastar, the pherdo zrnos the mol!

²⁹ Mi služinen tuke o narodi a mi bandon anglal tu o kmeňi!

Av raj upral peskere phrala a mi bandon anglal tu o čhave tira dakere!

Mi el prekošlo oda, ko tut prekošela, a mi el požehňimen oda, ko tut žehňinela!"

³⁰ Soča o Izak požehňinda le Jakob a ov odgeľa peskere dadestar, avelas pal o lovos leskero phral o Ezav. ³¹ Ov tiš tađa chaben, so rado chalas leskero dad, andä leske a phenda: "Dado miro, ušti a cha olestar, so tuke kerđom, avke man šaj požehňines." ³² Leskero dad o Izak lestar phučľa: "Ko sal?" Ov odphenda: "Me som tiro ešebno čhavo, o Ezav." ³³ O Izak igen predarandila a phučľa: "Akor ko sas oda, ko murdarda la džvirina a andä mange la? Chalom la imar sigeder, sar tu avľal. Požehňindom les a ela požehňimen profurt." ³⁴ Sar šunđa kada o Ezav, zoraless vriskinda a rovimnaha les igen mangelas: "Dado miro, de the man tiro požehnaňje!" ³⁵ O Izak phenda: "Tiro phral manca thođa avri a čorda tuke o požehnaňje." ³⁶ O Ezav odphenda: "Se na chudľa ča avke kada nav Jakob. Imar dujtovar manca thođa avri. Angloda mange iľa o pravos sar ešebne čhas a akana mange čorda the o požehnaňje." A mek phučľa: "Prekal ma tut nane imar ňisavo požehnaňje?" ³⁷ O Izak leske phenda: "Dikh, čhavo miro, me lestar imar kerđom rajes upral tu a savore leskere phralen leske diňom vaš o sluhi. Diňom les zrnos the mol. Prekal tu imar našti nič kerav, čhavo miro!" ³⁸ O Ezav phenda le dadeske: "Dado, hin tut ča jekh požehnaňje? Joj, dado, mangav tut, požehňin the

man!" a zorales zarunda. ³⁹ Leskero dad o Izak leske odphenda: "Dživeha dur le phuvakere barvalipnastar the le űeboskere brišindestar, so perel pre phuv. ⁴⁰ Dživeha olestar, so murdareha la šablaha, a aveha sluhas tire phraleske. Ča te pes leske ačhaveha andre, aveha premuklo."

O Jakob denašel andre aver phuv

⁴¹ Akor o Ezav našti avri ačhelas le Jakob vaš o požehnaűje, so les diűa o dad. O Ezav peske phenda: "Sar merela miro dad, akor murdarava mire phrales le Jakob."

⁴² Sar pes e Rebeka došunda, so phenda o Ezav, diűa peske te vičinel le čhas le Jakob a phenda leske: "Tiro phral tut kamel te murdarel. ⁴³ Akana, čhavo miro, šun man! Denaš ke miro phral ko Laban andro Charan.

⁴⁴ Ačh ke leste, medik na preačhela e choűi tire phraleskeri. ⁴⁵ Sar e choűi tire phraleskeri preačhela a bisterela pre oda, so leske kerđal, bičhavava vaš tu, hoj tut te len odarik. Soske tumen te našavel sodujen andre jekh džives?"

⁴⁶ E Rebeka palis phenda le Izakoske: "Džungliűa pes mange o dživipen maškar o Chetitanki. Te peske the o Jakob lela roműa le Chetitanendar andral kadi phuv, ela mange feder te merel!"

O roműa prekal o Izakoskere čhave

28 O Izak peske vičinda le Jakob a požehűinda les. Phenda leske: "Ma le tuke roműa andral o Kanaan. ² Dža andre phuv Paddan-Aram, andro kher le Betueliskero, ko dad tira dakero. Ode tuke le avri roműa le Labanoskere čhajendar, la dakere phralestar. ³ O Nekzoraleder Del tut mi požehűinel. Mi del tut but čhaven a tire čhavendar mi en but narodi. ⁴ Mi del le Abrahamoskero požehnaűje tuke the tire čhavengere čhavage, hoj e phuv, kaj sal cudzincos a so diűa o Del le Abrahamoske, te el tiri." ⁵ Palis o Izak bičhada le Jakob, hoj te džal andre phuv Paddan-Aram. Avke džalas ko Laban, savo sas o čhavo le Aramejoskero le Betueliskero a o phral la Rebekakero, savi sas e daj le Jakoboskeri the le Ezavoskeri.

⁶ O Ezav dikhűa, sar o Izak le Jakob požehűinda a bičhada andro Paddan-Aram, hoj odarik peske te lel roműa. Ov šunda, hoj leske phenda, sar les požehűinda: "Ma le tuke roműa andral o Kanaan," ⁷ a dikhűa, hoj o Jakob šunda le dades the la da a geűa andro Paddan-Aram. ⁸ Sar o Ezav avűa pre oda, hoj leskere dadeske le Izakoske nane pre dzeka o Kanaančanki, ⁹ geűa ko Izmael a iűa peske mek avra roműa la Machalata. Oj sas e čhaj le Abrahamoskere čhaske le Izmaeloske a e pheű le Nebajotoske.

Le Jakoboskero suno

¹⁰ O Jakob odgeűa andral e Beer-Šeba a geűa andro Charan. ¹¹ Sar dogeűa pro sentno than, ode presuča, bo imar o kham zageűa. Iűa jekh le barendar, pašliűa peske a thođa les tel o šero. ¹² Andro suno dikhűa garadiči

(ganki), so dochudenas la phuvatar dži ko űebos, a le Devleskere aűjela pal lende phirenas upre the tele. ¹³ Upral leste o RAJ ačhelas a phenda: "Me som o RAJ, o Del tire dadeskero le Abrahamoskero the o Del le Izakoskero. E phuv, pre savi pašlos, dava tuke the tire čhavengere čhavage. ¹⁴ Tire potomki ena ajci sar o prachos pre phuv a lena furt buter phuva pro zapados, pro vichodos, pro severos the pro juhos. Andre tute the prekal tire čhavengere čhave ena požehűimen savore narodi pre phuv. ¹⁵ Me som tuha a všadzik, kaj ča džaha, na domukava, hoj pes tuke vareso te ačhel, a anava tut pale andre kadi phuv. Na omukava tut, medik na kerava pal o lav, so tut diűom."

¹⁶ Sar pes o Jakob prekerđa andral o soviben, phenda: "O RAJ čačes hin pre kada than, ale me olestar na džanas!" ¹⁷ Daralas pes a phenda: "Savi bari dar avel kale thanestar! Nane oda űič aver sar o kher le Devleskero. Mušinel oda te el e űeboskeri brana."

¹⁸ O Jakob sig tosara uštiűa, iűa o bar, so leske sas tel o šero. Ačhada les sar sentno slupos a upral pro bar čhorelas avri o olejos. ¹⁹ Ole thaneske diűa nav Betel. Angloda pes oda than vičinelas Luz.

²⁰ Akor o Jakob diűa vera le RAJES: "Te aveha manca, Devla, a te man chraűineha pro drom, pre savo man mukava, te man deha maro the gada, ²¹ a bachtales man visarava pale andro kher mire dadeskero, akor tu, RAJEJA, aveha čačes miro Del. ²² Pre kada than, kaj ačhadom kada bar, tut o manuša lašarena. Savorestar, so man deha, me dava tuke pale o dešto kotor."

O Jakob avel ko Laban

29 Palis o Jakob džalas dureder le dromeha a avűa andre phuv pro vichodos. ² Jekhvareste dikhűa pre maűa chaűig, paš savi pašlonas trin bakrengere stadi, bo latar denas te pijel le bakren. O bar pre chaűig sas igen baro. ³ Sar tradle ode savore stadi, ile tele o bar pal e chaűig a dine te pijel le bakren. Palis o bar thode pale pre chaűig.

⁴ O Jakob ke lende prevakerđa: "Khatar san phralale?" "Amen sam andral e phuv Charan," odphende.

⁵ "Prindžaren le Nachoriskere čhas le Laban?" phučűa lendar o Jakob.

"Prindžaras les," odphende leske.

⁶ Palis lendar phučűa: "Sar leske hin?"

Odphende: "Mištes leske. Dikh, leskeri čhaj e Rachel akana avel le bakrenca."

⁷ O Jakob phenda: "Hin dur ke rat a nane mek časos te tradel le staden pre jekh than. Den te pijel le bakren a džan len te pasinel."

⁸ "Našti," odphende leske, "medik na stradaha savore stadi pre jekh than. Palis laha tele o bar pal e chaűig a daha te pijel le bakren."

⁹ Androda, sar lenca vakerelas, avelas e Rachel le dadeskere bakrenca, bo oj pasinelas le bakren. ¹⁰ Sar o Jakob dikhűa la Rachel le Labanoskere bakrenca, geűa te odlel tele o bar pal e chaűig a diűa te pijel peskere bačiskere bakren. ¹¹ Palis o Jakob čumidűa la Rachel a zorales zarunda. ¹² O Jakob phenda la Rachelake: "Me

som tiri famelija. Miri daj e Rebeka hiñi pheñ tire dadeske." Oj denašel as oda te phenel peskere dadeske.

¹³ Sar o Laban šundā, hoj avlā o Jakob, o čhavo leskera pheñakero, denašel as anglal leste a obchudlā les. Čumidlā les a ligendā les andre peskero kher. Sar o Jakob leske rozvakerdā savoro, so pes ačhiľa, ¹⁴ o Laban leske phendā: "Tu sal čačes jekh rat amenca." Avke o Jakob ačhiľa ke leste calo čhon.

Le Jakobskere romñija

¹⁵ Palis o Laban phendā le Jakoboske: "So? Ča vaš oda, hoj sal mange famelija, kereha prekal ma ča avke buči? Phen mange, so majinel te el tiro počiñiben (odmena)?" ¹⁶ Le Laban sas duj čhaja. E phureder sas e Leja a e terneder e Rachel. ¹⁷ La Leja sas šukar † jakha, ale e Rachel sas latar šukareder.

¹⁸ Le Jakoboske sas e Rachel buter pre dzeka, vašoda phendā le Labanoske: "Vaš tiri terneder čhaj kerava prekal tu eľta berš buči."

¹⁹ "Mištes," odphendā o Laban, "ela feder, te la dava tuke sar avre muršeske; ačh kade!" ²⁰ Avke o Jakob kerelas buči vaš e Rachel eľta berš, ale leske oda dičholas sar ča vajkeci dživesa, bo igen la kamelas.

²¹ Palis o Jakob phendā le Labanoske: "De mange mira romña, imar avlā o časos, hoj te džav ke late."

²² Avke o Laban vičindā savore manušen odarik a kerđa hoscina. ²³ Ale rači iľa peskera avra čha la Leja, andā la ko Jakob a ov laha pašlilā. ²⁴ O Laban diña la Lejake la Zilpa, hoj te el lakeri služka.

²⁵ Sar tosara o Jakob dikhľa, hoj oda sas e Leja, phendā le Labanoske: "S'oda tu mange kerđal? Či na keravas prekal tu buči vaš e Rachel? Soske manca thodāl avri?"

²⁶ O Laban phendā: "Andre amari phuv nane avke, hoj e terneder sigeder džal romeste a palis e phureder. ²⁷ Užar, medik na predžala kada bijavutno kurko la Lejaha. Avke tuke šaj les the la Rachel, te vaš late kereha buči prekal ma mek aver eľta berš."

²⁸ O Jakob kerđa avke a užardā, medik na pregeľa o bijavutno kurko. Palis leske o Laban diña peskera čha la Rachel romñake. ²⁹ O Laban diña la Rachelake peskera služka la Bilha. ³⁰ Avke o Jakob pašlilā the la Rachelaha. Kamelas la buter sar la Leja a kerelas prekal o Laban mek aver eľta berš.

Le Jakobskere ešebne čhave

³¹ Sar o RAJ dikhľa, hoj o Jakob na kamelas la Leja, phundrađa andre late o dživipen, ale la Rachel naštī uľa čhave. ³² E Leja ačhiľa khabñi, ulilā lake čhavoro a diña leske nav Ruben ††, bo oj phendā: "O RAJ dikhľa pre miro pharipen. Akana man imar miro rom kamela."

³³ Pale ačhiľa khabñi, a sar lake ulilā čhavoro, phendā: "O RAJ šundā, hoj o rom man na kamel, vašo-

† Abo: slabe †† Ruben hin: "Dikhen, muršoro."

da mange diña the kale čhavores." A diña leske nav Šimeon ‡.

³⁴ Ačhiľa pale khabñi, ulilā lake aver čhavoro a phendā: "Akana imar miro rom pes likerela paš mande, bo diñom les trine čhaven." Vašoda leske diña nav Levi ††.

³⁵ Palis pale ačhiľa khabñi, ulilā lake čhavoro a phendā: "Akana imar lašarava le RAJES." A diña leske nav Juda ††. Palis la preačhiľa te el čhave.

E Rachel la Lejaha pre peste džan

30 Sar e Rachel sprindžardā, hoj la naštī en čhave, imar naštī avri ačhelas peskera pheña. Phendā le Jakoboske: "De man čhave! Te na, ta merava!"

² O Jakob sas pre Rachel choľamen a vriskindā: "So? Me som o Del, savo likerel tiro dživipen, hoj te na ačhes khabñi?"

³ Oj odphendā: "Kade hiñi miri služka e Bilha, dža ke late a mi uľol mange prekal late čhave. Avke the man ena čhave."

⁴ Avke diña leske peskera služka la Bilha vaš e romñi a o Jakob geľa ke late. ⁵ E Bilha ačhiľa khabñi a diña le Jakob čhavores. ⁶ Akor e Rachel phendā: "O Del diña mange o čačipen, šundā miro hangos a diña man čhas." Vašoda leske diña nav Dan †††.

⁷ La Rachelakeri služka e Bilha ačhiľa pale khabñi a le Jakob diña dujte čhavores. ⁸ Akor e Rachel phendā: "Maravas man zoraha mira pheňaha a ñerindom (zvitazindom) upral late." Vašoda leske diña nav Naftali †††.

⁹ Sar e Leja sprindžardā, hoj la imar naštī en čhave, diña le Jakoboske peskera služka la Zilpa vaš e romñi.

¹⁰ The e Zilpa diña le Jakob čhavores. ¹¹ Akor e Leja phendā: "Savi man hin bach!" Vašoda leske diña nav Gad §.

¹² Palis e Zilpa diña le Jakob dujte čhavores. ¹³ E Leja androda phendā: "Savi bachtali som! Akana man o džuvľa vičinen a bachtali!" Vašoda leske diña nav Ašer §†.

¹⁴ Jekhvar, sar pes skidelas upre e pšeňica, o Ruben džalas pre maľa. Arakhľa ode mandragoskere rastlini §†† a diña len peskera dake la Lejake. E Rachel phendā la Lejake: "De man ola mandragori, so tuke andā tiro čhavo."

¹⁵ Oj lake odphendā: "Nane tuke dos, hoj mange iľal mire romes? Kames te lel the o mandragori mire čhas-tar?"

E Rachel lake phendā: "Akor vaš o mandragori, so andā tiro čhavo, mi pašľol kadi rat o Jakob tuha."

¹⁶ Sar o Jakob pes ke račate visarelas khere pal e maľa, e Leja geľa angle leste a phendā: "Av ke mande, bo me vaš tu počindom kadi rat mire čhaskere mandragorenca." Avke pašľolas odi rat laha.

‡ Šimeon hin: "Ov šunel." †† Levi hin: "Te phandel jekhetane."

††† Juda hin: "Te lašarel." ††† Dan hin: "Ov rozsudzindā vaš ma."

††† Naftali hin: "Te pes mareľ." § Gad hin: "O bachtalipen."

§† Ašer hin: "O radišagos." §†† Pačanas, hoj o mandragori le džuvľenge pomožinen te ačhen khabne.

¹⁷ O Del šundā avri la Leja. Oj ačhiľa khabňi a diňa le Jakob pandžtone muršores. ¹⁸ Akor e Leja phendā: "O Del man požehňinda vaš oda, hoj diňom mire romeske peskera služka." Avke leske diňa nav Jissachar †.

¹⁹ E Leja pale ačhiľa khabňi a diňa le Jakob šovtone čhavores. ²⁰ Akor e Leja phendā: "O Del man diňa lačo daros. Akana imar miro rom ačhela paš ma. Diňom les šov muršora." Vašoda leske diňa nav Zebulun ††. ²¹ Palis lake uliľa čhajori a diňa lake nav Dina.

²² Akor peske o Del leperďa pre Rachel, šundā la avri a phundraďa andre late o dživipen. ²³ Ačhiľa khabňi a uliľa lake čhavoro. Palis phendā: "O Del mandar iľa e ladž." ²⁴ Diňa leske nav Jozef ‡ a phendā: "Te mange o RAJ pridňahas mek dujte čhavores!"

O Jakob the o Laban

²⁵ Sar la Rachelake uliľa o Jozef, phendā o Jakob le Labanoske: "Muk man, kamav man te visarel pale khere andre miri phuv. ²⁶ De mange mire romňijen the mire čhaven, vaš save tuke keravas buči, hoj imar te džav het. Se tu korkoro džanes, keci buči keravas prekal tu."

²⁷ Ale o Laban leske phendā: "Av ke ma lačhe-jileskero, mangav tut, ma dža mek ňikhaj! Mire devlora mange sikade, sar o RAJ man prekal tu požehňinel.

²⁸ Phen mange, savo počňiňiben (odmena) kames."

²⁹ O Jakob leske phendā: "Se tu džanes mištes, so keravas prekal tu a sar sas mištes tire stadenge, kanastar somas paš lende. ³⁰ Angloda, sar avľom, sas tut frima a akana tut hin igen but. Všadzik, kaj džavas, tut o RAJ požehňinelas. Me mušňinav imar te dikhel the pre miri famelija."

³¹ O Laban lestar phučľa: "Sar tuke majňnav te počinel?"

"Ňič man ma de," odphendā o Jakob. "Ča ker oda jekh, so tuke phenav, avke me dureder pasinava tire bakren. ³² Adadžives man predžava maškar savore tire stadi. Domuk mange, hoj te odlav lendar savoren, pre save hin fleki the bodki. Savore kale bakre the o kozi, pre save hin fleki the bodki, ena miro počňiňiben. ³³ Pal kada džaneha, či som čačipnaskero vaj na: Sar aveha te dikhel pre miro počňiňiben a dikheha, hoj maškar o stadi hine o kozi, pre save nane fleki abo bodki, abo bakrore, save nane kale, akor šaj phenes, hoj len čordom tutar."

³⁴ "Mištes," phendā o Laban. "Mi el avke, sar phenes."

³⁵ Oda džives o Laban odliľa le capen the le kozen, pre save sas fleki the bodki, the savoren, pre save sas vareso parno. Odliľa the savore kale bakren a diňa len peskere čhavage andro vasta, ³⁶ hoj te džan le Jakobstar het pre ajci drom, keci šaj te predžal tel o trin džives. O Jakob ode ačhiľa te merkinel pre leskere aver stadi.

³⁷ Avke peske o Jakob skidňa zelena konara le topolistar, la mandlatar the le plataňostar. Cirdňa e cipa pal lende tele, hoj te ačhel pre lende parne pasiki.

³⁸ A kala konara thoďa andro žľabi, hoj o stadi len te

dikhen, sar džana te pijel. Bo ode pes parinenas. ³⁹ A ačhelas pes oda, hoj sar pes o bakre the o kozi parinenas angle ola konara, ulonas lenge bakrore, pre save sas pasiki, fleki the bodki. ⁴⁰ O Jakob odliľa ole bakroren le Labanoskere stadostar. Sar o bakre pes parinenas, ačhaďa len avke, hoj te dikhen pro Labanoskere kale bakre the pre ola, pre save sas fleki, hoj lenge te ulon flekimen the bodkimen bakrore. Avke peske kerďa bareder stados a odliľa len le Labanoskere stadostar. ⁴¹ Sar pes o zoraleder bakre parinenas, o Jakob thovelas o konara andro žľabos, hoj pes anglal lende te parinen. ⁴² Ale sar sas o bakre slabe, na thovelas o konara anglal lende. Aleha o Laban chudľa o slabe bakre a o Jakob o zorale. ⁴³ Avke o Jakob ačhiľa igen barvalo. Sas les but bakre, kozi, služki the sluhi, ťavi the somara.

O Jakob denašel le Labanostar

31 O Jakob šundā, sar o čhave le Labanoskere peske vakerenas: "O Jakob iľa savoro, so sas amare dadeskero. Savoro peskero barvalipen dochudľa amare dadestar." ² A o Jakob dikhľa, hoj o Laban imar na sas ke leste ajso lačo, sar sas.

³ Akor o RAJ phendā le Jakoboske: "Dža pale ke tiri famelija andre phuv tire dadengeri. Me avava tuha."

⁴ Sar o Jakob pasinelas o stados pre maľa, diňa peske te vičinel la Rachel the la Leja ⁵ a phendā lenge: "Tumaro dad imar nane ke ma ajso lačo, sar sas, ale o Del mire dadeskero sas manca. ⁶ Se korkore džanen, sar caľa mira zoraha keravas buči prekal tumaro dad.

⁷ Ale ov thoďa manca avri! Dešvar mange čerindā o počňiňiben (odmena), ale o Del na domukľa, hoj vareso nalačo mange te kerel. ⁸ Sar tumaro dad phendā: 'O flekimen ena tiro počňiňiben,' avke savore bakrenges ulonas (narodzinenas pes) flekimen bakrore. A sar phendā: 'O pasikimen chudeha vaš o počňiňiben,' avke le bakrenges ulonas pasikimen bakrore. ⁹ Kavke o Del odliľa o stados tumare dadestar a diňa les mange.

¹⁰ Sar avľa o časos le stadoske, hoj pes te parinen, džalas mange suno a dikhľom, hoj o samci, save chučenas pro samici, sas flekimen, pasikimen the bodkimen. ¹¹ O aňjelos le Devleskero ke ma andro suno prevakerďa: 'Jakob!' Me leske odphendom: 'Kade som!' ¹² O aňjelos phendā: 'Dikh, hoj savore samci, save pes parinen le samicenca, hine pasikimen, flekimen the bodkimen. Ačhiľa pes oda, bo dikhľom savoro, so tuha kerďa o Laban. ¹³ Me som o Del, savo pes tuke sikaďa paš o Betel, kaj pomakhľal le olejoha o baruno slupos a phandľal manca e vera. Akana dža avri andral kadi phuv pale andre tiri phuv, kaj tu uliľal.' "

¹⁴ E Rachel the e Leja phende le Jakoboske: "Amen džanas, hoj imar nane ňič, so šaj chudas le dadeskere barvalipnastar. ¹⁵ Kerďa amenca avke, sar te aňi leskere na ulamas! Se amen bikendā a rozkerďa sa, so zarodňa! ¹⁶ Savoro barvalipen, so o Del odliľa amare dadestar, hin amaro the amare čhavergero. Vašoda ker sa avke, sar tuke phendā o Del!"

† Jissachar hin: "O počňiňiben." †† Zebulun hin: "O pačiv."

‡ Jozef hin: "Mi pridel."

¹⁷ Akor o Jakob uštíla, thođa te bešel pro távi peskere čhaven the le romňen ¹⁸ a íla peha savore peskere stadi the savoro barvalípen, so peske dochudla andro Paddan-Aram, hoj te džal ke peskero dad ko Izak andre phuv Kanaan.

¹⁹ Sar o Laban džalas te strihinel le bakren, e Rachel čordá peskere dadeske le kherutune devloren. ²⁰ O Jakob thođa avri le Aramejoha le Labanoha, bo leske aňi na phenda, hoj džal lestar het. ²¹ Avke o Jakob íla peha savoro, so sas leskero, a denašla het. Paloda, sar pregeľa o paňi Eufkrat, džalas ko brehi andro Gilead.

O Laban džal pal o Jakob

²² Pal o trin dživesa phende avri le Labanoske, hoj o Jakob denašla het. ²³ Avke íla peha peskere pašutnen a džalas pal leste efa džives, medik les na dochudla dži paš o brehi andro Gilead. ²⁴ Ale rači avla o Del andro suno ko Laban a phenda leske: "Rozgondolín tuke, sar vakereha le Jakoboha, hoj leha te na vakeres namištes!"

²⁵ O Laban dochudla le Jakob akor, sar rozthovelas o stanos. Avke the o Laban rozthođa o stani peskere pašutnenca pro brehi andro Gilead. ²⁶ O Laban phenda le Jakoboske: "So tu kerďal? Thoďal manca avri! Mire čhajen čordal sar varesave zaille manušen! ²⁷ Soske mandar počoral denašlal a thoďal manca avri? Šaj tut lígendom avri radišagoha the le gilavipnaha, le bubenca the citarenca. ²⁸ Na domuklal mange aňi, hoj te čumidav mire čhajen the lengere čhaven. Líkerďal tut sar nagodaver manuši! ²⁹ Hin man zor te kerel tumenge namištes, ale o Del tumare dadeskero mange idž phenda: 'Rozgondolín tuke, sar vakereha le Jakoboha, hoj leha te na vakeres namištes!' ³⁰ Te imar avke kamehas te džal pale ke tiro dad, soske mange čordal mire kherutune devloren?"

³¹ O Jakob le Labanoske odphenda: "Bo daravas man a gondolindom mange, hoj mandar leha zoraha peskere čhajen. ³² Ale ke kaste arakheha tire devloren, oda mi merel! Angle amare phrala predikh savoro, so man hin, a le tuke pale oda, so hin tiro." O Jakob na džanelas olestar, hoj len čordá e Rachel.

³³ O Laban geľa andro Jakoboskero stanos, palis andre Lejakero a the andro stanos le duje služkengero, ale nič na arakhla. Sar avla avri andral Lejakero stanos, geľa andre Rachelakero. ³⁴ Ale oj le kherutune devloren garuđa andre távakero sedlos a bešla pre oda. O Laban predikhla calo stanos, ale na arakhla nič.

³⁵ E Rachel phenda le dadeske: "Ma av cholamen pre ma, rajeja miro, ale našti anglal tu uščav, bo som andre ola dživesa, so aven pre dojekh džuvlí." O Laban rodelas, ale le devloren na arakhla.

³⁶ Akor o Jakob cholisalíla a phenda le Labanoske: "So tuke kerdom ajso nalačo? Soha tut dukhadom, hoj pre mande avke džas? ³⁷ Te chudlal imar te prerodel mire veci, arakhlal vareso, so hin tiro? Thov oda kade anglal mire the tire phrala a on mi phenen, kaskero hino o čačipen! ³⁸ Keravas prekal tu biš (20) berš buči. Šoha (ňikda) tire bakrendar the le kozendar na ulonas

mule. Me šoha na chavas tire bakrendar andral o stados, ³⁹ a sar len murdarelas o dzivo džviros, me korkoro oda lavas pre mande. Te merelas vareso rači abo dživese, furt oda mandar mangehas pale. ⁴⁰ O kham man labarelas prekal o džives a prekal e rat fadžinavas – na sas man aňi soviben. ⁴¹ Kavke keravas prekal tu biš (20) berš buči. Dešuštar (14) berš vaš soduj čhaja a šov berš vaš peskere stadi, ale dešvar mange čerinehas miro počniiben. ⁴² Te na ulahas manca o Del mire dadengero, o Del le Abrahamoskero, saves o Izak lašarelas, akor čačes tu man na diňalas nič. Ale o Del dikhla miro pharipen, sar phares keravas prekal tu buči, a vašoda tuke o Del rači phenda pre godi."

⁴³ O Laban leske odphenda: "Kala čhaja hine mire čhaja, kala čhave hine mire čhave a kada stados hino miro stados. Savoro, so ade dikhes, hin miro. Ale adadžives našti kerav nič, hoj te ačhen paš ma mire čhaja peskere čhavenca. ⁴⁴ Vašoda av, phandaha peha vera a mi el o Del maškar amende švedkos."

⁴⁵ Akor o Jakob íla o bar a ačhadá les sar slupos. ⁴⁶ Peskere phralenge phenda: "Anen o bara!" Skidle o bara a thode len pre kopa. Palis chanas paš e kopa. ⁴⁷ Avke o Laban ole thaneske diňa nav Jegar-Sahaduta a o Jakob les diňa nav Gal-Ed †.

⁴⁸ O Laban phenda le Jakoboske: "Kadi kopa bara ela adadžives sar švedkos maškar amende", vašoda pes vičinel Gal-Ed. ⁴⁹ Vičinel pes the Micpa ††, bo o Jakob phenda: "O RAJ mi merkinel pre ma the pre tu, sar avaha pestar dur a na avaha jekhetane." ⁵⁰ O Laban leske mek phenda: "Te tut namištes líkerďalas ke mire čhaja, abo tuke ílalas mek aver romňijen, choc na džanlomas pal oda, ma bister, o Del hino o švedkos maškar amende!"

⁵¹ O Laban leske mek phenda: "Dikh, kade hin e baruňi kopa a kade hin o baruno slupos, so ačhadom maškar amende. ⁵² Kadi kopa the kada slupos hine sar švedki. Me na predžava kadi baruňi kopa a tu našti predžaha kada slupos, hoj te džas pre peste nalače gondolišagoha. ⁵³ O Del le Abrahamoskero the o Del le Nachoriskero, o Del amare dadengere, mi el amaro sudcas!"

O Jakob avke diňa vera pro Del, saves o Izak lašarelas. ⁵⁴ Palis o Jakob anda e obeta pro verchos a vičinda peskere phralen, hoj te chal lenca. Chanas o chaben a ačhile ode te presovel.

O Jakob pes kamel te zdžal le Ezavoha

32 O Laban sig tosara uštíla, čumidla peskere čhajen the lengere čhaven, požehňinda len a visarda pes pale khere.

² Sar džalas o Jakob dureder peskere dromeja, pre savo pes mukla, arakhle pes leha le Devleskere aňjela. ³ Soča len dikhla, phenda: "Kada hin le Devleskero taboris." Ole thaneske diňa nav Machanajim ‡.

⁴ O Jakob bičhadá anglal peste peskere muršen ke peskero phral ko Ezav, andre Seiriko phuv Edom.

† The Jegar-Sahaduta the Gal-Ed hin: e kopa bara sar švedkos.
†† Oda hin: E veža, khatar pes stražinel. ‡ Oda hin: O duj tabora.

⁵ Phendā lenge: "Kavke phenena mire rajeske le Ezavoske: 'Kada tuke del te džanel tiro sluhas o Jakob: Dži akana bešavas le Labanoha. ⁶ Hin man mire gurumña, somara, bakrore, sluhi the služki. Bičhavav ke tu mire muršen, pačabnaha, hoj aveha ke ma jileskero.' "

⁷ Sar avenas pale o murša, save sas bičhade, phende le Jakoboske: "Dogelam ke tiro phral ko Ezav. Ov imar avel ke tu štar šel (400) muršenca." ⁸ Androda avla pro Jakob bari dar the pharipen a rozulađa peskere manušen, bakren, gurumñen the řaven pro duj tabora. ⁹ Phendā peske: "Sar avela o Ezav ke jekh taboris a domarela les, dujto taboris ačhela a šaj denašel het."

¹⁰ Palis o Jakob pes mangelas ko Del: "Devla mire phure dadeskero le Abrahamoskero a mire dadeskero le Izakoskero, šun man! Ó, RAJEJA, tu phendal mange, hoj te džav pale andre miri phuv the ke miri famelija, a diňal man lav, hoj deha man bach andre savoreste.

¹¹ Na som ajso lačo, hoj mange te presikaves o jileskeriben a te keres oda, so tutar mangav me, tiro služobňikos. Ča la pacaha ade pregelom prekal o Jordan a akana man hin duj tabora. ¹² Mangav tut, le man avri andral le Ezavoskere vasta, bo darav, hoj avela a murdarela man the le romňijen le čhavenca. ¹³ Bo tu man diňal lav, hoj man deha bach a but čhaven sar moroskeri poš, so pes na del te zgenel."

¹⁴ Odi rat o Jakob ode ačhiľa te sovel. Palis rozulađa le stadostar o dari prekal peskero phral Ezav: ¹⁵ Iľa duj šel (200) kozen, biš (20) capen, biš (20) baranen the duj šel (200) bakren, ¹⁶ tranda (30) řaven peskere terne řavenca, saranda (40) gurumñen, deš biken, biš (20) somaricen the deš somaren. ¹⁷ O stadi, so rozulađa, diňa peskere sluhenge a phendā: "Džan anglal a o stadi mi en jekh avrestar dureder."

¹⁸ Le ešebneske (le peršeske) phendā: "Te tut zdžaha mire phraleha le Ezavoha a phučela tutar: 'Kaskero sal a kaj džas a kaskero hin kada stados, so trades angle tu?' ¹⁹ Pheneha: 'Kada hin daros tire služobňikostar le Jakobostar, so bičhavel peskere rajeske le Ezavoske. The ov avel pal amende.' "

²⁰ Phendā the le dujtoneske, le tritoneske the savorenge, ko džanas pal o stadi, hoj te phenen kavke le Ezavoske, sar pes leha zdžana: ²¹ "The korkoro tiro služobňikos, o Jakob, avel pal amende." Bo o Jakob peske phendā: "Dava le Ezavoske daros, so bičhavav anglal ma, hoj te el manca andro smirom, a ča palis man leske sikavava. Šaj el, hoj man prilela kamibnaha." ²² O dari sas bičhade anglal leste, ale ov ačhiľa prekal e rat andro taboris.

O Jakob pes marel le Devleha

²³ O Jakob mek odi rat uštila, iľa peha peskere duje romňijen, soduje služken the peskere dešujekh (11) čhaven a pregeľa prekal o paňi Jabbok. ²⁴ Bičhada len ešeb prekal o paňi a palis savoro, so les sas. ²⁵ Sar ačhiľa korkoro, avla varesavo murš ke leste a marelas pes leha, medik na vidňisalolas. ²⁶ Sar dikhľa, hoj les na thovela tele, demađa les andro klubos a avke leske o

kokalos chučila avri. ²⁷ O murš phendā: "Muk man, bo imar avel avri o kham."

O Jakob phendā: "Na mukava tut, medik man na požehňineha."

²⁸ O murš phučľa: "Sar tut vičines?"

"Jakob," odphendā.

²⁹ "Imar tut na vičineha Jakob, ale Izrael," phendā o murš, "bo marehas tut le Devleha the le manušenca a řerindal (zvitazindal) upral lende."

³⁰ O Jakob lestar palis phučľa: "Akana, phen mange tiro nav."

Ale ov odphendā: "Soske kames te džanel miro nav?" A požehňinda le Jakob.

³¹ O Jakob phendā: "Dikhľom le Devles muj-mujeha a ačhiľom te dživel." Avke diňa ole thaneske nav Peniel †.

³² Sar o Jakob džalas pal oda than Penuel het, o kham imar avelas avri a ov phirelas banges, bo o klubos leske sas dukhado. ³³ Vašoda dži akana na chan o Izraeliti o šľachi pal o klubos, bo le Jakoboskeri šľacha pro klubos sas dukhadi.

33 Sar o Jakob dikhľa, hoj avel o Ezav le štar šel (400) muršenca, rozđelinda le čhaven maškar e Leja, Rachel the duj služki. ² Ešeb (peršo) ačhada le duje služken lengere čhavenca, pro dujto than la Leja lakere čhavenca a palis la Rachel le Jozefoha. ³ Avke o Jakob geľa anglal lende a eftavar bandolas dži ke phuv, medik pes na dochudľa ko phral. ⁴ Ale o Ezav denašľa takoj ko phral, obchudľa les a čumidľa. A sodujđžene chudle te rovel.

⁵ Sar pes o Ezav rozdikhľa, dikhľa romňijen le čhavenca a phendā: "Ko hine kala, save hine paš tu?"

O Jakob odphendā: "Oda hine mire čhave, savenca o Del požehňinda tire služobňikoske." ⁶ Avke avle o služki le čhavenca a bandile anglal leste. ⁷ Geľa ke leste e Leja le čhavenca a the on bandile anglal leste. Pal savorende geľa ke leste the e Rachel le čaha le Jozefoha a bandile anglal leste.

⁸ O Ezav phučľa: "So kames te sikavel mange kale savore stadenca, saven bičhadaľ?"

O Jakob odphendā: "Diňom tuke len sar daros, hoj prekal lende tuke te avav pre dzeka, rajeja miro."

⁹ Ale ov phendā: "Man hin but, phrala miro, ča muk tuke oda, so hin tiro."

¹⁰ "Na!" phendā o Jakob. "Te som tuke pre dzeka, le kada daros mandar. Priiľal man ajse bare lačhipnaha, hoj sar dikhav pre tiro muj, dičhol mange avri sar le Devleskero muj! ¹¹ Mangav tut, le mandar kada daros. Se o Del man andre savoreste požehňinda a hin man savorestar but." Sar o Jakob leske furt avke vakereľas, prevakerďa les a iľa lestar oda.

¹² O Ezav phendā: "Mukas pes le dromeha sodujđžene a džas jekhetane."

¹³ O Jakob odphendā: "Miro raj džanel, hoj man hin cikne čhave a mušnav man te starinel the pal o bakre the gurumña, so den te pijel peskere ciknen. Te pre lende siďarava ča jekh džives, merena mange savore stadi. ¹⁴ Mi džal miro raj angle peskero služobňikos. Me

† Oda hin: O muj le Devleskero.

džava polokes pal tute, ale avke sig, sar pes dela le stadenca the le čhavenca, medik na dodžava ke tu andro Seir, rajeja miro."

¹⁵ Palis o Ezav phenda: "Domuk mange, mi mukav tuke varesave mire manušendar, hoj te džan tuha."

"Na kempel," odphenda o Jakob. "Ča jekh kamav, hoj te avav tuke pre dzeka, rajeja miro."

¹⁶ Mek oda džives o Ezav odgeľa pale andro Seir.

¹⁷ Ale o Jakob džalal andro Sukkot, kaj peske ačhađa kher a prekal peskere stadi kerđa streškici (kolibi).

Vašoda pes oda foros vičinel Sukkot.

¹⁸ Sar avelas andral o Paddan-Aram, o Jakob dogeľa mištes andro foros Šichem andre phuv Kanaan a bešelas pašes paš o foros. ¹⁹ Le Chamoroskere čhavendar o Jakob cinda kotor maľa vaš o šel (100) rupune. (O Chamor sas dad le Šichemoske.) Ode o Jakob rozthoda peskere stani. ²⁰ Ačhađa ode oltaris a diňa leske nav El-Elohe Izrael †.

E Dina the o Šichem

34 Jekhvar e Dina, le Jakoboskeri čhaj, savi leske uliľa la Lejatar, džalal pes te sprindžarel le džuvlenca, save ode bešenas. ² Sar la dikhľa o Šichem, iľa la našilu, pašlila laha a iľa latar e pačiv. Leskero dad o Chamor sas Chivijcos a sas rašaj andre odi phuv. ³ Akor o Šichem pes igen zakamľa andre Jakoboskeri čhaj Dina a kamelas te dochudel lakero jilo. ⁴ O Šichem phenda peskere daďeske le Chamoroske: "Kamav, hoj te el kadi džuvli miri romňi!"

⁵ O Jakob pes došunďa, hoj iľa leskera čha la Dina a našilu pašlila laha. Ale na vakerelas pal oda, bo užarelas pal peskere čhave, medik na avle pal e maľa le stadostar. ⁶ No o Chamor, le Šichemoskero dad, geľa ko Jakob, hoj leha te vakerel. ⁷ Sar o čhave le Jakoboskere avenas pal e maľa a došunde pes, so pes ačhiľa, igen len ada zadukhandiľa a sas igen choľamen. Se o Šichem kerďa baro džungipen le Izraeloske, bo našilu pašlila lengera pheňaha. Kerďa oda, so na sas domuklo. ⁸ Ale o Chamor lenge phenda: "Miro čhavo o Šichem pes igen zakamľa andre tumari čhaj. Den leske la romňake. ⁹ Sthovas amare fameliji. Tumen amenge dena tumare čhajen a tumen lena peske amare čhajen. ¹⁰ Bešen amenca, bo e phuv ela prekal tumende phundradı. Ačhen ade, phiren kaj ča kamen, a bešen ade pur furt."

¹¹ Palis o Šichem phenda lakere daďeske the le phralenge: "Te kerena mange pre dzeka, dava tumen, so kamena. ¹² Phenen, save dari kamen vaš e čhaj a keci kempel te počinel. Dava tumen ajci, keci kamena. Ča den mange la romňake!"

¹³ Vašoda, hoj o Šichem lengera pheňaha la Dinaha našilu pašlila, kamle lenca le Jakoboskere čhave te thovel avri a odphende le Šichemoske the leskere daďeske le Chamoroske: ¹⁴ "Ada naštı keras, hoj peskera pheňa te das le muršeske, savo nane občhindo (obrezimen), bo ulahas oda prekal amende ladž. ¹⁵ Ale ča avke pes šaj dovakeras, te pes dojekh murš

tumendar dela te občhinel, avke sar sam amen občhinde. ¹⁶ Palis tumenge daha amare čhajen a amen peske laha tumare čhajen. Avke dživaha jekhetane sar jekh narodos, ¹⁷ ale te amen na šunena a na dena pes te občhinel, la čha peske laha a džaha het."

¹⁸ Lengero lav sas le Chamoroske the leskere čhaske le Šichemoske pre dzeka. ¹⁹ O terno, savo sas andro jakha peskere famelijake igen baro, na užarelas a sigo geľa ada te kerel, bo le Jakoboskera čha igen kamelas.

²⁰ Avke o Chamor the leskero čhavo gele ke brana peskere foroskeri a vakerenas ko murša, save ode bešenas: ²¹ "Kala murša kamen amenca te dživel čačes andro smirom. Mi ačhen akor te bešel andre kadi phuv a mi phiren, kaj ča kamen, bo o than hino dos baro the prekal lende. Amen peske laha lengere čhajen vaš o romňa a peskere čhajen daha lenge. ²² Ale kala murša ča akor ačhena amenca te dživel sar jekh narodos, te dojekh amaro murš pes dela te občhinel, avke sar hine on občhinde. ²³ A ke oda: Či na ena amare lengere stadi, barvalipen, the savore džvirini? No ča priačas lenge pre ada a bešena amenca!" ²⁴ Savore murša, save sas paš odi foroskeri brana, šunde le Chamor the leskere čhas le Šichem a dine pes te občhinel.

²⁵ Pal o trito džives, sar len sas o dukha, o Šimeon the o Levi, o duj čhave le Jakoboskere, la Dinakere phrala, ile o šabli, počoral gele andro foros a murdarde avri savore muršen. ²⁶ Le šablınca murdarde the le Chamor the leskere čhas le Šichem. Palis ile la Dina andral e Šichemoskoro kher a gele het. ²⁷ Le Jakoboskere čhave avle pale ke ola mule a vaš e ladž la pheňakeri skidle savoro andral o foros. ²⁸ Ile le bakren, le gurumnen, le somaren a savoro, so sas ode the pre maľa. ²⁹ Odligende savoro lengero barvalipen the le romňen le čhavenca a skidle savoro, so len sas andro khera.

³⁰ Avke o Jakob phenda le Šimeonoske the le Leviske: "Tumen man aleha andan andre bibach, bo akana o Kanaančana the o Perizeja andre kadi phuv man naštı avri ačhena. Hin man ča frima manuša. Te pes sthove-na jekhetane pre mande, ňerinena (zvitazinena) upral ma a zhičinenena man the olen, save hine manca."

³¹ Ale on odphende: "Či mušinda te kerel amara pheňaha avke sar varesava lubňaha?"

O Del požehñinel le Jakob andro Betel

35 O Del phenda le Jakoboske: "Visar tut pale andro Betel a ačh ode te bešel. Ačhav o oltaris le Devleske, savo pes tuke sikaďa, sar denašehas tire phralestar le Ezavostar."

² Akor o Jakob phenda leskera famelijake the savorengenge, save sas leha: "Čhiven het savore avre devlen, so hine tumende, žužaren tumen a preuren pes. ³ Aven, džas andro Betel. Ode ačhavava o oltaris le Devleske, savo man šunďa avri oda džives, sar somas andro pharipen, a lidžalal man pal o drom." ⁴ Avke leske dine savore cudze devlen, so lende sas, the o kružki, so lende sas figimen andro kana. O Jakob oda garuda andre phuv tel o dubos paš o foros Šichem.

† Oda hin: O El hin o Del le Izraeloskero.

⁵ Sar džanas avri andral oda foros, avľa pre ola manuša ole forendar ajsi bari dar, hoj na kerde nič le Jakoboskera famelijake. ⁶ O Jakob avľa savore peskere manušenca andro Luz, so adadžives hin o Betel andre phuv Kanaan. ⁷ Ode ačhađa oltaris a diňa ole thaneske nav El-Betel, bo ode pes leske o Del sikađa, sar denašelas peskere phralestar. ⁸ Andre oda časos muľa e Debora, la Rebekakeri služka, savi la bararelas avri. Parunde la tel o dubos teleder le Betelostar. Ole duboske diňa nav "o Rovibnaskero Dubos".

⁹ Kana o Jakob pes visarelas andral o Paddan-Aram, sikađa pes leske pale o Del a požehňinda les.

¹⁰ Phendã leske: "Tiro nav hin Jakob, ale akanastar tut vičineha Izrael." Avke leske o Del diňa nav Izrael.

¹¹ O Del leske mek phendã: "Me som o Del Nekzoraleder. Mi ufon tuke pherdo čhave! Tutar avena but narodi a aveha dad le kralenge. ¹² E phuv, so diňom le Abrahamoske the le Izakoske, dava the tuke a the tire čhavengere čhavage." ¹³ Avke lestar o Del palis odgeľa.

¹⁴ Ode, kaj o Del leha vakerelas, ačhađa o Jakob baruno slupos a čhordã pre leste avri e mol the o olejos, so leske andã sar obeta. ¹⁵ Diňa nav Betel † ole thaneske, kaj leha o Del vakerelas.

E Rachel merel, sar uľol o Benjamin

¹⁶ Palis džanas avri andral o Betel. Sar sas imar pašes andre phuv Efrata, chudelas la Rachelake te uľol o čhavoro. Džalas lake oda igen phares. ¹⁷ Androda e džuvľi, savi pomožinelas paš o ločhiben, lake phendã: "Ma dara tut Rachel, ela tut pale muršoro." ¹⁸ Ale sar oj merelas a sas imar pašes paš o meriben, diňa peskere čhaske nav Ben-Oni ††, ale o Jakob leske diňa nav Benjamin ‡.

¹⁹ Avke e Rachel muľa a parunde la po drom ke Efrata, so hin adadžives Betlehem. ²⁰ Upral lakero hrobos ačhađa o Jakob bar a dži adadžives ačhel kada bar sar o leperiben prekal e Rachel.

²¹ O Izrael palis odarik odgeľa a rozthođa o stanospal e veža Migdal-Eder ††. ²² Sar imar bešelas andre kadiphuv, o Ruben geľa te pašľol la Bilhaha, savi sas romňi-služka leskere dadeskeri, a o Izrael pes pal ada došunda.

Le Jakoboskere čhave

Le Jakob sas dešuduj (12) čhave. ²³ La Leja sas čhave o Ruben – ešebno (peršo) čhavo le Jakoboskero – o Šimeon, o Levi, o Juda, o Jissachar the o Zebulun. ²⁴ La Rachel sas čhave o Jozef the o Benjamin. ²⁵ La Rachelakera služka la Bilha sas čhave o Dan the o Naf-tali. ²⁶ La Lejakera služka la Zilpa sas čhave o Gad the o Ašer.

Kala sas o čhave le Jakoboskere, save leske uľile andro Paddan-Aram.

† Oda hin: O kher le Devleskero. †† Oda hin: O čhavo mire pharipnaske. ‡ Oda hin: O čhavo mire čače vastestar. †† Oda hin: E veža, kaj merkinenas pro stadi.

Le Izakoskero meriben

²⁷ Palis o Jakob avľa ke peskero dad Izak andro Mamre andro Kirjat-Arba, so hin adadžives Hebron, kaj bešenas o Abraham the o Izak. ²⁸ O Izak dživelas šel the ochtovardeš (180) berš. ²⁹ Muľa andre šukar lače phuripnaskere berša a geľa paš peskere phure dada, save mule. Leskere čhave o Ezav the o Jakob les parunde.

Le Ezavoskere čhave

36 Kala hine o čhave le Ezavoskere, saves sas the aver nav Edom.

² O Ezav peske iľa romňen, save sas Kanaančanki: la Ada, la čha le Elonoskera le Chetitoskera, the la Oholibama, la Anakera čha, savake sas papus o Chivijcos o Cibeon. ³ Iľa peske the le Izmaeloskera čha la Basemat, savi sas le Nebajotoske pheň.

⁴ La Adake uľila o Elifaz a la Basematake o Reuel. ⁵ La Oholibamake uľila o Jeuš, o Jalam the o Korach. Kala hine le Ezavoskere čhave, save leske uľile andre phuv Kanaan.

⁶ Palis iľa o Ezav peskere romňen the čhaven, savore manušen, save sas leskere, the savore stadi, mek aver dobitkos the savoro barvalipen, so les sas andre phuv Kanaan, a geľa het peskere phralestar le Jakobostar andre phuv Seir. ⁷ Odgeľa vašoda, bo ov the o Jakob sas igen barvale a našti imar bešenas jekhetane. Bo pre odi phuv, andre savi bešenas, sas imar frima chaben prekal lengere stadi. ⁸ O Ezav, savo pes vičinelas the Edom, ačhiľa te bešel pre brehengeri phuv Seir.

⁹ O Ezav sas papus le Edomčanenge pre Seiriko phuv a kala hine leskere čhave. ¹⁰ Lengere nava sas o Elifaz, o čhavo la Ezavoskera romňake la Adake, the o Reuel, o čhavo la Ezavoskera romňake la Basematake.

¹¹ Le Elifazoskere čhave sas o Teman, o Omar, o Cefo, o Gatam the o Kenaz. ¹² Le Elifaz sas the romňi-služka e Timna, savake uľila o Amalek. E Ada sas lenge baba.

¹³ Le Reueloskere čhave sas o Nachat, o Zerach, o Šammah the o Mizzah. E Basemat sas lenge baba.

¹⁴ O Jeuš, o Jalam the o Korach sas čhave la Oholibamakeri, e čhaj la Anakeri, savo sas o čhavo le Cibeonoske.

¹⁵ Kala kmeňi avle le Ezavostar the leskere ešebne (perše) čhastar le Elifazostar: o Teman, o Omar, o Cefo, o Kenaz, ¹⁶ o Korach, o Gatam the o Amalek. Kala savore hine la Adakere čhaskere čhave. ¹⁷ Kala kmeňi avle le Reuelostar, le Ezavoskere čhastar: o Nachat, o Zerach, o Šammah the o Mizzah. Kala savore hine la Basematakere potomki. ¹⁸ Kala Ezavoskere kmeňi avle la Oholibamatar, la Anakera čhatar: o Jeuš, o Jalam the o Korach. ¹⁹ Kala kmeňi avle le Ezavostar – le Edo-mostar.

²⁰ O Seir sas andral o Choričanengero kmeňos, so dživelas andre odi phuv mek sigeder, sar avľa o Ezav. Andral o Seir avle o kmeňi o Lotan, o Šobal, o Cibeon,

o Anah,²¹ o Dišon, o Ecer the o Dišan. Kala hine o Choričanengere kmeňi le Seirostar andral e phuv Edom.

²² Le Lotanoskere čhave sas o Chori the o Hemam a leskeri pheň sas e Timna.

²³ Le Šobaloskopere čhave sas o Alvan, o Manachat, o Ebal, o Šefo the o Onam.

²⁴ Le Cibeonoskere čhave sas o Ajah the o Anah. O Anah sas oda, savo arakhľa pre pušta o prameňa le tate paňeha, sar pasinelas le dadeskere somaren.

²⁵ Le Anoskopere čhave sas o Dišon the e Oholibama.

²⁶ Le Dišonoskere čhave sas o Chemdan, Ešban, o Jitrán the o Keran.

²⁷ Le Eceroskopere čhave sas o Bilhan, o Zaavan the o Jaakan.

²⁸ Le Dišanoskere čhave sas o Uc the o Aran.

²⁹⁻³⁰ Kala hine o Choričike kmeňi andral o Seir: o Lotan, o Šobal, o Cibeon, o Anah, o Dišon, o Ecer the o Dišan.

O kraľa andre phuv Edom

³¹ Kala hine o kraľa, save sas upral o Edom mek sigeder, sar sas le Izraeliten kralis: ³² Andro Edom kralinelas o Belas, savo sas o čhavo le Beoriskero. Leskero foros sas e Dinhaba.

³³ Sar muľa o Belas, kralinelas o Jobab, le Zerachoskero čhavo andral e Bocra.

³⁴ Sar muľa o Jobab, kralinelas o Chušam andral e phuv Teman.

³⁵ Sar muľa o Chušam, kralinelas le Bedadoskero čhavo o Hadad, savo ňerinda (zvitazinda) upral o Midijana pre Moabiko phuv. Leskero foros sas Avit.

³⁶ Sar muľa o Hadad, kralinelas o Samlah andral e Masreka.

³⁷ Sar muľa o Samlah, kralinelas o Šaul andral o Rechobot paš o Baro Paňi.

³⁸ Sar muľa o Šaul, kralinelas le Achboriskero čhavo o Baal-Chanan.

³⁹ Sar muľa o Baal-Chanan, kralinelas o Hadar. Leskero foros pes vičinelas Pau a leskeri romňi sas e Mehetabel, e čhaj la Matredakeri, e čhaj la Me-Zahabakeri.

⁴⁰ Kala kmeňi sas le Ezavostar: o Timnas, o Alvah, o Jetet,⁴¹ o Oholibamah, o Elah, o Pinon,⁴² o Kenaz, o Teman, o Mibcar,⁴³ o Magdiel the o Iram. Kala nava chudle pal peskere ešebne (perše) dada. Dojekh lendar bešelass pre aver than andre phuv Edom. Kala savore Edomčana sas le Ezavostar.

O Jozef the phrala

37 O Jakob geľa te dživel andro Kanaan, kaj dživelas leskero dad sar cudzincos.

² Kada hin pal e Jakoboskeri famelija.

Sar sas le Jozefoske dešuefta (17) berš, pasinelas le bakren peskere phralenca. Bešelass peskere dadeskere čhavenca, save sas la Bilhatar the la Zilpatar. O Jozef

anelas pal peskere phrala o nalačhe hiri peskere dadeske.

³ O Izrael kamelas buter le Jozef sar avre čhaven, bo uliľa (narodzinda pes) leske, sar sas imar phuro. O Jakob leske diňa te sivel igen šukar farebno plaštös.

⁴ Sar dikhle leskere phrala, hoj lengero dad les kamelas buter sar len, našti avri ačhenas le Jozef. Vašoda na kamenas leha šukares te vakerel.

⁵ Jekhvar džalass suno le Jozefoske. Sar phenda avri o suno peskere phralenge, sas mek buter choľamen pre leste, ⁶ bo kavke lenge phenda: "Šunen, phralale, pal soste mange džalass suno! ⁷ Samas pre maľa a phandahas o dživ andro snopi. Miro zaphandlo snopos pes hazdňa a ačhelas upre. Dojekh tumaro zaphandlo snopos ačhelas pašal miro snopos a bandonas anglal leste."

⁸ Pre kada leske o phrala phende: "So? Kames te el kralis the raj upral amende?" Vaš leskere sune the lava o phrala les goreder našti avri ačhenas.

⁹ Le Jozef sas the aver suno a rozvakerďa oda le phralenge: "Sas man mek aver suno! Bandolas angle ma o kham, o čhon the dešujekh (11) čercheňa."

¹⁰ Kada phenda le dadeske the le phralenge. Ale o dad leske phenda: "Savo suno tut sas? Pal soste oda hin? Či avava me, tiri daj the tire phrala a banduvaha angle tu dži pre phuv?" ¹¹ Vašoda leskere phrala pre leste mek buter džanas, ale o dad gondolinelas furt pal oda suno.

¹² Jekhvar, sar o phrala gele te pasinel le dadeskere bakren andro Šichem, ¹³ o Izrael phenda le Jozefoske: "Tire phrala pasinen paš o Šichem. Av, bičhavav tut pal lende."

Ov odphenda: "Kade som."

¹⁴ O Izrael leske phenda: "Dža, dikh, sar hin le phralenge the le stadenge. Palis av a phen mange oda." Palis les bičhaďa andral dolina paš o Hebron.

Avke o Jozef avľa andro Šichem, ¹⁵ kaj les arakhľa varesavo murš, sar phirelas upre tele pal e maľa, bo na džanelas, kaj te džal, a phučľa lestar: "So rodes?"

¹⁶ "Rodav mire phralen," odphenda o Jozef. "Phen mange, kaj pasinen?"

¹⁷ O murš leske phenda: "Gele adarik het. Me len šundom, sar vakerenas, hoj džana andro Dotan."

O Jozef palis geľa pal peskere phrala a arakhľa len andro Dotan. ¹⁸ Sar les dikhle dural, mek sigeder, sar paš lende avľa, phende peske, hoj les murdarena.

¹⁹ Vakerenas maškar peste: "Dikhen, avel o raj upral o sune! ²⁰ Aven, džas! Murdaras les! Palis les čhivaha andre chaňig a phenaha, hoj les chaľa e dzivo džvirina.

Akor dikhaha, so ela leskere sunenca!"

²¹ Sar šundä kada o Ruben, kamelas les te cirdel avri andral lengere vasta, vašoda phenda: "Ma murdaras les! ²² Ma čhoren avri ňisavo rat! Čhiven les andre kadi chaňig, so hiňi pre pušta. Ma thoven pre leste o vasta!" Bo ov les kamľa te zachraňinel lendar a te anel les pale ko dad.

²³ Sar o Jozef avla ko phrala, čhide pal leste tele oda šukar farebno plaštós, so sas pre leste, ²⁴ a palís les čhide andre chañig. Andre chañig na sas pañi.

²⁵ Akor, sar bešenás paš o chaben, dikhle te avel le Izmaeliten le távenca andral o Gilead. O távi anenas pre peste e voňavo riciña, o balzamos the e mirra, so lidžanas andro Egipt.

²⁶ O Juda phendá peskere phralenge: "So amen ela olestar, te le phrales murdaraha a garuvaha oda, hoj les murdardám? ²⁷ Džás, bikenas les le Izmaelitenge, ale na thovas pre leste o vasta. Se hino amaro phral, amare ratestar." O phrala les šunde.

²⁸ Sar adarik predžanas o Midijañike kupci, o phrala ile avri le Jozef andral e chañig a bikende les vaš o biš (20) rupune le Izmaelitenge, save les ligende andro Egipt.

²⁹ Sar o Ruben avla pale paš e chañig a dikhla, hoj o Jozef ode nane, čhingerda pre peste o plaštós. ³⁰ Geľa pale ko phrala a phendá: "O muršoro ode nane! So kerava?"

³¹ Avke ile le Jozefoskere gada, murdarde le capos a močinde o gada andro rat. ³² Oda šukar plaštós ile, ligende le dadeske a phende: "Kada arakhlam. Dikh, či kada plaštós hin tire čhaskero, abo na."

³³ Sar o Jakob rozprindžarda oda plaštós, phendá: "Kada plaštós hino čačes mire čhaskero! Čaľa les varesavi dzivo džvirina! Le Jozef čačes rozčhingerda!"

³⁴ O Jakob čhingerda pre peste o plaštós, urda pre peste o gone a but dživesa sas andre žala pal o Jozef.

³⁵ Savore leskere čhave the čhaja avle les te podhazdel, ale ov oda na kamelas a phendá: "Andre žala pal miro čhavo džava tele andro than le mulengero."

³⁶ O Midijana bikende le Jozef andro Egipt le Putifariske, le Faraonoskere uradnikoske, savo sas o velitelis le stražnikenge.

O Juda the e Tamar

38 Andre oda časos o Juda geľa het peskere phralendar a ačhila ke jekh manuš, savo pes vičinelas Chirah a sas andral o foros Adullam. ² Sas ode jekh Kanaančanos o Šuas. Sar o Juda dikhla le Šuasoskera čha, ila peske la romňake a pašliľa laha. ³ Oj ačhila khabñi a uliľa lake čhavoro. O Juda leske diňa nav Er. ⁴ Pale ačhila khabñi a uliľa lake aver čhavoro. Diňa leske nav Onan. ⁵ Mek jekhvar lake uliľa (pes narodzindá) čhavoro a diňa leske nav Šelah. Sas oda andro Kezib, sar ov uliľa.

⁶ O Juda ila avri prekal peskero ešebno (peršo) čhavo romňa, savi pes vičinelas Tamar. ⁷ Ale le Judaskero ešebno čhavo o Er na sas le RAJESKE pre dzeka, avke leske o RAJ ila o dživipen.

⁸ Avke phendá o Juda le Onanoske: "Sar šogoris mušines peske te lel tira šogorkiňa romňake. Zdža tut laha a an prekal late le phraleske čhaven." ⁹ O Onan džanelas, hoj o čhave na ena leskere, vašoda, sar pes le phraleskera romňaha zdžalas, ov na dokerelas oda, hoj le phrales te el čhave. ¹⁰ Le RAJESKE ada na sas pre dzeka, avke the leske ila o dživipen.

¹¹ Avke phendá o Juda peskera borake la Tamarake: "Beš andro kher le dadeskero sar e bijeromeskeri, medik na dobarola avri miro čhavo o Šelah." Bo na kamla, hoj te merel avke sar leskere phrala. E Tamar avke geľa het a bešelas andro kher peskere dadeskero.

¹² Pal o buter časos muľa e romñi le Judaskeri, e čhaj le Šuasoskeri. Sar preačhila e žala le Judaske, geľa le prijatelíha le Chiroha andre Timna, kaj strihinenas leskere bakren.

¹³ Avke phende la Tamarake: "Tiro sastro džal akana andre Timna te strihinel peskere bakren." ¹⁴ E Tamar džanelas, hoj o nekterneder čhavo o Šelah imar baríla avri, ale o Juda les lake na diňa. Vašoda oj čhida tele pal peste o vdovike gada, ila peske o khosno, garuđa peskero muj a bešľa peske paš e brana andro foros Enajim. O Enajim sas pašes pro drom andre Timna.

¹⁵ Sar la o Juda dikhla, gondolinda peske, hoj hiñi lubñi, bo sas lake garudo o muj. ¹⁶ Geľa ke late pro drom a phendá: "Šun man, domuk mange, hoj te pašľuvav tuha." Ov na džanelas, hoj oda hiñi leskeri bori.

"So man deha vaš oda?" oj lestar phučla.

¹⁷ "Bičhavava tuke terňa kozica andral o stados," ov odphendá.

Avke oj leske phendá: "De man vareso aver vaš oda, medik la na bičhaveha."

¹⁸ "So tut šaj dav akana?" phučla latar o Juda.

"Tiri pečat' la špargaha the e paca, so hin tute andro vast," oj odphendá. Avke lake oda diňa, pašliľa laha a oj ačhila lestar khabñi. ¹⁹ Oj palís uštila a geľa het. Čhida tele o khosno a urda peske pale o vdovike gada.

²⁰ Palís o Juda bičhadá la terňa kozica peskere prijatelíha le Chiroha, hoj te lel latar pale oda, so lake diňa, ale na arakhla la. ²¹ Phučkerelas pes le manušen-dar, save bešenás ode: "Kaj hiñi odi lubñi, savi bešelas paš o drom paš o Enajim?"

"Ade na sas ñisavi lubñi," odphende leske.

²² Avke avla pale ko Juda a phendá leske: "Na arakhlom la. The o manuša andral oda foros vakere-nas, hoj ñisavi lubñi ode na sas."

²³ O Juda phendá: "Mi mukel peske oda, so la diňom. Ča te na avas pro asaben. Se me lake la kozica bičhadom tuha, ale tu la na arakhlal."

²⁴ Sar pregeľa trin čhon phende le Judaske: "Tiri bori e Tamar kerda lubipen a avke ačhila khabñi." O Juda phendá: "Ligenen la avri a labaren la!"

²⁵ Sar la anenas, diňa te phenel peskere sastreske: "Ačhilom khabñi le muršestar, saveskere hine kala veci. Dikh mištes, kaskeri hin kadi pečat' la špargaha the e paca." ²⁶ Sar o Juda oda dikhla, phendá: "Oj hiñi buter čačipnaskeri, sar som me, bo na diňom la mire čhaske le Šeloske." Paloda o Juda laha imar buter na pašľolas.

²⁷ Sar avla imar o časos lake te ločhol, sikada pes, hoj andre late hine duj čhave. ²⁸ Sar lake ulonas o čhave, jekh le čhavorendar diňa avri o vast. Odi romñi, savi lake pomožinelas, phandla ľoli šparga le čhavoreske pro vast a phendá: "Kada avla ešebno avri." ²⁹ Ale o

čhavoro cirdña andre pale o vast a leskero phral avľa ešebno avri. Oj phendã: "Sar tut ispidñal ešebno avri?" Vašoda leske diña nav Perc t. 30 Palis avľa the leskero phral avri, saveske sas e ľoli šparga pro vast. Leske dine nav Zerach ††.

O Jozef the le Putifariskeri romñi

39 Sar ligende le Jozef andro Egipt, o Egiptãnos o Putifar les cindã le Izmaelitendar. Ov sas uradñikos le Faraonoskero, o velitelis le palaciskere stražnikenge. ² Ale o RAJ sas le Jozefoha, avke les sas bach andre savoreste, so kerelas, a ačhifa andro kher leskere Egiptske rajeskero. ³ Leskero raj dikhľa, hoj o RAJ hino leha a hoj les delas bach andre dojekh buči. ⁴ O Jozef leske sas pre dzeka, avke o Putifar les ačhađa upral savorende andre peskero kher a diña leske andro vasta savoro, so sas leskero. ⁵ Akorestar, sar les o Egiptãnos ačhađa upral peskero kher, o RAJ požehñinelas leskero kher a savoro, so les sas. Le RAJESKERO požehñañje sas upral savoro, so les sas andro kher the pre maľa. ⁶ Avke savoro, so les sas, diña le Jozefoske andro vasta. O Putifar pes imar pal ñisoste na starinelas, ča pal o chaben, so chalas.

O Jozef mištes dičholas avri a sas igen šukar.

⁷ Pal varesavo časos peľa andro jakha le rajeskera romñake. Phendã leske: "Pašľuv peske paš mande!"

⁸ Ov ada na kamelas te kerel a le rajeskera romñake phendã: "Dikh, miro raj pes na mušinel te starinel pal ñisoste andro kher, bo me som ade a ačhađa man upral savoro, so hin leskero. ⁹ Andre kada kher nane ñiko bareder sar me. Nane ñič, so mange na diña andro vasta, ča tut na, bo sal leskero romñi. Sar šaj kerav ajsa baro džungipen, so hin binos anglo Del?" ¹⁰ Džives pre dživeseste le Jozef cirdelas pre oda, hoj laha te pašľol, ale ov la na šunđa.

¹¹ Sar andre jekh džives geľa te kerel peskeri buči andro kher, ñiko le služobñikendar na sas khere. ¹² E romñi le Putifariskeri les chudľa le plaštostar a phendã: "Av, pašľuv manca!" Ale ov denašľa avri a mukľa lake o plaštös andro vast. ¹³ Sar oj dikhľa, hoj lake mukľa o plaštös andro vast a denašľa avri, ¹⁴ vičindã peskere služobñiken a phendã lenge: "Dikhen, ande amenge kale Hebrejis, hoj amen the thovel andre ladž! Kamľa manca te pašľol, ale me chudľom te vriskinel!" ¹⁵ Sar šunđa, hoj vriskinav, mukľa paš ma peskero plaštös a denašľa avri."

¹⁶ Oj mukľa o plaštös paš peste, medik na avľa leskero raj khere. ¹⁷ Avke the leske oda phendã: "O Hebrejiko sluhã, saves andal ke amende, man kamľa te thovel andre ladž!" ¹⁸ Sar vriskinavas zorales, mukľa peskero plaštös paš ma a denašľa avri."

¹⁹ Sar o raj le Jozefoskero šunđa peskera romña, savi phendã: "Kada hin čačes oda, so kamľa tiro sluhã te kerel," igen pre leste cholisaliľa. ²⁰ Avke diña les te chudel a thođa les andre bertena maškar o kraliskere bertenoša. Ale sar sas o Jozef andre bertena, ²¹ o RAJ

† Oda hin: Te predemel avri. †† Oda hin: O Vidñišagos abo Lolo.

sas leha. Sas ke leste jileskero a diña, hoj te el le stražnikoske upral e bertena pre dzeka. ²² Avke o stražnikos ačhađa le Jozef upral savore bertenoša the upral savoro, so pes ode kerelas. ²³ Oda stražnikos na dodikhelas pre ñisoste, so leske diña te kerel, bo o RAJ sas le Jozefoha a delas les bach andre savoreste, so kerelas.

O Jozef prethovel o sune andre bertena

40 Pal varesavo časos o sluhã, savo čhivkerelas e mol le Faraonoske, the leskero ešebno (peršo) pekaris, choľarde varesoha peskere rajes, le Egiptske kralis. ² O Faraonos sas igen choľamen pre kala duj uradñika, pro sluhã the pro ešebno pekaris. ³ Diña len te phandel andro kher le veliteliskero le stražnikenge, andre bertena, kaj sas phandlo the o Jozef. ⁴ Ačhile andre bertena pro buter časos a o velitelis le stražnikengero diña le Jozefoske, hoj te kerel pašal lende.

⁵ Jekh rat džalas suno ole duje muršenge, le sluhãske, savo čhivkerelas e mol le Faraonoske, the le ešebne pekariske. Dojekh suno, so len sas, sikavelas vareso aver. ⁶ Sar ke lende tosara avľa o Jozef, dikhľa pre lende, hoj hin len varesavo pharipen. ⁷ Phučľa lendar: "Soske san andre ajsa pharipen?"

⁸ "Sas amen suno," odphende leske, "ale ñiko amenge na džanel te phenel, pal soste džal."

O Jozef lenge phendã: "Či na džanel o Del, pal soste hine o sune? Phenen mange len."

⁹ Avke o sluhã, savo čhivkerelas e mol, phendã avri le Jozefoske o suno: "Andro suno dikhľom anglal peste viñičis, ¹⁰ pre savo sas trin konarica. Sar avenas avri o prajti, takoj avenas avri the o kvitki a palis o hroznos dobariľa. ¹¹ Andro vast ľikeravas le Faraonoskeri kuči. O hroznos, so odčhindom, ispidavas (pučinavas) andre le Faraonoskeri kuči a podiňom leske e kuči andro vast."

¹² "Kada hin oda, so sikavel o suno," odphendã leske o Jozef. "Trin konarica hin trin dživesa. ¹³ Pal o trin dživesa o Faraonos tut pale hazdela upre a dela tuke pale tiro than. A pale podavkereha e kuči andro vast le Faraonoske, avke sar angloda leske čhivkerehas e mol. ¹⁴ Sar pes tuke kada ačhela, mangav tut, leper tuke pre ma a presikav mange o lačhipen: Privaker tut vaš ma ko Faraonos, hoj man te lel avri andral kadi bertena. ¹⁵ Se ile man andral e Hebrejiko phuv, ale aňi kade na kerďom ñič ajsa, vaš soste mušindomas te bešel andre bertena."

¹⁶ Sar dikhľa o ešebno pekaris, hoj o Jozef mištes prethovel o suno, phendã leske: "The man sas suno. Pro šero man sas trin košara mare. ¹⁷ Andro upruno košaris sas maro the bokela prekal o Faraonos a o čirikle chanas andral o košaris, so sas pre miro šero."

¹⁸ "Kada hin oda, so sikavel o suno," odphendã leske o Jozef. "Trin košara hin trin dživesa. ¹⁹ Pal o trin dživesa tuke dela o Faraonos te odčhinel o šero a figinela tut pro stromos a o čirikle chana tiro telos."

²⁰ Pal o trin dživesa o Faraonos kerďa pre peskere berša hoscina prekal savore peskere uradñika a diña

te anel anglal lende le sluhas, savo leske čhivkerelas e mol, the le ešebne pekaris. ²¹ Ole ešebne sluhaske diña pale leskero than, hoj te podavkerel leske e kuči andro vast, ²² ale le ešebne pekaris diña te umblavel (obešinel), avke sar lenge oda o Jozef phendā. ²³ Ale oda ešebno sluhas peske pro Jozef na leperdā. Bisterdā pre leste.

Le Faraonoskere sune

41 Pal o duj berš sas the le Faraonos suno: Ačhelas paš o pañi Nil. ² Dikhľa, sar jekhwareste andral o pañi avenas avri efta šukar the thule gurumña a chudle te chal e čar paš o pañi. ³ Pal lende avle efta aver džungale the šuke gurumña, so ačhenas paš ola ešebne (perše) gurumña pro brehos. ⁴ Palis ola džungale the šuke gurumña chale ole efta šukare the thule gurumñen. Androda pes o Faraonos prekerdā andral o soviben.

⁵ Palis geľa pale te sovel a sas les aver suno: Pre jekh stonka barile avri efta klasi, so sas šukar the pherde. ⁶ Palis barile aver efta klasi, ale kala sas avrišučarde the labarde la vichodoskera balvajatar. ⁷ Ola avrišučarde klasi chale upre ole efta pherde klasen. Akor pes o Faraonos prekerdā andral o soviben. Sas oda ča suno.

⁸ Tosara na sas le Faraonos smirom vaš o sune. Vašoda diña peske te vičinel savore Egiptske vrašcen the le godavere muršen a phendā lenge avri peskere sune. No na sas űiko, ko šaj phendahas leske, pal soste hine.

⁹ Palis o sluhas, savo čhivkerelas e mol, phendā le Faraonoske: "Adadžives avľa mange pre godi, hoj kerdom namištes. ¹⁰ Sar salas pre ma the pro glavno pekaris choľamen, diňal amen te phandel andre bertena, andro kher le veliteliskero, savo sas upral o stražňika. ¹¹ Soduždženenge džalas jekh rat suno a dojekh suno sikavelas aver. ¹² Sas amenca ode jekh terno Hebrejis, o sluhas ole veliteliskero. Phendā leske avri o sune a ov amenge phendā, so dojekh suno sikavel. ¹³ Avke sar amenge phendā, pes the ačhiľa. Me man dochudľom pale pre miro than, ale ole dujtones umblade (obešinde)."

¹⁴ Avke o Faraonos peske diña te vičinel le Jozef, saves takoj ile avri andral e bertena. O Jozef pes oholinda, urdā aver gada a avľa anglo Faraonos.

¹⁵ O Faraonos phendā le Jozefoske: "Džalas mange suno a űiko mange les na džanel te phenel, so sikavel. Šundom pal tu, hoj džanes te phenel, pal soste hine o sune."

¹⁶ "Na me," odphendā o Jozef le Faraonoske, "ale o Del tuke odphenela, hoj tuke te el mištes."

¹⁷ Avke o Faraonos phendā avri le Jozefoske o suno: "Džalas mange suno, hoj somas paš o pañi Nil.

¹⁸ Jekhwareste avle avri andral o pañi efta šukar the thule gurumña, so chudle te chal e čar paš o pañi.

¹⁹ Pal lende avle the aver efta džungale the šuke gurumña. Kajse džungale gurumña mek na dikhľom űikhaj andro Egipt. ²⁰ Ola džungale the šuke gurumña chale ole efta šukare the thule gurumñen. ²¹ Sar len

chale, na dičholas pre lende, hoj vareso chale, bo mek furt dičhonas avke džungales sar angloda. Akor man prekerdom andral o soviben. ²² Palis andro suno dikhľom, sar pre jekh stonka barile avri efta pherde the šukar klasi. ²³ Pal lende barile avri efta šuke the sane klasi, so sas labarde la vichodoskera balvajatar. ²⁴ Ola šuke klasi chale ole efta šukare klasen. Kada palis phendom mire vrašcenge, ale űiko mange na džanelas te phenel, pal soste džal."

²⁵ O Jozef phendā le Faraonoske: "Andre soduj sune sikavel oda jekh. Kaleha tuke o Del sikađa, so kamel te kerel. ²⁶ Efta šukar gurumña hin efta berš. Efta šukar klasi hin tiš efta berš. Oda hin jekh suno. ²⁷ Efta šuke the džungale gurumña, so palis avle avri, hine efta berš, avke sar the ola efta šuke klasi, so sas labarde la vichodoskera balvajatar. Oda ela efta berš bokh.

²⁸ Avke ela, sar oda phendom le Faraonoske. O Del sikađa, so kamel te kerel. ²⁹ Avela efta berš, so ela baro ulipen andre calo Egipt. ³⁰ Pal lende avela efta berš bokh a calo Egipt bisterela pre ola lače berša, sar len sas savorestar pherdo. E bokh zňičinela cali phuv. ³¹ Ela ajsi bari bokh, hoj bisterena pre oda but, so len sas angloda. ³² Le Faraonoske džalas oda suno dujtovar, bo o Del peske phendā, hoj oda džal imar sig te kerel.

³³ Akana, Faraonona, rode godavere muršes, savo džanela, so te kerel, a ačhav les upral cali phuv Egipt. ³⁴ Mi ačhavel o Faraonos upral kadi phuv uradňiken, save lena pandžto kotor savore ulipnastar prekal kala efta berša, sar ela but savorestar. ³⁵ Prekal kala lače berša, so avela, mi skiden savoro chaben a mi odthoven o zrnos andro fori le Faraonoskere a mi merkinen pre oda. ³⁶ Kala chabena ena odthode prekal kala efta berš, so majinel te avel e bokh pro Egipt, avke o manuša na merena bokhatar."

³⁷ Kada lav sas le Faraonoske the savore leskere služobňikenge pre dzeka. ³⁸ Akor o Faraonos phendā peskere služobňikenge: "Arakhela pes ajsi manuš, andre savo hin o duchos le Devleskero?"

³⁹ Palis o Faraonos phendā le Jozefoske: "Te tuke diña o Del kada savoro te džanel, nane űiko ajsi godaver, sar sal tu, savo džanel, so kempel te kerel. ⁴⁰ Aveha ešebno raj upral miro palacis a savore mire manuša mušinena te šunel sa, so pheneha. Ča vašoda, hoj me som kralis, ela man buter autorita sar tut."

⁴¹ O Faraonos mek phendā: "Dikh, ačhavav tut sar ešebne rajes upral calo Egipt." ⁴² Palis o Faraonos iľa tele e kraliko angrusi pal o angušť a thođa la le Jozefoske pro angušť. Urdā pre leste o gada le lače pochtanestar a thođa leske pre meň somnakuno lancos. ⁴³ Diña les te lidžal andro dujto kraliko verdan a vičinenas anglal leste: "Peren pro khoča!" Avke sas ačhado upral calo Egipt.

⁴⁴ Palis phendā o Faraonos le Jozefoske: "Me som o Faraonos, ale bijal tiro lav űiko andre calo Egipt našti űič kerel – našti čhalavel le vasteha, aňi le pindreha."

⁴⁵ O Faraonos čerinda le Jozefoske o nav pro Cafenat-Paneach a diña leske la Asenat romňake, savi sas e

čhaj le Poti-Feraskeri, savo sas rašaj andro foros He-liopolis. Avke o Jozef sas ačhado upral calo Egipt.

⁴⁶ Le Jozefoske sas tranda (30) berš, sar chudla te ker-el prekal o Faraonos, Egiptsko kralis. O Jozef palis odgeľa le Faraonostar a pregeľa pal cali phuv Egipt. ⁴⁷ Ola eŧta berša delas e phuv but ulipen. ⁴⁸ Ola eŧta berša o Jozef skidelas savoro chaben, so sas andro Egipt a odthovelas oda andro fori. Andre dojekh foros odthovelas o chaben ole mafendar, so sas ode. ⁴⁹ O Jozef skidňa ajci pferdo zrnos sar moroskeri poši. Sas olestar ajci but, hoj preačhile len te zgenel upre, bo pes oda aňi na delas.

Le Jozefoskere čhave

⁵⁰ Sar mek na sas e bokh, le Jozefoske ulile duj muršora, save les diňa e Asenat, e čhaj le rašaskeri le Poti-Feraskeri. ⁵¹ O Jozef diňa le ešebne čhaske nav Menašše, bo phendă: "O Del mange diňa te bisterel pre savore mire pharipena the pre cali miri dadeskero famelija." ⁵² Le dujtoneske diňa nav Efrajim, bo phendă: "O Del diňa, hoj mange te ulon čhave andre phuv, kaj man sas o pharipen."

⁵³ Andro Egipt ola eŧta berša le bare ulipnaske imar preačhile ⁵⁴ a palis avla eŧta berš bokh, avke sar o Jozef phendă. E bokh avla andre savore phuva, ale andre calo Egipt sas dos chaben. ⁵⁵ Sar imar the o Egiptana bokhalonas a o manuša vičinenas ko Faraonos vaš o chaben, phendă lenge o Faraonos: "Džan ko Jozef a keren oda, so tumenge phenela!"

⁵⁶ Sar imar sas e bokh pal cali phuv, o Jozef phundraďa savore šopi a bikenelas le Egiptanenge o zrnos, bo andro Egipt sas igen bari bokh. ⁵⁷ Savore manuša pal cali phuv džanas andro Egipt ko Jozef te cinel o zrnos, bo sas igen bari bokh pre cali phuv.

Le Jakoboskere čhave džan andro Egipt

42 Sar o Jakob dikhľa, hoj andro Egipt sas o zrnos, phendă peskere čhavage: "Soske bešen a dikhen jekh pre aver? ² Šundom, hoj andro Egipt bikenen o zrnos. Džan a cinen les odarik prekal amende, hoj te predživias a te na meras."

³ Avke ola deš phrala le Jozefoskere gele te cinel o zrnos andro Egipt. ⁴ Ale o Jakob na bičhaďa le Jozefoskere phrales le Benjamin leskere phralenca, bo phendă peske: "Šaj pes leske vareso ačhel." ⁵ Avke gele le Izraeloskere čhave olenca, save džanas andro Egipt te cinel o zrnos, bo the andro Kanaan sas bokh.

⁶ O Jozef, sar o raj upral o Egipt, diňa te bikenel o zrnos savore manušenge pal cali phuv. Avke avle ke leste leskere phrala, bandile anglal leste dži ke phuv. ⁷ Sar o Jozef dikhľa peskere phralen, prindžardă len, ale na diňa lenge oda te džanel a vakereleas lenca zoraha. Phučľa lendar: "Khatar avlan?"

"Andral e phuv Kanaan," on odphende. "Avlam te cinel chaben."

⁸ O Jozef sprindžardă peskere phralen, ale on les na sprindžarde. ⁹ Akor peske o Jozef leperďa pre ola sune,

save les sas pal lende varekana. Phendă lenge: "Tumen san špijona! Avlan te rodel o thana, so pes den lokes te zalel."

¹⁰ "Na, rajeja amaro!" phende leske. "Amen sam ča tire sluhi, save avle peske ade te cinel chaben. ¹¹ Savore sam čhave jekhe dadestar a sam pačivale manuša. Tire služobňika nane špijona!"

¹² Ale ov lenge pale phendă: "Na! Tumen avlan ade te rodel thana, so pes den lokes te zalel."

¹³ On odphende: "Tire služobňika samas dešuduj (12). Sam phrala, čhave jekhe dadestar andral o Kanaan. O nekterneder hino akana paš o dad a oda jekh phral imar nane."

¹⁴ Ale o Jozef lenge ada pale phendă: "Hin oda avke, sar phendom: San špijona! ¹⁵ Kavke man dodžanava, či vakeren čačipen: Na omukena kada than, medik na anena peskere nekternedere phrales. Lav vera pro Faraonos! ¹⁶ Bičhaven jekhes tumendar, hoj les te anel. Tumen, save ačhena, avena phandle andre bertena. Akor pes dikhela, či vakeren o čačipen, vaj na. Avke sar dživel o Faraonos: San špijona!" ¹⁷ Palis len thoďa pro trin džives andre bertena.

¹⁸ Pro trito džives lenge o Jozef phendă: "Me man darav le Devlestar. Te kamen te ačhel džide, keren oda, so phenav. ¹⁹ Te vakeren o čačipen, mušinel jekh tumendar te ačhel andre bertena a tumen savore džan khere a ligenen o zrnos peskere bokhale famelijenge. ²⁰ Ale tumare nekternedere phrales mange mušinen te anel! Kaleha presikavena, hoj vakeren o čačipen, a na merena."

On pre oda priačhile. ²¹ A vakerenas maškar peste: "Čačes kerďam namištes amare phraleske. Dikhľam les, andre savo pharipen hino, a sar pre amende zorales vičinelas, hoj leske te pomožinas, amen les na šunahas, a vašoda pre amende avla kadi bari bida."

²² O Ruben lenge phendă: "Na phendom tumenge, hoj te na keren nič ole čhaske? No tumen man na šundăn. Akana počinaha vaš leskero dživipen." ²³ Ale on na džanenas, hoj o Jozef lenge ačhalol, bo vakereleas lenca prekal o manuš, savo lenge prethovelas andre lengeri čhib. ²⁴ O Jozef pes lendar visardă a zarundă. Palis avla ke lende pale a vakereleas lenca. Avke lendar iľa avri le Šimeon a diňa les te phandel anglal lengere jakha.

O phrala džan pale andro Kanaan

²⁵ Palis o Jozef prikazindă le sluhenge, hoj te pheraren savore lengere gone le đivoha a te thoven lenge pale o rupune love andre dojekh gono a te den len chaben pro drom. Avke the kerde. ²⁶ O phrala peske thode o zrnos pro somara a gele het. ²⁷ Sar zaačhile te presovel pre jekh than, jekh lendar phundraďa o gono, hoj te del te chal le somaris, a dikhľa andre o love.

²⁸ Vičindă pro phrala: "Diňa mange pale o love! Kade hine andro gono!"

Akor previsaľiľa andre lende o jile, izdranas a vakerenas maškar peste: "Soda amenge kerďa o Del?"

²⁹ Sar doavle ke peskero dad ko Jakob andro Kanaan, phende leske savoro, so pes lenge ačhiľa: ³⁰ "Oda murš, o raj ola phuvake, igen namištes amenca vak-erelas, avke sar te ulamas špijona. ³¹ Ale amen leske phendám: 'Amen sam pačivale manuša, na sam nisave špijona. ³² Samas dešuduj phrala, čhave jekhe dadestar. Jekh amendar imar nane a oda nekterneder hino akana amare dadeha andro Kanaan.' ³³ O raj ola phuvake amenge phendá: 'Pal ada džanava, hoj vak-eren o čačipen, te jekhe tumare phrales mukena ade. Len peske o zrnos prekal peskeri famelija a šaj džan! ³⁴ Sar mange anena tumare nekternedere phrales, pal ada prindžarava, hoj na san špijona, ale hoj vakeren o čačipen. Palis tumenge pale premukava tumare phrales a pal kadi phuv šaj phirena, kaj kamena.' "

³⁵ Palis, sar čhivenas avri o zrnos andral o gone, savore ode arakhle peskere gonore le rupenca. Sar dikhle jekhetane le dadeha o love, predarandile.

³⁶ Akor lenge o dad o Jakob phendá: "Tumen kamen, hoj te našavav savore mire čhaven? O Jozef imar nane, aňi o Šimeon! A akana mange kamen te lel the le Benjamin? Me som oda, ko cerpinav vaš oda savoro!"

³⁷ Avke o Ruben phendá le dadeske: "Šaj murdares mire duje čhaven, te tuke na anava le Benjamin pale. Ma dara tut, ča de les mange andro vasta a me tuke les anava pale."

³⁸ Ale o Jakob phendá: "Me na mukav mire čhas ode te džal tumenca! Leskero phral o Jozef hino imar mulo a ov ačhiľa korkoro. Som imar phuro a te pes leske vareso ačhiľahas pro drom, pre savo geľanas, ta andre bari žaľa muľomas."

O phrala kamen te džal pale andro Egipt

43 Andre phuv Kanaan sas e bokh furt goreder. ² Sar imar dochale savoro zrnos, so cinde andro Egipt, o Jakob peskere čhvenge phendá: "Džan pale a cinen prekal amende sikra chaben!"

³ O Juda odphendá: "Oda murš amenge zoraless phendá: 'Sar na ela tumenca tumaro phral, na dikhena man pale.' ⁴ Te tu domukeha, hoj te avel amenca ode amaro phral, džaha a cinaha tuke chaben. ⁵ Ale te les na mukeha, amen bijal leste ode našti džas. Bo o raj upral o Egipt amenge zoraless phendá, hoj te na ela amenca amaro phral, na dikhaha les pale."

⁶ Akor o Izrael phendá: "Soske mange tumen kerđan mek buter pharipen? Soske phendán avri le muršeske, hoj hin tumen mek jekh phral?"

⁷ On odphende: "Bo ov amendar buterval phučelas, či mek dživel amaro dad a či amen hin phral. Odphendam leske ča pre oda, so amendar phučelas. Sar majindam te džanel, hoj phenela, hoj mušinas te anel amare phrales ode?"

⁸ Palis o Juda phendá peskere dadeske le Izraeloske: "Muk tire čhas le Benjamin, mi avel manca pro drom! Avke predživaha a na meraha aňi amen, aňi tu a aňi amare čhave. ⁹ Me les lav pre mande: Mire vastendar peske les šaj manges. Te les na anava tuke pale džides, avava anglal tu vinovato calo miro dživipen. ¹⁰ Te pes

na zlikerđamas ade ajci but, imar dujtovar ulamas andro Egipt the pale."

¹¹ O dad o Izrael lenge phendá: "Te o Benjamin mušinel te džal tumenca, akor len ola nekfeder veci andral amari phuv a lidžan ole rajeske upral o Egipt sar daros: Sikra balzamos the medos, e voňavo živica the mirra, o pendecha the mandle. ¹² Len tumenca duvar ajci love, bo mušinen te del pale savore love, so arakhlan andro gone. Šaj el, hoj vareko kerđa chiba. ¹³ Len tumenca the le phrales a džan imar pale ke oda manuš. ¹⁴ O Nekzoraleder Del mi presikavel tumenge o jileskeriben, hoj oda manuš te premukel le Benjamin the ole avre phrales. Te majinav te našavel mire čhaven, mi ačhel pes."

O phrala pale anglo Jozef

¹⁵ Avke o phrala ile peha o dari a duvar ajci rupune love the le Benjamin. Gele andro Egipt a ačhenas anglo Jozef. ¹⁶ Sar o Jozef dikhľa paš lende le Benjamin, phendá le sluhasko, savo sas upral leskero kher: "Le kale muršen andre miro kher. Murdar vareso andral o stados a pek oda, bo chana manca o dilos."

¹⁷ Oda sluhasko kerđa avke, sar leske o Jozef phendá, a iľa len andre leskero kher. ¹⁸ Ale ola murša predarandile, sar len ile andro kher le Jozefoskero, a phende peske: "Čačes amen ande ade vaš o love, so amenge thode pale andre amare gone. Akana amen chudena a marena! Lena amendar amare somaren a kerena amendar peskere otroken!"

¹⁹ Sar avle ko vudar paš le Jozefoskero kher, phende leskere sluhasko: ²⁰ "Mangas tut, rajeja, amen imar jekhvar ade samas te cinel chaben. ²¹ Sar avlam pro than, kaj ačhiľam te presovel, phundrađam o gone a dojekh amendar arakhlam peskere love – ajci, keci počindam. Akana tumenge anas ola love pale. ²² Iľam peha buter love, hoj peske te cinas pale chaben. Čačes na džanas, ko ola love thođa andro gone."

²³ "Aven andro smirom," phendá lenge o sluhasko. "Ma daran nisostar! Tumaro Del, o Del tumare dadeskero, tumenge ola love thođa andro gone. Se me tumaro počiniiben imar chudľom." Palis ke lende andá le Šimeon.

²⁴ Palis o sluhasko andá ole muršen andro Jozefoskero kher a diňa len paňi, hoj peske te thoven (omoren) o pindre. Diňa te chal the lengere somaren. ²⁵ Medik na avľa o Jozef, ile avri o dari prekal leste, bo sas lenge phendo, hoj chana ode o dilos.

²⁶ Sar o Jozef avľa andro kher, dine leske o dari a bandile anglal leste dži pre phuv. ²⁷ Ov lendar phučelas, hoj sar lenge hin, a phendá: "Mištes hin tumare phure dadeske, pal savo mange vakerenas? Mek dživel?"

²⁸ On odphende: "Tire sluhasko, amare dadeske, hin mištes, mek dživel." Palis pele pro khoča a bandonas anglal leste.

²⁹ Sar dikhľa peskere phrales le Benjamin, le čhas peskera dakero, phučľa: "Oda ov hino tumaro nekterneder phral, pal savo mange vakerenas?" Palis

phendā: "Mi el o Del jileskero ke tute, čhavo miro!"
³⁰ Androda o Jozef sigo geľa het, bo avľa leske pharo, sar dikhľa peskere phrales. Geľa andre andruno kher a ode chudľa te rovel. ³¹ Palis thoda (omorda) o muj a avľa avri. Zlíkerďa pes a phendā: "Anen o chaben!" ³² A podine o chaben le Jozefoske pre leskero skamind a leskere phralenge pre aver. O Egiptāna bešenavrether, bo našti chanas jekhetane le Hebrejenca. ³³ O phrala bešenavrether anglal o Jozef pal peskere berša, le nekphurederestar dži ko nekterneder. Dojekh lendar pes čudalinelas, hoj bešen sako pal peskere berša. ³⁴ Palis len pal peskero skamind diňa chaben. Ale le Benjamin diňa pandžvar buter sar avre phralen. Pijenas a mulatinenas jekhetane leha.

Le Jozefoskeri rupuňi kuči

44 O Jozef palis phendā le sluhasko upral leskero kher: "Pherar le muršenge o gone le chabeneha, keci ča birinena te lidžal, a dojekheske thov pale leskere love upral andro gone. ² Ole nekternedereske thov andro gono miri rupuňi kuči the leskere love, savenca počindā vaš o zrnos." O sluhasko kerďa avke, sar leske phendā o Jozef.

³ Tosara, sar vidňisaľolas, premukle le phralen lengere somarenca. ⁴ Sar džanas avri andral o foros a na sas mek dur, phendā o Jozef le sluhasko: "Dža sigo pal ola murša. Te len dochudeha, phen lenge: 'Soske vaš o lačhipen visardān pale o nalačhipen?' ⁵ Soske čordān e rupuňi kuči, andral savi pijel a savaha vražinel miro raj? Aleha kerďan igen namištes!"

⁶ Sar len dochudľa, phendā lenge ola lava. ⁷ On leske odphende: "Soske ada phenes, rajeja miro? Kajso vareso amen šoha (ňikda) na kerďamas! ⁸ Dikh, o love, so arakhlām upral andro gone, andām pale andral o Kanaan. Sar šaj amen čordāmas o rup vaj o somnakaj andral o kher tire rajeskero? ⁹ Te pes oda arakhela ke varesavo tiro služobňikos, mi merel a amen savore avaha tuke otroka, rajeja miro."

¹⁰ O sluhasko phendā: "Mištes, mi el avke, sar phendān. Oda, ko iľa e rupuňi kuči, ela miro otrokos a tumen avena premukle." ¹¹ Avke savore sigo thode peskere gone tele pre phuv a phundrade len. ¹² Palis o sluhasko chudľa te rodel le phurederestar dži ko nekterneder. E kuči pes arakhlā andro Benjaminoskero gono. ¹³ Androda savoredžene čhingerde pre peste o plaštōs. Thode o veci pro somaris a visarde pes pale andro foros.

¹⁴ Avke o Juda peskere phralenca dogeľa andro kher le Jozefoskero. Ov mek sas ode a bandīle anglal leste dži pre phuv. ¹⁵ O Jozef lenge phendā: "Oda so tumen kerďan? Tumen na džanenas, hoj ajsa manuš sar me džanel te vražinel?"

¹⁶ O Juda phendā: "So tuke šaj phenas pre ada, rajeja miro? So te keras, hoj amenge te odmukes? O Del oda domukľa pre peskere služobňika vaš o binos, so kerďam. Akana, rajeja miro, sam tire otroka, amen the oda, ke kaste arakhle e kuči."

¹⁷ Ale ov lenge odphendā: "Na! Me kajso vareso na kerava! Mange ela otrokos ča oda, ke kaste pes

arakhlā e kuči. Tumen savore šaj džan andro smirom ke peskero dad."

O Juda pes privakerel vaš o Benjamin

¹⁸ Palis o Juda geľa anglo Jozef a phendā: "Mangav tut, rajeja miro, domuk tire sluhasko, hoj te phenel vareso peskere rajeske. Ma av choľamen pre peskero sluhasko, se tu sal sar o Faraonos! ¹⁹ Tu pes akor, rajeja amaro, phučehasko tire sluhendar: 'Hin mek tumen dad abo phral?' ²⁰ Amen tuke, rajeja, phendām: 'Hin amen mek phuro dad the terno phral, savo leske ulīľa pro phuripen. Leskero phral imar hino mulo a ov ačhīľa jekhoru čhavo peskera datar. Amaro dad les igen kamel.'

²¹ Palis tu phendāl peskere sluhenge: 'Anen mange les, hoj les te dikhav peskere jakhenca!' ²² Akor, rajeja, phendām tuke: 'Oda čhavo našti omukel le dades, bo te les omukľahas, o dad muľahas.' ²³ Ale tu phendāl tire sluhenge: 'Te tumenca na avela tumaro nekterneder phral, ma sikaven pes mange pro jakha!'

²⁴ Sar palis avľam ke tiro sluhasko, ke amaro dad, rozvakerďam leske savoro, so phendāl tu, rajeja. ²⁵ Amaro dad phendā: 'Džan pale a cinen sikra chaben.' ²⁶ Amen leske odphendām: 'Našti džas, te amenca na avela the amaro nekterneder phral. Bijal leste pes našti sikavas ole manušeske pro jakha.'

²⁷ Pre ada amenge phendā tiro sluhasko, amaro dad: 'Tumen mištes džanen, hoj miri romňi man diňa ča duje čhaven. ²⁸ Jekh lendar odgeľa imar het a me mange phendom, hoj les mušindā te rozchal e dzivo džvirina. Akorestar les na dikhľom.' ²⁹ O dad mek phendā: 'Te lena mandar the kales a pro drom pes leske vareso ačhela, thovena man pro phuripen andro hrobos.'

³⁰ Akana, rajeja miro, sar me šaj džava pale ke tiro sluhasko ke miro dad, te o čhavo, saves cale peskere dživipnaha kamel, na ulahas amenca? ³¹ Te pes dodžanela, hoj o čhavo nane amenca, merela. Tire sluhi oleha anena tire sluhasko, amare dades, pro phuripen andro hrobos. ³² Me, tiro sluhasko, ilom ole čhas le dadestar pre peste. Phendom le dadeske, hoj te les na anava leske pale, avava vinovato anglal leste calo miro dživipen.

³³ Akana domuk mange, hoj me te ačhav tire otrokoske vaš kada čhavo, rajeja miro, a ov mi džal het peskere phralenca. ³⁴ Sar šaj avľomas pale ke miro dad, te o čhavo na ulahas manca? Birindomas te dikhel pre žala, so avľahas pre miro dad?"

O Jozef pes del te sprindžarel le phralenge

45 O Jozef pes imar našti zlíkerďa. Vičindā pre savorende, save ačhenas pašal leste: "Savore džan het!" Avke ňiko ode na sas, sar o Jozef pes diňa te sprindžarel peskere phralenge. ² Palis zorales zarundā. Šunde oda o Egiptāna the calo palacis le Faraonoskero.

³ Avke phendā peskere phralenge: "Me som o Jozef! Dživel mek miro dad?" Ale len oda avke zaiġa, hoj na džanenas te phenel aġi jekh lav peskere phraleske.

⁴ O Jozef lenge phendā: "Aven pašeder ke ma!" Sar avle ke leste, phendā: "Me som o Jozef, tumaro phral, saves bikendan andro Egipt." ⁵ Akana tumenge imar te na el pharo a te na dukhal tumen ada, hoj man kade bikendan. O Del man bičhađa ade angle tumende, hoj te zachraġnav tumare dživipena. ⁶ Hin oda imar duj berš, so hin e bokh pre phuv. Ela mek pandž berš, so pes na kerela buči pre maġa aġi pes na skidela upre. ⁷ O Del man bičhađa anglal tumende andre kadi phuv, hoj tumen kavke bares te zachraġinel, hoj te predživen tumare čhavenca. ⁸ Tumen man ade na bičhađan, ale o Del. Ov man ačhađa sar nekbaredere Faraonoskere uradġnikos sar ešebne (perše) rajes upral calo leskero kher the upral calo Egipt.

⁹ Sigo džan pale ke miro dad a phenen leske, hoj me phenav: 'O Del ačhađa man, le Jozef, sar ešebne rajes upral calo Egipt. Av ke ma so neksigeder!' ¹⁰ Bešeħa pašes paš ma andre phuv Gošen savoreħa, so tut hin: tire čhavenca the le čhavengere čhavenca, tire bakrorenca, kozenca the gurumġenca. ¹¹ Ode tumen me dava o chaben. Bo mek pandž berš likerela e bokh a na kamav, hoj vareko olendar, save hine tuħa, te bokħaġon – aġi tu aġi tiri famelija.' "

¹² O Jozef mek phendā: "Tumen the tumaro phral o Benjamin šaj dikhen, hoj som oda me, o Jozef, savo tumenca vakerel. ¹³ Phenen le dadeske, savi bari zor man hin andro Egipt, a phenen leske pal savoro, so dikhġan kade. Palis siđaren a anen les ade."

¹⁴ Avke pes o Jozef the o Benjamin obchudle a sodudžene chudle te rovel. ¹⁵ Rovibnaħa čumidġa savore peskere phralen. Palis leskere phrala leħa chudle te vakerel.

¹⁶ Sar avġa o ġiros andro kher le Faraonoskero, hoj avle le Jozefoskere phrala, sas oda pre dzeka le Faraonoske the leskere sluhenge. ¹⁷ O Faraonos phendā le Jozefoske: "Phen tire phralenge, mi thoven peskere veci pre peskere somara a mi džan andro Kanaan. ¹⁸ Mi len le dades the peskere fameliji a mi aven ke mande. Dava len oda nekfeder than, so hin andro Egipt, the le nekfedere chabenestar kala phuvatar. ¹⁹ Phen lenge mek, mi len peske o verdana andral o Egipt prekal peskere čhave the romġija a mi anen the le dades peħa. ²⁰ Te na bajinen pal ġisoste, so omukena, bo chudena oda nekfeder, so del o Egipt."

²¹ O čhave le Izraeloskere oda the kerde. O Jozef len diħa verdana the chaben pro drom, avke sar leske phendā o Faraonos. ²² Savoren lendar diħa neve gada, ale le Benjamin diħa trin šel (300) rup the mek pandž neve gada. ²³ Peskere dadeske bičhađa deše somaren, pre save sas thode ola nekfeder dari andral o Egipt, the deše oslicen, pre save sas thodo o zrnos, o mare the o chaben pro drom. ²⁴ Palis le phralen premukġa. Sar džanas het phendā lenge: "Ča pes ma vesekedinen le dromeħa!"

²⁵ Avke gele het andral o Egipt andro Kanaan ko dad ko Jakob. ²⁶ Phende leske: "O Jozef mek dživel! Ov hino ešebno raj upral calo Egipt!" Ale sar ada šundā o dad, ačħiġa sar bar a naštġi lenge dopačalas. ²⁷ Ale sar leske phende savoro, so lenge phendā o Jozef, a sar o Jakob dikhġa o verdana, so bičhađa o Jozef, hoj les te anen andro Egipt, o Jakob avġa pale ke peste. ²⁸ Phendā: "Akana tumenge imar pačav! Miro čħavo o Jozef čačes dživel! Džav les te dikhel, medik na merava."

O Jakob džal andro Egipt

46 O Izrael iġa peħa savoro, so les sas, a džalas andro Egipt. Sar dogeġa andre Beer-Šeba, andā ode obeti le Devleske, saves lašarelas leskero dad o Izak.

² O Del prevakerđa ko Izrael rači andro videġe: "Jakob! Jakob!"

"Kade som!" ov odphendā.

³ "Me som o Del, o Del tire dadeskero," phendā leske. "Ma dara tut te džal andro Egipt, bo ode tutar kerava iġen baro narodos. ⁴ A me tuħa džava andro Egipt a anava tut odarik pale. O Jozef ela paš tu, sar mereħa."

⁵ Avke o Jakob odgeġa andral e Beer-Šeba. Le Izraeloskere čħave thode le dades le Jakob, le čhaven the le romġijen andro verdana, save bičhađa o Faraonos. ⁶ Ile peħa o stadi the o barvalipen, so skidle andro Kanaan, a avle andro Egipt – o Jakob the savori leskeri famelija. ⁷ Andro Egipt andā caġa peskera famelija, peskere čhaven the čħajen lengere čhavenca.

⁸ Kala hine o nava le Izraeloskere čhavengere – oda hin o Jakob the leskere čħave – save avle andro Egipt: Leskero ešebno (peršo) čħavo sas o Ruben. ⁹ Le Ruben sas čħave o Chanoch, o Pallu, o Checron the o Karmi.

¹⁰ Le Šimeon sas čħave o Jemuel, o Jamin, o Ohad, o Jachin, o Cochar the o Šaul, savo sas čħavo la Kanaančankatar.

¹¹ Le Levi sas čħave o Geršon, o Kohat the o Merari.

¹² Le Juda sas čħave o Er, o Onan, o Šelah, o Perc the o Zerach. Ale o Er the o Onan mule andro Kanaan. Le Perc sas čħave o Checron the o Chamul.

¹³ Le Jissachar sas čħave o Tolas, o Puvvah, o Job the o Šimron.

¹⁴ Le Zebulun sas čħave o Sered, o Elon the o Jachleel.

¹⁵ Kala hine la Lejakere the le Jakoboskere čħave, save lenge ulile andro Paddan-Aram. Ode lenge uliġa the e čħaj e Dina. Savore leskere čħave the čħaja la Lejaha sas tranda the trin (33).

¹⁶ Le Gad sas čħave o Cifjon, o Chaggi, o Šuni, o Ecbon, o Eri, o Arodi the o Areli.

¹⁷ Le Ašer sas čħave o Jimnah, o Jišvah, o Jišvi the o Berijah a lengeri pheġ sas e Serach. Le Berijah sas čħave o Cheber the o Malkiel.

¹⁸ Kala dešušov (16) hine o čħave le Jakoboskere, save les sas la Zilpaha. Oj sas e služka, sava diħa o Laban peskera čħake la Lejake.

¹⁹ Le Jakoboskera romňake la Rachelake ulile o Jozef the o Benjamin. ²⁰ Le Jozefoske ulile andro Egipt o Menašše the o Efrajim la Asenataha, savi sas e čhaj le Poti-Feraskeri, savo sas rašaj andro Heliopolis.

²¹ Le Benjamin sas čhave o Belas, o Becher, o Ašbel, o Geras, o Naaman, o Echi, o Roš, o Muppim, o Chuppim the o Ard.

²² Kala hine la Rachelakere dešuštar (14) čhave, save la sas le Jakoboha.

²³ Le Danoskero čhavo sas o Chušim.

²⁴ Le Naftali sas čhave o Jachceel, o Guni, o Jecer the o Šillem.

²⁵ Kala epta čhave hine le Jakoboskere, save les sas la Bilhaha. Oj sas e služka, sava diňa o Laban peskera čhake la Rachelake.

²⁶ Le Jakoboskere čhave peskere čhavenca, save gele leha andro Egipt, sas šovardeš the šov (66), te na genas le Jakoboskere čhavengere borijen. ²⁷ Te zgenaha the le Jozefoskere duje čhaven, save leske ulile andro Egipt, avle ode le Jakoboskera famelijaha jekhetane eftavardeš (70) džene.

²⁸ O Jakob bičhađa peskere čhas le Juda anglal te phenel le Jozefoske, hoj pes te arakhel lenca andro Gošen. Avke avle andre phuv Gošen. ²⁹ O Jozef diňa te pririchtinel peskero verdan a geľa anglal peskero dad Izrael andro Gošen. Sar avľa paš leste, obchudľa les a chudľa te rovel.

³⁰ O Izrael phendá le Jozefoske: "Akana imar šaj merav, bo tut dikhľom a džanav, hoj džives."

³¹ Palis o Jozef phendá peskere phralenge the savorengere, save sas leha: "Mušnav te džal te phenel le Faraonoske, hoj avle ke ma mire phrala the savori famelija mire dadeskeri andral o Kanaan. ³² Phenava leske, hoj san pastjera, save likerem le bakren, a hoj avľan savore tumare stadenca the barvalipnaha. ³³ Te tumen o Faraonos vičinel a phučela tumendar, savi buči keren, ³⁴ phenen leske: 'Tire sluhi hine pastjera le stadengere calo amaro džživipen avke sar amare phure dada.' Ada phenena vašoda, hoj tumenge te domukel te ačhel andre phuv Gošen, bo o Egiptána na kamen nič le pastjerenca."

O Jakob anglo Faraonos

47 O Jozef odgeľa a phendá le Faraonoske: "Miro dad the mire phrala avle andral o Kanaan peskere stadenca, dobitkoha the savore barvalipnaha. Akana hine andre phuv Gošen." ² Palis iľa avri peskere phralendar pandže dženen a andá len anglo Faraonos.

³ O Faraonos pes phučľa leskere phralendar: "Savi buči keren?"

"Amen sam pastjera, save pasinen le staden avke sar the amare dada," odphende leske. ⁴ "Amen avľam te bešel andre kadi phuv, bo andro Kanaan avľa igen bari bokh a prekal o stadi ode nane chaben. Domuk tire sluhenge, hoj te bešen andre phuv Gošen."

⁵ O Faraonos phendá le Jozefoske: "Te tiro dad the tire phrala avle ke tute, ⁶ savore thana andre kadi phuv hine lenge phundrade. Mi bešel tiro dad the tire phrala andre nekfeder phuv Gošen. Te hin maškar lende godaver murša, ačhav len upral mire stadi."

⁷ O Jozef andá peskere dades le Jakob a sikađa les le Faraonoske. A o Jakob požehňinda le Faraonos. ⁸ O Faraonos phučľa le Jakobostar: "Keci tuke berš?"

⁹ O Jakob odphendá le Faraonoske: "Miro džživipnaskero drom likerel šel the tranda (130) berš. O džživipena mire dadengere likerenas buter a na sas ajse phare sar miro." ¹⁰ Palis o Jakob požehňinda le Faraonos a geľa lestar het. ¹¹ O Jozef thođa te bešel peskere dades the le phralen andro Egipt a diňa len phuva the mali andro nekfeder than andre phuv Raamses, avke sar oda phendá o Faraonos. ¹² Avke o Jozef diňa chaben le dades, le phralen the caľa dadeskera famelija pal oda, keci len sas čhave.

E bokh andro Egipt

¹³ Na sas maro pre calí phuv, bo e bokh sas igen bari. Andro Egipt the andro Kanaan e sas ajsi bari bokh, hoj o manuša sas bi e zor. ¹⁴ Vaš o zrnos, so bikenda, o Jozef skidňa savoro rup, so sas andro Egipt the andro Kanaan, a odligendá oda andro Faraonoskero palacis. ¹⁵ Sar imar na sas love andro Egipt the andro Kanaan, savore Egiptána avenas ko Jozef a mangenas: "De amen maro! So, majinas te merel, bo imar amen nane love?"

¹⁶ "Te tumen nane love, anen tumare stadi a me tumen vaš oda dava chaben," phendá lenge o Jozef.

¹⁷ Avke anenas ko Jozef peskere stadi a ov len delas maro vaš o graja, bakre, gurumňa the somara. Andre oda berš lendar o Jozef cinda savore stadi vaš o chaben.

¹⁸ Avke pregeľa jekh berš. Pre aver berš avle pale a phende: "Na garuvaha anglal tu, rajeva amaro, hoj o love amenge dogele a the amare stadi hine imar tire. Nane amen imar, so tut te del, ča amaro telos the e maľa. ¹⁹ Soske amen majinas te merel angle tire jakha, rajeva amaro, a te mukel ča avke peskere mali? Cin tuke amen the amare mali vaš o maro a avaha otroka le Faraonoske. Ča de amen div, hoj te predživas a te na meras a te na ačhen ča avke o mali."

²⁰ Kavke cinda o Jozef savore Egiptske mali prekal o Faraonos. Savore Egiptána bikenenas peskere mali, bo e bokh pre lende mek goreder avľa. Kavke o Faraonos dochudľa savore mali andre Egiptsko phuv. ²¹ Kaleha o Jozef kerđa le manušendar otroken pal calí phuv. ²² Ča le rašajengere phuva na odcinelas, bo o Faraonos len delas love pro chaben a sas lenge oda dos, hoj te predživen. Vašoda peskere phuva na bikenenas.

²³ O Jozef phendá le manušenge: "Adadžives tumen the tumare phuva cindom prekal o Faraonos. Len tumenge kada zrnos a sadzinen len pro mali. ²⁴ O pandžto kotor le ulipnastar mušinena te del le Faraonoske a ola štar kotora ačhela tumenge, hoj te el tumen, so te

sadzinel pro mali a te el tumare famelijen the le čhaven, sostar te dživel."

²⁵ "Tu amen likerđal paš o dživipen," on odphende. "Te sam tuke pre dzeka, rajeja amaro, ker amendar le Faraonoskere otroka!" ²⁶ O Jozef akor diña avri zakonos pal e Egiptsko phuv, so pes dolikerel dži adadžives, hoj o pandžto kotor le ulipnastar hino le Faraonoskero. Ča o phuva le rašajengere na sas leskere.

²⁷ Avke o Izraeliti ačhile te bešel andro Egipt andre phuv Gošen. Barvalonas a sas len igen but čhave. ²⁸ O Jakob dživelas andro Egipt mek dešuefta (17) berš a sas leske imar šel the saranda the efta (147) berš.

²⁹ Sar sas o Izrael anglo meriben, vičindā peskere čhas le Jozef a phendā leske: "Te som tuke pre dzeka, thov tiro vast pre mire čanga a de man lav, hoj mange presikaveha kada jileskeriben the pačivaliben: Ma parun man andro Egipt." ³⁰ Sar merava avke sar mire phure dada, lidža man andral o Egipt a parun man ode, kaj sas parumen the on.

"Kerava avke, sar phenes," odphendā o Jozef.

³¹ "Le vera, hoj oda kereha!" phendā leske o Jakob. Sar les diña vera, o Izrael bandīla tele pro hađos a lašarelas le Devles.

O Jakob požehñinel le Jozefoskere čhaven

48 Pal varesavo časos phende le Jozefoske: "Tiro dad hino nasvalo." Avke o Jozef iľa peha peskere duje čhaven le Menašše the le Efrajim a gele les te dikhel. ² Sar le Jakoboske phende: "Avel ke tu tiro čhavo o Jozef," o Izrael chudľa zor a bešľa peske pro hađos. ³ O Jakob phendā le Jozefoske: "O Nekzoraleder Del pes mange sikađa andro Luz andre phuv Kanaan a požehñindā man. ⁴ Phendā mange: 'Dava tut pherdo čhave. Tutar avena but narodi. Kadi phuv dava tire potomkenge, hoj te el lengeri pro furt.'"

⁵ O Jakob mek phendā: "Tire duj čhave, save tuke ulile andro Egipt mek sigeder, sar ke tu ade avlóm, ena akanastar mire. O Efrajim the o Menašše ena mire sar o Ruben the o Šimeon. ⁶ O čhave, save avena pal lende, ena tire. Mire phuva pal ma prelena ča prekal o Efrajim the Menašše, ena zgende jekhetane lenca. ⁷ Kerav oda prekal e Rachel, bo sar džavas andral o Paddan andro Kanaan, muľa mange pro drom. Parundóm la ode paš o drom, nadur la Efratatar." E Efrata hin adadžives Betlehem.

⁸ Sar dikhľa o Izrael le Jozefoskere čhaven, phučľa: "Ko hine kala?"

⁹ "Oda hine mire čhave, saven mange diña ade o Del," odphendā o Jozef peskere dađeske.

Avke o dad phendā: "An len ke mande, hoj len te požehñinav!" ¹⁰ O Izrael sas imar phuro a imar na dikhelas igen mištes. Sar len o Jozef andā ke leste, o Jakob len čumidľa a obchudľa. ¹¹ Palis o Izrael phendā le Jozefoske: "Šoha (ñikda) na phendomas, hoj tut mek pale dikhava. Ale o Del mange diña, na ča tut te dikhav, ale the tire čhaven." ¹² O Jozef iľa peskere čhaven tele pal o Jakoboskere čanga a bandīla le mujeha dži ke phuv.

¹³ Palis o Jozef iľa sodujen ko Jakob; le čače vasteha ačhađa le Efrajim pal e bałogñi (ľavo) sera le Izraeloskeri a le bałogne vasteha iľa le Menašše a ačhađa les pal e čači (pravo) sera. ¹⁴ Ale o Izrael prethođa peskere vasta a thođa peskero čačo vast pro Efrajimoskero šero, choc sas terneder. O bałogno vast thođa pro šero le Menaššeskero, savo sas ešebno čhavo. ¹⁵ Palis požehñindā le Jozef a phendā:

"Mi požehñinel kale čhaven o Del, angle savo phirenas mire dada o Abraham the o Izak,

o Del, savo man lidžalas le terñipnastar dži adadžives sar pastjeris!

¹⁶ Mi požehñinel len o aňjelos, savo man cirdña avri andral o dojekh nalačhipen!

Mi leperel pes prekal kala čhave miro nav the o nava mire dadengere, le Abrahamoskero the Izakoskero!

Mi ulon lenge pherdo čhave pal cali phuv."

¹⁷ Sar o Jozef dikhľa, hoj o dad thođa o čačo vast pro šero le Efrajimoske, na sas leske oda pre dzeka. Avke chudľa le dađeskero vast a kamľa les te prethovel pro šero le Menaššeskero. ¹⁸ O Jozef phendā le dađeske: "Na avke, dado miro! Se kada hin ešebno. Leske thov tiro čačo vast pro šero."

¹⁹ Ale o dad leske phendā: "Džanav, čhavo miro, džanav! The lestar ela narodos a the lestar ela buter. Ale leskero terneder phral, o Efrajim, ela bareder sar ov, leskere čhavendar ena but narodi."

²⁰ Avke len požehñindā oda džives a phendā:

"Sar o Izraeliti žehñinena varekas, leperena tumare nava a phenena kada:

'Mi kerel tuke o Del avke sar le Efrajimoske the le Menaššeske.'"

Kaleha thođa o Jakob le Efrajim anglo Menašše.

²¹ Palis o Izrael phendā le Jozefoske: "Dikh, me merava, ale o Del ela tumenca a anela tumen pale andro Kanaan, andre phuv tumare phure dađengeri. ²² A tut dav mire barvalipnastar buter sar tire phralen. Dav tuke e lači phuv Šichem, so dochudľom le Amorejendar peskera šablaha the lukoha."

Le Jakoboskero požehñaňje

49 O Jakob vičindā savore peskere čhaven a phendā lenge:

"Aven savore ke mande a phenava tumenge, so tumen užarel andro dživesa, so avena!

² Zdžan tumen jekhetane, savore čhave le Jakoboskere.

Šunen tumare dađes le Izrael!

³ Ruben, tu sal miro ešebno (peršo), e zor mire terñipnaske, nekrajikaneder the nekzoraleder mire čhavendar!

⁴ Sal sar o paňi, so pes na del te zaačhavel, imar na aveha ešebno, bo pašlilal mira romňaha. Aleha kerđal džungipen, sar tuke pašlilal andre miro hađos.

- ⁵ Šimeon the Levi, tumen san phrala,
pre tumare maribneskere zbraňi hin o rat.
- ⁶ Na kamav man te zdžal jekhetane tumenca.
Na kamav nič oleha, so tumen kamen te kerel,
bo andre cholí murdardan le muršen
a ča prekal peskero radišagos kerdan le bikendar
kafiki.
- ⁷ Mi el prekošli tumari cholí,
bo sas igen bari,
the tumaro rušiben, bo sas dzivo.
Tumare čhave na dživena jekhetane peha andre
phuv le Izraeloskeri,
ena rozčhide maškar o kmeňi le Jakoboskere.
- ⁸ Juda, tut tire phrala lašarena.
Chudeha tire nepřijateľen tel e meň,
o čhave tire dadeskere anglal tu bandona.
- ⁹ Sal sar ľevos, savo peske chudľa o chaben
a džal pale pre peskero than te pašľol.
Ko pes na daral les te uštavel?
- ¹⁰ Tu, Juda, ľikereha o kraliskero žezlos,
tire čhave kralinena pro furt.
O narodi tuke anena o dari a šunena tut.
- ¹¹ Peskere terne somaris phandeha paš o viňičis,
peskere somaricis ko viňično stromos,
andre mol peske žužareha o plaštós,
andro hroznoskero rat peskere gada.
- ¹² Tire jakha ena kaleder sar e mol,
tire danda parneder sar o thud.
- ¹³ Tu, Zebulun, bešeha pašes paš o moros,
ode, kaj zaačhaven o lodí.
Tiri phuv ela dži ko Sidon.
- ¹⁴ Jissachar, tu sal sar o zoralo somaris,
so pašľol maškar peskere košara.
- ¹⁵ Sar dikľal, hoj o than, kaj pašľos, hino lačo
a hoj e phuv hiňi šukar,
bandardal o dumo a ľidžahas o košara
a mušinehas te kerel phares buči sar otrokos.
- ¹⁶ Tu, Dan, pes zaačhaveha vaš o pravos peskere nar-
odoske
sar jekh le Izraeloskere kmeňendar.
- ¹⁷ Aveha sar o sap paš o drom,
sar jedovato sap pre sera le dromestar.
Dandereha le grajeske andro pindro
a o manuš perela tele pal leste palal.
- ¹⁸ Ó, RAJEJA miro, užarav pre tiri zachrana!
- ¹⁹ Pre tu, Gadona, chučena o živaňa,
ale tu pes visareha a džaha pre lende palunestar.
- ²⁰ Tiri phuv, Ašer, ela barvalí andro chaben,
chaha latar ajse chabena sar o kralís.
- ²¹ Tu, Naftali, sal sar avrimuklo jeleňis,
saveske uľon šukar terne jeleňa.

- ²² Jozef, tu sal sar odi ulípnaskeri rastlina,
so barol paš o paňi,
tire prajti prebararena e fala.
- ²³ La choláha pre tu džanas,
o lukostrelci pre tute ľivinenas,
- ²⁴ ale tiro lukos ela furt nacirdno
a tire vasta ena furt zorale,
bo hin tuha, o Nekzoraleder Del, savo hin o Pastjeris,
e Skala le Izraeloskeri.
- ²⁵ Mi pomožinel tuke o Del tire dadeskero!
Mi požehňinel tut o Nekzoraleder Del le brišindeha
andral o ňebos
the le paňeha andral e phuv
– a mi del tut but stadi the čhaven!
- ²⁶ O požehnaňja tire dadeskere
hine bareder sar o požehnaňja le čirlatune verchen-
gere
the sar o barvalípen le phure brehengere!
Mi perel oda savoro pre Jozefoskero šero,
pro čekat oleske, savo hin o princos maškar peskere
phrala!
- ²⁷ Tu, Benjamin, sal sar dzivo ruv (vlkos).
Tosara chas o chaben, so tuke chudľal,
rači rozdes olestar, so ačhiľa.”

²⁸ Kala hine savore dešuduj (12) Izraeloskere kmeňi a
kada lenge phendá o dad o Jakob, sar len pože-
hňinelas. Dojekhes lendar požehňinelas avke, sar
peske oda zasogaľindá (zaslužindá).

O Jakob merel

²⁹ Palís o Jakob lenge phendá: “Sar merava a džava ke
mire phure dada, save mule, parunen man paš mire
dada andre jaskiňa, so hiňi pre le Efronoskeri Cheti-
toskeri maľa, ³⁰ andre jaskiňa Machpela paš o Mamre
andro Kanaan. O Abraham la cindá le Chetitostar le
Efronostar, hoj les te el than pro hrobos. ³¹ Ode
parunde le Abraham leskera romňaha la Saraha the le
Izak leskera romňaha la Rebekaha. Ode parundom the
la Leja. ³² Odi maľa la jaskiňaha sas cindí le Chetitanen-
dar.”

³³ Sar imar o Jakob dovakerďa peskere čhavenca,
hazdňa peske o pindre pro hadós. Muľa a geľa paš
peskere phure dada, save mule.

O Jozef parunel le Jakob

50 Akor o Jozef obchudľa le dades, čumidelas les a
rovelas upral leste. ² Palís o Jozef phendá
peskere sluhenge, le doktorenge, hoj le dades te za-
balzaminen. ³ O doktora le Izrael balzaminenas saran-
da (40) dživesa, bo ajci kampelas oda te kerel. O
Egiptána rovenas upral leste eftavardeš (70) dživesa.
⁴ Sar imar pregele o rovíbnaskere dživesa, o Jozef
prevakerďa ko Faraonoskere uradňika: “Te som tu-
menge pre dzeka, akor mangav tumen, privakeren pes
važ ma ko Faraonos. ⁵ Miro dad man phandľa kala ver-
aha: ‘Sar me merava, parun man andro hrobos, so

mange kerdom andro Kanaan.' Domuk mange, hoj ode te džav te parunel mire dades. Palis avava pale."

⁶ O Faraonos phendā: "Ča dža a parun tuke le dades, avke sar les diňal vera."

⁷ O Jozef akor geľa te parunel le dades. Džanas leha savore Faraonoskere uradņika, o nekbareder raja andro palacis the o anglune manuša andral o Egipt.

⁸ Gele leha the cali leskeri famelija, o phrala the savoredžene andral leskere dadeskero kher. Andre phuv Gošen mukle ča peskere cikne čhaven, le bakren, le kozen the le gurumňen. ⁹ Džanas lenca the o manuša pro verdana the pro graja. Sas leha igen but manuša.

¹⁰ Sar doavle andro Goren-Atad, so hin pal o Jordan, but časos zorales rovenas a o Jozef kerelas o vartiša-gos efta dživesa prekal peskero dad. ¹¹ Sar o Kanaančana dikhle andro Goren-Atad o baro vartiša-gos, phenenas: "Le Egiptanen hin bari žala." Vašoda pes oda than pal o Jordan vičinel Abel-Micrajim †.

¹² O čhave palis kerde avke, sar lenge phendā o dad o Jakob. ¹³ Ligende les andro Kanaan a parunde les andre jaskiňa, so sas pre maľa Machpela paš o Mamre, so cindā o Abraham le Chetitostar le Efronostar, hoj les te el than pro hrobos. ¹⁴ Paloda, sar o Jozef parundā le dades, geľa pale andro Egipt, le phralenca the savorenca, save leha ode avle.

O phrala pes daran le Jozefostar

¹⁵ Paloda, sar lenge muľa o dad, le Jozefoskere phrala phende: "So te akana o Jozef džala pre amende? So te kamela amenge te visarel pale savoro, so leske kerdam?" ¹⁶ Avke dine te phenel le Jozefoske: "Sigeder,

† Oda hin: Le Egiptanengeri žala.

sar o dad muľa, ¹⁷ amenge phendā, hoj tuke te phenas: 'Odmuk tire phralenge oda nalačhipen, so tuke kerde, sar pre tu džanas.' Avke akana tut mangas, odmuk amenge, so tuke kerdam, bo the amen služinas tire dadeskere Devleske." O Jozef zarundā, sar šundā ola lava.

¹⁸ Palis leskere phrala avle ke leste, bandonas anglal leste a phende: "Ade sam anglal tute sar tire otroka!"

¹⁹ Ale o Jozef lenge phendā: "Ma daran tumen! Či me som Del? ²⁰ Kamenas mange te kerel nalačo, ale o Del ada visardā pro lačo, hoj te zachraňinel but manušen, avke sar oda kerel the adadžives. ²¹ Akana tumen imar ma daran! Me dava tumen the tumare čhaven savoro, so kampela." Ola lava pes chudle lengere jilendar a imar pes na daranas.

Le Jozefoskero meriben

²² O Jozef bešelas andro Egipt le dadeskera famelijaha a dživelas šel the deš (110) berš. ²³ Dikhľa le Efraji-moskere čhaven the lengere čhaven. Dikhľa the le čhaven le Machiroskeren, savo sas o čhavo le Menaššeskero, a priiľa len sar peskeren ††.

²⁴ Palis o Jozef phendā le phralenge: "Me merav, ale o Del ela čačes tumenca. Ligenela tumen adarik andre phuv, pal savi diňa lav le Abraham, le Izak the le Jakob." ²⁵ O Jozef mek le Izraeloskere čhaven phandľa la veraha: "O Del tumen čačes lidžala avri andral kadi phuv. Palis lena adarik het mire kokala!" ²⁶ O Jozef muľa, sar leske sas šel the deš (110) berš. Zabalzaminde les a thode les andro močto andro Egipt.

†† E Hebrejiko čhib: Sas thode pro Jozefoskere čanga.

2. MOJŽIŠOSKERO

O Egiptana trapinen le Izraeliten

1 Kala hine o nava le Izraeloskere čhavengere, save le Jakoboha avle andro Egipt, dojekh peskera famelijaha: ² o Ruben, o Šimeon, o Levi, o Juda, ³ o Jis-sachar, o Zebulun, o Benjamin, ⁴ o Dan, o Naftali, o Gad the o Ašer. ⁵ Savore potomki le Jakoboskere sas eftavardeš (70). O Jozef sas imar andro Egipt.

⁶ Palis muľa o Jozef the leskere phrala a calo oda pokoleňje, ⁷ ale le Izraeliten sas but čhave, a sas furt buter the zoraleder, avke hoj cali phuv sas pherardi lenca.

⁸ Palis andro Egipt ačhiľa nevo kralis, savo na džanelas nič pal o Jozef. ⁹ Ov phenda peskere manuŝenge: "Dikhen, o Izraeliti hine buter the zoraleder sar amen. ¹⁰ Aven keras vareso lenca, hoj te na en mek buter. Bo te ela o mariben, on šaj džan pre le űeprijateliskeri sera a marena pes amenca, a avke šaj džan het andral adi phuv." ¹¹ Vašoda upral o Izraeliti ačhađa dozorcen, hoj len te trapinen phare bučenca sar otroken. On ačhavenas prekal o Faraonos o fori Pitom the Raamses, kaj sas leskere skladi. ¹² So buter len o Egiptana trapinenas, buter o Izraeliti baronas a sas len buter čhave a zalenas buter lengeri phuv. Vašoda o Egiptana lendar igen daranas ¹³ a trapinenas len igen phara bučaha. ¹⁴ O dživipen lenge kerenas igen pharo, bo ispidenas len te kerel phari buči le cehlenca čhikatar, mušinenas te kerel e buči pre maľa a kerenas lenca igen namištes.

¹⁵ Palis o Egiptsko kralis phenda le Hebrejike džuvlenge, la Šifrake the la Puake, save pomožinas le džuvlenge paš o ločhiben: ¹⁶ "Sar pomožinena le Hebrejike džuvlenge te ločhol, dikhen, či hin muršoro, vaj čhajori. Le muršoren murdarena, ale le čhajoren mukena te dživel." ¹⁷ Ale ola džuvľa pes daranas le Devlestar a na kerenas avke, sar lenge phenda. ¹⁸ Avke len o Faraonos diňa te vičinel angle peste a phenda lenge: "Soske muken te dživel le muršoren?"

¹⁹ O džuvľa leske odphende: "O Hebrejika džuvľa nane ajse sar o Egiptska. On hine zoraleder a lengere čhave aven pro svetos sigeder, sar ke lende dodžas."

²⁰ O Del sas jileskero ke ola džuvľa, save pomožinas paš o ločhiben, vašoda o Izraeliti dureder baronas a sas buter. ²¹ A vaš oda, hoj ola džuvľa daranas le Devlestar, diňa, hoj te el the len peskere čhave.

²² Palis o Faraonos prikazinda savore peskere manuŝenge: "Len dojekhe Hebrejike muršores, savo

uľol, a čhiven les andro paňi Nil, ale le čhajoren muken te dživel!"

Sar o Mojžiš uliľa

2 Andre oda časos varesavo murš andral o kmeňos Levi, peske iľa romňa andral peskero kmeňos.

² Odi džuvľi ačhiľa khabňi a uliľa lake muršoro. Sar oj dikhľa, hoj hino šukar, garuvelas les trin čhon. ³ Ale sar les buter našti garuvelas, iľa o trstinakero košaris, makhľa les avri la smolaha, hoj te na džal andre o paňi. Thoda le muršores andre a palis thoda o košaris andre trstina paš o paňi Nil. ⁴ Leskeri pheň ačhelas dureder, hoj te dikhel, so pes leha ačhela.

⁵ Ipen akor le Faraonoskeri čhaj pes ode avľa te thovel (morel) a lakere služki pes prephirenas pašal o brehos. Sar oj dikhľa o košaris, bičhađa jekha peskera služka, hoj les te anel. ⁶ Sar otkerđa o košaris, dikhľa ode le muršores, savo rovelas. Sas lake pharo pre leste a phenda: "Kada muršoro hino le Hebrejike čhavidar."

⁷ Akor le čhavoreskeri pheň phučľa le Faraonoskera čhatar: "Kames, hoj te džav a te anav khatar o Hebreja varesava džuvľa, savi dela te pijel le čhavores o kolin vaš tu?"

⁸ "He, dža!" oj odphenda. Avke oj geľa a vičinda le čhavoreskera da. ⁹ Sar avľa, le Faraonoskeri čhaj lake phenda: "Le kale čhavores a de les te pijel, me tuke vaš oda počinava." Oj les iľa a delas les te pijel. ¹⁰ Sar o čhavoro sas bareder, oj les ligenda ke Faraonoskeri čhaj. Oj peske les iľa čhaske a diňa leske nav Mojžiš, bo phenda peske: "Se ilom les avri andral o paňi."

O Mojžiš denašel andro Midijan

¹¹ Sar o Mojžiš imar bariľa avri, geľa andre jekh džives ke peskere nipi, a dikhelas len, sar keren phares buči. Androda dikhľa, sar o Egiptanos marel jekhe muršes andral leskero narodos. ¹² O Mojžiš pes rozdikhľa pašal peste, či les vareko na dikhel a sar na dikhľa űikas, murdarda le Egiptanos a začhida les la pošaha. ¹³ Pre aver džives o Mojžiš pale geľa ke lende a dikhľa, sar pes duj Hebreja maren maškar peste, a phučľa olestar, savo kerelas namištes: "Soske mares tire phrales?"

¹⁴ Oda murš leske odphenda: "Ko tut ačhađa upral amende vodcaske the sudcaske? So, kames the man te murdarel, avke sar murdarda le Egiptanos?" Akor o Mojžiš igen predarandiľa a phenda peske: "Imar džanen paloda, so kerdom."

¹⁵ Sar pes pal oda o Faraonos došundā, kamla te del le Mojžiš te murdarel. Ale o Mojžiš denašla a ačhila te bešel andre phuv le Midijanengeri. Ode jekhvar bešel las paš e chañig. ¹⁶ Le Jetro, le rašas andro Midijan, sas efa čhaja. On avle ke chañig te cirdel o pañi andro žlabi prekal le dadeskero stados. ¹⁷ Androda avle ode o pastjera a tradle len avri odarik. Ale o Mojžiš uštíla, pomožinda lenga a diña lengere stados te pijel pañi.

¹⁸ Sar avle le Jetroskere † čhaja pale khere, phučla lendar: "Soske adadžives avlan avke sig?"

¹⁹ On leske odphende: "Varesavo Egiptanos amen zachrañinda le pastjerendar a the cirdña o pañi prekal amende the prekal o stados."

²⁰ "Kaj hino?" phučla lendar. "Soske les ode muklan? Vičinen les, mi avel te chal!"

²¹ Avke o Mojžiš priačhila pre oda, hoj ačhela ko Jetro. Ov leske diña romňake peskera čha la Cippora. ²² Palis lake ulíla muršoro, a o Mojžiš phenda: "Dava leske nav Geršom, bo som cudzincos andre kadi phuv."

²³ Pal o but berša o Egiptsko kralis muľa, ale o Izraeliti dureder cerpinenas andro otroctvo a vičinenas: "Mangas tut, pomožin amenge, Devla." Lengero mangipen geľa dží paš o Del. ²⁴ O Del šundā lengero roviben a leperđa peske pre zmluva, so phandla le Abrahamoha, Izakoha the le Jakoboha, ²⁵ bo dikhelas, so pes kerel le Izraelitena a sas leske pharo pre lende.

O RAJ vakerel le Mojžišoha

3 No o Mojžiš pasinelas o stados ke peskero saastro Jetro, savo sas rašaj andro Midijan. Jekh džives, sar lidžalas le bakren pal e pušta, dogeľa lenca dží ko Devleskero verchos Choreb ††. ² Ode pes leske sikađa andre jag andro krakos le RAJESKERO aňjelos. O Mojžiš dikhla, hoj o krakos labol, ale na zlabol. ³ A phenda peske: "Oda hin vareso čudno! Džav te dikhel pre oda krakos, soske na zlabol."

⁴ Sar o RAJ dikhla, hoj o Mojžiš džal te dikhel pre oda, prevakerđa ke leste andral o krakos: "Mojžiš, Mojžiš!"

Ov odphenda: "Kade som."

⁵ O Del phenda: "Ma av pašeder! Čhiv tele o sandalki pal o pindre, bo e phuv, pre savi aches, hiñi sentñi.

⁶ Me som o Del tire dadengero, o Del le Abrahamoskero, le Izakoskero the le Jakoboskero." Akor peske o Mojžiš garuđa o muj, bo daralas te dikhel pro Del.

⁷ O RAJ leske phenda: "Mištes dikhľom o trapišagos mire manušengero andro Egipt. Šundom len, sar vičinen, hoj lenga te pomožinav, bo o dozorci len trapinen sar otroken a džanav pal lengere dukha. ⁸ Vašoda me avľom tele, hoj len te zachrañinav andral o vasta le Egiptanengere. Avľom len te lel avri andral odi phuv a te lidžal len andre odi phuv, so hiñi igen bari the lači, a andre savi čulal o thud the medos – e phuv, kaj bešen o Kanaančana, o Chetitana, o Amoreja, o Perizeja, o Chivija the o Jebuseja. ⁹ O roviben le Izraelitengero doavľa dží ke ma a dikhľom lengero trapišagos, sar lenca o Egiptana namištes keren.

† E Hebrejiko čhib: le Reueloskere †† Oda hin o verchos Sinaj.

¹⁰ Akana dža, bičhavav tut ko Faraonos, hoj te lidžas mire manušen, le Izraeliten, avri andral o Egipt."

¹¹ Ale o Mojžiš le Devleske odphenda: "Ko som me, hoj te džav ko Faraonos a te lav avri le Izraeliten andral o Egipt?"

¹² O Del leske phenda: "Me avava tuha. Kada tuke ela pro znameňje, hoj tut me bičhadom: Sar leha avri le manušen andral o Egipt, tumen man lašarena pre kada verchos."

¹³ Ale o Mojžiš leske phenda: "Te džava paš o Izraeliti, phenava lenga: 'O Del tumare dadengero man bičhada ke tumende,' a phučena mandar: 'Sar pes vičinel?' So lenga odphenava?"

¹⁴ O Del le Mojžišoske odphenda: "ME SOM, SAVO SOM. Phen le Izraelitenge, hoj oda, ko pes vičinel ME SOM, man bičhada ke tumende."

¹⁵ A mek o Del phenda le Mojžišoske: "Le Izraelitenge phen kada: 'O RAJ man bičhada man ke tumende, o Del tumare dadengero – o Del le Abrahamoskero, le Izakoskero the le Jakoboskero.

Kada hin miro nav pro furt, savo tumenge leperena a saveha man vičinen a pokoleňje pro pokoleňje.'

¹⁶ Dža, zvičín le Izraelike vodcen a phen lenga: 'Sikađa pes mange o RAJ, o Del tumare dadengero – o Del le Abrahamoskero, le Izakoskero the le Jakoboskero.' Ov mange phenda: 'Me dikhavas mištes pre savoro, so tumenca keren andro Egipt, ¹⁷ vašoda diňom lav, hoj tumen lava avri andral o pharipen andral o Egipt a lidžava andre phuv le Kanaančanengeri, le Chetitanageri, le Amorejengeri, le Perizejengeri, le Chivijengeri the le Jebusejengeri, andre phuv, kaj čulal o thud the o medos.'

¹⁸ On tut šunena a džaha le Izraelike vodcenca ko Egiptsko kralis a phenena leske: 'Arakhľa pes amenca o RAJ, o Del le Hebrejengero. Domuk amenge akana te džal trin dživeseskero drom pre pušta, hoj ode te obetinas le RAJESKE, peskere Devleske.' ¹⁹ Ale me džanav, hoj o Egiptsko kralis tumenge na domukela te džal het, ale ča akor, te pre leste ispidava mire zorale vasteha. ²⁰ Vašoda sikavava pro Egipt miri zor a marava les oleha, hoj kerava maškar lende zazraki. Palis ov tumen premukela.

²¹ Kerava avke, hoj o Egiptana tumen dena pačiv, a na džana odarik het bijal nisoste. ²² Dojekh Izraeliko džuvľi mi džal ko Egiptске susedki abo ke ola, ko bešen lenca andro kher, a mi mangel lendar varesave somnakune the rupune veci a the o šukar gada, so urena pre tumare čhajora the muršora." Avke tumenca lena o barvalipen andral o Egipt.

O RAJ del le Mojžiš znameňja

4 O Mojžiš odphenda le RAJESKE: "So te mange na pačana a na šunena man, a phenena: 'O RAJ pes tuke na sikađa?'"

² Avke o RAJ le Mojžišostar phučla: "So tut hin andro vast?"

Odphenda: "Paca."

³ Palis leske o RAJ phenda: "Čhiv la pre phuv!"

Sar o Mojžiš čhida e paca pre phuv, čerinda pes pro sap a o Mojžiš chudla lestar te denašel. ⁴ Avke leske o RAJ phenda: "Nacirde o vast a chude les le chvostostar!" O Mojžiš nacirdla o vast, chudla les a andro vast pes leske čerinda pale pre paca. ⁵ Palis o RAJ phenda: "Ker ada, hoj o Izraeliti tuke te pačan, hoj pes tuke sikađa o Del lengere dadengero – o Del le Abrahamoskero, le Izakoskero the le Jakoboskero."

⁶ Palis leske o RAJ phenda: "Thov o vast tel o plaštós!" Ov thoda, a sar les ila avri, leskero vast sas malomocno, parno sar jiv.

⁷ A o RAJ leske phenda: "Thov o vast pale tel o plaštós!" Ov thoda, a sar les ila avri, sas pale sasto, avke sar calo leskero telos.

⁸ A mek o RAJ phenda: "Te tut na šunena a na pačana pro ešebno (peršo) znameñje, pačana pro dujto. ⁹ Ale te na pačana aňi kale duje znameñjenge a na šunena tut, akor le sikra paňi andral o Nil a čhiv les avri pre šuki phuv. Oda paňi pes čerinela pro rat."

¹⁰ Akor o Mojžiš phenda: "Na, RAJEJA, ma bičhav man. Me na džanav igen mištes te vakerel. Na vakeravas šoha (ňikda) mištes angloda, aňi akana, sar vakeres peskere služobňikoha, bo polokes vakerav a zaačhav andro lava."

¹¹ O RAJ leske odphenda: "Ko diňa le manušes muj? Ko šaj kerel, hoj o manuš te el ňemo abo kašuko? Hoj te dikhel abo te el koro? Na som oda me, o RAJ?"

¹² Akana dža, me tuke pomožinava andro vakeriben a dava tut lava, so te vakeres."

¹³ Ale o Mojžiš leske pale phenda: "Mangav tut, RAJEJA, bičhav varekas avres."

¹⁴ Akor o RAJ pre leste cholisalila a phenda: "A so o Aron, tiro phral, o Levitas? Džanav, hoj ov džanel mištes te vakerel; se ov imar avel angle tu a igen radisaľola, sar tut dikhela. ¹⁵ Vakereha leha a pheneha leske, so majinel te vakerel. Me tumenge sodujđženenge pomožinava andro vakeriben a sikavava tumenge, so te keren. ¹⁶ Ov ela tiro muj, a vakerela vaš tuke ko manuša. Tu aveha avke, sar o Del a pheneha leske, so te vakerel. ¹⁷ Le andro vast kadi paca, bo laha kereha o znameňja."

O Mojžiš džal pale andro Egipt

¹⁸ Akor o Mojžiš geľa pale ke peskero sastro ko Jetro a phenda leske: "Mangav tut, muk man te džal pale ke mire manuša andro Egipt, hoj te dikhav, či mek dživen."

O Jetro leske odphenda: "Dža andro smirom!"

¹⁹ O RAJ mek andro Midijan phenda le Mojžišoske: "Dža pale andro Egipt, bo imar mule savore, save tut kamle te murdarel." ²⁰ O Mojžiš ila peskera romňa the le čhaven, thoda len pro somaris a džalas lenca pale andro Egipt. Iľa peha andro vast e paca, so leske o Del phenda.

²¹ O RAJ mek le Mojžišoske phenda: "Sar džaha pale andro Egipt a sar aveha anglo Faraonos, merkin pre oda, hoj te keres savore kala zazraki, pre save tut diňom zor. Me kerava, hoj leskero jilo te el sar bar

avke, hoj na premukela mire manušen." ²² Palis le Faraonoske pheneha: "Kada vakerel o RAJ: 'O Izrael hi-no miro ešebno čhavo, ²³ a phendom tuke, hoj te premukes mire čhas, hoj man te lašarel. Ale tu les na kamla te premukel, vašoda murdarava tire ešebne čhas.'" "

²⁴ Jekhvar pro drom andro Egipt, sar rači zaačhile te presovel, o RAJ pes arakhla le Mojžišoha a kamla leske te lel o dživipen. ²⁵ Akor e Cippora ila e baruňi čhuri a odčhinda peskere čhaske e cipa le garude muršeskere kotorestar. Palis pes ola cipaha chudla le Mojžišoskere čangendar a phenda: "Tu sal miro rom le rateskero!" ²⁶ Avke les o RAJ mukla te dživel. Vašoda pes paš o občhindipen phenelas: "O rom le rateskero."

²⁷ O RAJ phenda le Aronoske: "Dža pre pušta, hoj pes te zdžas le Mojžišoha." O Aron geľa a zgeľa pes leha paš o verchos le Devleskero a čumidla les. ²⁸ Palis o Mojžiš phenda le Aronoske savore le RAJESKERE lava, savenca les bičhada, the pal o znameňja, save o RAJ prikazinda, hoj te kerel.

²⁹ Avke o Mojžiš the o Aron gele andro Egipt a zvičinde savore Izraelike vodcen. ³⁰ O Aron lenge phenda savoro, so o RAJ phenda le Mojžišoske. A o Mojžiš anglo jakha le manušengere kerelas o znameňja. ³¹ Sar oda o manuša dikhle, pačandile. A sar šunde, hoj o RAJ avla ke lende, a hoj dikhla lengero pharipen, pele pro khoča a chudle les te lašarel.

O Mojžiš the o Aron anglo Faraonos

5 Palis o Mojžiš the o Aron gele anglo Faraonos a phende: "Kada vakerel o RAJ, o Del le Izraelitengero: 'Premuk mire manušen, hoj pre pušta te oslavinen o inepos pre miri pačiv!' "

² "Ko hin o RAJ?" odphenda leske o Faraonos. "Soske majinav les te šunel a te premukel le Izraeliten? Me le RAJES na džanav a le Izraeliten na premukava."

³ On leske phende: "Arakhla pes amenca o Del le Hebrejengero. Domuk amenge te džal trine dživesengero drom pre pušta, hoj te obetinas ode le RAJESKE, amare Devleske. Bo te na keraha ada, marelama amen le nasvalibnaha abo le šablaha."

⁴ Ale o Faraonos lenge phenda: "Mojžiš the Aron, soske odligenen le manušen lengera bučatar? Džan pale, keren tumari buči! ⁵ Dikh, andre kadi phuv hin but tumare manuša a tumen kamen, hoj te preačhen te kerel e buči?"

O Faraonos len del phareder buči

⁶ Oda džives o Faraonos diňa prikazil le dozorcenge upral o otroka the le Izraelengere muršenge, save dodikhenas pre buči: ⁷ "Imar na dena sar angloda le manušen o phusa, hoj te keren o cehli čhikatar. Mi kiden peske korkore o phusa. ⁸ Ale ispiden pre lende, hoj te keren ajci cehli, sar kerenas dži akana. Nič frimeder! Hine leňiva, vašoda man avke mangel, hoj len te mukav te džal, hoj te obetinen peskere De-

vleske. ⁹ Ole muršen kampil te del phareder buči, hoj te keren a te na el len časos te šunel ola klamišagi.”

¹⁰ Avke o Egiptānengere the o Izraelengere dozorci, phende le Izraelitenge: “O Faraonos phendā, hoj na dela tumen buter o phusa. ¹¹ Korkore tumenge mušinen te kidel o phusa, kaj ča arakhena. Ale mušinen te kerel ajci cehli čhikatar, sar kerenas furt.” ¹² Avke o manuša gele te rodel o phusa pal calo Egipt. ¹³ O dozorci pre lende ispidenas a phenenas: “Keren sako džives ajci sar angloda, sar tumen denas o phusa.” ¹⁴ Le Faraonoskere dozorci chudle te marel le Izraelengere dozorcen, save sas ačhade te dodikhel e buči, a phenenas lenge: “Soske na kerdān aňi idž aňi adadžives ajci cehli čhikatar sar angloda?”

¹⁵ Palis gele le Izraelengere dozorci ko Faraonos a igen les mangelas: “Soske kada keres amanca, rajeja amaro? ¹⁶ O phusa amenge na doden a hin amenge prikazimen, hoj te keras furt o cehli čhikatar! Vašoda amen maren, ale vinovate oleske hine tire manuša.”

¹⁷ O Faraonos phendā: “San leňiva a na kamen te kerel buči, vašoda phenen: ‘Muk amen, hoj te džas te obetinel le RAJESKE.’ ¹⁸ Džan a keren buči! O phusa tumenge na dodena, ale mušinen te kerel ajci cehli čhikatar sar angloda.”

¹⁹ O Izraeloskere dozorci dikhle, hoj lenca nane mištes, sar lenge phendā: “Mušinen te kerel ajci cehli sar angloda.” ²⁰ Sar džanas avri khatar o Faraonos, zgele pes le Mojžišoha the le Aronoha, save pre lende užarenas. ²¹ Ola murša lenge phende: “O RAJ mi dikhel pre oda, so kerdān, a mi marel tumen vaš oda, bo akana amen džungľardān anglo Faraonos the angle leskere služobňika. Kada, so kerdān, hin avke, sar te lenge diňanas andro vast e šabľa, hoj amen te murdaren.”

O Mojžiš dovakerel le RAJESKE

²² Akor pes o Mojžiš visardā ko RAJ a mangelas les: “RAJEJA, soske domukľal kajci nalačhipen pre tire nipi? Soske man ade bičhadal? ²³ Akorestar, sar geľom anglo Faraonos, hoj leha te vakerav andre tiro nav, kerel lenca mek goreder a tu nič na keres, hoj len te zachraňines.”

O RAJ pale del lav pal e zachrana

6 O RAJ phendā le Mojžišoske: “Akana dikheha, so kerava le Faraonoske. Me pre leste ispidava, hoj te premukel mire manušen a avke zorales ispidava, hoj tradela len avri.”

² O Del prevakerđā ko Mojžiš a phendā: “Me som o RAJ. ³ Sikađom man le Abrahamoske, le Izakoske the le Jakoboske sar Nekzoraleder Del, ale miro nav o RAJ lenge na diňom te sprindžarel. ⁴ Phandľom lenca e zmluva, hoj lenge dava o Kanaan, e phuv, kaj angloda bešenas sar cudzinci. ⁵ A the šundom, sar o Izraeliti rovenas pharipnastar, bo o Egiptāna lendar kerde otroken, a leperđom mange pre miri zmluva.

⁶ Vašoda phen le Izraelitenge: ‘Me som o RAJ a lava tumen avri andral o zaphandľipen le Egiptānengero a zachraňinava tumen andral o otroctvo. Cinava tumen avri, bo marava len bare ranenca, mire zorale vasteha. ⁷ Prilava tumen sar mire manušen a avava tumaro Del. Sprindžarena, hoj me som o RAJ, tumaro Del. Me tumen lidžava avri andral o zaphandľipen le Egiptānendar. ⁸ Anava tumen andre odi phuv, pal savi la veraha phendom, hoj dava le Abrahamoske, le Izakoske the le Jakoboske. Dava la tumenge a ela tumari. Me som o RAJ.’”

⁹ Avke o Mojžiš geľa oda te phenel le Izraelitenge, ale on la phara bučatar na birinenas, sas len dos, a vašoda les na šunen as.

¹⁰ O RAJ phendā le Mojžišoske: ¹¹ “Dža anglo Faraonos, anglo Egiptsko kralis, a phen leske, hoj te premukel le Izraeliten andral leskeri phuv!”

¹² Ale o Mojžiš leske odphendā: “Te man na šunen o Izraeliti, sar man šaj šunel o Faraonos? A mek ke oda na džanav mištes te vakerel.”

¹³ O RAJ prevakerđā ko Mojžiš the ko Aron pal o Izraeliti the pal o Faraonos a prikazindā lenge, hoj te lidžan avri le Izraeliten andral o Egipt.

Le Mojžišoskero the Aronoskero rodokmeňos

¹⁴ Kala hine o famelijengere vodci:

Le Izraeloskere † ešebne (perše) čhas Ruben sas štar čhave: O Chanoch, Pallu, Checron the o Karmi. On sas le Rubenoskere fajti.

¹⁵ Le Šimeon sas čhave o Jemuel, Jamin, Ohad, Jachin, Cochar the o Šaul, saveske sas daj andral o Kanaan. Kala sas le Šimeonoskere fajti.

¹⁶ Kala hine le Leviskere čhave pal lengero rodokmeňos: O Geršon, Kohat the o Merari. O Levi dživelas 137 berša.

¹⁷ Le Geršon sas čhave o Libni the o Šimej. Lendar sas but potomki.

¹⁸ Le Kohat sas čhave o Amram, Jishar, Chebron the o Uzziel. O Kohat dživelas 133 berš.

¹⁹ Le Merari sas čhave o Machli the o Muši.

Kala savore hine le Leviskere fajti pal lengero rodokmeňos.

²⁰ O Amram peske iľa romňa peskera cetka la Jochebed a laha les sas o Aron the o Mojžiš. O Amram dživelas 137 berš.

²¹ Le Jishar sas čhave o Korach, Nefeg the o Zichri.

²² Le Uzziel sas čhave o Mišael, Elcafah the o Sitri.

²³ O Aron peske iľa romňa la Elišeba, savi sas čhaj le Amminadaboskeri a pheň le Nachšonoske. Le Aron sas laha o Nadab, Abihu, Eleazar the o Itamar.

²⁴ Le Korach sas trin čhave: o Assir, Elkanah the o Abiasaf. Kala sas le Korachoskere fajti.

²⁵ O Eleazar, le Aronoskero čhavo, peske iľa romňa jekha le Putieloskere čhajendar, a laha les sas o Pinchas.

Kala savore hine o fajtakere vodci andral o kmeños Levi.

²⁶ O Mojžiš the Aron hine kala, savenge o RAJ phendā: "Lidžan avri andral o Egipt le Izraeliten dojekhes pal peskero kmeños." ²⁷ Sas oda on, save vakerenas le Faraonoske, le Egiptske kraliske, hoj te premukel le Izraeliten andral o Egipt.

O RAJ bičhavel le Mojžiš the le Aron ko Faraonos

²⁸ Akor, sar o RAJ prevakerdā ko Mojžiš andro Egipt, ²⁹ o RAJ leske phendā: "Me som o RAJ. Phen le Faraonoske savoro, so tuke phenava."

³⁰ Ale o Mojžiš leske odphendā: "Me na džanav mištes te vakerele. Sar man šaj šunel avri o Faraonos?"

Ešebne eña rani pro Egipt

7 O RAJ phendā le Mojžišoske: "Dikh, ačhadom tut sar Devles, hoj te vakeres le Faraonoske a tiro phral o Aron ela sar tiro prorokos. ² Tu leske pheneha savoro, so tuke prikazinava a tiro phral o Aron vakerele le Faraonoha, hoj te premukel le Izraeliten andral peskeri phuv. ³ Ale me kerava le Faraonoske o jilo sar bar a andro Egipt kerava igen but mire znameñja the zazraki. ⁴ O Faraonos tumen na šunela, vašoda sikava pro Egipt miri zor a marava les le bare ranenca. Avke lava avri andral o Egipt le Izraeliten pal peskere kmeñi. ⁵ Sar nacirdava miro vast pro Egipt a lava avri odarik le Izraeliten, akor o Egiptāna sprindžarena, hoj me som o RAJ."

⁶ Avke o Mojžiš the o Aron kerde sa avke, sar lenge prikazinda o RAJ. ⁷ Le Mojžišoske sas ohtovardeš (80) berš a le Aronoske ohtovardeš the trin (83) berš, sar vakerenas le Faraonoha.

E paca čerimen pro sap

⁸ O RAJ phendā le Mojžišoske the le Aronoske: ⁹ "Sar o Faraonos tumenge phenela, hoj te keren varesavo zazrakos, phen le Aronoske: 'Le e paca a čhiv la pre phuv anglo Faraonos a čerinela pes pro sap.'"

¹⁰ Avke o Mojžiš the o Aron gele anglo Faraonos a kerde avke, sar lenge prikazinda o RAJ. O Aron čhidā e paca anglo Faraonos the angle leskere uradñika a e paca pes čerinda pro sap. ¹¹ Akor o Faraonos vičinda ke peste peskere godāvere muršen the le čarodejñiken a on tiš kerde odi veca peskere čarenca. ¹² Dojekh lendar čhidā peskeri paca pre phuv a on pes čerinde pro sapa, ale le Aronoskeri paca chaľa lengere paci. ¹³ Ale le Faraonoskero jilo zoralila sar bar a na šunda len, avke sar phendā o RAJ.

Ešebno (peršo) rana: O pañi čerimen pro rat

¹⁴ O RAJ phendā le Mojžišoske: "Le Faraonoskero jilo hino zoralo sar bar a na kamel te premukel le manušen. ¹⁵ Tajsja tosara dža ko Faraonos, sar džala tele ko pañi Nil. Le tuha e paca, so pes čerinda pro sap, a ode les užar paš o brehos. ¹⁶ Pheneha leske: 'O RAJ, o

Del le Hebrejengero, man bičhadā ke tute, hoj tuke te phenav: "Premuk mire manušen, hoj man te lašaren pre pušta." Ale tu dži akana na šundāl. ¹⁷ Vašoda o RAJ tuke phenel: "Pal ada džaneha, hoj me som o RAJ." Dikh, akana la pacaha, so hiñi mande andro vast, demava pal o Nil a o pañi pes čerinela pro rat. ¹⁸ O ribi, save hine andro pañi murdalona a o Nil khandisalo avke, hoj o Egiptāna našti pijena le pañestar.'"

¹⁹ O RAJ phendā le Mojžišoske: "Phen le Aronoske, hoj te nacirdel o vast upral o paña, kanali the nadrži andre calo Egipt a dojekh pañi pes ode čerinela pro rat, the andro kaštune the barune nadobi ela rat."

²⁰ O Mojžiš le Aronoha kerde sa avke, sar lenge o RAJ prikazinda. O Aron hazdña e paca, savi leste sas andro vast, a anglo Faraonos the leskere uradñika demadā pal o Nil a savoro pañi andre pes čerinda pro rat. ²¹ O ribi andro Nil murdalila a o pañi chudla te khandel avke, hoj o manuša andro Egipt našti pile o pañi. Avke sas o rat pal calo Egipt.

²² Ale o Egiptske čarodejñika oda tiš kerde peskere čarenca a le Faraonoskero jilo sas sar bar a na šunda len, avke sar phendā o RAJ. ²³ Ov pes visardā a geľa andre peskero palacis. Añi kalestar peske na kerda nič.

²⁴ Savore Egiptāna kopalinenas o chañiga pašal o Nil, hoj len te el pañi te pijel, bo andral o Nil našti pijenas.

²⁵ Efta džives likerelas oda, sar o RAJ čerinda o pañi andro Nil pro rat.

Dujto rana: o žabi

²⁶ Pañis o RAJ phendā le Mojžišoske: "Dža ko Faraonos a phen leske so phenel o RAJ: 'Premuk mire manušen, hoj man te lašaren. ²⁷ Ale te len na kameha te premukel, bičhavava všadzik pre cali tiri phuv le žaben. ²⁸ Andro pañi Nil ela pherdo žabi a avena odarik avri a džana andre tiro palacis, ode, kaj soves, andro khera tire uradñikenge, pre tire manuša, andre tire bova the pro chumer. ²⁹ Ena ajci, hoj phirena pal tu, pal tire manuša the pal tire uradñika.'"

8 O RAJ phendā le Mojžišoske: "Phen le Aronoske, hoj te nacirdel o vast la pacaha upral o potoki, kanali the nadrži a avke an le žaben pro Egipt."

² Avke o Aron nacirdla o vast upral o paña andro Egipt, o žabi avle avri a zaučharde calo Egipt. ³ Ale avke kerde the o čarodejñika peskere čarenca a ande le žaben pro Egipt.

⁴ O Faraonos diña te vičinel le Mojžiš the le Aron a phendā lenge: "Modlīnen tumen ko RAJ, hoj te lel mandar the mire manušendar le žaben a me premukava tire manušen, hoj te obetinen le RAJESKE."

⁵ O Mojžiš phendā le Faraonoske: "Tu peske kide avri, kana man te modlīnav vaš tu, vaš tire služobñika the manuša, hoj o RAJ te odlel tutar the tire kherestar le žaben a te en ča andro Nil."

⁶ "Tajsja," phendā o Faraonos.

Akor o Mojžiš phendā: "Mi ačhel pes avke, sar phendāl, hoj te džanes, hoj ñiko nane ajso sar o RAJ, amaro Del. ⁷ O žabi oddžana tutar, andral tire khera,

tire uradnikendar the manušendar. Ačhena ča andro Nil."

⁸ Avke o Mojžiš the o Aron odgele pašal o Faraonos. Paľis o Mojžiš igen mangelas le RAJES, hoj te odlele le Faraonostar le žaben, saven pre leste bičhadā. ⁹ O RAJ kerda avke, sar les mangelas o Mojžiš. A o žabi andro khera, pro dvori the pro malī murdaľile. ¹⁰ O Egiptāna len skidenas a thovenas pro bare kopi a o khandipen lendar sas pal calo Egipt. ¹¹ Sar o Faraonos dikhľa, hoj o žabi murdaľile, zoralarda peskero jilo sar bar a na šunda len, avke sar phenda o RAJ.

Trito rana: o muški

¹² O RAJ phenda le Mojžišoske: "Phen le Aronoske, hoj te nacirdel e paca a mi demel laha pal o prachos, so hin pre phuv, a lestar ela o muški pal calo Egipt." ¹³ On oda kerde. O Aron nacirdľa o vast la pacaha a demada pre phuv pal o prachos. Oda prachos andre calo Egipt pes čerinda pro muški, a gele pro manuša the pro dobitkos. ¹⁴ The o čarodejňika kamle te prianel le mušken, ale našti kerde. A o muški trapinenas dureder le manušen the le dobitkos.

¹⁵ Akor o čarodejňika phende le Faraonoske: "Ada kerda o Del!" Ale le Faraonoskero jilo sas sar bar a na šunda len, avke sar oda phenda o RAJ.

Štarto rana: o muchi

¹⁶ O RAJ phenda le Mojžišoske: "Sar o Faraonos džala sig tosara paš o paňi, džā anglal leste a phen leske: 'Kavke vakerele o RAJ: Premuk mire manušen, hoj man te lašaren!' ¹⁷ Bo te na premukeha mire manušen, bičhavava pre tute, pre tire uradňika, tire manuša the khera o muchi. Le Egiptānengere khera the e phuv, pre savi ačhen, ela pherdo muchi. ¹⁸ Ča andre phuv Gošen, kaj bešen mire manuša, na bičhavava le muchen, hoj te džanes, hoj me, o RAJ, som andre kadi phuv. ¹⁹ Kerava aver veca mire manušenge sar tire manušenge. A kada znameňje pes sikavela tajsa."

²⁰ O RAJ ada the kerda. Andre le Faraonoskero palacis the andre leskere uradňikengere khera, avle but muchi, sar e kalī chmara a zňičinde e phuv andro calo Egipt.

²¹ Akor o Faraonos vičinda le Mojžiš the le Aron a phenda lenge: "Džān a obetinen peskere Devleske andre kadi phuv."

²² "Ada na ela mištes ade te kerel," phenda leske o Mojžiš, "bo prekal o Egiptāna hin ada džungipen, te obetinas le RAJESKE amare Devleske. Bo te angle lende obetinaha oda, so lenge hin džungalo, či amen na murdarena vaš oda le barenca? ²³ Mušinas te džal trin dživeseskero drom pre pušta a ode te obetinel le RAJESKE amare Devleske, avke sar amenge prikazinel."

²⁴ O Faraonos phenda: "Mukava tumen, hoj te obetinen le RAJESKE, tumare Devleske, pre pušta, ale ča ma džān igen dur. Māngen pes the vaš mande."

²⁵ O Mojžiš odphenda: "Sar pašal tu oddžava, modľinava man vaš tute ko RAJ, a tajsa oddžana o muchi tu-

tar, tire uradňikendar the tire manušendar. Ale ča pale te na thoves amenca avri, hoj na premukeha le manušen te džal te obetinel le RAJESKE."

²⁶ Paľis o Mojžiš odgeľa le Faraonostar a mangelas le RAJES. ²⁷ O RAJ kerda avke sar mangelas o Mojžiš. O muchi odletinde le Faraonostar, leskere uradňikendar the leskere manušendar, a na ačhiľa ode aňi jekh mucha. ²⁸ Ale the akana le Faraonoskero jilo sas zoralo sar bar a le manušen na premukľa.

Pandžto rana: o dobitkos murdaľol

9 O RAJ phenda le Mojžišoske: "Džā pale ko Faraonos a phen leske, hoj kavke vakerele o RAJ, o Del le Hebrejengero: 'Premuk mire manušen, hoj mange te služinen. ² Ale te len na premukeha a zľikereha len, ³ potrestinava tut avke, hoj bičhavava baro nasvaliben pre savoro tiro dobitkos – pro graja, somara, távi, gurumňa, bakre the pro kozi. ⁴ A kerava, hoj aňi jekh le Izraeloskere dobitkostar te na murdaľol, ča le Egiptānengere.

⁵ Me, o RAJ, oda kerava tajsa.'" ⁶ Avke o RAJ oda pre aver džives the kerda. Savoro dobitkos le Egiptānengero murdaľiľa, ale le Izraelengero na. ⁷ O Faraonos pes dophučľa, či le Izraelitengere dobitkostar nič na murdaľiľa, a čačes sas avke. Ale the avke le Faraonoskero jilo sas zoralo a na premukľa le Izraeliten.

Šovto rana: o vredi

⁸ O RAJ phenda le Mojžišoske the le Aronoske: "Len le vastenca o prachos andral o bov a o Mojžiš mi čhivel oda andro luftos anglo Faraonos. ⁹ A pal calo Egipt e balvaj rozphurdela o prachos a olestar pes čhivela avri pro manuša the pro dobitkos o hňisava vredi (vredi)."

¹⁰ Avke ile o prachos andral o bov, gele anglo Faraonos a o Mojžiš rozčhida oda andro luftos. A pro manuša the pro dobitkos avle avri o hňisava vredi. ¹¹ O čarodejňika le Egiptānengere našti gele anglo Mojžiš, bo o vredi sas pre lende the pre savore Egiptāna. ¹² Ale o RAJ avke kerda, hoj le Faraonoskero jilo sas sar bar, a vašoda len na šunda, avke sar phenda o RAJ prekal o Mojžiš.

Eftato rana: o brišind le krupenca

¹³ O RAJ prevakerda ko Mojžiš: "Sig tosara džā anglo Faraonos a phen leske, hoj kavke phenel o RAJ, o Del le Hebrejengero: 'Premuk mire manušen, hoj mange te služinen, ¹⁴ bo akana bičhavav pre tu, pre tire uradňika the pre tire manuša savore rani, hoj te sprindžares, hoj pre cali phuv nane ajso sar me, o RAJ.

¹⁵ Imar akor tut šaj khosľom tele pale phuv, sar hazdňom miro vast a maravas tut the tire manušen le bare nasvalibnaha. ¹⁶ Ale mukľom tut te dživel ča vaš oda, hoj pre tute te sikavav miri zor a hoj pal miro nav pes te vakerele pal cali phuv. ¹⁷ No tu pes dureder hazdes upre a na kames te premukel mire manušen. ¹⁸ Vašoda tajsa kajso časos bičhavava pre phuv baro

brišind le krupenca, so mek na sas andro Egipt, kanastar hino dži adadžives. ¹⁹ Akana sig de te garuvel tire stadi the savoro, so tut hin pre maľa, bo sar chudela te del oda brišind, merena savore manuša the stadi, so ena avri.' "

²⁰ Akor varesave le Faraonoskere uradņika, save darandile le RAJESKERE lavendar, ligende peskere otroken andro kher a le staden andro maštalņi. ²¹ Aver džene, save ola lava na priile, mukle peskere otroken the staden pre maľa.

²² Palis o RAJ phendā le Mojžišoske: "Hazde upre o vast ko ņebos, hoj pre calo Egipt te del baro brišind le krupenca: pro manuša, dobitkos the pre savore rastlini andre odi phuv." ²³ Sar o Mojžiš hazdņa peskeri paca ko ņebos, o RAJ kerđa, hoj te herminel, te del o brišind le krupenca the e jag te perel pre phuv. Avke o RAJ kerđa andro Egipt, ²⁴ hoj delas baro brišind le krupenca a marenas o bleski. Kada mek na sas andro Egipt, kanastar ačhiľa narodoske. ²⁵ Oda brišind le krupenca delas pre savoro, so sas pre maľa andro Egipt, či pro manuša vaj pro dobitkos, a zņičińda savore rastlini the phagerđa o stromi pre maľa. ²⁶ Ča andre phuv Gošen kaj bešenas o Izraeliti na delas oda baro brišind.

²⁷ Palis peske o Faraonos dińa te vičinel le Mojžiš the le Aron a phendā lenge: "Akana kerđom binos. O RAJ hino čačipnaskero a man the mire manušen nane čačipen. ²⁸ Mangen le RAJES, bo imar hin dos le Devleskere perumendar the krupendar. Premukava tumen, na mušinen ade te ačhel."

²⁹ O Mojžiš leske odphendā: "So ča džava avri andral o foros, hazdava mire vasta ko RAJ a mangava les. O perumi the o brišind le krupenca preačhela, hoj te prindžares, hoj e phuv hińi le RAJESKERI. ³⁰ Ale me džanav, hoj tu the tire uradņika pes the avke mek na darana le RAJESTAR, le Devlestar."

³¹ O ľanos the o jačmeńis sas zņičimen, bo imar akor sas o jačmeńis andro klasi a pro ľanos sas o kvitki.

³² Ale ņisavi pšeńica na sas zņičimen, bo barol nasigeder.

³³ Palis o Mojžiš odgeľa le Faraonostar avri andral o foros a hazdņa o vasta ko RAJ. O perumi preačhiľa a o brišind le krupenca na delas buter pre phuv. ³⁴ Sar o Faraonos dikhľa, hoj o brišind le krupenca the o perumi preačhile, kerelas dureder o bini. Leskero jilo the leskere uradņikengere jile ačhile barune. ³⁵ Vašoda, hoj o jilo le Faraonoskero sas furt zoralo, le Izraeliten na premukľa, avke sar o RAJ prevakerđa prekal o Mojžiš.

Ochtoto rana: o maľengere grajora

10 Palis o RAJ phendā le Mojžišoske: "Dža ko Faraonos. Me kerđom, hoj le Faraonoskero jilo the leskere uradņikengere jile te en barune, hoj maškar lende te kerav kala znameńja, ² a hoj te vakeres peskere čhvenge the lengere čhvenge pal oda, so kerđom andro Egipt, hoj te džanen, hoj me som o RAJ."

³ Avke o Mojžiš the o Aron gele ko Faraonos a phende leske: "Kavke vakereľ o RAJ, o Del le

Izraelitengero: 'Mek keci tuke ľikerela, hoj pes angle ma te pokorines? Premuk mire manušen, hoj man te džan te lašareľ!' ⁴ Te na premukeha mire manušen, mek tajsa anava pre tiri phuv le maľengere grajoren. ⁵ Ena ajci, hoj zaučharena cali phuv a na dičhola la. Chana savoro, so tumenge ačhiľa paloda, sar delas o brišind le krupenca, a pal e maľa obchana savore stromi. ⁶ Pherarena tiro palacis, o khera tire uradņikengere the savore khera andro Egipt. Ajso vareso mek na dikhle tire dada, ańi o phure dada akorestar, sar avle andre kadi phuv dži adadžives." Palis o Mojžiš odgeľa le Faraonostar.

⁷ Le Faraonoskere uradņika phende: "Dži kana mek amenge kada murš kerela pharipen? Premuk ole manušen, hoj te lašaren le RAJES, peskere Devles. Tu na dikhes pre oda, hoj o Egipt ela zņičimen?"

⁸ Palis le Mojžiš the le Aron ande pale anglo Faraonos a ov lenge phendā: "Džan a lašaren le RAJES, tumare Devles! Ale ko tumenca džal?"

⁹ O Mojžiš odphendā: "Amen džaha savore, či terno vaj phuro, laha amare čhaven, čhajen the le bakren the o dobitkos, bo kamas te džal te oslavinel o inepos pre le RAJESKERI pačiv."

¹⁰ O Faraonos lenge odphendā: "Thovav vera pro RAJ, hoj tumen na mukava te džal het tumare čhvenca. Bo tumen gondolinen te kerel vareso nalačho. ¹¹ Na! Šaj džan ča tumen o murša te lašareľ le RAJES, sar oda kamentas." Avke len tradle avri pašal o Faraonos.

¹² Palis o RAJ phendā le Mojžišoske: "Nacirde o vast pro Egipt, hoj te aven andre odi phuv o maľengere grajora a te chan tele savore rastlini, so ačhile pal o brišind le krupenca."

¹³ Avke o Mojžiš hazdņa peskeri paca upral o Egipt a o RAJ bičhadā andre odi phuv e balvaj le vichodostar. E balvaj phurdelas calo džives the calo rat a tosara ode andā le maľengere grajoren. ¹⁴ O maľengere grajora avle pre calo Egipt a bešle peske všadzik andre odi phuv. Sas ajci but, sar šoha (ńikda) angłoda na sas a ańi paloda na ela. ¹⁵ Cali phuv andro Egipt sas ole grajorendar kali. Chale savoro, so ačhiľa pal o brišind le krupenca, sa pal o stromi the pal o maľi. Nič zeleno na ačhiľa andro Egipt, či pro stromi vaj pro maľi.

¹⁶ Avke o Faraonos sig vičińda le Mojžiš the le Aron a phendā: "Kerđom binos anglo RAJ, angle tumaro Del the angle tumende. ¹⁷ Mangav tut odmuk mange mek jekhvar a modľin tut ko RAJ ke peskero Del, hoj mandar te odleľ kadi meribnaskeri rana."

¹⁸ Avke o Mojžiš odgeľa lestar a mangelas le RAJES, ¹⁹ a o RAJ visarđa e balvaj, hoj te phurdel zorales le zapadostar. Odi balvaj odľigendā savore grajoren andro Lolo Moros. Avke andre calo Egipt na ačhiľa ańi jekh grajoro. ²⁰ Ale o RAJ kerđa, hoj o jilo le Faraonoske te el sar bar a vašoda na premukľa le Izraeliten.

Eńato rana: o kalipen

²¹ Palis o RAJ phendā le Mojžišoske: "Hazde tiro vast ko ņebos a pro Egipt avela ajso kalipen, hoj pes dela te chudel." ²² Akor o Mojžiš hazdņa o vast ko ņebos a an-

dre calo Egipt sas trin džives baro kalipen, ²³ avke hoj o Egiptana jekh avres na dikhenas. A ňiko na odgeľa trin džives pal oda than, kaj sas. Ale ode, kaj bešenas o Izraeliti, sas o svetlos.

²⁴ Akor o Faraonos vičindã ke peste le Mojžiš a phendã: "Džan, služinen le RAJESKE a the tumare čhave šaj džan tumenca! Muken ade ča o stadi the o dobitkos."

²⁵ O Mojžiš leske odphendã: "Akor amen mušines tu te del oda, so amenge kampela pro obeti the pro labarde obeti, hoj te anas le RAJESKE, amare Devleske. ²⁶ Na, amen las peha the amaro dobitkos. Na ačhela ade ňisavi džvirina, bo lendar peske kidaha avri oda, so kampela pre služba le RAJESKE, amare Devleske. Amen mek na džanas, so kempel pre obeta le RAJESKE, medik ode na dodžaha."

²⁷ Ale o RAJ kerďa le Faraonoske o jilo sar bar a vašoda len na kamľa te premukel. ²⁸ A phendã: "Dža mandar het a ma sikav tut mange pro jakha, bo oda džives, sar tut dikhava, mereha!"

²⁹ "Mi el avke, sar phendãl," odphendã leske o Mojžiš. "Imar man šoha na dikheha!"

Pal e dešto rana

11 O RAJ phendã le Mojžišoske: "Mek jekh rana mukava pro Faraonos the pro Egipt. Palis tumen premukela a na ča premukela, ale tradela avri savoren. ² Phen le manušenge, hoj dojekh murš the romňi peske te mangel peskere susedendar rupune the somnakune veci." ³ O RAJ kerďa, hoj o Izraeliti te aven pre dzeka le manušenge andro Egipt. Le Mojžiš denas andro Egipt bari pačiv the le Faraonoskere uradňika the o manuša.

⁴ Palis o Mojžiš phendã le Faraonoske: "Kavke vakerele o RAJ: 'Pal jepaš rat, predžava prekal o Egipt. ⁵ A merela dojekh čavoro andro Egipt, savo ešebno (peršo) uliľa. Oda le Faraonoskere čhastar, savo majinel te bešel pro tronos, dži ko čhavo la otrokiňakero, savi erňinel, a the savoro ešebno le dobitkostar. ⁶ Pal calo Egipt šundola baro roviben, so mek na sas a aňi na ela. ⁷ A pre ňisavo Izraelitas mek aňi o rikono na bašola (havkinela), aňi pre lengere džvirini.' Palis sprindžarena, hoj me o RAJ kerav avres le Egiptoha the Izraeloha." ⁸ Paloda leske o Mojžiš phendã: "Avena ke ma savore tire uradňika, bandona angle ma a mangel na man: 'Dža het savore tire manušenca, save pal tu džan.' A me akor džava het." Avke o Mojžiš odgeľa pašal o Faraonos igen cholãmen.

⁹ O RAJ phendã le Mojžišoske: "O Faraonos tumen na šunela. Vašoda andro Egipt pes ačhena mek but mire zazraki." ¹⁰ O Mojžiš the o Aron kerde savore ola zazraki anglo Faraonos, ale o RAJ kerďa, hoj le Faraonoskero jilo te el sar bar, vašoda le Izraeliten andral peskeri phuv na premukľa.

E Patraďi

12 Andro Egipt o RAJ le Mojžišoske the le Aronoske phendã: ² "Kada čhon prekal tumende ela ešebno (peršo) le čhonendar a ela ešebno čhon andro berš. ³ A den te džanel savore manušenge andral o Izrael: Andro dešto džives andre kada čhon dojekh murš mušinel te kidel avri jekhe bakrores: jekhes prekal dojekh kher. ⁴ Te varesavi famelija hiňi cikňi a na dočhaľa has ole bakrores, mi chan jekhetane le nekpašeder susedaha jekhe bakrores: pal oda, keci hine džene a ko keci chal. ⁵ O džviros mušinel te el beršeskero samcos bi e chiba, šaj les kiden avri le bakrendar abo le kozendar. ⁶ Pal oda bakroro pes mušinena te starinel dži andro dešuštarto (14.) džives andre oda čhon, palis savore Izraeliti ke račate murdarena ole bakroren. ⁷ O manuša mušinen te makhel leskere rateha e zarubňa pal o seri the upral o vudar andre oda kher, kaj chana le bakrores. ⁸ Odi rat o mas pekena pre jag a chana les le mareha bi o droždĩ the le kirke bilinenca. ⁹ Našti chan oda mas jalo aňi tado, ale ča peko pre jag – le šereha, le pindrenca the le gojenca. ¹⁰ A dži tosara lestar na muken ňič, ale te ačhela vareso, mušinen oda te zlabarel pre jag. ¹¹ Kavke les chana: Aven urde a phanden pašal peste o sirimos, uren pro pindre o sandali, andro vast mi el tumen o paci. Chan les sig, bo oda hin e Patraďi pre pačiv le RAJESKE.

¹² Odi rat predžava prekal o Egipt a murdarava ode savoren ešebnen a oda le manušendar dži ko dobitkos. A savore devlen andro Egipt odsudzinava. Me som o RAJ. ¹³ O rat, so ela pro zarubňi, sikavela, save hin tumare khera. Sar marava le Egipt, obdžava tumen le meribnaskera ranaha, bo dikhava o rat.

¹⁴ Mušinen te oslavinel kada džives sar inepos prekal o RAJ, hoj peske pro furt te leperen, pokoleňje pro pokoleňje, so me, o RAJ, kerďom."

O Inepos pal o Mare bi o Droždĩ

¹⁵ O RAJ phendã: "Efta dživesa chana o mare bi o droždĩ. Pro ešebno džives mušinen andral tumare khera te čhivel het savore droždĩ. A te vareko andre kala efta dživesa chala vareso le droždencã, akor oda dženo ela tradlo het mire manušendar. ¹⁶ Ešebno džives the eftato džives, pes zdžana, hoj man te lašaren. A ňisavi buči našti keren andre kala dživesa, ale ča šaj pririchtinen o chaben.

¹⁷ Dolikeren kada Inepos pal o Mare bi o Droždĩ, bo andre oda džives ilom avri tumare kmeňi andral o Egipt. Pro furt mušinen oda džives te oslavinel sar prikazis, pokoleňje pro pokoleňje. ¹⁸ O mare bi o droždĩ chudena te chal rači dešuštarto (14.) džives andro ešebno čhon dži rači andro bišujekhto (21.) džives oda čhon. ¹⁹ Tel o efta dživesa te na el tumen andro kher ňisave droždĩ. Dojekh, ko chala vareso le droždendar, ela avritradlo le narodostar, či hino Izraelitas abo cudzincos. ²⁰ Na chana ňič, andre soste hin o droždĩ. Všadzik, kaj bešena, chana ča o mare bi o droždĩ."

Ešebno Patrađi

²¹ O Mojžiš vičinda savore Izraelike vodcen a phendā lenge: "Džan a kiden peske avri bakrores andral o stados prekal peskere fajti a murdaren les sar Patrađakere bakrores. ²² Palis len konaricis le izopostar, močinen les andro čaro, kaj hin o rat, a makhen leha o vudar pal o seri the upral andre peskero kher. A dži tosara niko tumendar te na avel avri andral o kher. ²³ Sar o RAJ predžala prekal o Egipt, hoj ode te murdarel le Egiptānen, dikhela o rat pro vudara pal o seri the upral a na domukela le meribnaskere aňjeloske, hoj te džal andre tumare khera te murdarel.

²⁴ Tumen the tumare čhave mušinen te doľikerel kada prikazis pro furt. ²⁵ Sar avena andre phuv, pal savi o RAJ tumen diňa vera, hoj dela la tumenge, doľikeren kada inepos pro furt. ²⁶ A te tumendar jekhvar phučena tumare čhave: 'Soske oslavinas kada inepos?' ²⁷ phenena lenge: 'Kadi Patrađakeri obeta keras pre pačiv le RAJESKE, bo ov obgeľa o khera le Izraelitenge andro Egipt, sar murdardā le Egiptānen a amare khera zachraňinda.' " Akor o Izraeliti pele pro khoča anglo RAJ a lašarenas les. ²⁸ Palis gele a kerde avke, sar o RAJ prikazinda le Mojžišoske the le Aronoske.

O ešebne čhave meren

²⁹ Sar sas pal jepaš rat, o RAJ murdardā savore ešebne čhaven andro Egipt, a oda le Faraonoskere čhastar, savo majinda te bešel pre leskero tronos, dži ko ešebno čhavo oleske, savo sas zaphandlo andre bertena, a the savoro ešebno le dobitkostar. ³⁰ Odi rat o Faraonos, leskere uradňika the savore Egiptāna uštilē, bo sas baro roviben pal calo Egipt. Na sas kher, andre savo na sas murdardo ešebno čhavoro.

³¹ O Faraonos mek odi rat vičinda le Mojžiš the le Aron a phendā lenge: "Ušćen! Džan het mire manušen-dar, tumen the o Izraeliti! Džan a lašaren le RAJES, avke sar kamenas! ³² Len peske tumare stadi the dobitkos, avke sar mangelas a džan! A mangel o požehnaňje the prekal mande!"

³³ The o Egiptāna igen mangelas le Izraeliten, hoj sig te džan het andral lengeri phuv, bo phenenas: "Te ačhena ade, savore meraha."

O Izraeliti džan avri andral o Egipt

³⁴ Avke o Izraeliti peske ile le čarenca o chumer bi o drožđi, thode andro zajdi a ľigenenas pre peskere phike. ³⁵ O Izraeliti kerde avke, sar lenge phendā o Mojžiš, a mangelas peske le Egiptānendar rupune the somnakune veci the gada. ³⁶ O RAJ kerdā avke, hoj o Egiptāna te presikaven pačiv le Izraelitenge a te den lenge sa, so lendar mangelas. Kavke on odligende o barvalipen le Egiptānendar.

³⁷ Palis o Izraeliti pes mukle andral o Raamses a gele andro Sukkot. Sas vaj 600 000 murša, bi o džuvľa the čhave. ³⁸ A džanas lenca but aver manuša, but stadi the dobitkos. ³⁹ Ole chumerestar, so ile andral o Egipt,

pekle o mare bi o drožđi, bo on len odarik sig tradle avri a na sas len časos te pririchtinel o chumer aňi o chaben pro drom.

⁴⁰ O Izraeliti bešenas andro Egipt štar šel the tranda (430) berš. ⁴¹ Le RAJESKERE manuša avle avri andral o Egipt ipen pro posledno džives ole 430 beršenge.

⁴² Odi rat o RAJ na sovelas a merkinelas pro Izraeliti, hoj len te lel avri andral o Egipt. Vašoda odi rat hiňi le RAJESKERI pro furt a o Izraeliti mušinen te merkinel sako berš andre odi rat, pokoleňje pro pokoleňje.

O prikazi pal e Patrađi

⁴³ O RAJ phendā le Mojžišoske the le Aronoske: "Kada tumenge prikazinav pal e Patrađi:

Ñisavo cudzincos kale Patrađakere chabenestar našti chal. ⁴⁴ Olestar šaj chal dojekh otrokos, savo sas cimen vaš o love, te ela občhindo. ⁴⁵ Aňi ñisavo cudzincos olestar našti chal, aňi oda, ko kerel buči prekal tumende.

⁴⁶ Mušinen calo chaben te chal andre tumare khera. Našti lestar nič ľidžan avri a aňi jekh kokalos na phage-na. ⁴⁷ Kavke savore Izraeliti mušinen te oslavinel kada inepos.

⁴⁸ Te vareko, ko nane Izraelitas, kamela te oslavinel e Patrađi jekhetane tumenca, mušinel dojekh murš andral leskero kher pes te del te občhinel. Palis šaj oslavinel e Patrađi, avke sar the o Izraelitas. Ale ñisavo dženo, ko na ela občhindo (obrezimen), našti lestar chal. ⁴⁹ Kada zakonos mušinenena te doľikerel o Izraeliti the o cudzinci, save bešena maškar tumende."

⁵⁰ Savore Izraeliti kerde avke, sar o RAJ prikazinda le Mojžišoske the le Aronoske. ⁵¹ Andre oda džives o RAJ iľa avri andral o Egipt savore Izraelike kmeňi.

O prikazis pal o ešebne muršora

13 O RAJ phendā le Mojžišoske: ² "Sentňar mange dojekhe ešebne (perše) muršes, savo ulola le Izraelitengere džuvľenge. Bo dojekh ešebno hin miro a oda le manušendar the le dobitkostar."

³ O Mojžiš phendā le manušenge: "Leperen tumenge pre kada džives, andre savo geľan avri andral o Egipt, kaj sanas otroka. Bo o RAJ tumen odarik iľa avri peskere zorale vasteha. Vašoda našti chan nič, andre soste hin o drožđi. ⁴ Tumen adadžives adarik džan avri andro ešebno čhon Abib †. ⁵ Sar tumen o RAJ ľidžala andre phuv le Kanaančanageri, le Chetitananageri, le Amorejengeri, le Chivijengeri the le Jebusejengeri, so tumare dadenge la veraha phendā, hoj la dela tumenge – e phuv, andre savi čuľal o thud the o medos – akor sako berš andre oda čhon oslavinena kada inepos. ⁶ Efta dživesa chana o mare bi o drožđi a pro posledno džives oslavinena o inepos pre le RAJESKERI pačiv. ⁷ O mare bi o drožđi chana efta džives. A nič, andre soste hin o drožđi, pes našti arakhel maškar tumende, aňi andre cali tumari phuv. ⁸ Andre oda džives tumare čhavage phenena avke: 'Me kerav ada vaš

† Oda hin adadžives o čhon Nisan.

oda, so o RAJ kerda prekal ma, sar odgeřom avri andral o Egipt.⁹ Kada inepos ela pre tumende sar varesavo znakos, so hin priphandlo pro vast the pro čekat. Oda tumenge leperela, hoj furt te vakeren a te sikřon le RAJESKERO zakonos, bo ov tumen iřa avri andral o Egipt peskere zorale vasteha.¹⁰ Oslavinen kada inepos sako berř andre ajso dřives.

¹¹ O RAJ tumen anela andre le Kanaančanengeri phuv, avke sar la veraha phendā, hoj la dela tumenge the tumare dadenge. Sar tumenge la dela,¹² tumen dena prekal o RAJ dojekhe eřebne murřes, savo ulola la dřuvřake the le dobitkoske, bo oda hin le RAJESKERO.¹³ Dojekhe somaris, so ulol eřebno řaj cinen avri avke, hoj dena vař leste bakrores. A te ada na kerena, phagena leske e meř. Dojekhe eřebne murřores tumare řhavendar muřinen te cinel avri.

¹⁴ Te tumendar varekana phućena tumare řhave: 'Oda so kada hin?' Odphenena leske: 'O RAJ amen iřa avri andral o Egipt peskere zorale vasteha, andral odi phuv, kaj samas otroka.'¹⁵ Sar o Faraonos sas zorale jileskero a na kamelas amen te premukel, o RAJ murdarđa savoro murřikano eřebno andro Egipt, oda le manuřendar the le dobitkostar. Vařoda akana obetinas le RAJESKE savore eřebne samcen le dobitkostar, ale peskere eřebne řhaven cinas avri.'¹⁶ Kada tumenge ela pro leperiben, sar o znakos pro vast the pro čekat, hoj o RAJ amen iřa avri andral o Egipt peskere zorale vasteha."

O Izraeliti dřan avri andral o Egipt

¹⁷ Sar o Faraonos premukřa le Izraeliten, o Del len na řidřalas le dromeha prekal le Filiřtinengeri phuv, choc te sas charneder. Bo o Del peske phendā: "Mire manuřa řaj řerinen peskero gondoliřagos, sar muřindehas pes te marel andro mariben, a akor pes visarena pale andro Egipt."¹⁸ Vařoda len o Del řidřalas pal e puřřa ko Lolo Moros. O Izraeliti dřanas avri andral o Egipt avke sar slugađa pririchtimen andro mariben.

¹⁹ O Mojřiř iřa peha the le Jozefoskere kokala. Bo o Jozef phandřa la veraha le Izraeliten: "Sar tumen o Del zachrařinela, muřinen te lel peha adarik mire kokala."

²⁰ Sar odgele andral o Sukkot, kerde peske taboris andro Etam pro agor la puřřake.²¹ O RAJ dřalas angle lende prekal o dřives andro chmarakero slupos, hoj lenge te sikavel o drom, a raći andro jagalo slupos, hoj lenge te řvicinel. Avke on řaj dřanas dřivese the raći.²² O chmarakero slupos dřivese na odgeřa anglal o manuřa, aņi raći o jagalo slupos.

O Izraeliti pař o moros

14 Palis o RAJ phendā le Mojřiřoske: ² "Phen le Izraelitenge, hoj te visaren pes pale a te keren peske taboris anglo Pi-Hachiroť mařkar o Migdol the moros. Ode tumenge keren taboris anglo Baal-Cefon pař o moros.³ O Faraonos peske gondolinela pal o Izraeliti, hoj na dřanen, kaj dřan, a hoj andre puřřa nařřona.⁴ Me kerava le Faraonoske o jilo sar bar, hoj

pal tumende dřala. Pro Faraonos the pre leskere savore slugađa man oslavinava a o Egiptāna sprindřarena, hoj me som o RAJ." A o Izraeliti avke kerde.

O Egiptāna dřan pal o Izraeliti

⁵ Sar o Faraonos řundā, hoj o Izraeliti imar gele het, ov the leskere uradřika řerinde peskero gondoliřagos a phende peske: "So amen kerđam, hoj mukřam le Izraeliten te dřal het? Nařadāam peskere otroken!"

⁶ Avke o Faraonos diņa te pririchtinel o maribnaskero verdan a iřa peha peskera armada:⁷ řov řel (600) avrikidle maribnaskere verdana the savore verdana andral o Egipt. Pre dojekh verdan sas trin slugađa.⁸ O RAJ zorařardā le Faraonoske o jilo a dřalas pal o Izraeliti, sar on odarik dřanas sar ola, ko řerinde (zvitāzinde) †.⁹ O Egiptāna dřanas pal o Izraeliti la armadaha, pro graja, le maribnaskere verdanenca the savore slugađenca, a dochudle len, sar taborinenas pař o moros pař o Pi-Hachiroť anglo Baal-Cefon.

¹⁰ Sar o Faraonos sas paředer pař lende, o Izraeliti dikhle, hoj avel pal lende e Egiptsko armada. Igen darandile a vićinenas pro RAJ, hoj lenge te pomořinel.¹¹ A phende le Mojřiřoske: "Ći sas frima hrobi andro Egipt? Andal amen ade, hoj te meras pre puřřa! So amenge kerđal? Soske amen iřal avri andral o Egipt?"¹² Se na phenahas tuke mek andro Egipt: 'De amen smirom. Amen sluřinaha le Egiptānenge?' Se sas feder te sluřinel le Egiptānenge, sar te merel pre puřřa."

¹³ O Mojřiř lenge odphendā: "Ma daran tumen! Aven zorale a dikhena, hoj adadřives tumen o RAJ zachrařinela. Le Egiptānen, saven adadřives dikhnen, imar řoha (řnikda) na dikhena.¹⁴ Tumen řa aćhen andro smirom a o RAJ pes marela vař tumende."

O Izraeliti predřan prekal o Lolo moros

¹⁵ O RAJ phendā le Mojřiřoske: "Soske vićines ke ma, hoj tuke te pomořinav? Phen le Izraelitenge, hoj te dřan anglal!"¹⁶ Tu hazde tiri paca, nacirde o vast pro moros a rozđelinela pes, hoj o Izraeliti te predřan prekal leste pal e řuki phuv.¹⁷ Me kerava, hoj o jile le Egiptānenge ena sar bar. On dřana pal tumende a akor me, man oslavinava pro Faraonos, pre leskeri armada the maribnaskere verdana, pre leskere murřa the graja.¹⁸ Avke o Egiptāna sprindřarena, hoj me som o RAJ, sar zņićinava řařa leskera armada."

¹⁹ Akor le Devleskero aņjelos, savo dřalas anglo Izraeliti, geřa a aćhađa pes pal lende a the o chmarakero slupos, so sas angle lende, dřalas a aćhađa pes pal lende²⁰ a sas mařkar le Egiptānengeri armada the Izraelitengere manuřa. Odi chmara kerđa avke, hoj prekal o Egiptāna sas kalipen a prekal o Izraeliti svetlos. Avke řali rat nařři gele jekh ke aver.

²¹ O Mojřiř hazdņa o vast upral o moros a o RAJ diņa te phurdel pro moros zoraři balvaj pal o vichodos a řerinda o moros pre řuki phuv. Rozphurdřa o paņi pro duj seri²² a o paņi aćhelas sar muros pal e řaći (pravo) the

† E Hebrejiko řhib: le hazdle vasteha

baľogňi (ľavo) sera. Avke o Izraeliti džanas maškaral pal e šuki phuv.

²³ O Egiptána džanas pal lende andro moros: savore le Faraonoskere murša pro graja the maribnaskere verdana. ²⁴ Ale sar vidňisaľolas, o RAJ dikhľa andral o jagalo the chmarakero slupos pro taboris le Egiptánengero a kerďa maškar lende bari balamuta (zmetkos). ²⁵ Pre lengere verdana kerďa, hoj o kereki phares te bondaľon (krucinen pes), a vašoda on šaj džanas ča lokes. O Egiptána vakerenas: "Denašas le Izraelitendar, bo o RAJ pes vaš lende marel."

O Egiptána tašľon andro moros

²⁶ O RAJ phendľa le Mojžišoske: "Nacirde o vast upral o moros, hoj o paňa pes pale te visaren pro Egiptána, pre lengere murša the pro verdana." ²⁷ Avke o Mojžiš nacirdľa o vast upral o moros a pro tosara pes o paňi pale visarďa pre peskero than. O Egiptána denašenas, ale o RAJ len začordľa le bare paňeha maškar o moros. ²⁸ O paňi pes visarďa pale a zaučardľa la armada, le muršen pro graja the o verdana, save džanas pal o Izraeliti. Niko lendar na ačhiľa džido.

²⁹ Ale o Izraeliti pregele maškaral pal e šuki phuv, sar o paňi ačhelas andro moros sar muros pal e čači (pravo) the baľogňi (ľavo) sera. ³⁰ Oda džives o RAJ zachraňindľa le Izraeliten andral le Egiptánengere vasta. O Izraeliti dikhle le Egiptánen, hoj hine mule pro moroskero brehos. ³¹ Sar dikhle le RAJESKERI zor, so sikaďa pro Egiptána, akor pes daranas le RAJESTAR. Pačandïle leske the leskere služobňikoske, le Mojžišoske.

Le Mojžišoskeri giľi

15 Akor o Mojžiš the o Izraeliti giľade kadi giľi le RAJESKE:

"Giľavava le RAJESKE,
bo igen pes oslavindľa;
čhida le muršes leskere grajeha andro moros.

² Miri zor the miri giľi hin o RAJ,
bo ov man zachraňindľa.
Ov hino miro Del, lašarav les;
o Del mire dadeskero, kamav les te bararel.

³ O RAJ hino zoralo andro mariben;
leskero nav hin RAJ.

⁴ Ov le Faraonoskere maribnaskere verdana the le slugaďen čhida andro moros;
leskere nekfeder veliteľa mule andro Lolo Moros.

⁵ O baro paňi len učardľa andre;
pele dži tele andro moros sar bar.

⁶ Tiro čačo vast, ó, RAJEJA,
hino slavno la bara zoraha;
tiro čačo vast, ó, RAJEJA, zňičinela le ňeprijateľis.

⁷ Tu tira slavaha čhives tele olen, ko pre tute džan.
Bičhaves pre lende tiri cholï, so len zľabarel sar le phusen.

⁸ Tu phurdehas prekal tiro nakh pro moros:

O paňi ačhelas sar brehos;
maškaral ačhelas sar muros,
sar te fadžindahas o jilo le moroskero.

⁹ O ňeprijateľis phendľa:
'Denašav pal lende a chudava len.

Rozulavava (rozďelinava) lengero barvalipen
a pherarava man lenca.

Cirdava avri e šabľa

a zňičinava len.'

¹⁰ Tu phurdľal pre lende a o moros len začordľa.

Tašľile sar o oľovos andro bare paňa.

¹¹ Ko maškar o devla hino ajso sar tu, RAJEJA?

Ko hino ajso slavno the sentno?

Ko šaj kerel ajse zazraki the znameňja sar tu?

¹² Tu na cirdňal tiro vast pre lende
a e phuv len chaľa.

¹³ Tire pačivale kamibnaha ľidžahas kada narodos,
saves cindal avri peskera zoraha,
a ľidžahas len la zoraha andre tiri sentňi phuv.

¹⁴ O narodi oda šunde a daranas;

o Filištinci izdranas andre bari dar.

¹⁵ Akor o vodci andro Edom predarandïle,
e dar zaiľa le vodcen andral o Moab;
o Kanaančana daratar našade peskeri zor.

¹⁶ Avľa pre lende igen bari dar;

sar dikhle tiri zor,

ačhile čhit sar bar,

medik na pregele o moros tire manuša,
ó, RAJEJA, tire manuša, saven cindal avri.

¹⁷ Aneha len a thoveha te bešel

pro verchos, so hino tiro;

ode, RAJEJA, kaj tuke kerďal o than te bešel;

o Sentno Than, ó, Adonaj, so zathodäl tire vastenca.

¹⁸ O RAJ kraľinel furt pro furt."

¹⁹ Sar le Faraonoskere graja, o maribnaskere verdana the o murša pro graja gele andro moros, o RAJ len začordľa le paňeha, ale o Izraeliti pregele maškar o moros pal e šuki phuv. ²⁰ E prorokiňa Mirijam, le Aronoskeri pheň, iľa andro vast e čerkutka a pal late džanas savore džuvľija. Bašavenas pro čerkutki the khelenas. ²¹ E Mirijam chudľa te giľavel:
"Giľaven le RAJESKE, bo igen pes oslavindľa!
Le grajes the leskere muršes čhida andro moros."

O paňi paš e Mara the Elim

²² Paľis o Mojžiš le Izraelitenca odgele pašal o Lolo Moros a doavle pre pušťa Šur. Trin džives phirenas pal e pušťa, ale na arakhle ode paňi. ²³ Doavle pre oda than, so pes vičinel Mara, ale o paňi odarik naštï pile, bo sas kirko. Vašoda oda than vičinenas Mara. ²⁴ Avke o manuša reptinenas pro Mojžiš: "So pijaha?"

²⁵ Akor o Mojžiš igen mangelas le RAJES a ov leske sikaďa o kašt. Sar les o Mojžiš čhida andro paňi, oda paňi pes delas te pijel.

† Oda hin kirko

Ode lenge o RAJ diña o zakoni the o prikazaŋja a probalinelas (skušinelas) len. ²⁶ A phendā: "Me som o RAJ tiro Del, te man šunena a kerena oda, so hin angle mire jakha lačo, a te dolikerena mire zakoni the prikazaŋja, na domukava pre tumende nisavo nasvaliben, sar domuklōm pro Egiptāna, bo me, o RAJ, som oda, ko tut sastārel."

²⁷ Palis o Izraeliti avle andro Elim, kaj sas dešuduj (12) prameña the eftavardeš (70) palmi. Ode paš o paŋi peske kerde taboris.

E manna the o prepelici

16 Savore Izraeliti odgele andral o Elim a dešupandžto (15.) džives andro dujto čhon pal oda, sar gele avri andral o Egipt, doavle pre pušta Sin, so hiŋi maškar o Elim the Sinaj. ² Ode savore Izraeliti reptinenas pro Mojžiš the pro Aron. ³ Phenenas: "Se te muřamas le RAJESKERE vasteha andro Egipt! Ode beřahas paš o pira, čaluvas le masestar a chahas o maro, keci kamahas. Ale tumen amen iřan avri pre pušta, hoj ade savore te meras bokhatar."

⁴ O RAJ phendā le Mojžišoske: "Me tumenge bičhava-va o maro, so perela andral o řebos. O manuša mi džan a mi kiden peske ajci, keci lenge kampela pre sako džives. Aleha len probalīnava (skušinava) či pes likerena pal miro zakonos. ⁵ A pro šovto džives peske mi kiden a mi pririchtinen duvar ajci sar okla dživesa."

⁶ Avke o Mojžiš the o Aron phende savore Izraelitenge: "Rači sprindžarena, hoj oda sas o RAJ, ko tumen iřa avri andral o Egipt, ⁷ a tosara dikhena le RAJESKERI slava, bo šundā sar pre leste reptinen. Ko sam amen, hoj pre amende avke reptinen?" ⁸ A mek o Mojžiš phendā: "Pal oda sprindžarena, hoj oda hino o RAJ, sar rači tumen dela te chal o mas a tosara o maro, hoj te čalōn, choc te šundā keci pre leste reptinen. Ko sam amen? Tumen na pre amende reptinen, ale pro RAJ."

⁹ Palis o Mojžiš phendā le Aronoske: "Phen savore Izraelitenge, hoj te aven anglo RAJ, bo šundā tumaro reptišagos."

¹⁰ Sar o Aron oda phendā savore Izraelitenge, visarde pes ke pušta a akor pes sikađa andre chmara le RAJESKERI slava.

¹¹ O RAJ phendā le Mojžišoske: ¹² "Šundōm, sar pre ma o Izraeliti reptinenas. Phen lenge, hoj ke račate chana o mas a tosara pes čařarena le mareha. Avke džanena, hoj me som o RAJ, tumaro Del."

¹³ A ke račate avřa andro Izraeliko taboris but prepelici a tosara sas rosa vřadzik pašal o taboris. ¹⁴ Sar e rosa rozgeřa, pre pušta dičholas vareso cikno sar te sanore vločkici. ¹⁵ Sar oda o Izraeliti dikhle, jekh avrestar phučenas: "Oda so hin?" Bo na džanenas, so oda hin.

O Mojžiš lenge odphendā: "Kada hin o maro, so tumen del o RAJ sar chaben. ¹⁶ Kada hin, so o RAJ prikazindā: 'Dojekh peske mi kidel ajci, keci leske kampela pro chaviben. Dojekh peske mi kidel, keci hine džene andro stanos, duj řitri † pre jekh dženo.'"

† Akor vařinenas o řuko chaben pro řitri.

¹⁷ Avke o Izraeliti oda the kerde. Varesave kidenas buter, aver frimeder. ¹⁸ Palis oda merinenas le omeriha. Na ačhiřa but oleske, ko kidřa but, a na chibalinelas oleske, ko kidřa frima. Dojekh kidelas ajci, keci leske kampelas.

¹⁹ Palis lenge o Mojžiš phendā: "Řiko tumendar peske olestar te na odthovel pre tosara!"

²⁰ Ale varesave džene le Mojžiš na řunde a mukle peske the pre aver džives. Avke pes kerđa andre manna o kirme a chudřa te khandel. Akor o Mojžiš pre lende cholisaliřa.

²¹ Avke o manuša sako tosara kidenas ajci, keci lenge kampelas. Sar imar labarelas o kham, rozdžalas oda.

²² Šovto džives kidenas duvar ajci, duj omeri prekal jekh dženo. Akor avenas savore vodci a phenenas oda le Mojžišoske. ²³ Ov lenge odphenelas: "Kavke vakerele o RAJ: 'Tajsa hin o sentno džives o řabbat le RAJESKERO. Vařoda, so kampel te pekel, peken, so te tavel, taven, a so olestar ačhela, odthoven pre tosaraste.'"

²⁴ Avke peske o manuša odthovenas pre tosaraste, sar lenge prikazindā o Mojžiš, a na skhandliřa lenge, aři na sas andre kirme. ²⁵ Palis lenge o Mojžiš phendā: "Čan oda adadžives, bo kada džives, o řabbat, hino sentno le RAJESKERO. Adadžives na arakhena řič pre phuv. ²⁶ Šov džives e manna kidenas, ale eftato džives hin o řabbat, akor řič na arakhena pre phuv."

²⁷ Ale varesave manuša the pro řabbat džanas avri te kidel e manna, ale řič na arakhenas. ²⁸ Akor o RAJ phendā le Mojžišoske: "Dži kana man o manuša na řunena a na dolikerena mire prikazaŋja the zakoni? ²⁹ Ma bisteren, hoj me, o RAJ, tumenge diřnom o řabbat. Vařoda pro šovto džives tumen dava dos chaben, hoj tumenge te likerel pro duj dživesa. Dojekh mi ačhel pre peskero than. Pro eftato džives řiko tumendar te na džal avri te kidel." ³⁰ Avke o manuša eftato džives peske odpočovinde la bučatar.

³¹ Ole chabeneske o Izraeliti dine nav manna. Sas parno sar o korijandroskero zrnos a lačo sar e medoskeri bokeli. ³² O Mojžiš phendā: "Kada hin, so o RAJ prikazindā: 'Odthoven duj řitri manna, hoj pes te dolikerel prekal aver pokoleŋje, hoj te dikhen o maro, so tumen davas te chal pre pušta akor, sar tumen iřlōm avri andral o Egipt.'"

³³ Palis o Mojžiš phendā le Aronoske: "Le o džbanos a thov andre duj řitri manna a thov oda anglo RAJ, hoj pes te dolikerel prekal tumare potomki."

³⁴ O Aron oda thodā angle Archa la Zmluvakeri, hoj pes te dolikerel, sar o RAJ prikazindā le Mojžišoske.

³⁵ Avke o Izraeliti chanas e manna saranda (40) berř, medik na dogele andre phuv, kaj imar dživenas aver manuša. Chanas e manna, medik na doavle pre hrařica andre phuv Kanaan. ³⁶ (Akor pes vařinelas o řuko chaben andre mira, so sas vaj biř řitri.)

O paŋi andral e skala

17 Odarik savore Izraeliti pes mukle la puřtatar Sin, avke sar lenge prikazindā o RAJ a džanas

than thanestar. Palis peske kerde taboris andro Refidim, ale ode len na sas pañi te pijel. ² Akor pes o manuša chudle te veseke dinel le Mojžišoha a phende leske: "De amen pañi! Sam smedna."

O Mojžiš lenge phenda: "Soske pes manca veseke dinen? Soske pokušinena le RAJES?"

³ Ale o manuša sas igen smedna a reptinenas pro Mojžiš: "Soske amen iñal avri andral o Egipt? Vašoda, hoj amen, amare čhave the o dobitkos te meras le smedostar?"

⁴ O Mojžiš igen phučelas le RAJESTAR: "So te kerel kale manušenca? Se murdarena man le barenca!"

⁵ O RAJ phenda le Mojžišoske: "Dža anglo manuša a le peha varesave Izraelike vodcen. Le e paca andro vast, savaha demađal pal o pañi Nil, a dža! ⁶ Ode ačhava angle tu pre skala, pro verchos Choreb. Sar demeha pal e skala, avela andral avri o pañi, hoj te pijen o manuša." Avke o Mojžiš kada kerđa anglo Izraelike vodci. ⁷ Ole thaneske diña nav Massa the Meriba, bo o Izraeliti pes ode veseke dinenas a pokušinenas le RAJES, sar phenenas: "Hin maškar amende o RAJ abo na?"

O mariben le Amalekenca

⁸ Palis avle o Amaleka a gele pro mariben pro Izraeliti paš o Refidim. ⁹ O Mojžiš prikazinda le Jozuaske: "Kide avri muršen a dža pro mariben pro Amaleka. Me tajsa džava pro verchos a terđuvava ode le Devleskera paca andro vast."

¹⁰ O Jozua kerđa, avke sar leske prikazinda o Mojžiš a marelas pes le Amalekenca. O Mojžiš, Aron the o Hur, gele upre pro verchos. ¹¹ Medik sas le Mojžišoskere vasta hazdle upre, ñerinenas (zvitazinenas) o Izraeliti, ale sar o vasta thovelas tele, ñerinenas o Amaleka.

¹² Sar o Mojžiš imar na birinelas te hazdel upre o vasta, ande leske bar, hoj te bešel upre. O Aron leske podhazdelas jekh vast a o Hur dujto vast. Avke sas leskere vasta hazdle upre calo džives, medik na zapela o kham. ¹³ Vašoda o Jozua ñerinda upral o Amaleka la šablaha.

¹⁴ Palis o RAJ phenda le Mojžišoske: "Zapisin kada andro zvitkos, hoj te el pro leperiben a phen le Jozuaske, hoj o leperiben pal o Amaleka khosava pal kadi phuv."

¹⁵ Akor o Mojžiš ačhađa ode oltaris a diña leske nav: O RAJ mange diña o ñerindipen † (vitaztvo). ¹⁶ A phenda: "Vašoda hoj hazdle peskero vast pre le RAJESKERO tronos, o RAJ pes le Amalekenca marela pokoleñje pro pokoleñje."

O Jetro džal ko Mojžiš

18 O Jetro sas rašaj andro Midijan a sastro le Mojžišoske. Ov pes došunda, so kerđa o Del prekal o Mojžiš the prekal o Izraeliti, the sar len iña avri andral o Egipt.

² Avke anda peha le Mojžišoskera romña la Cippora, sava o Mojžiš bičhađa pale khere, ³ the soduje čhaven. O nav jekheske sas Geršom, bo o Mojžiš phenda: "Som

† E Hebrejiko čhib: e zastava.

cudzincos andre cudzo phuv." ⁴ Le dujtoneske diña nav Eliezer, bo phenda: "O Del mire dadeskero mange pomožinda a zachrañinda man le Faraonostar, hoj man na murdarđa."

⁵ Akor o Jetro avla ko Mojžiš le duje čhavenca the leskera romñaha pre puštá, kaj taborinelas paš o Devleskero verchos. ⁶ A diña te phenel le Mojžišoske: "Me, o Jetro tiro sastro, avav ke tu tira romñaha the lakere duje čhavenca."

⁷ Akor o Mojžiš gefa angle lende, bandiła tele angle peskero sastro a čumidla les. A sodujđzene jekh avres pozdravinenas andro smirom a gele andro stanos.

⁸ Palis o Mojžiš leske chudla savoro te vakere, so o RAJ kerđa le Faraonoske the le manušenge andro Egipt vaš o Izraeliti, the pal o pharipena, so len sas pro drom a sar len o RAJ iña avri.

⁹ Sar o Jetro šunda pal savoro lačhipen, so o RAJ kerđa prekal o Izrael, a sar len cirdña avri andral o vasta le Egiptanendar, igen radisañla olestar ¹⁰ a phenda: "Mi el barardo o RAJ, savo tumen zachrañinda andral o Egipt, andral o vasta le Faraonostar the Egiptanendar. ¹¹ Akana džanav, hoj o RAJ hin bareder, sar savore aver devla, bo ov oda kerđa, sar pes hazdenas upral tumende." ¹² Palis o Jetro anda le Devleske e labardi obeta the aver obeti. O Aron the savore Izraelike vodci avle, hoj te chan o chaben le Mojžišoskere sastreha anglo Del.

O Mojžiš ačhavel vodcen

¹³ Pre aver džives peske o Mojžiš bešla, hoj te rozsudinel maškar o manuša. O manuša ačhenas anglo Mojžiš tosarastar dži rači. ¹⁴ Sar o Jetro dikhla sa, so o Mojžiš kerel prekal o manuša, phenda: "Soske kada keres prekal o manuša? Soske bešes korkoro ade sar sudcas a savore manuša ačhen pašal tute tosarastar dži rači?"

¹⁵ O Mojžiš leske odphenda: "Mušinav ada te kerel, bo o manuša aven ke mande te rodel le Devleskeri voła. ¹⁶ Te len hin maškar peste veseke dišagos, aven ke mande, a rozsudzinav maškar lende, kaskero hin čačipen, a dav lenge te džanel le Devleskere zakoni the prikazañja."

¹⁷ O Jetro leske phenda: "Na keres mištes! ¹⁸ Tu the o manuša, save hine tuha ade, na birinena te kerel dureder. Oda phares prekal tu; našti ada keres korkoro! ¹⁹ Šun miri rada a o Del ela tuha. Tu mušines vaš o manuša te ačhel anglo Del te anel angle leste lengere veci. ²⁰ Tu len sikaveha te dolikerel o zakoni the o prikazañja a pheneha lenge, sar te dživel a so te kerel. ²¹ No, maškar savore manuša peske kide avri muršen, save hine godaver the pačivale, save daran pes le Devlestar a na dena pes te prepočinel. Ačhav len vodcenge upral o manuša: Vodcen upral o ezeros, šel, penda the deš. ²² On mi rozsudzinen furt o lokeder veci maškar o manuša, ale le phareder vecenca mi aven ke tute. Aleha tuke mi pomožinen, hoj tuke te el lokeder. ²³ Te oda kereha, sar o Del prikazinda, obačhoha

andre oda, a avke savore kala manuša džana pale pre peskero than andro smirom."

²⁴ Sar o Mojžiš šundā avri peskere sastres, kerda sa avke, sar leske phendā. ²⁵ Avke o Mojžiš andral calo Izrael kidna avri muršen, save sas godaver a ačhada len vodcenge upral o manuša – upral o ezeros, šel, penda the deš. ²⁶ On furt rozsudzinenas maškar o manuša. Le phare vecenca avenas ko Mojžiš a o lokeder veci rosudzinenas korkore.

²⁷ Palis pes o Mojžiš rozgeľa peskere sastreha a o Jetro džalas pale andre peskeri phuv.

O Izraeliti paš o verchos Sinaj

19 Ešebno (peršo) džives andro trito čhon paloda, sar o Izraeliti odgele andral o Egipt, doavle pre pušta Sinaj. ² Odgele andral o Refidim, avle pre pušta Sinaj a kerde peske anglo verchos taboris.

³ O Mojžiš geľa upre pro verchos ko Del. Akor o RAJ zvičinda pre leste pal o verchos: "Kada phen le Jakoboskera fajtake, le Izraelitengere manušenge: ⁴ 'Korkore dikhlān, so kerdom le Egiptānenge a sar tumen hor dinavas pro orloskere kridli a andom tumen ke mande. ⁵ Te man šunena a dolikerena miri zmluva, avena maškar savore narodi mire manuša ča prekal ma. Calī phuv hiņi miri, ale tumen avena miro avrikidlo narodos, ⁶ o krališagos le rašajengero a o sentno narodos.' Kada pheneha le Izraelitenge."

⁷ Palis o Mojžiš geľa, vičinda ke peste le manušengere vodcen a phendā lenge savoro, so leske prikazinda o RAJ. ⁸ Avke savore manuša jekhetane odphende: "Dolikeraha savoro, so phendā o RAJ," a o Mojžiš oda geľa te phenel le RAJESKE.

⁹ O RAJ phendā le Mojžišoske: "Me avava ke tu andre kalī chmara, hoj o manuša te šunen, sar tuha vakera va, hoj te pačan tuke furt."

Sar o Mojžiš phendā le RAJESKE le manušengere lava, ¹⁰ o RAJ leske odphendā: "Dža ko manuša, sentnar len adadžives the tajsja a mi rajbinen peske o gada. ¹¹ Mi en pririchtimen pro trito džives, bo oda džives Me angle lengere jakha avava tele pro verchos Sinaj. ¹² Ker pašal o verchos e hraņica, dži kaj šaj aven o manuša, a phen lenge: 'Merkinen pre oda, hoj te na džan pro verchos a aņi pes te na chuden leskera hraņicatar. Bo dojekh, ko pes chudela le verchostar, čačes merela.

¹³ Mušinela te el murdardo le barenca abo livimen le šipoha a nisavo vast pes lestar našti chudela. Či oda ela manuš vaj džvirina, mušinela te merel! Ale sar šundola but o hangos la trubakero †, šaj džan pro verchos.'"

¹⁴ Palis o Mojžiš avľa tele pal o verchos ko manuša, sentnarđa len a on rajbinenas peske o gada. ¹⁵ A mek lenge phendā: "Pro trito džives aven pririchtimen! Ma pašliven tumare romņijenca."

O Del pro verchos Sinaj

¹⁶ Pro trito džives sig tosara pro verchos chudľa te herminel a te marel o bleski. E kalī chmara les za- učharda andre a šundolas odarik igen zoralo hangos la trubakero a savore manuša andro taboris izdranas daratar. ¹⁷ O Mojžiš lidžalas le manušen andral o taboris, hoj pes te zdžan le Devleha, a on ačhile tele anglo verchos. ¹⁸ Calo verchos Sinaj sas andro thuv, bo o RAJ avľa pre leste tele andre jag. O thuv andral leste džalas sar te andral o bov, a calo verchos igen izdralas. ¹⁹ O hangos la trubakero sas zoraleder a zoraleder. Akor o Mojžiš vakerełas le Devleha a ov leske odphenelas le zorale hangoha, so šundolas sar hermišagos.

²⁰ O RAJ avľa tele pro agor le verchoske Sinaj, palis vičinda ke peste le Mojžiš a o Mojžiš geľa upre. ²¹ O RAJ leske phendā: "Dža tele a phen le manušenge, hoj ņiko te na predžal e hraņica, hoj ke ma te avel a te dikhen man, bo akor but lendar merena. ²² The o rašaja, save avena ke Ma, mušinen pes ešeb te sentnar, hoj len te na marav."

²³ O Mojžiš odphendā le RAJESKE: "O manuša našti aven upre pro verchos Sinaj, bo tu korkoro prikazinda, hoj te kerav hraņica pašal leste, dži kaj šaj aven o manuša, bo mušinel te el sentno!"

²⁴ O RAJ leske odphendā: "Akana dža tele a an peha pale le Aron. Ale o rašaja the o manuša te na predžan e hraņica, hoj pes te dochuden upre, bo len marava."

²⁵ Avke o Mojžiš geľa tele a phendā oda le manušenge.

O deš prikazaņja le Devleskere

20 O Del vakerełas savore kala lava:

² "Me som o RAJ, tiro Del, savo tut iľa avri andral o Egipt, kaj sanas otroka.

³ Na ela tut aver devla, ča jekh me!

⁴ Na kereha peske nisava modla aņi obrazis olestar, so hin upre pro ņebos, tele pre phuv abo andro paņi telal! ⁵ Na bandoha anglal lende aņi na lašareha len, bo me som o RAJ, tiro Del, o Del, savo žarlinel a savo vaš le dadengere bini marel le čhaven andro trito the štarto pokoleņje ole džengere, save man našti avri ačhen. ⁶ Ale o pačivalo kamiben presikavav ezera pokoleņenge, save man kamen a dolikeren mire prikazaņja.

⁷ Na pheneha andral o muj ča avke o nav le RAJESKERO, tire Devleskero, bo o RAJ marela dojekhes, ko lela le Devleskero nav hijaba andro muj!

⁸ Leper tuke pro Šabbat, hoj les te sentnares! ⁹ Šov dživesa kereha savori tiri buči ¹⁰ a eftato džives hin o Šabbat prekal o RAJ, tiro Del. Na kereha nisavi buči aņi tu, aņi tire čhave, aņi tire čhaja, aņi tire sluhi, aņi tiro dobitkos, aņi o cudzincos, savo dživel maškar tumende. ¹¹ Se o RAJ kerda tel o šov džives o ņebos the e phuv, o moros a savoro, so hin andre, a pro eftato

† E Hebrejiko čhib: andral o rohos.

džives peske odpočovinda. Vašoda o RAJ požehñinda o Šabbat a sentñarda les.

¹² De pačiv tira da the le dades, hoj but te džives pre phuv, so tuke dela o RAJ, tiro Del!

¹³ Na murdareha!

¹⁴ Na kereha lubipen!

¹⁵ Na čoreha!

¹⁶ Na svedčineha klamišagoha pre aver manuš!

¹⁷ Tire jakha te na kamen nič, so hin avreskero; te na kamen aňi leskero kher, aňi leskera romña, aňi leskere sluhen, aňi leskera gurunña abo somaris, aňi nič aver!"

¹⁸ Sar o manuša šunde o hromi the o zoralo hangos la trubakero a dikhle o bleski the o thuv andral o verchos, igen izdranas daratar a ačhenas dural. ¹⁹ Akor phende le Mojžišoske: "Tu amenca vaker a amen šunaha. Te na vakerel amenca o Del, hoj te na meras."

²⁰ O Mojžiš lenge odphenda: "Ma daran tumen, se o Del tumen avľa te probalinel (skušinel), hoj te daran lestar a te na keren buter o bini."

²¹ Avke o manuša ačhenas dur a ča o Mojžiš džalas paš e kalı chmara, andre savi sas o Del.

Pal o oltaris

²² Paľis o RAJ phenda le Mojžišoske: "Kada phen le Izraelitenge: 'Dikhľan, hoj tumenca vakeravas andral o űebos. ²³ Ma keren peske űisave avre devlen paš mande: aňi rupune aňi somnakune.

²⁴ Kereha mange la čhikatar oltaris a obetineha upre o labarde the smiromoskere obeti, peskere bakren the dobitkos. Ker oda vřadzik, kaj tuke phenava, hoj man te lařares, akor me avava a požehñinava tut. ²⁵ Te mange ačhaveha oltaris le barendar, ma priker len. Bo te ola bara prikereha tire sersamoha, imar na ena sentne. ²⁶ Ma dža upre ko oltaris pal o garadiči, bo te ada kereha, dičhola, so tut hin tel o gada.' "

Pal o Hebrejike otroka

21 O RAJ mek diňa kale zakoni peskere manuřenge:

² Te cineha Hebrejike otrokos, sluřinela tuke řov berř, ale pro eftato berř les premukeha a na mangeha vař leske űisave love. ³ Te ke tu avľa korkoro, džala tutar het korkoro, a te avľa ke tu la romňaha, džala het the laha. ⁴ Ale te leskero raj leske diňa romña a laha les sas murřora the čhajora, akor odi džuvľi the o čhave ačhena ole rajeske a o murř džala odarik het korkoro.

⁵ Ale te oda otrokos phenela, hoj na kamel odarik te džal het, bo peske zakamľa peskere rajes a peskera romña the le čhaven, ⁶ akor les leskero raj muřinel te anel pro than, kaj lařaren le Devles, a ode leske pro vudar abo pre zarubňa la suvaha mi premarel o kan. Avke ela leskero otrokos imar calo peskero dživipen.

⁷ Te vareko bikenela peskera čha sar otrokiňa, na džala het avke sar o murřikane otroka. ⁸ Te na ela pre dzeka peskere rajeske, savo la peske cinda, mi do-mukel, hoj te el cimen avri, ale nařti la bikenel le cudz-

incenge, bo lake na dolikerďahas peskero lav. ⁹ Te la lela peskere čhaske, muřinel pašal late te kerel sar pašal peskeri čhaj. ¹⁰ Te peske oda murř lela avra romña, nařti del la eřebnona frimeder pravos pro chaben, gada the andro haďos sar la dujtona. ¹¹ Te oda murř kala trin veci na dolikerela, odi džuvľi řaj lestar džal het a na muřinel leske te počinel űisave love.

Pal o manuřeskero the džvirinakero dživipen

¹² Te vareko demela varekas avke, hoj merela, muřinel tiř te merel. ¹³ Te pes oda ačhıľa, choc ov na kamľa les te murdarel, ale o Del oda domukľa, sikava-va tuke than, kaj oda manuř řaj denařel. ¹⁴ Oda dženo, ko sas choľamen pre peskero pařutno a murdarďa les, muřinel te merel, a choc denařla ko oltaris †, odle les odarik a muřinel the avke te merel.

¹⁵ Dojekh dženo, ko demela peskere dades abo da, muřinel te merel.

¹⁶ Oda, ko čorela varekas a paľis les bikenela, abo ole manuřes arakhena ke leste, muřinel te merel.

¹⁷ Dojekh, ko kořela peskere dades vaj peskera da, muřinel te merel.

¹⁸ Te pes o murřa mařkar peste vesekedinena a jekh demela avres le bareha abo le vasteha avke, hoj na merela, ale ačhela te pařol pro haďos, ¹⁹ ale paľis uřtela pal o haďos a řaj phirela avral la pacaha, oda dženo, ko leske oda kerďa, na ela vinovato. Ale muřinel leske te prepočinel vař o časos, so nařti kerel buči, the vař oda, so leske kampela, hoj te sastol avri.

²⁰ Oda dženo, ko demela peskere otrokos abo peskera otrokiňa la pacaha avke, hoj leske takoj merela tel o vasta, muřinel te el potrestimen. ²¹ Ale te oda otrokos dživela jekh abo duj džives, leskero raj na ela potrestimen, bo sas leskero otrokos.

²² Te pes o murřa mařkar peste marena a demena varesava khabňa džuvľa a oj nařavela peskere čhavores, ale oj korkori oda predřivela, oda dženo muřinel te počinel oda, so lestar mangela lakero rom – ajci, keci domukena o sudci. ²³ Ale te odi džuvľi merela, o trestos ela o dživipen vař o dživipen, ²⁴ e jakh vař e jakh, o dand vař o dand, o vast vař o vast, o pindro vař o pindro, ²⁵ o labardıpen vař o labardıpen, e rana vař e rana a e dukh vař e dukh.

²⁶ Te vareko demela peskere otrokos abo otrokiňa pal e jakh avke, hoj les korarela, muřinel les vař e jakh te premukel. ²⁷ A te peskere otrokoske abo otrokiňake demela avri o dand, muřinel len vař o dand te premukel.

²⁸ Te varekas o bikos murdarela le rohenca, muřinel te el murdardo le barenca a leskero mas pes nařti chal, ale oda dženo, kaskero sas o bikos, na ela vinovato. ²⁹ Ale te oda bikos angloda džalas pro manuřa a o nipi dovakerenas le chulajiske, a ov les na phandľa andre ohrada, a o bikos murdarela murřes vaj džuvľa, muřinel te el murdardo le barenca a the o chulaj muřinel te merel. ³⁰ Ale oda dženo řaj cinel avri peskero dživipen avke, hoj počinela ajci, keci pes lestar

† Pař o oltaris les űiko nařti kerelas űiř.

mangela. ³¹ Te o bikos murdarela varesave čhas abo čha, mušinel pes tiš te kerel pal kada zakonos. ³² Te o bikos murdarela otrokos abo otrokiña, mušinel te počinel ole dženeske, kaskero sas o otrokos, tranda (30) rupune a le bikos mušinen te murdarel le barenca.

³³ Te vareko odučharel a bo kopalinel avri chañig a na učharel la andre a perela andre o bikos abo o somaris, ³⁴ oda dženo, kaskeri hiñi e chañig, mušinel te počinel rupune ole dženeske, kaskero sas o džviros, a oda murdalo džviros ačhela leske.

³⁵ Te varesavo bikos murdarela aver dženeskere bikos, le džide bikos bikenena a o love the le murdale bikos maškar peste ulavena (rozdelinena). ³⁶ Ale te pes džanelas, hoj oda bikos angloda avke kerelas a leskero chulaj pre leste na merkinelas, mušinel vaše te počinel – o bikos vaš o bikos – a o murdalo bikos ačhela leske. ³⁷ Te vareko čorela le bikos abo bakrores a murdarela vaj bikenela les, mušinel te del pale vaš jekh bikos pandž a vaš jekh bakroro te del pale štar.

Zakoni pal o majetkos

22 Te ole dženes prichudena, sar čorel, a zrañinena avke, hoj merela, oda dženo na ela vinovato vaš leskero meriben, ² ale te pes kada ačhela sar imar vidñisaľola, ela vaš oda vinovato.

Oda, ko čorďa, mušinel vaš oda te počinel. Te les na ela sar te počinel, mušinel te el bikemen vaš ajci love, keci monas o čorde veci. ³ Te pes ke leste arakhela o čordo džviros, či bikos, somaris vaj bakro, mušinel vaše te visarel pale duvar ajci.

⁴ Te vareko pasinela peskere dobitki a mukela len te džal te chal avri e cudzo maľa abo e viñica, avke oda dženo mušinel te visarel pale peskere nekfeder ulipnastar pal e maľa the viñica.

⁵ Te vareko labarela peskeri maľa a odi jag predžala prekal o kraki a chudela te labol avreskeri maľa, a zlabola leske o điv či pro kopi vaj pre maľa, oda dženo, ko kerďa odi jag, mušinel te visarel pale vaš savoro, so zlabila.

⁶ Te vareko dela aver dženeske te garuvel o rup abo aver veci a te vareko aver leske andral o kher len čorela, a te chudena ole dženes, savo čorelas ola veci, mušinel leske te visarel pale duvar ajci. ⁷ Ale te les na prichudena, ela privičimen oda dženo, kaske sas dine ola veci, anglo Del a mušinel te phenel čačipen, hoj ov na iľa aver dženeskere veci. ⁸ Te hin varesavo vesekedišagos pal o barvalipen, či džal pal o gurmña, somaris, bakro, gada, abo vareso aver, pal soste sodudžene phenena: "Oda hin miro," akor sodudžene mi džan anglo Del. Oda dženo, pre kaste sikavela o Del, hoj hino vinovato, mušinel te del aver dženeske duvar ajci.

⁹ Te vareko dela avre manušeske te stražinel le somaris, le bikos, le bakres, abo avre džviros, a te oda džviros murdaľola, abo ela zrañimen, abo les čorena, a na ela švedkos, ¹⁰ oda manuš mušinel te lel vera anglo Del, hoj le džviros na čorďa. Akor oda, kaskero sas o džviros, mušinel oda te pril e oka manuš leske na

mušinel te del pale. ¹¹ Ale te leske čačes čorďa, mušinel leske vaš oda te visarel pale. ¹² Te les čačes o dzivo džviros rozčhingerďa, ov len mušinel te sikavel ole dženeske, kaskere sas, hoj leske te pačal. Akor na mušinel leske te visarel pale.

¹³ Te vareko peske lela kečeñ le džviros avre manušestar a o džviros ela zrañimen abo murdaľola a leskero chulaj na ela paš oda, mušinel leske te počinel ajci, keci molas. ¹⁴ Ale te pes oda ačhela akor, sar o chulaj ela paš oda, na mušinel vaš oda te počinel. Te o džviros sas dino kečeñ vaš o love, na mušinel buter te počinel le chulajiske.

Aver zakoni

¹⁵ Te varesavo murš pašľola la pačivala čhaha, savi mek na sas mangadĩ, mušinel la te lel romñake, a te počinel lakere dadeske vaš late. ¹⁶ Ale te la ñisar na kamela lakero dad leske te del romñake, oda murš the avke počinela ajci, keci pes počinel vaš e pačivali čhaj.

¹⁷ La čarodejñička na mukeha te dživel.

¹⁸ Te vareko pašľola le džviroha, mušinel te merel.

¹⁹ Te vareko obetinela avre devlence a na ča le RA-JESKE, mušinel te merel.

²⁰ Pro cudzincos na džaha zorales aňi na trapinena les, bo the tumen sanas cudzinci andro Egipt.

²¹ La vdova aňi le široten ma trapinen, ²² ale te oda kereha, me čačes šunava avri lengero roviben, te on vičinen pre ma. ²³ Akor miri cholĩ labola pre tumende avke, hoj murdarava tumen la šabľaha, hoj tumare romña ačhena vdovi a tumare čhave ena široti.

²⁴ Te deha kečeñ varekas čores mire manušendar maškar tumende, ma liker tut ke leste sar užerñikos: Ma le lestar buter, ale ča ajci, keci les diñal kečeñ. ²⁵ A te leha varekastar o plaštós sar e zaloha, de leske les pale, medik na zadžala o kham. ²⁶ Se les nane ñič aver, ča oda jekh plaštós, saveha pes učharel. Sar šaj džal te sovel? Te ov vičinel ke mande, šunava les avri, bo som lačhejileskero.

²⁷ Ma vaker namištes pro Del a ma koš tire vodcas.

²⁸ Ma zaliker mange te del o dari peskere đivostar, moľatar abo olivove olejostar. Mušines mange te del peskere ešebne (perše) čhas ²⁹ a ker avke the tire biko-ha the bakreha. Efta džives ela paš peskeri daj a pro ohtoto džives mange les deha.

³⁰ Aven mire manuša. Ma chan mas olestar, so o dzive džvirini rozčhingerde pre maľa, ale čhiven les le rikonenge.

Te na previsaren o čačipen ñikaske

23 Ma rozľidža nalačo hiros. Na pomožineha le manušeske, savo hino vinovato, oleha, hoj svedčineha falošnones.

² Ma liker tut paš aver džene, choc hine but, hoj te keres o nalačo. Sar svedčines pro sudos, ma previsar prekal lende o čačipen, ³ aňi ma zaačh tut vaš ñikaske pro sudos vaš oda, hoj hino čoro manuš.

⁴ Te arakheha tire nepřijateľiskere bikos abo somaris, mušines leske len te anel pale. ⁵ A te dikheha, hoj o somaris tire nepřijateľiskero perel tel o veci, save lidžal, ma odvisar pes lestar, ale pomožin leske les te hazdel upre.

⁶ Ma previsar o čačipen le čore manušeskero vaš leskeri veca pro sudos. ⁷ Mi el tutar dur o falošna lava. Ma murdar oles, ko nane vinovato a hino čačipnaskero, bo odsudzinava oles, ko oda kerela.

⁸ Ma de tut te prepočinel, bo oda korarel the olen, kas hin phundrade o jakha, a previsarel o lava le čačipnaskere manušengere.

⁹ Ma trapinen le cudzincos. Džanen mištes, sar pes šunel oda cudzincos, bo korkore sanas cudzinci andro Egipt.

Pal o eftato berš the Šabbat

¹⁰ Šov berš sadzineha pre tiri maľa a skideha pal late savoro ulipen, ¹¹ ale andro eftato berš pre maľa na kereha nič. Mi chan pal late tire čore manuša a mi chan o maľakere džvirini oda, so ačhela pal lende. Avke ker la viñicaha the le olivakere stromenca.

¹² Šov džives ker tiri buči, ale pro eftato džives ma ker ňisavi buči, hoj peske te odpočovines tu, tiro bikos the somaris, o čhavo tira služkakero the o cudzincos.

¹³ Keren savoro, so tumenge prikazindom! O nava avre devlengere ma leperen a aňi len te na šundol andral tumaro muj!

Pal o trin bare inepi

¹⁴ Trival andro berš oslavineha o inepi pre miri pačiv.

¹⁵ Dolikereha o Inepos pal o Mare bi o Droždí andro časos, so sas dino, andro čhon Abib, bo andre oda čhon avľal avri andral o Egipt. Efta dživesa chaha ola mare, avke sar tuke prikazindom.

Našti man aves te lašarel bijal e obeta.

¹⁶ Palis oslavineha o Inepos la Žatvakero, sar chude-na te skidel o ešebno (peršo) ulipen peskera bučatar, so sadzindal pre maľa.

Pro agor le beršeske oslavineha o Inepos la Žatvakero †, akor sar skideha upre o ulipen.

¹⁷ Sako berš, andre kala inepi, mušinen savore tumare murša te avel anglo RAJ, tumaro Del, hoj man te lašaren.

¹⁸ Ma av te obetinel mange rateskeri obeta jekhetane le droždžengere mareha. O žiros le ineposkera obetatar na mukeha dži tosara. ¹⁹ Sako berš aneħa andro Chramos le RAJESKERO, peskere Devleskero, nekfeder veci peskere ešebne ulipnastar.

La terňa kozica ma tav andre lakera dakero thud.

O RAJ lenge dovakerel a del lav

²⁰ Bičhavav angle tu le aňjelos, hoj tut te chrañinel pro drom, a te anel tut pre oda than, savo tuke priirichtindom. ²¹ Ale merkinen pre leste a šunen, so tumenge phenela. Ma vzburinen pes pre leste, bo na

† Oda hin o inepos Sukkot.

odmukela tumenge, se bičhadom les mira autoritaha.

²² Ale te les šunena a kerena savoro, so tumenge phenela, akor me man marava savore tumare nepřijateľenca a ačhavava man pre ola, ko pes ačhaven pre tumende. ²³ Se miro aňjelos džala angle tumende a lidžala tumen andre phuv le Amorejengeri, le Chetitangenengi, le Perizejengeri, le Kanaančanengeri, le Chivijengeri the le Jebusejengeri, saven zničinava. ²⁴ Ma banduven angle lengere devla a aňi ma služinen lenge. Ma keren avke sar on! Ale mušinen te zničinel ole modlen a te phagerel lengere sentne slupi. ²⁵ Te služinena ča le RAJESKE, peskere Devleske, me tumenge požehñinava o chaben the o paňi a o nasvaliben tumendar odlava. ²⁶ Akor andre tumari phuv aňi jekh džuvľi, savi ela khabňi, na našavela peskere čhavore a ňisavi džuvľi na ela bi o čhave. A dava tumenge but te dživel.

²⁷ Me kerava, hoj tumare nepřijateľa tumendar darana a ela maškar lende balamuta (zmetkos), sar pes lenca marena. Kerava, hoj pes tumendar visarena a denašena het. ²⁸ Bičhavava pre lende le sršnen, hoj te traden avri le Chivijen, Kanaančanen the le Chetitannen. ²⁹ Na tradava len avri tumendar tel jekh berš; te oda kerđomas, e phuv ulahas sar e pušta a e dzivo džvirina ode ulahas but pre tumende. ³⁰ Ale tradava len avri po sikra tumendar dži akor, medik tumen na avena buter, hoj te zalen peske odi phuv.

³¹ Tumari phuv ela le Lole Morostar dži paš o moros, kaj bešen o Filištinci †† a la puštatar dži ko paňi Euftrat, bo me andre tumare vasta dav ole manušen, save ode bešen, hoj len te traden avri. ³² Ma phanden e zmluva lenca, aňi lengere devlenca. ³³ Ma domuken ole manušen te bešel andre tumari phuv, bo te oda kerena, on tumen scirdena, hoj te keren binos angle ma. Te služinena lengere devlence, oda ela prekal tumende e pasca.

O RAJ phandel e zmluva

24 Palis o RAJ le Mojžišoske phendá: "Aven ke ma upre pro verchos tu, o Aron, o Nadab, o Abihu the o eftavardeš (70) Izraelike vodci a dural bandona angle ma a lašarena man. ² Ča tu korkoro ke ma aveħa pašeder a ňiko aver. O manuša te na aven upre pro verchos."

³ O Mojžiš avľa ko manuša a vakerelas lenge savore le RAJESKERE lava the zakoni. Savore manuša odphende jekhe hangoha: "Keraha sa, so phendá o RAJ." ⁴ Akor o Mojžiš pisinda savore lava, so o RAJ vakerelas.

Sig tosara uštiľa a paš o verchos ačhadá oltaris the dešuduj (12) sentne slupi prekal o dešuduj Izraelike kmeňi. ⁵ Palis bičhadá terne Izraeliten, hoj te anen le RAJESKE o labarde obeti a te murdaren terne biken pre smiromoskeri obeta. ⁶ Avke o Mojžiš iľa jepaš ole ratesatar a čhida andro čare, a aver jepašeħa pokropinda o oltaris. ⁷ Palis iľa o zvitkos le Devleskere zakonenca a

†† O Stredozemno Moros

zoraha genelas anglo manuša. On phende: “Šunaha the keraha savoro, so o RAJ phendā.”

⁸ Akor o Mojžiš ila o rat andral o čare, pokropindā le manušen a phendā: “Kada hin o rat la zmluvakero, savi o RAJ phandā tumenca, savi hiñi zathodi pre savore kala prikazañja.”

⁹ Palis gele pro verchos o Mojžiš, o Aron, o Nadab, o Abihu the o eftavardeš (70) Izraelike vodci ¹⁰ a dikhle le Izraeloskere Devles. Tel leskere pindre sas sar te zafiriskeri dlažba, belavo sar žužo ñebos. ¹¹ O RAJ na hazdña pro Izraelike vodci o vast, choc les dikhle. Palis chanas the pijenas.

¹² Avke o RAJ phendā le Mojžišoske: “Av ke ma pro verchos a ačñ ode. Dava tuke o zakonos the o prikazañja, so pisindom pro barune tabli, hoj te siklon.”

¹³ Avke o Mojžiš the leskero služobñikos o Jozua uštile a o Mojžiš gefa pre le Devleskero verchos. ¹⁴ A le vodcenge phendā: “Ačhen kade, medik pes na avaha pale. Ela tumenca o Aron the o Hur a te ela tumen vareso, džan pal lende.”

¹⁵ Sar o Mojžiš gefa upre pro verchos, e chmara zaučhardā o verchos. ¹⁶ Le RAJESKERI slava avla tele pro verchos Sinaj a šov džives les zaučharelas la chmaraha a pro eftato džives o RAJ zvičindā pro Mojžiš andral e chmara. ¹⁷ Le RAJESKERI slava pes le Izraelitenge dičholas sar e jag, so zlabarel pro agor le verchoske. ¹⁸ O Mojžiš gefa andre chmara a gefa upre pro verchos a sas ode saranda (40) dživesa the rača.

O dari prekal o Sentno Stanos

25 O RAJ phendā le Mojžišoske: ² “Phen le Izraelitenge, hoj prekal ma te kiden avri o dari. Prilen oda dojekhestar, ko man kamel te del korkoro pestar. ³ Kajse dari prilen: Somnakaj, rup, bronzos, ⁴ fijałovo, lolī the purpurovo vlna, sane pochtana, kozakere bala, ⁵ lolī cipa le baranostar, cipa le tuleñistar, akacijakere kašta, ⁶ olejos prekal o lampi, koreñje prekal o olejos te pomakhel the pro voñavo kadidlos, ⁷ onixoskere the aver dragane bara pro efodos the pre rašajiko žeba.

⁸ A mi keren mange o Sentno Stanos, hoj te dživav maškar tumende. ⁹ O Sentno Stanos the savore veci andre kerena pal oda planos, so tuke sikavava.”

E Archa la Zmluvakeri

¹⁰ “Le akacijakere kaštostar keren e Archa 110 centimetri džindardī, 66 centimetri buchli the 66 centimetri uči. ¹¹ Obthov la andral the avral le žuže somnakaha a pašal late ker somnakuno pasos. ¹² Kereha prekal late the štar somnakune kariki, so zachudeha pre lakere pindre: duj pre jekh sera a duj pre aver sera. ¹³ Palis kereha o družki le akacijakere kaštostar a obcirdeha len le somnakaha. ¹⁴ O družki zaispideha andro kariki pal soduj seri, hoj pes te del te hordinel. ¹⁵ O družki ačhena andre ola kariki, naštī len te lel avri. ¹⁶ Andre Archa la Zmluvakeri thoveha o duj barune tabli le prikazañjenca †, save tuke dava.

¹⁷ O kritos, saveha pes učharela e Archa, kereha le žuže somnakastar 110 centimetri džindardo the 66 centimetri buchlo. ¹⁸ Le žuže somnakastar kereha duje cheruben pro soduj agora pro kritos la Archake. ¹⁹ Jekh cherubos kereha pre jekh agor a dujto pre aver, a kereha len jekhetane le Archakere kritoha. ²⁰ Ole cherubenge ena rozcirdle o kridli upre a zaučharena lenca e Archa. Ena visarde le mujeha ke peste a dikhena pro kritos. ²¹ Le kritoha učhareha e Archa a thoveha andre o barune tabli ††, save tuke dava. ²² Ode man tuha arakhava a le kritostar maškar o cherubi tuke dava mire prikazañja prekal o Izraeliti.”

O skamind prekal o sentna mare

²³ “Kereha o skamind le akacijakere kaštostar 88 centimetri džindardo, 44 centimetri buchlo the 66 centimetri učo. ²⁴ Obthoveha les le žuže somnakaha a pašal leste kereha somnakuno pasos ²⁵ a pašal o skamind kereha lišta buchli sar e burñik a pre late o somnakuno pasos. ²⁶ Pre late kereha štar somnakune kariki, save prithoveha ko rohi paš leskere štar pindre. ²⁷ Pašes paš e lišta ena o kariki, andre save pes thovena o družki, hoj pes te del te hordinel o skamind. ²⁸ O družki kereha le akacijakere kaštostar a obcirdeha len le somnakaha. ²⁹ A mek kereha le žuže somnakastar o tañira, o kuča, o čarore the o džbani pre mołakeri obe-ta. ³⁰ Pre oda skamind thovena o sentno maro, hoj furt te el angle mande.”

O somnakuno momelaris

³¹ “Kereha somnakuno momelaris le žuže somnakastar. Calo momelaris mušinel te el avrimardo jekhe kotorestar: o maškaruno kotor, o podstavcos, o rameni, the o kvitki le pučikenca. ³² Pro momelaris ker šov rameni. O rameni avena avri le maškarune kotorestar, trin pal jekh sera a trin pal aver sera. ³³ Pro ešebno (peršo) ramenosa ela kerde trin kvitki le pučikenca le mandlendar; pro dujto ramenosa tiš ela kerde trin kvitki le pučikenca le mandlendar. Kavke ela kerdo pre savore šov rameni, so aven avri le maškarune kotorestar. ³⁴ Pro maškaruno kotor ela kerde štar kučora, so dičhon sar kvitki le pučikenca le mandlendar. ³⁵ Jekh pučikos ela tel o ešebna duj rameni maškaral, kaj pes zachudel o rameni, a avke ela the tel e dujto para the trito para. ³⁶ O momelaris le ramenosa the le kvitkenca mušinel te el kerdo jekhe kotorestar le žuže somnakastar.

³⁷ Pro momelaris ker efa lampi. O lampi thoveha avke, hoj te švicinen anglo momelaris. ³⁸ Ker paš leste the o silavis prekal o momelariskere knoti the cikne lopatki le žuže somnakastar. ³⁹ O momelaris the savoro, so kampil paš leste, ker tranda the pandž (35) kilendar ‡ le žuže somnakastar. ⁴⁰ Merkin pre oda, hoj te el kerdo sa pal oda planos, so tuke sikađom pro verchos.”

† E Hebrejiko čhib: o Svedectvo †† E Hebrejiko čhib: o Svedectvo
‡ Oda hin jekh talentos.

O lepedi prekal o Sentno Stanos

26 "O Sentno Stanos kereha le deše lepedendar, so ena kerde le sane pochtanendar la fijalova, lofa the purpurova vlnatar, pre save o majstros šukares sivela le cheruben. ² Dojekh lepeda ela dešuduj (12) metri džindardī a duj metri buchli. Avke ena kerde savore lepedi. ³ Pandž lepedi ena zaside jekhetane a aver pandž tiš. Avke lendar ena duj bare lepedi. ⁴ Pro agor jekha bara lepedake prisiveha fijalova kariki. Kada kereha the pre jekh agor pre dujto bari lepeda. ⁵ Siveha penda (50) kariki pro agor jekha lepedake the pro agor dujta lepedake avke, hoj o kariki te en jekh angle aver. ⁶ Ker penda somnakune čati, savenca sphandeha o bare lepedi avke, hoj o Stanos ela jekh.

⁷ O Stanos upral zaučhareha la lepedaha, so ela kerđi la kozakere balendar. Kajse lepedi kereha dešujekh (11) ⁸ a dojekh ela dešutrin (13) metri džindardī a duj (2) metri buchli. ⁹ Palis ole lepedendar zasiveha pandž jekhetane a aver šov tiš zasiveha jekhetane, avke lendar ena duj bare lepedi. Sar zaučhareha o Stanos, šovto lepeda anglo Stanos prethoveha pro jepaš. ¹⁰ Siveha penda (50) kariki pro agor jekha bara lepedake, a aver penda siveha pro agor dujta bara lepedake. ¹¹ Ker penda bronzune čati; o čati thov andro kariki a lenca prichudeha ke peste o lepedi. ¹² Oda so ačhela buter la dujta bara lepedatar, mi el figimen pre paluñi sera le Sentno Stanoskeri. ¹³ E Sentno Stanoskeri lepeda ela jekh laktos † buchleder sar o Sentno Stanos a ačhela te figinel pal soduj seri a avke zaučharela calo Sentno Stanos.

¹⁴ Ker aver duj lepedi, hoj pes lenca o Stanos te učarel andre. Ešebno (peršo) kereha la lofa sfarbimen baranoskera cipatar a upral late ela e lepeda le tufeñoskera cipatar."

O rami prekal o Sentno Stanos

¹⁵ "Kereha o rami le akacijakere kaštestar prekal o Sentno Stanos. ¹⁶ Dojekh ramos ela 4 metri džindardo a 66 centimetri buchlo. ¹⁷ Kereha duj jednaka kaštune rameni, so hine zachudle jekhetane le maškarune kaštorencu. Pre savore rami ena kala rameni. ¹⁸ Ker biš (20) rami prekal e južno sera. ¹⁹ Prekal ole biš rami ker saranda (40) rupune podstavci – duj tel dojekh ramos prekal leskere duj pindre. ²⁰ The prekal e severno sera ker biš rami ²¹ the saranda rupune podstavci – duj tel dojekh ramos. ²² Kereha šov rami prekal e paluñi sera pro zapados ²³ a paš oda kereha mek duj rami pro rohi pre paluñi sera. ²⁴ Mušinen te el prehandle andre peste le karicenca telunestar dži upre. Kavke len kereha a thoveha pro soduj rohi. ²⁵ Savore rami pre paluñi sera ena ochto a ena thode pro dešušov (16) rupune podstavci – duj tel dojekh ramos.

²⁶ Le akacijakere kaštestar kereha o druki prekal o Sentno Stanos: pandž pre severno sera, ²⁷ pandž pre južno sera a pandž pre zapadno paluñi sera.

† Oda hin 55 centimetri.

²⁸ Maškaruno drukos predžala prekal o maškar le ramenge a oda jekhe Stanoskere agorestar dži ke aver.

²⁹ O rami obcirdeha le somnakaha a kereha upre somnakune kariki, andre save pes thovena o druki, so ena tiš obcirdle le somnakaha.

³⁰ O Sentno Stanos kereha pal oda planos, so tuke sikađom pro verchos."

O veci andro Sentno Stanos

³¹ "Kereha the o pochtan la fijalova the lofa the purpurova vlnatar, pre save o majstros šukares sivela le cheruben. ³² Fignehe les pro štar somnakune slupi le akacijakere kaštestar. The o hačiki upre ela somnakune. O slupi ačhena pro štar rupune podstavci ³³ a o pochtan figin pro hačiki, hoj te rozulavel o Sentno Than le Neksentneder Thanestar a pal leste thoveha e Zmluvakeri Archa le duje barune tablenca. ³⁴ E Archa zaučhareha lakere kritoha. ³⁵ Anglo Neksentneder Than thoveha o skamind pre severno sera a o momeľaris pre južno sera.

³⁶ Anglo than, sar pes džala andro Stanos, kereha o pochtan la fijalova, lofa the purpurova vlnatar a upre siveha škar veci. ³⁷ Hoj te figines oda pochtan, kereha pandž slupi le akacijakere kaštestar a obcirdeha len le somnakaha a kereha upre the o hačiki le somnakastar. Kereha prekal o slupi pandž podstavci le bronzostar."

O oltaris pro labarde obeti

27 "Palis kereha le akacijakere kaštestar oltaris. Mušinel te el kerdo andre kocka 2,2 metri džindardo the 2,2 metri buchlo a 1,3 metros učo. ² Upal pal leskere štar agora kereha po jekh rohos, ajse sar hin le biken. Kala rohi the o oltaris ela kerdo jekhe kotorestar a obthoven calo oltaris le bronzoha. ³ Ker the bare čare pro prachos, lopati, cikne čare, vidli the cikne lopatki pro angara. Savoro sersamos ker le bronzostar. ⁴ Kereha bronzuñi rošta a pre lakere rohi prithoven štar bronzune kariki. ⁵ E rošta thoveha andral tel e obruba maškar o oltaris. ⁶ Prekal o oltaris ker o družki le akacijakere kaštestar a obcirde len le bronzoha. ⁷ O družki pes zaispidela andro kariki, so ena pal soduj seri pro oltaris, hoj pes te prehordinel. ⁸ Ker les le deskendar sar phundradī truhla, avke sar tuke sikađom pro verchos."

Le Sentne Stanoskeri dvora

⁹ "Ker e dvora pašal o Sentno Stanos. Pre južno dvorakeri sera ker o lepedi le sane pochtanestar; jekh sera mi el džindardī saranda the štar (44) metri ¹⁰ le biš (20) slupenca pro biš bronzune podstavci. O hačiki the o maškarune tički ko slupi mi en le rupunestar. ¹¹ Avke the pre severno sera ena biš slupi pro biš bronzune podstavci. O hačiki the o tički ko slupi mi en le ru-postar.

¹² Pre zapadno dvorakeri sera ena o lepedi bišuduj (22) metri džindarde a deš slupi pro deš podstavci. ¹³ E angluñi dvora pro vichodos ela tiš bišuduj metri buchli.

¹⁴⁻¹⁵ Pro soduj vudareskere seri thoven o lepedi 6,6 metri džindarde pro trin slupi a pro trin podstavci.

¹⁶ O vudar ela le zavesendar, save ena džindarde eña metri a ena kerde le sane pochtanestar, so ela šukares avrisido la belava, fjalova the loľa vlnaha, a ena figimen pro štar slupi a pro štar podstavci. ¹⁷ Savore slupi pašal e dvora mušinen te el zaphandle ke peste le rupune tičkenca. Lengere hačiki mušinen te el le rupostar a o podstavci le bronzostar. ¹⁸ E dvora mi el 44 metri džindardi, 22 metri buchli the 2,2 metri uči. Ola lepedi ena kerde le sane pochtanestar a o podstavci le bronzostar. ¹⁹ Savoro aver sersamos pre služba andro Sentno Stanos the o cilore prekal o Stanos the prekal e dvora, ena le bronzostar.”

O olejos andro momelaris

²⁰ “Prikazin le Izraelitenge, hoj tuke te anen nekfeder olivovo olejos pro momelaris, hoj furt te labol o svetlos. ²¹ O Aron the leskere čhave mušinen te merkinel, hoj odi lampa furt te labol andro Stanos anglo pochtan, so hino angle Archa. Ode anglo RAJ mušinel te el labardo o momelaris calo rat dži tosara. Kada prikazis mušinen te dolikerel o Izraeliti the lengere potomki pro furt.”

O rašajike gada

28 “Prikazin, hoj le Izraelitendar te aven angle ma tiro phral o Aron the leskere čhave: o Nadab, Abihu, Eleazar the o Itamar, bo kamav, hoj mange te služinen sar rašaja. ² Le Aronoske kereha sentno ruchos, hoj te el urdo andro šukariben the andre pačiv. ³ Vičin savore krajčiren, saven diňom godaveripen a phen lenge, hoj te siven le Aronoske rašajiko ruchos, hoj mange te služinel sar rašaj. ⁴ Mi siven ajse ruchi: E rašajiko žeba andre brekh, so ela phandli le nekbaredere rašajenge pašal o jilo, o efodos, o ruchos, o sido teluno gad, o turbanos the o sirimos. Kala gada kerena le Aronoske the leskere čhavage, hoj mange te služinen sar rašaja. ⁵ Sa ela kerdo la belava, fjalova the loľa vlnatar, le somnakune thaveha the le sane pochtanestar.”

O efodos

⁶ “O efodos mi siven la belava, fjalova the loľa vlnatar, le somnakune thaveha the le sane pochtanestar. ⁷ Kerela pes upre duj kotora, so pes zachudena pro vali a spojinen pes le efodoskere uprune kotorenca. ⁸ O sirimos, saveha pes phandela o efodos pašal o per, mušinel te el sido la fjalova, loľa the purpurova vlnatar, le somnakune thaveha the le sane pochtanestar.

⁹ Leha duj onixoskere bara a randeha upre o nava le Jakoboskere čhavengere: ¹⁰ šov nava pre jekh bar a aver šov nava pro dujto bar šoroaha, avke sar ulile.

¹¹ Kereha oda sar o majstros, savo randel avri o pečatidlos pro bara. Avke randeha avri pro soduj bara o nava le Jakoboskere čhavengere a palis len thoveha

andro somnakune ramici. ¹² Palis prichudeha pro efodos pro phike o bara, so leperena le Izraeloskere čhaven. O Aron len hordinela pre peskere phike anglo RAJ, hoj len te leperel. ¹³ Kereha mek duj somnakune ramici ¹⁴ the duj lancici le žuže somnakastar. Kereha len sar prephandle špargi a prichudeha len pro ramici.”

E rašajiko žeba

¹⁵ “Sar o majstros kereha e žeba andre brekh, so ela phandli le nekbaredere rašaske pašal o jilo. Ola žebaha rodela avri oda, so o Del kamel. Kereha la la belava, fjalova the loľa vlnatar, le somnakune thaveha the le sane pochtanestar. ¹⁶ Mušinel te el prethodo duvar andre kocka, džindardo the buchlo 22 centimetri. ¹⁷ Pre late thoveha andro štar šori dragane bara: andro ešebno (peršo) o rubinos, topasis, the smaragdos; ¹⁸ andro dujto malachitos, zafiris, the diamantos; ¹⁹ andro trito opalos, achatos, the ametistos; ²⁰ andro štarto chrizolitos, onixos the jaspisos. Thov len andro somnakune ramici. ²¹ Pre ola dešuduj (12) bara ena avrirandle o nava le Jakoboskere dešuduje čhavengere. Pre dojekh bar mušinel te el avrirandlo jekh kmeňoskero nav avke, sar pes kerel o pečatidlos.

²² Pre žeba kereha lancici le žuže somnakastar prephandle sar špargi. ²³ Mek kereha duj somnakune kariki a prisiveha len pre leskere duj uprune rohi ²⁴ a soduj somnakune špargi prichudeha ke ola kariki.

²⁵ Pro vali prichudeha o somnakune špargi pro somnakune ramici a avke len prichudeha anglunestar pro efodos. ²⁶ Ker duj somnakune kariki a prichude len andral pro soduj telune rohi la žebake paš o efodos.

²⁷ Ker mek duj somnakune kariki a prichude len pro anglune agora le efodoske ode, kaj hino zasido o efodos upral o sirimos. ²⁸ O kariki pre žeba prichude ko efodoskere kariki la belava špargaha avke, hoj te el upreder le sirimostar a te na pes e žeba čhalavel.

²⁹ Sar o Aron džala andro Neksentneder Than, urela pre peste kadi žeba, pre savi ena avrirandle o nava le Jakoboskere čhavengere. Akor me, o RAJ, mange furt leperava pre mire manuša. ³⁰ Andre žeba thovena o sentna losi, o Urim the o Tummim, hoj te el le Aronoske paš o jilo, sar avela anglo RAJ andro Neksentneder Than. Avke o Aron furt hordinela e rašajiko žeba, hoj pes te dodžanel miri voľa prekal o Izraeliti.”

O plaštós

³¹ “Ko efodos ker plaštós a mi el calo la fjalova vlnatar. ³² Pro plaštós ela maškaral avrimuklo than pro šero, so ela sido zorale thaveha, hoj pes te na rozparinel. ³³ Pre teluno agor siveha granatoskere phaba la fjalova, loľa the purpurova vlnatar a maškar lende cikne somnakune zvončeki. ³⁴ Avke pes čerinena o phaba le zvončekenca pašal teluno agor le plaštóske.

³⁵ O Aron les urela, sar kerela e rašajiko služba. Sar avela anglo RAJ pro Sentno Than, abo sar džala avri,

šundola lengero hangos pro znameŕje, hoj na merela."

E čelenka

³⁶ "Le žuže somnakastar ker somnakuŕi čelenka a rande andre o lava, avke sar pes kerel o pečatidlos: 'Sentno le RAJESKE.' ³⁷ Prichudeha la la belava špargaha pre angluŕi sera pro turbanos. ³⁸ E čelenka, so ela le Aronoste pro šero, sikavela, hoj ov lel pre peste e vina vaš o obeti, so namištes obetinena o Izraeliti. Avke me, o RAJ, prilava le Izraelitengere obeti.

³⁹ Siv leskero teluno ruchos the turbanos le loke pochtanestar a ker the farebno sirimos."

O telune gada

⁴⁰ "Siv lenge o telune ruchi, o čapki the o sirimi, hoj le Aronoskere čhave te en urde andro šukariben the andre pačiv. ⁴¹ Uri andre kala gada le Aron the leskere čhaven. Pomakh len, sentŕnar len a ačhav len sar rašajen, hoj mange te služinen.

⁴² Siv lenge telune gada, hoj len te učharen le perestar dži ko čanga, hoj te na dičhol lengero langipen.

⁴³ O Aron the leskere čhave hordinena o telune gada, sar džana andro Sentno Stanos abo sar džana ko oltaris the andro Neksentneder Than, hoj oleha te na keren binos a te na meren."

Kada ela prikazis prekal o Aron the leskere potomki pro furt.

Sar te sentŕnaren le rašajen

29 "Sar pomakhena rašajenge le Aron the leskere čhaven, hoj mange te služinen, leha sastes terne bikos the duje bakren bi e chiba. ² Le sane arestar kereha vajkeci mare bi o droždŕi le olivove olejoha the vajkeci bi o olejos; ker the sane marikla, so pomakheha le olejoha. ³ Ola mare thoveha andro košaris a an len angle mande, sar obetineha le bikos the duje bakren. ⁴ Palis an le Aron the leskere čhaven anglo vudar le Sentne Stanoskero a obthov (omor) len le paŕneha. ⁵ Uri pro Aron o teluno ruchos the o plaštós a upral uri o efodos the e rašajiko žeba. Palis phand pašal leste o efodoskero sirimos. ⁶ Pro šero leske thov o turbanos a upral prichude e sentno somnakuŕi čelenka. ⁷ Palis le o olejos, čhor leske pro šero a pomakh les. ⁸ An the leskere čhaven a uri lenge o telune ruchi. ⁹ Palis phand o sirimos pašal o Aron the pašal leskere čhave a pro šero lenge thov o čapki. Lengero rašajipen ačhela pro furt.

Aleha sentŕnareha le Aron the leskere čhaven andre služba.

¹⁰ An terne bikos anglo Sentno Stanos a o Aron the leskere čhave mi thoven o vasta pre leskero šero.

¹¹ Murdareha les anglo RAJ paš o vudar, sar pes džal andro Sentno Stanos. ¹² Ole bikostar le sikra rat a pomakh le angušteha le oltariskere rohi. Čhiv avri o rat, so ačhela, paš o oltariskero zaklados. ¹³ Palis le savoro žiros, so učharel leskere androne kotora, o nekfeder

kotor la pečinkatar the soduj ľadvini lengere žiroha, a kada savoro labar pro oltaris. ¹⁴ O mas, e cipa the o goja labar avri le taboristar. Kadi hiŕi e obeta vaš o binos.

¹⁵ Palis le jekhe bakres a o Aron the leskere čhave mi thoven pre leskero šero o vasta. ¹⁶ Murdar les a pokropin le rateha pašal calo oltaris. ¹⁷ Le bakres rozčhinger pro kotora, obthov (omor) leskere androne kotora the o pindre a thov oda paš ola aver kotora the paš o šero. ¹⁸ Akor cale bakres labar pro oltaris. Oda hin e labardi obeta prekal o RAJ, e lačhi saga, e obeta kerdŕi la jagaha prekal o RAJ.

¹⁹ Palis leha le dujte bakres a o Aron the leskere čhave mi thoven peskere vasta pre leskero šero.

²⁰ Murdar les, le sikra rat a pomakh leha le Aronoskero čačo (pravo) kan ode, kaj pes thovel o čeŕna. Avke ker the leskere čhvenge. Pomakh lenge the o angušŕ pre čačo vast the pro pindro. Oda rat, so ačhela, pokropin pašal calo oltaris. ²¹ Palis le oda rat, so hino pro oltaris, the o olejos a pokropin le Aron the leskere čhaven the lengere ruchi. Kavke ela o Aron a leskere čhave sentŕarde lengere ruchenca.

²² Avke le o žiros le bakrestar, o žirošno chvostos, o žiros so zaučharel leskere androne kotora, o nekfeder kotor la pečinkatar, soduj ľadvini le žiroha the e čači čang. Kada ela o bakroro pro sentŕariben. ²³ Palis andral o košaris le marenca bi o droždŕi, so hino thodo anglo RAJ, le maro bi o olejos, the maro le olejoha the sane marikla. ²⁴ De oda maro le Aronoske the leskere čhvenge andro vasta. On oda mi hazden upre, hoj te sikaven, hoj oda hin sentŕardo prekal o RAJ. ²⁵ Palis le lendar oda daros a labar pro oltaris la labarda obetaha sar voŕavo obeta le RAJESKE. Kadi ela obeta kerdŕi la jagaha prekal o RAJ. ²⁶ Palis hazde upre o bakreskero kolŕin, so sas obetimen pre le Aronoskero sentŕariben, hoj te sikaves, hoj oda mas hino sentŕardo prekal o RAJ. Kada kotor ela dino tuke.

²⁷ O kolŕin, so hino hazdlo upre, the e čang, so hiŕi diŕi pre obeta, sentŕnar. Ola kotora le bakrestar ena sentŕarde prekal o Aron the prekal leskere čhave.

²⁸ Oda hino miro prikazis: O kolŕin the e čang furt ela o kotor le Aronoske the leskere čhvenge, sar mire Izraelike manuša anena o chabeneskere obeti. Oda hino daros le manušendar mange, le RAJESKE.

²⁹ Le Aronoskere rucha mi prelen leskere čhave pal leste, hoj andre lende te en pomakhle the sentŕarde andre rašajiko služba. ³⁰ Oda čhavo, savo pal leste prelela e rašajiko služba a avela andro Sentno Stanos te služinel andro Neksentneder Than, mušinel eфта dživesa oda ruchos pre peste te urel.

³¹ Palis le ole bakres pro sentŕariben le rašajen ke služba, a tav leskero mas pro sentno than. ³² Oda mas the o mare andral o košaris chana o Aron the leskere čhave anglo vudar le Sentne Stanoskero. ³³ On mi chan oda, so sas obetimen vaš lengero odmuklŕiben, sar sas sentŕarde the ačhade andre rašajiko služba. ŕiko aver naštŕi chal ole chabenastar, ča o rašaja, bo hino sentno. ³⁴ A te ole masestar abo le marestar ačhela dži tosara, labar oda pre jag. Naštŕi pes oda chal, bo hino sentno.

³⁵ Le Aronoha the leskere čhavenca ker sa avke, sar tuke prikazindom. Efta dživesa pes sentňarena o rašaja. ³⁶ Sako džives, o manuša mušinen te anel terne bikos sar obeta vaš o binos. O oltaris obžužareha avke, hoj upre aneha e obeta vaš o binos a pomakheha les, hoj te el sentno. ³⁷ Efta dživesa obžužareha o oltaris, hoj les te sentňares. Avke ela o oltaris neksentneder. Savoro, so pes lestar chudela, ela sentno.

E sakodživeseskeri obeta

³⁸ Sako džives obetineha pro oltaris duje jekhberšeskere bakroren: ³⁹ jekhes tosara a dujtones rači. ⁴⁰ Paš o ešebno (peršo) bakro prithov kilos sano aro, zmišimen litra olivove olejoha a rozčhiv litra mol sar molakeri obeta. ⁴¹ Dujte bakrores obetineha rači – avke sar the e tosaraskeri obeta – la molaha the le areha mišimen le olejoha, so ela šukar saga: e obeta kerđi la jagaha prekal o RAJ.

⁴² Kadi labardī obeta anena sako džives paš o Sentno Stanoskero vudar anglo RAJ. Kerena oda pokoleñje pro pokoleñje. Ode man zdžava mire manušenca a ode vakerava tuha. ⁴³ Ode man arakhava le Izraelitenca a oda than ela sentno mira slavatar.

⁴⁴ Sentňarava o Sentno Stanos the o oltaris, a sentňarava le Aron the leskere čhaven, hoj mange te služinen sar rašaja. ⁴⁵ Me bešava maškar o Izraeliti a avava lengero Del. ⁴⁶ A sprindžarena, hoj me som o RAJ lengero Del, savo len ilom avri andral o Egipt, hoj te bešav maškar lende. Me som o RAJ, lengero Del.

O kadidloskero oltaris

30 Palis kerena oltaris le akacijakere kaštestar prekal e kadidloskeri obeta. ² Mušinel te el kerdo andre kocka, 45 centimetri † džindardo the buchlo, a učo 90 centimetri. Ela les pro štar agora po jekh rohos, ajse sar hin le biken, so ena jekhe kotorestar le oltariha. ³ Calo oltaris obthov le žuže somnakaha a pašal leste ker somnakuno pasos. ⁴ Pal soduj seri prichude o somnakune kariki tel o pasos avke, hoj prekal o kariki te predžan o dručki, hoj pes te del te hordinel. ⁵ O dručki ker le akacijakere kaštestar a obcirdeha len le somnakaha. ⁶ O oltaris thov angle lepeda, so hiñi angle zmluvakeri Archa. Ode man tuha arakhava.

⁷ Sako tosara, sar o Aron džala te pririchtinel o lampi, labarela pre leste o voňavo kadidlos. ⁸ O Aron les labarela pale the ke račate, sar džala te zalabarel e jag andro lampi. Kadi voňavo obeta anena furt anglo RAJ pal savore tumare pokoleñja. ⁹ Na obetinena upre aver kadidlos, añi ñisavi labardī abo chabeneskeri obeta, a añi na čhoreha avri e molakeri obeta pre leste.

¹⁰ Jekhvar andro berš o Aron obžužarela o oltaris avke, hoj pokropinela o štar rohi le džviroskere rateha, so sas obetimen vaš o bini. Kada kerela sako berš, pal savore tumare pokoleñja. Kada oltaris ela neksentneder prekal o RAJ."

O love prekal o Neksentneder Than

¹¹ Palis o RAJ phendā le Mojžišoske: ¹² "Sar zgeneha savore Izraeliten, hoj te džanes, keci hine, akor dojekh manuš pes mušinel te cinel avri anglo RAJ, hoj te na en marde le Devlestar, sar len zgeneha. ¹³ Dojekh, ko ela zgendo, mušinel te del jepaš šeklos †† sar obeta, so hiñi hazdli upre prekal o RAJ. O love kempel te važinel pal oda, sar pes važinel andro Sentno Stanos. ¹⁴ O murša, kaske hin biš (20) berš a buter, ena zgende, a mušinen te del le RAJESKE kadi obeta. ¹⁵ O barvalo manuš na počinela buter, añi o čoro frimeder, sar anena odi obeta prekal o RAJ. ¹⁶ Kala love kide avri le Izraelitendar a de pre služba andro Sentno Stanos. Me mange pre lende leperava, sar anena e obeta, so anel o smirom le RAJEHA."

E bronzuñi nadoba

¹⁷ O RAJ phendā le Mojžišoske: ¹⁸ "Ker e bari bronzuñi nadoba pro thoviben (moripen), so ačhela pro bronzuno podstavcos. Thov les maškar o Sentno Stanos the oltaris a čhiv andre pañi. ¹⁹ O Aron the leskere čhave ode thovena o vasta the o pindre. ²⁰ Sar džana andro Sentno Stanos, mušinen pes te thovel le pañeha, hoj te na meren. Avke kerena, the sar džana ko oltaris te kerel e služba, hoj te keren e labardī obeta prekal o RAJ. ²¹ Mušinen te thovel peske o vasta the o pindre, hoj te na meren. Kada ela prekal o Aron the prekal leskere potomki prikazis pro furt, pokoleñje pro pokoleñje."

O sentno olejos pro pomakhlipen

²² O RAJ mek phendā le Mojžišoske: ²³ "Le nekfeder voňavo koreñje, le šov kili sañi mirha, trin kili voňavo škorica, trin kili voňavo trstina ²⁴ the šov kili kassia – savoro važin avke, sar pes važinel andro Sentno Stanos. Zmišin oda le štar litri olivove olejoha ²⁵ a avke kereha sentno olejos pro pomakhlipen – oda ela zmišimen voňavo parfumos, avke sar kerel o olejkaris. Oda ela sentno olejos pro pomakhlipen. ²⁶ Pomakheha leha o Sentno Stanos the e Zmluvakeri Archa, ²⁷ o skamind leskere sersamoha, o momelāris leskere sersamoha, o kadidloskero oltaris, ²⁸ o oltaris pro labarde obeti leskere sersamoha, the e nadoba lakere podstavcoha. ²⁹ Sentňareha len a ena sentne. Sa, so pes lendar chudela, ela sentno.

³⁰ Palis le Aron the leskere čhaven pomakheha a sentňareha, hoj mange te služinen sar rašaja. ³¹ Le Izraelitenge vaker: 'Kada olejos ela pro sentno pomakhlipen prekal miri služba pro furt. ³² Naštī les čhoren avri pre chocsavo dženo a ole koreñjendar na kerena ñisavo aver olejos. Hino sentno a ačhela furt prekal tumende sentno. ³³ Te vareko kerela ole koreñjendar ajso olejos, abo pomakhlāhas leha varekas, ko nane rašaj, oda manuš ela avritradlo mire manušen-dar.' "

† Oda hin jekh laktōs.

†† Oda hin jekh rupuñi minca.

O kadidlos

³⁴ O RAJ phendā le Mojžišoske: "Le ole voňave koreň-jendar jednakones ajci živica, onixos, galbanos the žužo kadidlos. ³⁵ Olestar ker voňavo kadidlos, ajso sar kerel o olejkaris a zmišin le loneha, hoj te el žužo the sentno. ³⁶ Oda koreňje pučineha pro churdo praškos a sikra olestar thov angle Archa andro Sentno Stanos, kaj man tuha arakhava. Oda ela tumenge neksentneder. ³⁷ O kadidlos, so kavke pririchtineha ole koreňjendar, našti pririchtines prekal peste, bo oda ela sentno prekal o RAJ. ³⁸ Te vareko peske kerđahas ajso kadidlos, sar saga prekal peste, ela avritradlo mire manušendar."

O Becaleel the Oholiab

31 O RAJ phendā le Mojžišoske: ² "Dikh, andral o kmeňos Juda kidňom mange avri le Becaleel, saveske hino dad o Uri a papus o Chur. ³ Pherardom les mire Duchoha a diňom les prindžaripen, achalu-vipen the godaveripen pre dojekh buči, ⁴ hoj te gondolinel avri o plani sar te kerel o veci le somnakastar, le rupunestar the le bronzostar ⁵ a hoj te oprikerel o dragane bara a te zathovel len andro somnakaj the rup, te čingerel avri o kašta a te kerel dojekh majstroskeri buči. ⁶ Paš leste diňom le Oholiab, le Achisamachoskere čhas andral o kmeňos Dan. A savore majstren diňom e godi, hoj te keren savoro avke, sar tuke prikazindom: ⁷ O Sentno Stanos, e Zmluvakeri Archa the lakero kritos, the o aver veci andro Stanos, ⁸ o skamind leskere sersamoha, o momelaris le žuže somnakastar leskere sersamoha, o kadidloskero oltaris, ⁹ o oltaris pro labarde obeti leskere sersamoha, e bari bronzuňi nadoba le podstavcoha, ¹⁰ o sane ruchi pre le rašajengeri služba prekal o Aron the leskere čhave, ¹¹ o olejos pro pomakhlipen the o voňavo kadidlos prekal o Neksentneder Than. Savoro mi keren avke, sar tuke prikazindom."

Pal o Šabbat

¹² O RAJ phendā le Mojžišoske, ¹³ hoj te phenel le Izraelitenge: "Dolikeren o Šabbat, bo oda hin sar znameňje maškar mande the tumende pro furt, hoj te džanen, hoj me, o RAJ, tumen sentňarav.

¹⁴ Dolikeren o Šabbat, bo hino sentno! Ko les na sentňarela, mušinel te merel a dojekh, ko andre oda džives kerela buči, mi el avritradlo peskere manušendar. ¹⁵ Šov džives hin pre oda, hoj te keren buči, ale eftato hin le RAJESKERO sentno džives, hoj te odpočovinen. Dojekh, ko andre oda džives kerela buči, mušinel te merel! ¹⁶ O Izraeliti andre dojekh pokoleňje mi dolikeren o Šabbat sar zmluva pro furt. ¹⁷ Kada ela o znameňja maškar mande the mire manuša pro furt, bo o RAJ tel o šov dživesa kerđa o ňebos the e phuv, ale eftato džives preachiľa te kerel a odpočovinelas."

¹⁸ Sar o RAJ dovakerđa le Mojžišoha pro verchos Sinaj, diňa leske o Svedectvoskere tabli – o duj barune

tabli, pre save o Del pisinda o prikazaňja peskere angušteha.

E somnakuňi gurumňori

32 Sar o nipi dikhle, hoj o Mojžiš hino but časos pro verchos a na avel tele, avle ko Aron a phende leske: "Av, ker amenge devlen, save džana angle amende. Bo na džanas, so pes achiľa le Mojžišoha, ole muršeha, savo amen ligenda avri andral o Egipt."

² O Aron lenge odphendā: "Len tele tumare romňijendar, čhavendar the čhajendar o somnakune čeňa pal o kana a anen mange." ³ Avke dojekh manuš iľa andral o kana o somnakune čeňa a ande le Aronoske. ⁴ Ov lendar oda iľa, roztađa a čhordā avri somnakuňa gurumňora. O manuša phende: "Ó, Izrael, kada hino tiro del, savo tut iľa avri andral o Egipt!"

⁵ Sar oda o Aron dikhľa, ačhađa angle somnakuňi gurumňi oltaris a phendā: "Tajsa ela inepos pre pačiv le RAJESKE!" ⁶ Pre aver džives sig tosara uštiele a ande o labarde the smiromoskere obeti. O manuša bešle, chanas a pijenas; palis uštiele a khelenas džungales the bi e ladž jekh avreha.

⁷ O RAJ phendā le Mojžišoske: "Sigo dža pale tele! Bo tire manuša, saven ligendāl avri andral o Egipt, kerde baro nalačhipen angle Ma. ⁸ Igen sig odgele pal o drom, savo lenge sikađom. Kerde peske modla gurumňora! Bandon angle late, ande lake obeti a vičinde: "Ó, Izrael, kada hin tumaro del, savo tumen iľa avri andral o Egipt!" "

⁹ O RAJ mek phendā le Mojžišoske: "Dikhľom, hoj kale manuša hine zoralejileskere, bo na kamen te šunel.

¹⁰ Akana muk man. Mi el avričhordī pre lende miri cholī, hoj len te zňičinav. Palis tutar kerava baro narodos!"

¹¹ Ale o Mojžiš mangelas le RAJES, peskere Devles, a phendā: "RAJEJA, soske sal cholamen pre tire manuša, saven iľal avri andral o Egipt tira bara zoraha the bare vasteha? ¹² Te ada kereha, palis o Egiptana vakerena, hoj len ča ligendāl avri, hoj te murdares len pro verchi a te khoses tele pal e phuv. Mangav tut, ma av cholamen pre tire manuša. Čerin tiro gondoljšagos a ma de pre lende e bibach. ¹³ Leper tuke pre tire služobňika Abraham, Izak the Jakob †. Bo diňal len la veraha lav: 'Kerava tumendar baro narodos ajci, keci hin o čercheňa pro ňebos, a cali kadi phuv dava tumare čhavage, hoj pro furt te el tumari.'" ¹⁴ Avke o RAJ pes rozgondolinda a na diňa e bibach pre lende, sar kame-las.

¹⁵ O Mojžiš geľa tele pal o verchos a andro vasta lidžalas duj barune tabli, pre save sas pisimen o prikazaňja pal jekh sera the pal aver. ¹⁶ O Del korkoro kerđa o tabli a randā avri pre lende o prikazaňja peskere vasteha.

¹⁷ Sar o Jozua šundā le manušengeri bari vika, phendā le Mojžišoske: "Andro taboris hin maribnaskero vriskišagos."

¹⁸ O Mojžiš odphendā:

† E Hebrejiko čhib: Izrael

“Oda nane vriskiŝagos sar pal o ņerindipen (vitáztvo), aŝi o vriskiŝagos olengero ko prekelde (prehrajinde);

me ŝunav o gilavipnaskero hangos.”

¹⁹ Sar o Mojžiŝ avla paŝeder paŝ o taboris a dikhla la somnakuŝa gurumŝora the le manuŝen sar khelen, chofisalila, čhida o tabli tele a phagerda len paŝ o verchos. ²⁰ Palis ila la gurumŝora, sava peske kerde, zlabarda la andre jag a rozmarđa pro prachos. Palis oda prachos čhida andro paŝi a diŝa te pijel le Izraelitenge.

²¹ O Mojžiŝ phenda le Aronoske: “So tuke kerde kala manuŝa, hoj len ligenda andre ajsa baro binos?”

²² “Te na el cholamen miro raj!” odphenda o Aron. “Se tu prindžares kale manuŝen, hoj sig džan andro nalačhipen. ²³ On mange phende: ‘Ker amenge devles, savo džala angle amende. Se na džanas, so pes ačhila le Mojžiŝoha, le murŝeha, savo amen ila avri andral o Egipt.’ ²⁴ Me lenge odphendom: ‘Kas hin somnakaj, mi lel tele pal peste a mi anel mange. Sar ande, me les roztađom andre jag a avla avri olestar kadi gurumŝori.’ ”

²⁵ O Mojžiŝ dikhla, hoj o Aron domukla le manuŝenge te kerel, so on kamenas a kerenas, hoj lengere ņeprijateľa lendar te asan. ²⁶ Avke o Mojžiŝ ačhila andre taboriskeri brana a zvičinda: “Dojekh, ko hino pre le Devleskeri sera, aven ke ma!” A savore Leviti gele te ačhel paŝal leste.

²⁷ Ov lenge phenda: “Kavke vakerel o RAJ, o Del le Izraeloskero: ‘Dojekh paŝal peste mi phandel e ŝabľa. Predžan prekal o taboris jekha branatar dži ke aver a dojekh mi murdarel peskere phrales, prijateľis the susedas.’ ” ²⁸ O Leviti avke kerde, sar lenge prikazinda o Mojžiŝ a oda džives mule vaj 3 000 murŝa. ²⁹ Palis o Mojžiŝ phenda: “Adadžives pes sentňardan andre služba le RAJESKERI, bo dojekh murdarda peskere čhas the phrales. Vaŝoda o RAJ adadžives tumen požeňinda.”

O Mojžiŝ pes privakerel vaŝ o Izraeliti

³⁰ Pre aver džives o Mojžiŝ phenda le manuŝenge: “Kerđan baro binos anglo RAJ, ale akana džav pale pro verchos te mangel le RAJES, hoj tumenge te odmukel o binos.”

³¹ Avke o Mojžiŝ geľa pale ko RAJ a phenda leske: “Ó, Devla, kala manuŝa kerde baro binos, bo kerde peske somnakune devles. ³² Mangav tut, odmuk lengero binos. Te na, ta akor khos man avri andral tiro zvitkos, so pisinehas.”

³³ Ale o RAJ leske phenda: “Andral miro zvitkos khosava avri oles, ko kerel binos angle Ma. ³⁴ Tu akana dža a lidža le manuŝen pre oda than, pal savo tuke phendom. Miro aňjelos džala angle tu. Ale avela oda časos, sar len marava vaŝ lengere bini.”

³⁵ Avke o RAJ bičhadă nasvaliben pro manuŝa, bo ispidenas pro Aron, hoj lenge te kerel la somnakuŝa gurumŝora.

33 O RAJ phenda le Mojžiŝoske: “Dža het pal kada than le manuŝenca, saven ilal avri andral o

Egipt, a dža andre odi phuv, pal savi la veraha phendom, hoj dava le Abrahamoske, Izakoske the le Jakoboske, akor sar phendom: ‘Dava la tire potomkenge.’ ² Bičhavava angle tu le aňjelos a tradava odarik le Kanaančanen, le Amorejen, le Chetitanen, le Perizejen, le Chivijen the le Jebusejen. ³ Aveha andre phuv, kaj čuľal o thud the o medos. Ale me na džava tumenca, bo san zacata a na kamen te ŝunel. Te tumenca gelomas, ŝaj tumen zňičindomas le dromeħa.”

⁴⁵ Palis o RAJ phenda le Mojžiŝoske: “Phen le Izraelitenge: ‘San zoralejilengere! Te gelomas tumenca ča sikra, muŝindomas tumen te zňičinel. Akana thoven tele pal tumende o ŝukariben a dikhava, so tumenca kerava.’ ” Sar o manuŝa ŝunde oda zoralo vakeriben, ačhile smutne a ņiko pre peste na ila ņisavo ŝukariben. ⁶ Vaŝoda, sar o Izraeliti omukle o verchos Choreb, imar na hordinenas pre peste ņisavo ŝukariben.

O stanos, kaj pes džanas le RAJEHA

⁷ O Mojžiŝ ila o stanos a ačhadă les dureder le taboristar. Diŝa leske nav “O stanos, kaj pes zdžana le RAJEHA”. Te vareko rodela le RAJES, džalas avri andral o taboris andre oda stanos. ⁸ A sar o Mojžiŝ džalas andre oda stanos, savore manuŝa uŝtile. Dojekh ačhelas angle peskero stanoskero vudar a dikhenas pro Mojžiŝ, medik na geľa andro stanos. ⁹ Sar o Mojžiŝ geľa andro stanos, o chmarakero slupos avla tele a ačhelas paŝ o stanoskero vudar, medik o RAJ vakerelas le Mojžiŝoha. ¹⁰ Sar o manuŝa dikhenas, hoj o chmarakero slupos hino paŝ o stanoskero vudar, bandonas dži ke phuv, dojekh anglo peskero stanos. ¹¹ O RAJ vakerelas le Mojžiŝoha, muj-mujeha, avke sar vareko vakerel le prijateľiha. Palis pes visarda pale andro taboris. Ale leskero terno sluhas o Jozua, le Nunoskero čhavo, ačhelas andro stanos.

O Mojžiŝ the le RAJESKERI slava

¹² O Mojžiŝ phenda le RAJESKE: “Tu mange phenda: ‘Lidža kale manuŝen,’ ale na phenda mange, kas manca bičhaveħa. Phenda mange: ‘Prindžarav tut miŝtes a sal mange pre dzeka.’ ¹³ Te som tuke pre dzeka, ta de mange te džanel tire droma, hoj tut buter te prindžarav a te avav tuke furt pre dzeka. Leper tuke, hoj kala nipi hine tire manuŝa.”

¹⁴ O RAJ phenda: “Me korkoro džava tumenca a dava tut odpočinkos.”

¹⁵ O Mojžiŝ leske odphenda: “Te tu korkoro na aveħa amenca, akor amen aŝi ma bičhav het pal kada than. ¹⁶ Bo sar ŝaj sprindžarav, hoj me the kala manuŝa sam tuke pre dzeka, te na pal oda, hoj aveħa amenca? Aleħa, hoj sal amenca, me the tire manuŝa avaha aver savore narodendar pre phuv.”

¹⁷ Avke o RAJ phenda le Mojžiŝoske: “Me kerava the oda, so mandar mangeħas, vaŝoda bo sal mange pre dzeka a prindžarav tut pal o nav.”

¹⁸ Ale ov odphenda: “Sikav mange tiri slava.”

¹⁹ O RAJ leske odphenda: "Sikavava tuke savoro miro lačhipen a phenava angle tu miro nav, o RAJ. Sikavava miro jileskeriben, kaske kamav, a presikavava miro lačhejileskeriben, kaske kamav. ²⁰ Našti dikhes miro muj, bo űiko, ko man dikhela, našti ačhel te dživel."

²¹ Palis leske o RAJ phenda: "Kade hin than paš mande, kaj šaj ačhes pre skala. ²² Sar odarik predžava mira slavaha, thovava tut andre skalakeri škara a sar odarik predžava, zagaruva tut mira burňikaha. ²³ A sar odlava e burňik, dikheha ča miro dumo, ale miro muj űiko našti dikhel."

O Mojžiš pale pro verchos Sinaj

34 O RAJ phenda le Mojžišoske: "Ker duj barune tabli, ajse sar sas ešebnovar (peršovar). Me pre lende pisinava pale ola lava, so sas pre ešebna tabli, so len phagl'al. ² Av pririchtimen! Tosara aveha upre pro agor le verchoske Sinaj a ode ačh angle mande. ³ űiko tuha te na džal aňi pes te na sikavel pre oda calo verchos. Aňi o bakre, aňi o dobitkos pes anglo verchos našti pasinen."

⁴ Palis o Mojžiš kerd'a duj barune tabli, ajse sar sas ešebnovar. Sig tosara uštil'a, andro vasta il'a soduj tabli a geľa pro verchos Sinaj, avke sar leske prikazinda o RAJ. ⁵ O RAJ avľa tele andre chmara, ačhil'a paš o Mojžiš pro verchos a phenda peskero sentno nav – o RAJ. ⁶ O RAJ pregeľa anglal o Mojžiš a vičinelas: "Me som o RAJ, o RAJ o Del, savo hino lačhejileskero, kamibnaskero, kovlejileskero, pherdo le jileskeribnaha the verno. ⁷ Me presikavav e milost' le ezerenge a odmukav o nalačhipena, o vzburi the o bini, no the avke potrestinav dojekh binos: Vaš le dadengere bini marav lengere čhaven dž'i andro trito the štarto pokoleňje."

⁸ Akor o Mojžiš sig bandil'a dž'i ke phuv a lašarelas le RAJES. ⁹ Vakerelas: "RAJEJA, te arakhlom pačiv andre tire jakha, mangav tut, av amenca! Kala manuša hine zacata a na šunen, ale odmuk amenge amare bini the nalačhipena a prile amen sar tire manušen."

O RAJ phandel pale e zmluva

¹⁰ O RAJ leske odphenda: "Akana phandava tumenca zmluva. Angle tire manuša kerava bare veci, so mek šoha (ňikda) na dikhle aver narodi pal cali phuv. Savore manuša dikhena save bare veci me, o RAJ, šaj kerav, bo kerava prekal tu vareso igen baro. ¹¹ Te dolikereha kala zakoni, so tuke dav adadžives, tradava angle tu le Amorejen, le Kanaančanen, le Chetitanen, le Perizejen, le Chivijen the le Jebusejen. ¹² Merkin pre oda, hoj te na phandes zmluva ole narodenca andre phuv, kaj džaha, hoj te na ačhen prekal tu sar pasca. ¹³ Vašoda čiveha tele lengere oltara, phagereha lengere sentne slupi the čineha avri o slupi la modlake Ašerake. ¹⁴ Ma lašar űisave avre devles, bo me o RAJ som žarľivo Del, savo na zľidžava, hoj lašarena avre devles.

¹⁵ Aňi na phandeha zmluva ole manušenca andre odi phuv, bo te on lašarena peskere devlen a obetinena lenge, vičinenca ke odi obeta the tut, a šaj tut scirden,

hoj te chas olestar. ¹⁶ Palis tire čhave peske ilehas romňijen ole narodendar, save len scirdlehas pal peste a na ulehas mange buter verne, bo lašardehas lengere devlen.

¹⁷ Ma ker tuke devlen le trastestar a ma lašar len.

¹⁸ Doliker o Inepos pal o Mare Bi o Drožd'i. Avke sar tuke prikazindom, cha eřta dživesa ola mare andro čhon Abib, bo andre oda čhon avľal avri andral o Egipt.

¹⁹ Dojekh ešebno muřoro the samcos, savo ulola tumare stadostar the dobitkostar, hino miro. ²⁰ Ešebne somaris cineha avri avke, hoj deha bakrores. Te les na cineha avri, phageha leske e meň. Dojekh tire ešebne muřores muřines te cinel avri.

űiko pes te na sikavel angle ma bi o daros.

²¹ Šov dživesa kereha buči, ale eftato džives tuke odpočovineha la bučatar – the akor sar orineha a sar kideha e žatva.

²² Doliker o Inepos la Žatvakero † a pro agor le beršeske oslavineha o Inepos la Žatvakero ††, sar skideha upre pal e maľa o ulipen peskera bučatar.

²³ Savore tumare muřa trival andro berš muřinen te avel angle ma, anglo RAJ Adonaj, o Del le Izraeloskero, hoj man te lašaren. ²⁴ Me tradava avri anglal tu le naroden a kerava, hoj tut ela bareder phuv, vašoda űiko imar na kamela tiri phuv, sar trival andro berš aveha upre te lašarel le RAJES, tire Devles.

²⁵ Ma obetin mange rateskeri obeta jekhetane le droždengere mareha. űič le Patradakere obetatar na mukeha dž'i tosara.

²⁶ Savore nekfeder veci tire ešebne ulipnastar aneha andro Chramos le RAJESKERO, tire Devleskero.

La terňa kozica ma tav andre lakera dakero thud."

²⁷ Palis o RAJ phenda le Mojžišoske: "Pisin tuke kala lava, bo pal kala lava phandlom e zmluva tuha the le Izraelitencu." ²⁸ O Mojžiš sas ode le RAJEHA saranda (40) dživesa the saranda rača, so na čaľa maro aňi na piľa paňi. Pro barune tabli pisinda la zmluvakere lava – o Deš Prikazaňja.

O Mojžiš džal tele pal o verchos

²⁹ Sar o Mojžiš džalas tele pal o verchos Sinaj, sas leste andro vasta o duj barune tabli. Pal oda, sar vakerelas le RAJEHA, leskero muj švicinelas, ale ov oda na džanelas. ³⁰ Sar o Aron a savore Izraeliti dikhle, hoj le Mojžišoskero muj švicinel, daranas te džal paš leste.

³¹ Ale sar o Mojžiš len vičinda, avle ke leste o Aron the savore vodci le manuřengere. Sar lenca vakerelas, ³² gele paš leste the okla aver Izraeliti a o Mojžiš lenge diňa savore prikazaňja, so leske o RAJ prikazinda pro verchos Sinaj.

³³ Sar o Mojžiš preačhil'a te vakerel, thoda peske o khosno pro muj. ³⁴ Kecivar o Mojžiš džalas anglo RAJ, hoj leha te vakerel, lelas pal o muj o khosno a sar džalas odarik avri, pale les thovelas. Palis phenelas le Izraelitenge sa, so leske sas prikazimen. ³⁵ Sar on dikhle pro Mojžišoskero muj, hoj leske e cipa pro muj

† E Hebrejiko čhib: o Inepos le Kurkengero †† Oda hin o Inepos le Stankengero.

švicinel, thoda o Mojžiš pro muj o khosno, medik na geľa pale te vakere le RAJEHA.

Pal o Šabbat

35 Akor o Mojžiš vičindā savore Izraeliten a phendā lenge: "O RAJ prikazindā, hoj te dolik-eren kada: ² Šov dživesa kerena tumari buči, ale eftato džives – o Šabbat – ela tumen sentno džives le odpočinkoskero, so hino oddino le RAJESKE. Dojekh, ko oda džives kerela varesavi buči, mušinel te merel. ³ Pro Šabbat andre nisavo kher ma podlabaren aňi e jag."

O dari prekal o Sentno Stanos

⁴ O Mojžiš lenge mek phendā: "O RAJ prikazindā the oda: ⁵ Dojekh, ko kamel, mi anel le RAJESKE obeta: o somnakaj, o rup, o bronzos, ⁶ e fjalovo, ľoli the purpurovo vlna, o sane pochtana, o kozakere bala, ⁷ e ľoli sfarbimen cipa le baranostar, e cipa le tuleňistar, o akacijakere kašta, ⁸ olejos prekal o lampi, o koreňje pro olejos te pomakhel the pro voňavo kadidlos, ⁹ onixoskere the aver dragane bara pro efodos the pre rašajiko žeba pre brekh.

¹⁰ Dojekh tumendar, ko džanel kala veci te kerel, mi avel a mi kerel savoro, so o RAJ prikazindā: ¹¹ O Sentno Stanos, leskere lepedi, o čati, o rami, o tički, o slupi, o podstavci, ¹² e Zmluvakeri Archa, lakere družki the kritos, o andruno pochtan, ¹³ o skamind leskere sersamoha the družkenca the o sentne mare, ¹⁴ o momelaris, so del o svetlos andro Stanos, peskere sersamoha, o lampi the lengere oleja, ¹⁵ o kadidloskero oltaris leskere družkenca, o olejos pro pomakhlipen, o voňavo kadidlos, e lepeda paš o Stanoskero vudar, ¹⁶ o oltaris pro labarde obeti leskera bronzuňa roštaha, družkenca the savore sersamoha, e bronzuňi nadoba le podstavcoha, ¹⁷ o lepedi prekal e dvora le slupenca the podstavcenca; e lepeda prekal e dvorakeri brana, ¹⁸ o cilore prekal o Stanos the dvora, the lengere lani; ¹⁹ o side ruchi prekal e služba andro Sentno Than, the o sentne ruchi prekal o rašaj Aron the leskere čhave andre rašajiko služba."

²⁰ Paľis savore manuša odgele le Mojžišostar. ²¹ A dojekh, ko jilestar kada kamľa te kerel, anelas obetno daros le RAJESKE pro Sentno Stanos the savoro, so kampelas pre služba andre the pro rašajengere ruchi. ²² Avenas ode o murša the o džuvľa a denas jilestar o naramki, kružki, angrusa, lancici the aver somnakune veci. Dojekh, ko kamelas te obetinel le RAJESKE somnakaj, anenas les. ²³ Dojekh, kas sas, anelas e fjalovo, ľoli the purpurovo vlna, sane pochtana, kozakere bala, ľoli sfarbimen cipa le baranostar the cipa le tuleňistar. ²⁴ Ko kamelas te anel rup abo bronzos, anelas oda sar obeta le RAJESKE. Dojekh, kas sas akacijakere kašta a delas pes lenca te kerel, anelas len. ²⁵ The savore džuvľa, save džanenas te kerel le ľanostar, anenas e fjalovo, ľoli the purpurovo vlna, the sano pochtan. ²⁶ A o džuvľa, save džanenas te kerel o gada la kozakere bal-

endar, jilestar oda kerenas. ²⁷ O vodci anenas onixoskere bara the aver dragane bara pro efodos the prekal e rašajiko žeba pre brekh, ²⁸ olejos prekal o lampi, the o koreňje pro voňavo kadidlos the pro olejos te pomakhel. ²⁹ Savore Izraeliti ko kamenas, či murš vaj džuvľi, anenas le jilestar o daros le RAJESKE, hoj pes te kerel savoro, so o RAJ lenge prikazindā prekal o Mojžiš.

Pal o Becaleel the Oholiab

³⁰ Paľis o Mojžiš phendā le Izraelitenge: "Dikh, andral o kmeňos Juda kidňom mange avri le Becaleel, saveske sas dad o Uri a papus o Chur. ³¹ O Del les pherardā peskera zoraha a diňa les prindžaripen, ačaluvipen the godaveripen pre dojekh buči, ³² hoj te kerel šukar neve veci le somnakastar, le rupostar the le bronzostar; ³³ hoj te oprikerel o dragane bara a len te thovel andro somnakaj the rup; a hoj te čhingerel avri o kašta a te kerel dojekh majstroskeri buči. ³⁴ O Del diňa godi les the le Oholiab, le Achisamachoskere čhas andral o kmeňos Dan, hoj te sikaven avren te kerel e buči. ³⁵ Pherardā len la godaha, hoj te kerel dojekh buči le trasteha the le ľanoha, a hoj te siven la fjalova, ľola the purpurova vlnaha the le sane pochtanaha. Džanenas te kerel the e buči pro strojos, pre savo pes kerel o pochtana. On džanen te kerel savori buči the o plani pro Sentno Stanos."

36 "O Becaleel, Oholiab the savore murša, saven o RAJ diňa godi the ačaluvipen, hoj te džanen te kerel o veci pre služba andro Sentno Stanos, mi kerel e buči ča avke, sar prikazindā o RAJ."

O manuša anen o dari prekal o Stanos

² Paľis o Mojžiš vičindā le Becaleel, Oholiab the kale muršen, saven o RAJ diňa godi a save kamenas te kerel odi buči. ³ On le Mojžišostar preile savore dari, so o Izraeliti anenas, hoj te kerel o Sentno Stanos. A sako tosara o Izraeliti dureder anenas le Mojžišoske o dari. ⁴ Avke savore majstri, save kerenas paš o Sentno Stanos, preačhile te kerel, avenas dojekh ko Mojžiš ⁵ a phenenas leske: "O manuša anen buter dari, sar kampel pre kadi buči, so o RAJ prikazindā te kerel." ⁶ Akor o Mojžiš prikazindā, hoj te phenen andro taboris: "Imar aňi murš aňi džuvľi te na anel o dari prekal o Sentno Stanos." Avke o manuša preačhile te anel o dari, ⁷ bo oda, so ande, sas buter, sar kampelas pre caľi buči.

Pal e buči andro Sentno Stanos

⁸ Savore murša, save džanenas te kerel e buči pro Sentno Stanos, kerenas les le deše lepedendar. Ola lepedi sas side la fjalova, ľola the purpurova vlnatar a sas upre side o cherubi. ⁹ Dojekh lepeda sas dešuduj (12) metri džindardĩ the duj (2) metri buchľi. Avke sas kerde savore lepedi. ¹⁰ On pandž lepedi zasivenas jekhetane paš peste a avke kerde the avre pandženca. Avke lendar sas duj bare lepedi. ¹¹ Pro agor le pandžte pochtaneske kerde kariki la fjalova vlnatar. Kada

kerde the pre jekh agor pre dujto bari lepeda. ¹² Kerde penda (50) kariki pre dojekh agor la lepedake a aver penda pre aver lepeda avke, hoj o kariki sas jekh angle aver. ¹³ Kerde the penda somnakune čati, savenca prichudle o lepedi avke, hoj sthode ola duj stanoskere kotora andre jekh.

¹⁴ O Stanos upral zaučharde la lepedaha, so sas kerđi la kozakere balendar. Kajse lepedi kerde dešujekh (11). ¹⁵ Dojekh lepeda sas dešutrin (13) metri džindardı a duj (2) metri buchlı. ¹⁶ Pandž lepedi zaside jekhetane a the aver šov zaside jekhetane, avke sas lendar duj bare lepedi. ¹⁷ Penda (50) kariki kerde pro agor la posledna lepedake, so sas zaside le pandž lepedendar, a aver penda kerde pre aver lepeda, so sas zaside le šov lepedendar. ¹⁸ Kerde the penda bronzune čati, a prichudenas lenca o lepedi jekhetane. ¹⁹ Palıs kerde aver duj lepedi: jekh la baranoskera cipatar sfarbimen pro loles a aver le tufeñoskera cipatar.

²⁰ Prekal o Sentno Stanos kerde the o rami le akacijakere kaštostar. ²¹ Dojekh ramos sas 4 metri džindardo a 66 centimetri buchlo. ²² Kerde duj jednaka kaštune rameni, so sas zachudle jekhetane le maškarune kaštorencas. Pre savore rami sas kala rameni. ²³ Kerde biš (20) rami a thode len pre južno sera. ²⁴ Prekal ola rami kerde saranda (40) rupune podstavci. Duj tel sako ramos prekal leskere duj pindre. ²⁵ Prekal e severno sera kerde tiš biš rami ²⁶ the saranda (40) rupune podstavci – duj tel sako ramos. ²⁷ Prekal e paluňi sera pro zapados kerde šov rami ²⁸ a duj rami, so pes thode andro soduj rohi pre paluňi sera. ²⁹ Soduj rami sas sthode andre peste le karikencas telunestar dži upre. Kavke kerde le ramencas pro soduj rohi. ³⁰ Pre paluňi sera sas ochto rami a sas thode pro dešušov (16) rupune podstavci – duj tel dojekh ramos.

³¹ Le akacijakere kaštostar kerde o druki prekal o Sentno Stanos: pandž prekal o rami pre severno sera, ³² pandž pre južno sera a pandž pre zapadno paluňi sera. ³³ Maškaruno drukos kerde avke, hoj predžalas prekal o maškar le ramenge a oda jekhe Stanoskere agorestar dži ke aver. ³⁴ Le somnakaha obcirdle o rami a kerencas upre somnakune kariki, andre save thovenas o druki, so sas tiš obcirdle le somnakaha.

³⁵ Mek kerde the o pochtan la fjalova, ľola the purpurova vlnatar the sane side pochtanestar a o majstros siđa avri cheruben pro pochtan. ³⁶ Kerde štar slupi le akacijakere kaštostar a obcirdle len le somnakaha. O hačiki upre sas tiš somnakune. Roztađa prekal lende štar rupune podstavci. ³⁷ Prekal o vudar le Sentne Stanoskero, kerde farebno lepeda la fjalova, ľola the purpurova vlnatar the sane side pochtanestar, ³⁸ a paše pandž slupi le hačikencas. Lengere uprone kriti the o maškarune dručki sas le somnakastar a o pandž rupune podstavci le bronzostar.

E Zmluvakeri Archa

37 O Becaleel kerđa e Archa la Zmluvakeri le akacijakere kaštostar, 110 centimetri džindardı a 66 centimetri buchlı the uči. ² Andral the avral la obthođa

le žuže somnakaha a pašal late kerđa somnakuno pasos. ³ Kerđa prekal late the štar somnakune kariki pre lakere pindre: duj pre jekh sera a aver pre aver sera. ⁴ Palıs kerđa o dručki le akacijakere kaštostar a obcirdla len le somnakaha. ⁵ Ola dručki zaispidla andro kariki pal soduj seri, hoj pes te del te hordinel.

⁶ Upruno kritos, soha pes učharelas e Archa, kerđa le žuže somnakastar a sas 110 centimetri džindardo the 66 centimetri buchlo. ⁷ Kerđa the duje cheruben le žuže somnakastar a thoda len pro soduj agora pro kritos la Archake. ⁸ Jekhe cherubos thoda pre jekh agor a avres pre aver agora a kerđa len jekhetane le uprone Archakere kritoha. ⁹ Le cheruben sas rozcirdle o kridli upre avke, hoj zaučharenas lenca e Archa. Le mujenca sas visarde ke peste a dikhenas pro kritos.

O skamind prekal o sentne mare

¹⁰ O skamind kerđa le akacijakere kaštostar a sas 88 centimetri džindardo, 44 centimetri buchlo the 66 centimetri učo. ¹¹ Obcirdla les le žuže somnakaha a pašal leste kerđa somnakuno pasos, ¹² pašal leste mek kerđa lišta buchlı sar e burňik a pre late somnakuno pasos. ¹³ Pre oda pasos kerđa štar somnakune kariki, save prithođa ko rohi paš leskere štar pindre. ¹⁴ Pašes paš e lišta sas o kariki, andre save thovenas o dručki, hoj pes te del te hordinel o skamind. ¹⁵ Ola dručki kerđa le akacijakere kaštostar a obcirdla len le somnakaha. ¹⁶ A mek kerđa le žuže somnakastar veci pro skamind: o taňira, o kuča, o čarore the o džbani pre moľakeri obeta.

O somnakuno momelaris

¹⁷ Kerđa somnakuno momelaris le žuže somnakastar. Calo momelaris sas kerdo jekhe kotorestar: o maškaruno kotor, o podstavcos, o rameni, the o kvitki le pučikencas. ¹⁸ Pro momelaris kerđa šov rameni. O rameni avenas avri le maškarune kotorestar, trin pal jekh sera a trin pal aver sera. ¹⁹ Pro ešebno (peršo) ramenencas sas kerde trin kvitki le pučikencas le mandlendar; the pro dujto ramenencas sas kerde trin kvitki le pučikencas le mandlendar. Kavke sas kerdo pre savore šov rameni, so avenas avri le maškarune kotorestar. ²⁰ Pro maškaruno kotor sas kerde štar kalichi, so dičhonas sar kvitki le pučikencas le mandlendar. ²¹ Jekh kvitka sas tel o ešebne duj rameni, kaj avenas avri le maškarune kotorestar, dujto kvitka sas tel o dujte rameni a trito kvitka tel o trite rameni. ²² O momelaris le ramencas, le kvitkencas the pučikencas sas avrikerdo jekhe kotorestar le žuže somnakastar.

²³ Pro momelaris kerđa efa lampi a paš leste o silavis prekal o momelariskere knoti the cikne lopatki le žuže somnakastar. ²⁴ O momelaris the savoro, so kampil paš leste, kerđa tranda the pandž (35) kilendar le žuže somnakastar.

O kadidloskero oltaris

²⁵ Le akacijakere kaštostar kerda kadidloskero oltaris le štare rohenca, so sas jekhe kotorestar le oltariha. Sas kerdo andre kocka, 45 centimetri džindardo, 45 centimetri buchlo a 90 centimetri učo. ²⁶ Obcirdla o oltaris le somnakaha, the leskere seri the o rohi a pašal leste kerda somnakuno pasos. ²⁷ Prichudla upre duj somnakune kariki tel o pasos pal soduj seri. Avke, hoj prekal ola kariki te predžan o družki, hoj les te hordinen than thanestar. ²⁸ O družki kerda le akacijakere kaštostar a obcirdla len le somnakaha.

²⁹ Palis zmišinda sentno olejos pro pomakhlipen a kerda žužo voňavo kadidlos le voňave koreňendar, avke sar kerel o olejkaris o parfumos.

O oltaris pro labarde obeti

38 Palis le akacijakere kaštostar kerda oltaris pro labarde obeti. Sas kerdo andre kocka 2,2 metri džindardo the buchlo a sas 1,3 metros učo. ² Upral pre leskere rohi kerda aver štar rohi, ajse sar hin le biken. O rohi the o oltaris sas jekhe kotorestar a sas obthodo le bronzoha. ³ Kerda the savoro sersamos paš o oltaris le bronzostar: o bare čare prekal o prachos, o lopati, cikne čare, vidli the cikne lopatki pro angara. ⁴ Kerda bronzuňi rošta a thođa la andral tel e obruba maškar o oltaris. ⁵ Pašal lakere rohi kerda štar bronzune kariki, hoj o družki pes te del te thovel andre. ⁶ O družki kerda le akacijakere kaštostar a obcirdla len le bronzoha. ⁷ O družki zaispidla andro kariki pal soduj seri le oltariske, hoj pes te prehordinel. Kerda o oltaris le deskendar sar phundradı truhla. ⁸ Ila o gendali le džuvľendar, save služinenas paš o vudar andro Sentno Stanos, a lengere bronzostar kerda e bari nadoba le podstavcenca.

E dvora pašal o Sentno Stanos

⁹ Kerda e dvora pašal o Sentno Stanos. Pre južno dvorakeri sera kerda lepedi le sane pochtanestar; jekh sera sas džindardi saranda the štar (44) metri ¹⁰ le biš (20) slupenca pro biš bronzune podstavci. O hačiki the o maškarune tički ko slupi sas le rupunestar. ¹¹ Avke the pre severno sera sas biš slupi pro biš bronzune podstavci. O hačiki the o maškarune tički ko slupi sas le rupostar.

¹² Pre zapadno dvorakeri sera sas o lepedi bišuduj (22) metri džindarde the deš slupi pro deš podstavci. O hačiki the o maškarune tički ko slupi sas le rupostar. ¹³ E angľuňi dvora pro vichodos sas tiš bišuduj metri buchli ¹⁴ Pre jekh sera paš o vudar sas o lepedi 6,6 metri džindarde a sas pro trin slupi a pro trin podstavci. ¹⁵ Avke the pre aver sera paš o vudar sas o lepedi 6,6 metri džindarde, a sas pro trin slupi pro trin podstavci. ¹⁶ Savore lepedi pašal e dvora sas kerde le sane pochtanestar. ¹⁷ O podstavci tel o slupi sas le bronzostar a o hačiki, uprone kriti the o tički ko slupi sas le

rupostar. Savore avrone the androne slupi sas zaphandle ke peste le rupune tičkenca.

¹⁸ E lepeda pro vudar sas kerdi le sane side pochtanestar la belava, fijalova the ľola vlnatar. Sas džindardi eňa metri a uči duj metri, ajse sar o lepedi pre dvora. ¹⁹ E lepeda sas thodi pro štar bronzune slupi, so sas pro štar bronzune podstavci. O hačiki, uprone kriti the o maškarune družki sas obthode le rupoha. ²⁰ Savore cilore, so sas zamarde andre phuv pašal o Stanos the e dvora, sas le bronzostar.

O veci pro Stanos

²¹ Kade hin pisimen o somnakaj, o rup the o bronzos, so kampelas prekal o Sentno Stanos, so o Mojžiš prikazinda, hoj te keren o Leviti. Lidžalas len o Itamar, o čhavo le rašaskero le Aronoskero. ²² O Becaleel, saveske sas dad o Uri a papus o Chur andral o kmeňos Juda, kerda sa, so o RAJ prikazinda le Mojžišoske. ²³ Sas leha o Oholiab, le Achisamachoskero čhavo andral o kmeňos Dan. Ov sas majstros andre peskeri buči a džanelas šukares te sivel avri o sane pochtana la fijalova, ľola the purpurova vlnaha. ²⁴ Savoro somnakaj, so sas dino le RAJESKE prekal o Sentno Stanos, sas 1 tona pal oda, sar pes važinel andro Sentno Stanos.

²⁵ Sar sas zgende o manuša, o rup, so dine, sas 3,43 toni pal e vaha andro Sentno Stanos. ²⁶ Dojekh, ko sas zgendo, počinelas jekh minca: jepaš šeklos. Sas zgende 603 550 murša, kaske sas buter sar biš (20) berš. ²⁷ Le 3,4 toni rupoha kerde o šel (100) podstavci prekal o Sentno Stanos the pochtan. Jekh podstavcos važinelas 34 kili. ²⁸ Okle 30 kilendar o Becaleel kerda o hačiki, kriti the maškarune tički prekal o slupi.

²⁹ O bronzos, so ande le RAJESKE, sas 2,425 toni †. ³⁰ Lestar kerda o podstavci prekal o Stanoskero vudar, o oltaris, e rošta the le oltariskero sersamos, ³¹ o podstavci prekal o slupi pašal e dvora the paš e brana, the savore cilore.

Le rašaskere ruchi

39 Le Aronoske kerde sentne ruchi la fijalova, ľola the purpurova vlnatar. Avke kerde the sentne ruchi pre rašaskeri služba andro Sentno Stanos, avke sar o RAJ prikazinda le Mojžišoske.

O efodos

² O efodos kerde le somnakastar, la fijalova, ľola the purpurova vlnatar the le sane pochtanestar. ³ Le somnakastar kerde sane blachi a strihinde len pro thava, hoj lenca te prephanden o fijalova, lole the purpurova vlni the o sano pochtan. ⁴ Kerde upre duj kotora, so pes zachudenas pro vali a spojinenas pes le efodoskere uprone kotorenca. ⁵ O sido sirimos le efodoskero, sas tiš kerdo le somnakastar, la fijalova, ľola the purpurova vlnatar the sane pochtanestar, avke sar o RAJ prikazinda le Mojžišoske.

† E Hebrejiko čhib: 70 talenti the 2 400 šekli

⁶ Palis oprikerde o bara le onixostar, thode andro somnakune obrubi a randle avri pro bara o nava le Jakoboskere čhavengere, avke sar pes kerel o pečatídlos. ⁷ Palis len prichudenas pro efodos sar o bara, so leperena le Izraeloskere čhaven, avke sar o RAJ prikazindá le Mojžišoske.

E rašajiko žeba

⁸ Avke sar o efodos, kerde the e žeba pre brekh – phandli le nekbaredere rašajenge pašal o jilo – la fijalova, loľa the purpurova vlnatar the le sane pochtanestar. ⁹ Sas kocka a sas prethodo pro duvar, bišuduj (22) centimetri džindardo the buchlo. ¹⁰ Sas andre štar šori dragane bara: andro ešebno (peršo) šoros sas o rubinos, topasis, the smaragdos; ¹¹ andro dujto sas malachitos, zafiris, the diamantos; ¹² andro trito opalos, achatos, the ametistos; ¹³ a andro štarto sas chrizolitos, onixos, the jaspisos. O bara sas thode andro somnakune ramici. ¹⁴ Pre ola dešuduj (12) dragane bara sas o nava le Jakoboskere dešuduje čhavengere. Pre dojekh bar sas avrirandlo jekh kmeňoskero nav avke, sar pes kerel o pečatídlos.

¹⁵ Pre žeba sas kerde lancici le žuže somnakastar prephandle sar špargi. ¹⁶ On kerde the duj somnakune kocki a duj somnakune kariki. Soduj kariki priside pro uprune rohi la žebake. ¹⁷ O somnakune špargi prichudenas ke ola kariki pro agor la žebake ¹⁸ a pro vali prichudenas o špargi pro somnakune ramici a avke len prichudenas anglunestar pro efodos. ¹⁹ Kerde duj somnakune kariki a priside len andral ko soduj telune rohi le efodoske. ²⁰ Mek kerde the duj somnakune kariki a prichudle len telunestar pro anglune agora le efodoske, kaj hino zasido upral o sirimos. ²¹ O kariki pre žeba prichudle ko efodoskere kariki la belava špargaha avke, hoj te el upreder le sirimostar a te na chučkerel upre tele. Kerde sa avke, sar o RAJ prikazindá le Mojžišoske.

O plaštós

²² O plaštós, so pes urelas tel o efodos, kerde calo la fijalova vlnatar. ²³ Pro plaštós sas maškaral avrimuklo than pro šero. Oda than sas sido zorale thaveha, hoj pes te na rozparinel. ²⁴ Pro teluno agor le plaštóske side granatoskere phaba la fijalova, loľa the purpurova vlnatar the le sane pochtanestar. ²⁵ Le žuže somnakastar kerde cikne zvončeki a prichudle len maškar o phaba pašal calo teluno agor le plaštóske. ²⁶ Avke pes čerinenas o phaba le zvončekenca pašal o teluno agor le plaštóske, andre savo pes kerelas e služba, avke sar o RAJ prikazindá le Mojžišoske.

²⁷ Prekal o Aron the prekal leskere čhave side o telune ruchi le loke pochtanestar, ²⁸ o turbanos, o čapki the o telune gada le lanostar. ²⁹ Sar o RAJ prikazindá le Mojžišoske, kerde the o šukar farebno sirimos le sane pochtanestar, la fijalova, loľa the purpurova vlnatar.

E čelenka

³⁰ Le žuže somnakastar kerde somnakuňi čelenka a randle andre o lava, avke sar pes kerel o pečatídlos: "Sentno le RAJESKE". ³¹ Pre late prichudle e belavo šparga, hoj pes te del te priphandel pro turbanos, avke sar o RAJ prikazindá le Mojžišoske.

E buči pro Stanos hiňi dokerđi

³² Avke sas dokerđi savori buči pro Sentno Stanos. O Izraeliti kerde sa avke, sar o RAJ prikazindá le Mojžišoske. ³³ Le Mojžišoske ande o Sentno Stanos a savoro, so paš oda kampelas: o čati, o rami, o hačiki, o maškarune družki, o slupi the o podstavci, ³⁴ e lepeda kerdí le lole sfarbimen baranoskere cipendar, e lepeda le tuleňiskere cipendar the e andruňi lepeda, ³⁵ e Zmluvakeri Archa the lakero kritos the o družki, ³⁶ o skamind leskere sersamoha the o sentne mare, ³⁷ o momelaris le žuže somnakastar leskere lampenca the sersamoha, the o olejos, ³⁸ o somnakuno oltaris, olejos pro pomakhlípen, o voňavo kadídlos, e lepeda prekal o Stanoskero vudar, ³⁹ o bronzuno oltaris pro labarde obeti leskera bronzuňa roštaha, družkenca the sersamoha, e bronzuňi nadoba le podstavcoha, ⁴⁰ o lepedi prekal e dvora, o slupi lengere podstavcenca, o lepedi prekal e dvorakeri brana, o cilore the šele prekal e dvora the Stanos a savore sersami prekal e služba andro Sentno Stanos, ⁴¹ loke side ruchi prekal e služba andro Sentno Than, the o sentne ruchi prekal o rašaj Aron the leskere čhave andre rašajiko služba.

⁴² O Izraeliti dokerde savori buči ča avke, sar o RAJ prikazindá le Mojžišoske. ⁴³ O Mojžiš predikhelas e buči a dikhla, hoj kerde sa avke, sar o RAJ prikazindá. Palis len požehňinda.

Ačhaven o Sentno Stanos

40 O RAJ phendá le Mojžišoske: ² "Ešebno (peršo) džives andro ešebno čhon ačhav o Sentno Stanos, kaj pes zdžana le RAJEHA. ³ Ode thov e Zmluvakeri Archa a figin angle late o pochtan. ⁴ An andre the o skamind a thov upre o sersamos, so ke oda kampel. Avke an the o momelaris a upre thov o lampi. ⁵ O somnakuno kadídloskero oltaris thov anglo pochtan angle Archa a the paš o vudar anglo Stanos figin o pochtan.

⁶ O oltaris pro labarde obeti thov anglo Stanoskero vudar. ⁷ Maškar o Stanos the oltaris thov e bronzuňi nadoba a čhiv andre o paňi. ⁸ Pašal o Stanos ker e dvora a figin e lepeda paš e brana, sar pes džal andre.

⁹ Palis le olejos pro pomakhlípen, pomakh o Stanos savoreha, so hin andre, a ela sentno. ¹⁰ Pomakh the o oltaris pro labarde obeti savore leskere sersamenca. Sentňar les a ela neksentneder. ¹¹ Pomakh the e nadoba le podstavcoha a sentňar la.

¹² Palis an le Aron the leskere čhaven anglo Stanoskero vudar a thov (omor) len le paňeha. ¹³ Uri le Aron andro sentno ruchos, pomakh les a avke les sen-

tňar, hoj mange te služinel sar rašaj. ¹⁴ An the leskere čhaven a uri pre lende o telune ruchi. ¹⁵ Pomakh len avke, sar pomakhla le Aron, hoj the on mange te služinen sar rašaja. Ada pomakhlipen kerela rašajen lendar the lengere potomkendar pro furt.”

¹⁶ Palis o Mojžiš kerda sa avke, sar leske prikazinda o RAJ. ¹⁷ O Sentno Stanos ačhade ešebno džives andro ešebno čhon andro dujto berš paloda, sar omukle o Egipt. ¹⁸ Sar o Mojžiš ačhađa o Stanos, thođa o podstavci, upral lende rakinda o rami, zaispidla o družki a o slupi rozthođa andro šoros. ¹⁹ O Stanos zaučharda le side lepedenca a thođa upre e lepeda, avke sar o RAJ prikazinda le Mojžišoske.

²⁰ Palis iľa o barune tabli le deše prikazaňjenca a thođa andre Archa, zaispidla pašal o seri o družki a zaučharda la le kritoha. ²¹ Avke ligenda e Archa andro Stanos a figinda o andruno pochtan, hoj te na dičhol e Archa, avke sar o RAJ prikazinda le Mojžišoske.

²² O skamind thođa anglo pochtan pre severno sera andro Sentno Than ²³ a thođa pre leste o sentne mare anglo RAJ, avke sar o RAJ prikazinda le Mojžišoske.

²⁴ O somnakuno momelaris thođa anglo skamind pre južno sera andro Sentno Than. ²⁵ Pre leste thođa o lampi anglo RAJ, avke sar prikazinda le Mojžišoske.

²⁶ O somnakuno kađidloskero oltaris thođa andro Sentno Than anglo pochtan ²⁷ a labarda upre voňavo kađidlos, avke sar o RAJ prikazinda le Mojžišoske.

²⁸ Palis figinda lepeda paš o vudar andro Sentno Than. ²⁹ O oltaris pro labarde obeti thođa anglo Stanos. Pre leste obetinelas o labarde the chabeneskere obeti, avke sar o RAJ prikazinda le Mojžišoske.

³⁰ Maškar o Stanos the oltaris thođa e bronzuňi nadoba a čidđa andre paňi. ³¹ O Mojžiš, o Aron the leskere čhave ole paňeha obthovenas (omorenas) o vasta the o pindre. ³² Sar džanas andro Stanos abo ko oltaris, obthovenas pes avke, sar o RAJ prikazinda le Mojžišoske. ³³ Pašal o Stanos the oltaris kerda dvora a figinda e lepeda paš e dvorakeri brana. Avke o Mojžiš dokerda savori buči.

Le RAJESKERI slava

³⁴ Akor e chmara zaučharda o Sentno Stanos a le RAJESKERI slava pherarda o Stanos. ³⁵ Vašoda o Mojžiš našti geľa andro Stanos, bo upral leste sas e chmara a le RAJESKERI slava pherarda o Stanos.

³⁶ Furt, kana e chmara odarik pes hazdelas, savore Izraeliti pes mukenas pro drom. ³⁷ Ale te e chmara pes na hazdelas, na mukenas pes pro drom. ³⁸ Dživese le RAJESKERI chmara sas upral o Stanos a rači sas andre chmara jag, vašoda les dikhenas savore Izraeliti pal calo časos, sar phirenas than thanestar pal e pušta.

4. MOJŽIŠOSKERO

O Izraeliti pre pušta zgende

¹ Ešebno (peršo) džives andro dujto čhon andro dujto berš pal oda, sar o Izraeliti avle avri andral o Egipt pre pušta Sinaj, o RAJ prevakerđa ko Mojžiš andro Sentno Stanos a phendā leske: ² "Tu the o Aron zgenen savore Izraeliten pal lengere fajti the fameliji avke, hoj te el pisimen andre o nav dojekhe muršeske ³ andral o Izrael, kaske hin biš (20) berš the buteder a savo šaj džal andro mariben. A thovena len andro maribnaskere čati. ⁴ Andral dojekh kmeños tumenge mi pomožinel jekh famelijakero vodcas. ⁵ Kala hine o nava ole muršengere, save tumenge pomožinena:

Andral le Rubenoskero kmeños o Elicur, le Šedeuroskero čhavo;

⁶ andral le Šimeonoskero o Šelumiel, le Curišaddajoskero čhavo;

⁷ andral le Judaskero o Nachšon, le Amminadaboskero čhavo;

⁸ andral le Jissacharoskero o Netaneel, le Cuaroskero čhavo;

⁹ andral le Zebulunoskero o Eliab, le Chelonoskero čhavo;

¹⁰ le Jozefoskere čhavendar:

andral le Efraimoskero kmeños o Elišamas, le Ammichudoskero čhavo,

andral le Menaššeskero o Gamaliel, le Pedacuroske čhavo;

¹¹ andral le Benjaminoskero o Abidan, le Gideonoskero čhavo;

¹² andral le Danoskero o Achiezer, le Ammišaddajoskero čhavo;

¹³ andral le Ašeroskero o Pagiel, le Ochranoskero čhavo;

¹⁴ andral le Gadoskero o Eljasaf, le Deueloskero čhavo;

¹⁵ andral le Naftaliskero o Achiras, le Enanoskero čhavo."

¹⁶ Kala savore sas avrikidle sar vodci upral peskere kmeňi.

¹⁷ Kala dešuduj (12) murša pomožinenas le Mojžišoske the le Aronoske ¹⁸ a ešebno džives andro dujto čhon zvičinde jekhetane savore manušen. Palis pisinde andre lengere nava pal lengere fajti the fameliji. Savore muršen, savenge sas biš (20) berš a buteder, rachinenas a pisinenas andre, ¹⁹ avke sar o RAJ prikaz-

inda le Mojžišoske. On len pisinde andre pre pušta Sinaj.

²⁰ Savore murša, savenge sas biš berš a buteder, save šaj gele andro mariben, sas pisimen andre pal lengere kmeňi the fameliji. Ešebno sas pisimen andre le Rubenoskero kmeños, bo ov sas le Jakoboskero nekphureder čhavo. Kajci murša sas pisimen andre:

²¹ Andral o kmeños le Rubenoskero: 46 500

²²⁻²³ Andral o kmeños le Šimeonoskero: 59 300

²⁴⁻²⁵ Andral o kmeños le Gadoskero: 45 650

²⁶⁻²⁷ Andral o kmeños le Judaskero: 74 600

²⁸⁻²⁹ Andral o kmeños le Jissacharoskero: 54 400

³⁰⁻³¹ Andral o kmeños le Zebulunoskero: 57 400

³²⁻³³ Andral o kmeños le Efraimoskero: 40 500

³⁴⁻³⁵ Andral o kmeños le Menaššeskero: 32 200

³⁶⁻³⁷ Andral o kmeños le Benjaminoskero: 35 400

³⁸⁻³⁹ Andral o kmeños le Danoskero: 62 700

⁴⁰⁻⁴¹ Andral o kmeños le Ašeroskero: 41 500

⁴²⁻⁴³ Andral o kmeños le Naftaliskero: 53 400.

⁴⁴ Kalen zgende o Mojžiš the o Aron jekhetane le dešuduje vodcenca, dojekhes pal peskero kmeños.

⁴⁵ Zgende savore Izraeliten pal lengere kmeňi, kaske sas biš berš the buter a save šaj gele andro mariben.

⁴⁶ Savore jekhetane sas 603 550 murša.

Le Levitengeri služba

⁴⁷ Ale o murša andral o kmeños Levi na sas lenca pisimen andre. ⁴⁸ Bo o RAJ phendā le Mojžišoske: ⁴⁹ "Sar pisineha le Izraeliten andre, ma rachin paš lende o kmeños Levi. ⁵⁰ Ale ačhav len andre oda, hoj pes te starinen pal o Sentno Stanos the pal leskero sersamos. Hordinena les savoreha, so andre hin; stari-nena pes pal leste a rozthovena peske o taboris pašal o Stanos. ⁵¹ Sar o Sentno Stanos prehordinena dured-er, on les mušinena te rozkidel, a sar kerena taboris avrether, mušinena les te ačhavel pale. Aver džene našti džan paš o Sentno Stanos, bo oda dženo mušindahas te merel. ⁵² Okla Izraeliti bešena andre peskere stani, dojekh kmeños andre peskero taboris a paš peskeri zastava. ⁵³ Ale o Leviti peske ačhavana o stani pašal o Sentno Stanos, hoj te na avel miri choli pro Izraeliti. O Leviti stražinena o Sentno Stanos."

⁵⁴ O Izraeliti kerde sa avke, sar o RAJ prikazinda le Mojžišoske.

O poradkos andre le Izraelitengero taboris

2 O RAJ phendā le Mojžišoske the le Aronoske: 2 "O Izraeliti mi ačhaven taboris dojekh paš peskeri zastava a paš peskera fajtakero znakov. Kerena taboris dureder le Sentne Stanostar pal savore seri.

Pre vichodno sera

3 Pre vichodno sera le Sentne Stanostar o kmeňos Juda the o fajti, so lenca phirenas, kerena taboris paš peskeri zastava. O Nachšon, le Amminadaboskero čhavo, ela vodcas andro kmeňos Juda. 4 Andre leskeri partija ena 74 600 murša, save šaj džan andro mariben.

5 Paš lende kerela taboris le Jissacharoskero kmeňos a leskero vodcas ela o Netaneel, le Cuaroskero čhavo. 6 Andre leskeri partija ena 54 400 murša.

7 O vodcas andre Zebulunskero kmeňos ela o Eliab, le Chelonoskero čhavo. 8 Andre leskeri partija ena 57 400 murša.

9 Savore murša andral o taboris Juda, save šaj gele andro mariben, sas 186 400. On džana ešebne (perše) pro drom.

Pre južno sera

10 Pre južno sera le Sentne Stanostar o kmeňos Ruben the o fajti, so lenca phirenas, kerena taboris paš peskeri zastava. O Elicur, le Šedeuroske čhavo, ela vodcas andro kmeňos Ruben. 11 Andre leskeri partija ena 46 500 murša.

12 Paš lende kerela taboris le Šimeonoskero kmeňos. Lengero vodcas ela o Šelumiel, le Curišadajoskero čhavo. 13 Andre leskeri partija ena 59 300 murša.

14 Paš lende ela o kmeňos Gad. Lengero vodcas ela o Eljasaf, le Reueloskero čhavo. 15 Andre leskeri partija ena 46 650 murša.

16 Savore murša andral o taboris Ruben, save šaj gele andro mariben, sas 151 450 murša. On džana dujto pro drom.

O Sentno Stanos

17 Pal o ešebno the dujto taboris džalas o taboris Levi le Sentne Stanoha a pal lende džanas okla duj tabora. Avke sar ačhavana o stani andro taboris, avke the džana, dojekh pre peskero than a pal peskeri zastava.

Pre zapadno sera

18 Pre zapadno sera le Sentne Stanostar o kmeňos Efrajim the o fajti, so lenca phirenas, kerena taboris paš peskeri zastava. O Elišamas, le Ammichudoskero čhavo, ela vodcas andro kmeňos Efrajim.

19 Andre leskeri partija ena 40 500 murša.

20 Paš leste kerela taboris o kmeňos Menašše. Lengero vodcas ela o Gamaliel, le Pedacuroske čhavo. 21 Andre leskeri partija ena 32 200 murša.

22 Paš lende ela o kmeňos Benjamin. Lengero vodcas ela o Abidan, le Gideoniskero čhavo. 23 Andre leskeri partija ena 35 400 murša.

24 Savore murša andral o taboris Efrajim, save šaj gele andro mariben, sas 108 100 murša. On džana trite pro drom.

Pre severno sera

25 Pre severno sera le Sentne Stanostar o kmeňos Dan the o fajti, so lenca phirenas, kerena taboris paš peskeri zastava. O Achiezer, le Ammišaddajoskero čhavo, ela vodcas andro kmeňos Dan. 26 Andre leskeri partija ena 62 700 murša.

27 Paš leste kerela taboris o kmeňos Ašer. Lengero vodcas ela o Pagiel, le Ochranoske čhavo. 28 Andre leskeri partija ena 41 500 murša.

29 Paš lende kerela taboris o kmeňos Naftali. Lengero vodcas ela o Achiras, le Enanoske čhavo.

30 Andre leskeri partija ena 53 400 murša.

31 Savore murša andral o taboris Dan, save šaj gele andro mariben, sas 157 600 murša. On džana posledna pro drom pal peskere zastavi.

32 Kala hine o Izraeliti zgende pal peskere fameliji. Savore murša andro tabora savore partijenca sas jekhetane 603 550 murša. 33 Ale o kmeňos Levi na sas pisimen andre okle kmeňenca, avke sar o RAJ phendā le Mojžišoske."

34 O Izraeliti kerde sa avke, sar o RAJ prikazindā le Mojžišoske. Kavke ačhavas o stani paš peskere zastavi a avke džanas pro drom pal peskere kmeňi the fameliji.

Le Aronoskere čhave

3 Kada hin o rodokmeňos le Aronoske the le Mojžišoske andro časos, sar o RAJ prevakerdā ko Mojžiš pro verchos Sinaj.

2 Kala hine le Aronoskere čhave: Ešebno (peršo) o Nadab, palis o Abihu, o Eleazar the o Itamar. 3 On sas ačhade a pomakhle andre rašajiko služba. 4 O Nadab the o Abihu mule anglo RAJ, sar obetinde le RAJESKE la jagaha, so na sas sentñi. Len na sas čhave, a vašoda krenas e rašajiko služba o Eleazar the o Itamar, medik dživelas lengero dad o Aron.

O Leviti oddelimen pre služba

5 O RAJ phendā le Mojžišoske: 6 "An calo kmeňos Levi anglo rašaj Aron, hoj leske te pomožinen andre služba. 7 On kerena savore službi vaš leske the vaš savore Izraeliti anglo Sentno Stanos. 8 Starinena pes pal savoro, so hin andro Sentno Stanos, a kerena sa, so kampel andre služba vaš o Izraeliti. 9 O kmeňos Levi deha le Aronoske the leskere čhavege, hoj lenge te po-

možinen; on ena oddelimen prekal lende savore Izraelitendar. ¹⁰ Ačhaveha le Aron the leskere čhaven andre rašajiko služba. Te oda kamela te kerel vareko aver, ela murdardo.”

¹¹ O RAJ mek phenda le Mojžišoske: ¹² “Me mange le Leviten kidňom avri le Izraelitendar. Ilom mange len vaš savore ešebne čhave, save ulon le dajenge. O Leviti hine mire. ¹³ Mire hine savore ešebne čhave. Sar andro Egipt murdardom savoro, so ešebno ulifa, oddelindom mange savoro ešebno andral o Izrael le manušendar the le dobitkostar. Hine mire, me som o RAJ.”

O murša andral le Levitengero kmeňos zgende

¹⁴ Pre pušta Sinaj o RAJ phenda le Mojžišoske: ¹⁵ “Kamav, hoj te zgenes savore Leviten pal lengere fameliji the fajti. Zgen dojekhe muršes, ko hino phureder sar jekh čhon.” ¹⁶ A o Mojžiš len zgenda avke, sar leske prikazinda o RAJ.

¹⁷ Le Levi sas trin čhave: o Geršon, o Kohat the o Merari.

¹⁸ Le Geršonoskere čhave sas o Libni the o Šimej a lengere fajti pes vičinenas pal lende.

¹⁹ Le Kohatoskere čhave sas o Amram, o Jishar, o Chebron the o Uzziel a lengere fajti pes vičinenas pal lende.

²⁰ Le Merariskere čhave sas o Machli the o Muši a lengere fajti pes vičinenas pal lende.

Kala sas o Leviskere fajti peskere famelijenca:

Le Geršonoskeri fajta

²¹ Andre le Geršonoskeri fajta sas le Libniskeri the le Šimejoskeri famelija. ²² Zgende savore muršen phureder sar jekh čhon a sas 7 500. ²³ Le Geršonoskere fajti peske mušinenas te rozthovel o taboris pre zapadno sera le Sentne Stanostar. ²⁴ Lengero vodcas sas o Eljasaf, le Laeloskero čhavo. ²⁵ On pes starinenas pal o Sentno Stanos, pal o stanoskere prikrički, pal o vudareskero pochtan, ²⁶ pal o avruno dvorakere pochtana, so sas pašal o Sentno Stanos the oltaris, pal o stanoskere lani the pal savoro, so sas pašal oda.

Le Kohatoskeri fajta

²⁷ Andre Kohatoskeri fajta sas le Amramoskeri, le Jisharoskeri, le Chebronoskeri the le Uzzieloskeri famelija. ²⁸ Zgende savore muršen phureder sar jekh čhon a sas 8 600. Le Kohatoskeri fajta pes starinenas pal o veci andro Sentno Stanos. ²⁹ Le Kohatoskere fajti peske mušinenas te rozthovel o taboris pre južno sera le Sentne Stanostar. ³⁰ Lengero vodcas sas o Elicafan, le Uzzieloskero čhavo. ³¹ On pes starinenas pal e Zmluvakeri Archa, pal o skamind, momelaris, oltara, pal o sersamos pre služba andro Sentno Than the pal o pochtan anglo Neksentneder Than. ³² O Eleazar, le rašaskero Aronoskero čhavo, sas nekbarer vodcas le Levitenge. Ov dodikhelas pre ola džene, save pes starinenas pal o Sentno Stanos.

Le Merariskeri fajta

³³ Andre le Merariskeri fajta sas le Machliskeri the le Mušiskeri famelija. ³⁴ Zgende savore muršen phureder sar jekh čhon a sas 6 200. ³⁵ Lengero vodcas sas o Curiel, le Abichajiloskero čhavo. On peske mušinenas te rozthovel o taboris pre severno sera le Sentne Stanostar. ³⁶ Starinenas pes pal o stanoskere veci: pal o rami, dručki, slupi, podstavci the pal savore o veci, so hin paš o Sentno Stanos. ³⁷ Mek pes starinenas pal o dvorakere slupi, slupengere podstavci, cilore the pal o lani, so hin pre dvora.

O Mojžiš leskere čhavenca

³⁸ Pre vichodno sera le Sentne Stanostar kerena taboris o Mojžiš, o Aron the leskere čhave. On pes starinena pal o Sentno Stanos vaš o Izraeliti. Te vareko aver kamlahas te kerel odi služba, mušinelas te merel.

³⁹ O Mojžiš le Aronoha zgende savore Leviten pal lengere fajti avke, sar lenge prikazinda o RAJ. Zgende dojekhe muršes, ko sas phureder sar jekh čhon, a sas lendar 22 000.

O Leviti hine dine vaš o ešebne Izraeloskere čhave

⁴⁰ O RAJ phenda le Mojžišoske: “Zgen savore Izraelitengere muršen, save ulile ešebne a hine phureder sar jekh čhon a pisin len andre. ⁴¹ Le Leviten de mange vaš savore ešebne Izraeloskere muršora. Me som o RAJ! De mange the lengero dobitkos vaš dojekh ešebno le dobitkostar le Izraelostar.”

⁴² Avke o Mojžiš zgenda savore ešebne muršen, save ulile le Izraelitenge, sar leske prikazinda o RAJ. ⁴³ Savore ešebne murša phureder sar jekh čhon, save sas pisimen andre, sas 22 273.

⁴⁴ Palis o RAJ phenda le Mojžišoske: ⁴⁵ “Vaš savore Izraeloskere ešebne muršora de mange le Leviten a vaš lengero ešebno dobitkos de mange le Levitengero dobitkos. O Leviti hine mire. Me som o RAJ! ⁴⁶ O ešebne Izraeliti hine 273 buter sar o Leviti. Kampil len te cinel avri, ⁴⁷ vašoda kide avri lendar pandž rupune love vaš jekh dženo, avke sar važinenas andro Sentno Stanos. ⁴⁸ O love deha le Aronoske the leskere čhavage.”

⁴⁹ Avke o Mojžiš ila vaš ola 273 murša, save sas buter sar o Leviti, o love, hoj len te cinel avri. ⁵⁰ Kidňa avri 1 365 rupune love, avke sar važinenas andro Sentno Stanos. ⁵¹ Palis o Mojžiš oda diňa le Aronoske the leskere čhavage, avke sar prikazinda o RAJ.

Le Kohatengeri služba

4 O RAJ phenda le Mojžišoske the le Aronoske: ² “Zgen le muršen andral le Kohatoskeri fajta the famelija andral o kmeňos Levi. ³ Pisin andre savore muršen tranda (30) beršendar dži penda (50), save šaj keren e služba paš o Sentno Stanos.

⁴ Lengeri služba ela, hoj pes te starinen pal o sentne veci andro Sentno Stanos. ⁵ Sar ela o časos te sthovel o taboris, o Aron the leskere čhave avena andro Sentno Stanos, lena tele o andruno pochtan a zaučarena leha e Zmluvakeri Archa. ⁶ Palis upre thovena e lepeda le tuleñiskera cipatar a upral e fijalovo lepeda a ispidena andre o družki.

⁷ Pro skamind prekal o sentne mare thovena e fijalovo deka a upre thovena o tañira, o kuča, o čarore pre obeta a o džbani pre molakeri obeta. O maro ela furt pro skamind. ⁸ Pre oda thovena e loľi deka, učarena les andre le tuleñiskere cipenca a ispidena andre o družki.

⁹ Palis lena e fijalovo lepeda a učarena andre o melaris, o lampi, o silavis (kliši), o cikne lopatki the savore nadobi pro olejós. ¹⁰ Pačarena les savore sersamoha andre lepeda le tuleñiskera cipatar a thovena pro družki.

¹¹ Pro somnakuno oltaris thovena e fijalovo lepeda a učarena les andre lepeda le tuleñiskera cipatar a ispidena andre o družki.

¹² Palis lena savoro sersamos, soha pes služinel andro Sentno Stanos, thovena les pre fijalovo deka, učarena andre le tuleñiskera lepedaha a thovena pro družki.

¹³ Paloda žužarena o oltaris le žirošne prachostar a čhivena upre e fijalovo deka. ¹⁴ Pre oda thovena savoro sersamos, saveha pes služinel paš o oltaris: o lopatki pre jag, o vidli, o lopati the o čarore. Učarena savoro andre lepeda le tuleñiskera cipatar a ispidena andre o družki.

¹⁵ Sar o Aron the leskere čhave savoro učarena andre a sar kampela o taboris te prethovel avrether, avena le Kohatoskeri fajta, hoj oda te lidžan, ale našti pes chuden le sentne vecendar, hoj te na meren. Kada kerna on paš o Sentno Stanos, sar pes prethovela o taboris.

¹⁶ O rašaj Eleazar, le Aronoskero čhavo, pes starinela pal o olejós, voňavo kadidlos, chabeneskeri obeta the pal o olejós pro pomakhlipen. Dodikhela pre calo Sentno Stanos the pre savoro, so andre hin: pro sentne veci the sersamos."

¹⁷ O RAJ mek phendā le Mojžišoske the le Aronoske: ¹⁸⁻¹⁹ "Dodikhen pre oda, hoj le Kohatoskeri fajta andral o kmeños Levi te na meren, ale te dživen. Keren prekal lende kada: Sigeder sar avena paš o sentne veci, avela o Aron peskere čhavenca a phenena sakoneske, so te kerel a so te hordinel, ²⁰ hoj aňi pro sikra te na dikhen andro Sentno Stanos pro sentne veci, hoj te na meren."

Le Geršonitengeri služba

²¹ Dureder o RAJ phendā le Mojžišoske: ²² "Zgen le muršen andral le Geršonoskeri fajta the famelija andral o kmeños Levi. ²³ Pisin andre savore muršen tranda beršendar dži penda, save šaj keren e služba paš o Sentno Stanos.

²⁴ Kadi ela e služba le Geršonoskera fajtakeri: ²⁵ On hordinena o stanoskere lepedi, o Stanos, e lepeda le tuleñiskera cipatar, savaha pes učarelas andre, le Stanoskere vudareskeri lepeda, ²⁶ e vudareskeri lepeda andre dvora, e lepeda prekal e dvora the pašal o Stanos the oltaris, o lani the savoro sersamos pre oda. Sthovena savoro a hordinena peha.

²⁷ O Mojžiš the o Aron dodikhena pre oda, hoj o Geršoniti te hordinen a te keren savoro, so lenge prikazinena. ²⁸ Kadi hiňi lengeri služba paš o Sentno Stanos. Lidžala len o Itamar, o čhavo le rašaskero le Aronoskero.

Le Meraritengeri služba

²⁹ Zgen the le muršen andral e Merariskere fajti the fameliji andral o kmeños Levi. ³⁰ Pisin andre savore muršen tranda beršendar dži penda, save šaj keren e služba paš o Sentno Stanos. ³¹ Kada sa hordinena a pal kada pes starinena: Pal o stanoskere rami, družki, slupi the podstavci, ³² pal o dvorakere podstavci, slupi, cilore the lani a pal o sersamos, soha pes rozthovela o Stanos the e dvora. Phen sakoneske, so mušinela te hordinel. ³³ Kadi hiňi le Meraritengeri služba paš o Sentno Stanos. Lidžala len o Itamar, o čhavo le rašaskero le Aronoskero."

Savore Leviti zgende

³⁴ Avke sar o RAJ prikazindā, o Mojžiš, o Aron the o vodci zgende le muršen andral le Kohatoskere fameliji the fajti ³⁵ tranda beršendar dži penda, save mušinenas te služinel a te kerel e buči paš o Sentno Stanos.

³⁶ Zgende len a sas 2 750 murša, ³⁷ save mušinenas te služinel paš o Sentno Stanos. O Mojžiš the o Aron len zgende, avke sar lenge o RAJ prikazindā.

³⁸ Sar zgende le muršen andral le Geršonoskeri fajta the famelija ³⁹ tranda beršendar dži penda, save mušinenas te služinel paš o Sentno Stanos, ⁴⁰ sas 2 630 džene, ⁴¹ save mušinenas te služinel paš o Sentno Stanos. O Mojžiš the o Aron len zgende, avke sar lenge o RAJ prikazindā.

⁴² Sar zgende le muršen andral le Merariskeri famelija the fajta ⁴³ tranda beršendar dži penda, save mušinenas te služinel paš o Sentno Stanos, ⁴⁴ sas 3 200 džene, ⁴⁵ save mušinenas te služinel paš o Sentno Stanos. O Mojžiš the o Aron len zgende, avke sar lenge o RAJ prikazindā.

⁴⁶ Sar o Mojžiš, o Aron the o vodci zgende savore muršen andral o kmeños Levi pal lengere fajti the fameliji ⁴⁷ tranda beršendar dži penda, save mušinenas te služinel a te kerel e buči paš o Sentno Stanos, ⁴⁸ sas 8 580 džene. ⁴⁹ Sar o RAJ prikazindā le Mojžišoske, avke diňa dojekhe muršeske e služba paš o Sentno Stanos the o veci, so mušinel te hordinel.

Avke sas zgende, sar o RAJ prikazindā le Mojžišoske.

Traden avri le nažužen andral o taboris

5 O RAJ phendā le Mojžišoske: ² "Prikazin le Izraelitenge, hoj te traden avri andral o taboris savoren, save hine malomocne, abo nasvale avke, hoj čuľal lendar vareso, the olen, save pes meľarde oleha, hoj pes chudle le mulestar. ³ Traden len avri andral o taboris, ĉi muršes vaj džuvľa, hoj te na meľaren o taboris, kaj me bešav maškar mire manuša." ⁴ O Izraeliti kada kerde a tradle len avri andral o taboris, avke sar o RAJ prikazindā le Mojžišoske.

Te vareko varekas dukhavel

⁵ O RAJ pale phendā le Mojžišoske: ⁶ "Phen le Izraelitenge: 'Te varesavo murš vaj džuvľi hin napaĉivalo le Rajeske oleha, hoj kerel vareso nalaĉho varekaske, oda manuš hino vinovato. ⁷ Mušinel peskero binos te pridžanel a te poĉinel pale vaš oda oleske, kaske kerďa nalaĉhipen, a mek te pridel paš oda jekh pandžto kotor [†]. ⁸ Ale te merela oda manuš, kaske kempel te poĉinel pale, a nane les famelija, akor oda dženo, ko kerďa o nalaĉhipen, mušinel oda te del le RAJESKE prekal o rašaj. A mek paš oda mušinel te del le bakres le rašaske pre obeta vaš o binos. ⁹ Savore obeti the sentne dari, so anena o Izraeliti, aĉhena le rašaske. ¹⁰ O sentne dari, so anena o manuša le RAJESKE, aĉhena ole rašaske, savo oda lendar prilel.' "

Te o murš hino žarľivo

¹¹ O RAJ phendā le Mojžišoske: ¹² "Kada phen le Izraelitenge: 'Te varesavo muršeske uľahas e romňi napaĉivali a geľahas lestar ¹³ te pašľol varekaha avreha, meľardā pes andre, the te lakero murš pal oda na džanľahas a oj pre peste na phendāhas avri, the te na uľahas pre late o švedkos a na uľahas paš oda arakhľi. ¹⁴ Te palis lakero murš chudela te žarľinel pre peskeri romňi, savi pes meľardā andre, abo te pes oj na meľardā a o rom chudela te žarľinel, ¹⁵ ov la mušinel te lel ko rašaj a vaš lake anela kilos sano aro sar daros pre obeta. Pre kadi obeta naštĭ ĉhivel avri űisavo olejos aňi naštĭ pridel kadidlos, bo oda hin e obeta vaš e žarľivost' – e obeta, so sikavel, ĉi hiňi vinovato abo na.

¹⁶ O rašaj la džuvľa lela a aĉhavela la anglo oltaris anglo RAJ. ¹⁷ Palis o rašaj pherarela o ĉhikakero ĉaro le sentne paňeha, lela sikra prachos pal e phuv andro Sentno Stanos, a ĉhivela les andre oda paňi. ¹⁸ Avke o rašaj aĉhavela ola džuvľa anglo RAJ, rozmukela lake o bala a dela lake andro vasta e obeta, so sikavel, ĉi hiňi vinovato abo na. O rašaj ľikerela andro vasta o kirko paňi, so anel o prekošiben, ¹⁹ a phenela lake: "Te salas paĉivali tire romeske a na pašľilal űikaha avreha, kanastar džives le romeha, kada paňi tut na kerela űiĉ. ²⁰ Ale te na salas leske paĉivali, te pašľilal avre muršeha a te tut aleha meľardā andre, ²¹⁻²² akor o RAJ thovel pre tu o prekošiben. Aĉheha prekošli le RAJESTAR maškar tire manuša, ov domukela, hoj tuke o per te

[†] Oda hin biš (20) percent.

šuvľol, andral te šuĉos avri a te na aĉhes khabňi, a kada prekošibnaskero paňi tuke predžala pre dojekh andruno kotor."

Palis odi džuvľi phenela: "Mištes, mi aĉhel pes avke."

²³ Avke o rašaj pisinela kala prekošibena pro zvitkos a thovela (morela) le kirke paňeha o pismena tele.

²⁴ Palis oda kirko paňi, so anel o prekošiben, dela te pijel ola džuvľake, hoj te predžal prekal late, a te hiňi vinovato, ela la bare dukha. ²⁵ Avke o rašaj lela andral lakere vasta e obeta vaš e žarľivost', hazdela la upre anglo RAJ a anela la paš o oltaris. ²⁶ Avke ola obetatar lela sikra andre burňik sar e leperibnaskeri obeta, labarela oda pro oltaris a palis lake dela te pijel oda paňi. ²⁷ Te sas napaĉivali peskere romeske a aleha pes meľardā, oda prekošibnaskero paňi kerela, hoj la ela bare dukha, o per lake šuvľola, andral suĉola avri a imar naštĭ ela khabňi. Kajsĭ džuvľi ela prekošli maškar peskere manuša. ²⁸ Ale te sas paĉivali le romeske a hiňi žuži, na ela late űiĉ a dureder lake uľona o ĉhave.

²⁹ Kada hino zakonos pal e žarľivost': Te e džuvľi, savi dživel romeha, ela leske napaĉivali a kerela lubipen, ³⁰ abo te varesavo murš gondolinela, hoj leskeri romňi hiňi napaĉivali, mi anel la anglo RAJ a o rašaj laha mi kerel pal kada zakonos. ³¹ Te e džuvľi oda kerďa, ela potrestimen, ale o murš, savo la andā ko rašaj, ela bi e vina.' "

O zakonos pal o Nazareja

6 O RAJ phendā le Mojžišoske: ² "Phen kada le Izraelitenge: 'Te varesavo murš abo džuvľi del lav le RAJES, hoj pes oddela le RAJESKE sar Nazarejos, ³ naštĭ pijel mol, aňi aver zoralo pijiben, aňi moľakero šut, aňi e štava le hroznostar a naštĭ chal o hroznos, ĉi hino šuĉardo abo švižo. ⁴ Calo ĉasos, sar ela Nazarejos, naštĭ chal űiĉ olestar, so hin le viňiĉostar – aňi o zrnka andral aňi o cipi pal o hroznos.

⁵ Medik hino tel e Nazarejsko vera, naštĭ peske strihinel la britvaha o bala pal o šero, ale mušinel len te mukel te barol. Mušinel te aĉhel sentno, medik na predžala o dživesa, so pes oddel le RAJESKE.

⁶ Calo ĉasos, medik hino Nazarejos, naštĭ pes chudel le mule tēlostar. ⁷ Naštĭ pes oleha meľarel, aňi akor, sar leske merela o dad, e daj, o phral vaj o pheňa, bo leskere bala sikaven, hoj hino sentno le Devleske. ⁸ Pal calo ĉasos, so hino tel e Nazarejsko vera, ela sentno le RAJESKE.

⁹ Ale te vareko paš leste jekhvareste merela, aleha pes meľarela leskere bala. Mušinel te užarel eľta džives a palis peske mušinel te hoľinel o šero, a avke ela žužo. ¹⁰ Pro oĉtoto džives anela duj hrdľiĉki abo duj cikne holubi le rašaske paš o vudar andro Sentno Stanos. ¹¹ O rašaj anela ole ĉiriklendar jekhes sar obeta vaš o binos a dujtones sar labardi obeta, hoj leske te el odmuklo, hoj pes meľardā le mule tēlostar. Andre oda džives pale sentňarela o šero. ¹² Mušinel pes pale te oddel le RAJESKE sar Nazarejos pro calo ĉasos, bo o ĉasos angloďa pes leske imar na rachinela, bo na doľik-

erdã e Nazarejsko vera. Paš oda anela jekhberšeskere bakres sar obeta vaš o binos.

¹³ Kada hin o zakonos pal o Nazarejos: Oda džives, sar leske predžala o časos, so sas tel e Nazarejsko vera, avela paš o vudar andro Sentno Stanos. ¹⁴ Sar daros le RAJESKE anela jekhe saste jekhberšeskere bakrores sar labardĩ obeta, beršeskera ovečka sar obeta vaš o binos a saste baranos sar smiromoskeri obeta. ¹⁵ Anela andro košaris o mare bi o droždĩ, o mare le sane arestar mišimen le olivove olejoha the o šuke mare pomakhle le olejoha a ke oda chabeneskeri the molakeri obeta.

¹⁶ O rašaj ole dari anela anglo RAJ a kerela e obeta vaš o binos the e labardĩ obeta. ¹⁷ Le bakres obetinela le RAJESKE sar smiromoskeri obeta jekhetane le marenca bi o droždĩ a anela e chabeneskeri the molakeri obeta.

¹⁸ Palĩs paš o vudar andro Sentno Stanos peske o Nazarejos ostrihinela o bala. Avke lela o bala, so sas sentňarde le RAJESKE, a čhivela len andre jag tel e smiromoskeri obeta.

¹⁹ Sar peske strihindã o bala, so sikavenas, hoj hino Nazarejos, lela o rašaj e tadĩ bakraňi angluňi čang, o mare bi o droždĩ the o sucharis andral o košaris a dela leske andro vasta. ²⁰ O rašaj oda hazdela upre anglo RAJ sar hazdli obeta; o mare the o sucharis le hazdle kolineha the la čangaha hine o sentne dari prekal o rašaj. Paloda šaj o Nazarejos pijel mol.

²¹ Kala hine o zakoni prekal o Nazareja. Ale te o Nazarejos del lav, hoj dela buter sar kada, so kampil pal o zakonos, mušinel oda te dolikerel ipen avke, sar diňa lav.' "

Le Aronoskero požehňaňje

²² O RAJ phendã le Mojžišoske: ²³ "Phen le Aronoske the leskere čhavage: 'Kale lavenca žehňinena le Izraelitenge:

²⁴ Mi požehňinel tut o RAJ, mi chraňinel tut!

²⁵ Mi švicinel pre tu leskero muj a mi avel ke tu lačhejileskero!

²⁶ Mi visarel o RAJ pre tu peskero muj a mi del tut o smirom!'

²⁷ Kavke žehňinena le Izraelitenge andre miro nav a me len požehňinava."

O dari prekal o Sentno Stanos

7 Oda džives, sar o Mojžiš dokerdã o Sentno Stanos, pomakhľã les le olejoha a sentňardã les savore sersamoha, le oltariha the leskere vecenca. ² Palĩs o Izraelike vodci ande o dari; on sas o famelijengere vodci upral o kmeňi, savenge sas dino, hoj te zgenen le manušen. ³ On ande anglo Sentno Stanos anglo RAJ šov zaučharde verdana the dešuduje (12) guruven – duj vodci dine po jekh verdan a dojekh vodcas andã jekh guruv.

⁴ O RAJ phendã le Mojžišoske kada: ⁵ "Prile oda lendar. Oda ela pre služba andro Sentno Stanos. De oda le Levitenge, dojekheske pre leskeri služba."

⁶ Akor o Mojžiš priiľã lendar o verdana le guruvenca a diňa le Levitenge. ⁷ Duj verdana the štar guruven diňa le Geršonitenge pre lengeri služba. ⁸ Štar verdana the očno guruven diňa le Meraritenge pre lengeri služba. O Itamar, o čhavo le rašaskero le Aronoskero, dodikhelas pre lengeri buči. ⁹ Le Kohaten na dine olestar nič, bo on pes starinenas pal o sentne veci, save kampelas te hordinel pro phike.

¹⁰ The andre oda džives, sar sas o oltaris sentňardo the pomakhlo, o vodci ande o dari a thode len anglo oltaris. ¹¹ O RAJ phendã le Mojžišoske: "Sako džives jekh vodcas mi anel peskero daros, hoj te sentňarel o oltaris."

¹² Ešebno (peršo) džives andã peskero daros o Nachšon, le Amminadaboskero čhavo, o vodcas andral o kmeňos Juda.

¹³ Leskero daros sas: Jekh rupuno čaro, so važinelas 1,5 kilos; jekh rupuno čaroro, andral savo pes kropinel o rat a so važinelas 800 grami, avke sar pes važinel andro Sentno Stanos, soduj sas pherarde sane areha mišimen le olejoha pre chabeneskeri obeta; ¹⁴ jekh cikňi somnakuňi lopatka, so važinelas 110 grami, pherdĩ le kadĩdloha; ¹⁵ jekh terno bikos, jekh baranos, jekhberšeskero bakro pre labardĩ obeta; ¹⁶ jekh capos pre obeta vaš o binos; ¹⁷ the pre smiromoskeri obeta duj guruva, pandž barani, pandž capi the pandž jekhberšeskere bakrore. Kada sas obetno daros le Nachšonoskero, saveske sas dad o Amminadab.

¹⁸ Dujto džives andã peskero daros o Netaneel, le Cuaroskero čhavo, o vodcas andral o kmeňos Jis-sachar.

¹⁹ Leskero daros sas: Jekh rupuno čaro, so važinelas 1,5 kilos; jekh rupuno čaroro, andral savo pes kropinel o rat a so važinelas 800 grami, avke sar pes važinel andro Sentno Stanos, soduj sas pherarde sane areha mišimen le olejoha pre chabeneskeri obeta; ²⁰ jekh cikňi somnakuňi lopatka, so važinelas 110 grami, pherdĩ le kadĩdloha; ²¹ jekh terno bikos, jekh baranos, jekhberšeskero bakro pre labardĩ obeta; ²² jekh capos pre obeta vaš o binos; ²³ the pre smiromoskeri obeta duj guruva, pandž barani, pandž capi the pandž jekhberšeskere bakrore. Kada sas obetno daros le Netaneeloskero, saveske sas dad o Cuar.

²⁴ Trito džives andã peskero daros o Eliab, le Che-lonoskero čhavo, o vodcas andral o kmeňos Zebulun.

²⁵ Leskero daros sas: Jekh rupuno čaro, so važinelas 1,5 kilos; jekh rupuno čaroro, andral savo pes kropinel o rat a so važinelas 800 grami, avke sar pes važinel andro Sentno Stanos, soduj sas pherarde sane areha mišimen le olejoha pre chabeneskeri obeta; ²⁶ jekh cikňi somnakuňi lopatka, so važinelas 110 grami, pherdĩ le kadĩdloha; ²⁷ jekh terno bikos, jekh baranos, jekhberšeskero bakro pre labardĩ obeta; ²⁸ jekh capos

pre obeta vaš o binos; ²⁹ the pre smiromoskeri obeta duj guruva, pandž barani, pandž capi the pandž jekhberšeskere bakrore. Kada sas obetno daros le Eliaboskero, saveske sas dad o Chelon.

³⁰ Štarto džives andā peskero daros o Elicur, le Šedeuroskeo čhavo, o vodcas andral o kmeňos Ruben.

³¹ Leskero daros sas: Jekh rupuno čaro, so važinelas 1,5 kilos; jekh rupuno čaroro, andral savo pes kropinel o rat a so važinelas 800 grami, avke sar pes važinel andro Sentno Stanos, soduj sas pherarde sane areha mišimen le olejoha pre chabeneskeri obeta; ³² jekh cikňi somnakuňi lopatka, so važinelas 110 grami, pherdī le kadīdloha; ³³ jekh terno bikos, jekh baranos, jekhberšeskero bakro pre labardī obeta; ³⁴ jekh capos pre obeta vaš o binos; ³⁵ the pre smiromoskeri obeta duj guruva, pandž barani, pandž capi the pandž jekhberšeskere bakrore. Kada daros sas le Eliuroskeo, saveske sas dad o Šeđeur.

³⁶ Pandžto džives andā peskero daros o Šelumiel, le Curišaddajoskeo čhavo, o vodcas andral o kmeňos Šimeon.

³⁷ Leskero daros sas: Jekh rupuno čaro, so važinelas 1,5 kilos; jekh rupuno čaroro, andral savo pes kropinel o rat a so važinelas 800 grami, avke sar pes važinel andro Sentno Stanos, soduj sas pherarde sane areha mišimen le olejoha pre chabeneskeri obeta; ³⁸ jekh cikňi somnakuňi lopatka, so važinelas 110 grami, pherdī le kadīdloha; ³⁹ jekh terno bikos, jekh baranos, jekhberšeskero bakro pre labardī obeta; ⁴⁰ jekh capos pre obeta vaš o binos; ⁴¹ the pre smiromoskeri obeta duj guruva, pandž barani, pandž capi the pandž jekhberšeskere bakrore. Kada daros sas le Šelumieloskeo, saveske sas dad o Curišaddaj.

⁴² Šovto džives andā peskero daros o Eljasaf, le Deueloskeo čhavo, o vodcas andral o kmeňos Gad.

⁴³ Leskero daros sas: Jekh rupuno čaro, so važinelas 1,5 kilos; jekh rupuno čaroro, andral savo pes kropinel o rat a so važinelas 800 grami, avke sar pes važinel andro Sentno Stanos, soduj sas pherarde sane areha mišimen le olejoha pre chabeneskeri obeta; ⁴⁴ jekh cikňi somnakuňi lopatka, so važinelas 110 grami, pherdī le kadīdloha; ⁴⁵ jekh terno bikos, jekh baranos, jekhberšeskero bakro pre labardī obeta; ⁴⁶ jekh capos pre obeta vaš o binos; ⁴⁷ the pre smiromoskeri obeta duj guruva, pandž barani, pandž capi the pandž jekhberšeskere bakrore. Kada daros sas le Eljasafoskeo, saveske sas dad o Deuel.

⁴⁸ Eftato džives andā peskero daros o Elišamas, le Ammichudoskeo čhavo, o vodcas andral o kmeňos Efrajim.

⁴⁹ Leskero daros sas: Jekh rupuno čaro, so važinelas 1,5 kilos; jekh rupuno čaroro, andral savo pes kropinel o rat a so važinelas 800 grami, avke sar pes važinel andro Sentno Stanos, soduj sas pherarde sane areha

mišimen le olejoha pre chabeneskeri obeta; ⁵⁰ jekh cikňi somnakuňi lopatka, so važinelas 110 grami, pherdī le kadīdloha; ⁵¹ jekh terno bikos, jekh baranos, jekhberšeskero bakro pre labardī obeta; ⁵² jekh capos pre obeta vaš o binos; ⁵³ the pre smiromoskeri obeta duj guruva, pandž barani, pandž capi the pandž jekhberšeskere bakrore. Kada daros sas le Elišamoskeo, saveske sas dad o Ammichud.

⁵⁴ Ochtoto džives andā peskero daros o Gamaliel, le Pedacuroskeo čhavo, o vodcas andral o kmeňos Menašše.

⁵⁵ Leskero daros sas: Jekh rupuno čaro, so važinelas 1,5 kilos; jekh rupuno čaroro, andral savo pes kropinel o rat a so važinelas 800 grami, avke sar pes važinel andro Sentno Stanos, soduj sas pherarde sane areha mišimen le olejoha pre chabeneskeri obeta; ⁵⁶ jekh cikňi somnakuňi lopatka, so važinelas 110 grami, pherdī le kadīdloha; ⁵⁷ jekh terno bikos, jekh baranos, jekhberšeskero bakro pre labardī obeta; ⁵⁸ jekh capos pre obeta vaš o binos; ⁵⁹ the pre smiromoskeri obeta duj guruva, pandž barani, pandž capi the pandž jekhberšeskere bakrore. Kada daros sas le Gamalieloskeo, saveske sas dad o Pedacur.

⁶⁰ Eňato džives andā peskero daros o Abidan, le Gideoniskero čhavo, o vodcas andral o kmeňos Benjamin.

⁶¹ Leskero daros sas: Jekh rupuno čaro, so važinelas 1,5 kilos; jekh rupuno čaroro, andral savo pes kropinel o rat a so važinelas 800 grami, avke sar pes važinel andro Sentno Stanos, soduj sas pherarde sane areha mišimen le olejoha pre chabeneskeri obeta; ⁶² jekh cikňi somnakuňi lopatka, so važinelas 110 grami, pherdī le kadīdloha; ⁶³ jekh terno bikos, jekh baranos, jekhberšeskero bakro pre labardī obeta; ⁶⁴ jekh capos pre obeta vaš o binos; ⁶⁵ the pre smiromoskeri obeta duj guruva, pandž barani, pandž capi the pandž jekhberšeskere bakrore. Kada daros sas le Abidanoskeo, saveske sas dad o Gideonis.

⁶⁶ Dešto džives andā peskero daros o Achiezer, le Ammišaddajoskeo čhavo, o vodcas andral o kmeňos Dan.

⁶⁷ Leskero daros sas: Jekh rupuno čaro, so važinelas 1,5 kilos; jekh rupuno čaroro, andral savo pes kropinel o rat a so važinelas 800 grami, avke sar pes važinel andro Sentno Stanos, soduj sas pherarde sane areha mišimen le olejoha pre chabeneskeri obeta; ⁶⁸ jekh cikňi somnakuňi lopatka, so važinelas 110 grami, pherdī le kadīdloha; ⁶⁹ jekh terno bikos, jekh baranos, jekhberšeskero bakro pre labardī obeta; ⁷⁰ jekh capos pre obeta vaš o binos; ⁷¹ the pre smiromoskeri obeta duj guruva, pandž barani, pandž capi the pandž jekhberšeskere bakrore. Kada daros sas le Achiezeroskeo, saveske sas dad o Ammišaddaj.

⁷² Dešujekhto (11.) džives andā peskero daros o Pagiel, le Ochranoskero čhavo, o vodcas andral o kmeňos Ašer.

⁷³ Leskero daros sas: Jekh rupuno čaro, so važinelas 1,5 kilos; jekh rupuno čaroro, andral savo pes kropinel o rat a so važinelas 800 grami, avke sar pes važinel andro Sentno Stanos, soduj sas pherarde sane areha mišimen le olejoha pre chabeneskeri obeta; ⁷⁴ jekh cikňi somnakuňi lopatka, so važinelas 110 grami, pherdī le kadīdloha; ⁷⁵ jekh terno bikos, jekh baranos, jekhberšeskero bakro pre labardī obeta; ⁷⁶ jekh capos pre obeta vaš o binos; ⁷⁷ the pre smiromoskeri obeta duj guruva, pandž barani, pandž capi the pandž jekhberšeskere bakrore. Kada daros sas le Pagieloskero, saveske sas dad o Ochran.

⁷⁸ Dešudujto (12.) džives andā peskero daros o Achiras, le Enanoskero čhavo, o vodcas andral o kmeňos Naftali.

⁷⁹ Leskero daros sas: Jekh rupuno čaro, so važinelas 1,5 kilos; jekh rupuno čaroro, andral savo pes kropinel o rat a so važinelas 800 grami, avke sar pes važinel andro Sentno Stanos, soduj čarore sas pherarde sane areha mišimen le olejoha pre chabeneskeri obeta; ⁸⁰ jekh cikňi somnakuňi lopatka, so važinelas 110 grami, pherdī le kadīdloha; ⁸¹ jekh terno bikos, jekh baranos, jekh jekhberšeskero bakro pre labardī obeta; ⁸² jekh capos pre obeta vaš o binos; ⁸³ the pre smiromoskeri obeta duj guruva, pandž barani, pandž capi the pandž jekhberšeskere bakrore. Kada daros sas le Achiroskero, saveske sas dad o Enan.

⁸⁴ Kala dari ande o vodci andral o Izrael, sar sas o oltaris sentňardo the pomakhlo: Dešuduj rupune čare, dešuduj rupune čarore, andral save pes kropinel o rat, the dešuduj cikne somnakune lopatki. ⁸⁵ Jekh rupuno čaro važinelas 1,5 kilos a jekh rupuno čaroro važinelas 800 grami. Savore kale rupune nadobi važinenas jekhetane 27,6 kili, avke sar pes važinel andro Sentno Stanos. ⁸⁶ O dešuduj cikne somnakune lopatki sas pherde le kadīdloha. Dojekh lopatka važinelas 110 grami, avke sar važinenas andro Sentno Stanos. Savore somnakune lopatki važinenas jekhetane 1,32 kilos. ⁸⁷ Savore džviri pre labardī obeta sas dešuduj terne biki, dešuduj barani, dešuduj jekhberšeskere bakrore jekhetane lengera chabeneskera obetaha a sas dešuduj capi pre obeta vaš o binos. ⁸⁸ Savore džviri pre smiromoskeri obeta sas bišuštar (24) terne biki, šovardeš (60) barani, šovardeš capi the šovardeš jekhberšeskere bakrore. Kala sas obetne dari pro sentňariben le oltariske pal oda, sar sas pomakhlo le olejoha.

⁸⁹ Kecivar džalas o Mojžiš andro Sentno Stanos, hoj te vakerel le RAJEHA, šunelas leskero hangos, so šundolas maškar o duj cherubi, save sas pro kritos la Zmluvakera Archakero. Kavke vakerelas o Mojžiš le RAJEHA.

Sar te ačhavel o lampi pro momefaris

8 O RAJ phendā le Mojžišoske: ² "Phen le Aronoske, hoj te dodikhel pre oda, sar thovela o ehta lampi pro momefaris, hoj te švicinen anglo momefaris."

³ O Aron avke the kerda a ačhada o lampi avke, hoj te švicinen anglo momefaris, sar o RAJ prikazinda le Mojžišoske. ⁴ O momefaris sas calo somnakuno telunestar dži paš o kvitki. O Mojžiš les diňa te kerel ipen avke, sar leske sikada o RAJ.

Le Levitengero sentňariben

⁵ Palis o RAJ phendā le Mojžišoske: ⁶ "Oddelin le Leviten le Izraelitendar a obžužar len. ⁷ Kavke len obžužareha: Pokropineha len le paňeha pro obžužaripen, la britvaha peske mi holinen calo tēlos, mi rajbinen o gada. Avke pes mi obžužaren. ⁸ Palis mi len terne bikos the chabeneskeri obeta le sane areha, so ela mišimen le olejoha. A dujte terne bikos le pre obeta vaš lengere bini. ⁹ Palis an le Leviten anglo Sentno Stanos, kaj pes manca zdžan, a zvičín savore Izraeliten. ¹⁰ A sar len aneħa angle ma, o Izraeliti pre lende mi thoven o vasta. ¹¹ Palis o Aron mi anel le Leviten anglo RAJ sar e hazdli obeta le Izraelitendar, hoj mange te služinen.

¹² Avke o Leviti mi thoven o vasta pro šere le bikenge. Jekhe bikos obetin sar obeta vaš o bini a dujtes sar labardī obeta le RAJESKE, hoj te obžužares le Leviten le binendar. ¹³ Paloda le Leviten ačhav anglo Aron the angle leskere čhave a sentňar len le RAJESKE sar e hazdli obeta. ¹⁴ Rozulav (oddēlin) len le Izraelitendar. O Leviti ena mire.

¹⁵ Ešeb (peršo) len obžužar a de sar hazdli obeta, palis šaj keren e služba paš o Sentno Stanos. ¹⁶ On hine dine ča prekal ma, me mange len ilom vaš savore ešebne murša le Izraelitendar. ¹⁷ Miro hino savoro ešebno, so uliľa le Izraelitenge, či manuš abo džvirov. Sentňardom len mange andre oda džives, sar murdardom savoro ešebno andro Egipt. ¹⁸ Vašoda mange ilom le Leviten vaš savore ešebne čhave maškar o Izraeliti. ¹⁹ Le Leviten dav sar daros le Aronoske the leskere čhavage, hoj te služinen paš o Sentno Stanos a te keren o obeti vaš o binos le Izraelitengero, hoj te na en marde le džungale nasvalibnaha, te avena paš o Sentno Stanos."

²⁰ Avke o Mojžiš, o Aron the savore Izraeliti sentňarde le Leviten avke, sar o RAJ prikazinda le Mojžišoske. ²¹ O Leviti pes obžužarde le binendar, rajbinde peske o gada a o Aron len diňa le RAJESKE sar hazdli obeta. Palis o Aron vaš lenge andā le RAJESKE obeta, hoj te en žuže le binendar. ²² Avke o Leviti gele te kerel e služba paš o Sentno Stanos a dodikhenas pre lende o Aron the leskere čhave. Kerde lenca avke, sar o RAJ prikazinda le Mojžišoske.

²³ O RAJ mek phendā le Mojžišoske: ²⁴ "Kada hin o zakonos prekal o Leviti: Dojekh le bišuštar (25) beršendar upreder mušinel te služinel paš o Sentno Stanos,

²⁵ ale sar leske ela penda (50) berš, mukela e služba a imar na služinela. ²⁶ Šaj pomožinel avre Levitenge paš o Sentno Stanos te kerel lengeri služba, ale korkoro imar na služinela. Kavke rozulaveha e služba le Levitenge.”

Sar te likerel e Patrađi

9 O RAJ phendā le Mojžišoske pre pušta Sinaj andro ešebno (peršo) čhon andro dujto berš, paloda, sar o Izraeliti gele avri andral o Egipt: ² “O Izraeliti mi oslavinen e Patrađi andro časos, so diňom pre oda.

³ Oslavinen la dešuštarto (14.) džives andre oda čhon rači, sar zadžal o kham, pal savore zakoni a prikazaňja.”

⁴ Avke o Mojžiš phendā le Izraelitenge, hoj te oslavinen e Patrađi. ⁵ On pre pušta Sinaj dešuštarto džives andro ešebno čhon rači chudle te oslavinel e Patrađi. Kerde sa avke, sar o RAJ prikazinda le Mojžišoske.

⁶ Ale sas ode varesave murša, save pes meľarde, bo pes chudle le mule manušendar, a našti oslavinenas e Patrađi. Vašoda oda džives avle ko Mojžiš the Aron ⁷ a phende lenge: “Meľardam pes bo chudlam pes le mulendar, ale soske akana našti oslavinas e Patrađi a našti anas o obetno daros le RAJESKE jekhetane le avre Izraelitenca?”

⁸ O Mojžiš lenge odphendā: “Užaren ade, me džav andro Sentno Stanos te phučel le RAJESTAR, so ov phenela.”

⁹ O RAJ leske odphendā: ¹⁰ “Phen le Izraelitenge: ‘Te pes vareko tumendar abo tumare potomkendar meľarena oleha, hoj pes chudena le mule manušestar, abo ena dur pro drom, the avke mi oslavinen e Patrađi pre pačiv le RAJESKE. ¹¹ Oslavinena la pre aver čhon rači dešuštarto (14.) džives andre dujto čhon. Le bakrores čhana le marenca bi o droždi the le kirke bilinena. ¹² Nič olestar ma muken džī tosara a ma phagen leske aňi jekh kokalos. Dolikeren savore kale prikazaňja, sar oslavinena e Patrađi. ¹³ Ale te vareko hino žužo a nane dur pro drom, no the avke na oslavinel e Patrađi, ela avritradlo mire manušendar, bo na anda o daros le RAJESKE andro časos, sar sas phendo. Kajso manuš ela potrestimen vaš peskero binos.

¹⁴ O cudzincos, savo dživel maškar tumende, šaj oslavinel e Patrađi pre pačiv le RAJESKE, ale mušinel la te oslavinel pal o zakoni the prikazaňja, so sas avridine pal e Patrađi. Kala jednake zakoni the prikazaňja hin prekal o Izraeliti the prekal o cudzinci.’”

Pal e chmara upral o Sentno Stanos

¹⁵ Andre oda džives, sar sas o Sentno Stanos ačhado, zaučharda les e chmara a račatar džī tosara švicinelas sar jag upral o Sentno Stanos. ¹⁶ Sas oda furt avke: E chmara sas upral o Sentno Stanos dživese a rači švicinelas sar jag. ¹⁷ Akor, sar pes e chmara upral o Sentno Stanos hazdelas upre, o Izraeliti pes mukenas pro drom a pale rozthovenas o taboris ode, kaj e chmara zaačhelas. ¹⁸ Sar o RAJ prikazinelas, o Izraeliti

pes mukenas pro drom, a kaj phenelas, hoj te zaačhen, ode kerenas taboris a ačhenas ode, medik e chmara sas upral o Sentno Stanos. ¹⁹ Te e chmara ačhelas buter časos upral o Sentno Stanos, o Izraeliti šunenenas le RAJESKERO prikazaňje a na mukenas pes pro drom. ²⁰ Varekana sas e chmara upral o Sentno Stanos ča vajkeci dživesa. Sar o RAJ prikazinelas, o Izraeliti pes mukenas pro drom, a kaj phenelas, hoj te zaačhen, ačhenas a rozthovenas ode o taboris. ²¹ A varekana e chmara upral sas ča račatar džī tosara, a te tosara pes hazdelas upre, mukenas pes pro drom. Či oda sas dživese abo rači, te e chmara pes hazdelas upre, mukenas pes pro drom. ²² Te e chmara ačhelas upral o Sentno Stanos duj džives abo čhon, vaj buter časos, o Izraeliti ačhenas ode andro taboris, medik e chmara sas upral o Sentno Stanos. Ale sar pes hazdelas upre, mukenas pes pro drom. ²³ Sar o RAJ prikazinelas, o Izraeliti pes mukenas pro drom, a kaj phenelas, hoj te zaačhen, ačhenas a rozthovenas ode o taboris. Kerenas pal le RAJESKERE prikazaňja, so lenge phenelas prekal o Mojžiš.

O rupune trubi

10 O RAJ phendā le Mojžišoske: ² “Ker tuke duj rupune trubi. Zvičin lenca le Izraeliten jekhetane a de lenge lenca te džanel, hoj te sthoven o tabora a te pririchtinen pes pro drom. ³ Sar trubinena pro soduj trubi, savore Izraeliti pes mušinen te zdžal paš o vudar anglo Sentno Stanos. ⁴ Te trubinena ča pre jekh, mušinen pes te zdžal ke tu ča o vodci le Izraeloskere fajtengere. ⁵ Sar šundola o zoralo hangos la trubakero, o kmeňi, save taborinenas pro vichodno sera, pes mukena pro drom. ⁶ Sar trubinena zorales dujtovar, mukena pes o kmeňi, save taborinenas pre južno sera. Avke zorales pes trubinela, sar pes mukena pro drom, ⁷ ale te kameha, hoj pes te zdžan savoredžene, mi trubinen avres.

⁸ Pro trubi trubinena le Aronoskere čhave, o rašaja. Kada tumenge ela zakonos pro furt pre savore pokoleňja. ⁹ Sar imar avena andre peskeri phuv, a te džana andro mariben le űeprijateľiha, savo pre tumende ispidela, zatrubinen pre kala trubi. Akor me, o RAJ, mange pre tumende leperava, pomožinava tumenge a zachraňinava tumen le űeprijateľendar. ¹⁰ Andre ola dživesa, sar oslavinena – ešebno (peršo) džives le neve čhoneskero the tumare aver inepi – trubinena pro trubi paš o labarde the smiromoskere obeti. Akor mange leperava pre tumende. Me som o RAJ, tumaro Del.”

O Izraeliti omuken o Sinaj

¹¹ Dujto berš andro dujto čhon pro bišto (20.) džives pes hazdla e chmara upral o Sentno Stanos. ¹² Akor o Izraeliti odgele pal e pušta Sinaj. Džanas dureder le dromeha a vajkecivar zaačhile, medik e chmara na ačhila pre pušta Paran. ¹³ Oda sas ešebnovar, sar pes

mukle pro drom pal le RAJESKERO prikazis, so lenge diňa prekal o Mojžiš.

¹⁴ O partiji andral o taboris le Judaskere kmeňostar džanas ešebne pal peskeri zastava. Lengero vodcas sas o Nachšon, le Amminadaboskero čhavo. ¹⁵ Le Jis-sacharoskere kmeňoske sas vodcas o Netaneel, le Cuaroskero čhavo, ¹⁶ a le Zebulunskere kmeňoske sas vodcas o Eliab, le Chelonoskero čhavo.

¹⁷ Sar rozkidenas o Sentno Stanos, akor gele het o Geršoniti the o Merariti, save hordinenas o Sentno Stanos.

¹⁸ Palis džanas o partiji andral o taboris le Rubenoskere kmeňostar pal peskeri zastava. Lengero vodcas sas o Elicur, le Šedeuroske čhavo; ¹⁹ le Šime-onoskere kmeňoske sas vodcas o Šelumiel, le Curišad-dajoskero čhavo ²⁰ a le Gadoskere kmeňoske sas vodcas o Eljasaf, le Deueloskero čhavo.

²¹ Pal lende džanas o Kohatiti, save hordinenas o sentne veci andral o Sentno Stanos. Okla manuša rozthode le RAJESKERO Stanos pre aver than sigeder, sar on avle.

²² Palis džanas o partiji andral o taboris le Efraji-moskere kmeňostar pal peskeri zastava. Lengero vodcas sas o Elišamas, le Ammichudoskero čhavo; ²³ le Menaššeskere kmeňoske sas vodcas o Gamaliel, le Pedacuroske čhavo, ²⁴ a le Benjaminoskere kmeňoske sas vodcas o Abidan, le Gideoniskero čhavo.

²⁵ Paloda džanas o partiji andral o taboris le Danoskere kmeňostar pal peskeri zastava. Lengero vodcas sas o Achiezer, le Ammišaddajoskero čhavo; ²⁶ le Ašeroskere kmeňoske sas vodcas o Pagi-el, le Ochranoskero čhavo, ²⁷ a le Naftaliskere kmeňoske sas vodcas o Achiras, le Enanoskero čhavo.

²⁸ Furt sar pes mukenas pro drom, džanas o Izraeliti ajse šoroha pal peskere partiji.

²⁹ Palis o Mojžiš phendā peskere šogoriske le Chobaboske, saveske sas dad o Reuel † andral o Midijan: "Džas andre phuv, pal savi o RAJ phendā: 'Dava la tumenge.' Av amenca a presikavaha tuke o jileskeriben. Se o RAJ diňa le Izraeliten lav pal o lače veci."

³⁰ Ale ov leske odphendā: "Na džav. Me kamav te džal andre miri phuv ke mire manuša."

³¹ "Mangav tut, ma omuk amen," phendā o Mojžiš. "Se tu džanes, kaj pre pušta peske šaj keras o tabora. Tu amenge sikaveha o drom. ³² Te aveha amenca, palis pes tuha rozdelinaha savore lače vecenca, so amen dela o RAJ."

³³ Avke pes le verchostar Sinaj mukle pro trine dživeseskero drom a trin džives džalas angle lende the e Zmluvakeri Archa, hoj lenge te arakhel than pro odpočinkos. ³⁴ Akorestar, sar pes mukle pro drom andral o taboris, le RAJESKERI chmara sas calo džives upral lende.

³⁵ Sar pes kamenas te mukel pro drom la Zmluvakera Archaha, o Mojžiš phenelas:

"Av, RAJEJA!

Mi rozdžan pes ola, ko pre tu džan;

† Oda hin o Jetro.

mi denašen angle tu ola, ko tut našti avri ačhen."

³⁶ Sar e Archa zaačhelas pro odpočinkos, o Mojžiš phenelas:

"Av pale, RAJEJA,

ke tire ezera ezerengere Izraeliti."

E jag le RAJESTAR pro taboris

11 O manuša anglo RAJ chudle te reptinel vaš lengero pharipen. O RAJ ada šundā a sas igen choľamen avke, hoj zlabardā la jagaha o avrune agora le taboriskere. ² Akor o manuša chudle te vičinel pro Mojžiš, hoj lenge te pomožinel. Sar pes o Mojžiš modlindā ko RAJ, e jag preachiľa te labol. ³ Vašoda dine ole thaneske nav Tabera, bo le RAJESKERI jag labolas maškar lende.

O manuša peske mangel mas

⁴ Varesave bitanga manuša, save sas le Izraelitencā, kamenas igen te chal mas. A the o Izraeliti chudle pale te vičinel rovibnaha: "Te amen ulahas varesavo mas!

⁵ Leperas peske, sar chahas andro Egipt o ribi, o ogurki, o duduma, o poros, e purum the o cesnakos. ⁶ Se imar sa šučilam avri. Nič na dikhas, ča kadi manna!"

⁷ E manna dičholas sar slabo šargo korijandroskero zrnos. ⁸ O manuša džanas a kidenas la, erňinenas la andro mlĩnkocis abo rozmarenas la andro čaro pro aro. Tavenas la andre piri the pekenas o marikľa, so chutĩnenas sar o maro peko le olivovo olejoha. ⁹ Sar rači perelas e rosa pro taboris, akor perelas the e manna.

¹⁰ O Mojžiš šundā, hoj o manuša roven, dojekh famelija paš peskero stanoskero vudar. Sas leske igen pharo a o RAJ sas choľamen pro Izraeliti. ¹¹ A phendā le RAJESKE: "Soske avke keres tire služobňikoha? So kerđom, hoj mange kada zasluđindom? Soske mange diňal pre meň savore kale manušen? ¹² So me som lengero dad a on mire čhave, hoj mange vakeres, hoj len te lidžav pro vasta sar e džuvľi, savi del te pijel le cikne čhavores, a hoj len te anav andre phuv, pal savi diňal veraha lav lengere daden? ¹³ Khatar lava kajci mas kale savore manušenge? Roven a mangel mandar: 'De amen mas! Kamas te chal!' ¹⁴ Kadi buči hiňi phari prekal ma. Sar šaj man korkoro starinav pal kala manuša? ¹⁵ Te kames manca kavke te kerel, feder mange ela, te man murdareha, hoj te na dikhav pre miro trapišagos – te som tuke pre dzeka."

Kidel avri eftavardeš vodcen

¹⁶ Akor o RAJ phendā le Mojžišoske: "Zvičĩn eftavardeš (70) vodcen le Izraelitendar, pal save džanes, hoj hine le manušengere vodci. An len ko Sentno Stanos a mi ačhen ode tuha. ¹⁷ Avava tele a vakera tuha. Lava le Duchostar, so hino pre tute, a dava pre lende. On lidžana le manušengero pharipen jekhetane tuha. Imar na lidžaha oda pharipen korkoro.

¹⁸ Le Izraelitenge pheneha: "Sentňaren tumen pro tajsa. Chana mas, bo rovibnaha vičinenas ko RAJ: "Te

amen ulahas varesavo mas! Sar amenge sas mištes andro Egipt!" Akana o RAJ tumen dela mas a čačes les chana. ¹⁹ Na chana les ča jekh džives abo duj dživesa, aňi pandž dživesa vaj deš dživesa, aňi biš (20) dživesa, ²⁰ ale chana les calo čhon, medik tumenge na avela prekal o nakh a medik na džungfola tumenge. Vašoda, bo odčhidan pašal peste le RAJES, savo hino maškar tumende, bo rovibnaha pre leste vičinenas: "Soske avlam avri andral o Egipt?" " "

²¹ O Mojžiš pre oda phendā: "Kade manca hin 600 000 murša a tu phenes: 'Dava len mas a on les chana calo čhon!' ²² Choc te murdaraha savore amare bakren the dobitkos, abo te chudaha savore riben andro moros, the avke na ela oda prekal lende dos."

²³ O RAJ phendā le Mojžišoske: "So, miro vast hino cikno? Akana dikheha, či pes ačhela avke, sar phendom, abo na."

²⁴ O Mojžiš avla ko manuša a phendā lenge le RAJESKERE lava. Zvičinda eftavardeš dženen lengere vodcendar a rozačhađa len pašal o Sentno Stanos. ²⁵ Akor o RAJ avla andre chmara a prevakerđa ko Mojžiš. Iľa le Duchostar, so sas pro Mojžiš, a diňa le eftavardeš vodcenge. Sar avla pre lende oda Duchos, prorokinenas – no ča akor, palis imar na prorokinenas.

²⁶ Ale duj murša ačhile andro taboris, o Eldad the o Medad. The pre lende avla o Duchos, bo sas rachimen maškar lende. On na gele paš o Sentno Stanos, a vašoda prorokinenas andro taboris. ²⁷ Varesavo terno murš denašla ko Mojžiš a phendā leske: "O Eldad the o Medad prorokinen andro taboris."

²⁸ Akor o Jozua, le Nunoskero čhavo, savo čhavovestar služinelas le Mojžišoske, pes diňa anglal: "Mojžiš, rajeja miro, zaačhav len!"

²⁹ Ale o Mojžiš leske odphendā: "Tu daras pal ma? Kamľomas, hoj o RAJ te del peskero Duchos savore peskere manušen, hoj te en proroka!" ³⁰ Palis o Mojžiš geľa pale andro taboris le vodcenca andral o Izrael.

O RAJ bičhavel o prepelici

³¹ O RAJ bičhađa zoralı balvaj, so le morostar anelas le prepelicen, medik na sas všadzık andro Izraeliko taboris. Sas ađi but, hoj sas pašal o taboris pal dojekh sera pro but kilometri a sas la phuvatar nacalo metros.

³² O manuša len kidenas calo džives, calı rat a mek the aver calo džives. Ńiko na kidľa frimeder sar deš bare košara. Rozthode len a šučarde pašal calo taboris.

³³ Mek o mas sas lende andro danda a mek les aňi na rozžuvinde a imar o RAJ cholısalıľa a mukľa pre lende igen baro nasvalıben. ³⁴ Vašoda dine ole thaneske nav Kibrot-Hattaava, bo ode parunde le manušen, save igen žadinenas te chal aver chaben.

³⁵ Andral o Kibrot-Hattaava odgele o manuša andro Chacerot a ode ačhile.

O Aron the e Mirijam reptinen pro Mojžiš

12 E Mirijam le Aronoha reptinenas pro Mojžiš, bo iľa peske romňa Kušijka. ² Phende: "O RAJ vaker-

el ča prekal o Mojžiš? Či na vakerel the prekal amende?" A o RAJ šundā, so phende.

³ No o Mojžiš sas igen pokorno murš, nekpokorneder savore manušendar, save dživenas pre phuv.

⁴ O RAJ takoj pre oda phendā le Mojžišoske, le Aronoske the la Mirijamake: "Tumen trin džene, aven ko Sentno Stanos!" Avke on trin džene gele. ⁵ O RAJ avla tele andro chmarakero slupos, zaačhiľa paš o Sentno Stanoskero vudar a vičinda le Aron the la Mirijam. Sar sodujđzene gele pašeder,

⁶ phendā lenge: "Šunen mire lava: Te hin maškar tumende prorokos, me o RAJ man leske dav te sprindžarel andro viđeňje a vakerav leha andro suno.

⁷ Mire služobňikoha le Mojžišoha avke nane.

Ov hino vodcas upral savore mire manuša Izraeliti.

⁸ Leha vakerav muj-mujeha, phundradones a na garudones, ov šaj dikhel the le RAJESKERE podoba.

Sar oda, hoj tumen na daran kavke te vakerel pre miro služobňikos Mojžiš?"

⁹ O RAJ pre lende cholısalıľa a geľa lendar het.

¹⁰ Sar o chmarakero slupos le Sentno Stanostar geľa het, e Mirijam ačhiľa malomocno, parňi sar jiv. O Aron pes visardā ke Mirijam a dikhľa, hoj hiňi malomocno.

¹¹ Ov phendā le Mojžišoske: "Rajeja miro, mangav tut, ma potrestin amen vaš o binos, so na kerdām godaha.

¹² Te na el e Mirijam sar čhavoro, savo ulol mulo a jepaš leskero țelos imar rozperelas andre la dakero per."

¹³ Avke o Mojžiš chudľa te vičinel pro RAJ: "Devla, mangav tut, sastār la!"

¹⁴ O RAJ odphendā le Mojžišoske: "Te lake lakero dad čhungardahas pro muj, či na ladžandıľahas pes efa dživesa? Mi el avritradlı andral o taboris pro efa dživesa a palis šaj avel pale andro taboris." ¹⁵ Avke sas e Mirijam efa dživesa avri andral o taboris. O Izraeliti pes na mukle pre aver drom, medik e Mirijam na avla pale andro taboris.

¹⁶ Paloda pes o Izraeliti mukle pro drom andral o Chacerot a kerde peske taboris pre pušťa Paran.

O dešuduj murša predikhen o Kanaan

13 O RAJ phendā le Mojžišoske: ² "Kide avri jekhe vodcas andral dojekh kmeňos a bičhav len te predikhel e phuv Kanaan, so dav tumenge."

³ O Mojžiš kerdā avke, sar leske prikazinda o RAJ, a bičhađa pal e pušťa Paran dešuduje (12) vodcen andral o Izrael. ⁴ Sas oda kala džene:

Andral o kmeňos Ruben o Šammua, le Zachuroske čhavo;

⁵ andral o kmeňos Šimeon o Šafat, le Chorioske čhavo;

⁶ andral o kmeňos Juda o Kaleb, le Jefunnoske čhavo;

⁷ andral o kmeňos Jissachar o Jigal, le Jozefoske čhavo;

⁸ andral o kmeňos Efrajim o Hošeah, le Nunoskero čhavo;
⁹ andral o kmeňos Benjamin o Palti, le Rafuoskero čhavo;
¹⁰ andral o kmeňos Zebulun o Gaddiel, le Sodioskero čhavo;
¹¹ andral o kmeňos Jozef (so hin o kmeňos Menašše) o Gaddi, le Susioskero čhavo;
¹² andral o kmeňos Dan o Ammiel, le Gemalliskero čhavo;
¹³ andral o kmeňos Ašer o Setur, le Michaeloskero čhavo;
¹⁴ andral o kmeňos Naftali o Nachbi, le Vofsiskero čhavo;
¹⁵ the andral o kmeňos Gad o Geuel, le Machioskero čhavo.

¹⁶ Kala hine o nava le muršengere, saven o Mojžiš bičhada te predikhel e phuv. O Mojžiš diňa le Hošeoske, saveske sas dad o Nun, nav Jozua.

¹⁷ Sar len o Mojžiš bičhavelas te predikhel e phuv Kanaan, phenda: "Kadarik džan prekal e pušta Negev andre brehengeri phuv. ¹⁸ Dodžanzen tumen, savi hiňi e phuv a save manuša andre bešen. Či hine zorale vaj slabe? Hine but vaj frima? ¹⁹ Hiňi odi phuv lači vaj na? Hin lengere fori phundrade, abo hin pašal o muri? ²⁰ Anen o maľi ulipen a hin ode stromi vaj na? Keren savoro pre oda, hoj te anen varesavo ovocje andral odi phuv."

Sas oda andro časos, sar pes ešebnovar (peršovar) andro berš obkidel o hroznos.

²¹ Avke on gele a predikhle e phuv la puštatar Sin dži ko foros Rechob, paš o verchengero drom Chamat.

²² Avle andro Negev, odarik gele andro foros Hebron, kaj bešenas le Anakoskere potomki: o Achiman, Šešaj the o Talmaj. (O Hebron sas ačhado efa berš sigeder sar o foros Coan andro Egipt.) ²³ Sar doavle andre Dolina Eškol, ode odčhinde jekh strapcos hroznos, so sas ajso pharo, hoj les mušinenas te anel duj džene pro drukos. Ande the vajkeci granatoskere phaba the figi. ²⁴ Oda than pes vičinelas Dolina Eškol pal o strapcos le hroznostar, so ode o Izraeliti odčhinde.

O murša phenen, so dikhle

²⁵ Saranda (40) dživesa predikhenas odi phuv a palis avle pale. ²⁶ Avle ko Mojžiš, Aron the Izraeliti andro Kadeš pre pušta Paran. Phende lenge, so ode dikhle, a sikade o ovocje, so odarik ande. ²⁷ Phende le Mojžišoske: "Predikhlam e phuv a dodžanlam pes, hoj hiňi lači a čačes ode čulal o thud the o medos. Kada ovocje hin odarik. ²⁸ Ale o manuša ode hine zorale, o fori hin bare a pašal lende zorale muri. Dikhlam ode the le Anakoskere potomken. ²⁹ O Amaleka bešen pre brehengeri phuv a o Kanaančana bešen paš o moros the pašal o paňi Jordan."

³⁰ Ale o Kaleb kamelas, hoj te preačhen te vakerele ola manuša, save reptinenas pro Mojžiš, a phenda: "Aven, džas pre lende a zalas odi phuv! Amen len domaraha!"

³¹ Ale okla džene, save sas leha te predikhel e phuv, phenenas: "Našti pes lenca džas te marel, bo hine zoraleder sar amen." ³² On kavke maškar o Izraeliti lidžanas o nalačo hiros pal odi phuv. Phenenas: "Odi phuv, so predikhlam, chal le manušen, save andre bešen. Savore manuša, saven ode dikhlam, hine igen bare. ³³ Dikhlam ode the obren a maškar lende the le Anakoskere potomken. Amen pes šunahas maškar lende ciknore sar o maľengere grajora a avke the lenge dičhuvahas avri."

O Izraeliti pes vzburinen

14 Cali rat o Izraeliti rovenas a vriskinenas. ² Savore manuša reptinenas pro Mojžiš the pro Aron: "Ulahas amenge feder, te muľamas andro Egipt abo kade pre pušta. ³ Soske amen o RAJ lidžal andre kadi phuv? Hoj te meras la šablaha andro mariben? Hoj te zalen amare romňijen the čhavoren? Na ulahas amenge feder te džal pale andro Egipt?" ⁴ Jekh avreske phenenas: "Kidas peske avri vodcas a džas pale andro Egipt!"

⁵ Sar oda o Mojžiš the o Aron šunde, pele le mujeha dži pre phuv angle savore Izraeliti. ⁶ O Jozua, le Nunoskero čhavo, the o Kaleb, le Jefunnoskero čhavo, save sas olendar, save predikhle e phuv, pre peste dukhatar čhingerde o ruchi ⁷ a phende savore Izraelitenge: "E phuv, so samas te predikhel, hiňi igen lači. ⁸ Te avaha le RAJESKE pre dzeka, doanela amen andre odi phuv, kaj čulal o thud the o medos, a dela amenge la. ⁹ Ča pes ma vzburinen pro RAJ! Ma daran pes le manušendar, save ode bešen, bo lokes len domaraha. O RAJ hin amenca! Lengere devla len na chraňinen. Vašoda ma daran pes lendar!"

¹⁰ Ale savore Izraeliti vriskinenas, hoj len te murdaren le barenca. Androda pes savore Izraelitenge sikađa le RAJESKERI slava paš o Sentno Stanos.

O Mojžiš pes modľinel vaš o manuša

¹¹ O RAJ prevakerďa ko Mojžiš: "Dži kana man kala manuša tele dikhena? Dži kana mange na pačana, se maškar lende kerdom bare znameňja? ¹² Bičhavava pre lende baro nasvaliben a zničnava len, ale tutar kerava bareder the zoraleder narodos, sar hine on."

¹³ Ale o Mojžiš odphenda: "Dodžanena pes pal oda o Egiptana! Lendar iľal avri kale manušen tira zoraha ¹⁴ a on oda dena te džanel le manušenge, save bešen andre odi phuv. Ola manuša imar šunde, hoj tu, RAJEJA, sal maškar lende a hoj lenge diňal te dikhel tut le jakhenca. Šunde, hoj tiri chmara ačhel upral kala manuša, hoj dživese džas angle lende andre chmara a rači andro jagalo slupos. ¹⁵ Te akana zničineha savore tire manušen, o narodi, save šunde o hiros pal tu, phenena: ¹⁶ 'O RAJ našti doanda peskere manušen an-

dre odi phuv, pal savi len diña la veraha lav, vašoda len murdarđa pre pušťa.'

¹⁷ Akana, RAJEJA, mangav tut, sikav amenge tiri zor a ker, sar phendal: ¹⁸ 'Me, o RAJ, na cholisaľuvav sigo, presikavav o pačivalo kamiben a odmukav o binos the e vzbura. Ale ñikas na mukav bi o trestos; vaš le dadengere bini marav le čhaven dži andro trito the štarto pokoleñje.' ¹⁹ Mangav tut, odmuk kale manušenge prekal tiro baro pačivalo kamiben, avke sar lenge odmukehas akorestar, sar avle avri andral o Egipt, dži akana."

²⁰ O RAJ leske odphendā: "Odmukav lenge, avke sar mangehas. ²¹ No avke sar dživav a sar miri slava pherarel calī phuv, ²² aňi jekh kale manušendar na džala andre odi phuv. Bo dikhle miri slava the o zazraki, so keravas andro Egipt the pre pušťa, a the avke man dešvar pokušinenas a na šunenās. ²³ Vašoda ñiko lendar na džala andre odi phuv, pal savi phendom, hoj la dava lengere dadenge. Na dikhela la ñiko, ko man tele dikhľa. ²⁴ Ale mire služobňikos le Kaleb lidžava andre phuv, andre savi imar sas. Bo sas andre leste aver duchos a džalas pal mande cale jileha. A leskero potomstvos chudela e phuv sar d'edictvos. ²⁵ Tajsja džan prekal e pušťa ko Lolo Moros, bo andre dolina bešen o Amaleka the o Kanaančana."

O Del potrestinel le Izraeliten

²⁶ Palis o RAJ phendā le Mojžišoske the le Aronoske: ²⁷ "Dži kana cerpinava kale nalače manušen, save pre ma furt reptinen? Dos šundom le Izraelitengero reptišagos pre ma. ²⁸ Phen lenge: 'Avke sar dživav, phenel o RAJ, kerav tumenca avke, sar tumen šundom te vakerel. ²⁹ Pre kadi pušťa ačhena mule t'ela savoredženengere, kaske sas akor, sar sas pisimen andre, biš (20) berš the buter – savore tumendar, save pre ma reptinenas. ³⁰ Ñiko lendar na džala andre phuv, pal savi diňom la veraha lav, hoj andre bešena. Džana andre ča o Kaleb, le Jefunnoskero čhavo, the o Jozua, le Nunoskero čhavo. ³¹ No tumare čhaven, pal save phenenas, hoj ena zaile, me ode lidžava a on sprindžarena odi phuv, so na kamľan te prilēl. ³² Ale tumare mule t'ela ačhena pre kadi pušťa. ³³ Tumare čhave ena saranda (40) berš pastjera pre kadi pušťa. On cerpinena vaš oda, hoj mange na pačanas, medik na merela posledno dženo tumendar pre pušťa. ³⁴ Avke sar saranda dživesa predikhenas e phuv – jekh berš pes rachinela vaš jekh džives – saranda berš cerpinena vaš peskero nalačhipen, hoj te sprindžaren, so oda hin, te me džav pre tumende. ³⁵ Me, o RAJ, oda phendom a avke kerava savore kale nalače manušenca, save pes vzburiinde pre mande. Pre kadi pušťa merena.' "

³⁶ O murša, saven o Mojžiš bičhađa te predikhel e phuv, save avle pale a vakerenas o načačipen pal e phuv a oleha kerde upre le Izraeliten, hoj te reptinen pro RAJ, ³⁷ jekhvareste mule le meribnaskere nasvalibnaha anglo RAJ. ³⁸ Olendar, save sas te predikhel e phuv, ča o Jozua the o Kaleb ačhile te dživel.

O Izraeliti našti zalen o Kanaan

³⁹ Sar o Mojžiš phendā kala lava le Izraelitenge, ačhile igen smutne. ⁴⁰ Sig tosara uštile, gele pro verchos a phende: "Čačo, kerđam binos. Aven, džas andre phuv, pal savi o RAJ diña lav!"

⁴¹ Ale o Mojžiš lenge phendā: "Soske na šunen le RAJES? Tumaro planos tumenge na avela avri. ⁴² Ma džan, bo o RAJ nane tumenca a tumare ñeprijateľa tumen thovena tele. ⁴³ Sar tumen marena le Amalekenca the le Kanaančanenca, murdarena tumen la šabľaha. Visardan tumen het le RAJESTAR, vašoda na ela tumenca!"

⁴⁴ No on the avke gele pre brehengeri phuv, ale aňi e Zmluvakeri Archa, aňi o Mojžiš na omukle o taboris. ⁴⁵ Avke o Amaleka the o Kanaančana, save bešenas pre brehengeri phuv, gele pre lende, marde len a roztradle dži paš o foros Chorma.

O zakoni pal o obeti

15 O Raj prevakerđa ko Mojžiš: ² "Phen le Izraelitenge kada: 'Sar avena andre phuv, so tumenge dav a andre savi bešena, ³ anena le dobitkostar abo le bakrendar le RAJESKE o obeti. Anena e jagali obeta, e labardi obeta, e obeta pro inepi, e obeta, sar den lav le Devleske, the e obeta, so dena korkore pestar sar daros. Kala savore obeti voňinen šukares le RAJESKE. ⁴ Sar kerena kala obeti, avke oda, ko anela peskeri obeta le RAJESKE, pridela paš dojekh džviros e chabeneskeri obeta – kilos aro mišimen le litra olivove olejoha. ⁵ Ke dojekh bakroro, so dena sar e labardi obeta abo aver obeta, pridena litra mol, so čhivena avri pro oltaris.

⁶ Paš dojekh bakro, so obetinena, pridena duj kili aro mišimen 1,5 litraha olivove olejoha sar chabeneskeri obeta. ⁷ Priden the 1,5 litra mol, so čhivena avri pro oltaris. Oda voňinela šukares le RAJESKE.

⁸ Sar pririchtinena le RAJESKE terne bikos pre labardi obeta abo pre smiromoskeri obeta abo pre obeta, sar den lav le Devleske, ⁹ pridena paše sar e chabeneskeri obeta trin kili aro mišimen duje litrenca olejoha.

¹⁰ Anena the duj litri mol, so čhivena avri pro oltaris. Oda voňinela šukares le RAJESKE. ¹¹ Kavke kerena paš dojekh bikos, bakro, baranos the koza. ¹² Keren avke paš dojekh džviros, so anena pre obeta, kaj te anena buter.

¹³ Kavke mušinela te kerel dojekh Izraelitas, sar anela e obeta, so šukares voňinel le RAJESKE. ¹⁴ Te ela maškar tumende varesave cudzinci, abo o cudzinci, save dživen maškar tumende but berš, a the on kame na te anel e obeta, so šukares voňinel le RAJESKE, mi keren avke sar the tumen. ¹⁵ Kala zakoni ela prekal tumende the prekal o cudzinci, save bešen maškar tumende. O RAJ tumen lel jednakones. Kada zakonos doľikerena furt pro furt tumen the tumare potomki.

¹⁶ Kala zakoni the pravidla ena prekal tumende the prekal o cudzincos, savo bešel maškar tumende.' "

¹⁷ O RAJ prevakerđa ko Mojžiš: ¹⁸ "Phen le Izraelitenge kada: 'Sar avena andre phuv, andre savi tumen lidžav, ¹⁹ a sar chana o chaben andral odi phuv, odthoven olestar vareso sar daros le RAJESKE. ²⁰ Sako berš kere na e bokeli le ešebne (perše) arestar andral o humnos a anen oda sar o sentno daros le RAJESKE. ²¹ Avke tu the tire potomki mušinen a furt te anel maro peko le ešebne arestar, sar kiden a upre e pšeñica.

O obeti vaš o binos

²² Te kamlan te dolikerel, ale the avke na dolikerđan o zakoni, so o RAJ diña le Mojžišoske ²³ – savore le Devleskere prikazendar, so sas dine ole dživesestar, kanastar o Del chudla te del o zakoni tumen the savore tumare potomken pro furt – ²⁴ a o Izraeliti kerde o binos avke, hoj na kamle, a na džanenas olestar, akor savore mušinen te anel terne bikos pre labardi obeta, so šukares voñinel le RAJESKE. Obetinen the e chabeneskeri the moľakeri obeta, avke sar hin pisimen andro zakonos, a paš oda mek jekhe capos pre obeta vaš o binos. ²⁵ Te o rašaj anela kala obeti vaš savore Izraeliti, ela lenge odmuklo o binos, bo oda na kamle te kerel, a vaš peskero nalačhipen anenas le RAJESKE e labardi obeta the e obeta vaš o binos. ²⁶ Odmukela pes savore Izraelitenge the le cudzincenge, save bešen paš lende, bo savore manuša oda kerde, choc na kamle.

²⁷ Ale te ča jekh dženo kerela o binos, so na kamla, mušinel te anel pre obeta vaš o binos jekha jekhberšeskera koza. ²⁸ O rašaj obetinel a koza pro oltaris, hoj te obžuzarel le manušes le binostar, so na kamla te kerel, a palis ole dženeske ela odmuklo. ²⁹ Ajso zakonos mušinel te dolikerel o Izraelitas the o cudzincos, savo bešel paš tumende, sar kerela o binos, so na kamla.

³⁰ Te vareko kerela binos, so kamla te kerel, ča oda ela Izraelitas abo cudzincos, ruhinel pes pro RAJ. Ajse dženes kempel te tradel avri peskere manušendar, ³¹ bo na ačhelas le RAJESKERE lavestar a na dolikerđa leskero prikazañje. Kajse manušes mušinen te tradel avri. Leskeri vina ačhela pre leste."

O murš, savo na dolikerđa o Šabbat

³² Sar sas o Izraeliti pre pušta, prichudle varesave muršes, savo pro Šabbat kidelas o kašta. ³³ Ola džene, save les prichudle paš oda, sar kidel o kašta, ande les ko Mojžiš the ko Aron the angle savore Izraeliti. ³⁴ Dine les te stražinel, bo na džanenas, so leha te kerel. ³⁵ O RAJ phendā le Mojžišoske: "Oda murš mušinel te merel. Savore manuša andre leste čhivkerena le barenca avri andral o taboris." ³⁶ Avke les o manuša ligende avri andral o taboris, chudle andre leste te čhivkerel le barenca a muľa avke, sar o RAJ prikazinda le Mojžišoske.

O špargici pro ruchi

³⁷ Palis o RAJ phendā le Mojžišoske: ³⁸ "Phen le Izraelitenge: 'Siven pre tumare ruchi pro agora o špar-

gici a upral lende thoven o belave šnurici. ³⁹ O špargici tumenge ena pre kada: Kecivar pre lende dikhena, leperena tumenge savore le RAJESKERE zakoni, na visarena pes mandar a na džana pal tumare jileskere the jakhengere žadosci. ⁴⁰ Avke peske leperena a dolikere na savore mire prikazañje a avena sentne angle mande, angle tumaro Del." ⁴¹ Me som o RAJ, tumaro Del, savo tumen ligendā avri andral o Egipt. Me som o RAJ, tumaro Del."

Le Korachoskeri vzbura

16 O Korach, o čhavo le Jisharoskero andral e Levitengeri fajta, pes vzbura pro Mojžiš. Ke leste pes pridine trin džene andral o Rubenoskero kmeños: o Datan the o Abiram, le Eliaboskere čhave, the o On, le Paletoskero čhavo. ² On pes vzbura pro Mojžiš a lenca 250 Izraeliti, save sas o anglune vodci le manušengere. ³ Gele anglo Mojžiš the Aron a phende lenge: "Zageľan imar igen dur! Se savore amare manuša hine sentne a the amenca hino o RAJ. Soske pes hazden upral le RAJESKERE manuša?"

⁴ Sar ada šundā o Mojžiš, peľa le mujeha pre phuv. ⁵ Palis phendā le Korachoske the leskera partijake: "Tosara tumenge o RAJ phenela, ko hin leskero, ko hino sentno a ko šaj ke leste avel pašes. Kas peske kidela avri, oda šaj ke leste džal pašes. ⁶ Tu, Korach, the tiri partija kerena kada: Len peske o lopatki pro kadidlos, ⁷ tajsa andre thovena o jagale angara the o kadidlos a anena anglo RAJ. Kas peske o RAJ kidela avri, oda ela sentno. Levitale, tumen zageľan imar igen dur!"

⁸ Mek le Korachoske o Mojžiš phendā: "Šunen, Levitale! ⁹ Hin tumenge frima, hoj o Del le Izraeloskero tumen oddelinda le manušendar a vičinda ke peste, hoj te služinen andre le RAJESKERO Sentno Stanos a te ačhen anglo manuša, hoj lenge te služinen? ¹⁰ Se do mukla tuke the savore avre Levitenge, hoj te aven pašeder ke leste, ale tumen akana kamen te prele the e rašajiko služba? ¹¹ Aleha sikadal tu the cali tiri partija, hoj pes vzbura pro RAJ. Ko hin o Aron, hoj reptinen pre leste?"

¹² Akor o Mojžiš diña te vičinel le Datan the le Abiram, le Eliaboskere čhaven. Ale on odphende: "Na džas! ¹³ Hin ada frima, hoj amen ilal avri andral e phuv, kaj čulal o thud the o medos, hoj te meras pre kadi pušta? So, mek kames te ačhel upral amende sar raj? ¹⁴ Se na andal amen andre phuv, kaj čulal o thud the o medos, a aňi amenge na diňal andro d'edictvos o mali the o viñici. Kames amenca te thovel avri? Na! Na džas!"

¹⁵ Akor o Mojžiš igen cholisalila a phendā le RAJESKE: "Ma prile lendar o obeti. Aňi jekhe somaris lendar na ilom. Niskaske nič nalačho na kerđom!"

¹⁶ Palis o Mojžiš phendā le Korachoske: "Tu tira partija the o Aron mušinen te avel tajsa andre le RAJESKERO Sentno Stanos. ¹⁷ Dojekh tumendar mi lel peskeri kadidloskeri lopatka, mi thovel andre o kadidlos a mi anel anglo RAJ. Savore kadidli ena jekhetane

250. The tu le Aronoha lena peskere kadidloskere lopatki."

¹⁸ Avke pre aver džives peske sako iľa peskeri kadidloskeri lopatka, thođa andre o jagale angara a thođa upre o kadidlos. Palis pes savore ačhade paš o vudar ko Sentno Stanos jekhetane le Mojžišoha the le Aronoha. ¹⁹ O Korach zvičinda caľa peskera partija pro Mojžiš the Aron a gele paš o vudar ko Sentno Stanos. Androda pes sikađa le RAJESKERI slava savore manušenge.

²⁰ O RAJ phenda le Mojžišoske the le Aronoske: ²¹ "Džan pre sera kale manušendar, hoj len takoj te zničinov!"

²² Akor sodujđzene pele le mujeha pre phuv a vičinenas: "Ó, Devla! Tu sal o Del, savo des o dživipnaskero dichos dojekhe manušes! Vaš jekh manuš, savo kerđa binos, kames te el choľam pre savore manuša?"

²³ O RAJ phenda le Mojžišoske: ²⁴ "Phen le manušenge, hoj te džan pre sera le Korachoskere, le Datanoskere the le Abiramoskere stanendar!"

²⁵ Avke o Mojžiš geľa ko Datan the Abiram a o Izraeloskere vodci džanas pal leste. ²⁶ Le manušenge phenda: "Džan pre sera kale bijedevleskere muršen-gere stanendar! Ma chuden pes nisostar, so hin lengero, hoj te na meren vaš savore lengere bini."

²⁷ Avke o Izraeliti odgele pašal o Korachoskere, Datanoskere the le Abiramoskere stani. Palis o Datan the o Abiram gele avri andral lengere stani a ačhenas paš o vudar peskere romnenca the čhavenca.

²⁸ O Mojžiš phenda: "Nič na kerav mira voľatar; savore kale skutki man bičhađa te kerel o RAJ. Prindžarena oda pal kada: ²⁹ Te kala manuša merena avke, sar merel dojekh manuš, abo te pes lenge ačhela oda, so pes šaj ačhel avre manušenge, akor man o RAJ na bičhađa. ³⁰ Ale te o RAJ kerela vareso ajso, so mek pes šoha (ňikda) na ačhiľa angloda, hoj e phuv phundrav-ela peskero muj a chala len savoreha, so len hin, a te perena tele andro than le mulengero džide, akor prindžarena, hoj kala murša tele dikhle le RAJES."

³¹ Soča o Mojžiš kada dophenda, phundrađa pes e phuv tel o Datan the Abiram ³² a otkerđa peskero muj a zľiginda len savoreha, so len sas, jekhetane ole manušenca, save pes vzburinde le Korachoha. ³³ Džide pele tele andro than le mulengero savoreha, so len sas. E phuv pes upral lende zaphandľa, on našľile a imar na sas maškar o manuša. ³⁴ Sar savore Izraeliti, save sas pašal lende, šunde lengero vriskišagos, denašenas a phenenas: "Denašas, hoj the amen e phuv te na zľiginel!"

³⁵ Akor le RAJESTAR avľa jag a zlabarđa ole 250 muršen, save ande o kadidlos.

Le Aronoskeri paca rozkvitňinel

17 Palis o RAJ phenda le Mojžišoske: ² "Phen le Eleazaroske, le Aronoskere čhaske, hoj te lel o kadidloskere lopatki ole muršendar, save sas zlabarde. O prachos lendar mi rozčhivel avrether, bo o lopatki hine sentne. ³ Mi rovňinen avri o bľachi le kadidloskere lopatkendar ole manušengere, save počinde peskere dživipnaha vaš o binos. Palis ole bľachenca mi

obthoven o oltaris. Ande o lopatki anglo RAJ, vašoda hine sentne. Kada ela le Izraelitenge o znameňje, hoj te na bisteren."

⁴ Avke o rašaj Eleazar iľa o bronzune lopatki, save ande ola džene, save zlabile, a mardľa lendar avri bľachi, hoj te obthovel lenca o oltaris. ⁵ Kada ela le Izraelitenge pro leperiben, hoj ňiko, ko nane le Aronoskere potomkendar, našti džal ko oltaris te labarel o kadidlos anglo RAJ, hoj pes leske te na ačhel avke, sar le Korachoske the leskere manušenge. Savoro kerđa avke, sar leske phenda o RAJ prekal o Mojžiš.

O Izraeliti džan pro Mojžiš the Aron

⁶ Pre aver džives reptinenas savore Izraeliti pro Mojžiš the pro Aron: "Tumen murdarďan le RAJESKERE manušen."

⁷ Sar o manuša džanas pro Mojžiš the pro Aron a visarde pes ko RAJESKERO Sentno Stanos, jekhvareste o Stanos zaučharďa e chmara a sikađa pes le RAJESKERI slava. ⁸ Akor o Mojžiš the o Aron avle anglo Sentno Stanos. ⁹ Ode o RAJ phenda le Mojžišoske: ¹⁰ "Džan het kale manušendar! Takoj len zničinov." Akor sodujđzene pele le mujeha pre phuv.

¹¹ O Mojžiš phenda le Aronoske: "Le e kadidloskeri lopatka, thov andre o jagale angara pal o oltaris a thov upre o kadidlos. Denaš sigo ko manuša a obetin oda le RAJESKE, hoj lenge te en odmukle o bini. Bo o RAJ igen choľisalila pre lende a e pľaga imar avel." ¹² Avke o Aron iľa e kadidloskeri lopatka, sar leske phenda o Mojžiš, a denašelas maškar o manuša, ale e pľaga imar ode sas. Labarďa o kadidlos, hoj le manušenge te en odmukle o bini ¹³ a ačhađa pes maškar o mule the džide manuša a e pľaga preačhiľa. ¹⁴ Andre odi pohroma mule 14 700 manuša bijal ola 250 džene, save mule paš e vzbura le Korachoskeri. ¹⁵ Sar e pľaga preačhiľa o Aron geľa pale ko Mojžiš paš o vudar andro Sentno Stanos. ¹⁶ O RAJ phenda le Mojžišoske: ¹⁷ "Phen le Izraelitenge, hoj tuke te den o dešuduj (12) paci, jekh andral dojekh kmeňoskero vodcas. Pisin dojekheskero vodcaskero nav pre leskeri paca. ¹⁸ Le Aronoskero nav pisin pre paca andral o kmeňos Levi, bo ela jekh paca prekal dojekh kmeňoskero vodcas. ¹⁹ Palis len thov andro Sentno Stanos angle Zmluvakeri Archa, kaj man tumenca zdžav. ²⁰ E paca le muršeskeri, saves mange kidava avri, pučinelavri. Avke me za-ačhavava o reptišagos le Izraelitengero, save pre tumende furt reptinen."

²¹ Avke o Mojžiš oda phenda le Izraelitenge a lengere vodci leske dine jekhetane dešuduj paci, jekh paca andral dojekh kmeňos, a le Aronoskeri paca sas maškar lengere. ²² Palis o Mojžiš iľa o paci a thođa andro Sentno Stanos anglo RAJ.

²³ Sar o Mojžiš geľa pre aver džives andro Sentno Stanos, dikhľa, hoj pučinda avri le Aronoskeri paca, so sas thoďi vaš o kmeňos Levi. Pučinda avri, rozkvitňisalila a anda o mandle. ²⁴ Avke o Mojžiš li-

genda odarik o paci ke savore Izraeliti. Dikhle pre oda a dojekh vodcas iľa pale peskeri paca.

²⁵ Palis o RAJ phenda le Mojžišoske: "Le Aronoskeri paca, lidža pale angle Zmluvakeri Archa, hoj pes te zalikerel sar znađeje angle ola džene, save pes vzburi-nen. Aleha zaačhaveha lengero reptišagos pre ma a on na merena." ²⁶ O Mojžiš kerđa avke, sar leske prikaz-inda o RAJ.

²⁷ Ale o Izraeliti phende le Mojžišoske: "Vigos amenge! Meras! Savore meraha! ²⁸ Dojekh, ko džal pašes paš le RAJESKERO Sentno Stanos, merela. So, mušinas savore te merel?"

Le Levitengeri the rašajengeri služba

18 O RAJ phenda le Aronoske: "Te pes vareso ačhela andro Sentno Stanos, tu, tire čhave the o Leviti lidžana e vina vaš oda, ale te pes vareso ačhela paš e rašajiko služba, ela oda ča pre tu the pre tire čhave. ² An peha tira famelija andral o kmeños Levi, hoj pes te priden ke tu a te pomožinen tuke, medik tu the tire čhave služinena anglo Sentno Stanos. ³ On avena paš tute andre savori služba paš o Sentno Stanos. Ale našti aven paš o sentne veci, so hin andro Sentno Stanos, aňi paš o oltaris, hoj te na meren on, aňi tumen. ⁴ Pridena pes ke tu a starinena pes pal savori buči, so hin paš o Sentno Stanos. Ale űiko aver našti kerel tumenca e služba.

⁵ A tumen kerena e služba paš o Sentno Than the paš o oltaris, hoj te na avel pale pro Izraeliti miri cholı. ⁶ Me mange kidňom avri le Izraelitendar le Leviten, tumare phralen, sar daros prekal tumende. On hine oddine mange, hoj te keren e služba paš o Sentno Stanos. ⁷ Ale tu tire čhavenca služinena sar rašaja andre savoreste: paš o oltaris the andro Neksentneder Than. Ode mušinen te kerel tumari služba. E rašajiko služba tumenge dav sar daros. Te ode avela vareko aver, mušinel te merel."

Le rašajengero kotor le obetendar

⁸ Palis o RAJ phenda le Aronoske: "Ačhavav tut upral mire sentne dari. Savore sentne dari, so mange o Izraeliti anen, dav pro furt tuke the tire čhvenge sar tumaro kotor. ⁹ Le neksentneder darendar – le chabeneskera obetatar, la obetatar vaš o binos the la obetatar vaš e vina – o kotor, so pes na zlabarela pro oltaris, ela tumaro. Savore neksentneder dari, so mange anena, ela tuke the tire čhvenge. ¹⁰ Mušines len te chal pro sentno than; šaj chan oda ča o murša. Mi el tuke oda sentno!

¹¹ Savore sentne dari, so den o Izraeliti a so o rašaja hazden upre anglo RAJ, dava tuke, tire čhvenge the čhajenge pro furt. Olestar šaj chal sako, ko hino žužo andre tiri famelija.

¹² Dav tuke the o kotor le ešebne (perše) ulipnastar, so mange dena o Izraeliti sako berš: savoro nekfeder le olejostar, moľatar the le zrnostar. ¹³ Tire ena ešebne ovocje savorestar andral lengeri phuv, so anena

mange. Dojekh, ko hino žužo andre tiri famelija, šaj chal olestar.

¹⁴ Ela tiro savoro, so hin andro Izrael sentňardo le RAJESKE. ¹⁵ Dojekh muršoro abo džviros, so ulol ešebno, so anen angle ma o Izraeliti, ela tiro. Vašoda mušines te cinel avri dojekhe muršores the dojekhe džviros le nažuže dobitkostar, so ulol ešebno. ¹⁶ Sar le čhavoreske ela jekh čhon, mušinel te el avricindo vaš o pandž rupune love, avke sar pes važinel andro Sentno Stanos.

¹⁷ Ale ma cin avri le ešebne džviros le dobitkostar, le bakrendar the le kozendar, oda hin sentno. Lengere rateha pokropin o oltaris a o žiros labar sar jagalı obe-ta, so šukares voňinel mange. ¹⁸ O mas le džvirendar ela tiro avke sar the o pašvaro the e čači (pravo) čang la hazdľa obetatar. ¹⁹ Dav tuke, tire čhvenge the čhajenge pro furt savore sentne dari, so o Izraeliti anena mange. Kada hin zmluva, so pes na del te prephagel † a hiňi pro furt maškar mande the tute the maškar tire potomki."

²⁰ Mek o RAJ phenda le Aronoske: "Na chudeha űisavi phuv sar dedıctvos andro Izrael. Me som tiro dedıctvos the tiro kotor maškar o Izraeliti.

Pal o đesiatki

²¹ Le Levitenge dav andro dedıctvos savore đesiatki le Izraelitengere vaš lengeri služba, so keren andro Sentno Stanos. ²² Akanastar o Izraeliti te na aven ko Sentno Stanos, bo aleha kerena binos a mušinena te merel. ²³ E služba paš o Sentno Stanos kerena ča o Leviti a on lidžana e vina, te kerena varesavo nalačhipen. Kada hin pro furt o prikazis pal o Leviti the lengere potomki. Len na ela űisavi phuv sar dedıctvos andro Izrael. ²⁴ Bo dav lenge sar dedıctvos o đesiatki le Izraelitendar, so anena mange sar sentne dari. Vašoda lenge phendom, hoj maškar o Izraeliti len na ela űisavi phuv sar dedıctvos."

²⁵ O RAJ mek phenda le Mojžišoske: ²⁶ "Phen le Levitenge kada: 'Sar le Izraelitendar prilena o đesiatki, so tumenge dav sar dedıctvos, the tumen mange dena olestar o đesiatki sar daros. ²⁷ Kala tumare đesiatki pes tumenge rachinela, sar te diňanas o zrnos andral o humnos a e šťava andral o lisos. ²⁸ Avke savore đesiatkendar, so prilena le Izraelitendar, the tumen anena mange o đesiatki. Kala đesiatki mušinen te del le rašaske Aronoske. ²⁹ Le darendar, so tumenge dena, mušinen te kidel avri oda nekfeder prekal ma sar o sentne dari.'

³⁰ Mek phen le Levitenge: 'Sar olestar dena o nekfeder kotor, rachinela pes tumenge, sar te oda ulahas o ulıpen andral tumaro humnos the e šťava andral tumaro lisos. ³¹ Šaj chan oda la famelijaha, kaj kamen, bo oda hin tumaro počiňiben vaš tumari služba paš o Sentno Stanos. ³² Te anena mange o nekfeder kotor, na melarena tumen le binoha aňi na melarena o sentne dari le Izraelitengere a na merena.'"

† E Hebrejiko čhib: e zmluva phandlı le loneha

O pañi pro obžušaripen

19 Palis o RAJ phendā le Mojžišoske the le Aronoske: ² "Kada hin o zakonos, so prikazindā o RAJ: Phen le Izraelitenge, hoj tuke te anen loľa gurumňa, savi hiñi bijal e chiba a sava mek šoha na sas pre meň o jarmo. ³ Palis ola gurumňa dena le rašaske Eleazaroske, ligenela pes la avri pal o taboris a angle leste la murdarena. ⁴ Palis o Eleazar peske močinela o angušť andre lakero rat a kropinela eftavar visardo ko Sentno Stanos. ⁵ La gurumňa palis angle leste zlabarena. Zlabarena lakeri cipa, o mas, o rat the savoro andral lakero per. ⁶ Palis lela o cedroskero kašť, o izopos the e lofi vlna a čhivela oda pre gurumñi, sar labol. ⁷ O rašaj šaj džal andro taboris ča akor, sar peske rajbinela o gada a calo pes thovela (omorela). No the avke džiči rači ela nažužo. ⁸ The oda dženo, ko la gurumňa zlabarda, peske mušinel te rajbinel o gada a te thovel pes andro pañi, ale the avke džiči rači ela nažužo.

⁹ Palis varesavo murš, so hino žušo, skidela o prachos la gurumňakero, so zlabila pre jag, a thovela les pal o taboris pro žušo than. Ode ela odthodo prekal o Izraeliti, hoj lestar te keren o pañi pro obžušaripen, bo e gurumñi hiñi obeta vaš o binos. ¹⁰ The oda, ko skidňa o prachos, mušinel peske te rajbinel o gada a calo pes te thovel andro pañi, ale džiči rači ela nažužo. Kada ela zakonos pro furt prekal o Izraeliti the cudzinci, save dživen maškar tumende.

¹¹ Ko pes chudela le mule manušestar, ela nažužo efta dživesa. ¹² Oda dženo pes mušinel ole pañeha te obžušarel le binostar pro trito the eftato džives a palis ela žušo. Ale te pes pro trito the eftato džives na obžušarela, na ela žušo. ¹³ Sako, ko pes chudel le mule manušestar a na obžušardahas pes le binostar, melarela le RAJESKERO Sentno Stanos. Ela avritradlo le Izraelitendar, bo na sas pokropimen le pañeha pro obžušaripen. Ela nažužo a o nažužipen ačhela pre leste.

¹⁴ Kada hin o zakonos, te vareko merela andre varesavo stanos: Dojekh dženo, ko hino andro stanos a ko džala andre, ela nažužo efta dživesa. ¹⁵ The dojekh nadoba andro stanos, so na sas zaučhardi, ela nažuži.

¹⁶ Te pes vareko pre maľa chudela le manušestar, so sas murdardo la šablaha, vaj varekastar, ko muľa varesar avres, abo te pes chudela le mule manušeskere kokalendar, vaj le hrobostar, ela efta dživesa nažužo.

¹⁷ Prekal oda nažužo dženo lena andre nadoba sikra le prachostar la zlabarda gurumňatar, so hino pro obžušaripen le binostar, a čhivena upre o švižo pañi.

¹⁸ Palis vareko, ko hino žušo, lela o izopos, močinela les andre oda pañi a pokropinela o stanos, savore nadobi andre the savore manušen, save sas ode, sar muľa. Mušinel te pokropinel the dojekhes, ko pes chudľa varekastar, ko sas murdardo la šablaha, vaj varekastar, ko muľa varesar avres, abo pes chudľa le hrobostar abo le muleskere kokalendar. ¹⁹ Pro trito the eftato džives oda žušo dženo pokropinela le nažuže dženes a pro eftato džives les obžušarela le binostar. Palis peske

oda dženo rajbinela o gada, thovela pes andro pañi a rači imar ela žušo. ²⁰ Te pes vareko melarela, ale pes na obžušarela, mi el avritradlo le Izraelitendar, bo melarda le RAJESKERO Sentno Stanos. Ela nažužo, bo na sas pokropimen le pañeha pro obžušaripen. ²¹ Kada ela zakonos pro furt.

The oda, ko kropinela ole pañeha, rajbinela peske o gada, bo ko pes chudela ole pañestar pro obžušaripen, ela nažužo džiči rači. ²² Savoro, sostar pes chudela o nažužo dženo, ela nažužo. Te pes lestar chudela aver dženo, ela the ov nažužo džiči rači."

O pañi andral e skala paš e Meriba

20 Ešebno (peršo) čhon avle savore Izraeliti pre pušťa Sin a kerde peske taboris andro Kadeš. E Mirijam ode muľa a sas parundi.

² Le manušen ode na sas pañi te pijel, vašoda pes zgele pro Mojžiš the pro Aron. ³ Chudle pes te vesekedinel le Mojžišoha a dovakerenas leske: "Feder ulahas, te muľamas the amen avke, sar mule amare phrala anglo RAJ. ⁴ Soske ilan le RAJESKERE manušen pre kadi pušťa? Mušinas jekhetane le dobitkoha te merel? ⁵ Soske amen ilan avri andral o Egipt a andan pre kada than? Kade pes na del te sadzinel aňi o zrnos aňi o figi aňi e viñica aňi o granatoskere phaba! Mek aňi o pañi ade nane te pijel!"

⁶ O Mojžiš the o Aron gele het le manušendar paš o vudar andro Sentno Stanos a bandile le mujenca džiči tele. Ode lenge pes sikađa le RAJESKERI slava. ⁷ O RAJ phendā le Mojžišoske: ⁸ "Le e paca a tire phraleha le Aronoha zvičin savore manušen. Prevakeren ke skala angle lende a avela andral late avri o pañi. Avke lenge aneha avri pañi andral e skala, hoj te pijen o manuša the o dobitkos."

⁹ O Mojžiš ila e paca, so sas andro Sentno Stanos, avke sar leske prikazindā o RAJ. ¹⁰ Akor o Mojžiš le Aronoha zvičinde le manušen angle skala a phende lenge: "Šunen, tumen vzburencale! Mušinas tumen te del andral kadi skala pañi?" ¹¹ O Mojžiš hazdňa e paca andro vast a duvar demađa pre skala. Avľa avri andral late igen but pañi a savore manuša the dobitkos pile olestar.

¹² O RAJ phendā le Mojžišoske the le Aronoske: "Vašoda, hoj tumen na sas dos pačaben, hoj te den man pačiv sar Sentnes angle savore Izraeliti, na doľidžana le Izraeliten andre phuv, so lenge dav."

¹³ Kada pes ačhila paš o pañi Meriba, kaj o Izraeliti reptinenas pro RAJ a kaj lenge sikađa peskero sentipen.

O Izrael našti predžal o Edom

¹⁴ O Mojžiš bičhađa andral o Kadeš muršen ko Edomiko kralis. Phende leske:

"Kada tuke phenel tiro phral Izrael: Tumen džanen pal savore pharipena, so pes amenge ačhile. ¹⁵ Amare dada gele andro Egipt a bešenas ode but berša. O Egiptana amen the amare daden igen trapinenas,

¹⁶ vašoda amen vičinahas ko RAJ, hoj amenge te po-
možinel. Šunda avri amaro roviben a bičhađa amenge
aňjelos, savo amen iľa avri andral o Egipt.

Akana sam paš o Kadeš, so hin o foros pre hrañica
paš tiri phuv. ¹⁷ Mangas tut, domuk amenge te predžal
prekal tiri phuv. Na džaha pre tumare maľi aňi pro viňi-
ci a na pijaha o paňi andral tumare chaňiga. Džaha le
kraliskere dromeha a na visaraha pes ole dromestar
aňi pre jekh sera, aňi pre aver, medik na predžaha tiri
phuv."

¹⁸ Ale o Edomiko kralis odphenda:

"Naští predžas prekal miri phuv! Te predžaha, džava
pre tu pro mariben."

¹⁹ O Izraeliti leske odphende:

"Ačhaha pre amaro drom a te amen abo amaro do-
bitkos pijaha tire paňestar, počinaha tuke vaš oda. Na
kamas nič aver, ča te predžal prekal tiri phuv."

²⁰ Ale o Edomiko kralis pale odphenda:

"Naští predžas!"

Paľis geľa pro Izraeliti pro mariben bara armadaha.

²¹ Sar o Edomiko kralis na domukľa le Izraelitenge, hoj
te predžan prekal leskeri phuv, mukle pes avre drome-
ha.

Le Aronoskero meriben

²² O Izraeliko narodos odgeľa andral o Kadeš a avle
ko verchos Hor. ²³ Pre oda verchos paš e hrañica
Edom, o RAJ phenda le Mojžišoske the le Aronoske:
²⁴ "O Aron kade merela; na džala andre odi phuv, so
diňom le Izraelitenge, bo sodujđzene tumen vzburi-
ndan pre mande paš o paňi Meriba. ²⁵ Akana ľidža le
Aron the leskere čhas Eleazar pro verchos Hor. ²⁶ Ode
čhiv tele pal o Aron o ruchos a uri les pre leskero čha-
vo Eleazar, bo ode o Aron merela."

²⁷ O Mojžiš kerđa avke, sar leske prikazinda o RAJ a
džanas upre pro verchos Hor angle savore Izraeliti.

²⁸ Akor iľa o Mojžiš pal o Aron o ruchos a urđa les pre
leskero čhavo Eleazar. Ode, pro agor le verchoske Hor,
o Aron muľa. Paľis o Mojžiš the o Eleazar avenas tele
pal o verchos. ²⁹ Sar pes o Izraeliko narodos došunda,
hoj o Aron muľa, chudle savore pal leste te rovel a
rovenas tranda (30) dživesa.

O Arad hin zničimen

21 Sar pes o Kanaaňiko kralis andral o Arad, savo
bešelaso andro Negev, došunda, hoj o Izraeliti
aven le dromeha andro Atarim, geľa anglal lende,
marelas pes lenca a varesaven the zaiľa. ² Akor o
Izraeliti dine lav le RAJES: "Te amenge deha andro vas-
ta kale nipen, paľis calkom zničinaha lengere fori." ³ O
RAJ len šunda a diňa lenge andro vasta le Kanaančan-
nen. Avke o Izraeliti calkom zničinde len the lengere
fori a dine ole thaneske nav Chorma.

O bronzuno sap

⁴ Le verchostar Hor džanas le dromeha ko Lolo Mo-
ros pro juhos, hoj te obdžan e phuv le Edomčanengeri.

Ale o manuša pal o drom našade o avrilikeriben ⁵ a
reptinenas pro Del the pro Mojžiš: "Soske amen iľan
avri andral o Egipt? Hoj te meras pre pušta? Se nane
ade aňi maro, aňi paňi! A imar amenge nane mištes
kale džungale chabenestar!"

⁶ Akor o RAJ bičhađa pro manuša jedovate sapen. On
len danderenas a but le Izraelitendar mule. ⁷ O
manuša avenas ko Mojžiš a phenenas leske: "Kerđam
binos, sar reptinahas pro RAJ the pre tu. Mang tut vaš
amenge ko RAJ, hoj amendar te odlele kale sapen!"
Avke pes o Mojžiš chudľa te mangel vaš o manuša.

⁸ O RAJ phenda le Mojžišoske: "Ker bronzune sapes
a prichude les upre pro kaštuno drukos. Te vareko le
manušendar, ko sas danderdo le sapendar, dikhela
pre leste, ačhela te dživel." ⁹ Avke o Mojžiš kerđa
bronzune sapes a prichudľa les upre pro drukos. Te
oda, ko sas danderdo le sapendar, dikhelas pre oda
sap, ačhelas te dživel.

Le Izraelitengero drom andro Moab

¹⁰ O Izraeliti džanas dureder a kerde peske taboris
pašal o Obot. ¹¹ Paľis odgele andral o Obot a kerde
peske taboris paš o Ije-Abarim pre pušta, so hiňi pro
vichodos le Moabostar. ¹² Odarik odgele a kerde peske
taboris andre dolina Zered. ¹³ Paľis džanas dureder a
kerde peske taboris pro severos le paňestar Arnon pre
pušta, so hin pre hrañica le Amorejenca. O Arnon hin e
hrañica maškar o Moabčana the o Amoreja. ¹⁴ Vašoda
pes andre le RAJESKERE Maribnaskere Zvitki pisinel:
"O Vaheb pre phuv Sufa, o dolini paš o Arnon,
¹⁵ o dolinakero brehos, so ľidžal ko gavoro Ar
a oprinel pes paš e hrañica le Moaboha."
¹⁶ Odarik džanas paš e chaňig Beer, kaj o RAJ phenda
le Mojžišoske: "Zvičin jekhetane le manušen a me len
dava paňi."

¹⁷ Akor o Izraeliti giľavenas kadi giľi:

"Tu chaňigije, de paňi!

Giľaven pal late giľi,

¹⁸ pal e chaňig, so kopalinde avri o vodci!

Kopalinde la avri o kraľa

le žezloha the peskere pacenca."

Pal e pušta gele andro Mattana. ¹⁹ Andral e Mattana
gele andro Nahaliel, andral o Nahaliel andro Bamot.

²⁰ Andral o Bamot gele andre dolina andro Moab, paš
o verchos Pisga, khatar dičhol e pušta Ješimon.

Domaren o Sichon

²¹ Paľis o Izraeliti bičhade muršen ko Amorejiko kralis
Sichon, hoj leske te phenen:

²² "Domuk amenge te predžal prekal tiri phuv. Na
džaha pre tire maľi, aňi andro viňici, aňi na pijaha o
paňi andral tire chaňiga. Džaha le kraliskere dromeha,
medik na predžaha tiri phuv."

²³ Ale o Sichon na domukľa le Izraelitenge te predžal
prekal leskeri phuv, ale zvičinda peskera armada a
geľa pre lende pro mariben. Doavľa paš o foros Jahac a
marelas pes lenca. ²⁴ Ale o Izraeliti gele pre lende le

šablenca a zaile lengeri phuv le pañestar Arnon dži paš o pañi Jabbok, ale ča dži paš o Ammončana, bo on zoraless stražinenas peskeri hrañica. ²⁵ Avke o Izraeliti zaile savore ola fori a bešenas andre savore Amorejengere fori, andro Češbon the gavora. ²⁶ Andro Češbon bešelaso o kralis Sichon. Ov pes angloda marelas le Moabike kraliha a zaifa cali leskeri phuv dži paš o pañi Arnon. ²⁷ Vašoda o basñika phenen: "Aven andro Češbon!
Mi el ačhado zoraless o foros le Sichonoskero.

²⁸ Leskeri armada geľa odarik avri sar e jag; čhida tele o Ar andro Moab a zlabarda o brehi pašal o Arnon.
²⁹ Vigos tuke, Moab!
Tumen, so bararen le Kemoš, san zñičimen. Tire čhave denašen het a tire čhaja hine zaile, o Sichon le Amorejengero kralis len zaifa.

³⁰ Ale amen len zñičindam le Češbonostar dži paš o Dibon. Murdarđam len avri dži paš o Nofach; sa zñičindam dži paš e Medeba."

Domaren o Og

³¹ Sar imar o Izraeliti bešenaso andre phuv le Amorejengeri, ³² o Mojžiš bičhađa le muršen, hoj te predikhen o foros Jazer. Palis o Izraeliti zaile leskere gava a tradle avri odarik le Amorejen, save ode bešenaso. ³³ On odarik pes visarde a džanas upre le dromeha ko Bašan. Ale o kralis Og caľa peskera armadaha geľa pro Izraeliti pro mariben paš o Edrej.

³⁴ Ale o RAJ phenda le Mojžišoske: "Ma dara tut lestar, bo dav tuke andro vasta les, leskere manušen the leskeri phuv. Ker leha avke, sar kerđal le Amorejike kraliha, le Sichonoha, savo kralinelas andro Češbon."

³⁵ Avke o Izraeliti murdarde le Og, leskere čhaven the caľa armada. Ńiko pes na zachrañinda. Palis zaile leskeri phuv.

O Balak vičinel le Bileam

22 O Izraeliti džanas dureder a kerde peske taboris pro Moabike rovini pro vichodos le Jordanostar anglo Jericho.

² Sar o Balak, le Cipporoskero čhavo, dikhľa, so o Izraeliti kerde le Amorejenco, ³ ov the savore leskere manuša pes lendar daranas, bo sas igen but.

⁴ O Moabčana phende le Midijañike vodcenge: "Kala Izraeliti akana zñičinena savoro pašal amende avke sar o bikos e čar pre maľa."

Andre oda časos sas o Moabiko kralis o Balak, le Cipporoskero čhavo. ⁵ Ov bičhađa le muršen ko Bileam, ke le Beoriskero čhavo, andro Petor paš o pañi Euftrat, khatar sas the o Balak. Diña leske te džanel:

"Andral o Egipt avle avri o manuša, zaučharde e phuv a bešen nadur pašal miri phuv. ⁶ Vašoda av a prekoš len, bo on hine zoraleder sar me. Šaj el, hoj len palis domarava a tradava len avri andral miri phuv.

Džanav, hoj oda, kas požehñineha, ela požehñimen, a kas prekošeha, ela prekošlo."

⁷ Avke o Moabike the Midijañike vodci pes mukle pro drom a ile peha o love vaš o prekošiben. Sar doavle ko Bileam, phende leske, so kamel o Balak.

⁸ Ov lenge phenda: "Adadžives presoven ade a tajsa tumenge odphenava, so mange phenela o RAJ." Avke o Moabike vodci ačhile ko Bileam.

⁹ O Del avľa rači ko Bileam a phučľa lestar: "Ko hin kala murša andre tiro kher?"

¹⁰ O Bileam odphenda: "O Moabiko kralis Balak bičhađa ke ma kale muršen, hoj mange te phenen:

¹¹ 'Andral o Egipt avle avri o manuša a zaučharde miri phuv. Akana av, prekoš len! Talam len domarava a tradava len het.'"

¹² Ale o Del phenda le Bileamoske: "Ma dža lenca a ma prekoš kale manušen, bo hine požehñimen."

¹³ Sar tosara o Bileam uštíľa, phenda ole muršenge: "Džan korkore pale andre peskeri phuv, bo mange o RAJ na domukľa te džal tumenca."

¹⁴ Avke o Moabike vodci avle pale ko Balak a phende leske: "O Bileam na kamel te avel amenca."

¹⁵ O Balak pale bičhađa buter vodcen, so sas bareder sar ešebnovar (peršovar). ¹⁶ On avle ko Bileam a phende:

"Kavke vakerel o Balak: 'Mangav tut, ma zlíker tut, ale av ke ma! ¹⁷ Počinava tuke igen mištes a kerava savoro, so mange pheneha. Av a prekoš kale manušen!'"

¹⁸ Ale o Bileam odphenda le Balakoskere sluhenge: "Te man o Balak diňahas ajci rup vaj somnakaj, keci ča rešlilahas andre leskero palacis, the avke našti nič kerav, añi baro añi cikno. Mušinav te šunel le RAJES, mire Devles, andre savoreste! ¹⁹ Ačhen ade prekal e rat, hoj man te dodžanav, so mange mek o RAJ phenela."

²⁰ Rači o Del avľa ko Bileam a phenda leske: "Te tut kala murša avle te vičinel, ušti a dža lenca. Ale ker ča oda, so tuke phenava."

O somaris prevakerel

²¹ Avke o Bileam tosara uštíľa, pririchtinda le somaris a geľa ole Moabike vodcenco. ²² Ale vašoda, hoj o Bileam geľa lenca, o Del pre leste sas igen choľamen a le RAJESKERO aňjelos pes leske ačhađa andro drom, hoj les te na mukel dureder te džal. O Bileam džalas le somariha a džanas leha the duj sluhi.

²³ Sar o somaris dikhľa le RAJESKERE aňjelos te ačhel pro drom la šablaha andro vast, geľa pal o drom tele pre maľa. Ale o Bileam le somaris marelas, hoj te avel pale pro drom.

²⁴ Le RAJESKERO aňjelos ačhelas pro chodñikos maškar o viñici, kaj sas o muros pal jekh sera the pal aver. ²⁵ Sar o somaris pale dikhľa le aňjelos, geľa dži paš o muros a le Bileamoske prikikidľa o pindro. Vašoda o Bileam pale marda le somaris.

²⁶ Palis le RAJESKERO aňjelos pale geľa angle lende a zaačhíľa pro uzko than, hoj pes te na del te predžal añi pal jekh sera. ²⁷ Sar o somaris dikhľa le aňjelos, pašlíľa tele. O Bileam igen choľisalíľa a chudľa te marel le so-

maris la pacaha. ²⁸ Androda o RAJ phundrađa le somariske o muj a o somaris prevakerđa ko Bileam: "So tut kerđom, hoj man imar tritovar mares?"

²⁹ O Bileam leske odphendã: "Kerđal mandar dilines! Te ulahas paš mande e šablã, takoj tut murdarđomas!"

³⁰ O somaris leske odphendã: "Či na som me tiro somaris, pre savo furt phires, mek dži akana? Kerđom tuke varekana kada?"

"Na," odphendã leske.

³¹ Akor o RAJ phundrađa le Bileamoske o jakha a dikhla le RAJESKERE aňjelos te ačhel pro drom la šablã andro vast a o Bileam angle leste bandila le mujeha dži ke phuv.

³² Le RAJESKERO aňjelos leske phendã: "Soske trival mardal tire somaris? Me avlom vašoda, hoj tut te začhavav pre kada drom, bo džas andro nalačhipen.

³³ Ale o somaris man dikhla a trival pes mandar visardã. Te pes mandar na visardãhas, murdarđomas tut a les muklomas te dživel."

³⁴ O Bileam odphendã le aňjeloske: "Kerđom binos, bo na džanavas, hoj pes mange ačhavehas andro drom. No, te na kames, hoj te džav dureder, visarava man pale."

³⁵ Ale o aňjelos leske odphendã: "Dža kale muršenca, ale vakereha ča oda, so tuke phenava." Avke o Bileam geľa le Balakoskere vodcenca.

³⁶ Sar o Balak šundã, hoj o Bileam avel, geľa angle leste andro Moabiko foros Ar, paš o paňi Arnon, pre hraňica le Moaboskeri. ³⁷ O Balak vakerelas le Bileamoske: "Soske na avlal takoj, sar pal tu bičhadom ešebnovar? Či tuke na počindomas?"

³⁸ "Dikh, akana avlom ke tu," odphendã o Bileam. "Naštã phenav oda, so kamav. Me ča šaj phenav oda, so mange dela andro muj o Del."

³⁹ Palis o Bileam džalas le Balakoha a doavle andro foros Kirjat-Chucot. ⁴⁰ Ode o Balak obetinda gurunňen the bakren a olestar bičhada le Bileamoske the leskere sluhenge. ⁴¹ Tosara o Balak iľa peha le Bileam upre pro Bamot-Baal. Odarik dičholas o agor le Izraeloskere taboriskero.

O Bileam ešebnovar prorokinel le Izraelitenge

23 O Bileam phendã le Balakoske: "Ačhav mange kade efa oltara a pririchtin mange efa terne biken the efa bakren." ² O Balak kerđa avke, sar kame-las o Bileam. Palis o Balak the o Bileam obetinas jekh bikos the bakres pre dojekh oltaris.

³ Akor o Bileam phendã le Balakoske: "Ač paš tiri labardi obeta a me džava het. Šaj el, hoj pes manca o RAJ arakhela a oda, so mange sikavela, phenava tuke." Palis o Bileam odarik geľa upre pro brehos.

⁴ O Del pes arakhla le Bileamoha a o Bileam phendã: "Pririchtindom efa oltara a pre dojekh lendar obetindom bikos the bakres."

⁵ Palis o RAJ diňa le Bileamoske o lava andro muj a phendã: "Dža pale ko Balak kale lavenca."

⁶ Sar ke leste avla o Bileam, ov ačhelas paš peskeri labardi obeta jekhetane savore Moabike vodcenca.

⁷ Akor o Bileam prorokinda:

"Andral o Aram man andã o Balak,
le verchendar pal o vichodos o Moabiko kralis:
Av a prekoš le Jakob,
av a odsudzin le Izraeliten!"

⁸ Sar šaj prekošav oles, kas o RAJ na prekošel?
Sar šaj odsudzinav olen, kas o RAJ na odsudzinel?

⁹ Pal o uče skali dikhav les,
pal o brehi pre leste dikhav.
Dikhav le manušen, save dživen avrether,
on pes na rachinen maškar aver narodi.

¹⁰ Le Jakoboskere potomki hine ajci but sar e poši –
o Izrael pes na del te zgenel.

Te muľomas avke, sar meren o čačipnaskere!
Te dopelomas avke sar on!"

¹¹ Paloda o Balak phendã le Bileamoske: "So mange kerđal? Andom tut, hoj mire ñeprijatelen te prekošes, a tu lenge ča žehňines!"

¹² Ov leske odphendã: "Či naštã vakerav oda, so mange phenel o RAJ?"

O Bileam dujtovar prorokinel

¹³ O Balak leske phendã: "Av manca pre aver than, khatar dičhola o agor le Izraeloskere taboriskero. Kadarik dikhes ča vajkeci lendar, na savoren. Odarik mange len prekošeha." ¹⁴ Akor les odarik odľigendã pro than Cofim † pro verchos Pisga. Ode pale ačhada efa oltara a pre dojekh obetinelas bikos the bakres.

¹⁵ O Bileam phendã le Balakoske: "Ač kade paš tiri labardi obeta a me džava, hoj man te arakhav le RAJE-HA."

¹⁶ O RAJ leske diňa o lava andro muj a phendã: "Dža pale ko Balak kale lavenca."

¹⁷ Sar o Bileam džalas ko Balak, arakhla les te ačhel paš peskeri labardi obeta jekhetane le Moabike vodcenca. O Balak lestar phučla: "So vakerelas o RAJ?"

¹⁸ Akor o Bileam phendã:
"Uštã, Balak, a šun!

Merkin tuke, čhavo le Cipporoskero.

¹⁹ O Del nane manuš, hoj te klaminel.

Ov nane čhavo le manušeskero, hoj te čerinel peskere lava.

Či na kerel oda, so phenel?

Či del lav a na dolikerel?

²⁰ Sas mange prikazimen, hoj te žehňinav.
Ov požehňinda a me oda naštã čerinov!

²¹ Na dičhol andro Jakob ñisavo trapišagos,
aňi na dikhav o pharipen andro Izrael.

O RAJ, leskero Del, hino leha.

Ov vriskinel radišagoha peskere Kraliske.

²² O Del les iľa avri andral o Egipt;

marel pes vaš leste zorales sar dzivo bikos.

²³ Nane pro Jakob prekošiben,

ñisavo vražišagos pro Izrael.

Akana pes phenel le Jakoboske the le Izraeloske:

'Dikh, so o Del kerđa!'

† Abo: o than le straňnikengero

²⁴ Kada narodos uštel upre sar o zoralo ľevos!
Na pašľola peske, medik na chala oda, so chudela,
medik na pijela o rat olendar, saven murdarda.”
²⁵ Pre oda o Balak phenda le Bileamoske: “Te les našti
prekošes, ta akor les ma žehňin!”
²⁶ O Bileam odphenda le Balakoske: “Na phendom
tuke, hoj mušinav te kerel savoro, so mange phenel o
RAJ?”

O Bileam tritovar prorokinel

²⁷ Paľis o Balak le Bileamoske phenda: “Av, lav tut pre
aver than. Šaj el, hoj o Del les odarik kamela te
prekošel.” ²⁸ Avke o Balak ľigenda le Bileam pro ver-
chos Peor, khatar dičhol pre pušća.

²⁹ Paľis o Bileam phenda le Balakoske: “Ačhav ade ef-
ta oltara a pririchtin mange efa biken the efa
bakren.” ³⁰ O Balak kerda avke, sar kamelas o Bileam a
pre dojekh oltaris obetinelas jekhe bikos the jekhe
bakres.

24 O Bileam dikhľa, hoj o RAJ kamel te žehňinel le
Izrael. Vašoda na kerda avke sar angloda a imar
na vražinda, ale visarda pes le mujeha ke pušća. ² Sar
dikhľa le Izraeliten andro taboris rozačhaden pal
peskere kmeňi, avľa pre leste le Devleskero duchos ³ a
phenda kada prorocstvo:

“O prorocstvo le Bileamoskero, le čhaskero le Be-
oriskero:

Kada vakerel oda, kaskere jakha hine phundrade;
⁴ o prorocstvo oleskero, ko šunel le Devleskere lava.
Bandľom anglal leste
a dikhľom o videňje le Nekzoraleder Devlestar.

⁵ Save šukar hine tire stani, ó Jakob,
save lačhe hine o thana, kaj bešes, ó Izrael.

⁶ Hine sar o palmi andro dolini,
sar o zahradi paš o paňa,
sar o aloe, so sadzinda o RAJ,
sar o cedri paš o paňa.

⁷ O paňa čuľana avri andral tire vedri,
pre oda, so sadzines, ela pherdo paňi.

Tire kralis ela bareder pačiv sar le Agag
a tiro krališagos ela baro.

⁸ O Del, savo tut iľa avri andral o Egipt,
marel pes vaš tuke zorales sar o bikos.
Tu zňičineha peskere űeprijateľen,
phagereha lengere kokala
a ľivineha len le šipenca.

⁹ O Izrael odpočovinel sar o ľevos;
sar sovel, űiko les na uštavela.

Oda, ko žehňinela kale narodoske, ela požehňimen!
Ko les prekošela, ela prekošlo!”

¹⁰ Sar šundľa kala lava o Balak, choľisalľiľa pro Bileam
a demaďa pes choľatar andro vast. Paľis phenda le
Bileamoske: “Vičindom tut te prekošel mire űepri-

jaťelen a tu len imar trival žehňines! ¹¹ Dža adarik het!
Phendom, hoj tut mištes počinava, ale tiro RAJ oda na
domukľa.” ¹² O Bileam leske odphenda: “Se na
phendom tire muršenge, saven ke ma bičhadal:
¹³ ‘Choc man te o Balak diňahas ajci rup vaj somnakaj,
keci ča rešľiľahas andre leskero palacis, mušinav te
šunel le RAJESKERO lav, korkoro pestar našti űič kerav!
Ča oda, so phenela o RAJ, vakerava.’ ¹⁴ Akana džav pale
ke mire manuša. Ale av a phenava tuke, so o Izraeliti
kerena tire manušenca andre ola dživesa, so avena.”

O Bileam šartovar prorokinel

¹⁵ Paľis o Bileam phenda:

“O prorocstvo le Bileamoskero, le čhaskero le Be-
oriskero:

Kada vakerel oda, kaskere jakha hine phundrade,

¹⁶ o prorocstvo oleskero, ko šunel le Devleskere lava
a prilel o prindžaripen le Nekbareder Devlestar.
Bandľom anglal leste
a dikhľom o videňje le Nekzoraleder Devlestar.

¹⁷ Oda, so dikhav andro videňje,
mek pes na ačhiľa.

Jekh džives o kralis andral o Jakob pes sikavela sar e
čerčeň,

uštela upre o žezlos andral o Izrael.

Ov zňičinela le Moabike vodcen
a domarela savore Šetoskere potomken.

¹⁸ Ov domarela o Edom,
o Seir ela lengero barvalipen
a o Izrael barola a zoraľola.

¹⁹ Andral o Jakob avela o kralis
a zňičinela olen, save ačhile andro foros.”

²⁰ Sar o Bileam andro videňje dikhľa le Amaleken,
phenda kala lava:

“O Amalek sas o nekzoraleder narodos,
ale ela zňičimen pro furt.”

²¹ Sar dikhľa le Keniten, phenda kala lava:
“O than, kaj dživen, hino zoralo,
ačhadan tumenge o hňizdos pre skala.

²² No the avke, Kenitale, avena zňičimen,
sar tumen o Aššur zalela a odlidžala.”

²³ O Bileam pale phenda:

“Ko ačhela te dživel, sar kada o Del kerela?

²⁴ O loďi avena pašal o Kittimoskere brehi;
on zalena o Aššur the o Eber,
ale the on ena zňičimen.”

²⁵ Paľis o Bileam uštľa a visarda pes pale khere. The
o Balak geľa peskere dromeħa.

O Moab scirdel le Izraeliten pro binos

25 Sar imar o Izraeliti bešenas andro Šittim, vare-
save murša pašlonas le Moabike džuvľenca. ² On
vičinenas le Izraeliten pre peskere obetne hoscini,
savenca denas pačiv peskere devlen. O Izraeliti chanas

ole chabenestar a lašarenas lengere devlen ³ the le devles Baal-Peor. Vašoda o RAJ igen cholisalila pro Izraeliti.

⁴ Avke o RAJ phenda le Mojžišoske: "Le kale manušengere vodcen, angle ma len murdar a thov len te ačhel pro kham, hoj miri cholí te oddžal le Izraelostar."

⁵ Avke o Mojžiš prikazinda le Izraelike sudcenge: "Sako tumendar mi murdarel dojekhe muršes andral peskero kmeňos, savo lašarelas le Baal-Peor."

⁶ Ipen akor, sar paš o vudar le Sentne Stanoskero rovenas savore Izraeliti the o Mojžiš, avla varesavo Izraelitas la Midijaňika džuvlaha andre peskero stanos angle lengere jakha. ⁷ Sar oda dikhla o Pinchas, le Eleazaroskero čhavo, saveske sas papus o Aron, uštíla lendar a íla andro vast e kopija. ⁸ Geľa andro stanos ole Izraelitaskero, savo anda ola džuvla, a sodujen jekhetane predemada la kopijaha, sar pašlonas. Avke sas zaačhado o nasvalíben maškar o Izraeliti, ⁹ ale 24 000 manuša mule pre kada zoralo nasvalíben.

¹⁰ O RAJ phenda le Mojžišoske: ¹¹ "Vašoda, so kerđa o Pinchas, me imar na som buter cholamen pro Izraeliti. Ov na kamelas, hoj o manuša te lašaren avre devles, ča man, a vašoda len na zňičindom andre miri cholí.

¹² Phen le Pinchasoske, hoj leha phandava smiro-moskeri zmluva, so likerela pro furt. ¹³ Ov the leskere potomki ena pro furt andre rašajiko služba, bo igen labolas pal o Del a oleha, so kerđa, obžušarda le Izraeliten, hoj lenge te odmukav."

¹⁴ O Izraelitas, saves murdarđa jekhetane la Midijaňika džuvlaha, sas o Zimri, le Saluoskero čhavo, savo sas fajtakero vodcas andro kmeňos Šimeon. ¹⁵ E džuvli, savi sas murdardi, sas e Kozbi. Oj sas čhaj le Curosker, savo sas vodcas andre jekh Midijaňiko fajta.

¹⁶ Palis o RAJ phenda le Mojžišoske: ¹⁷ "Džan pro Midijana a murdaren len, ¹⁸ vaš oda nalačhipen, so tumenge kerde, sar tumen scirdle pro binos, hoj te lašaren le Baal-Peor a the vaš e Kozbi, savi sas murdardi akor, sar avla o nasvalíben paš o Peor."

¹⁹ No, paloda pes ačhíla oda:

O Izraeliti dujtovar zgende

26 Paloda o RAJ phenda le Mojžišoske the le rašaske Eleazaroske, saveske sas dad o Aron: ² "Zgen savore Izraelike muršen pal lengere fajti. Pisin andre savoren phureder sar biš (20) berš, save pes džanen te marel." ³ Avke pro Moabike rovini pro vichodos le Jordanostar anglo Jericho o Mojžiš the o Eleazar phende le Izraelike vodcenge: ⁴ "Zgen savore Izraelike muršen phurederen sar biš berš, avke sar o RAJ prikazinda le Mojžišoske."

Kala hine ola Izraeliti, save avle avri andral o Egipt:

⁵ Le Rubenoskere, savo sas ešebno (peršo) čhavo le Izraeloskero, sas kala potomki:
le Chanochostar, e Chanochoskeri fajta;

le Palluostar, e Palluoskeri fajta;

⁶ le Checronostar, e Checronoskeri fajta;

le Karmistar, e Karmiskeri fajta.

⁷ Savore zgende murša andral le Rubenoskero kmeňos sas 43 730.

⁸ Le Palluoskero čhavo sas o Eliab ⁹ a le Eliaboskere čhave sas o Nemuel, o Datan the o Abiram. Kada Datan the Abiram sas ola vodci, save pes le Korachoskera partijaha vzburiinde pro Mojžiš the Aron a pes ačhade pro RAJ. ¹⁰ Akor e phuv phundrađa peskero muj a zlíginda len jekhetane le Korachoskere muršenca, sar e jag zlabarda 250 muršen. Ada pes lenge ačhíla, hoj te daran the aver džene a te na keren avke sar on. ¹¹ Ale le Korachoskere čhave na mule.

¹² O potomki le Šimeonoskere pal peskere fajti sas kala:

le Nemuelostar, e Nemueloskeri fajta;

le Jaminostar, e Jaminoskeri fajta;

le Jachinostar, e Jachinoskeri fajta;

¹³ le Zerachostar, e Zerachoskeri fajta;

le Šaulostar, e Šauloskeri fajta.

¹⁴ Savore zgende murša andral le Šimeonoskero kmeňos sas 22 200.

¹⁵ O potomki le Gadoskere pal peskere fajti sas kala:

le Cefonostar, e Cefonoskeri fajta;

le Chaggistar, e Chaggiskeri fajta;

le Šunistar, e Šuniskeri fajta;

¹⁶ le Oznistar, e Ozniskeri fajta;

le Eristar, e Eriskeri fajta;

¹⁷ le Arodistar, e Arodiskeri fajta;

le Arelistar, e Areliskeri fajta.

¹⁸ Savore zgende murša andral le Gadoskero kmeňos sas 40 500.

¹⁹ Le Juda sas čhave o Er the o Onan, save mule andro Kanaan.

²⁰ O potomki le Judaskere pal peskere fajti sas kala:

le Šelostar, e Šeloskeri fajta;

le Percostar, e Percoskeri fajta;

le Zerachostar, e Zerachoskeri fajta.

²¹ O potomki le Percoskere sas:

le Checronostar, e Checronoskeri fajta;

le Chamulostar, e Chamuloskeri fajta.

²² Savore zgende murša andral le Judaskero kmeňos sas 76 500.

²³ O potomki le Jissacharoskere pal peskere fajti sas kala:

le Tolastar, e Tolaskeri fajta; le Puvvahostar, e

Puvvahoskeri fajta;

²⁴ le Jašubostar, e Jašuboskeri fajta;

le Šimronostar, e Šimronoskeri fajta.

²⁵ Savore zgende murša andral le Jissacharoskero kmeňos sas 64 300.

²⁶ O potomki le Zebulunoskere pal peskere fajti sas kala:

le Seredostar, e Seredoskeri fajta;
le Elonostar, e Elonoskeri fajta;
le Jachleelostar, e Jachleeloskeri fajta.

²⁷ Savore zgende murša andral le Zebulunoskero kmeňos sas 60 500.

²⁸ O čhave le Jozefoskere pal peskere fajti: o Menašše the Efrajim.

²⁹ O potomki le Menaššeskere sas kala: le Machiostar, e Machiroskeri fajta. O Machir sas dad le Gileadoske;

le Gileadostar, e Gileadoskeri fajta.

³⁰ Kala sas o potomki le Gileadoskere:

le Jezerostar, e Jezeroskeri fajta;

le Chelekostar, e Chelekoskeri fajta;

³¹ le Asrielostar, e Asrieloskeri fajta;

le Šechemostar, e Šechemoskeri fajta;

³² le Šemidastar, e Šemidaskeri fajta;

le Čeferostar, e Čeferoskeri fajta.

³³ Le Celofchad, saveske sas dad o Čefer, na sas murša, ča čhaja. Lengere nava sas: Machla, Noa, Chogla, Milka the Tirca.

³⁴ Savore zgende murša andral le Menaššeskero kmeňos sas 52 700.

³⁵ Kala sas o potomki le Efrajimoskere pal peskere fajti:

le Šutelachostar, e Šutelachoskeri fajta;

le Becherostar, e Becheroskeri fajta;

le Tachanostar, e Tachanoskeri fajta.

³⁶ Kala sas o potomki le Šutelachoskere:

le Eranostar, e Eranoskeri fajta.

³⁷ Savore zgende murša andral le Efrajimoskero kmeňos sas 32 500.

Kala hine o potomki le Jozefoskere pal peskere fajti.

³⁸ O potomki le Benjaminoskere pal peskere fajti sas kala:

le Belastar, e Belaskeri fajta;

le Ašbelostar, e Ašbeloskeri fajta;

le Achiramostar, e Achiramoskeri fajta;

³⁹ le Šefufamostar, e Šefufamoskeri fajta;

le Chufamostar, e Chufamoskeri fajta.

⁴⁰ O potomki le Belaskere sas:

le Ardostar, e Ardoskeri fajta;

le Naamanostar, e Naamanoskeri fajta.

⁴¹ Savore zgende murša andral le Benjaminoskero kmeňos sas 45 600.

⁴² O potomki le Danoskere pal peskere fajti sas kala: le Šuchamostar, e Šuchamoskeri fajta. Kala sas o fajti le Danoskere.

⁴³ Savore zgende murša andral le Šuchamoskeri fajta sas 64 000.

⁴⁴ O potomki le Ašeroskere pal peskere fajti sas kala: le Jimnostar, e Jimnoskeri fajta;

le Jišvistar, e Jišviskeri fajta;

le Berijostar, e Berijoskeri fajta.

⁴⁵ Le Berijoskere potomki sas:

le Čeberistar, e Čeberiskeri fajta;

le Malkielostar, e Malkieloskeri fajta.

⁴⁶ Le Ašeroskeri čhaj pes vičinelas Serach.

⁴⁷ Savore zgende murša andral le Ašeroskero kmeňos sas 53 400.

⁴⁸ O potomki le Naftaliskere pal peskere fajti sas kala:

le Jachceelostar, e Jachceeloskeri fajta;

le Gunistar, e Guniskeri fajta;

⁴⁹ le Jecerostar, e Jeceroskeri fajta;

le Šillemostar, e Šillemoskeri fajta.

⁵⁰ Savore zgende murša andral le Naftaliskero kmeňos sas 45 400.

⁵¹ Savore murša andral o Izrael, save sas zgende, sas 601 730.

⁵² O RAJ phendā le Mojžišoske: ⁵³ "Mi rozulavel (rozđelinel) pes e phuv Kanaan andro đedictvos le kmeňenge pal oda, keci hine džene. ⁵⁴ Le bareder kmeňoske deha andro đedictvos bareder kotor a le ciknedere kmeňoske cikneder kotor; dojekh mi chudel pal oda, keci sas zrachimem. ⁵⁵ E phuv pes rozulavela le losoha a pal o kmeňi la chudena. ⁵⁶ Le losoha pes rozulavela andro đedictvos maškar o bareder the cikneder kmeňi."

⁵⁷ Kala sas le Leviskere potomki pal peskere fajti:

le Geršonostar, e Geršonoskeri fajta;

le Kohatostar, e Kohatoskeri fajta;

le Meraristar, e Merariskeri fajta.

⁵⁸ The kala sas le Leviskere fajti:

e Libniskeri,

e Chebronoskeri,

e Machliskeri,

e Mušiskeri,

e Korachoskeri.

O Kohat sas le Amramoskero dad. ⁵⁹ Le Amramoskeri romňi pes vičinelas Jochebed, le Leviskeri čhaj. Oj leske uliła andro Egipt. Le Amram laha sas o Aron, o Mojžiš the e Mirijam. ⁶⁰ Le Aron sas štar čhave: o Nadab, o Abihu, o Eleazar the o Itamar. ⁶¹ Ale o Nadab the o Abihu mule, sar ande e cudzo jag anglo RAJ.

⁶² Andro kmeňos Levi sas 23 000 murša the čhavore phureder sar jekh čhon. On na sas rachimen maškar o Izraeliti, bo na chudle ňisavi phuv sar đedictvos.

⁶³ Kala hine ola džene, saven o Mojžiš the o Eleazar zgende, sar taborinenas pro Moabike rovini pro vichodos le Jordanostar anglo Jericho. ⁶⁴ Maškar lende na sas ňisavo dženo olendar, saven zgenda o Mojžiš the o rašaj Aron ešebnovar (peršovar) pre pušta Sinaj. ⁶⁵ Bo o RAJ pal lende phendā: "On merena pre pušta."

Lendar ačhiľa te dživel ča o Kaleb, le Jefunnoskero čhavo, the o Jozua, le Nunoskero čhavo.

Le Celofchadoskere čhaja

27 Akor e Machla, e Noa, e Chogla, e Milka the e Tirca, o čhaja le Celofchadoskere, saveske sas dad o Chefer, leskero sas o Gilead, leskero o Machir, leskero o Menašše a leskero o Jozef, ² avle anglo Mojžiš, anglo rašaj Eleazar, anglo vodci the angle savore manuša paš o vudar andre le RAJESKERO Sentno Stanos a phende: ³ "Amaro dad muľa pre pušta a na sas les murša. Na sas maškar le Korachoskere manuša, save pes vzburinde pro RAJ, ale muľa ča vaš peskero binos. ⁴ Mušinel te našlol le dadeskero nav andral leskero kmeños ča vašoda, bo les na sas murša? De amen phuv maškar amare dadeskere phrala."

⁵ Avke o Mojžiš phučľa le RAJESTAR, so te kerel. ⁶ A o RAJ phendľa le Mojžišoske: ⁷ "Oda, so mangel le Celofchadoskere čhaja, hin lačho. Mušines lenge te del o dēdictvos maškar lengere dadeskere phrala. Le dadeskeri phuv ela lengeri.

⁸ Le Izraelitenge phen: "Te vareko merela a na ela les čhave, leskeri phuv chudela leskeri čhaj. ⁹ No te les na ela čhaj, leskeri phuv chudena leskere phrala. ¹⁰ Te les nane aňi phrala, e phuv chudena leskere dadeskere phrala. ¹¹ Te leskere dades na ela phrala, e phuv chudena leskeri nekpašeder famelija. Oda ela zakonos prekal o Izraeliti, avke sar o RAJ prikazindľa le Mojžišoske."

O Jozua ačhado vodcaske

¹² O RAJ phendľa le Mojžišoske: "Dža pro verchos maškar o verchi Abarim a dikh pre odi phuv, so diňom le Izraelitenge. ¹³ Sar la dikheha, palis mereha, avke sar tiro phral o Aron. ¹⁴ Bo akor, sar savore Izraeliti reptinenas pre ma paš o paňi Meriba, pre pušta Sin paš o foros Kadeš, tumen man na diňan pačiv sar Sentnes angle savore Izraeliti."

¹⁵ Akor o Mojžiš phendľa le RAJESKE: ¹⁶ "RAJEJA Devla, tu des o dživipen savoreske, so hin stvorimen. Mangav tut, ačhav muršes upral kala manuša, ¹⁷ hoj len te lidžal andro mariben, hoj tiro narodos te na ačhel sar o bakrore bi o pastjeris."

¹⁸ O RAJ phendľa le Mojžišoske: "Le tuha le Nunoskere čhas le Jozua. Ov hin o murš, andre savo hin o Duchos, a thov pre leste o vast. ¹⁹ Ačhav les anglo rašaj Eleazar the angle savore manuša a phen lenge, hoj ov ela vodcas pal tute. ²⁰ Deha les vareso peskera autoritar, hoj les te šunen savore Izraeliti. ²¹ Ov pes ačhavela anglo rašaj Eleazar, savo pes dophučela vaš leste pre le Devleskeri voľa – prekal o losi Urim the Tummim. Kavke o Eleazar phenela le Jozuaske the le manušenge, kana te džan andro mariben a kana te avel pale."

²² O Mojžiš kerďa avke, sar leske prikazindľa o RAJ. Iľa le Jozua, ačhaďa les anglo rašaj Eleazar the angle savore Izraeliti, ²³ thoďa pre leste o vasta a ačhaďa les sar vodcas, avke sar o RAJ prikazindľa prekal o Mojžiš.

O obeti pre sako džives

28 O RAJ phendľa le Mojžišoske: ² "Prikazin le Izraelitenge kada: 'Dodikhen pre oda, hoj pro časos, so diňom, mange le RAJESKE te anen o chabeneskere obeti, so mange šukares voňinen.'

³ Phen lenge: 'Kadi hin e jagali obeta, so mange anena sako džives: duj jekhberšeskere bakroren bi e chiba sar labardı obeta. ⁴ Jekhe bakrores obetinena tosara a dujtones rači. ⁵ Paše anena e chabeneskeri obeta: jekh kilos sano aro mišimen le litra olivove olejoha. ⁶ Oda hin e sakodživeseskeri labardı obeta, so sas ešebnovar (peršovar) diňi pro verchos Sinaj sar jagali obeta, so šukares voňinel le RAJESKE. ⁷ Paš dojekh bakrore pes pridela sar moľakeri obeta jekh litra mol, savi le RAJESKE čhiv avri pro oltaris. ⁸ Ke račate obetineha dujte bakrores sar jagali obeta avke sar tosara jekhetane la moľakera obetaha. Oda hin e chabeneskeri obeta, so šukares voňinel le RAJESKE.

E obeta pro Šabbat

⁹ Pro Šabbat pre chabeneskeri obeta anena duje jekhberšeskere bakroren bi e chiba jekhetane la moľakera obetaha a duj kili sano aro mišimen le olivove olejoha. ¹⁰ Kadi labardı obeta anena dojekh Šabbat paš ola labarde the moľakere obeti, so anena sako džives.

O obeti pro ešebno džives andro čhon

¹¹ Pro ešebno džives sako čhon anena sar e labardı obeta le RAJESKE duj terne biken, jekhe bakres the eфта jekhberšeskere bakroren. Savore ole džviri mi en bi e chiba. ¹² Paš dojekh bikos priden sar chabeneskeri obeta o sano aro mišimen le olivove olejoha: paš dojekh bikos pridena trin kili sano aro, paš dojekh bakro duj kili sano aro ¹³ the paš dojekh bakrore jekh kilos sano aro. Kala labarde the chabeneskere obeti šukares voňinena le RAJESKE. ¹⁴ Paš oda pridena e moľakeri obeta: duj litri mol pre dojekh bikos, litra the jepaš pro bakro the jekh litra pre dojekh bakrore. Kadi labardı obeta pes obetinela ešebno džives andro čhon pal calo berš. ¹⁵ Paš ola labarde the moľakere obeti, so anena sako džives, obetinena the jekhe capos sar obeta vaš o binos.

E obeta pro Inepos pal o Mare Bi o Droždı

¹⁶ Dešuštarto (14.) džives andre ešebno čhon hiňi e Patradı pre pačiv le RAJESKE. ¹⁷ Pro dešupandžto (15.) džives chudela o inepos a eфта dživesa pes chala o mare bi o droždı. ¹⁸ Ešebno džives pro inepos tumen zdžana, hoj te lašaren le RAJES a na kerena nisavi buči. ¹⁹ Pre labardı obeta anena le RAJESKE e chabeneskeri obeta: duj terne biken, jekhe bakres the eфта jekhberšeskere bakroren a savore džviri mi en bi e chiba. ²⁰ Sar chabeneskeri obeta anena sano aro mišimen le olivove olejoha; trin kili pre dojekh bikos, duj kili pro bakro ²¹ the kilos aro pre dojekh bakrore. ²² Anen the

jekhe capos sar obeta vaš tumare bini. ²³ Kadi obeta anena paš e tosaraskeri labardī obeta, so imar pes kerel sako džives. ²⁴ Avke obetinena savore efta dživesa le RAJESKE e chabeneskeri obeta, so šukares voñinel le RAJESKE. Kadi obeta anena paš e tosaraskeri labardī obeta, so imar pes kerel sako džives. ²⁵ Zdžana tumen pro eftato džives, hoj te lašaren le RAJES. Na kerena ñisavi buči.

E obeta pro Inepos le Kurkengero

²⁶ Ešebno džives pro Inepos le Kurkengero, sar anena le RAJESKE e chabeneskeri obeta le ešebne ulipnastar, zdžana tumen, hoj te lašaren le RAJES a na kerena ñisavi buči. ²⁷ Anena pre labardī obeta, so šukares voñinel le RAJESKE, duj terne biken, jekhe bakres the efta jekhberšeskere bakroren. ²⁸ Sar chabeneskeri obeta anena sano aro mišimen le olivove olejoha: trin kili pre dojekh bikos, duj kili pro bakro ²⁹ the kilos pre dojekh bakro. ³⁰ Anen the jekhe capos pre obeta vaš tumare bini. ³¹ Kada anen paš o labarde, chabeneskere the moľakere obeti, so imar pes keran sako džives. Savore dživri pro obeti mi en bi e chiba.' "

O obeti pro Inepos le Trubengero

29 Ešebno (peršo) džives andro eftato čhon na kerena ñisavi buči, ale savore pes zdžana oda džives te lašarel le Devles. Oda džives trubinena pro trubi. ² Sar labardī obeta, so šukares voñinel le RAJESKE, anen jekhe bikos, jekhe bakres the efta jekhberšeskere bakroren bi e chiba. ³ Sar chabeneskeri obeta anen sano aro mišimen le olivove olejoha: trin kili aro pro bikos, duj kili pro bakro ⁴ the kilos pre dojekh le efta bakrorendar. ⁵ Anena the jekhe capos pre obeta vaš tumare bini. ⁶ Avke len obetinena jekhetane la čhoneskera labarda the chabeneskera obetaha, a jekhetane le labarde the moľakere obetenca, so pes keran sako džives, avke sar hin dino. Kala obeti šukares voñinena le RAJESKE.

O obeti pro Smiromoskero Džives

⁷ Zdžana tumen the dešto džives andre kada eftato čhon, hoj te lašaren le RAJES. Oda džives na chana ñisavo chaben añi na kerena ñisavi buči, a pokorinena pes anglo Del. ⁸ Sar labardī obeta, so šukares voñinel le RAJESKE, anena jekhe bikos, jekhe bakres the efta jekhberšeskere bakroren bi e chiba. ⁹ Sar chabeneskeri obeta obetinen sano aro mišimen le olivove olejoha: trin kili aro pro bikos, duj kili pro bakro, ¹⁰ the kilos pre dojekh bakro. ¹¹ Anena the jekhe capos pre obeta vaš o binos paš e koza so pes obetinel pre kada inepos vaš odmuklīben le manušenge. Kerena oda jekhetane le labarde, chabeneskere the moľakere obetenca, so pes keran sako džives.

O obeti pro Inepos le Stankengero

¹² Zdžana tumen the dešupandžto (15.) džives andro eftato čhon, hoj te lašaren le RAJES. Na kerena ñisavi

buči, ale efta dživesa oslavinena o Inepos le Stankengero pre pačiv le RAJESKE. ¹³ Pre ešebno džives anena sar e labardī obeta, so šukares voñinel le RAJESKE, dešutrin (13) terne biken, duje bakren the dešuštar (14) jekhberšeskere bakroren, savoren bi e chiba. ¹⁴ Sar chabeneskeri obeta anena sano aro mišimen le olivove olejoha: trin kili aro pre dojekh bikos, duj kili pre dojekh bakro ¹⁵ the kilos pre dojekh bakro. ¹⁶ Anena the jekhe capos pre obeta vaš tumare bini. Kerena oda jekhetane le labarde, chabeneskere the moľakere obetenca, so pes keran sako džives.

¹⁷ Pro dujto džives anena dešuduj (12) terne biken, duj bakren the dešuštar (14) jekhberšeskere bakroren bi e chiba. ¹⁸⁻¹⁹ Pal oda, keci biken, bakren the bakroren obetinena, ajci anena the e chabeneskeri the moľakeri obeta avke sar ešebno džives. Anena the e obeta vaš tumare bini, the okla obeti, so pes obetinen sako džives.

²⁰ Pro trito džives anena dešujekh (11) terne biken, duj bakren the dešuštar (14) jekhberšeskere bakroren bi e chiba. ²¹⁻²² Pal oda keci biken, bakren the bakroren obetinena, ajci anena the e chabeneskeri the moľakeri obeta avke, sar ešebno džives. Anena the e obeta vaš tumare bini, the okla obeti, so pes obetinen sako džives.

²³ Pro štarto džives anena deš terne biken, duj bakren the dešuštar jekhberšeskere bakroren bi e chiba. ²⁴⁻²⁵ Pal oda keci biken, bakren the bakroren obetinena, ajci anena the e chabeneskeri the moľakeri obeta avke, sar ešebno džives. Anena the okla obeti, so pes obetinen sako džives, the e obeta vaš o binos.

²⁶ Pro pandžto džives anena eña terne biken, duj bakren the dešuštar jekhberšeskere bakroren bi e chiba. ²⁷⁻²⁸ Pal oda keci biken, bakren the bakroren obetinena, ajci anena the e chabeneskeri the moľakeri obeta avke, sar ešebno džives. Anena the e obeta vaš tumare bini, the okla obeti, so pes obetinen sako džives.

²⁹ Pro šovto džives anena očno terne biken, duj bakren the dešuštar jekhberšeskere bakroren bi e chiba. ³⁰⁻³¹ Pal oda keci biken, bakren the bakroren obetinena, ajci anena the e chabeneskeri the moľakeri obeta avke, sar ešebno džives. Anena the e obeta vaš tumare bini, the okla obeti, so pes obetinen sako džives.

³² Pro eftato džives anena efta terne biken, duj bakren the dešuštar jekhberšeskere bakroren bi e chiba. ³³⁻³⁴ Pal oda keci biken, bakren the bakroren obetinena, ajci anena the e chabeneskeri the moľakeri obeta avke, sar ešebno džives. Anena the e obeta vaš tumare bini, the okla obeti, so pes obetinen sako džives.

³⁵ Pro očnoto džives tumen pale zdžana, hoj te lašaren le RAJES. Oda džives na kerena ñisavi buči. ³⁶ Sar labardī obeta, so šukares voñinel le RAJESKE, anen jekhe bikos, jekhe bakres the efta jekhberšeskere bakroren bi e chiba. ³⁷⁻³⁸ Jekhetane le bikoha, le bakreha the le bakrorenca obetinena o chabeneskere the moľakere obeti avke, sar hin dino. Anena the e obeta vaš tumare bini, the okla obeti, so pes obetinen sako džives.

³⁹ Kala labarde, chabeneskere, moľakere the smiro-moskere obeti mušinen te anel le RAJESKE pro inepi sako berš. Paš ola obeti anena the ola, pal save diňan lav a the ola, so anena korkore pestar.

30 O Mojžiš phendā le Izraelitenge savoro, avke sar leske prikazindā o RAJ.

O zakonos pal o lav the pal e vera

² A phendā le kmeňoskere vodcenge: "Kada prikazindā o RAJ: ³ Te o murš dela lav le RAJES abo lela vera, hoj pes zľikerela varesostar, mi dolľikerel oda lav a mi kerel avke, sar phendā.

⁴ Te e terňi džuvľi, savi mek dživel andro kher ke peskero dad, dela lav le RAJES, hoj kerela vareso, abo lela vera, hoj pes zľikerela varesostar, ⁵ a te lakero dad šunela lakero lav the vera, no nič pre oda na phenela, akor savore lakere lava the vera, so diňa, pes mušinel te dolľikerel.

⁶ Ale te lakero dad lake andre oda braňinela andre oda džives, sar pes dodžanela pal lakeri vera the lava, so diňa, na mušinel oda te dolľikerel. O RAJ lake odmukela, bo lakero dad pre oda na priačhila. ⁷ Te angloda, sar džala romeste, diňa lava abo iľa vera pre peste, a palis geľa romeste, ⁸ a te lakero rom andre oda džives, sar pes pal oda dodžanela, pre oda nič na phenela, mušinel pes lakere lava the vera te dolľikerel.

⁹ Ale te lakero rom pre oda na priačhela andre oda džives, sar pes pal oda dodžanela, na mušinel te dolľikerel e vera aňi o lava, so diňa. O RAJ lake odmukela.

¹⁰ Te e vdova abo e džuvľi, sava mukľa o rom, dela lav abo lela pre peste vera, mušinel pes oda te dolľikerel.

¹¹ Te e veraduňi džuvľi diňa lav abo iľa vera, ¹² a te lakero rom pal oda šunela a nič pre oda na phenela a ňisar la andre oda na zaačhavela, savore lava, so diňa the e vera, so iľa, mušinel te dolľikerel. ¹³ Ale te lakero rom pre oda na priačhela andre oda džives, sar oda šunela, palis ola lava, so diňa, abo e vera, so iľa, na mušinel te dolľikerel. Lakero rom oda zaačhada a o RAJ lake odmukela. ¹⁴ Lakere romes hin posledno lav pal savore lakere lava the veri, so diňa le RAJES. ¹⁵ Ale te lakero rom lake dži andre aver džives nič na phenela, savore lakere lava the e vera, so diňa, pes mušinel te dolľikerel, bo oda džives, sar ada šundā, sas čhit. ¹⁶ A te palis oda kamľahas te čerinel, ela oda pre leste, te e romňi peskero lav na dolľikerela."

¹⁷ Kala hine o prikazaňja, so diňa o RAJ le Mojžišoske pal o murš the pal leskeri romňi, pal o dad the pal leskeri čhaj andre leskero kher.

O mariben le Midijanenca

31 O RAJ phendā le Mojžišoske: ² "Mar le Midijanen vaš oda, so kerde le Izraelitenge. Sar ada kereha, mereha."

³ Akor o Mojžiš phendā le manušenge: "Pririchtinen pes pro mariben le Midijanenca a potrestinen len vaš oda, so kerde le RAJESKE. ⁴ Andral dojekh Izraeliko

kmeňos bičhaven andro mariben 1 000 muršen."

⁵ Avke kidle avri 1 000 muršen andral dojekh kmeňos. Savore murša sas 12 000. ⁶ O Mojžiš len bičhada andro mariben jekhetane le rašaha le Pinchasoha, saveske sas dad o Eleazar. O Pinchas pes starinelas pal o sentne veci the pal o maribnaskere trubi.

⁷ Mukle pes andro mariben pro Midijana, avke sar o RAJ prikazindā le Mojžišoske, a murdarde savore muršen. ⁸ Maškar o murdarde sas the o pandž Midijaňike kraľa: o Evi, o Rekem, o Cur, o Chur the o Reba. Murdarde the le Bileam, le Beoriskere čhas. ⁹ Palis o Izraeliti zaile a odlľigende le Midijaňike džuvľen le čhavenca, savoro lengero dobitkos, o stadi the lengero barvalipen. ¹⁰ Zlabarde savore fori, andre save bešenas, the lengere stani. ¹¹ Zaile a odlľigende savoro, so pes delas te odlľidžal le manušendar the le dobitkostar. ¹² Ande len anglo Mojžiš, rašaj Eleazar the anglo Izraeliti andro taboris, so sas pre Moabike maľi paš o Jordan pre aver sera le Jerichostar.

¹³ O Mojžiš, o Eleazar the savore Izraelike vodci gele pes lenca te zdžal avri pal o taboris. ¹⁴ O Mojžiš choľisalila pro veliteľa upral o ezeros the upral o šel, save pes visarenas le maribnastar.

¹⁵ Phendā lenge: "Soske mukľan te dživel savore džuvľen? ¹⁶ Leperen tumenge pre oda, hoj o džuvľa gele pal o Bileam. On scirdle le Izraeliten, hoj te lašaren le Peor a le RAJES te omuken. Vašoda avľa pro RAJESKERE manuša e bibach. ¹⁷ Akana murdaren dojekhe muršores the dojekha džuvľa, savi pašlila le muršeha. ¹⁸ Ale le čhajen, save mek na pašlile le muršeha, muken prekal peste.

¹⁹ Savore tumendar, ko murdarđa varekas abo pes chudľa le mule telostar, ačhena efa dživesa avri pal o taboris. Pro trito the pro eftato džives obžuzarena tumen the ole džuvľen, saven zailan. ²⁰ Obžuzaren savore gada, dojekh cipuňi veca, dojekh kaštuno sersamos the savoro, so hin la kozakere balendar."

²¹ O rašaj Eleazar phendā le muršenge, save pes visarde le maribnastar: "Kada hin o prikazis andro zakonos, so o RAJ diňa le Mojžišoske: ²² O somnakaj, o rup, o bronzos, o cinos vaj o olovos, ²³ oda hin, savoro so na zlabila, pes mušinel te obžuzarel andre jag the le žužipnaskere paňeha. A savore aver veci kempel te obžuzarel le žužipnaskere paňeha. ²⁴ Pro eftato džives peske rajbinena o gada a avena žuže. Ča akor šaj aven pale andro taboris."

Rozulaven maškar peste oda, so zaile

²⁵ Palis o RAJ phendā le Mojžišoske: ²⁶ "Tu, o rašaj Eleazar, the o Izraelike vodci zgenen savoro, so zailan - le manušen the o dobitkos. ²⁷ Rozulav oda pro duj: jepaš de le muršenge, save sas andro mariben, a aver jepaš okle manušenge. ²⁸ Palis kide avri olestar, so chudle o slugada, o daňe le RAJESKE: Dojekh 500 manušendar le jekhes avri, a avke the le bikendar, le somarendar, the le bakrendar. ²⁹ Le oda avri ole kotorestar, so hino lengero, a de le rašaske Eleazaroske sar le RAJESKERO kotor. ³⁰ Le kotorestar, so sas zailo a

dino le okle Izraelitenge, le jekhes avri dojekh penda (50) manušendar, a the le bikendar, le somarendar the bakrendar. Deha oda le Levitenge, save pes starinen pal le RAJESKERO Sentno Stanos.”³¹ A o Mojžiš the o Eleazar kerde sa avke, sar prikazinda o RAJ.

³² Savoro, so zaile o slugađa, sas 675 000 bakre, ³³ 72 000 dobitkos, ³⁴ 61 000 somara ³⁵ a 32 000 pačivale čhaja.

³⁶ O slugađa chudle 337 500 bakre ³⁷ a lendar dine sar daň le RAJESKE 675 bakre.

³⁸ Chudle 36 000 gurmňa a olestar e daň prekal o RAJ sas 72 gurmňa.

³⁹ Chudle 30 500 somara a olestar e daň prekal o RAJ sas 61 somara.

⁴⁰ Chudle 16 000 manušen, save sas zaile, a lendar dine le RAJESKE 32 dženen.

⁴¹ O Mojžiš oda diňa le Eleazaroske pre hazdli obeta le RAJESKE, avke sar prikazinda o RAJ.

⁴² Oka dujto kotor, so o Mojžiš rozulađa olestar, so chudle o slugađa, a dine okle Izraelitenge, ⁴³ sas 337 500 bakre, ⁴⁴ 36 000 gurmňa, ⁴⁵ 30 500 somara, ⁴⁶ the 16 000 manuša, saven zaile. ⁴⁷ Ole kotoresar, so sas le Izraelitengero, o Mojžiš iľa dojekhe pendatone manušes the dobitkos a diňa le Levitenge, save pes starinenas pal le RAJESKERO Sentno Stanos, avke sar o RAJ prikazinda le Mojžišoske.

⁴⁸ Palis avle anglo Mojžiš savore armadakere velitelja ⁴⁹ a phende leske: “Tire služobnika zgende le muršen, saven lidžahas. Aňi jekh lendar na chibafinel. ⁵⁰ Avke amen anas o somnakune veci – o naramki, o čati, o angrusa, o čeňa the o lancici – le RAJESKE sar obeta, hoj te el odmukle amare bini.”

⁵¹ O Mojžiš the o Eleazar iľa lendar o somnakaj the savore somnakune veci. ⁵² Savoro somnakaj, so dine o armadakere velitelja le RAJESKE sar hazdli obeta, sas vaj 190 kili. ⁵³ O slugađa peske mukle oda, so zaile. ⁵⁴ O Mojžiš the o Eleazar preile o somnakaj le armadakere velitelendar a ligende andre le RAJESKERO Sentno Stanos, hoj peske o RAJ te leperel pro Izraeliti.

E phuv pro vichodos pal o Jordan

32 Le kmeňen Ruben the Gad sas igen but dobitkos. Sar dikhle, savi lači maľa sas andro Jazer the Gilead prekal o dobitkos, ² avle ko Mojžiš, ko rašaj Eleazar the ko Izraelike vodci a phende: ³⁻⁴ “O RAJ pomožinda le Izraelitenge, hoj te zalen kale fori: o Atarot, o Dibon, o Jazer, e Nimra, o Češbon, o Elale, o Sebam, o Nebo the o Beon. Odi phuv hiňi lači prekal o dobitkos a amen hin baro dobitkos. ⁵ Mangas tut, te tuke sam pre dzeka, de amenge kadi phuv, hoj te el amari, a ma prele amen prekal o Jordan.”

⁶ O Mojžiš lenge phenda: “Tumare phrala mušinen te džal andro mariben a tumen kamen te ačhel kade? ⁷ Soske keren tele e dzeka le Izraelitenge, hoj te na džan andre phuv, so lenge diňa O RAJ? ⁸ Kavke kerenas the tumare dada, sar len bičhadom andral o Kadeš-Barnea, hoj te predikhen e phuv. ⁹ On avle dži andre Dolina Eškol, predikhle odi phuv, ale palis le

Izraelitenge kerde avke tele e dzeka, hoj na kamle te džal andre odi phuv, so lenge diňa o RAJ. ¹⁰ Andre oda džives o RAJ pre lende cholisalila a diňa vera: ¹¹ ‘O murša, kaske sas biš (20) berš the buter, sar avle avri andral o Egipt, na džana andre phuv, pal savi diňom la veraha lav le Abrahamoske, le Izakoske, the le Jakoboske, bo pes mange na oddine cale jileha. ¹² Ča o Kenizzitas o Kaleb, le Jefunoskero čhavo, the o Jozua, le Nunoskero čhavo, pes mange oddine cale jileha.’ ¹³ Akor o RAJ pro Izraeliti igen cholisalila a mukla len te phirel pal e pušta saranda (40) berš dži akor, medik na muľa avri oda pokoleňje, so kerenas oda, so na sas le RAJESKE pre dzeka.

¹⁴ Akana tumen keren avke sar tumare dada! Tumen, o Ruben the o Gad, san binošno pokoleňje, savo mek buter choľarel le RAJES pro Izrael! ¹⁵ Te tumen pes le RAJESTAR visarena a na džana pal leste, mukela le manušen mek buter pre pušta a tumen avena vino-vate vaš oda, hoj savore okla manuša ena zničimen.”

¹⁶ Ale on phende le Mojžišoske: “Ešeb (peršo) amenge domuken te ačhavel ohradi prekal amare stadi the fori prekal amare fameliji. ¹⁷ Amare fameliji ačhena andre kala zorale fori a dživena bi e dar andre kadi phuv a amen pes pririchtinaha amare phralenca le Izraelitenga te džal andro mariben, medik na zalaha e phuv, so ela lengeri. ¹⁸ Na avaha pale khere, medik savore Izraeliti na chudena peskeri phuv sar dedictvos. ¹⁹ Na ela amen phuv maškar lende pre aver sera pal o paňi Jordan, bo chudľam amari phuv kade pro vichodos le Jordanostar.”

²⁰ O Mojžiš lenge phenda: “Te čačes gondolinen oda, so phenen, akor pes pririchtinen te džal andro mariben vaš o RAJ. ²¹ Palis savore murša mi predžan prekal o Jordan anglo RAJ a mušinen pes te marel le ňeprijatelenca dži akor, medik len o RAJ na tradela avri angle leste ²² a te o RAJ zalela odi phuv, ta palis pes šaj visaren pale a anglo RAJ the anglo Izrael avena bi e vina. Avke ela kadi phuv tumaro dedictvos anglo RAJ.

²³ Ale te na dolikerena tumaro lav, phenav tumenge, hoj aleha kerena binos anglo RAJ. Akor šaj džanen, hoj avena marde vaš tumare bini. ²⁴ Avke šaj ačhaven peske o fori prekal tumare čhave the ohradi prekal tumare stadi, ale dolikeren the oda lav, so diňan.”

²⁵ Akor o murša andral o kmeňi Gad the Ruben phende le Mojžišoske: “Amen sam tire služobnika a keraha oda, so amenge prikazinda. ²⁶ Amare čhave, o romňa, o stadi the savore džviri ačhena andro fori andro Gilead. ²⁷ Ale savore tire služobnika predžana prekal o Jordan pririchtimen pro mariben anglo RAJ, avke sar phenda.”

²⁸ Avke o Mojžiš prikazinda le rašaske Eleazaroske, le Jozuaske the le Izraeloskere kmeňengere vodcenge: ²⁹ “Te o murša andral o Gad the Ruben predžana o Jordan pririchtimen pro mariben anglo RAJ, a te tumenge pomožinena te zalel odi phuv, dena lenge e Gilead-oskeri phuv sar lengero dedictvos. ³⁰ Ale te na predžana tumenca o Jordan a na džana tumenca an-

dro mariben, akor mušinena te chudel peskeri phuv maškar tumende andro Kanaan.”

³¹ O murša andral o Gad the Ruben phende: “Keraha avke, sar o RAJ prikazinda peskere služobnikenge.

³² Predžaha o Jordan andre phuv Kanaan pririchtimen pro mariben. Ale e phuv, so chudaha sar d'edictvos, ela kade pro vichodos le Jordanostar.”

³³ Avke o Mojžiš diña le kmeňenge Gad the Ruben the le jepaš kmeňoske Menašše e phuv le Si-chonoskeri, savo sas kralis upral o Amoreja, the e phuv le kraliskeri Ogoskeri andral o Bašan. Diña lenge cali odi phuv a paš oda o fori the o phuva pašal lende.

³⁴ Palis o kmeňos Gad pale ačhađa o fori Dibon, Atarot, Aroer, ³⁵ Atarot-Šofan, Jazer, Jogbeha, ³⁶ Bet-Nimra the o Bet-Haran. Ačhađa kala zorale fori the ohradi prekal o bakre. ³⁷ O kmeňos Ruben pale ačhađa o fori Češbon, Elale the Kirjatajim. ³⁸ Kale trin forenge, so pale ačhade – o Nebo, o Baal-Meon the e Sibma – dine aver nava.

³⁹ O potomki le Machioskere, savo sas čhavo le Menaššeskero, gele pro mariben andre phuv Gilead. Zaiľa la a tradľa avri odarik le Amorejen, save ode bešenias. ⁴⁰ Avke o Mojžiš diña e phuv Gilead le Machioskere potomkenge a on ode ačhile te bešel. ⁴¹ O Jair andral o kmeňos Menašše geľa pro mariben, zaiľa varesave gava andro Gilead a diña lenge nav: Gava le Jairoskere. ⁴² The o Nobach geľa pro mariben a zaiľa o foros Kenat le gavenca. Le foroske Kenat diña nav pal peste Nobach.

O tabora le Izraelitengere pre pušta

33 Kala sas o thana, kaj o Izraeliti peske kerenas tabora, akor sar o Mojžiš the o Aron len lidžanas pal lengere kmeňi andral o Egipt. ² O RAJ prikazinda le Mojžišoske, hoj te zapisinel o thana, kaj pes ačhavelas o taboris. Kada sas lengero drom:

³ O Izraeliti omukle o Egipt dešupandžto (15.) džives andro ešebno (peršo) čhon, jekh džives pal e Patradi. On džanas avri bi e dar andral o foros Raamses angle savore Egiptana, ⁴ save parunenas peskere ešebne muršoren, saven o RAJ murdarda. Aleha o RAJ sikađa, hoj ov hino zoraleder sar lengere devla.

⁵ O Izraeliti gele het andral o Raamses a kerde peske taboris paš o Sukkot.

⁶ Andral o Sukkot gele het a kerde peske taboris paš o Etam, so hino pro agor pre pušta.

⁷ Andral o Etam pes visarde pale ko Pi-Hachiot, pro vichodos le Baal-Cefonostar, a ode peske kerde taboris anglo Migdol.

⁸ Le Pi-Hachiotostar pes mukle dureder a prekal o Lolo Moros pregele pre pušta. Trin džives džanas pal e pušta Etam a kerde peske taboris paš e Mara.

⁹ La Maratar odgele paš o Elim, kaj sas o dešuduj (12) prameňa the eftavardeš (70) palmi a kerde peske ode taboris.

¹⁰ Le Elimostar džanas dureder a kerde peske taboris paš o Lolo Moros.

¹¹ Le Lole Morostar odgele a kerde peske taboris pre pušta Sin.

¹² Sar odgele pal e pušta Sin, kerde peske taboris paš e Dofka.

¹³ Andral e Dofka džanas dureder a kerde peske taboris paš o Aluš.

¹⁴ Andral o Aluš odgele a kerde peske taboris paš o Refidim. Ode na sas paňi prekal o manuša.

¹⁵ Andral o Refidim džanas dureder a kerde peske taboris pre pušta Sinaj.

¹⁶ Palis odgele la puštatar Sinaj a kerde peske taboris paš o Kibrot-Hattaava.

¹⁷ Andral o Kibrot-Hattaava džanas dureder a kerde peske taboris paš o Chacerot.

¹⁸ Andral o Chacerot džanas dureder a kerde peske taboris paš e Ritma.

¹⁹ Andral e Ritma džanas dureder a kerde peske taboris paš o Rimmon-Perec.

²⁰ Andral o Rimmon-Perec odgele a kerde peske taboris paš e Libna.

²¹ Andral e Libna odgele a kerde peske taboris paš e Rissa.

²² Andral e Rissa džanas dureder a kerde peske taboris paš e Kehelata.

²³ Andral e Kehelata odgele a kerde peske taboris paš o verchos Šefer.

²⁴ Andral o verchos Šefer odgele a kerde peske taboris paš o Charad.

²⁵ Andral o Charad džanas dureder a kerde peske taboris paš o Makhelot.

²⁶ Andral o Makhelot odgele a kerde peske taboris paš o Tachat.

²⁷ Andral o Tachat odgele a kerde peske taboris paš o Terach.

²⁸ Andral o Terach džanas dureder a kerde peske taboris paš e Mitka.

²⁹ Andral e Mitka odgele a kerde peske taboris paš e Chašmona.

³⁰ Andral e Chašmona odgele a kerde peske taboris paš o Moserot.

³¹ Andral o Moserot odgele a kerde peske taboris paš o Bene-Jaakan.

³² Andral o Bene-Jaakan džanas dureder a kerde peske taboris paš o Chor-Haggidgad.

³³ Andral o Chor-Haggidgad odgele a kerde peske taboris paš e Jotbata.

³⁴ Andral e Jotbata odgele a kerde peske taboris paš e Abrona.

³⁵ Andral e Abrona gele dureder a kerde peske taboris paš o Ecjon-Geber.

³⁶ Andral o Ecjon-Geber odgele a kerde peske taboris paš o Kadeš pre pušta Sin.

³⁷ Andral o Kadeš džanas dureder a kerde peske taboris paš o verchos Hor paš e hraňica Edom. ³⁸ O Aron geľa pro verchos Hor, avke sar leske o RAJ prikazinda, a ode muľa andro ešebno džives andro

pandžto čhon, saranda (40) berš paloda, sar o Izraeliti avle avri andral o Egipt. ³⁹ Le Aronoske sas šel the bišutrin (123) berš, sar muľa pro verchos Hor.

⁴⁰ (Akor pes došundā o kralis andral o Arad, savo sas Kanaančanos a savo bešelās andro Negev andro Kanaan, hoj aven o Izraeliti.)

⁴¹ Le verchostar Hor džanas dureder a kerde peske taboris paš e Calmona.

⁴² Andral e Calmona odgele a kerde peske taboris paš o Punon.

⁴³ Andral o Punon odgele a kerde peske taboris paš o Obot.

⁴⁴ Andral o Obot odgele a kerde peske taboris paš o Ije-Abarim pre Moabiko phuv.

⁴⁵ Andral o Ije-Abarim džanas dureder a kerde peske taboris paš o Dibon-Gad.

⁴⁶ Andral o Dibon-Gad odgele a kerde peske taboris paš o Almon-Diblatajim.

⁴⁷ Andral o Almon-Diblatajim odgele a kerde peske taboris paš o verchi Abarim anglo verchos Nebo.

⁴⁸ Sar odgele le verchendar Abarim, kerde peske taboris pro Moabike rovini pro vichodos le Jordanostar anglo Jericho. ⁴⁹ Lengero taboris sas pro Moabike rovini paš o Jordan le Bet-Ješimotostar dži ko Abel-Šittim.

O RAJ prikazinel te domarel o Kanaan

⁵⁰ Ode pro Moabike rovini pro vichodos le Jordanostar anglo Jericho phendā o RAJ le Mojžišoske: ⁵¹ "Phen le Izraelitenge kada: 'Sar predžana prekal o Jordan andro Kanaan, ⁵² mušinen te tradel avri savore manušen andral odi phuv. Zničinen savore lengere barune, kaštune the trastune modlen a the savore thana, kaj lašaren peskere devlen. ⁵³ Zalen odi phuv a bešen ode. Diňom la tumenge, hoj te el tumari. ⁵⁴ Rozdelinen odi phuv sar dēdictvos maškar tumare kmeňi the fajti le losoha. Le bareder fajtake dena bareder phuv a la cikneder fajtake dena cikneder phuv sar dēdictvos. Pre kaste savi phuv avela avri le losoha, odi ela leskeri. Dojekh kmeňos chudela peskeri phuv.

⁵⁵ Ale te na tradena avri le manušen andral odi phuv, ola, saven ode mukena, ena tumenge sar o trňi andro jakha the o koľaka andro dume a trapinena tumen andre odi phuv, kaj bešena. ⁵⁶ Palis oda, so kamfom te kerel lenge, kerava tumenge.' "

Le Izraeloskere hraňici

34 O RAJ phendā le Mojžišoske: ² "Le Izraelitenge prikazin kada: 'Sar avena andro Kanaan, andre phuv, so chudena sar dēdictvos, ena kala hraňici:

³ Pro juhos chudena kotor la puštatar Sin paš e Edomoskeri hraňica. Pre vichodno sera chudela e hraňica paš o južno agor le Londe Moroske ⁴ a džala dureder pro juhos le verchengere dromestar Akrabbim, odarik ko Sin a odarik pro juhos le Kadeš-Barneatar, palis ko Chacar-Addar a dži ko Acmon. ⁵ Le Acmonostar pes

visarela ko Egiptsko paňi a odarik džala dži paš o Stredozemno Moros.

⁶ Tumari zapadno hraňica ela o brehos le Stredozemne Moroskero.

⁷ Tumari severno hraňica džala le Stredozemne Morostar dži ko verchos Hor ⁸ a odarik dureder dži ko Lebo-Chamat a the ko Cedad, ⁹ palis prekal o Zifron dži ko Chacar-Enan. Oda ela tumari severno hraňica.

¹⁰ Tumari vichodno hraňica džala le severostar tele andral o Chacar-Enan ko Šefam, ¹¹ odarik džala tele ke Ribla a pro vichodos le Ajinostar dži paš o verchi pro vichodos paš o Galilejsko Moros †, ¹² palis tele pašal o Jordan dži paš o Londo Moros.

Oda ela calo hraňica pašal tumari phuv.' "

¹³ Paloda o Mojžiš diňa le Izraelitenge kada prikazis: "Prekal o losos tumenge rozulaven sar dēdictvos kadi phuv, so o RAJ prikazinda te del le eňa the jepaš kmeňenge. ¹⁴ Bo o kmeňi Ruben the Gad the o jepaš kmeňos Menašše imar peskeri phuv chudle ¹⁵ pro vichodos le Jordanostar anglo Jericho."

O vodci, save rozulavena e phuv

¹⁶ O RAJ phendā le Mojžišoske: ¹⁷ "Kala džene tumenge rozulavena (rozdelinena) e phuv: O rašaj Eleazar the o Jozua, le Nunoskero čhavo, ¹⁸ a kide avri po jekh vodcas andral dojekh kmeňos, hoj lenge te pomožinen te rozulavel e phuv."

¹⁹ Ola manuša sas:

andral o kmeňos Juda o Kaleb, le Jefunoskero čhavo;

²⁰ andral kmeňos Šimeon o Šemuel, le Ammichudoskero čhavo;

²¹ andral o kmeňos Benjamin o Elidad, le Kilonoskero čhavo;

²² andral o kmeňos Dan o Bukki, le Jogliskero čhavo;

²³ andral o kmeňos Menašše o Channiel, le Efordoskero čhavo;

²⁴ andral o kmeňos Efrajim o Kemuel, le Šiftanoskero čhavo;

²⁵ andral o kmeňos Zebulun o Elicafan, le Parnachoskero čhavo,

²⁶ andral o kmeňos Jissachar o Paltiel, le Azanoskero čhavo;

²⁷ andral o kmeňos Ašer o Achihud, le Šelomiskero čhavo;

²⁸ andral o kmeňos Naftali o Pedahel, le Ammichudoskero čhavo.

²⁹ Kala hine o murša, savenge o RAJ prikazinda, hoj te rozulaven le Izraelitenge e phuv Kanaan sar dēdictvos.

O fori prekal o Leviti

35 Sar sas o Izraeliti pro Moabike rovini pro vichodos le Jordanostar anglo Jericho, o RAJ phendā le Mojžišoske: ² "Prikazin le Izraelitenge, hoj le Levitenge te den andre peskere phuva o fori, kaj te

† E Hebrejiko čhib: Kinneret

bešen, the o malí pašal lende. ³ Andro fori bešena a o malí ena prekal lengere gurumña, stadi the aver do-bitkos.

⁴ O malí pašal o fori, so dena le Levitenge, ena džindarde 450 metri le foroskere murendar. ⁵ Kala ena o malí prekal lengero dobitkos. O malí le foroskere murendar merinen avri 900 metri pro vichodos, juhos, zapados the severos. †

⁶ Le Levitenge dena šov fori, andre save pes šaj džala te garuvel oda, ko varekas murdarda, ale na kamla. A paš oda len dena the aver saranda the duj (42) fori.

⁷ Savore fori the o malí pašal lende, so dena le Leviten, ena saranda the ochto (48). ⁸ Dojekh Izraeliko kmeños dela prekal o Leviti o fori peskera phuvatar pal oda, ke-ci les hin phuva. Le prekal o Leviti buter fori le kmeňostar, saves hin bareder phuv, a le frimeder fori le kmeňostar, saves hin frimeder phuv."

O fori pro garuđipen

⁹ O RAJ mek phenda le Mojžišoske: ¹⁰ "Phen le Izraelitenge kada: 'Sar predžana prekal o Jordan andro Kanaan, ¹¹ kiden avri o fori ††, andre save pes o manuš šaj garuvel, te varekas murdarel, ale na kamla. ¹² Ola fori ena pro garuđipen oleske, ko murdarda, hoj e famelija le muleskeri les te na murdarel sigeder, sar ulahas avrišundo anglo sudos. ¹³ Ela tumen šov fori pro garuđipen. ¹⁴ Kiden peske avri trin fori pro vichodos le Jordanostar the trin fori andro Kanaan. ¹⁵ Kala šov fori ena pro garuđipen na ča prekal o Izraeliti, ale the prekal o cudzinci the ola, ko hine avre narodendar a bešen maškar tumende. Ode pes šaj garuvel oda, ko varekas murdarel, ale na kamla.

¹⁶⁻¹⁸ Te vareko demel varekas le trasteha, le bareha abo le kašteha avke, hoj oda dženo merela, hino vrahos a mušinel te merel. ¹⁹ E nekpašeder famelija le muleskeri šaj murdarel le vrahos, sar les arakhela. ²⁰ Te vareko nalače gondolišagoha varekas murdarela avke, hoj les ispidela abo čhivela andre leste vareso, ²¹ abo les demela le vasteha avke, hoj merela, oda dženo hino vrahos a mušinel te merel. E nekpašeder famelija le muleskeri šaj les murdarel, te les arakhela.

²² Ale šaj pes ačhel, hoj vareko na gondolinen pro nalačo a ispidel varekas abo čhivel andre leste vareso, ²³ abo mukel tele o bar, so les šaj murdarel, bo na dikhla les, a oda dženo merela, ale ov na sas leha ňeprijateljís aňi leske na gondolinelas te kerel nič nalačo, ²⁴ akor o Izraeliti rozsudzinena pal kala zakoni maškar oda, ko murdarda, the maškar e nekpašeder famelija ole murdarde manušeskeri. ²⁵ O Izraeliti oles, ko murdarda, lena avri la famelijakere vastendar a lidžana les pale andro foros, kaj pes angloda garuđa. Ode mušinel te ačhel, medik na merela o nekbareder rašaj, savo sas pomakhlo le sentne olejoha.

²⁶ No te oda dženo, ko murdarda, džala avri andral o foros andre savo denašla, ²⁷ a te les jekh andral e famelija le muleskeri arakhela avri ole forostar a mur-

† E Hebrejiko čhib na del pes te ačhalol. †† O fori kaj šaj zachraňinen peskero dživipen.

darela les, na ela vinovato sar vrahos. ²⁸ Vašoda oda dženo, ko murdarda, mušinel te ačhel andro foros pro garuđipen, medik na merela o nekbareder rašaj. Ča akor šaj pale džal andre peskero gav.

²⁹ Kada ela zakonos prekal savore tumare pokoleňja všadzik, kaj bešena.

³⁰ Oles, ko murdarda, pes šaj murdarel ča akor, te ela pre oda duj švedki, abo buter. Te svedčinela ča jekh švedkos, na ela oda dos, hoj te el odsudzimen pro meriben.

³¹ O vrahos, savo hino vinovato, mušinel te el murdardo, našti pes cinel avri le lovenca.

³² Te oda dženo, ko denašla andro foros pro garuđipen, kamel te džal het pale te bešel andre peskeri phuv, našti pes cinel avri le lovenca, hoj te džal khere sigeder, sar merel o nekbareder rašaj.

³³ Ma meľaren e phuv andre savi bešen, bo o rat le murdarde manušeskeri meľarel e phuv. Odi phuv pes obžušarela ča te ela avričhordo o rat le vrahoskero, ko ešeb čhorda avri o rat. ³⁴ Ma meľaren le rateha e phuv, andre savi bešen a andre savi bešav the me, bo me, o RAJ, bešav maškar tumende.' "

O dedično pravos le čhajengero

36 Akor o vodci andral e famelija le Gileadoskeri, savo sas čhavo le Machiroskero, čhavo le Menaššeskero andral le Jozefoskero kmeños, gele ko Mojžiš the ke aver anglune fajtakere vodci. ² Phende leske: "Rajeja, o RAJ tuke prikazinda, hoj le losoha te rozdfelines le Izraelitenge e phuv sar dedictvos. O RAJ tuke prikazinda, hoj e phuv amare phraleskeri le Celofchadoskeri te des leskere čhajenge. ³ No te džaha romeste andre aver kmeños, amaro dedictvos ela dino ole kmeňoske. Avke našavaha o kotor la phuvatar, so sas amenge diňi. ⁴ Sar avela o Berš le Radišagoskero, so hin sako pendato (50.) berš, prekal o Izraeliti, lengero phuvakero kotor ela dino lengere neve kmeňoske. A avke amaro kmeños našavela odi phuv pro furt."

⁵ Avke o Mojžiš phenda le Izraelitenge kada prikazis le RAJESTAR: "Le muršen andral le Menaššeskero kmeños † hin čačipen. ⁶ Pal o čhaja le Celofchadoskere o RAJ prikazinda kada: 'Te džana romeste, oda dženo mušinel te el andral lengero dadeskero kmeños. ⁷ E dedično phuv le Izraelitengeri našti predžal andral jekh kmeños andre aver, ale savore Izraeliti mušinen te likerel peskere dadeskeri dedično phuv. ⁸ Vašoda dojekh čhaj, savi chudela e dedično phuv andre vare-savo Izraeliko kmeños, mušinel te džal romeste andre peskere dadeskero kmeños, hoj savore Izraeliti te chuden o dedictvos pal peskere dada. ⁹ Avke na džala o dedictvos andral jekh kmeños andre aver, ale savore Izraelike kmeňi likerena peskeri phuv.' "

¹⁰ Le Celofchadoskere čhaja kerde avke, sar o RAJ prikazinda le Mojžišoske. ¹¹ E Machla, e Tirca, e Chogla, e Milka the e Noa gele romeste pal peskere strična

‡ E Hebrejiko čhib: le Jozefoskero kmeños

phrala pal le dadeskeri sera. ¹² Ačhile romňija le muršenge andral o kmeňos Menašše, savo sas čhavo le Jozefoskero, a lengeri d'edično phuv ačhiľa lengeri dadeskera fajtake.

¹³ Kala prikazi the zakoni diňa o RAJ le Izraelitenge prekal o Mojžiš pro Moabike rovini pro vichodos le Jordanostar anglo Jericho.

5. MOJŽIŠOSKERO

O ešebno vakeriben le Mojžišoskero

1 Kala hine o lava, so phendā o Mojžiš savore Izraelitenge pro vichodos le Jordanostar pre pušća andre Araba pre aver sera paš o Suf, maškar o fori Paran the Tofel pal jekh sera a maškar o fori Laban the Chacerot the Di-Zahab pre aver sera. ² O drom le Chorebostar dži paš o Kadeš-Barnea, so džal prekal o Seiroskere brehi andre phuv Edom, likerel dešujekh (11) džives.

³ Saranda (40.) berš paloda, sar avle avri andral o Egipt, ešebno (peršo) džives andro dešujekhto (11.) čhon, phendā o Mojžiš le Izraelitenge savoro, so leske prikazindā o RAJ te phenel. ⁴ Sas oda paloda, sar ňerindā (zvitazindā) upral o Amorejiko kralis Sichon, savo bešelas andro Češbon, a sar ňerindā andro Edrej upral o Bašaňiko kralis Og, savo bešelas andro Aštarot.

⁵ Andro Moab, pal o Jordan, chudľa o Mojžiš te vakerel avri le RAJESKERO zakonos:

⁶ "O RAJ, amaro Del, amenge pro Choreb phendā: 'Imar but bešen paš kada verchos. ⁷ Sthoven o taboris a muken pes pro drom. Džan pre le Amorejengere brehi the andre savore fori andre dolina Araba – pro verchi the tele pre ňižina; the andro Negev the paš o moroskero brehos a džan andro Kanaan the Libanon dži ko baro paňi Euftrat. ⁸ Dikh, dav tumenge kadi phuv. Džan andre a zalen odi phuv, pal savi o RAJ diňa lav la veraha, hoj la dela tumare dadenge – le Abrahamoske, le Izakoske, le Jakoboske – the lengere potomkenge.' "

O Mojžiš ačhavel sudcen

⁹ O Mojžiš phendā le manušenge: "Andre oda časos, sar mek samas paš o verchos Sinaj, phendom tumenge: 'Na birinav man korkoro pal tumende te starinel. ¹⁰ O RAJ, tumaro Del, tumendar kerđa ajci but, hoj adadžives san imar ajci sar o čerčeňa pro ňebos.

¹¹ Mi del o RAJ, o Del tumare dadengero, hoj te aven ezerval buter, sar san akana, a mi požehňinel tumen avke, sar tumen diňa lav. ¹² Ale sar šaj me birinav te zfidžal tumare pharipena a sar šaj rozsudzina savoro korkoro? ¹³ Kiden avri andral dojekh tumaro kmeňos skušimen manušen, saven o manuša prindžaren, hoj hine godaver the ačaľon, a ačhavava len vodcenge upral tumende.'

¹⁴ Akor mange tumen phendān, hoj oda, so phendom, hin mištes te kerel.

¹⁵ Avke olen skušimen the godavere muršen andān ke ma a me len ačhadom vodcenge upral o ezeros, šel, penda abo deš manuša. Ačhadom the kmeňengere vodcen. ¹⁶ Akor prikazindom tumare sudcenge: 'Šunen mištes avri tumare phralen a sudzinen čačipnaha, choc te vareko pes sudzanela peskere phraleha abo le cudzincoha, savo dživel maškar tumende. ¹⁷ Pro sudos ma likerem paš ňikaste buter, ale šunen avri dojekhes jednakones, či oda ela cikno vaj baro manuš. Nikastar tumen ma daran, bo o sudos hin le Devlestar! Te na džanena te rozsudzinel korkore, aven oleha ke ma a me oda rozsudzina.' ¹⁸ Akor tumenge phendom savoro, so kampil te kerel."

Pal o murša, save predikhle e phuv

¹⁹ "Palis pes mukľam te džal dureder le verchostar Choreb a phirahas pal odi bari the nalači pušća, avke sar oda predžidľan pro drom, sar džahas ko Amorejika brehi, avke sar amenge prikazindā o RAJ, amaro Del, a dogelam dži ko Kadeš-Barnea. ²⁰ Ode tumenge phendom: 'Doavľan ko Amorejika brehi, so amenge diňa o RAJ, amaro Del. ²¹ Dikh, o RAJ, tiro Del, tuke diňa kadi phuv, so hiňi angle tute. Dža, zale la, avke sar tuke prikazindā o RAJ, o Del tire dadengero! Ma dara a ma izdra!'

²² Akor avľan savore angle ma kaleha: 'Bičhavas anglal muršen, save džana te predikhel e phuv, hoj amenge te phenen, save dromeha kampil te džal a andre save fori džaha te bešel.'

²³ Kada, so kamľan, mange sas pre dzeka, vašoda maškar tumende kidňom avri dešuduje (12) muršen, jekhes andral dojekh kmeňos. ²⁴ On pes mukle te predikhel odi phuv, gele upre pro brehi a doavle dži andre Dolina Eškol a predikhle la. ²⁵ Palis ola murša amenge ande ovocje, so odarik ile, a phende amenge: 'Odi phuv, so amenge del o RAJ, amaro Del, hiňi lači.' "

Le manušengero napačaben

²⁶ "Ale tumen pes vzburindān a na geľan odi phuv te zalel, sar tumenge prikazindā o RAJ, tumaro Del.

²⁷ Reptinenas andre peskere stani a vakerenas: 'O RAJ amen iľa avri andral o Egipt ča vašoda, hoj amen te del andro vasta le Amorejenge a te murdarel amen. ²⁸ Kaj oda amen džas? Daras pes, bo amare phrala amenge kerde tele e dzeka, sar phende: "O manuša ode hine zoraleder the učeder sar amen a lengere fori hine zo-

rale le bare murenca dži ko ňebos. Dikhľam ode the le obren, le Anakoskere potomken.”’

²⁹ Akor tumenge phendom: ‘Ma daran pes lendar a ma izdran! ³⁰ O RAJ, tumaro Del, savo džal angle tumende, pes marel vaš tumenge, avke sar oda furt kerelas andro Egipt angle tumare jakha ³¹ a the pre pušća. Ode dikhľan, hoj o RAJ, tumaro Del, tumen ľidžalas avke sar o dad peskere čhas, pal calo drom, medik na avľan pre kada than.’

³² No the avke na pačanas le RAJESKE, tumare Devleske, ³³ savo džalas angle tumende rači sar o jagalo slupos the dživese sar e chmara, hoj te arakhel thana prekal tumare tabora a hoj te sikavel tumenge o drom, pal savo majinenas te džal.”

Lengero trestos

³⁴ ‘Sar o RAJ šundǎ, so vakerenas, cholľisalľa a la veraha diňa lav: ³⁵ ‘Andral kada nalačo pokoleŋje ňiko na džala andre kadi lači phuv, pal savi la veraha diňom lav, hoj la dava tumare dadenge. ³⁶ Ča o Kaleb, le Jefunnoskero čhavo, džala andre. Ov sas mange cale jileha verno. Leske the leskere potomkenge dava kadi phuv, so sas te predikhel.’

³⁷ Vaš tumenge o RAJ cholľisalľa the pre ma a phendǎ: ‘Na džaha andre aňi tu. ³⁸ Džala andre tiro služobňikos o Jozua, le Nunoskero čhavo. Zoraľar les, bo ov ľidžala le Izraeliten te zalel e phuv andro dedľctvos.’

³⁹ Palľis o RAJ phendǎ amenge savorenge: ‘Džana andre tumare cikne čhavore, pal save phenenas, hoj ena zaile – o čhavore, save adadžives mek na džanen, so hin lačo a so na. Lenge la dava a on la zalena. ⁴⁰ Ale tumen, visaren pes a džan pale pre pušća le dromeha ko Lolo Moros.’

⁴¹ Tumen mange odphendǎn: ‘Kerďam binos anglo RAJ. Džas a maras pes avke, sar amenge prikazindǎ o RAJ, amaro Del.’ Palľis dojekh tumendar pes pririchtindǎ pro mariben a gondolľinenas peske, hoj ela lokes te džal pro brehengere phuva.

⁴² Ale o RAJ mange phendǎ: ‘Phen lenge, hoj pes te na džan te marel, bo me na avava maškar lende a lengere ňeprijatelǎ ňerinenas upral lende.’

⁴³ Me tumenge oda phendǎm, no tumen the avke na šundǎn. Vzburindǎn pes pro le RAJESKERO prikazis a geľan tumare baripnaha pro brehengere phuva.

⁴⁴ Palľis džanas pre tumende o Amoreja, save bešenas pre ola thana. Džanas pal tumende sar o včeli a roztradle tumen le Seirostar dži ke Chorma. ⁴⁵ Sar avľan pale, rovenas anglo RAJ. Ov tumen na šundǎ avri a na diňa pes ke tumende anglal. ⁴⁶ Vašoda mušindǎn te ačhel andro Kadeš ajci but dživesa, keci ode ačhilǎn.”

O phiriben pal e pušća

2 ‘Palľis pes visardǎm a geľam pre pušća le dromeha ko Lolo Moros, avke sar mange phendǎ o RAJ. But časos phirahas pašal o brehi Seir.

² Akor mange o RAJ phendǎ: ³ ‘Imar dos phirenas pašal kale brehi, akana džan pro severos. ⁴ Le manušenge de kada prikazis: “Džan prekal e phuv Seir †, so hiňi tumare phraleskeri le Ezavoskeri the leskere potomkengeri. On tumendar darana, ⁵ ale den tumenge pozoris, hoj tumen te na chuden lenca te marel, bo lengera phuvatar tumenge na dava aňi sikrica. O Seiroskere brehi diňom le Ezavoske the leskere potomkenge. ⁶ Lendar cinena o chaben the o paňi, hoj tumen te el, so te chal the te pijel.

⁷ Se o RAJ, tumaro Del, tumen požehňinelas andre savoreste, so kerenas. Ov pes starinelas pal tumende, sar phirenas pal kadi bari pušća. O RAJ, tumaro Del, hi-no tumena imar saranda (40) berš a ňič tumenge na chibalľinelas.”’

⁸ Obgeľam amare Ezavoskere phralen, save bešen andro Seir. Džahas pal o drom Araba, so chudel pro juhos paš o Elat the Ečjon-Geber, palľis pes visardǎm pre pušćakero drom, so džal andro Moab.

⁹ Akor mange o RAJ phendǎ: ‘Ma dža pro Moabčana a ma muk tut lenca andro mariben, bo lengera phuvatar tumenge na dava ňič. O foros Ar diňom lenge, le Lotoskere potomkenge.’

¹⁰ (Angloda ode bešenas o baro narodos o Emimčana – o manuša, so sas igen uče, ajse sar o Anaka. ¹¹ Le Emimčanen the le Anaken o narodi džanen avke sar le Refajen, ale o Moabčana len vičinen Emimčana. ¹² Angloda the o Choričana bešenas andro Seir, ale o potomki le Ezavoskere len odarik tradle a murdarde avri. On chudle te bešel pre lengere thana, avke sar oda kerde o Izraeliti andre phuv, so lenge diňa o RAJ.)

¹³ O RAJ mek amenge phendǎ: ‘Akana ušćen a predžan prekal e dolina Zered.’ Avke la pregeľam.

¹⁴ Tranda the ochto (38) berš amenge ľikerďa o drom andral e Kadeš-Barnea dži akor, sar pregeľam e dolina Zered. Akor imar mule avri savore maribnaskere murša andral oda calo pokoleŋje avke, sar lenge la veraha phendǎ o RAJ. ¹⁵ Le RAJESKERO vast džalas pre lende, medik savoredžene na mule avri.

¹⁶ Sar le manušendar mule avri savore maribnaskere murša, ¹⁷ o RAJ mange phendǎ: ¹⁸ ‘Adadžives predžaha prekal e Moabiko phuv paš o foros Ar. ¹⁹ Sar aveha pašes paš le Ammončanengeri phuv, ma dža pre lende a ma muk tut lenca andro mariben, bo lengera phuvatar tut na dava ňič. Odi phuv diňom lenge, le Lotoskere potomkenge.’

²⁰ (Kadi phuv o manuša lenas sar le Refajengeri, bo angloda ode bešenas. O Ammončana len vičinenas Zamzumčana. ²¹ On sas baro narodos – manuša, so sas igen uče, ajse sar o Anaka – ale o RAJ len zňičindǎ, hoj o Ammončana te zalen odi phuv a te bešen ode. ²² O RAJ avke kerďa the le Edomitenge, le Ezavoskere potomkenge, save bešen andro Seir. O Raj zňičindǎ le Choričanen, hoj o Edomiti te zalen odi phuv, a avke ode bešen dži adadžives. ²³ Le Avvičanen, save bešenas andro gava dži ke Gaza, murdarde avri o

† Oda hin o Edom.

Kaftorčana, save avle pal o ostrovos Kaftor †, a chudle te bešel andre lengeri phuv.)”

Domaren o foros Češbon

²⁴ “Sar imar predžahas prekal e phuv Moab, o RAJ amenge phendā: ‘Akana uščen, džan a predžan e dolina Arnon! Diňom tumenge andro vasta le Amorejike kralis Sichon andral o foros Češbon the leskeri phuv. Chude te zalel leskeri phuv a dža pre leste!

²⁵ Kale dživesestar kerava, hoj savore narodi tel o ňebos tutar te daran a sako tutar te izdral daratar, sar šunena pal tute.’

²⁶ Akor bičhadom le muršen pal e pušća Kedemot ko Češbonoskero kralis Sichon kale lavenca: ²⁷ ‘Domuk mange te predžal prekal tiri phuv. Džaha ča pal o drom a na džaha pal leste tele, aňi pre čači aňi pre baľogňi sera. ²⁸ O chaben, so chaha, the o paňi, so pijaha, tumendar cinaha vaš o love. Ča muk amen te predžal, ²⁹ avke sar amenge domukle te predžal prekal peskere phuva o Ezavoskere potomki andral o Seir, the o Moabčana andral o Ar, medik na predžaha o Jordan andre phuv, so amenge dela o RAJ, amaro Del.’ ³⁰ Ale o Češbonoskero kralis Sichon amenge na kamľa te domukel, hoj te predžas prekal leskeri phuv. Bo o RAJ, amaro Del, leske kerđa o jilo zoralo sar bar, hoj tuke les te del andro vasta, avke sar oda hin the adadžives.

³¹ O RAJ mange phendā: ‘Dikh, chudľom tuke te del andro vasta le Sichon the leskeri phuv. Dža a chude la te zalel.’

³² O Sichon savore peskere muršenca avľa pre amende pro mariben paš o Jahac. ³³ O RAJ, amaro Del, les diňa amenge andro vasta a amen murdardam les, leskere čhaven the savore leskere muršen. ³⁴ Akor zailam a zňičindam savore leskere fori. Murdardam savore muršen, romňen the čhaven. Ňiko amenge našti denašľa. ³⁵ Andral ola fori, so zailam, mukľam peske ča o dobitkos the o vzacna veci. ³⁶ O RAJ, amaro Del, amenge pomožindā te zalel savore fori le Aroerostar, so hino paš o dolina Arnon, dži paš o Gilead. Ňisavo foros prekal amende na sas dos zoralo. ³⁷ Ale na geľam paš e Ammoniko phuv, aňi ko brehos paš o paňi Jabbok, aňi paš o fori pro brehi abo avrether, kaj amenge o RAJ prikazindā, hoj te na džas.”

Domaren o Og

3 “Palis pes odarik visardam a džahas le dromeha ko Bašan pro severos, kaj kralinelas o Og. Ov caľa peskera armadaha avelas pre amende pro mariben paš o foros Edrej. ² Ale o RAJ mange phendā: ‘Ma dara tut lestar, bo me tuke les diňom andro vasta the calľ leskeri armada the leskeri phuv. Ker leha avke, sar kerďal le Amorejike kraliħa, le Sichonoha, andral o Češbon.’

³ O RAJ, amaro Del, amenge diňa andro vasta le kralis Og the caľa leskera armada. Murdardam len a Ňiko amenge našti denašľa. ⁴ Akor zailam savore

leskere šovardeš (60) fori the calľ phuv Argob, kaj kralinelas o Bašaňiko kralis Og. Na sas foros, savo na zailamas. ⁵ Savore ole zorale foren sas uče muri, brani the zavori, ale sas the but aĵse fori, kaj na sas muri the brani. ⁶ Zňičindam savore fori a murdardam savore muršen, džuvľen the čhavoren, avke sar kerďam andro fori le Sichonoskere le Češbonoskere kraliskere. ⁷ Zailam peske savoro dobitkos the o vzacna veci andral ola fori.

⁸ Avke andre oda časos ilam e phuv la dolinatar Arnon dži paš o verchos Chermon le duje Amorejengere kralenge, save bešenas pro vichodos le Jordanostar. ⁹ (O Sidončana vičinen o verchos Chermon Sirjon a o Amoreja Senir.) ¹⁰ Zailam calľ phuv le Ogoskeri: o fori pre phuv, so hiňi učeš, calo Gilead the calo Bašan dži paš o fori Salcha the Edrej pro vichodos. ¹¹ (O kralis Og sas posledno le Refajendar. Leskero mochtu †† hino thodo andro Ammoniko foros Rabba. Hino kerdo le barestar ‡, štar metri džindardo the duj metri buchlo.)”

Rozulavel e phuv pro vichodos

¹² “Sar zailam kadi phuv, diňom le kmeňoske Ruben the Gad e phuv pro severos le Aroerostar, so hiňi paš e dolina Arnon, a jepaš le brehengeru phuvatar le Gileadostar peskere forenca. ¹³ Diňom aver jepaš phuv le Gileadostar the calo Bašan – o krališagos le Ogoskero – le jepaš kmeňoske Menašše. Oda hin calľ phuv Argob.

Calo Bašan angloda vičinenas e phuv le Refajengeri. ¹⁴ O Jair andral o kmeňos Menašše zaila calľ phuv Argob dži paš e Gešurengeri the Maachatengeri phuv andro Bašan a diňa lenge nav pal peste – Chavot-Jair ††. Avke oda hin dži adadžives.

¹⁵ Le Machiroske diňom o Gilead. ¹⁶ Le kmeňenge Ruben the Gad diňom kotor le Gileadostar dži paš e dolina Arnon. O maškar la dolinakero sas e južno hraňica lengeru phuvake a e severno hraňica sas o paňi Jabbok, so hin e hraňica le Ammončanenca.

¹⁷ E zapadno hraňica kale trine kmeňengere sas o Jordan andre dolina Araba, le Kinneretostar †† dži paš o Londo Moros ††† tel o verchos Pisga pro vichodos.

¹⁸ Palis lenge prikazindom:

‘O RAJ, tumaro Del, tumenge diňa kadi phuv, hoj la te zalen. Savore murša, save šaj džan andro mariben, mi predžan prekal o Jordan vizbrojimen angle peskere Izraeloskere phrala. ¹⁹ Ča tumare romňa, čhave the dobitkos – džanav, hoj tumen hin but dobitkos – šaj ačhen andre tumare fori, so tumen diňom. ²⁰ Pomožinen tumare phralenge, medik lenge o RAJ na dela te dživel andro smirom, avke sar tumenge; medik na zalena e phuv, so lenge del o RAJ pro zapados le Jordanostar. Sar la zalena, šaj pes pale visaren andre phuv, so tumenge diňom.’

²¹ Le Jozuaske prikazindom: ‘Pre peskere jakha dikhľal, so kerďa o RAJ, tumaro Del, kale duje kralenge.

†† Abo: leskero hados ‡ Abo: le trastestar †† Oda hin: le Jairoskere gavora. †† Oda hin o Galilejsko Moros. ††† Oda hin o Mulo Moros.

† Oda hin e Kreta.

Avke kerela o RAJ savore krališagenca, khatar tu predžaha. ²² Ma daran tumen lendar, bo o RAJ tumaro Del korkoro pes marela vaš tumende.'

²³ Andre oda časos igen man modlinavas: ²⁴ 'Ó, Adonaj, RAJEJA, tu chudlál te sikavel peskere služobnikoske, savo sal baro the zoralo. Či hin mek varekaj pro űebos vaj pre phuv ajso del, savo kerdahas ajse bare the zorale skutki sar tu? ²⁵ Mangav tut, muk man te predžal te dikhel odi lači phuv, so hiűi pal o paűi Jordan, odi šukar brehengeri phuv the o Libanon.'

²⁶ Ale o RAJ pre ma cholisalíla vaš tumende a na šunda man avri. Phenda mange: 'Imar dos! Ma vaker mange buter pal oda. ²⁷ Dža upre pro verchos Pisga a rozdikh tut mištes pro severos, pro juhos, pro vichodos the pro zapados. Dikheha oda tire jakhenca, ale o Jordan na predžaha. ²⁸ Phen le Jozuaske, so te kerel, povzbudzin les a de les zor. Ov predžala o Jordan anglal kala manuša a rozulavela lenge andro dedictvos e phuv, so tu dikheha.'

²⁹ Paloda ačhilam andre dolina paš o foros Bet-Peor.'

Te dolikerel pes o zakonos

4 "Akana, Izrael, šun o prikazi the o zakoni, so tumen sikavav te dolikerel, hoj te dživen a te džan te zalel e phuv, so tumen del o RAJ, o Del tumare dadengero. ² Ma dothoven űič ke oda, so tumenge prikazinav, aűi ma odlen, ale dolikerena o prikazi le RAJESKERE, tumare Devleskere, so angle tumende thovav.

³ Pre tumare jakha dikhlán, so o RAJ kerđa paš o verchos Peor, sar murdarđa dojekhes, ko lašarelas la modla Baal-Peor. ⁴ Ale tumen, save sanas pačivale le RAJESKE, san adadžives džide.

⁵ Dikhen, sikavavas tumen o prikazi the o zakoni avke, sar mange prikazinda o RAJ, miro Del, hoj len te dolikeren the andre odi phuv, so džan te zalel. ⁶ Mištes len dolikeren, bo oda sikavela tumaro godaveripen the achaluvipen le narodenge. Bo sar on šunena pal savore prikazi the zakoni, phenena: 'Kada baro narodos hino čačes igen godaver.' ⁷ Hin varekaj ajso baro narodos, kaske lengere devla ulehas avke pašes sar amenge o RAJ, amaro Del, kana ča ke leste vičinas? ⁸ Hin varesave bare narodos ajse čačipnaskere prikazi the zakoni sar calo kada zakonos, so adadžives tumenge me dav?

⁹ Dodikhen mištes pre oda, hoj te na bisteren, so pre peskere jakha dikhlán, a te na našlól andral tumare jile, medik dživen. Sikaven pal oda tumare čhaven the le čhavengere čhaven. ¹⁰ Leperen tumenge pro džives, sar ačhenas paš o verchos Choreb † anglo RAJ, angle peskero Del, sar mange phenda: 'An jekhetane savore mire manušen, hoj te šunen mire lava a te siklón te del pačiv man pal calo peskero dživipen a te sikaven the peskere čhaven oda te kerel.' ¹¹ Sar akor gelán a ačhenas anglo verchos, so sas zaučhardo la bara kafa chmaraha a e jag labolas dži o űebos, ¹² o RAJ tumenca vakereles andral e jag. Šundan les te vakerel, ale na

† Oda hin o verchos Sinaj.

dikhlan les; šundolas ča leskero hangos. ¹³ Akor tumenge phenda peskeri zmluva, so prikazinda, hoj te dolikeren: o Deš Prikazaűja, so pisinda pro duj barune tabli. ¹⁴ Mange akor o RAJ prikazinda, hoj tumen te sikavav o prikazaűja the o zakoni, hoj len te dolikeren andre phuv, savi džana te zalel.

¹⁵ Oda džives, sar o RAJ vakereles tumenca andral e jag pro verchos Choreb, na dikhlán űisavi podoba, vašoda dikhen pre oda, ¹⁶ hoj te na keren binos: Ma keren űisavi modlengeri podoba, aűi podoba le muršeskeri, aűi la džuvlakeri, ¹⁷ aűi podoba la űisava džvirinakeri, so hin pre phuv, aűi podoba le čiriklengeri, so letinen pro űebos, ¹⁸ aűi podoba le džvirendar, so pes cirden pal e phuv, aűi podoba le űisave ribengeri, so hin andro paűi. ¹⁹ A sar dikhena upre pro űebos a dikhena o kham, o čhon the o čercheűa – savoro, so hin andro űebos – ma den tumen te scirdel, hoj tumen lenge te klaűinen a te lašaren len. Se o RAJ, tumaro Del, len diűa savore narodenge tel calo űebos.

²⁰ Ale tumen o RAJ zachraűinda andral o Egipt, andral o jagalo bov. Ila tumen avri, hoj te aven leskere manuša, avke sar oda hin the adadžives.

²¹ Vaš tumenge pre ma o RAJ cholisalíla a phenda la veraha, hoj na predžava o Jordan a na džava andre odi lači phuv, so tumenge del andro dedictvos o RAJ, tumaro Del. ²² Me merava andre kadi phuv. Na predžava o Jordan, ale tumen predžana a zalena odi lači phuv. ²³ Dikhen mištes pre oda, hoj te na bisteren pre zmluva le RAJESKERI, tumare Devleskeri, so tumenca phandla. Ma keren űisavi podoba la modlakeri, bo oda tumenge o RAJ, tumaro Del, zakazinda. ²⁴ Se o RAJ, tumaro Del, hino sar e jag, so zlabarel savoro, o žarlivo Del.

²⁵ Sar avena imar but časos andre odi phuv a ela tumen čhave the lengere čhave, ma keren binos oleha, hoj peske kerena modla andre chocsavi podoba. Bo oda ela nalačo andro jakha le RAJESKERE a cholisaűola pre oda. ²⁶ Vičínav adadžives sar švedkos o űebos the e phuv pre tumende, hoj te man na šunena, sig našlóna andral e phuv. Na dživena igen but andre phuv pal o Jordan, so džan te zalel. Avena calkom zűičimen. ²⁷ O RAJ tumen roztradela maškar o narodi a avena ča frima maškar o narodi, ke save o RAJ tumen lidžala.

²⁸ Ode služinena le devlengere, so o manuša kerena peskere vastenca le kaštestar the le barestar, so na šunen, na dikhen, na chan, aűi na voűinen.

²⁹ Ode rodena le RAJES, peskere Devles, a te les rode na cale peskere jileha the dušaha, arakhena les. ³⁰ Sar avena andro baro pharipen a kada savoro pes tumenge ačhela, akor andro posledna dživesa avena pale ko RAJ, ke peskero Del, a šunena les. ³¹ O RAJ, tumaro Del, hino lačhejileskero, na omukela aűi na zűičinelena tumen, aűi na bisterela pre zmluva, so phandla la veraha tumare dadenca.

O RAJ hin o Del

³² Rode andro čirlatuno časos, akorestar, sar o Del stvorinda le manušes pre phuv, jekhe űeboskere akorestar dži ke aver, či pes vareso kajso baro ačhilá

abo pal oda vareko šundā? ³³ Šundā varesavo narodos le Devles te vakerel andral e jag, avke sar šundān tumen, a palis ačhiġa te dživel? ³⁴ Či iġa avri varesavo del peskere manušen avre narodostar le skuškenca, le znameņjenca, le zazrakenca, le maribnaha, le skutkenca the la bara zoraha, avke sar oda kerđa angle tumare jakha o RAJ, tumaro Del, andro Egipt?

³⁵ Tumen oda dikhlān, hoj te prindžaren, hoj o RAJ hino o Del a aver del nane, ča ov. ³⁶ Ov tumenge domukġa te šunel leskero hangos andral o űebos, hoj tumen te sikavel. Pre phuv tumenge sikađa e jag a andral e jag šundān leskere lava. ³⁷ Ča vašoda, hoj kameġas tire daden, kidġa peske avri the lengere potomken. Ov džalas tumenca a peskera bara zoraha tumen iġa avri andral o Egipt, ³⁸ hoj angle tumende te tradel le bareder the zoraleder naroden avri, sar san tumen. Andā tumen andre lengeri phuv a diġa la tumenge andro dedictvos, avke sar oda hin adadžives.

³⁹ Leperen tumenge adadžives a šoha (űikda) ma bisteren, hoj o RAJ hino Del pro űebos the pre phuv. Aver del nane. ⁴⁰ Doliker leskere prikazaġja the zakoni, so tumenge adadžives dav, hoj tumenge the tumare potomkenge mištes te el a hoj but te dživen andre phuv, so tumenge del o RAJ, tumaro Del."

O fori pro garuđipen

⁴¹ Akor o Mojžiš diġa trin fori pal o Jordan pro vichodos, ⁴² hoj ode šaj denašel sako, ko varekas murdarđa, te oda na kamġa te kerel a na sas leskero űeprijatelīs. Te denašġahas ode, ačhiġahas te dživel. ⁴³ Prekal o kmeņos Ruben ela o foros Becer pre pušġa pre uči phuv, prekal o kmeņos Gad o Ramot andro Gilead a prekal o kmeņos Menašše o Golan andro Bašan.

O angluno lav pal o zakonos

⁴⁴ Kada sas o zakonos, so o Mojžiš diġa le Izraelitenge. ⁴⁵ Kala hine o svedectva, prikazaġja the zakoni, so o Mojžiš diġa le Izraelitenge, sar gele avri andral o Egipt ⁴⁶ a sas pal o Jordan andre dolina paš o Bet-Peor, andre phuv, kaj sas o Amorejiko kralīs Sichon, savo kralġinelas andro Češbon. O Mojžiš the o Izraeliti űerinde upral leste, sar avle avri le Egiptostar. ⁴⁷ Zaille leskeri phuv the e phuv le kralġiskeri Ogoskeri andral o Bašan – e phuv le duje Amorejengere kralġengeri pro vichodos le Jordanostar. ⁴⁸ Lengere phuva sas le Aroerostar, so hino paš e dolina Arnon, dži paš o verchos Sirjon (oda hin o Chermon) ⁴⁹ a caġi dolina Araba pro vichodos pal o Jordan dži paš o Londo Moros tel o verchos Pisga.

O Deš Prikazaġja

5 O Mojžiš zvičindā savore Izraeliten a phendā: "Šun, Izrael, o prikazaġja the o zakoni, save adadžives tumenge phenav. Sikġon len a mištes len dolikeren! ² O RAJ, amaro Del, phandġa amenca pro verchos Choreb † e zmluva. ³ Kadi zmluva na phandġa o

† Oda hin o verchos Sinaj.

RAJ amare dadenca, ale amenca savorenca, save adadžives sam kade. ⁴ O RAJ tumenca vakerelas pro verchos muj-mujeha andral e jag. ⁵ Me akor ačġavas maškar o RAJ the tumende, hoj tumenge te phenav leskero lav, bo daranas pes la jagatar a na geġan upre pro verchos.

O RAJ phendā:

⁶ 'Me som o RAJ, tiro Del, savo tut iġa avri andral o Egipt, kaj sanas otroka.

⁷ Na ašareha avre devlen, ča man!

⁸ Na kereha peske űisava modla aġi obrazis olestar, so hin upre pro űebos, tele pre phuv abo andro paġi tela! ⁹ Na bandoha anglal lende aġi na lašareha len, bo me som o RAJ, tiro Del! Som o Del, savo žarġinel a savo vaš le dadengere bini marel le čhaven andro trito the štarto pokoleġje ole džengere, save man našġi avri ačġen. ¹⁰ Ale o pačivalo kamiben presikavav ezera pokoleġenge, save man kamen a dolikeren mire prikazaġja.

¹¹ Na phenaha andral o muj ča avke o nav le RAJESKERO, tire Devleskero, bo o RAJ marel dojekhes, ko phenela le Devleskero nav hijaba!

¹² Doliker o Šabbat, hoj les te sentġares, sar tuke prikazindā o RAJ, tiro Del! ¹³ Šov dživesa kereha savori tiri buči, ¹⁴ ale eftato džives hin o Šabbat prekal o RAJ, tiro Del. Na kereha űisavi buči aġi tu, aġi tire čhave, aġi tire čhaja, aġi tire sluhi, aġi tiro dobitkos, aġi o cudzincos, savo dživel maškar tumende. Tire sluhi peske mušinen te odpočovinel avke sar tu.

¹⁵ Ma bister, hoj salas otrokos andro Egipt a hoj o RAJ, tiro Del, tut odarik iġa avri peskere zorale vasteha. Vašoda tuke o RAJ, tiro Del, prikazindā oda džives te dolikerel.

¹⁶ De pačiv tira da the le dades, hoj but te džives pre phuv, so tuke dela o RAJ, tiro Del!

¹⁷ Na murdareha!

¹⁸ Na kereha lubipen!

¹⁹ Na čoreha!

²⁰ Na svedčineha klamišagoha pre aver manuš!

²¹ Tire jakha te na kamen űič, so hin avreskero, te na kamen aġi leskera romġa, aġi leskero kher the maġa, aġi leskere sluhen, aġi leskera gurumġa abo somaris, aġi űič aver!'

²² Kala lava o RAJ phendā zorale hangoha savoredženenge pro verchos andral e jag the andral e kaġi chmara a űič ke oda na pridiġa. Pisindā len pro duj barune tabli a diġa mange.

²³ Sar labolas o verchos la jagaha a šundān andral o kaġipen o hangos, avle ke ma savore tumare fajtakere vodci the o phuredera ²⁴ a phendān: 'O RAJ, amaro Del, sikađa amenge peskeri slava the zor a šundān leskero hangos, so avelas avri andral e jag. Adadžives dikhlām, hoj o manuš šaj dživel, the akor sar vakerel le Devleha.

²⁵ Soske amen akana te meras? Se adi bari jag amen chala. A te dureder šunaha o hangos le RAJESKERO, amare Devleskero, meraha. ²⁶ Šundā vareko aver o hangos le džide Devleskero andral e jag, avke sar

amen, a ačhila te dživel? ²⁷ Vašoda dža pašeder, Mojžiš, a šun savoro, so vakerela o RAJ, amaro Del. Palis pheneha amenge savoro, so tuke vakerelas a amen oda šunaha a keraha.'

²⁸ O RAJ šundā tumare lava a phendā mange: 'Šundom o lava kale manušengere, sar tuha vakerelas. Savoro mištes phende. ²⁹ Ko lenge oda thoda pro jilo? Te len ulahas furt ajso jilo, hoj mandar te daran a te dolikeren savore mire prikazaňja the zakoni calo dživipen, hoj lenge the lengere čhvenge furt te el mištes.

³⁰ Akana dža a phen lenge, hoj te džan andre peskere stani. ³¹ Ale tu ačh ade paš mande a phenava tuke savore prikazaňja the zakoni. Sikav le manušen, hoj len te dolikeren andre phuv, so lenge dav andro đedictvos.'

³² Izraelitale, merkinen pre oda, hoj te dolikeren savoro, so tumenge prikazinda o RAJ, tumaro Del. Ma visaren pes lestar, aňi pre jekh aňi pre aver sera.

³³ Dolikeren savoro, so tumenge o RAJ tumaro Del phendā, hoj te el tumenge mištes a hoj but berš te dživen andre phuv, so zalena."

Te dolikerel o zakonos cale jileha

6 "O RAJ, tumaro Del, mange prikazinda, hoj tumen te sikavav kala prikazaňja the zakoni, hoj len te dolikeren andre odi phuv, so džan te zalel pal o Jordan. ² Te kamen but te dživel andre odi phuv tumen, tumare čhave the le čhavgere čhave mušinen calo dživipen te del pačiv le RAJES a te dolikerel leskere prikazaňja the zakoni. ³ Akor šun, Izrael, a ker sa, hoj len te dolikeres. Palis tut ela bach andre phuv, kaj čuľal o thud the o medos, a ačhela tutar baro narodos, sar tut diňa lav o RAJ, o Del tumare dadengero.

⁴ Šun, Izrael! O RAJ hin amaro Del, o RAJ hino jekh. ⁵ Kameha le Rajes, tire Devles, andral calo tiro jilo, andral cali tiri duša the andral cali tiri zor. ⁶ Kala lava, so tuke adadžives dav, likereha andre tiro jilo ⁷ a sikaveha len tire čhaven; vakereha pal lende, sar bešeha andre tiro kher, sar phireha le dromeha, sar džaha te pašlol the sar ušteha. ⁸ Pripchand peske len pro vast sar znaeňje a pro čekat sar leperiben. ⁹ Pisin len pro zarubňi peskere khereskere the pre peskere brani.

¹⁰ Sar tut o RAJ, tiro Del, lidžala andre phuv, pal savi la veraha diňa lav tire dadenge – le Abrahamoske, le Izakoske the le Jakoboske – hoj tuke dela kadi phuv le lače the bare forenca, save tu na ačhadal; ¹¹ o khera pherarde savore lačhipenenca, save andre na thodal; o chaňiga, save na kopalinda avri; o viňici the olivakere sadi, save na sadzinda. Sar olestar chaha a čaloa, ¹² dikh mištes pre oda, hoj te na bisteres pro RAJ, savo tut iľa avri andral o Egipt, andral o otroctvo.

¹³ Dara tut le RAJESTAR, tire Devlestar, leske služin a te des lav, de ča pre le RAJESKERO nav. ¹⁴ Ma lašar avre devlen, nisave devlen le manušengere, save hine pašal tu. ¹⁵ Bo o RAJ, tiro Del, savo hino maškar tumende, hino žarľivo Del a te kada kereha, ov cholisaľola a khosela tut tele pal e phuv. ¹⁶ Ma pokušinen le RAJES,

peskere Devles, avke sar kerdan andre Massa!

¹⁷ Dikhen mištes pre oda, hoj te dolikeren o prikazaňja the o zakoni, so tumenge diňa o RAJ, tumaro Del.

¹⁸ Ker oda, so hin lačo the čačo anglo RAJ, hoj tut te el bach, sar džaha te zalel odi lači phuv, pal savi o RAJ diňa lav la veraha tumare daden, ¹⁹ a tradeha avri tumare ňeprijatelēn, avke sar o RAJ phendā.

²⁰ Te varekana tutar phučela tiro čhavo: 'Soske tumenge o RAJ, amaro Del, diňa te dolikerel ola prikazaňja the zakoni?' ²¹ phen leske: 'Samas otroka le Faraonoske andro Egipt, ale o RAJ amen odarik li-gendā avri peskere zorale vasteha. ²² O RAJ angle amare jakha kerda bare the strašna znameňja the zrakri pre calo Egipt, pro Faraonos the pre calo leskero kher. ²³ Iľa amen odarik avri, hoj amen te anel a te del amenge e phuv, pal savi diňa lav la veraha. ²⁴ O RAJ, amaro Del, amenge prikazinda, hoj te dolikeras savore zakoni a te das les pačiv, hoj te el amenge furt mištes a hoj amen te likerel paš o dživipen avke sar adadžives. ²⁵ Te dolikeraha kala savore zakoni anglo RAJ, anglo amaro Del, avke sar amenge prikazinda, ela amenge oda o spravodlišagos.' "

O trestos te na šunena le Devles

7 "O RAJ tut anela andre phuv, so džas te zalel, a tradela avri angle tute but naroden: le Amorejen, le Chetitanen, le Girgašejen, le Chivijen, le Perizejen, le Kanaančanen the le Jebusejen – ehta naroden bareder the zoraleder, sar san tumen. ² Sar tuke len o RAJ dela andro vasta a domareha len, mušines savore manušen te murdarel. Ma ker lenca nisavi zmluva a ma presikav lenge o jileskeriben. ³ Ma aven veradune lenca, ma len lengere čhaven tumare čhajenge abo lengere čhagen tumare čhvenge. ⁴ Bo te oda kerena, on scirdena tire čhaven le RAJESTAR, hoj te lašaren avre devlen, vašoda o RAJ pre tumende igen cholisaľola a sigo tumen zničinel.

⁵ Vašoda keren lenge kada: Lengere oltara čhiven tele, lengere sentna bara rozmarem, o kaštune slupi la Ašerakere čhinen tele a lengere avričhinde modli zlabaren. ⁶ Se tumen san sentna manuša le RAJESKERE, tumare Devleskere. O RAJ peske tumen kidľa avri, hoj te aven leskere manuša maškar savore narodi pre phuv.

⁷ O RAJ peske tumen na zakamľa a na kidľa avri vašoda, hoj sanas buter sar aver narodi, se sanas nekikneder maškar o narodi pre phuv. ⁸ Ale vašoda, hoj o RAJ tumen kamelas a dolikerda o lav, so diňa la veraha tumare dadenge, iľa tumen a cinda avri peskere zorale vasteha andral o otroctvos, andral o vast le Faraonoskero, le Egipske kraliskero. ⁹ Vašoda džan, hoj ča o RAJ, tiro Del, hino jekh Del, savo hino pačivalo a savo dolikerel peskeri zmluva a presikavel o pačivalo kamiben ezera pokoleňenge ole manušengere, save les kamen a dolikeren leskere prikazaňja. ¹⁰ Oleske, ko les našti avri ačhel, potrestinel avke, hoj les zničinel. O RAJ na ela jileskero ke oda dženo, ko les našti avri

ačhel, ale takoj leske počinela vaš oda. ¹¹ Vašoda doliker o prikazaŋja the o zakoni, so tuke adadžives dav.”

O požehnaŋja te šunena

¹² “Te šunena, dolikerena a dživena pal kala zakoni, o RAJ, tumaro Del, tumenca dolikerela e zmluva a presikavela tumenge o pačivalo kamiben, avke sar la veraha diŋa lav tumare daden. ¹³ Kamela tumen a že-hñinela a avena igen but. Požehñinela tumen avke, hoj tumen dela but čhave, ulipen la phuvatar, zrnos, mol, olivovo olejos, but dobitkos the bakre andre odi phuv, so la veraha diŋa lav tumare daden. ¹⁴ Avena požehñimen buter sar aver narodi. Na ela maškar tumende ajso murš vaj džuvli, saven na ena čhave, aŋi dobitkos, saveske na ulon cikne. ¹⁵ O RAJ tumen chrañinela savore nasvalibenendar a na domukela pre tumende ñisave ole džungale nasvalibenendar, so dikhlan andro Egipt, ale domukela len pre ola manuša, save tumen našti avri ačhena. ¹⁶ Zñičinen dojekhe narodos, saves o RAJ dela andre tumare vasta. Ma presikaven lenge ñisavo jileskeriben aŋi ma lašaren lengere devlen, bo oda ulahas prekal tumende sar pasca!

¹⁷ Ma gondolinen tumenge: ‘Sar šaj tradas avri kale naroden? Se hine zoraleder sar amen!’ ¹⁸ Ma daran tumen lendar! Leperen tumenge, so kerda o RAJ, tumaro Del, le Faraonoske the cale Egiptoske. ¹⁹ Korkore dikhlan, sar o RAJ peskere zorale vasteha kerda ola bare zazraki the znameŋja, savenca tumen o RAJ, tumaro Del, liŋenda avri andral o Egipt. O RAJ kerela avke the le narodenca, savendar akana daran. ²⁰ A o RAJ bičhavela pre lende the le sršñen, medik na mere na avri ola, save ačhile a garude pes tumenge. ²¹ Vašoda tumen lendar ma daran, bo tumenca hino o RAJ, tumaro Del. Ov hino baro a anel dar le manušenge. ²² Jekh pal aver len o RAJ tradela avri angle tumende. Našti len zñičineha savoren jekhvareste, bo te ada kereha, avena pre tu but dziva džviri. ²³ O Raj tumenge dela tumare ñeprijatefen a kerela maškar lende bari balamuta, medik na ena zñičimen. ²⁴ Dela tumenge lengere krafen andro vasta, murdarena len a khosena lengere nava tele pal e phuv. Ņiko tumen na za-ačhavela; zñičinena savoren.

²⁵ Lengere kaštune devloren zlabaren andre jag. Ma kamen lengeru rup aŋi o somnakaj, so hin pre lende. Ma len tumenge oda, hoj tumen te na zachudel sar pasca, bo oda hin džungipen anglo RAJ, tumaro Del. ²⁶ Ma len tumenge ola veci andro khera, hoj te na peren andro prekošiben avke sar the on. Igen tumenge mi džunglon, bo hine prekošle.”

Te na bisteren pro RAJ

8 “Dolikeren pačivales dojekh prikazis, so adadžives tumenge phenav, hoj te dživen, hoj tumen te avel but čhave a te džan te zalel e phuv, pal savi o RAJ la veraha diŋa lav tumare daden. ² Leperen peske pre savore droma, sar o RAJ, tumaro Del, tumen lidžalas saranda (40) berš pal e pušta, hoj tumen te pokorinel a

te probalinel (skušinel), hoj te džanel, so tumen hin andro jile – či dolikerena leskere prikazaŋja, abo na.

³ Pokorinelas tumen a domukelas, hoj te bokhalon. Palis tumen čařarelas la mannaha, so angloda na prindžarenas aŋi tumen aŋi tumare dada. Aleha tumen o RAJ sikavelas, hoj o manuš na dživel ča le marestar, ale dojekhe lavestar, so avel avri andral le RAJESKERO muj. ⁴ Tel kala saranda berš tumenge o gada na čhingerisaľile a aŋi o pindre na šuvľile. ⁵ Len tumenge andro jile, hoj o RAJ, tumaro Del, tumen bararel avri avke, sar o dad bararel avri peskere čhas.

⁶ Dolikeren o prikazi le RAJESKERE, tumare Devleskere; phiren pal leskere droma a daran lestar! ⁷ Se o RAJ, tumaro Del, tumen lidžal andre lači phuv, kaj hin but paŋa, chaŋiga the prameŋa, so aven avri andral o dolini the andral o verchi; ⁸ andre phuv, kaj hin e pšeŋica, o jačmeŋis, o viŋici, o figovŋika, o granatoskere phaba, o olivovo olejos the o medos; ⁹ andre phuv, kaj hin furt maro a ŋič tumenge na chibalinel; kaj hin andro bara hin o trast a o verchi hine pherde le međoha.

¹⁰ Sar chana the čaľona, palikeren le RAJESKE, peskere Devleske, vaš e lači phuv, so tumenge diŋa.

¹¹ Den tumenge pozoris, hoj te na bisteren pro RAJ, tumaro Del, hoj te dolikeren leskere prikazi the o zakoni, so adadžives tumenge dav. ¹² Sar tumen ela o čalipen a ačhavena tumenge o šukar khera, andre save bešena; ¹³ sar tumen ela but dobitkos the bakre, rup the somnakaj, a sar sa, so tumen hin, barola, ¹⁴ palis ma ačhen barikane andro jile a ma bisteren pro RAJ, tumaro Del, savo tumen iľa avri andral o Egipt, andral o otroctvo. ¹⁵ Ov tumen lidžalas pal e bari the strašno pušta, kaj hine o jedovate sapa the o škorpiona, the pal o šuko than bi o paŋi a diŋa tumen o paŋi andral e zorali skala. ¹⁶ Pre pušta tumen čařarelas la mannaha, so angloda na chale tumare dada. Ov tumen pokorinelas a probalinelas, hoj tumenge palis te presikavel o lačhipen. ¹⁷ Vašoda peske šoha (ñikda) ma gondolinen: ‘Kada barvalipen dochudľam peskere vastenca the amara zoraha.’ ¹⁸ Leperen tumenge pro RAJ, tumaro Del, bo ov tumen del zor te dochudel o barvalipen, hoj te dolikerel e zmluva, so la veraha phandľa tumare dadenca, avke sar oda hin the adadžives.

¹⁹ Ale te bisterena pro RAJ, tumaro Del, a visalona ke aver devla, lašarena len a služinena lenge – adadžives tumenge phenav, hoj čačes merena. ²⁰ Avke sar o narodi, saven tumaro Del murdarela angle tumende, avke the tumen merena, bo na šunenas o hangos (hlasos) le RAJESKERO, tumare Devleskero.”

Soske o RAJ del e phuv le Izraeloske

9 “Šun, Izrael, adadžives predžaha prekal o Jordan, hoj te zñičinen le naroden, so hine bareder the zoraleder sar tumen a te zalen lengere bare fori le zorale murenca, so hine dži o ŋebos. ² O manuša, le Anakoskere potomki, hine zorale the bare! Prindžaren len a šundān pal lende: ‘Ko šaj džal pre lende?’ ³ Vašoda dikhena, hoj o RAJ, tumaro Del, džala angle tu-

mende sar e jag, so zlabarel savoro. Ov len zničinel a pokorinel a angle tumende; sar pre lende džana, trade-na len avri a sig len zničinena, avke sar tumenge phendā o RAJ.

⁴ Sar len o RAJ, tumaro Del, angle tumende tradela avri, palis peske ma gondolinen: 'O RAJ amen andā kade, hoj te zalas kadi phuv, bo sam čačipnaskere.' Bo o RAJ len tradela avri angle tumende vašoda, bo hine binošne the nalače. ⁵ Oda nane vaš tumaro spravodlišagos aňi vaš oda, hoj keren mištes, ale o RAJ tumenge del lengeri phuv vaš lengeri nalačhipen, bo kamel te dolikerel o lav, so diňa la veraha tumare dadenge le Abrahamoske, le Izakoske the le Jakoboske. ⁶ Akor džanen, hoj na vaš tumaro spravodlišagos tumenge o RAJ del kadi lačhi phuv, hoj la te zalen. Se tumen san zoralejleskero narodos, so na kamen te šunel."

Leperel le manuŝenge o vzburi

⁷ "Leperen tumenge a šoha ma bisteren, sar choľarenas le RAJES, peskere Devles, pre pušta. Vzburinenas tumen pro RAJ akorestar, sar avľan avri andral o Egipt, dži akor, medik na doavľan pre kada than. ⁸ Choľardan le RAJES pro verchos Choreb – avke choľisalifa, hoj tumen kamľa te murdarel avri. ⁹ Sar geľom pro verchos, hoj te prelav o barune tabli la zmluvakere, so o RAJ phandľa tumenca, ačhiľom pro verchos saranda (40) dživesa the saranda rača. O maro na chavas a o paňi na pijavas. ¹⁰ O RAJ mange diňa duj barune tabli, pre save sas pisimen le Devleskere angušteha savore lava, so tumenge phendā o RAJ pro verchos andral e jag andre oda džives, sar pes zgeľan.

¹¹ Pal o saranda dživesa the saranda rača mange o RAJ diňa duj barune tabli, o tabli la zmluvakere. ¹² O RAJ mange phendā: 'Ušti, sigo dža tele, bo tire manuša, saven andal avri andral o Egipt, keren namištes. Igen sig pes visarde le dromestar, so lenge prikazindom; kerde peske e modla.'

¹³ O RAJ mange mek phendā: 'Dikhav, hoj kala manuša hine čačes zoralejleskere a na kamen te šunel. ¹⁴ Muk man, hoj len te zničinav a te khosav lengeri nav pal e phuv. Ale tutar kerava narodos zoraleder the bareder, sar hine on.'

¹⁵ Avke man visardom a džavas tele pal o verchos, medik o verchos labolas la jagaha. Andro vasta mande sas o duj barune tabli la zmluvakere. ¹⁶ A sar dikhavas, dikhľom, hoj kerďan binos anglo RAJ, tumaro Del. Kerďan tumenge la somnakuňa modla, la gurmňora. Sig pes visardan le dromestar, so tumenge prikazindā o RAJ, tumaro Del. ¹⁷ Avke čhidom soduj tabli andral mire vasta pre phuv a phagerdom len angle tumende.

¹⁸ Palis anglo RAJ peľom pre phuv avke sar angloda a saranda dživesa the saranda rača na chavas maro aňi na pijavas paňi vaš savore tumare bini, so kerďan, sar kerenas oda, so na sas le RAJESKE pre dzeka a choľardan les. ¹⁹ Daravas man le RAJESKERA bara choľatar, bo avke choľisalifa, hoj tumen kamľa te murdarel avri. No o RAJ man šundā pale avri. ²⁰ O RAJ sas

igen choľamen the pro Aron a kamľa les te murdarel, vašoda man mangavas the vaš leste. ²¹ Iľom ola binošna somnakuňa gurmňora, so kerďan, a zlabardom andre jag. Palis la phagerdom pro kotora a rozpučindom la, medik latar na ačhiľa ča prachos. Palis oda prachos čhidom andro paňi, so avel tele le verchostar.

²² Choľardan le RAJES the andre Tabera, andre Massa the andro Kibrot-Hattaava.

²³ Sar tumen o RAJ bičhaďa andral o Kadeš-Barnea, phendā: 'Džan a len peske odi phuv, so tumenge dav.' Ale tumen pes vzburindan pro prikazis le RAJESKERO, tumare Devleskero; na pačanas leske aňi les na šunen. ²⁴ Kanastar tumen prindžardom, furt pes vzburinenas pro RAJ.

²⁵ Me pašľuvav le mujeha pre phuv anglo RAJ saranda dživesa the rača, bo phendā, hoj tumen zničinel a

²⁶ Mangavas man ko RAJ kavke: 'Ó, Adonaj, RAJEJA, ma zničin tiro dďedictvos, tire manušen, saven cindal avri tira bara zoraha a iľal avri andral o Egipt tire zorale vasteha. ²⁷ Leper tuke pre tire služobňika: pro Abraham, Izak the Jakob. Ma dikh pre lengere bini, pre lengeri nalačhipen the pre lengere zorale jile. ²⁸ Hoj o Egiptana te na phenen: "O RAJ len iľa, hoj len te murdarel pre pušta, bo našti len avri ačhelas a našti len doandā andre phuv, pal savi len diňa lav." ²⁹ Se on hine tire manuša, tiro dďedictvos, saven iľal avri andral o Egipt peskere vasteha the bara zoraha.' "

O Deš Prikazaňja pale pisimen

10 "Palis o RAJ phendā mange: 'Le barestar okresin duj barune tabli – ajse, sar sas ešebnovar (peršovar) a av ke ma upre pro verchos. Ker the kaštuňi archa. ² Me pisinava upre o lava, so sas pro ešebna tabli, save phagľal. Palis len thoveha andre archa.'

³ Avke kerďom e archa le akacijakere kaštestar a okresindom duj barune tabli – ajse, sar sas ešebnovar – a geľom pre verchos le tablenca andre vasta. ⁴ O RAJ upre pisindā o lava, so sas pro ešebna tabli, o Deš Prikazaňja, so tumenge diňa pro verchos, sar vakere-las tumenca andral e jag andre oda džives, sar pes zgeľan, a palis len mange diňa. ⁵ Avke avľom tele pal o verchos a thoďom o tabli andre archa, so kerďom, sar mange prikazindā o RAJ. Akorestar hine ode."

⁶ (Paloda o Izraeliti odgele pašal o chaňiga Bene-Jaakan andre Mosera. Ode o Aron muľa a parunde les. E rašajiko služba preiľa leskero čhavo o Eleazar.

⁷ Odarik džanas andre Gudgoda a odarik andre Jotbata, andre phuv, kaj sas but prameňa the paňi. ⁸ Akor peske o RAJ kidľa avri o kmeňos Levi, hoj te hordinen le RAJESKERI zmluvakeri archa, te služinen leske sar rašaja a te žehňinen andre leskero nav. Avke oda hin dži adadžives. ⁹ Vašoda o kmeňos Levi na chudľa ņisavi dďedično phuv avke sar okla kmeňi. Korkoro o RAJ hino leskero dďedictvos, avke sar leske phendā o RAJ, tumaro Del.)

¹⁰ "Me avke sar angloda ačhilom pro verchos saranda (40) dživesa the saranda rača. O RAJ man šunđa avri the akana a imar tumen na kamla te murdarel avri.

¹¹ Phendā mange: 'Ušti a lidža le manušen pre lengero drom, hoj te zalen e phuv, pal savi phendom la veraha, hoj dava tumare dadenge.'

¹² Izrael, so akana tutar kamel o RAJ, tiro Del? Ča ada, hoj te daras le RAJESTAR, te phires pal savore leskere droma, te kames les, te služines leske cale jileha the dušaha ¹³ a te dolikeres leskere zakoni the prikazaňja, so tumenge adadžives dav, hoj mištes te dživen.

¹⁴ Le RAJESKERO, tumare Devleskero, hin o űebos, the o nekučeder űebos, e phuv the savoro, so upre hin. ¹⁵ Ale le RAJESKERO kamiben ke tumare dada sas ajsō zoralo, hoj peske kidla avri tumen, lengere potomken, maškar savore aver narodi, avke sar oda hin adadžives. ¹⁶ Vašoda akanastar šunen le RAJES † a preačhen te el zoralejleskere. ¹⁷ Se o RAJ, tumaro Del, hino RAJ pre rajende the Del pre devlende. Hino baro, zoralo the užasno, na chudel paš űikaste buter a na del pes te prepočinel. ¹⁸ Zaačhel vaš e širotā the vdova, kamel le cudzincos a del les o maro the o gada.

¹⁹ Vašoda kamen the le cudzincen, bo the tumen sanas cudzinci andro Egipt. ²⁰ Daran tumen le RAJESTAR, tumare Devlestar, leske služinen, likerem tumen lestar a te den lav, den ča pre leskero nav. ²¹ Lašaren les, bo ov hino tumaro Del a dikhlan pre tumare jakha o bare the užasna zazraki, so prekal tumende kerđa. ²² Sar tumare dada gele andro Egipt, sas eftavardeš (70) džene, ale akana tumendar o RAJ, tumaro Del, kerđa ajci but sar o čercheňa pro űebos."

Te kamel a šunel le RAJES

11 "Kameha le RAJES, tire Devles, a calo dživipen dolikereha leskere zakoni, prikazaňja the sikavibena. ² Ma bisteren adadžives, hoj tumare čhave na dikhle a na predžidile oda, sar tumen o RAJ, tumaro Del, bararelas avri. Dikhlan le RAJESKERI slava the zor the leskero zoralo vast, ³ the leskere znaeňja the skutki, so kerđa le Faraonoske, le Egiptske kraliske the cafa leskera phuvake. ⁴ Tumen dikhlan, sar o RAJ zničindā la Egiptska armada lengere grajenca the verdanenca, sar kerđa, hoj len o Lolo Moros te zaučharel andre, sar pal tumende džanas, a hine zničimen dži adadžives. ⁵ Tumen džanen, so prekal tumende kerđa o RAJ pre pušta angloda, sar avlan kade. ⁶ Dikhlan the oda, so kerđa le Datanoha the le Abiramoha, le Elia-boskere čhavenca, sar e phuv phundrađa o muj a zligindā len lengere famelijenca, stanenca the savorenca, save pes lenca vzburiinde. ⁷ Tumen korkore dikhlan pre tumare jakha savore bare skutki, so kerđa o RAJ."

Te šunen, ena požehñimen

⁸ "Dolikerem dojekh prikazis, so tumenge adadžives dav, hoj te aven zorale te predžal o Jordan, a te zalen e phuv, andre savi džan, ⁹ a hoj te dživen but andre odi

† E Hebrejiko čhib: Občhinen tumare jile

phuv, pal savi o RAJ diňa lav tumare dadenge the lengere potomkenge – e phuv, kaj čuľal o medos the o thud. ¹⁰ E phuv, so džan te zalel, nane sar o Egipt, andral savo avlan avri. Ode sadzinenas o semena a phari buči kerenas, hoj te dochuden o paňi pro malī. ¹¹ Ale andre kadi phuv, so džan te zalel, hin brehi the dolini a pijel o paňi le brišindestar andral o űebos. ¹² O RAJ, tumaro Del, pes starinel pal late a leskere jakha pre late dikhnen calo berš.

¹³ Te čačes šunena mire prikazi, so tumenge adadžives dav, hoj te kamen le RAJES, tumare Devles, a te služinen leske cale jileha the dušaha, ¹⁴ dava pre phuv o brišind jesone the jarone, andre lačo časos, hoj te el tumen o zrnos, e mol the o olejos. ¹⁵ Dava the e čar pro malī prekal tumaro dobitkos a tumen chana a čafona.

¹⁶ Dodikhnen pre oda, hoj pes tumare jile te na den te odcirdel, hoj te na oddžan te služinel avre devlengē a te lašarel len. ¹⁷ Te kada kerena, o RAJ ela pre tumende igen choľamen. Phandela andre o űebos, hoj te na del o brišind a e phuv te na anel o ulipen a hoj tumen sig te meren avri andre odi lači phuv, so tumenge o RAJ del.

¹⁸ Dolikerem kala lava andre peskere jile the godi; priphanden len peske pro vasta the pro čekat sar lep-eriben. ¹⁹ Peskere čhaven pal oda sikaven a vakeren lenge, či san andro kher, či džana le dromeħa, či pašľona pro hados, či uštēna. ²⁰ Pisinena len pro zarubňi peskere kherengere the pre peskere brani, ²¹ hoj te dživen but tumen the tumare potomki andre odi phuv, pal savi o RAJ diňa lav la veraha tumare dadenge. Dživena ode, medik o űebos ela upral e phuv.

²² Te dolikerena savore kala prikazaňja the zakoni, so tumenge dav – hoj te kamen le RAJES, tumare Devles, a te keren savoro pal leskeri voľa a te likerem pes lestar – ²³ palis o RAJ tradela avri tumendar savore kala narodi a zalena o narodi, so hine bareder the zoraleder sar tumen. ²⁴ Dojekh than, pre savo uštarela tumaro pindro, ela tumaro. Tumari phuv ela la puštatar pro juhos dži paš o Libanon pro severos, le bare paňestar Eufrat pro vichodos dži paš o Stredozemno Moros pro zapados. ²⁵ űiko angle tumende na obačhola. O RAJ tumaro Del kerela, hoj o manuša pes tumendar te daran pal cali phuv, kaj džana, avke sar tumenge phendā.

²⁶ Adadžives tumenge dav, hoj peske te kiden avri o požehnaňje abo o prekošiben: ²⁷ Avena požehñimen, te dolikerena o prikazaňja le RAJESKERE, tumare Devleskere, so adadžives tumenge dav. ²⁸ Ale avena prekošle, te na dolikerena o prikazaňja le RAJESKERE, tumare Devleskere, a odvisarena tumen le dromestar, so tumenge prikazindom, oleħa, hoj chudena te lašarel avre devlen, saven na prindžaren. ²⁹ Sar tumen o RAJ, tumaro Del, lidžala andre odi phuv, so džan te zalel, vakerena o požehnaňje pal o verchos Gerizim a o prekošiben pal o verchos Ebal. ³⁰ Avke sar džanen, kala duj verchi hine pro zapados le Jordanoske, paš o Morehoskere bare stromi, pre le Kanaančanengeri phuv, so

dživen andre dolina Araba paš o foros Gilgal. ³¹ Akana predžan o Jordan, hoj te džan a te zalen e phuv, so tumenge del o RAJ, tumaro Del. Sar la zalena a bešena andre, ³² dikhen mištes pre oda, hoj te dolikeren savore prikazaŋja the zakoni, so tumenge adadžives dav.”

Jekh than pro lašariben

12 “Kala hine o zakoni the prikazaŋja, so mušinen te dolikerel, medik dživena andre phuv, so tumenge del o RAJ, o Del tumare dadengero. Šunen len! ² Andre phuv, so džana te zalel, calkom zničinen savore thana pro verchi, pro brehi the tel dojekh zeleno stromos, kaj o manuša lašarenas peskere devlen. ³ Lengere oltara čhiven tele, lengere sentne slupi sphageren, la Ašerakere kaštune slupi labaren a le devloren rezinen tele, hoj len imar šoha (ňikda) pre ola thana te na lašaren.

⁴ Tumen ma lašaren le RAJES, tumare Devles, avke sar on lašaren peskere devlen! ⁵ Bo o RAJ, tumaro Del, peske kidela avri savore tumare kmeňengere thanendar ča jekh than, kaj o manuša avena, hoj te lašaren leskero Nav. ⁶ Ode leske anena o labarde obeti the aver obeti, o dešto kotor, o dari, so anen korkore pestar abo pal save diňan lav le RAJES, a the le ešebnen (peršen) le dobitkostar the le bakrendar. ⁷ Ode anglo RAJ, peskero Del, chana tumare famelijenca a radisaľona savorestar, so peskere vastenca kerđan, bo o RAJ, tumaro Del, tumen andre oda požehňinda.

⁸ Ma keren avke, sar amen keras adadžives. Dži akana sako kerelas avke, sar peske gondolinelas, hoj oda hin lačo. ⁹ Bo mek na san andre phuv, so tumenge del o RAJ, tumaro Del, kaj dživena andro smirom. ¹⁰ Ale predžana o paňi Jordan a bešena andre phuv, so tumenge del andro đedictvos o RAJ, tumaro Del. Ov tumen chraňinela savore tumare ňeprijateľendar, hoj te dživen andro smirom. ¹¹ O RAJ peske kidela jekh than, kaj ela lašardo. Ode leske mušinen te anel savoro, so tumenge prikazinav: o labarde obeti the aver obeti, o dešto kotor, o dari the savoro nekfeder, pal soste diňan lav, hoj dena le RAJESKE. ¹² Radisaľon anglo RAJ, tumaro Del, le čhavenca, le čhajenca, le sluhenca the le služkenca the le Levitenca, save bešen andre tumare fori, saven nane jekhetane tumenca o đedično kotor andre phuv. ¹³ Ma keren o labarde obeti ode, kaj ča tumen kamena. ¹⁴ Obetinen len ča pre oda jekh than, savo peske o RAJ kidela avri pre phuv jekhe tumare kmeňostar, a ode keren savoro, so tumenge prikazinav.

¹⁵ Andre chocsavo foros, kaj kamena, šaj murdaren a chan džvirina ajci, keci tumenge požehňinela o RAJ. Savore tumendar šaj olestar chan, o žužo the nažužo manuš, avke sar te chaľanas jeleňis abo antilopa. ¹⁶ Ča lengero rat ma chan; čhoren les avri pre phuv sar paňi. ¹⁷ Ale andre tumare fori našti chan o dešto kotor le zrnostar, muštostar, olejostar, aňi ešebne le dobitkostar abo bakrendar, aňi ňisavo daros, so des korkoro pestar abo pal savo diňal lav le RAJES, aňi ňisave

avre obetendar. ¹⁸ Tumen, tumare čhavore, sluhi, služki the o Leviti, save dživen andre tumare fori, šaj chan kala obeti ča anglo RAJ, peskero Del, pre oda than pro lašariben, so peske kidňa avri o RAJ, tumaro Del. Ode radisaľona anglo RAJ, tumaro Del, savorestar, so tumare vastenca kerđan. ¹⁹ Merkinen pre oda, hoj te na bisteren pro Leviti, medik bešena andre kadi phuv.

²⁰ Sar o RAJ, tiro Del, tumen dela bareder phuv, avke sar tumen diňa lav, a phenena peske: ‘Kamas te chal mas,’ šaj chan mas ajci, keci kamena. ²¹ Te ela dur tumendar oda than pro lašariben, so peske kidela avri o RAJ, tumaro Del, šaj murdaren a chan ode, kaj bešen, ajci keci kamen, andral o dobitkos the bakre, so tumenge diňa o RAJ – avke sar tumenge phendom. ²² Šaj olestar chan o žuže the o nažuže manuša, avke sar te chaľanas o jeleňis the e antilopa. ²³ Ale šoha ma chan lengero rat, bo o rat hin o andro dživipen. Vašoda ma chan o mas le dživipnaha. ²⁴ Ma chan o rat, ale čhoren les avri pre phuv sar paňi. ²⁵ Ma chan les, hoj tumenge the tumare čhavenge te el mištes andro dživipen, bo keren oda, so hin lačo anglo jakha le RAJESKERE.

²⁶ Ale o sentne dari the o dari, pal save diňan lav le RAJES, lena a lidžana pre oda than, so peske kidela avri o RAJ. ²⁷ O labarde obeti, o mas the o rat, anena pro RAJESKERO oltaris. O rat le obetendar čhoren avri pro oltaris, ale o mas šaj chan. ²⁸ Dolikeren a šunen savore kala lava, so tumenge prikazinav. Te kerena oda, so hin lačo the pre dzeka le RAJESKE, tumare Devleske, ela tumenge the tumare čhavenge furt mištes andro dživipen.”

Te na služinen le modlence

²⁹ “Sar o RAJ, tumaro Del, zničinela angle tumende savore naroden, ke save džan, hoj te zalen lengere phuva, a sar imar ode bešena, ³⁰ dikhen pre oda, hoj tumen te na zachuden andre pasca oleha, hoj phučena pal lengere devla a phenena: ‘Sar kala narodi lašarenas peskere devlen? Aven, keras the amen avke!’ ³¹ Ma lašaren le RAJES, tumare Devles, avke sar on peskere devlen, bo keren savore džungale veci, so o RAJ našti avri ačhel. Se mek the peskere čhaven the čhagen obetinen andre jag.”

Te na lašaren avre devlen

13 “Keren sa, so tumenge prikaziňom. Ma priden ke oda nič aňi ma odlen olestar nič.

² Te maškar tumende ela prorokos abo vareko, ko džal o sune a džanel len te phenel avri, a ov tumenge sikavela znameňje abo kerela zazrakos, ³ a te oda znameňje abo zazrakos, pal savo phendā, pes ačhifa-has, a te oda prorokos phendahas tumenge: ‘Džas pal aver devla, saven na prindžaras, a služinas lenge,’ ⁴ ma šunen les. Bo oda o RAJ, tumaro Del, tumen probalinel (skušinel), hoj te džanel, či kamen le RAJES, tumare Devles, cale jileha the dušaha. ⁵ Phiren pal o RAJ, tumaro Del, a daran lestar. Dolikeren leskere prikazi, šunen leskero hangos (hlasos) a likerem pes lestar! ⁶ Oda pro-

rokos abo oda, ko džal o sune, mušinel te merel, bo kamla tumen te marel upre pro RAJ, pre tumaro Del, savo tumen iľa avri andral o Egipt a cinda avri andral o otroctvos. Kamla tumen te scirdel tele pal o drom, pal savo tumenge o RAJ, tumaro Del phendã, hoj te džan. Mušinen tumen te žužarel ole nalačhipnastar.

⁷ Te tumaro phral, o čhavo, e čhaj, e romňi abo o nekfeder prijateľis tumen kamela te scirdel, hoj te lašaren avre devlen, a phenela, hoj te džan te lašarel avre devlen (saven tumen aňi tumare dada na prindžarenas, ⁸ le narodengere devlen, save bešen pre phuv pašal tumende jekhe agorestar dži ke aver agor), ⁹ ma do-muken leske aňi les ma šunen. Ma presikaven leske ňisavo jileskeriben, aňi te na el tumenge pharo vaš leste a ma garuv les andre. ¹⁰ Mušinen les te murdare! Av ešebno (peršo), ko lela o bar a čhivela andre leste. Palis savore manuša mi len o bara a mi čhivkeren andre leste. ¹¹ Murdarena les le barenca, bo kamla tumen te odčirdel le RAJESTAR, tumare Devlestar, savo tumen iľa avri andral o Egipt, kaj sanas otroka. ¹² Sar pes pal oda dodžanena savore Izraeliti, darana pes a ňiko imar na kamela te kerel ajso nalačhipen.

¹³ Šaj el, hoj pes došunena pal varesavo foros ole forendar, kaj tumenge o RAJ, tumaro Del, diňa te bešel, ¹⁴ hoj varesave nalačhe manuša maškar tumende vakeren a kamen te scirdel le manušen andre peskero foros le lavenca: 'Aven, džas te lašarel avre devlen,' (le devlen, saven na prindžaren). ¹⁵ Te oda šunena, mištes tumen dophučen a roden avri, či oda hin čačipen. A te pes sikadžahas, hoj hin čačipen, hoj ola manuša kerde oda džungipen maškar tumende, ¹⁶ mušinen la šablaha te murdarel sakones andre oda foros; mušinen les calkom te zničinel – le manušen the le dobitkos. ¹⁷ Palis savore lengere veci anen pro foroskero pľacos a zlabaren o foros the savoro, so hin andre, avke sar labardi obeta le RAJESKE, tumare Devleske. Oda foros mušinel te ačhel pro furt zburajiskos a ňiko les našti pale ačhavel. ¹⁸ ňisave veci, so sas dine le Devleske, hoj te en zničimen, te na lel ňiko aňi andro vast, hoj te preačhel le RAJESKERI cholí a hoj te presikavel tumenge o jileskeriben the o lačhipen. Bo kerela tumendar baro narodos avke, sar diňa lav la veraha tumare dadenge, ¹⁹ te šunena o hangos le RAJESKERO, tumare Devleskero, a te dolikerena savore leskere prikazi, so adadžives tumenge dav, a te kerena oda, so hin lačho anglo RAJ, tumaro Del."

O žužo the nažužo chaben

14 "Tumen san čhave le RAJESKERE, tumare Devleskere. Sar likerem o smutkos pal o manuš, savo muľa, ma čhingerem tumen aňi ma hoľinen pes upral o čekat, avke sar kerem aver manuša, ² bo san sentne manuša le RAJESKERE, tumare Devleskere. Kidľa peske tumen avri, savore avre narodendar pre phuv, hoj te aven leskere manuša.

³ Ma chan ňič, so hin nažužo le Devleske. ⁴ Kala hine o džviri, saven šaj chan: gurumňa, bakres, koza, ⁵ jeleňis, gazela, sarna, kozorožcos, antilopa, dzive

bakres the dziva koza. ⁶ Šaj chan savore džvirinen, save prežuvinen e čar a saven hin o kopiti rozulade pro duj kotora. ⁷ Ale našti chan táva, zajacos the damanos.

Kala džviri prežuvinen e čar, ale nane len o kopiti rozulade pro duj kotora, vašoda hine nažuže. ⁸ Aňi bales našti chan, les hin o kopiti rozulade pro duj kotora, ale na prežuvinel čar; hino tumenge nažužo. Našti chan lengero mas aňi pes našti chuden murdale balestar.

⁹ Olendar, so dživen andro paňi, šaj chan savoro, kas hin plutvi the šupini. ¹⁰ Ale našti chan olen, saven nane šupini the plutvi. On hine tumenge nažuže.

¹¹ Šaj chan savore žuže čiriklen. ¹²⁻¹⁸ Ale le čiriklendar našti chan orlos, sova, jastrabos, sokolos, supos, vrana, pštrosos, čajka, bocianos, volavka, pelikanos, kormoranos, datlos the ňetopiris.

¹⁹ Savoro hmizos, so letinel, hino prekal tumende nažužo, našti les chan. ²⁰ Savore žuže čiriklen šaj chan.

²¹ Ma chan ňisavo murdalo mas. Šaj les den le cudzincoske, savo dživel maškar tumende, ov oda šaj chal abo šaj bikenel avre cudzincoske. Ale tumen san o narodos sentno le RAJESKE, tumare Devleske.

Na taveha la terňa kozica andre lakere dakero thud."

O dešto kotor

²² "Sako berš thoven pre sera o dešto kotor le ulipnastar, so tumenge barona pro maľi. ²³ Pre oda than, so peske kidľa avri o RAJ, tiro Del, chaha angle leste o dešto kotor tumare zrnostar, la neva moľatar, le olivove olejostar the le ešebnes (peršes) le dobitkostar the le bakrendar, hoj te sikľon te daral pes le RAJESTAR pro furt. ²⁴ Te oda than, kaj hino lašardo le RAJESKERO nav, hino tumendar dur, hoj ode te lidžan o dešto kotor olestar, so tumenge požehňinda o RAJ, palis kerem avke: ²⁵ Bikenem oda vaš o love. Palis len ola love a lidžan pre oda than, so peske kidela avri o RAJ, tumaro Del. ²⁶ Ode vaš ola love cinen sa, so kamena: dobitkos, bakre, mol, aver pijiben the savoro, so ča kamen. Palis chan ode anglo RAJ, tumaro Del, a radisaľuven le famelijenca.

²⁷ Ma zamuken a ma bisterem pro Levitas, savo bešel andre tumaro foros, bo nane les dedično kotor andre phuv.

²⁸ Pro koňec dojekhe trite beršeske lidža a thov calo dešto kotor ole beršeskere ulipnastar andre tumare fori. ²⁹ Avke šaj aven ode o Leviti, saven nane o kotor la phuvatar aňi dedičtvo, o cudzinci, o široti the o vdovi, save bešen andre tire fori. Mi chan čales olestar, hoj tut te požehňinel o RAJ, tiro Del, andre dojekh buči, so kereha tire vastenca."

O berš, kana pes savoro odmukel

15 "Pro koňec dojekhe eftate beršeske hin o časos, kana musaj te odmukel savoreng, so ile kečeň. ² Kavke oda kampil te kerel: Sako, ko diňa kečeň avre Izraelitas, odmukela leske oda, so leske kamelas. Na mušinen te mangel pale o love, bo o RAJ korkoro diňa avri, hoj o adošagos pes te odmukel. ³ Le cudzincostar

šaj les pale o adošagos, ale tire phraleske odmuk, so les diňal kečeň. ⁴ Na ela maškar tumende čoro manuš, bo andre odi phuv, so sar dedictvos tuke del o RAJ, tiro Del, te zalel, tut igen požehñinela, ⁵ te mištes šuneha le RAJES, tire Devles, a te dolikereha savore prikazañja, so tumenge adadžives dav. ⁶ Bo o RAJ, tiro Del, tut požehñinela, avke sar diňa lav, a tu deha kečeň but naroden, ale tumen na lena kečeň avre narodendar. Tumen vladñinena upral aver narodi, ale on na vladñinena upral tumende.

⁷ Te varesavo Izraelitas ela čoro andre chocsavo foros, so tumenge del o RAJ, tumaro Del, ma phand angle leste tiro jilo añi tiro vast, ale pomožin leske. ⁸ Ale av ke leste ščiro, phundrav tiro vast a de les kečeň savoro, so leske kampil. ⁹ Ale de pozoris pre oda, hoj tut te na el andro jilo kajso nalačo gondolišagos, hoj tuke pheneha: 'Pašes hin o eftato berš, o berš, so pes sa odmukel,' hoj te na phandes andre tiro jilo avke, hoj les na deha nič. Bo akor ov vičindahas ko RAJ a ulahas pre tute binos. ¹⁰ De les ščirones, a te na el tuke pharo andro jilo vaš oda, hoj les vareso des, bo o RAJ, tiro Del, tut požehñinela andre savoreste, so kereha tire vastenca. ¹¹ O čore manuša ena furt maškar tumende, vašoda tumenge prikazinav: 'De ščirones le čore manušes andre tiri phuv the oles, kas nane.' "

Sako eftato berš te premukel le otroken

¹² "Te vareko le Izraelitendar pes tuke bikenela sar otrokos, či murš vaj džuvli, služinela tuke šov berš, ale pro eftato berš les mušineha te premukel. ¹³ Sar les premukeha, ma muk les te džal het avke, hoj les na deha nič. ¹⁴ De les ščirones olestar, soha tut požehñinda o RAJ, tiro Del: tire stadostar, zrnostar the molatar. ¹⁵ Ma bister pre oda, hoj salas otrokos andro Egipt a hoj tut cinda avri o RAJ, tiro Del. Vašoda adadžives tuke oda prikazinav.

¹⁶ Ale te o otrokos phenela: 'Na kamav adarik te džal het,' bo zakamla pes andre tu the andre tiri famelija a hin leske mištes ke tu, ¹⁷ akor les mušines te anel paš o vudar a ode leske pre zarubña premar o kan la suvaha. Avke ela calo peskero džživipen tiro otrokos. Kavke ker the la otrokiñaha.

¹⁸ Te na el tuke pharo te premukel le otrokos, bo oda, hoj tuke šov berš služinelas, sas prekal tu igen mištes a molas tut duvar frimeder, sar te iľalas pre buči robotnikos. Ker oda a o RAJ, tiro Del, tut požehñinela andre savoreste, so kereha."

Te obetinel o ešebno le džvirendar

¹⁹ "Dojekh ešebno (peršo) samcos, so ulola – e gurni, o bakro abo e koza – pes mušinel te del le RAJESKE, tumare Devleske. Nisave ešebne bikoha na kereha buči a nisave ešebne bakres na strihineha. ²⁰ Sako berš len chaha tira famelijaha anglo RAJ, tiro Del, pre oda than, so peske korkoro kidela avri. ²¹ Ale te oda ešebno džvirov ela varesar chibno: Te ela koro, bango, abo te leste ela vareso aver, našti les obetines

le RAJESKE, tire Devleske. ²² Chana les andre tumare khera savore tumendar, o žuže the o našuže manuša, sar pes chal e gazela abo o jeleñis. ²³ Ale našti chas o rat ole džvirovskero; čhiveha les avri pre phuv sar o pañi."

E Patrađi the o Inepos pal o Mare bi o Drožđi

16 "Andro čhon Abib ma bisteren te oslavinel e Patrađi pre pačiv le RAJESKE, tumare Devleske. Bo andre oda čhon tumen o RAJ, tumaro Del, prekal e rat iľa avri andral o Egipt. ² E Patrađakeri obeta tire stadostar abo dobitkostar anen le RAJESKE, tumare Devleske, pre oda than, kaj peske kidela avri o RAJ, hoj les te lašaren. ³ Ma chan ola obetaha maro le drožđendar. Efta dživesa chana mare bi o drožđi, o maro le trapišagoskero, avke sar kerdan, sar denašenas avri andral o Egipt. Avke šaj tumenge leperen savore dživesa, medik dživena, pre oda džives, sar avlan avri andral o Egipt. ⁴ Efta dživesa te na el ñikas tumendar andre tumari phuv drožđi. Ma muk nič dži tosara ole masestar, so obetinena rači pro ešebno (peršo) džives.

⁵ Našti obetinen e Patrađakeri obeta andre nisavo aver foros, so tumenge del o RAJ, tumaro Del, ⁶ ale ča pre oda than, kaj o RAJ, tumaro Del, peske kidela avri, hoj les te lašaren. E Patrađakeri obeta anena rači, sar zaperela o kham, andre ajso časos, sar avlan avri andral o Egipt. ⁷ Odi obeta peken a o mas chan pre oda than, so peske kidela avri o RAJ, tumaro Del, hoj les te lašaren. Tosara pes visarena a džana pale andre tumare stani. ⁸ Šov dživesa chan o mare bi o drožđi a eftato džives tumen savore džžana pre pačiv le RAJESKE, tumare Devleske, hoj les te lašaren. Oda džives ma keren nisavi buči."

O Kurkengero Inepos

⁹ "Zgenen efta kurke le časostar, sar chudena te košinel le kosakoha e pšeniča. ¹⁰ Palis oslavinena o Inepos le Kurkengero † pre pačiv le RAJESKE, tumare Devleske, a olestar, so tumenge požehñinela o RAJ, tumaro Del, jilestar anena o daros pal oda, ko keci chudla le RAJESTAR. ¹¹ Radisaľon anglo RAJ, tumaro Del, pre oda than, kaj peske o RAJ kidela avri, hoj les te lašaren. Radisaľon tumen, tumare čhave the čhaja, tumare sluhi the služki, o Leviti, save bešen andre tumare fori, the o cudzinci, o široti the o vdovi, save hine ke tumende. ¹² Ma bisteren pre oda, hoj sanas otroka andro Egipt, vašoda mištes dolikeren a dživen pal ola zakoni."

O Inepos le Stankengero

¹³ "Paloda, sar skidena o ulipen le žužodivostar the le hroznostar, oslavinena efta dživesa o Inepos le Stankengero. ¹⁴ Radisaľon pre odi oslava tumen, tumare čhave the čhaja, o sluhi the služki, o Leviti, o cudzinci, o široti the o vdovi, save bešen ke tumende. ¹⁵ Efta dživesa oslavinen oda inepos pre pačiv le RAJESKE,

† Oda hin o Inepos la Žatvakero; o Letñice abo Turice.

tumare Devleske, pre oda than, kaj peske kidela avri o RAJ. Igen radisaľona, bo o RAJ tumen poŹehňinela a ela tumen baro ulipen the bach andre savoreste, so kerena.

¹⁶ Trival andro berš dojekh murš pes mušinel te sikavel anglo RAJ, peskero Del, pre oda than, kaj o Del kidela avri: pro Inepos pal o Mare Bi o Droždĩ, pro Inepos le Kurkengero the pro Inepos le Stankengero. A űiko naštĩ avel bijal űisoste andro vasta. ¹⁷ Sako tumendar mi obetinel pal oda, keci les o RAJ, leskero Del, poŹehňinda.”

Pal o sudci

¹⁸ “Andre savore fori, so del o RAJ, tumaro Del, le kmeňenge, ačhaven sudcen the uradňiken. Ola murša mušinena te sudzinel čačipnaha le manušen. ¹⁹ Ma previsar o čačipen pro sudos. Ma dikh pro manuš, ale sudzin pal oda, ko so kerel. Ma de tut te prepočinel le manušeske, bo oda korarel o jakha le godaverenge a previsarel o lava le čačipnaskere manušengere. ²⁰ Dolikereha furt ča o spravodľišagos, hoj te džives a hoj te zales e phuv, so tuke del o RAJ, tiro Del.”

Te na lašaren avre devlen

²¹ “Sar ačhavena oltaris le RAJESKE, tumare Devleske, naštĩ paše thoven la Ašerakero slupos le kaštestar.

²² Ma ačhaven aňi űisavo baruno slupos, bo o RAJ, tumaro Del ada naštĩ avri ačhel.”

17 “Ma obetinen le RAJESKE, tumare Devleske, bikos abo bakres, saven hin chocsavi chiba, bo kada o RAJ, tumaro Del naštĩ avri ačhel.

² Šaj pes ačhela, hoj andre varesavo foros, so tumenge diňa o RAJ, tumaro Del, pes arakhela murš abo džuvľĩ, save kerena varesavo nalačhipen anglo RAJ, tumaro Del, a aleha na dolikerena leskeri zmluva,

³ odvisarena pes le RAJESTAR a sluŹinena avre devlence abo le khameske, le čhoneske, abo le čercheňenge, so lence zakazindom. ⁴ Sar pal oda šuneha abo te tuke vareko pal oda phenela, dodžan tut čĩ oda hin čačipen, hoj ajsa džungipen vareko kerďa andro Izrael. Te oda ela čačes avke, ⁵ oles, ko kada nalačhipen kerďa, čĩ murš abo džuvľĩ, le avri pal o foroskere brani a murdar ole manušes le barenca. ⁶ Te pre leste svedčinen a duj abo trin švedki, mušinel te el murdardo. Te ela ča jekh švedkos, naštĩ les murdares. ⁷ Ola švedki mi čhiven o bara andre leste ešebne (perše) a palis savore manuša. Kaleha tradeha avri o nalačhipen maškar tumende.”

O nekbareder rašajiko sudos

⁸ “Te ela vareso igen pharo prekal tumende te rozsudzinel: o murdaripen, o vesekedišagi, abo te vareko zraňinela avre dženes – varesavo dokeriben andre tiro foros – akor dža oleha pre oda than, so o RAJ, tiro Del, kidľa avri. ⁹ Ode dža ko levitska rašaja the ko sudcas, so hin pro urados andre oda časos, a phuč lendar, sar oda kempel te sudzinel, a on tuke phenena, so ma-

jines te kerel. ¹⁰ Palis ker savoro a liker tut pal oda, avke sar tuke phende a sikade pre oda than, so peske kidľa avri o RAJ. ¹¹ Doliker lengere lava, ker sa avke, sar rozsudzinena, a ma odvisar pes olestar. ¹² Ale te vareko na kamela oda te dolikerel a na šunela le rašas, abo le sudcas, savo ode sluŹinel le RAJESKE, tire Devleske, ajsa manuš mi merel. Aleha khoseha avri o nalačhipen andral o Izrael. ¹³ Mi šunen pal ada savore manuša, hoj pes te daran a te na keren imar ajsa nalačhipen.”

O prikazi pal o kralis

¹⁴ “Sar džana andre phuv, so tumenge del o RAJ, tiro Del, zalena la, bešena ode a akor phenena: ‘Ačhavas peske kralis avke, sar oda keren aver narodi pašal amende.’ ¹⁵ Dodikhen pre oda, hoj te ačhaven oles, kas o RAJ, tumaro Del, kidela avri. Mušinel te el Izraelitas. Naštĩ el cudzincos, savo nane tumaro phral. ¹⁶ Naštĩ peske skidel but grajen a naštĩ bičhavel le manušen pale andro Egipt, hoj odarik peske te anel buter grajen. Bo o RAJ tumenge phendã: ‘Šoha (ňikda) tumen ma visaren pale ole dromeha!’ ¹⁷ Naštĩ peske skidel but romňijen, bo aleha pes visarela le RAJESTAR; aňi peske naštĩ skidel but rup abo somnakaj.

¹⁸ Sar ačhela kraliske, mušinel peske te del te prepisinel o zakonos andral o zvitkos, pre savo dodikhen o levitska rašaja. ¹⁹ Mi en ola zvitki le zakonca ko kralis, hoj peske len te genel, medik dživela, a hoj te sikľol pes te daral le RAJESTAR, peskere Devlestar, a te dolikerel savore lava the prikazi ole zakonoskere. ²⁰ Te kada kerela, na gondolinela pal peste, hoj hino feder sar savore manuša andral o Izrael, a na visarela pes le zakonostar aňi pre jekh aňi pre aver sera. Avke ov the leskere potomki kralinena andro Izrael pro furt.”

O chaben prekal o rašaja the Leviti

18 “Le levitske rašajen – calo kmeňos Levi – na ela andro Izrael űisavo kotor aňi dedictvos. On dživena le RAJESKERE jagale obetendar, bo ada hin lengero dedictvos. ² Na ela len dđedictvos avke sar avre kmeňen. Lengero dđedictvos ela korkoro o RAJ, avke sar lence phendã.

³ Kecivar o manuša obetinena bikos abo bakres, le rašajen hin pravos le obetendar te chudel kada: e angľuňĩ čang, e sankã the e džombra. ⁴ Den lence o ešebno (peršo) tumare zrnostar, muštostar, olejostar the la bakraňa vlnatar. ⁵ Bo o RAJ, tumaro Del, peske len the lengere čhaven kidľa avri savore kmeňendar, hoj furt te keren e sluŹba andro nav le RAJESKERO.

⁶ Te o Levitas, savo bešel andre varesavo foros andro Izrael, peske zalela andro jilo te džal pre oda than pro lašariben, so kidela avri o RAJ, ⁷ šaj kerel e sluŹba andro nav le RAJESKERO, peskero Devleskero, avke sar the okla Leviti, save ode sluŹinen. ⁸ Šaj chudel ajci chaben sar the okla rašaja, choc te chudľa o love la famelijakere dđedictvostar, so bikendã.”

Pal o vražnika

⁹“Sar aveha andre phuv, so tuke del o RAJ, tiro Del, ma ker oda džungipen, sar keren o narodi, save ode bešen. ¹⁰Te na el maškar tumende niko, ko obetinda-has peskere čhas abo čha sar jagali obeta. Ma muk le manušen, hoj te veštinen, te vražinen, te čarinen, abo te phenen avri o znaženja. ¹¹Ma muk, hoj te pokeren le manušen, aňi hoj te vičinen avri le duchen aňi hoj te vakeren le mulenca. ¹²Bo o RAJ našti avri ačhel sakones, ko kala veci kerel. O RAJ, tiro Del, ipen vaš kala veci le naroden angle tumende tradela het. ¹³Aven žuže anglo RAJ, tumaro Del.”

Avela ajso prorokos sar o Mojžiš

¹⁴“O narodi, savengere phuva zalena, on šunen le čarodejňiken the le vraščen. Ale tumenge oda o RAJ na domukel te kerel.

¹⁵O RAJ, tumaro Del, tumenge bičhavela prorokos ajses sar me tumare phralendar le Izraelitendar. Les šunen. ¹⁶Ela avke, sar kamehas le RAJESTAR, tire Devlestar, andre oda džives, sar sanas zgele paš o verchos Choreb a sar phenda: ‘Imar te na šunas o hangos le RAJESKERO, amaro Devleskero, aňi te na dikhas odi bari jag, hoj te na meras.’

¹⁷Akor mange o RAJ phenda: ‘Mištes phende. ¹⁸Bičhavava jekhes lendar, hoj te el prorokos, sar sal tu. Thovava mire lava andre leskero muj, hoj te vakerele le manušenge savoro, so leske prikazinav. ¹⁹Te vareko na šunela mire lava, so vakerele o prorokos andre miro nav, me les marava. ²⁰Ale o prorokos, savo andre miro nav vakerele, so leske na prikazindom, abo o prorokos, savo vakerele andro avre devlengero nav, mušinel te merel.’

²¹Šaj tuke phenes: ‘Sar prindžaraha, save lava nane le RAJESKERE?’ ²²Prindžarena oda avke: Te o prorokos vakerele andre le RAJESKERO nav a na ačhela pes avke, sar phenda, palis ola lava na sas le RAJESKERE. Oda prorokos vakerele karkoro pestar, vašoda pes lestar ma daran.”

O fori pro garuđipen

19 “Sar o RAJ, tumaro Del, zničinel le naroden andral odi phuv, so tumenge del, a sar la zalena a bešena imar andre lengere fori the khera, ²kide avri trin fori, so hine maškaral andre odi phuv, so tumenge del o RAJ, tumaro Del. ³Dodžan tut, sar dur hine o droma ke ola fori a pal oda rozđelin e phuv pro trin kitora, hoj andre dojekh te el foros. Te vareko murdarela varekas, šaj denašela andre jekh ajso foros, hoj pes te garuvel.

⁴Avke ela oleha, ko varekas murdarela: Sar ode denašela, šaj ačhel te dživel, te pes leske ačhiľa, hoj murdarda avre dženes, ale na kamla a ov na sas leskero űprijateljis. ⁵Šaj pes ačhel, hoj vareko džala avre dženeha andro veš te čingerele o kašta a le tovereha pes nacirdela, hoj te činel tele o stromos, a

jekhvareste chučela tele o tover pal o poriskos a demela avre dženes avke, hoj merela, ajso dženo mi denašel andre jekh ole forendar, hoj pes te garuvel. ⁶No te o foros ela dur, e nekpašeder famelija ole mule dženeskeri andre cholli šaj džal pal leste, dochudela les pro drom a murdarela les. Se oda dženo peske na zasogalinda (zaslužinda) te merel, bo angloda sas le murdarde dženeha lačo a na sas pre leste cholamen. ⁷Vašoda tuke prikazinav: ‘Kide avri trin fori!’

⁸Sar o RAJ, tumaro Del, rozbararela tumari phuv avke, sar diňa lav la veraha tumare daden, a dela tumenge cali phuv, pal savi phenda, hoj lenge dela, ⁹vašoda, bo mištes dolikeres savore kala prikazi, so tumenge adadžives dav: te kamel le RAJES, tumare Devles, a te phirel pal leskere droma furt. Akor pride ke ola trin fori mek aver trin fori. ¹⁰Ker oda, hoj pes te na čhorel avri o rat oleskero, ko nane vrahos, andre tumari phuv, so tumenge del o RAJ, tumaro Del, andro dđedictvos, hoj te na aves vaše mardo tu.

¹¹Šaj pes ačhel, hoj vareko našti avri ačhelas avre dženes, geľahas pre leste a demadahas les avke, hoj muľahas, a oda dženo denašľahas andre jekh kale forendar. ¹²Akor o foroskere vodci mi bičhaven pal leste andre oda foros, mi len les odarik avri a mi den les te murdarel oleske, ko sas nekpašeder famelija ole murdarde dženeske. ¹³Ma presikaven leske űisavo jileskeriben. Kaleha khosena avri o murdaripen andral o Izrael, hoj tumenge te dživen mištes.

¹⁴Ma zalen e phuv űisave susedaske avke, hoj thovena dureder e hraňica, so tumare phure dada imar čirla chudle andro dđedictvos, sar o RAJ, tumaro Del lenge la diňa.”

O zakonos pal o švedki

¹⁵“Jekh švedkos nane dos pre oda, hoj te usvedčinel varekas varesave binostar. Kampel duje abo trine švedken, hoj te el o manuš odsudzimen.

¹⁶Te kamela vareko te svedčinel falošnones pre aver dženo, hoj kerda varesavo nalačhipen, ¹⁷akor sodudžene mušinen te džal te el sudzimen anglo RAJ anglo rašaja the sudci, save akor ena andre služba. ¹⁸Palis pes o sudci mušinena te dodžanel, či oda hin čačipen. Te oda manuš falošnones vakerele pre aver dženo, ¹⁹akor leha keren avke, sar ov kamla te kerel avre manušeske. Kaleha khosena avri o nalačhipen maškar tumende. ²⁰Palis pes pal ada savore došunena, darana pes a imar na domukena, hoj pale ajso nalačhipen maškar tumende te avel. ²¹Ma presikaven leske űisavo jileskeriben. O trestos ela o dživipen vaš o dživipen, e jakh vaš e jakh, o dand vaš o dand, o vast vaš o vast, o pindro vaš o pindro.”

O prikazi pal o mariben

20 “Sar džana pro mariben pre peskere űeprijateljľa a dikhena, hoj len hin buter graja the verdana a hine buter sar tumen, ma daran pes, bo tumenca hino o RAJ, tumaro Del, savo tumen iľa avri andral o Egipt.

² Angloda, sar džana andro mariben, o rašaj džala anglo manuša a prevakerela kavke: ³ Šun Izrael! Adadžives džan andro mariben pre peskere űeprijateľa. Aven zorale, ma izdran a ma daran pes lendar!

⁴ Se o RAJ, tumaro Del, džal tumenca, ov pes marela vaš tumende le űeprijateľenca, hoj tumen te űerinen.'

⁵ Palis prevakerena o kmeűengere vodci ko manuša: 'Hin ade ajso dženo, savo peske ačhaďa kher a mek les na sentňarda le Devleske? Mi džal khere a mi kerel oda, hoj te na merel andre kada mariben a hoj te na kerel oda aver dženo vaš leste, a te na dživel andre leskero kher. ⁶ Hin ade ajso dženo, savo sadzinda viňica a mek na kidľa o ešebno (peršo) ulipen? Mi visarel pes pale khere, hoj te na merel andre kada mariben a hoj te na radisaľol olestar aver dženo. ⁷ Hin ade ajso dženo, ko hino mango varesava džuvľaha, ale mek peske la na iľa romňake? Mi visarel pes pale khere, hoj te na merel andre kada mariben a te na lel peske la aver dženo.' ⁸ O kmeűengere vodci mek mi phučen le manušendar: 'Hin ade ajso dženo, ko izdral a daral pes? Mi visarel pes pale khere, hoj te na anel maškar aver slugaďa dar.' ⁹ Sar dovakerena o kmeňoskere vodci, akor mušinena te ačhavel le veliteľen upral o manuša.

¹⁰ Sar avena paš varesavo foros pro mariben, ešeb phučen le manušendar, či pes na kamen te poddel korkore. ¹¹ Te priačhena pre oda a phundravena tumenge o foroskere brani, akor savore manuša odarik tumenge služinena sar otroka. ¹² Ale te pre oda na priačhena a mukena pes tumenca andro mariben, akor rozthoven tumen pašal oda foros a džan pre lende. ¹³ A te o RAJ, tumaro Del, tumenge len dela andro vasta, murdaren savore muršen la šabľaha. ¹⁴ Len tumenge le džuvľen, le čhavoren, le dobitkos the sa, so ode ela. Keren peske chasna savorestar, so sas tumare űeprijateľengero. O RAJ tumenge oda del. ¹⁵ Kavke kereha savore forenca, so hine tumendar dur, a nane le narodendar pašal tumende.

¹⁶ Andro fori ole narodengere, so tumenge del o RAJ, tumaro Del andro dedictvos, ma muk űič te dživel.

¹⁷ Zňičin a murdar avri le Chetitanen, le Amorejen, le Kanaančanen, le Perizejen, le Chivijen the le Jebusejen, avke sar tumenge prikazinda o RAJ, tumaro Del, ¹⁸ hoj on tumen te na sikaven te kerel savore nalačhe veci, so keren prekal peskere devla, a oleha kerďanas binos anglo RAJ, tumaro Del.

¹⁹ Sar avena rozthode pašal varesavo foros but časos, hoj les te zalen, ma čhinen tele o stromi le tovereha.

Se palis pal lende chana o ovocje, vašoda ma čhinen len tele. O stromos nane manuš, hoj pre leste te džas.

²⁰ Šaj čhinen tele ča o stromi, so džanen, hoj na anen ovocje, hoj te ačhaven oda, so tumenge kempel, hoj te zalen o foros."

Te pes arakhel murdardo manuš pre maľa

21 "Te pes pre phuv, so tuke del o RAJ, tiro Del, arakhela murdardo manuš a na džanela pes, ko les murdarďa, ² akor džana o vodci the o sudci andral o

fori, so hine pašal, a merinena, sar dur hin leskero tēlos le forendar. ³ Sar pes dodžanena, savo foros hino nekpašeder, lena ola foroskere vodci gurumňa, savi mek na kerďa űisavi buči, ⁴ ľidžana la paš o jarkos, so furt čuľal, andre dolina, kaj mek šoha (ňikda) na sas orimen e phuv, a ode lake phagena e meň. ⁵ Palis ode avena o levitska rašaja, bo len peske kidľa avri o RAJ, tiro Del, hoj leske te služinen, hoj te požehňinen andre RAJESKERO nav a te rozsudzinen dojekh vesekeďišagos abo oda, te vareko avre dženes dukhavela. ⁶ Palis savore vodci ole forostar, so hino nekpašeder ke oda murdardo dženo, thovena (omorena) o vasta le paňeha upral e gurumňi, savake phagle e meň paš o paňi. ⁷ A phenena: 'Amen na murdarďam kale manušes a na dikhľam, ko kada kerďa. ⁸ Ó RAJEJA, odmuk tire Izraelike manušenge, saven cindal avri. Ma domuk, hoj te čhoren avri o rat le manušeske, so űič na kerďa.' Avke len na ela binos vaš oda manuš. ⁹ Te kereha oda, so o RAJ prikazinel, na aveha vinovato vaš oda murdaripen."

Pal e zaili romňi

¹⁰ "Sar o RAJ, tiro Del, tuke dela o űerindipen andro mariben pro űeprijateľa a sar zaleha le manušen, ¹¹ šaj peske les romňake ola džuvľa, savi ela maškar lende igen šukar a sava tu kameha. ¹² Palis la an khere. Oj peske mi holinel o šero, mi strihinel o naja, ¹³ mi čhivel tele o gada, andre save sas zaili, a mi dživel andre tiro kher. Mi rovel pal peskero dad the daj calo čhon a palis la šaj les romňake. Oj ela tiri romňi a tu lakero rom. ¹⁴ Ale te tuke palis džungľola, premuk la a oj ela slobodno te džal, kaj kamel. Dživehas laha, vašoda laha našti keres sar otrokiňaha, hoj la bikeneha."

O pravos le ešebne čhaskero

¹⁵ "Te varesave muršes hin duj romňija; jekha kamel, ale dujtona na; a te lenge ulona muršora, ale o ešebno (peršo) muršoro ela olatar, sava na kamel, ¹⁶ palis andre oda džives, sar rozďelinela o dedictvos maškar o čhave, o pravos, so hin le ešebne čhas, našti del ole čhaske, savo les sas olatar, sava kamel. ¹⁷ Mušinel te del pravos sar ešebnes ole čhas, savo les sas olatar, sava na kamel, a dela les duvar ajci kotor savorestar, so les hin, bo ov hin o ešebno, ko sikavel pre le dadeskeri zor."

Pal o zacato čhavo

¹⁸ "Te hin varekas zacato čhavo, so pes na poddel a na šunel peskere dades the peskera da, choc leske dovakeren, ¹⁹ leskero dad the e daj les mi len a mi ľidžan paš e brana ko foroskere vodci. ²⁰ Mi phenen lenge: 'Kada amaro čhavo hino zacato, na poddel pes a na kamel amen te šunel; a mek hino papačis the pijakos.' ²¹ Palis savore murša andral oda foros les mi murdaren le barenca. Kavke khoseha avri o nalačhipen maškar peste. Mi šunel oda calo Izrael a mi daral pes."

Pal o manuš figimen pro kašt

²² "Te vareko kerđahas ajsi veca, vaš soske peske zaslužindahas te merel, a figindahas pes pro kašt, ²³ na mukeha leskero telos ode te figinel prekal e rat. Mušines les te parunel mek oda džives, bo ko hino figimen pro kašt, hino le Devlestar prekošlo. Ma meľaren e phuv, so tumenge del o RAJ, tumaro Del, andro dedictvos."

Aver zakoni

22 "Te dikheha gurumňora abo bakrores, hoj našilifa avre dženeske, ma predža pašal lende, sar te len na dikhľalas, ale an len leske pale. ² Ale te oda dženo bešela tutar dur a tu na džaneha, kaskero oda džvirov hin, an les ke tute khere a mi ačhel ode, medik les oda dženo na rodela. Paľis les deha leske pale. ³ Kavke ker the le somariha, le gadenca the savore vecenca, so našada aver dženo, te oda arakhľal. Ma visar tut lestar het, ale pomožin leske.

⁴ Te dikheha pro drom, hoj le avre dženeskero somaris abo bikos peľa, ma visar tut lestar, ale pomožin leske les te hazdel upre.

⁵ E džuvľi te na urel pre peste muršikane gada a o murša te na uren o džuvľikane gada. Bo o Del našti avri ačhel oles, ko kada kerel.

⁶ Te džaha le dromeha a jekhvareste dikhľalas pro stromos abo pre phuv le čiriklengero hňizdos a andre le cikne čiriklen abo o jandrore, a lengeri daj bešľahas pre ola jandrore abo pro čiriklore, ma le la da le čiriklorenca. ⁷ Le čirikloren peske šaj les, ale lengeri da muk, hoj tuke te džal mištes a but te džives.

⁸ Sar tuke ačhaveha nevo kher, ker tuke pašal e strecha zabradli, hoj te na avel pre tu e vina vaš o rat, te vareko perela tele pal e strecha a murdarela pes.

⁹ Ma sadzin andre peskeri viňica aver semena. Te kada kereha, mušines te oddel le RAJESKE savoro ulipen la viňicakero the savoro, so sadzindal.

¹⁰ Ma orin e maľa avke, hoj pal o pluhos jekhetane phandeha le guruves the le somaris.

¹¹ Ma uri pre peste o gada, so hine kerde jekhetane la vlnatar the ľanostar.

¹² Pre tiro plaštos telal prisiv špargici pašal o štar agora."

Te o rom phenel pre romňi, hoj na sas pačivali

¹³ "Te o murš peske lela romňa, pašľola laha a paloda leske džungľola, ¹⁴ te paľis chudela pal late te vakerel falošnones a nalačo hiros pal late ľidžala a phenela: 'Sar la ilom romňake a kamľom laha te pašľol, avľom pre oda, hoj na sas pačivali,' ¹⁵ akor o dad the e daj ola džuvľake lena e lepeda, pre savi sovenas odi rat o terne, a anena e lepeda a sikavena le vodcenge andro foroskere brani, hoj te dikhen, hoj sas pačivali čhaj. ¹⁶ Akor lakero dad phenela le vodcenge: 'Diňom mira čha romňake kale muršeske, ale oj leske džungľila. ¹⁷ Falošnones pre late vakerel a phenel, hoj na sas

pačivali, sar la ila romňake. Ale kada sikavel, hoj miri čhaj sas pačivali.' Avke rozkerena e lepeda anglo vodci le foroskere. ¹⁸ Paľis o vodci andral oda foros mušinena te lel ole muršes a te marel les. ¹⁹ A mek paš oda mušinela te počinel šel rupune love lakere dadeske vaš oda, hoj la pačivala džuvľa andral o Izrael kerđa napačivalake. Odi džuvľi ela dureder leskeri romňi a šoha (ňikda) la našti premukel.

²⁰ Ale te ela čačipen, so oda murš pal late vakerelas, a la na ulahas, soha pes te presikavel, hoj sas pačivali, ²¹ akor o vodci la lena paš lakero dadeskero vudar a o murša ole foroskere la murdarena le barenca, bo andro Izrael kerđa baro nalačipen oleha, hoj andre le dadeskero kher kerđa lubipen. Kaleha khoseha avri o nalačipen maškar peste."

Pal o napačivaliben

²² "Te prichudena le muršes paš oda, sar pašľol la džuvľaha, sava hin rom, akor mi merel o murš the e džuvľi. Avke khosena avri o nalačipen andral o Izrael.

²³ Te e pačivali džuvľi ela mangadi imar varesave muršeha a te aver murš andro foros laha pašľilahas, ²⁴ akor anen sodujdženen paš e foroskeri brana a murdaren len le barenca: la džuvľa vašoda, bo na vičinelas, hoj lake te pomožinen, choc sas andro foros, a le muršes, bo pašľilifa avre dženeskera mangada džuvľaha. Kaleha khosena avri o nalačipen maškar peste.

²⁵ Ale te arakhľahas o murš mangada džuvľa pre maľa, chudľahas la a našilu pašľilahas laha, akor ča oda murš mušinel te merel. ²⁶ La džuvľa ma ker nič. Oj na kerđa ľisavo binos, vaš soste mušindahas te merel. Oda hin avke, sar te vareko varekas murdardahas: O murdardo manuš vaš oda našti. ²⁷ Aňi odi džuvľi vaš oda našti, bo arakhľla la pre maľa, a oj vriskinelas, ale na sas ode ňiko, ko lake pomožindahas.

²⁸ Te varesavo murš arakhľahas la džuvľa, savi mek hiňi pačivali a nane mangadi, a te la chudľahas, pašľilahas laha a prichudlehas len paš oda, ²⁹ o murš, savo laha pašľilifa, dela penda (50) rupune love lakere dades a oj ačhela leskeri romňi, bo laha našilu pašľilifa. Šoha la našti omukel."

23 "Ňiko peske našti lel romňake le dadeskera romňa, bo oleha kerel ladž peskere dadeske."

Ko našti avel maškar o manuša le RAJESKERE

² "Ňisavo murš, savo sas kastrimen avri avke, hoj leskero muršiben sas rozpučimen abo odčhimen, našti avel maškar o manuša le RAJESKERE, sar hine zgele.

³ Ňiko, ko ulifa sar kopirdanos (kopiľakos), aňi leskere potomki dži andro dešto pokoleňje našti aven maškar o manuša le RAJESKERE, sar hine zgele.

⁴ O Ammončana the o Moabčana aňi lengere potomki dži andro dešto pokoleňje našti aven maškar o manuša le RAJESKERE, sar hine zgele. ⁵ Bo na avle paš tumende le mareha the le paňeha pro drom, sar avenas avri andral o Egipt, a vičinde pre tumende le Bileam, le Beoriskere čhas, andral o Petor andro Aram-

Naharajim †, hoj tumen te prekošel. ⁶ Ale o RAJ, tumaro Del, na kamla te šunel avri le Bileam, ale visarda oda prekošiben pro požehnaŋje, bo o RAJ, tumaro Del, tumen kamel. ⁷ Medik dživena, šoha (ňikda) ma keren nič prekal lengero smirom aňi prekal oda, hoj lenge te džal mištes.

⁸ Ma dikhen tele le Edomčanen, bo hine tumari famelija, aňi le Egiptānen, bo bešenas andre lengeri phuv sar cudzinci. ⁹ O čhave andral lengero trito pokoleňje šaj aven maškar o manuša le RAJESKERE, sar hine zgele."

Pal o žužipen andro taboris

¹⁰ "Te san andro taboris akor, sar hin o mariben, chraňinen tumen savorestar, so hino nažužo. ¹¹ Te ela maškar tumende murš, savo pes meľarela peskere semenostar, sar sovelas, mušinel te džal avri andral o taboris pre calo džives. ¹² Angloda, sar zaračola, thovela (omorela) pes le paňeha a palis, sar zadžala o kham, šaj avel pale andro taboris.

¹³ Avri le taboristar ela than, kaj džana pro budaris. ¹⁴ Mi el tumen lopatki paš o sersami, a medik džana pro budaris, kerena chev a palis oda začivena. ¹⁵ O RAJ, tumaro Del, hino maškar tumende andro taboris, hoj tumen te chraňinel a te del tumenge le ňeprijatelen andro vasta. O taboris mušinel te el sentno, hoj o RAJ te na dikhel maškar tumende oda, so hin pre ladž, a te na visalol tumendar."

Aver prikazi

¹⁶ "Te denašela otrokos peskere rajestar ke tute, ma bičhav les pale leskere rajeske. ¹⁷ Mi bešel maškar tumende andre varesavo tumaro foros, pre oda than, kaj peske kidela avri; ma trapin les!

¹⁸ Ma domuk andro Izrael ňisava džuvľake abo muršeske te ačhel chamoskeri lubňi abo chamoskero lubaris. ¹⁹ Andro Chamos le RAJESKERO, tumaro Devleskero, ma anen sar daros o počihiben le lubariskero abo la lubňakero, bo o RAJ, tumaro Del, ajsen našti avri ačhel.

²⁰ Te des kečeň le Izraelitas love abo chaben abo vareso aver, ma le lestar interesis. ²¹ Ale te des kečeň le cudzincos, šaj lestar les interesis, ale le Izraelitastar ma le, hoj tut o RAJ, tiro Del, te požehňinel andre savoreste, so kereha andre phuv, savi džas te zalel.

²² Te des lav tire RAJES, tire Devles, ma prethov oda te kerel, bo ov čačes tutar užarela, hoj te keres oda, so phendal. Te na dolikereha oda lav, ela tut binos anglo RAJ, tiro Del. ²³ Te na deha lav le RAJES, na ela tut binos, ²⁴ ale savoro, so phenela tiro muj la veraha le RAJESKE, tire Devleske, mušineha te dolikerel, bo diňal les lav korkoro pestar.

²⁵ Te džaha andre viňica avre dženeskeri, šaj chas ode ajci hroznos, keci kames, ale našti tuke les o hroznos andro košaris. ²⁶ Te džaha prekal e maľa avre

dženeskeri, kaj barol e pšeňica, šaj tuke kides o klasi le vasteha, ale našti len čhingeres le kosakoha."

O zakonos pal o rozvodos

24 "Te peske o murš lel romňa a palis leske džungľol, bo arakhel pre late vareso nalačho, mi pisinel lake rozvodno ľil, mi del les lake a mi bičhavel la het andral o kher. ² Sar lestar oddžala, šaj peske la lel aver rom. ³ Ale te pes ačhela, hoj džungľola the dujtone romeske a ov lake pisinela o rozvodno ľil a dela les lake a bičhavela la het andral o kher, abo te pes ačhela, hoj lakero dujto rom merela, ⁴ lakero ešebno (peršo) rom peske la našti lel pale romňake, bo leske hiňi imar meľardí andre. Oda ulahas anglo RAJ džungipen. Ma an o binos pre phuv, so tuke del andro đedictvos o RAJ, tiro Del."

Aver zakoni

⁵ "O murš, savo peske mekča ila romňa, našti džal andro mariben a našti les ispiden aňi andre aver služba. Ačhela khere berš, hoj te kerel radišagos peskera romňake.

⁶ Te varekas des kečeň, ma le lestar andre zaloha o malmoskero bar, bo olestar dživel e famelija.

⁷ Te pes avľahas pre oda, hoj vareko zaila avre Izraelitas, kerelas leha sar otrokoha a bikenda les, akor oda, ko les zaila, mi merel. Kavke khoseha o nalačhipen andral o Izrael.

⁸ Le rašajenge phendom, so te keren, te varekas ela malomocenstvo. Keren savoro avke, sar o levitska rašaja tumenge prikazinena. ⁹ Leperen peske pre oda, so o Del kerda la Mirijamake, sar džanas avri andral o Egipt.

¹⁰ Sar deha kečeň avre dženes, ma dža andre leskero kher te lel e zaloha. ¹¹ Užar avri a oda dženo, kas diňal kečeň, mi anel avri e zaloha. ¹² Te hino oda dženo čoro, na mukeha tuke prekal e rat oda, so tut diňa sar zaloha. ¹³ Sar zadžala o kham, de leske pale o plaštos, hoj les te el, soha pes te učarel. Ov tuke palikerela a kavke aveha čačipnaskero anglo RAJ, tiro Del.

¹⁴ Ma trapin le čore manušes, savo kerel prekal tu buči, avke hoj leske zaačhaveha o počihiben, či hino Izraelitas vaj cudzincos, savo bešel andre tire fori. ¹⁵ O počihiben leske de mek andre oda džives angloda, sar zaperela o kham, bo hino čoro a dživel olestar, so zarodel. Te oda na kereha, vičinel ko RAJ angle tu a ela tut binos.

¹⁶ O dada našti en murdarde vaš o binos, so kerde lengere čhave, aňi o čhave vaš o dada, ale dojekh merela vaš peskero binos.

¹⁷ Pro sudos ma previsar o pravos le cudzincoskero aňi le šiotengero a la vdovatar ma le o gada andre zaloha. ¹⁸ Leper tuke, hoj salas otrokos andro Egipt a hoj tut odarik cinda avri o RAJ, tiro Del. Vašoda tuke prikazinav, hoj ada te dolikeres.

¹⁹ Sar skideha o ulipen pal tiri maľa a bistereha ode snopos, ma visar tut pale. Mi ačhel le cudzincoske, la

† Oda hin e Mezopotamija.

širotake abo la vdovake, hoj tut te požehñinel o RAJ, tiro Del andre savoreste, so kereha. ²⁰ Sar skideha o olivi pal o stromi, ma dža dujtovar te dokidel, so upre ačhiľa, ale muk vajkeci prekal o cudzinci, široti the vdovi. ²¹ Sar skideha o hroznos pal tiri viñica, ma dža dujtovar te dokidel upre, ale oda, so ačhela, muk prekal o cudzinci, široti the vdovi. ²² Leper tuke, hoj salas otrokos andro Egipt. Vašoda tuke prikazinav, hoj ada te dolikeres.”

25 “Te pes duj murša maškar peste vesekedinena a džana oleha pro sudos, hoj len o sudci te rozsudzinen, le čačipnaskeres kempel te ospravedlñinel a le vinovates te odsudzinel. ² Te o vinovato peske zaslužinel te el mardo le bičoha abo la pacaha, o sudcas les thovela te pašlol pre phuv a angle leste les marena aji rani, keci peske zaslužinel. ³ Našti chudel buter sar saranda (40) rani. Bo te les mardalas buter sar saranda rani, kerđalas leske ladž anglo aver Izraeliti.

⁴ Na phandeha o piskos la gurumñake, savi kerel buči, hoj te na chal.”

Te merela o rom bi o čhavo

⁵ “Te duj phrala bešena jekhetane a jekh lendar merela bi o čhavo, leskeri romñi našti džal romeste andre aver famelija. Lakero šogoris peske la mušnela te lel ⁶ a lengero ešebno (peršo) čhavo pes rachinela sar čhavo ole phraleskero, savo muľa. Ov lidžala leskero nav, hoj te na bisteren pre leste andro Izrael.

⁷ Ale te lakero šogoris peske la na kamela te lel romñake, oj mušnela te džal paš e foroskeri brana a te phenel ode le vodcenge: ‘Mire romeskero phral man na kamel romñake, hoj te dolikerel o nav le phraleskero andro Izrael. Na kamel mange te kerel oda, so mušinel sar šogoris.’ ⁸ Akor les o foroskere vodci privičinena, hoj leha te vakeren. Te pale phenela, hoj la na kamel te lel romñake, ⁹ mušnela e šogorkiña te avel paš leste a anglo vodci leske lela tele jekh sandalka pal o pindro, čhungarela leske andro muj a phenela: ‘Avke pes mi ačhel le muršeske, savo na kamel te del potomkos peskere phrales.’ ¹⁰ Leskera famelija sako džanela andro Izrael sar ‘e famelija le muršeskeri, saveske sas e sandalka ili tele.’”

Aver prikazi

¹¹ “Te pes duj murša marena maškar peste a e romñi jekhe muršeskeri leske kamela te pomožinel, avke, hoj avre muršes chudela maškar o čanga, ¹² takoj lake odčhin o vast. Ma av ke late jileskero!

¹³ Te na avel tut dvojita vahi – phareder the lokeder – ¹⁴ a ma klamin ñikas oleha, hoj tut ela andro kher dvojito mira – bareder the cikneder. ¹⁵ Te važinena the merinena o veci pačivales, o RAJ, tumaro Del, tumen dela bareder dživipen pre kadi phuv, so tumenge del. ¹⁶ O RAJ, tumaro Del, našti avri ačhel ñikas, ko važinel napačivalones.

¹⁷ Leperen tumenge, so tumenca kerde o Amaleka pal o drom, sar avenas avri andral o Egipt. ¹⁸ Sar sanas

slaba a strapimen, avle pre tumende palunestar a murdarde savoren, so na birinenas; on pes na daranas le Devlestar. ¹⁹ Sar o RAJ, tumaro Del, tumen dela o smirom tumare ñeprijateljendar andre phuv, so džan te zalel sar dedictvos, khosena avri o leperiben pro Amaleka tel o ñebos. Ma bisteren pre oda!”

O dari le ešebne ulipnastar

26 “Sar avena andre phuv, so tumenge del o RAJ, tumaro Del, andro dedictvos, a sar la zalena the bešena andre, ² sako mušinel te lel savore ulipnastar o ešebno (peršo) kotor, so barol andre phuv, so tuke del o RAJ. Mi thovel oda andro košaris a mi anel pre oda than, so peske kidela avri o RAJ pro lašariben. ³ Džan pal o rašaj, savo ode akor služinela, a phenen leske: ‘Adadžives phenav avri anglo RAJ, angle miro Del, hoj avlóm andre phuv, so la veraha phendá amare dadenge, hoj la amenge dela.’ ⁴ Palis o rašaj lela o košaris andral tumare vasta a thovela les anglo oltaris le RAJESKERO, tumare Devleskero. ⁵ Palis phenena anglo RAJ: ‘Miro dad sas Aramejčanos, savo phirelas than thanestar a geľa andro Egipt frima manušenca. Ode dživelas sar cudzincos a pal o but berša lestar ačhiľa baro the zoralo narodos. ⁶ Ale o Egiptána amenca namištes kerenas, trapinenas amen a ispidenas amen andre buči sar otroken. ⁷ Akor amen vičinahas ko RAJ, ko Del amare dadengero. Ov amen šundá avri a dikhľa amaro pharipen, trapišagos the dukh. ⁸ Avke amen o RAJ iľa odarik avri peskera bara zoraha a kerđa bare znameñja le zazrakenca, so anelas bari dar. ⁹ Andá amen pre kada than a diña amenge kadi phuv – e phuv, kaj čulal o thud the o medos. ¹⁰ Vašoda akana andom o ešebno (peršo) ulipen la phuvatar, so man tu diňal, RAJEJA.’ Palis thoven o košaris anglo RAJ, tumaro Del, a bandúven anglo RAJ. ¹¹ Avke tu the tiri famelija keren oslava, hoj te palikeren le RAJESKE vaš savoro lačo ulipen, so tumen diña. Ma bisteren te vičinel le Leviten the le cudzincen, save bešen maškar tumende, hoj te chan tumenca.

¹² Sako berš pes del o dešto kotor savorestar, so barilá pre maľa, ale sako trito berš pes oda dešto kotor mušinel te del le Levitenge, le cudzincenge, le širotenge the le vdovenge andre tumare fori, hoj te chan a te čalón. ¹³ Palis phenaha anglo RAJ, tiro Del: ‘Andom avri andral miro kher o chaben, so sas dino le RAJESKE, a diňom oda le Levitenge, le cudzincenge, le širotenge the le vdovenge, avke sar mange prikazindal. Dolikerđom sa, so prikazindal a pre ñisoste na bisterđom. ¹⁴ Na chalóm olestar, sar somas andro smutkos; na ilóm nič olestar andral miro kher, sar somas nažužo, a na diňom oda sar obeta prekal o mule. Šundóm tut RAJEJA a kerđom sa avke, sar prikazindal pal o dešto kotor. ¹⁵ Mangav tut, dikh andral o ñebos pal tiro sentno than a požehñin tire Izraelike manušen the e phuv, kaj čulal o thud the o medos, e phuv, so amenge diňal, avke sar diňal lav la veraha amare dadenge.’”

O Izrael hino le RAJESKERO narodos

¹⁶ "Adadžives tumenge o RAJ, tumaro Del, prikazinel, hoj te dolikeren kala zakoni the prikazaŋja. Dikhen pre oda, hoj len te dolikeren cale tumare jileha the dušaha. ¹⁷ Adadžives phendān, hoj o RAJ ela tumaro Del a hoj phirena pal leskere droma, hoj dolikerena leskere zakoni the prikazaŋja a hoj šunena les. ¹⁸ A the o RAJ adadžives phendā, hoj tumen avena leskere manuša, avke sar angloda phendā la veraha, a prikazinel tumenge, hoj te dolikeren savore leskere prikazaŋja. ¹⁹ O RAJ tumendar kerela bareder sar savore narodi, so stvorindā. Tumen chudena e pačiv, e slava the o baro nav a avena o sentno narodos le RAJESKE, tumare Devleske, avke sar phendā."

O bara pro leperiben

27 O Mojžiš le Izraelike vodcenca prikazindā le manušenge: "Dolikeren dojekh prikazis, so tumenge adadžives dav. ² Andre oda džives, sar predžana o paŋi Jordan andre phuv, so tumenge del o RAJ, tumaro, Del, ačhaven peske bare bara a pomakhen len le vapnoha. ³ Pisinen pre lende savore lava kale zakonoskere, sar predžana prekal o Jordan andre phuv, so tumenge del o RAJ, tumaro Del, andre phuv, andre savi čuŋal o thud the medos, avke sar tumen diŋa lav o RAJ, o Del tumare dadengero. ⁴ Avke, sar predžana prekal o Jordan, ačhaven ola bara pro verchos Ebal, avke sar adadžives tumenge prikazinav, a pomakhen len le vapnoha. ⁵ Ode le RAJESKE, tumare Devleske, ačhaven oltaris le barendar, so na sas oprikerde le trastune sersamoha. ⁶ Ole barendar ačhavena oltaris le RAJESKE, tumare Devleske, a anena leske upre o labarde obeti. ⁷ Mek obetinena e smiromoskeri obeta, hoj ode te chan a te radisaŋon anglo RAJ, tumaro Del. ⁸ Pro bara pisinen savore lava le zakonoskere šukares a mištes."

⁹ Palis o Mojžiš the o levitska rašaja phende savore Izraelitenge: "Čhit a šun, Izrael! Adadžives ačhilan o manuša le RAJESKERE, tumare Devleskere. ¹⁰ Vašoda šunen o hangos le RAJESKERO, tumare Devleskero a dolikeren leskere prikazaŋja the o lava, so adadžives tumenge dav."

O požehnaŋje the o prekošiben

¹¹ Mek oda džives o Mojžiš prikazindā le manušenge:

¹² "Sar predžana o Jordan, akor pes mi ačhaven pro verchos Gerizim o Izraelike kmeŋi o Šimeon, o Levi, o Juda, o Jissachar, o Jozef the o Benjamin pro požehnaŋje. ¹³ A o kmeŋi o Ruben, o Gad, o Ašer, o Zebulun, o Dan the o Naftali mi ačhen pro verchos Ebal pro prekošiben."

O prekošibena

¹⁴ "O Leviti mi phenen zorale hangoha savore Izraelike muršenge:

¹⁵ 'Prekošlo hino oda, ko kerela peske varesavi modla le kaštetar, barestar abo trastetar a počoral la lašarela; bo le RAJESKE oda džungl'ol.'

A savore manuša mi phenen: 'Amen!'

¹⁶ 'Prekošlo hino oda manuš, ko na del pačiv peskere dades the da.'

A savore manuša mi phenen: 'Amen!'

¹⁷ 'Prekošlo hino oda manuš, ko peske zalela e phuv avre dženeskeri avke, hoj thovela dureder peskeri hraŋica.'

A savore manuša mi phenen: 'Amen!'

¹⁸ 'Prekošlo hino oda, ko le kore manušes lidžala pal o nalačo drom.'

A savore manuša mi phenen: 'Amen!'

¹⁹ 'Prekošlo hino oda manuš, ko previsarel o pravos le cudzincenge, le šerotenge the le vdovenge.'

A savore manuša mi phenen: 'Amen!'

²⁰ 'Prekošlo hino oda manuš, ko pašlola le dadeskera romŋaha, bo kerel ladž peskere dadeske.'

A savore manuša mi phenen: 'Amen!'

²¹ 'Prekošlo hino oda manuš, ko pašlola le džvirenca.'

A savore manuša mi phenen: 'Amen!'

²² 'Prekošlo hino oda manuš, ko pašlola peskera pheŋaha abo peskera ŋevlastna pheŋaha.'

A savore manuša mi phenen: 'Amen!'

²³ 'Prekošlo hino oda manuš, ko pašlola peskera sasaha.'

A savore manuša mi phenen: 'Amen!'

²⁴ 'Prekošlo hino oda manuš, ko počoral murdarela avre dženes.'

A savore manuša mi phenen: 'Amen!'

²⁵ 'Prekošlo hino oda manuš, ko vaš o love murdarela avre dženes, so na kerda ŋič.'

A savore manuša mi phenen: 'Amen!'

²⁶ 'Prekošlo hino oda manuš, ko na dolikerela o lava le zakonoskere a na dživela pal lende.'

A savore manuša mi phenen: 'Amen!'

O požehnaŋja

28 "Te čačes šunena le RAJES tumare Devles; te dolikerena leskere prikazaŋja, so tumenge adadžives dav, a dživena pal lende, ov tumen hazdela upral savore narodi pre phuv. ² Te šunena o lava le RAJESKERE, tumare Devleskere, avena pre tumende savore kala požehnaŋja a ačhena pre tumende:

³ Požehŋimen aveha andro foros a požehŋimen aveha pre maŋa.

⁴ Požehŋimen ena o čhave, so tutar ulona, požehŋimen ela o ulipen tira phuvakero, o gurunŋora tire do-bitkostar the o bakrore tire stadostar.

⁵ Požehŋimen ela o zrnos andre tiro košaris a o chumer pre tiri tabla.

⁶ Požehŋimen aveha, sar džaha andre, a požehŋimen aveha, sar džaha avri.

⁷ O RAJ zŋičinela tumare ŋeprijatelen, sar pre tumende avena. Jekhe dromeha pre tumende avena, ale eŋta dromenca tumendar denašena.

⁸ O RAJ prikazinela, hoj te en požehñimen tumare chabeneskere skladi the savoro, sostar pes chudena tumare vasta. Požehñinela tumen andre phuv, so tumenge del.

⁹ Te dolikerena o prikazañja le RAJESKERE, tumare Devleskere, a te phirena pal leskere droma, kerela tumendar peskero sentno narodos, avke sar phendã la veraha. ¹⁰ Palis savore narodi pre phuv dikhena, hoj san le RAJESKERE avrikidle manuša, a darana pes tumendar. ¹¹ O RAJ tumen dela but lačhipen – požehñimen ena o čhave, so tumenge ulõna, the o ulipen tumara phuvakero the o gurumñora tumare dobitkostar andre kadi phuv, so phendã la veraha tumare dadenge.

¹² Otkerela tumenge peskere ñeboskere skladi, hoj te bičhavel o brišind, kana kampil, a požehñinela savori tumari buči. Tumen dena kečeñ le naroden, ale na mušinena te lel kečeñ ñikastar. ¹³ O RAJ tumendar kerela šero a na chvostos, avena furt upre a šoha na avena tele, te čačes šunena savore prikazañja le RAJESKERE, tumare Devleskere, so tumenge adadžives dav, a dživena pal lende. ¹⁴ Ma visaren tumen añi pre jekh añi pre aver sera le lavendar, so tumenge adadžives prikazinav, hoj te na džan pal aver devla a te na služinen lenge.”

O prekošibena, te na šunena

¹⁵ “Ale te na šunena le RAJES, tumare Devles; te na dolikerena leskere prikazañja, so tumenge adadžives dav, a na dživena pal lende, avena pre tumende savore kala prekošibena:

¹⁶ Prekošlo aveha andro foros a prekošlo aveha pre maľa.

¹⁷ Prekošlo ela o zrnos andre tiro košaris a o chumer pre tiri tabla.

¹⁸ Prekošle ena o čhave, so tutar ulõna, prekošlo ela o ulipen tira phuvakero, o gurumñora tire dobitkostar the o bakrore tire stadostar.

¹⁹ Prekošlo aveha, sar džaha andre, a prekošlo aveha, sar džaha avri.

²⁰ O RAJ pre tumende bičhavela o prekošiben, e dar the e bibach pre savoro, so kerena a sostar pes chudena tumare vasta, dži akor, medik tumen na khosela tele pal e phuv a medik tumen na zñičinela vaš tumare nalače skutki, bo les omuklan. ²¹ O RAJ pre tumende domukela baro nasvaliben, medik na merena avri andre phuv, so džan te zalel. ²² O RAJ tumen marela le nasvalibenenca, hoj šuvlõna a ela tumen bare horučki; mukela pre tumende baro tačipen the šukiben; dela plešña pro ulipen a avke les zñičinela. Kada pes tumenge ačhela, medik na merena. ²³ Andral o ñebos na dela ñisavo brišind a tumari phuv ela ajsi zoralĩ sar trast. ²⁴ O RAJ na dela brišind pre phuv, ale pošĩ the prachos, so avela andral o ñebos pre tumende džĩ akor, medik na avena zñičimen.

²⁵ O RAJ domukela, hoj o ñeprijateľa upral tumende te ñerinen (zviťazinen). Jekhe dromeha avena pre lende, ale efa dromenca lendar denašena. Sar

dikhena aver narodi pre phuv, so pes tumenca ačhiľa, igen pes darana. ²⁶ Tumare mule teli chana o ñeboskere čirikle the o džvirini pre phuv a ñiko len pašal na tradela avri. ²⁷ O RAJ pre tumende bičhavela o vredi (vredi), ajse sar andro Egipt. Ela tumen ger pal calo tẽlos a chandžola tumen, ale na sastõna olestar avri. ²⁸ O RAJ kerela, hoj te na aven paš e godĩ a te aven kore the diline. ²⁹ Dživese hmatinena avke sar o kore manuša andro kalipen a našti arakhena o drom. Na ela tumen bach andre ñisoste, so kerena; aver tumen furt trapinena a občorarena a ñiko tumenge na pomožinela.

³⁰ Tu aveha mangado la džuvlaha, ale aver dženo pašlõla laha; ačhaveha o kher, ale na bešeha andre; sadzineha e viñica, ale na chaha latar o ulipen. ³¹ Angle tire jakha tuke murdarena la gurumña, ale o mas latar na chaha; angle tire jakha tuke čorena le somaris, ale na dena tuke les pale. O ñeprijateľa tuke čorena o stados, ale na ela ñiko, ko tuke pomožindaahas. ³² Dikheha pre oda, sar tire čhaven the čhajen lel aver narodos otrokenge. Užareha pre lende sako džives, ale ñič oleha našti kereha. ³³ O manuša, saven na prindžarehas, chana o ulipen tira bučakero a tut na ela ñič, ča igen baro pharipen calo dživipen. ³⁴ Ačheha dilino olestar, so dikheha pašal tute. ³⁵ O RAJ tut marela le vredenca pro khoča the pro pindre, le petendar džĩ o šero, ale našti olestar sastõha avri.

³⁶ O RAJ lidžala tumen the tumare krafis andre cudzo phuv, kaj anglođa na dživenas tumen añi tumare phure dada. Ode služinena le kaštune the barune devleng. ³⁷ O manuša andre ola phuva, kaj tumen o RAJ tradela avri, predarana olestar, so pes tumenge ačhiľa; avena lenge pre vistraha a asana tumendar.

³⁸ Sadzinena but semenos pre maľa, ale frima ulipen skidena, bo chana les o maľakere grajora. ³⁹ Sadzinena o viñici a starinena tumen pal lende, ale e mol lendar na pijena añi na kidena upre o hroznos, bo e viñica chana o kirme. ⁴⁰ O olivakere stromi barola vřadzik pre phuv, ale lengere olejoha tut na pomazineha, bo o olivi sig perena tele. ⁴¹ Ela tumen čhave the čhaja, ale našavena len, bo ena zaile. ⁴² Pre savore tumare stromi the pro maľĩ ena o maľakere grajora.

⁴³ O cudzincos, savo bešel maškar tumende, ela furt barvaleder the zoraleder, ale tumen avena čoreder a našavena e zor. ⁴⁴ Ov tumen dela kečeñ, ale tumen les na. Ov ela o šero a tumen o chvostos.

⁴⁵ Avena pre tumende savore kala prekošibena a ena tumenca, medik tumen na zñičinela, bo na šundãn le RAJES, tumare Devles, a na dolikerđan o zakoni the prikazañja, so tumenge diña. ⁴⁶ Ena pre tumende the pre tumare potomki pro furt sar znameñje the vistraha. ⁴⁷ Vašoda, hoj na služinenas cale jileha the radišagoha le RAJESKE, peskere Devleske, sar tumen sas savoro, ⁴⁸ služinena bokhale the smedne tumare ñeprijateľenge, saven pre tumende bičhavela o RAJ. Avena čore a na ela tumen so te urel. Kerela, hoj te cerpinen tel e phari buči †, medik tumen na zñičinela.

† E Hebrejiko čhib: thovela tuke o trastuno jarmo pre meñ

⁴⁹ O RAJ anela pre tumende le narodos pal oki sera la phuvakeri; sar orlos priletinela oda narodos a na achaluveha leskeri čhib. ⁵⁰ Oda narodos ela bijileskero a na sajinela aňi le phure manušen aňi le cikne čhavoren. ⁵¹ Chala tumaro dobitkos the ulípen, medik tumen na zňičinela. Na mukela tumenge aňi zrnos, aňi mol, aňi olejos, aňi gurumňen, aňi bakren, medik na merena bokhatar. ⁵² Džala pre dojekh foros andre tumari phuv, so diňa tumenge o RAJ, tumaro Del. Rozačhavela pes pašal savore fori medik lenge na perena tele o bare, zorale muri, pre save pes mukenas.

⁵³ Sar tumare űeprijatela ena rozačhade pašal tumare fori, avena ajse bokhale, hoj chana oda so tumendar ulíla – o mas tumare čhavengero the čhavengero, saven tumenge diňa o RAJ, tumaro Del. ⁵⁴⁻⁵⁵ Mek the o nekkovleder a nekrajikaneder murš maškar tumende chala peskere čhavengero mas a ela ajso skupo, hoj na dela te chal aňi peskere phrales aňi peskera romňa, sava kamel, aňi peskere čhaven, so leske mek ačhena te dživel. Na ela nič aver te chal andre oda pharipen, sar tumen o űeprijatelis phandela andre, akor sar pes rozthovela pašal tumare fori. ⁵⁶ Mek the e nekkovleder a nekrajikaneder džuvli maškar tumende, so sas ajsi kiňešno the barikaňi, hoj aňi o pindro na mušinelas te thovel pre phuv, ela ajsi skupo ke peskero rom, saves kamel, ko čhavo, abo ke čhaj, ⁵⁷ hoj chala počoral peskere čhavores, savo lake mekča ulóla, a the oda, so latar avela avri pal o ločhuviben – a na dela len nič olestar te chal. Bo na ela nič aver te chal andre oda pharipen, sar tumen o űeprijatelis phandela andre, akor sar pes rozthovela pašal tumare fori.

⁵⁸ Te na dolíkerena a na dživena pal kala lava, so hine pisimen andre kada zvitkos, a te na darana kale slavne the darandutne navestar le RAJESKERE, peskere Devleskere, ⁵⁹ o RAJ domukela pre tumende the pre tumare potomki bare rani, bari bibach, so líkerela but, the meribnaskere nasvalíbena, so pes na dela te sastarel. ⁶⁰ Anela pre tumende pale o nasvalíbena, so predžidílan andro Egipt a ačhena pre tumende furt. ⁶¹ O RAJ the pre tumende bičhavela všelijake nasvalíbena the bibach, pal save pes aňi na pisinel andre kada zakonoskero zvitkos, medik tumen na zňičinela. ⁶² Ačhena igen frima, choc te sanas ajci sar o čercheňa pro űebos, bo na šunen as le RAJES, peskere Devles. ⁶³ Avke sar akor tumendar radisaólas o RAJ, sar tumenge kerelas mištes, a kerelas, hoj te aven buter, avke akana radisaóla, sar tumen zňičinela a mardarela avri. Avena cirdle avri andral e phuv, so džan te zalel.

⁶⁴ Akor o RAJ tumen roztradela maškar savore narodi pre phuv, jekhe agostar dží pre aver. Ode služinena le kaštune the barune devlenge, saven na prindžarenas tumen aňi tumare dada. ⁶⁵ Ale aňi maškar ola narodi tumen na ela smirom, aňi tumare pindre peske na arakhena than te odpočovinel. O RAJ tumen dela o pharipen andro jilo, o strapimen jakha the e duša bi o užaripen (nađe). ⁶⁶ Tumaro dživipen figinela ča pro

bal; rat-džives dživena andre bari dar, hoj našavena peskero dživipen. ⁶⁷ Vaš odi dar andre tumare jile, the vaš oda, so dikhena pro jakha, tosara phenena: 'Te imar ulahas rat!' a rači phenena: 'Te imar ulahas tosara!' ⁶⁸ O RAJ tumen bičhavela pale andro Egipt pro lođi, choc phendom, hoj imar ode na džana. Ode pes kamena te bikenel tumare űeprijatelenge sar o otroka, ale űiko tumen na cinela."

⁶⁹ Kale hine o lava la zmluvakere, so o RAJ prikazindá le Mojžišoske, hoj te phandel le Izraelitena andre Moabiko phuv, paš odi zmluva, so lenca phandla pro verchos Choreb.

O RAJ pale phandel e zmluva le Izraelitena

29 O Mojžiš zvičindá savore Izraeliten a phenda:

"Tumen pre peskere jakha dikhlán savoro, so kerđa o RAJ, tumaro Del, andro Egipt le Faraonoske, savore Egiptanenge the cała lengera phuvake.

² Dikhlan ola bare rani, ola zazraki the o phare skuški, so kerđa o RAJ andro Egipt. ³ Ale dží adadžives o RAJ tumen na diňa jilo, so achalol, aňi jakha, so dikhen, a aňi kana, so šunen. ⁴ Sar tumen lídžavas saranda (40) berš pal e pušta, na čhingerisalile o gada pre tumende aňi o sandalki pre tumare pindre. ⁵ Na chanas maro a na pijenas mol aňi aver pijiben, ale o RAJ tumen delas o chaben, hoj te prindžaren, hoj ov hino o RAJ, tumaro Del.

⁶ Sar avlam pre kada than, mukla pes pre amende pro mariben o kralis Sichon andral o Češbon the o kralis Og andral o Bašan, ale amen upral lende űerindam (zvitazindam). ⁷ Zailam lengeri phuv a diňam la andro dedictvos le kmeňoske Ruben, le kmeňoske Gad the jepaš kmeňoske Menašše.

⁸ Dolíkeren o lava kala zmluvakere a dživen pal oda, hoj tumen te el bach andre savoreste, so kerena. ⁹ Tumensavoređzene ačhen adadžives anglo RAJ, tumaro Del: tumare vodci the o uradňika, savore murša andral o Izrael, ¹⁰ tumare čhave, tumare romňija a the o cudzinci, save bešen maškar tumende, save tumenge čhingeren o kašta a hordinen o paňi. ¹¹ Tumen ačhen kade vašoda, hoj te aven le RAJEHA tumare Devleha andre zmluva, so adadžives tumenca phandel la veraha. ¹² O RAJ pale tumen ačhavela sar peskere manušen a ov ela tumaro Del, sar tumenge phenda a sar diňa vera tumare daden: le Abraham, le Izak the le Jakob. ¹³ Ale kadi zmluva na phandel la veraha ča tumenca, ¹⁴ save adadžives ačhen anglo RAJ, amaro Del, ale the olenca, save adadžives amenca nane.

¹⁵ Tumen džanen, sar bešahas andro Egipt a sar predžahas o phuva avre narodengere. ¹⁶ Dikhlan ode lengere džungale veci the lengere kaštune, barune, somnakune the rupune modlen. ¹⁷ Dodikhen pre oda, hoj maškar tumende te na el űisavo murš abo džuvli, fajta abo kmeňos, savo le RAJESTAR, tumare Devlestar, pes odvisarel avke, hoj džal te služinel le devlenge andral ola narodi, hoj te na el maškar tumende ajso koreňis, so anel o jedos the o kirkiben.

¹⁸ Šaj pes ačhel, hoj vareko šunela kala lava pal o prekošiben, ale phenela peske: 'Nič pes mange na ačhela. Dživava avke, sar kamav. Se jednakes dop-erela o švižo the o šuko stromos.' ¹⁹ Ajse muršeske o RAJ na kamela te odmukel, bo leskeri choľi igen labola pre leste. O RAJ domukela pre leste savoro prekošiben, so hin pisimen andre kada zvitkos, a khosela tele leskero nav pal e phuv. ²⁰ O RAJ les kidela avri savore Izraelike kmeňendar pre leskeri bibach pal ola prekošibena la zmluvakere, so hine pisimen andre kale zakonoskero zvitkos.

²¹ Tumare potomki, save avena pal tumende, the o cudzinci, savo avela dural andral aver phuv, dikhena kadi bibach the o nasvalibena, so pre tumari phuv bičhada o RAJ. ²² Calı phuv ela zlabardi la siraha the za- učhardi le loneha a ode pes na sadzinela nič, aňi na ulola nič, aňi čar na barola. Tumari phuv ela sar o fori Sodoma the Gomora, Adma the Cebojim, so o RAJ zňičindā andre peskeri bari choľi. ²³ Akor savore narodi phučena: 'Soske oda kerda o RAJ kala phuvake? Soske kadi bari choľi?'

²⁴ Aver odphenena: 'Vašoda, bo na dolikerde e zmluva le RAJESKERE, le Devleskeri tumare dadengeri – e zmluva, so lenca phandla akor, sar len iľa avri andral o Egipt. ²⁵ Visarde pes het le RAJESTAR a gele te služinel a te bandol avre devlenge, saven na džanenas a pal save lenge na phenda, hoj len te lašaren. ²⁶ Vašoda sas o RAJ choľamen pre kadi phuv a domukla pre late savore prekošibena, so hine pisimen andre kada zvitkos. ²⁷ O RAJ igen cholısalıľa a andre peskeri bari choľi len cirdna avri andral lengeri phuv a tradla len avri andre aver phuv, kaj hine dži adadžives.'

²⁸ O garude veci hine le RAJESKERE, amare Devleskere, ale o veci, so amenge sikada, hine amare the amare čhavengere; mušinas te dolikerel savore lava kale zakonskere."

Te pes o Izraeliti visarena pale ko RAJ

30 "Sar pre tumende avena savore kala požehnaňja the prekošibena, pal save tumenge phendom, a te peske len lena andro jilo, sar dživena maškar o narodi, kaj tumen tradela avri o RAJ, tumaro Del, ² a te tumen the tumare potomki avena pale ko RAJ, tumaro Del, a te cale jileha the dušaha dolikerena leskere prikazi, so adadžives tumenge dav, ³ akor o RAJ, tumaro Del, čerinela oda, so tumen užarelas, a pale ela ke tumende jileskero. Anela tumen pale andral savore narodi, kaj tumen tradla avri. ⁴ Choc te ulanas avritradle dži pre aver agor la phuvake, o RAJ, tumaro Del, tumen odarik skidela upre a anela pale. ⁵ Anela tumen andre odi phuv, so zaile tumare dada, a tumen la zale- na. Presikavela tumenge o lačhipen a kerela tumendar buter, sar sas tumare dada. ⁶ O RAJ, tumaro Del, obžužarela † tumare jile the o jile tumare potomken- gere, hoj les te kamen cale jileha the dušaha a avke te dživen. ⁷ Akor o RAJ domukela ola prekošibena pre tu- mare ňeprijateľa, save tumen našti avri ačhen a džan

pre tumende. ⁸ Palis tumen pale šunena le RAJES a dolikerena savore leskere prikazaňja, so adadžives tu- menge dav. ⁹ O RAJ, tumaro Del, igen požehňinela sa- voro, so kerena tumare vastenca. Požehňimen ena o čhave, so tutar ulona, požehňimen ela o ulipen tira phuvakero, o gurunňora tire dobitkostar the o bakrore tire stadostar. O RAJ tumendar pale radisalola avke, sar radisalolas tumare dadendar, pre tumaro lačo, ¹⁰ te les šunena a te dolikerena leskere prikazaň- ja the o lava, so hin pisimen andre kale zakonoskero zvitkos, a te pes visarena ko RAJ, tumaro Del, cale jile- ha the dušaha."

Te kidel peske avri o dživipen abo o meriben

¹¹ "Kada prikazis, so tumenge adadžives dav, nane phares te ačhalol aňi te šunel. ¹² Nane dži andro ňe- bos, hoj te phučen: 'Ko džala upre andro ňebos te anel les tele a te phenel amenge, hoj les te dolikeras?' ¹³ Nane aňi dži pre oki sera le moroske, hoj te phučen: 'Ko predžala o moros, hoj les te anel a te phenel amenge, hoj les te dolikeras?' ¹⁴ Se oda lav hino igen pašes, hino andre tiro muj the andre tiro jilo, hoj les te dolikeres.

¹⁵ Šunen! Adadžives tumenge šaj kiden avri, so ka- men: o dživipen abo o meriben; o lačhipen abo o nalačhipen. ¹⁶ Te dolikerena o prikazaňja le RAJESKERE, tumare Devleskere, so tumenge adadžives dav, te les kamena a te šunena a dolikerena savore leskere za- koni, akor dživena a ačhela tumendar baro narodos. A o RAJ, tumaro Del, tumen požehňinela andre phuv, so džan te zalel.

¹⁷ Ale te tumen andro jilo odvisarena a na šunena les; te dena tumen te scirdel a lašarena a služinena avre devlenge, ¹⁸ akor adadžives tumenge phenav, hoj ave- na zňičimen. Na dživena but andre phuv, kaj predžana prekal o Jordan, hoj la te zalen.

¹⁹ Adadžives mange vičnav o ňebos the e phuv sar švedken, hoj tumenge diňom te kidel avri, so kamen: o dživipen abo o meriben; o požehnaňje abo o prekošiben. Vašoda kiden tumenge avri o dživipen, hoj tumen the tumare potomki te dživen. ²⁰ Kamen le RA- JES, tumare Devles, šunen leskero hangos a likerem pes lestar, bo o RAJ hino tumaro dživipen a dela tumen but berša andre phuv, pal savi diňa lav la veraha tu- mare daden le Abraham, le Izak the le Jakob."

O Jozua ačhado vodcaske pal o Mojžiš

31 Palis o Mojžiš geľa a phenda kala lava savore Izraelitenge. ² Phenda lenge: "Adadžives mange hin šel the biš (120) berš. Imar našti avav tumaro vod- cas a o RAJ mange phenda, hoj na predžava o Jordan. ³ O RAJ, tumaro Del, džala anglal tumende. Zňičinela kale naroden angle tumende a tumen zalena lengeri phuv. O Jozua predžala o Jordan anglal tumende, avke sar phenda o RAJ. ⁴ O RAJ lenca kerela avke, sar kerda le Amorejike kraľenca le Sichonoha the le Ogoha, saven zňičindā lengere phuvencu. ⁵ Dela tumenge te

† E Hebrejiko čhib: občhinen

ňerinel (te zvitazinel) upral lende a tumen lenca mušinen te kerel pal o prikazis, so tumen diňom. ⁶ Aven zorale, ma daran tumen lendar a ma izdran, bo korkoro o RAJ, tumaro Del, džal tumenca. Na omukela tumen a na džala tumendar het.”

⁷ O Mojžiš vičinda le Jozua a angle savore Izraeliti leske phenda: “Av zoralo a ma dara tut, bo tu lidžaha kale manušen andre phuv, pal savi o RAJ diňa lav la veraha lengere phure daden. Tu lenge la deha, hoj te el lengeri. ⁸ Korkoro o RAJ džala angle tu a ela tuha. Na omukela tut a na džala tutar het. Ma dara tut aňi ma izdra.”

O geňipen le zakonoskero

⁹ Avke o Mojžiš pisinda le Devleskero zakonos a diňa les le levitske rašajenge, save lidžanas e Zmluvakeri Archa, the savore Izraelike vodcenge. ¹⁰ O Mojžiš lenge prikazinda: “Pregen o zakonos pro koňec sako eftato berš, sar ela o Inepos le Stankengero, andro berš, so hin dino, hoj pes te odmukel o kečenißen. ¹¹ Pregene na les, hoj te šunen o manuša andral o Izrael, sar pes avena te sikavel anglo RAJ, lengero Del, pre leskero avrikidlo than. ¹² Zvičinen savore manušen – le muršen, le romňijen, le čhaven the le cudzincen, save bešen andre tumare fori – hoj te šunen a te siklon te del pačiv le RAJES, tumare Devles, a hoj te dolikeren pačivalones leskere prikazaňja the zakoni. ¹³ The lengere čhave, save oda zakonos na prindžarenas, mi šunen a mi siklon te del pačiv le RAJES, tumare Devles, medik dživena andre phuv, so zalena, sar predžana prekal o Jordan.”

Le Devleskere posledna prikazi le Mojžišoske

¹⁴ O RAJ phenda le Mojžišoske: “Dikh, imar avel tiro časos te džal het pal kadi phuv. Vičin le Jozua a aven andro Sentno Stanos, hoj les te ačhavav vodcaske.” Avke o Mojžiš the o Jozua gele andro Sentno Stanos ¹⁵ a ode pes lenge sikađa o RAJ andre chmarakero slupos, so ačhelas paš o vudar le Sentne Stanoskero.

¹⁶ O RAJ phenda le Mojžišoske: “Tu mereha a džaha paš tire phure dada, ale kala manuša na ena pačivale a na dolikerena e zmluva, so lenca phandlom. Visarena pes mandar a lašarena le devlen andral odi phuv, kaj džan. ¹⁷ Oda džives pre lende cholisaľuvava, omukava len a garuvava angle lende miro muj. On ena zničimen, bo avela pre lende but pohromi the cerpišagi. Palis peske phenena: ‘Kala pohromi pre amende avle, bo amaro Del nane maškar amende.’ ¹⁸ Oda džives lenge garuvava miro muj vaš oda nalačhipen, hoj chudle te lašarel avre devlen.

¹⁹ Akana tumenge pisinen andre kadi gilí. Sikav le Izraeliten la te gilavel a thov kadi gilí andre lengere muja, hoj te el sar miro švedkos pre lende. ²⁰ Lidžava len andre phuv, kaj čulal o thud the o medos a pal savi diňom lav lengere daden. Ode chana, a sar imar čaľona a thuľona, visarena pes mandar het a lašarena avre devlen; odčhivena man a prephagena miri zmlu-

va. ²¹ Sar avena pro Izraeliti savore kala pohromi the cerpišagi, kadi gilí ela sar švedkos pre lende, bo na našľola andral o muj lengere potomkenge. Džanav, so gondolinen a so kamen adadžives te kerel, mek anglo-da, sar len lidžava andre odi phuv, pal savi len diňom lav la veraha.”

²² Mek andre oda džives pisinda o Mojžiš kadi gilí a sikađa la te gilavel le Izraeliten.

²³ O RAJ prikazinda le Jozuaske, le Nunoskere čhaske: “Av zoralo a ma dara tut nisostar, bo aneha le Izraeliten andre phuv, pal savi len diňom lav, a me avava tuha!”

²⁴ Sar o Mojžiš pisinda savore lava ole zakonoskere andro zvitkos, ²⁵ prikazinda le Levitenge, save lidžan e Zmluvakeri Archa le RAJESKERI: ²⁶ “Len kada zvitkos le zakonoskero a thoven les paš e Zmluvakeri Archa le RAJESKERI, tumare Devleskeri, hoj ode te el sar švedkos pre tumende. ²⁷ Bo džanav tumen mištes, hoj na kamen te šunel a vzburinen tumen. Te imar akana tumen vzburinen le RAJESKE, sar mek dživav a som maškar tumende; so ela akor, sar merava! ²⁸ Anen angle mande savore kmeňengere vodcen the le uradňiken. Kamav angle lende te vakerel kala lava, hoj te vičnav o ňebos the e phuv sar švedken pre lende.

²⁹ Bo džanav, hoj tumen pal miro meriben kerena o nalače veci a oddžana le dromestar, pal savo tumenge prikazindom te džal. A pal varesavo časos pre tumende avela e pohroma, bo kerena oda, so nane le RAJESKE pre dzeka, a avke les choľarena.”

³⁰ O Mojžiš savore lava ola gilakere phenda savore Izraelitenge.

Le Mojžišoskeri gilí

32 “O ňebos the e phuv, šunen, so tumenge phenav;

šunen o lava andral miro muj.

² Mi perel miro sikaviben sar o brišind, miro vakeriben mi čulal sar e rosa, sar o cicho brišind pre nevi čar, sar o kapki pro terne rastlini.

³ Me vakerav pal le RAJESKERO nav; bararen amare Devles!

⁴ Ov hino e Skala, leskeri buči hiňi bi e chiba. Savore leskere droma hine čače. O Del hino pačivalo, na kerel nič namištes, hino čačipnaskero the lačo.

⁵ Ale leskere manuša pes lestar visarde a nane lače, hine o pokoleňje binošno the previsardo.

⁶ Kada den pale le RAJESKE, manušale diline the nagodaľaver? Nane ov tumaro Dad, tumaro Stvoritelis, savo tumendar kerđa zoralo narodos?

⁷ Leperen tumenge pre ola čirlatune dživesa, gondolinen pre ola berša, so sas varekana. Phučen tumare dadendar a on tumenge phenena,

phučen tumare phurendar a on tumenge dena te džanel,

⁸ kana o Nekbareder RAJ rozulavelas le narodenge e phuv andro đedictvos a diňa savore manušen than, kaj te bešen, pal oda, keci hin manuša †.

⁹ Ale le Jakobskere potomken peske kidľa avri sar peskere manušen.

¹⁰ Arakhľa len pre omukľi phuv, pre pušta, kaj nane nič. Starinelas pes pal lende, chrañinelas len sar e zreñica andre peskeri jakh.

¹¹ Sar o orlos chrañinel peskero hñizdos a sikavel peskere cikne te letinel, a sar rozcirdel o kridli, hoj len te zachudel pro dumo, hoj te na peren,

¹² avke the o RAJ korkoro ligenelas peskere manušen, na pomožinda leske ñisavo aver del.

¹³ Andľa len pre brehengeri phuv, delas len te chal oda, so barol pre maľa, o medos andral o skali, the olejos andral olivakere stromi, so baronas pre baruñi phuv.

¹⁴ Lengere gurumňa the kozi denas but thud; sas len nekfeder bakre the kozi, gurumňa andral o Bašan; chanas o nekfeder zrnos a pijenas e hroznoskeri mol.

¹⁵ Le RAJESKERE manuša barvalile, no ačhile zorale-jileskere, thulile a čalarde pes avri.

Omukle le Devles, peskere Stvoritelis, tele dikhenas e Skala, peskere zorale Spasitelis.

¹⁶ Le avre devlenca kerenas, hoj o RAJ te žarľinel; peskere nalačhipnaha les choľarenas.

¹⁷ Na obetinas le Devleske, ale le demonenge – le devlence, saven angloda na prindžarenas, le neve devlence, savendar lengere dada na daranas.

¹⁸ Bisterde pre peskeri Skala, savi len andľa pro svetos; omukle peskere Devles, savo len diňa o dživipen.

¹⁹ Sar o RAJ oda dikhľa, cholisalilľa a odčhida pestar peskere čhaven the čhajen.

²⁰ Phenda: 'Imar lenge na pomožinava; dikhava, so pes lenca ačhela, bo hine o previsardo pokoleñje, o čhave, save nane pačivale.

²¹ Peskere modlenca man choľarde, provokovinas man peskere devlenca, so na mon nič,

vašoda the me len choľarava avre narodoha, provokovinava len le manušenca, so na mon nič.

²² Miri cholil rozlabola sar jag a džala tele dži pro than le mulengero;

chala e phuv the lakero ulipen, zlabarela the o zakladi le verchengere.

²³ Mukava pre lende e bibach pal e bibach a livinava pre lende savore mire šipi.

²⁴ Merena bokhatar a murdaľona la horučkatar the le nasvalibnastar. Mukava pre lende la dživa džvirina, the le jedovate sopen, so len danderena.

²⁵ Avri lenge e šablľa lela le čhaven; andro khera len ela bari dar; o terne murša the o terne džuvľa merena, añi o cikne čhavore añi o phure na predživena.

²⁶ Phendom, hoj len rozčhivava a ñiko peske pre lende na leperela,

²⁷ ale daravas man olestar, so phendehas tire ñeprijateľa: "Oda amen ñerindaťam upral o Izrael, o RAJ oda na kerđa." "

²⁸ O Izrael hin o narodos bi e godi, nane les ñisavo godaveripen.

²⁹ Te ulahas godaver, achalilahas a sprindžardahas, kaj džal lengero drom.

³⁰ Sar šaj jekh ñeprijateľsko slugađis džal pro ezeros le Izraeloskere?

Abo sar šaj duj džene lendar zatraden amare deš ez-eren?

Ča te len omukľahas lengeri Skala a o RAJ len diňahas andre lengere vasta.

³¹ Lengeri skala hiñi slabo, nane sar amari Skala, the o ñeprijateľa oda šaj dikhen.

³² Lengere ñeprijateľa hine sar e Sodoma the e Gomo-
ra,

sar e viñica, so anel o kirko the jedovato hroznos.

³³ Lengeri mol hin o jedos le sapestar.

³⁴ O RAJ na bisterela, so o ñeprijateľa kerde; ov užarel pre peskero časos, hoj len te marel.

³⁵ Miri pomsta the miro trestos pes sikavela; podđžala lenge o pindro.

Lengero džives la pohromakero hino pašes, avel sigo pre lende oda, so kamel te avel.

³⁶ O RAJ zachrañinela peskere manušen, peskere služobňikenge presikavela o jileskeriben, sar dikhela, hoj na birinen a na ačhilľa ñiko, añi otrokos añi slobodno.

³⁷ Phenela: 'Kaj hine lengere devľa?

Kaj hiñi e skala, pre savi pes zmukenas?

³⁸ Kaj hine o devľa, so chanas le obetengero žiros a pijenas o molakere obeti?

Akana mi aven a mi pomožinen tumenge, mi en tumaro štitos!

³⁹ Dikhen akana, hoj ča me korkoro som Del a aver nane.

Me dav o dživipen the o meriben, me dukhavav the sašťarav.

Ñiko naštli lel ñikas avri andral mire vasta.

† E Hebrejiko čhib: o čhave le Devleskere

⁴⁰ Avke sar me som o džido Del,
hazdav ko ņebos miro vast a lav vera:

⁴¹ Ostrarava miri blištáco šablá
a sudzinava laha;
pomstínava man mire ņeprijateľenge
a potrestinava olen, ko man našti avri ačhen.

⁴² Mire šipi mačona le ratestar,
le ratestar le mulendar the olendar, ko hine zaile;
miri šablá chala o mas
a odčhinela o šere lengere vodcenge.'

⁴³ Tumen narodale, radisaŕon leskere manušenca,
se o RAJ pomstínela o rat peskere služobníkengero,
počinela pale le ņeprijateľenge
a peskeri phuv the manušen obžužarela le binostar."

⁴⁴ Palis o Mojžiš le Jozuaha, le Nunoskere čaha, avle
anglo manuša a phende lenge o lava kala giľakere.

O Del vakerele pal le Mojžišoskero meriben

⁴⁵ Sar o Mojžiš dovakerďa savore kala lava le
Izraelitenge, ⁴⁶ phendá: "Len tumenge andro jilo sa-
vore lava, savenca tumenge adadžives dovakerav, a
prikazinen len tumare čhvenge, hoj len te dolikeren a
te dživen pal lende. ⁴⁷ Kala lava nane ča ajse chocsave
lava – hine tumaro dživipen! Te len šunena, dživena
but andre odi phuv, so džan te zalel, sar predžana o
paňi Jordan."

⁴⁸ Mek andre oda džives phendá o RAJ le Mojžišoske:
⁴⁹ "Dža andro verchi Abarim a dža upre pro verchos
Nebo andre phuv Moab, khatar dičhol o Jericho, a dikh
e phuv Kanaan, so dav le Izraelitenge, hoj te el lengeri.
⁵⁰ Pre oda verchos mereha a džaha paš tire phure da-
da, avke sar muľa tiro phral o Aron pro verchos Hor a
geľa paš peskere phure dada, ⁵¹ bo na sanas mange
pačivale anglo Izraeliti paš o paňi Meriba paš o Kadeš
pre pušća Sin. Vašoda, hoj man na diňan pačiv anglo
Izraeliti sar Sentnes, ⁵² na džaha andre odi phuv, so
dav le Izraelitenge, ale dikheha la ča dural."

O Mojžiš žehňinel le Izraelitenge

33 Kada hin o požehnaňje, saveha o Mojžiš, le De-
vleskero murš, požehňinda le Izraeliten angle
peskero meriben:

² "O RAJ avľa andral o verchos Sinaj,
žiarinelas lenge andral o Seir,
švicinelas le verchostar Paran.

Avľa peskere sentne ezera ezerenca
a pal leskeri čači sera labolas e jag.

³ O RAJ kamel peskere manušen
a savore sentne hine andre leskere vasta.
Bandon tele angle leskere pindre
a prilen leskere lava,

⁴ o zakonos, so amenge diňa o Mojžiš,
sar o đedictvos savore Jakoboskere manušenge.

⁵ O RAJ sas le Izraelitengero krališ,
sar pes zgele lengere vodci the o kmeňi."

⁶ Pal o kmeňos Ruben o Mojžiš phendá:
"Mi dživel o Ruben, te na merel avri,
ale mi en leskere manuša frima."

⁷ Pal o kmeňos Juda phendá:
"Ó, RAJEJA, šun avri le Judaskero mangipen,
an les pale paš okla kmeňi.
Zoraľar les andro mariben, ó RAJEJA,
pomožin leske leskere ņeprijateľenca!"

⁸ Pal o kmeňos Levi phendá:
"RAJEJA, sikav tiri voľa prekal o losi Urim the Tummim
prekal o Leviti, tire pačivale služobňika;
tu len skušinehas paš e Massa the paš o paňi Meriba,
hoj te dikhes, save čačes hine.

⁹ Sikade tuke bareder pačiv
sar peskere dadenge, dajenge, phralenge abo le
čhvenge;

šunenas tire prikazi,
dolikerenas tiri zmluva.

¹⁰ Sikavena tire manušen,
hoj te dolikeren tiro zakonos
a anena obeti pre tiro oltaris.

¹¹ RAJEJA, de len zor
a mi el tuke pre dzeka lengeri buči!
Zňičin lengere ņeprijateľen,
hoj imar te na ušćen pale!"

¹² Pal o kmeňos Benjamin phendá:
"Kada hin o kmeňos, saves o RAJ kamel a chraňinel;
merkinel pre leste calo džives,
bešel maškar leskere brehi."

¹³ Pal o kmeňos Jozef phendá:
"Mi požehňinel o RAJ lengeri phuv
la rosaha andral o ņebos upral
the le paňeha pal e phuv telal,

¹⁴ le nekfeder ulipnaha le khamestar,
le barvale plodenca čhon pre čhoneste;

¹⁵ mi el lengere phurikane verchi zaučharde
le neklačheder ovocjenca.

¹⁶ Mi pherarel pes lengeri phuv savoreha, so hin
lačho;

mi el požehňimen le lačipnaha le RAJESTAR,
savo vakerďa andral o jagalo krakos.
Mi bešel kada požehnaňje pro šero le Jozefoske,
pro vodcas maškar peskere phrala.

¹⁷ O Jozef hino sar o nekzoraleder ešebno (peršo)
bikos,

hin les rohi sar le dzive bivolos.

Ola rohi hine o ezera manuša andro Menašše
a o deš ezera andro Efrajim;
lenca predžubinela le naroden
a ispidela len dži pro agor la phuvake."

¹⁸ Pal o kmeňos Zebulun phendá:
"Radisaľuv Zebulun pre peskere droma;
radisaľuv Jissachar, andre peskere stani!"

¹⁹ Le manušen zvičinenena pro verchos,

ode anena o čačipnaskere obeti.
O barvalipen len ela andral o moros
a o pokladi kidena avri telal e pošī.”

²⁰ Pal o kmeňos Gad phendā:

“Mi el lašardo o RAJ, savo kerda bareder lengeri phuv.
O Gad užarel sar o ľevos,
hoj te odčhinel o vast abo o šero.

²¹ Ile peske nekfeder than la phuvatar;
chudle le vodcengero kotor.

Dolikerenas o prikazi the o zakoni le RAJESKERE,
sar sas zgele le Izraeloskere vodci.”

²² Pal o kmeňos Dan phendā:

“O Dan hino sar o terno ľevos,
savo chučel andral o Bašan.”

²³ Pal o kmeňos Naftali phendā:

“O Naftali pes čalarel le RAJESKERE lačhipnaha,
le RAJESKERO požehnaňje hin barvales pre leste.
Ov zalel e phuv pro juhos le morostar †.”

²⁴ Pal o kmeňos Ašer phendā:

“Mi el požehňimen o Ašer buter okle kmeňendar,
mi el les nekbuter pačiv le phralendar!
Mi el les ajci olivovo olejos, hoj peske andre šaj
močinel o pindre!

²⁵ Leskere fori mi en chraňimen le trastune branenca;
mi dživel furt andro smirom.”

²⁶ “Nane ňiko ajso, sar o Del le Ješurunoskero:

Pal o ňebos sidarel, hoj tuke te pomožinel,
pro chmari pes ľidžal andre peskeri slava.

²⁷ O Del, so dživel pro furt, hin tiro than pro
garudĭpen

a ľikerel tut pre peskere večne vasta.

Tradela tutar tire ňeprijateľen
a phenela tuke, hoj len te zňičines.

²⁸ Le Jakoboskere potomki dživen andro smirom
andre phuv, kaj hin pherdo zrnos the mol,
kaj e rosa andral o ňebos zaučharel e phuv.

²⁹ Bachtalo sal Izrael!

Ko hin ajso sar tu –

sar o narodos zachraňimen le RAJESTAR?

Ov hino tumaro štitos, so tut chraňinela;

tiri slavno šablā, so tuke dela te ňerinel (zvitāzinel).

Tire ňeprijateľa pes angle tute pokorinena,
ale tu lenge uštareha pre meň.”

O meriben le Mojžišoskero

34 Palis o Mojžiš džalas andral e Moabiko ňižina
upre pro verchos Nebo, dži pro verchos Pisga
khatar dičhol o Jericho. Odarik leske o RAJ sikađa calĭ
phuv le Gileadostar dži ko Dan, ² calĭ phuv le Naf-
taliskeri, e phuv le Efrajimoskeri, e phuv le
Menaššeskeri the calĭ phuv le Judaskeri dži paš o Stre-
dozemno Moros, ³ e pušta Negev, the e dolina, so džal
le Coarostar dži paš o Jericho, le palmengero foros. ⁴ O
RAJ leske phendā: “Kadi hiňi e phuv, pal savi diňom lav
la veraha le Abraham, le Izak the le Jakob, hoj la dava
lengere potomkenge. Domukľom tuke, hoj la te
dikhes, ale na džaha andre.”

⁵ Palis ode andro Moab muľa le RAJESKERO
služobňikos o Mojžiš, avke sar phendā o RAJ. ⁶ Sas
parundo andre dolina paš o foros Bet-Peor andro
Moab. Ale dži adadžives ňiko na džanel, kaj hin leskero
hrobos. ⁷ Le Mojžišoske sas 120 berš sar muľa. Leskeri
zor les na omukľa a o jakha leske na slabisalĭle. ⁸ O
Izraeliti rovenas pal o Mojžiš tranda (30) dživesa pre
Moabiko ňižina, medik na pregeľa o roviben the o
smutkos pal leste.

⁹ O Jozua, le Nunoskero čhavo, sas igen godaver, bo
o Mojžiš pre leste thođa o vasta. O Izraeliti les šunen-
as a kerenas avke, sar o RAJ prikazindā le Mojžišoske.

¹⁰ Akorestar imar na sas andro Izrael ajso prorokos
sar o Mojžiš, saveha o RAJ vakerdahas muj-mujeha.

¹¹ ňiko aver na kerda ajse zazraki the znameňja, save
ov kerda andro Egipt, sar les bičhada o RAJ ko
Faraonos, ke leskere služobňika the savore manuša.

¹² ňisavo prorokos naštĭ presikađa kajsi bari zor abo
zazraki, sar kerda o Mojžiš anglo jakha cale Izraeloske.

† Oda hin o Galilejsko Moros.

JOZUA

O prikazis te predžal prekal o Jordan

1 Paloda, so muľa le RAJESKERO služobňikos o Mojžiš, o RAJ prevakerďa ko Jozua, ko čhavo le Nunoskero, savo sas služobňikos le Mojžišoskero: ²“Miro služobňikos o Mojžiš hino mulo. Av tu the savore kala manuša a predžan prekal o paňi Jordan andre phuv, so dav le Izraelitenge. ³Diňom tumenge savoro, pre soste thovena tumare pindre, avke sar oda phendom le Mojžišoske. ⁴Calí phuv le Chetitanengeri la južna puštatar dži ko verchi Libanon the le bare paňestar, so hino o Eufrat, dži ko Stredozemno Moros pro zapados ela tumari. ⁵Ňiko na obačhola anglal tu, medik dživeha. Avava tuha, avke sar the le Mojžišoha. Šoha (ňikda) tut na mukava. ⁶Av zoralo a ma dara tut ņisostar! Tu lidžaha kale manušen, hoj te zalen peske andro dedictvos kadi phuv, paľ savi diňom andre vera lav tumare phure dadenge. ⁷Ča av zoralo a ma dara tut ņisostar! Liker tut pal o zakonos, so tuke diňa miro služobňikos o Mojžiš. Ma odvisar tut lestar aňi pre čači (pravo) aňi pre balogňi (ľavo) sera, hoj tut te el bach všadzík, kaj džaha. ⁸Ma preač te genel kada zakonoskero zvitkos! Gondolín pal leste rat-džives, hoj te dolíkeres savoro, so hin andre pisimen, bo ča akor avela tuke sa avri a ela tut bach. ⁹Či na phendom tuke, hoj te aves zoralo a ņisostar pes te na daras? Ma izdra a ma podde tut! Bo o RAJ, tiro Del, ela tuha všadzík, kaj ča džaha.”

¹⁰Palís o Jozua phendá le veliteľenge upral o manuša: ¹¹“Predžan prekal o taboris a phenen le manušenge: ‘Pririchtinen tumenge o chabena, bo pal o trin dživesa predžana prekal o Jordan andre odi phuv, hoj peske la te zalen. Bo odi phuv tumenge dela o RAJ, tumaro Del, hoj te el tumari.’”

¹²O Jozua phendá le kmeňenge Ruben, Gad the jepaš kmeňoske Menašše: ¹³“Ma bisteren pre oda, so tumenge prikazindá le RAJESKERO služobňikos o Mojžiš: ‘O RAJ tumaro Del, tumen dela smirom a anela andre phuv, so tumen dela pro vichodos le Jordanostar.’” ¹⁴Tumare romňija, čhavore the savore stadi ačhena ade andre phuv pro vichodos le Jordanostar, so tumenge diňa o Mojžiš. Ale savore tumare zorale murša, save hine pririchtimen pro mariben, predžana prekal o Jordan anglal savore aver kmeňi, lenge te pomožinel, ¹⁵medik na zalena e phuv, so lenge dela o RAJ, o Del, a medik the len na anela andro smirom. Palís pes šaj visaren pale andre peskeri phuv pro vichodos le Jor-

danostar, so tumenge diňa le RAJESKERO služobňikos o Mojžiš; ela tumari.”

¹⁶On phende le Jozuaske: “Keraha savoro avke, sar phendá. Džaha všadzík ode, kaj amen bičhaveha. ¹⁷Avke, sar šunahas le Mojžiš, šunaha the tut! Ča mi el tuha o Raj, tiro Del, avke sar le Mojžišoha. ¹⁸Dojekh, ko na šunela oda, so tu prikazines – choc te so leske phendálas – a na kamľahas oda te kerel, mi merel! Ča av zoralo a ma dara tut ņisostar!”

O špijona the e Rachab andro Jericho

2 O Jozua, o čhavo le Nunoskero, bičhaďa počoral andral o Šittim duje špijonon andro Jericho a phendá lenge: “Džan a obdikhen e phuv the o Jericho.” Avke odgele a gele andro kher ke Rachab, savi sas lubňi, a ačhile ode.

²Le kralíske andro Jericho phende: “Merkin, bo rači ade avle o Izraeliti te predikhel e phuv.” ³Akor diňa o kralís te phenel la Rachabake: “An avri ole muršen, save hine andre tiro kher! Bo avle ade te predikhel cali phuv!”

⁴Ale e Rachab ole muršen garuďa. Phendá: “He, avle ade varesave murša, ale me na džanavas, khatar hine. ⁵Sar zaračolas a e foroskeri brana pes phandelas andre, gele het. Na džanav, kaj gele. Sidaren pal lende, mek len šaj dochuden.” ⁶Oj len ligenda pro pados a ode len garuďa tel o ľanos, so sas ode rozthodo. ⁷Avke le kralískere murša džanas pal lende le dromeha dži ko than, khatar pes predžal prekal o Jordan. Sar gele avri, takoj pal lende phandle andre o brani.

⁸Sigeder, sar o špijona džanas te sovel, geľa pal lende e Rachab pro pados ⁹a phendá: “Me džanav, hoj o RAJ tumenge diňa kadi phuv. Savore ade sam pherarde la daraha angle tumende a našaďam e zor.

¹⁰Šundám, sar o RAJ anglal tumende šučarďa avri o Lolo Moros †, sar džanas avri andral o Egipt. Šundám the oda, so kerdan le duje Amorejike kralenge pro vichodos le Jordanostar, le Sichonoske the le Ogoske, hoj len murdarďan savoreha, so len sas. ¹¹Sar oda šundám, samas pherarde la daraha angle tumende a našaďam e zor, bo o RAJ, tumaro Del, hin Del upre pro ņebos the tele pre phuv. ¹²Akana len vera anglo RAJ, hoj avke, sar me tumenge presikaďom o jileskeriben, presikavena the tumen mira famelijake a den man znameňje, ¹³hoj mire dades la daha, le phralen, le pheňen the lengere fameliji mukena te dživel a hoj amen zachraňinena le meribnastar!”

† E Hebrejiko čhib: O Trstínakero Moros

¹⁴ O murša lake phende: "Das tut lav: Amare dživipena vaš tumare! Te na phenena ñikaske, soske ade avlám, dolíkeraha oda lav a presikavaha tumenge o jileskeriben, sar amenge o RAJ dela kadi phuv."

¹⁵ Palís len mukl'a avri prekal oblaka le šeleha (lanoha), bo lakero kher sas ačhado jekhetane le foroskere muroha. ¹⁶ Phend'a lenge: "Džan pro brehi, hoj tumen le kralískere murša te na arakhen. Garuven pes ode trin dživesa, medik pes ola murša na visarena pale. Palís džan tumare dromeha."

¹⁷ O špijona lake phende: "Dolíkeraha e vera, so tut diňam, hoj mukaha tira famelija te dživel, ča te kerena ada: ¹⁸ Sar avaha andre kadi phuv, mušines te phandel loľi šparga pre oblaka, prekal savi amen mukl'al, a mušines ade te lel le dades, la da, le phralen le caľa famelija. ¹⁹ Te vareko lendar omukela o kher a ela murdardo, ela korkoro vaš oda vinovato a amen alestar avaha žuže, ale te vareko andro kher ela mardo, amen oda laha pre peste. ²⁰ A te varekaske phenaha, hoj soske ade avlám, akor odi vera amen imar na phandela."

²¹ "Mi ačhel pes avke, sar phend'an," oj odphend'a a akor len premukl'a a on gele het. Palís phandl'a pre oblaka loľi šparga.

²² O špijona gele paš o brehi a ačhile ode trin dživesa, medik le kralískere murša pes na visarde pale. Ola murša len rodenas všadzík, no na arakhle len. ²³ Palís kala duj špijona gele tele pal o brehi, pregele prekal o Jordan ko Jozua a phende leske avri sa, so pes lenge ačhiľa. ²⁴ A phende leske: "O RAJ diňa čačes calí kadi phuv andre amare vasta. Savore manuša hine pherarde la daraha angle amende a našade e zor."

O Izraeliti predžan prekal o Jordan

3 O Jozua uštil'a sig tosara a savore Izraelitenc a džalal andral o Šittim ko Jordan. Ode presute, medik na pregele o paňi. ² Pal o trin dživesa o vodci pregele prekal o taboris ³ a phende le manušenge: "Soča dikhena le rašajen, le Leviten, hoj lidžana e Zmluvakeri Archa – e Archa le Rajeskeri, tumare Devleskeri – džan pal lende, ⁴ hoj te džanen, save dromeha majinen te džal, bo mek šoha (ñikda) angle oda pes na mukl'an ole dromeha. Ma džan pašes ke Archa, aven latar dur, ajso jekh kilometros!"

⁵ Palís o Jozua phend'a le manušenge: "Sentňaren pes, bo tajsa o RAJ kerela maškar tumende bare zazraki."

⁶ O Jozua phend'a le rašajenge: "Hazden e Zmluvakeri Archa a džan laha anglo manuša." Avke hazdle e Archa a džanas anglal lende.

⁷ O RAJ phend'a le Jozuaske: "Adadživesestar tutar kerava bares anglal savore Izraeliti, hoj te dikhen, hoj som tuha, avke sar somas the le Mojžišoha. ⁸ Phen le rašajenge, save lidžan e Zmluvakeri Archa: 'Sar avena pro agor le Jordanostar, džan a ačhen andro paňi.' "

⁹ Palís o Jozua phend'a le Izraelitenge: "Avena a šunen o lava le RAJESKERE, tumare Devleskere. ¹⁰ Pal ada prindžarena, hoj hino maškar tumende o džido Del,

savo čačes tradela anglal tumende le Kanaančanen, le Chetitanen, le Chivijen, le Perizejen, le Girgašejen, le Amorejen the le Jebusejen. ¹¹ Dikhen, o rašaja predžan anglal tumende prekal o Jordan la RAJESKERA Zmluvakeri Archa, savo hin o Del caľa phuvake. ¹² Akana peske kiden avri dešuduje (12) muršen, jekhes andral dojekh Izraeliko kmeňos. ¹³ Soča o rašaja thovena peskere pindre andro Jordan le Rajeskeri Zmluvakeri Archa, oda paňi pes zaačhavela a o paňi, so avel upral, pes ačhavela pre jekh than."

¹⁴ O manuša pes mukle te džal het peskere taboristar, hoj te predžan o Jordan a o rašaja lidžanas e Zmluvakeri Archa angle lende. ¹⁵ O paňi andro Jordan sas ajso baro, hoj prečhorelas o brehi, bo sas časos, sar pes skidel upre o ulípen. Ale sar o rašaja, save lidžanas e Archa zmluvakeri, doavle ko paňi a sar thode peskere pindre pro agor andro Jordan, ¹⁶ o paňi pes zaačhada. O paňi, so avelas upral, pes ačhada pre jekh than igen dur lendar, paš o gavoro Adam, so hino paš o Caretan. O paňi imar na džalal tele ko moros Araba, so hino o Londo Moros, a o manuša predžanas prekal o Jordan pašes ko Jericho. ¹⁷ O rašaja, save lidžanas le RAJESKERI Zmluvakeri Archa, ačhenas pre šuki phuv maškar o Jordan, medik savore manuša na pregele. Avke savore Izraeliti pregele prekal e šuki phuv.

O dešuduj bara pro leperiben

4 Sar savore manuša pregele prekal o Jordan, o RAJ phend'a le Jozuaske: ² "Kiden tumenge avri dešuduje (12) muršen, andral dojekh kmeňos po jekh. ³ Phen lenge, hoj peske te len dešuduj bara adarik, kaj ačhenas o rašaja maškar o Jordan. Mi prelídžan len a thoven len pro than, kaj tumen sovna kadi rat."

⁴ O Jozua vičind'a ke peste ole dešuduje muršen le Izraelitendar, saven ačhada andral dojekh kmeňos po jekh, ⁵ a phend'a lenge: "Džan angle Archa le RAJESKERI, tumari Devleskeri, pro maškar andro Jordan. Dojekh mi lel jekh bar pro phiko – jekh bar vaš dojekh Izraeliko kmeňos. ⁶ Kada mi el tumenge pro leperiben pro furt. Te pes jekhvar tumare čhave phučena, so hine prekal tumende kala bara, ⁷ odphenen lenge, hoj sar prelídžanas le RAJESKERI Zmluvakeri Archa prekal o Jordan, o paňi angle late zaačhiľa. O Izraeliti peske leperena pro furt kale barenca, hoj o paňi andro Jordan sas zaačhado."

⁸ O Izraeliti kerde avke, sar o Jozua lenge phend'a: ile dešuduj bara maškar o Jordan, jekh bar vaš dojekh Izraeliko kmeňos, avke sar o RAJ phend'a le Jozuaske. Ande ola bara andro taboris a ode len thode tele. ⁹ O Jozua diňa te ačhavel dešuduj aver bara maškar o Jordan pre oda than, kaj ačhenas o rašaja, save lidžanas e Zmluvakeri Archa. O bara hine ode dží adadžives.

¹⁰ O rašaja la Archaha terdonas maškar o Jordan, medik na sas dokerdo savoro, so o RAJ phend'a prekal o Jozua le manušenge. The o Mojžiš ada phend'a le Jozuaske imar sigeder. O manuša sidarenas te predžal pre aver sera. ¹¹ Sar pregele savore, predžanas the o rašaja le RAJESKERA Archaha a gele pale te ačhel anglo

manuša. ¹² O kmeñi Ruben, Gad the jepaš kmeños Menašše sas pririchtimen pro mariben a pregele anglo Izrael, avke sar lenge oda phendá o Mojžiš. ¹³ Ajse 40 000 murša pririchtimen pro mariben, džanas anglo RAJ pro mali paš o Jericho.

¹⁴ Oda džives o RAJ hazdña upre le Jozua anglal calo Izrael, hoj pal calo leskero dživipen leske presikavenas ajsi bari pačiv avke sar the le Mojžišoske.

¹⁵ Palis o RAJ phendá le Jozuaske: ¹⁶ "Phen le rašajenge, save lidžan e Zmluvakeri Archa, hoj te džan avri andral o Jordan."

¹⁷ Akor o Jozua phendá le rašajenge: "Aven avri andral o Jordan!"

¹⁸ Sar o rašaja, save lidžanas e Archa, avle avri andral o Jordan a uštarde le pindrenca pre šuki phuv, o pañi avla pale pre peskero than. Sas pale ajsa baro, hoj prečhorelas o brehi.

¹⁹ Andro dešto džives ešebne (perše) čhonestar o manuša pregele o Jordan a kerde peske taboris paš o Gilgal, pre vichodno sera le Jerichoskera phuvatar.

²⁰ Ode o Jozua ačhađa ola dešuduj bara, so ile andral o Jordan. ²¹ A phendá le Izraelitenge: "Te pes tumare čhave pal oda jekhvar phučena, so hine prekal tumende kala bara, ²² phenen lenge, hoj adarik pregefa o Izrael prekal o Jordan pal e šuki phuv. ²³ Bo o RAJ, tumaro Del, anglal tumende šučarđa avri o Jordan, medik na pregefan, avke sar o RAJ tumaro Del kerđa le Lole Moroha †, so anglal amende šučarđa avri, medik na pregefam. ²⁴ Oda kerđa vašoda, hoj te džanen savore manuša pal cali phuv, savi bari hiñi le RAJESKERI zor, a hoj lestar te daran pro furt."

O Jozua občhinel le Izraeliten

5 Sar šunde savore Amorejike kraľa, save bešenas pro zapados pal o Jordan, the savore Kanaaňike kraľa, save bešenas paš o moros, hoj o RAJ šučarđa avri o pañi Jordan, hoj o Izraeliti te predžan, sas pherarde la daraha anglal lende a našade e zor.

² Akor phendá o RAJ le Jozuaske: "Ker tuke barune čhura a pale občhin le Izraeliten." ³ Avke o Jozua kerđa barune čhura a občhindá le Izraeliten paš o brehos Aralot. ⁴ Občhindá len vašoda, bo savore murša, kaske sas o berša andro mariben, save avle avri andral o Egipt, mule le dromeha pre puštá paloda, sar džanas avri andral o Egipt. ⁵ Savore murša, save avle avri, sas občhinde (obrezimen), ale ñiko le muršendar, save ulile le dromeha pre puštá, na sas mek občhindo. ⁶ Bo o Izraeliti phirenas pal e puštá saranda (40) berš, medik na mule savore murša, kaske sas o berša andro mariben, save avle avri andral o Egipt, bo na šunenas le RAJES. O RAJ lenge andre vera phendá, hoj na dikhena e phuv, so hiñi barvali le thudeha the le medoha, pal savi diña lav lengere phure daden, hoj lenge la dela. ⁷ O RAJ diña, hoj lengere čhave te baron avri pre lengero than, a o Jozua ole čhaven občhindá, bo na sas občhinde le dromeha.

† E Hebrejiko čhib: O Trstinakero Moros

⁸ Sar imar sas savore murša občhinde, ačhile andro taboris, medik na sastile avri. ⁹ Palis o RAJ phendá le Jozuaske: "Sas oda ladž, hoj sanas otroka andro Egipt. Adadžives tumendar adi ladž odčhidom." Vašoda pes dži adadžives kada than vičinel Gilgal ††.

O inepos Patrađi

¹⁰ Sar o Izraeliti taborinenas paš o Gilgal pro mali paš o Jericho, oslavinenas o inepos Patrađi ke račate andro dešuštarto (14.) džives ole čhoneske. ¹¹ Pre aver džives pal e Patrađi chanas chaben le ulipnastar andral e phuv: o mare bi o droždi the peko žužodiv. ¹² Andre oda džives, sar chale chaben la phuvatar, e manna preačhiľa. Andre oda berš o Izraeliti chanas o chaben andral o Kanaan, bo len imar na sas manna.

O Jozua the o murš la šablaha

¹³ Sar sas o Jozua pašes paš o Jericho, jekhwareste dikhľa te ačhel muršes la šablaha andro vast. O Jozua geľa ke leste a phučľa: "Sal jekh amendar, abo sal amaro ñeprijatělis?"

¹⁴ "Na," ov odphendá. "Me som o nekbareder velitelis le RAJESKERA armadakero a akana avlom."

Akor o Jozua bandiľa le mujeha dži ke phuv a phendá: "So kames te phenel tire služobňikoske, rajeja miro?"

¹⁵ O velitelis le RAJESKERA armadakero leske phendá: "Čhiv tele o sandalki, bo o than, pre savo ačhes, hin sentno." Avke o Jozua oda kerđa.

O Jericho perel

6 Akor o manuša andral o Jericho phandle anglo Izraeliti o foroskere brani. Ñiko na džalas avri aňi andre. ² O RAJ phendá le Jozuaske: "Dikh, diňom tuke andro vasta o Jericho the leskere kralis le slugađenca. ³ Obdža o foros savore tire slugađenca sako džives jekhvar a ker avke šov džives. ⁴ Mi lidžan efta rašaja angle Archa efta trubi le rohendar. Pro eftato džives obdžan o foros eftavar a o rašaja furt mi trubinen. ⁵ Sar šunena, hoj zalikeren jekhvar o hangos andral o trubi, akor savore manuša zorales mi vriskinen. Akor perena o foroskere muri a o manuša džana prosto andro foros."

⁶ Avke o Jozua, le Nunoskero čhavo, vičindá le rašajen a phendá: "Hazden e Zmluvakeri Archa a efta rašaja le efta trubenca mi džan angle RAJESKERI Archa."

⁷ Le manušenge phendá: "Džan! Obdžan calo foros a o slugađa pririchtimen pro mariben mi džan angle RAJESKERI Archa."

⁸⁻⁹ Kerde avke, sar o Jozua phendá: ešeb (peršo) džanas o slugađa a pal lende džanas efta rašaja le trubenca, save calo kada časos trubinenas. Pal lende džanas aver rašaja, save lidžanas le RAJESKERI Archa a pal lende mek aver slugađa. ¹⁰ Ale o Jozua phendá le manušenge: "Ma vriskinen, ma vakeren zorales a ma phenen aňi jekh lav dži oda džives, medik tumenge na

†† Oda hin: Te odčhivel.

phenava, hoj te vriskinen. Palis vriskinen!" ¹¹ Avke kerdã, hoj le RAJESKERA Archaha te obdžan o foros. Sar les obgele jekhvar, avle andro taboris a ode ačhile te presovel.

¹² Pre aver džives sig tosara o Jozua uštíla a o rašaja hazdle le RAJESKERI Archa. ¹³ O efta rašaja lidžanas efta trubi angle RAJESKERI Archa le dromeha a furt trubinenas. O slugađa džanas anglal the pal e RAJESKERI Archa. ¹⁴ Kavke the pro dujto džives obgele o foros jekhvar a palis pes visarde andro taboris. Avke oda kerenas šov dživesa.

¹⁵ Pro eftato džives, sar vidñisaolas, uštíle a obgele o foros avke sar angloda. Ča andre oda džives obgele les eftavar. ¹⁶ Sar les imar obgele eftavar, o rašaja chudle te trubinel a o Jozua phendã le manušenge: "Vriskinen, bo o RAJ tumenge diña kada foros! ¹⁷ O foros the savoro, so hin andre, hin dino le RAJESKE sar obeta, hoj te el zñičimen. Ča e lubñi e Rachab the savore, save hine laha andro kher, ačhena te dživel, bo garuđa amare špijonon, saven bičhađam. ¹⁸ Ma chuden pes olestar, so mušinel te el zñičimen, bo oda hin dino ča prekal o RAJ. Te lena vareso, o Izraeliko taboris mušinel te el zñičimen a perela andre bibach. ¹⁹ Savoro rup, somnakaj, o veci le bronzostar the le trastestar hine dine ča prekal o RAJ. Thovena oda andre le RAJESKERI pokladñica."

²⁰ O rašaja trubinenas. Soča o manuša šunde o trubi, chudle te vriskinel bara vikaha a o foroskere muri pele. Avke o manuša džanas prosto upre andre oda foros a kavke les zaile. ²¹ Oddine calo foros le RAJESKE aleha, hoj le šablēna murdarde dojekhes andro foros: le muršen, džuvlēn, phuren, le ternen, le gurunēn, bakren the le somaren.

²² O Jozua phendã le duje muršenge, save predikhle e phuv: "Džan andro kher ke lubñi Rachab a len la avri odarik savorenca, save hine ode, avke sar lake la veraha diñan lav." ²³ Avke o špijona gele a ile avri la Rachab, lakere dades la daha, le phralen the savoren, save sas laha. Thode caľa lakera famelija te bešel avri paš o Izraeliko taboris. ²⁴ Labarde avri o foros savoreha, so ode sas. Ča o rup, o somnakaj the o veci le bronzostar the le trastestar thode andre le RAJESKERI pokladñica. ²⁵ O Jozua mukľa te dživel la lubña Rachab, lakera famelija the savore, save laha sas. Bo garuđa le špijonon, saven o Jozua bičhađa te predikhel o Jericho. On dživen maškar o Izraeliti dží adadžives.

²⁶ Andre oda časos o Jozua phandľa le manušen kala veraha:

"Prekošlo mi el anglo RAJ oda,
ko chudela pale te ačhavel kada foros Jericho!
O zaklados thovela vaš o dživipen
peskere ešebne časkero
a o brani ačhavela vaš o dživipen
peskere nekternedere časkero."

²⁷ O RAJ sas le Jozuaha a o hiros pal leste pes rozligendã pal calí phuv.

Le Achanoskero binos

7 Le Izraelitenge sas phendo, hoj savoro andro Jericho sas oddino le RAJESKE sar obeta, hoj te el zñičimen. Ale o Izraeliti na dolíkerde oda, bo jekh murš, o Achan, íla olestar, a vašoda o RAJ sas igen choľamen pro Izraeliti. O Achan sas o čhavo le Karmioskero, savo sas o čhavo le Zabdiskero a ov sas o čhavo le Zerachoskero andral o kmeños Juda.

² Palis o Jozua bičhađa muršen andral o Jericho andro foros Aj, so hino paš o Bet-Aven pro vichodos le Betelostar. Phendã lenge: "Džan te predikhel odi phuv." Avke o murša gele te predikhel o foros Aj.

³ Sar avle pale ko Jozua, phende leske: "Soske ode džana savore, mi džan ode ča vaj duj ezera (2 000) abo trin ezera (3 000) murša a on domarena o Aj. Soske te trapinel savore muršen, te ode nane ajci manuša?"

⁴ Avke gele ajse trin ezera (3 000) Izraeliti pro mariben, ale on mušinde te denašel ole muršendar andral o Aj.

⁵ O murša andral o Aj tradenas len la foroskera branatar tele le brehoha dží ko thana, kaj phagerenas o bara. Le dromeha murdarde lendar ajse tranda the šov (36) muršen. Avke o Izraeliti sas pherarde la daraha a našade e zor.

⁶ Akor o Jozua andre žala pre peste čhingerđa o plaštós a bandíla le mujeha dží ke phuv angle RAJESKERI Archa. Ode pašolas jekhetane le Izraelike vodcena, medik na zaračila, a čhivkerenas peske o prachos pro šero. ⁷ O Jozua phendã: "Ó, RAJEJA, Devla, soske preligendã kale narodos prekal o Jordan? Ča vašoda, hoj amen te des andro vasta le Amorejenge, hoj amen te murdaren? Feder ulahas amenge te ačhiľamas pal o Jordan! ⁸ Mangav tut, RAJEJA, so majinav te phenel pre ada akana, te o Izraeliti denašle peskere ñeprijateľendar? ⁹ Sar pes oda došunena o Kanaančana the aver manuša, save ade bešen, avena pre amende pal dojekh sera a murdarena amen avri. Akana, so kereha, hoj te na džal pal tu nalačho hiros?"

¹⁰ Ale o RAJ phendã le Jozuasko: "Uští! Soske pašlos pre phuv le mujeha? ¹¹ O Izraeliti kerde binos anglal ma a na dolíkerde miri zmluva, so len diňom! Kamenas manca te thovel avri: Čorde varesave veci, so sas oddine prekal ma, a odthode len maškar peskere veci.

¹² Vašoda o Izraeliti naští obačhon anglal peskere ñeprijateľa a mušinen te denašel lendar, bo ačhile oda, so mušinel te el zñičimen. Na avava tumenca, medik na zñičinena oda, so majindã te el oddino mange.

¹³ Dža, phen le manušenge, hoj pes te sentñaren pro tajsã. Phen lenge, hoj o RAJ, o Del le Izraeloskero, phenel avke: 'Izrael, ífal le vecendar, so majinde te el zñičimen! Na obačhoha anglal tire ñeprijateľa, medik pestar na odčhivena oda, so majindã te el zñičimen.

¹⁴ Vašoda tajsã tosara avena anglal ma jekh kmeños pal aver. Oda kmeños, so o RAJ avri kidela, avela anglal ma jekh fajta pal aver. Ola fajta, so o RAJ avri kidela, avela anglal ma jekh famelija pal aver a ola famelija, so o RAJ avri kidela, avela anglal ma jekh murš pal aver.

¹⁵ Oda manuš, pre kaste pes sikavela, hoj leste hin oda,

so majindã te el zničimen, ela labardo savoreha, so les hin. Bo na dolikerdã le RAJESKERI zmluva a kerdã le Izraeloske bari ladž.' "

¹⁶ Sig tosara o Jozua uštíla a phendã le Izraelitenge, hoj te aven jekh kmeños pal aver, a o kmeños Juda sas avrikidlo. ¹⁷ Palis phendã le kmeñoske Juda, hoj te aven avri, a le Zerachoskeri fajta sas avrikidni. Avke phendã, hoj te aven o murša andral e Zerachoskeri fajta, a o Zabdi sas avrikidlo. ¹⁸ Sar phendã, hoj te aven o murša andral leskeri famelija, o Achan sas avrikidlo. Ov sas le Karmioskero čhavo, leskero dad o Zabdi a leskero dad o Zerach andral o kmeños Juda.

¹⁹ O Jozua phendã le Achanoske: "Čhavo miro, phen mange avri o čačipen anglo RAJ, anglo Del le Izraeloskero, a pridžan tut, so kerđal. Ma garuv nič anglal ma!"

²⁰ O Achan odphendã: "Čačipen hin, kerđom binos anglo RAJ, anglo Del le Izraeloskero, a kada hin oda, so kerđom: ²¹ Dikhľom maškar o veci andro Jericho šukar Šinariko plaštõs, ajse duj kili rup, the jekh somnakuňi cehla phari vaj jepaš kilos. Avke len igen kamavas, hoj mange len ilom. Garuđom len andro miro stanos tel e phuv a o rup hin dži telal."

²² Palis o Jozua phendã varesave muršenge, hoj te džan sigo andro stanos. Čačes ola veci sas garude andre leskero stanos tel e phuv a o rup sas dži telal.

²³ Avke oda ile andral o stanos, ande le Jozuaske the le Izraelitenge a thode oda anglo RAJ. ²⁴ Androda o Jozua a savore Izraeliti chudle le Achan, le Zerachoskere čhas, the o rup, o plaštõs, e somnakuňi cehla the leskere čhaven, čhajen, gurumňen, somaren, bakren, leskero stanos the savoro, so les sas, a ligende len andre dolina Achor. ²⁵ O Jozua phendã: "Soske amen andal andre bibach? Akana tut anela o RAJ andre bibach!" Avke savore Izraeliti čhivkerenas andre lende le barenca, medik na mule, a palis len labarde savore vecenca. ²⁶ Thode upral lende bari kopa bara, so hin ode dži adadžives. Avke o RAJ pes visardã peskera bara choľatar. Vašoda pes odi dolina furt vičinel Achor †.

O Izraeliti zalen o foros Aj

8 Avke o RAJ phendã le Jozuaske: "Ma dara tut, av zoralo! Le tuha savore slugađen a dža andro foros Aj. Dav tuke andro vasta le kralis andral o Aj, leskere manušen, o foros the e phuv. ² Ker le Ajoha the leskere kraliha avke, sar kerđal le Jerichoha the leskere kraliha, ale akana peske šaj len lengere dragane veci the o stadi. Muk varesave muršen, hoj te džan pro foros palunestar."

³ Avke o Jozua džalas savore peskere slugađenca te zalel o foros Aj. Kidľa peske avri 30 000 zorale slugađen, rači len bičhađa ⁴ a phendã: "Džan, garuven pes pal o foros, ale ma aven igen dur lestar. Aven savore pririchtimen! ⁵ Ale me the savore murša, save hine manca, džaha pašes ko foros a te avena pre amende, denašaha lendar avke sar ešebnovar (peršovar). ⁶ On avena pal amende, bo peske gondolinena,

† Oda hin: E bibach.

hoj amen lendar denašas avke sar ešebnovar. Kaleha len dochudaha avri le forostar. ⁷ Tumen akor džan palunestar pro foros a zalen les. O RAJ, tumaro Del, tumenge les dela andro vasta. ⁸ Sar zalena o foros, podlabaren les pal le RAJESKERO lav. Kada tumenge prikazinav." ⁹ Kavke len o Jozua bičhađa a garuvenas pes pro zapados le Ajostar, maškar o Betel the Aj. O Jozua odi rat ačhiľa te presovel maškar o manuša.

¹⁰ O Jozua uštíla sig tosara, vičindã le muršen a džalas le vodcenca angle lende ko foros Aj. ¹¹ Savore slugađa, save sas leha, gele dži ko foros. Sar avle pašes ke leste, kerde peske taboris pro severos le Ajostar. Maškar lende the maškar o foros Aj sas dolina. ¹² Imar angloda iľa ajse pandž ezera (5 000) muršen a phendã lenge, hoj pes te garuven pro zapados le forostar maškar o Aj the Betel. ¹³ Avke ačhade buteder muršen andro taboris pro severos le forostar a varesave muršen garude pro zapados. Odi rat o Jozua geľa tele andre dolina.

¹⁴ Sar oda dikhľa o kralis andral o Aj, sidarelas sig tosara le muršenca avri andral o foros. Geľa savore peskere muršenca pro mariben pro Izraeliti le dromeha, sar pes džal ke Jordaňiko dolina, pre oda than sar ešebnovar. Ale ov na džanelas, hoj pre leste hine pririchtimen aver garude murša pal o foros. ¹⁵ O Jozua the calo Izrael kerenas pestar, hoj prekhelde (prehrajinde) a denašenas lendar pre pušťa. ¹⁶ O murša andral o Aj vičinde savoren, save ačhile andro foros, hoj te džan the on pal lende. Denašenas pal o Jozua a avke len dochudle avri andral o foros. ¹⁷ Savore manuša andral o Aj the andral o Betel džanas pal o Izraeliti a o foros mukle phundrado.

¹⁸ O RAJ phendã le Jozuaske: "Hazde pro foros Aj e kopija, so tuke hiňi andro vast, bo dava tuke les." O Jozua hazdňa peskeri kopija pro foros. ¹⁹ Sar hazdňa o vast, o garude murša sigo denašle avri pal peskero than, sidarenas andro foros, zaile les a takoj podlabarde.

²⁰ Sar pes o murša andral o Aj visarde palal, dikhle, sar o thuv džal andral o foros upre andro ňebos. Na sas len imar ňikhaj te denašel, bo o Izraeliti, save denašenas pre pušťa, pes visarde pal lende. ²¹ Bo sar o Jozua the calo Izrael dikhle, hoj lengere murša zaile o foros a hoj odarik džal o thuv, visarde pes a chudle te marel le muršen andral o Aj. ²² Ola Izraeliti, save zaile o Aj, džanas andral o foros pre lende a avke pes dochudle o murša andral o Aj maškar lende. Marenas pes lenca pal o duj seri avke, hoj ňiko lendar našti denašľa aňi na ačhiľa džido. ²³ Ale le kralis andral o Aj chudle džides a ande les ko Jozua.

²⁴ O Izraeliti murdarde savore manušen andral o foros Aj. Džanas pal lende pre maľa the pre pušťa a dojekh murš sas murdardo la šablaha. Palis visardã pes calo Izrael andro foros Aj a the le manušen odarik murdarde. ²⁵ Oda džives murdarde 12 000 muršen the džuvľen – savoren, save dživenas andro Aj. ²⁶ Se o Jozua likerelas e kopija andro vast a nacirdľa la, medik savoren andral o foros Aj na murdarde avri. ²⁷ O

Izraeliti peske ile ča o dragane veci the o stadi andral o foros, kavke sar phendā o RAJ le Jozuaske.

²⁸ Avke o Jozua labarda o Aj a kerda lestar zburaniskos pro furt a hin oda dži adadžives. ²⁹ Le kralis andral oda foros diňa te figinel a mukla les ode pro stromos, medik o kham na zapela. Ke račate o Jozua phendā le muršenge, hoj te len leskero mulo telos tele pal o stromos. Palis les čhide paš e foroskeri brana a thode upral leste bari kopa bara, so hin ode dži adadžives.

O Jozua pregenel le Mojžišoskero zakonos

³⁰ Akor o Jozua ačhađa le RAJESKE, le Izraeloskere Devleske, oltaris pro verchos Ebal. ³¹ Oda oltaris sas le barendar, so na sas oprikerde, savendar pes o trast na chudla, avke sar phendā le RAJESKERO služobnikos o Mojžiš. Ov oda pisinda le Izraelitenge andro zakonoskero zvitkos. Kerde ode le RAJESKE labarde the smiromoskere obeti. ³² Ode angle savore Izraeliti pisinda pre ola bara o zakonos, so diňa o Mojžiš. ³³ Calo Izrael, leskere vodci, uradnika the sudci ačhenas pal soduj seri pašal e Archa anglo rašaja, save sas Leviti a lidžanas le RAJESKERI Zmluvakeri Archa. Ačhenas ode the o cudzinci, save maškar lende bešen. Jepaš le manušendar ačhenas anglo verchos Gerizim a jepaš anglo verchos Ebal, sar angloda phendā le RAJESKERO služobnikos Mojžiš, hoj te keren, sar požehņinena le Izraeliten.

³⁴ Palis pregenda savore lava le zakonoskere, o požehnaņje the o košiben, avke sar hin pisimen andro zakonoskero zvitkos. ³⁵ O Jozua pregenda dojekh lav, so o Mojžiš prikazinda, angle savore Izraeliti, anglo romňa, čhavore the cudzinci, save džanas lenca.

O Gibeona thoven avri le Izraelitena

9 Sar pes oda došunde savore krafa, save bešen pro zapados le Jordanostar pro verchengere the brehengere phuva a teleder paš o Stredozemno Moros dži ko verchi Libanon – o Chetitana, o Amoreja, o Kanaančana, o Perizeja, o Chivija the o Jebuseja – ² zgele pes jekhetane pro mariben pro Jozua the pro Izraeliti.

³ Ale sar o manuša andral o Gibeon šunde, so kerda o Jozua andro Jericho the andro Aj, ⁴ phende peske, hoj leha thovena avri. Varesave murša thode pro somara purane gone le chabeneha a ile cipune gone pre mol, so sas purane, čingerde the side. ⁵ Urde peske purane side sandalki the purane gada a ile peha the šuko trušaco maro. ⁶ Kavke džanas ko Jozua andro taboris paš o Gilgal te phenel le Izraelitenge the leske: "Avlam andral e phuv, so hiňi dur adarik. Phanden amenca zmluva."

⁷ O Izraeliti phende le Gibeonenge †: "So, te bešen tumen pašes paš amende? Sar amen akor šaj tumenca phandas e zmluva?"

⁸ "Sam tire služobnika," odphende le Jozuaske.

O Jozua lendar phučla: "Ko san a khatar san?"

⁹ Odphende leske: "Amen avlam andral e phuv, so hiňi igen dur, bo šundam pal o RAJ, tumaro Del. Šundam pal savoro, so kerda andro Egipt ¹⁰ a mek the pal oda, so kerda ole duje Amorejike kralenge pal o Jordan: le kraliske le Sichonoske andral o Češbon a le kraliske le Ogoske andral o Bašan, savo bešelas andro foros Aštarot. ¹¹ Vašoda amenge amare vodci the savore manuša andral amari phuv phende: 'Len tumenge chaben pro drom, džan anglal lende a phenen lenge: "Amen sam tumare služobnika, phanden amenca akana zmluva." ' ¹² Kada hin amaro maro, so peske ilam kheral mek tato, sar avlam ke tumende. A akana dikhen! Šučila avri a ačhila trušaco. ¹³ Kala hine amare cipune gone pre mol. Sar peske len pherardam, sas neve. Dikhen, akana hine čingerde. Amare gada the o sandalki hine zničimen le bare dromestar."

¹⁴ O Izraelike murša ile lengere chabenestar, ale le RAJESTAR pes pal ada na phučle. ¹⁵ O Jozua pes dothoda lenca andro smirom a phandla lenca e zmluva, hoj len mukela te dživel a le Izraelengere vodci pre oda priačhile la veraha.

¹⁶ Ale pal o trin dživesa, sar peha phandle zmluva pes došunde, hoj ola manuša bešen nadur the pašes paš lende. ¹⁷ Avke o Izraeliti džanas le dromeha a pro trito džives avle andre lengere fori: O Gibeon, Kefira, Beerot the Kirjat-Jearim. ¹⁸ Ale o Izraeliti len na murdarde, bo o vodci ile vera pro RAJ, pro Del le Izraeloskero. Savore Izraeliti namištes vakerenas pro vodci, ¹⁹ ale on odphende: "Ilam vera pro RAJ, pro Del le Izraeloskero. Vašoda akana našti lenca nič keras. ²⁰ Mušinas len te mukel džiden, hoj amen o Del te na marel vaš e vera, so len diňam." ²¹ Palis lenge mek phende: "Mukas len te dživel! Ale mušinena te čingerel o kašta a te hordinel o paňa prekal savorendre pro furt." Kavke o vodci dolikerde e vera, so dine le Gibeonen.

²² Palis o Jozua len vičinda a phendā lenge: "Soske amenca thođan avri? Phenda amenge, hoj san igen dural, ale bešen pašes paš amende! ²³ Vašoda san akana prekošle a ačhena otroka pro furt! Čingerena o kašta a hordinena o paňa prekal o kher mire Devleskero!"

²⁴ On phende le Jozuaske: "Tire služobnika pes igen daranas pal o dživipen. Phende amenge, hoj o RAJ, tiro Del, phendā peskere služobnikoske le Mojžišoske, hoj tumenge te del cali phuv a te murdarel savoren manušen odarik anglal tumende. Vašoda avke kerdam. ²⁵ Akana sam andre tire vasta. Ker amenca oda, so gondoline, hoj hino lačo the čačipnaskero."

²⁶ Ov kerda lenca oda, hoj len ila avri andral o vasta le Izraelengere a na murdarde len. ²⁷ A oda džives o Jozua lendar kerda peskere sluh, save mušinas te čingerel o kašta a te hordinel o paňa prekal savore Izraeliti the prekal le RAJESKERO oltaris pre oda than, so peske kidela avri o RAJ. A kada hin oda, so keren dži adadžives.

† O Gibeona sas Chivija.

O Jozua ňerinel upral o pandž Amorejike kraľa

10 O Jeruzalemsko kralis Adoni-Cedek igen predarandila, sar šundā, hoj o Jozua zaila o foros Aj a zničindā les the leskere kralis avke, sar kerda the le Jerichoha the leskere kraliha, a sar šundā the oda, hoj o manuša andral o Gibeon pes dothode, hoj ačhena andro smirom le Izraelitenca a hoj bešen maškar lende. ² Ov the leskere manuša pes daranas, bo o Gibeon sas baro foros sar jekh le kraľengere forendar. O Gibeon sas bareder sar o foros Aj a savore murša odarik pes džanenas te marel. ³ Vašoda o kralis Adoni-Cedek vičindā kraľen andral aver fori: le Hoham andral o Hebron, le Piream andral o Jarmut, le Jafijah andral o Lachiš the le Debir andral o Eglon. ⁴ Mangelas len: "Aven ke mande a pomožinen mange te domarel o foros Gibeon, bo pes dothode, hoj ačhena andro smirom le Jozuaha the le Izraelitenca."

⁵ Avke pes zgele ola pandž Amorejike kraľa andral o Jeruzalem, Hebron, Jarmut, Lachiš the Eglon. Avle savore peskere slugađenca paš o Gibeon a ode pes rozthode a gele pro mariben pre leste.

⁶ Avke o Gibeona dine te phenel le Jozuaske andro taboris paš o Gilgal: "Ma omuk tire služobņiken! Sigo av ke amende! Pomožin amenge a zachrañin amen, bo savore Amorejike kraľa, save bešen pro verchengeri phuv, pes pre amende kiden pro mariben."

⁷ O Jozua geľa andral o Gilgal savore slugađenca the zorale muršenca pro mariben. ⁸ O RAJ phendā le Jozuaske: "Ma dara tut lendar, bo diñom tuke len andro vasta. Ņiko lendar na obačhola anglal tute."

⁹ O Jozua džalas cali rat andral o Gilgal a geľa pre lende avke, hoj aņi na užarenas pre oda. ¹⁰ O RAJ kerda, hoj o Amoreja la daratar ačhile sar bi e godi anglo Izraeliti. Paš o Gibeon o Izraeliti igen but dženen murdarde a džanas pal lende le dromeha upre pro Bet-Choron a murdarkerenas len dži ke Azeka the Makkeda. ¹¹ Sar denašenas le Izraelitendar tele pal o brehos le dromeha andral o Bet-Choron, o RAJ diňa, hoj te perel pre lende andral o ňebos bare ľegošne krupi sar bara dži ke Azeka avke, hoj ola, save mule le ľegošne krupendar, sas buter sar ola, saven murdarde o Izraeliti le šablēnca.

¹² Oda džives, sar o RAJ diňa le Izraelitenge te ňerinel (zvitazinel) upral o Amoreja, o Jozua vakerelas le RAJE-HA. Anglal calo Izrael phendā:

"Khameja, zaačhav tut upral o Gibeon a tu, čhoneja, upral e dolina Ajalon!"

¹³ Avke o kham the o čhon zaačhile, medik o manuša na ňerinde upral peskere ňeprijateľa. Oda hin pisimen andro le Jašariskero zvitkos.

O kham pes zaačhadā maškar o ňebos a calo džives na zageľa. ¹⁴ Ajso džives na sas aņi angloda aņi palis, hoj o RAJ kavke šundahas avri le manušes. O RAJ pes čačes marelas vaš o Izrael.

¹⁵ Palis o Jozua pes visarda andro taboris Gilgal a calo Izrael leha.

¹⁶ Ola pandž kraľa denašle a garude pes andre jaskiňa paš e Makkeda. ¹⁷ Avke le Jozuaske gele te phenel: "Arakhle pes ola pandž kraľa. Garuven pes andre jaskiňa paš e Makkeda." ¹⁸ O Jozua phendā: "Začhiven e chev andre jaskiňa bare barenca a ačhaven paš late le muršen, hoj te merkinen. ¹⁹ Ale tumen pes ma zaačhaven. Džan pre peskere ňeprijateľa palunestar a ma domuken lenge, hoj pes te visaren pre peskere fori, bo o RAJ tumaro Del, tumenge len diňa andro vasta."

²⁰ O Jozua the o Izraeliti preačhile o mariben peskere ňeprijateľenca, bo murdarde maj savoren. Ole, save predžidile, denašle a dochudle pes andre peskere zorale fori le murenca. ²¹ Savore manuša pes visarde pale a mištes dogele andro taboris ko Jozua paš e Makkeda. Ņiko peske imar na domukla te phenel aņi lav pro Izraeliti.

²² Avke o Jozua phendā: "Phundraven e chev andre jaskiňa a anen ke mande ole pandž kraľen." ²³ Kerde oda a ande ke leste andral e jaskiňa ole kraľen andral o Jeruzalem, Hebron, Jarmut, Lachiš the Eglon. ²⁴ Sar ole kraľen ande ke leste, o Jozua vičindā savore Izraelitenca a le veliteľenge, save avle leha, phendā: "Aven a terđuven le pindrenca pro meňa kale kraľenge!" On gele a terđile lenge pro meňa.

²⁵ Palis lenge o Jozua phendā: "Ma daran tumen aņi ma izdran! Aven zorale a bi e dar, bo ada kerela o RAJ savore tumare ňeprijateľenca, pre save džana pro mariben." ²⁶ Palis o Jozua len diňa te murdarel a te figinel pro pandž stromi. Ode sas figimen, medik na zaračila.

²⁷ Sar zaračolas, diňa o Jozua len te lel tele a te čhivel andre jaskiňa, andre savi pes imar angloda garuvenas. Palis zathode e chev andre jaskiňa le bare barenca, so hine ode dži adadžives.

O Jozua zalel buter phuva

²⁸ O Jozua mek oda džives zaila o foros Makkeda a le manušen odarik murdarđa la šablaha. Ņikas na mukla te dživel. Le kraliha andral e Makkeda kerda avke, sar angloda le kraliha andral o Jericho.

²⁹ Palis o Jozua savore Izraelitenca geľa andral e Makkeda ko foros Libna a džalas pre leste pro mariben. ³⁰ The kada foros le kraliha diňa o RAJ le Izraelitenge andro vasta. Marenas len le šablēnca a murdarde savore manušen odarik – ňikaske na dine te predživel. Lengere kraliha kerda avke sar le kraliha andral e Jericho.

³¹ Palis o Jozua pregeľa cale Izraeloha andral e Libna ko foros Lachiš. Ode pes rozthode a džanas pro mariben pro manuša andral oda foros. ³² O RAJ diňa o foros Lachiš le Izraelitenge a pro dujto džives les zailē. Murdarde savoren le šablēnca, avke sar kerde andre Libna. ³³ Akor o kralis o Horam avla pro mariben andral o foros Gezer te pomožinel le kraliske andro Lachiš, ale o Jozua ňerinda upral leste the upral leskere manuša avke, hoj ňiko lendar na predžidila.

³⁴ Palis o Jozua pregeľa andral o Lachiš savore Izraelitenca ko foros Eglon a ode pes rozthode a džanas pre leste pro mariben. ³⁵ Mek oda džives les zaila. Murdarde le šablénca savoren, save sas andro foros, avke sar oda kerde le foroha Lachiš.

³⁶ Palis o Jozua savore Izraelitenca gele andral o Eglon ko foros Hebron pro mariben. ³⁷ Zaile les a murdarde savoren le kraliha a mek savoren andro pašutne gava. Na mukle ňikas te dživel. Avke sar oda kerde andro Eglon, ola gava zničinde a na mukle ňikas te dživel.

³⁸ Palis pes o Jozua visardã le Izraelitenca ko foros Debir pro mariben. ³⁹ Zaile les the leskere kraľenca a mek savoren andro pašutne gava a murdarde len. Na mukle ňikas te dživel. Avke sar kerde le forenca Hebron the Libna a lengere kraľenca, kerde the le foroha Debir a leskere kraliha.

⁴⁰ Kavke o Jozua ňerinda (zvitãzinda) upral savore kraľa andre cali phuv: pro verchengeri phuv the andre e pušta pro juhos, pro brehengeri phuv the pre vichodno sera le verchengeri – na mukla ňikas te dživel. Murdarã savoren, avke sar phenda o RAJ, o Del le Izraeloskero. ⁴¹ O Jozua len murdarã le forostar Kadeš-Barnea dži ke Gaza a cali phuv Gošen dži ko Gibeon. ⁴² Savore kraľen lengere phuvenca zaila jekhvareste, bo o RAJ, o Del le Izraeloskero, pes marelas vaš o Izrael.

⁴³ Palis pes o Jozua savore Izraelitenca visardã andro taboris Gilgal.

O Jozua ňerinel upral o kralis Jabin

11 Sar pes oda došundã o kralis Jabin andral o Chacor, diňa te vičinel le kralis Jobab andral o Madon, le kraľen andral o Šimron the andral o Achšaf, ² the le kraľen, save bešenã pro severne verchi a teleder andre dolina Jordan pro juhos le Galilejske mo-rostar the pre brehengeri phuv a the pašal o Dor pro zapados. ³ Diňa te vičinel the le Kanaančanen pal o zapados the pal o vichodos: le Amorejen, le Chetitanen, le Perizejen, le Jebusejen pal o verchengeri phuv the le Chivijien tel o verchos Chermon andre phuv Micpa. ⁴ O kraľa avle savore peskere armadenca – sas ajci slugađa sar e poši paš o brehos le moroskero. A sas len igen but graja the verdana pro mariben. ⁵ Kala savore kraľa pes sthode jekhetane a kerde peske taboris paš o paňa Merom, hoj te džan pro mariben pro Izrael.

⁶ Akor o RAJ phenda le Jozuaske: “Ma dara tut lendar, bo tajsa andre ajso časos ena mule. Me len dava andro vasta le Izraelitenge. Lengere grajenge podčhin o pindre a o verdana zlabar.” ⁷ O Jozua peskere slugađenca sidãrenas te džal ko paňa Merom a gele pre lende pro mariben. ⁸ O RAJ len diňa le Izraelitenge andro vasta, ňerinde (zvitãzinde) upral lende a džanas pal lende dži ko baro foros Sidon pro severos the ko Misrefot-Majim a pro vichodos dži ke dolina Micpa. Domarde len a na mukle ňikas te dživel. ⁹ O Jozua kerã avke, sar leske phenda o RAJ: podčhinda le grajenge o pindre a zlabarã o verdana.

¹⁰ Akor o Jozua avla pale, zaila o foros Chacor a le kralis odarik murdarã. (O kralis andral o Chacor kralinelas upral savore krališagi, so sas andre odi phuv.) ¹¹ Dojekhes odarik murdarde, na mukle ňikas džides a o foros zlabarde.

¹² Savore kala kraľengere fori o Jozua zaila a lengere kraľen phandla. Dojekhes murdarã la šablaha, avke sar leske prikazinda o Mojžiš, le RAJESKERO služobňikos. ¹³ O Izraeliti na zlabarde o fori, save sas ačhade pro kopi, o Jozua zlabarã ča o Chacor. ¹⁴ O Izraeliti peske ile savoro, so andre ola fori arakhle, a ile the savore stadi. Ale le manušen odarik murdãrenas la šablaha, medik lendar na sas dojekh mulo. ¹⁵ Avke sar o RAJ prikazinda peskere služobňikoske, le Mojžišoske, avke o Mojžiš phenda le Jozuaske a avke o Jozua the kerã. Ov na mukla avri nič olestar, so prikazinda o RAJ le Mojžišoske.

O phuva, so zaila o Jozua

¹⁶ Kavke o Jozua zaila cali kadi phuv: verchengere phuva the brehengere phuva pro severos the pro juhos, cali pušta pro juhos, cali phuv Gošen the e dolina paš o Jordan: ¹⁷ oda le verchostar Chalak upre ko verchos Seir pro juhos dži paš o Baal-Gad, so hin andre dolina Libanon tel o verchos Chermon pro severos. Savore kraľen odarik chudla a diňa te murdarel. ¹⁸ O mariben kale savore kraľenca igen but likerelas le Jozuaske. ¹⁹ ňisave fori le Izraelitenca pes na dothode andro smirom, ča jekh o Chivija andral o Gibeon. Savore fori zaile maribnaha. ²⁰ Bo o RAJ kerã, hoj ola manuša te en zoralejleskere, hoj pes te maren le Izraelitenca, hoj te en savore zničimen a murdarde bijal o jileskeriben, avke sar prikazinda o RAJ le Mojžišoske.

²¹ Akor avla o Jozua a murdarã le Anaken pro brehengere phuva: andral o Hebron, Debir, Anab the andral o Judske the Izraelike brehi. Zničinda len the savore lengere fori. ²² Le Anakendar na ačhila andre Izraeliko phuv ňiko. Ačhile ča andro fori Gaza, Gat the Ašdod.

²³ O Jozua zaila odi cali phuv avke, sar prikazinda o RAJ le Mojžišoske. O Jozua diňa kadi phuv le Izraelitenge sar dedictvos, dojekhe kmeňoske o kotor, so hin leskero. Avke le manušen andre odi phuv sas le maribnastar smirom.

O kraľa, save prekhelde

12 O Izraeliti ňerinde (zvitãzinde) upral duj kraľa pro vichodos le Jordanostar a zaile lengere phuva. Ola phuva chudenas le juhostar le paňestar Arnon upre pre vichodno sera le Jordanoskeri dži ko verchos Chermon.

² Jekh lendar sas o Amorejiko kralis o Sichon, savo bešelas andro foros Češbon. Leskeri phuv sas le forostar Aroer pro brehos le paňestar Arnon – maškartal ola dolinatar – dži ko paňa Jabbok pro severos, kaj chudelas imar e phuv le Ammončanengeri, oda hin

jepaš phuv Gilead. ³ Leskeri phuv sas le Galilejske mo-rostar paš o Jordan dži ko Bet-Ješimot paš o verchos Piska, so hin pro vichodos le Londe Morostar.

⁴ O dujto kralis sas o Og andral o Bašan, savo ačhiľa ča jekh le poslednendar savore Refajendar a bešelas andro fori Aštarot the Edrej. ⁵ Leskeri phuv sas le bre-hendar paš o Chermon dži ke Salcha – cali phuv Bašan dži ke hraňica le Gešurenca the le Maachatānenca. Kralinelas upral o jepaš phuv Gilead dži ke phuv le kraliskeri le Sichonoskeri, savo sas andral o foros Češbon.

⁶ Upral kala duj kraľa ňerinda le RAJESKERO služobňikos o Mojžiš le Izraelitencā. O Mojžiš diňa lengere phuva le Rubenskere the le Gadoskere kmeňenge a jepaš Menaššeskere kmeňoske, hoj te en lengero d'edictvos.

⁷ O Jozua the o Izraeliti ňerinde upral o kraľa pre zapadno sera le Jordanoskeri le Baal-Gadostar pro severos, so hin andre dolina Libanon, dži pro juhos ko verchos Chalak, so džal upre ko Seir. O Jozua diňa kala phuva le Izraelike kmeňenge pro furt. ⁸ Diňa lenge the savoro, so upre sas: o verchi, o telune thana, e Jor-daňiko dolina, o brehi a e pušta Negev pro juhos. Pre kala thana bešenā o Chetitana, o Amoreja, o Kanaančana, o Perizeja, o Chivija the o Jebuseja. ⁹ O Izraeliti ňerinde upral o kraľa andre kala fori: o Jericho, o Aj, so hin paš o Betel, ¹⁰ o Jeruzalem, o Hebron, ¹¹ o Jarmut, o Lachiš, ¹² o Eglon, o Gezer, ¹³ o Debir, o Ged-er, ¹⁴ e Chorma, o Arad, ¹⁵ e Libna, o Adullam, ¹⁶ e Makkeda, o Betel, ¹⁷ o Tappuach, o Chefer, ¹⁸ o Afek, o Šaron, ¹⁹ o Madon, o Chacor, ²⁰ o Šimron-Meron, o Achšaf, ²¹ o Taanach, o Megiddo, ²² o Kedeš, o Jokneam andro Karmel, ²³ Dor paš o moroskero brehos, o Gojim andre Galileja ²⁴ the o Tirca. Savore kraľa sas jekhetane tranda the jekh (31).

O phuva, so mek na sas zaile

13 Sar imar sas o Jozua igen phuro, o RAJ leske phenda: "Tu sal imar phuro a hin tuke imar but berš, ale ačhile ode but phuva, so o Izraeliti mek na za-ile. ² Ačhile mek o Filištinike the Gešurengere phuva. ³ O phuva, pal save phenen, hoj hine le Kanaančanengere, le paňestar Šichor, so džal pro vichodos le Egip-tostar, dži pro severos paš o Ekron. Ode bešen pandž Filištinike kraľa andral e Gaza, andral o Ašdod, o Aškālon, o Gat the o Ekron. Ačhiľa mek e phuv le Avvičanengeri, ⁴ pro juhos e phuv le Kanaančanengeri dži ke phuv Meara, so hiňi le Sidončanengeri, dži ko Afek, so hiňi e phuv le Amorejengeri. ⁵ Ačhiľa the e phuv le Gebalengeri the calo Libanon pro vichodos le Baal-Gadostar paš o verchos Chermon dži prekal o verchengero drom Lebo-Chamat. ⁶ Me anglal o Izraeliti tradava avri savore Sidončanen, save bešen maškar o verchi Libanon dži ko Misrefot-Majim. Tu akana le losoha ča rozulav le Izraelitenge o phuva avke, sar tuke phendom. ⁷ Rozulav kadi phuv le eňa kmeňenge the jepaš le Menaššeskere kmeňoske, hoj te el lengeri."

O phuva pro vichodos le Jordanostar

⁸ O Rubenskero, Gadoskero the o dujto jepaš le Menaššeskero kmeňos priile o d'edictvos, so lenge diňa o Mojžiš, le RAJESKERO služobňikos, pro vichodos pal o Jordan. Lengeri phuv chudelas ⁹ le forostar Aroer pro brehos paš e dolina Arnon, dureder ko foros, so hi-no maškar odi dolina, the ko rovno than le Dibonostar dži ko foros Medeba. ¹⁰ On priile savore fori le Amorejike kraliskere le Sichonoskere, savo kralinelas andro Češbon, dži ke phuv le Ammončanengeri. ¹¹ Priile mek o Gilead, e phuv le Gešurengeri the le Maachatānengeri, savore verchi paš o Chermon the cali phuv Bašan dži ke Salcha. ¹² E phuv Bašan sas angle oda le kraliskeri le Ogoskeri, savo bešelas andro Aštarot the Edrej. Ov ačhiľa ča jekh poslednendar savore Refajendar, upral save o Mojžiš ňerinda (zvitāzinda) a tradňa avri. ¹³ Ale o Izraeliti na tradle avri le Gešuren the le Maachatānen, vašoda dži adadžives bešen maškar lende.

O Leviskero kmeňos

¹⁴ O Mojžiš na diňa ňisavi phuv le kmeňos Levi vaš o d'edictvos, bo o RAJ o Del le Izraeloskero lenge phenda: "Na chudena o phuva, ale ča o obeti, so ena labarde pre miro oltaris."

Le Rubenskere phuva

¹⁵ O Mojžiš diňa o phuva vaš o d'edictvos le fameli-jenge andral o kmeňos Ruben. ¹⁶ Pro juhos lengeri phuv chudelas le forostar Aroer, so hino pro brehos paš e dolina Arnon – lengere sas the o foros maškar e dolina, the e phuv dži ke Medeba, ¹⁷ o foros Češbon the savore leskere fori, so hine pre odi phuv: o Dibon, o Bamot-Baal, o Bet-Baal-Meon, ¹⁸ e Jahca, o Kedemot, o Mefaat, ¹⁹ o Kirjatajim, e Sibma the o Ceret-Šachar pro brehos andre dolina, ²⁰ o Bet-Peor tel o verchos Piska the o Bet-Ješimot. ²¹ Chudle mek savore fori pre odi phuv the calo krališagos le Amorejike kraliskero le Sichonoskero, savo kralinelas andro Češbon. O Mojžiš ňerinda upral leste the upral o Midijaňike vodci, save sas o Evi, o Rekem, o Cur, o Chur the o Reba: Kala savore sas le kraliskere Sichonoskere vodci. ²² O Izraeliti murdarde the le vrašcos le Bileam, le Beoriskere čhas. ²³ Pro zapados le Rubenengeri phuv chudelas le brehostar Jordan. Kale fori the gava priile o fajti le Rubenengere sar d'edictvos.

Le Gadoskere phuva

²⁴ O Mojžiš diňa the d'edictvos dojekha fajtake andral o Gadoskero kmeňos. ²⁵ Sas lenge dino o foros Jazer, savore fori andro Gilead the jepaš phuv le Ammončanengeri dži ko Aroer, so hino pro pašes paš e Rabba, ²⁶ le Češbonostar ko Ramat-Micpa the Betonim; le forostar Machanajim dži ko than Lo-Debar. ²⁷ Tele andre dolina Jordan chudle o fori Bet-Haram, Bet-Nimra, Sukkot the Cafon a the oda, so ačhiľa la phuvatar le Si-

chonoskera, savo sas kralis le Chešbonoskero, the e vichodno sera le Jordanoskeri dži paš o Galilejsko moros. ²⁸ Kala fori the gava priile o fajti andral o kmeňos Gad sar d'edictvos.

Le Menaššeskere phuva

²⁹ O Mojžiš diňa le fajtenge andral o jepaš kmeňos Menašše kala phuva vaš o d'edictvos: ³⁰ Le forostar Machanajim ko severos, caľi phuv Bašan – o krališagos le kraliskero Ogoskero. Andro Bašan sas šovardeš (60) gava, so zaiľa o Jair. ³¹ O čhave le Machiroskere, savo sas o čhavo le Menaššeskero, priile jepaš phuv Gilead, o fori Aštarot the Edrej, kaj bešelas o kralis Og.

³² Kala phuva rozulaďa o Mojžiš andre Moabiko phuv pal o Jordan, pro vichodos le Jerichostar. ³³ Le kmeňoske Levi o Mojžiš na diňa nisavo d'edictvos, bo o RAJ, o Del le Izraeloskero, hino lengero d'edictvos, avke sar len diňa lav.

O Jozua rozulavel o phuva pro zapados le Jordanostar

14 Kala hine o phuva, so o Izraeliti chudle andro Kanaan, avke sar lenge dine sar d'edictvos o rašaj o Eleazar the o Jozua, o čhavo le Nunoskero, the le kmeňengere vodci andral o Izrael. ² O d'edictvos dine lenge prekal o losos, avke sar phend'a o RAJ prekal o Mojžiš, hoj te den le eňa the jepaš kmeňenge. ³ O Mojžiš imar diňa duj the jepaš kmeňenge o d'edictvos pal o Jordan, ale le Leviten na diňa nič. ⁴ Le Jozefoskere čhavendar sas duj kmeňi: o Menašše the o Efrajim. Le Leviten na diňa nisavo d'edictvos andre odi phuv. Chudle ča fori, hoj ode te bešen, the maľi prekal o gurumňa the stadi. ⁵ O Izraeliti kerde avke, sar o RAJ phend'a le Mojžišoske, a rozulade o phuva.

⁶ Sar o Izraeliti mek sas andro Gilgal, avle o manuša andral o kmeňos Juda ko Jozua. O Kaleb, o čhavo le Jefunnoskero andral e Kenizziko fajta, leske phend'a: "Tu džanes mištes, so phend'a o RAJ le Devleskere manušeske le Mojžišoske andro Kadeš-Barnea pal ma the pal tu. ⁷ Sas mange saranda (40) berš, sar man le RAJESKERO služobňikos o Mojžiš bičhaďa andral o Kadeš-Barnea te predikhel e phuv. Me leske phend'om o čačipen pal oda, so dikhľom. ⁸ Mire phrala, save džanas manca, darade avri le manušen. Ale me man likeravas le RAJESTAR, mire Devlestar. ⁹ Mek oda džives o Mojžiš man diňa vera: 'E phuv, pal savi phirehas, ela pro furt tiro the tire čhavengero d'edictvos, bo furt tut likerahas le RAJESTAR, mire Devlestar.' ¹⁰ Akana, šun! O RAJ dži akana man likerelas paš o dživipen, avke sar phend'a. Pregel'a imar saranda the pandž (45) berš akorestar, sar o RAJ oda phend'a le Mojžišoske. Oda sas akor, sar o Izraeliti mek phirenas pal e pušťa, a akana mange imar hin ohtovardeš the pandž (85) berš. ¹¹ Ole dživesestar, so man o Mojžiš bičhaďa, som mek furt zoralo. Avke sar ešebnovar (peršovar) hin man mek ajsi zor, hoj adadžives šaj džav pro mariben. ¹² Vašoda de mange akana kala brehi, pal save oda džives vakereľas o Mojžiš. Bo tu korkoro akor šundal,

hoj ode hine o Anaka the bare fori zorale murenca. Šaj el, hoj o RAJ ela manca a tradava len avri, avke sar oda phend'a o RAJ."

¹³ Avke o Jozua požehňinda le Kaleb, le Jefunnoskere čhas, a diňa leske o foros Hebron vaš leskero d'edictvos. ¹⁴ O Kaleb chudľa o Hebron sar d'edictvos, bo furt pes likerelas le RAJESTAR, le Izraeloskere Devlestar. ¹⁵ Angloda pes o Hebron vičinelas Kirjat-Arba, bo o Arba sas nekbareder manuš maškar o Anaka. Palis andre odi phuv sas smirom le maribnastar.

Le Judaskere phuva

15 Le Judaskero kmeňos priiľa o phuva, so prekal o losos ačhiľa lenge. Odi phuv chudel pro juhos dži ke pušťa Sin paš o Edom dži tele pro juhos. ² Pro juhos odi phuv chudel paš o brehos le Londe Morostar, paš o moroskero agor, so hin dži tele pro juhos, ³ džal ko juhos prekal o verchengero drom Akrabbim andre pušťa Sin a odarik džal pro juhos le Kadeš-Barneatar. Palis chudel pašal o Checron upre ko Addar, kaj visaľol ke Karka, ⁴ odarik dureder ko Acmon a dži ko paňi Egipt a ole paňestar dži paš o moros. ⁵ Pro vichodos le Judaskeri phuv chudel le Londe Moroskera seratar a oda le juhostar dži ko paňi Jordan. Odarik džal dureder pro severos le morostar ⁶ upre paš o Bet-Chogla a predžal khatar o severos la Bet-Arabatar upre ke skala Bohan. O Bohan sas le Rubenoskero čhavo. ⁷ Palis leskeri phuv chudel upre la dolinatar Achor ko Debir a odarik pes visarel pro severos ko Gilgal, so hino pre severno sera ola dolinatar paš o drom Adummim, odarik džal dureder ko paňa En-Šemeš the ko En-Rogel. ⁸ Palis leskeri phuv džal dureder upre andre dolina Ben-Hinnom pro juhos le Jebusejengere forostar – oda hin Jeruzalem. Dureder džal dži upre ko verchos pro zapados le forostar the pro severos la Refajengere dolinatar. ⁹ Palis leskeri phuv chudel le verchostar tele ko than, khatar chudel te džal o paňi Neftoach, dureder ko fori pašes paš o verchos Efron, palis tele ke Baala – oda hin o Kirjat-Jearim. ¹⁰ La Baalatar palis pes visarel ko zapados ko verchos Seir a predžal pro severos le verchostar Jearim – oda hin Kesalon – a lestar tele ko Bet-Šemeš dži ke Timna. ¹¹ Palis chudel pro severos le verchostar Ekron, visarel pes ko Šikron, džal dureder ko verchos Baala, palis ko Jabneel a dži paš o moros. ¹² Pro zapados le Judaskeri phuv chudelas le Stredozemne Moroskera seratar.

Pre kala phuva dživenas o Judaskere kmeňi pal peskere fajti.

Le Kaleboskeri phuv

¹³ O Jozua diňa le Kaleboske, le Jefunnoskere čhaske, varesave le Judaskere phuvendar, avke sar leske oda phend'a o RAJ. Diňa leske o foros Kirjat-Arba, oda hin o Hebron. Oda foros sas le Arbasoskero, savo sas dad le Anakoskero. ¹⁴ O Kaleb odarik čhiďa avri le Anakoskere trine čhaven: le Šešaj, le Achiman the le Talmaj.

¹⁵ Odarik džanas pro mariben ko foros Debir, so pes angloda vičinelas Kirjat-Sefer. ¹⁶ Akor o Kaleb phenda: "Oleske, ko ņerinela (zvitazinela) upral o foros Kirjat-Sefer a zalela les, dava mira čha la Achsa vaš e romŋi." ¹⁷ O Otŋiel, o čhavo le Kenazoskero, savo sas o phral le Kaleboske, zaiŋa odi phuv a avke chudŋa la Achsa vaš e romŋi.

¹⁸ Sar ov peske la iŋa romŋake, o Otŋiel la kerd'a upre, hoj te mangel peskere dadestar e maŋa. Sar geŋa tele pal o somaris, o Kaleb latar phučŋa: "So kames?"

¹⁹ Oj odphenda: "De man tiro požehnaŋje. Te mange imar diŋal e pušta Negev, de mange the o paŋa." Avke o Kaleb lake diŋa o uprone the o telune prameŋa.

²⁰ Kada hin o d'edictvos le Judaskere kmeŋoskero pal lengere fajti. ²¹ O fori, so sas le Judaskere kmeŋoskero pro juhos dži ko Edom, sas:

o Kabceel, o Eder, o Jagur, ²² e Kina, e Dimona, e Adada, ²³ o Kedeš, o Chacor, o Jitnan, ²⁴ o Zif, o Telem, o Bealot, ²⁵ e Chacor-Chadatta, o Kerijot-Checron, oda hin Chacor, ²⁶ o Amam, e Šema, e Molada, ²⁷ e Chacar-Gadda, o Češmon, o Bet-Palet, ²⁸ o Chacar-Šual, e Beer-Šeba, e Bizjotja, ²⁹ e Baala, o Ijim, o Ecem, ³⁰ o Eltolad, o Kesil, e Chorma, ³¹ o Ciklag, e Madmanna, e Sansanna, ³² o Lebaot, o Šilchim, o Ajin the o Rimmon: jekhetane bišueŋa (29) fori the lengere gavenca.

³³ Pro telune brehi sas kala fori:

O Eštaol, e Cora, e Ašna, ³⁴ o Zanoach, o En-Gannim, o Tappuach, o Enam, ³⁵ o Jarmut, o Adullam, o Socho, e Azeka, ³⁶ o Šaarajim, o Aditajim, e Gedera the o Gederotajim: dešuštar (14) fori the lengere gavenca.

³⁷ Lengere fori sas the o Cenan, e Chadaša, o Migdal-Gad, ³⁸ o Dilan, e Micpa, o Jokteel, ³⁹ o Lachiš, o Bockat, o Eglon, ⁴⁰ o Kabbon, o Lachmas, o Kitliš, ⁴¹ o Gederot, o Bet-Dagon, e Naama the e Makkeda; dešušov (16) fori the lengere gavenca.

⁴² Lengere fori sas the e Libna, o Eter, o Ašan, ⁴³ o Jiftach, e Ašna, o Necib, ⁴⁴ e Keila, o Achzib the e Mareša; eŋa fori lengere gavenca.

⁴⁵ Sas lengero the o foros Ekron le cikne forenca the le gavenca; ⁴⁶ a le Ekronostar dži ko moros savore fori paš o foros Ašdod lengere gavenca. ⁴⁷ O Ašdod the Gaza leskere cikne forenca the gavenca a odarik savoro dži ko Egiptsko paŋi the ko brehos le Stredozemno Moroskero.

⁴⁸ Priile mek o fori pal o brehi:

o Šamir, o Jattir, o Socho, ⁴⁹ e Danna, e Kirjat-Sanna, oda hin Debir, ⁵⁰ o Anab, o Eštemo, o Anim, ⁵¹ o Gošen, o Cholon the o Gilo: dešujekh (11) fori the lengere gavenca.

⁵² O Arab, e Ruma, o Ešan, ⁵³ o Janum, o Bet-Tappuach, e Afeka, ⁵⁴ e Chumta, e Kirjat-Arba, oda hin Hebron, the o Cior: eŋa fori the lengere gavenca.

⁵⁵ O Maon, o Karmel, o Zif, e Jutta, ⁵⁶ o Jezreel, o Jokdeam, o Zanoach, ⁵⁷ o Kajin, e Gibeja the e Timna: deš fori the lengere gavenca. ⁵⁸ O Chalchul, o Bet-Cur,

o Gedor, ⁵⁹ o Maarat, o Bet-Anot the o Eltekon: šov fori the lengere gavenca.

⁶⁰ O Kirjat-Baal, oda hin Kirjat-Jearim, the e Rabba: duj fori the lengere gavenca.

⁶¹ Pre pušta priile e Bet-Araba, o Middin, e Sechacha, ⁶² o Nibšan, o Londo Foros the o En-Gedi: šov fori the lengere gavenca.

⁶³ Ale le Judaskere manuša našti čhivenas avri le Jebusejen andral o Jeruzalem, avke ačhile dži adadžives te bešel paš lende.

O phuva le Efrajimskere the le jepaš Menaššeskere

16 E phuv, so sas diŋi prekal o losos le Jozefoskere čhavage, chudel le Jordanostar paš o Jericho pro vichodos le Jerichoskere paŋendar a e hraŋica džal dži ke pušta a upre ko Beteloskere brehi, ² paŋis dureder ko Luz, odarik ko Atarot – ke phuv le Arkijengeri – ³ mek pro zapados ke phuv le Jafletengeri dži ke phuv ko Teluno Bet-Choron the ko Gezer a zaačhel dži ko moros.

⁴ Kala phuva chudle le Jozefoskere čhave o Menašše the o Efrajim sar d'edictvos.

⁵ Le kmeŋoske Efrajim sas dine pal leskere fameliji kala phuva:

Ola phuva chuden le Atarot-Addarostar dži ko Upruno Bet-Choron ⁶ a dureder e hraŋica džal ko moros, pro severos le Michmetatostar, paŋis pro vichodos andro Taanat-Šilo a pašal leste pro vichodos predžal ko Janoach. ⁷ Khatar o Janoach džal tele andro Atarat the ke Naara a predžal pašes paš o Jericho dži ko Jordan. ⁸ Le forostar Tappuach džal e hraŋica ko zapados paš o paŋi Kana a zaačhel paš o moros. Kada d'edictvos chudle o fameliji andral o kmeŋos Efrajim. ⁹ The varesave fori le gavenca andral le Menaššengere phuva sas dine le kmeŋoske Efrajim.

¹⁰ Ale o Efrajima na tradle avri le Kanaančanen, save bešenos andro foros Gezir. Avke on ačhile maškar lende dži adadžives, ale ačhile lengere otroka.

O phuva le jepaš Menaššeskere pro zapados

17 O dujto jepaš kmeŋos Menašše chudŋa pro zapados prekal o losos o d'edictvos, bo ov sas le Jozefoskero ešebno (peršo) čhavo. Le Menaššeskero ešebno čhavo o Machir, savo sas zoralo andro mariben, chudŋa o phuva Gilead the Bašan. O Machir sas dad le Gileadoskero. ² The aver fajti andral o kmeŋos Menašše chudle prekal o losos o phuva sar d'edictvos: e fajta le Abiezeriskeri, le Chelekoskeri, le Asrieloskeri, le Šechemoskeri, le Cheferoskeri the le Šemidasoskeri. On sas o čhave le Menaššeskere, savo sas čhavo le Jozefoskero.

³ Ale le Celofchad na sas čhave, ča čhaja: e Machla, e Noa, e Chogla, e Milka the e Tirca. O Celofchad sas o čhavo le Cheferoskero, o Chefer sas le Gileadoskero, o

Gilead sas le Machiroskero a o Machir sas le Menaššeskero. ⁴ Avle ko rašaj Eleazar, ko Jozua, savo sas le Nunoskero čhavo, the ko vodci a phende: "O RAJ phendā le Mojžišoske, hoj the amen te del o d'edictvos maškar amare phrala." Avke o Jozua diña the len o d'edictvos maškar lengere dadeskere phrala, avke sar phendā o RAJ. ⁵ Kavke chudlā o Menašše o phuva Gilead the Bašan pal o Jordan the mek aver deš phuva, ⁶ bo le Menaššeskere čhaja chudle o d'edictvos maškar leskere čhave. E phuv Gilead ačhiła okla manušenge andral o kmeños Menašše.

⁷ O phuva le Menaššengere chudenas la phuvatar Ašer ko Michmetat, so hin pro vichodos le Šichemostar, a e hrañica džalas dureder pro juhos ko En-Tappuach. ⁸ E phuv pašal o Tappuach ačhiła le Menaššenge, ale o foros Tappuach sas le Efrajimengero. ⁹ E hrañica džal dureder tele ko pañi Kana. O fori pro juhos ole pañestar maškar o Menaššeskere fori hine le Efrajimoscere. Leskeri hrañica džal dureder pre severno sera ole pañestar dži ko Stredozemno Moros. ¹⁰ Pro juhos le pañestar Kana e phuv sas le Efrajimoscere a pro severos le Menaššeskere. Leskeri hrañica pro zapados sas o Stredozemno Moros. Pro severozapados leskera phuvatar sas o Ašer a pro severovichodos sas o Jis-sachar.

¹¹ Andro phuva le Jissacharskere the le Ašeroskere o Menašše priiła o fori Bet-Šean, Jibleam, Dor, En-Dor, Taanach the Megiddo lengere gavenca. O trito Dor sas paš o brehos le morostar.

¹² O kmeños Menašše našti zaila kala fori a avke o Kanaančana ode bešenas dureder. ¹³ Sar o Izraeliti sas zoraleder, ispidenas pro Kanaančana, hoj prekal lende te keren buči, ale našti len tradle avri.

¹⁴ Andre jekh džives le Jozefoscere čhave – o kmeñi Menašše the Efrajim – phende le Jozuaskere: "Soske amen diñal vaš o d'edictvos ča ajci sikra phuva? Se amen sam baro narodos, bo o RAJ amen dži akana požehñinelas."

¹⁵ O Jozua lenge odphendā: "Te san ajci but a o brehi andro Efrajim tumenge hine frima, džan andre phuv ko Perizeja the ko Refaja a ode čhingeren avri o veš, hoj tumen te el phuv."

¹⁶ O čhave le Jozefoscere phende: "O brehi amenge hine frima, ale savore Kanaančanen, save bešen andre dolina, hin trastune verdana. Ola trastune verdana hin olen, save bešen andro Bet-Šean paš leskere gava, the olen, save bešen andre dolina Jezreel."

¹⁷ O Jozua phendā le Efrajimoscere the le Menaššeskere kmeñenge: "San baro narodos, saves hin bari zor. Na ela tut ča jekh kotor la phuvatar, ¹⁸ ale the o brehi ena tire. Te ode hin veš, čhinger les avri a ela tiro dži ke leskero agor, bo tradeha avri le Kanaančanen, choc len hin trastune verdana a hine zorale."

Le Benjaminskere phuva

18 Sar savore Izraeliti zaila e phuv, zgele pes jekhetane andro foros Šilo a ačhade ode o Sent-

no Stanos. ² Maškar o Izraeliti ačhile mek efa kmeñi, savenge mek na sas dino o d'edictvos.

³ Avke o Jozua phendā le Izraelitenge: "Dži kana kamen te užarel, hoj peske te zalen e phuv, so tumenge diña o RAJ, o Del tumare dadengero? ⁴ Kiden tumenge avri trine muršen dojekhe kmeñostar. Me len bičhava-va, hoj te predžan e phuv a te zapisinel andre o phuva prekal dojekh kmeños. Palis mi aven ke ma. ⁵ Mi rozulaven odi phuv pro efa kotora. O kmeños Juda ačhela ode, kaj hino pro juhos, a o kmeñi le Jozefoscere pro severos. ⁶ Zapisinen andre ola efa kotora ola phuvakere a anen oda ke mande. Me tumenge čhivava o losos anglo RAJ, amaro Del. ⁷ O Leviti na chudena kotor ola phuvatar maškar tumende, bo oda, hoj hine le RAJESKERE rašaja, hin lengero d'edictvos. O Gad, o Ruben the o jepaš Menaššeskero kmeños chudle pro vichodos pal o Jordan o d'edictvos, so lenge diña o Mojžiš, le RAJESKERO služobñikos."

⁸ Ola murša pes mukle pro drom. O Jozua lenge phendā: "Džan, predžan e phuv a zapisinel andre o thana pre odi phuv, palis aven pale ke ma. Ade andro Šilo tumenge čhivava o losos anglo RAJ." ⁹ O murša odgele a pregele e phuv. Rozulade la pro efa kotora a zapisinde ola phuva the le forenca. Palis avle ko Jozua andro taboris andro Šilo. ¹⁰ O Jozua lenge čhida o losos andro Šilo anglo RAJ a rozulađa ode e phuv le Izraelitenge pal lengere kmeñi.

¹¹ O ešebno (peršo) losos peľa pro kmeños Benjamin pal lengeri famelija. Lengere phuva hine maškar le Judaskere the le Jozefoscere kmeñi.

¹² Pre leskeri severno sera e hrañica chudel paš o Jordan a odarik džal upre ko brehos pro severos le Jerichostar a predžal prekal o verchi dži ke pušća paš o Bet-Aven pro zapados. ¹³ Odarik lengeri hrañica džal dureder ko Luz, oda hin o Betel. Džal pro brehos pro juhos khatar o Luz tele andro Atarot-Addar a ko verchos pro juhos le Telune Bet-Choronostar.

¹⁴ Pre zapadno sera ole verchostar, so hino paš o Bet-Choron, e hrañica visalol ko juhos a džal dži paš o Kirjat-Baal – oda hin le Judaskero foros Kirjat-Jearim. Kada hin e zapadno sera lengeri phuvakeri.

¹⁵ Lengeri južno hrañica chudel pro zapados paš o Kirjat-Jearim a džal dži paš o paña Neftoach. ¹⁶ E hrañica odarik džal dži paš o verchos, so hino angle dolina Ben-Hinnom a pro severos la dolinake le Refajengera, a džal tele prekal e dolina Hinnom, pro juhos le Jebusejengere verchostar dži tele ko En-Rogel. ¹⁷ Palis visalol ko severos ko En-Šemeš. Odarik džal ko Gelilot paš o brehos Adummim a džal tele ke skala le Bohanoskeri, savo sas o čhavo le Rubenoskero. ¹⁸ Palis predžal pro severos khatar o brehos Bet-Araba tele ke Jordaňiko dolina ¹⁹ a dureder džal ko severos ko verchos Bet-Chogla dži ke severno sera le Londe Moroskeri, kaj o Jordan džal andro moros. Oda hin e južno hrañica.

²⁰ O Jordan hin lengeri vichodno hrañica.

Kada sas o d'edictvos le Benjaminoskere fajtengero.

²¹ Kala hine lengere fori pal lengere fajti: O Jericho, e Bet-Chogla, o Emek-Kecic, ²² e Bet-Araba, o Cemarajim, o Betel, ²³ o Avvim, e Para, e Ofra, ²⁴ o Kefar-Ammoni, o Ofni the e Geba; dešuduj (12) fori le gavenca.

²⁵ O Gibeon, e Rama, o Beerot, ²⁶ e Micpa, e Kefira, e Moca, ²⁷ o Rekem, o Jirpeel, e Tarala, ²⁸ e Cela, o Helef, o Jebus, oda hin o Jeruzalem, e Gibeja the o Kirjat-Jearim; dešuštar (14) fori the le gavenca.

Kada sas o d'edictvos le Benjaminoskere fajtengero.

Le Šimeonoskere phuva

19 O dujto losos peľa pro Šimeonoskero kmeňos pal leskere fajti. Lengero d'edictvos sas maškar o phuva le Judaskere.

² Chudle kala fori:

E Beer-Šeba, e Šeba, e Molada, ³ o Chacar-Šual, e Bala, o Ecem, ⁴ o Eltolad, o Betul, e Chorma, ⁵ o Ciklag, o Bet-Markabot, e Chacar-Susa, ⁶ o Bet-Lebaot the o Šaruchen: dešutrin (13) fori the lengere gavenca.

⁷ Chudle the kala fori: o Ajin, o Rimmon, o Eter the o Ašan: štar fori the lengere gavenca. ⁸ Lengere hine the kala savore gava, so hine pašal ola fori dži ko Baalat-Beer the Rama-Negev.

Kada hin o d'edictvos le kmeňoskero Šimeon pal leskere fajti. ⁹ Le Šimeonoskeri phuv sas maškar e Judaskeri. O d'edictvos le Judaskero sas igen baro, vašoda chudle the on maškar lende o d'edictvos.

Le Zebulunoskere phuva

¹⁰ O trito losos peľa pro kmeňos Zebulun pal lengere fajti:

Lengeri phuv sas dži ko Sarid. ¹¹ E phuv sas pro zapados ke Marala dži pre sera le Dabbešetostar the ko paňi, so hino pro vichodos le Jokneamostar. ¹² Le Sario-dostar pes visarel ko vichodos dži ke phuv paš o foros Kislot-Tabor a odarik ko Daberat the ke Jafia. ¹³ Odarik džal dureder ko vichodos andro Gat-Chefer, andro Et-Kacin the andro Rimmon a visarel pes andre Nea.

¹⁴ Pro severos pes visarel ko Channaton a džal dži ke dolina Jiftach-El. ¹⁵ Lengere hine the o Kattat, o Nahalal, o Šimron, e Jidala the o Betlehem; dešuduj (12) fori the lengere gavenca.

¹⁶ Kala fori lengere gavenca hine o d'edictvos le kmeňoskero Zebulun pal lengere fajti.

Le Jissacharoskere phuva

¹⁷ O štarto losos peľa pro kmeňos Jissachar pal lengere fajti. ¹⁸ Lengere phuva sas: o Jezreel, o Kesulot, o Šunem, ¹⁹ o Chafarajim, o Šijon, o Anacharat, ²⁰ o Rabbit, o Kišjon, o Ebec, ²¹ o Remet, o En-Gannim, e En-Chadda the o Bet-Paccec. ²² Lengeri phuv džal dži pre sera le forendar Tabor, Šachacajim the Bet-Šemeš dži paš o Jordan. Oda hin dešušov (16) fori the lengere gavenca.

²³ Kala fori lengere gavenca hine o d'edictvos le kmeňoskero Jissachar pal lengere fajti.

Le Ašeroskere phuva

²⁴ Pandžto losos peľa pro kmeňos Ašer. ²⁵ Andre lengere phuva sas o fori:

o Chelkat, o Chali, o Beten, o Achšaf, ²⁶ o Allammelech, o Amad the o Mišal. Pro zapados lengeri hraňica džal dži pre sera le forendar Karmel the Šichor-Libnat.

²⁷ Odarik e hraňica visaľol ko vichodos andro Bet-Dagon dži pre sera la phuvatar Zebulun a paš e dolina Jiftach-El, palis ko severos ko Bet-Emek the Neiel a odarik visaľol ko Kabul; ²⁸ džal ko Ebron, Rechob, Chammon the Kana dži ko Baro Sidon; ²⁹ palis e hraňica pes visarel ke Rama dži ko zoralo foros Tir, odarik pes visarel ke Chosa a džal dži ko moros. Lengere hin the o Machalab, o Achzib, ³⁰ e Umma, o Afek the o Rechob: bišuduj (22) fori lengere gavenca.

³¹ Kala fori lengere gavenca hine o d'edictvos le kmeňoskero Ašer pal lengere fajti.

Le Naftaliskere phuva

³² O šovto losos peľa pro kmeňos Naftali pal lengere fajti.

³³ Lengeri phuv chudel le Chelefostar, le dubostar paš o Caanannim, džal prekal o Adami-Nekeb the o Jabneel ko Lakkum dži paš o paňi Jordan. ³⁴ Odarik visaľol ko Aznot-Tabor pro zapados the ko Chukok. Pro juhos pes chudelas le phuvatar Zebulun, pro zapados le phuvatar Ašer a pro vichodos le Jordanostar. ³⁵ Lengere zorale fori hin o Ciddim, o Cer, o Chammat, o Rakkat, o Kinneret, ³⁶ e Adama, e Rama, o Chacor, ³⁷ o Kedeš, o Edrej, o En-Chacor, ³⁸ o Jiron, o Migdal-El, o Chorem, o Bet-Anat the o Bet-Šemeš: dešueňa (19) fori lengere gavenca.

³⁹ Kala fori lengere gavenca hine o d'edictvos le kmeňoskero Naftali pal lengere fajti.

Le Danoskere phuva

⁴⁰ O eftato losos peľa pro kmeňos Dan pal lengere fajti. ⁴¹ Lengere phuva sas:

e Cora, o Eštaol, o Ir-Šemeš, ⁴² o Šaalabbin, o Ajalon, e Jitla, ⁴³ o Elon, e Timna, o Ekron, ⁴⁴ o Elteke, o Gibbeton, o Baalat, ⁴⁵ o Jehud, o Bene-Berak, o Gat-Rimmon, ⁴⁶ o Me-Jarkon, o Rakkon the e phuv paš e Joppa. ⁴⁷ Sar le Danenge sas o phuva frima, gele pro mariben pro foros Lešem, zaile les a le manušen odarik murdarde. Ačhile ode te bešel a ole foroske Lešem čerinde o nav pro Dan pal peskero dad.

⁴⁸ Kala fori le gavenca hine o d'edictvos le kmeňoskero Dan pal lengere fajti.

Le Jozuaskeri phuv

⁴⁹ Sar o Izraeliti preačhile te rozulavel o phuva sar d'edictvos, dine the le Jozuaske, le Nunoskere čhaske, o d'edictvos maškar peskere phuva. ⁵⁰ Avke sar lenge o RAJ phend'a, dine le Jozuaske o foros Timnat-Serach

pro brehi andre phuv Efrajim, so peske mangelas. Pale oda foros ačhadā a ačhiġa ode te bešel.

⁵¹ Kala hine o phuva, so o rašaj Eleazar, o Jozua the o vodci dine prekal o losos le kmeňoske Izrael. Čhide o losi andro foros Šilo, anglal o vudar le RAJESKERE Sentne Stanostar. Kavke palis preačhile te rozulavel o phuva.

O fori pro garuđipen

20 Andre jekh džives phendā o RAJ le Jozuaske: ²“Phen le Izraelitenge, hoj peske te len avri o fori pro garuđipen. Bo sar o Mojžiš mek dživelas, me leske phendom, ³ hoj o manuš, savo murdarđahas varekas, ale na kamġa oda te kerel, šaj denašel andre ola fori pes te garuvel la famelijatar, savi leske kamġahas oda pale te visarel. ⁴ Te vareko denašela andre jekh kajso foros, mi ačhel avri paš e foroskeri brana a le vodcenge mi phenel anglal savorende, so pes ačhiġa. Akor les lena andre peskero foros a dena les than, kaj šaj bešel. ⁵ Te pal leste geġahas o manuš, savo leske kamġahas pale te visarel, na dena les leske andro vasta, bo na kamġa te murdarel ole manušes sar peskere ņeprijateľis. ⁶ Mi ačhel oda manuš andre oda foros, medik na ela avrišundo pro sudos anglo manuša a medik na merela oda, ko ela baro rašaj andre oda časos. Palis šaj džal pale andre peskero foros, andral savo denašġa.”

⁷ O Izraeliti ile avri pro zapados le Jordanostar kala fori pro garuđipen: o Kedeš andro Galileja pro brehi le Naftaliskere, o Šichem pro brehi le Efrajimoskere the e Kirjat-Arba – oda hin Hebron – pro brehi le Judaskere. ⁸ Pal o Jordan pro vichodos le Jerichostar ile avri o Becer pre pušća, pre phuv le Rubenengeri, o Ramot andro Gilead andre phuv le Gadengeri the o Golan andre phuv Bašan, so hin le Menaššengeri. ⁹ Kala fori ile avri prekal savore Izraeliti the prekal o cudzinci, save pes likerenas maškar lende. Ode majinde te denašel dojekh, ko murdarđahas varekas, saves na kamġa te murdarel, hoj te na el murdardo la famelijatar, so leske oda visarđahas pale le meribnaha, medik na ela avrišundo pro sudos anglo manuša.

Le Levitengere phuva

21 Akor avle o vodci andral o kmeňos Levi ko rašaj Eleazar, ko Jozua, savo sas o čhavo le Nunoskero, the ko Izraelike vodci ² andro foros Šilo, so hino andro Kanaan, a phende lenge: “O RAJ phendā prekal o Mojžiš, hoj amen te den fori, kaj bešaha, the maġi prekal amare stadi.” ³ Avke o Izraeliti dine le Leviten peskere dēđictvostar o fori le maġenca, avke sar lenge oda phendā o RAJ.

⁴ Ešeb (peršo) čhide o losi prekal e fajta le Kohatoskeri. Prekal o losos o Leviti, o čhave le rašaskere le Aronoskere, priile dešutrin (13) fori le kmeňendar Juda, Šimeon the Benjamin. ⁵ Okla manuša andral e fajta Kohat priile prekal o losos deš fori le kmeňendar Efrajim, Dan the le jepaš kmeňostar Menašše.

⁶ Le Geršonoskeri fajta prekal o losos priiġa dešutrin fori le kmeňendar Jissachar, Ašer, Naftali the le jepaš kmeňostar Menašše andre phuv Bašan.

⁷ E fajta le Merariskeri priile pal peskere fameliji prekal o losos dešuduj (12) fori le kmeňendar Ruben, Gad the Zebulun.

⁸ Kavke o Izraeliti dine prekal o losos le Levitenge kala fori the le maġenca, avke sar lenge oda phendā o RAJ prekal o Mojžiš.

⁹ Kala hine o nava le forengere, so dine o kmeňi Juda the Šimeon, ¹⁰ le Aronoskere čhavenge andral e fajta Kohat, save sas Leviti. Bo ešeb (peršo) čhide o losi prekal lende.

¹¹ Dine lenge o foros Kirjat-Arba leskere maġenca. Oda hin o Hebron pro brehi le Judaskere, so sas angloda o foros le Arbasoskero, savo sas dad le Anakoskero.

¹² Ale o maġi kale foroskere the leskere gavenca dine sar dēđictvos le Kaleboske, le Jefunnoskere čhaske.

¹³ Le rašaskere Aronoskera famelijake dine kala fori pro garuđipen the lengere maġenca: o Hebron, e Libna, ¹⁴ o Jattir, e Eštemoa, ¹⁵ o Cholon, o Debir, ¹⁶ o Ajin, e Jutta the o Bet-Šemeš: eňa fori kale duje kmeňendar.

¹⁷ Le Benjaminengere phuvendar lenge dine kala fori le maġenca: o Gibeon, e Geba, ¹⁸ o Anatot the o Almon: štar fori.

¹⁹ Savore fori le maġenca, so sas dine le Aronoskera famelijake, sas dešutrin.

²⁰ Okla Leviti andral e fajta Kohat chudle prekal o losos o fori le kmeňostar Efrajim.

²¹ Pro brehi le Efrajimoskere len dine o foros Šichem le maġenca – so sas o foros pro garuđipen prekal o vrahi – the o Gezer, ²² o Kibcajim the o Bet-Choron: štar fori le maġenca.

²³ Le kmeňostar Dan len dine štar fori le maġenca: o Elteke, o Gibbeton, ²⁴ o Ajalon the o Gat-Rimmon.

²⁵ Andral e phuv jepaš kmeňoskeri Menašše len dine duj fori le maġenca: o Taanach the o Jibleam.

²⁶ Avke kala fameliji andral e fajta Kohat priile deš fori le maġenca.

²⁷ La fajtake Geršon le kmeňostar Levi dine: le jepaš kmeňostar Menašše duj fori le maġenca: o Golan andro Bašan the e Beeštera le maġenca. O Golan sas o foros pro garuđipen prekal o vrahi.

²⁸ Andral o kmeňos Jissachar len dine štar fori le maġenca: o Kišjon, o Daberat, ²⁹ o Jarmut the o En-Gannim.

³⁰ Andral o kmeňos Ašer len dine štar fori le maġenca: o Mišal, o Abdon, ³¹ o Chelkat the o Rechob.

³² Andral o kmeňos Naftali len dine trin fori le maġenca: o Kedeš andre Galileja – so sas foros pro garuđipen prekal o vrahi – the o Chamot-Dor the o Kartan.

³³ Kala savore fori le maġenca, so chudle o Geršona, sas dešutrin.

³⁴ O Leviti andral le Merariskeri fajta priile:

le kmeňostar Zebulun štar fori le maľenca: o Jokneam, e Karta, ³⁵ e Dimna the o Nahalal.

³⁶ Andral o phuva le Rubenengere len dine štar fori the le maľenca: o Becer, e Jahca, ³⁷ o Kedemot the o Mefaat.

³⁸⁻³⁹ Andral o kmeňos Gad len dine štar fori le maľenca: o Ramot andro Gilead – so sas foros pro garuđipen prekal o vrahi – a mek o fori Machanajim, Chešbon the Jazer.

⁴⁰ Savore fori, so sas dine la Merariskera fajtake, sas dešuduj.

⁴¹⁻⁴² Le Leviten sas jekhetane saranda the ochto (48) fori le maľenca maškar le Izraelitengere phuva. Pašal dojekh foros le Levitengero sas maľa.

E phuv hiňi imar le Izraelitengeri

⁴³ O RAJ diňa le Izraelitenge cali phuv, pal savi diňa vera lengere daden. Zaile la a gele ode te bešel. ⁴⁴ O RAJ len diňa smirom andre dojekh phuv, avke sar diňa vera lengere daden, a ňiko lengere ňeprijateľendar na obačhiľa anglal lende. O RAJ lenge delas furt te ňerinel (zvitazinel) upral peskere ňeprijateľa. ⁴⁵ O RAJ dolikerďa savore lava, so diňa le Izraeliten. Sar lenge oda phendľa, avke pes savoro ačhiľa.

O vichodne kmeňi pes visaren pale khere

22 Akor peske o Jozua diňa te vičinel o kmeňi Ruben, Gad the jepaš kmeňos Menašše.

² Phendľa lenge: "Dolikerďan savoro, so tumenge phendľa le RAJESKERO služobňikos o Mojžiš a šundān man andre savoreste, so tumenge phendom. ³ Na omuklan tumare phralen imar calo ada časos. Dži andre ada džives pačivalones dolikerďan o prikazaňja le RAJESKERE, tumare Devleskere. ⁴ Ale akana imar diňa o RAJ, tumaro Del, tumare phralen smirom, avke sar len diňa lav. Akana džan pale ke tumare stani, andre tumari phuv, so tumenge diňa le RAJESKERO služobňikos o Mojžiš pal o Jordan. ⁵ Merkinen pre oda, hoj te dolikeren o prikazaňje the o zakonos, so tumenge diňa le RAJESKERO služobňikos o Mojžiš, hoj te kamen le RAJES, tumare Devles, te phiren pal leskero drom, te dolikeren leskere prikazaňje a te služinen leske cale jileha the caľa dušaha."

⁶ Palis o Jozua len požeňňinda a mukľa len te džal andre peskere stani. ⁷ Le jepaš kmeňoske Menašše diňa o Mojžiš o phuva andro Bašan a le avre jepaš kmeňoske diňa o Jozua o phuva lengere phralenca pro zapados le Jordanostar. O Jozua požeňňinda the len, a sar len mukľa te džal andre peskere stani, ⁸ phendľa lenge: "Džan pale andre peskere stani le bare barvalipnaha, but stadenca the rupoha, somnakaha, bronzoha, trasteha the but gadenca. Rozulaven tumen peskere phralenca oda, so iľan le ňeprijateľendar."

⁹ O kmeňos Ruben, Gad the o jepaš kmeňos Menašše odgele le Izraelitendar andral o foros Šilo andro Kanaan a gele pale andre peskeri phuv Gilead, so zaile, avke sar phendľa o RAJ prekal o Mojžiš.

O oltaris paš o Jordan

¹⁰ Sar avle andro Gelilot paš o Jordan mek andro Kanaan, o kmeňi Ruben, Gad the jepaš kmeňos Menašše ačhade ode baro oltaris. ¹¹ O Izraeliti pes došunde, hoj o kmeňi Ruben, Gad the jepaš kmeňos Menašše ačhade oltaris pre lengeri sera le Jordanostar paš o Gelilot. ¹² Vašoda pes savore andral o Izrael zgele andro foros Šilo, hoj te džan pre lende pro mariben.

¹³ O Izraeliti bičhade le Pinchas, le čhas le Eleazaroskere, savo sas rašaj, ko kmeňi Ruben, Gad the ko jepaš kmeňos Menašše andro Gilead. ¹⁴ Bičhade leha deše vodcen, jekhes andral dojekh kmeňos. Dojekh sas o vodcas jekha fajtake andral o Izrael.

¹⁵ Sar on avle ko kmeňos Ruben, Gad the ko jepaš kmeňos Menašše andro Gilead, phende lenge: ¹⁶ "Avke vakeren savore le RAJESKERE manuša: 'Soske pes avke napačivalones ľikerďan anglo Del le Izraeloskero? Soske pes adadžives odvisarďan le RAJESTAR? Ačhadān peske o oltaris a kaleha chudľan te džal pro RAJ!

¹⁷ Nane imar dos oda binos, so kerďam paš o verchos Peor? Dži adadžives pes lestar našti obžužarďam a prekal ada avľa baro nasvaliben pre le RAJESKERE manuša! ¹⁸ Tumen pes adadžives kamen te odvisarel le RAJESTAR? Te adadžives chudena te džal pro RAJ, akor tajsa ela choľamen pre savore manuša andral o Izrael. ¹⁹ Te hiňi tumari phuv melarďi, predžan andre phuv le RAJESKERI, kaj ačhel le RAJESKERO stanos a ačhen te bešel maškar amende. Ča na chuden te džal pro RAJ, aňi pre amende, te peske ačhaven paš le RAJESKERO mek aver oltaris. ²⁰ O Zerachoskero čhavo o Achan pes ľikerďa napačivalones, sar iľa oda, so sas tel o prekošiben, a vašoda avľa le RAJESKERI choľi pre calo Izrael! Ov korkoro vaš oda binos na muľa.' "

²¹ O kmeňi Ruben, Gad the o jepaš kmeňos Menašše odphende le Izraelike vodcenge: ²² "O Nekzoraleder hin o Del! O RAJ hin o Del! O Nekzoraleder, o RAJ oda džanel a mi džanel the o Izrael: Te akana kaleha džas pro RAJ abo ľikeras pes napačivalones, mek adadžives amen šaj murdaren! ²³ Te na šundāmas le RAJES a ačhadāmas peske oltaris pre labarďi obeta, chabeneskeri abo smiromoskeri obeta, mi marel amen o RAJ. ²⁴ Ačhadān les, bo darahas, hoj tumare čhave phendehas amare čhavage: 'So tumen hin le RAJEHA, le Izraeloskere Devleha? ²⁵ Se o RAJ diňa maškar amende the tumende, Rubenona the Gadona, o paňi Jordan sar hraňica. Nane tumen ňič le RAJEHA! Kaleha tumare čhave kerdehas, hoj amare čhave pes preačhilehas te daral le RAJESTAR. ²⁶ Vašoda amen peske phendām: 'Ačhavas peske oltaris, ale na pre labarďi obeta, aňi na prekal aver obeta, ²⁷ ale hoj te sikavel maškar tumende the amende a the maškar amare čhave, hoj kamas te lašarel le RAJES angle leskero stanos peskere labarde, chabeneskere the smiromoskere obetenca.' Avke tumare čhave na phenena amare čhavage: 'Tumen na chal ňič le RAJEHA!' ²⁸ Bo phendām peske, te tumare čhave kavke phendehas amenge vaj amare čhavage, odphenaha

leng: 'Dikhen, amare dada ačhade oltaris ajso sar le RAJESKERO! Nane pre labarde obeti, aňi pre chabeneskere obeti, aňi pre smiromskere obeti, ale hino sar švedkos maškar amende the tumende. ²⁹ Mi el amendar ada dur, hoj pes le RAJESTAR te odvisaras a te džas pre leste, te peske ačhadamas aver oltaris paš le RAJESKERO. Na ačhavaha aver oltaris pro labarde, chabeneskere the pro smiromskere obeti.' "

³⁰ Sar šunda o rašaj o Pinchas the o vodci andral o Izrael, so phende o kmeňi Ruben, Gad the o Menašše, sas lenge oda igen pre dzeka. ³¹ O rašaj o Pinchas, o čhavo le Eleazaroskero, lenge phenda: "Adadžives prindžardam, hoj o RAJ hino paš amende, vašoda pes na likerđan napačivalones anglo RAJ. Akana zachraňindan le Izraeliten le RAJESKERA chořatar."

³² Avke o rašaj o Pinchas the o vodci pes visarde pale le kmeňendar Ruben the Gad andral e phuv Gilead, gele andro Kanaan ko Izraeliti a phende lenge savoro, so pes ačhiľa. ³³ Le Izraelitenge sas ada pre dzeka a lašarenas le Devles. Imar na vakernas pal oda, hoj džana pro mariben pre lende a zňičinena e phuv, andre savı bešenas o kmeňi Ruben the Gad.

³⁴ O kmeňi Ruben the Gad phende: "Kale oltariske das nav Ed †, bo hin sar švedkos maškar amende, hoj o RAJ hin o Del."

Le Jozuaskere lava anglo meriben

23 O RAJ diňa le Izraeliten smirom savore lengere řeprijateľendar, save sas pašal lende. Akorestar pregeľa imar but časos a o Jozua sas imar igen phuro. ² Andre jekh džives vičinda savore Izraeliten, vodcen, sudcen the le uradňiken a phenda lenge: "Me som imar igen phuro. ³ Tumen dikhlán savoro, so kerđa o RAJ, tumaro Del, kale narodenge prekal tumende, hoj korkoro pes marelas vaš tumende. ⁴ Dikhen, tumare kmeňenge diňom prekal o losos vaš o dđedictvos o phuva le narodengere, save mek ade ačhile, the o phuva savore narodengere, upral save řerindom (zvitazindom) le Jordanostar dži ko Stredozemno Moros pro zapados. ⁵ O RAJ, tumaro Del, len korkoro tradela avri angle tumende. Tradela len avri a tumen zalena lengeri phuv, avke sar tumenge phenda o RAJ, tumaro Del.

⁶ Likerena a keren čačes savoro, so hin pisimen andro Mojžišoskero zakonoskero zvitkos. Ma visaren pes lestar aňi pre čači (pravo) sera aňi pre balogňi (ľavo). ⁷ Te na chal tumen nič le narodenca, save mek ačhile maškar tumende. Mek aňi ma leperen pre lengere devlengere nava, ma thoven vera pre lende, ma služinen lenge aňi ma bandon anglal lende. ⁸ Ale likerena tumen le RAJESTAR, peskere Devlestar, sar oda kerenas dži adadžives, ⁹ bo o RAJ tradňa anglal tumende le bare the zorale naroden a řiko lendar dži adadžives na obačhiľa. ¹⁰ O RAJ, tumaro Del, tumen diňa lav, hoj pes korkoro marela vaš tumende, vašoda jekh tumendar řorinelu upral o ezeros (1 000) murša. ¹¹ Merkinen pre oda, hoj te kamen ča le RAJES, tumare Devles.

† Oda hin: O švedkos.

¹² Ale te pes lestar visarena pale a te pes likerena ole narodenca, save mek ačhile paš tumende, a te peske lendar lena romen vaj romňijen, ¹³ akor džanen, hoj o RAJ, tumaro Del, imar kala narodi na tradela tumendar het, ale ena tumenge sar garuđi chev, sar pasca, sar bičos pro dumo the sar kandre andro jakha, medik na merena avri andral kadi lači phuv, so tumenge diňa o RAJ, tumaro Del.

¹⁴ Me imar maj merav – džav het pal kadi phuv. Gondolinen cale tumare jileha the dušaha pal oda, hoj aňi jekh le lavender, so tumenge diňa o RAJ, tumaro Del, na našiliľa. Savoro pes ačhiľa. ¹⁵ Avke sar o RAJ dolikerđa dojekh lačo lav, so tumen diňa, avke pre tumende domukela the savoro nalačo, so phenda, medik na merena avri andral kadi lači phuv, so tumenge diňa. ¹⁶ Sar na kerena pal e zmluva, so tumenge o RAJ, tumaro Del, diňa, hoj la te dolikerena, a te služinena avre devlengere a bandona anglal lende, akor le RAJESKERI choři ela bari upral tumende a sig mere-na avri andral kadi lači phuv, so tumenge diňa."

O Jozua prevakerel andro Šichem

24 O Jozua vičinda savore kmeňi andral o Izrael. Vičinda lengere vodcen, sudcen the le uradňiken andro Šichem. Sar ačhenas anglo RAJ, ² o Jozua phenda savore manušenge: "Kavke phenel o RAJ, o Del le Izraeloskero: 'Tumare dada bešenas varekana pal o baro paňi Euftrat a služinenas avre devlengere – the o Terach, o dad le Abrahamoskero the le Nachoriskero. ³ Ale me iřom tumare dades le Abraham avri andral e phuv paš o Euftrat a preľigendom les prekal cali phuv Kanaan. Diňom les čhas le Izak a prekal leste les diňom pherdo čhaven. ⁴ Le Izakoske diňom le Jakob the le Ezav. Le Ezavoske diňom vaš o dđedictvos e brehengeri phuv Seir, ale o Jakob geľa peskere čhavenca te bešel tele andro Egipt.

⁵ Palis bičhadom le Mojžiš the le Aron a maravas le Egipt bare dukhenca. Palis tumen odarik ľigendom avri. ⁶ Sar tumare daden iřom avri andral o Egipt, avle ko moros, ale o Egiptana le verdanenca the le grajenca džanas pal lende pro mariben dži ko Lolo Moros ††. ⁷ Sar vičinenas pre ma, hoj lenge te pomožinav, bičhadom maškar tumende the maškar o Egiptana e kali chmara. Palis phundrađom o moros a pregeľan, ale sar o Egiptana džanas pal tumende, diňom, hoj o moros len te zaučharel. Tumen korkore dikhlán, so lenge kerđom. Palis ačhilan te bešel pre pušta but berša.

⁸ Andom tumen andre phuv le Amorejengeri pal o Jordan. Sar pes tumenca marenas, murdarđom len anglal tumende a diňom, hoj te řerinen (zvitazinen) upral lende a te zalen lengeri phuv. ⁹ Palis o Moabiko kralis o Balak, o čhavo le Cipporoskero, geľa pre tumende pro mariben. Diňa peske te vičinel le Beoriskere čhas le Bileam, hoj tumen te prekošel. ¹⁰ Me na kamľom te řunel le Bileam, ale kerđom oda, hoj ov

†† Oda hin: Trstínakero Moros.

tumen te žehñinel pale a pale. Avke ilom tumen avri andral leskere vasta.

¹¹ Sar pregeľan prekal o Jordan a avľan ko Jericho, marenas pes tumenca ola manuša a palis mek the o Amoreja, o Perizeja, o Kanaančana, o Chetitana, o Girgašeja, o Chivija the o Jebuseja. No me tumenge diňom upral lende te ñerinel. ¹² Bičhadom pre lende e bari dar, hoj te izdran, a tradňom len tumendar het – the soduje Amorejike kralen. Na ačhiľa pes ada prekal tiri šabl’a aňi prekal tiro lukos. ¹³ Diňom tumenge e phuv, pre savi buči na kerenas, a mek the o fori, so na ačhadan a andre save ačhiľan te bešel, a chan o hrozno pal o viňičis the o olivi pal stromos, so na sadzindan.’ ”

¹⁴ O Jozua mek lenge phend’a: “Vašoda akana daran le RAJESTAR, služinen leske jilestar the pačivalones a odčhiven le devlen, savenge služinenas tumare dada pal o paňi Eufkrat the andro Egipt. Služinen ča le RAJESKE! ¹⁵ Te na kamen te služinel le RAJESKE, kiden tumenge avri adadžives, kaske kamen te služinel, či le devleng, savenge služinenas tumare dada pal o paňi Eufkrat, abo le devleng andral e phuv le Amorejengeri, andre savi bešen. Ale me the miro kher služinaha le RAJESKE.”

¹⁶ O manuša odphende: “Aňi amenge pre godi te na avel, hoj te omukas le RAJES a te služinas avre devleng! ¹⁷ O RAJ hino amaro Del. Ov iľa amen the amare daden avri andral o Egipt, andral o otroctvo. Kerđa bare zazraki angle amare jakha a merkinelas pre amende pro drom, pal savo džahas. Chrañinelas amen savore narodendar, prekal save predžahas. ¹⁸ O RAJ tradňa avri anglal amende savore narodi the le Amorejen, save bešenas andre kadi phuv. The amen služinaha le RAJESKE, bo ov hino amaro Del!”

¹⁹ Akor phend’a o Jozua le manušenge: “Našti služinen ča avke le RAJESKE, bo ov hino sentno Del a jekh čačo Del, savo tumenge na odmukela, te les na šunena a te kerena o bini. ²⁰ Te omukena le RAJES a služinena avre devleng, visarela pes tumendar a marela tumen; zñičinela tumen, choc angloda sas lačho ke tumende.”

²¹ Ale o manuša phende le Jozuaske: “Na! Amen služinaha le RAJESKE!”

²² O Jozua lenge phend’a: “Tumen korkore san maškar peste švedki, hoj peske iľan avri le RAJES, hoj leske te služinen.”

“He! Sam švedki,” odphende.

²³ Vašoda o Jozua phend’a: “Akana zñičinen savore devlen, so tumen hin, a visaren pes cale jileha ko RAJ, ko Del le Izraeloskero.”

²⁴ Androda o manuša phende le Jozuaske: “Amen služinaha le RAJESKE, amare Devleske, a šunaha les.”

²⁵ Andre oda džives phandľa andro Šichem o Jozua le manušenca e zmluva a diňa len zakonos, so mušinenas te dofikerel. ²⁶ O Jozua pisinda savore kala lava andro Devleskero zakonoskero zvitkos. Palis iľa baro bar a thoďa les tel o dubos paš o sentno than le RAJESKERO. ²⁷ O Jozua palis phend’a savore manušenge: “Dikhlen kada bar ela prekal amende sar švedkos, bo šund’a savoro, so amenge phend’a o RAJ. Ela sar švedkos upral tumende, hoj te na zaprinen tumare Devles.”

²⁸ Palis o Jozua premukľa le manušen andre peskere phuva, so chudle.

²⁹ Pal kada savoro muľa o Jozua, o čhavo le Nunoskero, o služobňikos le RAJESKERO. Sas leske šel the deš (110) berš. ³⁰ Parunde les andre leskeri phuv, so chudľa andro Timnat-Serach pre brehengeri phuv Efrajim, pro severos le verchostar Gaaš.

³¹ O Izraeliti služinenas le RAJESKE, medik dživelas o Jozua the o phureder manuša, save dživenas buter sar o Jozua, bo on korkore dikhle savoro, so kerđa o RAJ prekal o Izrael.

³² O kokala le Jozefoskere, so o Izraeliti ande andral o Egipt, parunde pale andro Šichem, andre phuv, so cinda o Jakob vaš o šel rupune minci le Chamorostar, le Šichemoskere dadestar. Odi phuv chudle sar dđedictvos le Jozefoskere čhave.

³³ Sar muľa o Eleazar, o čhavo le Aronoskero, parunde les andro foros Gibeja. Oda sas o foros, so chudľa leskero čhavo o Pinchas andre phuv Efrajim maškar o brehi.

SUDCENGERO

O kmeňi Juda the Šimeon džan pro Kanaančana

1 Paloda, sar muľa o Jozua, o Izraeliti phučenar le RAJESTAR: "Ko amendar džala ešebno (peršo) pro mariben pro Kanaančana?"

² O RAJ odphenda: "Mi džal o Juda, se diňom e phuv andre lengere vasta."

³ Avke o manuša andral o kmeňos Juda mangelas le manušen andral o kmeňos Šimeon: "Aven amenca a pomožinen amenge te džal pro Kanaančana pro mariben andre phuv, so sas amenge diňi. Palis džaha the amen tumenca andre phuv, so sas tumenge diňi." Avke o kmeňos Šimeon geľa lenca.

⁴ Sar geľa o kmeňos Juda pro mariben, o RAJ lenge diňa te ňerinel upral o Kanaančana the Perizeja a murdarde andro foros Bezek 10 000 muršen. ⁵ Andro Bezek arakhle le kralis Adoni-Bezek, marenas pes leha a ňerinde upral o Kanaančana the Perizeja. ⁶ Sar o Adoni-Bezek chudľa te denašel, džanas pal leste. Chudle les a odčhinde leske o angušta pal o vasta the pal o pindre. ⁷ Akor o Adoni-Bezek phenda: "Eftavardeš (70) kraľa, savenge diňom te odčhinel o angušta pro vasta the pro pindre, kidenas o trušini tel miro skamind. O Del mange visarda pale vaš oda, so kerďom." L'igende les andro Jeruzalem a ode muľa.

⁸ O kmeňos Juda geľa pro mariben pro Jeruzalem a zaiľa les. Le manušen odarik murdarde a o foros zlabarde. ⁹ Palis džanas pro mariben pro Kanaančana, save bešenar pre brehengeri phuv, andro Negev pre pušta. ¹⁰ Sar o kmeňos Juda geľa pro Kanaančana, save bešenar andro Hebron, so pes angloda vičinelas Kirjat-Arba, ňerinde upral o fajti Šešaj, Achiman the Talmaj.

¹¹ Odarik gele pro mariben pro foros Debir, so pes angloda vičinelas Kirjat-Sefer. ¹² Akor o Kaleb phenda: "Oleske, ko ňerinelar upral o Kirjat-Sefer, dava mira čha la Achsa romňake." ¹³ Avke o Otňiel, o čhavo le Kenazoskero, savo sas terneder phral le Kaleboske, oda foros zaiľa. O Kaleb diňa peskera čha la Achsa leske vaš e romňi.

¹⁴ Palis o Otňiel chudľa te kerel upre la Achsa, hoj te mangel peskere dadestar e maľa. Sar geľa tele pal o somaris, o Kaleb latar phučľa: "So kames?" ¹⁵ Oj odphenda: "De man daros. Te mange imar diňal e pušta Negev, de mange the o prameňa." Avke o Kaleb lake diňa o uprone the o telune prameňa.

¹⁶ O čhave andral e fajta Kenit, savenge sas o dad o Chobab, le Mojžišoskero sastro, gele le kmeňoha Juda andral o palmengero foros Jericho andre Judsko pušta

andro Negev, kaj ačhile te bešel maškar o manuša paš o foros Arad.

¹⁷ Palis o kmeňi Juda the Šimeon gele pro mariben pro Kanaančana, save bešenar andro Cefat, a calo oda prekošlo foros zničinde. Avke dine ole foroske nav Chorma. ¹⁸ O kmeňos Juda zaiľa o fori Gaza, Aškalon the Ekron lengere gavenca.

¹⁹ O RAJ sas le kmeňoha Juda. On zaiłe o brehengeri phuva, ale le manušen, save bešenar tel o brehi, našti tradle avri, bo sas len trastune verdana. ²⁰ Le Kaleboske dine o foros Hebron, avke sar oda phenda o Mojžiš. Ov odarik tradňa avri le Anakoskere trine čhaven. ²¹ Ale o kmeňos Benjamin na tradle avri le Jebusejen, save bešenar andro Jeruzalem. Vašoda o Jebuseja ačhile te bešel maškar o Benjamini andro Jeruzalem dži adadžives.

O maribena le kmeňengere pro severos

²² The o kmeňi Efrajim the Menašše džanas pro mariben pro foros Betel a o RAJ sas lenca. ²³ Bičhade le muršen te predikhel o Betel, so pes angloda vičinelas Luz. ²⁴ Sar dikhle varesave muršes te avel avri andral o foros, phende leske: "Sikav amenge, khatar mek šaj džas andro foros, a mukaha tut te dživel." ²⁵ Avke sikađa lenge o than, khatar pes delas te džal andre. Sar o kmeňi Efrajim the Menašše murdarde odarik savoren, premukle ole muršes leskera famelijaha. ²⁶ Oda murš geľa andre phuv le Chetitanengeri, ačhađa ode foros a diňa leske nav Luz. Kavke pes vičinel dži adadžives.

²⁷ O kmeňos Menašše našti tradňa avri le manušen andral o fori Bet-Šean, Taanach, Dor, Jibleam the Megiddo, aňi andral o gava pašal lende. Bo o Kanaančana na kamenas odarik te džal het. ²⁸ Sar o Izraeliti ačhile zoraleder, ispidenas zoraha pro Kanaančana, hoj prekal lende te keren buči, ale našti savoren tradle avri. ²⁹ Aňi o kmeňos Efrajim našti tradňa avri le Kanaančanen, save bešenar andro Gezer, a vašoda ačhile maškar lende te bešel. ³⁰ The o kmeňos Zebulun našti tradňa avri le Kanaančanen andral o fori Kitron the Nahalal. Avke o Kanaančana ačhile te bešel maškar lende, ale o manuša andral o kmeňos Zebulun pre lende ispidenas, hoj te keren buči. ³¹ O kmeňos Ašer našti tradňa avri le Kanaančanen andral o fori Akko, Sidon, Achlab, Achzib, Chelba, Afik the Rechob. ³² Avke ačhiľa o kmeňos Ašer te bešel maškar o manuša, save bešenar andro Kanaan, bo našti len tradňa avri. ³³ O kmeňos Naftali na tradle avri

le Kanaančanen andral o fori Bet-Šemeš the Bet-Anat. On bešenas maškar o Kanaančana, ale ispidenas pre lende, hoj te keren buči. ³⁴ O Amoreja tradenas o kmeňos Dan dži ke brehengeri phuv a na domukle lenge te džal tele pal o brehi. ³⁵ Avke o Amoreja ačhile te bešel paš o verchos Cheres the andro fori Ajalon the Šaalbim, ale o kmeňi Efrajim the Menašše sas lendar zoraleder a ispidenas pre lende, hoj te keren buči. ³⁶ E phuv le Amorejengeri † sas le verchengere dromestar Akrabbim dži ke Sela the mek dureder.

Le RAJESKERO aňjelos andro Bochim

2 Le RAJESKERO aňjelos džalas andral o Gilgal upre andro Bochim a phenda le Izraelitenge: “Iřom tumen avri andral o Egipt a andom tumen andre phuv, pal savi diřnom vera tumare daden. Phendom: ‘Miri zmluva tumenca řoha (ňikda) na preačhela. ² Nařti phanden e zmluva le manuřenca andral kadi phuv. Čhiven tele lengere oltara.’ Ale tumen man na řundān. Soske ada kerđan? ³ Vařoda akana tumenge phenav, hoj imar len na tradava anglal tumende. Ačhena tumare řeprijateľa a lengere devla ena tumenge sar pasca oleha, hoj len lařarena.” ⁴ Sar le RAJESKERO aňjelos phenda savore Izraelitenge kala lava, chudle zoralet rovel. ⁵ Vařoda dine ole thaneske nav Bochim †† a ode ande obeta le RAJESKE.

O Jozua merel

⁶ Sar o Jozua premukľa le Izraeliten, odgele dojekh andre peskeri phuv, so chudle vař o đedictvos. ⁷ O Izrael sluřinelas le RAJESKE pal calo řasos, medik dživelas o Jozua the o phureder vodci, save predřidile le Jozua a dikhle savore bare zazraki le RAJESKERE, save kerđa prekal o Izraeliti. ⁸ Le RAJESKERO sluřobňikos o Jozua, le Nunoskero čhavo, muľa andro řel the deř (110) berř. ⁹ Parunde les andre leskeri đedično phuv andro Timnat-Cheres pro brehi Efrajim, pro severos le verchostar Gaař.

¹⁰ Sar mule lendar savore, avle pal lende aver pokoleňje, save bisterde pre oda savoro, so kerđa o RAJ prekal o Izrael. ¹¹ O Izraeliti kerenas bini anglo RAJ, bo sluřinenas le Baalengere modleng. ¹² Omukle le RAJES, peskere dadengere Devles, savo len iľa avri andral o Egipt. Lařarenas avre devlen, le devlen ole narodengere, save beřenas pařal lende. Bandonas anglal lende a kaleha kerenas le RAJESKE pre choři.

¹³ Preačhile te sluřinel le RAJESKE a chudle te lařare le devlen Baal the la Ařarta. ¹⁴ Vařoda o RAJ sas chořamen pro Izrael a diňa, hoj te řerinen (zviřazinen) upral lende lengere řeprijateľa, save beřenas pařal lende. Domukľa le zbuřňikenge, hoj len te občoren, a o Izraeliti nařti obačhile anglal lende. ¹⁵ Kana ča džanas pro mariben, o RAJ lenge kerelas namiřtes, hoj te prekhelen (prehrajinen), avke sar lenge phenda andre vera. Avke dochudle pes andro baro pharipen.

¹⁶ Paři o RAJ lenge ačhađa sudcen, save len zachraňinenas lengere řeprijateľendar. ¹⁷ Ale on peskere sudcen na řunenas, sas napačivale le RAJESKE a lařarenas avre devlen. Sig pes odvisarde le RAJESKERE dromestar, pal savo phirenas lengere dada, sar řunenas leskere prikazaňja. Na kerenas avke sar lengere dada. ¹⁸ Sar o řeprijateľa le Izraeliten trapinenas a lenge kerenas namiřtes, le RAJESKE sas pharo pre lende. Avke peske iľa avri sudcas, hoj len te zachraňinel peskere řeprijateľendar. Medik o sudcas dživelas, o RAJ len zachraňinelas, bo sas ke lende jileskero. ¹⁹ Ale sar o sudcas muľa, pale pes visarde ko nalačhipen a sas mek goreder sar lengere dada, save sluřinenas avre devleng a bandonas anglal lende. Na preačhenas te kerel o nalačhipen, aňi na denas peske te phenel. ²⁰ Vařoda o RAJ sas chořamen pro Izraeliti a phenda: “Kada narodos na dořikerđa miri zmluva, pal savi phendom lengere dadenge, hoj la te dořikeren. A vař oda, hoj man na řunde, ²¹ aňi me imar na tradava avri anglal lende aňi jekhe ole narodendar, save mek ačhile, sar o Jozua muľa. ²² Aleha dikhava, či o Izraeliti pes řikerena pal mire droma a či phirena pal lende sar lengere dada, abo na.” ²³ Vařoda o RAJ mukľa ole narden andre odi phuv, na tradňa len avri a na diňa len andre le Jozuaskere vasta, sar mek dživelas.

Aver narodi mařkar o Izraeliti

3 Kala hine o narodi, save mek mukľa o RAJ andre phuv, hoj prekal lende te probařinel (skuřinel) savore Izraeliten, save pes řoha (ňikda) na marenas le Kanaančanenca. ² Bo kamelas, hoj o Izraelike pokoleňja, save pes mek na džanenas te marel, te sikľon pes te marel. ³ Sas oda kala narodi: Pandř Filiřtinike kraľa, savore Kanaančana, Sidončana the Chivija, save beřenas andro Libanoňike verchi le verchostar Baal-Chermon dži ko verchengero drom Chamat. ⁴ Prekal lende kamľa te probařinel le Izraeliten, hoj pes te sikavel, či řunena o prikazaňja, so o RAJ diňa lengere dadenge prekal o Mojžiř.

⁵ O Izraeliti beřenas mařkar o Kanaančana, o Chetitana, o Amoreja, o Perizeja, o Chivija the o Jebuseja. ⁶ Lenas peske lengere čhajen vař o romňija, peskere čhajen denas lengere čhavage a sluřinenas lengere devleng.

O Otňiel

⁷ O Izraeliti kerenas bini anglo RAJ, bo bisterde pro RAJ, pre peskero Del, a sluřinenas le modleng Baal the Ařarta. ⁸ Vařoda sas o RAJ pre lende chořamen a diňa len andro vasta le kraliske le Kuřan-Riřatajimoske andral o foros Aram-Naharajim. O Izraeliti sas očno berř leskere otroka. ⁹ Ale sar vičinenas ko RAJ, hoj lenge te pomořinel, bičhađa ke lende le Otňiel, le Kenazoskere čhas le Kaleboskere nekternedere phrales, hoj len te zachraňinel. ¹⁰ Le RAJESKERO Duchos avľa pre leste a ov ačhila vodcas le Izraelitenge a džalas lenca pro mariben pro Aramejiko kralis Kuřan-Riřata-

† Abo: le Edomčanengeri †† Oda hin: O manuřa, save roven.

jim. O RAJ lenge diña te ñerinel (zvitázinel) upral leste.
¹¹ Avke andre odi phuv sas smirom saranda (40) berš, medik dživelas o Otñiel, le Kenazoskero čhavo.

O Ehud

¹² Ale o Izraeliti pale kerenas bini anglo RAJ, vašoda o RAJ diña le Moabike kraliske le Eglonoske te ñerinel upral lende. ¹³ O Eglon pes sthoda le Ammončanenca the le Amalekenca a geľa pro mariben pro Izraeliti, ñerinda upral lende a zaiľa o Jericho, le palmengero foros. ¹⁴ O Izraeliti služinenas le Moabike kraliske le Eglonoske dešuocho (18) berš.

¹⁵ Akor o Izraeliti igen chudle te mangel le RAJES, hoj lenge te pomožinel a o RAJ lenge bičhađa le Ehud, le Geraskere čhas andral o kmeňos Benjamin, savo sas baľogaris (ľavakos). O Izraeliti bičhade leha o daňe le Moabike kraliske le Eglonoske. ¹⁶ O Ehud peske kerđa šabľa, ostro pal soduj seri the bari vaj jepaš metros, a thođa la pal e čači (pravo) sera paš e čang tel o gada. ¹⁷ Diña ola daňe le kraliske le Eglonoske, savo sas igen thulo murš. ¹⁸ Sar o Ehud leske diña ola love, premukľa le muršen, save ola love ande. ¹⁹ Ov korkoro pes visardća khatar o modli paš o Gilgal a džalas pale ko kralis Eglon leske te phenel: "Kralina, kamav tuke vareso te phenel, so ñiko našti šunel, ča tu."

O Eglon phenda: "Čhit!" Akor savore, save ačhenas pašal leste, gele avri.

²⁰ O Ehud geľa ko kralis Eglon, andro upruno šilalo kher, kaj peske bešelas a savo sas ča prekal leste. O Ehud phenda: "Hin man prekal tu lav le Devlestar." Avke o Eglon uštiľa. ²¹ Akor o Ehud le baľogne vasteha andral peskeri čači sera iľa e šabľa a demađa leske andro per. ²² Sar demađa andro per, o angluno špicos pregeľa dži prekal o dumo a o čiken (thulipen) garuđa e ručka, vašoda e šabľa na iľa avri. ²³ Avke o Ehud geľa avri pre veranda a o vudar ole upruno khereskero pal peste phandľa andre.

²⁴ Soča geľa avri, avle le Eglonoskere sluhi a sar dikhle, hoj o upruno khereskero vudar hino phandlo andre, phende peske: "Ov mušinel te bešel pro budaris andre peskero šilalo kher." ²⁵ Užarenas igen but a andre ladž na džanenas, so te kerel, bo ov lenge o vudar na phundravelas. Androda ile e kleja, phundrade a dikhle, hoj lengero raj pašľol mulo pre phuv.

²⁶ Medik on užarenas, o Ehud denašľa. Pregeľa pašal o modli a denašľa andre Seira. ²⁷ Sar ode doavľa, zatrubinda pro bakreskero rohos pro brehi Efrajim a odarik ľidžalas le Izraeliten tele. ²⁸ Phenda lenge: "Aven pal ma, bo o RAJ tumenge diña andro vasta tumare ñeprijatelen le Moabčanen." On džanas pal leste a ile le Moabčanendar o thana, khatar pes predžalas prekal o Jordan, a ñikaske na domukle, hoj odarik te predžan. ²⁹ Akor murdarde vaj 10 000 zorale muršen. Ñiko lendar na denašľa. ³⁰ Oda džives o Izraeliti ñerinde upral o Moabčana a e phuv sas andro smirom ochto-vardeš (80) berš.

O Šamgar

³¹ Pal o Ehud ačiľa sudcas o Šamgar, le Anatoskero čhavo, savo tiš zachraňinda le Izrael. Murdarđa šov šel (600) Filištinen la pacaha, savaha traden le gurumñen.

E Debora the o Barak

4 Sar muľa the o Ehud, o Izraeliti pale kerenas bini anglo RAJ, ² vašoda len o RAJ diña andro vasta le Kanaaňike kraliske le Jabinoske, savo kralinelas andro foros Chacor. O velitelis leskere slugađenge sas o Siserah, savo bešelas andro Charošet-Hagojim. ³ O Izraeliti igen mangenas le RAJES, hoj lenge te pomožinel, bo le Jabin sas eňa šel (900) trastune verdana a biš (20) berš len igen trapinelas.

⁴ Andre oda časos e prorokiňa Debora, e romňi le Lappidotoskeri, sas sudkiňa upral o Izrael. ⁵ Oj bešelas tel e Deborkeri palma pro brehi Efrajim, maškar o fori Rama the Betel. O Izraeliti phirenas ke late, sar len sas vareso maškar peste. ⁶ Oj bičhađa pal o Barak, le Abinoamoskero čhavo, andral o foros Kedeš andre phuv le Naftalengeri. Phenda leske: "O RAJ, o Del le Izraeloskero, tuke phenel: 'Le tuha 10 000 muršen andral o kmeňi Naftali the Zebulun a dža pro verchos Tabor. ⁷ Me tuke palis anava ko paňi Kišon le Siserah, le Jabinoskere velitelis, leskere verdanenca the le slugađenca a dava tuke les andro vasta.'"

⁸ O Barak lake odphenda: "Te aveha manca, džava, ale te na aveha manca, na džava."

⁹ "Džava tuha," odphenda leske e Debora, "ale andre kada mariben e slava na ela tiri, bo o RAJ dela le Siserah andro vasta la džuvľake." Palis e Debora uštiľa a džalas le Barakoha andro Kedeš, ¹⁰ kaj o Barak vičinda le kmeňen Zebulun the Naftali. Džanas pal leste 10 000 murša the e Debora.

¹¹ Ale o Kenitas o Cheber odgeľa okle Kenitendar, save sas o čhave le Chobaboskere, savo sas šogoris le Mojžišoske. Ačhađa peskero stanos paš o dubos andro Caananim paš o Kedeš.

¹² Sar le Siseroske phende, hoj o Barak, o čhavo le Abinoamoskero, geľa upre pro verchos Tabor, ¹³ diña te zvičinel savore peskere manušen le eňa šel (900) trastune verdanenca, hoj te džan andral o Charošet-Hagojim ko paňi Kišon.

¹⁴ E Debora phenda le Barakoske: "Ušti, bo adadžives tuke o RAJ diña andro vasta le Siserah. Korkoro o RAJ imar džalas anglal tu!" Avke o Barak džalas tele pal o verchos Tabor a pal leste 10 000 murša. ¹⁵ Sar o Barak džalas pro mariben, o RAJ kerđa, hoj anglal leste ačhile sar bi e godi o Siserah the leskere murša, save sas pro trastune verdana, the savore leskere slugađa, avke len murdarde le šabľenca. Androda o Siserah chučiľa tele pal o verdan a chudľa te denašel.

¹⁶ O Barak džalas pal leskere verdana the slugađa dži ko Charošet-Hagojim. Savore Siseroskere slugađen murdarde a ñiko lendar na ačiľa džido. ¹⁷ O Siserah denašelas ke la Jaelakero stanos, bo sas smirom

maškar o kralis Jabin andral o Chacor the maškar e Cheberiskeri famelija. E Jael sas romni le Cheberiskeri, savo sas Kenitas. ¹⁸ Oj geľa avri anglal o Siserah a phendã leske: "Av, rajeja miro, av andre miro stanos. Ma dara tut!" Sar geľa andre, e Jael les zaučhardã la lepedaha. ¹⁹ Mangelas latar: "De čã man te pijel paňi, bo som smedno." Avke oj phundraďã o cipuno gono le thudeha, diňa les te pijel a pale les zaučhardã. ²⁰ Mek lake phendã: "Ačh paš o stanoskero vudar a te vareko avela a phučela tutar, či hin ade vareko, phen, hoj na."

²¹ Paľis ov zorales zasučã. Akor e Jael iľã o čokanos the o kolikos (ciloro) pal o stanos a džalas ke leste cichones. Predemaďã o kolikos prekal leskeri slichã dži andre phuv a ov muľã. ²² Sar o Barak džalas pal o Siserah, e Jael geľa anglal leste a phendã leske: "Av sikavava tuke muršes, saves rodes!" Avke geľa ke late andro stanos a sas ode o Siserah, savo pašolas mulo le kolikoha andro šero.

²³ Oda džives o Del diňa le Izraelitenge le Kanaaňike kralis le Jabin tel lengeri zor. ²⁴ Ole časostar o Izrael džanas pro kralis Jabin furt zoraleder, medik les na zňičinde.

La Deborakeri gilï

5 Akor gilãvelas kadi gilï e Debora le Barakoha, le Abinoamoskere čhaha:
² "Lašaren le RAJES, bo o vodci chudle te ľidžal o Izrael a o manuša uštïle a radišagoha džanas!
³ Šunen, kraľale! Phundraven o kana, rajale! Gilãvava le RAJESKE, gilãvava žalmos le RAJESKE, le Izraeloskere Devleske.
⁴ RAJEJA, sar tu avri avľal andral o Seir a sar džahas la phuvatar Edom, zarazisalïľã e phuv, andral o ňebos delas brišind a andral e chmara čhordolas o paňi.
⁵ O verchi razisalonas anglal o RAJ, anglal o Del andral o Sinaj, anglal o RAJ, o Del le Izraeloskero.
⁶ Andro dživesa le Šamgariskere, le Anatoskere čhaskere, a andro dživesa la Jaelakere sas omukle o droma, o manuša phirenas palune dromenca.
⁷ O gava ačhile omukle, o manuša len omukle, medik me e Debora na uštïľom upre, medik me, e daj le Izraeloske, na uštïľom upre.
⁸ Sar o manuša peske ile avri avre devlen, o mariben pes chudľã paš o foroskere brani, no na dičholas o štïtos aňi e kopija maškar 40 000 Izraeliti.
⁹ Miro jilo hino jekhetane le Izraelike vodcenca, le manušenca, save kamle te džal radišagoha andro mariben.
 Lašaren le RAJES!

¹⁰ Tumen, save bešen pro parne somara pro pokrovci, a the tumen, save phiren pal o droma: Gondolinen!

¹¹ Šunen o hangos olengere, save gilãven paš o chaňiga.

Ode lašaren le RAJESKERO spravodľišagos, o ňerindïpen (vitãztvo) le Izraelike manušengero! Akor o manuša le RAJESKERE gele tele ko brani.

¹² Uštï, preker tut, Deboro, preker tut, uštï!

Gilãv gilï! Uštï, Barak!

ľidžã het peskere zaphandlen, čhavo le Abinoamoskero!

¹³ Paľis avle tele ola, save mek ačhile le vodcendar, le RAJESKERE manuša avle tele manca sar ola, save hine zorale.

¹⁴ O manuša džanas tele andral o Efrajim, kaj bešenangloda o Amaleka, aver džanas andral o Benjamin.

Le Machirostar avle o vodci

a le Zebulunostar ola, save hine velïteľã.

¹⁵ Le Jissacharoskere princi la Debora the o Jissachar le Barakoha džanas pal leste tele andre dolina. Le Rubenoskero kmeňos but pal oda vakerenas, či te džal, vaj na.

¹⁶ Soske ačhïľal te bešel maškar o ohradi, hoj te šunen, sar o pastjera vičinenas peskere staden?

Le Rubenoskero kmeňos but vakerenas, ale naštï pes dothovenas.

¹⁷ O Gilead ačhïľã te bešel pal o Jordan a soske o Dan ačhïľã paš o loďi?

O Ašer ačhïľã te bešel paš o moros, bešenangloda o thana paš o brehos.

¹⁸ Le manušenge andral o kmeňos Zebulun sas jekh či merena, avke the le Naftalenge, save džanas pro malï pro mariben.

¹⁹ Avle o kraľã a marenas pes; o kraľã andral o Kanaan džanas pro mariben andro Taanach paš o paňã Megiddo, ale o rup peske odarik na ile.

²⁰ O čercheňa andral o ňebos pes marenas, pal peskere droma džanas pro mariben pro Siserah.

²¹ O paňi Kišon len odlïgenda, oda čirlatuno paňi o Kišon.

Av zorali dušo miri a džã bi e dar!

²² Akor demenas pal e phuv le grajengere kopiti, akor denašenangloda a denašenangloda zorale graja.

²³ 'Prekošen o foros Meroz!' phenel o aňjelos le RAJESKERO.

'Prekošen, prekošen leskere manušen, bo na avle te pomožinel le RAJESKE, te pomožinel le RAJESKE te džal pre ola zorale murša!'

²⁴ Av bachtalï maškar o džuvľã, Jaelo.

Tu, romňije le Cheberiskeri, le Kenitoskeri! Av požehňimen upral o džuvľã andro stani!

²⁵ O Siserah mangelas peske paňi, podiňa leske thud; andre kuči leske andã šutľo thud.

²⁶ Nacirdla o vast, ila o kolikos,
le čače vasteha o pharo čokanos,
demađa le Siserah, pharađa leske o šero,
predemađa leske e sliča.
²⁷ Peľa tele paš lakere pindre,
previsalila a nacirdla pes.
Paš lakere pindre visalila a peľa.
Ode, kaj peľa, muľa.
²⁸ Prekal e oblaka dikhel e daj le Siseroskeri
a vičinel prekal o mreži:
‘Soske avel avke nasig leskero verdan?’
Soske na šunav le grajen, save cirden o verdan?’
²⁹ Odphende lake lakere nekgođaveder džuvla,
lengere lava peske korkori leperel:
³⁰ ‘Mušinen peske te rozulavel oda, so peske dochu-
dle.
Jekh abo duj zaphandle džuvlen prekal jekh murš,
šukar plašti prekal o Siserah,
igen šukar gada,
jekh abo duj side khosne pre miri meň!
³¹ Kavke mi meren savore tire nepřijatela, ó, RAJEJA!
Ale ola, save les kamen,
ena sar kham, so avel avri andre peskeri zor.”

Palis andre odi phuv sas saranda (40) berš smirom.

O Izraeliti hine tel o vasta le Midijanengere

6 O Izraeliti pale kerenas bini anglo RAJ. Vašoda len diňa efa berš andro vasta le Midijanenge. ² O Midijana sas zoraleder sar o Izraeliti, vašoda peske kerde thana, kaj pes te garuven andro verchi, thana andro jaskiňi the garude thana maškar o brehi. ³ Soča o Izraeliti preačhile te sadzinel, džanas pre lende o Midijana, o Amaleka the aver kmeňi pal o vichodos. ⁴ Kerde peske taboris paš lende a zňičinde savoro maľakero ulipen andre odi phuv dži paš e Gaza. Na mukle andro Izrael nisavo chaben, aňi bakren, aňi gurumňen, aňi somaren. ⁵ Avle peskere stadenca the le stanenca ajci but sar o maľengere grajora. Na delas pes len te zgenel, aňi lengere řavi. Gele andre odi phuv, hoj la te zňičinen. ⁶ Sar o Izraeliti ačhile čore bi o chaben prekal o Midijana, chudle te vičinel pro RAJ. ⁷ Sar vičinenas pro Raj, hoj lenge te pomožinel, ⁸ o RAJ bičhađa ke lende le prorokos a phenda lenge: “Kavke phenel o RAJ, o Del le Izraeloskero: ‘Me tumen ilom avri andral o Egipt the andral o otroctvo. ⁹ Cirdňom tumen avri andral o vasta le Egiptanengere the savorendar, save pre tumende džanas. Me len tradňom avri anglal tumende a diňom tumenge lengeri phuv.’ ¹⁰ Phendňom tumenge: ‘Me som o RAJ, tumaro Del. Na služinena le Amorejengere devlengere andre phuv, kaj akana bešen.’ Ale tumen man na šundán.”

O Gideon

¹¹ O aňjelos le RAJESKERO avla andro foros Ofra a bešľa peske tel o dubos le Joašoskero, savo sas andral e Abiezeriskeri fajta. Leskero čhavo o Gideon ipen akor

marelas la pacaha o žužodiv andre moľakero lisos, hoj o žužodiv te garuvel anglo Midijana. ¹² Androda o aňjelos le RAJESKERO pes leske sikada a phenda leske: “O RAJ tuha, zoralo murš!”

¹³ Androda leske phenda o Gideon: “Šaj tutar vareso phučav, rajeja? Te hino o RAJ amenca, soske pes amenge kada savoro ačhila? Kaj hine savore leskere bare zazraki, pal save amenge amare dada vakerenas: ‘O RAJ amen ila avri andral o Egipt.’ Ale akana amen o RAJ omukla a diňa amen andro vasta le Midijanenge.”

¹⁴ O RAJ dikhla pre leste a phenda: “Dža andre tiri zor a zachraňin le Izraeliten andral o vasta le Midijanengere. Me korkoro tut bičhavav.”

¹⁵ Ale ov phučla: “Rajeja, sar majinav te zachraňinel o Izrael? Se miri fajta hiňi nekčoreder andral o kmeňos Menašše a andro kher miro dadeskero man len vaš ňisoste.”

¹⁶ “Me avava tuha,” odphenda o RAJ. “Zňičineha le Midijanen, avke sar te ulehas ča jekh murš.”

¹⁷ O Gideon phenda: “Te som tuke pre dzeka, akor sikav mange vareso, hoj te džanav, hoj šal čačes o RAJ, savo vakeres manca. ¹⁸ Mangav tut, ma dža adarik, medik na anava anglal tu miro daros.”

Ov odphenda: “Mištes, užarava, medik na aveha pale.”

¹⁹ O Gideon geľa khere, pririchtinda la terňa koza a le deše kile arestar kerđa mare bi o drožďi. O mas thođa andro košaris a e zumin čhorda andre piri. Ligenda leske oda tel o dubos a thođa anglal leste. ²⁰ Le Devleskero aňjelos leske phenda: “Le o mas the o mare bi o drožďi, thov len pre skala a e zumin čhor upral.” Ov avke kerđa. ²¹ Le RAJESKERO aňjelos hazdňa e paca, so leste sas andro vast, a chudla pes leskere agoreha le masestar the ole marendar. Avla avri jag andral e skala a čala oda mas the ole mare. Androda le RAJESKERO aňjelos našliľa anglal leskere jakha.

²² Sar o Gideon prindžarda, hoj oda sas le RAJESKERO aňjelos, zvičinda: “Ach, Raja, RAJEJA, dikhlom tire aňjelos muj-mujeha!”

²³ O RAJ leske phenda: “Ma dara tut! Av andro smirom, na mereha.”

²⁴ Avke o Gideon ode ačhađa oltaris prekal o RAJ a diňa leske nav: O RAJ hin o smirom. Oda oltaris hin dži adadžives andro foros Ofra andre Abiezerengeri phuv.

²⁵ Mek odi rat leske phenda o RAJ: “Le andral tire dadeskero stados terne bikos the mek jekhe efa beršengere bikos. Čhiv tele le Baaloskero oltaris tire dadeskero a rozčhinger the o slupos la Aštartakero, so hino paš leste! ²⁶ Ačhav oltaris pre pačiv le RAJESKE, tire Devleske, upre pro brehos. Palis le ole dujte bikos a obetin les pro kašta ole rozčhingerde slupostar sar labardi obeta.” ²⁷ O Gideon ila deše muršen peskere sluhendar a kerđa avke, sar leske phenda o RAJ. Ale vašoda, hoj daralas le dadeskera famelijatar the le manušendar andral oda foros, na kerđa oda dživese, ale rači.

²⁸ Sar o murša andral o foros sig tosara uštile, dikhle, hoj le Baaloskero oltaris hino čhido tele a o kaštuno

slupos la Aštartakero pre leste hino rozčhingerdo. A pro nevo ačhado oltaris sas obetimen dujto bikos sar labardi obeta. ²⁹ Maškar peste phučenas: "Ko oda kerđa?" Rodenas a phučenas, medik pes na dodžanle, hoj oda kerđa o Gideon, le Joašoskero čhavo.

³⁰ O murša phende le Joašoske: "An avri tire čhas! Mušinel te merel, bo čhidā tele le Baaloskero oltaris a rozčhingerdā o slupos la Aštartakero, so hin paš leste!"

³¹ O Joaš phendā savorenge, save džanas pre leste: "Tumen pes kamen te zaačhel vaš o Baal? Gondolinen peske, hoj les zachrañinena? Ko pes kamel te zaačhel vaš leste, oda manuš dži tosara mi merel! Te o Baal hino čačes del, mi zaačhel korkoro vaš peste, te leske čhide tele o oltaris." ³² Oda džives le Gideonoske dine nav Jerubbaal, so hin: "Mi zaačhel o Baal korkoro vaš peste, bo o Gideon leske čhidā tele o oltaris."

O Gideon ņerinel

³³ Savore Midijana, o Amaleka the o vichodne kmeñi pes sthode jekhetane, pregele prekal o Jordan a kerde peske taboris andre dolina Jezreel. ³⁴ O Duchos le RAJESKERO avla pro Gideon a ov zatrubinda, hoj te vičinel ke peste la Abiezeriskera fajta. ³⁵ Palis bičhađa le muršen, hoj te džan pal calo kmeños Menašše, avke the kada kmeños sas vičimen. Diña te vičinel the le kmeñen Ašer, Zebulun the Naftali – the on pes leha zgele.

³⁶ Akor o Gideon phendā le Devleske: "Tu phenes, hoj kames prekal mande te zachrañinel le Izrael. ³⁷ Dikh, rozthovava pre oda than, kaj pes žužarel o điv, puža (kožuchos) pal o bakro. Te ela e rosa pre leste a e phuv ela pašal leste šuki, prindžarava, hoj prekal mande zachrañineha o Izrael, avke sar phendā." ³⁸ Kavke pes the ačhiła. Sar pro dujto džives sig tosara uštilā, ispidña avri andral e puža pherdo kuči rosakero pañi.

³⁹ O Gideon pale mangelas le Devles: "Na av pre ma choľamen, te mek jekhvar ke tu prevakerava. Domuk mange oda mek jekhvar te probalinel (skušinel) la pužaha. Mi ačhel ča e puža šuki a všadzik pašal late mi el e rosa." ⁴⁰ O Del avke kerđa the odi rat. Ča e puža sas šuki a pal e phuv sas všadzik rosa.

O Gideon ņerinel upral o Midijana

7 Sig tosara o Jerubbaal, oda hin o Gideon, the o manuša, save sas leha, gele te kerel taboris paš o pañi Charod. Le Midijanengero taboris sas lendar pro severos andre dolina paš o verchos Moreh. ² O RAJ phendā le Gideonoske: "Hin paš tu igen but murša, hoj tuke te dav te ņerinel (zvitāzinel) upral o Midijana. Bo o Izraeliti pes hazdena upre a šaj phenen: 'Ňerindam peskera zoraha.' ³ Phen le manušenge, hoj te šunen: 'Ko pes daral a izdral, šaj oddžal pal o verchos Gilead a šaj džal pale khere.'" Akor 22 000 manuša pes visarde pale khere a 10 000 lendar ačhile.

⁴ Ale o RAJ le Gideonoske phendā: "Mek furt hin lendar but. Lidža len ko pañi, ode len tuke probalñava (skušñava). Pal kaste tuke phenava: 'Kada mi džal

tuha,' oda tuha mi džal. No pal kaste tuke phenava: 'Kada te na džal tuha,' oda tuha te na džal."

⁵ Avke o Gideon ligendā le manušen tele ko pañi. O RAJ leske phendā: "Ačhav dojekhes, ko chlipinela o pañi sar rikono, pre jekh sera. A olen, save džana pro khoča a avke pijena o pañi, ačhav pre aver sera." ⁶ Ola, ko chlipinenas o pañi andral e burñik, sas trin šel (300) murša. Okla aver peske gele pro khoča a pijenas.

⁷ O RAJ phendā le Gideonoske: "Zachrañinava tumen prekal o trin šel (300) murša, save chlipinenas o pañi, a dava tumenge le Midijanen andro vasta. Okla mi džan pale khere." ⁸ Avke o Gideon paš peste muklā ča trin šel (300) muršen, save preile o chaben the o trubi, a bičhađa savore avre Izraeliten pale khere.

O taboris le Midijanengero sas teleder lendar andre dolina.

⁹ Andre odi rat le Gideonoske o RAJ phendā: "Ušti, džā tele andro taboris, bo diñom tuke len andro vasta.

¹⁰ Ale te pes daras te džal ode korkoro, akor džā tire služobñikoha le Puroha ¹¹ a šun len, so vakerena. Akor tut imar na daraha te džal pre lende pro mariben."

Avke o Gideon geľa tele peskere služobñikoha le Puroha džī ko anglune slugađa, pro agor le taboriskero.

¹² O Midijana, o Amaleka the o vichodne kmeñi bešen andre dolina sar o maľengere grajora a lengere ľavi pes añi na denas te zgenel upre, bo sas sar moskeri poši paš o brehos.

¹³ O Gideon avla ipen akor, sar jekh murš vakerelas avreske, hoj leske džalas suno. Phendā: "Šun, savo man sas suno! Jekh peko jačmeno maro pes kulñinelas (kotulñinelas) andro Midijañiko taboris džī ko stanos a demađa andre leste avke, hoj pes previsarđa a peľa pre phuv."

¹⁴ Oda dujto leske phendā: "Oda nane nič aver sar e šablā le Gideonoskeri andral o Izrael, savo hin le Joašoskero čhavo. O Del leske diña, hoj te ņerinel upral calo Midijañiko taboris!"

¹⁵ Sar o Gideon šundā pal oda suno the pal oda, so sikavel, bandiľa pro khoča a lašarelas le RAJES. Palis geľa pale andro Izraeliko taboris a zvičinda: "Ušten! O RAJ tumenge diña te ņerinel upral o Midijana!" ¹⁶ Avke rozulađa le trin šel (300) muršen pro trin partiji, savorenge diña andro vasta o trubi the o fakli andro džbani ¹⁷ a phendā lenge: "Dikhnen pre ma a keren oda, so me! Sar džava pro agor le taboriskero, the tumen keren oda, so kerava me. ¹⁸ Soča zatrubinava olenca, save hine manca, zatrubinen akor the tumen všadzik pašal calo taboris a vičinen: 'Vaš o RAJ the vaš o Gideon!'"

¹⁹ O Gideon le šel (100) muršenca avle pro agor le taboriskero pre jepaš rat, akor, sar pes o stražñika čerinenas. Zatrubinde a phagerde o džbani, so likerenas andro vasta. ²⁰ Akor savore trin šel (300) murša zatrubinde pro trubi a phagerde o džbani. Andro baľogñi (ľavo) vast ile o fakli a andro čačo (pravo) vast o trubi. Trubinenas a vičinenas: "E šablā vaš o RAJ the vaš o Gideon!" ²¹ Dojekh lendar ačhiła pre peskero than pašal o taboris. Avke andro taboris chudle savore te

denašel vriskišagoha. ²² Medik o trin šel (300) murša trubinenas, o RAJ diña, hoj pes andro taboris jekh aver te maren le šablénca. O manuša denašenas andral o taboris ke Bet-Šitta, ke Cerera the dži pro agor la Abel-Mecholatar paš o Tabbat.

²³ Palis vičinde le Izraeliten andral o kmeňi Naftali, Ašer the calo kmeňos le Menaššeskero, hoj te džan pal o Midijana. ²⁴ O Gideon bičhađa le muršen ko brehi Efrajim, hoj te phenen: "Aven tele pro Midijana a zalen o paňi Jordan dži paš e Bet-Bara, hoj odarik te na predžan."

Avke savore murša andral o Efrajim sas vičimen a zale o paňa Jordan dži ke Bet-Bara. ²⁵ Zaille soduje Midijaňike kraľen le Oreb † the le Zeeb ††. Le Oreb murdarde pre Vranakeri skala a le Zeeb pro Ruvakero (Vlkoskero) lisos. Džanas durededer pal o Midijana a o šero le Oreboskero the le Zeeboskero ande le Gideonoske pal o Jordan.

O Gideon a o Efrajim

8 O murša andral o kmeňos Efrajim dovakerde le Gideonoske: "So tu amenge kerďal, hoj amen na vičindaľ, sar geľal pes te marel le Midijanenca?" Igen pes leha vesekeďinde.

² Ov odphenda: "Kerďom me vareso bareder sar tumen? Či nane feder ovocje, so mukel o Efrajim pre maľa, sar calo hroznoskero ulipen le Abiezeriskero? ³ O Del diña tel tumari zor le Midijaňike velitelēn le Oreb the le Zeeb. Me našti kerďom vareso ajso baro sar tumen." Sar lenge kada phenda, preačhiľa lengeri cholī.

O Gideon ňerinel upral o Calmun the Zebach

⁴ Sar o Gideon avľa ko Jordan peskere trin šel (300) muršenca, pregeľan o paňi. Sar džanas imar but pal o Midijana, bokhalīle avri a na birinenas. ⁵ Avke o Gideon mangľa le manušen andral o foros Sukkot: "Mangav tumen, den prekal mire murša maro, bo imar na birinen a me džav pal o Midijaňike kraľa, pal o Zebach the Calmun."

⁶ O vodci andral o Sukkot leske odphende: "Či hine o kraľa o Zebach the o Calmun imar andre tire vasta? Soske majindaľmas te del maro tire muršen?"

⁷ O Gideon lenge phenda: "Sar mange o RAJ pomožinela te ňerinel (zvitāzinel) upral lende, akor avava ade pale a marava tumen le puštākere kandrenca the le bodľakenca." ⁸ Avke odarik geľa het upre andro Penuel a pomangľa the ode le vodcen, hoj les te den varesavo chaben. Ale the on leske odphende avke sar o murša andral o Sukkot. ⁹ Avke phenda le muršenge andral o Penuel: "Sar ňerinava a avava pale, čhivava tele kadi veža."

¹⁰ O kraľa o Zebach the o Calmun sas andro Karkor ajse 15 000 slugaďenca, save ačhile le vichodne kmeňendar, bo 120 000 lendar sas murdarde. ¹¹ O Gideon džalas pro drom, pre savo phirenas o kočovňika pro vichodos le forendar Nobach the Jogbeha. Geľa

pro taboris pro mariben ipen akor, sar oda na užarenas. ¹² O Zebach the o Calmun denašle, ale o Gideon džalas pal lende. Chudľa sodujen a savore lengere muršen roztradňa.

¹³ Pal o mariben pes o Gideon, le Joašoskero čhavo, visarďa pale prekal o verchengero drom Cheres.

¹⁴ Chudľa jekhe terne muršes andral o Sukkot a šunen nas les avri. Oda murš pisinda prekal leste savore eftavardeš the efa (77) nava le phuredere manušengere the le vodcengere andral o Sukkot. ¹⁵ Sar palis avľa o Gideon ko manuša andral o Sukkot, phenda lenge:

"Dikhen, kade hin o Zebach the o Calmun, prekal save man asandiľan avri a phenda: 'So, imar ňerindaľ upral o Zebach the Calmun, hoj te das tire muršen maro?'"

¹⁶ Avke iľa le vodcen andral o Sukkot a le puštākere kandrenca the bodľakenca len chudľa te marel. ¹⁷ Palis e veža andro foros Penuel čhida tele a le muršen odarik murdarďa.

¹⁸ Palis phučľa le Zebachostar the le Calmunostar: "Save muršen murdarďan pro verchos Tabor?"

"Muršen, save marenas pre tu. Dojekh lendar dičholas sar o čhavo le kraľiskero," odphende.

¹⁹ O Gideon odphenda: "On sas mire phrala, o čhave mira dakere. Avke sar dživel o RAJ, na murdarďomas tumen, te len mukľanas te dživel." ²⁰ Palis phenda peskere nekphuredere čhaske le Jeteroske: "Ušti a murdar len!" Ale o Jeter na iľa avri e šabľa, bo sas mek terno a daralas pes.

²¹ O Zebach the o Calmun phende le Gideonoske: "Av, murdar amen tu! Bo savo hin o murš, ajsi hin the leskeri zor." Avke o Gideon uštiľa a murdarďa len. Lengere távendar iľa tele pal o meňa o šukar lanci le čhonorenca.

O Izraeliti kamen le Gideon vaš peskero kraľis

²² O murša andral o Izrael phende le Gideonoske: "Av tu amaro kraľis – tu, tiro čhavo the o čhavo tire čhaskero – bo zachraňindaľ amen andral o vasta le Midijanengere."

²³ "Na avava tumaro kraľis aňi me aňi miro čhavo, ale o RAJ ela tumaro kraľis," odphenda o Gideon. ²⁴ Palis mek phenda: "Kamav tumendar mek vareso. Dojekh tumendar mange mi del o čeňa, so iľan le ňeprijatelēndar." O Midijana hordinenas o somnakune čeňa andro kana, bo sas Izraeliti.

²⁵ O Izraeliti odphende: "Radišagoha tuke daha ola čeňa." Avke thode pre phuv o plaštōs a dojekh pre leste čhide o somnakune čeňa. ²⁶ Ole savore somnakune čeňa važinenas ajse biš (20) kili. Dochudľa mek o šukar lanci le čhonorenca, čeňa the purpurova plašti, so hordinenas o Midijaňike kraľa the o šukar lanci, so sas pre lengere távi. ²⁷ O Gideon le somnakastar kerďa socha a thoďa la andre peskero foros Ofra. Savore Izraeliti omukle le Devles a gele ode te lašarel ola socha. Prekal o Gideon the prekal leskeri famelija sas oda sar pasca.

²⁸ O Izraeliti ňerinde upral o Midijana, avke hoj imar šoha (ňikda) pre lende na džanas pro mariben. Andre

† Oda hin: E vrana. †† Oda hin: O ruv (vlkos).

odi phuv sas saranda (40) berš smirom, medik o Gideon dživelas.

Le Gideonoskere čhave

²⁹ Avke o Joašoskero čhavo o Gideon pes visarđa pale khere. ³⁰ Le Gideon sas eftavardeš (70) čhave, bo sas les but romñija. ³¹ Leskera romñake-služobničkake, savi dživelas andro Šichem, uliľa čhavo a diňa leske nav Abimelech. ³² O Gideon muľa andre šukar phure berša. Parunde les andro hrobos leskere dadeskero le Joašoskero, andre le Abiezerengero foros Ofra.

³³ Soča o Gideon muľa, o Izraeliti chudle pale te el na-pačivale le Devleske a lašarenas le Baaleskere devlen. Le Baal-Berit peske ile sar devles. ³⁴ O Izraeliti peske imar na leperenas pro RAJ, pre peskero Del, savo len iľa avri andral o vasta savore lengere nepřijatelendar. ³⁵ A aňi le Gideonoskera famelijake na presikade e pačiv vaš savoro, so prekal lende kerđa.

O Abimelech

9 Le Gideonoskero čhavo o Abimelech geľa andro Šichem ke la dakere phrala the ke lakeri famelija. Phenda lenge: ² "Phučen le manušendar andral o Šichem: 'So hin feder prekal tumende? Oda, hoj eftavardeš (70) čhave le Gideonoskere te en upral tumende, abo ča jekh murš?' Ma bisteren, hoj som tumare ratestar the telostar!" ³ O phrala leskera dakere vakerenas savore manušenca andral o Šichem pal leste. Ola manuša kamenas, hoj o Abimelech len te lidžal, bo peske phende: "Hino amaro phral!" ⁴ Palis dine le Abimelech eftavardeš (70) rupune andral o chramos lengere devleskero Baal-Berit. Ov peske ola eftavardeš (70) rupune iľa a počinda zbujňikenge, save džanas pal leste. ⁵ Avke geľa andro kher peskere dadeskero andre Ofra a pre jekh bar murdarđa peskere eftavardeš (70) phralen, le Gideonoskere čhaven. Ale o Jotam, le Gideonoskero nekterneder čhavo, na sas murdardo, bo peš garuđa. ⁶ Palis pes zgele savore manuša andral o Šichem the Bet-Millo a gele andro Šichem pašes paš o sentno dubos, kaj sas o sentno slupos, a ode ačhade le Abimelech vaš o kralis.

⁷ Sar pal ada šunda o Jotam, geľa te ačhel upre pro verchos Gerizim a zorales zvičinda:

"Šunen man, manušale andral o Šichem, hoj tumen o Del te šunel avri!

⁸ Jekhvar zgele pes o stromi, hoj peske maškar peste te len avri le kralis. Phende la olivake: 'Av amaro kralis!'

⁹ Ale e oliva phenda:

'Majinav te zaačhavel miro olejos, saveha požehñinav le devlen the le manušen, hoj man te hazdav upral o stromi?'

¹⁰ Palis o stromi phende le figovňikoske:

'Av tu amaro kralis!'

¹¹ Ale o figovňikos lenge phenda:

'Majinav man te zdel mire ovocjendar, save hine lačhe the gule,

hoj man te hazdav upral o stromi?'

¹² Palis o stromi phende le viňičiske:

'Av a kralin amenge tu!'

¹³ Ale o viňičis lenge phenda:

'Majinav te preačhel te del miri mol, so kerel radišagos le devleng the le manušenge, hoj man te hazdav upral o stromi?'

¹⁴ Palis savore stromi phende le kandruno stromoske:

'Av tu amaro kralis!'

¹⁵ O kandruno stromos lenge phenda:

'Te man čačes kamen te pomakhel vaš tumaro kralis,

aven, garuven tumen tel miro ciños.

Te na, mi avel avri andral o kandruno stromos e jag a mi zlabarel o Libanoňike sosni! "

¹⁶ O Jotam mek phenda: "Kerđan čačipnaha the pačivalones, hoj peske iľan avri le Abimelech vaš o kralis? Likerenas tumen mištes ko Gideon the ke leskeri famelija? Kerđan leha avke, sar peske zasogalinda (zaslužinda)? ¹⁷ Bo miro dad pes marelas vaš tumende, choc leske džalas vaš o dživipen a zachraňinda tumen le Midijanendar. ¹⁸ Ale adadžives pes tumen ačhaden pro mariben pre miri dadeskeri famelija. Murdarđan leskere čhaven, eftavardeš (70) muršen pre jekh bar. A le Abimelech, la služkakere čhas, ačhaden vaš o kralis upral o Šichem, bo hino tumenge famelija. ¹⁹ Te adadžives kerđan pačivalones a žuže jileha le Gideonoha the leskera famelijaha, akor radisaľon le Abimelechoha a ov mi radisaľol tumenca. ²⁰ Ale te na, akor mi avel avri e jag andral o Abimelech a mi zlabarel le manušen andral o Šichem the andral o Bet-Millo. A le manušendar andral o Šichem the Bet-Millo mi avel avri e jag a mi zlabarel le Abimelech!" ²¹ Palis o Jotam daratar denašľa peskere phralestar le Abimelechostar a ačhiľa te bešel andro foros Beer.

²² O Abimelech kralinelas upral o Izrael trin berš.

²³ Palis o Del bičhađa nalačhe duchos maškar o Abimelech the maškar o manuša andral o Šichem, hoj te zradzinen le Abimelech. ²⁴ O Del oda kerđa, hoj te visarel pale le Abimelechoske vaš oda, hoj murdarđa le Gideonoskere eftavardeš (70) čhaven, a the le manušenge andral o Šichem, bo leske pomožinenas andre oda. ²⁵ O manuša andral o Šichem ačhade pre leste pro verchi muršen, save občorarnas dojekhes, ko predžalas pašal lende pal o drom. O Abimelech pes pal ada dodžanľa.

²⁶ Palis avľa o Gaal, o čhavo le Ebedoskero, peskere phralenca te bešel andro Šichem a o manuša odarik leske chudenas te pačal. ²⁷ Jekhvar, sar gele pre viňica te skidel upre o hroznos a ispidenas avri e šťava, kerde hoscina a gele andro chramos peskere devleskero. Chanas, pijenas a prekošenas le Abimelech. ²⁸ Palis o Gaal, o čhavo le Ebedoskero, phučľa: "Ko hin o Abimelech a so hin o foros Šichem, hoj leske te služinas? Hino ča o čhavo le Gideonoskero a le Zebul ačhađa, hoj te lidžal o foros vaš leste. Služinen le Šichemoskere muršenge, save hine o čhave le Chamoroskere! Soske majinas le Abimelechoske te služinel? ²⁹ Te ulomas me

kralis upral kala manuša, imar čirla čhidomas tele le Abimelech. Phendomas leske: 'An tuha buter muršen a av pro mariben!' "

³⁰ Sar ada šunda o Zebul, savo lidžalas o foros, chalas bari cholī. ³¹ Avke bičhađa počoral muršen andre Aruma ko Abimelech, hoj leske te phenen: "Dikh, le Ebedoskero čhavo, o Gaal a leskere phrala avle andro Šichem a keren upre le manušen pre tute. ³² Akana dža rači peskere muršenca a garuv tut andro maļi! ³³ Palis tosara, sar vidnišalola, dža pro mariben pre oda foros! Sar avela o Gaal peskere muršenca pre tute, ker leha, so ča tu kames."

³⁴ O Abimelech uštīla mek odi rat savore peskere muršenca a gele pes te garuvel pašes paš o foros Šichem pro štar partiji. ³⁵ Sar o Gaal geļa te ačhel anglal e foroskeri brana, o Abimelech avelas avri peskere muršenca, save sas garude. ³⁶ O Gaal ole muršen dikhla a phenda le Zebuloske: "Dikh, varesave murša aven tele pal o verchi."

"Oda hin o ciņi pro verchos. Ča dičhon sar o murša," odphenda leske o Zebul.

³⁷ Ale o Gaal pale phenda: "Na, čačes aven tele varesave murša pal o verchos a aver čata avel khatar o dubos le vraščengero."

³⁸ Palis o Zebul leske phenda: "Kaj hine tire bare lava? Či na phenda: 'Ko hin o Abimelech, hoj leske te služinas?' Kala murša hine ola, saven avri asandīfal. Akana dža a mar tut lenca!" ³⁹ Avke o Gaal lidžalas le manušen andral o Šichem pro mariben pro Abimelech. ⁴⁰ Ale o Abimelech džalas pal leste a ov denašļa. But le Gaaloskere muršendar sas murdarde dži paš e foroskeri brana. ⁴¹ O Abimelech ačhiļa andre Aruma a o Zebul čhidā avri le Gaal the leskere phralen andral o Šichem.

⁴² Pro dujto džives o Abimelech pes došunda, hoj o murša andral o Šichem gele pro maļi. ⁴³ Avke iļa peskere muršen, rozulađa len pro trin čati a bičhađa len, hoj pes te garuvel andro maļi pašes paš o Šichem. Sar dikhle, hoj o murša aven avri andral o foros, chučile pre lende a murdarkerde len. ⁴⁴ O Abimelech geļa jekha partijaha anglal ke foroskeri brana a zaile la. Duj čati gele pre ola, save sas pro maļi, a murdarkerde len. ⁴⁵ Marenas pes calo džives a zaile o foros. Murdarde savoren odarik, calo oda foros zničinde a rozčhide les le loneha.

⁴⁶ Sar o manuša, save sas andre veža paš o Šichem, pes došunde, so pes ačhiļa, denašenas andro chamos le El-Beritoskero, hoj pes te garuvel andro garudo than. ⁴⁷ Le Abimelechoske phende, hoj ode pes zgele savore manuša andral e veža paš o Šichem. ⁴⁸ Avke geļa peskere manušenca pro verchos Calmon. Andro-da iļa o tover, čhingerđa o konara pal o stromos, hazdņa len a thođa peske len pro phiko. Olenge, ko sas leha, phenda: "Oda, so man dikhlan te kerel, sigo keren the tumen." ⁴⁹ Avke kerde oda the leskere manuša a džanas pal o Abimelech. Ola konara thode upral o garudo than a zlabarde len upral lende. Mule

savore manuša andral e veža paš o Šichem, ajse 1 000 murša the džuvlija.

O Abimelech merel

⁵⁰ Palis o Abimelech geļa ko foros Tebec, ačhađa peskere muršen pal dojekh sera a zaiļa les. ⁵¹ Maškar oda foros sas zorali veža. Savore murša, džuvlija the savore manuša andral oda foros denašle andre. Phandle pal peste o vudar a gele upre pre strecha. ⁵² O Abimelech avļa dži ke odi veža pro mariben. Geļa ko vudar vašoda, hoj la te podlabarel. ⁵³ Ale androda varesavi džuvli leske čhidā pro šero malmoskero bar a pharađa leske o šero. ⁵⁴ Ov androda sigo vičinda le terne muršes, savo leske hordinelas o zbraņi, a phenda leske: "Le avri tiri šabļa a murdar man, hoj te na phenen pal ma: 'Murdarda les e džuvli.'" Avke oda murš les predemađa a ov muļa. ⁵⁵ Sar o Izraeliti dikhle, hoj o Abimelech muļa, savore pes visarde pale khere.

⁵⁶ Avke o Del visarda pale le Abimelechoske oda, so kerđa peskere dadeske, sar murdarđa peskere eftavardēš (70) phralen. ⁵⁷ O Del visarda pale the le muršenge andral o Šichem vaš oda, so kerde. Kavke avļa pre lende o prekošiben, so phenda o Gideonoskero čhavo o Jotam.

O Tolas the o Jair

10 Pal o Abimelech avļa o Tolas, hoj te zachraņinel le Izraeliten. Sas andral o kmeņos Jissachar a bešelas andro foros Šamir pro brehi Efrajim. Leskero dad sas o Puah a leskero o Dodo. ² Lidžalas o Izrael bišutrin (23) berš. Palis muļa a parunde les andro Šamir.

³ Pal leste avļa o Jair andral o Gilead a lidžalas o Izrael bišuduj (22) berš. ⁴ Sas les tranda (30) čhave a dojekh lendar džalas pro peskero somaris. Sas len tranda fori, so pes dži adadžives vičinen Jairoskere gava a hine andre phuv Gilead. ⁵ Sar o Jair muļa, parunde les andro foros Kamon.

O Jeftah

⁶ O Izraeliti pale kerenas bini anglo RAJ. Služinas le modlengje Baal the Aštarta a the le Aramejike, Ammonike, Sidonike, Moabike the Filištīnike devlengje. ⁷ Akor o RAJ cholīsalīļa pro Izraeliti a diņa len le Filištīnenge the le Ammončanenge andro vasta. ⁸ On andre oda časos ispīdenas pro Izraeliti a na denas lenge smirom. Dešuocho (18) berš trapīnenas savore Izraeliten pal o Jordan, andre le Amorejengeri phuv Gilead. ⁹ O Ammončana pregele the o Jordan a gele pro mariben pro kmeņi Juda, Benjamin the Efrajim. Pro Izraeliti avļa baro pharipen.

¹⁰ Akor chudle pale te vičinel ko RAJ: "Kerdam binos anglal tu, bo omuklam tut, peskere Devles, a služinahas le Baalengere modlengje Baal!"

¹¹ O RAJ odphenda le Izraelitenge: "Či me tumen na zachraņindom le Egiptānendar, le Amorejendar, le Ammončanendar, le Filištīnendar, ¹² le Sidončanendar, le

Amalekendar the le Midijanendar, save tumen trapine-nas? Sar pre ma vičinenas, cirdňom tumen avri andral lengere vasta. ¹³ Ale tumen man pale omuklan a služinenas avre devlenge, vašoda tumen imar na zachraňina. ¹⁴ Džan a vičinen pro devla, saven peske ilan avri! Mi zachraňinen tumen on, sar avena andro pharipen!"

¹⁵ Ale o Izraeliti phende le RAJESKE: "Kerđam binos, ker amenca, sar tu kames, ale mangas tut, ča zachraňin amen adadžives!" ¹⁶ Avke čhide peštar het le cudze devlen a služinenas le RAJESKE. O RAJ imar na birinelas te dikhel pro pharipen le Izraelitengero.

¹⁷ Sar o Ammončana pes zgele a kerde peske taboris andro Gilead, hoj te džan pro mariben, avke the o Izraeliti pes zgele a kerde peske taboris paš e Micpa. ¹⁸ O manuša the o vodci andral o Gilead phende jekh avreske: "Oda, ko ešeb (peršo) džala pro mariben pro Ammončana, ela vodcas savore manušenge andral o Gilead."

O Jeftah

11 O Jeftah andral o Gilead sas zoralo murš. Sas o čhavo la lubňakero a leskero dad sas o Gilead. ² Le Gilead sas the peskera romňaha čhave. Sar imar dobarile kala čhave, tradle avri le Jeftah. Phende leske: "Tu našti chudes nič amare dadeskere barvalipnastar, bo sal o čhavo avra džuvlatar." ³ O Jeftah denašla peskere phralendar a geľa te bešel andre phuv Tob. Ode pes leha zgele o nalače murša a džanas jekhetane leha.

⁴ Andre oda časos, sar o Ammončana džanas pro Izraeliti pro mariben, ⁵ o vodci andral o Gilead gele pal o Jeftah andre phuv Tob. ⁶ Phende le Jeftoske: "Av amaro vodcas, hoj te džas pro mariben pro Ammončana."

⁷ Ale o Jeftah lenge phendá: "Na san oda tumen, save pre ma džanas a tradňan man avri andral o kher mire dadeskero? Soske aven akana ke ma, sar san andro pharipen?"

⁸ "Se vašoda akana avlam ke tu pale," odphende leske o vodci, "te džaha amenca pro mariben pro Ammončana, aveha velitelis savore manušenge andral o Gilead."

⁹ O Jeftah lenge phendá: "Te man prilena pale, hoj man te marav le Ammončanenca, a te o RAJ mange len dela andro vasta, avava čačes tumaro vodcas?"

¹⁰ "Mi el o RAJ maškar amende švedkos," phende leske o vodci, "amen das tut lav, hoj keraha sa avke, sar phendal." ¹¹ Avke geľa o Jeftah le Gileadoskere vodcena a o manuša les ačhade vaš peskero vodcas the velitelis. Andro foros Micpa o Jeftah phendá anglo RAJ savoro, so imar phendá le vodcenge.

¹² Palis o Jeftah bičhađa le muršen ko Ammoniko kralis, hoj leske te phenen: "So tut hin pre mande, hoj avlal pro mariben andre miri phuv?"

¹³ O Ammoniko kralis phendá le Jeftoskere muršenge: "Sar o Izraeliti avenas avri andral o Egipt, zaile miri phuv le paňestar Arnon dži ko paňi Jabbok

the ko Jordan. Akana de mange oda pale andro smirom!"

¹⁴ Avke o Jeftah pale bičhađa le muršen ko Ammoniko kralis ¹⁵ a diňa leske te phenel:

"Kavke phenel o Jeftah: O Izrael na ila le Ammončanenge aňi le Moabčanenge lengeri phuv. ¹⁶ Sar džanas o Izraeliti avri andral o Egipt prekal e pušta ko Lolo Moros † a doavla andro Kadeš, ¹⁷ o Izraeliti bičhade ko kralis andral o Edom le muršen, hoj leske te phenen: 'Kamľomas te predžal prekal tiri phuv.' Ale o Edomiko kralis pal kada na kamla aňi te šunel. The ko Moabiko kralis bičhade le muršen, ale aňi ov lenge oda na domukla. Vašoda o Izraeliti ačhile andro Kadeš.

¹⁸ Palis o Izraeliti džanas prekal e pušta a obgele e Moabiko the Edomiko phuv. Doavle pre vichodno sera la Moabika phuvatar a kerde peske taboris pal o paňi Arnon. Ale na pregele odarik, bo ode chudelas e phuv Moab.

¹⁹ Palis o Izraeliti bičhade le muršen ko Amorejiko kralis ko Sichon andro Češbon a pomangla les:

'Kamľomas te predžal prekal tiri phuv andre amari!'

²⁰ Ale o Sichon na pačalas oleske, hoj o Izraeliti kamen ča avke te predžal prekal leskeri phuv. Vičinda ke peste savore peskere muršen, kerđa taboris andre Jahca a geľa pro mariben pro Izraeliti.

²¹ Ale o RAJ, o Del le Izraeloskero, diňa le kralis Sichon leskere manušenca andro vasta le Izraelitenge. Avke o Izraeliti upral leste ňerinde (zviťazinde) a zaile cali phuv le Amorejengeri, save ode bešenas. ²² Zaile cali phuv le Amorejengeri le paňestar Arnon dži ko paňi Jabbok the la puštatar dži ko Jordan.

²³ O RAJ, o Del le Izraeloskero, ila e phuv le Amorejendar a diňa la le Izraelitenge a tu kames odi phuv te zalel? ²⁴ Či tuke na leha oda, so tuke dela tiro del o Kemoš? Ale amen peske zalaha savoro, so amenge o RAJ, amaro Del, imar diňa. ²⁵ Či sal feder sar o Moabiko kralis o Balak, o čhavo le Cipporoskero? Či pes vesekedinda le Izraeloha, abo geľa leha pro mariben?

²⁶ O Izraeliti bešen imar trin šel (300) berš andro foros Češbon the andro Aroer, andre lengere gava the mek andre savore fori pal o soduj seri le paňestar Arnon. Soske lenge kala fori akorestar na ilan? ²⁷ Me tuke na kerđom nič nalačo, ale tu mange keres namištes, te aves pre ma pro mariben. O RAJ hin o sudcas. Ov adadžives mi sikavel maškar o Izraeliti the Ammončana, kaskero hin o čačipen."

²⁸ Ale o Ammoniko kralis na kamla aňi oda te šunel, so leske diňa te phenel.

Le Jeftoskeri vera

²⁹ Le RAJESKERO Duchos avla pro Jeftah a ov pregeľa prekal o phuva Gilead the Menašše andre Gileadiko Micpa. Odarik geľa pro mariben pro Ammončana. ³⁰ O Jeftah diňa vera le RAJES: "Te mange čačes deha le Ammončanen andro vasta ³¹ a te man lendar visarava pale andro smirom, akor dava le RAJESKE sar labardí

† E Hebrejiko čhib: O Trstinakero Moros

obeta oles, ko avela ešeb (peršo) angle mande andral o vudar mire khereskero."

³² Palis o Jeftah geľa pro mariben pro Ammončana a o RAJ leske len diňa andro vasta. ³³ Domarda biš (20) fori le Aroerostar dži paš o Minnit the dži ko Abel-Keramim. Igen but le Ammončanendar murdarda a avke ňerinda (zvitazinda) upral lende.

Le Jeftoskeri čhaj

³⁴ Sar o Jeftah avelas pale khere andre Micpa, leskeri čhaj avľa avri anglal leste le khelibnaha the bašavibnaha pre tamburina. Sas les ča jekh čhajori, na sas les ňisave aver čhave. ³⁵ Soča la dikhľa, čhingerđa pre peste o plaštós a zvičinda: "Ó, čhajori miri, prekal tute hin miro jilo dukhado! Andal man andre bari bibach! Diňom vera le RAJES a mušnav oda te dolikerel!"

³⁶ Oj leske phenda: "Dado miro, te diňal le RAJES vera, akor ker manca ča avke, sar phenda. Se o RAJ tuke diňa, hoj te visares pale tire ňeprijateľenge le Ammončanenge." ³⁷ Palis mek phenda le dadeske: "Ker prekal ma kada: Muk man duj čhon, hoj te džav mire prijateľkenca pro verchi. Ode rovaha upral oda, hoj šoha (ňikda) na džava romeste."

³⁸ "Dža," phenda lake a mukľa la pro duj čhon. Avke oj geľa peskere prijateľkenca pro verchi a ode rovelas upral oda, hoj šoha na džala romeste. ³⁹ Pal o duj čhon avľa pale ko dad a ov odi vera dolikerđa. Oj ačhiľa pačivali.

Akorestar pes andro Izrael kerel oda, ⁴⁰ hoj o Izraelike čhaja džan avri sako berš pro štar džives peske te leperen pre le Gileadoskeri Jeftoskeri čhaj.

O Efrajim pes marel le Jeftoha

12 O murša andral o Efrajim pes zgele pro mariben. Pregele prekal o Jordan andro foros Cafon a phende le Jeftoske: "Soske geľal pro mariben pro Ammončana a amen na vičindaľ, hoj te džas tuha? Vašoda labaraha tiro kher the tuha!"

² O Jeftah lenge phenda: "Me the mire manuša igen pes vesekedinahas le Ammončanenca. Ale sar tumen mangavas, hoj mange te pomožinen, na zachraňindan man andral lengere vasta. ³ Ale sar dikhľom, hoj mange na kamen te pomožinel, geľom pro mariben pro Ammončana, choc mange džalas vaš o dživipen. O RAJ mange len diňa andro vasta. Soske kamen adadžives te džal pre ma pro mariben?"

⁴ Palis o Jeftah skidňa savore manušen andral o Gilead a geľa pro mariben pro Efrajim. O Gileadi ňerinde (zvitazinde) upral o Efrajima, bo dovakerenas lenge: "Tumen, Gileadale, denašľan andral o Efrajim the Menašše." ⁵ O Gileadi zaike o thana, khatar pes delas te predžal prekal o Jordan ko Efrajim. Te phenelas varesavo Efrajimos, so denašelas: "Kamav te predžal pre aver sera," o Gileadi lestar phučenas: "Sal Efrajimos?" Te phendaahas: "Na som!", ⁶ akor leske phenas: "Phen Šibbolet!" Te ov phendaahas "Šibbolet", bo na džanelas te phenel mištes oda lav, akor les chude-

nas a murdarenas pre oda than, khatar pes delas te predžal. Akor mule le Efrajimendar 42 000 murša.

⁷ O Jeftah sas sudcas andro Izrael šov berš. Sar muľa o Jeftah o Gileados, parunde les andre varesavo jekh foros andro Gilead.

O Ibcan, o Elon the o Abdon

⁸ Pal o Jeftah sas sudcas andro Izrael o Ibcan andral o foros Betlehem. ⁹ Sas les tranda (30) murša the tranda (30) čhaja. Peskere čhajen diňa romeste avra fajtake a peskere čhavage anda tranda (30) čhajen andral aver fajta. O Ibcan sas sudcas andro Izrael efa berš. ¹⁰ Sar o Ibcan muľa, parunde les andro Betlehem.

¹¹ Pal leste ačhiľa sudcas andro Izrael o Elon andral o kmeňos Zebulun. Lidžalas o Izrael deš berš. ¹² Sar o Elon muľa, parunde les andro Ajalon, andre phuv le Zebulunoskeri.

¹³ Pal leste ačhiľa sudcas andro Izrael o Abdon, o čhavo le Hilleloskero, andral o foros Piraton. ¹⁴ Sas les saranda (40) čhave the tranda (30) čhavengere čhave, save džanas pro eftavardeš (70) somara. Ov lidžalas o Izrael ochto berš. ¹⁵ Sar muľa o Abdon, le Hilleloskero čhavo, andral o Piraton, parunde les andro Piraton andre phuv Efrajim pro le Amalekengere brehi.

O Samson uľol

13 O Izraeliti palis pale kerenas o bini anglo RAJ. Avke o RAJ len diňa andro vasta le Filištinege pro saranda (40) berš.

² Sas jekh murš andral o foros Cora andral o kmeňos Dan, savo pes vičinelas Manoach. Leskeri romňi našti ačhelas khabňi a na sas la čhave. ³ Le RAJESKERO aňjelos pes lake sikada a phenda: "Dikh, našti ačhehas khabňi a tuke na uľile čhave, ale akana ačheha khabňi a ela tut muršoro. ⁴ Vašoda merkin, hoj te na pijes mol aňi aver pijiben, a ma cha nič, so hin melalo. ⁵ Bo ačheha khabňi a ela tut muršoro. Leskere bala našti ostrihinen, bo ole dživesestar, kana uľola, ela dino ča prekal o Del sar Nazarejos. Ov chudela te zachraňinel o Izrael le Filištinenar."

⁶ Avke oj džalas oda te phenel peskere romeske a phenda: "Avľa ke ma Devleskero murš. Dičholas avri sar le RAJESKERO aňjelos, daravas pre leste te dikhel. Na phučľom lestar, khatar hino, a ov mange na phenda peskero nav. ⁷ Ale phenda mange, hoj ačhava khabňi a ela man muršoro. Phenda, hoj te na pijav mol aňi ňisavo aver pijiben a te na chav nič, so hin melalo, bo o čhavoro ela dino ča prekal o Del sar Nazarejos, kanastar uľola dži ko meriben."

⁸ Palis o Manoach pes modľinelas ko RAJ: "RAJEJA, mangav tut, hoj oda Devleskero murš, saves bičhadal, te avel pale ke amende. Mi phenel amenge, so te kerel kale čhavoreha, savo uľola."

⁹ O Del šundľa avri le Manoach a o aňjelos le RAJESKERO avľa pale ke džuvľi, sar bešelas pre maľa a lakero rom o Manoach na sas laha. ¹⁰ Avke oj denašelas oda te phenel peskere romeske. Phenda leske:

“Oda murš, savo oda džives avľa ke ma, pes mange sikađa pale!”

¹¹ O Manoach uštíla, geľa peskera romňaha ke oda murš a phučľa: “Sal tu oda murš, savo vakerelas mira romňaha?”

“He, som,” odphenda.

¹² O Manoach phučľa: “Sar pes ačhela oda, so phendał, sar kempel te dživel o čavoro a so majinel te kerel?”

¹³ O aňjelos le RAJESKERO leske phenda: “Tiri romňi mušinel te kerel savoro, so lake phendom. ¹⁴ Te na pijel nič, so hin le viňičostar, te na pijel mol aňi nisavo aver pijiben a te na chal nič, so hin melalo. Mi dolikerel savoro, so lake phendom.”

¹⁵ O Manoach phenda le RAJESKERE aňjeloske: “Man-gas tut, ačh ade, medik tuke na pririchtinaha terňa koza.”

¹⁶ Ale o aňjelos leske odphenda: “The te man ade zlíkerđalas, na chaľomas tire chabenestar. Ale te pririchtineha labardí obeta le RAJESKE, an la.”

O Manoach na džanelas, hoj oda hin le RAJESKERO aňjelos, ¹⁷ vašoda lestar phučľa: “Sar tut vičines? Sar pes ačhela oda, so phendał, kamľamas tuke te presikavel e pačiv.”

¹⁸ “Soske phučes pal miro nav? Na del pes te achaľol,” odphenda leske le RAJESKERO aňjelos.

¹⁹ Avke o Manoach íla terňa koza the e chabeneskeri obeta a obetinda oda pre skala le RAJESKE. O RAJ kerđa anglo Manoach the leskeri romňi vareso naužardo: ²⁰ Sar e jag džalas andral o oltaris upre andro ňebos, o aňjelos le RAJESKERO geľa upre la jagaha. Sar oda dikhle o Manoach the leskeri romňi, pele le mujeha ke phuv. ²¹ Le RAJESKERO aňjelos pes imar pale le Manoachoske the leskera romňake buter na sikađa.

²² O Manoach phenda peskera romňake: “Amen čačes meraha, bo dikhľam le Devles.”

²³ Ale leskeri romňi leske phenda: “Te amen o RAJ kamľahas te murdarel, na ílahas amendar e labardí the e chabeneskeri obeta. Na sikađahas amenge kada savoro a aňi akanake amenge ajso vareso na phenda-has.”

²⁴ Sar lake ulíľa o čhavo, diňa leske nav Samson. O čhavo barolas a o RAJ les požehňinelas. ²⁵ Akor, sar sas andro taboris Dan maškar o foros Cora the Eštaol, le RAJESKERO Duchos chudelas andre leste te kerel.

Le Samsonoskero bijav

14 O Samson geľa tele andro foros Timna a ode pes zadikhľa andre jekh Filištinka. ² Sar pes visarelas khere, phendał peskere dadeske the la dake: “Andre Timna dikhľom jekha Filištinka. Len mange la romňake!”

³ O dad the e daj les prevakerenas: “Či nane džuvľi maškar o čhaja tire phralengere the maškar amare manuša? Soske peske kames te lel romňa maškar o naobčhinde (naobrezimen) Filištinci?”

Ale o Samson le dadeske phenda: “Kala mange le, bo oj mange hiňi pre dzeka!” ⁴ O dad the e daj na džane-

nas, hoj oda hin le RAJESTAR, savo kamľa te džal pro Filištinci. Bo andre oda časos o Izrael sas tel e Filištínengeri zor.

⁵ Avke o Samson geľa le dadeha the la daha tele andre Timna. Sar avenas ko viňici andre Timna, jekhvareste džalas pre lende terno ľevos, savo gravčinelas. ⁶ Le RAJESKERO Duchos avľa pro Samson a ov peskere vastenca rozčinda le ľevos sar terňa koza. Le dadeske the la dake pal oda na phenda nič. ⁷ Palís geľa tele, vakerelas ola džuvľaha, savi sas leske pre dzeka.

⁸ Sar pes visarda pal varesavo časos la peske te lel romňake, odgeľa le dromestar te dikhel pro mulo ľevos. Andro ľelos le ľevoskero sas but včeli the medos. ⁹ Íla andre burňik sikra medos a le dromeħa lestar chalas. Avľa ko dad the ke daj a diňa the len ole medostar te chal, ale na phenda lenge, hoj o medos íla avri andral o mulo ľevos.

¹⁰ Palís leskero dad geľa tele ke odi džuvľi a o Samson ode kerđa hoscina, avke sar kerenas furt o terne murša. ¹¹ Sar les dikhle o Filištinci, íle avri prekal leste tranda (30) terne muršen, hoj te ačhen leha pro bijav.

¹² O Samson lenge phenda: “Phenava tumenge vareso garudo. Te džanena mange pre oda te odphenel pal o ehta džives, akor tumen dava tranda (30) gada the tranda (30) bijavutne gada. ¹³ Ale te mange na džanena pre oda te odphenel, tumen mušinena mange te del ola tranda (30) gada the tranda (30) bijavutne gada.”

“Phen amenge oda,” phende leske. “Kamas oda te šunel.” ¹⁴ Ov lenge phenda:

“Andral oda, so chal, avľa avri o chaben a andral oda, so hino zoralo, avľa avri o gulípen.”

A na džanenas te avel pre oda aňi pal o trin dživesa.

¹⁵ Pro štarto džives ispidenas pre Samsonoskeri romňi: “Prevaker tire romes, hoj amenge te phenel avri oda garudípen. Te na, labaraha tut the tiro dadeskero kher. Vičindaťam amen ade, hoj amen te občoraren?”

¹⁶ Palís le Samsonoskeri romňi le rovibnaha avľa angle leste a phenda: “Tu man naští avri ačhes a na kames man! Mire manušenge phendał garudípen, ale mange na phendał, so oda hin.”

“Se me oda aňi mire dadeske aňi mira dake na phendom a tuke oda mušínave te phenel avri?” phenda lake o Samson. ¹⁷ Ale oj pre leste rovibnaha ispidelas, medik líkerelas e hoscina dží pro eftato džives. Ajci pre leste ispidelas, hoj lake oda phenda avri. Oj palís geľa te phenel peskere manušenge, so oda garudípen hin.

¹⁸ Pro eftato džives, medik na zapela o kham, lestar phučle ola foroskere murša:

“So hin guleder sar o medos?”

A so hin zoraleder sar o ľevos?”

O Samson lenge odphenda:

“Te tumen na orindaťanas mira terňa gurunňoraha, na džanľanas oda garudípen!”

¹⁹ Avke avľa le RAJESKERO duchos pro Samson, geľa tele andro foros Aškalon a murdarda tranda (30)

muršen. Iľa lendar oda, so len sas, a lengere in-eposkere gada diňa olenge, save pre oda garudipen avle. Palis andre bari cholı o Samson geľa pale ko dadeskero kher. ²⁰ Leskera romňa dine leskere prijateliske, savo sas pro bijav.

O Samson kerel namištes le Filištínenge

15 Pal varesavo časos, sar pes skidelas o žužodiv pal e maľa, o Samson iľa terňa kozica a geľa te dikhel peskera romňa a phendä: "Kamav te džal andro kher ke miri romňi."

Ale lakero dad leske na domukľa te džal andre ² a phendä leske: "Gondolindom mange, hoj la imar našti avri aches, vašoda la diňom tire prijateliske. Lakeri terneder pheň hiňi šukareder sar oj. Mi el tiri romňi!"

³ Ale o Samson leske odphendä: "Akana na avava vinovato, te le Filištínenge kerava namištes!" ⁴ Avke odgeľa a chudľa trin šel (300) liški. Palis iľa o fakli a le lišken sphandľa po duj le porenca, avke hoj maškar o pora priphandľa e fakľa. ⁵ Labarda o fakli a le lišken mukľa te džal ko Filištínengero div. Kavke zlabarda o div, so sas pro kopi, oda, so sas mek andre phuv, o viňici the olivakere stromi.

⁶ O Filištinci phučenaz: "Ko ada kerđa?" Phende lenge: "O Samson, le Timňanoskero džamutro, bo leskera romňa dine leskere prijateliske."

Avke o Filištinci avle a zlabarde la the lakere dades. ⁷ O Samson lenge phendä: "Vaš oda, so tumen kerđan, na preačhava pre tumende te džal, medik tumenge na visarava pale!" ⁸ Marelaz le Filištinen bara cholaha a but lendar murdarđa. Palis geľa tele te bešel andre chev andre skala Etam.

⁹ Avke avle o Filištinci, kerde peske taboris andre Judsko a sas rozačhade pro than Lechi. ¹⁰ O murša andral e Judsko phuče: "Soske avľan pre amende pro mariben?"

"Avľam te chudel le Samson a te visarel leske oda, so ov kerđa amenge," odphende.

¹¹ Akor trin ezera (3 000) murša andral e Judsko avle tele paš e skala Etam a phende le Samsonoske: "Či tu na džanes, hoj amen sam tel e zor le Filištínengeri? So tu amenge kerdäl?"

Odphendä lenge: "Avke, sar on kerde mange, me kerdom lenge." ¹² Phende leske: "Avľam tut te chudel a te del andro vasta le Filištínenge."

O Samson lenge phendä: "Len vera, hoj na chučena pre ma tumen korkore!"

¹³ "Na chučaha pre tu," phende leske, "ča sphandaha tut a daha tut lenge andro vasta. Čačes amen tut na kamas te murdarel." Avke les phandle duje neve lanenca a ligende les avri andral e skala.

¹⁴ Sar avľa ko than Lechi, o Filištinci vriskinenaz a denašenaz anglal leste. Androda avľa jekhvaresto pro Samson le RAJESKERO Duchos a o šele pre leskere musa ačhile sar zlabarde thava a pele tele leskere vastendar. ¹⁵ Arakhlä e kokaluňi sankä le mule somaristar, iľa la andro vast a murdarđa laha ezeros (1 000) muršen.

¹⁶ Palis o Samson phendä:

"La somariskera sankaha len čhidom pro but kopi, la somariskera sankaha murdardom ezeros (1 000) muršen."

¹⁷ Sar dovakerđa, odčhida pestar e sankä andral o vast. Vašoda pes oda than vičinel Ramat-Lechi †.

¹⁸ O Samson andro baro smedos vičinelaz pro RAJ: "Tu diňal tire služobňikoske kada baro ñerindipen (vitaztvo), ale akana mušnav te merel andro smedos a te perel andro vasta ole naobčhinde (naobrezimen) muršenge?" ¹⁹ Akor o Del phundrađa e chev andro Lechi, hoj te avel avri o paňi. Sar piľa o Samson, prek-erdä pes a avľa ke peste. Vašoda le paňeske, so hin dži adadžives andro Lechi, diňa nav En-Hakkore ††.

²⁰ O Samson lidžalaz le Izraeliten andro časos le Filištínengero biš (20) berš.

O Samson denašel le Filištínendar

16 Sar avľa jekhvar o Samson andro foros Gaza a dikhľa ode jekha lubňa. Geľa ke late a pašliľa laha. ² Soča o manuša andral e Gaza šunde, hoj o Samson avľa ode, gele takoj ke foroskeri brana a cali rat ode cichones pre leste užarenaz, medik na vidňisalíľa. Phende: "Ko tosara les murdaraha."

³ O Samson sovelaz dži jepaš rat. Pal jepaš rat uštilä, chudľa e brana le foroskeri a cirdňa la avri le čopenca the le zavoriha. Thoda peske la pro phiko a ligendä la dži upre pro verchos anglo Hebron.

O Samson the Delila

⁴ Palis geľa tele andre dolina Sorek a ode pes zakamľa andre džuvli, savi pes vičinelaz Delila. ⁵ Androda avle ke late o Filištínike vodci a phende lake: "Chude les andre a dodžan tut, khatar les hin ajsi bari zor a sar les šaj thovaz tele, hoj les te sphandas a te prelaz upral leste e zor. Palis dojekh amendar tut dela 1 100 rupune minci."

⁶ Avke e Delila phendä le Samsonoske: "Phen mange, khatar hin tut ajsi zor? Soha tut kempel te phandel, hoj te prelen upral tute e zor?"

⁷ "Te man phandena le eфта neve lukoskere špargenca, so mek na šučile avri, ačhava bi e zor a avava ajsi sar sako aver," phendä lake o Samson.

⁸ O Filištínike kraľa lake ande eфта neve, cinde lukoskere špargi a oj les lenca sphandľa. ⁹ Andre lakero kher pes gele te garuvel vajkeci murša. Akor zvičinda: "Samson, o Filištinci džan pre tu!" Ov androda rozčhinda o špargi avke, sar e jag rozčhinel o thav. Avke mek na avle pre oda, andre soste hiňi garuđi leskeri zor.

¹⁰ Akor e Delila phendä le Samsonoske: "Tu manca kerehas ča pheras a na phendäl mange o čačipen. Akana mange phen, soha pes del tut te sphandel!"

† Oda hin: O kokaluno sankakero brehos. †† Oda hin: O prameňis le vičibnaskero.

¹¹ "Te man sphandena neve šelenca, savenca pes mek nič na kerelas, ačhava bi e zor a avava ajso sar sako aver," phendá lake.

¹² Avke e Delila ilá neve šele a sphandlá les lenca, medik užarenas o murša andro kher. Palís zvičindá: "Samson, o Filištínci džan pre tu!" Ale ov rozčhingerdá o šele le musendar sar thava.

¹³ E Delila phendá le Samsonoske: "Dži akana kerehas manca ča pheras a na phenehas mange avri o čačipen. Phen mange, sar tut šaj sphandav?"

"Te eфта vrkoči mire balendar prichudeha (zakhuveha) prekal o špargi andro strojos, pre savo pes keren o pochtana, a zachudeha len le kaštune ciloreha, akor našavava e zor a avava sar sako aver," phendá lake.

¹⁴ Sar o Samson zasuča, prethoda leskere vrkoči andro strojos a prichudlá le kolíkoha. Palís zvičindá pre leste: "Samson, o Filištínci džan pre tu!" Ov pes prekerdá andral o soviben a cirdña avri o ciloro the o strojos leskere špargenca.

¹⁵ E Delila leske phendá: "Sar tu šaj phenes, hoj man kames, te tiro jilo nane phundrado prekal ma? Imar trival manca kerehas ča pheras a na phendal mange avri, so tut kerel zorales!" ¹⁶ Sar pre leste kale lavenca ispidelas džives pre dživeseste, imar na birinelas oda aňi te zlidžal.

¹⁷ Akor o Samson lake phendá avri o čačipen: "Mire balendar pes mek e čhuri na chudlá, bo mek sigeder, sar uliřom, somas dino prekal o Del sar Nazarejos. Ale te man vareko ostrihindahas, omuklahas man imar e zor a ulomas ajso sar the aver."

¹⁸ E Delila dikhla, hoj akana lake phundrađa peskero jilo a le Filištínike vodcenge diňa te phenel: "Aven akana, bo imar mange phenela avri savoro." O Filištínike vodci avle a ande peha the o rup. ¹⁹ Oj kerđa avke, hoj te zasovel pre lakere čanga, palís vičindá jekhe muršes, savo leske ostrihindá o eфта vrkoči le šerestar. Kaleha oj les thođa tele a e zor les omukla. ²⁰ Akor zvičindá: "Samson, o Filištínci džan pre tu!" Sar pes prekerđa, phendá peske: "Avke sar furt, the akana len pal ma razinava tele." Ale ov na džanelas, hoj lestar o RAJ odgeľa. ²¹ O Filištínci les chudle, ile leske avri o jakha a ligende les andre Gaza. Ode les phandle le bronzune kliginenca a andre bertena muřinelas te erřinel o điv. ²² Ale o bala, so leske ostrihinde, leske chudle pale te barol.

O Samson merel

²³ O Filištínike vodci pes zgele, hoj te anen bari obeta peskere devleske le Dagonoske a kerde bari hoscina. Phenenas:

"Amaro del amenge diňa amare řeprijateľis le Samson andro vasta."

²⁴ Sar dikhle o manuša le Samson, lařarenas peskere devles a phenenas:

"Amaro del amenge diňa andro vasta amare řeprijateľis, savo zňičindá amari phuv a murdarđa amare manuřen."

²⁵ Sar igen radisařonas zvičinde: "Anen le Samson, hoj les avri te asas." Avke ande le Samson andral e bertena a ov len muřinelas te zabavinel.

Sar les ačhade mařkar o slupi, ²⁶ o Samson phendá le terne muršeske, savo les chudelas le vastestar: "Domuk mange, hoj man te chudav le slupendar, pre save ačhel o kher, a te zmukav man pre lende." ²⁷ Andro kher sas pherdo murša the džuvlija a sas ode savore Filištínike vodci. Pre strecha sas ajse 3 000 murša the džuvlija, save dikhenas pro Samson, sar len zabavinel.

²⁸ Akor o Samson vičinelas ko RAJ a mangelas les: "Ó, Adonaj, RAJEJA! Leper tuke pre ma a mek jekhvar man de ajsi zor, so man sas, ó, Devla, hoj te visarav pale le Filištínenge mek jekhvar vař soduj mire jakha." ²⁹ Androda o Samson zorales chudla soduj mařkarune slupi, pre save ačhelas o kher, jekh le čače vasteha the dujto slupos balogne (lave) vasteha a zmukla pes pre lende zoraha. ³⁰ Phendá: "Mi merav jekhetane le Filištínenca!" Čaľa zoraha ispidelas a o kher peľa pro vodci the pre savore manuša, save sas andre. Pař peskero meriben murdarđa buter sar olen, save murdarđa, sar mek dživelas.

³¹ Leskere phrala savora dadeskera famelijaha džanas tele a ile leskero řelos pale khere. Parunde les andro hrobos leskero dadeskero Manoachoskero, mařkar e Cora the o Eřtaol. O Samson řidžalas o Izrael biř (20) berř.

O Michah peske kerel devlores

17 Pro brehi Efrajim dživelas jekh murř, savo pes vičinelas Michah. ² Ov phendá peskera dake: "Ola ezeros the řel (1 100) rupune, so tuke sas čorde a prekal save phendal avri o prekořiben, a oda the anglal mande, hine ke ma, bo me len tuke ilom."

E daj leske odphendá: "Čhavo miro, mi požeňinel tut o RAJ!"

³ Ov palís andá pale la dake ola ezeros the řel (1 100) rupune a oj leske phendá: "Kala rupune odthovav prekal o RAJ, hoj pes lendar te kerel mire čhaske avričhingerđi modla the ruđuňi modla. Kaleha tuke dava pale kala rupune." ⁴ Avke ov diňa pale o rupune peskera dake. Androda ilá leskeri daj duj řel (200) rupune a diňa len le zlatňikoske. Ov lendar kerđa avričhingerđi modla the ruđuňi modla, so palís sas andre Michoskero kher.

⁵ O Michah kerđa andro peskero kher sentno than. Kerđa peske efodos the kherutune devloren a ačhada jekhe peskere čhavendar vař o rařaj.

⁶ Andre oda časos andro Izrael na sas kralis. Sako kerelas oda, so gondolinelas, hoj hino lačo.

⁷ Sas jekh terno čhavo andral o Judsko Betlehem, andral o kmeňos Juda, savo sas Levitas a beřelas ode sar cudzincos. ⁸ Oda murř geľa het andral o Betlehem, hoj te rodel aver than, kaj te beřel. Le dromeha avla ko brehi Efrajim ko Michoskero kher.

⁹ O Michah lestar phučla: "Khatar aves?"

"Me som Levitas andral o Judsko Betlehem," odphendá, "a rodav varesavo than, kaj ačhava te

bešel.”¹⁰⁻¹¹ O Michah leske phenda: “Ačh ke mande a av mange dad the rašaj. Sako berš tut dava deš rupune, chaben the gada.” O terno Levitas priačhila pre oda. Ov bešelas ode a ačhila le Michoske sar leskero čhavo. ¹² O Michah les ačhada vaš rašaj a ov ačhila te dživel andre leskero kher. ¹³ O Michah peske phenda: “Akana čačes džanav, hoj o RAJ ela ke ma lačo, bo o Levitas mange ačhila rašaske.”

O kmeños Dan len le Michoskere rašas the o modli

18 Andre oda časos mek le Izraeliten na sas kralis. Akor o kmeños Dan rodenas prekal peste dedično phuv, kaj te bešen. Bo dži akor mek na chudle maškar o kmeñi Izrael phuv vaš o dedictvos. ² Avke o kmeños Dan bičhade peskere fajtendar pandž zorale muršen andral o fori Cora the Eštaol, hoj te predikhen e phuv. Phende lenge: “Džan te predikhel odi phuv.” Sar avle pro brehi Efrajim dži ko Michoskero kher, ačhile ode te presovel. ³ Sar sas paš o kher le Michoskero, sprindžarde pal o vakeriben, hoj o terno Levitas na sas odarik. Gele ke leste a phučle: “Ko tut ade anda? So ade tu keres? So ade rodes?” ⁴ Ov lenge odphenda: “Kavke pes manca o Michah dothoda, hoj leske te služinav sar o rašaj.” ⁵ Palis leske phende: “Phuč akor le Devlestar, hoj pes te dodžanas, či amaro drom ela bachtalo.” ⁶ “Džan andro smirom!” phenda lenge o rašaj. “O RAJ imar džal anglal tumende pro drom, pal savo džan.” ⁷ Avke ola pandž murša džanas dureder a dogele andro Lajiš. Dikhle, hoj o manuša ode dživen andro smirom the bi e dar avke sar o Sidončana. Njiko ode na sas andro trapišagos aňi andro čoripen, bešen dur le Sidončanendar a na sas len nič avre manušenca. ⁸ Sar pes visarde pale andre Cora the o Eštaol, lengere phrala lendar phučle: “So ode dikhlan?” ⁹ “Aven, džas pre lende!” odphende. “Dikhlam, hoj odi phuv hiňi igen lači. Pre soste mek užaren? Ma zlikeren tumen, aven džas la te zale!” ¹⁰ Sar ode džana, arakhena ode manušen, save na džanen pal nisoste. E phuv hiňi igen bari a o Del tumenge la dela andro vasta. Pre odi phuv hin savoro, so le manušeske kempel.” ¹¹ Avke šov šel (600) Daniti le zbrañenca gele andral e Cora the o Eštaol pro mariben. ¹² Sar džanas upre, kerde peske taboris paš o Kirjat-Jearim andre Judsko. Vašoda oda than, so hino pro zapados le Kirjat-Jearimostar, pes dži adadžives vičinel Taboris le Danengero. ¹³ Palis odarik džanas dureder prekal o brehi le Efrajimoscere a doavle ko Michoskero kher. ¹⁴ Akor prevakerde ola pandž murša, save gele te predikhel e phuv paš o Lajiš. Phende peskere phralenge: “Džanen tumen olestar, hoj andre kala khera hin o efodos the o kherutune devlora, e avričhingerđi modla the e ruđuni modla? Akana gondolinen pal oda, so kerena.” ¹⁵ Avke avle ko kher le terne Levitaskero paš o kher le Michoskero a pozdravinde les. ¹⁶ Androda šov šel (600) Daniti pririchtimen pro mariben, ačhenas angle brana. ¹⁷ Ola pandž murša, save sas te predikhel e phuv, gele andro kher a

ile e avričhingerđi modla, o efodos, le kherutune devlora the e ruđuni modla. O rašaj ačhelas angle brana le šov šel (600) vizbrojimen muršenca.

¹⁸ Sar o murša gele andre le Michoskero kher a ile odarik e avričhingerđi modla, o efodos, le kherutune devlora the e ruđuni modla, o rašaj lendar phučla: “S'oda tumen keren?”

¹⁹ Odphende leske: “Čhit, phand andre o muj! Av amenca! Av tu amenge dad the rašaj. So hin prekal tu feder? Te el rašaj andro kher jekhe muršeskero, abo te el rašaj prekal jekh calo kmeños le Izraeloskero?”

²⁰ Le rašaske oda sas pre dzeka. Iľa o efodos, kherutune devlora the e avričhingerđi modla a geľa jekhetane lenca. ²¹ Visarde pes a džanas dureder. Mukle te džal anglal le romňijen the le čhaven le barvalipnaha the le stadenca.

²² Sar imar sas dur le Michoskere kherestar, sas zvičimen o murša, save bešenas pašes paš o Michah a dochudle le Daniten. ²³ Sar pre lende vičinenas, o Daniti pes visarde a phučle le Michostar: “So pes tuha ačhila, hoj tuke vičindaľ tire muršen?”

²⁴ O Michah lenge phenda: “Iľan mire devlen, so mange kerdom, the mire rašas. Tumen džan het a so ačhel mange? Sar šaj phučen, so pes manca ačhila?”

²⁵ O Daniti leske phende: “Na kamas tut imar buter te šunel, bo varesave murša pes šaj choľaren a chučena pre tumende. Tu kames, hoj tut te murdaren the caľa tira famelija?” ²⁶ Avke o Daniti džanas peskere dromeha. Sar dikhľa o Michah, hoj hine zoraleder sar ov, visarda pes pale khere.

²⁷ Ale on ile peha oda, so peske o Michah kerđa, the leskere rašas a džanas pro mariben pro foros Lajiš, pro smiromoscere manuša, save pal nisoste na džanenas. O Daniti murdarkerde len avri a zlabarde oda foros.

²⁸ Njiko len na avľa te zachrañinel, bo oda foros sas dur le Sidonostar a na sas len nič avre manušenca. Oda foros sas pašes andre dolina Bet-Rechob.

Palis pale ačhade o foros a bešenas ode. ²⁹ Le foroske dine nav Dan, pal peskero prapapus Dan, savo sas o čhavo le Izraeloskero. Angloda pes oda foros vičinelas Lajiš. ³⁰ O Daniti peske ode ačhade odi avričhingerđi modla. O Jonatan the leskere čhave sas rašaja andro kmeños Dan, medik odarik le manušen na zaile. O Jonatan sas o čhavo le Geršomoskero, saveske sas o dad o Mojžiš. ³¹ Likerenas ode e modla, so kerđa o Michah, medik ačhelas le Devleskero Stanos andro Šilo.

O Levitas the leskeri romňi-služka

19 Andre jekh časos, sar andro Izrael na sas kralis, jekh Levitas bešelas pro durale brehi andro Efrajim. Iľa peske andral o Judsko Betlehem mek jekha romňi-služobňička. ² Ale oj jekhvar les omukľa, bo chalas pre leste choľi a geľa pale ke peskero dad andro Judsko Betlehem. Zľikerđa pes ode ajse štar čhon. ³ Palis lakero rom geľa pal late, hoj la te prevakerde a te anel la pale khere. Iľa peha le sluhas the duje somaren. Sar les oj ľigenda andro kher peskere

dadeskero a sar les dikhľa lakero dad, priiľa les radišagoha. ⁴ O sastro les zlíkerelas, hoj te ačhel ode trin džives. Avke ačhile te presovel a chanas the pijenas.

⁵ Pro štarto džives o Levitas uštíľa, sar vidňisalíľa, hoj imar te džal khere, ale lakero dad les prevakerelas: "Ma džan ňikhaj, ešeb (peršo) chan vareso, hoj tumen te zoraľaren, a palís šaj džan." ⁶ Avke ačhile ode a jekhetane peske bešenas a chanas the pijenas. O dad ola džuvľakero leske phendá: "Mangav tut, ačh ade prekal e rat a mi radisaľol tiro jilo!" ⁷ Palís, sar uštíľa, hoj te džal het, o sastro les igen mangelas, hoj mek te ačhel, a ov ačhíľa. ⁸ Pro pandžto džives sig tosara kamelas imar te džal pro drom. No leskero sastro pale pre leste ispidelas a phendá: "Ešeb tut zoraľar, ačhen ade, medik na ela o dilos!" Ačhile a chanas jekhetane.

⁹ Sar o Levitas palís uštíľa, hoj te džal pro drom peskera romňaha-služobňičkaha, leskero sastro les pale prevakerelas: "Dikh, maj imar zaračol. Presoven ade a radisaľon! Tajsa sig tosara uštěna a džana pro drom andre peskero stanos." ¹⁰ Ale o Levitas imar na kamelas te presovel ode a avke thođa o sedli pre peskere duj somara a geľa peskera romňaha-služobňičkaha the le sluhaha pro drom. Avľa anglo Jebus, so hin adadžives Jeruzalem.

¹¹ Sar sas paš o Jebus a sas imar igen nasig, o sluhas phendá leske: "Av, mangav tut, džas andre kada Jebusejiko foros a ačas ode te presovel."

¹² Ale leskero raj leske phendá: "Na džaha andre kada foros maškar o manuša, save nane Izraeliti, ale džaha dží andre Gibeja."

¹³ "Av, džas," phendá le sluhaske, "dikhaha, či pes del te džal ke Gibeja abo ke Rama a presovas andre jekh kale forendar." ¹⁴ Avke gele dureder a o kham imar zadžalas, sar imar sas paš e Gibeja andre phuv le Benjaminengeri. ¹⁵ Ačhile te presovel andre Gibeja. Sar ode o Levitas avľa, ačhíľa pro foroskero plácos, bo ňiko len na íľa ke peste te presovel.

¹⁶ Odi rat avelas jekh phuro murš andral e buči pal e maľa, so sas andral o brehi le Efrajimoskere, a bešelas andre Gibeja maškar o Benjamini. ¹⁷ Sar pes obdikhľa, dikhľa ode pro plácos ole muršes. O phuro murš lestar phučľa: "Kaj džas? Khatar aves?"

¹⁸ Ov odphendá: "Amen avas andral o Judsko Betlehem a džas pale khere ko palune brehi andro Efrajim. Džavas andro Betlehem a akanake džav khere, ale ňiko man na íľa andre peskero kher. ¹⁹ Hin man phusa the chaben prekal amare somara a maro the mol prekal amende. Hin man savoro, so mange kempel."

²⁰ O phuro murš phendá: "Smirom tuke. Me tut dava savoro, so tuke kempel. Ča ma ačh kade avri prekal e rat pro plácos." ²¹ Avke les lígendá andre peskero kher a diňa chaben prekal leskere somara. Omorde peske o pindre, chanas the pijenas.

²² Sar lenge imar sas mištes, jekhwareste varesave nalače murša andral oda foros pes rozačhade pašal calo kher, chudle te durkinel pro vudar a vičinenas pro

phuro: "An avri ole muršes, savo avľa andre tiro kher. Kamas leha te pašľol!"

²³ Androda o phuro murš avľa avri a dovakerelas lenge: "Na, phralale mire! Ma keren nič nalačo kale muršeske, savo avľa andre miro kher. Ma keren kajso džungipen! ²⁴ Dikhen, kade hiňi miri čhaj, savi hiňi pačivali, the kale muršeskeri romňi-služka. Anava tumenge len akana avri. Šaj lenca pašľon a keren lenca, so ča kamen, ale kale muršeha ma keren kajso džungipen!" ²⁵ Ale ola murša les na kamenas aňi te šunel. Avke o Levitas íľa peskera romňaha-služobňička a lígendá la ke lende avri. On laha cali rat pašľuvkerenas a ko tosara la premukle.

²⁶ Palís odi džuvľi avľa pale ke oda kher, kaj ačhíľa lakero rom. Peľa anglal paš o vudar a pašľolas ode, medik na vidňisalíľa. ²⁷ Lakero rom uštíľa tosara a sar phundraďa o vudar, hoj te džal het, dikhľa peskera romňaha-služobňička, sar pašľol le vastenca pro vudar. ²⁸ Phendá lake: "Uští, džas!" Ale na odphendá leske. Avke la thođa pro somaris a džalas khere.

²⁹ Sar avľa khere, íľa e čhuri, chudľa peskera romňaha-služobňička, rozčhingerďa lakero telos pro dešuduj (12) kotora a rozbičhadá len pal calo Izrael. ³⁰ Dojekh, ko ada dikhľa, phendá: "Nič ajsa pes mek na ačhíľa, aňi ňiko na dikhľa akorestar, so o Izraeliti gele avri andral o Egipt, dží adadžives! Gondolinen pal ada! So kempel te kerel?"

O mariben le Benjaminenca

20 Palís pes savore Izraeliti le Danostar dží ke Beer-šeba the andral o Gilead zgele sar jekh anglo RAJ andre Micpa. ² Zgele pes savore Devleskere manuša – o vodci andral savore Izraelike kmeňi. Sas ode 400 000 murša le šablěna. ³ O Benjamini pes pal ada došunde, hoj o Izraeliti gele upre andre Micpa.

O Izraeliti phučenas: "Phenen amenge, sar pes ačhíľa kada nalačhipen?"

⁴ Pre ada o Levitas, o rom ola murdardá džuvľakero, odphendá: "Peskera romňaha-služobňičkaha avľom te presovel andre Benjaminiko foros Gibeja. ⁵ Ale o Gibejana avle rači pre mande a rozačhade pes pašal oda kher, andre savo somas, bo kamenas man te murdarel. Našilu pašľuvkerenas mira romňaha-služobňičkaha avke, hoj muľa. ⁶ Avke íľom la a rozčhindom la pro kotora, so rozbičhadom pal calo Izrael, bo kerde nalačhipen the baro džungipen andro Izrael. ⁷ Akana, tumen savore manuša le Izraeloskere, gondolinen pal ada a phenen, so kerena!"

⁸ Savore manuša sas andre oda jekh a phende: "Ňiko amendar na džala andre peskero stanos, aňi ňiko khere. ⁹ Kada hin oda, so lenca keraha: Prekal o losos pes dodžanaha, sar džaha pre lende. ¹⁰ Andral dojekh Izraeliko kmeňos laha avri deše muršen le šelendar, šel le ezerendar the ezeros le deše ezerendar, hoj te anen o chaben prekal o manuša, save avle te visarel pale le Benjaminenge andral e Geba vaš oda džungipen, so kerde andro Izrael."

¹¹ Palis pes savore Izraeliti zgele sar jekh paš o foros. ¹² O kmeñi andral o Izrael bičhade le muršen pal cali Benjaminiko phuv, hoj te phenen: "Oda savo džungipen tumen kerđan?! ¹³ Akana amenge den avri le nalačhe muršen andral e Gibeja, save oda kerde. Murdaraha len a avke odlaha oda nalačhipen andral o Izrael."

Ale o Benjamini na kamenas te šunel oda, so phende lengere phrala, o Izraeliti. ¹⁴ Zgele pes andral peskere fori andre Gibeja pro mariben pro Izraeliti. ¹⁵ Savore Benjamini, save pes ode zgele, sas 26 000 murša le šablénca. The mek efa šel (700) avrikidle murša, save bešenas andre Gibeja. ¹⁶ Maškar ola savore sas efa šel (700) avrikidle murša, save sas bałogara (lavaka), a dojekh džanelas igen mištes te čhivkerel o bara andral o prakos.

¹⁷ Le Izrael sas 400 000 murša le šablénca, avrisikade pro mariben.

¹⁸ O Izraeliti džanas andro Betel te phučel le Devlestar: "Ko amendar ešeb (peršo) majinel te džal pro mariben pro Benjamini?"

O RAJ lenge odphenda: "Ešeb džala o Juda."

¹⁹ Avke o Izraeliti tosara uštile a kerde peske taboris pašes paš e Gibeja. ²⁰ Sar o Izraeliti gele pro mariben pro Benjamini, rozačhade pes pre lende paš e Gibeja.

²¹ Ale o Benjamini gele avri le forostar a andre oda džives murdarde 22 000 Izraeliten. ²²⁻²³ O Izraeliti džanas andro Betel a dži rači rovenas anglo RAJ. Palis phučle le RAJESTAR: "Majinas te džal pale pro mariben pre amare phrala pro Benjamini?"

O RAJ lenge phenda: "Džan, maren tumen lenca!"

Avke o Izraeliti chudle pale zor a pale pes rozačhade pro mariben pre oda than, kaj pes rozačhade ešebno džives. ²⁴ Avke o Izraeliti gele pro dujto džives pro mariben le Benjaminenca, ²⁵ ale o Benjamini gele pale pro Izraeliti a murdarde lendar mek 18 000 muršen, savendar dojekh pes džanelas te marel la šablaha.

²⁶ Palis savore Izraeliti džanas upre andro Betel a ode rovenas a bešenas anglo RAJ. Calo džives dži rači poscinenas a ande le RAJESKE labarde the smiro-moskere obeti. ²⁷ Palis o Izraeliti phučenas le RAJESTAR, so majinen te kerel. Andre oda časos sas ode le Devleskeri Zmluvakeri Archa, ²⁸ paš savi o Pinchas kerelas e rašajiko buči. Leskero dad sas o Eleazar, savo sas o čhavo le Aronoskero. O Izraeliti phučle: "Majinas pes te marel dureder amare phralenca le Benjaminenca, abo majinas te preačhel?"

O RAJ odphenda: "Džan, maren pes, bo tajsja tumenge len dava andro vasta."

²⁹ Avke o Izraeliti rozačhade garude muršen pašal e Gibeja. ³⁰ Pro trito džives džanas pro mariben pro Benjamini a avke sar angloda pes rozačhade pro mariben pre Gibeja. ³¹ O Benjamini gele pre lende a o Izraeliti denašenat het a kaleha len dochudle dur le forostar. Avke sar angloda, the akana chudle te murdarkerel le Izraeliten. Murdarde lendar ajse tranda (30) muršen pre mała the pro droma, so džan jekh andro Betel the dujto andre Gibeja. ³² O Benjamini peske phende: "The

akana on prekhelena (prehrajnena); avke sar angloda." Ale o Izraeliti pes dothode: "Denašas lendar a kaleha len dochudaha dur le forostar!"

³³ Sar savore Izraeliti omukle peskere thana a pale pes rozačhade paš o Baal-Tamar, ola aver Izraeliti, save sas garude, chučile avri a džanas pro mariben le zapadostar andre Geba. ³⁴ Pre Gibeja avle 10 000 murša, save sas avrikidle andral calo Izrael. O mariben sas ajso baro, hoj o Benjamini aňi na sprindžarde, sar pašes sas lengeri bibach. ³⁵ Avke o RAJ diňa le Izraelitenge te űnerinel (zviťazinel) upral o Benjamini a oda džives murdarde 25 100 Benjaminen, save pes džanenas te marel la šablaha. ³⁶ Avke o Benjamini dikhle, hoj prekhelde.

Sar o Izraeliti űnerinde

Angloda o Izraeliti oddžanas le Benjaminendar, bo pes zmukle pro murša, save sas garude paš e Gibeja.

³⁷ Akor o garude murša denašenat pro mariben andre Gibeja a le šablénca murdarkerde savoren, save sas andro foros. ³⁸ O Izraeliti pes dothode ole muršenca, hoj o thuv andral o foros ela lenge sar znameňje, ³⁹ hoj te visaren pes pale andro mariben. Angloda imar sigeder o Benjamini murdarde lendar ajse tranda (30) muršen a phende peske: "Murdarkeras len avke sar ešebnovar (peršovar)." ⁴⁰ Akor chudla andral o foros te džal upre o thuv. Sar pes o Benjamini obdikhle palal, dikhle, hoj andral calo foros džalas o thuv dži ko űebos. ⁴¹ Androda o Izraeliti pes visarde pale pro mariben. O Benjamini predarandile, bo dikhle, sar pašes hin lengeri bibach. ⁴² Vašoda pes visarde a denašenat le Izraelitendar pre pušta, ale le maribnastar na denašle, bo ola aver murša avenas avri andral o foros a murdarkerde len. ⁴³ Džanas pre lende pal dojekh sera a na preačhenas te džal pal lende dži pro vichodos la Gibejatar. ⁴⁴ Avke mule 18 000 zorale murša andral o kmeňos Benjamin. ⁴⁵ Sar ola aver Benjamini pes visarde a denašenat pre pušta ke skala Rimmon, o Izraeliti murdarde lendar 5 000 pašal o drom. Džanas dureder pal lende dži ko Gidom a murdarde mek 2 000 muršen.

⁴⁶ Oda džives murdarde 25 000 Benjaminen, save sas zorale andro mariben le šablénca. ⁴⁷ Ale 600 murša pes visarde a denašle pre pušta pre skala Rimmon a ode ačhile štar čhon. ⁴⁸ O Izraeliti pes pale visarde andre Benjaminiko phuv a murdarkerde ode savore muršen, džuvliven, čhaven the le džvirinen. Savore fori, prekal save džanas, zlabarde.

O romňija prekal o Benjamini

21 O Izraeliti ile angloda vera andre Micpa: "űiko amendar na dela peskera čha romňake le Benjaminenge." ² O manuša avle andro Betel a bešenat ode le zorale rovibnaha anglo Del dži rači. ³ Phenenas: "Ó, RAJEJA, Devla le Izraeloskero, soske pes andro Izrael ačhiľa oda, hoj adadžives jekh tire kmeňostar našliľa?"

⁴ Pre aver džives sig tosara o Izraeliti ode ačhade oltaris a ande labarde obeti the smiromoskere obeti.

⁵ Palis phučenar: "Ko le Izraelike kmeňendar na avľa, sar pes zgelam anglo RAJ? Bo diňam bari vera upral savore, ko na avela anglo RAJ andre Micpa, hoj mušinel te merel!"

⁶ Le Izraelitenge avľa pharo pre peskere phrala pro Benjamini a vakerenas: "Adadžives o Izrael našada jekh peskero kmeňos. ⁷ So kampil te kerel, hoj te arakhas romňijen prekal o Benjamini, save mek ačhile? Bo diňam vera le RAJES, hoj na daha lenge peskere čhagen romňenge." ⁸ Palis phučle: "Ko le Izraelike kmeňendar na avľa anglo RAJ andre Micpa?" A avle pre oda, hoj ňiko andral o Jabeš-Gilead na avľa andro taboris, kaj sas zgele. ⁹ Bo sar zgende le manušen, na sas ode ňiko andral o Jabeš-Gilead. ¹⁰ Vašoda o Izraeliti bičhade 12 000 zorale muršen a phende lenge: "Džan, murdaren savoren andro Jabeš-Gilead, the le džuvlijen le čhavenca! ¹¹ Kada kerena: Murdaren dojekhe muršes the dojekha džuvľa, savi imar pašlifa le muršeha." ¹² Arakhle maškar lende štar šel (400) terne pačivale čhagen a ligende len andro taboris Šilo andre phuv Kanaan.

¹³ Palis savore Izraeliti bičhade le muršen, hoj te vakeren le Benjaminenca, save sas pre skala Rimmon, hoj te en lenca andro smirom. ¹⁴ Avke o Benjamini pes visarde pale a o Izraeliti len dine ole džuvlijen andral o Jabeš-Gilead, saven mukle te dživel. Ale na sas lendar dos prekal savore.

¹⁵ Le manušenge sas pharo pro Benjamini, bo o RAJ cirdña avri jekh kmeňos le Izraelike kmeňendar. ¹⁶ O

Izraelike vodci phende: "So kereha ole avrenca, hoj sakones te el džuvľi, te imar na ačhila ňisavi džuvľi maškar o Benjamini?" ¹⁷ Phende mek: "Našti našavas jekh le dešuduje (12) Izraelike kmeňendar. Mušinas te zachrañinel o kmeňos Benjamin, hoj te na merel avri! ¹⁸ Ale našti lenge das amare čhagen vaš o romňija, bo diňam bari vera, hoj dojekh, ko dela peskera čha vaš e romňi le Benjaminenge, ela prekošlo!"

¹⁹ Palis o Izraelike vodci gondolinenas a phende: "Sako berš hin le RAJESKERO inepos andro Šilo." O Šilo hin pro severos le Betelostar, pro juhos le Lebonatar the pro vichodos le dromestar, so džal upre andral o Betel andro Šichem. ²⁰ Phende le Benjaminenge: "Džan a garuven tumen andro viñici. ²¹ Sar dikhena le džuvľen andral o Šilo, sar aven avri te khelel, džan avri andral o viñici a sako peske mi chudel džuvľa ole Šiloskere čhajendar a džan andre Benjamini phuv. ²² Sar avena lengere dada the lengere phrala pes tumenca te veseke dinel, phenen lenge: 'Muken len amenge, bo ňiko amendar na chudľa romňa andro mariben. Vaš oda, hoj tumen len amenge na diňan, na avena prekošle.' "

²³ O Benjamini avke the kerde. Dojekh peske chudľa džuvľa olendar, save khelenas, a ligenda la andre peskeri phuv. Chudle pale te ačhavel o fori a bešenas ode. ²⁴ Palis o Izraeliti odgele odarik a visarde pes pale andre peskeri phuv ke peskere kmeňi the fajti.

²⁵ Andre oda časos na sas kralis andro Izrael a sako kerelas pal peskeri dzeka.

RUT

Le Elimelechoseri famelija andro Moab

1 Andre oda časos, sar lidžanas o sudci e Judsko phuv, avľa bari bokh. Akor jekh manuš iľa peskera romňa the peskere duje čhaven a geľa het andral o Betlehem te bešel andre Moabiko phuv sar cudzincos ² a ode ačhiľa te dživel. Ov pes vičinelas Elimelech a sas andral e fajta Efrat andral o Judsko foros Betlehem. Leskeri romňi pes vičinelas Noemi a leskere duj čhave pes vičinenas Machlon the Kiljon.

³ Palis o Elimelech muľa a leskeri romňi e Noemi ačhiľa korkori peskere duje čhavenca. ⁴ On peske ile romňen Moabčanken la Orpa the la Rut. Paloda ode bešenas vaj deš berš ⁵ a palis sodujdžene o Machlon the o Kiljon mule a e Noemi ačhiľa korkori bi o čhave the bi o rom.

E Rut the e Noemi džan pale andro Betlehem

⁶ Akor e Noemi peske phendľa, hoj džala het peskere borijenca andral e Moabiko phuv, bo pes došundľa, hoj o RAJ pes pale visardľa ke peskere manuša a diňa len maro. ⁷ Avke peskere duje borijenca odgeľa andral e Moabiko phuv, kaj bešenas, a džanas pale le dromeha andre Judsko phuv.

⁸ Palis phendľa e Noemi peskere duje borijenge: "Džan soduj džeňa pale khere ke peskere daja. Mi el o RAJ jileskero ke tumende avke, sar tumen sanas ke ma the ke tumare roma, save imar mule. ⁹ Mi del tumenge o RAJ, hoj peske te arakhen romen, a mi el tumenge mištes andre ola khera!"

Ale sar len čumidľa, chudle igen zorales te rovel. ¹⁰ On phende lake: "Na! Amen džas tuha ke tiro narodos!"

¹¹ Ale e Noemi phendľa: "Džan pale, čhajale mire! Soske manca avena? Gondolinen tumenge, hoj mek man šaj el buter čhave, save ena tumare roma? ¹² Džan pale, čhajale mire, me imar som igen phuri. Našti imar dživav le romeha! A te oda ulahas avke, hoj gelomas pale romeste mek kadi rat a ulahas man čhave, ¹³ či tumen užardanas, medik barilehas avri? Soske pes majindanas te zlíkerel, hoj te na džan pale romeste? Na, čhajale mire! Miri dukh hin bareder sar tumari, bo o RAJ pre ma domukel baro pharipen."

¹⁴ No on chudle pale te rovel. Palis e Orpa čumidľa la sasa a visardľa pes pale, ale e Rut ačhiľa paš late.

¹⁵ Akor e Noemi phendľa: "Dikh, e Orpa geľa pale ke peskere manuša the ke peskere devľa. Dža the tu pal late!"

¹⁶ Ale e Rut phendľa: "Preač imar mange te vakereľ, hoj tut te omukav a te džav tutar het! Kaj tu džaha, ode the me džava, a kaj tu bešeha, ode the me bešava. Tiro narodos ela miro narodos a tiro Del ela the miro Del.

¹⁷ Ode, kaj mereha tu, kamav the me te merel a ode kamav te el parundi. Mi potrestinel man zorales o RAJ, te domukava, hoj man tutar te odlel vareso! Ča o meriben man tutar šaj odlel." ¹⁸ Sar dikhľa e Noemi, hoj e Rut laha the avke kamelas te džal, preačhiľa la te prevakerel.

¹⁹ Avke džanas jekhetane dži ko foros Betlehem. Sar dogele andro Betlehem, savore manuša andral oda foros avle ke lende a o džuvľa phučenas: "Hin oda čačes e Noemi?"

²⁰ "Ma vičinen man imar Noemi," phendľa lenge. "Vičinen man Mara †! Bo o Nekzoraleder Del kerďa miro dživipen dukhado. ²¹ Sar odgeľom adarik, sas man savoro, ale o RAJ man andľa pale a kerďa, hoj akana man nane nič. Soske man majindanas te vičinel Noemi ††, te o Nekzoraleder Del pes mandar visardľa a domukľa pre ma e bibach?"

²² Avke avľa pale e Noemi andral e Moabiko phuv peskera boraha, savi sas Moabčanka. Andro Betlehem doavle akor, sar pes majinda te skidel upre o jačmeňis.

E Rut pre Boaziskeri maľa

2 Sas jekh angluno murš, savo sas barvalo, a vičinelas pes Boaz. Ov sas famelija la Noemakere romeske, le Elimelechoske.

² E Moabčanka e Rut phendľa la Noemake: "Muk man te džal pre maľa te skidel upre o jačmeňis pal varekaste, savo mange domukela."

E Noemi lake odphendľa: "Dža, čhaje miri!" ³ Avke e Rut geľa pre maľa ke ola, ko kiden upre o klasi. No ačhiľa pes, hoj chudľa te kidel pre odi sera la maľakeri, so sas le Boaziskeri, savo sas e famelija le Elimelechoske.

⁴ Akor avľa o Boaz andral o Betlehem a phendľa peskere manušenge: "O RAJ tumenca!"

A on odphende: "O RAJ tut mi požehňinel!"

⁵ O Boaz pes phučľa olestar, savo lidžalas le robotňiken: "Kaskeri hiňi kadi terňi džuvľi?" ⁶ Oda sluhas odphendľa: "Kadi džuvľi hiňi andral e Moabiko phuv, odi, savi avľa pale la Noemaha. ⁷ Mangľa man, či šaj skidel upre o klasi, so ačhiľa pal o manuša, save kereñas pre maľa. Avľa sig tosara a akorestar ačhelas pro pindre a kerelas. Ča sikra peske bešľa tel e streškica."

† Oda hin: kirko †† Oda hin: bachtalı

⁸ Akor prevakerda o Boaz ke Rut: "Šun man, čhaje miri! Ma dža te kidel upre o klasi pre aver maľa, aňi ma dža adarik het. Ale liker tut mire služobničendar.

⁹ Dikh, pre savi maľa keren, a dža pal lende. Phendom mire sluhenge, hoj tuke te na kerel nič nalačo. Te aveha smedno, dža paš o džbani, so pherarde o sluhi, a pi ole paňestar."

¹⁰ Akor e Rut bandiľa le mujeha pre phuv anglal leste a phenda leske: "Soske sal ke ma ajso lačo a zaačes tut vaš ma, te me som cudzinka?"

¹¹ O Boaz odphenda: "Phende mange sa avri, so kerdal prekal tiri sasuj: Sar tuke muľa o rom a sar omuklal le dades the la da the e phuv tire narodoskeri a geľal maškar o manuša, saven mek na prindžarehas.

¹² Vaš oda, so tu kerdal, mi požehñinel tut o RAJ, o Del le Izraeloskero. Mi del tut baro počiñiben o RAJ, ke savo tut avľal te garuvel."

¹³ "Palikerav tuke, rajeja miro, hoj sal ke mande lačhejileskero," odphenda leske. "Hazdñal man upre oleha, hoj manca avke šukares vakeres, choc te na som aňi jekh tire služobničendar."

¹⁴ Sar pes imar džalas te chal, o Boaz lake phenda: "Av te chal amenca. Le peske o kotor le marestar a močnin les andre omačka." Palis peske bešľa paš leskere murša a o Boaz la diňa peko điv. Oj chalas, medik na čaliľa – a mek lake the ačiľa. ¹⁵ Palis uštiľa a geľa pale te kidel upre o klasi. O Boaz le sluhenge phenda: "Ma zaačhaven la, choc te kamela te kidel upre o klasi maškar o snopi. ¹⁶ A cirden o klasi pal o snopi a čhiven len pre phuv, hoj peske oj te kidel. Ma keren pre late vika."

¹⁷ E Rut kidelas o klasi dži rači a sar len žužarelas, kidľa upre vaj deš kili jačmeñis. ¹⁸ Akor geľa andro foros te sikavel la sasake, keci kidľa upre. Diňa la the le chabenestar, so lake ačiľa.

¹⁹ E sasuj latar phučľa: "Khatar kada kidľal? Pre savi maľa kerehas buči? Mi el bachtalo oda, ko sas ajso lačo ke tu!"

Avke e Rut phenda avri la sasake, ke kaste kerelas buči, a phenda: "Oda murš, ke savo keravas adadžives buči, pes vičinel Boaz."

²⁰ Akor e Noemi phenda peskera borake: "O RAJ, savo na bisterel aňi pro džide, aňi pro mule, mi požehñinel le Boaz!" A mek phenda: "Oda murš hino amenge famelija – ov hin jekh olendar, savo majinel te ačhel paš amende a te cinel avri amaro đedictvos."

²¹ Palis e Rut lake phenda: "O Boaz mange mek phenda, hoj šaj man likerav leskere sluhendar, medik na kidena upre savoro, so hin leskero."

²² E Noemi phenda peskera borake: "Mištes hin, čhaje miri, hoj šaj kides le služobničenca pre leskeri maľa, bo ode tuke ñiko na kerela nič nalačo."

²³ Avke pes e Rut likerelas paš o Boaziskere služobničiki, medik na preačhile te kidel upre o jačmeñis a palis the o žužodiv. Calo kada časos bešelas ke peskeri sasuj.

E Noemi del godi la Rut

3 Jekh džives lake phenda e sasuj Noemi: "Čhaje miri, imar hin časos, hoj tuke te rodav varesavo kher, hoj tuke te el mištes. ² Dikh, oda Boaz, saveskere čhajenca salas, hin amari famelija. O Boaz džal adi rat pre maľa te prekidel o jačmeñis. ³ Šun, so kereha akana! Thov (omor) tut a muk pre peste parfumos. Uri pre peste nekfeder gada a palis dža ode, kaj pes prekidel o jačmeñis paš e maľa. Ale le Boaziske tut na de te dikhel, medik na preačhela te chal the te pijel! ⁴ Sar ov džala te pašľol, dodžan tut, kaj pašľol. Dža a odučhar leske e lepeda pal o pindre a pašľuv peske paš leskere pindre. Ov tuke phenela, so palis te kerel."

⁵ E Rut lake odphenda: "Kerava savoro, so mange phendaľ." ⁶ Akor geľa pre maľa a kerdľa savoro, so lake phenda e sasuj Noemi.

⁷ Sar o Boaz chaľa the piľa, sas andre lači dzeka. Ode, kaj sas o jačmeñis pre kopa, geľa peske te pašľol. Akor e Rut cichones džalas ke leste, odučharďa e lepeda pal leskere pindre a pašľiľa peske ode. ⁸ Pal jepaš rat pes prekerďa o Boaz a sar pes obdikhľa, jekhvareste dikhľa te pašľol paš peskere pindre varesava džuvľa.

⁹ Ov latar phučľa: "Ko tu sal?"

"Me som tiri služka e Rut," odphenda leske. "Vašoda, hoj mange sal famelija, so mange hin igen pašes, a hin tut pravos man te cinel avri, mangav tut, ochrañin man †."

¹⁰ Ov lake odphenda: "Čhaje miri, o RAJ tut mi požehñinel. Akana presikadľal mek bareder pačiv sar odi pačiv, so presikadľal tira sasake. Bo na geľal ko terne čhave, aňi ko čore aňi ko barvale. ¹¹ Akana tut ma dara, čhaje miri! Kerava tuke savoro, so mangehas. Bo savore manuša, save bešen andre kada foros, džanen, hoj sal lači džuvľi. ¹² Hin oda čačipen, hoj som la famelijatar, so tut majinel te cinel avri. Ale mek hin aver manuš, savo hin pašeder famelija, sar som me. ¹³ Adi rat ačh te sovel ade. Tosara dikhaha, či oda manuš tut kamela te cinel avri. Te kamela, mi kerel oda. Ale te na kamela, dav tut lav, avke sar o RAJ dživel, hoj kerava oda me. Pašľuv tuke ade dži tosara."

¹⁴ Avke e Rut pašľolas paš leskere pindre dži tosara. Uštiľa tosara mek sigeder, sar vidñisaľolas, bo o Boaz phenda: "Ñiko pes te na dodžanel, hoj e džuvľi sas rači pre maľa."

¹⁵ A mek phenda: "An o plaštos, so hin pre tu, a liker les." Oj les likerelas a o Boaz andre čhida vaj biš (20) kili jačmeñis a thodľa lake pro dumo. Palis geľa pale andro foros.

¹⁶ Sar e Rut avľa ke sasuj, oj latar phučľa: "Sar tuke džal, čhaje miri?"

Avke lake sa vakerďa avri, so prekal late o Boaz kerďa, ¹⁷ a mek phenda: "Kala biš kili man diňa a phendaľ mange: 'Našti džas het ča avke ke tiri sasuj biľal ñisoste.' "

† E Hebrejiko čhib: Rozker pre ma o agor tire plaštostar.

¹⁸ Palis e Noemi phendā: “Čhaje miri, akana mek liker avri, medik tut na dodžaneha, sar oda savoro dop-erela. Bo na ela les smirom, medik na dokerela adadžives savoro.”

O Boaz cinel avri la Rut

4 O Boaz geľa andre brana le foroskeri a ode peske bešľa. Akor odarik predžalas oda murš, pal savo o Boaz lake vakerelas a sas leske famelija. Ov leske phendā: “Av kade a beš tuke.” Ov avľa a bešľa peske.

² Akor peske o Boaz kidňa avri deše foroskere vod-cendar a phendā lenge: “Bešen tumenge kade tele.” A on peske bešle. ³ Avke o Boaz phendā ole manuške andral e famelija: “Odi Noemi, savi avľa pale andral e Moabiko phuv, kamel te bikenel o kotor la maľakero, so sas le Elimelechoskeri. ⁴ Me mange phendom, hoj tu pal ada majines te džanel. Vašoda kalen švedken vičindom, hoj tuke te phenav, hoj te cines odi maľa. Te la kames te cinel, cin la, a te na, ta phen mange. Me džanav, hoj tut hin ešebno (peršo) pravos te cinel odi maľa. Me som pal tu.”

“Cinava!” phendā oda manuš.

⁵ Ale o Boaz leske phendā: “Mek oda džives, sar cineha odi maľa la Noematar, mušineha la Moabčanka la Rut peske te lel romňake pal o rom, savo lake muľa, a mušineha mek te likerel o nav pal lakero ešebno (peršo) rom. Sar tut laha ela čhavoro, o đedictvos pal lakero rom mušinela te ačhel leske.”

⁶ Akor oda manuš phendā: “Te hin oda avke, me la našti cinav prekal peste, bo na ela mištes mire đedictvoha. Tuke phenav: Te kames, cin la tu!”

⁷ Varekana kerenas avke andro Izrael, sar cinenas vaj čerinenas maškar peste vareso, hoj jekh murš čhivelas tele e sandalka a delas avreske. Oleha sikavenas, hoj pes dothode.

⁸ Avke oda manuš phendā le Boaziske: “Cin tuke la.” A čhida tele e sandalka.

⁹ Sar ov ada kerďa, o Boaz phendā ole švedkenge, save lidžanas o foros, the savore manušenge:

“Adadžives savore dikhľan, hoj la Noematar cindom savoro, so sas le Elimelechoskeri, le Kiljonoskeri the le Machlonoskeri. ¹⁰ Kaleha mange iľom la Moabčanka la Rut, savi sas e romňi le Machlonoskeri, hoj te likerav o nav the o đedictvos oleske, savo muľa, a hoj pes te na bisterel pre leskeri nav andre kada foros. Adadžives tumen san oleske savore švedki!”

¹¹ Androda o vodci the savore manuša andral o foros phende: “Amen sam o švedki. Mi del o RAJ, hoj odi romňi, savi džala andre tiro kher, te el ajsi sar e Rachel the e Leja, save dine le Izrael but čhaven! Te aves baro andre tiro kmeňos Efrat! Mi džanel sako pal tiro nav andro Betlehem! ¹² O čhave, save tut o RAJ dela kala romňatar, mi en sar o kmeňos le Percoskeri, savo sas o čhavo la Tamarakero the le Judaskero.”

¹³ Avke peske o Boaz iľa la Rut a oj ačhila leskeri romňi. Sar pes zgele, o RAJ diňa, hoj te ačhel khabňi a uľiľa (narodzindā pes) lake muršoro. ¹⁴ Akor o džuvľa phende la Noemake: “Mi el barardo o RAJ, savo tut adadžives diňa čhavo, savo tut dodikhela †! Mi del o RAJ, hoj leskeri nav pes furt te leperel andro Izrael. ¹⁵ Ov tuke obdžidarela o jilo a likerela tut dži ke tiro phuripen. Andā les pro svetos tiri bori, savi tut kamel. Oj tuke hiňi feder, sar te tut uľahas efa čhave!”

¹⁶ E Noemi igen kamelas le čhavo, iľa les pro vasta a bararelas les avri. ¹⁷ O džuvľa, save bešenas paš e Noemi, dine le čhavo, nav Obed a phenenas: “La Noemake uľiľa muršoro.” O Obed sas dad le Izajoske a o Izaj sas dad le Davidoske.

Le Percoskeri rodokmeňos

¹⁸ Kada hin le Percoskeri rodokmeňos: O Perc sas dad le Checronoske, ¹⁹ o Checron sas dad le Ramoske, o Ram le Amminadaboske, ²⁰ o Amminadab le Nachšonoske, o Nachšon le Salmonoske, ²¹ o Salmon le Boaziske, o Boaz le Obedoske, ²² o Obed le Izajoske a o Izaj sas dad le Davidoske.

† E Hebrejiko čhib: o vikupitelis

1. SAMUELOSKERO

O Elkanah the leskeri famelija

1 Sas jekh murš andral e fajta le Cufuskeri, savo pes vičinelas Elkanah. Ov bešelas andro foros Rama pro Efrajimoscere brehi. Leskero dad sas o Jerocham, savo sas o čhavo le Elihuskero, o Elihu sas čhavo le Tochuoskero a o Tochu sas čhavo le Efrajimoscero le Cufuskero. ² Le Elkanah sas duj romňija. Jekh pes vičinelas Anna the dujto Peninna. La Peninna sas čhave, ale la Anna na sas.

³ O Elkanah phirelas sako berš andral peskero foros andro Šilo te anel obeta a te lašarel le Nekzoraledere RAJES. O Chofni the o Pinchas, le Eliskere čhave, sas ode le RAJESKERE rašaja. ⁴ Kecivar džalas o Elkanah te obetinel, delas olestar kotor peskera romňa la Peninna the savore lakere čhaven the čhajen. ⁵ Ale la Anna delas bareder kotor, bo kamelas la, choc o RAJ kerđa, hoj la naští uľa čhave. ⁶ Vašoda, hoj o RAJ kerđa, hoj la naští uľa čhave, e Peninna la furt trapinelas a dukhave las le lavenca. ⁷ Kada kerelas e Peninna berš pre beršeste, kecivar e Anna džalas andre le RAJESKERO kher. Avke pre late džalas, hoj la anelas andro roviben a aňi na chalas. ⁸ Lakero rom latar phučľa: "Anno, soske roves a na chas? So sal ajsi smutno? Či na som tuke buter sar deš čhave?"

E Anna pes modľinel

⁹ Jekh džives, sar imar dochale a dopile, e Anna uštíla a geľa pes te modľinel. Sar o rašaj o Eli bešelas pre peskero stolkos paš o vudar andre RAJESKERO kher andro Šilo, ¹⁰ oj andre bari žala chudľa te rovel a modľinelas pes ko RAJ. ¹¹ Diňa kadi vera: "Ó, Nekzoraleder RAJEJA, dikh pre mande, pre tiri služobňička! Dikh pre miro pharipen! Leper tuke pre ma a ma bister pre ma, mangav tut! Te man deha muršores, dava tuke les, medik dživela. Leskere balendar pes e čhuri na chudela."

¹² Sar pes imar buter modľinelas anglo RAJ, o Eli dikhľa pre lakero muj. ¹³ Oj pes modľinelas andre peste avke, hoj ča o vušta lake phirenas. Vašoda, hoj la na šundolas, o Eli peske gondolinelas, hoj hiňi maťi.

¹⁴ Phučľa latar: "Dži kana aveha maťi? Ma pi imar e mol a av strižbo!"

¹⁵ "Na, rajeja miro," odphendľa leske e Anna, "som džuvľi, sava hin bari žala andro jilo. Na piľom mol aňi aver pijiben. Ča phendom man avri anglo RAJ. ¹⁶ Ma le man sar nalača džuvľa. Oda, so vakeravas dži akana, hin vaš miri bari žala the pharipen."

¹⁷ O Eli lake odphendľa: "Dža andro smirom. O Del le Izraeloskero tut mi šunel avri."

¹⁸ Oj odphendľa: "Som tiri služobňička. Mi avav tuke pre dzeka." Avke e Anna palís geľa het, chaľa mek a na sas buter smutno.

La Annake ufol o Samuel

¹⁹ Sig tosara uštíle, lašarenas le RAJES a gele pale khere andre Rama. Palís o Elkanah pašíla peskera romňaha la Annaha a o RAJ peske pre late leperďa.

²⁰ Pal varesavo časos e Anna ačhiľa khabňi a ulíla lake muršoro. Diňa leske nav Samuel, bo phendľa:

"Mangľom mange les le RAJESTAR."

²¹ O Elkanah džalas peskera caľa famelijaha, hoj te anel le RAJESKE e beršeskeri obeta a hoj te del o daros, pal savo diňa lav le Devles, ²² ale e Anna leha na geľa. Peskere romeske phendľa: "Sar o čhavoro imar preačhela te pijel andral o kolín, palís les anava a sikavava le RAJESKE, hoj te ačhel ode pro furt."

²³ "Ker avke, sar tu džanes," phendľa lake o Elkanah. "Ačh khere, medik o čhavoro na preačhela te pijel andral o kolín. Mi ačhel pes avke, sar o RAJ phendľa!" Avke e Anna ačhiľa khere, medik les na preačhiľa te del te pijel.

²⁴ Sar o čhavoro preačhiľa te pijel andral o kolín, ila les peha andre RAJESKERO kher andro Šilo. Iľa the trinberšengere bikos, jekh gono aro the mol andro cipuno gono. ²⁵ Sar le bikos murdarde a le čhavores ande ko Eli, ²⁶ e džuvľi phendľa: "Mangav tut, rajeja miro, čačes tuke phenav, avke sar džives, me som odi džuvľi, savi ačhelas kade paš tute a modľinelas pes ko RAJ. ²⁷ Vaš kada čhavoro man mangavas a o RAJ man šundľa avri.

²⁸ Akana me les dav le RAJESKE, hoj te el ča prekal leste, medik dživela." Palís chudle ode te lašarel le RAJES.

E giľi la Annakeri

2 E Anna pes modľinelas kavke:

"O jilo mange radisaľol andro RAJ; o RAJ man diňa zor.

Miro muj asal avri mire ňeprijateľen!
Radisaľuvav, bo tu man zachraňindľa.

² Níko nane ajsi sentno sar o RAJ;
nane ňíko, ča tu jekh;

nane aver Skala, sar hin amaro Del.

³ Preačhen pes te presikavel,
ma vakeren avke barikanes;
bo o RAJ hin o Del, savo džanel savorestar,

ov sudzinel sa, so keren o manuša.
⁴ O luki le zorale slugadengere phadon, ale ola, save na birinen, chuden nevi zor.
⁵ O čale mušinen te kerel buči prekal aver, hoj len te el maro, ale o bokhale imar buter na bokhalon.
 Ola džuvľake, savi na ulonas o čhave, ulon eftavar čhave,
 ale odi džuvľi, sava sas but čhave, hiňi andre bari žala.
⁶ O RAJ lel o dživipen a del o dživipen, bičhavel andre mulengero svetos a odarik lel avri.
⁷ O RAJ del o čoripen the o barvalipen.
 Varekas thovel tele a varekas hazdel upre.
⁸ Oles, kas nane, hazdel andral o prachos; le čores cirdel avri andral e čhik, hoj len te thovel te bešel le rajikane manušenca a te thovel len te bešel pro pačivalo tronos.
 Bo le RAJESKERE hine o slupi, so likerena e phuv, bo pre lende ačhađa o svetos.
⁹ Ov merkinel pro phiriben peskere pačivale manušengere,
 ale o bijedevleskere ňemisaľona andro kalipen, bo ňiko na ňerinela (na zviťazinela) peskera zoraha.
¹⁰ Ola, ko džan pro RAJ, ena zňičimen, demela pre lende le perumoha andral o ňebos.
 O RAJ sudzinela caľi phuv.
 Peskere krafis dela zor;
 hazdela upre peskere pomakhles.”

Le Eliskere čhave

¹¹ O Elkanah geľa pale khere andre Rama, ale o čhavo o Samuel ačhiľa te služinel le RAJESKE paš o rašaj Eli.
¹² O čhave le Eliskere sas nalačhe a na daranas pes le RAJESTAR. ¹³ Na likerenas pes ko manuša avke, sar pes le rašajendar užarelas. Bo sar vareko anelas e obeta, avelas le rašaskero služobňikos la vidlaha ipen akor, sar pes o mas tavelas. ¹⁴ Demelas laha andro kotlos, piri, panvica abo čaro a savoro, so e vidla zachudelas, peske lelas. Kavke kerenas savore Izraelitenge, save avenas andro šilo. ¹⁵ A mek ke oda; sigeder, sar zlabarenas o žiros, avelas le rašaskero služobňikos a phenelas oleske, savo obetinelas: “De mange o mas, hoj les te pekav avri le rašaske. Bo na prilela tutar o mas tado, ale ča jalo!”
¹⁶ Ale te vareko leske phenelas: “Ešeb (peršo) kampil te zlabarel o žiros, palis tuke le, so kames,” ov leske odphenelas: “Na! De mange oda takoj, bo te na, ta lava mange oda zoraha!”
¹⁷ O binos ole ternengero sas igen baro anglo RAJ, bo kerenas bi e pačiv le RAJESKERE obetenca.

O Samuel andro šilo

¹⁸ O Samuel služinelas anglo RAJ a sas pre leste urdo ľanoskero efodos. ¹⁹ Leskeri daj leske sako berš sivelas cikno plaštos a anelas leske oda akor, sar peskere romeha avelas pre beršeskeri obeta. ²⁰ Sar o Eli požehinelas le Elkanah the leskera romňa, phendá: “Mi del

tuke o RAJ kala romňaha avre čhaven vaš kada, savo sas avrimanglo a dino prekal o RAJ.” Palis gele khere.
²¹ O RAJ požehňinda la Anna andre oda, hoj lake ulile (narodzinde pes) trin muršora the duj čhajora. Ale o Samuel barolas avri anglo RAJ.

O Eli dovakerel peskere čhavenge

²² O Eli sas imar igen phuro a furt šunelas pal savoro, so kerenas leskere čhave savore Izraelitenge, the pal oda, sar pašľuvkerenas le džuvľenca, save služinenas anglo vudar andre le RAJESKERO Stanos. ²³ Dovakere-las lenge: “Oda so tumen keren? Savore manušendar šunav pal tumende ča nalačhe lava. ²⁴ Preačhen aleha, čhave mire! Nane oda lačho hiros, so džal pal tumende maškar o RAJESKERE manuša. ²⁵ Te kerela manuš namištes le manušeske, o Del pes vaš leste zaačhela, ale te vareko kerela binos anglo RAJ, ko vaš leste za- ačhela?” Vašoda o RAJ len kamelas te murdarel, bo on na šunenas peskere dades.
²⁶ Ale o terno Samuel barolas a le RAJESKE the le manušenge sas pre dzeka.

O prorokos prevakerel ko Eli

²⁷ Jekhvar avľa ko Eli le Devleskero murš a phendá leske: “Kavke phenel o RAJ: ‘Sikadom man tire dadeskera famelijake, sar mek sas otroka andro Egipt tel e zor le Faraonoskere manušengeri. ²⁸ Iľom mange les avri vaš o rašaj maškar savore Izraelike kmeňi, hoj pre miro oltaris te anel o labarde obeti, te labarel o kaďidlos a te hordinel anglal mande o rašajiko efodos. Tira famelijake mukľom kotor savore le Izraelitengere labarde obetendar. ²⁹ Soske keren bi e pačiv mire obetenca the darenca, so phendom mire manušenge, hoj te anen? Soske tire čhave tuke hine feder sar me a des len te chal ola nekfeder kotora le obetendar, so mange anen mire manuša?’

³⁰ Vašoda kavke phenel o RAJ, o Del le Izraeloskero: ‘Choc phendom, hoj mange služineha tu the caľi tiri famelija sar rašaja pro furt’, no akana tumenge phenav, hoj ela oda dur mandar. Likerava ča olen, ko man likerena. Olen, ko man na likerena, na likerava aňi me. ³¹ Hin pašes oda časos, sar murdarava savore ternen andre tiri famelija the fajta avke, hoj ňiko tumendar pes na dodživela dži andro phuripen. ³² Tu predživeha ča o pharipen a zavidzineha o požehňanja, so me dava le Izrael. Andre tiro kher na ela aňi jekh phuro. ³³ Ale mukava jekhes andral tiri famelija sar rašaj anglo oltaris. Predživela ča roviben the pharipen, bo savore murša andral tiri fajta merena andro nekfeder berša.

³⁴ Vaš o sikaviben tuke ela oda, so pes ačhela soduje tire čhavenca, le Chofniha the le Pinchasoha: Soduj merena andre jekh džives. ³⁵ Ačhavava mange pačivale rašas, savo kerela savoro pal miri dzeka. Zoralarava leskere čhaven, hoj mange te služinen pro furt anglo miro pomakhlo krafis. ³⁶ Ko ačhela andral tiri famelija, avela anglal leste te bandol, hoj ča te chudel jekh

rupuŋi abo jekh kotor maro. Phenela leske: Mangav tut, thov man andre varesavi rašajiko buči, hoj te el man vareso te chal."

O RAJ ačhavel le Samuel prorokoske

3 O terno Samuel služinelas le RAJESKE anglo Eli. Andre oda časos o lav le RAJESKERO sas dino ča igen sikra a o videŋja na sas ajci but.

²Jekh rat pašľolas o Eli, savo imar na dikhelas mištes pro jakha, pre peskero than. ³Le Devleskeri lampa mek švicinelas, sar o Samuel pašľolas andre le RAJESKERO Chramos, kaj sas e Archa le Devleskeri. ⁴Androda o RAJ vičindā pro Samuel.

Ov odphendā: "Kade som." ⁵Denašľa ko Eli a phendā: "Kade som. Vičinehas man?"

Ale ov odphendā: "Na vičindom tut. Dža tuke te pašľol." Avke geľa te pašľol.

⁶O RAJ pale vičindā pro Samuel. Ov ušľifa, geľa ko Eli a phendā: "Kade som, se vičinehas man."

"Na, čhavo miro," phendā leske o Eli, "na vičindom tut. Ča džā, pašľuv."

⁷O Samuel le RAJES mek na prindžarelas, bo mek le RAJESTAR na chudľā ņisavo lav.

⁸Sar o RAJ imar tritovar vičindā pro Samuel, ov ušľifa a geľa le Eliske te phenel: "Kade som, se vičinehas man."

Akor o Eli achaliľa, hoj le čhavores vičinel o RAJ. ⁹O Eli phendā le Samueloske: "Dža, pašľuv tuke. Te pre tu pale vičinelā, phen: 'Vaker, RAJEJA. Tiro služobňikos tut šunel.'" Avke o Samuel geľa te pašľol pre peskero than.

¹⁰O RAJ avľā, ačhelas ode a vičindā pre leste avke sar angloda: "Samuel! Samuel!"

Ov odphendā: "Vaker, tiro služobňikos tut šunel."

¹¹O RAJ phendā le Samueloske: "Andro Izrael kerava ajso vareso, hoj zarazisaľola dojekh, ko pal oda šunela.

¹²Oda džives domukava pro Eli savoro, so phendom pre leskeri famelija – kerava sa. ¹³Dav leske te džanel, hoj vaš leskero binos sudzinava leskera famelija pro furt. Bo džanelas pal o bini peskere čhavengere, hoj namištes vakere nas pre mande, ale ov lenge na dovakerelas. ¹⁴Vašoda diňom vera le Eliskera famelijake, hoj leskere bini šoha (ňikda) na odmukava prekal ņisave obeti aňi dari."

¹⁵O Samuel pašľolas džī tosara. Palis phundraďa o vudar andre le RAJESKERO kher. Daralas te phenel le Eliske pal o videŋje, ¹⁶ale o Eli zvičindā pro Samuel: "Samuel, čhavo miro!"

"Kade som," ov odphendā.

¹⁷O Eli lestar phučľa: "So tuke phendā? Mangav tut, ma garuv ņič anglal ma! Mi potrestinel tut o Del bares, te mange na pheneha oda, so tuke phendā." ¹⁸Avke o Samuel leske sa avri phendā a ņič anglal leste na garuďa. Palis o Eli phendā: "Se ov hin o RAJ. Mi kerel oda, so hin leske pre dzeka."

¹⁹Sar o Samuel dobarolas, o RAJ sas leha a dojekh le Samueloskero lav avelas avri. ²⁰Savore manuša andral o Izrael, le Danostar džī ke Beer-Šeba, sprindžarde, hoj

o Samuel sas ačhado sar prorokos le RAJESTAR. ²¹O RAJ pes dureder sikavelas le Samueloske andro Šilo. Delas pes leske te sprindžarel prekal peskero lav.

4 Le Samueloskero lav sas prekal calo Izrael.

O Filištinci ņerinen upral o Izrael

Andre oda časos gele o Izraeliti pro mariben pro Filištinci. Kerde peske taboris paš o Eben-Ezer a o Filištinci paš o Afek. ²O Filištinci pes pre lende rozačhade pro mariben. Pal o zoralo mariben o Izraeliti prekhelde (prehrajinde). Mule lendar ajse štar 4 000 murša. ³Sar pes visarenas pale o Izraelike murša andro taboris, o vodci phučle: "Soske o RAJ adadžives domukľā, hoj te prekhelas o mariben le Filištinenca? Aven, las peske andral o Šilo le RAJESKERI Zmluvakeri Archa. Avke o RAJ ela maškar amende a lela amen avri andral amare ņeprijatelengere vasta."

⁴Avke o manuša bičhade le muršen andro Šilo a on ande pale e Zmluvakeri Archa le nekzoraledere RAJESKERI, savo bešel pro tronos upral o cherubi. Le Eliskere duj čhave o Chofni the o Pinchas avle le Devleskera Zmluvakera Archaha.

⁵Sar anenas e RAJESKERI Archa andro taboris, o Izraeliti chudle avke zorales te vriskinel, hoj e phuv razisaľolas. ⁶Sar oda o Filištinci šunde, phučenas: "Oda so ajsi bari vika andro E Hebrejiko taboris?"

Sar pes dodžanle, hoj ande le RAJESKERI Archa, ⁷igen predarandile, bo vakere nas maškar peste: "Avľā andre lengero taboris o Del!" Vriskinde: "Vigos amenge! Ajso vareso pes amenge mek na ačhiľa. ⁸Jaj, namištes amenca! Ko amen šaj lela avri andral o vasta kale zorale Devlestar? Se oda hin oda Del, savo pre pušťa marelas le Egipt savore dukhenca. ⁹Aven zorale, Filištinale! Likeren pes sar murša! Ma podden tumen, hoj te na ačhen otroka le Hebrejenge, avke sar the on tumenge sas otroka. Maren tumen bi e dar!"

¹⁰Avke o Filištinci gele pro mariben, o Izraeliti prekhelde a sako denašelas andre peskero stanos. Prekhelde avke bares, hoj mule 30 000 slugaďa. ¹¹E Devleskeri Archa sas zaili a le Eliskere soduj čhave o Chofni the o Pinchas mule.

O Eli merel

¹²Varesavo Benjaminos denašelas le maribnastar a mek oda džives doavľā andro Šilo. Leskere gada sas čhingerde a pro šero les sas prachos. ¹³Sar oda murš avľā, o Eli ipen užarelas pro stolkos paš o drom, bo daralas pes pal e Devleskeri Archa. Sar oda murš avľā andro foros a phendā, so pes ačhiľa, savore manuša chudle igen zorales te rovel.

¹⁴O Eli šundā o roviben a phučľa: "Oda so ajsi vika?"

Oda murš denašelas ko Eli leske oda te phenel. ¹⁵Le Eliske sas imar eňavardeš the ochto (98) berš a sas imar koro. ¹⁶Oda murš phendā le Eliske: "Avav ipen pal o mariben. Adadžives odarik denašľom."

"So pes ačhiľa, čhavo miro?" phučľa lestar o Eli.

¹⁷ Ov leske odphenda: "O Izraeliti denašle le Filištinenge a but amare muršendar murdarde. E Devleskeri Archa sas zaiľi a tire soduj čhave o Chofni the o Pinchas mule."

¹⁸ Soča leperďa le Devleskeri Archa, o Eli peľa pal o stolkos le dumeha paš e brana, phagľa e meň a muľa, bo sas thulo the phuro. O Eli ľidžalas o Izrael saranda (40) berš.

¹⁹ Leskeri bori, le Pinchasoskeri romňi, sas khabňi a sas imar lakero časos, hoj te anel pro svetos le čhavores. Sar šunda, hoj zaile le Devleskeri Archa a hoj muľa lake o sastro the o rom, chudľa te rodzinel a uliľa lake muršoro, ale andre ola bare dukha merelas. ²⁰ Sar imar merelas, phenenas lake o džuvľija, save ačhenas laha: "Ma dara tut, se uliľa tuke muršoro." Ale oj aňi na odphenelas a aňi na šunelas.

²¹ Le čhavoreske diňa nav Ikabod †, bo phenda: "E slava omukľa le Izrael," bo ile le Devleskeri Archa a muľa lake o sastro the o rom. ²² Phenda: "E slava odgeľa khatar o Izrael, bo zaile le Devleskeri Archa."

Le Devleskeri Archa ko Filištinci

5 Sar o Filištinci zaile le Devleskeri Archa, preľigende la andral o Eben-Ezer andro foros Ašdod. ² Palis la ľigende andro chramos ke lengero del Dagon a thode la paš leste. ³ Sar o Ašdoďana sig tosara uštile pro dujto džives, arakhle le Dagon čhides tele pre phuv angle Devleskeri Archa. Avke ile le Dagon a thode les pale pre peskero than. ⁴ Sar pre aver džives sig tosara uštile, o Dagon sas pale čhido tele angle RAJESKERI Archa. Leskero šero the soduj vasta sas phagerde pre phuv paš o vudar a ačhiľa leske ča o tēlos. ⁵ Vašoda dži adadžives le Dagonoskere rašaja a savore, ko ode phiren andre leskero chramos, na uštaren pre oda than.

⁶ O RAJ igen marelas le Ašdoďanen a dukhavelas len the lengere gava le vredenca (vredenca). ⁷ Sar o manuša andral o Ašdod dikhle, so pes ačhel, phende: "Le Izraeloskeri Devleskeri Archa ade našti ačhel, bo peskere vasteha amen igen marel the amare devles le Dagon." ⁸ Zvičinde ke peste savore Filištínike vodcen a phučle lendar: "So keraha le Izraelitengera Devleskera Archaha?"

On odphende: "Lidžan la andro foros Gat!" Avke la preľigende.

⁹ Ale sar la preľigende, o RAJ peskera zoraha mukľa pre oda foros ajsi bari balamuta (zmetkos), hoj na džanenas, so te kerel. Marelas len le vredenca, či sas terno vaj phuro. ¹⁰ Avke bičhade le Devleskeri Archa andro Ekron.

Sar ode avle o manuša andral o Ekron, zvičinde: "Ande ke amende le Izraelitengeri Devleskeri Archa, hoj te murdarel amen the amare manušen." ¹¹ Avke dine te vičinel savore Filištínike vodcen a phende: "Bičhaven pale kadı Izraelitengeri Devleskeri Archa pre lakero than, hoj te na murdarel amen the amare manušen." Bo šunenas zorales pre peste le Devleskero

vast a calo foros sas andro meribnaskeri dar. ¹² Ola, save na mule, sas dukhade le vredenca. O vičiňiben ole foroskero sas šundo dži andro ňebos.

O Filištinci den pale le Devleskeri Archa

6 Le RAJESKERI Archa sas andre Filištíniko phuv efta čhon. ² O Filištinci vičinde le rašajen the le vrašcen a phučenas lendar: "So kempel te kerel le RAJESKERA Archaha? Phenen amenge, sar la te bičhavel pale pre lakero than."

³ On odphende: "Te bičhavena pale le Izraeloskeri Devleskeri Archa, bičhaven la the le daroha vaš o binos, so kerďan. Palis sastona avri a ačafona, soske tumen marelas."

⁴ O Filištinci phučenas: "Savi obeta kempel te bičhavel vaš amaro binos?"

On odphende: "Pandž somnakune vredi (vredi) the pandž somnakune mišen; prekal dojekh Filištíniko vodcas po jekh, bo odi bibach, so avľa pre tumende, avľa the pre tumare vodci. ⁵ Keren le somnakastar vareso ajso sar vredi, so hine pre tumende, the somnakune mišen ajsen sar ola, save ňičinen e phuv. Den pačiv le Izraeloskere Devles: Šaj el, hoj preačhela te marel tumen, tumare devlen the tumari phuv. ⁶ Soske kamen avke te kerel sar o Egiptana the o Faraonos? Choc pre lende domukelas o dukha, mušinde len te premukel, hoj odarik te oddžan.

⁷ Vašoda akana pririchtinen nevo verdan a len duje gurmňen, saven hin cikne a save mek šoha (ňikda) na cirdenas o verdan. Mi ľidžan o verdan, ale lengere ciknen traden andre maštalňa. ⁸ Palis len le RAJESKERI Archa a thoven la andro verdan. O somnakune veci the o daros sar obeta vaš o binos thovena andre cikňi truhla paš e Archa a mukena len te džal. ⁹ Sar dikhena, hoj džala ko Bet-Šemeš, andre peskeri phuv, džanena, hoj sas oda o RAJ, savo pre tumende domukľa kada savoro nalačo. Ale te na, akor sprindžarena, hoj oda na sas o vast le RAJESKERO pre tumende, ale hoj oda sas ča bibach."

¹⁰ Ola murša oda avke the kerde. Ile duje gurmňen, saven sas cikne. Lġigende len ko verdan a lengere ciknen phandle andre maštalňa. ¹¹ Pro verdan thode le RAJESKERI Archa la cikňa truhlaha, andre savi thode le somnakune mišen le somnakune vredenca. ¹² O gurmňna džanas rovno ko Bet-Šemeš, furt džanas, denas avri peskere hangi a na visarenas pes pre ňisavi sera. O Filištínike vodci džanas pal lende dži ke hraňica paš o Bet-Šemeš.

¹³ O manuša andral o Bet-Šemeš ipen skidenas andre dolina o žužodiv, a sar dikhle e Archa, chudle te radisaľol. ¹⁴ O verdan zaačhiľa paš e Jozuaskeri maľa, so sas andral o Bet-Šemeš. Ode sas baro bar. O verdan phagerde pro kašta, hoj te keren jag, a le gurmňen obetinde le RAJESKE sar labardı obeta. ¹⁵ O Leviti thode tele le RAJESKERI Archa the e truhla le somnakune vecenca pre oda baro bar. Oda džives o murša andral o Bet-Šemeš ande le RAJESKE labarde obeti the aver

† Oda hin: Bi e slava.

obeti. ¹⁶ Pandž Filištínike vodci savoro dikhle a mek oda džives pes pale visarde khere andro Ekron.

¹⁷ Kala hine o somnakune vredí, so ande o Filištínci le RAJESKE sar obetakero daros vaš peskere bini: jekh vaš dojekh foros – Ašdod, Gaza, Aškalon, Gat the Ekron.

¹⁸ Bičhade ajci somnakune miši, keci sar sas o zorale fori le murenca the gava, upral save kralínenas ola pandž Filištínike kraľa. Oda baro bar, pre savo thode le RAJESKERI Archa, hin dži adadžives pre le Jozuaskeri maľa andro Bet-Šemeš.

Le RAJESKERI Archa andro Kirjat-Jearim

¹⁹ O RAJ murdardá varesave muršen andral o Bet-Šemeš vaš oda, hoj dikhle andre le RAJESKERI Archa. Le penda ezere (50 000) manušendar mule eftavardeš (70). O manuša rovenas, hoj o RAJ len avke zorales mardá. ²⁰ O murša andral o Bet-Šemeš phučenas: “Ko šaj obačhol anglo RAJ, angle kada sentno Del? Ke kaste e Archa bičhavaha, hoj la te el amendar?”

²¹ Le manušenge andral o Kirjat-Jearim dine te phenel: “O Filištínci dine pale le RAJESKERI Archa. Aven peske vaš late.”

7 O murša andral o Kirjat-Jearim avle vaš le RAJESKERI Archa a ligende la andro kher ko Abinadab, savo bešelas pro brehos, a leskero čhavo o Eleazar sas ačhado, hoj pre late te merkinel.

O Izraeliti pes visaren pale ko Del

² E Archa sas andro Kirjat-Jearim but časos – biš (20) berš. Andre oda časos calo Izrael visarde pes le rovibnaha ko RAJ. ³ Akor o Samuel phendá le Izraelitenge: “Te pes visarena cale tumare jileha ko RAJ, te pestar odčhivena savore avre devlen the le Aštarten, te pes čačes oddena le RAJESKE a služinena ča leske, ov cirdela tumen avri andral o vasta le Filištínengere.” ⁴ Avke o Izraeliti odčhíde pestar o modli le Baalen the le Aštarten a služinenas ča le RAJESKE.

⁵ O Samuel lenge phendá: “Zvičinen savore Izraeliten andre Micpa a me man vaš tumende privakerava ko RAJ.” ⁶ Sar pes zgele andre Micpa, cirdle peske paňi a čhorenas avri anglo RAJ. Oda džives pes ode poscinenas a phenenas: “Kerdám binos anglo RAJ.” O Samuel sas vodcas upral o Izraeliti andre Micpa.

O Filištínci prekhelen

⁷ Sar pes o Filištínci dodžanle, hoj pes o Izraeliti zgele andre Micpa, lengere vodci gele pre lende pro mariben. Sar oda šunde o Izraeliti, chudle lendar te daral. ⁸ Mangelas le Samuel: “Ma preačh pes te modlínel vaš amende ko RAJ, ke amaro Del, hoj amen te cirdel avri andral o vasta le Filištínengere.” ⁹ O Samuel iľa terne bakrores a obetindá les sar calí labardí obeta. Vičinelas ko RAJ a mangelas les, hoj te pomožinel le Izraelitenge, a o RAJ les šundá avri.

¹⁰ Akor, sar o Samuel anelas le RAJESKE e labardí obeta, o Filištínci gele pro mariben pro Izraeliti. Oda džives o RAJ diňa andral o ňebos te demel pro Filištínci bare

perumi a avke predarandíle, hoj pes rozdenašle. ¹¹ Androda o Izraeliti džanas andral e Micpa pal o Filištínci, marenas len a murdarde. Džanas pal lende dži ko than pal o Bet-Char.

¹² Akor iľa o Samuel o bar, ačhada les maškar e Micpa the Šen, diňa leske nav Eben-Ezer † a phendá: “Dži ade amenge pomožinelas o RAJ.” ¹³ O Filištínci avke prekhelde (prehrajinde), hoj imar buter na džanas pro mariben pre le Izraelitengeri phuv, bo o Del len na domukelas, medik dživelas o Samuel. ¹⁴ O fori, so zaile o Filištínci le Ekronostar dži ko Gat, dine pale le Izraelitenge a o Izraeliti peske ile pale peskere phuva le Filištínendar. Le Izrael sas smirom the le Amorejenca.

¹⁵ O Samuel sas sudcas andro Izrael calo peskero dživipen. ¹⁶ Sako berš džalal pašal o fori Betel, Gilgal the Micpa. Andre kala fori sudzinelas o veci, so sas maškar o Izraeliti. ¹⁷ Palis pes visarelas pale andre Rama, kaj sas leskero kher, a ode tiš sudzinelas le Izraeliten. Ode ačhada oltaris le RAJESKE.

O Izraeliti peske mangelas kralis

8 Sar o Samuel sas imar phuro, ačhada peskere čhaven sar sudcen andro Izrael. ² Leskero ešebno (peršo) čhavo pes vičinelas Joel the o dujto Abijah. On sas sudci andre Beer-Šeba. ³ Ale on na kerenas avke sar lengero dad, bo kamenas ča te zbarvalol, denas pes te prepočinel a na sudzinenas pal o čačipen.

⁴ Akor pes zgele savore vodci andral o Izrael a gele ko Samuel andre Rama. ⁵ Phende leske: “Imar sal phuro a tire čhave na keren avke sar tu. Ačhav amenge kralis, savo amen lidžala, avke sar hin the savore naroden.”

⁶ Le Samueloske na sas pre dzeka, sar vakerenas, hoj len te del kralis, savo len ligendahas. Avke o Samuel pes modlínelas ko RAJ. ⁷ O RAJ phendá le Samueloske: “Šun avri le manušen andre savoreste, so kamen. Bo na dikhle tut tele, ale man, bo na kamen man kraliske. ⁸ Sikavel oda lengere skutki, so kerenas akorestar, sar len iľom avri andral o Egipt, dži adadžives. Omukle man a služinenas avre devlenge. Kavke keren the tuha. ⁹ Šun len. Ale ešeb lenge dovaker a phen lenge, so šaj kerel o kralis, sar ela upral lende.”

¹⁰ Avke o Samuel savoro, so leske o RAJ vakerelas, phendá le manušenge, save lestar mangelas kralis. ¹¹ O Samuel phendá: “O kralis, savo tumen lidžala, kerela oda: Tumare čhaven ačhavela andro mariben paš peskere verdana the maškar o murša, save džana pro graja, a dela, hoj te denašen anglal leskero verdan. ¹² Ačhavela len vaš o velíteľa upral o ezeros (1 000) abo penda (50) murša, aver džana leske te kerel buči pre maľa, aver te skidel upre o div abo te kerel zbraňi the vizbroj prekal leskere verdana. ¹³ Lela tumare čhagen, hoj te pririchtinen o voňava masci a hoj leske te taven a te peken. ¹⁴ Zalela tumare nekfeder maľi, o viňici the o olivi a dela peskere služobňikenge. ¹⁵ Le divendar the le viňicendar kidela avri o dešto kotor a dela peskere

† Oda hin: O bar, so pomožinel.

uradnikenge the sluhenge. ¹⁶ Lela tumare sluhen, služobničken, nekfeder gurumñen the somaren, hoj te keren prekal leste. ¹⁷ O dešto kotor lela the tumare stadendar a the tumen korkore leske služinena sar o otroka. ¹⁸ Andre oda džives, sar vičinenena pro RAJ, hoj tumenge te pomožinel vaš o krališ, saves peske avri iñan, ov tumen na šunela avri."

¹⁹ Ale o manuša na kamenas te šunel le Samuel a phende: "Na, mi liđžal amen o krališ! ²⁰ Kamas te el sar the aver narodi. Mi liđžal amen o krališ. Ov džala anglal amende a marel pes vaš amende."

²¹ O Samuel šundā avri savoro, so phende o manuša, a geñā oda te phenel le RAJESKE. ²² O RAJ phendā le Samueloske: "Šun len a ačhav lenge krališ."

Avke phendā o Samuel le Izraelitenge: "Džan savore pale andre peskere fori!"

O Samuel pomakhel le Saul vaš o krališ

9 Sas jekh murš andral o Benjaminiko kmeños, savo pes vičinelas Kiš. O dad leske sas o Abijel, leskero o Ceror, leskero o Bechorat a leskero o Afiač. ² Le Kiš sas šukar the zoralo čhavo o Saul. Ńiko le Izraelitendar na sas ajso šukar sar ov, bo le šereha prebararelas savoren.

³ Andre jekh džives o Kiš našađa peskere somaren. Avke phendā peskere čhaske le Sauloske: "Le tuha jekhes le sluhendar a dža te rodel ole somaren." ⁴ Avke on prephirde prekal o Efrajimike brehi the prekal e phuv paš o Šališa, ale na arakhle len. Prephirde the prekal e phuv paš o Šaalim, ale na sas ode. Pañis pregele prekal e Benjaminengeri phuv, ale añi ode len na arakhle.

⁵ Sar pes dochudle andre phuv Cuf, o Saul phendā peskere sluhasko: "Av, džas pale khere, hoj te na daral miro dad akana buter pal amende sar pal o somara."

⁶ Ale ov leske odphendā: "Užar! Andre kada foros hino jekh Devleskero murš, saves o manuša igen likerem, bo savoro, so phenel, pes čačes the ačhel. Av, džas pal leste. Ov amenge šaj phenel, kaj te džal."

⁷ "Mištes," phendā o Saul peskere sluhasko, "džas pal leste, ale so les daha? O maro amenge dogeñā. Nane amen nič, so te del le Devleskere muršes. Či hin amen?"

⁸ "Hin man jekh cikñi ru puñi minca," odphendā leske o sluhasko. "Te la dava le Devleskere muršeske, phenela amenge, kaj te džas." ⁹ Andre ola dživesa, te vareko kamelas te džanel vareso le Devlestar, phenelas: "Aven, džas ke oda, savo dikhel anglal!" Avke vičinenas adadživeseskere prorokos.

¹⁰ O Saul phendā le sluhasko: "Mištes vakeres. Av, džas pal leste." Avke avle andro foros, kaj bešel as oda Devleskero murš.

¹¹ Sar džanas upre le brehoha andro foros, dikhle terne džuvlñjen, save džanas pañeske. Phučle lendar: "Hin ade oda murš, savo dikhel sa anglal?"

¹² "He," odphende. "Imar džalas anglal tu. Sidar, ipen džalas andro foros, bo adadžives ela pro učo than e smiromoskeri obeta. ¹³ Te sidarena, mek les šaj dochu-

den, medik na džala pro učo than paš o chaben. O manuša na chana, medik na avela. Sar požehñinela e obeta, akor chana. Ča džan, ipen akana les dochudena."

¹⁴ Avke gele upre andro foros. Sar ode doavle, ipen džalas anglal lende o Samuel, savo džalas pro učo than.

¹⁵ Jekh džives angloda, sar avñā o Saul, o Del sikađa le Samueloske: ¹⁶ "Tajsa, andre kajso časos, bičhavava ke tu muršes andral e Benjaminiko phuv. Oles pomakheha vaš o vodcas upral miro Izraeliko narodos. Ov les lela avri andral o vasta le Filištínengere. Dikhñom pre mire manušengero pharipen, bo lengero roviben avñā upre džiš ke mande."

¹⁷ Sar o Samuel dikhñā le Saul, phendā leske o RAJ: "Kada hino oda murš, pal savo tuke phendñom, hoj ela o krališ upral mire manuša."

¹⁸ Pañis o Saul geñā ko Samuel, savo sas maškar e brana, a phučñā lestar: "Phen mange, kaj ade bešel oda murš, savo dikhel sa anglal?"

¹⁹ "Oda me som," odphendā leske o Samuel. "Dža anglal mande pro učo than. Adadžives chana manca a tajsa tosara tuke odphenava pre savoreste, so kames te džanel, a avke šaj džaha tire dromeha. ²⁰ Pal o somara, so našñile anglo trin dživesa, tut imar na mušines te daral, bo arakhle pes. Ale ko hin ajso dragano, pre kaste užarel calo Izrael? Či na sal oda tu the cali tire dadeskeri famelija?"

²¹ Ale o Saul leske odphendā: "Me som ča Benjaminos. Som andral o nekčikneder Izraeliko kmeños a miri famelija hiñi nekčoreder savore Benjaminike fajtendar. Soske mange oda phenes?"

²² Pañis o Samuel iñā le Saul the leskere sluhasko andro kher a thođa len pro angluno than paš o skamind, kaj bešenas o tranda (30) manuša, save sas vičimen. ²³ O Samuel phendā le muršeske, savo kerelas le chabeneha: "De mange oda kotor mas, so tuke diñom te garuv-el pre sera."

²⁴ Avke oda murš hazdñā upre oda nekfeder kotor le masestar, e čang, a thođa les anglo Saul. Phendā: "Dikh, kada hin prekal tu. Ča, bo garuđom tuke oda akorestar, sar vičindñom le manušen." Avke o Saul chalas le Samueloha oda džives.

²⁵ Sar džanas tele pal oda učo than a doavle andro foros, o Samuel iñā le Saul andre peskero kher pro pados a vakerele leha †. ²⁶ Ode ačhiñā te presovel. Sar tosara vidñisañolas, o Samuel vičindā pro Saul: "Ušñi, imar hin o časos, hoj tut te premukav." Androda o Saul ušñiñā a geñā le Samueloha avri. ²⁷ Sar imar sas džiš paš o agor le foroskero, phendā o Samuel le Sauloske: "Phen le sluhasko, hoj te džal anglal" – a o sluhasko geñā – "ale tu ačh ade mek sikra, bo hin man prekal tu lav le Devlestar."

O Saul pomakhlo vaš o krališ

10 O Samuel iñā cikno džbanos le olejoha a čhiđa le Sauloske pro šero. Čumidñā les a phendā: "Kale-

† Abo: a kerelas leske o hados pro pados

ha tut o RAJ pomakhľa vaš o vodcas upral peskero d'edictvos. ² Sar akana oddžaha mandar, arakheha paš o hrobos la Rachelakero andre Benjaminengeri phuv Celcach duje muršen, save tuke phenena: 'O somara pes imar arakhle. Tiro dad imar na daral pal lende, ale pal tumende. Phučel: So šaj kerav prekal miro čhavo?'

³ Sar odarik džaha dureder, dochudeha pes ko dubiko stromos paš o Tabor. Ode dikheha trine muršen, save džana te lašarel le Devles andro Betel. Jekh lidžala trine cikne kozen, dujto trin peke mare the trito jekh cipuno gono mol. ⁴ Phenena: 'Smirom tuke!' a dena tut duj mare, so lendar leha.

⁵ Palis aveha pre Devleskero verchos Gibeja, kaj hin le Filištínengero taboris. Sar džaha andro foros, arakheha ode but proroken, save avena tele pal o verchi, le bašavibnaha pre harfa, bubna, flauta the pre citara. On prorokinena. ⁶ Akor o Duchos le RAJESKERO pre tu zorales avela a the tu lenca prorokineha a čerineha tut pre aver manuš. ⁷ Sar pes tuke kada savoro ačhela, ker avke, sar dikheha, hoj hin mištes, bo o Del ela tuha.

⁸ Aveha tele anglal mande andro Gilgal. Džava ode the me, hoj te anav o labarde the smiromskere obeti. Užareha efa dživesa, medik avava ke tu. Palis tuke phenava, so te kerel."

⁹ Soča pes o Saul visarda le Samuelostar, o Del leske čerinda o jilo. Andre oda džives pes savoro ačhiľa avke, sar oda o Samuel phenda. ¹⁰ Sar avle odarik andre Gibeja, jekh partija proroka džanas anglal leste. Akor avľa the pre leste le Devleskero Duchos zorales a ov tiš lenca prorokinelas. ¹¹ Savore, save les angloda prindžarenas a dikhle les te prorokinel, phučenas maškar peste: "So pes ačhiľa le Kišoskere čhaha? Či the o Saul hino maškar o proroka?"

¹² Jekh odarik phučľa: "Ko hin lengero dad?" Akorestar chudle kavke te vakerele: "The o Saul hino maškar o proroka?" ¹³ Sar preačhiľa o Saul te prorokinel, odgeľa pro učo than.

¹⁴ Akor leskero bačis phučľa le Saulostar the le sluhastar: "Kaj všadzík sanas?"

"Rodahas le somaren," odphende leske. "Sar len našti arakhľam, geľam ko Samuel."

¹⁵ O bačis phenda le Sauloske: "Phen mange, so tuke o Samuel phenda."

¹⁶ "Phenda amenge, hoj o somara pes imar arakhle," odphenda o Saul peskere bačiske, ale na phenda leske, hoj les o Samuel kidňa avri vaš o kralis.

O Saul ačhel kraliske

¹⁷ O Samuel vičinda le Izraeliten, hoj pes te zdžan jekhetane anglo RAJ andre Micpa. ¹⁸ Phenda lenge: "Kada phenel o RAJ, o Del le Izraeloskero: 'Me tumen ilom avri andral o Egipt a zachraňdom tumen le Egiptanendar the savore krafendar, save džanas pre tumende.' ¹⁹ Ale akana odčhidan pestar tumare Devles, savo tumen cirdňa avri andral dojekh dukh the pharipen, a mangelas man, hoj te ačhavav le kralis upral

tumende. Avke akana ačhaven pes anglo RAJ pal peskere kmeňi the fajti."

²⁰ Sar o Samuel vičinda savore kmeňi andral o Izrael, o losos peľa pro Benjaminoskero kmeňos. ²¹ Palis vičinda anglal le Benjaminen pal peskere fajti a o losos peľa pre le Matriskeri fajta a palis pro Saul, le Kišoskero čhavo. Ale sar les rodenas, našti les arakhle. ²² Phučenas le RAJESTAR: "Avela mek oda murš?"

O RAJ odphenda: "Garuđa pes ode, kaj hine odthode o veci."

²³ Avke o manuša denašenas ode a ile les odarik avri. Sar ačhelas anglo manuša, dojekhes prebararlas le šereha. ²⁴ O Samuel phenda savore manušenge: "Dikhen kale muršes, saves peske kidňa avri o RAJ? Maškar o manuša nane ajso sar ov."

Avke savore manuša radisaľonas a vičinenas: "Mi dživel o kralis!"

²⁵ O Samuel palis phenda le manušenge oda, so hin le kraliske domuklo te kerel a so na. Zapisinda oda andre zvitkos a thođa anglo RAJ. Palis len bičhada savoren khere.

²⁶ Sar o Saul džalas khere andre Gibeja, gele leha the zorale murša, savenge oda o Del thođa pro jilo. ²⁷ Ale varesave nagođaver manuša phende: "Sar šaj amen ov zachraňinel?" Na lenas les vaš ňisoste a aňi leske na ande daros. Ale o Saul pes kerelas, hoj oda na šunda.

O Saul ňerinel upral o Ammončana

11 Pal o čhon o Ammoniko kralis Nachaš geľa peskere muršenca te ačhavel o stani paš o foros Jabeš andre phuv Gilead. Savore murša andral o Jabeš phende le Nachašiske: "Phand amenca zmluva a služinaha tuke."

² Ale o Nachaš lenge odphenda: "Phandava tumenca zmluva, ale ča akor, te dojekheske tumendar lava avri e čači (pravo) jakh. Kaleha kerava e ladž cale Izraeloske."

³ O vodci ole foroskere leske phende: "De amen efa džives, hoj te bičhavas amare muršen pal calo Izrael, ale te na arakhaha varekas, savo amenge pomožinela, zdaha pes tuke."

⁴ Ola murša, save sas bičhade, doavle andre Gibeja, kaj bešelas o Saul. Sar rozvakerde le manušenge savoro, so pes ačhiľa, o manuša chudle zorales te rovel. ⁵ Androda o Saul avelas ipen khatar e maľa peskere guruvenca a phučľa: "So pes ačhiľa le manušenca? Soske savore roven?" Avke leske phende oda, so vakerenas o murša andral o Jabeš.

⁶ Sar oda šunda o Saul, avľa zorales pre leste le Devleskero Duchos a igen chofisaľiľa. ⁷ Avke iľa duje guruven a rozčhingerďa len pro kotora. Diňa len te rozbičhavel peskere muršenca pal calo Izrael, hoj te phenen: "Te pes vareko na pridela andro mariben le Sauloha the le Samueloha, kada pes ačhela leskere guruvenca." Akor o manuša andral o Izrael igen predarandile le RAJESTAR a savore jekhetane pes zgele pro mariben. ⁸ Sar len savoren zgende andro Bezek,

sas lendar 300 000 murša andral o Izrael a 30 000 andral e Judsko.

⁹ Le muršenge, save avle andral o Jabeš, phendā: "Džan a phenen le muršenge andral o Jabeš, hoj tajsa, sar ela nektateder, avela e zachrana." Avke ola murša lenge gele oda te phenel a on zaradisašile. ¹⁰ O manuša phende le Nachašiske: "Tajsa džaha avri ke tumende. Palis amenca šaj keres, so ča kames."

¹¹ Ale o Saul pro dujto džives rozulađa le manušen pro trin partiji a sigeder, sar vidňisalila, gele andro taboris le Ammončanengero. Murdarkerde le Ammončan dži ko dilos, sar sas nektateder. Ola aver murša pes rozdenašle avke, hoj na sas lendar aňi duj, save ačhilehas jekhetane.

¹² Akor o manuša phende le Samueloske: "Kaj hine ola manuša, save phende, hoj na kamen le Saul kraliske? An amenge len avri a murdaraha len!"

¹³ Ale o Saul odphendā: "Adadžives na murdaraha ňikas, bo adadžives o RAJ zachraňindā le manušen andral o Izrael."

¹⁴ Palis o Samuel phendā le manušenge: "Aven, džas andro Gilgal a ode pale phenaha, hoj ov hino amaro kralis." ¹⁵ Avke savore gele andro Gilgal a pale priile le Saul vaš peskero kralis a kerde anglo RAJ smiro-moskere obeti. O Saul the savore manuša andral o Izrael ode igen radisašonas.

O Samuel prevakerel ko Izraeliti

12 Palis o Samuel phendā le Izraelitenge: "Kerđom savoro, so mandar mangenas, a diňom tumen kralis. ² Akana ov tumen lidžala. Me imar sphurilom a šivisalilom, ale mire čhave hine maškar tumende. Lidžavas tumen mire terňipnastar dži adadžives. ³ Kade som. Odphenen mange anglo RAJ the anglo kralis, savo sas pomakhlo: Či varekaske tumendar ilom la gurumňa? Abo varekastar le somaris? Kas občorardom abo thodom leha avri? Džavas pre varekaste zoraha? Priilom varekastar love andre žeba? Te he, da-va tumenge oda pale!"

⁴ Odphende leske: "Na! Tu na džahas pre ňikaste zoraha, aňi na thovehas ňikaha avri a aňi ňikastar na ilal ňič."

⁵ Phendā lenge: "Adadžives hin tumenge o RAJ o švedkos the leskero pomakhlo kralis, hoj paš ma ajsa ňič na arakhlan."

"He, hino amenge švedkos," phende leske.

⁶ O Samuel phendā le manušenge: "Švedkos hin o RAJ, savo ačhađa le Mojžiš le Aronoha a ligenda avri tumare daden andral o Egipt. ⁷ Akana ačhen ade, hoj tumen te sudzinav anglo RAJ pal savore leskere čačipnaskere skutki, so presikađa tumenge the tumare dadenge.

⁸ Sar avla o Jakob andro Egipt a tumare dada vičinenas ko RAJ, hoj lenge te pomožinel, bičhađa le Mojžiš the le Aron. On ligende avri odarik tumare daden a thode len te bešel pre kada than. ⁹ Ale tumare dada bisterde pro RAJ, pre peskero Del, vašoda len diňa andro vasta le Siseroske, savo sas o velitelis upral o murša

andral o Chacor, the andro vasta le Filištinenge the le kraliske andral o Moab, save gele pre lende pro mariben. ¹⁰ Akor vičinenas ko RAJ, hoj lenge te pomožinel, a phenenas: 'Binošne sam, bo omuklam le RAJES a chudlam te lašarel le devlen le Baal the la Aštarta. Ale akana, te amen cirdeha avri andral o vasta amare ňeprijatelenge, služinaha tuke.' ¹¹ Avke o RAJ bičhađa le Gideon †, le Barak ††, le Jeftah the le Samuel, hoj tumen te cirden avri andral o vasta tumare ňeprijatelenge, save sas pašal tumende. Palis šaj bešlan pale andro smirom. ¹² Sar dikhlan, hoj pre tumende džal o Ammoniko kralis o Nachaš, phendan mange: 'Na! Amen kamas kralis, savo amen lidžala,' choc tumaro kralis sas o RAJ, tumaro Del.

¹³ Akana tumen hin kralis, saves peske ilan avri a manglan. O RAJ les ačhađa upral tumende. ¹⁴ Te darana le RAJESTAR, te leske služinena a šunena les, te kerena pal oda, so tumenge phenel, kada sikavela, hoj tumen the tumaro kralis džan mištes pal o RAJ, tumaro Del. ¹⁵ Ale te les na šunena a na kerena oda, so tumenge phenel, o RAJ tumen the tumare kralis čačes marelā, avke sar marelās the tumare daden. ¹⁶ Avke ačhen ade a dikhen, sar o RAJ kerela baro znaenje angle tumende. ¹⁷ Či nane ipen o časos te skidel upre o ulipen? Ale me mangava le RAJES, hoj te bičhavel zoralo brišind le perumenca, hoj korkore pre oda te aven, sar kerđan igen namištes anglo RAJ, hoj peske manglan kralis."

¹⁸ Avke o Samuel vičinelas pro RAJ a o RAJ diňa zoralo brišind le perumenca. Savore manuša chudle te daral le RAJESTAR the le Samuelostar.

¹⁹ Phende le Samueloske: "Mang le RAJES, tire Devles, vaš tire služobnika, hoj te na meras. Ke savore peskere bini pridiňam the aver binos, hoj peske manglam kralis."

²⁰ "Ma daran tumen!" odphendā lenge o Samuel. "Choc kerđan ajci nalačhipen, ča ma odvisaren pes le RAJESTAR, ale služinen leske cale tumare jileha. ²¹ Ma džan pal aver devla, saven nane zor tumenge te pomožinel aňi te zachraňinel, bo nane pre ňisoste. ²² O RAJ na omukela tumen prekal peskero baro nav, bo ačhel peske vašoda, hoj tumendar te kerel peskere manušen. ²³ Te na ačhel pes mange, hoj te kerav binos anglo RAJ oleha, hoj man preačhava te modlinel vaš tumende. Kamav tumen te sikavel furt oda, so hin lačo the čačipnaskero. ²⁴ Daran le RAJESTAR a služinen leske pačivalones andral calo tumaro jilo. Ma bisteren pre ola bare skutki, so kerđa prekal tumende! ²⁵ Ale te kerena dureder bini, merena the tumare kraliha."

O Samuel dovakerel le Sauloske

13 O Saul sas imar kralis berš. Andro dujto berš, sar kralinelas upral o Izrael, ² peske kidňa avri le Izraelitendar trin ezera (3 000) muršen: Duj ezera (2 000) sas le Sauloha andro Michmas the pro brehi an-

† E Hebrejiko čhib: Jerubbaal †† E Hebrejiko čhib: Bedan

dro Betel a ezeros (1 000) le Jonatanoha andre Benjaminiko phuv andre Gibeja. Oklen bičhađa khere.

³ O Jonatan geľa pro Filištínike slugađa andre Geba a savore Filištínci pes pal oda došunde. Akor o Saul diňa te trubinel pro rohos andre calí phuv a phendá: "Mi šunen o Hebreja!" ⁴ Avke savore Izraeliti pes pal oda došunde, hoj o Saul murdarda le Filištínike slugađen. Aleha len o Filištínci mek buter našti avri ačhenas. O Izraeliti sas zvičimen andro Gilgal.

⁵ O Filištínci pes jekhetane zgele pro mariben pro Izraeliti. Sas len 30 000 verdana, 6 000 murša pro graja the ajci slugađa sar poši paš o moroskero brehos. On avle andro Michmas pro vichodos le Bet-Avenostar a kerde peske ode taboris. ⁶ Sar o Izraeliti rozprindžarde, hoj o Filištínci hine zoraleder a o mariben prekhelena (prehrajnena), gele pes te garuvel andro jaskiňi, andro cheva, maškar o bare bara the andro chaňiga. ⁷ Varesave Hebreja pregele prekal o Jordan andre phuv Gad the Gilead.

O Saul ačhiľa andro Gilgal a leskere murša, save džanas pal leste, andre dar izdranas. ⁸ O Saul užarelas mek efa dživesa, avke sar leske phendá o Samuel. Ale o Samuel na avelas andro Gilgal a o murša pes odarik rozgele. ⁹ O Saul phendá: "Anen mange e labardi the smiromoskeri obeta." Avke obetinda labardi obeta. ¹⁰ Paloda, sar obetinda, avľa o Samuel. O Saul džalas anglal leste, hoj les te pozdravinel.

¹¹ "So tu kerdal?" phučľa o Samuel.

O Saul odphendá: "Dikhľom, hoj mire nipi džan mandar het a tu na avľal pre oda časos, sar mange phendal. Sar dikhľom, hoj pes o Filištínci imar zdžan andro Michmas pro mariben, ¹² phendom peske: 'O Filištínci šaj aven akana pre mande andro Gilgal a me man mek na mangľom ko RAJ, hoj te el amenca', vašoda šundom andre mande, hoj mušnav te obetinel labardi obeta."

¹³ "Oda, so kerdal, sas diliňipen," phendá leske o Samuel. "Tu na šundal, so tuke phendá o RAJ, tiro Del. Te šundalas, o RAJ tuke the tira famelijake diňahas pro furt o krališagos upral o Izrael. ¹⁴ Ale akana imar tiro krališagos na obačhola. O RAJ peske imar arakhľa muršes pal peskero jilo, savo lidžala leskere manušen, bo na kerdal avke, sar tuke phendá."

¹⁵ Avke o Samuel geľa andral o Gilgal andre Benjaminiko phuv Gibeja. O Saul zgendá le muršen, save ačhile leha a sas lendar vaj šov šel (600) murša.

O Izraeliti bijal o zbraňi

¹⁶ O Saul, leskero čhavo Jonatan the leskere murša, save sas lenca, peske kerde taboris andre Geba, medik o Filištínci sas andro Michmas. ¹⁷ Andral o Filištíniko taboris gele trin partiji murša, hoj te občoraren o gava. Jekh partija džalas ke Ofra andre phuv Šual, ¹⁸ dujto džalas ko Bet-Choron the trito upre pro brehos, khatar dičhol e Cebojimiko dolina the e pušta.

¹⁹ Andre ola dživesa o Filištínci na mukle ňisave kovačis te kerel peskeri buči andro Izrael. Bo peske phende: "Našti domukas, hoj o Hebreja te kerel peske

šabli the kopiji." ²⁰ Vašoda savore Izraeliti džanas ko Filištínci peske te zaostrarel o pluhos, e motika, o tover abo o kosakos. ²¹ Sar kamenas te zaostrarel o pluhos the e motika, počinenas vaš oda duvar ajci rupune sar vaš o tover the vaš e paca, savaha traden le gurnuňen.

²² Avke andre oda džives, sar sas o mariben, na sas šabľa aňi kopija ňikas le muršendar, save sas le Sauloha the le Jonatanoha. Ča le Saul the le Jonatan sas.

²³ O Filištínci bičhade jekh partija muršen, hoj te merkinen andro Michmas pro verchengero drom.

O Jonatan džal pro mariben pro Filištínci

14 Andre jekh džives phendá o Jonatan, o čhavo le Sauloskero, terne manušeske, savo lidžalas leskere zbraňi: "Av, džas prekal o Filištíniko taboris, so hin pre aver sera." Ale peskere dadeske oda na phendá.

² O Saul pes zľikerelas paš o foros Gibeja tel o granatoskero stromos andro Migron. Paš leste sas vaj šov šel (600) murša. ³ Akor o rašaj Achijah hordinelas o efodos. Ov sas o čhavo le Achituboskero, savo sas o phral le Ikabodoskero, savo sas o čhavo le Pinchasoskero, saveske sas o dad o Eli, o rašaj le RAJESKERO andro Šilo. O nipi na džanenas pal oda, hoj o Jonatan geľa het.

⁴ Prekal o verchengero drom, pal savo kamelas o Jonatan te predžal ko Filištíniko taboris, sas duj bare skali, jekhake sas Bocec the dujtonake Senne. ⁵ E skala pro severos ačhelas sar o slupos anglo Michmas a e dujto skala ačhelas pro juhos angle Geba.

⁶ O Jonatan phendá le terne muršeske, savo hordinelas leskere zbraňi: "Av, džas prekal o Filištíniko taboris ke ola naobčhinde (naobrezimen). Šaj el, hoj amenge o RAJ pomožinela. Bo nič les našti zaačhavel ke oda, hoj amenge te del te ňerinel (zvitazinel), či sam but vaj frima."

⁷ "Ker sa avke, sar kames," odphendá leske oda murš. "Ča džá. Avava tuha andre savoreste."

⁸ O Jonatan phendá: "Av, kempel pes amenge te dochudel ke ola murša a te sikavel pes lenge. ⁹ Te amenge phenena: 'Ačhen, medik na džaha ke tumende,' ačhaha pre oda than a na džaha. ¹⁰ Ale te phenena: 'Aven upre ke amende,' akor džaha, bo ada amenge sikavela, hoj o RAJ len amenge diňa andre amare vasta."

¹¹ Avke pes sodujdžene sikade le Filištínenge a on lenge phende: "Dikhen, o Hebreja aven avri andral o cheva, kaj sas garude!" ¹² Androda o Filištínci vičinenas pro Jonatan the pro terno murš: "Aven upre ke amende, vareso tumenge kamas te sikavel."

O Jonatan phendá peskere muršeske: "Av manca, bo o RAJ len diňa andro vasta le Izraelitenge." ¹³ O Jonatan pes cirdelas le vastenca the le pindrenca upre pre skala a o terno murš džalas pal leste. Sar o Jonatan len marelas, o Filištínci perenas tele anglal leste a pal leste oda terno len murdarelas. ¹⁴ Oda sas ešebno (peršo) mariben le Jonatanoskero the leskere terne

muršeskero. Medik pregele tranda (30) metri, murdarde biš (20) muršen.

O Saul ņerinel upral o Filištinci

¹⁵ Andro taboris, pre maŝa the vŝadzik maŝkar o manuŝa avŝa bari dar. Predarandile the o slugađa the ola, save gele te občorarel, a the e phuv zarazisaŝiŝa. Kada savoro kerđa o Del.

¹⁶ Le Sauloskere murŝa, save merkinenas andre Benjaminiko phuv Gibēja, dikhle, sar o Filištinci denaŝk-eren upre tele sar bi e godi. ¹⁷ Akor o Saul phendā olenge, ko sas leha: "Zgenen savore muršen a dikhen, ko amarendar geŝa het." Sar ada kerde, dikhle, hoj o Jonatan the leskero sluhās ode nane.

¹⁸ O Saul phendā le Achijoske: "An ade le Devleskeri Zmluvakeri Archa." Bo oda časos sas e Archa ko Izraeliti. ¹⁹ Medik o Saul vakerelas le raŝaha, e vika andro taboris sas furt zoraleder. Vaŝoda phendā o Samuel le raŝaske: "Muk oda avke!"

²⁰ O Saul the savore nipi, save sas leha, pes jekhetane zgele a gele ode, kaj sas o mariben. Paŝis dikhle, hoj o Filištinci andre bari dar ačhile sar bi e godi a maŝkar peste pes murdarkerenas. ²¹ O Hebreja, save sas dži akor le Filištinenca, gele lenca andro taboris a visarde pes pale ko Izraeliti, save sas le Sauloha the le Jonatanoha. ²² Sar savore Izraeliti, save sas garude andro Efrajimike brehi, pes dodžanle, hoj o Filištinci denaŝle het, gele the on pro mariben. ²³ Oda dživēs o RAJ zachrañinda le Izraeliten a o mariben sas dži pal o Bet-Aven.

O Jonatan chal o medos

²⁴ Choc o Izraeliti andre oda dživēs imar na birinenas, o Saul len phandŝa kala veraha: "Prekoŝlo ela dojekh, ko chala vareso dži rači!" Avke ņiko pes le chabenestar na chudŝa.

²⁵ Savore murŝa gele andro veŝ, kaj vŝadzik sas medos. ²⁶ Sar ode gele, zbačinde, hoj ode hin pherdo medos, ale ņiko lendar na koŝtoŝinda oda medos, bo o nipi daranas pes le Sauloskere prekoŝibnastar. ²⁷ Ale o Jonatan pal oda na džanelas, hoj leskero dad phandŝa la veraha le muršen. Iŝa e paca, so leste sas andro vast, a lakere agoreha ispidña andro medos a okoŝinda. Takoj sas leske feder †. ²⁸ Jekh le murŝendar leske phendā: "Tiro dad phendā le murŝenge, hoj prekoŝlo ela oda, ko adadžives vareso chala. Vaŝoda o murŝa hine bi e zor."

²⁹ O Jonatan phendā: "Miro dad andā amare muršen andre bari bibach. Dikhen, sar akana mange hin feder, so koŝtoŝindom sikra ole medostar. ³⁰ Te ča o murŝa ŝaj adadžives chalehas olestar, so peske zaile le ņepri-jatēfendar, či na uŝahas o ņerindipen (vitāztvo) baro upral o Filištinci?"

³¹ Oda dživēs murdarkerenas o Izraeliti le Filištinen le Michmasostar dži ko Ajalon a o manuŝa meksa buter na birinenas. ³² Andre odi bari bokh o murŝa chučile

pro stadi, pro bakre, pro guruva the pro terne gurumña, rozčhingerenas len pre phuv a chanas o mas the le rateha. ³³ Vareko le Sauloske phendā: "Dikh, o murŝa kerde binos anglo RAJ, bo chale o mas le rateha."

"Hine napačivale anglo RAJ!" phendā o Saul. "Takoj ke ma kotulinen o baro bar." ³⁴ Paŝis mek phendā:

"Rozdžan pes maŝkar o manuŝa a phenen lenge, hoj dojekh mi anel ke ma peskero guruv abo bakres. Pre kada bar len murdarena a chana, hoj te na keren binos anglo RAJ oleha, hoj chaŝanas o mas le rateha."

Odi rat savore manuŝa ande peskere guruven a ode len murdarde. ³⁵ Paŝis o Saul ačhađa le RAJESKE oltaris. Sas eŝebno, so kerđa.

³⁶ O Saul phendā le murŝenge: "Džas rači pro Filištinci a murdarkeras len dži tosara. Na mukaha lendar ņikas te dživel!"

"Ker avke, sar džanes," on odphende.

Ale o raŝaj Achijah phendā: "Džas eŝeb ade te phučel le Devlestar."

³⁷ Avke o Saul phučelas le Devlestar: "Majinas te džal pro Filištinci? Deha amenge len andro vasta?" Ale oda džives o Del leske na odphendā.

³⁸ Akor o Saul vičinda le vodcen the peskere muršen a phendā lenge: "Savo binos sas adadžives kerdo, hoj amenge o Del na odphenel? ³⁹ Avke sar dživel o RAJ, o zachrancas le Izraeloskero, choc oda hin miro čhavo o Jonatan, muŝinela te merel." Ale ņiko leske pre ada na phendā ņič.

⁴⁰ O Saul phendā cale Izraeloske: "Ačhaven pes pre jekh sera, medik me the miro čhavo o Jonatan ačhaha pre dujto sera."

"Ker avke, sar hin tiri dzeka," odphende o manuŝa le Sauloske.

⁴¹ Akor o Saul pes modŝinelas ko RAJ: "Ó, Devla le Izraeloskero, de mange te prindžarel o čačipen pal kala bara ††." O losos sikađa pro Jonatan the pro Saul, hoj on kerde binos a na o manuŝa. ⁴² O Saul phendā: "Čhiven o losos maŝkar mande the miro čhavo Jonatan." A o losos sikađa pro Jonatan.

⁴³ Akor phučŝa o Saul le Jonatanostar: "Phen mange, so kerđa?"

Pre oda leske o Jonatan odphendā: "Ča le pacakere agoreha, so ŝikeras andro vast, koŝtoŝindom sikra medos. Kade som. Mi merav."

⁴⁴ "Mi marel man igen zorales o Del, te tu na mereha!" phendā o Saul.

⁴⁵ Ale o manuŝa phučle le Saulostar: "Muŝinel te merel o Jonatan, savo andā baro ņerindipen andro Izrael? Kada pes te na ačhel! Sar dživel o RAJ, na perela aňi bal pal leskero ŝero pre phuv! Se kada, so adadžives kerđa, kerđa le Devleha!" O manuŝa kaleha zachrañinde le Jonatan, hoj na muŝinda te merel.

⁴⁶ Paŝis o Saul preačhiŝa te džal pal o Filištinci a on gele pale andre peskeri phuv.

† E Hebrejiko čhib: leske phundrile o jakha

†† E Hebrejiko čhib: Tummim

Le Sauloskere ņerindĭpena

⁴⁷ Sar o Saul preiĭa o kraliŝagos upral o Izrael, dŝalas pro mariben pre savore peskere ņeprijatĕla: pro Moabĉana, Ammonĉana, Edomĉana the pro Filiŝtinci the pro kraĭa andral e Coba. Vŝadzik, kaj o Saul dŝalas, ņerinelas. ⁴⁸ Marelas pes igen zorales. ņerindĭa upral o Amaleka a zachraĭindĭa le Izrael olendar, save pre lende dŝanas.

Le Sauloskeri famelija

⁴⁹ Le Sauloskere ĉhave sas o Jonatan, o Jiŝvi the o Malki-Ŝua. Leskeri phureder ĉhaj pes viĉinelas Meraba a e terneder Mikal. ⁵⁰ Le Sauloskeri romĭni sas e Achinoama, e ĉhaj le Achimaacoskeri. O velitĕlis le slugadengero sas o Abner, o ĉhavo le Neroskero, le Sauloskere baĉiskero. ⁵¹ Le Sauloskero dad o Kiŝ the le Abneroskero dad o Ner sas ĉhave le Abijeloskere.

⁵² Medik dŝivelas o Saul, sas igen zorale maribena le Filiŝtinenca. Sar o Saul dikhelas varesave zorale murŝes, savo pes na daralas, thovelas les ke peskere slugaĉa.

O mariben le Amalekenca

15 Andre jekh dŝives phendĭa o Samuel le Sauloske: "Sas oda o RAJ, savo man biĉhaĉa tut te pomakhel vaŝ o kralis upral leskere manuŝa andral o Izrael. Akana ŝun, so tuke phenel o RAJ: ² 'Marava le Amaleken vaŝ oda, so kerde le Izraelitenca, hoj gele pre lende pro mariben, sar dŝanas avri andral o Egipt. ³ Vaŝoda akana dŝa pro Amaleka a zĭiĉin len savoreha, so len hin. Ma muk ņikas ode te dŝivel, ale murdar savoren: le murŝen le dŝuvlijen, le ĉhavoren the olen, save pijen andral o kolĭn, the le gurunĭnen, bakren, ŝaven the somaren!' "

⁴ Avke o Saul zviĉindĭa peskere murŝen andro Telaim a zgenda len. Sas jekhetane 200 000 slugaĉa andral o Izrael the 10 000 murŝa andral e Judsko phuv. ⁵ O Saul dŝalas peskere murŝenca ko foros le Amalekengero. Garude pes andre dolina a uŝarenas. ⁶ Le Kenitenge phendĭa: "Dŝan het le Amalekendar, hoj tumen te na murdarav jekhetane lenca. Se presikaĉan o laĉhipen le Izraelitenge, sar dŝanas avri andral o Egipt." Avke o Keniti lendar odgele.

⁷ O Saul geĭa pro mariben pro Amaleka a marelas pes lenca le Chavilatar dŝi ko Ŝur, so hin pro vichodos le Egiptostar. ⁸ Murdarda savore Amaleken, ale lengere kralis le Agag mukĭa te dŝivel. ⁹ O Saul the leskere murŝa na murdarde le Agag, aĭni ola nekfeder dŝvirina le bakrendar, gurunĭendar the kozendar. Na kame-nas len te zĭiĉinel, ĉa olen, save sas nalaĉhe the nas-vale.

¹⁰ O RAJ phendĭa le Samueloske: ¹¹ "Bajinav, hoj aĉhaĉom le Saul kraliske, bo pes mandar visarda a na ŝunda mire prikazaĭja." O Samuel sas igen cholĭamen a cali rat zorales viĉinelas ko RAJ.

¹² Palis sig tosara uŝiĭa o Samuel a geĭa pal o Saul, ale doŝunda pes, hoj o Saul geĭa andro Karmel, hoj ode te aĉhavel bar, hoj pre leste te leperen, a palis pes visarda a geĭa tele andro Gilgal.

¹³ Sar o Samuel avĭa, o Saul leske phendĭa: "O RAJ tut mi poŝehĭinel! Kerĉom oda, so mange o RAJ phendĭa."

¹⁴ "A ola bakre the gurunĭna? So len ŝunav avke te murĉinel?" phuĉĭa lestar o Samuel.

¹⁵ O Saul odphendĭa: "O slugaĉa len ande khatar o Amaleka a na murdarde len, ale mukle oda nekfeder le bakrendar the le gurunĭendar, hoj oda te obetinen le RAJESKE, tire Devleske. Oda, so aĉiĭa, murdarde."

¹⁶ "Ĉhit!" phendĭa leske o Samuel. "Ŝun, so mange adi rat o RAJ phendĭa."

"Vaker," odphendĭa o Saul.

¹⁷ "Choc te andre peskere jakha salas cikno," phendĭa leske o Samuel, "salas aĉhado sar nekbareder maŝkar o Izraeliti a o Raj tut pomakĭĭa vaŝ o kralis upral o Izrael. ¹⁸ Palis tut o RAJ biĉhaĉa a phendĭa: 'Dŝa ko binoŝne Amaleka a mar tut lenca, medik savoren na murdareha avri.' ¹⁹ Soske na ŝundĭal le RAJES, ale siĉarehas tuke oda te lel a kerĉal oda, so nane le RAJESKE pre dzeka?"

²⁰ "Ale me le RAJES ŝundĉom," odphendĭa o Saul.

"Geĭom ode, kaj man biĉhaĉa, andĉom le kralis Agag a murdarĉom savore Amaleken. ²¹ Ale mire murŝa odi nekfeder dŝvirina na murdarde, ale ile len andro Gilgal, hoj te anen len sar obeta le RAJESKE, tire Devleske."

²² Ale o Samuel phendĭa:

"Ĉi o RAJ kamel buter o labarde vaj aver obeti sar oda, hoj les te ŝunas?"

Prekal leste hin feder sar obeta, te les ŝunas; a te del les paĉiv hin feder sar o ŝiros le bakrengero.

²³ Se e vzbura hiĭni ajsi sar le vraŝcengero binos a te ispidel pes naŝilu anglal hin binos avke, sar te laŝarel le modlen.

Tu odĉidĭal tutar o lav le RAJESKERO, vaŝoda the ov tut odĉidĭa, hoj imar te na aves kralis."

²⁴ "He, kerĉom binos," phendĭa o Saul le Samueloske.

"Na dolikerĉom o prikazaĭje le RAJESKERO aĭni tiro. Kerĉom oda, so kamenas mire murŝa, bo daravas lendar. ²⁵ Mangav tut, odmuk mange miro binos a av manca pale, kamav te laŝarel le RAJES."

²⁶ "Na visarava man tuha pale," phendĭa leske o Samuel, "bo na ŝundĭal o prikazaĭje le RAJESKERO. O RAJ tutar odlĭĭa o kraliŝagos upral o Izrael."

²⁷ Sar pes o Samuel visarda, hoj te dŝal het, o Saul leske zachudĭa o agor le plaŝĉoskero a odĉhindĭĭa. ²⁸ O Samuel phendĭa le Sauloske: "Kavke adadŝives o RAJ odĉindĭa tutar o Izraeloskero kraliŝagos a dela les varekaske, ko hin feder sar tu. ²⁹ Ov, savo hin e Slava le Izraeloskeri, aĉhel pre peskero lav a na ĉerinel oda, so phendĭa. Ov nane sar manuŝ, savo lel peskere lava pale."

³⁰ "Kerĉom binos," phendĭa o Saul. "Ale mangav tut! Presikav mange e paĉiv anglo phuredera the anglo Izraeliti. Visar tut manca pale, hoj te dŝav te laŝarel le

RAJES, tire Devles." ³¹ Avke o Samuel geľa pale le Sauloha a o Saul lašarelas le RAJES.

³² Palis o Samuel phendā: "Anen mange le Amaleken-gere kralis le Agag."

O Agag avelas ke leste bi e dar. Gondolinelas andre peste: "Čačas, imar obgeľa man o meribnaskero pharipen."

³³ Ale o Samuel phendā: "Sar tu tira šablaha lehas le džuvlendar lengere čhaven, avke the tiri daj ela bi o čhave maškar o džuvlija!"

Avke o Samuel rozčingerďa le Agag anglo RAJ andro Gilgal.

³⁴ Palis o Samuel geľa andre Rama a o Saul geľa khere andre Gibeja. ³⁵ O Samuel imar na dikhľa le Saul dži ke peskero meriben a sas leske pharo pal leste. O RAJ igen bajinelas, hoj ačhaďa le Saul sar kralis upral o Izrael.

O David pomakhlo kraliske

16 O RAJ phendā le Samueloske: "Dži kana aveha smutno pal o Saul? Me lestar odilom o krališagos upral o Izrael. Akana pherar peskero rohos le olejoha a dža ko Izaj, savo bešel andro Betlehem, bo jekhe leskere čhavendar mange ilom avri vaš o kralis."

² "Sar šaj džav ode?" phučľa o Samuel. "Te pes pal oda došunela o Saul, murdarela man."

O RAJ leske phendā: "Le tuha terňa gurumňa a pheneha: 'Avlom te obetinel le Rajeske.' ³ Vičineha the le Izaj paš e obeta. Me tuke dava te džanel, so te keres. Pomakheha mange oles, kas tuke phenava."

⁴ O Samuel kerďa avke, sar leske o Raj phendā. Sar avľa andro Betlehem, o phuredera ole foroskere predarandile, gele ke leste a phučle: "Aves andro smirom?"

⁵ "He, andro smirom," odphendā o Samuel. "Avlom te obetinel le RAJESKE. Akana žužaren pes a aven manca ke smiromoskeri obeta." Palis sentňardā le Izaj the leskere čhaven a vičindā len paš e smiromoskeri obeta.

⁶ Sar ode avle a o Samuel dikhľa le Eliab, phendā peske: "Čačas, kada murš, savo ačhel ade anglo RAJ, hin leskero pomakhlo."

⁷ Ale o RAJ leske phendā: "Ma dikh pre oda, sar dičhol avral a savo učo hino, bo me mange les na kidňom avri. Me na dikhav avke sar o manuš. Bo o manuš dikhel ča le jakhenca, ale me dikhav andro jilo."

⁸ Palis o Izaj vičindā le Abinadab a andā les ko Samuel, ale o Samuel phendā: "Aňi les peske o RAJ na kidňa avri." ⁹ O Izaj andā angle leste le Šammah, ale ov phendā: "Aňi les o RAJ na kidňa avri." ¹⁰ Avke o Izaj andā angle leste peskere efa čhaven, ale ov phendā: "Aňi jekhes lendar o RAJ na kidňa avri." ¹¹ Palis o Samuel lestar phučľa: "Kala hine savore tire čhave?"

"Hin man mek jekh čhavo," odphendā o Izaj. "Hino le bakrenca pre maľa."

"Bičhav vaš leske," phendā leske o Samuel. "Mi avel ade, bo na bešaha pašal o skamind, medik ov na avela."

¹² Avke bičhaďa vaš leske a andā les. Ov sas lolo andro muj, sas les šukar jakha a dičholas igen mištes.

Akor o RAJ phendā: "Ušti a pomakh les, bo ov hin oda."

¹³ Avke o Samuel ila o rohos le olejoha a pomakhľa les anglal savore leskere phrala. Avke le RAJESKERO Duchos avľa pro David a sas pre leste ole dživesestar. Palis o Samuel uštıla a geľa andre Rama.

O David služinel le Sauloske

¹⁴ O Duchos le RAJESKERO odgeľa le Saulostar a o nalačo duchos, so sas bičhado le RAJESTAR, trapinelas les.

¹⁵ Akor leske phende o služobňika: "Dičhol, hoj o nalačo duchos, so sas bičhado le Devlestar, tut trapinel. ¹⁶ No akana phen tire služobňikenge, hoj te arakhen varekas, ko džanel te bašavel pre citara. Sar pre tu avela o nalačo duchos le Devlestar, ov tuke zabašavela a ela tuke mištes."

¹⁷ O Saul phendā le služobňikenge: "Arakhen mange manušes, savo džanel šukares te bašavel, a anen les ke mande."

¹⁸ Akor jekh lendar phendā: "Dikhľom le Izajoskere čhas, savo džanel te bašavel. Hino zoralo maribnaskero murš, savo mištes džanel te vakerel, šukares dičhol avri a o RAJ hino leha."

¹⁹ Avke o Saul bičhaďa ko Izaj le sluhen, hoj leske te phenen: "Bičhav ke mande tire čhas le David, savo hino paš o bakre." ²⁰ O Izaj ila le somaris, thoďa pre leste jekh gono mol, o maro the kozica a bičhaďa ko Saul peskere čhaha le Davidoha.

²¹ Avke o David avľa ko Saul a chudľa leske te služinel. O Saul peske les zakamľa a ačhaďa les sar oles, ko lidžal leskere zbraňi. ²² O Saul palis diňa te phenel le Izajoske: "Mi ačhel o David ke mande, bo igen hino mange pre dzeka."

²³ Kana ča avelas o nalačo duchos le Devlestar pro Saul, lelas o David e harfa. Sar bašavelas, le Sauloske sas feder, bo o nalačo duchos lestar oddžalas.

O David the o Golijaš

17 O Filištinci pes zgele pro mariben paš o Socho andre Judsko. Kerde peske taboris andro Efes-Dammim maškar o Socho the Azeka. ² The o Saul pes zgeľa le Izraelitencā, kerde peske taboris andre dolina Ela a rozačhade pes pro mariben pro Filištinci. ³ O Filištinci pes rozačhade pre jekh brehos a o Izraeliti pro dujto brehos; maškar lende sas dolina.

⁴ Jekh murš, o Golijaš andral o foros Gat, avľa avri andral o Filištinko taboris. Ov sas trin metri učo, ⁵ pro šero les sas bronzuňi prilba a sas pre leste urdo šupinato pancjeris le bronzostar, so važinelas penda the efa (55) kili. ⁶ Pro pindre les sas bronzune chraňiča a pro phike e bronzuňi kopija. ⁷ O kašt leskera kopijatar sas ajso thulo sar o kašt le strojoskero, pre savo pes keren o pochtana, a o trastuno špicos leskera kopijatar sas pharo vaj efa kili. Angle leste džalas o sluhas leskere štitoha.

⁸ O Golijaš geľa avri a vriskinelas pro Izraelike slugađa: "Soske avľan a rozačhadan pes pro mariben? Me som Filištincos a tumen san le Sauloskere sluhi. Len peske avri muršes a mi avel tele ke ma. ⁹ Te andro mariben ňerinela (zvitazinela) a murdarela man, avaha tumare sluhi. Ale te me ňerinava a murdarava les, tumen avena amare otroka a služinena amenge!" ¹⁰ A mek phendã: "Adadžives andom pre ladž le Izraeliten. Bičhaven mange varekas pro mariben!" ¹¹ Sar o Saul the savore Izraeliti šunde, so phendã o Golijaš, predarandile a izdranas andre dar.

¹² O David sas o čhavo le Efraťanoskero le Izajoskero andral o Judsko Betlehem, saves sas očno čhave. Andre oda časos, sar o Saul kralinelas, sas o Izaj imar phuro a našti džalas le muršenca andro mariben. ¹³ Ale leskere trin nekphureder čhave gele le Sauloha. Ešebno (peršo) pes vičinelas Eliab, dujto Abinadab the trito Šammah. ¹⁴ O David sas nekterneder. Ola trin nekphureder gele pal o Saul. ¹⁵ O David džalas ko Saul a avelas pale lestar, hoj te pasinel le dadeskere bakren andro Betlehem.

¹⁶ O Golijaš avelas anglo Izraeliti a hazdelas pes upral lende sako tosara the rači. Kavke kerelas saranda (40) dživesa.

¹⁷ Jekhvar o Izaj phendã peskere čhaske le Davidoske: "Le tuha deš kili peko dživ the kala deš mare a lidža oda peskere phralenge andro taboris. ¹⁸ Kala deš kotora siros lidža le veliteľiske, savo hino upral o ezera (1 000) murša. Dža, dikh, sar hin tire phralenge, a pheneha mange oda. ¹⁹ Bo gele le Sauloha the savore Izraelitencã pro mariben pro Filištinci andre dolina Ela."

²⁰ O David sig tosara uštilã a le bakren diňa jekhe pastjeriske. Palis pes pririchtindã a geľa, avke sar leske phendã o Izaj, leskero dad. Andro taboris avľa ipen akor, sar pes o Izraeliti rozačhade pro mariben a sar vriskinenas zorales. ²¹ O Izraeliti the o Filištinci pes rozačhade pro mariben jekh angle aver. ²² O David diňa o chaben le stražňikoske upral o veci a denašelas ko o Izraeliti. Sar ode avľa, phučelas le phralendar, sar lenge hine. ²³ Medik lenca vakerelas, avľa avri le Filištinnendar o Golijaš, lengero angluno slugadžis, savo sas andral o Gat, a pale lenge vakerelas ola lava, so anglođa. O David oda šundã. ²⁴ Sar savore Izraeliti dikhle ole muršes, chudle lestar te denašel, bo daranas pes.

²⁵ Varesavo Izraelitas phendã: "Dikhľan ole muršes, savo avľa avri? Kerel oda vašoda, hoj te anel pre ladž le Izraeliten. O kralis dela baro daros oles, ko les murdarela. Dela leske peskera čha romňake a leskeri famelija na mušinelã imar te počinel o daňe."

²⁶ O David phučľa le muršendar, save paš leste ačhenas: "So chudela oda, ko murdarela ole Filištincos a odlela e ladž andral o Izrael? So peske gondolinel kada naobčhindo (naobrezimen) Filištincos pal peste, hoj šaj avri asal le slugadžem le džide Devleskere?"

²⁷ A o manuša leske pale phende, so chudela oda, ko murdarela le Golijaš.

²⁸ Sar šundã le Davidoskero nekphureder phral o Eliab oda, so vakerel o David le muršenca, cholisaľiľa pre leste a phendã: "So tu ade keres? Paš kaste mukľal oda cikno stados pre puštã? So pes hazdes upre? Dikhav tiro nalačo jilo! Avľal, hoj čã te dikhes o mariben!"

²⁹ "So me akana kerđom?" phučľa lestar o David. "Se me man čã phučľom." ³⁰ Palis pes visardã ke aver murš a pale lestar oda phučľa. O manuša leske odphenenas avke sar ešebnovar (peršovar). ³¹ O murša šunde, so o David vakerelas, a gele oda te phenel le Sauloske. Avke o Saul bičhadã pal leste.

³² O David phendã le Sauloske: "Rajeja miro, te na daral pes ňiko kale Filištincostar. Tiro služobňikos džala a marela pes leha."

³³ "Na," odphendã o Saul, "našti tut leha mares, se sal mek terno a ov pes marel ciknovarbastar."

³⁴ Ale o David phendã le Sauloske: "Tiro služobňikos pasinelas peskere dadeskero stados. Varekana avelas o ľevos či medvedis a lelas avri andral o stados le bakrores, ³⁵ džavas pal leste, maravas les a cirdavas le bakrores leske avri andral o piskos. Sar avelas pre ma pale, chudavas les la meňatar a maravas les džĩ akor, medik les na murdaravas. ³⁶ Tiro služobňikos murdardã imar ľevos the medvedis a kada naobčhindo Filištincos doperela tiš avke, bo avri asalas le džide Devleskere slugadžem." ³⁷ O David mek phendã: "O RAJ, savo man avri cirdňa andral o pazura le ľevoskere the medvediskere, cirdela man avri the andral o vasta kale Filištincostar."

"Mištes," phendã le Davidoske o Saul. "Dža a o RAJ mi el tuha!"

³⁸ O Saul urďã upre le David andre peskere maribnaskere gada. Pro šero leske thoďã bronzuňi prilba a thoďã pre leste o pancjeris. ³⁹ O David peske priphandľa e šabľa pašal o gada a kamelas andre oda te phirel, ale phares leske oda sas.

"Na džananav man andre oda te čhalavel," phendã le Sauloske, "na som pre oda mek sikado." Avke oda pal peste čhidã tele. ⁴⁰ Iľa peskeri paca, kidňa peske pandž hladke barora andral o paňi a thoďã len andre peskeri pastjeriko zajdica. A le prakoha †, so les sas andro vast, džalas ke oda Filištincos.

⁴¹ O Golijaš džalas ko David the anglal leste o sluhã, savo lidžalas leskero štitos. ⁴² Sar dikhľa pro David, asalas les avri, bo sas mek ternoro the šukar čhavo, savo dičholas mištes avri. ⁴³ O Golijaš phendã le Davidoske: "So me som rikono, hoj aves pre ma le pacenca?" A chudľa les te prekošel peskere devlenca. ⁴⁴ Palis leske mek phendã: "Av ke mande, hoj te dav tiro ľelos te chal le čirikleng the la dziva džvirinake."

⁴⁵ O David leske odphendã: "Tu aves pre ma la šabľaha, kopijaha the le oštepoha, ale me pre tu džav andro nav le Nekzoraledere RAJESKERO, andro nav le Devleskero le Izraeloskere slugadžengero, saves avri asahas. ⁴⁶ Adadžives tut dela o RAJ andre mire vasta, murdarava tut a odčhinava tuke o šero. Dava te chal le

† E šňura la cipatar, prekal savi pes čhivelas o bara.

čiriklenghe the la dziva džvirinake o t'ela le Filištinen-gere slugadengere. Avke cali phuv sprindžarela, hoj le Izraeliten hin Del. ⁴⁷ Savore, save hine kade zgele, pes dodžanena, hoj le RAJESKE na kampil ko ņerindipen (vitžtvo) šablá aňi kopija, bo ada mariben hin le RAJESKERO, savo tumen dela andre amare vasta."

⁴⁸ Sar pes dochudľa o Golijaš pašes ko David, o David takoj denašľa avri pre leste pro mariben. ⁴⁹ Akor o David thođa andre peskeri zajdica o vast, iľa odarik jekh bar a le prakoha livinda andre leste. O bar pregeľa leske dži andro čekat a ov peľa le mujeha pre phuv.

⁵⁰ Kavke o David le prakoha the le bareha thođa tele a murdarda le Golijaš bijal e šablá.

⁵¹ Palis o David denašľa ko Golijaš a ačhađa pes upral leste. Cirdňa avri leske e šablá andral o sirimos, murdarda a odčhinda leske o šero.

Sar o Filištinci dikhle, hoj lengero nekzoraleder muřš muľa, rozdenašle pes. ⁵² O Izraeliti the o Judejci jekhetane denašenas bare vriskiřagoha pal o Filištinci dži ko Gat the ko brani paš o Ekron. O Filištinci, saven murdarde, pašlonas pro drom, sar pes džal andro Šaarajim dži ko Gat the ko Ekron. ⁵³ Sar o Izraeliti preačhile te džal pal o Filištinci, gele andre lengero taboris a ile peske odarik savoro, so mukle.

⁵⁴ O David iľa le Golijařiskero šero a figenda les andro Jeruzalem. Leskeri vizbroj peske thođa andro stanos.

⁵⁵ Sar o Saul dikhľa le David te džal avri pro mariben pro Golijaš, phučľa le Abnerostar, savo sas o velitelis upral o slugađa: "Abner, ko hin o dad kale terne čhaske?"

"Avke sar džives kralina, me čačes na džanav," odphenda leske o Abner.

⁵⁶ "Dodžan tut, ko hin leskero dad," phenda o Saul.

⁵⁷ Sar o David avelas pale pal oda, sar murdarda le Golijaš, o Abner les iľa anglo Saul le Golijařiskere šereha, so likerelas andro vast. ⁵⁸ O Saul lestar phučľa: "Ter-no muršeja, kaskero sal?"

"Som o čhavo tire služobňikoskero le Izajoskero andral o Betlehem," odphenda o David.

O Jonatan peske zakamľa le David

18 Paloda, sar o David dovakerđa le Sauloha, o Jonatan ačhila sar jekh duša le Davidoha a kamelas le David sar pes korkores. ² Andre oda džives o Saul iľa le David ke peste a na domukľa les, hoj te džal pale ko dad. ³ O Jonatan phandľa le Davidoha zmluva, bo kamelas les sar pes korkores. ⁴ Palis o Jonatan leske diňa pal peste o plaštos, peskere maribnaskere gada, e šablá, o lukos the o sirimos.

⁵ Vřadzik, kaj les o Saul bičhavelas pro mariben, sas le David bach. Vařoda les o Saul ačhađa upral peskere slugađa. Sas oda pre dzeka savore manuřenge the le Sauloskere služobňikenge.

O Saul kamel te murdarel le David

⁶ Sar o David murdarda le Golijaš a visarelas pes pale, avle avri o džuvlija andral savore Izraelike fori bare giľavipnaha a khelenas anglo kralis Saul le bubnena the le bařavibnaha pre citara the pre harfa. ⁷ O džuvlija paš o kheliben giľavenas:

"O Saul murdarda ezeren (1 000), ale o David deř ezeren (10 000)!"

⁸ Kada le Saul igen chořarda, bo oda giľavipen leske na sas pre dzeka. Phenda peske: "Pal o David phenen, hoj murdarda deř ezeren (10 000) a pal ma, hoj ča ezeren (1 000). Imar ča o kraliřagos leske kampil!" ⁹ Ole dživesestar o Saul pro David dikhelas bange jakhenca.

¹⁰ Pre aver džives avľa pro Saul o nalačo duchos le Devlestar, hoj ačhila sar bi e gođi andro kher. O David bařavelas pre citara avke sar furt a o Saul likerelas andro vast e kopija. ¹¹ O Saul peske phenda: "La kopijaha premarava le David dži ke fala." Čhida la kopijaha, ale o David pes čhalada pre aver sera. Oda pes duvar ačhila.

¹² O Saul chudľa te daral le Davidostar, bo o RAJ sas leha, ale lestar odgeľa. ¹³ Vařoda o Saul le David bičhađa het pestar. Ačhađa les sar velitelis upral o ezeros (1 000) slugađa, saven o David lidžalas andro maribena. ¹⁴ Le David sas bach andre savoreste, so kerelas, bo o RAJ sas leha. ¹⁵ Sar o Saul dikhľa, savi bari bach les hin, mek buter lestar daralas. ¹⁶ Savore Izraeliti the Judejci peske zakamade le David, bo sas lengero vodcas, savo len lidžalas andro maribena.

O David le Sauloskero džamutro

¹⁷ O Saul phenda le Davidoske: "Dikh, kade hiňi miri nekphureder čhaj e Meraba. Dava tuke la romňake, ča služin mange bi e dar a lidža le RAJESKERE maribena." Bo o Saul peske phenda: "Te na merel mire vastestar, ale le Filištínike vastestar."

¹⁸ Ale o David leske odphenda: "Ko som me vaj miri dadeskeri famelija the fajta andro Izrael, hoj te avav le kraliskero džamutro?" ¹⁹ Ale sar avľa oda časos, hoj o Saul majinda te del peskera čha la Meraba le Davidoske vař e romňi, diňa la le Adrijeloske andral e Mechola.

²⁰ Ale leskeri dujto čhaj e Mikal pes zakamľa andro David. Sar oda le Sauloske phende, sas oda leske pre dzeka. ²¹ O Saul peske phenda: "Dava leske la, mi el leske sar pasca, hoj les o Filištinci te murdaren." Avke o Saul phenda pale le Davidoske: "Mek adadžives řaj aves miro džamutro." ²² Palis o Saul phenda peskere služobňikenge, hoj leske te phenen: "O kralis peske tut čačes zakamľa a savore leskere služobňikenge sal pre dzeka. Vařoda ačh leskero džamutro."

²³ Sar vakerenas le Sauloskere služobňika le Davidoske kala lava, ov phenda: "Gondolinen tumenge, hoj ča avke řaj ačhav le kraliskero džamutro? Se me som čoro a na som nič."

²⁴ Palis o služobníka sa phende avri le Sauloske.
²⁵ Androda o Saul phendá: "Džan ko David a phenen leske: 'O kralis na kamel nisave dari, ale ča oda †, so sikavela, hoj murdardal šel (100) Filištinen, hoj te visarel pale peskere neprijateľenge.'" O Saul kamla, hoj o David te merel le Filištínike vastestar.

²⁶ O služobníka oda gele te phenel le Davidoske. Sar ada šunda, sas leske oda pre dzeka, hoj te el le kraliskero džamutro. Mek sigeder, sar oda časos pregeľa, ²⁷ o David pes mukla pro drom peskere muršenca a murdarda duj šel (200) Filištinen. Anda le kraliske oda, so lestar kamelas, hoj palis avke te ačhel leskero džamutro. Palis o Saul diňa peskera čha la Mikal le Davidoske romňake.

²⁸ Sar o Saul dikhla a sprindžarda, hoj o RAJ hino le Davidoha a leskeri čaj e Mikal les kamel, ²⁹ meksa buter daralas le Davidostar a ačhila leskero neprijateľis pro furt.

³⁰ O Filištínike veliteľa dureder džanas pro mariben pro Izrael, ale sar džanas pre lende, o David furt narinelas (zvitazinelas) buter sar aver o služobníka le Sauloskere. Aleha peske kerđa o David baro nav.

O Saul kamel te murdarel le David

19 O Saul phendá peskere čhaske le Jonatanoske the savore služobnikenge, hoj kamel te murdarel le David. Ale o Jonatan peske le David igen zakamla, ² vašoda diňa leske te džanel: "Miro dad tut kamel te murdarel, merkin pre tu tajsa tosara. Garuv tut. ³ Me džava pre maľa mire dadeha ode, kaj aveha garudo. Vakerava leha pal tu, a te man vareso dodžanava, phenava tuke."

⁴ O Jonatan zaačhelas vaš o David anglal peskero dad Saul a vakerelas: "Te na kerel o kralis binos pre peskero služobnikos pro David. Se ov tuke na kerđa nič nalačo, ale oda, so kerelas prekal tu, sas igen mištes."

⁵ Choc džanelas, hoj les oda mola o dživipen, murdarda le Filištincos a avke o RAJ pomožinda cale Izraeloske ko baro neriňipen (vitaztvo). Se korkoro oda dikhlal a radisaľohas. Te ov tuke na kerđa nič nalačo, soske akana kames te kerel binos oleha, hoj les murdareha? Nane tut vaš soske les te murdarel."

⁶ O Saul šunda le Jonatan a iľa vera: "Avke sar dživel o RAJ, o David na ela murdardo". ⁷ Avke o Jonatan vičinda le David a phendá leske savore lava, so vakereľas. Palis les anda anglo Saul a o David leske služinelas avke sar angloda.

⁸ Sar sas pale o mariben, o David geľa andro mariben pro Filištinci a domarda savoren avke, hoj denašenas anglal leste.

⁹ Sar sas o Saul andre peskero kher a andro vast les sas kopija, avľa pre leste pale o nalačo duchos le RAJESTAR. O David bašavelas pre citara. ¹⁰ O Saul les kamla te pridemel la kopijaha ke fala. Ale ov geľa pre sera a e kopija pregeľa pašal leste andre fala. Odi rat o David pes zachraňinda oleha, hoj denašľa.

† E Hebrejiko čhib: o muršikane garude udi le Filištinenandar

O David denašel le Saulostar

¹¹ Palis o Saul bičhađa peskere muršen andro kher ko David, hoj pre leste te merkinen a tosara les te murdaren. E Mikal, le Davidoskeri romňi, leske phendá: "Džal pal tiro dživipen. Te na denašeha kađi rat, tajsa aveha murdardo." ¹² Avke e Mikal zmukla le David prekal e oblaka avri a ov denašľa het. ¹³ E Mikal palis iľa le kherutune devlores, thođa les pro haďos, pro šero leske thođa kozakero kožuchos a učarda andre la lep- edaha.

¹⁴ Sar o Saul bičhađa peskere muršen, hoj te zalen le David, oj phendá: "O David hino nasvalo."

¹⁵ Ale o Saul pale bičhađa le muršen, hoj te džan te dikhel le David, a phendá lenge: "Anen mange les the le haďoha, hoj les te murdarav." ¹⁶ Sar o murša pale avle, dikhle pro haďos ča le kherutune devlores a paš leskero šero o kozakero kožuchos.

¹⁷ Akor o Saul phendá la Mikalake: "Soske man klamindaľ a muklal, hoj miro neprijateľis te denašel?"

E Mikal leske odphendá: "Phendá mange: 'Muk man te džal het. Bo te na mukeha man, murdarava tut.' "

O David džal ko Samuel

¹⁸ Avke o David denašľa a zachraňinda pes. Geľa ko Samuel andre Rama a phendá leske savoro, so leske kerđa o Saul. Palis o David the o Samuel gele te bešel andro Najot. ¹⁹ Sar pes o Saul došunda pal oda, hoj o David hino andro Najot andre Rama, ²⁰ bičhađa le muršen, hoj le David te chuden. Ale sar ode dikhle le Samuel le prorokenca, save prorokinenas, avľa the pre lende o Duchos le Devleskero a the on prorokinenas. ²¹ Sar oda phende le Sauloske, bičhađa avre muršen. No the on chudle te prorokinel. Avke pes ačhila the pro tritovar. ²² Palis geľa the korkoro o Saul andre Rama. Sar avľa ke bari chaňig, so hin paš o foros Sechu, phučelas, kaj hine o Samuel the o David. Vareko leske phendá: "Hine andro Najot andre Rama."

²³ Avke geľa andro Najot andre Rama. No the pre leste avľa o Duchos le Devleskero a ov prorokinelas, medik na dogeľa dži andro Najot andre Rama. ²⁴ The ov pes čhida tele a prorokinelas anglo Samuel. Calo džives the cali rat pašľolas bi o gada. Vašoda pes vakereľ: "So, the o Saul hino maškar o proroki?"

O Jonatan pomožinel le Davidoske

20 Palis o David denašľa andral o Najot andre Rama. Avľa ko Jonatan a phendá leske: "Savo binos kerďom? So nalačo kerďom a so namištes? So kerďom tire dadeske, hoj man kamel te murdarel?"

² "Oda šoha (ňikda) na!" odphendá leske o Jonatan. "Tu na mereha! Miro dad mange phenel savoro, so kerel. Či hin oda baro vaj cikno, na garuvel oda anglal ma. Soske mange majindaľahas ipen kada te garuvel? Oda našti avke el!"

³ Ale o David iľa vera a phendá: "Tiro dad mištes džanel, hoj som tuke pre dzeka. Vašoda peske gondo-

linel, hoj tu olestar na mušines te džanel, hoj te na trapines tut. Ale avke sar dživel o RAJ a sar džives tu, som pašes paš o meriben."

⁴ O Jonatan phučla le Davidostar: "Phen mange, so prekal tu majnav te kerel oda kerava."

⁵ O David phendā le Jonatanoske: "Tajsa ela Inepos Neve Čhoneskero a me sar furt majnav te bešel le kraliha paš o skamind. Domuk mange te džal het a te garuvel pes pre maľa dži ke trito rat. ⁶ Ale te tiro dad man rodela, phen leske: 'O David man pomangľa, či šaj džal sigo khere andro Betlehem, bo pes ode kerela e beršeskeri chabeneskeri obeta vaš calī famelija.' ⁷ Te phenela: 'Mištes,' tire služobňikoske pes na ačhela nič. Ale te cholisaľola, akor džaneha čačes, hoj man kamel te dukhavel. ⁸ Mangav tut, presikav mange e pačiv vaš e vera, so manca phandľal anglo RAJ. Ale te kerdom vareso nalačo, murdar man tu. Soske man majindalas te del tire dadeske?"

⁹ "Kada pes našti ačhel!" odphendā leske o Jonatan. "Te ela avke, sar phenes, hoj miro dad tut kamel te dukhavel, či oda tuke na phendomas?"

¹⁰ O David phučla le Jonatanostar: "Ko mange dela te džanel, te tiro dad tuke odphenela andre choli?"

¹¹ O Jonatan leske phendā: "Av, džas pre maľa." Avke gele sodujdžene pre maľa.

¹² Palis o Jonatan mek phendā le Davidoske: "Mi el o RAJ, o Del le Izraeloskero, mange švedkos, hoj paltajsaskero andre kajso časos, phučava man mire dadeSTAR. Te les na ela nič pre tute, čačes tuke dava te džanel. ¹³ Ale te miro dad tut kamel te dukhavel, mi marel man zorales o RAJ, te tuke na dava te džanel a mukava tut te džal andro smirom. Mi el tuha o RAJ, sar sas mire dadeha. ¹⁴ Ale medik dživav, presikav mange e pačiv le RAJESKERI, hoj te na merav. ¹⁵ Ma preačh te presikavel e pačiv mira famelijake aňi akor, sar o RAJ pal e phuv zničinelna savore tire űeprijateľen."

¹⁶ Akor o Jonatan phandľa zmluva le Davidoskera famelijaha a phendā: "O RAJ mi mangel avri o rat andral le Davidoskere űeprijateľengere vasta." ¹⁷ O Jonatan pale phendā la veraha le Davidoske, sar les kamel, bo kamelas les sar pes korkores.

¹⁸ O Jonatan leske phendā: "Tajsa hin o Inepos Neve Čhoneskero, a te na aveha pre peskero than, zbačinea, hoj ode na sal. ¹⁹ Dža paltajsaskero pre oda than, kaj pes angloda garuvehas a ačh ode paš o bar Ezel.

²⁰ L'ivinava pašal leste trin šipi, sar te kamľomas te talinel (trafinel) andre varesoste. ²¹ Palis bičhavava terne čhas a phenava leske: 'Dža! Rode ola šipi.' Te leske phenava: 'O šipi hine ade paš tu, an mange len,' akor šaj aves. Na ačhela pes tuke nič, avke sar dživel o RAJ. ²² Ale te leske phenava: 'O šipi hine dureder tutar,' akor dža het, bo korkoro o RAJ tut bičhavel. ²³ Te džal pal odi vera, so peske phendām, džan, hoj o RAJ hino švedkos maškar mande the tute pro furt!"

²⁴ Avke o David pes garuđa pre maľa. Sar imar sas o Inepos Neve Čhoneskero, o kralis Saul peske bešľa paš o chaben. ²⁵ Bešľa peske pre peskero than paš e fala sar furt. O Jonatan bešelna anglal leste a o Abner paš o

Saul, ale o David na sas pre peskero than. ²⁶ Oda džives o Saul na phendā nič, bo phendā peske: "Mušinda pes varesoha te melarel. Hino našužo, vašoda nane hodno ade te avel." ²⁷ Sar sas le Davidoskero than prazdno the aver džives pal o inepos, akor phučla o Saul peskere čhastar le Jonatanostar: "Soske na avľa le Izajoskero čhavo aňi idž aňi adadžives paš o chaben?"

²⁸ O Jonatan leske odphendā: "O David man igen mangelas, hoj les te mukav te džal andro Betlehem. ²⁹ Phendā: 'Muk man te džal, bo amara famelija hin e beršeskeri chabeneskeri obeta a miro phral man ode vičinda. Te som tuke pre dzeka, muk man. Mi džav te dikhel peskere phralen.' Bijal kada na avľa pre peskero than paš o kraliskero skamind."

³⁰ Akor o Saul cholisaľila pro Jonatan a phendā leske: "Tu sal čhavo la zacata džuvľakero, savi hiňi napačivali! Či me na džanav, hoj sal jekh le Izajoskere čhaha? Oda hin pre ladž tuke the tira dake! ³¹ Medik dživela o David pro kadi phuv, na obačhoha tu aňi tiro krališagos. Akana bičhav pal leste a de les te anel ke mande, bo mušinel te merel!"

³² "Soske mušinel te merel? So kerđa?" phučla o Jonatan peskere dadeSTAR le Saulostar. ³³ Akor o Saul čhida pal leste la kopijaha, hoj les te murdarel. Avke o Jonatan avľa pre oda, hoj leskero dad kamel te murdarel le David.

³⁴ Palis o Jonatan andre bari choli uštila pašal o skamind a pro dujto džives ole čhoneskero na chaľa nič, bo sas leske pharo pal o David, bo o dad leske kerđa ladž.

³⁵ Tosara pre aver džives o Jonatan geľa pre maľa, hoj pes te zdžal le Davidoha a geľa leha the o terno slugas.

³⁶ Phendā leske: "Dža rode o šipi, so livinava." Medik o terno slugas denašelas, livinda o šipos dureder lestar.

³⁷ Sar avľa pre oda than, kaj o Jonatan livinda o šipos, vičinda pre leste: "Nane o šipos dureder tutar?" ³⁸ Palis vičinda pre leste pale: "So ačhes ode? Sidar! Denaš!"

Avke ov skidňa o šipi a avľa ke peskero raj, ³⁹ ale oda terno slugas na džanelas, pal soste džal. Džanelas pal oda ča o Jonatan the o David. ⁴⁰ Palis o Jonatan diňa peskeri vizbroj ole terne slugaske a phendā leske: "Dža a lidža oda andro foros."

⁴¹ Sar oda terno slugas džalal het, o David uštila pal e skala, kaj sas, a bandolas anglo Jonatan trival le mujeha dži ke phuv. Palis sodujdžene pes čumidle a jekhetane rovenas, ale buter o David.

⁴² Palis o Jonatan phendā le Davidoske: "Dža andro smirom a ma bister, savi vera peske diňam andre le RAJESKERO nav. Mi el o RAJ švedkos pro furt maškar amende a maškar miro the tiro potomstvos."

O David denašel le Saulostar

21 O David odgeľa a o Jonatan pes visardā pale andro foros. ² O David geľa ko rašaj Achimelech andro foros Nob. Sar les o Achimelech dikhľa, predarandiľa. Geľa anglal leste a phučla lestar: "Soske sal korkoro? Nane tuha űiko?"

³ O David leske odphenda: "O kralis man bičhađa a phenda mange, hoj niko pes pal oda te na dodžanel, soske som ade. Mire muršenge imar phendom pal jekh than, kaj pes arakhaha. ⁴ Hin tut varesavo chaben? De man pandž mare, abo vareso, so tut hin."

⁵ O rašaj leske phenda: "Aver maro man nane, ča sentno. Šaj tut dav ole marestar, ale ča akor, te tire murša na pašlile le džuvlenca."

⁶ O David leske odphenda: "Čačes tuke phenav, amen na pašlilam le džuvlenca. Mire murša hine furt žuže, sar džan ča pre kajse droma. So mek buter adadžives!"

⁷ Avke o rašaj les diňa oda sentno maro, bo aver maro ode na sas, ča ola mare, so angloda sas anglo RAJ andro Sentno Stanos, medik ode na thovenas neve mare.

⁸ Andre oda džives o Edomčanos o Doeg mušinda te el anglo RAJ. Ov sas le Sauloskero služobňikos, savo sas upral leskere pastjera.

⁹ O David phučla le Achimelechostar: "Nane tut kopija vaj šabla? Bo o kralis pre ma avke sidarelas, hoj mange na ilom aňi e šabla aňi nisave aver zbraňi."

¹⁰ O rašaj leske odphenda: "Hin ade ča e šabla le Fil-ištincoskeri le Golijašiskeri, saves murdardaľ andre dolina Ela. Hiňi zapačardi andro plaštos pal o efodos. Te kames, le tuke la, bo aver nane."

"De mange la!" phenda leske o David. "Feder latar imar aňi nane."

O David ko kralis Achiš

¹¹ O David oda džives denašla le Saulostar a geľa andro foros Gat ko kralis Achiš. ¹² Le Achišoske phende o služobňika: "Či oda nane o David, o kralis upral peskeri phuv? Či na giľavenas pal leste paš o kheliben, hoj o Saul murdardaľ peskere ezeren (1 000), ale o David peskere deš ezeren (10 000)?"

¹³ O David gondolinelas pal kale lava a igen pes daralas le kralistar Achišostar andral o Gat. ¹⁴ Avke pes chudla te likerel paš lende avres. Medik sas andre lengere vasta, kerelas pestar dilines. Čarbinelas pro foroskere brani a mukelas pal e brada te čuľal o šlini.

¹⁵ Androda o Achiš phenda peskere služobňikenge: "Se tumen korkore dikhen, hoj kada murš hino dilino! Soske les andan ke mande? ¹⁶ Či nane man imar dos diline murša? Soske mange mek anen kales, hoj te kerel ade diliňipena? The ov mek mušinel te avel andre miro kher?"

O David andre jaskiňa Adullam

22 O David denašla andral o foros Gat a geľa andre jaskiňa Adullam. Sar pes pal oda došunde leskere phrala the cali famelija, gele pal leste. ² Gele the savore, save sas andre varesavo pharipen, abo kamenas varekasko o love, abo ola, saven na sas smirom andro jilo. Sas leha pal o štar šel (400) murša, savenge achiľa vodcas.

³ Palis o David odgeľa andre Moabiko Micpa a ode pomangľa le Moabike kralis: "Mangav tut, kralina, domuk mira dake the le dadeske, hoj te ačhen ke tu-

mende, medik man na dodžanava, so o Del kerela prekal ma." ⁴ Avke o David iľa peskera da the le dades ko Moabiko kralis a ačhile ode, medik pes ov garuvelas pro verchengere thana.

⁵ Palis o prorokos Gad phenda le Davidoske: "Ma ačh imar ade, ale dža andre Judsko." Avke o David geľa andro veš Cheret.

O Saul murdarel le rašajen

⁶ Andre jekh džives pes o Saul došunda, hoj dikhle le David leskere muršen. Ipen akor o Saul bešelas tel o stromos tamariška pro brehos andre Gibeja la kopijaha andro vast a leskere služobňika ačhenas pašal leste. ⁷ Avke o Saul phenda le služobňikenge: "Šunen man mištes, Benjaminale! Gondolinen peske, hoj o čhavo le Izajoskero tumen dela mali abo viňici? Abo hoj tumen ačhavela sar velitelēn upral o ezeros (1 000) abo šel (100) slugađa? ⁸ Tumen savore pes sthođan pre mande! Ńiko tumendar mange na phenda, hoj miro čhavo phandľa vera le Izajoskere čhaha. Aňi jekheske na sas pharo pre mande, hoj mange te phenel, hoj miro čhavo kerđa upre mire služobňikos, hoj te rodel, kana man šaj murdarel!"

⁹ Androda o Edomčanos o Doeg, savo ačhelas maškar le Sauloskere služobňika, phenda: "Sar somas andro Nob, dikhľom ode le Izajoskere čhas te vakereľ le rašaha le Achimelechoha, savo hin o čhavo le Achituboskero. ¹⁰ O Achimelech mangelas le RAJES vaš o David a palis les diňa chaben the e šabla le Golijašiskeri."

¹¹ Avke o Saul bičhađa vaš o rašaj Achimelech, le Achituboskero čhavo, the vaš leskeri famelija, save sas tiš rašaja andral o Nob, a on savore avle ke leste. ¹² O Saul phenda: "Šun man mištes, čhavo le Achituboskero!"

"So pes achiľa, rajeja?" odphenda leske. ¹³ O Saul lestar phučla: "Soske pes počoral zgeľan pre mande tu the o čhavo le Izajoskero? Soske les diňan maro the šabla a privakerđan pes vaš leste ko Del? Akana pes vzburiňđa a užarel pre oda, kana man šaj murdarel!"

¹⁴ O Achimelech phenda le kraliske: "Hin vareko maškar tire služobňika pačivaleder sar o David, savo hin o džamutro le kraliskero the o velitelis upral tire slugađa, saves den bari pačiv cali tiri famelija? ¹⁵ Na sas oda ešebnovar (peršovar), so man privakeravas ko Del vaš o David. Čačes na! Te na gondolinel peske o kralis nič nalačo pal peskero služobňikos aňi pal leskeri cali famelija. Se tiro služobňikos pal adi vzbura aňi na džanelas!"

¹⁶ Ale o kralis o Saul leske phenda: "Achimelech, tu the tiri cali famelija mušinen te merel." ¹⁷ Palis phenda peskere stražňikenge, save sas paš leste: "Džan, zalen le RAJESKERE rašajen a murdaren len, bo pomožinde le Davidoske! Choc džanenas, hoj denašel, na phende mange oda."

Ale o služobňika le Sauloskere na kamenas te thovel o vasta pre le RAJESKERE rašaja, hoj len te murdaren.

¹⁸ Avke o Saul phendá le Doegoske andral o Edom: "Murdar tu le rašajen!" Oda džives o Doeg murdardá ochtovardeš the pandž (85) muršen, save hordinenas rašajiko plaštós. ¹⁹ Palis geľa andre rašajengero foros Nob a murdardá ode le muršen the džuvlijen, čhaven the cikne čhavoren, save pijenas andral o kolín, le gu-ruven, somaren the bakren.

²⁰ Zachraňindá pes ča o Ebjatar, o čhavo le Achimelechskero, o čhavo le Aчитuboskero. Ov denášla ko David. ²¹ O Ebjatar le Davidoske phendá: "O Saul murdardá le RAJESKERE rašajen andral o Nob." ²² O David odphendá leske: "Imar akor, sar ode sas o Edomčanos o Doeg, džanavas, hoj oda phenela avri le Sauloske. Me som vinovato vaš cali tiri famelija. ²³ Ačh ade manca a ma dara tut! O Saul kamel te murdarel tut the man, ale manca pes tuke nič na ačhela."

O David zachraňinel o foros Keila

23 Andre jekh džives varesave manuša phende le Davidoske: "O Filištinci gele pro mariben pro foros Keila a čorkeren lenge o ulípen, so skidle." ² Avke o David pes geľa te mangel ko RAJ: "RAJEJA, majinav te džal pre kala Filištinci pro mariben?"

"He," odphendá o RAJ le Davidoske. "Dža pro Filištinci a zachraňin o foros Keila."

³ Ale le Davidoskere murša phende: "Dikh, imar kade andre Judsko sam andre dar, a so mek buter, te džaha andre Keila pre armada le Filištínengeri!"

⁴ Avke o David geľa pale te vakere le RAJEHA a o RAJ leske odphendá: "Ušti a dža andre Keila, bo le Filištinen dava tuke andro vasta." ⁵ Avke o David odgeľa peskere muršenca andre Keila pro mariben pro Filištinci, murdarde but lendar a ile lengere stadi. Avke o David ňerinda upral lende a zachraňindá le manušen andral e Keila. ⁶ Sar o Ebjatar, o Achimelechskero čhavo, denášla ko David andre Keila, anda peha the o efodos.

O Saul džal pal o David

⁷ Le Sauloske phende, hoj o David geľa andre Keila. O Saul phendá: "O Del les diňa tel miri zor. Oleha, hoj geľa andre oda zoralo foros, kaj hine o brani the zavori. Korkoro pes andre phandla." ⁸ Avke o Saul zvičinda peskere muršen, hoj te džan pro mariben andro foros Keila a te zalen le David leskere muršenca.

⁹ Sar pes o David došundá, hoj les o Saul kamel te zal, phendá le rašaske le Ebjataroske: "An mange o efodos." ¹⁰ Palis pes o David modlinelas: "Ó, RAJEJA, Devla le Izraeloskero! Tiro služobňikos šundá, hoj o Saul kamel te džal andre Keila prekal mande kamel te zničinel o foros. ¹¹ Dena man o manuša andral e Keila andre leskere vasta? Čačes avela ade o Saul, sar oda šundá tiro služobňikos? Ó, RAJEJA, Devla Izraeloskero, mangav tut, odphen tire služobňikoske!"

Avke o RAJ leske odphendá: "Ov avela."

¹² O David pale phučla: "Dinehas man the mire muršen o manuša andral e Keila andro vasta le Sauloske?"

"He, kerdehas oda," odphendá o RAJ.

¹³ Palis o David peskere šov šel (600) muršenca odgele andral e Keila a phirenas than thanestar. Sar le Sauloske phende, hoj o David geľa het andral e Keila, o Saul na mukla pes pro drom.

¹⁴ O David pes zlíkerelas pro verchengere thana the pro brehi pre pušta Zif. Choc o Saul džives pre dživeseste džalas pal o David, o Del les leske na diňa andro vasta.

¹⁵ O David prindžardá, hoj o Saul pal leste džal, hoj les te murdarel, a vašoda pes zlíkerelas paš e Chorša andre pušta Zif. ¹⁶ Akor o Jonatan, o čhavo le Sauloskero, geľa pal o David andre Chorša, hoj les andro nav le Devleskero te zoraľarel. ¹⁷ Phendá leske: "Ma dara tut, bo miro dad o Saul na thovela pre tu o vast. Ačheha kraliske upral o Izrael a me avava dujto pal tu. Miro dad o Saul džanel, hoj oda hin čačipen." ¹⁸ Avke phandle peha sodujdžene zmluva anglo RAJ. O David ačhiľa andro Chorša a o Jonatan geľa pale khere.

¹⁹ O manuša andral o Zif avle ko Saul andre Gibeba, hoj leske te phenel: "O David pes garuvel paš amende andre Chorša pro verchengere thana; pro brehos Chachila pro juhos le Ješimonostar. ²⁰ Te tuke hin, kralina, pre dzeka te avel, av, kana kames. Muk oda pre amende! Amen sa keraha prekal oda, hoj les te dochudes andre tire vasta."

²¹ O Saul phendá: "Mi požehňinel tumen o Del vaš oda, hoj mange presikaven ajsi pačiv. ²² Džan, pririchtinen oda dureder. Arakhen čačes oda than, kaj o David pes garuvel, a dodžan pes, ko les dikhla. Šundom, hoj hino igen vibito. ²³ Preroden savore thana, kaj šaj el garudo, a visaren pes pale ke mande, sar čačes džane-na, kaj hino. Palis džava tumenca a te ela mek furt andre odi phuv, arakhava les, choc te mušindomas te rodel maškar savore fajti andral e Judsko."

²⁴ Avke on gele anglo Saul pale andre pušta Zif. Akor o David peskere muršenca sas pre pušta Maon andre phuv Araba pro juhos le Ješimonostar. ²⁵ O Saul peskere muršenca gele te rodel le David. Sar pes pal oda došundá o David, geľa teleder a zlíkerelas pes paš e skala pre pušta Maon. Došundá pes pal oda o Saul a džalas pal leste.

²⁶ O Saul džalas pašal o brehos pre jekh sera a o David peskere muršenca pre dujto. O David denášelas sigo, hoj les o Saul te na chudel. Sar sas o Saul peskere muršenca imar pašes ke oda, hoj le David the leskere muršen te zalen, ²⁷ avla leske te phenel jekh leskere muršendar: "Av sigo! O Filištinci avle andro Izrael te zalen savoro." ²⁸ Avke o Saul preačhiľa te džal pal o David a džalas pro mariben pro Filištinci. Vašoda pes oda than vičinel "e Skala, kaj pes rozdenaše".

O David mukel te dživel le Saul

24 O David odarik geľa het a zlíkerelas pes pro verchengere thana andro En-Gedi. ² Sar o Saul

avelas pale andral o mariben le Filištinenca, phende leske: "O David hino pre pušća pašes o En-Gedi." ³ Avke o Saul peske iľa 3 000 nekfeder muršen andral calo Izrael a džalas te rodel le David the leskere muršen pro vichodos pašes paš o Skali le Dzive Kozengere.

⁴ O Saul avľa ke bakrengeri ohrada paš o drom, kaj sas e jaskiňa. O Saul ode geľa pro budaris. O David the leskere murša bešenas andre jaskiňa dži ko nekpaluneder than. ⁵ O murša phende le Davidoske: "Kada hin oda džives, pal savo tuke phendä o RAJ: 'Dava tuke tire neprijateljís andre tire vasta. Kereha leha avke, sar tu kameha!' " Avke o David počoral geľa paš o Saul a odčhindä kotor leskere plaštostar.

⁶ Ale palís o David bajinelas oda, so kerďa. ⁷ Peskere muršenge phendä: "O RAJ man mi chrañinel, hoj te kerav vareso mire rajeske, savo hino le RAJESKERO pomakhlo. Na hazdava o vast upral leste, bo hino le RAJESKERO pomakhlo." ⁸ Kale lavenca dovakerďa peskere muršenge a na domukľa lenge te džal pro Saul. Palís o Saul geľa avri andral e jaskiňa a džalas peskere drome-ha.

⁹ Palís geľa the o David avri andral e jaskiňa a zvičindä pro Saul: "Rajeja miro, kraliňa!" Sar o Saul pes visarďa, o David anglal leste bandiľa le mujeha dži ke phuv ¹⁰ a phendä le Sauloske: "Soske šunes pro lava le manušengere, save phenen, hoj tut kamav te dukhavel? ¹¹ Ipen andre kada džives korkoro dikhlal, hoj andre jaskiňa tut o RAJ diňa mange andro vasta. Vareko mire muršendar pre ma ispidelas, hoj tut te murdarav, ale mange sas pharo pal tu. Phendom mange: 'Na hazdava o vast upral miro raj, bo hino le RAJESKERO pomakhlo.' ¹² Ča dikh, dado miro! Likerav andro vast o kotor, so odčhindom tire plaštostar. Prekal ada, hoj les odčhindom a tut na murdarďom, šaj dikhes korkoro, hoj na kamav tuke te kerel nič aňi te murdarel. Me tuke na kerďom nič nalačo, ale tu džas pre ma, hoj man te murdares. ¹³ Mi rozsudzinel o RAJ maškar mande the tute a mi marel tut o RAJ vaš ma. Ale miro vast pes tutar na chudela. ¹⁴ Avke sar pes imar čirlastar vakerel: 'Ča o nalače manuša keren o nalače skutki.' Vašoda me miro vast pre tu na hazdava. ¹⁵ Pre kaste chudľa te džal o Izraeliko kralís? Pal kaste džal? Pro mulo rikono? Pre jekh pušum? ¹⁶ Akor mi rozsudzinel maškar amende o RAJ, mi phenel, kas amendar hin čačipen. Mi dikhel, mi zaačhel vaš ma a mi cirdel man avri andral tire vasta."

¹⁷ Sar o David preačhiľa te vakerel, phučľa lestar o Saul: "Oda čačes hin tiro hangos, David, čhavo miro?" A chudľa zorales te rovel. ¹⁸ Palís phendä le Davidoske: "Tu sal buter čačipnaskero sar me, bo presikaďal mange o lačhipen, ale me tuke ča o nalačhipen.

¹⁹ Adadžives presikaďal, savo lačo sal ke mande. O RAJ man diňa tuke andro vasta, ale tu man na murdarďal. ²⁰ Te vareko arakhela peskere neprijateljís, mukela les ča avke te džal? Mi visarel tuke pale o RAJ oda lačhipen, so mange adadžives presikaďal. ²¹ Akana imar čačes džanav, hoj tu ačheha kralíske a o Izraeliko krališagos ela zoralo, sar les tu lidžaha. ²² Vašoda

akana de man vera anglo RAJ, hoj na murdareha mira famelija a hoj na khoseha miro nav tele pal e phuv."

²³ Avke o David diňa vera le Saul. Palís o Saul geľa khere a o David peskere muršenca geľa upre pro verchengero than, kaj pes garuvenas.

O Nabal the e Abigajil

25 Sar o Samuel muľa, zgeľa pes calo Izrael a rovenas pal leste. Parunde les andre peskero kher andre Rama. Palís o David odarik geľa pre pušća Paran.

² Andre oda foros Maon sas igen barvalo murš, saves sas but khera the maľi pro Karmel. Sas les 3 000 bakre the 1 000 kozi a akor sas ipen andro Karmel, sar strihinenas peskere bakren. ³ Oda murš pes vičinelas Nabal a leskeri romňi e Abigajil. Oj sas igen godaver the šukar, ale ov sas furt choľamen a avrenge kerelas namištes. Sas andral o Kaleboskero kmeňos.

⁴ Sar pes o David pre pušća došundä, hoj o Nabal strihinel le bakren, ⁵ bičhaďa deše terne muršen a phendä lenge: "Džan andro Karmel a den te pozdravinel mandar le Nabal. ⁶ Phenen leske: 'Žičinav tuke savoro nekfeder! Smirom tira famelijake the smirom savoreske, so hin tiro! ⁷ Šundom, hoj tut hin murša, save akana strihinen le bakren. Sar sas tire pastjera paš amende, šoha (ňikda) lenge na kerďam nič nalačo a nič lenge na našliľa, medik sas andro Karmel. ⁸ Phuč tut tire pastjerendar, on tuke phenena! Mi en tuke kala murša pre dzeka, bo džan ke tu andro lačo džives. Mangav tut, de varesave dari peskere služobňiken the tire čhaske le Davidoske.' "

⁹ Avke o murša gele ko Nabal, phende leske savoro, so lenge phendä o David, a užarenas.

¹⁰ Androda lenge o Nabal phendä: "Ko hin o David a ko o čhavo le Izajoskero? Adadžives hin but ajse sluhi, save denašen khatar peskere raja. ¹¹ Či so? Akana majinav te lel miro maro, paňi the o mas, so murdarďom prekal mire murša, save strihinen le bakren, a te del oda le muršenge, save na džanav, khatar hine?"

¹² Avke pes o murša visarde pale ko David a phende leske sa, so vakerelas o Nabal. ¹³ Androda o David phendä: "Akana dojekh tumendar mi phandel pašal peste e šabľa." Avke o David the savore peske phandle o šabli. Džanas leha štar šel (400) murša a duj šel (200) ačhile paš o veci.

¹⁴ Ale varesavo le Nabaloskere sluhendar phendä la Abigajilake: "Dikh, o David bičhaďa le sluhen pal e pušća ko Nabal, hoj les te pozdravinen, ale ov pre lende vriskinelas a bičhaďa len het. ¹⁵ Ola murša sas ke amende igen lače, šoha amenge na kerde nič nalačo a aňi nič amenge na našliľa, sar samas pre maľa, kaj sas the on. ¹⁶ On amenge sas sar muros a chrañinenas amen pal savore dživesa the rača, medik pasinahas le bakren. ¹⁷ Vašoda tuke rozgondolín, so kereha, bo o meriben hin igen pašes paš amaro raj the paš leskeri famelija. Ale le Nabaloha pes na del te vakerel, bo ov hino bi e pačiv."

¹⁸ E Abigajil sigo iľa duj šel (200) mare, duj cipune gone mol, o mas le pandže bakrendar, dešuefta (17)

kili peko div, šel (100) burňika šuke hrozni the duj šel bokela le figendar a thoda pro somara. ¹⁹ Le sluhenge phenda: "Džan anglal ma a me džava pal tumende." Ale peskere romeske le Nabaloske oda na phenda.

²⁰ Sar džalas e Abigajil pro somaris le dromea, so sas pašal o verchi, arakhla pes le Davidoha ipen akor, sar džalas tele peskere muršenca pal o verchos. ²¹ O David ipen phenda: "Čačes hijaba chrañnavas savoro, so sas ole muršes pre pušta, hoj leske nič te na našlol. Akana vaš o lačhipen mange visarel le nalačipnaha. ²² O Del man mi marel zorales, te na murdarava dojekhe leskere muršen dži tosara!"

²³ Sar e Abigajil dikhla le David, sigo geľa tele pal o somaris. Peľa anglal leste a bandolas dži ke phuv.

²⁴ Čhida pes paš leskere pindre a phenda: "Rajeja miro, mi el oda savoro pre ma! Domuk te prevakerel tira služobničake. Šun man avri! ²⁵ Ma ker tuke nič ole nalače muršestar, bo ov hino ajso nalačo, sar phenel the leskero nav Nabal † – o nagodaveripen hin andre leste. Tiri služobnička na dikhla tire terne muršen, saven bičhadal. ²⁶ Akana, rajeja miro, avke sar dživel o RAJ a avke sar džives tu: O RAJ tuke na domukla pes te mefarel le rateha, hoj les te murdarel a korkoro te visares pale tire ñeprijateľenge. Tire ñeprijateľeľa the ola, save kamen tuke o nalačhipen, mi doperen avke sar the o Nabal. ²⁷ Mangav tut, prile mandar kada daros, so tuke andom. Mi el oda pre chasna tuke the tire muršenge, save džan tuha. ²⁸ Odmuk tira služobničkake, hoj mange domuklom tuha avke te vakerel. O RAJ čačes ačhavela mire rajeske o kher, so ela pro furt, bo lidžas o maribena le RAJESKERE. Medik dživeha, te na arakhel pes pre tu nič nalačo. ²⁹ Choc bi vareko pre tu geľahas, abo kamľahas tut te murdarel, tiro dživipen ela jekhetane olenca, save dživen le RAJEHA, tire Devleha. O dživipen tire ñeprijateľenge ela odčhido avke, sar pes livinel andral o prakos. ³⁰ Sar o RAJ imar tuke kerela savoro lačhipen, so tuke phenda, a ačhavela tut vaš o kralis upral o Izrael, ³¹ palis ačheha andro smirom a na trapineha tut oleha, hoj korkoro visardal pale tire ñeprijateľenge oleha, hoj len murdarđal. Sar o RAJ tuke presikavela o lačhipen, gondolin tuke pre ma, pre tiri služobnička."

³² O David odphenda la Abigajilake: "Mi el barardo o RAJ, o Del le Izraeloskero, savo tut bičhada adadžives angle ma. ³³ Av požehñimen vaš tiro godaveripen, bo adadžives man zlikerđal, hoj korkoro te na visarav pale mire ñeprijateľenge a te na murdarav ole manušen.

³⁴ O RAJ, o Del le Izraeloskero, mange na domukla, hoj tuke te kerav vareso nalačo. Te na avľalas sigo anglal mande, čačes le Nabaloskere muršendar na ačhilehas ñiko džido dži tosara."

³⁵ Avke o David latar priiľa o daros, so anda leske, a phenda lake: "Dža andro smirom pale khere. Šundom tut avri a kerava avke, sar phendał."

³⁶ Sar e Abigajil avľa khere, arakhla, hoj o Nabal ipen kerelas andre peskero kher hoscina, ajsi sar hin le kralen. Sas les lači dzeka a igen mačila. Vašoda leske

dži tosara nič na phenda, ³⁷ ale sar tosara o Nabal strižbisaliľa, e Abigajil leske phenda savoro, so pes ačhiľa. Jekhvareste leskero jilo sas avke sar le muleskero a ačhiľa sar bar. ³⁸ Palis pal o deš džives o RAJ marda le Nabal a ov muľa.

³⁹ Sar pes o David došunda, hoj o Nabal muľa, phenda: "Mi el o RAJ barardo, bo ov visarda pale le Nabaloske vaš oda, hoj mange kerda ladž, a chudla o počiñiben vaš peskero binos. Ov zlikerda peskere služobňikos olestar, hoj te na kerav binos, a visarda le Nabaloskero nalačhipen pre leste."

Palis o David bičhada manušen ke Abigajil, hoj te phenen lake: "O David peske tut kamel te lel romňake." ⁴⁰ O služobňika gele ke Abigajil andro Karmel a phende lake: "Bičhavel amen ke tute o David, bo kamel tut te lel peske romňake."

⁴¹ Androda bandiľa dži ke phuv a phenda: "Me som tiri služobnička a som pririchtimen te thovel (morel) o pindre peskere rajeskere služobňikenge." ⁴² Avke e Abigajil sigo bešľa pro somaris a oj the peskere pandže služkenca džalas le Davidoskere sluhenca. Palis ačhiľa le Davidoskeri romňi.

⁴³ O David iľa peske romňake the la Achinoama andral o Jezreel. Soduj ačhile leskere romňija. ⁴⁴ O Saul peskera čha la Mikal, savi sas le Davidoskeri romňi, diňa le Paltioske, le Lajišoskere čhaske, savo sas andral o Gallim.

O David pale mukel te dživel le Saul

26 Varesave manuša andral e pušta Zif avle ko Saul andre Gibeja a phende leske: "O David pes garuvel pro brehos Chachila pašes paš e pušta Ješimon."

² Avke o Saul geľa pre pušta Zif. Džanas leha 3 000 avrikidle Izraeliti, hoj te roden le David. ³ O Saul peske kerda taboris pro brehos Chachila, paš o drom paš e pušta Ješimon. O David pes zlikerelas pre pušta; sar došunda, hoj o Saul avľa pal leste, ⁴ bičhada le muršen, hoj te džan te dikhel, či čačes hin o Saul ode.

⁵ Palis o David geľa pre oda than, kaj sas le Sauloskero taboris. Dikhla o than, kaj pašľolas o Saul the o veliteľis le slugađengero o Abner, o čhavo le Neroskero. O Saul pašľolas maškar o taboris a o murša pašal leste.

⁶ Akor o David phučľa le Achimelechostar, savo sas Chetitos, the le Abišajostar, savo sas o phral le Joaboske a o čhavo la Cerujakero: "Ko avela manca ko Saul andro taboris?"

"Me džava tuha!" phenda o Abišaj.

⁷ Avke o David the o Abišaj gele rači ke lende a ode arakhle le Saul, sar sovel maškar o taboris. E kopija leske sas ispidli andre phuv pašes paš o šero a o Abner the o murša pašľonas pašal leste.

⁸ O Abišaj phenda le Davidoske: "O Del adadžives tuke diňa tire ñeprijateľis andre tire vasta. Domuk mange, hoj les te premarav la kopijaha ke phuv. Ča jekhvar demava! Na mušinava dujtovar!"

⁹ Ale o David leske odphenda: "Ma murdar les! O RAJ čačes potrestinela oles, ko hazdela o vast pre leskero

† Oda hin: Nagodaver.

pomakhlo kralis." ¹⁰ A o David mek phenda: "Avke sar dživel o RAJ, ča o RAJ ada šaj kerel. Šaj merel avke sar dojekh andro phure berša, abo džala pro mariben a ode merela. ¹¹ Mi chrañinel man o RAJ, hoj te na hazdav o vast pre leskero pomakhlo. Le akana leskeri kopija, so hiñi paš leskero šero, the o džbanos le pañeha a džas het!" ¹² O David iľa o džbanos the e kopija, so sas le Sauloske paš o šero, a gele het. Niko nič na dikhľa a ñiko pal oda añi na džanelas. Savore sovenas duderer, bo o RAJ diña pre lende zoralo soviben.

¹³ Palis pregeľa o David pre dujto sera ola dolinakeri a zaačiľa pro agor le brehoskero dur lendar. ¹⁴ Vičiñda pro Sauloskere murša the pro Abner: "Abner! Odphen mangle!"

"Ko sal, hoj vičines pro kralis?" phučľa o Abner.

¹⁵ O David leske odphenda: "Či na sal tu oda baro murš andro Izrael? Soske na merkinahas pre tiro raj, pre tiro kralis? Vareko sas andro taboris, hoj te murdarel tire rajes, le kralis. ¹⁶ Oda, so tu kerdal, nane mištes. Avke sar dživel o RAJ, tu the tire murša peske zasogalinen (zaslužinen) te merel, bo na merkinenas pre peskero raj, pre le RAJESKERO pomakhlo. Ča dikh! Kaj hiñi le kraliskeri kopija the o džbanos le pañeha, so sas leske paš o šero?"

¹⁷ O Saul sprindžarda le David pal o hangos a phučľa lestar: "Sal oda tu, David, čhavo miro?"

Ov odphenda: "He, rajeja, kralina miro! ¹⁸ Soske miro raj džal pre peskero služobñikos? So kerđom ajso nalačo? ¹⁹ Akana mangav tut, rajeja, kralina miro, šun peskere služobñikos! Te o RAJ tut kerđa upre pre ma, mi prilal e voňavo obeta. Ale te oda sas o manuša, mi perel pre lende le RAJESKERO prekošiben! Bo čhide man avri andral e phuv le RAJESKERI, hoj te džav andre phuv, kaj majinav te lašarel avre devlen! ²⁰ Mangav tut, ma domuk, hoj miro rat te el avričhordo pre phuv dur le RAJESTAR! Bo so avľa o Izraeliko kralis te rodel man sar jekh pušum, avke sar te rodñahas varesava dziva kachña pro verchi?"

²¹ O Saul phenda: "Kerđom binos. Av pale, David, čhavo miro! Na kerava tuke nič, bo adadžives dikhľom, hoj man mukľal te dživel. Čačas somas dilino a kerđom igen namištes."

²² "Ade hiñi le kraliskeri kopija!" odphenda leske o David. "Mi avel vareko le terne muršendar la te lel. ²³ O RAJ visarela dojekheske vaš leskero spravodľišagos the pačivaliben. Ov adadžives mange tut diña andre mire vasta, ale me na kamľom te hazdel o vast pre le RAJESKERO pomakhlo. ²⁴ Avke sar adadžives mange džalas pal tiro dživipen, mi džal the le RAJESKE pal miro dživipen a mi cirdel man avri andral dojekh pharipen."

²⁵ O Saul phenda le Davidoske: "Av požehñimen, David, čhavo miro! Savoro, so chudeha te kerel, tuke avela čačas avri!"

Palis o David geľa peskere dromeħa a o Saul geľa kħere.

O David denašel ko kralis Achiš

27 O David peske phenda: "Ko džanel? Šaj el, hoj jekhvar andre kala dživesa man o Saul murdarela. Nefeder ela te denašava andre Filištíniko phuv. Palis man šaj rodel o Saul pal caľi Izraeliko phuv, ale avava lestar garudo."

² Avke o David geľa peskere šov šel (600) muršenca ko Gatsko kralis Achiš, o čhavo le Machoskero. ³ O David the leskere murša ačhile te bešel andro Gat ko Achiš peskere famelijenca. Le Davidoha sas soduj leskere romñija, e Achinoama andral o Jezreel the e Abigajil andral o Karmel, savi sas leskeri romñi pal o Nabal. ⁴ Sar le Sauloske phende, hoj o David denašľa andro Gat, preačiľa les te rodel.

⁵ O David phenda le Achišoske: "Te som tuke pre dzeķa, de man than andre jekh cikno foros, hoj ode te bešav. Tiro služobñikos na mušinel te bešel paš tu andre tiro foros."

⁶ Andre oda džives o Achiš diña leske o foros Ciklag. Vašoda hino dži adadžives o Ciklag le Judske kralengero. ⁷ O David andre Filištíniko phuv bešel as berš the štar čhon.

O David džal pro mariben andro Negev

⁸ O David peskere muršenca džalas pro mariben pro Gešura, Gizriti the pro Amaleka, save čirleder bešenas andro phuva, prekal save pes džalas andro Šur the andro Egipt. ⁹ Sar o David džalas andre ola phuva, na mukľa añi muršes añi džuvľa te dživel. Lelas le bakren, gurmñen, somaren, řaven the o gada a palis džalas pale ko Achiš.

¹⁰ Sar o Achiš phučľa: "Pre kaste adadžives geľan pro mariben?"

O David odphenda: "Samas andre pušťa Negev andre Judsko phuv," abo: "Samas andre phuv le Jerachmeelengeri andro Negev," abo: "Samas andro Negev andre phuv le Kenitengeri." ¹¹ O David murdarda dojekhe muršes the džuvľa, hoj ñiko lendar te na džal pale andro foros Gat a te na phenen, so o David the leskere murša čačas kerde. Kada hin oda, so kerđa o David prekal calo časos, sar bešel as andre Filištíniko phuv. ¹² O Achiš pačalas le Davidoske a phenda peske: "O David ela čačas miro služobñikos pro furt, bo o Izraeliti les imar našti avri ačhen."

28 Andre oda časos o Filištínci zvičinde peskere slugađen pro mariben pro Izraeliti. O Achiš phenda le Davidoske: "Čačas džanes, hoj tu tire muršenca džaha manca pro mariben."

² O David le Achišoske odphenda: "Tu korkoro akana dikheħa, so tiro služobñikos šaj kerel!"

"Mištes," phenda o Achiš le Davidoske. "Ačhavav tut vaš miro řelesno stražñikos pro furt."

O Saul andro En-Dor

³ O Samuel muľa a calo Izrael upral leste rovelas. Parunde les andre leskero foros Rama. O Saul tradña

avri andral odi phuv savoren vraščen the olen, ko privičinenas le mulengere duchen.

⁴ Sar pes o Filištinci zgele, kerde peske taboris paš o Šunem. O Saul diña te zvičinel calo Izrael a kerde peske taboris paš o brehos Gilboa. ⁵ Sar o Saul dikhľa e armada le Filištingeri, avľa bari dar andre leskero jilo. ⁶ O Saul phučelas le RAJESTAR, so te kerel, ale ov leske na odphenelas aňi andro sune, aňi prekal o Urim the Tummim †, aňi prekal o proroka. ⁷ Vašoda o Saul phendá peskere služobňikenge: "Arakhen mange varesava džuvľa, savi privičinel le mulengere duchen. Me džava latar man te phučel."

"Jekh hiňi andro En-Dor," phende leske leskere služobňika.

⁸ O Saul pes preurďa andre aver gada, hoj les te na prindžarel, a geľa rači duje peskere muršenca ke odi džuvľi. Phendá lake: "Privičin mange jekhe muleskere duchos, pal savo tuke phenava o nav."

⁹ E džuvľi leske odphendá: "Tu džanes, so kerďa o kralis o Saul, hoj tradňa avri andral e phuv le vraščen the olen, save privičinenas le mulengere duchen. Soske manca kames avri te thovel? Kames, hoj te merav?"

¹⁰ Avke o Saul iľa lake vera pro RAJ: "Avke sar dživel o RAJ, na ačhela pes tuke nič nalačo vaš ada."

¹¹ "Kas tuke te vičínav avri?" phučľa lestar e džuvľi. "Vičín mange avri le Samuel," ov odphendá.

¹² Sar e džuvľi dikhľa le Samuel, zorales vriskindá a phendá le Sauloske: "Soske manca thoďal avri? Se tu sal o Saul!"

¹³ "Ma dara tut!" phendá lake o kralis. "So dikhes?" "Dikhav varesavo duchos, savo avel avri andral e phuv," phendá e džuvľi.

¹⁴ "Sar dičhol avri?" phučľa latar.

"Avel avri varesavo phuro murš zaučardo andro plaštós," oj odphendá.

O Saul sprindžarda, hoj oda hin o Samuel, a bandiľa anglal leste dži ke phuv.

¹⁵ O Samuel phendá le Sauloske: "Soske mange na des smirom a vičines man ade upre?"

"Som andro baro pharipen," odphendá o Saul. "O Filištinci džan pre mande pro mariben, o Del pes mandar visarda a mek na odphendá mange aňi prekal o proroka aňi prekal o sune. Vičindom tut, hoj mange te phenes, so te kerel."

¹⁶ Ale o Samuel leske odphendá: "Soske mandar phučes, te korkoro o RAJ pes tutar visarda a ačhiľa tiro ňeprijateľis? ¹⁷ O RAJ kerďa ča oda, so prekal mande imar anglal phendá. Cirdňa tuke o krališagos andral tire vasta a diña les tire pašutneske, le Davidoske.

¹⁸ Vašoda, hoj na šundal le RAJES a na kerďal sa pal leskeri cholí pro Amaleka, avke sar o RAJ kamelas tutar, ov tuha adadžives kerel kavke. ¹⁹ Tut the calo Izrael dela andro vasta le Filištinge a tu the tire čhave avena tajsa ode, kaj som me. O RAJ dela the le Izraelike slugađen andro vasta le Filištinge."

²⁰ Jekhvareste o Saul, savo sas učo, avke the peľa pre phuv, bo oda, so leske phendá o Samuel, les predarada avri. Na sas les zor, bo na čaľa nič calo džives the calo rat. ²¹ Odi džuvľi avľa ko Saul. Sar dikhľa, hoj igen predarandiľa, phendá: "Dikh, tiri služobňička tut šunda, a choc mange džalas vaš miro dživipen, kerďom, so mange phendal. ²² Akana šun the tu tira služobňička. Anava tuke kotor maro, hoj te chas a te aves zoralo, sar džaha le dromeħa."

²³ Ov na kamelas a phendá: "Na kamav te chal!"

Ale leskere služobňika the odi džuvľi na preačhenas pre leste te ispidel, medik len na šunda. Palis uštíľa pal e phuv a bešľa peske pro hados.

²⁴ Ola džuvľa sas khere thuli gurumňori. Takoj la iľa a murdarda. Palis iľa o aro, zaušanda o chumer a pekľa o mare bi o drožďi. ²⁵ Diña oda le Sauloske the leskere služobňikenge. Sar dochale, uštíle a mek odi rat gele het.

O Filištinci bičhaven le David het

29 O Filištinci zvičinde savore peskere slugađen andro Afek, medik o Izraeliti peske kerde taboris paš o prameňis andro Jezreel. ² O Filištínike vodci džanas peskere slugađenca andro partiji po šel (100) the po ezeros (1 000) a o David peskere muršenca džalas pal lende jekhetane le Achišoha. ³ O Filištínike velíteľa phučle: "So kale Hebrejenca?"

O Achiš lenge odphendá: "Se oda hino o David, o služobňikos le kraliskero le Sauloskero andral o Izrael, savo hino imar buter sar berš manca. Akorestar, sar avľa ke ma, dži adadžives na arakhlom nič nalačo pre leste."

⁴ Ale o Filištínike velíteľa sas choľamen pro Achiš a phende leske: "Bičhav het kale muršes. Mi džal pale pro than, so les diňal. Te na avel amenca pro mariben, bo sar pes maraha, šaj pes visarel pre amende. Se soħa ela buter pre dzeka peskere rajeske, te na oleħa, hoj leske dela amare odčhimen šere? ⁵ Nane ov oda David, pal savo pes ġiľavelas paš o kheliben, hoj o Saul murdarda peskere ezere (1 000), ale o David peskere deš ezere (10 000)?"

⁶ O Achiš vičinda le David a phendá leske: "Avke sar dživel o RAJ, čačes sal pačivalo, vašoda kamľomas, hoj te aves manca, sar džaha pro maribena. Ole dživesestar, sar avľal ke ma, dži adadžives na arakhlom pre tu nič nalačo. Ale le vodcenge na sal pre dzeka. ⁷ Vašoda visar tut a dža andro smirom. Ma ker nič, so nane pre dzeka le Filištínike vodcenge."

⁸ "So ajsa kerďom, hoj našti džav pro mariben pro ňeprijateľa peskere rajeskere the kraliskere?" phučľa o David le Achišostar. "So šaj phenes pre ma, pre tiro služobňikos, akorestar, sar tuke chudľom te služinel, dži adadžives?"

⁹ O Achiš leske odphendá: "Me džanav. Se sal mange pre dzeka sar le Devleskero aňjelos. Ale o Filištínike vodci phende: 'Našti džas amenca pro mariben.'

¹⁰ Vašoda ušti tajsa mek sigeder, sar vidňisalola, a dža het tu the tire rajeskere služobňika."

† Oda hin: le rašajengere losi.

¹¹ Avke o David peskere muršenca sig tosara uštile a gele pale andre Filištíniko phuv. Ale o Filištínci džanas andro Jezreel.

O David dochudel savoro pale le Amalekendar

30 Pro trito džives o David avľa peskere muršenca andro Ciklag. Ale sar ode na sas angloda, o Amaleka gele pro mariben andro Negev a o foros Ciklag domarde the labarde avri. ² Zaile odarik savore džuvlën the savoren, save ode sas, le ciknederestar dži ko phureder, ale ñikas lendar na murdarde. Ča džanas dureder a lenas len het peha.

³ Sar avľa o David peskere muršenca ko foros, dikhľa, hoj hino avrilabardo a hoj o Amaleka lïgende het lengere romñen, čhaven the čhajan. ⁴ O David the o murša, save leha sas, chudle zorales te rovel a rovenas, medik na ačhile bi e zor. ⁵ Zaile the le Davidoskere soduje romñijen: La Achinoama andral o Jezreel the la Abigajil andral o Karmel, e romñi pal o Nabal. ⁶ O David pes prekal ada dochudľa andre bari bibach, bo leskere murša vakernas pal oda, hoj les kamen te murdaren le barenca. Dojekheske lendar sas pharo andro jilo pal peskere čhave the čhaja, ale o David arakhľa zor andro RAJ, peskero Del.

⁷ O David phendä le rašaske le Ebjataroske, le Achim-elechoscere čhaske: "Dža, an mange o efodos!" Avke oda o Ebjatar leske andä ⁸ a o David phučľa le RAJES-TAR: "Majinav te džal pal kala živaña? Dochudava len?"

"He, dža pal lende," o RAJ odphendä. "Čačes len dochudeha a aneja pale savoren, saven zaile."

⁹ Avke o David geľa het šov šel (600) muršenca, save leha džanas. Sar dogele paš o pañi Besor, varesave lendar ode zaačhile. ¹⁰ O David džalas dureder pal o Amaleka ča štar šel (400) muršenca a duj šel murša ode ačhile, bo na birinenas te džal dureder prekal o pañi Besor.

¹¹ Pre maľa arakhle varesave Egipťanos a ande les ko David. Dine les maro, pañi, ¹² kotor bokeli le figendar the duj konarica šuke hrozni. Sar chaľa, takoj avľa ke peste, bo imar trin džives the trin rača ñič na chaľa añi na piľa.

¹³ O David lestar phučľa: "Ko hin tiro raj? Khatar sal?" Ov leske odphendä: "Som služobñikos andral o Egípt, o sluhas jekhe Amalekoske. Sar anglo trin dživesa nasvalifom, miro raj man omukľa. ¹⁴ Džahas pro maribena andre phuv le Keretanengeri pro juhos andre Judsko the andre phuv le Kaleboskeri a zlabardam avri o foros Ciklag."

¹⁵ "Ligendälas man ke ola slugađa?" phučľa lestar o David.

Ov leske odphendä: "Le vera pro Del, hoj man na murdareha a na deha man andro vasta mire rajeske. Palis tut ke odi partija lidžava."

¹⁶ Avke ov lïgendä les ode. Sar avle ode, o Amaleka sas rozčhide všadzík. Chanas, pijenas a mulatinenas vaš ole but veci, so peske zaile andral e Filištíniko the Judsko phuv. ¹⁷ Tosarastar o David džalas pre lende a murdarkerelas len dži rači pro dujto džives. Ñiko

lendar na denašľa, ča štar šel (400) terne murša, save beše pro tavi a denaše het. ¹⁸ O David zachrañinda savore veci, peskere duje romñijen the manušen, save o Amaleka zaile. ¹⁹ Ñiko lendar na chibalinelas; añi o cikne añi o bare, o čhave abo o čhaja. O David dochudľa pale savore veci, so lenge o Amaleka zaile, ²⁰ the savore bakren the gurmñen. A ola, save tradenas o stados anglal leste, phenenas: "Kada sa hin le Davidoskero!"

²¹ Palis o David avľa ke ola duj šel (200) murša, save na birinenas leha dureder te džal a saven mukľa paš o pañi Besor. On gele ko David the ke leskere murša, hoj pes te arakhen leha. Sar o David avľa pašeder ke lende, phendä: "Smirom tumenge!" ²² Ale savore nalačhe the nagodaver murša, save džanas le Davidoha, phende: "Ola, save na avle amenca, na chudena ñič olestar, so peske zailam. Ale dojekh chudela pale ča peskera romña the peskere čhaven. Mi len peske len a mi džan het!"

²³ Ale o David phendä: "Phralale mire, ma keren avke oleha, so amenge o RAJ diña. Ov amen zachrañinda a diña amenge andro vasta le živañen, save pre amende avle. ²⁴ Ko kamel oda te šunel? Bo o kotor, so chudela oda, savo džalas andro mariben, chudela the oda, savo ačhila te merkinel pro veci. Savore jekhetane chudena." ²⁵ Akorestar oda avke the kerenas. O David kerđa olestar zakonos, so pes dolikerel andro Izrael dži adadžives.

²⁶ Sar avľa o David andro Ciklag, bičhađa olestar, so peske zaile, le Judske vodcenge, so sas leskere prijatelä. Diña lenge te phenel: "Bičhavav tumenge o daros olestar, so peske zailam le RAJESKERE ñeprijatelendar." ²⁷ Diña oda olenge, save bešen andro fori Betel, Ramot-Negev, Jattir, ²⁸ Aroer, Sifmot, Eštemoa ²⁹ the Rachal; diña the olenge andre fori le Jerachmee-lengere the le Kenitengere ³⁰ a the olenge, save bešen andro fori Chorma, Bor-Ašan, Atach ³¹ the Hebron. O David oda bičhađa pre savore thana, kaj džalas peskere muršenca.

O Saul the leskere čhave meren

31 O Filištínci pes marenas le Izraelitenca. O Izraeliti pes rozdenaše a but lendar sas murdarde pro verchos Gilboa. ² O Filištínci džanas pašes pal o Saul the pal leskere trin čhave a murdarde le čhaven: le Jonatan, Abinadab the Malki-Šua. ³ O mariben pašal o Saul sas zoralo a dochudle les o lukostrelci. Sar les lïvinde, sas andre bari dukh.

⁴ Avke o Saul phendä peskere sluhasko, savo hordinelas leskere zbrañi: "Cirde avri e šablä a murdar man sigeder, sar avena ola naobčhinde (naobrezi-men), hoj man te na premaren a te na keren mange ladž."

Ale leskero sluhas oda na kamelas te kerel, bo igen daralas. Avke o Saul iľa peskeri šablä a čhida pes pre late. ⁵ Sar o sluhas dikhľa, hoj o Saul hino mulo, the ov pes čhida pre šablä a muľa leha. ⁶ Avke andre oda

džives mule jekhetane o Saul, leskere trin čhave, leskero sluhas the savore leskere murša.

⁷ Sar dikhle o Izraeliti pre dujto sera la dolinakeri Jezreel the pro vichodos le Jordanoskero, hoj o Izraeliti pes rozdenašle a hoj o Saul the leskere čhave mule, the on denašle a omukle peskere fori. Avke o Filištinci avle a zaile peske ole fori.

⁸ Pre aver džives pal o mariben o Filištinci avle te občorel olen, save sas mule, a arakhle ode le Saul the leskere trine čhaven pro verchos Gilboa. ⁹ Le Sauloske odčhinde o šero, ile leskeri vizbroj a bičhade andre Fil-

ištíniko phuv. Kada hiros dine te džanel andre lengere modlengero chramos the maškar o nipi. ¹⁰ Le Sauloskeri vizbroj thode andre la Aštartakero chramos a leskero tēlos figinde pro muros le foroskero Bet-Šan.

¹¹ Sar o manuša andral o Jabeš-Gilead pes došunde, so o Filištinci kerde le Sauloha, ¹² gele savore zorale murša caľi rat andro Bet-Šan, hoj te len tele pal o foroskero muros le Sauloskero the leskere čhavengere tēla. Sar avle andro Jabeš, o tēla zlabarde, ¹³ lengere kokala thode andro hrobos tel o stromos tamariška paš o Jabeš a efa džives pes poscinenas.

2. SAMUELOSKERO

O David pes dodžanel pal o Sauloskero meriben

1 Pal o meriben le Sauloskero o David pes visarđa le maribnastar, andre savo ňerinda (zvitazinda) upral o Amaleka, a ačhiľa duj dživesa andro Ciklag.

2 Pro trito džives avľa ko David jekh murš andral le Sauloskero taboris. Leskere gada sas čhingerde a sas leske o prachos pro šero. Sar avľa ko David, bandiľa pro khoča anglal leste.

3 "Khatar aves?" phučľa lestar o David.
"Denašlom andral o Izraeliko taboris," ov odphenda le Davidoske.

4 "Phen mange, so pes ačhiľa?" phenda leske o David.
"O murša denašle andral o mariben," ov odphenda.
"But lendar pele a mule. Muľa the o Saul the leskero čhavo Jonatan."

5 O David mek phučľa le terne muršestar: "Sar džanes, hoj o Saul the leskero čhavo o Jonatan mule?"

6 O terno murš leske odphenda: "Somas pro verchos Gilboa a dikhľom, sar o Saul pes predemel la kopijaha a o murša pro verdana the pro graja les dochuden.

7 Sar o Saul pes visarđa, dikhľa man a zvičinda pre ma. Phendom: 'Kade som!' **8** Ov mandar phučľa: 'Ko sal tu?' Odphendom: 'Me som Amalekos.' **9** Palis mange phenda: 'Av ke ma a murdar man, bo hin man bare dukha, ale mek dživav.' **10** Avke geľom ke leste a murdarđom les, bo džanas, hoj ola dukha imar na predživela. Palis iľom tele pal leskero šero e korona the pal o musa o naramkos a andom oda tuke, rajeja miro."

11 Sar o David oda šunda, takoj pre peste čhingerđa o gada a kerde oda the leskere murša, save sas leha.

12 Andre bari žaľa rovenas a poscinenas pes dži rači vaš o Saul the vaš leskero čhavo Jonatan; vaš calo Izrael the vaš o manuša le RAJESKERE, bo sas murdarde andro mariben.

13 Androda o David phučľa le terne muršestar: "Khatar sal?"
Ov odphenda: "Me som jekhe Amalekoskero čhavo, cudzincos, savo bešav andre tumari phuv."

14 Avke o David lestar phučľa: "Tu pes na darahas te hazdel o vast a te murdarel le RAJESKERE pomakhles?"

15 Palis o David vičinda jekhe le terne muršendar a phenda leske: "Av ade a murdar les." Avke ov geľa a murdarđa les. **16** Bo o David phenda: "Tiro rat mi perel pre tiro šero! Bo korkoro tut pridžanľal, hoj murdarďal oles, kas o RAJ ačhada kraliske upral o Izrael."

Le Davidoskeri rovišnaskeri gili

17 Avke o David giľađa rovišnaskeri gili prekal o Saul the leskero čhavo Jonatan. **18** Vičinda la "E Gili le Lukoskeri" a prikazinda le Judaskere manušenge, hoj pes la te sikaven. Hiňi pisimen andro zvitkos le Jašariskero.

19 "Ó, Izrael, tiro baripen the radišagos akana pašľon pro brehi!
Ó, sar pele ola zorale murša!
20 Ma vakeren pal oda andro Gat,
aňi ma rozľidžan oda pal o ulici andro Aškalon,
hoj te na radisaľon o čhaja le Filištínengere;
o čhaja olengere, save nane občhinde (obrezimen),
hoj te na asan.

21 Tumen, verchale, so san andre Gilboa:
Te na cindarel e rosa aňi te na del brišind pre tumende,
aňi o maľi te na den o ulipen,
bo ode sas andre melfarde o štiti le zorale muršengere
a o štitos le Sauloskero imar nane buter pomakhlo le olejoha,
22 ale le rateha the le thulipnaha le zorale muršendar,
save mule.
O lukos le Jonatanoskero šoha (ňikda) na našađa peskero cieľos
a e šabľa le Sauloskeri sas furt čalardi leskere ňeprijaťendar.

23 Ajse šukar the igen kamade sas o Saul the o Jonatan;
sas jekhetane andro dživipen the andro meriben.
On sas sigeder sar o orli a zoraleder sar o ľevi.
24 Čhajale le Izraeloskere, roven upral o Saul!
Ov tumen urelas andro purpurova gada,
so sas šukar pochtanestar;
le somnakune vecenca tumenge len šukararlas.
25 Ó, sar perkerde o zorale murša andro mariben!
Pre tire uče thana pašľol o Jonatan mulo!
26 Bari žaľa man hin pal tu,
Jonatan, phraloro miro.
Salas mange igen dragano
a tiro kamiben ke mande sas igen šukar,
feder sar o kamiben le džuvľengero.
27 Ó, sar perkerde o zorale murša!
O maribnaskere zbraňi sas našade!"

O David ačhel kraliske upral e Judsko

2 Palis o David phučla le RAJESTAR: "Kames, hoj te džav andre varesavo Judsko foros?" "Dža!" odphenda leske o RAJ. "Kaj majinav te džav?" phučla pale o David. "Andro Hebron," odphenda o RAJ. 2 Avke o David ode geľa a leha the leskere duj džuvľa, e Achinoama andral o Jezreel the e Abigajil andral o Karmel, leskeri romňi pal o Nabal. 3 O David iľa peha the peskere muršen lengere famelijenca a bešenas andro Hebron the andro pašutne fori. 4 Palis avle o murša andral e Judsko a pomakhle ode le David vaš o kralis upral o kmeňos le Judaskero. Sar o David šunda, hoj o manuša andral o Jabeš-Gilead parunde le Saul, 5 bičhađa peskere muršen, hoj te džan ko Jabeš-Gilead te phenen le manušenge: "Mi požehñinel tumen o RAJ, bo presikadãan o jileskeriben peskere rajeske le Sauloske oleha, hoj les parundãan. 6 Akana o RAJ mi presikavel tumenge o jileskeriben the e pačiv. Kamav tumenge te visarel pale oda lačhipen, so tumen kerđan. 7 Ale akana aven zorale, ma podden tumen! O Saul tumaro raj muľa, ale o Judaskero kmeňos man pomakhľa vaš peskero kralis."

O Išbošet ačhel kraliske upral o Izrael

8 Ale o Abner, o čhavo le Neroskero, savo sas o veliteľis upral le Sauloskere slugađa, iľa le Sauloskere čhas le Išbošet a prefigenda les prekal o paňi Jordan andro foros Machanajim. 9 Ode les o Abner ačhađa kraliske upral o phuva Gilead, Ašer, Jezreel, Efrajim, Benjamin the upral calo Izrael. 10 Le Sauloskere čhaske le Išbošetoske sas saranda (40) berš, sar ačhiľa kraliske upral o Izrael, a kralinelas duj berš. Ale o kmeňos Juda pes likerenas le Davidostar. 11 O David kralinelas upral o kmeňos Juda andro Hebron efa berš the šov čhon.

O maribena maškar o Izraeliti the e Judsko

12 Andre jekh džives o Abner, o čhavo le Neroskero, geľa le Išbošetoskere služobňikenca andral o Machanajim andro Gibeon. 13 Andre oda časos gele pro drom the o Joab, o čhavo la Cerujakero, le Davidoskere služobňikenca a arakhle pes lenca paš o paňi Gibeon. Jekh partija pes rozthode pre jekh sera le paňestar the dujto pre aver.

14 Avke o Abner phenda le Joaboske: "Mi uštën varesave le terne muršendar a mi maren pes jekh avreha angle amende."

"Mi džan," phenda o Joab.

15 Avke gele pre peste avri dešuduj (12) Benjamini vaš o Išbošet a dešuduj murša vaš o David. 16 Chudle jekh avres le šerestar a demade jekh avreske la šablaha andre sera (pašvar). Avke savore jekhetane pele. Ole thaneske andro Gibeon dine nav Chelkat-Haccurim, so hin prethodo: e Maľa le Šablengeri.

17 Oda džives chudľa maškar lende zorale mariben a le Davidoskere murša ñerinde (zvitãzinde) upral o Abner the upral o Izraeliti.

18 Sas ode o trin čhave la Cerujakere: O Joab, o Abišaj the o Asahel. O Asahel džanelas te denašel sigo sar srnka. 19 Ov denašelas pal o Abner a na visarelas pes aňi pre čači (pravo), aňi pre baľogňi (ľavo) sera. 20 Androdro o Abner pes obdikhľa a phučla le Asahelostar: "Sal oda tu, Asahel?"

"He! Me som," ov odphenda.

21 Avke o Abner leske phenda: "Dža pre čači (pravo) abo baľogňi (ľavo) sera! Chude varesave terne muršes a le leskere veci." Ale o Asahel na kamelas te preačhel te džal pal o Abner.

22 O Abner leske pale phenda: "Preačh pal ma te džal! Soske majinav tut te murdarel? Sar palis dikhlomas andro jakha tire phraleske le Joaboske?"

23 Ale o Asahel peske na delas te phenel, avke o Abner leske demađa la kopjakere palune agoreha andro per. E kopija leske pregeľa avri prekal o dumo. O Asahel peľa a muľa pre oda than. Pre oda than, kaj o Asahel peľa a muľa, pes zaačhavelas dojekh, ko odarik predžalas.

24 Ale o Joab the o Abišaj džanas dureder pal o Abner. Sar zaračila, avle pro brehos Amma anglo Gijach pro drom ke pušta Gibeon. 25 Avke o Benjamini pes zgele le Abneroha sar jekh partija a ačhenas upre pre jekh brehos. 26 O Abner zvičinda pro Joab: "Dži kana kamas jekh avres te murdarkerel? Tu na ačhaľos, hoj oda amenge na anela ñič lačho? Kana imar pheneha le muršenge, hoj te preačhen te džal pre peskere phrala?"

27 "Avke sar dživel o Del," phenda leske o Joab, "te na prevakerđalas tu, mire murša na preačhlehas, ale gelehas pal peskere phrala dži tosara." 28 Avke o Joab zatrubinda pro rohos, savore murša zaačhile a preačhile te džal pro Izraeliti. Avke o mariben imar dureder na sas.

29 O Abner peskere muršenca džalas calo rat prekal e Araba, pregele prekal o paňi Jordan a džalas dži ko dilos andro Machanajim.

30 Sar o Joab preačhiľa te džal pal o Abner, diňa te zvičinel savore muršen a avľa pre oda, hoj ode na sas dešueňa (19) le Davidoskere muršendar the o Asahel. 31 Ale o murša le Davidoskere murdarde trin šel the šovardeš (360) le Abneroskere muršen andral o Benjamin. 32 Avke le Asahel prefigende andro Betlehem a parunde les andre le dadeskero hrobos. Palis o Joab peskere muršenca džanas cali rat a andro Hebron doavle, sar vidñisaľolas.

3 O maribena maškar o Sauloskere the Davidoskere murša likerelas igen but. O David furt buter zoraľolas, ale le Sauloskere manuša našavenas e zor.

Le Davidoskere čhave

2 Andro Hebron ulile le Davidoske kala čhave: Ešebno (peršo) o Amnon, o čhavo la Achinoamakero andral o Jezreel; 3 dujto o Kileab, o čhavo la Abigajilakero, savi

sas romni le Nabaloskeri andral o Karmel; trito o Absolon, o čhavo la Maachakero, savi sas čhaj le kraliskeri Talmajoskeri andral o Gešur; ⁴ štarto o Adonijah, o čhavo la Chaggitakero; pandžto o Šefatjah, o čhavo la Abitalakero; ⁵ the šovto o Jitream, o čhavo la Eglakero. Kala čhave ulile le Davidoske andro Hebron.

O Abner predžal ko David

⁶ Andre oda časos, sar sas o maribena maškar o Sauloskere the Davidoskere murša, o Abner ačhila angluno le Sauloskere muršendar. ⁷ Le Saul sas romni-služka e Ricpa, e čhaj le Ajoskeri.

Andre jekh džives o Išbošet, o čhavo le Sauloskero, phendā le Abneroske: "Soske geľal te pašľol paš le dadeskeri aver romni?"

⁸ O Abner chalas bari cholľ pre leste a phučľa: "Som varesavo rikono andral e Judsko? Dži adadžives presikavav e pačiv tire dadeske le Sauloske, leskere phralenge the leskera famelijake. Andro vasta le Davidoske tut na diňom, ale tu mange adadžives čhives pro jakha oda, hoj kerđom binos kala džuvľaha? ⁹ Man mi marel zorales o Del, te na kerava le Davidoske oda, so leske o RAJ phendā andre vera. ¹⁰ Bo o RAJ phendā, hoj le Sauloskera famelijatar odlela o kraljšagos a kerela, hoj le Davidoskero tronos ačhela pro furt upral o Izrael, upral e Judsko the upral cali phuv andral o Dan dži ke Beer-Šeba." ¹¹ Ale o Išbošet le Abneroske andre bari dar aňi na odphendā.

¹² Palis o Abner bičhaďa peskere muršen ko David, hoj leske te phenen: "Kaskeri hiňi kadi phuv? Phand manca zmluva a pomožinava tuke, hoj o Izraeliti te predžan pre tiri sera."

¹³ "Mištes," odphendā o David. "Phandava tuha zmluva, ale na zdžava man tuha, te na aneħa la Sauloskera čha la Mikal ke mande." ¹⁴ Palis o David bičhaďa muršen ko Išbošet, le Sauloskero čhavo, hoj leske te phenen: "De mange pale mira romňa la Mikal, sava chudľom vaš oda, hoj murdarđom šel Filištinen."

¹⁵ Avke o Išbošet bičhaďa muršen a ile la lakere romestar le Paltielostar, savo sas le Lajjšoskero čhavo. ¹⁶ O Paltiel džalas laha rovibnaha dži ko foros Bachurim. Ale o Abner leske phendā: "Dža pale khere!" Avke ov geľa.

¹⁷ O Abner pes zgela le Izraelike vodcenca a phendā lenge: "Tumen imar sigeder kamľan le David kralške.

¹⁸ Akana keren oda, bo o RAJ le Davidoske phendā: 'Prekal peskero služobňikos David cirdava peskero Izraeliko narodos avri andral o vasta le Filištinenegere the andral o vasta savore lengere ħeprijateľengere.' "

¹⁹ O Abner oda phendā avke the le Benjaminenge. Palis geľa pal o David andro Hebron, hoj leske te phenel pal savoreste, so kamle savore Izraeliti the o Benjamini te kerel. ²⁰ Sar avľa o Abner le biš muršenca ko David andro Hebron, o David kerďa hoscina prekal leste the prekal leskere murša. ²¹ Palis o Abner phendā le Davidoske: "Džava akana te zvičinel savore Izraeliten ke tu kralina, rajeja miro. Phandena tuha e zmluva, hoj te aves kralis upral savoreste, avke sar kames." Avke o

David premukľa le Abner a ov geľa het andro smirom.

O Joab murdarel le Abner

²² Ipen akor pes visarenas pale andral o mariben o Joab the le Davidoskere služobňika a ande peħa oda, so peske zaile. Ale o Abner imar na sas ko David andro Hebron, bo les premukľa, hoj te džal andro smirom khere. ²³ Sar avľa o Joab peskere slugaďenca, phende leske, hoj o Abner, le Neroskero čhavo, avľa ko kralis a ov les mukľa te džal andro smirom.

²⁴ O Joab geľa ko David a phučľa lestar: "So kerďal? Soske mukľal te džal le Abner ča avke, sar avľa ke tu?"

²⁵ Se tu prindžares le Abner, le Neroskere čhas! Avľa vašoda, hoj tut te oklaminel. Kamel te rozdikhel o thana, kaj phires a khatar pes visares pale. Kamel te džanel pal savoreste, so keres."

²⁶ Sar o Joab odgeľa khatar o David, bičhaďa le muršen pal o Abner. On les ande pale khatar e chaňig Sira, ale o David olestar na džanelas. ²⁷ Sar pes o Abner visarďa pale andro Hebron, o Joab leske phendā: "Kamav tuha ča korkoro te vakereľ." Palis les ľigendā paš e foroskeri brana, ode leske predemaďa o per la šablaha a ov muľa. O Joab kamľa leske te visarel vaš oda, hoj murdarďa leskere phrales le Asahel.

²⁸ Sar pes o David pal oda došundā, phendā: "Man the mire kraljšagos nane binos vaš o rat le Abneroskero. ²⁹ Leskero rat mi perel pro šero le Joaboskero the pre leskeri cali famelija, hoj te el furt murš andre leskeri famelija, ko hin nasvalo avke, hoj čľal lestar hňisos, abo kas hin malomocenstvo, abo kas nane maro, ko phireľ pro bakulľi, či perel andro mariben!"

³⁰ Avke o Joab the leskero phral o Abišaj murdarde le Abner vaš oda, hoj murdarďa leskere phrales le Asahel andro mariben andro Gibeon.

³¹ O David phendā le Joaboske the savore manušenge, save sas leħa: "Rozčhingeren peske o gada, uren pre peste o gone a chuden te rovel pal o Abner." Sar les parunde, o David geľa pal o murša, save ľigenenas leskero tēlos. ³² Le Abner parunde andro Hebron. O David zorales rovelas paš le Abneroskero hrobos a rovenas leħa savore manuša.

³³ Palis o David giľaďa rovibnaskeri gilľi: "Mušindā o Abner te merel sar varesavo dilino manuš?"

³⁴ O vasta tuke na sas zaphandle; tire pindre na sas andro lanci; tu peľal sar oda, kas murdarde o živaňa."

Androda savore manuša pale chudle te rovel. ³⁵ Palis avle savore ko David a ispidenas pre leste, hoj te chal varesavo chaben, medik sas džives. Ale o David iľa vera: "Mi marel man zorales o Del, te čhava maro abo varesavo chaben sigeder, sar zaračola."

³⁶ Sar oda šunde savore manuša, sas lenge oda pre dzeka avke sar savoro, so o David kerelas. ³⁷ Oda džives savore manuša the calo Izrael džanenas, hoj o David na kamľa o meriben le Abneroskero.

³⁸ O David phendā peskere služobňikenge: "Či na džanen, hoj adadžives muľa o baro vodcas, o angluno murš andral o Izrael? ³⁹ Choc som pomakhlo vaš o kralis, adadžives som sar bi e zor a kala duj čhave la Cerujakere – o Joab the o Abišaj – hine zoraleder sar me. O RAJ mi visarel pale le nalačipnaha oleske, savo kerđa nalačo."

O Išošet merel

⁴ Sar pes o čhavo le Sauloskero o Išošet došundā, hoj o Abner muľa andro Hebron, daralas pes a o Izraeliti na džanenas so te kerel. ² Le Išošet sas duj murša, save sas veliteľā upral o slugađa. Jekh lendar pes vičinelas Baanah the dujto Rechab. Lengero dad sas o Rimmon andral o foros Beerot pre Benjaminiko phuv. Lenas o Beerot sar Benjaminiko foros, ³ bo o manuša, save angloda bešenas andro Beerot, denašle andro Gittajim a dživen ode dži adadžives sar cudzinci.

⁴ Le Sauloskere čhas le Jonatan sas čhavo, savo pes vičinelas Mefibošet. Sas leske pandž berš, sar avľa andral o foros Jezreel o hiros pal o Saul the Jonatan, hoj sas murdarde. E služka, savi les bararelas avri, les iľa a denašľa leha. Sar denašelās, avke sidārelās, hoj lake peľa andral o vasta a ačhiľa kalika.

⁵ Andre jekh džives o Rechab the o Baanah, o čhave le Rimmonoskere andral o Beerot, pes mukle pro drom a avle paš o kher le Išošetoskero pal o dilos, sar ipen pašľolas pro haďos. ⁶ Gele andro kher avke sar ola, ko hordinen o žužodiv. Predemade le Išošet a o Rechab the leskero phral Baanah denašle.

⁷ Sar gele andro kher, ipen akor o Išošet pašľolas pre peskero haďos, kaj sovelas. Demade les, murdarde les a odčhinde leske o šero. Palis ile leskero šero a džanas cali rat prekal e Jordaňiko dolina. ⁸ Sar avle andro Hebron, sikade le Išošetoskero šero le Davidoske a phende: "Kade hin o šero le Išošetoskero, savo sas o čhavo le Sauloskero, tire ňeprijateljiskero, savo tut kamľa te murdarel. Adadžives o RAJ visardā pale le Sauloske the leskera famelijake vaš miro raj the kralis."

⁹ Ale o David odphendā le Rechaboske the le Baanoske: "Avke sar dživel o RAJ, savo man cirdňa avri andral savore pharipena, ¹⁰ sar mange jekhvar jekh murš avľa te phenel, hoj o Saul muľa, a gondolinelas peske, hoj mange anda lačo hiros, me les ode andro Ciklag chudľom a murdardom. Kavke chudľa o počňiben vaš oda lačo hiros. ¹¹ So mek goreder oda ela prekal o nalače manuša, save murdarde ole čačipnaskere muršes, medik sovelas pre peskero haďos andre peskero kher. Akana na majinav te mangel leskero rat andral tumare vasta a tumen te zňičinel pal adi phuv?"

¹² Avke o David phendā peskere terne muršenge, hoj len te murdaren. On lenge odčhinde o vasta the o pin-dre a figinde len paš o cikno paňi andro Hebron. Le Išošetoskero šero ile a parunde andro le Abneroskero hrobos paš o Hebron.

O David ačhel kraliske upral calo Izrael

⁵ Palis savore Izraelike kmeňi avle ko David andro Hebron a phende: "Dikh, sam jekh rat andral tiri famelija. ² Imar akor, sar o Saul sas kralis upral amende, tu lidžahas le Izraeloskere slugađen andro mariben. O RAJ tuke phendā: 'Tu lidžaha miro Izraeliko narodos sar pastjeris a aveha lengero vodcas.'"

³ Avke savore vodci andral o Izrael avle ko David andro Hebron. Ode lenca o David phandľa zmluva anglo RAJ a pomakhle les vaš o kralis upral o Izrael.

⁴ Le Davidoske sas tranda (30) berš, sar ačhiľa kralis, a kralinelas saranda (40) berš. ⁵ Kralinelas upral e Judsko efa berš the šov čhon andro Hebron a upral calo Izrael the Judsko kralinelas tranda the trin (33) berš andro Jeruzalem.

O David zalel o Jeruzalem

⁶ Jekh džives o kralis o David džalas peskere muršenca andro Jeruzalem pro Jebuseja, save ode bešenas. Ale o Jebuseja dine te phenel le Davidoske: "Ade pes na dochudeha. The o kore the bange tut adarik trade-na avri," bo peske gondolinenas, hoj o David pes ode na dochudela. ⁷ Ale o David zaila the avke o zoralo foros Sion; oda akana hin o Foros le Davidoskero.

⁸ Oda džives o David phendā: "Ko kamel te ňerinel (zvitazinel) upral o Jebuseja, mi džal prekal o tunelis, khatar džal o paňi andro foros, hoj te dochudel ole 'koren the bangen', save hine mire bare ňeprijateljā." Vašoda pes vakerele: "O kore the o bange na džana andro Devleskero kher."

⁹ Sar o David zaila oda zoralo foros, ačhiľa ode te bešel a diňa leske nav "Foros le Davidoskero". Palis o David ačhađa o muros khatar o Millo – o than, kaj zrovňindā o brehos – dži andre. ¹⁰ O David ačhelas furt zoraleder a o RAJ, o Del o Nekzoraleder, sas leha.

¹¹ O kralis Chiram andral o Tir bičhađa peskere služobňiken ko David. Jekhetane lenca bičhađa o cedroskere kašta, le tēsaren the muraren, hoj leske te ačhaven palacis. ¹² Akor o David dikhľa, hoj o RAJ les ačhađa kraliske upral o Izrael a hoj hazdňa upre leskero krališagos prekal peskero Izraeliko narodos.

Le Davidoskere čhave uľon andro Jeruzalem

¹³ Sar o David geľa het andral o Hebron, iľa peske andral o Jeruzalem mek avre romňijen-služobňičken, savenca les sas muršora the čhaja. ¹⁴ Kala hine o nava leskere čhavengere, save uľile andro Jeruzalem: O Šammuas, Šobab, Natan, Šalamun, ¹⁵ Jibchar, Elišuas, Nefeg, Jafias, ¹⁶ Elišamas, Eljadas the o Elifelet.

O ňerindipen upral o Filištinci

¹⁷ Sar pes o Filištinci dodžanle, hoj le David pomakhle kraliske upral o Izrael, džanas savore Filištínike slugađa pre leste, hoj les te zalen. Sar pes o David pal oda došundā, geľa andre peskero zoralo than. ¹⁸ Androda o Filištinci avle a rozthode pes andre Refajengeri dolina.

¹⁹ Avke o David phučelas le RAJESTAR: "Majinav te džal pro Filištinci? Deha mange len andre mire vasta?"

"Dža pre lende!" odphenda leske o RAJ. "Čačes dava tuke len andre tire vasta."

²⁰ Avke o David geľa andro Baal-Peracim, a sar ňerinda upral lende, phenda: "O RAJ rozčhinda mire ňeprijateľen anglal mande, avke sar o paŋi predemel o hradzi." Vašoda dine ole thaneske nav Baal-Peracim †.

²¹ O Filištinci ode mukle peskere devloren a o David the leskere murša len odlgende.

²² Ale o Filištinci pale gele pre lende pro mariben a kerde peske taboris andre Refajengeri dolina. ²³ Avke o David phučľa pale le RAJESTAR a ov leske odphenda: "Ma dža pre lende anglunestar, ale obdža len palunestar. Dža pre lende pašal o balzamike stromi. ²⁴ Sar šuneha o phiriben pal o agor ole balzamike stromengero, takoj dža pro Filištinci pro mariben, bo akor džava me anglal tu te ňerinel upral lengere sluğađa." ²⁵ O David kerđa sa avke, sar leske o RAJ phenda, a murdarkerelas le Filištinen la Gebatar dži ko Gezer.

E Zmluvakeri Archa andro Jeruzalem

6 O David peske pale kidľa avri 30 000 nekfedere muršen andral o Izrael. ² Džalas lenca andro Judsko foros Baala, hoj odarik te len le Devleskeri Archa, so pes vičinelas "E Archa le Nekzoraledere RAJESKERI, savo bešel upral o cherubi". ³ Le Devleskeri Archa thode pre nevo verdan a ligende la avri andral o Abinadaboskero kher, savo sas pro brehos. Le Abinadaboskere čhave o Uzzah the o Achijo la lidžanas. ⁴ Sar prelidžanas e Devleskeri Archa andral o kher le Abinadaboskero, o Achijo džalas angle Archa. ⁵ O David the savore Izraeliti khelenas a bašavenas caľa zoraha anglo RAJ pro citari, harfi, bubni, čerkutki the pro cimbal.

⁶ Ale sar avle ko Nachonoskero humnos, o Uzzah nacirdľa peskero vast ke Devleskeri Archa a zachudľa la, bo le guruvence podgele o pindre. ⁷ O RAJ igen cholisaliľa pro Uzzah, bo pes opovažinda te chudel e Zmluvakeri Archa. Vašoda les murdarda pro than a ov muľa paš e Archa le Devleskeri.

⁸ O David rušelas, hoj o RAJ demađa le Uzzah peskera cholaha, vašoda diňa ole thaneske nav Perek-Uzzah ††. Avke pes vičinel dži adadžives.

⁹ Oda džives chudľa o David te daral le RAJESTAR a phenda: "Sar me šaj lav ke ma le RAJESKERI Archa?"

¹⁰ Avke o David na iľa le RAJESKERI Archa ke peste andro Jeruzalem, ale diňa la te lidžal andro kher le Obed-Edomoskero, savo sas andral o Gat. ¹¹ E Archa le RAJESKERI ode ačhiľa trin čhon a o RAJ požehñinelas le Obed-Edom the caľa leskera famelija.

¹² Le kraliske le Davidoske phende, hoj prekal e Devleskeri Archa o RAJ požehñinel le Obed-Edom, leskera famelija the savoro, so les hin. Avke o David iľa le Devleskeri Archa andral o kher le Obed-Edomoskero a li-

† E Hebrejiko čhib: O raj, savo predemel †† E Hebrejiko čhib: O trestos le Uzzoskero

genda le radišagoha andro Foros le Davidoskero. ¹³ Sar o murša, save lidžanas le RAJESKERI Archa, kerde šov kroki, o David obetinda le bikos the thuľa gurumňa.

¹⁴ O David, pre saveste sas urdo efodos le lanostar, chudľa andral caľi peskeri zor te khelel. ¹⁵ Ov the savore Izraeliti ile le RAJESKERI Archa andro Jeruzalem, džanas bara vikaha a trubinenas.

¹⁶ Sar džanas la RAJESKERA Archaha andro Jeruzalem, le Sauloskeri čhaj e Mikal dikhelas avri prekal e oblaka. Sar dikhľa le kralis le David, sar chučerel a khelel anglo RAJ, dikhľa les tele.

¹⁷ Sar ande le RAJESKERI Archa, thode la pro pririchtimen than maškar o stanos, so imar o David prekal e Archa ačhađa. O David andľa anglo RAJ labarde the smiromoskere obeti. ¹⁸ Sar imar dokerđa kala obeti, požehñinda le manušen andro nav le Nekzoraledere RAJESKERO. ¹⁹ Paľis diňa savore Izraeliten, save ode sas, le muršen the le džuvľen, po jekh maro, ovocno bokeli le dätľendar the bokeli le šuke hroznendar. Paľis pes savore rozgele andre peskere khera.

²⁰ Sar pes o David visarelas khere te požehñinel peskera famelija, le Sauloskeri čhaj e Mikal geľa avri anglal leste a phenda: "Savi bari pačiv tuke kerďal adadžives, tu, savo sal kralis andro Izrael! Adadžives likerďal tut sar varesavo sluhas, sar čhidľal tele peskero ruchos anglal o služki!"

²¹ O David lake odphenda: "Sas oda anglo RAJ, savo peske na iľa avri tire dades aňi caľa leskera famelija, ale man peske ačhađa vaš o kralis upral leskere manuša andro Izrael. Me khelava anglo RAJ! ²² A mek buter man kamava te pokorinel sar anglo a angle tire jakha na avava ňič, ale kala služki, pal save vakerehas, man dena pačiv."

²³ Avke e Mikal, le Sauloskeri čhaj, sas bi o čhave dži ko meriben.

Le Natanoskero proctvo

7 Sar o kralis o David geľa te bešel andre peskero palacis a sar o RAJ diňa, hoj leskero krališagos te el andro smirom savore ňeprijateľenca, save sas pašal leste, ² phenda o David le prorokoske le Natanoske: "Dikh, me bešav andro kher, so hino ačhado le cedrostar, ale e Archa le RAJESKERI hiňi ča andro stanos."

³ O Natan leske odphenda: "Dža a ker savoro, so kames te kerel, bo o RAJ hino tuha."

⁴ Avke mek odi rat phenda o RAJ le Natanoske:

⁵ "Dža a phen mire služobňikoske le Davidoske: 'Avke phenel o RAJ: Tu mange kames te ačhavel kher, hoj te bešav andre?' ⁶ Se akorestar, so ligendom le Izraeliten avri andral o Egipt, dži adadžives na bešavas andro kher, ale somas andro stanos všadzik, khatar phirenas. ⁷ Medik somas le Izraelitencu pro drom, šoha (ňikda) na phučľom le Izraelitencu vodcendar, saven ačhadom, hoj te lidžan miro narodos: "Soske mange na ačhade kher le cedrostar?" "

⁸ Akana phenaha mire služobňikoske le Davidoske: 'Kavke vakereľ o RAJ o Nekzoraleder: Andom tut odarik, kaj pasinehas le bakren, a ačhadom tut vaš o

vodcas upral o Izrael. ⁹ Džavas tuha všadzík, kaj džahas, a murdardom savore tire nepřijatělen, save sas anglal tu. Kerava, hoj tiro nav te el igen baro sar o nava le nekbaredere vodcengere pre phuv. ¹⁰ Peskere Izraelike narodoske dava than, kaj les sadzinava a ode bešela. Imar na izdrala a o nalače manuša les na dukhavena, sar oda kerenas angloda; ¹¹ akorestar, sar ačhadom le sudcen upral peskero Izraeliko narodos, aveha andro smirom savore tire nepřijatělendar. O RAJ phenel, hoj ačhavela tuke kher. ¹² Sar avela tiro časos a tu džaha ke tire phure dada, dava tut potomkos, savo ela tutar, a kerava, hoj te el furt zoraleder leskero krališagos. ¹³ Ov ačhavela Chramos prekal miri pačiv a me kerava, hoj te ačhel leskero krališagos pro furt. ¹⁴ Avava leske dad a ov ela miro čhavo. Sar kerela varesavo binos, marava les la pacaha, sar kerel dojekh dad. ¹⁵ Ale miro lačhipen lestar na odlava, sar les odiłom le Saulostar, savos odčhidom anglal tu. ¹⁶ Tiro potomstvos ela zoralo a tiro krališagos the tronos ačhela pro furt anglal ma.' "

¹⁷ O Natan vakerelas le Davidoske sa avke, sar oda šundā le RAJESTAR andro videňje.

Le Davidoskeri modlitba

¹⁸ Palis o kralis o David geła, bešla peske anglo RAJ andro Stanos a modlinelas pes avke:

"Ko som me, ó, RAJEJA, Devla, a ko hin miri famelija, hoj man andal dži ade? ¹⁹ A mek ke oda, sar te ulahas frima, ó, RAJEJA, Devla, vakerehas the pal oda, so ela palis tire služobňikoskera famelijaha. Ó, RAJEJA, Devla, tu avke furt keres le manušeha?

²⁰ So mek pre oda šaj phenav? Se tu, ó, Adonaj, RAJEJA, prindžares tire služobňikos. ²¹ Prekal tiro lav a avke, sar kamlal, kerdal kala savore bare veci a diňal oda te džanel tire služobňikoske.

²² Vašoda sal baro, ó, RAJEJA, Devla, bo nane ajso sar tu. Pal savoreste, so šundam amare kanenca, nane aver Del, sar sal tu. ²³ Pre phuv nane aver narodos ajso sar o Izrael, saves peske cindal avri, hoj te en tire, a oleha peske kerdal baro nav. Bare the šukar veci kerdal prekal lende, sar len iłal avri andral o Egipt a tradnal avri anglal lende avren naroden lengere devlen. ²⁴ Tu kerdal, hoj o Izraeliti te en tire manuša pro furt, a tu, RAJEJA, ačhiłal lengero Del.

²⁵ Ale akana, RAJEJA, Devla, mangav tut, liker pro furt oda lav, so phendal mange the mira famelijake. Doliker oda, sar phendal. ²⁶ Avke tiro nav ela barardo a o manuša vakerena pal tu furt: 'O RAJ o Nekzoraleder hin o Del upral o Izrael!' Tu dolikereha miro tronos pro furt.

²⁷ Bo tu korkoro, ó, Nekzoraleder RAJEJA, o Del le Izraeloskero, sikađal peskere služobňikoske a phendal: 'Ačhaveha tiro potomstvos furt pro tronos †.' Vašoda mange me domukłom te anel kadi modlitba anglal tu.

²⁸ Ó, RAJEJA, Devla, tu sal o Del. Tire lava hine čačipnaskere a tire služobňikoske phendal, hoj kereha leske oda lačhipen. ²⁹ Akana mangav tut, požeňhin mira cala

famelija, hoj vareko latar pro furt te ačhol anglal tu. Bo tu, ó, RAJEJA, Devla, vakerehas a tiro požeňnaňje ačhela pro furt pre miro potomstvos."

Le Davidoskere maribena

8 Palis o David ňerinda (zvitazinda) upral o Filištinci, thođa len tele a odlifa lendar o Meteg-Amma.

² O David ňerinda the upral o Moabčana. Palis len merinda la špargaha. Phendā lenge, hoj te pašlon pre phuv a premerinda len. Sar odmerinda duje špargenca, ole Moabčanen murdarde, palis odmerinda jekha-ha špargaha a olen mukła te dživel. Avke mule duvar ajci sar ola, save ačhile te dživel. O Moabčana ačhile sluhi le Davidoske a anenas leske o daňe.

³ Palis o David ňerinda upral o kralis Hadad-Ezer, o Rechoboskero čhavo, andral e Coba, sar džalas te zalel o phuva paš o Eufat. ⁴ O David zaila lestar 1 700 muršen pro graja the 20 000 slugađen. Mukła peske lendar ča 100 grajen le verdanenca a olenge, save ačhile, diňa te phagel o pindre.

⁵ Sar avle o Aramejčana andral o Damaskus te pomožinel le kraliske Hadad-Ezeroske, o David ňerinda the upral lende a murdarđa lendar 22 000 muršen.

⁶ Palis o David diňa te rozačhavel partiji muršen andro Aramejiko Damaskus. Avke o Aramejčana ačhile sluhi le Davidoske a the on anenas leske o daňe. O RAJ pomožinelas le Davidoske všadzík, kaj džalas.

⁷ O David skidňa le Hadad-Ezeroskere služobňikendar o somnakune štiti a andā len andro Jeruzalem.

⁸ O kralis o David skidňa le Hadad-Ezeroskere forendar Betach the Berotaj igen but bronzos.

⁹ Sar o Toji, o kralis andral o Chamat, pes došundā, hoj o David ňerinda upral cali le Hadad-Ezeroskeri armada, ¹⁰ bičhađa peskere čhas le Joram ko David, hoj les te pozdravinel a te phenel leske: "Av bachtalo vaš oda, hoj ňerinda upral o Hadad-Ezer!" Andā le Davidoske rupune, somnakune the bronzune veci.

¹¹ The ole o David sentňarda le RAJESKE jekhetane le rupoha the le somnakaha, so peske zaila savore narodendar, saven thođa tele: ¹² Le Aramejčanendar, Moabčanendar, Ammončanendar, Filištinenendar, Amalekendar the le Hadad-Ezerostar, savo sas le Rechoboskero čhavo, o kralis andre Coba.

¹³ O David peske kerdā baro nav the oleha, sar pes visarelas pale, hoj murdarđa andre Londi Dolina 18 000 Aramejčanen.

¹⁴ Všadzík andro Edom rozačhađa partiji muršen. Avke savore Edomčana ačhile le Davidoskere sluhi. O RAJ pomožinelas le Davidoske všadzík, kaj ča džalas.

¹⁵ O David kralinelas upral calo Izrael a savore peskere manušenge kerelas oda, so sas čačipnaskero the lačho. ¹⁶ O Joab, la Cerujakero čhavo, sas velitelis upral e armada a o Jošafat, le Achiludoskero čhavo, sas upral savore leskere uradňika. ¹⁷ O Cadok, le Achituboskero čhavo, the o Achimelech, le Ebjataroskero čhavo, sas rašaja a o Serajah sas pisaris. ¹⁸ O Benajah, le Jehojadoskero čhavo, sas velitelis upral o Keretana

† E Hebrejiko čhib: Ačhaveha tuke kher

the Pilešana, save chrañinenas le David. The le Davidoskere čhave sas rašaja.

O David the o Mefibošet

9 Jekh džives o David pes phučla: "Ačhiła le Sauloskera famelijatar mek vareko? Kamfomas leske te presikavel prekal o Jonatan o jileskeriben."

² Le Saul sas sluhās, savo pes vičinelas Cibah. Oles privičinde ko David a phučla lestar: "Tu sal o Cibah?"

Ov odphenda: "Som tiro služobňikos."

³ O David phučla: "Na ačhiła imar le Sauloskere famelijatar ňiko, hoj leske te presikavav le Devleskero jileskeriben?"

O Cibah leske odphenda: "Hin mek ade le Jonatanoskero čhavo, savo hino kalika pro pindre."

⁴ "Kaj hino?" phučla o David.

"Hino andro Lo-Debar, andro kher le Machiroskero, savo hino o čhavo le Ammieloskero," odphenda leske o Cibah.

⁵ Akor o David bičhađa, hoj les te anen andral o Lo-Debar.

⁶ Sar avla ko David o Mefibošet, o čhavo le Jonatanoskero, savo sas čhavo le Sauloskero, bandiła anglal leste le mujeha.

O David zvičinda: "Mefibošet!"

"Ade hino tiro služobňikos," odphenda leske.

⁷ "Ma dara tut!" phenda leske o David. "Kamav tuke te presikavel o jileskeriben prekal tiro dad Jonatan. Visarava tuke o mali pal o Saul tiro papus a furt chaha jekhetane manca pašal miro skamind."

⁸ O Mefibošet bandiła angle leste a phenda: "So hino tiro služobňikos, hoj pes visares ke ajsa mulo rikono, sar som me?"

⁹ Palis o David vičinda le Sauloskere sluhās le Cibah a phenda leske: "Savoro, so sas le Sauloskero the leskera famelijakero, dav le Mefibošetoske, bo hino tiro rajeskero čhavo. ¹⁰ Tu, tire čhave the tire sluhi leske kere-na buči pre mała a skidena leske upre o ulipen, hoj te el le Sauloskera famelija, so te chal. Ale o Mefibošet chala pro furt jekhetane manca pašal miro skamind, bo leskero papus sas o Saul." Le Cibah sas dešupandž (15) čhave the biš (20) sluhi.

¹¹ O Cibah phenda le kraliske: "Tiro služobňikos kerela sa avke, sar pheneha, rajeja miro the kralina." Avke o Mefibošet chalas le Davidoha jekhetane pašal o skamind, avke sar te ulahas jekh le kraliskere čhaven-dar.

¹² Le Mefibošet sas terno čhavoro, savo pes vičinelas Michas. Le Ciboskeri calo famelija ačhile služobňika le Mefibošetoske. ¹³ O Mefibošet bešelas andro Jeruzalem, bo chalas furt jekhetane le Davidoha pašal o skamind. A ov sas kalika pro soduj pindre.

O Ammončana keren le Izraelitenge ladž

10 Sar muła o Ammoniko kralis o Nachaš, leskero čhavo Chanun ačhiła pal leste kralis. ² O David peske phenda: "Presikavava le Nachašiskere čhaske le

Chanunoske o jileskeriben, sar kerdā leskero dad mange." Avke bičhađa peskere služobňiken, hoj leske te del te džanel, hoj le Davidoske hin pharo pal leskero dad.

Sar avle o služobňika andre le Ammončanengeri phuv, ³ o Ammonike vodci phende peskere rajeske le Chanunoske: "Gondolines tuke, hoj o David kamel te del pačiv tire dades oleha, hoj bičhavel peskere služobňiken ke tu? Na, bičhavel len sigeder vašoda, hoj te predikhen kada foros a palis les te zničinen?"

⁴ Androda o Chanun chudla le Davidoskere služobňiken, oholinda lenge jepaš brada, ostrihinda jepaš gada le perestar dži tele a avke len mukla te džal.

⁵ Sar oda phende le Davidoske, bičhađa anglal lende avre muršen, bo ola murša sas igen pre ladž. Diňa lenge te phenel: "O kralis tumenge phenel, hoj te ačhen andro Jericho, medik tumenge na barola o bajuzi pre brada. Palis šaj aven pale."

O mariben le Ammončanenca

⁶ Sar o Ammončana peske pridžandle, hoj le David rozchoľarde, dine te vičinen le Aramejčanen andral o Bet-Rechob the e Coba le 20 000 slugađen, le kralis andral e Maacha le 1 000 muršenca the 12 000 muršen andral o Tob.

⁷ Sar pes o David pal oda došundā, bičhađa andro mariben le Joab the savore zorale slugađen. ⁸ O Ammončana pes rozačhade pro mariben paš e foroskeri brana. O Aramejčana andral e Coba the Rechob a o murša andral o Tob the e Maacha sas rozačhade pre mała.

⁹ Sar o Joab dikhla, hoj avle pre leste anglunestar the palunestar, kidla peske avri nekfeder muršen andral calo Izrael a rozačhađa len pro Aramejčana. ¹⁰ Olen, save ačhile, diňa peskere phraleske le Abišajoske, hoj lenca te džal pro mariben pro Ammončana. ¹¹ Phenda leske: "Te dikhaha, hoj o Aramejčana ňerinen (zvitazinen) upral mande, aveha mange te pomožinel, a te dikhava, hoj o Ammončana ňerinen upral tut, džava me tuke te pomožinel. ¹² Av zoralo a maras pes zorales vaš amare manuša the vaš o Devleskere fori! Mi kerel o RAJ oda, so hin lačo anglal leskere jakha."

¹³ Avke o Joab peskere muršenca džalas andro mariben pro Aramejčana, ale on lestar denašle. ¹⁴ Sar dikhle o Ammončana, hoj o Aramejčana denašen le Joabostar, the on chudle te denašel anglal o Abišaj a gele pale andro foros. Palis o Joab pes visarda andral o mariben a geľa andro Jeruzalem.

O Izrael ňerinel upral o Aramejčana

¹⁵ Sar o Aramejčana dikhle, hoj o Izraeliti ňerinen upral lende, pale pes zgele. ¹⁶ Akor o Hadad-Ezer bičhađa muršen, hoj te anen le Aramejčanen, save bešenas pre aver sera le paňestar Eufat. On avle andro Chelam a o Šobach, o velitelis upral e armada le Hadad-Ezeroskeri, len lidžalas.

¹⁷ Sar oda phende le Davidoske, diña te zvičinel savore Izraeliten. Pregelã prekal o Jordan a avla andro Chelam. O Aramejčana pes rozačhade pro mariben a džanas pro David. ¹⁸ On ale denašle le Izraelitendar. Palis o David the leskere murša murdarde 700 muršen pro verdana the 40 000 muršen pro graja. The le Šobach, le velitëlis upral e armada, dukhade a ov muľa pre oda than. ¹⁹ Sar savore kraľa, save služinenas le Hadad-Ezeroske, dikhle, hoj o Izrael ñerinda upral lende, phandle lenca zmluva a služinenas lenge. O Aramejčana pes imar daranas buter te pomožinel le Ammončanenge.

Le Davidoskero binos

11 Avke pro dujto berš jarone, andro časos, sar o kraľa džanas andro mariben, o David bičhađa le Joab peskere muršenca the savore slugađen andral o Izrael. Ñerinde (zvitazinde) upral o Ammončana a palis pes rozačhade pašal o foros Rabba. Ale o David ačhiľa andro Jeruzalem.

² Ke račate o David uštíla pal o haďos a prephirelas pes pal e palaciskeri strecha. Dikhľa jekha džuvľa, sar pes thovelas (morelas). Oj sas igen šukar. ³ Avke o David bičhađa le sluhas, hoj te dodžanel pes, ko hiňi. O sluhas leske odphenda: "Oj hiňi e Batšeba, le Eliamoskeri čhaj. Lakero rom hino o Chetitos Urijaš."

⁴ Akor o David phenda le sluhaske: "Dža, an la ke mande!" Oj ipen pes obžužarda olestar, so le džuvlen hin sako čhon. Sar avla ke leste, ov pašliľa laha. Palis oj pes visarda khere. ⁵ Ale e Batšeba pes dodžanľa, hoj hiňi khabňi, a diña oda te phenel le Davidoske.

⁶ Palis o David diña te phenel le Joaboske, hoj te bičhavel ke leste le Urijaš. Avke o Joab les bičhađa. ⁷ Sar ke leste avla o Urijaš, o David lestar phučľa: "Sar hin le Joaboske the le slugađenge? Sar džal dureder o mariben?" ⁸ Avke leske phenda: "Dža khere a odpočovin tuke." Palis, sar o Urijaš odgeľa, o David bičhađa daros andre leskero kher. ⁹ Ale o Urijaš na geľa khere, ale pašliľa peske jekhetane savore služobňikenca paš o udar, sar pes džal andro palacis.

¹⁰ Sar le Davidoske phende, hoj o Urijaš na geľa khere, o David leske phenda: "Se avlal pal baro drom, soske na džas khere?"

¹¹ O Urijaš leske odphenda: "E Archa, o murša andral o Izrael the andral e Judsko bešen andro stani a miro velitëlis o Joab peskere muršenca taborinen pre maľa. Sar me šaj džav khere te chal, te pijel a te pašlol paš e romňi? Avke sar džives tu, me oda na kerava."

¹² Akor leske o David phenda: "Ačhuv ade mek adadžives a tajsa tut premukava." Avke o Urijaš ačhiľa andro Jeruzalem oda džives dži andre aver. ¹³ Palis o David les vičinda ke peste, chalas the pijelas leha, medik les na zmačarda. Ale rači o Urijaš geľa te sovel jekhetane le Davidoskere služobňikenca, khere na geľa.

O Urijaš merel

¹⁴ Avke tosara o David pisinda ľil le Joaboske a bičhađa le Urijaš, hoj leske te ľidžal. ¹⁵ Andro ľil pisinda: "Thoven le Urijaš anglal, kaj hin o mariben nekzoraleder. Tumen palis džan lestar het, hoj les te murdaren."

¹⁶ Sar o Joab džalas pro foros pro mariben, thođa le Urijaš pre ajsa than, pal savo džanelas, hoj hin ode zorale murša. ¹⁷ Sar o murša andral o foros gele avri pro mariben pro Joab, ačhiľa pes, hoj murdarde varesave le Davidoskere muršen the le Urijaš.

¹⁸ Palis o Joab bičhađa jekhe muršes ko David, hoj leske te phenel pal o mariben. ¹⁹ Phenda leske: "Sar pheneha le kraliske savoro pal o mariben, ²⁰ ov pes šaj rozchofarel a šaj tutar phučel: 'Soske geľan avke pašes paš o foros? Na džanenas, hoj pal o muri pes ľivinkerel? ²¹ Či na džanes, ko murdarđa le Jerubbaaloscere čhas le Abimelech? Na sas oda e džuvľi, savi pre leste čhiđa pal o muri o malmoskero bar, a avke muľa andro Tebec? Soske geľan pašes paš o muri?' Akor leske phen: 'The tiro služobňikos o Urijaš muľa.'"

²² Avke o murš odgeľa. Sar doavľa ko David, phenda leske savoro, so o Joab vakerelas. ²³ Phenda: "Ole murša sas zoraleder sar amen a avle avri andral o foros pro mariben, ale amen len ispidľam dži ke foroskeri brani. ²⁴ Avke o lukostrelci ľivinkerenas pal o muri pre tire služobňika a varesaven murdarde. Muľa the tiro služobňikos o Urijaš."

²⁵ O David le sluhaske phenda: "Le Joaboske phen, hoj pes te na trapinel, bo šoha (ňikda) na džanel, ko šaj merel andro mariben. A mek phen leske, hoj te zoraľarel o mariben pre oda foros a te zničinel les! Avke les zoraľar andre oda."

²⁶ Sar pes dodžanľa e Batšeba, hoj lakero rom o Urijaš muľa, chudľa pal leste te rovel. ²⁷ Sar pregeľa o smutkos pal lakero rom, akor o David bičhađa vaš e Batšeba a iľa la andre peskero kher. Ačhiľa leskeri romňi a uliľa lake muršoro. Ale oda, so o David kerđa, na sas le RAJESKE pre dzeka.

O Natan dovakerel le Davidoske

12 O RAJ bičhađa le Natan ko David. Ov avla ke leste a phenda: "Andre jekh foros sas duj murša. Jekh sas barvalo a dujto čoro. ² Le barvales sas igen but bakre the gurumňa, ³ ale le čores sas ča jekh bakroro, so peske cinda. Ov la ľikerelas a oj barolas jekhetane leha the leskere čhavenca. Chalas leha jekhetane ole chabenestar, so the ov, pijelas andral leskero poharis a sovelas pre leskere vasta. Sas leske sar čhaj.

⁴ Jekhvar avla ko barvalo murš vareko pal o drom. Ale na kamľa te lel peskere bakrores abo gurumňa, hoj la te pririchtinel ole muršeske, savo ke leste avla. Avke iľa ole čorestar leskere bakrores a pririchtinda les."

⁵ O David sas igen choľamen pre oda barvalo murš a phenda le Natanoske: "Avke sar dživel o RAJ, oda murš, savo ada kerđa, mušinel te merel. ⁶ Vaš oda bakroro

mušinela akana te visarel pale štar bakre, bo kerda ka-di veca a na sas leske pharo upral kada čoro murš.”

⁷ Akor o Natan le Davidoske phenda: “Tu sal oda murš! A kavke phenel o RAJ, o Del le Izraeloskero: ‘Me tut pomakhlom vaš o kralis upral o Izrael a cirdnom tut avri andral o vasta le Sauloskere. ⁸ Diňom tuke leskero krališagos the leskere romňijen andre tire vasta. Ačhadom tut vaš o kralis upral o Izrael the upral e Judsko. Te na sas tuke oda dos, diňomas tut duvar ajci buter. ⁹ Soske ilal le RAJESKERO lav vaš nisoste a kerdal oda, so nane leske pre dzeka? Le Urijaš diňal te murdarel la šablaha a ilal tuke leskera romňa. Vašoda, hoj les diňal te murdarel le Ammončanenge, ¹⁰ akanastar imar e šablá šoha (ňikda) pes na odvisarela tira famelijatar, bo lehas man vaš nisoste a ilal tuke le Urijašiskera romňa.

¹¹ Domukava pre tu bibachtalipen, so ela tira famelijatar. Angle tire jakha tuke odlava tire romňijen a dava len tire pašutneske. Ov lenca pašlola avke, hoj savore oda dikhena. ¹² Tu oda kerdal počoral, ale me oda kera dživese anglo calo Izrael.’”

O David kerel pokaňje

¹³ Akor phenda o David le Natanoske: “Kerdom binos anglo RAJ.” Ov leske odphenda: “O Raj tuke odmukla tiro binos a na mereha. ¹⁴ Ale oleha, so kerdal, diňal le RAJESKERE neprijatelenge, hoj šaj vakeren pre leste namištes. Vašoda tiro čavoro, savo ulola, mušinel te merel.”

¹⁵ Sar o Natan geľa khere, o Raj dukhadá le nasvalibnaha le Davidoskere čhavořes, savo uliľa la Batšebake. ¹⁶ O David mangelas le Devles vaš o čavoro a igen pes poscinelas. Sar džalas te sovel, pašlolas cali rat pre phuv. ¹⁷ Leskere phureder služobňika gele paš leste a kamenas les te hazdel pal e phuv, hoj te chal lenca, ale ov na kamelas te uštel aňi te chal.

¹⁸ Pro eftato džives o čavoro muľa, ale le Davidoskere služobňika daranas leske oda te phenel. Phende peske: “Medik o čavoro dživelas, privakerahas pes ke leste, ale na šunelas amen. Sar šaj akana leske phenas, hoj o čavoro muľa? Šaj peske kerel vareso.”

¹⁹ Ale o David zbačinda, hoj leskere služobňika vareso počoral vakeren maškar peste, a avľa pre oda, hoj o čavoro muľa. Phučľa lendar: “Muľa o čavoro?”

“Muľa,” odphende leske.

²⁰ O David uštilá pal e phuv, sthoda (omordá) pes, pomakhla pes la mascaha a urda aver gada. Palis geľa andre le RAJESKERO stanos a bandolas anglo RAJ. Sar odarik geľa khere, mangelas peske chaben. Dine les a ov chalas.

²¹ O služobňika lestar phučle: “So tu keres? Medik o čavoro dživelas, poscinehas tut a rovehas. Ale sar o čavoro muľa, akor uštilá a džas te chal?”

²² Ov odphenda: “Medik o čavoro dživelas, poscinavas man a rovavas, bo gondolindom mange: ‘Šaj el, hoj o RAJ ela ke ma jileskero a le čhavořes mukela te dživel. ²³ Ale akana, sar muľa, soske man majinav te

poscinel? So šaj les visarav pale? Me džava pal leste, ale ov ke ma na avela.’”

²⁴ Palis o David hazdelas upre peskera romňa la Batšeba le lavenca, geľa ke late a pašliľa laha. Sar lake uliľa muršoro, dine leske nav Šalamun. O RAJ peske les zakamada, ²⁵ vašoda prekal o prorokos Natan phenda le Davidoske, hoj leske te den nav Jedidijah †.

O ňerindipen upral e Rabba

²⁶ O Joab geľa pro mariben pre Ammoniko Rabba a zaiľa le kraľiskero foros. ²⁷ O Joab bičhadá muršen, hoj te phenen le Davidoske: “Maras man lenca a zailom lenge o teluno foros paš o paňi. ²⁸ Akana zvičín ole muršen, save ačhile, mi rozačhaven pes pašal oda foros a mi zalen les, hoj upral oda foros te na ňerinov (na zvitazinav) me korkoro a te na dav ole foroske miro nav.”

²⁹ Avke o David iľa savore muršen, geľa andre Rabba, ode marelas pes lenca a ňerinda upral lende. ³⁰ Palis iľa e koruna pal o šero lengere devleske, so pes vičinelas Milkom. E koruna sas phari buter sar tranda (30) kili a sas andro the dragano bar, so thode pro šero le Davidoske. Ov odarik iľa igen but veci. ³¹ Odligenda le manušen, save bešenas ode, a diňa lenge o pili, krompača the tovera, hoj te keren buči paš o cehli. Avke kerde the savore Ammonike forenca. Palis o David the savore manuša gele pale andro Jeruzalem.

O Amnon the e Tamar

13 Paloda pes ačhiľa kada: Le Davidoskere čhas le Absolon sas igen šukar pheň, savi pes vičinelas Tamar. Le Davidoskero čhavo Amnon andre late pes zakamla. ² O Amnon pes trapinelas vaš late avke, hoj nasvaliľa olestar, bo oj sas mek pačivali a ov peske gondolinelas, hoj šoha (ňikda) na ela leskeri. ³ Ale sas les prijatelis o Jonadab. Ov sas le Šimeoskero čhavo, savo sas phral le Davidoske, a sas igen godaver murš. ⁴ Phučľa le Amnonostar: “Sar oda, hoj tu, o čhavo le kraľiskero, sal sako tosara ajso smutno? Na phenaha mange?”

O Amnon leske phenda: “Kamav la Tamar, le Absolonoskera pheňa.”

⁵ O Jonadab leske phenda: “Pašľuv tuke pro hados a ker pestar, hoj sal nasvalo. Sar avela tut te dikhel tiro dad, phen leske: ‘Mangav tut, domuk, hoj miri pheň e Tamar man te del te chal. Mi pririchtinel anglal mande o chaben, bo kamav andral lakere vasta te chal.’”

⁶ Avke o Amnon pašliľa pro hados a kerelas pestar, hoj hino nasvalo.

Sar avľa o David les te dikhel, phenda leske: “Domuk mira pheňake, hoj te avel a mi pekel anglal ma duj bokela. Kamav andral lakere vasta te chal.”

⁷ Palis o David phenda la Tamarake: “Dža andro kher ke tiro phral ko Amnon a pririchtin leske o chaben.”

⁸ Sar e Tamar avľa ko Amnon andro kher, ov ipen pašlolas pro hados. Avke iľa o chumer, zaušanda,

† Oda hin: O RAJ les kamel.

kerda anglal leste bokela a pekla len. ⁹ Palis ila e tepša le bokelenc a thoda anglal leste, ale ov na kamelas te chal.

Palis o Amnon phenda: "Bičhaven savore manušen adarik het." Avke savore lestar gele het. ¹⁰ Paloda phenda la Tamarake: "An mange o bokela ode, kaj so-vav. Chava andral tire vasta." E Tamar ila o bokela, so pekla, a ligenda len le Amnonoske andro hados. ¹¹ Ale sar leske delas o bokela, cirdna la ke peste a phenda: "Av, pašlív tuke paš ma, pheñe miri!"

¹² "Na, phrala miro!" phenda leske e Tamar. "Av godaver a ma ker oda mangle! Bo ajso andro Izrael pes na kerel! ¹³ Kaj man thovava andre ajsi ladž? A tut lena andro Izrael vaš o lubaris! Ale povaker tuke le kraliha, ov dela man tuke!" ¹⁴ Ale ov la na šundā. Chudla la a pašlila laha, bo ov sas zoraleder.

¹⁵ Paloda le Amnonoske e Tamar igen džungliła, a oda avke, hoj la imar našti avri ačhelas, a odi ñenavist ke late sas bareder sar anglođa o kamiben. O Amnon lake phenda: "Skide tut a dža het!"

¹⁶ "Na!" phenda leske. "Kada, hoj man trades het, hin goreder sar oda, so manca kerđal!"

Ale ov na kamelas la te šunel. ¹⁷ Vičinda peskere sluhās, savo pašal leste kerelas, a phenda leske: "Čhiv kala džuvla avri a phand pal late o vudar!" ¹⁸ Avke o sluhās čidha la avri a phandla pal late o vudar. Pre Tamar sas šukar upruno plaštōs, so hordinenas le kraliskere čhaja, sar sas slobodne. ¹⁹ E Tamar peske čidha pro šero o prachos, čhingerđa pre peste o upruno plaštōs, so sas pre late, thoda peske o vast pro šero a džalas het bare rovibnaha.

²⁰ Palis lakero phral o Absolon latar phučla: "Na sas tuha tiro phral o Amnon? Akana, pheñe miri, imar ma vaker pal oda. Se hino tiro phral, ma domuk tuke oda, so pes ačhila, andro tiro jilo." Avke e Tamar ačhila andro Absolonoskero kher omukli the smutno.

²¹ Sar pes pal oda došundā o David, sas igen choľamen. ²² O Absolon imar buter na vakerelas le Amnonoha. Našti les avri ačhelas, bo pašlila leskera pheñaha la Tamaraha.

O Absolon visarel pale le Amnonoske

²³ Pal o duj berš, sar ko Absolon strihinenas le bakren andro Baal-Chacor paš o Efrajim, vičinda savore kraliskere čhaven. ²⁴ O Absolon geľa ko David a phenda: "Šaj aves tu the tire služobnika ke mande, bo ipen strihinen mire bakren."

²⁵ "Na, čhavo miro," odphenda leske o David. "Na mušinas te džal savore, hoj pes te na starines pal amende." Choc o Absolon pre leste ispidelas, ov na kamelas te džal leha, ale požehñinda les.

²⁶ Palis o Absolon phenda: "Te na, akor mi avel amencana miro phral o Amnon."

"Soske majinel te džal tuha?" phučla o David. ²⁷ Ale o Absolon avke pre leste ispidelas, hoj mukla le Amnon the savore princen.

[Palis ov pririchtinda lenge hoscina avke sar prekal o kralis.] ²⁸ O Absolon phenda peskere sluhenge: "Merki-

nen! Sar le Amnon ela lači dzeka la moľatar, palis tumenge prikazinava a tumen les murdarena. Ma daran pes, bo oda me tumenge phendōm! Aven bi e dar a aven zorale!" ²⁹ Palis o sluhi kerde avke, sar lenge phenda, a murdarde les. Akor savore le Davidoskere čhave uštıla, beše pro peskere somara a denaše.

³⁰ On sas mek pro drom, sar le Davidoske vareko phenda: "O Absolon murdarđa savore tire čhaven – ñiko lendar na ačhila te dživel." ³¹ O David uštıla, čhingerđa pre peste o gada a pašlila pre phuv. Savore leskere služobnika ačhenas pašal leste le čhingerde gadenca.

³² Sas paš leste o Jonadab, le Davidoskero phraleskero čhavo, saveske sas dad o Šimeah. O Jonadab phenda: "Te na gondolinel peske miro raj, hoj o Absolon murdarđa savore tire čhaven. Muľa ča o Amnon. Bo dičholas pro Absolon, hoj kamel le Amnon te murdarel akorestar, sar našilu pašlila la Tamaraha.

³³ Rajeja miro the kralina, ma trapin tut pal oda, so tuke phende, hoj savore tire čhave mule. Muľa ča o Amnon."

³⁴ Ale o Absolon denašla.

O sluhās, savo merkinelas, jekhvareste zbačinda a dikhla pro drom khatar o Horonajim but manušen pre sera le verchoskeri a phenda le kraliske: "Dikhľom le manušen pro drom khatar o Horonajim pre sera le verchoskeri."

³⁵ O Jonadab phenda le Davidoske: "Dikh, oda aven tire čhave. Ačhila pes avke, sar tuke phendōm." ³⁶ Soča dovakerđa, avle le Davidoskere čhave a chudle igen te rovel. Avke the o David savore peskere služobnikenca igen rovenas.

³⁷⁻³⁸ Sar o Absolon denašelas, dochudla pes andro Gešur. Geľa ko Ammichudoskero čhavo ko Talmaj, savo sas kralis andro Gešur, a bešelas ode trin berš. O David calo časos sas smutno pal peskero čhavo Amnon. ³⁹ Palis o David igen kamelas te džal ko Absolon, bo imar les pregeľa o pharipen pal oda, hoj o Amnon muľa.

E džuvli andral o Tekoa prevakerel le David

14 Sar la Cerujakero čhavo o Joab dikhla, hoj o kralis o David hino smutno pal o Absolon, ² bičhada varekas andre Tekoa, hoj te anen odarik godaver džuvla. Sar la ande, phenda lake o Joab: "Ker avke: Uri pre tu ola gada, so hin pro smutkos, a le olejoha tut ma pomakh, ale av sar džuvli, savi imar but časos likerel o smutkos pal o mulo. ³ Palis džaha ko David, hoj leha te vakeres." A diña la godi, so leha majinel te vakerel.

⁴ Akor odi džuvli andral e Tekoa geľa ko kralis, bandōlas anglal leste le mujeha dži ke phuv a phenda: "Pomožin mange, kralina!"

⁵ "So tute?" phučla latar o kralis.

"Me som vdova," odphenda. "Miro rom muľa. ⁶ Sar mire duj čhave sas pre maľa, dokerenas pes maškar peste a na sas ode ñiko, hoj len pestar te odlel. Jekh lendar demađa dujtones avke, hoj les murdarđa.

⁷ Akana džal pre ma cali fajta a phenen: 'De amenge oles, ko murdarda peskere phrales, hoj les te murdaras vaš o dživipen peskere phraleskero.' Te on oda kerena, me ačhava bi o čhavo a lena miro užaripen (nađej), so mek mange ačhiľa, bo pal miro rom na ačhiľahas pre kadi phuv o nav aňi o potomstvos."

⁸ "Dža khere," phenda lake o David. "Me lava ada andre mire vasta."

⁹ Ale e džuvli le Davidoske phenda: "Palikerav tuke, rajeja miro the kralina. Odi vina mi perel pre mande the pre miri famelija a tu the tiro tronos avena bi e vina."

¹⁰ Avke o kralis lake phenda: "Te vareko phenela vare-so pre tu, an les ke mande a kerava oda, hoj šoha (ňik-da) pre tu imar na vakerela nič nalačo."

¹¹ A oj leske phenda: "Mangav tut, le mange vera anglo RAJ, tiro Del, hoj oda dženo, savo mušinel te visarel pale mire čhaske vaš o dživipen peskere phraleske, les te na murdarel, bo oleha kerđahas mek goreder binos."

"Avke sar dživel o RAJ," phenda lake o David, "tire čhaske aňi o bal na perela pal o šero."

¹² E džuvli mek phenda: "Domuk tira služobničake, hoj te phenel mek vareso peskere rajeske the kraliske." "Vaker!" phenda o David.

¹³ Oj leske phenda: "Soske keres nalačo le Devleskere manušenge? Tu korkoro pes odsudzindal andre oda, so phendaľ, bo na domukľal te anel khere peskere čhas, saves tradňal het. ¹⁴ Bo mušinas savore te merel, sam sar o paňi, so hino avričhordo pre phuv a so imar pes na del te skidel. Ale o Del na kamel te lel ňikaske o dživipen, ale kerel sa, hoj te anel pale oles, ko hino lestar dur. ¹⁵ Vašoda avľom te phenel peskere rajeske the kraliske, bo o manuša man oleha darade a phendom mange: 'Džava te vakerel le kraliľa a šaj el, hoj man šunela avri. ¹⁶ Gondolinav, hoj šaj man šunel avri a zachraňinel ole manušendar, save man the mire čhas kamen te lel avri andral e phuv, so amenge diňa o Del.' ¹⁷ O lav mire rajeskero the kraliskero mange anel o smirom, bo miro raj the kralis hino sar le Devleskero aňjelos, savo rozprindžarel o lačo le nalačh-estar. O RAJ, tiro Del, mi el tuha."

¹⁸ Akor o David lake phenda: "Vareso tutar phučava a odphen mange o čačipen!"

"Ča vaker, rajeja miro the kralina," odphenda e džuvli.

¹⁹ "Na sas oda o Joab, savo tut bičhada ke ma?" phučľa latar o David.

E džuvli odphenda: "Avke sar tu džives, rajeja miro the kralina, našti garuvav ada angle tu, hoj tuke te na odphenav. Sas oda tiro služobňikos o Joab, savo mange oda phenda a diňa man godi, so tuke te phenel. ²⁰ Ov oda kerđa vašoda, hoj te čerinel odi veca. Ale tu, rajeja miro, sal godaver sar le Devleskero aňjelos a džanes pal savoreste, so pes kerel andre adi phuv."

O Joab anel pale o Absolon

²¹ Palis o David phenda le Joaboske: "Mištes, me kerava avke, sar tu kames. Dža a an pale le Absolon."

²² Akor o Joab peľa anglo David a bandolas le mujeha dži ke phuv a palikerelas leske. Phenda: "Adadžives sprindžardom, hoj som tuke pre dzeka, rajeja miro the kralina, bo kerďal avke, sar kamľom." ²³ Palis o Joab geľa andro Gešur a anda le Absolon pale andro Jeruzalem. ²⁴ O kralis phenda le Joaboske: "Mi džal andre peskero kher, ale angle mande pes te na sikavel." Avke o Absolon geľa andre peskero kher, ale le kralis na dikhľa.

O Absolon pale dikhel le kralis

²⁵ Andre calo Izrael le Absolon lašarenas, bo na sas ňiko ajso šukar sar ov. Le šerestar dži ko pindre sas pre leste sa lačo. ²⁶ Leskere bala sas igen bare a strihinelas len jekhvar andro berš, sar sas igen phare. Sar len važinelas, sas vaj duj kili phare. ²⁷ Le Absolon sas trin muršora the jekh čhaj a lakero nav sas Tamar. Oj sas igen šukar džuvli.

²⁸ O Absolon bešelas andro Jeruzalem duj berš, ale mek na dikhľa le David. ²⁹ Palis diňa te vičinel le Joab, hoj te avel ke leste, bo kamľa les te bičhavel ko David, ale o Joab na kamelas te džal ke leste. O Absolon bičhadaľ pal leste dujtovar, ale aňi akor na geľa. ³⁰ Palis o Absolon phenda peskere sluhenge: "Dikhen, le Joaboskeri maľa hiňi pašes paš miri a hin les ode jačmeňis. Džan a podlabaren les!" Avke o sluhi gele a podlabarde odi maľa.

³¹ Palis o Joab geľa ko Absolonoskero kher a phenda leske: "Soske tire sluhi podlabarde mange e maľa?"

³² O Absolon leske odphenda: "Dikh! Bičhadom pal tu, hoj te aves ke mande, bo kamľom tut te bičhavel ko kralis, hoj leske te phenes: 'Soske avľom andral o Gešur? Se feder mange uľahas, te ačhiľomas ode.' Ale akana kamav te džal anglo David a te vareso kerđom nalačo, mi murdarel man."

³³ Palis o Joab geľa ko David a phenda leske savoro. Avke o David vičinda ke peste le Absolon. Sar avľa ke leste, bandolas anglo kralis le mujeha dži ke phuv a ov čumidla le Absolon.

O Absolon pes vzburinel pro kralis

15 Palis peske o Absolon stradľa verdan, grajen the penda (50) muršen, save denašenas anglal leste. ² O Absolon sig tosara ačhelas pro drom paš e brana, sar pes džal andro foros. Ode lelas pre sera dojekhe muršes, ko avelas varesava vecaha ko kralis, hoj les te šunel avri, a phučelas lestar: "Khatar sal?" Sar leske oda murš phenelas: "Me som andral jekh Izraeliko kmeňos," ³ o Absolon leske phenda: "Dikh, tu vakeres mištes a čačipen, ale nane ňiko paš o kralis, hoj tut te šunel avri. ⁴ Ale te man ačhadehas vaš o sudcas andre kadi phuv, dojekheske pomožindomas ola vecaha,

savaha avlahas ke ma pro sudos, hoj te el leskero čačipen."

⁵ Sar vareko avelas ko Absolon a kamelas anglal leste te bandol, ov les obchudelas a čumidelas. ⁶ Avke kere-las o Absolon savore Izraelitenca, save avelas ko kralis, hoj ov te rozsudzinel lengero pravos. Aleha len počoral dochudelas pre peskeri sera a sas le Izraelitenge buter pre dzeka sar o kralis David.

⁷ Palis pal o štar berš phenda o Absolon le kraliske le Davidoske: "Domuk mange te džal andro Hebron, hoj te dolikerav e vera, so diňom le RAJES. ⁸ Sar bešavas andro Gešur andro Aram, phendom le Rajeske: 'Te man aneħa pale andro Jeruzalem, džava tut te lašarel andro Hebron.' "

⁹ "Dža andro smirom!" phenda leske o David. Avke o Absolon gefa andro Hebron.

¹⁰ Palis o Absolon bičhađa počoral peskere muršen andre savore kmeňi le Izraeloskere, hoj te phenen: "Sar šunena o hangos la trubakero, akor zvičinen: 'O Absolon ačhiľa kralis andro Hebron!' " ¹¹ Le Absolonoha gele andral o Jeruzalem duj šel (200) murša, save sas vičimen a na džanenas nisostar, so kamel te kerel.

¹² Sar anelas o Absolon o obeti, bičhađa vaš o Davidoskero radcas Achitofel andral o foros Gilo. Vašoda o murša, save pes dovakerde pro David, kenas furt bareder vzbura a mek buter manuša pes pridenas ko Absolon.

O David denašel andral o Jeruzalem

¹³ Androda ko David avľa o sluhas a phenda: "Dojekh murš andral o Izrael hino pre le Absolonoskeri sera!"

¹⁴ Palis o David phenda savore peskere služobňikenge, save sas leha andro Jeruzalem: "Aven! Denašas het, bo te na denašaha, na zachraňinaha pes le Absolonostar. Sigo džas het, hoj te na dochudel amen! Bo anela pre amende bibach a murdarela dojekhes andro foros."

¹⁵ "He, mištes, rajeja amaro the kralina!" phende o služobňika le Davidoske. "Amen keraha savoro, so tu pheneha."

¹⁶ Palis o David odarik odgeľa savore peskere manušenca the la famelijaha. Mukľa ode ča peskere deše romňijen-služobňičken, hoj pes te starinen pal o palacis. ¹⁷ O David the savore leskere murša odgele andral o foros a zaačhile paš o paluno kher. ¹⁸ Anglo David predžanas savore leskere uradňika, savore Keretana, Piletana the šov šel (600) murša, save avle ke leste andral o Gat.

¹⁹ Akor phenda o David le Ittajoske, savo sas andral o Gat: "Soske tu aves amenca? Dža pale ko kralis Absolon a ačhuv ode. Se sal cudzincos, saves tradle avri andral peskeri phuv. ²⁰ Se mekča idž avľal. Sar šaj me kamav tutar, hoj te aves manca, te me korkoro na džanav, kaj majinav te džal? Dža pale a le tuha tire phralen. Mi presikavel tuke o RAJ o lačhipen the o pačivaliben."

²¹ Ale o Ittaj odphenda: "Avke sar dživel o RAJ a avke sar džives tu, rajeja miro the kralina, me džava všadzik tuha, či pro meriben vaj pro dživipen."

²² O David leske odphenda: "Mištes, av amenca!" Avke o Ittaj džalas savore peskere muršenca the caľa famelijaha, jekhetane le Davidoha. ²³ Savore manuša andral odi phuv chudle igen te rovel, sar odarik predžanas. Avke o David pregeľa prekal o paňi Kidron a savore manuša džanas leha pre oda drom, sar pes džal pre pušta.

²⁴ Jekhetane lenca džalas o rašaj Cadok the savore Leviti, save lidžanas le Devleskeri Zmluvakeri Archa. Sar la thode tele, o Ebjatar obetinelas o obeti, medik savore manuša na gele avri andral o foros.

²⁵ Palis o David phenda le Cadokoske: "Odlidža e Archa le Devleskeri pale andro foros, bo te arakhava anglo RAJ o lačhipen, anela man pale a sikavela mange la the oda than, kaj ela. ²⁶ Ale te phenela: 'Na sal mange pre dzeka,' akor mi kerel manca avke, sar leske hin pre dzeka."

²⁷ O David phenda le rašaske le Cadokoske: "Dža andro smirom pale andro foros. Le tuha tire čhas le Achimaac the le Jonatan, le Ebjataroskere čhas. ²⁸ Me užarava pre oda than, khatar pes predžal prekal o Jordan, medik mange na dena te džanel." ²⁹ Avke o Cadok the o Ebjatar ligende e Archa le Devleskeri pale andro Jeruzalem a ačhile ode.

³⁰ Palis o David džalas pindrango upre pro Olivovo Verchos, le dromeha rovelas a o šero peske zagaruđa, avke the savore manuša, save sas leha, peske garude o šere a rovenas. ³¹ Vareko le Davidoske phenda: "O Achitofel hino tiš maškar o vzburenci, save hine le Absolonoha." Vašoda o David pes mangelas: "Mangav tut, RAJEJA miro, ma domuk, hoj pes te ačhel oda, so phenda o Achitofel."

³² Sar o David dogeľa pro agor le verchengero, pro than, kaj pes lašarelas le Devles, džalas angle leste o Arkijcos o Chušaj. Leskero plaštós sas rozčingerdo a pro šero les sas prachos. ³³ Avke o David leske phenda: "Te aveha manca, mušinava man pal tu te starinel."

³⁴ Ale dža pale andro foros a phen le Absolonoske: 'Ó, kralina, som tiro služobňikos. Avke sar angloda služinavas tire dadeske, avke kamav tuke te služinel.' Te oda kereha, šaj previsaresh oda, so vakerelas o Achitofel. ³⁵ Ena tuha ode duj rašaja, o Cadok the o Ebjatar. Savoro, so tut dodžaneħa andro palacis, phen lenge, ³⁶ bo ode hine the lengere čhave, o Achimaac the o Jonatan. Lenca mange dena te džanel savoro, so pes ode dodžanena."

³⁷ Avke le Davidoskero prijatelis o Chušaj avľa pale andro foros Jeruzalem ipen akor, sar the o Absolon.

O David the o Cibah

16 Sar džalas o David dureder pal o verchos, avelas anglal leste le Mefibošetoskero sluhas o Cibah duje somarenca. Sas pre lende duj šel (200) mare, šel (100) konarica hrozni, šel (100) šviža ovcje the jekh gono mol.

² O David phučla le Cibostar: "So kames oleha te kerel?"

Ov odphenda: "Kala somara hine prekal tiri famelija, hoj te džan pre lende, a o maro the o ovocje hine pro chaben. E mol hiňi, hoj te pijen, sar na birinena pre pušta."

³ "Kaj hino o Mefibošet, saveske hino papus tiro raj o Saul?" phučla lestar o David.

O Cibah odphenda: "Ov ačhiľa andro Jeruzalem, bo gondolinel peske, hoj adadžives o Izraeliti leske dena pale o krališagos pal leskero papus Saul."

⁴ O David le Ciboske odphenda: "Savoro, so hin le Mefibošetoskero, ačhela tuke."

"Banduvav anglal tu!" phenda o Cibah. "Ča mi avav tuke pre dzeka, rajeja miro the kralina."

O David the o Šimej

⁵ Sar o David sas pašeder ko gav Bachurim, ipen akor odarik džalas avri o Šimej, o čhavo le Geraskero andral le Sauloskeri famelija. Le dromeha furt košelas.

⁶ Čhivkerelas o bara andro David the andre savore leskere služobňika, choc paš o David sas pal e čači (pravo) the baľogňi (ľavo) sera savore manuša the o slugađa. ⁷ Prekošelas les kavke: "Dža het, džan het! Vrahona! Lotrona! ⁸ Iľal peske le Sauloskero krališagos a akana o RAJ tut mareľ, bo murdarďal but leskera famelijatar. O RAJ diňa o krališagos tire čhaske le Absolonoske. Avel pre tu e bibach, vrahona!"

⁹ O Abišaj, o čhavo la Cerujakero, phenda le Davidoske: "Rajeja miro, soske domukes, hoj kada rikono tut kavke te košel? Muk man, hoj te džav ke leste. Mi odčhinav leske o šero!"

¹⁰ Ale o David leske phenda: "So tumen andre oda, čhave la Cerujakere! Bo te o RAJ leske phenda, hoj te prekošel man, akor ko leske šaj phenel: 'Soske kada keres?'"

¹¹ Palis o David phenda le Abišajoske the savore peskere služobňikenge: "Se miro čhavo, savo hino mandar, man kamel te murdarel a so mek buter kada Benjamins? Muken les, mi prekošel man, bo o RAJ leske oda phenda. ¹² Šaj el, hoj o RAJ dikhela miro pharipen a visarela mange pale le lačhipnaha vaš adadživeseskero košiben."

¹³ O David peskere muršenca džalas dureder le dromeha. O Šimej džalas pašes pašal leste pal o verchengero brehos, le dromeha les košelas a čhivkerelas pre leste o prachos the o bara. ¹⁴ O David the o murša, save leha džanas, avle domarde paš o Jordan a ode peske odpočovinde.

O Chušaj vakerel le Absolonoha andro Jeruzalem

¹⁵ O Absolon le Achitofeloha the savore Izraelitenc a avľa andro Jeruzalem. ¹⁶ Sar avľa ko Absolon o Arkijcos o Chušaj, le Davidoskero prijateľis, phenda leske: "Mi dživel o kralis! Mi dživel o kralis!"

¹⁷ "Ada hin tiro kamiben, so sikaves le Davidoske?" phučla o Absolon le Chušajostar. "Soske na geľal lenca?"

¹⁸ O Chušaj phenda le Absolonoske: "Na! Me kamav te ačhol olenca, kas peske kidle avri kala manuša, savore Izraeliti the o RAJ! ¹⁹ Se me kaske služinav, te na leskere čhaske! Avke sar služinavas tire dadeske, služinava the tuke."

O Absolon pašliľa le Davidoskere romňenca

²⁰ Palis o Absolon phenda le Achitofeloske: "Phen, so kempel amenge te kerel?"

²¹ O Achitofel odphenda. "Dža ke tire dadeskere romňija-služki, saven mukľa, hoj te merkinen pre leskero palacis, a pašľuv lenca. Palis savore manuša andro Izrael pes dodžanena, hoj kerďal bari ladž tire dadeske. Oleha tire murša, save džan pal tu, ena mek buter zoraľarde." ²² Avke le Absolonoske ačhade pre strecha stanos a ov anglal savore Izraeliti pašľolas peskere dadeskere romňenca-služobňičkenca.

²³ Andre oda časos o Achitofel vakerelas ajse goďaver lava, hoj o David the o Absolon oda lenas sar le Devleskero lav.

O Chušaj čerinel le Achitofeloskero goďaver vakeriben

17 Palis o Achitofel phenda le Absolonoske: "Domuk, hoj mange te kidav avri 12 000 muršen a mek adi rat lenca te džav pal o David. ² Džava pre leste akana, medik na birinel a hino bi e zor. Daravava les a savore leskere murša pes rozdenašena. Palis o kralis ela korkoro a me les murdarava. ³ Avke anava pale savore manušen ke tute, bo te merela oda murš, saves tu rodes, savore manuša ena andro smirom." ⁴ Oda vakeriben sas pre dzeka le Absolonoske the savore Izraelike vodcenge.

⁵ Ale o Absolon phenda: "Vičín ade mek le Chušaj le Arkijcos, hoj te šunas, so ov phenel." ⁶ Sar avľa o Chušaj, o Absolon leske phenda: "O Achitofel phenda, so amenge kempel te kerel. So pre oda tu phenes? Majinas te kerel avke, sar ov vakerel? Te na, ta phen tu!"

⁷ O Chušaj odphenda le Absolonoske: "Oda, so akana o Achitofel phenda, na anela pro lačhipen. ⁸ Se prindžares peskere dades the leskere muršen. On hine zorale maribnaskere murša a ke oda choľamen sar e medvedica, savake ile lakere ciknen. Tiro dad hino sikado pro mariben a na ačhel rači te sovel paš peskere murša. ⁹ Ipen akana pes garuvel andre vare-savi chev abo pre aver than. Te vareko peľahas andro mariben, sar pes zachudľahas, rozľigendľahas pes oda hiros, hoj le Absolonoskere murša prekhelde (prehrajinde). ¹⁰ Akor the oda nekzoraľeder murš, savo sas zoralo sar o ľevos, našavela e zor, bo calo Izrael džanel, hoj tiro dad o David hino maribnaskero murš a leskere murša hine zorale. ¹¹ Vašoda phenav tuke, zvičín ke peste calo Izrael le Danostar dži paš e Beer-Šeba. On ena ajci sar e poší pro moroskero brehos a tu len ľidžaha andro mariben. ¹² Palis džaha pal leste. Sar les

arakhaha ode, kaj ela, mukaha pes pre leste avke, sar perel e rosa pre phuv a na ačhela te dživel ov, aňi ňiko leskere muršendar. ¹³ Te pes garudahas andre varesavo foros, calo Izrael andahas o lani. Odcirdlomas o foros andro paňi a na ačhilahas pal leste aňi cikno bar."

¹⁴ Akor o Absolon the savore Izraelike murša phende: "Feder hin o godaver vakeriben le Chušajoskero sar le Achitofeloskero." Avke o RAJ na domukla, hoj pes te ačhel pal le Achitofeloskere lava, bo kamla te anel e bibach pro Absolon.

O David pal o Jordan

¹⁵ O Chušaj phenda le rašajenge le Cadokoske the le Ebjataroske, so o Achitofel vakerelas le Absolonoske the le vodcenge andral o Izrael a so ov palis lenge phenda, hoj te keren. ¹⁶ Phenda lenge: "Akana bičhaven sigo varekas kada te phenel le Davidoske a phenen leske: 'Ma zliker tut adi rat pre pušta paš o Jordan, ale sigo predža prekal o paňi. Bo te na, mereha tu the savore manuša, save hine tuha.'"

¹⁷ O Jonatan the o Achimaac užarenas paš o En-Rogel, bo našti gele andro Jeruzalem, hoj len ňiko te na dikhel. Varesavi služka lenge majinda te phenel, so pes kerel, a on palis majinde oda te phenel le Davidoske.

¹⁸ Ale varesavo čavoro len zbačinda a phenda avri le Absolonoske. Vašoda on sidarenas odarik het andro Bachurim ke varesavo murš. Ole muršes sas pre dvora chaňig a on gele andre. ¹⁹ Leskeri romňi iľa e lepeda, nacirdla la upral e chaňig a čhivkerelas upre o zrnos, hoj te na dičhol e chaňig.

²⁰ Sar avle le Absolonoskere murša ke džuvli andro kher, phuće latar: "Kaj hine o Achimaac the o Jonatan?"

"Odgele adarik a pregele o paňi," odphenda lenge.

Akor on len chudle te rodel, ale sar len našti arakhle, visarde pes pale andro Jeruzalem. ²¹ Sar odarik gele het, o Achimaac the o Jonatan avle avri andral e chaňig a gele te phenel le Davidoske, so o Achitofel vakerelas le Absolonoske, hoj te kerel, a phende: "Ušti a predža sigo prekal o paňi!" ²² Avke o David the savore leskere manuša uštile a pregele prekal o Jordan. Dojekh lendar pregeľa o paňi, medik na vidňisaľolas.

²³ Sar o Achitofel dikhla, hoj pes na ačhila avke, sar kamla, thoda pro somaris o sedlos, bešľa pre leste a geľa khere andro peskero foros. Kerda khere savoro, so kampelas, a palis pes figinda. Avke muľa a parunde les andre leskere dadeskero hrobos.

²⁴ O David avla andro Machanajim, medik o Absolon predžalas prekal o Jordan peskere muršenca andral o Izrael. ²⁵ O Absolon ačhada le Amasah pre le Joaboskero than vaš o velitelis upral o slugada. Leskero dad sas o Izmaelitas o Jitrah a e daj e Abigajil, le Nachašiskeri čhaj. Oj sas e pheň la Cerujake, le Joaboskera dake. ²⁶ O Absolon the o Izraeliti peske kerde taboris andre phuv Gilead.

²⁷ Sar o David avla andro Machanajim, avle ke leste o Šobi, o Machir the o Barzillaj. O Šobi sas le

Nachašiskero čhavo andral o Ammoniko foros Rabba, o Machir sas le Ammieloskero čhavo andral o Lo-Debar a o Barzillaj sas Gileados andral o Rogelim. ²⁸ Ande le Davidoske the leskere manušenge o veci pro soviben the pira, grati, žužodiv, jačmeňis, peko div, aro, fizola, šošovica, ²⁹ medos, čhil, bakrano siros the gurnuňakero siros, hoj len te el, so te chal, bo džanenas, hoj o David the leskere murša imar na birinen, bo sas bokhale the smedne pre pušta.

Le Absolonoskere murša prekhelen

18 O David diňa te zvičinel le muršen, save sas leha, a rozulađa len andro partiji po ezeros (1 000) the šel (100) slugada a ačhada upral lende velitelēn. ² Avke len bičhada andro trin partiji le Joaboha, le Joaboskere phraleha le Abišajoha the le Ittajoha andral o Gat. Dojekh lendar lidžalas peskera partija. Palis phenda o David le muršenge: "Čačes džava the me tumenca."

³ "Našti aves," phende o murša. "Te denašaha het, na džala lenge pal amende, choc te jepaš džene amendar merena. Ale tu sal draganeder sar ezeros (1 000) amendar! Ela feder, te amenge pomožineha andral o foros."

⁴ "Kerava avke, sar phenen," phenda o David. Palis ačhelas paš e brana a savore murša džanas andro partiji po šel (100) the po ezera (1 000) odarik het. ⁵ O kralis phenda le Joaboske, Abišajoske the le Ittajoske: "Ča prekal ma aven jileskere le terne muršeske le Absolonoske."

⁶ Avke o murša gele pre maľa pro Izraeliti a o mariben pes zachudla andro Efrajimiko veš. ⁷ Le Davidoskere murša ňerinde (zvitazinde) upral o Izraeliti a mule lendar oda džives igen but manuša – 22 000 murša. ⁸ O mariben sas andre odi cali phuv. Andro veš mule buter murša sar ola, save mule andro mariben.

O Absolon merel

⁹ O Absolon džalas pre mulica † a jekhvarestes pes arakhla anglo Davidoskere murša. Sar leskeri mulica predžalas tel o konara le igen bare dubostar, o Absolon pes zachudla le šereha pro konara a ačhila te figinel andro luftos, medik e mulica telal leste denašľa het. ¹⁰ Vareko oda dikhla a geľa te phenel le Joaboske: "Dikhľom le Absolon te figinel pro dubos!"

¹¹ O Joab phenda ole muršeske, savo leske avla oda te phenel: "Te les dikhľal, soske les takoj na murdardaľ? Diňomas tut deš rupune the jekh sirimos!"

¹² Ov odphenda le Joaboske: "Choc te man diňalas ezeros (1 000) rupune, na hazdňomas o vast pre le kraliskero čhavo. Bo amen savore šundam, sar o David phenda tuke, le Abišajoske the le Ittajoske, hoj te chraňinen le terne muršes le Absolon. ¹³ Te murdardo-mas les, o kralis the avke pes pal oda dodžanľahas, tu na ačhilalas vaš ma."

† Oda hin džvirina maškar o somaris the graj.

¹⁴ "Na zlíkerava man ade tuha!" phendá o Joab. Avke iľa o trin kopiji a demada len andro jilo le Absolonoske, savo mek dživelas a figinelas pro dubos. ¹⁵ Palís o deš terne murša, save hordinenas le Joaboskere zbraňi, ačhenas pašal o Absolon a murdarde les.

¹⁶ O Joab zatrubinda pro rohos a o murša imar na džanas pal o Izraeliti, bo ov len zaačhađa. ¹⁷ Ile le Absolon, čhide les andre bari chev andro veš a začhide les but barenca. Savore manuša andral o Izrael pes rozdenašle, dojekh andro peskero stanos.

¹⁸ Medik dživelas o Absolon, diňa peske te ačhavel andre Kraliskeri dolina bar pre peskero leperiben. Phendá peske: "Nane man čhavo, savo leperela miro nav." Vašoda diňa ole leperde bareske nav pal peste. Dži adadžives pes vičinel Le Absolonoskero bar pro leperiben.

¹⁹ Palís o Achimaac, o čhavo le Cadokoskero, phendá le Joaboske: "Muk man, hoj te džav ko David, hoj leske te phenav oda lačo hiros, hoj o RAJ les zachraňinda leskere nepřijatělstar."

²⁰ "Na," odphendá leske o Joab, "adadžives na phenaha leske, bo muľa leskero čhavo. Šaj leske anes o hiros pre aver džives."

²¹ Palís phendá peskere slugaske le Kušijcoske: "Dža a phen le kraliske, so dikhlal." O murš bandiľa anglal leste a chudľa te denašel.

²² Ale o Achimaac pale phendá le Joaboske: "Mange hin savoro jekh. Ča muk man, hoj te denašav pal oda Kušijcos."

"Soske oda kames te kerel, čhavo miro?" phučľa lestar o Joab. "Na ela tut olestar nisavo počniiben."

²³ "Mi ačhel pes chocso," phendá o Achimaac, "ale me džav!"

"Akor dža!" phendá leske o Joab. Avke o Achimaac denašelas pal o lačo drom a dochudľa le Kušijcos.

²⁴ O David bešelas pro than maškar e andruňi the avruňi foroskeri brana. Akor geľa o murš, savo merkinelas paš e foroskeri brana, pre strecha la branake pro muros a dikhlá jekhe muršes, sar denašel. ²⁵ Zvičinda tele a phendá le kraliske.

Akor o kralís o David phendá: "Te hino korkoro, anel lačo hiros." Sar oda murš sas pašeder, ²⁶ o murš paš e brana zbačinda avre muršes, sar denašel. Akor vičinda pro murš, savo phundravelas e brana: "Hin ode aver murš, savo denašel!"

O David phendá: "The ov anel lačo hiros!"

²⁷ O murš, savo merkinelas paš e brana, phendá: "Ešebno (peršo) murš denašel avke sar o Achimaac, o čhavo le Cadokoskero."

"Ov hino lačo manuš," phendá o David. "Avel ade lače hiroha."

²⁸ Androda o Achimaac phendá le Davidoske: "Smirom tuke!" Avke bandiľa le mujeha dži ke phuv a phendá: "Bachtalo o RAJ, tiro Del, savo tuke diňa le nepřijatělen, save hazdle o vasta pre tute, pre miro raj the kralís."

²⁹ "Mištes hin le Absolonoske?" phučľa lestar o David.

O Achimaac odphendá: "Dikhľom ča bari balamuta (zmetkos), sar o Joab bičhađa tire služobňikos the tire slugas, ale na džanav, pal soste džal."

³⁰ "Ačh ode!" phendá o David. Avke ov geľa a ačhelas ode.

³¹ Jekhvareste avľa o Kušijcos a phendá: "Mi šunel miro raj the kralís lačo hiros! O RAJ tut adadžives cirdňa avri andral e zor savorendar, save pes hazdle upre pre tute."

³² "Sar hin le terne muršeske le Absolonoske?" phučľa o David le Kušijcostar.

Ov odphendá: "Kada, so pes ačhiľa tire čhaske, rajeja the kralína miro, mi ačhel pes avke tire nepřijatělenca the olenca, save pes hazdle upre pre tute!"

O Joab dovakerel le Davidoske

19 Oda hiros le David igen zaiľa, geľa andre upruno kher, so sas upral e brana, a rovelas. Le dromeha rovibnaha vakerelas: "Čhavo miro, Absolon! Čhavo miro! Čhavo miro, Absolon! Šaj me muľom a na tu, Absolon, čhavo miro, čhavo miro!" ² Le Joaboske phende, hoj o kralís hino smutno a rovel pal o Absolon. ³ Andre oda džives pes o ňerindipen (vitáztvo) čerinda pro smutkos savore slugađege, bo o slugađa pes dodžanle, hoj le kraliske hin igen pharo pal peskero čhavo. ⁴ Akor o slugađa pes počoral visarenas andro foros Machanajim, avke sar keren o slugađa, save pes ladžan olestar, hoj denašen le maribnastar. ⁵ O kralís peske garuđa o muj a chudľa zoraless te rovel: "Čhavo miro, Absolon! Absolon, čhavo miro, čhavo miro!"

⁶ Akor o Joab geľa ko David a phendá: "Adadžives kerďal ladž savore tire služobňikenge, save adadžives zachraňinde o dživipen tuke, tire čhavage, romňijenge, čhajenge the romňijenge-služobňičkenge. ⁷ Se tu kames olen, save pre tu džan, a džas pre ola, save tut kamen. Adadžives dikhlam, hoj na džal tuke pal o uradňika a aňi pal o služobňika. Dikhav, hoj tuke ulahas feder, te o Absolon ačhiľahas te dživel a amen savore te ulamas mule. ⁸ Vašoda ušťi! Av avri a podhazde upre tire služobňiken. Bo lav vera pro RAJ, te na aveha avri, dži rači ňiko lendar na ačhela tuha. Oda ela prekal tu mek goreder sar savoro, so pes tuke terňipnastar dži adadžives ačhiľa."

⁹ Avke o kralís ušťiľa a bešľa peske paš e brana. Sar phende savore slugađege, hoj o kralís bešel paš e brana, avle angle leste savore.

Ale o Izraeliti pes rozdenašle, dojekh andro peskero stanos.

E Judsko the o Izrael kamen pale le David

¹⁰ Savore kmeňi andral o Izrael pes vesekedinenas maškar peste a phenenas: "O kralís amen cirdňa avri andral e zor amare nepřijatěendar, andral e zor le Fil-ištinendar. Ale akana mušinda te denašel andral kadi phuv le Absolonostar. ¹¹ Ale o Absolon, saves pomakhľam vaš amaro kralís, muľa andro mariben.

Soske mek užaren? So na keren vareso, hoj te avel pale o kralis?"

¹² O kralis o David diña te phenel le rašajenge le Cadokoske the le Ebjataroske: "Phenen le vodcenge andre Judsko: 'Soske tumen majinen te el posledne manuša, save anena pale khere le kralis? Se o kralis dodžanla pes, so vakerenas o manuša andro Izrael. ¹³ Tumen san mire phrala, sam jekh rat. Soske tumen majinen te el posledne manuša, save anena pale khere le kralis?' ¹⁴ Le Amasoske phenena: 'Se amen sam phrala, jekh rat. Mi marel man zorales o Del, te tu na aveha velitelis upral mire slugada vaš o Joab.' "

¹⁵ Aleha sas savore manušenge andral e Judsko pre dzeka. On dine the phenel le kraliske: "Av pale, tu the savore tire služobňika."

O David džal pale andro Jeruzalem

¹⁶ Sar o David visarda pes pale khere, avla le drome ha paš o paňi Jordan. O manuša andral e Judsko imar avle andro Gilgal, hoj pes leha te zdžan a te prefigenen les prekal o paňi. ¹⁷ Andre oda časos sidarelas the o Benjamins o Šimej, le Geraskero čhavo andral o Bachurim, a geľa le muršenca andral e Judsko anglo kralis David. ¹⁸ Avle leha ezeros (1 000) murša andral o Benjamin. Avla the o Cibah, savo sas služobňikos le Sauloskera famelijake, a leha leskere dešupandž (15) čhave the biš (20) sluhi. On sas sigeder paš o paňi Jordan sar o David. ¹⁹ Pregele prekal o paňi, hoj te prelidžan leskera famelija, a kerde savoro, so o David kamelas.

O David presikavel o jileskeriben le Šimejoske

Sar o David kamla te predžal prekal o Jordan, peľa angle leste le Geraskero čhavo o Šimej ²⁰ a phenda leske: "Rajeja miro! Mangav tut, bister pre oda nalačhipen, so tuke kerdom oda džives, sar džahas het andral o Jeruzalem. Ma liker oda andro tiro jilo. ²¹ Se me, tiro služobňikos, džanav, hoj kerdom binos. Ale adadžives avav ešebno (peršo) anglal tu la Jozefoskera famelijatar, rajeja miro the kralina."

²² Androda o Abišaj, la Cerujakero čhavo, phenda: "Či na majinas les te murdarel? Se prekošelas le RA-JESKERE pomakhles!"

²³ Ale o David phenda: "So te kerel tumenca, čhave la Cerujakere, hoj adadžives ačhen mange pre oda, so kamav te kerel? Adadžives majinel te el vareko murdardo andro Izrael? Či so, me na džanav, hoj som adadžives kralis upral o Izrael?" ²⁴ Palis phenda le Šimejoske: "Na mereha!" A kada leske phenda o David la veraha.

O David presikavel o jileskeriben le Mefibošetoske

²⁵ The le Sauloskero čhavo o Mefibošet avla anglo David. Akorestar, sar o David geľa het, ov peske na thovelas (na morelas) o pindre, aňi na rajbinelas pal peste o gada a na strihinelas e brada dži akor, medik na avla pale o David. ²⁶ Sar avla andral o Jeruzalem an-

glo David, ov leske phenda: "Mefibošet, soske na avla manca?"

²⁷ Ov odphenda: "Se tu džanes, hoj me na phirav pro pindre. Phendom mire sluhaskes, hoj te thovel o sedlos pro somaris, bo kamlom te džal le kraliha, ale ov man oklaminda. ²⁸ Ov vakerelas namištes pre mande ke tu, rajeja the kralina miro. Ale tu, rajeja miro the kralina, sal sar le Devleskero aňjelos. Ker avke, sar tu kames. ²⁹ Se cali miri dadeskeri famelija peske tutar na zasogalinel (na zaslužinel) nič, ča te merel. Ale tu domuklal tire služobňikoske te bešel pašal tiro skamind. So mek šaj buter kamav tutar?"

³⁰ O David leske phenda: "Soske ajci vakeres? Se phenav: Tu the o Cibah peske rozulaven o maľi."

³¹ O Mefibošet odphenda le Davidoske: "Mi lel peske choc savoro, prekal mande hin oda dos, hoj miro raj the kralis avla khere bachtales."

O David presikavel o jileskeriben le Barzillajoske

³²⁻³³ O Gileados o Barzillaj sas andral o gav Rogelim, so hin paš o Machanajim. Ov sas igen phuro, sas leske ohtovardeš (80) berš. Sas barvalo murš, savo dodelas o chaben prekal o kralis, medik sas andro Machanajim. The o Barzillaj avla le kraliha tele dži paš o Jordan, hoj les odarik te prelidžal. ³⁴ O David phenda leske: "Av manca khere andro Jeruzalem a ode man pal tute postarinava."

³⁵ O Barzillaj leske odphenda: "Keci berš mek dživava, hoj te džav tuha, kralina, andro Jeruzalem?"

³⁶ Adadžives mange hin ohtovardeš (80) berš. Andre ňisoste imar man nane radišagos: Našti koštolinav, so chav aňi so pijav, a na šunav o hangos, so gilaven o murša the o džuvla. Soske džava tuha? Se tiro služobňikos ela tuke ča pro pharipen. ³⁷ Džava tuha, kralina, mek sikra pal o Jordan, ale soske tu, kralina, man kames te del ajso počiňiben (odmena)? ³⁸ Domuk mange, hoj man te visarav pale andre peskero foros a ode te merav paš o hrobos peskere dadeskero the peskera dakero. Ale hin ade jekh tiro služobňikos o Kimham, savo dureder džala tuha, rajeja the kralina miro. Ker leske avke, sar tuke hin pre dzeka."

³⁹ O David phenda: "Akor mi avel manca o Kimham a me leske kerava avke, sar tuke hin pre dzeka. Savoro, so kames, kerava prekal tu." ⁴⁰ Palis savore manuša the o David pregele prekal o Jordan. Avke ov čumidla le Barzillaj, požehňinda les a ov pes visarda khere.

O Izrael the e Judsko pes vesekedinen pal o David

⁴¹ O kralis o David džalas dureder andro Gilgal a o Kimham leha. Savore manuša andral e Judsko the jepaš Izrael les preligende. ⁴² Ode avle ko kralis savore murša andral o Izrael a phučle lestar: "Soske tut čorde amare phrala andral e Judsko a prefigende tut, tira famelija the savore tire muršen prekal o Jordan?"

⁴³ Androda savore murša andral e Judsko phende le muršenge andral o Izrael: "Oda vašoda, bo hino

amenge fajta. Soske san choľamen? Odchalám vareso le kralistar, abo diňa amen ov varesave dari?"

⁴⁴ O Izraeliti lenge odphende: "Amen hin dešvar buter pro kralis pravos sar tumen. Soske amen dikhľan tele? Se amen ešebne phendám, hoj anaha pale amare kralis!"

Ale o manuša andral e Judsko sas zoraleder andro la-va sar o murša andral o Izrael.

O Šeba pes vzburinel

20 Akor sas ode the jekh nalačo murš o Šebas, le Bichriskero čhavo, savo sas Benjamins. Ov zatrubinda pro rohos a phendá:

"Amen nane nič jekhetane le Davidoha, nič le Izajoskere čhaha!

Džan savore andre peskere stani, ó, Izrael!"

² Avke savore murša andral o Izrael odgele le Davidostar a džanas pal o Šebas. Ale o murša andral e Judsko pes likerenas peskere kralistar le Jordanostar dži paš o Jeruzalem.

³ Sar o David avľa andre peskero kher andro Jeruzalem, iľa ole deše romňijen-služobňičken, saven mukľa, hoj te starinen pal o palacis, a thođa len andro kher, kaj merkinenas pre lende. Delas len te chal, ale na pašľolas lenca buter. On dži andro meriben sas zaphandle andro kher a dživenas ode sar vdovi.

⁴ Avke o David phendá le Amasoske: "Hin tut trin džives pre oda, hoj te vičines ade le muršen andral e Judsko a av the tu ade!" ⁵ Paľis o Amasah geľa len te vičinel, ale na dolikerďa oda časos, so les diňa o David.

⁶ Akor o David phendá le Abišajoske: "Akana amenge kerela o Šebas goreder sar angloda o Absolon. Vašoda le mire muršen a dža pal leste, hoj peske te na arakhel bare fori zorale murenca a te na denašel amenge."

O Joab murdarel le Amasah

⁷ Le Joaboskere murša, o Keretána, o Piletána the savore zorale murša gele avri andral o Jeruzalem a džanas pal o Bichriskero čhavo Šebas.

⁸ Sar imar sas paš e bari skala paš o Gibeon, o Amasah avelas ke lende. Pro Joab sas urde o slugaďike gada le sirimoha, pre savo les sas priphandľi e šabľa. Sar džalas ko Amasah, peľa leske avri.

⁹ O Joab phučľa le Amasostar: "Sar sal, phrala miro?" A chudľa les le čače vasteha la bradatar, avke sar te les kamľahas te čumidel. ¹⁰ Ale o Amasah na dikhľa, hoj le Joaboste andro vast hiňi e šabľa, a o Joab demaďa leske e šabľa andro per. Oda avke demaďa, hoj o goja leske pele avri pre phuv. O Amasah takoj muľa pro than a ov les na mušinda pale te demel.

Avke o Joab the leskero phral o Abišaj džanas dured-er pal o Šebas. ¹¹ Paľis vareko le Joaboskere terne muršendar ačhiľa paš o Amasoskero telos a zvičinda: "Ko likerel paš o Joab the paš o David, mi džal pal o Joab!" ¹² O Amasah pašľolas andro rat pre phuv maškar o drom. Sar jekh le Joaboskere muršendar dikhľa, hoj o manuša zaačhen a dikhen pre leste, odcirdľa les pre

maľa a čhidá pre leste o plaštós, bo dikhľa, hoj dojekh zaačhelas paš leste. ¹³ Sar les ile pal o drom, savore murša dureder džanas le Joaboha pal o Šebas.

E godáver džuvľi zachraňinel o foros Abel

¹⁴ O Šebas pregeľa prekal savore Izraelike kmeňi dži paš o foros Abel-Bet-Maacha. Savore andral e Bichriskeri famelija pes zgele a džanas pal leste andro foros. ¹⁵ Sar le Joaboskere murša šunde, hoj o Šebas hino ode, rozačhade pes pašal o foros a džanas pre leste. Vašoda, hoj pes te dochuden andro foros, hordinenas e čhik the e pošo pašal o avruno muri a kopafinenas telal o muri, hoj te peren tele. ¹⁶ Androda varesavi godáver džuvľi andral o foros phendá: "Mištes šunen! Phenen le Joaboske, hoj te avel ke ma, bo kamav leha te vakerel!" ¹⁷ Sar o Joab geľa ke odi džuvľi, oj lestar phučľa: "Tu sal o Joab?"

"He, me som," odphendá.

"Šun, so vakerela tiri služobňička," oj phendá leske.

"Vaker! Šunav tut," odphendá o Joab.

¹⁸ Avke oj phendá: "Varekana pes kavke vakerelas: 'Te kames tut vareso te dodžanel, dža a phuč pes andro Abel,' a pal oda the ker. ¹⁹ Amen hin savorenca o smirom. Sam pačivale Izraeliti! Soske kamen te zničinel o foros, so hino sar e daj andro Izrael? Soske kamen te zničinel le RAJESKERO đedictvos?"

²⁰ "Na, šoha (ňikda)!" odphendá o Joab. "Pača mange, me na kamav te zalel aňi te zničinel tumaro foros!"

²¹ Nane oda avke. Ale le Bichriskero čhavo o Šebas, savo hino andral le Efrajimoskere verchi, pes vzburinda pro kralis David. Den mange les a me oddžava andral o foros."

"Mištes, leskero šero tuke prečhivava prekal o muros," phendá e džuvľi le Joaboske.

²² Paľis odi džuvľi prevakerďa peskera godáha ke savore manuša andre oda foros. Avke on le Šebasoske odčhinde o šero a čhide prekal o muros le Joaboske. Akor o Joab zatrubinda pro rohos a savore odgele pašal o foros, dojekh andre peskero stanos. A o Joab pes visardá pale ko kralis andro Jeruzalem.

Le Davidoskere služobňika

²³ O Joab lidžalas savore slugađen andro Izrael a o Benajah, le Jehojadoskero čhavo, sas veliteľis le Keretá-nenge the le Piletá-nenge. ²⁴ O Adoram lidžalas o buča, andre save ispidenas le manušen te kerel, a o Jošafat, le Achiludoskero čhavo, sas uradňikos. ²⁵ O Šejah sas pisaris a o Cadok the o Ebjatar sas rašaja. ²⁶ The o Iras andral o Jair sas rašaj le Davidoskero.

Efta murša meren vaš o Gibeona

21 Sar o David kralinelas, sas bokh, so likerelas trin berš pal peste. Akor o David rodelas ko RAJ, soske ada hin, a ov leske odphendá: "O Saul the leskeri famelija hine vinovate vaš o rat le Gibeonengero."

² O manuša andral o Gibeon na sas Izraeliti, on sas posledne le Amorejendar, savenge o Izraeliti dine lav,

hoj len na murdarena. Ale o Saul kerelas sa pre oda, hoj len te murdarel avri, bo kamla, hoj e phuv te ačhel ča prekal e Judsko the Izrael. Vašoda o David peske diňa te vičinel le Gibeonen a vakerelas lenca. ³ Phučla lendar: "So prekal tumende te kerav, hoj te aven amenca lače, hoj te žehñinen le RAJESKERE manušen?"

⁴ O Gibeona phende: "Amenge na džal pal o rup abo pal o somnakaj le Sauloskero the leskera famelijakero, aňi pal oda, hoj varekas te murdaras andral o Izrael."

"So phenena, oda kerava," phendá lenge o David.

⁵ Avke phende le kraliske: "O Saul amen kamla te murdarel avri, hoj te na ačhel ñiko amendar andre Izraeliko phuv. ⁶ Vašoda de amenge leskere čhavendar efa muršen. Amen len murdaraha anglo RAJ andre Gibeja, kaj kralinelas o Saul, savo sas le RAJESKERO avrikidlo."

"Dava tumenge len," phendá o kralis.

⁷ Ale o kralis na diňa lenge le Mefibošet, le Jonatanoskere čhas, saveske sas papus o Saul, vaš e vera, so diňa o David the o Jonatan jekh avreske anglo RAJ. ⁸ O David iľa duje Sauloskere čhaven le Armoni the le Mefibošet. Lengeri daj sas e Ricpa, le Ajoskeri čhaj. A mek iľa the le pandže čhaven le Sauloskera čatar la Merabatar, save la sas le Adrijeloha, savo sas o čhavo le Barzillajoske andral e Mechola. ⁹ Diňa len andro vasta le Gibeonenge, save len murdarde pro verchos anglo RAJ. Ode savore efa jekhetane pele a mule andre ešebne (perše) dživesa, sar pes skidelas o jačmeñis.

¹⁰ Le Ajoskeri čhaj e Ricpa iľa o gono a rozphundrađa les anglal peste pre skala akorestar, sar zachudľa e žatva, dži akor, medik na diňa o brišind. Na domukľa, hoj o čirikle pre lengere tela te bešen prekal o džives a o dzive džvirini prekal e rat.

¹¹ Sar le Davidoske phende, so kerđa le Ajoskeri čhaj e Ricpa, savi sas romñi-služka le Sauloskeri, ¹² o David geľa te lel le Sauloskere the le Jonatanoskere kokala le manušendar andral o Jabeš-Gilead, save len ile andral o pľacos andro Bet-Šan, kaj len o Filištinci figinde andre oda džives, sar murdarde le Saul pro verchos Gilboa. ¹³ Odľigendá odarik o kokala le Sauloskere the le Jonatanoskere a skidle the o kokala ole efa džengenere, save sas murdarde.

¹⁴ O kokala le Sauloskere the le Jonatanoskere parunde andro hrobos leskere dadeskero, savo pes vičinelas Kiš, andre le Benjaminengeri phuv paš e Cela. Kerde sa avke, sar lenge phendá o kralis. Palis o Del imar šundá avri lengero mangipen vaš e phuv.

O maribena le muršenca andral e fajta Rafah

¹⁵ Pale chudle o Izraeliti pes te marel le Filištinenca. O David geľa peskere muršenca pro mariben pro Filištinci, ale o David andre oda na birinelas. ¹⁶ Sas ode the o Jišbi-Benob andral e fajta Rafah. Leskeri kopija sas phari vaj trin the jepaš kili a pašal leste sas phandľi e nevi šabľa. Phendá, hoj murdarela le David. ¹⁷ Ale o Abišaj, la Cerujakero čhavo, avľa le Davidoske te pomožinel. Ov le Filištincos demađa a murdardá. Akor o

murša ile vera a phende le Davidoske: "Našti aves amenca andro mariben, hoj te na murdaľol o momelaris le Izraeloskero."

¹⁸ Paloda sas pale o mariben le Filištinenca andro Gob. Akor o Sibbečaj andral e Chuša murdardá le Saf, savo sas andral e fajta Rafah.

¹⁹ Palis andro aver mariben le Filištinenca andro Gob o Elchanan, o čhavo le Jaireskero † andral o Betlehem, murdardá le Golijaš andral o Gat. O kašt leskera kopijatar sas ajso thulo sar o kašt le strojoseri, pre savo pes keren o pochtana.

²⁰ Sar sas pale o mariben andro Gat, sas ode igen učo murš, saves sas bišuštar (24) angušta, bo sas les pro vasta the pro pindre po šov angušta. The ov sas andral e fajta Rafah. ²¹ Ale sar asalaš avri le Izraeliten, murdardá les o Jonatan, o čhavo le Šimeoskero, savo sas phral le Davidoske.

²² O David the leskere murša murdarde kale štare muršen andral e fajta Rafah.

Le Davidoskeri gili

22 O lava kala gilakere gilavelas o David pre pačiv le RAJESKE andre oda džives, sar les cirdňa avri andral e zor savore leskere ñeprijateľendar the le Saulostar:

² "O RAJ hino miri skala, miro zoralo kher the miro zachrancas.

³ Miro Del hin miro zoralo bar, ke savo denašav, miro štitos, miro hrados the e zor, savi man zachrañinel.

Miro zachrancas, tu man zachrañindal le maribneskere muršendar.

⁴ Vičinav ko RAJ, savo hino hodno te lel e chvala, a som zachrañimen mire ñeprijateľendar.

⁵ O vlni le meribnaskere man zakerde andre, o zorale paňa man zaučharde.

⁶ O lani le hroboskere sas phandle pašal ma, o meriben thođa o pasci pre miro drom.

⁷ Sar somas andro pharipen, vičinavas pro RAJ, pre miro Del. Andral peskero chramos šundá miro hangos, miro vriskišagos geľa dži andre leskere kana.

⁸ E phuv pes čhaladá a razisalifa, čhalade pes o zakladi le ñeboskere, bo ov sas cholamen.

⁹ O thuv leske džalas andral o nakh, andral o muj e jag, so sa zlabarel, o jagale angara labonas lestar.

¹⁰ Otkerđa o ñebos a avľa tele, e kalí chmara sas tel leskere pindre.

¹¹ Bešľa pro cherubos a letinelas, ľidžalas pes pro kridli la balvajakere

¹² a le kalipnaha pes učhardá, le kale chmarendar peske kerđa stanos.

† Abo: Le Jaare-Oregimoskero

¹³ Leskere svetlostar labonas angle leste o jagale an-gara.

¹⁴ Palis o RAJ hermindā andral o ņebos a o hangos le Nekbaredere Devleskero ŝundiĉa.

¹⁵ Livinda peskere ŝipi a roztradna le ņeprijatelen, biĉhaĉa o bleski a denaŝenas.

¹⁶ O dolini le moroskere pes sikade, o zakladi la phuvakere sas oduĉharde, bo o RAJ pokarhinda a phurdna peskere dichoha andral o nakh.

¹⁷ O RAJ upral nacirdla o vast, chudla man a cirdna man avri andral o bare paña.

¹⁸ Zachrañinda man le zorale ņeprijatelendar, save man naŝti avri aĉhenas,

bo sas zoraleder sar me.

¹⁹ Avle pre mande, sar somas andro pharipen, ale o RAJ man chrañinelas.

²⁰ Andā man avri pro baro than, zachrañinda man, bo som leske pre dzeka.

²¹ Vaŝ miro spravodlišagos man o RAJ diña odmena, visardā mange pale vaŝ oda, hoj mire vasta hine žuže.

²² Bo likeravas man pal o droma le RAJESKERE a na odvisardom man mire Devlestar.

²³ Se savore leskere zakoni hine angle mire jakha a leskere lavendar man na visardom.

²⁴ Somas žužo angle leste a zlikeravas man le binostar.

²⁵ O RAJ man diña odmena vaŝ miro spravodlišagos the vaŝ oda, hoj som žužo andre leskere jakha.

²⁶ Ko žužejileskero sal the tu žužejileskero, ko paĉivalo sal the tu paĉivalo;

²⁷ ko žužo sal the tu žužo, ale oles, ko hino previsardo andre peskero jilo, zachudeha tire goĉaveripnaha.

²⁸ Bo tu zachrañines le pokorne manuŝen, a peskere jakhenca dikhes pre ola, ko pes hazden upre, hoj len tele te thoves.

²⁹ RAJEJA, tu sal miri momeli; o RAJ mange ŝvicinel andro kalipen.

³⁰ Tuha ŝaj džav the pre armada, mire Devleha preĉuĉava the o muros.

³¹ Le Devleskero drom hino dokonalo, le RAJESKERO vakeriben hino bi e mel, ov hin o ŝtitos olenge, ko ke leste denaŝen.

³² Bo ko hin o Del, te na o RAJ? Ko hin e Skala, te na amaro Del?

³³ O Del hino miro zoralo hrados a chrañinel man pre mire droma.

³⁴ Diña man pindre sar le jeleñis a aĉhaĉa man pro uĉe thana.

³⁵ Sikavel mire vasten te marel pes, del man zor te nacirdel o bronzuno lukos.

³⁶ Diñal man ŝtitos, so man ochrañinda, a tiro laĉhipen mandar kerĉa bares.

³⁷ Kerĉal mire pindrege laĉho drom, hoj te na perav.

³⁸ Džava pal mire ņeprijateĉa a na avava pale, medik len na žniĉinava.

³⁹ Domardom len avke, hoj naŝti uŝtenas, pele mange tel o pindre.

⁴⁰ Urĉal man andre maribnaskeri zor a kerĉal, hoj mire ņeprijateĉa anglal mande te bandon;

⁴¹ Tu keres, hoj mire ņeprijateĉa te denaŝen mandar, a me žniĉindom olen, ko man naŝti avri aĉhenas.

⁴² Mangenas, ale ņiko len na zachrañinda; viĉinenas pro RAJ, ale ov lenge na odphenda.

⁴³ Rozdemava len a ena sar o prachos pre e phuv. Rozphagerava len a ena sar ĉhik, so hin pre ulica.

⁴⁴ Zachrañineha man olendar, ko pes pre ma vzburinde, aĉhaveha man ŝereske upral o narodi. O manuŝa, saven na prindžaravas, mange akana služinen.

⁴⁵ O manuŝa andral aver narodi daratar bandon anglal ma

a ŝunen man pre dojekh lav.

⁴⁶ Naŝade e zor a daraha aven avri andral peskere zorale thana.

⁴⁷ O RAJ džive!
E chvala mi džal mira Skalake!
Bararav le Devles,

mira Skala, mire Spasitelis!
⁴⁸ Ó, Devla, tu vaŝ ma zaaĉhes a ĉhives tele le naroden angle mande.

⁴⁹ Tu sal miro zachrancas a cirdes man avri mire ņeprijatelendar. Tu man hazdes upral ola, ko pre ma džan, a cirdes man avri andral o vasta le maribnaskere murŝengere.

⁵⁰ Vaŝoda tut, RAJEJA, laŝarava maŝkar o narodi a giĉavava o žalmi pal tiro nav.

⁵¹ Tu des tire kraliske bares te ņerinel; presikaves o paĉivalo kamiben tire pomazimen kraliske, le Davidoske the leskere ĉhvenge pro furt."

Le Davidoskere posledne lava

23 Kala hine o posledne lava, so phenda o David o ĉhavo le Izajoskero; o lava le murŝeskere, saves o Del upre hazdna, savo sas pomakhlo le Jakoboskere Devlestar a kamado lavutaris andro Izrael, savo sthovelas o giĉa:

² "O Duchos le RAJESKERO vakerel prekal ma a leskere lava hine mange pre ĉhib.

³ O Del, e skala le Izraeloskeri, vakerel ke ma:

‘O kralis, ko čačipnaha lidžal le manušen a daral le Devlestar,

⁴ hino avke sar o kham, so avel avri;
sar o tosar bijal o chmari;
sar o svetlos, so pes odmarel la čaratar pal o brišind.’

⁵ Či nane miri famelija čačipnaskeri anglo Del?
Phandľa manca žuži zmluva pro furt, so pes šoha (ňik-
da) na čerinela.

Ov hino andre savoreste miro zachrancas,
dela man savoro, so lestar kamava.

⁶ Savore bijedevleskere hine sar o kandre, so hine
čhide pre sera,

so ňiko na chudel andro vast,
⁷ ale ko kamľahas pes lendar te chudel,
mušinel te lel o trast, abo la kopijakero kašt.
Ena zlabarde pre oda than, kaj hine.”

Le Davidoskere zorale murša

⁸ Kala hine o nava le Davidoskere zorale muršengere:
Ešebno (peršo) sas o Jošeb-Baššebet † andral o
Tachemon, savo sas vodcas le Trine muršenge. Ov la
kopijaha murdarda 800 muršen.

⁹ Dujto le Trinendar sas o Eleazar, o čhavo le Do-
doskero andral le Achoachoskeri fajta. Ov sas le Davi-
doha akor, sar vičinenas pro mariben le Filištinen, save
pes ode zgele. Sar o Izraeliti denašenas lendar, ¹⁰ ov
geľa ode a marelas le Filištinen. Ajci pes lenca marelas,
hoj imar našti phundravelas o vast, hoj te mukel e
šablă. Palis o manuša pes pale visarde ko Eleazar ča
vašoda, hoj te len o veci le mulendar. Andre oda džives
o RAJ len diňa baro ňerindipen (vităztvo).

¹¹ Trito ole Trinendar sas o Šammah, o čhavo le
Ageoskero andral o Harar. Sar pes o Filištinci zgele paš
e Lechi pre maľa, kaj sas e šošovica, o manuša denaše
lendar het, ¹² ale ov ačhelas maškar e maľa,
chrañinelas la a murdarda le Filištinen. Avke o RAJ diňa
le Izrael baro ňerindipen.

¹³ Jekhvar, sar pes skidelas o ulipen, trin džene le
Tranda (30) zorale muršendar gele ko David andre
jaskiňa Adullam. Akor e Filištiniako armada peske kerđa
taboris andre le Refajengeri dolina. ¹⁴ Akor o David sas
pro zoralo verchengero than a o Filištinike slugađa sas
andro Betlehem. ¹⁵ Palis o David sas igen smedno a
phendă: “Ko man dela te pijel paňi andral e chaňig, so
hiňi paš e brana andro Betlehem?” ¹⁶ Avke ola trin
džene pes premarde prekal o taboris le Filištinen-
gero a pherarde o paňi andral e chaňig, so sas paš e brana
andro Betlehem, a ande le Davidoske. Ale ov na kame-
las oda paňi te pijel a čhorda les avri pre pačiv le RA-
JESKE ¹⁷ a phendă: “Ó, RAJEJA, šoha (ňikda) ada na
kerđomas! Bo oda hin o rat le muršengero, save gele
te anel oda paňi, choc lenge džalal pal o dživipen.”
Avke o David na kamelas oda paňi te pijel.

Kada hin, so kerde ola trin zorale murša.

¹⁸ Le Joaboskero phral o Abišan, saveske sas daj e
Ceruja, sas vodcas le Tranda muršenge. Andre jekh

mariben murdarda trin šel (300) muršen la kopijaha a
avke leskero nav sas baro maškar ola Tranda. ¹⁹ Ke ola
Tranda les sas pačiv a ačhiľa lengero vodcas, ale the
avke na sas ajso, sar ola Trin.

²⁰ O Benajah, o čhavo le Jehojadoskero andral o
Kabceel, sas zoralo murš, savo kerelas but bare veci.
Ov murdarda duje le nekzorededer muršen andral o
Moab. Andre jekh džives, sar delas o jiv, ov geľa andre
chev, kaj sas o ľevos, saves murdarda. ²¹ Murdarda the
jekhe igen bare muršes andral o Egipt. Choc le
Egiptanoste sas andro vast e kopija a le Benajoste sas
ča e paca, ov iľa le Egiptanoske andral o vast e kopija a
murdarda les laha. ²² Kada kerđa o Benajah, o čhavo le
Jehojadoskero, a kaleha peske kerđa baro nav, avke
sar ola Trin. ²³ Sas les buter pačiv sar ole Tranda, choc
na sas jekh le Trinendar. O David les ačhada upral
peskere telesne stražňika.

²⁴ Maškar ola Tranda murša sas the le Joaboskero
phral o Asahel, le Dodoskero čhavo o Elchanan andral
o Betlehem, ²⁵ o Šammah, o Elikas andral o Charod,
²⁶ o Chelec andral o Palet, le Ikkešoskero čhavo o Iras
andral e Tekoa, ²⁷ o Abiezer andral o Anatot, o Mebun-
naj andral e Chuša, ²⁸ o Calmon le Achoachendar, o
Mahraj andral e Netofa, ²⁹ le Baanoskero čhavo o
Cheleb andral e Netofa, le Ribajoskero čhavo o Ittaj
andral e Gibeja, ³⁰ o Benajah andral o Piraton, o Hiddaj
andral o Gaašiskere dolini, ³¹ o Abi-Albon andral e Ara-
ba, o Azmavet andral o Bachurim, ³² o Eljachbas andral
o Šaalbon, le Jašenoskere čhave o Jonatan, ³³ o
Šammah andral o Harar, le Šararoskero čhavo o Achi-
jam andral o Harar, ³⁴ le Achasbajoskero čhavo o
Elifelet andral e Maacha, le Eliamoskero čhavo o
Achitofel andral o Gilon, ³⁵ o Checraj andral o Karmel, o
Paaraj andral e Arbi, ³⁶ le Natanoskero čhavo o Jigal an-
dral e Coba, o Bani andral o Gad, ³⁷ o Ammončanos o
Celek, o Nachraj andral o Beerot – savo hordinelas o
zbraňi le Joaboske, saveske sas daj e Ceruja – ³⁸ o Ira
andral o Jitri, o Gareb andral o Jitri ³⁹ the o Chetitos o
Urijaš.

On savore sas jekhetane tranda the efa (37) murša.

O David zgenel le manušen

24 O RAJ pale sas choľamen pro Izraeliti. Kerđa up-
re le David pre lende, hoj te džal te zgenel le
manušen andral o Izrael the andral e Judsko.

² O kralis phendă le Joaboske, savo sas velitelis upral
leskeri armada: “Predža tire velitelenca pal savore
kmeňi andro Izrael le Danostar dži ko Beer-Šeba a
zgen le manušen, hoj te džanav, keci hine.”

³ Ale o Joab phendă le kraliske: “Mi kerel o RAJ, tiro
Del, hoj lendar te el šelvar (100) ajci buter, sar hine, a
tu oda the korkoro te dikhes. Ale soske kames oda te
kerel, rajeja miro the kralina?”

⁴ Ale o kralis peske ačhelas vaš oda, so phendă le Joa-
boske the le velitelenge upral o slugađa. Avke o Joab
the o velitelă odgele le kralistar te zgenel le manušen
andro Izrael.

† Abo: Išbošet

⁵ Pregele prekal o Jordan a chudle le Aroerostar the le forostar, so sas maškar e dolina. Odarik gele prekal e phuv Gad a palis dži ko foros Jazer. ⁶ Palis avle andre phuv Gilead the andro foros Kadeš, andre le Chetitanengeri phuv, a odarik gele andro Dan a palis andro phuva pašal o foros Sidon. ⁷ Palis gele ko zoralo foros Tir the ke savore Chivijengere the Kanaančanengere fori. Odarik gele andro Beer-Šeba andre Judsko pušča pro juhos.

⁸ Avke phirenas pal cali phuv a pal o eña (9) čhon the biš (20) dživesa pes visarde pale andro Jeruzalem. ⁹ O Joab avla a phenda le Davidoske: "Andro Izrael hin 800 000 murša, save pes džanenas te marel, a andral e Judsko hin 500 000 muršen."

¹⁰ Paloda, sar zgende le manušen, o David pes šunelas vinovato a phenda le RAJESKE: "Kerđom igen baro binos angle tu. Akana tut mangav, RAJEJA, od muk mange kada binos, bo na kerđom oda godaha!"

¹¹ Sar o David tosara uštila, o RAJ phenda le Davidoskere prorokoske le Gadoske, ¹² hoj te phenel le Davidoske: "Kavke vakerele o RAJ: 'Dav tuke trin veci. Kide tuke avri, so kames, hoj pes te ačhel, a me oda kerava.'"

¹³ Avke o Gad avla ko David a phenda: "Majinel te el andre tiri phuv efa berš bokh? Abo kames trin čhon te denašel peskere ňeprijateľendar, save pal tu džana? Abo kames, hoj te el andre tiri phuv trin dživesa baro nasvaliben? Akana rozgondolín tuke a phen mange, so te phenel oleske, savo man ke tu bičhađa."

¹⁴ O David phenda le Gadoske: "Oda mange hin igen phares peske te kidel avri! Me na kamav te el mardo le manušendar, mi marel man o RAJ, bo leskero jileskeriben hino igen baro." ¹⁵ Vašoda o RAJ oda tosara domukla pro Izrael o baro nasvaliben a oda dži akor, sar sas phendo. Avke andre cali phuv Izrael le Danostar dži paš o Beer-Šeba mule 70 000 manuša. ¹⁶ Sar o aňjelos imar nacirdla peskero vast, hoj te dukhavel le

Jeruzalem, le RAJESKE sas pharo vaš oda nalačhipen a phenda le aňjeloske, savo murdarkerelas: "Preačh! Odle o vast!" Ipen akor le RAJESKERO aňjelos sas paš o humnos le Aravnoskero, savo sas Jebusejis.

¹⁷ Sar o David dikhla le aňjelos, savo dukhavel le manušen, phenda le RAJESKE: "Me kerđom ada binos. Me som vinovato, na kala manuša! Se on hine ča o bakre! Na kerde nič! Mangav tut, mar man the mira famelija."

¹⁸ Andre oda džives avla o Gad ko David a phenda leske: "Dža upre a ačhav oltaris le RAJESKE pre le Aravnoskero humnos." ¹⁹ O David geľa a kerđa avke, sar o RAJ prikazinda prekal o Gad. ²⁰ Sar dikhla o Aravnah, hoj avel ke leste o kralis peskere služobňikenca, avla anglal leste a bandila le mujeha dži ke phuv.

²¹ "Soske avel o kralis, miro raj, ke mande?" phučla lestar.

"Kamav te cinel tutar o humnos," odphenda o David, "hoj te ačhavav le RAJESKE o oltaris, bo avke preačhela oda baro nasvaliben pro manuša."

²² "Mi lel miro raj the kralis peske sa, so kamel, a mi obetinel ode," phenda o Aravnah le Davidoske. "Dikh, hin ade gurumňa pre labardi obeta the o sersamos, soha pes prečhivkerelas o žužodiv † the o jarmi †† le guruvengere pre jag. ²³ Ó, kralina! Kada tuke savoro dav me, o Aravnah. Mi el le RAJES, tire Devles, andre tute kamiben."

²⁴ Ale o kralis leske phenda: "Kada na! Kamav tutar te cinel a te počinel. Na anava le RAJESKE, mire Devleske, labarde obeti, save man nič na molas." Avke o David cinda oda humnos the o gurumňa vaš o penda (50) rup, ²⁵ ačhađa le RAJESKE oltaris a anda leske o labarde the smiromskere obeti. Palis o manuša pes modfine nas vaš odi phuv a o RAJ oda baro nasvaliben odvisarda le Izraelostar.

† E Slovačiko čhib: mlaticé smyky †† O kašt, so pes thovelas pre meň le džvirenge, hoj te cirden o verdan.

1. KRAL'ENGERO

Le Davidoskero phuripen

1 Sar o David sas igen phuro, sas les šil, a choc thovkerenas pre leste o lepedi, našti roztačolas.
2 Leskere služobníka leske phende: "Kampel amare rajeske the kralíske te rodel la džuvľa, savi mek na pašliľa le muršeha. Oj pes pal leste starinela a kerela pašal leste. Pašľola paš leste, a avke amare rajes the kralís ela tates."
3 Paľis rodenas šukar džuvľa andre calo Izrael, arakhle la Abišag andral o Šunem a ande la ko kralís.
4 Odi džuvľi sas igen šukar. Starinelas pes a kerelas pašal leste, ale o kralís laha na pašliľa.

O Adonijah kamel te ačhel kralíske

5 O Adonijah, la Chaggitakero čhavo, pes hazdelas upre a phenelas: "Me avava kralís!" Stradľa peske maribnaskere verdana, muršen pro graja the penda (50) murša, save denašenas angle leste. **6** O David leske šoha (ňikda) andre ňisoste na dovakerelas: "Soske oda keres?" Ov sas igen šukar a uliľa (narodzindľa pes) pal o Absolon. **7** Ov sas dothodo le Joaboha the le rašaha le Ebjataroha. On ačhenas vaš o Adonijah. **8** Ale o rašaj Cadok na sas le Adonijoha, aňi le Jehojadoskero čhavo o Benajah, aňi o prorokos Natan, aňi o Šimej, aňi o Rei, aňi le Davidoskere telesne stražńika.
9 Andre jekh džives o Adonijah obetinelas le bakren, gurumńen the thule terne gurumńen paš o bar Zochelet, so hino paš o prameńis En-Rogel. **10** Ale na vičindľa le proroken le Natan the le Benajah, aňi le telesne stražńiken, aňi peskere phrales le Šalamun.

O Natan the e Batšeba anglo kralís

11 O Natan phendľa le Šalamunoskera dake la Batšebake: "Tu na šundal, hoj la Chaggitakero čhavo o Adonijah ačhiľa kralíske? Ale amaro raj o David pal oda aňi na džanel!" **12** Av manca, phenava tuke, sar šaj aven zachrańimen tu the tiro čhavo Šalamun. **13** Dža ko David a phen leske: "Či mange na phendal, rajeja miro the kralína, hoj miro čhavo o Šalamun ačhela kralís pal tute a hoj ov bešela pre tiro tronos? Soske akor ačhiľa o Adonijah kralíske?" **14** Medik ode vakereha le kraliľa Davidoha, me džava pal tu a phenava, hoj hin avke, sar phenes."

15 Avke e Batšeba geľa andro kher ko kralís. O David sas igen phuro a e Šunemčanka Abišag pašal leste kerelas. **16** E Batšeba bandiľa a diňa le kralís pačiv.

"So kames?" ov phučľa latar.

17 "Rajeja miro," oj odphendľa leske, "iľal mange vera pre tiro RAJ the Del: 'Tiro čhavo o Šalamun ela kralís pal mande, ov bešela pre miro tronos.'" **18** Ale akana o Adonijah ačhiľa kralís a tu pal ada aňi na džanes, rajeja miro the kralína. **19** Ov obetindľa igen but gurumńen, thule terne gurumńen the le bakren. Vičindľa savore tire čhaven, le rašas le Ebjatar the le slugadengere velitelís le Joab, ale le Šalamun na vičindľa! **20** Akana, rajeja miro the kralína, savore manuša andral o Izrael užaren pre tu, hoj te džanen, ko pal tu majinel te ačhol kralís. **21** Te tu ada na kereha, rajeja miro the kralína, ta paľis, sar tu mereha, man the mire čhas le Šalamun lena vaš ola, ko kerde namištes."

22 Medik vakerelas le Davidoha, avľa andre o prorokos o Natan. **23** Vareko phendľa le kralíske: "Hino ade o prorokos o Natan." Sar avľa anglo David, bandiľa le mujeha dži ke phuv.

24 Paľis lestar phučľa: "Rajeja miro the kralína, phendal tu, hoj o Adonijah ačhola pal tu kralís a bešela pre tiro tronos?" **25** Adadžives geľa tele a obetindľa igen but gurumńen, terne thule gurumńen the le bakren. Vičindľa peske savore tire čhaven, le velitelén upral o slugada the le rašas le Ebjatar a ode chan, pijen a vičinen: "Mi dživel o kralís Adonijah!" **26** Ale na vičindľa aňi man, tire služobńikos, aňi le Cadok, aňi le Jehojadoskere čhas le Benajah, aňi le Šalamun. **27** Rajeja miro the kralína, kerdal oda tu avke? A na diňal amenge te džanel, ko majinel te el pal tu kralís, savo bešela pre tiro tronos?"

O Šalamun ačhel kralíske

28 Akor o David prevakerďa: "Vičinen mange la Batšeba!" Avke avľa ko kralís a zaačhiľa angle leste.

29 O David phendľa: "Avke sar dživel o RAJ, savo man cirdňa avri andral dojekh miro pharipen, **30** mek adadžives kerava oda, so tuke phendom andre vera anglo RAJ, anglo Del le Izraeloskero, hoj tiro čhavo o Šalamun ela kralís pal mande a bešela pre miro tronos."

31 Akor e Batšeba bandiľa le mujeha dži ke phuv, diňa le David pačiv a zvičindľa: "Mi dživel miro raj the kralís o David pro furt!"

32 Paľis o David phendľa: "Vičinen mange le rašas le Cadok, le prorokos Natan the le Jehojadoskere čhas le Benajah!" Sar avle anglal leste, **33** o David lenge phendľa: "Len peha le služobńiken peskere rajeskeren a thoven te bešel mire čhas le Šalamun pre mulica a odľidžan les tele paš o prameńis Gichon. **34** Ode les o

rašaj o Cadok the o prorokos Natan pomakhena vaš o kralis upral o Izrael. Akor zatrubinen pro rohos a zvičinen: 'Mi dživel o kralis o Šalamun!' ³⁵ Tumen džan pal leste. Ov avela a bešela pre miro tronos a kralinela pal mande, bo les ačhadom, hoj te lidžal o Izrael the e Juda."

³⁶ O Benajah odphenda le kraliske: "Amen! O RAJ, o Del, oda mi kerel mire rajeske the kraliske! ³⁷ Avke sar o RAJ sas mire rajeha the le kraliha, mi el the le Šalamunoha a leskero tronos mi el bareder sar le Davidoskero, mire rajeskero."

³⁸ O rašaj o Cadok, o prorokos Natan, o Benajah, o Keretana the o Piletana gele tele, thode te bešel le Šalamun pre le Davidoskeri mulica a lidžanas les paš o prameñis Gichon. ³⁹ O Cadok iła andral le RAJESKERO Stanos o rohos le olejoha a pomakhla le Šalamun. Palis zatrubinde a savore manuša zvičinde: "Mi dživel o kralis o Šalamun!" ⁴⁰ Savore manuša džanas pal leste andro Jeruzalem a bašavenas pro flauti a radisafonas avke zorales, hoj e phuv zarazisaliła.

O Adonijah daral le Šalamunostar

⁴¹ Šunđa oda o Adonijah the savore, save ode sas vičimen, ipen akor, sar dochale pre hoscina. Sar o Joab šunđa o trubi, phučla: "So ajsi bari vika andro foros?"

⁴² Mek vakerelas, sar jekhvareste avla o Jonatan, o čhavo le rašaskero le Ebjataroskero. O Adonijah leske phenda: "Ča av, se tu sal zoralo murš a anes o lačo hiros."

⁴³ "Na!" odphenda leske o Jonatan. "Amaro raj, o kralis David, ačhada le Šalamun vaš o kralis! ⁴⁴ O David bičhada le rašas le Cadok, le prorokos Natan, le Benajah, le Keretanen the le Piletanen, hoj te džan le Šalamunoha. On les thode pre le Davidoskeri mulica. ⁴⁵ O Cadok le Natanoha les paš o Gichon pomakhle vaš o kralis. Visarde pes odarik radišagoha a andre calo foros hin bari vika. Kada, so šunđan, hin kadi vika. ⁴⁶ O Šalamun imar bešel pro kraliskero tronos. ⁴⁷ Mek the le Davidoskere služobnika avle te presikavel e pačiv amare rajeske, le kraliske Davidoske. Phende: 'Mi kerel tiro Del, hoj te el le Šalamunoskero nav bareder sar tiro, a leskero tronos mi el bareder sar tiro!' " Akor o David bandiła pro hados ⁴⁸ a phenda: "Mi el barardo o RAJ, o Del le Izraeloskero, bo šaj adadžives dikhav le kralis, saves o Del diňa te bešel pre miro tronos!"

⁴⁹ Avke savore, ko sas pre hoscina ko Adonijah predarandile, uštile a rozgele pes. ⁵⁰ The o Adonijah pes daralas le Šalamunostar, vašoda odgeła andro stanos le RAJESKERO a chudla pes le oltariskere rohendar. ⁵¹ Le Šalamunoske phende: "Dikh! O Adonijah daral le kralistar le Šalamunostar, bo pes chudel le oltariskere rohendar a mangel: 'Akana mi lel mange vera o Šalamun, hoj na domukela, hoj man te murdaren la šablaha.' "

⁵² O Šalamun odphenda: "Te pes likerela pačivalones, aňi bal pal o šero leske na perela. Ale te man dodžanova, hoj vareso nalačo kerda, merela!" ⁵³ Palis diňa o Šalamun les te odligenel het le oltaristar. Sar palis o

Adonijah avla te bandol anglo kralis, o Šalamun leske phenda: "Dža khere."

Le Davidoskere posledne lava

2 Sar o David džanelas, hoj leskero meriben hino pašes, prikazinda peskere čhaske le Šalamunoske ada: ² "Me imar džav pal kadi phuv avke sar dojekh manuš, ale tu av zoralo a liker tut sar murš. ³ Doliker o prikazaňja le RAJESKERE, tire Devleskere. Phir pal leskero drom a doliker leskere lava, prikazaňja the savoro, so hin pisimen andre le Mojžišoskero zakonos. Te kada dolikereha, palis tut ela bach andre savoreste, so kereha, a všadzik, kaj džaha. ⁴ Avke o RAJ likerela oda lav, so mange phenda: 'Te tire čhave dživena avke, sar me kamav, a te phirena angle mande pačivalones, cale jileha the cała dušaha, ela furt vareko tira famelijatar pro tronos andro Izrael.'

⁵ Tu džanes, so mange kerda o Joab, la Cerujakero čhavo, sar murdarda mire duje Izraelike veliteľen: Le Abner, le Neroskere čhas, the le Amasah, le Jeteroskere čhas. Murdarda len akor, sar te ulehas andro mariben, ale sas o smirom. Oleha meľarda le rateha o sirimos pašal peste the o sandalki pre peskere pindre. ⁶ Se tu džanes, so te kerel! Ma muk les, hoj te sphurol a andro smirom te merel.

⁷ Ale le Barzillajoske andral o Gilead ker ada: Presikav o jileskeriben leskere čhavage. Mi chan jekhetane pašal tiro skamind, bo on ke ma sas jileskere akor, sar denašavas anglal tiro phral Absolon.

⁸ Hin ade the o Benjaminos Šimej, o čhavo le Geraskero andral o Bachurim. Ov man igen prekošla andre oda džives, sar džavas andro Machanajim. Ale palis avla anglal ma paš o paňi Jordan a ode leske diňom vera anglo RAJ, hoj les na murdarava la šablaha. ⁹ Ale akana ma muk les bijal o trestos. Tu sal godaver murš a džanes, so leha te kerel. Ma muk les, hoj te sphurol a andro smirom te merel."

O David merel

¹⁰ Palis o David muła a parunde les paš peskere phure dada andro Foros le Davidoskero. ¹¹ O David kralinelas upral o Izrael saranda (40) berš; andro Hebron efa (7) berš a andro Jeruzalem tranda the trin (33) berš. ¹² Avke o Šalamun bešla pro tronos peskere dadeskero a leskero tronos ačhiła igen zoralo.

O Adonijah hin murdardo

¹³ Andre jekh džives geła la Chaggitakero čhavo o Adonijah te dikhel le Šalamunoskera da la Batšeba. Oj lestar phučla: "Aves andro smirom?"

Ov odphenda: "He, andro smirom. ¹⁴ Kamav tutar vareso te phučel."

"Vaker," phenda leske e Batšeba.

¹⁵ "Se tu džanes," ov phenda, "hoj o krališagos majinda te el miro a hoj savore manuša andral calo Izrael peske man kidle avri vaš o kralis. Ale o krališagos mandar sas odilo a sas dino mire phraleske, bo o RAJ leske

diña. ¹⁶ Akana, hin man jekh mangipen. Ker mange ada!"

"Vaker!" oj phendá leske.

¹⁷ Avke ov phendá: "Privaker tut vaš ma ko Šalamun, hoj te del mange la Abišag andral o Šunem romňake. Ov čačes priačhela pre oda."

¹⁸ "Mištes," odphendá leske e Batšeba, "privakerava man vaš tu ko kralis."

¹⁹ Palis, sar avla e Batšeba ko Šalamun te privakerel pes vaš o Adonijah, o Šalamun uštíla pal o tronos a bandíla angle late. Avke bešla pale pro tronos a thođa the la te bešel pro tronos paš leskeri čači (pravo) sera.

²⁰ Avke leske oj phendá: "Kamav tutar jekh cikňi veca, hoj te keres prekal ma!"

"Phen, so kames, a me oda kerava, daje miri," phendá lake o Šalamun.

²¹ Oj phendá: "Mi den la Abišag andral o Šunem vaš e romňi tire phraleske le Adonijoske."

²² "Soske manges prekal o Adonijah la Abišag?" phučla latar o Šalamun. "Se mang the o krališagos, bo ov hino miro phureder phral a leha hino o rašaj o Ebjatar the la Cerujakero čhavo o Joab!"

²³ Androda o kralis o Šalamun íla vera anglo RAJ: "O Del man zorales mi marel, te o Adonijah na počinela peskere džživipnaha vaš kadi veca, so mandar mangelas. ²⁴ Avke sar dživel o RAJ, savo man thođa pro tronos mire dadeskero a savo mange kerđa sa avke, sar phendá, o Adonijah mušinel mek adadžives te merel."

²⁵ Palis o Šalamun bičhađa le Jehojadoskere čhas le Benajah te murdarel le Adonijah. Ov geľa a murdarda les.

O Ebjatar hin bičhado khere

²⁶ Le Ebjataroske o Šalamun phendá: "Dža pre peskere malí andro Anatot, bo zasogalines (zaslužines) tuke merel. Ale adadžives mek tut na murdarava, bo tu lídžahas le RAJESKERI Archa angle miro dad David a zlídžahas leha leskere pharipena, so les sas." ²⁷ Avke le Ebjatar premukla andral e rašajiko služba, so kerelas anglo RAJ. Avke pes ačhiľa oda, so o RAJ phendá andro šilo pre le Eliskeri famelija.

O Joab hin murdardo

²⁸ Sar o hiros pal oda avla dži ko Joab, ov darandíla, bo pes líkerelas le Adonijoha, choc angloda na sas le Absolonoha. Avke denašla andre le RAJESKERO stanos a ode pes chudla le oltariskere rohendar. ²⁹ Le Šalamunoske phende, hoj o Joab denašla andro RAJESKERO stanos a hoj ipen hino paš o oltaris. O Šalamun bičhađa varekas ko Joab lestar te phučel: "Soske oda kerďal, hoj denašlal ko oltaris?"

"Daravas tutar, vašoda denašlom ko RAJ," ov odphendá.

O Šalamun phendá le Jehojadoskere čhaske le Benajoske: "Dža a murdar les!"

³⁰ Avke ov geľa paš o stanos le RAJESKERO a phendá: "O kralis phenel, av avri!"

Ale o Joab odphendá: "Na, me ade merava."

O Benajah geľa te phenel le kraliske, so phendá o Joab.

³¹ "Ker avke, sar kamel!" phendá leske o kralis. "Murdar les ode a parun les! Avke khoseha pal ma the pal miri famelija o rat, so o Joab vaš ňisoste avri čhorda.

³² Bo akana o RAJ leske visarel pale vaš o rat, so avri čhorda akor, sar murdarda la šablaha duje muršen, save sas buter čačipnaskere the feder sar ov. Choc miro dad na džanelas pal oda, murdarda le čhas le Neroskeres le Abner, savo sas velítelis upral o slugađa andro Izrael, the le čhas le Jeteroskeres le Amasah, savo sas velítelis upral o slugađa andre Judsko.

³³ Lengero rat mi perel pro šero le Joaboske the pre leskero potomstvos pro furt. Ale le Davidoskere potomstvos, leskera famelija the leskere tronos mi el smirom le RAJESTAR pro furt."

³⁴ Avke o Benajah geľa, demađa le Joab a murdarda les. Palis les parunde paš leskero kher pre pušta.

³⁵ Avke o Šalamun pre le Joaboskero than ačhađa vaš o velítelis upral o slugađa le Jehojadoskere čhas le Benajah a le Cadok vaš o rašaj pre le Ebjataroskero than.

O Šimej hino murdardo

³⁶ Palis o Šalamun diña te vičinel ke peste le Šimej a phendá leske: "Ačhav tuke kher andro Jeruzalem, beš ode a ňikhaj odarik ma dža! ³⁷ Ale andre oda džives, sar džaha adarik het a predžaha o paňi Kidron, čačes mereha! Vaš tiro meriben korkoro tuke aveha vinovato."

³⁸ O Šimej leske odphendá: "Oda, so phendal, rajeja miro the kralina, hino lačho a me kerava avke, sar phendal." Avke o Šimej ačhiľa but časos andro Jeruzalem.

³⁹ Palis pal o trin berš le Šimejoske denašle duj sluhi ko Gatsko kralis ko Achiš, saveske sas dad o Maachah. Sar le Šimejoske phende, hoj leskere sluhi hine andro Gat, ⁴⁰ bešla pro somaris a geľa ko Achiš andro Gat len te rodel. Sar len arakhla, anda len pale khere.

⁴¹ Sar o Šalamun šundá, so o Šimej kerďa, ⁴² bičhađa vaš leske a phendá: "Či tu mange na phendal anglo RAJ a na prikazindom tuke, hoj sar džaha het chockaj andral o Jeruzalem, čačes mereha? A tu korkoro mange phendal, hoj šundal, so phendom a hoj mištes vakerďom. ⁴³ Soske na dolíkerďal oda lav, so phendal anglo RAJ, a na šundal oda, so me tuke phendom?"

⁴⁴ Pridžan tuke savoro nalačhipen, so kerdal mire dadeske le Davidoske. Akana o RAJ tuke visarela pale oda savoro! ⁴⁵ Me, o Šalamun, som kralis a o RAJ man požehňinela a kerela, hoj le Davidoskero tronos ela zoralo pro furt."

⁴⁶ Palis o Šalamun phendá le Benajoske: "Dža a murdar le Šimej." Ov geľa, demađa les a murdarda. Avke o krališagos sas zoralo andre le Šalamunoskere vasta.

O Šalamun mangel o godaveripen le RAJESTAR

3 O Šalamun ačhila džamutro le kraliske le Faraonoske andral o Egipt, bo peske iľa leskera čha romňake. Andā la peske andro Foros le Davidoskero, medik na dokerđa peskero palacis, o Chramos le RAJESKERO the o muri pašal o Jeruzalem. ² O manuša anenas o obeti pro chocsave uče thana, bo mek na sas dokerdo o Chramos prekal o RAJ. ³ O Šalamun kamelas le RAJES. Likerelas pes pal o prikazaňja, save les diňa leskero dad o David, ale the avke mek anelas obeti pro chocsave uče thana a labarelas ode o voňava obeti.

⁴ Jekhvar o kralis geľa te obetinel andro Gibeon, bo ode sas nekfeder ačhado učo than pro lašariben. Pre oda oltaris o Šalamun obetinda 1 000 labarde obeti.

⁵ Ode pes leske rači andro suno sikađa o RAJ, o Del, a phendā: "So kames, hoj tut te dav?"

⁶ O Šalamun odphendā: "Tu presikaďal baro lačhipen tire služobňikoske le Davidoske, mire dadeske, bo ov sas verno, čačipnaskero the pačivalo ke tu. Oda baro lačhipen leske presikaďal the akor, sar les diňal čhas, savo adadžives bešel pre leskero tronos. ⁷ No akana, RAJEJA, Devla miro, tu ačhaďal tire služobňikos kraliske pal miro dad David, ale me som terno murš a na džanav, sar mištes te lidžal le manušen. ⁸ Akana me som ade maškar tire avrikidle manuša, save hine ajci but, hoj pes len na del te zgenel aňi te zrachelin.

⁹ Mangav tut, de man godi, sar te lidžal tire manušen, hoj te sprindžarav, so hin lačo a so nalačo. Bo ko šaj lidžal kada baro narodos?"

¹⁰ Le RAJESKE sas pre dzeka, so peske o Šalamun mangľa. ¹¹ Phendā leske: "Mištes kerďal, hoj tuke na mangľal baro dživipen, aňi o barvalipen, aňi o meriben peskere ňeprijateľengero, ale mangľal tuke o godaveripen, hoj mištes te sudzines. ¹² Vašoda kerava avke, sar mandar mangľal. Dava tut baro godaveripen, hoj savoro te rozprindžares; ajso godaveripen, so mek šoha (ňikda) ňikas anglal tu na sas aňi na ela. ¹³ Dava tut the oda, so mandar na mangľal: O barvalipen the e slava – avke, hoj pal calo tiro dživipen ňiko le kralendar na ela ajso sar tu. ¹⁴ Te phireha pal mire droma a te dolikerela mire zakoni the prikazaňja avke, sar oda dolikerelas tiro dad o David, dava tut, hoj but te džives." ¹⁵ Androda o Šalamun pes prekerďa a avľa pre oda, hoj o RAJ vakerelas leha andro suno.

Palis geľa andro Jeruzalem a ačhaďa pes angle RAJESKERE Zmluvakeri Archa. Andā ode labarde the smiromskere obeti a kerďa prekal savore peskere služobňika hoscina.

Le Šalamunoskero godaveripen

¹⁶ Jekhvar avle ko Šalamun duj džuvľija, save sas lubňa, a ačhile anglal leste. ¹⁷ Jekh lendar phendā: "Ó, rajeja miro, me bešav kala džuvľaha jekhetane andre jekh kher. Sar mange uliľa miro muršoro, oj sas paš oda. ¹⁸ Palis pro trito džives the lake uliľa muršoro.

Samas andro kher ča duj džeňa a ňiko aver ode na sas. ¹⁹ Ale kala džuvľake o muršoro rači muľa, bo oj pašliľa pre leste. ²⁰ Pal o jepaš rat, medik me sovavas, oj uštíľa a iľa pašal ma mire čhavores. Thoda les paš peste a peskere mule čhavores thoda paš mande. ²¹ Sar tosara uštíľom a kamlom te del le čhavores te pijel, dikhľom, hoj sas mulo. Ale sar vidňisaľolas, obdikhľom les feder a avľom pre oda, hoj oda nane miro čhavoro, savo mange uliľa."

²² No oki džuvľi phenelas: "Na! Miro čhavoro hino oda, savo dživel, a tiro hino oda mulo!"

A pale oki džuvľi phenelas: "Na! Tiro hino oda mulo a miro oda, savo dživel!"

Kavke pes vesekedinenas anglo kralis.

²³ O kralis peske phendā: "Jekh lendar phenel: 'O džido čhavoro hino miro a o mulo tiro' a e dujto phenel: 'O mulo čhavoro hino tiro a o džido miro.'"

²⁴ Avke o kralis phendā: "Anen mange e šabľa!" Sar ande leske e šabľa, ²⁵ phendā: "Rozčhinen ole džide čhavores pro duj kotora a den jekh kotor jekhake a aver kotor avrake!"

²⁶ O jilo ola džuvľakero, savi sas daj le džide čhavoreskeri, sas pherdo le kamibnaha ko muršoro, a vašoda phendā le kraliske: "Mangav tut, rajeja miro, den lake ole džide čhavores a ma murdaren les!"

Oki džuvľi phenelas: "Na ela aňi miro aňi tiro. Rozčhinen les!"

²⁷ Avke o Šalamun phendā: "Ma murdaren les, ale den les ola džuvľaka, savi kamel, hoj te dživel. Oj hiňi čačes leskeri daj!"

²⁸ Sar pes calo Izrael dodžanľa pal oda, so kerďa o Šalamun, denas les bari pačiv, bo dikhle, hoj sas les o godaveripen le Devleskero, hoj mištes te sudzinel.

Le Davidoskere služobňika

4 O Šalamun ačhila kralis upral calo Izrael. ² Kala sas leskere bare uradňika:

O Azarijah, le Cadokoskero čhavo, sas o rašaj.

³ O Elichoref the o Achijah, le Šišoskere čhave, sas pisara andro palacis.

O Jošafat, le Achiludoskero čhavo, sas o matrikaris.

⁴ O Benajah, le Jehojadoskero čhavo, sas o veliteľis upral o slugađa.

O Cadok the o Ebjatar sas o rašaja.

⁵ O Azarijah, le Natanoskero čhavo, sas o baro guverneris upral o krajengere guvernera.

O Zabud, le Natanoskero čhavo, sas o rašaj the le kraliskero pašutno radcas.

⁶ O Achišar sas o uradňikos upral o služobňika andro palacis.

O Adoniram, le Abdoskero čhavo, sas veliteľis upral o robotňika, save sas ispidle andre buči.

⁷ O Šalamun ačhaďa dešuduj (12) guverneren upral o kraji andre calo Izrael, save pes starinenas pal o chaben prekal o kralis the calo palacis. Dojekh lendar anelas andral peskero krajos jekhvar andro berš pre

calo čhon chaben andre le kraliskero palacis. ⁸ Kala hin lengere nava the kraja:

O Ben-Chur andro Efrajimike brehi;

⁹ o Ben-Deker andro Makac, Šaalbim, Bet-Šemeš, Elon the Bet-Chanan;

¹⁰ o Ben-Chesed andro Arubbot, Socho the cali phuv Chefer;

¹¹ o Ben-Abinadab andro Nafat-Dor – leskeri romñi sas e Tafat, le Šalamunoskeri čhaj;

¹² o Baanas, le Achiludoskero čhavo, andro fori Taanach the Megiddo the andre calo Bet-Šean, so hi-no paš e Caretan teleder le Jezreelostar, khatar o Bet-Šean dži ke Abel-Mechola the dži pal o Jok-meam;

¹³ o Ben-Geber andro foros Ramot-Gilead – sas les o gava le Jairoskere, le Menaššeskere, andro Gilead, mek the e phuv Argob andro Bašan – ode sas šovardeš (60) bare fori le murenca, pre save sas o bronzune brani;

¹⁴ o Achinadab, le Iddoskero čhavo, andro Machanajim;

¹⁵ o Achimaac andro Naftali – le Achimaacoske sas romñi e Basemat, le Šalamunoskeri čhaj;

¹⁶ o Baanas, le Chušajoskero čhavo, andro Ašer the Alot;

¹⁷ o Jošafat, le Paruachoskero čhavo, andro Jissachar;

¹⁸ o Šimej, le Elaskero čhavo, andre phuv Benjamin;

¹⁹ the o Geber, le Urihoskero čhavo, andre phuv Gilead, kaj sas o Amorejiko kralis o Sichon the o Bašaňiko kralis o Og.

Upral savore kraji sas jekh baro guverneris. ²⁰ O Judejci the o Izraeliti sas ajci but sar e poš i paš o moros. Sas lenge mištes, bo len sas, so te chal a te pijel.

Nadpis

5 O Šalamun kralinelas upral savore krališagi le paňestar Euftrat dži paš e Filištínengeri phuv a mek the paš e Egiptsko hraňica. On anenas le Šalamunoske o daňe a služinenas leske pal calo leskero dživipen.

² Le Šalamunoske džalal pro džives eňa toni sano aro the dešuochto (18) toni thulo aro, ³ deš thule gurumňa, biš (20) terne gurumňa, save pes pasinenas pre maľa, šel (100) bakre, mek the o jeleňa, o sarni the o avričalarde kachňa. ⁴ Vašoda, hoj sas kralis upral savore narodi pre zapadno sera le paňestar Euftrat, le Tif-sachostar dži andre Gaza, sas les smirom savore narodendar, save bešenat pašal leste. ⁵ Medik o Šalamun kralinelas, o manuša andre cali Judsko the Izrael – andral o Dan dži Beer-Šeba – dživenas bi e dar a dojekhes sas viňica the figovňikos.

⁶ Le Šalamun sas maštalňi prekal o 40 000 graja, save cirdeňas o verdana, the 12 000 murša pro graja.

⁷ Leskere guvernara pes starinenas pal o chaben prekal o kralis the calo palacis. Dojekh lendar anelas

andral peskero kraj os jekhvar andro berš chaben pre calo čhon andre le kraliskero palacis. On merkinenas pre oda, hoj len te el savoro, so kampil. ⁸ Avke dojekh guverneris anelas o kotor le jačmeňistar the phusendar ode, kaj kampelas, prekal o graja the džvirini, so cirdeňas.

Le Šalamunoskero godaveripen

⁹ O Del diňa le Šalamun godaveripen the prindžaripen andre savoreste, avke sar hin e poš i paš o moroskero brehos. ¹⁰ Leskero godaveripen sas bareder sar o godaveripen pal calo vichodos the savoro godaveripen andro Egipt. ¹¹ Sas godaveder sar savore manuša the sar o Ezrachitas o Etan the sar o čhave la Macholakere – o Heman, o Kalkol the o Dardas. Avke o hiros pal leste džalal maškar savore narodi, save ode sas. ¹² Sthoda 3 000 godaver vakeribena the 1 005 giľa. ¹³ Vakerelas pal o stromi – le libanoňike cedrostar dži ko izopos, so barol andral o muros. Vakerelas the pal o džvirini, pal ola, save pes cirdeňal pal e phuv, pal o čirikle the pal o ribi. ¹⁴ O manuša andral dojekh narodos avenas te šunel le Šalamunoskero godaveripen. Bičhade len o kraľa pal savore phuva, bo došunde pes pal leskero godaveripen.

O Šalamun pes pririchtinel te ačhavel o Chramos

¹⁵ Sar pes o kralis Chiram andral o Tir došunda, hoj le Šalamun pomakhle vaš o kralis pal leskero dad, bičhada ke leste peskere uradňiken, bo ov sas furt le Davidoskero prijatelis. ¹⁶ Paľis o Šalamun diňa te phenen le Chiramoske:

¹⁷ "Džanes, hoj miro dad o David našt i ačhada Chramos pre pačiv le RAJESKE peskere Devleske prekal o maribena le narodenca, save bešenat pašal leste, medik leske o RAJ len na thovela paš o pindre. ¹⁸ Ale akana o RAJ, miro Del, mange diňa smirom avre narodendar, save bešenat pašal mande, a imar man nane ňeprijatelis a na mušnav man lendar te daral. ¹⁹ Vašoda kamav te ačhavel o Chramos pre pačiv le RAJESKE, mire Devleske, avke sar o RAJ phenda mire dadeske le Davidoske: 'Tiro čhavo, saves thovava pro tronos pal tu, ačhavela o Chramos pre pačiv mire naveske.'

²⁰ Akana bičhav tire muršen, hoj mange te čhingen andro Libanon o cedroskere kašta. Mire murša kerena jekhete tire muršenca a me lenge počinava ajci, keci phenena. Se tu mištes džanes, hoj amare murša na džanen te kerel le kaštenca avke sar o Sidončana."

²¹ Sar o Chiram šunda le Šalamunoskere lava, radišagoha zvinčinda: "Mi el adadžives lašardo o RAJ, hoj diňa le David godavere čhas, hoj te lidžal kada baro narodos."

²² O Chiram diňa te phenel le Šalamunoske: "Šundom oda, so mange phende tire murša. Kerava sa oda, so mandar kames: Dava tut cedroskere the sosnakere kašta. ²³ Mire murša len anena khatar o Libanon dži ko moros. Ode o kašta sphandena ke

peste jekhetane a bičhavava len prekal o moros pre oda than, kaj kameha. Ode mire murša len rozphundravena a tumen peske len odarik šaj len. Ale tu palis doliker oda, so me kamav, hoj andro miro palacis dodavkereha o chabena."

²⁴ Avke o Chiram le Šalamunoske dodelas ajci cedroskere the sosnakere kašta, keci kamelas. ²⁵ O Šalamun delas le Chiram sako berš andre leskero palacis 2 000 toni žužodiv the 400 000 litri olivovo olejos.

²⁶ O RAJ požehñinda le Šalamun godaveripnaha, avke sar les diña lav. Sas andro smirom le Chiramoha a phandle maškar peste zmluva.

²⁷ Palis o Šalamun ispidelas andre buči pro Chramos 30 000 muršen andral calo Izrael. ²⁸ Ačhađa le Adoniram, hoj te lidžal o buča. Le muršen rozulađa andro trin partiji po 10 000 murša. Dojekh partija kerelas jekh čhon andro Libanon a palis sas duj čhon khere.

²⁹ Le Šalamun sas 80 000 murša, save čhingerenas o bara andro verchi, the 70 000 murša, save hordinenas o bara. ³⁰ Ačhađa upral lende 3 300 velitēfen, save len lidžanas andre buči. ³¹ Avke lenge phenda o Šalamun, hoj te čhingeren avri bare kvadri le lače barendar, hoj lendar te keren o zakladi pro Chramos. ³² Le Šalamunoskere murša, le Chiramoskere murša the o murša andral o Gebal čhingerenas a pririchtinenas o kašta the o bara prekal o Chramos.

O Šalamun ačhavel o Chramos

6 O Šalamun chudľa te ačhavel o Chramos le RAJESKE štar šel the ochtovardeš (480) berš pal oda, so o Izraeliti gele avri andral o Egipt, akor, sar kralinelas andro Izrael imar štarto berš, andro dujto čhon Ziv.

² O Chramos, so ačhavelas o Šalamun le RAJESKE, sas 27 metri džindardo, 9 metri buchlo the 13,5 metri učo. ³ E veranda anglo Chramos sas 4,5 metri džindardi a sas buchli 9 metri – ajci keci o Chramos. ⁴ Andro Chramos diña te kerel oblaki, so andral sas buchleder sar avral. ⁵ Paš o avrone muri pašal o trin seri le chramoskere ačhađa učo kher trine poschodenca a sas andre the aver khere. ⁶ O teluno poschodos sas buchlo 2,2 metri, o dujto sas buchlo 2,7 metri the o upruno 3,1 metri. Pašal le chramoskero muros mukľa avri schodos pro dojekh poschodos a thovelas o hredi pre ola schodi, hoj te keren e podlaha.

⁷ O bara sas imar pririchtimen andro lomos, a vašoda na šundolas o čokana, o dlati, añi ñisave trastune sersami, sar ačhavenas o Chramos.

⁸ O vudar le telune poschodoskero sas pre južno sera le chramoskeri. Odarik pes džalas upre le garadičenca andro maškaruno the upruno poschodos. ⁹ Sar dokerđa o Chramos, kerđa e strecha le hranolendar the le deskendar, so sas le cedrostar. ¹⁰ O trin poschodi pašal o chramoskere muri sas dojekh uče 2,2 metri a sas spojimen le Chramoha le cedroskere hranolencas.

¹¹ Akor o RAJ prevakerđa ko Šalamun: ¹² "Te džal pal oda Chramos, so ačhaves, te dolikereha savore mire zakoni the prikazañja a te likereha tut pal mire lava,

me dolikerava tuke miro lav, so phendom tire dadeske le Davidoske. ¹³ Bešava maškar o Izraeliti a me mire Izraelike manušen na omukava."

O Chramos hino dokerdo

¹⁴ Kavke dokerđa o Šalamun e buči pro Chramos. ¹⁵ O androne fali sas obthode le cedroskere deskenca la phuvatar dži ko stropos a e phuv sas kerđi le sosnakere kaštestar. ¹⁶ Kerđa prička le cedroskere kaštestar 9 metri le palune murostar andro Chramos a avke pal e prička sas o Neksentneder Than. ¹⁷ O baro than anglo Neksentneder Than sas 18 metri džindardo. ¹⁸ O Chramos sas andral obthodo le cedroskere kašteha, so sas avrirandlo le prajtenca the le kvitkenca. Savore obthode le cedroskere kašteha avke, hoj na dičholas ñisavo bar.

¹⁹ Andro Chramos sas paluno than, kaj thođa le RAJESKERI Zmluvakeri Archa. ²⁰ Oda Neksentneder chramoskero than sas 9 metri džindardo, 9 metri buchlo the 9 metri učo a sas obthodo le žuže somnakaha. The o oltaris sas obthodo le cedroskere kašteha. ²¹ O Šalamun obrakinda andral o Chramos le žuže somnakaha. Anglo Neksentneder Than, so diña te obcirdel le somnakaha, figinda o pochtan le somnakune lancenca. ²² Obthođa calo Chramos andral le somnakaha; avke the o oltaris andro Sentno Than.

²³ Andro Neksentneder Than kerđa le olivakere kaštestar duje cheruben †, save sas uče 4,4 metri. ^{24,25} O cherubi dičhonas avri jednakones a sas jednakones uče the džindarde. Le cherubengere kridli sas džindarde 2,2 metri a merinenas 4,4 metri, sar sas rozcirdle. ²⁶ Soduj cherubi sas uče 4,4 metri. ²⁷ Thođa len paš peste maškar o Neksentneder Than a lengere kridli sas rozcirdle avke, hoj o kridlos jekhe cheruboskero pes chudelas jekha falatar a o kridlos dujtoneskero pes chudelas la avra falatar. Lengere aver kridli pes chudenas maškaral. ²⁸ Le cheruben obthođa le somnakaha.

²⁹ Pal savore fali andro paluno than the angluno than le chramoskero diña te randel avri o cherubi, o palmi the o kvitki. ³⁰ The e phuv pro soduj thana le chramoskere obthođa le somnakaha.

³¹ Diña te kerel vudar le olivakere kaštestar andro Neksentneder Than. O prahos the e zarubña sas kerde avke, hoj sas pandž zarubñi jekh andre aver. ³² Pro soduj kridli le vudareskere sas avrirandle o cherubi, o palmi the o kvitki. O vudar, o cherubi the o palmi obthođa le somnakaha. ³³ O zarubñi pro angluno vudar andro Chramos kerđa le olivove kaštestar a o zarubñi sas zathode štarval jekh andre aver. ³⁴ O vudar sas le sosnakere kaštestar a delas pes te sthovel, bo sas štar vudareskere kridli, duj pre dojekh sera.

³⁵ Randľa pre lende avri o cherubi, o palmi the o kvitki a oda obthođa le igen sane somnakaha.

³⁶ Palis ačhađa o muri pašal e andruñi dvora le barune kvadrendar the le cedroskere kaštestar. Pre dojekh trito baruno šoros thođa o cedroskere hranoli.

† Abo: añjelen

³⁷ Andro čhon Ziv, sar kralinelas o Šalamun štarto berš, sas dokerde o chramoskere zakladi. ³⁸ Dešujekhtho (11.) berš andro ochtoto čhon † sas dokerdo o Chramos; savoro ipen avke sar kamelas o kralis. O Šalamun ačhavelas o Chramos efa berš.

O Šalamun ačhavel peskere palaca

7 O Šalamun ačhavelas the peskero palacis a keralas les dešutrin (13) berš, medik les na dokerda. ²³ Ačhađa bari hala, so pes vičinelas Libanoňiko Vešeskero Kher. Sas 44 metri džindardo, 22 metri buchlo a 13,5 metri učo. Le cedrostar ačhađa trin šori slupi po dešupandž (15). Sas jekhetane 45 slupi, so likerenas le cedroskere hredi. O stropos upral o hredi sas le cedroskere kaštetar. ⁴ Pro soduj avruno muri sas po trin šori oblaki. ⁵ Anglal sas trin vudara pre dojekh fala. Pro vudara the oblaki sas o štareagorengere rami.

⁶ O Šalamun ačhađa the le Slupengeri Hala, so sas 22 metri džindardi the 13,5 metri buchli. Anglal sas kerdi e slupengeri veranda.

⁷ Ačhađa the e hala, kaj sas o tronos a so pes vičinelas Sudcengeri Hala. Sas obthodi le cedroskere kaštetar la phuvatar dži ko stropos.

⁸ O palacis, andre savo bešelas o Šalamun, sas pre aver dvora pal e hala a sas ačhado avke sar the odi Sudcengeri Hala. Ačhađa ajso palacis the prekal le Faraonoskeri čhaj, sava peske iľa romňake.

⁹ Savore palaca, o hali the e bari dvora sas ačhade le nekfeder barune kvadrendar le zakladostar dži e strecha. O bara sas mištes oprikerde la pilaha angluňa the paluňa seratar. ¹⁰ O zakladi sas le dragane bare barendar, so merinenas 4 metri the 3,5 metri. ¹¹ Upral lende sas bara, so sas mištes oprikerde, the o kašta le cedrostar. ¹² O muri pašal e palaciskeri dvora sas ačhade trine šorendar le barune kvadrendar a pre lende sas jekh šoros le cedroskere hranolendar, avke sar sas ačhadi e andruňi dvora the e hala andre le RA-JESKERO Chramos.

Pal o Chiram

¹³ O Šalamun diňa te vičinel le Chiram andral o Tir. ¹⁴ Ov sas o čhavo la vdovakero andral o kmeňos Naftali a leskero dad, savo sas andral o Tir, kerelas le bronzoha. O Chiram sas igen godaver a džanelas te kerel savoro le bronzostar. Ov avľa ko Šalamun a chudľa te kerel savore buča, so lestar kamelas.

O bronzune slupi

¹⁵ Ov kerda le bronzostar duj slupi, so sas uče vaj 8 metri. O obvodos jekhe sluposkero sas 5,3 metri. ¹⁶ Mek kerda pro agor le slupenge o bronzune kriti, so sas uče 2,2 metri. ¹⁷ O kriti upral o slupi sas šukares obthode le prephandle lancenca. Pre dojekh slupos sas efa lanci. ¹⁸ Kerda duj šori granatoskere phaba le bronzostar pašal o prephandle lanci, so zagaruvenas

o kritos upral o slupos. Kavke kerda the pro dujto slupos.

¹⁹ O sluposkere kriti sas kerde le bronzostar sar o kvitki ľalije, so sas uče 1,8 metros. ²⁰ Pro soduj kriti, so sas thode pro slupi, sas duj šel (200) phaba a sas rozthode andro duj šori pašal lende.

²¹ O Chiram diňa te ačhavel o slupi angle angluňi dvora le chramoskeri. Oleske pro juhos diňa nav Jachin a dujtoneske pro severos Boaz. ²² O upruno agor le slupengero dičholas avri sar o ľalije. Avke sas e buči pro slupi dokerdi.

E igen bari nadrža

²³ O Chiram kerda le bronzostar igen bari okruhlo nadrža. Le jekhe agostar ke aver merinda 4,4 metri, sas uči 2,2 metri a lakero obvodos sas 13,2 metri.

²⁴ Pašal o agor sas kerde šukar bronzune ruži andro duj šori – po deš ruži pro 44 centimetri. O ruži sas kerde jekhetane la nadobaha le bronzostar.

²⁵ E nadoba sas thodi pro dešuduj (12) bronzune biki. Trin biki dikhenas pro severos, trin pro zapados, trin pro juhos a trin pro vichodos. E nadrža ačhelas pre lende a lengere buľa sas maškaral. ²⁶ E sera pre nadrža sas thuli 7,5 centimetri a lakero agor dičholas avri sar e phundrađi ľalija. Rešľolas andre 40 000 ľitri paňi.

O bronzune verdanora

²⁷ Mek kerda deš bronzune verdanora. Dojekh verdanoro sas džindardo 1,8 metros, buchlo 1,8 metros the učo 1,3 metros. ²⁸ O verdanoro sas kerdo avke: Kerde rami a andro rami thode o bronzune bľachi.

²⁹ Pre ola bľachi the pro rami sas avrirandle o ľevi, o biki the o cherubi. Upral the telal o ľevi the biki sas figimen o bronzune venci.

³⁰ Pre dojekh verdanoro sas bronzune kereki the tički. Pre leskere štar rohi sas o rameni, so likerenas e nadoba. O rameni sas obthode le bronzune vencenca. ³¹ Upral o verdanoro tel e nadoba sas okruhlo ramos, so avelas avri upral le verdanorestar 45 centimetri a džalas tele 22 centimetri. A pašal leste sas avrirandle o šukar veci. O bľachi sas hranate a na okruhle.

³² Tel o verdanoreskere bľachi sas štar kereki, so sas 66 centimetri uče, a lengere tički sas prichudle pro verdanoro. ³³ Sas kerde avke sar o kereki pro verdana andro mariben. O tički, o rafiki, o špici the o ložiska sas kerde le bronzostar.

³⁴ Pro rohi sas štar ručki, so sas kerde jekhe kotorestar le verdanoreha. ³⁵ Upral o verdanoro sas obruba uči 22 centimetri a tel o verdanoro sas rameni, so likerenas savoro. O rameni, o bľachi the o verdanoro sas jekhe kotorestar. ³⁶ Pro bľachi the rameni kerda všadzik cherubi, ľevi, palmi a pašal savoro o venci. ³⁷ Avke kerda deš jednake verdanora, so sas jednakones džindarde the bare.

³⁸ Kerda the deš nadobi le bronzostar – jekh pre dojekh verdanoro. Dojekh nadoba sas buchli 1,8 metros

† Oda hin: O čhon Bul.

a rešfolas andre 800 litri pañi. ³⁹ Pandž verdanora thođa pre južno sera a pandž pre severno sera le chramoskeri. E igen bari nadržža thođa pre vichodno sera.

Savore veci, so kerđa

⁴⁰ O Chiram palis kerđa lavora, lopati the čarore. Avke dokerđa e buči, so kerelas prekal o Šalamun pre le RAJESKERO Chramos. ⁴¹ Kerđa:

o duj slupi;
o kriti le bronzostar, so thođa pro upruno agor le slupenge a sas šukares obthode le prethode lancen-
ca;
⁴² 400 granatoskere phaba le bronzostar, so sas thode pro duj prehandle lanci;
⁴³ deš verdanora the deš nadobi, so sas pre ola verdanora;
⁴⁴ e igen bari nadržža a tel late dešuduj biken;
⁴⁵ o pira, o lopati the o čarore. Savore ola veci, so kerđa le Šalamunoske prekal le RAJESKERO Chramos, sas kerde le blištáce bronzostar.

⁴⁶ O Šalamun oda diña te kerel andro čhikakere formi maškar o gava Sukkot the Caretan pašal o Jordan.

⁴⁷ Savore veci sas ajci but, hoj o Šalamun o bronzos añi na diña te važinel.

⁴⁸ O Šalamun diña te kerel andre le RAJESKERO Chramos the aver sersamos:

o somnakuno oltaris;
o somnakuno skamind, pre savo pes thovelas o maro;
⁴⁹ o deš somnakune momel'ara – pandž ačhenas pre čači (pravo) sera a pandž pre ba'ogñi (l'avo) sera anglo Neksentneder Than;
o somnakune kvitki, o lampi, o silava;
⁵⁰ o čare, o čhurora, o kuča the o lopatki, so sas tiš kerde le somnakastar.
The o somnakune čopi pro vudara andro Chramos.

⁵¹ Sar o Šalamun dokerđa savori buči pre le RAJESKERO Chramos, and'a ode o sentne veci peskere dadeskere le Davidoskere: o rup, o somnakaj the aver veci a thođa len andre le chramoskere skladi.

E Archa le RAJESKERI lidžan andro Chramos

8 Akor o Šalamun zvičind'a ke peste andro Jeruzalem savore Izraelike vodcen le dojekhe kmeňostar the fajtatar, hoj te anen e Archa le RAJESKERI andral o Foros le Davidoskero – andral o Sion – andro Chramos. ² Savore murša andral o Izrael pes zgele ko kralis Šalamun, sar sas o inepos andro eftato čhon Etanim.

³ Sar avle savore vodci andral o Izrael, o rašaja hazdle le RAJESKERI Archa upre ⁴ a preligende la; o rašaja the o Leviti lidžanas o Sentno Stanos the savore sentne veci, so sas andro Stanos. ⁵ O Šalamun the savore Izraelike manuša, save pes ode zgele, obetinas

angle Archa ajci but bakren the gurumñen, hoj pes añi na delas te zgenel.

⁶ O rašaja ligende e RAJESKERI Zmluvakeri Archa pro paluno than andro Chramos, pro Neksentneder Than a thode la tel o cherubengere kridli. ⁷ Lengere kridli sas rozcircdle upral o than, kaj e Archa sas thođi, a garude la the o družki, savenca lidžanas e Archa. ⁸ O družki sas ajse džindarde, hoj lengere agora dičholas andral o Sentno Than, ale avral len na dičholas. Ode hine dži adadžives. ⁹ Andre Archa sas ča o duj barune tabli, pre save sas pisimen o deš prikazañja, so ode thođa o Mojžiš akor, sar o RAJ phandla e zmluva le Izraelitenca pro verchos Choreb †, sar avle avri andral o Egipt.

¹⁰ Sar o rašaja avenas avri andral o Sentno Than, e chmara zaučharda o Chramos le RAJESKERO ¹¹ a o rašaja našti dureder kerenas e služba prekal e chmara, bo le RAJESKERI slava pherarda oda than. ¹² Akor phend'a o Šalamun: "O RAJ phend'a, hoj bešela andre ka'li chmara. ¹³ Ale me akana prekal tu ačhadom šukar Chramos, o than, kaj šaj aves pro furt."

O Šalamun vakerel ko manuša

¹⁴ Medik savore Izraeliti ode ačhenas, o kralis pes visarda ke lende a požehñinda len. ¹⁵ Phend'a lenge:

"Mi el lašardo o RAJ, o Del le Izraeloskero, bo ov dolikerđa o lav a peskere vastenca kerđa oda, so phend'a mire dadeske le Davidoske: ¹⁶ 'Ole dživesestar, sar ilom mire manušen le Izraeliten avri andral o Egipt, andre ñisavo Izraeliko kmeňos na kidňom mange avri foros, kaj mange te keren o Chramos, andre savo ulahas lašardo miro nav, ale kidňom mange avri le David, hoj te el upral mire Izraelike manuša.'

¹⁷ Imar mire dadeske le Davidoske sas andro jilo, hoj te ačhavel o Chramos, hoj o manuša te lašaren le RAJES, le Izraeloskere Devles. ¹⁸ Ale o RAJ mire dadeske le Davidoske phend'a: 'Mištes, hoj tuke sas andro jilo te ačhavel o Chramos prekal miro nav, ¹⁹ ča oda Chramos na ačhaveha tu, ale korkoro tiro čhavo, savo ela tutar. Ov mange ačhavela o Chramos prekal miro nav.'

²⁰ O RAJ oda, so phend'a, the kerđa a ačhilom kralis pal miro dad o David a bešlom pro Izraeliko tronos, avke sar phend'a o RAJ. Ačhadom the o Chramos prekal o nav le RAJESKERO – prekal le Izraeloskero Del. ²¹ Pririchtindom ode than prekal e Archa, andre savi hiñi le RAJESKERI zmluva, so phandla amare dadenca akor, sar len ila avri andral o Egipt."

Le Šalamunoskeri modlitba

²² Palis anglo manuša, save pes zgele, o Šalamun ačhelas anglo le RAJESKERO oltaris, hazdña o vasta ko ñebos ²³ a phend'a:

"RAJEJA, Devla le Izraeloskero! Nane aver Del, sar sal tu, añi pro ñebos, añi pre phuv. Tu dolikeres e zmluva a sal lačhejileskero ke peskere služobñika, save džan pal tu cale jileha. ²⁴ Tu dolikerdal tiro lav, avke sar

† Abo: Sinaj

phendal mire dadeske le Davidoske. Tire vastenca kerdal, so le mujeha phendal, a adadžives oda hin avke.

²⁵ Ale akana, RAJEJA, Devla le Izraeloskero, doliker oda lav, so diňal tire služobňikos le David, mire dades, akor sar leske phendal: 'Furt ela vareko leskere potomkendar pro Izraeliko tronos, ale ča akor, te man mištes šunena tire čhave avke sar tu.' ²⁶ Vašoda, Devla le Izraeloskero, mangav tut, mi ačhel pes avke, sar phendal mire dadeske le Davidoske.

²⁷ Či so, šaj o Del bešel pre phuv? Se aňi o űebos, aňi o nekučeder űebos leske nane dos a na mek kada Chramos, so ačhađom! ²⁸ Mangav tut, RAJEJA, Devla miro, šun avri e modlĭtba tire služobňikoskeri, mangav vaš o jileskeriben! Ker avke, sar tutar mangav adadžives. ²⁹ Mi dikhen tire jakha rat a dživos pre kada Chramos, pal savo phendal, hoj ode ela tiro nav lašardo. Šun avri e modlĭtba tire služobňikoskeri, te pes visarel a modlĭnel ke kada than. ³⁰ Mangav tut, šun o mangipen tire služobňikoskero the tire Izraelike manušengero akor, sar ena visarde ke kada than a modlĭnena pes. Šun len avri andral o űebos, kaj bešes, a odmuk lenge.

³¹ Te varesavo manuš kerela binos pre peskero pašutno a ov pre leste ispidela, hoj te džal andro Chramos, hoj te lel vera anglo tiro oltaris, ³² tu oda šun andral o űebos a rozsuzin maškar lende. Oles, ko ela vinovato, mar avke, sar peske zasogalĭnel (zaslužinel). Vaš o čačipnaskero zaačh tut a de les tiš avke, sar peske zasogalĭnel.

³³ Sar o űeprijateľa űerinenena (zvitazinena) upral tire Izraelike manuša, bo kerde binos, ale te palĭs pes visarena ke tute, lašarena tiro nav, modlĭnena pes a mangena tut andre kada Chramos, ³⁴ šun len avri andral o űebos. Odmuk tire manušenge o bini a an len pale andre phuv, so diňal lengere dadenge.

³⁵ Sar tu zaačhaveha o brišind vašoda, hoj tire manuša kerde binos, ale te visarena pes le binostar, bo pokorindal len a te dikhena ke oda than a lašarena tiro nav, ³⁶ šun len avri andral o űebos. Odmuk o bini tire Izraelike manušenge, tire služobňikenge, sikav len, sar te džal pal tiro drom a de o brišind andre tiri phuv, so diňal sar đedĭctvos tire manušenge.

³⁷ Te ela andre phuv bokh the e plaga, abo te o ulĭpen pro malĭ kirňola, abo te ela pro malĭ o grajora the o kirme, abo te o űeprijateľa džana pre lengere fori, abo te ela o pharipen vaj o nasvalĭben, ³⁸ šun dojekh modlĭtba the o mangipen vaš o jileskeriben. Te pes chocko andral tiro narodos ke tu mangela, abo te nacirdela peskere vasta ke kada Chramos, ³⁹ šun oda andral o űebos, odmuk a pomožin lenge. Počin dojekheske pal savoro, so kerel, se tu korkoro džanes o jile savore manušengere, ⁴⁰ avke, hoj pes tutar te daran pal calo časos, medik dživena andre kadi phuv, so diňal amare dadenge.

⁴¹ Te o cudzincos, savo nane andral o Izrael, avlahas dural andral aver phuv prekal tiro nav ⁴² – bo the aver narodi pes dodžanena pal tiro baro nav, pal tiri zor the

pal savoro, so kerdal – a kade modlĭndahas pes ke kada Chramos, ⁴³ šun avri andral o űebos, kaj bešes lengero mangipen a ker lenge avke, sar tutar mangena, hoj savore narodi pre phuv tut te sprindžaren a te daran tutar avke sar tire Izraelike manuša. Palĭs the on džanena, hoj kada Chramos, so ačhađom, hino prekal tiro nav.

⁴⁴ Te džana tire murša le dromeha, saveha len bičhaveha pro mariben pre peskere űeprijateľa, a te visarena pes ke tiro avrikidlo foros the ko Chramos, so ačhađom pre pačiv tire naveske, a te pes mangena ke tu, RAJEJA, ⁴⁵ šun avri lengere modlĭtbi the o mangipen andral o űebos a de lenge o űerindĭpen (vitaztvo).

⁴⁶ Te tire manuša angle tu kerena o binos, bo dojekh manuš hino binošno, a tu pre lende aveha choľamen a domukeha lengere űeprijateľenge, hoj te űerinenen upral lende, a on len palĭs odlĭgenena sar zaphandlen andre peskeri phuv – čĭ pašes abo dur – ⁴⁷ a te andre odi phuv, kaj sas odlĭgende, peske pridžanena, hoj kerde binos, a te pes visarena ke tu a te mangena tut vaš o jileskeriben a phenena: 'Kerđam binos a sam vinovate. Kerđam nalačhipen,' ⁴⁸ a te pes visarena cale peskere jileha the dušaha a mangena tut andre odi phuv, kaj hine zaphandle, sar ena visarde ke peskeri phuv, so diňal lengere dadenge, the ko avrikidlo foros the ko Chramos, so ačhađom prekal tiro nav, ⁴⁹ šun avri andral o űebos, kaj bešes, lengere modlĭtbi the mangipen a zaačh tut vaš lenge. ⁵⁰ Odmuk lenge savore bini a savoro nalačhipen, so kerde tuke, a de, hoj lengere űeprijateľa te en ke lende lačhejleskere. ⁵¹ Se on hine tire manuša, tiro đedĭctvos, saven iľal avri andral o Egipt – andral o trastuno bov.

⁵² Dikh pro mangipen tire služobňikoske a šun o modlĭtbi the tire Izraelike manušengere, sar ke tu vičĭnena, hoj lenge te pomožines. ⁵³ Se tu peske len kidňal avri vaš peskero đedĭctvos andral savore narodi pre phuv, avke sar phendal prekal tiro služobňikos Mojžiš, sar odlĭgendal amare daden andral o Egipt, ó, RAJEJA, Devla!"

O Šalamun žehňinel le manušen

⁵⁴ Sar o Šalamun mangelas a modlĭnelas pes ko RAJ, sas pro khoča anglo oltaris a hazdelas upre o vasta ko űebos. Sar preačĭlĭa, uštilĭa ⁵⁵ a požehňinda zorale hangoha savore Izraelike manušen. Phendā:

⁵⁶ "Mi el lašardo o RAJ, savo diňa o smirom peskere manušen le Izraeliten, avke sar oda phendā. Dolikerđa dojekh lav, so diňa prekal peskero služobňikos o Mojžiš. ⁵⁷ Mi ačhel o RAJ, amaro Del, amenca, avke sar sas amare dadenca. Te na omukel amen a te na odčĭhivel amen pestar het. ⁵⁸ O RAJ mi visarel amare jile ke peste, hoj te dživas avke, sar ov kamel, a te dolĭkeras savore leskere lava, prikazaňja the zakoni, so diňa amare daden. ⁵⁹ Kala lava, savenca man mangavas anglo RAJ, mi en pašes paš miro RAJ, o Del, dživese the rači. Mi zaačhel vaš peskero služobňikos the vaš peskere Izraelike manuša sako džives. ⁶⁰ Palĭs dojekh narodos pre phuv džanela, hoj ča o RAJ hino Del a

nane aver. ⁶¹ Odden pes le RAJESKE, amare Devleske, cale tumare jileha a dolikeren leskere zakoni the o prikazaŋja avke sar adadžives."

⁶² Palis o kralis the savore manuša andral o Izrael ande obeti le RAJESKE. ⁶³ O Šalamun obetinda le RAJESKE 22 000 gurumŋen the 120 000 bakren sar o smiromskere obeti. Avke o Šalamun the savore manuša sentŋarde o Chramos le RAJESKERO. ⁶⁴ Vašoda, hoj o bronzuno oltaris sas cikno prekal ola savore obeti, o kralis oda džives sentŋarda the o maškaruno than pre dvora anglo le RAJESKERO Chramos a the ode kerenas o labarde obeti, chabeneskere obeti the o žiros pre smiromskere obeti.

⁶⁵ Andre oda časos o Šalamun the savore Izraeliti kerde paš o Chramos anglo RAJ, amaro Del, o Inepos le Stankengero, so likerelas eŋta džives. Avle ode igen but manuša khatar o Lebo-Chamat pal o severos dži paš o paŋi Egipt pro juhos. ⁶⁶ O Šalamun pro ochtoto džives bičhađa le manušen khere. On savore les chudle te ašarel a dojekh lendar džalas khere bare radišagoha vaš savoro lačhipen, so o RAJ presikađa peskere služobŋikoske le Davidoske the le Izraelitenge, leskere manušenge.

O RAJ pes pale sikavel le Šalamunoske

9 Sar o Šalamun dokerđa le RAJESKERO Chramos, peskero palacis a savoro, so kamla te kerel, ² sikada pes leske o RAJ dujtovar andro suno avke sar anglo andro Gibeon. ³ O RAJ leske phendā:

"Šundom avri tiri modlitba the o mangipen, sar pes mangehas ke mande. Me sentŋardom kada Chramos, so ačhaďal, hoj ode miro nav te el barardo pro furt. Mire jakha the miro jilo ode ena pro furt.

⁴ Te tu phireha angle ma pačivalones the žuže jileha avke sar tiro dad o David a te dolikereha mire zakoni the prikazaŋja a te kereha savoro, so tuke phendom, ⁵ me dolikerava o lav, so phendom tire dadeske le Davidoske: Leskero tronos ela furt zoralo upral o Izrael a furt ela vareko andral leskero potomstvos pro tronos.

⁶ Ale te pes mandar odvisareha tu the tire čhave a na dolikerena mire zakoni the o prikazaŋja, so tumen diňom, ale džana te služinel avre devlenge a lašarena len, ⁷ akor me khosava tele mire manušen le Izraeliten pal kadi phuv, so len diňom. O Chramos, so sentŋardom prekal miro nav, odčhivava mandar a palis o Izrael ela dojekh narodoske pro pheras the pro asaben. ⁸ A kale Chramostar na ačhela nič, ča o bara, a dojekh, ko odarik predžala, ela sar kašt a phenela: 'Soske kada o RAJ kerđa kala phuvake the Chramoske?' ⁹ Odphenela pes lenge: 'Bo omukle le RAJES, peskere Devles, savo iľa avri lengere daden andral o Egipt. Chudle te bandol a te lašarel avre devlen, a vašoda o RAJ pre lende domukla kadi bibach.' "

O Šalamun pes dothovel le Chiramoha

¹⁰ O Šalamun ačhavelas o Chramos le RAJESKE the o palacis biš berš (20) ¹¹ a o kralis Chiram andral o Tir do-delas le Šalamunoske cedroskere the sosnakere kašta a o somnakaj ajci, keci kamelas. Palis o Šalamun les diňa biš fori andre Galileja. ¹² O Chiram avla andral o Tir te predikhel ola fori, so les diňa o Šalamun, ale leske na sas pre dzeka. ¹³ Avke phendā le Šalamunoske: "Phrala miro, oda save fori man diňal?" Palis ole forenge diňa nav Kabul a kavke dži adadžives pes vičinel odi phuv. ¹⁴ Ale o Chiram the avke bičhađa le Šalamunoske 4 000 kili somnakaj.

¹⁵ O Šalamun ispidelas pro manuša, hoj te keren e buči sar otroka pro Chramos le RAJESKERO the pre leskero palacis, pre terasa pašal o foros the pro muri pašal o Jeruzalem, Chacor, Megiddo the Gezer. ¹⁶ O Faraonos, o Egiptsko kralis, geľa pro mariben andro foros Gezer, domardā les a zlabardā avri. Murdardā le Kanaančanen the ole manušen, save ode bešenas, a palis o foros diňa peskera čhake, le Šalamunoskera romňake. ¹⁷ Palis o Šalamun pale ačhađa o foros Gezer, teluno foros Bet-Choron, ¹⁸ Baalat, Tamar pre Judsko pušta ¹⁹ the savore fori, kaj sas odthodo o chaben, mek the o fori prekal o maribnaskere verdana the graja. A ačhade savoro, so kamelas andro Jeruzalem, andro Libanon the andre cali phuv, kaj sas kralis.

²⁰⁻²¹ O Šalamun ispidelas andre buči savore Amorejen, Chetitanen, Perizejen, Chivijen the Jebusejen, save ačhile andre odi phuv a saven anglo na murdarde avri. Lengere potomki mušinas te kerel sar otroka – a oda dži adadžives. ²² O Šalamun le Izraelitendar na kerelas otroken, bo on leske služinas sar slugađa, uradŋika, velitelā the velitelā upral o verdana the upral o murša pro graja. ²³ O Šalamun ačhađa upral o buča 550 velitelēn, save sas upral o buča, so kerenas o manuša.

²⁴ Sar leskeri romŋi, le Faraonoskeri čhaj, odgeľa upre andral o Foros le Davidoskero, hoj te bešel andre peskero palacis, so lake ačhađa o Šalamun, ov chudla te kerel e terasa pašal o foros.

²⁵ O Šalamun anelas andro berš trival o labarde the o smiromskere obeti pro oltaris, so ačhađa le RAJESKE, a labarelas anglal leste o kadidlos. A avke dokerđa o Chramos.

²⁶ O Šalamun mek kerđa o lodi andro Ecjon-Geber, so hino paš o Elat, paš o brehos le Lole Moroskero andro Edom. ²⁷ O Chiram bičhađa peskere služobŋiken, save mištes prindžarenas o moros, hoj te služinen le Šalamunoskere muršenca pro lodi. ²⁸ On džanas la lodaha andre phuv Ofir a odarik ande 14 000 kili somnakaj le Šalamunoske.

E krafovna andral e Šeba avel ko Šalamun

10 Sar pes došundā e krafovna andral e Šeba pal le Šalamunoskeri slava, avla ke leste a phučkerelas lestar phare veci, hoj les te probalinel (skušinel). ² Avla

andro Jeruzalem igen but manušenca the le tavenca, pre save anelas voňava oleja, igen but somnakaj the o dragane bara. Sar doavla ko Šalamun, vakerelas leha pal savoro, so la sas pro jilo. ³ O Šalamun lake odphenelas pre savoro, so lestar phučelas. Prekal leste na sas nič ajso pharo, hoj te na odphenel lake. ⁴ E kralovna andral e Šeba dikhla, savo baro godaveripen hin le Šalamun, the savo palacis ačhađa ⁵ the o chabena pre leskero skamind. Dikhla, sar bešenas pašal leste leskere služobnika a sar pes likerenas leskere sluhi the čašnika. Dikhla the lengero uraviben the o labarde obeti, so anelas andro RAJESKERO Chramos. Sar oda savoro dikhla, ačhila bijal peste a na džanelas, so pre oda te phenel.

⁶ Phenda le Šalamunoske: "Čačipen hin, so me šundom andre miri phuv pal tute the pal tiro godaveripen. ⁷ Ale me oleske na pačavas, medik na avlom a na dikhlom pre mire jakha. No, so me dikhav, olestar mange na phende aňi jepaš! Tiro godaveripen the barvalipen hino bareder, sar me pal oda šundom. ⁸ Bachtale hine tire murša the tire služobnika, save furt pašal tu keren a šunen tiro godaveripen! ⁹ Mi el barardo o RAJ, tiro Del, savo peske tut zakamla avke, hoj tut thođa pro Izraeliko tronos. Bo o RAJ kamel o Izrael pro furt, ačhađa tut vaš o kralis, hoj te likereres o zakonos the o spravodlišagos."

¹⁰ Palis oj diňa le Šalamun buter sar 4 000 kili somnakaj a igen but voňava oleja the dragane bara. Šoha (ňikda) buter pes imar ode na anda ajci but voňava oleja, keci anda e kralovna andral e Šeba le Šalamunoske.

¹¹ (The le Chiramoskere lodí anenas o somnakaj andral o Ofir the igen but algumoskere kašta the o dragane bara. ¹² Ole kaštendar o Šalamun kerđa o slupi andro Chramos the peskero palacis a mek diňa te kerel o citari the o harfi prekal o lavutara. Ajci but kašta pes imar dži adadžives ode buter na ande.)

¹³ O Šalamun diňa la kralovna andral e Šeba o dari, so pes delas le kralenge, a paš oda the mek savoro, so oj kamelas. Palis oj the savore lakere služobnika gele pale andre peskeri phuv.

Le Šalamunoskero barvalipen

¹⁴ Le Šalamunoske anenas sako berš vaj 23 toni somnakaj, ¹⁵ a mek ke oda the o daňe, so počinenas savore Izraelike krajengere guvernera, o kraľa andral e Arabija the o manuša, save bikenkeren.

¹⁶ O Šalamun kerđa duj šel (200) štiti le somnakastar. Pre jekh štitos leske kampelas vaj efa kili somnakaj.

¹⁷ Palis mek kerđa trin šel (300) cikneder štiti le somnakastar. Pre jekh štitos leske kampelas vaj duj kili somnakaj. Avke o Šalamun len thođa andro palacis, so pes vičinelas Libanoňiko Veš.

¹⁸ Palis o kralis kerđa igen baro tronos, so sas obthodo la slonovinaha the le žuže somnakaha. ¹⁹ E paluňi sera, kaj oprinelas o šero, sas okruhli a pal soduj seri le tronostar, kaj oprinelas o vasta, ačhenas duj levi. Anglo tronos sas šov garadiči ²⁰ a pro garadiči ačhenas

pal o soduj seri levi – jekhetane dešuduj (12) levi. Ajso tronos na sas űikhaj andre űisavo krališagos. ²¹ Savore kuča, andral save pijelas o Šalamun, sas kerde le somnakastar a savore veci andro palacis, so pes vičinelas Libanoňiko Veš, sas kerde le žuže somnakastar. Nič na sas kerdo le rupostar, bo andre oda časos o rup prekal lende na sas dragano. ²² Le Šalamun sas but lodí pro moros. Sako trin berš len bičhavelas pro moros le Chiramoskere lodenca, hoj te doanen o somnakaj, o rup, e slonovina, opicen the paven.

²³ O Šalamun sas barvaleder the godaveder sar dojekh kralis pre phuv. ²⁴ O manuša andral dojekh narodos kamenas te šunel o godaveripen, so les diňa o Del. ²⁵ Berš pre beršeste sako, ko avelas ke leste, anelas leske daros: rupune abo somnakune veci, gada, veci pro mariben, voňava oleja, grajen the mulicen.

²⁶ Palis o Šalamun diňa te anel peske verdana the grajen. Avke les sas 1 400 verdana pro mariben a 12 000 graja. Rozačhađa o verdana andro aver fori the paš peste andro Jeruzalem. ²⁷ O kralis kerđa, hoj te el o rup ajci sar o bara a o kašta le cedrostar ajci sar o dzive figovňiki pro Judske brehi. ²⁸ O graja prekal o Šalamun pes anelas andral o Egipt the andral o Kuj †. Le kraliskere murša len cinenas khatar o Kuj. ²⁹ Andral o Egipt pes cinelas o verdan pro mariben vaš šov šel (600) rupune the o graj vaš šel the penda (150) rupune. Avke on odarik anenas grajen the verdana prekal savore Chetitanengere the Aramejike kraľa.

O Šalamun lašarel avre devlen

11 O kralis o Šalamun kamelas but džuvlijen andral aver narodi: le Faraonoskera čha, Moabčanken, Ammončanken, Edomčanken, Sidončanken the Chetitanen. ² On sas ole narodendar, pal save o RAJ le Izraelitenge phenda: "Našti peske len romňijen andral aver narodi, aňi on andral tumaro narodos. Šaj el, hoj on tumen mandar odcirdena, hoj te lašaren lengere devlen." Ale o Šalamun len the avke kamelas. ³ Sas les efa šel (700) rajikane romňija the trin šel (300) romňija-služki. On les odcirdle le Devlestar. ⁴ Sar o Šalamun sphurila, leskere romňija les scirdle pal aver devla a ov imar na sas ajso pačivalo le RAJESKE, peskere Devleske, sar sas leskero dad o David. ⁵ Ov lašarelas la Aštarta, savi sas del andro Sidon, the le Molech ††, savo sas igen džungalo del andro Ammon. ⁶ Aleha o Šalamun kerelas nalačhipen anglo RAJ a ov na sas calo oddino le Devleske avke sar leskero dad o David.

⁷ Akor pro verchos pre vichodno sera le Jeruzalemostar o Šalamun ačhađa oltaris prekal o Kemoš, savo sas o džungalo del le Moabčanengero, the prekal o Molech, savo sas džungalo del le Ammončanengero.

⁸ Kavke kerđa oltara the prekal savore peskere romňija andral aver narodi, save peskere devlengere anenas o voňava the aver obeti.

⁹⁻¹⁰ Choc o RAJ, o Del le Izraeloskero, pes le Šalamunoske sikađa duvar andro suno a phenda leske, hoj te na lašarel avre devlen, ov the avke le RAJES na

† Oda hin e Cilicija. †† Abo: o Milkom

šundā, ale odvisardā pes lestar. Aleha o RAJ sas chofa-men pro Šalamun. ¹¹ Vašoda o RAJ phendā le Šalamunoske: "Te ada kerdāl a na dolikerdāl miri zmluva the o zakonos, so tut diňom, čačes lava tutar o krališagos a dava jekhe tire služobňikoske. ¹² Ale prekal tiro dad David oda na kerava, medik tu dživeha, ale odlava oda tire čhastar, ¹³ no aňi lestar na odlava calo krališagos. Jekh kmeňos mukava tire čhaske, ča vaš miro služobňikos David the vaš o Jeruzalem, so mange avri kidňom."

Pal o Hadad

¹⁴ O RAJ kerđā upre le Edomčanos Hadad, savo sas andral le kralengeri famelija, hoj te el le Šalamunoskero űeprijatělís. ¹⁵⁻¹⁶ Akor, sar o David űnerinda (zvitazinda) upral o Edom, o Joab, leskero velítělís upral o slugađā, geľa te parunel olen, save mule. O Joab savore Izraelitenca ačhiľa andro Edom šov čhon, medik na murdarđā savore ole muršen. ¹⁷ Ča o Hadad, savo sas mek čhavoro, the varesave peskere dadeskere služobňikendar andral o Edom, denašle andro Egipt. ¹⁸ Odgele khatar o Midijan, a sar avle andro Paran, ile odarik muršen a gele andro Egipt ko Faraonos. Ov les diňa kher, chaben the maľa. ¹⁹ Vašoda, hoj o Hadad sas le Faraonoske pre dzeka, diňa leske the la Tachpeneskera pheňa romňake – e Tachpenes sas le Faraonoskeri romňi. ²⁰ Palís lake uliľa muršoro o Genubat. E kralovna les barardā avri andro palacis maškar o kralískere čhave.

²¹ Sar pes o Hadad andro Egipt došundā, hoj muľa o David the o Joab, savo sas velítělís upral slugađā, phendā le kralíske: "Domuk, hoj te džav pale andre miri phuv."

²² "Soske?" phučľa lestar o Faraonos. "Chibalinel tuke vareso ade, hoj jekhvareste kames te džal pale andre tiri phuv?"

"Na," odphendā leske o Hadad, "ale the avke man muk te džal khere."

Pal o Rezon

²³ O Del kerđā upre le Rezon, le Eljadasoskere čhas, hoj te el le Šalamunoskero űeprijatělís. O Rezon denašľa peskere rajestar le Hadad-Ezerostar, savo sas kralís andre Coba. ²⁴ O Rezon vičinda ke peste zbu-jňiken, saven liđžalas. Sar len o David murdarkerelas, o Rezon the leskere murša gele andro Damaskus a ode ačhiľa kralís. ²⁵ Avke o Rezon sas kralís andro Aram †. Sas űeprijatělís le Izraeloske medik dživelas o Šalamun a kerelas lenge o nalačhipen, avke sar the o Hadad.

O RAJ del lav le Jeroboam

²⁶ The o Jeroboam, savo sas služobňikos le Šalamunoske, pes vzburiňā pro Šalamun. Ov sas le Nebatoskero čhavo, Efraťanos andral e Cereda, a leskeri daj sas e vdova Ceruja. ²⁷ Oda pes ačhiľa, sar o Šalamun kerđā o Millo a oprikerđā o foroskere muri.

† Abo: Sirija

²⁸ O Jeroboam sas zoralo murš. Sar o Šalamun dikhľa ole terne muršes, sar kerel peskeri buči, ačhađa les upral o murša andral o kmeňi Efrajim the Menašše, hoj len te liđžal andre buči.

²⁹ Andre jekh džives, sar o Jeroboam džalas het andral o Jeruzalem, arakhľa pes pre maľa le Achijoha, savo sas o prorokos andral o Šilo. Na sas ode űiko, ča on duj džene. Pro Achijah sas urdo nevo plaštós. ³⁰ Chudľa oda plaštós a rozčhingerđā les pro dešuduj (12) kotora. ³¹ A le Jeroboamoske phendā: "Le tuke deš kotora, bo kavke phenel o RAJ, o Del le Izraeloskero: 'Odlava o krališagos le Šalamunostar a tuke dava deš kmeňi.

³² Andral savore Izraelike kmeňi leske ačhela ča jekh kmeňos a oda prekal miro služobňikos David the prekal o foros Jeruzalem, so mange kidňom avri.

³³ Kerava oda vašoda, bo o Šalamun man omukľa a chudľa te lašarel le Sidonike devles, la Aštarta, le Moabike devles Kemoš the le Ammonike devles Molech a na phirelas pal mire droma, na kerelas oda, so kamav, a na dolikerelas miro zakonos the mire lava avke sar leskero dad o David. ³⁴ Calo krališagos lestar na odlava, ale likerava les paš e zor, medik ov dživela a oda prekal miro služobňikos David, saves mange avri kidňom a savo dolikerelas mire prikazaňja the lava.

³⁵ Ale leskere čhastar odlava o krališagos le deše kmeňenca a dava len tuke. ³⁶ Le Šalamunoskere čhaske mukava ča jekh kmeňos, avke ela man furt vareko le Davidoskere čhavendar, save mange služine-na andro foros Jeruzalem, andro foros, so mange avri kidňom, hoj ode te avav lašardo. ³⁷ Ale tut Jeroboam ačhavava kralíske upral o Izrael. Aveha kralís všadzík, kaj ča kameha. ³⁸ Te šuneha savoro, so tuke phenava, te phireha pal mire droma, te kereha oda, so ela lačo angle mire jakha, te dolikereha mire prikazaňja the lava avke sar miro služobňikos o David, me kerava, hoj furt vareko tira famelijatar liđžala o Izrael, avke sar vareko la Davidoskera famelijatar furt liđžal e Judsko. ³⁹ Vaš le Šalamunoskero binos marava le Davidoskere čhaven, ale na pro furt.' "

⁴⁰ Vašoda o Šalamun kamelas te murdarel le Jeroboam, ale o Jeroboam denašľa andro Egipt ko kralís Šišak. Ode sas, medik o Šalamun na muľa.

Le Šalamunoskero meriben

⁴¹ Aver veci, so o Šalamun kerđā, the savoro leskero godaveripen hin pisimen andro zvitki le Šalamunoskere. ⁴² O Šalamun kralinelas andral o Jeruzalem pal calo Izrael saranda (40) berš. ⁴³ Sar muľa o Šalamun, parunde les andro foros le Davidoskero, leskere dadeskero. Pal leste ačhiľa kralís leskero čhavo o Rechabeam.

Deš kmeňi pes vzburiňen pro Rechabeam

12 O Rechabeam geľa andro Šichem, bo ode avle savore Izraeliti, hoj les te ačhaven vaš o kralís. ² Sar pes pal oda došundā o Jeroboam, le Nebatoskero čhavo – ov sas andro Egipt, bo ode denašľa anglo Šala-

mun – mek ode užarelas. ³ Ale o Izraelike vodci bičhade vaš leste. Avke o Jeroboam savore Izraelitencavle ko Rechabeam a phende leske: ⁴ “Tiro dad o Šalamun pre amende thođa pharo jarmo, ale tu akana ker lokeder e phari buči the o jarmo, so pre amende thođa tiro dad, a amen tuke služinaha.”

⁵ “Džan a aven ke ma pal o trin džives a phenava tumenge,” odphenda lenge o kralis Rechabeam. Avke gele het.

⁶ Palis o Rechabeam phučkerelas le phuredere vodcendar, save služinenas angloda leskere dadeske le Šalamunoske: “So majinav te odphenel le manušenge?”

⁷ On leske odphende: “Te aveha lačno ke kala manuša a kereha lenge avke, sar tutar mangel, on tuke furt služinena pačivalones.”

⁸ Ale o Rechabeam na priiła lengeru vakeriben, ale phučelas le terne muršendar, save jekhetane leha baronas a denas les godi. ⁹ Phučła lendar: “So majinav te phenel le manušenge, save man mangel, hoj lendar te odlav o jarmo, so pre lende thođa miro dad?”

¹⁰ O terne murša leske odphende: “Le manušenge, save ke tu avle a phende, hoj tiro dad pre lende thođa pharo jarmo, a kamen, hoj tu lenge oda te keres lokeder, phen kavke: ‘Man hin thuleder o cikno anguš, sar mire dades sas o tēlos. ¹¹ Miro dad pre tumende thođa pharo jarmo, ale me tumenge mek kerava phareder! Miro dad tumen marelas le cikne bičoha, ale me tumen marava le bare bičoha †!’ ”

¹² Pro trito džives avla o Jeroboam savore manušenca ko Rechabeam, avke sar lenge phenda o kralis: “Aven ke ma pal o trito džives.” ¹³ O kralis lenge zorales odphenda a na priiła le phuredere vodcengeru lav.

¹⁴ Vakerelas lenca avke, sar leske phende o terne murša: “Miro dad pre tumende thođa pharo jarmo, ale me tumenge kerava mek phareder! Miro dad tumen marelas le bičoha, ale me pal tumende cirdava tele e cipa!” ¹⁵ Avke o Rechabeam na priačhiła pre oda, so kamenas o manuša. Kada kerđa o Del, hoj pes avke te ačhel, sar phenda o RAJ le Jeroboamoske prekal o Šilončanos Achijah.

¹⁶ Sar savore Izraeliti dikhle, hoj o kralis o Rechabeam len na šunđa, phende leske:

“Nane amen nič le Davidoha!

So amen hin le Izajoskere čhaha?

Andre peskere stani, Izrael!

Akana David, starin tut pal peskero kher!”

Avke savore Izraeliti gele khere ¹⁷ a o Rechabeam kralinelas ča upral o Izraeliti, save bešenas andro Judske fori.

¹⁸ Palis o kralis o Rechabeam bičhađa ko Izraeliti le Adoram, savo sas upral e buča, ale savore Izraeliti les murdarde le barenca. Sar pes pal oda šunđa o Rechabeam, sigo bešła pro verdan a denašła odarik andro Jeruzalem. ¹⁹ Avke pes calo Izrael vzburiđa pre le Davidoskeri famelija a oda likerel džiči adadžives.

²⁰ Sar pes o manuša andral o Izrael došunde, hoj o Jeroboam pes visardā andral o Egipt, bičhade pal leste. Avke pes zgele a ačhade les vaš o kralis upral calo Izrael. Ča o kmeños le Judaskero zaačhiła vaš le Davidoskeri famelija.

²¹ Sar o Rechabeam avla andro Jeruzalem, diňa te zvičinel andral o kmeños Juda the Benjamin 180 000 avrikidle slugaden andro mariben pro Izrael, hoj leske te visaren pale o krališagos. ²² Akor o Del prevakerđa ko Šemajah, ko Devleskero murš: ²³ “Dža a phen le Šalamunoskere čhaske le Rechabemoske, le Judske kraliske, a le manušenge andre Judsko the Benjamin, ²⁴ hoj o RAJ kavke vakerel: ‘Ma džan pro mariben pre tumare phrala, pro Izraeliti. Savore džan khere, bo me kada kerdom.’ ” On šunde le RAJESKERO lav a savore gele khere.

O Jeroboam oddžal le RAJESTAR

²⁵ Palis o Jeroboam ačhađa o foros Šichem andre Efrajimiko brehengeri phuv a ode ačhiła te bešel. Palis odarik geła a ačhađa o foros Penuel. ²⁶ Ale o Jeroboam phenda peske: “Akana pes šaj visarel o krališagos pale le Davidoskera famelijake. ²⁷ Te kala manuša gelehas a obetindehas o obeti andre le RAJESKERO Chramos andro Jeruzalem, ulehas pale pačivale peskere rajeske le Rechabemoske, le Judske kraliske. Palis man murdardehas a visardehas pes pale ke leste.”

²⁸ Avke o kralis Jeroboam kerđa duj somnakune gurumňoren a phenda le manušenge: “Dos phirenas andro Jeruzalem! Izrael, kade hin tumare devla, save tut ligende avri andral o Egipt.” ²⁹ Jekh thođa andro Betel a dujto andro Dan. ³⁰ Kada, so kerđa, anelas le manušen pro binos, bo on džanas džiči andro Dan te lašarel jekh somnakuňa gurumňa.

³¹ O Jeroboam ačhađa the thana, kaj lašarenas le modlen, a andre rašajiko služba thođa chočsave manušen, save na sas andral o kmeños Levi. ³² Andro ohtoto čhon, andro dešupandžto (15.) džives, diňa inepos prekal o Izraeliti, ajso, sar sas the andre Judsko a pro oltaris obetinelas o labarde obeti. Avke oda kerđa andro Betel a obetinda le gurumňorenge, so kerđa. Palis andro Betel ačhađa rašajen, save služinenas pre ole thana, kaj lašarenas le modlen. ³³ Avke andro ohtoto čhon pro dešupandžto džives pro inepos, so diňa avri korkoro pestar, geła ko oltaris, so ode ačhađa a kerđa ode e voňavo obeta.

O prorokos prorokinel pal o oltaris

13 Ipen akor, sar o Jeroboam kamelas te kerel e obeta, avla khatar e Judsko andro Betel le RAJESKERO prorokos. ² O prorokos phenda andre le RAJESKERO nav: “Oltarina, oltarina! Kavke phenel o RAJ: ‘Le Davidoskera famelijake uřola muršoro a dena leske nav Joziaš. Ov pre tu obetinelu le modlengere rašajen, save akana pre kada oltaris keren o voňava obeti. Zlabarela pre oda oltaris the le manušengere kokala!’ ”

³ A mek andre oda džives o prorokos diňa znađeňe.

† E Hebrejiko čhib: Me tumen marava le škorpionenca!

Phendá: "Kada ela o znameñje, hoj o RAJ vakerelas prekal ma: O oltaris pharola pro duj kotora a o prachos andral leste perela avri."

⁴ Sar o kralis Jeroboam šundá, so phendá o prorokos pro oltaris, so hino andro Betel, sikada pre leste le vasteha a phendá: "Chuden les!" A sar ada phendá, leskero vast takoj ačhiła něvladno a našti les imar cirdña pale ke peste. ⁵ Androda pes o oltaris pharada pro duj kotora a o prachos andral leste peła avri, avke sar phendá o prorokos andre le RAJESKERO nav.

⁶ O Jeroboam phendá le prorokoske: "Mangav tut, modlin tut vaš ma ko RAJ, ke peskero Del, hoj mange te sastarel avri o vast." Avke pes o prorokos mangelas ko RAJ a leskero vast sastila avri a sas ajso sar angloda.

⁷ Palis o Jeroboam phendá le prorokoske: "Av manca andre miro kher, chaha varesavo chaben a dava tut the daros."

⁸ O prorokos leske odphendá: "Choc te man diňalas jepaš tire barvalipnastar, na geľomas tuha, na chalomas o maro, aňi paňi na piľomas pre kada than. ⁹ Bo o RAJ mange phendá: 'Našti chas o maro, aňi paňi našti pijes a aňi ole dromeha pes našti pale visares.'" ¹⁰ Avke o prorokos odarik geľa avre dromeha a na oleha, saveha avľa andro Betel.

O phuro prorokos andral o Betel

¹¹ Andro Betel bešelas jekh phuro prorokos. Leskere čhave avle ke leste a phende leske savoro, so kerđa le Devleskero prorokos andre oda džives andro Betel, the oda, so phendá le kraliske le Jeroboamoske. Sar leske oda savoro phende, ¹² ov lendar phučľa: "Save dromeha geľa?" Leskere čhave leske sikade, save dromeha džalas o prorokos andral e Judsko. ¹³ Palis phendá peskere čhavage: "Thoven o sedlos pro somaris!" Sar leske thode, ov bešľa pre leste ¹⁴ a geľa pal le Devleskero prorokos. Arakhľa les te bešel tel o dubos a phučľa lestar: "Tu sal oda prorokos le Devleskero, savo avľa andral e Judsko?"

"He, me som!" ov odphendá.

¹⁵ "Av manca khere, hoj te chas vareso," phendá leske o phuro prorokos andral o Betel.

¹⁶ Ale o prorokos odphendá: "Našti man tuha visarav pale a pre kada than našti chav tuha o maro, aňi o paňi našti pijav, ¹⁷ bo o RAJ mange phendá: 'Na chaha ode o maro, aňi na pijeha o paňi a na džaha ole dromeha, saveha avľal.'" "

¹⁸ Palis o phuro prorokos leske phendá: "The me som prorokos avke sar the tu a le RAJESKERO aňjelos mange phendá: 'Dža a an les pale andre peskero kher, hoj te chal ode o maro a te pijel o paňi.'" Kavke leske klaminelas. ¹⁹ Androda le Devleskero prorokos geľa leha andre leskero kher a chaľa ode o maro a piľa o paňi.

²⁰ Sar bešenas pašal o skamind, o RAJ prevakerđa ko phuro prorokos, savo les andá pale andre peskero kher. ²¹ Zvičinda pre le Devleskero prorokos, savo avľa andral e Judsko, a phendá leske: "Kavke vakerel o RAJ: 'Vašoda, hoj man na šundal a na dolikerďal miro lav, so

tuke phendom, ²² ale geľal a chaľal ode o maro a piľal o paňi, na aveha parundo andre tire dadengero hrobos.'" "

²³ Sar le Devleskero prorokos chaľa a piľa, o phuro prorokos pririchtinda leske le somaris pro drom.

²⁴ Avke, sar odarik le Devleskero prorokos odgeľa, arakhľa pes le ľevoha pro drom. O ľevos pre leste chučila a murdarđa les. Palis o somaris the o ľevos ačhenas paš leskero ľelos, so pašľolas pro drom.

²⁵ Ipen akor odarik džanas varesave murša a dikhle o ľelos pre phuv the le ľevos te ačhel paš leste. Gele andro Betel, kaj bešelas o phuro prorokos, a savoro oda rozvakerde.

²⁶ Sar pal oda šundá o phuro prorokos phendá: "Kada hino oda prorokos, savo na šundá o lava le RAJESKERE! Avke o RAJ bičhadá le ľevos pre leste, hoj les te murdarel, a o ľevos kerđa avke, sar phendá o RAJ."

²⁷ Palis phendá peskere čhavage: "Pririchtinen mange le somaris pro drom." Avke sar on oda kerde, ²⁸ ov geľa a arakhľa le prorokoskero ľelos te pašľol pre phuv. O somaris the o ľevos ačhenas paš o ľelos. O ľevos na chaľa o ľelos aňi le somaris. ²⁹ O phuro prorokos hazdña leskero ľelos, thođa pre peskero somaris a odligenda les pale andro Betel, hoj te rovel pre leste a te parunel. ³⁰ Parunda les andre peskero hrobos a rovelas pal leste: "Ach, phrala miro!"

³¹ Paloda, sar les parunda, phendá peskere čhavage: "Sar merava, thoven man andre oda hrobos, kaj pašľol kada prorokos, hoj mire kokala te en paš leskere. ³² Čačes pes ačhela oda, so vakerelas kada prorokos andre le RAJESKERO nav pro oltaris andro Betel the pre savore thana andre Samarija, kaj služine nas avre devlence."

³³ Aňi pal kada, so pes ačhiľa, pes o Jeroboam na odvisarđa pal peskero nalačo drom, ale dureder ačhavelas andre rašajiko služba pro uče thana chocsaven muršen. ³⁴ Aleha o Jeroboam andá peskera famelija andro binos, a vašoda mušinde te el savore zničimen a khosle tele pal kadi phuv.

Le Jeroboamoskero čhavo merel

14 Andre oda časos nasvalila le Jeroboamoskero čhavo o Abijah. ² O Jeroboam phendá peskera romňake: "Preuri tut andre aver gada, hoj tut te na sprindžaren, hoj sal miri romňi. Dža andro Šilo, kaj hino o prorokos o Achijah, bo ov mange phendá, hoj ačhava kralis andro Izrael. ³ Le peha deš mare, varesave bokela the džbanos le medoha a dža ke leste. Ov tuke phenela, so ela le čhavoreha." ⁴ Oj kerđa avke, sar lake phendá, a geľa andro Šilo ko Achijah.

Ov imar na dikhelas mištes, bo sas maj koro a igen phuro. ⁵ Ale o RAJ phendá le Achijoske: "Le Jeroboamoskeri romňi ipen akana avel ade, hoj te phučel pes pal peskero čhavo, bo hino igen nasvalo, ale oj kerela pestar, hoj hiňi vareko aver. Tu lake pheneha kavke the kavke."

⁶ Palis, sar o Achijah šundá lakero phiriben, hoj imar hiňi paš o vudar, phendá lake: "Av andre. Me džanav,

hoj tu sal le Jeroboamoskeri romñi. Soske pestar keres, hoj sal vareko aver? Nalačo hiros tuke phenava. ⁷ Dža a phen le Jeroboamoske, hoj o RAJ, o Del le Izraeloskero, leske kavke phenel: 'Kidňom mange tut avri le manušendar a ačhadom tut, hoj te lidžas mire manušen le Izraeliten. ⁸ Odiľom o krališagos le Davidoskera famelijatar a diňom tuke. Ale tu na likerehas tut avke, sar miro služobňikos o David, savo dolikerehas mire prikazaňja a savo džalas pal ma cale peskere jileha a kerelas ča oda, so lestar kamavas. ⁹ Ale tu pes likerehas goreder sar savore kraľa, save sas angle tute. Le dumeha tut odvisardal mandar a kerďal peske avre devlen the modlen le somnakastar ča vašoda, hoj man lenca te choľares. ¹⁰ Vašoda anav pre tiri famelija e bibach. Murdarava dojekhe tire muršes andro Izrael, savore otroken the slobodnen. Zňičinava tira famelija, avke sar o šmeci hine zlabarde. ¹¹ Te vareko tira famelijatar merela andro foros, chana len o rikone a olen, save merena pre maľa, chana o čirikle. Avke phenda o RAJ.'

¹² O Achijah mek lake phenda: "Akana dža pale khere. Sar dodžaha andro foros, tiro čhavoro merela. ¹³ Savore manuša andral o Izrael pal leste rovena a parunena les. Ča ov andral le Jeroboamoskeri famelija ela parundo avke, sar kampil, bo ča andre leste o RAJ, o Del le Izraeloskero, arakhľa vareso lačo. ¹⁴ O RAJ ačhavela kralis andro Izrael, savo murdarela avri le Jeroboamoskera famelija a oda mek adadžives! He, imar akana! ¹⁵ O RAJ razinela le Izraeloha, avke sar e balvaj čhalavel la trstinakera pacaha andro paňi. Ov le Izraeliten cirdela avri andral kadi lači phuv, so diňa lengere dadenge a rozčhivela len pal o baro paňi Eufrat, bo kerde slupi la modlake Ašera, savenca rozchoľarde le RAJES. ¹⁶ O RAJ omukela le Izraeliten, bo o Jeroboam kerďa binos a the le manušen anda andro binos."

¹⁷ Avke le Jeroboamoskeri romñi pes visardä pale khere andro foros Tirca. Soča geľa prekal o vudar andro kher, o čhavoro muľa. ¹⁸ O Izraeliti rovenas pal leste a parunde les, avke sar phenda o RAJ prekal peskero služobňikos o prorokos Achijah.

Le Jeroboamoskero meriben

¹⁹ Savore aver veci, so o Jeroboam kerďa, leskere maribena a sar lidžalas o krališagos, hin pisimen andro Zvitkos le Izraelike Kralengero. ²⁰ O Jeroboam lidžal o krališagos bišuduj (22) berš. Ov muľa a sas parundo. Pal leste ačhiľa kralis leskero čhavo o Nadab.

O Rechabeam ačhel kralis andre Judsko

²¹ Le Šalamunoskero čhavo o Rechabeam ačhiľa kralis andre Judsko, sar sas leske saranda the jekh (41) berš. Kralinelas dešuefta (17) berš andro foros Jeruzalem, andro foros, so peske kidňa avri o RAJ maškar savore Izraelike fori, hoj ode les te lašaren. Le Rechabeamoskeri daj pes vičinelas Naama a sas Ammončanka.

²² O manuša andral o kmeňos Juda kerenas buter binos anglo RAJ sar savore lengere phure dada a aleha pre peste anenas buter le RAJESKERI cholí, ²³ bo the on ačhavenas thana pro lašariben, o sentne slupi the o slupi la modlake Ašera; a oda pre dojekh učo than the paš dojekh baro stromos. ²⁴ Ale nekgoreder sas, hoj pre ola thana, kaj lašarenas peskere devlen, o murša the o džuvľa služinenas sar lubňa. Kerenas savore nalače the džungale veci, so kerenas o narodi, saven o RAJ tradľa avri anglal o Izraeliti.

²⁵ Sar o Rechabeam kralinelas pandž berš, geľa o Egipťsko kralis o Šišak pro Jeruzalem pro mariben. ²⁶ Iľa andral le RAJESKERO Chramos the andral o palacis savore dragane veci the o somnakune štiti, so diňa te kerel o Šalamun. ²⁷ Palis o Rechabeam pre lengero than diňa te kerel o štiti le bronzostar a diňa le veliteľenge upral o stražňika, save merkinenas paš o palaciskero vudar. ²⁸ Kecivar džalas o kralis andre le RAJESKERO Chramos, o stražňika lenas o štiti a džanas leha, a palis len thovenas andro kher, kaj sovenas o stražňika.

²⁹ Savore aver veci, so kerďa o Rechabeam, hin pisimen andro Zvitkos le Judske Kralengero. ³⁰ Maškar o Rechabeam the Jeroboam sas furt o maribena. ³¹ O Rechabeam muľa a sas parumen andro Foros le Davidoskero. Leskeri daj e Naama sas andral o Ammon. Pal o Rechabeam ačhiľa kralis leskero čhavo Abijam.

O Abijam kralis andre Judsko

15 Andro dešuochtoto (18.) berš, sar kralinelas le Nebatoskero čhavo o Jeroboam andro Izrael, o Abijam ačhiľa kralis upral e Judsko. ² Ov lidžalas o krališagos andro Jeruzalem trin berš. Leskeri daj sas Maacha, e čhaj le Abišalomoskeri.

³ Ov kerelas ajse bini sar angle leste leskero dad. Leskero jilo na sas oddino le RAJESKE, peskere Devleske, avke sar leskero prapapus o David. ⁴ Ale ča prekal o David o RAJ, leskero Del, chraňinelas o Jeruzalem a diňa ode o svetlos oleha, hoj ačhadä leskere čhas sar kralis. ⁵ O RAJ ada kerďa, bo o David kerelas savore, so sas le RAJESKE pre dzeka. Medik ov dživelas andre savoreste les šunelas, ča na andre oda, so kerďa le Urijašoha, le Chetitoha †.

⁶ O maribena maškar o Rechabeam the o Jeroboam sas furt, medik dživenas. ⁷ O mariben le Jeroboamoha likerelas dureder the akor, sar sas kralis o Abijam. Savore aver veci, so kerďa o Abijam, hin pisimen andro Zvitkos le Judske Kralengero. ⁸ Sar o Abijam muľa, parunde les andro Foros le Davidoskero. Pal leste ačhiľa kralis leskero čhavo o Asa.

O Asa kralis andre Judsko

⁹ Sar kralinelas o Jeroboam bišto (20) berš upral o Izrael, andre Judsko ačhiľa kralis o Asa. ¹⁰ Ov kralinelas andro Jeruzalem saranda the jekh (41) berš. Leskeri baba sas e Maacha, le Abišalomoskeri čhaj.

¹¹ O Asa kerelas savoro, so sas le RAJESKE pre dzeka avke sar leskero prapapus o David. ¹² Ov andral odi phuv tradla avri savore muršen the le džuvlijen, save služinenas paš o oltara sar lubňa. Zničinda savore modlen, so kerde anglođa leskere phure dada. ¹³ The peskera baba la kralovna Maacha čidča tele pal o tronos, bo kerča la modlake Ašera slupos. O Asa les činda tele a labarča andre dolina Kidron. ¹⁴ O Asa sas cale jileha oddino le RAJESKE pal calo peskero dživipen, choc na zničinda savore thana, kaj lašarenas le modlen. ¹⁵ Preligendča andre le RAJESKERO Chramos o dari, so leskero dad the ov sentňarde: o rup, somnakaj the o sersamos prekal o Chramos.

¹⁶ O maribena maškar o Asa the o Izraeliko kralis Baaša sas furt, medik dživenas. ¹⁷ Andre jekh džives o Baaša geľa pro mariben pre Judsko. O foros Rama zoraľarča, hoj ňiko le manušendar pes te na dochudel avri aňi andre Judsko.

¹⁸ Avke o Asa iľa savoro rup the somnakaj, so ačhiľa andre le RAJESKERO Chramos the palacis, a bičhađa peskere služobňikenca andro Damaskus ko Aramejiko kralis Ben-Hadad. Ov sas le Tabrimmonoskero čhavo a leskero papus sas o Chezijon. Diňa leske te phenel kale lava: ¹⁹ "Maškar amende mi el phandli e zmluva, avke sar anglođa sas maškar amare dada. Kada rup the somnakaj tuke bičhavav sar daros. Mangav tut, oddža la zmluvatar, so phandľal le kraliľa Baašaha, hoj te oddžal het peskere slugadenca andral miri phuv!"

²⁰ O Ben-Hadad kerča avke, sar leske phendča o Asa, a bičhađa peskere veliteľen pro Izraelike fori. Domarča o Ijon, Dan, o foros Abel-Bet-Maacha the o phuva Galileja † the Naftali. ²¹ Sar pes pal oda šundča o Baaša, zaačhađa o buča pre Rama a visarča pes pale andre Tirca, hoj ode te bešel. ²² O kralis Asa prikazinda savore manušenge andre Judsko, hoj te odligenen andral e Rama o bara the o kašta, savenca o Baaša ačhavelas o foros. Palis o Asa ačhađa oleha o foros Geba andro Benjamin the o foros Micpa.

²³ Savore aver veci, so kerča o kralis Asa the leskere ňerindipena (vitaztva), the sar zoraľarča o fori, hin pisimen andro Zvitkos le Judske Kralengero. Ale ov andro phuripen nasvaliľa pro pindre. ²⁴ O Asa muľa a parunde les andro Foros le Davidoskero. Pal leste ačhiľa kralis leskero čhavo o Jošafat.

O Nadab kralis andro Izrael

²⁵ Sar kralinelas o Asa dujto berš andre Judsko, le Jeroboamoskero čhavo o Nadab ačhiľa kralis upral o Izrael a lidžalas len duj berš. ²⁶ Ale o Nadab kerelas oda, so na sas le RAJESKE pre dzeka, avke sar the leskero dad, savo lidžalas le Izrael andro binos.

²⁷ Palis o Baaša, o čhavo le Achijoskero andral o kmeňos Jissachar, pes vzburinda pro Nadab. Murdarča les akor, sar o Izraelike slugađa sas rozačhade pašal le Filištinenkero foros Gibbeton. ²⁸ Sar kralinelas o Asa andre Judsko trito berš, o Baaša murdarča le Nadab a ačhiľa pal leste kralis andro Izrael. ²⁹ Sar ačhiľa kraliske,

murdarča caľa Jeroboamoskera famelija a na mukľa ňikas te dživel, avke sar o RAJ phendča prekal peskero prorokos Achijah andral o Šilo. ³⁰ Oda pes ačhiľa vašoda, bo o Jeroboam kerelas o bini a the le manušen andral o Izrael lidžalas andre oda. Kaleha kerča choľi le RAJESKE, le Izraelike Devleske.

³¹ Savore aver veci, so kerča o Nadab, hin pisimen andro Zvitkos le Izraelike Kralengero. ³² Medik dživelas o Baaša the o Asa, sas maškar lende furt o maribena.

O Baaša kralis andro Izrael

³³ O Baaša, le Achijoskero čhavo, ačhiľa upral calo Izrael kralis andre Tirca a kralinelas bišuštar (24) berš. Oda pes ačhiľa andro trito berš, sar kralinelas o Judsko kralis Asa. ³⁴ O Baaša kerelas oda, so na sas le RAJESKE pre dzeka, avke sar anglođa o Jeroboam, savo lidžalas le Izraeliten andro bini.

16 Akor o RAJ prevakerča ko prorokos Jehu, savo sas o čhavo le Chananiskero, hoj te džal te phenel le Baašaske: ² "Me tut hazdňom upre andral o prachos a ačhadom tut vodcaske upral mire manuša andro Izrael. Ale tu pes likerehas sar the o Jeroboam a ligendal mire manušen andro binos, hoj man aleha te choľaren. ³ Vašoda akana zničinava le Baaša the leskera famelija avke, sar oda kerdom le Jeroboamoha, le Nebatoskere čhaha, the leskera famelijaha. ⁴ Te vareko le Baašaskera famelijatar merela andro foros, chana les o rikone, a te merela vareko pre maľa, chana les o čirikle."

⁵ Savore aver veci, so kerča o Baaša, the leskere ňerindipena (vitaztva), hin pisimen andro Zvitkos le Izraelike Kralengero. ⁶ Palis o Baaša muľa a parunde les andre Tirca. Pal leste ačhiľa kralis leskero čhavo o Elah.

⁷ O RAJ prevakerča prekal o prorokos Jehu ko Baaša the ke leskeri famelija, bo kerelas binos anglo RAJ. Peskere binenca the oleha, hoj murdarča le Jeroboamoskera famelija, pre peste anelas le RAJESKERI choľi.

O Elah kralis upral o Izrael

⁸ Andro bišušovto (26) berš, sar kralinelas o Asa andre Judsko, ačhiľa kralis upral o Izrael o Elah, le Baašaskero čhavo. Ov kralinelas andre Tirca duj berš. ⁹ Ale pre leste pes ačhađa leskero služobňikos o Zimri, savo sas veliteľis upral o jepaš leskere maribnaskere verdana. Andre jekh džives o Elah mulatinelas a mačiľa andre Tirca andro kher le Arcasoskero, savo sas upral o palacis andre Tirca. ¹⁰ Akor avľa o Zimri a murdarča les. Ačhiľa pes oda andro bišueftato (27) berš, sar kralinelas andre Judsko o Asa. Avke pal o Elah ačhiľa kralis o Zimri.

¹¹ Palis, sar bešľa pre leskero tronos, diňa te murdarel savoren andral le Baašaskeri fajta a na mukľa te dživel aňi jekhe muršes andral leskeri famelija the prijaťeľa. ¹² Avke o Zimri murdarkerča avri caľa Baašaskera famelija avke, sar o RAJ phendča le Baašaske prekal o prorokos Jehu, ¹³ bo o Baaša the o

† E Hebrejiko čhib: calo Kinneret

Elah kerenas o bini a lašarenas avre devlen a the le Izraeliten lidžanas andro binos. Aleha pre peste ande e choľi le RAJESKERI.

¹⁴ Savore aver veci, so kerđa o Elah, hin pisimen andro Zvitkos le Izraelike Kral'engero.

O Zimri kralis upral o Izrael

¹⁵ Andro bišueftato (27) berš, sar kralinelas o Judsko kralis Asa, ačhiľa kralis upral o Izrael o Zimri andre Tirca pro efta džives. Akor o slugađa andral o Izrael pes rozačhade pašal o Filištíniko foros Gibbeton. ¹⁶ Sar pes o Izraeliti došunde andro taboris, hoj o Zimri pes vzburiđa pro kralis a murdarđa les, ačhade mek oda džives le Omri vaš o kralis upral calo Izrael, savo sas velitelis upral o slugađa andro taboris. ¹⁷ Palis o Omri the calo Izrael omukle o foros Gibbeton a gele pes te rozačhavel pro mariben pašal o foros Tirca. ¹⁸ Sar o Zimri dikhľa, hoj o foros sas zailo, geľa andro nekzoraleder kher andro palacis, podlabarđa les a muľa. ¹⁹ Kada pes leske ačhiľa vaš peskere bini, bo the ov kerelas oda, so na sas le RAJESKE pre dzeka. Ov kerelas ola bini avke sar o Jeroboam a mek ke oda lidžalas le Izraeliten andro binos.

²⁰ Savore aver veci, so o Zimri kerđa, the oda, sar pes vzburiđa, hin pisimen andro Zvitkos le Izraelike Kral'engero.

²¹ Akor o Izraeliti pes rozulade pro duj partiji, bo varesave kamenas, hoj te el kralis o Tibni, o čhavo le Ginatoskero, ale dujto partija kamenas le Omri. ²² Ale o manuša, save ačhenas paš o Omri, sas zoraleder a ňerinde (zvitázinde) upral le Tibnioskere manuša. Avke o Tibni muľa a o Omri ačhiľa kralis.

O Omri kralis upral o Izrael

²³ Andro trandato ešebno (31) berš, sar kralinelas andre Judsko o Asa, andro Izrael ačhiľa kralis o Omri. Ov kralinelas upral lende dešuduj (12) berš – olestar šov berš andre Tirca. ²⁴ Palis le Šemerostar cinda o brehos Šomeron vaš eftavardeš (70) kili rup †. Avke pro brehos ačhađa foros, saveske diňa nav Samarija pal o Šemer, bo oda brehos sas anglođa leskero.

²⁵ O Omri kerelas oda, so na sas le RAJESKE pre dzeka, bo kerelas buter bini sar savore kraľa angle leste. ²⁶ Ov kerelas avke sar the o Jeroboam a peskere binoha cirdňa the le Izraeliten pro binos oleha, hoj chudle te lašarel avre devlen. Aleha pre peste ande e choľi le RAJESKERI, le Izraelike Devleskeri.

²⁷ Savore aver veci, so kerđa o Omri, the leskere ňerindipena hin pisimen andro Zvitkos le Izraelike Kral'engero. ²⁸ Sar o Omri muľa, parunde les andre Samarija. Pal leste ačhiľa kralis leskero čhavo o Achab.

O Achab kralis upral o Izrael

²⁹ Andro tranda ochtoto (38) berš, sar kralinelas andre Judsko o Asa, andro Izrael ačhiľa kralis o Achab, le Omrioskero čhavo. Ov kralinelas andre Samarija

bišuduj (22) berš. ³⁰ O Achab kerelas oda, so na sas le RAJESKE pre dzeka, bo kerelas buter bini sar savore kraľa angle leste. ³¹ Na sas leske dos, hoj kerelas o bini avke sar the o Jeroboam, ale ke oda mek iľa peske la Jezabel romňake. Oj sas e čhaj le Etbaaloskeri, savo sas kralis andro Sidon. Vašoda o Achab chudľa te služinel le Baaloske a te lašarel les. ³² Ov ačhađa andre Samarija chramos prekal o Baal a andre oda chramos kerđa leske the oltaris. ³³ O Achab mek kerđa slupos la modlake Ašera a aleha pre peste ande buter e choľi le RAJESKERI, le Izraelike Devleskeri, bo sas goreder sar savore kraľa angle leste.

³⁴ Medik kralinelas o Achab, jekh murš andral o Betel, savo pes vičinelas Chijel, chudľa pale te ačhavel o foros Jericho. Ale sar o Chijel thovelas o zakladi, leskero nekphureder čhavo o Abiram muľa. Palis, sar dokerđa o foroskere brani, muľa leske the o terneder čhavo o Segub. Ov ačhađa pale o Jericho vaš o dživipena peskere čhavage, avke sar phendä anglo but berš o Joza, o čhavo le Nunoskero.

O Eliaš zaačhavel o brišind

17 Akor o Eliaš, o prorokos andral o foros Tišbe andro Gilead, phendä le kraliske Achaboske: "Avke sar dživel o RAJ, o Del le Izraeloskero, saveske me služinav: Tel kala trin berš na ela rosa, aňi o brišind na dela, medik me na phenava."

² Palis o RAJ phendä le Eliašoske: ³ "Dža adarik pro vichodos a garuv tut paš o paňi Kerit, so hino pre vichodno sera le Jordanostar. ⁴ Odarik pijeha o paňi the chaha o chaben, bo prikazindom le vranenge, hoj tuke te anen."

⁵ Avke o Eliaš odgeľa a kerđa oda, so leske phendä o RAJ a bešelas pro vichodos le Jordanostar paš o paňi Kerit. ⁶ Odarik pijelas o paňi a o vrani leske anenas tosara the rači o maro the o mas. ⁷ Ale pal varesavo časos o paňi odarik našliľa, bo na delas andre odi phuv o brišind.

O Eliaš andre Sarepta

⁸ O RAJ phendä le Eliašoske: ⁹ "Ušti a dža andro foros Sarepta paš o Sidon a ode ačh te bešel, bo me ode phendom jekha vdovake, hoj pes pal tu te starinel le chabeneha." ¹⁰ Avke o Eliaš geľa andre Sarepta. Sar doavľa paš le foroskeri brana, ipen akor ode varesavi vdova kidelas o kašta. Ov pre late zvičinda: "Mangav tut, an mange te pijel sikra paňi." ¹¹ Sar leske džalas te anel o paňi, ov mek lake phendä: "Mangav tut, an mange the sikra maro."

¹² Oj leske phendä: "Avke sar dživel o RAJ, tiro Del, nane man ňisavo maro! Hin man ča sikra aro andro čaro the olejos andro džbanos. Ipen akana kidav o kašta, hoj te džav te tavel chaben mange the mire čhaske. Kada ela amaro posledno chaben a palis bokhatar meraha."

¹³ "Ma dara tut!" odphendä lake o Eliaš. "Dža a ker avke, sar phendäl, ale ešeb (peršo) ker cikno maro

† E Hebrejiko čhib: duj talenti

prekal ma a an mange. Palis ker tuke the tire čhaske. ¹⁴Bo kavke phenel o RAJ, o Del le Izraeloskero: 'O aro andral tiro čaro aňi o olejos andral o džbanos na našlo-la, medik o RAJ na dela pale o brišind pre phuv.' "

¹⁵Avke oj geľa a kerdã avke, sar phendã o Eliaš. A sas len but dživesa so te chal. ¹⁶O aro andral o čaro aňi o olejos andral o džbanos na našlolas, avke sar phendã o RAJ prekal o Eliaš.

¹⁷Pal varesavo časos lake o čhavo nasvaliľa. Oda nasvaliben sas furt goreder, medik na muľa. ¹⁸Avke oj leske phendã: "Ó, Devleskero manuš, so tut kerdõm? Avľal mange te leperel mire bini anglo Del a te kerel, hoj miro čhavo te merel?"

¹⁹"De mange tire čhas!" odphendã lake. Palis iľa les andral lakere vasta a geľa leha andro upruno kher, kaj sovelas. Ode les thoďa pre peskero hadõs ²⁰a zoraes pes mangelas: "RAJEJA, Devla miro, soske oda kerdal kala vdovake, ke savi avľom te bešel? Soske la dukhadal aleha, hoj lakero čhavo muľa?" ²¹Palis o Eliaš pašľiľa upral o mulo čhavo trival a mangelas le RAJES: "RAJEJA miro, Devla! Mangav tut, visar pale o dživipen kale čhaske!"

²²O RAJ šundã leskero mangipen avri a o čhavoro obdžidiľa. ²³Palis le čhavores o Eliaš iľa a ľigendã les tele paš leskeri daj a phendã lake: "Dikh, tiro čhavo dživel."

²⁴A oj leske odphendã: "Akana džanav, hoj sal le Devleskero prorokos a o RAJ čačes vakereľ prekal tu!"

O Eliaš pes sikavel le Achaboske

18 Pal o buter časos, sar na delas trin berš o brišind, o RAJ prevakerďa ko Eliaš: "Dža a sikav tut le kraliske Achaboske, bo kamav te bičhavel pre phuv o brišind." ²Avke o Eliaš geľa ko kralis Achab.

Andre Samarija sas bari bokh, ³a vašoda o Achab peske diňa te vičinel le Obadiah, savo sas o spravcas le palaciskero. O Obadiah igen daralas le RAJESTAR, ⁴a sar angloda e Jezabel murdarkerelas le RAJESKERE proroken, ov iľa ke peste šel (100) proroken a po penda (50) len garuďa andre jaskiňa. Ode lenge anelas chaben the paňi. ⁵O Achab phendã le Obadiosk: "Av džas andre cali phuv paš dojekh paňi the dolina, či na arakhaha dos čar prekal amare graja the mulici, hoj te na murdaras amaro dobitkos." ⁶Palis pes dothode, ko kaj džala. Avke o Achab džalas jekha seraha a o Obadiah avra seraha.

⁷O Obadiah sas ipen pro drom, sar pes jekhvareste arakhľa le Eliašoha. Sar les sprindžarda, peľa anglal leste a phučľa: "Sal oda tu, Eliaš, rajeja miro?"

⁸"He, me som," odphendã. "Dža a phen peskere rajeske, hoj som ade."

⁹"So nalačho kerdõm," phučľa o Obadiah, "hoj kames tire služobňikos te del andro vasta le Achaboske, hoj man te murdarel? ¹⁰Avke sar dživel o RAJ, tiro Del, phenav tuke, hoj o kralis tut diňa te rodol andre dojekh narodos the krališagos. Sar leske ola kraľa phene-nas, hoj na sal ode, ov pre lende ispidelas, hoj te len pre peste vera, hoj tut čačes na arakhle. ¹¹A tu akana

kames, hoj te džav te phenel mire rajeske: 'O Eliaš hino ade.' ¹²Se sar džava tutar het, le RAJESKERO Duchos tut šaj odlidžal het a me na džanava kaj. Sar oda džava te phenel le Achaboske a palis tut na arakhela, murdarela man. Se me, tiro služobňikos, terňipnastar lašarav le RAJES. ¹³Či na phende tuke, rajeja miro, so me kerdõm akor, sar e Jezabel murdarkerelas le RAJESKERE proroken? Hoj garuďom šel (100) proroken a po penda (50) len thoďom andre jaskiňa a hordinavas lenge o maro the paňi? ¹⁴A tu akana mange phenes, hoj te džav te phenel mire rajeske: 'O Eliaš hin ade.' Se ov man murdarela!"

¹⁵Pre oda leske o Eliaš phendã: "Avke sar dživel o Nekzoraleder RAJ, saveske služinav, mek adadžives man leske sikavava."

¹⁶Avke geľa o Obadiah oda te phenel le Achaboske. Palis o Achab džalas anglo Eliaš. ¹⁷Sar o Achab dikhľa le Eliaš, phendã leske: "Či na sal oda tu, savo anes le Izraeliten andro pharipen?"

¹⁸"Na me," odphendã o Eliaš. "Ale tu the tiri famelija, bo omukľan o prikazaňja le RAJESKERE a chudľan te lašarel le Baalokere modlen. ¹⁹Akana vičín savore Izraeliten ke ma pro verchos Karmel. Vičín the le Baalokere štar šel the penda (450) proroken, the le štar šel (400) proroken la Ašerakere, save chan pal o skamind la Jezabelakero."

O Eliaš the le Baalokere proroka pro verchos

²⁰Akor o Achab bičhadã pal savore Izraeliti the pal le Baalokere proroka, hoj te aven pro verchos Karmel.

²¹Androda o Eliaš geľa angle savore manuša a phendã: "Dži kana kamen te el pro duj seri, hoj lašare-na jekhvar le Devles a palis le Baal? Te hin o RAJ tumaro Del, lašaren les, ale te hin o Baal tumaro del, akor les lašaren."

Ale o manuša leske pre oda nič na phende.

²²O Eliaš mek phendã: "Le RAJESKERE prorokendar ačhiľom ča me, ale le Baalokere prorokendar hin štar šel the penda (450). ²³Mi anen amenge duje biken. Le Baalokere proroka peske mi kiden avri jekhe bikos, mi rozčhingeren les pro kotora a mi thoven les pro kašta, ale e jag mek te na podlabaren. Me palis pririchtinava dujtones a thovava les pro kašta, ale aňi me e jag na podlabarava. ²⁴Palis le Baalokere proroka mi mangen peskere devles a me mangava le RAJES. Oda del, savo podlabarela e jag, ela čačes o Del."

Avke savore manuša phende: "Mištes!"

²⁵O Eliaš phendã le Baalokere prorokenge: "Kiden peske avri jekhe bikos a pririchtinen les ešeb (peršo) tumen, bo tumen san buter. Palis mangen tumare devles, ale e jag na podlabaren."

²⁶Avke ile peskere bikos a pririchtinde les. Tosarastar dži ko dilos mangelas le Baal a vičinenas: "Ó, Baal, odphen amenge!" No na šundolas les, aňi lenge na odphendã, choc khelenas the chučkerenas pašal o oltaris, so kerde.

²⁷Palis, pro dilos, o Eliaš lendar asalas a phendã: "Vičinen pre leste mek buter, se ov hino o del! Šaj el,

hoj akana gondolinel pal vareso, vaj geľa pro budaris, abo geľa varekaj pro drom! Abo mek sovel a kampil les te uštavel!" ²⁸ Avke o proroka chudle te kerel bareder vika a čhingerenas pes le šablencu the le oštēpenca, medik lendar na čuľalas o rat, avke sar furt kerenas. ²⁹ Imar sas pal o dilos a on mek oda kerenas dži akor, sar pes anelas e račakeri obeta. No le Baal na šundolas, aňi na odphenda lenge a nič pes na ačhiľa.

³⁰ Akor o Eliaš phenda savore manuŝenge: "Aven ke mande!" Avke savore manuša avle ke leste a ov oprikerďa le RAJESKERO oltaris, so sas čhido tele. ³¹ O Eliaš iľa dešuduj (12) bara; ajci, keci sas o kmeňi le Jakobskere čhavendar, saveske o RAJ phenda: "Tiro nav ela Izrael." ³² Ole barendar ačhaďa oltaris prekal o RAJ a pašal leste kopalinda ajsu buchlo žľabos, hoj šaj andre rešľiľa dešuduj litri †. ³³ Palis thoďa pro oltaris o kašta a rozčhingerďa le bikos. Thoďa les pro kašta a phenda: ³⁴ "Pheraren štar kanti paňi a čhiven pre obeta the pro kašta! Keren oda pale!" A on avke the kerde. Palis lenge phenda: "Keren oda tritovar!" On oda kerde. ³⁵ O paňi čuľalas pašal oltaris a pherarda the calo žľabos.

³⁶ Sar avľa o časos pre chabeneskeri obeta, geľa o prorokos o Eliaš ko oltaris a phenda: "RAJEJA, Devla le Abrahamskero, Izakoskero the Jakoboskero: adadžives mi sprindžaren, hoj tu sal o Del andro Izrael, hoj me som tiro služobňikos a kada savoro kerav prekal tiro lav. ³⁷ Odphen mange, RAJEJA, odphen, hoj kala manuša te džanen, hoj tu, RAJEJA, sal o Del, a hoj te visares lengere jile pale ke peste."

³⁸ Androda avľa andral o űebos e jag le RAJESTAR a zlabarďa e obeta, o kašta, bara, prachos the o paňi, so sas andro žľabos.

³⁹ Sar savore manuša kada dikhle, bandiľe le mujeha dži ke phuv a phenenas: "O RAJ hin o Del, o RAJ hin o Del!"

⁴⁰ O Eliaš lenge phenda: "Chuden le Baaloskere proroken, hoj űiko lendar te na denašel het!" Sar len chudle, o Eliaš len ligenda tele paš o paňi Kišon a ode len murdarkerďa.

O Eliaš pes mangel vaš o brišind

⁴¹ Palis phenda o Eliaš le Achaboske: "Dža te chal a te pijel, bo šunav o hangos le bare brišindeskero." ⁴² Avke o Achab geľa upre, hoj te chal a te pijel, ale o Eliaš geľa pro verchos Karmel. Bandiľa dži ke phuv, o muj peske thoďa maškar o khoča a ⁴³ phenda peskere sluhasko: "Dža upre a dikh pro moros."

Sar geľa a rozdikhľa pes, phenda: "Nane ode nič!"

Avke o Eliaš leske phenda, hoj te džal pale te dikhel mek eftavar.

⁴⁴ Sar oda o sluhasko kerďa eftavar phenda: "Dikhav te avel upre le morostar chmara, cikňi sar te le manušeskeri burňik."

O Eliaš leske phenda: "Dža a phen le Achaboske: 'Pririchtin peskero verdan a dža tele, bo dela baro brišind a te na dochudel tut.'"

⁴⁵ Akor pro űebos o chmari kaľile, phurdelas bari balvaj a chudľa te del zoralo brišind. O Achab bešľa andre peskero verdan a geľa andro Jezreel. ⁴⁶ Le RAJESKERO zor avľa pro Eliaš. Ov peskere gada phandľa pašal peste a denašelas anglo Achab calo drom dži ko Jezreel.

O Eliaš denašel pro verchos Choreb

19 O Achab phenda la Jezabelake savoro, so kerďa o Eliaš, the oda, sar murdarďa la šablaha savore proroken. ² Akor oj diňa te phenel le Eliašoske: "Mi maren man zorales mire devla, te tajsu andre ajsu časos na murdarava tut, avke sar tu murdarďal mire proroken."

³ Sar oda šunda o Eliaš, daralas pes pal peskero dživipen, iľa peskere sluhasko a denašľa andre Judsko Beer-Šeba. Ode mukľa peskere sluhasko. ⁴ Sar o Eliaš džalas korkoro pal e pušťa calo džives, bešľa peske tel o krakos a kamľa te merel. Kavke pes modľinelas: "Hin man savorestar dos, RAJEJA miro! Le mandar o dživipen, bo me na som űisoha feder mire dadendar." ⁵ Palis peske pašľiľa tel o krakos a zasuča.

Jekhwareste pes lestar chudľa o aňjelos a phenda leske: "Ušti a cha!" ⁶ Sar pes o Eliaš obdikhľa pašal peste, arakhľa paš o šero maro, so sas peko pre jag, the jekh džbanos paňi. Čaľa, piľa a pale zasuča.

⁷ Palis le RAJESKERO aňjelos avľa pale, chudľa pes lestar dujtovar a phenda: "Ušti a cha, bo hin angle tu igen baro drom." ⁸ Avke uštiľa, čaľa a piľa. Zoraľarďa pes ole chabeneha a džalas saranda (40) dživesa the rača, medik na dogeľa pre le Devleskero verchos Choreb ††. ⁹ Ode geľa andre jaskiňa a presuča e rat.

Akor o RAJ ke leste jekhwareste prevakerďa: "Eliaš, so ade keres?"

¹⁰ Ov odphenda: "RAJEJA, Devla Nekzoraleder, tu džanes, hoj tuke so nekfeder služinavas, ale o manuša andral o Izrael omukle e zmluva, so tuha phandle. Čhide tele tire oltara a tire proroken murdarde la šablaha! Ča me korkoro ačhilom, ale akana kamen the man te murdare!"

¹¹ "Dža avri andral e jaskiňa a ačhuv angle ma pro verchos, bo akana predžava pašal tu," phenda leske o RAJ.

Jekhwareste sas zorali balvaj, so odphurdelas o verchi a o skali anglo RAJ pharonas, ale o RAJ na sas andre odi balvaj. Paloda e phuv zorales razisaľolas, ale aňi andre oda na sas o RAJ. ¹² Avke avľa e jag, ale aňi andre odi jag na sas o RAJ. Paloda šundolas cicho hangos. ¹³ Sar oda šunda o Eliaš, zagaruďa peske o muj le plaštõha, geľa avri a ačhaďa pes angle jaskiňa.

Androda ke leste o RAJ prevakerďa: "Eliaš, so ade keres?"

¹⁴ Ov odphenda: "Mange igen džalas pal oda, hoj tuke te služinav so nekfeder, RAJEJA, Devla Nekzoraleder, bo o Izraeliti omukle tiri zmluva, čhivkerde tele o oltara a murdarde tire proroken la šablaha a űiko

† E Hebrejiko čhib: duj sea

†† Abo: Sinaj

lendar na ačhiľa, ča me. A akana kamen the man te murdarel."

¹⁵ O RAJ leske odphendā: "Dža pale le dromeha ke puštā paš o Damaskus. Sar ode dodžaha, pomakh le Chazael kraliske upral o Aram; ¹⁶ le Jehu, le Nimšiskere čhas, pomakh vaš o kralis upral o Izrael a le Elizeus, le Šafatoskere čhas andral e Abel-Mechola, pomakh vaš o prorokos pre tiro than. ¹⁷ A ela avke: O Jehu murdarela sakones, kas o Chazael na murdarela, a o Elizeus murdarela sakones, kas o Jehu na murdarela. ¹⁸ Me mukava mange andro Izrael efta ezeren (7 000) manušen, save na bandile anglo Baal, aňi les na čumidle."

O Eliaš vičinel le Elizeus

¹⁹ Sar odarik o Eliaš odgeľa, arakhľa le Šafatoskere čhas le Elizeus ipen akor, sar orinelas e maľa. Sas les dešuduj (12) pari guruva a ov korkoro lidžalas e posledno para. Sar o Eliaš džalas pašal leste, čhiđa pre leste peskero plaštōs. ²⁰ Avke o Elizeus mukľa le guruven a denašľa pal o Eliaš. Phendā leske: "Mangav tut, domuk mange, hoj te čumidav la da the le dades, palis džava pal tu."

"Dža a visar tut pale!" phendā leske o Eliaš. "Me tut na zaačhavav."

²¹ Avke o Elizeus geľa, murdarda duje guruven a tađa len pre jag, so kerđa le kaštune jarmendar, so sas pre ola guruva, a oda mas diňa te chal le manušenge. Palis odgeľa a džalas pal o Eliaš a služinelas leske.

O Aramejčana džan pro Izrael

20 O kralis andral o Aram, o Ben-Hadad, diňa te zvičinel savore slugađen. Sas leha tranda the duj (32) kraľa, o graja the o maribnaskere verdana. On gele, rozačhade pes pašal o foros Samarija a džanas pre leste. ² Bičhada muršen andro foros, hoj te phenen le Izraelike kraliske le Achaboske: "O Ben-Hadad phenel avke: ³ 'Tiro rup the somnakaj, tire romňija the nekfeder čhave hine akana mire.' "

⁴ "Avke sar phenes, rajeja miro the kralina, me the savoro, so man hin, akana hino tiro," odphendā leske o Achab.

⁵ O murša avle pale ke leste a phende: "Šun, so phenel o Ben-Hadad: 'Kamavas tutar, hoj te des mange tiro somnakaj, rup, tire romňijen the čhaven.

⁶ A akana, tajsa andre ajso časos bičhavava ke tu mire služobňiken, save predikhena tiro palacis the o khera tire služobňikenge a lena savoro, so ela lenge pre dze-ka.' "

⁷ Avke o Achab zvičinda ke peste savore Izraelike vodcen a phendā: "Dikhen, hoj kada murš amenge kamel te kerel aleha pre choľi. Ov mange diňa te phenel, hoj kamel miro somnakaj the rup, mire romňijen the čhaven, a me pre oda priačhiľom."

⁸ Palis savore vodci the manuša leske phende: "Ma šun les a ma domuk oda!"

⁹ Avke o Achab phendā le muršenge, saven bičhada o Ben-Hadad: "Phenen mire rajeske the kraliske, hoj oda, so ešebnovar (peršovar) kamelas peskere služobňikostar, les dava, ale kada, so akana mandar kamel, imar na." Avke on leske oda gele te phenel.

¹⁰ O Ben-Hadad leske diňa te phenel: "Mi maren man zorales mire devla, te ole forostar ačhela ajci prachos, hoj te el dojekhe mire muršes sikra andre burňik."

¹¹ O kralis o Achab pre oda odphendā: "Oda, ko mekča lel o zbraňi andro vasta, te na lašarel pes avke sar oda, ko imar thovel tele e šabľa pal o mariben."

¹² O Ben-Hadad oda šundā akor, sar pijelas le kraľenca andro stani. Palis phendā peskere muršenge, hoj pes te pririchtinen pro mariben pre Samarija. Avke pes on rozačhade pašal o foros.

¹³ Jekhvareste avľa ko kralis Achab varesavo prorokos a phendā: "Kavke vakerel o RAJ: 'Dikhes kale but slugađen? Mek adadžives tuke dava o ňerindipen (vitāztvo) upral lende, hoj te džanes, hoj me som o RAJ.' "

¹⁴ "Ko lidžala o mariben?" phučľa o Achab le prorokostar.

O prorokos odphendā: "O terne slugađa le guvernerengere, save lidžan o fori!"

"Ko majinel te džal ešebno pro mariben?" mek phučľa o kralis.

"Tu!" odphendā.

¹⁵ Avke o Achab diňa te zvičinel ole terne slugađen – savore sas 232. Zvičinda the savore Izraelike slugađen, save sas 7 000.

¹⁶ Pro dilos gele pro mariben, ipen akor, sar o Ben-Hadad sas mato, bo pijelas andro stanos le tranda the duje (32) kraľenca, save leske avle te pomožinel.

¹⁷ Ešeb gele o terne slugađa a avke le Ben-Hadadoskere murša, save anglal merkinenas pro Izraeliti, avle a phende leske, hoj varesave murša aven andral e Samarija. ¹⁸ Ov lenge odphendā: "Zalen len, choc te aven ade andro smirom, abo pro mariben!"

¹⁹ Ale o Izraeliti džanas avri andral o foros, ešeb o terne slugađa, save lidžanas o mariben, a pal lende caľi armada. ²⁰ Dojekh lendar murdarda ole muršes, savo džalas pre leste. Avke o Aramejčana denašenas het a o Izraeliti džanas pal lende. O kralis andral o Aram, o Ben-Hadad, denašľa odarik het le muršenca pro graja. ²¹ Akor o Achab džalas pal lende, zaiľa leskere grajen the o verdana a zničinda le Ben-Hadadoskera armada.

O Aramejčana džan pale pro Izrael

²² Palis o prorokos geľa ko kralis Achab a phendā leske: "Dža, zoraľar a pririchtin tire slugađen, bo kavke pre aver berš o Ben-Hadad avela pre tu pro mariben."

²³ Le Ben-Hadadoskere služobňika phende leske: "Ňerinde (zvitāzinde) upral amende, bo lengero del hino del le verchengero, ale te pes lenca maraha pro rovno than, ňerinaha amen! ²⁴ Vašoda akana ker kada, hoj te na lidžan o maribena o kraľa, ale o velitěľa le slugađengere. ²⁵ Palis arakh aver muršen, ajci keci tuke mule andro mariben, a avke ker the le grajenca the le

maribnaskere verdanenca. Avke džaha pes lenca te marel pro rovno than a čačes ņerinaha pre lende." Ov len šunda a kerđa avke.

²⁶ A ačhiła pes, hoj pal o berš o Ben-Hadad vičinda le Aramejčanen a geła lenca andro foros Afek pro mariben pro Izrael. ²⁷ O Izraeliti pes zgele, pririchtinde pes a džanas pro mariben. Kerde peske taboris angle lende sar te duj cikne stadi le kozengere, ale o Aramejčana sas všadzik pal calī odi phuv.

²⁸ Avke o prorokos avła ko kralis Achab a phenda leske: "Kavke phenel o RAJ: 'O Aramejčana phenen, hoj me som del le verchengero a na del la dolinakero, vašoda dava kala bara armada andre tire vasta a on pałis sprindžarena, hoj me som o RAJ.'" "

²⁹ Efta džives taborinenas jekh angle aver a pro eftato džives pes chudle te marel. O Izraeliti murdarde andre jekh džives 100 000 slugađen. ³⁰ Ole, save ačhile te dživel, denašle andro foros Afek, ale pro 27 000 lendar pele o foroskere muri. O Ben-Hadad denašła a dochudła pes andro foros, pro garudo than andro kher.

³¹ Pałis leskere služobňika leske phende: "Šundam, hoj o Izraelike krafa hine jileskere. Av, thovas pašal o per o gone a the o špargi pašal e meň a džas ko Izraeliko kralis. Šaj el, hoj tut mukela te dživel."

³² Avke kerde a gele ko kralis a phende: "Tiro služobňikos o Ben-Hadad tut mangel, hoj les te mukese te dživel."

O Achab lendar phučła: "Ov mek dživel? Ov hino miro phral!"

³³ Ole služobňika oda ile sar lačho znameňje lestar a chasňarde (viužinde) oda avri a phende: "O Ben-Hadad hino tiro phral!"

"Džan a anen les ke ma!" phenda o Achab.

Avke o Ben-Hadad avła ke leste, ov les iła pre peskero verdan ³⁴ a phenda leske: "O fori, so iła miro dad tire dadestar, dava tuke pale. Šaj peske keres andro Damaskus pro ulici o pľaci avke sar varekana miro dad andre Samarija."

O Achab leske phenda: "Sar phandava tuha e zmluva, mukava tut te džal." Avke leha phandła e zmluva a premukła les.

O prorokos odsudzinel le Achab

³⁵ Akor jekh dženo maškar o proroka phenda avre dženeske, avke sar leske phenda o RAJ: "Čhin man!" Ale ov oda na kerđa. ³⁶ Avke oda prorokos leske phenda: "Sar mandar oddžaha het, o ľevos tut murdarela, bo na šundal le RAJES!" Sar lestar oda dženo geła het, o ľevos pre leste chučila a murdarđa les.

³⁷ Pałis oda prorokos arakhła avres a phenda leske: "Čhin man!" Avke oda murš les igen demađa a dukhađa. ³⁸ Androda o prorokos geła te užarel le Izraelike kralis Achab pro drom a o jakha peske zagaruđa le khosneha, hoj les te na sprindžaren. ³⁹ Sar o kralis odarik predžalas, ov zvičinda zoraes pre leste: "Tiro služobňikos sas andro mariben a vareko ke ma anda varesave muršes a phenda mange: 'Merkin pre kada

murš! Te denašela, počineha tire dživipnaha, abo tran-da the štar (34) kili rupoha.' ⁴⁰ Ale medik me, tiro služobňikos, vareso aver keravas, ov jekhvareste denašła."

Pre oda leske phenda o Achab: "Tu korkoro tut odsudzindal a mušines te počinel."

⁴¹ Ale ov peske sigo iła pal o jakha tele o khosno a o Achab sprindžarda, hoj hino jekh le prorokendar.

⁴² Pałis oda prorokos phenda le kraliske: "Kavke phenel o RAJ: 'Vašoda, hoj premukłal le Ben-Hadad, pal savo prikazindom, hoj te merel, akana lava tiro dživipen vaš leskero a tire manušen vaš leskere manuša.'" "

⁴³ Avke o Izraeliko kralis Achab sas andre bari cholī a džalas pale khere andre Samarija nalačha dzekaha.

Le Nabotoskeri viňica

21 Le Nabot andral o Jezreel sas viňica pašes paš o Achaboskero palacis. ² Andre jekh džives phenda o kralis Achab le Nabotoske: "De mange tiri viňica, so hiňi pašes paš miro palacis, bo kamav ode te sadzinel e zeleňina. Dav tut vaš late mek feder, sar tut hin, a te na, počinava vaš late ajci, keci mol." ³ O Nabot leske odphenda: "O RAJ man mi chraňinel, hoj me la tuke te dav, se hiňi o dedictvos pal mire phure dada!" ⁴ Akor o Achab avła khere cholāmen the andre nalačhi dzeka vaš oda, so leske phenda o Nabot. Pašliła pro hados, sas visardo ke fala a na kamelas nič te chal. ⁵ Akor avła ke leste leskeri romňi e Jezabel a phučła lestar: "So pes ačhiła? Soske tut hin nalačhi dzeka? Soske na chas nič?" ⁶ Ov lake odphenda: "Vaš oda, so mange phenda o Nabot. Kamľom lestar te cinel e viňica vaš love abo, te kamľahas, diňomas les vaš late mek feder viňica, sar les hin. Ale ov phenda, hoj la mange na dela." ⁷ Oj leske phenda: "Či na sal tu kralis andro Izrael? Ušti, cha vareso a ma trapin tut! Me dochudava odi viňica a dava tuke!" ⁸ Pałis andre le Achaboskero nav pisinda ľila, zapečatiňda leskera pečataha a bičhadła len le uradňikenge the le vodcenge, save bešenas le Nabotaha andro foros Jezreel. ⁹ Andro ľila pisinda: "Den te džanel savorenge, hoj ela o postos. Sar o manuša ena jekhetane, thoven le Nabot te bešel pro pačivalo than. ¹⁰ Arakhen varesave bijedevleskere muršen a thoven len te bešel anglal leste. Mi phenen pre leste, hoj prekošelas le Devles the le kralis. Pałis les mi len avri andral o foros a mi čhivkeren andre leste le barenca, medik na merela!" ¹¹ Avke o uradňika the o vodci, save leha bešenas andro foros Jezreel, kerde avke, sar lenge pisinda andro ľila e Jezabel. ¹² On dine avri o postos a le Nabot thode te bešel pro pačivalo than. ¹³ Akor avle ola duj bijedevleskere murša, bešle anglal leste a chudle te vakarel pro Nabot, hoj prekošelas le Devles the le kralis. Avke les o manuša ile avri andral o foros a čhivkerenas andre leste le barenca, medik na muła. ¹⁴ Pałis la Jezabelake dine te džanel: "O Nabot sas murdardo le barenca." ¹⁵ Sar pes e Jezabel dodžanła, hoj o Nabot muła, phenda le Achaboske: "Ušti a dža. Le e viňica, so tuke na kamľa te bikenel o Nabot, bo ov imar

na dživel, hino mulo." ¹⁶ Sar o Achab šundā, hoj o Nabot muľa, geľa te zalel leskeri viňica.

O Eliaš dovakerel le Achaboske

¹⁷ Akor o RAJ prevakerđa ko Eliaš andral o Tišbe: ¹⁸ "Ušti a dža anglo Izraeliko kralis Achab andral e Samarija, bo ipen akana hino andre le Nabotoskeri viňica, hoj la peske te zalel. ¹⁹ Phen leske, hoj kavke vakerel o RAJ: 'Murdardal le Nabot a mek kames te lel leskeri viňica? Ode, kaj o rikone lizinenas le Nabotoskero rat, lizinenas the tiro rat.'" ²⁰ Palis o Achab phendā le Eliašoske: "Arakhľal man, ěprijaťelina miro?" O Eliaš odphendā: "He, bo pes oddiňal, hoj te keres o nalačhipen anglo RAJ. ²¹ Avke o RAJ tuke phenel: 'Vaš oda, so kerdal, anava pre tu e bibach. Zničinava andro Izrael savore muršen andral tiri famelija, či le otroken vaj slobodnen. ²² Tira famelijaha kerava avke, sar kerdom le Jeroboamoha, le Nebatoskere čhaha, the le Baašaha, le Achijoskere čhaha, bo le Izraeliten ľidžahas andro binos a kerehas oda, so man anelas andre cholí.'" ²³ O RAJ phenel the pal e Jezabel, hoj o rikone chana lakero telos paš o foroskere muri andro Jezreel. ²⁴ A te vareko andral le Achaboskeri famelija merela andro foros, chana les o rikone, a te leske vareko merela pre maľa, chana les o supí."

²⁵ (Nisavo kralis pes na oddiňa te kerel o nalačhipen anglo RAJ avke sar o Achab, bo andre savoreste les ispidelas leskeri romňi e Jezabel. ²⁶ O Achab pes ľikere-las igen namištes oleha, hoj bandolas angle aver devla avke sar the o Amoreja, saven o RAJ tradľa avri anglal o Izraeliti.) ²⁷ Sar o Achab šundā kala lava, rozčhingerđa pre peste o gada a urđa pre peste o gono. Poscinelas pes, sovelas andro gono a sas igen smutno. ²⁸ Avke o RAJ phendā le prorokoske Eliašoske: ²⁹ "Dikhľal, sar pes o Achab angle ma pokorinda? Vašoda, hoj ada kerdā, na kerava odi bibach, so leske phendom, medik ov dživela, ale kerava oda, sar ela kralis leskero čhavo."

O Achab na šunel le prorokos Michah

22 Trin berš na sas mariben maškar o Aramejčana the Izraeliti, ² ale pro trito berš geľa o Judsko kralis Jošafat ko Izraeliko kralis Achab. ³ O Achab phendā peskere služobňikenge: "Se tumen džanen, hoj o foros Ramot-Gilead hino amaro. Soske na keras nič, hoj les te las andral o vasta le Aramejike kraliske?"

⁴ Avke phučľa le Jošafatostar: "Aveha manca pro mariben pro Ramot-Gilead?"

O Jošafat leske odphendā: "Som tuha, mire manuša hine tire manuša a mire graja hine tire graja." ⁵ Ale o Jošafat phendā le Izraelike kraliske: "Phuč ešeb (peršo), so phenel pre oda o RAJ."

⁶ Avke o Izraeliko kralis zvičinda vaj štar šel (400) pro-roken a phučľa lendar: "Majinav te džal pro mariben pro Ramot-Gilead, abo na?"

"Dža!" odphende leske. "O RAJ les dela le kraliske andro vasta!"

⁷ Ale o Jošafat phučľa: "Nane ade mek aver prorokos le RAJESKERO, hoj lestar te phučas?"

⁸ O Achab leske odphendā: "Hin ade mek o Michah, le Jimloskero čhavo, prekal savo pes šaj phučas le RAJESTAR, ale me les našti avri ačhav, bo šoha (ňikda) mange nič lačo na prorokinel, ča nalačo."

"Te na vakerel avke o kralis!" phendā o Jošafat.

⁹ Avke o Izraeliko kralis peske diňa te vičinel jekhe uradňikos a phendā leske: "Sigo dža a an mange le Michah, le Jimloskere čhas!"

¹⁰ O Achab the o Jošafat bešenas pre peskere troni andre Samarija paš e foroskeri brana pre oda than, kaj žužarenas o dĳv, a sas urde andro kralengere plašti a savore proroka anglal lende prorokinenas. ¹¹ Jekh lendar, o Cidkijah, le Kenaaniskero čhavo, peske kerdā trastune rohi a vičinelas: "Avke phenel o RAJ: 'Kale rohenca predemeha le Aramejčanen, medik len na mur-dareha.'" ¹² Savore proroka kavke prorokinenas: "Dža pro Ramot-Gilead a ela tumen bach! Bo o RAJ oda dela tuke andro vasta."

¹³ Oda murš, savo geľa pal o Michah, phendā leske: "Dikh, savore proroka prorokinenas le kraliske bach. The tu prorokin bach!"

¹⁴ Ale o Michah leske odphendā: "Avke sar dživel o RAJ, me vakerava oda, so o RAJ phenela."

¹⁵ Sar avľa ko kralis Achab, phučľa lestar: "Michah, majinas te džal pro mariben pro Ramot-Gilead, abo na?"

"Džan a ěnerinena. O RAJ oda dela andro vasta le kraliske!" phendā leske.

¹⁶ Ale o kralis leske phendā: "Kecivar tut mušinav te lel andre vera, hoj mange te vakeres ča o čačipen andre le RAJESKERO nav?"

¹⁷ O Michah phendā: "Dikhľom calo Izrael rozčhido pal o verchi sar bakren, saven nane pastjeris. A o RAJ phendā: 'Kale manušen nane ko te ľidžal. On šaj džan andro smirom khere.'" ¹⁸ Akor o Achab phendā le Jošafatoske: "Na vakeravas tuke, hoj mange nič lačo na prorokinel, ale ča nalačo?"

¹⁹ O Michah mek phendā: "Šun akana o lav le RAJESKERO! Dikhľom le RAJES te bešel pro tronos a savore aňjelen te ačhel pašal leste, pre čači (pravo) the baľogňi (ľavo) sera. ²⁰ O RAJ phučľa: 'Ko kerela upre le Achab, hoj te džal pro mariben andro Ramot-Gilead a hoj ode te merel?' Jekh phenelas kavke a dujto avke. ²¹ Androda avľa varesavo duchos anglo RAJ a phendā: 'Me leha thovava avri!' O RAJ lestar phučľa: 'Sar?' ²² Avke oda duchos phendā: 'Me kerava, hoj o proroka le Achaboske te klaminen.' O RAJ phendā: 'Tu čačes leha thoveha avri. Dža a ker ada!' ²³ Akana pes avke the ačhiľa! O RAJ kerdā, hoj savore tire proroka tuke te klaminen. O RAJ diňa avri pre tu e bibach."

²⁴ Androda o Cidkijah, le Kenaaniskero čhavo, geľa ko Michah, čhinda les pal o muj a phendä: "Sar geľa mandar o Duchos le RAJESKERO, hoj te vakereľ tuha?"

²⁵ O Michah phendä: "Tu korkoro dikheha andre oda džives, sar denašeha tut te garuvel kher kherestar."

²⁶ Avke o Achab phendä: "Chude le Michah a lidža les ko foroskero velitelis Amon the ko kraliskero čhavo Joaš. ²⁷ A phen, hoj o kralis kavke prikazinel: 'Thoven les andre bertena a den les te chal ča maro the paňi, medik na avava bachtales pale.'"

²⁸ Ale o Michah phendä: "Te pes bachtales visareha, ta akor o RAJ na vakereľas prekal ma." A mek phendä: "Šunen ada, savore manuša!"

Le Achaboskero meriben

²⁹ O Izraeliko kralis Achab the o Judsko kralis Jošafat gele pro mariben pro Ramot-Gilead. ³⁰ O Achab phendä le Jošafatoske: "Me man preurava andre aver gada, sar džava andro mariben, ale tu pre tu muk tiro kraliskero plaštös." Avke o Achab pes preurda andre aver gada a geľa andro mariben.

³¹ O kralis andral o Aram prikazinda peskere tranda the duj velitelenge (32) upral o maribnaskere verdana: "Te na džal tumenge pal ñikaste, ča pal o Izraeliko kralis." ³² Sar o velitelä dikhle le Jošafat, gondolinde, hoj oda hino o Izraeliko kralis, a gele pre leste. Akor o Jošafat zvičinda ³³ a sar pre oda avle, hoj oda nane o Izraeliko kralis, preačhile pre leste te džal.

³⁴ Androda varesavo slugadis ča avke livinda andral o lukos a talinda (trafindä) le Achab maškar o pancjeris. Avke phendä le manušeske, savo lidžalas leskero verdan: "Visar tut a odligen man andral o mariben, bo som zrañimen." ³⁵ Ale oda džives o mariben sas zoralo a o Achab mušinda te ačhel calo džives andro verdan anglo Aramejčana. O rat andral leskeri rana čuľalas andro verdan a rači muľa. ³⁶ Sar zagela o kham, andro taboris šundiľa hangos: "Dojekh andre peskero foros the andre peskeri phuv!"

³⁷ Avke o kralis muľa. Palis gele andre Samarija a ode les parunde. ³⁸ Sar leskero verdan thovenas (omorenas) le ratestar paš o paňi andre Samarija, o rikone chlipinenas leskero rat a o lubňa andre landonas, avke sar phendä o RAJ.

³⁹ Savore aver veci, so o Achab kerdä, the oda, sar o palacis obthoda la slonovinar a sar zoralarda o fori,

hin pisimen andro Zvitkos le Izraelike Kralengero.

⁴⁰ Sar o Achab muľa, pal leste ačhiľa kralis leskero čhavo Achazijah.

O Jošafat kralis upral e Judsko

⁴¹ Sar imar kralinelas o Achab upral Izrael štarto berš, ačhiľa kralis upral e Judsko o Jošafat, le Asaoskero čhavo. ⁴² Le Jošafatoske sas tranda the pandž (35) berš, sar ačhiľa kralis, a andro Jeruzalem kralinelas biš the pandž (25) berš. Leskeri daj pes vičinelas Azuba, oj sas le šilchioskeri čhaj. ⁴³ Ov kerelas oda, so sas le RAJESKE pre dzeka, avke sar leskero dad o Asa. ⁴⁴ Ale o thana, kaj lašarenas le modlen, na zñičinda a o manuša ode dureder obetinenas a labarenas kadidlos.

⁴⁵ Maškar o Jošafat the Izraeliko kralis sas o smirom. ⁴⁶ Savore aver veci, so o Jošafat kerdä, leskere maribena the o ñerindipena (vitaztva) hin pisimen andro Zvitkos le Judske Kralengero.

⁴⁷ Ov tradňa het andral odi phuv le muršen the džuvľen, save služinenas sar lubňa pre ola thana, kaj lašarenas peskere devlen. On sas ode, kanastar sas kralis leskero dad o Asa.

⁴⁸ Andro Edom akor na sas kralis, ča uradñikos. ⁴⁹ O Jošafat diňa te ačhavel o lodí, hoj te džan pro moros andro Ofir pal o somnakaj. Ale o lodí na gele, bo tašľile (potopinde) paš o Ecjon-Geber.

⁵⁰ Akor o Achazijah, le Achaboskero čhavo, phendä le Jošafatoske: "Mi džan mire služobñika pro lodí tire muršenca." Ale o Jošafat oda na kamľa. ⁵¹ O Jošafat muľa a sas parundo andro kraliskero hrobos andro Foros le Davidoskero. Pal leste ačhiľa kralis leskero čhavo o Jehoram.

O Achazijah kralis upral o Izrael

⁵² Le Achaboskero čhavo o Achazijah ačhiľa kralis upral o Izrael andre Samarija, sar kralinelas o Jošafat imar dešueftato (17.) berš. ⁵³ Kerelas oda, so na sas le RAJESKE pre dzeka, the oda, so leskero dad, e daj the o Jeroboam, le Nebatoskero čhavo, savo lidžalas le Izrael andro binos. ⁵⁴ O Achazijah lašarelas the služinelas le Baaloske. Aleha pre peste anelas le RAJESKERI cholí avke sar the leskero dad.

2. KRAL'ENGERO

O Eliaš the o kralis Achazijah

1 Paloda, sar muľa o Izraeliko kralis Achab, o Moabčana pes vzburiinde pro Izrael. ² O Achazijah peľa pal o balkonos andral peskero upruno kher andre Samarija a dukhađa pes. Bičhađa peskere služobňiken a phendľa lenge: "Džan a phučen pes andro Ekron ko del Baal-Zebub, či avava sasto."

³ Akor le RAJESKERO aňjelos phendľa le Eliašoske andral o Tišbe: "Ušti a dža pro drom, hoj pes te zdžas le služobňikencu, saven bičhađa o Samarijiko kralis, a phen lenge: 'So, nane andro Izrael Del, hoj pes džan te phučen le devlestar Baal-Zebub andro Ekron?' ⁴ Vašoda kavke o RAJ phenel: 'Andral o haďos, pre savo pašlos, imar na ušteha, ale čačes pre leste mereha.'" Avke o Eliaš odarik geľa het.

⁵ Sar avle pale leskere služobňika, o kralis lendar phučľa: "Soske pes visardan pale?"

⁶ Odphende leske: "Arakhlam pes varesave muršeha, savo amenge phendľa: 'Visaren pes pale ko kralis, savo tumen bičhađa, a phenen leske, hoj o RAJ vakerele: So, nane andro Izrael Del, hoj pes džan te phučen le devlestar Baal-Zebub andro Ekron? Vašoda imar na ušteha andral o haďos, pre savo pašlos, ale čačes pre leste mereha.'" "

⁷ O kralis lendar phučelas: "Sar dičholas avri oda murš, savo pes tumenca zgeľa a vakerelelas tumenge kala lava?"

⁸ "Sas pre leste džvirinakero cipakero plaštös a pašal leste sas phandlo cipuno sirimos," phende leske.

"Oda sas o Eliaš andral o Tišbe," phendľa o kralis.

⁹ Paľis o kralis bičhađa peskere velitelis le penda (50) slugadenca pal o Eliaš. Sar o velitelis avľa ko Eliaš, ov ipen akor bešelas pro agor le brehoskero a phendľa leske: "Le Devleskero murš, o kralis prikazindľa, hoj te aves tele!"

¹⁰ O Eliaš phendľa le veliteliske: "Te som le Devleskero murš, akor mi perel andral o ňebos e jag a mi zlabarel tut the tire muršen." Androda e jag andral o ňebos peľa a zlabardľa les the leskere muršen.

¹¹ Avke o kralis pal leste bičhađa avre velitelis le penda (50) slugadenca. Ov leske phendľa: "Le Devleskero murš, o kralis prikazindľa, hoj takoj te aves tele!"

¹² O Eliaš odphendľa: "Te som le Devleskero murš, akor mi perel andral o ňebos e jag a mi zlabarel tut the tire muršen." Androda le Devleskeri jag andral o ňebos peľa a zlabardľa les the leskere muršen.

¹³ Paľis o kralis bičhađa tritovar avre velitelis le penda (50) slugadenca. Sar oda velitelis geľa upre ko Eliaš, bandiľa anglal leste a zorales les mangelas: "Devleskero murš, mangav tut vaš miro dživipen the o dživipen mire manušengere. Av jileskero ke amende! ¹⁴ Bo dikh, e jag andral o ňebos peľa a zlabardľa angle mande ole duje velitelis the lengere penda (50) slugaden. Ale akana mangav tut, presikav mange o jileskeriben, hoj na merava avke sar on."

¹⁵ Akor le RAJESKERO aňjelos prevakerďa ko Eliaš: "Dža leha tele a ma dara tut!" Avke o Eliaš uštifa a geľa leha ko kralis. ¹⁶ Sar o Eliaš avľa ko kralis, phendľa: "Kavke vakerele o RAJ: 'Bičhadal tire služobňiken, hoj pes te phučen le devlestar Baal-Zebubostar andro Ekron pal tiro sastipen, avke sar te na ulahas andro Izrael o Del, savestar šaj phučfal. Vašoda čačes mereha pre oda haďos, pre savo pašlos.'" "

¹⁷ O Achazijah muľa, avke sar o RAJ phendľa prekal o Eliaš, a vašoda, hoj le Achazijah na sas čhave, leskero phral o Joram pal leste ačhiľa kralis. Oda sas andro dujto berš, sar kralinelas andre Judsko le Jošafatoskero čhavo o Jehoram.

¹⁸ Savore aver veci, so kerďa o Achazijah, hin pisimen andro Zvitkos le Izraelike Kralengero.

O Eliaš ilo upre andro ňebos

2 Sar o RAJ kamľa te lel le Eliaš andre balvaj andro ňebos, o Eliaš le Elizeoha džanas avri andral o Gilgal. ² O Eliaš phendľa le Elizeoske: "Mangav tut, ačhuv ade, bo o RAJ man bičhavel andro Betel."

Ale o Elizeus phendľa: "Avke sar dživel o RAJ a avke sar tu, me tut na omukava!" Avke gele andro Betel.

³ Akor jekh partija proroka, save bešenias andro Betel, gele ko Elizeus a phučle lestar: "Džanes, hoj adadžives o RAJ tutar lela tire rajes?"

"Džanav," odphendľa o Elizeus. "Ale ma vakeren pal oda!"

⁴ Paľis leske o Eliaš phendľa: "Mangav tut, Elizeus, ačhuv ade, bo o RAJ man bičhavel andro Jericho."

Ale o Elizeus odphendľa: "Avke sar dživel o RAJ a avke sar tu, me tut na omukava." Avke gele sodujdžene andro Jericho.

⁵ Jekh partija proroka, save sas andro Jericho, gele ko Elizeus a phučle lestar: "Džanes, hoj adadžives o RAJ tutar lela tire rajes a imar tut buter na lidžala?"

"Džanav oda," odphendľa. "Ale ma vakeren pal oda!"

⁶ Paľis leske phendľa o Eliaš: "Mangav tut, Elizeus, ačhuv ade, bo o RAJ man bičhavel ko Jordan."

Ale o Elizeus odphenda: "Avke sar dživel o RAJ a avke sar tu, me tut na omukava." Avke gele sodujdžene.

⁷ Penda (50) proroka ola partijatar džanas pal lende dži ko Jordan, a sar o Eliaš the o Elizeus zaačhile paš o pañi, ola proroka nadur lendar zaačhile. ⁸ O Eliaš iła peskero plaštós, bondarda (skrucinda) les a demađa leha pal o pañi. Avke pes o pañi rozulađa pro duj seri a sodujdžene pregele pre aver sera pal e šuki phuv.

⁹ Sar imar predžanas, o Eliaš phenda le Elizeoske: "Phen mange, so kames, hoj prekal tu te kerav mek sigeder, sar avava ilo tutar."

"Mangav tut, mi avel pre ma duvar ajci tire duchostar," phenda leske o Elizeus.

¹⁰ "Phari veca tuke manges," odphenda leske o Eliaš, "ale ačhela pes oda akor, te man dikheha, sar avava tutar ilo upre. Ale te man na dikheha, na chudeha oda."

¹¹ Avke sar džanas le vakeribnaha, jekhwareste pes sikađa jagalo verdan le jagale grajenca. On avle maškar lende a o Eliaš sas ilo andro ņebos andre bari balvaj. ¹² O Elizeus oda dikhla a vriskinelas: "Dado miro, dado miro! O graja the o maribnaskere verdana andral o Izrael ile mire rajes!" Avke imar les buter na dikhla. Akor iła peskere gada a prečhinda len pro duj kotora.

¹³ Palis hazdña o plaštós, so peła le Eliašostar, visarda pes a zaačila pro brehos paš o Jordan. ¹⁴ Hazdña o plaštós a zvičinda: "Kaj hin o RAJ, o Del le Eliašoskero?" Avke le plaštoha demađa pal o pañi, o pañi pes rozulađa pro duj seri a o Elizeus odarik pregeľa.

¹⁵ Sar oda dural dikhle ola penda (50) proroka, save sas andral o Jericho, phende: "Le Eliašoskero duchos hino pro Elizeus." Avke on gele ke leste, bandile anglal leste dži ke phuv ¹⁶ a phende leske: "Dikh, maškar amende hin penda (50) zorale murša. Šaj džan te rodel tire rajes, či les na odligenda o Duchos le RAJESKERO a na čhida pre varesavo verchos, abo andre varesavi dolina."

"Na mušinen!" phenda o Elizeus.

¹⁷ Ale on pre leste ajci ispidenas, medik na domukla, hoj te džan. Rodenas trin dživesa, ale na arakhle les.

¹⁸ Palis on avle ko Elizeus, kaj sas andro Jericho, a ov lenge phenda: "Či tumenge na phendom, hoj te na džan?"

O nalačo pañi hino sastardo

¹⁹ Varesave Jerichoskere murša phende le Elizeoske: "Dikh, rajeja amaro, andre kada foros pes mištes amenge bešel, ale o pañi nane lačo a e phuv na anel ulipen †."

²⁰ "Anen mange nevo čaro a thoven andre lon," phenda lenge. Sar oda čaro leske ande, ²¹ geľa ko pañi, čhida andre o lon a phenda: "Kavke phenel o RAJ: 'Sastardom kada pañi. Imar ņiko kale pañestar na merela a e phuv anela o ulipen.' " ²² Oda pañi hino dži adadžives lačo, avke sar phenda o Elizeus.

O Elizeus the o nalače čhave

²³ Palis khatar o Jericho geľa upre andro Betel, a sar džalal le dromeha, o terne čhave andral oda foros lestar asanas a phenenas: "Av upre, tu, lango šero! Av upre, lango šero!"

²⁴ Avke o Elizeus pes visarda, a sar len dikhla, prekošla len andro nav le RAJESKERO. Androda avle avri andral o veš duj medvedici a murdarde saranda the duj (42) čhaven.

²⁵ Odarik geľa o Elizeus pro verchos Karmel a palis pes visarda andre Samarija.

O trin krafa džan pro Moab

3 Andro dešuochtoto (18.) berš, sar kralinelas o Judsko kralis Jošafat, ačila andre Samarija kralis upral o Izrael o Joram, savo sas čhavo le Achaboskero. Ov kralinelas dešuduj (12) berš. ² O Joram kerelas oda, so na sas pre dzeka le RAJESKE, ale na avke sar leskeri daj the dad. Ov čhida tele o slupos, so ačhađa leskero dad le Baaloske. ³ Ale o Joram na kamelas te omukel o bini avke sar anglal leste o Jeroboam, o čhavo le Nebatoskero, savo lidžalas le Izrael andro binos, a na kamelas te preačhel.

⁴ O Moabiko kralis o Meša likerelas bakren a sako berš delas le kralis andro Izrael šel ezera (100 000) cikne bakroren the e vlna pal o šel ezera (100 000) bakre sar daň. ⁵ Soča o Achab muľa, o Moabiko kralis pes vzburiđa pro Izraeliko kralis. ⁶ O kralis Joram takoj geľa pre leste pro mariben andral e Samarija a diňa te zvičinel calo Izrael. ⁷ Diňa te phenel le Judske kraliske le Jošafatoske: "O Moabiko kralis pes pre ma vzburiđa. Na avlalas manca pre leste pro mariben?" "He! Džava tuha," odphenda leske o Jošafat. "So hin miro, hin tiro. Me, mire manuša the graja."

⁸ Akor o Jošafat lestar phučla: "Save dromeha džaha pre lende?"

"Le dromeha prekal Edomoskeri pušta," odphenda leske o Joram.

⁹ Avke džanas o kralis Joram, o Judsko kralis the o Edomiko kralis pro Moab. Džanas bare dromeha a pal o efa džives le slugađen imar na sas pañi prekal peste aňi prekal o dobitkos.

¹⁰ Akor o Joram phenda: "Vigos amenge! O RAJ amen trine krafen ade vičinda vašoda, hoj amen te del andro vasta le Moabike kraliske!"

¹¹ Ale o Jošafat phučla: "Nane ade varesavo prorokos, savestar šaj phučas le RAJESTAR, so majinas te kerel?"

Pre oda phenda jekh služobňikos le Joramoskero: "Hin ade le Šafatoskero čhavo o Elizeus, savo služinelas le Eliašoske."

¹² "O RAJ prevakerela prekal leste," phenda o Jošafat. Avke gele ke leste savore trin kraľa.

† Abo: le džuvlengje ulon mule čhave

O mariben le Moabčanenca

¹³ O Elizeus phendā le Izraelike kraliske: "Soske tu aves ke mande? Dža ke tire dadeskere the dakere pro-roka!"

"Na!" phendā leske o kralis o Joram. "O RAJ amen trine krafen ade andā, hoj amen te del andro vasta le Moabčanenge."

¹⁴ Pre oda leske o Elizeus phendā: "Avke sar dživel o RAJ o Nekzoraleder, saveske služinav, te na likerdomas mange le Judske kralis le Jošafat, aňi pre tu na zadikhľomas. ¹⁵ Ale akana anen ke ma varekas, ko bašavel pre harfa."

Medik oda lavutaris bašavelas pre harfa, e zor le RAJESKERI avľa pro Elizeus. ¹⁶ Ov phendā: "Kavke phenel o RAJ: 'Andre kadi šuki dolina kopalın avri but cheva.

¹⁷ Choc na dikhena, hoj del o brišind, aňi na šunena e balvaj, kadi dolina ela pherardi le paňeha a tu the tiro dobitkos odarik pijena.' ¹⁸ Le RAJESKE oda hin frima a andre tumare vasta dela the le Moabčanen. ¹⁹ Tumen domarena dojekh baro the zoralo foros a čhinena tele savore lačhe stromi, zaačhavana lengere chaňiga (prameňa) a lengere ulipnaskere maľi začhivena le barenca."

²⁰ Avke tosara, sar pes anelas e chabeneskeri obeta, jekhvareste avľa o paňi andral o Edom a začhordā caľi phuv.

²¹ Sar šunde savore Moabčana, hoj o trin kraľa džan pre lende pro mariben, dine te zvičinel savore muršen, save pes džanenas te marel, le ternederestar dži ko phureder, a rozačhade len paš e hraňica. ²² Sig tosara, sar o kham avelas avri, o Moabčana dikhle angle peste, hoj o paňi dičhol sar rat, ²³ a phende peske: "Oda hin o rat! Ole kraľa pes mušinde maškar peste te marel a murdarde jekh avres. Akana džan a len savoro, so hin andre lengero taboris!"

²⁴ Ale sar o Moabčana gele ko Izraeliko taboris, o Izraeliti gele pre lende a marenas len avke, hoj o Moabčana lendar denašenat het. On džanas pal o Moabčana a murdarkerenas len. ²⁵ Lengere fori čhide tele, o ulipnaskere maľi začhivkerde le barenca, o chaňiga zaačhade a o lačhe stromi čhingerde tele. Nič ode na ačhiľa, ča o muri le foroskere Kir-Chareset na pele, ale o murša le prakenca pes rozačhade pašal oda foros a ľivinenas pre leste.

²⁶ Sar o Moabiko kralis dikhľa, hoj o mariben prekhelela (prehrajnela), iľa peha eľta šel (700) muršen le šablınca, hoj pes te dochuden ko Edomiko kralis, ale našti pregele. ²⁷ Akor iľa peskere ešebne (perše) čhas, savo majindā te el pal leste kralis, a obetindā les pro foroskere muri sar labardi obeta le Moabike devleske. Sar oda o Izraeliti dikhle, igen predarandile †, gele odarik het a visarde pes pale andre peskeri phuv.

E vdova the o olejos

⁴ Andre jekh džives jekh romňi phendā le Elizeoske: "Tiro služobňikos, miro rom muľa. Se tu džanes, hoj ov daralas le RAJESTAR. Ale akana jekh murš, saveske kamavas love, kamel te lel mire soduje čhaven vaš o otroka." Lakero rom sas andre partija le prorokengeri.

² O Elizeus latar phučľa: "So kames, hoj prekal tu te kerav? Phen mange, so tut hin khere?"

"Tira služobňička andre calo kher nane nič," odphendā leske, "ča sikra olivovo olejos andre kuči."

³ Pre oda lake phendā: "Dža a mang tuke savore manušendar, save bešen pašal tute ajci prazndne džbani, keci šaj anes. ⁴ Dža andro kher tire čhavenca, phand pal tumende o vudar a čhivker andre ola džbani olejos andral odi kuči. Sar pherareha jekh džbanos, thov les pre sera."

⁵ Oj odgeľa lestar a phandľa pal peskere čhave the pal peste o vudar. On lake anenas o džbani a oj andre čhivelas o olejos. ⁶ Sar o džbani sas pherarde, phendā le čhaske: "An mange aver džbanos."

Ale ov lake phendā: "Imar nane buter." Akor andral odi kuči preačhiľa te čuľal o olejos.

⁷ Paľis, sar oda geľa te phenel le prorokoske Elizeoske, ov lake phendā: "Dža, biken oda olejos a de pale o love, kaske kames (o adošagos), a pal oda, so tuke ačhela, šaj džives tu tire čhavenca."

O Elizeus sastarel la džuvľake le čhavores

⁸ Andre jekh džives o Elizeus džalas andro foros šunem. Ode dživelas jekh barvaľi džuvľi, savi les vičindā ke peste te chal. Kana odarik predžalas, furt ode džalas te chal. ⁹ Oj phendā peskere romeske: "Me džanav, hoj kada murš, savo furt adarik predžal, hino sentno murš le Devleskero. ¹⁰ Ačhavas leske upral amaro kher cikno murimen kher a thovas leske ode haďos, skamind, stolkos the momelaris. Bo te varekana avela ke amende, šaj džal ode te bešel."

¹¹ Avke andre jekh džives, sar ode avľa o Elizeus, geľa andre oda kher a pašliľa ode. ¹² Paľis peskere služobňikoske le Gehaziske phendā: "Dža, vičín ade ola šunemčanka." Ov la vičindā a oj avľa angle leste. ¹³ O Elizeus le Gehaziske phendā, hoj lake te phenel: "Phuč latar, so šaj kerav prekal late, bo oj pes pal amende starinel a igen but prekal amende kerel. Či na kamel, hoj man vaš lake te privakerav ko kralis, abo ko veliteľis upral o slugada?"

Sar ada lake o Gehazi phendā, oj odphendā: "Soske? Se me bešav maškar mire manuša!"

¹⁴ "So šaj prekal late keras?" phučľa o Elizeus le Gehazistar.

Ov odphendā: "Se nane la muršoro a lakero rom imar hino phuro."

¹⁵ "Dža, vičín la!" phendā o Elizeus. Sar la vičindā, oj ačhiľa paš o vudar. ¹⁶ Ov lake phendā: "Pal o berš andre ajso časos ľikereha andro vasta tire muršores."

† Abo: pro Izrael sas bari choli.

“Ó, le Devleskero murš, ma klamin tira služobnička!” phendá leske.

¹⁷ Andre oda časos, sar lake phendá o Elizeus, odi romni achiíla khabni a ulíla (narodzinda pes) lake muršoro.

¹⁸ Sar o čhavoro podbaríla, andre jekh džives geła pal peskero dad, savo kidelas pal e mała o ulípen. ¹⁹ Le dadeske phendá: “Dukhal man o šero, dukhal man o šero!”

Avke phendá le sluhasko, hoj les te odlidžal ke leskeri daj. ²⁰ Odligendá les a diňa les leskera dake. O čhavo lake bešelás pro čanga dži ko dilos, a palís muła. ²¹ Oj les ligendá upre te pašlól andro upruno kher pro Elizeoskero hados, phandíla pal peste o vudar a geła het.

²² Palís vičindá peskere romes a phendá: “Dža a bičhav mange jekhe le sluhendar, hoj te anel la oslica. Mušinav man so neksigeder te dochudel ko Devleskero murš, palís avava pale.”

²³ “Soske kames ke leste te džal adadžives?” phučla. “Se nane o Inepos Neve Čhoneskero aňi o Šabbat.”

“Oda nič!” oj odphendá. ²⁴ Palís thođa pre oslica o sedlos a peskere sluhasko prikazindá: “Sidar a ma zaačh! Ma dža polokeder, medik tuke na phenava.”

²⁵ Sar imar sas pašes ko verchos Karmel, kaj sas o Elizeus, ov la dural dikhla a phendá peskere sluhasko le Gehaziske: “Dikh, oda hiňi odi Šunemčanka! ²⁶ Denáš ke late a phuč latar.”

Avke geła a phučla latar: “Sar sal tu? Sar hin tire romeske? A sar tire čhavoreske?”

“Savoro mištes,” oj odphendá.

²⁷ Sar avla upre ko prorokos, bandíla a obchudla leskere pindre. Ale o Gehazi geła ke late, hoj la lestar te odlel, ale o Elizeus leske phendá: “Muk la, bo hiňi andro baro pharipen. O RAJ mange pal ada na diňa te džanel a garuđa ada angle ma.”

²⁸ Oj leske phendá: “Či me mange mangas čhavores mire rajestar? Se na phendom tuke, hoj man te na keres upre?”

²⁹ Akor o Elizeus prikazindá le Gehaziske: “Pririchtin tut pro drom, le tuha miri paca a dža. Te pes arakheha varekaha pro drom, ma de pes ke leste anglal. Te pes vareko dela ke tu anglal, ma odphen leske. Miri paca thov le čhaske pro muj.”

³⁰ Ale leskeri daj phendá: “Avke sar dživel o RAJ the tu, na džava bijal tu.” Avke o Elizeus uštíla a džalás pal late. ³¹ O Gehazi ode sas sigeder sar on a thođa le čhavoreske e paca pro muj, ale nič pes na achiíla. Na dichinelas aňi peha na čhalada. Avke pes visardá pale ko Elizeus a phendá leske: “O čhavoro pes na prekerdá.”

³² Sar o Elizeus geła andro kher, o čhavoro pašlolas pro hados mulo. ³³ Geła andre, phandíla pal peste o vudar a modlínelas pes ko RAJ. ³⁴ Palís geła upre pro hados, kaj sas o čhavoro, pašlíla pre leste a thođa peskere vušta ke čhavoreskere, o jakha ke leskere jakha the o burňika ke leskere burňika. Achiíla pre leste

te pašlól, medik leskero telos na roztačila. ³⁵ Palís uštíla a phirelas upre tele andro kher. Avke geła upre a pale pašlíla pre leste. Androda o čhavoro eftavar kichňinda a phundrađa o jakha.

³⁶ Palís o Elizeus vičindá le Gehazi a phendá leske, hoj te vičinel la Šunemčanka. Ov la vičindá, a sar avla ko Elizeus, ov lake phendá: “Le tuke tire čhas.” ³⁷ Sar geła andre, bandíla anglal leste dži ke phuv. Palís íla peskere čhas a geła het.

O Elizeus sprikerel o nalačo chaben

³⁸ Sar o Elizeus pes visardá pale andro Gilgal, sas bokh andre odi phuv. Sar e partija proroka anglal leste bešenás, phendá peskere služobnikoske: “Dža, thov e bari piri a tav varesavo chaben prekal kala proroka.”

³⁹ Palís jekh lendar geła pre mała te kidel varesave bilini. Arakhla varesavi dzivo rastlina a kidňa pal late o kirko ovocje pherdo plaštós. Čhingerđa oda ovocje andre piri a thođa len te tadól, ale okla manuša pal oda na džanenas †. ⁴⁰ Sar oda chaben denas te chal le muršenge, on koštoľinde a zvičinde: “Andre piri hin o meriben! Murš le Devleskero!” Oda chaben pes na delas te chal.

⁴¹ Avke o Elizeus prikazindá, hoj te anen aro. Čhiđa oda aro andre piri a phendá: “Kiden le manušenge, hoj te chan.” Avke oda chaben imar na sas nalačo.

O Elizeus del te chal šel muršen

⁴² Varesavo murš avla andral o foros Baal-Šališa a anda le Elizeoske le ešebne (perše) ulípnastar biš (20) cikne jačmeňiskere mare the žužođiv, so mekča kidle upre, andro gono. A o Elizeus phendá: “Rozde oda le manušenge, hoj te chan!”

⁴³ Ale leskero sluhasko phendá: “So, kada majinav te del te chal šel (100) manušenge?”

Ov leske odphendá: “Ča lenge de! Mi chan. Bo kavke phenel o RAJ: ‘Čhana a mek olestar the ačhela.’”

⁴⁴ Avke lenge oda diňa. On chale a mek achiíla olestar, avke sar phendá o RAJ.

O Naaman hino sastardo

5 O Naaman sas velítelís upral o slugađa andro Aram. O kralís les igen líkerelas, bo o RAJ prekal leste diňa le Aramejčanenge o ňerindípen (vitáztvo). Ov sas zoralo maribnaskero murš, ale sas nasvalo pro malomocenstvo.

² Jekhvar o slugađa andral o Aram gele pro Izraelike gava a odarik zaile cikňa čhajora. Oj achiíla služka le Naamanoskera romňake. ³ Jekh džives phendá peskera raňake: “Te ča miro raj geľahas ko prorokos, savo hino andre Samarija, ov les sastardahas le malomocenstvosťar.”

⁴ Sar o Naaman oda šundá, geła ko kralís a phendá leske, so vakereľas odi čhajori andral o Izrael. ⁵ O Aramejiko kralís phendá: “Šaj džas! Me le kralíske andro Izrael bičhavava líl.” Avke ov geła a íla peha 30 000

† Abo: choc ňiko na džanelas, so oda sas.

rupune, 6 000 somnakune minci the deš ineposkere gada. ⁶ Le kral'iske andro Izrael anda o lil a sas andre pisimen: "Jekhetane le lileha tuke bičhavav peskere služobňikos le Naaman, hoj les te sastares le nasvalib-nastar."

⁷ Sar o Izraeliko kral'is pregenda o lil, rozčhingerda pre peste o gada a phenda: "So, me som Del, hoj man hin zor upral o dživipen abo upral o meriben? Soske oda bičhada ke ma muršes, hoj les te sastarav? Dikhen, hoj kaleha čačes rodel drom pro mariben."

⁸ Ale sar o Elizeus pes pal oda dodžanla, hoj o Izraeliko kral'is peske rozčhingerda o gada, diña te phenel le kral'iske: "Soske tuke rozčhingerdal o gada? Se mi avel ke mande a dodžanela pes, hoj hin andro Izrael prorokos."

⁹ Akor o Naaman geľa peskere grajenca the le verdenca a zaačhiľa paš le Elizeoskero khereskero vudar.

¹⁰ O Elizeus bičhada peskere sluhas, hoj leske te phenel: "Dža, thov (omor) tut eftavar andro Jordan a tiro tēlos ela pale sasto avke sar angoda."

¹¹ Ale o Naaman choľaha džalas het a phenda: "Gondolinavas mange, hoj avela ke ma a modlinela pes ko RAJ, ke peskero Del, kivinela le vasteha upral miri cipa a me avava sasto!" ¹² Či nane o paňa Abana the o Parpar andro Damaskus feder sar savore paňa andro Izrael? So našti man andre ola paňa sthodom (omordom) a na ulomas sasto?" Avke pes odvisarda a choľaha geľa het.

¹³ Androda avle ke leste leskere služobňika a prevakerenas les: "Rajeja amaro, te tutar kamľahas o prorokos varesavi bari veca, či oda na kerđalas? A akana soske tut na kames te thovel andro paňi, avke sar tuke phenda, hoj te aves žužo?" ¹⁴ Avke o Naaman geľa tele andro paňi Jordan a eftavar cale tēloha geľa tel o paňi, avke sar leske phenda o prorokos. Akor leskero tēlos sas ajso žužo sar o tēlos le cikne čhavoeskero.

¹⁵ Paľis avľa pale peskere služobňikenca ko Elizeus. Sar ode doavle, zaačhiľa anglal leste a phenda: "Akana džanav, hoj űikhaj avrether nane Del, ča andro Izrael. Mangav tut, prile kada daros peskere služobňikostar."

¹⁶ O Elizeus leske odphenda: "Avke sar dživel o RAJ, saveske služinav, na lava tutar." Choc pre leste o Naaman ispidelas, ov lestar űič na iľa.

¹⁷ Akor o Naaman phenda: "Te na kames miro daros, domuk, hoj te den tire služobňikos ajci čhik, keci birinena te lel o duj mulici, bo tiro služobňikos imar na obetinela o labarde obeti aňi űisave dari avre devlence, ča jekheske le RAJESKE. ¹⁸ Ale mi odmukel mange o RAJ jekh: Sar o kral'is, miro raj, džal andro chramos le Rimmonoskero, hoj te bandol angle leste, me mušinav te džal leha, bo chudel pes mire vastestar, a sar ov bandol anglo Rimmon, mušinav the me. Mi odmukel mange o RAJ."

¹⁹ "Dža andro smirom," phenda leske o Elizeus.

O binos le Gehaziskero

Soča o Naaman lestar sikra odgeľa le dromeha, ²⁰ o Gehazi, le Elizeoskero služobňikos, peske phenda:

"Miro raj mukľa ole Aramejčanos Naaman ča avke te džal bi o daros. Majinda lestar te lel oda, so les kamľa te del. Avke sar dživel o RAJ, denašava pal leste a lava mange vareso lestar."

²¹ Akor o Gehazi denašelas pal o Naaman. Sar o Naaman zbačinda, hoj pal leste vareko denašel, chučila tele pal o verdan a geľa angle leste a phučľa: "Hin savoro mištes?"

²² "Savoro mištes," odphenda o Gehazi. "Ale miro raj man bičhada, hoj tuke te phenav: 'Ipen akana ke ma avle duj terne andral e prorokengeri partija khatar e brehengeri phuv, andral o Efrajim. Ov tut mangel, hoj len te des 3 000 rupune the duj ineposkere gada.'"

²³ "Mangav tut, ker mange pal e dzeka a le kade 6 000 rupune minci," phenda o Naaman a ispidelas pre leste, hoj oda te lel, a thođa o rup the duj ineposkere gada andro duj gone a diña peskere duje sluhenge, hoj anglal leste te lidžan. ²⁴ Sar avľa pro brehos, kaj bešelas o Elizeus, iľa ola veci lendar a garuđa andro kher. Avke ole muršen premukľa a on gele het.

²⁵ Paloda korkoro avľa a zaačhiľa anglo peskero raj. O Elizeus lestar phučľa: "Khatar aves, Gehazi?"

"Tiro služobňikos na sas űikhaj," odphenda.

²⁶ Ale o Elizeus leske pre oda phenda: "Či na sas miro duchos paš oda, sar vareko pes pal o verdan visarda a geľa anglal tute? Či hin akana o časos, hoj pes te lel o rup, gada, olivakere stromi, o viňici, bakren, le dobitkos, sluhent the služken?" ²⁷ Vašoda le Naamanoskero malomocenstvo ela pre tute the pre tiro potomstvos pro furt!"

Avke sar o Gehazi lestar odgeľa, sas malomocno a leskeri cipa sas parňi sar jiv.

Pal o tover, so peľa andro paňi

6 E partija le prorokengeri phenda le Elizeoske: "Dikh, o than, andre savo tuha ade bešas, hino prekal amende cikno. ² Aven, džas ko paňi Jordan. Dожekh amendar odarik mi anel po jekh kašt a lendar peske keraha kher, andre savo bešaha."

"Džan!" phenda lenge o Elizeus.

³ Vareko lendar phenda: "Mangav tut, av the tu amenca."

"Mištes, džava," odphenda. ⁴ Avke geľa lenca.

Sar doavle paš o Jordan, čhingerenas tele o stromi. ⁵ Androda, sar jekh lendar čhingerelas tele o stromos, peľa leske o tover pal o poriskos andro paňi. Akor ov zvičinda: "Ó, rajeja miro, oda tover mange ča iľom kečeň!"

⁶ "Kaj peľa oda tover?" phučľa lestar o Elizeus.

Sar leske sikađa oda than, o Elizeus odphagľa konaris a čhidľa pre oda than andro paňi, avke o tover avľa upre. ⁷ A phenda leske: "Le tuke les!" Avke ov nacirdľa o vast a iľa les.

O Elizeus zaačhavel la armada andral o Aram

⁸ Jekhvar, sar o Aramejiko kral'is sas andro mariben le Izraeloha, iľa peskere velitēlen, vakerelas lenca a

phenda lenge, kaj kamla te kerel o taboris. ⁹ Ale o Elizeus le Izraelike kraliske diña pal oda te džanel a phenda: "Merkin, hoj te na džas pre oda than, bo ode hine o Aramejčana." ¹⁰ Avke o Izraeliko kralis bičhada peskere muršen pre oda than, pal savo leske phenda o Elizeus. Ada pes ačhiła buterval, a vašoda pre kajse thana o Izraeliti furt merkinenas.

¹¹ Vašoda o Aramejiko kralis chořisalila, privičinda ke peste peskere velitelēn a phučla lendar: "Na phenena mange, ko amarendar pes likerel le Izraelike kraliha?"

¹² "Niko, rajeja miro the kralina," phenda jekh lendar, "ale o Elizeus, o Izraeliko prorokos, phenel avri le Izraelike kraliske the oda, so vakeres andre tiro kher, kaj soves."

¹³ "Džan a dodžanen pes, kaj akana hino," phenda o Aramejiko kralis, "palis les dava te phandel andre."

"Ipen akana hino andro Dotan," odphende leske.

¹⁴ Avke ode bičhada zorała armada le maribnaskere verdanena the grajenca. On ode dogele rači a rozačhade pes pašal oda foros.

¹⁵ Sar le Elizeoskero sluhas uštıla tosara a geła avri, dikhla, hoj e armada le grajenca the verdanena hine rozačhade pašal o foros. A phenda le Elizeoske: "Namištes amenca, rajeja miro! So keraha?"

¹⁶ "Ma dara tut!" odphenda leske o Elizeus. "Ola, ko hine amenca, hine buter sar ola, ko hine lenca." ¹⁷ Palis pes o Elizeus modlinelas: "RAJEJA, mangav tut, phundrav leske o jakha, hoj te dikhel." Avke o RAJ phundrađa le sluhasko o jakha a ov jekhvaroste dikhla pro verchos but grajen the jagale verdana pašal o Elizeus.

¹⁸ Sar o Aramejčana avenas ke leste tele, o Elizeus pes kavke modlinelas ko RAJ: "De, hoj kala manuša te en kore." Akor o RAJ avke kerđa, sar les mangelas o Elizeus.

¹⁹ Palis lenge o Elizeus phenda: "Kada nane oda foros, so roden. Na san pro lačho drom. Aven pal ma, řigenava tumen ke oda murš, saves roden." Avke len řigenda andre Samarija.

²⁰ Sar ode dogele, o Elizeus phenda: "RAJEJA, phundrav lenge o jakha, mi dikhel." O RAJ lenge phundrađa o jakha a on dikhle, hoj hine maškar e Samarija.

²¹ Sar len dikhla o Izraeliko kralis, phučla le Elizeostar: "Te murdarel len? Te murdarel len, rajeja miro?"

²² "Ma murdar len!" ov odphenda. "Či murdares olen, saven tu zales la šablaha the le lukoha? De len te chal the te pijel paři a muk len te džal pale ke peskero raj."

²³ Avke kerđa prekal lende bari hoscina. Sar chale a pile, premukla len a gele ke peskero kralis. Palis o Aramejike slugađa preačhile te džal pro Izraelike gava.

Bari bokh andre Samarija

²⁴ Pal varesavo časos o Aramejiko kralis Ben-Hadad, zvičinda savore peskere slugađen, gele pro foros Samarija a rozačhade pes pašal leste. ²⁵ Andre Samarija sas bari bokh, bo o Aramejčana but časos sas rozačhade pašal oda foros. Sas ajsi bokh, hoj vaš le so-

mariskero šero počinenas ochtovardeš (80) rupune a vaš jekh čaroro dzivo purum pandž rupune.

²⁶ Sar o Izraeliko kralis pes prephirelas pal o foroskero muros, varesavi džuvli pre leste zvičinda: "Pomožin mange, rajeja miro the kralina!"

²⁷ Ov lake phenda: "Te tuke o RAJ na pomožinel, sar me tuke šaj pomožinav? Le žužodivoha, abo la mołaha?" ²⁸ Palis latar phučla: "So tute hin?"

Oj phenda: "Kadi džuvli ade man kerđa upre. Phenda: 'De tire čhas, hoj les adadžives te čhas, a mires chaha tajsa.' ²⁹ Avke mire čhas tađam a čalam. Sar pre aver džives lake phendom: 'De tire čhas, hoj les te čhas,' oj peskere čhas garuđa."

³⁰ Sar oda šunđa o kralis, so odi džuvli phenda, rozčhingerđa pre peste o gada. Sar pes prephirelas pal o foroskere muri, o manuša dikhle, hoj pre leskero telos tel o gada hine urde o gone. ³¹ O kralis phenda: "O RAJ man zorales mi marel, te adadžives le řafatoskere čhaske le Elizeoske na odčhina o šero!"

³² Akor o kralis bičhada ko Elizeus varesaves peskere manušendar. Ov bešelās khere a o vodci ole forengere leha. Medik ke leste na avla oda murš, o Elizeus le vodcenge phenda: "Dikhel, oda vrahos bičhavel varekas, hoj mange te odčhinel o šero. Merkinen! Te oda murš avela, phanden pre leste o vudar a řikeren les, hoj te na avel andre. Či na šundol, hoj pal leste phirel leskero raj?" ³³ Mek lenca vakerelas, sar ke leste avla o kralis a phenda: "Soske mek te užarel, hoj o RAJ amenge pomožinela? Se kada bibachtalipen avla le RAJESTAR!"

O Elizeus prorokinel

7 Akor o Elizeus phenda: "Šunen, so phenel o RAJ: 'Tajsa andre kajso časos pes bikenela paš e Samarijiko brana trin kili nekfeder aro, abo šov kili jačmeņis vaš o jekh rup.'"

² Ale le kraliskero nekpašeder velitelis, phenda le Elizeoske: "Čoc o RAJ phundravela o oblaki pro řebos, kada pes našti ačhel!"

"Tu korkoro oda dikheha, ale na chaha olestar," phenda leske o Elizeus.

O malomocne andro Aramejiko taboris

³ Paš e foroskeri brana ačhenas štar malomocne murša. On phende jekh avreske: "So ade užaraha, medik na meraha?" ⁴ Se te džaha andro foros, meraha ode bokhatar, bo hin ode bokh, a te ačhuvaha ade, tiš meraha. Aven, predžas andro Aramejiko taboris. Te amen mukena te dživel, ta dživaha, a te amen murdarena, ta meraha."

⁵ Avke sar zaračila, džanas andro taboris, ale sar dogele paš o taboris, avle pre oda, hoj ode nane řiko. ⁶ O RAJ avke kerđa, hoj o Aramejčana andro taboris řunenas le grajen, o maribnaskere verdana the e bari vika le but slugađereri a gondolinde peske, hoj o Izraeliko kralis vičinda pro mariben le Četitanengere krařen the le Egipske krařen. ⁷ Sar zaračolas, denašle

odarik het. Omukle o taboris avke, sar sas: peskere stani, grajen the somaren.

⁸ Sar ola štar malomocne avle paš o anglune stani andro taboris, gele andro jekh stanos. Ode chale a pile. Ile savoro, so sas andro stanos: o rup, somnakaj the o gada. Palis gele odarik a garude len. Avke gele andre aver stanos, ile savore veci, so andre sas, a gele len te garuvel.

⁹ Avke phende jekh avreske: "Namištes keras. Adadžives hin baro džives, bo hin amende lačno hiros, ale te oda na phenaha ňikaske a te užaraha dži tosara, avaha potrestimen vaš ada. Aven, džas ada te phenel andre le kraliskero palacis."

¹⁰ Sar dogele andro foros, zvičinde pro stražnika, save ačhenas paš e foroskeri brana a phende lenge: "Ipen akana avlam khatar o Aramejiko taboris, ale ode aňi na dikhlam, aňi na šundam ňisave muršes, ča o graja the o somara, save hine mek furt priphandle, a o stani hine avke, sar sas." ¹¹ Avke ola stražnika paš e brana dine te džanel le kraliske andro palacis.

O Izraeliti andro Aramejiko taboris

¹² Sas mek rat, sar oda phende le kraliske. Avke o kralis uštifa pal o hados a phenda peskere služobnikenge: "Phenava tumenge, so kamen amenca te kerel o Aramejčana. On džanen, hoj bokhaluvas, a vašoda gele avri andral o taboris, hoj pes te garuven andro maľi. Gondolinen peske, hoj zalena olen, save džana avri andral o foros, a avke pes dochudena on andro foros."

¹³ Palis jekh leskero služobnikos phenda: "Vašoda bičhav pandže muršen le grajenca, save mek ade hine, a avke šaj pes dodžanas, so pes ačhila. Te predživena, ta predživaha the amen, a te merena, na ela lenge goreder sar amenge, se the avke savore Izraeliti merena."

¹⁴ Avke ola murša peske ile duj maribnaskere verdana le grajenca. O kralis len bičhađa ko Aramejiko taboris a phenda lenge: "Džan a predikhen, so pes ačhila!" ¹⁵ Ole murša džanas pal o Aramejčana dži ko Jordan a dikhle pro drom rozčhide but gada the zbraňi, so andre bari balamuta (zmetkos) pestar odčivkerde, sar denašenas. Palis, sar avle pale ko kralis, phende leske savoro, so dikhle. ¹⁶ Avke o manuša andral e Samarija gele andro Aramejiko taboris a ile odarik savoro. Ačhila pes oda avke, sar phenda o RAJ, hoj trin kili nekfeder aro mola jekh rup a šov kili jačmeňis mola jekh rup.

¹⁷ Palis o Izraeliko kralis thođa ole nekpašeder velitelis, hoj te merkinel paš e brana, ale androda, sar o manuša pes ispidenas andre brana, uštarenas pre leste avke, hoj muľa. Ačhila pes sa avke, sar phenda le Devleskero murš o Elizeus, sar avla ke leste o kralis: ¹⁸ "Tajsja kajso časos andre Samarija pes bikenela trin kili nekfeder aro, abo šov kili jačmeňis vaš o jekh rup."

¹⁹ Akor phenda le kraliskero nekpašeder velitelis le Elizeoske: "Choc o RAJ phundravela o oblaki pro ňebos, kada pes naští ačhel." Avke o Elizeus leske phenda: "Tu

korkoro oda dikheha tire jakhenca, ale na chaha olestar." ²⁰ A the avke pes leske ačhila. O manuša, sar pes ispidenas andre brana, pre leste uštarenas a muľa.

O kralis the e džuvľi andral o Šunem

⁸ O Elizeus phenda la džuvľake andral o Šunem, savake uštađa andral o meriben le čhas: "Ušti a dža caľa tira famelijaha avrether te bešel, bo o RAJ dela andre kadi phuv e bokh, so likerela efa berš." ² Oj kerđa avke, sar lake phenda le Devleskero murš o Elizeus. Odgeľa peskera famelijaha andre Filištíniko phuv a bešelas ode efa berš.

³ Pal o efa berš odi džuvľi pes visarda pale andro Izrael a geľa ko kralis te mangel lestar pale peskero kher the maľa. ⁴ Ipen akor o kralis vakereľas le Gehaziha, le Elizeoskere sluhaha, a phenda leske: "No ča phen mange pal savore zazraki, so kerđa o Elizeus." ⁵ Sar vakereľas o Gehazi le kraliske pal oda, sar o Elizeus uštađa andral o meriben le čhas, ipen akor odi džuvľi geľa ko kralis, hoj lestar te mangel pale peskero kher the e maľa.

Akor o Gehazi phenda le kraliske: "Dikh, rajeja miro the kralina! Ade hiňi odi džuvľi a kade lakero čhavo, saves o Elizeus uštađa andral o meriben." ⁶ Avke o kralis latar phučelas pal oda a oj leske savoro vakereľas.

Palis o kralis ačhađa uradňikos, hoj pes pal oda te postarinel, a phenda leske: "De lake pale savoro, so sas lakero, the e chasna, so anda e maľa akorestar, sar odgeľa andral kadi phuv, dži adadžives."

O Chazael murdarel le Ben-Hadad

⁷ O Aramejiko kralis Ben-Hadad sas nasvalo. Akor o Elizeus geľa andro Damaskus a vareko phenda le kraliske: "Avľa ade le Devleskero murš." ⁸ Akor o kralis phenda le uradňikoske le Chazaeloske: "Le peha vare-savo daros, dža ko Elizeus a mang les, hoj te phučel le RAJESTAR, či avava sasto."

⁹ Avke o Chazael thođa pro saranda (40) tavi nekfeder dragane veci andral o Damaskus a lidžalas oda sar daros le Elizeoske. Sar o Chazael doavľa, geľa anglal leste a phenda leske: "Tiro čhavo, o Ben-Hadad, man bičhađa pal tu, hoj te phučav tutar, či ela sasto."

¹⁰ O Elizeus leske odphenda: "Dža a phen leske, hoj sastola, ale o RAJ mange sikađa, hoj čačes merela." ¹¹ Palis pes pre leste dikhelas dži akor, medik o Chazael pes na ladžalas, a o Elizeus chudľa te rovel.

¹² "Soske rovel miro raj?" phučľa lestar o Chazael. "Bo džanav, savo nalačhipen kereha le Izraelitenge," odphenda leske. "Lengere zorale fori zlabareha, le terne muršen la šablaha murdareha, lengere cikne čhavorenca demeha andre phuv a le khabne džuvľen rozčhingereha."

¹³ "Sar ada me šaj kerav?" phučľa lestar o Chazael. "Se me, tiro služobnikos, som ča rikono."

"O RAJ mange sikađa, hoj tu ačheha kralis andro Aram," odphenda leske o Elizeus.

¹⁴ Palis odgeľa le Elizeostar ke peskero raj. O Ben-Hadad lestar phučľa: "So tuke phendā o Elizeus?"

O Chazael leske odphendā: "Phendā mange, hoj dživeha." ¹⁵ Ale pre aver džives o Chazael iľa renta, cindarda la a thoda le Ben-Hadadoske pro muj a zatasada les.

Avke pal leste ačhiľa o Chazael kralis andro Aram.

O Jehoram kralis andre Judsko

¹⁶ Andro pandžto berš, sar kralinelas andro Izrael o Joram, o čhavo le Achaboskero, ačhiľa kralis andre Judsko o Jehoram, le Jošafatoskero čhavo. ¹⁷ Sas leske tranda the duj berš (32), sar ačhiľa kralis, a andro Jeruzalem kralinelas očno berš. ¹⁸ Kerelas o nalačhipen sar the le Achaboskeri fajta the o Izraelike kraľa, bo leskeri romni sas le Achaboskeri čhaj. Avke kerelas oda, so na sas le RAJESKE pre dzeka. ¹⁹ Ale o RAJ na kamelas te zničinel e Judsko prekal peskero služobnikos David, bo leske phendā, hoj leskere čhavendar mukela furt varekas pro tronos te kralinel †.

²⁰ Sar o Jehoram kralinelas, o manuša andral o Edom pes vzburinde pre Judsko a ačhade prekal peste peskere kralis. ²¹ Palis o Jehoram geľa savore peskere verdanenca andro Cair. Ode pes pašal leste rozačhade o Edomčana pal savore seri, ale ov le velitelēnca pes rači predemade prekal lende a denašle khere. ²² Ole dživesestar e Judsko na likerelas tel peskeri zor o Edom. Andre oda časos pes vzburindā the o foros Libna.

²³ Savore aver veci, so kerđa o Jehoram, hin pisimen andro Zvitkos le Judske Kral'engero. ²⁴ Sar o Jehoram muľa, parunde les andre dadengero hrobos andro Foros le Davidoskero. Pal leste ačhiľa kralis leskero čhavo o Achazijah.

O Achazijah kralis andre Judsko

²⁵ Andro dešudujto (12.) berš, sar kralinelas andro Izrael o Joram, o čhavo le Achaboskero, ačhiľa andre Judsko kralis o Achazijah, le Jehoramoskero čhavo.

²⁶ Sas leske bišuduj (22) berš, sar ačhiľa kralis, a andro Jeruzalem kralinelas jekh berš. Leskeri daj sas e Atalija a lakero dad sas o Izraeliko kralis o Omri. ²⁷ Ov kerelas oda, so na sas le RAJESKE pre dzeka, bo sas andral le Achaboskeri fajta.

²⁸ Jekhvar o Achazijah le Joramoha geľa andro mariben paš o Ramot-Gilead pro Aramejiko kralis Chazael. Ale o Aramejčana les zraňinde ²⁹ a o Joram pes mušindā te visarel pale andro foros Jezreel, hoj te sastol le ranendar, so les sas andro mariben paš o Ramot. Ode les palis geľa te dikhel o Achazijah.

Le Jehu pomakhen vaš o kralis

9 Paloda o Elizeus vičindā ke peste jekhe dženes le prorokengera partijatar a phendā leske: "Pririchtin tut. Le peha e kuči le olejoha a dža andro

† E Hebrejiko čhib: E momeli mukela leskere potomkenge pro furt.

Ramot-Gilead. ² Sar ode aveha, arakh le Jehu, saveske hino dad o Jošafat a papus o Nimši. Vičín les pašal o velitelā a džaha leha odarik het andro paluno kher. ³ Palis leha odi kuči le olejoha, čhiveha leske pro šero a pheneha: 'Avke vakerele o RAJ: Pomakhľom tut vaš o kralis upral o Izrael.' Paloda sigo phundrav o vudar a denaš!"

⁴ Avke oda terno prorokos geľa andro Ramot-Gilead.

⁵ Sar ode dogeľa, ipen akor sas zgele o velitelā le slugađengere a ov phendā: "Ó, velitelina, anav tuke lačo hiros."

"Prekal kaste?" phučľa o Jehu.

"Prekal tu, velitelina!" ov phendā.

⁶ Akor o Jehu uštíľa a geľa leha andre aver kher. Avke oda prorokos leske pro šero čhorda avri o olejos a phendā: "Avke vakerele o RAJ: 'Pomakhľom tut vaš o kralis upral miro narodos, upral o Izrael. ⁷ Zničineha la famelija le Achaboskera, tire rajeskera. Aleha leske visarava pale vaš mire proroka the vaš savore mire služobnika, saven murdarda e Jezabel. ⁸ Calí le Achaboskeri famelija merela – dojekh murš andro Izrael, či oda ela otrokos vaj slobodno. ⁹ Zničinava leskeri famelija, avke sar zničindom o fameliji le kral'engere andral o Izrael – avke sar zničindom la famelija le Jeroboamoskera the la famelija le Baašaskera. ¹⁰ La Jezabel chana o rikone pre maľa paš o Jezreel a na ela parumen.'" Sar o terno prorokos savoro phendā, phundrađa o vudar a denašľa.

¹¹ Palis o Jehu pes visarda pale paš o velitelā a jekh lendar phučľa: "Hin savoro mištes? Soske avľa pal tute oda dilino?"

"Korkore džanen, savo hino oda murš the leskero vakereben," odphendā lenge o Jehu.

¹² "Oda nane čačipen!" phende leske. "Phen amenge čačes, so tuke phendā!"

Avke lenge odphendā: "Kada hin, so mange phendā: 'Kavke vakerele o RAJ: Pomakhľom tut vaš o kralis upral o Izrael.'" "

¹³ Akor on sigo ile peskere gada a thode tel leskere pindre pro garadiči. Zatrubinde pro rohos a vičinenas: "O Jehu hino kralis."

O Jehu mardarel le Joram the le Achazijah

¹⁴⁻¹⁵ Avke o Jehu, le Jošafatoskero čhavo, lidžalas le manušen ke vzbura pro kralis Joram, savo sas andro Jezreel, bo o Joram savore Izraelitenca chraňinenas o Ramot-Gilead anglo Aramejiko kralis Chazael. Ale andro mariben o Aramejčana zraňinde le Joram a visarda pes pale andro foros Jezreel, hoj te sastol le ranendar. Avke o Jehu phendā peskere manušenge: "Te man kamen vaš o kralis, akor merkinen, hoj ňiko te na džal avri andral kada foros a te na phenel andro Jezreel, so kamas te kerel!" ¹⁶ Palis o Jehu bešľa pro maribnaskero verdan a geľa andro Jezreel, bo ode pašľolas o Joram. O Judsko kralis o Achazijah sas ode tiš, bo geľa le Joram te dikhel.

¹⁷ Sar o stražņikos pre veža andro Jezreel zbačinda le Juhu peskere slugadēnca, phendā: "Dikhav te avel varesave slugadēn."

O Joram odphendā: "Sigo bičhav anglal lende muršes pro graj, hoj te phučen lendar, či aven ade andro smirom."

¹⁸ Sar oda murš pro graj dogeļa ke leste, phendā: "O kralīs phučen, či aven ade andro smirom."

"So tuke andre oda!" odphendā o Juhu. "Ačh pal ma."

O stražņikos, savo sas pre veža, phendā: "Oda, kas bičhadan, geļa dži ke lende, ale na avel pale."

¹⁹ Palīs bičhada avre muršes pro graj ke lende. Ov geļa a phendā: "O kralīs phučen, či aven ade andro smirom."

O Juhu odphendā: "So tuke andre oda! Ačh pal ma."

²⁰ O stražņikos pale phendā: "Geļa dži ke lende, ale na avel pale. Oda murš, savo avel pro verdan, hino sar te o Juhu, le Nimšiskero čhavo, bo ča ov avke dilines džal pro verdan."

²¹ Akor o Joram prikazindā: "Pririchtin mange o verdan!" Sar leske ande o verdan, o Joram the o Judsko kralīs Achazijah džanas pre peskere verdana anglo Juhu. Arakhle pes pre le Nabotoskeri maļa. ²² Sar o Joram dikhļa le Juhu, phučļa lestar: "Aves ade andro smirom, Juhu?"

"Sar šaj phenas, hoj hin smirom," odphendā o Juhu, "te mek furt pes kerel o lubipen the čarodejņictvo tira dakero la Jezabelakero?"

²³ Akor o Joram visarda o verdan, chudļa te denašel a zvičinda: "Achazijah, thode amenca avri!"

²⁴ Ale o Juhu iļa o lukos a caļa zoraha livinda o šipos le Joramoske andro dumo avke, hoj leske pregeļa prekal o jilo a ov peļa tele andre peskero verdan.

²⁵ Palīs o Juhu phendā peskere velitelīske le Bidkariske: "Le les a čhiv les pre maļa le Nabotoskeri andral o Jezreel. Leper tuke oda, so šundām, sar džahas duj džene pro verdan pal leskero dad Achab. O RAJ pal leste kavke phendā: ²⁶ 'Se idž dikhļom le Nabatoskero the leskere čhavengero rat, vašoda tuke visarava pale pre kadi maļa.' Avke vakerel o RAJ. Vašoda le les a čhiv pre le Nabotoskeri maļa, avke sar phendā o RAJ."

²⁷ Sar oda dikhļa o Judsko kralīs Achazijah, denašļa pro drom, sar pes džal ko Bet-Haggan. Ale o Juhu pal leste džalas a peskere muršenge phendā: "The les murdaren!" Avke on les zrañinde andro verdan pro drom upre andro Gur, paš o Jibleam. Ale varesar pes o Achazijah dochudļa andro foros Megiddo a ode palīs muļa. ²⁸ Avke leskere služobņika les thode pro verdan a ligende andro Foros le Davidoskero. Ode les parunde paš leskere phure dada.

²⁹ O Achazijah ačhiļa kralīs andre Judsko, sar kralinelas andro Izrael dešujekh (11) berš o Joram, le Achaboskero čhavo.

O Juhu murdarel la Jezabel

³⁰ Sar avelas o Juhu andro Jezreel, e Jezabel pes pal oda dodžanļa. Malinda peske o jakha, sprikerda o bala a dikhelas avri prekal e oblaka. ³¹ Sar o Juhu predžalas

prekal e brana, oj zvičinda: "Anes o smirom? Tu sal vrahos sar o Zimri, savo murdarda peskere kralīs!"

³² O Juhu dikhļa upre pre oblaka a phendā: "Ko hino manca? Ko?" Akor varesave služobņika dikhle tele pre leste. ³³ O Juhu lenge prikazinda: "Čhiven la tele!" Avke la čhide tele. Sar pre late uštarkerenas o graja, lakero rat strikinelas pre fala the pro graja.

³⁴ Akor o Juhu geļa andro palacis, ode chaļa a piļa. Palīs phendā: "Džan a parunen kala prekošļa džuvļa, bo oj hiņi le kraliskeri čhaj." ³⁵ Ale sar o murša gele avri, hoj la te parunen, arakhle ode ča lakeri lebka, o pindre the o vasta. ³⁶ Sar avle pale, phende oda le Jehuoske a ov phendā: "Ačhiļa pes avke, sar phendā o RAJ prekal peskero služobņikos Eliaš andral o Tišbe: 'Pre maļa andro Jezreel o rikone chana la Jezabelakero tēlos ³⁷ a oda, so pal late ačhela, ela rozčhido pre maļa andro Jezreel sar hnojos a imar ņiko na phenela, hoj kadi hiņi e Jezabel.' "

O Juhu murdarel la Achaboskera famelija

10 Andre Samarija sas le Achab eftavardeš (70) čhave. O Juhu pisinda lila a bičhada len le vodcenge, le phurederenge andro foros Samarija the le Achaboskere manušenge, save pes starinenas pal leskere čhave. Andro lila sas pisimen: ² "Ke tumende hine o čhave tumare rajeskere, o graja, o verdana the o zbraņi a san andro zoralo foros le murenca. Soča chudena kada lil, ³ kiden tumenge avri le nekfedere tumare rajeskere čhavendar, savo tumen džanela te lidžal, ačhaven les pro tronos peskere dadeskero a maren pes vaš e famelija tumare rajeskeri."

⁴ Ale on igen darandile a phende peske: "Te o duj kraļa anglal leste na obačhile, sar šaj obačhuvamen?"

⁵ Avke o manuša, save sas ačhade upral o palacis the upral o foros, o phuredera the ola, save pes starinenas pal o Achaboskere čhave, dine te phenel le Jehuoske: "Sam tire služobņika, keraha savoro, so pheneha. ņikas vaš o kralīs na ačhavaha. Ker, sar tu džanes."

⁶ O Juhu lenge pisinda dujto lil: "Te san manca a te man šunena, akor odčhinen o šere tumare rajeskere čhavage a tajsa andre ajso časos anen len ke ma andro Jezreel."

Le kralengere eftavardeš (70) čhave sas le anglune foroskere manušenca, save pes pal lende starinenas. ⁷ Sar oda lil avļa ke lende, on chudle le kraliskere eftavardeš (70) čhaven a savoren murdarde. Lengere šere thode andro košara a bičhade len le Jehuoske andro Jezreel.

⁸ Palīs, sar avļa jekh murš leske te phenel, hoj ande le kraliskere čhavengere šere, phendā: "Thoven len paš e brana pro duj kopi a muken len ode dži tosara."

⁹ Tosara o Juhu geļa avri, ačhiļa paš savore manuša a phendā: "Tumen na san vinovate. Me man vzburiņdom pre miro raj a murdarđom les, ale ko murdarda kale savoren? ¹⁰ Akana šaj džanen, hoj dojekh lav, so phendā o RAJ pre le Achaboskeri famelija, pes the ačhiļa. O RAJ kerda oda, so phendā prekal peskero

služobnikos Eliaš." ¹¹ Palis o Jehu murdarda savoren le Achaboskera famelijatar, save ačhile andro Jezreel, the savore leskere anglune manušen, prijat'elen the rašajen. Nikas lendar na mukla te dživel.

¹² Sar o Jehu džalas andre Samarija le dromeha andro Bet-Eked, so hin o than le pastjerengero, ¹³ arakhla le muršen le Achazijoskera famelijatar. O Achazijah sas Judsko kralis, saves murdarda. Phučla lendar: "Ko san?"

"Sam le Achazijoskeri famelija a džas te dikhel le kraliskere the la kralovnakere čhaven," phende leske.

¹⁴ "Chuden len, ale mek len ma murdaren!" prikazinda o Jehu. Avke sar len chudle, ligende len paš e bari chev paš o Bet-Eked a ode savoren murdarde, saranda the duj (42) muršen. Nikas lendar na mukla te dživel.

¹⁵ Sar odarik odgeľa, arakhla le Rechaboskere čhaha, le Jonadaboha, savo džalas angle leste. O Jehu pozdravinda les a phučla lestar: "Me som tuha, sal the tu čačes manca?"

"He," phenda o Jonadab.

Palis o Jehu phenda: "Akor de mange o vast." Avke leske diňa o vast a scirdla les ke peste pro verdan. ¹⁶ O Jehu leske phenda: "Av manca, hoj te dikhes, sar caľa zoraha služinav le RAJESKE." Avke ov leha džalas pre leskero verdan.

¹⁷ Sar dogele andre Samarija, murdarda ode dojekhes la Achaboskera famelijatar a niko lendar na ačhiľa, avke sar o RAJ prevakerđa prekal o Eliaš.

O Jehu murdarel le Baaloscere manušen

¹⁸ Palis o Jehu diňa te vičinel savore manušen a phenda: "O Achab služinelas le Baaloske frima, ale me leske služinava buter. ¹⁹ Akana vičinen ke mande savore le Baaloscere proroken; dojekhes, ko les lašarel the savore leskere rašajen. Mušinen savore te avel, bo kerav bari obetno hoscina prekal o Baal. Ko na avela, ela murdardo." Kavke lenca o Jehu kamla te thovel avri, hoj te murdarel savoren, save lašarenas le Baal.

²⁰ Mek phenda: "Den avri sentno džives, hoj te lašaren le Baal." Palis avke the kerde ²¹ a diňa oda te phenel avri pal calo Izrael. Avke pes zgele savore, save lašarenas le Baal, a niko lendar na chibalinelas. Gele andro chramos le Baaloscero a pherarde les jekhe agorestar dži ko aver. ²² Akor o Jehu prikazinda oleske, savo merkinelas pro gada: "De o gada olenge, save lašaren le Baal." Avke ov lenge diňa.

²³ Palis geľa o Jehu le Jonadaboha andre le Baaloscero chramos a phenda olenge, save les lašarenas: "Rozdikhen tumen pašal peste a merkinen, hoj ade tumenca te na el niko le RAJESKERE služobnikendar, ale ča ola, save lašaren le Baal." ²⁴ Akor chudle te kerel o obeti the o labarde obeti, ale o Jehu imar rozačhada ochtvardeš (80) muršen avri, savenge phenda: "Ole muršen dav andre tumare vasta. Ko tumendar mukela te denašel varesave muršes, počinela vaš leste peskere dživipnaha."

²⁵ Palis, sar dokerde e labardi obeta, o Jehu prikazinda le stražnikenge the le velitelenge: "Aven andre,

murdaren len! Niko lendar te na denašel!" Sar len murdarde le šabl'enca, čhivkerde len avri. Palis odligende khatar o andruno than, andral le Baaloscero chramos, ²⁶ o sentne slupi a zlabarde len. ²⁷ Čhide tele le Baaloscero sentno slupos the leskero chramos a kerde lestar budaris, kaj phiren dži adadžives.

²⁸ Avke o Jehu zaačhada o lašariben le Baaloscero andro Izrael. ²⁹ Ale o Jehu na omukelas o bini, so kerđa anglal leste o Jeroboam, le Nebatoskero čhavo, savo lidžalas le Izrael, hoj te lašaren le somnakune gumumňoren andro Betel the andro Dan.

³⁰ O RAJ phenda le Jehuoske: "Tu kerđal oda, so hin mange pre dzeka, bo kerđal la Achaboskera famelijake savoro, so kamavas, vašoda tire čhave bešena dži andro štarto pokoleňje pro Izraeliko tronos." ³¹ Ale o Jehu na merkinelas pre oda, hoj te dolikerel cale peskere jileha o zakonos, so diňa avri o RAJ, o Del le Izraeloscero. Na odvisarda pes le nalačhipnastar le Jeroboamoskere, savo ligenda le Izraeliten andro bini.

O Jehu merel

³² Andre oda časos o RAJ chudla te odlel le Izraeliten dar e phuv. O Chazael n'erinelas (zvitazinelas) upral o Izraeloscere phuva ³³ pro vichodos le Jordanostar a le forostar Aroer paš o paňi Arnon zaila calo Gilead the Bašan, kaj bešenas o kmeňi Gad, Ruben the Menašše.

³⁴ Savore aver veci, so kerđa o Jehu, the leskere n'indipena (vitaztva), hin pisimen andro Zvitkos le Izraelike Kralengero.

³⁵ Sar o Jehu muľa, parunde les paš leskere phure da andre Samarija. Pal leste ačhiľa kralis leskero čhavo o Joachaz. ³⁶ O Jehu kralinelas upral o Izrael andre Samarija bišuochto (28) berš.

E Jehošeba garuvel le Joaš

11 Sar e Atalija, le Achazijoskeri daj, dikhla, hoj lakero čhavo hino murdardo, geľa a diňa te murdarel savore le kraliskere čhaven. ² Ča o Joaš, o čhavo le Achazijoskero, na sas murdardo. E Jehošeba sas čhaj le kraliskeri le Joramoskeri a pheň le Achazijoskeri. Oj ila le Joaš het pašal le kraliskere čhave the ola džuvla, save les delas te pijel o kolin. Anda len a garuđa andro kher pro soviben andro Chramos angle Atalija, hoj les te na murdarel. ³ E Jehošeba les šov berš garuvelas andro Chramos, medik e Atalija kralinelas upral e Judsko phuv.

O Joaš hino ačhado kraliske

⁴ Andro eftato berš o rašaj o Jehojada vičinda ke peste le velitel'el upral o šel, le velitel'el upral le kraliskere stražnika the le velitel'el upral o palaciskere stražnika. Iľa len andro Chramos. Ode lenca phandla e zmluva a phenda, hoj te len vera. Palis lenge sikađa le kraliskere čhas le Joaš ⁵ a prikazinda lenge: "Rozulaven olen, save pro Šabbat merkinena pro trin partiji. Jekh partija merkinela paš le kraliskero palacis, ⁶ dujto paš e brana Sur a trito paš e brana pal o kher, kaj soven o

stražnika. ⁷ Ola stražnika, saven pro Šabbat nane služba, mušinena te merkinel pro Chramos the pro kralis. ⁸ Savore likerena andro vasta o zbrañi a rozačhavana pes pašal o kralis. Dojekh, ko kamlahas pes te dochudel ko kralis, mi merel. Džan le kraliha všadzik, kaj džala."

⁹ O velitel'a upral o šel kerde sa avke, sar lenge phenda o Jehojada. Dojekh iľa peskere muršen a savore avle ke leste, či sas len pro Šabbat služba vaj na. ¹⁰ O Jehojada diña le velitel'enge o kopiji the o štiti le kraliskere Davidoskere, so sas andro Chramos. ¹¹ O stražnika pes rozačhade le zbrañenca andro vast pašal o oltaris the kralis a pašal o Chramos: le juhostar dži pro severos.

¹² Palis o Jehojada and'a avri le Joaš, thođa leske pro šero e koruna a dine leske e kraliskeri zmluva. Pomakhle les a ačhade vaš o kralis. Kl'apkinenas a vičinenas anglal leste: "Mi dživel o kralis!"

La Atalija murdaren

¹³ Sar e Atalija šund'a e vika le stražnikendar the le manušendar, geľa pal lende andro Chramos. ¹⁴ Sar ode doavľa, dikhľa ode te ačhel le neve kralis paš o slupos, kaj ačhelas furt o kralis. Pašal leste sas o velitel'a the ola, save trubinen, a savore manuša radisaľonas a trubinenas pro rohi. Akor peske e Atalija rozčhingerđa o gada a zvičinda: "Zradzinde man! Zradzinde man!"

¹⁵ O Jehojada na kamľa te murdarel la Atalija andro Chramos a vašoda phenda le velitel'enge: "Len la, lidžan avri le stražnikendar a murdaren dojekhes, ko la kamela te zachrañinel." ¹⁶ Sar la lidžanas prekal e brana, khatar o graja džan andro palacis, ode la murdarde.

O Jehojada pale phandel e zmluva le RAJEHA

¹⁷ O Jehojada kerđa, hoj o kralis the o manuša te phanden le RAJEHA zmluva, hoj ena leskere manuša. A mek phandľa e zmluva maškar o kralis the manuša.

¹⁸ Androda savore manuša andral e Judsko gele andre le Baaloskero chramos a čhide les tele. Leskere oltara the o modli phagerde a leskere rašas le Mattan anglo oltara murdarde.

Palis o Jehojada ačhađa stražniken, hoj te merkinen pro Chramos. ¹⁹ Iľa le velitel'en upral o šel, le kraliskere stražniken the le stražniken andro palacis the savore manušen a jekhetane odligende le kralis andral o Chramos. Džanas leha andro palacis prekal e Stražnikengeri brana. Palis o Joaš bešľa pre peskero than, pro tronos. ²⁰ Savore manuša radisaľonas a andro foros sas smirom, bo e Atalija sas murdardi andro palacis.

O Joaš ačhel kralis

12 Le Joašoske sas efta berš, sar ačhiľa kralis. ² Ačhiľa kralis, sar o Jehu kralinelas upral o Izrael efta berš, a andro Jeruzalem kralinelas saranda (40) berš. Leskeri daj e Cibja sas andral e Beer-Šeba. ³ O

Joaš pal calo peskero dživipen kerelas oda, so sas le RAJESKE pre dzeka, bo o rašaj o Jehojada les sikavelas.

⁴ Ale o Joaš na zñičinda le modlengere thana pro lašariben a o manuša ode dureder obetinas a labarenas o kadidlos.

O love pro Chramos

⁵ O Joaš phenda le rašajenge: "Kiden avri o love le sentne darendar, so sas dine prekal o Chramos: o love, so mušinas te del, the ola, so anenas jilestar pro Chramos. ⁶ Dojekh rašaj mi anel o love, so iľa olendar, kaske služinelas, hoj pes lenca te oprikerel o Chramos všadzik, kaj kempel."

⁷ Ale aňi andro bišutrito (23.) berš, sar kralinelas o Joaš, o rašaja mek na oprikerde o Chramos. ⁸ Avke o kralis Joaš ke peste vičinda le anglune rašas Jehojada the savore rašajen a phučľa lendar: "Soske na oprikeren o Chramos? Akanastar o love na mukena prekal peste, ale dena len pro Chramos, hoj pes te oprikerel." ⁹ O rašaja pre oda priačhile, hoj imar na kidena avri o love le manušendar a hoj na oprikerena korkore o Chramos.

¹⁰ Palis o Jehojada iľa jekh truhla, kerđa upral chev a thođa la paš o oltaris pre čači (pravo) sera, sar pes avel andro Chramos. Avke o rašaja, save merkinenas paš o vudar, thovkerenas andre o love, so o manuša anenas andro Chramos. ¹¹ Sar imar dikhenas, hoj e truhla hiñi pherardi le lovenca, avelas le kraliskero pisaris le bare rašaha a čhivenas andral e truhla avri o love, zgenenas len a thode len andre gone. ¹² Palis ola zgende love sas dine andro vasta le muršenge, save sas upral e buči pro Chramos. Avke on počinenas le muršen, save kerenas e buči pro Chramos: le tésaren, le muraren, ¹³ olen, ko čhingerenas o bara the savoro, so kampelas te oprikerel pro Chramos. On mek vaš ola love cinenas o kašta, oprikerde bara the savore aver veci, so kampelas, hoj te oprikeren o Chramos.

¹⁴ Ale ole lovendar, so sas avrikidle andro Chramos, pes na diña te kerel o rupune čare, čhura, kuča the trubi aňi aver rupune abo somnakune veci. ¹⁵ Ola love sas dine le muršenge, save lenca oprikerenas o Chramos. ¹⁶ Ole muršendar, savenge sas dine o love, pes na užarelas, hoj te presikaven, kaj thode o love, bo sas pačivale a počinenas le manušen, save kerenas e buči pro Chramos. ¹⁷ O love, so o manuša anenas sar obeta vaš o binos, na sas prekal o Chramos, ale ačhenas le rašajenge.

O Joaš merel

¹⁸ Akor geľa o Aramejiko kralis o Chazael pro mariben pro foros Gat a zaiľa les. Palis kamľa te džal the pro Jeruzalem. ¹⁹ Avke o kralis o Joaš skidña savore sentne dari, so obetinde leskere phure dada, o Judske kraľa o Jošafat, Jehoram the Achazijah. Iľa the peskere sentne dari the o somnakaj, so sas andro pokladñici, andro Chramos the andro palacis, a bičhađa oda le Chazaeloske. Palis ov odgeľa andral o Jeruzalem.

²⁰ Savore aver veci, so kerda o Joaš, hin pisimen andro Zvitkos le Judske Kral'engero.

²¹ Palis leskere služobnika pes vzburiinde pro Joaš a murdarde les paš o Bet-Millo, pro drom, sar pes džal andro gav Silla. ²² Murdarde les leskere služobnika o Jozakar, la Šimeataker o čhavo, the o Jehozabad, le Šomeroskero čhavo. Sar muľa, parunde les paš leskere phure dada andro Foros le Davidoskero. Pal leste ačhiľa kralis leskero čhavo o Amacijah.

O Joachaz kralis upral o Izrael

13 Sar imar kralinelas andre Judsko biš the trin (23) berš o Joaš, le Achazjoskero čhavo, andre Samarija ačhiľa kralis upral o Izrael o Joachaz, le Jehuoskero čhavo. Ov kralinelas dešuefta (17) berš. ² Keralas oda, so na sas le RAJESKE pre dzeka, a na preačhelas te kerel ola bini, so kerelas o Jeroboam, le Nebatoskero čhavo, savo andä le Izrael andro binos. ³ Akor o RAJ sas choľamen pro Izraeliti, a vašoda len diňa pro but berš andro vasta le Aramejike kraliske le Chazaeloske the leskere čhaske le Ben-Hadadoske.

⁴ Ale sar pes o Joachaz modľinelas ko RAJ, ov les šunda avri, bo dikhľa, sar o Aramejiko kralis le Izraeliten trapinel. ⁵ Akor o RAJ diňa le Izraeliten manušes, savo len iľa avri andral o vasta le Aramejike kralistar. Palis šaj bešle andre peskere khera andro smirom avke sar angloda. ⁶ Ale na preačhile te kerel oda binos, andre savo le Izrael andä o Jeroboam, a andre Samarija mek furt ačhelas o slupos la Ašerakero.

⁷ O Aramejiko kralis zničindä e Izraeloskeri armada a uštarelas pre lende avke sar pro prachos, sar pes marel avri o div. O Chazael mukľa le Joachazoske le Izraeloskera armadatar ča penda (50) muršen pro graja, deš maribnaskere verdana the deš ezera (10 000) slugaden.

⁸ Savore aver veci, so o Joachaz kerda, the leskere ňerindipena (vitäztva), hin pisimen andro Zvitkos le Izraelike Kral'engero. ⁹ Sar o Joachaz muľa, parunde les paš leskere phure dada andro foros Samarija. Pal leste ačhiľa kralis leskero čhavo o Jehoaš.

O Jehoaš kralis upral o Izrael

¹⁰ Sar imar kralinelas tranda the efta (37) berš andre Judsko o Joaš, andro foros Samarija ačhiľa kralis upral o Izrael o Jehoaš, le Joachazoskero čhavo, a kralinelas ode dešušov (16) berš. ¹¹ Ov kerelas oda, so na sas le RAJESKE pre dzeka, a na preačhelas te kerel ola bini, so kerelas o Jeroboam, le Nebatoskero čhavo, savo andä le Izraeliten andro binos.

¹² Savore aver veci, so o Joaš kerda, the leskere ňerindipen upral o Judsko kralis, hin pisimen andro Zvitkos le Izraelike Kral'engero. ¹³ Sar o Jehoaš muľa, parunde les andre Samarija paš leskere phure dada a pal leste ačhiľa kralis upral o Izrael leskero čhavo o Jarobeam.

O Elizeus merel

¹⁴ Sar o Elizeus sas nasvalo pro meriben, avľa ke leste o Izraeliko kralis o Jehoaš. Zarundä angle leste a phendä: "Dado miro, dado miro! O Izraelike verdana the leskere murša pro graja!"

¹⁵ "Le o lukos the o šipi!" phendä leske o Elizeus. Avke len ov iľa. ¹⁶⁻¹⁷ A mek leske phendä: "Phundrav e oblaka, so hiňi pro vichodos!" Ov la phundrađa a o Elizeus leske phendä: "Nacirde o lukos!" Sar oda kerda, o Elizeus peskere vasta thoda pre leskere a phendä: "Livin o šipos!" Sar livinda, phendä: "Tu sal le RAJESKERO šipos, saveha ňerineľa (zvitäzinela) upral o Aram, a zničineha cali lengeri armada paš o Afek."

¹⁸ A mek phendä: "Le ola šipi!" Sar len o Jehoaš iľa, prikazinda leske: "Dem lenca andre phuv!" Avke ov lenca demađa trival a preačhiľa. ¹⁹ Akor o Elizeus pre leste cholisalila a phendä: "Majindaľ lenca te demel pandžvar, abo šovar! Avke zničindaľas la Aramejika armada, ale akana ňerineha upral lende ča trival."

²⁰ Palis o Elizeus muľa a parunde les.

Sako berš jarone o zbujnika andral o Moab džanas andro Izrael. ²¹ Jekhvar, sar o Izraeliti parunenas vare-save muršes, dikhle, hoj aven o zbujnika andral o Moab. Vašoda čhide les andre le Elizeoskero hrobos a denašle odarik. Sar oda telos peľa pre le Elizeoskere kokala, oda mulo obdžidila a uštila pro pindre.

O Izrael lel pale o fori le Aramejčanendar

²² Medik o Joachaz kralinelas, o Aramejiko kralis Chazael na preačhelas te trapinel le Izraeliten. ²³ Ale le RAJESKE sas pharo pre lende. Presikađa lenge o lačhejileskeriben a visarda pes pale ke lende angle odi zmluva, so phandľa le Abrahamoha, Izakoha the Jakoboha. Dži adadžives len na kamľa te zničinel aňi te odčhivel pestar het.

²⁴ Sar muľa o Aramejiko kralis o Chazael, ačhiľa pal leste kralis leskero čhavo o Ben-Hadad. ²⁵ Avke o Jehoaš pale iľa o fori le Ben-Hadadostar, so o Chazael andro mariben iľa leskere dadestar le Joachazostar. O Jehoaš upral leste trival ňerinda, avke pale dochudľa o Izraelike fori.

O Amacijah kralis upral e Judsko

14 Sar andro Izrael kralinelas dujto berš o Jehoaš, le Joachazoskero čhavo, ačhiľa kralis andre Judsko o Amacijah, le Joašoskero čhavo. ² Sas leske bišupandž (25) berš, sar ačhiľa kralis, a andro Jeruzalem kralinelas bišueňa (29) berš. Leskeri daj e Joaddan sas andral o Jeruzalem. ³ O Amacijah kerelas oda, so sas le RAJESKE pre dzeka, ale na sas ajso sar leskero prapapus o David. Savoro kerelas avke sar leskero dad o Joaš, ⁴ ale o thana, kaj lašarenas le modlen, na zničinda a o manuša pre lende mek furt obetinenas a labarenas o kadidlos.

⁵ Sar imar o krališagos sas zorales andre leskere vasta, diňa te murdarel peskere služobniken, save mur-

darde leskere dades. ⁶ Ale lengere čhaven na diña te murdarel, bo o RAJ prikazinda andro Mojžišoskero zakonos: "O dada našti en murdarde vaš o binos, so kerde lengere čhave, añi o čhave vaš o dada, ale do-jekh mi merel vaš peskero binos."

⁷ O Amacijah andre Londi Dolina murdarda deš ezera (10 000) Edomike slugaden. Andro mariben zaila o foros Sela. Palis ole foros diña nevo nav Jokteel a dži adadžives pes avke vičinel.

⁸ Andre jekh džives o Amacijah bičhada peskere muršen, hoj te phenen le Izraelike kraliske Jehoašoske: "Av ke mande! Dikhaha, ko hin amendar zoraleder!"

⁹ Ale o Jehoaš leske odphenda: "O kandro andro Libanon diña te phenel le zorale Libanoñike cedroske: 'De tira čha mire čhaske romñake.' A ipen akor e dzivo džvirina avla pal o verchos a uštarda pro kandro!"

¹⁰ Gondolines tuke, hoj sal zoralo, bo ñerinda (zvitaz-indal) upral o Edom. Oslavin tiro ñerindipen, ale ačhuv khere! Soske tut thodalas andre oda? Se pereha tu the e Judsko tuha."

¹¹ Ale o Judsko kralis Amacijah les na šunda, vašoda o Izraeliko kralis Jehoaš geľa pre les pro mariben paš o Bet-Šemeš andre Judsko. ¹² O Izrael ñerinda upral e Judsko a savore lengere slugada denašenas khere.

¹³ Avke paš o Bet-Šemeš o Jehoaš zaila le Judske kralis Amacijah, o čhavo le Joašoskero, o čhavo le Achazijoskero. Palis geľa andro Jeruzalem a čhida tele o foroskere muri la Efrajimika Branatar dži paš e Rohoskeri Brana, ajse duj šel (200) metri. ¹⁴ Iľa odarik savoro rup, o somnakaj the savore dragane veci, so arakhle andro Chramos the andre palaciskere pokladni. Avke odfigenda a iľa pale andre Samarija the varesave manušen, save likerelas ke peste.

¹⁵ Savore aver veci, so kerda o Jehoaš, leskero ñerindipena the oda, sar pes marelas le Judske kraliha, hin pisimen andro Zvitkos le Izraelike Kralengero.

¹⁶ Sar muľa o Jehoaš, parunde les andro foros Samarija paš o Izraelike krala. Pal leste ačhiľa kralis leskero čhavo o Jarobeam.

Le Amacijah murdaren

¹⁷ O Judsko kralis Amacijah, le Joašoskero čhavo, dživelas mek dešupandž (15) berš, sar muľa o Izraeliko kralis Jehoaš. ¹⁸ Savore aver veci, so kerda o Amacijah, hin pisimen andro Zvitkos le Judske Kralengero.

¹⁹ Sar pes pre leste andro Jeruzalem počoral dothode, hoj les murdarena, ov denašľa andro Lachiš, ale bičhade pal leste muršen a ode les murdarde. ²⁰ Avke les odarik ande andro Jeruzalem pro graja a parunde les andro Foros le Davidoskero paš leskere phure dada.

²¹ Akor savore manuša andral e Judsko ile le Azarijah † a ačhade les vaš o kralis pal leskero dad Amacijah. Sas leske ča dešušov (16) berš. ²² Sar muľa leskero dad, o Azarijah iľa pale o foros Elat a oprikerda les.

O Jarobeam kralis upral o Izrael

²³ Sar o Amacijah, le Joašoskero čhavo, kralinelas upral e Judsko dešupandž berš, ačhiľa kralis upral o Izrael o Jarobeam, le Jehoašoskero čhavo, a kralinelas andro foros Samarija saranda the jekh (41) berš. ²⁴ Ov kerelas oda, so na sas le RAJESKE pre dzeka, a na preačhelas te kerel ola bini, so kerelas o Jeroboam, le Nebatoskero čhavo, savo andľa le Izrael andro binos.

²⁵ O Jarobeam dochudľa prekal o Izrael pale o phuva le Lebo-Chamatostar dži paš o moros andre Araba ††. Oda sas avke, sar o RAJ, o Del le Izraeloskero, phenda prekal peskero služobnikos the prorokos Jonaš andral o Gat-Chefer, savo sas le Amittajoskero čhavo.

²⁶ O RAJ dikhľa, sar savore Izraeliti sas andro baro pharipen, či otroka vaj o slobodne. Na sas ode ñiko, ko len cirdñahas avri andral o pharipen. ²⁷ Ale o RAJ na kamľa te khosel le Izraeliten pal kadi phuv, ale zachrañinda len prekal o kralis Jarobeam.

²⁸ Savore aver veci, so kerda o Jarobeam, leskere ñerindipena (vitaztva) the oda, sar pes marelas a sar dochudľa pale o fori Damaskus the o Chatat prekal o Izrael, hin pisimen andro Zvitkos le Izraelike Kralengero. ²⁹ Sar o Jarobeam muľa, parunde les paš leskere phure dada, paš o Izraelike krala. Pal leste ačhiľa kralis leskero čhavo o Zecharijah.

O Azarijah kralis andre Judsko

15 Andro bišueftato (27.) berš, sar kralinelas o Jarobeam andro Izrael, andre Judsko ačhiľa kralis o Azarijah ‡, o čhavo le Amacijoskero. ² Sas leske dešušov (16) berš, sar ačhiľa kralis, a penda the duj (52) berš kralinelas andro Jeruzalem. Leskeri daj sas e Jecholija andral o Jeruzalem. ³ O Azarijah kerelas oda, so sas le RAJESKE pre dzeka, avke sar leskero dad o Amacijah. ⁴ Ale o thana, kaj lašarenas le modlen, na sas zñičimen, ale o manuša pre lende mek furt obetinenas a labarenas o kađidlos.

⁵ Palis o RAJ le Azarijah avke dukhada le nasvalibnah, hoj sas malomocno dži andre oda džives, medik na muľa. Ov bešelasa korkoro andre jekh kher, vašoda leskero čhavo o Jotam sas ačhado upral o palacis a lidžalas le manušen andre odi phuv.

⁶ Savore aver veci, so kerda o Azarijah, hin pisimen andro Zvitkos le Judske Kralengero. ⁷ Sar o Azarijah muľa, parunde les paš leskere phure dada andro Foros le Davidoskero. Pal leste ačhiľa kralis leskero čhavo o Jotam.

O Zechariah kralis andro Izrael

⁸ Sar kralinelas andre Judsko o Azarijah tranda the očno (38) berš, ačhiľa kralis upral o Izrael o Zecharijah, o čhavo le Jarobeamoskero. Ov kralinelas andro foros Samarija šov čhon. ⁹ Kerelas oda, so na sas le RAJESKE pre dzeka, avke sar the leskere dada a na

† O kralis Azarijah hin the o kralis Uzziyah.

†† Oda hin adadžives o Mulo Moros. ‡ O kralis Azarijah hin the o kralis Uzziyah.

preačhelas te kerel ola bini, so kerelas o Jeroboam, le Nebatoskero čhavo, savo andā le Izrael andro binos.

¹⁰ O Šallum, le Jabešoskero čhavo, pes počoral dothoda pro Zechariah a murdarda les anglo manuša. Avke ov pal leste ačhiľa kralis. ¹¹ Savore aver veci, so kerdā o Zechariah, hin pisimen andro Zvitkos le Izraelike Kralengero. ¹² Avke le RAJESKERO lav, so phenda pal o kralis Jehu, pes the ačhiľa: "Tire čhave bešena pro Izraeliko tronos dži andro štarto pokoleñje."

O Izraelike kraľa Šallum the Menachem

¹³ Sar andre Judsko kralinelas o Uzziah tranda the eña (39) berš, andro Izrael ačhiľa kralis o Šallum, le Jabešoskero čhavo, a kralinelas andro foros Samarija jekh čhon. ¹⁴ Palis o Menachem, le Gadioskero čhavo, geľa andral e Tirca andre Samarija, murdarda le Šallum a ačhiľa pal leste kralis.

¹⁵ Savore aver veci, so kerdā o Šallum, the sar kerdā e vzbura, hin pisimen andro Zvitkos le Izraelike Kralengero.

¹⁶ Andre oda časos, sar o Menachem džalas andral e Tirca, zničinda o foros Tappuach the o gava pašal, bo ola manuša na kamle te phundravel o foroskere brani. Avke murdarda savoren andro Tappuach a le khabne džuvljen rozčhingerđa.

¹⁷ Sar andre Judsko kralinelas o Uzziah tranda the eña (39) berš, andro Izrael ačhiľa kralis o Menachem, le Gadioskero čhavo. Kralinelas deš berš andro foros Samarija. ¹⁸ Ov kerelas oda, so na sas le RAJESKE pre dzeka, a medik kralinelas, na preačhelas te kerel ola bini, so kerelas o Jeroboam, le Nebatoskero čhavo, savo andā le Izrael andro binos.

¹⁹ Sar avľa andro Izrael o Asiriko kralis Tiglat-Pileser †, o Menachem les diña tranda the štar (34) toni rup, hoj leske te pomožinel zoraleder te dolikerel o krališagos. ²⁰ Avke o Menachem ispidelas pro barvale Izraeliti, hoj dojekh lendar te počinel penda (50) rupune, a diña oda le Asirike kraliske. Palis o Asiriko kralis geľa het andral odi phuv.

²¹ Savore aver veci, so kerdā o Menachem, hin pisimen andro Zvitkos le Izraelike Kralengero. ²² Sar o Menachem muľa, ačhiľa kralis leskero čhavo o Pekachiah.

O Pekachiah kralis andro Izrael

²³ Sar andre Judsko kralinelas penda (50) berš o Azarijah, andre Samarija pro duj berš ačhiľa kralis upral o Izrael o Pekachiah, le Menachemoskero čhavo. ²⁴ Ov kerelas oda, so na sas le RAJESKE pre dzeka, avke sar the leskere dada a na preačhelas te kerel ola bini, so kerelas o Jeroboam, le Nebatoskero čhavo, savo andā le Izrael andro binos. ²⁵ O Pekach, le Remaljoskero čhavo, pes počoral dothoda le penda (50) muršenca andral o Gilead pro Pekachiah a murdarda

les †† andre palaciskeri veža andre Samarija. Avke pal leste ačhiľa kralis.

²⁶ Savore aver veci, so o Pekachiah kerdā, hin pisimen andro Zvitkos le Izraelike Kralengero.

O Pekach kralis andro Izrael

²⁷ Sar imar andre Judsko kralinelas o Azarijah penda the duj (52) berš, andro Izrael ačhiľa kralis o Pekach, le Remaljoskero čhavo. Ov kralinelas andro foros Samarija biš (20) berš. ²⁸ Kerelas oda, so na sas le RAJESKE pre dzeka, a na preačhelas te kerel ola bini, so kerelas o Jeroboam, le Nebatoskero čhavo, savo andā le Izrael andro binos.

²⁹ Sar sas andro Izrael kralis o Pekach, avľa ode o Asiriko kralis Tiglat-Pileser a zaiľa peske o fori Ijon, Abel-Bet-Maacha, Janoach, Kedeš the Chacor a o phuva Gilead the Galileja, oda hin cali phuv Naftali. A le manušen odarik odligenda andre Asirija. ³⁰ Andro bišto (20.) berš, sar kralinelas le Uzzioskero čhavo Jotam, le Eloskero čhavo o Hošea pes vzburinda pro Pekach a murdarda les. Sar o Hošea les murdarda, ačhiľa pal leste kralis.

³¹ Savore aver veci, so kerdā o Pekach, hin pisimen andro Zvitkos le Izraelike Kralengero.

O Jotam kralis andre Judsko

³² Sar andro Izrael kralinelas o Pekach, le Remaljoskero čhavo, dujto berš, andre Judsko ačhiľa kralis o Jotam, le Uzzioskero čhavo. ³³ Sas leske bišupandž (25) berš, sar ačhiľa kralis, a andro Jeruzalem kralinelas dešušov berš. Leskeri daj sas e Jeruša, le Cadokoskeri čhaj. ³⁴ O Jotam kerelas oda, so sas le RAJESKE pre dzeka, avke sar leskero dad o Uzziah. ³⁵ Ale o thana, kaj lašarenas le modlen, na sas zničimen a o manuša pre lende mek furt obetinenas a labarenas o kadidlos. O Jotam ačhada the e Upruñi Brana andro Chramos.

³⁶ Savore aver veci, so kerdā o Jotam, hin pisimen andro Zvitkos le Judske Kralengero. ³⁷ Andre ola dživesa o RAJ ešebnovar (peršovar) bičhada pre Judsko le Aramejike kralis Recin the le Izraelike kralis Pekach. ³⁸ Sar o Jotam muľa, parunde les paš leskere phure dada andro Foros le Davidoskero. Pal leste ačhiľa kralis o Achaz.

O Achaz kralis upral o Judsko

16 Sar andro Izrael o Pekach, le Remaljoskero čhavo, kralinelas dešueftato (17.) berš, andre Judsko ačhiľa kralis o Achaz, le Jotamoskero čhavo. ² Le Achazoske sas biš (20) berš, sar ačhiľa kralis, a andro Jeruzalem kralinelas dešušov (16) berš. O Achaz na kerelas avke sar leskero prapapus o David, ale kerelas oda, so na sas le RAJESKE pre dzeka. ³ Bo kerelas avke sar o Izraelike kraľa anglal leste. Peskere čhas zlabarda sar obeta le modlenge avke, sar kerenas o narodi, saven o RAJ tradña avri anglal o Izraeliti. ⁴ O kadidlos

† Oda hin o Pul.

†† E Hebrejiko čhib: the le Argoboha the le Arjehoha.

obetinelas tel dojekh zeleno stromos, pro brehi the pro uče thana, kaj lašarenas le modlen.

⁵ Palis o Aramejiko kralis Recin le Izraelike kraliha Pekachoha gele pro mariben pro Jeruzalem a rozačhade pes pašal leste, ale na domarde les. ⁶ Andre oda časos o Aramejiko kralis peske zaiła o foros Elat a le Judske manušen odarik tradña het. Palis avle o Edomčana andro Elat te bešel a hine ode dži adadžives.

⁷ Akor o Achaz bičhada muršen ko Asiriko kralis Tiglat-Pileser, hoj leske te phenen: "Me som tiro čhavo the služobňikos. Av, zachrañin man andral o vasta le Izraelike the Aramejike kralendar, save pes pre ma ačhade." ⁸ O Achaz iła o somnakaj the o rup, so sas andro Chramos the andre palaciskere pokladñi, a bičhada oda sar daros le Asirike kraliske. ⁹ O Asiriko kralis les šunđa, geła peskere slugadenca pro Damaskus a domardá les. Le manušen zaiła, thođa len andro foros Kir a le kralis Recin murdarda.

¹⁰ Sar o Achaz geła andro Damaskus, hoj pes te zdžal le Asirike kraliha, dikhła ode oltaris. Akor bičhada le rašaske le Urijoske obrazis, sar dičhol avri oda oltaris a the sar hino ačhado. ¹¹ Avke o Urijah ačhada ajso oltaris sar oda, so sas andro Damaskus a pal savo leske bičhada o Achaz obrazis. O Urijah les dokerđa mek anglođa, sar o Achaz avła khatar o Damaskus. ¹² Sar avła pale a dikhła oda oltaris, geła paše a obetinda ode ¹³ e labardi the chabeneskeri obeta. Čhorda pre leste avri e moľakeri obeta a pokropinda o oltaris le rateha le smiromskere obetendar. ¹⁴ Avke o bronzuno oltaris, so sas maškar o nevo oltaris the o Chramos, odligenda pre severno sera le neve oltaristar.

¹⁵ Palis o kralis Achaz prikazinda le Urijoske: "Pre oda baro oltaris obetineha e tosaraskeri labardi obeta, e račakeri chabeneskeri obeta the e labardi obeta le kraliskeri la chabeneskera obetaha. Obetineha ode the o labarde obeti, so anena o manuša, o chabeneskere obeti the o moľakere obeti a savoro rat le labarde the avre obetendar čhor avri pro baro oltaris. O bronzuno oltaris mange ela pre oda, te pes vareso kamava te dodžanel." ¹⁶ O rašaj Urijah kerđa sa avke, sar leske prikazinda o kralis Achaz.

¹⁷ Palis o Achaz rozkidła o bronzune verdanora le nadrženca, so sas paš o Chramos. Iła tele o nadrži the o blachi pal lengere seri. E kanta le pañeha, so sas thodi upral o bronzune biki, odlila a thođa pre baruñi dlažba. ¹⁸ The o stanos, kaj pro Šabbat lašarenas le RAJES, iła tele a o vudar, khatar džanas o kraľa andro Chramos, zaphandła. Ov oda savoro kerelas, hoj te el pre dzeka le Asirike kraliske.

¹⁹ Savore aver veci, so kerđa o Achaz, hin pisimen andro Zvitkos le Judske Kralengero. ²⁰ Sar o Achaz muľa, parunde les paš leskere phure dada andro Foros le Davidoskero a pal leste ačhila kralis leskero čhavo o Chizkija.

O Hošea, posledno Izraeliko kralis

17 Andre dešudujto (12.) berš, sar andre Judsko kralinelas o Achaz, upral o Izrael ačhila kralis o Hošea, le Eloskero čhavo. Ov kralinelas andro foros Samarija eña berš. ² Kerelas nalačhipen anglo RAJ, ale na avke sar o Izraelike kraľa, save sas anglal leste.

³ Palis o Asiriko kralis Šalmaneser geła pro mariben pro Hošea. O Hošea pes leske zdiña a mušinelas leske te počinkerel o dañe. ⁴ Ale o Šalmaneser pes dodžanła, hoj o Hošea bičhada le muršen andro Egipt ko kralis So †. A dodžanła pes the oda, hoj leske preačhila te počinkerel o dañe, avke sar oda kerelas sako berš. Avke les diña o Šalmaneser te chudel a te phandel andre bertena.

E Samarija zničimen a o Izraeliti odligende andre Asirija

⁵ Palis o Asiriko kralis džalas pre cali Izraeloskeri phuv. Sar avła anglo foros Samarija, rozačhada pes pašal late trin berš. ⁶ Andro eñato berš, sar kralinelas o Hošea, o Asiriko kralis domarda e Samarija. Zaiła le Izraeliten a odligenda len andre Asirija. Thođa len te bešel andro foros Chalach, andro Chabor paš o pañi Gozan the andro Medske fori.

⁷ Kada pes ačhila vašoda, hoj o Izraeliti kerenas binos anglo RAJ, peskero Del, savo len iła avri andral o Egipt the andral o vasta le Faraonostar. O Izraeliti lašarenas avre devlen ⁸ a kerenas avke sar o narodi, saven o RAJ tradła avri anglal lende, a likerenas ola tradiciji, so chudle te kerel o Izraelike kraľa. ⁹ O Izraeliti kerenas počoral ajse veci, so na sas pre dzeka le RAJESKE, lengere Devleske. Ačhavenas o modlengere thana pro lašariben andre savore peskere fori, le cikne vežendar dži ko baro foros le zorale murenca. ¹⁰ Pre dojekh učo brehos the tel dojekh zeleno stromos ačhavenas peske o oltara the o slupi la modlake Ašera. ¹¹ Pre dojekh modlengero than pro lašariben labarenas o kađidlos avke sar the o narodi, saven o RAJ anglal lende tradła avri het. Kerenas o nalačhe veci a aleha pre peste anenas le RAJESKERI choľi. ¹² Lašarenas avre devlen, choc lenge o RAJ prikazinda, hoj ada te na keren. ¹³ O RAJ prevakerelas prekal savore peskere proroka ko Izrael the ke Judsko: "Visaren tumen pal tumare nalačhe drama a dolikeren mire prikazañje the mire zakoni, so hine pisimen andre calo zakonos, so diñom tumare dadenge a so tumenge bičhadom prekal mire služobňika o proroka."

¹⁴ Ale on les na šunenas a na denas peske te phenel avke sar the lengere dada, save na pačanas le RAJESKE, peskere Devleske. ¹⁵ Odčhide pestar leskero zakonos the e zmluva, so phandła lengere dadenca, a na šunenas les, choc lenge dovakerelas. On lašarenas le modlen, save na sas pre ñisoste, a aleha ačhile the on pre ñisoste. Likerenas pes pal o tradiciji le naroden-

† Leskero nav sas o So.

gere, save sas pašal lende, choc lenge o RAJ prikazindā, hoj te na keren avke sar aver narodi.

¹⁶ Omukle savore prikazaŋja le RAJESKERE, peskere Devleskere, a kerde peske duje somnakune gurumŋoren the slupi la Ašerake a bandonas angle savore čercheŋa pro ŋebos a služinenas le Baaloske.

¹⁷ Peskere muršoren the čhajen zlabarde sar obeta avre devlence a džanas pal oda, hoj te vražinen a te čarinen. Avke pes oddine te kerel o nalačhipen a aleha pre peste anenas le RAJESKERI choŋi.

¹⁸ Akor o RAJ pro Izrael sas igen choŋamen a odčhiđa len pestar het a ačhiŋa ča o kmeŋos Juda. ¹⁹ Ale aŋi o kmeŋos Juda na dolikerelas o prikazaŋja le RAJESKERE, peskere Devleskere, ale on priile oda, so kerelas o Izrael. ²⁰ Vašoda o RAJ pestar odčhiđa calo Izraeliko narodos, dukhavelas len a diŋa andro vasta le zbuŋjikenge, medik len pestar na tradŋa avri het.

²¹ Sar o RAJ odliŋa o Izrael le Judostar †, o Izraeliti ačhade le Jeroboam, le Nebatoskere čhas, vaš peskero kralis. Ale o Jeroboam odvisarđa le Izraeliten le RAJESTAR a liğenda len andro baro binos. ²² O Izraeliti kerenas savore bini, so kerelas o Jeroboam, a na omukle len, ²³ medik o RAJ len pestar na odčhiđa, avke sar angloda phenda prekal peskere služobŋika o proroka. Vašoda o Izraeliti sas zaile a odligende andre Asirija a ode hine dži adadžives.

O manuša andral aver narodi džan te bešel andre Samarija

²⁴ O Asiriko kralis andā le manušen andral o fori Babilon, Kuta, Avva, Chamat the Sefarvajim a thođa len te bešel andro Samarijike fori, khatar sas o Izraeliti odligende het zaphandle. On zaile e Samarija a bešenas andre lengere fori. ²⁵ Sar ode chudle te bešel, na lašarenas le RAJES, a vašoda o RAJ pre lende bičhađa le leven, save len murdarenas. ²⁶ Akor o manuša andral oda foros phende le Asirike kraliske: "O narodi, saven andal te bešel andre Samarijike fori, na prindžaren o zakonos le Devleskero ola phuvakero, vašoda ov pre lende bičhađa le leven a on len murdarkeren."

²⁷ Akor o kralis prikazindā: "Len ode jekhe rašas, saves odarik ade andān. Mi džal ode te bešel a mi sikavel len, so lendar kamel o Del andre odi phuv."

²⁸ Avke ode geŋa jekh rašaj, savo sas zailo andral e Samarija. Bešelas andro Betel a sikavelas len, sar majinen te lašarel le RAJES.

²⁹ Ale dojekh narodos peske kerđa peskere devlen a ačhade len andre ola sentne thana, save angloda ačhade o manuša andral e Samarija. Dojekh narodos oda kerelas andro foros, kaj bešelas. ³⁰ O manuša khatar o Babilon peske kerde le devles Sukkot-Benot, o manuša khatar o Kut le Nergal a o manuša khatar o Chamat le Ašimas. ³¹ O Avvičana kerde le Nibchaz the le Tartak a o manuša andral o Sefarvajim obetinas peskere čhaven sar labardī obeta le devlence Adramelech the Anammelech. ³² A choc lašarenas le RAJES, kidle peske avri rašajen a ačhade len, hoj te služinen le

modlence pre ola thana. On ode obetinas peskere devlence. ³³ Le RAJES lašarenas, ale služinenas the peskere devlence pal o tradiciji ole narodengere, khatar sas odligende andre odi phuv.

³⁴ Dži adadžives oda keren avke, sar kerenas angloda. Le RAJES na lašaren avke, sar majinen, aŋi pes na likerem pal oda, so hin pisimen andro zakonos, aŋi pal o prikazaŋja, save o RAJ diŋa avri le čhavage le Jakobskere, saves diŋa nav Izrael. ³⁵ O RAJ lenca phandŋa zmluva a prikazindā lenge: "Ma lašaren avre devlen, aŋi ma bandon anglal lende, aŋi ma služinen a aŋi ma obetinen lenge. ³⁶ Ale lašaren man, tumare RAJES, savo tumen liğenda avri andral o Egipt peskere vasteha the bara zoraha. Ča mange obetinen a anglal ma bandon. ³⁷ Pal savore dživesa dolikerem mire lava, zakonos the prikazaŋja, so tumenge pisindom, a avre devlen ma lašaren. ³⁸ Ma bisteren pre zmluva, so tumenca phandŋom, a avre devlen ma lašaren. ³⁹ Ale lašaren ča man, le RAJES tumare Devles. Me tumen lava avri andral o vasta savore tumare ŋeprijaŋefendar."

⁴⁰ Ale on les na šunde a kerenas pal peskere tradiciji. ⁴¹ Kala narodi lašarenas le RAJES, ale služinenas the peskere avričingerde devlence. Dži adadžives lengere čhave a le čhavengere čhave keren avke sar lengere dada.

O Chizkija kralis upral e Judsko

18 Sar kralinelas andro Izrael trito berš o Hošea, le Eloskero čhavo, andre Judsko ačhiŋa kralis o Chizkija, le Achazoskero čhavo. ² Sas leske bišupandž (25) berš, sar ačhiŋa kralis, a andro Jeruzalem kralinelas bišueŋa (29) berš. Leskeri daj sas e Abija, le Zecharijoskeri čhaj. ³ Ov kerelas oda, so sas le RAJESKE pre dzeka, avke sar the leskero prapapus o David.

⁴ Zŋičindā o thana, pre save lašarenas le modlen, sphagerđa o sentne slupi, čhindā tele la Ašerakere slupi a rozphagerđa the le bronzune sapes Nechuštan, saves kerđa o Mojžiš, bo dži akor o Izraeliti leske labarenas o kadidlos.

⁵ O Chizkija pačalas le RAJESKE, le Izraelike Devleske. Ŋiko le Judske kralendar na sas ajso sar ov, aŋi angle leste aŋi pal leste. ⁶ Ov sas pačivalo le RAJESKE, šunelas les andre savoreste a dolikerelas dojekh prikazaŋje, so o RAJ diŋa le Mojžišoske. ⁷ O RAJ sas le Chizkijoha, a vašoda les sas bach andre savoreste, so kerelas. Ov pes vzburiŋdā pro Asiriko kralis a na poddiŋa pes leske. ⁸ Ov domarđa le Filištinen dži ko foros Gaza the leskere phuva – le cikne gavendar dži ko bare fori le murenca.

⁹ Sar o Chizkija andre Judsko kralinelas štarto berš a sar andro Izrael kralinelas o Hošea eftato berš, o Asiriko kralis o Šalmaneser geŋa pro foros Samarija a rozačhađa pes pašal late. ¹⁰ Pal o trin berš la domarđa. Avke e Samarija sas zŋičimen andro šovto berš, sar kralinelas o Chizkija a sar andro Izrael kralinelas eŋato berš o Hošea. ¹¹ Palis o Asiriko kralis odligenda le Izraeliten andre Asirija a thođa len te bešel andro foros Chalach, andro Chabor paš o paŋi Gozan the an-

† E Hebrejiko čhib: andral le Davidoskero kher

dro Medske fori. ¹² Oda pes ačhila, bo na šunen as le RAJES, peskere Devles, a na dolikerenas leskeri zmluva a ni o prikazaŋja, so len diŋa le RAJESKERO služobŋikos o Mojžiš; na kerenas pal oda, so phenda.

O Sancherib džal pre Judsko

¹³ Andro dešuštarto (14.) berš, sar kralinelas o Chizkija, o Asiriko kralis o Sancherib geŋa pro mariben pre savore Judske zorale fori a zaiŋa len. ¹⁴ Avke o Chizkija diŋa te phenel le Asirike kraliske andro Lachiš: "Kerdom namištes. Mangav tut, ma av pre ma a dava tut sa, so ča tu kameha." Akor o Asiriko kralis leske phenda: "Bičhav mange 10 000 kili rup the 1 000 kili somnakaj." ¹⁵ Palis o Chizkija diŋa leske savoro rup the sa, so arakhla andro Chramos the andre palaciskere pokladni.

¹⁶ The pal o chramoskero vudar the pal e zarubna iŋa tele o somnakaj, saveha len korkoro obthoda, a diŋa le Asirike kraliske.

¹⁷ Akor o Asiriko kralis bičhada khatar o Lachiš ko Chizkija andro Jeruzalem peskere nekbareder velitelis, le nekbareder uradŋikos the le velitelis Rabšakeh la armadaha. Sar avle ko Jeruzalem, zaačhile pro drom pre oda than, kaj kerenas o lepedi paš o žlabos, andre savo avelas o paŋi andral e upruŋi nadrža. ¹⁸ A vičinenas ke peste le kralis le Chizkija, ale gele paš lende o Eljakim, le Chilkijoskero čhavo, savo lidžalas o palacis, o pisaris Šebna the o uradŋikos Joach, le Asafoskero čhavo.

¹⁹ Akor o velitelis Rabšakeh lenge phenda: "Džan a phenen le Chizkijoske:

Kavke phenel o baro kralis Sancherib: Oda pre soste tut zmukes, hoj na daras? ²⁰ Gondolines tuke, hoj ča le lavenca šaj ŋerines (zvitazines) andro mariben? Šaj čerines o lava vaš e zor? Pre kaste tut zmukes, hoj pes pre ma ačhaves? ²¹ Tu pes zmukes pro Egipt, pre odi prephagi trstina. Se ko pes pre late zmukela, premarela peske o vast. Ajso hin o Faraonos, o Egiptsko kralis ke savore, save pes pre leste zmukel! ²² Te mange phenena: 'Amen pes zmukas pro RAJ, pre amaro Del.' Mištes, ale oda sas o Chizkija, savo čhidā tele leskere sentne thana the oltara a prikazinda andre Judsko the Jeruzalem: 'Angle kada oltaris, so hino andro Jeruzalem, bandona.'

²³ Ale akana av! Dohov pes mire rajeha, le Asirike kraliha. Dava tut 2 000 graja, te tuke stradeha muršen, save džana pre lende! ²⁴ Sar tu šaj ŋerines upral mire kraliskero nekcikneder velitelis, te pes zmukes pro Egipt, hoj tuke bičhavana verdana the muršen pro graja? ²⁵ Gondolines tuke, hoj avlom pre kada than korkoro mandar, hoj les te zničinav? Na, oda o RAJ mange phenda: 'Dža a zničin odi phuv!'

²⁶ Akor le Rabšakehoske phende o Eljakim, o Šebna the o Joach: "Mangas tut, vaker peskere služobŋikenca andre Aramejiko čhib, se amen avke ačaluvas! Ma vaker amenca andre amari Hebrejiko † čhib anglo manuša, save hine pro foroskere muri."

²⁷ O Rabšakeh lenge odphenda: "Či so, miro kralis man bičhada, hoj te vakerav kala lava ča tumare kraliske the tumenge? Na, ale the le manušenge, save bešen pal kala muri. Bo avke sar tumen the on mušinena te chal oda, so džal avri andral peskero per, a te pijel peskero muter."

²⁸ O Rabšakeh zaačhila a vriskinelas andre Hebrejiko čhib: "Šunen, so phenel o baro Asiriko kralis! ²⁹ Ma den pes te diliŋarel le Chizkijoha, bo našti tumen cirdel avri andral mire vasta. ³⁰ Ma den pes leha a ni te prevakerel, hoj pes te zmukel pro RAJ oleha, hoj phenel: 'O RAJ amen zachraŋinela a kada foros bizo na ela dino andro vasta le Asirike kraliske.'

³¹ A ni ma šunen les, bo kavke phenel o Asiriko kralis: Zden tumen a aven ke mande! Avke dojekh tumendar chala o ulipen pal peskero viŋičis the figovŋikos a pijela o paŋi andral peskeri chaŋig, ³² medik na avava pal tumende a na lava tumen andre ajsi phuv sar the tumari; andre phuv, kaj hin o žužodiv the mol; andre phuv, kaj hin o maro the viŋici, kaj hin olivi, olejos the medos. Kiden tumenge avri o dživipen a na o meriben!

Ma šunen le Chizkija, bo tumen diliŋarel le lavenca: 'O RAJ amen zachraŋinela.' ³³ Či so, cirdna avri varesavo del andral mire vasta peskero narodos? ³⁴ Kaj hine o devla andral o Chamat the Arpad? Kaj o devla andral o Sefarvajim, Hena the Ivva? So, cirdle avri la Samarija andral mire vasta? ³⁵ Savo del peskere narodos šaj cirdna avri andral mire vasta? Sar šaj tuke gondolines, hoj o RAJ zachraŋinela o Jeruzalem andral mire vasta?"

³⁶ O manuša pre oda nič na phende, bo o Chizkija lenge prikazinda, hoj nič te na vakeren.

³⁷ Palis o Eljakim, o Šebna the o Joach avle andro čhingerde gada ko Chizkija a phende leske savoro, so vakerelas o Rabšakeh.

O Chizkija phučel le Izaiašostar

19 Sar oda šunda o kralis Chizkija, čhingerda pre peste o gada, urda pre peste o gone a geŋa andro Chramos. ² Akor bičhada le Eljakim, savo sas upral o palacis, le pisaris Šebna the le phuredere rašajen. On pes urde andro gone a gele ko prorokos Izaiaš, ke le Amocoskero čhavo. ³ On leske phende: "Kavke vakerel o Chizkija: 'Andre kada džives sam marde andre dar the andre ladž avke sar o čhavoro, savo pes mangel pro svetos, ale la džuvla nane zor, hoj les te anel pro svetos. ⁴ Ale šaj el, hoj o RAJ, o džido Del, šunda, sar les anelas pre ladž o Rabšakeh, saves bičhada leskero raj, o Asiriko kralis. Vaš ola lava, so šunda o RAJ, o džido Del, mi potrestinel les. Mang le Devles vaš amare manuša, save ačhile te dživel.'"

⁵ Sar avle o služobŋika le kraliskere ko Izaiaš, ⁶ ov lenge phenda: "Phenen tumare kraliske, hoj kavke phenel o RAJ: 'Ma dara tut ole lavendar, savenca pre ma namištes vakerenas o služobŋika, saven bičhada o Asiriko kralis. ⁷ Me dava andre leste ajso duchos, hoj sar šunela nalačo hiros, visarela pes pale andre peskeri phuv, kaj les dava te murdarel la šablaha.'"

† Oda hin e Judsko čhib.

O Asirčana pale dovakeren le Chizkijoske

⁸ Sar o Rabšakeh šundā, hoj o Asiriko kralis odgefa andral o Lachiš, visarda pes pale a arakhla le kralis andro mariben pre Libna.

⁹ Andre oda časos pes o Asiriko kralis dodžanla, hoj o kralis Tirhakah andral o Kuš avel pre leste pro mariben. Palis o Asiriko kralis bičhađa varesave muršen ko Judsko kralis Chizkija, hoj leske te phenen: ¹⁰ "Tiro Del, pre savo tut zmukes, te na thovel tuha avri, sar phenel, hoj o Jeruzalem na ela dino andro vasta le Asirike kraliske. ¹¹ Se tu šundal, so kerde o Asirike krafa savore narodenge, sar savoren zničinde. Gondofines tuke, hoj šaj aves zachrañimen? ¹² Mire dada zničinde o fori Gozan, Charan the Recef a murdarde le manušen andral o Eden, save bešenas andro Telassar. Či so, šaj zachrañinde len lengere devla? ¹³ Kaj hino o kralis andral o foros Chamat? Kaj o kralis andral o Arpad? Kaj o krafa andral o Sefarvajim, Hena the Ivva?"

O kralis Chizkija pes modlinel

¹⁴ O Chizkija preiła le muršendar o lila a pregenda len. Palis geła andro Chramos a phundrađa len anglo RAJ. ¹⁵ Avke pes chudla te modlinel ko RAJ: "Ó, RAJEJA, Devla le Izraeloskero, savo bešes pro tronos maškar o cherubi! Tu jekh sal Del upral savore krališagi, so hine pre kadi phuv. Tu kerdal o ňebos the e phuv. ¹⁶ Phundrav o kana, RAJEJA, a šun! Phundrav o jakha a dikh! Šun, sar tut o kralis Sancherib asal avri a sar kerel ladž le džide Devlestar. ¹⁷ Oda hin čačipen, ó, RAJEJA, hoj o krafa andral e Asirija zničinde o narodi the lengere phuva ¹⁸ a hoj lengere devlen zničinde a zlabarde. Šaj ada kerde, bo on na sas čačes devla, ale ča o manuša len kerde peskere vastenca le kaštestar the barestar. ¹⁹ Ale akana, RAJEJA, Devla, mangav tut, zachrañin amen andral leskere vasta. Mi sprindžaren savore krafa pre phuv, hoj ča tu, RAJEJA, sal jekh Del."

O RAJ odphenel le Chizkijoske

²⁰ Akor o Izaiaš, le Amocoskero čhavo, diňa te phenel le Chizkijoske: "Kada phenel o RAJ, o Del le Izraeloskero: 'Šundom avri tiro mangipen, so vakerehas pal o Asiriko kralis Sancherib.' ²¹ Kada pal leste phenel o RAJ:

'E pačivali čhaj le Sionoskeri dikhel tut tele a asal tutar.

E čhaj le Jeruzalemoskeri kivinel le šereha pre tu, sar denašes.

²² Kastar tu kerehas ladž, kas asahas avri?

Pre kaste hazdlal upre o hangos the o jakha? Pro Sentno RAJ le Izraeloskero!

²³ Prekal tire murša, saven bičhađal, mandar kerdal ladž.

Tu phendal: "Mire but verdanenca gełom pro nekbareder verchi andro Libanon.

Ode leskere uče cedri the o šukar sosni čhingerđom tele.

Dochudlom man andre leskere nekdureder thana, andro garude thana andro veš.

²⁴ Andro cudze phuva kopalindom avri o chañiga, piłom andral o pañi a peskere stupajenca šučardom savore paña andro Egipt."

²⁵ Ale tu, Sancherib, oda na šundal?

Me ada richtinavas čirlastar, anglo but berš oda diňom avri, akana oda the kerav.

Diňom tut zor, hoj te zničines o zorale fori a nič lendar te na ačhel, ča kopi bara.

²⁶ O manuša, save andre bešenas, sas slabe, predarandutne the pro asaben.

Sas sar o rastlini pre mała, sar e zeleno čar, sar e čar pre strecha, so e keradi balvaj sigo šučarel avri.

²⁷ Džanav, kana uštes a bešes, kana džas avri a kana pale aves. Džanav, savi bari cholí chas pre ma.

²⁸ Šundom pal tiri cholí the pal tiro barikañiben, vašoda tuke thovava e trastuñi karika andro nakh, andro muj le grajeskero zubadlos.

Visarava tut pale ole dromeha, khatar avlal.'

²⁹ Tuke, Chizkija, ela pro znameñje ada, hoj andre kada berš chana ča oda điv, so barola avri korkoro, a aver berš chana oda, so pale barola olestar. Ale pro tri-to berš sadzinen o điv the o viñici a chana lendar o ulipen. ³⁰ Ola, ko pes zachrañinena andre Judsko, mukena o koreňa andre phuv a anena o ulipen. ³¹ Bo ola, ko ačhile te dživel, džana avri andral o Jeruzalem; ola, ko sas zachrañimen, khatar o verchos Sion. Bo o RAJ igen kamel, hoj pes oda te ačhel.

³² Vašoda o RAJ avke vakerehas pal o Asiriko kralis: 'Andre kada foros pes na dochudela, aňi o šipos, so livinela. Aňi le štitoha na doavena paš o foros a aňi paš o muri na čhivela avri e kopa, hoj pes te dochuden andro foros. ³³ Ale visarela pes pale pal oda drom, pal savo avla, a andre kada foros pes na dochudela. Avke phenel o RAJ. ³⁴ Me zachrañinava kada foros prekal ma the prekal miro služobňikos David.' "

³⁵ Mek odi rat le RAJESKERO aňjelos geła andre Asiriko taboris a murdarđa 185 000 muršen. Sar o manuša tosara uštile, dikhle všadzik mulen. ³⁶ Avke o Asiriko kralis Sancherib pes visarda pale andre Asirija. Sar ode dogeła, ačhila te bešel andro foros Ninive.

³⁷ Andre jekh džives, sar o Sancherib lašarelas andro chramos le devles Nisroch, leskere čhave o Adrammelech the o Sarecer les murdarde la šablaha a denašle andre phuv Ararat. Avke pal leste ačhila kralis leskero čhavo o Esar-Chaddon.

Le Chizkijoskero nasvaliben

20 Andre oda časos o kralis Chizkija nasvalila pro meriben. Akor geła ke leste o prorokos Izaiaš, le

Amocoskero čhavo, a phenda leske: "Kavke tuke o RAJ phenel: 'De tuke andro šoros (poradkos) savore veci, bo mereha.'"

² Sar oda o Chizkija šunda, visarda pes le mujeha ke fala a mangelas le RAJES: ³ "Ó, RAJEJA, mangav tut, ma bister pre oda, hoj pačivalones the cale jileha phiravas pal tiro drom. Keravas savoro, so sas tuke pre dzeka." Palis chudla igen zorales te rovel.

⁴ Mek aňi o Izaiaš na pregeľa e maškaruňi dvora, o RAJ ke leste pale prevakerďa: ⁵ "Visar tut a phen le Chizkijoske, le vodcaske, savo ľidžal mire manušen, hoj avke phenel o RAJ, o Del tire prapapusker o Davidoskero: 'Šundom avri tiri modľitba a dikhlom tire apsa. Sastarava tut a pro trito džives džaha andro Chramos. ⁶ Ke tire berša tuke mek pridava dešupandž (15) berš. Zachraňinava tut the kada foros andral o vasta le Asirike kralistar. Kada foros na domukavava te zňičinel, ča prekal ma the prekal miro služobňikos David.'"

⁷ Akor o Izaiaš prikazinda le kraliskere služobňikenge: "Thoven leske pro vredos masca le figendar." On ile, pomakhle leske o vredos a ačhiľa sasto.

⁸ O Chizkija phučľa le Izaiašostar: "Savo ela o znameňje, hoj man o RAJ sastarela a hoj pal o trin džives džava andro Chramos?"

⁹ O Izaiaš odphenda: "Kada tuke ela znameňje le RAJESTAR, hoj dolikerela oda, so phenda: Majinel o ciňos te džal deš garadiči anglal abo palal?"

¹⁰ "Lokeder hin the o ciňos džala anglal, vašoda mi džal palal," odphenda o Chizkija.

¹¹ Avke o Izaiaš mangelas le RAJES a o RAJ diňa, hoj o ciňos geľa deš garadiči palal pre le Achazoskeri khameskeri ora.

O Chizkija pes presikavel le barvalipnaha

¹² Andre oda časos o Babiloňiko kralis o Merodach-Baladan †, le Baladanoskero čhavo, bičhadľa le Chizkijoske ľila the daros, bo pes dodžanľa pal leskero nasvaliben. ¹³ O Chizkija le muršen priiľa a sikaďa lenge peskero barvalipen: o rup, somnakaj, koreňje, voňava oleja, o zbraňi the savoro, so sas andre leskeri pokladňica. Na garuďa anglal lende nič, so sas andre leskero palacis the andre calo krališagos.

¹⁴ Palis o prorokos Izaiaš geľa ko Chizkija a phučľa lestar: "So vakerenas ola murša a khatar avle?" "Avle dural," odphenda. "Avle andral aver phuv, dži andral o Babilon."

¹⁵ "So dikhle andre tiro palacis?" phučľa o Izaiaš.

"Dikhle savoro, so andre hin," odphenda o Chizkija. "Na garuďom nič anglal lende."

¹⁶ Pre oda o Izaiaš leske phenda: "Šun o lav le RAJESKERO! ¹⁷ Dikh, ela ajs o džives, hoj savoro, so hin andre tiro palacis, ela odligendo andro Babilon – the oda, so tire phure dada dži adadžives thode andre. Na ačhela ade nič, phenel o RAJ. ¹⁸ The tire čhaven, save

ena tutar a save tuke ulona, odligenena a kerena lendar sluhlen le kraliske andro Babiloňiko palacis."

¹⁹ O Chizkija leske odphenda: "Kada lav, so mange phenda le RAJESTAR, hino lačo," ale gondolinda peske: "Soske te na, ča mi el o smirom a nič pes te na ačhel, medik me dživava."

²⁰ Savore aver veci, so o Chizkija kerďa, leskere ňerindipena (vitǎztva), the sar ačhadľa e upruňi nadrž a sar prianda o paňi andro foros telal e phuv, hin pisi-men andro Zvitkos le Judske Kralengero. ²¹ Sar muľa o Chizkija, parunde les a pal leste ačhiľa kralis leskero čhavo o Menašše.

O Menašše kralis andre Judsko

21 Le Menaššeske sas dešuduj (12) berš, sar ačhiľa kralis upral e Judsko, a andro Jeruzalem kralinelas penda the pandž (55) berš. Leskeri daj pes vičinelas Chefci-Ba. ² Ov kerelas anglo RAJ o nalačhipen the o džungipen avke sar the o narodi, saven o RAJ tradľa avri anglal o Izrael. ³ O Menašše pale ačhadľa o modlengere thana pro lašariben, so leskero dad o Chizkija zňičinda. Kerďa o oltara prekal o Baal the la Ašerakero slupos avke sar o kralis Achab andro Izrael. Bandolas anglo čercheňa a lašarelas len. ⁴ Ačhadľa the o oltara andro Chramos, pal savo phenda o RAJ: "Andro Jeruzalem ela miro nav furt lašardo." ⁵ Pro soduj chramoskere dvori ačhadľa oltara prekal savore čercheňa, hoj len te lašaren. ⁶ Peskere čhas zlabarda sar obeta. Ov čarinelas, vražinelas a anda ke peste le vrašcen the olen, save privičinenas le mulengere dučen. Aleha kerelas buter nalačhipen anglo RAJ a anelas pre peste leskeri cholí.

⁷ O Menašše iľa la Ašerakero slupos a thoďa les andro Chramos, pal savo o RAJ phenda le Davidoske the leskere čhaske le Šalamunoske: "Andre kada Chramos the andro Jeruzalem, so mange avri kidňom maškar savore Izraelike kmeňi, ela miro nav furt lašardo. ⁸ Te o Izraeliti šunena savore mire lava a te dolikerena mire prikazaňja, so lenge diňa miro služobňikos Mojžiš, akor me na domukava, hoj te en avritradle andral kadi phuv, so diňom lengere dadenge." ⁹ Ale o manuša andral e Judsko na šunde le RAJES a o Menašše len ľigenda mek andro bareder binos, sar kerenas ola narodi, saven o RAJ zňičinda anglal o Izraeliti.

¹⁰ Akor o RAJ prevakerďa prekal peskere služobňika-proroka: ¹¹ "Aleha, hoj o kralis Menašše kerel kala bare bini, kerďa mek goreder bini sar savore Amoreja anglođa. Peskere modlenca ľigenda andro binos le manušen andral e Judsko. ¹² Vašoda o RAJ, o Del le Izraeloskero, phenel avke: 'Pro Jeruzalem the pre Judsko anava ajsi bibach, hoj oda zalela dojekhes, ko pal oda šunela. ¹³ Potrestinava o Jeruzalem avke sar the la Samarija, avke sar kerďom le Izraelike kraliľa le Achaboha the leskere potomstvoha. Le manušen andral o Jeruzalem khosava avri, avke sar pes khosel avri o čaro a palis pes visarel upre. ¹⁴ A mire manušen, save predživena, omukava a dava andro vasta lengere ňeprijateľenge, save len domarena a občorena lengeri

† Abo: o Berodach-Baladan

phuv, ¹⁵ bo kerenas nalačhipen angle ma a anenas pre peste miri cholí ole dživesestar, sar avle avri lengere phure dada andral o Egipt, dži adadžives.' "

¹⁶ O Menašše murdarđa vaš ňisoste ajci but manušen, hoj lengero rat sas pal calo Jeruzalem. A mek ke oda ligenelas le Judske manušen, hoj te keren o bini anglo RAJ.

¹⁷ Savore aver veci, so Menašše kerđa, the leskere bini, so kerđa, hin pisimen andro Zvitkos le Judske Kralengero. ¹⁸ Sar muľa o Menašše, parunde les andre le Uzzoskeri bar (zahrada), so sas paš o palacis. Pal leste ačhiľa kralis leskero čhavo o Amon.

O Amon kralis andre Judsko

¹⁹ Le Amonoske sas bišuduj (22) berš, sar ačhiľa kralis andre Judsko, a andro Jeruzalem kralinelas duj berš. Leskeri daj sas e Mešullemet, le Charucoskeri čhaj, andral e Jotba. ²⁰ Ov kerelas baro nalačhipen anglo RAJ avke sar the leskero dad o Menašše. ²¹ Služinelas le modlence, lašarelas len avke sar the leskero dad a phirelas pal savore leskere droma. ²² Odvisarđa pes le RAJESTAR, le dadengere Devlestar, a na šunelas leskere prikazaňja.

²³ Palis le Amonoskere služobňika pes vzburinde pre leste a murdarde les andre leskero palacis. ²⁴ Akor o Judske manuša murdarde olen, save kerde vzbura pro kralis Amon, a pal leste ačhade kraliske leskere čhas le Joziaš.

²⁵ Savore aver veci, so kerđa o Amon, hin pisimen andro Zvitkos le Judske Kralengero. ²⁶ Le Amon parunde andre leskero hrobos, andre le Uzzoskeri bar. Pal leste ačhiľa kralis leskero čhavo o Joziaš.

O Joziaš kralis upral e Judsko

22 Le Joziašoske sas ochto berš, sar ačhiľa kralis andre Judsko, a kralinelas andro Jeruzalem tran-da the jekh (31) berš. Leskeri daj sas e Jedida, le Adajoskeri čhaj, andral o Bockat. ² Ov kerelas oda, so sas le RAJESKE pre dzeka. Phirelas pal le Devleskero drom avke sar leskero prapapus o David a na odvisarđa pes ole dromestar.

³ O pisaris Šafan sas čhavo le Acalioskero a leskero papus sas o Mešullam. Sar o kralis Joziaš kralinelas dešuočtoto (18.) berš, prikazinda le Šafanoske, hoj te džal andro Chramos. ⁴ Phendã: "Dža pal o nekbareder rašaj Chilkiyah a phen leske, hoj te zgenel ola love, so kidle avri o stražňika le manušendar paš o chramoskero vudar. ⁵ Ola love mi den le muršenge, save hine ačhade upral e buči andro Chramos, a on mi počinen le robotňiken, save oprikeren o Chramos: ⁶ le řesaren the muraren. Mi cinen o kašta the oprikerde bara prekal o Chramos. ⁷ Ole muršendar, save hine ačhade upral e buči, pes na užarelas, hoj te presikaven, kaj o love thode, bo hine pačivale."

O Chilkiyah arakhel andro Chramos le Devleskero zakonos

⁸ Palis o nekbareder rašaj Chilkiyah phendã le pisariske le Šafanoske: "Dikh, andro Chramos arakhľom o zvitkos le Devleskere zakonoha." Avke o Chilkiyah la diňa le Šafanoske a ov la pregendã. ⁹ Palis o Šafan gefa ko kralis a phendã: "Tire služobňika ile o love, so sas andro Chramos. Dine len le robotňikenge, save oprikeren o Chramos, ¹⁰ a o Chilkiyah mange diňa varesavo zvitkos." Avke o Šafan andral genelas le kraliske.

¹¹ Sar o kralis Joziaš šundã o lava andral o zakonoskero zvitkos, rozčhingerđa pre peste o gada ¹² a prikazinda le rašaske Chilkijoske, le Šafanoskere čhaske le Achikamoske, le Michajoskere čhaske le Achboriske, le pisariske Šafanoske the peskere služobňikoske le Asajoske: ¹³ "Džan a phučen le RAJESTAR pal o lava, so hin pisimen andre kada zvitkos! Phučen pal ma the pal cali Judsko phuv. Se o RAJ hino choľamen pre mande the pre savore manuša, bo amare phure dada na dolikerenas a na kerenas avke, sar hin pisimen andro zakonoskero zvitkos."

¹⁴ Akor o Chilkiyah, Achikam, Achbor, Šafan the o Asajah gele te phučen la prorokiňatar Chuldatar. Oj bešelas andro Jeruzalem, andro nevo foros, a lakero rom sas o Šallum, le Tikvoskero čhavo, o čhavo le Charchasoskero, savo pes starinelas pal le kraliskere gada. Sar dogele andre lakero kher, chudle lake pal oda te vakere.

¹⁵ Oj lence phendã: "Kavke phenel o RAJ, o Del le Izraeloskero: 'Phenen oleske, ko tumen ade bičhađa, ¹⁶ hoj avke phenel o RAJ: "Domukava e bibach pre kada foros the pro manuša, save ade bešen, avke sar hin pisimen andro zakonoskero zvitkos, so pregendã o Judsko kralis, ¹⁷ bo pes mandar odvisarde a labarenas o kadidlos avre devlence. Savoreha, so kerenas, anenas pre peste miri cholí. Miri cholí pre kada than hiňi sar jag, so labol a na preačhel.'" ¹⁸ Le Judske kraliske, savo tumen bičhađa te phučen le RAJESTAR, phenen: 'Kavke vakerele o RAJ, le Izraeloskero Del, pal o lava, so šundãl: ¹⁹ Vašoda, hoj tut visardal ke ma a pokorindaľ pes a rozčhingerďal o gada pre peste a rovehas, sar šundãl mire lava, šundom tut avri. Vašoda, hoj dava e bibach pro Jeruzalem the pre leskere manuša, hoj ena andre bari dar the andro prekošiben. ²⁰ Na dikheha odi bibach, so anava pre kada than. Mereha a aveha parumen andro smirom.'"

Avke pes on visarde pale ko kralis a phende leske, so e prorokiňa vakerelelas.

O Joziaš genel o zakonos le manušenge

23 O kralis o Joziaš vičinda ke peste savore vodcen andral e Judsko the Jeruzalem. ² Gele leha andro Chramos savore murša andral e Judsko: o manuša andral o Jeruzalem, o rašaja, o proroka, savore manuša, či o čore vaj barvale. O kralis angle lende pregendã savore lava, so sas pisimen andro zmluvakero zvitkos, so

arakhle andro Chramos. ³ Palis o Joziaš ačhila paš o slupos a phandla anglo RAJ zmluva, hoj leske ena pačivale a dolikerena leskere prikazaŋja the o zakoni cale peskere jileha the dušaha a hoj kerena sa avke, sar hin pisimen andro zmluvakero zvitkos. Savore manuša ode dine lav, hoj dolikerena e zmluva.

O Joziaš zničinel o modli le oltarenca

⁴ Palis o Joziaš prikazinda le nekbareder rašaske le Chilkijoske, le avre rašaske the olinge, ko stražinenas paš o vudar anglo Chramos, hoj te lidžan avri andral o Chramos savore veci, so sas kerde, hoj te lašaren le Baal, la Ašera the savore ņeboskere čercheňa. Diňa oda te zlabarel avri pal o Jeruzalem, pro maľi paš e dolina Kidron a o prachos lendar diňa te lidžal andro Betel. ⁵ Le rašajen, saven o Judske kraľa ačhade andre služba, hoj te labaren o kadidlos pro modlengere thana pro lašariben the andro Jeruzalem, zaačhaďa. Zaačhaďa the olen, save anenas e obeta le Baaloske, le khameske, čhoneske the čercheňenge. ⁶ La Ašerakero slupos diňa te lidžal avri andral o Chramos dži pal o Jeruzalem, andre dolina Kidron. Ode la diňa te zlabarel a oda prachos rozčhidă pro cintiris le čore manušengero. ⁷ Palis čhidă tele o khera andro Chramos, kaj bešenas savore murša the džuvľa, save ode služinenas sar lubňa, a kaj kerenas o pochtana prekal la Ašerakero lašariben. ⁸ Diňa te vičinel savore rašajen andral o Judske fori a zmelardă savore oltara pre ola thana, kaj o rašaja kerenas o obeti le modlenge; a oda la Gebatar dži ke Beer-Šeba. Zničinda the o modlengere oltara, so sas paš le Jošuaskeri brana pre balogňi (ľavo) sera, sar pes džal andro foros prekal e foroskeri brana – o Jošua sas o foroskero guverneris. ⁹ Le rašajen, save služinenas le modlenge, na domukľa te služinel paš le RAJESKERO oltaris andro Jeruzalem, ale šaj chale o mare bi o droždĭ savore rašajenca.

¹⁰ O Joziaš zmelardă the o Tofet, so hino andre dolina Ben-Hinnom, hoj ode imar buter ņiko peskere čhas abo čha andre jag te na obetinel le devleske Molech.

¹¹ Iľa odarik le grajen, saven o Judske kraľa dine pro lašariben le khameske, a zlabardă le khameskere verdana. Sas ačhade pre dvora paš le RAJESKERI chramoskeri brana nadur, kaj bešelas o uradňikos Natan-Melech.

¹² O Joziaš mek čhidă tele o oltara, so ačhade o Judske kraľa pro upruno Achazoskero kher, the o oltara, so ačhaďa o Menašše pro soduj dvori anglo Chramos. Sar len rozphagerďa, o prachos čhidă andre dolina Kidron. ¹³ O Joziaš zmelardă the o thana pro vičodos le Jeruzalemostar a pre južno sera le Olivove verchostar, kaj lašarenas le modlen, bo ode ačhaďa o Izraeliko kralis Šalamun oltara le džungale devlence: la Aštartake andral o Sidon, le Kemošiske andral o Moab the le Milkomoske andral o Ammon. ¹⁴ Rozphagerďa o sentne slupi a čhingerďa tele la Ašerakere slupi the o thana, kaj ačhenas začhidă le manušengerere kokalenca.

¹⁵ Avke kerďa the le modlengere oltariha pro than andro Betel, so ačhaďa o Jeroboam, le Nebatoskero

čhavo, savo ligenda le Izraeliten andro binos. Le modlengero oltaris le thaneha rozphagerďa pro prachos a la Ašerakero slupos zlabardă. ¹⁶ Sar pes o Joziaš visardă, dikhľa pro učo than o hrobi. Palis diňa andral o hrobi te lel avri o kokala a zlabardă len pre oda oltaris. Avke les zmelardă, sar o RAJ prevakerďa angloda prekal o prorokos.

¹⁷ Palis o Joziaš phučľa: "Kaskero hrobos dikhav?"

O murša andral o foros Betel leske odphende: "Oda hin o hrobos le prorokoskero, savo avľa andral e Judsko a savo phenda kada savoro, so kerďal pre kada oltaris."

¹⁸ "Muken les!" prikazinda o Joziaš. "Ňiko leskere kokalenca te na čhalavel." Avke na čhalade leskere kokalenca aňi le prorokoskere kokalenca, savo avľa khatar e Samarija.

¹⁹ Avke sar kerďa andro Betel, o Joziaš kerďa the andre aver Samarijike fori. Zničinda savore thana, kaj lašarenas le modlen, so ačhade o Izraelike kraľa, bo aleha cholarenas le RAJES. ²⁰ Palis pre ole oltara murdarďa savore rašajen, save služinenas pre ola thana, a labarelas upre le manušengerere kokala. Avke pes o Joziaš visardă pale andro Jeruzalem.

O Joziaš oslavinel e Patraďi

²¹ O kralis o Joziaš savore manušenge prikazinda: "Oslavinen e Patraďi pre pačiv le RAJESKE, le Devleske, avke sar hin pisimen andre kada zakonoskero zvitkos."

²² Kavke pes e Patraďi na oslavinelas akorestar, sar o sudci lidžanas o Izrael, a aňi pal calo časos, sar kralinelas o Izraelike the o Judske kraľa. ²³ Andro dešuochtoto (18.) berš, sar o Joziaš kralinelas, oslavinenas odi Patraďi andro Jeruzalem pre pačiv le RAJESKE.

Le RAJESKERI cholĭ na preačhel pre Judsko

²⁴ O Joziaš tradľa avri andral o Jeruzalem the Judsko le vrašcen the olen, save privičinenas le mulengere duchen, a zničinda le kherutune devloren the o džungale modli, so mek ode sas. Oda kerďa, hoj pes te ačhel, sar hin pisimen andro zakonoskero zvitkos, so arakhľa o rašaj Chilkijah andro Chramos. ²⁵ Ňiko le kralendar, save sas angle leste aňi pal leste, pes na visardă cale peskere jileha, dušaha the zoraha avke sar o Joziaš pal o Mojžišoskero zakonos ko RAJ.

²⁶ Ale le RAJESKERI bari cholĭ sas sar jag a na preačhelas te labol pre Judsko vaš savore nalačhipena, so kerelas o Menašše pre leste. ²⁷ Vašoda o RAJ phendă: "E Judsko mandar odčhivava, hoj les te na dikhav, avke sar odčhidom o Izrael. Odčhivava the o Jeruzalem, so mange avri kidňom, a the o Chramos, pal savo phendom, hoj ode ela lašardo miro nav."

O Joziaš merel

²⁸ Savoro aver veci, so o Joziaš kerďa, hin pisimen andro Zvitkos le Judske Kralengero.

²⁹ Akor, sar sas kralis o Joziaš, o Egiptsko kralis Necho geľa te pomožinel le Asirike kraliske paš o paňi Euftrat. O Joziaš len andro Megiddo kamľa te zaačhavel, ale o Necho les andro mariben murdarďa. ³⁰ Avke leskere služobňika les thode pro verdan, ligende les khatar o Megiddo andro Jeruzalem a parunde les andre leskero hrobos. Paloda o manuša andral e Judsko ile le Joachaz, le Joziašoskere čhas, pomakhle les a ačhade les kraliske pal leskero dad.

O Joachaz kralis upral e Judsko

³¹ Le Joachazoske sas bišutrin (23) berš, sar ačhiľa kralis, a trin čhon kralinelas andro Jeruzalem. Leskeri daj sas e Chamutal, oj sas čhaj le Jeremioskeri, savo sas andral e Libna. ³² O Joachaz kerelas o nalačhipen anglo RAJ avke sar the leskere dada. ³³ Ov preačhiľa te kralinel akor, sar les o Egiptsko kralis Necho diňa te sphandel andre Ribla, andre phuv Chamat. A pre Judsko ispidelas, hoj leske te počinen o daňe – 3,4 toni rup the 34 kili somnakaj. ³⁴ Palis o Necho ačhadďa vaš o kralis le Joziašoskere čhas Eljakim a leskero nav čerinda pro Jojakim. Le Joachaz o Necho iľa peha andro Egipt a ode the muľa.

O Jojakim ačhel kralis upral e Judsko

³⁵ O Jojakim počinelas le Faraonoske o rup the o somnakaj. A hoj les te el sar te del le Faraonoske, ispidelas pro manuša, hoj leske te den o somnakaj the rup, a oda dojekh pal leskero barvalipen.

³⁶ Le Jojakimoske sas bišupandž (25) berš, sar ačhiľa kralis, a kralinelas andro Jeruzalem dešujekh (11) berš. Leskeri daj sas e Zebida, e čhaj le Pedajoskeri, andral e Ruma. ³⁷ Ale o Jojakim kerelas o nalačhipen anglo RAJ avke sar the leskere dada.

O Judsko kralis Jojakim

24 Sar o Jojakim kralinelas andre Judsko, avľa pre leste pro mariben o Babiloňiko kralis Nebukadnecar a o Jojakim pes leske poddiňa pro trin berš. Palis pes pale vzburiňďa pre leste. ² Ale o RAJ bičhavelas pre leste partiji zbuňniken: le Chaldejcen, Aramejčanen, Moabčanen the Ammončanen. Bičhadďa len, hoj te zničinen e Judsko, avke sar phendďa o RAJ prekal peskere proroka. ³ Oda avľa pre Judsko, avke sar o RAJ prikaziňďa, hoj les pestar te odčhivel vaš savore bini, so kerďa o Menašše, ⁴ the vaš oda, hoj vaš nisoste murdarďa manušen. O RAJ leske na kamľa te odmukel, bo vaš nisoste čhordďa avri o rat le manušengero a začhordďa calo Jeruzalem.

⁵ Savore aver veci, so o Jojakim kerďa, hin pisimen andro Zvitkos le Judske Kral'engero. ⁶ Sar o Jojakim muľa, ačhiľa pal leste kralis leskero čhavo o Jojachin.

⁷ O Egiptsko kralis preačhiľa te džal andral peskeri phuv pro mariben, bo o Babiloňiko kralis zaiľa savore leskere phuva; a oda le Egiptske paňestar džiči ko baro paňi Euftrat.

O Judsko kralis Jojachin

⁸ Le Jojachinoske sas dešuochto (18) berš, sar ačhiľa kralis upral e Judsko, a andro Jeruzalem kralinelas trin čhon. Leskeri daj sas e Nechušta, le Elnatanoskeri čhaj andral o Jeruzalem. ⁹ Ov kerelas oda, so na sas le RAJESKE pre dzeka, avke sar the leskero dad.

¹⁰ Andre oda časos avle pro Jeruzalem e Babiloňiko kraliskeri armada a rozačhade pes pašal o foros.

¹¹ Palis the o Babiloňiko kralis Nebukadnecar dogeľa ko Jeruzalem, kaj sas rozačhade leskere slugaďa.

¹² Avke o Judsko kralis Jojachin peskera daha, služobňikenca, uradňikenca the veliteľenca pes zdiňa leske.

Sas oda ochtoto berš, sar kralinelas o Nebukadnecar a sar les zaiľa. ¹³ O Nebukadnecar odarik odligenda savoro barvalipen andral o Chramos the andral le kraliskero palacis a skidňa savore somnakune veci, so diňa te kerel o Izraeliko kralis o Šalamun prekal o Chramos. Oda pes ačhiľa avke, sar phendďa o RAJ. ¹⁴ Andral o Jeruzalem zaiľa a odligenda andre peskeri phuv 10 000 manušen: savore uradňiken, vodcen, maribnaskere muršen, kovačen the tésaren. Ačhile ode ča o nekčoreder manuša.

¹⁵ Zaiľa le Jojachin, leskera da, romňijen, uradňiken the le anglune manušen andral e Judsko a odligenda len andral o Jeruzalem andro Babilon. ¹⁶ Iľa odarik 7 000 slugaden the 1 000 tésaren the kovačen: savore zorale maribnaskere muršen. ¹⁷ A vaš o Jojachin ačhadďa kraliske leskere bačis le Mattanijah a diňa leske nevo nav Cidkijah.

O Cidkijah kralis upral e Judsko

¹⁸ Le Cidkijoske sas bišujekh (21) berš, sar ačhiľa kralis andre Judsko, a kralinelas andro Jeruzalem dešujekh (11) berš. Leskeri daj sas e Chamutal, e čhaj le Jeremioskeri, savi sas andral e Libna. ¹⁹ Ov kerelas oda, so na sas le RAJESKE pre dzeka avke sar the o Jojakim. ²⁰ Vašoda o RAJ le manušen andral o Jeruzalem the Judsko pestar odčhida, bo sas pre lende cholamen. Palis o Cidkijah pes vzburiňďa pro Babiloňiko kralis.

O Cidkijah zailo

25 Sar o Cidkijah kralinelas eňato berš, o Babiloňiko kralis Nebukadnecar geľa andro dešto džives andro dešto čhon savore peskere slugadenca pro Jeruzalem. Pašal oda foros kerďa taboris a hordinenas pašal o muri pro kopi e čhik the e poši, hoj pes te dochuden andro foros. ² E armada sas rozačhadďi pašal o Jeruzalem džiči andro dešujekh (11.) berš, sar kralinelas o kralis Cidkijah.

³ A andro štarto čhon the eňato džives, sar andro Jeruzalem sas bari bokh a le manušen na sas, so te chal, ⁴ o Babiloňike slugaďa kerde chev andro muros. Mek odi rat o Cidkijah savore peskere slugadenca denašľa prekal e brana maškar o duj muri, so sas paš le kraliskeri bar (zahrada), choc džanenas, hoj o Ba-

bilončana sas rozačhade pašal calo foros. Denašenas le dromeha ke Jordaňiko dolina, ⁵ ale o Babiloňike slugađa pes mukle pal lende a dochudle len andre dolina paš o Jericho. Savore leskere slugađa les omukle. ⁶ Le Cidkijah zaile a odligende andre Ribla ko Nebukadnecar, kaj sas odsudzimen. ⁷ Leskere čhaven murdarde angle leskere jakha. Palis leske diňa te lel avri o jakha, diňa les te phandel andro lanci a iľa les andro Babilon.

O Chramos zničimen

⁸ Andro eftato džives andro pandžto čhon, sar kralinelas o Nebukadnecar dešueňato (19.) berš, avľa andro Jeruzalem o veliteľis upral telesne stražňika o Nebuzaradan, savo sas služobňikos le Babiloňike kraliske. ⁹ Ov zlabarďa andro Jeruzalem o Chramos, o palacis the dojekh baro kher. ¹⁰ Palis savore leskere slugađa čhide tele o foroskere muri. ¹¹ Akor o Nebuzaradan odligendďa odarik le manušen, save ačhile andro foros, olen, save pregele ko Babiloňiko kralis, the savore avre manušen. ¹² O Nebuzaradan mukľa ča le nekčoredere manušen andre odi phuv, hoj te keren buči pre maľa the pre viňica.

¹³ Palis o Babilončana phagerde o bronzune slupi, o verdanora the e igen bari bronzuňi nadrža †, so sas anglo Chramos, a o bronzos odligende andro Babilon. ¹⁴ Ile odarik the o čare, lopati, čhura, pekača the savore bronzune veci, savenca služinenas andro Chramos. ¹⁵ O Nebuzaradan iľa the o somnakune, rupune čare the o lopatki, savenca lenas o jagale angara. ¹⁶ O bronzos le duje slupendar, la bara kantatar the le verdanorendar, so diňa te kerel o Šalamun prekal o Chramos, sas ajci but, hoj pes aňi na delas te važinel. ¹⁷ Soduj slupi sas kerde le bronzostar, sas uče očno metri a o kritos pre lengero agor sas učo buter sar jekh metros. Pašal o kriti sas kerde duj šori granatoskere phaba le bronzostar khatar o prephandle lanci, so garuvenas o kriti upral o slupi.

Le Judske manušen odligenen

¹⁸ O nekbareder veliteľis o Nebuzaradan zaifľa the le nekbaredere rašas Serajah, le dujtone rašas Cefanjah the le trine rašajen, save stražinenas o vudar. ¹⁹ Andral o foros iľa oles, savo sas angloďa veliteľis upral o slugađa, pandže goďavere muršen, save sas pašes paš o

† 2Krn 4,2

kralis, le veliteľiskere pisaris, savo zapisinelas le muršen ke armada, the šovardeš (60) anglune muršen, saven ode arakhle. ²⁰ O Nebuzaradan len iľa a ligendďa ko Babiloňiko kralis andre Ribla. ²¹ Ode andre Ribla, andre Chamatiko phuv, len o Babiloňiko kralis diňa te murdarel.

Avke o Judske manuša sas zaile a odligende andral peskeri phuv.

O Gedaliah guverneris andre Judsko

²² O Babiloňiko kralis Nebukadnecar ačhaďa le Gedaliah guverneriske andre Judsko upral savore manuša, save na sas odligende andro Babilon. Ov sas le Achikamoskero čhavo, saveske sas papus o Šafan. ²³ Sar pes pal oda došunde o Judske veliteľľa the o slugađa, hoj o Babiloňiko kralis ačhaďa vaš o guverneris le Gedaliah, gele pal leste jekhetane peskere muršenca andre Micpa. Sas oda kala murša: o Jišmael, le Netanijoskero čhavo, o Jochanan, le Kareachoskero čhavo, o Serajah, le Tanchumetoskero čhavo andral e Netofa, the o Jaazaniah, le Maachoskero čhavo. ²⁴ O Gedaliah lenge phendďa: "Dav tumen lav. Ma daran pes le Babiloňike uradňikendar. Ačhen andre kadi phuv a služinen le Babiloňike kraliske, bo avke tumenge ela mištes!"

²⁵ Andro eftato čhon o Jišmael, le Netanijoskero čhavo, saveske sas papus o Elišamas, andral le kraliskeri famelija, geľa andre Micpa le deše muršenca a murdarďa le Gedaliah the le Judske the Babiloňike muršen, save ode leha sas. ²⁶ Akor savore manuša andral e Judsko, le čorestar džiči ko barvalo, the o armadakere veliteľľa gele andro Egipt, bo daranas pes le Babilončanendar.

O Jojachin hino premuklo andral e bertena

²⁷ Sar sas o Judsko kralis Jojachin odligendo andro Babilon tranda the eфта (37) berš, o Evil-Merodach ačhilľa kralis andro Babilon. Andro bišueftato (27.) džives andro dešudujto (12.) čhon andre oda berš premukľa andral e bertena le Jojachin. ²⁸ Delas les feder pačiv sar avre cudze kraľen, save sas leha andro Babilon. ²⁹ Le Jojachinoske sas domuklo te čhivel pal peste tele o bertenošike gada, a medik dživelas, chalas pal le kraliskero skamind. ³⁰ Sako džives, medik dživelas, o kralis les delas oda, so leske kampelas.

1. KRONIKENGERO

O potomki le Adamoskere dži ko Abraham

1 Adam sas dad le Šetoske, o Šet le Enošiske, ² o Enoš sas dad le Kenanoske, o Kenan le Mahalaleloske, o Mahalalel le Jaredoske, ³ o Jared le Enochoske, o Enoch le Matuzalemoske, o Matuzalem le Lamechoske ⁴ a o Lamech sas dad le Noachoske. Le Noach sas trin čhave: o Šem, o Cham the o Jafet.

⁵ Le Jafetoskere čhave sas o Gomer, o Magog, o Madaj, o Javan, o Tubal, o Mešech the o Tiras. ⁶ Le Gomeroskere čhave sas o Aškenaz, o Rifat [†] the o Togarmah. ⁷ Le Javanoskere čhave sas o Elišah the o Taršiš, the o Kittana the o Dodana.

⁸ Le Chamoskere čhave sas o Kuš, o Micrajim, o Put the o Kanaan. ⁹ Le Kušoskere čhave sas o Sebas, o Chavilah, o Sabtas, o Raemah the o Sabtechas. Le Raemoskere čhave sas o Šebah the o Dedan. ¹⁰ O Kuš sas dad le Nimrodoske. Ov sas ešebno (peršo) zoralo maribnaskero murš pre phuv. ¹¹ O Micrajim sas prapapus le Ludenge, le Anamenge, le Lehabenge, le Naf-tuchenge, ¹² le Patrusenge, le Kasluchenge, savendar hine o Filištinci, the le Kaftorenge. ¹³ Le Kanaanoskero ešebno čhavo sas o Sidon the dujto o Chet. ¹⁴ Lestar sas the o Jebuseja, o Amoreja, o Girgašeja, ¹⁵ o Chivija, o Arkija, o Sineja, ¹⁶ o Arvadeja, o Cemareja the o Chamataja.

¹⁷ Le Šemoskere čhave sas o Elam, o Aššur, o Arpachšad, o Lud the o Aram. Le Aramoskere čhave sas o Uc, o Chul, o Geter the o Mešech. ¹⁸ O Arpachšad sas dad le Šelachoske a o Šelach le Eberiske. ¹⁹ Le Eber sas duj čhave: O ešebne pes vičinelas Paleg, bo sar ov dživelas, e phuv sas rozuladi, a leskero phral pes vičinelas Joktan. ²⁰ Le Joktanoskere čhave sas o Almodad, o Šelef, o Chacarmavet, o Jerach, ²¹ o Hadoram, o Uzal, o Diklah, ²² o Ebal, o Abimael, o Šebah, ²³ o Ofir, o Chavilah the o Jobab. Kala savore sas le Joktanoskere čhave. ²⁴ Avke le Šemoskere potomki sas o Arpachšad, o Šelach, ²⁵ o Eber, o Paleg, o Reu, ²⁶ o Serug, o Nachor, o Terach ²⁷ the o Abram, savo hin o Abraham.

O potomki le Abrahamoskere dži ko Jakob

²⁸ Le Abrahamoskere čhave sas o Izak the o Izmael. ²⁹ Kala hine lengere potomki: Le Izmael sas dešuduj (12) čhave: O Nebajot sas nekphureder, palis o Kedar, o Adbeel, o Mibsam, ³⁰ o Mišmas, o Dumah, o Massas, o Chadad, o Temas, ³¹ o Jetur, o Nafiš the o Kedemah.

³² Le Abraham sas šov čhave la Keturaha, savi sas leske romni-služka: o Zimran, o Jokšan, o Medan, o Midijan, o Jišbak the o Šuach. Le Jokšanoske sas duj čhave: o Šebah the o Dedan. ³³ Le Midijan sas pandž čhave: o Efah, o Efer, o Chanoch, o Abidas the o Eldaah. Kala sas savore la Keturakere čhave.

³⁴ Le Abrahamoskere čhas, le Izak, sas duj čhave: O Ezav the o Jakob ^{††}.

Le Ezavoskere potomki

³⁵ Le Ezav sas pandž čhave: o Elifaz, o Reuel, o Jeuš, o Jalam the o Korach. ³⁶ Le Elifazoskere čhave sas o Teman, o Omar, o Cefi, o Gatam, o Kenaz, o Timnas the o Amalek. ³⁷ Le Reueloskere čhave sas o Nachat, o Zerach, o Šammah the o Mizzah.

Ešebne Edomike manuša the lengere kraľa

³⁸ Le Seiroskere čhave sas o Lotan, o Šobal, o Cibeon, o Anah, o Dišon, o Ecer the o Dišan.

³⁹ Le Lotanoskere čhave sas o Chori the o Homam a leskeri pheñ sas e Timna. ⁴⁰ Le Šobaloskere čhave sas o Alvan, o Manachat, o Ebal, o Šefi the o Onam. Le Cibeonoskere čhave sas o Ajah the o Anah. ⁴¹ Le Anoskero čhavo sas o Dišon. Le Dišonoskere čhave sas o Chemdan [‡], o Ešban, o Jitran the o Keran. ⁴² Le Eceroskere čhave sas o Bilhan, o Zaavan the o Jaakan. Le Dišanoskere čhave sas o Uc the o Aran.

⁴³ Kala sas o kraľa, save kralinenas andro Edom mek sigeder, sar sas andro Izrael kralis:

o Belas, čhavo le Beoriskero andral o foros Dinhaba.

⁴⁴ Sar muľa o Belas, ačhiľa pal leste kralis o Jobab, le Zerachoskero čhavo, andral e Bocra.

⁴⁵ Sar muľa o Jobab, pal leste kralinelas o Chušam andral e Temančiko phuv.

⁴⁶ Sar muľa o Chušam, pal leste ačhiľa kralis o Hadad, le Bedadoskero čhavo, savo ňerinda (zvitazinda) upral o Midijana pre Moabiko phuv. Le Hadadoskero foros sas o Avit.

⁴⁷ Sar muľa o Hadad, pal leste ačhiľa kralis o Samlah andral e Masreka.

⁴⁸ Sar muľa o Samlah, ačhiľa kralis o Šaul andral o Rechobot pašal o paňi Euftrat.

⁴⁹ Sar muľa o Šaul, ačhiľa kralis o Baal-Chanan, le Achboriskero čhavo.

⁵⁰ Sar muľa o Baal-Chanan, ačhiľa kralis o Hadad andral o foros Pau, leskeri romni sas e Mehetabel, savi sas čhaj la Matredakeri a oj čhaj la Me-Zahabakeri.

[†] Abo: Difat

^{††} E Hebrejiko čhib: o Izrael [‡] Abo: Chamran

⁵¹ Sar muľa o Hadad, kala vodci lidžanas o Edomike kmeňi: o Timnas, o Alvah, o Jetet, ⁵² o Oholibamah, o Elah, o Pinon, ⁵³ o Kenaz, o Teman, o Mibcar, ⁵⁴ o Magdiel the o Iram.

Le Jakobskere čhave

2 Le Jakob sas dešuduj (12) čhave: o Ruben, o Šimeon, o Levi, o Juda, o Jissachar, o Zebulun, ² o Dan, o Jozef, o Benjamin, o Naftali, o Gad the o Ašer.

Le Judaskere potomki dži ko David

³ Kala hine le Judaskere čhave, save les sas la Bašua, savi sas andral o Kanaan: O Er, Onan the o Šelah. Ale o Er, leskero ešebno (peršo), na sas le RAJESKE pre dzeka, vašoda les murdarda. ⁴ Le Juda sas peskera boraha la Tamaraha duj čhave: o Perc the o Zerach. Savore čhave le Juda sas pandž.

⁵ Le Percoskere čhave sas o Checron the o Chamul. ⁶ Le Zerach sas pandž čhave: o Zimri, o Etan, o Heman, o Kalkol the o Dardas. ⁷ Le Karmioskero čhavo sas o Achan, savo anda le Izrael andre bibach oleha, hoj peske ila olestar, so sas oddino le Devleske.

⁸ Le Etanoskero čhavo sas o Azariah.

⁹ Le Checronskere čhave sas: o Jerachmeel, o Ram the o Kaleb.

¹⁰ O Ram sas dad le Amminadaboske a o Amminadab le Nachšonoske, savo sas vodcas upral e Judsko. ¹¹ O Nachšon sas dad le Salmonoske a o Salmon le Boaziske. ¹² O Boaz sas dad le Obedoske a o Obed le Izajoske.

¹³ Le Izaj sas efa čhave: Ešebno o Eliab, dujto o Abinadab, trito o Šimeah, ¹⁴ štarto o Netaneel, pandžto o Raddaj, ¹⁵ šovto o Ocem the eftato o David. ¹⁶ Lengere pheňa sas e Ceruja the e Abigajil. La Ceruja sas trin čhave: o Abišaj, o Joab the o Asahel. ¹⁷ La Abigajilakero čhavo sas o Amasah. Leskero dad sas o Izmaelitas o Jeter.

Le Checronskere potomki

¹⁸ Le Kaleb, le Checronskere čhas, sas duj romňija – e Azuba the e Jeriot – savenca les sas trin čhave: o Ješer, o Šobab the o Ardon. ¹⁹ A sar muľa e Azuba, o Kaleb peske ila romňake la Efrata, savaha les sas o Chur. ²⁰ O Chur sas dad le Urihoske, savo sas dad le Becaleeloske.

²¹ Sar le Checronoske sas šovardeš (60) berš, ila peske la Machiroskera čha romňake, savi sas pheň le Gileadoske. Laha les sas o Segub. ²² O Segub sas dad le Jairoske, savo lidžalas bišutrin (23) fori andro Gilead. ²³ Ale o Gešura the o Aramejčana lenge zaile šovardeš (60) gava: Le Jairoskere gava the o foros Kenat le gavenca. A savore manuša, save bešenias andro Gilead, sas le Machiroskere potomki.

²⁴ Sar muľa o Checron, o Kaleb ila la Efrata romňake, savi sas vdova pal leskero dad o Checron a savaha les sas o Aščur, savo ačhađa o foros Tekoa.

Le Jerachmeeloskere potomki

²⁵ Le Jerachmeel, le Checronoskere nekphureder čhas, le sas pandž čhave: Ešebno o Ram, o Bunah, o Oren, o Ocem the o Achijah. ²⁶ Le Jerachmeel sas the dujto romňi – e Atara, savi sas daj le Onamoske. ²⁷ Le Ram, savo sas le Jerachmeeloskero ešebno čhavo, sas kala čhave: o Maac, o Jamin the o Eker. ²⁸ Le Onamoskere čhave sas o Šammaj the o Jada. Le Šammajoskere čhave sas o Nadab the o Abišur.

²⁹ Le Abišuroskeri romňi sas e Abihajil. Laha les sas o Achban the o Molid. ³⁰ Le Nadaboskere čhave sas o Seled the o Appajim. Le Seled na sas čhave. ³¹ O Appajim sas dad le Jišioske a o Jiši le Šešanoske, o Šešan sas dad le Achlajoske.

³² Le Jada, le Šammajoskere phrales, sas duj čhave: o Jeter the o Jonatan. Le Jeter na sas čhave. ³³ Le Jonatanoskere čhave sas o Palet the o Zazas. Kala sas o čhave le Jerachmeeloskere.

³⁴ Le Šešan na sas čhave, ča čhaja. Ale sas les sluhias andral o Egipt, savo pes vičinelas Jarchas. ³⁵ Leske diňa peskera čha romňake a sas len o Attaj. ³⁶ O Attaj sas dad le Natanoske a o Natan le Zabadoske, ³⁷ o Zabad sas dad le Eflaloske a o Eflal le Obedoske, ³⁸ o Obed sas dad le Jehuoske a o Jehu sas dad le Azarioske. ³⁹ O Azariah sas dad le Cheleciske a o Chelec le Elastoske, ⁴⁰ o Elasaš sas dad le Sismajoske a o Sismaj le Šallumoske, ⁴¹ o Šallum sas dad le Jekamioske a o Jekamiah le Elišamasoske.

Le Kaleboskere potomki

⁴² Le Kaleb, le Jerachmeeloskere phrales, sas duj čhave: Ešebno o Mešas, savo sas dad le Zifoske, the dujto o Marešah, savo sas dad le Chebronoske. ⁴³ Le Chebronoskere čhave sas: o Korach, o Tappuach, o Rekem the o Šemas. ⁴⁴ O Šemas sas dad le Rachamoske the o Racham le Jorkoamoske a o Rekem le Šammajoske. ⁴⁵ O Šammaj sas dad le Maonoske a o Maon le Bet-Curoske.

⁴⁶ Le Kaleb sas mek trin čhave la Efaha, la romňaha-služobničkaha: o Charan, o Mocas the o Gazez. Palis sas the le Charan čhavo, saves vičinenas o Gazez.

⁴⁷ Le Jahdajoskere čhave sas: o Regem, o Jotam, o Gešan, o Palet, o Efah the o Šaaf.

⁴⁸ Le Kaleb sas the aver romňi-služka e Maacha. Laha les sas o Šeber the o Tirchanah. ⁴⁹ Palis o Šaaf, savo ačhađa o Madmanna, the o Ševas, savo ačhađa o Machbena the e Gibeja. Le Kaleboskeri čhaj sas e Achsa.

⁵⁰ The kala sas le Kaleboskere čhave: Ešebno o Chur, savo les sas la Efrataha, o Šobal, savo ačhađa o Kirjat-Jearim, ⁵¹ o Salmas, savo ačhađa o Betlehem, o Charef, savo ačhađa o Bet-Gader.

⁵² O Šobal, savo ačhađa o Kirjat-Jearim, sas prapapus le manušenge andral o Haroeh the jepaš Menuchoťanengera fajtake. ⁵³ Savore kala kmeňi bešenias paš o Kirjat-Jearim: o Jitričana, o Putana, o Šumatana the o

Mišrajitana. O manuša andral o fori Cora the o Eštaol sas andral odi fajta.

⁵⁴ O Salmas ačhađa o Betlehem a sas prapapus le manušenge andral e Netofa the Atarot-Bet-Joab a jepaš Menuchoťanengera fajtake andral e Cora.

⁵⁵ O fajti le pisarengere, save bešenias andro Jabec, sas o Tiraťana, Šimeatana a o Suchatana. On sas o Keniti, save sas le Chammatoskere potomki, a ov sas prapapus le Rechabčanenge.

Le Davidoskere potomki

3 Kala sas le Davidoskere čhave, save ulile andro Hebron: Ešebno (peršo) o Amnon la Achinomatatar, savi sas andral o Jezreel; dujto o Daniel la Abigajilatar, savi sas andral o Karmel; ² trito o Absolon la Maachatar, savi sas čhaj le kralfiskeri Talmajoskeri andral o Gešur; štarto o Adonijah, la Chaggitatar; ³ pandžto o Šefatjah la Abitalatar; šovto o Jitream la Eglatar.

⁴ Kala šov čhave ulile andro Hebron, kaj kralinelas efa berš the šov čhon, a andro Jeruzalem kralinelas tranda the trin (33) berš.

⁵ Kala čhave leske ulile andro Jeruzalem: o Šimea, o Šobab, o Natan the o Šalamun – štar la Batšebatar, le Ammieloskera čhatar – ⁶ the o Jibchar, o Elišuah, o Elifelet, ⁷ o Nogah, o Nefeg, o Jafias, ⁸ o Elišamas, o Eljadas the o Elifelet, jekhetane eňa čhave. ⁹ Kala savore sas le Davidoskere čhave a sas les mek aver čhave le romňenca-služobničkenca. E Tamar sas lengeri pheň.

O potomki le Šalamunoskere

¹⁰ Kala sas potomki le Šalamunoskere, save sas kraľa andre Judsko: o Rechabeam, leskero čhavo o Abijah, leskero čhavo o Asa, leskero čhavo o Jošafat, ¹¹ leskero čhavo o Jehoram, leskero čhavo o Achazijah, leskero čhavo o Joaš, ¹² leskero čhavo o Amacijah, leskero čhavo o Azarijah, leskero čhavo o Jotam, ¹³ leskero čhavo o Achaz, leskero čhavo o Chizkija, leskero čhavo o Menašše, ¹⁴ leskero čhavo o Amon, leskero čhavo o Joziaš ¹⁵ the leskere štar čhave: ešebno o Jochanan, o dujto Jojakim, o trito Cidkijah the o štarto Šallum.

¹⁶ Le Jojakim sas duj čhave: o Jechonijah the o Cidkijah.

Le Jojakimoskere potomki

¹⁷ Kala hine efa čhave le Jechonijoskere, savo sas bertenošis andre Babilon: o Šealtiel, ¹⁸ o Malkiram, o Pedajah, o Šenaccar, o Jekamiah, o Hošamas the o Nedabiah. ¹⁹ Le Pedajoskere čhave sas o Zerubbabel the o Šimej. Le Zerubbabeloskere čhave sas o Mešulam the o Chananiyah. Lengeri pheň sas e Šelomita. ²⁰ Sas les the aver pandž čhave: o Chašubah, o Ohel, o Berechijah, o Chasadijah the o Jušab-Chesed.

²¹ Le Chananijoskere potomki sas o Palatiah the o Ješajah, o Refajah, o Arnan, o Obadiaš the o Šechanijah a lengere čhave. ²² O Šechanijah sas dad le Šemasoske. Le Šemajah sas šov čhave: o Chattuš, o Jigal, o

Bariach, o Neariah the o Šafat. ²³ Le Neariah sas trin čhave: o Eljoenaj, o Chizkijah the o Azrikam. ²⁴ Le Eljoenaj sas efa čhave: o Hodavijah, o Eljašib, o Palajah, o Akkub, o Jochanan, o Delajah the o Anani.

Le Judaskere potomki

4 Le Judaskere čhave sas o Perek, o Checron, o Karmi, o Chur the o Šobal. ² O čhavo le Šobaloskero sas o Reajah, leskero sas o Jachat a leskere o Achumaj the o Lahad. Kala savore sas andral e fajta, so bešenias andre Cora.

³⁻⁴ O Chur sas o nekphureder čhavo le Kaleboskero la Efrataha. Ov ačhađa [†] o Betlehem. Le Chur sas trin čhave: o Etam, o Penuel the o Ezer. Le Etam sas trin čhave: o Jezreel, o Jišma the o Jidbaš a jekh čhaj e Haclelponia. O Penuel ačhađa o foros Gedor a o Ezer o foros Chuša.

⁵ O Aščur ačhađa o foros Tekoa a sas les duj romňija: e Chela the e Naara. ⁶ La Naaraha sas les štar čhave: o Achuzzam, o Chefer, o Temeni the o Achaštar. ⁷ La Chelaha les sas o Ceret, o Jecochar the o Etnan.

⁸ Le Kocoskere čhave sas o Anub the o Cobebah. Le Acharcheloskere fajti sas le Kocoskere potomki. O Acharchel sas čhavo le Harumoskero.

⁹ Le Jabec denas bareder pačiv sar leskere phralen. Leskeri daj leske diňa nav Jabec, bo phendā: “Andro dukha les andom pro svetos.” ¹⁰ Andre jekh džives o Jabec vičinelas pro Izraeloskero Del: “Mangav tut, požehňin man, hoj man te el mek buter phuv. Mi lidžal man tiro vast a odle mandar savoro nalačhipen, so man šaj dukhavel.” Avke o Del les diňa savoro, so lestar mangelas.

¹¹ Le Šuchoskero phral sas Kelub. Leskero čhavo sas o Mechir a leskero Ešton. ¹² Le Ešton sas trin čhave: o Bet-Rafah, o Paseach the o Techinnah, savo ačhađa o foros Ir-Nachaš. O potomki kale muršengere dživenias andre Recha.

¹³ Le Kenaz sas duj čhave: o Otňiel the o Serajah. Le Otňiel sas duj čhave: o Chatat the o Meonotaj. ¹⁴ O Meonotaj sas dad le Ofroske.

O Serajah sas dad le Joaboske, savo ešebno (peršo) gela te bešel andre dolina Ge-Charašim, kaj dživenias o majstri.

¹⁵ Le Kaleb, le Jefunnoskere čhas, sas trin čhave: o Iru, o Elah the o Naam. O Elah sas dad le Kenazoskero. ¹⁶ Le Jehallelel sas štar čhave: o Zif, o Zifah, o Tirjah the o Asarel.

¹⁷⁻¹⁸ Le Ezrah sas štar čhave: o Jeter, o Mered, o Efer the o Jalon. O Mered peske iľa romňake la Bitiah, savi sas čhaj le Faraonoskeri. Laha les sas e Mirijam the duj čhave: o Šammaj the o Jišbach, savo ačhađa o foros Eštemoa. O Mered peske iľa the romňa andral o kmeňos Juda. Laha les sas aver trin čhave: o Jered, savo ačhađa o foros Gedor, o Cheber, savo ačhađa o Socho, the o Jekutiel, savo ačhađa o foros Zanoach.

¹⁹ O Hodijah peske iľa le Nachamoskera pheňa romňake. Lengere potomki sas e fajta Garm, savi

[†] E Hebrejiko čhib: o dad le Betlehemoskero

bešelas andro foros Keila, the e fajta le Maachoskeri, savi bešelas andro foros Eštemoa.

²⁰ Le Šimonoskere čhave sas: o Amnon, o Rinnah, o Ben-Chanan the o Tilon.

Le Jišioskere čhave sas o Zochet the o Ben-Zochet.

Le Šeloskere potomki

²¹ O Šelah sas jekh le Judaskere čhavendar. Leskere potomki sas o Er, savo ačhađa o foros Lecha; o Laadah, savo ačhađa o foros Mareša; o fajti andral e Bet-Ašbea, save džanenas te kerel le lanostar o pochтана; ²² o Jokim the o murša andral o foros Kozeba; o Joaš the o Saraf, save lidžanas † o Moab, ale palis pes odarik visarde andro Lechem. Ale ada hin čir-latuno vakeriben. ²³ On sas ola, save kerenas la čhikatar o čare, bešenas andro fori Netaim the Gedera a služinenas le kraliske.

Le Šimeonoskere potomki

²⁴ Le Šimeonoskere čhave sas o Nemuel, o Jamin, o Jarib, o Zerach the o Šaul. ²⁵ Le Šauloskero čhavo sas o Šallum, leskero čhavo o Mibsam a leskero čhavo o Mišmas. ²⁶ Le Mišmasoskero čhavo sas o Chammuel, leskero čhavo o Zachur a leskero čhavo o Šimej. ²⁷ Le Šimej sas dešušov (16) murša the šov čhaja, ale leskere phralen na sas ajci čhave, vašoda le Šimeonoskero kmeňos na sas ajso baro sar le Judaskero.

²⁸ On bešenas andre Beer-Šeba, Molada, Chacar-Šual, ²⁹ Bilha, Ecem, Tolad, ³⁰ Betuel, Chorma, Ciklag, ³¹ Bet-Markabot, Chacar-Susim, Bet-Biri the andro Šaarajim. Kala sas lengere fori dži akor, medik kralinelas o David. ³² Lengere pandž gava sas o Etam, o Ajin, o Rimmon, o Tochen, o Ašan ³³ the mek savore gava, so sas pašal lende dži paš o foros Baal. Kala hine o thana, kaj le Šimeonoskere potomki bešenas, sar sas pisimen andre fajtengere zvitki.

³⁴⁻³⁸ Kala murša sas vodci andre peskere fajti: o Mešobab, o Jamlech, le Amacijoskero čhavo o Jošah, o Joel, o Jehu – savo sas čhavo le Jošibjoskero, ov le Serajoskero a ov le Asieloskero – o Eljoenaj, o Jaakobah, o Ješochajah, o Asajah, o Adiel, o Jesimiel, o Benajah the o Zizas, o čhavo le Šifioskero, ov le Allonoskero, ov le Jedajoskero, ov le Šimrioskero a ov le Šemajoskero.

Lendar ačhiľa bari famelija, ³⁹ vašoda odarik gele het a džanas paš o Gedor pro vichodos ola dolinatar te rodel čar prekal peskere stadi. ⁴⁰ Arakhle ode igen bari the lachi maľa. Andre odi phuv sas smirom a šunenas pes ode mištes. Angloda andre odi phuv bešenas o Chamčana.

⁴¹ Avke kala fajti avle andro Gedor, sar kralinelas andre Judsko o Chizkija. Le Chamčanengere stani čhide tele a le Meunitanen, save ode bešenas, murdarde avri a zaile lengere thana, bo ode sas maľi prekal lengere stadi. Avke ode bešen dži adadžives. ⁴² Pozneder vaj pandž šel (500) murša andral o kmeňos Šimeon gele pro verchi Seir andro Edom. Lidžalas len o Palatiah, o

Neariah, o Refajah the o Uzziel, le Jišioskere čhave.

⁴³ Murdarde le Amaleken, save ode mek ačhile, a ode bešen dži adadžives.

Le Rubenoskere potomki

⁵ O Ruben sas ešebno (peršo) čhavo le Jakoboskero, ale pašliľa le dadeskera romňaha, vašoda našađa o pravos, so hin ešebne čhas. Leskero pravos pregeľa pro Jozefoskere čhave a avke andre famelijakero rodokmeňos na sas les pačiv sar ešebnes. ² No choc te andral o kmeňos Juda avľa baro vodcas a choc sas zoraleder sar leskere phrala, o pravos le ešebne čhaskero ačhiľa le Jozefoske. ³ Le Ruben, ešebne Jakoboskere čhas, sas štar čhave: o Chanoch, o Palu, o Checron the o Karmi.

⁴ O Joel sas dad le Šemajoske, ov le Gogoske, o Gog le Šimejoske, ⁵ ov le Michoske, o Michah le Reajoske a ov le Baaloske. ⁶ O Baal sas dad le Beeroske, savo sas vodcas upral le Rubenoskero kmeňos, sar len zaifľa a odľigenda o Asiriko kralis Tiglat-Pileser.

⁷ Andre famelijakero zvitkos hin zapisimen o vodci andral o kmeňos Ruben: O Jeiel, palis Zecharijah, ⁸ o Belas, čhavo le Azazoskero, čhavo le Šemasoskero, čhavo le Joeloskero. On bešenas le forostar Aroer dži pro severos ko Nebo the Baal-Meon. ⁹ Andre phuv Gilead len sas igen but stadi, a vašoda bešenas pre pušta, so hiňi pro vichodos dži paš o paňi Eufrat.

¹⁰ Sar sas kralis o Saul, o kmeňos Ruben geľa andro mariben pro Hagarčana a murdarde savoren. Avke gele te bešel andre lengere fori andro Gilead pro vichodos.

Le Gadoskere potomki

¹¹ O kmeňos Gad bešelas pro severos le Rubenostar, andre phuv Bašan dži ko foros Salcha. ¹² O Joel sas ešebno vodcas andre phuv Bašan, dujto sas o Šafam, a pal lende o Janaj the o Šafat. ¹³ Aver Gadoskere fajti a lengere vodci sas: o Michael, o Mešullam, o Šebas, o Joraj, o Jakan, o Zias the o Eber. ¹⁴ On sas potomki le Abichajiloskere, savo sas čhavo le Churioskero, ov le Jaroachoskero, ov le Gileadoskero, ov le Michaeloskero, ov le Ješišajoskero, ov le Jachdoskero a ov le Buzoskero. ¹⁵ O vodcas kale fajtenge sas o Achi, savo sas le Abdieliskero čhavo a ov le Guniskero. ¹⁶ On bešenas andre phuva Gilead the Bašan andro gava the pre caľi phuv Šaron, kaj sas čar prekal o stadi. ¹⁷ (Kala savore sas pisimen andro famelijakero rodokmeňos, sar andre Judsko kralinelas o Jotam a andro Izrael o Jarobeam.)

¹⁸ Andro kmeňos Ruben, Gad the jepaš kmeňos Menašše sas 44 760 slugađa avrisikade andro mariben le štitenca, šabľenca, lukenca the šipenca. ¹⁹ On pes marenas le Hagarčanenca the le kmeňenca Jetur, Nafiš the le Nodab. ²⁰ On ňerinde (zvitázinde) upral lende vašoda, bo vičinenas ko Del andro mariben. Ov len šundľa avri a pomožinda lenge, bo pačanas andre leste. Vašoda diňa andre lengere vasta le Hagarčanen

† Abo: save peske ile romňen andral o Moab

the olen, save lenge pomožinenas. ²¹ Ile lendar 50 000 t'avi, 250 000 bakren, 2 000 somaren the 100 000 manušen. ²² The but manuša mule andro mariben, bo oda mariben sas le Devleskero. Pre lengero than bešen nas dži akor, medik na sas zaile andre Asirija.

O jepaš kmeňos Menašše

²³ O jepaš kmeňos Menašše bešen as andre phuv Bašan dži ko Baal-Chermon the Senir, oda hin o verchos Chermon. On sas igen baro kmeňos. ²⁴ Kala sas zorale maribnaskere murša the anglune vodci, save lidžanas peskere fajti: o Efer, o Jiši, o Eliel, o Azriel, o Jirmejah, o Hodavijah the o Jachdiel.

O kmeňi pro vichodos odligende andre Asirija

²⁵ Ale o manuša na sas pačivale peskere dadengere Devleske, omukle les a chudle te lašarel le devlen avre narodengere, saven anglal lende o Del zničinda. ²⁶ O Izraeliko Del kerd'a upre le Asirike kralis le Pul – oda hin o Tiglat-Pileser – hoj te džal pre lende pro mariben. Ov zaila o kmeňi Ruben, Gad the jepaš kmeňos Menašše a odligenda len andro Chalach, Chabor, andre Hara the ko paňi Gozan, kaj hine dži adadžives.

Le Leviskere potomki

²⁷ Le Levi sas trin čhave: o Geršon, o Kohat the o Merari.

²⁸ Le Kohatoskere čhave sas o Amram, o Jishar, o Chebron the o Uzziel.

²⁹ Le Amram sas duj murša: o Aron the o Mojžiš; the jekh čhaj e Mirijam. Le Aron sas štar čhave: o Nadab, o Abihu, o Eleazar the o Itamar.

³⁰ O Eleazar sas dad le Pinchasoske, o Pinchas le Abišuasoske, ³¹ o Abišuas sas dad le Bukkioske, o Bukki le Uzzijske, ³² o Uzzi le Zerachijoske, o Zerachijah le Merajotoske, ³³ o Merajot le Amarioske, o Amariah le Achituboske, ³⁴ o Achitub le Cadokoske, o Cadok le Achimaacoske, ³⁵ o Achimaac le Azarioske, o Azariah le Jochananoske, ³⁶ o Jochanan sas dad le Azarioske, savo služinelas sar rašaj andro Chramos, so ačhađa o Šalamun andro Jeruzalem. ³⁷ O Azariah sas dad le Amarioske, o Amariah le Achituboske, ³⁸ o Achitub le Cadokoske, o Cadok le Šallumoske, ³⁹ o Šallum le Chilkijoske, o Chilkijah le Azarioske, ⁴⁰ o Azariah le Serajoske a o Serajah le Jehocadakoske. ⁴¹ Ale o Jehocadak sas zailo jekhetane le manušenca andral o Jeruzalem the Judsko akor, sar len o RAJ bičhađa andro Babilon le Nebukadnecaroskere vasteha.

Aver potomki le Leviskere

6 Le Leviskere čhave sas o Geršom, o Kohat the o Merari. ² Le Geršomoskere čhave sas o Libni the o Šimej. ³ Le Kohatoskere čhave sas o Amram, o Jishar, o Chebron the o Uzziel. ⁴ Le Merariskere čhave sas o Machli the o Muši. Kale hine le Levitengere fajti pal lengere fameliji:

⁵ Le Geršomoskero čhavo sas o Libni, leskero o Jachat, leskero o Zimmah, ⁶ leskero o Joach, leskero o Iddo, leskero o Zerach the leskero o Jeatraj.

⁷ Le Kohatoskero čhavo sas o Amminadab, leskero o Korach, leskero o Assir, ⁸ leskero o Elkanah, leskero o Ebjasaf, leskero o Assir, ⁹ leskero o Tachat, leskero o Uriel, leskero o Uziah a leskero o Šaul.

¹⁰ Le Elkanah sas duj čhave: o Amasaj the o Achimot. ¹¹ Le Achimotoskero čhavo sas o Elkanah, leskero o Co-faj, leskero o Nachat, ¹² leskero o Eliab, leskero o Jerocham, leskero o Elkanah the leskero o Samuel.

¹³ Le Samuel sas duj čhave: Ešebno (peršo) o Joel a dujto o Abijah.

¹⁴ Le Merariskero čhavo sas o Machli, leskero o Libni, leskero o Šimej, leskero o Uzzah, ¹⁵ leskero o Šimeas, leskero o Chaggijah the leskero o Asajah.

O lavutara andre le RAJESKERO kher

¹⁶ Kalen muršen o David ačhađa, hoj te služinen le giľavipnaha pro than, kaj lašarenas le RAJES akorestar, sar andro Jeruzalem ande e Zmluvakeri Archa. ¹⁷ On služinenas le giľavipnaha anglo Sentno Stanos, medik o Šalamun na ačhađa o Chramos andro Jeruzalem. On kerenas služba akor, sar pre lende avelas o šoros.

¹⁸ Kala manuša lengere čhavenca kerenas kadi služba: andral e Kohatoskeri fajta o lavutaris Heman, saveske sas dad o Joel, leske o Samuel, ¹⁹ leske o Elkanah, leske o Jerocham, leske o Eliel, leske o Toach, ²⁰ leske o Cuf, leske o Elkanah, leske o Machat, leske o Amasaj, ²¹ leske o Elkanah, leske o Joel, leske o Azarijah, leske o Cefanjah, ²² leske o Tachat, leske o Assir, leske o Ebjasaf, leske o Korach, ²³ leske o Jishar, leske o Kohat, leske o Levi the leske o Jakob.

²⁴ O Asaf, le Hemanoskero pašutno, leha ačhelas andre služba pal e čači (pravo) sera. Le Asafoskero dad the phure dada pal o rodokmeňos sas: o Berechijah, o Šimea, ²⁵ o Michael, o Baasejah, o Malkijah, ²⁶ o Etni, o Zerach, o Adajah, ²⁷ o Etan, o Zimmah, o Šimej, ²⁸ o Jachat, o Geršom the o Levi.

²⁹ Pal e baľogňi (ľavo) sera leha ačhelas andre služba o Etan andral le Merariskeri fajta. Leskero dad the phure dada pal o rodokmeňos sas: o Kiši, o Abdi, o Malluch, ³⁰ o Čašabijah, o Amacijah, o Chilkijah, ³¹ o Amci, o Bani, o Šemer, ³² o Machli, o Muši, o Merari the o Levi. ³³ Okle Levitenge sas dine savore aver službi andro Stanos, pro than, kaj lašarenas le Devles.

Le Aronoskere potomki

³⁴ O Aron peskere čhavenca anelas o labarde the o voňava obeti pro oltara. On kerenas andro Neksentneder Than savori služba, hoj o RAJ te odmukel o bini le Izraelitenge, sa avke sar prikazinda o Mojžiš, le Devleskero služobňikos. ³⁵ Kala hine le Aronoskere potomki: Leskero čhavo sas o Eleazar, leskero o Pinchas, leskero o Abišuas, ³⁶ leskero o Bukki, leskero o Uzzi, leskero o Zerachijah, ³⁷ leskero o Merajot, leskero o

Amariah, leskero o Achitub, ³⁸ leskero o Cadok the leskero o Achimaac.

O fori dine le Levitenge

³⁹ Kala hine o fori the o phuva, so chudle o potomki le Aronoskere la Kohatoskera fajtatar. On chudle ešebno kotor la phuvatar, so sas dino le Levitenge prekal o losos. ⁴⁰ Andre Judsko chudle o foros Hebron le maľenca, so sas pašal leste. ⁴¹ Ale o gava le maľenca pašal oda foros sas dine le Kaleboske, le Jefunnoskere čhaske. ⁴² Le Aronoskere potomkenge sas dine kale fori le maľenca: o Hebron, so sas o foros pro garuďipen †, o Jattir, e Libna, e Eštemoa, ⁴³ o Chilen, o Debir, ⁴⁴ o Ašan the o Bet-Šemeš. ⁴⁵ Le kmeňostar Benjamin lenge sas dine o fori le maľenca: e Geba, o Alemet the o Anatot. Kala dešutrin (13) fori sas rozulade (rozďelimen) maškar o Kohatoskere potomki.

⁴⁶ Okla potomki le Kohatoskere chudle prekal o losos deš fori le kmeňostar Menašše pal o zapados.

⁴⁷ Le Geršomoskere potomkenge sas dine dešutrin fori andral o kmeňi Jissachar, Ašer, Naftali, the vichodno Menašše andro Bašan. ⁴⁸ Le Merariskere potomkenge prekal o losos sas dine dešuduj (12) fori andral o kmeňi Ruben, Gad the Zebulun. ⁴⁹ Avke o Izraeliti dine le Levitenge o fori le maľenca. ⁵⁰ Kala fori andral o kmeňi Juda, Šimeon the Benjamin lenge sas dine prekal o losi.

⁵¹ Le kmeňostar Efrajim sas dine varesave le Kohatoskere fajtenge kala fori le maľenca: ⁵² O Šichem pro Efrajimoskere brehi, so sas o foros pro garuďipen, o Gezer, ⁵³ o Jokmeam, o Bet-Choron, ⁵⁴ o Ajalon the o Gat-Rimmon. ⁵⁵ Le Kohatoskere fajtenge, save ačhile, sas dine le kmeňostar Menašše pro zapados o fori Aner the Bileam le maľenca.

⁵⁶ Le Geršomoskere potomkenge sas dine kala fori le maľenca:

andral o kmeňos Menašše pro vichodos o Golan andre phuv Bašan the Aštarot;

⁵⁷ le kmeňostar Jissachar: o Kedeš, o Daberat, ⁵⁸ o Ramot the o Anem;

⁵⁹ le kmeňostar Ašer: o Mašal, o Abdon, ⁶⁰ o Chukok the o Rechob;

⁶¹ le kmeňostar Naftali: o Kedeš andre Galileja, o Chammon the o Kirjatajim.

⁶² Olenge, ko ačhile le Merariskere potomstvosar, sas dine le kmeňostar Zebulun o fori Rimmon the Tabor le maľenca.

⁶³ Le kmeňostar Ruben pre vichodno sera le Jordanostar paš o Jericho lenge sas dine kala štar fori le maľenca: o Becer pre pušća, e Jahca, ⁶⁴ o Kedemot the o Mefaat;

⁶⁵ a le kmeňostar Gad kala fori: o Ramot andro Gilead, o Machanajim, ⁶⁶ o Češbon the o Jazer.

Le Jissacharoskere potomki

7 Le Jissachar sas štar čhave: o Tolas, o Puah, o Jašub the o Šimron.

² Le Tolasoskere čhave sas o Uzzi, o Refajah, o Jeriel, o Jachmaj, o Jibsam the o Šemuel. On sas vodci andre famelija le Tolasoskera fajtake. Andre lengero fajtakero rodokmeňos sas zapisimen 22 600 zorale maribnaskere murša, sar kralinelas o David.

³ Le Uzzioskero čhavo sas o Jizrachiah. Le Jizrachioskere čhave sas o Michael, o Obadiah, o Joel the o Jiššijah. On savore sas vodci andro fajti. ⁴ Andre lengero rodokmeňos sas zapisimen 36 000 maribnaskere murša, bo sas len but romňija the čhave.

⁵ Savore zorale maribnaskere murša, save sas zapisimen andre le Jissacharoskero rodokmeňos, sas 87 000.

Le Benjaminengere potomki

⁶ Le Benjamin sas trin čhave: o Belas, o Becher the o Jediael.

⁷ Le Belas sas pandž čhave: o Ecbon, o Uzzi, o Uzziel, o Jerimot the o Iri. On sas zorale maribnaskere murša the vodci andre peskere fajti. Andre lengero rodokmeňos sas zapisimen 22 034 maribnaskere murša.

⁸ Le Becheroskere čhave sas o Zemirah, o Joaš, o Eliezer, o Eljoenaj, o Omri, o Jeremot, o Abijah, o Anatot the o Alemet. ⁹ Dojekh lendar sas vodcas andre peskeri fajta. Andre lengero rodokmeňos sas zapisimen 22 200 maribnaskere murša.

¹⁰ Le Jediaeloskero čhavo sas o Bilhan. Le Bilhanoskere čhave sas o Jeuš, o Benjamin, o Ehud, o Keanaanah, o Zetan, o Taršiš the o Achišachar. ¹¹ Kala savore le Jediaeloskere čhave sas vodci andre peskeri fajta. Lendar sas 17 200 zorale maribnaskere murša, save sas pririchtimen te džal andro mariben. ¹² Le Irioskere čhave sas o Šuppim the o Chuppim.

O Dan †† sas dad le Chušimenge.

Le Naftaliskere potomki

¹³ Le Naftaliskeri daj sas e Bilha a leskere čhave sas o Jachciel, o Guni, o Jecer the o Šallum.

Le Menaššeskere potomki

¹⁴ Le Menašše la romňaha-služobňičkaha, andral o Aram, sas duj čhave: o Asriel the o Machir, savo sas dad le Gileadoske. ¹⁵ O Machir arakhľa romňijen prekal o Šuppim the Chuppim. E Maacha sas leskeri pheň. Leskero dujto čhavo sas o Celofchad. Le Celofchad sas ča čhajora.

¹⁶ Le Machir peskera romňaha la Maachaha sas čhavo a oj leske diňa nav Pereš. A leskero phral sas o Šereš. Le Šerešoskere čhave sas o Ulam the o Rekem. ¹⁷ O Ulam sas dad le Bedanoske. Kala sas savore potomki le Gileadoskere, čhavo le Machiroskero, čhavo le Menaššeskero.

† 4. M. 35,11

†† Abo: aver murš

¹⁸ Le Gileadoskeri pheñ e Hammolechet sas daj le Išhodoske, Abiezeriske the le Machloske. ¹⁹ Le Šemidas sas štar čhave: o Achjan, o Šechem, o Likchi the o Aniam.

Le Efrajimoscere potomki

²⁰ O Efrajim sas dad le Šutelachoske, ov le Beredoske, ov le Tachatoske, ov le Eladoske, ov le Tachatoske, ²¹ ov le Zabadoske a ov le Šutelachoske. Le Efrajim sas mek duj čhave, o Ezer the o Elad, ale len murdarde o manuša andral o Gat akor, sar avle te čorel lengero dobitkos. ²² Lengero dad o Efrajim but dživesa likerelas o smutkos. A avke avle ke leste leskere phrala a prevakerenas les. ²³ Palis geľa ke peskeri romñi a pašlila laha. Ulila lake muršoro, saveske diňa nav Berijah, bo pre leskeri famelija avla e bibach.

²⁴ Le Efrajimosceri čhaj sas e Šeera. Oj diňa te ačhavle o Teluno the Upruno Bet-Choron the o Uzen-Šeera.

²⁵ Le Efrajim sas mek jekh čhavo o Refach. Leskere potomki sas kala: Leskero čhavo o Rešef, leskero o Telach, leskero o Tachan, ²⁶ leskero o Ladan, leskero o Ammichud, leskero o Elišamas, ²⁷ leskero o Nun the leskero o Jozua.

²⁸ Lengere phuva the fori sas kala: o Betel le gavenca, pro vichodos o Naaran, pro zapados o Gezer le gavenca, the o Šichem le gavenca dži ke Ajja le gavenca.

²⁹ O kmeňos Menašše chudla o foros Bet-Šean le gavenca, o Taanach le gavenca, o Megiddo le gavenca the o Dor le gavenca.

Andre kala fori bešenat o potomki le Jozefoscere, savo sas čhavo le Jakoboscero.

Le Ašeroskere potomki

³⁰ Le Ašeroskere čhave sas o Jimnah, o Jišvah, o Jišvi the o Berijah. Lengeri pheñ sas e Serach.

³¹ Le Berijoscere čhave sas o Cheber the o Malkiel, savo ačhađa o gav Birzajit.

³² Le Cheber sas trin čhave: o Jaflet, o Šomer the o Chotam. Lengeri pheñ sas e Šua.

³³ Le Jafletoscere čhave sas o Pasach, o Bimhal the o Ašvat.

³⁴ Le Šemeroskere čhave sas o Achi, o Rohgah, o Jechubbah the o Aram.

³⁵ O čhave le Helemoscere, leskere phraleskere, sas o Cofach, o Jimnas, o Šeleš the o Amal.

³⁶ Le Cofachoscere čhave sas o Suach, o Charnefer, o Šual, o Beri, o Jimrah, ³⁷ o Becer, o Hod, o Šammas, o Šilšah, o Jitran the o Beeras.

³⁸ Le Jeteroscere čhave sas o Jefunneh, o Pispah the o Aras.

³⁹ Le Ulloskere čhave sas o Arach, o Channiel the o Ricjah.

⁴⁰ Kala savore sas le Ašeroskere potomki. On sas zorale maribnaskere murša the vodci andre peskere fajti. Andre lengero rodokmeňos sas zapisimen 26 000 zorale maribnaskere murša.

Le Benjaminengere potomki

8 Le Benjamin sas pandž čhave. Ešebno (peršo) čhavo sas o Belas, dujto o Ašbel, trito o Achrach, ² štarto o Nochah the pandžto o Rafah.

³ Le Belasoscere čhave sas o Addar, o Geras, o Abihud, ⁴ o Abišuas, o Naaman, o Achoach, ⁵ o Geras, o Šefufan the o Churam.

⁶ O potomki le Echudoscere, save sas o vodci andre peskere fajti a save dživenas andre Geba, ale sas thode te bešel andro Manachat, hine kala: ⁷ O Naaman, o Achijah the o Geras, saven prethode te bešel avrether a savo sas o dad le Uzzasoske the le Achichudoske.

^{8,9} O Šacharajim premukla peskere duje romñijen la Chušima the la Baara. Pozneder, sar bešelas andre Moabiko phuv, ila peske la Chodeša romňake a laha les sas efa čhave: o Jobab, o Cibijas, o Mešas, o Malkam, ¹⁰ o Jeuc, o Sachijah the o Mirmah. Kala sas o vodci andre peskere fajti.

¹¹ La Chušimaha les sas o Abitub the o Elpaal.

¹² Le Elpaaloscere čhave sas o Eber, o Mišam the o Šemed. On ačhade o fori Ono the Lod le gavenca, so hine pašal lende.

¹³ O Berijah the o Šemas sas vodci le fajtenge, save bešenat andro Ajalon. On sas ola, save tradle avri le manušen andral o Gat. ¹⁴ Le Berijoscere čhave sas o Achijo, o Šašak, o Jeremot, ¹⁵ o Zebadijah, o Arad, o Eder, ¹⁶ o Michael, o Jišpah the o Jochas.

¹⁷ Le Elpaaloscere potomki sas o Zebadijah, o Mešulam, o Chizki, o Cheber, ¹⁸ o Jišmeraj, o Jizlijah the o Jobab.

¹⁹ Le Šimejoscere potomki sas o Jakim, o Zichri, o Zabdi, ²⁰ o Elienaj, o Cilletaj, o Eliel, ²¹ o Adajah, o Berajah the o Šimrat.

²² Le Šašakoscere potomki sas o Jišpan, o Eber, o Eliel, ²³ o Abdon, o Zichri, o Chanan, ²⁴ o Chananijah, o Elam, o Antotijah ²⁵ o Jifdejah the o Penuel.

²⁶ Le Jerochamoskere potomki sas o Šamšeraj, o Šecharijah, o Atalijah, ²⁷ o Jaarešijah, o Elijah the o Zichri.

²⁸ Kala savore sas zapisimen andro rodokmeňos sar vodci, save bešenat andro Jeruzalem.

²⁹ O Jeiel, oda hin o Abi-Gibeon, bešelas andro foros Gibeon. Leskeri romñi sas e Maacha. ³⁰ Leskero ešebno čhavo sas o Abdon, palis o Cur, o Kiš, o Baal, o Ner, o Nadab, ³¹ o Gedor, o Achijo, o Zecher ³² the o Miklot, savo sas dad le Šimeoske. The on bešenat pašes paš peskere phrala andro Jeruzalem.

³³ O Ner sas dad le Kišoske a o Kiš le Sauloske. Le Sauloscere čhave sas o Jonatan, o Malki-Šua, o Abinadab the o Ešbaal. ³⁴ O Jonatan sas dad le Merib-Baaloske, o Merib-Baal le Michasoske.

³⁵ Le Michasoscere čhave sas o Piton, o Melech, o Tareas the o Achaz. ³⁶ O Achaz sas dad le Joaddoske a le Joaddoscere čhave sas o Alemet, o Azmavet the o Zimri. O Zimri sas dad le Mocasoske. ³⁷ O Mocas sas

dad le Bineasoske, o Bineas le Rafoske, o Rafah le Elastoske, o Elasa le Aceloske.

³⁸ Le Acel sas šov čhave: o Azrikam, o Bocheru, o Jišmael, o Šearijah, o Obadijah the o Chanan. ³⁹ Leskere phrales le Ešek sas trin čhave: ešebno o Ulam, dujto o Jeuš the trito o Elifelet.

⁴⁰ Le Ulamoskere čhave sas zorale maribnaskere murša the lukostrelci. Sas les but potomki: Šel the penda (150) čhave the čhavengere čhave.

Kala savore sas andral o kmeňos Benjamin.

O manuš, save avle pale andro Jeruzalem

9 Savore Izraeliti sas zapisimen pal peskeri fajta andro Zvitkos le Izraelike the Judske Kralengero. Ale kerenas bini anglo RAJ, a vašoda sas o Judejci zaile a odligende andro Babilon.

² Ešebne (perše) manuš, save avle pale te bešel andre peskeri phuv the andre peskere fori, sas vajkeci Izraeliti, rašaja, Leviti the le chramoskere služobnika.

³ Andro Jeruzalem gele te bešel vajkeci manuš andral o kmeňi Juda, Benjamin, Efrajim the Menašše.

⁴⁶ Andral o kmeňos Juda ode avle pale te bešel 690 fameliji. On savore sas potomki le Judaskere čhavidar: le Perecostar, le Šelostar the le Zerachostar. Lengere vodci sas o Utaj, o Asajah the o Jeuel. O Utaj sas le Ammichudoskero čhavo a potomkos le Omrioskero, le Imrioskero, le Baniskero the le Perecoskero; o Asajah sas potomkos le Šeloskero a o Jeuel le Zerachoskero.

⁷⁹ Andral o kmeňos Benjamin ode avle pale te bešel 956 fameliji: lendar sas o Sallu le Mešullamoskero čhavo, saveske sas papus o Hodavijah a prapapus o Hassenuah; o Jibnejah le Jerochamoskero čhavo; o Elah le Uzzioskero čhavo, saveske sas papus o Michri; a o Mešullam le Šefatijahoskero čhavo, saveske sas papus o Reuel a prapapus o Jibnijah.

Kala savore sas vodci andre peskere fameliji.

O rašaja, save avle pale te bešel andro Jeruzalem

¹⁰⁻¹² Le rašajendar avle te bešel andro Jeruzalem o Jedajah, o Jojarib, o Jachin, o Azarijah, le Chilkijoskero čhavo, savo sas potomkos le Mešullamoskero, le Cadokoskero, le Merajotoskero the le Achituboskero; o Adajah le Jerochamoskero čhavo, savo sas potomkos le Paščurosokero the le Malkijoskero; o Maasaj, le Adieloskero čhavo, savo sas potomkos le Jachzeroskero, le Mešullamoskero, le Mešillemitoskero the le Immeroskero.

¹³ O rašaja, save sas vodci andre peskere fameliji, sas jekhetane 1 760. On džanenas mištes te kerel savori služba andro Chramos.

O Leviti save avle te bešel andro Jeruzalem

¹⁴⁻¹⁶ Kala džene le Levitendar avle te bešel andro Jeruzalem: o Šemajah andral le Merariskero rodokmeňos, savo sas potomkos le Chaššuboske, le Azrikamoske the le Chašabijoske; o Bakbakkar, o

Chereš, o Galal a o Mattanijah, le Michasoskero čhavo, savo sas potomkos le Zichriske the le Asafoske; o Obadijah, savo sas le Šemajoskero čhavo, o čhavo le Galaloske, o čhavo le Jedutunoske; o Berechijah le Asasoskero čhavo, saveske sas papus o Elkanah, savo bešelas andro gavora pašal o foros Netofa.

O chramoskere stražnika

¹⁷ Kala džene stražinenas paš o chramoskero vudar: o Šallum, o Akkub, o Talmon, o Achiman the leskere phrala. O Šallum sas lengero vodcas. ¹⁸ Dži andre oda časos stražinenas paš e Kraliskeri Brana pre vichodno sera le foroskeri. On angloda stražinenas le Levitengere tabora.

¹⁹ O Šallum, o potomkos le Koreoskero the le Ebjasafoskero, jekhetane leskera famelijah andral e Korachoskeri fajta sas ačhade, hoj te stražinen paš o vudar le RAJESKERE Stanoskero, avke sar varekana lengere dada stražinenas le RAJESKERO taboris. ²⁰ O Pinchas, le Eleazaroskero čhavo, sas varekana lengero vodcas a o RAJ sas leha.

²¹ O Zecharijah, le Mešelemijoskero čhavo, stražinelas paš o vudar andre le RAJESKERO Stanos.

²² Savore, save sas avrikidle, hoj te stražinen e chramoskeri brana, sas 212. On sas zapisimen pal peskere gava. O David le prorokoha Samueloha ačhade kale stražnikengere daden andre služba. ²³ On the lengere potomki služinenas paš o brani andre le RAJESKERO Chramos a angloda andro Sentno Stanos. ²⁴ O brani sas pro štar seri: pro vichodos, zapados, severos the pro juhos. ²⁵ Furt pro eftato džives lengere phrala andral lengere gava, len čerinenas andre služba. Bo sako eftato džives pes čerinenas. ²⁶ Ola štar anglune stražnika sas Leviti. On pes starinenas pal o Chramos, skladi the pokladni. ²⁷ On rači sas paš o Chramos, bo sas ačhade les te stražinel, a sako tosara mušinenas te phundravel e brana.

Le Levitengeri služba

²⁸ Varesave Leviti pes starinenas pal o veci pro lašariben andro Chramos. Sar o veci lenas avri abo thovenas pale, mušinenas len te zgenel. ²⁹ Aver džene merkinenas pro sersamos the pro savore sentne veci, pro sano aro, olejos, kađidlos, koreňje the pre mol.

³⁰ Ale varesave rašaja kerenas o masci le koreňjendar.

³¹ O Levitas o Mattitijah, o nekphureder čhavo le Šallumoskero le Korachoskera fajtatar, sas ačhado, hoj te pekel o sentne mare. ³² Aver murša andral le Kohatoskeri fajta sas ačhade, hoj te pririchtinen o sentne mare andro Chramos sako Šabbat.

³³ Varesave vodci andral e Levitengere fameliji, save sas lavutara, bešenas andro Chramos a na kerenas nič aver, bo mušinenas te el pririchtimen andre služba rat the džives.

³⁴ Kala savore sas vodci andre le Levitengere fameliji pal lengere fajti a bešenas andro Jeruzalem.

Le Sauloskero rodokmeňos

³⁵ O Jeiel, oda hin o Abi-Gibeon, ešebno bešel as andro foros Gibeon. Leskeri romňi sas e Maacha.

³⁶ Leskero ešebno čhavo sas o Abdon, palis o Cur, o Kiš, o Baal, o Ner, o Nadab, ³⁷ o Gedor, o Achijo, o Zecharijah the o Miklot, ³⁸ savo sas dad le Šimeamoskero. The on bešen as paš peskere phrala andro Jeruzalem.

³⁹ O Ner sas dad le Kišoske, o Kiš le Sauloske. Le Sauloskere čhave sas o Jonatan, o Malki-Šua, o Abinadab the o Ešbaal. ⁴⁰ O Jonatan sas dad le Merib-Baaloske a ov le Michasoske. ⁴¹ Le Michasoskere čhave sas o Piton, o Melech, o Tachrea, the o Achaz. ⁴² O Achaz sas dad le Jaroske a o Jarah le Alemetoske, le Azmavetoske the le Zimriske. O Zimri sas dad le Mocasoske, ⁴³ ov le Bineasoske, ov le Refajoske, ov le Elsasoske a ov le Aceloske.

⁴⁴ Le Acel sas šov čhave: o Azrikam, o Bocheru, o Jišmael, o Šearijah, o Obadijah the o Chanan.

Le Sauloskero meriben

10 O Filištinci gele pro mariben pro Izraeliti. Ale o Izraeliti pes rozdenaše a but lendar sas murdarde pro verchos Gilboa. ² O Filištinci pes dochudle ko Saul the ke leskere trin čhave a murdarde le Jonatan, le Abinadab the le Malki-Šua. ³ O mariben sas zoralo pašal o Saul, o lukostrelci les živinde a sas igen zraňimen.

⁴ Akor o Saul phendá le sluhasker, savo hordinelas leskere zbraňi: "Cirde avri e šablá a murdar man sigeder, sar avena ola naobčhinde (naobrezimen), hoj mange te na keren ladž."

Ale leskero sluh as oda na kamelas te kerel, bo igen daralas. Avke o Saul iľa peskeri šablá a čhida pes pre late. ⁵ Sar o sluh as dikhľa, hoj o Saul hino mulo, the ov pes čhida pre šablá a muľa. ⁶ Avke andre oda džives mule jekhetane o Saul the leskere trin čhave, vašoda ňiko leskere čhavendar pal leste na kralinelas.

⁷ Sar o Izraeliti, save bešen as andre dolina Jezreel, dikhle, hoj le Sauloskere murša pes rozdenaše a hoj o Saul the leskere čhave mule, the on denaše a omukle peskere fori. Avke o Filištinci avle a zaille peske ola fori.

⁸ Pre aver džives pal o mariben avle o Filištinci te občorel olen, save sas mule, a arakhle ode le Saul the leskere trine čhaven pro verchos Gilboa. ⁹ Pal o Saul čhida tele o gada, odčhinde leske o šero, ile leskeri vizbroj a bičhade len andre Filištíniko phuv. Kada hiros dine te džanel peskere modlengi the le manušenge.

¹⁰ Le Sauloskeri vizbroj thode andre peskere devlengeri chramos a leskero šero figinde andre le Dagonoskero chramos.

¹¹ Sar o manuša andral o Jabeš-Gilead pes došunde, so o Filištinci kerde le Sauloha, ¹² gele ode savore zorale murša, ile le Sauloskero telos the leskere čhavengeri a ande len andro Jabeš. Parunde len an-

dro hrobos tel o baro stromos a efa džives pes poscinenas.

¹³ Avke o Saul muľa, bo na sas pačivalo le RAJESKE, na dolikerelas leskero lav a geľa the te phučel le mulengere duchendar, so majinel te kerel, ¹⁴ a na le RAJESTAR. Vašoda o RAJ les diňa te murdarel a o krališagos diňa le Davidoske, le Izajoskere čhaske.

O David ačhel kralis upral calo Izrael

11 Savore Izraeliti pes zgele ko David andro Hebron a phende: "Se amen sam jekh rat. ² Tu lidžahas le Izraeliten andro mariben mek sigeder, sar sas kralis o Saul, bo o RAJ, tiro Del, tuke phendá: 'Tu lidžaha mire manušen sar pastjeris a ačheha lengeri vodcas.'"

³ Savore vodci andral o Izrael avle ko kralis andro Hebron, kaj lenca phandľa anglo RAJ e zmluva. Avke pomakhle le David vaš o kralis upral o Izrael, avke sar phendá o RAJ prekal o prorokos Samuel.

O David zalel o Jeruzalem

⁴ O David geľa savore Izraelitenca andro mariben pro Jeruzalem, so pes angloda vičinelas Jebus, bo ode furt bešen as o Jebuseja. ⁵ Ola Jebuseja phende le Davidoske: "Ade pes na dochudeha!" Ale o David domardá o zoralo foros Sion, oda hin akana o Foros le Davidoskero.

⁶ Akor o David phendá: "Ko ešebno (peršo) murdarela Jebusejis, ačhela nekbareder velitelis." Ešebno geľa o Joab, la Cerujakero čhavo, vašoda ačhila nekbareder velitelis.

⁷ Palis o David ačhila te bešel andre oda zoralo foros, vašoda o manuša les vičinenas o Foros le Davidoskero. ⁸ Palis chudľa te ačhavel o foros pro vichodos pašal o than, kaj zrovňindá o brehos, a o Joab oprikerđa o foros, kaj mek kampelas. ⁹ O David ačhelas furt zoraleder, bo o RAJ o Nekzoraleder sas leha.

O trin zorale murša le Davidoskere

¹⁰ Kala hine o zorale murša le Davidoskere, save jekhetane savore Izraelitenca les ačhade vaš o kralis upral o Izrael a zoralarde leskero krališagos pal cali phuv, avke sar o RAJ diňa lav pal o Izrael:

¹¹ Ešebno o Jašobeam, andral le Chachmonoskeri fajta, savo sas vodcas le Trine, save sas trin zorale murša. La kopijaha murdarđa trin šel (300) muršen andre jekh mariben.

¹² Dujto ole Trinendar sas o Eleazar, le Dodoskero čhavo, andral le Achoachoskeri fajta. ¹³ Ov sas le Davidoha andre Pas-Dammim akor, sar pes o Filištinci zgele pro mariben. Ode sas jačmeňiskeri maľa. Sar o manuša denašen as le Filištínendar, ¹⁴ o Eleazar ačhelas maškar e maľa a marelas pes le Filištinenca. Akor o Izraeliti ňerinde (zvitázinde) upral lende. Avke o RAJ diňa upral lende baro ňerindipen (vitáztvo).

¹⁵ Jekhvar avle trin le tranda (30) zorale muršendar ko David pre skala paš e jaskiňa Adullam. Akor o Fil-

ištínike slugađa peske kerde taboris andre le Refajengeri dolina. ¹⁶ O David sas akor pro verchos andro zoralo than a e Filištíniko slugađengeri partija sas andro Betlehem. ¹⁷ A o David kamelas igen te pijel paňi a phendá: "Ko man dela te pijel paňi andral e chaňig, so hiňi paš e brana andro Betlehem?" ¹⁸ Avke ola trin džene pes premarde prekal le Filištínengero taboris, cirdle o paňi andral odi chaňig, so sas paš e brana andro Betlehem, a ande le Davidoske. Ale ov na kamelas oda paňi te pijel, ale čhordá les avri sar obeta prekal o RAJ. ¹⁹ A phendá: "Mi chraňinel man o RAJ, hoj ada te kerav! Se oda ulahas avke, sar te piľomas o rat le muršengero, save gele te anel oda paňi." A na kamelas oda paňi te pijel.

Kada kerde ola trin zorale murša.

O tranda zorale murša

²⁰ Le Joaboskero phral o Abišaj sas vodcas le tranda (30) zorale muršenge. Andre jekh mariben la kopijaha murdarđa trin šel (300) muršen, avke leskero nav ačhiľa baro maškar ola Tranda. ²¹ Maškar ola Tranda les sas bareder pačiv a ačhiľa lengero vodcas, ale na sas les ajsi pačiv sar ole Trin.

²² O Benajah, le Jehojadoskero čhavo, sas zoralo murš, kerelas but bare veci a sas andral o Kabceel. Ov murdarđa duje zorale Moabčanen. Andre jekh džives, sar delas o jiv, ov geľa andre chev a murdarđa le ľevos. ²³ Murdarđa the jekhe Egipťanos, savo sas učo buter sar duj metri. Choc le Egipťanoste andro vast sas igen thuli kopija a leste ča e paca, o Benajah leske la iľa andral o vast a murdarđa les laha. ²⁴ Ada kerđa o Benajah, le Jehojadoskero čhavo, a aleha peske kerđa nav avke sar ola Trin. ²⁵ Maškar ola Tranda les sas pačiv, ale the avke na sas sar ola Trin. O David les ačhadá veliteľiske upral peskere tělesne stražňika.

²⁶ Aver zorale murša sas le Joaboskero phral o Asahel; le Dodoskero čhavo o Elchanaan andral o Betlehem; ²⁷ o Šammot andral o Charor; o Chelec andral o Palon; ²⁸ o Iras, le Ikkešoskero čhavo andral e Tekoa; o Abiezer andral o Anatot; ²⁹ o Sibbechaj andral e Chuša; o Ilaj andral o Achoach; ³⁰ o Mahraj andral e Netofa; le Baanoskero čhavo Cheled andral e Netofa; ³¹ le Ribajoskero čhavo o Itaj andral le Benjaminiko phuv Gibeja; o Benajah andral o Piraton; ³² o Churaj andral o Gaašiskere dolini; o Abijel andral e Araba; ³³ o Azmavet andral o Bachurim; o Eljachbas andral o Šaalbon; ³⁴ le Hašemoskere čhave andral o Gizon; le Šageoskero čhavo o Jonatan andral o Harar; ³⁵ le Sacharoskero čhavo o Achijam andral o Harar; le Uroskero čhavo o Elifal; ³⁶ o Chefer andral e Mechera; o Achijah andral o Palon; ³⁷ o Checro andral o Karmel; le Ezbajoskero čhavo o Naaraj; ³⁸ le Natanoskero phral o Joel; le Hagrioskero čhavo o Mibchar; ³⁹ o Ammončanos o Celek; o Nachraj andral o Beerot, savo hordinelas o zbraňi le Joaboske, la Cerujakere čhaske; ⁴⁰ the o Jitričana o Ira the o Gareb; ⁴¹ o Chetitos o Urijaš; le Achlajoskero čhavo o Zabad; ⁴² le Šizasoskero čhavo o Adinas, savo sas vodcas andro kmeňos Ruben, le tranda maribnaskere

muršenca; ⁴³ le Maachoskero čhavo o Chanan; o Jošafat andral o Mitán; ⁴⁴ o Uzzias andral o Aštarot; o Šamas the o Jeiel, o čhave le Chotamoskere andral o Aroer; ⁴⁵ le Šimrioskero čhavo o Jediael the leskero phral o Jochas andral o Tic; ⁴⁶ o Eliel andral e Machava; le Elnaamoskere čhave o Jeribaj the o Jošavijah; o Moabčanos o Jitmah; ⁴⁷ o Eliel; o Obed the o Jaasiel andral e Coba.

Le Davidoskere murša andral o kmeňos Benjamin

12 Kala murša avle ko David andro Ciklag akor, sar denašľa le Saulostar, le Kišoskere čhastar. On sas zorale maribnaskere murša, save leske pomožine-nas andro mariben. ² Savorende sas o luki a džanenas igen mištes te ľivinkerel le lukoha a te čhivkerel andral o prakos o bara le baľogne (ľave) vaj le čače (prave) vasteha. On sas andral o kmeňos Benjamin avke sar the o Saul.

³ O Achiezer the o Joaš, le Šemaoskere čhave andral e Gibeja, sas veliteľá upral lende.

Kala murša sas: o Jeziel the o Palet, le Azmavetoskere čhave; o Berachas the o Jehu andral o Anatot; ⁴ o Jišmajah andral o Gibeon, savo sas maškar o Tranda a sas lengero veliteľis; ⁵ o Jirmejah, o Jachaziel, o Jochanan, o Jozabad andral e Gedera; ⁶ o Eluzaj, o Jerimot, o Bealijah, o Šemarijah, o Šefatijah andral o Charuf; ⁷ o Elkanah, o Jiššijah, o Azarel, o Joezer, o Jašobeam andral le Korachoskeri fajta; ⁸ the O Joelah the Zebadijah, o čhave le Jerochamoskere andral o Gedor.

O murša andral o kmeňos Gad

⁹ O murša andral o kmeňos Gad tiš gele ko David pro verchengere thana pre pušťa. On sas zorale maribnaskere murša, furt pririchtimen te džal andro mariben le štitoha the la kopijaha. Sas zorale sar o ľevi a denašenas avke sar o sarni.

¹⁰ Lengero vodcas sas o Ezer, dujto pal leste sas o Obadijah, trito o Eliab, ¹¹ štarto o Mišmannah, pandžto o Jirmejah, ¹² šovto o Attaj, eftato o Eliel, ¹³ ochtoto o Jochanan, eňato o Elzabad, ¹⁴ dešto o Jirmejah the dešujekhto (11.) o Machbannaj.

¹⁵ Kala murša andral o kmeňos Gad sas veliteľá le slugađenge. O bareder veliteľá sas upral ezeros (1 000) slugađa a o teleder upral o šel (100). ¹⁶ Sas oda on, save pregele prekal o Jordan andro ešebno (peršo) čhon akor, sar o paňi prečhorelas soduj brehi, a roztradle le manušen, save bešenas andre ola dolini pro vichodos the zapados.

O murša andral o kmeňi Benjamin the Juda

¹⁷ The varesave džene andral o kmeňi Benjamin the Juda gele ko David pro verchengero than. ¹⁸ O David geľa avri angle lende a phendá: "Te aven ke ma andro smirom, hoj te pomožinel mange sar prijateľá, akor ačhen manca, ale te man avľan te del andre le ňeprijateľiske, choc mire vastenca ňikas ňič na kerdom, o

Del amare dadengero pre oda mi dikhel a mi marel tu-men."

¹⁹ Akor le Devleskero duchos avla pro Amasaj, savo sas velitelis upral o Tranda, a ov phenda:

"Sam tire, David!

Sam tuha, čhavo le Izajoskero.

Smirom! O smirom tuke the oleske, ko tuke pomožinel!

Se korkoro tiro Del tuke pomožinel."

Avke o David len priiła a ačhađa len velitelenge upral peskere slugađa.

O murša andral o kmeños Menašše

²⁰ The varesave murša andral o kmeños Menašše gele ko David akor, sar džalas le Filištinenca pro mariben pro Saul. Ale ačhiła pes, hoj o David the leskere murša le Filištinenge na pomožinde, bo o Filištínike vodci peske phende: "Ov šaj predžal ko Saul, ke peskero raj, a šaj meras." Avke bičhade les het andro Ciklag. ²¹ Sar džalas andro Ciklag, džanas leha kala murša andral o Menašše: o Adnach, o Jozabad, o Jedi-ael, o Michael, o Jozabad, o Elihu the o Cilletaj. On sas savore velitelja upral o ezeros slugađa. ²² On pomožine- nas le Davidoske andro mariben pro zbužnikengere partiji, bo savore sas zorale maribnaskere murša a ačhile velitelja upral leskeri armada. ²³ Sako džives ave- nas o murša le Davidoske te pomožinel, medik les na sas bari armada, ajsi sar te le Devleskeri armada.

Le Davidoskeri armada andro Hebron

²⁴ Kala sas o vizbrojimen slugađa, save avle ko David andro Hebron, hoj te den leske le Sauloskero krališa- gos, avke sar phenda o RAJ:

²⁵ Andral o kmeños Juda: 6 800 murša, save hordine- nas o štitos the kopija a sas furt pririchtimen andro mariben;

²⁶ andral o Šimeon: 7 100 zorale maribnaskere murša;

²⁷ andral o Levi: 4 600 murša, ²⁸ lenca o vodcas andral le Aronoskeri fajta o Jehojada le 3 700 muršenca ²⁹ a o terno Cadok, savo sas zorale maribnaskero murš, le bišuduje (22) velitelenca andral peskeri famelija;

³⁰ andral o Benjamin, le Sauloskero kmeños: 3 000 murša. On dži akor sas le Sauloha;

³¹ andral o Efrajim: 20 800 zorale maribnaskere murša, dojekhes lendar sas baro nav andre peskeri fajta;

³² andral o jepaš kmeños Menašše pro zapados: 18 000 murša, save sas kidle avri pre oda, hoj te ačhaven le David kraliske;

³³ andral o Jissachar: 200 vodci jekhetane le muršenca, saven lidžanas. On ačhalile, so pes ačhela, a džanenas, so le Izraelitenge kempel te kerel;

³⁴ andral o Zebulun: 50 000 murša, save sas pririchti- men te džal andro mariben chocsave zbrañenca;

³⁵ andral o Naftali: 1 000 velitelja a lenca 37 000 murša vizbrojimen le kopijenca the štitenca;

³⁶ andral o Dan: 28 600 murša pririchtimen andro mariben;

³⁷ andral o Ašer: 40 000 murša pririchtimen andro mariben;

³⁸ le vichodne Jordanostar, le kmeñostar Ruben, Gad the jepaš Menašše: 120 000 murša, save sas vizbroji- men chocsave zbrañenca.

³⁹ Savore kala slugađa sas pririchtimen te džal pro mariben a gele andro Hebron, bo sas igen vaš oda, hoj te ačhaven le David kraliske upral calo Izrael. The savore Izraeliti kamle, hoj o David te ačhel kraliske. ⁴⁰ On ačhile paš o David trin džives, chanas the pijenas, bo o Izraeliti pes pal lende starinenas. ⁴¹ The ola, ko beše- nas dur, avke sar o Jissachar, o Zebulun the o Naftali, anenas lenge pro somara, tavi, mulici the guruva igen but chabena – aro, šuke figi the hroznos, mol, olejos, gurunen the bakren – bo andro Izrael sas baro radiša- gos.

Prefigenen e Zmluvakeri Archa

13 O David pes zgela savore velitelenca upral o ezeros the upral o šel slugađa a vakerelas lenca, hoj les te den godi. ² Phenda savore Izraelitenge, save sas ode zgele: "Te san vaš kada a te hin oda le RAJES- TAR, amare Devlestar, akor bičhavas le muršen ke amare phrala andre savore Izraeloskere phuva, the ko rašaja the Leviti andre lengere fori the gava, hoj te aven ke amende. ³ A anaha ke amende e Zmluvakeri Archa amare Devleskeri, bo na džalas amenge pal late, sar kralinelas o Saul." ⁴ Savore priačhile pre oda, so o David phenda, bo oda sas dojekheske pre dzeka.

⁵ Avke o David ke peste zvičinda savore Izraeliten le Egiptske pañestar Šichor pro juhos dži paš o Lebo- Chamat pro severos, hoj te anen le Devleskeri Archa andral o Kirjat-Jearim. ⁶ Palis o David the savore Izraeli- ti gele andro Baala (oda hino Kirjat-Jearim) andre Jud- sko, hoj odarik te len e Archa le Devleskeri, savi pes vičinel pal o RAJ, savo bešel upral o cherubi.

⁷ Preligenas le Devleskeri Archa andral Abinada- boskero kher pro nevo verdan, so lidžanas o Uzzah the o Achijo. ⁸ O David the savore Izraeliti khelenas the gilavenas anglo Del cała peskera zoraha a bašavenas pro citari, harfi, bubni, cimbali the trubi.

⁹ Sar avle ko Kidonoskero humnos, o Uzzah nacirdla o vast ke Archa, hoj la te zachudel a te na perel, bo le guruvenge podgele o pindre. ¹⁰ Takoj o RAJ cholisalila pro Uzzah a murdarda les, bo nacirdla o vast pre Ar- cha. Ode pro than muła anglo Del.

¹¹ O David rušelas, hoj o RAJ demađa a murdarda le Uzzah andre choli, vašoda pes vičinel oda than dži adadžives Perek †-Uzzah.

¹² Oda džives o David darandiła le Devlestar a

phenda: "Sar ligenava ke mande le Devleskeri Archa?"

¹³ Avke o David na diña te lidžal e Archa ke peste andro Jeruzalem, ale ligenđa la andro kher ko Obed-Edom, savo sas andral o Gat. ¹⁴ Le Devleskeri Archa ačhiła trin čhon andro kher ko Obed-Edom a o RAJ požehñinelas cała leskera famelija the savoro, so les sas.

† Oda hin: Te predemel.

Le Davidoskero palacis the čhave

14 O Tirsco kralis Chiram bičhađa ko David peskere služobņiken, muraren the tēsaren le cedroskere kaštenca, hoj leske te ačhaven o palacis.

² Akor o David sprindžarđa, hoj les o RAJ čačes ačhađa vaš o kralis upral o Izrael a hoj leskero krališagos upre hazdņa prekal peskero narodos Izrael.

³ O David peske iľa avre romņijen, savenca les sas buter čhave andro Jeruzalem. ⁴ Kala hine lengere nava: o Šammuas, o Šobab, o Natan, o Šalamun, ⁵ o Jibchar, o Elišuas, o Elpelet, ⁶ o Nogah, o Nefeg, o Jafias, ⁷ o Elišama, o Beeljadas the o Elifelet.

O ņerindņipen upral o Filištinci

⁸ Sar pes došunde o Filištinci, hoj o David hino pomakhlo kralis upral calo Izrael, gele pal leste, hoj les te zalen. Sar o David ada šundā, geľa avri pre lende. ⁹ O Filištinci andre dolina le Refajengeri džanas pro gava te murdarel a te čorel. ¹⁰ Avke o David phučelas le Devlestar: "Majinav te džal pro Filištinci? Deha len mange andro vasta?"

O RAJ leske odphendā: "Dža, dava len andre tire vasta."

¹¹ Avke o David peskere muršenca džanas andro Baal-Peracim a ode upral lende ņerindā (zvitāzindā). A phendā: "O Del rozčhinda mire vasteha le ņeprijatēlen, avke sar o paņi predemel e hradza." Avke ole thaneske dine nav Baal-Peracim. ¹² O Filištinci ode mukle the peskere devloren a o David len diņa te zlabarel.

¹³ Ale o Filištinci pale gele pre ola gava andre dolina. ¹⁴ Avke o David pale phučelas le Devlestar a ov leske odphendā: "Ma dža pre lende anglunestar, ale obdža len paš o balzamike stromi. ¹⁵ Soča šuneha o hangos pal o slugađengero phiriben pro agor ole balzamike stromengero, takoj dža pro Filištinci, bo o Del džal anglal tu len te marel." ¹⁶ O David kerđa sa avke, sar leske o Del phendā, a murdarkerelas le Filištinen le Gibeonostar dži paš o Gezer.

¹⁷ O hiros pal kada, so kerđa o David, pes rozlīgendā andre savore phuva. O RAJ avke kerđa, hoj pes lestar te daran savore narodi.

E Zmluvakeri Archa prefigenen andro Jeruzalem

15 Andro Foros le Davidoskero peske o David ačhađa khera. Pririchtindā the than prekal e Devleskeri Archa a ačhađa prekal late stanos. ² A phendā: "Ņiko naštī līdžal le Devleskeri Archa, ča o Leviti. Bo len peske o RAJ kidņa avri, hoj la te hordinen a te keren paš late e služba pro furt."

³ Palis o David diņa te zvičinel savore Izraeliten andro Jeruzalem, hoj te līdžan le RAJESKERI Archa pre oda than, kaj ov pririchtindā. ⁴ Avke o David diņa te vičinel le Aronoskere the Levitengere potomken. ⁵ Avľa o vodcas Uriel le 120 muršenca andral le Kohatoskeri fajta, ⁶ o Asajah le 220 muršenca andral le Merariskeri fajta, ⁷ o Joel le 130 muršenca andral le Geršomoskeri fajta,

⁸ o Šemajah le 200 muršenca andral le Elicafanoskeri fajta, ⁹ o Eliel le ochtovardeš (80) muršenca andral le Chebronoskeri fajta ¹⁰ the o Amminadab 112 muršenca andral le Uzzieloskeri fajta.

¹¹ Palis o David vičindā le rašajen le Cadok the le Ebjatar the le Leviten le Uriel, le Asajah, le Joel, le Šemajah, le Eliel the le Amminadab ¹² a prikazindā lenge: "Tumen san o vodci andre le Levitengere fajti. Sentņaren pes the okle Levitenca a līdžan e Archa le RAJESKERI, le Izraeloskere Devleskeri, pre oda than, so pririchtindom. ¹³ Bo angloda pes oda kerelas bijal tumende, Levitale, a vašoda o RAJ, amaro Del, amen demada andre cholī, bo na phučahas lestar, sar majinas te kerel pal oda, so hin pisimen."

¹⁴ Avke o rašaja the o Leviti pes sentņarde a preligende e Zmluvakeri Archa le RAJESKERI, le Izraeloskere Devleskeri. ¹⁵ O Leviti ligenenas e Archa le Devleskeri le dručkenca pro phiko, avke sar o Mojžiš prikazindā prekal le RAJESKERO lav.

¹⁶ Palis o David prikazindā le Levitengere vodcenge, hoj te kiden avri dženen peskere famelijendar, hoj te giľaven the radišagoha te bašaven pro harfi, citari the cimbali.

¹⁷ Avke o Leviti kidle avri le Heman, le Joeloskere čhas, leskera famelijatar le Asaf, le Berechijoskere čhas, the le Etan, le Kušajoskere čhas, andral e fajta Merari, ¹⁸ a paš lende lengere phralen, save len majinenas te čerinel: le Zecharijah, le Jaaziel, le Šemiramot, le Jechiel, le Unni, le Eliab, le Benajah, le Maasejah, le Mattitijah, le Elifeleh; the le Miknejah a le chramoskere stražņiken: le Obed-Edom the le Jeiel.

¹⁹ O lavutara o Heman, o Asaf the o Etan bašavenas pro bronzune cimbali. ²⁰ O Zecharijah, o Aziel, o Šemiramot, o Jechiel, o Unni, o Eliab, o Maasejah the o Benajah bašavenas pro harfi o učeder hangos. ²¹ O Mattitijah, o Elifeleh, o Miknejah, o Obed-Edom, o Jeiel the o Azaziah bašavenas pro citari o teluno hangos. ²² O Kenanijah sas avrikidlo, hoj te līdžal le Leviten, save sas lavutara, bo mištes džanelas te giľavel a te bašavel.

²³⁻²⁴ O Berechijah the o Elkanah, o Obed-Edom the o Jechijah stražņinenas paš o vudar, kaj sas e Archa. O rašaja o Šebanijah, o Jošafat, o Netaneel, o Amasaj, o Zecharijah, o Benajah the o Eliezer trubinenas angle Devleskeri Archa.

²⁵ O David, o Izraelike vodci the o velīteľa upral o ezeros džanas bare radišagoha te līdžal e Zmluvakeri Archa upre andral le Obed-Edomoskero kher. ²⁶ O Del pomožinelas le Levitenge, save līdžanas e Zmluvakeri Archa le RAJESKERI, vašoda obetinde leske eġta biken the eġta bakren. ²⁷ Avke o David, o Leviti, save līdžanas e Zmluvakeri Archa, ola, save giľavenas, the o Kenanijah, savo līdžanas o giľavipen, sas urde andro ľanoskere plaštī a pro David sas mek urdo o efodos le ľanostar. ²⁸ Savore Izraeliti džanas le RAJESKERA Archaha upre andro Jeruzalem bara vikaha the bašavibnaha pro cimbali, harfi, citari, rohi the trubi.

²⁹ Sar avle la RAJESKERA Archaha andro Jeruzalem, ipen akor e Mikal, le Sauloskeri čhaj, dikhelas avri

prekal e oblaka. Sar dikhľa le David, hoj radišagoha kheel, dikhľa les tele andre peskero jilo.

E Archa thoven andro stanos

16 Le Devleskeri Archa ande a thode la andro stanos, so prekal late ačhađa o David. Palis ande anglo Del o labarde the smiromskere obeti. ² Sar o David dokerđa ola labarde the smiromskere obeti, požehňinda le manušen andre le RAJESKERO nav. ³ Palis diňa le muršen the džuvľen, savore Izraeliten, po jekh maro the bokeli le đatľendar the šuke hrozendar.

⁴ Varesave Leviten ačhađa, hoj te služinen angle RAJESKERI Archa a le gilavipnaha te lašaren, te modľinen a te palikeren le RAJESKE, le Izraelike Devleske. ⁵ O Asaf sas lengero vodcas a dujto pal leste sas o Zechariah. O Jaaziel, o Šemiramot, o Jechiel, o Mattitijah, o Eliab, o Benajah, o Obed-Edom the o Jeiel bašavenas pro harfi the citari a o Asaf pre cimbalu. ⁶ O rašaja o Benajah the o Jachaziel furt trubinenas angle Devleskeri Zmluvakeri Archa.

O David lašarel le Devles

⁷ Andre oda džives o David ešebnovar (peršovar) ačhađa le Asaf the leskere pašutnen, hoj le lašaribnaha te palikeren le RAJESKE:

⁸ "Palikeren le RAJESKE, hazden upre leskero nav!

Den te džanel leskere skutki maškar o narodi!

⁹ Gilaven leske, bašaven leske!

Vakeren pal savore leskere zazraki!

¹⁰ Lašaren tumen leskere sentne naveha!

Mi radisaľon o jile olenge, ko roden le RAJES!

¹¹ Roden le RAJES the leskeri zor,

ma preačhen te rodel leskero muj!

¹² Leperen tumenge pro zazraki,

pro bare veci, so kerđa,

the pre oda, sar sudzinelas,

¹³ tumen, o čhave le Izraeloskere, leskere služobňikoskere;

o čhave le Jakoboskere, le Devleskere avrikidle!

¹⁴ Ov hin o RAJ, amaro Del,

leskere zakoni hine prekal o manuša pal cali phuv.

¹⁵ Šoha (ňikda) ma bisteren pre leskeri zmluva, pre leskero lav, so prikazinda ezera pokoleňenge.

¹⁶ Phandľa e zmluva le Abrahamoha,

a la veraha diňa lav le Izak,

¹⁷ le Jakoboske la diňa sar zakonos,

le Izraeloske sar e večno zmluva,

¹⁸ akor, sar phendă: 'Tuke dava e Kanaaňiko phuv andro đedictvos.'

¹⁹ Sar mek sanas ča frima džene,

a sanas andre odi phuv ča cudzinci.

²⁰ Phirenas andral jekh narodos ke aver

a andral jekh kraljšagos ke aver.

²¹ O Del na domukľa, hoj len vareko te trapinel,

vaš lende pokarhinda the le krafen:

²² 'Ma thoven o vasta pre mire pomazimen manuša, ma dukhaven mire proroken!'

²³ Dojekh pre kadi phuv gilaven le RAJESKE!

Džives pre džives vakeren pal leskero spaseňje!

²⁴ Vakeren le narodenge pal leskeri slava,

den te džanel savore manušenge pal leskere zazraki.

²⁵ Bo o RAJ hino baro, les kempel te del nekbareder lašariben

a lestar te daral buter sar savore devľendar.

²⁶ Bo savore devľa andral aver narodi hine ča modli, ale o RAJ stvorinda o ňebos.

²⁷ E pačiv the e slava hine anglal leste,

e zor the o radišagos hin ode, kaj ov bešel.

²⁸ Den le RAJESKE, savore manušale pre phuv,

den le RAJESKE e slava the e zor.

²⁹ Den le RAJESKE e slava hodno leskere naveske!

Hazden upre o dari a džan angle leste!

Bandon tele anglo RAJ andre leskero sentno šukariben!

³⁰ Izdra lestar, calo svetos!

E phuv hiňi zorales zathodi,

na čhalavela pes!

³¹ Mi radisaľol o ňebos a e phuv mi thovel baripen, mi vakeren maškar o narodi: 'O RAJ kralineľ!'

³² Mi šundol zorales o moros the savoro, so andre hin, mi oslavinel e maľa the savoro, so upre hin!

³³ O stromi andro veš mi gilaven radišagostar anglo RAJ,

bo ov avela te sudzinel le manušen pre phuv.

³⁴ Palikeren le RAJESKE, bo hino lačho;

leskero lačhejileskeriben ľikerel pro furt.

³⁵ Vičinen pre leste: 'Zachraňin amen, Devľa, Spasiťeli-na amaro!

Cirde amen avri le narodendar a zvičin amen jekhetane,

hoj te palikeras tire sentne naveske

a te radisaľon andre tiri sentňi slava.'

³⁶ Mi el lašardo o RAJ, o Del le Izraeloskero,

akanastar pro furt!"

A savore manuša odphende: "Amen! Slava le RAJESKE!"

O službi andro Jeruzalem the Gibeon

³⁷ O David ačhađa le Asaf the leskere pašutne Leviten, hoj angle RAJESKERI Zmluvakeri Archa furt te keren e dživeseskeri služba, ³⁸ the le Obed-Edom a leskere šovardeš the očno (68) pašutnen. O Obed-Edom, le jedutunoskero čhavo, the o Chosah sas upral savore chramoskere stražňika.

³⁹ O David mukľa le rašas Cadok the le rašajen andral leskeri fajta angle RAJESKERO Stanos pro učo than andro Gibeon, ⁴⁰ hoj furt te anen le RAJESKE pro oltaris o

labarde obeti, tosara the rači, a oda avke, sar hin pisi-men andre le RAJESKERO zakonos, so diña le Izraelitenge. ⁴¹ Lenca sas o Heman, o Jedutun the ola, save sas avrikidle, hoj te palikeren le RAJESKE vaš oda, hoj leskero lačhejileskeriben likerel pro furt. ⁴² O Heman the o Jedutun pes starinenas pal o trubi, pal o cimbali the pal aver nastroji pro lašariben. Le Jedutunuskere čhave ačhenas paš e brana.

⁴³ Palis pes savore manuša rozgele khere. Geľa the o David, hoj te požehñinel peskera famelija.

O RAJ del lav le David

17 Sar o David imar bešelas andre peskero palacis, phendã le prorokoske Natanoske: "Me bešav andre cedroskero palacis, ale le RAJESKERI Zmluvakeri Archa hiñi ča andro stanos."

² O Natan le Davidoske odphendã: "Ker oda, so hin tuke pro jilo, bo o Del hino tuha."

³ Mek odi rat, o Del phendã le Natanoske: ⁴ "Dža a phen mire služobňikoske le Davidoske, hoj kada phenel o RAJ: 'Na, na ačhaveha mange kher, hoj me te bešav ode. ⁵ Se na bešav andro chramos akorestar, sar ligendom avri le Izraeliten andral o Egipt, dži adadžives, ale somas andro stanos, a džavas tumenca than thanestar. ⁶ Sar phiravas le Izraelitencã, šoha (ñik-da) na phendom le vodcenge andro Izrael, savenge prikazindom, hoj te lidžan mire manušen: "Soske mange na ačhaven o cedroskero chramos?" "

⁷ Mire služobňikoske le Davidoske phen, hoj kavke vakerele o RAJ o Nekzoraleder: 'Iľom tut la maľatar, kaj pasinehas le bakren, hoj te ačhes vodcas upral mire manuša, o Izrael. ⁸ Džavas tuha všadzik, kaj džahas, a zñičindom angle tu savore tire ñeprijateľen. Kerava, hoj tiro nav ela baro, avke sar o nava le nekbaredere vodcengere pre phuv. ⁹ Peskere Izraelike narodoske dava than, kaj les thovava. Ode pre peskero than bešela a na mušinelã pes buter te daral. A o nalačhe manuša les na dukhavenã avke sar angloda, ¹⁰ sar lidžanas mire manušen o sudci, saven ačhadom upral o Izrael. Tire ñeprijateľen thovava tele.

Me o RAJ tuke phenav, hoj tut dava but potomken.

¹¹ Sar avelã tiro časos a sar aveha parumen paš tire phure dada, ačhavava pal tute pro tronos tire potomkos a kerava, hoj leskero krališagos te el zoralo.

¹² Ov mange ačhavelã o chramos a me kerava, hoj te ačhel leskero krališagos pro furt. ¹³ Avava leske dad a ov ela miro čhavo. A miro jileskeriben lestar na odlava, avke sar odilom le Saulostar, savo sas anglal tute, ¹⁴ ale ačhavava les upral mire manuša the krališagos pro furt. Ov bešela pro tronos pro furt."

¹⁵ O Natan phendã le Davidoske sa avke, sar oda šunđa le RAJESTAR andro videñje.

Le Davidoskeri modlitba

¹⁶ Akor o David geľa andro Sentno Stanos, bešľa peske anglo RAJ a phenelas: "Ko som me, RAJEJA, Devla, a ko hiñi miri famelija, hoj man andal dži ade?"

¹⁷ Ale Devla, frima tuke oda sas a mek vakerehas pal oda, so ela tire služobňikoskera famelijaha. Tu dikhes pre ma sar pre varesavo baro manuš, ó, RAJEJA, Devla.

¹⁸ So mek buter šaj phenav me, o David, pre oda, hoj man des ajsi bari pačiv? Se tu mištes džanes tire služobňikos. ¹⁹ Ó, RAJEJA, tu prekal tiro služobňikos the pal tiro jilo kerďal kala bare veci a diňal oda te džanel mange. ²⁰ Ó, RAJEJA, nane ñiko ajsi sar tu! Nane aver Del, ča tu, avke sar oda korkore šundam amare kanenca. ²¹ A savo aver narodos pre phuv hino ajsi sar o Izrael? O narodos, saves peske tu, Devla, cindal avri andral o otroctvos, hoj te en tiro narodos a aleha peske kerďal baro nav akor, sar lenge kerehas bare the zorale veci, sar len lehas avri andral o Egipt a sar tradľal avri anglal lende avre naroden. ²² Tu kerďal, hoj o Izraeliti te en tire manuša pro furt, a tu, ó, RAJEJA, ačhilal lengero Del.

²³ Akana, RAJEJA, doľiker pro furt oda lav, so diňal mange the mira famelijake. Ker sa avke, sar phendal, ²⁴ hoj tiro nav te el furt barardo a hoj o manuša pal tu te vakerele: 'O RAJ o Nekzoraleder hino le Izraeloskero Del!' A e kraliskeri famelija tire služobňikoskeri le Davidoskeri mi ačhel pro furt anglal tute.

²⁵ Se tu, Devla miro, sikaďal peskere služobňikoske, hoj thoveha mira famelija furt pro tronos. Vašoda me akana bi e dar anav anglal tu kadi modlitba. ²⁶ Ale akana, ó, RAJEJA, tu sal o Del a phendal tire služobňikoske kada lačhipen. ²⁷ Mangav tut, požehñin mira caľa famelija, hoj pro furt te ačhen pro tronos. Bo so tu požehñines, RAJEJA, ačhel furt požehñimen."

Le Davidoskere ñerindipena

18 Pal varesavo časos o David ñerindã (zvitãzindã) upral o Filištinci a iľa lendar o foros Gat le pašutne gavenca.

² O David ñerindã the upral o Moabčana. On pes leske poddine a počinenas leske o dañe.

³ Palis ñerindã the upral o Hadad-Ezer, o kralis andre phuv Coba, paš o Chamat akor, sar peske džalas te zalel o phuva paš o pañi Euftrat. ⁴ O David zailã lestar ezeros (1 000) verdana, efa ezera (7 000) muršen pro graja the 20 000 slugađen. Mukľa peske lendar ča šel (100) grajen le verdanencã a olenge, save ačhile, diña te phagel o pindre.

⁵ Sar avle o Aramejčana andral o Damaskus te pomožinel le Hadad-Ezeroske, o David murďardã lendar 22 000 muršen. ⁶ Palis o David diña te rozačhavel slugađen andro Damaskus. Avke o Aramejčana pes poddine le Davidoske a počinkerenas leske o dañe. O RAJ pomožinelas le Davidoske te ñerinel všadzik, kaj džalas.

⁷ O David iľa o somnakune štiti, so hordinenas le Hadad-Ezeroskere veliteľã, a odligendã len andro Jeruzalem. ⁸ Andral le Hadad-Ezeroskere fori Tibčat the Kun o David skidña igen but bronzos. Palis o Šalamun diña lestar te kerel e igen bari nadrža, o slupi the o sersamos prekal o Chramos.

⁹ Sar o kralis Tou andral o Chamat šundā, hoj o David ňerinda upral cali armada le Hadad-Ezeroskeri andral e Coba, ¹⁰ bičhađa peskere čhas le Hadoram ko kralis David, hoj leske te phenel: "Smirom tuke! Av bachtalo, bo ňerinda upral o Hadad-Ezer." A bičhađa leske somnakune, rupune the bronzune veci. O kralis Tou ada kerđa, bo the ov sas andro mariben le Hadad-Ezeroha. ¹¹ Ole veci o kralis David sentňarda le RAJESKE jekhetane le rupoha the le somnakaha, so iľa avre narodendar: le Edomčanendar, Moabčanendar, Ammončanendar, Filištinenendar the Amalekendar.

Le Davidoskere uradňika

¹² O Abišaj, čhavo la Cerujakero, ňerinda andre Londi Dolina upral o 18 000 Edomčana. ¹³ Rozačhađa peskere slugađen andro tabora pal calo Edom a savore Edomčana pes le Davidoske poddine. O RAJ pomožinelas le Davidoske te ňerinel všadzik, kaj džalas.

¹⁴ O David kralinelas upral calo Izrael a sas pačivalo the čačipnaskero ke dojekh manuš. ¹⁵ O Joab, la Cerujakero čhavo, sas velitelis upral e armada; o Jošafat, le Achiludoskero čhavo, sas nekbareder pisaris; ¹⁶ o Cadok, le Achituboskero čhavo, the o Abimelech, le Ebjataroskero čhavo, sas rašaja; o Šavša sas pisaris; ¹⁷ o Benajah, le Jehojadoskero čhavo, sas velitelis le Keretānenge the le Piletānenge, save stražinelas le kralis. Le Davidoskere čhave sas nekbareder uradňika le kraliske.

O mariben le Ammončanenca the Aramejčanenca

19 Sar o Ammoniko kralis Nachaš muľa, ačhiľa pal leste kralis o Chanun, leskero čhavo. ² O David peske phenda: "Presikavava le Chanunoske, le Nachašiskere čhaske, o jileskeriben, avke sar oda kerđa leskero dad mange." Avke bičhađa peskere služobňiken, hoj leske te presikavel o pharipen pal leskero dad.

Sar avle le Davidoskere služobňika andre le Ammončanengeri phuv, ³ o Ammonike vodci phende le Chanunoske: "Gondolines tuke, hoj o David kamel te del pačiv tire dades oleha, hoj bičhavel peskere služobňiken, hoj tuke te presikavel o pharipen? Na! Bičhavel len vašoda, hoj te predikhen kadi phuv a palis la te zalen." ⁴ Akor o Chanun chudľa le Davidoskere služobňiken, oholinda len, jepaš gada lenge ostrihinda le perestar dži tele a mukľa len te džal.

⁵ Sar oda vareko phenda le Davidoske, ov anglal lende bičhađa avre muršen, bo ola murša sas igen pre ladž. O kralis diňa lenge te phenel: "Ačhen andro Jericho, medik tumenge na barola o bajuzi pre brada a palis šaj aven pale."

⁶ Sar o Ammončana peske pridžandle, hoj le David rozchoľarde, o Chanun the o Aramejčana počinde tranda the štar (34) toni rup, hoj lenge te bičhaven maribnaskere verdana the muršen pro graja andral e Aram-Naharajim, Aram-Maacha the Coba. ⁷ Palis 32 000 verdana the o kralis andral e Maacha peskere muršenca

avle a kerde peske taboris paš e Medeba, medik o Ammončana doavle odarik, kaj sas andro mariben.

⁸ Sar pes pal oda došundā o David, bičhađa andro mariben le Joab the cali armada. ⁹ O Ammončana pes rozačhade pro mariben angle foroskeri brana a o krala, save lenge avle te pomožinel, ačhenas pre peskere thana pre maľa.

¹⁰ Sar o Joab dikhľa, hoj avle pre leste anglunestar the palunestar, kidľa peske avri nekfedere muršen andral calo Izrael a rozačhađa len pro Aramejčana. ¹¹ A olen, save ačhile, diňa peskere phraleske le Abišajoske, hoj len te rozačhavel pro Ammončana. ¹² O Joab leske phenda: "Te dikheha, hoj o Aramejčana hine zoraleder sar me, aveha mange te pomožinel, a te dikhava, hoj o Ammončana hine zoraleder sar tu, džava me tuke te pomožinel. ¹³ Av zoralo a maras pes zoraes vaš amare manuša the vaš le Devleskere fori! Mi kerel o RAJ oda, so hin lačho anglal leskere jakha."

¹⁴ Avke o Joab peskere muršenca džalas andro mariben pro Aramejčana, ale on lestar denašle. ¹⁵ Sar o Ammončana dikhle, hoj o Aramejčana denašen le Joabostar, the on chudle te denašel anglal leskero phral Abišaj a gele pale andro foros. Avke o Joab pes visarda le maribnastar a geľa andro Jeruzalem.

¹⁶ Sar o Aramejčana dikhle, hoj o Izraeliti upral lende ňerinde (zvitāzinde), bičhade vaš aver Aramejčana, save bešenas pre aver sera le paňestar Eufkrat. On avle ke lende a o Šobach †, o velitelis upral e armada le Hadad-Ezeroskeri, len lidžalas.

¹⁷ Sar pal oda le Davidoske phende, diňa te zvičinel savore Izraeliten, pregeľa prekal o Jordan a rozačhađa pes angle lende. Avke o David pes mukľa pre lende pro mariben a marelas pes le Aramejčanenca, ¹⁸ ale on le Izraelitendar denašle a o David the leskere murša murdarde 7 000 muršen pro graja, 40 000 slugađen the le Šobach, savo sas velitelis upral e armada.

¹⁹ Sar savore krala, save služinenas le Hadad-Ezeroske, dikhle, hoj o Izrael ňerinda upral lende, phandle le Davidoha zmluva a služinenas leske.

Avke o Aramejčana na kamle buter te pomožinel le Ammončanenge.

O David zalel e Rabba

20 Pre aver berš jarone, andro časos, sar o krala džanas andro mariben, o Joab džalas la armada-ha pro Ammončana a zničinda lengeri phuv, ale o David ačhiľa andro Jeruzalem. Palis o Joab džalas pro foros Rabba a zničinda les. ² Avke o David iľa e koruna pal o šero lengere devleske, so pes vičinelas Milkom. Odi koruna sas phari buter sar tranda (30) kili †† a sas andre the dragano bar, so thode andre koruna le Davidoskeri. Andral oda foros o David zaila igen but veci. ³ Le manušen, save ode bešenas, odarik odligenda a thoda len andre buči, hoj te keren le pilenca, krompačenca the le toverenca. Avke kerđa the savore Ammonike forenca. Palis o David savore manušenca geľa pale andro Jeruzalem.

† Abo: Šofach †† E Hebrejiko čhib: jekh talentos

O maribena le Filištinenca

⁴ Paloda sas pale o mariben le Filištinenca andro Gezer. Akor o Sibbechaj andral e Chuša murdarđa le Saf †, savo sas andral e fajta Rafah. Avke thode tele le Filištinenen.

⁵ Palis andre aver mariben le Filištinenca o Elchanan, le Jairoskero čhavo, murdarđa le Lachmi, le Golišaškere phrales andral o Gat. O kašt le Golišaškera kopijatar sas ajso thulo sar o kašt le strojoser, pre savo pes kerel o pochtana.

⁶ Andre aver mariben, so sas paš o Gat, sas igen učo murš, saves sas bišuštar (24) angušta. Sas les pro vasta the pro pindre po šov angušta. The ov sas andral e fajta Rafah. ⁷ Ale sar asalas avri le Izraeliten, murdarđa les o Jonatan, le Šimeoskero čhavo, savo sas phral le Davidoske.

⁸ O David the leskere murša murdarde kale trine muršen andral e fajta Rafah andral o foros Gat.

O David zgenel le manušen

21 O satan pes ačhađa pro Izraeliti a kerđa upre le David, hoj te zgenel le manušen andro Izrael.

² Avke o David prikazindä le Joaboske the le veliteľenge: "Džan a zgenen le manušen andro Izrael, la Beer-Šebatar dži ko Dan, bo kamav te džanel, keci hine."

³ Ale o Joab phendä le kraliske: "Mi kerel o RAJ, hoj le Izraelitendar te el šelvar buter, sar hine! Či nane on, rajeja miro the kralina, savore tire sluhi? Soske ada miro raj kamel te kerel? Soske aleha kames te anel le Izrael andro binos?"

⁴ Ale o kralis peske ačhelas vaš oda, so phendä, a o Joab les mušindä te šunel. Avke o Joab geľa, pophirdä calo Izrael, zgendä len a avľa pale andro Jeruzalem. ⁵ A phendä le Davidoske, keci hin manuša: "Andre calo Izrael hine 1 100 000 murša, save pes džanen te marel la šablaha, a andre Judsko 470 000 murša." ⁶ Ale le manušen andral o kmeňi Levi the Benjamin na zgendä, bo le kraliskero prikazis le Joab igen trapinelas.

O Del marel le manušen

⁷ Aňi le Devleske kada na sas pre dzeka, a vašoda marda le Izrael. ⁸ Akor o David phendä le Devleske: "Kerđom aleha igen baro binos angle tu. Akana mangav tut, odmuk mange kada binos, bo na kerđom oda godaha!"

⁹ O RAJ phendä le Gadoske, savo sas le Davidoskero prorokos: ¹⁰ "Dža a phen le Davidoske: 'Kavke vakerele o RAJ: Dav tuke trin veci. Kide tuke avri, so kames, hoj pes te ačhel, a me oda kerava.'"

¹¹ Avke o Gad geľa ko David a phendä: "Kavke phenel o RAJ: ¹² 'Kide tuke avri: Majinel te el andre tiri phuv trin berš bokh? Abo kames trin čhon te denašel peskere ňeprijateľendar, save džana pre tu la šablaha?"

† Abo: o Sippaj

Vaj andre cali tiri phuv te avel le RAJESKERO aňjelos a trin dživesa tumen te marel le bare nasvalibnaha? Akana rozgondolin tuke a phen mange, so te phenel oleske, savo man ke tu bičhađa.'"

¹³ O David phendä le Gadoske: "Oda mange hin igen phares peske te kidel avri! Me na kamav te perel andre le manušengere vasta, mi marel man o RAJ, bo leskero jileskeriben hino igen baro."

¹⁴ Akor o RAJ domukľa pro Izrael baro nasvaliben a mule 70 000 Izraeliti. ¹⁵ O Del bičhađa le aňjelos, hoj te zničinel le manušen andro Jeruzalem. Ale sar oda o RAJ dikhľa, sas leske pharo vaš oda baro nalačhipen, so diňa te kerel, a phendä le aňjeloske: "Preačh! Ma ker imar oda!" Ipen akor le RAJESKERO aňjelos sas paš o humnos le Ornanoskero, savo sas Jebusejis.

¹⁶ Sar pes o David rozdikhľa, dikhľa maškar e phuv the maškar o ňebos te ačhel le RAJESKERE aňjelos la šablaha andro vast, sar la nacirdľa pro Jeruzalem. Akor o David the o vodci sas urde andro gone a pele le mujeha dži ke phuv.

¹⁷ O David phendä le Devleske: "Me diňom te zgenel le manušen a kerđom ada baro binos. Se on hine ča o bakre. Me som vinovato, ale on na kerde nič! Ó, RAJEJA, mangav tut, Devla miro, mar man the mira famelija a odle kadi bibach peskere manušendar."

O David cinel o than prekal o Chramos

¹⁸ Akor le RAJESKERO aňjelos phendä le prorokoske Gadoske, hoj te phenel le Davidoske: "Dža upre a ačhav oltaris le RAJESKE pre le Ornanoskero humnos."

¹⁹ O David geľa a kerđa sa avke, sar o Gad ke leste prevakerđa andre le RAJESKERO nav.

²⁰ Sar o Ornan marelas avri o žužodiv, visardä pes a dikhľa le aňjelos. Leskere štar čhave, save sas leha, pes garude. ²¹ O David džalas ke leste. Sar o Ornan dikhľa, hoj avel ke leste o David, geľa avri a bandiľa anglal leste le mujeha dži ke phuv.

²² O David leske phendä: "Kamav tutar te cinel o humnos, hoj te ačhavav le RAJESKE oltaris, bo avke preačhela oda baro nasvaliben pro manuša. Biken les mange vaš ajci, keci mol."

²³ O Ornan leske odphendä: "Le tuke les. Mi kerel miro raj the kralis oda, so hin lačho angle leskere jakha. Dikh, dav kale gurumňen pre labardi obeta, o žužodiv pre chabeneskeri obeta the o sersamos, savenca maravas avri o žužodiv ††, hoj te keres jag. Dav oda savoro!"

²⁴ Ale o David leske phendä: "Kada na! Kamav tutar te cinel a te počinel vaše ajci, keci mol. Na anava le RAJESKE oda, so hin tiro, aňi o labarde obeti, so man nič na molas."

²⁵ Avke o David cindä oda humnos vaš o šov šel (600) rupune. ²⁶ Ačhađa le RAJESKE ode oltaris a andä leske o labarde the smiromskere obeti. Sar o David vičinelas pro RAJ, ov leske odphendä oleha, hoj bičhađa andral o ňebos e jag pro oltaris, kaj sas o labarde obeti.

†† E Slovačko čhib: mlaticé smyky

²⁷ A o RAJ phendā le aňjeloske, hoj te thovel pale e šablā pre peskero than. ²⁸ Akorestar, sar o David dikhla, hoj leske o RAJ odphendā pro humnos le Ornanoskero le Jebusejiskero, obetinelas ode. ²⁹ Le RAJESKERO sentno stanos, so kerdā o Mojžiš pre pušta, the o oltaris prekal o labarde obeti andre oda časos sas pro učo than andro Gibeon. ³⁰ Ale o David ode našti geľa, hoj pes te phučel le Devlestar, bo igen predarandila le RAJESKERE aňjeloskera šablātar.

22 O David phendā: "Kade ela o Chramos le RAJESKERO, le Devleskero, a kade ela le Izrael oltaris pro labarde obeti."

O David pririchtinel e buči pro Chramos

² O David diňa te vičinel savore cudzincen, save bešenas andro Izrael, a ačhadā lendar manušen, hoj te pririchtinen o bara pre buči pre le Devleskero Chramos. ³ Diňa te anel igen but trasta, hoj lendar te keren o lecegi (karfa) the o čopi pro kaštune brani, the ajci bronzos, so pes na delas aňi te odvažinel, ⁴ the mek igen but cedroskere kašta, bo o Sidončana the o Tirčana le Davidoske dodenas igen but cedroskere kašta.

⁵ O David phendā: "Miro čhavo o Šalamun hino mek terno a mek mištes na džanel te kerel o Chramos, so pes majinel te ačhavel le RAJESKE. Kampel les te ačhavel kavke, hoj te el igen baro the šukar, hoj dojekh pre phuv pal leste te džanel." O David mek anglo peskero meriben diňa te anel igen but veci prekal o Chramos.

O David phenel le Šalamunoske, sar te ačhavel o Chramos

⁶ Palis peske diňa te vičinel peskere čhas le Šalamun a prikazindā leske, hoj te ačhavel o Chramos le RAJESKE, le Izraeloskere Devleske. ⁷ O David phendā le Šalamunoske: "Čhavo miro, andre miro jilo sas, hoj te ačhavav o Chramos prekal o RAJ, miro Del. ⁸ Ale le RAJESKERO lav avla ke ma: 'Lidžahas o bare maribena pre kadi phuv a čhordal avri igen but rat. Vašoda na ačhaveha o Chramos prekal miro nav, bo čhordal avri igen but rat. ⁹ Ale ela tut muršoro, ov ela ajso, sar phenel leskero nav: "Murš smiromoskero." A me kera-va, hoj les te el smirom savore leskere űeprijatēfendar pal dojekh sera. Leskero nav ela Šalamun. Sar ov kralinela andro Izrael, dava o smirom the o cicho le maribnastar. ¹⁰ Ov ačhavela o Chramos prekal miro nav. Ela mange čhavo a me avava leske dad. Leskere potomstvosstar ela furt vareko pro tronos upral o Izrael.'

¹¹ Akana, čhavo miro, mi lidžal tut o RAJ, hoj bachtales te ačhaves o Chramos le RAJESKE, peskere Devleske, avke sar pal tu phendā. ¹² Ča mi del tut o RAJ godaveripen the prindžaripen andre savoreste, sar tut ačhavela upral calo Izrael, hoj te dolikeres o zakonos le RAJESKERO, tire Devleskero. ¹³ Akor tut ela bach, te dolikereha calo zakonos the o prikazi, so diňa avri o

RAJ le Mojžišoske prekal o Izrael. Av zoralo a ma dara tut! Ačh zorales!

¹⁴ Dikh, phara bučaha andom prekal le RAJESKERO Chramos 3 400 toni somnakaj † the 34 000 toni rup ††, ajci but bronzos the trasta, so pes na del aňi te odvažinel, a kašta the bara. Ke ada, so hin, mušines mek te anel buter. ¹⁵ Hin paš tu but manuša, save džanen te kerel peskeri buči: O tēsara, ola, save keren le barenca, the igen but majstri, save džanen te kerel dojekh buči ¹⁶ le somnakaha, rupoha, bronzoha the trastenca. Ušti a muk tut andre buči, o RAJ ela tuha!"

¹⁷ Palis o David prikazindā savore Izraelike vodcenge, hoj te pomožinen leskere čhaske le Šalamunoske.

¹⁸ Phendā: "O RAJ, tumaro Del, hino tumenca a diňa tumen o smirom le manušendar pal savore seri, bo ov len mange diňa andre miri zor a on hine poddine le RAJESKE the leskere manušenge. ¹⁹ Akana roden le RAJES, tumare Devles, cale jileha the dušaha. Chuden te ačhavel o Chramos le RAJESKERO, le Devleskero, hoj pes te prelidžal le RAJESKERI Zmluvakeri Archa the o sentne veci andro Chramos, so ela ačhado prekal le RAJESKERO nav."

O David ačhavel andre služba le Leviten

23 Sar o David sas imar igen phuro, ačhadā peskere čhas le Šalamun kraliske upral o Izrael.

² Zvičindā savore Izraelike vodcen, rašajen the Leviten. ³ Zgende savore Leviten phurederen sar tranda (30) berš a sas 38 000 murša. ⁴ O David phendā: "Lendar ačhavav 24 000, hoj te služinen andre le RAJESKERO Chramos, šov ezera (6 000) uradņiken the sudcen, ⁵ štar ezera (4 000) stražņiken the štar ezera dženen, save lašarena le RAJES a bašavena pre ola nas- troji, so diňom te kerel pro lašariben."

⁶ O David le Leviten rozulađa pal lengere trin fajti pal le Leviskere čhave: Geršon, Kohat the Merari.

Le Geršonoskero potomstvos

⁷ Le Geršonoskere čhave sas o Ladan the o Šimej. ⁸ Le Ladan sas trin čhave: Ešebno (peršo) o Jechiel, palis o Zetam the o Joel. ⁹ On sas vodci andre Ladanoskeri famelija. Le Šimej sas trin čhave: o Šelomot, o Chaziel the o Haran. ¹⁰ A sas les mek aver štar čhave: o Jachat, o Zina, o Jeuš the o Berijah. ¹¹ O Jachat sas ešebno, dujto o Zizah. Le Jeuš the le Berijah na sas but muršora, vašoda pes len rachinelas sar jekh fajta.

Le Kohatoskero potomstvos

¹² Le Kohat sas štar čhave: o Amram, o Jishar, o Chebron the o Uzziel. ¹³ Le Amramoskere čhave sas o Aron the o Mojžiš. O Aron the leskere potomki sas sentnarde andre služba, hoj pes pro furt te starinen pal o sentne veci, te anel o voňava obeti anglo RAJ, te služinel leske a andre leskero nav te žehņinel le manušen. ¹⁴ O čhave le Mojžišoskere, le Devleskere

† Oda sas 100 000 talenti somnakaj. †† Oda sas 1 000 000 talenti rup.

muršeskere, sas rachimen andro kmeños Levi. ¹⁵ Le Mojžišoskere čhave sas o Geršom the o Eliezer. ¹⁶ Le Geršomoskero ešebno čhavo sas o Šebuel. ¹⁷ Le Eliezer sas ča jekh čhavo o Rechabiah, ale le Rechabiah sas but čhave.

¹⁸ Le Jishar, le Kohatoskere dujtone čhas, sas ešebno čhavo o Šelomot, savo sas vodcas andre fajta. ¹⁹ Le Chebron, le Kohatoskere tritone čhas, sas štar čhave: Ešebno o Jerijah, dujto o Amariah, trito o Jachaziel the štarto o Jekameam. ²⁰ Le Uzziel, le Kohatoskere štar-tone čhas, sas o Michah the o Jiššijah.

Le Merariskero potomstvos

²¹ Le Merari sas duj čhave: o Machli the o Muši. Le Machlioskere čhave sas o Eleazar the o Kiš. ²² O Eleazar muľa a na sas les muršora, ča čhaja, vašoda leskere čhajen peske ile romñijenge le Kišoskere čhave. ²³ Le Merariskero dujto čhavo sas o Muši. Les sas trin čhave: o Machli, o Eder the o Jeremot.

²⁴ Kala sas le Leviskere potomki pal lengere fameliji the fajti, save sas vodci a dojekheskero nav sas zapisimen. Dojekh, kaske sas buter sar biš (20) berš, sas ačhado, hoj te služinel andre le RAJESKERO Chramos.

Le Levitengeri buči andro Chramos

²⁵ Akor o David phendā: "O RAJ, o Del le Izraeloskero, diña peskere manušenge o smirom a ačhila te bešel andro Jeruzalem pro furt. ²⁶ Vašoda o Leviti buter na mušinen te hordinel o sentno stanos the o veci pre služba andre." ²⁷ Akorestar pal le Davidoskere posledne prikazi pes rachinenas andre služba o Leviti biš (20) beršendar upre.

²⁸ Lengeri buči sas te pomožinel andro Chramos le rašajenge, le Aronoskere potomkenge, andre služba, hoj te merkinen pro chramoskere thana the dvora a te starinen pes pal savore sentne veci the pal e služba andro Chramos. ²⁹ Mušinenas pes te starinel pal o sentne mare, pal o sano aro pre chabeneskeri the peki obeta the pal o mare bi o droždī. Mušinenas te mišinel o aro le olejoha a mek te merinel a te važinel o obeti. ³⁰ On sas ačhade the pre oda, hoj sako džives tosara the rači te palikeren a te lašaren le RAJES, ³¹ sar anenas o labarde obeti le RAJESKE pro Šabbatoskero džives, abo pro Inepos Neve Čhoneskero the pre savore inepi. Sas avridino, keci Leviti mušinenas te služinel pro furt anglo RAJ andro Chramos.

³² On pes starinenas pal o sentno stanos le RAJESKERO the pal o Sentno Than a pomožinenas le Aronoskere potomkenge, peskere pašutnenge, andre služba andro Chramos.

O rašaja hine rozulade andre služba

24 Le Aronoskere potomki sas rozulade (rozdelimen) andro partiji. Le Aron sas štar čhave: o Nadab, o Abihu, o Eleazar the o Itamar. ² O Nadab the o Abihu mule sigeder sar lengero dad. Bo len na sas čhave, e rašajiko služba preile lengere phrala o Eleazar

the o Itamar. ³ O David jekhetane le Cadokoha, savo sas potomkos le Eleazaroskero, the le Achimelechoha, savo sas le Itamariskero potomkos, lenge rozulada e buči andre služba. ⁴ Andre le Eleazaroskero potomstvos sas buter vodci sar andre le Itamariskero. Vašoda le Eleazaroskere potomki sas rozulade andro dešušov (16) partiji a le Itamariskere andro ochto (8). ⁵ Lengero potomstvos rozulade prekal o losos andre služba sar chramoskere uradñika the Devleskere služobñika. ⁶ O pisaris Šemajah, le Netaneeloskero čhavo andral le Leviskero kmeños, len zapisinda. O krališ, o uradñika, o rašaj Cadok, o Achimelech, le Ebjataroskero čhavo, the o vodci andral le rašajengere the Levitengere fajti sas paš oda sar švedki. Jekhvar losinenas vaš le Eleazaroskero potomstvos a jekhvar vaš le Itamariskero.

⁷ Kala hine o partiji pal o nava peskere fajtakere vodcenge. O šoros sas kajso: Ešebno (peršo) losos peľa pro Jojarib, dujto pro Jedajah, ⁸ trito pro Charim, štarto pro Seorim, ⁹ pandžto pro Malkijah, šovto pro Mijamin, ¹⁰ eftato pro Hakkoc, ochtoto pro Abijah, ¹¹ eňato pro Ješua, dešto pro Šechaniah, ¹² dešujekhto (11.) pro Eljašib, dešudujto (12.) pro Jakim, ¹³ dešutrito (13.) pro Chuppah, dešuštarto (14.) pro Ješebab, ¹⁴ dešupandžto (15.) pro Bilgah, dešušovto (16.) pro Immer, ¹⁵ dešueftato (17.) pro Chezir, dešuochtoto (18.) pro Hapiccec, ¹⁶ dešueňato (19.) pro Petachiah, bišto (20.) pro Jechezkel, ¹⁷ bišujekhto (21.) pro Jachin, bišudujto (22.) pro Gamul, ¹⁸ bišutrito (23.) pro Delajah a bišuštarto (24.) pro Maaziah.

¹⁹ Kale muršenge sas rozuladi e buči andro Chramos, avke sar perelas pre lende o šoros a oda sa avke, sar diña avri lengero phuro dad Aron pal o prikazis le RAJESKERO, le Izraeloskero Devleskero.

Aver Leviti ačhade andre služba

²⁰ Kala hine aver fajtakere vodci, andral le Levitengero potomstvos: andral le Amramoskeri fajta sas vodcas o Šubael, a andral leskeri fajta o Jechdejah;

²¹ andral le Rechabijoskeri fajta sas o Jiššijah ešebno;

²² andral le Jisharoskeri fajta o Šelomot, a andral leskeri fajta o Jachat.

²³ Le Chebron sas štar čhave: Ešebno o Jerijah, dujto o Amariah, trito o Jachaziel a štarto o Jekameam.

²⁴ Andral le Uzzieloskeri fajta sas vodcas o Michah a andral leskeri fajta o Šamir ²⁵ jekhetane le Jiššijoha, savo sas le Michoskero phral. Andral le Jiššijoskeri fajta sas vodcas o Zechariah.

²⁶ Le Merariskere čhas, le Jaaziah, sas duj čhave: o Machli the o Muši.

²⁷ O potomki le Merariskere prekal o Jaaziah sas o Šoham, o Zachur the o Ibri.

²⁸⁻²⁹ Le Machli sas duj čhave: o Eleazar the o Kiš. A le Eleazar na sas murša, ale le Kiš sas o Jerachmeel.

³⁰ Le Mušiskere čhave sas o Machli, Eder the o Jerimot.

Kala sas le Leviskere potomki, sako pal peskeri fajta.

³¹ The on losinenas jekhetane peskere phralenca, le

Aronoskere potomkenca, savi buči majinenas te kerel. Sas paš oda o David, o Cadok, Achimelech the o vodci andral le rašajengere the Levitengere fajti.

O lavutara andro Chramos

25 O David the le chramoskere vodci kidle avri varesave dženen le Asafoskere, Hemanoskere the Jedutunoskere čhavendar, hoj te prorokinen, sar bašavena pro citari, harfi the cimballi. Sas oda kala murša:

² Le Asafoskere čhavendar sas o Zachur, o Jozef, o Netanijah the o Asarelah. On sas ligende le Asafoha, savo prorokinelas pro kraliskero prikazis.

³ Le Jedutunoskere čhavendar sas: O Gedaliah, o Ceri, o Ješajah, o Šimej, o Chašabiah the o Mattitijah. Upral lende sas lengero dad o Jedutun, savo prorokinelas akor, sar la harfaha bašavenas, palikerenas a lašarenas le RAJES.

⁴ Le Heman sas dešuštar (14) čhave: o Bukkijah, o Mattaniah, o Uzziel, o Šebuel, o Jerimot, o Chananiyah, o Chanani, o Eliatah, o Giddalti, o Romamti-Ezer, o Jošbekašah, o Malloti, o Hotir the o Machaziot. ⁵ Savore kala čhave sas le Hemanoskere, le kraliskere prorokoskere. On sas dine leske prekal le Devleskero lav, hoj les te den pačiv. O Del diňa le Heman dešuštar muršora the trin čhaja.

⁶ Savore kale muršen lidžanas lengere dada o Asaf, o Jedutun the o Heman ko bašaviben pro citari, pro cimballi the pro harfi, sar gilavenas paš e služba andre le RAJESKERO Chramos. O kralis sas upral lende.

⁷ On jekhetane lengere pašutnenca sas avrisikade, hoj te gilaven le RAJESKE. Savore sas jekhetane duj šel the ohtovardeš the očno (288). ⁸ On savore losinenas, hoj len te rozulaven (rozdelinen) andre služba, či ternes vaj phures, či olen, save džanenas, vaj olen, save siklonas.

⁹ Kala duj šel the ohtovardeš the očno (288) murša sas rozulade pal peskere fajti le čhavenca andro bišuštar (24) partiji po dešuduj (12) džene jekhe vodcaha. Avke o losos peľa pro vodci: ešebno (peršo) pro Jozef andral le Asafoskeri fajta; dujto pro Gedaliah; ¹⁰ trito pro Zachur; ¹¹ štarto pro Jicri †; ¹² pandžto pro Netanijah; ¹³ šovto pro Bukkijah; ¹⁴ eftato pro Jesarelah ††; ¹⁵ očno pro Ješajah; ¹⁶ eňato pro Mattaniah; ¹⁷ dešto pro Šimej; ¹⁸ dešujekhto (11.) pro Azarel †; ¹⁹ dešudujto (12.) pro Chašabiah; ²⁰ dešutrito (13.) pro Šubael ††; ²¹ dešuštarto (14.) pro Mattitijah; ²² dešupandžto (15.) pro Jerimot; ²³ dešušovto (16.) pro Chananiyah; ²⁴ dešueftato (17.) pro Jošbekašah; ²⁵ dešuochtoto (18.) pro Chanani; ²⁶ dešueňato (19.) pro Malloti; ²⁷ bišto (20.) pro Eliatah; ²⁸ bišujekhto (21.) pro Hotir; ²⁹ bišudujto (22.) pro Giddalti; ³⁰ bišutrito (23.) pro Machaziot; ³¹ the bišuštarto (24.) pro Romamti-Ezer.

† Abo: o Ceri †† Abo: o Asarelah † Abo: o Uzziel †† Abo: o Šebuel

O chramoskere stražnika

26 O chramoskere stražnika sas rozulade (rozdelimen) andro partiji pal peskeri fajta. Andral le Korachoskeri fajta sas o Mešelemijah, čhavo le Koreoskero, savo sas čhavo le Asafoskero. ² Le Mešelemijah sas kala čhave: Ešebno (peršo) o Zecharijah, dujto o Jediael, trito o Zebadijah, štarto o Jatniel, ³ pandžto o Elam, šovto o Jochanan the eftato o Eljehoenaj.

⁴⁵ Le Obed-Edom sas očno čhave, bo o Del les požehňinda: Ešebno o Šemajah, dujto o Jozabad, trito o Joach, štarto o Sachar, pandžto o Netaneel, šovto o Ammiel, eftato o Jissachar the očno o Peulletaj.

⁶ Le Šemajah sas čhave, save sas vodci andre peskere fajti, bo sas zorale maribnaskere murša: ⁷ o Otni, o Refael, o Obed the o Elzabad. The lengere pašutne o Elihu the o Semachijah, save sas zorale murša. ⁸ Kala savore potomki le Obed-Edomoskere the lengere čhave a lengere pašutne sas zorale murša, save džanenas te stražinel. On sas jekhetane šovardeš the duj (62).

⁹ Savore Mešelemijoskere čhave the pašutne sas dešuochto (18) zorale murša.

¹⁰ Le Chosah andral le Merariskeri fajta sas štar čhave: O Šimri sas o vodcas – choc te na uliľa ešebno – leskero dad les ačhađa vodcaske; ¹¹ dujto sas o Chilkiyah, trito o Tebalijah the štarto o Zechariah. Savore le Chososkere čhave the pašutne sas dešutrin (13) džene.

¹² Kala chramoskere stražnika sas rozulade andro partiji, sako pal lengere fajti a sas lenge diňi e služba andre le RAJESKERO Chramos, avke sar the okle Levitenge. ¹³ Le losoha kidenas avri savore famelijendar, či sas cikňi, či bari, ko majinel te služinel paš savi brana.

¹⁴ Le Šelemijoske sas diňi prekal o losos e vichodno brana. Le Zecharijoske, leskere čhaske, savo sas igen godaver murš, sas diňi e severno brana; ¹⁵ le Obed-Edomoske sas diňi e južno brana a leskere čhavage sas dine te merkinel pro thana, kaj sas odthode o veci; ¹⁶ le Šuppimoske the le Chososke e zapadno brana the e brana Šallechet, khatar pes džal le dromeha upre.

O stražnika jekh avres čerinenas avke: ¹⁷ Paš e vichodno brana sas šov Leviti; paš e severno štar; paš e južno štar; paš o thana, kaj sas odthode o veci, sas po duj; ¹⁸ paš e dvora pre zapadno sera sas duj a paš o drom, so lidžal andre dvora, štar Leviti. ¹⁹ Kala sas o partiji stražnika andral le Korachoskere the Merariskere fajti, save stražinenas.

Aver chramoskere služobňika

²⁰ Lengere pašutne Leviti pes starinenas pal o chramoskere pokladňi the pal o dari, so sas dine prekal o Del. ²¹ O Ladan, andral e Geršonoskeri fajta, sas dad le Jechielioske. But džene andral leskero potomstvos sas vodci andre peskere fajti. ²² Le Jechieli sas duj čhave: o Zetam the o Joel. On pes starinenas pal o chramoskere pokladňi the skladi.

²³ The le Amramoskere, le Jisharoskere, le Chebronoskere the le Uzzieloskere potomki pes starinenas pal o pokladni.

²⁴ O Šebuel sas upral savore chramoskere pokladnika. Ov sas andral e fajta le Geršomoskeri, savo sas čhavo le Mojžišoskero. ²⁵ O Šebuel sas pašutno le Šelemotoha prekal o Eliezer, savo sas phral le Geršomoske. O Eliezer sas dad le Rechabijoske, ov le Ješajoske, ov le Joramoske, ov le Zichriske a ov le Šelomotoske. ²⁶ O Šelomot the leskere pašutne pes starinenas pal savore pokladni the dari, so anelas a sentiñarelas le Devleske o kralis David, o vodci le fajtengere, o veliteľa upral o ezeros the o veliteľa upral o šel a the aver veliteľa upral e armada. ²⁷ Bo oda, so on zalenas andro mariben, denas andro Chramos, hoj les te oprikeren. ²⁸ O Šelomot the leskere pašutne pes starinenas the pal ola sentiñarde dari, so dine prekal o Chramos o prorokos Samuel, o Saul le Kišoskero čhavo, o Abner, le Neroskero čhavo, the o Joab, la Cerujakero čhavo.

O Leviti, save na služinenas andro Chramos

²⁹ Andral le Jisharoskero potomstvos, o Kenaniah the leskere čhave sas ačhade uradnikenge the sudcenge andro Izrael. On na služinenas andro Chramos.

³⁰ O Chašabijah the leskere murša andral le Chebronoskeri fajta, ezeros the efa šel (1 700) zorale murša, pes starinenas andro Izrael pro zapados le Jordanostar pal savore službi prekal o RAJ the prekal o kralis. ³¹ O Jerijah sas vodcas le fajtenge the le famelijenge andre le Chebronoskero potomstvos. Sar o David sas imar kralis saranda (40) berš, arakhle andro zvitki, hoj andre lengero potomstvos hine zorale murša, save bešen andro Jazer, andre Gileadiko phuv. ³² Le Jerijah sas duj ezera the efa šel (2 700) pašutne, save sas vodci andre peskere fajti. Len o David ačhađa upral o kmeñi Ruben, Gad the jepaš kmeños Menašše, hoj te merkinen pre savore veci le Devleskere the kraliskere.

O veliteľa upral o dešuduj čati

27 Sako čhon andro berš 24 000 murša andre jekh čata služinenas sar slugađa andre Izraeloskeri armada. Andre ole čati sas o vodci upral o fajti, o veliteľa upral o ezeros the upral o šel the lengere služobnika.

² Andro ešebno (peršo) čhon lidžalas e čata o Jašobeam, le Zabdieloskero čhavo. ³ Ov sas le Percoskero potomkos a sas angluno velitelis savore slugađege andre ešebno čhon.

⁴ Andro dujto čhon lidžalas e čata o Achoachitas Dodaj a velitelis sas o Miklot. Andre odi čata sas 24 000 murša.

⁵ Andre trito čhon lidžalas e čata o Benajah. Leskero dad sas angluno rašaj o Jehojada. ⁶ Oda Benajah sas vodcas le Tranda (30) zorale muršenge. Ale o velitelis upral e čata sas leskero čhavo o Ammizabad.

⁷ Andro štarto čhon lidžalas e čata o Asahel, le Joaboskero phral, a pal leste leskero čhavo o Zebadijah.

⁸ Andro pandžto čhon lidžalas e čata o Šamhut, le Jizrachoskero potomkos.

⁹ Andro šovto čhon lidžalas e čata o Iras, le Ikkešoskero čhavo, andral e Tekoa.

¹⁰ Andro eftato čhon lidžalas e čata o Chelec andral o kmeños Efrajim khatar o Palon.

¹¹ Andro ohtoto čhon lidžalas e čata o Sibbechaj, andral le Zerachoskeri fajta, andral e Chuša.

¹² Andro eñato čhon lidžalas e čata o Abiezer andral o Anatot, andral o kmeños Benjamin.

¹³ Andro dešto čhon lidžalas e čata o Mahraj andral e Netofa. Ov sas andral le Zerachoskeri fajta.

¹⁴ Andro dešujekhto (11) čhon lidžalas e čata o Benajah andral o kmeños Efrajim andral o Piraton.

¹⁵ Andro dešudujto (12) čhon lidžalas e čata o Cheldaj andral e Netofa. Ov sas andral le Otñieloskeri fajta. Andre dojekh čata sas 24 000 murša.

O vodci upral o kmeñi

¹⁶ Kala hine o vodci upral o kmeñi andro Izrael: o Eliezer, le Zichriskero čhavo, upral o kmeños Ruben;

o Šefatjah, le Maachoskero čhavo, upral o Šimeon;

¹⁷ o Chašabjah, le Kemueloskero čhavo, upral o Levi;

o Cadok upral le Aronoskeri fajta; ¹⁸ o Elihu, le Davidoskero phral, upral o Juda;

o Omri, le Michaeloskero čhavo, upral o Jissachar;

¹⁹ o Jišmajah, le Obadjoskero čhavo, upral o Zebulun;

o Jerimot, le Azrieloskero čhavo, upral o Naftali;

²⁰ o Hošeah, le Azazjoskero čhavo, upral o Efrajim;

o Joel, le Pedajoskero čhavo, upral o zapadno kmeños Menašše;

²¹ o Jiddo, le Zecharijoskero čhavo, upral jepaš kmeños Menašše andro Gilead;

o Jaasiel, le Abneroskero čhavo, upral o kmeños Benjamin;

²² the o Azarel, le Jerochamoskero čhavo, sas upral o kmeños Dan.

Kala sas o kmeñoskere vodci andro Izrael.

²³ O David na diña te pisinel andro zvitkos le ternederen sar biš berš (20), bo o Del les diña lav, hoj kerela lendar ajci but Izraeliti sar o čercheña pro ñebos. ²⁴ O Joab, la Cerujakero čhavo, len chudľa te zgenel, ale na dogeđa len, bo o Del cholisalifa pre lende a mardľa len vaš oda, hoj le Izraeliten kamle te zgenel. Vašoda na sas pisimen, keci sas andre kronika le kraliskeri Davidoskeri.

O uradnika upral o kraliskero barvalipen

²⁵ O Azmavet, le Adieloskero čhavo, pes starinenas pal o kraliskere skladi.

O Jonatan, le Uzzioskero čhavo, pes starinenas pal aver skladi andro fori, gava the veži.

²⁶ O Ezri, le Keluboskero čhavo, sas upral o murša, save kerenas buči pre maľa.

²⁷ O Šimej andral e Rama pes starinenas pal o viñici.

O Zabdi andral o Šefam pal o thana, kaj sas odthodi e mol.

²⁸ O Baal-Chanan andral o Geder pes starinelas pal o olivi the dzive figi pre zapadno brehengeri phuv.

O Joaš pes starinelas pal o olivovo olejos. ²⁹ O Šitraj andral o Šaron pes starinelas pal o dobitkos, so pes pasinelas pro mali andro Šaron.

O Šafat, le Adlajoskero čhavo, pal o dobitkos, so pes pasinelas andro dolini.

³⁰ O Izmaelitas o Obil pes starinelas pal o tavi.

O Jechdejah andral o Meronot pes starinelas pal o oslici.

³¹ O Hagarčanos o Jaziz pes starinelas pal o bakre the kozi.

Kala savore pes starinenas pal le Davidoskero barvalipen.

Le Davidoskere radci

³² O Jonatan, le Davidoskero bačis, sas godaver murš the radcas. Ov jekhetane le Jechieloha, le Chachmonoskere čhaha, likerenas avri le kraliskere čhaven.

³³ O Achitofel sas le kraliskero radcas a o Arkijcos Chušaj sas le kraliskero prijatelj. ³⁴ Sar o Achitofel muľa, ačhile pal leste radci o Jehojada, le Benajoskero čhavo, the o Ebjatar.

O veliteľis upral le kraliskeri armada sas o Joab.

O David del le Šalamunoske o planos le Chramostar

28 O David vičinda ke peste andro Jeruzalem savore Izraelike uradniken: le kmeňoskere vodcen; le armadakere veliteľen, save služinenas le kraliske; le veliteľen upral o ezeros the upral o šel slugađa; le manušen, save pes starinenas pal calo leskero barvalipen the pal leskere the le čhavengere stadi. Vičinda the le palaciskere uradniken, slugađen the savore zorale maribnaskere muršen.

² Sar savore doavle, o David uštila a phenda: "Phralale mire the manušale mire! Šunen man avri! Andre miro jilo sas oda, hoj ačhavava than prekal amare RAJESKERI Zmluvakeri Archa, so hiňi sar stolkos, kaj o Del thovela peske o pindre. Savoro imar pririchtindom, hoj pes te ačhavel, ³ ale o Del mange phenda: 'Tu našti ačhaves o Chramos prekal miro nav, bo sal slugađis a čhordal avri but rat.'

⁴ Ale o RAJ, o Del le Izraeloskero, peske ila man andral cali famelija avri kraliske pro furt, bo savore kmeňendar peske o Del kidňa avri le Juda sar vodcas a savore famelijendar, mire dadeskera famelija the savore mire dadeskere čhavendar kidňa avri man vaš o kralis upral calo Izrael. ⁵ O RAJ man diňa igen but čhaven a savore mire čhavendar peske kidňa avri mire čhas le Šalamun, hoj te bešel pro tronos a te kralinel upral le RAJESKERO krališagos andro Izrael. ⁶ Phenda mange: 'Tiro čhavo o Šalamun mange ačhavela miro Chramos the mire dvori, bo mange les ilom avri vaš o čhavo a avava leskero dad. ⁷ Te pes likerela mire

prikazaňjendar the zakonostar avke sar akana, pro furt leske ačhela o krališagos.'

⁸ Akana tumenge phenav anglo Del, angle savore Izraeliti the angle savore, save hine zgele anglo RAJ, hoj te merkinen a te dolikeren savore prikazaňja le RAJESKERE, peskere Devleskere, hoj tumenge te ačhel ka-di šukar phuv a hoj la palis te den tumare potomkenge sar dedictvos pro furt.

⁹ A tu Šalamun, čhavo miro, sprindžar tire dadeskere Devles a služin leske cale jileha the godaha, bo o RAJ džanel amare jile the amaro gondolišagos. Te les rodeha, dela pes tuke te arakhel, ale te pes lestar odvisareha, omukela tut pro furt. ¹⁰ Ma bister pre oda, hoj tut o RAJ kidňa avri, hoj te ačhaves leske sentno Chramos. Av zoralo a muk tut andre buči!"

¹¹ Palis o David diňa peskere čhaske le Šalamunoske o planos, sar te ačhavel savore thana andro Chramos: e angluňi dvora, o than, kaj sas odthode o veci, o up-rune thana, o androne thana the o than prekal e Zmluvakeri Archa, kaj hine odmukle o bini. ¹² Diňa leske the o planos, so sas les andro duchos, sar te kerel e chramoskeri avruňi dvora, o avrone thana pašal o Chramos, o thana, kaj sas odthode o chramoskere veci the o dari, so anenas le RAJESKE. ¹³ O David diňa leske the o planos, sar o rašaja the o Leviti majinde te el rozulade (rozđelimen) andre služba a sar oda te kerel a sar pes te starinen pal savore veci andro Chramos. ¹⁴ A phenda, keci kampela rup the somnakaj pre ola veci, so ena kerde a savenca služinena andro Chramos, ¹⁵ a keci kampela rup the somnakaj pre dojekh lampa the momelaris, ¹⁶ the pro rupune skaminda the pro dojekh somnakuno skamind prekal o sentne mare prekal o Del. ¹⁷ Phenda, keci kampela žužo somnakaj, savestar kerena o vidlički, čare the pohara, a keci kampela somnakaj the rup, savestar kerena o čare, ¹⁸ a keci žužo somnakaj kampela, sar kerena o oltaris, pre savo labarena o voňava obeti. Diňa the o planos le verdanestar: prekal o somnakune cherubi, save peskere rozcirdle kridlenca garuvenas le RAJESKERI Zmluvakeri Archa.

¹⁹ O David phenda le Šalamunoske: "Kada savoro sas zapisimen le RAJESKERE godaha a leskero vast sas pre mande, hoj te pririchtinav savori buči pro Chramos.

²⁰ Muk tut andre buči a ma dara! Ma dara tut a ma izdra, bo o RAJ o Del, miro Del, ela tuha. Na omukela tut a na odvisarela pes tutar, medik na dokereha savore buča pro Chramos, andre savo palis le RAJESKE služinena. ²¹ Dikh, hin tut but partiji rašaja the Leviti, save hine pririchtimen pre savori služba andre le Devleskero Chramos. Hin paš tu o manuša, save džanen te kerel dojekh buči, the o uradnika, a savore manuša tut šunena, so lenge ča pheneha."

O dari prekal o Chramos

29 Palis o kralis David phenda savore manušenge, save sas ode zgele: "Miro čhavo o Šalamun, saves peske kidňa avri o Del, hino mek terno a mek na džanel but pal o dživipen. Bo e buči pro Chramos hiňi

bari a na kerel pes prekal o manuš, ale prekal o RAJ, prekal o Del. ² Keci birindom, ajci pririchtindom materijalos a diňom prekal le Devleskero Chramos o somnakaj pro somnakune veci, o rup pro rupune, o bronzos pro bronzune, o trasta pro trastune the o kašta pro kaštune veci. Diňom mek o mramoris the onixoskere bara, malachitoskere the farebna bara – savore dragane bara pro šukariben. ³ A vašoda, hoj mange hin pro jilo le Devleskero Chramos, dav mek mire barvalipnastar o somnakaj the o rup ke oda, so imar diňom: ⁴ šel (100) toni nekfeder somnakaj andral o Ofir the duj šel the saranda (240) toni žužo rup, hoj te šukalaren o fali andro Chramos, ⁵ the o somnakaj pro somnakune the o rup pro rupune veci, savendar kerena o majstri o veci andro Chramos. Ko kamlahas adadžives jilestar te anel varesave dari le RAJESKE?"

⁶ Avke, sar o David dovakerda, o vodci andral peskere fajti, o kmeňoskere vodci, o veliteľa upral o ezeros, o veliteľa upral o šel the o uradnika dine jilestar o dari prekal o RAJ. ⁷ On dine prekal o Chramos buter sar šel the eftavardeš (170) toni somnakaj, buter sar trin šel the saranda (340) toni rup, vaj šov šel the biš (620) toni bronzos a buter sar trin ezera the štar šel (3 400) kili trasta. ⁸ Kas sas varesave dragane bara, delas len le Jechieloske andral le Geršonoskeri fajta andro vasta sar daros prekal le RAJESKERO Chramos, bo ov sas upral o pokladi. ⁹ O manuša radisaľonas ole darendar, so o vodci anenas jilestar le RAJESKE. The o David igen radisaľolas.

O David palikerel le RAJESKE

¹⁰ Palis o David lašarelas le RAJES angle savore manuša kavke:

"Av lašardo, RAJEJA, Devla amare phure dadeskero, le Jakoboskero, čirlastar pro furt!

¹¹ Tu sal baro, zoralo the slavno!

Tuke e pačiv the e slava!

Tiro hino savoro, so hin pro ňebos the pre phuv.

Tiro hino o krališagos

a sal barardo upral savoreste!

¹² O barvalipen the e pačiv hin tutar.

Tu kralines upral savoreste.

Andre tire vasta hin e zor.

Kas tu kameha, oles šaj keres bares the zoraes!

¹³ Akana, Devla amaro, palikeras tuke

a lašaras tiro slavno nav!

¹⁴ Ale ko som me the mire manuša, hoj tut šaj diňam ajci dari? Se savoro hin tutar a akana tuke oda ča pale das. ¹⁵ Sam cudzinci the hosci andre tire jakha, avke

sar the amare phure dada. Amaro časos pre kadi phuv hino sar o ciňos, so predžal, a sig meras. ¹⁶ Ó, RAJEJA, Devla amaro, savoro kada barvalipen, so tuke diňam, hoj pes te ačhavel o Chramos prekal tiro sentno nav, hin tutar a tiro hin savoro. ¹⁷ Me džanav, Devla miro, hoj tu dikhes pro jilo le manušeskero a rado dikhes oles, ko hino pačivalo. Me jilestar tuke andom kala dari a akana dikhav, hoj kala tire manuša tiš jilestar the radišagoha ande o dari. ¹⁸ Ó, RAJEJA, Devla amare dadengero le Abrahamoskero, Izakoskero the le Izraeloskero, ker, hoj te en furt pačivale, a lengere jile pricirde ke peste. ¹⁹ A ker, hoj miro čhavo o Šalamun te el tuke pačivalo cale jileha a te dolikerel tire prikazaňja, zakoni the sikavibena, a mi kerel savoro, so kampil, hoj te el ačhado o Chramos, prekal savo diňom kala dari." ²⁰ Palis o David phenda savore manušenge: "Lašaren le RAJES, peskere Devles!"

Avke savore ole manuša chudle te lašarel le RAJES, le Devles peskere dadengere, a andre pačiv bandonas dži ke phuv anglo RAJ the anglo kralis David.

O Šalamun pale ačhado kraliske

²¹ Palis o Izraeliti ande le RAJESKE o dari a pre aver džives o labarde obeti: ezeros (1 000) terne biken, ezeros bakren, ezeros bakroren, e molakeri obeta the aver obeti vaš calo Izrael. ²² Oda džives chanas a pijenaš anglo RAJ bare radišagoha a le Davidoskere čhas le Šalamun pale ačhade kraliske. Pomakhle les vaš o kralis a le Cadok vaš o rašaj. ²³ Avke o Šalamun bešľa pal peskero dad David sar kralis pro tronos, so ačhađa o RAJ. Sas les bach a savore Izraeliti les šunenas. ²⁴ Savore uradnika, slugađa the le Davidoskere aver čhave les šunenas.

²⁵ O RAJ igen hazdňa upre le Šalamun angle savore Izraeliti avke, hoj les diňa ajci slava, so na sas savore aver kralen andro Izrael.

Le Davidoskero meriben

²⁶ O David, le Izajoskero čhavo, kralinelas upral calo Izrael ²⁷ jekhetane saranda (40) berš. Andro Hebron kralinelas ehta berš a andro Jeruzalem tranda the trin (33) berš. ²⁸ Ov sas barvalo, sas les pačiv maškar o manuša a muľa, sar sas igen phuro. Pal leste ačhiľa kralis leskero čhavo o Šalamun.

²⁹ Savore aver veci, so kerda o David akorestar, sar sas kralis, hin pisimen andro zvitki le prorokengere Samuel, Natan the Gad. ³⁰ Ode hin pisimen pal leskero zoralo krališagos the pal oda, so pes ačhiľa leha, le Izraeloha the avre krališagenca.

2. KRONIKENGERO

O Šalamun mangel o godaveripen

1 O Šalamun, le Davidoskero čhavo, imar zorales likerelas o krališagos andro vasta. O RAJ, leskero Del, les igen hazdña upre a sas leha.

² O Šalamun vičinda calo Izrael: le velitelen upral o ezera the upral o šel slugada, le sudcen, savore vodcen andral calo Izrael the le fajtakere vodcen ³ a geľa savorenca pro učo than andro Gibeon. Bo ode sas le Devleskero Sentno Stanos, so kerďa pre pušťa o Mojžiš, o služobňikos le RAJESKERO. ⁴ Ale o David imar diňa le Devleskeri Zmluvakeri Archa te prelídžal andral o Kirjat-Jearim andro Jeruzalem, bo ode prekal late kerďa o stanos. ⁵ O bronzuno oltaris, so kerďa o Becaleel, le Urihoskero čhavo, saveske sas papus o Chur, sas angle RAJESKERO Sentno Stanos paš o Gibeon. Ode o Šalamun the savore manuša lašarenas le RAJES ⁶ a obetinda pro bronzuno oltaris ezeros džvirinen anglo RAJ. O oltaris sas anglo Sentno Stanos.

⁷ Odi rat o Del pes sikaďa le Šalamunoske andro suno a phendā: "Phen, so tut majinav te del!"

⁸ Ov odphendā le Devleske: "Mire dadeske le Davidoske presikaďal baro jileskeriben a ačhaďal man vaš o kralis pal leste. ⁹ RAJEJA, Devla, akana mi ačhel pes oda, so phendal mire dadeske le Davidoske. Tu man thoďal kraliske upral kala manuša, save hine ajci but sar o prachos pre phuv. ¹⁰ Vašoda de man godaveripen the prindžaripen, hoj te džanav, sar te lidžal kale manušen. Bo ko šaj lidžal kada tiro baro narodos?"

¹¹ Pre oda leske o Del odphendā: "Vašoda, hoj kada kames a na manglal tuke o barvalipen, aňi o pokladi, aňi e pačiv, aňi baro dživipen, aňi o meriben tire űeprijatēlengero, ale o godaveripen the prindžaripen, hoj te lidžas mire manušen, upral save tut ačhaďom kraliske, ¹² dava tut o godaveripen the prindžaripen, hoj te lidžas le manušen. Dava tut mek o barvalipen, the pokladi the ajsi pačiv, so na sas le kralen angle tu a na ela aňi olen, save ena pal tu."

¹³ Palis o Šalamun pes visarďa pale andro Jeruzalem pal oda učo than, kaj sas o Sentno Stanos paš o Gibeon a kralinelas andro Izrael.

Le Šalamunoskeri zor the barvalipen

¹⁴ Palis o kralis diňa te anel o maribnaskere verdana the le muršen pro graja. Sas les 1 400 maribnaskere verdana a 12 000 graja, saven likerelas andro Jeruzalem the aver fori. ¹⁵ Sar sas kralis o Šalamun, o rup the o somnakaj andro Jeruzalem sas ajci but sar o bara a

cedroskere kašta sar o dzive figovňiki, so baron pro brehi. ¹⁶ O graja prekal o Šalamun pes anelas andral o Egipt the andral e phuv Kuj, kaj le kraliskere manuša len cinenas vaš ajci, keci monas. ¹⁷ Andral o Egipt cinenas o maribnaskero verdan vaš šov šel (600) rupune a o graj vaš šel the penda (150) rupune. Avke on odarik len anenas the prekal savore Chetitanengere the Aramejike kraľa.

O Šalamun pririchtinel o veci pro Chramos

¹⁸ O Šalamun prikazinda, hoj te ačhaven o Chramos, kaj te lašaren le RAJES, a peske o palacis.

2 Ačhaďa 70 000 muršen, hoj te hordinen o veci the 80 000 muršen, save kerenas le barenca andro verchi, a kidňa avri 3 600 muršen, hoj pre lende te merkinen.

² O Šalamun diňa te phenel le kraliske Chiramoske andral o Tir:

"Bičhav mange o cedroskere kašta, avke sar kerďal mire dadeske le Davidoske, hoj peske te ačhavav o palacis. ³ Bo kamav te ačhavel o Chramos pre pačiv le RAJESKE, mire Devleske. Oda than ela sentno, bo ode pes anglal leste labarela o voňava obeti a furt pes thovena o sentne mare. Anela pes ode o labarde obeti tosara the rači, pro Šabbat, pro inepos le Neve Čhoneskero the pre aver inepi le RAJESKERE, amare Devleskere. Ada pes kerela furt andro Izrael, bo avke o RAJ prikazinda.

⁴ O Chramos, so leske kamav te ačhavel, mušinel te el igen baro, bo amaro Del hino bareder sar savore devla. ⁵ Ko leske šaj ačhavel Chramos? Bo o űebos – he, the o nekučeder űebos – prekal leste hino cikno! Jekh, so šaj kerav hin ada, hoj le Devleske ačhavava Chramos, kaj leske anaha obeti.

⁶ Avke bičhav mange varesave muršes, savo džanel te kerel le somnakaha, rupoha, bronzoha, trasteha, the la fjalova, loľa the purpurova vlnaha, a te randel avri obrazki. Ov kerela e buči andre Judsko the Jeruzalem jekhetane ole manušenca, saven kidňa avri miro dad o David.

⁷ Bičhav mange the andral o Libanon cedroskere, ciprusoskere the algumoskere kašta. Bo džanav, hoj tire sluhi ačhaľon te oprikerel o kašta. Mire sluhi kere-na paš tire murša, ⁸ hoj mange te pririchtinen but kašta, bo o Chramos, so džav te ačhavel, mušinel te el baro the šukar. ⁹ Tire sluhenge, save čhingeren o kašta, bičhavav pro chaben 2 000 toni žužodiv, 2 000 toni

jačmeñis, 400 000 litri mol the 400 000 litri olivovo olejos.”

¹⁰ O kralis Chiram odphenda leske le lileha:

“O RAJ kamel peskere manušen, vašoda tut ačhađa kraliske upral lende. ¹¹ Lašarav le RAJES, le Izraeloskere Devles, savo stvorinda o ñebos the e phuv! Bo diña le kralis David godaver čhas, savo achaloł a džanel sar te ačhavel le RAJESKE o Chramos the peske o palacis.

¹² Bičhavav ke tu le Churam-Abi, savo hino godaver majstros a achaloł la bučake. ¹³ Leskeri daj hiñi andral o Izraeliko kmeños Dan a leskero dad andral o Tir. Ov achaloł te kerel e buči le somnakaha, rupoha, bronzoha, trasteha, bareha, kašteha, le lole, fijałove the belave pochtaneha the sane pochtaneha. Šaj čhingerel avri savoro, so leske pheneha. Mi kerel e buči jekhetane le manušenca, saven kidña avri miro raj o David – tiro dad.

¹⁴ Akana bičhav mire sluhenge o žužođiv (e pšeñica), jačmeñis, olejos the e mol, avke sar phendał. ¹⁵ Amen pale čhingeraha andro Libanon ajci kašta, keci kampela. Ola kašta ena sphandle jekhetane ke peste a bičhavaha len pal o moros tele andre Joppa. Pałis odarik len šaj les andro Jeruzalem.”

¹⁶ O Šalamun zgenda savore cudzincen, save bešen andro Izrael, avke sar anglođa kerdã leskero dad o David. Arakhľa ode 153 600 muršen. ¹⁷ Lendar kidña avri 70 000 muršen, save hordinenas o veci, 80 000 muršen, save krenas le barenca andro verchi, a 3 600 muršen, hoj pre lende te merkinen.

O Chramos chuden te ačhavel

3 O Šalamun chudľa te ačhavel le RAJESKERO Chramos andro Jeruzalem pro verchos Morija, kaj pes sikađa o RAJ leskere dadeske le Davidoske. Oda than o David diña: o humnos, so cinda le Ornanostar, savo sas Jebusejis. ² Chudľa les te ačhavel, sar imar kralinelas štarto berš, dujto čhon the dujto džives.

³ O Chramos, so o Šalamun ačhavelas, sas džindardo bišuefta (27) metri a buchlo eña metri. ⁴ E angluñi veranda sas ajci buchli sar o Chramos a uči eña metri †. Andral sas obthodi le žuže somnakaha. ⁵ O baro than andro Chramos obthoda le cedroskere kašteha, so obcirdľa le somnakaha a pre oda somnakaj šukares kerdã o palmi the lanci. ⁶ O Chramos andral obthoda le dragane barenca a o somnakaj ande andral e phuv Parvajim. ⁷ Le somnakaha obcirdľa o fali, o kašta pro stropos, o prahi, o zarubñi the o vudar a pro fali diña te randel avri le cheruben.

⁸ Pałis kerdã o andruno than, so pes vičinelas o Neksentneder Than. Sas eña metri džindardo the eña metri buchlo a obthoda les biš (20) tonenca somnakaha. ⁹ O somnakune lecegi važinenas buter sar jepaš kilos. The o uprone thana obcirdľa le somnakaha.

¹⁰ Andro Neksentneder Than kerdã duje cheruben a obcirdľa len le somnakaha. ¹¹⁻¹³ Ola cherubi ačhenas le mujeha ko vudar. Dojekhes sas duj bare kridli a dojekh kridlos sas džindardo 2,2 metri. Lengere kridli sas roz-

cirdle avke, hoj o kridlos jekhe cheruboskero pes chudelas jekha falatar a o kridlos le dujtoneskero pes chudelas avra falatar. Peskere dujte kridlenca pes chudenas jekh avrestar maškaral. Lengere rozcirdle kridli sas jekhetane eña metri.

¹⁴ O pochtan andro Chramos anglo Neksentneder Than kerdã le belave, lole the fijałove pochtanestar a diña upre te sivel le cheruben.

O duj bronzune slupi

¹⁵ Anglo Chramos diña te ačhavel duj slupi, so sas jekhetane uče buter sar 15 metri, a pre lengero agor o bronzune kriti, so sas uče 2,2 metri. ¹⁶ O kriti upral o slupi sas šukares obthode le prephandle lancenca. Kerdã the šel (100) granatoskere phaba a thoda len pro lanci. ¹⁷ Ola duj slupi ačhađa anglo Chramos. Oleske pro juhos diña nav Jachin a dujtoneske pro severos Boaz.

O veci andro Chramos

4 O Šalamun mek kerdã le bronzostar o oltaris 9 metri buchlo a 4,4 metri učo ² the igen bari okruhlo nadrža. E nadrža jekhe agorestar ke aver merinda 4,4 metri, sas uči 2,2 metri a lakero obvododos sas 13,2 metri. ³ Upre pašal calo avruno agor sas kerde cikne biki andro duj šori. Pro dojekh 44 centimetri sas deš biki, save sas kerde jekhetane la nadržaha, sar la krenas le bronzostar.

⁴ E nadrža sas thodi pro dešuduj (12) bronzune biki. Trin biki dikhenas pro severos, trin pro zapados, trin pro juhos a trin pro vichodos. E nadrža sas thodi pre lende a lengere buľa sas maškaral. ⁵ La nadržakeri sera sas thuli vaj 7,5 centimetri a lakero agor dičholas avri sar e phundrađi kvitka ľalija. Rešlolas andre vaj 60 000 litri pañi.

⁶ Kerdã the deš nadobi. Pandž thoda pro juhos a pandž pro severos. Andre obthovenas (omorenas) o kotora le džvirinendar, so obetinenas sar labarde obeti. E bari nadrža sas prekal o rašaja, hoj pes andre te obthoven (omoren).

⁷ A kerdã the deš somnakune momelara, ajse sar o Šalamun prikazinda, a thoda len andro Chramos, pandž pro juhos a pandž pro severos.

⁸ Kerdã mek deš skaminda a thoda len andro Chramos: pandž pro juhos a pandž pro severos. Kerdã the šel somnakune čare.

⁹ Diña te ačhavel e andruñi dvora prekal o rašaja the e bari dvora prekal okla manuša. Kerdã o vudara la dvorakere, so obcirdña le bronzoha. ¹⁰ E bari nadrža thoda paš o chramoskero rohos pre juhovichodno sera.

¹¹ O Chiram kerdã the pira, lopati the čare. Avke dokerdã e buči, so kerdã prekal o Šalamun pre le RAJESKERO Chramos:

¹² o duj slupi;

o uprone kriti le bronzostar pro slupi;

o lanci, savenca šukares obthovenas o kriti;

† E Hebrejiko čhib: penda the štar (54) metri

¹³ o štar šel (400) granatoskere phaba le bronzostar, so sas pro duj prekhude (prephandle) lanci;
¹⁴ o deš verdanora le nadobenca;
¹⁵ e igen bari nadržā a tel late dešuduje biken;
¹⁶ o čare, o lopati, o vidli the savore aver veci.

Oda savoro kerda o Chiram le žuže bronzostar le Šalamunoske prekal le RAJESKERO Chramos. ¹⁷ O Šalamun oda diña te kerel andro čhikakere formi maškar o gava Sukkot the Caretan † andre Jordaňiko dolina.
¹⁸ Savore kala veci, so o Šalamun kerda le bronzostar, sas ajci but, hoj o bronzos imar na diña te važinel.

¹⁹ Ov diña te kerel andre le RAJESKERO Chramos the kala veci le žuže somnakastar:

o somnakuno oltaris;
 o skaminda, pre save pes thovelas o sentne mare;
²⁰ o momelara lengere lampenca, hoj te labon anglo Neksentneder Than;
²¹ o kvitki, o lampi, o silava;
²² o čhura, o čare, o kuča the o lopatki;
 o vudara andro Neksentneder Than the andro Chramos sas obcirdle le somnakaha.

5 Sar imar dokerda o Šalamun savore buča pre le RAJESKERO Chramos, ligenda andre o sentne dari peskere dadeskere le Davidoskere. O rup, o somnakaj the savore veci thođa paš o barvalipen andre le Devleskero Chramos.

E Archa pes anel andro Chramos

² Palis o Šalamun zvičinda andro Jeruzalem savoren kmeňoskere the fajtakere vodcen, hoj te prelidžan le RAJESKERI Zmluvakeri Archa andral o Foros le Davidoskero, andral o Sion. ³ Avke pes zgele savore murša andral o Izrael paš o kralis, sar sas o inepos andro eftato čhon.

⁴ Sar sas imar zgele savore Izraelike vodci, o Leviti hazdle upre e Archa ⁵ a lidžanas la andro Chramos. O rašaja the o Leviti lidžanas o Sentno Stanos the savore sentne veci, so sas andro Stanos. ⁶ O kralis Šalamun the savore Izraelike manuša, save pes zgele ke leste angle Archa, dine ajci but bakren the dobitkos, hoj pes aňi na delas te zgenel.

⁷ Palis o rašaja ligende le RAJESKERI Zmluvakeri Archa pre lakero than andro Chramos, andro Neksentneder Than a thode la tel o kridli le cherubengere. ⁸ Lengere kridli sas rozcirdle upral oda than kaj sas thođi e Archa a garuvenas la the lakere družki. ⁹ O družki sas ajse džindarde, hoj lengere agora dičholas andral o Sentno Than, ale avral len na dičholas. Ode hine dži adadžives. ¹⁰ Andre Archa sas ča o duj barune tabli, so ode thođa o Mojžiš akor, sar o RAJ phandla e zmluva le Izraelitencā pro verchos Choreb ††, sar avle avri andral o Egipt.

Le RAJESKERI slava

¹¹ Palis o rašaja gele avri andral o Sentno Than. Savore rašaj, save ode sas, pes obžužarde andre služba,

† Abo: Cereda †† Abo: Sinaj

či sas pre lende o šoros abo na. ¹² Savore Leviti, save gilavenas – o Asaf, Heman the Jedutun lengere čhavenca the pašutnenca – ačhenas pre vichodno sera le oltaristar. Sas urde andro loko pochtan a bašavenas pro cimballi, harfi the citari a šel the biš (120) rašaja trubinenas. ¹³ Ola, save trubinenas the ola, save gilavenas, jekhetane lašarenas le RAJES sar jekh jilo le bašavibnaha the gilavipnaha:

“Ov hino lačho;

leskero kamiben likerel pro furt.”

Andre oda e chmara pherarda calo Chramos le RAJESKERO. ¹⁴ Prekal odi chmara o rašaja naštī kerde peskeri buči, bo le RAJESKERI slava pherarda calo Chramos le Devleskero.

Le Šalamunoskeri modlitba

6 Akor o Šalamun phenda:

“O RAJ phenda,

hoj kamel te bešel andre kaľi chmara.

² Akana ačhadom prekal tu baro the šukar Chramos, o than, kaj šaj bešes pro furt.”

³ Palis o Šalamun pes visarda ke savore Izraeliti, save ode ačhenas a požehňinda len. ⁴ A phenda:

“Mi el lašardo o RAJ, o Del le Izraeloskero, savo dolikerda peskero lav, so diña mire dades le David, sar leske phenda: ⁵ Akorestar, sar ifom avri mire manušen le Izraeliten andral o Egipt, na kidňom mange avri ňisavo foros andre Izraeliko phuv, kaj mange te keren o Chramos, andre savo ulahas lašardo miro nav. Aňi na kidňom mange avri ňisaves vodcas, hoj te el upral mire Izraelike manuša.’ ⁶ Ale akana kidňom mange avri o foros Jeruzalem, hoj te avav ode lašardo. A kidňom mange avri le David, hoj te lidžal mire Izraelike manušen.

⁷ Imar mire dadeske le Davidoske sas andro jilo, hoj te ačhavel o Chramos le RAJESKE, le Izraeloskere Devleske. ⁸ Ale o RAJ phenda mire dadeske: ‘Mištes, hoj kames te ačhavel o Chramos prekal ma. ⁹ Ča oda Chramos na ačhaveha tu, ale tiro čhavo, savo ela tutar. Ov ačhavela o Chramos prekal ma.’

¹⁰ O RAJ dolikerda oda, so phenda. Me ačhilom kralis pal miro dad o David a bešlom pro Izraeliko tronos, avke sar phenda o RAJ. Ačhadom the o Chramos prekal o RAJ, le Izraeloskero Del. ¹¹ Andro Chramos thođom the e Archa, andre savi hiňi e zmluva, savi o RAJ phandla le Izraelitencā.”

Le Šalamunoskeri modlitba

¹² Palis o kralis ačhelas upre anglo le RAJESKERO oltaris the angle savore manuša, save ode sas zgele a hazdňa o vasta. ¹³ No o Šalamun angloda kerda le bronzostar javiskos, so sas džindardo the buchlo 2,2 metri a učo 1,3 metros a thođa les pro maškar pre avruňi dvora. Sar ačhelas pre oda javiskos, bandiľa tele anglo savore Izraeliti a hazdňa o vasta ko ňebos.

¹⁴ Phenda:

“RAJEJA, Devla le Izraeloskero! Nane aver Del, sar sal tu – aňi pro ņebos, aňi pre phuv. Tu dolikeres e zmluva a sal lačhejileskero ke peskere služobňika, save džan pal tu cale jileha. ¹⁵ Tu dolikerďal tiro lav, savo diňal mire dades, le David; tu vakerďal peskere mujeha a kerďal oda peskere vastenca, hoj adadžives dojekh lav imar pes ačhiľa.

¹⁶ Ale akana, ó, RAJEJA, Devla le Izraeloskero, doliker the oda lav, so diňal tire služobňikos le David, mire dades, sar leske phendal: ‘Furt ela vareko tire potomkendar pro tronos le Izraeloskero, te tire čhave mange ena pačivale a merkinena pre oda, hoj te šunen a te dživen pal miro zakonos avke sar tu.’ ¹⁷ Akana mangav tut, ó, RAJEJA, Devla le Izraeloskero, mi ačhel pes avke sar phendal tire služobňikoske, le Davidoske.

¹⁸ Ale šaj o Del čačes bešel pre phuv le manušenca? Se aňi o ņebos – aňi o nekučeder ņebos – nane prekal tut dos baro a na mek kada Chramos, so tuke ačhaďom! ¹⁹ Mangav tut, RAJEJA, Devla miro, šun avri e modlitba tire služobňikoskeri a presikav leske o jileskeriben! Ker avke, sar tutar mangel. ²⁰ Tire jakha mi dikhen rat-džives pre kada Chramos, pal savo phendal, hoj ode ela tiro nav lašardo. Šun avri e modlitba tire služobňikoskeri, te pes visarel pre kada than a modlinel pes ke tu.

²¹ Mangav tut, šun avri o mangipen tire služobňikoskero the le Izraelitengero, akor sar modlínena pes ke tu visarde ke kada than. Šun len avri andral o ņebos, odarik, kaj bešes, a sar len šuneha, odmuk lenge.

²² Te vareko kerela vareso nalačho avreske a mušinel te avel andro Chramos te lel vera angle tiro oltaris, ²³ tu oda šun andral o ņebos a rozsudzín maškar lende. Oles, ko ela vinovato, mar avke, sar peske zasogalinel (zaslužinel). A vaš o čačipnaskero zaačh tut a ker leha pal leskero spravodlišagos.

²⁴ Sar o ņeprijateľa ņerinena (zvitazinena) upral tire Izraelike manuša, bo kerde binos angle tu a te pes visarena pale ke tu a lašarena tiro nav, te pes modlínena a mangena tut andre kada Chramos, ²⁵ šun len avri andral o ņebos, odmuk tire manušenge o bini a an len pale andre phuv, savi diňal lenge the lengere dadenge.

²⁶ Sar phandes o ņebos a zaačhaves o brišind, vašoda, hoj tire manuša kerde binos anglal tu a te pes modlínena ke kada than, lašarena tiro nav a visarena pes le binostar, bo len dukhaďal, ²⁷ šun len avri andral o ņebos a odmuk o bini le Izraelitenge, tire služobňikenge. Sikav len, sar te džal pal tiro drom, a de o brišind andre tiri phuv, savi diňal sar dedictvos tire manušenge.

²⁸ Te ela andre phuv bokh the o nasvaliben, abo te ela pro malí o grajora the o kirme, abo te o ulipen kirňola, abo te o ņeprijateľa džana pre lengere fori, abo te ela chocsavo pharipen vaj o nasvaliben maškar lende, ²⁹ šun avri dojekh modlitba the mangipen – či pes mangela ke tu jekh dženo vaj calo Izraeliko narodos. A te vareko ela andre pharipen the andro dukha a

nacirdela peskere vasta ke kada Chramos, ³⁰ šun les avri andral o ņebos, kaj bešes, a odmuk lenge! Ker sakoneha pal oda, sar dživelas, se tu korkoro džanes o jile savore manušengere. ³¹ Avke pes tutar darana a phirena pal tire droma, medik dživena andre kadi phuv, savi diňal amare dadenge.

³² No, te o cudzincos, savo nane andral o Izrael, avela dural andral aver phuv, bo šunďa, savo baro a zoralo sal, the save bare veci keres, a te modlínela pes ke kada Chramos: ³³ Šun avri leskero mangipen andral o ņebos, kaj bešes, a ker leske avke, sar tutar mangela, hoj savore narodi pre phuv tut te sprindžaren a te daran tutar, avke sar the tire manuša, o Izraeliti. Palís the on džanena, hoj kada Chramos, so ačhaďom, hino prekal tiro nav.

³⁴ Sar džana tire manuša le dromeha, saveha len bičhaveha pro mariben pre peskere ņeprijateľa, a ena visarde ke oda foros, so kidňal avri, the ko Chramos, so ačhaďom pre pačiv tire naveske, hoj pes te modlínen: ³⁵ Šun avri lengere modlitbi the mangipena andral o ņebos a zaačh tut vaš lende.

³⁶ A te tire manuša angle tu kerena binos – bo nane manuš, savo na kerel binos – a tu pre lende aveha choľamen a deha len avri lengere ņeprijateľenge, hoj len te odlígenen sar zaphandlen andre aver phuv, či pašes abo dur; ³⁷ a te andre odi phuv, kaj ena odlígende, peske pridžanena, hoj kerde binos a te pes visarena ke tu a te mangena tut vaš o jileskeriben a phenena: ‘Kerďam binos a sam vinovate, bo kerďam nalačhipen’ ³⁸ a te pes visarena ke tu cale peskere jileha the dušaha andre odi phuv, kaj len odlígende a zaphandle, a te tut mangena, sar ena visarde ke peskeri phuv, so diňal lengere dadenge, the ko foros, so peske kidňa avri, the ko Chramos, so ačhaďom prekal tiro nav: ³⁹ Šun avri lengere modlitbi the mangipena andral o ņebos, kaj bešes, a zaačh tut vaš lenge. A odmuk tire manušenge, save kerde bini angle tu.

⁴⁰ Akana, Devla miro, dikh pre amende a šun e modlitba, so džal ke tu pal kada than.

⁴¹ Akana, RAJEJA, Devla, av te odpočovinel andre kada Chramos, tu the tiri Archa, so sikavel tiri zor. Ó, RAJEJA, Devla, o spaseňje mi el o ruchos tire rašajenge, tire sentne mi radisaľon tire lačhipnastar.

⁴² Ó, RAJEJA, Devla, ma odvisar tut tire pomakhle kralístar! Leper tuke pre tiro jileskeriben, so presikaďal tire služobňikoske le Davidoske!”

O Šalamun sentňarel o Chramos

7 Sar pes o Šalamun preačhiľa te modlinel, avľa e jag andral o ņebos a labarďa o obeti, save sas ode thode a le RAJESKERI slava pherarďa o Chramos. ² O rašaja našti gele andre le RAJESKERO Chramos, bo leskeri slava pherarďa calo Chramos. ³ Sar savore

Izraeliti dikhle e jag andral o ņebos the le RAJESKERI slava, pele le mujeha dži pre phuv, bandonas anglo RAJ, lašarenas les a palikerenas:

“O RAJ hino lačo;

a leskero baro kamiben likerel pro furt.”

⁴ Palis o Šalamun the savore manuša anenas anglo RAJ o obeti. ⁵ O Šalamun diňa pre obeta le RAJESKE 22 000 gurumŕnen the 120 000 bakren. Avke o Šalamun the savore manuša sentňarde o Chramos le Devleskero. ⁶ O rašaja ačhenas pre peskere thana the o Leviti ačhenas le sersamoha, savo diňa te kerel o kralis David prekal o lašariben le RAJESKERO. A kecivar lenge o David prikazinelas, gifavenas: “Leskero jileskeriben the kamiben likerel pro furt.” Sar o rašaja pre aver sera trubinenas, savore Izraeliti ačhenas.

⁷ Akor o Šalamun sentňarda o maškaruno than pre dvora anglo Chramos. Ode anenas o labarde obeti the thule kotora la smiromoskera obetendar, vašoda bo o bronzuno oltaris, so kerdā o Šalamun, sas prekal savore kala obeti cikno.

⁸ Palis o Šalamun the savore Izraeliti oslavinenas o Inepos le Stankengero eŕta džives. Avle ode igen but manuša khatar o Lebo-Chamat pal o severos dži paš o paŕni Egipt pro juhos. ⁹ Sentňarenas eŕta dživesa o oltaris a the o Inepos likerelas eŕta dživesa. Andro ochtoto džives pes savore zgele. ¹⁰ O Šalamun premukla le manušen khere andro bišutrito (23) džives, andro eftato čhon. On džanas khere bare radišagoha vaš savoro lačhipen, savo o RAJ presikada le Davidoske, le Šalamunoske the le Izraelitenge.

O RAJ odphenel le Šalamunoske pre modlitba

¹¹ Sar o Šalamun dokerda le RAJESKERO Chramos, peskero palacis a savoro, so kamla andre te kerel, ¹² sikada pes leske o RAJ rači andro suno a phenda leske:

“Šundom avri tiri modlitba a kidnom mange avri kada Chramos, hoj mange andre te anen o obeti.

¹³ A te phandava o ņebos a zaačhava o brišind; te phenava le grajorenge, hoj te chan o ulipen pal e phuv a te domukava pre mire manuša o nasvalipen ¹⁴ a te akor mire manuša pes pokorinena, mangena pale ke ma a odvisarena pes le binendar, me len šunava avri andral o ņebos. Odmukava lenge o bini a lengeri phuv pale sastarava avri. ¹⁵ Mire jakha ena visarde pre kada Chramos, mire kana ena phundrade a odphenava pre dojekh modlitba, savi avela ke ma pal kada than. ¹⁶ Bo kidnom mange avri kada Chramos a sentňardom les, hoj miro nav andre te lašaren pro furt. Dikhava pre leste, bo miro jilo ela ode furt.

¹⁷ Te phireha angle ma pačivalones, avke sar tiro dad o David a te dolikereha mire zakoni the prikazaŕnja a te kereha savoro, so tuke phendom, ¹⁸ me dolikerava o lav, so phendom tire dadeske le Davidoske: ‘Furt ela vareko andral tiro potomstvos pro Izraeliko tronos.’

¹⁹ Ale te pes mandar odvisarena a na dolikerena mire zakoni the prikazaŕnja, save tumen diňom, a džana te služinel avre devlenge a lašarena len, ²⁰ me

tumen khosava tele pal miri phuv, so tumenge diňom. The kada Chramos, so mange kidnom avri, hoj ode te avav lašardo, odčhivava mandar het a palis ela dojkehe narodoske pro pheras the pro asaben. ²¹ A dojekh, ko odarik predžala, pes čudalinel a phenela: ‘Kada Chramos sas ajso šukar! Soske oda o RAJ kerdā kala phuvake the kale Chramoske?’ ²² Odphenela pes lenge: ‘Bo omukle le RAJES, peskere Devles, savo iŕa avri lengere daden andral o Egipt a chudle te lašarel a te služinel avre devlenge. Vašoda o RAJ pre lende domukla kadi bibach.’”

Aver buči, so kerdā o Šalamun

8 Le Šalamunoske likerelas biš berš, medik na dokerda o Chramos le RAJESKERO the peskero palacis. ² Paloda oprikerda o fori, so leske diňa o Chiram, a bičhada le Izraeliten andre te bešel. ³ Palis o Šalamun geŕa pro mariben andro foros Chamat-Coba a zaiŕa les. ⁴ Ačhada o foros Tadmor pre pušta a andro Chamat savore fori, kaj odthovkerenas o chaben. ⁵ Palis oprikerda o foroskere muri, brani the zavori andro fori Upruno Bet-Choron the Teluno Bet-Choron, ⁶ Baalat the savore fori, kaj odthovkerenas o chaben, the savore fori, kaj likerelas peskere grajen the o verdana. Ačhada savoro, so kamla andro Jeruzalem, Libanon the všadzik andre peskero krališagos.

⁷⁻⁸ O Šalamun ispidňa andre buči savore Kanaančangere potomken, saven o Izraeliti na murdarde, sar zaile lengeri phuv. Sas oda o Chetitana, o Amoreja, o Perizeja, o Chivija the o Jebuseja, save hine dži adadžives lengere otroka. ⁹ Ale le Izraeliten na ispide las andre odi buči, bo on leske služinenas sar slugada, veliteŕa upral e armada, upral o verdana the sar murša pro graja. ¹⁰ Le Šalamun mek sas 250 veliteŕa, save dodikhenas pro robotnika.

¹¹ La Faraonoskera čha o Šalamun odligenda andral o Foros le Davidoskero andro palacis, so prekal late ačhada. Phenda peske: “Miri romni našti bešel andro palacis le Izraelike kraliskero le Davidoskero, bo oda hine sentne thana, kaj sas le RAJESKERI Archa.”

¹² Akor o Šalamun obetinelas le RAJESKE o labarde obeti pro oltaris, so ačhada avri pre dvora anglo Chramos. ¹³ Obetinelas avke, sar o Mojžiš prikazinda: pro Šabbat, pro Inepos le Neve Čhoneskero, the pro trin bare beršeskere inepi – o Inepos pal o Mare Bi o Droždī, o Inepos le Kurkengero the o Inepos le Stankengero. ¹⁴ O Šalamun kerdā avke, sar phenda leskero dad o David. Ačhada andre služba partiji rašajen, hoj te keren e služba andro Chramos the le Leviten, hoj te lidžan o chvali a te pomožinen le rašajenge andre lengeri sakodživeseskeri buči. A mek ačhada the stražniken andro partiji paš dojekh brana, bo avke oda prikazinda le Devleskero služobnikos o David. ¹⁵ On sa dolikerde avke, sar prikazinda o kralis pal o rašaja, Leviti the skladi.

¹⁶ O Šalamun dokerda cali buči pro Chramos ako-restar, sar chudla te kerel o zakladi. Avke le RAJESKERO Chramos sas dokerdo.

¹⁷ Palis o Šalamun geľa andro Ecion-Geber the Elat paš o moroskero brehos, andro Edom. ¹⁸ O Chiram leske bičhaďa lodı, so lıdžanas leskere velıťela the namorňika, save mištes prindžarenas o moros. On jekhetane le Šalamunoskere muršenca gele andro Ofir a ande odarik le Šalamunoske dešupandž (15) toni somnakaj.

E kraľovna andral e Šeba ko Šalamun

9 Sar pes e kraľovna andral e Šeba došundā pal e Šalamunoskeri slava, avľa andro Jeruzalem, bo kamľa lestar te phučel phare veci, hoj les te probalinel (skušinel). Avľa igen but manušenca the le tavenca, pre save anelas voňava oleja, koreňje, but somnakaj the o dragane bara. Sar doavľa ko Šalamun, vakerelas leha pal savoro, so la sas pro jilo. ² O Šalamun lake odphenelas pre savoro, so lestar phučelas. Na sas prekal leste nič ajso pharo, hoj lake te na odphenel. ³ Sar e kraľovna andral e Šeba dikhľa, savo baro goďaveripen le Šalamun hin, savo palacis ačhaďa, ⁴ o chabena pre leskero skamind, sar bešenas pašal leste leskere služobňika, sar pes likerenas leskere sluhi the čašňika, lengero uraviben the o labarde obeti, so o Šalamun anelas andro Chramos, oj pes čudaľinelas a na džanelas, so pre oda te phenel.

⁵ Phendā le Šalamunoske: "Čačipen hin, so šundom andre miri phuv pal tute the pal tiro goďaveripen. ⁶ Ale me oleske na pačavas, medik na avľom a na dikhľom pre mire jakha. No, so me dikhav, oleslar mange na phende aňi jepaš! Tiro goďaveripen hino o keci bareder, sar pal oda šundom. ⁷ Bachtale hine tire murša the tire služobňika, save furt pašal tu keren a šunen tiro goďaveripen. ⁸ Mi el barardo o RAJ, tiro Del, savo peske tut zakamľa avke, hoj tut thoďa pro Izraeliko tronos. Tiro Del kamel o Izrael, a kamel len te likerel pro furt, vašoda tut ačhaďa vaš o kralıs, hoj te likerel leskero zakonos the o spravodľiřagos."

⁹ Palıs diňa le Šalamun buter sar štar toni somnakaj, igen but voňava oleja, koreňja the dragane bara. O Šalamun šoha (ňikda) buter na chudľa ajci voňava oleja the koreňja, keci leske andā e kraľovna andral e Šeba.

¹⁰ O sluhi le Chiramoskere the Šalamunoskere, save anenas andral o Ofir o somnakaj, anenas the igen but algumoskere kařta the dragane bara. ¹¹ Ole kařtendar o Šalamun kerďa o garadiči prekal le RAJESKERO Chramos the peskero palacis a mek diňa te kerel o citari the o harfi prekal o lavutara. Ajso vareso andre Judsko mek na sas.

¹² O Šalamun diňa la kraľovna andral e Šeba savoro so kamelas the mangelas. Diňa la buter dari sar oda, so oj leske andā. Palıs geľa peskere sluhenca pale andre peskeri phuv.

Le Šalamunoskero barvalipen

¹³ Le Šalamunoske anenas sako berř vaj 23 toni somnakaj, ¹⁴ a mek ke oda the o daňe, so počinenas o

manuřa, save bikenkerenas. Savore Izraelike kraľengere guvernara the o kraľa andral e Arabija anenas leske o rup the o somnakaj.

¹⁵ O Šalamun kerďa duj řel (200) řtiti le somnakastar. Pre jekh řtitos leske kampelas vaj eřta kili somnakaj.

¹⁶ Mek kerďa trin řel (300) cikneder řtiti le somnakastar. Pre jekh řtitos leske kampelas vaj trin kili somnakaj. Avke o Šalamun len thoďa andro palacis, so pes vičinelas Libanoňiko Veř.

¹⁷ Palıs o kralıs kerďa igen baro tronos, so sas obthodo la slonovinaha the le řuže somnakaha. ¹⁸ Anglo tronos sas řov garadiči the somnakuno stolkos pro pindre, so sas kerdo jekhetane le tronoha. Pal soduj seri le tronostar, kaj oprinelas o vasta, ačhenas duj ľevi ¹⁹ a pre sako garadičos ačhenas pal o seri duj ľevi – jekhetane sas deřuduj (12). Ajso tronos na sas řikhaj andre řisavo kralıřagos.

²⁰ Savore kuča, andral save pijelas o Šalamun, sas kerde le somnakastar the savore veci andro palacis, so pes vičinelas Libanoňiko Veř, sas kerde le řuže somnakastar. Nič na sas kerdo le rupostar, bo andre oda časos o rup prekal lende na sas dragano. ²¹ Le Šalamun sas but lodı pro moros. Sako trin berř len bičhavelas pro moros le Chiramoskere loďenca, hoj te doanen o somnakaj, o rup, e slonovina, opicen the paven.

²² O Šalamun sas barvaleder the goďaveder sar dojekh aver kralıs pre phuv. ²³ Savore kraľa pal e phuv avenas ke leste te řunel o goďaveripen, so les diňa o Del. ²⁴ Berř pre berřeste, dojekh, ko avelas ke leste, anelas leske daros: rupune the somnakune veci, gada, veci pro mariben, voňava oleja, grajen the mulicen.

²⁵ Le Šalamun sas mařtalňi prekal o 4 000 graja, maribnaskere verdana the 12 000 murřa pro graja. Varesave lendar likerelas ke peste andro Jeruzalem a oklen andre aver fori. ²⁶ Ov kralınelas upral savore kraľa le paňestar Euftrat dži paš le Filiřtinengeri phuv the dži paš e Egiptoskeri hraňica. ²⁷ Sar o Šalamun kralınelas andro Jeruzalem, o rup sas ajci sar o bara a o cedroskere kařta ajci sar o dzive figovňiki, so baron pro brehi. ²⁸ O graja prekal o Šalamun pes anelas andral o Egipt the andral aver phuva.

Le Šalamunoskero meriben

²⁹ Savore aver veci, so kerďa o Šalamun eřebnovarestar (perřovarestar), medik na muľa, hin pisimen andro Zvitkos le Prorokoskero Natanoskero the andro Prorocťvo le Achijoskero andral o řilo, the andro Videňja le Jedoskere, andre savo hin pisimen the pal o kralıs Jeroboam, savo sas le Nebatoskero čhavo. ³⁰ O Šalamun kralınelas andro Jeruzalem upral calo Izrael saranda (40) berř. ³¹ Sar muľa, parunde les andro Foros le Davidoskero. Pal leste ačhıľa kralıs leskero čhavo o Rechabeam.

O Izrael rozdelimen pro duj seri

10 O Rechabeam geľa andro Šichem, bo ode avle savore Izraeliti, hoj les te ačhaven vaš o krališ. ² Sar oda šunda o Jeroboam, le Nebatoskero čhavo, savo sas andro Egipt, kaj denašľa le Šalamunostar, geľa pale khere. ³ Bičhade pal leste, hoj te avel ode. Avke o Jeroboam savore Izraelitenca avle ko Rechabeam a phende leske: ⁴ "Tiro dad o Šalamun pre amende thođa pharo jarmo, ale tu akana ker lokeder e phari buči the o jarmo, so pre amende thođa tiro dad, a služinaha tuke."

⁵ O Rechabeam lenge odphenda: "Džan a aven ke ma pal o trin džives a phenava tumenge." Avke o manuša odgele het.

⁶ Palis o Rechabeam phučerelas le phuredere vodcendar, save služinenas angloda leskere dadeske le Šalamunoske: "So majinav te odphenel le manušenge?"

⁷ On leske odphende: "Te aveha lačho ke kala manuša a kereha lenge avke, sar tutar mangel, on tuke furt služinena pačivalones."

⁸ Ale o Rechabeam na priiľa lengero vakeriben, ale phučelas le terne muršendar, save jekhetane leha baronas a denas les godi. ⁹ Phučľa lendar: "So majinav te phenel le manušenge, save man mangel, hoj lendar te odlav o jarmo, so pre lende thođa miro dad?"

¹⁰ O terne murša leske odphende: "Le manušenge, save ke tu avle a phende, hoj tiro dad pre lende thođa pharo jarmo a kamen, hoj tu lenge oda te keres lokeder, phen kavke: 'Man hin thuleder o cikno anguš, sar mire dades sas o telos. ¹¹ Miro dad pre tumende thođa pharo jarmo, ale me tumenge mek kerava phareder! Miro dad tumen marelas le cikne bičoha, ale me tumen marava le bare bičoha †!'"

¹² O Jeroboam pro trito džives avľa savore manušenca ko Rechabeam, avke sar lenge phenda o krališ: "Aven ke ma pal o trito džives!" ¹³ O krališ lenge zoraes odphenda a na priiľa le phuredere vodcengero lav.

¹⁴ Vakerelas lenca avke, sar leske phende o terne murša: "Miro dad pre tumende thođa pharo jarmo, ale me tumenge kerava mek phareder! Ov tumen marelas le bičoha, ale me pal tumende cirdava tele e cipa!"

¹⁵ Avke o Rechabeam na priačhiľa pre oda, so kamenas o manuša. Kada kerđa o Del, hoj pes avke te ačhel, sar phenda o RAJ le Jeroboamoske prekal o Šilončanos Achijah.

¹⁶ Sar savore Izraeliti dikhle, hoj o Rechabeam len na šunda, phende leske:

"Nane amen nič le Davidoha!

So amen hin le Izajoskere čhaha?

Andre peskere stani, Izrael!

Akana, David, starin tut pal peskero kher!"

Avke savore Izraeliti gele khere ¹⁷ a o Rechabeam kralinelas ča upral o Izraeliti, save bešenas andro Judske fori.

† E Hebrejiko čhib: Me tumen marava le škorpionenca; abo: le korbačenca

¹⁸ Palis o Rechabeam bičhađa ko Izraeliti le Hadoram, savo sas ačhado upral o buča, ale on les murdarde le barenca. Sar pes pal oda došunda o Rechabeam, sigo bešľa pro verdan a denašľa odarik andro Jeruzalem.

¹⁹ Avke pes calo Izrael vzburiŋđa pre le Davidoskeri famelija a likerel oda dži adadžives.

O Šemajah prevakerel ko Rechabeam

11 Sar avľa o Rechabeam andro Jeruzalem, diňa peske te vičinel andro mariben pro Izrael 180 000 avrikidle slugađen andral o kmeňos Juda the Benjamin. Bo kamľa pale te dochuden o krališagos le Rechabeamoske.

² Akor o RAJ prevakerđa ko Šemajah, ko Devleskero murš: ³ "Phen le Rechabeamoske, le Šalamunoskere čhaske, le Judske kraliske, the savore Izraelitenge andre Judsko the Benjamin, ⁴ hoj o RAJ kada phenel: 'Ma džan pro mariben pre peskere phrala. Dojekh pes mi visarel khere, bo me kada kerdom.' " On šunde le RAJESKERO lav a na gele andro mariben pro Jeroboam.

O Rechabeam zorařarel o fori

⁵ O Rechabeam geľa te bešel andro Jeruzalem a andre Judsko ačhađa o fori le zorale murenca: ⁶ o Betlehem, Etam, Tekoa, ⁷ Bet-Cur, Socho, Adullam, ⁸ Gat, Mareša, Zif, ⁹ Adorajim, Lachiš, Azeka, ¹⁰ Cora, Ajalon the o Hebron. Ola sas o fori le zorale murenca andre Judsko the andro Benjamin. ¹¹ Zorařarđa o muri, ačhađa andre ola fori le velitělen a thođa andre o chabena, olejos the mol. ¹² Andre dojekh foros diňa kopiji the štiti a kaleha len igen zorařarđa. Avke le Rechabeamoske ačhile o kmeňi Juda the Benjamin.

O Leviti the o rašaja aven andre Judsko

¹³ Akor o rašaja the savore Leviti andral calo Izrael, pes pridine ke leste. ¹⁴ O Leviti omukle peskere mali the khera a gele andre Judsko the andro Jeruzalem, bo o Jeroboam peskere čhavenca lenge na domukľa te služinel sar le RAJESKERE rašaja. ¹⁵ Avke o Jeroboam peske korkoro ačhađa rašajen, hoj te služinen pro thana, kaj lašarenas le kozen the gurumňoren, so lenge kerđa sar modli. ¹⁶ Ale andral dojekh Izraeliko kmeňos avle pal o Leviti andro Jeruzalem o manuša, save cale peskere jileha rodenas le RAJES, le Izraelike Devles, hoj te anen o obeti peskere dadengere Devleske. ¹⁷ Avke zorařarde o krališagos andre Judsko a trin berš ačhenas paš o Rechabeam, bo kala berša phirenas pal o drom le Davidoskero the Šalamunoskero.

Le Rechabeamoskeri famelija

¹⁸ O Rechabeam peske iľa romňa la Machalata, savake sas dad o Jerimot, le Davidoskero čhavo. Lakeri daj sas e Abihajil, e čhaj le Izajoskere čhaskeri, le Elia-boskeri. ¹⁹ Le Rechabeam sas laha trin čhave: o Jeuš, Šemarijah the o Zaham. ²⁰ Palis peske iľa romňa la Maacha, le Absolonoskera čha. Laha les sas štar čhave:

o Abijah, Attaj, Zizas the o Šelomit. ²¹ Maškar savore peskere romňija the romňija-služki, o Rechabeam nekbuter kamelas la Maacha, le Absolonoskera čha. Sas les dešuocho (18) romňija a šovardeš (60) romňija-služki, savenca les sas bišuocho (28) muršora the šovardeš (60) čhajora.

²² O Rechabeam ačhađa le Abijah, la Maachakere čhas, vaš o vodcas maškar peskere phrala, bo kamla, hoj ov te ačhel kralis. ²³ O Rechabeam kerđa godaha: Thoda peskere čhaven všadzik andre Judsko the Benjaminiko phuv andre zorale fori. Diňa lenge sa, so kempel the but džuvljen.

O Šišak džal pro Jeruzalem

12 Sar o Rechabeam zoraľarđa peskero krališagos a sas zoraleder, omukla jekhetane le Izraelitenca le RAJESKERO zakonos. ² A vašoda, hoj na sas pačivale le RAJESKE zakonoske, o Egiposko kralis Šišak geľa pro mariben pro Jeruzalem andro pandžto berš, sar kralinelas o Rechabeam. ³ Avľa le 1 200 maribneskere verdanenca, 60 000 muršenca pro graja the but slugađenca andral o Egipt, Libija, Sukkot the Kuš. ⁴ Domarđa a zaila o zorale fori andre Judsko a dogeľa dži paš o Jeruzalem.

⁵ Akor avľa o prorokos Šemajah ko Rechabeam the ko Judske vodci, save denašle le Šišakostar andro Jeruzalem. Phendä lenge: "Kavke phenel o RAJ: 'Tumen man omuklan, vašoda the me tumen omuklom a diňom andro vasta le Šišakoske.'"

⁶ Pre oda o kralis the o Izraelike vodci pes pokorinde a phende: "O RAJ hino čačipnaskero."

⁷ Sar o RAJ dikhla, hoj pes pokorinde, prevakerđa ko Šemajah a phendä: "Vašoda, hoj pes pokorinde, na zničinava len, ale len zachraňinava. Miri cholí na mukava pro Jeruzalem prekal o Šišak. ⁸ Ale on ena tel leskeri zor, hoj te siklon a te džanen či hin feder te služinel mange, abo le kralenge andral aver phuva."

⁹ O Egiposko kralis Šišak geľa pro mariben pro Jeruzalem a ila savoro barvalipen andral le RAJESKERO Chramos the palacis. Iľa savoro, the o somnakune štiti, save diňa te kerel o Šalamun. ¹⁰ Palis o Rechabeam pre lenger o than diňa te kerel o štiti le bronzostar a diňa len le velitelenge upral o stražnika paš o palaciskero vudar. ¹¹ Kecivar džalas o kralis andre le RAJESKERO Chramos, o stražnika lenas o štiti a džanas leha, a palis len thovenas andro kher le stražnikengero. ¹² Vašoda, hoj o Rechabeam pes pokorinda, o RAJ preačhila pre leste te el cholamen a na zničinda les calkom. A sas len pale bach andre Judsko.

Sar o Rechabeam kralinelas

¹³ O kralis Rechabeam ačhila zoralo kralis andro Jeruzalem. Sas leske saranda the jekh (41) berš sar ačhila kralis a kralinelas dešuefta (17) berš andro Jeruzalem, andro foros savo peske kidňa avri o RAJ maškar savore Izraelike kmeňi, hoj ode te el lašardo leskero nav. Leskeri daj sas e Naama andral o Ammon.

¹⁴ Ov kerelas o nalačhipen, bo na rodelas le RAJES cale peskere jileha.

¹⁵ Savore veci, so kerđa o Rechabeam ešebnovarestar (peršovarestar), medik na muľa, hine pisimen andre leskero rodokmeňos the andro zvitki, save pisinde o proroka Šemajah the Iddo. Maškar o Rechabeam the Jeroboam sas furt o maribena. ¹⁶ Sar o Rechabeam muľa, parunde les andro Foros le Davidoskero. Pal leste ačhila kralis leskero čhavo, o Abijah.

O Judsko kralis Abijah

13 Sar andro Izrael kralinelas o Jeroboam dešuocho (18.) berš, o Abijah ačhila andre Judsko kralis ² a kralinelas andro Jeruzalem trin berš. Leskeri daj sas e Michaja, le Urieloskeri čhaj andral e Gibeja.

Sar sas o mariben maškar o Abijah the Jeroboam ³ o Abijah džalas pre leste le 400 000 slugađenca, ale o Jeroboam džalas pre leste le 800 000 slugađenca.

⁴ Akor o Abijah ačhila pro verchos Cemarajim andre Efrajimiko phuv a phendä: "Šun man, Jeroboam the calo Izrael! ⁵ Či tumen na džanen, hoj o RAJ, o Del le Izraeloskero, kerđa le Davidoha zmluva, so pes na del the prephagel †, hoj dela les the leskere potomken o krališagos upral o Izrael pro furt? ⁶ Ale o Jeroboam le Nebatoskero čhavo, savo sas slugas le Šalamunoske, pes vzburiňđa pre peskero raj. ⁷ Akor pes pašal leste zgele nalače manuša the zbujňika a ačhade pes pro Rechabeam, pre le Šalamunoskero čhavo. Ov sas mek terno a na sas les godi, hoj te obačhol angle lende.

⁸ Gondolinen tumenge, hoj šaj ňerinen (zvitázin) upral le RAJESKERO krališagos, so hino andro vasta le Davidoskere čhavage? ňerinen, bo san but džene? Bo hin tumenca the o somnakune gurumňora, so tumenge kerđa o Jeroboam sar devlen? ⁹ Či na tradlan avri le RAJESKERE rašajen, le Aronoskere potomken the le Leviten? Či na ačhadan peske le rašajen, avke sar aver narodi? Se dojekh dženo, ko kamel te el rašaj, anel terne bikos the eŧta bakren a avke ačhel rašaj tumare devlence, so nane nič.

¹⁰ Ale amaro Del hino o RAJ, a amen les na omuklam. Amare rašaja, save služinen le RAJESKE, hine le Aronoskere potomki a o Leviti lenca služinen. ¹¹ Sako tosara the rači anen le RAJESKE o labarde the voňava obeti a thoven o mare pro žužo skamind. Sako rat labaren o lampi pro somnakuno momelaris. Amen dolikeras o prikazaňja le RAJESKERE amare Devleskere, ale tumen les omuklan! ¹² Vašoda o Del hino amaro vodcas a sar leskere rašaja trubinena, hoj te den znameňje pro mariben, ov amen lidžala pre tumende! Muršale andral o Izrael, ma džan pes te marel le RAJEHA, savo hino Del tumare dadeskero! Na ela tumen bach!"

¹³ Medik o Abijah vakerelas, o Jeroboam bičhađa jekh partija muršen pre Judsko armada palunestar. Avke on ačhenas anglo Judejci, ale okla murša sas pal lende.

¹⁴ Sar pes o Judejci visarde a dikhle, hoj aven pre lende

† E Hebrejiko čhib: e zmluva le loneskeri

the palunestar, chudle te vičinel pro RAJ, hoj lenge te pomožinel. O rašaja trubinenas pro trubi ¹⁵ a o Judejci chudle te vriskinel maribnaskere hangoha. O Abijah len lidžalas andro mariben a o Del zničinda le Jeroboam the leskera armada angle lende. ¹⁶ Avke o Izraeliti denašle anglo Judejci a o Del len diña andre lengere vasta. ¹⁷ O Abijah the leskere manuša ņerinde (zvitazine) upral lende a le Izraelike muršendar peľa andro mariben jepaš milionos murša. ¹⁸ Akor sas o Izraeliti pokorimen a o Judejci pes imar na daranas, bo pes zmukenas pro RAJ, pre lengere dadengero Del.

¹⁹ O Abijah dureder džalas pal o Jeroboam a zaiľa leskere fori o Betel, Ješanah the Efron lengere gavenca. ²⁰ Avke le Jeroboam imar šoha (ňikda) na sas e zor, so les sas, medik kralinelas o Abijah. Palis les o RAJ avke dukhada, hoj muľa.

²¹ Ale le Abijoskeri zor sas furt bareder. Iľa peske dešuštar (14) romňijen, savenca les sas bišuduj (22) muršora a dešušov (16) čhajora.

²² Savore aver veci, so o Abijah kerđa, the leskero vakeriben, hine pisimen andro zvitkos le prorokoskero Iddoskero. ²³ Sar o Abijah muľa, parunde les andro Foros le Davidoskero. Pal leste ačhiľa kralis leskero čhavo, o Asa. Sar ov kralinelas, sas deš berš smirom andre phuv.

O Judsko kralis Asa

14 O Asa kerelas oda, so sas le RAJESKE, leskere Devleske, pre dzeka. ² Zničinda o oltara the o thana pro lašariben le modlengere, phagerđa o sentne slupi a čhingerđa tele la Ašerakere slupi. ³ Le manušenge andral e Judsko prikazinda, hoj te lašaren le RAJES, peskere dadengere Devles, a te dolikeren leskero zakonos the prikazaňja. ⁴ Ov andre cali Judsko phuv zničinda o modlengere thana the o kadidloskere oltara. Medik ov kralinelas, sas smirom andre oda krališagos. ⁵ Andre Judsko o Asa ačhavelas o zorale fori, bo andre odi phuv sas smirom. Andre ola berša ņiko na avľa pre leste pro mariben, bo o RAJ leske diña o smirom.

⁶ Phenda le manušenge andral e Judsko: "Zoraľaras kala fori oleha, hoj ačhavaha pašal lende o muri, o veži, brani the zavori. Kadi phuv hiňi furt amari, bo kerahas oda, so amendar kamelas o RAJ amaro Del. Rodahas le RAJES a diña amenge o smirom pal dojekh sera." Avke ačhavenas o fori a sas len bach.

⁷ Le Asa sas le kmeňostar Juda 300 000 murša, savende sas o kopiji the bare štiti, a le Benjaminendar les sas 280 000 murša, savende sas o cikneder štiti the luki. Kala savore sas zorale maribnaskere murša.

⁸ O Zerach andral o Kuš geľa pre lende pro mariben la milionoskera armadaha le kmeňostar Juda the trin šel (300) maribnaskere verdanenca a dogeľa dži paš e Mareša. ⁹ O Asa džalas pre leste peskere muršenca a pririchtinde pes pro mariben andre dolina Cefata paš e Mareša.

¹⁰ O Asa mangelas le RAJES, peskere Devles: "RAJEJA, ča tu jekh šaj pomožines le slabenge andro mariben

pro zorale. Pomožin amenge, RAJEJA, Devla amaro, bo pre tute pes zmukas. Andre tiro nav amen džas pre kadi bari armada. RAJEJA, tu sal amaro Del a ņiko angle tu na obačhola."

¹¹ Avke o RAJ pomožinda le Asaoske the leskera armadake te ņerinel (zvitazine) upral o Kušijci. On chudle odarik te denašel ¹² a o Asa pal lende džalas peskera armadaha dži ko Gerar. Ode o RAJ peskera armadaha murdarde ajci Kušijcen, hoj ča vajkeci lendar ačhile džide. A odligende odarik igen but veci. ¹³ On palis lokes domarde the savore gava pašal o foros Gerar vašoda, bo avľa pre kale manuša bari dar le RAJES-TAR. A odligende odarik savore lačhe veci, save ča kamenas. ¹⁴ Džanas the pre le pastjerengere tabora a odligende odarik igen but bakren the řaven. Avke gele pale andro Jeruzalem.

O Asa zničinel o modli andre Judsko

15 Akor le Devleskero duchos avľa pro Azarjah, pro Odedoskero čhavo. ² Ov geľa anglo kralis Asa a phenda leske: "Šunen man, Asa the savore manuša andral e Judsko the Benjamin! O RAJ ela tumenca, te tumen avena leha. Te les rodena, dela pes tumenge te arakhel. Ale te pes lestar odvisarena, the ov pes tumendar odvisarela. ³ But časos sas o Izrael bijal o čačo Del the bijal o rašaj, savo sikavel o zakonos. ⁴ Ale sar pes andre peskero pharipen visarenas ko RAJ, ko Del, a mangenas les, delas pes lenge te arakhel. ⁵ Andre ola dživesa sas bari dar te džal varekaj pal o Izrael, bo maškar o manuša andre odi phuv na sas o smirom. ⁶ O narodos džalas pre aver narodos a o foros pre aver foros, bo o Del pre lende domukľa dar the pharipen. ⁷ Ale tumen aven zorale a na preačhen te kerel e buči, bo chudena o počiňiben."

⁸ Kala prorocke lava, so vakerelas o Azarjah, zoraľarde le Asa. Ov zničinda o modli andre cali Judsko the Benjamin the andro Efrajimike brehengere fori, so zaiľa. Palis oprikerđa the le RAJESKERO oltaris, so sas andre chamoskeri dvora.

⁹ Palis o Asa vičinda savore manušen andral e Judsko, Benjamin the le manušen andral o Efrajim, Menašše the Šimeon, save ode gele te bešel. Bo but Izraeliti imar pregele ko Asa, sar dikhle, hoj leha hino o RAJ, leskero Del.

¹⁰ Savore pes zgele andro Jeruzalem, sar o Asa kralinelas dešupandž (15) berš a trin čhon. ¹¹ Oda džives obetinde le RAJESKE olestar, so pal o mariben ande andral o Gerar: efa šel (700) gurunňen the efa ezera (7 000) bakren. ¹² On ile vera, hoj lašarena le RAJES le dadengere Devles cale peskere jileha the dušaha. ¹³ Dojekh, ko na lašarela le RAJES, le Izraelike Devles, mušinela te merel, či ela terno vaj phuro, či murš, vaj romňi. ¹⁴ Ile odi vera anglo RAJ a palis radisaľonas zorale hangoha, a trubinenas pro trubi the rohi. ¹⁵ Savore manuša andre Judsko sas andro baro radišagos, bo odi vera ile cale peskere jileha. Rodenas le RAJES a ov pes lenge delas te arakhel. Avke o RAJ len diña smirom savore lengere ņeprijateľendar.

¹⁶ O Asa čhida tele pal o tronos peskera baba, la kralovna Maacha, bo kerda slupos la modlake Ašera. Palis oda slupos čhinda tele, phagerda a labarda andre dolina Kidron. ¹⁷ Choc o thana andro Izrael, kaj pes lašarenas o modli, na sas zničimen, o Asa cale jileha služinelas le Devleske medik dživelas. ¹⁸ Ov anda andre le RAJESKERO Chramos o sentne dari, so diña ov the leskero dad: o rup, somnakaj the savore aver veci.

¹⁹ Avke na sas ode o mariben, dži andro tranda the pandžto berš (35) sar kralinelas o Asa.

O kralis Baaša džal pro Asa

16 Sar andre Judsko kralinelas o Asa tranda the šov (36) berš, o Izraeliko kralis Baaša geľa pro mariben pre Judsko. O foros Rama zoraľarda a thođa ode le slugađen, hoj ňiko andral e Judsko pes te na dochudel aňi avri, aňi andre.

² O Asa iľa savoro rup the somnakaj andral le RAJESKERO Chramos the palacis a bičhađa oda peskere služobņikenca andro Damaskus ko kralis Ben-Hadad. Diña leske te phenel: ³ "Mi el maškar amende e zmluva, avke sar angloda sas maškar amare dada. Kada rup the somnakaj tuke bičhavav sar daros. Mangav tut, akana oddža la zmluvatar, so phandľal le Izraelike kraliħa le Baašaha, hoj te oddžal het andral miri phuv peskere slugađenca!"

⁴ O Ben-Hadad kerda avke, sar leske phenda o Asa a bičhađa peskere velitělen la armadaha pro Izraelike fori. On domarde o fori Ijon, Dan, Abel-Majim the savore fori le Naftaliskere, kaj sas odthodo o chaben.

⁵ Sar pal oda šunđa o Baaša, preačhiľa te kerel o buča pro foros Rama. ⁶ Avke o kralis Asa prikazinda savore manušenge andre Judsko, hoj te odligenen andral e Rama o bara the o kašta, savenca o Baaša ačhavelas o foros. Palis o Asa oleha zoraľarda o fori Geba the Micpa.

O prorokos dovakerel le kraliske

⁷ Akor avľa ko Asa o prorokos Chanani a phenda leske: "Vašoda, hoj tut zmkľal pro Aramejiko kralis a na pro RAJ, našti ňerines (zvitazines) upral e armada le Aramejike kraliskeri. ⁸ Či bisterďal, savi bari armada sas le Kušijcen the le Libijčanen a keci len sas maribnaskere verdana the murša pro graja? Ale tu pes zmkľal pro RAJ, a vašoda len tuke diña andro vasta. ⁹ Bo o jakha le RAJESKERE predikhen cali phuv, hoj te zoraľarel olen, save hine leske oddine cale jileha. Na kerďal goďaha, vašoda akanastar aveha furt andro mariben."

¹⁰ Vaš kala lava o Asa pro prorokos cholisaliľa a thođa les andre bertena. Akorestar o Asa trapinelas varesave peskere manušen.

O Asa merel

¹¹ Savore aver veci, so kerda o kralis Asa ešebnovarestar (peršovarestar), medik na muľa, hin pisimen andro Zvitkos le Judske the Izraelike Kralengero. ¹² Sar

o Asa kralinelas tranda the eňa (39) berš, igen navaliľa pro pindre. Ale aňi akor pes na visarda ko RAJ, hoj leske te pomožinel, ale ko doktora. ¹³⁻¹⁴ O Asa muľa, sar kralinelas saranda the jekh (41) berš a parunde les paš leskere phure dada andro hrobos, savo peske diña te kerel andro Foros le Davidoskero. Pre leskero těelos thode but voňava oleja a labarde bari jag pre leskeri pačiv.

O Judsko kralis Jošafat

17 Pal o Asa ačhiľa kralis leskero čhavo, o Jošafat. Ov zoraľarda peskero krališagos anglo Izrael.

² Andre savore zorale Judske fori diña slugađen. Rozačhađa partiji slugađen the pre aver thana andre Judsko the andro Efrajimike fori, save domarda leskero dad o Asa.

³ O RAJ sas le Jošafatoħa, bo andre peskere ešebne (perše) berša kerelas avke, sar leskero prapapus David. Na lašarelas le Baal, ⁴ ale služinelas peskere dadeskere Devleske, dolikerelas leskere prikazaňja a na kerelas sar o Izraelike kraľa anglal leste. ⁵ Vašoda o RAJ zoraľarda leskero krališagos a savore manuša andral e Judsko leske anenas dari. Avke ačhiľa barvalo the slavno. ⁶ Ov sas pačivalo andre služba le RAJESKE a zničinda andre Judsko savore modlengere thana pro lašariben the la Ašerakere slupi.

⁷ Andro trito berš sar kralinelas, bičhađa kale uradņiken andro Judske fori, hoj te sikaven le manušen le RAJESKERO zakonos: le Ben-Chajil, Obadiah, Zecharijah, Netaneel the le Michajah. ⁸ Lenca sas the o Leviti Šemajah, Netanijah, Zebadijah, Asahel, Šemiramot, Jonatan, Adonijah, Tobijah, Tob-Adonijah the o rašaja Elišamas the Joram. ⁹ Ile peħa le RAJESKERO zakonos a sikavenas le manušen andre savore Judske fori.

¹⁰ Pro narodi, save sas pašal e Judsko, avľa bari dar le RAJESTAR, avke ňiko lendar na džalas pro mariben pro Jošafat. ¹¹ A varesave Filištinci anenas le Jošafatoske dari the počinenas leske daň. O Arabi leske anenas eřta ezera the eřta šel (7 700) capen the bakren.

¹² O Jošafat sas furt zoraleder. Andre Judsko ačhađa zorale fori the o fori le skladenca, ¹³ kaj odthovenas but chaben. Likerelas andro Jeruzalem le nekfeder slugađen, ¹⁴ save sas rozulade (rozdelimen) andro partiji pal peskere fajti.

Andre Judsko o velitěľa upral o ezeros sas:

o Adnah le 300 000 zorale slugađenca,

¹⁵ dujto o Jochanan le 280 000 slugađenca

¹⁶ a trito o Amasiah le Zichriskero čhavo, savo korkoro pestar geľa andre služba le RAJESKERI, le 200 000 slugađenca.

¹⁷ Andral o Benjamin:

o Eljadas, o zoralo slugaďis, le 200 000 slugađenca le lukenca the šřitenca

¹⁸ a dujto o Jehozabad le 180 000 vizbrojimen slugađenca.

¹⁹ Kala murša služinenas le kraliske andro Jeruzalem a avre slugaden rozačhada andre zorale fori pal cali Judsko phuv.

O Michah dovakerel le Achaboske

18 Le kralis Jošafat andral e Judsko sas igen baro barvalipen the slava. Leskero čhavo iľa romňake le Achaboskera čha, vašoda o kraľa ačhile jekhetane. ² Pal varesave berša geľa ko Achab andre Samarija. O Achab prekal o Jošafat the leskere manuša murdarda but bakren the gurunen. A paš oda les kerelas upre pro mariben pro Ramot-Gilead. ³ Avke o Izraeliko kralis Achab phučľa le Jošafatostar: "Aveha manca pro mariben pro Ramot-Gilead?"

O Jošafat leske odphenda: "Me the mire murša sam jekhetane tuha a džaha tumenca andro mariben." ⁴ Ale o Jošafat phenda le Achaboske: "Phuč ešeb (peršo) so phenel pre oda o RAJ."

⁵ Avke o Achab zvičinda ajse štar šel (400) proroken a sar sas jekhetane, phučľa lendar: "Majinav te džal pro mariben pro Ramot-Gilead, abo na?"

"Dža!" odphende leske. "O RAJ oda dela le kraliske andro vasta!"

⁶ Ale o Jošafat pes phučľa: "Nane ade mek varesavo aver prorokos le RAJESKERO, hoj lestar te phučas?"

⁷ O Achab odphenda: "Hin ade mek o Michah, le Jimloskero čhavo, prekal savo pes šaj phučas le RAJESTAR, ale me les našti avri ačhav, bo mange nič lačo na prorokinel, ale furt ča nalačo."

"Ma vaker avke, kralina!" phenda o Jošafat.

⁸ Avke o Achab vičinda jekhe uradnikos a phenda leske: "An sigo le Jimloskere čhas Michah!"

⁹ O Achab the o Jošafat bešenas pre peskere troni paš e brana anglo foros Samarija pre oda than, kaj žužarenas o điv. Sas pre lende urde o kralengere plašti a ola proroka anglal lende prorokinenas. ¹⁰ O Cidkijah, le Kenaaniskero čhavo, kerđa trastune rohi a vičinelas: "Avke phenel o RAJ: 'Kale rohenca predemeha le Aramejčanen, medik len na murdareha avri.' "

¹¹ Savore proroka kavke prorokinenas: "Dža pro Ramot-Gilead a ela tumen bach! Bo o RAJ oda dela andro vasta le kraliske."

¹² O uradnikos, savo geľa pal o Michah, phenda leske: "Dikh, savore proroka prorokinenas le kraliske bach. Mi en tire lava ajse sar lengere. The tu prorokin bach!"

¹³ Ale o Michah leske phenda: "Avke sar dživel o RAJ, me vakerava ča oda, so phenela miro Del."

¹⁴ Sar o Michah avľa ko Achab, phučľa lestar: "Majinav te džal pro Ramot-Gilead, abo na?"

"Džan a ňerinena (zvitazinena)," phenda leske, "o RAJ oda dela andre tumare vasta!"

¹⁵ Ale o kralis leske phenda: "Kecivar tut te lel andre vera, hoj mange te vakeres ča o čačipen andre le RAJESKERO nav?"

¹⁶ O Michah phenda: "Dikhľom calo Izrael rozčhido pal o verchi sar bakren, saven nane pastjeris. A o RAJ

phenda: 'Kale manušen nane ko te lidžal. Dojekh andro smirom mi džal khere.' "

¹⁷ Akor phenda o Achab le Jošafatoske: "Na phendom tuke, hoj mange nič lačo na prorokinel, ale ča nalačo?"

¹⁸ O Michah mek phenda: "Šunen akana o lav le RAJESKERO! Dikhľom le RAJES te bešel andro ňebos pre leskero tronos a savore aňjelen te ačhel pašal leste.

¹⁹ O RAJ lendar phučľa: 'Ko kerela upre le Izraelike kralis Achab, hoj te džal pro mariben andro Ramot-Gilead, hoj ode te merel?' Jekh phenelas kavke a dujto avke. ²⁰ Androda avľa varesavo duchos anglo RAJ a phenda: 'Me leha thovava avri!' A o RAJ lestar phučľa: 'Sar?' ²¹ Avke oda duchos phenda: 'Me kerava, hoj o proroka le Achaboske te klaminen.' O RAJ phenda: 'Dža a ker ada. Ela tut bach!' ²² Akana pes avke the ačhiľa! O RAJ kerđa, hoj o duchos len te lidžal andro klamišagos, a korkoro pre tu mukľa e bibach!"

²³ Androda o Cidkijah, le Kenaaniskero čhavo, geľa ko Michah, demađa les pal e čham a phenda: "Sar geľa mandar oda duchos le RAJESKERO, hoj te vakerele tuha?"

²⁴ O Michah odphenda: "Tu oda korkoro dikheha andre oda džives, sar denašeha tut te garuvel kher kherestar."

²⁵ Akor o Achab prikazinda: "Chuden le Michah a lidžan les ko foroskero velitelis Amon the ko kraliskero čhavo Joaš. ²⁶ Phenen, hoj o kralis kavke prikazinel: 'Thoven les andre bertena a den les te chal ča maro the paňi, medik man na avava pale bachtales.' "

²⁷ Ale o Michah phenda: "Te pes bachtales visareha, akor o RAJ na vakerele prekal ma. Mi šunen oda savore manuša!"

Le Achaboskero meriben

²⁸ O Izraeliko kralis Achab the o Judsko kralis Jošafat džanas pro mariben pro Ramot-Gilead. ²⁹ A o Achab phenda le Jošafatoske: "Me man preurava andre aver gada sar džava andro mariben, ale tu pre tu muk tiro kraliskero plaštös." Avke o Achab pes preurđa andre aver gada a geľa andro mariben.

³⁰ O kralis andral o Aram prikazinda peskere velitelenge upral o maribnaskere verdana: "Te na džal tumenge pal ňikaste, ča pal o Izraeliko kralis." ³¹ Sar o velitelja dikhle le Jošafat, gondolinde peske, hoj oda hino o Izraeliko kralis a gele pre leste. Akor o Jošafat zvičinda a o Del leske pomožinda a visarda len lestar. ³² Sar o velitelja pre oda avle, hoj oda nane o Achab, preačhile pre leste te džal.

³³ Ale varesavo slugadis ča avke livinda andral o lukos a talinda (trafinda) les maškar o pancjeris. Avke o Achab phenda le manušeske savo lidžalas leskero verdan: "Visar tut a odligen man andral o mariben, bo som zraňimen." ³⁴ Ale oda džives o mariben sas zoralo, avke o Achab mušinda te ačhel dži rači andro verdan anglo Aramejčana a sar zageľa o kham ov muľa.

O prorokos dovakerel le Jošafatoske

19 Sar o Judsko kralis Jošafat avla pale khere andro Jeruzalem bachtales, ² avla o prorokos Jehu, le Chananiskero čhavo, arakhla pes leha a phenda leske: "Gondofines tuke, hoj hin mištes te pomožinel le bi-jedevleskere manuŝenge a te sikavel o jileskeriben olenge, ko džan pro RAJ? Vašoda hin pre tute le RAJESKERI cholí. ³ Ale o RAJ paš tu arakhla the vareso lačho: Tu zničindal savore Ašerakere modlengere slupi andral odi phuv a kamehas te kerel oda, so hin le Devleske pre dzeka."

O Jošafat ačhavel sudcen

⁴ Choc o Jošafat bešelas andro Jeruzalem, pale geľa ko manuša la Beer-Šebatar dži paš o Efrajimike brehi, hoj te vakerele le manušenca, hoj pes pale te visaren ko RAJ, savo hino Del lengere phure dadengero. ⁵ Andre dojekh zoralo foros andre Judsko phuv ačhađa sudcen. ⁶ Phenda le sudcenge: "Merkinen pre oda so kerena, bo na sudzinen andre manušeskero nav, ale andro RAJESKERO nav. Ov hino tumenca paš dojekh sudos, sar sudzinen varekas. ⁷ Vašoda keren peskeri buči pačivalones a mi el tumen dar anglo RAJ, bo o RAJ amaro Del hino čačipnaskero, na kidel peske avri manušen, aňi na del pes te cinel."

⁸ Palis o Jošafat the andro Jeruzalem ačhađa Leviten, rašajen the anglune muršen sar sudcen, hoj te sudzinen le manušen te len hin vareso maškar peste, abo te vareko na dolikerel le RAJESKERO zakonos. ⁹ Palis o Jošafat lenge prikazinda: "Keren oda pačivalones, cale jileha a mi el tumen dar anglo RAJ. ¹⁰ A sar avena angle tumende o manuša andral aver fori, hoj len te roz-sudzinen – či džala pal oda, hoj vareko varekas murdarda, abo hoj vareko na dolikerda o zakonos, o prikazaňja abo le RAJESKERE lava – mušinen lenge te dovakerel, sar pes majinen te likerel, hoj te na keren binos anglo RAJ, hoj le RAJESKERI cholí te na avel pre tumende the pre tumare pašutne. Keren oda a na ela tumen binos.

¹¹ O Amariah, o nekbareder rašaj, rozsudzinel a savore RAJESKERE veci. O Zebadijah, le Jišmaeloskero čhavo, savo hino vodcas upral o kmeňos Juda, rozsudzinel a savore krafiskere veci a o Leviti ena o uradňika paš o sudos. Aven bi e dar a o RAJ mi el oleha, kas hin čačipen."

O mariben le manušenca andral o Edom

20 Pal varesavo časos gele pro mariben pro Jošafat o Moabčana, o Ammončana a lenca varesave Meunci.

² Varesave manuša avle a phende le Jošafatoske: "Igen bari armada avel pre tu andral o Edom pal aver sera le morostar. Hine imar andro Chacecon-Tamar, oda andro En-Gedi." ³ O Jošafat predarandila a mangelas le RAJES, so majinel te kerel. A andre cali Judsko phuv diňa avri o postos. ⁴ Palis pes zgele andro Jeruza-

lem o manuša andral dojekh Judsko foros a mangelas le RAJES, hoj lenge te pomožinel.

⁵ Avke o Jošafat ačhila maškar savore manuša angle nevi dvora andre le RAJESKERO Chramos ⁶ a phenda:

"RAJEJA, Devla amare dadengero, či na sal Del pro űebos a na kralines upral savore narodi the krališagi? Andre tire vasta hin bari zor a űiko na obačhola angle tu. ⁷ Devla amaro, či na tradlal avri anglal tiro Izraeliko narodos le manušen, so bešenas andre kadi phuv? Či na diňal la pro furt le potomkenge le Abrahamoskere, savo sas tiro prijatelís? ⁸ Ade bešenas a ačhade tuke o Chramos prekal tiro nav a phende: ⁹ Te avela pre amende varesavo nalačhipen, mariben, nasvaliben či bokh, a te avaha anglal tu angle kada Chramos – kaj tut lašaren – a chudaha te vičinel andre peskero pharipen ke tute, tu amen šuneha avri a zachraňineha."

¹⁰ Ale akana avle ade pre amende o Ammončana, Moabčana the Edomčana. Tu na domuklal amare phure dadenge te zničinel kale naroden, akor sar džanas avri andral o Egipt, avke obgele len a na murdarde. ¹¹ Akana, dikh sar amenge visaren pale! Avle amen te tradel avri andral e phuv, savi amenge tu diňal. ¹² Devla amaro, či tu len na kames te potrestinel? Amen sam bi e zor angle kadi bari armada, savi avel pre amende. Na džanas, so te kerel, ale amare jakha hine hazdle ke tute, bo ča jekh tu amenge šaj pomožines."

¹³ Sar savore Judejci ačhenas anglo RAJ peskere čhavenca, romňenca the le muršorenca, ¹⁴ avla le RAJESKERO Duchos pro Levitas, savo sas maškar o manuša. Ov sas o Jachaziel, le Zecharijoskero čhavo andral le Asafoskeri fajta a potomkos le Asafoskero prekal o Benajah, Jeiel the Mattaniah.

¹⁵ Ov prevakerda: "Šunen man, ó kralina Jošafat, the savore manuša, save bešen andre Judsko the Jeruzalem! Avke tumenge phenel o RAJ: 'Na daran tumen a na izdran kala zoraľa armadatar. Bo kada mariben nane tumaro, ale le Devleskero. ¹⁶ Tajsa džan pre lende, bo on akor avena upre la dolinakere dromeha Cic a arakhena len pro agor la dolinakero, angle pušta Jeruel. ¹⁷ Tumen pes na mušinen te marel, ale rozačhaven pes a ačhen pro than. Avke dikhena sar tumen o RAJ zachraňinela, ó manušale andral e Judsko the Jeruzalem! Ma daran tumen a ma izdran! Tajsa džan pre lende a o RAJ ela tumenca.' "

¹⁸ Avke o Jošafat bandila anglo RAJ le mujeha dži ke phuv a savore manuša andral e Judsko the Jeruzalem pele pre phuv a lašarenas les. ¹⁹ Andre oda varesave Leviti andral o Kohatoskero the Korachoskero potomstvos uštíle upre a zorale hangoha chudle te lašarel le RAJES, le Izraelike Devles.

²⁰ Avke pre aver džives sig tosara uštíle a džanas andre pušta paš e Tekoa. Akor o Jošafat anglal lende za- ačhila a phenda: "Šunen man manušale andral e Judsko the Jeruzalem! Pačan le RAJESKE, amare Devleske, a obačhona! Pačan the le prorokenge a ela amen bach!" ²¹ Sar lenca dovakerda, ačhađa muršen, hoj te džan angle armada a te lašaren le RAJES le lavenca:

“Palikeren le RAJESKE!

Leskero kamiben hino pro furt!”

²² A soča chudle te gilavel a te lašarel le RAJES, o RAJ kerdā bari balamuta (zmetkos) maškar o Ammončana, Moabčana the Edomčana †, save avle pre lende pro mariben. On korkore maškar peste pes chudle te marel. ²³ Avke o Moabčana the o Ammončana gele pre Edomiko armada a murdarde savoren. Palis pes visarde a murdarde jekh avres.

²⁴ Sar e Judsko armada avla pre oda than, khatar dičhol pre pušća, dikhle pre phuv ča mule manušen. Nīko lendar na ačhiła te dživel. ²⁵ O Jošafat peskere muršenca geła ke lende a ile savoro, so pal lende ačhiła. Arakhle paš lende igen but sersamos, dragane veci the gada. Sas ode ajci veci, hoj naštī odarik odligende savoro. Trin dživesa hordinenas oda, so birinenas. ²⁶ Pro štarto džives pes zgele andre dolina Beracha, kaj lašarenas le RAJES. Vašoda oda than pes džī adadžives vičinel le Berachoskeri †† dolina.

²⁷ Palis o Jošafat lidžalas cała armada pale andro Jeruzalem. Sas len baro radišagos, bo o RAJ lenge diña o ņerindīpen (vitāztvo) upral o ņeprijatēla. ²⁸ Sar doavenas andro Jeruzalem, bašavenas pro harfi, citari the trubi, sar phirenas paš o Chramos.

²⁹ Dojekh narodos šunđa, so kerđa o RAJ le Izraelike ņeprijatēliha. Avke e dar le Devlestar avla pre lende.

³⁰ Avke o Jošafat kralinelas andro smirom, bo leskero Del leske diña o smirom pal dojekh sera.

Sar o Jošafat dokraliŋđa

³¹ Le Jošafatoske sas tranda the pandž (35) berš sar ačhiła kralis andre Judsko a kralinelas andro Jeruzalem bišupandž (25) berš. Leskeri daj sas e Azuba, le Šilchioskeri čhaj. ³² Ov kerelas oda, so anglal leste leskero dad o Asa a na odvisardā pes ole dromestar. So kerelas, sas le RAJESKE pre dzeka. ³³ Ale o thana kaj lašarenas le modlen na zničinda a o manuša mek furt lašarenas avre devlen a na peskere dadengere Devles.

³⁴ Savore aver veci, so o Jošafat kerđa, ešebnovarestar (peršovarestar), medik na muła, del pes te genel andre Kronika le Jehuoskeri, savo sas čhavo le Chananiskero. Oda hin pisimen andro Zvitkos le Izraelike Kralengero.

³⁵ Jekhvar o Judsko kralis Jošafat pes dothoda le Izraelike kraliha Achazijoha, savo sas igen nalačo.

³⁶ On jekhetane ačhade o Iodī paš o pristavos Ecjon-Geber. ³⁷ Ale o Eliezer, le Dodavahuoskero čhavo andral e Mareša, prorokinelas le Jošafatoske: “Vašoda, hoj tut dothodal jekhetane le Achazijoha, o RAJ zničinel a oda, so ačhadal!” Avke e balvaj rozdemada o Iodī a šoha (ņikda) lenca na gele pro moros.

O Jehoram kralis andre Judsko

21 Sar o Jošafat muła, parunde les andro Foros le Davidoskero. Pal leste ačhiła kralis andro Judsko leskero čhavo o Jehoram. ² Le Jehoram sas šov phrala:

† O murša andral o verchi Seir. †† Beracha: te lašarel

o Azarijah, Jechiel, Zecharijah, Azarjah, Michael the o Šefatiah. Kala savore sas le Jošafatoskere čhave. ³ O dad len diña igen but rup, somnakaj the barvale veci a Judske fori le zorale murenca. Ale o krališagos diña le Jehoramoske, bo sas ešebno (peršo) čhavo.

⁴ Sar le Jehoramoste sas imar o krališagos zorales andro vasta, diña te murdarel la šablaha savore peskere phralen the varesave Izraelike vodcen. ⁵ Sas leske tranda the duj berš (32), sar ačhiła kralis a kralinelas ochto berš andro Jeruzalem. ⁶ Ov kerelas avke sar le Achaboskeri fajta the o aver Izraelike krala, bo iła romňake le Achaboskera čha. Vašoda kerelas nalačhipen anglo RAJ. ⁷ Ale o RAJ na kamelas te zničinel le Davidoskera fajta, prekal peskero služobňikos David. Bo phandla leha zmluva a diña les lav, hoj mukela furt varekas leskere potomkendar pro tronos.

⁸ Sar o Jehoram kralinelas, o manuša andral o Edom pes vzburinde pre Judsko a korkore peske ačhade kralis. ⁹ Avke o Jehoram geła ode savore peskere velitēfenca the maribnaskere verdanenca. Ode pes pašal leste pal savore seri rozačhade o Edomčana, ale ov le velitēfenca pes rači predemade prekal lende a denašle het. ¹⁰ Ole dživesestar džī adadžives o Judsko na likerelas tel peskeri zor o Edom.

Akor the o foros Libna pes vzburinda, bo o Jehoram omukla le RAJES, peskere dadeskere Devles. ¹¹ Ačhada andre Judsko the o thana, kaj lašarenas le modlen a aleha lidžalas le manušen andral o Jeruzalem the Judsko andro binos.

Le Eliašoskero lil

¹² O Jehoram chudla lil le prorokostar le Eliašostar a sas andre pisimen:

“Avke vakerel o RAJ, o Del tire prapapuskero le Davidoskero: ‘Tu na phirehas pal oda drom, so tiro dad o Jošafat the o Judsko kralis Asa, ¹³ ale phirehas pal ole droma so the o Izraelike krala a lidžahas le manušen andral e Judsko the Jeruzalem, hoj te en napačivale le RAJESKE, avke sar len lidžalas the le Achaboskeri famelija. Tu murdardal the peskere phralen, save sas feder sar tu, ¹⁴ vašoda o RAJ igen dukhavela tire manušen, tire čhaven the romňijen a zničinela sa, so tut hin. ¹⁵ Tu aveha igen nasvalo pre džombra a oda nasvaliben ela furt goreder, medik tutar o goja na avena avri.’”

¹⁶ Palis o RAJ kerdā upre le Filištinen the le Araben, save bešenas pašes paš o Kušijci, hoj te džan pro mariben pro Jehoram. ¹⁷ On gele andre Judsko a ile andral le kraliskero palacis savoro, so ode arakhle: o barvalipen, leskere čhaven the romňijen. A ņiko leske na ačhiła, ča o nekterneder čhavo, o Achazijah.

¹⁸ Pal kada savoro o RAJ mukla pro Joram o nasvaliben pre džombra, so pes na delas te sastarel. ¹⁹ O nasvaliben sas furt goreder a pal o duj berš andral leste avle avri o goja a muła andro bare dukha. O manuša leske na labarde e bari jag pro vartišagos, avke sar leskere phure dadenge.

²⁰ O Jehoram ačhiľa krališ, sar leske sas tranda the duj (32) berš a ochto berš kralinelas andro Jeruzalem. Ňikaske na sas pal leste pharo sar muľa. Parunde les andro Foros le Davidoskero, ale na andre le kralengere hrobi.

O Achazijah krališ andre Judsko

22 O manuša andral o Jeruzalem ačhade pal o Jehoram vaš o krališ leskere nekternedere čhas, le Achazijah. Bo savore leskere phuredere čhaven murdarđa e partija murša, savi jekhetane le Arabenca avľa andro taboris.

² Le Achazijoske sas bišuduj (22) berš, sar ačhiľa krališ a kralinelas andro Jeruzalem jekh berš. Leskeri daj sas e Atalija, savake sas papus o Izraeliko krališ Omri.

³ The ov kerelas avke, sar le Achaboskeri famelija, bo leskeri daj les andre kada lidžalas. ⁴ Kerelas oda, so na sas le RAJESKE pre dzeka, avke sar le Achaboskeri famelija, bo on ačhile leskere radci, sar muľa leskero dad. A oda les thovelas tele. ⁵ Ov len šundā the akor, sar geľa le Achaboskere čhaha le Joramoha – savo sas krališ andro Izrael – pro mariben pro Aramejiko krališ Chazael andro Ramot-Gilead. Ode o Aramejčana zrañinde le Joram, ⁶ avke ov pes pale visarda andro Jezreel, hoj te sastol le ranendar. O Judsko krališ Achazijah geľa te dikhel le Joram andro Jezreel, sar sas zrañimen.

⁷ O Del chasňardā oda, hoj o Joram geľa te dikhel le Achazijah, hoj les te čhivel tele. Bo sar sas ov ke leste, geľa pre lende o Jehu, le Nimšiskero čhavo, saves o RAJ pomakhľa, hoj te zñičinel le Achaboskera famelija.

⁸ Sar o Jehu murdarkerelas le Achaboskera famelija, arakhľa ode le vodcen andral e Judsko the le Achazijoskere phraleskere čhaven, save leske služinenas, a o Jehu the len murdarđa. ⁹ Palis rodenas le Achazijah a chudle les, sar pes garuvelas andre Samarija. Odarik les ande ko Jehu a sas murdardo. Parunde les, bo phende: “Leskero papus sas o Jošafat, savo sas cale jileha pačivalo le RAJESKE.”

Andre le Achazijoskeri famelija na sas ko te prelel o krališagos.

O Joaš hino zachrañimen

¹⁰ Sar dikhľa e Atalija, le Achazijoskeri daj, hoj lakero čhavo hino murdardo, chudľa te murdarkerel caľa kraliskera famelija andro Judsko. ¹¹ Ale jekh čhaj le kraliskeri le Joramoskeri, e Jehošeba, zachrañinda jekhe čhas oleha, hoj les odligenda maškar o kraliskere čhave, saven e Atalija kamľa te murdarel. Bo iľa le Joaš, le Achazijoskere čhavores, the la džuvľa, savi les delas te pijel a garuđa len andro kher pro soviben andro Chramos, hoj les te na murdarel e Atalija. E Jehošeba sas pheň le Achazijoske a lakero rom sas o rašaj Jehojada. ¹² Garuvelas le Joaš andro Chramos šov berš, medik e Atalija kralinelas andro Judsko.

O Jehojada ačhavel le Joaš kraliske

23 Andre eftato berš o rašaj Jehojada diňa te vičinel ke peste le veliteľen upral o šel – le Jerochamoskere čhas le Azarjah, le Jochananoskere čhas le Jišmael, le Obedoskere čhas le Azarjah, le Adajoskere čhas le Maasejah the le Zichriskere čhas le Elišafat – hoj lenca te phandel e zmluva. ² On pophirde pal caľi Judsko phuv a vičinenas le Leviten andral dojekh Judsko foros the savore fajtengere vodcen andro Izrael. Sar avle andro Jeruzalem, ³ savore ola džene pes zgele andro Chramos a phandle zmluva le kraliľa.

O Jehojada lenge phendā: “Kade hino le kraliskero čhavo, o Joaš! Ov ela krališ, avke sar o RAJ le David diňa lav pal leskere potomki. ⁴ Keras avke: Tumen, o rašaja the Leviti, pes rozulavena (rozđelinena) pro trin partiji. Jekh partija le Levitendar the rašajendar mi stražinen pro Šabbat paš o chramoskere vudara, ⁵ dujto partija andro kraliskero palacis a trito partija paš e Zakladoskeri Brana. A savore aver manuša pes mi zdžan andre chramoskeri dvora. ⁶ Ale ņiko andre našti džala, ča o rašaja the o Leviti, save ode služinen. On šaj džan andre, bo hine sentňarde. Savore aver manuša, mi ačhen avri, avke sar o RAJ prikazinda. ⁷ Tumen o Leviti pes rozačhavana le zbrañenca andro vasta pašal o krališ. Te vareko kamľahas pes te dochudel andro Chramos, mi merel. Džan le kraliľa, všadzik kaj džala.”

⁸ O Leviti the savore murša andral e Judsko kerde sa avke, sar lenge prikazinda o Jehojada. Dojekh lelas peskere muršen, či len sas služba pro Šabbat vaj na, bo o Jehojada oda džives ņikas na premukľa andral e služba. ⁹ Palis o Jehojada diňa le veliteľenge o kopiji a cikne the bare štiti andral o Chramos, so sas le Davidoskere. ¹⁰ Ov rozačhada savore muršen le zbrañenca pašal o krališ: Ačhenas pašal o oltaris the Chramos, le juhostar dži ko severos.

¹¹ Akor ande le Joaš avri a thode leske pro šero e koruna. Dine leske e kraliskeri zmluva a ačhade les vaš o krališ. O Jehojada leskere čhavenca les pomakhle a vičinenas anglal leste: “Mi dživel o krališ.”

Murdaren la Atalija

¹² Sar e Atalija šundā e vika le manušengeri, save džanas a radisaľonas le kralistar, geľa the oj ke lende andro Chramos. ¹³ Sar ode doavľa, dikhľa te ačhel le neve krališ paš o slupos, kaj ačhelas furt o krališ. Pašal leste sas o veliteľā o murša le trubenca a savore manuša radisaľonas a trubinenas a o lavutara le citarenca the harfenca lidžanas e oslava. Akor e Atalija rozčhingerđa o gada pre peste a zvičinda: “Zradzinde man! Zradzinde man!”

¹⁴ O rašaj Jehojada phendā le veliteľenge upral o šel: “Lidžan la avri le slugađendar a murdaren dojekhes, ko kamela vaš late te zaačhel!” Bo na kamľa la Atalija te murdarel andre le RAJESKERO Chramos. ¹⁵ On la chudle a džanas laha ke Grajengeri Brana paš o palacis a ode la murdarde.

O Jehojada lidžal pale le manušen paš o RAJ

¹⁶ Palis o Jehojada phandla zmluva anglo RAJ, hoj ov, o Joaš the savore Izraeliti ena le RAJESKERE manuša.

¹⁷ Avke savore manuša gele andre le Baaloskero chramos a čhide les tele. Phagerde o oltara the o modli a murdarde le Mattan, savo sas leskero rašaj, paš o oltaris.

¹⁸ Palis o Jehojada ačhađa le Levitengere rašajen upral o Chramos. Bo len o David ačhađa andre odi služba, hoj te anen o labarde obeti le RAJESKE avke, sar hin pisimen andro Mojžišoskero zakonos, le radišagoha the giľavipnaha, sar prikazinda o David. ¹⁹ A ačhađa paš o chramoskere brani le vratņiken, hoj pes te na dochudel andre űiko, ko hino nažužo.

²⁰ Palis o Jehojada iľa peha le velitelēn upral o űel, le anglune manušen, uradņiken the savore manušen andral odi phuv a odligenda le kralis andral o Chramos prekal e Upruņi Brana andro palacis a thode les te bešel pro tronos. ²¹ Savore manuša andre odi phuv radisaľonas a andro foros sas smirom, bo la Atalija murdarde la šablaha.

O Joaš kralis andre Judsko

24 Le Joašoske sas eřta berš, sar ačhiľa kralis a kralinelas andro Jeruzalem saranda (40) berš. Leskeri daj sas e Cibja andral e Beer-Šeba. ² Medik o rašaj Jehojada dživelas, o Joaš kerelas oda, so sas le RAJESKE pre dzeka. ³ O Jehojada le Joašoske kidņa avri duje romņijen a lenca les sas murša the čhaja.

⁴ Pal varesavo časos o Joaš peske phenda, hoj oprikerela le RAJESKERO Chramos. ⁵ Zvičinda le rašajen the le Leviten a prikazinda lenge: "Džan andre savore Judske fori a kiden avri le manušendar e beršeskeri daň, hoj te oprikeras amare Devleskero Chramos. Keren oda sigo!" Ale o Leviti aleha na sidarenas.

⁶ Avke o kralis Joaš peske diňa te vičinel le anglune rašas, le Jehojada, a phučľa lestar: "Soske na bičhaďal le Leviten, hoj te anen le manušendar andral e Judsko the Jeruzalem e beršeskeri daň prekal o Sentno Stanos, avke sar o Mojžiš le RAJESKERO služobņikos diňa avri le Izraelitenge? ⁷ Se e bijedevleskeri džuvľi Atalija the lakere čhave gele andro Devleskero Chramos, phagerenas a ile savore sentne veci, hoj lenca te lašaren le Baal."

⁸ Avke o kralis prikazinda le Levitenge, hoj te keren bari truhlica a te thoven la avri paš e chramoskeri brana. ⁹ Palis diňa te phenel le manušenge andre cali Judsko the Jeruzalem, hoj te anen le RAJESKE o daňe, avke sar o Mojžiš, le Devleskero služobņikos, oda diňa avri le Izraelitenge pre pušta. ¹⁰ Savore velitelēla the manuša radišagoha anenas o love a čhivkerenas andre truhlica, medik na sas pherardi. ¹¹ Sako džives o Leviti lidžanas e truhlica ko kraliskero uradņikos. Te dikhelas, hoj hin andre but love, avelas o kraliskero pisaris the o uradņikos le nekbaredere rašaskero, čhivenas o love avri a zgenenas len. Palis la thovenas pale pre lakero

than. Kerenas oda sako džives a kidle avri igen but love.

¹² Palis o kralis the o Jehojada ola love denas le muršeske, savo sas ačhado upral e buči. O Chramos oprikerenas o manuša, save džanenas te kerel le barenca, o řesara the o kovača, save kerenas le trasteha the le bronzoha. ¹³ Mukle pes te prikerel o Chramos a e buči lenge džalas igen mištes. Oprikerde a zoraľarde o Chramos a sas ajšo sar angloda. ¹⁴ Sar dokerde e buči, o love so ačhile ande anglo kralis the Jehojada. A o Joaš vaš ola love diňa te kerel veci andro Chramos: o sersamos pre služba the pro obeti, o čare the aver somnakune a rupune veci. A medik o Jehojada dživelas, furt kerenas o labarde obeti andro Chramos.

¹⁵ O Jehojada sphuriľa a muľa, sar leske sas 130 berš. ¹⁶ Parunde les andro kraliskero hrobos andro Foros le Davidoskero, bo kerđa but lačhipen prekal o Izrael, prekal o Del the prekal leskero Chramos.

O Joaš pes odvisarel le RAJESTAR

¹⁷ Pal oda sar muľa o Jehojada, o Judske vodci avle a dine pačiv le kralis. A priačhiľa pre lengere lava. ¹⁸ On palis preačhile te lašarel andro Chramos le RAJESKERO, peskere dadengere Devles, a chudle te lašarel la Ašerakere slupi the modli. Vaš kala bini avľa le Devleskeri choľi pre Judsko the Jeruzalem. ¹⁹ O RAJ bičhavelas ke lende le proroken, hoj pes pale te visaren ke leste. Ale on len na šunenas, choc lenge dovakerenas.

²⁰ Akor avľa le Devleskero Duchos pre le Jehojadoskero čhavo Zecharijah. Ov ačhiľa anglo manuša a dovakerelas lenge: "Kavke vakerel o Del: 'Soske na dolikeren le RAJESKERE prikazaňje? Na ela tumen bach, bo omukľan man a vašoda the me tumen omukava.'"

²¹ Akor o manuša pes dothode pro Zecharijah a pre kraliskero lav les murdarde le barenca pre dvora paš o Chramos. ²² O Joaš bisterđa pro lačhipen, so leske kerelas leskero dad, o Jehojada, a diňa te murdarel leskere čhas. Sar o Zacharijah merelas, zvičinda: "RAJEJA, dikh pre ada a visar lenge pale!"

Le Joaš murdaren

²³ E Aramejiko armada geľa pro Joaš andre Judsko the Jeruzalem vaj pal o berš. Murdarde savore leskere vodcen, save sas upral o manuša a savore veci the barvalipen, so zaile, bičhade le kraliske andro Damaskus.

²⁴ Choc e Aramejiko armada avľa frima muršenca, o RAJ diňa la Judska armada, choc sas bareder, andre lengere vasta, bo omukle le RAJES, peskere dadengere Devles. Avke o Joaš sas potrestimen. ²⁵ Sar o Aramejiko armada odgeľa, mukle le Joaš igen dukhades. Korkore leskere služobņika pes dothode pre leste, vašoda, hoj diňa te murdarel le Jehojadoskere čhas, a murdarde les pre leskero hados. Sar muľa, parunde les andro Foros le Davidoskero, ale na andre kralengere hrobi.

²⁶ Kala džene pes pre leste dothode: o Zabad o čhavo la Šimeatakeru, savi sas Ammončanka, the o Jehozabad o čhavo la Šimritakeru, savi sas Moabčanka.

²⁷ Andro Viklados pal o Kralengere Zvitki hin pisimen pal le Joašoskere čhave, the oda, so pal leste vakere-nas o proroka, the pal oda, sar oprikerđa o Chramos. Pal leste ačhiľa kralis leskero čhavo o Amacijah.

O Amacijah kralis andre Judsko

25 Le Amacijoske sas bišupandž (25) berš, sar ačhiľa kralis, a kralinelas bišueňa (29) berš andro Jeruzalem. Leskeri daj sas e Joaddan andral o Jeruzalem. ² O Amacijah kerelas oda, so sas le RAJESKE pre dzeka, ale na cale jileha. ³ Sar imar o krališagos sas zorales andre leskere vasta, diňa te murdarel peskere služobňiken, save murdarde leskere dades. ⁴ Ale lengere čhaven na diňa te murdarel, bo o RAJ prikazinda andro Mojžišoskero zakonos: "O dada našti meren vaš o binos, so kerde lengere čhave, aňi o čhave vaš le dadengere, ale dojekh mi merel vaš peskero binos."

O mariben le Edomčanenca

⁵ O Amacijah vičinda savore muršen andral o kmeňos Juda the Benjamin a ačhađa andre lengere fajti velitelēn upral o ezeros the upral o šel slugađa. Palis zgenda 300 000 muršen phureder sar biš (20) berš pririchtimen te džal andro mariben le štitoha the kopijaha. ⁶ Počinda 3,4 toni rup † vaš o 100 000 zorale maribnaskere muršen andral o Izrael, hoj te maren pes vaš leste.

⁷ Ale avľa ke leste jekh murš le Devleskero a phenda: "Kralina, ma le tuha le Izraeliten, bo o RAJ nane ole manušenca andral o Efrajim!" ⁸ Choc te džas šmelones andro mariben, o Del kerela, hoj te prekheles (prehrajines) o mariben le ňeprijateľiľa, bo le Devles hin zor te pomožinel abo te čhivel tele!"

⁹ Pre oda lestar o Amacijah phučľa: "Ale so ela ole rupoha, so počindom vaš lende?"

Le Devleskero murš leske odphenda: "O RAJ tuke šaj del mek buter sar oda."

¹⁰ Avke o Amacijah bičhađa pale khere le muršen, save avle ke leste andral o Efrajim. On igen cholisaliľa pro manuša andral e Judsko a choľaha pes visarde khere.

¹¹ O Amacijah bi e dar džalal peskere muršenca andre Londi Dolina. Ode murdarđa 10 000 Edomčanen ††¹² a zailē the avre 10 000 muršen. Ligende len upre dži pro agor pre skala Sela a odarik len čhivkerenas tele pro skali a sas rozmarde.

¹³ Ale ola murša, saven o Amacijah bičhađa khere, džanas pro Judske fori la Samarijatar dži paš o Bet-Choron. Ode murdarde 3 000 muršen a zailē odarik but veci.

¹⁴ Sar o Amacijah ňerinda (zvitazinda) upral o Edomčana, visaliľa pale andro Jeruzalem. Anda peha le

† E Hebrejiko čhib: šel (100) talenti †† E Hebrejiko čhib: muršen andral o Seir

Edomike devloren a bandolas angle lende the labarelas o kađidlos. ¹⁵ Akor o RAJ igen cholisaliľa pro Amacijah a bičhađa ke leste prorokos, savo leske dovakere-las: "Soske lašares avre narodengere devlen, save našti zachraňinde peskere manušen andral tire vasta?"

¹⁶ Medik o prorokos vakerelas, o Amacijah leske phenda: "So, ačhađam tut, hoj te aves le kraliskero radcas? Preač! So majinav tut te murdarel?"

Avke o prorokos preačhiľa, ale mek phenda: "Džanav, hoj o Del tut zničinel, bo kerdal oda a na šundal mire lava."

O Izrael ňerinel upral e Judsko

¹⁷ Palis o Judsko kralis Amacijah pes dothođa peskere radcenca pro Izrael. Bičhađa le muršen, hoj te phenen le Izraelike kraliske, le Jehoašoske, savo hin o čhavo le Joachazoskero, o čhavo le Jehuoskero: "Av! Mar pes manca!"

¹⁸ Ale o Jehoaš leske odphenda: "Andro Libanoňiko verchos o kandro phenda le zorale cedroske: 'De tira čha mire čhaske romňake.' A ipen akor e dzivo džvirina predžalas a uštarda pro kandro! ¹⁹ Ašares tut a gondoliňes tuke, hoj sal zoralo, bo ňerinda (zvitazinda) upral o Edom. Oslavin tiro ňerindipen, ale ačh khere! Soske rodes o nalačhipen? Se pereha the tu the e Judsko."

²⁰ Ale o Amacijah les na šunda. Kada kerđa o Del, hoj les te del andre le Joašoskere vasta, bo chudle te lašarel le Edomike devlen. ²¹ Avke o Izraeliko kralis Jehoaš geľa pro mariben pro Amacijah paš o Bet-Šemeš andre Judsko. ²² O Izrael ňerinda upral e Judsko a dojekh lengero slugađis denašelas pale khere. ²³ O Jehoaš zaila paš o Bet-Šemeš le Amacijah, le Judske kralis, a odligenda les andro Jeruzalem. A čhida tele o foroskere muri la Efrajimika Branatar dži paš e Rohoskeri Brana, vaj duj šel (200) metri. ²⁴ Iľa odarik savoro rup, somnakaj the dragane veci, so arakhle andre le RAJESKERO Chramos, kaj merkinenas o potomki le Obed-Edomoskere. Iľa the o barvalipen andral o palaciskere pokladni a odligenda le manušen, saven zaila, ole vecenca andre Samarija.

O Amacijah murdardo

²⁵ O Judsko kralis Amacijah, le Joašoskero čhavo, dživelas mek dešupandž (15) berš, sar muľa o Izraeliko kralis Jehoaš, le Joachazoskero čhavo. ²⁶ Savore aver veci, so kerđa o Amacijah, ešebnovarestar (peršovarestar), medik na muľa, hin pisimen andro Zvitkos le Judske the Izraelike Kralengero. ²⁷ Akorestar, sar o Amacijah pes odvisarđa le RAJESTAR, varesave manuša andro Jeruzalem pes pre leste dothode, ale ov denašľa andro Lachiš. Palis pal leste bičhade muršen a ode les murdarde. ²⁸ Avke les odarik preligende pale andro Jeruzalem pro graj a parunde les andro Foros le Davidoskero, paš leskere phure dada.

O Uzziah kralis andre Judsko

26 Avke savore manuša andral e Judsko ile le Uzzi-ah a ačhade les kraliske pal leskero dad Amacijah. Sas leske dešušov (16) berš, sar ačhiła kralis. ²³ Ov andro Jeruzalem kralinelas penda the duj (52) berš. Leskeri daj sas e Jecholija andral o Jeruzalem. Akor, sar leskero dad o Amacijah muła, ov zaiła o foros Elat prekal e Judsko a oprikerđa les. ⁴ Kerelas oda, so sas le RAJESKE pre dzeka, avke sar the leskero dad o Amacijah. ⁵ O Uzziah rodelas le Devles, medik dživelas o Zecharijah, bo ov les sikavelas le Devleskero lav. A medik rodelas le Devles, ov les delas bach andre savoreste.

⁶ O Uzziah geła pale andro mariben pro Filištinci. Čhidža tele o muri le forenge Gat, Jabne the Ašdod. A ačhađa o zorale fori paš o Ašdod the avrether pre Filištinengeri phuv. ⁷ O Del leske pomožinelas andro mariben pro Filištinci, pro Arabi, save bešenlas andro Gur-Baal, the pro Meuniti. ⁸ O Ammončana počinenas le Uzzioske o daňe. A o hiros pal leste pes dochudlja dži paš o Egipt, bo ačhiła igen zoralo.

⁹ Andro Jeruzalem o Uzziah ačhađa o veži pre Rohoskeri Brana, pre Dolinakeri Brana the pro muroskero rohos a zoralardža len. ¹⁰ Ačhađa the o veži pre pušća a kopalinda but chaňiga, bo sas les pro brehi the pre nižina but stadi. Sas les the manuša, save kere-nas buči pre mała the andre viňica, bo kadi buči sas leske igen pre dzeka a e phuv sas lači.

¹¹ Le Uzziah sas bari armada, so sas pririchtimen te džal pro mariben. O pisaris Jeiel the o uradnikos Maasejah len zgenenas the zapisinenas a upral lende sas o Chananiyah, le kraliskero uradnikos. ¹² Upral e armada sas 2 600 fajtakere vodci, savore zorale maribnaskere murša. ¹³ On sas ačhade upral o 307 500 slugađa, save sas avrisikade andro mariben, hoj te maren pes vaš o kralis leskere ňeprijatelena. ¹⁴ O Uzziah diňa le slugađen o štiti, kopiji, pancjeri, luki, prilbi the bara andro praki. ¹⁵ Andro Jeruzalem diňa te kerel le godaver muršenge o maribnaskere stroji, andral save livinkerenas o šipi a čhivkerenas o bare bara. Thoda len pro veži the pro foroskere muri. O hiros pal leste geła igen dur, bo o RAJ leske pomožinda, a ačhelas furt zoraleder.

O Uzziah ačhel malomocno

¹⁶ Sar le Uzzioskero krališagos sas zoralo, igen ačhiła barikano a oda avke, hoj les oda zničinda. Sas napačivalo anglo RAJ, peskero Del, oleha, hoj geła andro Chramos te labarel o kadidlos pro oltaris. ¹⁷ Gele pal leste o rašaj o Azarijah a leha ochtovardeš (80) le RAJESKERE rašaja, save na daranas. ¹⁸ Ačhade pes pre leste a phende: "Uzziah, tu o kadidlos našti labares le RAJESKE, ale ča o sentňarde rašaja andral le Aronoskero potomstvos. Omuk o Sentno Than, bo salas napačivalo a kerđal binos. O RAJ tut buter na požehňinela."

¹⁹ Le Uzzioste sas andro vast e lopatka le kadidloha, hoj oda te labarel. Cholisaľiľa pro rašaja, a medik kere-las pre lende vika, avľa pre leskero čekat o malomocenstvo, sar ačhelas paš o kadidloskero oltaris andro Chramos. ²⁰ Sar dikhenas pre leste o nekbareder rašaj o Azarijah the okla rašaja, dikhle, hoj les hin pro čekat malomocenstvo. On les takoj odarik ligende avri a the ov sidarelas te džal, bo o RAJ les ole nasvalibnaha dukhađa.

²¹ O Uzziah sas malomocno, medik na muła. Našti džalas buter andre le RAJESKERO Chramos a bešelas avrether korkoro andre aver kher. Leskero čhavo o Jotam lidžalas o palacis the le manušen andre odi phuv.

²² Savore aver veci, so kerđa o Uzziah, ešebnovarestar (peršovarestar), medik na muła, hin andro zvitkos, so pisinda o prorokos Izaiaš, le Amocoskero čhavo. ²³ Sar o Uzziah muła, na parunde les andre le kralengere hrobi, bo sas malomocno, ale andro hrobos pre kralengeri mała. Pal leste ačhiła kralis leskero čhavo o Jotam.

Jotam kralis andre Judsko

27 Le Jotamoske sas bišupandž (25) berš, sar ačhiła kralis. Ov andro Jeruzalem kralinelas dešušov (16) berš. Leskeri daj sas e Jeruša, le Cadokoskeri čhaj. ² Ov kerelas oda, so sas le RAJESKE pre dzeka, avke sar the leskero dad o Uzziah, ale ča na kerđa oda, so leskero dad, savo geła andro Chramos te labarel o kadidlos. Ale o manuša dureder kere-nas o bini anglo RAJ.

³ O Jotam ačhađa e Upruňi Brana le chramoskeri a bari buči kerđa pro foroskere muri pro brehos Ofel. ⁴ Ov pro Judske brehi ačhavelas o fori a pro thana, kaj sas but veš, ačhavelas o hradbi the o veži. ⁵ Marelas pes le Ammončanengere kraliňa a ňerinda (zvitazinda) pre leste, avke o Ammončana andre oda berš leske počinenas 3,4 toni rupune †, 1 000 toni žužodiv (pšeňica) the 1 000 toni jačmeňis. Ajci leske davkerenas mek andro dujto the trito berš.

⁶ O Jotam zoraľolas, bo sas pačivalo a pačivalones šunelas le RAJES, peskere Devles.

⁷ Savore aver veci, so kerđa o Jotam, o maribena the leskere droma, hin pisimen andro Zvitkos le Judske the Izraelike Kralengero. ⁸ Le Jotamoske sas bišupandž (25) berš, sar ačhiła kralis, a dešušov berš kralinelas andro Jeruzalem. ⁹ Sar o Jotam muła, parunde les paš leskere phure dada andro Foros le Davidoskero. Pal leste ačhiła kralis leskero čhavo o Achaz.

O Achaz kralis andre Judsko

28 Le Achazoske sas biš (20) berš, sar ačhiła kralis. Andro Jeruzalem kralinelas dešušov (16) berš. Na kerelas oda, so sas le RAJESKE pre dzeka avke, sar leskero prapapus o David. ² Ov kerelas sar the o Izraelike kraľa anglal leste a kerđa the o avričhorde modli prekal o Baal. ³ Labarelas o kadidlos andre dolina Ben-

† E Hebrejiko čhib: šel (100) talenti rupune

Hinnom a peskere čhaven zlabardā sar obeti, avke sar kerenas o narodi, saven o RAJ tradlā avri anglal o Izrael. ⁴ O kadidlos obetinelas tel dojekh zeleno stromos, pro brehi the pro uče thana, kaj lašarenas le modlen.

O Aramejčana the o Izraeliti džan pre Judsko

⁵ Vašoda o RAJ, leskero Del, diña le Achaz le Aramejike kraliske andro vasta. Ov upral leste ņerindā (zvitāzindā) andro mariben a odligende but leskere manušen andro Damaskus.

O Achaz sas dino andro vasta the le kraliske andro Izrael, savo tiš upral leste ņerindā. ⁶ Avke andre jekh džives o Pekach, le Remaljoskero čhavo, murdardā 120 000 zorale slugađen andre Judsko, bo o manuša andral e Judsko omukle le RAJES, peskere dadengere Devles. ⁷ O Zichri, savo sas zoralo maribnaskero murš andral o Efrajim, murdardā le kraliskere čhas Maasejah the le uradnikos Azrikam the le Elkanah, savo sas leskero dujto nekbareder velitelis. ⁸ A choc te o Judejci sas lengere pašutne, e Izraeliko armada odligendā andre Samarija 200 000 lengere romñijendar, čhavendar the čhajendar the igen but veci.

O prorokos Oded

⁹ Andre Samarija sas le RAJESKERO prorokos o Oded. Ov geľa anglo slugađa, save avenas andre Samarija, a phendā lenge: “Čačes o RAJ, o Del tumare dadengero, sas choľamen pro manuša andre Judsko, vašoda len tumenge diña andro vasta. Ale tumen len murdarenas ajsa bara choľaha, hoj oda šundilā džī andro ņebos. ¹⁰ Akana peske kamen te kerel otroken le muršendar the džuvľendar andral e Judsko the Jeruzalem? Ale aleha keren binos anglo RAJ, angle tumaro Del. ¹¹ Šunen man mištes! Premuken le manušen, saven zailan peskere pašutnendar, bo te na premukena len, o RAJ tumen marelā peskera bara choľaha.”

¹² Akor štar Efrajimika vodci gele anglo murša, save avenas pal o mariben. Oda sas o Azarjah, le Jochananoskero čhavo, o Berechijah, le Mešillemotoskero čhavo, o Jechizkijah, le Šallumoskero čhavo, the o Amasah, le Chadlajoskero čhavo. ¹³ A phende lenge: “Ma anen ade le manušen, saven zailan, bo aleha kerdānas o binos anglo RAJ a mek buter pre amende andānas e bibach. Se imar akana hin amen but bini a le RAJESKERI choľi hiňi upral o Izrael.”

¹⁴ Akor o slugađa angle ola vodci the savore manuša premukle savoren, saven zaile, a dine pale the o veci, so odarik ile. ¹⁵ Palis ola štar vodci ile olen, save sas zaile, a le vecendar, so sas zailo, urde upre le manušen, save sas bi o gada. Dine len pro pindre sandali, o chaben the o pijiben a pomakhle lengere rani la mascaha. Thode pro somara olen, save na birinenas te džal, a palis len odligende ke lengere pašutne andro Jericho, andro palmengero foros. Palis pes visarde khere andre Samarija.

O Achaz mangel le Asirike kralis, hoj leske te pomožinel

¹⁶ Andre oda časos o kralis Achaz mangelas le Asirike kralis, hoj leske te pomožinel, ¹⁷ bo o Edomčana pale gele pro mariben pre Judsko a zaile le manušen. ¹⁸ O Filištinci tiš gele pro mariben andro fori pre ņižina the paš e južno pušta. Domarde a zaile o fori Bet-Šemeš, Ajalon the Gederot, the o fori Socho, Timna the Gimzo lengere gavenca. Varesave lendar ode ačhile te bešel. ¹⁹ O Del avke mardā le Judejcen, bo o Achaz na šundā le RAJES a na preačhilā te lidžal le manušen andro bini. ²⁰ Akor avľa andre Judsko ke leste o Asiriko kralis o Tiglat-Pileser. Ov leske na pomožindā, ale kerđā mek buter pharipen. ²¹ A choc te o Achaz ilā o somnakaj andral o Chramos, andral o palacis the le uradnikendar a diña le Asirike kraliske, oda leske na pomožindā.

²² Andre oda baro pharipen o Achaz mek buter kereľas bini anglo RAJ oleha, ²³ hoj obetinelas le devlengle le Aramejčanengere †, save upral leste ņerinde. Phendā peske: “Te o Aramejike devla pomožinde peskere kralenge, obetina the me lenge, hoj mange te pomožinen.” Ale kada andā e bibach leske the leskere narodoske.

²⁴ Akor o Achaz skidňa o veci andral o Chramos a phagerđā len. O vudar andro Chramos phandlā a pre dojekh ulicakero rohos andro Jeruzalem le modlengle kerđā oltara. ²⁵ Andre dojekh Judsko foros ačhađa thana pro lašariben, hoj pes te labarel o kadidlos avre devlengle, a aleha kerelas pre choľi le RAJESKE, peskere dadengere Devleske.

²⁶ Savore aver veci, so Achaz kerđā, ešebnovarestar (peršovarestar), medik na muľa, hin pisimen andro Zvitkos le Judske the Izraelike Kralengero. ²⁷ Sar o Achaz muľa, parunde les andro Jeruzalem, ale na andre kralengere hrobi. Pal leste ačhilā kralis leskero čhavo o Chizkija.

O Chizkija kralis andre Judsko

29 Le Chizkijoske sas bišupandž (25) berš, sar ačhilā kralis a kralinelas andro Jeruzalem bišueňa (29) berš. Leskeri daj sas e Abija, le Zecharijoskeri čhaj. ² Ov kerelas oda, so sas le RAJESKE pre dzeka – sa avke sar the leskero prapapus o David.

Sentňaren o Chramos

³ Ešebno (peršo) čhon andro ešebno berš, sar kralinelas o Chizkija, phundrađa o chramoskero vudar a oprikerđā les. ⁴ Palis vičindā le rašajen the le Leviten a rozačhađa len pre vichodno dvora le Chramostar. ⁵ Phendā lenge: “Šunen man, Levitale! Akana sentňaren pes a sentňaren the o Chramos le RAJESKERO, le Devleskero tumare dadengero. Hordinen avri savore džungale veci andral o Chramos. ⁶ Se amare dada na sas le RAJESKE amare Devleske pre dzeka, bo kerenas angle leste o bini. Omukle les a odvisarde pes lestar

† E Hebrejiko čhib: andral o Damaskus

the le thanestar, kaj ov bešel. ⁷ Phandle o chramoskero vudar, murdarkerde andre o momelara, hoj te na labon, a na obetinas o kadidlos aňi labardi obeta andro Sentno Than le Izraelike Devleske. ⁸ Vašoda o RAJ sas cholamen pre Judsko the pro Jeruzalem a kerda, hoj te en pro asaben a hoj dojekh te daral olestar, so pes lenge ačhila, sar the korkore dikhen. ⁹ Amare dada sas murdarde andro mariben a amare romňijen the čhaven zaiile. ¹⁰ Ale akana kamav te phandel zmluva le RAJEHA, le Devleha andral o Izrael, hoj amendar te odvisarel peskeri bari chofi. ¹¹ Čhvale mire, ma aven leňive a ma užaren, se tumen o RAJ peske kidňa avri, hoj te ačhen angle leste, hoj leske te služinen a te obetinen o kadidlos.”

¹² Avke pes mukle andre buči o Leviti:

andral le Kohatoskeri fajta o Machat, le Amasajoskero čhavo, the o Joel, le Azarjoskero čhavo;

andral le Merariskeri fajta o Kiš, le Abdioskero čhavo, the o Azarijah, le Jehalleleloskero čhavo;

andral le Geršonoskeri fajta o Joach, le Zimmoskero čhavo, the o Eden, le Joachoskero čhavo;

¹³ andral le Elicafanoskeri fajta o Šimri the o Jeiel;

andral le Asafoskeri fajta o Zecharijah the o Mattaniah;

¹⁴ andral le Hemanoskeri fajta o Jechiel the o Šimej; andral le Jedutunoskeri fajta o Šemajah the o Uzziel.

¹⁵ Zvičinde savore Leviten, sentňarde pes a avle te obžužarel o Chramos, avke sar prikazinda o kralis pal le RAJESKERO Zakonos. ¹⁶ Akor o rašaja gele andre, hoj les te obžužaren, a savoro džungipen, so arakhle andro Chramos, hordinenas avri pre dvora. Palis o Leviti ile odarik ola veci a odligende ke dolina Kidron. ¹⁷ E buči chudle te kerel andro ešebno džives andro ešebno čhon a andro ochtoto džives dogele paš e chramoskeri veranda. Palis mek ochto dživesa sentňarenas o Chramos a dokerde oda andro dešušovto (16.) džives andro ešebno čhon.

¹⁸ Palis gele ko kralis Chizkija a phende leske:

“Ožužardam calo Chramos, o oltaris pro labarde obeti leskere sersamoha, the o skamind, pre savo thovenas o sentno maro, leskere sersamoha. ¹⁹ Pririchtindam a sentňardam mek the ola veci, save o kralis Achaz čhida avri andral o Chramos, sar sas napačivalo ko Del. Ola veci hine akana anglo RAJESKERO oltaris.”

Pale obetinen andro Chramos

²⁰ O Chizkija sig tosara uštifa, diňa te zvičinel ke peste le foroskere vodcen a džanas ko Chramos. ²¹ Akor diňa te anel ehta terne biken, ehta bakren, ehta terne bakroren the ehta capen sar binoskeri obeta vaš o krališagos, vaš o oltaris the vaš o Judsko. A phenda le rašajenge, le Aronoskere potomkenge, hoj len te obetinen pre le RAJESKERO oltaris. ²² Akor o rašaja murdarde le biken, zachudenas lengero rat a pokropinas o oltaris; palis murdarde le bakren a the lengere rateha pokropinas o oltaris a sar murdarde le terne bakroren, the lengere rateha pokropinas o

oltaris. ²³ Palis ande sar obeta vaš o binos le capen anglo kralis the angle savore manuša, a thovenas o vasta pre lende. ²⁴ O rašaja palis murdarenas le capen a lengero rat anenas pro oltaris sar obeta vaš o binos, hoj te odlel o binos cale Izraelostar, bo o kralis prikazinda, hoj te anen e labardi obeta the e obeta vaš o bini prekal calo Izrael.

²⁵ O Chizkija andro Chramos ačhada le Leviten le cimbalenca, harfenca the citarenca, bo kavke prikazinda o David, bo o RAJ leske avke vakerelas prekal peskere proroka o Gad the o Natan. ²⁶ Sar o Leviti ačhenas le Davidoskere bašavibnaskere nastrojenca a o rašaja le trubenca, ²⁷ o Chizkija diňa te anel pro oltaris e labardi obeta. A sar e obeta chudle te kerel, o manuša gilavenas le RAJESKE a o lavutara chudle te bašavel pro trubi the pre savore le Davidoskere nastrojji. ²⁸ A savore, ko ode sas, denas le RAJES pačiv le gilavipnaha the le trubenca. Kada likerelas, medik na zlabila e labardi obeta.

²⁹ Palis, sar dokerde o labarde obeti, o kralis the savore manuša gele pro khoča a lašarenas le RAJES. ³⁰ O kralis le vodcenca prikazinde le Levitenge, hoj te lašaren le RAJES le gifenca, so pisinde o David the o prorokos Asaf. Avke on le RAJES lašarenas bare radišagoha a bandonas anglal leste dži ke phuv.

³¹ Palis o Chizkija phenda: “Akana san sentňarde andre služba le RAJESKE. Aven a anen andro Chramos o obeti the o palikeribnaskere obeti.” Avke savore ande o obeti the palikeribnaskere obeti a ola, save kamenas te del buter, anenas the o labarde obeti. ³² O manuša ande pre labardi obeta le RAJESKE eftavardeš (70) biken, šel (100) bakren the duj šel (200) terne bakren. ³³ O sentne dari, so ande, sas šov šel (600) biki the trin ezera (3 000) bakre. ³⁴ Ale o rašaja sas frima, hoj te scirdkeren o cipi pal o džvirini pre labardi obeta, vašoda lenge gele te pomožinel o Leviti, medik odi buči na dokerde a medik buter rašaja pes na sentňarde. Bo o Leviti sas pačivaloneder sar o rašaja andre oda, hoj pes sentňarenas. ³⁵ Bo sas igen but o labarde obeti the o žiros le smiromskere obetendar the o molakere obeti.

Avke pale chudle te lašarel le RAJES andro Chramos sar angloda. ³⁶ O Chizkija the savore manuša radisaľonas olestar, bo o Del lenge pomožinda igen sig kada savoro te kerel.

Zvičinel le manušen pre Patradi

30 Palis o Chizkija vičinda calo Izrael the Judsko a pisinda lila the le kmeňoske Efrajim the Menašše, hoj te aven andro Chramos andro Jeruzalem te oslavinel e Patradi pre pačiv le RAJESKE, le Izraelike Devleske. ² O kralis pes dothoda le vodcenca the savore manušenca andro Jeruzalem, hoj andro dujto čhon oslavinena e Patradi. ³ On la našti oslavinenas andro dino časos, bo na sentňarde pes but rašaja a o manuša pes na zgele andro Jeruzalem. ⁴ Priačhile pre ada o kralis the savore manuša, save ode sas. ⁵ Avke pes dothode a bičhade lil pal calo Izrael, la Beer-Še-

batar dži ko Dan, a vičinenas savoren, hoj te aven andro Jeruzalem te oslavinel e Patrađi pre pačiv le RAJESKE, le Izraelike Devleske. Bo but džene la na oslavinenas avke, sar hin pisimen andro Zakonos.

⁶ O murša gele le lilenca, so sas le kralistar the vodcendar, pal calo Izrael the Judsko a phenenas avke, sar lenge o kralis prikazinda:

“Visaren tumen pale ko RAJ, ko Del le Abrahamoskero, Izakoskero the Jakoboskero, hoj pes ov te visarel pale ke tumende, ke ola, save sas zachrañimen andral le Asirike kralengere vasta. ⁷ Ma aven ajse sar tumare dada the pašutne, bo on na sas pačivale le RAJESKE, peskere Devleske. Se šaj dikhen korkore, sar len igen zorales potrestinel. ⁸ Akana den peske te phenel! Ma aven ajse sar tumare dada, bo na kamenas te šunel! Podden pes le RAJESKE! Aven andro Chramos, so o RAJ, tumaro Del, sentñarđa pro furt. Služinen le RAJESKE, peskere Devleske, hoj pes te odvisarel tumendar leskeri choñi! ⁹ Te pes visarena ko RAJ, akor ole, save zaille tumare pašutnen the čhaven, presikavena lenge o jileskeriben a premukena len pale khere, bo o RAJ, tumaro Del, hino lačhejileskero the milostivo a na odvisarela pes tumendar, te pes tumen visarena ke leste.”

¹⁰ O murša, saven o kralis the o vodci bičhade, džanas foros forostar andro phuva le kmeñengere Efrajim the Menašše dži ko Zebulun. Ale o manuša len anenas pro asaben a asanas lendar. ¹¹ Ale varesave murša andral o kmeñi Ašer, Menašše the Zebulun pes pokorinde a avle andro Jeruzalem. ¹² O Del avke kerđa, hoj diña le manušen the andre Judsko jekh gondolišagos, hoj te keren oda, so prikazinda o kralis the o uradñika pal le RAJESKERO lav.

Oslavinen e Patrađi

¹³ Avke andro dujto čhon igen but manuša pes zgele andro Jeruzalem, hoj te oslavinen o Inepos pal o Mare Bi o Droždi. ¹⁴ Ile a zñičinde savore oltara, so sas andro Jeruzalem, the o kadidloskere oltara a čhide len andre dolina Kidron.

¹⁵ Andro dešuštarto (14.) džives andro dujto čhon murdarde le Patrađakere bakrores. O rašaja the o Leviti, save mek na sas obžuzarde, andre ladž pes sentñarde. Palis ande o labarde obeti andro Chramos. ¹⁶ On ačhenas pre peskere thana andro Chramos, sar pisinda andro zakonos le Devleskero murš o Mojžiš, a o rašaja kropinenas pro oltaris o rat, so lenge podine o Leviti. ¹⁷ Vašoda, hoj sas ode zgele but ajse džene, save na sas sentñarde, on našti murdarenas le Patrađakere bakroren. Avke vaš lende o Leviti murdarenas le bakroren, hoj len te sentñaren le RAJESKE. ¹⁸ But manuša, save ode avle andral o kmeños Efrajim, Menašše, Jissachar the Zebulun, pes na sentñarde a oleha, hoj chanas le Patrađakere bakrores, na dolikerde le Devleskero zakonos. Vašoda pes modlinelas vaš lende o Chizkija: ¹⁹ “RAJEJA, Devla amare dadengero, kala manuša hine nažuže angle tiro zakonos. Ale on tut lašaren jilestar, vašoda mangav tut,

av ke lende jileskero a odmuk lenge.” ²⁰ A o RAJ leskeri modlitba šunđa avri a sastarđa le manušen.

²¹ Palis o Izraeliti, save sas andro Jeruzalem, oslavinenas o Inepos pal o Mare Bi o Droždi efa džives bare radišagoha. A o Leviti the o rašaja lašarenas le RAJES sako džives cala zoraha.

²² Palis o Chizkija šukares prevakerđa ke savore Leviti, bo sikade hoj džanen mištes te služinel le RAJESKE. Efa džives oslavinenas a anenas ode smiromoskere obeti a palikerenas le RAJESKE, peskere dadengere Devleske.

²³ Ale savore manuša, save sas ode zgele phende, hoj oslavinena mek efa džives o inepos. Avke radišagoha oslavinenas mek aver efa džives. ²⁴ O Chizkija diña le manušenge pre obeta, 1 000 biken the efa ezera 7 000 bakren a o uradñika dine 1 000 biken the 10 000 bakren. A sentñarde pes but rašaja. ²⁵ Savore manuša andral e Judsko radisalonas le rašajenca the Levitenca, the le manušenca, save avle le severostar, the le cudzincenca, save bešenas andro Izrael the Judsko. ²⁶ Andro Jeruzalem sas ajso baro radišagos, savo na sas akorestar, sar sas kralis andro Izrael le Davidoskero čhavo, o Šalamun. ²⁷ Palis o rašaja the o Leviti ačhenas, hoj te žehñinen le manušen a o RAJ len šunđa avri andral peskero sentno than, andral o ñebos.

O manuša zñičinen le modlen

31 Sar preačhile te oslavinel e Patrađi, gele savore Izraeliti andre Judske fori a sphagerde o sentne slupi, čhingerde o kaštune slupi la Ašerakere a zñičinde savore uče thana the oltara andre Judsko the andro phuva Benjamin, Efrajim the Menašše. Palis savore Izraeliti gele pale khere andre peskere fori.

O dari prekal o Leviti the rašaja

² O kralis Chizkija ačhađa le rašajen the le Leviten te služinel andro partiji. Lengere službi sas, hoj te keren o labarde the smiromoskere obeti, hoj te palikeren a hoj te lašaren paš o chramoskere vudara. ³ O Chizkija delas andral peskere stadi dobitkos pro labarde obeti a oda o tosaraskere the račakere obeti, the o labarde obeti pro Šabbat, pro neve čhoneskere inepi the pro aver oslavi, avke sar hin pisimen andro Mojžišoskero zakonos. ⁴ Le manušenge andro Jeruzalem prikazinda, hoj te anen prekal o rašaja the Leviti ole obetendar oda, so mušinen te del lenge pro dživipen, hoj on te šaj en oddine te kerel sa, so kempel pal le RAJESKERO zakonos.

⁵ Sar pal ada savore šunde, chudle te anel o Izraeliti peskere ešebne (perše) ulipnastar o žužodiv (pšeñica), e mol, o olejos the o medos the savorestar, so len sas le maľendar. Ande igen but: o dešto kotor savorestar. ⁶ Avke the o Izraeliti the savore manuša, save bešenas andre Judske fori, anenas o dešto kotor lengere dobitkostar the bakrendar a the avre darendar, so sas dine prekal o RAJ, a thode oda savoro pro kopi. ⁷ O manuša chudle te hordinel andro Jeruzalem o dari an-

dro trito čhon a ada kerenas dži andro eftato čhon.
⁸ Sar avla o kralis Chizkija peskere vodcenca a dikhle ola dari, lašarenas le RAJES a ašarenas leskere manušen, le Izraeliten.

⁹ O Chizkija pes phučla le rašajendar the le Leviten-dar pal ola veci pro kopi ¹⁰ a o nekbareder rašaj o Azarijah, o potomkos le Cadokoskero, leske odphenda: "Akorestar, sar chudle o manuša te hordinel o dari andro Chramos, sas amen igen but chaben a ole chaben-estar ačhila mek but, bo o RAJ požehñinda peskere manušen. Dikhen, keci mek olestar ačhila!"

¹¹ Avke o Chizkija diña te pririchtinel o skladi prekal o chaben andro Chramos. Sar len pririchtinde, ¹² diña te hordinel savore ola dari, so sas dine prekal o Del, andre ola skladi. Nektbareder upral ola skladi sas o Levitas Konaniah a dujto pal leste leskero phral, o Šimej.

¹³ Len ačhađa o kralis Chizkija the o nekbareder rašaj o Azarijah upral o Levitengere uradñika andro Chramos: o Jechiel, Azaziah, Nachat, Asahel, Jerimot, Jozabad, Eliel, Jismachjah, Machat the o Benajah.

¹⁴ O Levitas Kore, le Jimnoskero čhavo, sas stražņikos pre vichodno brana a ov sas ačhado te kidel le manušendar o dari, so anenas prekal o Del, a palis te rozulavel. ¹⁵ O Leviti o Eden, Minjamin, Ješua, Šemajah, Amariah the Šechaniah, save služinenas andro rašajengere fori, pačivalones rozulavenas kala dari avre pašutne rašajenge pal lengere partiji, le ternenge the le phurederenge.

¹⁶ Rozdenas the ole muršenge, save sas zapisimen andre fajtakero zvitkos a oda phureder sar trin berš – dojekheske, save služindehas jekhvar andro Chramos, pal oda, sar sas ačhade andre služba. ¹⁷ O rašaja sas zapisimen pal o fajti a o Leviti le biš (20) beršendar pal o partiji, andre save služinenas. ¹⁸ Sas zapisimen caľa famelijaha – savore peskere romñijenca, le cikne the bare čhavenca – bo pačivalones pes sentñarenas.

¹⁹ Sas ačhade murša, hoj te rozden o chaben le rašajenge andral o Aronoskero potomstvos, save bešenas andro fori the lengere gava. Rozdenas oda savore rašajenge the Levitenge, save sas zapisimen andro fajtakero rodokmeños.

²⁰ Avke kerelas o Chizkija andre caľi Judsko. Kerelas savoro, so sas čačipnaskero, lačho the pačivalo anglo RAJ. ²¹ Savoro, so chudľa te kerel o Chizkija andro Chramos, kerelas avke, sar sas pisimen andro zakonos the prikazañja. A sas les andre savoro bach, bo rodelas le RAJES cale peskere jileha.

O Sancherib džal pro Jeruzalem

32 Paloda, sar o Chizkija sikađa peskero pačivaliben oleha, so kerđa prekal o RAJ, avla o Asiriko kralis Sancherib pro mariben pre Judsko. Peskera armada rozačhađa pašal o zorale fori a kamľa len te zalel. ² Sar o Chizkija dikhľa, hoj o Sancherib avla a kamel te džal pro Jeruzalem, ³ dovakerđa pes peskere vodcenca the velitelenca, hoj zaačhavana o prameña, so hine avri pal o foros, a on leske andre ada pomožinde. ⁴ Avle igen but manuša a zaačhade o

prameña the o pañi, so džalas prekal odi phuv. A phende peske: "Sar o Asirike kraľa avena, soske majinen te arakhel ajci but pañi?" ⁵ Palis o kralis chudľa te prikerel savore zñičimen muri a pre ola muri ačhađa o veži the dujto avruno muros. Zoraľarđa the o avruno muros pašal e terasa pro vichodos le Forostar le Davidoskere a diña te kerel but kopiji the štiti.

⁶ Ačhađa le velitelen upral o manuša, diña len te vičinel jekhetane ke peste pro phundrado than paš e foroskeri brana a prevakerđa ke lende: ⁷ "Aven zorale a ma daran tumen! Ma predaran le Asirike kralistar, aňi leskera armadatar, so avel leha, bo amenca hiňi bareder zor. ⁸ Les hin bari armada, ale oda hine ča manuša, ale amenca hino o RAJ, amaro Del, pririchtimen amenge te pomožinel a te lidžal amare maribena." A o manuša pes zmukle pre oda, so phenda o Judsko kralis Chizkija.

⁹ Palis o Sancherib bičhađa peskere služobņiken andro Jeruzalem, medik korkoro peskera armadaha pes marelas andro foros Lachiš. Diña te phenel le Chizkijoske the le Judejcenge andro Jeruzalem:

¹⁰ "Avke phenel o Asiriko kralis Sancherib: Pre soste pes zmuklen, te me le slugađen rozačhadom pašal o Jeruzalem? Ko tumen šaj zachrañinel? ¹¹ O Chizkija tumenge vakerel: 'O RAJ, amaro Del, amen zachrañinela andral o vasta le Asirike kraľiske.' Avke tumen diliňarel, hoj tumen te mukel te merel andre bokh the bi o pañi. ¹² Se korkoro ov čhidä tele le RAJESKERE thana the oltara a prikazinda le manušenge andre Judsko the Jeruzalem: 'Angle jekh oltaris bandona a labarena upre o kađidlos.'

¹³ Či tumen na džanen, so kerđom me the mire dada le manušenge andre aver phuva? Či šaj zachrañinde lengere devla lengere phuva andral mire vasta? ¹⁴ Ko savore devlendar andral ole narodi, saven mire dada zñičinde, šaj zachrañinde peskere manušen? Sar šaj akana tumaro Del tumen zachrañinel andral mire vasta? ¹⁵ Te na tumen o Chizkija diliňarel a klaminel! Ma pačan leske, bo ñisavo narodoskero aňi kraľišagoskero del naštı zachrañinda peskere manušen andral mire vasta aňi andral o vasta mire dadengere. Vašoda aňi tumaro Del na zachrañinela tumen andral mire vasta."

¹⁶ Le Sancheriboskere sluhi dureder namištes vakere-nas pro RAJ, pro Del, the pre leskero služobņikos Chizkija. ¹⁷ O Sancherib pisinda ľila andre save asalas avri le RAJES, le Izraeloskere Devles: "Avke sar o narodengere devla andral aver phuva na zachrañinde peskere manušen andral mire vasta, avke the le Chizkijoskero Del na zachrañinela peskere manušen andral mire vasta!" ¹⁸ Le Sancheriboskere vodci andre Hebrejiko čhib vičinenas pro manuša, save ačhenas pro Jeruzalemoskere muri, hoj len te daraven avri a avke te zalen o foros. ¹⁹ On vakerenas pal o RAJ, pal o Jeruzalemoskero Del, avke sar pal o devla avre narodengere – devla, saven kerde peskere vastenca.

²⁰ Vašoda o kralis Chizkija the o prorokos Izaiáš, le Amocoskero čhavo, vičinenas a mangelas le Devles, hoj lenge te pomožinel ²¹ a o RAJ bičhađa le aňjelos,

savo murdarda savore zorale muršen, vodcen the uradniken andro taboris le Asirike kraliskero. Avke pes o Sancherib visarda pale andre peskeri phuv andre ladž.

Sar jekhvar gela andre peskere devleskero chramos, varesave leskere čhavendar les murdarde la šablaha.

²² Avke o RAJ zachraňinda le Chizkija the le Jeruzalemske manušen andral o vasta le Asirike kralistar Sancheribostar the andral o vasta avre nepřijatělendar a diňa len o smirom le narodendar, save sas pašal lende. ²³ But manuša anenas andro Jeruzalem o dari le RAJESKE a o dragane veci le Judske kraliske. Akorestar le Chizkija denas pačiv savore narodi.

O Chizkija sastardo le nasvalibnastar

²⁴ Andre oda časos o Chizkija nasvaliľa pro meriben. Ale sar pes modlinelas ko RAJ, ov leske odphenda a diňa les znameňje, hoj sastola. ²⁵ Ale o Chizkija sas ajso barikano, hoj aňi na presikada o palikeriben vaš o lačhipen, so leske kerda o RAJ. Vašoda o Del cholisalifa pre leste, pre Judsko the pro Jeruzalem. ²⁶ Palis o Chizkija the o manuša andral o Jeruzalem pes pokorinde a mangenas le RAJES, hoj lenge te odmukel. Vašoda o RAJ len na marda, medik o Chizkija na muľa.

Le Chizkijoskero barvalipen

²⁷ O Chizkija sas igen barvalo a dojekh les delas pačiv. Kerda peske o pokladňi prekal o rup, somnakaj, dragane bara, voňava masci the štiti the avre dragane veci. ²⁸ Sas les skladi, kaj odthovelas o dřiv, mol the oleja. Sas les the maštalňi prekal savoro dobitkos the stadi. ²⁹ O Del diňa le Chizkija but stadi, bakre, dobitkos the aver barvalipen a ačhada peske o fori.

³⁰ Sas oda o Chizkija, savo začida o upruno paňi Gichon a kerda tunelis, hoj o paňi te džal pal e zapadno sera andro Foros le Davidoskero. O Del sas le Chizkijoha, Sas les bach andre savoreste, so kerelas. ³¹ Ale sar avle ke leste o Babiloňike vodci, hoj te phučen pal o znameňje, so pes ačhila andre odi phuv, o Del les mukla, bo kamla les te probalinel (preskušinel), hoj pes te dodžanel savoro, so les hin andro jilo.

O Chizkija merel

³² Savore aver veci, so o Chizkija kerda, the pal leskere pačivale skutki, hin pisimen andro Videňje le Prorokoskero Izaiášoskero, savo sas le Amocoskero čhavo, a andro Zvitkos le Judske the Izraelike Kralengero. ³³ Sar muľa o Chizkija, parunde les pro upruno than andre le kralengere hrobi a savore manuša andral e Judsko the Jeruzalem les denas bari pačiv. Pal leste ačhila kralis leskero čhavo o Menašše.

O Menašše kralis andre Judsko

33 Le Menaššeske sas dešuduj (12) berš, sar ačhila kralis andre Judsko. Ov andro Jeruzalem kralinelas penda the pandž (55) berš. ² Kerelas oda, so na sas le RAJESKE pre dzeka, avke sar the o narodi,

saven o RAJ tradľa avri anglo Izrael. ³ Ačhada pale o oltara, so leskero dad o Chizkija zňičinda, o thana, kaj lašarenas le Baal, the o slupi la modlake Ašera. Bando-las anglo čercheňa a lašarelas len. ⁴ Ačhada the o oltara andro Chramos, pal savo o RAJ phenda: "Andro Jeruzalem ela miro nav barardo pro furt." ⁵ Pro soduj chramoskere dvori ačhada oltara prekal savore čercheňa, hoj len te lašaren. ⁶ Peskere čhaven andre dolina Ben-Hinnom zlabarda sar obeta. Ov čarinelas the vražinelas a anda ke peste le vrašcen the olen, save privičinenas le mulengere dučen. Ov aleha kere-las buter nalačhipen anglo RAJ a anelas pre peste leskeri cholí.

⁷ O Menašše iľa e socha a thođa la andro Chramos, pal savo o RAJ phenda le Davidoske the leskere čhaske le Šalamunoske: "Andre kada Chramos the andro Jeruzalem, so mange avri kidňom maškar savore Izraelike kmeňi, ela miro nav furt lašardo. ⁸ A te o Izraeliti šunena savore mire lava a te dolikerena mire prikazaňja, so lenge diňom prekal miro služobňikos Mojžiš, akor me na domukava, hoj te en avritradle andral kadi phuv, so diňom lengere dadenge." ⁹ Ale o Menašše li-genelas le manušen andral e Judsko the Jeruzalem andro mek bareder binos, sar kerenas ola narodi, saven o RAJ zňičinda anglal o Izraeliti.

¹⁰ Choc o RAJ prevakerelas ko Menašše the ke leskere manuša, on les na šunenas.

Le Menaššeskero pokaňje

¹¹ Vašoda o RAJ domukla le velitelēn andral e Asiriko armada, hoj te džan pre lende. On le Menašše chudle, sphandle les le bronzune lancenca, thode leske andro nakh o hakos a odligende les andro Babilon. ¹² O Menašše sas andro baro pharipen a chudla te rodel le RAJES, peskere dadengere Devles, a igen pes pokorinda angle leste. ¹³ Sar pes modlinelas ko RAJ, ov šundľa avri leskero mangipen a anda les pale andro Jeruzalem, andre leskero krališagos. Avke o Menašše sprindžarda, hoj ča o RAJ hino o Del.

¹⁴ Paloda o Menašše pašal o Foros le Davidoskero ačhada bareder avrune muri andre dolina pro zapados le prameňistar le Gichonostar, sar pes džal ke Ribno Brana pašal o brehos Ofel. A andre savore Judske zorale fori le murenca rozačhada le armadakere velitelēn. ¹⁵ Andral o Chramos odligenda avri la socha, le modlen the savore oltara, so angloda ačhada pro brehos paš o Chramos the andro Jeruzalem. Savore kala veci čhida avri andral o foros. ¹⁶ Avke pale ačhada le RAJESKE o oltaris, obetinda pre leste o smiromskere the palikeribnaskere obeti a prikazinda le manušenge andral e Judsko, hoj te služinen le RAJESKE, le Izraelike Devleske. ¹⁷ Ale o manuša furt anenas o obeti pro uče thana, choc ča le RAJESKE.

¹⁸ Savore aver veci, so kerda o Menašše, leskeri modlitba ko Del the o lava, so leske vakerelas o proroka andro nav le RAJESKERO, hin pisimen andro Zvitkos le Izraelike Kralengero. ¹⁹ Andro Zvitkos le Chozajoskero hin pisimen pal leskeri modlitba a sar o Del leske

odphenda. Hin andre pisimen the pal leskere bini the napačivaliben a sar ačhađa o modlengere thana pro lašariben, o slupi la Ašerakere the o modli anglođa, sar pes pokorinda. ²⁰ Sar o Menašše muľa, parunde les andre leskero hrobos paš o palacis a pal leste ačhiľa kralis leskero čhavo o Amon.

O Amon kralis andre Judsko

²¹ Le Amonoske sas bišuduj (22) berš, sar ačhiľa kralis andre Judsko. Ov andro Jeruzalem kralinelas duj berš. ²² Ov kerelas baro nalačhipen anglo RAJ, avke sar the leskero dad o Menašše. Obetinelas savore modlengere, so kerđa leskero dad, a lašarelas len. ²³ Na pokorinda pes anglo Del sar leskero dad, ale kerelas mek goreder bini.

²⁴ Palis le Amonoskere služobňika pes vzburiinde pre leste a murdarde les andre leskero palacis. ²⁵ Ale o Judske manuša murdarde olen, so kerde vzbura pro kralis Amon a pal leste ačhade kraliske leskere čhas le Joziaš.

O Joziaš kralis andre Judsko

34 Le Joziašoske sas ochto berš, sar ačhiľa kralis, a andro Jeruzalem kralinelas tranda the jekh (31) berš. ² Ov kerelas oda, so sas le RAJESKE pre dzeka. Phirelas pal le Devleskero drom avke sar leskero prapapus o David a na odvisarđa pes ole dromestar.

³ Andro ochtoto berš, sar o Joziaš kralinelas a mek sas terno, chudľa te rodel le prapapuskere le Davidoskere Devles. O Joziaš andro dešudujto (12.) berš chudľa te obžužarel e Judsko the o Jeruzalem avke, hoj zničinda o modlengere thana, la Ašerakere slupi the savore avre modli. ⁴ O Joziaš sas paš oda, sar čhivenas tele le Baaloskere oltara the o kadidloskere oltara. La Ašerakere slupi čhidľa tele a savore aver modli rozphagerđa pro prachos a oda prachos rozčhidľa pro hrobi ole manušengere, save obetinenas ole modlengere. ⁵ Palis le rašajengere kokala zlabarđa pro oltara, kaj lašarenas o modli, a avke o Joziaš obžužarđa e Judsko the o Jeruzalem. ⁶ Avke kerđa the andre fori le kmeňengere Menašše, Efrajim, Šimeon the Naftali. ⁷ Čhidľa tele lengere oltara the la Ašerakere slupi a sphagerđa le modlen, hoj lendar ačhiľa ča prachos. Andre calo Izraeliko phuv phagerđa savore kadidloskere oltara a palis geľa pale andro Jeruzalem.

E buči pro Chramos

⁸ Andro dešuochtoto (18.) berš, sar kralinelas a palođa sar obžužarđa cali phuv the o Chramos le modlendar, o Joziaš bičhađa manušen, hoj te oprikeren o Chramos le RAJESKERO, peskere Devleskero. On sas o Šafan, le Acalioskero čhavo; o guverneris Maasejah andral o Jeruzalem the o pisaris Joach, le Joachazoskero čhavo.

⁹ Sar avle ko nekbareder rašaj Chilkiyah, dine leske o love, so prekal le Devleskero Chramos o Leviti, save sas o stražňika, kidle avri le manušendar andral o

kmeňi Menašše, Efrajim the andral savore aver Izraelike kmeňi a the le manušendar andral o Benjamin, Judsko the Jeruzalem. ¹⁰ Ola love dine le muršenge, save sas ačhade upral e buči andro Chramos, a on počinenas le robotňiken, save oprikeren o Chramos, ¹¹ le tésaren the le muraren. Vaš ola love cinenas o oprikerde bara the kašta, savenca prikerenas o khera, so o Judske krala zamukle.

¹² O murša kerenas peskeri buči pačivalones. Upral lende sas ačhade o Leviti o Jachat the Obadiah andral e Merariskeri fajta, the o Zecharijah the o Mešullam andral e Kohatoskeri fajta. Savore Leviti, save džane nas te bašavel pro nastroj, ¹³ merkinenas pre ola murša, save hordinenas o veci, a sas ačhade pre savore aver buča. Varesave Leviti sas pisara, uradňika the stražňika.

O Chilkiyah arakhel o zakonoskero zvitkos

¹⁴ Sar lenas avri o love, so sas dine andro Chramos, akor o rašaj Chilkiyah arakhľa o zakonoskero zvitkos, so o RAJ diňa avri prekal o Mojžiš. ¹⁵ Akor o Chilkiyah phenda le pisariske le Šafanoske: "Andro Chramos arakhľom o zakonoskero zvitkos." Avke o Chilkiyah les diňa le Šafanoske.

¹⁶ O Šafan les iľa, geľa ko kralis Joziaš a phenda leske: "Tire služobňika kerde savoro, so prikazindaľ. ¹⁷ Ola love, so arakhle andro Chramos, dine le robotňikenge, save prikerenas o Chramos, the lengere majstrege." ¹⁸ Palis o pisaris Šafan phenda le kraliske: "O rašaj Chilkiyah mange diňa varesavo zvitkos." Palis andral genelas anglo kralis.

¹⁹ Sar o kralis Joziaš šunďa o lava andral o zvitkos, čhingerďa pre peste o gada. ²⁰ Palis prikazindaľ le Chilkijoske, le Achikamoske, savo sas le Šafanoskero čhavo, le Abdonoske, savo sas le Michoskero čhavo, le Šafanoske the peskere služobňikoske le Asajoske: ²¹ "Džan a phučen le RAJESTAR pal o lava kale zvitkoskere vaš ma, vaš e Judsko the vaš ola, save ačhile andro Izrael. Se le RAJESKERI bari cholí hiňi pre amende avričidi, bo amare dada na dolikerenas le Devleskero lav a na dživenas pal o lava, so hin pisimen andre oda zvitkos."

²² Akor o Chilkiyah the o murša, saven bičhađa o kralis, geľa pes te phučel ke prorokiňa Chulda. Oj bešelas andro Jeruzalem pre nevi sera a lakero rom, savo pes starinelas pal le kraliskere gada, sas o Šallum, le Tokhatoskero čhavo, o čhavo le Chasroskero. Sar ode doavle, chudle lake pal oda te vakereľ.

²³ Oj lenge phenda: "Kavke phenel o RAJ, o Del le Izraeloskero: 'Phenen oleske, ko tumen ade bičhađa, ²⁴ hoj domukava e bibach pre kada foros the pro manuša, save ade bešen – savore prekošibena, avke sar hin pisimen andro zvitkos, andral savo genenas anglo Judsko kralis. ²⁵ Bo pes mandar odvisarde a labarenas o kadidlos avre devlengere a savoreha, so kerenas peskere vastenca, anenas pre peste miri cholí; miri cholí hiňi sar jag, so hiňi avričordi pre kada than a na preačhela te labol.'" ²⁶ Le Judske kraliske, savo tu-

men bičhađa te phučel le RAJESTAR, phenen: 'Kavke vakerel o RAJ, le Izraeloskero Del, pal o lava, so šundal: ²⁷ Vašoda, hoj tiro jilo sas kovlo a na sas zoralo sar bar, ale pokorindal tut, sar šundal leskere lava pre kada than, a rozčhingerdal pre peste o gada andre pokora a rovehas angle mande, me tut šundom avri. ²⁸ Medik tu dživeha, na dikheha odi bibach, so anava pre kada than the pro manuša. Mereha a aveha parumen andro smirom.' "

Avke pes on visarde pale ko kralis a phende leske, so e prorokiňa vakerelas.

O Joziaš phandel e zmluva le RAJEHA

²⁹ Akor o kralis Joziaš vičinda ke peste savore vodcen andral e Judsko the Jeruzalem. ³⁰ Geľa ko Chramos a jekhetane leha gele the savore murša andral e Judsko, o manuša andral o Jeruzalem, o rašaja the o Leviti – savore manuša, či o čore vaj barvale. Pregenda angle lende savore lava, so sas pisimen andro Zvitkos la Zmluvakero, so arakhle andro Chramos. ³¹ Palis o Joziaš ačhiľa pre kraliskero than paš o slupos a anglo RAJ phandľa zmluva, hoj leske služinena a dolikerena leskere prikazaňja the zakoni cale peskere jileha the dušaha a hoj dživena avke, sar hin pisimen andre oda zvitkos.

³² Palis prikazinda dojekheske andro Jeruzalem the Benjamin, hoj odi zmluva te dolikerel. Avke o manuša andral o Jeruzalem dolikerenas odi zmluva, so phandle le Devleha, savo sas o Del lengere dadengero.

³³ Avke o Joziaš zničinda savoren džungale modlen andral savore Izraelike phuva. Palis prikazinda dojekheske andro Izrael, hoj te služinel ča le RAJESKE, peskere Devleske. Medik ov dživelas, o manuša pes na odvisarde le RAJESTAR, peskere dadengere Devlestar.

O Joziaš oslavinel e Patrađi

35 O Joziaš oslavinelas andro Jeruzalem e Patrađi pre pačiv le RAJESKE. Le Patrađakere bakrores murdarde andro ešebno (peršo) čhon andro dešuštarto (14.) džives. ² Le rašajen ačhađa a zoraldđa len le lačhe lavenca andre služba andro Chramos. ³ Palis le Levitenge, save sas sentňarde le RAJESKE a save sikavenas calo Izrael leskero zakonos, prikazinda: "Thoven e sentňi Archa andro Chramos, so ačhađa o Šalamun, o Izraeliko kralis, le Davidoskero čhavo. Imar na mušinen la buter te prehordinel than thanestar. Akana služinen le RAJESKE, peskere Devleske, the le Izraelitenge, leskere manušenge! ⁴ Andre chramoskeri služba tumen rozulaven andro partiji pal peskere dadengere fameliji avke, sar pisinda o Izraeliko kralis David the leskero čhavo Šalamun.

⁵ Ačhaven tumen andro sentno than avke, hoj jekh partija le Levitengeri te pomožinel po jekha Izraelike famelijake. ⁶ Murdaren le Patrađakere bakrores, sentňaren tumen a pririchtinen le bakrores tumare Izraelike manušenge avke, sar o RAJ phendľa prekal o Mojžiš."

⁷ O Joziaš peskere barvalipnastar diňa prekal savore manuša 3 000 biken the 30 000 bakren the terne kozen sar obetno daros pre Patrađi.

⁸ Leskere vodci tiš dine dari prekal o manuša, rašaja the Leviti. O Chilkihah, Zecharijah the o Jechiel, anglune vodci andro Chramos, dine le rašajenge pre Patrađi 2 600 bakroren the 300 biken. ⁹ O Levitengere vodci – o Konaniah, leskere phrala Šemajah the Netaneel, o Chašabiah, Jeiel the o Jozabad – dine le Levitenge pre obeta 5 000 bakren the kozen a 500 biken.

¹⁰ Sar savore sas pririchtimen pre Patrađakeri oslava, o rašaja the o Leviti ačhenas andro partiji pre peskere thana, sar lenge o kralis prikazinda. ¹¹ Palis murdarkerenas le Patrađakere bakroren, o rašaja kropinenas o rat pro oltaris a o Leviti pal lende cirdenas tele e cipa.

¹² O labarde obeti odthovenas pre sera, hoj pes te del le manušenge pal o fameliji, a on len obetinenas o RAJESKE, avke sar hin pisimen andre le Mojžišoskero zvitkos. Avke kerde the le dobitkoha. ¹³ Le Patrađakere bakrores pekenas pre jag avke, sar majinenas te kerel. O sentne dari tavenas andro čare, pira the kotli a palis oda mas sigo denas le manušenge. ¹⁴ Palis o Leviti pririchtinenas o mas prekal peste the prekal o rašaja andral le Aronoskero potomstvos, bo o rašaja služinenas džiči rači, sar obetinenas o labarde the žiroskere obeti.

¹⁵ Medik sas e oslava, o Leviti pririchtinenas o chaben the prekal o chramoskere stražňika, save ačhenas pre peskere thana, the prekal o lavutara andral le Asafoskeri fajta, save giľavenas, avke sar prikazinda o David, Asaf, Heman the le kraliskero prorokos o Jedutun.

¹⁶ Avke oda džives pre le kraliskero Joziašoskero prikazis sas kerdňi savori služba le RAJESKE avke, hoj oslavinenas e Patrađi a labarenas o labarde obeti pre le RAJESKERO oltaris. ¹⁷ Savore Izraeliti, save ode sas, oslavinenas e Patrađi andre oda časos a palis o Inepos pal o Mare Bi o Droždňi eđa džives. ¹⁸ E Patrađi pes avke andro Izrael na oslavinelas akorestar, sar sas o prorokos Samuel. Nisavo Izraeliko kralis angloda na oslavinelas e Patrađi avke sar o Joziaš, o rašaja, o Leviti the o manuša, save ode sas andral e Judsko the Jeruzalem. ¹⁹ Kadi Patrađi pes oslavinelas andro dešuochtoto (18.) berš, sar kralinelas o Joziaš.

Le Joziašoskero meriben

²⁰ Pal savoreste, sar o Joziaš oprikerďa o Chramos, o Egiptsko kralis Necho peskera armadaha geľa pro mariben pro foros Karkemiš, so hin paš o paňi Euftrat. O Joziaš peskera armadaha geľa angle leste. ²¹ Avke o Necho bičhađa muršen, hoj leske te phenen: "So man hin tuha, Judsko kralina? Me na avľom pro mariben adadžives pre tu, ale upral kada narodos, saveha som andro mariben. O Del mange prikazinda, hoj sigo te džav. O Del hino manca, ma zaačhav man, bo ov tut zničinela!"

²² Ale o Joziaš lestar na odgeľa, aňi na šundľa leskere lava, choc ola lava sas le Devlestar. Preurďa pes a geľa pre leste andro mariben pro rovno than Megiddo.

²³ Ale andro mariben o lukostrelcos le šipoha talinda (trafinda) le Joziaš. Ov phenda peskere služobnikenge: "Ligenen man adarik, bo som igen zrañimen." ²⁴ Avke o služobnika les ile pal leskero verdan, thode les pre aver a odligende andro Jeruzalem, kaj palis muľa. Parunde les andro dadengero hrobos a savore manuŝenge andre Judsko the Jeruzalem sas pharo pal o Joziaš.

²⁵ O prorokos Jeremiaš pal o Joziaš pisinda rovibnaskeri gili. Dži adadžives savore lavutara, o murša the džuvľa, odi gili andro Izrael gilaven, sar peske leperen pro Joziaš. Odi gili šaj arakhen andro Rovibnaskere Gila.

²⁶ Savore aver veci, so o Joziaš kerđa, sar sas oddino le Devleske the sar dolikerelas le RAJESKERO zakonos, ²⁷ ešebnovarestar (peršovarestar), medik na muľa, hin pisimen andro Zvitkos le Izraelike the Judske Krafengero.

O Joachaz kralis andre Judsko

36 Paloda o manuša andral e Judsko ile le Joachaz, le Joziašoskere čhas, a ačhade les andro Jeruzalem kraliske pal leskero dad. ² Le Joachazoske sas bišutrin (23) berš, sar ačhiľa kralis a trin čhon kralinelas andro Jeruzalem. ³ Palis o Egiptske kralis Necho iľa lestar o krališagos a pro Judejci ispidelas, hoj leske te počinen o dañe: 3,4 toni rup the 34 kili somnakaj. ⁴ O Necho ačhađa upral e Judsko the Jeruzalem vaš o kralis le Eljakim, leskere phrales, a diña leske nevo nav Jojakim. Le Joachaz o Necho odligenda andro Egipt.

O Jojakim kralis andre Judsko

⁵ Le Jojakimoske sas bišupandž (25) berš, sar ačhiľa kralis, a andro Jeruzalem kralinelas dešujekh (11) berš. Kerelas oda, so na sas pre dzeka le RAJESKE, peskere Devleske. ⁶ Sar o Jojakim kralinelas, avľa pre leste pro mariben o Babiloňiko kralis Nebukadnecar. Zaiľa les, phandľa le lancenca a odligenda andro Babilon. ⁷ O Nebukadnecar iľa the varesave veci andral o Chramos, odligenda andro Babilon a thođa len andre peskero chramos.

⁸ Savore aver veci, so o Jojakim kerđa, leskere džungipena the o nalačhipena, hin pisimen andro Zvitkos le Judske Krafengero. Pal leste ačhiľa kralis leskero čhavo o Jojachin.

O Jojachin kralis andre Judsko

⁹ Le Jojachinoske sas dešuochto (18) berš, sar ačhiľa kralis andre Judsko, a trin čhon the deš džives kralinelas andro Jeruzalem. The ov kerelas oda, so na sas le RAJESKE pre dzeka. ¹⁰ Sar pregeľa berš, o Nebukadnecar le Jojachin iľa sar otrokos andro Babilon a iľa the o dragane veci andral o Chramos. Ačhađa kraliske le Cidkijah, leskere bačis, andre Judsko the Jeruzalem.

O Cidkijah kralis andre Judsko

¹¹ Le Cidkijoske sas bišujekh (21) berš, sar ačhiľa kralis andre Judsko, a andro Jeruzalem kralinelas dešujekh (11) berš. ¹² Ov kerelas oda, so na sas le RAJESKE pre dzeka, a na pokorinda pes anglo prorokos Jeremiaš, savo vakerelas le RAJESKERE lava. ¹³ O Cidkijah pes vzburinda pro Nebukadnecar, choc leske la veraha andro RAJESKERO nav phenda, hoj leske ela pačivalo. Ov na kamelas te šunel a na kamľa te visarel pes pale ko RAJ, ko Izraeliko Del. ¹⁴ A mek ke oda the savore rašaja the Judske vodci sas so buter napačivale le RAJESKE. Kerenas oda džungipen, so o narodi, save sas pašal lende. Lašarenas le modlen a avke meľarde o Chramos, so o RAJ sentňarda andro Jeruzalem.

¹⁵ O RAJ, o Del lengere dadengero, ke lende furt bičhavelas le proroken, hoj lenge te dovakerel, bo sas leske pharo pal peskere manuša the pal o Chramos.

¹⁶ Ale on kerde ladž olenge, saven bičhađa, asanas leskere prorokendar a na prilenas leskere lava. Avke sas dži akor, medik na sas e cholĭ le RAJESKERI ajsi bari, hoj nič la imar našti odvisarda.

O Jeruzalem zničimen

¹⁷ O RAJ bičhađa pro Jeruzalem le Babiloňike kralis, savo la šablaha andro Chramos murdarda lengere terne muršen. Na mukľa te dživel aňi le ternen či phuren, aňi le muršen či džuvľen, aňi le sasten či nasvalen. Avke o Del savoren diña andre leskere vasta.

¹⁸ Ov iľa andral o Chramos le Devleskero savore bare, cikne the dragane veci, o barvalipen le kraliskero the le uradnikengero a savoro odligenda andro Babilon.

¹⁹ Palis podlabarde o Chramos the savore palaca a čhide tele le Jeruzalemoskere muri. Avke sas zničimen savore dragane veci, so sas andre.

²⁰ Olen, save predžidile, zaiľa andro Babilon. Ode služinenas leske the leskere čhavage sar otroka dži akor, medik e Perzija na preiľa o krališagos. ²¹ Avke pes ačhiľa le RAJESKERO lav, so phenda prekal o Jeremiaš: "Sar e phuv ela omukli, ela la o Šabbatoskero odpočinkos dži akor, medik na predžala eftavardeš (70) berš."

O Kiros premukel le Izraeliten pale khere

²² Andro ešebno (peršo) berš, sar kralinelas o Perziko kralis Kiros – hoj pes te ačhel avke, sar phenda o RAJ prekal o Jeremiaš – o RAJ thođa pro jilo le kraliske le Kiroške, hoj te del te phenel andro lil andre calo peskero krališagos:

²³ "Avke phenel o Perziko kralis Kiros:

'O RAJ, o Del, savo hino upral o űebos, mange diña savore krališagi pre phuv a ačhađa man, hoj leske te ačhavav o Chramos andro Jeruzalem, so hino andre Judsko. Akana savore leskere manuŝendar šaj džan pale ode a mi el lenca o RAJ, o Del!'"

EZDRAŠ

O Izraeliti aven pale andro Jeruzalem

1 Oda sas ešebno (peršo) berš, so kralinelas o kralis Kiros andral e Perzija: Vašoda, hoj pes te ačhel oda, so phendā o RAJ prekal o prorokos Jeremias, o RAJ thođa pro jilo le kraliske Kiroške, hoj te del te džanel andro lil andre calo peskero krališagos:

²“Kavke phenel o Perziko kralis Kiros:

‘O RAJ, o Del, savo hino upral o ņebos, mange diña savore krališagi pre phuv a kidña peske man avri, hoj leske te ačhavav Chramos andro Jeruzalem andre Judsko. ³Akana savore, save san leskere manuša – mi el lenca lengero Del – šaj džan pale andro Jeruzalem andre Judsko, hoj te ačhaven o Chramos le RAJESKERO, savo hin o Del le Izraeloskero. Oda hin o Del, saves pes lašarel andro Jeruzalem. ⁴Dojekh, ko ade bešel, lenge mi pomožinel, hoj pes te dochudel pale khere. Mi den len o rup, somnakaj, sersamos, dobitkos the o dari, so korkore pestar kamen te del prekal o Chramos le Devleskero andro Jeruzalem.’”

⁵Avke o fajtakere vodci le kmeñendar Juda the Benjamin, o rašaja the o Leviti a dojekh, ke kaste o Del prevakerđa, hoj te džal te ačhavel le RAJESKERO Chramos, pes pririchtinenas te džal andro Jeruzalem.

⁶Savore manuša, save bešenas paš lende, len dine rupune čare, somnakaj, sersamos, dobitkos, dragane veci the o dari prekal o Chramos.

⁷O kralis Kiros lenge diña pale o veci andral le RAJESKERO Chramos, so iľa o Nebukadnecar andral o Jeruzalem a thođa andre peskero chramos. ⁸O Perziko kralis Kiros prikazinda, hoj len te anel o Mitredat, leskero pokladnikos, hoj len te pregenel a te del le Judske guverneriske Šešbaccaroske.

⁹Oda sas tranda (30) somnakune čare, ezeros (1 000) rupune čare, bišueña (29) lopatki pro kađidlos, ¹⁰tranda (30) somnakune kuča, štar šel the deš (410) rupune kuča a ezeros (1 000) aver čare.

¹¹Savore čare le somnakastar the rupostar sas 5 400. Kada savoro iľa o Šešbaccar a lidžalas andral o Babilon le manušenca, sar džanas pale andro Jeruzalem.

O manuša save avle pale andro Jeruzalem

2 Kala hine o manuša, saven o kralis Nebukadnecar zaiľa a odligenda andro Babilon, a save pes visarde pale andro Jeruzalem the andre Judsko, dojekh andro peskero foros. ²On avle peskere vodcenca, save sas o Zerubbabel, o Ješua, o Nechemiah, o Serajah, o

Reelajah, o Mordochaj, o Bilšan, o Mispar, o Bigvaj, o Rechum the o Baanah.

A sas oda kajci džene andral o Izraeloskere fajti: ³andral le Parošoskeri fajta sas 2 172 potomki, ⁴andral le Šefatjoskeri 372, ⁵andral le Arachoskeri 775, ⁶andral le Pachat-Moaboskeri fajta – potomki pal o Ješua the o Joab – 2 812, ⁷andral le Elamoskeri 1 254, ⁸andral le Zattuoskeri 945, ⁹andral le Zakkajoskeri 760, ¹⁰andral le Baniskeri 642, ¹¹andral le Bebajoskeri 623, ¹²andral le Azgadoskeri 1 222, ¹³andral le Adonikamoskeri 666, ¹⁴andral le Bigvajoskeri 2 065, ¹⁵andral le Adinoskeri 454, ¹⁶andral le Ateroskeri, saves vičinenas the Chizkija, 98, ¹⁷andral le Becajoskeri 323, ¹⁸andral le Joroskeri 112, ¹⁹andral le Chašumoskeri 223, ²⁰a andral le Gibbaroskeri sas 95 potomki.

²¹The ola manuša, savengere phure dada bešenas andre kala fori, visalile pale: andral o Betlehem 123, ²²andral e Netofa 56, ²³andral o Anatot 128, ²⁴andral o Azmavet 42, ²⁵andral o Kirjat-Jearim, andral e Kefira the andral o Beerot 743, ²⁶andral e Rama the Geba 621, ²⁷andral o Michmas 122, ²⁸andral o Betel the Aj 223, ²⁹andral o Nebo 52, ³⁰andral o Magbiš 156, ³¹andral o Elam 1 254, ³²andral o Charim 320, ³³andral o Lod, Chadid the Ono 725, ³⁴andral o Jericho 345, ³⁵the andral o Senaah 3 630 manuša.

³⁶Kala savore hine potomki andral le rašajengere fajti, save avle pale: andral le Jedajoskeri 973 potomki le Ješuaskere, ³⁷andral le Immeroskeri 1 052, ³⁸andral le Paščuroskeri 1 247 ³⁹a andral le Charimoskeri 1 017.

⁴⁰Kala savore hine potomki andral Levitengere fajti, save avle pale: 74 andral e fajta le Ješuaskeri the Kadmieloskeri, save sas potomki le Hodavijoskere.

⁴¹O chramoskere lavutara: 128 potomki le Asafoskere;

⁴²Ola, save stražinenas paš o chramoskere brani: 139 potomki le Šallumoskere, le Ateroskere, le Talmonoskere, le Akkuboskere, le Chatitoskere the le Šobajoskere.

⁴³O chramoskere služobnika sas o potomki le Cichasoskere, le Chasufaoskere, le Tabbaotoskere, ⁴⁴le Keroskere, le Sijoskere, le Padonoskere, ⁴⁵le Lebanoskere, le Chagaboskere, le Akkuboskere, ⁴⁶le Chagaboskere, le Šamlajoskere, le Chananoskere, ⁴⁷le Giddeloskere, le Gacharoskere, le Reajoskere, ⁴⁸le Recinoskere, le Nekodaoskere, le Gazzamoskere, ⁴⁹le Uz-zoskere, le Paseachoskere, le Besajoskere, ⁵⁰le Asnoskere, le Meunimoskere, le Nefusimoskere, ⁵¹le Bakbukoskere, le Chakufoskere, le Charchuroskere, ⁵²le Baclutoskere, le Mechidaoskere, le Charšaoskere,

⁵³ le Barkosokere, le Siseroskere, le Temachoskere, ⁵⁴ le Neciachoskere the le Chatifoskere.

⁵⁵ Le Šalamunoskere služobnikengere potomki, save avle pale, sas le Sotajoskere, le Soferetoskere, le Perudasoskere, ⁵⁶ le Jaalokere, le Darkonoskere, le Giddelokere, ⁵⁷ le Šefatjokere, le Chattiloskere, le Pocheret-Haccebajimoskere the le Amioskere. ⁵⁸ Savore chramoskere služobnika the o potomki le Šalamunoskere služobnikengere, sas 392.

⁵⁹ The 652 manuša avle pale andral o Babiloňike fori Tel-Melach, Tel-Charša, Kerub, Addan the Immere, ale ča našti presikade, hoj hine Izraeliti. ⁶⁰ Sas andral o fajta le Delajoskeri, le Tobijoskeri the le Nekodaskeri.

⁶¹ Kala trin fajti našti presikade, hoj sas rašaja: le Chobajoskeri, le Hakkocoskeri the le Barzillajoskeri. O Barzillaj sas murš, savo peske iľa romňa le Barzillajoskera čha andral o Gilead a iľa peske lakero nav.

⁶² On rodenas peskero fajtakero zvitkos, kaj sas zapisimen ale les na arakhle, a vašoda len premukle andral e rašajiko služba. ⁶³ Le kraliskero guverneris lenge prikazinda, hoj našti chan le chabenestar, so hino obetimen le Devleske, medik ode na sas rašaj, savo šaj phučel le RAJESTAR prekal o losi Urim the Tummim.

⁶⁴ Savore, save pes visarde pale andre Judsko, sas jekhetane 42 360 manuša. ⁶⁵ A mek avle lenca 7 337 sluhi the služki a 200 džuvľa the murša, save gilavenas. ⁶⁶ Len sas 736 graja, 245 mulici, ⁶⁷ 435 ťavi the 6 720 somara.

⁶⁸ Sar ola manuša doavle ke le RAJESKERO Chramos andro Jeruzalem, varesave fajtakere vodci denas o dari pro Chramos korkore pestar, hoj les pale te ačhaven pre oda than, kaj ačhelas. ⁶⁹ Dojekh lendar anenas andro pokladni ajci, keci šaj denas pre buči pro Chramos: 500 kili somnakaj, 2 800 kili rup the 100 rašajike plašti.

⁷⁰ O rašaja, o Leviti the varesave le Izraelitendar ačhile te bešel andro Jeruzalem; o lavutara, o chramoskere stražnika the služobnika andre peskere fori; a varesave le Izraelitendar andro fori, kaj bešenas lengere phure dada.

Pale ačhaven o oltaris

3 Sar sas pašes o eftato čhon, akor sar o Izraeliti imar bešenas andre peskere fori, zgele pes jekhetane savore andro Jeruzalem. ² O Ješua, le Jocadacoskero čhavo, peskere pašutnenca, the o Zerubbabel, le Šealtieloskero čhavo, peskere pašutnenca jekhetane avre rašajenca peske phende, hoj ačhavana oltaris le Izraeloskere Devleske, hoj te obetinen upre o labarde obeti, avke sar hin pisimen andro zakonos le Mojžišoskero, le Devleskero muršeskero. ³ O oltaris ačhade pre oda than, kaj angloda ačhelas, choc te daranas le manušendar, save bešenas pašal lende. Avke chudle pale te anel tosara the rači o labarde obeti le RAJESKE. ⁴ Oslavinenas the o Inepos le Stankengero, avke sar hin pisimen, a sako džives anenas ajci labarde obeti, keci sas dino pre oda džives. ⁵ Paloda anenas o sakodživeseskere obeti, o obeti pro inepos le Neve Čhoneskero the pre dojekh beršeskero

inepos le RAJESKERO, a furt o manuša anenas le RAJESKE e obeta, so denas korkore pestar. ⁶ Andro ešebno (peršo) džives eftate čhoneskero chudle te anel le RAJESKE o labarde obeti, choc te na sas thode o chramoskere zakladi.

Keren o zakladi pro Chramos

⁷ O manuša dine o love le řesareng the le muršenge, save kerenas le barenca. Dine o chaben, o pijiben the o olejos le Sidončanenge the le Tirčanenge, hoj te anen o cedroskere kašta la lođaha andral o Libanon ke Joppa, avke sar lenge domukľa o Perziko kralis Kiros. ⁸ E buči pro Chramos chudle te kerel andro dujto berš andro dujto čhon, sar avle pale andro Jeruzalem. Sas oda kala džene: o Zerubbabel, le Šealtieloskero čhavo, the o Ješua, le Jocadacoskero čhavo, peskere dženenca, le rašajenca, le Levitenca the olenca, save avle andral o Babilon. Ačhade le Leviten, save sas phureder sar biš (20) berš, upral o manuša, save kerenas e buči pre le RAJESKERO Chramos. ⁹ Avke sas upral ola džene, save kerenas o Chramos, o Ješua, leskere čhave the phrala, o Kadmiel peskere čhavenca andral le Hodavijoskeri fajta the le Chenadadoskere čhave peskere čhavenca the phralenca, bo sas Leviti.

¹⁰ Sar chudle te kerel o chramoskere zakladi, o rašaja andre peskere plašti le trubenca ačhenas pre peskere thana a o Leviti andral le Asafoskeri fajta ačhenas pre peskere thana le cimbalenca, hoj te lašaren le RAJES, avke sar diňa avri o kralis David. ¹¹ Lašarenas le gilenca le RAJES a palikerenas leske:

“O RAJ hino lačho,

leskero jileskeriben upral o Izrael likerel pro furt.”

Savore manuša igen radisaľonas bara vikaha. Lašarenas le RAJES, hoj pes chudľa e buči pro chramoskere zakladi. ¹² Ale o phureder rašaja, Leviti the fajtakere vodci, save angloda dikhle o purano Chramos, igen rovenas, sar dikhle, hoj pale keren o chramoskere zakladi. Ale aver džene radisaľonas bara vikaha, ¹³ hoj ņiko našti rozprindžarelas e radišagoskeri vika le rovibnastar, bo o manuša igen vriskinenas a dural len šundoľas.

E buči pro Chramos kamen te zaačhavel

4 Sar šunde le Judengere the Benjaminengere ņeprijatěľa, hoj ola, save sas zaile andro Babilon, pes visarde pale a ačhaven o Chramos le RAJESKE, le Izraeloskere Devleske, ² avle ko Zerubbabel the ko fajtakere vodci a phende lenge: “Kamas the amen te ačhavel tumenca, bo the amen lašaras tumare Devles, avke sar tumen. Amen leske obetinas ole dživesestar, sar amen ade andă o Asiriko kralis Esar-Chaddon.”

³ Ale o Zerubbabel, o Ješua the aver vodci andral o Izraelike fajti lenge phende: “Tumen the amen našti ačhavas jekhetane o Chramos amare Devleske. Ča amen korkore les mušinas te ačhavel le RAJESKE, le Izraelike Devleske, avke sar amenge prikazinda o Perziko kralis Kiros.”

⁴ Avke o manuša andral odi phuv kerenas sa pre oda, hoj le Judske manušen te na el dzeka te kerel buči, a daravenas len avri, hoj te na ačhaven o Chramos.

⁵ Mek ke oda peske počoral počinenas le bare uradņiken, hoj te zničinen lengeri buči. Kada kerenas furt, sar kralinelas o Perziko kralis Kiros dži akor, medik na kralinelas o kralis Darius.

O nepřijatelja pisinen lil le kraliske

⁶ Sar chudľa te kralinel o kralis Ahasver, pisinde lil, andre savo namištes vakerenas pro manuša andral e Judsko the Jeruzalem.

⁷ A sar kralinelas o Artaxerxes, pisinde leske lil o Bišlam, Mitredat, o Tabeel the aver manuša, save lenca kerenas e buči. Oda lil sas pisimen andre Aramejiko čhib a kampelas les te prethovel.

⁸ O uradņikos Rechum the o pisaris Šimšaj pisinde le kraliske Artaxerxesoske kajso lil pro Jeruzalem:

⁹ "O uradņikos Rechum, o pisaris Šimšaj the aver lengere manuša, o sudci, uradņika the o vodci upral o manuša andral o Uruk, Babilon the o Elamiti andro Šušan ¹⁰ a mek aver narodi, saven o baro the slavno Asnappar zaila a thođa te bešel andre Samarijike fori the andre provincija pal o paņi Euftrat."

¹¹ Andre oda lil sas pisimen:

"Le kraliske Artaxerxesoske: Amen sam tire služobņika, andral e provincija pal o Euftrat.

¹² Das te phenel le kraliske, hoj o Židi, save avle tutar ade te bešel andro Jeruzalem, chudle pale te ačhavel kada zoralo a nalačo foros a oprikeren pašal leste o muri the o zakladi. ¹³ Mi džanel olestar o kralis, hoj sar ela kada foros ačhado a leskere zorale muri oprikerde, preačhena tuke te počinel o clo the o daņe a kada ela prekal o kralis namištes. ¹⁴ No akana te sam pačivale le kraliske, našti amen dikhas pre oda, sar keren namištes le kraliske, a vašoda akana le kraliske das kada te džanel. ¹⁵ Bo te dikheha andro kralengero zvitkos, dodžaneha tut, hoj o Jeruzalem pes čirlastar vzburlnelas pro kralis, a vašoda sas oda foros zničimen. ¹⁶ Avke das te phenel le kraliske, hoj sar ela kada foros ačhado a leskere muri oprikerde, na ela tut zor upral e provincija Euftrat."

E buči pro Chramos zaačhadī

¹⁷ O kralis odphenda le uradņikoske Rechumoske, le pisariske Šimšajoske the ole manušenge, save bešenas andre Samarija the andre provincija pal o Euftrat, kada:

"Smirom tumenge.

¹⁸ Oda lil, so mange bičhadān, sas prethodo a prengendo angle mande. ¹⁹ Me prikazindom, hoj te roden andro zvitki, a on arakhle, hoj oda foros pes čirlastar vzburlnelas a kerenas pharipena avre krafenge. ²⁰ Andro Jeruzalem sas zorale kraľa, save kralinenas pal cali phuv pal o Euftrat a počinenas lenge o daņe the o clo. ²¹ Akana den avri o prikazis, hoj ola murša te preačhen te ačhavel o foros, a te na chuden pale te ačhavel,

medik me na dava aver prikazis. ²² Zaačhaven oda takoj, hoj te na keren le kraliske goreder."

²³ Sar le kraliskero lil pregende anglo Rechum, Šimšaj the angle lengere manuša, on sigo gele andro Jeruzalem a andre kraliskero nav zaačhade te kerel e buči le Židen.

²⁴ Avke e buči pre le Devleskero Chramos andro Jeruzalem sas zaačhadī, medik na kralinelas dujto berš o kralis Darius andre Perzija.

Ačhaven pale o Chramos

5 O prorokos Aggeus the o Zachariaš, le Iddoskero čhavo, prorokinenas le Židenge andre Judsko the Jeruzalem andro nav le Devleskero Izraeloskero, savo sas upral lende. ² Akor le Šealtieloskero čhavo o Zerubabel the le Jocadakoskero čhavo o Ješua pes mukle takoj te ačhavel le Devleskero Chramos andro Jeruzalem. Lenca sas the le Devleskere proroka a pomožinenas lenge.

³ Andre oda časos ke lende avľa o Tattenaj, savo sas guverneris andro Zapadno Euftrat, o Šetar-Bozenaj the ola, save jekhetane lenca kerenas, a phučle lendar: "Ko tumenge domukľa te ačhavel kada Chramos a te prikerel kala muri?" ⁴ A mek lendar phučle: "Sar pes vičinen o murša, save keren e buči pro Chramos?" ⁵ Ale o Del merkinelas pro Židovike vodci, avke lenge na zaačhade te kerel e buči, medik na pisinde le kraliske Darioske a medik lenge ov na odphenda pale.

O lil prekal o Darius

⁶ Kada lil pisinde o guverneris Tattenaj, Šetar-Bozenaj, lengere murša the o vodci andro Zapadno Euftrat a bičhade le kraliske Darioske. ⁷ Andre sas pisimen:

"Le kraliske Darioske: Smirom tuke, kralina!

⁸ Mi džanel o kralis pal kada, hoj amen geľam andre Judsko phuv ko Chramos le bare Devleskero. On les ačhaven le bare barune kvadrendar a thoven o kaštune hranoli andro fali. Dojekh lendar kerel pačivalones e buči pro Chramos a džal lenge mištes.

⁹ Akor phučľam le vodcendar: 'Ko tumenge domukľa te ačhavel kada Chramos a te oprikerel kala muri?'

¹⁰ Phučľam lendar the pal lengere nava, hoj tuke te das te džanel, a pisindam o nava le muršengere, ko hine lengere vodci.

¹¹ On amenge odphende: 'Amen sam služobņika le Devleskere, savo hino Del pro űebos the pre phuv, a ačhavas kada Chramos, so sas ačhado imar anglo but berša. Ačhavelas a dokerđa les o baro Izraeloskero kralis. ¹² Ale vaš oda, hoj amare phure dada anenas andre choľi le Devles pro űebos, diņa len andro vasta le Babiloņike kraliske Nebukadnecaroske andral o Chaldej. Ov zničinda kada Chramos a odľigenda le manušen sar zaphandlen andro Babilon.

¹³ Ale andro ešebno (peršo) berš, sar kralinelas o Kiros andro Babilon, prikazinda, hoj pes pale te ačhavel le Devleskero Chramos. ¹⁴ A mek the visarda pale o

somnakune the rupune veci, so o Nebukadnecar iľa andral o Chramos andro Jeruzalem a thođa andre peskero chramos andro Babilon. Palis o Kiros kale veci diňa le Šešbaccaroske, saves ačhađa guverneriske upral e Judsko ¹⁵ a phenda leske: "Le kala veci a lidža len andro Chramos andro Jeruzalem! A mi ačhavel pes le Devleskero Chramos pre oda than, kaj sas ešebnovar (peršovar) ačhado." "

¹⁶ Palis oda Šešbaccar geľa a ačhađa o zakladi pre le Devleskero Chramos andro Jeruzalem. Ole dživesestar pes ačhavel dži akana, ale mek nane dokerdo.

¹⁷ Akana, te o kralis kamela, mi rodel andro Babiloňike kralengere zvitki, či o Kiros diňa avri, hoj kada Chramos andro Jeruzalem pes šaj pale ačhavel. Mi del amenge o kralis te džanel, so peske pal oda gondolinel."

O Darius arakhel o zvitkos

6 Avke o kralis Darius prikazinda, hoj te roden andro Babiloňike kralengere zvitki, či o Kiros diňa avri, hoj o Chramos andro Jeruzalem pes šaj pale ačhavel. ² Arakhle jekh zvitkos andro palacis andro foros Ekbatana andre provincija Medija a sas andre pisimen kada:

³ "Andro ešebno (peršo) berš prikazinda o kralis Kiros, sar kralinelas, hoj pale te ačhaven le Devleskero Chramos andro Jeruzalem:

"Mi ačhavel pes kada Chramos sar than, pre savo pes anela o chabeneskere the o labarde obeti. O Chramos mi el bišuefta (27) metri učo the bišuefta metri buchlo. ⁴ O muri mi en ačhade kavke – trin šori barune kvadri a jekh šoros le kaštestar. Savoro mi el počimen andral e kraliskeri pokladňica. ⁵ A mi den pale the o somnakune the rupune veci, so o kralis Nebukadnecar iľa andral o Jeruzalemoskero Chramos a odligenda andro Babilon. Ola veci mi en thode pale pre lengero than, andro Jeruzalem, andre le Devleskero Chramos! "

O Darius domukel e buči pro Chramos

⁶ Palis o Darius diňa te phenel le Tattenajoske, savo sas uradňikos andro Zapadno Euftrat, le Šetar-Bozenajoske, olenge, save jekhetane lenca kerenas, the le vodcenge pašal o paňi Euftrat:

"Džan odarik het! ⁷ Muken len, mi keran e buči pre le Devleskero Chramos! O Židoviko guverneris the lengere vodci mi ačhaven le Devleskero Chramos ode, kaj sas angloda. ⁸ Kada tumenge prikazinav, sar pes majinen te likerel ko Židovike vodci, save keran e buči pre le Devleskero Chramos. Mi el lenge savoro počimen le kraliskera pokladňatar the le daňendar andral o Zapadno Euftrat, hoj e buči te na zaačhel, ⁹ a sako džives furt te del le rašajenge andro Jeruzalem savoro, so lenge kampela: terne biken, bakroren the bakren pre labardi obeta le Devleske, savo hino pro ňebos, vaj o điv, lon, mol, the olejos, ¹⁰ hoj te anen le ňeboskere Devleske ajse obeti, so leske ela pre dzeka, a te modľinen

pes vaš oda, hoj le kralis the leskere čhaven te el bachtalo dživipen. ¹¹ A mek prikazinav: te vareko tumendar na dolikerela mire lava, cirdela pes avri andral leskero kher e hreda, so likerel calo kher. Palis pre odi hreda les thovena upre a primarena. A leskero kher ela zničimen sar jekh kopa šmeci. ¹² O Del, savo peske kidňa avri o Jeruzalem, hoj ode te el lašardo, mi zničinel savore kraľen the naroden, save na kamena te dolikerel mire lava a kamena te zničinel o Chramos andro Jeruzalem. Me o Darius dav avri kale prikazi a mušinen pes te dolikerel!"

O Chramos hino dokerdo

¹³ Palis o Tattenaj, o guverneris andro Zapadno Euftrat, o Šetar-Bozenaj the lengere murša kerde sa avke, sar lenge prikazinda o kralis Darius. ¹⁴ Avke o Židovike vodci šaj dureder ačhavenas o Chramos a e buči lenge barolas tel lengere vasta, avke sar prorokinenas o proroka Aggeus the Zachariaš, le Iddoskero čhavo. O Chramos dokerde avke, sar prikazinda le Izraeloskero Del a sar prikazinde o Perzike kraľa: Kiros, Darius the Artaxerxes. ¹⁵ Le Devleskero Chramos dokerde andro trito džives andro čhon Adar andro šovto berš, sar kralinelas o Darius.

O Chramos sentňaren

¹⁶ Palis o Izraeliti, rašaja, Leviti the okla aver, save avle andral o Babilon, kaj sas zaile, oslavinenas radišagoha, hoj sentňarde o Devleskero Chramos. ¹⁷ Sar sentňarenas o Chramos, obetinde šel (100) biken, duj šel (200) bakren the štar šel (400) terne bakroren the dešuduj (12) capen vaš o bini cale Izraeloskere a oda jekh capos vaš jekh Izraeliko kmeňos. ¹⁸ Palis ačhade andre chramoskeri služba andro Jeruzalem le rašajen the Leviten, avke sar hin pisimen andre le Mojžišoskero zvitkos.

E Patrađi oslavinen

¹⁹ Akor ola manuša, save avle pale andral o Babilon, oslavinenas e Patrađi andro dešuštarto (14.) džives andro ešebno čhon. ²⁰ O rašaja the o Leviti pes obžuzarde, savore sas žuže a avke o Leviti šaj murdarenas le Patrađakere bakrores prekal o manuša, save avle pale, prekal peskere pašutne rašaja the prekal peste. ²¹ Palis o Izraeliti chanas le Patrađakere bakrores, a na ča ola manuša, save sas zaile andro Babilon, ale the ola, save omukle o džungipen, so kerenas aver narodi, a palis avle te rodel le RAJES, le Izraelike Devles. ²² Efta dživesa savore Izraeliti oslavinenas e Patrađi, o Inepos pal o Mare Bi o Drožđi. O RAJ len pherarda le radišagoha, bo thođa pro jilo le Asirike kraliske, hoj lenge te pomožinel andre buči pro Chramos le Izraelike Devleske.

Le Ezdrašoskero rodokmeňos

7 Pal kada savoro, andro časos, sar kralinelas o Perziko kralis o Artaxerxes, o rašaj Ezdraš avľa

khatar o Babilon andro Jeruzalem. Kada hin le Ezdrašoskero rodokmeños: Leskero dad sas o Serajah, leskero o Azariah, leskero o Chilkijah, ² leskero o Šalum, leskero o Cadok, leskero o Achitub, ³ leskero o Amariah, leskero o Azariah, leskero o Merajot, ⁴ leskero o Zerachijah, leskero o Uzzi, leskero o Bukki, ⁵ leskero o Abišuas, leskero o Pinchas, leskero o Eleazar a leskero o Aron, savo sas nekbareder rašaj.

O Ezdraš avel andro Jeruzalem

⁶ O Ezdraš avla upre andro Jeruzalem andral o Babilon. Sas pisaris, savo mištes džanelas le Mojšioskero zakonos, so diña o RAJ, o Del le Izraeloskero. O kralis les delas savoro, so lestar mangelas, bo o vast le RAJESKERO, leskere Devleskero, sas upral leste. ⁷ Leha avenas andro Jeruzalem varesave Izraeliti, o rašaja, o Leviti, o lavutara, o stražnika the o služobnika le chramoskere. Sas oda andro eftato berš, sar kralinelas o Artaxerxes andre Perzija. ⁸ Ov dogeľa andro Jeruzalem pro pandžto čhon andre oda berš. ⁹ Ešebno (peršo) džives andro ešebno čhon odgeľa andral o Babilon a andro ešebno džives andro pandžto čhon dogeľa andro Jeruzalem, bo o Del upral leste likerelas peskero vast. ¹⁰ O Ezdraš sas cale jileha oddino te siklöl o zakonos le RAJESKERO a te dolikerel les, a hoj te sikavel le Izraelitenge ole zakoni the prikazi.

Le kraliskero lil le Ezdrašoske

¹¹ Oda hin o lil, so odpisinda o kralis Artaxerxes le Ezdrašoske, savo sas zakoňikos the rašaj a savo džanelas mištes le RAJESKERO zakonos the leskere prikazi prekal o Izrael:

¹² "Me, o Artaxerxes, o kralis upral savore kraľa.

Le rašaske Ezdrašoske, savo sikavel o zakonos le ňeboskere Devleskero:

Smirom tumenge!

¹³ Me prikazinav, hoj šaj džan tuha savore andral miro krališagos, ko kamena te džal andro Jeruzalem: o Izraeliti, rašaja the Leviti. ¹⁴ O kralis jekhetane leskere efa radcenca tut bičhavel, hoj te dikhes, či dolikeren andro Jeruzalem the Judsko o zakonos tire Devleskero, so hino tute andro vasta. ¹⁵ Le tuha o rup the o somnakaj, so me the mire radci das sar dari le Izraeloskere Devleske, saves hin o Chramos andro Jeruzalem, ¹⁶ a savoro rup the somnakaj, so skideha andre cali provincija Babilon, a the o dari, so dena o manuša the o rašaja prekal o Chramos lengere Devleskero andro Jeruzalem. ¹⁷ Dodikh mištes pre oda, hoj vaš kala love te cines biken, bakren, bakroren, điv the mol a obetin len pro oltaris andro tumaro Devleskero Chramos andro Jeruzalem!

¹⁸ Tu tire manušenca šaj keren oda, so kamen le rupoha the somnakaha, so ačhela. Keren oda, so kamel tumaro Del. ¹⁹ Lidža anglo Del andro Jeruzalem o nadobi, so tuke sas dine pre služba andro Chramos tumare Devleskero. ²⁰ A so mek kampela andro

Chramos tire Devleskero, počin andral le kraliskeri pokladňa.

²¹ Me o kralis Artaxerxes oleha prikazinav savore pokladňikenge andre provincija Zapadno Euftrat, hoj te den le rašaske Ezdrašoske, savo mištes džanel o zakonos le ňeboskere Devleskero, savoro, so tumendar mangela: ²² šaj den dži 3,4 toni † rup, 10 toni †† điv, 2 000 litri ‡ mol, 2 000 litri †† olivovo olejos a lon keci kampela. ²³ Kampel te kerel savoro, so kamel o ňeboskero Del prekal peskero Chramos, hoj te na avel leskeri cholí pre miro krališagos the mire čhave. ²⁴ A mek tumenge phenav, hoj ňiko našti mangel ňisave daňe abo clo le rašajendar, le Levitendar, le stražnikendar, či le služobnikendar, aňi olendar, save gilaven, andre le Devleskero Chramos.

²⁵ Tu, Ezdraš, ker godaha avke, sar tut o Del diña, ačhav sudcen the uradňiken, save mištes džanen o zakonos tire Devleskero a mi lidžan le manušen andro Zapadno Euftrat, a ko na džanela o zakonos, oles sikaven! ²⁶ Dojekh, ko na šunela o zakonos tire Devleskero abo o zakonos le kraliskero, mi el takoj odsudzimen pro meriben, abo mi el avritradlo andral odi phuv, abo mi el čhido andre bertena, abo mi lel pes lestar savoro, so les hin!"

O Ezdraš lašarel le Devles

²⁷ Mi el barardo o RAJ, o Del amare dadengero, savo thođa pro jilo le kraliske, hoj kavke te del pačiv le RAJESKERE Chramos andro Jeruzalem. ²⁸ O RAJ avke kerđa, hoj o kralis, leskere radci the savore vodci mange presikade o jileskeriben. Le Devleskero vast man zoraľarđa a me prevakerďom le Izraeloskere vodcen, hoj te aven manca upre andro Jeruzalem.

O manuša, save avle le Ezdrašoha

8 Kala vodci avle manca avri andral o Babilon akor, sar kralinelas o Artaxerxes, jekhetane olenca, andral lengere fajti, save sas zapisimen andre lengero rodokmeños. ² Sas oda kala:

andral e Pinchasoskeri fajta o Geršom;

andral e Itamariskeri fajta o Daniel;

andral le Davidoskeri fajta o Chattuš, ³ savo sas čhavo le Šechanioskero;

andral le Parošoskeri fajta o Zecharijah, saveha sas zapisimen 150 murša;

⁴ andral le Pachat-Moaboskeri fajta o Eljehoenaj, le Zerachijoskero čhavo, a leha 200 murša;

⁵ andral e Zattuoskeri fajta o Šechaniah, le Jac hazieloskero čhavo, a leha 300 murša;

⁶ andral le Adinoskeri fajta o Ebed, le Jonatanoskero čhavo, a leha penda (50) murša;

⁷ andral le Elamoskeri fajta o Ješajah, le Atalijoskero čhavo, a leha eftavardeš (70) murša;

† Oda hin 100 talenti. †† Oda hin 100 kori. ‡ Oda hin 100 bati.
†† Oda hin 100 bati.

⁸ andral le Šefatjoskeri fajta o Zebadijah, le Michaeloskero čhavo, a leha ohtovardeš (80) murša;

⁹ andral le Joaboskeri fajta o Obadijah, le Jechieloskero čhavo, a leha 218 murša;

¹⁰ andral le Baniskeri fajta o Šelomit, le Josifijoskero čhavo, a leha 160 murša;

¹¹ andral le Bebajoskeri fajta o Zecharijah, le Bebajoskero čhavo, a leha bišuochto (28) murša;

¹² andral le Azgadoskeri fajta o Jochanan, le Hakkatanoskero čhavo, a leha 110 murša;

¹³ posledne andral le Adonikamoskeri fajta o Elifelet, o Jeiel the o Šemajah a lenca šovardeš (60) murša;

¹⁴ andral le Bigvajoskeri fajta o Utaj the o Zabud a lenca eftavardeš (70) murša.

O služobnika prekal o Chramos

¹⁵ Palis savoren zvičindom paš o pañi, so džal andro foros Ahava, a ačhilam ode trin dživesa. Rozdikhľom man maškar o manuša the rašaja, ale na arakhľom maškar lende aňi jekhes Levitas. ¹⁶ Akor vičindom paš ma le vodcen le Eliezer, le Ariel, le Šemajah, le Elnatan, le Jarib, le Elnatan, le Natan, le Zecharijah. Vičindom the le Mešullam a mek le Jojarib the le Elnatan †, save sikavenas o zakonos. ¹⁷ Prikazindom lenge, hoj te džan ko Iddo, savo sas vodcas andre Kasifija, a te mangen lestar the okle Levitendar, le chramoskere služobnikendar, hoj te bičhaven ke amende muršen pre služba andre le Devleskero Chramos. ¹⁸ Vašoda, bo le Devleskero lačno vast sas pre amende, bičhade amenge le Šerebiah, godaverones muršes, savo sas Levitas andral le Machlioskeri fajta, leskere dešuochto (18) čhavenca the phralenca. ¹⁹ Bičhade mek le Chašabiah the Ješajah le biš (20) pašutnenca andral le Merariskeri fajta, ²⁰ the 220 chramoskere služobniken, saven angloda o David the o vodci dine le Levitenge, hoj lenge te pomožinen andre služba. Kala savore sas zapisimen pal peskere nava.

O Ezdraš the o manuša pes poscinen a modľinen

²¹ Palis paš o pañi Ahava diňom avri o postos, hoj pes te pokorinas anglal peskero Del a te mangas lestar bachtalo drom, hoj te chrañinel amen, amare čhaven the amaro barvalipen, sar džaha andro Jeruzalem. ²² Ladžavas man te mangel le kralistar slugađen the muršen pro graja, hoj amen te chrañinen le nepřijatendar, sar džaha le dromeha. Se phendám le kraliske: "O vast amare Devleskero hino upral savore, save les roden, ale leskeri bari choľi hiňi pre savore, save les omuken." ²³ Avke pes vaš oda poscinahas a mangahas amare Devles a ov amen šundá avri.

²⁴ Palis mange kidňom avri dešuduje (12) anglunen rašajen, the le Šerebiah, le Chašabiah the mek deše avren. ²⁵ Avke lenge odvažindom o rup, somnakaj, o nadobi prekal o Chramos, so dine o kralis, leskere radci, o vodci the savore Izraeliti prekal le Devleskero

† Trine muršen sas nav Elnatan.

Chramos. ²⁶⁻²⁷ Savoro ode sas: biš the duj (22) toni rup; šel (100) rupuno nadobi, so važinelas eftavardeš (70) kili; 3,4 toni somnakaj; biš somnakune čare, so važine-nas buter sar ochto kili; a duj bronzune nadobi, so sas dragane sar o somnakaj.

²⁸ Phendom lenge: "Tumen san sentňarde prekal o RAJ the kala veci a o rup le somnakaha hino sar e obe-ta le RAJESKE, tumare dadengere Devleske. ²⁹ Starinen pes pal oda a merkinen upre, medik len na odvažinena a na dena le rašajenge, le Levitenge the le Izraelike vodcenge andre le RAJESKERO Chramos andro Jeruzalem." ³⁰ Avke o rašaja the o Leviti lendar ile o rup, somnakaj the ola nadobi, hoj len te odlidžan andro Jeruzalem, andre le Devleskero Chramos.

Aven andro Jeruzalem

³¹ Andro dešudujto džives andro ešebno (peršo) čhon odgeľam le paňestar Ahava a džahas andro Jeruzalem.

Le Devleskero vast sas upral amende. Ov amen chrañinelas le nepřijatendar the le zbujnikendar.

³² Sar doavľam andro Jeruzalem, ačhilam ode trin dživesa. ³³ Pro štarto džives geľam andro Chramos a odvažindam o rup, somnakaj the o nadobi andro Chramos le rašaske, le Meremotoske, saveske sas dad o rašaj Urijah. Sas paš oda o Eleazar, le Pinchasoskero čhavo, the o duj Leviti o Jozabad, le Ješuaskero čhavo, the o Noadiah, le Binnujoskero čhavo. ³⁴ Savoro pes zgenďa a važindá. E vaha dojekha vecatar sas zapisimen.

³⁵ Palis o manuša, save avle andral o Babilon, ande o labarde obeti le Izraeloskere Devleske. Obetinde dešuduj biken vaš calo Izrael, eňavardeš the šov (96) bakren, eftavardeš the ehta (77) terne bakroren the dešuduj capen sar obeta vaš lengere bini. Kada savoro sas obetimen le RAJESKE sar labardi obeta. ³⁶ Palis dine le kraliskere ľila le uradňikenge the le guvernerenge andre provincija Zapadno Eufat. Avke on pomožine-nas le manušenge a denas oda, so kampelas pre le Devleskero Chramos.

O romňija andral aver narodi

9 Sar pes kada savoro imar kerďa, avle ke ma o Izraelike vodci a phende: "O Izraelike manuša, rašaja the o Leviti pes na oddelinde le narodendar, save bešen paš amende: o Ammončana, o Moabčana, o Egiptana, o Kanaančana, o Chetitana, o Perizeja, o Jebuseja the o Amoreja, a keren ola džungale veci so the on. ² O Izraeloskere murša peske the prekal peskere čhave ile romňijen andral kala narodi a kaleha meľarde le Devleskere sentne manušen le cudzincen-ca. Amare vodci the uradňika kada binos kerde sar ešebne (perše)."

³ Sar oda šundom, rozčhindom pre ma o ruchos the o plaštós a cirdavas mange o bala pal o šero the pal e brada. Bešľom mange a somas bijal peste andre žaľa. ⁴ Akor pes zgele ke ma savore manuša, save daranas le Izraeloskere Devleskere lavestar vaš oda binos, so

kerde o Židi, save avle pale andral o Babilon. Me ode bešavas andre bari žala dži e račakeri obeta.

O Ezdraš pes modlinel

⁵ Paš e račakeri obeta uštilom pal oda than, kaj man pokorindom a le rozčingerde ruchoha the plaštoha peľom pro khoča, hazdňom upre o vasta a mangavas le RAJES, peskere Devles:

⁶ "Devla miro, igen man ladžav te hazdel miro muj upre ke tu, miro Del, bo amare bini amen prebararde a amaro nalačhipen imar hino dži paš o ňebos. ⁷ Kerahas baro nalačhipen akorestar, sar sas amare phure dada, dži adadžives. Vaš amare nalačhipena samas amen, amare kraľa the amare rašaja dine andro vasta avre kraľenge: On amen murdarde, ile amen zaphandlen het andral amari phuv, čorde amaro barvalipen a kerde amenge ladž, avke sar hin the adadžives.

⁸ Akana, RAJEJA, Devla amaro, tu salas pro frima časos ke amende jileskero a mukľal varekas amendar te avel pale andral o Babilon a te dživel andro smirom andre kada sentno foros. Tu amen cirdňal avri andral o otroctvo a diňal amen nevo dživipen. ⁹ A choc sam otroka, tu amen na omukľal andre amaro otroctvos. Ale kerdal, hoj o Perzike kraľa te en ke amende jileskere a te muken amen te džal te dživel nevo dživipen a te ačhavas pale o Chramos, so sas rozčhido. A diňal amen muros andre Judsko the Jeruzalem, hoj amen leha te chraňines.

¹⁰ Ale akana, so šaj tuke phenas, Devla amaro? Se omukľam tire prikazaňja, ¹¹ so amenge diňal prekal tire služobňika-proroka, sar phendal: 'E phuv savi džan, peske te zalel, hiňi melardı, bo o narodi, save andre bešen, la pherarde jekhe agorestar dži ke aver le nalačhipnaha the džungipnaha. ¹² Vašoda ma den tumare čhajen romňenge lengere čhavenge, aňi ma len peskere čhavenge lengere čhajen! Ma pomožinen lenge, hoj len te el e bach the o lačhipen. Te kada dolikerena, avena zorale a chana o lačhipen pal kadi phuv a dena la peskere čhavenge sar dedictvos pro furt.'

¹³ Pal kada savoro, so avľa pre amende vaš amare bini the nalačhipen, tu Devla amaro, amen potrestindal frimeder sar peske zasogalindam (zaslužindam) vaš amaro nalačhipen. A mukľal amenge kalen, save pes zachraňinde. ¹⁴ So, akana pale na dolikeraha tire prikazaňja, a laha romňijen andral ole nalače narodi? Se te ada keraha, či na aveha pre amende avke cholamen, hoj amen savoren zňičineha a na mukeha ňikas te dživel? ¹⁵ RAJEJA, Devla le Izraeloskero, tu sal čačipnaskero! Adadžives sam ade, ča ajci, keci pes zachraňindam. Sam ade vinovate angle tu: vaš ole bini našti ačas angle tu!"

O Izraeliti premuken le cudze romňijen

10 Medik o Ezdraš pašľolas le mujeha ke phuv anglo Devleskero Chramos, rovibnaha pes modlinelas a phenelas avri o bini, avle ke leste but Izraeliti:

o murša, džuvľa the o čhave a igen rovenas. ² Avke o Šechaniah, le Jechieloskero čhavo andral le Elamoskeri fajta, phenda le Ezdrašoske: "Kerdam binos angle amaro Del oleha, hoj peske ilam romňijen andral aver narodi, save bešen ade, ale the avke mek hin prekal o Izrael o užaripen (naďej). ³ Akana aven, phandas zmluva angle amaro Del, hoj bičhavaha het savore ole romňijen the lengere čhaven, mi kerel pes oda avke, sar phenen ola, save daran amare Devleskere prikazaňjendar. Mi kerel pes avke, sar hin pisimen andro zakonos. ⁴ Ušti, bo tu ada mušines te kerel. Amen tuke pomožinaha, ča muk tut andre oda bi e dar!"

⁵ Avke o Ezdraš uštila a phenda le anglune rašajenge, Levitenge the savore Izraelitenge, hoj te len vera, hoj dolikerena oda lav. A dine les vera. ⁶ Palıs o Ezdraš odgeľa pal o than anglo Chramos a geľa andro kher ko Jochanan, saveske sas dad o Eljašib, hoj ode te presovel. Ov ode o chaben na čaľa aňi paňi na piľa, bo sas leske pharo vaš o binos olengero, save avle pale andral o Babilon.

⁷ A palıs dine te phenel pal cali Judsko the Jeruzalem, hoj pes te zdžan andro Jeruzalem savore manuša, save sas zailo andro Babilon. ⁸ Dine avri, hoj dojekh, ko ode na avela tel o trin džives, avke sar pes dothode o anglune manuša the o vodci, našavela peskero barvalipen a na rachinela pes sar jekh amendar. ⁹ Avke tel o trin džives savore Judske the Benjaminike manuša pes zgele andro Jeruzalem. Sas oda andro bišto (20.) džives andro eňato čhon. Savore manuša bešenas pre dvora anglo Chramos a izdranas olestar, so sas phendo, the le bare brišindestar.

¹⁰ Akor uštila o rašaj Ezdraš a phenda lenge: "Kerdan binos oleha, hoj peske ilan romňijen andral o cudzo narodos a aleha andan bareder binos pro Izrael.

¹¹ Akana phenen avri peskere bini le RAJESKE, tumare dadengere Devleske, a keren oda, so ov kamel. Oddžan le narodendar, save ade bešen, a omuken peskere cudze romňijen."

¹² A savore manuša, save ode sas zgele, zoraha phende: "Čačipen tut hin! Mušinas oda te kerel, so amenge phendal!" ¹³ A mek phende: "Sam ade but džene a igen del o brišind. Našti ačas ade avri. Kada hin vareso, so pes na del te kerel tel o jekh abo duj džives, bo but džene amendar sam andre oda binos. ¹⁴ Amare vodci vaš amenge pes mi postarinen pal adi veca. A dojekhe dženes, kas hin romňi andral aver narodos, mi avel pre oda časos, so ela phendo, jekhetane le vodcenca the le sudcenca andral peskere fori. Avke peš amendar šaj odvisarel le Devleskeri bari cholı."

¹⁵ Ča o Jonatan le Asaheloskero čhavo the o Jachzejah le Tikvoskero čhavo pre oda na priačhile, a o Leviti Mešullam the Šabbetaj sas andre oda lenca.

¹⁶ Ale o Izraeliti, save sas ode, avke kerde. O rašaj o Ezdraš peske kidňa avri le fajtakere vodcen a zapisinda lengere nava. Andro ešebno (peršo) džives andro dešto čhon zgele pes a chudle pal odi veca te vakereľ. ¹⁷ A kerde oda savore muršenca, saven sas cudze romňija, dži andro ešebno džives andre ešebno čhon.

O murša, saven sas romňija andral aver narodos

¹⁸ Avľa avri, hoj le rašajengere čhavendar peske ile cudze romňijen o Maasejah, Eliezer, Jarib the o Gedaliah. Sas le Ješuaskere čhavendar the leskere phralendar. O Ješuas sas le Jocardakoskero čhavo.

¹⁹ On dine lav, hoj premukena peskere romňijen a dojekh obetnela bakres vaš peskero binos.

²⁰ Andral le Immeroskeri fajta: o Chanani the o Zebadijah.

²¹ Andral le Charimoskeri fajta: o Maasejah, o Elijah, o Šemajah, o Jechiel the o Uzziah.

²² Andral le Paščuroskeri fajta: o Eljoenaj, o Maasejah, o Jišmael, o Netaneel, o Jozabad the o Elasih.

²³ Le Levitendar: o Jozabad, o Šimej, o Kelajah (oda hin o Kelita), o Petachiah, o Jehudah the o Eliezer.

²⁴ Olendar, ko giľavenas: O Eljašib.

Le chramoskere stražňikendar: o Šallum, o Telem the o Uri.

²⁵ Le Izraeloskere manušendar: Andral le Parošoskeri fajta o Ramiah, o Izziah, o Malkijah, o Mijamin, o Eleazar, o Malkija the o Benajah.

²⁶ Andral le Elamoskeri fajta o Mattaniah, o Zechariah, o Jechiel, o Abdi, o Jeremot the o Elijah.

²⁷ Andral le Zattuoskeri fajta o Eljoenaj, o Eljašib, o Mattaniah, o Jeremot, o Zabad the o Aziza.

²⁸ Andral le Bebajoskeri fajta o Jochanan, o Chananiyah, o Zabbaj the o Atlaj.

²⁹ Andral le Baniskeri fajta o Mešullam, o Malluch, o Adajah, o Jašub, o Šeal the o Jeremot.

³⁰ Andral le Pachat-Moaboskeri fajta o Adnas, o Kelal, o Benajah, o Maasejah, o Mattaniah, o Becaleel, o Binnuj the o Menašše.

³¹ Andral le Čarimoskeri fajta o Eliezer, o Jiššijah, o Malkijah, o Šemajah, o Šimeon, ³² o Benjamin, o Malluch the o Šemarijah.

³³ Andral le Čašumoskeri fajta o Mattenaj, o Mattatah, o Zabad, o Elifelet, o Jeremaj, o Menašše the o Šimej.

³⁴ Andral le Baniskeri fajta o Maadaj, o Amram, o Uel, ³⁵ o Benajah, o Bedjah, o Keluh, ³⁶ o Vanijah, o Meremot, o Eljašib, ³⁷ o Mattaniah, o Mattenaj, o Jaasav, ³⁸ o Bani, o Binnuj, o Šimej, ³⁹ o Šelemiah, o Natan, o Adajah, ⁴⁰ o Machnadbaj, o Šašaj, o Šaraj, ⁴¹ o Azarel, o Šelemiah, o Šemarijah, ⁴² o Šallum, o Amariah the o Jozef.

⁴³ Andral le Neboskeri fajta o Jeiel, o Mattitiah, o Zabad, o Zebinas, o Jaddaj, o Joel the o Benajah.

⁴⁴ Dojekhe kale muršes sas romňi andral aver narodi. Bičhade len het, the olen, saven sas čhave.

NEHEMIAŠ

1 O Nehemiaš phučel pal o Jeruzalem

1 Kala hine o lava le Nehemiašoskere, saveske sas dad o Chachaljah: Andro čhon Kislev andro bišto (20.) berš, sar andre Perzija kralinelas o Artaxerxes, somas andro kraliskero foros Šušan. ² Akor avla ke ma jekh mire phralendar o Chanani varesave muršenca andral e Judsko. Phučavas lestar pal o Jeruzalem the pal ola Židi, save avle pale andral o Babilon, kaj sas zabile. ³ On mange phende: "Ola, save predžidile a save avle pale, hine andre peskeri phuv andro baro pharipen a tele len dikhen okla narodi. O muri pašal o Jeruzalem hine čhide tele a o brani zlabarde."

O Nehemiaš pes modlinel

⁴ Sar šundom ola lava, bešlom mange a rovavas. Likeravas vajkeci dživesa o smutkos, poscinavas a modlínovas man anglo Del, savo hino pro ňebos.

⁵ A phendom: "Ó, RAJEJA, Devla pro ňebos! Tu sal baro the zoralo Del, savo dolikeres peskeri zmluva the o jileskeriben olenca, save tut kamen a dolikeren tire prikazaŋja. ⁶ Dikh pre ma a šun avri tire služobňikoskeri modlitba, so džal ke tu rat the džives, vaš tire služobňika o Izraeliti. Pridžanav, hoj savore kerđam binos: me, mire dadeskeri famelija the calo Izrael. ⁷ Bare bini kerđam angle tu. Na šunahas tut a na dolikerahas tire zakoni the prikazaŋja, so amenge diňal prekal tiro služobňikos Mojžiš.

⁸ Mangav tut, leper tuke pro lava, so phendal peskere služobňikoske le Mojžišoske: 'Te avena tu the o Izraeliti mange napačivale, rozčhivava tumen maškar o narodi. ⁹ Ale te pes ke ma visarena, dolikere na mire prikazaŋja a dživena pal oda, choc te ulanas rozchide dži pro nekdureder thana la phuvakere, anava tumen pale pre oda than, so mange kidňom avri, hoj ode te avav lašardo.'

¹⁰ Se on hine tire služobňika the tiro narodos, so zachraňindal tira bara zoraha the zorale vasteha.

¹¹ Mangav tut, ó, RAJEJA, šun avri miri modlitba the e modlitba savore tire služobňikengeri, save jilestar tut den pačiv. De man adadžives bach, hoj o kralis te el ke ma jileskero."

Andre oda časos somas le kraliskero čašňikos, so leske podelas e mol.

O Nehemiaš džal andro Jeruzalem

2 Jekh džives andro čhon Nisan, sar o Artaxerxes kralinelas imar bišto (20.) berš, sar imar ande e

mol, ilom e mol andre kuči a diňom leske. Šoha (ňikda) angloda na somas angle leste smutno ² a ov mandar phučla: "Soske sal smutno? Se na sal nasvalo, akor mušinel tut vareso te trapinel."

Pre oda igen predarandilom ³ a phendom leske: "Mi dživel o kralis pro furt! Sar te na avav smutno, te o foros, kaj hine parunde mire phure dada, hino čhido tele a o brani zlabarde?"

⁴ O kralis mange odphenda: "So kames, hoj te kerav?"

Me androda man modlínovas ko Del pro ňebos. ⁵ Odphendom le kraliske: "Te hin ada le kraliske pre dzeka a te tiro služobňikos arakhla jileskeriben andre tire jakha, mi bičhavel man andre Judsko, andro foros, kaj hine parunde mire phure dada, hoj les pale te ačhavav."

⁶ Akor o kralis mandar phučla – a e krafovna bešelas paš leste: "Keci tuke likerela ode o drom a kana aveha pale?" Sar leske phendom keci, o kralis pre oda pri-ačhila a domukla mange te džal.

⁷ Palis leske mek phendom: "Te hin oda le kraliske pre dzeka, akor mange mi den o lila prekal o guvern-era pre dujto sera pal o paňi Euftrat, hoj mange te domuken te predžal andre Judsko. ⁸ Mangav mek o lil prekal o Asaf, savo hino ačhado upral o kraliskere veša, hoj mange te del o kašta pre brana, pre veža paš o Chramos, pro foroskere muri the pro kher, andre savo bešava." O kralis mange oda savoro diňa, bo le Devleskero lačno vast sas upral mande, ⁹ a bičhada manca le velitelen the muršen pro graja. Sar avlom ko guvernera pre dujto sera pal o Euftrat, diňom lenge o lila, so mange diňa o kralis. ¹⁰ Ale sar o Chorončanos Sanballat the o Ammončanos Tobiaš, savo sas uradňikos, šunde, hoj ode avla murš, savo kamel te kerel prekal o Izraeliti lačno, igen cholisalile.

O Nehemiaš predikhel o muri

¹¹ Avlom andro Jeruzalem a ačhilom ode trin dživesa. ¹² Palis rači me the vajkeci murša uštílám, ale ňikaske na phendom, so mange o Del thođa pro jilo, hoj te kerav prekal o Jeruzalem. Na ilom manca ňisavo džviros, ča le somaris, pre savo džavas. ¹³ Odi rat geľom avri prekal e Dolinakeri Brana ko Drakoskero prameňis dži ke Šmecengeri Brana a predikhavas o Jeruzalemoskere muri. Ole muri sas rozphagerde a o brani zlabarde.

¹⁴ Palis pregeľom ke Prameňiko Brana the ke le Kraliskeri Nadrža. Ale palis na sas than, khatar te predžal le somariha, ¹⁵ vašoda dureder geľom andre

dolina Kidron te predikhel o muri. Palis man visardom pale andro foros prekal e Dolinakeri Brana. ¹⁶ Ale o vodci na džanenas, kaj gefom aňi so keravas. Na phendom nič le Židenge, aňi le rašajenge, le uradňikenge, le vodcenge, aňi ňikasko olendar, so palis kerena e buči.

O foroskere muri chuden te prikerel

¹⁷ Palis lenge phendom: "Korkore dikhen, andre savo pharipen sam. O Jeruzalem hino zňičimen a o brani zlabarde la jagaha. Aven, ačhavas pale o foroskere muri, hoj te na avas buter pro asaben." ¹⁸ Sar lenge rozvakerdom pal oda, sar le Devleskero lačno vast sas upral ma a so mange phendá o kralis, phende mange: "Aven, mukas pes andre oda!" Avke chudle te kerel odi lačni buči.

¹⁹ Ale sar oda šunde o Chorončanos Sanballat, o Ammončanos Tobiaš the o Arabos Gešem, asanas amendar, kerenas ladž a phenenas: "Oda so keren? So, kamen tumen te vzburlnel pro kralis?"

²⁰ Me lenge pre oda odphendom: "O Del pro ňebos amenge dela bach. Amen, leskere služobňika, pes mukaha andre kadi buči a ačhavaha o muri. Ale tumen nane ňisavo kotor, aňi pravos, aňi na san leperde andro Jeruzalem."

O manuša save prikeren o foroskere muri

3 Avke o nekbareder rašaj o Eljašib the leskere pašutne rašaja kerenas e Bakrengeri Brana. On la oprikerde a thode upre o vudar. Ola branatar chudle te prikerel o muros dži paš e veža Mea a odarik dži ke veža Chananel. ² Paš leste prikerenas o murša andral o Jericho a nadur lendar o Zachur, le Imrioskero čhavo.

³ E Ribno Brana prikerenas le Senaoskeri fajta. Zorařarde la le kaštenca pal o seri the pro maškar a thode upre o čopi, o vudar the zavori. ⁴ Paš lende prikerelas le Urijoskero čhavo o Meremot, saveske sas papus o Hakkoc. Paš leste prikerelas o Mešullam le Berechijoskero čhavo, saveske sas papus o Mešezabel. Paš leste prikerelas o Cadok le Baanoskero čhavo.

⁵ Paš leste prikerenas o murša andral e Tekoa, ale o anglune manuša andral oda foros na kamenas te kerel prekal peskero Raj e buči.

⁶ E Puraňi Brana prikerenas o Jojada, le Paseachoskero čhavo, the o Mešullam, le Besodejoskero čhavo. Zorařarde la le kaštenca pal o seri the pro maškar a thode upre o vudara the trastune zavori. ⁷ Paš lende prikerelas o Melatiah andral o Gibeon, o Jadon andral o Meronot the o murša andral o Gibeon the Micpa dži paš o kher le guverneriskero upral e provincija o Zapadno Eufat. ⁸ Paš lende prikerelas o muri Uzziel, le Charchajoskero čhavo, savo kerelas veci le somnakastar. Paš leste prikerelas o muri o Chananijah, savo kerelas o voňava masci. On zorařarde o Jeruzalemoskere muri dži ko Buchlo Muros. ⁹ Paš lende prikerelas Refajah, le Churoske čhavo, savo lidžalas jepaš Jeruzalem. ¹⁰ Paš leste, angle peskero kher, prik-

erelas o Jedajah, le Charumafoskero čhavo. Paš leste prikerelas o Chattuš, le Chašabnejoskero čhavo. ¹¹ O Malkijah, le Charimoskero čhavo, the o Chaššub, le Pachat-Moaboskero čhavo, prikerenas o aver kotor le muroske the e Bovengeri Veža. ¹² Paš lende prikerelas o Šallum, le Hallochešoskero čhavo, peskere čhajnca. Ov sas vodcas upral jepaš le Jeruzalemoskero.

¹³ E Dolinakeri Brana prikerenas o Chanun the o manuša andral o foros Zanoach. On la ačhade upre a thode o vudara the o trastune zavori pal o seri the pro maškar. Prikerde mek štar šel the saranda (440) metri muroš dži ke Šmecengeri Brana.

¹⁴ E Šmecengeri Brana prikerelas o Malkijah, le Rechaboskero čhavo. Ov sas vodcas andro Bet-Kerem. Ov la ačhada a thođa upre o čopi, o vudar the o zavori.

¹⁵ E Prameňiskeri Brana prikerelas o Šallun, le Kolchozehoskero čhavo, savo sas vodcas andro foros Micpa. Ov la ačhada, kerda upral late o pados a thođa upre o čopi o vudar the o zavori. Oprikerda the o muri paš o paňi Siloam †, paš e kraliskeri bar (zahrada) dži ko garadiči, pal save pes džal tele avri andral o Foros le Davidoskero. ¹⁶ Pal leste prikerelas o Nehemiah, le Azbukoskero čhavo, o muri paš e nadrža, paš o hrobi le Davidoskere the paš o kasarňi. Ov sas vodcas upral jepaš foros Bet-Cur.

¹⁷ Pal leste prikerenas o Leviti a lidžalas len o Rechum, le Baniskero čhavo. Pal lende prikerelas o Chašabiah, savo sas vodcas pro jepaš okresis Keilate.

¹⁸ Pal leste prikerenas aver Leviti, saven lidžalas o Chenadad, le Bavvajoskero čhavo, savo sas vodcas upral dujto jepaš okresis Keilate. ¹⁹ Paš lende prikerelas o Ezer, le Ješuaskero čhavo, o vodcas andre Micpa. Ov prikerelas aver kotor le muroske dži pro rohos, kaj sas o zbraňi andro sklados. ²⁰ Pal leste prikerelas o Baruch, le Zabbajoskero čhavo, savo igen mištes kerelas le muroske rohostar dži paš o vudar le Eljašiboskere khereskero, le bare rašaskero. ²¹ Pal leste kerelas o Meremot, le Urijoskero čhavo, saveske sas papus o Hakkoc. Ov prikerelas le Eljašiboskere vudarestar dži pro agor leskere khereske.

²² Paš leste prikerenas o rašaja, save sas andral o gava pašal o foros. ²³ Pal lende kerenas o Benjamin the o Chaššub a paš lende o Azariah, le Maasejoskero čhavo, saveske sas papus o Ananiah; sako prikerelas paš peskero kher. ²⁴ Pašal le Azarioskero kher dži pro rohos le muroske kerelas o Binnuj, le Chenadadoskero čhavo. ²⁵ Paš leste prikerelas o Palol ††, le Uzajoskero čhavo. Chudľa te kerel paš o agor le murostar, paš e veža le uprone palaciskeri, pašes paš e dvora le stražňikengeri. Pal leste kerelas o Pedajah, le Parošoskero čhavo. ²⁶ O chamoskere služobňika, save bešenos pro brehos Ofel, prikerenas dži paš e Paňeskeri Brana pro vichodos dži paš e veža, khatar pes stražinelas o Chamos. ²⁷ Pal lende prikerenas o murša andral o foros Tekoa. Kerenas ola vežatar dži paš o muros pro Ofel.

† Abo: o paňi Šelach †† E Hebrejiko čhib: o Palal

²⁸ Upreder le Grajengera Branatar kerenas o rašaja, sako angle peskero kher. ²⁹ Paš lende kerelas o Cadok, le Immeroskero čhavo, angle peskero kher. Pal leste kerelas o Šemajah, le Šechanoskero čhavo, savo stražinelas e Vichodno Brana. ³⁰ Pal leste prikerelas o Chananijah, le Šelemioskero čhavo the o Chanun, o šovto čhavo le Calafoskero. Pal lende kerelas angle peskero kher o Mešullam, le Berechijoskero čhavo. ³¹ O Malkijah, savo kerelas veci le somnakastar, prikerelas pal lende dži paš o kher, kaj bešenas o chramoskere služobníka the ola, save cinen a bikenen, paš le Stražnikengeri Brana, anglo kher, so sas ačhado pro rohos le muroske. ³² Maškar oda kher pro rohos the maškar e Bakrengeri Brana prikerenas o muros ola, save kerenas o veci le somnakastar the ola, save bikenen a cinen.

O űeprijateľa kamen te zaačhavel e buči

³³ Sar pes došundă o Sanballat, hoj ačhavas o muri, igen cholisalila a asalas avri le Izraeliten. ³⁴ Paš peskere manuša the Samarijike slugada phenda: "Oda so keren kala Židi? Se on nane nič! Gondolinen peske, hoj pale ačhavana o foros? So, šaj obetinena? Dokere-na e buči tel jekh džives? So šaj keren kale šmecenca pro kopi? Se hine zlabarde!"

³⁵ O Ammončanos Tobiaš ačhelas paš leste a phenda: "Ča mi ačhaven! E liška lenge čhivela tele o muri, sar upre chučela!"

³⁶ No me man chudľom te modľinel: "Devla amaro, šun, sar asan amendar. Odvisar oda pale pre lende a mi en ajse sar ola, saven zalen a odligenen andre aver phuv. ³⁷ Ma odmuk lenge oda nalačhipen, so amenge kerenas, a ma bister pre lengere bini. Bo olen, ko ačhavelas kada foros, andro jakha asanas avri."

³⁸ Avke amen dureder ačhavahas o muri. O manuša pačivalones kerenas e buči a o muros pašal calo foros sas imar jepaš dokerdo.

4 Ale sar pes došunde o Sanballat, o Tobiaš, o Arabi, o Ammončana the o murša andral o Ašdod, hoj o muri pes prikerel a o cheva andro muros pes zakerel andre, igen cholisalile. ² Akor savore jekhetane pes dothode a phende, hoj džana pro mariben pro Jeruzalem a kerena ode bari balamuta (zmetkos). ³ Ale amen pes modľinahas ke amaro Del a ačhadam muršen, hoj te stražinen pro muri rači the dživese.

⁴ Akor o manuša andre Judsko phende: "O manuša imar na birinen. Kampel te hordinel mek but bara pal o kopi. Amen na birinaha te dokerel o muri."

⁵ Amare űeprijateľa peske phende: "Sar avaha ke lende jekhvareste, nič na džanena a nič na dikhena. Murdaraha len a e buči zaačhavaha."

⁶ Ale o Židi, save bešenas pašes paš lende, avle amenge oda te phenel dešvar: "Všadzík, kaj pes visaraha, odarik pre amende džana!" ⁷ Vašoda diňom le manušen o šablí, kopiji the luki a ačhadom len pal peskere fajti paš o muros, kaj mek na sas dokerdo.

Andre jekh vast e zbraň a andre aver o sersamos

⁸ Sar oda dikľom, uštilom a prevakerďom ko vodci, uradńika the ko manuša: "Ma daran pes lendar! Lep-eren tumenge, savo baro the zoralo hino amaro RAJ, a maren pes vaš peskere phrala, čhave, čhaja, romńija the khera." ⁹ Sar amare űeprijateľa šunde, hoj pre oda avľam a hoj o Del len andre oda zaačhada te kerel, savore šaj geľam pale te kerel o muri.

¹⁰ Ole dživesestar jepaš mire muršendar kerenas e buči pro muri a aver murša ľikerenas andro vasta o kopiji, o štiti, o luki the o pancjera a o veliteľa ačhenas vaš savore manuša. ¹¹ Ola, ko kerenas e buči pro muros, the ola, save hordinenas o materijalos, jekhe vasteha kerenas e buči a dujtoneha ľikerenas e zbraň. ¹² Pašal dojekh dženo sas zaphandľi e šablí a kavke kerelas e buči. Ale o murš la trubaha ačhelas paš ma. ¹³ Phendom le manušenge, le vodcenge the le uradńikenge: "E buči hińi bari a amen keras všadzík pro muri a sam dur jekh avrestar. ¹⁴ Te šunena e truba, aven sigo savore paš amende. Amaro Del pes marela vaš amende!" ¹⁵ Avke e buči pro muri kerahas akorestar, sar vidńisaľolas, dži akor, medik o čerčeňa na avenas avri, a jepaš murša ľikerenas andro vasta o kopiji.

¹⁶ Andre oda časos phendom le manušenge: "Dojekh dženo the leskero sluhas mi ačhel pre rat andro Jeruzalem, avke amenge rači pomožinena te stražinel a prekal o džives te kerel e buči." ¹⁷ űiko amendar, ańi me, ańi mire manuša, ańi o sluhi ańi o murša, save stražinenas, na čhidam pal peste tele o gada a dojekheste sas paš o vast e zbraň.

O Nehemiaš pomožinel le čorenge

5 Akor chudle o manuša the o džuvľa igen te vakerel pre okla Židi vaš oda, so kerenas. ² Varesave lendar phenenas: "Peskere muršoren the čhajoren mušinas te del sar otroken, hoj amen te den žužodiv (obilie), hoj te predživas."

³ Aver vakerenas: "Das amare maľi, o vińici the o khera andre zaloha, hoj amen te den žužodiv andre kadi bari bokh."

⁴ Aver phenenas: "Mušindam peske te lel kečeň, hoj te počinas le krališke o daňe vaš o maľi the vińici. ⁵ Ale the amen sam Židi avke sar on. Či nane amare čhave ajse sar lengere? Amare čhavendar mušinas te kerel otroken a varesave amare čhaja imar hine bikende vaš o otrokińi. Imar na džanas, so te kerel, bo ile amendar o maľi the o vińici."

⁶ Sar šundom kale lava a dikľom lengero pharipen, igen somas choľamen. ⁷ Gondolinas pal oda a vičindom mange le vodcen the le uradńiken a phendom lenge: "Tumen barvaľon pre tumare fameliji avke, hoj len den kečeň a kiden lendar avri buter." Palis diňom te zvičinel savoren manušen pal odi veca ⁸ a phendom lenge: "Amen kerdam savore pre oda, hoj te cinas avri andral o otroctvo amare Židovike fameli-

jen, save sas bikende avre narodenge. Ale tumen len akana pale cinen prekal peste?" Pre oda leske o vodci the o uradnika na phende aňi lav, bo džanenas, hoj hin les čačipen.

⁹ Mek phendom: "Namištes keren. So, na kamen te phirel anglo Del andre dar, hoj amendar amare űeprijateľa te na asan? ¹⁰ Se me, mire pašutne the mire služobnika len das furt kečeň o love the žužodiv (obilie). Odmukas lenge oda, so amenge kamen!

¹¹ Den lenge mek adadžives pale o mali, o viňici, o olivakere sadi the o khera, so lendar iľan. Den pale the o interesis, so lendar iľan akor, sar tumendar ile kečeň, o love, o žužodiv, e mol the o olivovo olejso."

¹² O vodci lenge odphende: "Keraha avke, sar phenes. Daha lenge savoro pale a na mangaha lendar űič."

Avke diňom te vičinel le rašajen a angle lende on dine la veraha lav, hoj kerena avke, sar phende. ¹³ Palis razindom avri mire žebi a phendom: "Avke o Del razinela avri dojekhe muršes, ko na doľikerela oda lav, a odlela leskero kher the savoro, so les hin, a na mukela leske űič."

Akor savore manuša phende: "Amen!" A kerde avke, sar dine lav, a lašarenas le RAJES.

Le Nehemiašoskero jileskeriben

¹⁴ Sar kralinelas o Artaxerxes bišto (20.) berš andre Perzija, ačhilom guverneris andre Judsko. Akorestar dži trandato the dujto (32.) berš – oda hin dešuduj berš – aňi me aňi miri famelija na mangľom le manušendar o love pro chaben, so šaj mangľom sar guverneris. ¹⁵ Ale o guvernera angle mande trapinas le manušen oleha, hoj lendar kidenas avri sako džives e daň pro maro the pre mol saranda (40) rupune love. A the lengere služobnika len trapinas. Ale me avke na keravas, bo daravas mire Devlestar. ¹⁶ Me the savore mire murša jekhetane lenca kerahas caľa zoraha e buči pro muri a na cindam peske aňi maľa. ¹⁷ Paš miro skamind manca chanas o anglune Židi the o vodci, vaj šel the penda (150) džene, a mek the ola, save ke amende avenas andral aver narodi. ¹⁸ Sako džives lenge richtinavas jekhe guruves, šove bakren the but kachňen. Paš oda sako dešto džives, davas te anel but mol andro gone. Ale šoha (ňikda) na mangavas o love pro chaben, so šaj mangľomas sar guverneris, bo o manuša kerenas phares e buči.

¹⁹ Devla miro, leper tuke pre ma the pre miro lačhipen, so kerdom kale manušenge!

O Nehemiaš džanel, so kamen te kerel o űeprijateľa

6 Sar pes dodžanle o Sanballat, o Tobiaš, o Arabčanos Gešem the savore amare űeprijateľa, hoj doprikerďom o muri a nane andre imar űisave cheva, choc o vudara pro brani mek na thoďom, ² o Sanballat the o Gešem mange dine te phenel: "Av, zdžas pes andre varesavo gav pre rovina Ono." Ale on mange oleha kamle te kerel vareso nalačo.

³ Bičhadom ke lende mire muršen, hoj lenge te phenen: "Hin man te kerel bari buči a našti akana džav ke tumende. Soske te mukav e buči ča avke, hoj man tumenca te zdžav?"

⁴ On mange oda dine te phenel štarval, ale me lenge odphendom avke sar ešebnovar (peršovar).

⁵ Palis o Sanballat ke ma bičhadľa peskere muršes pandžtovar. Sas leste andro vast phundrado ľil ⁶ a sas andre pisimen:

"Maškar o narodi pes vakeral a the o Gešem ada phenel, hoj tu the o Židi kamen te kerel vzbura, a vašo-da oprikeres o muri. A mek hin phendo, hoj kames te ačhel kralis ⁷ a hoj ačhadal proroken, hoj te vakeren pal tu andro Jeruzalem: 'Andre Judsko hin kralis! Tu džanes, hoj o kralis andre Perzija pes pal oda dodžanela! Vašoda av, zdžas pes a vakeraha pal oda."

⁸ Akor leske odphendom: "űič olestar, so vakeres, nane čačipen. Korkoro tuke ada gondolindal avri."

⁹ On savore amen kamenas te daravel avri a phenenas peske: "Našavena e zor a na dokerena e buči."

Ale me man modľinavas: "Devla, de man zor!"

¹⁰ Andre jekh džives geľom andro kher ko Šemajah, saveske sas dad o Delajah, a leske o Mehetabel. O Šemajah sas phandlo andre peskero kher a phendľa mange: "Av, zdžas pes andre le Devleskero Chramos te garuvel andro Sentno Than a phandaha o vudar, bo tire űeprijateľa tut kamen te murdarel. A avena adadžives rači!"

¹¹ Ale me leske odphendom: "Me na som ole dženenar, save denašen. Gondolines tuke, hoj man džava te garuvel andro Chramos, hoj man te zachraňinav? Na, na džava!" ¹² Avľom pre oda, hoj les na bičhadľa ke ma o Del, ale ola lava mange phendľa, bo o Tobiaš the o Sanballat leske počinde, hoj oda te phenel. ¹³ Bičhade les ke ma, hoj man te daravel avri, hoj man te garuvav andro Chramos a oleha te kerav binos. Palis oda hiros pal ma rozľigendehas, hoj te meľaren miro lačo nav.

¹⁴ Me man modľinavas: "Ó, Devla miro, leper tuke pre savoro nalačhipen, so kerde o Tobiaš the o Sanballat. Leper mek the pre prorokiňa Noadja a pre ola aver proroka, save man daravenas avri!"

E buči dokerďi

¹⁵ E buči pro muri ľikerelas penda the duj (52) džives a sas dokerďi andro bišupandžto (25.) džives andro čhon Elul. ¹⁶ Sar pes savore amare űeprijateľa pal oda došunde a sar oda dikhle o narodi, save bešenas pašal amende, daranas pes a sas pokorimen. Džanenas, hoj o Del amenge pomožinda te dokerel e buči.

¹⁷ Andre ola dživesa o Judske anglune manuša the o Tobiaš pisinenas but ľila a bičhavkerenas maškar peste. ¹⁸ But manuša andre Judsko sas dothode la veraha le Tobiašoha, bo sas džamutro le Šechanioske, saveske sas dad o Arach. Le Tobiašoskero čhavo o Jochanan peske iľa romňa la čha le Mešullamoskera, saveske sas dad o Berechijah. ¹⁹ O manuša angle mande vakerenas pal savoro lačhipen, so kerelas o Tobiaš, a palis leske vakerenas savore mire lava. A dured-

er o Tobiaš mange bičhavkerelas o lila, hoj man te daravel avri.

O Nehemiaš prikazinel te stražinel o brani

7 Sar sas o muri oprikerde a diňom te thovel o vudara pro brani, ačhađom andre služba le stražniken, le Leviten the le lavutaren. ² Ačhađom upral o Jeruzalem mire phrales le Chanani the le Chananijah, savo sas veliteľis upral e chramoskeri veža, bo sas pačivalo a daralas le Devlestar buter sar aver džene. ³ Phendom lenge: "Ma phundraven pro Jeruzalemoskere brani o vudar, medik o kham na ela dži upre. Mek angloda, sar o stražnika džana het rači, phanden o vudara a thoven upre o zavori. Le manušendar, save bešen andro Jeruzalem, ačhaven, hoj te stražinen pro buter thana pašal o muros the paš peskere khera."

O manuša, save avle pale

⁴ O Jeruzalem sas igen baro foros, ale na bešenas ode but manuša a o khera pes pale na ačhavelas. ⁵ Akor miro Del mange thoda pro jilo, hoj te zvičinav ke mande savore vodcen, uradniken the manušen a te zapisinav len pal lengere fajti. Arakhľom o zvitkos, andre savo sas zapisimen o fajti, save pes ešebne (perše) visarde pale andral o Babilon. Sas ode pisimen: ⁶ Kala hine o manuša, saven o kralis Nebukadnecar zaila a odligenda andro Babilon a akana avle pale andro Jeruzalem the Judsko, dojekh andre peskero foros.

⁷ O vodci, save avle lenca, sas o Zerubbabel, o Ješua, o Nechemiah, o Azariah, o Raamiah, o Nachamani, o Mordochaj, o Bilšan, o Misperet, o Bigvaj, o Nechum the o Baanah.

⁸ Andral le Parošoskeri fajta avle 2 172 potomki, ⁹ andral le Šefatjoskeri 372, ¹⁰ andral le Arachoskeri fajta 775, ¹¹ andral le Pachat-Moaboskeri fajta, oda hin le Ješuaskere the le Joaboskere čhave, 2 812 potomki, ¹² andral le Elamoskeri fajta 1 254, ¹³ andral le Zattuoskeri 945, ¹⁴ andral le Zakkajoskeri 760, ¹⁵ andral le Binnujoskeri 642, ¹⁶ andral le Bebajoskeri 623, ¹⁷ andral le Azgadoskeri fajta 1 222, ¹⁸ andral le Adonikamoskeri fajta 667, ¹⁹ andral le Bigvajoskeri fajta 2 065, ²⁰ andral le Adinoskeri fajta 454, ²¹ andral le Ateroskeri fajta, o potomki le Chizkijoskere, 98, ²² andral le Čašumoskeri fajta 328, ²³ andral le Becajoskeri fajta 324, ²⁴ andral le Charifoskeri fajta 112 ²⁵ a andral le Gibeonoskeri fajta 95 potomki.

²⁶ Avle pale the kala manuša, savengere phure dada bešenas andre kala fori: andral o Betlehem the Netofa 178; ²⁷ andral o Anatot 128; ²⁸ andral o Bet-Azmavet 42; ²⁹ andral o Kirjat-Jearim, Kefira the Beerot 743; ³⁰ andral e Rama the Geba 621; ³¹ andral o Michmas 122; ³² andral o Betel the Aj 223; ³³ andral o Nebo 52; ³⁴ andral o Elam 1 254; ³⁵ andral o Charim 320; ³⁶ andral o Jericho 345; ³⁷ andral o Lod, Chadid the Ono 721; ³⁸ the andral o Senaah 3 930.

³⁹ Kala savore hine potomki andral le rašajengere fajti, save avle pale: andral le Jedajoskeri (save sas o potomki le Ješuaskere) 973; ⁴⁰ andral le Immeroskeri 1 052; ⁴¹ andral le Paščuroskeri 1 247; ⁴² andral le Charimoskeri 1 017.

⁴³ O Leviti: andral e fajta le Ješuaskeri the Kadmieloskeri (save sas o potomki le Hodvoskere) avle pale 74.

⁴⁴ Ola, save gilavenas andro Chramos: andral le Asafoskeri fajta avle 128 potomki.

⁴⁵ Ola, save stražinenas paš o chramoskere brani: andral e fajta le Šallumoskeri, le Ateroskeri, le Talmonoskeri, le Akkuboskeri, le Chatitoskeri the le Šobajoskeri avle 138 potomki.

⁴⁶ Avle pale the ola, save služinenas andro Chramos, andral e fajta le Cichasoskeri, le Chasufaoskeri, le Tabbaotoskeri, ⁴⁷ le Keroskeri, le Sioskeri, le Padonoskeri ⁴⁸ le Lebanoskeri, le Chagaboskeri, le Šamlajoskeri, ⁴⁹ le Chananoskeri, le Giddeloskeri, le Gacharoskeri, ⁵⁰ le Reajoskeri, le Recinoskeri, le Nekodaoskeri, ⁵¹ le Gazzamoskeri, le Uzzoskeri, le Paseachoskeri, ⁵² le Besajoskeri, le Meunimoskeri, le Nefusimoskeri, ⁵³ le Bakbukoskeri, le Chakufoskeri, le Charchuroskeri, ⁵⁴ le Baclutoskeri, le Mechidaoskeri, le Charšaoskeri, ⁵⁵ le Barkososkeri, le Siseroskeri, le Temachoskeri, ⁵⁶ le Neciachoskeri the le Chatifoskeri.

⁵⁷ Kala potomki le Šalamunoskere služobnikengere avle pale: le Sotajoskere, le Soferetoskere, le Peridasoskere, ⁵⁸ le Jaaloskere, le Darkonoskere, le Giddeloskere, ⁵⁹ le Šefatjoskere, le Chattiloskere, le Pocheret-Haccebajimoskere the le Amonoskere. ⁶⁰ Savore chramoskere služobnika the le Šalamunoskere služobnikengere potomki sas 392.

⁶¹ Kala manuša avle pale andral o Babiloňike fori Tel-Melach, Tel-Charša, Kerub, Addon the Immer, ale našti presikade hoj hine Izraeliti: ⁶² 642 potomki andral le Delajoskeri, le Tobijoskeri the le Nekodaskeri fajta.

⁶³ Visarde pes pale the e fajta le Chobajoskeri, le Hakkocoskeri the le Barzillajoskeri. Ov peske iľa romňa le Barzillajoskera čha andral o Gilead a iľa peske lakero nav. ⁶⁴ On rodenas peskero fajtakero zvitkos kaj sas zapisimen, ale les na arakhle. Vašoda len premukle andral e rašajiko služba. ⁶⁵ Avke o guverneris lenge prikazinda hoj našti chan le chabenestar, so hino obe timen le Devleske, medik ode na sas rašaj, savo šaj phučel le RAJESTAR prekal o losi Urim the Tummim.

Le manušengero barvalipen the dari pro Chramos

⁶⁶ Savore, save pes visarde pale andre Judsko, sas jekhetane 42 360 manuša. ⁶⁷ Avle lenca 7 337 sluhi the služki, the 245 džuvľa a murša, save gilavenas. Sas len 736 graja, 245 mulici, ⁶⁸ 435 řavi the 6 720 somara.

⁶⁹ Varesave fajtakere vodci denas o dari pro Chramos. O guverneris diňa andre chramoskeri pokladňica ochto kili somnakaj, penda (50) čare the 530 rašajengere plašti. ⁷⁰ O fajtakere vodci dine andre pokladňica prekal o Chramos 168 kili somnakaj the 1 250

kili rup. ⁷¹ Aver manuša dine 168 kili somnakaj, 140 kili rup a 67 rašajike plašti.

⁷² Avke o rašaja, o Leviti, o stražnika, o lavutara, o chamoskere služobnika the o aver Izraeliti gele te bešel andre peskere fori andro Judsko. Sar sas o eftato čhon, o Izraeliti imar sas andre peskere fori.

O Ezdraš pregenel le manušenge le Devleskero zakonos

8 ¹⁻² Andro ešebno (peršo) džives andro eftato čhon pes savore manuša jekhetane zgele angle Paňeskeri Brana a phende le zakoňnikoske Ezdrašoske, savo sas the o rašaj, hoj te anel o zakonoskero zvitkos, so o RAJ diňa le Izraelitenge prekal o Mojžiš. Avke o Ezdraš andā o zakonos anglo manuša, save sas zgele: anglo murša, džuvľa the angle savore, save šaj achalile oleske, so šunenās. ³ Tosarastar dži ko dilos angle Paňeskeri Brana genelas andral o zakonos le džuvľenge, muršenge the savorengenge, save šaj oleske achalonas. A savore manuša mištes šunenās, so andral genelas.

⁴ O zakoňnikos Ezdraš ačhelas pro kaštuno javiskos, so sas prekal oda kerdo. Paš leskeri čači (pravo) sera ačhelas o Mattitiah, o Šema, o Ananiah, o Urijah, o Chilkijah the o Maasejah. Pal leskeri baľogňi (ľavo) sera ačhelas o Pedajah, o Mišael, o Malkijah, o Chašum, o Chašbaddanah, o Zecharijah the o Mešullam.

⁵ Sar o Ezdraš phundrađa o zakonoskero zvitkos, savore manuša les dikhle, bo ov sas pro učeder than. Akor savore manuša uštĭle upre. ⁶ O Ezdraš lašarelas le RAJES, le bare Devles, a savore manuša hazdle upre o vasta a phende: "Amen! Amen!" A bandonas anglo RAJ le mujeha dži ke phuv.

⁷ O Leviti – o Ješua, o Bani, o Šerebiah, o Jamin, o Akkub, o Šabbetaj, o Hodijah, o Maasejah, o Kelita, o Azariah, o Jozabad, o Chanan the o Palajah – pomožinenas le manušenge te achalol o zakonos, medik ode ačhenas. ⁸ On genelas andral le Devleskero zakonos a mištes prethovenas le manušenge, hoj te achalon oda, so sas lenge pregendo.

Le manušengero roviben

⁹ Sar o manuša šunde, so o zakonos vakereľ, chudle te rovel. Akor o guverneris Nehemiaš, o Ezdraš, savo sas zakoňnikos the rašaj, the o Leviti, save sikavenas le manušen, phende lenge: "Kada džives hino sentňardo le RAJESKE, tumare Devleske. Vašoda ma aven smutne a ma roven!" ¹⁰ Džan khere, chan o lačhipen, pijen e nevi mol a den the olen, kas nane nič, bo kada džives hino sentňardo amare RAJESKE. Ma aven smutne, bo o radišagos le RAJESKERO hin tumari zor."

¹¹ The o Leviti len prevakerenas le lavenca: "Kada džives hino sentno. Vašoda aven andro smirom a ma aven smutne!" ¹² Palis savore manuša gele khere te chal a te pijel, bičhavenas peske o chabena a oslavinenas bare radišagoha, bo achalile o lava, so sas lenge pregendo.

O manuša oslavinen o Inepos le Stankengero

¹³ Pre dujto džives pes zgele savore fajtakere vodci, o rašaja the o Leviti paš o zakoňnikos Ezdraš, hoj len te sikavel o zakonos. ¹⁴ Andro zakonos, so o RAJ prikazinda prekal o Mojžiš, arakhle pisimen, hoj o Izraeliti mušinen te bešel andro stani, sar oslavinen andro eftato čhon o Inepos le Stankengero. ¹⁵ Phende, hoj mušinen te rozvakereľ všadzik andre savore fori the andro Jeruzalem: "Džan pro brehi a anen o prajti pal o olivi the pal o dzive olivi, mirti, palmi the pal aver stromi, hoj lendar te keren o stani, avke sar hin pisimen andro zakonos."

¹⁶ Palis savore manuša gele, ande o prajti a kerde peske o stani pre peskere strechi the dvori, pre dvora anglo Chamos a pro phundrađe thana angle Paňakeri the Efrajimiko Brana. ¹⁷ Avke savore manuša, save avle pale andral o Babilon, peske kerde o stani a bešenās andre. Se o Izraeliti oda na kerenas akorestar, sar len ľidžalas o Jozua, le Nunoskero čhavo, dži adadžives. A sas len igen baro radišagos.

¹⁸ Sako džives, le ešebne (perše) dživesestar dži ko posledno džives, genelas le Devleskero zakonos andral o zvitkos. Efta dživesa oslavinenas o inepos a pro ohtoto džives, savore pes jekhetane zdžanas, avke sar sas pisimen andro zakonos.

O manuša phenen avri peskere bini

9 Pro bišuštarto (24.) džives andre oda čhon pes o Izraeliti zgele. Sas urde andro gone, poscinenas pes a o prachos peske čhivkerenas pro šero. ² Akor pes o potomki le Izraeloskere oddelinde savore cudzincendar. Uštĭle a phenenas avri peskere the le dadengere bini. ³ Ačhenas pre peskere thana a trin ori genelas andral o zakonos le RAJESKERO, peskero Devleskero, a aver trin ori phenenas avri o bini a lašarenas le RAJES peskere Devles. ⁴ Palis o Ješua, o Bani, o Kadmiel, o Šebaniah, o Bunni, o Šerebiah, o Bani the o Kenani ačhile pre le Levitengero javiskos a zorale hangoha vičinenas pro RAJ, pre peskero Del. ⁵ O Leviti – o Ješua, o Kadmiel, o Bani, o Chašabnejah, o Šerebiah, o Hodijah, o Šebaniah the o Petachiah – phende:

"Uštĭn a lašaren le RAJES, peskere Devles, savo hino čirlastar pro furt.

Dojekh mi lašarel leskero slavno nav, so hino upral savoro lašariben."

⁶ Palis pes o Izraeliti chudle kavke te modľinel:

"Ó RAJEJA, ča tu korkoro sal RAJ,

tu stvorindaľ o ňebos,

o nekučeder ňebos the savore čercheňa,

e phuv the savoro, so upre hin, o moros the savoro, so andre hin.

Tu des o dživipen savoreske

a savore pro ňebos angle tu bandon a lašaren tut.

⁷ Tu sal o RAJ, o Del,

savo peske kidňal avri le Abram

a ligendal les avri andral o Ur, andral le Chaldejiko phuv,

a diňal leske nav Abraham.

⁸ Sar dikhľal, hoj leskero jilo hino tuke pačivalo, phandľal leha zmluva, hoj e phuv le Kanaančanengeri,

le Chetitanengeri, le Amorejengeri, le Perizejengeri, le Jebusejengeri the le Girgašejengeri

deha leskere potomkenge.

A tu dolikerďal oda lav,

bo sal čačipnaskero.

⁹ Dikhľal amare dadengero pharipen andro Egipt, šundal len, sar ke tu zorales vičinenas paš o Lolo Moros.

¹⁰ Kerďal bare znađeňja the zazraki pro Faraonos, pre savore leskere služobňika the pre savore leskere manuša andre leskeri phuv, bo džanehas,

hoj pes igen namištes likerelas ke tire manuša.

Aleha tu peske kerďal baro nav, so tut hin dži adadžives.

¹¹ Rozdelindal angle lende o moros

a maškaral pregele pal e šuki phuv.

Ale olen, save pal lende džanas, čidal andro baro paňi,

avke sar pes čhivel o bar andro bare paňa.

¹² Tu len lidžahas prekal o džives sar chmarakero slupos

a rači sar jagalo slupos,

hoj lenge te švicines pro drom,

khatar kamle te džal.

¹³ Avľal tele pro verchos Sinaj,

prevakerďal ke lende andral o ňebos

a diňal lenge o prikazaňja

o zakoni, so hine čačipnaskere the lače.

¹⁴ Sikadal len,

hoj te prindžaren tiro Šabbatoskero sentno džives,

a diňal lenge prekal peskero služobňikos Mojžiš

o zakoni the o prikazaňja.

¹⁵ Diňal len o maro andral o ňebos,

sar bokhaľonas,

a the o paňi andral e skala,

sar sas smedne.

Phendal lenge, hoj te džan

a te zalen peske e phuv,

pal savi len diňal lav,

hoj lenge la deha.

¹⁶ Ale on, amare dada, ačhile barikane, zoraľarde peskere jile a na šunenas tire prikazaňja.

¹⁷ Na kamenas tut te šunel

a bisterde pre tire bare zazraki,

so lenge kerďal.

Zoraľarde peskere jile a ile peske andro šero,

hoj pes visarena pale andro otroctvo andro Egipt.

Ale tu sal o Del, savo odmukel

a savo hino jileskero the lačhejileskero,

zľikeres tut andre cholľi a sal barvalo andro jileskeriben,

a vašoda len na omukľal.

¹⁸ Choc te peske kerde somnakuňa gurumňora

a phende: 'Kada hin amaro del,

savo amen ligenda avri andral o Egipt!'

A choc tuke kerenas igen baro nalačhipen,

¹⁹ tu len andre peskero baro jileskeriben

na omukľal pre pušta.

O chmarakero slupos lendar na odgeľa dživese,

ale lidžalas len pre lengero drom.

Aňi o jagalo slupos lendar na odgeľa rači,

ale švicinelas lenge pro drom,

kaj džanas.

²⁰ Andre peskero jileskeriben len sikavehas,

so kampil te kerel.

Čaľarehas len la mannaha

a diňal len te pijel o paňi, sar sas smedne.

²¹ Saranda (40) berš pes pal lende starinehas pre pušta

a na chibalinelas lenge ode ňič.

O plašti pre lende pes na čhingerde

a aňi o pindre na šuvľile.

²² Dehas lenge o ňerindĭpena (vitaztva) upral o

krališagi the narodi

a diňal lenge e phuv dži paš o agor.

On peske zaile e phuv Češbon, kaj kralinelas o Sičhon,

the e phuv Bašan, kaj kralinelas o Og.

²³ Diňal len ajci but čhave, keci hin čerčeňa pro ňebos

a andal len andre odi phuv,

pal savi phendal lengere dadenge,

hoj andre te džan a te zalen la.

²⁴ Lengere čhave ode gele a zaile odi phuv

a tu angle lende pokorindal le Kanaančanen;

diňal andre lengere vasta

le kraľen the le naroden andre odi phuv,

hoj lenca te keren, so kamena.

²⁵ Tire manuša zaile o zorale fori, o ulĭpnaskere maľi,

o khera pherde le barvalĭpnaha,

o chaňiga, so imar sas kerde, o olivakere sadi, o viňici

the but ovocna stromi.

Chale a čalĭle, thulĭle

a radisaľonas prekal tiro baro lačhipen.

²⁶ Ale on na kamenas te šunel a vzburinde pes pre tu.

Tiro zakonos pestar odčhide

a murdarde tire proroken,

save lenge dovakerenas, hoj pes te visaren pale ke tu.

Kerde baro nalačhipen oleha, hoj pes tuke ruhinenas.

²⁷ Vašoda len diňal andro vasta le ňeprijaťelenge

a on len trapinenas.

Sar andre oda pharipen ke tu vičinenas,

tu len šundal avri andral o ňebos.

Andre peskero baro jileskeriben

lenge bičhavehas vodcen,

save len lenas avri andral o vasta le ňeprijaťelendar.

²⁸ Ale sar ča sas andro smirom,

pale kerenas o nalačhipen angle tu.
 Diňal len andro vasta lengere ñeprijateľenge,
 hoj te en tel lengeri zor,
 ale sar pale ke tu vičinenas,
 tu len andre peskero jileskeriben šundal avri andral o
 ñebos
 a buterval len zachraňdjal.
²⁹ Dovakerehas lenge,
 hoj pes te visaren pale ke tiro zakonos,
 ale on ačhile barikane
 a na šunenas tire prikazaňja,
 so lidžan le manušes andro dživipen.
 Sas zacate andre peskere jile, na šunde tut
 a visarde pes ke tu le dumeha.
³⁰ But berša lenca likerehas avri,
 tire Duchoha dovakerehas lenge prekal o proroka,
 ale on na šunenas,
 a vašoda len diňal andro vasta avre narodenge.
³¹ Ale andre peskero baro jileskeriben
 len na zňičindjal aňi na omuklal,
 bo sal jileskero the lačhejileskero Del.
³² Akana Devla amaro,
 savo sal baro, zoralo the darandutno Del!
 Tu dolikeres e zmluva the o lačhejileskeriben:
 Leper tuke, sar cerpinahas akorestar,
 sar amen lidžanas o Asirike kraľa, dži akana!
 Leper tuke, sar cerpinehas amen,
 amare kraľa the vodci, amare rašaja the amare proro-
 ka,
 amare dada the savore manuša!
³³ Tu sal čačipnaskero andre savoreste,
 so pre amende avla, bo tu kerehas pačivalones,
 ale amen kerahas o bini.
³⁴ Amare kraľa the vodci, amare rašaja the amare da-
 da
 na dolikerenas tiro zakonos a na šunenas tire prikaza-
 űja
 aňi oda, so lenge dovakerehas.
³⁵ Tu požehňinehas lenge o krališagos
 a andre peskero baro lačhipen
 lenge diňal bari lačhi phuv,
 ale on na omukenas peskere bini,
 hoj tuke te služinen.
³⁶ Dikh, amen sam adadžives otroka!
 Sam otroka andre odi phuv,
 so diňal amare dadenge,
 hoj andral late te chan o chaben the o lačhipen.
³⁷ Ale vaš amare bini
 o baro ulipen pal adi phuv diňal le kralenge,
 saven ačhadal upral amende.
 On amenca the amare dobitkoha keren, so kamen.
 Sam andro baro pharipen!"

O vodci zapečatinen e zmluva

10 Vaš kada savoro, so pes ačhiľa, amen keras a
 pisinas e zmluva. Amare vodci, o Leviti the o
 rašaja la zapečatinas. ² E zmluva zapečatinde o Ne-
 hemiaš, o čhavo le Chachaljaskero the o Cidkijah.

O rašaja, save zapečatinde e zmluva

³ O Serajah, o Azariah, o Jeremiah, ⁴ o Pašchur, o
 Amariah, o Malkijah, ⁵ o Chattuš, o Šebaniah, o Mal-
 luch, ⁶ o Charim, o Meremot, o Obadiah, ⁷ o Daniel, o
 Ginneton, o Baruch, ⁸ o Mešullam, o Abijah, o Mijamin,
⁹ o Maaziah, o Bilgaj the o Šemajah.

O Leviti, save zapečatinde e zmluva

¹⁰ O Ješua, le Azanijoskero čhavo, o Binnuj, le
 Chenadadoskere čhavendar, o Kadmiel ¹¹ the leskere
 phrala: o Šebaniah, o Hodijah, o Kelita, o Palajah, o
 Chanan, ¹² o Michas, o Rechob, o Chašabiah, ¹³ o
 Zachur, o Šerebiah, o Šebaniah, ¹⁴ o Hodijah, o Bani
 the o Beninu.

O vodci, save zapečatinde e zmluva

¹⁵ O Paroš, o Pachat-Moab, o Elam, o Zattu, o Bani,
¹⁶ o Bunni, o Azgad, o Bebjaj, ¹⁷ o Adonijah, o Bigvaj, o
 Adin, ¹⁸ o Ater, o Chizkija, o Azzur, ¹⁹ o Hodijah, o
 Chašum, o Becaj, ²⁰ o Charif, o Anatot, o Nebaj, ²¹ o
 Magpiaš, o Mešullam, o Chezir, ²² o Mešezabel, o
 Cadok, o Jadduas, ²³ o Palatiah, o Chanan, o Anajah,
²⁴ o Hošeah, o Chananijah, o Chaššub, ²⁵ o Hallocheš, o
 Pilcha, o Šobek, ²⁶ o Rechum, o Chašabnah, o Maase-
 jah, ²⁷ o Achijah, o Chanan, o Anan, ²⁸ o Malluch, o
 Charim the o Baanah.

O manuša den vera, hoj dolikerena o zakonos

²⁹ Aver manuša, o rašaja, o Leviti, ola, save gilaven
 the stražinen, o služobňika andro Chramos the savore,
 save pes oddelinde avre narodendar, hoj te dolikeren
 le Devleskero zakonos, the lengere romňija a čhave,
 save imar oleske achalonas, ³⁰ pridine pes ke peskere
 vodci a ile pre peste vera, hoj ena prekošle, te na dolik-
 erena le Devleskere zakoni, so diňa avri o Del prekal
 peskero služobňikos Mojžiš, a hoj dolikerena savore
 leskere prikazaňja. ³¹ Avke phende:

"Amare čhajen na daha avre narodenge romňenge a
 lengere čhajen na laha amare čhavenge. ³² Te o
 manuša andral aver narodi anena vareso te bikenel
 andro Šabbatoskero džives abo andre aver inepos, či
 oda ela o dživ, na cinaha lendar nič. A sako eftato berš
 amen na laha le ulipnastar nič a omukaha o love
 olenge, kas diňam kečeň. ³³ A mek ke oda dojekh
 amendar sako berš davkeraha rupune love štar grami
 † pre služba andre amaro Devleskero Chramos ³⁴ pro
 sentne mare, pre chabeneskeri obeta, labardī obeta,
 Šabbatoskeri the Neve Čhoneskeri obeta, pro inepi,
 pro sentne dari the pro obeti vaš o bini le Izraeloskere
 the pre savore službi andro Chramos. ³⁵ A amen – o
 rašaja, o Leviti the o manuša – prekal o losos kidaha
 avri, kana andro berš savi famelija anela o kašta pre
 labardī obeta prekal o RAJ, amaro Del, avke sar hin
 pisimen andro zakonos. ³⁶ Davkeraha sako berš ešeb-
 ne (perše) ulipnastar, so skidaha pal e mala the pal

† Oda hin e tretina le šeklostar.

ovocna stromi a daha andre le RAJESKERO Chramos. ³⁷ Mek lidžaha amare ešebne čhaven andro Chramos le rašajenge a oddelinaha len le Devleske; a daha the amare gurumñen the bakren, save ulile ešebne, avke sar hin pisimen andro zakonos, ³⁸ the o ešebno le arestar the le ulipnastar pal savore stromi, o ešebno la moľatar the olejostar a lidžaha oda andro Chramos le rašajenge prekal amaro Del. A le Levitenge daha o dešto kotor le ulipnastar, bo on oda kidena avri andral savore amare gava. ³⁹ Jekh rašaj andral e fajta le Aronoskeri mušinel te el paš oda, sar o Leviti kidena avri o dešto kotor a palis on olestar mušinen te anel o dešto kotor andro chramoskere skladi. ⁴⁰ O Izraeliti the o Leviti mušinen te anel o dari le đivostar, la moľatar the le olejostar, andre ola skladi, kaj hine o sentne veci a kaj bešenias o rašaja, o stražņika the ola, save gilaven. Daha savoro, so kempel prekal o kher amare Devleskero.”

O manuša, save bešenias andro Jeruzalem the Judsko

11 O Izraelike vodci bešenias andro Jeruzalem a kidenas avri prekal o losos dojekha dešta famelija, hoj te džal te bešel andro sentno foros Jeruzalem, medik okla ačhile te bešel andre aver fori the gava. ² O manuša žehņinenas savore ole dženge, save korkore pestar džanas te bešel andro Jeruzalem. ³ Okla Izraeliti, rašaja, Leviti, chramoskere služobņika the potomki le Šalamunoskere služobņikengere bešenias andre peskere khera andre peskere fori.

Kala hine o vodci andral e Judsko provincija, save bešenias andro Jeruzalem:

⁴ Andral o kmeņos Juda: o Atajah, saveske sas dad o Uzziah, leske o Zecharijah, leske o Amariah, leske o Šefatjah the leske o Mahalalel, savo sas potomkos le Percoskero; ⁵ o Maasejah, saveske sas dad o Baruch, leske o Kol-Chozeħ, leske o Chazajah, leske o Adajah, leske o Jojarib the leske o Zecharijah, savo sas potomkos le Šiloskero. ⁶ Savore le Percoskere potomki, save bešenias andro Jeruzalem, sas 468 zorale murša.

⁷ Andral o kmeņos Benjamin:

o Sallu, saveske sas dad o Mešullam, leske o Joed, leske o Pedajah, leske o Kolajah, leske o Maasejah, leske o Itiel the leske o Ješajah, ⁸ a mek o Gabbaj the o Sallaj. Savore sas jekhetane 928. ⁹ O Joel, le Zichriskero čhavo, sas lengero vodcas a o Jehudah, le Hassenuoskero čhavo, sas dujto vodcas andro foros.

¹⁰ O rašaja:

o Jedajah, le Jojariboskero čhavo, o Jachin ¹¹ the o Serajah, saveske sas dad o Chilkijah, leske o Mešullam, leske o Cadok, leske o Merajot the leske o Achitub, savo sas angloda o nekbareder rašaj. ¹² On le famelijenca, save služinenas andro Chramos, sas 822.

A mek o Adajah, saveske sas dad o Jerocham, leske o Palaliah, leske o Amci, leske o Zecharijah, leske o

Paščur the leske o Malkijah, ¹³ a leskere phrala, save sas o fajtakere vodci – savore sas 242.

Mek o Amaššaj, saveske sas dad o Azarel, leske o Achzaj, leske o Mešillemot the leske o Immer ¹⁴ a lengera famelijatar sas 128 zorale murša, savenge sas vodcas o Zabdiel, le Hagedolimoskero čhavo.

¹⁵ O Leviti:

o Šemajah, saveske sas dad o Chaššub, leske o Azrikam, leske o Chašabijah the leske o Bunni.

¹⁶ Mek o Levitengere vodci o Šabbetaj the o Jozabad, save sas upral e buči, so kerenas avri pašal o Chramos; ¹⁷ o Mattanijah, saveske sas dad o Michas, leske o Zabdi, savo sas potomkos le Asafoskero, savo lidžalas anglal o giľa paš o modlitbi; o Bakbukiah, savo leske pomožinelas; the o Abda saveske sas dad o Šammua, leske o Galal a leske o Jedutun. ¹⁸ O Leviti andro sentno foros Jeruzalem sas jekhetane 284.

¹⁹ O chramoskere stražņika:

o Akkub, o Talmon the lengere pašutne. Sas jekhetane 172.

²⁰ Okla manuša andre Judsko

Okla Izraeliti, rašaja the Leviti bešenias andre savore Judske fori, dojekh pre odi phuv, so chudľa andro đedictvos. ²¹ O chramoskere služobņika bešenias pro brehos Ofel andro Jeruzalem a lengere vodci sas o Cichas the o Gišpas. ²² O vodcas le Levitenge andro Jeruzalem sas o Uzzi, saveske sas dad o Bani, leske o Chašabiah, leske o Mattanijah the leske o Michas. O Uzzi sas le Asafoskere potomkendar, save sas lavutara paš e služba andro Chramos. ²³ On pes mušinenas te čerinel andre služba, avke sar o kralis prikazinda, a oda dojekh andro džives, sar pre lende avelas o šoros. ²⁴ O Petachiah, le Mešezabeloskero čhavo, andral e Zerachoskeri fajta andral o kmeņos Juda, sas le Perzike kraliske radcas, savo anelas anglo kralis o veci pal o Izraelike manuša.

O manuša, save bešenias andre aver fori

²⁵ Varesave manuša bešenias andro fori the gava pašes paš peskere maľi. O manuša andral e Judaskeri fajta bešenias andre Kirjat-Arba, Dibon, Jakobceel, ²⁶ Ješua, Molada, Bet-Palet, ²⁷ Chacar-Šual, Beer-Šeba, ²⁸ Ciklag, Mechona, ²⁹ En-Rimmon, Cora, Jarmut, ³⁰ Zanoach, Adullam, Lachiš the Azeka.

Avke o Judske manuša bešenias le forostar Beer-Šeba pro juhos dži andre dolina Hinnom pro severos.

³¹ O manuša andral o kmeņos Benjamin bešenias andro fori Geba, Michmas, Ajja, Betel the andro gava, so ode sas: ³² andro Anatot, Nob, Ananja, ³³ Chacor, Rama, Gittajim, ³⁴ Chadid, Cebojim, Neballat, ³⁵ Lod, Ono the andre dolina Ge-Charašim. ³⁶ Varesave Leviti andral e Judsko bešenias maškar o manuša andral o Benjamin.

O rašaja the o Leviti save avle pale

12 Kala hine o rašaja the o Leviti, save avle pale andral o Babilon le Zerubbabeloha, le Šealtieloskere čaha, the le Ješuaha:

O rašaja:

o Serajah, o Jeremiah, o Ezdraš, ² o Amariah, o Mal-luch, o Chattuš, ³ o Šechaniah, o Rechum, o Meremot, ⁴ o Iddo, o Ginnetoj, o Abijah, ⁵ o Mijamin, o Maadiah, o Bilgah, ⁶ o Šemajah, o Jojarib, o Jedajah, ⁷ o Sallu, o Amok, o Chilkihah the o Jedajah. On sas o vodci le rašajenge the lengere pašutnenge andre oda časos, sar o Ješua sas nekbareder rašaj.

⁸ O Leviti:

o Ješua, o Binnuj, o Kadmiel, o Šerebiah, o Jehudah the o Mattaniah. On peskere pašutnenca lidžanas o giľa, savenca andro Chramos lašarenas le Devles. ⁹ O Bakbukiah, o Unni the okla Leviti ačhenas angle lende a odphenenas le gil'avipnaha pre lengero gil'avipen.

O potomki le Ješuaskere

¹⁰ O nekbareder rašaj o Ješua sas dad le Jojakimoske, ov le Eljašiboske, ov le Jojadaoske, ¹¹ ov le Jonatanoske a ov le Jadduaske.

O vodci andre le rašajengere fajti

¹² Sar o Jojakim sas nekbareder rašaj, kala rašaja sas vodci andre rašajengere fajti:

o Merajah andre le Serajoskeri fajta, o Chananijah andre le Jeremioskeri, ¹³ o Mešullam andre le Ezdrašoskeri, o Jochanan andre le Amarioskeri, ¹⁴ o Jonatan andre le Malluchoskeri, o Jozef andre le Šebanioskeri, ¹⁵ o Adnas andre le Charimoskeri, o Chelkaj andre le Meremotoskeri, ¹⁶ o Zecharijah andre le Id-doskeri, o Mešullam andre le Ginnetonoskeri, ¹⁷ o Zichri andre le Abijoskeri, o Piltaj andre le Minjaminoskeri the Moadioskeri, ¹⁸ o Šammua andre le Bilgoskeri, o Jehonatan andre le Šemajoskeri, ¹⁹ o Mattenaj andre le Jojariboskeri, o Uzzi andre le Jedajoskeri, ²⁰ o Kallaj andre le Salluoskeri, o Eber andre le Amokoskeri, ²¹ o Chašabiah andre le Chilkihjoskeri a o Netaneel andre le Jedajoskeri.

O vodci andre le Levitengere fajti

²² Sar sas nekbareder rašaja o Eljašib, o Jojada, o Jochanan the o Jadduas, a medik kralinelas andre Perzija o Darius, o Leviti the o vodci andre le rašajengere fajti sas zapisimen andro zvitkos. ²³ O vodci andre le Levitengere fajti sas zapisimen ča dži akor, sar sas rašaj o Jochanan, saveske sas papus o Eljašib.

O službi andro Chramos

²⁴ O lašariben the o palikeriben andro Chramos lidžanas kala džene: o Chašabiah, o Šerebiah, o Ješua, o Binnuj the o Kadmiel. Okla aver Leviti ačhenas angle

lende a odphenenas le gil'avipnaha pre lengero gil'avipen, avke sar prikazind'a le Devleskero murš o David.

²⁵ O Mattaniah, o Bakbukiah, o Obadiah, o Mešullam, o Talmon the o Akkub sas stražnika paš o skladi, so sas paš o chramoskere brani.

²⁶ On služinenas akor, sar sas nekbareder rašaj o Jojakim, le Ješuaskero čhavo a ov le Jocardakoskero, a sar sas andro Jeruzalem o Nehemiaš guverneris a sar o zakoňikos Ezdraš služinelas sar rašaj.

E buči dokerd'i a o manuša oslavinen

²⁷ Sar imar kamle te sentňarel o Jeruzalemoskere muri, gele pal savore Leviti, kaj bešenas, hoj te aven a te oslavinen a te palikeren le gil'enca le bašavibnaha pro cimballi, pro harfi the pro citari. ²⁸ Avke o lavutara ode avle andral o gava pašal o Jeruzalem the andral e Netofa, ²⁹ andral o Bet-Gilgal, andral e Geba the andral o Azmavet, bo on peske ačhade gava pašal o Jeruzalem. ³⁰ Sar pes o rašaja the o Leviti obžuzarde, palis obžuzarde the le manušen, o brani the o foroskere muri.

³¹ Palis bičhadom le Judske vodcen, hoj te džan upre pro foroskere muri, a ačhadom duj partiji muršen, save gil'avenas a palikerenas le RAJESKE.

Ešebno (peršo) partija džalal pal o muros pre čači (pravo) sera ke Šmecengeri Brana. ³² Pal lende džalal o Hošajah the jepaš Judske vodci: ³³ o Azariah, o Ezdraš, o Mešullam, ³⁴ o Jehudah, o Benjamin, o Šemajah, o Jeremiah ³⁵ the varesave rašaja, save trubinenas, a pal lende džalal o Zecharijah, saveske sas dad o Jonatan, leske o Šemajah, leske o Mattaniah, leske o Michajah, leske o Zachur the leske o Asaf. ³⁶ Džanas leha the leskeri famelija: o Šemajah, o Azarel, o Milalaj, o Gilalaj, o Maaj, o Netaneel, o Jehudah the o Chanani. On bašavenas pre ajse nastrojji sar the le Devleskero murš o David, a o zakoňikos Ezdraš džalal angle lende.

³⁷ Paš e Prameňiko Brana džanas upre le garadičenca andro Foros le Davidoskero pašal leskero palacis dži paš e Paňakeri Brana pro vichodos.

³⁸ Dujto partija murša, save gil'avenas the palikerenas, džanas pal o muros pre baľogňi (ľavo) sera a pal lende me – o Nehemiaš – jekhetane jepaš manušenca. Džahas pašal e Bovengeri Veža dži ko Buchlo Muros, ³⁹ odarik džanas ke Efrajimiko Brana, ke Puraňi Brana the ke Ribno Brana a odarik ke veža Chananel the ke Veža Mea †, odarik dži ke Bakrengeru Brana a za-ačhilam, sar dogelam paš e Stražňikengeri Brana.

⁴⁰ Avke soduj partiji gele pre peskero than andre le Devleskero Chramos a gil'avenas a palikerenas le RAJESKE. Avke keravas the me jekhetane le jepaš vodcenca ⁴¹ the o rašaja, save trubinenas: o Eljakim, o Maasejah, o Minjamin, o Michajah, o Eljoenaj, o Zecharijah the o Chananijah ⁴² a mek the o Maasejah, o Šemajah, o Eleazar, o Uzzi, o Jochanan, o Malkijah, o Elam the o Ezer. O Jizrachijah lidžalal le muršen, hoj te gil'aven.

† Oda hin e Veža le Šel Slugađengeri.

⁴³ Oda džives anenas ode but obeti a igen radisaľonas, bo o Del len diňa baro radišagos. A the o romňija le čhavenca igen radisaľonas avke, hoj dural šundolas oda radišagos, so sas andro Jeruzalem.

O dari pro lašariben andro Chramos

⁴⁴ Andre oda džives sas ačhade varesave murša, hoj pes te starinen pal o chramoskere skladi, kaj sas o dari le ešebne ulipnastar the le dešte kotorestar. Majinde te anel pal o foroskere maľi kotor le ulipnastar prekal o rašaja the Leviti, avke sar hin pisimen andro zakonos. Savore manuša andre Judsko radisaľonas le rašajengera the le Levitengera bučatar, ⁴⁵ bo on kenas e žužipnaskeri služba the okla službi, so o Del prikazinda. The o chramoskere lavutara the o stražnika kenas peskeri služba, avke sar prikazinda o David the leskero čhavo Šalamun. ⁴⁶ Imar čirlastar, sar dživelas o David the o Asaf, sas džene, save lidžalas olen, save gilavenas a lidžalas o lašaribnaskere the palikeribnaskere gila le Devleske. ⁴⁷ Sar dživenas o Zerubbabel the o Nehemiaš, savore Izraeliti denas sako džives o dari olenge, ko gilavenas, the le stražnikenge. The avre Levitenge denas o sentne dari a on olestar denas kotor le Aronoskere potomkenge.

O Izrael pestar bičhavel le cudzincen

13 Andre oda džives, sar genenas le manušenge andral le Mojžišoskero zakonos, arakhle andre pisimen, hoj o Ammončana the o Moabčana šoha (ňikda) našti en maškar le Devleskere manuša. ² Se na dine chaben aňi paňi le Izraeliten, sar avenas andral o Egipt, ale bičhade pre lende le Bileam, hoj len te prekošel, ale amaro Del oda prekošiben čerinda pro požehnaňje. ³ Sar o manuša šunde kada zakonos, bičhade pestar het savore manušen, save sas andral aver narodi.

O Tobiaš hino avričhido andral o Chramos

⁴ Ale mek angloda, sar pes kada ačhiľa, o rašaj Eljašib sas ačhado upral o chramoskere skladi amare Devleskere. Ov sas famelija le Tobiašoskeri. ⁵ Diňa leske o baro than andro Chramos. Ode angloda odthovkernas o chabeneskere obeti, o kadidlos, o veci pre služba, o dari prekal o rašaja the o dešto kotor le ulipnastar, la moľatar the le olejostar, so sas prekal o Leviti, prekal o lavutara the stražnika.

⁶ Sar pes kada savoro ačhiľa, me na somas andro Jeruzalem, bo andro trandato the dujto (32.) berš, sar kralinelas andro Babilon o Artaxerxes, geľom pale ko kralis. Pal varesavo časos les mangľom, hoj man te mukel te džal het. ⁷ Sar man visardom pale andro Jeruzalem, dodžanľom man pal oda nalačhipen, so kerda o Eljašib prekal o Tobiaš, bo ov leske diňa o kher andro Devleskero Chramos. ⁸ Me pre oda igen cholisalilom a čhidom avri savore leskere veci andral oda kher. ⁹ Palis prikazindom, hoj oda than te žužaren

avri a pale andre te thoven o veci pre chramoskeri služba, o chabeneskere obeti the o kadidlos.

O manuša pale den o dešto kotor

¹⁰ Dodžanľom man the oda, hoj ola, save gilaven andro Chramos, the o Leviti gele pale te kerel buči pre peskere maľi, bo o manuša lenge na denas oda, so kampľa. ¹¹ Akor diňom te zvičinel jekhetane le vodcen a phendom lenge zorales: "Soske hino le Devleskero kher zamuklo?" Palis andom le Leviten the le lavutaren pale andro Chramos, hoj te keren peskeri buči. ¹² Avke savore manuša andral e Judsko chudle te hordinel o dešto kotor le đivostar, la moľatar the le olejostar andro chramoskere skladi. ¹³ Upral ola skladi ačhadom le rašas Šelemiah, le pisaris Cadok the le Levitas Pedajah. Lenge andre oda pomožinelas le Zachuroske čhavo o Chanan, saveske sas papus o Mattaniah. Me džnavas, hoj kala murša hine pačivale a lengeri buči sas te del dojekheske andro Chramos, so leske patrinelas.

¹⁴ Vašoda, ó, Devla miro, leper tuke pre savore veci, so kerdom prekal e služba andro Chramos, a ma bister pre miro pačivaliben.

O Šabbatoskero džives pale sentňaren

¹⁵ A mek dikhľom, hoj o manuša andre Judsko pro Šabbat pučinen o hroznos andro moľakero lisos a pro somara thovenas o zrnos the e mol, o hroznos, o figi the aver veci a lidžanas andro Jeruzalem. Vašoda lenge dovakerdom, hoj te na bikenavkeren o chaben andre oda džives. ¹⁶ Varesave manuša andral o foros Tir bešenas andro Jeruzalem. On anenas ode o ribi the aver veci, hoj te bikenen amare manušenge pro Šabbat. ¹⁷ Akor dovakerdom le Judske vodcenge a phučľom lendar: "Soske keren kada nalačhipen? Soske na sentňaren o Šabbatoskero džives?" ¹⁸ Se vaš kada o Del marda tumare phure daden a zňičinda kada foros. Tumen anen pro Izrael bareder cholľ le Devlestar aleha, hoj na sentňaren o Šabbatoskero džives."

¹⁹ Palis prikazindom, hoj sar paraščuvine zaračola, o Jeruzalemoskere brani mušinen te el zaphandle andre a našti len phundraven, medik na predžala o Šabbatoskero džives. Palis varesaven mire sluhendar thođom paš o brani, hoj te merkinen, hoj ňiko te na anel pro Šabbat andro foros ňisavo chaben the aver veci. ²⁰ Palis ola manuša, save bikenenas the cinavkerenas, presute jekhvar abo duvar avri paš o brani.

²¹ Akor lenge dovakerdom a phendom: "Soske tumen presoven avri paš o brani? Sar kerena oda mek jekhvar, marava tumen!" Avke akorestar imar andro Šabbatoskero džives buter na avenas. ²² Le Levitenge prikazindom: "Obžužaren pes a džan te merkinel paš o brani, hoj te sentňaren o Šabbatoskero džives."

Leper tuke pre ma, Devla miro, the vaš kada, a av ke ma jileskero andre tiro baro kamiben.

Pal o romňija andral aver narodos

²³ Andre ola dživesa dikhľom le muršen andral e Judsko, hoj peske ile romňijen andral o Ašdod, Ammon the Moab. ²⁴ A jepaš lengere čhavendar vakerenas andre Ašdođanengeri čhib the andre aver narodengere čhiba a na džanenas te vakerel andre amari čhib. ²⁵ Vašoda lenge zorales dovakerđom a vičindom pre lende o prekošiben, varesave muršen mardom a cirdnom lenge avri o bala pal o šero. Palis lenge phendom, hoj te len vera anglo Del, a phendom: "Ma den tumare čhajen romňenge lengere čhavage a tumen ma len lengere čhajen tumare čhavage, aňi peske! ²⁶ Či na kerđa aleha binos the o Izraeliko kralis o Šalamun? Maškar o but narodi na sas ajso kralis sar ov. Sas pre dzeka peskere Devleske a ov les ačhađa kraliske upral calo Izrael, ale the avke o džuvľa andral

aver narodi les cirdle andro binos. ²⁷ Mušinas te šunel pal tumende, hoj keren kada nalačhipen a hoj san napačivale le Devleske oleha, hoj peske len romňijen andral aver narodi?"

²⁸ O Eljašib sas nekbareder rašaj a leskero čhavo sas o Jojada. Jekh le Jojadoskere čhavendar peske ila romňa le Sanballatoskera čha andral o foros Bet-Choron, a vašoda les mandar tradľom avri.

²⁹ Ma bister pre lende, Devla miro, hoj meľarde tiri zmluva le rašajenca the le Levitenca!

³⁰ Avke le rašajen the le Leviten obžuzardom savore cudze vecendar. Phendom le rašajenge the Levitenge, kana a sar dojekh lendar te služinel, ³¹ a phendom, kana a sar te anel o kašta the o ešebno (peršo) ulipen andro Chramos.

Devla miro, leper tuke pre oda lačhipen, so kerđom!

ESTER

O kralis kerel bari hoscina

1 Kada hin oda, so pes ačhila akor, sar sas kralis o Ahasver †, savo lidžalas šel the bišuefta (127) provinciji (kraj) andral e Indija dži pro Kuš ††. ² Andre ola dživesa o kralis Ahasver bešel as pro tronos, so sas andro kraliskero foros Šušan. ³ Sar imar kralinelas trito berš, kerda bari hoscina a vičinda peskera bara rada the savoren uradniken; paš leste sas mek o princi, o velitelja the o guvernera andral o phuva Perzija the Medija.

⁴ O kralis lenge sikavelas 180 dživesa peskero barvalipen, baripen the šukariben andre peskero krališagos. ⁵ Sar pregeľa oda časos, kerda bari hoscina prekal savore manuša, save sas andro kraliskero foros Šušan; prekal o nekbarvaleder dži ko nekčoreder. Odi hoscina kerda avri andre bar (zahrada) le palaciskeri a likerelas efa dživesa. ⁶ E bar sas šukares obthodi le firhanga la dragaňa bavnatar, so sas parni the belavo, a figinde len upre pre mramoriskere slupi le rupune obručkenca the le špargenca, so sas kerde le lole pochtanendar. Mek thode pre bar o rupune the somnakune valendi. E phuv pre bar sas obthodi igen but šukare mozaikenca le lole blištace barorendar, le parne mramoristar the le šukare mušlendar. ⁷ O moľa pes davkerenas andro somnakune kuča. Dojekh ole kučendar sas aver a e kraliskeri mol sas igen but, bo o kralis sas igen sčiro. ⁸ Sako šaj pijelas avke, sar kamelas, bo o kralis prikazinda peskere sluhenge andral o palacis, hoj te den savoren ajci, keci on kamena.

E kralovna na šunel le kralis

⁹ Akor kerda the e kralovna Vašti hoscina andro kraliskero palacis prekal o džuvľa.

¹⁰ Pal efa dživesa, sar imar o kralis Ahasver piľa but mol a sas andre lači dzeka, vičinda peskere efa eunuchen ‡: le Mehuman, le Biztas, le Charbonas, le Bigtas, le Abagtas, le Zetar the le Karkas. ¹¹ Phenda lenge: "Vičinen mange la kralovna Vašti, hoj te avel ke ma, a mi thovel peske e koruna pro šero!" Bo e Vašti sas igen šukar džuvli a ov kamelas te sikavel lakero šukariben le nipenge the le anglune muršenge. ¹² Sar avle ke late o sluhi le kraliskere ole lavenca, e kralovna Vašti odphenda leske: "Na džav!" Vašoda o kralis cholisalifa.

¹³ Avke sar o kralis furt kerelas, sar pes kamelas te dodžanel, so phenel o zakonos a so majinel pal oda te

† Oda hin: o Xerxes. †† Abo: Etiopija ‡ O eunuchi sas o anglune sluhi le kraliskere.

kerel, vičinda peske le godavere muršen. ¹⁴ Sas ke leste nekpašeder efa murša andral e Medsko the Perziko phuv: o Karšenas, o Šetar, o Admatas, o Taršiš, o Merešis, o Marsenos the o Memuchan. Lenge sas furt domuklo te vakerel le kraliha, bo sas len nekbareder thana andro krališagos.

¹⁵ O kralis lendar phučľa: "So phenel o zakonos pre oda, so kerda e kralovna e Vašti, te na šunda, so diňa avri o kralis Ahasver le sluhenca, save sas bičhade ke late?"

¹⁶ Akor phenda o Memuchan le krališke the ole muršenge, save sas andre bari rada: "Šunen! E kralovna e Vašti na kerda namištes ča le krališke, ale the savore uradnikenge a mek dojekhe muršeske andral e kraliskeri phuv! ¹⁷ Mek te pes došunena savore romňa, so kerda e kralovna, akor the on dikhena tele peskere romen, bo phenena peske: "O kralis Ahasver vičinda la kralovna, hoj ke leste te džal, a oj na geľa!" ¹⁸ A mek te pes pal e kralovnakere lava došunena o romňa le anglune muršengere andral e Medija the Perzija, mek adadžives the on vakerena avke peskere romenca a na šunena len. No olestar avela ča bare vesekedišagi the e cholli. ¹⁹ No tu, kralina, te tuke hin ada pre dzeka, de avri nevo zakonos, hoj e Vašti imar šoha (ňikda) našti avel anglo kralis. Mi el pisimen andro Medsko the Perziko zakonos, hoj pes te dolikerel pro furt. O kralis mi del lakero than avra džuvľake, ko hin feder sar oj! ²⁰ Te šunela dojekh romni le kraliskero nevo zakonos, so diňa avri prekal calo peskero krališagos, akor peske likerela peskere romes, či hin barvalo vaj čoro."

²¹ Le Memuchanoskeri rada sas pre dzeka le krališke the le anglune muršenge a o kralis kerda avke, sar ov phenda. ²² Rozbičhada o lila maškar peskere manuša andre dojekh provincija le krališagoskeri, andre dojekh čhib the pisišagos. Pisinda, hoj dojekh murš te lidžal peskero kher a pre leskero lav les sako te šunel.

E Ester ačhel kralovnake

2 Sar imar pregeľa e cholli le kraliskeri le Ahasveroskeri, furt gondofinelas pre oda, so kerda e kralovna Vašti, the pre oda, so sas pal late avridino andro zakonos. ² Palis le kraliskere sluhi, save pašal leste kerenas, leske phende: "Kralina, de, hoj tuke te arakhen so nekšukareder pačivale čhagen. ³ Ačhav andre savore provinciji (kraj) le krališagoskere manušen, hoj te kiden avri le nekšukaredere pačivale čhagen. Mi anen len andro kraliskero foros Šušan ko Hegaj, ke tiro eunuchos, savo merkinel pre savore džū-

vľa le kraliskere, a o Hegaj len mi del veci pro šukariben. ⁴Odi čhaj, savi ela pre dzeka le kraliske, mi ačhel kralovnake vaš e Vašti." Kada sas le kraliske pre dzeka a kerđa avke.

⁵Andro foros Šušan bešelas jekh Židos, savo pes vičinelas Mordekaj. Ov sas andral o Benjaminiko kmeños a sas o čhavo le Jairoske. O Jairus sas o čhavo le Šimejoske a o Šimej sas o čhavo le Kišoske. ⁶Sar o kralis Nebukadnecar ifa avri le kralis le Jechonijah andral o Jeruzalem, akor sas ilo the o Mordekaj le zaphandle manušenca. ⁷O Mordekaj bararelas le bačiskera čhajora sar peskera čha, bo na sas la aňi daj aňi dad. Lakero nav sas Hadassa, ale vičinelas pes the Ester. Sas igen šukar čhaj.

⁸Sar pes diňa avri le kraliskero zakonos, chudle te skideli upre but čhajen andro foros Šušan ko Hegaj a merkinelas pre lende. ⁹Ole Hegajoske sas e Ester igen pre dzeka a diňa la o veci pro šukariben the oda nekfeder chaben. Diňa la mek efa šukare služobničken andral o palacis a ke oda len diňa nekfeder than andro haremos le kraliskero.

¹⁰No e Ester ňikaske na phendã, kaskeri hiňi, aňi andre savo narodos ulifa (pes narodzinda), bo o Mordekaj lake phendã, hoj ňikaske te na vakerel, ko hiňi. ¹¹O Mordekaj pes sako džives predžalas angle dvora le haremoskeri, kaj bešelas e Ester. Kamľa te džanel, sar lake ode hin a so pes laha kerel.

¹²Dojekha čha pririchtinenas jekh berš, hoj te el šukar, medik na džalas ko kralis. Sas oda avke avridino, hoj la makhenas šov čhon le mirrakere olejoha a palis la makhenas šov čhon le voňave mascenca the aver vecenca pro šukariben. ¹³Akor, sar avelas o šoros pre odi čhaj, lidžanas la ko kralis. Sar džalas andro kraliskero palacis, šaj urelas pre peste andral o haremos, so ča kamelas. ¹⁴Oj džalas ko kralis rači, no sar tosara odarik avelas avri, džalas andre aver haremos paš o kraliskero sluhas Šaašgaz, savo merkinelas pre aver kraliskere džuvľa. Odi čhaj, savi leske na sas pre dzeka, imar pes na dochudelas pale paš o kralis, te na sas vičimen pal o nav.

¹⁵Sar avľa o šoros pre Ester (pre čhaj le Abichajiloskeri, sava barardã avri o Mordekaj), hoj te džal ko kralis, na mangelas ňič; ča oda, so lake o Hegaj phendã. Dojekheske, ko dikhľa la Ester, sas takoj pre dzeka. ¹⁶No ligende la Ester ko kralis Ahasver andro dešto (10.) čhon, oda sas o čhon Tebet, andro eftato berš leskere krališagostar.

¹⁷Sar dikhľa o kralis la Ester, kamelas la buter sar savore čhajen. Oj leske sas buter pre dzeka a presikadã lake bareder pačiv sar savore pačivale čhajenge. Thođa lake pro šero e kraloviko koruna a ačhadã la kralovnake vaš e Vašti. ¹⁸Avke kerđa o kralis bari hoscina prekal e Ester a vičindã savore peskere anglune muršen the le uradňiken. Diňa avri baro inepos prekal dojekh provincija a ščirones rozdavkerelas le manušenge o dragane dari.

O Mordekaj zachraňinel le kralis

¹⁹Sar dujtovar anenas jekhetane le čhajen, o Mordekaj ačhifa uradňikos andro palacis †. ²⁰E Ester mek furt likerelas andre peste, kaskeri hiňi a andre savo narodos ulifa (pes narodzinda). Na phendã oda avri ňikaske, avke sar lake oda phendã o Mordekaj. Oj les šunelas, avke sar oda ciknovarestar furt kerelas.

²¹Andre oda časos, sar o Mordekaj ačhifa uradňikoske, sas ode ipen duj eunuchi, o Bigtan the o Tereš, save merkinenas paš o vudar le kraliskero. On igen sas choľamen pro kralis a dovakerenas pes, sar le kralis te murdaren. ²²O Mordekaj pes savorestar dodžanľa a sa phendã avri la kralovnake Esterake. Oj palis geľa a vakerelas sa le kraliske vaš o Mordekaj. ²³Pal oda lav, so šundã o kralis, pes dodžanle, hoj hin o čačipen. Ole sodujen eunuchen ile te umblavel (te figinel). Savoro, so pes ačhifa, pisinde andre kronika (zvitkos pal o čirlatune veci) paš o kralis.

O Haman kamel te murdarel le Židen

3 O kralis Ahasver hazdňa upre le Agagitos Haman, savo sas le Hammedatoskero čhavo. Ačhadã les pro nekbareder than upral savore raja andro peskero krališagos. ²Akor savore uradňika, save sas andre dvora le kraliskeri, sar dikhle le Haman, bandonas anglal leste, avke sar oda phendã o kralis. Ale o Mordekaj na kamelas te perel pro khoča aňi te bandol anglal leste.

³Akor o kraliskere uradňika, save sas andre dvora, chudle te dovakerel le Mordekajiske: "Soske tu na dolikeres oda, so o kralis diňa avri?" ⁴Dovakerenas leske sako džives, no ov len na šunelas, bo phendã lenge, hoj hino Židos. Vašoda gele ko Haman a phende leske pal oda, bo kamle te dikhel, či leske oda predžala.

⁵Sar o Haman dikhľa pro Mordekaj, hoj ov čačes na perel pro khoča aňi na bandol anglal leste, sas pre leste igen choľamen. ⁶Sar pes mek došundã o Haman, andral savo narodos hin o Mordekaj, phendã peske: "Na murdarava ča les, ale the leskero calo Židoviko narodos, so dživen andre calo Ahasveroskero krališagos."

⁷Sar imar kralinelas o kralis Ahasver dešuduj (12) berš, andro ešebno (peršo) čhon, so pes vičinelas Nisan, chudle te losinel vaš o Haman, hoj pes te lel avri o džives the o čhon. No o losi ("o purim") pele pro dešutrito (13.) džives andro dešudujto čhon, so hin o čhon Adar.

⁸Akor o Haman phendã le kraliske: "Hin ade jekh narodos, so hine rozčhide maškar o narodi andral savore provinciji (kraji) tire krališagostar. Lengero zakonos hin aver sar o zakonos savore narodengero a na dolikeren le kraliskero zakonos. Nane mištes prekal o kralis oda te mukel ča avke. ⁹Te o kralis domukela, mi del avri ajso zakonos, hoj dojekh Židos te el murdardo. Me dav miro lav, hoj počinava trin šel the saranda ez-

† E Hebrejiko čhib: bešelas andre kraliskeri brana

era (340 000) kili rup le uradņiken, hoj len te thoven andre kraliskere pokladņici."

¹⁰ Sar ŝunda o kralis kala lava, iľa tele pal o angušt e angrusi a diňa le Hamanoske, le Hammedatoskere čhaske, le Židengere űeprijateliske. ¹¹ Akor phenda le Hamanoske: "Muk tuke tire love a dža. Ker ole narodoha, so ča tu kames."

¹² Pro dešutrito (13.) džives ešebne čhonestar vičinde peske le uradņiken, so pisinenas o zakoni. On pisinenas savoro, so o Haman lenge vakerelas, andre dojekh čhib the pisišagos prekal dojekh provincija. No pisinenas oda, so ov phenda, savore vladareng the le guvernerenge the le princenge andral ola provinciji. Savoro sas pisimen andro nav le kraliskero le Ahasveroskero a sas oda zapečatimen leskera angrusaha. ¹³ Ola lila rozbičhavkerenas andre savore kraliskere provinciji le sluhenca pro graja. Sas andre pisimen: "Andro dešudujto (12.) čhon, so hin Adar, pro dešutrito (13.) džives, savoren Židen murdaren avri a űikas na muken te dživel, le ternendar dži ko phure, le džuvlfendar dži ko čhavore." Sas lenge domuklo, hoj savoro, so hin le Židen, peske šaj len. ¹⁴ Oda, so sas pisimen andro lila, sas avridino sar zakonos prekal dojekh provincija, hoj te džanel te el pririchtimen dojekh narodos pre oda džives.

¹⁵ Mekča, so avľa avri o zakonos andro kraliskero foros Šušan, o sluhi pro graja chudle takoj te rozlídžal ola lila. Palis o kralis the o Haman peske beše tele a chudle te pijel. Ale o manuša andre oda foros Šušan na džanenas, so te kerel, bo ačhile bi e godi.

O Mordekaj mangel la Esteratar e pomoca

4 O Mordekaj pes dodžanľa pal savoro, so pes ačhiľa. Čhingerđa pre peste o gada, urđa pre peste o gone a pro šero peske čhivkerelas popolos. Palis geľa andro foros a igen zorales the phares chudľa te rovel. ² Avke doavľa ča paš e kraliskeri brana, bo andro palacis űiko naštĭ geľa upre urdo andro gono. ³ Všadzik andre dojekh provincija (krajos), kaj pes dochudľa le kraliskero lav, so sas leskero zakonos, pes o Židi zdžanas a likerenas o postos andre bari žala the roviben. Urenas pre peste o gone a pašlonas peske andro popolos.

⁴ Palis avle la Esterakere služobņički pal e kraliskeri dvora the lakere eunuchi a phende lake savoro, so pes ačhiľa. La kralovnake sas pharo a phenda lenge: "Džan ko Mordekaj a čhiven pal leste tele o gono. Uren les upre andro gada." Ale ov na kamľa. ⁵ Avke e Ester vičinda ke peste jekhe kraliskere eunuchos le Hatach. Bičhađa les ko Mordekaj, hoj pes te dodžanel, so les trapinel a soske pes avke likerel.

⁶ O Hatach geľa ko Mordekaj pro pľacos, kaj sas e kraliskeri brana, hoj lestar te phučel, so pes ačhiľa. ⁷ Akor o Mordekaj savoro vakerelas le Hatachoske, so pes leske ačhiľa a mek pal o love, keci kamel te del o Haman andre kraliskeri pokladņica, te dela le Židen te murdarel. ⁸ Diňa le eunuchoske jekh lĭl ole zakonostar, so sas avridino andro foros Šušan, hoj les lake te sikav-

el a te rozvakerel, pal soste džal. Bo kamľa, hoj pes e Ester te dodžanel savorestar, so kerđa o Haman. A phenda le Hatachoske: "Dža ke Ester a phen lake, hoj mušinel te džal ko kralis pes te mangel vaš peskero calo narodos, hoj len te na del te murdarel."

⁹ Avke o Hatach geľa ke kralovna Ester a rozvakerđa lake, so vakerelas o Mordekaj. ¹⁰ Ale e Ester bičhađa pale le Hatach, hoj te phenel le Mordekajiske: ¹¹ "Savore sluhi the o nipi andral e kraliskeri phuv džanen pal o zakonos, hoj dojekh murš vaj džuvľi, ko džala andre andruņi dvora a kas o kralis na vičinda, mušinel te merel. Ča oda, pre kaste o kralis sikavela peskere somnakune žezloha, na merela. No na vičinde man, hoj te džav ko kralis, imar tranda (30) dživesa."

¹² O Mordekaj ŝunda o lava la Esterakere ¹³ a odphenda lake pale: "Ma gondolin tuke, hoj ča tu jekh na mereha savore Židendar, bo sal andro kraliskero palacis. ¹⁴ Te akana aveha čhit, odi zachrana šaj avel avrestar prekal o Židi a ena zachraņimen, ale tu the tiri famelija merena. No ko džanel, čĭ tu na ačhiľal kralovnake ipen vaš oda, so pes akana kerel."

¹⁵ E Ester pale odphenda le Mordekajiske: ¹⁶ "Dža, kide avri savoren Židen, saven arakheha andro foros Šušan, a poscinen tumen vaš ma. Ma chan a ma pijen trin dživesa the trin rača. Me man avke poscinava the mire služobņičkenca. Palis džava ko kralis, choc džanav, hoj oda le kraliskero zakonos na domukel. Te majinava te merel, mi merav."

¹⁷ Akor geľa o Mordekaj het a kerđa sa avke, sar leske phenda e Ester.

E kralovna Ester anglal o kralis

5 E kralovna Ester pes pro trito džives urđa andre kraloviko ruchos a geľa andro palacis andre andruņi dvora a thoda pes te ačhel anglo oda than, kaj bešel o kralis. O kralis ipen bešelas pre peskero tronos, pre oki sera, khatar pes delas te dikhel pro vudar andre dvora. ² Sar dikhľa o kralis la kralovna Ester te ačhel pre andruņi dvora, takoj leske sas pre dzeka a nacirdľa pre Ester o somnakuno žezlos, so likerelas andro vast. Oj geľa ke leste a chudľa le kraliskero žezlos le agorestar.

³ O kralis phučľa la Esteratar: "Savo hin tut mangipen? Choc mangeha jepaš le krališagostar, dava tuke les."

⁴ "No te hin oda le kraliske pre dzeka," phenda e Ester le kraliske, "mi avel o kralis adadžives le Hamanoha pre hoscina, so leske pririchtindom."

⁵ Avke o kralis phenda le sluhenge: "Džan sigo, anen le Haman, avke sar oda kamľa e Ester."

Palis o kralis the o Haman gele pre hoscina, so kerđa e Ester. ⁶ Sar pijenas e mol, o kralis phenda la Esterake: "Phen mange, so kames, a oda pes ačhela. Choc mangeha jepaš le krališagostar, dava tuke les."

⁷ E Ester leske odphenda: "Hin man ke tut mangipen a the vareso, so kamav. ⁸ Te me tuke, kralĭna, som čačes pre dzeka a te mange deha savoro, so mangava, a kereha oda, so kamav, vičĭnava tut, kralĭna, the le

Haman pale pre miri hoscina, so kerava prekal tu-mende. Tajsa tuke, kralina, odphenava, so tu mandar phučas."

O Haman kamel te umblavel le Mordekaj

⁹ Sar o Haman džalas khere, igen radisaŋolas a sas leske igen mištes. Ale sar dikhla le Mordekaj paš e kraliskeri brana, hoj aňi na uštıla aňi na daralas lestar, sas pre leste igen choŋamen. ¹⁰ Ale o Haman pes zlik-erđa a džalas khere.

Sar doavla khere, vičinda peske le prijatelēn the peskera romňa la Zereš. ¹¹ Palis pes o Haman angle lende lašarelas, savo baro hin leskero barvalipen, keci čhave les hin, a sar les hazdňa o kralis upre upral savore peskere anglune murša the raja. ¹² A vakerelas lenge: "Ale mek oda nane savoro! Adadžives man e kralovna Ester vičinda pre hoscina a somas ode ča me le kraliha. No e kralovna kerela tajsa pale hoscina! Vičinda man jekhetane le kraliha! ¹³ Ale prekal mande oda nane nič, sar dikhav te bešel paš e kraliskeri brana le Židos le Mordekaj."

¹⁴ Ale leskeri romňi e Zereš the savore leskere prijatela leske phende: "De te ačhavel e umbladi (šibeñica) le kaštestar uči bišuduj (22) metri a mang tosara le kralis, hoj le Mordekaj te del upre te figinel. Palis tu ča dža le kraliha radišagoha pre odi hoscina!"

Le Hamanoske sas kala lava pre dzeka a diňa te kerel e umbladi.

O kralis hazdel upre le Mordekaj

6 Odi rat o kralis našti sovelas a phenda le sluhenge: "Anen mange e kronika, andre savi hin pisimen savoro, so pes ačhila mire krališagostar, a pregenen mange andral." ² Sar genenas, dodžanle pes, hoj o Mordekaj phenda avri pro eunuchi, pro Bigtan the pro Tereš, pre ola sluhi, save merkinenas paš o vudar le kraliske, save kamenas te murdarel le kralis.

³ "So chudla o Mordekaj vaš oda, so kerđa prekal ma?" phučla lendar o kralis.

"Na chudla nič," odphende leske o sluhi.

⁴ Akor phučla o kralis: "Ko hin avri pre dvora?" Ipen akor avla o Haman andre dvora le palaciskeri te phenel le kraliske, hoj le Mordekaj te umblavel (te figinel) pre kaštuňi umbladi (šibeñica), so leske ov korkoro diňa te kerel.

⁵ Le kraliskere sluhi leske phende: "Kralina, o Haman hino avri pre dvora."

"Mi avel andre," phenda o kralis. ⁶ O Haman geľa andre a o kralis lestar phučla: "So kempel te kerel oleske, kaske kamel o kralis te presikavel e pačiv?"

A o Haman peske phenda: "Kaske avreske kamľahas o kralis buter te presikavel e pačiv, te na mange?"

⁷ Vašoda o Haman odphenda le kraliske: "Te kames, kralina, varekaske te presikavel e pačiv, ⁸ mi anen leske o ruchos, so urel ča o kralis, a mi anen leske the le grajes la kraliskera korunaha, pre savo ča o kralis bešel.

⁹ Phen jekheske tire nekbareder rajendar, hoj leske te

anen ruchos the le grajes, a mi urel oles, kaske kamel o kralis te presikavel e pačiv. Palis les mi thovel te bešel pro graj pro foros a mi vičinen anglal leste: 'Avke pes presikavel e pačiv oleske, kas kamel o kralis upre te hazdel!'"

¹⁰ Akor phenda o kralis le Hamanoske: "An takoj o ruchos the le grajes, pal savo vakerehas, a avke de pačiv le Židos le Mordekaj, savo bešel paš e brana. Ma muk avri nič olestar, so phenda!"

¹¹ Avke o Haman ila le grajes the o ruchos, urđa les pro Mordekaj a thođa les te bešel pro graj a predžalas pes leha maškar o foros a vičinelas anglal leste: "Avke pes presikavel e pačiv oleske, kas kamel o kralis upre te hazdel!"

¹² Avke o Mordekaj avla pale andre kraliskeri brana. No o Haman andre bari ladž garuđa o muj a denašelas khere. ¹³ Rozvakerđa oda savoro avri peskera romňake la Zerešake the peskere prijatelenge, so pes leske ačhila.

Leskere godaver murša the e romňi e Zereš phende: "Te hino o Mordekaj andral o Židoviko narodos, phenav tuke, kada hin mekča o agor oleske, so pes tuha ačhela, hoj na ŋerineha (na zvitazineha) upral leste. Merkin pre tu, bo čačas na dopereha mištes."

¹⁴ Mek leha vakerenas, sar avle le kraliskere sluhi, te lel le Haman ke kralovna Ester pre hoscina.

O Haman hino potrestimen

7 O kralis the o Haman sas pale pre hoscina ke kralovna Ester. ² Pro dujto džives, sar pijenas e mol pre hoscina, o kralis pes pale phučla latar: "So prekal tu šaj kerav Ester? Ča phen mange a dava tuke dži jepaš mire krališagostar."

³ E kralovna Ester odphenda: "Ó, kralina, te arakhlom o kamiben andre tire jakha a te tuke som pre dzeka, mangav tut vaš o miro dživipen the vaš o dživipen mire narodoske. Kada hin oda, so tutar me mangav. ⁴ Bo samas bikende me the miro narodos, hoj amen te murdarden avri. Te majindamas ča te el bikende sar otroka, na phendomas nič, hoj tuke te na kerav mek buter pharipen."

⁵ O kralis pes la Esteratar phučla: "Ko hin oda? Kaj hin oda, savo kamel ajso vareso te kerel?"

⁶ "Oda ŋeprijatelis hin kada nalačo Haman!" odphenda leske e Ester.

Sar oda šunda o Haman, parňila avri andro muj anglo kralis the angle kralovna. ⁷ Akor o kralis cholisalila a uštıla pal oda than, kaj pijenas e mol, a geľa avri andre bar (zahrada) paš o palacis. O Haman andre odi dar uštıla a geľa ke kralovna Ester te mangel la vaš peskero dživipen, bo dikhla, hoj o kralis les kamel imar te del te murdarel.

⁸ Sar o kralis avelas pale andral e bar le palacistar pre oda than, kaj sas e hoscina, akor ipen o Haman geľa te pašlol paš lakere pindre pre odi valenda, kaj e kralovna Ester pašolas, a mangelas la vaš peskero dživipen. Sar o kralis dikhla, so kerđa, phenda leske: "Tu mek kames paš mande andre miro kher te pašlol la kralovna?"

Sar phendá o kralis kada lav, o sluhi takoj garude le Hamanoske o muj. ⁹ Avke jekh le eunuchendar, savo pes vičinelas Charbonas, phendá le kraliske: "Avri hin e kaštuňi umbladi (šibeňica), so diňa imar anglal te kerel o Haman prekal o Židos Mordekaj, savo zachraňinda le kralis. Odi umbladi ačhel paš o Hamanoskero kher a hin uči bišuduj (22) metri."

Akor o kralis phendá: "Figinen le Haman upre!" ¹⁰ On gele a figinde le Haman pre kaštuňi umbladi, so diňa te kerel prekal o Mordekaj. Akor le kraliskeri cholí preačhíla.

Le kraliskero zakonos prekal o Židi

8 Mek andre oda džives o kralis Ahasver diňa la kralovnake Esterake o kher le Hamanoskero, oleskero, savo kamla te murdarel avri le Židen. Sar e kralovna Ester palis vakerelas le kraliske, so hin lake o Mordekaj, ov sas vičimen anglo kralis. ² Avke o kralis iňa tele pal o vast e angrusi, so sas angloda le Hamanoste, a diňa le Mordekajiske. E kralovna Ester ačhađa le Mordekaj upral le Hamanoskero majetkos.

³ E Ester pes pale mangelas angle le kraliskere pindre, rovelas a mangelas les, hoj te na domukel oda, so kamla te kerel o Agagitos Haman le Židenge. ⁴ Akor o kralis nacirdla ke Ester pale peskero somnakuno žezlos a e Ester uštíla anglo kralis.

⁵ "Kralína miro," phendá e Ester, "te tuke som šukar angle tire jakha a te tuke hin ada pre dzeka a mek man čačes dureder kames a te tuke gondolines, hoj hin oda mištes, so vakerav, de te pisinel lila, hoj oda, so diňa avri o Agagitos Haman, o čhavo le Hammedatoskero, pes te zaačhavel, hoj le Židen andral savore kraliskere provinciji (kraji) te na murdaren avri. ⁶ Sar šaj dikhav, kralína, pre miro narodos the pre miri famelija, hoj len džan te murdarel? Sar šaj dikhav pre oda?"

⁷ Avke o kralis Ahasver phendá la kralovnake Esterake the le Mordekajiske: "Le Hamanoskero kher diňom la Esterake, bo les diňom te umblavel (te figinel) pre umbladi (šibeňica) vaš oda, hoj kamla te murdarel le Židen. ⁸ Ale o zakonos, so ov diňa avri, pes na del te čerinel, bo me imar thođom la angrusakero znakos pre oda lil. Ale me šaj kerav oda, hoj tumenge akana domukava te del avri nevo zakonos. Keren avke, sar džanen prekal e zachrana tumare narodoske, a thoven upre miro znakos."

⁹ Avke pes ačhíla, hoj andro bišutrito (23.) džives andro trito čhon Sivan o Mordekaj peske vičinda le kraliskere uradňiken, hoj te pisinel lil prekal o Židi, vladara, guvernera the princi andro šel the bišuefta (127) provinciji la Indijatar dži ko Kuš. Sas pisimen prekal dojekh phuv the narodos andre lengeri čhib the pisišagos a the le Židenge lengeri čhibaha the pisišagoha. ¹⁰ O Mordekaj diňa oda džives te pisinel ola lila andro Ahasveroskero nav a thođa upre le kraliskero znakos. Andral e kraliskeri maštalna diňa te rozlídžal le sluhenca pro igen sidarde graja ola lila.

¹¹ Andre oda lil o kralis domukla le Židenge andral dojekh foros, hoj pes te zdžan jekhetane a te na den

pes te murdarel. Te o slugađa andral aver phuva abo narodos kamlahas len te murdarel, hin lenge domuklo savoren slugađen lengere romňenca the čhavenca te murdarel, hoj ňiko lendar te na ačhel džido, a šaj peske len oda, so hin lengero. ¹² Andre jekh dešutrito (13.) džives the andro dešudujto (12.) čhon Adar sas lenge tiš oda domuklo te kerel andre savore provinciji le Kraliskere le Ahasveroskere. ¹³ Oda lil majinda te el avridino sar o zakonos prekal savore provinciji, hoj o Židi te en pririchtimen pes te marel peskere ňeprijateľenca, sar oda džives avela. ¹⁴ O sluhi gele pro graja a sidarenas pro drom, avke sar lenge oda o kralis phendá. O zakonos sas avridino the andro foros Šušan.

O Židi radisaľon

¹⁵ Sar o Mordekaj odgeľa, sas pre leste urde ajse gada, so urelas the o kralis. Sas pre leste plaštós, so sas belavo the parno, a pro šero les sas bari somnakuňi koruna. O plaštós sas sido le pochtanestar the lole purpurostar. O manuša andral o foros Šušan radisaľonas. ¹⁶ Le Židen sas smirom the bachtalo džives. Predživenas baro radišagos a všadzík lenge o nipi presikavenas e pačiv. ¹⁷ Andre savore fori, phuva the všadzík, kaj pes dochudla le kraliskero lav the leskero zakonos, sas le Židen baro radišagos a kerde peske inepos the hoscini. But manuša andral aver narodi pes pridenas ko Židi, bo pes lendar daranas.

O Židi murdaren peskere ňeprijateľen

9 Andro dešudujto (12.) čhon Adar pro dešutrito (13.) džives, sar pes majinda te kerel pal o zakonos, so sas avridino, peske o ňeprijateľa gondoline-nas, hoj ňerinenas (zvitazinena) upral o Židi. Ale ačhíla pes oda, so ňiko na užarelas, hoj le Židen sas bareder zor sar len. ² Andral dojekh provincija (krajos) le kraliskeri le Ahasveroskeri pes savore Židi jekhetane zgele andre peskere fori, hoj pes te maren ole manušenca, save len kamenas te murdarel. Anglo Židi ňiko na obačhíla, bo pre savore narodi avla bari dar. ³ Palis savore princi, uradňika the guvernera andral savore provinciji ačhenas paš o Židi, bo avla pre lende bari dar anglo Mordekaj. ⁴ Le Mordekaj sas baro lav anglo kralis a došunde pes pal leste andre dojekh provincija. Ov sas furt zoraleder.

⁵ Akor o Židi marenas savore peskeren ňeprijateľen le šablēnca a mudarkerenas len avri, hoj ňiko lendar te na ačhel džido. Kerenas lenca, so ča kamenas. ⁶ Ča andro baro foros Šušan o Židi murdarde pandž šel (500) muršen. ⁷ Mule the o Paršandat, o Dalfon, o Aspatas, ⁸ o Poratas, o Adalijas, o Aridatas, ⁹ o Parmaštas, o Arisaj, o Aridaj the o Vajzatas. ¹⁰ On sas o deš čhave le Hamanoskere, savo sas čhavo le Hammedatoskero, le Židengero ňeprijateľis. Ale o Židi na ile nič olestar, so ačhíla pal lende.

¹¹ No mek oda džives pes o kralis došundá, keci manuša sas murdarde andro foros Šušan, ¹² a phendá

la kraljovna Esterake: "Došundom man, hoj andro foros Šušan o Židi murdarde pandž šel (500) muršen the le deše Hamanoskere čhaven. So kerde mek pre okla mire provinciji? Te hin tut mek vareso, hoj tuke te kerav, phen mangle!"

¹³ "Te tuke oda hin pre dzeka, kralina," odphenda e Ester, "domuk le Židenge, hoj tajsa te keren oda, so kerde adadžives. O tēla le Hamanoskere čhavengere mi en figimen pre umbladi (šibeñica)."

¹⁴ Avke o kralis phenda, hoj oda te keren. A andro foros Šušan o kralis diña avri zakonos, hoj le Hamanoskere deše čhavengere tēla te figinen pre umbladi. ¹⁵ Pro dešuštarto (14.) džives andro čhon Adar pes pale zgele o Židi andro foros Šušan a murdarde trin šel (300) muršen. A avke sar angloda na ile nič le barvalipnastar, so ačhiła pal lende.

¹⁶ A mek andral aver provinciji o Židi pes jekhetane zdžanas, hoj pes te maren peskere neprijateljēna, hoj te el len smirom lendar. Murdarde eftavardeš the pandž ezera (75 000) manušen, ale na ile nič le barvalipnastar, so ačhiła pal lende. ¹⁷ Oda pes ačhiła pro dešutrito (13.) džives andro čhon Adar, ale pro dešuštarto (14.) džives peske kerde hoscina. Oda džives oslavinenas sar baro inepos. ¹⁸ No andro foros Šušan pro dešutrito (13.) the dešuštarto (14.) džives o Židi murdarenas peskere neprijateljēn a pro dešupandžto (15.) džives pes zgele, hoj peske te keren inepos. Andre oda džives igen radisaŕonas a sas len bari hoscina. ¹⁹ Vašoda le Židenge, save dživen andro gava, hin o dešuštarto (14.) džives sar inepos, kaj peske jekh aver davkeren o dari.

O Inepos Purim

²⁰ Palis o Mordekaj pisinda andre savoro, so pes ačhiła, a diña te bičhavel o lila savore Židenge, save sas pašes the dur, andre savore provinciji le kraliskere le Ahasveroskere. ²¹ A phenda lenge: "Sako berš mušinen te likerel o dešuštarto (14.) the dešupandžto (15.) džives andro čhon Adar sar inepos, ²² bo andre ola dživesa, sar sas tumen imar smirom peskere neprijateljendar, pes čerinda tumari žala pro radišagos a o roviben pro bachtalo džives. Avke likerel peske ola dživesa sar inepos a jekhetane maškar peste davkeren o chaben a le čoren o dari."

²³ Avke o Židi oda priile a chudle te kerel, sar lenge oda pisinda o Mordekaj, ²⁴ bo o Agagitos Haman, o čhavo le Hammedatoskero, o neprijateljēn savore Židengero, rodelas, sar te murdarel le Židen. Ov čhida o losi "o purim", pre savo džives len te murdarel. ²⁵ Ale sar o kralis pes dodžanla, hoj o Haman kamelas te murdarel le Židen, diña le lileha te pisinel, hoj oda te visarel pre leste, a avke les the leskere čhaven diña te figinel pre umbladi. ²⁶ A vašoda pes vičinel oda inepos Purim pal o Hebrejiko lav "pur". Vaš savoro, so pes ačhiła, the vaš oda, so pisinda o Mordekaj andro lil, ²⁷ o Židi peske ile kala duj dživesa sar inepos. On, lengere potomki the ola, save pes ke lende priden, les likerel andro lil. ²⁸ Kala duj dživesa peske mušinen te leperel a te dolikerel sako berš savore Židovike fameliji andre dojekh pokoleñje, andre dojekh phuv the andre dojekh foros. Kala dživesa o Židi mušinen te oslavinel o Purim pro furt a lengere potomki mušinen peske furt pre lende te leperel.

²⁹ Palis e kraljovna Ester, e čhaj le Abichajiloskeri, pisinelas dujto lil jekhetane le Mordekajoha pal o Inepos Purim, hoj pes te dolikerel pro furt. ³⁰ Ola lila rozbičhađa savore Židenge andro šel the bišuefta (127) kraliskere provinciji. Andro lila sas pisimen: "Mi el maškar tumende o smirom the o čačipen. ³¹ Me, e kraljovna Ester, the o Mordekaj dav kada Inepos Purim, hoj pes te dolikerel pro furt; andre oda džives, so sas imar avridino, a mušinen les tumen the tumari cali famelija, o čhave the tumare potomki, te dolikerel a te ačhen andre oda džives andro postos zorale rovbna-ha." ³² Oda zakonos pal o Inepos Purim sas pisimen andro zvitkos, avke sar prikazinda e Ester.

Le Mordekajiskeri slava

10 O kralis Ahasver diña avri, hoj dojekh manuš andral savore phuva the ostrovi leske mušinen te del o dañe. ² Savore kraliskere bare the lače skutki, pal o baripen le Mordekajiskero the pal oda, sar les palis upre hazdña, sas pisimen andro kroniki le Medske the Perzike kralenge. ³ Oda Židos Mordekaj sas dujto pal o kralis Ahasver, sas les baro lav anglo Židi a angle lengere jakha sas igen baro, bo kerelas savoro prekal oda, hoj te en andro smirom, a privakere-las pes vaš lende.

JONAŠ

O Jonaš denašel het le Devlestar

1 O lav le RAJESKERO avla ko Jonaš, ko čhavo le Amittajoskero: ²“Ušti a dža andre oda baro foros Ninive a zoraha phen avri pre leste, bo me dikhľom, savo baro hin lengero nalačhipen.”

³ Ale o Jonaš uštíľa, hoj te denašel het le RAJESTAR andre phuv Taršiš. Geľa tele andre Joppa, kaj arakhľa e loďa, so ode džalas. Počinda vaš o drom a geľa andre loďa, hoj lenca te džal andro Taršiš le RAJESTAR.

⁴ Ale o RAJ bičhaďa zorali balvaj pro moros a avla bari burka a imar dičholas, hoj e loďa rozperela. ⁵ O namorňika pre loďa pes daranas a chudle sako te vičinel pre peskero del. Chudle andral e loďa avri te čhivkerel o veci andro moros, hoj te el lokeder.

Ale o Jonaš peske olestar na kerelas nič. Geľa dži andre nekteluneder than la loďake te pašľol a zorales zasuča. ⁶ Avla paš leste o kapitanos la loďakero a phenda leske: “So tute, hoj soves? Ušti, vičin ke tiro Del! Šaj el, hoj ela leske pharo pal amende a na meraha.”

⁷ Akor o namorňika peske phende: “Aven, čhivas o losi a dodžanaha pes, ko hin oda, prekal kaste pes ačhiľa kada nalačhipen.” Avke čhide o losi a peľa o losos pro Jonaš. ⁸ Phende leske: “Akana amenge phen, soske pre amende avla kada nalačhipen? So ade keres? Khatar sal? Andral savi phuv the narodos sal?”

⁹ O Jonaš lenge phenda: “Me som Hebrejis a lašarav le RAJES, le ňeboskere Devles, savo kerďa o moros the e šuki phuv.”

¹⁰ Akor ola murša igen daranas a phende leske: “S'oda kerďal?” Bo pes dodžanle, hoj denašel le Devlestar. O Jonaš lenge oda phenda. ¹¹ Phende leske: “Akor, so majinas tuha te kerel, hoj te preačhel e burka pro moros?” Bo e burka furt goreder zoraloľas.

¹² Ov lenge phenda: “Čhiven man andro moros a o moros pes preačhela te hazdel upre. Bo džanav, hoj vaš mande pre tumende avla kadi bari burka.”

¹³ Ale o murša veslinenas savora zoraha, hoj pes te dochuden la loďaha pre šuki phuv, ale na delas pes, bo e burka sas furt zoraleder a zoraleder. ¹⁴ Vašoda vičinenas pro RAJ: “Joj, Devla! Ma domuk, hoj te meras vaš o dživipen kale manuškero! Ma thov pre amende leskero ňevinno rat! Se tu sal o RAJ a kerďal avke, sar tuke sas pre dzeka.” ¹⁵ Paľis ile le Jonaš, čhide les andro moros a o moros pes zaačhaďa. ¹⁶ Avke ola murša chudle te daral igen le RAJESTAR a obetinde leske obeta a dine leske vera.

O Jonaš pes modľinel andre riba

2 Ale o RAJ bičhaďa, hoj te avel bari riba, hoj te zľiginel le Jonaš. O Jonaš sas andre riba trin dživesa the trin rača.

² O Jonaš pes modľinelas andral e riba ko RAJ, ke peskero Del, ³ a phenda: “Andral miro pharipen vičinavas pro RAJ a odphenda mange, dži telal andral o mulengero svetos pre tu vičinavas, mangas man, hoj mange te pomožines, a tu man šundal. ⁴ Čhidal man maškar o Stredozemno Moros, hoj man o prudos te učharel andre. Savore ola bare paňa le zorale vlnenca džanas upral ma. ⁵ A phendom mange: ‘Choc som odčhido tire jakhendar, the avke dikhava tiro sentno Chramos.’ ⁶ O paňa man zaile dži ko kirlo, o moros man sa zaučharďa andre, le moroskeri čar pes mange zapačarďa pašal o šero. ⁷ Geľom tele dži ke phuv paš o nekteleder zakladi le verchengere, e phuv pal ma andre zaphandľa peskere brani pro furt. Ale tu, RAJEJA, Devla miro, cirdňal avri miro dživipen andral e chev.

⁸ Sar andre mande miri duša merelas, akor man zagondolňdom pre tu, RAJEJA, a miri modľitba avla dži ke tiro sentno Chramos. ⁹ Ola manuša, save den pačiv le devlen, so nane pre ňisoste, visaren pes le Devleskere lačhipnastar. ¹⁰ Ale me tuke kamav te anel e obeta le bare paľikeribnaha a kamav te doľikerel ola lava, so tut diňom. E zachrana hin le RAJESTAR!”

¹¹ Akor o RAJ phenda la ribake, hoj te čhungarel avri le Jonaš pre šuki phuv, a oj oda kerďa.

O Ninivčana keren pokaňje

3 Akor o lav le RAJESKERO avla dujtovar ko Jonaš: ²“Ušti a dža andre oda baro foros Ninive a zoraha phen avri ke leste oda, so tuke phenava.” ³ O Jonaš uštíľa a geľa andro Ninive, sar phenda o RAJ. Ninive sas ajso baro foros, hoj trin dživesa kampelas les te predžal.

⁴ Ešebno (peršo) džives o Jonaš geľa andro foros a chudľa lenge zorales te vakereľ: “Mek saranda (40) dživesa a o Ninive ela zňičimen!” ⁵ Akor o nipi andral o Ninive pačandíle le Devleske. Phende peske, hoj ľikereňa o postos, a urde pes upre andro gone – le nek-barederestar dži ko nekcikneder.

⁶ Sar pes došundľa pal oda le Niniveskero kralis, uštíľa upre pal peskero tronos, čhida tele o plaštös, urďa pes andro gone a bešľa peske andro prachos. ⁷ Andro Ninive diňa te džanel: “Kada tumenge phenel o kralis the leskere uradňika: te na chan nič o manuša, aňi e

džvirina, aňi o gurumňa, aňi o bakrore – te na pasinen pes, aňi te na pijen paňi. ⁸ Ale o manuša the e džvirina pes mi uren andro gone a mi vičinen ko Del. Sako pes mi visarel peskere nalače džživpnastar the olestar, so keren namištes avreske. ⁹ Ko džanel, či o Del na čerinela oda, so kamla te kerel, a na ela leske pharo pre amende a na odvisarela pes peskera bara choľatar, hoj amen te na meras?”

¹⁰ Sar o Del dikhľa, hoj pes visarde peskere nalače džživpnastar, avľa leske pharo pre lende a na domukľa nič olestar, so kamla te kerel pre lende.

O Jonaš rušel pro Del

4 Le Jonašiske na sas oda ňisar pre dzeka a sas igen choľamen. ² Palis pes modlinelas ko RAJ: “Joj, RAJEJA! Či oda na phendom, mek sar somas khere? Vašoda ešeb (peršo) kamľom te denašel andro Taršiš, bo džanavas, hoj sal kamibnaskero the jileskero Del, savo ľikerel avri le manušenca. Džanavas, hoj sal barvalo andro lačhipen a visareha tut ole nalačhipnastar, so kamlal te kerel le binošenge. ³ Akana, RAJEJA, le mandar miro džživipen, bo feder mange hin te merel, sar te dživel.”

⁴ Ale o Del lestar phučľa: “Hin mištes, hoj tut choľardal?”

⁵ O Jonaš geľa avri andral o foros pro vichodos a ačhila ode. Ode peske kerdä streškica a bešľa peske andro ciños, hoj te dikhel, so pes ačhela andro foros.

⁶ O RAJ, o Del, diňa, hoj te barol avri upral o Jonaš bari rastlina, hoj les upral o šero te el o ciños, hoj leske te el feder. O Jonaš olestar igen radisaľolas. ⁷ Ale o Del diňa sig tosara pro dujto džives, hoj o kirmo te rozchal e rastlina, a šučila avri. ⁸ Sar avľa avri o kham, o Del diňa, hoj te phurdel le vichodostar e balvaj. O kham labarelas o šero le Jonašiske a sas leske igen namištes. Phendä peske: “Feder mange hin te merel, sar te dživel!”

⁹ Ale o Del phendä le Jonašiske: “Hin mištes, hoj tut choľares vaš odi rastlina?” O Jonaš leske odphendä: “He! Choľarav man dži pro meriben!” ¹⁰ O Del leske phendä: “Tuke hin pharo pal odi rastlina, pre savi na kerehas nič, hoj te barol, so tel jekh rat bariľa avri a tel jekh rat the šučila avri? ¹¹ A mange na majinel te el pharo vaš oda baro foros Ninive, andre savo hin buter sar 120 000 manuša, save na džanen te rozprindžarel, so hin lačho the nalačo – the mek but džvirini?”

MATUŠ

Le Ježišoskero rodokmeños

- 1** O lil pal o rodokmeños le Ježišoskero Kristoskero, čhavo le Davidoskero, čhavo le Abrahamoskero.
- ² O Abraham sas dad le Izakoske, o Izak sas dad le Jakoboske, o Jakob sas dad le Judaske the leskere phralenge
- ³ a o Juda sas dad le Perciske the le Zerachoske, savenge sas daj e Tamar. O Perc sas dad le Checronoske, o Checron sas dad le Ramoske,
- ⁴ o Ram sas dad le Amminadaboske, o Amminadab sas dad le Nachšonoske, o Nachšon sas dad le Salmonoske,
- ⁵ o Salmon sas dad le Boaziske la Rachabatar a o Boaz sas dad le Obedoske la Rutatar. O Obed sas dad le Izajoske,
- ⁶ o Izaj sas dad le kraliske le Davidoske a o David sas dad le Šalamunoske, savo uliŕa (pes narodzinda) le Urijašiskera romňatar.
- ⁷ O Šalamun sas dad le Rechabemoske, o Rechabeam sas dad le Abijoske, o Abijah sas dad le Asaske,
- ⁸ o Asa sas dad le Jošafatoske, o Jošafat sas dad le Jehoramoske a o Jehoram sas dad le Uzzioske.
- ⁹ O Uzziah sas dad le Jotamoske, o Jotam sas dad le Achazoske, o Achaz sas dad le Chizkijoske,
- ¹⁰ o Chizkija sas dad le Menaššeske, o Menašše sas dad le Amonoske a o Amon sas dad le Jozijašiske.
- ¹¹ O Jozijaš sas dad le Jekonijašiske the leskere phralenge akor, sar sas o nipi andral o Izrael zaile andro Babilon.
- ¹² Paloda, sar sas o Izraeliti zaile andro Babilon, sas le Jekonijaš čhavo o Šealtiel a o Šealtiel sas dad le Zerubabeloske.
- ¹³ O Zerubbabel sas dad le Abijudoske, o Abijud sas dad le Eljakimoske, o Eljakim sas dad le Azoriske,
- ¹⁴ o Azor sas dad le Cadokoske, o Cadok sas dad le Achimoske a o Achim sas dad le Elijudoske.
- ¹⁵ O Elijud sas dad le Eleazaroske, o Eleazar sas dad le Mattanoske, o Mattan sas dad le Jakoboske
- ¹⁶ a o Jakob sas dad le Jozefoske, savo sas rom la Mariake, savake uliŕa o Ježiš, saves vičinen Kristus.
- ¹⁷ Avke savore pokoleňja le Abrahamostar dži ko David sas dešuštar (14); le Davidostar dži akor, sar sas o Izraeliti zaile andro Babilon, sas dešuštar pokoleňja; a akorestar dži ko Kristus sas tiš dešuštar pokoleňja.

Sar uliŕa o Ježiš Kristus

- ¹⁸ O Ježiš Kristus uliŕa (pes narodzinda) kavke: Akor, sar sas leskeri daj e Maria mangadi le Jozefoha, mek angle oda sar pes zgele, sikađa pes, hoj hiňi khabňi le Sentne Duchostar.
- ¹⁹ Ale o Jozef, lakero rom, sas čačipnaskero manuš a vaš oda, hoj lake na kamla te kerel ladž, kamla la počoral te premukel.
- ²⁰ Sar pal oda gondofinelas, sikađa pes leske o aňjelos le Rajeskero andro suno a phenda: "Jozef, čhavo le Davidoskero, ma dara tut te prilel la Maria romňake, bo oda čhavoro, saves oj užarel, hin le Sentne Duchostar.
- ²¹ Ulola lake čhavo a deha leske nav Ježiš, bo ov zachraňnela peskere nipen lengere binendar."
- ²² Kada savoro pes ačhila vašoda, hoj pes te ačhel oda, so phenda o Raj prekal o prorokos:
- ²³ "Dikh, e pačivali džuvli khabňola, ulola lake čhavo a dena leske nav Immanuel," so hin prethodo: "O Del amenca."
- ²⁴ O Jozef uštiŕa andral o soviben a kerđa avke, sar leske oda phenda o aňjelos le Devleskero, a iŕa la Maria romňake.
- ²⁵ Ale le Jozef na sas la Mariaha nič dži akor, medik lake na uliŕa (pes narodzinda) čhavo. A ov leske diňa nav Ježiš.

O godaver murša andral o vichodos

- 2** Akor, sar o Ježiš uliŕa (pes narodzinda) andre Judsko Betlehem, sas o Herodes kralis a andro Jeruzalem avle o godaver murša pal o vichodos.
- ² A phučenas: "Kaj hin oda Židoviko kralis, savo uliŕa? Bo dikhŕam leskeri čercheň pro vichodos a avŕam anglal leste te bandol."
- ³ Sar oda šunda o kralis Herodes, predarandiŕa a the calo Jeruzalem leha.
- ⁴ A zvičinda savore anglune rašajen the le zakoniken a phučelas lendar, kaj majinel te ulol o Kristus.
- ⁵ On leske phende: "Andre Judsko Betlehem, bo avke hin pisimen prekal o Proroka:
- ⁶ "Tu, Betlehem, andre Judsko phuv, ŕiŕsoha na sal nek-cikneder andral o anglune fori andre Judsko, bo tutar mange avela o vodcas, savo lidžala mire manušen – le Izrael – sar bakroren."
- ⁷ Akor o Herodes vičinda počoral le godavere muršen a mištes pes lendar dophučŕa, kana pes lenge sikađa e čercheň.

⁸ Avke len bičhađa andro Betlehem a phendā: “Džan a mištes tumen dophučen pal oda čhavoro. Sar les arakhena, aven mange te phenel, hoj the me te džav a te banduvav anglal leste.”

⁹ On šunde le kralis avri a gele het. A e čerčeň, savi dikhle pro vichodos, džalas anglal lende, medik na za-ačhiľa upral oda than, kaj sas o čhavoro.

¹⁰ Sar dikhle e čerčeň, igen radisalile.

¹¹ A sar gele andro kher, arakhle le čhavores la Mariaha, leskera daha. Pele pro khoča a bandonas anglal leste. Ile avri peskere dari a dine les somnakaj, kadidlos the mirra.

¹² Ale andro suno lenge o Del phendā, hoj te na džan pale ko Herodes, vašoda gele avre dromeha pale andre peskeri phuv.

Denašen andro Egipt

¹³ Sar on odgele, sikađa pes o aňjelos le Rajeskero le Jozefoske andro suno a phendā: “Ušti, le tuha le čhavores the leskera da a denaš andro Egipt! Ačh ode dži akor, medik tuke na phenava! Bo o Herodes rodela le čhavores, hoj les te murdarel.”

¹⁴ Ov uštiľa, iľa peha rači le čhavores the leskera da a denašľa andro Egipt.

¹⁵ Sas ode dži akor, medik na muľa o Herodes, hoj pes te ačhel oda, so phendā o Raj prekal o prorokos: “Andral o Egipt vičindom mire čhas.”

¹⁶ Sar dikhľa o Herodes, hoj o godaver murša leha thode avri, igen pes choľarda. Diňa te murdarel savore muršoren dži duj berš andro Betlehem the pašal cali odi phuv, pal oda časos, pre savo pes mištes dophučľa le godavere muršendar.

¹⁷ Akor pes ačhiľa oda, so sas phendo prekal o prorokos Jeremiaš:

¹⁸ “O hangos šundiľa andro foros Rama, baro roviben the o hikišagos. Oda e Rachel rovel upral peskere čhave a na kamel te el andro smirom, bo on imar nane.”

Aven pale andral o Egipt

¹⁹ Sar muľa o Herodes, sikađa pes andro suno o aňjelos le Rajeskero le Jozefoske andro Egipt

²⁰ a phendā leske: “Ušti, le tuha le čhavores the leskera da a dža andre Izraeliko phuv, bo mule ola, save kamenas te murdarel le čhavores.”

²¹ Ov uštiľa, iľa peha le čhavores the leskera da a avľa andre Izraeliko phuv.

²² Ale sar šundā, hoj imar o Archelaos kralinel andre Judsko phuv vaš peskero dad o Herodes, daralas pes ode te džal. Andro suno leske sas phendo, hoj te džal andre Galileja.

²³ Vašoda avľa ode a bešelas andro foros, so pes vičinel Nazaret, hoj pes te ačhel oda, so sas phendo prekal o Proroka, hoj ov pes vičinel Nazaretsko.

O Jan Krstiteľ

³ Andre ola dživesa avľa o Jan Krstiteľ a kazinelas pre Judsko pušta

² a phenelas: “Visaren tumen le binendar! Bo pašes hin le ňeboskero krališagos!”

³ O Jan hin oda, pal savo imar anglal phendā o prorokos Izaiaš:

“Kada hin o hangos, so vičinel pre pušta: ‘Pririchtinen o drom le Rajeske, rovňaren avri leske o chodňiki!’”

⁴ Oda Jan sas urdo andro gada la tãvakera srstatar, pašal o per les sas cipuno sirimos a chalas kobilki the maľakero medos.

⁵ Akor avenas ke leste o manuša andral calo Jeruzalem, cali Judsko the cali phuv pašal o paňi Jordan

⁶ a phenenas avri peskere bini a ov len bolelas andro paňi Jordan.

⁷ A sar dikhľa but Farizejen the Saducejen, hoj aven pre leskero bolipen, phendā lenge: “Fajta sapengeri, ko tumenge sikađa, sar te denašal le Devleskera choľatar, so avela?”

⁸ Akor dživen avke, hoj o nipi te dikhen, hoj pes tumen visardan tumare binendar!

⁹ Ma gondolinen tumenge, hoj phenena: ‘Se o Abraham hino amaro dad!’ Bo phenav tumenge, hoj o Del kale barendar šaj kerel čhaven le Abrahamoske!

¹⁰ O tover imar hino prithodo paš o koreňis le stromengero a dojekh stromos, savo na anel lačo ovocje, pes čhinel avri a čhivel pre jag.

¹¹ Me tumen bolav le paňeha, hoj pes te sikavel, hoj tumen pes visardan le binendar, ale oda, savo avel pal ma, hino zoraleder sar me. Na som hodno leske mek aňi o sandalki te lidžal. Ov tumen bolela le Sentne Duchoha the la jagaha.

¹² Andre leskero vast hin o vejaris a ov prežužarela peskero humnos. O prežužardo dïv (zrnos) sthovela andre peskeri šopa, ale o phus labarela andre jag, so šoha (ňikda) na murdaľola.”

O Ježiš boldo le Janostar

¹³ Akor avľa o Ježiš andral e Galileja paš o Jordan pal o Jan, hoj pes leske te del te bolel.

¹⁴ No o Jan leske na kamľa te domukel a phenelas: “Mange kempel, hoj te avav boldo tutar a tu aves pal ma?”

¹⁵ Ale o Ježiš leske odphendā: “Akana muk avke! Bo kempel amenge te kerel savoro spravodlišagos, so o Del kamel.” A paľis leske domukľa.

¹⁶ Sar sas o Ježiš boldo, takoj avľa avri andral o paňi. A phundriľa leske o ňebos a dikhľa, hoj o Duchos le Devleskero sar holubica avelas tele pre leste.

¹⁷ A andral o ňebos šundiľa o hangos: “Kada hin miro čhavo, saves kamav. Lestar man hin o radišagos!”

O beng pokušinel le Ježiš

⁴ O Ježiš sas ligendo upre pre pušta le Duchostar, hoj les o beng te pokušinel.

² A pal oda, sar pes poscinelas saranda (40) dživesa the saranda rača, bokhalila avri.

³ Avla ke leste o beng a phendā leske: "Te sal Čhavo le Devleskero, phen, hoj kale barendar te ačhen mare."

⁴ Ov odphendā: "Hin pisimen: 'O manuš na dživela ča le marestar, ale dojekhe lavestar, so avel avri le Devleskere mujestar.'"

⁵ Akor les iła o beng andro sentno foros, thoda les te ačhel upre pro agor le chamoske

⁶ a phendā leske: "Te sal Čhavo le Devleskero, čhiv tut tele. Se hin pisimen: 'Prikazina peskere aňjelenge pal tu a chudena tut pro vasta, hoj te na demes o pindro pro bar.'"

⁷ O Ježiš leske odphendā: "Ale hin the pisimen: 'Na pokušineha le Rajes, tire Devles!'"

⁸ Pale les iła o beng pro igen učo verchos a sikađa leske savore krališagi le svetoskere the lengero baripen.

⁹ A phendā leske: "Kada savoro tuke dava, te angle mande pereha a bandoha."

¹⁰ Akor leske phendā o Ježiš: "Dža het, bengeja, bo hin pisimen: 'Ča anglo Raj, tiro Del, bandoha a ča leske korkoreske služineha!'"

¹¹ Akor les o beng omukla, avle o aňjela a kerenas pašal leste.

O Ježiš chudel te služinel andre Galileja

¹² Sar šundā o Ježiš, hoj le Jan phandle andre berte-na, geľa andre Galileja.

¹³ Omukla o Nazaret a avla te bešel andro foros Kafarnaum, savo hino paš o moros, andro phuva Zebulun the Naftali,

¹⁴ hoj pes te ačhel oda, so phendā o prorokos Izaiaš:

¹⁵ "E phuv le Zebulunoskeri the e phuv le Naftaliskeri, pro drom ko moros, pal o Jordan, e Galileja le Nažiden-geri!"

¹⁶ O manuša, save dživenas andro kalipen, dikhle baro kham. Olenge, save dživenas andre odi phuv andro ciňos le meribnaskero, avla avri o kham."

¹⁷ Akorestar chudla o Ježiš te kazinel a te vakerel: "Visaren tumen le binendar! Bo pašes hin le ňboskero krališagos."

O Ježiš vičinel ešebne učeňiken

¹⁸ Sar phirelas pašal o Galilejsko moros, dikhla duje phralen, le Šimon (saves vičinen Peter) the le Andrej leskere phrales, sar mukenas e sita andro moros, bo sas ribara.

¹⁹ A phendā lenge: "Aven pal ma a me tumendar kera-ava ribaren, save chuden le manušen."

²⁰ On takoj omukle o siti a gele pal leste.

²¹ Sar geľa sikra dureder, dikhla avre duje phralen, le Jakob the le Jan, le Zebedeoskere čhaven. Sas pre lođka lengere dadeha le Zebedeoha a prikerenas o siti. Vičinda len

²² a on takoj omukle e lođka the peskere dades a gele pal leste.

O Ježiš sikavel andre Galileja

²³ O Ježiš phirelas pašal cali phuv Galileja a sikavelas ode andro sinagogi. Kazinelas o evaňjelium pal o krališagos a sastarelas dojekh nasvaliben the dojekh dukh, so sas le nipen.

²⁴ A rozlignenda pes pal leste o hiros pal cali Sirija. Anenas ke leste savore nasvalen, save cerpinenas andro dukha, le zaphandlen demonenca, olen, saven sas epilepsija, the le kaliken a o Ježiš len sastarelas.

²⁵ Džanas pal leste but nipi andral e Galileja, andral o Dekapolis, Jeruzalem, Judsko the andral e phuv pal o Jordan.

O vakeriben pro verchos

5 Sar o Ježiš dikhla ole nipen, geľa upre pro verchos. Bešla peske a leskere učeňika avle paš leste.

² A chudla len kavke te sikavel:

Ko hin bachtalo

³ "Bachtale hine o čore pro duchos, bo lengero hin o ňboskero krališagos.

⁴ Bachtale hine ola, save roven, bo o Del lenge dela pale o radišagos.

⁵ Bachtale hine o ciche, bo lengeri ela e phuv.

⁶ Bachtale hine ola, save hine bokhale the smedne pal o spravodlišagos, bo on ena čalarde.

⁷ Bachtale hine o lačhejileskere, bo o Del ela ke lende lačhejileskero.

⁸ Bachtale hine o žužejileskere, bo on dikhena le Devles.

⁹ Bachtale hine ola, save anen o smirom, bo on pes vičinenena le Devleskere čhave.

¹⁰ Bachtale hine ola, pre kaste džan vaš o spravodlišagos, bo lengero hin o ňboskero krališagos.

¹¹ Bachtale avena, te vaš ma pre tumende namištes vakerena, džana pre tumende a phenena pre tumende savoro nalačhipen.

¹² Radisaľon a thoven baripen, bo baro hin tumaro počiňiben andro ňbos, bo avke džanas the pro proroka, save sas angle tumende."

O lon the o svetlos le phuvakero

¹³ "Tumen san o lon la phuvakero. Te o lon našavela peskero londipen, soha pes londarela? Pre ňisoste imar nane lačo, ča hoj pes te čhivel avri a o nipi pal oda te phiren.

¹⁴ Tumen san o svetlos le svetoskero. O foros, so ačhel upre pro verchos, našti te garuvel.

¹⁵ Se e momeli na labaren pre oda, hoj la te garuven tel e piri, ale thoven la pro momelaris a labol savorengenge andro kher.

¹⁶ Avke mi labol tumaro svetlos anglo manuša, hoj te dikhnen tumare lače skutki a te lašaren tumare Dades, savo hino andro ňbos."

Pal o Zakonos

¹⁷ "Ma gondolinen tumenge, hoj avlom te prephagel o Zakonos abo le Proroken. Na avlom te prephagel, ale te pherdarel.

¹⁸ Bo čačipen phenav tumenge, hoj medik na našlona e phuv the o ņebos, na našlola aňi jekh pismenkos aňi jekh čjarkica andral o Zakonos, medik pes savoro na ačhela.

¹⁹ Oles, ko prephaglahas ča jekh le nekciknedere prikazaňjendar a sikadahas avke le manušen, vičinena nekcikneder andro ņeboskero krališagos. Ale oles, ko len dolikerela a sikavela, vičinena baro andro ņeboskero krališagos.

²⁰ Bo phenav tumenge, te na ela tumaro spravodlišagos (spravodlišagos) feder sar oda le zakoňikengero the le Farizejengero, šoha (ňikda) na džana andro ņeboskero krališagos."

Pal o rušiben

²¹ "Šundān, hoj sas phendo le phurenge: '*Na murdareha!* Oda, ko murdardahas, mušinel te džal anglo sudos.'

²² Ale me tumenge phenav, hoj sako, ko rušel pre peskero phral, mušinel te džal anglo sudos. Sako, ko phendahas peskere phraleske: 'Tu demado!' mušinel te džal angle Bari Rada. A sako, ko phendahas: 'Tu dilino!' ela čhido andro jagalo peklos.

²³ Te andalas tiro daros pro oltaris a ode tuke avlahas pre godi, hoj tire phrales hin vareso pre tute,

²⁴ muk ode tiro daros anglo oltaris, džā a lačhuv tire phraleha. Palis av a obetin tiro daros.

²⁵ Gondolin mištes a dothov tut sigo oleha, ko džal pre tute, medik sal leha pro drom, hoj te na del tut andre le sudcaske a o sudcas tut diňahas le stražňikoske a palis tut čhidehas andre bertena.

²⁶ Čačipen phenav tuke, hoj odarik na aveha avri, medik savoro na počineha."

Pal o lubipen

²⁷ "Šundān, hoj sas phendo le phurenge: '*Na kereha lubipen!*'

²⁸ Ale me tumenge phenav, hoj oda, ko dikhela pre džuvli a andre peskeri godi la kamel, oda imar kerđa laha lubipen andre peskero jilo.

²⁹ Te tut cirdel pro binos tiri čači (pravo) jakh, džubin la avri a čhiv la tutar het! Bo feder tuke hin, hoj te merel jekh tiro kotor, sar te calo tiro telos ulahas čhido andro peklos.

³⁰ Te tut cirdel pro binos tiro čačo vast, odčhin les a čhiv tutar het! Bo feder tuke hin, hoj te merel jekh tiro kotor, sar te calo tiro telos ulahas čhido andro peklos."

Pal o rozvodos

³¹ "Sas avke phendo: '*Oda, ko omukela peskera romňa, mi pisinel lake premuklo lil.*'

³² Ale me tumenge phenav, hoj oda, ko omukela peskera romňa, te oj na kerđa lubipen, lidžal la ko lubipen a sako, ko peske lela kajsa romňa, savi hiňi pre-mukli, kerel o lubipen."

Pal e vera

³³ "Šundān mek, hoj sas phendo le phurenge: '*Na leha klamišagoha e vera, ale dolikereha le Rajeske tiri vera!*'

³⁴ Ale me tumenge phenav, hoj šoha te na len vera, aňi pro ņebos, bo oda hin o tronos le Devleskero,

³⁵ aňi pre phuv, bo oda hin o than, kaj ov thovel peskere pindre, aňi pro Jeruzalem, bo oda hin o foros ole bare Kraliskero.

³⁶ Aňi pre tiro šero na leha vera, bo mek aňi jekh bal našti keres parno abo kalo.

³⁷ Ale sar vakeren, ta vakeren avke, hoj tumaro 'He' mi el 'He' a tumaro 'Na' mi el 'Na'. Savoro, so hin buter upral oda, hin le nalačhestar."

Te na visaren pale o nalačo

³⁸ "Šundān, hoj sas phendo: '*E jakh vaš e jakh a o dand vaš o dand.*'

³⁹ Ale me tumenge phenav: Ma de pale oleske, ko tuke kerel namištes. A oleske, ko tut demela pal e čači (pravo) čham, visar the aver čham.

⁴⁰ Te vareko pes tuha kamel te sudzinel, hoj tuke te lel o teluno gad, muk leske the o gerekos.

⁴¹ A te vareko tut ispidela, hoj leha te džas jekh kilometros, džā leha duj.

⁴² Oles, ko tutar mangel vareso, de. A olesar, ko kamel tutar kečeň, ma visar tut."

Te kamas peskere ņeprijateľen

⁴³ "Šundān, hoj sas phendo le phurenge: '*Kameha tire prijateľis a na kameha oles, savo pre tu džal.*'

⁴⁴ Ale me tumenge phenav: Kamen peskere ņeprijateľen, [žičinen o lačo olenge, save tumen prekošen, keren o lačhipen olenge, save tumen našti avri ačhen] a mangel pes ko Del vaš ola, [ko tumen tele dikhen] a džan pre tumende,

⁴⁵ hoj te aven o čhave peskere Dadeske, savo hino andro ņebos, bo kerel, hoj o kham te avel avri pro nalače the pro lače a del o brišind pro čačipnaskere the pro načačipnaskere.

⁴⁶ Bo te kamľanas ča olen, save tumen kamen, savo počinišiben tumen užarel? Či na keren oda the o napačabnaskere?

⁴⁷ A te pozdravindanas ča tumare phralenge, soha ulanas aver? Či na keren oda the o manuša, save na prindžaren le Devles?

⁴⁸ Aven dokonale avke, sar tumaro Dad, savo hino andro ņebos."

Sar te del le čoren

6 "Merkinen tumenge, hoj te na keren tumare lače skutki anglo manuša avke, hoj tumen te

dikhen, bo palis imar tumenge na počinela pale tumaro Dad, savo hino andro űebos.

² Avke te des vareso le čoren, ma ker oda avke, hoj pal oda sako te džanel †, sar oda keren ola dujemujengere, save pes rado presikaven andro sinagogi the pro ulici, hoj len o manuša te lašaren. Čačipen phenav tumenge, hoj imar chudle peskero počiniben.

³ Ale te tu des vareso le čoren, te na džanel tiro balogñi (lavo) vast, so kerel tiro čačo (pravo) vast.

⁴ Bo te des oda andro garudipen, tiro Dad dikhel oda, so hin garudo, a ov tuke počinela pale avke, hoj oda dičhola."

Pal e modlitba

⁵ "Sar tut modlines, ma av sar ola dujemujengere, bo on, sar pes modlinen, rado ačhen andro sinagogi abo pre ulica, hoj len o manuša te dikhen. Čačipen phenav tumenge, hoj imar chudle peskero počiniben.

⁶ Ale sar pes tu modlines, dža andre tiro kheroro, phand pal tu o vudar a modlin tut tire Dadeske, savo hino andro garudipen. Bo tiro Dad dikhel oda, so hin garudo, a ov tuke počinela pale.

⁷ Ale sar pes tumen modlinen, ma beblinen but sar o pohana, bo on peske gondolinen, hoj ena avrišunde vašoda, hoj but vakeren.

⁸ Avke ma aven ajse sar on, bo tumaro Dad džanel, so tumenge kempel, mek sigeder sar lestar mangel."

Le Rajeskeri modlitba

⁹ "Tumen pes modlinen kavke:

'Dado amaro, savo sal andro űebos, mi el sentňardo tiro nav!

¹⁰ Mi avel tiro krališagos! Mi ačhel pes tiri voľa avke sar andro űebos, avke the pre phuv!

¹¹ De amen adadžives o maro, so amenge kempel sako džives

¹² a odmuk amenge amare bini avke, sar the amen odmukas olenge, save amen dukhade.

¹³ A ma domuk amenge, hoj te avas pokušimen, ale zachrañin amen le nalačhestar.' [Bo tiro hin o krališagos the e zor the e slava pro furt. Amen.]

¹⁴ Bo te tumen odmukena le manušenge lengere bini, odmukela the tumenge tumaro Dad andral o űebos.

¹⁵ Ale te tumen na odmukena le manušenge lengere bini, añi tumaro Dad tumenge na odmukela tumare bini."

Pal o postos

¹⁶ "Sar pes poscinen, ma aven sar ola dujemujengere, save peštar keren chmurave, hoj le manušenge te sikaven, hoj on cerpinen, bo pes poscinen. Čačipen phenav tumenge, hoj imar chudle peskero počiniben.

¹⁷ Ale sar tu pes poscines, uchan o bala a thov (omor) o muj,

† *Ma vitrubin angle peste*

¹⁸ hoj te na dikhen o manuša, hoj tut poscines, ale tiro Dad, savo hino andro garudipen. A tiro Dad, savo dikhel oda, so hin garudo, tuke počinela pale."

Pal o barvalipen andro űebos

¹⁹ "Ma skiden tumenge o barvalipen pre phuv, kaj len e hardza the o kirme chan a kaj pes dochuden o živaña a čoren,

²⁰ ale skiden tumenge o barvalipen andro űebos, kaj len e hardza añi o kirme na chan a kaj pes o živaña na dochuden añi na čoren.

²¹ Bo ode, kaj hin tumaro barvalipen, ode ela the tumaro jilo.

²² E jakh hin e lampa le teloskeri. Te ela tiri jakh žuži, andre calo tiro telos ela o svetlos,

²³ ale te na ela tiri jakh žuži, calo tiro telos ela andro kalipen. Akor te oda svetlos andre tu hin kalipen, savo baro ela o kalipen?

²⁴ űiko našti služinel duje rajenge. Bo jekhes kameha a dujtones našti avri ačheha, abo jekhes rado dikheha a dujtones tele dikheha. Našti služinen the le Devleske the le svetoskere barvalipnaske."

Te mukas pes pro Del andre savoreste

²⁵ "Vašoda tumenge phenav: Ma starinen tumen pal tumaro dživipen, so chana, abo so pijena, añi pal tumaro telos, so urena. Či nane o dživipen buter sar o chaben a o telos sar o uraviben?

²⁶ Dikhen pro čirikle pro űebos, hoj añi na sadzinen, na kiden upre añi na sthoven andro šopi, a tumaro űeboskero Dad pes pal lende starinel! Či tumen na mon buter sar on?

²⁷ Bo ko tumendar šaj peskere starostenca kerel, hoj te dživel buter berš? űiko.

²⁸ Soske peske keren starosci pal o uraviben? Dikhen pro kvitki pre maľa, sar baron, ale na keren buči añi na heklinen.

²⁹ No phenav tumenge, hoj añi o Šalamun andre calo peskero šukariben na sas avke urdo sar jekh lendar.

³⁰ Te o Del e maľakeri čar kavke uravel, so adadžives hiñi a tajsja ela čidi andro bov, ta akor tumen na uravela buter? Manušale cikne pačabnaha!

³¹ Avke ma starinen tumen a ma phenen: 'So chaha? So pijaha? So uraha?'

³² Bo oda savoro roden o napačabnaskere. Se tumaro Dad andral o űebos džanel, hoj tumenge oda savoro kempel.

³³ Ale roden ešeb (peršo) o krališagos le Devleskero the leskero čačipen a ov tumen dela savore kala veci.

³⁴ Avke ma starinen tumen, so ela tajsja, bo tajsaskero džives pes starinela pal peste. Sako džives hin dos trapišagos."

Te na sudzinen avren

7 "Ma sudzinen, hoj te na aven sudzimen.

² Bo save sudoha sudzinen, ajseha avena sudzimen, a sava miraha merinen, ajsaha tumenge ela tiš merimen.

³ Soske dikhes o šmecos andre jakh tire phraleske a andre tiri jakh o kašt na dikhes?

⁴ Te andre tiri jakh hin o kašt, sar šaj phenes tire phraleske: 'De, hoj tuke te lav avri o šmecos andral e jakh?'

⁵ Tu dujemujengero, ešeb (peršo) le avri o kašt andral tiri jakh a palis dikheha žužes, hoj te les avri o šmecos andral e jakh tire phraleske.

⁶ Ma den oda, so hin sentno, le rikonenge aňi ma čhivkeren tumare perli anglo bale, hoj pre lende te na uštaren le pindrenca, te na pes visaren a te na rozčhingeren tumen."

Mangen, roden, durkinen!

⁷ "Mangen a ela tumenge dino, roden a arakhena, durkinen a phundravela pes tumenge.

⁸ Bo sako, ko mangel, lel; a ko rodel, arakhel; a oleske ko durkinel, pes phundravela.

⁹ Abo ko hin tumendar ajso manuš, hoj te lestar leskero čhavo manglahas maro, ta diňahas les bar?

¹⁰ Abo te lestar manglahas riba, diňahas les sap?

¹¹ Avke, te tumen, save san nalače, džanen te del tumare čhaven lače dari, či na sigeder tumaro Dad andral o űebos dela lače dari olen, ko lestar mangen!"

E cesno brana

¹² "Savoro, so kamľanas, hoj tumenge o manuša te keren, oda keren lenge. Bo oda hin, so sikavel le Mojšoskero Zakonos the o Proroka.

¹³ Aven andre prekal e cesno brana. Bo e buchli brana the buchlo drom lidžan andro meriben a but hin ajse, save phiren andre.

¹⁴ Ale e cesno brana the uzko drom lidžan andro dživipen a frima hin ajse, save les arakhen."

Pal o falošna proroka

¹⁵ "Merkinen tumenge pro falošna proroka, save ke tumende aven sar bakrore, ale andro jilo hine dzive ruva (vlki).

¹⁶ Pal lengero ovocje len prindžarena. Či šaj andral o kandre te obkidel o hroznos, abo andral o koľaka o figi?

¹⁷ Avke dojekh lačo stromos anel lačo ovocje a o nalačo stromos anel nalačo ovocje.

¹⁸ O lačo stromos našti anel nalačo ovocje a aňi o nalačo stromos našti anel lačo ovocje.

¹⁹ Dojekh stromos, so na anel lačo ovocje, pes čhinel avri a čhivel pes pre jag.

²⁰ Avke len prindžarena pal lengero ovocje.

²¹ Na sako, ko mange phenel: 'Rajeja, Rajeja!' džala andro űeboskero krališagos, ale oda, ko kerel e voľa mire Dadeskeri, savo hino andro űebos.

²² But džene mange andre oda Džives phenena: 'Rajeja, Rajeja, či na prorokinahas andre tiro nav? Na

tradahas avri le demonen andre tiro nav? Na kerahas but zazraki andre tiro nav?'

²³ Akor lenge phenava: 'Šoha (ňikda) tumen na prindžaravas. Džan mandar het tumen, save kerenas o nalačhipen!'"

Pal o duj khera

²⁴ "Sako, ko šunel kala mire lava a dolikerel len, hino sar oda gođaver manuš, savo ačhađa peskero kher pro bar.

²⁵ A avľa baro brišind, avle o paňa, phurdle o balvaja a demade pre oda kher, ale na peľa, bo sas ačhado pro bar.

²⁶ A sako, ko šunel kala mire lava a na dolikerel len, ela sar oda nagodaver manuš, savo ačhađa peskero kher pre poši.

²⁷ A avľa baro brišind, avle o paňa, phurdle o balvaja a demade pre oda kher. Peľa a sas calo zňičimen."

Pro agor

²⁸ Sar dovakerđa o Ježiš kala lava, o nipi pes čudalinenas upral leskero sikaviben,

²⁹ bo ov len sikavelas sar oda, kas hin autorita, a na sar lengere zakoňika.

Sastarel le malomocnes

8 Sar avľa o Ježiš tele pal o verchos, avenas pal leste igen but nipi.

² A avľa ke leste o malomocno, bandolas anglal leste a phendā: "Rajeja, te kamľalas, šaj man žužares."

³ O Ježiš nacirdľa o vast, chudľa pes lestar a phendā: "Kamav, av sasto!" Takoj sas žužo andral o malomocnostvo.

⁴ O Ježiš leske phendā: "Merkin, hoj te na phenes űikaske pal oda, ale džā, sikav tut le rašaske a obetin oda daros, so prikazindā o Mojšiš, sar svedectvo lenge."

Sastarel le veliteliskere sluhas

⁵ Sar avľa o Ježiš andro Kafarnaum, avľa ke leste o velitelis upral o šel slugađa a mangelas les:

⁶ "Rajeja, miro sluhas pašlol khere nasvalo, našti pes čhalavel a igen cerpinel."

⁷ O Ježiš leske phendā: "Me džava a sastarava les avri."

⁸ O velitelis leske phendā: "Rajeja, na som hodno, hoj te aves andre miro kher. Ale phen čā lav a miro sluhas sastola avri.

⁹ Se the me som manuš tel e autorita avre manušeske a hin man autorita upral o slugađa. A te phenava kaleske: 'Džā!' – ta džala; a avreske: 'Av!' – avela; a mire sluhaske: 'Ker kada!' – ov kerela."

¹⁰ Sar oda šundā o Ježiš, čudalindā pes a phendā olenge, save pal leste džanas: "Čačipen phenav tumenge, hoj andro Izrael ke űikaste na dikhlom kajso baro pačaben.

¹¹ Ale phenav tumenge, hoj avena but džene pal o vi-chodos the pal o zapados a bešena paš o skamind le Abrahamoha, Izakoha the le Jakoboha andro ñe-boskero krališagos,

¹² ale o čhave le krališagoskere ena avričhide andro baro kalipen, kaj ela o roviben a randena le dandena andre dukh."

¹³ Paľis phendā o Ježiš le veliteliske: "Dža – avke, sar pačandilal, pes tuke mi ačhel!" A leskero sluhās sastilā avri andre odi ora.

Sastarel but nasvale manušen

¹⁴ Sar avla o Ježiš andro kher ko Peter, dikhla leskera sasa, hoj pašol a hin la horučka.

¹⁵ Chudla pes lakere vastestar a takoj latar e horučka geľa het. Oj uštilā a kerelas pašal leste.

¹⁶ A sar zaračila, ande ke leste but dženen, save sas zaphandle le demonenca. A o Ježiš le laveha tradňa avri le nalače dučen a savoren, savenge sas namištes, sastardā avri,

¹⁷ hoj pes te ačhel oda, so sas phendo prekal o pro-rokos Izaiaš:

"Ov ila pre peste amare slabišagi a lidžalas amare nas-valibena."

Sar te džal pal o Ježiš

¹⁸ Sar dikhla o Ježiš pašal peste igen but nipen, prikazinda le učeņikenge te džal la lođkaha pre aver sera.

¹⁹ Avla ke leste varesavo zakoņikos a phendā leske: "Učitelina, džava pal tu vřadzik, kaj džaha!"

²⁰ O Ježiš leske odphendā: "Le lišken hin peskere che-va, kaj řaj dživen, a le čiriklen andral o ñebos peskere hñizdi, ale le Čhas le Manušeskeres nane kaj o řero te thovel."

²¹ Aver leskere učeņikendar leske phendā: "Rajeja, domuk mange eřeb (perřo) te džal te parunel mire dades."

²² Ale o Ježiš leske phendā: "Av pal ma a muk le mulen te parunel peskere mulen."

O Raj zaačhavel e burka

²³ Geľa andre lođka a leskere učeņika gele pal leste.

²⁴ Jekhvareste avla bari burka pro moros avke, hoj o vlni avenas andre e lođka, ale ov sovelas.

²⁵ Avle ke leste leskere učeņika, uřtade les a phende: "Rajeja, zachraņin amen, bo meras!"

²⁶ Ov lenge phendā: "So tumen daran, manuřale cikne pačabnaha!" Avke uřtilā, pokarhindā la balvaj the le moros a sas igen čhit.

²⁷ O manuřa pes čudalinenas a phenenas: "Oda, savo manuř hino, hoj les o balvaja the o moros řunen?"

Sastarel le posadnuten andre Gadara

²⁸ Sar avla pre oki sera andre phuv Gadara, avle ke leste duj manuřa, save sas zaphandle le demonenca.

Avenas andral o hrobi bara cholaha a ñiko pašal lende pal oda drom nařti pregeľa.

²⁹ A vriskinenas: "So amen hin tuha, Ježiš, Čhavo le Devleskero? Avlal amen te trapinel sigeder, sar avela oda časos?"

³⁰ Nadur odarik sas but bale, save pes ode pasinenas.

³¹ O demona les mangelas: "Te amen trades avri, domuk amenge te džal andre ola bale!"

³² A phendā lenge: "Džan!" On avle avri a gele andro bale. A savore bale pes mukle tele le brehoha andro moros, tařilile a mule andro paņi.

³³ Ola, save pasinenas le balen, denařle het a gele andro foros a vakerenas avri sa, so pes ačhilā, the pal ola, save sas zaphandle le demonenca.

³⁴ Avke savore manuřa andral oda foros avle ko Ježiš a sar les dikhle, mangelas les, hoj te džal het andral lengeri phuv.

O Raj sastarel le banges

9 O Ježiš beřla andre lođka, geľa la lođkaha pre oki sera a avla andre peskero foros.

² A ande ke leste jekhe banges, savo pašolas pro hados. Sar dikhla o Ježiš lengero pačaben, phendā le bangeske: "Čhavo miro, ma dara tut, odmuken pes tuke o bini."

³ Varesave zakoņika peske phende: "Kada manuř pes ruhinel!"

⁴ Ale o Ježiš dikhla, so peske gondolinen a phendā: "Soske gondolinen namištes andre tumare jile!"

⁵ Bo so hin lokeder? Te phenel: "Odmukel pes tuke o bini!" – vaj te phenel: "Uřti a džā?"

⁶ Ale hoj te džanen, hoj le Čhas le Manušeskeres hin zor pre phuv te odmukel o bini" – phendā le bangeske: "Uřti, le tuke tiro hados a džā khere!"

⁷ Ov uřtilā a geľa khere.

⁸ Sar oda dikhle o nipi, predarandile a lařarenas le Devles, hoj diņa kajsi zor le manuřen.

O Raj vičinel le Matuš

⁹ Sar džalas o Ježiš odarik, dikhla manuřen, savo pes vičinelas Matuš, te beřel pre colņica a phendā leske: "Av pal ma!" Ov uřtilā a geľa pal leste.

¹⁰ Paľis sar beřelas o Ježiš andro kher paš o skamind, avle but colņika the binořne a beřenas jekhetane le Ježiřoha the leskere učeņikenca.

¹¹ Sar oda o Farizeja dikhle, phenenas leskere učeņikenge: "Soske chal tumaro učitelis le colņikenca the le binořnenca?"

¹² O Ježiš oda řundā a phendā lenge: "Le sastenge na kempel doktoris, ale le nasvalenge.

¹³ Džan a siklon, so hin oda, so hin pisimen andro Lav le Devleskero: "Kamav, hoj te aven lačhejileskere a na hoj mange te anen obeti." Bo na avlom te vičinel le čačipnaskeren, ale le binořnen."

O phučiben pal o postos

¹⁴ Akor avle ko Ježiš o učeňika le Janoskere a phende leske: "Soske pes amen the o Farizeja poscinas but a tire učeňika pes na poscinen?"

¹⁵ O Ježiš lenge phenda: "Či šaj aven o hosci pro bijav smutne, medik hino lenca o terno? Ale avena o dživesa, sar lendar ela o terno ilo het, akor pes poscinenena."

¹⁶ Se ňiko na zasivel le neve pochtaneha e chev pro purane gada, bo palis o nevo pochtan odčhindahas kotor le puranestar a uľahas mek bareder chev.

¹⁷ Aňi na čhiven e nevi mol andro purane cipune gone, bo e nevi mol čhingerela e cipa, čuľola avri a o gone čhindona. Ale e nevi mol pes čhivel andro neve gone. Avke pes na musarela aňi e mol aňi o gone."

Pal e muľi čhajori the pal e nasvali džuvľi

¹⁸ Medik lenge oda vakerelas, avľa varesavo baro manuš, bandiľa anglal leste a phenda: "Miri čhajori akana muľa, ale av, thov pre late tiro vast a dživela."

¹⁹ O Ježiš uštíľa a geľa pal leste peskere učeňikenca.

²⁰ A varesavi džuvľi, savi sas dešuduj (12) berš nasvali pro džuvľikano nasvaliben, avľa palunestar ko Ježiš a chudľa pes agorestar leskere gadendar.

²¹ Bo phenda peske: "Ča te man leskere gadendar chudava, sastuvava avri."

²² O Ježiš pes visarda a sar la dikhľa, phenda: "Pača, čhaje, tiro pačaben tut sastarda." Takoj odi džuvľi sastíľa avri.

²³ Sar avľa o Ježiš andro kher ke oda angluno manuš, dikhľa ole manušen, save bašavenas pro pištálki, the ole nipen, save kerenas vika a vrisकिनenas.

²⁴ Phenda lenge: "Džan het, bo e čhajori na muľa, ča sovel." Ale asanas lestar.

²⁵ Sar sas ola nipi tradle het, geľa o Ježiš andre, chudľa la čhajora vastestar a oj uštíľa.

²⁶ A kada hiros pes pal leste rozľigenda pal cali odi phuv.

Sastarel le duje koren

²⁷ Sar odarik o Ježiš džalas het, avenas pal leste duj kore manuša a vrisकिनenas: "Čhavo le Davidoskero, av ke amende jileskero!"

²⁸ Sar geľa andro kher, avle ke leste o kore a o Ježiš lenge phenda: "Pačan, hoj oda šaj kerav?" Ophende: "He, Rajaja!"

²⁹ Avke pes chudľa lengere jakhendar a phenda: "Mi ačhel pes tumenge avke, sar pačan!"

³⁰ Takoj lenge phundrile o jakha. O Ježiš lenge zoraha prikazinda: "Merkinen pre oda, hoj pes pal oda ňiko te na dodžanel!"

³¹ Ale on gele avri a rozľigende pal leste o hiros pal cali odi phuv.

O Ježiš sastarel le ňemones

³² Sar avenas avri, ande ko Ježiš ňemone manušes, zaphandles le demonoha.

³³ Pal oda, sar o Ježiš tradňa avri le demonos, o ňemo prevakerďa. O nipi pes čudalinenas a phenenas: "Mek šoha (ňikda) na dikhľam kajso vareso andro Izrael!"

³⁴ Ale o Farizeja phenenas: "Le nekbaredere demonoha tradel avri le demonen!"

E žatva hiňi bari

³⁵ O Ježiš phirelas pal savore ola fori the gavora a sikavelas len andre lengere sinagogi. Kazinelas o evaňjelium pal o krališagos a sastarelas dojekh dukh the nasvaliben maškar o manuša.

³⁶ Sar dikhľa o Ježiš ole nipen, igen leske sas pharo vaš lenge, hoj hine strapimen the bi e zor sar o bakrore bi o pastjeris.

³⁷ Akor phenda peskere učeňikenge: "E žatva hiňi bari, ale frima hin ola, save keren buči.

³⁸ Vašoda mangen le Rajes upral e žatva, hoj te bičhavel manušen, hoj te keren buči pre leskeri žatva!"

O Raj vičinel le dešuduje učeňiken

10 Vičinda peskere dešuduje učeňiken ke peste a diňa len autorita te traden avri le nalače duchen a te sastaren dojekh dukh the nasvaliben.

² O nava ole dešudujengere (12) sas kala: Ešebno o Šimon – saves vičinenas Peter – the leskero phral o Andrej, o Jakob le Zebedeoskero the leskero phral o Jan,

³ o Filip, o Bartolomej, o Tomaš, o Matuš o colňikos, o Jakob le Alfeoskero, o Tadeus,

⁴ o Šimon Kanaansko – saves vičinenas Zelota – the o Judaš Iškarijotsko, savo les diňa andre.

O Raj bičhavel le učeňiken

⁵ Kale dešudujen bičhadľa o Ježiš a prikazinda lenge: "Ma džan pro drom ko manuša, save nane Židi, a ma džan andre fori le Samaritanengere.

⁶ Ale sigeder džan ko bakrore, save našľile andral o kher le Izraeloskero.

⁷ Džan a kazinen, hoj hino pašes o ňeboskero krališagos.

⁸ Le nasvalen sastaren avri, le malomocnen žužaren, le mulen uštaven andral o meriben, le demonen traden avri. Hijaba chudľan, hijaba den.

⁹ Ma len tumenca aňi somnakune aňi rupune aňi meďune love andro žebi.

¹⁰ Ma len aňi gonoro pro drom aňi po duj gada aňi sandalki aňi paci; bo o manuš, savo kerel buči, peske zasogalinel (zaslužinel) peskero chaben.

¹¹ Andre savo foros abo gavoro džana, dophučen tumen, ko tumen andre oda foros priiľahas. Ode ačhen dži akor, medik na džana het.

¹² Sar džana andro kher, pozdravinen.

¹³ Te ela oda kher pačivalo, mi avel tumaro smirom pre leste – ale te na ela pačivalo, mi avel tumaro smirom pale ke tumende.

¹⁴ Te tumen na prilena a na šunena tumare lava, džan het andral oda kher abo andral oda foros a keren tele o prachos pal tumare pindre.

¹⁵ Čačipen phenav tumenge, hoj lokeder ela le manušenge andral e Sodoma the Gomora andro sudno džives sar ole foroske.”

Sar o bakrore maškar o ruva

¹⁶ “Me tumen bičhavav sar le bakroren maškar o ruva (vlki). Aven pozorne sar o sapa the kovle sar o holubi.

¹⁷ Merkinen tumenge pro manuša! Bo dena tumen andre pro sudi a marena tumen andro sinagogi le bičenca.

¹⁸ The anglo foroskere vladara the anglo kraľa tumen lidžana vaš ma, hoj lenge the le Nažidenge te aven švedki.

¹⁹ Sar tumen dena andre, ma starinen tumen pal oda, so vakerena abo so phenena. Bo andre oda časos tumenge ela dino so te vakerel.

²⁰ Se na vakerena oda tumen, ale o Duchos tumare Dadeskero, savo vakerel prekal tumende.

²¹ O phral le phrales dela pro meriben the o dad le čhas a o čhave džana pre daj the pro dad a murdarena len.

²² Savoredžene tumen našti avri ačhena vaš ma, ale oda, ko likerela avri dži o agor, ela spasimen.

²³ Te pre tumende džana andre jekh foros, denašen andre aver. Bo čačipen tumenge phenav, hoj na predžana o fori le Izraeloskere, medik na avela o Čhavo le Manušeskero.

²⁴ Oda, ko siklöl, nane bareder sar oda, savo les sikavel, aňi o sluhās sar leskero raj.

²⁵ Dos hin, te o učeňikos hino ajso sar leskero učitelis a o sluhās sar leskero raj. Te le rajes upral o kher vičinde Belzebul – demonos – ta mek buter le nipen andral o kher!”

Kastar pes te daral

²⁶ “Vašoda ma daran tumen lendar! Bo nič nane avke garudo, so na ela jekhvar otkerdo a nane počoral nič, so pes jekhvar na dodžanela.

²⁷ Oda, so tumenge vakerav počoral, phenen avri phundrades a oda, so šunen ča andro kan, vrisकिनен avri pal o padi!

²⁸ Ma daran tumen olendar, save murdaren o telos, ale našti murdaren e duša. Ale sigeder daran Olestar, savo šaj zničinel the e duša the o telos andro peklos.

²⁹ Či na bikenen duje cikne čiriklen vaš jekh minca? Ale aňi jekh lendar na merel bi oda, hoj lendar tumaro Dad na džanel.

³⁰ Ale tumenge hin zgende mek the savore bala pro šero.

³¹ Avke ma daran tumen! Tumen mon buter sar but čirikle.

³² Ko man pridžanela anglo manuša, ke oda man the me pridžanava anglo miro Dad, savo hino andro ňebos.

³³ Ale ko man zaprinela anglo manuša, oles the me zaprinava anglo miro Dad, savo hino andro ňebos.”

O Ježiš na anel o smirom, ale e šablā

³⁴ “Ma gondolinen tumenge, hoj avlöm te del o smirom pre phuv; na avlöm te del o smirom, ale e šablā.

³⁵ Bo avlöm, hoj te džal o čhavo pro dad, e čhaj pre daj a e bori pre sasuj

³⁶ a andre peskeri famelija ena le manušeske ňeprijaťela.

³⁷ Oda, ko dikhel radeder peskere dades vaj peskera da sar man, nane hodno, hoj te el miro učeňikos. A oda, ko dikhel radeder peskere čhas vaj peskera čha sar man, nane hodno, hoj te el miro učeňikos.

³⁸ Oda, ko na lel peskero kerestos a na avel pal ma, nane hodno, hoj te el miro učeňikos.

³⁹ Oda, ko arakhela peskero dživipen, našavela les, ale oda, ko vaš ma našavela peskero dživipen, les arakhela.”

Pal o počičiben

⁴⁰ “Oda, ko tumen prilel, man prilel – a ko man prilel, prilel Oles, savo man bičhađa.

⁴¹ Oda, ko prilel le prorokos vaš oda, hoj hino prorokos, chudela o počičiben (odmena) sar prorokos. A oda, ko prilel le čačipnaskeres vaš oda, hoj hino čačipnaskero, chudela o počičiben sar čačipnaskero.

⁴² Ko diňahas te pijel jekhes kale ciknarendar ča jekh poharis šilalo paňi ča vaš oda, hoj hino učeňikos, čačipen tumenge phenav, na našavela peskero počičiben.”

O Jan bičhavel pal o Ježiš

11 Sar imar dovakerđa o Ježiš peskere učeňikenge so te keren, geľa odarik het, hoj te sikavel a te kazinel andre Galilejske fori.

² O Jan Krstiteľ sas andre bertena a sar šunđa, save veci kerel o Ježiš, bičhađa duje peskere učeňiken,

³ hoj lestar te phučen: “Sal tu oda, savo majinel te av-el, abo kempel te užarel avres?”

⁴ O Ježiš lenge odphendā: “Džan a phenen le Janoske, so šunen the dikhen:

⁵ O kore dikhen, o bange phiren, o malomocne pes žužaren, o kašuke šunen, o mule ušten andral o meriben a le čorenge pes vakerel o evaňjelium.

⁶ Bachtalo hin oda manuš, ko na perel andral o pačaben vaš ma!”

⁷ Sar on odgele, chudlā o Ježiš te vakerel le nipenge pal o Jan: “So geľan te dikhel pre puštā? E trstina sar laha čhalavel e balvaj?

⁸ Abo so geľan te dikhel? Manušes urdones andro barikane gada? Se ola, save uren o barikane gada, bešen andro barikane khera.

⁹ Abo soske geľan? Te dikhel le prorokos? He, phenav tumenge, mek buter sar prorokos.

¹⁰ Bo ov hin oda, pal kaste hin pisimen: *'Me bičhavav mire poslos anglal tu a ov pririchtinela prekal tu o drom.'*

¹¹ Čačipen phenav tumenge, hoj maškar savore nipi, ko ulile (narodzinde pes) andral e džuvli, na sas bareder sar o Jan Krstiteľ; ale oda, ko hin nekcikneder andro űeboskero krališagos, hino bareder sar ov.

¹² Le Janoskere Krstiteľiskere dživesendar dži akana zľidžal o krališagos le űeboskero olen, save pes andre zorales ispiden a on pes andre dochuden.

¹³ Bo savore Proroka the o Zakonos prorokinenas pal o krališagos dži ko Jan.

¹⁴ A te kamena ada te prilel: Ov hin o Eliaš, savo mušinda te avel.

¹⁵ Kas hin kana, hoj te šunel, mi šunel!"

O binošno pokoleűje

¹⁶ "Ke kaste pripodobűinava adadživeskere manušen? Hine sar ola čhavore, save bešen pro pľacos, vičinen peskere kamaraten a phenen:

¹⁷ 'Bašavahas tumenge, ale na khelenas; rovasahas andre žala, ale na rovenas.'

¹⁸ Bo avľa o Jan, na chalas aűi na pijelas a phende: 'Hin andre leste nalačo duchos.'

¹⁹ Avľa o Čhavo le Manušeskero, chalas the pijelas a phende: 'Dikhen pre kada manuš, ajso chavačis the pijakos; ľikerel pes le binošnenca the le colűikenca.' O godaveripen pes presikavel sar čačipen oleha, so kerel."

O napačabnaskere fori

²⁰ Akor chudľa te karhinel o fori, andre save kerđa nekbuter zazraki vaš oda, hoj pes na visarde le binendar:

²¹ "Jaj, vigos tuke Chorazin! Vigos tuke, Betsaido! Bo te pes andro Tir the andro Sidon ačhilehas ola zazraki, so pes ačhile ke tumende, čirla pes imar urdehas andro gone, čhidehas peske pro šero o prachos a visardehas pes le binendar.

²² Ale phenav tumenge, hoj le forenge Tir the Sidon ela lokeder pro sudno džives sar tumenge.

²³ A tu Kafarnaum, *so sal upre hazdlo dži andro űebos, aveha tele čhido dži andro peklos,*

bo te pes andre Sodoma ačhilehas ola zazraki, so pes ačhile ke tu, ta mek dži adadžives ačhilahas.

²⁴ Ale phenav tumenge, hoj la phuvake Sodoma ela lokeder pro sudno džives sar tuke."

O evaűjelium hin prekal o ciknore

²⁵ Akor andre oda časos phenda o Ježiš: "Palikerav tuke, Dado, Raja upral o űebos the upral e phuv, hoj garuďal kala veci anglo manuša, save hine godaver the avrisikade, a sikaďal len le cikne čhavorenge.

²⁶ He, Dado, bo avke oda kamehas.

²⁷ Miro Dad mange diňa savoro. űiko na džanel le Čhas, ča o Dad; aűi le Dades na džanel űiko, ča o Čhavo the oda, kaske les o Čhavo kamel te sikavel.

²⁸ Aven ke mande savore, save san strapimen a na birinen! Me tumenge dava te odpočovinel.

²⁹ Len pre tumende miro jarmo † a sikľon mandar, bo me som cicho the pokorno andro jilo, a ela tumen odpočinkos andre duša.

³⁰ Bo miro jarmo nane pharo a oda, so me thovav pre tumende te ľidžal, hino loko."

O phučiben pal o Šabbat

12 Jekhvar sombatone džalas o Ježiš pašal e maľa, kaj sas sadzimen. Leskere učeűika sas bokhale a chudle te čhingerel a te chal o klasi.

² Sar oda dikhle o Farizeja, phende leske: "Dikh, tire učeűika keren oda, so naštĳi keren sombatone, bo hin Šabbat ††!"

³ O Ježiš lenge phenda: "Mek na gendaű, so kerďa o David, sar sas bokhalo ov the leskere manuša?"

⁴ Ov geľa andre le Devleskero kher a chaľa o sentna mare, so naštĳi chaľa aűi ov aűi leskere manuša, ča o rašaja.

⁵ Abo na gendaű andro Zakonos, hoj sombatone o rašaja andro chramos keren buči a aleha na dolĳikeren o Šabbat, ale hine bi o binos?"

⁶ Phenav tumenge, hoj kade hin vareso bareder sar o chramos.

⁷ Te ačhaľonas, so oda hin: *'Kamav o lačhe-jileskeriben a na obeti!'* – ta na odsudzindaűanas le manušen, save hine bi o binos.

⁸ Bo o Čhavo le Manušeskero hino Raj the upral o Šabbat."

O Raj sastarel pro Šabbat

⁹ Geľa odarik het a avľa andre lengeri sinagoga.

¹⁰ Ode sas jekh manuš, so leskero vast sas űevladno. Ča vaš oda, hoj les te den andre, phučle le Ježišostar: "Šaj pro Šabbat (sombatone) te sastarel?"

¹¹ Ov lenge phenda: "Ko tumendar hino ajso manuš, hoj te les uľahas jekh bakro a peľahas leske pro Šabbat andre chev, čĳi les na chudela a na cirdela avri?"

¹² Čĳi nane buter o manuš sar o bakro? Vašoda šaj pro Šabbat mištes te kerel."

¹³ Avke phenda le manušeske: "Nacirde o vast!" Ov nacirdľa, sastĳiľa leske avri a sas ajso sar the oka dujto vast.

¹⁴ O Farizeja odarik gele het a dovakerenas pes pre leste, sar les te murdarel.

Le Devleskero služobűikos

¹⁵ Sar pes o Ježiš pal oda dodžanľa, odgeľa odarik. Džanas pal leste but nipi a savoren sastarďa.

¹⁶ Ale prikazinda lenge, hoj te na vakeren avre manušenge pal leste,

† O jarmo pes thovelas pre meű le džvirenge, hoj te cirden o verdan. †† O džives, andre savo pes na kerel buči.

¹⁷ hoj pes te ačhel oda, so sas phendo prekal o prorokos Izaiaš:

¹⁸ *“Dikh, miro služobňikos, saves mange avri kidňom; saves kamav! Andre leste man hin o radišagos. Thova va mire Duchos pre leste a vakerela le narodenge pal o sudos.*

¹⁹ *Na veseke dinela pes aňi na vriskinela aňi ňiko na šunela leskero hangos pre ulica.*

²⁰ *E prephagi trstina na dophagela a e momeli, savi mek thuvisalol, na murdarela andre, medik na kerela, hoj te ňerinel (zvitazinel) o spravodlišagos.*

²¹ *Pre leskero nav pes zmukena o narodi.”*

O Ježiš the o Belzebul

²² Akor ke leste ande jekhe manušes zaphandle le demonoha, savo sas koro the ňemo, a ov les sastarda avke, hoj dikhelas the vakerelas.

²³ A savore ola nipi pes čudalinenas a phenenas: *“Nane ov oda Čhavo le Davidoskero?”*

²⁴ Ale sar oda šunde o Farizeja, phende: *“Ov tradel avri le demonen ča la zoraha le Belzebuloskera, savo hino upral savore demona.”*

²⁵ O Ježiš dikhla, so peske gondolinen, a phenda lenge: *“Dojekh krališagos, so pes rozulavel a džal pre peste, ela zničimen. A ňisavo foros na obačhela, te pes rozulavel a džal pre peste – aňi ňisavo kher, so hin rozulado.*

²⁶ Te o satan tradel avri le satan, korkoro andre peste hino rozulado. Akor, sar šaj obačhela leskero krališagos?

²⁷ A te me tradav avri le demonen le Belzebuloha, tumare učeňika len kaha traden avri? Vašoda on ena tumare sudci.

²⁸ Ale te me le Devleskere Duchoha tradav avri le demonen, ta akor ke tumende avla le Devleskero krališagos.

²⁹ Sar šaj džal vareko andro kher le zorale muršeske te čorel leskere veci, medik ole zorale muršes na phandela? Ča akor šaj čorel avri leskero kher.

³⁰ Oda, ko nane manca, džal pre mande, a ko na skidel manca, rozčivkerel.

³¹ Vašoda tumenge phenav, hoj dojekh binos the dojekh nalačo vakeriben pro Del, ela le manušenge odmuklo, ale ko pes ruhnela pro Duchos, oleske na ela odmuklo.

³² A te phenela vareko lav pro Čhavo le Manušeskero, ela leske odmuklo, ale te phendaahas vareko nalačo pro Sentno Duchos, oleske na ela odmuklo aňi andre kada časos, aňi andre oda, so avela.”

O stromos pes prindžarel pal o ovocje

³³ *“Te tumen hin lačo stromos, leskere ovocje ena lače; abo te tumen hin nalačo stromos, leskere ovocje ena nalače. Bo o stromos pes prindžarel pal o ovocje.*

³⁴ Fajta sapengeri, sar šaj vakeren lače veci, te tumen san nalače? Bo soha hin pherardo o jilo, oda o muj vakerel.

³⁵ O lačo manuš lel andral peskero lačo barvalipen avri o lače veci, a o nalačo manuš andral peskero nalačo barvalipen lel avri o nalače veci.

³⁶ Ale phenav tumenge, hoj vaš dojekh lav, so phene na o manuša ča avke, počinena andro sudno džives.

³⁷ Bo andral tire lava aveha ospravedlňimen a andral tire lava aveha odsudzimen.”

O Farizeja kamen te dikhel znameňje

³⁸ Akor leske phende varesave Farizeja the zakoňika: *“Učitelina, kamas tutar te dikhel znameňje.”*

³⁹ Ale ov lenge odphenda: *“O manuša nalače the napačivale mangel znameňje, ale na ela lenge dino znameňje, ča o znameňje le prorokoskero Jonašiskero.*

⁴⁰ Bo avke, sar *sas o Jonaš andro per la bara ribake trin džives the trin rača, ela the o Čhavo le Manušeskero andro jilo la phuvake trin džives the trin rača.*

⁴¹ O murša andral o foros Ninive uštена upre pro sudos tumenca a odsudzinenena tumen, bo sar lenge o Jonaš kazinelas, visarde pes le binendar – ale kade hin vareko bareder sar o Jonaš.

⁴² E kralovna pal o juhos uštela upre pro sudos tumenca a odsudzinelena tumen, bo avla dural pal aver agor la phuvake te šunel e godi le Šalamunoskeri – ale kade hin vareko bareder sar o Šalamun.”

Sar avel pale o nalačo duchos

⁴³ *“Sar džal avri o nalačo duchos andral o manuš, phirel pal o thana, kaj nane paňi, a rodel, kaj peske šaj odpočovinel, ale na arakhel.*

⁴⁴ Akor peske phenel: *‘Džav mange pale andre miro kher, khatar avlom avri.’ A sar avel, dikhel, hoj hino žužo, avrišulado the pratimen.*

⁴⁵ Avke džal a anel peha aver efa duchen, goreder sar hino ov, džan andre a bešen ode. A palis ole manušeske ela goreder sar angloda. Avke pes ačhela the kale adadživeskere nalače manušenge.”

Le Ježišoskeri daj the phrala

⁴⁶ Medik vakerelas le nipenge, avla leskeri daj the leskere phrala, ačhenas avri a kamenas leha te vakerel.

⁴⁷ Vareko leske phenda: *“Dikh, tiri daj the tire phrala ačhen avri a kamen tuha te vakerel.”*

⁴⁸ Ale o Ježiš leske odphenda: *“Ko hin miri daj a ko hin mire phrala?”*

⁴⁹ Sikađa le vasteha pre peskere učeňika a phenda: *“Dikh, miri daj the mire phrala!”*

⁵⁰ Bo sako, ko kerel e vola mire Dadeskeri, savo hino andro ňebos, oda hin miro phral, miri pheň the miri daj.”

O podobenstvo pal o štar phuva

13 Oda džives o Ježiš geľa avri andral oda kher a bešľa peske paš o moros.

² Zgele pes ke leste igen but nipi, vašoda geľa andre lodka a bešľa peske. Savore nipi ačhenas paš o moroskero brehos.

³ Vakerelas lenge but andro podobenstva a phendā: "O manuš geľa te rozčhivkerel o semena.

⁴ A sar rozčhivkerelas, varesave pele paš o drom, avle o čirikle a chale len.

⁵ Aver pele pro baruno than, kaj len na sas but phuv, a sig barile, bo na gele but tele andre phuv.

⁶ Ale sar avľa avri o kham, zlabarelas len a šučile avri, bo na sas len o koreňis.

⁷ Aver pele andro kandre (kraki) a o kandre barile a tasade len.

⁸ Aver pele andre lači phuv a ande chasna, varesave šel (100), varesave šovardeš (60) a varesave tranda (30).

⁹ Kas hin kana, hoj te šunel, mi šunel!"

Soske vakerel andro podobenstva

¹⁰ Avle o učeňika a phende leske: "Soske lenge vakeres andro podobenstva?"

¹¹ A ov lenge odphendā: "Tumenge hin dino te achalol o garude veci andral o Devleskero krališagos, ale lenge nane dino.

¹² Bo oleske, kas hin, ela dino buter; ale olesar, kas nane, mek pes lela the oda, so les hin.

¹³ Andro podobenstva lenge vakerav vaš oda, hoj te dikhen, ale te na dikhen a hoj te šunen, ale te na šunen aňi te na achalon.

¹⁴ Ačhel pes paš lende oda prorocstvo, so phendā o Izaiaš:

'Te šunel šunena, ale nič na achalona; te dikhel dikhena, ale nič na dikhena.

¹⁵ *Bo kale nipenge zorafile o jile, le kanenca phares šunde a phandle andre peskere jakha, hoj ča le jakhenca te na dikhen, le kanenca te na šunen a andro jilo te na achalon, hoj pes te na visaren, a me len te sastarav avri.'*

¹⁶ Ale bachtale hine tumare jakha, hoj dikhen, the tumare kana, hoj šunen.

¹⁷ Bo čačipen phenav tumenge, hoj but proroka the čačipnaskere manuša kamenas te dikhel oda, so tumen dikhen, ale na dikhle; a te šunel oda, so tumen šunen, ale na šunde."

O Ježiš vakerel avri o podobenstvo

¹⁸ "Akor šunen a achalon o podobenstvo pal oda manuš, savo rozčhivkerelas o žužodiv.

¹⁹ Sar o manuš šunel o lav pal oda krališagos a na achalol, akor avel o nalačo a čorel oda, so leske sas sadzimen andro jilo. Kada hin oda, savo sas sadzimen paš o drom.

²⁰ A pro baruno than hin sadzimen ole manušeske, ko šunel o lav a takoj les radišagoha prilel.

²¹ Ale nane les koreňis a likerel avri ča pre varesavo časos. Sar avel o pharipen vaj džan pre leste vaš o lav, takoj odperel le pačabnastar.

²² Andro kandre hin sadzimen ole manušeske, ko šunel o lav, ale o starišagos the o barvalipen andre kada svetos tasavel o lav, a nane lestar chasna.

²³ Ale andre lači phuv hin sadzimen ole manušeske, ko šunel o lav a achalol. Oda palis anel chasna: Vareko šel (100), vareko šovardeš (60) a vareko tranda (30)."

Pal o kukoľ maškar o žužodiv

²⁴ Phendā lenge mek the aver podobenstvo: "O ňeboskero krališagos hino sar o manuš, savo sadzindā lačo semenos pre peskeri maľa.

²⁵ Ale medik o nipi sovenas, avľa leskero ňeprijateľis a sadzindā o kukoľ † maškar o žužodiv pre maľa a geľa het.

²⁶ Sar bariľa o žužodiv a andā o ulipen, akor pes sikađa the o kukoľ.

²⁷ Avle o sluhi a phende le chulajiske: 'Rajeja, či na sadzindā o lačo semenos pre tiri maľa? Khatar akor avľa kada kukoľ?'

²⁸ Ov phendā: 'O ňeprijateľis ada kerđa.' O sluhi leske phende: 'Kames, hoj te džas a te cirdas len avri?'

²⁹ Ov phendā: 'Na, bo sar cirdena avri o kukoľ, šaj cirden avri the o žužodiv.

³⁰ Muken, hoj te barol jekhetane soduj dži e žatva, a andre žatva phenava olenge, save skiden upre: Skiden upre ešeb (peršo) o kukoľ a phanden len andro snopi te labarel, ale o žužodiv lidžan andre miri šopa.' "

Pal o horčično semenos the o droždī

³¹ A pale lenge phendā aver podobenstvo: "O ňeboskero krališagos hino sar o horčično semenos, so iľa o manuš a sadzindā pre peskeri maľa.

³² Oda semenos hino nekcikneder maškar savore semena, ale sar barol avri, hino bareder sar aver rastlini a ačhel lestar stromos. Avke o čirikle peske bešen pre leskere konara."

³³ A vakerelas lenge mek the aver podobenstvo: "O ňeboskero krališagos hino sar o droždī, so iľa e džuvli a rozkerđa andre igen but aro ††, medik calo chumer na avľa upre."

³⁴ Kada savoro vakerelas o Ježiš andro podobenstva le nipenge a bi o podobenstva lenge na vakerelas nič,

³⁵ hoj pes te ačhel oda, so sas phendo prekal o prorokos: "*Phundravava miro muj andro podobenstva a vakerava ola veci, so sas garude akorestar, sar sas stvorimen o svetos.*"

† E burina, so dičhol avri sar o žužodiv. †† Trin miri (miery) abo 50 kili

Vakerel avri o podobenstvo pal o kukol

³⁶ Akor omukla o Ježiš le nipen a geľa andro kher. Avle ke leste leskere učeňika a phende leske: "Phen amenge avri o podobenstvo pal oda kukol pre maľa."

³⁷ Ov lenge odphenda: "Oda, ko rozčhivkerel o lačho semenos, hin o Čhavo le Manušeskero;

³⁸ e maľa hin o svetos; o lačhe semena hine o manuša le krališagoskere; o kukol hine o manuša le nalačheskere;

³⁹ o ňeprijateľis, savo len sadzinda, hin o beng; e žatva hin o agor le svetoskero a ola, save kiden upre, hine o aňjela.

⁴⁰ Avke, sar pes kidel upre o kukol a labarel andre jag, ela the pro agor kale svetoske:

⁴¹ O Čhavo le Manušeskero bičhavela peskere aňjelen a kiden avri andral leskero krališagos savoren, save lidžan le manušen andro binos, the olen, save keren o nalačhipen.

⁴² A čhivena len andro jagalo bov. Ode ela o roviben the randena le dandanca andre dukh.

⁴³ Akor švicinena o čačipnaskere manuša sar o kham andro krališagos lengere Dadeskero. Kas hin kana, hoj te šunel, mi šunel!"

Pal o poklados the perla

⁴⁴ "O ňeboskero krališagos hino sar o poklados garudo pre maľa. Sar les o manuš arakhľa, garuda les a radišagostar geľa a bikenda savoro, so les sas, a palis cinda odi maľa.

⁴⁵ A pale, o ňeboskero krališagos hino sar o manuš, savo cinavkerel a rodelaš o šukar perli.

⁴⁶ A sar arakhľa jekh dragaňi perla, odgeľa, bikenda savoro, so les sas, a cinda la."

Pal e sita

⁴⁷ "Mek, o ňeboskero krališagos hino sar e sita, so mukle andro moros a zachudľa savore ribendar.

⁴⁸ A sar sas pherdĭ, cirdle la avri pro brehos, bešle peske a skidle o lačhe ribi andro košara a o nalačhe čhide avri.

⁴⁹ Avke ela the pro agor le svetoske: Avena o aňjela a lena avri le nalačhen le čačipnaskerendar

⁵⁰ a čhivena len andro jagalo bov. Ode ela o roviben a randena le dandanca andre dukh."

Neve the purane veci

⁵¹ O Ježiš lenge phenda: "Achalĭlan kaleske savoreske?" A on leske odphende: "He."

⁵² Ov lenge phenda: "Vašoda dojekh sikado manuš, savo pes sikada pal o ňeboskero krališagos, hino sar o chulaj, savo lel avri andral peskero barvalipen the neve the purane veci."

Le Ježiš na prilen andro Nazaret

⁵³ Sar dovakerďa o Ježiš kala podobenstva geľa odarik het.

⁵⁴ Avľa andre odi phuv, kaj bariľa avri, a ode sikavelas len andre sinagoga avke, hoj pes čudalĭnenas a phenenas: "Khatar les hin ajsi godĭ the zazraki?"

⁵⁵ Či nane ov le řesariskero čhavo? Či pes na vičinel leskeri daj Maria a leskere phrala Jakob, Jozef, Šimon the Juda?"

⁵⁶ Či nane savore leskere pheňa ke amende? Khatar les hin kada savoro?"

⁵⁷ A na priile les. O Ježiš lenge phenda: "O prorokos hino bi e pačiv ča ode, kaj bariľa avri the andre peskero kher."

⁵⁸ Na kerďa ode but zazraki, bo na sas len pačaben.

O Jan Krstiteľ merel

14 Andre oda časos šunďa o Herodes, savo sas vladaris upral e Galileja, o hiros pal o Ježiš

² a phenda peskere sluhenge: "Oda hin o Jan Krstiteľ! Ov uštĭľa andral o meriben, a vašoda les hin zor te kerel ola zazraki."

³ Bo o Herodes chudľa le Jan, phandľa les a thoďa les andre bertena vaš e Herodijada, savi sas romňi le Filiposke, leskere phraleske.

⁴ Bo o Jan leske phenelas: "Nane tuke domuklo, hoj laha te džives."

⁵ O Herodes kamelas les te murdarel, ale daralas pes le manušendar, bo on les lenas vaš o prorokos.

⁶ Ale palis pre Herodesiskere berša khelelas la Herodijakeri čhaj angle savorende a sas leske pre dze-ka.

⁷ Vašoda la diňa lav, hoj la dela savoro, so ča peske mangľahas.

⁸ A vaš oda, hoj la lakeri daj prevakerďa, phenda: "An takoj mange pre tacka o šero le Janoskero Krstiteľiskero."

⁹ O kralis ačhiľa smutno, ale vaš o lav, so la diňa, the anglo manuša, save leha sas pre hoscina, prikazinda, hoj te anen.

¹⁰ Avke diňa te odčhinel le Janoske o šero andre bertena.

¹¹ Leskero šero ande pre tacka a dine la čhake a oj li-genda peskera ďake.

¹² Akor avle leskere učeňika, ile leskero řelos a parunde les. Palis gele a phende oda le Ježišoske.

Pandž ezera manuša čafon

¹³ Sar oda šunďa o Ježiš, odgeľa odarik la loďkaha pre omuklo than. Ale došunde pes pal oda o nipi a gele andral o fori pešones pal leste. ¹⁴ Sar avľa o Ježiš avri andral e loďka, dikhľa igen but nipen. Sas leske pharo pre lende a sastardĭ le nasvalen, save sas maškar lende.

¹⁵ Sar zaračĭľa, avle ke leste leskere učeňika a phende leske: "Pre kada than nane řič a imar hin but ori, roz-

muk le nipen, hoj te džan andro fori peske te cinel te chal."

¹⁶ Ale o Ježiš lenge phendā: "Na kempel lenge te džal. Tumen len den te chal."

¹⁷ Ale on leske phende: "Hin amen kade ča pandž mare the duj ribi."

¹⁸ Ov lenge phendā: "Anen mange len!"

¹⁹ Phendā le nipenge, hoj peske te bešen pre čar. Iľa ola pandž mare the duj ribi, dikhľa pro ňebos a palikerďa. Palis phagerelas o mare, delas le učeňikenge a o učeňika denas le nipenge.

²⁰ Chale savore a čalile. Ole kotorendar, so ačhiľa, ki-dle upre dešuduj (12) pherde bare košara.

²¹ Ola, save chanas, sas vaj pandž ezera (5 000) murša, bi o džuvľa the bi o čhave.

O Ježiš phirel pal o paňi

²² O Ježiš takoj bičhaďa peskere učeňiken, hoj te džan andre loďka a te džan anglal pre dujto sera le moroske, medik ov na rozrukela le nipen. ²³ Sar len rozrukľa, geľa ča ov pro verchos pes te modľinel. Sar zaračiľa, sas ode korkoro.

²⁴ E loďka imar sas maškar o moros a o vlni laha čhivkerenas, bo phurdelas zoralı balvaj.

²⁵ Ke tosara, sar mek na vidňisaľolas †, phirelas o Ježiš pal moros a avľa ke lende.

²⁶ Sar o učeňika les dikhle te phirel pal o moros, predarandile a phende: "Oda hino mulo!" A vriskinde daratar.

²⁷ Ale o Ježiš ke lende takoj prevakerďa: "Ma izdran! Me som. Ma daran tumen!"

²⁸ A o Peter leske phendā: "Rajeja, te sal oda tu, phen mange, hoj te džav ke tu pal o paňi."

²⁹ Ov phendā: "Av!" O Peter geľa avri andral e loďka, phirelas pal o paňi a džalas ko Ježiš.

³⁰ Ale sar dikhľa pre zoralı balvaj, darandıľa, chudľa te tašľol a vriskindā: "Rajeja, zachraňin man!"

³¹ O Ježiš takoj nacirdľa o vast, zachudľa les a phendā: "Manušeja, savo cikno pačaben tut hin! Soske na pačasas?"

³² Sar gele andre loďka, e balvaj preačhiľa.

³³ A ola, ko sas pre loďka, bandonas anglal leste a phenenas: "Tu sal čačes o Čhavo le Devleskero!"

Sastarel andro Genezaret

³⁴ Sar pregele la loďkaha o moros, avle andre phuv Genezaret.

³⁵ O manuša andral oda than les sprindžarde a rozhirinde oda pal calı odi phuv. Ande ke leste savore nasvalen

³⁶ a mangenas les, čı lenge na domukela, hoj pes te chuden ča le agorestar leskere gadendar. Ola, save pes lestar chudle, sastile avri.

O tradicii le phurederengere

15 Akor avle ko Ježiš o zakoňika the o Farizeja andral o Jeruzalem a phende leske:

² "Soske tire učeňika na dolikeren oda, so amenge dine o phure? Bo na thoven (omoren) o vasta, sar džan te chal o maro."

³ Ov odphendā: "A tumen soske na dolikeren le Devleskero prikazaňje, ale čerinen les vaš tumari tradicija.

⁴ Bo o Del phendā: *'De pačiv tira da the le dades! A oda, ko košel la da the le dades, mušinel te merel!'*

⁵ Ale tumen phenen: 'Sako, ko phendahas la dake abo le dadeske: Oda kotor mire barvalipnastar, so šaj diňomas tumenge, thodom pre sera le Devleske, našti tumenge oda dav.'

⁶ Avke tumen phenen, hoj na kempel te del pačiv la da vaj le dades. Kajse tumare tradicijenca musaren le Devleskero prikazaňje.

⁷ Tumen dujemujengere, mištes pal tumende pro-rokinelas o prorokos Izaiaš, sar phendā:

⁸ *'Kala nipi man lašaren le mujeha, ale lengero jilo hino mandar dur.'*

⁹ *'Hijaba man lašaren, bo sikaven o sikaviben, so hin le manušendar.'*

¹⁰ Palis o Ježiš vičindā ke peste le nipen a phendā lenge: "Šunen a achaľon!"

¹¹ Le manušes na meľarel oda, so džal andro muj, ale oda, so avel avri andral o muj."

¹² Akor avle leskere učeňika a phende leske: "Džanes, hoj o Farizeja rušle, sar šunde oda lav?"

¹³ Ov odphendā: "Dojekh sadzimen rastlina, savi na sadzindā miro Dad andral o ňebos, ela avricirdli avri le koreňenca.

¹⁴ Muken len avke! On korkore hine kore a kamen te lidžan avre koren. A te jekh koro lidžala avre kores, so-dujdžene perena andre chev."

¹⁵ O Peter leske phendā: "Phen amenge avri pal oda podobenstvo!"

¹⁶ O Ježiš phendā: "So the tumen mek na achaľon?"

¹⁷ Na achaľon, hoj savoro, so avel andro muj, džal andro per a odarik džal avri?

¹⁸ Ale oda, so avel avri andral o muj, avel andral o jilo a oda meľarel le manušes.

¹⁹ Bo andral o jilo avel o nalačho gondolišagos, te murdarel, o lubipen te kerel, te čorel, o klamišagi te vakerel a te ruhinel.

²⁰ Kada hin, so meľarel le manušes. Ale te chal le vastenca, so nane thode, na meľarel le manušes."

La Kanaansko džuvľakero pačaben

²¹ O Ježiš odarik geľa het a geľa andro phuva Tir the Sidon.

²² A varesavi Kanaansko džuvľi andral odi phuv avľa ke leste a vriskinelas: "Av ke ma jileskero, Rajeja, Čhavo le Davidoskero! Miri čhaj hiňi igen zaphandli le demonenca."

† Oda hin maškar o trin the šov ori.

²³ Ale ov lake na odphenda aňi lav. Akor avle ke leste leskere učeňika a mangelas les: "Bičhav la het, bo vriskinel pal amende."

²⁴ Ale ov odphenda: "Me som bičhado ča ko bakrore, save našile andral o kher le Izraeloskero."

²⁵ Ale oj avľa, bandiľa anglal leste a phenda: "Rajeja, pomožin mange!"

²⁶ Ov odphenda: "Nane šukares te lel le čhavorenge o maro a te čhivel les le rikonorenge."

²⁷ Oj odphenda: "He, Rajeja, ale the o rikonore telal o skamind chan o trušini, so peren lengere rajenge."

²⁸ Akor lake o Ježiš odphenda: "Ó, džuvlije, baro hin tiro pačaben! Mi ačhel pes tuke avke, sar kames." A lakeri čaj sastíľa avri ola oratar.

Sastárel paš o Galilejsko moros

²⁹ Sar o Ježiš odarik odgeľa, avľa ko Galilejsko moros. Geľa upre pro verchos a ode peske bešľa.

³⁰ Avle ke leste igen but nipi a sas lenca o bange, o kore, o ňeme, o kaľiki the mek but aver. Thovenas len paš le Ježišoskere pindre a ov len sastárelas.

³¹ O nipi pes čudalínenas, sar dikhle, hoj o ňeme vakeren, o kaľiki hine saste, o bange phiren, o kore dikhen a lašarenas le Izraeloskere Devles.

Čaľarel štar ezere manušen

³² O Ježiš peske vičinda peskere učeňiken a phenda: "Pharo mange hin pre kala nipi, bo imar trin dživesa hine manca a nane len so te chal. Na kamav len te bičhavel khere bokhalen, hoj te na odperen pal o drom."

³³ O učeňika leske phende: "Khatar laha pre kada omuklo than ajci maro, hoj te čaľaras kajci but dženen?"

³⁴ O Ježiš lenge phenda: "Keci tumen hin mare?" On phende: "Efta the vajkeci cikne ribi."

³⁵ A phenda le nipenge, hoj peske te bešen pre phuv.

³⁶ Iľa ola efta mare the ola ribi, palikerđa, phagerelas a podelas peskere učeňikenge a o učeňika denas le nipenge.

³⁷ Chale savore a čaľile. Ole kotorendar, so ačhile, kidle upre efta pherde košara.

³⁸ Ola, save chanas, sas vaj štar ezera (4 000) murša, bi o džuvľa the bi o čhave.

³⁹ Paľis rozmuķľa le nipen, geľa andre loďka a avľa andre phuv paš o Magadan.

O Farizeja kamen te dikhel znameňje

16 Avle ke leste varesave Farizeja the Saduceja, pokušinenas les a mangelas lestar, hoj lenge te sikavel znameňje andral o ňebos.

² A o Ježiš lenge odphenda: "Sar hin rat, phenen: 'Ela šukares, bo o ňebos hino lolo.'

³ A tosara phenen: 'Adadžives ela brišindalo, bo o ňebos hino zachmurimen a lolo.' Sar dikhen pro ňebos, džanen te phenel, savo ela džives, ale o znameňja ole časoskere na achalón?

⁴ O pokoleňje nalačo the lubikano mangel znameňje, ale na ela leske dino znameňje, ča o znameňje le Jonašiskero." Mukľa len ode a geľa het.

Le Farizejengere the Saducejengere drožďi

⁵ Leskere učeňika avle pre oki sera le moroske a bisterde peha te lel o maro.

⁶ O Ježiš lenge phenda: "Merkinen tumenge pre le Farizejengere the le Saducejengere drožďi."

⁷ A o učeňika gondolínenas maškar peste: "Vašoda phenel, bo na iľam peha o maro."

⁸ Ale sar oda sprindžarda o Ježiš, phenda lenge: "Manušale cikne pačabnaha, so vakeren, hoj tumen nane maro?"

⁹ Mek furt na achalón? Imar bisterďan pre ola pandž mare prekal ola pandž ezera (5 000) murša a keci košara kidňan upre?

¹⁰ Bisterďan the pre ola efta mare prekal ola štar ezera (4 000) murša a keci košara kidňan upre?

¹¹ Sar oda na achalón, hoj tumenge na vakerevas pal o maro? Ale merkinen tumenge pre le Farizejengere the Saducejengere drožďi!"

¹² Akor achalíle, hoj na vakerđa pal oda, hoj te merkinen pro drožďi le mareskere, ale pro sikaviben le Farizejengero the Saducejengero.

O Peter viznavinel, ko hin o Ježiš

¹³ Sar avľa o Ježiš andro phuva paš e Filiposkeri Cezarea, phučľa peskere učeňikendar: "So phenen o manuša pal o Čhavo le Manušeskeri, hoj ko som?"

¹⁴ On odphende: "Jekh phenen, hoj sal o Jan Krstiteľ, aver, hoj o Eliaš, a pale aver, hoj o Jeremiaš, abo jekh le prorokendar."

¹⁵ Phenda lenge: "Ko phenen tumen, hoj som?"

¹⁶ O Šimon Peter odphenda: "Tu sal o Kristus, o Čhavo le džide Devleskeri!"

¹⁷ O Ježiš leske odphenda: "Bachtalo sal Šimon, čhavo le Jonašiskero, bo o manuš † tuke kada na sikada, ale miro Dad, savo hino andro ňebos.

¹⁸ A me tuke phenav: Tu sal o Peter a pre kada bar ačhavava miri khangeri a o meriben †† upral late na ňerinela (na zvitázinela).

¹⁹ Dava tuke o kleji andral o ňeboskero krališagos a savoro, so phandeha pre phuv, ela phandlo the pro ňebos. A savoro, so rozphandeha pre phuv, ela rozphandlo the pro ňebos."

²⁰ A phenda peskere učeňikenge, hoj te na phenen ňikaske avri, hoj ov hin o Kristus.

O Ježiš phenel, hoj ela murdardo

²¹ Akorestar chudľa o Ježiš te sikavel peskere učeňiken, hoj mušinel te džal andro Jeruzalem a but te cerpinel le phurederendar, le nekbaredere rašajendar the le zakoňikendar; hoj mušinel te merel a pal o trin dživesa te uštel andral o meriben.

† Abo: O telos the o rat †† Abo: O brani le pekloskere

²² Akor les iľa o Peter pre sera a chudľa leske te dovakerel: "O Del te na domukel, Rajeja! Oda pes tuke šoha (ňikda) te na ačhel!"

²³ Ale o Ježiš visalíľa ko Peter a phendľa leske: "Satan, dža mandar het! Ačhes mange andro drom, bo na gondolínes pre le Devleskere veci, ale pre le manušeskere!"

Sar te džal pal o Ježiš

²⁴ Akor phendľa o Ježiš peskere učeňikenge: "Te kamel vareko te avel pal ma, te na džível prekal peste, mi lel pre peste peskero kerestos a mi avel pal ma.

²⁵ Bo sako, ko kamel te zachraňinel peskero dživipen, les našavela, ale ko našavela peskero dživipen vaš ma, oda les arakhela.

²⁶ Bo so hin le manušes olestar, hoj calo svetos ela leskero a o dživipen našavela? Soha peske o manuš šaj cinel avri peskero dživipen?

²⁷ Bo o Čhavo le Manušeskero avela peskere aňjelenca andre slava peskere Dadeskeri a akor dela počíňiben (odmena) sakones pal oda, sar kerelas.

²⁸ Čáčipen tumenge phenav, hoj varesave tumendar, save kade ačhen, na dikhena o meriben, medik na dikhena le Čhas le Manušeskeres te avel andre leskero krališagos."

O Ježiš pes čerinel andre slava

17 Pal o šov džives peske vičinda o Ježiš le Peter, le Jakob the le Jan leskere phrales. Iľa len peha a sas korkore pro učo verchos.

² Ode pes anglal lende čerinda. Leskero muj leske labolas sar o kham a o gada leske parňile sar o svetlos.

³ Akor pes sikade lenge o Mojžiš the o Eliaš a vakere-nas le Ježišoha.

⁴ O Peter phendľa le Ježišoske: "Rajeja, mištes amenge hin kade. Te kames, keras trin stani: Tuke jekh, le Mojžišoske jekh the le Eliašoske jekh."

⁵ Mek sar vakerelas, zaučhardľa len andre e žiarivo chmara a andral e chmara prevakerďa ke lende o han-gos: "Kada hin miro Čhavo, kas kamav. Lestar hin man radišagos, les šunen!"

⁶ Sar oda šunde o učeňika, pele pro muj a igen pes daranas.

⁷ O Ježiš avľa ke lende, chudľa pes lendar a phendľa lenge: "Uštén, ma daran tumen!"

⁸ A sar hazdle upre o jakha, na dikhle imar ňikas, ča le Ježiš korkores.

⁹ Sar avenas tele pal o verchos, phendľa lenge o Ježiš: "Ma vakeren avri ňikaske pal oda, so dikhľan, medik o Čhavo le Manušeskero na uštela andral o meriben!"

¹⁰ Leskere učeňika lestar phučle: "Soske phenen o za-koňika, hoj ešeb (peršo) mušinel te avel o Eliaš?"

¹¹ O Ježiš lenge odphendľa: "O Eliaš čačes avela ešebno a prikerela sa,

¹² ale phenav tumenge, hoj o Eliaš imar avľa a na prindžarde les, ale kerde leha, sar kamle. Avke lendar cerpinela the o Čhavo le Manušeskero."

¹³ Akor achalíle o učeňika, hoj lenge vakerelas pal o Jan Krstiteľ.

Sastárel le čhavores zaphandle le demonoha

¹⁴ Sar avle paš o nipi, avľa ke leste jekh manuš, savo peľa pro khoča, bandolas anglal leste

¹⁵ a phendľa: "Rajeja, av jileskero ke miro čhavo, bo hin les zachvati a igen cerpinel, bo furt perel andre jag the andro paňi.

¹⁶ Andom les ke tire učeňika, ale našti les sastárde."

¹⁷ O Ježiš odphendľa: "Ó, manušale bi o pačaben the previsarde, mek dži kana tumenca avava? Dži kana tu-men mek zlíkerava? Anen les ke mandel!"

¹⁸ O Ježiš les pokarhindľa a o demonos takoj andral leste geľa avri. O čhavo sastíľa avri ola oratar.

¹⁹ Palis avle o učeňika korkore paš o Ježiš a phende: "Soske les amen našti tradňam avri?"

²⁰ Ov lenge phendľa: "Vašoda, hoj frima pačan. Bo phenav tumenge, te tumen ulahas ča ajso pačaben sar o horčíčno dřiv (zrnos), phenena kale verchoske: 'Predža kadarik kode!' – a predžala. A na ela ňič, so našti kerena."

²¹ ["Ale ajse na džan avri, ča la modľitbaha the le posto-ha."]

²² A sar phirenas jekhetane pal e Galileja, phendľa lenge o Ježiš: "O Čhavo le Manušeskero ela dino andro vasta le manušenge.

²³ Murdarena les, ale pro trito džives uštela andral o meriben." A o učeňika ačhile igen smutne.

O Raj počinel le chramoskeri daň

²⁴ Sar doavle andro Kafarnaum, avle ko Peter ola, save kiden avri le chramoskere daňe, a phende: "Tu-maró učiteľis na počinel le chramoskeri daň?"

²⁵ Ov odphendľa: "Počinel!" Sar avľa o Peter andro kher, phučľa lestar o Ježiš ešebno (peršo): "So pes tuke dičhol, Šimon? Kastar len o kraľa andral kada svetos o clo abo o daňe? Peskere čhavendar, abo le cudzen-dar?"

²⁶ Ov odphendľa: "Le cudzendar." Akor leske o Ježiš phendľa: "Akor lengere čhave na mušinen te počinel.

²⁷ Ale hoj pre amende te na rušen, dža ko moros a čhiv e udíca. Ešebno riba, so pes chudela, le avri a sar lake phundraveha o muj, arakheha andre rupuňi min-ca †. Le les avri a počin e daň vaš tu the vaš ma."

O nekbareder andro ňeboskero krališagos

18 Andre odi ora avle o učeňika ko Ježiš a phende: "Ko hin bareder andro ňeboskero krališagos?"

² O Ježiš peske vičinda čhavores, ačhaďa les maškar lende

³ a phendľa: "Čáčipen tumenge phenav, te tumen na visarena a na avena sar o čhavore, šoha (ňikda) na džana andro ňeboskero krališagos.

⁴ Ko pes pokorinela a ela sar kada čhavoro, oda hin nekbareder andro ňeboskero krališagos."

† Oda hin jekh stater

drachmi.

⁵ Sako, ko prilela jekhes kajse čhavorendar andre miro nav, man prilel."

Te na odciriden avres andral o pačaben

⁶ Oleske, ko odcirdele andral o pačaben jekhes kale ciknorendar, save pačan andre ma, ulahas feder, te leske thodehas baro bar † pre meñ a čhidehas les andro moros.

⁷ Vigos le svetoske vaš oda, hoj cirdel le manušen pro binos. Oda, hoj o manuš ela odcirdele andral o pačaben, mušinel te avel, ale vigos ole manušeske, prekal kaste oda avel.

⁸ "Te tut cirdel tiro vast abo tiro pindro te kerel binos, odčhin les a čhiv les tutar het. Bo feder tuke hin te džal andro dživipen bango abo kalika, sar soduje vastenca abo pindrenca te džal andre večno jag.

⁹ A te tut cirdel pro binos tiri jakh, džubin la avri a čhiv la tutar het. Bo feder tuke hin te džal jekha jakha andro večno dživipen, sar soduje jakhenca andro jagalo peklos.

¹⁰ Dikhen pre oda, hoj te na odčhiven jekhes kale ciknorendar! Bo phenav tumenge, hoj lengere aňjela andro űebos ačhen furt angle miro Dad andro űebos.

¹¹ [Bo o Čhavo le Manušeskero avla, hoj te zachrañinel oda, so sas našado.]"

Pal o našado bakroro

¹² "Sar pes tumenge dičhol? Te ulahas varesave manušes šel (100) bakre a te jekh lendar našliľahas, či na mukela ola eňavardeš the eňa (99) pro brehi a na džala te rodel oles, savo našliľa?

¹³ Čačes phenav tumenge: Te pes ačhela, hoj les arakhela, buter lestar radisalola sar ole eňavardeš the eňendar (99), save na našliľe.

¹⁴ Avke aňi tumaro Dad andro űebos na kamel, hoj te našol aňi jekh kale ciknorendar."

Sar te dživel jekhetane le phralenca

¹⁵ "Te kerđahas tiro phral binos, dža a vaker leha pal oda ča tu the ov korkoro. Te tut šunela, dochudľal pale tire phrales.

¹⁶ Te tut na šunela, le tuha mek jekhes abo duje dženen, bo *dojekh lav ačhela pro duj abo trin švedki*.

¹⁷ Te len na šunela, phen oda andre khangeri. A te na šunela aňi la khangera, mi el tuke sar colňikos a sar manuš, savo dživel binošnes a bi o Del.

¹⁸ Čačipen tumenge phenav: Savoro, so phandena pre phuv, ela phandlo the andro űebos a savoro, so rozphandena pre phuv, ela rozphandlo the andro űebos.

¹⁹ Pale tumenge phenav, hoj te duj džene tumendar pes dothovena andre varesoste pre phuv a mangena vaš oda, chudena oda mire Dadeštar, savo hino andro űebos.

²⁰ Bo ode, kaj duj abo trin džene pes zgele andre miro nav, som the me maškar lende."

† O baro bar andral o malmos

Pal o sluhas, so na odmukel

²¹ Akor avla ke leste o Peter a phendľa leske: "Rajeja, te kerela miro phral pre mande binos, kecivar leske mušinav te odmukel? Dži eftavar?"

²² O Ježiš leske phendľa: "Na phenav tuke, hoj eftavar, ale eftavardešvar ehta (70 x 7).

²³ Vašoda o űeboskero krališagos hino ajsa: Sas kralis, savo kamelas te džanel, keci love leske kamen leskere sluhi.

²⁴ Sar chudľa te genel, ande leske jekhe manušes, savo leske kamelas but milioni ††.

²⁵ Ale vaš oda, hoj les na sas sar te del pale, phendľa leskero raj, hoj te bikenen vaš o otroka les the leskera romňa, the le čhaven a mek savoro, so les hin, hoj te del pale oda, so le kraliske kamelas.

²⁶ Akor peľa o sluhas pro khoča, bandolas anglal leste a mangelas les: 'Rajeja, užar mek pre ma a savoro tuke dava pale!'

²⁷ Le kraliske sas pre leste pharo, mukľa les a savore love, so leske kamelas, leske odmukľa.

²⁸ Sar geľa odarik avri, arakhľa avre sluhas ole kraliskere, savo leske kamelas vaj šel (100) rupune minci ‡. Chudľa les, tasavelas les a phendľa: 'De mange pale oda, so mange kames!'

²⁹ Akor oda aver sluhas peľa paš leskere pindre a mangelas les: 'Užar mek pre ma a savoro tuke dava pale.'

³⁰ Ale ov na kamľa te užarel. Geľa a čhidľa les andre bertena, medik leske na počinela oda, so leske kameles.

³¹ Sar dikhle okla sluhi, so pes ačhiľa, sas igen smutne. Avle a vakerde avri le kraliske savoro, so pes ačhiľa.

³² Akor peske les vičindľa o kralis a phendľa leske: 'Nalačo sluhona, savoro, so mange kamehas, tuke odmukľom, bo mangehas man,

³³ či na majindal te el the tu jileskero ke miro aver sluhas avke, sar me somas jileskero ke tu?'

³⁴ Akor o kralis cholisalila a diňa les andre bertena, hoj te el potrestimen, medik na dela pale savoro, so leske kamelas.

³⁵ Avke kerela the miro űeboskero Dad tumenge, te na odmukela sako peskere phraleske andral o jilo."

Pal o rozvodoss

19 Sar o Ježiš dovakerďa kala lava, geľa het andral e Galileja a avla andre Judsko phuv pal o Jordan.

² Džanas pal leste but nipi a ov len ode sastarelas.

³ Avle ke leste o Farizeja a kamenas les te chudel andro lav. Phučle lestar: "Či šaj omukel o rom peskera romňa vaš chocoste?"

⁴ Ov odphendľa: "So na gendľan, hoj ešebnovarestar (peršovarestar) o Del len stvorindľa sar muršes the džuvľa?"

†† 10 000 talenti ‡ 100 denara

⁵ A o Del mek phendā: *'Vašoda oddžala o murš la datar the le dadestar a ela jekhetane la romňaha a on duj džene ena jekh tēlos.'*

⁶ Avke imar nane duj, ale jekh tēlos. Vašoda oda, so o Del phandlā, o manuš te na rozphandel!"

⁷ Phende leske: "Akor soske phendā o Mojžiš, hoj šaj te del la romňake o rozvodno lil a te premukel la?"

⁸ Phendā lenge: "O Mojžiš tumenge domuklā te premukel tumare romňijen vaš oda, hoj tumare jile sas barune. Ale ešebnovarestar (peršovarestar) na sas avke.

⁹ A phenav tumenge, hoj sako, ko omukela peskera romňa, te oj na kerđa lubipen, a lela peske avra, kerel laha lubipen." ["Oda murš, ko peske lel ajsa, savi hiňi premuklī, tiš kerel lubipen."]

¹⁰ Akor leske phende leskere učeňika: "Te oda hin avke maškar o murš the leskeri romňi, akor nane mištes te lel romňa."

¹¹ Ov lenge phendā: "Na savore achal'on oda lav, ale ča ola, kaske oda hin dino.

¹² Bo hin ajse murša, save ulile (narodzinde pes) avke, hoj našti dživen džuvľaha. A hin the ajse murša, savendar o nipi ajsen kerde. A mek hin the pačivale murša, save korkore kamle te ačhel pačivale prekal o űeboskero krališagos. Oda, ko šaj prilel, mi prilel!"

O Raj požehňinel le čhavoren

¹³ Akor leske ande le čhavoren, hoj pre lende te thovel o vasta a modľinelas pes vaš lenge, ale o učeňika lenge na domukenas.

¹⁴ No o Ježiš lenge phendā: "Domuken le čhavorenge te avel ke ma a ma braňinen lenge, bo ajsengero hin o krališagos le Devleskero."

¹⁵ A sar thoda pre lende o vasta, geľa odarik het.

O barvalo terno murš

¹⁶ Varesavo murš avľa ke leste a phendā: "Učitelina, so ajso lačho mange kempel te kerel, hoj man te el o večno dživipen?"

¹⁷ Ov leske phendā: "Soske mandar phučes pal o lačho? Jekh hino Lačho. A te kames te džal andro dživipen, doliker o prikazaňja."

¹⁸ Phendā le Ježišoske: "Save?" A o Ježiš phendā: "Na murđareha! Na kereha lubipen! Na čoreha! Na svedčineha klamišagoha pre tiro pašutno!"¹⁹ De pačiv tira da the le dades! Kameha avres avke sar pes korkores!"

²⁰ O terno murš leske pre oda odphendā: "Kada savoro imar dolikerđom. So mange mek kempel?"

²¹ O Ježiš leske phendā: "Te kames te avel dokonalo, dža, biken tiro barvalipen a rozde le čorenge a ela tut o barvalipen andro űebos. Palis av a phir pal ma!"

²² Ale sar oda šundā o terno murš, geľa het smutno, bo sas les but barvalipen.

Pal o barvalipen

²³ O Ježiš phendā peskere učeňikenge: "Čačipen phenav tumenge, hoj o barvalo phares avela andro űeboskero krališagos.

²⁴ A pale tumenge phenav, hoj lokeder hin la tāvake te predžal prekal e suvakeri chev, sar le barvaleske te džal andro űeboskero krališagos."

²⁵ Sar oda šunde leskere učeňika, igen pes čudalinenas a phenenas: "Ta akor, ko šaj el spasimen?"

²⁶ Ale o Ježiš dikhľa pre lende a phendā lenge: "O manuša ada našti keren, ča o Del šaj. Bo o Del šaj kerel savoro."

²⁷ Akor leske odphendā o Peter: "Dikh, amen omukľam savoro a geľam pal tu. So amen hin olestar?"

²⁸ O Ježiš lenge phendā: "Čačipen tumenge phenav, hoj andre oda časos, so avela, sar bešela o Čhavo le Manušeskero pre peskero slavakero tronos, akor the tumen, save pal mande džanas, bešena pro dešuduj (12) troni a sudzinena o dešuduj fajti le Izraeloskere.

²⁹ A sako, ko omukelas vaš miro nav o khera, le phralen abo le pheňen, le dades abo la da, le čhaven vaj o malī, chudela šelvar ajci buter a chudela o večno dživipen.

³⁰ Ale but olendar, ko sas ešebne (perše), ena posledna a o posledna ena ešebne."

Pal o robotňika andre viňica

20 "Bo o űeboskero krališagos hino sar jekh chulaj, savo geľa sig tosara avri, hoj te lel le robotňiken andre peskeri viňica.

² Dothoda pes le robotňikenca, hoj len dela jekh rupuňi minca † pro džives, a bičhada len andre peskeri viňica.

³ Sar geľa avri vaj eňa orendar, dikhľa avre dženen, hoj űič na keren a ačhen pro placos.

⁴ The lenge phendā: 'Džan the tumen andre viňica a počinava tumen avke, sar kempel.' A on gele.

⁵ Pale geľa avri vaj dešuduj (12) orendar the trin orendar a vičinda avre robotňiken.

⁶ Palis geľa avri vaj pandž orendar a arakhľa avre dženen te ačhel a űič te na kerel a phendā lenge: 'So kade ačhen calo džives a űič na keren?'

⁷ Phende leske: 'Vašoda, hoj űiko amen na iľa andre buči.' Phendā lenge: 'Džan the tumen andre viňica te kerel buči.'

⁸ Sar zaračila, phendā la viňicakero raj peskere spravcoske: 'Vičín le robotňiken a počín lenge.' Chude le poslednendar dži o ešebne (perše).

⁹ Sar avle ola, save sas ile andre buči vaj pandž orendar, chudle po jekh rupuňi minca.

¹⁰ Palis avle ola ešebne a gondolinenas peske, hoj chudena buter, ale the on chudle po jekh minca.

¹¹ Sar ile, dudrinenas pro chulaj

† Jekh denaris

¹² a vakerenas: 'Amen pes trapinahas calo džives pro kham, ale kala posledna kerenas buči ča jekh ora a počindal len avke sar amen!'

¹³ Ale ov odphenda jekheske lendar: 'Prijaťelina, na som načačipnaskero ke tu! Či tut na dothodaľ manca vaš jekh minca?'

¹⁴ Le oda, so hin tiro, a dža! Me kamav kale posled-
nones te del avke sar tut.

¹⁵ Abo našti kerav mireha oda, so me kamav? Dikhes pre mande namištes vaš oda, hoj som lačo?'

¹⁶ Avke ena o posledna ešebne a o ešebne posledna."

O Raj phenel avri pal peskero cerpišagos

¹⁷ Sar o Ježiš džalas upre andro Jeruzalem, iľa peske pre sera ole dešduje učeňiken a pal o drom lenge vakerelas:

¹⁸ "Šunen: Džas upre andro Jeruzalem a o Čhavo le Manušeskero ela avridino le nekbaredere rašajenge the le zakoňikenge a odsudzinena les pro meriben.

¹⁹ Dena les le Nažidenge, hoj lestar te asan a hoj les te zbičinen the te ukrižinen; ale pro trito džives ušćela andral o meriben."

Pal o thana paš le Ježišoskero tronos

²⁰ Akor avľa e daj le Zebedeoskere čhavengeri ko Ježiš peskere čhavenca, bandolas anglal leste a mangelas lestar vareso.

²¹ Ov lake phenda: "So kames?" Oj phenda: "Phen, hoj kala mire duj čhave te bešen jekh pre tiri čači (pravo) a aver pre tiri baľogňi (ľavo) sera andre tiro krališagos."

²² O Ježiš lake odphenda: "Na džanen, so mangel. Či šaj pijen odi kuči, savi me majinav te pijel?" ["A či šaj aven bolde ole bolipnaha, saveha me som boldo?"] Phende leske: "Šaj."

²³ Ov lenge phenda: "Čačes pijena odi kuči, so me pijav. [The ole bolipnaha, saveha som me boldo, the tumen avena bolde] ale, hoj te bešen pal miri čači the baľogňi sera, oda nane miri veca. Ola thana chudena ola, prekal kaste miro Dad len pririchtinda."

²⁴ Sar oda šunde okla deš učeňika, rušle pre ola duj phrala.

²⁵ Ale o Ježiš peske len vičinda a phenda: "Džanen, hoj o vladara ľidžan le naroden zoraha a o bare raja trapinen le nipen.

²⁶ Ale maškar tumende te na el avke. Oda, ko kamel te el bareder, mi el tumaro slugas.

²⁷ Oda, ko kamel te el ešebno, mi služinel savoreng.

²⁸ Bo aňi o Čhavo le Manušeskero na avľa, hoj leske te služinen, ale hoj ov te služinel a te počinel peskere dživipnaha vaš o but manuša."

Sastarel duje koren paš o Jericho

²⁹ Sar avelas avri andral o Jericho, džanas pal leste igen but nipi.

³⁰ Bešenas paš o drom duj kore manuša. Sar šunde, hoj odarik džal o Ježiš, vriskinde: "Rajeja, Čhavo le Davidoskero, av ke amende jileskero!"

³¹ Ale o nipi lenge phenenas, hoj te čhiten, no on mek zoraleder vriskinenas: "Av ke amende jileskero, Rajeja, Čhavo le Davidoskero!"

³² O Ježiš zaačhiľa, vičinda len a phučľa: "So kamen, hoj tumenge te kerav?"

³³ On leske phende: "Rajeja, hoj pes te phundraven amare jakha."

³⁴ Le Ježišoske sas pharo pre lende a chudľa pes lengere jakhendar. Takoj chudle te dikhel a džanas pal leste.

O Ježiš le lašaribnaha avel andro Jeruzalem

21 Sar imar doavenas paš o Jeruzalem a avle andre Betfaga paš o Olivovo Verchos, bičhada o Ježiš duje učeňiken

² a phenda lenge: "Džan andre kada foros, so hin angle tumende. Soča džana andre, arakhena zaphandles terne somaricis the somaris. Odphanden len a anen len ke ma.

³ Te vareko tumenge vareso phenela, tumen phenena, hoj le Rajeske len kempel, ale maj len bičhavela pale."

⁴ Oda savoro pes ačhiľa, hoj pes te ačhel oda, so phenda o prorokos:

⁵ "Phenen le Sionoskera čhake: 'Dikh, tiro kralis avel ke tu pokorno a bešel pre oslica, pro terno somaricis.'"

⁶ O učeňika gele a kerde avke, sar lenge oda phenda o Ježiš.

⁷ Ande la oslica the le somaricis, thode pre lende peskere gada a o Ježiš peske bešľa.

⁸ But manuša rakinenas peskere gada pro drom, aver čhingerenas o prajti pal o stromi a rakinenas pro drom.

⁹ O nipi, save džanas anglal leste, the ola, save džanas pal leste, vičinenas: "Hosanna le Davidoskere Čhaske! Požehňimen oda, ko avel andro nav le Rajeskero! Hosanna andro ňebos!"

¹⁰ Sar avľa andro Jeruzalem, andre calo foros avľa bari vika a o manuša phučenas: "Ko hin kada?"

¹¹ Ola nipi phenenas: "Kada hin o Ježiš, oda prorokos andral o Galilejsko Nazaret."

O Raj žužarel o chamos

¹² O Ježiš geľa andro chamos a tradňa avri savoren, save ode cinenas the bikenenas. Previsarda o skamin-
da olenge, save vatinenas o love, the olenge, save bikenenas le holuben.

¹³ Phenda lenge: "Hin pisimen: 'Miro kher pes vičinel kher prekal o modľitbi', ale tumen lestar kerďan kher prekal o živaňa!"

¹⁴ Avle ke leste andro chamos o kore the o bange a sastarda len.

¹⁵ Ale sar dikhle o nekbareder rašaja the o zakoňika ola zazraki, so kerelas, the le čhavoren, save vriskinen andro chamos: "Hosanna le Davidoskere Čhaske!" – rušen

¹⁶ a phende leske: "Šunes, so vakeren?" O Ježiš phendā: "He. Tumen mek šoha (ňikda) na gendān: 'Andral o muja le čhavorengere the le cikne čhavengere tuke kerdāl o lašariben?'"

¹⁷ O Ježiš len ode muklā, geļa avri andral o foros andre Betanija a ode presuča.

Prekošel o figovňikos

¹⁸ Tosara, sar džalas pale andro foros, sas bokhalo.

¹⁹ Pal o drom dikhļa jekh figovňikos a geļa paš leste, ale na arakhļa upre o figi, ča o prajti. Avke phendā leske: "Imar šoha buter te na barol pre tu ovocje!" A oda figovňikos takoj šučilā avri.

²⁰ Sar oda dikhle leskere učeňika, čudalinenas pes a phenenas: "Sar oda, hoj oda figovňikos takoj šučilā avri?"

²¹ O Ježiš lenge odphendā: "Čačipen tumenge phenav, te tumen ulahas pačaben a na pochibindānas, kerdānas the tumen oda, so me le figovňikoha. A na ča kada, ale te phendānas kale verchoske: 'Hazde tut a čhiv tut andro moros!' ačhela pes.

²² Savoro, vaš soske tumen pačabnaha mangena andre modlītba, chudena."

Phučiben pal leskeri autorita

²³ Sar avļa andro chramos a sikavelas, avle ke leste o nekbareder rašaja the o phuredera le nipengere a phende leske: "Sava zoraha keres kala veci? Ko tut diňa odi autorita?"

²⁴ O Ježiš lenge odphendā: "The me tumendar vareso phučava a te mange odphenena, me tumenge phenava, sava autoritaha kerav kala veci.

²⁵ Khatar sas le Janoskero bolīpen? Andral o ňebos vaj le manušendar?" On gondolinenas maškar peste a phenenas: "Te phenaha: 'Andral o ňebos' – phenela amenge: 'Akor soske leske na pačandilān?'"

²⁶ Ale aňi naštī phenas: 'Le manušendar', bo savore lenas le Jan sar prorokos a daras pes le nipendar."

²⁷ Odphende le Ježišoske: "Na džanas." Akor lenge ovphendā: "Aňi me tumenge na phenava, sava autoritaha kerav kala veci."

O podobenstvo pal o duj čhave

²⁸ "No, so phenen pre oda? Varesave manušes sas duj čhave. Avļa ko ešebno a phendā: 'Čhavo miro, džā adadžives te kerel buči andre miri viňica!'"

²⁹ Ov odphendā: 'Na kamav te džal.' Ale palīs leske sas pharo a geļa.

³⁰ Avļa ke dujto čhavo a the leske phendā ada. Ov odphendā: 'Džav, rajaja!' – ale na geļa.

³¹ Savo kale dujendar kerdā oda, so lendar o dad kamelas?" Odphende leske: "Oda ešebno (peršo)." O Ježiš lenge phendā: "Čačipen tumenge phenav: O colňika the o lubňa tumen predenašen andro krališagos le Devleskero!"

³² Bo avļa o Jan te sikavel tumen pal o čačipnaskero drom, ale na pačandilān leske. No o colňika the o

lubňa leske pačandile a tumen oda dikhļan, ale the avke na čerindān tumaro jilo a na chudļan leske te pačal."

Pal o nalače viňicakere chulaja

³³ "Šunen the aver podobenstvo! Sas jekh raj, savo peske sadzindā e viňica a ohradzindā la. Kerdā e chev, kaj pes pučinel avri e štava andral o hroznos, a ačhađa e veža. Palīs diňa e viňica kečeň le chulajenge a geļa het pro droma.

³⁴ Sar avļa oda časos, sar pes skidel o hroznos, bičhađa peskere sluhēn ke ola chulaja, hoj te lel peskero ulīpen.

³⁵ Ale ola chulaja chudle leskere sluhēn; jekhes marde, avres murdarde a andre avreste čhivkerenas le barenca.

³⁶ Pale bičhađa avre sluhēn, buter sar ešebnovar (peršovar), ale the lenca ada kerde.

³⁷ Pro agor bičhađa ke lende peskere čhas, bo phendā peske: 'Dena mire čhas pačiv.'

³⁸ Ale ola chulaja peske phende: 'Oda hin o dēdičos. Aven, murdaras les a leskero dēdictvos ela amaro!'"

³⁹ Chudle les, čhide les avri andral e viňica a murdarde les.

⁴⁰ No, sar avela o raj la viňicakero, so kerela ole manušenca?"

⁴¹ Phende leske: "Murdarela ole nalače manušen bara choļaha a e viňica dela avre chulajenge, save leske anena o ulīpen andre peskero časos."

⁴² O Ježiš lenge phendā: "So, mek šoha na gendān, so hin pisimen?"

'Ipen oda bar, so o murara odčhide, ačhilā o hlavno bar. O Raj oda kerdā a amen pes oleske čudalinas!'

⁴³ Vašoda tumenge phenav, hoj pes tumendar lela o krališagos le Devleskero a dela pes le manušenge, save anena o ovocje.

⁴⁴ Oda, ko perela pre oda bar, pes phagerela a oles, pre kaste perela, rozmarela."

⁴⁵ Sar šunde o nekbareder rašaja the o Farizeja ola leskere podobenstva, prindžarde, hoj vakerel pal lende.

⁴⁶ Kamle les te chudel, ale daranas pes le nipendar, bo on les lenas sar prorokos.

O podobenstvo pal o bijav

22 O Ježiš lenge pale vakerelas andro podobenstva:

² "O ňeboskero krališagos hino sar jekh manuš, savo sas kralīs, a kerdā peskere čhaske bijav.

³ Bičhađa peskere sluhēn, hoj te džān te vičinel pro bijav le manušen, ale on na kamenas te avel.

⁴ Pale bičhađa avre sluhēn a phendā: 'Phenen le manušenge, save hine vičimen: O dilos imar pririchtindom, mire gurumňa the o thule džvirini hine imar murdarde a sa imar hin kisno! Aven pro bijav!'"

⁵ Ale lenge oda sas jekh a gele het, vareko pre peskeri maļa a vareko, hoj te bikenkerel.

⁶ A okla chudle leskere sluhén, ande len avri pre ladž a murdarde len.

⁷ Sar oda šundā o kralīs, cholisalīla, bičhađa peskere slugađen a murdarđa ole vrahén. A lengero foros podlabarđa.

⁸ Akor phendā peskere sluhenge: 'O bijav imar hino pririchtimen, ale o manuša, save sas vičimen pro bijav, na sas hodne te džal.'

⁹ Vašoda džan pro droma avri le forostar a vičinen pro bijav savoren, kas arakhena.'

¹⁰ Ola sluhi gele pro droma a skidle savoren, kas arakhle, le lačhen the le nalačhen. A andre bijaveskeri sala sas pherdo hosci.

¹¹ Ale sar avla andre o kralīs te dikhel pro hosci, dikhla ode manušes, savo na sas urdo andro bijavutne gada.

¹² A phendā leske: 'Prijaťelīna, sar avlal andre, te na sal urdo andro bijavutne gada?' A ov sas čhit.

¹³ Akor phendā o kralīs le sluhenge: 'Phanden leske o pindre the o vasta a čhiven les avri andro kaľipen!' Ode ela o roviben a randena le dandenca andre dukh.

¹⁴ Bo hin but vičimen, ale frima hin avrikidle."

O phučiben pal o daňe

¹⁵ Akor o Farizeja odgele a dovakerenas pes, sar les te chudel andro lava.

¹⁶ Bičhade ke leste peskere učeňiken le Herodijanenca † a on leske phende: "Učitelīna, džanas, hoj sal čačipnaskero a sikaves le Devleskero drom andro čačipen. A na džal tuke pal oda, so o manuša phenen, bo na dikhes pro manuš.

¹⁷ Phen amenge, so gondolīnes: Kampel te počinel le Cisariske o daňe, vaj na?"

¹⁸ Ale o Ježiš prindžarđa lengero nalačhipen a phendā: "Soske man kamen te chudel pro lav, tumen dujemujengere?"

¹⁹ Sikaven mange e minca, savaha pes počinel o daňe!" On leske ande o denaris.

²⁰ A phučla lendar: "Kaskero hin kada obrazis the nav?"

²¹ Phende: "Le Cisariskero." Avke lenge phendā: "Den oda, so hin le Cisariskero, le Cisariske, a so hin le Devleskero, le Devleske."

²² Sar oda šunde, čudalinde pes, omukle les a gele het.

Pal o ušťiben andral o meriben

²³ Oda džives avle ke leste o Saduceja, save phenen, hoj o manuš našťi ušťel andral o meriben. A phučle le Ježišostar:

²⁴ "Učitelīna, o Mojžiš phendā, *te vareko merela bi o čhave, leskero phral peske mušinelā te lel leskera romňa, hoj te kerel le phraleske čhaven.*

²⁵ Sas ke amende efa phrala. Ešebno iľa romňa a palīs muľa. A vaš oda, hoj les na sas čhave, mukla la romňa peskere phraleske.

²⁶ Avke pes ačhila le dujtoneha, the le tritoneha – džike eftato.

²⁷ Palīs, sar mule avri savore phrala, muľa the oj.

²⁸ Akor, te savore efa phrala laha dživenas, kaskeri lendar ela romňi, sar ušťena andral o meriben?"

²⁹ O Ježiš lenge odphendā: "Tumen calkom na achalón, bo na prindžaren le Devleskero lav aňi leskeri zor.

³⁰ Bo sar ušťena o mule andral o meriben, na lena romňen a na džana romeste, ale ena sar o aňjela andro ňebos.

³¹ Tumen na gendān, so phendā o Del, pal o mule, save ušťena andral o meriben?"

³² 'Me som o Del le Abrahamoskero, o Del le Iza-koskero the o Del le Jakoboskero!' O Del nane Del le mulenge, ale le džidenge!"

³³ Sar oda šunde o nipi, čudalīnenas pes upral leskero sikaviben.

O nekbareder prikazaňje

³⁴ Sar o Farizeja šunde, hoj o Ježiš phandla le Saducejenge o muj andre, sa pes zgele.

³⁵ Jekh lendar, zakoňikos, phučla le Ježišostar, hoj les te chudel avri:

³⁶ "Učitelīna, savo prikazaňje hin nekbareder andro Zakonos?"

³⁷ O Ježiš leske phendā: "*Kameha le Rajes, tire Devles, andral calo tiro jilo, andral cali tiri duša the andral cali tiri godi.*"

³⁸ Ada hin oda baro the ešebno (peršo) prikazaňje.

³⁹ A dujto hino ajsa sar o ešebno: '*Kameha avres avke sar pes korkores!*'

⁴⁰ Pre kala duj prikazaňja ačhel calo Zakonos the o Proroka."

O phučiben pal o Davidoskero čhavo

⁴¹ Sar pes zgele o Farizeja, phučla lendar o Ježiš:

⁴² "So tumen phenen pal o Kristus? Kaskero hino čhavo?" Phende leske: "Le Davidoskero."

⁴³ Phendā lenge: "Akor soske o David les andro Duchos vičinel Rajeja? Bo phenel:

⁴⁴ '*O Raj phendā mire Rajeske: Beš tuke pal miri čači (pravo) sera, medik tuke na thovava tire ňeprijaťelēn tel o pindre.*'

⁴⁵ Te korkoro o David les vičinel 'Rajeja', sar šaj avel o Kristus leskero čhavo?"

⁴⁶ Ňiko leske na džanelas te odphenel aňi lav a ole dživesestar Ňiko buter lestar pes na tromandila (odvažinda) te phučel.

Dovakerel le Farizejenge the zakoňikenge

23 Akor vakerelas o Ježiš le nipenge the peskere učeňikenge:

² "O zakoňika the o Farizeja peske bešle pre le Mojžišoskero than a sikaven, so phenel o Zakonos.

† O Židi, save líkerenas paš o Herodes

³ Vašoda savoro, so tumenge phenena, hoj te dolikeren, oda dolikeren the keren, ale pal lengere skutki ma keren. Bo on na keren oda, so vakeren.

⁴ Sphanden bare pharipena, so našti te zlidžal, a thoven len pro vali le manušenge, ale on korkore na kamen aňi jekhe angušteha lenge te pomožinel.

⁵ Savoro, so on keren, keren ča vaš oda, hoj len o nipi te dikhen. Thoven o bare krabički le Devleskere laveha pre peskero čekat the pro vasta a bare špargici pro agor peskere gadenge.

⁶ Kamen nekfeder thana pro hoscini the anglune thana andro sinagogi.

⁷ Kamen, hoj lenge o nipi andro foros te pozdravinen a te vičinen len: 'Rabbi.'

⁸ Ale tumen peske ma domuken te phenel 'Rabbi', bo ča jekh hin tumaro Učitelis – o Kristus – a tumen savore san phrala.

⁹ A ma phenen ňikaske pre phuv 'Dado', bo ča jekh hin tumaro Dad, oda, savo hino andro ňebos.

¹⁰ Aňi peske ma domuken te phenel 'Duchovne Vodci', bo ča jekh hin tumaro vodcas, o Kristus.

¹¹ Oda, ko ulahas maškar tumende bareder, ela tumaro služobňikos.

¹² Sako, ko pes upre hazdela, ela tele dikhlo a oda, ko hin pokorno, ela upre hazdlo.

¹³ Ale vigos tumenge, zakoňikale the Farizejale, tumen dujemujengere! Bo phanden andre le nipenge o ňeboskero krališagos – tumen korkore andre na džan a olenge, save kamlehas, na domuken.

¹⁴ [Vigos tumenge, zakoňikale the Farizejale, tumen dujemujengere! Bo thoven avri le vdovenca a len lengere khera a but tumen modlĭnen, hoj tumen te dičhol. Vašoda avena goreder sudzimen.]

¹⁵ Vigos tumenge, zakoňikale the Farizejale, tumen dujemujengere! Bo predžan o moros the e phuv, hoj te dochuden jekhe manušes prekal tumaro pačaben, a sar pes visarel, keren lestar čhas prekal o peklos duvar goreder, sar san tumen."

¹⁶ "Vigos tumenge, kore vodcale! Bo phenen: 'Ko lela vera pro chramos, oda nane nič, ale ko ilahas vera pre le chramoskero somnakaj, oda imar mušinel te dolikerel.'

¹⁷ Tumen diline the kore! So hin bareder: O somnakaj, či o chramos, so sentňarel o somnakaj?

¹⁸ Abo tumen phenen: 'Te ilahas vareko vera pro oltaris, oda nane nič, ale te ilahas vareko vera pre oda daros, so hin upre, oda imar mušinel te dolikerel.'

¹⁹ Tumen diline the kore! So hin bareder, o daros, či o oltaris, so sentňarel o daros?

²⁰ Avke oda, ko lel vera pro oltaris, lel vera pro oltaris the pre savoreste, so upre hin.

²¹ A oda, ko lel vera pro chramos, lel vera pro chramos the pre Oda, ko andre bešel.

²² Oda, ko lel vera pro ňebos, lel vera pro tronos le Devleskero the pre Oda, ko upre bešel.

²³ Vigos tumenge, zakoňikale the Farizejale, tumen dujemujengere! Bo den o dešto kotor andral e meta, andral o kopros the andral e raška, ale omukľan oda,

so buter kampil te dolikerel andro Zakonos: O spravodlišagos, o lačhejleskeriben the e vernost'. Kada kampľa te kerel a koda te na omukel.

²⁴ Tumen kore vodcale! La mucha precedzinen a la tava prelĭginen!"

²⁵ "Vigos tumenge, zakoňikale the Farizejale, tumen dujemujengere! Bo žužaren avral e kuči the o čaro, ale andral hin pherdo hamišagos the džungipen.

²⁶ Farizejina, tu koro manuš! Žužar ešeb (peršo) e kuči the o čaro andral, hoj te aven žuže the avral!

²⁷ Vigos tumenge, zakoňikale the Farizejale, tumen dujemujengere! Bo san ajse sar parne hrobi, so dičhon avral šukares, ale andral hine pherde le mulengere kokalenca the dojekhe džungipnaha.

²⁸ Avke the tumen avral dičhon le nipenge, hoj san čačipnaskere, ale andral san pherde le falšišagoha the le nalačipnaha."

²⁹ "Vigos tumenge, zakoňikale the Farizejale, tumen dujemujengere! Bo ačhaven o hrobi le prorokenge a šukaľaren o pomňiki le čačipnaskerengere.

³⁰ Phenen: 'Te džidiľamas andro dživesa amare dadengere, na murdarďamas lenca le proroken.'

³¹ Avke korkore phenen avri pre peste, hoj san o čhave olengere, save murdarde le proroken.

³² Ta aven a dokeren oda, so chudle te kerel tumare dada!

³³ Tumen sapale! Tumen čhave le sapengere! Sar šaj denašen olestar, hoj te aven odsudzimen andro peklos?

³⁴ Vašoda bičhavav ke tumende le proroken, le godaveren the le manušen, save hine avrisikade andro Zakonos. Varesaven lendar ukrižinena the murdarena a varesaven lendar marena bičoha andre tumare sinagogi a džana pre lende foros forostar,

³⁵ hoj te aven potrestimen vaš oda, hoj murdarďan le čačipnaskeren a oleha čhordan avri lengero rat pre phuv – le Abelostar dži ko Zachariaš, o čhavo le Barachiašiskero, saves murdarďan maškar o chramos the oltaris.

³⁶ Čačipen tumenge phenav, kada savoro avela pre kada pokoleňje!"

O roviben pal o Jeruzalem

³⁷ "Ó, Jeruzalem, ó, Jeruzalem! Tu, so murdares le proroken a čhivkeres le barenca andre ola, save sas ke tu bičhade. Kecivar kamľom te skidel tire čhaven, avke sar e kachňi skidel peskere kachňoren tel peskere kridli, ale na kamenas!

³⁸ Dikh, tumaro kher ačhela omuklo, na ela nič andre!

³⁹ Bo phenav tumenge, hoj akanastar man imar šoha (ňikda) na dikhena, medik na phenena: 'Požehňimen oda, ko avel andro nav le Rajeskero!'"

O chramos ela tele čhido

24 Palis geľa o Ježiš avri andral o chramos a sar džalas het, avle ke leste leskere učeňika, hoj leske te sikaven le chramoskere stavbi.

² Ale o Ježiš lenge odphenda: "Dikhen kada savoro? Čačipen tumenge phenav, hoj kade na ačhela bar pre bareste! Sa ela tele čhido."

O pharipena pro koñec sveta

³ Sar bešelas pre Olivovo Verchos, avle pal leste leskere učeñika korkore a phende leske: "Phen amenge, kana oda avela. Pal soste prindžaraha, hoj tu aves a imar hin o koñec le svetoske?"

⁴ O Ježiš lenge odphenda: "Merkinen, hoj tumen vareko te na klaminel!

⁵ Bo ena but ajse, save avena andre miro nav a phenena: 'Me som o Kristus!' – a cirdena but dženen pro falošno drom.

⁶ Sar šunena pal o maribena a hoj pes maren o narodi, ma predaran, bo oda mušinel te avel, ale mek na ela o koñec.

⁷ Bo o narodos džala pro narodos a o krališagos pro krališagos; ela bari bokh a pre but thana e phuv razisařola.

⁸ Oda ela anglune dukha le svetoskere andro trapišagos.

⁹ Akor tumen zaphandena, hoj te aven potrestimen a the murdarde a savore narodi tumen naští avri ačhena vaš miro nav.

¹⁰ Akor but džene oddžana le pačabnastar. Jekh avres dena andre a phral le phrales naští ačhela avri.

¹¹ Avena but falošna proroka a cirdena but dženen pro falošno drom.

¹² Vašoda, hoj o nalačhipen barola, andro but džene šilařola o kamiben,

¹³ ale oda, ko likerela avri dži o koñec, ela spasimen.

¹⁴ A kada evañjelium pal o krališagos pes vakerela pal calo svetos, hoj savore narodi te šunen, a palis avela o koñec.

¹⁵ Sar dikhena, hoj pre sentno than ačhel oda baro džungipen, so meřarel andre o chramos, avke sar phenda o prorokos Daniel – oda, ko genel, mi ačaloř –

¹⁶ akor ola, save ena andre Judsko, mi denašen upre pro verchi.

¹⁷ Oda, ko ela pro pados, te na avel tele, hoj peske vareso te lel andral o kher.

¹⁸ A oda, ko ela pre mařa, te na visařol pale khere vaš o gada.

¹⁹ No andre ola dživesa ela phares le khabņenge the ole džuvľenge, save den te pijel le čhavoren.

²⁰ Modľinen tumen, hoj te na mušinen te denašel jevende abo pro Šabbat (sombatone)!

²¹ Bo akor ela ajso pharipen, sar mek šoha (ñikda) na sas, kanastar o Del stvorinda o svetos, a imar šoha buter na ela.

²² Te o Raj na kerđahas frimeder ola dživesa, na uľa has zachrañimen ñisavo manuš. Ale vaš o manuša, saven peske kidña avri, kerđa ola dživesa frimeder.

²³ Te tumenge akor vareko phendaahas: 'Dikh, kade hin o Kristus,' abo: 'Kode hino!' – ma pačan!

²⁴ Bo avena but falošna mesijaša the but falošna proroka a kerena bare znameñja the zazraki, hoj te cirden

pro falošno drom – te pes oda ča diňahas – the le avrikidle manušen.

²⁵ Dikhen, phendom tumenge oda anglal!

²⁶ Te tumenge akor vareko phenela: 'Dikh, pre pušća hino!' – ma džan avri. Abo: 'Dikh, andro khera hino!' – ma pačan.

²⁷ Bo sar demel o perumos pro vichodos a dičhol les dži o zapados, avke ela, sar avela o Čhavo le Manušeskero.

²⁸ Bo ode, kaj hin o řelos le muleskero, pes skidena the o supi.

²⁹ A takoj pal o pharipen andre ole dživesa, o kham kařola a o čhonoru imar na labola. O čerčeña perena andral o ñebos a o ñeboskere zora pes čhalavena.

³⁰ Akor pes sikavela pro ñebos znameñje le Čhaskero le Manušeskero a savore nipi pre phuv rovena, sar dikhena *le Čhas le Manušeskeres te avel pro ñeboskere chmari* andre zor the andre bari slava.

³¹ Sar šundřola e bari truba, bičhavela peskere añjelen a skidena upre leskere avrikidle manušen pal savore štar seri le svetoske, andral jekh agor le ñebostar dži andre aver."

O podobenstvo pal o figovñikos

³² "Le figovñikostar peske len o podobenstvo: Sar leskere konara hine imar kovle a o prajti aven avri, džanen, hoj o ñilaj hino pašes.

³³ Avke the tumen, sar dikhena, hoj pes oda savoro ačhel, džanen, hoj oda hino pašes paš o vudar.

³⁴ Čačipen phenav tumenge, hoj kada pokoleñje na predžala, medik pes kada savoro na ačhela.

³⁵ O ñebos the e phuv našřona, ale mire lava šoha na našřona.

³⁶ Ale ole dživesestar the ola oratar na džanel ñiko, añi o ñeboskere añjela, añi o Čhavo, ča jekh o Dad."

Te aven pririchtimen

³⁷ "Sar sas andre ola dživesa, sar dživelas o Noach, avke ela the akor, sar avela o Čhavo le Manušeskero.

³⁸ Bo andre ola dživesa angle potopa o manuša chanas the pijenas, lenas romñen a džanas romeste dži andre oda džives, sar geľa o Noach andro korabos

³⁹ a na džanenas ñisostar, medik na avľa e potopa a savoren iľa het – avke ela the sar avela o Čhavo le Manušeskero.

⁴⁰ Akor ena duj džene pre mařa: Jekh ela ilo a dujto ačhela.

⁴¹ Duj džuvľija erñinena malmoha: Jekh ela ili a dujto ačhela.

⁴² Vašoda ma soven, bo na džanen, andre savi ora the andre savo džives avela tumaro Raj.

⁴³ Ale kada džanen: Te džanľahas o gazdas, andre savi ora rači avela, merkindahas a na domukľahas le živañiske te džal andre peskero kher.

⁴⁴ Vašoda the tumen aven pririchtimen, bo o Čhavo le Manušeskero avela andre odi ora, savi na užarena."

Pal o lačo the nalačo sluhas

⁴⁵ "Akor ko hin oda verno the godaver sluhas, saves ačhađa leskero raj upral peskere sluhi, hoj len te del te chal pro časos?"

⁴⁶ Bachtalo hin oda sluhas, saves leskero raj, sar avela, arakhela oda te kerel.

⁴⁷ Čačipen tumenge phenav, hoj les ačhavela upral calo peskero barvalipen.

⁴⁸ Ale te peske gondolindahas oda nalačo sluhas andre peskero jilo: 'Miro raj mek but na avela' –

⁴⁹ a chudľahas te marel olen, save leha služinen, a chaľahas the piľahas le matenca,

⁵⁰ avela o raj ole sluhasko andro džives, savo na užarel, the andre ora, so na džanel.

⁵¹ Rozčhinela les pro jepaš a leskero kotor ela le duje-mujengere manušenca. Ode ela o roviben a randena le dandanca andre dukh."

Pal o deš pačivale čhaja

25 "Akor ela o űeboskero krališagos ajso, sar o deš pačivale čhaja, save ile peskere lampi a gele anglal te užarel le ternes.

² Ale pandž lendar sas godaver a pandž nagodaver.

³ O nagodaver ile peskere lampi, ale na ile peha olejos,

⁴ ale o godaver ile peskere lampi the olejos andro cakli.

⁵ Sar imar but na avelas o terno, indralile (zadriminde) savore a zasute.

⁶ Ale pal jepaš rat vareko vriskinda: 'Dikh, o terno ave! Džan avri ke leste!'

⁷ Akor užarel savore čhaja a pririchtinenas peske o lampi.

⁸ A o nagodaver phende le godaverenge: 'Den amen tumare olejostar, bo amare lampi murdaľon andre.'

⁹ Ale o godaver lenge odphende: 'Na! Hoj te na el frima the amen the tumen. Feder ela, te tumen peske džana te cinel ke ola, save bikenen.'

¹⁰ A sar odgele te cinel, avľa o terno. Ola, save sas pririchtimen, gele leha andre pro bijav a phandľa pes andre o vudar.

¹¹ Palis doavle the okla čhaja a phenenas: 'Rajeja, Rajeja, phundrav amenge!'

¹² Ale ov odphenda: 'Čačipen tumenge phenav, na prindžarav tumen!'

¹³ Vašoda ma soven, bo na džanen o džives aňi e ora, kana avela o Čhavo le Manušeskero!"

Pal o talenti

¹⁴ "Oda ela avke, sar jekh manuš, savo džalas het pro droma, vičinda peske le sluhon a diňa lenge peskero barvalipen.

¹⁵ Jekhes diňa pandž talenti, avres duj a avres jekh. Sakones diňa pal oda, so džanelas te kerel.

¹⁶ Oda, savo chudľa pandž talenti, geľa takoj te kerel buči ole lovenca a zarodňa aver pandž talenti.

¹⁷ Avke the oda, savo chudľa duj, zarodňa aver duj.

¹⁸ Ale oda, savo chudľa jekh, odgeľa, kopalinda avri andre phuv chev a ode garudľa le rajeskere love.

¹⁹ Palis pal o but časos avľa pale o raj ole sluhengero a phučelas lendar, so kerde le lovenca.

²⁰ Avľa oda, savo chudľa pandž talenti, andľa aver pandž a phenda: 'Rajeja, pandž talenti man diňal, dikh, aver pandž lenca rodňom!'

²¹ Leskero raj leske phenda: 'Mištes kerďal, lačo the pačivalo sluhona! Salas pačivalo andro frima, ačhavava tut upral but veci. Av andro radišagos tire rajeskero!'

²² Avľa the oda, savo chudľa duj talenti a phenda: 'Rajeja, duj talenti man diňal, dikh, aver duj lenca rodňom!'

²³ Leskero raj leske phenda: 'Mištes kerďal, lačo the pačivalo sluhona! Salas pačivalo andro frima, ačhavava tut upral but veci. Av andro radišagos tire rajeskero!'

²⁴ Palis avľa the oda, savo chudľa jekh talentos a phenda: 'Rajeja, džanavas, hoj tu sal bijileskero manuš. Kides upre ode, kaj na sadzindaľ, a les tuke oda, so na rozčhidal.

²⁵ Vašoda man daravas a geľom te garuvel tiro talentos andre phuv. Dikh, kade hin oda, so hin tiro!'

²⁶ Ale leskero raj leske odphenda: 'Nalačo the leňivo sluhona! Džanehas, hoj kidav upre ode, kaj na sadzindaľ, a lav mange oda, so na rozčhindaľ.

²⁷ Šaj diňal mire love olenge, save keren le lovenca, a sar me avľomas, iľomas mange pale buter.

²⁸ Vašoda len lestar o talentos a den oleske, kas hin deš talenti.

²⁹ Bo sakones, kas hin, oles ela dino a ela les pherdo. Ale o lestar, kas nane, pes lela the oda, so les hin.

³⁰ A kale sluhas, savestar nane chasna, čhiven avri andro kalipen – ode, kaj ela o roviben a randena le dandanca andre dukh.'"

Pal o posledno sudos

³¹ "Sar avela o Čhavo le Manušeskero andre peskeri slava a savore aňjela leha, akor peske bešela pro tronos andre peskeri slava.

³² A savore narodi pes džana angle leste a rozulavela len jekhen avrendar avke, sar o pastjeris rozulavel le bakroren the le capen.

³³ Thovela te ačhel le bakroren pal peskeri čači (pravo) sera a le capen pal e baľogňi (ľavo) sera.

³⁴ Akor phenela o Kralis olenge, save ena pal leskeri čači sera: 'Aven tumen, save san požehňimen mire Dadestar, zalen o krališagos, so sas pririchtimen prekal tumende, kanastar sas kerdo o svetos.

³⁵ Bo somas bokhalo a diňan man te chal, somas smedno a diňan man te pijel, somas cudzincos a priľan man,

³⁶ somas lango a diňan man te urel, somas nasvalo a avľan pal ma, somas andre bertena a avľan man te dikhel.'

³⁷ Akor leske phenena o čačipnaskere: 'Rajeja, kana tut dikhlam bokhales a čalardam tut, abo smednones a diňam tut te pijel?'

³⁸ A kana tut dikhl'am cudzincos a priil'am tut, abo langes a diňam tut te urel?

³⁹ Kana tut dikhl'am nasvales abo andre bertena a avl'am pal tute?

⁴⁰ O Kralis lenge odphenela: 'Čačipen tumenge phenav: Savoro, so kerđan jekheske kale mire nekciknedere phralendar, mange oda kerđan.'

⁴¹ Palis phenela the olenge pal e balogñi sera: 'Tumen prekošle, džan mandar het andre večno jag, so hin pririchtimen prekal o beng the leskere aňjela.'

⁴² Bo somas bokhalo, a na diňan man te chal, somas smedno, a na diňan man te pijel,

⁴³ somas cudzincos, a na priil'an man, somas lango, a na diňan man te urel, somas nasvalo the andre bertena, a na avlan pal ma.'

⁴⁴ Akor leske the on odphenena: 'Rajeja, kana tut dikhl'am bokhales, abo smednones, abo sar cudzincos, abo langes, abo nasvales, abo andre bertena, a na kerđam pašal tu?'

⁴⁵ Akor lenge odphenela: 'Čačipen tumenge phenav: Te oda na kerđan jekheske kale mire nekciknedere phralendar, mange oda na kerđan.'

⁴⁶ A kala džana andro večno trapišagos, ale o čačipnaskere andro večno dživipen."

O rašaja pes dothoven pro Ježiš

26 Sar dovakerđa o Ježiš savore kala lava, phenđa peskere učeñikenge:

² "Džanen, hoj mek duj džives a ela e Patrađi a o Čhavo le Manušeskero ela dino, hoj les te ukrižinen."

³ Akor pes zgele o nekbareder rašaja, o zakoñika the o phuredera le nipengere andre dvora ko nekbareder rašaj Kajfaš.

⁴ Dovakerde pes, hoj le Ježiš počoral chudena a murdarena les.

⁵ Ale phenenas: "Na pro inepos, hoj pes o manuša te na vzburinen pre amende."

O Ježiš pomakhlo andre Betanija

⁶ Sar sas o Ježiš andre Betanija andro kher ko Šimon, saves sas malomocenstvo,

⁷ avla ke leste jekh džuvli. Ola džuvla sas alabastroskero caklocis le igen dragane olejoha. Sar bešelasa o Ježiš paš o skamind, čidiša leske oda olejos avri pro šero.

⁸ Sar oda dikhle o učeñika, chofisafile a phende: "Nane zijan, kajso dragano olejos?"

⁹ Kada olejos pes šaj bikenđa vaš o but love a šaj pes diňa le čorengel!" ¹⁰ Sar oda dikhla o Ježiš, phenđa lenge: "Soske pre late chan cholí? Lačno skutkos mange kerđa."

¹¹ Bo o čore tumenca hine furt, ale me tumenca furt na avava.

¹² Oda, hoj čidiša avri o olejos pre miro telos, kerđa pre miro pohrebos.

¹³ Čačipen tumenge phenav, hoj všadzik, kaj pes vakerele pal o svetos kada evaňjelium, pes phenela the

oda, so kadi džuvli akana kerđa, pre lakero leperiben."

O Judaš zradzinel le Ježiš

¹⁴ Akor jekh le dešudujendar o Judaš Iškarijotsko geľa het ko nekbareder rašaja

¹⁵ a phučla: "So man dena, te les tumenge dava andre?" A on dine les tranda (30) rupune minci.

¹⁶ O Judaš akorestar rodela drom, sar les te del andre.

E posledno večera

¹⁷ Ešebno džives, sar pes chal o mare bi o drožđi, avle o učeñika ko Ježiš a phende leske: "Kaj kames, hoj tuke te pririchtinas o Patrađakero chaben?"

¹⁸ Ov phenđa: "Džan andro foros ke oda the oda manuš a phenen leske: 'O Učitelis tuke phenel: Miro časos hin pašes. Ke tu chava mire učeñikena o Patrađakero chaben.'"

¹⁹ O učeñika kerde avke, sar lenge oda phenđa o Ježiš, a pririchtinde o chaben.

²⁰ Sar zaračila, bešla o Ježiš le dešudujenca paš o skamind.

²¹ Sar chanas, phenđa: "Čačipen tumenge phenav: Jekh tumendar man dela andre."

²² Sar oda šunde, ačhile igen smutne a phučenasa lestar jekh pal aver: "Som oda me, Rajeja?"

²³ O Ježiš odphenđa: "Oda, ko peske manca o maro močinela andro čaro, ov man dela andre."

²⁴ O Čhavo le Manušeskero mušinel te merel, avke sar pal leste hin pisimen, ale ole manušeha, ko les del andre, ela igen namištes. Feder leske ulahas, te aňi na ulilahas (pes narodzindahas)."

²⁵ Pre oda o Judaš, savo les delas andre, phenđa: "Som oda me, Rabbi?" O Ježiš leske phenđa: "Tu oda phenďal."

²⁶ Sar chanas, ila o Ježiš o maro a palikerđa. Phagerele, delas le učeñiken a phenđa: "Len, chan, kada hin miro telos."

²⁷ Palis ila e kuči, palikerđa, diňa lenge a phenđa: "Pijen andral savore,

²⁸ bo kada hin miro rat la zmluvake, so pes čhorel avri vaš but manuša, hoj lenge te el odmukle o bini."

²⁹ Ale phenav tumenge, hoj imar buter šoha (ñikda) na pijava olear, so barol pre viňica, dži andre oda džives, medik les na pijava nevo tumenca andro krališagos le Dadeskero."

Phenel, hoj les omukena savore

³⁰ Gilade e chvala a palis gele pre Olivovo Verchos.

³¹ Akor lenge o Ježiš phenđa: "Adi rat tumen savore denašena a omukena man, bo hin pisimen: 'Marava le pastjeris a o bakrore andral o stados pes sa rozdenašena.'

³² Ale sar uščava andral o meriben, džava anglal tumende andre Galileja."

³³ Akor leske o Peter phenđa: "Te tut savore omukena, me tut šoha na omukava."

³⁴ O Ježiš leske odphenda: "Čačipen tuke phenav, hoj mek adi rat, sigeder sar o kohutos gilavela, tu trival man zaprineha."

³⁵ O Peter leske phenda: "Choc tuha mušinava te merel, šoha tut na zaprinava." A savore učeņika avke phenenas.

E modlitba andre Getsemansko zahrada

³⁶ Palis lenca o Ježiš avla pre ajsa than, so pes vičinel Getsemane. Ode phenda peskere učeņikenge: "Bešen tumenge kade, medik man me džava kode te modlinel."

³⁷ Iľa peha le Peter the le duje čhaven le Zebe-deoskere. Avla pre leste baro pharipen a sas igen smutno.

³⁸ Akor lenge phenda: "Miri duša hiņi pro meriben smutno! Ačhen manca kade a ma soven!"

³⁹ Geľa lendar sikra dureder anglal, peľa le mujeha pre phuv a modlinelas pes: "Dado miro, te pes oda del, mi obdžal man kadi kuči. Ale na avke sar me kamav, ale sar tu."

⁴⁰ Palis avla ke peskere učeņika, arakhľa len te sovel a phenda le Peteriske: "So, na birinen manca te el jekh ora upre?"

⁴¹ Ma soven a modlinen tumen, hoj te na džan andro pokušeņje! Bo o duchos kamel oda, so hin lačo, ale o tēlos hino slabo."

⁴² Pale odgeľa pes dujtovar te modlinel a phenelas: "Dado miro, te man našti obdžal kadi kuči a mušinav la te pijel, mi ačhel pes oda, so tu kames!"

⁴³ Sar avla, arakhľa len pale te sovel, bo cirdelas len igen te sovel.

⁴⁴ Mukľa len, odgeľa pes pale tritovar te modlinel a phenda pale ole lava.

⁴⁵ Palis avla ko učeņika a phenda lenge: "Akana imar soven a odpočovinen tumenge! Dikh, avla e ora a o Čhavo le Manušeskero hino dino andro vasta le bi-nošne manušenje.

⁴⁶ Uštēn a džas. Miro zradcas hino pašes."

Le Rajes zalen

⁴⁷ Androda, medik o Ježiš vakerelas, avla o Judaš, jekh le dešudujendar. Leha avenas but nipi khatar o nekbareder rašaja the khatar o phuredera le šablēnca the le pacenca andro vasta.

⁴⁸ Le Ježišoskero zradcas lenge diņa anglal te džanel: "Oda, kas čumidava, oda hin ov. Chuden les."

⁴⁹ Takoj avla ko Ježiš a phenda: "Smirom tuke, Rabbi!" A čumidla les.

⁵⁰ O Ježiš leske phenda: "Prijatēlina, soske avla?" Avke avle, chudle les a zaile.

⁵¹ Jekhvarestē jekh olendar, savo sas le Ježišoha, iľa avri e šabľa, demađa le nekbaredere rašaskere sluhās a odčhindā leske o kan.

⁵² O Ježiš leske phenda: "Thov e šabľa pale pro than, bo sako, ko pes la šabľaha marel, la šabľaha the merela.

⁵³ Abo gondolines tuke, hoj našti akana mangav mire Dades a ov mange bičhadahas buter sar dešuduj (12) legioni aņjelen?

⁵⁴ Ale sar pes palis ačhilahas oda, so hin pisimen, hoj pes avke mušinel te ačhel?"

⁵⁵ Andre odi ora phenda o Ježiš le nipenge: "Avlan pre ma le šablēnca the pacenca, hoj man te zalen sar le živaņis? Sako džives bešavas maškar tumende andro chramos, sikavavas a na phandlan man.

⁵⁶ Ale kada savoro pes ačhila, hoj te pes ačhel oda, so pisinde o Proroka." Androda les savore učeņika omukle a denašle het.

O Ježiš angle Bari Rada

⁵⁷ On zaile le Ježiš a ligende les ko nekbareder rašaj, ko Kajfaš. Ode pes zgele o zakoņika the o phuredera.

⁵⁸ O Peter avelas pal leste dural a doavla dži andre dvora le nekbaredere rašaske. Geľa andre a bešľa peske le sluhēnca, hoj te dikhel, sar oda savoro dop-erela.

⁵⁹ O nekbareder rašaja, o phuredera the cali Bari Rada kamenas te arakhel falošno svedectvo pro Ježiš, hoj les te murdaren.

⁶⁰ Ale choc but falošna švedki avle, the avke nič na arakhle. Palis avle duj džene

⁶¹ a phende: "Kada manuš phenda: 'Me šaj čhivav tele kada chramos a tel o trin džives les pale šaj ačhavav.'"

⁶² Akor uštīla o nekbareder rašaj a phenda leske: "Nič na phenes pre oda, so pre tu kala manuša vakeren?"

⁶³ Ale o Ježiš sas čhit. A o nekbareder rašaj leske phenda: "Thov vera anglo džido Del a phen amenge, či sal tu o Kristus, o Čhavo le Devleskero."

⁶⁴ O Ježiš leske phenda: "Tu oda phenda. Ale phenav tumenge, hoj akanastar dikhena *le Čhas le Manušeskeres te bešel pre čači (pravo) sera le Nekzoraledereske a te avel pro ņeboskere chmari.*"

⁶⁵ Akor čhingerđa o nekbareder rašaj peskere gada a phenda: "Ruhinel pes! So mek kempel amenge švedken? Akana šundan, sar pes ruhinel!"

⁶⁶ So pre oda phenen?" A on odphende: "Zasogalinel (zaslužinel) peske te merel!"

⁶⁷ Akor leske chudle te čhungarel pro muj a marenas les pal o šero. Aver les marenas le pacenca

⁶⁸ a phenenas: "Prorokin amenge, Kristus! Ko tut demađa?"

O Peter zaprinel le Ježiš

⁶⁹ O Peter bešelās avri pre dvora. Avla ke leste jekh služka a phenda leske: "The tu salas ole Ježišoha andral e Galileja."

⁷⁰ Ale o Peter zaprinđa angle savoredženende a phenda: "Na džanav, so vakeres."

⁷¹ Sar geľa paš e brana, dikhľa les aver služka a phenda olenge, save ode sas: "The kada manuš sas ole Ježišoha andral o Nazaret."

⁷² Ale o Peter pale zaprinđa a iľa vera: "Na prindžarav ole manušes!"

⁷³ Na pregeľa but a ola, save ode ačhenas, avle a phende le Peteriske: "Tu sal čačes jekh lendar, bo šunas oda pal tiro vakeriben."

⁷⁴ Androda pes o Peter chudľa te košel a iľa pre peste vera: "Me na prindžarav ole manušes!" A takoj giľađa o kohutos.

⁷⁵ Akor avľa le Peteriske pre godi ola lava, so leske o Ježiš phendľa: "Sigeder sar o kohutos giľavela, tu man trival zaprineha." Geľa avri a chudľa igen te rovel.

Le Ježiš anen anglo Pilat

27 Sig tosara pes dovakerde savore nekbareder rašaja the o phuredera le nipengere pro Ježiš, hoj les dena te murdarel.

² Phandle les, liġende het a oddine le vladariske le Pilatoske.

Le Judaškero meriben

³ Sar dikhľa o Judaš, savo diňa andre le Ježiš, hoj les odsudzinde, sas leske pharo a diňa pale le nekbareder rašajenge the le phurederenge ola tranda (30) rupune minci

⁴ a phendľa: "Kerđom binos, bo le manušes, savo na kerđa nič nalačo, zradzindom pro meriben." Ale on odphende: "So amen hin andre oda? Oda hin tiri veca!"

⁵ O Judaš čhida ola rupune minci andro chramos, geľa het a umblađa (figindľa) pes.

⁶ O nekbareder rašaja ile ola love a phende: "Našti len thovas andre le chramoskeri pokladňica, bo oda hin o počniiben vaš o rat."

⁷ Dovakerde pes a ole lovenca cinde e maľa olestar, so kerelas o kuča, hoj ode te parunen le cudzincen.

⁸ Vašoda pes vičinel odi maľa "Rateskeri Maľa" dži adadžives.

⁹ Akor pes ačhiľa oda, so sas phendo prekal o prokocos Jeremiaš:

"Ile ola tranda (30) rupune minci, o počniiben, pre savo pes dovakerde varesave Izraeloskere nipi,

¹⁰ a dine len vaš e maľa oleske, ko kerelas o kuča, avke sar mange prikazinda miro Raj."

O Ježiš anglo Pilat

¹¹ O Ježiš ačhelas anglo vladaris a o vladaris lestar phučľa: "Sal tu o Židoviko kralis?" O Ježiš leske phendľa: "Tu oda vakeres."

¹² O nekbareder rašaja the o phuredera pre leste but vakerenas, ale ov nič na odphendľa.

¹³ Akor leske o Pilat phendľa: "Na šunes, keci but pre tu vakeren?"

¹⁴ Ale o Ježiš leske na odphendľa aňi jekh lav, vašoda pes o vladaris igen čudalinelas.

¹⁵ Sako berš pre Patrađi premukelas o vladaris le nipenge jekhe bertenošis, saves on mangelas.

¹⁶ Akor len sas jekh igen nalačo bertenošis, saves vičinenas Barabaš.

¹⁷ Sar pes o nipi zgele, phendľa lenge o Pilat: "Kas kamen, hoj tumenge te premukav: Le Barabaš, vaj le Ježiš, saves vičinen Kristus?"

¹⁸ Bo džanelas, hoj les dine andre prekal e zavist.

¹⁹ Sar bešelas pro sudno stolkos, bičhađa ke leste leskeri romňi, hoj leske te phenen: "Te na chal tut nič ole čačipnaskere manušeha, bo adadžives andro suno but cerpindom vaš leske!"

²⁰ Ale o nekbareder rašaja the o phuredera kerde upre le nipen, hoj te mangel le Barabaš a te murdaren le Ježiš.

²¹ O Pilat lendar phučľa: "Kas kale dujendar kamen, hoj tumenge te premukav?" On phende: "Le Barabaš!"

²² O Pilat phučľa: "Akor, so te kerav le Ježišoha, saves vičinen Kristus?" A savoredžene vriskinenas: "Ukrižin les!"

²³ Phučľa lendar: "So ajsa nalačo kerđa?" No on mek zorededer vriskinenas: "Ukrižin les!"

²⁴ Sar dikhľa o Pilat, hoj nič našti kerel the hoj o nipi keren mek bareder vika, iľa o paňi, thođa (omordľa) o vasta anglo nipi a phendľa: "Me som žužo kale čačipnaskere manušeskere ratestar! Pre tumende oda ačhel."

²⁵ A savore nipi phende: "Leskero rat mi el pre amende the pre amare čhave!"

²⁶ Akor lenge premukľa le Barabaš. Ale le Ježiš zbičinda a diňa les te ukrižinel.

O slugađa asan le Ježišostar

²⁷ O slugađa ile le Ježiš andre le vladariskero palacis a pašal leste ačhelas cali čata.

²⁸ Čhide leske tele o gada a urde les andro purpurovo plaštós.

²⁹ Le kandrendar (le trňendar) leske kerde koruna a thode leske la pro šero. Andre čačo vast les dine paca, perenas anglal leste pro khoča, asanas lestar a phenenas: "Mi dživel o Židoviko kralis!"

³⁰ Čhungarenas pre leste, ile odi paca a marenas les pal o šero.

³¹ Sar lestar imar preačhile te asal, čhide pal leste tele o purpurovo plaštós, urde pre leste leskere gada a lidžanas les te ukrižinel.

³² Sar avenas avri, arakhle varesave manušes, savo pes vičinelas Šimon Cirenejsko. Leske prikazinde, hoj te lidžal le Ježišoskero kerestos.

O Ježiš ukrižimen

³³ Avle pre oda than, so pes vičinel Golgota, so hin "le Lebkenġero Than".

³⁴ Dine les te pijel mol mišimen le žičoha. Ale sar koštoľinda, na kamľa te pijel.

³⁵ Sar les ukrižinde, rozulade peske leskere gada a losinenas vaše, [hoj pes te ačhel oda, so phendľa o prokocos: "Rozulade peske mire gada a losinenas vaš mire veci."]

³⁶ Palis peske o slugađa bešle a merkinenas pre leste.

³⁷ Upral leskero šero dine te pisinel leskeri vina: "Kada hin o Ježiš, le Židengero Kralis".

³⁸ Jekhetane leha ukrižinde duje živañen, jekhes pal e čači (pravo) sera a dujtones pal e balogñi (ľavo).

³⁹ Ola manuša, save odarik predžanas, pes ruhine-nas, kerenas le šerenca

⁴⁰ a phenenas: "Tu, so čhives tele o chramos a tel o trin džives les ačhaves, korkoro zachrañin tut! Te sal o Čhavo le Devleskero, av tele pal o kerestos!"

⁴¹ Avke the o nekbareder rašaja le zakoñikenca the le phurederenca asanas lestar a phenenas:

⁴² "Avren zachrañinelas a pes naští zachrañinel? Ov hino o Izraeliko kralis! Mi akana avel tele pal o kerestos a pačaha leske!"

⁴³ Pačalas le Devleske, akana les mi zachrañinel, te les kamel! Se phendá: 'Me som o Čhavo le Devleskero!'

⁴⁴ Asanas lestar the o lotri, save sas jekhetane leha ukrižimen.

⁴⁵ Dešuduj (12) orendar † pro dilos avľa kalipen pal caľi phuv a likerđa dži trin ori pal o dilos.

O Ježiš merel

⁴⁶ Vaj trin orendar o Ježiš zoraha vičinda: "Eli, Eli, lama sabachtani?" So hin prethodo: "Devla miro, Devla miro, soske man omukla?"

⁴⁷ Sar oda šunde varesave džene, save ode ačhenas, phende: "Vičinel le Eliaš!"

⁴⁸ Jekh dženo takoj denašelas te močinel e špongija andro šut, thođa la pre paca a delas les te pijel.

⁴⁹ Ale okla džene phenenas: "Muk avke! Dikhaha, či avela o Eliaš les te zachrañinel!"

⁵⁰ Ale o Ježiš pale zoraľes vriskinda a muľa.

⁵¹ Akor o pochtan, so sas figimen andro chramos, phariľa pro jepaš uprunestar dži tele, e phuv razisaľolas a o skali pharonas.

⁵² O hrobi pes phundravenas a but sentna manuša uštíľe andral o meriben.

⁵³ Sar o Ježiš imar uštíľa andral o meriben, avle avri andral o hrobi, gele andro sentno foros a sikade pes but dženge.

⁵⁴ Sar dikhľa o velítelís the ola, save leha stražinenas le Ježiš, hoj e phuv razisaľolas the savoro, so pes ačhelas, igen pes daranas a phenenas: "Oda sas čačes o Čhavo le Devleskero!"

⁵⁵ Sas ode the but džuvľa, save dikhenas dural. On džanas pal o Ježiš andral e Galileja a kerenas pašal leste.

⁵⁶ Maškar lende sas e Maria Magdalena the e Maria, e daj le Jakoboskeri the le Jozesiskeri, a mek e daj le Zebedeoskere čhavengeri – le Jakoboskeri the le Janoskeri.

Parunen le Ježiš

⁵⁷ Sar zaračíľa, avľa jekh barvalo manuš andral e Arimatija, savo pes vičinelas Jozef. Ov sas tiš le Ježišoskero učeñikos.

⁵⁸ Geľa anglo Pilat a mangelas le Ježišoskero tēľos. Avke o Pilat prikazinda, hoj leske les te den.

⁵⁹ O Jozef iľa o tēľos a zapačardá les andre žuži lepe-da.

⁶⁰ Thođa les andre peskero nevo hrobos, so avri kerđa andre skala. Paľís zaučhardá o vudar andro hrobos bare bareha a geľa het.

⁶¹ Sas ode e Maria Magdalena the oki aver Maria a bešenas anglo hrobos.

Stražinen o hrobos

⁶² Pre aver džives, so sas Šabbat, pes zgele o nekbareder rašaja the o Farizeja ko Pilat

⁶³ a phende: "Rajeja, avľa amenge pre godí, hoj oda zvodcas, medik dživelas, phendá: 'Pal o trin džives uščava andral o meriben.'

⁶⁴ Vašoda prikazin, hoj dži o trito džives mištes te stražinen o hrobos, hoj les te na aven leskere učeñika rači te čoreľ a te na phenen le nipenge, hoj uštíľa andral o meriben. Avke ela o posledno klamišagos goreder sar o ešebno."

⁶⁵ O Pilat lenge phendá: "Hin tumen slugađa, džan a merkinen pre leste, sar ča džanen."

⁶⁶ Avke on gele, zapečatínde andre o bar a dine le slugađenge te merkinel.

O Ježiš uštēľ andral o meriben

28 Pal o Šabbat (sombat), sar avel avri o kham pro ešebno džives andro kurko, gele e Maria Magdalena the oki dujto Maria te dikhel o hrobos.

² A dikh, e phuv zoraľes razisaľíľa, bo o aňjelos le Rajeskero avľa tele andral o ňebos, odcirdľa o bar pašal o hrobos a bešľa peske upre.

³ Ov dičholas avri sar bleskos a leskere gada sas parne sar jiv.

⁴ O slugađa pes lestar avke darandíľe, hoj ačhile sar mule.

⁵ Ale o aňjelos phendá le džuvľenge: "Tumen ma daran! Bo džanav, hoj roden le Ježiš, savo sas ukrižimen.

⁶ Nane ade, bo uštíľa andral o meriben, avke sar phendá. Aven, dikhen oda than, kaj pašľolas.

⁷ Džan sigo te phenel leskere učeñikenge, hoj uštíľa andral o meriben a džal anglal tumende andre Galileja. Ode les dikhena. Leperen tumenge oda, so phendom!"

⁸ Avle sigo avri andral o hrobos a daraha the bare radišagoha denašenas oda te phenel leskere učeñikenge.

⁹ Androda jekhvarestes pes lenca o Ježiš arakhľa a phendá lenge: "Smírom tumenge!" On avle ke leste,

† E Grekengeri čhib: Šov orendar dži ko eňa ori. Akor genenas ori avres sar adadžives.

bandonas anglal leste a chudenas pes leskere pindrendar.

¹⁰ Akor lenge o Ježiš phendā: “Ma daran tumen! Džan te phenel mire phralenge, hoj te džan andre Galileja. Ode man dikhena.”

Le slugađengero hiros

¹¹ Sar o džuvľa džanas ko učeňika, varesave ole slugađendar odgele andro foros a phende le nek-baredere rašajenge savoro, so pes ačhiľa.

¹² Sar pes zgele le phurederenca te dovakerel, dine le slugađen but love

¹³ a phende: “Phenen, hoj leskere učeňika avle rači a čorde les medik tumen sovenas.

¹⁴ A te pes oda došunela o Pilat, amen les prevakeraha, hoj tumen te na el starišagos.”

¹⁵ O slugađa ile o love a kerde avke, sar lenge sas phendo. A kada vakeriben pes rozlīgenda maškar o Ži-di dži adadžives.

O Raj bičhavel le učeňiken

¹⁶ O dešujekh (11) učeňika gele andre Galileja pre oda verchos, kaj lenge phendā o Ježiš.

¹⁷ Sar les dikhle, bandonas anglal leste, ale varesave pochibinenas.

¹⁸ O Ježiš avľa ke lende a phendā: “Hin mange diňi savori zor pro ņebos the pre phuv.

¹⁹ Avke džan a keren mange učeňiken andral savore narodi. Bolen len andro nav le Dadeskero, le Časkero the le Sentne Duchoskero

²⁰ a sikaven len te dolikerel savoro, so tumenge prikaziňom. Dikhen, me som tumenca pal savore dživesa, medik na ela o koňec le svetoskero.”

MAREK

Pal o Jan Krstiteľ

- 1** O evaňgelium pal o čhavo le Devleskero, pal o Ježiš Kristus, chudľa avke,
² sar pisinelas o prorokos Izaiaš:
"Dikh, me bičhavav mire poslos anglal tu a ov pririchtinela prekal tu o drom.
³ *O hangos, so vičinel pre pušťa: 'Pririchtinen o drom le Rajeske, rovňaren avri leskere chodňiki!'"*
⁴ O Jan chudľa te bolel pre pušťa a phenelas, hoj o manuša te keren o pokaňje a te den pes te bolel, hoj pes lenge te odmukel o bini.
⁵ Avenas ke leste savore manuša andral e Judsko the Jeruzalem. O nipi phenenas avri peskere bini a o Jan len bolelas andro paňi Jordan.
⁶ Ov sas urdo andro gada la t'avakera srstatar, pašal o per les sas cipuno sirimos a chalas kobilki the maľakero medos.
⁷ Ov kazinelas: "Pal mande avel zoraleder, sar som me. Na som hodno anglal leste te bandol a te phundravel o sirimocis pre leskere sandalki.
⁸ Me tumen boldom le paňeha, ale ov tumen bolela le Sentne Duchoha."

O Ježiš hino boldo

- ⁹ Andre ola dživesa avľa o Ježiš andral o Galilejsko Nazaret a sas boldo le Janostar andro paňi Jordan.
¹⁰ Sar avelas avri andral o paňi, dikhľa phundrado o ňebos a le Duchos, savo sar holubica avelas tele pre leste.
¹¹ Androda andral o ňebos šundľa o hangos: "Tu sal miro čhavo, kas kamav. Tutar man hin o radišagos."
¹² Takoj les o Duchos ligenda pre pušťa.
¹³ Sas ode saranda (40) dživesa a sas pokušimen le satanostar. Sas ode le dzive džvirenca a o aňjela pašal leste kerenas.

O Ježiš chudel te služinel

- ¹⁴ Paloda, sar sas o Jan phandlo andre bertena, avľa o Ježiš andre Galileja, kaj kazinelas o evaňgelium le Devleskero.
¹⁵ Phenelas: "Imar avľa o časos! O kraľišagos le Devleskero hino pašes. Visaren tumen le binendar a pačan andro evaňgelium!"

O Ježiš vičinel ešebne učeničen

- ¹⁶ Sar phirelas pašal o Galilejsko moros, dikhľa le Šimon the leskere phrales le Andrej, sar mukenas e sita andro moros, bo on sas ribara.
¹⁷ O Ježiš lenge phenda: "Aven pal mande a me tumendar kerava ribaren, save chudena le manušen."
¹⁸ On takoj omukle o siti a gele pal leste.
¹⁹ Sar geľa odarik sikra dureder, dikhľa le Jakob the leskere phrales le Jan, le Zebedeoskere čhaven, sar pre loďka prikeren o siti.
²⁰ Takoj len vičinda. On omukle peskere dales le Zebedeus andre loďka le manušenca, save kerenas prekal leste buči, a gele pal o Ježiš.

Andre sinagoga andro Kafarnaum

- ²¹ Avke gele andro foros Kafarnaum a pro Šabbat geľa andre sinagoga a sikavelas.
²² On čudalinenas pes oleske, so sikavelas, bo ov na sikavelas sar o zakoňika, ale sar oda, kas hin autorita.
²³ Ipen akor sas andre sinagoga jekh manuš, andre savo sas nalačo duchos. Ov vriskinda:
²⁴ "So amen hin tuha, Ježiš Nazaretsko? Avľal amen te murdarel? Me džanav, ko tu sal: Oda Sentno le Devleskero!"
²⁵ O Ježiš prikazinda ole nalače duchoske: "Čhit, dža andral leste avri!"
²⁶ O nalačo duchos leha čhivkerelas, vriskinda zoraless a geľa avri andral leste.
²⁷ Savore pes čudalinenas a phučenjas jekh avrestar: "So kada hin – nevo sikaviben? Bo andre autorita prikazinel le nalače duchenge a on les šunen!"
²⁸ O hiros pal leste sigo chudľa te džal pal caľi Galileja.

Sastarel le Peteriskera sasa

- ²⁹ Sar avle avri andral e sinagoga, o Ježiš, o Jakob the o Jan gele andro kher ko Šimon † the ko Andrej.
³⁰ Ode pašfolas le Šimonoskeri sasuj andre horučka a takoj le Ježišoske phende pal late.
³¹ Ov avľa ke late, chudľa la vastestar a hazdňa upre. E horučka la takoj omukľa a oj pašal lende kerelas.
³² Rači, sar zagela o kham, anenas ke leste savore nasvalen the olen, save sas zaphandle le demonenca.
³³ Savore manuša andral o foros pes zgele paš o vudar.

† Oda hin o Peter.

³⁴ O Ježiš sastárda but nasvalen, save pes trapinenas andro nasvalibena a tradña avri but demonen. Na domukla le demonenge te vakerel, bo on les prindžarenas.

Džan andre Galileja

³⁵ Sig tosara, mek sar sas rat, uštíla a geľa pro omuklo than, kaj pes modlinelas.

³⁶ Ale o Šimon the ola, save sas leha, les gele te rodel.

³⁷ Sar les arakhle, phende leske: "Sako tut rodel!"

³⁸ O Ježiš lenge phenda: "Aven džas andre aver gava, so hine kade pašes, hoj the ode te vakerav o evaňjelium, bo vaš oda avľom."

³⁹ Vakerelas o evaňjelium pal caľi Galileja andre lengere sinagogi a tradelas avri le demonen.

O malomocno hino sastárdo

⁴⁰ Avľa ke leste jekh malomocno a mangelas les pro kocha: "Te kamľalas, šaj man sastáres!"

⁴¹ Le Ježišoske sas pharo vaš leske, thoda pre leste o vast, chudľa pes lestar a phenda: "Me kamav, av sasto!"

⁴² Takoj sastíľa avri a sas žužo.

⁴³ O Ježiš leske dovakerďa a takoj les bičhaďa het le lavenca:

⁴⁴ "Šun, ma phen ada űikaskes, ale dža, sikav tut le rašaske a obetin oda, so prikazinda o Mojžiš, lenge pro svedectvo."

⁴⁵ Ale ov džalas a všadzík vakerelas but, so pes ačhíľa. Vašoda o Ježiš anglo nipi imar našti geľa andro fori, ale sas avri pro omukle thana, kaj pal leste avenas o manuša pal savore seri.

Sastárel le banges

2 Pal varesave dživesa geľa o Ježiš pale andro foros Kafarnaum a but džene pes dodžanle, hoj hino khere.

² Takoj pes zgele ajci manuša, hoj na sas kaj te ačhel, aňi paš o vudar. A vakerelas lenge pal o evaňjelium.

³ Akor štar murša lidžanas jekhe banges ko Ježiš,

⁴ ale vaš oda, hoj ode sas but manuša, on pes našti dochudle le nasvaleha ke leste. Avke otkerde e strecha a mukle le banges tele le haďoha ode, kaj sas o Ježiš.

⁵ Sar dikhľa o Ježiš lengero pačaben, phenda le bangeske: "Čhavo miro, odmukle tuke hin o bini."

⁶ No bešenas ode the varesave zakaňika a andro jile peske gondolinenas:

⁷ "Sar kada manuš kavke šaj vakerel? Ruhinel pes! űiko našti odmukel o bini, ča jekh o Del!"

⁸ O Ježiš prindžarda andro duchos, hoj on pal leste kavke gondolinen, a phenda lenge: "So oda gondolinen andre tumare jile?"

⁹ So hin lokeder? Te phenel le bangeske: 'Odmukle tuke hin o bini', čí te phenel: 'Uští, le tiro haďos a dža?'

¹⁰ Ale vaš oda, hoj te džanen, hoj le Čhas le Manušeskeres hin pravos the zor te odmukel pre phuv o bini" – phenda le bangeske:

¹¹ "Phenav tuke: Uští, le tiro haďos a dža khere!"

¹² Ov takoj uštíľa a savore dikhle, sar íľa peskero haďos a geľa het. Savore pes čudalinenas, lašarenas le Devles a phenenas: "Mek šoha (ňikda) kajso vareso na dikhľam!"

O Ježiš vičinel le Levi

¹³ Geľa pale paš o moros. But manuša džanas pal leste a ov len sikavelas.

¹⁴ Sar džalas, dikhľa le Levi, le Alfeoskere čhas, sar bešelas pre colňica, a phenda leske: "Av pal mande!" A ov uštíľa a geľa pal leste.

¹⁵ Sar o Ježiš bešelas ke leste andro kher pašal o skamind, but colňika the binošne bešenas leha the leskere učeňikenca, bo but ajse manuša pal leste džanas.

¹⁶ Ale sar les dikhle o zakaňika the o Farizeja te chal le colňikenca the le binošnenca, phučle leskere učeňikendar: "Sar oda, hoj pijel the chal le colňikenca the le binošnenca?"

¹⁷ Sar ada šunďa o Ježiš, phenda lenge: "Le sastenge na kempel le doktoris, ale le nasvalenge. Me na avľom te vičinel le čačipnaskeren, ale le binošnen!"

O phučiben pal o postos

¹⁸ Le Janoskere učeňika the o Farizeja pes poscinen. Varesave avle a phučle le Ježišostar: "Soske pes le Janoskere the le Farizejengere učeňika poscinen, ale tire na poscinen?"

¹⁹ A o Ježiš lenge phenda: "Čí šaj poscinen o hosci pro bijav, medik hino lenca o terno? Medik hino lenca o terno, našti pes poscinen!"

²⁰ Ale avena ajse dživesa, hoj o terno na ela lenca, a andre ola dživesa pes poscinenas.

²¹ Se űiko na zasivel le neve pochtaneha e chev pro purane gada, bo palis o nevo pochtan šaj odčhinel ktor le puranestar a kerela pes mek bareder chev.

²² A űiko aňi na čhivel e nevi mol andro purane cipune gone, bo e nevi mol čhingerela e cipa a čuľola avri a o gone čhindona. Ale e nevi mol pes čhivel andro neve gone."

O phučiben pal o Šabbat

²³ Jekh Šabbat (sombat), sar o Ježiš džalas pašal e maľa, kaj sas sadzimen, leskere učeňika chudle te čhingerel o klasi.

²⁴ O Farizeja leske phende: "Dikh, keren oda, so našti keren pro Šabbat!"

²⁵ Ov lenge phenda: "Mek šoha na gendaň, so kerďa o David, sar les na sas so te chal a sas bokhalo ov the leskere manuša?"

²⁶ Akor, sar sas nekbareder rašaj o Ebjatar, geľa andro kher le Devleskero a chalas o sentna mare, so šaj chan ča o rašaja a űiko aver – a diňa the peskere manušen."

²⁷ Phenda lenge: "O Šabbat hino kerdo prekal o manuš a na o manuš prekal o Šabbat!"

²⁸ O Čhavo le Manušeskero hino Raj the upral o Šabbat."

Sastárel o vast pro Šabbat

3 Sar geľa pale andre sinagoga, sas ode jekh manuš, saves sas ňevladno vast.
² A kamenas te džanel či les sastárela avri pro Šabbat (sombatone), hoj les te den andre.
³ O Ježiš phenda ole manušeske, saves sas ňevladno vast: "Ačh kade maškarall!"
⁴ A phučľa lendar: "Či šaj pro Šabbat mištes te kerel, vaj na? O dživipen te zachraňinel, či te murdarel?" Ale on sas čhit.
⁵ Dikhľa pro manuša pašal peste choľaha ale the pharipnaha, bo sas ajse bijileskere. Phenda le manušeske: "Nacirde o vast!" Sar nacirdľa, sastíľa leske avri a sas ajso sar o dujto vast.
⁶ O Farizeja pes takoj gele te dovakerel le Herodijancenca, sar te murdarel le Ježiš.

O Raj sastárel paš o moros

⁷ O Ježiš peskere učeňikenca geľa paš o moros. Džanas pal leste but manuša andral e Galileja, Judsko,
⁸ Jeruzalem, Idumea the Zajordansko. Džanas pal leste the but nipi andral o Tir the Sidon, bo šunde pal oda, so kerel.
⁹ Le učeňikenge phenda: "Pririchtinen mange e loďka, hoj pes pre ma te na ispiden."
¹⁰ Bo but dženen sastárdá a savore nasvale pes pre leste ispidenas, bo kamenas pes lestar te chudel.
¹¹ Sar o nalačhe duchi les dikhenas, perenas anglal leste a vrisकिनenas: "Tu sal o Čhavo le Devleskero!"
¹² Ale o Ježiš lenge zakazindá, hoj ňikaske ada te na phenen avri.

Vičinel le dešudujen

¹³ Paloda o Ježiš geľa pro brehos a vičindá paš peste olen, saven kamľa, hoj te džan leha. Sar gele ke leste,
¹⁴ kidňa peske avri dešudujen, hoj te aven leha a te bičhavel len te vakerel o evaňjelium. Vičinelas len apoštola.
¹⁵ A diňa len autorita te tradel avri le demonen.
¹⁶ Kala hine ola dešuduj (12): O Šimon (saveske diňa nav Peter),
¹⁷ o Jakob the leskero phral o Jan, le Zebedeoskere čhave (savenge diňa nav Boanerges, so hin prethodo: Le Perumoskere Čhave),
¹⁸ o Andrej, o Filip, o Bartolomej, o Matuš, o Tomaš, o Jakob le Alfeoskero čhavo, o Tadeus, o Šimon Kanaan-sko
¹⁹ the o Judaš Iškarijotsko, savo les palis zradzindá.

Ruhinen pes pro Sentno Duchos

²⁰ Avle andro kher a pale pes zgele igen but manuša. Vašoda len na sas kana mek aňi maro te chal.
²¹ Sar ada šunde le Ježišoskeri famelija, avle, hoj les te len het, bo phende pre leste, hoj našada e godi.

²² O zakoňika, save avle andral o Jeruzalem, phende pre leste, hoj andre leste hin o Belzebul, savo hino vodcas le demonenge, a hoj leskera zoraha tradel avri le demonen.

²³ O Ježiš peske len vičindá a chudľa lenge te vakerel andro podobenstva: "Sar šaj tradel o satan avri le satan?"

²⁴ Te pes o krališagos rozulavela a džala pre peste, oda krališagos našti obačhela.

²⁵ A te pes o kher rozulavela a džala pre peste, oda kher našti obačhela.

²⁶ Avke, te o satan džala korkoro pre peste a rozulavela pes, našti obačhela, ale avľa leskero koňec.

²⁷ ňiko našti džal ko zoralo murš andro kher te čorel leskere veci, medik ole zorale muršes na phandela. Palis šaj čorel avri leskero kher.

²⁸ Čačipen tumenge phenav, hoj savore bini the o nalačhe lava, so vakerena o manuša pro Del, lenge ela odmukle.

²⁹ Ale oleske, ko pes ruhinel pro Sentno Duchos, na ela šoha (ňikda) odmuklo, ale leskero binos ačhela pre leste furt."

³⁰ Bo phenenas: "Hin andre leste nalačo duchos."

Le Ježišoskeri daj the phrala

³¹ Avľa leskeri daj the leskere phrala, ačhenas avri a dine les te vičinel.

³² Bešenas pašal leste but manuša a phende leske: "Tiri daj the tire phrala tut roden."

³³ Ov lenge odphenda: "Ko hin miri daj a ko hin mire phrala?"

³⁴ Visalíľa ke ola, save leha bešenas, sikaďa pre lende a phenda: "Dikhen, miri daj the mire phrala.

³⁵ Bo sako, ko kerel le Devleskeri voľa, hino miro phral, miri pheň the miri daj."

O podobenstvo pal o štar phuva

4 O Ježiš chudľa pale te sikavel paš o moros. A vaš oda, hoj pes zgele igen but manuša, ov geľa andre loďka a o manuša sas pre phuv paš o moros.

² Sikavelas len but andro podobenstva a andre peskero sikaviben lenge vakerelas:

³ "Šunen, geľa o manuš te rozčhivkerel o semena.

⁴ Sar rozčhivkerelas, varesave pele paš o drom. Avle o čirikle a chale oda.

⁵ Aver pele pro baruno than, kaj len na sas but phuv a sig barile, bo na gele but tele andre phuv.

⁶ Ale sar avľa avri o kham, zlabarelas len a šučile avri, bo na sas len koreňis.

⁷ Aver pele andro kandre (kraki) a sar o kandre barile, tasade len a na sas lendar chasna.

⁸ Aver pele andre lači phuv, baronas a ande chasna. Varesave tranda (30), varesave šovardeš (60) a varesave šel (100)."

⁹ A phenda lenge: "Kas hin kana pre ada, hoj te šunel, mi šunel!"

Soske sikavel andro podobenstva

¹⁰ Sar sas korkoro, phučle lestar o dešuduj (12) apoš-tola the okla, save sas paš leste, pal oda podobenstvo.

¹¹ Ov lenge phendā: "Tumenge hin dino te achafol o garude veci andral o krališagos le Devleskero, ale kolenge, save hine avri, pes sikavel savoro andro podobenstva,

¹² *hoj te dikhel dikhena, ale na dikhena; te šunel šunena, ale na achafona, hoj pes te na visaren a te na el lenge odmukle o bini."*

Vakerel avri o podobenstvo

¹³ O Ježiš phučla lendar: "Te na achafon kada podobenstvo, sar palis achafona savore okla podobenstva?

¹⁴ O semena, so rozchivkerelas o manuš, hin o lav.

¹⁵ Ola, savege hino sadzimen o lav paš o drom, hine ola, save šunena o lav, ale o satan takoj avel a lel avri o sadzimen lav.

¹⁶ Ola, savege hino sadzimen pro baruno than, hine ola, save takoj radišagoha prilen o lav, sar les šunen,

¹⁷ ale likerem avri ča pre varesavo časos, bo nane len koreñis. Palis, sar avel o pharipen vaj pre lende o manuša džan vaš o lav, takoj oddžan le pačabnastar.

¹⁸ Aver, savege hino sadzimen andro kandre, šunen o lav,

¹⁹ ale o pharipena andre kada dživipen the o klamišagos pal o barvalipen the aver žadosci, so aven andro jilo, tasaven o lav a nane lestar chasna.

²⁰ A aver, savege hine sadzimen andre lači phuv, šunen o lav, prilen les andro jilo a anen chasna – varesave tranda (30), varesave šovardeš (60), varesave šel (100)."

O podobenstvo pal e momeli

²¹ Phendā lenge: "Či pes anel e momeli pre oda, hoj la te garuven tel e piri abo tel o hados? Či na pre oda, hoj la te thoven pro momelaris?

²² Bo nič nane garudo, so pes na sikavela jekhvar avri. Savoro, so hin zaučardo, avela avri andro svetlos.

²³ Te hin varekas kana, hoj te šunel, mi šunel!"

²⁴ A phendā lenge: "Šunen mištes! Sava miraha merinen, ajsaha tumenge ela merimen a mek pes tumenge pridela.

²⁵ Bo kas hin, oles mek ela dino, a kas nane, olesar pes lela mek oda, so les hin."

O podobenstvo pal o horčično semenos

²⁶ Ov phendā: "Le Devleskere krališagoha hin avke, sar te ilahas o manuš o semenos a sadzindahas les andre phuv.

²⁷ Rači džal te sovel, tosara uštěl a o semenos pes pučinel avri a barol, aňi korkoro na džanel sar.

²⁸ Bo e phuv del ulipen korkori pestar – ešeb (peršo) o phus, palis o klasos a palis but dīva andro klasos.

²⁹ A sar dobarol o dīv, takoj pes bičhavel te košinel, bo avla e žatva."

³⁰ Palis phendā: "Ke soste pripodobňinava le Devleskero krališagos, vaj save podobenstvoha tumenge sikavava?

³¹ Hin sar horčično semenos, savo pes sadzinel a hino nekcikneder maškar savore semena pre phuv.

³² Ale sar pes sadzinel, chudel te barol a hino nekbarereder maškar savore rastlini a hin les ajse bare konara, hoj o čirikle peske šaj bešen andre leskero ciños."

³³ O Ježiš lenge vakerelas o lav andro but kajse podobenstva – ajci, keci šaj achafonas.

³⁴ No, le manušenge bi o podobenstva na vakerelas, ale sar sas korkoro peskere učeňikenca, lenge phenelas avri sa.

Zaačhavel e balvaj pro moros

³⁵ Oda džives, sar zaračilā, o Ježiš lenge phendā: "Aven džas pre dujto sera le moroskeri."

³⁶ Odgele pašal o nipi a le Ježiš ile peha pre lođka. Džanas leha the aver lođki.

³⁷ Jekhvareste avla bari burka la balvajaha. O vlni demkerenas andre lođka avke, hoj pes pherarelas le paňeha.

³⁸ O Ježiš sovelas peske pre perňica (zahlavkos) palal andre lođka. Uštade les a phende leske: "Učitelina, tuke hin jekh, hoj kade meraha?"

³⁹ Ov uštīla a rozkazindā la balvajake the le moroske: "Preačh, čhit!" E balvaj preačīla a sas igen čhit.

⁴⁰ Palis lenge phendā: "So tumen avke daran? Mek furt tumen nane pačaben?"

⁴¹ Ale on pes igen daranas a phenenas jekh avreske: "Ko hino ov, hoj les e balvaj the o moros šunen?"

O zaphandlo manuš andre Gadara

5 Pregele prekal o Galilejsko moros pre oki sera a doavle andre phuv Gadara.

² Takoj, sar o Ježiš geľa avri andral e lođka, avla pašal o hrobi ke leste jekh manuš, andre savo sas nalačo duchos.

³ Ov bešelās andro hrobi a ňiko les imar aňi le lancenca našti phandelas.

⁴ Bo sas buterval phandlo le lancenca the le putenca pro vasta the pro pindre, ale čhingerelas o lanci a phagerelas o puta. ňiko na džanelas so leha te kerel.

⁵ Furt rači the dživese kerelas vika pro brehi the paš o hrobi a korkoro pes marelās le barenca.

⁶ Sar dikhla le Ježiš dural, denašelās ke leste, peľa pro khoča

⁷ a vriskindā zorale hangoha: "So man hin tuha, Ježiš, Čhavo le Někbarereder Devleskero? Le vera anglo Del, hoj man na trapineha!"

⁸ Bo o Ježiš leske phendā: "Nalačo duchona, dža andral leste avri!"

⁹ Avke o Ježiš lestar phučla: "Sar tut vičines?" Odfpenda leske: "Miro nav hin Legion, bo sam igen but."

¹⁰ A igen les mangelas, hoj len te na tradel andral odi phuv avri.

¹¹ Ode pašes pro brehos sas but bale andro stados

¹² a o demona les mangelas: "Bičhav amen andre kale bale, hoj te džas andre lende."

¹³ O Ježiš lenge takoj domukla a o nalačhe duchi gele avri andral o manuš andro bale. Calo stados, vaj duj ezera (2 000) bale, denašenaste le brehoha andro moros a tašlile.

¹⁴ Ola džene, save pasinenaste le balen, denašle a phende ada avri andro foros the pro malı a o manuša avle te dikhel, so pes ačhiła.

¹⁵ Sar avle ko Ježiš a dikhle oles, andre savo sas oda Legion, hoj bešel a hino urdo andro gada a hino paš e godı, predarandıle.

¹⁶ Ola, save ada dikhle, vakerenaste lenge, so pes ačhiła oleha, andre savo sas nalačhe duchi, the le balenca.

¹⁷ Avke mangelaste le Ježiš, hoj te džal avri andral lengeri phuv.

¹⁸ Sar džalaste o Ježiš andre lođka, mangelaste les oda manuš, či šaj džal leha.

¹⁹ O Ježiš leske na domukla, ale phenda leske: "Dža khere ke tiri famelija a phen lenge avri, save bare veci tuke kerđa o Raj the savo lačhipen tuke presikađa."

²⁰ Geła a chudla te vakerel andro Dekapolis, save bare veci leske kerđa o Ježiš; a savore pes čudalinenaste.

E Jairoskeri čhajori the e nasvalı džuvlı

²¹ Sar pale preplavinde pre oki sera le moroskeri, avle ke leste paš o moros igen but manuša.

²² Avla ko Ježiš o Jairus, jekh vodcas andral e sinagoga. Sar les dikhla, peła paš leskere pindre

²³ a igen les mangelaste: "E čhajori mange merel. Mangav tut, hoj te aves te thovel pre late o vasta, hoj te sastol avri a te dživel."

²⁴ Avke o Ježiš odgeła leha. Džanas pal leste igen but manuša a ispidenaste les pal savore seri.

²⁵ Sas ode jekh džuvlı, savi sas dešuduj (12) berš nasvalı pro džuvlıkano nasvalıben.

²⁶ Diňa savore peskere love avri le doktorengi a igen but lendar cerpinda, no na sas lake feder, ale ča furt goredi.

²⁷ Sar šunda pal o Ježiš, oj avla maškar o nipi ko Ježiš palunestar a dotkniđa pes leskere ruchostar.

²⁸ Bo phenda peske: "Ča te man leskere ruchostar dotkniđava, sastuvava avri."

²⁹ Takoj lake preačhiła o rat te džal andral o telos a šunda andre peste, hoj hiňi avrisastardi le nasvalıbnastar.

³⁰ O Ježiš takoj džanla, hoj lestar e zor geła avri, visalila ko manuša a phučla: "Ko pes dotkniđa mire ruchostar?"

³¹ O učeňika leske odphende: "Se dikhes, hoj tut o manuša ispiden pal savore seri, a tu phučes: 'Ko pes mandar dotkniđa?' "

³² Ale o Ježiš dikhelas pašal peste, hoj te dikhel, ko ada kerđa.

³³ E džuvlı izdralaste daratar – bo džanelaste, so pes lake ačhiła – peła angle leste pro khoča a phenda avri calo čačipen.

³⁴ Ov lake phenda: "Čhaje miri, tiro pačaben tut sastarda. Dža andro smirom. Av sastı andral tiro nasvalıben."

³⁵ Medik ov laha vakerelaste, avle o nipi khatar o Jairoskero kher a phende leske: "Tiri čhajori imar muła. De smirom le Učitelıstı."

³⁶ Sar o Ježiš šunda, so le Jairoske vakerde, phenda leske: "Ma dara tut, ča pačal!"

³⁷ Palıstı na domukla niňkaske pal peste te džal, ča le Peteriske, Jakoboske the leskere phraleske, le Janoske.

³⁸ Avle andro kher ko Jairus a dikhle ode but manušen, save roven a keren bari vika.

³⁹ O Ježiš geła andre a phenda lenge: "Soske keren vika a roven, se e čhajori na muła, oj ča sovel!"

⁴⁰ A asanaste lestar. No ov tradňa savoren avri, ila la čhajorakera da the le dades the olen, save sas leha, a gele pre oda than, kaj pašlolaste e čhajori.

⁴¹ Chudla la čhajorakero vast a phenda lake: "Talitha kumi!" Oda pes prethovel: "Čhajori, tuke phenav, ušti!"

⁴² E čhajori takoj uštıla a phirelaste – sas lake dešuduj berš – a savore pes igen čudalinenaste.

⁴³ Ale o Ježiš lenge zakazinda, hoj niňkaske oda te na vakeren. Palıstı lenge phenda, hoj la te den te chal.

O Ježiš andro Nazaret

6 Palıstı odgeła odarik a avla andre peskero gav, kaj bariła avri, a leskere učeňika džanas leha.

² Sar sas o Šabbat (sombat), chudla te sikavel andre sinagoga. Sas ode but džene a sar les šunde, čudalinenaste pes a phenenaste peske: "Khatar les hin kada? Khatar les hin kajsi godı? Sar kerel peskere vastenca ajse zazraki?"

³ Či nane ov o tesaris? Či nane la Mariakero čhavo the o phral le Jakoboske, Jozefoske, Judaske the le Šimonoske? A či nane leskere pheňa amenca?" A na pačanaste andre leste.

⁴ O Ježiš lenge phenda: "O prorokos hino bi e pačiv ča andre peskero gav a maškar peskere pašutne the famelija."

⁵ Našti ode kerđa nisave zazraki, ča oda, hoj pre vare-save nasvale thođa o vasta a sastarelaste len.

⁶ Čudalinda pes, hoj o manuša na pačan. Palıstı phirelaste andro pašutne gava te sikavel.

Bičhavel avri le dešuduje učeňiken

⁷ Vičinda ke peste le dešudujen (12) a chudla len te bičhavel avri po duje dženen. Diňa len autorita upral o nalačhe duchi.

⁸ Prikazindá lenge: "Len peha ča e paca pro drom a nič aver – aňi maro, aňi love andro sirimos, aňi zajdica.

⁹ O sandalki šaj uren pro pindre, ale buter gada peha na len."

¹⁰ Phendá lenge: "Ačhen andre ajsó kher, kaj tumen lena, dží akor, medik na džana avri andral oda foros.

¹¹ Te tumen andre varesavo than na prilena, aňi na kamena te šunel, džan odarik het a o prachos pal o pindre keren tele sar svedectvo pre lende." ["Čačipen tumenge phenav, hoj feder ela pro sudno džives le forenge Sodoma the Gomora, sar ole foroske."]

¹² On gele avri a kazinenas, hoj o manuša te keren pokaňje.

¹³ Tradenas avri but demonen a makhenas but nasvalen le olejoha a sastárenas len.

O Jan Krstiteľ merel

¹⁴ O kralis Herodes šundá pal o Ježiš, bo všadzík pal leste vakerenas a phenenas: "O Jan Krstiteľ uštíla andral o meriben, vašoda andre leste hin adi zor te kerel zazraki."

¹⁵ Aver phenenas pro Ježiš, hoj hino Eliaš, mek aver phenenas, hoj hino ajsó prorokos sar jekh le čirlatune prorokendar.

¹⁶ No sar oda šundá o Herodes, phendá: "Oda hin o Jan, kaske odčhindóm o šero. Ov uštíla andral o meriben!"

¹⁷ Bo o Herodes diňa le Jan te zalel a te thovel andre bertena. Vašoda, hoj o Herodes ačhiľa te dživel le Fili-poskera peskere phraleskera romňaha,

¹⁸ o Jan dovakerelas le Herodesiske: "Našti džives le phraleskera romňaha!"

¹⁹ Vašoda e Herodijada chalas cholí pro Jan a kamelas les te murdarel, ale našti.

²⁰ Bo o Herodes pes daralas le Janostar, bo džanelas, hoj hino čačipnaskero the sentno murš a chraňinelas les. Rado les šunelas, ale na džanelas, so peske pal oda te gondolinel.

²¹ Ale jekh džives oj šaj kerdá vareso: Sas le Herodesiske o berša a ov kerdá e hoscina prekal peskere generala a velítela the prekal o anglune manuša andral e Galileja.

²² Sar avľa andre e čhaj la Herodijakeri a khelelas, sas ada pre dzeka le Herodesiske the olenge, save leha sas pre hoscina. O kralis phendá la čhake: "Mang mandar, so ča kames, a dava tuke!"

²³ A diňa la lav: "Lav vera, hoj so mangeha, dava tut, dží jepaš mire krališagostar."

²⁴ Oj geľa avri pal peskeri daj a phučľa latar: "So mange lestar te mangav?" E daj lake odphendá: "Le Janoskero Krstiteľiskero šero."

²⁵ Palis e čhaj takoj sidarelas ko kralis a mangľa lestar: "Kamav, hoj mange takoj akana te anes pre tac-ka o šero le Janoskero Krstiteľiskero."

²⁶ O kralis ačhiľa smutno, ale vaš odi vera, so la diňa, anglo manuša, save sas pre hoscina, na kamľa lake te odphenel.

²⁷ Avke o kralis takoj bičhađa le katos a prikazindá, hoj te anel le Janoskero šero. O katos geľa, odčhindá leske o šero andre bertena

²⁸ a anda o šero pre tacka la čhake. A e čhaj diňa peskera dake.

²⁹ Sar oda šunde le Janoskere učeňika, avle, ile leskero tělos a thode les andro hrobos.

Čařarel pandž ezere manušen

³⁰ O apoštola pes pale zgele le Ježišoha a vakerenas leske savoro, so kerenas the sikavenas.

³¹ Phendá lenge: "Aven, džas korkore pre varesavo omuklo than, hoj tumenge sikra te odpočovinen." Bo furt ajci manuša ke lende avenas a oddžanas, hoj len na sas aňi kana te chal.

³² Avke gele la loďkaha varekaj pre omuklo than, hoj te aven korkore.

³³ Ale but nipi len dikhle, hoj džan het a avle pre oda, kaj džan. Vašoda but džene andral savore gavora odarik gele pro pindre a doavle pre dujto sera angle lende.

³⁴ Avke, sar avľa o Ježiš avri andral e loďka, dikhľa ode but nipen a sas leske pharo pre lende, bo sas sar o bakrore bi o pastjeris. A chudľa len te sikavel but veci.

³⁵ Sar imar sas but ori, avle ke leste leskere učeňika a phende leske: "Pre kada than nane nič a imar hin but ori.

³⁶ Rozmuk len, hoj te džan andro gava the andro fori peske te cinel vareso te chal."

³⁷ Ale ov lenge odphendá: "Tumen len den te chal!" Phende leske: "Kames, hoj te džas a te cinas maro vaš o duj šel (200) denara † a te das len te chal?"

³⁸ Ov lendar phučľa: "Keci tumen hin mare? Džan te dikhel!" Sar pes dodžanle, phende leske: "Pandž mare the duj ribi."

³⁹ Palis lenge phendá, hoj peske te bešen pre zeleno čar andro partiji.

⁴⁰ Avke beše peske andro partiji po šel (100) the po penda (50).

⁴¹ Palis iľa ola pandž mare the duj ribi, dikhľa pro ňebos, požehňindá, phagerelas o mare a delas le učeňikenge, hoj te poden le manušenge. The ola duj ribi rozulađa savorenge.

⁴² Chale savore a čalile.

⁴³ No ole mareNDAR the ribendar mek ačhiľa a o učeňika kidle upre dešuduj (12) pherde bare košara.

⁴⁴ O murša, save chale, sas vaj pandž ezera (5 000) murša.

O Raj phirel pal o moros

⁴⁵ Takoj paloda bičhađa o Ježiš peskere učeňiken, hoj te džan la loďkaha anglal leste andre Betsaida pre dujto sera le moroskeri, medik ov premukela le manušen.

⁴⁶ Sar odgeľa lendar, geľa pro verchos pes te modlinel.

† Oda hin beršeskero počňiben.

⁴⁷ Sar zaračila, sas e lodka maškar o moros a korkoro o Ježiš sas pre phuv.

⁴⁸ O Ježiš dikhla, hoj pes o učeñika trapinen le veslenca, bo e balvaj phurdelas pre lende, avke avla ke lende, sar imar vidñisalolas, no mek sas rat †. Phirelas pal o moros a kamla pašal lende te predžal.

⁴⁹ Ale sar les dikhle te phirel pal o pañi, vriskinde, bo gondolinde, hoj dikhen varesave mules.

⁵⁰ Savore les dikhle a darandile. Ale takoj o Ježiš prevakreda ke lende: "Ma izdran! Me som. Ma daran tumen!"

⁵¹ Geľa paš lende andre lodka a e balvaj preačila. A igen pes čudalinenas,

⁵² bo na achalile akor, sar pes ačila o zazrakos le marenca, bo lengere jile sas zaphandle.

Sastarel andro Genezaret

⁵³ Sar pregele o moros, avle andro Genezaret a ode priphandle e lodka.

⁵⁴ Soča avle avri andral e lodka, o manuša les prindžarde.

⁵⁵ Rozdenašle pes pal cali odi phuv a anenas le nasvalen pro nošitki ode, kaj šunenenas, hoj o Ježiš hino.

⁵⁶ Všadzik, kaj džalas, anenas ke leste le nasvalen avri pro ulici – andro gava, vaj andro fori, vaj pre maľa. A mangenas les, či pes šaj dotkñinen ča leskere gadendar, a savore, save pes dotkñinde, sastile avri.

So meľarel le manušes

7 O Farizeja the varesave zakoñika, save avle andral o Jeruzalem, pes zgele paš o Ježiš.

² Dikhle, hoj le Ježišoskere učeñika chan o maro melale vastenca, bo na thode (morde) len avke, sar o Farizeja phenenas, hoj kempel te kerel.

³ Bo o Farizeja the savore Židi dolikeren oda, so varekana kerenas o tradiciji le phurendar, hoj medik na thovenas mištes o vasta, na chanas.

⁴ A te aven pal o pľacos, na chan, medik pes na thoven. Preile le phurendar the but aver tradiciji, ajse sar oda: Sar te thovel avri o pohara, kuča, pira the o međune grati.

⁵ Avke o Farizeja the o zakoñika lestar phučle: "Soske tire učeñika na dolikeren o tradiciji le phurendar a chan o maro le melale vastenca?"

⁶ Odphendā lenge: "Tumen dujemujengere, mištes pal tumende prorokinelas o Izaiáš, avke sar hin pisi-men:

'Kala nipi man lašaren le mujeha, ale lengero jilo hino mandar dur.

7 Hijaba man lašaren, bo sikaven o sikaviben, so hin le manušendar.'

⁸ Bo omuklan le Devleskero prikazañje a dolikeren le manušengere tradiciji."

⁹ A phendā lenge: "Le Devleskero prikazañje čerinen vaš tumare tradiciji.

¹⁰ Bo o Mojžiš phendā: *'De pačiv tira da the le dades! A oda, ko košel la da the le dades, mušinel te merel!'*

¹¹ Ale tumen phenen: 'Sako, ko phendahas la dake abo le dadeske: Oda kotor mire barvalipnastar, so šaj diñomas tumenge, thodom pre sera le Devleske,'

¹² a palis leske imar na domuken nič te kerel prekal e daj the prekal o dad.

¹³ Kajse tradicijenca, so likerem a poden dureder, musaren le Devleskero Lav. A but ajse veci keren!"

¹⁴ Palis vičinda ke peste le nipen a phendā lenge: "Šunen man savore a achalon!"

¹⁵ Le manušes na meľarel oda, so chal, ale oda, so avle avri andral leskero jilo.

¹⁶ [Te hin varekas kana, hoj te šunel, mi šunel!]"

¹⁷ Sar odgeľa le manušendar a geľa andro kher, leskere učeñika lestar phučle pal oda podobenstvo.

¹⁸ A phendā lenge: "So añi tumen na achalon? Na achalon, hoj nič, so avle avral a džal andro manuš, les našti meľarel?"

¹⁹ Bo oda na džal andre leskero jilo, ale ča andro per a palis džal avri." Aleha o Ježiš phendā, hoj dojekh chaben hino žužo.

²⁰ A phendā: "Oda, so avle avri andral o manuš, oda les meľarel.

²¹ Bo andral o manuš – andral leskero jilo – avle nalačo gondolišagos, te kerel lubipen, te murdarel, te čorel,

²² te pašlol avre romñenca, te kamel o barvalipen, o nalačhipen, te klaminel, ñisostar pes te na ladžal, te zavidzinel, te ruhinel pes, te el barikano a te kerel o dil-iñipen.

²³ Savore kala nalače veci aven andral o jilo a meľaren le manušen."

O pačaben la džuvľakero

²⁴ Uštıla a geľa odarik paš o fori Tir [the Sidon]. Geľa andro kher a na kamla, hoj pes ada vareko te dodžanel, ale našti pes garuđa.

²⁵ Takoj šunđa pal leste jekh džuvli, sava sas čhajori, andre savi sas nalačo duchos. Oj avla a peľa paš le Ježišoskere pindre.

²⁶ Sas Grekiña a sas andral e phuv Fenicija andre Siri-ja. Mangelas les, hoj te tradel avri le demonos andral lakeri čhajori.

²⁷ Ale o Ježiš lake phendā: "Domuk, hoj ešeb (peršo) te čalon o čhave, bo nane šukares te lel le čhavege o maro a te čhivel les le rikonorege."

²⁸ Ale oj leske odphendā: "He Rajeja, ale the o rikonore chan telal o skamind o trušini, so peren le čhavendar."

²⁹ Phendā lake: "Vaš oda lav, so phendal, dža! O demonos imar geľa avri andral tiri čhaj."

³⁰ Sar geľa andre peskero kher, arakhla peskera čhajora te pašlol pro hados a o demonos imar geľa andral late avri.

† Oda sas maškar o trin the šov ori.

O kašuko the šepetlivo manuš

³¹ Palis geľa het pašal o Tir prekal e phuv Sidon. A odarik geľa pašal e phuv, so pes vičinel Dekapolis, ko Galilejsko moros.

³² A ande ke leste manušes, savo sas kašuko the igen šepetlivo, a mangelas les, hoj te thovel pre leste o vasta.

³³ O Ježiš les iľa pašal o nipi sikra dureder, thođa peskere angušta andre leskere kana, čhungarđa a dotkňinda pes leskera čhibatar.

³⁴ Palis dikhľa pro ňebos, pharipnaha peske vzdichňinda a phendă: "Effatha!" So hin: "Phundrav tut!"

³⁵ Takoj pes phundrade leskere kana the leskeri čhib a vakerelas imar žužes.

³⁶ O Ježiš prikazinda le manušenge, hoj ada te na vakeren ňikaskes. Ale so buter lenge prikazinelas, on mek buter vakerenas.

³⁷ Igen pes čudalinenas a phenenas: "Sa kerel mištes! Kerel, hoj o kašuke šunen a o ňeme vakeren!"

Čalarel štar ezere manušen

8 Andre ola dživesa, sar sas pale zgele but manuša a na sas len so te chal, o Ježiš vičinda ke peste le učeňiken a phendă lenge:

² "Pharo mange hin vaš kala manuša, bo imar trin dživesa hine manca a nane len so te chal.

³ Te len bičhavava khere bokhalen, odperena pal o drom, bo varesave avle dural."

⁴ O učeňika leske odphende: "Ko pre kada omuklo than šaj dochudel maro, hoj te čalarel kajci manušen?"

⁵ Ale phučľa lendar: "Keci tumen hin mare?" Odphende leske: "Efta."

⁶ Rozkazinda le manušenge, hoj peske te bešen pre phuv. Iľa ole efta mare, palikerđa le Devleske, phagere las a podelas o maro le učeňikenge, hoj on te poden le manušenge. A kerde avke.

⁷ Sas len the varesave cikne ribi, the vaš ola palikerđa a phendă, hoj len te poden.

⁸ Avke chanas a čalile. Olestar, so ačhiľa, kidle upre efta košara.

⁹ Ola, save chanas, sas vaj štar ezera (4 000) manuša. Palis len bičhađa het,

¹⁰ a takoj geľa le učeňikenca andre lodka a avľa andre phuv Dalmanuta.

O Farizeja mangel znameňje

¹¹ Avle paš leste o Farizeja a chudle pes leha te kerel. Mangelas lestar znameňje andral o ňebos a oleha les probalinenas (skušinenas).

¹² Phares peske vzdichňinda andro duchos a phendă: "Soske kala manuša mangel znameňje? Čačipen phenav tumenge, hoj kale manušenge na ela dino ňisavo znameňje."

¹³ Mukľa len ode, geľa pale andre lodka, a pregeľa pre oki sera le moroske.

O phučiben pal o kvasos

¹⁴ Andre lodka len sas ča jekh maro, bo bisterde peha te lel.

¹⁵ O Ježiš lenge dovakerelas: "Merkinen tumenge pre le Farizejengere the le Herodesiskere droždi!"

¹⁶ Palis vakerenas maškar peste: "Vašoda vakerel, bo nane amen maro."

¹⁷ O Ježiš džanelas, so vakerenas a phendă lenge: "Soske pal oda vakeren, hoj nane tumen maro? So mek furt na achaľon? Hine tumare jile zaphandle?"

¹⁸ Hin tumen jakha – a na dikhen? Hin tumen kana – a na šunen? Soske bisterďan:

¹⁹ Sar ola pandž mare rozulavavas maškar o pandž ezera (5 000) manuša, keci pherde košara kidňan upre olestar, so ačhiľa?" Phende leske: "Dešuduj (12)."

²⁰ "A sar ola efta mare rozulavavas maškar o štar ezera (4 000) manuša, keci pherde košara kidňan upre olestar, so ačhiľa?" Odphende: "Efta."

²¹ A phendă lenge: "So mek furt na achaľon?"

Sastarel le kores andre Betsaida

²² Palis avle andre Betsaida. Ande ke leste jekhe kores a mangelas les, hoj pes lestar te dotkňinel.

²³ O Ježiš chudľa le kores vastestar a iľa les avri andral o gav. Ode leske le šlinenca makhľa o jakha, thođa pre leste o vasta a phučľa lestar: "Dikhes vareso?"

²⁴ O koro dikhľa upre a phendă: "Dikhav le manušen, ale dičhon avri sar stromi, so phiren."

²⁵ O Ježiš pale thođa pre leskere jakha o vasta a chudľa te dikhel. O koro avke sastilľa avri, hoj dikhelas savoro žužes.

²⁶ Bičhađa les khere a phendă leske: "Ma dža andre oda gav [aňi pal oda ma phen ňikaskel!]"

O Peter viznavinel, ko hin o Ježiš

²⁷ Palis geľa o Ježiš le učeňikenca andro gavora andre phuv Cezarea Filiposkeri. Pal o drom lendar phučľa: "So pal mande phenen o manuša? Ko phenen, hoj som?"

²⁸ Odphende leske: "Jekh phenen, hoj sal o Jan Krstiteľ, aver, hoj o Eliaš, a pale aver, hoj sal jekh le prorokendar."

²⁹ Ov lendar phučľa: "Ko phenen tumen, hoj som?" O Peter leske odphendă: "Tu sal o Kristus!"

³⁰ No prikazinda lenge, hoj ňikaskes pal leste te na phenen avri.

O Ježiš vakerel pal peskero meriben

³¹ Palis len chudľa te sikavel, hoj o Čavo le Manušeskeru mušnela but te cerpinel a te el odčhido le phuredendar, le nekbaredere rašajendar the le za-koňikendar a hoj mušnela te merel a pal o trin dživesa te uštel andral o meriben.

³² Vakerelas lenge pal oda phundradones. Akor o Peter les iľa pre sera a chudľa leske te dovakerel.

³³ Ale o Ježiš visalíla, dikhla pro učeňika a pokarhinda le Peter: "Dža mandar het, Satan, bo na gondolines pre le Devleskere veci, ale pre le manuškere!"

Sar te džal pal o Ježiš

³⁴ Palis vičinda ke peste le manušen the le učeňiken a phendža lenge: "Te kamel vareko te avel pal ma, mi zaprinel pes. Mi lel pre peste peskero kerestos a mi avel pal ma."

³⁵ Bo sako, ko kamel te zachrañinel peskero dživipen, našavela les, ale ko našavela peskero dživipen vaš ma the vaš o evaňjelium, zachrañinela les.

³⁶ Bo so hin le manušes olestar, te dochudela calo svetos, ale o dživipen našavela?

³⁷ So o manuš šaj del vaš peskero dživipen?

³⁸ Bo vaš dojekh, ko pes ladžala vaš ma the vaš mire lava andre kada lubikano the binošno svetos, pes ladžala the o Čhavo le Manušeskero, sar avela le sentne aňjelenca andre slava peskere Dadeskeri!"

9 O Ježiš lenge phendža: "Čačipen tumenge phenav, hoj tumendar, save kade ačhen, hine varesave, save na dikhena o meriben, medik na dikhena le Devleskero krališagos te avel andre zor."

O Ježiš pes čerinel andre slava

² Pal o šov džives o Ježiš ila peha le Peter, le Jakob the le Jan a sas korkore pro učo verchos. Ode pes anglal lende čerinda.

³ Leskere gada sas parne sar jiv – ajse parne, hoj nič pre phuv len na kerđahas parneder.

⁴ A sikađa pes lenge o Eliaš the o Mojžiš a vakerenas le Ježišoha.

⁵ Akor phendža o Peter le Ježišoske: "Rajeja, mištes amenge hin kade! Keras trin stani – tuke jekh, le Mojžišoske jekh the le Eliašoske jekh."

⁶ O Peter na džanelas, so te phenel, bo igen predarandile.

⁷ Jekhvareste avla e chmara, zaučhardža len a andral e chmara prevakerđa ke lende o hangos: "Kada hin miro Čhavo, saves kamav. Les šunen!"

⁸ Takoj sar pes obdikhle, imar na dikhle paš peste űikas, ča le Ježiš korkores.

⁹ Sar avenas tele pal o verchos, phendža lenge o Ježiš, hoj oda, so dikhle, űikaske te na vakeren avri, medik o Čhavo le Manušeskero na uštela andral o meriben.

¹⁰ On doľikerde oda, so lenge o Ježiš phendža, ale phučenjas jekh avrestar: "So oleha gondolinel, sar phenel, hoj uštela andral o meriben?"

¹¹ A phučle lestar: "Soske phenen o zakoňika, hoj ešeb (peršo) mušinel te avel o Eliaš?"

¹² Ov lenge odphendža: "Čačipen hin, hoj o Eliaš avela ešebno a prikerela sa. Ale soske hin pisimen pal o Čhavo le Manušeskero, hoj mušinela te el odčhido a but te cerpinel?"

¹³ Phenav tumenge, hoj o Eliaš imar avla, ale kerde leha, so kamle, avke sar pal leste hin pisimen."

Tradel avri le nalačhe duchos andral o čhavoro

¹⁴ Sar avle pale paš o učeňika, dikhle pašal lende but manušen a hoj varesave zakoňika pes lenca vesekedinen.

¹⁵ Ola manuša, sar dikhle le Ježiš, igen radisaľonas a avle les te pozdravinel.

¹⁶ O Ježiš lendar phučla: "Pal soste pes lenca vesekedinen?"

¹⁷ Jekh ole manušendar leske odphendža: "Rajeja, andom ke tu mire čhas, bo hin andre leste o űemo duchos a naští vakerel.

¹⁸ Všadzik, kaj pre leste oda avel, čhivkerel leha, marel leske pro muj o peni, randel le dandenca a ačhel sar kašt. Phendom tire učeňikenge, hoj les te traden andral leste avri, no naští oda kerde."

¹⁹ O Ježiš lenge odphendža: "Ó, manušale bi o pačaben! Mek dží kana tumenca avava? Dží kana tumen mek zľikerava? Anen les ke mandel!"

²⁰ Ande les paš leste a sar oda duchos dikhla le Ježiš, čhivkerelas le čhavoreha. Ov peľa pre phuv, kulinelas pes a pro muj leske marelas o peni.

²¹ O Ježiš phučla leskere dadestar: "Kanastar hino ajso?" Ov odphendža: "Ciknorestar.

²² Buterval les čhivelas andre jag the andro paňi, hoj ča les te murdarel. Te šaj vareso keres, av jileskero ke amende a pomožin amenge."

²³ O Ježiš leske odphendža: "Soske phenes: 'Te šaj?' Oda, ko pačal, savoro šaj kerel!"

²⁴ Ole čhaveskero dad takoj zvičinda: "Pačav, Rajeja! Pomožin mange, hoj feder te pačav!"

²⁵ Sar o Ježiš dikhla, hoj pes mek buter manuša skiden, pokarhinda ole nalačhe duchos a phendža leske: "Tu űemo the kašuko duchona, prikazinav tuke: Av andral leste avri a šoha buter andre leste ma džal!"

²⁶ O duchos leha čhivkerelas, vriskinelas a palis geľa avri. O čhavoro sas sar mulo, vašoda but džene phende, hoj muľa.

²⁷ Ale o Ježiš les chudla vastestar, hazdňa les a uštíla.

²⁸ Sar o Ježiš avla andro kher a imar sas korkore le učeňikenca, phučle lestar: "Soske les amen naští tradňam avri?"

²⁹ Odphendža lenge: "Kajse demonen naští te tradel avri, ča la modľitbaha [the le postoha]."

Dujtovar vakerel pal peskero meriben

³⁰ Palis gele het odarik a džanas pašal e Galileja. O Ježiš na kamelas, hoj alestar vareko te džanel.

³¹ Bo le učeňiken sikavelas a phenelas lenge: "O Čhavo le Manušeskero ela dino andro vasta le nipenge a murdarena les, ale pro trito džives uštela andral o meriben."

³² O učeňika na ačalonas ole laveske, ale te phučel lestar pal oda pes daranas.

O Raj sikavel, ko hin bareder

³³ Avle andro Kafarnaum. Sar sas andro kher, phučla lendar o Ježiš: "Pal soste vakereleas maškar peste, sar avahas pal o drom?"

³⁴ Ale on sas čhit. Bo sar avenas pal o drom, vakereleas pal oda, ko hin lendar nekbareder.

³⁵ O Ježiš peske bešla, vičinda le dešudujen a phenda lenge: "Oda, ko kamel te el ešebno, mi el posledno a mi služinel savorenge."

³⁶ Palis iľa čhavores a ačhađa les maškar lende. Sar les iľa pro vasta, phenda:

³⁷ "Sako, ko prilela jekhes kajse čhavorendar andre miro nav, man prilel. A sako, ko man prilel, na man prilel, ale Oles, ko man bičhađa."

Ko na džal pro Ježiš, hino leha

³⁸ O Jan leske phenda: "Rajeja, dikhl'am varesave manušes, sar andre tiro nav tradelas avri le demonen a na domukahas leske ada, bo na phirel amenca."

³⁹ Ale o Ježiš lenge phenda: "Ma braňinen leske! Bo űiko, ko kerel andre miro nav zazraki, našti vakerele takoj namištes pal mande.

⁴⁰ Bo ko na džal pre amende, hino amenca!

⁴¹ Čačipen phenav tumenge, hoj sako, ko tumen dela te pijel jekh poharis paňi andre miro nav, bo san le Kristoskere, čačes chudela peskeri odmena."

Te na cirdel avres pro binos

⁴² "Oleske, ko kerel, hoj te oddžal andral o pačaben jekh kale ciknorendar, save pačan andre ma, uľahas feder, te leske thodehas baro bar † pre meň a čhidehas les andro moros!

⁴³ A te tut cirdela tiro vast te kerel o binos, odčhin les, bo feder tuke hin te džal andro dživipen bi o vasta, sar te džal soduje vastenca andro peklos, andre odi jag, so šoha (ňikda) na murdaľol andre!

⁴⁴ [Ode, kaj lengero kirmo na merel a e jag na preačhel!]

⁴⁵ A te tut cirdela pro binos tiro pindro, odčhin les, bo feder tuke hin te džal andro dživipen bi o pindro, sar te el čhido soduje pindrenca andro peklos, andre jag, so šoha na murdaľol andre!

⁴⁶ [Ode, kaj lengero kirmo na merel a e jag na preačhel!]

⁴⁷ A te tut cirdela pro binos tiri jakh, džubin la avri, bo feder tuke hin te džal jekha jakhaha andro Devleskero krališagos, sar soduje jakhenca te el čhido andro peklos!

⁴⁸ Ode, kaj lengero kirmo na merel a e jag na murdaľol andre!

⁴⁹ Bo dojekh ela žužardo la jagaha, avke sar dojekh obeta pes žužarel le loneha.

⁵⁰ O lon hino lačo, ale te o lon našavela peskero londipen, soha les londareha? Mi el andre tumende o lon a dživen andro smirom jekh avrenca!"

Pal o rozvodos

¹⁰ O Ježiš odarik uštila a geľa andre Judsko the andre phuv pal o Jordan. A pale pes zgele paš leste igen but nipi a ov len sikavelas avke sar furt.

² Androda avle ke leste o Farizeja a phučle lestar, či šaj omukel o rom peskera romňa, bo kamenas les te chudel avri.

³ O Ježiš lenge odphenda: "So tumenge prikazinda o Mojžiš?"

⁴ Odphende: "O Mojžiš domukľa le muršeske te pisinel o rozvodno ľil a te premukel la romňa."

⁵ O Ježiš lenge odphenda: "O Mojžiš tumenge pisinda oda prikazaňje, bo tumare jile hine barune.

⁶ Ale ešebnovarestar, sar stvorinda o svetos, o *Del stvorinda len sar muršes the džuvľa.*

⁷ *Vašoda oddžala o murš la datar the le dadestar a ela jekhetane la romňaha*

⁸ *a on duj džene ena jekh tēlos.* Avke imar nane duj, ale jekh tēlos.

⁹ Vašoda, so o Del phandľa, o manuš te na rozphan-del!"

¹⁰ Palis, sar sas andro kher, phučle lestar pal oda o učeňika.

¹¹ O Ježiš lenge phenda: "Sako, ko omukel peskera romňa a lel peske avra, kerel laha lubipen.

¹² A te e romňi omukela peskere romes a lela peske avres, tiš kerel lubipen."

O Raj požehňinel le čhavoren

¹³ Anenas ke leste le čhavoren, hoj te thovel pre lende o vasta, ale o učeňika len na domukenas.

¹⁴ Sar o Ježiš oda dikhľa, cholisalila a phenda lenge: "Domuken le čhavorenge te avel ke ma a ma braňinen lenge, bo ajsengero hin o krališagos le Devleskero.

¹⁵ Čačipen phenav tumenge: Ko na prilela le Devleskero krališagos sar čhavoro, šoha (ňikda) andre na džala."

¹⁶ Palis lelas o Ježiš le čhavoren pro vasta, thovelas pre lende o vasta a žehňinelas lenge.

O barvalo terno murš

¹⁷ Sar džalas pal o drom, avľa ke leste jekh terno manuš, peľa anglal leste pro khoča a phučla lestar: "Lačo Učitelina, so te kerav, hoj te dochudav o večno dživipen?"

¹⁸ O Ježiš leske phenda: "Soske man vičines lačo? űiko nane lačo, ča jekh o Del.

¹⁹ O prikazaňja džanes: *'Na murdareha! Na kereha lubipen! Na čoreha! Na svedčineha klamišagoha pre tiro pašutno! űikaha na thoveha avri! De pačiv tira da the le dades!'*"

²⁰ Ov leske odphenda: "Učitelina, savoro kada imar ternipnastar dolikerav."

²¹ Akor pre leste dikhľa o Ježiš kamibnaha a phenda leske: "Mek jekh tuke kempel: Dža, biken savoro, so tut

† Oda hin o baro bar andral o malmos.

hin, a rozde le čorenge a ela tut o barvalipen andro ņebos. Palis av a phir pal ma!"

²² Sar šundā ola lava, ačhiła smutno a geła het, bo sas les but barvalipen.

Pal o barvalipen

²³ O Ježiš dikhła pre peskere učeņika a phendā: "Sar phares pes dochudena andro Devleskero krališagos ola, kas hin o barvalipen!"

²⁴ O učeņika pes igen čudalinenas leskere lavenge, ale o Ježiš lenge ada phendā mek jekhvar: "Čhavorale, sar phares hin te džal andro krališagos le Devleskero [olenge, save pes muken pro barvalipen]."

²⁵ Lokeder hin la tāvake te predžal prekal e suvakeri chev sar le barvaleske andro krališagos le Devleskero."

²⁶ On pes mek buter čudalinenas a jekh avreske phenenas: "Akor, ko šaj el spasimen?"

²⁷ O Ježiš dikhła pre lende a phendā: "Ko manuša pes oda na del, hoj pes te ačhel, ale le Devleske šaj. Bo o Del šaj kerel savoro."

²⁸ Akor chudła te vakerele o Peter: "Dikh, amen omuklam savoro a gełam pal tu."

²⁹ O Ježiš odphendā: "Čačipen tumenge phenav, hoj dojekh dženo, ko omukla vaš ma the vaš o evaņjelium peskero kher, vaj le phralen abo le pheņen, vaj la da abo le dades, vaj le čhaven abo o maļi,

³⁰ dochudela imar akana andre kada časos šelvar ajci khera, phralen, pheņen, dajen, čhaven the maļi – choc pre leste o manuša džana – a andro časos, so avela, o večno dživipen.

³¹ Ale but olendar, ko hine ešebne (perše), ena posledna a o posledna ena ešebne."

Tritovar vakerele pal peskero meriben

³² Džanas le dromeha upre andro Jeruzalem. O Ježiš džalal anglal lende a le učeņiken andro jilo na sas smirom. A ola, save džanas pal lende, pes daranas. Iła le dešudujen pale pre sera a vakerele, so pes leske ačhela:

³³ "Šunen, džas upre andro Jeruzalem a o Čhavo le Manušeskero ela dino le nekbareder rašajenge the le zakoņikenge. Odsudzinena les pro meriben a dena les le Nažidenge.

³⁴ Asana lestar, čhungarena pre leste, zbičinenena les a murdarena, ale pro trito džives uštela andral o meriben."

Le Zebedeoskere čhavengero mangipen

³⁵ O Jakob the o Jan, o čhave le Zebedeoskere, avle ko Ježiš a phende leske: "Učitelina, kamas, hoj amenge te keres sa, so tutar mangaha."

³⁶ Ov lenge phendā: "So kamen, hoj tumenge te kerav?"

³⁷ Odphende: "De amenge, hoj te bešas jekh pre tiri čači (pravo) a aver pre baļogņi (lavo) sera, akor sar bešeha pro tronos andre tiri slava."

³⁸ Ale o Ježiš lenge odphendā: "Tumen na džanen, so mandar mangel. Či šaj pijen odi kuči, savi me pijav, a či šaj aven bolde ole bolipnaha, saveha me som boldo?"

³⁹ Odphende: "Šaj." O Ježiš lenge phendā: "Čačipen hin, hoj pijena odi kuči, so me pijav. The ole bolipnaha, saveha som me boldo, the tumen avena bolde.

⁴⁰ Ale nane man pravos te phenel, ko bešela pal miri čači the baļogņi sera. Ola thana ena dine olenge, prekal kaste hine pririchtimen."

⁴¹ Sar oda šunde okla deš učeņika, sas chołamen pro Jakob the pro Jan.

⁴² Ale o Ježiš peske len vičindā: "Džanen, hoj o vladara lidžan le naroden zoraha a o bare raja trapinen le nipen.

⁴³ Ale maškar tumende te na el avke! Ale oda, ko kamel te el baro maškar tumende, mi el tumaro slugas.

⁴⁴ Oda, ko kamel te el te el maškar tumende ešebno, mi služinel savorenge.

⁴⁵ Bo aņi o Čhavo le Manušeskero na avla, hoj leske te služinen, ale hoj ov te služinel a te počinel peskere dživipnaha vaš o but manuša."

Sastarel le kores paš o Jericho

⁴⁶ Palis avle andro Jericho. Sar avelas o Ježiš le učeņikenca the but manušenca avri andral o Jericho, o koro Bartimeus, le Timaoskero čhavo, bešelasa paš o drom a žobrinelas.

⁴⁷ Sar šundā o koro, hoj avel o Ježiš Nazaretsko, chudła te vriskinel: "Ježiš, čhavo le Davidoskero, av ke ma jileskero!"

⁴⁸ O nipi leske phenenas, hoj te čhiteľ, no ov mek zoraleder vriskinelas: "Čhavo le Davidoskero, av ke ma jileskero!"

⁴⁹ O Ježiš zaačhiła a phendā: "Vičinen les!" Vičinde le kores a phende leske: "Ma dara! Uštī, vičinel tut!"

⁵⁰ O koro čhidā tele peskero plaštōs, chučila upre a geła ko Ježiš.

⁵¹ O Ježiš leske phendā: "So kames, hoj tuke te kerav?" O koro leske odphendā: "Učitelina, kamav te dikhel!"

⁵² Akor leske o Ježiš phendā: "Dža, tiro pačaben tut sastardā!" Ov takoj chudła te dikhel a džalal pal o Ježiš.

Le lašaribnaha avel andro Jeruzalem

11 Sar imar sas pašes paš o Jeruzalem, paš e Betfaga the Betanija pre Olivovo Verchos, bičhada o Ježiš duje peskere učeņiken

² a phendā lenge: "Džan andre kada gav, so hin angle tumende, a takoj soča džana andre, arakhena zaphandles somaricis, pre savo mek ņiko na bešla. Odphanden les a anen les kade.

³ Te tumendar vareko phučela: "Soske oda keren?" – phenen leske: "Le Rajeske les kampel, ale maj lesanela pale."

⁴ Gele a arakhle le somaricis zaphandles ko vudar, avri paš o drom a odphandle les.

⁵ Varesave nipi, save ode ačhenas, phučle lendar: "Soske odphanden le somaricis?"

⁶ On lenge odphende avke, sar lenge phendā o Ježiš, a mukle len te džal.

⁷ Avke ande le somaricis ko Ježiš, čhide pre leste peskere gada a o Ježiš peske pre leste bešļa.

⁸ But džene rakinenas peskere gada pro drom a aver čhingerenas o prajti pal o stromi pre maļa a rakinenas pro drom.

⁹ Ola nipi, save džanas angle leste the pal leste, vičinenas:

"Hosanna! Požehñimen oda, ko avel andro nav le Rajeskeru!"

¹⁰ Požehñimen hin o krališagos amare dadeskero le Davidoskero, savo avel! Hosanna andro ņebos!"

¹¹ O Ježiš geļa andro Jeruzalem andro chramos a savoro peske predikhļa. Palīs odgeļa le učeñikenca andre Betanija, bo sas but ori.

Prekošel o figovñikos

¹² Sar pre aver džives gele andral e Betanija, sas bokhalo.

¹³ Dural dikhļa o figovñikos a geļa te dikhel, či upre na ela varesavo ovcje. Ale sar doavļa ko stromos, na sas upre nič, ča o prajti, bo na sas le figengero časos.

¹⁴ Akor o Ježiš phendā: "Imar buter šoha (ñikda) te na chal ñiko tiro ovcje!" A šunde ada leskere učeñika.

Žužarel o chramos

¹⁵ Sar avle andro Jeruzalem, o Ježiš geļa andro chramos a chudļa te tradel avri olen, save cinenas the bikenenas. Previsarđa o skaminda olenge, save vatine nas o love, the olenge, save bikenenas le holuben.

¹⁶ A na domukļa ñikaske, hoj vareso te prelidžal prekal o chramos.

¹⁷ Sar len sikavelas, phenelas: "Či nane pisimen: 'Miro kher pes vičinelu kher prekal o modlitbi prekal savore narodi? Ale tumen lestar kerđan kher prekal o živaña!'"

¹⁸ Šunde ada o zakoñika the o nekbareder rašaja a rodenas, sar les te murdarel. Daranas lestar, bo le nipenge sas pre dzeka, so o Ježiš sikavelas.

¹⁹ Sar zaračolas, džanas avri andral o foros.

O sikaviben pal o figovñikos

²⁰ Palīs sig tosara, sar džanas pašal o figovñikos, dikhle, hoj calo šučilā avri dži andro koreñis.

²¹ O Peter peske leperđa, so phendā o Ježiš, a phendā leske: "Učitělina, dikh, o figovñikos, so prekošlal, šučilā avri!"

²² O Ježiš odphendā le učeñikenge: "Mi el tumen o pačaben andro Del!"

²³ Bo čačipen phenav tumenge, te vareko phendahas kale verchoske: 'Hazde tut a čhiv tut andro moros' a te na pochibinela andre peskero jilo, a pačal, hoj pes leske oda ačhela, so phenel, ela leske oda kerdo.

²⁴ Vašoda tumenge phenav: Pačan, hoj savoro, vaš soske tumen mangel andre modlitba, imar chudljan a hino tumaro.

²⁵ Sar tumen džan te modlinel, a hin tumen vareso pre varekaste, odmuken lenge oda, hoj the tumaro Dad andral o ņebos te odmukel tumare bini."

²⁶ ["Te tumen na odmukena, añi tumaro Dad andral o ņebos tumenge na odmukela tumare bini."]

O phučiben pal le Ježišoskeri autorita

²⁷ Avle pale andro Jeruzalem. Sar pes o Ježiš predžalas pal o chramos, avle ke leste o nekbareder rašaja, o phuredera the o zakoñika

²⁸ a phučle lestar: "Sava zoraha keres kala veci? Ko tut diña odi autorita, hoj te keres kala veci?"

²⁹ O Ježiš lenge odphendā: "The me tumendar vareso phučava. Odphenen mange a me tumenge phenava, sava autoritaha kerav kala veci.

³⁰ Khatar sas le Janoskero bolipen? Andral o ņebos, vaj le manušendar? Odphenen mange!"

³¹ On gondolīnenas maškar peste: "Te phenaha: 'Andral o ņebos', phenela: 'Akor soske leske na pačandilān?'"

³² Ale te phenaha: 'Le manušendar...!' – on daranas pes le nipendar, bo savore nipi pačanas, hoj o Jan sas čačikano prorokos.

³³ Avke odphende le Ježišoske: "Na džanas." Akor lenge o Ježiš odphendā: "Añi me tumenge na phenava, sava autoritaha kerav kala veci."

Pal o nalače viñicakere chulaja

12 O Ježiš lenge chudļa te vakere andro podobestva: "O manuš peske sadzindā e viñica a ohradzindā la. Kerđa e chev, kaj pes pučinel avri e šta-va andral o hroznos, a ačhađa e veža. Palīs diña e viñica kečeñ le chulajenge a geļa het pro droma.

² Sar avļa o časos, hoj pes kidelas upre o hroznos, bičhađa peskere slugas ko chulaja, hoj les te den olestar, so kidle upre.

³ On les chudle, marde les, na dine les nič a bičhade les het.

⁴ Pale ke lende bičhađa avre slugas, ale leske pharade o šero a asandile les avri.

⁵ Ov pale bičhađa avres, no les murdarde. Mek but sluhlen bičhađa, ale jekhen marenas a avren murdarenas.

⁶ Akor bičhađa ke lende peskere jekhores čhas, saves igen kamelas, bo phendā peske: 'Dena pačiv mire čhas.'

⁷ No ola chulaja peske phende: 'Leske ačhela savoro. Aven, murdaras les a leskero đedictvos ela amaro!'

⁸ Avke les chudle, murdarde a čhide avri andral e viñica."

⁹ O Ježiš phučļa: "No, so kerela o raj la viñicakero? Avela, murdarela ole chulajen a e viñica dela avrengē."

¹⁰ A phendā: "Na gendān, so hin pisimen:

'O murara odčhide ipen oda bar, so pre stavba hino hlavno.

¹¹ *O Raj oda kerda a amen pes oleske čudalinas?"*

¹² Kamenas les te zachudel, bo achalile, hoj pal lende phenda kada podobenstvo. Ale daranas pes le nipendar, vašoda les mukle a gele het.

O phučiben pal o daňe

¹³ Palis ke leste bičhade varesave Farizejen the Herodijanen, hoj les te chuden andro lava.

¹⁴ Sar avle ko Ježiš, phende leske: "Učitelina, džanas, hoj vakeres čačipen a na džal tuke pal oda, so o manuša phenen, bo tu na dikhes pro manuš, ale sikaves le Devleskero drom andro čačipen. Phučas tutar: Kampil te počinel le Cisariske o daňe, či na? Kampil te del, vaj na kampil?"

¹⁵ O Ježiš prindžarda lengero budžaňdipen a phenda lenge: "Soske man kamen te chudel pro lav? Anen mange o denaris (e minca), hoj les te dikhav."

¹⁶ On ande a o Ježiš lendar phučla: "Kaskero hin kada obrzis the nav?" On leske odphende: "Le Cisariskero."

¹⁷ Avke lenge o Ježiš phenda: "Den oda, so hin le Cisariskero, le Cisariske, a so hin le Devleskero, le Devleske." A igen pes čudalinas.

Pal o uštiben andral o meriben

¹⁸ Avle ke leste o Saduceja. On pačan, hoj o manuš našti uštél andral o meriben.

¹⁹ A phučle le Ježišostar: "Učitelina, o Mojžiš amenge pisinda, hoj te muľahas varekaske o phral a mukela la romňa bi o čhave, hoj leskero phral peske la mušinelate lel romňake, hoj te kerel le phraleske čhaven."

²⁰ Sas efta phrala. Ešebno peske iľa romňa a muľa, ale na sas len čhave.

²¹ Palis laha ačhila dujto phral a tiš muľa bi o čhave, avke varesar sas the tritone phraleha.

²² Avke laha dživenas savore efta phrala, no űnikastar la na sas čhave. Palis, sar mule avri savore phrala, muľa the oj.

²³ Akor kaskeri lendar ela romňi, sar uštěna andral o meriben, te savore efta phrala laha dživenas?"

²⁴ O Ježiš lenge odphenda: "Tumen čačes na achalõn, bo na prindžaren le Devleskero Lav aňi leskeri zor."

²⁵ Bo sar uštěna o mule andral o meriben, na lena romňen a na džana romeste, ale ena sar o aňjela andro űnbos.

²⁶ Te džal pal o mule, save uštěna andral o meriben: Tumen na gendan andro Mojžišoskero Zakonos, hoj o Del leske paš o labardo krakos phenda: *'Me som o Del le Abrahmoskero, o Del le Izakoskero the o Del le Jakoboskero'*?

²⁷ O Del nane Del le mulenge, ale le džidenge. Tumen čačes űisoske na achalõn."

O nekbareder prikazaňje

²⁸ Androda avľa pašeder jekh le zakoňikendar, bo šunda, sar pes le Ježišoha vesekedinas o zakoňika, a

džanľa, hoj lenge o Ježiš mištes odphenda. A phučla lestar: "Savo prikazaňje hin nekbareder maškar savore?"

²⁹ O Ježiš leske odphenda: "Nekbareder maškar savore prikazaňje hin: *'Šun, Izrael! O Raj, amaro Del, hin jekh Raj!'*

³⁰ *Kameha le Rajes, tire Devles, andral calo tiro jilo, andral cali tiri duša, andral cali tiri godi the andral cali tiri zor!'*

³¹ Dujto hin kada: *'Kameha avres avke, sar pes korkores!'* Bareder prikazaňje kalendar imar nane."

³² O zakoňikos leske phenda: "Mištes, učitelina! Čačipen phenda, hoj hin ča jekh Del a aver nane."

³³ A te kamel les andral calo peskero jilo, andral cali godi, andral cali duša the andral cali zor a te kamel avres avke, sar pes korkores, hin buteder sar savore labarde the aver obeti."

³⁴ O Ježiš dikhľa, hoj o zakoňikos godaha odphenda a phenda leske: "Na sal dur le Devleskere krališagostar." A imar buter űiko pes na tromandila (odvažinda) te phučel vareso le Ježišostar.

O phučiben pal o Davidoskero čhavo

³⁵ Sar o Ježiš sikavelas andro chramos, phenda: "Sar oda, hoj o zakoňika phenen, hoj o Kristus hin o čhavo le Davidoskero?"

³⁶ Bo korkoro o David phenda prekal o Sentno Duchos:

'O RAJ phenda mire Rajeske: Beš tuke pal miri čači (pravo) sera, medik tuke na thovava tire űeprijateľen tel o pindre.'

³⁷ Te korkoro o David les vičinel 'Rajeja', sar šaj avel o Kristus leskero čhavo?" A but nipi les radišagoha šunenas.

Te merkinen pro zakoňika

³⁸ Sar len o Ježiš sikavelas, phenelas lenge: "Den tumenge pozoris pro zakoňika, bo on kamen te phirel andro šukar džindarde gada a kamen, hoj len o nipi andro foros te pozdravinen;"

³⁹ kamen anglune thana andro sinagogi a nekfeder thana pro hoscini;

⁴⁰ thoven avri le vdoenca a len lengere khera, ale but pes modľinen, hoj len te dičhol. Vašoda ena gored-er sudzimen."

E čori vdova del nekbuter

⁴¹ O Ježiš peske bešľa andro chramos paš e pokladňica a dikhelas, sar o nipi andre čhivkerenas o love. But barvale čhide but.

⁴² Androda avľa jekh čori vdova a čhida duj churde minci, so na sas but love.

⁴³ Akor o Ježiš vičinda le učeňiken ke peste a phenda lenge: "Čačipen phenav tumenge, hoj kadi čori vdova čhida buter sar savore aver, save čhivkerenas andre pokladňica."

⁴⁴ Bo savore čhide olestar, so lenge ačhelas, ale oj čhida peskere čoripnastar savoro, so la sas pro dživipen."

O chamos ela tele čhido

13 Sar avelas o Ježiš avri andral o chamos, phendā leske jekh le učēnikendar: "Dikh, Rajeja, save bara the save stavbi!"

² O Ježiš leske odphendā: "Dikhes kala bare stavbi? Na ačhela kade bar pre bareste; sa ela tele čhido."

O anglune dukha le svetoskere

³ Sar bešelas pre Olivovo brehos, khatar dičhol o chamos, avle ke leste korkore o Peter, o Jakob, o Jan the o Andrej a phučle lestar:

⁴ "Phen amenge, kana oda avela? Pal soste prindžaraha, hoj oda imar hin pašes?"

⁵ O Ježiš lenge chudlā te vakerel: "Merkinen, hoj tumen vareko te na klaminel!"

⁶ Bo ena but ajse, save avena andre miro nav a phenena: 'Me som o Kristus!' a cirdena pro falošno drom but dženen.

⁷ Sar šunena pal o maribena a hoj pes maren o narodi, ma predaran, bo oda mušinel te avel, ale mek na ela o koñec.

⁸ Bo o narodos džala pro narodos a o krališagos pro krališagos. Pre varesave thana e phuv razisaľola a ela bari bokh. Oda ela o anglune dukha le svetoskere andro trapišagos.

⁹ Ale tumen pre peste merkinen! Vaš ma tumen lena pro sudi; andro sinagogi tumen dena te marel a vaš ma ačhena anglo bare raja the anglo kraľa, hoj lenge te svedčinel.

¹⁰ Ale anglođa ešeb (peršo) musaj te avel vakerdo o evaňjelium savore narodenge.

¹¹ Sar tumen lidžana, hoj tumen te phanden andre, ma starinen tumen pal oda, so vakerena. Ale vakeren oda, so tumenge odi ora ela dino te phenel, bo na tumen vakerena, ale o Sentno Duchos.

¹² Phral phrales dela andre, hoj les te murdarel, a o dad peskere čhas. O čhave džana pre daj the pro dad a murdarena len.

¹³ Vaš miro nav tumen savoredžene našti avri ačhena. Ale oda, ko likerela avri andro pačaben dži o agor, ela spasimen."

O baro pharipen

¹⁴ "Sar dikhena oda baro džungipen, so meľarel andre o chamos, pre oda than, kaj na majinel te el – oda, ko genel, mi ačalol – akor ola, save ena andre Judsko, mi denašen upre pro verchi.

¹⁵ Oda, ko ela pre strecha, te na avel tele, hoj peske vareso te lel andral o kher.

¹⁶ Oda, ko ela pre maľa, te na visaľol pale khere vaš o gada.

¹⁷ No andre ola dživesa ela igen phares le khabňenge the ole džuvľenge, save den te pijel le čhavoren.

¹⁸ Modľinen tumen, hoj pes oda te na ačhel jevende!

¹⁹ Bo ola dživesa ena ajse phare, sar mek šoha (ňik-da) na sas, kanastar o Del stvorinda o svetos, a imar šoha buter na ela.

²⁰ A te o Raj na kerđahas frimeder ola dživesa, na uľahas zachraňimen ňisavo manuš. Ale vaš o manuša, saven peske kidňa avri, kerđa ola dživesa frimeder.

²¹ Te tumenge akor vareko phendahas: 'Dikh, kade hin o Kristus!' abo: 'Kode hino!' – ma pačan.

²² Bo avena but falošna mesijaša, save phenena pal peste, hoj hine o Kristus, the but falošna proroka a kerena bare znameňja the zazraki, hoj te cirden pro falošno drom – te pes diňahas – the olen, kas peske o Del kidňa avri.

²³ Tumen pre peste merkinen! Savoro tumenge phendom anglal."

Sar avela o Čhavo le Manušeskero

²⁴ "Andre ola dživesa, pal oda pharipen, o kham kaľola a o čhonor o imar na labola.

²⁵ O čerčeňa perena andral o ňebos a o ňeboskere zora pes čhalavena.

²⁶ Akor dikhena *le Čhas le Manušeskere te avel pro ňeboskere chmari* andre zor the andre bari slava.

²⁷ Ov bičhavela peskere aňjelen, hoj te skiden upre leskere avrikidle manušen pal savore štar seri le svetoske – andral jekh agor pre phuv dži andre aver."

O podobenstvo pal o figovňikos

²⁸ "Le figovňikostar peske len o podobenstvo: Sar leskere konara hine imar kovle a o prajti aven avri, džanen, hoj o ňilaj hino pašes.

²⁹ Avke the tumen, sar dikhena, hoj pes oda savoro ačhel, džanen, hoj oda hino pašes paš o vudar.

³⁰ Čačipen phenav tumenge, hoj na predžala kada pokoleňje, medik pes kada savoro na ačhela.

³¹ O ňebos the e phuv našľona, ale mire lava šoha na našľona."

Te merkinel a te na zasovel

³² "Ale ole dživesestar the ola oratar na džanel ňiko, aňi o ňeboskere aňjela, aňi o Čhavo, ča jekh o Dad.

³³ Merkinen pre tumende, ma zasoven! Bo na džanen, kana avela odi ora.

³⁴ O Čhavo le Manušeskero hino ajso sar jekh manuš, savo omukľa peskero kher a geľa het. Le sluhenge diňa pes pal oda te starinel. Phendā dojekheske, so te kerel, a le vartašiske (stražňikoske) prikazinda, hoj te merkinel a te na zasovel.

³⁵ Vašoda merkinen a ma zasoven, bo na džanen, kana avela o raj le khereskero: Či rači, vaj pal jepaš rat, či akor, sar o kohutos gilavel, vaj tosara.

³⁶ Hoj te na avel akor, sar les na užarena, a arakhela tumen te sovel.

³⁷ So tumenge phenav, savorenge phenav: 'Ma zasoven!' "

Roden sar le Ježiš te murdarel

14 Sas mek duj džives angle Patrađi the anglo Inepos, sar pes chal o mare bi o drožđi. O bare rašaja the o zakonička rodenas, sar le Ježiš počoral te chudel a te murdarel.

² Ale phenenas: "Našti oda keras pro inepos, hoj pes te na vzburinen o manuša."

E džuvli pomakhel le Rajes

³ Sar sas andre Betanija andro kher ko Šimon, saves sas malomocenstvo, a bešelasa paš o skamind, avla ko Ježiš jekh džuvli. Ola džuvla sas caklocis le alabastrostar a andre sas igen dragano olejos andral o narodos. Phagla o caklocis a čhida avri oda olejos le Ježišoske pro šero.

⁴ Varesave olendar, save ode sas, dudrinenas: "Nane zijan, kajso dragano olejos?"

⁵ Kada olejos pes šaj bikenda vaš o trin šel (300) rupune minci † a šaj pes diňa le čorenge." A igen lake dovakerenas.

⁶ Ale o Ježiš phenda: "Muken la! Soske la trapinen? Lačno skutkos mange presikađa."

⁷ Bo o čore tumenca ena furt a lenge šaj keren lačhipen, kana ča kamena, ale me tumenca furt na avava.

⁸ Oj kerđa oda, so šaj – imar anglal pomakhla miro telos pro pohrebos.

⁹ Čačipen tumenge phenav, hoj všadzik, kaj pes o evaňjelium vakerela pal o svetos, pes phenela the oda, so kadi džuvli akana kerđa, pre lakero leperiben."

O Judaš pes dothovel le rašajenca

¹⁰ O Judaš Iškarijotsko, jekh le dešudujendar, geľa pal o nekbareder rašaja, hoj les te zradzinel.

¹¹ Sar oda on šunde, radisaľile a phende leske, hoj les dena vaš oda love. O Judaš akorestar rodelas drom, sar les te zradzinel.

Pririchtinen e posledno večera

¹² Ešebno džives andro Inepos, sar pes chal o mare bi o drožđi, o džives, sar pes murdarel la Patrađakero bakroro, phende o učeňika le Ježišoske: "Kaj kames, hoj te džas a te pririchtinas o Patrađakero chaben?"

¹³ Akor bičhađa duje peskere učeňiken a phenda lenge: "Džan andro foros. Ode pes tumenca arakhela manuš, savo lidžala jekh džbanos paňi. Džan pal leste

¹⁴ a oleske, andre kaskero kher džala, phenen: 'O Učitelš tuke phenel: Kaj hin o than, kaj chaha le učeňikenca o Patrađakero chaben?'

¹⁵ Ov tumenge sikavela upruno baro than, so imar ela pririchtinen the pratimen avri. Ode amenge pririchtinen o chaben."

¹⁶ O učeňika gele andro foros a arakhle savoro avke, sar lenge o Ježiš phenda; a pririchtinde o Patrađakero chaben.

Phenel avri pal o zradcas

¹⁷ Rači avla o Ježiš le dešuduje učeňikenca.

¹⁸ Sar bešenasa paš o skamind a chanas, o Ježiš phenda: "Čačipen tumenge phenav, hoj jekh tumendar, savo manca chal, man zradzinela."

¹⁹ Sar oda šunde, ačhile smutne a phučenas lestar jekh pal aver: "Som oda me?"

²⁰ O Ježiš lenge odphenda: "Jekh le dešudujendar, oda, savo manca močinel o maro andro čaro."

²¹ O Čhavo le Manušeskero mušinel te merel, avke sar pal leste hin pisimen, ale ole manušeha, ko les zradzinela, ela igen namištes. Feder leske ulahas, te aňi na uliľahas (pes narodzindaľahas)."

E posledno večera

²² A sar chanas, iľa o Ježiš o maro, palikerđa le Devleske, phagerelas, delas lenge a phenda: "Len, [chan], kada hin miro telos."

²³ Palis iľa the e kuči, palikerđa, diňa lenge a savore pile andral.

²⁴ Phenda lenge: "Kada hin miro rat la zmluvake, so pes čhorel avri vaš but manuša."

²⁵ Čačipen tumenge phenav, hoj imar buter šoha (ňikda) na pijava olestar, so barol pre viňica, dži andre oda džives, medik les na pijava nevo andro krališagos le Devleskero."

Phenel, hoj o Peter les zaprinela

²⁶ Gilade jekh chvala, palis gele pre Olivovo Verchos.

²⁷ O Ježiš lenge phenda: "Adi rat man savore omukena, bo hin pisimen:

'Marava le pastjeris a o bakrora pes sa rozdenašena.'

²⁸ Ale sar uščava andral o meriben, džava angle tumende andre Galileja."

²⁹ Akor leske o Peter phenda: "Te tut savore omukena, me tut šoha na omukava!"

³⁰ O Ježiš leske odphenda: "Čačipen tuke phenav, hoj mek adi rat, sigeder sar o kohutos dujtovar gilavela, tu trival man zaprineha."

³¹ Ale o Peter mek buter vakerelas: "Čhoc tuha mušinava te merel, šoha tut na zaprinava." A savore učeňika avke phenenas.

E modlitba andre Getsemane

³² Palis avle pre ajsa than, so pes vičinel Getsemane. Ode phenda peskere učeňikenge: "Bešen tumenge kade, medik man modľinava."

³³ Iľa peha ča le Peter, le Jakob the le Jan a sas leske igen phares.

³⁴ A phenda lenge: "Miri duša hiňi pro meriben smutno, ačhen kade a ma zasoven."

³⁵ Geľa lendar sikra dureder anglal, peľa pre phuv a mangelas pes, hoj te pes del, či les našti kadi phari ora obdžal.

† 300 denara. Oda hin o beršeskero počňiben.

³⁶ Phenelas: "Abba, Dado, tu šaj keres savoro, le mandar kadi kuči! Ale na oda, so me kamav, ale so tu kames."

³⁷ Paľis avľa a arakhľa len te sovel. A phendā le Peteriske: "Soves, Šimon? Jekh ora na birindal upre te ačhel?"

³⁸ Ma soven a modľinen tumen, hoj te na džan andro pokušeňje, bo o duchos kamel, ale o telos hino slabo."

³⁹ O Ježiš pes geľa pale te modľinel a vakerelas pale ola lava.

⁴⁰ Sar avľa pale, arakhľa len pale te sovel, bo o jakha lenge perenas tele. A na džanle, so leske pre oda te phenel.

⁴¹ Avľa tritovar a phendā lenge: "Mek furt soven a odpočovinen tumenge? Preačhen! Avľa odi ora – dikhen, o Čhavo le Manušeskero hino dino andro vasta le binošenge.

⁴² Ušćen a džas, imar hino pašes miro zradcas."

Le Ježiš zalen

⁴³ Takoj androda, medik o Ježiš vakerelas, avľa o Judaš, jekh le dešudujendar, a leha avenas but nipi khatar o bare rašaja, zakoňika the phuredera le šabľenca the le pacenca andro vasta.

⁴⁴ Le Ježišoskero zradcas lenge diňa anglal te džanel: "Oda, kas čumidava, hin ov. Zalen les a mištes les odlidžan het."

⁴⁵ Sar doavľa, takoj geľa ko Ježiš a phendā leske: "Rabbi!" A čumidľa les.

⁴⁶ Ola nipi les takoj chudle a zaile.

⁴⁷ Varesavo dženo, savo pašes ačhelas, iľa avri e šabľa a demađa le sluhas le nekbaredere rašaskere a odčhindā leske o kan.

⁴⁸ O Ježiš lenge phendā: "Avke pre ma avľan le šabľenca the le pacenca sar pro živaňis, hoj man te zalen.

⁴⁹ Džives so džives somas maškar tumende andro chramos a sikavavas, ale na zaiľan man. Ale kada pes mušinel te ačhel, sar hin pisimen."

⁵⁰ Akor les savore omukle a denašle het.

⁵¹ Džalas pal leste varesavo terno manuš, urdo ča andre lepeda. The oles chudle,

⁵² ale ov mukľa e lepeda a lango denašľa het.

O Ježiš angle Bari Rada

⁵³ Ľigende le Ježiš ko nekbareder rašaj, kaj pes zgele savore anglune rašaja, o phuredera the o zakoňika.

⁵⁴ O Peter avelas pal leste dural a doavľa dži andre le nekbareder rašaskeri dvora. Ode peske bešľa le stražňikenca paš e jag.

⁵⁵ O anglune rašaja the e caľi Bari Rada kamenas te arakhel vareso pro Ježiš, hoj les te murdaren, ale našti arakhle.

⁵⁶ But falošna švedki namištes vakerenas pro Ježiš, ale o lava lenge na bešenas.

⁵⁷ Varesave džene ušćile a svedčinenas pre leste klamišagoha:

⁵⁸ "Amen šundam, sar phendā: 'Čhivava tele kada chramos, so o manuša ačhade, a tel o trin džives kera-va aver, so na ela ačhado le manušestar.' "

⁵⁹ Ale aňi kala lava lenge na bešenas.

⁶⁰ Akor ušćila o nekbareder rašaj, ačhila maškaral a phučľa le Ježišostar: "So, nič na phenes pre oda, so pre tute kala nipi vakeren?"

⁶¹ Ale o Ježiš sas čhit a na phendā mek aňi lav. O nekbareder rašaj pale lestar phučľa: "Sal tu o Kristus, o Čhavo le Devleskero ?"

⁶² O Ježiš leske phendā: "Me som. *A dikhena, sar bešel o Čhavo le Manušeskero pre čači (pravo) sera le Nekzoralederese a sar avel pro űeboskere chmari.*"

⁶³ Akor čhingerđa o nekbareder rašaj peskere gada a phendā: "Pre soste amenge mek kampil švedken?"

⁶⁴ Šundān, sar pes ruhinel! So pre oda phenen?" A savore phende, hoj peske zasogalinel (zaslužinel) te mer-el.

⁶⁵ A varesave chudle pre leste te čhungarel. Za- učharenas leske o muj, marenas les pal o šero a phenenas leske: "Prorokin! Ko tut demađa?" Paľis les ile o stražňika a marenas les.

O Peter zaprinel le Ježiš

⁶⁶ Sar sas o Peter tele pre dvora, avľa ode jekh le nekbareder rašaskere služkendar.

⁶⁷ Sar dikhľa le Peter, hoj pes tačarel paš e jag, phendā: "The tu salas ole Ježišoha andral o Nazaret."

⁶⁸ Ale o Peter zaprinđa: "Me na džanav aňi na ačalu- vav, so vakeres!" A geľa odarik avri pre avruňi dvora. Akor o kohutos giľađa.

⁶⁹ Sar les ode dikhľa e služka, phendā pale okleng: "The kada hino jekh lendar."

⁷⁰ Ale o Peter pale zaprinđa. Ale na ľikerđa but a ola, save ačhenas paš o Peter, phende leske pale: "Tu sal čačes jekh lendar, bo sal Galilejčanos [a o vakeriben tut lenca hin jekh]."

⁷¹ Ale o Peter chudľa te košel a iľa pre peste vera: "Me na prindžarav ole manušes, pal savo tumen vakeren!"

⁷² Androda takoj giľađa o kohutos dujtovar. Akor avľa le Peteriske pre godi ola lava, so leske o Ježiš phendā: "Sigeder, sar o kohutos duvar giľavela, tu man trival zaprineha." A chudľa te rovel.

O Ježiš anglo Pilat

15 Takoj sig tosara pes dovakerde o nekbareder rašaja, o phuredera, o zakoňika the e Bari Rada. Phandle le Ježiš, odľigende les a diňe le Pilatoske.

² O Pilat lestar phučľa: "Sal tu o Židoviko kraľis?" O Ježiš leske odphendā: "Tu oda vakeres."

³ O nekbareder rašaja pre leste but vakerenas a ⁴ o Pilat lestar pale phučľa: "So, nič na odphenes? Dikh, keci pre tu vakeren!"

⁵ Ale o Ježiš imar na odphendā. Vašoda pes o Pilat igen čudalinelas.

O Ježiš odsudzimen pro meriben

⁶ Furt pro inepos lenge premukelas jekhe bertenošis, saves peske on kidenas avri.

⁷ Akor sas andre bertena jekh, saves vičinenas Barabaš. Ov sas zaphandlo olenca, save paš e vzbura murdarde varesave manušen.

⁸ Sar o nipi avle, chudle te mangel le Pilat, hoj lenge te premukel jekhe bertenošis, avke sar furt.

⁹ O Pilat phučļa: "Kamen, hoj tumenge te premukav le Židovike kralis?"

¹⁰ Bo džanelas, hoj les o nekbareder rašaja dine andre zavistatar,

¹¹ ale o bare rašaja kerde upre le nipen, hoj te mangel le Barabaš.

¹² O Pilat lendar pale phučļa: "Akor so kamen, hoj te kerav oleha, kas vičinen Židoviko kralis?"

¹³ On vriskinde: "Ukrižin les!"

¹⁴ O Pilat lendar phučļa: "So ajsa nalačo kerda?" No on mek zoraleder vriskinenas: "Ukrižin les!"

¹⁵ Vašoda o Pilat lenge premukļa le Barabaš, bo kamelas le nipenge te kerel pal e dzeka. Palis prikazinda, hoj le Ježiš te zbičinen a diňa les te ukrižinel.

O slugađa les asan avri

¹⁶ O slugađa les ligende andre le vladariskero palacis – oda hin o Praetorium – a vičinde cali čata.

¹⁷ Urde les upre andro purpurovo plaštós a thode leske pro šero koruna, so kerde le kandrendar (trëndar).

¹⁸ A chudle pre leste te vičinel: "Mi dživel o Židoviko kralis!"

¹⁹ Marenas les pal o šero le pacenca, čungarenas pre leste, perenas pro khoča a bandonas anglal leste.

Ukrižinen le Ježiš

²⁰ Sar lestar imar preačhile te asal, čhide pal leste tele o purpurovo plaštós a urde pre leste leskere gada. Palis les ligende avri, hoj les te ukrižinen.

²¹ Akor varesavo Šimon Cirenejsko, o dad le Alexandroskero the le Rufoskero, avelas pal e maļa. Leske prikazinde, hoj te lidžal le Ježišoskero kerestos.

²² A lidžanas le Ježiš pro than, so pes vičinel Golgota (oda hin prethodo: Le Lebkengero Than).

²³ Dine les te pijel mol mišimen la mirraha †, ale ov na kamļa.

²⁴ Ukrižinde les a leskere gada maškar peste rozulade le losoha.

²⁵ Eňa orendar †† tosara les ukrižinde.

²⁶ Upral leskero šero sas pisimen leskeri vina: "Le Židengero Kralis."

²⁷ Jekhetane leha ukrižinde duje živažen, jekhes pal e čači (pravo) sera a dujtones pal e balogņi (lavo).

²⁸ [Akor pes ačhiļa oda, so hin pisimen: "Lidžanas les sar živaņis."]

† E mirra hin o kirko koreņje. †† Grekengeri čhib: E trito ora

²⁹ Ola manuša, save odarik predžanas, pes ruhinenas pre leste, kerenas le šerenca a phenenas: "Tu, savo čhives tele o chramos a tel o trin džives les ačhaves!"

³⁰ Zachraņin tut korkoro a av tele pal o kerestos!"

³¹ The o nekbareder rašaja le zakoiņenca asanas maškar peste: "Avren zachraņinelas a pes našti zachraņinel?"

³² O Kristus, o Izraeliko kralis! Akana mi avel tele pal o kerestos, hoj te dikhas a te pačas!" Asanas lestar mek the ola, save sas leha ukrižimen.

O Ježiš merel

³³ Dešuduj (12) orendar ‡ pro dilos avļa kalipen pal cali phuv a likerđa dži trin ori †† pal o dilos.

³⁴ A trin orendar o Ježiš zoraha vičinda: "Eloi, Eloi, lama sabachtani?" – so hin prethodo: "Devla miro, Devla miro, soske man omukļa!"

³⁵ Varesave džene, save ode ačhenas, oda šunde a phenenas: "Šunen, vičinel le Eliaš."

³⁶ Jekh dženo denašel as te močinel e špongija andro šut, thoda la pre paca, diňa les te pijel a phenda: "Užaren! Dikhaha, či avela o Eliaš, hoj les te lel tele."

³⁷ Akor o Ježiš zorales vriskinda a muļa.

³⁸ O pochtan, so sas figimen andro chramos, phariļa pro jepaš uprunestar dži tele.

³⁹ O velitelis ačhelas paš leste a sar dikhļa, hoj kavke muļa, phenda: "Kada manuš sas čačas o Čhavo le Devleskero!"

⁴⁰ Varesave džuvļa dikhenas dural. Maškar lende sas e Maria Magdalena, e Salome, the e Maria – e daj le terneder Jakoboskeri the Jozesiskeri.

⁴¹ On phirenas pal leste a kerenas pašal leste, sar sas mek andre Galileja. Sas ode mek but aver džuvļa, save leha avle upre andro Jeruzalem.

Parunen le Ježiš

⁴² Sas o džives, kana pes richtinenas anglo Šabbat (sombat). Vašoda, sar imar zaračiļa,

⁴³ avļa o Jozef andral e Arimatija ko Pilat. Ov sas angluno muš andre Bari Rada, savo tiš užarelas o krališagos le Devleskero. Ov pes na daralas, avļa anglo Pilat a mangļa o telos le Ježišoskero.

⁴⁴ O Pilat pes čudalinda, hoj o Ježiš imar muļa.

Vičinda peske le velitelis a phučļa lestar, kana muļa.

⁴⁵ Sar pes dodžanļa le velitelistar, hoj imar muļa, diňa o telos le Jozefoske.

⁴⁶ O Jozef cinda lepeda, iļa le Ježišoskero telos tele a zapačarda andre lepeda. Thoda les andro hrobos, so sas avrikerdo andre skala, a zaučarda andre o vudar le bareha.

⁴⁷ E Maria Magdalena the e Maria le Jozesiskeri daj dikhenas, kaj les thoven.

‡ Grekengeri čhib: E šovto ora †† Grekengeri čhib: E eňato ora

O Ježiš uštel andral o meriben

16 Sar imar pregeľa o Šabbat (sombat), e Maria Magdalena, e Maria, e daj le Jakoboskeri, the e Salome cinde voňava oleja, hoj te pomakhen le Ježiš.

² Ešebno džives pal o Šabbat, sar avelas o kham avri sig tosara, avle ko hrobos.

³ A phenenas jekh avrake: "Ko amenge odcirdela o bar pašal o hrobos?"

⁴ Sar dikhle feder, dikhle, hoj oda bar, so sas igen baro, imar hino odčhido.

⁵ Gele andro hrobos, dikhle, hoj pre čači (pravo) sera bešel terno manuš, urdo andro džindarde parne gada, a darandile pes.

⁶ Ale ov lenge phendā: "Ma daran tumen! Roden le Ježiš Nazaretsko, oles, saves ukrižinde? Ov sas uštado andral o meriben. Nane ade! Dikhen, oda than, kaj les thode.

⁷ Džan, phenen le učeňikenge the le Peteriske: 'Džal andre Galileja anglal tumende a ode les dikhena, avke sar tumenge anglal phendā.' "

⁸ On denašle sig avri andral o hrobos, bo izdranas a ačhile bijal peste. Ńikasko nič na phende, bo pes daranas.

O Ježiš pes sikavel le učeňikenge

⁹ [Kurke sig tosara, sar uštíľa andral o meriben, pes ešeb (peršo) sikađa la Maria Magdalenake, andral savi angloda tradňa avri eŃta demonen.

¹⁰ Oj oda geľa te phenel le manušenge, save leha phirenas. On sas pal leste igen smutne a rovenas.

¹¹ On sar šunde, hoj o Ježiš dživel a hoj les dikhľa, na pačanas lake.

¹² Palis, sar džanas duj džene lendar andro gav, sikađa pes lenge pro drom o Ježiš andre aver podoba.

¹³ On pes visarde pale a phende oda oklengen, ale aňi lenge na pačandíle.

¹⁴ Ale palis pes sikađa le dešujekh (11) apoštolenge, sar bešenas paš o skamind. Pokarhindā len vaš oda, hoj lengere jile sas zaphandle a na pačanas olenge, save les dikhle pal oda, sar uštíľa.

¹⁵ Phendā lenge: "Džan pal calo svetos a phenen avri o evaňjelium savore manušenge!

¹⁶ Oda, ko pačala a dela pes te bolel, ela zachraňimen. Ko na pačala, ela odsudzimen.

¹⁷ Ola, save pačana, kerena kala veci: Andre miro nav tradena avri le demonen a vakerena neve čhibenca.

¹⁸ Te le sapen ílehas andro vasta, abo te pilehas vare-so meribnaskero, nič lende na ela. Pro nasvale thovenā o vasta a sastōna avri."

¹⁹ Sar lenca o Ježiš vakerelas, sas ilo upre andro Ńebos a bešľa peske pal e čači (pravo) sera le Devleske.

²⁰ On palis gele a vakerenas všadzík o evaňjelium. O Raj lenge pomožinelas a pridžanelas pes ke lengero lav prekal o zazraki, so kerenas.]

Amen.

LUKAŠ

O angluno vakeriben

1 Imar but džene kamenas te pisinel o veci, so pes ačhile ke amende,
² sar amenge oda podine ola, save sas služobníka andro lav a švedki ešebnovarestar (peršovarestar).
³ Vašoda, lačho Teofilona, the me mange phendom, hoj kampil mištes te predikhel a te predžal ole veci avke, sar pes ačhila, a te pisinel tuke,
⁴ hoj mištes te prindžares o čačipen pal ola veci, so tut sikavenas.

O Zachariaš the e Alžbeta

⁵ Sar sas o Herodes kralis upral e Judsko, dživelas varesavo rašaj o Zachariaš, savo sas jekh le Abijaškere rašajendar. Leskeri romňi e Alžbeta sas le Aronoskere potomkendar.
⁶ Soduj džene sas čačipnaskere anglo Del a dolikerenas bi e chiba savore zakoni the prikazaňja le Rajeskere.
⁷ Na sas len čhave, bo e Alžbeta našti ačhila khabňi a sodujdženenge sas imar buter berša.
⁸ Jekh džives, sar avľa pro Zachariaš o šoros, kerelas anglo Del e rašajiko služba,
⁹ bo le rašajen sas ajso zvikos te losinel a o losos peľa pre leste. A geľa andro chramos le Rajeskero, hoj te labarel o kaďidlos.
¹⁰ Akor, sar thuvisaľolas o kaďidlos, avri pes modľinenas igen but nipi.
¹¹ Androda pes sikaďa le Zachariašoske o aňjelos le Rajeskero a ačhelas pre čači (pravo) sera le oltariske, kaj pes labarelas o kaďidlos.
¹² Sar les dikhľa o Zachariaš, predarandíľa a avľa pre leste bari dar.
¹³ Ale o aňjelos leske phendľa: "Ma dara tut Zachariaš, bo tiro mangipen hin avrišundo! Tiri romňi e Alžbeta khabňola, uľola (narodzinela pes) lake muršoro a deha leske nav Jan.
¹⁴ Ela tut baro radišagos lestar a but džene radisafona, sar uľola!
¹⁵ Bo ov ela baro anglo Raj. Na pijela e mol aňi ňisavo aver pijiben a imar andre peskera dakero per ela pherardo le Sentne Duchoha.
¹⁶ Ov anela but dženen le Izraeloskere čhavendar pale ko Raj, ke lengero Del.
¹⁷ Ov džala anglo Del andro duchos the zor le Eliášoskeri, hoj te visarel o jile le dadengere pale ko čhave a te visarel olen, save na šunen le Devles, ke

godí the ko čačipen. Ov avke le Rajeske pririchtinela le nipen."

¹⁸ Ale o Zachariaš phendľa le aňjeloske: "Pal soste oda prindžarava? Me som imar phuro a the mira romňake hin but berša."

¹⁹ Akor leske o aňjelos odphendľa: "Me som o Gabriel, savo ačhel anglo Del, a som bičhado vašoda, hoj tuha te vakerav a te phenav tuke kada."

²⁰ Dikh, ačheha ňemo a našti prevakereha dží andre oda džives, sar pes oda ačhela! Bo na pačandíľal mire lavenge, save pes ačhena andre peskero časos."

²¹ O nipi užarenas le Zachariaš a čudalinenas pes, hoj pes kajci zlíkerďa andro chramos.

²² Sar avľa avri, našti ke lende prevakerďa a prindžarde, hoj dikhľa videňje andro chramos, bo sikavelas lenge le vastenca a ačhila ňemo.

²³ Sar pregele leskere dživesa andre služba, geľa pale khere.

²⁴ Pal ola dživesa ačhila khabňi e Alžbeta, leskeri romňi, a garuvelas pes pandž čhon.

²⁵ Phenelas: "Kada mange kerďa o Raj andre kala dživesa, sar pre ma dikhľa a iľa mandar e ladž anglal o nipi."

O aňjelos pes sikavel la Mariake

²⁶ Andre šovto čhon o Del bičhada le aňjelos Gabriel andro Galilejsko foros Nazaret

²⁷ ke pačivali džuvli Maria, savi sas mangadi le Jozefoha. O Jozef sas potomkos le Davidoskero.

²⁸ Sar avľa o aňjelos ke late, phendľa: "Radisaľuv! Chudľal o lačhipen (milost) le Devlestar! O Raj tuha." ["Bachtaľi sal maškar o džuvľa!"]

²⁹ E Maria na džanelas so te kerel a gondofinelas upral leskere lava, sar lake pozdravinda.

³⁰ Ale o aňjelos lake phendľa: "Ma dara tut Mario, bo arakhľal o lačhipen (milost) anglo Del.

³¹ Ačheha khabňi, uľola (narodzinela pes) tuke čhavoro a deha leske nav Ježiš.

³² Ov ela baro a vičanela pes Čhavo le Nekbaredereskero. A o Raj, o Del, leske dela o tronos le Davidoskero, leskere dadeskero.

³³ Kralinela upral o kher le Jakoboskero pro furt a leskere krališagoske na ela šoha (ňikda) koňec."

³⁴ E Maria phendľa le aňjeloske: "Sar pes oda ačhela, te som mek pačivali?"

³⁵ O aňjelos lake phendľa: "O Sentno Duchos avela pre tu a e zor le Nekbaredereskeri tut učharel andre.

Vašoda o sentno čavoro, so tutar uŕola, vičinela pes Čhavo le Devleskero.

³⁶ Dikh, tiri pašutni e Alžbeta, pre savi phende, hoj la našti el čhave, imar šovto čhon hiñi khabni, choc hiñi phuri.

³⁷ Bo o Del šaj kerel savoro."

³⁸ "Me som le Rajeskeri služobnička," phenda e Maria. "Mi ačhel pes mange pal tire lava." A o aňjelos latar odgeľa.

E Maria ke Alžbeta

³⁹ Andre ola dživesa e Maria uštifa a geľa sigo andro foros pre brehengeri phuv andre Judsko.

⁴⁰ Geľa andro kher ko Zachariaš a pozdravinda la Alžbetake.

⁴¹ Sar šundă e Alžbeta la Mariakero pozdravos, podčučila andre late o čavoro a e Alžbeta sas pherardi le Sentne Duchoha.

⁴² Vičinda zorale hangoha: "Tu sal bachtali maškar o džuvľa a bachtalo hin oda, ko tutar uŕola!

⁴³ Ale sar oda, hoj mire Rajeskeri daj avel ke mande?

⁴⁴ Bo soča šundifa andre mire kana tiro hangos, sar man pozdravinda, o čavoro radišagoha pes čhalada andre miro per!

⁴⁵ Bachtali sal, bo pačandila, hoj pes tuke ačhela, so o Raj phenda!"

E gili la Mariakeri

⁴⁶ E Maria phenda:

"Miri duša bararel le Rajes

⁴⁷ a miro duchos radisaŕol andro Del, miro Spasitelis,

⁴⁸ bo dikhľa peskera služobničakeri pokora. Akanas-tar man savore pokoleňja vičinenena bachtali,

⁴⁹ bo o Zoralo manca kerďa bare veci – sentno hin leskero nav.

⁵⁰ Le Devleskero lačhipen džal andral jekh pokoleňje pre aver olenge, save pes lestar daran.

⁵¹ Ov sikaďa e zor peskere vasteha a roztradňa olen, save pes hazdenas upre andro jile,

⁵² le zoralen čhida tele pal o tronos a hazďna upre olen, save sas tele dikhle;

⁵³ le bokhalen pheradňa lačhe vecenca a le barvalen bičhada het čučes (prazdnones).

⁵⁴ Pomožinda le Izraeloske, peskere služobnikoske, bo na bisterel pro lačhipen,

⁵⁵ avke sar phenelas amare dadenge, le Abrahamoske the leskere čhavage pro furt."

⁵⁶ E Maria laha ačhila vaj trin čhon a palis geľa pale khere.

O Jan Krstiteľ uŕol

⁵⁷ La Alžbetake avle o dživesa, hoj te ločhol (tele te pašŕol), a ulifa lake muršoro.

⁵⁸ Sar pes dodžanle lakere susedi the famelija, hoj o Raj lake presikaďa ajso lačhipen, radisaŕonas laha.

⁵⁹ Pre ohtoto džives avle te občhinel (obrezinel) le čhavores a kamle leske te del nav pal leskero dad, Zachariaš.

⁶⁰ Ale leskeri daj phenda: "Na, bo vičinela pes Jan."

⁶¹ Phende lake: "Se ňiko nane andre tiri famelija, ko pes avke vičinel!"

⁶² Vašoda le vastenca sikavenas le Zachariašoske, a pučle lestar, sar kamel te del nav.

⁶³ Ov peske mangľa tabulka a pisinda: "Leskero nav hin Jan." A savore pes čudalinenas.

⁶⁴ Jekhvareste pes leske pomukle o vušta the leskeri čhib. Chudľa te vakerel a lašarelas le Devles.

⁶⁵ Akor avľa dar pre savorende, save pašal lende bešenas, a pal caŕi brehengeri phuv andre Judsko pes vakerelas pal kala veci.

⁶⁶ Savore, so oda šunde, gondolinaenas andre peskere jile a phenenas: "So oda ča ela kale čhavorestar?" Bo le Rajeskeri vast sas upral leste.

Le Zachariašoskero proctvo

⁶⁷ O Zachariaš, leskero dad, sas pherardo le Sentne Duchoha a prorokinelas:

⁶⁸ "Požehñimen hin o Del, o Raj le Izraeloskero, bo avľa ke peskere nipi a cinda len avri.

⁶⁹ Diňa amen zorale Spasitelis andral o potomstvos le Davidoskero, peskere služobnikoskero,

⁷⁰ avke sar imar čirlastar vakerelas prekal o muja peskere sentne prorokengere,

⁷¹ hoj amen zachrañinela amare ñeprijaťendar the andral o vasta savorendar, save amen našti avri ačhen.

⁷² Aleha sikavel peskero lačhipen amare dadenge a leperel peske pre peskeri sentno zmluva,

⁷³ pro lav, so diňa le Abraham amare dades,

⁷⁴ hoj zachrañinela amen andral o vasta amare ñeprijaťendar, hoj te služinas leske bi e dar

⁷⁵ dojekh džives andre amaro dživipen, sentnes the andro čačipen.

⁷⁶ A tu, čhavoreja, vičineha tut prorokos le Nekbared-ereskero, bo džaha anglo Raj, hoj leske te pririchtines o droma;

⁷⁷ hoj te des leskere nipenge te džanel pal o spaseňje oleha, hoj lenge ela odmukle o bini.

⁷⁸ Bo prekal le Devleskero baro lačhejileskeriben avela o spaseňje ke amende andral o ñebos avke, sar avel avri o kham,

⁷⁹ hoj te del o svetlos olenge, ko bešen andro kaŕipen the andro ciňos le meribnaskero, hoj te lidžal amare pindre pro drom, kaj hin o smirom."

⁸⁰ O čavoro barolas a zoraŕolas andro duchos. Džive-las pre pušta dži andre oda džives, medik pes na sikaďa le Izraeloskere manušenge.

O Ježiš uŕol

2 Andre ola dživesa o Cisar Augustus diňa avri, hoj pes te zapisinen savore manuša.

² Kada ešebno zgendipen pes ačhila akor, sar sas o Kyrenios vladaris andre Sirija.

³ Savore pes gele te zapisinel – sako andre peskero foros.

⁴ Avke geľa the o Jozef andral o Galilejsko foros Nazaret andre Judsko, andro foros le Davidoskero, Betlehem, bo ov sas potomkos le Davidoskero,

⁵ hoj pes te zapisinel la Mariaha, savi sas leha man-gađi a sas khabňi.

⁶ Medik ode sas, avľa pre late o časos, hoj te ulol (narodzinel pes) o čhavoro.

⁷ Avke lake uliľa lakero ešebno čhavoro a pačardľa les andro pherne. Thoda les te pašľol andro jasle, bo na sas len than andro sovibnaskero kher, kaj te sovel.

O pastjera the o aňjela

⁸ Andre odi phuv sas o pastjera a stražinenas rači peskere bakren pre maľa.

⁹ Jekhvareste ačhiľa o aňjelos le Rajeskero angle lende a le Rajeskeri slava len zaučhardľa a igen pes daranas.

¹⁰ Ale o aňjelos lenge phendľa: “Ma daran tumen, bo avľom tumenge te phenel jekh baro radišagos, so ela prekal savore nipi!

¹¹ Bo adadžives tumenge uliľa andro foros le Davidoskero o Spasitelis – o Kristus, o Raj.

¹² A kada tumenge ela znameňje: Arakhena cikne čhavores zapačardes andro pherne te pašľol andro jasle.”

¹³ A jekhvareste pes sikađa le aňjeloha e ňeboskeri armada, save lašarenas le Devles a phenenas:

¹⁴ “E slava le Devleske upre pro ňebos a pre phuv o smirom le nipenge, savendar les hin o radišagos!”

¹⁵ Sar lendar o aňjela gele het andro ňebos, phende peske ola pastjera: “No ča džas andro Betlehem te dikhel, so pes ačhiľa, so amenge phendľa o Raj!”

¹⁶ Avke gele, sidărenas a arakhle la Maria le Jozefoha, the le čhavores, savo pašľol andro jasle.

¹⁷ Sar oda dikhle, vakerenas všadzik, so lenge sas phendo pal oda čhavoro.

¹⁸ Dojekh, ko šunda, so o pastjera vakerenas, pes oleske čudalinelas.

¹⁹ Ale e Maria likerelas savore kala lava andre peskero jilo a gondolinelas pal oda.

²⁰ Palis pes o pastjera visarde pale a lašarenas the bararenas le Devles vaš savoro, so šunde a dikhle, bo savoro sas avke, sar lenge phendľa o aňjelos.

Le Ježiš anen andro chramos

²¹ Sar pregeľa ochto džives a kampľa les te občhinel (obrezinel), dine leske nav Ježiš, avke sar phendľa o aňjelos, medik na khabňola leskeri daj.

²² Sar pregele ola dživesa, so pes obžučarenas, avke sar phenel le Mojžišoskero Zakonos, ande les upre andro Jeruzalem, hoj les te sikaven le Rajeske.

²³ Bo andre le Rajeskero Zakonos hin pisimen, hoj *dojekh muršoro, savo ešebno ulol, ela sentňardo prekal o Raj,*

²⁴ a o Zakonos mek prikazinda, hoj te obetinen *duje hrdličken, abo duje terne holuben.*

²⁵ Andro Jeruzalem dživelas jekh manuš, savo pes vičinelas Simeon. Oda sas ajsa manuš, savo pes dar-alas le Devlestar a sas čačipnaskero. Užarelas o spaseňje le Izraeloskero a o Sentno Duchos sas leha.

²⁶ Sas leske sikado le Sentne Duchostar, hoj na merela dži akor, medik na dikhela le Kristus, saves bičhavela o Raj.

²⁷ A liĝendo le Duchostar avľa andro chramos. E daj the o dad anenas le čhavores, le Ježiš, hoj te keren oda, so prikazinda o Zakonos.

²⁸ O Simeon les iľa pro vasta, bararelas le Devles a phendľa:

²⁹ “Rajeja, akana premukes tire služobňikos andro smirom, avke sar man diňal lav,

³⁰ bo mire jakha dikhle tiro spaseňje,

³¹ so pririchtinda angle savore narodi,

³² o svetlos, hoj te švicinel le narodenge a pre slava tire Izraeloskere manušenge.”

³³ O Jozef the leskeri daj pes čudalinenas upral oda, so pes pal leste vakerelas.

³⁴ O Simeon len požehňinda a phendľa la Mariake, leskera dake: “Kada čhavoro hino dino, hoj te peren abo te ušćen but džene andral o Izrael; the pro znameňje, pre savo but džene džana,

³⁵ hoj pes te sikavel oda, so peske gondolinen but džene andro jile. A prekal tiri duša predžala e šabľa.”

³⁶ Sas ode varesavi prorokiňa Anna, le Fanueloskeri čhaj andral o kmeňos le Ašeroskeri. Sas lake imar buter berša. Sar geľa romeste, dživelas leha ča eđa berš.

³⁷ Palis sas vdova dži ochtovardeš the štar (84) berš. Na džalas avri andral o chramos a rat-džives služinelas le Devleske andro posti the andro modlitbi.

³⁸ Ipen akor ode avľa the oj, lašarelas le Devles a vakerelas pal o Ježiš savorengenge, save užarenas, hoj o Jeruzalem ela zachraňimen.

³⁹ Sar kerde savoro, so phenel le Rajeskero Zakonos, gele pale andre Galileja, andre peskero foros, Nazaret.

⁴⁰ O čhavoro, o Ježiš, barolas the zoraľolas pro duchos; sas igen gođaver a le Devleskero lačhipen (milost) sas upral leste.

O Ježiš sar čhavoro andro chramos

⁴¹ A leskeri daj the o dad phirenas sako berš pre Patrađi andro Jeruzalem.

⁴² Sar leske sas dešuduj (12) berš, gele pre Patrađi, avke sar furt kerenas.

⁴³ Sar pregeľa e Patrađi, avenas pale khere. O čhavoro o Ježiš ačhiľa andro Jeruzalem, ale leskeri daj the o dad olestar na džanenas.

⁴⁴ On gondolinenas peske, hoj hino verekaj maškar ola nipi, save lenca džanas jekhetane. Pregele jekh džives drom a palis les rodenas maškar e famelija the maškar ola, saven džanenas.

⁴⁵ Sar les na arakhle, gele pale andro Jeruzalem a ode les rodenas.

⁴⁶ Pal o trin džives le Ježiš arakhle andro chramos te bešel maškar o učitelja, sar len šunelas a phučelas lendar.

⁴⁷ Dojekh, ko les šunelas, pes čudalinelas upral leskeri godi the upral oda, sar lenge odphenelas.

⁴⁸ Sar les dikhle, čudalinenas pes. E daj leske phenda: "Čhavoreha, soske amenge ada kerdal? Tiro dad the me tut rodahas a darahas pal tu."

⁴⁹ O Ježiš lenge phenda: "Sar oda, hoj man rodenas? So na džanenas, hoj mušinar te el andre mire Dadeskero kher?"

⁵⁰ Ale on na achalile ole laveske, so lenge phenda.

⁵¹ Geľa lenca pale, avľa andro Nazaret a šunelas len. Leskeri daj likerelas savore ola lava andre peskero jilo.

⁵² O Ježiš barolas andro godaveripen the pro telos a sas les lačhipen anglo Del a o nipi les rado dikhenas.

Pal o Jan Krstiteľ

3 Sar sas o Tiberius imar Cisarís dešupandžto (15.) berš a o Pontsko Pilat vladaris andre Judsko, o Herodes tetrarchas andre Galileja a o Filip, leskero phral, tetrarchas andre phuva Iturea the Trachonitida a o Lyzaniaš tetrarchas andre Abilena

² a sar sas nekbareder rašaja o Annaš the o Kajfaš, prevakerđa o Lav le Devleskero pre pušta ko Jan, ke le Zachariašoskero čhavo.

³ Ov phirelas pal calí phuv pašal o Jordan a kazinelas: "Odvísaren tumen le binendar a den pes te bolel, hoj o Del te odmukel tumare bini."

⁴ Avke sar hin pisimen andro zvitkos le prorokoskero Izaiašoskero:

"Kada hin o hangos, so vičinel pre pušta: 'Pririchtinen o drom le Rajeske, rovňaren avri leskere chodňiki!"

⁵ *Dojekh dolina ela začidi a dojekh verchos the brehos cikňola. Oda, so hin bango, ela rovno a oda drom, so hin pukľato, ela hladko.*

⁶ *A savore nipi dikhena o spaseňje le Devleskero."*

⁷ O Jan phenelas le nipenge, save avenas ke leste, hoj len te bolel: "Fajta sapengeri! Ko tumenge sikada, sar te denašel le Devleskera choľatar, so avela?"

⁸ Dživen avke, hoj o nipi te dikhen, hoj tumen visardan tumare binendar! A ma phenen tumenge: "Se o Abraham hino amaro dad! Bo phenav tumenge, hoj o Del kale barendar šaj kerel le Abrahamoskere čhaven!"

⁹ O tover imar hino prithodo paš o koreňis le stromengeri! Dojekh stromos, so na anel lačho ovocje, čhiven avri a čhiven pre jag!"

¹⁰ O nipi lestar phučenas: "So amenge akor kampil te kerel?"

¹¹ O Jan lenge odphenda: "Kas hin duj gada, mi del oles, kas nane, a kas hin chaben, mi kerel tiš avke!"

¹² The o colňika pes avle te bolel a phučle lestar: "Učitelina, amenge so kampil te kerel?"

¹³ Ov lenge phenda: "Ma kiden avri buter, sar tumenge hin phendo!"

¹⁴ A phučle lestar the o slugađa: "Amenge so kampil te kerel?" Phenda lenge: "O love ňikastar ma kiden avri

zoraha a pre ňikaste ma ispiden, hoj tumen te prepocinel. Aven spokojne oleha, so zaroden!"

¹⁵ O manuša užarenas pro Mesijašis a gondolinenas andre peskere jile pal o Jan, hoj ov hino Kristus.

¹⁶ Ale o Jan odphenda savoreng: "Me tumen bolav le paňeha, ale avel mandar vareko bareder, kaske na som hodno te rozphandel o sirimocis pre leskere sandalki. Ov tumen bolela le Sentne Duchoha the la jagaha.

¹⁷ Andre leskero vast hin o vejaris a ov prežužarela peskero humnos. O prežužardo div (zrnos) sthovela andre peskeri šopa, ale o phus labarela andre jag, so šoha (ňikda) na murdaľola."

¹⁸ Mek the andro but aver veci dovakerelas le manušenge a vakerelas lenge o evaňjelium.

¹⁹ Ale o Jan karhinelas le tetrarchas Herodes vaš e Herodijada, savi sas romňi le Filiposke, leskere phraleske, the vaš savore nalačhipena, so kerelas.

²⁰ A ke oda savoro, o Herodes kerđa mek oda, hoj le Jan phandľa andre bertena.

O Ježiš boldo

²¹ Akor, sar pes bolenas savore nipi, sas boldo the o Ježiš a sar pes modľinelas, jekhwareste phundriľa o ňebos

²² a o Sentno Duchos avľa pre leste andre podoba sar ĥolubica. Andral o ňebos šundiľa hangos: "Tu sal miro Čhavo, saves kamav, tutar man hin o radišagos."

O rodokmeňos le Ježišoskero Kristoskero

²³ Sar chudľa o Ježiš te kazinel, sas leske vaj tranda (30) berš a o manuša peske gondolinenas, hoj sas le Jozefoskero čhavo. Le Jozefoskero dad sas o Heli,

²⁴ leskero dad sas o Mattat, leskero o Levi, leskero o Melchi, leskero o Jannai, leskero o Jozef,

²⁵ leskero o Mattatiaš, leskero o Amos, leskero o Nahum, leskero o Esli, leskero o Nagge,

²⁶ leskero o Mahat, leskero o Mattatiaš, leskero o Se-mein, leskero o Jozech, leskero o Joda,

²⁷ leskero o Joanan, leskero o Resa, leskero o Zerubabel, leskero o Šealtiel, leskero o Neri,

²⁸ leskero o Melchi, leskero o Addi, leskero o Kosam, leskero o Elmadam, leskero o Er,

²⁹ leskero o Ješua, leskero o Eliezer, leskero o Jorim, leskero o Mattat, leskero o Levi,

³⁰ leskero o Simeon, leskero o Juda, leskero o Jozef, leskero o Jonam, leskero o Elijahim,

³¹ leskero Melea, leskero o Menamas, leskero o Mat-tatas, leskero o Natan, leskero o David,

³² leskero o Izaj, leskero o Obed, leskero o Boaz, leskero o Salmon, leskero o Nachšon,

³³ leskero o Amminadab, leskero o Admin †, leskero o Checron, leskero o Perek, leskero o Juda, leskero o Jakob,

³⁴ leskero o Izak, leskero o Abraham, leskero o Ter-ach, leskero o Nachor,

† Oda hin o Ram.

³⁵ leskero o Serug, leskero o Reu, leskero o Paleg, leskero o Eber, leskero o Šelach,

³⁶ leskero o Kainan, leskero o Arpachšad, leskero o Šem, leskero o Noach, leskero o Lamech,

³⁷ leskero o Matuzalem, leskero o Enoch, leskero o Jared, leskero o Mahalalel, leskero o Kenan,

³⁸ leskero o Enoš, leskero o Šet a leskero dad sas o Adam, savo sas le Devlestar.

O Ježiš pokušimen

4 O Ježiš avľa pale pašal o Jordan pherdo le Sentne Duchoha. O Duchos les lidžalas pal e pušća ² saranda (40) dživesa a ode sas pokušimen le bengestar. Andre ola dživesa nič na chalas, a pro agor ole dživesenge bokhalifa avri.

³ O beng leske phendā: "Te sal o Čhavo le Devleskero, phen, hoj kale barestar te ačhel maro."

⁴ O Ježiš leske odphendā: "*Hin pisimen, hoj o manuš na dživela ča le marestar, [ale dojekhe Devleskere lavestar!]*"

⁵ Palis les iľa o beng pro učo than a jekhvareste leske sikađa savore krališagi le svetoskere.

⁶ O beng leske phendā: "Tuke dava savori kadi zor the slava, bo mange hin diňa a dava la kaske kamav te del.

⁷ Te bandōha angle mande, kada savoro ela tiro."

⁸ O Ježiš leske odphendā: "*Ča anglo Raj, tiro Del, bandōha a ča leske korkoreske služineha!*"

⁹ Paloda les ligendā andro Jeruzalem, thođa les te ačhel upre pro agor le chamoske a phendā leske: "Te sal o Čhavo le Devleskero, čhiv tut kadarik tele.

¹⁰ Se hin pisimen: "*Prikazina peskere aňjelenge pal tu, hoj tut te chraňinen.*"

¹¹ *On tut chudena pro vasta, hoj te na demes o pindro pro bar."*

¹² O Ježiš leske odphendā: "*Hin phendo: 'Na pokušineha le Rajes, tire Devles!'*"

¹³ Sar o beng les imar preačhiľa te pokušinel, geľa lestar het, ale ča pre varesavo časos.

O Ježiš andro Nazaret

¹⁴ O Ježiš avľa andre zor le Duchoskeri pale andre Galileja a rozligendā pes pal leste o hiros kadarik pal cali odi phuv.

¹⁵ Ode len andro sinagogi sikavelas a savoredžene les lašarenas.

¹⁶ A avľa andro Nazaret, kaj bariľa avri. A avke, sar sas sikado, geľa pro Šabbat (sombatone) andre sinagoga. Sar ušćiľa te genel,

¹⁷ podine leske o zvitkos pal o prorokos Izaiaš. Phundrađa o zvitkos a arakhľa oda than, kaj sas pisimen:

¹⁸ "*O Duchos le Rajeskero hin pre mande, a vašoda man pomakhľa te vakerel le čorenge o evaňgelium, [bičhada man te sastarel olen, kas hin dukhade jile,] te del te džanel le zaphandlengge, hoj hine premukle; le korenge te phundravel o jakha; te premukel olen, save cerpinen,*

¹⁹ *a te del te džanel, hoj avľa bachtalo berš le Rajestar."*

²⁰ Phandľa andre o zvitkos, diňa les le sluhasko a bešľa peske. A savoredžene andre sinagoga visarde peskere jakha pre leste.

²¹ A chudľa lengge te vakerel: "Adadžives pes ačhile kala lava, so akana šundān."

²² Sa les denas čačipen a čudalinenas pes ole šukar lavenge, so avenas andral leskero muj. Phenenas: "Či nane ov le Jozefoskero čhavo?"

²³ A phendā lengge: "Tumen mange phenena kada podobenstvo: 'Doktorina, sastar pes korkores! Oda, so šundām, hoj kerďal andro Kafarnaum, ker the ade, kaj bariľal avri!'"

²⁴ A phendā: "Čačipen tumenge phenav, hoj nisave prorokos na den pačiv ode, kaj bariľa avri.

²⁵ Ale čačipen tumenge phenav, hoj sar dživelas o Eli-aš, sas but vdovi andro Izrael akor, sar na delas brišind trin the jepaš berš a avľa bari bokh pre cali phuv.

²⁶ No o Eliaš na sas bičhado ke nisavi lendar, ča ke vdova andre Sarepta andre phuv Sidon.

²⁷ A but malomocne sas andro Izrael, sar dživelas o prorokos Elizeus, ale niko lendar na sas obžuzardo, ča o Naman andral e Sirija."

²⁸ Sar oda šunde, savoredžene, save sas andre sinagoga, igen cholisafile.

²⁹ Ušćiľa a tradle les avri andral o foros a ligende les pro verchos, pre savo sas ačhado lengero foros, dži pro agor, hoj les odarik te čhiven tele.

³⁰ Ale ov pregeľa maškar lende a geľa het.

O Raj sikavel andro Kafarnaum

³¹ Palis geľa andre Galilejsko foros Kafarnaum a sikavelas len pro Šabbat.

³² A čudalinenas pes upral leskero sikaviben, bo leskero vakeriben sas zoralo.

³³ Andre odi sinagoga sas jekh manuš, savo sas zaphandlo nalačhe duchoha, demonoha. Ov zorales vriskindā:

³⁴ "Jaj, so amen hin tuha, Ježiš Nazaretsko! Avľal amen te murdarel? Me džanav, ko tu sal, oda Sentno le Devleskero!"

³⁵ O Ježiš les pokarhindā a phendā: "Čhit a džā andral leste avri!" O demonos les čhidā maškar lende a geľa andral leste avri a na kerďa leske nič nalačho.

³⁶ Akor avľa bari dar pre savorende a vakerenas maškar peste: "Savo hin kada lav, hoj andre autorita the andre zor rozkazinel le nalačhe duchenge a on džan avri?"

³⁷ A džalas pal leste o hiros pal cali odi phuv.

Sastarel le Peteriskera sasa

³⁸ Palis ušćiľa, avľa avri andral e sinagoga a geľa andro kher ko Šimon. A le Šimonoskera sasa sas bari horučka a mangelas les, hoj lake te pomožinel.

³⁹ O Ježiš zaačhiľa, dikhľa pre late a pokarhindā e horučka – a takoj la omukľa. E sasuj ušćiľa a kerelas pašal lende.

⁴⁰ Palis rači, sar zagela o kham, anenas savoredžene peskere nasvalen, save cerpinenas andro chocsave nasvalibena, ko Ježiš. A ov thovelas pre dojekh lendar o vasta a sastarelas len.

⁴¹ Andral o but džene džanas avri o demona a vriskinenas: "Tu sal o Kristus, oda Čhavo le Devleskero!" Ale ov len karhinelas a na domukelas lenge te vakerel, bo on džanenas, hoj ov hin o Kristus.

⁴² A sar sas pale džives, geľa odarik het pre omuklo than. O nipi les rodenas a avle dži ke leste a zlikerenas les, hoj te na džal lendar het.

⁴³ Ale ov lenge phendā: "Mušinav the avre forenge te vakerel pal o krališagos le Devleskero, bo pre oda som bičhado."

⁴⁴ Avke kazinelas andro sinagogi andre Judsko.

O Raj vičinel ešebne učeņiken

5 Jekhvar, sar o Ježiš ačhelas paš o Galilejsko moros, ispidenas pes pre leste o nipi, hoj te šunen le Devleskero lav.

² Akor dikhľa paš o brehos te ačhel duj lođki – o ribara len mukle ode, hoj te rajbinen o siti.

³ O Ježiš geľa andre jekh ole lođendar, so sas le Šimonoskeri, a mangľa les, hoj te džal sikra dureder la phuvatar. Bešľa peske a sikavelas le nipen andral e lođka.

⁴ Sar dovakerďa, phendā le Šimonoske: "Dža la lođka ha dureder andro bareder paňi a čhiven o siti, hoj te chuden le riben."

⁵ O Šimon leske odphendā: "Rajeja, calo rat kerahas buči a nič na chudľam, ale pre tiro lav čhivava e sita."

⁶ Sar ada kerde, chudle ajci ribi, hoj e sita lenge chudľa te čhindol.

⁷ Avke sikade le vasteha ole dženen, save sas pre oki lođka, hoj lenge te aven te pomožinel. On avle a pherarde soduj lođki avke, hoj chudle te tašľol.

⁸ Sar oda dikhľa o Šimon Peter, peľa pro khoča anglo Ježiš a phendā: "Dža mandar het, Rajeja! Me som binošno manuš!"

⁹ Bo ov the okla džene igen pes oleske čudalinenas, keci ribi chudle.

¹⁰ A čudalinenas pes the o Jakob le Janoha, le Zebedeuskere čhave, save kerenas buči jekhetane le Šimonoha. O Ježiš phendā le Šimonoske: "Ma dara tut, akanastar chudeha le manušen!"

¹¹ Avke, sar pricirdle o lođki ko brehos, omukle savoro a gele pal leste.

O malomocno manuš sastardo

¹² Jekhvar sas o Ježiš andre varesavo foros, kaj sas malomocno murš. Sar dikhľa le Ježiš, peľa anglal leste pro muj a mangelas les: "Rajeja, te kamľalas, šaj man sastares."

¹³ O Ježiš nacirdľa o vast, chudľa pes lestar a phendā: "Kamav, av sasto!" A takoj sas žužo andral o malomocenstvo.

¹⁴ O Ježiš leske prikazindā: "Ma phen oda ņikaske avri, ale dža, sikav tut le rašaske a obetin oda, so prikazindā o Mojžiš, hoj te sikaves savorenge, hoj sal sasto andral o malomocenstvo."

¹⁵ Ale o hiros pal leste pes furt dureder rozlidžalas. But nipi pes zdžanas, hoj les te šunen a hoj len te sastarel le nasvalibenendar.

¹⁶ Ale ov džalas pre pušťa korkoro, hoj pes ode te modľinel.

O Ježiš sastarel le banges

¹⁷ Andre jekh džives, sar sikavelas, bešenas pašal leste but Farizeja the zakoňika. On avle andral savore gavora andral e Galileja a Judsko the andral o Jeruzalem. A le Rajeskeri zor sas le Ježišoha, hoj te sastarel le nasvalen.

¹⁸ Androda avle ode murša, save lidžanas pro haďos jekhe manušes, savo sas bango. A rodenas drom, sar les te dochudel andro kher a te thovel anglo Ježiš.

¹⁹ Sas ode but nipi a na sas len khatar te džal andre, vašoda gele upre pro kher a mukle les tele le haďoha prekal e strecha maškaral o manuša anglo Ježiš.

²⁰ Sar dikhľa o Ježiš lengero pačaben, phendā o Ježiš le bangeske: "Manušeja, odmukle tuke hin o bini."

²¹ O zakoňika the o Farizeja chudle te gondolinel a phenenas peske: "Ko hin kada manuš, hoj pes kavke ruhinel! ņiko našti odmukel o bini, ča jekh o Del!"

²² Ale o Ježiš prindžardā, so peske gondolinen a phendā lenge: "Soske oda gondolinen andre tumare jile?"

²³ So hin lokeder te phenel: 'Odmukle tuke hin o bini,' či te phenel: 'Ušti a dža?'

²⁴ Ale vašoda, hoj te džanen, hoj le Čhas le Manušeskere hin pravos the zor pre phuv te odmukel o bini" – phendā le bangeske: "Tuke phenav: Ušti, le tuke tiro haďos a dža khere!"

²⁵ Ov takoj anglal lende uštiľa, iľa oda, pre soste pašľolas, chudľa te lašarel le Devles a geľa khere.

²⁶ Akor pes savoredžene čudalinenas a lašarenas le Devles. Avľa pre lende e dar a phenenas: "Adadžives dikhľam oda, so mek šoha (ňikda) na dikhľam."

O Raj vičinel le Levi

²⁷ Palis, sar geľa odarik avri, dikhľa jekhe colňikos, savo pes vičinelas Levi, te bešel pre colňica a phendā leske: "Av pal ma!"

²⁸ Ov uštiľa, omukľa savoro a geľa pal leste.

²⁹ Paloda o Levi leske presikaďa andre peskero kher bari pačiv. Sas ode but colňika the aver džene, savenca bešenas paš o skamind.

³⁰ O Farizeja the lengere zakoňika dudrinenas a phenenas leskere učeņikenge: "Soske chan le colňikenca the le binošenca?"

³¹ O Ježiš lenge odphendā: "Le sastenge na kempel doktoris, ale le nasvalenge."

³² Na avľom te vičinel le čačipnaskeren, ale le binošen, hoj pes te visaren le binendar."

O phučiben pal o postos

³³ On leske phende: "Le Janoskere učeñika furt pes poscinen the modlĭnen, the o učeñika le Farizejengere, ale tire chan the pijen!"

³⁴ Ov lenge phendā: "Či šaj phenen le hoscenge pro bijav, hoj pes te poscinen, medik hino lenca o terno?"

³⁵ Ale avena o dživesa, sar lendar ela o terno ilo het, a andre ola dživesa pes poscinenena."

³⁶ A phendā lenge the kada podobenstvo: "Se ñiko na odčhinel kotor le neve pochtanestar, hoj leha te zasivel andre o purane gada, bo čhingerđahas o neve gada a o nevo pochtan pro purano añi na pasindahas.

³⁷ Añi ñiko na čhivel e nevi mol andro purane cipune gone, bo e nevi mol čhingerđahas e cipa a čulola avri a o gone čhindona.

³⁸ Ale e nevi mol pes čhivel andro neve gone. [Avke pes na musarel añi e mol añi o gone.]

³⁹ A sako, ko pijel e purañi mol, na kamel e nevi, bo phenel peske: 'E purañi hiñi feder.' "

O phučiben pal o Šabbat

6 Jekhvar pro Šabbat (sombatone), sar o Ježiš džalas prekal e maľa, kaj sas sadzimen, leskere učeñika čhingerenas o klasi, pučinenas len andro vasta a chanas.

² Akor lenge varesave džene le Farizejendar phende: "Soske keren oda, so našti keren pro Šabbat?"

³ O Ježiš lenge phendā: "Mek šoha (ñikda) na gendān, so kerđa o David, sar sas bokhalo ov the leskere manuša?"

⁴ Akor, sar geľa andro Devleskero kher, iľa o sentne mare a chalas a diña the peskere manušen, choc ola mare našti chalas ñiko aver, ča o rašaja."

⁵ A phendā lenge: "O Čhavo le Manušeskero hin o Raj upral o Šabbat."

O Ježiš sastarel pro Šabbat

⁶ Jekhvar pre aver Šabbat geľa andre sinagoga a sikavelas. A sas ode jekh manuš, saves sas ñevladno čačo vast.

⁷ O zakoñika the o Farizeja užarenas, či sastarela varekas pro Šabbat, hoj len te el vareso pre leste te phenen.

⁸ O Ježiš džanelas, so gondolĭnen, no the avke phendā le manušeske, saves sas ñevladno vast: "Uštĭ a ačh kade maškaral!" Ov uštĭla a ačhelas.

⁹ Akor lenge o Ježiš phendā: "Phučav tumendar: Šaj pro Šabbat mištes te kerel, vaj namištes te kerel? O dživipen te zachrañinel, či te murdarel?"

¹⁰ Dikhľa pašal peste pre savoredžene a phendā le manušeske: "Nacirde o vast!" Kerđa avke a leskero vast sas pale sasto.

¹¹ Avľa andre lende bari cholĭ a vakerenas maškar peste, so šaj kerdehas le Ježišoske.

O dešuduj učeñika

¹² Andre ola dživesa pes geľa o Ježiš pro verchos te modlĭnel a sas ode calĭ rat andre modlitba.

¹³ Sar vidñisalĭla, vičindā peske le učeñiken a kidña peske lendar avri dešudujen (12), saven diña nav apoštola. Oda sas kala:

¹⁴ O Šimon (saveske diña nav Peter), leskero phral o Andrej, o Jakob, o Jan, o Filip, o Bartolomej,

¹⁵ o Matuš, o Tomaš, o Jakob le Alfeoskero the o Šimon (saves vičinenas Zelota),

¹⁶ o Juda, o čhavo le Jakobskero – the o Judaš Iškarijotsko, savo les zradzindā.

But manuša džan pal o Ježiš

¹⁷ Sar lenca geľa tele, zaačhĭla pro rovno than. Sas leha but leskere učeñika the igen but nipi andral calĭ Judsko a Jeruzalem, the andral e Tirsko the Sidoniko phuv pašal o moros.

¹⁸ Avenas les te šunel a hoj len te sastarel andral lengere nasvalĭbena. A sas sastarde avri the ola, saven trapinenas o nalačhe duchi.

¹⁹ Savore nipi pes lestar kamenas te chudel, bo avelas lestar avri e zor, so savoren sastarelas.

Ko hin bachtalo a kaske vigos

²⁰ Ov dikhľa pre peskere učeñika a vakerelas: "Bachtale hine o čore, bo tumaro hin o krafišagos le Devleskero!"

²¹ Bachtale hin ola, save hine akana bokhale, bo avena čalarde! Bachtale hine ola, save akana roven, bo palĭs asana!

²² Bachtale san, te tumen o nipi našti avri ačhena, te tumen čhivena avri a anena pre ladž a ruhinena pes pre tumaro nav vaš o Čhavo le Manušeskero.

²³ Radisaľon andre oda džives a khelen, bo andro ñebos tumen užarel baro počiñiben. Se the lengere dada avke kerenas le prorokenge!

²⁴ Ale vigos tumenge, barvale, bo tumen imar akana iľan tumaro radišagos!

²⁵ Vigos tumenge, so san akana čalarde, bo avena bokhale! Vigos tumenge, so akana asan, bo avena andre žala a rovena!

²⁶ Vigos tumenge, te pal tumende savore nipi mištes vakerena, bo ipen avke kerenas lengere dada le falošne prorokenca!"

O kamiben ko ñeprijateľa

²⁷ "Ale tumenge, so man šunen, phenav: Kamen tumare ñeprijateľen, keren lačhipen olenge, ko tumen našti avri ačhen,

²⁸ žehñinen olenge, ko tumen košen, a modlĭnen tumen vaš ola, save tumen tele dikhen.

²⁹ Oleske, ko tut demel pal jekh čham, sikav the dujto a oleske, ko tutar lel o plaštos, de the o gada.

³⁰ De sakones, ko tutar mangel. A ma mang pale olestar, ko tutar iľa vareso.

³¹ Avke, sar kamen, hoj o nipi tumenge te keren, keren the tumen lenge.

³² Te kamen ča olen, so tumen kamen, savo počičiben vaš oda užaren? Se the o binošne kamen olen, so len kamen.

³³ A te keren o lačhipen ča olenge, save tumenge keren lačhipen, savo počičiben vaš oda užaren? Se the o binošne oda keren.

³⁴ Te dena kečeň ča olen, pal save džanen, hoj tumenge dena pale, savo počičiben vaš oda užaren? Se the o binošne den kečeň, hoj oda te dochuden pale.

³⁵ Ale kamen olen, save pre tumende džan! Keren lenge o lačhipen, den kečeň a ma užaren pale. Avke ela tumaro počičiben baro a avena o čhave le Nekbaredereskere, bo ov hino lačo the ko nalače the ke ola, save leske na palikeren.

³⁶ Vašoda aven lačhejileskere, avke sar tumaro Dad hino lačhejileskero."

Te na sudzinen jekh avres

³⁷ "Ma sudzinen a na avena sudzimen! Ma odsudzinen a na avena odsudzimen! Odmuken a ela tumenge odmuklo.

³⁸ Den a ela tumenge dino a thovela pes andre tumari brekh pherdo mira, razimen avri, zaispidni andre a pherardi, bo sava miraha merines, ajsaha tuke ela merimen."

³⁹ Phenda lenge the podobnostvo: "Či šaj lidžal o koro le kores? Či na perena sodujžene andre chev?

⁴⁰ Oda, ko sikl'ol, nane bareder sar oda, ko les sikavel, ale sako, ko hin avrisikado, ela ajso sar oda, ko les sikavel.

⁴¹ Soske dikhes o šmecos andre jakh tire phraleske, ale andre tiri jakh o kašt na dikhes?

⁴² Abo sar šaj phenes tire phraleske: 'Phrala, domuk, hoj tuke te lav avri o šmecos andral e jakh,' ale oda kašt, so hin andre tiri jakh, na dikhes? Tu dujemu-jengero! Ešeb (peršo) le avri o kašt andral tiri jakh a palis šaj les avri o šmecos andral e jakh tire phraleske."

Pal o lačo the nalačo stromos

⁴³ "Bo o lačo stromos na anel nalačo ovocje a o nalačo stromos na anel lačo ovocje.

⁴⁴ Bo dojekh stromos pes prindžarel pal o ovocje. Se andral o kandre (o kraki) na obkiden o figi, aňi andral o kořaka na obkiden o hroznos.

⁴⁵ O lačo manuš lel avri andral peskero lačo barvalipen o lače veci a o nalačo manuš andral peskero nalačo barvalipen lel avri o nalače veci. Bo soha hin pherardo o jilo, oda o muj vakerel."

Pal o duj khera

⁴⁶ "So man vičinen: 'Rajeja, Rajeja,' ale na keren oda, so phenav?

⁴⁷ Sikavava tumenge sar hin oda, ko avel ke ma, šunel mire lava a dolikerel len.

⁴⁸ Oda manuš hino sar oda, savo ačhavelas peskero kher. Kopalinelas a geľa but tele andre phuv a thoda o zaklados pre skala. Sar avľa o baro brišind a demada baro paňi pre oda kher, na čhalada leha, bo sas mištes zathodo pre skala.

⁴⁹ Ale oda, ko šunda a na kerđa, hino sar oda manuš, savo ačhada peskero kher pre phuv bi o zaklados. Sar avľa o baro paňi a demada pre oda kher, takoj pes rozpeľa a peľa igen bares."

Sastarel le veliteliskere sluhas

7 Sar o Ježiš dovakerđa oda savoro le manušenge, save les šunenas, geľa andro Kafarnaum.

² Jekhe velitelis upral o šel (100) slugada sas sluhas, saves igen likerelas. No oda sluhas sas pro meriben nasvalo.

³ Sar šunda o velitelis pal o Ježiš, bičhada ke leste varesave Židovike phurederen, hoj te mangel les, hoj te avel a te sastarel leskere sluhas.

⁴ On avle ko Ježiš, igen les mangelas a phende: "Zasogalinel (zaslužinel) peske, hoj leske oda te keres,

⁵ bo ov kamel amare nipen. Se mek e sinagoga amenge ačhada."

⁶ Avke lenca o Ježiš geľa. Sar imar na sas dur ole kherestar, bičhada ke leste o velitelis peskere prijatelen, hoj leske te phenen: "Rajeja, ma trapin tut, bo na som hodno, hoj te aves andre miro kher.

⁷ Aňi man na šunavas hodno te džal ke tute. Ale phen ča lav a miro sluhas sastola avri.

⁸ Bo the me som manuš tel o vast avrengje a tel miro vast hin o slugada. A te phenava kaleske: 'Dža!' – ta džala; a avreske: 'Av!' – ta avela; a mire sluhaske: 'Ker kada!' – ov takoj kerela."

⁹ Sar oda šunda o Ježiš, čudalinda pes. Visarda pes ko nipi a phenda lenge: "Phenav tumenge, hoj andro Izrael na dikhl'om kajso baro pačaben."

¹⁰ Sar ola džene, save sas bičhade, gele pale andro kher, arakhle ole sluhas, savo sas nasvalo, imar sastes.

Le vdovakere čhas uštavel andral o meriben

¹¹ Pre aver džives džalas o Ježiš andro foros, so pes vičinel Nain. A džanas leha but leskere učeňika the igen but nipi.

¹² Sar doavľa paš e foroskeri brana, ipen akor lidžanas avri jekhe mules. Oda sas jekhoru čhavo peskera dakero, savi sas vdova. Džanas laha igen but nipi andral o foros.

¹³ Sar la dikhľa o Raj, sas leske igen pharo pre late a phenda lake: "Ma rov!"

¹⁴ Geľa pašeder, chudľa pes le mochtestar a ola, save lidžanas le mules, zaačhile. O Ježiš phenda: "Čhavoreja, phenav tuke, ušti!"

¹⁵ O mulo peske bešľa a chudľa te vakerel. O Ježiš les diňa leskera dake.

¹⁶ Akor avľa bari dar pre savorende. Lašarenas le Devles a phenenas: "Baro prorokos uštiľa maškar amende a o Del avľa ke peskere nipi!"

¹⁷ Kada hiros pal leste pes rozlīgenda pal cali Judsko the pal savore fori odarik pašal.

O Jan bičhavel muršen ko Ježiš

¹⁸ Le Janoskere učeņika leske ande o hiros pal oda savoro. Palis o Jan peske vičinda duje džen en peskere učeņikendar

¹⁹ a bičhađa len ko Ježiš, hoj lestar te phučen: "Sal tu oda, ko majinel te avel, abo kempel te užarel avres?"

²⁰ Sar avle ola murša ke leste, phende: "O Jan Krstiteľ amen bičhađa pal tu a phendā, hoj tutar te phučas: 'Sal tu oda, ko majinel te avel, abo kempel te užarel avres?' "

²¹ Ipen andre odi ora sastārelas but džen en le nasvalibnastar, avre dukhendar the le nalače duchendar a but kore dženenge diņa pale te dikhel.

²² O Ježiš lenge odphendā: "Džan a phenen le Janoske, so dikhlan the šundān: O kore dikhen, o bange phiren, o malomocne pes žužaren, o kašuke šunen, o mule ušten andral o meriben a le čoreng pes vakerel o evaņgelium.

²³ Bachtalo hin oda manuš, ko na perel andral o pačaben vaš ma!"

Vakerel avri pal o Jan

²⁴ Sar on odgele, chudla o Ježiš te vakerel le nipenge pal o Jan: "So geľan te dikhel pre pušta? E trstina, sava ha čhalavel e balvaj?"

²⁵ Abo, so geľan te dikhel? Manušes, savo hino urdo andro barikane gada? Se ola, save uren o barikane gada a dživen barikanes, bešen andro palaca.

²⁶ Abo, soske geľan te dikhel? Le prorokos? He, phenav tumenge, mek buter sar prorokos.

²⁷ Bo ov hin oda, pal kaste hin pisimen: *'Me bičhavav mire poslos anglal tu a ov pririchtinela prekal tu o drom.'*

²⁸ Bo phenav tumenge, hoj nane bareder prorokos sar o Jan Krstiteľ maškar savore nipi, save ulile (pes narodzinde) le džuvlendar, ale oda, ko hin nekcikneder andro ņeboskero krališagos, hino bareder sar ov."

²⁹ Sar o nipi the o colņika, save šunenas le Jan, pes dine te bolel leskere bolipnaha, on peske pridžanle, hoj o Del hino čačipnaskero.

³⁰ Ale o Farizeja the o zakoņika odčhide pestar oda, so o Del kamla, bo na priile le Janoskero bolipen.

³¹ O Ježiš phendā: "Ke kaste pripodobņinava adadživeskere manušen? Pre kaste maren?"

³² Hine sar ola čhavore, save bešen pro placos a vičinen pre peste: 'Bašavahas tumenge, ale na khelenas! Giľavahas andre žaľa sar upral o mulo, ale na rovenas!'

³³ Bo avla o Jan Krstiteľ, savo na chalas maro aņi na pijelas mol, a phenen: 'Hin andre leste nalačo duchos!'

³⁴ Avla o Čhavo le Manušeskero, savo chalas the pijelas, a phenen: 'Dikhen, ajs o chavačis the pijakos! Likerel pes le binošnenca the le colņikenca!'

³⁵ Ale le Devleskero godaveripen pes presikavel sar čačipen oleha, so kerel."

O Ježiš andro kher ko Farizejis

³⁶ Varesavo Farizejis les vičinda ke peste te chal. O Ježiš geľa andro leskero kher a bešľa peske pal o skamind.

³⁷ No andre oda foros sas varesavi binošno džuvli. Sar pes došundā, hoj bešel andre le Farizejiskero kher, andā peha jekh caklocis, andre savo sas igen dragano olejos.

³⁸ Ačhelas pal leste paš leskere pindre, rovelas a chudla leske te cindarel le apsenca o pindre a khoselas len le balenca. Čumidelas leske o pindre a pomakhelas le voņave olejoha.

³⁹ Sar kada dikhla o Farizejis, savo les vičinda ke peste, phendā peske: "Te ov ulahas prorokos, džanlahas, ko hin kadi džuvli, savi pes lestar chudel – hoj hiņi binošni."

⁴⁰ O Ježiš leske odphendā: "Šimon, kamav tuke vare-so te phenel." Ov phendā: "Phen, učiteľina!"

⁴¹ "Duj džene kamenas love jekhe manušeske, savo delas kečeņ. Jekh leske kamelas pandž šel (500) rupune a dujto penda (50).

⁴² Na sas len sar te del pale a ov odmukla sodujdženenge. Phen mange: Ko kale dujendar les buter kamela?"

⁴³ O Šimon odphendā: "Gondolinav mange, hoj oda, kaske buter odmukla." O Ježiš leske phendā: "Mištes rozsudzindal."

⁴⁴ Visarda pes ke džuvli a phendā le Šimonoske: "Dikhes kala džuvla? Avlom andre tiro kher a na diňal man paņi pro pindre, ale oj mange o pindre peskere apsenca cindarda a peskere balenca len khosla.

⁴⁵ Tu man na čumidlal, ale oj mange na preačihla te čumidel o pindre, kanastar avlom andre.

⁴⁶ O šero mange na pomakhlal le olejoha, ale oj mange pomakhla o pindre le voņave olejoha.

⁴⁷ Vašoda tuke phenav, oda, hoj buter kamel, sikavel, hoj lakere buter bini hine odmukle. Oda, kaske hin frima odmuklo, frima kamel."

⁴⁸ A phendā lake: "Odmuken pes tuke o bini."

⁴⁹ Ola džene, save leha bešen jekhetane paš o skamind, chudle maškar peste te vakerel: "Ko hin kada, hoj the o bini odmukel?"

⁵⁰ Ale o Ježiš phendā la džuvlake: "Tiro pačaben tut zachraňinda. Dža andro smirom!"

O džuvla, save phirenas le Rajeha

8 Palis phirelas o Ježiš pal o fori the gavora, kazinelas a vakerelas pal o krališagos le Devleskero. A sas leha o dešuduj (12) učeņika

² the varesave džuvla, saven sastarda avri le nalače duchendar the le nasvalibenendar. Oda sas e Maria (sava vičinenas Magdalena), andral savi gele avri eфта demoni;

³ e Johanna, e romñi le Chuzasoskeri, savo dodikhe-las pro chulajipen le Herodesiske; e Zuzana, the mek but aver, save lenge pomožinas peskere lovenca the vecenca.

O podobenstvo pal o štar phuva

⁴ Sar pes zgele igen but nipi a zdžanas pes ke leste but manuša andral o fori, phendā kada podobenstvo:

⁵ "Geļa o manuš te rozčhivkerel o semena. Sar rozčhivkerelas, varesave pele paš o drom, phirelas pes pal lende a o čirikle len chale.

⁶ Aver pele pro baruno than, a sar barile, šučila avri, bo na sas len pañi.

⁷ Aver pele maškar o kandre (kraki) a o kandre barile jekhetane lenca a tasade len.

⁸ A varesave pele andre lači phuv a sar barile avri, ande šelvar ajci chasna." Sar oda o Ježiš dovakerđa, vičindā: "Kas hin kana pre oda, hoj te šunel, mi šunel!"

⁹ Leskere učēnika lestar phučle: "Pal soste hin kada podobenstvo?"

¹⁰ Ov phendā: "Tumenge hin dino te achalol o garude veci andral o Devleskero krališagos, ale oklengē avri pes vakerel andro podobenstva, hoj te *dikhen, ale te na dikhen*; hoj te *šunen, ale te na achalon*.

O Ježiš vakerel avri o podobenstvo

¹¹ O podobenstvo hin pal kada: O semenos hin o lav le Devleskero.

¹² Ola, save hine paš o drom, hine ola, save šunen, ale palis avel o beng a lel avri o lav andral lengerō jilo, hoj te na pačan a te na aven zachrañimen.

¹³ Ola, savenge hino sadzimen pre skala, hine ajse, save prilēn o lav radišagoha, sar šunen, ale nane len koreñis a pačan ča pre varesavo časos a akor, sar avel e proba (skuška), oddžan.

¹⁴ Ola, savenge hino sadzimen andro kandre, hine ola, save šunde o lav, ale tasaven len andre o starišagi, o barvalipen the o kiñešagi le dživipnaskere a nane lendar chasna.

¹⁵ A ola andre lači phuv, hin ola, save šunde o lav a likerēn les andro čačipnaskero the lačo jilo a anen furt chasna.

Pal e momeli

¹⁶ Ńiko, ko labarel e momeli, na garuvel la tel e piri, añi na thovel la tel o hačos, ale ačhavel la pro momelaris, hoj ola, save aven andre, te dikhen o svetlos.

¹⁷ Bo nane nič počoral, so na ela jekhvar sikado, a nane nič garudo, so pes na džanela a na avela jekhvar avri.

¹⁸ Vašoda šunen mištes! Bo kas hin, oles mek ela dino, a kas nane, olesar pes lela mek oda, so peske gondolinel, hoj les hin."

Le Rajeskeri daj the phrala

¹⁹ Avle ke leste leskeri daj the o phrala a našti pes ke leste dochudle, bo sas ode but manuša.

²⁰ O manuša phende leske: "Tiri daj the tire phrala ačhen avri a kamen tut te dikhel."

²¹ O Ježiš lenge odphendā: "Miri daj the mire phrala hine ola, save šunen le Devleskero lav a dolikerēn les."

O Raj zaačhavel e balvaj

²² Jekh džives o Ježiš geļa andre lođka le učēnikenca a phendā lenge: "Aven, predžas la lođkaha pre oki sera le moroske." A on gele.

²³ Sar pes la lođkaha plavinenas, o Ježiš zasuča. Jekhvarēste avļa bari balvaj pro moros. E lođka pherdolas le pañeha avke, hoj imar šaj tašlile.

²⁴ Avle ke leste, uštade les a phende: "Rajeja! Rajeja! Imar tašlūvas!" Avke o Ježiš uštila, pokarhinda la balvaj the le vlnen a on preačhile a pro moros sas igen čhit.

²⁵ A phendā lenge: "Kaj hin tumaro pačaben?" O učēnika pes andre dar čudalīnenas a phenenas jekh avreske: "Ko hin kada manuš, hoj le balvajenge the le pañeske rozkazinel a on les šunen?"

O posadnuto manuš andre Gadara

²⁶ Andral e Galileja doavle la lođkaha andre phuv Gadara, so hiñi pre aver sera le morostar.

²⁷ Sar geļa avri andral e lođka, arakhļa pes leha vare-savo muřš andral oda foros, andre savo sas nalače duchi. Imar čirlastar sas lango a na bešelās andro kher, ale andro hrobi.

²⁸ Sar dikhļa le Ježiš, vriskišagoha peļa anglal leste a vičindā zorales: "So man hin tuha, Ježiš, Čhavo le Něk-baredere Devleskero? Mangav tut, ma trapin man!"

²⁹ Phendā oda, bo o Ježiš prikazindā le nalače duchoske, hoj te džal avri andral leste. Choc les phandenās le lancenca the le putenca pro pindre a merkinenas pre leste, ov furt phagerelas o puta a o nalačo duchos les lelas pro omukle thana.

³⁰ O Ježiš lestar phučļa: "Sar tut vičines?" Ov phendā: "Legion," bo but nalače duchi gele andre leste.

³¹ A mangelās les, hoj len te na bičhavel andre benguañali chev †.

³² Sas ode baro stados le balenca, so pes pasinenas pro verchos. Mangle le Ježiš, hoj lenge te domukel te džal andre lende a ov lenge domukļa.

³³ O nalače duchi gele avri andral o manuš andro bale a o stados pes mukļa tele le brehoha andro moros a tašlile.

³⁴ Sar dikhle o pastjera, so pes ačhila, denašle a phende ada avri andro foros the pro maļi.

³⁵ Avke o manuša avle te dikhel, so pes ačhila. Sar avle ko Ježiš, arakhle ole manušes, andral savo gele avri o nalače duchi, te bešel paš le Ježišoskere pindre – urdones the paš e godi – a daranas pes.

³⁶ Ola, save oda dikhle, lenge vakerenas, sar sas o posadnuto sastardo.

³⁷ Akor savore nipi andral Gadarañiko phuv les mangelās, hoj te džal lendar het, bo avļa pre lende igen

† Abo: o Abyssos

bari dar. Avke o Ježiš geľa andre lodka a visardã pes pale.

³⁸ Oda murš, andral savo gele avri ola nalače duchi, les mangelas, či šaj džal leha. Ale o Ježiš les bičhađa het. Phendã leske:

³⁹ "Dža khere a vaker, save bare veci tuke kerđa o Del." Ov geľa a vakerelas pal calo foros, save bare veci leske kerđa o Ježiš.

E muli čhajori the e nasvali džuvli

⁴⁰ Sar avľa o Ježiš pale pre aver sera le moroske, priile les igen but nipi, bo savore les užarenas.

⁴¹ Avľa ode jekh murš, savo pes vičinelas Jairus. Ov sas angluno manuš andral e sinagoga. Peľa paš le Ježišoskere pindre a mangelas les, hoj leha te džal andre leskero kher,

⁴² bo leskeri jekhori čhajori – vaj dešuduj beršengeri – merelas. Sar džalas, o nipi pes pre leste ispidenas.

⁴³ Sas maškar lende varesavi džuvli, savi sas dešuduj berš nasvali pro džuvlikano nasvaliben a diňa savoro, so la sas avri le doktorenge, ale űiko la našti sastãrđa.

⁴⁴ Oj avľa ko Ježiš a palunestar pes dotkűinda leskere gadendar a takoj lake o rat preačhiľa te džal.

⁴⁵ O Ježiš phendã: "Ko pes mandar chudľa?" A sar pes űiko na pridžanelas, phendã o Peter: "Rajeja, o nipi pes pre tu kikiden the ispiden [a tu phenes: "Ko pes mandar chudľa?"]"

⁴⁶ Ale o Ježiš phendã: "Chudľa pes mandar vareko, bo šundom, sar mandar geľa avri e zor."

⁴⁷ Sar dikhlã odi džuvli, hoj oda našti garuvel andre, izdralas daratar, avľa a peľa anglal leste a angle savoredženende leske phendã avri, soske pes lestar chudľa a sar sastila avri.

⁴⁸ Ov lake phendã: "Čhaje miri, tiro pačaben tut sastãrđa. Dža andro smirom!"

⁴⁹ Medik o Ježiš vakerelas, avľa vareko andral le Jairoskero kher a phendã leske: "Tiri čhajori imar muľa, de smirom le učiteliske!"

⁵⁰ Sar oda šundã o Ježiš, phendã leske: "Ma dara tut! Ča pača a ela sastãrdi!"

⁵¹ Geľa andro kher a na domuklã űikasko, hoj leha te džal andre, ča le Peteriske, Janoske the Jakoboske a the la čhajorakera dake the dadeske.

⁵² Savore rovenas a hikinenas upral late. Ale o Ježiš phendã: "Ma roven! Na muľa – ča sovel."

⁵³ Asandile les avri, bo džanenas, hoj muľa.

⁵⁴ Ale ov tradňa savoren avri, chudľa la le vastestar a vičindã: "Čhajorije, ušti!"

⁵⁵ Lakero duchos avľa pale andre late a oj takoj uštiľa. O Ježiš prikazindã, hoj la te den te chal.

⁵⁶ Lakeri daj the dad ačhile bijal peste, ale o Ježiš lenge prikazindã, hoj te na vakeren űikhaj, so pes ačhiľa.

Bičhavel avri le dešuduje učeņiken

⁹ O Ježiš vičindã ke peste le dešuduje učeņiken a diňa len e autorita the zor, hoj te traden avri savore nalače duchen a te sastarel o nasvalibena.

² Bičhađa len te kazinel pal o krališagos le Devleskero a te sastarel le nasvalen.

³ Phendã lenge: "Ma len tumenca űič pro drom – aņi e paca, aņi e zajdica, aņi maro, aņi love, aņi po duj gada.

⁴ Te džana andre varesavo kher, ačhen ode, medik na džana avri andral oda foros.

⁵ Džan het andral oda foros, kaj tumen na prilena a o prachos pal o pindre keren tele, sar svedectvo pre lende."

⁶ Avke gele, phirenas pal o gavora, vakerenas o evaņjelium a všadzik sastarenas.

O Herodes phučel pal o Ježiš

⁷ The o tetrarchas o Herodes šundã pal savoreste, so kerelas o Ježiš, a na džanelas, so peske te gondofinel, bo vareko phenelas, hoj o Jan uštiľa andral o meriben,

⁸ a varesave džene phenenas, hoj o Eliaš pes sikađa, a pale aver phenenas, hoj uštiľa jekh le čirlatune prorokendar.

⁹ O Herodes phendã: "Le Janoske odčhindom o šero. Ko hin akor kada, hoj pal leste šunav kajse veci?" A kamelas les te dikhel.

O Raj čafarel pandž ezere manušen

¹⁰ Sar avle o apoštola pale, vakerenas le Ježišoske sa, so kerenas. Iľa len peha a gele korkore andro foros, so pes vičinel Betsaida.

¹¹ Sar pes oda o nipi dodžanle, gele pal leste. Priiľa len a vakerelas lenge pal o krališagos le Devleskero a sastarelas olen, kaske oda kampelas.

¹² Sar imar zaračolas, avle o dešuduj (12) učeņika ke leste a phende leske: "Rozmuk le nipen, hoj te džan andro pašutne fori the gavora te presovel e rat a te arakhen peske te chal, bo kade sam dur le forostar."

¹³ Phendã lenge: "Tumen len den te chal!" On phende: "Hin amen ča pandž mare the duj ribi. Kames, hoj te džas a te cinas chaben prekal savore kala nipi?"

¹⁴ Sas ode vaj pandž ezera (5 000) murša. Ale phendã peskere učeņikenge: "Thoven len te bešel andro partiji po penda (50) dženen!"

¹⁵ Kerde avke a thode savoren te bešel.

¹⁶ Palis iľa ola pandž mare the duj ribi, dikhlã pro űebos, požehűindã, phagerelas a delas le učeņikenge, hoj on te poden le manušenge.

¹⁷ Chale savore a čaľile. Olestar, so ačhiľa, kidle upre dešuduj košara.

O Peter viznavinel, ko hin o Ježiš

¹⁸ Sar pes modľinelas korkoro a sas leha the o učeņika, phučľa lendar: "So phenen o manuša pal mande? Ko phenen, hoj som?"

¹⁹ On leske odphende: "Hoj o Jan Krstiteľ, aver phenen, hoj o Eliaš, a pale aver vakeren, hoj uštila jekh le čirlatune prorokendar."

²⁰ Ov lendar phuča: "A tumen, so phenen – ko som?" O Peter leske odphenda: "Tu sal o Kristus le Devleskero!"

²¹ No o Ježiš lenge zoraha prikazinda, hoj oda ňikaskete na phenen avri.

²² Pašis lenge phenda: "O Čhavo le Manušeskero mušinel a but te cerpinel a te el odčhido le phured-endar, le nekbaredere rašajendar the le zakoňikendar. Mušinel a te el murdardo a pal o trin dživesa te uštel andral o meriben."

Sar te džal pal o Ježiš

²³ A savorenge phenda: "Te kamel vareko te avel pal ma, mi zaprinel pes, mi lel sako džives peskero kerestos a mi avel pal ma.

²⁴ Bo sako, ko kamel te zachrañinel peskero dživipen, les našavela, ale ko našavela peskero dživipen vaš ma, oda les zachrañinela.

²⁵ Bo so hin le manušes olestar, te dochudela calo svetos, ale peskero dživipen musarela a našavela?

²⁶ Bo sako, ko pes ladžala vaš ma the vaš mire lava, vaš oda pes ladžala the o Čhavo le Devleskero, sar avela andre peskeri slava the andre slava le Dadeskeri the le sentne aňjelengeri.

²⁷ Ale čačipen tumenge phenav, hoj varesave džene tumendar, save kade ačhen, na dikhena o meriben, medik na dikhena o krališagos le Devleskero."

O Ježiš pes čerinel andre slava

²⁸ Vaj ochto džives pal ola lava, ila peha o Ježiš le Peter, le Jan the le Jakob a geľa pro verchos pes te modlinel.

²⁹ Sar pes o Ježiš modlinelas, leskero muj pes jekhvareste čerinda a leskere gada parñile a dičhonas sar o bleskos.

³⁰ A jekhvareste duj murša leha vakerenas, o Mojžiš the o Eliaš.

³¹ Sikade pes andre slava a vakerenas pal leskero meriben andro Jeruzalem, so pes mušinda te ačhel, avke sar oda o Del kamelas.

³² Angloda pro Peter the okla učeñika avľa zoralo soviben a sar pes prekerde dikhle leskeri slava the le Mojžiš a Eliaš, save leha ačhenas.

³³ Sar ola murša imar kamenas te džal het, phenda o Peter le Ježišoske: "Rajeja, mištes amenge hin kade. Keras peske trin stani: Jekh tuke, jekh le Mojžišoske the jekh le Eliašoske!" Ov na džanelas, so vakerelas.

³⁴ Mek sar oda vakerelas, avľa e chmara a zaučharda len. Daranas pes, sar džanas andre chmara.

³⁵ Andral e chmara prevakerda o hangos: "Kada hin miro Čhavo, saves mange avri kidňom – les šunen!"

³⁶ Androda, sar vakerelas oda hangos, ačhila o Ježiš pale ča korkoro. On sas čhit a andre ola dživesa na vakerenas ňikaskete pal oda, so dikhle.

Sastárel le čhas zaphandles le demonoha

³⁷ Pre aver džives, sar avle tele pal o verchos, arakhle pes lenca igen but nipi.

³⁸ A jekh manuš ole nipendar vičinda: "Učitelina, mangav tut, dikh pre miro čhavo, bo nane man aver čhave, ča ov jekh.

³⁹ O duchos les chudel a jekhvareste vriskinel a čhivkerel leha, marel leske pro muj o peni, furt les trapinel a phares lestar džal het.

⁴⁰ Mangľom tire učeñiken, hoj les te traden andral leste avri, no on oda našti kerde."

⁴¹ O Ježiš lenge odphenda: "Ó, tumen previsarde manušale bi o pačaben! Mek džič kana tumenca avava a lidžava tumen? An kade tire čhas!"

⁴² Mekča, sar avelas o čhavo, čhida leha o nalačo duchos a čhivkerelas leha. Ale o Ježiš pokarhinda le nalače duchos, sastarda le čhavořes a diňa les pale le dadeske.

⁴³ A savore pes čudalinenas oleske, savi bari hin le Devleskeri zor. Androda, medik pes sako čudalinelas oleske, so kerelas o Ježiš, ov phenda peskere učeñikenge:

⁴⁴ "Tumen ma bisteren pre kala lava: O Čhavo le Manušeskero ela dino le manušenge andro vasta."

⁴⁵ Ale on na achalile kale laveske, bo sas garudo anglal lende, hoj leske te na achalon, ale daranas pes lestar pal oda lav te phučel.

Ko hin čačes baro

⁴⁶ O učeñika chudle maškar peste te gondolinel, ko hin lendar bareder.

⁴⁷ Ale o Ježiš dikhľa, so peske andro jilo gondolinen. Iľa le čhavořes, ačhada les paš peste

⁴⁸ a phenda: "Sako, ko prilela kajse čhavořes andre miro nav, man prilel. A sako, ko man prilel, prilel oles, ko man bičhada. Bo oda, ko hin maškar tumende nek-čikneder, oda hin čačes baro."

⁴⁹ O Jan phenda: "Rajeja, dikhľam varesave manušes te tradel avri le demonen andre tiro nav a na domuka-has leske, bo na phirel amenca."

⁵⁰ Ale o Ježiš leske phenda: "Domuken leske, bo oda, ko na džal pre tumende, hino tumenca."

O Samarijiko gav na prilel le Ježiš

⁵¹ Sar imar sas pašes ola dživesa, hoj o Ježiš te el ilo upre andro ňebos, phenda peske, hoj džal andro Jeruzalem.

⁵² A bičhada anglal peste varesave manušen, hoj leske savoro te pririchtinen. Gele a doavle andro Samarijiko gav,

⁵³ ale ola nipi les ode na priile, bo o Ježiš sas pro drom andro Jeruzalem.

⁵⁴ Sar oda dikhle o učeñika o Jakob the o Jan, phende: "Rajeja, kames, hoj te mangas e jag andral o ňebos, hoj len te labarel [avke sar kerda o Eliaš?]"

⁵⁵ Ale o Ježiš visalifa, pokarhinda len [a phenda: "Tumen na džanen, savo duchos andre tumende hin,
⁵⁶ bo o Čhavo le Manušeskero na avla te murdarel le manušen, ale te zachrañinel."] A gele andre aver gavoro.

Sar te džal pal o Ježiš

⁵⁷ Jekhvar, sar džanas pal o drom, vareko leske phenda: "Rajeja, džava pal tu vřadzík, kaj džaha."
⁵⁸ O Ježiš leske phenda: "Le liřken hin peskere cheva a le řiriklen peskere hñizdi, ale le Čhas le Manušeskero nane kaj o řero te thovel."
⁵⁹ A avreske phenda: "Av pal ma!" Ale ov phenda: "Rajeja, domuk mange eřeb (perřo) te džal te parunel mire dades."
⁶⁰ Ale o Ježiš leske phenda: "Le mulen muk te parunel peskere mulen, ale tu dža a vaker pal o kraliřagos le Devleskero!"
⁶¹ Aver phenda: "Džava pal tu, Rajeja, ale domuk mange eřeb, hoj te dav mira famelijake te džanel, hoj džav het."
⁶² Ale o Ježiš leske phenda: "Ñiko, ko thovel peskero vast pro pluhos a obdikhel pes palal, nane hodno andre le Devleskero kraliřagos."

Bičhavel le eftavardeř učeñiken

10 Palis kidña avri o Raj the avre eftavardeř (70) dženen a bičhada len po dujen anglal peste andre dojekh foros the pre dojekh than, kaj ov kamelas te džal.

² A phenda lenge: "E řatva hiñi bari, ale frima hin ola, save keren buči. Vařoda mangel le Rajes upral e řatva, hoj te bičhavel le robotñiken pre leskeri řatva.

³ Džan! Bičhavav tumen sar le bakroren mařkar o ruva (vlki).

⁴ Ma len tumenca añi bugelaris añi zajdica añi sandalki a ma zaačhen pro drom varekaha te vakerel.

⁵ Sar džana andre varesavo kher, eřeb (perřo) phenen: 'Smirom kale khereske!'

⁶ Te ode ela manuř, savo prilela o smirom, tumaro smirom ačhela pre leste, ale te na, o smirom avela pale pre tumende.

⁷ Andre oda kher ačhen a chan the pijen oda, so tumen dena, bo o robotñikos peske zasogañinel (zasluřinel) peskero počiñiben. Ma phiren kher kherestar!

⁸ Sar džana andre varesavo foros a prilena tumen, chan oda, so tumen dena.

⁹ Sasřaren andre oda foros le nasvalen a phenen lenge: 'O kraliřagos le Devleskero avla pařes ke tumende.'

¹⁰ Ale te džana andre varesavo foros a na prilena tumen, džan avri pre leskere ulici a phenen:

¹¹ 'Keras pre tumende tele mek the kada prachos, so pes amenge zachudla pro pindre andre tumaro foros. Ale džanen, hoj o kraliřagos le Devleskero avla ke tumende.'

¹² No phenav tumenge, hoj le manuřenge andral e Sodoma ela lokeder andre oda džives sar ole foroske."

O napačabnaskere fori

¹³ "Jaj, vigos tuke Chorazin! Vigos tuke, Betsaido! Bo te pes andro Tir the andro Sidon ačhilehas ola zazraki, so pes ačhile ke tumende, řirla imar beřlehas urde andro gone, čhidehas peske pro řero o prachos a visardehas pes le binendar.

¹⁴ No, le forenge Tir the Sidon ela lokeder pro sudno džives sar tumenge.

¹⁵ A tu Kafarnaum, lidžas tut upre dži andro ñebos? Aveha tele čhido dži andro peklos!"

¹⁶ Phenda o Ježiš: "Oda, ko tumen řunel, man řunel, a ko tumen na prilel, man na prilel, a ko man na prilel, na prilel oles, ko man bičhada."

O eftavardeř učeñika aven pale

¹⁷ Palis avle pale ola eftavardeř (70) džene radiřagoha a phenenas: "Rajeja, the o demona pes amenge podden andre tiro nav."

¹⁸ Ov odphenda: "Dikhlom le satan te perel andral o ñebos avke sar o perumos.

¹⁹ řunen! Diñom tumen zor te uřtarel pro sapa the pro řkorpionjoni a the autorita upral savori zor le bengeskeri a ñiř tumen na dukhavela.

²⁰ Ale ma radisaon oleske, hoj pes tumenge o duchi podden, ale sigeder radisaon oleske, hoj tumare nava hine pisimen andro ñebos."

O Ježiš lařarel le Dades

²¹ Akor o Ježiš radisañifa andro Sentno Duchos a phenda: "Lařarav tut Dado, Raja upral o ñebos the upral e phuv! Bo garudal kala veci anglo avrisikade the gođaver manuřa a sikađal len le čhavorenge. He, Dado, bo avke oda kamehas.

²² Savoro mange hin dino mire Dadestar. Ñiko na džanel ko hin o Čhavo, ča o Dad. A ñiko na džanel ko hin o Dad, ča o Čhavo the oda, kaske o Čhavo oda kamlahas te sikavel."

²³ Visarda pes ko učeñika, sar sas korkore a phenda: "Bachtale hine ola jakha, save dikhen oda, so tumen dikhen!

²⁴ Bo phenav tumenge, hoj but proroka the kraľa kamentas te dikhel oda, so tumen dikhen, ale na dikhle, a kamentas te řunel oda, so tumen řunen, ale na řunde."

Pal o lačo Samaritanos

²⁵ Varesavo zakoñikos uřtila a probañinelas (skuřinelas) les: "Učiřelina, so mange kempel te kerel, hoj te chudav o večno dživipen?"

²⁶ O Ježiš leske phenda: "So hin pisimen andro Zakonos? So ode genes?"

²⁷ Ov odphenda: "Kameha le Rajes, tire Devles, andral calo tiro jilo, andral cali tiri duřa, andral cali tiri zor the andral cali tiri gođi a kameha avres avke sar pes korkores."

²⁸ O Ježiš leske phendā: "Mištes odphendā, kada ker a dživeha."

²⁹ Ale o zakoņikos kamelas te presikavel peskero čačipen a phučla lestar dureder: "A ko hin mange oda pašutno manuš?"

³⁰ O Ježiš leske odphendā: "Varesavo manuš džalas andral o Jeruzalem tele andro Jericho a chudle les o živaņa. Čhide leske tele o gada a marde les, gele het a mukle les ode jepaš mules.

³¹ Ačhiľa pes, hoj džalas ole dromeħa tele varesavo rašaj a sar les dikhľa, obgeľa les pal aver sera.

³² A avke the jekh Levitas, sar džalas tele, avľa paš oda than a sar les dikhľa, obgeľa tiš pal aver sera.

³³ No palis avľa ke leste varesavo Samaritanos, savo džalas ole dromeħa a sar les dikhľa, avľa leske pharo pre leste.

³⁴ Avľa ke leste, čhidā leske pro rani olejos the mol a phandľa len andre. Thođa les pre peskero somaris, li-gendā les andro sovibnaskero kher a starindā pes pal leste.

³⁵ Pre aver džives, sar džalas het, iľa avri duj denara, diňa le chulajiske a phendā: 'Starin tut pal leste a te tut mola buter, me tuke počinava, sar avava kadarik pale.'

³⁶ Ko kale trinendar pes tuke dičhol, hoj sas pašutno manuš oleske, kas chudle o živaņa?"

³⁷ Ov odphendā: "Oda, ko sas ke leste jileskero." Akor leske o Ježiš phendā: "Dža a ker the tu avke!"

E Marta the e Maria

³⁸ O Ježiš le učeņikenca džalas pal o drom a avľa andre jekh gav. A e džuvli, savi pes vičinel Marta, les priiľa andre peskero kher.

³⁹ Sas la pheň, savi pes vičinelas Maria. Oj peske bešľa paš le Ježišoskere pindre a šunelas leskero lav.

⁴⁰ Ale e Marta kerelas igen but pašal o manuša a imar sas pre late but. Avľa ko Ježiš a phendā: "Rajeja, tu na dikhes, hoj miri pheň man mukľa, hoj te kerav pašal o manuša korkori? Phen lake, hoj manca te kerel!"

⁴¹ Ale o Ježiš lake odphendā: "Marto, Marto, starines the trapines tut but vecenca.

⁴² Ale ča jekh kampil. E Maria peske kidňa avri, so hin feder, oda, so latar ņiko na lela."

Le Rajeskeri modlitba

11 Jekhvar pes o Ježiš modľinelas pre varesavo leskero učeņikos: "Rajeja, sikav amen pes te modľinel, avke sar the o Jan sikađa peskere učeņiken."

² Ov lenge phendā: "Sar pes modľinen, phenen: 'Dado [amaro, savo sal andro ņebos], mi el sentňardo tiro nav, mi avel tiro krališagos, [mi ačhel pes tiri voľa, avke sar andro ņebos, avke the pre phuv!]

³ De amen adadžives o maro, so amenge kampil sako džives!

⁴ Odmuk amenge amare bini avke, sar the amen odmukas olenge, ko kerel bini pre amende. A ma do-muk, hoj te avas cirdle andro binos, [ale le amendar le nalačhes].'"

Pal o prijateľis, savo pes na del te odmarel

⁵ Phendā lenge: "Te varekas tumendar hin varesavo prijateľis a te džaha ke leste pal jepaš rat a pheneħa leske: 'Phrala, de man kečėň trin mare,

⁶ bo avľa ke ma o prijateľis dural a nane man les so te del.'

⁷ A ov andral o kher leske odphendāhas: 'De smirom! O vudar imar hin phandlo a mire čhave hine manca imar pro haďos, našti uščav, hoj tut te dav.'

⁸ Phenav tumenge, te na uštėla a na dela les o maro vaš oda, hoj hino leskero prijateľis, uštėla a dela les sa, so kamel, vaš oda, hoj pes na ladžalas te mangel.

⁹ Avke the me tumenge phenav: Mangen a ela tumenge dino! Roden a arakhena! Durkinen a phundrav-ela pes tumenge.

¹⁰ Bo sako, ko mangel, chudela, a ko rodel, arakhela, a oleske, ko durkinel, pes phundravela.

¹¹ Abo ko hin tumendar ajso dad, hoj te lestar o čhavo mangľahas [maro, ta diňahas les bar]? Abo te lestar mangľahas riba, ta diňahas les sapes?

¹² Abo te lestar mangľahas jandro, ta diňahas les škopijonos?

¹³ Avke te tumen, save san nalačhe, džanen te del tumare čhaven lačhe dari, či tumaro Dad andral o ņebos na dela sigeder le Sentne Duchos olen, save lestar mangen?"

O Ježiš the o Belzebul

¹⁴ Jekhvar o Ježiš tradelas avri le ņemone demonos. Sar geľa avri o demonos o ņemo prevakerďa a o nipi pes čudalinenas.

¹⁵ Ale varesave džene lendar phende: "Ov tradel avri le demonen le Belzebuloskera zoraha, savo hino upral savore demonu."

¹⁶ A pale aver džene les pokušinenas a mangelas lestar znameňje andral o ņebos.

¹⁷ Ale o Ježiš džanelas, so peske gondolinen, a phendā lenge: "Dojekh krališagos, so pes rozulavel a džal pre peste, pes rozperela. The oda kher, so hino rozulado pre peste, perel.

¹⁸ Avke, te o krališagos le satanoskero hino rozulado maškar peste, sar šaj obačhela? Tumen phenen, hoj me tradav avri le demonen le Belzebuloha.

¹⁹ No, te me tradav avri le demonen le Belzebuloha, tumare učeņika len kaha traden avri? Vašoda on ena tumare sudci.

²⁰ Ale te me le Devleskera zoraha tradav avri le demonen, akor avľa ke tumende le Devleskero krališagos.

²¹ Te jekh zoralo manuš – mištes vizbrojimen – merkinel pre peskero kher, leskero barvalipen ņiko našti čorel.

²² Ale te avľahas pre leste zoraleder, sar hino ov, a domardahas les, ov lestar lela leskeri vizbroj, pre savi pes zmukelas, a leskero barvalipen rozulavela.

²³ Oda, ko nane manca, džal pre mande, a ko na skidel manca, rozčhivkerel."

Te o nalačho duchos avel pale

²⁴ "Sar džal o nalačho duchos avri andral o manuš, phirel pal o šuke thana a rodel peske than, kaj pes te odpočovinel. Sar na arakhel, phenel peske: 'Džav pale andre miro kher, khatar avľom avri.'

²⁵ Sar avel, arakhel les avrišulado the avrišukaľardo.

²⁶ Akor džal a lel peha mek efa avre duchen, goreder sar ov, džan andre a bešen ode. Avke ole manušeha pro agor ela mek goreder, sar sas ešebnovar (peršovar)."

²⁷ Androda, sar o Ježiš vakerelas, vičinelas jekh džuvľi ole nipendar: "Bachtali hin odi džuvľi, savi tut anda pro svetos a the ola kolina, so tut denas te pijel!"

²⁸ Ale ov odphenda: "Bachtale hine sigeder ola džene, save šunen le Devleskero lav a dolikeren les!"

O znaeňje le Jonašiskero

²⁹ Sar pes zdžanas ke leste but nipi, chudľa te vakerel: "Adadživeskere manuša hine nalačhe, mangel znaeňje, ale na ela lenge dino znaeňje, ča o znaeňje le prorokoskero Jonašiskero.

³⁰ Bo avke, sar sas o Jonaš znaeňje prekal o manuša andral o Ninive, avke ela the o Čhavo le Manušeskero kale manušege.

³¹ E kralovna pal o juhos uštela pro sudos pre kala manuša a odsudzinela len, bo avľa dural pal aver agor la phuvake te šunel o godaveripen le Šalamunoskero, ale kade hin vareko bareder sar o Šalamun.

³² O murša andral o foros Ninive ušteta pro sudos pre kala manuša a odsudzinena len, bo sar lenge o Jonaš kazinelas, visarde pes le binendar, ale kade hin vareko bareder sar o Jonaš.

Pal e momeli

³³ Ňiko na labarel e momeli a na thovel la te ačhel pro garudo than aňi tel e piri, ale pro momelaris, hoj ola, save aven andre, te dikhen o svetlos.

³⁴ E momeli le teloskeri hin e jakh. Te ela tiri jakh žuži, andre calo tiro telos ela o svetlos, ale te na ela tiri jakh žuži, calo tiro telos ela andro kalipen.

³⁵ Merkin, hoj o svetlos, so hin andre tu, te na el kalipen!

³⁶ Te ela calo tiro telos andro svetlos a na ela andre Ňisavo kalipen, akor labola calo avke, sar te andre tu labiľahas e lampa."

O vakeriben pro Farizeja the zakoňika

³⁷ Sar o Ježiš mek vakerelas, vičinda les varesavo Farizejis ke peste te chal. Geľa a bešľa peske paš o skamind.

³⁸ Sar o Farizejis dikhľa, hoj o Ježiš anglo chaben na thoďa (na omorďa) o vasta, čudalinda pes.

³⁹ O Raj leske phenda: "Tumen, o Farizeja žužaren avral e kuči the o čaro, ale andre tumende hin pherdo hamišagos the nalačhipen.

⁴⁰ Tumen nagodaver. Se oda, so stvorinda avruno, kerďa the andruno!

⁴¹ Ale den le čorenge oda, so tumen hin andre kuči, a ela tumenge sa žužo.

⁴² Ale vigos tumenge Farizejale, hoj den o dešto kotor andral e meta, e ruta the savore aver koreňje, ale obdžan o spravodľišagos the o kamiben le Devleskero. Kada kampa te kerel a koda te na zamukel.

⁴³ Jaj, vigos tumenge Farizejale! Bo kamen anglune thana andro sinagogi a hoj tumenge te pozdravinen pro placos.

⁴⁴ Jaj, vigos tumenge, [zakoňikale the Farizejale! Tumen dujemujengere!] Bo san sar o naprindžarde hrobi a o nipi, save pašal phiren, na džanen, hoj phiren upral o hrobi."

⁴⁵ Jekh le zakoňikendar leske odphenda: "Učitelina, te kavke vakeres, choľares the amen."

⁴⁶ O Ježiš phenda: "Vigos the tumenge, zakoňikale! Bo thoven pro nipi ajsio pharipen, so našti te zľidžal, ale tumen korkore na kamen te čhalavel aňi le angušteha ole pharipnaha.

⁴⁷ Vigos tumenge! Bo ačhaven le prorokenge o hrobi a tumare dada len murdarde!

⁴⁸ Avke san švedki, save den čačipen tumare daden. Bo on le proroken murdarde a tumen lenge ačhaven hrobi.

⁴⁹ Vašoda the o Godaveripen le Devleskero phenda: 'Bičhavava ke lende le proroken the le apoštolen. Varesaven lendar murdarena a pre varesave lendar džana.'

⁵⁰ Avke kala manuša ena potrestimen vaš o rat savore prorokengero, so sas avričhordo, kanastar sas kerdo o svetos,

⁵¹ le Abeloskere ratestar dži ko rat le Zachari-ašoskero, saves murdarďan maškar o chramos the oltaris. He, phenav tumenge, hoj kada pokoleňje ela potrestimen vaš oda savoro.

⁵² Vigos tumenge, zakoňikale! Bo iľan e kleja le vudarestar, so phundravel o prindžaripen. Tumen korkore andre na geľan a olenge, save kamenas, na domukenas."

⁵³ Sar geľa odarik avri, chudle o zakoňika the o Farizeja pre leste igen te džal a phučkernas lestar pal o but veci,

⁵⁴ hoj ča les te chuden andre pre varesavo lav.

Te merkinen pre le Farizejengero kvasos

12 Medik pes zgele but ezera manuša, avke hoj jekh avreske uštarenas pro pindre, chudľa o Ježiš ešeb (peršo) te vakerel peskere učeňkenge: "Chraňinen tumen le Farizejengere kvasostar, so hin o dujemujeskeriben.

² Ale Ňič nane garudo, so na ela jekhvar otkerdo, a nane Ňič počoral, so pes jekhvar na sikavela.

³ Vašoda savoro, so vakerđan andro kalipen, pes šunela andro svetlos a oda, so phendān počoral andro kan, oda pes vičinela avri pal o strechi.

Kastar te daral

⁴ Ale tumenge – mire prijateľenge – phenav: Ma daran tumen olendar, save murdaren o tēlos a palīs imar nič buter naštī keren.

⁵ Ale sikavava tumenge, kastar tumen majinen te daral: Daran tumen olestar, ko šaj murdarel o tēlos a hin les the zor tumen te čhivel andro peklos. He, phenav tumenge: Lestar tumen daran!

⁶ Či na bikenen pandž cikne čiriklen vaš o duj minci? A o Del aňi pre jekh lendar na bisterel.

⁷ Ale tumenge hin zgende mek savore bala pro šero. Avke ma daran tumen! Tumen mon buter sar but cikne čirikle.

Te pridžanel le Ježiš anglo manuša

⁸ Ale phenav tumenge: Sako, ko man pridžanela anglo manuša, ke oda pes the o Čhavo le Manušeskero pridžanela anglo aňjela le Devleskere.

⁹ Ale ko man zaprinela anglo manuša, oles the me zaprinava anglo Devleskere aňjela.

¹⁰ Oleske, ko phenela lav pro Čhavo le Manušeskero, ela odmuklo. Ale oleske, ko pes ruhinela pro Sentno Duchos, oleske na ela odmuklo.

¹¹ Sar tumen lidžana andro sinagogi, anglo uradi the anglo bare raja, ma starinen tumen, sar pes brañinena a so vakerena.

¹² Bo o Sentno Duchos andre odi ora tumenge sikavela, so te phenel."

Pal o nagodāver barvalo manuš

¹³ Varesavo dženo ole nipendar leske phendā: "Učitelina, phen mire phraleske, hoj peske te rozulavel manca o dēdictvos!"

¹⁴ Ale ov odphendā: "Manušēja, ko man ačhađa te sudžinel, abo te rozulavel maškar tumende?"

¹⁵ A phendā lenge: "Dikhen a merkinen pre tumende, hoj tumen te na zakamen andro love! Bo le manušes nane o dživipen andro barvalipen."

¹⁶ Phendā lenge podobenstvo: "Varesave barvale manušeske andā e phuv but ulipen.

¹⁷ Gondolinelas peske andro jilo a phendā: 'So kera-va? Bo nane man, kaj te sthovel miro ulipen.'

¹⁸ A phendā: 'Kerava kada: Čhivava tele mire šopi a kerava lendar bareder a sthovava ode savoro miro ulipen the miro barvalipen

¹⁹ a phenava mange: Dušo miri, hin tut but barvalipen sthodo pro but berša; akana imar odpočovin, cha, pi a mulatin!

²⁰ Ale o Del leske phendā: 'Tu nagodāver! Mek adi rat tutar ela ilo tiro dživipen a oda, so tuke skidňal, kaske ačhela?'

²¹ Avke ela oleha, ko peske sthovel o barvalipen a nane barvalo andro Del."

Te mukas pes pro Del andre savoreste

²² Phendā peskere učēnikenge: "Vašoda tumenge phenav, ma starinen tumen pal tumaro dživipen, hoj so chana; aňi pal tumaro tēlos, hoj so urena.

²³ Bo o dživipen hin buter sar o chaben a o tēlos hin buter sar o uraviben.

²⁴ Dikhen pro vrani! Aňi na sadzinen, aňi na kiden upre; nane len špajzi aňi šopi a o Del len čařarel. Či tumen na mon buter sar o čirikle?

²⁵ Ńiko tumendar naštī phenel: 'Me buteder dživava, bo me man starinav pal o dživipen.'

²⁶ Te aňi oda nekcikneder naštī keren, akor soske pes starinen pal aver veci?

²⁷ Dikhen pro kvitki pre maľa, sar baron. Na keren buči aňi na heklinen. No phenav tumenge, hoj aňi o Šalamun andre calo peskero šukariben na sas avke urdo sar jekh lendar.

²⁸ Akor, te o Del e maľakeri čar kavke uravel, so adadžives hiňi a tajsa ela čhidī andro bov, ta akor tumen na uravela buter? Manušale, cikne pačabnaha!

²⁹ Ma gondolinen ča pal oda, so chana abo so pijena. Ma trapinen tumen pal oda!

³⁰ Bo oda savoro roden o nipi kale svetoskere. Se tumaro Dad džanel, hoj tumenge oda kampil.

³¹ Ale roden ešeb (peršo) o krališagos le Devleskero a ov tumen dela savore kala veci.

³² Ma dara tut, cikno stadocina, bo tumaro Dad tumenge kamel te del o krališagos!

³³ Bikenen tumaro barvalipen a rozden le čorengel! Keren tumenge o zajdici, so na čhingersaľon, o barvalipen andro űebos, so šoha (ňikda) na našľola – ode, kaj o živaňis pes na dochudel a o kirme na chan.

³⁴ Bo ode, kaj hin tumaro barvalipen, ela the tumaro jilo."

Pal o sluhi, save merkinen

³⁵ "Aven furt pririchtimen a o momela tumenge mi labon!

³⁶ Aven ajse sar ola manuša, so užaren peskere Rajes, kana avela pale pal o bijav, hoj leske takoj te phundraven, sar avela a durkinela.

³⁷ Bachtale hine ola sluhi, saven o Raj arakhela te užarel, sar ov avela! Čačipen tumenge phenav, hoj urela pre peste e leketa, thovela len te bešel pal o skamind, avela a kerela pašal lende.

³⁸ Te avľahas pal jepaš rat, či ko tosara, bachtale hine ola sluhi, saven arakhľahas, hoj na soven!

³⁹ Ale kada džanen, hoj te džanľahas o gazdas, andre savi ora rači avela o živaňis, merkindahas a na domukľahas leske te džal andro peskero kher.

⁴⁰ Vašoda the tumen aven pririchtimen, bo o Čhavo le Manušeskero avela andre ora, so na užarena."

Pal o verno the godāver sluhas

⁴¹ O Peter leske phendā: "Rajeja, ča amenge phenes kada podobenstvo, vaj savoredženenge?"

⁴² O Raj odphendā: "Akor, ko hin oda verno the godāver sluhās, saves ačhađa leskero raj upral peskere sluhi, hoj len te del te chal pro časos?"

⁴³ Bachtalo hin oda sluhās, saves leskero raj, sar avela, arakhela oda te kerel!

⁴⁴ Čačipen tumenge phenav, hoj les ačhavela upral calo peskero barvalipen.

⁴⁵ Ale te peske gondolindāhas oda nalačo sluhās andre peskero jilo: 'Miro raj mek but na avela!' A chudlāhas te marel le sluhē the le služken, chalāhas, piłahas the mačilahas –

⁴⁶ avela o raj ole sluhāske andro džives, so na užarel, the andre ora, so na džanel; rozčhinela les pro jepaš a dela les than maškar o napačabnaskere.

⁴⁷ Oda sluhās, savo džanelas, so lestar o raj kamelas, a na pririchtinda pes, aňi na kerđa avke, sar ov lestar kamelas, ela igen mardo.

⁴⁸ A oda, ko na džanelas, ale kerel ola veci, vaš save peske zasogalinel (zaslužinel) mariben, ela frimeder mardo. Sakonestar, ko but chudlā, pes but užarela. A olestar, kaske sas but dino, pes buter mangela."

O Ježiš avel te rozulavel

⁴⁹ "Avlōm e jag te čhivel pre phuv. A so me kamav? Hoj imar te labol!"

⁵⁰ Ale mušnav te el boldo le bolipnaha a avke phares mange, medik pes oda na ačhela!

⁵¹ Gondolinen tumenge, hoj avlōm te del o smirom pre phuv? Na, ale phenav tumenge, hoj te rozulavav!

⁵² Bo akanastar ena pandž džene andre jekh kher rozolade, trin džene džana pro duj a duj džene džana pro trin.

⁵³ Rozulado ela o dad le čhaha a o čhavo le dadeha; e daj la čhaha a e čhaj la daha; e sasuj la boraha a e bori peskera sasaha."

Te prindžaren o znaeňja

⁵⁴ Phendā le nipenge: "Sar dikhen, hoj e chmara avel le zapadostar, takoj phenen, hoj avel o brišind a hin avke.

⁵⁵ A sar dikhen, hoj phurdel e balvaj le juhostar, phenen, hoj ela tačipen a hin avke.

⁵⁶ Tumen dujemujengere! Oda, so pes sikavel pre phuv the pro ňebos, džanen te rozprindžarel, akor sar oda, hoj kada časos na rozprindžaren?

⁵⁷ Soske korkore pestar na rozsudzinen, so hin mištes te kerel?

⁵⁸ Bo sar džas oleha, kaha rušes anglo raja, lačhuv leha avri mek pal o drom, hoj tut te na lidžal anglo sudcas a o sudcas tut diňahas le slugadiske a o slugadīs tut čhidāhas andre bertena.

⁵⁹ Phenav tuke, hoj odarik na aveha avri, medik na počineha dži posledno minca."

Vičinel le manušen ko pokaňje

13 Akor ode avle varesave džene, a vakerenas leske pal ola Galilejčana, saven murdarđa o Pilat, sar obetinas le Devleske.

² O Ježiš lenge odphendā: "Gondolinen tumenge, hoj ola Galilejčana, save avke cerpinenas, sas binošneder sar savore aver Galilejčana?"

³ Phenav tumenge, hoj na – ale te tumen na visarena le binendar, savoredžene avke merena.

⁴ Abo so tumenge gondolinen pal ola dešuochto (18) džene, pre save peła e veža andro Siloe a murdarđa len? Gondolinen tumenge, hoj on sas binošneder sar savore manuša, save bešen andro Jeruzalem?

⁵ Phenav tumenge, hoj na sas! Ale te tumen na visarena le binendar, savoredžene avke merena."

Pal o figovňikos, so na del ovocje

⁶ A phendā kada podobenstvo: "Varesave manušen sas sadzimen figovňikos andre peskeri viňica. Avlā a rodelaš upre ovocje, ale na arakhlā.

⁷ Akor phendā le vinariske: 'Dikh, imar trito berš phirav a rodav ovocje pre kada figovňikos, ale na arakhav. Čhin les tele! Soske mek the odi phuv musarel!'

⁸ Ale ov leske phendā: 'Rajeja, muk les mek ada berš, mek pašal leste kopalnava a čhivava hnojos.

⁹ Šaj anel aver berš ovocje, ale te na, čhineha les tele.'"

Sastārel pro Šabbat jekha džuvlā

¹⁰ Jekh Šabbat (sombat) sikavelas andre sinagoga.

¹¹ Sas ode džuvli, andre savi sas o nalačo duchos a trapinelas la le nasvalibnaha. Dešuochto (18) berš la bandarelas a oj pes aňi sikra našti rovñinelas avri.

¹² Sar la dikhlā o Ježiš, vičindā la ke peste a phendā lake: "Džuvlīje, akanastar sal imar rozphandlī tire nasvalibnastar!'"

¹³ Thodā pre late o vasta. Oj pes takoj rovňardā avri a lašarelas le Devles.

¹⁴ Akor cholisalīlā o angluno manuš andral e sinagoga, hoj o Ježiš sastārdā pro Šabbat, a phendā le nipenge: "Šov džives hin, andre save pes kerel buči! Andre ola dživesa aven, hoj te sastōn avri – ale ma keren oda pro Šabbat!'"

¹⁵ Ale o Raj leske odphendā: "Tu dujemujengero! Či na odphandel sako tumendar pro Šabbat peskera gurumňa vaj peskere somaris andral e maštālā a na lidžal les ko paňi te pijel?"

¹⁶ Kadi džuvli hiňi le Abrahamoskeri čhaj a o beng la zaphandlā andre imar dešuochtoto (18.) berš. Našti sas avrisastārdi andral ola puta pro Šabbat?"

¹⁷ Sar oda phendā, ladžanas pes savoredžene, save pre leste džanas. A savore nipi radisaľonas ole savore bare vecenge, so ov kerelas.

Pal o horčično semenos

¹⁸ Akor phendā: "Sar dičhol o krališagos le Devleskero a ke soste les pripodobňinava?"

¹⁹ Hino sar o horčično semenos, so iľa o manuš a čhida andre peskeri maľa. Ode bariľa, ačhiľa lestar baro stromos a pre leskere konara peske kerde hñzdi o čirikle andral o űebos."

²⁰ Pale phendā: "Ke soste pripodobňinava o krališagos le Devleskero?"

²¹ Hino sar o droždĭ, so iľa e džuvľi a rozkerđa andre igen but aro †, medik calo chumer na avľa upre."

E cesno brana

²² Le dromeha andro Jeruzalem predžalas o fori the o gavora a sikavelas ode.

²³ Vareko leske phendā: "Rajeja, ena frima džene zachraňimen?" Ov odphendā:

²⁴ "Keren sa, hoj te aven andre prekal e cesno brana, bo phenav tumenge, hoj but džene kamena te avel andre, ale naštĭ avena.

²⁵ Bo sar uštĕla o chulaj a zarinela o vudar a te tumen ačhena avri, durkinena pro vudar a phenena: 'Rajeja, Rajeja, phundrav amenge!' Ov tumenge odphenela: 'Na prindžarav tumen! Khatar san?'

²⁶ Akor chudena te vakerel: 'Chahas the pijahas tuha a pre amare ulĭci sikavehas.'

²⁷ Ale phenela tumenge: 'Na prindžarav tumen, khatar san. Džan mandar het, tumen, save kerenas o nalačhipen!'

²⁸ Ode ela o roviben a randena le dandenca andre dukh, sar dikhena le Abraham, le Izak, le Jakob the savore proroken andro krališagos le Devleskero a tumen avena avričhide.

²⁹ O manuša avena pal o vichodos the pal o zapados, pal o severos the pal o juhos a bešena paš o skamind andro krališagos le Devleskero.

³⁰ Avke, hin posledna, so ena ešebne, a hin ešebne, so avena posledna."

Vakerel pal o Herodes

³¹ Andre oda časos avle varesave Farizeja a phende leske: "Av avri a dža adarik het, bo o Herodes tut kamel te murdarel."

³² Ov lenge phendā: "Džan a phenen ola liškake, hoj tradav avri le demonen a sastarav adadžives the tajsa a pre trito džives dokerava miri buči.

³³ Ale mušĭnav adadžives the tajsa the paltajsaste te phirel. Bo na del pes, hoj te merel o prorokos avrether sar andro Jeruzalem!

Le Ježišoske hin pharo pro Jeruzalem

³⁴ Ó, Jeruzalem, Jeruzalem! Tu, so murdares le proroken a čhivkeres le barenca andre ola, save hine bičhade ke tute! Kecivar kamľom te skidel tire čhaven

† Oda hin trin miri abo 50 kili.

avke, sar e kachňi skidel peskere kachňoren tel peskere kridli, ale na kamľan!

³⁵ Dikh, mukava tumaro kher omuklo! Čačipen tumenge phenav, hoj man imar šoha (ňikda) na dikhena, medik na avela e ora, hoj phenena: 'Bachtalo, ko avel andro nav le Rajeskero!'"

Pale sastarel pro Šabbat

14 Jekhvar pro Šabbat (sombatone) geľa o Ježiš te chal andro kher ke varesavo angluno Farizejis. A o Farizeja les dodikhenas avri.

² Anglal leste sas varesavo manuš, saveske o pindre the vasta sas šuvle.

³ O Ježiš pes visardā ko zakoňika the farizeja a phučľa lendar: "Šaj pro Šabbat te sastarel, abo na?"

⁴ Ale on sas čhit. Avke o Ježiš iľa ole manušes, sastardā les a mukľa les te džal.

⁵ Avke lenge phendā: "Te tumenge perela o čhavo vaj o bikos andre chaňig, ta na cirdena les avri takoj pro Šabbat?"

⁶ A on leske pre oda na džanle te odphenel aňi lav.

Pal o ešebne the posledna thana

⁷ Sar dikhľa, hoj ola, save sas vičimen, peske kiden avri anglune thana, phendā lenge kada podobenstvo:

⁸ "Te tut vareko vičĭnena pro bijav, ma beš tuke pro angluno than, bo maškar ola vičĭnde šaj el vareko bareder sar tu.

⁹ Bo avela oda, savo tumen sodujen vičĭndā a phenela tuke: 'Muk leske oda than!' Avke palĭs tu andre ladž džaha te bešel pro paluno than.

¹⁰ Ale te tut vičĭnena, dža tuke te bešel pro paluno than. A sar avela oda, savo tut vičĭndā, phenela tuke: 'Phrala miro, beš tuke pašeder, pro feder than!' Akor tut ela pačĭv angle savoredžene, save tuha bešen pašal o skamind.

¹¹ Bo sako, ko pes upre hazdel, ela tele dikhlo, a oda, ko pes pokorĭnena, ela upre hazdlo."

¹² Ole manušeske, savo les vičĭndā, phendā: "Te keres dilos, abo večera, ma vičĭn tuke tire prijatĕlen aňi le phralen aňi le pašutnen abo barvale suseden – bo te avke keres, the on tut palĭs šaj vičĭnen a dena tuke pale.

¹³ Ale te keres hoscina, vičĭn le čoren, le bangen, le kalĭken the le koren.

¹⁴ A aveha bachtalo, bo len nane soha tuke te visarel pale, a dela pes tuke pale akor, sar o čačĭpnaskere ena uštade andral o meriben."

O podobenstvo pal e bari večera

¹⁵ Sar oda šundā jekh olendar, save leha bešenas paš o skamind, phendā leske: "Bachtalo, ko chala o maro andre le Devleskero krališagos!"

¹⁶ No ov leske phendā: "Varesavo manuš kerđa bari večera a vičĭndā but dženen.

¹⁷ Sar imar sas e večera, bičhađa peskere sluhās, hoj te phenel olenge, save hine vičimen: 'Aven, bo imar hin savoro pririchtimen.'

¹⁸ Ale on leske savoredžene jekh pal aver odphene-nas. Ešebno leske phendā: 'Cindom maľa, mušinav la te džal te dikhel. Mangav tut, prebačim mange!'

¹⁹ Aver phendā: 'Cindom deš guruva a džav len te probalinel (skušinel) avri. Mangav tut, prebačim mange!'

²⁰ Pale aver dženo phendā: 'Ilom mange romňa, a vašoda našti džav.'

²¹ Sar avľa pale o sluhās, phendā oda peskere rajeske. Akor cholšaliľa o chulaj a phendā peskere sluhāske: 'Dža sigo andro foros pro droma the pro dromora a an kade le čoren, le bangen, le kaliken the le koren!'

²² O sluhās phendā: 'Rajeja, ačhiľa pes avke, sar phendāl, a mek hin than.'

²³ A o raj phendā le sluhāske: 'Dža avri le forostar pro droma the maľakere dromora a ispiden pre lende te aven, hoj miro kher te el pherdo!'

²⁴ Bo phenav tumenge, hoj aňi jekh ole muršendar, save sas vičimen pro bijav a odphende, na chana miri večera."

Sar te džal pal o Kristus

²⁵ Džanas leha but nipi. Ov pes visardā ke lende a phendā:

²⁶ "Našti aves miro učeňikos, medik man feder na kameha sar tire dades vaj tira da, tira romňa abo tire čhaven, tire phralen vaj tire pheňen. Našti aves pal ma, medik man feder na kameha sar tiro dživipen.

²⁷ Oda, ko na lel peskero kerestos a na avel pal ma, našti el miro učeňikos.

²⁸ Bo te vareko tumendar kamel te ačhavel e veža, či peske ešeb (peršo) na bešel, hoj te zrachel, či les hin pre oda, hoj te dokerel cali veža?

²⁹ Hoj palis savoredžene lestar te na asan, sar dikhena, hoj kerđa o zakladi a nane les pre oda, hoj te dokerel.

³⁰ A phenena: 'Kada manuš chudľa te ačhavel a našti dokerđa.' "

³¹ "Abo savo kralis džal andro mariben avre kraliľa, medik ešeb (peršo) na bešel a na dopučel pes, či šaj džal le 10 000 manušenca pre oda, ko pre leste avel le 20 000 manušenca?

³² Te na, akor bičhavela peskere sluhēn medik leskero ňeprijatelis hino dur, hoj pes leha te dothovel pal o smirom.

³³ Avke ňiko, ko na omukel savoro, so les hin, našti el miro učeňikos."

Pal o lon

³⁴ "O lon hino lačo, ale te o lon našavela peskero londipen, sar šaj te dochudel pale o londipen?

³⁵ Nane lačo aňi andre phuv aňi andro hnojās, vašoda les čhivena het. Kas hin kana, hoj te šunel, mi šunel!"

Pal o našado bakroro

15 O colňika the o binošna avenas pašeder ko Ježiš, hoj les te šunen.

² O Farizeja the o zakoňika dudrinenas a phenenas: "Kada manuš prilel le binošnen a chal lenca."

³ Akor lenge phendā kada podobenstvo:

⁴ "Te varekas tumendar ela šel (100) bakre a jekhes lendar našadahas, či na mukela olen eňavardeš the eňa (99) pre maľa a na džala pal oda, savo našliľa, medik les na arakhela?

⁵ Sar les arakhel, lel peske les pro vali a radisaľol.

⁶ A sar avel khere, vičinel le prijatelēn the le suseden a phenel lenge: 'Radisaľon manca, bo arakhľom le bakres, savo mange našliľa!'

⁷ Phenav tumenge, hoj bareder radišagos ela andro ňebos upral jekh binošno manuš, savo pes visarela ko Del, sar upral ola eňavardeš the eňa (99) čačipnaskere, savenge pes na kampil te visarel le binendar."

Pal e našadi minca

⁸ "Abo, te varesava džuvľa ela deš rupune minci a te jekh lendar našadahas, či na labarela e momeli a na šulavela o kher, hoj mištes te rodel, medik ola love na arakhela?

⁹ Sar la arakhela, vičinel le prijatelken the le susedken a phenela: 'Radisaľon manca, bo arakhľom o love, so našadom!'

¹⁰ Phenav tumenge, hoj ajsa radišagos hin maškar o aňjela le Devleskere upral jekh binošno manuš, savo pes visarel le binendar ko Del."

Pal o našado čhavo

¹¹ A phendā: "Varesave manušes sas duj čhave.

¹² O terneder čhavo phendā le dadeske: 'Dado, de mange miro kotor tire barvalipnastar!' Avke o dad lenge rozulađa o barvalipen.

¹³ Pal varesave dživesa o terneder čhavo iľa savoro a geľa het dur andre varesavi phuv. Ode dživelas barikanes a rozkerđa savoro peskero barvalipen.

¹⁴ Sar imar savoro prečaľa, avľa bari bokh andre odi phuv a na sas les so te chal.

¹⁵ Geľa a chudľa te kerel buči prekal varesavo manuš, savo andre odi phuv bešelas. Ov les bičhađa pre peskere maľi te pasinel le balen.

¹⁶ Kamelas pes te čaľarel ča ole cipenca, so chan o bale, ale ňiko leske len na delas.

¹⁷ Akor pes zagondolinda a phendā peske: 'Keci robotňiken ke miro dad hin but chaben a me kade merav bokhatar!'

¹⁸ Uščava, džava ke miro dad a phenava: Dado, kerđom binos anglo ňebos the angle tu,

¹⁹ imar na som buter hodno, hoj man te vičinav tiro čhavo; prile man sar jekhe tire robotňiken.'

²⁰ Akor uštíla a džalas ke peskero dad. Ov mek sas dur, sar les dikhla leskero dad. Ačhiła leske pharo pro čhavo, denašla ke leste, obchudla les a čumidla les.

²¹ O čhavo leske phenda: 'Dado, kerdom binos anglo ňebos the angle tu a imar buter na som hodno, hoj man te vičinav tiro čhavo.'

²² Akor phenda o dad peskere sluhenge: 'Anen sigo nekšukareder ruchos a uren pre leste! Thoven e angrusi pro angušt a o sandalki pro pindre!

²³ Len ola thuła gurumňora a murdaren la! Chas a radisaľuvás,

²⁴ bo kada miro čhavo sas mulo a obdžidila, sas našado a arakhla pes!' A chudle te radisaľol.

²⁵ Leskero phureder čhavo sas akor pre maľa. Sar avelas pale a sas pašes ko kher, šundā o bašaviben the o kheliben.

²⁶ Vičinda peske jekhes le sluhendar a phučla lestar, so pes ačhiła.

²⁷ Ov leske phenda: 'Tiro phral avla pale, a vašoda, hoj avla sasto, tiro dad murdarđa thuła gurumňora.'

²⁸ Ov cholisaľila a na kamla te džal andro kher. Avke avla pal leste leskero dad a prevakerelas les.

²⁹ Ale ov odphenda peskere dadeske: 'Ajci but berš tuke služinav a furt kerav oda, so mange phenes, ale man šoha (ňikda) na diňal aňi kozica, hoj man te zabavinav mire prijatelēnca.

³⁰ Ale sar avla kada tiro čhavo, savo le lubnenca rozkerđa tiro barvalipen, murdarďal prekal leste thuła gurumňora.'

³¹ O dad odphenda: 'Čhavo miro, tu sal furt manca a savoro, so hin miro, hin the tiro.

³² Ale kempel te radisaľol a te thovel baripen, bo kada tiro phral sas mulo a obdžidila; sas našado a arakhla pes.' "

Pal o napačivalo sluhás

16 O Ježiš vakerelas peskere učeňikenge: "Sas jekh barvalo manuš a les sas jekh sluhás, savo leske dodikhelas pro barvalipen. A avle pro sluhás te phenel, hoj leske rozčhivkerel o barvalipen.

² Avke peske les vičinda a phenda: 'So šunav pal tu? Sikav mange, so keres oleha, so tuke diňom, bo imar buter našti dodikheha pre miro barvalipen.'

³ O sluhás peske phenda: 'So kerava, te mandar o raj lela e buči? Te kopalinel na birinav a te žobrinel man ladžav.

⁴ Imar džanav, so kerava, hoj man o manuša te prilen andre peskere khera, sar našavava e buči.'

⁵ Po jekhes peske vičinda olen, save kamenas le rajeske, a le ešebnestar phučla: 'Keci kames mire rajeske?'

⁶ Odphenda: 'Šel bečki olivovo olejos.' Ov leske phenda: 'Le o papiris, kaj hin pisimen, keci kames, a beš sigo a pisin penda (50).'

⁷ Palis phučla le dujtonestar: 'Tu keci kames?' Odphenda: 'Ezeros (1 000) gone žužodiv.' Ov leske phenda: 'Le kade o papiris, kaj hin pisimen, keci kames, a pisin ochto šel (800).'

⁸ A o raj ašardā le napačivale sluhás, hoj kerđa ajsi godaver veca. Bo kale svetoskere manuša keren jekh ke aver godavereder, sar o čhave le svetloskere.

⁹ Phenav the tumenge: Keren tumenge prijatelēn le načačipnaskere barvalipnastar. Hoj on tumen te prilen andro večne khera, sar jekhvar našola oda barvalipen."

¹⁰ "Oda, ko hino pačivalo andro frima, hino pačivalo the andro but, a ko nane pačivalo andro frima, nane pačivalo aňi andro but.

¹¹ Te na sanas pačivale andre le svetoskero barvalipen, ko tumenge dela oda čačo barvalipen?

¹² A te na sanas pačivale andre oda, so na sas tumaro, ko tumenge dela oda, so hin tumaro?"

¹³ "Ňiko našti služinel duje rajenge. Bo jekhes kameha a dujtones našti avri ačheha, abo jekhes rado dikheha a dujtones tele dikheha. Našti služinen the le Devleske the le svetoskere barvalipnaske."

¹⁴ Oda savoro šunenás the o Farizeja, save igen kamenas o love, a asanas lestar.

¹⁵ A o Ježiš lenge phenda: "Tumen san ola, save korkore pestar keren čačipnaskere anglo manuša, ale o Del prindžarel tumare jile. Bo oda, so hin baro anglo manuša, oda hin anglo Del džungipen."

Aver sikavibena le Ježišoskere

¹⁶ "O Zakonos the o Proroka hine dži paš o Jan; ako-restar pes vakerel pal o krališagos le Devleskero a sako pes ispidel zoraha andre.

¹⁷ Ale sigeder o ňebos the e phuv našlona, sar te našliľahas andral o Zakonos jekh čjarkica.

¹⁸ Sako, ko premukel peskera romňa a lel peske avra, kerel o lubipen a sako, ko peske lela kajsa romňa, sava aver rom premukla, kerel o lubipen."

O barvalo the o Lazar

¹⁹ "Sas jekh barvalo manuš, savo pes urelas andre ola nekšukareder gada a sako džives mulatinelas a dživelas barikanes.

²⁰ Sas the jekh čoro manuš, saves vičinenas Lazar. Ov pašľolas paš leskeri brana a sas les pherdo vredi.

²¹ Kamelas te chal o trušini, so perenas le barvaleske pal o skamind, no mek the o rikone avenas a lizinenas leske o vredi.

²² Ačhiła pes, hoj o čoro manuš muľa a o aňjela les li-gende paš o Abraham andro ňebos. Muľa the o barvalo a sas parumen.

²³ Palis andro peklos andro dukha hazdňa o jakha a dikhla dural le Abraham the le Lazar paš leste.

²⁴ Akor vriskinda: 'Dado Abraham, av ke ma jileskero! Bičhav le Lazar, hoj te močinel o agor le anguštostar andro paňi a te cindarel mange e čhib, bo igen cerpinav andre kadi jag!'

²⁵ O Abraham phenda: 'Čhavo miro, ma bister pre oda, hoj tu chudehas savoro lačhipen, sar dživehas, a o Lazar chudla o nalačhipen. Avke akana ov radisaľol a tu cerpines.

²⁶ A mek ke oda hin maškar amende the tumende bari chev, hoj ola, save kamen te predžal adarik, našti predžan a aňi ola, save kamen te avel odarik kade, našti pes dochuden ke amende.'

²⁷ Phendā: 'Akor mangav tut, dado Abraham, bičhav les andre mire dadeskero kher,

²⁸ bo hin man pandž phrala. Mi džal lenge te phenel pal ada dukhengero than, hoj pes the on te na dochuden ade!'

²⁹ Ale o Abraham leske phendā: 'Hin len o Mojžiš the o Proroka – len mi šunen!'

³⁰ O barvalo odphendā: 'Na, dado Abraham! Ale te vareko uštela andral o meriben a džala ke lende, akor pes visarena le binendar!'

³¹ Ale o Abraham phendā: 'Te na šunen le Mojžiš the le Proroken, ta na pačana aňi akor, te vareko uštela andral o meriben.' "

Te na cirden avres pro binos

17 O Ježiš phendā peskere učeňikenge: "Mušinen pes te ačhel ola veci, so cirden le manušen pro binos, ale vigos ole manušeske prekal kaste oda avel.

² Feder leske uľahas te leske thodehas baro bar † pre meň a čhidehas les andro moros, hoj te kerel tele le pačabnastar jekhes kale ciknrendar.

³ Merkinen tumenge! Te kerđahas tiro phral binos, priphen leske, a te pes visarela le binostar, odmuk leske.

⁴ A te eftavar andro džives kerđahas binos pre tute, a eftavar andro džives pal tu avľahas a phendāhas: 'Prebačín, odmuk mange' – odmukeha leske!'

Pal o pačaben

⁵ O apoštola phende le Rajeske: "De amen bareder pačaben!'

⁶ O Raj phendā: "Te tumen uľahas o pačaben sar o horčično semenos, phendānas kale stromoske: 'Le tut avri the le koreňenca a zasadzin tut andro moros,' šundahas tumen.' "

O sluhas the leskeri buči

⁷ "Te hin tumen sluhas, savo orinel abo pasinel, ko tumendar leske takoj phenel, sar avel pal e maľa: 'Av, beš tuke paš o skamind?'

⁸ Sigeder leske phenela: 'Pririchtin mange e večera, le pre tu e leketa a ker pašal ma, medik me na dočava a na dopijava. Tu palis chaha the pijeha'.

⁹ Či palikerel ole sluhasko vaš oda, hoj kerđā oda, so leske sas phendo?'

¹⁰ Avke the tumen, te kerena savoro, so tumenge sas phendo, phenen: 'Sam ča o sluhi, save peske na zasogalinas (na zaslužinas) ňič. Kerđam ča oda, so mušindam te kerel.' "

Sastārel le deše malomocnen

¹¹ O Ježiš džalas andro Jeruzalem prekal e Samarija the Galileja.

¹² Sar doavľa andre varesavo gav, arakhle pes leha deš malomocne murša, save dural ačhenas

¹³ a zoraha vriskinenas: "Ježiš! Učitelina! Av ke amende jileskero!'

¹⁴ Sar len dikhľa, phendā lenge: "Džan a sikaven tumen le rašajenge!'" A sar džanas, sas obžuzarde andral o malomocenstvo.

¹⁵ Jekh lendar, sar dikhľa, hoj sastıľa avri, avľa pale a zorale hangoha lašarelas le Devles.

¹⁶ Le mujeha bandıľa džı ke phuv paš le Ježišoskere pindre a palikerelas leske. A ov sas Samaritanos.

¹⁷ Akor phendā o Ježiš: "Či na sastıľe avri deš džene? Kaj hine okla eňa džene?'

¹⁸ On na avle pale, hoj te lašaren le Devles, ča kada cudzincos?'

¹⁹ Phendā leske: "Ušti a džā, tiro pačaben tut sastārđā.' "

Kana avela o krališagos le Devleskero

²⁰ Sar lestar o Farizeja phučle, kana avela o krališagos le Devleskero, ov lenge odphendā: "O krališagos le Devleskero na avela avke, hoj les te dikhas.

²¹ Aňi na phenena: 'Dikh, kade hino!' abo 'Kode hino!' Bo o krališagos le Devleskero hin maškar tumende!'

²² Phendā le učeňikenge: "Avela ajso časos, hoj peske mangena te dikhel jekh le dživesendar le Čhas le Manušeskeres, ale na dikhena.

²³ Phenena tumenge: 'Dikh, kode hino!' vaj 'Kade hino!' Ale tumen ma džan, ma denašen pal lende!'

²⁴ Bo avke, sar o perumos demel a dičhol savoro pal jekh agor pre phuv džı pre aver, avke ela the akor, sar avela o Čhavo le Manušeskero andre peskero džives.

²⁵ Ale ešeb mušinel but te cerpinel a te el odčhido kale pokoleňjostar.

²⁶ Sar sas andro Noachoskere dživesa, avke ela the andro dživesa, sar avela o Čhavo le Manušeskero.

²⁷ Chanas, pijenas, lenas romňijen a džanas romeste džı andre oda džives, sar geľa o Noach andro korabos. Akor avľa e potopa a savore mule.

²⁸ Avke sas the andro dživesa le Lotoskere: Chanas, pijenas, cinenas, bikenenas, sadzinenas a ačhavenas khera,

²⁹ ale oda džives, sar geľa o Lot avri andral e Sodoma, o Del bičhađa e jag the sira andral o ňebos a savore mule.

³⁰ Avke ela the andre oda džives, sar pes sikavela o Čhavo le Manušeskero.

³¹ Ko ela oda džives pre strecha a leskere veci ena andro kher, te na avel tele len te lel. Aňi oda, so ela pre maľa, pes te na visarel pale!'

³² Leperen pre Lotoskeri romňi!'

† O baro bar andral o malmos

³³ Sako, ko kamlahas te zachrañinel peskero dživipen, oda les našavela a sako, ko les našavela, oda les zachrañinela.

³⁴ Phenav tumenge: Odi rat duj džene ena pro hačos: Jekh ela ilo a dujto ačhela.

³⁵ Duj džuvlĳija jekhetane erñinena: Jekh ela ilĳi a dujto ačhela.

³⁶ [Duj džene ena pre maĳa, jekh ela ilo a dujto ačhela.]

³⁷ On leske odphende: "Kaj, Rajeja?" Ov lenge odphenda: "Ode, kaj ela o telos, ode pes skidena the o supĳi."

O sudcas the e vdova

18 O Ježiš lenge vakerelas podobenstvo pal oda, hoj pes furt kempel te modĳinel a te na omukel pes:

² "Andre jekh foros sas sudcas, savo pes le Devlestar na daralas a le manušestar na ladžalas.

³ Sas andre oda foros the varesavi vdova, savi phirelas ke leste a phenelas: 'Zaačh vaš ma anglo manuš, savo pre ma džal!'

⁴ Ov but na kamelas oleha nič te kerel. Ale palĳis peske phenda: 'Na darav man le Devlestar a le manušestar na ladžav,

⁵ ale vaš oda, hoj man kadi vdova na del smirom, zaačhava vaš late, bo imar la naštĳi zĳidžav, sar avke phirel pal ma.'

⁶ O Raj phenda: "Šunen, so phenda oda načačipnaskero sudcas!

⁷ Či o Del na zaačhela vaš ola, kas peske avri kidña, save ke leste rat-džives vičinen? Či len mukela but te užarel?

⁸ Phenav tumenge, hoj zaačhela vaš lenge a oda sig. Ale čĳi arakhela o Čhavo le Manušeskero o pačaben pre phuv, sar avela?"

O Farizejis the o colñĳikos

⁹ Olenge, save pačanas andre peste, hoj hine čačipnaskere a oklen dikhenas tele, vakerelas kada podobenstvo:

¹⁰ "Duj murša pes gele andro chramos te modĳinel. Jekh sas Farizejis a dujto sas colñĳikos.

¹¹ O Farizejis peske ačĳiĳa a kavke pes andre peste modĳinelas: 'Devla, paĳikerav tuke, hoj na som aĳso sar okla manuša, save čoren, hine načačipnaskere a keren o lubipen – abo sar kada colñĳikos.

¹² Poscinav man duvar andro kurko a dav o dešto andral savoreste, so chudav.'

¹³ Ale o colñĳikos ačhelas dural a na kamelas mek añĳi o jakha te hazdel ko ñebos, ale pes marelas pal o kolĳin a phenelas: 'Ó, Devla, av ke ma ĳileskero, bo som binošno!'

¹⁴ Phenav tumenge, hoj ov geĳa khere a sas leske odmukle o bini, ale avreske na. Bo sako, ko pes upre hazdel, ela pokorimen, a oda, ko hin pokorno, ela upre hazdlo."

O Raj le čhavorenca

¹⁵ Anenas ko Ježiš the le cikne čhavoren, hoj pre lende te thovel o vasta. Ale sar oda dikhle o učeñĳika, na domukenas lenge.

¹⁶ Ale o Ježiš len vičinda ke peste a phenda: "Domuken le čhavorenge te avel ke ma a ma brañinen lenge, bo aĳsengero hin o kralĳišagos le Devleskero.

¹⁷ Čačipen phenav tumenge: Ko na prilela le Devleskero kralĳišagos sar čhavoro, šoha (ñĳikda) andre na džala."

O barvalo terno murš

¹⁸ Varesavo angluno manuš lestar phučĳa: "Lačo Učĳitelĳina, so te kerel, hoj te chudav o večno dživipen?"

¹⁹ O Ježiš leske phenda: "Soske man vičines lačo? Ñĳiko nane lačo, ča jekh o Del.

²⁰ O prikazañĳa džanes: 'Na murdareha! Na kereha lubipen! Na čoreha! Na svedčineha klamišagoha pre tiro pašutno! De pačĳiv tira da the le dades!'"

²¹ Ov odphenda: "Kada savoro imar mire terñĳpnastar dolĳikerav."

²² Sar oda šunda o Ježiš, phenda leske: "Mek jekh veča tuke kempel. Biken savoro, so tut hin, a rozde le čorenge a ela tut o barvalĳipen andro ñebos. Palĳis av a phir pal ma!"

²³ Ale sar oda šunda, ačĳiĳa igen smutno, bo sas igen barvalo.

²⁴ Sar oda dikhĳa o Ježiš, phenda: "Sar phares avena andro kralĳišagos le Devleskero ola, saven hin barvalĳipen!"

²⁵ Lokeder hin la t'avake te predžal prekal e suvakeri chev, sar le barvaleske andro Devleskero kralĳišagos."

²⁶ Akor phende ola džene, save oda šunde: "Ta akor, ko šaj el spasimen?"

²⁷ O Ježiš odphenda: "So naštĳi keren o manuša, o Del šaj."

²⁸ O Peter phenda: "Dikh, amen omukĳam savoro a geĳam pal tu."

²⁹ O Ježiš lenge phenda: "Čačipen tumenge phenav, hoj sako, ko omukĳa vaš o kralĳišagos le Devleskero peskero kher, vaj le dades the la da, abo le phralen vaj la romña, abo le čhaven,

³⁰ chudela imar akana andre kada časos buterval aĳci a andre oda džives, so avela, mek the o večno dživipen."

Vakerel pale pal peskero meriben

³¹ Ilĳa peske le dešudujen a phenda: "Džas andro Jeruzalem a ačhela pes savoro, so hin pisimen prekal o Proroka pal o Čhavo le Manušeskero.

³² Bo dena les le Nažidenge, asana lestar, anena les pre ladž a čhungarena pre leste.

³³ Marena les le bičoĳa a murdarena les, ale pro trito džives uštĳela andral o meriben."

³⁴ Ale on na ačalĳile nič olestar, bo sas anglal lende garudo oda lav. Añĳi na džanenas pal soste vakerel.

Sastárel le kores paš o Jericho

³⁵ Sar avelas o Ježiš paš o foros Jericho, varesavo koro manuš bešelas paš o drom a žobrinelas.

³⁶ Sar šundá le nipen, save pašal leste predžanas, phučelas lendar, so pes kerel.

³⁷ Phende leske: "O Ježiš Nazaretsko adarik džal."

³⁸ Akor o koro vriskinda: "Ježiš, Čhavo le Davidoskero! Av ke ma jileskero!"

³⁹ Ola, save džanas anglal, phenenas leske, hoj te čhitel, ale ov mek zoraleder vriskinda: "Čhavo le Davidoskero! Av ke ma jileskero!"

⁴⁰ Avke zaačiha o Ježiš a phendá, hoj les te anen ke leste. Sar avla paš leste, phučla lestar:

⁴¹ "So kames, hoj tuke te kerav?" Ov phendá: "Rajeja, kamav te dikhel."

⁴² O Ježiš leske phendá: "Dikh! Tiro pačaben tut sastárda."

⁴³ Takoj chudla te dikhel a džalas pal o Ježiš a lašarelas le Devles. The savore nipi, save oda dikhle, lašarenas le Devles.

O Zacheus

19 Palis geľa andro Jericho.

² Ode sas varesavo murš, savo pes vičinelas Zacheus. Ov sas jekh le anglune colňikendar a sas barvalo.

³ Kamelas te dikhel, ko hin o Ježiš. Ale anglo nipi les našti dikhla, bo sas cikno.

⁴ Denašla anglal a geľa upre pro dzivo figovňikos, hoj les te dikhel, bo odarik o Ježiš majinelas te predžal.

⁵ Sar avla o Ježiš pre oda than, dikhla upre a phendá leske: "Zacheus, av sigo tele, bo adadžives mušinar te ačhel andre tiro kher!"

⁶ Ov avla sigo tele a radišagoha les priiľa.

⁷ Savore, save oda dikhle, dudrinenas a phenenas: "Ko binošno manuš geľa andro kher!"

⁸ Ale o Zacheus uštiľa a phendá le Rajeske: "Jepáš mire barvalipnastar, Rajeja, dav le čorenge, a te varekas andre varesoste občordom, dav leske pale štarval ajci."

⁹ O Ježiš leske phendá: "Adadžives avla o spaseňje kale khereske, bo the ov hino o čhavo le Abrahamoskero."

¹⁰ Bo o Čhavo le Manušeskero avla, hoj te rodel a te spasinel oda, so sas našado."

Pal o talenti

¹¹ Sar oda šunenas, phendá mek jekh podobenstvo, bo imar sas paš o Jeruzalem a ola nipi peske gondolinenas, hoj imar takoj pes sikavela o krališagos le Devleskero.

¹² Avke phendá: "Jekh baro raj džalas dur andre vare-savi phuv te prelel o krališagos a palis majinda te avel pale.

¹³ Vičinda peske deše sluhen, diňa len deš talenti a phendá lenge: 'Zaroden lenca buter, medik me na avava pale.'

¹⁴ Ale o manuša andral leskeri phuv les našti avri ačhenas a bičhade pal leste le sluhen, hoj te phenen: 'Na kamas, hoj kada manuš te el amaro kralis.'

¹⁵ Sar imar ode preiľa o krališagos, avla pale andre peskeri phuv a phendá: 'Vičinen le sluhen savenge diňom o love, hoj man te dodžanav, ko keci ole lovenca zarodňa.'

¹⁶ Avla ešebno a phendá: 'Rajeja, tiro talentos zarodňa aver deš talenti.'

¹⁷ A ov leske phendá: 'Mištes, lačho sluhona! Vašoda, hoj salas pačivalo andro frima, ela tut autorita upral o deš fori.'

¹⁸ Palis avla dujto a phendá: 'Rajeja, tiro talentos zarodňa pandž talenti.'

¹⁹ Leske phendá: 'The tu av upral o pandž fori.'

²⁰ Aver avla a phendá: 'Rajeja, dikh, kade hin tiro talentos. Sas mande garudo andro khosno.'

²¹ Daravas tutar, bo sal zoralejileskero. Les oda, so tuke na odthoďal, a kides upre oda, so na sadzindal.'

²² O raj leske phendá: 'Tu nalačho sluhona! Sudzinava tut pal oda, so phendal. Džanehas, hoj som zoralejileskero, hoj lav oda, so mange na odthoďom, a kidav upre oda, so na sadzindom.'

²³ Akor soske na diňal mire love olenge, save keren le lovenca, a sar me avlomas, ilomas mange pale buter?'

²⁴ Olenge, save ode ačhenas, phendá: 'Len lestar o talentos a den oleske, kas hin deš talenti.'

²⁵ Odphende leske: 'Rajeja, se les imar hin deš talenti!'

²⁶ Odphendá: 'Sakones, kas hin, oles ela dino; ale olestar, kas nane, pes lela the oda, so les hin.'

²⁷ A ole manušen, save man na kamenas kraliske – anen kade a murdaren len angle mande! "

Avel andro Jeruzalem le lašaribnaha

²⁸ Sar oda phendá, geľa anglal o manuša a džalas andro Jeruzalem.

²⁹ Sar avla paš o gava Betfaga the Betanija, paš o Olivovo Verchos, bičhada duje peskere učeňiken

³⁰ a phendá lenge: "Džan andre kada gav, so hin angle tumende. Soča andre džana, arakhena zaphandles somaricis, pre savo mek šoha (ňikda) ňisavo manuš na bešľa. Odphanden les a anen les ke ma.

³¹ Te tumendar vareko phučela: 'Soske les odphanden,' phenena leske kavke: 'Le Rajeske les kampil.' "

³² On gele a arakhle savoro avke, sar lenge oda phendá.

³³ A sar odphandenas le somaricis, leskere chulaja lenge phende: "Soske odphanden le somaricis?"

³⁴ On odphende: "Le Rajeske les kampil."

³⁵ Ande les ko Ježiš, čhide pre leste peskere ruchi a thode le Ježiš upre te bešel.

³⁶ Sar džalas, rakinenas peskere gada pro drom.

³⁷ Sar imar sas paš oda than, kaj pes avel tele pal o Olivovo Verchos, chudle savore ola but učeňika te

lašarel zorale hangoha le Devles vaš savore zazraki, so dikhle

³⁸ a vičinenas: "Bachtalo o krališ, savo avel andro nav le Rajeskero! O smirom pro ņebos the o lašariben le Devleske!"

³⁹ Ale varesave Farizeja, save sas maškar ola but nipi, leske phende: "Učitelina, dovaker tire učeñikenge!"

⁴⁰ Ale ov lenge odphenda: "Phenav tumenge, hoj te on ena čhit, o bara vriskinena!"

O Raj rovel upral o Jeruzalem

⁴¹ Sar avla o Ježiš pašeder a dikhla o foros, zarunda upral leste.

⁴² A phenda: "No, te ča andre kada džives prindžardalas, so tut šaj del o smirom! Ale akana oda hin garudo angle tire jakha.

⁴³ Avena pre tu ajse dživesa, hoj tire ņeprijateľa ačhavena pašal tu o barikadi, rozačhavena pes pašal tu a ispidena tut pal savore seri.

⁴⁴ Rovñarena tut la phuvaha a the tire čhaven tuha a na mukena andre tu bar pre bareste, bo na sprindžardal o časos, sar tut avla o Del te zachrañinel."

O Ježiš žužarel o chramos

⁴⁵ Geľa andro chramos a chudla andral te tradel avri olen, save ode bikenenas the cinenas

⁴⁶ a phenda lenge: "Hin pisimen: '*Miro kher pes vičinel a kher prekal o modlitbi*', ale tumen lestar kerdan kher prekal o živaña!"

⁴⁷ Paľis sako džives sikavelas o Ježiš andro chramos. Ale o nekbareder rašaja, o zakoñika the o anglune murša rodenas, sar les te murdarel.

⁴⁸ Ale na džanenas, so te kerel, bo savore nipi calo časos igen mištes šunenenas leskere lava.

O phučiben pal leskeri zor

20 Andre jekh džives, sar o Ježiš sikavelas andro chramos le manušen a vakerelas lenge o evañjelium, ačhile paš leste o nekbareder rašaja, o zakoñika the o phuredera le manušengere

² a phende leske: "Phen amenge, sava zoraha keres kala veci? Ko tut diña odi autorita?"

³ A ov lenge odphenda: "The me tumendar vareso phučava a odphenen mange.

⁴ O bolipen le Janoskero sas andral o ņebos, vaj le manušendar?"

⁵ On gondolinenas maškar peste: "Te phenaha: 'Andral o ņebos,' phenela amenge: 'Akor soske leske na pačandiljan?"

⁶ A te phenaha: 'Le manušendar' – savore nipi amen murdarena le barenca, bo on pačan, hoj o Jan sas prorokos."

⁷ Avke odphende: "Na džanas khatar leskero bolipen."

⁸ O Ježiš lenge phenda: "Añi me tumenge na phenava, sava autoritaha kada kerav."

O podobenstvo pal o nalačhe chulaja

⁹ Chudla te vakerel le manušenge kada podobenstvo: "Varesavo manuš sadzinda e viñica, diña la kečeñ le chulajenge a geľa het pro but berša.

¹⁰ Sar avla o časos, bičhađa peskere sluhas ke ola chulaja, hoj les te den olestar, so bariľa andre viñica. Ale ola chulaja les marde, bičhade les pale a na dine les nič.

¹¹ A bičhađa dujtone sluhas. No the oles marde, ande les avri pre ladž, bičhade les pale a na dine les nič.

¹² Paľis bičhađa the tritones. Ale on the oles dukhade a čhide les avri.

¹³ Akor phenda o raj la viñicakero: 'So kerava? Bičhavava mire čhas, saves kamav. Sar les dikhena, ladžana pes lestar.'

¹⁴ No sar les dikhle ola chulaja, gondolinenas maškar peste a phende peske: 'Leske ačhela savoro. Aven, murdaras les a savoro ela amaro!'

¹⁵ Čhide les avri andral e viñica a murdarde les. No, so lenca kerela o raj la viñicakero?"

¹⁶ Avela, murdarela kale chulajen a e viñica dela avrengel."

Sar oda šunde, phende: "Te na pes oda ačhel!"

¹⁷ Ale ov dikhla pre lende a phenda: "Akor so oda hin oda, so hin pisimen?"

'*O murara odčhide ipen oda bar, so pre stavba hino hlavno.*'

¹⁸ Sako, ko perela pre oda bar, pes phagerela, a pre kaste perela, oles rozmarela."

¹⁹ O nekbareder rašaja the o zakoñika les kamenas takoj te phandel andre, ale daranas pes le manušendar. Bo prindžarde, hoj pre lende phenda kada podobenstvo.

O phučiben pal o dañe

²⁰ Kamenas les te chudel avri, a vašoda bičhade pre leste le špijonon, save pestar kamukeri kerenas čačipnaskere, hoj les te chuden pro lava a paľis les te den andro vasta the andre zor le vladariske.

²¹ A phučle lestar: "Učitelina, džanas, hoj mištes vakeres the sikaves a na dikhes pro manuš, ale sikaves le Devleskero drom andro čačipen.

²² Phen amenge, či kempel te počinel le Cisariske o dañe, vaj na?"

²³ No o Ježiš predikhla lengero budžandipen a phenda lenge: "Soske man kamen te chudel pro lav!"

²⁴ Sikaven mange o denaris (e minca). Kaskero obrazis the nav upre hin?" On phende: "Le Cisariskero."

²⁵ O Ježiš lenge phenda: "Den oda, so hin le Cisariskero, le Cisariske, a so hin le Devleskero, le Devleske."

²⁶ A našti les chudle andro lav anglo manuša. Čudalinde pes upral oda, so lenge odphenda, a imar sas čhit.

O phučiben pal o večno dživipen

²⁷ Palis avle ke leste varesave Saduceja, save phenen, hoj o manuša našti ušten andral o meriben. Phučle lestar:

²⁸ "Učitelina, o Mojžiš amenge pisinda: *'Te merela varekaske o phral a mukela peskera romňa bi o čhave, leskero phral peske mi lel ola romňa a mi kerel le phraleske čhaven.'*

²⁹ Sas efta phrala. Ešebno iľa romňa, muľa a na sas les čhave.

³⁰ Avke peske la iľa dujto, ale the ov muľa.

³¹ The trito peske la iľa a avke kerde the savore efta phrala, na zamukle čhaven a mule avri.

³² Palis muľa the odi romňi.

³³ Akor kaskeri lendar ela romňi, sar uštēna andral o meriben, te savore efta phrala laha dživenas?"

³⁴ O Ježiš lenge phenda: "O manuša pre kada svetos peske len romňen a džan romeste.

³⁵ Ale ola, save hine hodne te uštēl andral o meriben a te dživel andro časos, so avela, imar na lena romňen aňi na džana romeste.

³⁶ Bo imar našti merena, bo ena sar o aňjela. Ena le Devleskere čhave, bo sas uštade andral o meriben.

³⁷ A hoj o mule čačes uštēna, sikađa the o Mojžiš paš o krakos, bo phenel, hoj o Raj *hino Del le Abrahamskero, o Del le Izakoskero a o Del le Jakoboskero.*

³⁸ O Del nane Del le mulenge, ale le džidenge, bo leske sako dživel."

³⁹ Akor varesave džene le zakoňikendar phende: "Učitelina, mištes phenda!"

⁴⁰ A buter pes imar na tromandile (na odvažinde) te phučel.

O phučiben pal o čhavo le Davidoskero

⁴¹ O Ježiš lenge phenda: "Sar šaj phenen, hoj o Kristus hino o čhavo le Davidoskero?"

⁴² Se korkoro o David phenel andro Žalmi: *'O Raj phenda mire Rajeske:*

Beš tuke pal miri čači (pravo) sera,

⁴³ *medik tuke na thovava tire*

ňeprijatēlen tel o pindre.'

⁴⁴ Te les o David vičinel 'Rajeja' akor, sar šaj el leskero čhavo?"

Te merkinen pro zakoňika

⁴⁵ Sar les savore manuša šunenenas, phenda peskere učeňikenge:

⁴⁶ "Merkinen tumenge pro zakoňika, bo on kamen te phirel andro šukar džindarde gada a kamen, hoj lenge o nipi andro foros te palikeren. Kamen anglune thana andro sinagogi a nekfeder thana pro hoscini.

⁴⁷ On thoven avri le vdovenca a len lengere khera, ale but pes modlinen, hoj len te dičhol. Vašoda ena gored-er sudzimen!"

E čori vdova del nekbuter

²¹ O Ježiš pes zadikhľa, sar o barvale denas o love andre le chamoskeri pokladňica.

² Dikhľa the varesava igen čora vdova, sar ode čhida duj churde minci.

³ A phenda: "Čačipen tumenge phenav, hoj kadi čori vdova čhida buter sar savore.

⁴ Bo kala savore denas olestar, so lenge ačhelas, ale oj čhida peskere čoripnastar savoro, so la sas pro dživipen."

O chamos ela tele čhido

⁵ Sar varesave učeňika vakerenas pal o chamos, hoj hino avrišukaľardo šukare barenca the ole darenca, so dine o manuša prekal o Del, phenda:

⁶ "Avena dživesa, sar olestar, so akana dikhen, na ačhela bar pre bareste. Sa ela tele čhido."

O pharipena pro koňec sveta

⁷ Phučle lestar: "Učitelina, kana oda ela? Pal soste prindžaraha, hoj oda imar hin pašes?"

⁸ Ov phenda: "Merkinen, hoj tumen vareko te na klaminel. Bo ena but ajse, save avena andre miro nav a phenena: 'Me som o Kristus,' the: 'Odi ora imar hin pašes.' Ma džan pal lende!"

⁹ Sar šunena pal o maribena the pal o vzburi, ma daran! Bo oda pes mušinel ešeb (peršo) te ačhel, ale na ela takoj o koňec."

¹⁰ Palis lenge vakereľas: "O narodos džala pro narodos a o krališagos pro krališagos,

¹¹ e phuv igen razisaľola a ela bari bokh the nas-valibena pre varesave thana. Sikavena pes veci, so anena bari dar, the bare znameňja andral o ňebos.

¹² Ale mek angloda savoreste phandena tumen andre a džana pre tumende. Dena tumen andro sinagogi the andro berteneni a lidžana tumen anglo kraľa the anglo vladara vaš miro nav.

¹³ Oda pes tumenge ačhela vašoda, hoj te den o svedectvo.

¹⁴ Mištes achalōn, hoj na kempel pes tumenge anglal te trapinen, so phenena pre peskeri obrana,

¹⁵ bo me tumen dava ajse lava the godi, pre save ňiko našti odphenela pale a našti obačhela ňiko olen-dar, save pre tumende džana.

¹⁶ Zradzinena tumen tumare daja the dada, o phrala, o pašutne the o prijatēľa – a varekas tumendar the murdarena.

¹⁷ Savoredžene tumen našti avri ačhena vaš miro nav.

¹⁸ Ale mek aňi jekh bal pal o šero tumenge na našľola.

¹⁹ Te likerena avri, chudena peskero dživipen.

O Jeruzalem ela zničimen

²⁰ Sar dikhena, hoj o armadi hine rozačhade pašal o Jeruzalem, akor džanena, hoj sigo les rozmarna a ela tele čhido.

²¹ Akor ola, save ena andre Judsko, mi denašen upre pro verchi. Ola, save ena andro foros, mi džan odarik het a ola, save ena pro maľi, te na džan andro foros.

²² Bo oda ena o dživesa, sar o Del marel peskere manušen, hoj pes te ačhel savoro, so hin pisimen.

²³ Andre ola dživesa ela igen phares le khabňenge the ole džuvľenge, save den te pijel le čhavoren. Bo ela baro pharipen pre phuv a e cholľ ela pre kala nipi.

²⁴ Murdarena varesaven le šablŕenca; avren phandena andre a odlđžana len maškar savore narodi. A o Nažidi ena upral o Jeruzalem a zničinen les, medik pes na pherarela lengero časos.

Sar avela o Čhavo le Manušeskero

²⁵ O znameňja ena pro kham, pro čhon the pro čercheňa. O narodi pre phuv ena andre dar a na džanena so te kerel, bo igen hučinel a moros the o vľni.

²⁶ O nipi merena daratar olestar, sar užarena, so avela pro svetos, bo o ňeboskere zora peha čhalavena.

²⁷ Akor dikhena *le Čhas le Manušeskeres te avel andre chmara* andre bari zor the andre slava.

²⁸ Sar pes oda chudela te ačhel, ušťen a hazden upre o šere, bo pašes hin tumaro spaseňje."

O podobenstvo pal o figovňikos

²⁹ Phendă lenge kada podobenstvo: "Dikhen pro figovňikos the pre savore stromi!

³⁰ Sar dikhen, hoj imar aven avri o prajti, džanen, hoj o ňilaj hino pašes.

³¹ Avke the tumen, sar dikhena, hoj pes oda ačhel, džanen, hoj pašes hin o krališagos le Devleskero.

³² Čačipen tumenge phenav, hoj kada pokoleňje na predžala, medik pes kada savoro na ačhela.

³³ O ňebos the e phuv našľona, ale mire lava šoha (ňikda) na našľona.

Te merkinen pre peste

³⁴ Merkinen pre tumende, te na gondolinen andro jile ča pal o but chaben, pijiben the starišagi, so hin andre kada dživipen – hoj oda džives te na avel jekhvareste pre tumende.

³⁵ Bo avela pre savore manuša, save bešen pre phuv, jekhvareste sar e pasca.

³⁶ Vašoda ma soven, ale furt tumen modľinen ko Del, hoj te denašen savorestar, so pes majinel te ačhel a hoj te ačhen anglo Čhavo le Manušeskero."

³⁷ Prekal o džives sikavelas andro chramos a rači džalas avri a presovelas pro Olivovo Verchos.

³⁸ A savore nipi avenas sig tosara andro chramos, hoj les te šunen.

O Judaš zradzinel le Ježiš

22 O Inepos e Patraďi, kana pes chalas o mare bi o drožďi.

² O nekbareder rašaja the o zakoňnika rodenas, sar le Ježiš te murdarel, ale daranas pes le nipendar.

³ Akor geľa o satan andro Judaš, savo pes vičinel Iškarijotsko. Ov sas jekh le dešudujendar.

⁴ Sar o Judaš odgeľa, dovakerďa pes le nekbaredere rašajenca the le chramoskere veliteľenca, sar les dela lenge andre.

⁵ On radisaľile a dovakerde pes, hoj les dena love.

⁶ Ov priačhiľa pre oda a rodelas, sar les te del andre akor, sar leha na ena o nipi.

Pririchtinen e posledno večera

⁷ Palis avľa o Inepos, sar pes chal o mare bi o drožďi, andre savo kampelas te murdarel le Patraďakere bakrores.

⁸ O Ježiš bičhaďa le Peter the le Jan a phendă: "Džan a pririchtinen amenge o Patraďakero chaben, hoj te chas."

⁹ On leske phende: "Kaj kames, hoj te pririchtinas?"

¹⁰ Ov lenge phendă: "Sar džana andro foros, arakhela pes tumenca jekh manuš, savo ľidžala o paňi andro džbanos. Džan pal leste andre oda kher, kaj džala.

¹¹ A phenena le manušeske, kaskero hino o kher: 'O Učitelis tuke phenel: Kaj hin oda than, kaj šaj chav o Patraďakero chaben mire učeňikenca?'

¹² Ov tumenge sikavela upruno baro than, so imar ela pratimen avri. Ode amenge pririchtinen o chaben."

¹³ On odgele a arakhle savoro avke, sar lenge o Ježiš phendă, a pririchtinde o Patraďakero chaben.

E posledno večera

¹⁴ Sar avľa odi ora, bešľa peske paš o skamind a the o dešuduj (12) apoštola leha.

¹⁵ Phendă lenge: "Igen kamavas tumenca te chal kada Patraďakero chaben sigeder, sar cerpinava.

¹⁶ Bo phenav tumenge, hoj imar les buter na chava, medik na ela pherardo andro krališagos le Devleskero."

¹⁷ Avke iľa e kuči, palikerďa a phendă: "Len kada a den jekh avreske.

¹⁸ Bo phenav tumenge, hoj imar buter šoha (ňikda) na pijava olestar, so barol pre viňica, medik na avela o krališagos le Devleskero."

¹⁹ Avke iľa o maro a palikerďa. Phagerelas, podelas lenge a phendă: "Kada hin miro tĕlos, so pes del vaš tumenge, kada keren pre miro leperiben."

²⁰ Avke pal e večera iľa e kuči a phendă: "Kadi kuči hin e nevi zmluva andre miro rat, so pes čhorel avri vaš tumenge.

²¹ Ale kade paš o skamind hin manca o manuš, savo man zradzinel.

²² O Čhavo le Manušeskero mušinel te merel, avke sar hin dino, ale vigos ole manušeske, ko les zradzinel."

²³ Akor o učeñika chudle jekh avrestar te phučel, ko oda kerela.

Ko hin nekbareder

²⁴ Chudle pes te veseke dinel, ko lendar hin nekbareder.

²⁵ O Ježiš lenge phendā: "O kraļa lidžan le naroden zoraha a ola, saven hin autorita upral o nipi, pes den te vičinel: 'O lačhejleskere.'

²⁶ Ale tumen ma keren avke. O nekbareder maškar tumende mi el sar o nekcikneder a oda, ko lidžal, mi el sar oda, ko služinel.

²⁷ Bo ko hin bareder? Oda, ko bešel paš o skamind, vaj oda, ko kerel pašal? Či na oda, ko bešel? Ale me som maškar tumende sar oda, ko služinel.

²⁸ Tumen andre mire pokušeñja ačhenas paš ma.

²⁹ A me tumen dava pravos, hoj te kralinlen, avke sar man diña miro Dad,

³⁰ hoj te chan a te pijen paš miro skamind andre miro krališagos a te bešen pro troni a te sudzinen o dešuduj kmeñi le Izraeloskere."

Phenel, hoj o Peter les zaprinela

³¹ O Raj phendā: "Šimon, Šimon, dikh, o satan peske tumen avri mangļa, hoj tumen te precidzinel sar o žužođiv (o zrnos).

³² Ale me vaš tu mangavas, hoj te na našlöl tiro pačaben. Ale tu, sar pes jekhvar visareha, zorařar tire phralen."

³³ Ov leske phendā: "Rajeja, tuha som pririchtimen te džal the andre bertena the pro meriben."

³⁴ Ov phendā: "Phenav tuke, Peter, hoj na giřavela adadžives o kohutos, medik trival na pheneha, hoj man na prindžares."

³⁵ Palis lenge phendā: "Sar tumen bičhadom bi o love, bi e zajdica the bi o sandalki, či sas tumen vareso frima?" On phende: "Na sas."

³⁶ Akor lenge phendā: "Ale akana oda, kas hin o love, mi lel peske len a the e zajdica; oda, kas nane šablā, mi bikenel peskere gada a mi cinel peske.

³⁷ Bo phenav tumenge, hoj mušinel pes mange te ačhel oda, so hin pal ma pisimen: '*Rachinenas les le živañenca.*' Oda, so hin pal ma pisimen, pes akana imar ačhel."

³⁸ On leske phende: "Rajeja, dikh, kade hin duj šablī." Ov lenge phendā: "Dos hin."

Andre Getsemansko zahrada

³⁹ Palis geļa avke sar furt pro Olivovo Verchos a o učeñika džanas pal leste.

⁴⁰ Sar avļa pre oda than, phendā lenge: "Modlinen tumen, hoj te na peren andro pokušeñje!"

⁴¹ Ov lendar geļa dureder, vaj ajci sar pes del te dočhivel le bareha, peļa pro khoča a modlinelas pes:

⁴² "Dado, te kames, le mandar kadi kuči, ale na avke sar me kamav, ale sar tu!"

⁴³ A sikađa pes leske o añjelos andral o ñebos a delas les zor.

⁴⁴ Le Ježišoske sas andro jilo igen phares a mek zoraleder pes modlinelas. A leskero spocišagos pal leste čhordolas pre phuv sar ratvale kropaja.

⁴⁵ Sar uštīļa pašal e modlitba, avļa ko učeñika a arakhļa len te sovel, bo on zasute andre žala.

⁴⁶ Phendā lenge: "So soven? Uštēn a modlinen tumen, hoj te na peren andro pokušeñje!"

O Judaš zradzinel le Rajes

⁴⁷ Medik ov vakerelas, avenas ke leste o nipi. Anglal lende džalas jekh le dešudujendar, o Judaš. Ov avļa ko Ježiš, hoj les te čumidel.

⁴⁸ O Ježiš leske phendā: "Judašina, čumibnaha zradzines le Čhas le Manušeskere?"

⁴⁹ Sar dikhle ola, save sas pašal leste, hoj so pes kerel, phende leske: "Rajeja, te maras pes le šablēnca?"

⁵⁰ Varesavo dženo lendar demađa la šablāha le nekbaredere rašaskere sluhas a odčhinda leske o čačo kan.

⁵¹ Ale o Ježiš phendā: "Preačhen!" A chudļa pes leskere kanestar a sastārđa les.

⁵² A phendā le nekbareder rašajenge, le chramoskere veliteľenge the le phurederenge, save pre leste avle: "Avke pre ma avļan, sar pro živañis – le šablēnca the le pacenca?"

⁵³ Sako džives somas tumenca andro chramos a na thođan pre mande o vasta. Ale kadi hin tumari ora, sar hin le kalipnaskeri zor."

O Peter zaprinel le Ježiš

⁵⁴ Sar les zaile, liġende les andro kher ko nekbareder rašaj. O Peter džalas pal leste dural.

⁵⁵ Sar rozthode e jag maškar e dvora a bešle peske pašal, o Peter peske bešļa maškar lende.

⁵⁶ Varesavi služka les dikhļa, te bešel paš e jag, zadikhļa pes pre leste a phendā: "The kada sas leha!"

⁵⁷ Ale o Peter zaprinđa a phendā: "Džuvlije, na prindžarav les!"

⁵⁸ Na pregeļa but a dikhļa les aver dženo a phendā: "The tu sal lendar!" Ale o Peter phendā: "Manušeja, na som!"

⁵⁹ Vaj pal jekh ora vareko aver phenelas: "He, čačo hin, the kada sas leha, bo hino Galilejčanos!"

⁶⁰ O Peter phendā: "Manušeja, na džanav, so vakeres!" A takoj, medik vakerelas, giřađa o kohutos.

⁶¹ Akor o Raj visaliļa a dikhļa pro Peter a le Peteriske avļa pre godi oda lav le Rajeskero, so leske phendā: "Sigeder, sar adadžives o kohutos giřavela, tu trival man zaprineha."

⁶² O Peter geļa avri a chudļa igen te rovel.

Asan le Ježišostar

⁶³ O murša, save chudenas le Ježiš, lestar asanas a marenas les.

⁶⁴ Zakerde leskere jakha a phučenas lestar: "Prorokin, ko tut demađa!"

⁶⁵ The mek but aver veci pre leste vakerenas a ruhi-nenas pes.

O Ježiš angle Bari Rada

⁶⁶ Sar vidňisalilä, zgele pes o phuredera le manušen-gere, o nekbareder rašaja the o zakoňika a ligende les angle Bari Rada

⁶⁷ a phenenas: "Te sal tu o Kristus, akor phen amenge!" Ov lenge phendä: "Te tumenge phenava, na pačana.

⁶⁸ A te tumendar vareso phučava, na odphenena mange.

⁶⁹ Ale akanastar o Čhavo le Manušeskero bešela pal e čači (pravo) sera le zorale Devleske."

⁷⁰ Savoredžene phende: "Tu sal akor o Čhavo le Devleskero?" Ov lenge phendä: "Tumen mištes phenen, hoj me som."

⁷¹ On phende: "So kempel amenge mek vareso buter? Se korkore šundam andral leskero muj!"

O Ježiš anglo Pilat

23 Androda uštile savoredžene a ligende les ko Pilat.

² Chudle pre leste te vakerele: "Kales arakhľam, sar previsarelas amaro narodos! Na domukelas te del le Cisariske o daňe a phenelas pal peste, hoj ov hin o Kristus, o kralis!"

³ O Pilat lestar phučľa: "Sal tu o Židoviko kralis?" O Ježiš leske odphenä: "Tu oda vakeres."

⁴ Akor o Pilat phendä le nekbaredere rašajenge the le nipenge: "Pre kada manuš na arakhav ňisavi vina."

⁵ Ale on pre leste ispidenas a phenenas: "Kerel upre le manušen, sar sikavel pal calı Judsko! Chudľa andral e Galileja a avľa dži kade!"

O Ježiš anglo Herodes

⁶ Sar oda o Pilat šundä, phučľa: "Hino kada manuš andral e Galileja?"

⁷ Sar pes dodžanľa, hoj hin tel e autorita le Herodesiske, bičhađa les ko Herodes, bo the ov sas andre ola dživesa andro Jeruzalem.

⁸ Sar o Herodes dikhľa le Ježiš, igen radisalilä, bo imar čirlastar les kamelas te dikhel. Bo but pal leste šunelas a užarelas, hoj les dikhela te kerel varesavo za-zrakos.

⁹ Phučelas lestar but veci, ale o Ježiš leske nič na odphenä.

¹⁰ Ačhenas ode o nekbareder rašaja the o zakoňika a igen pre leste vakerenas.

¹¹ O Herodes peskere slugađenca les ande avri pre bari ladž a asanas lestar. Palis urďa les andro šukar ga-da a bičhađa les pale ko Pilat.

¹² O Pilat the o Herodes sas peha ole dživesestar lačhe, bo angloda pes našti avri ačhenas.

O Ježiš odsudzimen

¹³ O Pilat peske vičindä le nekbareder rašajen, le anglune muršen the le nipen

¹⁴ a phendä lenge: "Andan mange kale manušes a phendän, hoj kerel upre le manušen. Me lestar phučavas anglal tumende a na arakhľom pre kada manuš ňisavi ajsi vina, sar tumen pre leste vakeren.

¹⁵ Ale aňi o Herodes na arakhľa pre leste nič, vašoda amenge les bičhađa pale. Na kerďa nič, vaš soske mušindahas te merel!

¹⁶ Dava les te zbičinel a premukava les!"

¹⁷ [Bo pre oda inepos lenge mušinelas furt te premukel jekhe bertenošis.]

¹⁸ Ale on savoredžene vriskinde: "Kales murdar! Muk amenge le Barabaš!"

¹⁹ Ov sas zaphandlo andre bertena vaš oda, hoj kerďa andro foros varesavi vzbura a the vaš oda, hoj murdarďa.

²⁰ Akor pale ke lende prevakerďa o Pilat, bo kamelas te premukel le Ježiš.

²¹ Ale on vriskinenas: "Ukrižin! Ukrižin les!"

²² O Pilat lenge tritovar phendä: "Ale so ajsi nalačho kerďa? Na arakhľom pre leste nič, vaš soske mušindahas te merel! Dava les te zbičinel a premukava les!"

²³ Ale on pre leste ispidenas bara vikaha a mangesnas, hoj les te del te ukrižinel. Lengeri vika ňerinda (zvitazinda).

²⁴ Akor kerďa o Pilat avke, sar peske mangesnas.

²⁵ Premukľa oles, savo sas phandlo andre bertena vaš e vzbura the vaš oda, hoj murdarďa, bo les peske mangesnas. A le Ježiš lenge diňa avri, avke sar kame-nas.

Le Ježiš ukrižinen

²⁶ Sar imar les lidžanas, ačhade varesave Šimon Cirenejsko, sar avelas pal e maľa, a thode pre leste o kerestos, hoj les te lidžal pal o Ježiš.

²⁷ Džanas pal leste igen but nipi. Maškar lende sas but džuvľa, save rovenas a hikinenas upral leste.

²⁸ O Ježiš pes visarďa ke lende a phendä: "Čhajale Jeruzalemoskere, ma roven upral ma, ale roven korkore upral peste the upral tumare čhave.

²⁹ Bo aven ajse dživesa, sar phenena: 'Bachtale ola džuvľa, saven našti en čhave; ola, save na ločhile (na pašľile tele) a ola, save na denas te pijel le čhavoren!'

³⁰ Akor phenena le verchenge: 'Peren pre amende!' a le brehenge: 'Učharen amen andre!'

³¹ Bo te kada keren le saste stromoha, so kerena le šuke stromoha?"

³² A lidžanas leha the duje živaňen, hoj len jekhetane leha te murdaren.

³³ Sar avle pre oda than, so pes vičinel Lebka, ode les ukrižinde a leha the ole živañen – jekhes pal e čači (pravo) a dujtones pal e bałogñi (ľavo) sera.

³⁴ O Ježiš phendá: “Dado, odmuk lenge, bo na džanen, so keren!” Palis peske rozulade leskere gada a losinde vaše.

³⁵ O manuša ačhenas a dikhenas. O Židovike vodci lestar asanas a phenenas: “Avren zachrañinelas! Mi zachrañinel pes korkoro, te ov hin o Mesijašis, oda avrikidlo le Devleskero!”

³⁶ The o slugađa lestar asanas, avenas a podenas leske šut.

³⁷ Phenenas: “Te sal tu oda Židoviko kralis, zachrañin tut!”

³⁸ Upral leste sas pisimen: “Kada hin le Židengero Kralis!”

³⁹ Jekh olendar, savo leha sas ukrižimen, vakerelas pre leste: “Či na sal tu o Kristus? Zachrañin pes the amen!”

⁴⁰ Ale oka dujto leske zoraha priphendá: “Añi tu na daras le Devlestar? Se the tu sal avke odsudzimen!”

⁴¹ Amen čačipnaha chudľam oda, so peske zasogalindam (zaslužindam), ale ov na kerđa nič nalačo!”

⁴² A phendá: “Ježiš, leper tuke pre ma, sar aveha andre tiro krališagos.”

⁴³ O Ježiš leske phendá: “Čačipen tuke phenav, adadžives aveha manca andro rajos.”

Le Ježišoskero meriben

⁴⁴ Sas vaj dešuduj (12) ori † pro dilos a avľa o kalipen pre calí phuv a likerelas dží trin ori ††.

⁴⁵ O kham kalíľa a o chramoskero pochtan phariľa pro jepaš.

⁴⁶ O Ježiš vriskindá zorale hangoha: “Dado, *andre tire vasta dav mire duchos!*” Sar oda phendá, muľa.

⁴⁷ Sar dikhľa o velítelis upral o šel slugađa, so pes ačhiľa, lašarelas le Devles a phendá: “Kada manuš sas čačes čačipnaskero!”

⁴⁸ Savore nipi pes ode zgele sar pro đivadlos, hoj te dikhen, so pes ode ačhel. Sar oda dikhle, marenas pes andre brekh (andro čuča) a gele het.

⁴⁹ Savore, save prindžarenas le Ježiš, ačhenas dural. A dikhenas pre oda the o džuvľa, save pal leste džanas andral e Galileja.

Parunen le Ježiš

⁵⁰ Sas jekh manuš andral e Bari Rada, savo pes vičinelas Jozef. Ov sas lačo the čačipnaskero manuš

⁵¹ andral e Judsko foros Arimatija. Ov užarelas o krališagos le Devleskero a na diňa čačipen la Bara Radake, aňi oleske, so kerde.

⁵² Avľa ko Pilat a mangľa peske le Ježišoskero tělos.

⁵³ Sar les iľa tele, zapačardá les andre lepeda a thođa andro hrobos, so sas avrikerdo andre skala, andre savo mek šoha (ňikda) ňiko na pašľolas.

⁵⁴ Sas paraščuvin a imar avelas o Šabbat (sombat).

⁵⁵ Džanas pal leste the o džuvľa, save avle le Ježišoha andral e Galileja. Dikhle o hrobos the sar thode leskero tělos ode.

⁵⁶ Palis gele pale a pririchtinde o voňava oleja the o voňava masci. Ale prekal o Šabbat odpočovinenas, avke sar prikazinel o Zakonos.

O Ježiš uštěl andral o meriben

24 Ešebno džives pal o Šabbat avle o džuvľa sig tosara ko hrobos a anenas o voňava oleja, so pririchtinde.

² Arakhle o bar odcirdlo pašal o hrobos.

³ Sar gele andre, na arakhle o tělos le Rajeskero le Ježišoskero.

⁴ Sar ode ačhenas a na džanenas, so peske pal oda te gondofinel, jekhvareste ačhile paš lende duj murša andro igen jagale gada.

⁵ O džuvľa darandíle a bandíle le šereha ke phuv. Ale ola murša lenge phende: “Soske roden le džides maškar o mule?”

⁶ Nane kade, uštíľa andral o meriben! Leperen pre oda, so tumenge phenelas, sar mek sas andre Galileja:

⁷ “O Čhavo le Manušeskero mušinel te el dino andro vasta le binošne manušenge; mušinel te el ukrižimen a pro trito džives te uštěl andral o meriben.”

⁸ Akor peske leperde leskere lava.

⁹ Sar gele pale khatar o hrobos, phende savoro le dešujekh (11) učeňikenge the savorengenge oklengenge.

¹⁰ Sas oda e Maria Magdalena, e Johanna, e Maria le Jakoboskeri the okla aver lenca, save oda vakerenas le apoštolengenge.

¹¹ Ale lenge pes dičholas le džuvľengere lava sar dil-iňipen a na pačanas lenge.

¹² Ale o Peter uštíľa a denašelas ko hrobos. Sar bandíľa andre, dikhľa ode ča o lepedi. Geľa het a čudalinelas pes oleske, so pes ačhiľa.

Pro drom andro Emaus

¹³ Andre oda džives džanas duj džene lendar andro foros, so pes vičinel Emaus. Oda foros hino le Jeruzale-mostar vaj dešujekh (11) kilometri.

¹⁴ On peske vakerenas pal savoreste, so pes ačhiľa.

¹⁵ Androda, sar on vakerenas a phučenas jekh avrestar, avľa o Ježiš paš lende a džalas lenca.

¹⁶ Ale on les na prindžarde, bo na sas lenge oda mek dino.

¹⁷ A phendá lenge: “Pal soste tumenge vakeren le dromeha?” A on pharipnaha začhile.

¹⁸ Jekh lendar, savo pes vičinelas Kleofaš, leske phendá: “So, dural aves andro Jeruzalem, hoj ča tu korkoro na džanes, so pes andre kala dživesa ode ačhiľa?”

¹⁹ Ov lendar phučľa: “A so?” On leske phende: “Oda, so pes ačhiľa le Ježišoha andral o Nazaret, savo sas prorokos a sas zoralo andre oda, so kerelas the vakerelas, anglo Del a the anglo savore manuša.

† Grekengeri čhib: šov ori †† Grekengeri čhib: eňa ori

²⁰ Les o nekbareder rašaja the amare anglune murša dine te odsudzinel pro meriben a ukrižinde les.

²¹ Amen pes zmuklām pre leste, hoj ov zachrañinela le Izrael. Ale oda imar hin trito džives, sar pes kada savoro ačhiļa.

²² A amen predarandilam olestar, so vakerenas vare-save amare džuvlija. Sig tosara gele paš o hrobos

²³ a na arakhle leskero tēlos. Avle a vakerenas, hoj dikhle le añjelen a on lenge phende, hoj dživel.

²⁴ Palis gele varesave džene amarendar ko hrobos a arakhle savoro avke, sar phende ola džuvļa. Ale les na dikhle."

²⁵ O Ježiš lenge phendā: "Tumen nagodāver manušale, save polokes pačan savoreske, so vakere-nas o Proroka!

²⁶ Či na mušinda o Kristus kada savoro te precerpinel a avke te džal andre peskeri slava?"

²⁷ A chudļa lenge te sikavel andral o Zakonos le Mo-jžišoskero the andral savore Proroka, kaj hin savoro pal leste pisimen andro Pisišagos.

²⁸ Avke doavle paš oda foros, andre savo džanas. Ale o Ježiš pes kerelas, hoj džala dureder.

²⁹ Ale on les mangle: "Ačh amenca, bo imar zaračol a maj ela kalipen!" Avke geļa andre a ačhiļa lenca.

³⁰ Sar peske lenca bešļa paš o skamind, iļa o maro a palikerelas, phagerelas a podelas lenge.

³¹ Androda pes lenge phundrade o jakha a on les sprindžarde, ale ov lendar našliļa.

³² Akor phende jekh avreske: "Či na labonas andre amende amare jile, sar amenge pal o drom vakere-las a delas te achaľol o Pisišagos?"

³³ Takoj uštila a gele pale andro Jeruzalem, kaj arakhle le dešujekh (11) učeñiken jekhetane avrenca, so sas lenca.

³⁴ Ola phenenas, hoj o Raj čačes uštila a pes sikađa le Šimonoske.

³⁵ Palis the ola duj vakerenas pal oda, so pes lenge pro drom ačhiļa a sar les sprindžarde, sar phagerelas o maro.

O Raj pes sikavel le učeñikenge

³⁶ Sar pal oda vakerenas jekhvareste o Ježiš korkoro ačhiļa maškar lende a phendā lenge: "Smirom tu-menge!"

³⁷ Ale on igen predarandile, bo gondolinenas peske, hoj dikhen le duchos.

³⁸ Ov lenge phendā: "Soske predarandilān? Soske hin andre tumare jile ajse phučibena?"

³⁹ Dikhen mire vasta the mire pindre, hoj oda som me! Chuden tumen mandar a džanena. Se le duchos nane tēlos the kokala – ale man hin, sar dikhen."

⁴⁰ Sar oda phendā, sikađa lenge o vasta the o pindre.

⁴¹ A sar peske mek andre oda baro radišagos našti dopačanas a čudalinenas pes, phendā lenge: "Nane tu-men ade vareso te chal?"

⁴² On leske podine kotor peki riba.

⁴³ Ov iļa a anglal lende chaļa.

⁴⁴ Phendā lenge: "Kada hin mire lava, so tumenge vakerevas, mek sar somas tumenca: Mušinel pes te ačhel savoro, so hin pal ma pisimen andro Mo-jžišoskero Zakonos, Proroka the Žalmi."

⁴⁵ Akor phundrade lengeri godi, hoj te achalōn o Pisišagos.

⁴⁶ Phendā lenge: "Avke hin pisimen, hoj o Kristus cer-pinela a pro trito džives uštila andral o meriben

⁴⁷ a andre leskero nav pes kazinela savore nardo-ge, hoj pes te visaren le binendar a te el odmukle lengere bini. A chudela pes oda le Jeruzalemstar.

⁴⁸ A tumen san o švedki, hoj avke pes ačhiļa.

⁴⁹ Me tumenge bičhavava oda daros, pal savo miro Dad diña lav. Ačhen andre kada foros, medik na prile-na e zor andral o ņebos."

O Ježiš ilo upre andro ņebos

⁵⁰ Palis len iļa avri angle Betanija a hazdña peskere vasta a diña len o požehnañje.

⁵¹ Sar oda kerelas, geļa lendar sikra dureder a sas ilo upre andro ņebos.

⁵² On bandile anglal leste a avle pale andro Jeruza-lem bare radišagoha.

⁵³ A sas calo časos andro chramos a lašarenas the bararenas le Devles.

JAN

O Ježiš – o večno Lav le Devleskero

- 1** Ešebnovarestar (peršovarestar) sas o Lav a oda Lav sas paš o Del a oda Lav sas o Del.
2 Ov sas ešebnovarestar paš o Del.
3 Savoro pes stvorindā prekal leste a bijal leste na sas stvorimen nič olestar, so hin.
4 Andre leste sas o dživipen a oda dživipen sas o svetlos le manušenge.
5 Oda svetlos labol andro kalipen a o kalipen les na.
6 Sas jekh manuš bičhado le Devlestar, savo pes vičinelas Jan.
7 Ov avľa te svedčinel pal oda svetlos, hoj oda savore te šunen a te pačan.
8 Ov korkoro na sas oda svetlos, ale avľa te svedčinel pal oda svetlos.
9 Oda čačo svetlos, so labol prekal dojekh manuš, avelas pro svetos.
10 Ov sas andro svetos, so o Del prekal leste stvorindā, ale oda svetos les na prindžarda!
11 Avľa andre peskero, ale leskere nipi les na priile!
12 Ale savoren, save les priile, olen, save pačan andre leskero nav, diňa pravos te ačhen o čhave le Devleskere,
13 save na ulile (narodzinde pes) le ratestar aňi olestar, so kamelas o telos, vaj o murš – ale le Devlestar.
14 Oda Lav ačhiľa manuš a dživelas maškar amende. Dikhahas leskeri slava, e slava, so hin ča le jekhe Čhas, savo avľa le Dadestar a savo hino pherdo le lačhipnaha (milostaha) the le čačipnaha.
15 O Jan svedčinel pal leste a vičinel: "Kada hin oda, pal kaste phendom, 'Oda, ko avel pal mande, sas angle ma, bo sas sigeder sar me.'"
16 Hin les pherdo lačhipen (milost) a amen savore priifam olestar jekh požehnaňje pal aver.
17 Bo prekal o Mojžiš sas dino o Zakonos, ale o lačhipen (milost) the o čačipen avľa prekal o Ježiš Kristus.
18 Le Devles šoha (ňikda) ňiko na dikhľa, ale o jekhoru Čhavo, savo hino pašes paš o Dad, amenge les sikada.

Le Janoskero svedectvo

- 19** Kada hin oda, so svedčinel o Jan, sar ke leste o Židi bičhade andral o Jeruzalem le rašajen the le Leviten, hoj te phučen: "Ko tu sal?"
20 Na garuđa andre a phendā avri: "Me na som o Kristus."

21 A phučle lestar: "Ko akor sal? Či sal tu o Eliaš?" Ov phendā: "Na som." "Abo sal oda prorokos?" Odphendā: "Na."

22 Androda leske phende: "Akor, ko sal? Hoj te džanas te odphenel olenge, save amen bičhade. So pal tute phenes?"

23 Phendā oda, so pisindā o prorokos Izaiaš: "Me som o *hangos*, so vičinel pre pušta: 'Rovňaren avri o drom le Rajeskero!'"

24 Maškar o manuša, save sas pal leste bičhade, sas the Farizeja.

25 On lestar phučle: "Soske akor boles, te na sal tu o Kristus aňi o Eliaš aňi oda prorokos?"

26 O Jan lenge odphendā: "Me bolav le paňeha, ale maškar tumende ačhel oda, kas tumen na prindžaren.

27 Ov hin oda, ko avel pal mande, ale me na som hodno leske te rozphandel o sirimocis pro sandalki."

28 Oda pes ačhiľa andre Betanija pal o Jordan, kaj o Jan bolelas.

29 Pre aver džives dikhľa o Jan le Ježiš, hoj avel ke leste, a phendā: "Dikh, o Bakroro le Devleskero, savo odlel o binos le svetostar!

30 Kada hin oda, pal kaste me phendom: 'Pal mande avel murš, savo hin angle ma, bo sas sigeder sar me.'

31 Aňi me les na prindžaravas, ale vašoda avlom a bolavas le paňeha, hoj les o Izrael te sprindžarel."

32 O Jan svedčinelas: "Dikhľom le Duchos te avel sar holubica tele andral o ňebos a ačhiľa pre leste.

33 Aňi me les na prindžaravas, ale oda, ko man bičhada te bolel le paňeha, mange phendā: 'Pre kaste dikheha te avel tele le Duchos a hoj ačhel pre leste, oda hin ov, savo bolel le Sentne Duchoha.'

34 Me dikhľom a svedčinar, hoj kada hino o Čhavo le Devleskero."

Ešebne učeňika le Ježišoskere

35 Pre aver džives ode pale ačhelas o Jan the duj leskere učeňika

36 a dikhľa le Ježiš, sar odarik pašal predžal, a phendā: "Dikhen, o Bakroro le Devleskero!"

37 Ola duj učeňika šunde, so phendā, a gele pal o Ježiš.

38 O Ježiš visaliľa a dikhľa, hoj džan pal leste, a phendā lenge: "So roden?" On leske odphende: "Rabbi (so hin prethodo: Učitelina), kaj bešes?"

39 Ov lenge phendā: "Aven a dikhen!" Avke gele a dikhle, kaj bešel, a ačhile oda džives ke leste. Sas vaj štar ori † pal o dilos.

⁴⁰ Jekh ole dujendar, save oda šunde le Janostar a gele pal o Ježiš, sas o Andrej. Leskero phral sas o Šimon Peter.

⁴¹ Ov ešeb (peršo) arakhľa le Šimon a phenda leske: "Arakhľam le Mesijašis," so hin prethodo: Le Kristus.

⁴² A anda les ko Ježiš. O Ježiš dikhľa pre leste a phenda: "Tu sal o Šimon, o čhavo le Jonašiskero. Tu pes vičineha Kefas," so hin prethodo: "Peter."

⁴³ Pre aver džives o Ježiš kamľa te džal andre Galileja. Arakhľa le Filip a phenda leske: "Av pal ma!"

⁴⁴ O Filip sas andral e Betsaida, o foros le Andrejiskero the le Peteriskero.

⁴⁵ A o Filip arakhľa le Natanael a phenda leske: "Arakhľam oles, pal kaste hin pisimen andro Mojžišoskero Zakonos the andro Proroka, le Ježiš, le Jozefoskere čhas andral o Nazaret."

⁴⁶ O Natanael leske phenda: "Či andral o Nazaret šaj avel vareso lačho?" O Filip leske odphenda: "Av a dikh!"

⁴⁷ Sar dikhľa o Ježiš, hoj o Natanael avel ke leste, phenda: "Dikh, čačo Izraelitas, andre savo nane klamišagos."

⁴⁸ O Natanael leske phenda: "Khatar man prindžares?" O Ježiš leske odphenda: "Mek sigeder, sar tut o Filip vičinda, dikhľom tut, sar salas tel oda figovňikos."

⁴⁹ O Natanael leske phenda: "Rabbi, tu sal oda Čhavo le Devleskero! Tu sal o krafis le Izraeloskero!"

⁵⁰ O Ježiš leske odphenda: "Tu pačas, bo phendom tuke: 'Dikhľom tut tel oda figovňikos'? Bareder veci sar kada dikheha."

⁵¹ Palis phenda: "Čačas, čačas phenav tumenge, hoj dikhena o ňebos phundrado a le Devleskere aňjelen te džal upre a tele paš o Čhavo le Manušeskero."

O bijav andre Kana

2 Pal o duj dživesa sas o bijav andro gav Kana Galilejsko a sas ode e daj le Ježišoskeri.

² O Ježiš sas vičimen pro bijav peskere učeňikenca.

³ Sar imar lenge dodžalas e mol, phenda e daj le Ježišoske: "Nane len mol."

⁴ O Ježiš lake phenda: "So man the tut andre oda, džuvľije? Mek na avľa miri ora."

⁵ Paloda leskeri daj phenda le sluhenge: "Savoro, so tumenge phenela, keren!"

⁶ A ačhenas ode šov barune kanti pro paňi, hoj pes o Židi te thoven (moren) pal lengeri tradicija. Andre dojekh rešľolas vaj po šel litra.

⁷ O Ježiš lenge phenda: "Pheraren o kanti le paňeha!" A pherarde len dži upre.

⁸ Palis lenge phenda: "Len andral a ľigenen oleske, ko ľidžal o bijav." A ľigende.

⁹ Ov na džanelas, khatar sas, ale o sluhi, save ile le paňestar, džanenas. Avke sar koštoľinda o paňi, so sas čerimen pre mol, vičinda peske le ternes

¹⁰ a phenda leske: "Dojekh manuš thovel pro skamind ešeb (peršo) e lači mol a sar imar buter pile,

palis del e goreder. Ale tu mukľal e lači mol dži akana!"

¹¹ Kada ešebno zazrakos, so o Ježiš kerďa, pes ačhľa andre Kana Galilejsko. Avke sikaďa peskeri slava a leskere učeňika andre leste pačandile.

¹² Paloda geľa andro Kafarnaum peskera daha, peskere phralenca the učeňikenca a ačhile ode vajkeci dživesa.

O Raj žužarel o chramos

¹³ E Patraďi le Židengeri sas pašes a o Ježiš džalas andro Jeruzalem.

¹⁴ Ode andro chramos arakhľa olen, save bikenkerenas le gurumňen, bakren the holuben the olen, save vatinenas o love.

¹⁵ Kerďa peske le špargendar bičos a tradňa savoredženen le bakrenca the gurumňenca avri andral o chramos. Olenge, save vatinenas o love, previsarďa o skaminda a rozčhida o love.

¹⁶ Olenge, save bikenkerenas le holuben, phenda: "Lidžan kada adarik het! Ma keren mire Dadeskere kherestar pľacos!"

¹⁷ Leskere učeňikenge avľa pre godi, hoj hin pisimen: "O kamiben vaš tiro kher andre mande labol sar jag."

¹⁸ Akor leske o Židi phende: "Sikav amenge varesavo zazrakos, hoj te džanas, hoj tut hin autorita kada te kerel."

¹⁹ O Ježiš lenge odphenda: "Čhiven tele kada chramos a tel o trin džives les pale ačhavava."

²⁰ Akor phende o Židi: "Saranda the šov (46) berš ačhavenas kada chramos a tu les ačhaveha tel o trin džives?"

²¹ Ale ov oda vakereľas pal o chramos peskere tēloskero.

²² Sar imar uštíľa andral o meriben, o učeňika peske leperde, hoj oda phenda, a pačandile andro Pisišagos the leskere laveske.

²³ Sar sas andro Jeruzalem pro Inepos Patraďi, but pačandile andre leskero nav, bo dikhenas o zazraki, save kerelas.

²⁴ Ale o Ježiš na dopačalas lenge, bo džanelas savore manušen.

²⁵ Na kampelas leske, hoj vareko te svedčinel leske pal o manuš, bo ov korkoro džanelas, so hin le manušes andro jilo.

O Ježiš the o Nikodem

3 Sas jekh Farizejis, savo pes vičinelas Nikodem a sas angluno manuš maškar o Židi.

² Ov avľa rači ko Ježiš a phenda leske: "Rabbi, džanas, hoj avľal le Devlestar sar učitelis, bo ňiko našti kerel ajse zazraki, sar tu keres, te leha na uľahas o Del."

³ O Ježiš leske odphenda: "Čačas, čačas phenav tuke: Oda, ko na uľola (pes na narodzinela) pale, našti dikhel o kraľišagos le Devleskero."

⁴ O Nikodem phendā: “Sar šaj ulol manuš, te hino imar phuro? Či šaj džal djuťovar peskera dake andro per, hoj te ulol?”

⁵ O Ježiš odphendā: “Čačes, čačes phenav tuke, hoj te vareko na ulola andral o paňi the andral o Duchos, našťi džal andre le Devleskero krališagos.

⁶ So uliľa andral o tēlos, hin o tēlos, a so uliľa andral o Duchos, hin o duchos.

⁷ Ma čudalĭn tut, hoj tuke phendom: ‘Mušinen te ulol pale.’

⁸ E balvaj phurdel, kaj kamel, šunes la, ale na džanes, khatar avel a kaj džal. Avke oda hin the sakoneha, ko uliľa andral o Duchos.”

⁹ O Nikodem lestar phučľa: “Sar pes oda šaj ačhel?”

¹⁰ O Ježiš odphendā: “Se tu sal učitēlis andro Izrael a kada na džanes?”

¹¹ Čačes, čačes phenav tuke, hoj so džanas, phenas a oda, so dikhľam vakeras avri, no tumen na prilen amaro svedectvo.

¹² Te tumenge vakerav pal o veci andre kada svetos a na pačan, sar palis pačana, te tumenge vakerava o veci pal o űebos?

¹³ űiko na geľa upre andro űebos, ča oda, ko avľa tele andral o űebos, o Čhavo le Manušeskero.

¹⁴ Avke, sar o Mojžiš pre pušťa hazdňa upre le sapes, mušinel te el upre hazdlo o Čhavo le Manušeskero,

¹⁵ hoj sakones, ko pačal andre leste, te el o večno dživipen.

¹⁶ Bo o Del avke kamelas o svetos, hoj peskere jekhore Čhas diňa, hoj űiko, ko pačal andre leste, te na merel, ale te el les o večno dživipen.

¹⁷ Bo o Del na bičhađa pro svetos peskere Čhas, hoj te odsudzinel o svetos, ale hoj les te spasinel.

¹⁸ Oda, ko pačal andre leste, na ela odsudzimen. Ale oda, ko na pačal, imar hino odsudzimen, bo na pačandĭľa andro nav le Devleskere jekhore Čhaskero.

¹⁹ Kada hin oda sudos, hoj o svetlos avľa pre phuv, ale o nipi buter kamenas o kalĭpen sar o svetlos, bo lengere skutki sas nalače.

²⁰ űiko, ko kerel nalače veci, našťi avri ačhel o svetlos a na džal andro svetlos, hoj te na dičhol, so kerel.

²¹ Ale oda, ko dživel andro čačipen, džal andro svetlos, hoj pes te sikavel, hoj oda so kerel, hin kerdo prekal o Del.”

Le Janoskero svedectvo pal o Ježiš

²² Palis avľa o Ježiš peskere učeňikenca andre Judsko phuv. Ode lenca ačhiľa a bolelas.

²³ A the o Jan bolelas andro Aion, paš o Salem, bo ode sas but paňi a avenas pes ode te bolel.

²⁴ O Jan mek na sas phandlo andre bertena.

²⁵ Varesave le Janoskere učeňika pes vesekedinenas jekhe Židoha pal o žužaripen andro Zakonos.

²⁶ Avle ko Jan a phende leske: “Rabbi, oda, savo sas tuha pal o Jordan a pal savo tu diňal svedectvo, bolel a savore džan ke leste.”

²⁷ O Jan odphendā: “O manuš peske našťi lel űič korkoro, te leske oda na ela dino andral o űebos.

²⁸ Tumen korkore san mire švedki, hoj phendom: ‘Me na som o Kristus, ale som bičhado anglal leste.’

²⁹ E terňi hiňi le terneskeri. Le terneskero prijatēlis, savo ačhel pašes a šunel, igen radisaľol le terneskere hangoske. Kada miro radišagos hin akana pherdo.

³⁰ Ov mušinel te barol a me te cikňol.

O Čhavo avel upral

³¹ Oda, ko avel upral, hino upral savorende. Ko hino pal e phuv, hino pal e phuv a vakerel pal o veci, so pes kerel pre phuv; ale oda, ko avel andral o űebos, hino upral savorende.

³² Vakerel pal oda, so dikhľa a šundā, ale űiko na prilel leskero svedectvo.

³³ Oda, ko prilel leskere lava, sikavel, hoj o Del hino čačipnaskero.

³⁴ Bo oda, kas o Del bičhađa, vakerel o lava le Devleskere, bo o Del leske del le Duchos bi e mira.

³⁵ O Dad kamel le Čhas a diňa savoro andre leskere vasta.

³⁶ Oda, ko pačal andro Čhavo, oles hin o večno dživipen, ale oda, ko na prilel le Čhas, na dikhela o dživipen, ale ačhel pre leste e cholĭ le Devleskeri.”

O Ježiš a e Samaritanka

4 Sar pes dodžanľa o Ježiš, hoj o Farizeja pes došunde pal leste, hoj dochudel a bolel buter učeňiken sar o Jan,

² choc o Ježiš korkoro na bolelas, ale leskere učeňika,

³ omukľa e Judsko phuv a geľa pale andre Galileja.

⁴ Mušinda te džal prekal e Samarija.

⁵ Avke avľa andre Samarija andro foros Sichar, so sas pašes paš odi maľa, so diňa o Jakob peskere čhaske le Jozefoske.

⁶ Ode sas e chaňig le Jakoboskeri. O Ježiš sas strapi-men le dromestar, avke peske bešľa paš e chaňig. Sas vaj dešuduj (12) ori † pro dilos.

⁷ Akor avľa jekh džuvľi andral e Samarija te cirdel o paňi. O Ježiš lake phendā: “De man te pijel!”

⁸ Bo leskere učeňika gele andro foros te cinel te chal.

⁹ Akor leske odi Samaritanka phendā: “Tu sal Židos a me som Samaritanka. Sar šaj mandar manges te pijel paňi?” Bo o Židi na vakeren le Samaritanenca.

¹⁰ O Ježiš lake odphendā: “Te džanľalas, savo daros del o Del a ko hin oda, savo tuke phenel: ‘De man te pijel,’ mangľalas les a ov tut diňahas o džido paňi.”

¹¹ E džuvľi leske phendā: “Rajeja, se nane tut aňi džbanos a e chaňig hiňi bari. Akor, khatar leha o džido paňi?”

¹² So, sal tu bareder sar amaro dad o Jakob, savo amenge diňa e chaňig? Se ov korkoro andral pijelas, the leskere čhave the leskere džvirini.”

¹³ O Ježiš lake odphendā: “Sako, ko pijela kale paňestar, ela pale smedno,

¹⁴ ale ko pijela ole paňestar, so les me dava, oles na smedzinela šoha (ňikda). Ale o paňi, so les me dava,

† Grekengeri čhib: šov ori

ačhela andre leste sar e chañig, so dela o večno dživipen."

¹⁵ E džuvli leske odphendā: "Rajeja, de man ole pañestar, hoj man te na smedzinel a te na phirav kade pañeske."

¹⁶ Ov lake phendā: "Dža, vičin tire romes a av kade!"

¹⁷ E džuvli odphendā: "Nane man rom." Ov phendā: "Mištes phendā, hoj tut nane rom,

¹⁸ bo sas tut pandž roma a oda, kaha sal akana, nane tiro rom. Ada phendā čačo."

¹⁹ Akor oj phendā: "Rajeja, dikhav, hoj sal prorokos.

²⁰ Amare dada lašarenas le Devles pre kada verchos a tumen phenen, hoj andro Jeruzalem hin o than, kaj les kempel te lašarel."

²¹ O Ježiš lake odphendā: "Pača mange, džuvlije: Avel e ora, hoj na lašarena le Devles aňi pre kada verchos aňi andro Jeruzalem.

²² Tumen lašaren oles, saves na prindžaren. Ale amen lašaras oles, so prindžaras, bo o spaseňje avel le Židendar.

²³ Ale avel e ora a imar hiňi akana, hoj ola, save čačes lašaren le Dades, les lašarena andro Duchos the andro čačipen. Bo o Dad rodel ajsen, save les avke lašaren.

²⁴ O Del hino Duchos a ola, save les lašaren, mušinen les te lašarel andro Duchos the andro čačipen."

²⁵ E džuvli leske phendā: "Džanav, hoj avela o Mesi-jašis, savo pes vičinel Kristus. Sar ov avela, phenela amenge savoro."

²⁶ O Ježiš odphendā: "Me som, savo tuha vakerav."

²⁷ Androda avle leskere učeňika a čudalinenas pes, hoj vakerelas la džuvľaha. Ale űiko lake na phendā: "So rodes?" Abo leske: "Soske laha vakeres?"

²⁸ Akor mukľa e džuvli peskero džbanos, geľa andro foros a phendā ode le nipenge:

²⁹ "Aven, dikhen le manušes, savo mange phendā savoro, so kerđom! Či nane ov o Kristus?"

³⁰ Gele avri andral o foros a avle ke leste.

³¹ Androda les mangelas leskere učeňika: "Rabbi, cha!"

³² Ale ov phendā: "Man hin te chal chaben, pal savo tumen na džanen."

³³ Akor phenenas o učeňika jekh avreske: "So, andā leske vareko te chal?"

³⁴ Ale o Ježiš lenge odphendā: "Miro chaben hin oda, hoj te kerav e voľa oleskeri, savo man bičhadā, a te dokerav leskeri buči.

³⁵ Či tumen na phenen, hoj mek štar čhon a avela e žatva? Phenav tumenge, hazden tumare jakha a dikhen pro maľi: Imar hine parne – del pes te skidel!

³⁶ Oda, ko skidel upre, imar lel o počiňiben a skidel o ulipen pro večno dživipen. Hoj oda, ko sadzinda, jekhetane te radisaľon oleha, ko skidňa upre.

³⁷ Bo oda lav, so vakeren o nipi, hin čačipen: 'Jekh sadzinel a aver skidel upre.'

³⁸ Me tumen bičhadom te skidel upre oda, pre soste tumen buči na kerđan. Aver kenas a tumen hin lengera bučatar chasna."

³⁹ But Samaritana andral oda foros pačandile andro Ježiš prekal odi džuvli, bo oj vakerelas: "Phendā mange avri savoro, so keravas."

⁴⁰ Sar ke leste avle o Samaritana, mangelas les, hoj te ačhel ke lende. Ačhiľa ode duj džives.

⁴¹ Mek buter džene pačandile, sar šunde leskero lav

⁴² a phenenas la džuvľake: "Amen imar pačas na ča vaš oda, so tu phendā, bo the korkore šundam a džanas, hoj ov hino čačes o Spasitelis le svetoskero."

Sastarel le uradňioskere čhas

⁴³ Pal ola duj dživesa odgeľa odarik andre Galileja.

⁴⁴ O Ježiš korkoro phendā, hoj le prorokos nane pačiv ode, kaj bariľa avri.

⁴⁵ Avke avľa o Ježiš andre Galileja. O manuša andral e Galileja les priile, bo the on sas pre Patradī andro Jeruzalem a dikhle sa, so kerelas.

⁴⁶ Avke o Ježiš avľa pale andre Galilejsko Kana, kaj čerindā o paňi pre mol. Ode sas jekh kraliskero uradňikos a sas les nasvalo čhavo andro Kafarnaum.

⁴⁷ Sar ov šundā, hoj o Ježiš avľa andral e Judsko andre Galileja, geľa ke leste a mangľa les, hoj te avel te sastarel leskere čhas, bo ov imar merelas.

⁴⁸ O Ježiš leske phendā: "Te na dikhľanas dđivi the za-zraki, na pačandilľanas."

⁴⁹ O uradňikos odphendā: "Rajeja, av manca, medik na merel miro čhavo."

⁵⁰ O Ježiš leske phendā: "Dža, tiro čhavo dživel." Ov pačandilľa le laveske, so leske phendā o Ježiš, a geľa.

⁵¹ Le dromeha arakhle pes leha leskere sluhi a phende leske: "Tiro čhavo dživel."

⁵² Phučľa lendar pre ora, kana leske sas feder. Odphende: "Idž, jekh oratar † les e horučka omukľa."

⁵³ Akor prindžardā o dad, hoj oda sas andre odi ora, sar leske o Ježiš phendā: "Tiro čhavo dživel." A pačandilľa ov, the calo leskero kher.

⁵⁴ Kada sas imar dujto zazrakos, so kerđa o Ježiš, sar avľa andral e Judsko phuv andre Galileja.

Sastarel jekhe nasvales paš e Bethesda

5 Palis o Ježiš geľa andro Jeruzalem pro Židoviko in-epos.

² Andro Jeruzalem paš e Bakrengeri brana sas paňi, so o Židi vičinen Bethesda. Sas ode pandž pristreški, so sas kerde pro slupi.

³ Andre ola thana pašľonas igen but nasvale – kore, bange the kaľiki. [Užarenas, medik pes na čhalavela o paňi.

⁴ Bo o Židi pačanas, hoj le Rajeskero aňjelos avelas pal varesavo časos andro paňi a čhalavelas le pañeha a ko pes akor ešebno chudelas le pañestar, sastolas avri andral savore nasvalibena, so les sas.]

⁵ A sas ode varesavo manuš, savo sas tranda the ochto (38) berš nasvalo.

⁶ Sar les dikhľa o Ježiš te pašľol a prindžardā, hoj imar hino but nasvalo, phendā leske: "Kames te sastol avri?"

† Grekengeri čhib: eľta orendar

⁷ O nasvalo manuš leske odphendá: "Rajeja, nane aj-so manuš, savo man ligendahas andro pañi akor, sar pes čhalavel. A medik me dodžav, imar aver džal anglal ma."

⁸ Akor leske o Ježiš phendá: "Ušti, le tiro hados a dža!"

⁹ Oda manuš takoj sastíla avri, íla peskero hados a phirelas. Oda pes ačhiła pro Šabbat (sombatone).

¹⁰ Vašoda o Židi phende oleske, savo sas sastardo: "O Šabbat hin, našti lidžas o hados!"

¹¹ Ov lenge odphendá: "Oda, ko man sastarda, phendá mange: 'Le tiro hados a dža!'"

¹² Avke lestar phučle: "Ko hin oda manuš, so tuke phendá: 'Le tiro hados a dža?'"

¹³ Ale oda manuš, savo sastíla avri, na džanelas ko oda hin, bo o Ježiš odgeła dureder pašal ola nipi, save pes ode zgele.

¹⁴ Palis les arakhíla o Ježiš andro chramos a phendá leske: "Dikh, sastílal avri, imar buter ma ker o bini, hoj pes tuke te na ačhel vareso goreder!"

¹⁵ Oda manuš geła het a phendá le Židenge: "O Ježiš man sastarda."

¹⁶ Vašoda džanas o Židi pro Ježiš, bo kerđa oda pro Šabbat.

¹⁷ O Ježiš lenge odphendá: "Miro Dad furt kerel, vašoda the me kerav."

¹⁸ Vaš oda lav les o Židi mek buter kamenas te muredel, na ča hoj o Šabbat na dolikerel, ale mek the le Devles vičinel Dado a kerel pestar jekh le Dadeha.

Le Ježišoskeri autorita

¹⁹ Avke lenge o Ježiš odphendá: "Čačes, čačes tumenge phenav, o Čhavo našti kerel nič korkoro pestar, ča oda, so dikhel te kerel peskere Dades. Avke sar kerel o Dad, kerel the o Čhavo.

²⁰ Bo o Dad rado dikhel le Čhas a sikavel leske savoro, so ov kerel. A sikavela leske mek bareder veci sar kala, hoj pes tumen te čudalinen.

²¹ Bo sar o Dad uštavel le mulen a obdžidarel len, avke the o Čhavo, kas kamel, obdžidarel.

²² Bo o Dad na sudzinel níkas, ale savoro sudos diña le Čhaske,

²³ hoj savore te den pačiv le Čhas, avke sar den pačiv le Dades. Ko na del pačiv le Čhas, na del pačiv le Dades, savo les bičhada.

²⁴ Čačes, čačes phenav tumenge, hoj hin večno dživipen oles, ko šunel miro lav a pačal oleske, ko man bičhada. Na džala pro sudos, ale pregeła andral o meriben andro dživipen.

²⁵ Čačes, čačes phenav tumenge, hoj avela e ora a imar hiñi ade, sar o mule šunena o hangos le Devleskere Čhaskero a ola, save les šunena, dživena.

²⁶ Bo sar hin le Dades o dživipen andre peste, avke diña the le Čhaske, hoj les te el o dživipen andre peste.

²⁷ Diña les pravos te sudzinel, bo hino o Čhavo le Manušeskero.

²⁸ Ma čudalinen pes oleske, bo avel e ora sar savore, save hine andro hrobi, šunena leskero hangos

²⁹ a ola, save mištes kerenas, uštена andral o meriben a dživena, ale ola, save namištes kerenas, uštена a avena odsudzimen.

³⁰ Me našti kerav nič korkoro mandar. Sudzinav avke, sar šunav le Dadestar a miro sudos hino čačipnaskero, bo na rodav miri voľa, ale e voľa Oleskeri, savo man bičhada."

O svedectvo pal o Ježiš

³¹ "Te me vakerav korkoro pal mande, miro svedectvo nane čačipnaskero.

³² Aver svedčinel pal ma a džanav, hoj oda, so vakerel hin čačipen.

³³ Tumen bičhadan manušen ko Jan a ov diña čačipnaskero svedectvo.

³⁴ No me na prilav o svedectvo le manušestar, ale kada phenav vašoda, hoj te aven spasimen.

³⁵ Ov sas e momeli, so labolas the švicinelas, a tumen kamlan sikra te radisaol andre leskero svetlos.

³⁶ No man hin bareder svedectvo sar le Jan. Bo o skutki, save mange diña te kerel o Dad, me kerav. Ola skutki svedčinen, hoj man o Dad bičhada.

³⁷ The o Dad, savo man bičhada, korkoro diña pal ma svedectvo. Tumen šoha na šundán leskero hangos aňi na dikhlan leskero muj.

³⁸ A leskero lav na ačhel andre tumende, bo na pačan oleske, kas ov bičhada.

³⁹ Roden andro Pisišagi, bo gondolinen tumenge, hoj andre tumen hin o večno dživipen a ipen oda svedčinel pal mande.

⁴⁰ Ale na kamen te avel paš ma, hoj tumen te el o večno dživipen.

⁴¹ O ašariben le nipendar na prilav,

⁴² ale prindžarav tumen, hoj andre tumare jile le Devles na kamen.

⁴³ Me avlom andro nav mire Dadeskero a na prilén man, ale te avlahas vareko aver andre peskero nav, oles priilanas.

⁴⁴ Sar šaj tumen pačan, te jekh avrestar rado prilén o ašariben, ale o ašariben le jekhore Devlestar na roden?

⁴⁵ Ma gondolinen tumenge, hoj me pre tumende vak-erava le Dadeske. O Mojžiš, pre savo pes tumen zmuken, ov pre tumende vakerela avri.

⁴⁶ Bo te pačandilanas le Mojžišoske, pačandilanas the mange, bo ov pisinelas pal mande.

⁴⁷ Ale te na pačan oleske, so ov pisinda, sar pačana oleske, so me vakerav?"

Čafarel but manušen

6 Palis pregeła o Galilejsko Moros, so the pes vičinel Tiberijadsko Moros.

² A džanas pal leste igen but nipi, bo dikhle leskere zazraki, sar sastarelas le nasvalen.

³ O Ježiš geła pro verchos peskere učeňikenca a ode peske bešla.

⁴ O inepos le Židengero, e Patradi, sas pašes.

⁵ Sar hazdña o Ježiš o jakha a dikhľa, hoj aven ke leste igen but nipi, phenda le Filiposke: "Kaj cinaha o maro, hoj kala nipi te chan?"

⁶ Ale oda phenda, hoj les te probalinel avri (skušinel avri), bo džanelas, so kerela.

⁷ O Filip leske phenda: "O maro vaš o duj šel (200) denara na ela len dos, hoj sako lendar ča sikra te chudel."

⁸ Jekh leskere učeňikendar, o Andrej, o phral le Šimonoskero Peteriskero, leske phenda:

⁹ "Hin ade jekh čavoro, saves hin pandž jačmene mare the duj ribi. Ale so oda hin prekal kajci džene?"

¹⁰ O Ježiš phenda: "Phenen le nipege, hoj peske te bešen." A pre oda than sas but čar. Akor peske beše o murša a sas vaj pandž ezera (5 000).

¹¹ O Ježiš ila o mare, palikerđa a rozdelas le učeňikenge a o učeňika olenge, save bešenas. Avke kerđa the le ribenca, a savoren sas ajci keci kamenas.

¹² Sar imar čalile, phenda peskere učeňikenge: "Ski-den upre, so ačhiľa, hoj nič te na musalol!"

¹³ Avke skidle upre dešuduj (12) pherde košara, so ačhile ole pandž jačmenearendar, so chanas.

¹⁴ Sar dikhle o nipi oda zazrakos, so o Ježiš kerđa, phenenas: "Ov hino čačes oda Prorokos, so majinda te avel pro svetos."

¹⁵ Sar o Ježiš avľa pre oda, hoj les kamen te lel a našilu lestar kamen te kerel kralis, geľa pale korkoro pro verchos.

O Raj phirel pal o moros

¹⁶ Sar zaračila, gele leskere učeňika paš o moros.

¹⁷ Gele andre loďka a džanas pre aver sera le moroskeri andro Kafarnaum. Imar sas rat a o Ježiš mek na avľa pale ke lende.

¹⁸ O moros pes upre hazdelas, bo phurdelas zorali balvaj.

¹⁹ Sar odgele la loďkaha vaj pandž abo šov kilometri, dikhle le Ježiš te phirel pal o moros. Ov avľa pašes ke lende a daranas pes.

²⁰ Phenda lenge: "Me som, ma daran tumen!"

²¹ Akor les ile andre loďka a e loďka sas takoj pre oda than, kaj kamle te džal.

O Ježiš – o maro le dživipnaskero

²² O nipi, save ačhenas pre aver sera le moroskeri, džanenas, hoj ode sas ča odi jekh loďka, andre savi gele leskere učeňika het. Džanenas the oda, hoj o Ježiš na geľa jekhetane peskere učeňikencu andre loďka, ale hoj o učeňika odgele korkore.

²³ Ale avle aver loďki andral e Tiberijada paš oda than, kaj chanas o maro, akor sar o Raj palikerđa.

²⁴ No pre aver džives, sar dikhle ola nipi, hoj ode nane o Ježiš aňi leskere učeňika, gele andre ola loďki, so avle andral e Tiberijada. Avke avle andro Kafarnaum te rodel le Ježiš.

²⁵ A sar les arakhle pre aver sera le moroske, phende leske: "Rabbi, kana ade avľal?"

²⁶ O Ježiš lenge odphenda: "Čačes, čačes phenav tumenge: Tumen man na roden vaš oda, hoj dikhľan o zazraki, ale hoj chaľan olearendar a čalilľan.

²⁷ Ma keren buči vaš o chaben, so našľola, ale vaš o chaben, so ačhela andro večno dživipen a so tumen o Čhavo le Manušeskero dela, bo pre leste thođa o Del o Dad peskeri pečat."

²⁸ Akor leske phende: "So kampil te kerel, hoj te keras o skutki le Devleskere?"

²⁹ O Ježiš lenge odphenda: "O Del kamel oda skutkos: hoj te pačan andre Oda, kas ov bičhađa."

³⁰ Akor leske phende: "Savo znameňje kereha, hoj te dikhas a te pačas tuke? So kereha?"

³¹ Amare dada chanas e manna pre pušta, avke sar hin pisimen: '*Diňa len te chal o maro andral o űebos.*'"

³² Pre ada lenge o Ježiš phenda: "Čačes, čačes phenav tumenge, hoj na o Mojžiš tumen diňa o maro andral o űebos, ale miro Dad tumen del o čačo maro andral o űebos.

³³ Bo le Devleskero maro hin oda, ko avel tele andral o űebos a del le svetos dživipen."

³⁴ Akor leske phende: "Rajeja, de amen furt oda maro."

³⁵ O Ježiš odphenda: "Me som oda maro, so del o dživipen, ko avela ke mande, na ela šoha (ňikda) bokhalo, a ko andre mande pačal, šoha na ela smedno.

³⁶ Ale phendom tumenge, choc maň imar dikhľan, the avke na pačan.

³⁷ Savore, saven mange del o Dad, avena ke ma a oles, ko avela ke ma, šoha na odtrada.

³⁸ Bo na avľom tele andral o űebos, hoj te kerav miri voľa, ale a voľa oleskeri, ko man bičhađa.

³⁹ Oda, ko man bičhađa, kamel, hoj te na našavav űikas olendar, so man diňa. Ale kamel, hoj len savoren te uštavav andral o meriben andro posledno džives.

⁴⁰ E voľa mire Dadeskeri hiňi, hoj sako, ko dikhel le Čhas a pačal andre leste, te chudel o večno dživipen. A me leš uštavava andro posledno džives."

⁴¹ O Židi pre leste reptinenas, bo phenda: "Me som oda maro, so avľa tele andral o űebos."

⁴² A phenenas: "Či nane kada o Ježiš, o čhavo le Jozefoskero? Či na prindžaras leskere dades the da? Sar šaj phenel: 'Avľom tele andral o űebos?' "

⁴³ Akor lenge o Ježiš odphenda: "Ma dudrinen maškar tumende!

⁴⁴ űiko našti avel ke mande, te les na pricirdňahas o Dad, savo man bičhađa. A me les uštavava andro posledno džives.

⁴⁵ Andro Proroka hin pisimen: '*Savore ena sikade le Devlestar.*' Avke sako, ko šunđa le Dadestar a sikľiľa lestar, avel ke mande.

⁴⁶ űiko na dikhľa le Dades, ča oda, ko hino le Devlestar – ov le Dades dikhľa.

⁴⁷ Čačes, čačes phenav tumenge: Oles hin o večno dživipen, ko andre mande pačal.

⁴⁸ Me som o maro le dživipnaskero.

⁴⁹ Tumare dada chanas e manna pre pušta, ale mule.

⁵⁰ Ale kada hin oda maro, so avla tele andral o ňebos, a manuš, savo chala lestar, na merela.

⁵¹ Me som oda džido maro, so avla tele andral o ňebos. Te vareko chala ole marestar, dživela furt. O maro, so me dava, hin miro tēlos, so dava vaš o dživipen le svetoske."

⁵² Akor pes o Židi vesekedinenas maškar peste a phenenas: "Sar amenge kada šaj del te chal peskero tēlos?"

⁵³ O Ježiš lenge phendā: "Čačes, čačes phenav tumenge, hoj te na chana o tēlos le Čhaskero le Manušeskero a te na pijena leskero rat, na ela tumen o dživipen andre peste.

⁵⁴ Ko chal miro tēlos a pijel miro rat, oles hin večno dživipen a me les uštavava andro posledno džives.

⁵⁵ Bo miro tēlos hin oda čačo chaben a miro rat čačo pijiben.

⁵⁶ Oda, ko chal miro tēlos a pijel miro rat, ačhel andre ma a me andre leste.

⁵⁷ Avke, sar man bičhađa o džido Dad a sar me dživav le Dadestar, avke the oda, ko man chala, dživela mandar.

⁵⁸ Kada hin oda maro, so avla tele andral o ňebos; na avke sar tumare dada chanas e manna a mule. Oda, ko chala kada maro, dživela pro furt."

⁵⁹ Kada phendā, sar len sikavelas andre sinagoga andro Kafarnaum.

But učeņika oddžan le Rajestar

⁶⁰ Sar leskere učeņika oda šunde, but lendar phende: "Kala hine zorale lava! Ko len šaj šunel?"

⁶¹ Ale o Ježiš džanelas, hoj leskere učeņika pre leste dudrinen, vašoda lenge phendā: "Kada marel tele tumaro pačaben?"

⁶² A so akor, te dikhlānas le Čhas le Manušeskero te džal upre ode, kaj sas angloda?

⁶³ O Duchos hin, savo obdžidarel; le manušeskero zor nane pre ňisoste. O lava, so tumenge me vakerdom, hine Duchos the dživipen.

⁶⁴ Ale maškar tumende hin ajse, save na pačan." Bo o Ježiš imar ešebnovarestar (peršovarestar) džanelas, save na pačan a ko les zradzinela.

⁶⁵ A phendā: "Vašoda tumenge phendom, hoj ňiko našti avel ke ma, te leske oda na ela dino mire Dadestar."

⁶⁶ Akorestar odgele but leskere učeņika het a na phirenas imar leha.

⁶⁷ Avke o Ježiš phendā le dešudujenge: "So, the tumen kamen te džal het?"

⁶⁸ O Šimon Peter leske odphendā: "Rajeja, ke kaste džaha? Se tut hin o lava, so den o večno dživipen,

⁶⁹ a amen pačandiľam a prindžardam, hoj tu sal oda Sentno le Devleskero."

⁷⁰ O Ježiš lenge odphendā: "Či me mange na kidnom avri tumen le dešudujen? Ale jekh tumendar hin o beng."

⁷¹ Oda phendā pal o Judaš, saveske sas dad o Šimon Iškarijotsko. Bo ov sas jekh le dešudujendar, savo les palis zradzindā.

O Ježiš pro Inepos le Stankengero

7 Palis phirelas o Ježiš pal e Galileja. Na kamelas te phirel pal e Judsko, bo o Židi les kamenas te murdarel.

² Sas pašes le Židengero inepos, o Inepos le Stankengero.

³ Akor leske leskere phrala phende: "Dža adarik het andre Judsko, hoj the tire učeņika te dikhen o skutki, so keres.

⁴ Bo ňiko, ko kamel pes te sikavel anglo nipi, na kerel nič počoral. Te keres kajse veci, sikav tut le svetoske."

⁵ Bo aňi leskere phrala andre leste na pačanas.

⁶ Akor lenge o Ježiš phendā: "Miro časos mek na avla, ale tumaro časos hino ade furt.

⁷ Pre tumende o svetos na džal, ale man našti avri ačhel, bo me pre leste phenav avri, hoj namištes kerel.

⁸ Tumen džan andro Jeruzalem pro inepos. Me na džav pre kada inepos, bo mek na avla miri ora."

⁹ Kada lenge phendā a ačhiľa andre Galileja.

¹⁰ Ale sar odgele leskere phrala pro inepos, odgeľa the ov – no na avke, hoj les te dičhol, ale počoral.

¹¹ O Židi les rodenas pro inepos a phenenas: "Kaj hino koda?"

¹² A maškar o nipi pes pal leste but vakerelas. Jekh vakerenas, hoj hino lačho, a aver vakerenas, hoj cirdel le nipen pal peste le klamišagoha.

¹³ Ale ňiko pal leste na vakerelas anglal o nipi, bo daranas pes le Židendar.

O Ježiš sikavel andro chramos

¹⁴ Sar imar pregeľa jepaš inepos, odgeľa o Ježiš upre andro chramos a sikavelas.

¹⁵ Akor pes o Židi čudaľinenas a phenenas: "Khatar džanel le Devleskero Lav, te na sikľiľa?"

¹⁶ O Ježiš lenge odphendā: "Miro sikaviben nane mandar, ale Olestar, ko man bičhađa.

¹⁷ Te vareko kamel te kerel le Devleskeri voľa, džanela, či hin oda sikaviben le Devlestar, abo či me korkoro mandar vakerav.

¹⁸ Oda, ko vakerel korkoro pestar, rodel peskeri slava. Ale oda, ko rodel e slava oleske, savo les bičhađa, vakerel o čačipen a nane andre leste klamišagos.

¹⁹ Či na diňa tumenge o Mojžiš o Zakonos? A ňiko tumendar na doľikerel o Zakonos. Soske man kamen te murdarel?"

²⁰ O nipi odphende: "Demonos andre tu hin. Ko tut kamel te murdarel?"

²¹ O Ježiš odphendā: "Jekh zazrakos kerdom a savore tumen oleske čudaľinen.

²² O Mojžiš tumen diňa o občhindipen (e obriezka), vašoda tumen občhinen le manušes pro Šabbat (sombatone) – choc o občhindipen nane lestar, ale le dadendar.

²³ Te o murš prilel o občindipen pro Šabbat, hoj pes te dolikerel le Mojžišoskero Zakonos, akor soske pre mande chan cholí, hoj sastárdom pro Šabbat cale manušes?

²⁴ Ma sudzinen pal oda, sar pes dičhol avral, ale sudzinen o čačipnaskero sudos."

²⁵ Akor phende varesave Jeruzalemčana: "Či oda nane ov, saves kamen te murdarel?"

²⁶ A dikh, bi e dar vakerele a nič leske na phenen. So, čačes prindžarde o anglune murša, hoj ov hin o Kristus?

²⁷ Se pal kada džanas khatar hino, ale sar avela o Kristus, pal leste na džanela niko, khatar hino."

²⁸ Akor sikavelas o Ježiš andro chramos a zvičinda: "Tumen man prindžaren a džanen the khatar som. No me na avlóm korkoro mandar, ale oda, ko man bičhada, hino čačo, ale oles tumen na prindžaren.

²⁹ Me les prindžarav, bo som lestar a ov man bičhada."

³⁰ Akor les kamenas te zachudel, ale niko pre leste na thođa o vasta, bo mek na avla leskeri ora.

³¹ But džene ole nipendar andre leste pačandile a phende: "Te avela o Kristus, či kerela buter zazraki, sar ov kerđa?"

O Farizeja kamen te zalel le Ježiš

³² Ale sar šunde o Farizeja le nipen, hoj peske pal leste vakerele kajse veci, bičhade on the o nekbareder rašaja le sluhén, hoj les te zalén.

³³ Akor lenge o Ježiš phenda: "Imar nabut časos som tumenca a palis džava ke oda, ko man bičhada.

³⁴ Rodena man, ale na arakhena, a ode, kaj me som, tumen našti aven."

³⁵ Akor peske o Židi phende: "Kaj džala, hoj les amen na arakhaha? Či so, džala andre le Grekengere fori, kaj bešen amare manuša, hoj te sikavel le Greken?"

³⁶ So hin oda, so phenda: "Rodena man a na arakhena a ode, kaj me som, tumen našti aven?" "

Pal o džido pañi

³⁷ Pre posledno baro džives andro inepos ačhelas o Ježiš a zvičinda: "Te hin vareko smedno, mi avel ke mande a mi pijel!"

³⁸ Andral oda manuš, ko pačal andre ma, avena avri o prudi le džide pañeha, avke sar phenel le Devleskero Lav!"

³⁹ Ale ada phenda pal o Sentno Duchos, saves chudena ola, save andre leste pačana. Na sas mek dino o Sentno Duchos, bo mek o Ježiš na sas ilo upre andre slava.

Vesekedinen pes pal o Ježiš

⁴⁰ Varesave džene ole nipendar, save šunde oda lav, phenenas: "Ov hino čačes oda Prorokos."

⁴¹ Aver phenenas: "Ov hin o Kristus." Ale aver phenenas: "Sar šaj avel o Kristus andral e Galileja?"

⁴² Či na phenel le Devleskero Lav, hoj o Kristus avela le Davidoskere potomstvostar, andral o foros Betlehem, kaj bešelas o David?"

⁴³ Avke o nipi pes angle leste vesekedinenas.

⁴⁴ Varesave džene lendar les kamle te zalel, ale niko pre leste na thođa o vasta.

⁴⁵ O sluhi avle pale ko nekbareder rašaja the ko Farizeja a on lenge phende: "Soske les na andan?"

⁴⁶ O sluhi odphende: "Šoha (nikda) nisavo manuš na vakerele avke sar kada manuš."

⁴⁷ Akor lenge odphende o Farizeja: "So, the tumen diliňardža?"

⁴⁸ Hin vareko maškar o anglune murša, abo maškar o Farizeja, ko pačandila andre leste?"

⁴⁹ Na, ča ola nipi, save na prindžaren o Zakonos – prekoše hine!"

⁵⁰ Androda phenda jekh le Farizejendar, o Nikodem, savo sas anglođa pal o Ježiš:

⁵¹ "Amaro Zakonos na sudzinel le manušes sigeder, medik les na šunel avri a na dodžanel pes, so kerel."

⁵² Odphende leske: "So, the tu sal andral e Galileja? Gen andre le Devleskero Lav a dikheha, hoj o prorokos na avela andral e Galileja."

⁵³ A geľa sako andre peskero kher.

E džuvli, savi kerđa o lubipen

8 O Ježiš odgeľa pro Olivovo Verchos.

² Tosara avla pale andro chramos a savore manuša avenas ke leste. Ov peske bešľa a sikavelas len.

³ O zakoňika the o Farizeja ande ke leste jekha džuvla, sava arakhle te kerel lubipen, a thode la te ačhel maškaral.

⁴ A phende leske: "Učitelina, kadi džuvli sas arakhli paš oda, sar kerelas lubipen.

⁵ O Mojžiš amenge andro Zakonos prikazinda te murdarel le barenca kajsa džuvla – a tu, so pre oda phenes?"

⁶ Kada phende vašoda, hoj les te chuden pro lav, hoj pre leste palis te vakerele. Ale o Ježiš bandila tele a pisinelas le angušteha pre phuv.

⁷ Sar lestar na preačhenas te phučkerel, uštilla a phenda lenge: "Ko tumendar hino bi o binos, mi čhivel andre late ešebno le bareha."

⁸ A pale bandila tele a pisinelas pre phuv.

⁹ Sar oda on šunde, jekh pal aver džanas het, ešeb (peršo) o nekphureder, medik ode na ačhila ča o Ježiš the odi džuvli, savi ačhelas maškaral.

¹⁰ O Ježiš pale uštilla a phenda lake: "Kaj hine savore? Niko tut na odsudzinda?"

¹¹ Oj phenda: "Niko, Rajeja!" O Ježiš lake phenda: "Añi me tut na odsudzina: Dža a imar ma ker buter o bini!"

O Ježiš – o svetlos le svetoskero

¹² Palis ke lende o Ježiš pale prevakerđa: "Me som o svetlos le svetoskero. Oda, ko phirela pal mande, na

phirela andro kalipen, ale ela les o svetlos le dživip-naskero."

¹³ O Farizeja leske phende: "Tu vakeres korkoro pal tu; tiro svedectvo nane čačipnaskero."

¹⁴ O Ježiš odphenda: "Choc me korkoro pal mande vakerav, miro svedectvo hin čačo, bo džanav, khatar avlom a kaj džav. Ale tumen na džanen, khatar avav abo kaj džav."

¹⁵ Tumen sudzinen avke sar o nipi, me na sudzinav űikas.

¹⁶ Ale te sudzinav, miro sudos hino čačipnaskero, bo na som korkoro, ale o Dad, savo man bičhađa, hino manca.

¹⁷ Se the andre tumaro Zakonos hin pisimen, hoj o svedectvo duje manušengero hino čačo.

¹⁸ Me svedčinav korkoro pal mande a svedčinel pal mande the o Dad, ko man bičhađa."

¹⁹ Akor leske phende: "Kaj hino tiro Dad?" O Ježiš odphenda: "Na prindžaren aűi man aűi mire Dades. Te prindžardanas man, prindžardanas the mire Dades."

²⁰ O Ježiš vakerđa oda, sar sikavelas andro chramos paš e pokladűa, ale űiko pre leste na thođa o vasta, bo mek na avla leskeri ora.

O vakeriben le napačabnaskere űidenca

²¹ Paloda lenge o Ježiš pale phenda: "Me džav het a tumen man rodona a merena andre tumaro binos. Ode, kaj me džav, tumen naštűi aven."

²² Akor phenenas o űidi: "So, kamel pes korkoro te murdarel, te phenel: 'Ode, kaj me džav, tumen naštűi aven?'"

²³ Ov lenge phenda: "Tumen san telal, me som upral. Tumen san andral kada svetos, me na som."

²⁴ Vašoda phendom tumenge, hoj merena andre tumare bini. Bo te na pačana, hoj Me Som, merena andre tumare bini."

²⁵ Akor leske phende: "Ko sal tu?" O Ježiš lenge odphenda: "Me som oda, so furt tumenge phenavas."

²⁶ Hin man but pal tumende te vakerel a te sudzinel. Ale oda, ko man bičhađa, hino čačo a me vakerav le svetoske oda, so šundom lestar."

²⁷ No on na achalile, hoj lenge vakerelas pal o Dad.

²⁸ Avke phenda o Ježiš: "Sar hazdena upre le Čhas le Manušeskeres, akor džanena, hoj me som a hoj korkoro mandar na kerav űič, ale vakerav avke, sar man sikađa miro Dad."

²⁹ Oda, ko man bičhađa, hino manca. Na mukla man o Dad korkores, bo me furt kerav oda, so hin leske pre dzeka."

O čačipen oslobodzinel

³⁰ Sar oda vakerelas, but džene andre leste pačandile.

³¹ Akor phenda o Ježiš ole űidenge, save andre leste pačandile: "Te dolikerena miro lav, čačas san mire učeűika."

³² Prindžarena o čačipen a o čačipen tumen oslobodzinela."

³³ Odphende leske: "Amen sam le Abrahamoskere čhave a šoha (űikda) űikasko na samas otroka. Sar tu phenes: 'Avena oslobodzimen?'"

³⁴ O Ježiš lenge phenda: "Čačas, čačas phenav tumenge, hoj sako, ko kerel o binos, hino otrokos le binoske."

³⁵ O otrokos na ačhela andro kher furt, ale o čhavo ačhela furt."

³⁶ Sar tumen o Čhavo oslobodzinela, akor avena čačas slobodne."

³⁷ Džanav, hoj san le Abrahamoskere čhave, ale kamen man te murdarel, bo na kamen te prilal mire lava."

³⁸ Me vakerav oda, so dikhlom ke miro Dad, a tumen keren avke, sar šundűan tumare dadestar."

³⁹ Odphende leske: "Amaro dad hin o Abraham." O Ježiš odphenda: "Te ulanas le Abrahamoskere čhave, kerđanas ola veci, so o Abraham."

⁴⁰ Akana man kamen te murdarel, manušes, savo tumenge vakerelas o čačipen, so šundűa le Devlestar. A kada o Abraham na kerđa."

⁴¹ Tumen keren o skutki tumare dadeskere." On phende leske: "Amen na ulilam (pes na narodzindam) le lubipnastar, amen hin jekh Dad, o Del."

⁴² O Ježiš lenge phenda: "Te ulahas o Del tumaro dad, kamlanas man, bo me avlom le Devlestar a akana som ade. Bo me na avlom korkoro mandar, ale ov man bičhađa."

⁴³ Soske na achalon oleske, so me vakerav? Vašoda, hoj naštűi zlidžan mire lava."

⁴⁴ Tumaro dad hin o beng a tumen kamen te kerel o nalače űadosci tumare dadeskere. Ov sas vrahos ešebnovarestar (peršovarestar) a na ačhila andro čačipen, bo andre leste nane űisavo čačipen. Te klaminel, vakerel oda, so hin andre leste, bo ov hino klamaris the o dad le klamišagoske."

⁴⁵ Ale mange na pačan, bo me vakerav o čačipen."

⁴⁶ Ko tumendar šaj phenel pre ma, hoj kerđom vare-savo binos? Ale te vakerav o čačipen, soske mange na pačan?"

⁴⁷ Oda, ko hino le Devlestar, šunel le Devleskere lava. Tumen vašoda na šunen, bo na san le Devlestar."

O Ježiš the o Abraham

⁴⁸ Akor leske o űidi odphende: "Či amen na phenas mištes, hoj sal Samaritanos a hin andre tu demonos?"

⁴⁹ O Ježiš odphenda: "Andre mande nane demonos. Me dav pačiv mire Dades, ale tumen man na den pačiv."

⁵⁰ Me na rodav miri slava, ale hin aver, ko ada rodel prekal ma, a ov hino sudcas."

⁵¹ Čačas, čačas phenav tumenge te vareko dolikerela miro lav, šoha na dikhela o meriben."

⁵² Akor leske o űidi phende: "Akana prindžardam, hoj andre tu hin demonos. O Abraham mula the o proroka mule a tu phenes, hoj te vareko dolikerela tiro lav, šoha na merela?"

⁵³ So sal tu bareder sar amaro dad o Abraham, savo muľa? The o proroka mule. So tutar keres?"

⁵⁴ O Ježiš odphenda: "Te man lašarav me korkoro, miro lašariben na mol nič. Miro Dad hin oda, ko man lašarel – pal kaste tumen phenen, hoj hino tumaro Del.

⁵⁵ Tumen les na prindžardan, ale me les prindžarav. Te phendomas, hoj les na prindžarav, ulomas ajso klamaris sar tumen. No me les prindžarav a dolikerav leskero lav.

⁵⁶ O Abraham tumaro dad radisalila, hoj dikhela miro džives; no dikhla a radisalila."

⁵⁷ Akor leske o Židi phende: "Mek tuke nane aňi penda (50) berš a le Abraham dikhla?"

⁵⁸ O Ježiš phenda: "Čačes, čačes phenav tumenge, hoj sigeder sar sas o Abraham, Me Som."

⁵⁹ Akor hazdle o bara, hoj andre leste te čhiven, ale o Ježiš pes garuđa a geľa avri andral o chramos.

O manuš, savo sas koro kanastar ulila

9 Sar džalas o Ježiš dikhla jekhe manušes, savo sas koro, kanastar ulila (pes narodzinda).

² A leskere učeňika lestar phučle: "Rabbi, ko kerđa binos, hoj ulila koro? Ov, vaj leskeri daj the dad?"

³ O Ježiš odphenda: "Aňi ov na kerđa binos aňi leskeri daj the dad. Ale kada pes ačhila vašoda, hoj pes pre leste te sikavel le Devleskeri zor.

⁴ Me mušinav te kerel o skutki oleskere, savo man bičhađa, medik hin o džives. Avel e rat a akor našti kerela ņiko skutki.

⁵ Medik som pro svetos, som o svetlos le svetoske."

⁶ Sar oda phenda, čhungarđa pre phuv, kerđa le šlinenca čhik a pomakhla o jakha le koreske.

⁷ A phenda leske: "Dža, thov (omor) tut andro paňi Siloam" (so hin prethodo: Bičhado). Avke geľa a thoda pes, avla pale a dikhelas.

⁸ Akor phende leskere susedi the ola, save les anglo-da dikhenas te žobrinel: "Či oda nane ov, savo bešelasa žobrinelas?"

⁹ Jekh phenenas: "Oda hin ov." Aver phenenas: "Nane, ale dičhol sar ov." Ale ov phenelas: "Oda som me."

¹⁰ Akor lestar phučle: "Sar tuke phundrile o jakha?"

¹¹ Ov odphenda: "O manuš, savo pes vičinel Ježiš, kerđa čhik, pomakhla mire jakha a phenda mange: 'Dža ko paňi Siloam a thov tut!' Avke gelom, a sar man thođom, chudlom te dikhel."

¹² Akor leske phende: "Kaj hino oda manuš?" Phenda: "Na džanav."

¹³ Palis liġende oles, savo sas koro, ko Farizeja.

¹⁴ Oda džives, sar kerđa o Ježiš e čhik a phundrađa leskere jakha, sas Šabbat (sombat).

¹⁵ O Farizeja lestar pale phučle: "Sar chudlal te dikhel?" Ov lenge phenda: "Thoda čhik pre mire jakha, thođom (mordom) man a chudlom te dikhel."

¹⁶ Akor phende varesave Farizeja: "Kada manuš nane le Devlestar, bo na dolikerel o Šabbat!" Aver phenenas: "Sar šaj kerel binošno manuš kajse zazraki?" A veseke dinenas pes maškar peste.

¹⁷ Avke pale phende le koreske: "Tu, so phenes akana pal leste, sar tuke phundrađa o jakha?" Ov phenda: "Hino prorokos."

¹⁸ O Židi na pačanas, hoj sas koro a chudla te dikhel, medik peske na vičinde leskera da the dades.

¹⁹ Avke lestar phučle: "Hin kada tumaro čhavo? Pal leste phenen, hoj ulila koro? Sar oda, hoj akana dikhel?"

²⁰ Leskeri daj the o dad lenge odphende: "Džanas, hoj hin amaro čhavo a džanas, hoj ulila koro,

²¹ ale sar oda, hoj akana dikhel, na džanas. Amen na džanas, ko phundrađa leskere jakha. Hin leske o berša, phučen lestar; ov vakerela korkoro vaš peste."

²² Kada phenda leskeri daj the o dad, bo daranas pes le Židendar. Bo o Židi pes maškar peste dovakerde, hoj oda, ko pre leste phenela, hoj hino o Kristus, ela avričhido andral e sinagoga.

²³ Vašoda phenda leskeri daj the dad: "Hin leske o berša, lestar phučen."

²⁴ Akor vičinde o Farizeja dujtovar ole manušes, savo sas koro, a phende leske: "Vaker čačipen anglo Del. Amen džanas, hoj oda manuš hino binošno."

²⁵ Ov odphenda: "Či hino binošno, me na džanav, ale jekh džanav: Somas koro a akana dikhav."

²⁶ Pale leske phende: "So tuke kerđa? Sar phundrađa tire jakha?"

²⁷ Odphenda lenge: "Imar tumenge phendom a na šundān. Soske oda kamen pale te šunel? The tumen kamen te avel leskere učeňika?"

²⁸ On leske rakinenas a phende: "Tu sal leskero učeňikos, ale amen sam o učeňika le Mojžišoskere!"

²⁹ Amen džanas, hoj o Del ko Mojžiš vakerelas, ale pal kada na džanas, aňi khatar hino."

³⁰ Ov odphenda: "Ipen oda hin čudno, hoj tumen na džanen, khatar hino, ale phundrađa mire jakha.

³¹ Se amen džanas, hoj o Del le binošnen na šunel, ale šunel oles, ko les del pačiv a kerel leskeri voľa.

³² Šoha na sas šundo, hoj vareko phundrađa o jakha oleske, ko ulila koro.

³³ Te ov na ulahas le Devlestar, našti nič kerđahas."

³⁴ Odphende leske: "Tu ulilal calo andro bini a amen aves te sikavel?" A tradle les avri andral e sinagoga.

O kore andro duchos

³⁵ O Ježiš šunda pal oda, hoj les tradle avri, a sar les arakhla, phenda leske: "Tu pačas andro Čhavo le Manušeskero?"

³⁶ Ov odphenda: "A ko hin oda Rajeja, hoj andre leste te pačav?"

³⁷ O Ježiš leske phenda: "Imar les the dikhla a ov hin oda, savo tuha vakerel."

³⁸ Ov phenda: "Pačav, Rajeja!" A peľa pro khoča angle leste.

³⁹ O Ježiš phenda: "Me avlom andre kada svetos te sudzinel. Hoj ola, save na dikhen, te dikhen a ola, save dikhen, te en kore."

⁴⁰ Šunde oda varesave Farizeja, save leha sas a phende leske: "So, the amen sam kore?"

⁴¹ O Ježiš lenge odphenda: "Te ulanas kore, na ulahas tumen binos, ale akana phenen: 'Amen dikhas!' Vašoda tumaro binos ačhel."

O Ježiš hino lačno Pastjeris

10 "Čačes, čačes phenav tumenge, hoj oda, ko na džal andre prekal o vudar andre bakraňi maštalňa, ale džal avres, hino živaňis the zbuňnikos.

² Ale oda, ko avel andre prekal o vudar, hin o pastjeris le bakrengero.

³ Leske o vratňikos phundravel a o bakrore šunen leskero hangos (hlasos). Vičinel peskere bakroren pal o nava a lidžal len avri.

⁴ Sar lidžal avri savore peskere bakroren, džal anglal lende a o bakrore džan pal leste, bo prindžaren leskero hangos.

⁵ Ale pal aver dženo šoha (ňikda) na džana a denašena lestar, bo na prindžaren leskero hangos."

⁶ Kada podobenstvo lenge phenda o Ježiš, ale on na achalile, pal soste lenge vakereles.

⁷ Akor lenge o Ježiš pale phenda: "Čačes, čačes phenav tumenge, me som o vudar le bakrorengenge.

⁸ Savore, save avle angle mande, sas zbuňnika the živaňa, ale o bakrore len na šunde.

⁹ Me som o vudar. Te avela vareko andre prekal ma, ela spasimen. Avela andre a džala avri a arakhela o chaben.

¹⁰ O živaňis avel ča vašoda, hoj te čorel, te murdarel a te zničinel. Me vašoda avlom, hoj len te el dživipen a savorestar pherdo."

¹¹ "Me som o lačno Pastjeris. O lačno Pastjeris del peskero dživipen vaš o bakrore.

¹² Ale sar o najomňikos, savo nane pastjeris a o bakrore nane leskere, dikhel te avel le ruves (vlkos), omukel le bakroren a denašel. Palis o ruv len chudel a roztradel.

¹³ Oda manuš denašel het, bo ov hino ča najomňikos a na bajinel pal o bakrore.

¹⁴ Me som oda lačno Pastjeris a me prindžarav miren a the mire man prindžaren.

¹⁵ Avke, sar man prindžarel o Dad, avke the me prindžarav le Dades a dav miro dživipen vaš o bakrore.

¹⁶ Hin man the aver bakrore, so nane andral kadi maštalňa a the len mušnav te lidžal. Šunena miro hangos a ela jekh stados the jekh Pastjeris.

¹⁷ Vašoda man kamel miro Dad, bo me dav miro dživipen, hoj mange les te lav pale.

¹⁸ Ņiko mandar na lel o dživipen, ale me korkoro les dav. Hin man zor les te del a hin man zor les te lel pale. Kada prikazaňje chudlom le Dadestar."

¹⁹ Vaš ola lava pes chudle o Židi maškar peste pale te vesekedinel.

²⁰ A but džene lendar phenenas: "O demonos andre leste hin a diliňalol. Soske les šunen?"

²¹ Aver phenenas: "Kala lava nane manušestar, andre savo hin demonos. Či šaj phundravel o demonos o jakha le korengenge?"

O napačaben le Židengero

²² Andro Jeruzalem sas o Inepos Hanukkah † a sas jevend.

²³ A o Ježiš pes predžalas pal o chramos andre dvora le Šalamunoskeri.

²⁴ Akor o Židi ačhile pašal leste a phende: "Dži kana amen mukeha avke, hoj te na džanas, ko tu sal? Te sal o Kristus, phen amenge phundradones!"

²⁵ O Ježiš lenge odphenda: "Phendom tumenge a na pačan. O skutki, so me kerav andre mire Dadeskero nav, sikaven pre mande.

²⁶ Ale tumen na pačan, bo na san mire bakrore.

²⁷ Mire bakrore šunen miro hangos a me len prindžarav a on aven pal mande.

²⁸ Me len dav večno dživipen a šoha na merena. Ņiko len na cirdela avri andral miro vast.

²⁹ Miro Dad, savo mange len diňa, hino nekbareder savorendar. Ņiko len našti cirdel avri andral o vast mire Dadeske.

³⁰ Me the o Dad sam jekh."

³¹ Akor hazdle o Židi o bara, hoj les te murdaren.

³² Ale o Ježiš lenge odphenda: "But lačne skutki tumenge sikađom, so hine mire Dadestar. Vaš savo man kamen te murdarel le barenca?"

³³ O Židi leske odphende: "Na vaš o lačne skutki tut kamas te murdarel, ale vaš oda, hoj pes ruhines pro Del a keres tutar Del – tu, so sal ča manuš."

³⁴ O Ježiš lenge odphenda: "Či nane pisimen andre tumaro Zakonos: 'Me phendom, devla san?'

³⁵ Vičinel 'devla' olen, kaske sas dino o Lav le Devleskero – a le Devleskero Lav hin čačipen pro furt.

³⁶ Sar oda, hoj tumen phenen oleske, kas peske o Dad kidňa avri a bičhađa pro svetos, hoj pes ruhinel pro Del? Ča vaš oda, hoj phendom: 'Me som o Čhavo le Devleskero?'

³⁷ Te me na kerav o skutki mire Dadeskere, akor mange ma pačan.

³⁸ Ale te kerav ola skutki – choc mange na pačan, pačan mire skutkenge, hoj te prindžaren a te pačan, hoj o Dad hino andre mande a me som andro Dad."

³⁹ Akor les pale kamenas te chudel, no ov geľa avri andral lengere vasta.

⁴⁰ A pale odgeľa pal o Jordan, pre oda than, kaj o Jan angloda bolelas, a ačhiľa ode.

⁴¹ But džene avle pal leste a phenenas: "Choc o Jan na kerdä űisavo zazrakos, savoro, so pal o Ježiš phenda, hin čačipen."

⁴² A but džene ode andre leste pačandile.

O Lazar merel

11 Sas jekh nasvalo, o Lazar, andral o gav Betanija, kaj bešenas e Maria the lakeri pheň Marta.

² Odi Maria pomakhľa le Rajes le olejoha a kłosľa leske o pindre le balenca. Lakeri phral Lazar sas nasvalo.

† O inepos, sar o chramos sas pale sentňardo.

³ Avke ola pheña dine le Ježišoske te phenel: "Rajeja, oda, kas tu rado dikhes, hino nasvalo."

⁴ Sar o Ježiš oda šunđa, phendā: "Kada nasvaliben nane pro meriben, ale pre le Devleskeri slava, hoj o Čhavo le Devleskero te el barardo."

⁵ O Ježiš rado dikhelas la Marta, lakera pheña the le Lazar.

⁶ Ale sar šunđa, hoj o Lazar hino nasvalo, ačhiła mek duj džives pre oda than, kaj sas.

⁷ Palis phendā le učeňikenge: "Aven, džas pale andre Judsko."

⁸ O učeňika leske phende: "Rabbi, ča akana tut kame-nas o Židi te murdarel le barenca a pale ode džas?"

⁹ O Ježiš odphendā: "Či nane dešuduj (12) ori andro džives? Te vareko phirel dživese, na perela, bo dikhel o svetlos kale svetoskero."

¹⁰ Ale te phirel vareko rači, perela, bo nane andre leste o svetlos."

¹¹ Pal kala lava lenge phendā: "Amaro prijateľis Lazar zasuča, ale džav, hoj les te uštavav."

¹² Akor leske o učeňika phende: "Rajeja, te zasuča, sastola avri."

¹³ O Ježiš vakerelas pal leskero meriben, ale on peske gondolinenas, hoj vakerel pal o soviben.

¹⁴ Palis lenge o Ježiš phendā phundradones: "O Lazar muła."

¹⁵ Vaš tumenge som rado, hoj ode na somas, hoj tumen te pačan. Ale aven, džas pal leste!"

¹⁶ Akor phendā o Tomaš, saves vičinen Didimos, okle učeňikenge: "Džas the amen, hoj te meras leha!"

O Ježiš – o uštiben the o dživipen

¹⁷ Sar ode avła o Ježiš, dodžanła pes, hoj o Lazar imar štar džives pašlol andro hrobos.

¹⁸ E Betanija sas pašes paš o Jeruzalem, vaj trin kilometri.

¹⁹ A but Židi avle ke Marta the Maria te prelīdzal lenca e dukh pal lengero phral.

²⁰ Sar šunđa e Marta, hoj avel o Ježiš, geła ke leste, ale e Maria ačhiła khere.

²¹ Avke phendā e Marta le Ježišoske: "Rajeja, te ade ulālas, miro phral na mułahas."

²² Ale the akana džanav, hoj savoro, so mangeha le Devlestar, o Del tut dela."

²³ O Ježiš lake phendā: "Tiro phral uštela."

²⁴ E Marta leske phendā: "Džanav, hoj uštela akor, sar uštēna o mule andral o meriben andro posledno džives."

²⁵ O Ježiš lake phendā: "Me som oda, ko uštavel le manušen andral o meriben a del len o dživipen. Oda, ko andre mande pačala, choc merela, dživela."

²⁶ Ņiko olendar, save dživen a pačan andre ma, šoha (ňikda) na merela. Pačas oleske?"

²⁷ Oj leske phendā: "He, Rajeja, me pačandilom, hoj tu sal o Kristus, o Čhavo le Devleskero, savo mušinda te avel pro svetos."

O Ježiš rovel

²⁸ Sar oda phendā, geła pale, vičinda peskera pheña la Maria a počoral lake phendā: "O Učiteľis hino ade a vičinel tut."

²⁹ Sar oda šunđa, uštīła sigo a geła pal leste.

³⁰ O Ježiš mek na geła andro gav, ale ačhiła mek pro than, kaj ke leste avła e Marta.

³¹ O Židi, save andro kher zlidžanas la Mariaha e dukh, dikhle, sar sigo uštīła a geła avri. Gele pal late, bo peske gondolinenas, hoj džal paš o hrobos te rovel.

³² Avke e Maria avła ode, kaj sas o Ježiš, a sar les dikhła, peła paš leskere pindre a phendā leske: "Rajeja, te ade ulālas, miro phral na mułahas."

³³ Sar dikhła o Ježiš, hoj rovel oj the o Židi, save avle laha, zaiła les oda a avła leske igen pharo andro jilo

³⁴ a phučła: "Kaj les thodān?" On leske phende: "Rajeja, av a dikh!"

³⁵ A o Ježiš zarundā.

³⁶ Akor phende o Židi: "Dikhen, sar les rado dikhelas!"

³⁷ Varesave džene lendar phende: "Či ov, savo phundradā o jakha le koreske, našti kerđa vareso, hoj o Lazar te na merel?"

O Ježiš uštavel le Lazar

³⁸ Le Ježišoske sas pale pharo a avła ko hrobos, so sas jaskiña a sas phandlo le bareha.

³⁹ O Ježiš phendā: "Odlen o bar!" E Marta, e pheň le muleskeri, phendā: "Rajeja, imar khandel, bo hino ode imar štarto džives."

⁴⁰ O Ježiš lake phendā: "Či na phendom tuke, hoj te pačaha, dikheha le Devleskeri slava?"

⁴¹ Avke odile o bar. O Ježiš hazdña upre o jakha a phendā: "Dado, palikerav tuke, hoj man šundāl avri."

⁴² Me džanavas, hoj man furt šunes, ale oda phendom anglo nipi, save ade ačhen, hoj te pačan, hoj man tu bičhadāl."

⁴³ Sar oda phendā, vičinda zorale hangoha: "Lazar, av avri!"

⁴⁴ O mulo avła avri. O pindre the o vasta leske sas za-phandle le faštēnca a leskero muj sas zakerdo andre le khosneha. O Ježiš lenge phendā: "Rozphanden les a muken te džal het!"

O Bari Rada kamel te murdarel le Ježiš

⁴⁵ But džene ole Židendar, save avle pal e Maria, dikhle so kerđa o Ježiš, a pačandile andre leste.

⁴⁶ Ale varesave džene lendar gele ko Farizeja a phende lenge, so kerđa o Ježiš.

⁴⁷ Akor zvičinde o nekbareder rašaja the o Farizeja e Bari Rada a phende: "So keraha? Bo kada manuš kerel but znameňja!"

⁴⁸ Te les mukaha avke, savore pačana andre leste! Avena o Rimana a zničinena o chramos the amaro narodos!"

⁴⁹ Jekh dženo lendar, o Kajfaš, savo sas oda berš nekbareder rašaj, phendā: "Tumen na džanēn nič!"

⁵⁰ Na achalón, hoj tumenge hin feder te merela jekh manuš vaš o nipi, sar te muľahas calo narodos."

⁵¹ Vašoda, hoj sas oda berš nekbareder rašaj, na phenda oda korkoro pestar, ale prorokinda, hoj o Ježiš merela vaš o narodos,

⁵² a na ča vaš o narodos, ale the hoj te anel pale le rozčhide čhaven le Devleskere jekhetane.

⁵³ Avke ole dživesestar pes dovakerde, hoj les murdarena.

⁵⁴ Vašoda o Ježiš pes imar na sikavelas maškar o Židi, ale geľa odarik andro phuva paš e pušta, andro foros Efrajim. Ode ačhiľa peskere učeňikenca.

⁵⁵ E Patraďi sas pašes a but džene gele angle Patraďi andro Jeruzalem, hoj pes te obžuzaren.

⁵⁶ Akor rodenas le Ježiš a sar ačhenas andro chramos, phenenas jekh avreske: "So phenen? Avela ov pro inepos?"

⁵⁷ Ale o nekbareder rašaja the o Farizeja imar dine prikazis, hoj te vareko pes dodžanela, kaj hino o Ježiš, mušinelas oda te phenel avri, hoj les te chuden.

E Maria pomakhel le Rajes

12 Šov džives angle Patraďi o Ježiš avľa andre Betanija, kaj bešelas o Lazar, saves o Ježiš uštaďa andral o meriben.

² Kerde leske ode te chal. E Marta kerelas pašal lende a o Lazar sas jekh olendar, save leha bešenas pašal o skamind.

³ E Maria iľa vaj jepaš ľitra igen dragano olejos andral o nardos a pomakhľa le Ježišoskere pindre a khosľa len peskere balenca. Calo kher voňinelas pal o olejos.

⁴ Jekh leskere učeňikendar, o Judaš Iškarijotsko, savo les palis zradzinda, phenda:

⁵ "Soske pes oda olejos na bikenda vaš o trin šel (300) rupune † a na diňa pes le čorenge?"

⁶ Oda na phenda vaš oda, hoj leske džalas pal o čore, ale vaš oda, hoj čorkerelas. Sas leste o gonoro le lovenca a lelas peske olestar, so andre thovenas.

⁷ Ale o Ježiš phenda: "Muk la, bo oda kerďa pre oda džives, sar merava.

⁸ Bo o čore hine tumenca furt, ale me tumenca furt na avava."

⁹ But Židi pes dodžanle, hoj o Ježiš sas ode. Avle andre Betanija na ča pal o Ježiš, ale the hoj te dikhen le Lazar, saves uštaďa andral o meriben.

¹⁰ Avke o nekbareder rašaja pes dovakerde, hoj murdarena the le Lazar,

¹¹ bo angle leste but Židi oddžanas a pačandile andro Ježiš.

Avel le lašaribnaha andro Jeruzalem

¹² Pre aver džives but nipi, save avle pre Patraďi, došunde pes, hoj o Ježiš džal andro Jeruzalem.

¹³ On skidle konara pal o palmi, gele ke leste a vičinenas:

"Hosanna! Požehňimen, ko avel andro nav le Rajeskero!"

Bachtalo o kralis le Izraeloskero!"

¹⁴ O Ježiš arakhľa somaricis a bešľa pre leste, avke sar hin pisimen:

¹⁵ "Ma dara tut, čhajori le Sionoskeri! Dikh, tiro kralis avel bešindos pro somaricis."

¹⁶ Akor, sar oda phenda, o učeňika na achalile, ale sar o Ježiš sas oslavimen, avľa lenge pre goďi, hoj pes leske ačhiľa avke, sar sas pisimen pal leste.

¹⁷ Ola nipi, save dikhle, sar vičinda avri le Lazar andral o hrobos a uštaďa les andral o meriben, vakerenas avri pal oda.

¹⁸ Vašoda avle o nipi ke leste, bo šunde, hoj kerďa oda zazrakos.

¹⁹ Akor peske o Farizeja phende: "Dikhen, nič našti keras. Calo svetos džal pal leste!"

O Greki kamen te dikhel le Ježiš

²⁰ Sas ode the varesave Greki, save avle andro Jeruzalem, hoj pro inepos te lašaren le Devles.

²¹ On avle ko Filip, savo sas andral e Galilejsko Betsaida, a mangle les: "Rajeja, kamas te dikhel le Ježiš."

²² O Filip geľa a phenda le Andrejiske a sodujďzene gele te phenel le Ježišoske.

²³ O Ježiš lenge odphenda: "Avľa e ora, hoj te avel oslavimen o Čhavo le Manušeskero.

²⁴ Čačes, čačes phenav tumenge: Te perela o zrnos andre phuv, ale na merela, ačhela korkoro. Ale te merela, anela but ulipen.

²⁵ Oda, ko rado dikhel peskero dživipen, našavela les. Ale oda, ko na kamel peskero dživipen andre kada svetos, zachraňinela les pro večno dživipen.

²⁶ Te mange vareko služinel, mi phirel pal ma, a ode, kaj som me, ela the miro služobňikos. Te mange vareko služinela, oles dela pačiv miro Dad.

Vakerel pal peskero meriben

²⁷ Akana mange hin phares a so šaj phenav: 'Dado, le man avri andral kadi ora? Se vašoda avľom, hoj te cerpinav.

²⁸ Dado, oslavin tiro nav!" Akor šundľiľa o hangos (hlasos) andral o ňebos: "Imar oslavindom a mek oslavinava."

²⁹ Ola nipi, save ode ačhenas a šunde oda, phende: "Herminďa!" Aver phende: "O aňjelos leske vareso phenda."

³⁰ O Ježiš odphenda: "Na prekal ma šundľiľa oda hangos, ale prekal tumende.

³¹ Akana hin o sudos upral kada svetos; akana ela avričhido o princos le svetoskero.

³² A sar me avava upre hazdlo la phuvatar, cirdava savoren ke mande."

³³ Oda phenda vašoda, hoj lenge te del te džanel, save meribnaha merela.

³⁴ O nipi leske odphende: "Amen šundam andro Zakonos, hoj o Kristus ačhela pro furt. Sar phenes, hoj o

† 300 denara

Čhavo le Manušeskero mušinel te el upre hazdlo? Ko hin oda Čhavo le Manušeskero?"

³⁵ O Ježiš lenge phendā: "Mek frima o svetlos hin tumenca. Phiren, medik tumen hin o svetlos, hoj tumen te na zachudel o kalīpen. Bo ko phirel andro kalīpen, na džanel, kaj džal.

³⁶ Medik tumen hin o svetlos, pačan andro svetlos, hoj te aven o čhave le svetloskere." Sar o Ježiš oda phendā, odgefa a garuđa pes lendar.

O Židi na pačan andro Ježiš

³⁷ Choc kerđa kajci but zazraki anglal lende, na pačanas andre leste,

³⁸ hoj pes te ačhel oda lav, so phendā o prorokos Izaiaš:

"Rajeja, ko pačandīla amare lavenge? A kaske sas sikađi le Devleskeri zor?"

³⁹ Vašoda našti pačandīle, bo avrether pisindā o Izaiaš:

⁴⁰ *"Korardā lengere jakha a zakerđa lengero jilo, hoj le jakhenca te na dikhen, le jileha te na achalōn a te na visaren pes, a me len te sastārav avri."*

⁴¹ Kada phendā o Izaiaš, sar dikhla leskeri slava a vakerelas pal leste.

⁴² The avke but anglune murša andre leste pačandīle. Ale anglo Farizeja pes na pridžanenas, hoj len te na čhiven avri andral e sinagoga.

⁴³ Bo buter kamenas, hoj len o nipi te ašaren, sar o Del.

⁴⁴ O Ježiš vičindā: "Oda, ko pačal andre ma, na pačal ča andre ma, ale andre oda, ko man bičhađa.

⁴⁵ A ko man dikhel, dikhel oles, savo man bičhađa.

⁴⁶ Me avlōm sar o svetlos pre phuv, hoj ņiko, ko andre ma pačal, te na ačhel andro kalīpen.

⁴⁷ Te vareko šundahas mire lava, ale na dolikerena len, me les na sudzinav. Bo me na avlōm, hoj te sudzinav o svetos, ale te zachraņinav.

⁴⁸ Te vareko na prilel man aņi mire lava, leskero sudcas hin o lav, so vakeravas, a sudzinela les andro posledno džives.

⁴⁹ Bo me na vakeravas korkoro mandar, ale o Dad, ko man bičhađa, korkoro mange prikazindā, so mušinav te phenel a sar te vakerel.

⁵⁰ A me džanav, hoj leskero prikazaņje anel o večno dživipen. Oda, so me vakerav, vakerav avke, sar mange phendā o Dad."

Thovel o pindre le učeņikenge

13 Sas o džives angle Patrađi. O Ježiš džanelas, hoj avla leskeri ora, hoj te oddžal andral kada svetos ko Dad, a vašoda, hoj kamelas peskeren, save sas pro svetos, presikađa lenge baro kamiben.

² Rači paš o chaben o beng imar thođa andro jilo le Judašiske, saveske sas dad o Šimon Iškarijotsko, hoj les te zradzinel.

³ No o Ježiš džanelas, hoj o Dad leske diņa savoro andro vasta a hoj avla le Devlestar a džal ko Del.

⁴ Uštīla pašal o chaben, čhidā tele o uprune gada a phandla e leketa pašal peste.

⁵ Palīs čhidā o paņi andro lavoris, chudla te thovel (omorel) o pindre le učeņikenge a khoselas la leketaha, so sas phandli pašal leste.

⁶ Sar avla paš o Šimon Peter, phendā leske: "Rajeja, tu mange kames te thovel o pindre?"

⁷ O Ježiš leske odphendā: "Oda, so me kerav, tu akana na achalōs, ale palīs achaloha."

⁸ O Peter leske phendā: "Šoha tuke na domukava, hoj mange te thoves o pindre!" Ale o Ježiš leske odphendā: "Te tuke na thovava o pindre, na aveha buter miro učeņikos."

⁹ Akor leske o Šimon Peter phendā: "Rajeja, na ča mire pindre, ale the o vasta the o šero."

¹⁰ O Ježiš leske phendā: "Oleske, ko imar pes thođa, kampil te thovel ča o pindre, bo imar hino calo žužo. The tumen san žuže, ale na savore."

¹¹ Džanelas, ko les zradzinela, vašoda phendā: "Na savore san žuže."

¹² Sar lenge thođa o pindre, urđa pre peste pale o uprune gada a bešla peske. Palīs phendā: "Achalīlan, so tumenge kerđom?"

¹³ Tumen man vičinen 'Učitelina' the 'Rajeja' a mištes phenen, bo me som.

¹⁴ No te me, tumaro Raj the Učitelis, tumenge thođom o pindre, avke the tumen thoven o pindre jekh avreske.

¹⁵ Me tumenge sikađom, sar te kerel, hoj the tumen te keren avke sar me.

¹⁶ Čačes, čačes phenav tumenge, hoj o sluhās nane bareder sar leskero raj, aņi oda, savo sas bičhado, nane bareder sar oda, ko les bičhađa.

¹⁷ Te oda džanav, bachtale san, te oda the keren.

¹⁸ Na vakerav pal tumende savorende. Me džanav, kas mange avri kidņom, ale hoj pes te ačhel oda, so hin pisimen:

'Oda, ko manca chal o maro, chudla pre ma te džal.'

¹⁹ Phenav tumenge oda akana, hoj palīs, sar pes oda ačhela, te pačan hoj Me Som.

²⁰ Čačes, čačes phenav tumenge: Oda, ko prilel oles, kas me bičhavava, man prilel, a ko man prilel, prilel oles, ko man bičhađa."

O Ježiš phenel, ko les zradzinela

²¹ Sar oda vakerelas o Ježiš, sas leske phares pro jilo a phendā lenge phundradones: "Čačes, čačes phenav tumenge, jekh tumendar man zradzinela."

²² O učeņika dikhenas jekh pre aver, bo na achalōnas, pal kaste vakerel.

²³ Jekh leskere učeņikendar – oda, saves o Ježiš rado dikhelas – sas igen pašes paš o Ježiš.

²⁴ O Šimon Peter leske sikađa, hoj te phučel, pal kaste vakerel.

²⁵ Oda učeņikos zmukla o šero pašeder ko Ježiš a phučla lestar: "Rajeja, ko hin oda?"

²⁶ O Ježiš odphenda: "Oda, kaske me podava o močimen maro." Močinda o maro a diña le Judašiske, saveske sas dad o Šimon Iškarijotsko.

²⁷ Sar o Judaš iľa o maro, o satan takoj avľa andre leste. O Ježiš leske phenda: "Oda, so kames te kerel, ker sigo."

²⁸ Ale niko lendar, save bešenar pašal o skamind, na achalile, soske leske o Ježiš oda phenda.

²⁹ Vaš oda, hoj le Judašiste sas o gonoro le lovenca, varesave učeňika peske gondolinenas, hoj leske phenel: "Dža, cin oda, so kempel pro inepos," abo: "De vareso le čoren."

³⁰ Sar iľa o Judaš o maro, geľa avri. A sas rat.

O nevo prikazaňje

³¹ Sar o Judaš geľa avri, phenda o Ježiš: "Akana hin oslavimen o Čhavo le Manušeskero a o Del hin oslavimen andre leste.

³² A te hin oslavimen andre leste, the o Del les oslavinela korkoro andre peste a takoj les oslavinela.

³³ Čhave mire, imar na avava but tumenca. Rodena man a avke, sar phendom le Židenge, the tumenge akana phenav: Ode, kaj me džav, tumen našti aven.

³⁴ Nevo prikazaňje tumen dav: Kamen jekh avres. Avke, sar me tumen kamavas, the tumen kamen jekh avres.

³⁵ Pal oda prindžarena savore, hoj san mire učeňika, te ela o kamiben maškar tumende."

Phenel, hoj o Peter les zaprinela

³⁶ O Šimon Peter leske phenda: "Rajeja, kaj džas?" O Ježiš leske odphenda: "Kaj me džav, ode pal ma akana našti aves, ale palis pal ma aveha."

³⁷ O Peter leske phenda: "Rajeja, soske našti džav akana pal tu? Me o dživipen vaš tu dava!"

³⁸ O Ježiš leske odphenda: "Tu vaš ma o dživipen deha? Čačes, čačes phenav tuke, hoj medik o kohutos na gilavela, tu man trival zaprineha."

O Ježiš hin o drom, o čačipen the o dživipen

14 "Te na pes tumaro jilo daral! Pačan andro Del, pačan the andre ma.

² Andre mire Dadeskero kher hin but khera, te oda na ulahas avke, phendomas tumenge, hoj tumenge džav te pririchtinel o than?

³ Sar oddžava a pririchtinava tumenge o than, avava pale a lava tumen ke mande, hoj te aven ode, kaj som me.

⁴ Tumen džanen o drom kaj džav."

⁵ O Tomaš leske phenda: "Rajeja, na džanas, kaj džas. Sar šaj džanas o drom?"

⁶ O Ježiš leske phenda: "Me som o drom, o čačipen the o dživipen. Niko na avela ko Dad, te na prekal ma.

⁷ Te prindžardanas man, prindžardanas the mire Dades. Akanastar les imar prindžaren a imar les dikhlan."

⁸ O Filip phenda: "Rajeja, sikav amenge le Dades. Na kempel amenge buter."

⁹ O Ježiš leske phenda: "Kajci but som tumenca a na prindžardal man, Filip? Ko man dikhľa, dikhľa le Dades. Sar šaj phenes: 'Sikav amenge le Dades?'"

¹⁰ Na pačas, hoj me som andro Dad a o Dad andre ma? O lava, so tumenge vakerav, na vakerav korkoro mandar. Ale oda kerel o Dad, savo dživel andre mande.

¹¹ Pačan mange, hoj me som andro Dad a o Dad andre mande. A te na, akor pačan vaš oda, so kerav!

¹² Čačes, čačes phenav tumenge, hoj the oda, ko pačal andre ma, kerela o skutki, save me kerav – a mek bareder kerela, bo me džav ko Dad.

¹³ Me kerava savoro, so mangena andre miro nav, hoj te el o Dad oslavimen andro Čhavo.

¹⁴ Te mangena mandar vareso andre miro nav, me oda kerava."

O Raj del lav pal o Sentno Duchos

¹⁵ "Te man kamen, dolikerena mire prikazaňja.

¹⁶⁻¹⁷ A me mangava le Dades a dela tumen le Duchos, savo tumenge pomožinela a lidžala †. Ov, o Duchos le čačipnaskero, ela tumenca pro furt. O svetos les našti prilel, bo les aňi na dikhel aňi na prindžarel. Ale tumen les prindžaren, bo dživel maškar tumende a ela andre tumende.

¹⁸ Na omukava tumen sar široti, avava ke tumende.

¹⁹ Mek sikra a o svetos man buter na dikhela, ale tumen man dikhena. Vašoda, hoj me dživav, the tumen dživena.

²⁰ Andre oda džives tumen prindžarena, hoj me som andre miro Dad a tumen andre mande a me andre tumende.

²¹ Ko prilel mire prikazaňja a dolikerel len, oda man kamel. A oda, ko man kamel, oles kamela miro Dad; a the me les kamava a sikavava man leske."

²² O Judaš, ale na oda Iškarijotsko, phenda: "Rajeja, sar oda, hoj kames amenge tut te sikavel a na le svetoske?"

²³ O Ježiš leske odphenda: "Te man vareko kamel, dolikerela miro lav a miro Dad les kamela. A amen avaha ke leste a dživaha leha.

²⁴ Oda, ko man na kamel, na dolikerel mire lava. O lav, so šunen, nane miro, ale le Dadeskero, savo man bičhađa.

²⁵ Kada tumenge phendom, medik somas tumenca.

²⁶ Ale o Sentno Duchos, savo tumenge pomožinela ††, saves bičhavela o Dad andre miro nav, ov tumen sikavela savoreske a leperela tumenge savoro, so tumenge phendom.

²⁷ Smirom tumenge mukav; miro smirom tumenge dav. Ale me les tumenge na dav avke, sar kada svetos. Tumare jile pes te na trapinen aňi te na predaran!

²⁸ Šund'an, hoj tumenge phendom: 'Džav a pale avava ke tumende.' Te man kamľanas, radisalľanas, hoj

† O Ťešitelis abo Radcas †† O Ťešitelis abo Radcas

phendom: 'Džav ko Dad,' bo o Dad hino bareder sar me.

²⁹ Phendom tumenge akana, sigeder sar pes oda ačhela, hoj tumen te pačan, sar pes oda ačhela.

³⁰ Imar na vakerava but tumenca, bo avel o princos le svetoskero. Nane les zor upral mande,

³¹ ale hoj o svetos te prindžarel, hoj kamav le Dades, kerav savoro, so mange prikazinda. Ušt'en, džas adarik!"

O Ježiš hino čačo viñičis

15 "Me som oda čačo viñičis a miro Dad hino vinaris.

² Dojekh konaricis andre mande, savo na anel ovocje, odčhinel. Dojekh, savo anel ovocje, žužarel, hoj te anel buter ovocje.

³ Tumen san imar žuže vaš o lav, so tumenge vakeravas.

⁴ Ačhen andre mande a me andre tumende. Sar o konaricis našti anel ovocje korkoro pestar, te na ačhela andro viñičis, avke añi tumen, te na ačhena andre mande.

⁵ Me som o viñičis, tumen san o konarica. Ko ačhel andre mande a me andre leste, anel but ovocje, bo bijal mande našti nič keren.

⁶ Te vareko na ačhel andre mande, pes čhivela het avke, sar o konaricis a šučola avri. Lena ajse konarica, čhivena len pre jag a zlabona.

⁷ Te ačhena andre mande a mire lava ačhena andre tumende, akor mangel savoro, so kamen, a ačhela pes tumenge.

⁸ Oleha hin barardo miro Dad, hoj tumen anena but ovocje a avena mire učeñika.

⁹ Sar man kamel o Dad, avke the me tumen kamav. Ačhen andre miro kamiben!

¹⁰ Te dolikerena mire prikazañja, ačhena andre miro kamiben, avke sar me dolikeravas mire Dadeskere prikazañja a ačhav andre leskero kamiben.

¹¹ Kada tumenge phenavas vašoda, hoj miro radišagos te ačhel andre tumende a tumaro radišagos te el pherdo.

¹² Kada hin miro prikazañje: Kamen jekh avres avke, sar me tumen kamav.

¹³ Ñikas nane bareder kamiben sar oles, savo del peskero dživipen vaš peskere prijatela.

¹⁴ Tumen san mire prijatela, te keren savoro, so tumenge prikazinav.

¹⁵ Imar tumenge na phenav buter sluhi, bo o sluhas na džanel, so kerel leskero raj. Ale tumen vičhav 'prijatela', bo savoro, so šundom mire Dadestar, tumenge diñom te džanel.

¹⁶ Na tumen peske man kidñan avri, ale me mange tumen kidñom avri a ačhadom, hoj te džan te anen ovocje, so ačhel. Hoj o Dad tumen te del savoro, so mangena andre miro nav.

¹⁷ Kada tumenge prikazinav: Kamen jekh avres!"

O svetos našti avri ačhel le učeñiken

¹⁸ "Te tumen o svetos našti avri ačhel, džanen, hoj man sigeder našti avri ačhelas.

¹⁹ Te uñanas andral o svetos, o svetos tumen rado dikhñahas sar peskero. Ale vašoda, hoj na san andral o svetos, ale me mange tumen avri kidñom andral leste, o svetos tumen našti avri ačhel.

²⁰ Leperen peske pro lav, so tumenge phendom: O sluhas nane bareder sar leskero raj. Te pre mande džanas, džana the pre tumende. Te miro lav dolikerde, dolikerena the tumare.

²¹ Oda savoro tumenge kerena vaš miro nav, bo na prindžaren oles, savo man bičhada.

²² Te na avlomas a na vakerdomas lenge, na uñahas len binos. Ale akana našti phenen, hoj na džanenas.

²³ Oda, ko man našti avri ačhel, našti avri ačhel the mire Dades.

²⁴ Te na kerdomas maškar lende o skutki, so ñiko aver na kerdá, na uñahas len binos. Ale akana dikhle a the avke man the mire Dades našti avri ačhen,

²⁵ hoj pes te ačhel o lav, so hin pisimen andre lengero Zakonos:

'Našti man avri ačhenas a na sas vaš soske.'

²⁶ Ale sar avela o Ťešitelis, saves tumenge bičhavava, o Duchos le čačipnaskero, savo avel le Dadestar, ov svedčhina pal ma.

²⁷ A the tumen svedčhina pal ma, bo san manca ešebnovarestar (peršovarestar)."

16 "Kada tumenge phendom vašoda, hoj te na preačhen te pačal.

² Čhivena tumen avri andral o sinagogi a ela časos, sar peske gondolinela sako, ko tumen murdarela, hoj oleha služinel le Devleske.

³ Oda kerena, bo na prindžarde añi le Dades añi man.

⁴ Kada phendom, hoj peske te leperen, sar avela odi ora, hoj anglal tumenge pal oda phendom. Angloda tumenge kada na phendom, bo somas tumenca."

Pal o Sentno Duchos, savo avela

⁵ "Ale akana džav ke Oda, savo man bičhada, a ñiko tumendar mandar na phučel: 'Kaj džas?'

⁶ Ale vaš oda, hoj tumenge vakerdom kala veci, o pharipen pherarda tumaro jilo.

⁷ No me tumenge phenav o čačipen: Ela tumenge feder, te me džava het. Bo te na, o Sentno Duchos na avela ke tumende. Ale te džava het, bičhavava les ke tumende.

⁸ Sar ov avela, sikavela le svetoske pro binos, pro spravodlišagos the pro sudos:

⁹ O binos hin andre oda, hoj na pačan andre ma;

¹⁰ o spravodlišagos hin andre oda, hoj džav ke miro Dad a imar man buter na dikhena;

¹¹ a o sudos hin andre oda, hoj o princos andral kada svetos hino odsudzimen.

¹² Šaj tumenge phenav mek but, ale akana našti zlidžan.

¹³ Ale sar avela o Duchos le čačipnaskero, lidžala tumen andre dojekh čačipen. Na vakerela korkoro pestar, ale vakerela savoro, so šunel. A phenela tumenge the oda, so avela.

¹⁴ Ov man oslavinela, bo lela olestar, so hin miro, a phenela tumenge.

¹⁵ Sa, so hin le Dades, hin miro – vašoda phendom, hoj lela olestar, so hin miro, a phenela tumenge.”

O Ježiš oddžala a pale avela

¹⁶ “Mek sikra a na dikhena man a pale sikra a dikhena man.”

¹⁷ Akor varesave učeņika maškar peste phende: “Soske phenel: ‘Mek sikra a na dikhena man a pale sikra a dikhena man?’ A soske phenel: ‘Me džav ko Dad?’”

¹⁸ Avke phenenas: “So hin ada: ‘Mek sikra?’ Na džanas, so vakerel.”

¹⁹ O Ježiš džanelas, hoj lestar oda kamle te phučel a phendā lenge: “Phučen jekh avrestar, soske phendom: ‘Mek sikra a na dikhena man a pale sikra a dikhena man?’

²⁰ Čačes, čačes tumenge phenav, hoj tumen rovena the hikinena a o svetos radisaŀola. Tumen avena andro pharipen, ale tumaro pharipen pes visarela pro radišagos.

²¹ La khabņa džuvŀa hin o dukha, sar ločhol (pašŀol tele), bo avŀa lakeri ora. Ale sar lake uŀol o čhavoro, radišagostar bisterel pro dukha, bo andā le čhavores pro svetos.

²² The tumen akana hin pharipen, ale pale tumen dikhava a tumare jile radisaŀona a tumaro radišagos tumendar űiko na lela.

²³ Oda džives mandar imar na phučena űič. Čačes, čačes tumenge phenav, hoj dela tumen sa, so mangel na le Dadestar andre miro nav.

²⁴ Dži akana mek andre miro nav na mangenas űič. Avke mangel a chudena, hoj tumaro radišagos pes te pherarel.

Le Ježišoskero űerindŀipen upral o svetos

²⁵ Kada tumenge vakeravas andro podobenstva, ale avela e ora, hoj tumenge na vakerava buter andro podobenstva. Ale vakerava tumenge phundradones pal o Dad.

²⁶ Andre oda džives tumen mangena andre miro nav. Na phenav tumenge, hoj me vaš tumenge mangava le Dades,

²⁷ se korkoro o Dad tumen rado dikhel, bo tumen man rado dikhenas a pačandŀan, hoj me avŀom le Devlestar.

²⁸ Avŀom khatar o Dad andro svetos. Akana pale omukav o svetos a džav ko Dad.”

²⁹ Akor o učeņika phende: “Dikh, akana vakeres phundradones, a na vakeres andro podobenstvo.

³⁰ Akana džanas, hoj džanes savoro a na kampil tuke, hoj tutar vareko te phučel. Vašoda pačas, hoj avŀal le Devlestar.”

³¹ O Ježiš lenge odphendā: “Akana pačan?”

³² No, avel e ora a imar akana avŀa, hoj dojekh tumendar denašela pal peskero drom a man mukena korkores, ale na som korkoro, bo o Dad hino manca.

³³ Kada tumenge vakeravas vašoda, hoj tumen te el andre mande smirom. Andro svetos tumen ela pharipen. Ale aven zorale! Me űerindom (zvitāzindom) upral o svetos.”

Le Ježišoskero modŀitba

17 Sar oda o Ježiš dovakerđā, dikhŀa pro űebos a phendā: “Dado, avŀa e ora. Oslavin tire Čhas, hoj o Čhavo te oslavinel tut.

² Bo tu les diŀal autorita upral dojekh manuš, hoj te del večno dživipen savoren, saven leske diŀal.

³ O večno dživipen hin andre oda: Hoj te prindžaren tut, jekhe čače Devles the le Ježiš Kristus, kas bičhađal.

⁴ Me dokerđom sa, so mangel pre kadi phuv diŀal te kerel, a oleha tut oslavindom.

⁵ Dado, akana oslavin man la slavaha, so man sas paš tute mek sigeder, sar sas stvorimen o svetos.

⁶ Sikadom tiro nav le manušenge, saven mangel diŀal andral o svetos. Tire sas a diŀal len mangel a dolŀikerde tiro lav.

⁷ Akana džanen, hoj tutar hin savoro, so mangel diŀal.

⁸ Bo o lava, so mangel tu diŀal, diŀom lenge a on priŀle a čačes prindžarde, hoj avŀom tutar, a pačandŀile, hoj tu man bičhađal.

⁹ Me mangav vaš lende. Na mangav vaš o svetos, ale vaš ola, saven mangel diŀal, bo hine tire.

¹⁰ A savoro, so hin miro, hin tiro a tiro hin miro. A me som oslavimen prekal lende.

¹¹ Imar buter na som pro svetos, ale on hine pro svetos a me džav ke tu. Sentno Dado, dolŀiker andre tiro nav olen, saven mangel diŀal, hoj te en jekh avke sar amen.

¹² Sar somas lenca pro svetos, me len dolŀikeravas andre tiro nav, so man tu diŀal. Merkinavas pre lende a űiko lendar na našŀiŀa, ča oda, savo mušinda te el našado, hoj pes te ačhel avke, sar hin pisimen.

¹³ Akana džav ke tu a kada phenav, medik som andro svetos, hoj miro radišagos len te el pherdo andro jile.

¹⁴ Me lenge diŀom tiro lav a o svetos len našti avri ačhel, bo nane andral o svetos, avke sar me na som andral o svetos.

¹⁵ Na mangav, hoj len te les andral o svetos, ale hoj len te chraŀines le nalačestar.

¹⁶ Nane andral o svetos, avke sar me na som andral o svetos.

¹⁷ Sentŀar len tire čačipnaha! Tiro lav hin o čačipen.

¹⁸ Avke, sar tu man bičhađal andro svetos, the me len bičhadom andro svetos.

¹⁹ Vaš lenge me man oddav tuke, hoj the on čačes te en oddine.

²⁰ Na mangav ča vaš kala, ale mangav the vaš ola, save prekal lengere lava pačana andre mande,

²¹ hoj te en savore jekh. Avke sar tu, Dado, sal andre ma a me andre tu, kavke mi en the on andre amende, hoj o svetos te pačal, hoj tu man bičhađal.

²² E slava, so man diňal, diňom lenge, hoj te en jekh, avke sar amen.

²³ Me andre lende a tu andre mande, hoj te en jekh andre savoreste, hoj o svetos te džanel, hoj tu man bičhađal a hoj kames len avke, sar man kames.

²⁴ Dado, kamav, hoj ola manuša, saven mange diňal, te en manca ode, kaj som me, hoj te dikhen miri slava – e slava, so mange diňal vašoda, hoj man kamehas mek sigeder, sar sas o svetos stvorimen.

²⁵ Čačipnaskero Dado, o svetos tut na prindžarda, ale me tut prindžardom a the kala prindžarde, hoj man tu bičhađal.

²⁶ Diňom lenge tut te džanel a mek oda kerav, hoj o kamiben, saveha man kamehas, te ačhel andre lende a me andre lende."

Zalen le Ježiš

18 Sar pes o Ježiš imar domodlinda, geľa peskere učeňikenca tele prekal o paňi Kidron, kaj sas olivovo sados. O Ježiš geľa andre peskere učeňikenca.

² O Judaš, savo les zradzinda, džanelas ole thanestar, bo o Ježiš pes buterval ode arakhelas peskere učeňikenca.

³ Avke iľa peha o Judaš jekh čata slugađen the sluhen le nekbaredere rašajendar the Farizejendar. Sas len lampaša the aver švetli, šabli the kopiji.

⁴ O Ježiš džanelas savorestar, so pre leste avela, avke geľa a phenda lenge: "Kas roden?"

⁵ Odphende leske: "Le Ježiš andral o Nazaret." Ov phenda: "Me Som." Ačhelas lenca the o Judaš, savo les zradzinda.

⁶ Sar lenge phenda: "Me Som," gele palal a pele pre phuv.

⁷ Avke lendar pale phučla: "Kas roden?" On phende: "Le Ježiš Nazaretsko."

⁸ O Ježiš odphenda: "Phendom tumenge, hoj me som. Te man roden, len muken te džal."

⁹ Oda phenda, hoj pes te ačhel leskere lava: "Ňikas olendar, saven mange diňal, na našadom."

¹⁰ Akor o Šimon Peter cirdňa avri peskeri šabla a odčhinda le nekbaredere rašaskere sluhasko o čačo kan. Ov pes vičinelas Malchos.

¹¹ Ale o Ježiš phenda le Peteriske: "Thov e šabla pale, kaj sas! Či na pijava avri e kuči, so mange o Dad diňa?"

¹² Akor o slugađa, o velitelis the o sluhi le Židengere ile le Ježiš a zaphandle les.

¹³ A ešeb (peršo) les ligende ko Annaš, bo ov sas o sastro le Kajfaškero. O Kajfaš sas oda berš nekbareder rašaj.

¹⁴ Oda sas ov, savo phenda le Židenge, hoj feder ela, te merela jekh manuš vaš savore nipi.

O Peter zaprinel le Ježiš

¹⁵ Džalas pal o Ježiš o Šimon Peter the dujto učeňikos. Ole učeňikos o nekbareder rašaj prindžarelas a geľa jekhetane le Ježišoha andre le nekbareder rašaskeri dvora.

¹⁶ No o Peter ačhelas avri paš o vudar. Palis oda dujto učeňikos, saves o nekbareder rašaj prindžarelas, avľa avri a vakerđa ola čhajaha, savi phundravelas e brana, palis iľa andre le Peter.

¹⁷ Odi čhaj, savi phundravelas e brana, phenda le Peteriske: "Na sal the tu jekh kale manuškere učeňikendar?" Ov odphenda: "Na som."

¹⁸ Ačhenas ode o sluhi the o služobňika le Židengere a kerde bari jag a tačarenas pes, bo sas šil. Ačhelas lenca the o Peter a tačarelas pes.

O Ježiš anglo nekbareder rašaj

¹⁹ O nekbareder rašaj phučelas le Ježišostar pal o učeňika the pal leskero sikaviben.

²⁰ O Ježiš leske odphenda: "Me vakeravas le svetoske avke, hoj sako šaj šundňa. Furt sikavavas andre sinagoga the andro chramos, kaj pes zdžan savore Židi, a nič na vakeravas počoral.

²¹ So mandar phučes? Phuč olendar, save šunde, so lenge vakeravas. On džanen, so vakerdom."

²² Sar oda phenda, jekh le slugađendar, savo ode ačhelas, čhinda le Ježiš pal o muj a phenda: "Avke odphenes le nekbareder rašaske?"

²³ O Ježiš leske odphenda: "Te namištes phendom, sikav, so namištes phendom, ale te mištes, soske man mares?"

²⁴ Palis bičhađa o Annaš le Ježiš zaphandlones ke aver nekbareder rašaj Kajfaš.

O Peter pale zaprinel le Ježiš

²⁵ O Šimon Peter ačhelas a tačarelas pes. A phende leske: "Na sal the tu jekh leskere učeňikendar?" No ov zaprinda a phenda: "Na som."

²⁶ Jekh le nekbareder rašaskere sluhendar, famelija oleske, kaske o Peter odčhinda o kan, phenda: "Na dikhlom tut leha andre bar (zahrada)?"

²⁷ O Peter pale zaprinda a takoj gilada o kohutos.

O Ježiš anglo Pilat

²⁸ Avke ligende le Ježiš khatar o Kajfaš andro Pilatoskero palacis a sas tosara. Ale on na gele andre, hoj pes te na melaren, bo kamle te chal le bakrores pre Patradi.

²⁹ O Pilat avľa avri pal lende a phenda: "So hin tumen pre kada manuš?"

³⁰ Odphende leske: "Te na kerđahas kada manuš namištes, na andamas les ke tu."

³¹ O Pilat odphenda: "Len les tumen a sudzinen les pal tumaro Zakonos." O Židi leske phende: "Amen nane pravos Ňikas te murdarel."

³² Oda sas, hoj pes te ačhel o lava le Ježišoskere, savenca diña te džanel, save meribnaha merela.

³³ Avke o Pilat geľa pale andro palacis, vičinda le Ježiš a phendá leske: "Sal tu o Židoviko kralis?"

³⁴ O Ježiš odphendá: "Phenes oda korkoro pestar, či aver tuke pal ma phende?"

³⁵ O Pilat phendá: "So me som Židos? Korkoro tiro narodos the o nekbareder rašaja mange tut dine. So kerdál?"

³⁶ O Ježiš odphendá: "Miro krališagos nane andral kada svetos. Te ulahas miro krališagos andral kada svetos, mire služobníka pes mardehas vaš ma, hoj te na avav dino le Židenge. Ale akana miro krališagos nane adarik."

³⁷ Akor o Pilat phendá: "Ta, the avke sal kralis?" O Ježiš odphendá: "Tu phenes, hoj som kralis. Me pre oda ulilom (pes narodzindom) a vašoda avlom pro svetos, hoj te svedčínav pal o čačipen. Sako, ko hin andral o čačipen, šunel miro hangos."

³⁸ O Pilat phučľa: "So hin o čačipen?" Sar oda phendá, geľa pale avri paš o Židi a phendá lenge: "Me pre leste na arakhľom nič nalačo."

³⁹ Hin tumen tradicija, hoj tumenge jekhes premukav sako Patrađi. Kamen, hoj tumenge te premukav le Židovike kralis?"

⁴⁰ Ale on savore vičinenas: "Na les, ale le Barabaš!" O Barabaš sas zbužňikos.

O Pilat les odsudzinel pro meriben

19 Akor iľa o Pilat le Ježiš a diña les te marel le bičoha.

² O slugađa kerde le kandrendar (le trňendar) koruna a thode leske la pro šero. Urde les andro purpurovo plaštós,

³ avenas paš leste a phenenas: "Mi dživel o Židoviko kralis!" A marenas les pal o muj.

⁴ Palis o Pilat avľa pale avri a phendá lenge: "Dikhen, anav tumenge les avri, hoj te prindžaren, hoj na arakhav pre leste nič nalačo."

⁵ Avke avľa o Ježiš avri. Pro šero les sas e koruna le kandrendar a sas urdo andro purpurovo plaštós. O Pilat lenge phendá: "Dikhen, o manuš!"

⁶ Sar les dikhle o nekbareder rašaja the o stražňika, vris kinde: "Ukrižin les! Ukrižin les!" O Pilat lenge phendá: "Tumen les len a ukrižinen! Me pre leste na arakhav nič nalačo!"

⁷ O Židi leske odphende: "Amen hin zakonos a pal amaro zakonos mušinel te merel, bo kerelas pestar Čhavo le Devleskero."

⁸ Sar oda šundá o Pilat, mek buter pes daralas

⁹ a geľa pale andre peskero palacis a phučľa le Ježišostar: "Khatar sal?" Ale o Ježiš leske na odphendá.

¹⁰ O Pilat leske phendá: "Manca na vakeres? Na džanes, hoj man hin zor tut te premukel abo zor tut te ukrižinel?"

¹¹ O Ježiš odphendá: "Na ulahas tut upral mande ňisavi zor, te tuke oda na ulahas dino upral. Vašoda hin bareder binos oles, ko man zradzinda."

¹² Akorestar les kamelas o Pilat te premukel. Ale o Židi vris kinenas: "Te kales premukeha, na sal le Cisariskero prijateľis. Bo sako, ko pestar kerel kralis, džal pro Cisaris."

¹³ Sar o Pilat šundá kala lava, iľa le Ježiš avri a bešľa peske pro sudno stolkos pro than, so pes vičinel Litostrotos a andre Hebrejiko čhib Gabata.

¹⁴ A sas vaj pro dilos † paraščuvine, so sas o džives angle Patrađi. O Pilat phendá le Židenge: "Dikhen! Tumaro kralis!"

¹⁵ No on vris kinde: "De les het! Murdar les! Ukrižin les!" O Pilat phendá: "So, te ukrižinel tumare kralis?" Ale o nekbareder rašaja odphende: "Nane amen kralis, ča Cisaris!"

Le Ježiš ukrižinen

¹⁶ Akor lenge les diña te ukrižinel. Avke ile le Ježiš het.

¹⁷ Lidžalas peskero kerestos a džalas pro than, so pes vičinel Lebka – andre Hebrejiko čhib Golgota.

¹⁸ Ode les ukrižinde a leha mek duje avren, jekhes pal jekh a dujtones pal dujto sera, a le Ježiš maškaral.

¹⁹ O Pilat diña te pisinel pre tabuľka: "O Ježiš Nazaret-sko, le Židengero Kralis," a thode la pro kerestos.

²⁰ A genenas la but Židi, bo oda than, kaj sas o Ježiš ukrižimen, sas pašes paš o foros. Sas pisimen andre Hebrejiko, Grekengeri the Latíňiko čhib.

²¹ Akor phende le Židengere nekbaredere rašaja le Pilatoske: "Ma pisin: 'Le Židengero Kralis,' ale pisin, hoj ov phendá: 'Som kralis le Židengero.'"

²² Ale o Pilat odphendá: "Oda, so pisinđom, pisinđom."

²³ Sar imar o slugađa ukrižinde le Ježiš, rozulade leskere gada pro štar kotora, dojekhe slugađiske jekh kotor. Ile the o teluno gad, so na sas sido a sas jekhe pochtanestar upral dži tele

²⁴ a phende peske: "Na čhingeras les, ale losinas vaše, kaskero ela." Aleha pes ačhila avke, sar hin pisimen: "Rozulade peske maškar peste mire gada a vaš miro ruchos peske čhide losos." Oda hin, so kerde o slugađa.

²⁵ Paš le Ježišoskero kerestos ačhelas leskeri daj, lak-eri pheň – e Maria, so sas romňi le Kleofašiskeri – the e Maria Magdalena.

²⁶ Sar dikhľa o Ježiš, hoj ode ačhen leskeri daj the o učeňikos, saves kamelas, phendá peskera dake: "Džuvľije, dikh, tiro čhavo!"

²⁷ Palis phendá le učeňikoske: "Dikh, tiri daj!" Ako-restar la iľa oda učeňikos ke peste.

O Ježiš merel

²⁸ Palis, sar imar dikhľa o Ježiš, hoj hin savoro dokero a hoj pes te ačhel oda, so hin pisimen, phendá: "Smedno som!"

²⁹ Sas ode čaro le šuteha. On cindarde e špongija andro šut, phandle la pre izoposkeri paca a thode leske paš o vušta.

† Grekengeri čhib: šov ori

³⁰ Sar o Ježiš koštoľinda o šut, phenda: "Dokerdo hin!" Zmukľa tele o šero a mukľa avri peskere duchos.

³¹ Vašoda, hoj sas o džives anglo Šabbat (sombat), mangle o Židi le Pilat, hoj te del te phagel o kokala pro pindre olenge, save sas ukrižimen. Bo na kamenas len te mukel pro keresti pro Šabbat a oda Šabbat sas baro.

³² Avke avle o slugađa a phagle o kokala ešebneske the dujtoneske, save leha sas ukrižimen.

³³ Ale sar avle paš o Ježiš a dikhle, hoj imar hino mu- lo, na phagerde leske o kokala,

³⁴ ale jekh le slugađendar predemađa la kopijaha leskeri sera a takoj čuliľa avri o rat the o paňi.

³⁵ A oda murš, savo oda dikhľa, diňa svedectvo a leskero svedectvo hin čačipnaskero. Ov džanel, hoj vakereľ čačipen, hoj the tumen te pačan.

³⁶ Oda pes ačhiľa vašoda, hoj pes te ačhel oda, so hin pisimen:

"Aňi jekh leskero kokalos na ela phagerdo!"

³⁷ A pale avrether pisinel:

"Dikhena oles, kas predemade!"

Parunen le Ježiš

³⁸ O Jozef andral e Arimatija sas le Ježišoskero učeňikos, ale počoral, bo daralas le Židendar. Ov mangľa le Pilat, či šaj lel tele le Ježišoskero tēlos a ov leske domukľa. Avke avľa a iľa tele le Ježišoskero tēlos.

³⁹ Avľa the o Nikodem, savo sas angloda rači paš o Ježiš, a iľa peha vaj tranda (30) kili mišimen aloe the mirra.

⁴⁰ Avke ile le Ježišoskero tēlos a faštinde les andro lepedi le voňave olejenca, avke sar hine o Židi sikade te parunel.

⁴¹ Pre oda than, kaj les ukrižinde, sas bar (zahrada) a andre bar nevo hrobos, andre savo mek šoha (ňikda) ňiko na sas thodo.

⁴² A vaš oda, hoj sas o džives anglo Šabbat a hoj o hrobos sas pašes, thode ode le Ježiš.

O Ježiš nane andro hrobos

20 Palis ešebno džives andro kurko sig tosara, mek sar sas rat, avľa e Maria Magdalena ko hrobos a dikhľa, hoj o bar hino odcirdlo pašal o hrobos.

² Sar oda dikhľa, denašelas a avľa ko Šimon Peter the ke oda dujto učeňikos, saves rado dikhelas o Ježiš, a phenda lenge: "Ile le Rajes andral o hrobos a na džanas, kaj les thode."

³ Akor o Peter the o dujto učeňikos džanas ko hrobos.

⁴ Soduj džene denašenas jekhetane, ale o dujto učeňikos denašelas sigeder sar o Peter a avľa ešebno ko hrobos.

⁵ Sar bandiľa, dikhľa ode ča o lepedi, ale na geľa andre.

⁶ Palis avľa the o Šimon Peter, geľa andro hrobos a tiš ode dikhľa o lepedi

⁷ the o khosno, so sas le Ježišoske pro šero. O khosno na sas paš o lepedi, ale sas zapačardo pre aver than.

⁸ Akor avľa andre the o dujto učeňikos, savo sas ešebno ko hrobos, a dikhľa a pačandiľa.

⁹ Mek na achafiľe le Devleskero Lav, hoj mušinda te uštel andral o meriben.

¹⁰ Avke ola učeňika gele pale khere.

Sikavel pes la Maria Magdalenake

¹¹ Ale e Maria ačhelas avri paš o hrobos a rovelas. A sar rovelas, bandiľa andro hrobos

¹² a dikhľa te bešel duje aňjelen andro parne gada ode, kaj pašolas le Ježišoskero tēlos, jekhes paš o šero a dujtones paš o pindre.

¹³ On lake phende: "Džuvľije, so roves?" Oj odphenda: "Ile mire Rajes a na džanav, kaj les thode."

¹⁴ Sar oda phenda, visarda pes palal a dikhľa le Ježiš te ačhel, ale na džanelas, hoj oda hino Ježiš.

¹⁵ O Ježiš lake phenda: "Džuvľije, so roves? Kas rodes?" Oj peske gondoliňa, hoj hino zahradňikos, a phenda leske: "Rajeja, te les tu iľal het, phen mange, kaj les thodaľ, a me les lava."

¹⁶ O Ježiš lake phenda: "Maria!" Oj visaliľa a phenda leske andre Hebrejiko čhib: "Rabbuni!" (So hin prethodo: Učitelina.)

¹⁷ O Ježiš lake phenda: "Ma chude tut mandar, bo mek na somas upre ke miro Dad, ale dža ke mire phrala a phen lenge: 'Džav upre ke miro Dad the ke tumaro Dad a ke miro Del the ke tumaro Del.' "

¹⁸ Avke avľa e Maria Magdalena a phenda avri le učeňikenge, hoj dikhľa le Rajes, a the oda, so lake phenda.

Sikavel pes le učeňikenge

¹⁹ Mek rači andre oda džives, o ešebno džives andro kurko, sas o učeňika zgele a daratar anglo Židi sas o vudar zarimen. O Ježiš avľa, ačhiľa maškar lende a phenda lenge: "Smirom tumenge!"

²⁰ Sar oda phenda, sikađa lenge peskere vasta the peskeri sera. O učeňika radisaľile, sar dikhle le Rajes.

²¹ O Ježiš lenge pale phenda: "Smirom tumenge! Sar man bičhađa o Dad, avke the me tumen bičhavav."

²² Sar oda phenda, phurdňa pre lende a phenda lenge: "Prilen le Sentne Duchos!"

²³ Olenge, kaske odmukena o bini, hin odmuklo, a kaske na odmukena o bini, nane odmuklo."

O Ježiš the o Tomaš

²⁴ Ale o Tomaš, savo pes vičinel Didimos, jekh le dešudujendar, na sas lenca, sar avľa o Ježiš.

²⁵ Avke leske phenenas ola aver učeňika: "Dikhľam le Rajes!" No ov lenge phenda: "Te na dikhava o cheva pal o lecegi andre leskere vasta a na thovava miro angušt pro cheva, kaj sas predemado a na thovava miro vast andre leskeri sera, na pačava!"

²⁶ Pal ochto dživesa sas pale leskere učeňika andro kher a the o Tomaš sas lenca. O Ježiš avľa prekal o zari- men vudar, ačhiľa peske maškar lende a phenda: "Smirom tumenge!"

²⁷ Palis phenda le Tomašiske: "Thov tiro angušť kade a dikh pre mire vasta. An tiro vast a thov les pre miri sera a ma av napačabnaskero, ale pačabnaskero!"

²⁸ O Tomaš leske odphenda: "Miro Raj, the miro Del!"

²⁹ O Ježiš leske phenda: "Pačandilal, bo man dikhľal. Bachtale hine ola, save na dikhle, a pačandile."

³⁰ O Ježiš mek but aver zazraki kerdā angle peskere učeňika, so nane pisimen andre kada zvitkos.

³¹ Ale kada hin pisimen vašoda, hoj te pačan, hoj o Ježiš hin o Kristus, Čhavo le Devleskero, a le pačabna-ha tumen te el andre leskero nav o dživipen.

Pale pes sikavel le učeňikenge

21 Palis pes pale sikađa o Ježiš le učeňikenge paš o Tiberijadsko moros. Ačhila pes kavke:

² Sas jekhetane o Šimon Peter, o Tomaš, saves vičinen Didimos, o Natanael andral e Kana Galilejsko, o duj čhave le Zebedeoskere the duj aver leskere učeňika.

³ O Šimon Peter lenge phenda: "Džav te chudel ribi." Phende leske: "Džas the amen tuha." Avke bešle andre loďka a odgele, ale odi rat na chudle nič.

⁴ Sar vidňisaľolas, ačhelas o Ježiš paš o paňi, ale o učeňika na džanenas, hoj oda hino Ježiš.

⁵ O Ježiš lenge phenda: "Čhavale, chudľan varesave ribi?" On odphende: "Na!"

⁶ Ov lenge phenda: "Čhiven e sita pre čači (pravo) sera la loďkake a chudena." Avke čhide a chudle ajci but ribi, hoj e sita aňi na birinenas te cirdel avri.

⁷ Akor phenda oda učeňikos, saves kamelas o Ježiš, le Peteriske: "Oda hin o Raj!" Sar šunda o Šimon Peter, hoj oda hin o Raj, urďa pre peste uprune gada, so angľoda čhida tele, a chučila andro moros.

⁸ O aver učeňika avle pre loďka a cirdenas pal peste e sita le ribenca, bo na sas dur la phuvatar, vaj šel (100) metri.

⁹ Sar doavle paš o brehos, dikhle rozthode kerade angara a upral sas thodĩ e riba the o maro.

¹⁰ O Ježiš lenge phenda: "Anen ole ribendar, so akana chudľan."

¹¹ O Šimon Peter geľa a cirdňa e sita pre phuv. Andre sas pherdo bare ribi, šel penda the trin (153), ale choc sas kajci but, na čhindila e sita.

¹² Palis phenda o Ježiš: "Aven, chan!" Ňiko le učeňikendar pes na tromandile (na odvažinde) lestar te phučel: "Ko tu sal?" Bo džanenas, hoj oda hin o Raj.

¹³ O Ježiš avľa a diňa lenge o maro the e riba.

¹⁴ Kada sas imar tritovar, so pes sikađa o Ježiš peskere učeňikenge, kanastar uštila andral o meriben.

O Raj the o Peter

¹⁵ Sar imar dochale, phenda o Ježiš le Šimonoske Peteriske: "Šimon, čhavo le Janoskero, kames man buter sar kala?" Ov leske phenda: "He, Rajeja, tu džanes, hoj tut rado dikhav." O Ježiš leske phenda: "Pasin mire bakroren!"

¹⁶ Pale leske phenda: "Šimon le Janoskero, kames man?" Ov leske phenda: "He, Rajeja, tu džanes, hoj tut rado dikhav." O Ježiš leske phenda: "Starin tut pal mire bakrore!"

¹⁷ Tritovar leske phenda: "Šimon le Jonašiskero, rado man dikhes?" Akor ačhila smutno o Peter, hoj lestar tritovar phučel: "Rado man dikhes?" A phenda leske: "Rajeja, tu džanes savoro! Tu džanes, hoj tut rado dikhav." O Ježiš leske phenda: "Pasin mire bakroren!"

¹⁸ Čačes, čačes phenav tuke: Sar salas terneder, phandehas tut korkoro a džahas, kaj kamehas. Ale sar phuroha, nacirdeha tire vasta a aver tut phandela a ľidžala tut ode, kaj na kameha."

¹⁹ Oleha o Ježiš diňa le Peteriske te džanel, save meribnaha osľavinela le Devles. Sar oda phenda, prikazinda leske: "Av pal ma!"

²⁰ O Peter visalila a dikhľa, hoj džal pal leste o učeňikos, saves kamelas o Ježiš a savo paš o chaben geľa pašeder ko Ježiš te phučel: "Rajeja, ko tut zradzinela?"

²¹ Sar les o Peter dikhľa, phenda le Ježišoske: "Rajeja, so ela kaleha?"

²² O Ježiš leske phenda: "Te kamav, hoj te ačhel, medik na avava, so tut andre oda? Tu av pal ma!"

²³ Vaš oda lav pes maškar o phrala vakerelas, hoj oda učeňikos na merela. No o Ježiš leske na phenda, hoj na merela, ale: "Te kamav, hoj te ačhel, medik na avava, so tut andre oda?"

²⁴ Oda hin oda učeňikos, savo svedčinel pal kala veci a kada pisinda. Džanas, hoj leskero svedectvo hino čačipnaskero.

²⁵ No, hin mek but aver, so kerdā o Ježiš. Te pes oda savoro pisindahas, gondolinav mange, hoj aňi le svetos na ulahas dos than pre ola zvitki, so pes diňahas te pisinel.

Amen.

SKUTKI

1 Lačno Teofilona, ešebno (peršo) zvitkos pisindom pal savoreste, so chudla anglunestar o Ježiš te kerel the te sikavel,

² dži andre oda džives, sar sas upre ilo andro ňebos. Angloda diňa prekal o Sentno Duchos o prikazaňja le apoštolenge, saven peske kidňa avri.

³ Saranda džives pal leskero meriben pes lenge o Ježiš sikavelas avke, hoj te džanen, hoj dživel. Dikhle les a vakerelas lenca pal o Devleskero krališagos.

⁴ Sar mek sas lenca jekhetane, prikazinelas lenge: "Ma džan het andral o Jeruzalem, ale užaren pre oda daros, pal savo tumenge vakeravas, hoj o Dad dela.

⁵ O Jan bolelas le paňeha, ale tumen avena bolde le Sentne Duchoha, imar pal o nabut dživesa."

O Ježiš džal andro ňebos

⁶ No sar pes zgele, phučle le Ježišostar: "Rajeja, či kames akana pale te ačhavel o krališagos le Izraeloskero?"

⁷ Ov lenge odphenda: "Oda nane tumari veca te džanel kana, abo te prindžarel o časi (o idej), so peske o Dad kerđa andre peskeri zor.

⁸ Ale avela pre tumende o Sentno Duchos, prilena leskeri zor a avena mire švedki andro Jeruzalem the pal cali Judsko the andre Samarija a palis the dži andro posledno agor la phuvake."

⁹ Pal kala lava sas angle lengere jakha hazdlo upre andro ňebos a e chmara les zaučharđa.

¹⁰ Androda, sar dikhenas pro ňebos, jekhvareste paš lende ačhile duj murša urde andro parne gada,

¹¹ a phende: "Muršale andral e Galileja, so kade ačhen a dikhen pro ňebos? Kada Ježiš, savo sas tumendar upre ilo andro ňebos, avela pale avke, sar les dikhlan te džal andro ňebos."

¹² Palis gele pale andro Jeruzalem pal o Olivovo Verchos, so hin pašes paš o Jeruzalem, vaj jekh kilometros.

¹³ Sar doavle andro foros, gele andro upruno baro kher, kaj bešenas o Peter, o Jakob, o Jan, o Andrej, o Filip, o Tomaš, o Bartolomej, o Matuš, o Jakob le Alfeoskero, o Šimon Zelota, savo les vičinenas Horlivec, the o Judaš le Jakoboskero.

¹⁴ Kala savore sas jekhetane andro modlitbi le džuvlence the la Mariaha, le Ježišoskera daha, the leskere phralenca.

Kiden avri le Matej vaš o apoštolos

¹⁵ Andre ola dživesa uštíla o Peter maškar savore učeníka. Sas ode vaj šel the biš (120) manuša. Ov phenda:

¹⁶ "Muršale, phralale, mušinda pes te ačhel oda, so hin pisimen, so imar anglal phenda o Sentno Duchos prekal o David pal o Judaš, savo lidžalas olen, save zaphandle le Ježiš.

¹⁷ Bo o Judaš sas jekh amendar a služinelas amenca jekhetane."

¹⁸ Vaš oda, hoj zradzinda le Ježiš, chudla love a cinda peske maľa. Paloda peľa tele šereha a phariľa avke, hoj savoro andral leste avľa avri.

¹⁹ A dodžanle pes olestar savore manuša, save bešen andro Jeruzalem. Vašoda pes vičinel odi maľa andre lengeri čhib Akeldama, so hin le Rateskeri Maľa.)

²⁰ "Bo andro Žalmi hin pisimen:
'Mi ačhel leskero kher omuklo a ňiko ode te na bešel!' A avrether:
'Leskeri služba mi prelel aver!'

²¹ Vašoda kampil ole muršendar jekhes avri te lel, savo sas amenca calo časos, medik sas o Ježiš maškar amende a phirelas amenca,

²² savo sas amenca akorestar, sar sas boldo o Ježiš le Janostar, dži andre oda džives, sar sas amendar upre ilo. Oda murš mi svedčinel amenca, hoj o Ježiš uštíla andral o meriben."

²³ Avke ačhade duje dženen: Le Jozef Barsabaš, savo les vičinenas Čačipnaskero, the le Matej.

²⁴ Palis pes kavke modlínenas: "Rajeja, tu, savo prindžares o jile savore manušenge, tu amenge sikav, saves kale dujendar tuke kidňal avri,

²⁵ hoj te zalel e služba the o apoštolstvo, andral savo o Judaš odgeľa pre peskero than."

²⁶ Avke len dine losi a o losos peľa pro Matej, savo sas imar rachimen maškar o dešujekh (11) apoštola.

O Sentno Duchos avel tele

2 Sar imar sas pendato (50.) džives pal e Patradi, pro Letňice (Turice), so hin le Židengero inepos, sas savore pre jekh than a užarenas savore pre oda jekh.

² Jekhvareste šundíla andral o ňebos zoralo hangos, avke sar te avľahas zorali balvaj a pherarda calo kher, kaj bešenas.

³ Sikade pes lenge ajse sar jagale rozulade čhiba a pre dojekh lendar bešľa jekh čhib.

⁴ Jekhwareste sas savore pherarde le Sentne Duchoha a chudle te vakerel andre aver čhiba, avke sar lenge delas o Duchos te phenel.

⁵ Andro Jeruzalem bešen as o pobožna Židi andral savore narodi pal calo svetos.

⁶ Sar šunde ola hangij, sar o apoštola vakeren andro lengere čhiba, sa pes ode zgele a našti avenas ke peste.

⁷ Sa pes čudalinenas a phenenas jekh avreske: "Či nane savore kala, save kade vakeren, andral e Galileja?"

⁸ Sar oda, hoj len šunas te vakerel sako andre peskere čhiba, andre save avri barišam?

⁹ Šunas len amen: O Parti, o Medi, o Elamiti, ola, save bešas andre Mezopotamija, andre Judsko the andre Kapadokija, andro Pontus the andre Azija,

¹⁰ andre Frigija the andre Pamfilija, andro Egipt the andre phuv Libija paš o Cirenija, the ola, save hine andral o Rim,

¹¹ o Židi the ola, save pregele andro Židoviko pačaben, o Kretana the o Arabi – savore šunas len te vakerel andre amare čhiba bare veci le Devleskere!"

¹² Igen pes čudalinenas a našti ke peste avenas, phenenas jekh avreske: "So hin kada?"

¹³ Ale varesave lendar asanas a phenenas: "Pile gufi mol!"

O Peter kazinel

¹⁴ O Peter uštíla jekhetane le dešujekh (11) apoštolenca a zorale hangoha ke lende prevakerđa: "Muršale, save san Židi the tumen, save bešen andro Jeruzalem! Šunen mištes mire lava a achalón kaleske!"

¹⁵ Kala nane mate, sar tumenge tumen gondolinen. Se mekča hin eña ori tosara.

¹⁶ Ale kada hin oda, so sas phendo prekal o prorokos Joel:

¹⁷ *'Andre ola posledna dživesa ela avke, phenel o Del, hoj čhivava avri mire Duchostar pre dojekh tēlos a tumare čhave the tumare čhaja prorokinena, tumare terne nipi dikhena videňja a tumare phure manuša džana sune.*

¹⁸ *He, mek the pre mire služobňika the pro služobňički čhivava avri mire Duchostar a prorokinena.*

¹⁹ *Dava, hoj te dikhen zazraki upre pro ňebos the znameňja tele pre phuv, o rat e jag the baro thuv.*

²⁰ *O kham pes čerinela pro kalípen a o čhon pro rat mek sigeder, sar avela oda baro the slavno džives le Rajeskero.*

²¹ *A ela avke, hoj sako, ko lašarela le Rajeskero nav, ela zachraňimen.'*

²² Muršale andral o Izrael, šunen kala lava: O Ježiš Nazaretsko, oda murš, savo sas le Devlestar bičhado, sas angle tumende presikado andre bari zor the andro zazraki, so o Del kerelas prekal leste maškar tumende, avke sar the korkore dikhlán.

²³ O Del imar anglal diňa pal peskeri voľa the planos, hoj tumen ole muršes te zalen a prekal o vasta le binošngere te primaren pro kerestos a te murdaren.

²⁴ Oles o Del uštađa andral o meriben a il'a lestar o meribnaskere dukha, se aňi pes na delas, hoj les o meriben te likerel andre peskeri zor.

²⁵ Bo o David vakerelas pal leste:

'Dikhavas le Rajes angle mande furt; ov hino paš miro čačo vast, me man na čhalavava.

²⁶ *Vašoda radisalíla miro jilo the miri čhib, hoj mek the miro tēlos ačhela pro užaripen (nađej),*

²⁷ *bo na mukeha miri duša pre oda than, kaj hine o mule, aňi na dela tire sentnoneske, hoj leskero tēlos te kirňol.*

²⁸ *Diňal mange te prindžarel o droma le dživipnaskere a pherareha man radišagoha anglal tute!'*

²⁹ Muršale, phralale! Šaj tumenge phenav o čačipen pal amaro phuro dad o David: Ov muľa, parundán les a leskero hrobos hin ke amende dží adadžives.

³⁰ Vašoda, hoj sas prorokos, džanelas, bo o Del diňa les andre vera lav, hoj ačhavela pre leskero tronos leskero potomkos.

³¹ *Angloda imar dikhl'a a vakerelas pal o Kristus, hoj uštēla andral o meriben a hoj leskeri duša na ačhíla pre oda than, kaj hine o mule, aňi leskero tēlos na kirňola.*

³² Ipen ole Ježiš o Del uštađa andral o meriben a amen savore oda dikhl'am.

³³ O Del les hazdňa upre paš peskero čačo vast a chudla le Sentne Duchos le Dadestar, avke sar phend'a. Palis les čhid'a avri pre amende a oda hin, so akana dikhen the šunen.

³⁴ Bo o David mek na sas andro ňebos a phenel: *'O Del phend'a mire Rajeske: Beš tuke pal miri čači (pravo) sera,*

³⁵ *medik tuke na thovava tire ňeprijateľen tel o pindre.'*

³⁶ Mi džanen savore manuša andral o Izrael, hoj o Del ole Ježiš, saves tumen ukrižindán, kerđa Rajeske the Kristoske."

Pačan trin ezera nipi

³⁷ Sar oda šunde, čhalad'a oda lengere jilenca a phende le Peteriske the okle apoštolenge: "So kampil te kerel, phralale?"

³⁸ O Peter lenge phend'a: "Keren pokaňje a sako tumendar pes mi del te bolel andro nav Ježiš Kristus, hoj tumenge te el odmukle o bini a chudena le Sentne Duchos sar daros.

³⁹ Bo oda, so o Del phend'a, patrinel tumenge the tumare čhavage the savorenge, save hine dural: Sakoneske, kas vičinela o Raj, amaro Del."

⁴⁰ The mek avre buter lavenca lenge svedčinelas. Vakerelas a phenelas lenge pre godi: "Zachraňinen tumen andral kada binošno pokoleňje!"

⁴¹ Avke ola, save radišagoha priile leskero lav, dine pes te bolel. Andre oda džives pes pridine ke lende vaj trin ezera (3 000) manuša.

⁴² Ola savore calo časos pes sikavenas le apoštoldar a furt pes zdžanas le phralenca. Phagerenas jekhetane o maro a ačhenas pro modlitbi.

E ešebno khangeri

⁴³ Avľa dar pre savore nipi a o apoštola kerenas but zazraki the znaenjeja.

⁴⁴ Ola, save pačandile, sas peha a savoro len sas jekhetane.

⁴⁵ Bikenenas peskere mali the majetki a rozdenas maškar peste avke, kaske keci kampelas.

⁴⁶ Sako džives sas jekhetane andro chramos. Andre peskere khera phagerenas o mare a radišagoha the žuže jileha chanas o chaben.

⁴⁷ Lašarenas le Devles a savore nipi len rado dikhenas. A o Raj pridelas sako džives neve zachrañmen manušen.

O Peter sastarel avri le banges

3 O Peter the o Jan džanas upre andro chramos trin orendar pro modlitbi.

² Ipen anenas varesave muršes, savo sas bango, kanastar les e daj anda pro svetos. Les hordinenas sako džives paš o chramos paš o vudar, so pes vičinel Šukar, hoj peske te mangel love olendar, save džanas andro chramos.

³ Sar ov dikhľa le Peter the le Jan, hoj kamen te džal andro chramos, mangelas len, hoj les te den vareso.

⁴ Akor o Peter the o Jan dikhle pre leste a phende: "Dikh pre amende!"

⁵ Ov dikhelas pre lende igen bares, bo užarelas, hoj les dena vareso.

⁶ Ale o Peter phenda: "Somnakaj the rup man nane, no oda, so man hin, oda tut dava: Andro nav Ježiš Kristus Nazaretsko ušti a džal!"

⁷ Chudľa les a hazdña les čače vastestar. Takoj pro than leske zorafile o pindre the o khoča,

⁸ chučila upre a phirelas. Gefa lenca andro chramos, kaj phirelas, chučerelas radišagostar a lašarelas le Devles.

⁹ Savore nipi, save ode sas, les dikhle te phirel a te lašarel le Devles.

¹⁰ Mištes les prindžarenas, hoj oda sas ov, savo bešelas paš e chramoskeri brana, so pes vičinelas Šukar, a žobrinelas. A igen pes čudalinenas olestar, so pes leske ačhiľa.

Kazinel andre dvora le Šalamunoskeri

¹¹ O bango phirelas pal o Peter the pal o Jan a savore manuša pes zgele ke lende andre bari dvora le Šalamunoskeri, bo našti ke peste avenas.

¹² Sar oda dikhľa o Peter, odphenda le manušenge: "Muršale andral o Izrael, so tumen oleske avke čudalinen? Abo soske pre amende avke dikhen, sar te oda amen peskera zoraha kerđamas, hoj ov phirel? Abo vašoda, bo sam pobožna?"

¹³ O Del le Abrahamoskero, le Izakoskero the le Jakoboskero, o Del amare dadengero oslavinda peskere čhas le Ježiš, saves tumen diñan andre a na kamenas les akor, sar les o Pilat kamelas te premukel.

¹⁴ Tumen na kamenas le Sentnes a Čačipnaskeres, ale mangelas, hoj tumenge te premukel le vrahos.

¹⁵ Ale oles, ko del o dživipen, tumen murdarđan. Les o Del uštađa andral o meriben a amen sam oleske švedki!

¹⁶ Dikhen kale muršes a prindžaren les. Diña peskero pačaben andro nav Ježiš Kristus a avľa leske pale e zor andro pindre. Angle tumare jakha o pačaben andro Ježiš calkom sastarda kale muršes.

¹⁷ Phralale, akana džanav, hoj tumen aňi na džanenas, so kerđan, aňi ola, save tumen lidžan.

¹⁸ O Del phenda prekal savore peskere proroka, hoj leskero Kristus cerpinela, a kerđa, hoj pes avke te ačhel.

¹⁹ Vašoda akana keren pokaňje a visaren tumen, hoj pes tumenge te khosel o bini a te avel pre tumende nevi zor the o smirom le Devlestar,

²⁰ hoj te bičhavel tumenge le Ježiš Kristus, savo sas pre oda imar anglal dino.

²¹ Ov mušinel te ačhel andro ņebos dži akor, medik o Del na prikerela savoro, pal soste imar čirla vakerelas prekal savore peskere sentna proroka.

²² Bo o Mojžiš phenda le dadenge:

'O Raj, tumaro Del, tumenge ačhavela prorokos tumare phralendar avke sar man. Les šunena andre savoreste, so tumenge phenela.'

²³ Ela avke, hoj dojekh manuš, savo na šunela ole prorokos, ela le Devleskere manušendar odčhido.'

²⁴ A o Samuel the savore aver proroka, save sas pal leste, tiš pal kala dživesa vakerenas.

²⁵ Le Devleskere zasľubeňja, so phenda prekal peskere proroka, hine prekal tumende a tumen hin o kotor pre zmluva, so o Del phandľa tumare dadenca, sar phenda le Abrahamoske:

'Prekal tiro potomkos, požehňinava savore narodi pre phuv.'

²⁶ Sar o Del ačhađa peskere Služobňikos le Ježiš, ešeb (peršo) les bičhađa tumenge, hoj tumen te požehňinel avke, hoj te visarel tumen tumare binošne dromendar."

O Peter the Jan angle Bari Rada

4 Sar oda vakerelas le manušenge, avle pre lende o rašaja, o Saduceja the o velitelis le stražňikengero andro chramos.

² On sas pre lende choľamen, bo o apoštola sikavenas le manušen a phenenas lenge, hoj andro Ježiš šaj uštena andral o meriben.

³ Phandle len dži tosara andre bertena, bo imar sas rat.

⁴ Ale but olendar, save šunde o lav, pačandile a sas vaj pandž ezera (5 000) murša.

⁵ Ačhiľa pes pro dujto džives tosara, hoj pes andro Jeruzalem zgele o anglune murša, o phuredera, o zakoňika,

⁶ the o nekbareder rašaj Annaš, o Kajfaš, o Jan, o Alexander the mek savore andral e famelija le nekbareder rašaske.

⁷ Ačhade len maškaral a phučenas lendar: "Sava zoraha, abo andre savo nav oda kerdan?"

⁸ O Peter, pherardo le Sentne Duchoha, phenda lenge: "Tumen, so lidžan le manušen the o phuredera le Izraeloskere!

⁹ Amen sam adadžives sudzimen vaš o lačhipen, so pes kerdā le nasvale manušeske a tumen amendar phučen, sar les sastārdam.

¹⁰ Akor mi džanen savore Izraeliti the tumen, hoj andro nav Ježiš Kristus Nazaretsko sas sastādo. Oda hin o Ježiš, saves tumen ukrižindan a o Del les uštada andral o meriben. Leskera zoratar hino kada manuš sas to angle tumare jakha.

¹¹ Oda hin
'oda bar, so tumen o murara odčhidan a so ačhiļa oda hlavno bar.'

¹² A nane andre ničaste avreste e zachrana, bo aņi nane aver nav tel o ņebos, so ulahas dino le manušenge, andre savo šaj avas amen zachraņimen."

¹³ Sar dikhle, hoj o Peter the o Jan pes na daran, čudalinenas pes, bo džanenas, hoj hine ča ajsa manuša, save nane avrisikade. A prindžarde len, hoj phirenas le Ježišoha.

¹⁴ Sar dikhle paš lende te ačhel ole manušes, savo sastīļa avri, na sas len pre lende so te phenel.

¹⁵ Bičhade len avri andral e Bari Rada. Paļis pes maškar peste dovakerenas:

¹⁶ "So keraha kale manušenca? Bo savore, save bešen andro Jeruzalem, džanen, hoj prekal lende pes ačhiļa baro zazrakos a amen oda našti phenas, hoj na.

¹⁷ Ale hoj pes oda mek buter te na rozvakerel maškar o nipi, zakazinas lenge, hoj imar buter te na vakeren andre oda nav ņisave manušeske."

¹⁸ Vičinde len a prikazinde lenge, hoj imar te na vakeren aņi te na sikaven andro nav Ježiš.

¹⁹ Ale o Peter the o Jan lenge odphende: "Korkore rozsudzinen, či oda ela mištes anglo Del, hoj buter te šunas tumen sar le Devles.

²⁰ Bo amen našti preačas te vakerel pal oda, so dikhļam the šundām."

²¹ Paļis lenge mek jekhvar zakazinde a mukle len, bo na arakhle pre lende nič, vaš soske len šaj potrestinde. Bo savore manuša lašarenas le Devles vaš oda, so pes ačhiļa.

²² Ole manušeske, savo sastīļa avri, sas buter sar saranda (40) berš.

O učeņika lašaren le Devles

²³ Paļis, sar len premukle, avle paš peskere a phende lenge pal savoreste, so lenge o nekbareder rašaja the o phuredera phende.

²⁴ Sar oda on šunde, jekhetane hazdle o hangos ko Del a phende: "Tu sal Nekbareder Del, savo kerdal o ņebos the e phuv the o moros the savoro, so andre hin.

²⁵ Tu phenda prekal o Davidoskero muj, prekal tiro služobņikos:

'Soske pes cholaren o narodi

a o manuša gondolinen pal o diliņipen?

²⁶ *Uštīle upre o kraļa pre phuv the ola, save vladņinen, a gele pro Del the pre leskero Kristus.'*

²⁷ Bo čačes o Herodes the o Pontsko Pilat le Nažidenca the le Izraelitencas pes zgele andre kada foros a džanas pre tiro Sentno Služobņikos, pro Ježiš, kas tu pomazindal,

²⁸ hoj te keren savoro oda, so tiro vast the tiri voļa imar anglal kamļa, hoj pes te ačhel.

²⁹ Avke akana, ó, Rajeja, dikh pre oda, sar amen daraven avri a de tire služobņikenge te vakerel o lav žužes the bi e dar.

³⁰ Thov tiro vast, hoj te sastarel avri, a ker o dīvi the o zazraki andro nav Ježiš, andro nav tire Sentne Služobņikoskere."

³¹ Sar pes preačhile te modlīnel, razisalīļa oda than, kaj sas zgele, a jekhwareste savore sas pherarde le Sentne Duchoha a vakerenas le Devleskero lav bi e dar.

Le pačabnaskeren hin savoro jekhetane

³² Ola, save pačandīle, sas igen but, sas len jekh gondolišagos the jekh jilo. Aņi jekh lendar na phenelas pal varesoste, so les sas, hoj oda hin leskero, ale sa len sas jekhetane.

³³ O apoštola denas andre bari zor svedectvo pal oda, hoj o Raj o Ježiš uštīļa andral o meriben a upral lende savorende sas baro lačhipen (milost) le Devleskero.

³⁴ Na sas ņiko maškar lende, kas ulahas vareso frima. Bo savore, kas sas maļi abo khera, bikenenas len a ola love, so vaš oda chudenas,

³⁵ anenas le apoštolenge a on rozdenas savorenge, kaske keci kampelas.

³⁶ Jekh lendar sas o Jozef, saves dine o apoštola nav Barnabaš (so hin prethodo: Oda, ko avren podhazdel upre.) Ov sas Levitas andral o Ciprus.

³⁷ Les sas maļa, so bikenda a ola love anda a diņa le apoštolenge.

O Ananijaš the e Zafira

5 Ale jekh murš Ananijaš a leskeri romņi Zafira bikende maļa

² a počoral iļa peske ole lovendar. A leskeri romņi olestar džanelas. Okla love, so leske ačhiļa, anda a thođa le apoštolenge paš o pindre.

³ O Peter phenda: "Ananijaš, soske pherarda o beng tiro jilo, hoj te klamines le Sentne Duchoske a počoral iļal ole lovendar, so chudļal vaš e maļa?

⁴ Či na sas e maļa tiri, akor sar mek na sas bikendi? A sar sas bikendi, tiš laha šaj kerdal, so kamļal. Soske tuke domukļal andro jilo odi veca? Na klamindal le manušenge, ale le Devleske."

⁵ Sar šundā o Ananijaš ola lava, peļa tele a muļa. A dojekh, ko oda šundā, predarandīļa.

⁶ O terne murša uštíle, ile les avri a parunde les.

⁷ Vaj pal o trin ori avla andre leskeri romni, ale oj na džanelas, so pes ačhíla.

⁸ O Peter phučla the latar: "Phen mange, či vaš kajci bikendan e mała?" Oj odphenda: "He, vaš ajci."

⁹ Avke lake o Peter phenda: "Soske tumen dovakerdan, hoj pokušinena le Rajeskere Duchos? Dikh, o pindre olengere, save parunde tire romes, hine paš o vudar a lidžana avri the tut."

¹⁰ Androda oj pefa leske paš o pindre a muła. Sar avle andre o terne, dikhle la muła, ile la avri a parunde la paš lakero rom.

¹¹ A avla bari dar pre cali khangeri the pre savorende, save oda šunde.

¹² Prekal le apoštolengere vasta pes ačhenas maškar o nipi bare divi the zazraki. Savore sas jekhetane andre le Šalamunoskeri dvora a sas len jekh gondolišagos.

¹³ Aver džene imar daranas te džal maškar lende a the avke len o nipi lašarenas.

¹⁴ So dureder, ta buter manuša pačanas a igen but murša the džuvla pačandíle le Rajeske.

¹⁵ Pro ulici anenas le nasvalen a thovenas len pro hađi the pro nošitki, hoj te perel pre varekaste le Peteriskero ciños, sar odarik predžala.

¹⁶ Andral o pašutne fori pes zdžanas but nipi andro Jeruzalem a anenas le nasvalen the olen, kas o nalačhe duchu trapinenas, a savore sas sastarde.

O rašaja džan pro apoštola

¹⁷ Akor uštíla o nekbareder rašaj the savore, save leha sas andral e sekta le Saducejengeri. On len našti avri ačhenas,

¹⁸ vašoda chudle le apoštolen a phandle len andre foroskeri bertena.

¹⁹ Ale o aňjelos le Rajeskero phundrađa prekal e rat o vudar la bertenakero, ligenda len avri a phenda:

²⁰ "Džan andro chramos a vakeren le manušenge savore lava pal oda nevo dživípen."

²¹ Sar oda on šunde, avle sig tosara andro chramos a sikavenas. Sar avla o nekbareder rašaj the ola, save sas leha, vičinde e Bari Rada, savore phurederen andral o Izrael. A bičhade pal lende andre bertena, hoj len te anen.

²² O služobňika gele a andre bertena len na arakhle. Avke avle pale

²³ a phende: "E bertena arakhlam mištes andre phandlí a le stražňiken arakhlam te ačhel avri paš o vudar, ale sar la phundrađam, na arakhlam andre ňikas."

²⁴ Sar šunda o chramoskero velítelís the o nekbareder rašaja ola lava, čudalínenas pes, bo na džanenas, so pes ačhíla.

²⁵ Androda vareko avla, diňa lenge te džanel a phenda: "Dikhen, ola murša, saven tumen thođan andre bertena, ačhen andro chramos a sikaven le manušen."

²⁶ Akor odgeľa o velítelís le sluhenca a anda len, ale na zoraha, bo daralas le manušendar, hoj te na čhivk-eren le barenca andre lende.

²⁷ Sar len ande, ačhade len angle Bari Rada. O nekbareder rašaj lendar phučla:

²⁸ "Či na zakazindam tumenge, hoj te na sikaven andre oda nav? Ale dikh, tumen pherardan o Jeruzalem tumare sikavibnaha a amenge den e vina vaš leskero meriben."

²⁹ O Peter odphenda a the okla apoštola phende: "Buter kempel te šunel le Devles sar le manušen.

³⁰ O Del amare dadengero uštađa andral o meriben le Ježiš, saves tumen primardan pro kerestos a murardan.

³¹ Oles o Del hazdňa upre ke peskero čačo vast a kerđa lestar Nektbareder Vodcas the Spasiťelís, hoj o Izrael te visalol pale ko Del a te el lenge odmukle o bini.

³² Amen sam leskere švedki andre kala veci the o Sentno Duchos, saves diňa o Del olenge, save les šunen."

Le Gamalieloskeri rada

³³ Sar oda on šunde, sas igen choľamen a kamle len te murdarel.

³⁴ Ale uštíla varesavo Farizejis andral e Bari Rada, savo pes vičinelas Gamaliel, le Zakonoskero učítelís, saves peske važinenas savore nipi. Ov rozkazinda, hoj te lidžan le manušen pro sikra avri

³⁵ a phenda lenge: "Muršale andral o Izrael, mištes tumen rozgondolinen, so kerena kale manušenca!

³⁶ Bo načirla uštíla o Teudas, savo phenelas pal peste, hoj ov hino vareko. A prithode pes paš leste vaj štar šel (400) murša. Ale sar les palís murdarde, savore, ko les šunenas, pes rozdenašle a rozgele.

³⁷ Pal leste, akor sar pes zgenenas o manuša, uštíla o Judaš andral e Galileja. Iľa pal peste but nipen a the ov muła a savore, save les šunenas, pes rozgele.

³⁸ Vašoda tumenge phenav, hoj te oddžan kale manušendar a te muken len! Bo te ča o manuša keren kada planos, abo kadi buči, rozperela pes,

³⁹ ale te hin oda le Devlestar, našti len zaačhavana. A te na oda mek dičhol avke, hoj džan pro Del!"

⁴⁰ A šunde les. Vičinde peske le apoštolen, marde len. Prikazinde lenge, hoj te na vakeren andro nav Ježiš, a premukle len.

⁴¹ Sar o apoštola odgele pašal e Bari Rada, thovenas baripen vaš oda, hoj šaj cerpinen vaš o nav Ježiš.

⁴² Na preačhenas sako džives te sikavel andro chramos the pal o khera a vakerenas o evaňjelium, hoj o Ježiš hin o Kristus.

Ačhaven efta služobňiken

6 Andre ola dživesa, sar sas furt buteder učeňika, chudle o Helenisti † te dudrinel pro Hebreja ††, hoj na pomožinenas lengere vdovenge sako džives avke sar avre vdovenge.

† O židi, save vakerenas andre le Grekengeri čhib. †† O židi, save vakerenas andre Hebrejiko čhib.

² Akor peske o dešuduj (12) džene vičinde savore učeñiken a phende: "Nane oda šukares, hoj amen te omukas le Devleskero lav a te keras kala buča.

³ Vašoda kiden avri tumendar eфта muršen, pal save dojekh džanel, hoj hine pherde le Sentne Duchoha the la godaha. Len ačhavaha pre kadi buči

⁴ a amen pes šaj modlinas a služinas le Devleskere laveha calo časos."

⁵ Oda lav sas pre dzeka savoredženenge a kidle avri le Štefan, muršes, kas sas pherdo pačaben the Sentno Duchos, the le Filip, le Prokorus, le Nikanor, le Timon, le Parmenas the le Mikulaš andral e Antiochija, savo sas Grekos a savo imar sigeder pregeľa andre Židoviko pačaben.

⁶ Ačhade len anglo apoštola a on pes pre lende modlinde a thode pre lende o vasta.

⁷ Le Devleskero lav barolas a sas furt buteder učeñika andro Jeruzalem. A the igen but rašaja pačandile.

Le Štefan zaphanden

⁸ O Del diňa le Štefan pherdo lačhipen (milost) the zor a kerelas maškar o nipi bare divi the zazraki.

⁹ A avle varesave manuša andral e Libertinsko sinagoga, kaj sas Židi andral e Cirenija the Alexandrija, a mek ole, save sas andral e Cilicija the andral e Azija, a veseke dinenas pes le Štefanoha.

¹⁰ Ale našti avle anglal ola godaha the ole Duchoha, saveha vakerelas.

¹¹ Akor podčhide muršen, save phende: "Šundam les te vakerel nalače lava pro Mojžiš the pro Del."

¹² Avke marde upre le nipen the le phurederen the le zakoñiken. Avle pre leste, chudle les a ligende les angle Bari Rada.

¹³ Ačhade falošne švedken, save phende: "Kada manuš na preačhel te vakerel nalače lava pre kada Sentno Than the pro Zakonos.

¹⁴ Bo šundam les te vakerel, hoj oda Ježiš Nazaretsko čhivela tele kada than a čerinela o tradiciji, so amenge diňa o Mojžiš."

¹⁵ Savore, save bešenas andre Bari Rada, pes zadikhle pro Štefan a dikhle leskero muj avke sar muj le aňjeloskero.

Le Štefanoskere lava

7 O nekbareder rašaj lestar phučľa: "Hin oda čačes avke?"

² O Štefan odphendľa: "Phralale the dadale, šunen! O baro Del pes sikađa amare dadeske le Abrahamoske, sar sas andre Mezopotamija, akor, sar mek na bešelas andro Charan

³ a phendľa leske: *Av avri andral tiri phuv the andral tiri famelija a dža andre odi phuv, so tuke sikavava.*

⁴ Akor odgeľa andral e Chaldejiko phuv a bešelas andro Charan. Palis, sar muľa leskero dad, prefigende les odarik andre kadi phuv, andre savi tumen akana bešen.

⁵ O Del ode na diňa le Abraham aňi sikra phuv, ale diňa les lav, hoj odi phuv dela leske the leskere potomkenge. O Del oda phendľa akor, sar mek les na sas čhave.

⁶ O Del phendľa, hoj *leskere potomki bešena andre cudzo phuv, hoj ode lendar kerena otroken a štar šel (400) berš len trapinena.*

⁷ *Ale oda narodos, kaske on služinena, me sudzinava,* phendľa o Del. *Palis avena odarik avri a služinena mange* pre kada than.

⁸ Kerďa leha zmluva pal o občhindipen (e obriezka), avke leske uliľa o Izak a pre ochtoto džives les o Abraham občhinda (obrezinda). Le Izakostar sas o Jakob a le Jakobostar sas o dešuduj (12) bare dada.

⁹ O bare dada sas hamišne (žarlive) pro Jozef a bikende les andro Egipt, ale o Del sas leha

¹⁰ a iľa les avri andral savore leskere pharipena, presikađa leske peskero lačhipen (milost) a diňa les godi anglo Faraonos, kralis andral o Egipt. Ov palis ačhađa le Jozef, hoj pes te starinel pal o Egipt the pal calo leskero kher.

¹¹ Palis avľa bari bokh pro calo Egipt the pro Kanaan the baro pharipen a amare daden na sas so te chal.

¹² Sar šundľa o Jakob, hoj andro Egipt hin o chaben, bičhađa ešeb (peršo) amare daden.

¹³ Sar avle dujtovar, diňa pes o Jozef te prindžarel peskere phralenge a o Faraonos pes dodžanľa pal e famelija le Jozefoskeri.

¹⁴ Akor len bičhađa o Jozef, hoj te anen ke leste le Jakob, leskere dades the cali leskeri famelija – eftarardeš the pandž (75) manušen.

¹⁵ O Jakob the amare dada avle tele andro Egipt a ode the mule.

¹⁶ Palis len prefigende andro Šichem a parunde len andro hrobos. Oda hrobos cinda o Abraham le Chamoroskere čhavendar andro Šichem.

¹⁷ Sar sas pašes o časos, hoj o Del te dolikerel oda lav, so diňa le Abrahamoske, amaro manuša andro Egipt igen zoraľonas a sas furt buteder,

¹⁸ medik *na sas andro Egipt aver kralis, savo imar na prindžarelas le Jozef.*

¹⁹ Oda kralis palis avke trapinelas amare manušen the amare daden, hoj mušinenas te odčhivel peskere čhavoren, save mekča ulonas a mukenas len te merel.

²⁰ Andre oda časos uliľa (pes narodzinda) o Mojžiš a sas igen šukar anglo Del. Andre le dadeskero kher les bararenas avri trin čhon.

²¹ Sar les dine pestar het, arakhľa les le Faraonoskeri čhaj, hazďna les andral o paňi a barardľa les avri sar peskere čhas.

²² O Mojžiš sas avrisikado andro nekfeder Egipsko godaveripen a sas zoralo andre oda, so vakerelas, the andre oda, so kerelas.

²³ Sar leske sas saranda (40) berš, avľa leske andro jilo, hoj te džal te dikhel peskere phralen, le Izraeloskere čhaven.

²⁴ A dikhľa, sar o Egiptanos dukhavelas jekhe Izraelitas, vašoda o Mojžiš geľa te pomožinel le Izraelitaske avke, hoj les murdarđa.

²⁵ Ov peske gondolinelas, hoj leskere phrala achalona, hoj o Del len kamel te zachrañinel prekal leskero vast, ale on oleske na achalile.

²⁶ Palis pre aver džives, sar pes duj džene vesekedinenas, sikađa pes lenge a kamľa maškar lende te anel o smirom. Phenda: 'Muršale! Phrala san, soske tumen maren?'

²⁷ Ale oda, ko dukhavelas le phrales, les ispidňa a phenda: 'Ko tut thođa upral amende, hoj amen tu te lidžas a te sudzines?'

²⁸ So? Kames man te murdarel, sar murdarďal idž kole Egiptanos?'

²⁹ Vaš oda lav o Mojžiš denašľa a bešel as andre Midijaniko phuv sar cudzincos, kaj leske uľile duj muršora.

³⁰ Sar pregeľa saranda (40) berš, sikađa pes leske o aňjelos le Rajeskero pre pušťa paš o verchos Sinaj andro krakos, so labolas.

³¹ Sar oda dikhľa o Mojžiš, čudalinelas pes oleske, so dikhel. Ale sar geľa pašeder, hoj te dikhel feder, prevakerđa ke leste o hangos (hlasos) le Rajeskero:

³² 'Me som o Del tire dadengero, o Del le Abrahamskero, o Del le Izakoskero a o Del le Jakoboskero.' O Mojžiš avke predarandľila, hoj izdralas a daralas pre oda buter te dikhel.

³³ O Raj leske phenda: 'Čhiv tele o kamašľi pal o pindre, bo odi phuv, pre savi ačhes, hiňi sentno.

³⁴ Dikhľom – he mištes dikhľom – sar mire nipi cerpinen andro Egipt a šundom, sar lenge hin phares. Vašoda avľom tele, hoj len te zachrañinav. Avke akana av a bičhavava tut andro Egipt.'

³⁵ O Mojžiš hin oda, saves na kamle. Phende pre leste: 'Ko tut thođa upral amende, hoj amen tu te lidžas a te sudzines?' A ipen les bičhada o Del, hoj len te lidžal a te zachrañinel akor, sar ke leste prevakerđa o aňjelos, savo pes leske sikađa andro krakos.

³⁶ O Mojžiš len iľa odarik avri a kerelas paš oda zazraki the đivi andro Egipt, paš o Lolo Moros a mek saranda (40) berš pre pušťa.

³⁷ O Mojžiš hin oda, savo phenda le Izraeloskere manušenge: 'O Raj, tumaro Del, tumen dela prorokos avke sar man tumare phralendar.'

³⁸ Ov hin oda, ko sas pre pušťa le manušenca andral o Izrael the le aňjeloha, savo ke leste vakerelas pro verchos Sinaj the ke amare dada a ov chudľa o lava le dživipnaskere, hoj len te del amenge.

³⁹ Ale amare dada les na kamenas te šunel, odčhide les a visalile peskere jilenca pale andro Egipt.

⁴⁰ Phende le Aronoske: 'Ker amenge devlen, save džana angle amende, bo na džanas, so pes ačhiľa ole Mojžišoha, savo amen iľa avri andral e Egiptsko phuv.'

⁴¹ Kerde peske gurumňora a obetinde la modlake e obeta a radisalonas oleske, so kerde peskere vastenca.

⁴² Ale o Del lendar visalilľa a diňa len, hoj te lašaren o čerčeňa andral o űebos, avke sar hin pisimen andre le prorokengero zvitkos:

'Kher le Izraeloskero, andan mange obeti the dari pre pušťa tel o saranda (40) berš?'

⁴³ Iľan a lidžanas le Molochoskero stanos the e čerčeň tumare devleskeri le Refanoskeri; o modli, so tumenge kerďan, hoj angle lende te bandon. Vašoda lava tumen het a prethovava tumen dži pal o Babilon.'

⁴⁴ Amare daden sas pre pušťa o Sentno Stanos. Oda Stanos sas kerdo avke, sar o Del le Mojžišoske phenda the sar oda dikhľa.

⁴⁵ Oda Sentno Stanos preile amare dada a le Jozuaha les doande andre phuv, so sas le pohanengeri. Le pohanen tradňa o Del het amare dadendar a o Sentno Stanos ode ačhiľa dži andre Davidoskere dživesa.

⁴⁶ O Del rado dikhelas le David a o David mangelas le Jakoboskere Devles, či šaj leske ačhavel kher,

⁴⁷ ale o Šalamun ačhada le Devleske kher.

⁴⁸ Ale o Nekbareder na bešel andro khera, so hine kerde le manušendar, avke sar phenel o prorokos:

⁴⁹ 'O űebos hin miro tronos, phenel o Del, a e phuv hiňi tel mire pindre. Savo kher mange ačhavana? Vaj kaj hin varesavo than, kaj mange me šaj odpočovinav?'

⁵⁰ Či oda savoro na kerđa miro vast?'

⁵¹ Tumen manušale! San zacate a tumare jile hine zaphandle. Na šunen pre tumare kana! Furt džan pro Sentno Duchos, avke sar the tumare dada!

⁵² Pre savo prorokos na džanas tumare dada? A murdarenas olen, save imar anglal phenenas, hoj avela o Čačipnaskero. Les tumen akana diňan andre a the murdarďan.

⁵³ Tumen priľan o Zakonos le aňjelendar a na dolľkerďan les!''

Le Štefanoskero meriben

⁵⁴ Sar oda on šunde, dukhandľila len andro jile a andre bari cholľ randenas le dandenca pre leste.

⁵⁵ O Štefan, pherdo le Sentne Duchoha, hazďňa o jakha pro űebos a dikhľa le Devleskeri slava the le Ježiš te ačhel pre čači (pravo) sera le Devleske.

⁵⁶ A phenda: "Dikhen, o űebos dikhav phundrado a le Čhas le Manušeskere te ačhel pre čači (pravo) sera le Devleske."

⁵⁷ Akor on vriskinde zorales, phandle andre o kana a jekhetane pre leste chučile.

⁵⁸ Tradle les avri andral o foros a čhivkerenas andre leste le barenca. O švedki peske thode peskere gada paš jekh terno manuš, savo pes vičinelas Saul.

⁵⁹ Čhivkerenas andro Štefan le barenca a ov vičinelas pro Raj a phenelas: "Raja, Ježiš, prile mire duchos!"

⁶⁰ Palis peľa pro khoča a vičinda zorale hangoha: "Rajeja, ma rachin lenge kada binos!" Sar oda phenda, zasuča.

O Saul džal pro zboros

8 Le Saul na sas nič pre oda, hoj le Štefan murdaren. Andre oda džives džanas bares pro zboros, so sas andro Jeruzalem. Savore pes rozdenašle andre

Judsko phuv the andre Samarija, ale o apoštola na denašle.

² O pobožna murša parunde le Štefan a igen pal leste rovenas.

³ Ale o Saul musarelas o zboros. Džalas andro khera, lelas le muršen the le džuvlen a thovelas len andro bertení.

⁴ Ola, save pes rozdenašle, džanas than thanestar a vakerenas o evaňjelium.

O evaňjelium pes kazinel andre Samarija

⁵ O Filip geľa andro foros Samarija a kazinelas lenge le Kristus.

⁶ O manuša jekhetane igen šunenias oda, so vakere-las o Filip, a dikhenas o zazraki, so kerelas.

⁷ Bo andral o but manuša, saven sas nalače duchi, gele ola duchi avri bara vikaha a but kaliki the bange sastíle avri.

⁸ Andre oda foros avľa baro radišagos.

⁹ Mek angloda sas andre oda foros jekh murš, savo pes vičinelas Šimon. Ov vražinelas a o nipi andre Samarija ča denas avri o jakha. Ov phenelas pal peste, hoj hino vareko baro.

¹⁰ Savore, bare the cikne, les igen šunenias a phene-nas: "Ov hino odi Bari zor le Devleskeri."

¹¹ Igen mištes les šunenias, bo imar but kerelas maškar lende o čari.

¹² Ale sar pačandíle le Filiposke, savo lenge vakere-las pal o Devleskero krališagos the pal o nav Ježiš Kristus, denas pes te bolel o murša the o džuvľa.

¹³ The oda Šimon pačandíľa, diňa pes te bolel a lik-erelas pes paš o Filip. A sar dikhľa, hoj pes keren bare đivi the zazraki, čudalinelas pes.

¹⁴ Sar pes o apoštola andro Jeruzalem došunde, hoj e Samarija priiľa o lav le Devleskero, bičhade ke lende le Peter the le Jan.

¹⁵ Sar ode doavle, modlínenas pes vaš lenge, hoj te chuden le Sentne Duchos,

¹⁶ bo mek na avľa tele pre ňikaste lendar a sas ča bolde andro nav le Rajeskero le Ježišoskero.

¹⁷ Akor pre lende thovenas o vasta a on prilenas le Sentne Duchos.

¹⁸ Sar dikhľa o Šimon, hoj o Sentno Duchos pes del aleha, hoj o apoštola pre lende thoven o vasta, anda lenge love

¹⁹ a phendá: "Den the man odi zor, hoj oda, pre kaste thovava o vasta, te chudel le Sentne Duchos."

²⁰ O Peter leske phendá: "Mi kirňon tire love the tuha, bo gondolindal tuke, hoj le Devleskero daros peske šaj te cinel vaš o love!"

²¹ Tu na sal jekh amendar andre kadi buči, bo tiro jilo nane žužo anglo Del.

²² Vašoda ker pokaňje andral kada binos a mang le Rajes, či tuke na odmukela oda, so tuke gondolínehas andro jilo.

²³ Bo dikhav, hoj sal andre kirko hamišagos a phand-lo andro binos!"

²⁴ O Šimon odphendá: "Mangen le Rajes vaš ma, hoj te na avel pre ma nič olestar, so phendán."

²⁵ Sar imar o apoštola dine avri o svedectvo a vak-erde le Rajeskero lav, avenas pale andro Jeruzalem. Pal o drom vakerenas avri o evaňjelium andro but Samari-tanska gavora.

O Filip the o eunuchos

²⁶ O aňjelos le Rajeskero prevakerđa ko Filip a phendá leske: "Ušti a dža pro juhos, pro drom, so džal andral o Jeruzalem tele andre Gaza." Pal oda drom pes imar akana igen na phirel.

²⁷ O Filip uštiľa a geľa. Dikhľa muršes Etiopanos, savo sas baro manuš, eunuchos la Kandakakero, la kralov-nakero andral e Etiopija. Ov sas upral savoro lakero barvalípen a sas andro Jeruzalem te lašarel le Devles.

²⁸ Džalas pale khere, bešelas pre peskero verdan a genelas le prorokos Izaiaš.

²⁹ O Duchos phendá le Filiposke: "Dža pašeder a dochude o verdan."

³⁰ Sar doavľa o Filip šundá les te genel le prorokos Izaiaš a phendá: "Či achalos oda, so genes?"

³¹ Ov odphendá: "Sar šaj achaluvav, te mange ňiko na sikavel?" A mangľa le Filip, hoj te bešel paš leste a te džal leha.

³² Oda, so genelas le Devleskere Lavestar, sas kada: "*Lidžanas les sar ovečka te murdarel a avke sar o bakroro na del avri o hangos anglal oda, ko les stri-hinel, avke aňi ov na phundrađa peskero muj.*"

³³ *Ov sas tele dikhlo a na sudzinde les avke, sar kam-plá. A ko šaj vakerela pal leskero potomstvos, te leskero dživípen pes lel pal e phuv?"*

³⁴ O eunuchos odphendá le Filiposke: "Mangav tut, pal kaste vakerele o prorokos? Pal peste, či pal avreste?"

³⁵ Akor chudľa o Filip te vakerele ole lavestar andral o Izaiaš a phenelas leske o evaňjelium pal o Ježiš.

³⁶ Sar džanas pal o drom, dikhle varesavo paňi a o eunuchos phendá: "Dikh, paňi! So mange braňinel te del pes te bolel?"

³⁷ [O Filip phendá: "Te pačas andral calo tiro jilo, šaj." Ov odphendá: "Pačav, hoj o Ježiš Kristus hino le Devleskero Čhavo."]

³⁸ Zaačhađa o verdan. Soduj džene, o Filip the o eu-nuchos, gele andro paňi a boldá les.

³⁹ Sar avle avri andral o paňi, o Duchos le Rajeskero iľa le Filip het. O eunuchos les buter na dikhľa a džalas peskere dromeha radišagoha.

⁴⁰ O Filip pes arakhľa andro Azotus. Phirelas a vakere-las savore ole forenge o evaňjelium, medik na doavľa andre Cezarea.

O Saul pes visarel

9 O Saul mek furt džalas pro učeňika le Rajeskere a kamelas len te murdarel avri. Avľa ko nekbareder rašaj

² a mangľa lestar o lila pre sinagogi andro Damaskus, hoj te rodel avri ole muršen the le džuvlen,

save džan pal o drom le Rajeskero, hoj len te phandel andre a te anel len andro Jeruzalem.

³ Androda, sar džalas, ačhila pes, sar imar sas pašes paš o Damaskus, hoj jekhvareste les zaučharda andre o kham andral o ņebos.

⁴ Peľa pre phuv a šundā o hangos, so leske phendā: "Saul, Saul, soske pre mande džas?"

⁵ O Saul phendā: "Ko sal, Rajeja?" O Raj odphendā: "Me som o Ježiš, pre kaste tu džas."

⁶ Ušti a dža andro foros, ode pes tuke phenela, so kempel te kerel."

⁷ Ola murša, save leha džanas jekhetane, na džanenas pre oda so te phenel. Bo šunde o hangos (hlasos), ale ņikas na dikhle.

⁸ Paľis uštiľa o Saul pal e phuv a sar phundrađa o jakha, na dikhelas nič. Avke les ile vastestar a ligende les andro Damaskus.

⁹ A trin džives sas avke, hoj na dikhelas, na chalas, aňi na pijelas.

¹⁰ Andro Damaskus sas varesavo učeňikos, savo pes vičinelas Ananijaš. Leske phendā o Raj andro videňje: "Ananijaš!" Ov odphendā: "Kade som, Rajeja."

¹¹ Avke leske o Raj phendā: "Ušti a dža pre ulica, so pes vičinel Rovno. Andre le Judaskero kher arakh avri le Saul andral o Tarzus, bo ipen akana pes modľinel.

¹² Ov dikhľa andro videňje muršes, savo pes vičinelas Ananijaš, savo avľa paš leste a thoda pre leste o vasta, hoj te dikhel."

¹³ O Ananijaš odphendā: "Rajeja, but manušendar šundom pal kada murš, hoj keci but nalačhipen kerđa tire sentnenge andro Jeruzalem.

¹⁴ A the kade les hin zor le nekbareder rašajendar te phandel andre savoren, save lašaren tiro nav."

¹⁵ Ale o Raj leske phendā: "Dža, bo me mange les kidňom avri, hoj prekal leste te kerav miri buči, hoj ov te anel miro nav anglo aver narodi, anglo kraľa the anglo čhave le Izraeloskere.

¹⁶ Me leske sikavava, keci but mušinel a te precerpinel vaš miro nav."

¹⁷ Akor odgeľa o Ananijaš a geľa andro kher, thoda pre leste o vasta a phendā: "Saul, phrala! O Raj o Ježiš, savo pes tuke sikađa pro drom, sar avehas kade, man bičhada, hoj pale te dikhes a te aves pherdo le Sentne Duchoha."

¹⁸ Takoj leske pele tele pal o jakha ajse sar šupini. Pale predikhľa, uštiľa a diňa pes te bolel.

O Saul kazinel andro Damaskus

¹⁹ Paľis chaľa o chaben a chudľa zor. A ačhila vajkeci dživesa le učeňikenca andro Damaskus.

²⁰ Takoj vakerelaš andro sinagogi, hoj o Ježiš Kristus hin le Devleskero Čhavo.

²¹ Savore, save les šunde pes čudalinenas a phenenas: "Či nane oda ov, savo andro Jeruzalem murdarelas olen, save lašarenas kada nav? A the kade avľa, hoj len te phandel andre a te lidžal anglo nekbareder rašaja."

²² O Saul sas furt zoraleder andro lav. Igen džanelas te dokazinel, hoj o Ježiš hin o Kristus, dži avke, hoj o Židi, save bešenas andro Damaskus, pre oda našti odphenenas.

O Saul denašel andro Jeruzalem

²³ Sar imar pregeľa but dživesa, dovakerde pes o Židi maškar peste, hoj les murdarena

²⁴ a stražinenas o brani rat-džives, hoj les te murdaren, ale o Saul pes pal oda dodžanľa.

²⁵ Vašoda o učeňika les rači mukle tele pal o muros le lanoha andro košaris.

²⁶ Sar avľa o Saul andro Jeruzalem, kamľa te džal paš o učeňika, ale daranas lestar, bo na pačanas leske, hoj the ov hin o učeňikos.

²⁷ Ale o Barnabaš les iľa a ligendā ko apoštola. Vakerđa lenge avri, sar dikhľa le Rajes pro drom, hoj leha vakerđa a the sar andro Damaskus vakerelas bi e dar andro nav le Ježišoskero.

²⁸ Paľis o Saul dživelas lenca jekhetane andro Jeruzalem.

²⁹ Vakerelas andro nav Ježiš bi e dar a vesekedinelas pes le Židenca, save vakerenas andre Grekengeri čhib. Ale on les kamenas te murdarel.

³⁰ No, sar pes pal oda dodžanle o phrala, ile les tele andre Cezarea a bičhade andro Tarzus.

³¹ Avke sas andro khangera pal cali phuv Judsko the andre Galileja the andre Samarija smirom. Sikľonas a dživenas andre pačiv anglo Raj. O khangera baronas a o Sentno Duchos lenge pomožinelas.

O Peter sastarel le Eneaš

³² Sar phirelas o Peter than thanestar, avľa the ko sentna †, save bešenas andre Lidda.

³³ Arakhľa ode varesave manušes, savo pes vičinelas Eneaš, savo sas kalika a ochto beršendar pašľolas ča andro haďos.

³⁴ O Peter leske phendā: "Eneaš, o Ježiš Kristus tut sastarel avri! Ušti a ker pal tu o haďos!" O Eneaš takoj uštiľa.

³⁵ Dikhle les savore, save bešenas andre Lidda the andro Šaron a visarde pes ko Raj.

Uštavel la Tabita andral o meriben

³⁶ Andre Joppa sas jekh učeňička, savi pes vičinelas Tabita, so hin andre Grekengeri čhib Dorkas ††. Oj kerełas but lačhipen a pomožinelas le čorenge.

³⁷ Andre ola dživesa pes ačhila, hoj nasvaliľa a muľa. Sar la thode le paňeha, ligende la andre upruno kher.

³⁸ Vašoda, hoj e Lidda hiňi pašes paš e Joppa a o učeňika pes došunde, hoj ode hin o Peter, bičhade ke leste duje muršen a mangelas les: "Av sigo ke amende!"

³⁹ O Peter uštiľa a geľa lenca. Sar doavľa ode, ligende les andre upruno kher. Ačhile pašal leste savore vdovi

† Oda hin: pačabnaskere manuša. †† Oda hin prethodo Srnka.

a sikavenas leske o rokli the o gada, so lenge kerelas e Dorkas, medik sas lenca.

⁴⁰ Akor bičhađa o Peter savoren avri, bandiľa pro khoča a modlińda pes. Palis visaliľa ke muli a phenda lake: "Tabito, ušti!" Oj phundrađa o jakha a sar dikhľa le Peter, bešľa peske.

⁴¹ Ov lake podińa o vast a hazdńa la. Palis vičinda le sentnen the le vdoven a ačhađa la džidona anglal lende.

⁴² Dodžanľa pes pal oda cali Joppa a but džene pačandile andro Raj.

⁴³ O Peter ačhiľa buter časos andre Joppa ke varesavo Šimon, savo kerelas le cipenca.

O Kornelius dikhel viđeńje

10 Andre Cezarea sas varesavo murš, savo pes vičinelas Kornelius. Ov sas velitelis upral o šel slugađa andral e čata, so la vičinenas Italsko.

² Ov sas pobožno manuš a ov the cali leskeri famelija lašarenas le Devles. Pomožinelas but le čoreńge a furt pes modlinelas ko Del.

³ Jekhvar, vaj trin orendar pal o dilos, žužes dikhľa andro viđeńje le Devleskere ańjelos. O ańjelos leske phenda: "Kornelius!"

⁴ Ov pes pre leste zadikhľa a daraha phenda: "So, Rajaja?" O ańjelos leske odphenda: "Tiro lačhipen, so kerehas le čoreńge, the o modlitbi sas avrišunde a o Del pre tu na bisterđa.

⁵ Avke akana bičhav le muršen andre Joppa a vičin le Šimon, savo pes vičinel Peter.

⁶ Ov bešel ke varesavo Šimon, savo kerel le cipenca a leskero kher hin paš o moros. Ov tuke phenela, so kampil te kerel."

⁷ A sar odgeľa het o ańjelos, so leha vakerelas, vičinda peske o Kornelius duje sluhlen the jekhe pobožne slugadiš, savo paš leste furt ačhelas.

⁸ Sar imar lenge sa vakerđa avri, bičhađa len andre Joppa.

O Peter dikhel viđeńje

⁹ Pre aver džives, sar sas ola murša pro drom a imar sas pašes paš o foros, vaj pro dilos o Peter geľa pro pados pes te modlinel.

¹⁰ Igen bokhaliľa a kamelas te chal. Medik leske kerehas o chaben, dikhľa viđeńje.

¹¹ Dikhľa o űebos phundrado a andral avelas tele pre phuv vareso sar bari lepeda, so sas mukli tele le štare agorenca.

¹² Andre sas savore štarpindreńgere džviri, save ča hin pre phuv, o dzive džviri, ola, save pes cirden pal e phuv, the o čirikle.

¹³ A prevakerđa ke leste o hangos (hlasos): "Ušti Peter, murdar a cha!"

¹⁴ O Peter phenda: "Na, Rajaja! Mek šoha (ńikda) na chaľom vareso melalo abo nažužo."

¹⁵ Oda hangos leske pale phenda: "Pre oda, so o Del žužarda, tu ma phen melalo!"

¹⁶ Kada savoro pes ačhiľa trival a palis e lepeda sas takoj ili upre andro űebos.

¹⁷ Medik o Peter andre peste gondolinelas, so leske o Del kamľa te phenel prekal oda, so dikhľa, doavle paš e brana ola murša, saven bičhađa o Kornelius, bo arakhle o drom paš le Šimonoskero kher.

¹⁸ Vičinde a phučle, či ode na bešel o Šimon, saves vičinen Peter.

¹⁹ Sar mek gondolinelas o Peter pal oda, so dikhľa, phenda leske o Duchos: "Dikh, trin murša tut roden.

²⁰ Ušti, dža tele pal o pados a dža lenca! Ma odcirde tut lendar, bo me len bičhadom."

²¹ Sar avľa o Peter tele pal ola murša, phenda: "Me som oda, kas roden. Soske pal mande avľan?"

²² On odphende: "O Kornelius, velitelis upral o šel slugađa amen bičhađa. Ov hino čačipnaskero manuš, savo daral le Devlestar. Calo Židoviko narodos del les calo pačiv. O sentno ańjelos leske phenda, hoj te vičinel tut andre peskero kher a te šunel tire lava."

O Peter džal ko Kornelius

²³ Akor len vičinda o Peter andre, dińa len pačiv a presute ode. Pre aver džives o Peter odgeľa lenca a gele leha the varesave phrala andral e Joppa.

²⁴ Pre dujto džives doavle andre Cezarea. O Kornelius len imar užarelas a vičinda peske la famelija the peskere pašutne prijatelēn.

²⁵ Sar geľa o Peter andre a o Kornelius les dikhľa, peľa pro khoča a bandolas anglal leste.

²⁶ Ale o Peter les hazdńa a phenda: "Ušti, the me som ča manuš."

²⁷ Vakerelas leha, geľa andre a dikhľa ode but zgele manušen.

²⁸ A phenda lenge: "Tumen džanen, hoj le Židoske nane domuklo te džal abo te arakhel pes cudze manušeha. Ale mange sikađa o Del, hoj te na phenav pal varesavo manuš, hoj hino nažužo abo melalo.

²⁹ Vašoda avľom a na odphendom tuke. A akana phučav, soske vaš ma bičhadan?"

³⁰ O Kornelius phenda: "Anglo štar džives trin orendar † man modlinavas andre miro kher. A jekhvareste angle ma ačhiľa murš andro igen parne gada

³¹ a phenda: 'Kornelius, tiro lačhipen, so kerehas le čoreńge, the o modlitbi sas avrišunde a o Del pre tu na bisterđa.

³² Bičhav andre Joppa a vičin le Šimon, saves vičinen Peter. Ov bešel paš o moros andro kher ko Šimon, savo kerel le cipenca. [Sar avela, phenela tuke savoro.]

³³ Avke bičhadom pal tu a tu mištes kerdal, hoj avľal. Akana sam kade savore anglo Del, hoj te šunas savoro, so tuke phenda o Raj."

Vakerel andro kher le Korneliuskero

³⁴ Akor chudľa o Peter te vakerel: "Akana čačes ačaluľav, hoj o Del na dikhel jekhe manušes barederes sar avres.

† *Greķengeri čhib: eńa orendar*

³⁵ Ale le Devleske hin pre dzeka sako andral dojekh narodos, ko lestar daral a dživel andro čačipen.

³⁶ Bo džanen oda lav, so bičhađa o Del te kazinel le Izraelitenge, o smiromoskero evaňjelium le Ježišoskero Kristoskero, savo hin o Raj upral savore.

³⁷ Tumen džanen pal oda, so pes ačhiľa pal cali Judsko. Chudľa pes ada andre Galileja pal o bolipen, so vakerelas o Jan.

³⁸ A tumen džanen pal o Ježiš andral o Nazaret, sar les o Del pomakhľa le Sentne Duchoha the la zoraha a phirelas pal e phuv, kerelas o lačhipen le manušenge a sastarelas savoren, save sas tel e zor le bengeskeri, bo o Del sas leha.

³⁹ Amen sam ola, save dikhľam oda, so kerelas andre Židoviko phuv the andro Jeruzalem. Palis les murdarde a primarde les pro kerestos.

⁴⁰ Les pro trito džives o Del uštađa a sikavelas pes amenge.

⁴¹ Na sikavelas pes savore manušenge, ale ča le švedkenge, saven peske o Del imar anglal kidňa avri. Oda sam amen, save leha chahas the pijahas paloda, sar uštifľa andral o meriben.

⁴² Prikazinda amenge, hoj te vakeras le manušenge a te das lenge te džanel, hoj ov hino le Devlestar dino te sudzinel le džiden the le mulen.

⁴³ Pal leste vakeren savore proroka, hoj andre leskero nav ela odmukle o bini sakoneske, ko pačala andre leste."

O Sentno Duchos avel pro Nažidi

⁴⁴ Medik o Peter vakerelas kala lava, avľa o Sentno duchos tele pre savorende, save šunenas o lav.

⁴⁵ O pačabnaskere le Židendar, save avle le Peteriha pes čudalinenas, hoj the pro manuša, save nane Židi, hin avričhido o Sentno Duchos,

⁴⁶ bo šunde len te vakerel andre aver čhiba a te lašarel le Devles. Akor o Peter phendľa:

⁴⁷ "Či šaj vareko zaačhavel te bolel le paňeha olen, save priile le Sentne Duchos avke sar the amen?"

⁴⁸ A prikazinda len te bolel andro nav Ježiš Kristus. Palis les mangle, hoj te ačhel ode vajkeci dživesa.

O Peter pale andro Jeruzalem

11 Palis šunde o apoštola the o phrala andre Judsko, hoj the o manuša, save nane Židi, priile le Devleskero lav.

² Sar avľa o Peter upre andro Jeruzalem, dovakerenas leske o pačabnaskere Židi

³ a phende: "Geľal andro khera ke ola, save nane občhinde (obrezimen) a chahas lenca!"

⁴ O Peter lenge chudľa sa te vakerel avri:

⁵ "Somas andro foros Joppa, modľinavas man a dikhľom videňje. Avelas pre mande andral o űebos vareso sar bari lepeda, so avelas tele le štare agorenca a doavľa dži paš ma.

⁶ Mištes man andre zadikhľom a dikhľom štarpin-drengere dživiri, dzive dživiri, olen, save pes cirden pal e phuv, the le čiriklen.

⁷ A šundom o hangos, savo mange phendľa: 'Ušti Peter, murdar a cha!'

⁸ Me phendom: 'Na Rajeja! Mek šoha (ňikda) na geľa andre miro muj vareso melalo abo nažužo!'

⁹ O hangos andral o űebos mange pale phendľa: 'Ma phen melalo pre oda, so o Del žužarda!'

¹⁰ Ada sa pes ačhiľa trival a palis sas savoro pale ilo upre andro űebos.

¹¹ Takoj paloda doavle trin murša, saven bičhade ke ma andral e Cezarea, paš o kher, kaj bešavas.

¹² O Duchos mange phendľa, hoj te džav lenca a te na odcirdav man lendar. Avle manca the kala šov phrala a geľam andro kher ke oda murš.

¹³ Vakerelas amenge, hoj dikhľa andre peskero kher le aňjelos, savo ačhiľa angle leste a phendľa leske: 'Bičhav andre Joppa vajkeci muršen a vičin le Šimon, saves vičinen Peter.

¹⁴ Ov tuke vakerela o lava, savenca aveha zachraňimen tu the calo tiro kher.'

¹⁵ Androda, sar chudľom te vakerel, avľa pre lende o Sentno Duchos, avke sar anglođa pre amende.

¹⁶ A avľa mange pre godi oda lav le Rajeskero, sar phendľa: 'O Jan bolelas le paňeha, ale tumen avena bolde le Sentne Duchoha.'

¹⁷ Te len o Del diňa ajso daros sar the amen, save pačandifľam andro Raj Ježiš Kristus, akor ko som me, hoj man te ačhavav le Devleske?"

¹⁸ Sar oda šunde, preačhile te vakerel. Lašarenas le Devles a phende: "The le manušenge, save nane Židi, diňa o Del, hoj pes te visaren ke leste a te el len o dživipen."

O evaňjelium andre Antiochija

¹⁹ Andre ola pharipena, so avle akor, sar murdarde le Štefan, pes rozdenašle ola, save pačanas le Rajeske. Gele dži andre Fenicija, Ciprus the Antiochija. Vakerenas o evaňjelium ča le Židenge a űikaske avreske.

²⁰ Ale varesave lendar sas the andral o Ciprus the Cirenija a sar avle andre Antiochija, vakerenas the le Grekenge avri pal o Ježiš Kristus.

²¹ Le Rajeskeri zor sas lenca a but džene pačandile a visalile ko Del.

²² E khangeri andro Jeruzalem pes došundľa pal oda a bičhade le Barnabaš andre Antiochija.

²³ Sar ode avľa a dikhľa oda lačhipen (milost) le Devlestar, radisalifľa a phenelas lenge, hoj te ačhen paš o Raj cale jilenca.

²⁴ O Barnabaš sas lačho manuš, pherdo le Sentne Duchoha the le pačabnaha. A igen but nipi pačandile andro Raj.

²⁵ Palis geľa o Barnabaš andro Tarzus te rodel avri le Saul. Sar les arakhľa, anda les andre Antiochija.

²⁶ Ačhiľa pes avke, hoj pes calo berš zdžanas andre odi khangeri a sikavenas but nipen. Andre Antiochija ešebnovar (peršovar) dine le učeňiken nav "Krestana".

²⁷ Andre ola dživesa avle o proroka andral o Jeruzalem andre Antiochija.

²⁸ Jekh lendar, o Agabus, uštíla a prekal o Duchos prorokinda, hoj pal cali phuv avela bari bokh. Odi bokh avla čačes, sar sas Cisarís o Klaudius.

²⁹ Vašoda pes savore učeňika dovakerde, hoj sako dela ajci, keci šaj del, hoj te pomožinen le phralenge andre Judsko.

³⁰ Palís oda kerde a bičhade le Barnabaš the le Saul, hoj te anel o love le vodcenge andre khangeri andro Jeruzalem.

O Herodes džal pro apoštola

12 Andre oda časos o kralís Herodes chudla igen te džal pre varesave andral e khangeri.

² Ov la šablaha murdarđa le Jakob, le Janoskere phrales.

³ Sar dikhla, hoj oda sas pre dzeka le Židenge, diňa, hoj te zalen the le Peter. Ipen akor sas o Inepos, sar pes chal o mare bi o droždi.

⁴ Sar les chudla, thoda les andre bertena a diňa, hoj pre leste te merkinen štar čati po štar slugađa. Pal e Patradí les kamla te anel anglo nipi.

⁵ Medik likerenas le Peter andre bertena, o manuša andre khangeri pes vaš leske na preačhenas te modlinel.

O Peter avriilo andral e bertena

⁶ Andre odi rat, sar imar les kamla o Herodes te anel anglo nipi, sovelas o Peter maškar o duj slugađa. Ov sas zaphandlo duje lancenca a anglo vudar sas mek o slugađa, save stražinenas e bertena.

⁷ A jekhvareste o aňjelos le Rajeskero avla andre bertena a ačhila paš leste. Švicinelas avke sar kham. Demađa le Peter andre sera, uštađa les a phenda: "Sigo, uští!" A pal o vasta leske pele o lanci.

⁸ O aňjelos leske phenda: "Phand pašal tu o sirimos a uri o sandalki!" O Peter oda kerđa a o aňjelos leske palís phenda: "Čhiv pre tu tiro plaštos a av pal ma!"

⁹ O Peter džalal pal leste a aňi na džanelas, hoj oda, so pes ačhel prekal o aňjelos, hin čačes. Gondolinelas peske, hoj džal suno.

¹⁰ Sar pregele ešebne (perše) slugađen the dujtone, doavle paš e trastuňi brana, savaha pes džal andro foros, a phundrađa pes lenge korkori pestar. Sar avle avri, pregele jekh ulica a o aňjelos lestar takoj odgela.

¹¹ O Peter avla ke peste a phenda: "Akanake čačes džanav, hoj o Raj bičhađa peskere aňjelos a iľa man avri andral e Herodesiskere vasta the andral oda savoro, so mange kame o Židi te kerel."

¹² Sar imar savoreske achaliľa, avla paš o kher la Mariakero. Oj sas e daj le Janoske, saves vičinen the Marek. Ode sas zgele but manuša a modlinenas pes.

¹³ O Peter durkinda pre brana a avla e čhajori, savi pes vičinelas Rode, te phučel, ko oda hin.

¹⁴ Sar prindžarđa le Peteriskero hangos, avke pes radisaľolas, hoj leske na phundrađa, ale denašla te phenel, hoj o Peter ačhel angle brana.

¹⁵ Ale on lake phende: "So, diliňi sal?" No oj ačhelas furt pre peskero lav a phenelas, hoj oda hin čačo. On palís phende: "Oda leskero aňjelos hin."

¹⁶ O Peter mek furt durkinelas. Sar phundrađe, dikhle les a igen pes čudalinenas.

¹⁷ Ov lenge sikađa le vasteha, hoj te čhiten a chudla lenge te vakerel, sar les o Raj iľa avri andral e bertena a phenda: "Den ada te džanel le Jakoboske the le phralenge." Palís gela pre aver than.

¹⁸ Sar vidňisalíla, daranas pes o slugađa a chudle pes maškar peste te vesekedinel, bo na džanle, so pes ačhila le Peteriha.

¹⁹ O Herodes les diňa te rodel. Sar les na arakhla, vičinda peske le slugađen, hoj lendar te phučel, so pes ačhila. Palís len diňa te murdarel. Paloda odgela andral e Judsko te bešel andre Cezarea.

O Herodes merel

²⁰ O Herodes chalas cholí pro Tirčana the pro Sidončana, ale on pes savore jekhetane sthoda a avle pal leste, bo lenas o chaben le kraliskera phuvatar. Sar imar prevakerde le Blastus, le kraliskere nekbaredere manušes a dochudle les pre peskeri sera, mangle le Herodes vaš o smirom.

²¹ Palís, sar avla oda džives, urđa pes o kralís andre kraliskere gada, bešla peske pro tronos a prevakerđa ke lende.

²² A o manuša zoraha vriskinenas: "Kada hin hangos le Devleskero, nane manušeskero!"

²³ Androda o aňjelos le Rajeskero les ode pro than marda, bo na diňa e slava le Devleske. Chanas les o kirme a muľa.

²⁴ O lav le Devleskero buter šundolas a dodžalal furt buteder maškar o manuša.

²⁵ Sar imar o Barnabaš the o Saul dokerde oda, pre soste sas bičhade, gele het andral o Jeruzalem. Ile peha le Jan, saves vičinenas the Marek.

O Barnabaš the o Saul bičhade avri

13 Andre khangeri andre Antiochija sas proroka the učitelja o Barnabaš, o Šimon, saves vičinen Kalo, o Lucius andral e Cirenija, o Manahem (savo sas avriбарardo paš o guverneris Herodes) the o Saul.

² Sar služinenas le Rajeske a poscinenas, phenda lenge o Sentno Duchos: "Oden mange le Barnabaš the le Saul pre odi buči, pre savi len me kidňom avri."

³ Akor poscinenas, modlinenas pes, thode pre lende o vasta a premukle len.

O drom andro Ciprus

⁴ On sas bičhade le Sentne Duchostar a avle tele andre Seleukia a odarik gele la loďaha pro ostrovos Ciprus.

⁵ Sar avle andro Salamis, vakerenas o lav le Devleskero andre le Židengere sinagogi. O Jan sas lenca a pomožinelas lenge.

⁶ Sar pregele calo ostrovos dži andro Pafos, arakhle ode varesave čarodejnikov, falošne prorokos. Ov sas o Židos Barjezus

⁷ a sas le guverneriha, savo sas godaver murš a vičinelas pes Sergius Pavlus. A o guverneris peske vičinda le Barnabaš the le Saul, bo kamelas te šunel le Devleskero lav.

⁸ Ale o Elimas, o čarodejnikov (bo avke pes prethovel leskero nav) lenge ačhelas pro lav a kamelas te odlel le guverneris andral o pačaben.

⁹ Akor o Saul, savo pes vičinel the Pavol, sas pherardo le Sentne Duchoha. Dikhla pre leste

¹⁰ a phenda: "Tu sal le bengeskero čhavo, pherdo andro klamišagos the džungipen – tu, savo džas pre dojekh čačipen. Kana preačheha te previsarel o čače dro-ma le Devleskere?"

¹¹ Avke akana, dikh! Avla pre tu o vast le Rajeskero: Korisafoha a na dikheha pre varesavo časos o kham!" A takoj pre leste avla o kalipen, phirelas pašal peste a rodelas, ko les šaj lidžal vastestar.

¹² Sar dikhla o guverneris, so pes ačhila, pačandiła a čudalinelas pes upral le Rajeskero sikaviben.

Andro foros Antiochija

¹³ Palis o Pavol the ola, save sas leha, gele la lođaha andral o Pafus a gele andro foros Perga andre Pamfili-ja. Ale o Jan (saves vičinenas the Marek) lendar odgeła andro Jeruzalem.

¹⁴ Andral e Perga gele andro foros Antiochija andre Pisidija. Pro Šabbat (sombatone) gele andre sinagoga a beše peske.

¹⁵ Sar imar pregende andral o Zakonos the andral o Proroka, bičhade pal lende ola, save lidžan e sinagoga, hoj lenge te phenen: "Phralale, te tumen hin varesavo lav, so šaj pomožinel le manušenge, phenen lenge!"

¹⁶ Akor uštila o Pavol, sikađa le vasteha, hoj te šunen a phenda: "Muršale andral o Izrael the tumen, save pes daran le Devlestar, šunen!"

¹⁷ Le Izraeloskero Del peske kidňa avri amare daden a hazdňa len upre, akor sar dživenas sar cudzinci andre Egiposko phuv a peskera bara zoraha len iła odarik avri.

¹⁸ Paloda pre pušta o Del likerelas avri oleha, so on kerenas vaj saranda (40) berš.

¹⁹ Palis zničinda efa naroden andre phuv Kanaan a odi phuv le Izraelitenge rozulađa.

²⁰ A paloda vaj štar šel the penda berš (450) len delas sudcen dži paš o prorokos Samuel.

²¹ Akorestar peske mangelas kralis a o Del lenge diňa pro saranda (40) berš le Saul. Ov sas le Kišoskero čhavo andral o kmeños Benjamin.

²² Sar les palis iła het, diňa lenge le David kraliske, pal savo diňa svedectvo a phenda pre leste: '*Arakhlom le David, le Izajoskere čhas, muršes pal miro jilo, savo furt kerel miri voła.*'

²³ Andral leskero potomstvos ačhađa o Del le Ježiš sar Spasitelis, avke sar diňa o lav le Izrael.

²⁴ O Jan imar anglo Ježiš phenelas savore Izraelitenge, hoj pes te visaren le binendar a te den pes te boel.

²⁵ Sar imar o Jan dokerelas peskeri buči, phenda: 'Me na som oda, ko tumenge gondolinen, hoj som. Ale dikhen, pal ma avel oda, kaske na som hodno te phundravel o kamašli pro pindre.'

²⁶ Phralale, čhave le Abrahamskere, the tumen, save pes daran le Devlestar! Tumenge hin bičhado kada lav, so tumen šaj zachrañinel.

²⁷ Bo ola, save bešen andro Jeruzalem, the lengere vodci les na prindžarde, ale aleha, hoj les odsudzinde, pes ačhile o lava le prorokengere, so pes genel sako Šabbat.

²⁸ Na arakhle pre leste nič, vaš soske mušinda te merel, ale on the avke mangelas le Pilat, hoj les te del te murdarel.

²⁹ Sar imar dokerde savoro, so hin pal leste pisimen, ile les tele pal o kerestos a thode les andro hrobos.

³⁰ Ale o Del les uštađa andral o meriben

³¹ a palis ov pes buter dživesa sikavelas olenge, save andral e Galileja avle jekhetane leha andro Jeruzalem. On hine akanake leskere švedki anglo nipi.

³² The amen tumenge phenas: Oda lav, so o Del diňa amare daden,

³³ akana dolikerđa amenge, lengere čhavage, bo uštađa le Ježiš andral o meriben. Avke sar hin pisimen andro dujto Žalm: '*Tu sal miro čhavo, me adadžives ačhilom tiro Dad.*'

³⁴ Oda, hoj les uštađa andral o meriben, hoj te na kirňol leskero telos andro hrobos, phenda kavke: '*Dava tumen sentne the lačhe požehnañja, so diňom le David.*'

³⁵ A phenel pre aver than: '*Tu na domukeha tire sentnoneske, hoj leske te kirňol o telos andro hrobos.*'

³⁶ O David andre peskero pokoleñje kerđa le Devleskeri voła. Sar muła, sas thodo paš peskere dada a leskero telos kirňila andro hrobos,

³⁷ ale oleske, kas o Del uštađa andral o meriben, o telos na kirňila.

³⁸ Kamav, hoj te džanen, phralale, hoj prekal leste tumenge šaj el odmukle o bini the savoro, sostar tumen našti ospravedlñindas le Mojžišoskero Zakonos.

³⁹ Andre leste hin ospravedlñimen sako, ko pačal.

⁴⁰ Merkinen pre peste, hoj te na avel pre tumende oda, so imar anglal phende o Proroka:

⁴¹ '*Dikhen, tumen, save asan le Devlestar, čudalinen a merena! Bo andre tumare dživesa kerava vareso baro, soske tumen na pačana, choc te tumenge vareko pal oda vakerela.*'"

⁴² Sar avenas avri andral e sinagoga, mangelas len o manuša, hoj lenge buter pal oda te vakeren the pre aver Šabbat.

⁴³ Sar pes rozgele andral e sinagoga, but Židi the manuša, save priile o Židoviko pačaben, džanas pal o Pavol the pal o Barnabaš. On lenca vakerenas a

phenenas lenge, hoj te ačhen andre le Devleskero lačhipen.

⁴⁴ Pre aver Šabbat pes zgele vaj calo foros te šunel le Devleskero lav.

⁴⁵ Sar dikhle o Židi ole but nipen, avľa andre lende e zavist'. Chudle te vakerel pre oda, so vakerelas o Pavol, previsarenas leskere lava a namištes vakerenas pre leste.

⁴⁶ Ale o Pavol the o Barnabaš na daranas te phenel: "Tumenge pes mušinda ešeb (peršo) te vakerel le Devleskero lav. Ale te o lav tumen na kamen a korkore tumendar odčhiven o večno dživipen, oddžas tumendar a džas ko manuša, save nane Židi.

⁴⁷ Bo amenge o Raj avke prikazinda: *'Thod'om tut, hoj te lidžas e zachrana savore narodenge dži andro posledno agor la phuvake.'*"

⁴⁸ Sar oda šunde o Nažidi, radisaľonas a lašarenas o lav le Rajeskero. A pačandile savore, save sas avrikidle andro večno dživipen

⁴⁹ a o lav le Rajeskero pes rozlidžalas pal cali odi phuv.

⁵⁰ Ale o Židi marde upre le pobožne the anglune džuvľen the le foroskere vodcen pre oda, hoj te džan pro Pavol the pro Barnabaš, a tradle len avri andral peskeri phuv.

⁵¹ Vašoda on marde tele o prachos pre oda than pal peskere pindre a gele andre Ikonija.

⁵² A o učeňika sas pherarde le radišagoha the le Sentne Duchoha.

O Pavol the o Barnabaš andre Ikonija

14 The andre Ikonija pes ačhila oda, hoj gele andre Židoviko sinagoga a sar vakerenas, pačandile igen but Židi the Greki.

² Ale o Židi, save na pačandile, marde upre le Nažiden a choľarde len pro phrala.

³ O apoštola ačhile ode buter časos a vakerenas bi e dar o lav pal le Devleskero lačhipen (milost). A o Raj pes pridžanelas ke lende avke, hoj pes ačhenas bare divi the zazraki prekal lengere vasta.

⁴ O nipi andro foros pes rozulade: Jekh sas le Židenca a dujte le apoštolenca.

⁵ O Židi, o Nažidi the lengere vodci peske phende, hoj džana pre lende a čhivkerena andre lende le barenca.

⁶ Ale on pes olestar dodžanle a denašle andre phuv Likaonija, andro fori Listra the Derbe the andro phuva ode pašes

⁷ a vakerenas ode o evaňjelium.

Andre Listra

⁸ Andre Listra bešelas varesavo murš, savo sas kalika pro pindre, kanastar ulıľa (pes narodzinda), a mek šoha (ňikda) na phirda.

⁹ Oda manuš šunelas le Pavol te vakerel a ov pre leste dikhľa. Sar dikhľa, hoj les hin pačaben, hoj šaj el sastardo,

¹⁰ vičinda: "Ušti upre a ačh pre tire pindre!" Ov chučıľa upre a phirelas.

¹¹ A sar dikhle o nipi, so kerđa o Pavol, chudle te vriskinel a phende andre le Likaonengeri čhib: "O devla pes sikade sar manuša a avle tele paš amende!"

¹² Le Barnabaš vičinenas Zeus a le Pavol Hermes, bo ov lidžalas o lav.

¹³ O rašaj andral o Zeuskero chramos, so sas anglo lengero foros, anda biken the venci ke brana a ov the o nipi kamle le apoštolenge te obetinel.

¹⁴ Ale sar oda šunde o apoštola o Barnabaš the o Pavol, čhingerde pre peste o gada, denašle maškar o nipi

¹⁵ a vičinenas: "Muršale, so oda keren? Se the amen sam ča manuša avke sar the tumen. A vakeras tumenge o evaňjelium, hoj te visaľon kale mule modlenar ko džido Del, savo kerđa o űebos the e phuv the o moros the savoro, so andre hin.

¹⁶ Andre čirlatune časi mukelas te džal savore narden lengere dromenca,

¹⁷ no the avke na preačhelas o Del te del te džanel pal peste. Kerelas o lačhipen, delas o brišind andral o űebos the ulipen pro maľi, pherarelas amen le chabeneha the le radišagoha andro jile!"

¹⁸ Kale lavenca len varesar phares prevakerde a za ačhade, hoj lenge te na obetinen.

¹⁹ Ale paloda avle o Židi andral e Antiochija the andral e Ikonija a marde upre le nipen. Čhivkerenas le barenca andro Pavol, ligende les avri andral o foros a gondolinenas peske, hoj muľa.

²⁰ No sar ačhile o učeňika pašal leste, uštila a geľa lenca andro foros. A pre aver džives geľa le Barnabašha andro Derbe.

Aven pale andre Antiochija

²¹ Sar imar dovakerde o evaňjelium andre ola foros a kerde but učeňiken, visarde pes pale andre Listra, andral Ikonija the andre Antiochija.

²² Ode zoraľarenas le učeňiken pro duchos a povzbudzinenas len, hoj te ačhen andro pačaben. Phenenas lenge, hoj andre le Devleskero krališagos musaj te džal prekal o but pharipena.

²³ Andro khangera la modľitbaha the le postoha kidenas avri le phurederen. Palis len denas andro vasta le Rajeske, andre savo pačandile.

²⁴ Sar pregele e phuv Pisidija, doavle andre phuv Pamfilija.

²⁵ Sar dovakerde o lav andre Perga, gele andre Atalija.

²⁶ Odarik gele la loďaha pale andre Antiochija. Angloda ole forostar sas bičhade avri, sar o phrala len dine andre le Rajeskere vasta ke buči, so akana dokerde.

²⁷ Sar doavle, zgele pes le manušenca andre khangeri a vakerenas lenge, so kerđa lenca o Del a sar phundraďa le Nažidenge o drom ko pačaben.

²⁸ Ačhile ode le učeňikenca but časos.

O apoštola pes arakhen andro Jeruzalem

15 Andral e Judsko avle tele varesave džene a sikavenas le phralen, hoj našti ena zachrañimen, te pes na občhinena (obrezinena) avke, sar oda diña o Mojžiš.

² Vašoda pes lenca vesekedinenas o Pavol the o Barnabaš. Dovakerde pes, hoj o Pavol the o Barnabaš the vareko lendar te džal ola vecaha upre andro Jeruzalem ko apoštola the ko phuredera.

³ Akor len bičhađa e khangeri a gele prekal e Fenicija the Samarija. Vakerenas pal oda, hoj the aver narodi pes visarde ko Del a savore phralen sas baro radišagos olestar.

⁴ Sar doavle andro Jeruzalem, priiľa len e khangeri, o apoštola the o phuredera a phenenas lenge avri savoro, so lenca kerďa o Del.

⁵ Ale varesave le Farizejendar, save pačandile, uštile a phenenas le manušenge: "Ola manuša, save nane Židi, pes mušinen te občhinel a kempel lenge te prikazinel, hoj te dolikeren le Mojžišoskero Zakonos."

⁶ Akor pes o apoštola the o phuredera zgele, hoj pal oda te gondolinen.

⁷ Paloda, sar imar buter vakerenas, uštifa o Peter a phendā lenge: "Phralale! Tumen džanen, hoj o Del man kidña avri tumendar anglo but časos, hoj mandar te šunen the aver nipi o evaňelium a te pačan.

⁸ O Del, savo prindžarel o jile, sikađa, hoj len prilel oleha, hoj len diña le Sentne Duchos avke sar the amen.

⁹ Ov kerďa lenca avke sar the amenca, sar žužardā lengere jile le pačabnaha avke sar amare.

¹⁰ Kamen akana te choľarel le Devles oleha, hoj thoven pre meň le učeñikenge ola phare prikazi, so na birinenas te lidžal aňi amare dada, aňi amen?

¹¹ Na! Amen pačas, hoj prekal o lačhejileskeriben (milost), so del o Raj o Ježiš Kristus, avaha zachrañimen avke sar the on."

¹² Savore ola but manuša preačhile te vakerel akor, sar šunde le Barnabaš the le Pavol te vakerel, save bare đivi the zazraki kerďa o Del prekal lende maškar o manuša, save nane Židi.

¹³ Sar preačhile te vakerel, phendā o Jakob: "Phralale, šunen man!

¹⁴ O Šimon akana vakerelas pal oda, sar peske o Del ešebnovar (peršovar) kidña avri manušen le Nažiden-dar, hoj te aven leskere nipi.

¹⁵ Oleha pasinen the o lava le Prorokengere, sar hin pisimen:

¹⁶ *Palis avava pale a ačhavava o rozpelo kher le Davidoskero. Oda, so hin tele čhido, pale ačhavava a thovava les te ačhel pre peskero than,*

¹⁷ *hoj the okla manuša te roden le Rajes: Savore, save nane Židi, saven vičindom, hoj te aven mire. Avke phenel o Raj, savo kerel kada savoro'.*

¹⁸ Imar čirlastar pes oda džanel.

¹⁹ Vašoda phenav, hoj na kempel te kerel pharipen le Nažidenge, save pes visarde ko Del,

²⁰ ale kempel lenge te pisinel lil a te phenel andre, hoj te na keren lubipen, te na chan o rat, oda, so hin obetimen le modlenge, aňi o mas le tasade džvirinendar.

²¹ Bo le Mojžišoskero Zakonos pes imar čirla genel sako Šabbat (sombat) andro sinagogi a leskere lava vakeren andre dojekh foros."

O lil le Nažidenge andre Antiochija

²² Akor o apoštola the o phuredera the caľi khangeri peske phende, hoj ela mištes te kidaha avri amendar muršen a bičhavaha len andre Antiochija. Bičhade le Barnabaš the le Pavol a lenca bičhade le Juda, saves vičinen Barsabaš, the le Silas, save sas anglune murša maškar o phrala.

²³ Pisinde a bičhade lenca kada lil: "O apoštola, o phuredera the o phrala andral o Jeruzalem pozdravinen le phralen andral o aver narodi andre Antiochija, Sirija the Cilicija.

²⁴ Šundam, hoj varesave džene amendar tumen na den smirom le lavenca a previsarde tumare goďa, bo phenen, hoj tumen te občhinen (obrezinen) a te dolikeren o Zakonos. Ale amen lenge nič na phendā,

²⁵ vašoda pes savoredžene jekhetane dovakerďam, hoj kidaha avri muršen a bičhavaha len ke tumende le Barnabašihā the le Pavloha. On hine amare phrala, saven kamas,

²⁶ murša, save dine peskere džživipena vaš o nav amare Rajeskero le Ježišoskero Kristoskero.

²⁷ Vašoda bičhavas le Juda the le Silas, hoj the on kore tumenge oda te phenen.

²⁸ Bo le Sentne Duchoske the amenge pes avke dičholas, hoj te na das tumenge nisavo pharo prikazis, ča oda, so igen kempel:

²⁹ Hoj te na keren lubipen, te na chan o rat, oda, so hin obetimen le modlenge, aňi o mas le tasade džvirinendar. Te kada savoro dolikerena, mištes kerena. Ačhen Devleha!"

³⁰ Sar pes rozgele, doavle andre Antiochija, zvičinde le manušen andre khangeri a dine lenge o lil.

³¹ Sar les pregende, radisaľile oleske.

³² The o Juda the o Silas sas proroka, vašoda podhazdenas le phralen andro pačaben a but lavenca len zoralarenas.

³³ Sar imar ode ačhile varesavo časos, rozgele pes le phralenca andro smirom a gele pale ke ola, save len bičhade.

³⁴ [No o Silas dikhelas avke, hoj ode te ačhel.]

³⁵ The o Pavol a Barnabaš ačhile andre Antiochija a sikavenas. On the but aver džene vakerenas le Rajeskero lav.

O Barnabaš pes rozdžal le Pavloha

³⁶ Pal vajkeci dživesa phendā o Pavol le Barnabašiske: "Džas ča pale te dikhel amare phralen pal savore fori, savenge vakerďam le Rajeskero lav, a dikha-ha, sar lenge džal."

³⁷ O Barnabaš kamla, hoj peha te len le Jan, saves vičinen the Marek.

³⁸ Ale le Pavloske pes dičholas avke, hoj les na kampel peha te lel. Bo angloda odgeľa lendar, sar sas andre Pamfilija a buter lenca na služinelas.

³⁹ Prekal oda pes vesekedinenas maškar peste avke, hoj pes rozgele. O Barnabaš peha iľa le Marek a gele pre loďa andro Ciprus,

⁴⁰ ale o Pavol peske kidňa avri le Silas. O phrala pes modlīnenas vaš lende a dine len andre le Rajeskere vasta a avke gele het.

⁴¹ Ov phirelas pal e Sirija the Cilicija a podhazdelas o khanger a andro pačaben.

O Pavol lel peha le Timoteus

16 Avke doavľa o Pavol andre Derbe the Listra. Ode sas varesavo učēnikos, savo pes vičinelas Timoteus. Leskeri daj sas pačabnaskeri Židkiňa a leskero dad sas Grekos.

² O phrala andral e Listra the Ikonija pal leste mištes vakerenas.

³ O Pavol kamla, hoj leha te džal pro drom. Avke občhinda (obrezinda) les prekal o Židi, save ode bešen, bo sako džanelas, hoj leskero dad sas Grekos.

⁴ Sar phirenas pal ola fori, phenenas lenge, hoj te dolikeren oda, so phende o apoštola the o phuredera andral o Jeruzalem.

⁵ O khanger a zoraľonas andro pačaben a džives so džives sas buter džene.

O drom andre Macedonija

⁶ O Sentno Duchos lenge na domukľa te vakerel o lav andre Azija, vašoda pregele e Galatsko phuv the e Frigija.

⁷ Sar avle andre phuv Mizija, kamenas te džal dureder andre Bitinija, ale o Duchos le Ježišoskero lenge na domukľa.

⁸ Avke pregele e Mizija a avle tele andre foros Troada.

⁹ Ode dikhľa o Pavol rači viđeňje: Varesavo murš, Macedončanos, ačhelas a mangelas les: "Av andre Macedonija a pomožin amenge!"

¹⁰ Sar dikhľa o viđeňje, takoj paloda rodahas drom, sar te džal andre Macedonija. Avke amen oleske ačaluvas, hoj o Raj amen ode vičinda, hoj lenge te vakeras o evaňjelium.

¹¹ Akor geľam la loďaha andral e Troada rovnones pro ostrovos Samotrake a pre aver džives andro Neapolis andre Macedonija.

E Lidija pačal

¹² Odarik geľam andro Filipi, so hin ešebno (peršo) foros andre Rimanengeri provincija Macedonija. Samas andre oda foros vajkeci dživesa.

¹³ Pro Šabbat (sombatone) geľam pal e foroskeri brana paš o paňi, kaj peske gondolīnenas, hoj pes

zdžana o Židi pre modlitba. Bešlam peske a vakerahas le džuvľenca, save pes ode zgele.

¹⁴ Šunelas amen varesavi džuvľi, savi pes vičinelas Lidija, savi bikenelas o lole pochtana a sas andral o foros Tijatira. Oj pes daralas le Devlestar a o Raj lake phundraďa o jilo, hoj mištes te ačaloľ oda, so vakerel o Pavol.

¹⁵ Sar pes bolda oj the savore manuša andral lakero kher, mangelas amen: "Te phenen pal mande, hoj man hin pačaben andro Raj, akor aven andre miro kher a bešen ke mande." A prevakerďa amen.

O Pavol the o Silas andre bertena

¹⁶ Ačhiľa pes, sar džahas pre modlitba, hoj pes amenca arakhľa varesavi čhaj, sava sas vraščengero duchos. Sar vražinelas, zarodelas peskere rajenge bare love.

¹⁷ Oj phirelas pal o Pavol the pal amende a vriskinelas: "Kala manuša hine o služobňika le Nekkbaedere Devleskere a on tumenge phenen, sar šaj aven zachraňimen!"

¹⁸ Kada kerelas but dživesa. O Pavol pre oda choľisalīľa, vašoda visalīľa a phenda ole duchoske: "Prikazinav tuke andro nav Ježiš Kristus, dža andral late avri!" A o duchos latar takoj geľa het.

¹⁹ Ale sar dikhle lakere raja, hoj oleha našade o love, chudle le Pavol the le Silas a ľidžanas len pro pľacos anglo nekbareder manuša ole foroske.

²⁰ Ande len anglo velīteľa a phende: "Kala manuša hine Židi a keren vzbura andre amaro foros

²¹ a sikaven o zviki, so amen o Rimana našti aňi priľas, aňi dolikeras."

²² Androda džanas pre lende the o nipi a o sudci cirdle tele pal lende o gada a dine len le pacenca te marel.

²³ Sar imar len but marde, čhide len andre bertena a le stražňikoske phende, hoj len mištes te stražinel.

²⁴ Sar chudľa o stražňikos oda prikazis, čhida len andre andruňi bertena a o pindre lenge zaphandľa andro kaštune kľigina.

²⁵ Ale pal jepaš rat o Pavol the o Silas pes modlīnenas a giľavenas o giľa pre le Devleskeri chvala a o bertenoša len šunenias.

²⁶ Jekhvareste razisalīľa e phuv avke, hoj la bertenakere zakladi pes čhalade. Takoj phundrile savore vudara a savore puta pes otkerde.

²⁷ Sar uštīľa o stražňikos a dikhľa, hoj savore vudara andre bertena hine phundrade, cirdňa avri e šabľa a kamla pes te murdarel. Gondolīnelas peske, hoj o bertenoša denašle.

²⁸ Ale o Pavol vičinda zorale hangoha: "Ma ker tuke nič nalačo, bo savore sam ade!"

²⁹ Sar peske mangľa e lampa, denašľa andre a peľa predarandutno anglo Pavol the Silas.

³⁰ Ľigenda len avri a phenda: "Rajale, so kampil te kerel, hoj te avav zachraňimen?"

³¹ On leske phende: "Pača andro Raj Ježiš Kristus a aveha zachraňimen tu the calo tiro kher!"

³² Vakerenas leske the savorenge andre leskero kher le Rajeskero lav.

³³ Sar mek sas rači, iľa len a thođa (omorde) lenge avri o rani. A takoj paloda pes diňa te bolel ov the savore andre leskero kher.

³⁴ Palis len iľa upre andre peskero kher, thođa lenge pro skamind o chaben a radisařolas caľa peskera famelijaha, hoj pačandila andro Del.

³⁵ Sar sas džives, bičhade o sudci le slugađen, hoj te džan te phenel: "Premuk kale manušen!"

³⁶ O stražnikos la bertenakero phendā le Pavloske: "O sudci bičhade le slugađen, hoj tumen te premukav. Avke akana džan avri andro smirom."

³⁷ Ale o Pavol lenge phendā: "Ešeb (peršo) amen marde angle savore nipi a aňi amen na sudzinde, choc te sam Rimaňike občana! A paloda amen čhide andre bertena, ale akana amen počoral traden avri?" Na. Mušinen te avle a korkore amen te lidžal adarik.

³⁸ O slugađa dine te džanel ola lava le sudcenge. On pes predarandile, sar šunde, hoj hine Rimaňike občana.

³⁹ On avle a odmangle pes lenge. A sar len odligende avri, mangelas len, hoj te džan het andral o foros.

⁴⁰ Sar avle avri andral e bertena, gele ke Lidija, dikhle le phralen a radisařile lenge. Palis gele het.

O apoštola andre Tesalonika

17 Sar pregele prekal o fori Amfipolis the Apoloni-ja, avle andre Tesalonika, kaj sas e sinagoga le Židengeri.

² Avke sar furt kerelas, o Pavol geľa maškar lende a trival pal peste pro Šabbat lenca vakerelas pal oda, so hin pisimen.

³ Sikavelas lenge andral o Devleskero Lav, hoj te achalon, hoj o Kristus mušinda te cerpinel a pro trito džives te uštel andral o meriben. Phendā: "Oda Ježiš, pal savo me tumenge vakerav, hin o Kristus."

⁴ Varesave lendar pačandile a pridine pes ko Pavol the ko Silas. Lenca pačandile mek but Greki, save pes daranas le Devlestar, the but anglune džuvľa.

⁵ Ale o hamišne (žarlive) Židi peske ile pal e ulica varesave živaňen, hoj te maren upre le manušen the calo foros. Gele pro Jasonskero kher a kamle te anel le Pavol the le Silas anglo nipi.

⁶ Sar len na arakhle, ile le Jason the varesave phralen anglo uradnika ole foroske a vrisकिनenas: "Kala, save upre maren calo svetos, avle the kade ⁷ a o Jason len priiľa andre peskero kher. Kala savore džan pro Cis-ariskere zakoni, bo phenen, hoj aver dženo, o Ježiš, hi-no kralis!"

⁸ Kavke marde upre le nipen the le uradniken andral oda foros, save oda šunenas.

⁹ Ispidle pro Jason the pro phrala, hoj te den o love, palis len premukle.

Andre Berea

¹⁰ O phrala takoj rači bičhade le Pavol the Silas andre Berea. Sar ode doavle, gele andre Židoviko sinagoga.

¹¹ On sas buter otkerde prekal oda sar okla andral e Tesalonika. Priile o lav radišagoha a sako džives rode-nas avri andral le Devleskero Lav, či oda hin čačes avke.

¹² Avke pačandile but džene lendar, the mek but anglune džuvľa the murša andral e Grecko.

¹³ Ale sar pes dodžanle o Židi andral e Tesalonika, hoj o Pavol the andre Berea vakerel le Devleskero lav, avle the ode a marenas upre le manušen, hoj te džan pre lende.

¹⁴ Akor o phrala takoj bičhade le Pavol, hoj te džal dži ko moros. Ale o Silas the o Timoteus ačhile ode.

¹⁵ Ola, save džanas le Pavloha, les ligende dži andro Ateni. On pes visarde andre Berea a ile le Pavlostar prikazis prekal o Silas the Timoteus, hoj so neksigeder te aven pal leste.

O Pavol andro Ateni

¹⁶ Medik len o Pavol užarelas andro Ateni, leskero duchos andre leste cholisařolas, sar dikhľa, hoj andro foros hin pherdo modli.

¹⁷ Vašoda vakerelas andre sinagoga le Židenca the olenca, save pes daranas le Devlestar. The pro placos vakerelas sako džives olenca, save odarik ča avke predžanas.

¹⁸ Chudle pes leha te vesekedinel varesave filozofa the mudrci: O Epikurejci the Stoici. Jekh phenenas: "So kamel kada beblošis te phenel?" A aver phenenas: "Avke oda dičhol, hoj vakerel pal varesave aver devľa." Bo o Pavol lenge vakerelas pal o Ježiš the pal o uštiben andral o meriben.

¹⁹ Chudle les, ligende les pro Areopagos a phende: "Kamas te džanel, so oda hin oda nevo sikaviben, so tu vakeres.

²⁰ Bo oda, so šunen amare kana, hin vareso, so mek na šundam. Vašoda kamľamas te džanel, sar oda hin."

²¹ Bo savore Atenčana the o cudze manuša, save ode bešenas, pre nisoste avreste na užarelas, ča pre oda, hoj te šunen abo te phenen vareso nevo.

²² Akor o Pavol terdila maškaral pro Areopagos a phendā: "Muršale andral o Ateni! Pal savoreste dikhav, hoj san igen pobožna manuša.

²³ Sar phiravas pal o foros, predikhavas mange tumare sentne thana a arakhľom the oltaris, pre savo hin pisimen: 'Le devleske, saves na prindžaras.' Oles, kas tumen lašaren, ale na prindžaren, pal oda tumenge me vakerav.

²⁴ O Del, savo kerđa o svetos the savoro, so andre hin, ov hin o Raj le űeboske the la phuvake a na bešel andro chrami kerde le manušengere vastendar.

²⁵ Aňi pes leske na služinel le manušeskere vastenca, sar te leske vareso kampľahas, bo ov korkoro del savoreske o dživipen, o dichos the savoro.

²⁶ Ov kerda jekhe ratestar savore manušen, hoj te bešen pal cali phuv. Diña le manušen časos, keci te dživel, the o than, kaj te bešel.

²⁷ O Del oda kerda, hoj o manuša les te roden, hoj šaj pes te nacirden ke leste a te arakhen les. Se ov nane dur ñikastar amendar.

²⁸ Bo andre leste dživas, čhalavas pes a sam. Avke sar oda phende the varesave tumare basñika: 'Bo amen sam the leskero potomstvos.'

²⁹ Akor te sam le Devleskero potomstvos, našti peske gondolinas, hoj o Del dičhol avri sar vareso le somnakastar, le rupostar, abo le barendar – sar oda, so o manuš gondolinda avri a kerda peskere vastenca.

³⁰ O Del imar na leperel ola časi, sar o manuša na prindžarahas leskeri voľa, ale akana phenel savore manušenge všadzik, hoj pes te visaren peskere nalačhe dromendar.

³¹ Bo diña jekh džives, andre savo sudzinela spravodlišagoha calo svetos prekal o jekh murš, saves pre oda kidña avri. O Del čačes oda sikađa savorengoleha, hoj les uštađa andral o meriben."

³² Ale sar šunde oda, hoj les uštađa andral o meriben, chudle varesave džene te asal, ale aver džene phende: "Kamas tut pal oda te šunel te vakerel the dujtovar."

³³ Avke o Pavol geľa lendar het.

³⁴ No varesave murša pes pridine ke leste a pačandile. Maškar lende sas o Dionis Areopagitas the e džuvli Damaris a lenca mek aver.

O Pavol andro Korint

18 Palis odgeľa o Pavol andral o Ateni a avľa andro foros Korint.

² Ode arakhľa varesave Židos, o Akvilas, savo sas andral o Pontus a nadočirla avľa peskera romňaha la Priscillaha andral e Talijañiko. Soduj džene ode avle, bo o Cisarís Klaudius diña avri oda, hoj savore Židi mušinen te džal het andral o Rim. O Pavol pes pridiña paš lende,

³ a vašoda, hoj džanelas te kerel o stani avke sar on, bešelas ke lende a kerelas lenca.

⁴ Vakerelas andre sinagoga sako Šabbat (sombat) a prevakerelas le Židen the le Greken.

⁵ Sar avle andral e Macedonija o Silas the o Timoteus, o Pavol diña calo peskero časos pre oda, hoj te vakerel o lav a te svedčinel le Židenge, hoj o Ježiš hino Kristus.

⁶ Ale sar pro Pavol o Židi džanas a namištes vakernas pre leste, o Pavol razinda avri peskere gada le pračostar a phenda lenge: "Tumaro rat pre tumaro šero! Me som žužo olestar. Akanastar džava ko manuša, save nane Židi."

⁷ Odgeľa odarik a geľa andro kher ko Titus Justus, savo lašarelas le Devles. Leskero kher sas igen pašes paš e sinagoga.

⁸ O Krispus, angluno andral e sinagoga, pačandila le Rajeske caľa peskera famelijaha. A sar šunenas, but aver manuša andro Korint pačanas a denas pes te bolel.

⁹ O Raj phenda le Pavloske rači andro videñje: "Ma dara tut. Vaker a ma av čhit!

¹⁰ Bo me som tuha a ñiko pre tu na thovela o vast, hoj tuke te kerel vareso nalačo, bo hin man andre kada foros but manuša."

¹¹ A ačhiľa ode berš the šov čhon a sikavelas len le Devleskero lav. ¹² Ale sar sas o Gallion guverneris andre Achaja, uštile o Židi jekhetane pro Pavol a ligende les pro sudos.

¹³ Phende: "Kada marel upre le manušen, hoj te lašaren le Devles avke, sar o Zakonos na domukel!"

¹⁴ Sar imar o Pavol kamľa te prevakerel, phenda o Gallion le Židenge: "Židale! Te kerda vareso nalačo, abo te na dolikerda amaro Zakonos, šundomas tumen avri, avke sar kempel.

¹⁵ Ale te tumen vesekedinen vaš o lava, vaš o nava the vaš tumaro Zakonos, oda hiñi tumari veca. Bo me na kamav te avel sudcas oleske."

¹⁶ A čhidľa len odarik avri.

¹⁷ Akor chudle savore Židi le Sostenes, savo lidžalas e sinagoga, te marel pre oda than, kaj pes sudzinel. Ale o Gallion pre oda ñič na phenda.

Pale andre Antiochija

¹⁸ O Pavol ode ačhiľa mek but dživesa a palis pes rozgeľa le phralenca. Geľa la lođaha andre Sirija a geľa leha e Priscilla the o Akvilas. Andre Kenchrea peske diña te strihinel o bala, bo diña ajso lav.

¹⁹ Sar avle andro foros Efezus, o Pavol len ode mukľa a geľa korkoro andre sinagoga, kaj vakerelas le Židencu.

²⁰ Sar les mangenas, hoj ode te ačhel buter časos, ov na kamľa.

²¹ Ale, sar pes lenca rozgeľa, phenda: "Te kamela o Del, avava pale ke tumende." Avke geľa la lođaha andral o Efezus.

²² Sar doavľa andro pristavos Cezarea, geľa upre andro Jeruzalem te dikhel e khangeri a odarik geľa andre Antiochija.

²³ Sar ode imar ačhiľa varesavo časos, geľa pale dureder pal e Galatsko phuv a palis pal e Frigija a podhazdelas savore učeñiken andro pačaben.

O Apollo andro Efezus

²⁴ Varesavo Židos andral e Alexandrija, savo pes vičinelas Apollo, avľa andro Efezus. Ov sas murš, savo džanelas te vakerel a sas zoralo andro Devleskero lav.

²⁵ O Apollo sas imar avrisikado le Rajeskere dromeske. Ov sas igen horľivo andro duchos a vakere las a sikavelas mištes pal o Raj Ježiš, ale prindžarelas ča le Janoskero bolipen.

²⁶ A chudľa bi e dar te vakerel andre sinagoga. Sar les šunde e Priscilla the o Akvilas, ile les ke peste a feder vakerde leske avri le Devleskero drom.

²⁷ Sar o Apollo kamľa te džal andre Achaja, o phrala leske pomožinde oleha, hoj pisinde le učeñikenge andre Achaja, hoj les te prilen. Sar ode avľa, igen po-

možinda olinge, save pačandile prekal o lačhipen (milost) le Devleskero.

²⁸ O Apollo zorales phenelas pre godi le Židenge a anglo manuša sikavelas andro le Devleskero Lav, hoj o Ježiš hin o Mesijašis.

O Pavol andro Efezus

19 Sar o Apollo sas andro Korint, o Pavol phirelas pal o brehengere phuva a avla andro Efezus.

Ode arakhla varesave učeņiken

² a phendā lenge: "Chudlan le Sentne Duchos akor, sar pačandilan?" On leske odphende: "Mek aņi na šundam, hoj hin o Sentno Duchos."

³ Ov lendar phučla: "Ta akor, save bolipnaha san bolde?" On odphende: "Le Janoskere bolipnaha."

⁴ O Pavol phendā: "O Jan bolelas vašoda, hoj o manuša pes te visaren le binendar a phenelas lenge, hoj te pačan andre oda, ko avela pal leste, andro Ježiš Kristus."

⁵ Sar oda šunde, dine pes te bolel andro nav le Rajeskero Ježišoskero.

⁶ Palis o Pavol pre lende thođa o vasta, avla pre lende o Sentno Duchos a vakerenas andro čhiba the prorokinenas.

⁷ On savore sas vaj dešuduj (12) murša.

⁸ O Pavol geļa andre sinagoga a vakerelas ode bi e dar vaj trin čhon. Vakerelas the sikavelas len pal o krališagos le Devleskero.

⁹ Sar pes varesave na poddenas, na šunen as namištes vakerenas anglo manuša pal o Devleskero drom, odgeļa lendar. Kidņa avri le učeņiken a vakere-las lenca andre hala le Tirannoskeri.

¹⁰ Ada likerđa duj berš a savore, save bešen as andre provincija Azija, o Židi the o Greki, šunde le Rajeskero lav.

¹¹ O Del kerelas bare veci prekal o vasta le Pavloskere.

¹² Vašoda o manuša anenas ko nasvale o khosne the o leketi, savenca pes chudle le Pavlostar. O nas-valibena lendar takoj oddžanas a o nalače duchi lendar džanas avri.

Le Skevoskere čhave

¹³ Ale sas ode the varesave Židi, save phirenas foros forostar te tradel avri le duchen. On kamenas te tradel avri le nalače duchen andral o manuša andro nav le Rajeskero Ježišoskero a phenenas: "Prikazinas tumenge andro nav le Ježišoskero, pal savo o Pavol vakere: Džan het!"

¹⁴ Kerenas oda o ehta čhave le Skevaskere, savo sas o nekbareder Židoviko rašaj.

¹⁵ Ale o nalačo duchos lenge odphendā: "Le Ježiš prindžarav, the pal o Pavol džanav, ale ko san tumen?"

¹⁶ Oda manuš, andre kaste sas o nalačo duchos, len chudla a savoren ajci marđa, hoj on lange the zmarde denašle andral oda kher.

¹⁷ Savore Židi the Greki, save bešen as andro Efezus, pes olestar dodžanle, avla bari dar pre savorende a lašarenas o nav le Rajeskero, le Ježišoskero.

¹⁸ But olendar, save pačandile, avenas a vakerenas avri o bini so kerenas.

¹⁹ Ola, save čarinenas, anenas peskere zvitki a labarenas len angle savorende. Sar gende, avle pre oda, hoj ola zvitki monas penda ezera (50 000) rupune.

²⁰ Avke le Devleskero lav barolas a zoraolas.

Džan pro apoštola

²¹ Sar pes kala veci dokerde, o Pavol peske phendā, hoj predžala e Macedonija the e Achaja a hoj palis džala andro Jeruzalem. Phendā: "Ačhava ode a palis mušinav te džal te dikhel o Rim."

²² A bičhađa andre Macedonija dujen olendar, save pašal leste kerenas, le Timoteus the le Erastos. No ov mek ačhiļa varesavo časos andre Azija.

²³ Andre oda časos pes igen vesekedinenas andro Efezus o manuša vaš o evaņjelium.

²⁴ Bo varesavo manuš Demetrios kerelas e buči le rupeha. Ov kerelas cikne rupune khangerora la devliņake Dijanake a delas olen, save leske kerenas buči, but te zarodel.

²⁵ Ov pes lenca zgeļa a the mek avre manušenca, save kerenas kale vecenca, a phendā: "Muršale, tumen džanen, hoj kala bučatar amen but zarodas.

²⁶ Dikhen a šunen, hoj kada Pavol na ča andro Efezus, ale maj pal cali provincija Azija cirdņa upre but manušen a prevakerđa len. Ov phenel, hoj oda, so keren le manušengere vasta, nane devla.

²⁷ Akana na ča, hoj amari buči šaj našavas a polokes la ņikaske na kampela, ale mek the o chramos la bara devliņake la Dijanake pes na likerela vaš ņisoste a musarela pes e slava olake, kas lašarel cali Azija the calo svetos."

²⁸ Sar oda šunde, avla andre lende e cholī a vriskinenas: "Bari hiņi e Dijana andral o Efezus!"

²⁹ Andre calo foros kerenas bari vika a savoredžene jekhetane denašle andro teatros (divadlos). Cirdle pal peste the le Gajos the le Aristarchos, save sas Macedončana, a phirenas jekhetane le Pavloha.

³⁰ O Pavol kamla te džal maškar o manuša, ale o učeņika les na mukle.

³¹ The varesave uradņika andral e Azija, save sas leskere prijateļa, bičhade ke leste a mangle les, hoj te na džal andro teatros.

³² Avke sas, hoj dojekh lendar vriskinelas vareso aver, bo savoredžene sas sar diline a but lendar aņi na džanenas, soske pes zgele.

³³ O Židi cirdle avri le nipendar le Alexander a ispidle les anglal. O Alexander kerđa le vasteha, hoj te čhiten a kamla te prevakerel ko manuša.

³⁴ Ale sar prindžarde, hoj hino Židos, chudle savoredžene vaj duj ori jekhetane te vriskinel: "Bari hiņi e Dijana andral o Efezus!"

³⁵ Sar o foroskero pizaris zaačhađa le manušen, phendā: "Muršale andral o Efezus, savore manuša džā-

nen, hoj o foros Efezus likerel o chramos la bara Di-janake the ole sentne bareske, so peľa andral o űebos.

³⁶ Vašoda, hoj pes pre oda na del nič te phenel, kam-pel tumenge te zaačhel, hoj te na keren varesavo dil-iűipen.

³⁷ Bo andan kade kale manušen a on na vakerenas namištes pre tumari devli.

³⁸ Te hin le Demeter the olen, save hine leha, vareso pre varekaste, pre oda hin o foroskere sudi the o prokonzula. Ode pre peste mi vakeren avri.

³⁹ A te kamen mek vareso aver, oda pes dela te vak-erel akor, sar vičinaha le manušen, hoj pes te zdžal pal o Zakonos.

⁴⁰ Bo amen šaj den andre vaš e vzbura, so pes ačhiľa adadžives. Bo aűi na džanas sar te phenel avri, so pes ačhiľa." Pal ola lava rozmuķľa le manušen.

O drom andre Macedonija the Troada

20 Sar pes imar preačhile te vesekedinel, vičinda o Pavol ke peste le učeűiken, zoraľarda len, obchu-dle pes a palis odgeľa andre Macedonija.

² Sar pregeľa ola phuva, delas len zor andro pačaben butere lavenca a avľa andro Grecko.

³ Ačhiľa ode trin čhon a palis kamľa te džal la lođaha andre Sirija. Vašoda, hoj o űidi pes pre leste kidenas, rozgondoliűda pes, hoj avela pale prekal e Macedonija.

⁴ Džanas leha o Sopater le Pyroskero čhavo andral e Berea, o Aristarchos the o Sekundus andral e Tesaloni-ka, o Gajos andral o Derbe, o Timoteus a andral e Azija o Tichikus the o Trofimius.

⁵ On gele anglal a użarenas amen andre Troada.

Uštavel le Eutichus andral o meriben

⁶ Pal o Inepos, sar pes chal o bi o droždengere mare, geľam la lođaha andral o Filipi a pandže dživesenca doavľam pal lende andre Troada, kaj ačhiľam efa džives.

⁷ Ešebno džives andro kurko, sar pes zgeľam te phagerel o maro, o Pavol lenge vakerelas but o lav dži pal jepaš rat, bo pre aver džives kamľa te džal het.

⁸ Andre upruno kher, kaj samas zgele, sas but lampi.

⁹ Jekh terno manuš, o Eutichus, bešelas andre obla-ka. Vašoda, hoj o Pavol but vakerelas, cirdelas les pro soviben a zasuča avke zorales, hoj peľa pal o trito poschodos tele. Sar les hazdle, sas mulo.

¹⁰ Ale o Pavol geľa tele, čhidľa pes pre leste, obchudľa les a phenda: "Ma daran tumen, bo leskeri duša hiűi andre leste."

¹¹ Palis geľa pale upre, phagerelas a chalas o maro. Vakerelas lenca dži tosara a palis geľa het.

¹² Le terne manušes ande džidones a savoren sas olestar radišagos.

¹³ O Pavol amenge phenda, hoj kamel te džal pro pindre andro Assos. Amen geľam ode la lođaha siged-er a odarik majindam le Pavol te lel pre lođa.

¹⁴ Sar pes amenca arakhľa andro Assos, iľam les an-dre lođa a avľam andre Mitilena.

¹⁵ Odarik geľam la lođaha het, pre dujto džives avľam paš o Chios a pre trito džives geľam la lođaha paš o Samos. Palis pre aver džives avľam andro Miletus.

¹⁶ Bo o Pavol peske phenda, hoj obdžala o Efezus a na ačhela ode, hoj pes te na zľikerel andre Azija. Bo kamelas te avel pro Letűice (Turice) andro Jeruzalem, te pes oda diňahas.

O Pavol oddžal andral o Miletus

¹⁷ Andral o Miletus bičhaďa andro Efezus a vičinda ke peste le phurederen andral e khangeri.

¹⁸ Sar avle paš leste, phenda lenge: "Tumen džanen, hoj ešebne dživesestar, kanastar avľom andre Azija, somas calo časos maškar tumende.

¹⁹ Služinavas le Rajeske andre cali pokora le apsenca prekal o probi (skuški), so pre ma avenas le űidendar.

²⁰ Nič olestar, so tumenge uľahas pre chasna, na garuďom andre. Ale vakeravas a sikavavas tumen an-glo manuša pal o khera

²¹ a vakeravas o svedectvo le űidenge the le Grekenge, hoj pes te visaren ko Del a te pačan andre amaro Raj Ježiš Kristus.

²² Ale akana o Duchos man ispidel, hoj te džal andro Jeruzalem, choc na džanav, so pes manca ode ačhela.

²³ Ča ajci džanav: O Sentno Duchos mange furt sikav-el pal o fori a phenel, hoj man użarel e bertena the o pharipen.

²⁴ Ale pal miro dživipen mange na džal. Džal mange ča pal oda, hoj te dodenašav miro denašiben a te dok-erav e služba, so priiľom le Rajestar le Ježišostar – hoj te vakerel avri o evaűjelium pal le Devleskero lačhipen (milost).

²⁵ Akana džanav, hoj űiko tumendar, maškar kaste phiravas a vakeravas pal o Devleskero krališagos, man imar buter na dikhela.

²⁶ Vašoda tumenge adadžives phenav, hoj som žužo savoredženengere ratestar.

²⁷ Bo me tumenge phendom sa, so kamel o Del; nič tumenge na garuďom andre.

²⁸ Merkinen pre tumende the pro calo stados, andre savo tumen o Sentno Duchos ačhaďa sar pastoren, hoj te čalaren le Devleskeri khangeri, so peske cinda peskere rateha.

²⁹ Bo me džanav, hoj avena maškar tumende dzive ruva (vlki), save na sajina o stados, sar me džava het.

³⁰ Bo mek the maškar tumende ena ajse manuša, save previsarena o lava, hoj ča te cirden pal peste le učeűiken.

³¹ Vašoda merkinen! Ma bisteren pre oda, hoj rat-džives trin berš na preačhiľom sakoneske tumendar te vakerel le apsenca pre godi.

³² Avke akana, phralale, dav tumen le Devleske a mukav tumenge leskero lav pal leskero lačhipen (milost), so tumen šaj del zor te barol a so tumen del o dedictvos savore sentnenca.

³³ Me na kamľom űikaskero rup abo somnakaj, abo varekaskere gada.

³⁴ Tumen korkore džanen, hoj zarodavas korkoro mire vastenca pre oda, so mange the olenge, save sas manca, kampelas.

³⁵ Savoro tumenge sikadom, hoj kampil te kerel buči, te likerel le slaben a te na bisteren pro lava le Rajeskere le Ježišokere, bo ov phenda: 'Bachtaleder hin te del, sar te lel.' "

³⁶ Sar oda dophenda, geľa pro khoča savoredženenca a modlinda pes.

³⁷ A avľa pre savoredženende baro roviben, obchudenas le Pavol pašal e meň a čumidenas les.

³⁸ Nekbuter len dukhalas oda, so o Pavol phenda, hoj imar buter les na dikhena. A ligende les dži paš e lođa.

Le Pavloskero drom andro Jeruzalem

21 Sar geľam lendar het, odgeľam la lođaha pro moros. Rovnones doavľam pro ostrovos Kos, pre aver džives pro ostrovos Rodos a odarik andro foros Patara.

² Ode arakhľam lođa, so džalas andre phuv Fenicija, a geľam laha.

³ Dikhahas dural o ostrovos Ciprus, obgeľam les pal e baľogňi (ľavo) sera a džahas la lođaha andre Sirija. Začhiľam andro foros Tir, bo ode kampil te thovel tele pal e lođa oda, so lidžalas.

⁴ Arakhľam ode le učeňiken a ačhiľam ode eľta dživesa. Ola učeňika phenenas le Pavloske prekal o Duchos, hoj te na džal upre andro Jeruzalem.

⁵ Sar pregele ola eľta dživesa, džahas dureder. Savoredžene le romňijenca the le čhavenca amen ligende dži avri pal o foros. Ode pro brehos geľam pro khoča a modlinda pes.

⁶ Sar lendar odgeľam, geľam andre lođa a on gele pale khere.

⁷ Džahas la lođaha dureder andral o Tir andro foros Ptolemaida. Ode palikerďam le phralenge a ačhiľam ode jekh džives.

⁸ Palis pre aver džives odgeľam le dromeħa a doavľam andre Cezarea. Ode geľam andro kher ko Filip, savo sas evaňjelistas, a ačhiľam ke leste. Ov sas jekh ole eľta sluźobnikendar, save sas avrikidle andro Jeruzalem.

⁹ Les sas Ńtar pačivale čħaja a on prorokinenas.

¹⁰ Medik ode samas a ačhiľam ode buter dživesa, avľa ode varesavo prorokos, o Agabus, andral e Judsko.

¹¹ Sar avľa paš amende, iľa le Pavloskero sirimos, phandľa peske o vasta the o pindre a phenda: "Kada phenel o Sentno Duchos: 'Kavke phandena andro Jeruzalem ole muršes, kaskero hin kada sirimos, a dena les andro vasta le manušenge, save nane Ńidi.' "

¹² Sar oda Ńundam, mangahas les the amen the o phrala andral o foros, hoj te na džal upre andro Jeruzalem.

¹³ Ale o Pavol odphenda: "So keren? Soske roven a dukhaven miro jilo? Bo me som pririchtimen, na čħa man te del te phandel, ale the te merel andro Jeruzalem vaš o nav le Rajeskero le Ježišokero."

¹⁴ Sar dikhľam, hoj pes na del te prevakerel, preačhiľam a phendam: "Mi ačhel pes e voľa le Rajeskeri."

¹⁵ Pal ola dživesa pes pririchtinda a geľam upre andro Jeruzalem.

¹⁶ Avenas amenca the varesave učeňika andral e Cezarea a ligenas amen ko Mnason, bo ke leste majinda te bešel. Ov sas andral o Ciprus a sas jekh le čirlatune učeňikendar.

O Pavol andro Jeruzalem

¹⁷ Sar doavľam andro Jeruzalem, o phrala amen radišagoha priile.

¹⁸ Pre aver džives geľa o Pavol amenca ko Jakob a avle ode the savore phuredera.

¹⁹ Palikerďa lenge a chudľa lenge te vakerel avri savoro, so kerďa o Del maškar o Nažidi prekal le Pavloskeri sluźba.

²⁰ Sar oda on Ńunde, lašarenas le Devles a phende: "Dikhes phrala, hoj igen but Ńidi pačandile a on savore hine oddine le Zakonoske.

²¹ Pal tute pes došunde, hoj sikaves le Ńiden, save dživen maškar o Nažidi, hoj te oddžan le Mojžišostar, bo phenes lenge, hoj te na občħinen (obrezinen) le čħavoren a te na dolikeren o tradiciji.

²² Akana, so kereħa? Bo savore lendar pes došunena, hoj tu avľal.

²³ Ker oda, so tuke phenas: Hin amen Ńtar murša, save dine lav le Devleske.

²⁴ Le len tuħa a jekhetane lenca tut obžužar a počin vaš lenge, hoj peske te den te holinel o Ńere. Palis savoredžene prindžarena, hoj nane čačipen oda, so pal tu Ńunde, ale hoj the tu korkoro dolikeres o Zakonos.

²⁵ Le Nažidenge, save pačandile, amen pisinda, hoj te na keren o lubipen a te na chan o rat, aňi oda, so hin obetimen le modlenge, aňi le tasade džvirinakere masestar."

²⁶ Akor iľa o Pavol ole muršen a pre aver džives pes lenca diňa te obžužarel. Geľa andro chramos a diňa le rašajenge te džanel, keci dživesa pes obžužarena a hoj pal ola dživesa pes anela e obeta vaš dojekh lendar.

O Ńidi zalen le Pavol

²⁷ Sar imar predžalas ola eľta dživesa, dikhle les andro chramos o Ńidi andral e Azija a marde upre savore manušen.

²⁸ Chudle les a vriskinenas: "Muršale andral o Izrael, pomožinen! Kada hin oda manuš, savo savoredženen všadžik sikavel a vakerel pro Izraeliti, pro Zakonos the pre kada than. Mek the le Greken andħa andro chramos a meľardħa kada Sentno Than!"

²⁹ Bo angloda dikhle le Trofimus andral o Efezus le Pavloħa andro foros a gondolinenas peske, hoj les o Pavol iľa andro chramos.

³⁰ Calo foros pes vzburiňďa a o manuša pal dojekh sera ode denašenas. Chudle le Pavol, lidžanas les avri andral o chramos a takoj phandle o brani.

³¹ Androda, sar les imar džanas te murdarel, pes došunda o velitelis upral o ezeros slugađa, hoj hin bari vika andro Jeruzalem.

³² Ov peha takoj iľa le slugađen the le velitelēn upral o šel a denašľa maškar lende. Sar dikhle o manuša le velitelis the le slugađen, preačhile te marel le Pavol.

³³ O velitelis avľa paš leste, chudľa les a diňa les te phandel duje lancenca. Phučľa lendar: "Ko hin kada manuš? So kerđa?"

³⁴ Ale sako ole but manušendar vriskinelas vareso aver. Sar pes o velitelis angle vika našti dodžanľa o čačipen, rozkazinda, hoj les te len andre kasarňa.

³⁵ Sar avľa o Pavol paš o garadiči (ganki), ačhiľa pes oda, hoj les mušinde o slugađa te lidžal pro vasta anglo manuša,

³⁶ bo savore ola but nipi džanas pal leste a vriskine-nas: "Murdaren les!"

O Pavol privakerel

³⁷ Sar les imar kamenas te lidžal andre kasarňa, phendľa o Pavol le veliteliske: "Šaj tuke vareso phenav?" A ov odphendľa: "Džanes te vakerel andre Grekengeri čhib?"

³⁸ Na sal tu oda Egiptanos, savo anglo vajkeci dživesa marda upre a ligenda pre pušťa štar ezera (4 000) živažen?"

³⁹ O Pavol phendľa: "Me som Židos, občanos andral o Tartzus, savo hin nachocsavo foros andre phuv Cilicija, a mangav tut, domuk mange te prevakerel ko nipi."

⁴⁰ Sar leske domukľa, ačhiľa o Pavol pro garadiči a kerđa le manušenge le vasteha, hoj te čhiten. Sar sas savoredžene čhit, prevakerđa ke lende andre Hebrejiko čhib.

22 A o Pavol phendľa: "Muršale, phralale the dadale! Šunen akana, so me pre oda phenav."

² Sar šunde, hoj ke lende prevakerđa andre Hebrejiko čhib, sas mek cicheder.

³ A phendľa: "Me som Židos, uliľom (pes narodzindom) andre Tartzus andre phuv Cilicija, ale bariľom avri andre kada foros. A ciknovarestar o Gamaliel sas miro učitelis. Ode sikliľom o Zakonos amare dadengero a džavas pal o Del avke sar the tumen adadžives.

⁴ Somas oda, so džalas pre ola, save pačandile o evaňjelium a varesaven the diňom te murdarel. Phandavas a davas andre bertena le muršen the le džuvľen.

⁵ Mire švedki hine o nekbareder rašaj the savore phuredera. Sar lendar chudľom o ľila pro phrala, džavas andro Damaskus, hoj len te phandav a te anav andro Jeruzalem, hoj len te potrestinen.

Le Pavloskero svedectvo

⁶ Ačhiľa pes mange, sar džavas imar paš o Damaskus, avke vaj pro dilos, hoj jekhwareste avľa andral o ňebos igen zoralo svetlos a zaučharda man andre.

⁷ Peľom pre phuv a šundom o hangos, so mange phendľa: 'Saul, Saul, soske pre mande džas?'

⁸ A me odphendom: 'Ko sal, Rajeja?' Odphendľa mange: 'Me som o Ježiš Nazaretsko, oda, pre kaste tu džas.'

⁹ Ola, save sas manca, dikhle oda svetlos a darandile, ale o hangos, so manca vakerelas, na šunde.

¹⁰ Me phendom: 'So majinav te kerel, Rajeja?' O Raj mange odphendľa: 'Ušti a dža andro Damaskus. Ode pes tuke phenela savoro, so mušines te kerel.'

¹¹ Ole zorale svetlostar na dikhavas nič a vašoda man ligenenas le vastestar ola, save sas manca. Avke geľom andro Damaskus.

¹² Avľa varesavo Ananijaš, pobožno murš, savo dolikereľas o Zakonos. Savore Židi, save ode bešenas, mištes vakerenas pal leste.

¹³ Ačhiľa paš ma a phendľa mange: 'Phrala, Saul, dikh pale!' A takoj mange phundrile o jakha a dikhľom les.

¹⁴ O Ananijaš phendľa: 'O Del amare dadengero peske tut anglal kidňa avri, hoj te prindžares leskeri voľa a te dikhes ole Čačipnaskeres a te šunes o hangos andral leskero muj.

¹⁵ Bo aveha leskero švedkos maškar savore manuša a vakereha pal oda, so dikhľal the šundal.

¹⁶ Akana, so užares? Ušti, de tut te boleľ, obžuzar tut tire binendar a lašar o nav le Rajeskero.'

¹⁷ Sar avľom pale andro Jeruzalem a modľinavas man andro chramos, dikhľom videňje.

¹⁸ Dikhľom le Rajes, sar mange phenel: 'Siďar a dža avri andral o Jeruzalem, bo na prilena tire lava pal mande.'

¹⁹ Me phendom: 'Rajeja, on džanen, hoj me džavas pal o sinagogi pre ola, save pačan andre tu, a phandavas len andre bertena a maravas len.

²⁰ The akor, sar murdarde tire švedkos le Štefan, me somas ode a davas lenge o čačipen, sar les murdarenas, a ačhavas paš lengere gada, medik les na murdarde le barenca.'

²¹ Androda mange phendľa: 'Dža, bo me tut bičhavava dur maškar o manuša, save nane Židi.' "

O Pavol phenel, hoj hino Rimaňiko občanos

²² Šunenas les dži akor, medik na phendľa kada lav. Palis chudle zoraha te vriskinel a phende: "Murdar les! Kajso manuš mi džal het pal o svetos! Našti dživel!"

²³ Sar vriskinenas a čhivkerenas o uprone gada pal peste tele the o prachos andro luftos,

²⁴ phendľa o velitelis, hoj te len le Pavol andro kasarňi. Prikazinda, hoj les te zbicinel a palis te šunen avri, bo kamľa pes te dodžanel, vaš soske pro Pavol avke vriskinenas.

²⁵ Sar les ile te zbicinen, phendľa o Pavol le veliteliske upral o šel slugađa, savo ode ačhelas: "Či šaj maren bičoha le Rimaňike občanos bi o sudos?"

²⁶ Sar oda šunda o velitelis upral o šel, geľa oda te phenel peskere veliteliske: "So kereha? Bo kada manuš hino Rimaňiko občanos!"

²⁷ Akor avľa o veliteľis paš o Pavol a phendā leske: "Phen mange, sal tu Rimaňiko občanos?" Ov odphendā: "He, som."

²⁸ O veliteľis odphendā: "Me mange vaš o but love cindom oda, hoj te avav Rimanos." O Pavol phendā: "Ale me ulilom (pes narodzindom) sar Rimaňiko občanos."

²⁹ Avke lestar takoj odgele o slugađa, save les kamle te marel. The o veliteľis pes darandila, sar šundā, hoj o Pavol hino Rimaňiko občanos, bo diňa les te phandel.

O Pavol angle Bari Rada

³⁰ Pre aver džives kamelas mištes pes te dodžanel, so vakerenas o Židi, hoj kerđa namištes. Iľa leske pal o vasta tele o puta a phendā, hoj pes te zdžan o nekbareder rašaja the e cali Bari Rada. Andā le Pavol a ačhađa les angle lende.

23 O Pavol dikhľas andro jakha le manušenge andral e Bari Rada a phendā: "Muršale, phralale! Dži adadžives me dživav avke, hoj miro jilo hino žužo anglo Del."

² Ale o nekbareder rašaj, o Ananijaš, phendā olenge, save ačhenas paš o Pavol, hoj les te maren pal o muj.

³ Akor leske o Pavol phendā: "Marela tut o Del, tu parňi falo! Bešes ade, hoj man te sudzines pal o Zakonos, ale phenes, hoj man te maren – a keres oda, so o Zakonos na phenel!"

⁴ Ola, save ode ačhenas, phende: "Tu rakines le Devleskere nekbareder rašaske?"

⁵ O Pavol odphendā: "Na džanavas, phralale, hoj ov hino o nekbareder rašaj, bo hin pisimen: *'Na vakereha namištes a na košeha oles, ko lidžal tire manušen!'*"

⁶ Sar pes o Pavol dodžanľa, hoj jepaš andral e Bari Rada hine Saduceja a aver jepaš Farizeja, vriskindā: "Muršale, phralale! Me som Farizejis, čhavo le Farizejiskero a sudzinen man vaš oda, hoj užarav pre oda, hoj o mule uštēna andral o meriben!"

⁷ Sar oda phendā, chudle pes te veseke dinel o Farizeja the o Saduceja maškar peste a ola, save sas zgele, pes rozulade pro duj seri.

⁸ Bo o Saduceja phenen, hoj našti te uštel andral o meriben, hoj nane aňjela, aňi duchi, ale o Farizeja pačan the oda the ada.

⁹ A sas olestar bari vika. Andre oda uštile upre varesave Farizeja, save sas avrisikade andro Židoviko Zakonos, a phenenas: "Na dikhas nič nalačo pre kada manuš. A so te ke leste prevakerđa o duchos abo o aňjelos? [Te na pes ačhavas le Devleske!]"

¹⁰ Sar pes furt buter veseke dinenas, daralas pes o veliteľis, hoj te na rozcirden le Pavol. Vašoda phendā le slugađenge, hoj les te džan te cirdel lendar avri a te lidžan les andro kasarňi.

¹¹ Pre aver rat avľa o Raj ke leste a phendā: "Ma dara tut Pavol, bo sar pal ma zoraha svedčinehas andro Jeruzalem, avke mušines te svedčinel the andro Rim."

O Židi pes dothoven pro Pavol

¹² Sar avľa avri o kham, dovakerde pes varesave Židi a ile pre peste vera, hoj na chana aňi na pijena, medik na murdarena le Pavol.

¹³ Ola, save ile vera, sas buter sar saranda (40).

¹⁴ Avle ko nekbareder rašaja the ko phuredera a phende: "Iľam pre peste vera, hoj na laha nič andro muj, medik na murdaraha le Pavol.

¹⁵ Avke akana tumen the e Bari Rada mangel le veliteľis, hoj les tajsja te anel tele ke tumende. Keren avke, sar te les kamľanas buter te šunel avri pal leskeri veca. A amen sam pririchtimen les te murdarel mek sigeder, sar ade doavela."

¹⁶ Ale sar le Pavloskera pheňakero čhavo šundā, so kamen te kerel, avľa andre kasarňa a diňa oda te džanel le Pavloske.

¹⁷ O Pavol peske vičindā jekhe veliteľis upral o šel a phendā: "Lidža kale terne manušes ko peskero veliteľis, bo kamel leske vareso te phenel."

¹⁸ Avke les iľa, ligendā les ke peskero veliteľis a phendā: "O bertenošis o Pavol peske man vičindā a mangľa man, hoj te anav kale terne manušes ke tu, bo kamel tuke vareso te phenel."

¹⁹ O veliteľis les iľa vastestar sikra pre sera a phučľa lestar: "So mange kames te phenel?"

²⁰ Ov phendā: "O Židi pes dovakerde, hoj tut mangel na, hoj tajsja te anes le Pavol angle Bari Rada, a kerena avke, sar te pes kamlehas pal leste vareso buter te dodžanel.

²¹ Ale ma de tut lenge te prevakerel, bo buter sar saranda (40) murša pre leste džan. On ile vera, hoj na chana aňi na pijena, medik les na murdarena. Akana imar hine pririchtimen a ča užaren pre oda, hoj lenge tu te domukes."

²² Paľis premukľa o veliteľis le terne manušes a prikazindā leske: "Ma phen ñikaske avri, hoj mange oda phendā!"

Le Pavol lidžan andre Cezarea

²³ Paľis o veliteľis peske vičindā varesave duje veliteľen upral o šel a phendā: "Pririchtinen duj šel (200) slugađen the eftavardeš (70) muršen pro graja a mek duj šel (200) slugađen le kopijenca, hoj te džan eňa orendar rači andre Cezarea."

²⁴ Prikazindā, hoj te anen le grajes, te thoven upre le Pavol te bešel a bachtales te lidžan ko vladaris Felix.

²⁵ A pisindā leske kajso ľil:

²⁶ "O Klaudius Lisijaš paľikerel le lačhe vladariske le Felixoske!

²⁷ Kale manušes zaille o Židi a kamle les te murdarel, ale avľom le slugađenca a cirdňom lenge les avri andral o vasta, bo dodžanľom man, hoj hino Rimaňiko občanos.

²⁸ Kamľom man mištes te dodžanel, soske pre leste vakeren a ligendom les angle lengeri Bari Rada.

²⁹ Avl'om pre oda, hoj pre leste vakeren vaš varesave lava andral lengero zakonos, ale na kerda nič, vaš soske mušindahas te merel, abo te džal andre bertenana.

³⁰ Sar mange dine te džanel, so o Židi kamen te kerel kale muršeske, takoj les bičhadom ke tute. Prikazindom olenge, save pre leste vakeren, hoj te phenen oda tuke, te len hin vareso pre leste. [Av bachtalo!]"

³¹ Avke o slugađa kerde oda, so lenge sas phendo. Ile le Pavol a ligende les prekal e rat andre Antipatrída.

³² Pre aver džives ola, save džanas pro graja, gele dureder le Pavloha a okla slugađa gele pale andre kasarňa.

³³ Sar doavle andre Cezarea, dine le vladariske o lil a ačhade angle leste le Pavol.

³⁴ O vladaris pregenda o lil a phučla lestar, andral savi provincija hino. Sar pes dodžanla, hoj hino andral e Cilicija,

³⁵ phenda: "Sar ena ade ola, save pre tute vakeren, šunava tut avri." A prikazinda, hoj les te stražinen andre le Herodesiskero palacis.

Vakeren pro Pavol anglo vladaris

24 Pal o pandž dživesa avla tele o nekbareder rašaj Ananijaš le phurederenca the le Tertulloha, savo sas baro manuš andro vakeriben, hoj te vakeren pro Pavol anglo vladaris.

² Vičinde le Pavol a o Tertullus chudla pre leste te vakerel: "Nekbareder Felix, amen džanas, hoj prekal tu avla baro smirom a prekal tiri godi hin andre kada narodos feder dživipen!"

³ Amen furt andre savoro, ó, baro Felix, všadzík tuke igen palikeras!

⁴ Ale hoj tut but te na zlíkerav, mangav tut, hoj amen sikra te šunes avri andre tiro lačhipen.

⁵ Bo avlam pre oda, hoj kada manuš hino sar nasvaliben, kerel upre le Židen a anel nasmirom maškar lende pal calo svetos. Lidžal e sekta, savi pes vičinel o Nazariti,

⁶ a kamelas te mefarel o chramos. Amen les chudlam [a kamlamas te sudzinel pal amaro zakonos,

⁷ ale avla o velitelis Lisijaš a cirdňa les bara zoraha avri andral amare vasta a ila les het.

⁸ Palis prikazinda olenge, save pre leste vakerenas, hoj te aven ke tu.] Sar tu lestar phučeha, the korkoro tut dodžaneha pal oda savoro, so amen pre leste vakeras."

⁹ O Židi ačhenas vaš o Tertullus a denas les čačipen.

O Pavol anglo Felix

¹⁰ Sar kerda o vladaris le vasteha le Pavloske, hoj te vakerel, phenda o Pavol: "Džanav, hoj imar but berš sudzines kada narodos. Vašoda phenava bi e dar o čačipen pal mande.

¹¹ Bo šaj tut dodžanes, hoj nane oleske buter sar dešuduj (12) džives, sar man gelom te modlínel andro Jeruzalem.

¹² A na arakhle man varekaha te vakerel aňi te marel upre le nipen andro chramos, andro sinagogi, aňi andro foros.

¹³ Aňi tuke oda našti presikaven, so pre mande akana vakeren.

¹⁴ Ale oda tuke avri phenav, hoj me služinav mire dadengere Devleske ole dromeha, so on vičinen sekta. Pačav savoreske, so hin pisimen andro Zakonos the Proroka.

¹⁵ Užarav pro Del a pačav oleske, hoj uštena andral o meriben o čačipnaskere the o nalačhe – avke sar the on.

¹⁶ Vašoda kerav sa, hoj man te el žužo jilo anglo Del the anglo nipi.

¹⁷ Pal o buter berš avl'om andro Jeruzalem, hoj te anav mire narodoske almužni, dari the obeti.

¹⁸ Diňom man te žužarel a palis varesave Židi andral e Azija man arakhle andro chramos. Na sas ode manca nisave nipi, aňi na sas vika.

¹⁹ On akana kade majinde te ačhel angle tu, hoj te vakeren, so len pre mande hin.

²⁰ Abo kala, save hine ade, mi phenen či arakhle pre mande nalačhipen akor, sar ačhavas angle Bari Rada.

²¹ Nič, ča oda jekh lavoro, so phendom, sar ačhavas angle lende, a vriskindom: 'Adadžives man sudzinen vaš oda, bo sikavav, hoj o mule uštena andral o meriben.' "

²² Sar oda šunda o Felix, bo ov mištes džanelas pal oda pačaben, prethoda lengero sudos a phenda: "Sar avela o velitelis Lisijaš, palis rozsudzina tumari veka."

²³ Phenda le veliteliske upral o šel, hoj te phanden le Pavol andre loki bertena a te domukel leskere učeníkenge te avel a te anen leske oda, so kempel.

O Pavol anglo Felix the Druzilla

²⁴ Pal vajkeci dživesa avla o Felix peskera romňaha la Druzillaha, savi sas Židkiňa, bičhadá pal o Pavol a šunelas les, so vakerel pal o pačaben andro Ježiš Kristus.

²⁵ Sar vakerelas o Pavol pal o spravodlišagos, pal oda, hoj pes te zlíkeras le žadoscendar, the pal o sudos, so avela, darandila o Felix a phenda: "Akana imar dža, ale sar man ela časos vičínava tut."

²⁶ Ale androda ov užarelas, hoj les o Pavol dela love, hoj les te premukel. Vašoda pal leste the buterval bičhavelas a vakerelas leha.

²⁷ Sar pregeľa duj berš, o Porcius Festus ačhiľa vladaris pal o Felix. O Felix kamelas te avel pre dzeka le Židenge, vašoda mukla le Pavol andre bertena.

Kamel te el sudzimen anglo Cisarís

25 Trin džives pal oda, sar o Festus avla andre odi provincija, odgeľa andral e Cezarea upre andro Jeruzalem.

² Avle paš leste o nekbareder rašaja the anglune le Židendar, hoj te vakeren pro Pavol. Mangenas le Festus,

³ hoj te kerel lenge pre dzeka a te bičhavel vaš o Pavol, hoj les te anel andro Jeruzalem. Bo o Židi le dromeha les kamle te murdarel.

⁴ Ale o Festus odphenda, hoj o Pavol mušinel te ačhel andre bertena andre Cezarea a hoj ov korkoro ode maj džala.

⁵ A phenda: "Tumare anglune mi aven manca a te len hin pre oda murš vareso, ode pre leste mi vakeren."

⁶ O Festus ačhila maškar lende vaj ochto abo deš džives a palis odgeľa tele andre Cezarea. Pre aver džives bešľa o Festus, hoj te sudzinel a diňa te anel le Pavol.

⁷ Sar avľa o Pavol, ačhile pašal leste o Židi, save avle andral o Jeruzalem, a vakerenas pre leste but bare veci, so našti dokazinenas.

⁸ O Pavol pes brañinelas a phenda: "Na phendom nič, aňi pre le Židengero Zakonos, aňi pro chramos, aňi pro Cisariss."

⁹ O Festus kamľa te avel pre dzeka le Židenge a odphenda le Pavloske: "Kames te džal upre andro Jeruzalem, hoj te aves ode sudzimen angle mande?"

¹⁰ Ale o Pavol odphenda: "Me akana som anglo Cisariskero sudos a ade majinav te el sudzimen. Tu džanes mištes, hoj na kerđom le Židen nič nalačo.

¹¹ Te kerđom vareso nalačo, vaš soske mušinav te merel, na darav man te merel. Ale te nane nič čačo, so pre mande kala Židi vakeren, ñiko man našti del lenge andro vasta. Mi sudzinel man o Cisariss!"

¹² Akor pes o Festus dovakerđa peskera radaha a phenda: "Ko Cisariss tut mangľal, ko Cisariss džaha!"

O Pavol anglo Agrippa the Bernika

¹³ Pal vajkeci dživesa avle andre Cezarea o krališ Agrippa the e Bernika te dikhel le Festus.

¹⁴ Sar imar ode sas buter dživesa, diňa te džanel o Festus le kraliske pal o Pavol a phenda: "O Felix ade mukľa varesave bertenošiss.

¹⁵ A sar somas andro Jeruzalem, avle ke ma o nek-bareder rašaja the o phuredera le Židengere a mangelas man, hoj les te odsudzina.

¹⁶ Me lenge phendom, hoj o Rimana našti den le bertenošiss andro vasta olenge, save pre leste vakeren, medik les na šunen avri angle lende, hoj the ov pes te brañinel pre oda, so vakeren.

¹⁷ Avke avle o Židi kade pal mande, me takoj pre aver džives bešľom a diňom te anel ole manušes, hoj les te sudzina.

¹⁸ Ola, save pre leste vakerenas, ačhenas pašal leste, ale na vakerenas pre leste varesave bare veci, sar me užaravas, hoj vakerena.

¹⁹ Ale vesekedinenas pes leha vaš peskero pačaben the pal varesavo Ježiš, savo muľa, pal kaste o Pavol phenel, hoj dživel.

²⁰ Me na džanavas so te kerel andre kadi veca, vašoda lestar phučľom, či na kamel te džal andro Jeruzalem, hoj les ode te sudzinen.

²¹ Vašoda, bo o Pavol pes mangľa ko Cisariss, hoj les te sudzinel, me prikazindom, hoj te ačhel andre bertena, medik les na bičhavava ko Cisariss."

²² O Agrippa phenda le Festoske: "The me kamľomas te šunel ole manušes." Ov phenda: "Tajsja les šuneha."

²³ Avke pre aver džives avľa o Agrippa the e Bernika bare rajikañbnaha pre oda than, kaj pes sudzinel. Avle leha o bare veliteľa the o bare raja andral o foros a o Festus prikazinda, hoj te anen le Pavol.

²⁴ O Festus phenda: "Kralina Agrippa the savore, save san amenca kade! Dikhen kale manušes, vaš savo man mangelas igen but Židi andro Jeruzalem the kade a vrisकिनenas, hoj na tromal buter te dživel.

²⁵ Ale me ačhalľom, hoj na kerđa nič, vaš soske mušindahas te merel. No ov pes mangľa ko Cisariss a me phendom, hoj les ode bičhavava.

²⁶ Ale nane man so pal leste te pisinel le Cisariske. Vašoda les andom angle tumende a nekbuter angle tute, kralina Agrippa, hoj te džanav so te pisinel, sar les šunaha avri.

²⁷ Bo mange pes dičhol, hoj nane mištes te bičhavel ode bertenošiss, medik na pisinava, so kerđa."

O Pavol vakerel anglo Agrippa

26 O Agrippa phenda le Pavloske: "Domukav tuke, hoj te vakeres vaš peste." Akor hazdňa o Pavol o vast a phenda:

² "Bachtalo som, kralina Agrippa, hoj šaj adadžives vakerav vaš ma anglal tute pal ola savore veci, so pre mande o Židi vakeren.

³ Vašoda, bo tu mištes prindžares le Židengere tradiciji the oda, so len rozulavel, mangav tut, hoj man te šunes avri phundrade jileha.

⁴ Savore Židi džanen miro dživipen terñipnastar, prindžaren, savo sas ešebnovar (peršovar) andre miro narodos the andro Jeruzalem.

⁵ Prindžaren man ešebnovarestar a te kamlehas, šaj phenen avri, hoj dživavas sar jekh le Farizejendar, save igen dolikeren savoro andre amaro pačaben.

⁶ The akana ačhav anglo sudos vašoda, bo pačav ole laveske, so diňa o Del amare dadenge.

⁷ Oda lav, so phenda o Del, furt užaren o dešuduj (12) fajti andral amaro narodos, sar lašaren le Devles rat-džives. A vaš oda, so me pačav the užarav, o Židi pre mande vakeren, kralina Agrippa.

⁸ Soske tumen phenen, hoj našti te pačal oleske, hoj o Del uštavel le mulen?

⁹ Me mange tiš gondolinavas, hoj mušinav zoraha te džal pre dojekh, ko pačal andro nav Ježiš Nazaretsko.

¹⁰ A andro Jeruzalem oda the kerđom. O nek-bareder rašaja mange domukle te phandel but sentnen andro berten. A sar len murdarenas, the me davas miro lav ke oda, hoj len te murdaren.

¹¹ Pal savore sinagogi len buterval maravas a ispidavas len, hoj te zaprinen peskero pačaben. Andre bari cholj pre lende džavas a lavas len palal dži andro aver fori.

O Pavol phenel sar pes visarda

¹² Aleha džavas the andro Damaskus. O nekbareder rašaja mange oda domukle a dine man pravos.

¹³ Kralina, sar džavas pro dilos pal o drom, dikhľom andral o ňebos svetlos zoraleder sar o kham. Oda jekhwareste man zaučharda andre the olen, save sas manca.

¹⁴ Savore peľam pre phuv a šundom o hangos, so mange andre Hebrejiko čhib phenda: 'Saul, Saul, soske pre mande džas?' Phares tuke ela, te aveha sar guruv, so ruhinel andre peskero rajeskero špicos.

¹⁵ A me phendom: 'Ko sal, Rajeja?' O Raj phenda: 'Me som o Ježiš, pre kaste tu džas.'

¹⁶ Ale ušti a ačhav tut pro pindre. Bo man tuke sikađom, hoj te aves miro služobňikos a te vakeres pal oda, so dikhľal, the pal oda, so tuke sikavava.

¹⁷ Lava tut avri andral o vasta le Židenge the andral e zor avre narodenge, ke save tut me akana bičhavav,

¹⁸ hoj te phundraves lengere jakha, hoj pes te visaren le kalipnastar ko svetlos the le bengeskera zoratar ko Del, hoj lenge te el odmukle o bini a hoj len te el o than maškar ola sentna, save pačan andre ma.'

Phenel pal leskeri služba

¹⁹ Avke, kralina Agrippa, me kerdom, so šundom andro videňje andral o ňebos.

²⁰ Me vakeravas ešeb (peršo) andro Damaskus the andro Jeruzalem the pal cali Judsko phuv a palis the le Nažidenge, hoj pes te visaren le binendar ko Del a hoj te sikaven oda peskere skutkenca.

²¹ Vašoda man o Židi chudle andro chramos a kame-nas man te murdarel.

²² Ale o Del mange pomožinda, a vašoda ačhav dži adadžives a vakerav savorengenge, či sluhasko abo kraliske. A na vakerav nič aver, ča oda, so prorokinde o Proroka the o Mojžiš,

²³ hoj o Kristus cerpinela the uštela ešebno andral o meriben a vakerela le Židenge the avre narodenge pal o svetlos."

²⁴ Sar o Pavol ačhelas vaš peste a kada vakerelas, phenda o Festus zorale hangoha: "Tu na sal paš e godi, Pavol! Igen but sikľiľal a oda tut ľidžal andro dil-iňipen!"

O Festus na kamel te pačal

²⁵ Ale o Pavol phenda: "Me na som dilino, nekbareder Festus, ale vakerav o čačipnaskere lava andral e sasti godi.

²⁶ Bo o kralis džanel pal kala veci, vašoda leske bi e dar avke vakerav, bo džanav mištes, hoj nane nič sostar na džanľahas. Bo oda pes na ačhiľa varekaj andro kutos.

²⁷ Kralina Agrippa, pačas le prorokenge? Džanav, hoj pačas."

²⁸ O Agrippa phenda le Pavloske: "Imar na kampľa but, hoj man te prevakeres, hoj te ačhav Krestanoske."

²⁹ Ale o Pavol phenda: "Či ačheha akana vaj pozned-er, mangav mange le Devlestar, hoj na ča tu, ale the savore, save man adadžives šunen, te aven ajse, sar som me, ale bi e kala puta."

³⁰ Sar oda phenda, uštıla o kralis, o vladaris, e Bernika the ola, save lenca bešenas.

³¹ A sar džanas, phenenas jekh avreske: "Kada manuš na kerel nič, vaš soske mušindahas te merel vaj te avel andrephandlo."

³² O Agrippa phenda le Festoske: "Te kada manuš pes na mangľahas ko Cisarís, šaj les premukľamas."

O Pavol džal andro Rim

27 Sar sas phendo, hoj te džas la lođaha andre Italija, oddine le Pavol the varesave avren bertenošen le veliteliske, savo pes vičinelas Julius a sas andral e Cisariskeri čata.

² A bešľam pre lođa andral e Adramitija, so majinelas te džal la seraha pašal e Azija. Sar imar geľam, sas amenca o Aristarchos, o Macedončanos andral e Tesalonia.

³ Pre aver džives doavľam andro Sidon. Vašoda, hoj o Julius sas lačo le Pavloha, domukľa leske te džal ko prijateľa, hoj les te den oda, so leske kampelas.

⁴ Sar odarik geľam het, mukľam pes la lođaha pre aver sera pašal o ostrovos Ciprus, kaj e balvaj avke zorales na phurdelas pre amende.

⁵ Pregelam o moros la lođaha pašal e Cilicija the Pamfilija a doavľam ke Mira andre provincija Licija.

⁶ Ode arakhľa o velitelis lođa andral e Alexandrija, so džalas andre Italija, a thođa amen upre.

⁷ But dživesa džahas la lođaha igen polokes a igen phares dochudľam pes paš o Knidus. Vašoda, hoj e balvaj amenge na domukelas te džal avke, sar kamľam, geľam pašal o Salmon tele pašal o ostrovos Kreta.

⁸ Igen pharipnaha palis pregeľam pašal leste a avľam pro than, so pes vičinelas Šukar Pristavos, pašes paš o foros Lasea.

⁹ Vašoda, hoj imar pregeľa but časos, dar sas te džal dureder la lođaha, bo pregeľa imar the o Postos † a avelas o jevend. Palis o Pavol lenge phenda:

¹⁰ "Muršale, merkinen, me dikhav, hoj nane mištes te džal dureder, bo na ča e lođa the oda, so hin andre lođa, našavaha, ale the amare dživipena."

¹¹ Ale o velitelis buter pačalas le kapitanoske the oleske, kaskeri sas e lođa, sar le Pavloske.

¹² Vašoda, hoj na sas mištes te ačhel andre oda pristavos prekal o jevend, buter džene lendar peske phende, hoj džana odarik het. Bo kamenas pes varesar te dochudel dži andro Fenix a ode te ačhel prekal o jevend. O Fenix hin o pristavos pre Kreta, so hin phundrado pro juhozapados the severozapados.

† O Židoviko inepos Jom Kippur

E balvaj pro moros

¹³ Chudľa te phurdel e južno balvaj a gondolinenas peske, hoj imar dochudle oda, so peske phende. Hazdle upre o kotvi a džanas la lođaha pašes pašal e Kreta.

¹⁴ Ale na pregeľa but a demađa pre lođa zoraľi balvaj, so pes vičinel Eurakilon.

¹⁵ Sar imar e balvaj e lođa zachudľa a našti la likerďam, pomukľam, hoj la te lidžal e balvaj.

¹⁶ Sar avľam paš o cikno ostrovos, so pes vičinel Kauda, ča ajci-ajci so zachraňinďam e loďka, so pal peste cirdahas.

¹⁷ Cirdle la upre a palis zoraľarde e lođa le lanenca. Darahas, hoj te na demas tel o paňi andre pošakero than paš e phuv Libija, mukle tele la loďakeri lepeda a dine pes te lidžal la balvajake.

¹⁸ Vašoda, hoj e zoraľi balvaj amenca igen čivkerelas, pro dujto džives čivkerenas avri o veci andral e lođa.

¹⁹ A pro trito džives peskere vastenca čivkerenas avri o sersamos la loďakero.

²⁰ Sar imar buter dživesa pes na sikavenas aňi o kham aňi o čerčeňa a mek furt likerelas oda nalačo časos, preačhiľam imar te pačal, hoj pes zachraňinaha.

²¹ Sar imar buter dživesa na chaľam nič, ačhiľa o Pavol maškar lende a phendä: "Kampľa man te šunel, muršale, a te na mukel pes andral e Kreta. Na ulahas tumen kada pharipen the kada našaviben.

²² Akana tumen mangav, hoj tumen pes te na daran, bo ňiko tumendar na našavela o dživipen, ča e lođa tašľola.

²³ Bo adi rat ačhiľa paš mande o aňjelos le Devlestar, kaskero som the saveske služinav,

²⁴ a phendä mange: 'Ma dara tut, Pavol, bo mušines te ačhel anglo Cisarıs! Dikh, o Del tuke diňa olen, save hine tuha andre lođa.'

²⁵ Vašoda, muršale, ma daran tumen, bo pačav le Devleske, hoj pes ačhela avke, sar mange phendä.

²⁶ Ale e balvaj amen lidžala pre varesavo ostrovos."

²⁷ E dešuštarto (14.) rat amen ligendä e balvaj pro Adrijatiko moros a vaj pal jepaš rat pes dičholas le namorňikenge, hoj doaven paš varesavi phuv.

²⁸ Merinde, keci tele hin o paňi, a sas saranda (40) metri. Sar gele la lođaha sikra dureder, pale merinde a sas tranda (30) metri.

²⁹ Daranas pes, hoj te na demen pro bar, mukle palunestar tele štar kotvi a mangenas pes, hoj te el imar džives.

³⁰ O namorňika kamenas te denašel andral e lođa a mukle e loďka tele andro moros. Kamukeri pes kerenas, hoj kamen anglunestar te mukel tele o kotvi.

³¹ O Pavol phendä le veliteľiske the le slugadenge: "Te kala na ačhena pre lođa, tumen našti aven zachraňimen."

³² Akor prečhinde o slugađa o šele la loďkake a mukle, hoj te perel andro moros.

³³ Medik na avľa avri o kham, mangľa o Pavol savoren, hoj te chan, a phendä: "Adadžives imar hin dešuštarto (14.) džives, so užaren bokhaha a na chan nič.

³⁴ Vašoda tumen mangav, hoj te chan, bo oda hin prekal tumari zachrana. Ňikaske tumendar pes mek aňi o bal pro šero na našavela!"

³⁵ Sar o Pavol oda dophendä, iľa o maro a palikerďa le Devleske angle savorende, odphagľa a chudľa te chal.

³⁶ Savorenge avľa pale o radišagos a chanas the on.

³⁷ Pre lođa samas savore duj šel the eftavardeš the šov (276).

³⁸ Sar čaľile le chabenestar, čivkerenas andral e lođa avri o dživ (zrnos), hoj te el e lođa lokeder.

E lođa demel a tašľol

³⁹ Sar imar sas džives, na prindžarde oda than, ale dikhle varesavi zatoka a phende peske, hoj te pes oda dela, ta zaačhena la lođaha pre phuv.

⁴⁰ Odčhinde o kotvi pal soduj seri a mukle len tele andro moros. Rozphandle the o šele pro kormidli, hazdle upre e angluňi lepeda a kerinenas ko brehos.

⁴¹ Ale e lođa demađa pre pošakero than tel o paňi avke, hoj angluno kotor la loďake pes našti čhalavelas a palunestar o vlni phagerenas e lođa.

⁴² Akor kamle o slugađa te murdarel le bertenošen, hoj te na varesavo chučel andro paňi a denašel.

⁴³ Ale o veliteľis upral o šel kamľa te zachraňinel le Pavol a na domukľa lenge te kerel oda, so kamenas. Phendä, hoj ola, save džanen te plavinel, ešebne te chučen andro paňi a te doplavinen ke phuv.

⁴⁴ Ola aver manuša kamle te preplavinel pro kašta, abo pre varesave aver kotora pal e lođa. Kavke pes savore bachtales dochudle pre phuv a zachraňinde pes.

O Pavol pro ostrovos Malta

28 Sar imar pes zachraňinďam, akor prindžardam, hoj o ostrovos pes vičinel Malta.

² O manuša, save ode bešenas, amenge sikade bari pačiv, bo priile amen savoredženen a rozthode e jag, bo chudľa te del brišind a sas šil.

³ Sar skidňa o Pavol upre šuke kaštora a thođa pre jag, avľa avri o sap anglo tačipen a danderďa les andro vast.

⁴ O manuša, save ode bešenas, dikhle, sar leske figinel o sap pro vast, a phenenas jekh avreske: "Kada manuš mušinel te el vrahos, bo choc pes zachraňinda le morostar, the avke les diňa te merel e devľi Spravodlišagos."

⁵ Ale ov razindä tele le sapes andre jag a na ačhiľa pes leske nič nalačo.

⁶ On užarenas, hoj šuvľola, abo hoj perela jekhvareste tele mulo. Sar imar buter užarenas a dikhle, hoj pes leske nič nalačo na ačhel, visarde peskere lava a phende, hoj hino del.

⁷ Pašal oda than sas mali le načelňikos ole ostrovoske a leskero nav sas Publius. Priiľas amen a trin džives pašal amende kerelas.

⁸ Ačhiľa pes, hoj le Publiuskero dad pašľolas strapi-men andre horučka a igen les pretradelas. O Pavol geľa ke leste, modľiľda pes, thoďa pre leste o vasta a sastarda les.

⁹ Sar pes oda ačhiľa, avenas the aver nasvale manuša pal o ostrovos a sas avrisastarde.

¹⁰ On amenge presikade bari pačiv, a sar imar džahas la loďaha het, dine amen oda, so kampelas pro drom.

O drom andral e Malta andro Rim

¹¹ Pal o trin čhon odgeľam het la loďaha andral e Alexandrija, so ačhiľa prekal o jevend pro ostrovos. La loďa sas znakos Dvojički.

¹² Sar doavľam la loďaha andro Sirakus, ačhiľam ode trin džives.

¹³ Odarik džahas la loďaha pašal o brehos a doavľam andro Regium. Vašoda, hoj pre aver džives phurdelas lachi balvaj, dogeľam tel o duj džives andro Puteol.

¹⁴ Ode arakhľam le phralen, save amen mangle, hoj ode te ačas eľta dživesa. Avke avľam andro Rim.

¹⁵ Sar pes o phrala odarik pal amende došunde, avenas ke amende dži paš o fori Appiuskero pľacos the paš o Trin Taberne. Sar len dikhľa o Pavol, palikerďa le Devleske, radisaľiľa a sas povzbudzimen.

¹⁶ Sar doavľam andro Rim, [o velitelis upral o šel oddiľna le bertenošen le nekbareder veliteliske]. Ale le Pavloske sas domuklo te bešel avrether jekhe slugadiha, savo pre leste merkinelas.

O Pavol kazinel andro Rim

¹⁷ Ačhiľa pes, hoj pal o trin džives peske o Pavol vičindľa le Židovike vodcen. Sar pes zgele, phenelas lenge: "Muršale, phralale! Choc te na kerdom nič amare manušen, aňi na džavas pro dadengere tradiciji, the avke man andro Jeruzalem phandle andre a dine andro vasta le Rimanenge.

¹⁸ Ale on, sar imar man šunde avri, kamle man te premukel, bo na arakhle pre ma nič ajso, vaš soske mušindomas te merel.

¹⁹ Ale vaš oda, hoj o Židi oda na kamenas, mušindom man te mangel anglo Cisarıs, ale na kamavas nič te vakerel pre miro narodos.

²⁰ Akana tumen vašoda vičindom, hoj tumen te dikhav a te vakerav tumenca. Bo vaš oda, pre soste užarel o Izrael, som adadžives phandlo kale lancoha."

²¹ On leske phende: "Amen pal tute na chudľam ňisavo ľil andral e Judsko, aňi na avľa ňiko le phralendar, hoj amenge te del te džanel, abo te phenel vareso nalačo pal tute.

²² Ale kamľamas tutar te šunel, sar gondofines, bo džanas pal kadi sekta, hoj pre late všadzik džan."

²³ Dine leske te džanel savo džives a avle buter džene ke leste andro kher. Ov lenge vakerelas avri, sikavelas pal o krališagos le Devleskero a prevakerelas len pal o Ježiš andral o Mojžišoskero Zakonos the andral o proroka tosaratar dži rači.

²⁴ Varesave pačanas oleske, so vakerelas, ale aver na pačanas.

²⁵ Vašoda, hoj len na sas jekh gondolišagos, rozgele pes akor, sar o Pavol phendľa kada lav: "Mištes vakereľas o Sentno Duchos prekal o prorokos Izaiaš amare dadenge:

²⁶ *Dža ke kala nipi a phen: Tumen šunena tumare kanenca, ale na achalona! Tumen dikhena tumare jakhenca, ale na dikhena!*

²⁷ *Bo kale nipengero jilo ačhiľa baruno, peskere kanenca phares šunen a peskere jakha phandle andre, hoj te na dikhen, le kanenca te na šunen, le jileha te na achalona a te na visaren pes, hoj len te sastarav avri.'*

²⁸ Ta akor džanen, hoj avre narodenge hiňi bičhadi kadi zachrana le Devleskeri a on la the šunena."

²⁹ [Sar oda o Pavol phendľa, o Židi gele het a igen pes maškar peste vesekedinenas.]

³⁰ O Pavol ačhiľa duj berš andro kher, so peske korkoro iľa. Prilelas savoren, ko ke leste avelas,

³¹ a vakerelas pal o krališagos le Devleskero a sikavelas pal o Raj Ježiš Kristus phundradones the bi e dar. A ňiko leske andre oda na braňinelas.

RIMANENGE

O pozdravos

1 Pisinav tumenge, me o Pavol, o služobnikos le Ježišoskero Kristoskero. O Del peske man avri kidña, hoj te avav leskero apoštolos, a vičinda man, hoj te vakerav o evaňjelium.

² O Del imar čirla diña lava pal oda evaňjelium prekal peskere proroka andro peskero sentno Lav.

³ Oda hin o evaňjelium pal leskero Čhavo a amaro Raj Ježiš Kristus, savo pal o t'elos uliła (narodzinda pes) le Davidoskera famelijatar.

⁴ No o Sentno Duchos sikađa peskera bara zoraha pre leste, hoj hino o Čhavo le Devleskero akor, sar les uštađa andral o meriben.

⁵ Prekal o Kristus mange sas dino le Devleskero lačhipen (milost), hoj te avav leskero apoštolos a te lidžav le manušen andral savore narodi, hoj te pačan andre leste a te šunen les.

⁶ The tumen san jekh lendar, save san vičimen le Ježišostar Kristostar.

⁷ A vašoda pisinav tumenge savoreng andro foros Rim, kas o Del kamel a kas peske avri kidña sar peskere sentne manušen: O lačhipen (milost) the o smirom tumenge le Devlestar, amare Dadestar the amare Rajestar le Ježišostar Kristostar.

O Pavol kamel te džal ke lende

⁸ Ešeb kamav te palikerel mire Devleske prekal o Ježiš Kristus vaš tumenge savoreng, hoj pes vakerel pal tumaro pačaben pal calo svetos.

⁹ O Del, saveske andral calo jilo služinav le evaňjelioha pal leskero Čhavo, hin miro švedkos, sar tumen furt leperav,

¹⁰ kecivar man modlinav. Furt mangav le Devles, hoj mange te del imar te džal ke tumende, kana ov kamela.

¹¹ Bo igen tumen kamav te dikhel, hoj tumen te dav varesavo duchovno daros, hoj te zoraľon.

¹² Kamav te phenel, hoj sodujđzene jekhvareste te zoraľuvas: Tumen mire pačabnastar a me tumare pačabnastar.

¹³ Kamav, hoj te džanen, phralale, hoj buterval kamľom te džal ke tumende. Bo kamav te dochudel varesave neve manušen andro pačaben the maškar tumende, avke sar maškar aver narodi. Ale vareso man furt ačhavelas.

¹⁴ Bo me oda mušinav te vakerel savore manušenge: Le Grekenge the avre narodenge; olenge, save hine avrisikade the save nane avrisikade.

¹⁵ Vašoda kamav igen te vakerel o evaňjelium the ke tumende andro foros Rim.

Pal e zor le evaňjelioskeri

¹⁶ Se me man na ladžav vaš o evaňjelium le Kristoskero, bo oda hin e zor le Devleskeri, so zachraňinel olen, ko pačal: Ešeb (peršo) le Židen a palis the le Nažiden.

¹⁷ Bo andro evaňjelium pes presikavel, hoj o manuš hino čačipnaskero anglo Del le pačabnastar a ča le pačabnaha, avke sar hin pisimen: *"O čačipnaskero manuš dživela le pačabnastar."*

O binos le manušengero

¹⁸ Le Devleskeri cholí pes sikavel andral o ňebos pre dojekh binos the nalačhipen le manušengero, so garuven andro čačipen le nalačipnaha.

¹⁹ Bo lenge hin dino te džanel, so šaj te džanel pal o Del. Se o Del lenge oda diña te džanel.

²⁰ Le Devleskeri zor the leskero devľipen našti te dikhel, ale kanastar o Del kerđa o svetos, šaj oda dikhen andre ola veci, so kerđa, a vašoda len nane ospravedlňeňje.

²¹ Bo choc prindžarenas le Devles, na lašarenas les sar Devles, aňi leske na palikerenas. Andre peskero gondolišagos gele andro diliňipen a andre lengero nagođaver jilo avľa o kalipen.

²² Phenen pre peste, hoj hine gođaver, ale ačhile diline.

²³ Na te lašardehas le Devles, savo šoha (ňikda) na merel, ale lašaren o obraza, so maren pro manuš, savo na dživel furt, abo lašaren le čiriklen, le chocsave džviren, abo le sapen.

²⁴ Vašoda len o Del oddiña andre oda džungipen, so kamenas te kerel andral peskere jile, hoj te keren ola ladžandutne veci peskere t'elencu maškar peste.

²⁵ On čerinde o čačipen le Devleskero vaš o klamišagos. Na le Devles lašarenas a leske služinenas, ale le vecenge, so o Del kerđa. Les kampil le manušenge furt te lašare! Amen.

²⁶ Vašoda len o Del diña andro džungale žadosci. Bo lengere džuvľa preačhile te dživel le muršenca avke, sar kampil.

²⁷ Avke the o murša omukle o normalno džvivipen le džuvľenca a chudľa andre lende te labol e binošno ža-

dosca jekh ke aver. O murša le muršenca kerenas o džungale veci a chudle pre peskere tela o počičiben, so peske zasogalinde (zaslužinde) vaš oda nalačhipen, so kerenas.

²⁸ A vašoda, hoj ola manuša na kamle te likerel andre peskere goda o čačipen pal o Del, diňa len o Del andre lengere previsarde goda, hoj te keren oda džungipen, so na tromal te kerel.

²⁹ Hine pherarde savore binenca, le nalačhipnaha, le džungipnaha, la cholaha the le hamišagoha. Hine nalače; murdaren; maren pes; klaminen; keren o pletki;

³⁰ namištes vakeren jekh pre aver. Našti avri ačhen le Devles; lidžan pes upre; hine barikane; lašaren pes; gondoliňen avri o nalače veci; na šunen le dajen the le daden;

³¹ nane godaver; na dolikeren peskere lava; na sikaven nisavo kamiben a nane jileskere ke aver.

³² Kala manuša džanen, hoj le Devleskero zakonos phenel, hoj ko avke dživel, zasogalinen peske o meriben. Na ča, hoj oda keren, ale mek the avre dženge phenen, hoj oda šaj keren.

Le Devleskero čačipnaskero sudos

2 Tu manušeja, sudzines avren? Te ada keres, našti tut nisoha ospravedlňineha, kaj te ko sal. Bo te tu sudzines avren a palis keres ola veci, so the on, korkoro tut sudzines.

² Amen džanas, hoj o Del sudzinela čačipnaha ole manušen, save keren kajse veci.

³ Tu manušeja, sudzines avre manušen vaš oda, so keren a the tu oda keres? Gondoliňes tuke, hoj tu denašeha le Devleskere sudostar?

⁴ So, tu tele dikhes le Devleskero baro lačhipen, avrikeriben the zlikeriben? Na džanes, hoj le Devleskero lačhipen tut lidžal ko pokaňje?

⁵ Tiro jilo hino baruno the zacato a avke tuke skides e cholí pre oda džives, sar o Del sikavela peskeri cholí a čačipnaha sudzinela savoro.

⁶ O Del počinel sakoneske vaš oda, sar kerelas.

⁷ Ov dela o večno dživipen sakones, ko likerelas avri te kerel o lačhipen a džalas pal oda, hoj te dživel furt a te chudel e slava the e pačiv.

⁸ Ale pre sakoneste, ko na šunelas o čačipen vaš oda, hoj dikhelas ča pre peste a kamelas te kerel o nalačhipen, sikavela peskeri igen bari cholí.

⁹ O pharipen the e dukh avela pre sakoneste, ko kerel o nalačhipen: Ešeb (peršo) pro Židi a palis the pro Nažidi.

¹⁰ Ale sako, ko kerel o lačno, chudela e slava, e pačiv the o smirom: Ešeb o Židos a palis the o Nažidos.

¹¹ Bo o Del na sudzinela le manušen pal o muj.

¹² Savore, save kerenas bini a nane len o zakonos, bi o zakonos the merena. A savore, save kerenas bini a hin len o zakonos, le zakonostar ena sudzimen.

¹³ Bo paš o Del nane čačipnaskere ola manuša, save ča šunen o zakonos, ale ola, save les dolikeren.

¹⁴ Te le Nažiden nane zakonos, ale korkore pestar keren oda, so kamel o zakonos, choc len nane zakonos, korkore peske hine zakonos.

¹⁵ On sikaven, hoj oda, so kamel o zakonos, hin pisimen andre lengere jile. A takoj the lengero svedomje pre oda sikavel, sar pes andro gondoliňšagos obviňinen, abo obraňinen.

¹⁶ Avke sar oda phenavas andre miro evaňjelium, hoj andre oda džives o Del sudzinela prekal o Ježiš Kristus ola veci, so o manuša garuven andre.

O Židi the o zakonos

¹⁷ Ale te pes tu mukes pro zakonos; vičines tut Židos; lašares tut le Devleha

¹⁸ a džanes, so tutar o Del kamel; te siklos andral o zakonos te prindžarel, so hin lačno the nalačno

¹⁹ a pačas tuke, hoj sal oda, ko lidžal le koren; oda, ko hin o svetlos olengero, save hine andro kalipen;

²⁰ oda, ko bararel avri le nagođaveren a sikavel le terne manušen, bo andro zakonos tut hin o čačipen the o prindžaripen:

²¹ Akor soske tu, savo avres sikaves, tut korkores na sikaves?

Tu vakeres, hoj pes te na čorel, a tu korkoro čores?

²² Avrenges phenes, hoj te na keren lubipen, a tu korkoro oda keres? Našti avri ačhes o modli, ale čores avri o chramos?

²³ Lašares tut le zakonoha, ale oleha, hoj les na šunes, keres ladž le Devleske.

²⁴ Avke sar hin pisimen: *"Vaš tumenge o Nažidi namištes vakeren pro Del."*

²⁵ Te dolikeres o zakonos, akor hin tiro občhindipen (obriezka) pro lačno; ale te na dolikeres o zakonos, oda hin avke, sar te šoha (ňikda) na ulalas občhindo (obrezimen).

²⁶ Te dolikerel o naobčhindo manuš oda, so lestar kamel o zakonos, či les na rachinel o Del avke, sar te ulahas občhindo?

²⁷ A oda manuš, savo nane občhindo, ale dolikerel o zakonos, ov sudzinela tut. So the te sal občhindo a hin tut o zakonos, ale na dolikeres les?

²⁸ Bo nane Židos oda manuš, ko avke dičhol avral; aňi o občhindipen (e obriezka) nane oda, so dičhol pro telos;

²⁹ ale Židos hin oda manuš, savo hino počoral občhindo andro jilo le Duchostar a na le pisimen zakonostar. Kajse manušes na lašaren o nipi, ale o Del.

3 So hin feder le Židen avre narodendar, abo savi chasna hin le občhindipnastar (la obriezkatar)?

² Igen bari chasna andre savoreste! Vašoda, hoj pre ešebno than lenge sas dine le Devleskere lava.

³ Se, so te varesave lendar na pačanas ole lavenge? Či vaš oda akana o Del na ela verno, bo len na sas pačaben?

⁴ Šoha na! Ale mi dičhol, hoj o Del hino čačipnaskero a dojekh manuš hino klamaris, avke sar hin pisimen: *"Te presikavel pes, hoj sal čačipnaskero, sar vakeres, a hoj te ňerines (zvitazines), te tut sudzinena."*

⁵ Te amaro nalačhipen, so keras, sikavel, savo čačipnaskero o Del hino – ta akor, so šaj phenas? Akor o Del namištes kerel, te amen vaš oda mare! (Kada phenav avke, sar manuš.)

⁶ Šoha na! Se sar palis o Del sudzindahas o svetos?

⁷ Ale te miro klamišagos sikavel, hoj le Devleskero čačipen hino bareder a anel leske oda e slava, akor soske som the me sudzimen sar binošno?

⁸ Vaj so, hin oda avke, sar varesave manuša vakeren? Bo phenen pre amende, hoj amen phenas: "Aven keras o nalačo, hoj te avel o lačo." Ola manuša ena vaš oda čačipnaha odsudzimen.

Ńiko nane čačipnaskero

⁹ So akor? Hine o Židi feder sar o Nažidi? Ńisoha na! Se akana phendām the pro Židi the pro Nažidi, hoj savore hine tel o bini.

¹⁰ Avke sar hin pisimen:

"Ńiko nane lačo,

¹¹ *Ńiko na achałol, Ńiko na rodel le Devles.*

¹² *Sako pes visardā het le Devlestar, sa gele namištes, nane Ńiko, ko kerdahas o lačo, aŃi jekh.*

¹³ *Lengero kirlo hin sar phundrado hrobos, peskere čhibenca vakeren klamišagos a pro vušta len hin o jedos le sapestar.*

¹⁴ *Andre lengero muj hin pherdo džungale košibena.*

¹⁵ *Lengere pindre hine sidarde te dukhavel a te muredarel,*

¹⁶ *pre lengere droma hin sa musardo the bibachtalo.*

¹⁷ *O drom, so anel o smirom, na prindžarde.*

¹⁸ *Nane andre lende Ńisavi dar anglo Del."*

¹⁹ Amen džanas, hoj oda, so hin phendo andro zakonos, hin phendo prekal ola, save dživen tel o zakonos, hoj pes te phandel andre dojekh muj a calo svetos te el binošno anglo Del.

²⁰ Bo le zakonoskere skutkendar na ela anglal leste ospravedlŃimen Ńisavo manuš. Se prekal o zakonos pes prindžarel o binos.

O spravodlišagos avel prekal o pačaben

²¹ Ale akana pes sikađa, hoj o Del kerel le manušen spravodlŃiven bi o zakonos, avke sar sikavel andro zakonos the andro proroka;

²² o spravodlišagos le Devleskero prekal o pačaben andro Ježiš Kristus savorenge, ko pačan. Bo nane Ńisavo rozđjelis maškar o manuša,

²³ bo savore kerde bini a nane len le Devleskeri slava.

²⁴ Ale hine ospravedlŃimen hijaba, le Devleskere lačhipnastar (milostatar), prekal o Ježiš Kristus, savo len cinda avri.

²⁵ O Del imar anglal diňa le Ježiš a obetinda les, hoj prekal leskero rat pačabnaha andre leste te avas ko Del. Oleha o Del presikađa peskero spravodlišagos, hoj odmukla o bini, so sas kerde anglal,

²⁶ sar o Del zlíkerelas avri. Vašoda, hoj akana andre kada časos te presikavel peskero spravodlišagos, bo

Ov hino čačipnaskero a ospravedlŃinel oles, ko pačal andro Ježiš.

²⁷ Soha pes palis o manuš šaj lašarel? Ńisoha! Soske? Či šaj pes lašaras, hoj dolíkeras o zakonos? Na! Ale oleha, hoj pačas.

²⁸ Bo amen pačas, hoj o manuš hino ospravedlŃimen le pačabnaha bi o zakonoskere skutki.

²⁹ Či hino ča Del le Židenge? Či nane Del the le Nažidenge? He, hino Del the le Nažidenge.

³⁰ Se hin ča jekh Del. Ov ospravedlŃinela le Židen lengere pačabnastar a the le Nažiden prekal o pačaben.

³¹ Abo či amen tele čhivas o zakonos le pačabnaha? Na, šoha (Ńikda) na! Ipen hoj visara: Amen les upre hazdas.

O pačaben pes rachinel sar spravodlišagos

4 So akor phenaha pal o Abraham, amaro dad pal o telos?

² Bo te sas o Abraham ospravedlŃimen le skutkendar, ta hin les soha pes te lašarel, ale na anglo Del.

³ Se sar hin pisimen? "*O Abraham pačandila le Devleske a rachinelas pes leske oda vaš o spravodlišagos.*"

⁴ Oleske, ko kerel buči, na rachinel pes o počihiben sar daros, ale počinel pes les, bo peske oda zasogalinel (zaslužinel).

⁵ Ale oleske, ko na kerel o skutki, ale pačal andre Oda, ko ospravedlŃinel le bijedevleskere manušes, rachinel pes leskero pačaben sar spravodlišagos.

⁶ Avke sar the o David vakerele pal oda, hoj bachtalo hin o manuš, kas rachinel o Del sar čačipnaskeres bijal oda, hoj peske oda zasogalinda:

⁷ *"Bachtale hine ola,*

kaske sas odmukle o nalačhipena

a kaske sas o bini učharde andre!

⁸ *Bachtalo manuš,*

kaske o Raj na rachinel o binos!"

⁹ Hine kala bachtalipena ča prekal o občhinde (obrezimen), abo the prekal o naobčhinde? Se phenas: "*Le Abrahamoske pes rachinelas o pačaben vaš o spravodlišagos.*"

¹⁰ Ale kana pes leske oda rachinelas? Sar sas občhindo, abo akor, sar mek na sas? Na akor, sar imar sas, ale akor, sar mek na sas občhindo.

¹¹ Ov sas občhindo a avke leskero občhindipen (leskeri obriezka) sikavelas, hoj pačabnaha sas čačipnaskero anglo Del mek angloda, sar sas občhindo. Avke ačhiła o Abraham dad savorenge, save pačana, hoj the lenge pes oda te rachinel sar o spravodlišagos, the te nane občhinde.

¹² Ov hino tiš dad olenge, save hine občhinde, olenge, save na ča hoj hine občhinde, ale the dživen andre oda pačaben, sar amaro dad o Abraham džive-las mek angloda, sar sas občhindo.

O lav hin dino prekal o pačabnaskere

¹³ Bo na prekal o zakonos sas dino le Abrahamoske the leskere čhavage o lav, hoj ela o dēdičos le svetoskero, ale prekal o pačaben sas čačipnaskero.

¹⁴ Te hine dēdiča ola, save len hin o zakonos, akor o pačaben nane nič a o Del diña hijaba peskere lava.

¹⁵ Bo le Zakonoha avel e cholī, ale kaj nane zakonos, ode nane aňi binos.

¹⁶ Vašoda mušinel o spravodlišagos te avel prekal o pačaben, hoj oda te avel le Devleskere lačhipnastar (milostatar) a oda lav te avel prekal savore Abrahamoskere čhave. Oda lav na sas dino ča prekal ola, save dživen le zakonostar, ale the prekal ola, save dživen pačabnaha sar o Abraham. Ov hino Dad amenge savoreng.

¹⁷ Avke sar hin pisimen: "*Kerđom tutar dades but narodenge.*" O Abraham hin amaro dad anglo Del, saveske ov pačandīľa; oda Del, savo obdžidarel le mulen a vakarel ke oda, so nane, sar te ulahas.

¹⁸ Ode, kaj na sas le Abraham pes pre soste te zmukel, pačandīľa. A užarelas, hoj ela *dad but narodenge*, avke sar sas phendo: "*Ajci but tut ela čhave.*"

¹⁹ Le Abrahamoskero pačaben na cikňiľa aňi akor, sar leske sas maj šel (100) berš a dikhelas, hoj leskero tēlos imar hino phuro a na birinel a leskera romňa la Sara imar našti aven čhave.

²⁰ Na preačhiľa te pačal andre oda lav, so les o Del diña, ale zoraliľa andro pačaben a bararelas le Devles.

²¹ Igen pačalas, hoj o Del hino zoralo oda the te kerel, so leske phendā.

²² Vašoda o Del le Abrahamoske oda rachinelas sar spravodlišagos.

²³ A na ča prekal leste oda hin pisimen, hoj pes leske o pačaben rachinelas,

²⁴ ale the prekal amende – amenge, save pačas andre Oda, ko uštađa amare Rajes le Ježiš andral o meriben.

²⁵ Bo ov sas dino te merel vaš amare bini a sas ušta-do andral o meriben, hoj amen te avas čačipnaskere.

Ospravedlňimen prekal o pačaben

5 Akana sam ospravedlňimen pačabnaha a hin amen smirom le Devleha prekal amaro Raj Ježiš Kristus.

² Pačabnaha andre leste šaj avas andro lačhipen (milost) le Devleskero, andre savo lačhipen the ačas. A lašaras pes oleha, hoj užaras pre le Devleskeri slava.

³ Na ča oda, ale lašaras pes the le pharipenencia. Bo džanas, hoj o pharipen amen lidžal ko avrilikeriben

⁴ a andro avrilikeriben pes presikavel či obačhiľam; a oda amenge anel o užaripen (nađej).

⁵ A kada užaripen amenge šoha (ňikda) na ela pre ladž, bo o kamiben le Devleskero hin avričhido andre amare jile prekal o Sentno Duchos, savo amenge sas dino.

⁶ Bo o Kristus andre le Devleskero časos, mek sar amen samas slaba, muľa vaš o bijedevleskere.

⁷ Či diňahas vareko o dživipen vaš o čačipnaskero manuš? No talam pes vareko arakhľahas, ko diňahas peskero dživipen vaš varesavo lačo manuš,

⁸ ale o Del presikavel peskero kamiben ke amende avke, hoj mek akor, sar amen samas binošna, imar o Kristus muľa vaš amenge.

⁹ Vašoda akana avaha mek sigeder zachraňimen le Devleskera cholatar prekal o Kristus, te imar sam obžuzarde leskere rateha.

¹⁰ Prekal o meriben leskere Čhaskero, andā o Del o smirom maškar amende imar akor, sar mek amen samas ke leste nalače. Avke akana džanas, hoj avaha zachraňimen leskere dživipnaha, te sam imar leha lače.

¹¹ A na ča oda, ale le Devleha pes lašaras prekal amaro Raj Ježiš Kristus, prekal savo amen hin akana smirom le Devleha.

Pal o Adam the pal o Kristus

¹² Prekal jekh manuš avľa o binos andro svetos a le binostar avľa o meriben. Avke pregeľa o meriben pre savore manuša, bo savore kerde bini.

¹³ O binos sas pro svetos imar the anglo zakonos, ale te nane zakonos, o binos pes na rachinel.

¹⁴ Ale le Adamostar dži ko Mojžiš sas o manuša tel e zor le meribnaske, the te na kerde ajso binos sar o Adam.

O Adam sikavel pre Oda, ko avela.

¹⁵ Ale le Devleskere daroha hin avres sar le binoha. Bo te prekal jekhe manušeskero binos but džene mule, ta avke prekal o lačhipen (milost) jekhe manušeskero, le Ježišoskero Kristoskero, igen but rozbariľa le manušenge le Devleskero lačhipen (milost) the daros.

¹⁶ Kale Devleskere daroha oda hin avres, sar ole binoha, so kerđa jekh manuš. Bo prekal jekh binos avľa o sudos, ale pal o but bini avľa le Devleskero lačhipnaskero daros, so amendar kerel čačipnaskeren.

¹⁷ Vašoda, hoj jekh manuš kerđa binos, chudľa o meriben te kralinel. So sigeder akana prekal oda jekh, prekal o Ježiš Kristus, kralinena andro dživipen savore, so chudle le Devleskero lačhipen (milost) the oda daros, so lendar kerel čačipnaskeren.

¹⁸ Avke sar prekal jekh manuš, savo kerđa binos, avľa o sudos pre savore manuša, avke the prekal jekh čačipnaskero skutkos avľa o ospravedlňeňje pre savore manuša, hoj len te avel o dživipen.

¹⁹ Bo avke sar prekal oda, hoj jekh manuš na šundā, ačhile but džene binošna, avke the prekal oda, hoj jekh manuš šundā, ačhena but džene čačipnaskere.

²⁰ Andre oda avľa mek the o zakonos, hoj te barol o binos. Ale kaj bariľa o binos, ode mek buter bariľa le Devleskero lačhipen (milost),

²¹ hoj avke, sar o binos chudľa te kralinel a te lidžal ko meriben, the o lačhipen (milost) le Devleskero

chudľa te kralinel le čačipnaha a te lidžal ko večno dživipen prekal o Ježiš Kristus amaro Raj.

Mule le binoske, džide le Kristoske

- 6** Akor so phenaha? Ačhaha andro binos, hoj te barol o lačhipen (milost) le Devleskero?
² Šoha na! Amen, save mułam le binoske, sar šaj mek andre leste dživas?
³ Abo so, na džanen, hoj savore, save samas bolde andro Ježiš Kristus, bolde sam andre leskero meriben?
⁴ Le bołipnaha samas jekhetane leha parunde andro meriben, hoj avke, sar sas o Kristus uštado andral o meriben le Dadeskera slavaha, the amen te dživas andro nevo dživipen.
⁵ Bo te ačhiłam jekh leha andre leskero meriben a mułam avke sar the ov, ta avke avaha uštade sar ov.
⁶ Se džanas, hoj amaro purano manuš, sas jekhetane leha ukrižimen, hoj te el zničimen o binošno tělos, hoj imar buter te na avas otroka le binoske.
⁷ Bo oda, ko muľa, hino imar slobodno le binostar.
⁸ Amen pačas, hoj te mułam le Kristoha, jekhetane leha the dživaha.
⁹ Se džanas, hoj o Kristus uštifa andral o meriben, imar buter na merel a imar nane tel e zor le meribnaske.
¹⁰ Bo ov muľa jekhvar pro furt a le binos imar nane upral leste ňisavi zor, ale o dživipen, so dživel, dživel le Devleske.
¹¹ Avke peske the tumen gondolinen pal tumende, hoj san mule le binoske, ale džide le Devleske andro Ježiš Kristus.
¹² Te na kralinel o binos andre tumaro meribnaskero tělos avke, hoj šunena leskere těloskere žadosci.
¹³ Añi ma den, hoj varesavo kotor tumare tělostar te el le binoske sar o nastrojis pro nalače veci. Ale odden tumen le Devleske sar ola, save uštife andral o meriben a dživen. A tumare těloskere kotora den le Devleske sar o nastroji le čačipnaske.
¹⁴ O binos na ela tumaro raj, bo na san tel o zakonos, ale tel o lačhipen (milost) le Devleskero.

Otroka le čačipnaske

- ¹⁵ Akor sar? Keraha o bini, bo na sam tel o zakonos? Bo sam tel o lačhipen (milost) le Devleskero? Šoha na!
¹⁶ So na džanen, hoj te tumen varekaske odden te šunel sar otroka, hoj san otroka oleske, kas šunen? Vaj san otroka le binoske, so lidžal andro meriben, abo san otroka le šundipnaske, so lidžal ko spravodlišagos.
¹⁷ Varekana sanas otroka le binoske, ale palikeras le Devleske, hoj andral o jilo šundān oda sikaviben, so tumenge sas dino.
¹⁸ Akana san slobodne le binostar a ačhiłan otroka le čačipnaske.
¹⁹ Vašoda, hoj tumaro tělos hino slabo, vakerav sar manuš: Bo avke, sar diñan tumare těla te služinel le nažužipnaske the le nalačhipnaske, hoj kerenas o

nalačhipen, avke akana den cale tumare těla te služinel le čačipnaske pro sentņipen.

- ²⁰ Bo akor, sar sanas otroka le binoske, sanas slobodne le čačipnaske.
²¹ Savi chasna tumen olestar akor sas? Akana tumen vaš oda ladžan, bo pro agor oleske hin o meriben.
²² Ale akana san slobodne le binostar a ačhiłan otroka le Devleske. Kada tumendar kerela sentnen a lidžala tumen andro večno dživipen.
²³ Bo o počiņiben vaš o binos hin o meriben. Ale o Del diña peskero lačhipnaskero daros, o večno dživipen andro Ježiš Kristus, andre amaro Raj.

O podobenstvo pal e veraduņi džuvli

- 7** Abo či na džanen, phralale – bo phenav olinge, save prindžaren o zakonos – hoj le zakonos hin zor upral o manuš dži akor, medik dživel?
² Bo e veraduņi džuvli hiņi le zakonoha phandli ke peskero rom, medik o rom dživel. Ale te o murš muľahas, e džuvli uľahas slobodno le zakonostar, so la phandelas ko murš.
³ Ale medik dživel o rom a oj geľahas avre muršeha, vičindehas la lubņi. Ale te lakero rom muľahas, oj hiņi slobodno le zakonostar a nane lubņi te ačhela te dživel avreha.
⁴ Avke the tumen, phralale mire, muľan le zakonoske prekal o tělos le Kristoskero, hoj te patrinen Oleske, ko sas uštado andral o meriben, hoj te anas e chasna le Devleske.
⁵ Bo sar samas andro tělos, kerenas andre amende o binošna žadosci, so avenas prekal o zakonos. A sa, so kerahas, lidžalas andro meriben.
⁶ Ale akana sam oslobodzimen le zakonostar, bo mułam oleske, so amen phandelas andre, vašoda akana služinas le Devleske andro nevo duchos a na andro purano pisimen zakonos.

O binos andro manuš

- ⁷ Akor so? Phenaha, hoj o zakonos hin binos? Šoha na! Ale o binos na prindžaravas, prindžardom les ča prekal o zakonos. Bo aņi pal e žadosca na džanľomas, te na phendahas o zakonos: *“Na kameha te lel ňič le pašutnestar!”*
⁸ O binos pes chudľa le zakonostar a prekal o prikazaņje andre mande uštada savore nalače žadosci. Bo bi o zakonos hino o binos mulo.
⁹ Me dživavas varekana bi o zakonos, ale sar avľa o prikazaņje, o binos obdžidifa.
¹⁰ Ale me muľom a sikađa pes, hoj o prikazaņje, so man kamelas te lidžal ko dživipen, mange andā o meriben.
¹¹ O binos pes olestar chudľa, klaminda man prekal o prikazaņje a murdarda man.
¹² Avke o zakonos hin sentno the o prikazaņje hino sentno, čačipnaskero the lačo.
¹³ Akor so? Oda lačo mange andā o meriben? Šoha na! Ale hoj te dičhol o binos, hoj oda hin binos. O binos

mange prekal oda lačno anel o meriben. Hoj pes prekal o prikazaŋje te sikavel o binos, savo baro hino.

¹⁴ Se džanas, hoj o zakonos hino duchovno, ale me som tělesno, bikendo andro otroctvo le binoske.

¹⁵ Me na achaluřuvav oleske, so kerav. Bo na kerav oda, so kamav, ale kerav oda, so nařti avri ačhav.

¹⁶ Ale te kerav oda, so na kamav, dav čačo le zakonos, hoj hino lačno.

¹⁷ Avke akana imar oda na kerav me, ale o binos, so dživel andre mande.

¹⁸ Se džanav, hoj andre mande – oda hin andre miro tělos – na dživel o lačno. Bo the te kamav te kerel o lačno, na birinav oda te kerel.

¹⁹ Bo na kerav o lačno, so kamav, ale kerav oda nalačno, so na kamav.

²⁰ Ale te kerav oda, so me na kamav, na kerav oda imar me, ale oda kerel o binos, so dživel andre mande.

²¹ Avke arakhav andre mande o zakonos, hoj sar kamav te kerel o lačno, takoj hin paš ma o nalačno.

²² Bo andre miro andruno manuř dav radiřagoha čačipen le Devleskere zakonos.

²³ Ale dikhav andre mande aver zakonos, so pes marel le zakonoha andre miri godi a phandel man andro zakonos le binoskero, so hin andre mande.

²⁴ Ó, čoro manuř som! Ko man lela avri andral kada meribnaskero tělos?

²⁵ Ale pašikerav le Devleske, hoj kerel oda prekal o Ježiř Kristus, amaro Raj.

Avke akana, me mira godaha sluřinav le Devleskere zakonoske, ale mire těloha le binoskere zakonoske.

Pal o dživipen andro Duchos

8 Akana imar nane řisavo odsudeŋje prekal ola, save hine andro Ježiř Kristus.

² Bo o zakonos le Duchoskero, so amen del o dživipen andro Ježiř Kristus, man oslobodzinda andral o zakonos le binoskero the andral o meriben.

³ Oda, so nařti kerelas o zakonos, bo o tělos sas slabo, oda kerđa o Del, sar bičhađa peskere Čhas. Ov avřa andre ajso tělos, sar hin le binořne manuřen, a odsudzinda o binos andro tělos.

⁴ O Del oda kerđa, hoj pes te dokerel sa, so amendar o zakonos mangelas, andre amende, save na dživas pal o tělos, ale pal o Duchos.

⁵ Bo ola, save dživen pal o tělos, gondoliřen pro těloskere veci, ale ola, save dživen pal o Duchos, gondoliřen pro duchoskere veci.

⁶ Bo le těloskero gondoliřagos anel o meriben, ale o gondoliřagos le Duchoskero anel o dživipen the o smiom.

⁷ Le těloskero gondoliřagos džal pro Del, bo pes na poddel le Devleskere zakonoske, bo pes aři nařti poddel.

⁸ Ola, save dživen andro tělos, nařti aven pre dzeka le Devleske.

⁹ No tumen na san andro tělos, ale andro duchos, te o Duchos le Devleskero dživel andre tumende. Ale te varekas nane le Kristoskero Duchos, oda nane leskero.

¹⁰ Ale te hin o Kristus andre tumende, akor hin o tělos mulo vař o binos, ale o Duchos hin dživipen vař o spravodliřagos.

¹¹ Te dživel andre tumende o Duchos oleskero, savo uřtađa le Ježiř andral o meriben, ta akor oda, ko uřtađa le Kristus andral o meriben, obdžiđarela the tumare meribnaskere těla prekal peskero Duchos, savo dživel andre tumende.

¹² Vařoda, phralale, amen na muřinas te dživel avke, sar kamel o tělos,

¹³ bo te dživen le těloske, merena, ale te le Duchoha meraren o skutki le těloskere, dživena.

¹⁴ Bo savore, save hine řigende le Devleskere Duchoha, hine čhave le Devleskere.

¹⁵ Se priiřan le Duchos, so tumendar na kerel otroken, hoj pale te dživen andre dar, ale priiřan le Duchos, so tumendar kerel čhaven. Andre leste řaj vičinas: "Abba, Dado!"

¹⁶ Oda Duchos korkoro sikavel amare duchoske, hoj sam o čhave le Devleskere.

¹⁷ A te sam o čhave, sam the o dđiča: O dđiča le Devleskere the jekhetane dđiča le Kristoskere. Bo te leha jekhetane cerpinas, jekhetane leha the avaha andre leskeri slava.

E slava, so avela

¹⁸ Me mange gondoliřav, hoj o phariřen, so amen hin akanake, pes aři na del te rachinel ke odi slava, so pes amenge sikavela.

¹⁹ Bo calo řebos the cali phuv igen uřarel pro Del, hoj te presikavel peskere čhaven.

²⁰ Bo savoro, so sas kerdo pre phuv, hin musardo. Nane lačno pre řisoste a oda na korkoro pestar, ale o Del oda avke domukřa. No diņa amen the oda, pre soste pes řaj zmukas,

²¹ hoj sa, so sas kerdo le Devlestar, ela andre jekh džives oslobodzimen andral o otroctvo, so les zřiřinelas, a hoj sa ela andre sloboda the slava le Devleskere čhavengeri.

²² Amen džanas, hoj sa, so sas kerdo le Devlestar, dži akana cerpinel andro dukha sar e džuvři, savi uřarel te ločhol (tele te pašřol).

²³ No na ča oda, ale the amen, save chudřam le Duchos sar oda eřebno daros le Devlestar, cerpinas andre peste, sar uřaras pro Del, hoj amendar te kerel peskere čhaven a te oslobodzinel amaro tělos.

²⁴ Bo amen sam zachrařimen andro uřariřen (nađej). Ale te oda, pre soste uřaras, řaj te dikhel, akor oda nane uřariřen. Bo soske vareko uřarela pre oda, so dikhel?

²⁵ Ale te pes zmukas pre oda, so na dikhas, ta akor uřaras pre oda avriřikeribnaha.

²⁶ Avke the o Duchos pomořinel amare slabiřagenge. Se amen na džanas, vař soske pes amenge kampil te modřinel. Ale korkoro o Duchos pes privakerel vař amenge avke, hoj pes aři le lavenca na del te phenel avri.

²⁷ Ale oda, ko prindžarel o jile, džanel, so kamel o Duchos, bo ov pes privakerel vaš o sentna avke, sar o Del kamel.

²⁸ Amen džanas, hoj sa, so avel andro dživipen, hin pro lačo olenge, save kamen le Devles a kas peske vičindā andre peskero planos.

²⁹ Olen, kas peske o Del kidña avri, olen the anglal diña, hoj te ačhen ajse sar leskero Čhavo, hoj o Čhavo te el ešebno maškar o but phrala.

³⁰ Olen, kas peske anglal iľa avri, the vičindā avri; olen, kas vičindā avri, kerđa the čačipnaskeren; olen, kas kerđa čačipnaskeren, diña the peskeri slava.

Le Devleskero kamiben

³¹ Akor so pre oda šaj phenas? Te hin o Del amenca, ko pre amende šaj avel?

³² O Del, savo na sajindā peskere Čhas, ale diña les vaš amenge savorengē, či oleha amenge na diña savoro?

³³ Ko šaj vakerel pre ola manuša, kas peske o Del avri kidña? O Del hin oda, so amendar kerel čačipnaskeren.

³⁴ Ko len šaj odsudzinel? O Ježiš Kristus hin oda, ko muľa a mek the uštíľa andral o meriben, hino pal e čači (pravo) sera le Devleske a privakerel pes vaš amenge.

³⁵ Ko amen odlela le Kristoskere kamibnastar? O pharipen, abo e dukh? Abo te pre amende džana, vaj e bokh, abo o čoripen, či e dar pal o dživipen, vaj o meriben?

³⁶ Avke sar hin pisimen:

“Vaš tuke amen kamen te murdarel calo džives; keren amenca sar le bakrorenca, saven lidžan te murdarel.”

³⁷ Ale andre kada savoro ňerinas (zvitāzinas) a predžas oda prekal o Ježiš, savo peske amen zakamľa.

³⁸ Bo me pačav, hoj aňi o meriben, aňi o dživipen, aňi o aňjela, aňi o uprune zora, aňi ola veci, so hin akana, aňi ola veci, so mekča avena, aňi ňisave zora,

³⁹ aňi oda, so hin učes, aňi oda, so hin teles, aňi nič aver, so sas kerdo le Devlestar, amen našti odlela le Devleskere kamibnastar, so hin andro Ježiš Kristus, andre amaro Raj.

Pal o Izrael

9 Me vakerav čačipen andro Kristus, na klaminav a miro svedomje andro Sentno Duchos mange hin švedkos,

² hoj man hin bari žaľa a furt man dukhal o jilo.

³ Bo me korkoro kamľomas te el prekošlo a odčhido le Kristostar vaš mire phrala the miri famelija pal o tēlos.

⁴ On hine o Izraeliti: Lendar kerđa peskere čhaven; lenge sas diňi e slava, o zmluvi, o zakonos, e bohoslužba the o zaslubeňja.

⁵ Lendar hine o dada a lendar hine the ola, kastar av-el o Kristus pal o tēlos, savo hino Del upral savorende a hino požehñimen pro furt. Amen.

⁶ Ale našti phenas, hoj o Del prephagľa peskere lava. Bo na savore, save hine andral o Izrael, hine Izraeliti.

⁷ Aňi na savore hine o čhave ča vaš oda, hoj hine o potomki le Abrahamoskere, ale o Del phendā le Abrahamoske: *“Le Izakostar pes tuke rachinela o potomstvos.”*

⁸ Dikhas, hoj le Devleskere čhave nane ola, save ulile (pes narodzinde) andro Izrael pal o tēlos. Ale ola čhave, pal save o Del diña lav, pes rachinen andro Abrahamoskero potomstvos.

⁹ A kada hin oda lav, so diña o Del: *“Aver berš andre kajso časos avava a la Sara ela čhavoro.”*

¹⁰ Avke oda sas na ča paš late, ale the paš e Rebeka. La Rebekakere čhaven sas jekh dad, amaro dad o Izak.

¹¹⁻¹² Bo mek akor, sar o čhave aňi na ulile, aňi na kerde nič lačo abo nalačo, imar sas lake phendo le Devlestar: *“O phureder služinela le ternedereske.”* O Del phendā kada, hoj te sikavel, hoj ov kidel avri, sar kamel, a hoj oda na sas vaš oda, so jekh lendar kerđa.

¹³ Avke sar hin pisimen: *“Le Jakob kamavas, ale le Ezav našti avri ačhavas.”*

¹⁴ Akor so šaj phenas, hoj o Del nane čačipnaskero? Šoha na!

¹⁵ Bo le Mojžišoske phenel kada:

“Ela mange pharo vaš oda, vaš kaste me kamav a avava jileskero ke oda, ke kaste me kamav!”

¹⁶ Na džal pal oda, so kamen abo so keren o manuša, ale džal pal oda, hoj o Del del peskero lačhipen.

¹⁷ Andro lava le Devleskere hin phendo le Faraonoske: *“Vašoda tut vičindom andro dživipen, hoj pre tute te sikavav miri zor a hoj pes miro nav te rozvakerel pal cali phuv.”*

¹⁸ Bo o Del hino jileskero ke oda, ke kaste ov kamel; ale kaske kamel, oleske zakerel o jilo andre.

Le Devleskeri cholī the lačhejileskeriben

¹⁹ Ale vareko mange šaj phenel: *“Ňiko pes našti ačhavel oleske, so o Del kamel. Te oda hin avke, soske amen akor marel?”*

²⁰ Ó, manušeja, ko sal tu, hoj ačhes pre čhib le Devleske? Či šaj phenel oda, so hino kerdo oleske, ko les kerđa: *“Soske man avke kerđal?”*

²¹ Abo či nane zor le hrnčjaris upral e čhik, hoj andral odi jekh čhik te kerel jekh kuči pre pačiv a aver pre napačiv?

²² Avke o Del kamľa te sikavel peskeri cholī the peskeri zor. Igen zlíkerelas avri a zlidžalas ola kuča, pre save sas leskeri cholī, so sas pririchtimen pro meriben.

²³ O Del kamľa te sikavel peskeri bari slava pro kuča, pre save sas lačhejileskero a save pririchtindā pre slava –

²⁴ pre amende, saven peske vičindā: Na ča le Židendar, ale the le Nažidendar.

²⁵ Avke sar the andro Hozeaš phenel:

“Olen, save na sas mire manuša, vičinava ‘mire manuša’ a olenge, saven na kamavas, phenava: ‘Kamav tumen.’

²⁶ A ela avke, hoj ode, kaj pes lenge phenelas:

*'Tumen na san mire manuša',
ode pes len vičinel čhave le džide Devleskere."*

²⁷ O Izaiaš vičinel upral o Izrael:
*"The te o čhave le Izraeloskere ulehas ajci, keci hin e
poši paš o moros,
ča frima lendar ena zachrañimen,
²⁸ bo o Raj kerela la phuvaha savoro, so phenda,
a kerela oda sig."*

²⁹ The o Izaiaš oda imar anglal phenda:
*"Te amenge o Nekzoraleder Raj na muklahas o potom-
stvos,
uľamas sar e Sodoma a dičhilamas avri sar e Gomora."*

O Izrael the o evaňjelium

³⁰ So akor oleha phenas? O Nažidi, save na kerenas
nič pre oda, hoj te ačhen čačipnaskere anglo Del,
dochudle o spravodlišagos prekal o pačaben.

³¹ No o Izrael, savo kerelas sa, hoj te ačhel čačip-
naskero prekal o zakonos, na dochudle o spravodliša-
gos prekal o zakonos.

³² Soske? Vašoda, hoj on pes na mukenas pro
pačaben, ale pre peskere skutki. Avke pele pro bar a
demade pes,

³³ sar hin pisimen:
*"Dikh, thovav pro Sion e skala,
kaj pes o manuša demena
the o bar, pre savo perena,
ale oda, ko andre leste pačala,
pes šoha (ňikda) na ladžala."*

10 Phralale, jilestar kamav a mangav le Devles, hoj
o Izrael te avel zachrañimen.

² Šaj phenav, hoj labon pal o Del, ale nane len lačo
prindžaripen.

³ Bo na prindžaren le Devleskero spravodlišagos a
kamen te presikavel peskero spravodlišagos, na pod-
dine pes le Devleskere čačipnaske.

⁴ Se o Kristus hin o koñec le zakonoske, hoj sako, ko
pačala, te el čačipnaskero anglo Del.

O spaseňje prekal savorende

⁵ Bo o Mojžiš pisinel pal o spravodlišagos andral o za-
konos:

*"Oda manuš, ko dolikerela leskere prikazaňja, dživela
lendar."*

⁶ Ale o spravodlišagos prekal o pačaben, phenel ka-
da:

*"Ma phen tuke andro jilo: 'Ko džala upre andro ňebos?'
(Oda hin te anel le Kristus tele.)"*

⁷ Abo:
*"Ko džala tele andro svetos le mulengero?" (Oda hin te
anel le Kristus upre andral o meriben.)"*

⁸ Ale sar phenel? *"Oda lav hino igen pašes, hino an-
dre tiro muj the andre tiro jilo"* – oda hin oda lav pal o
pačaben, so vakeras.

⁹ Bo te viznavineha le Ježiš sar Rajes a pačaha andre
tiro jilo, hoj les o Del uštađa andral o meriben, aveha
zachrañimen.

¹⁰ Se le jileha pes pačal, hoj te avas čačipnaskere, ale
le mujeha pes viznavinel, hoj te avas zachrañimen.

¹¹ Bo hin pisimen: *"Sako, ko andre leste pačal, na
ladžala pes."*

¹² Oda hin jekh, či oda hin Židos vaj Grekos, bo oda
jekh Raj hino Raj savorende – barvalo ke sakoneste, ko
les mangel.

¹³ Bo sako, ko vičinel pro nav le Rajeskero, ela
zachrañimen.

¹⁴ Ale sar šaj pre leste vičinenena, te andre leste na
pačandile? A sar šaj pačana andre oda, pal kaste na
šunde? A sar šaj šunena, te ňiko lenge o lav na vak-
erela?

¹⁵ A sar šaj vakereña, te na ena bičhade? Avke sar hin
pisimen:

*"Save šukar hine o pindre olengere, save aven te vak-
erel o lačo hiros pal o lače veci."*

¹⁶ Ale na savore priile o evaňjelium, bo o Izaiaš
phenel:

"Rajeja, ko pačandila amare lavenge?"

¹⁷ O pačaben avel akor, sar šunas, a šunas akor, sar
pes vakereñ o lav le Kristoskero.

¹⁸ Ale phučav: So, čačes na šunde? Sar hoj na? Šunde!
Avke sar hin pisimen:

*"Lengero hangos pes rozlįgenda pal cali phuv
a lengere lava dži pro agor le svetoske."*

¹⁹ Pale phučav: Či oda o Izrael na achaliľa? O Mojžiš
ešebno pre oda odphenda:

*"Me kerava, hoj o manuša andral o Izrael te žarľinen
pro manuša, save aňi nane narodos."*

*Kerava, hoj te chan cholľ pro narodos, savo nane
godaver."*

²⁰ O Izaiaš pes na daralas te phenel:

*"Diňom man te arakhel olenge, save man na rodenas,
sikađom man olenge, save pal ma na phučenas."*

²¹ Ale pal o Izrael phenel:

*"Calo džives nacirdavas mire vasta
ko manuša, save na kamenas te šunel a ačhenas
mange pre čhib."*

O Del na odčhidā le Izrael

11 Phučav akor: Či odčhidā o Del peskere
manušen? Šoha na! Se the me som Izraelitas an-
dral o potomstvos le Abrahamoskero andral o kmeňos
Benjamin.

² O Del na odčhidā peskere manušen, saven peske
anglal kidňa avri. Se džanen, so hin pisimen andro lav,
kaj pes vakereñ pal o Eliaš – sar vakereñas le Devleske
pro Izrael a phenda:

³ *"Rajeja, tire proroken murdarde a tire oltara čhide
tele. Ačhilom ča me korkoro a the man kamen te mur-
darel."*

⁴ Ale so leske odphenda o Del? *"Mukľom mange efa
ezera (7 000) muršen, save na lašarenas le Baal, le
falošne devles."*

⁵ Avke hin the akana. Ačhiľa lendar ča frima džene, ča
ola, kas peske kidňa o Del avri peskere milostaha.

⁶ Ale te oda hin le Devleskere milostatar, ta akor oda nane le skutkendar; bo te oda ulahas avke, palis imar le Devleskero milost' na ulahas milost'.

⁷ Akor so? O manuša andral o Izrael na dochudle oda, so rodenas, ča ola, save sas avrikidle. A okle dženenge ačhiła e godi zaphandli,

⁸ avke sar hin pisimen:
"O Del len diňa duchos, hoj zorales te soven, jakha, hoj te na dikhen, the kana, hoj te na šunen – dži adadžives."

⁹ A o David phenel:
"Mi en zachudle paš peskero pijibnaskero skamind sar andre pasca, mi peren a mi en marde!"

¹⁰ *Mi korisałon pro jakha, hoj te na dikhen, a bandar lengero dumo pro furt."*

O spaseňje le Nažidenge

¹¹ Me akor phučav: Pele o manuša andral o Izrael avke, hoj imar na uštena? Šoha na! Ale vaš oda, hoj on pele andro binos, avla e zachrana ko Nažidi, hoj o Izrael pre lende te thovavel.

¹² Ale te le Židengero binos anda o barvalipen le svetoske a oda, hoj on pele, anda o barvalipen le Nažidenge, ta keci buter barvalipen anela oda, sar avena savoredžene pale?

¹³ Tumenge, le Nažidenge, phenav: Lašarav kadi služba, bo me som apoštolos le Nažidenge.

¹⁴ A talam šaj kerava oda, hoj mire teloskere phrala te thovaven, a oleha šaj zachraňinava varekas lendar.

¹⁵ Bo te vaš oda, hoj o Del odčhiđa le Židen, hin o svetos le Devleha andro smirom – ta so ela akor, sar len pale prilela? Te na o dživipen andral o meriben?

¹⁶ Te o ešebno kotor le marestar hin dino le Devleske sar sentno, akor calo maro hino sentno a te hin o koreňis sentno, akor the o konara.

¹⁷ Varesave konarica sas avriphage, a tu, sar e dzivo oliva, salas andre zaštepimen maškar okla. Te oleha ačhiła tutar – le Nažidostar – oda, ko lel e chasna la olivakere koreňistar the le žirostar,

¹⁸ ma lašar tut upral o konara. Ale te tut lašares, ta džan, hoj na tu lidžas o koreňis, ale o koreňis tut.

¹⁹ Ale tu phenaha: "O konara sas avriphage, hoj me te avav zaštepimen."

²⁰ Mištes, sas avriphage vaš oda, hoj na pačanas, ale tu aches le pačabnaha. Vašoda tut ma lidža upre, ale dara tut!

²¹ Bo te o Del na sajinda o čače konara, na sajinel aňi tut.

²² Vašoda dikh le Devleskero lačhipen, ale the oda, sar zoraha sudzinel! O Del hino zoralo ke ola, save pele, ale hino lačno ke tu, te ačheha andro lačhipen. Ale te na ačheha, aveha the tu avričhindo.

²³ Avke the on, te na ačhena andro napačaben, ena pale zaštepimen. Bo le Devles hin zor pale len te zaštepinel.

²⁴ Te tu sal avričhindo andral e dzivo oliva a sal zaštepimen andre lači oliva, so nane prirodzeno, ta keci

sigeder ena kala konara, so imar sas andre čači (pravo) oliva, pale zaštepimen andre peskeri oliva?

O Izrael ela pale zachraňimen

²⁵ Se kamav, phralale, hoj te džanen kada garudipen, hoj te na aven godaver korkore ke peste. Bo varesave manušenge andral o Izrael hine o jile zakerde andre dži akor, medik na avena savore manuša, save nane Židi ko Del.

²⁶ A avke ela calo Izrael zachraňimen, sar hin pisimen:

"Andral o Sion avela o Zachrancas a odlela o bijedevleskeriben le Jakobostar."

²⁷ *Kada ela miri zmluva prekal lende, sar odlava lengere bini."*

²⁸ Vašoda, hoj o Židi odčhide o evaňjelium, hine ňeprijateľa le Devleskere a ada hin pro lačno tumenge, save na san Židi. Ale vaš lengere dada, saven peske o Del kidňa avri, hine leskere prijateľa.

²⁹ Bo o Del na lel pale o dari, so diňa, a na bisterel pro manuša, kas peske kidňa avri.

³⁰ Avke sar tumen, o Nažidi, varekana na šunenas le Devles, ale akana chudľan le Devleskero lačhipen (milost) vaš oda, hoj o Židi na šunenas le Devles,

³¹ avke akana on na šunen, hoj pes tumenge te dochudel le Devleskero lačhipen. No prekal oda palis the on chudena pale le Devleskero lačhipen.

³² Bo o Del zakerđa andre savore manušen andre oda, hoj les te na šunen, hoj pre sakoneste te avel palis leskero lačhipen.

Bararel le Devles

³³ Ó, savo baro hino o Del andre peskero barvalipen, godaveripen the prindžaripen! Ko šaj achalol leskere sudi a ko šaj avel pre oda, save hin leskere droma?

³⁴ *"Se ko prindžarel le Devleskero gondolišagos? Abo ko sas varekana leskero radcas?"*

³⁵ *"Ko diňa le Devles vareso, hoj ov oda leske te del pale?"*

³⁶ Bo lestar, prekal leste a leske hin savoro! Leske e slava pro furt! Amen.

Nevo dživipen andro Kristus

12 Phralale, mangav tumen igen vaš oda, hoj o Del hino lačhejileskero! Den tumare tela sar džidi, sentňi obeta, so ela le Devleske pre dzeka. Ada hin nekfeder služba le Devleske.

² Ma keren avke, sar kerel kada svetos. Ale domuken le Devleske te čerinel tumen andral a te del tumen nevo gondolišagos, hoj palis te džanen, so kamel o Del, so hin lačno, so hin leske pre dzeka a so hin dokonalo.

³ Vaš o lačhipen (milost) le Devleskero, so sas mange dino, phenav sakoneske tumendar: Ma av barikano, ma gondolin pal tu buter, sar kempel, ale gondolin pal tu ajci, keci tut o Del diňa pačaben.

⁴ Bo sar amen hin but kotora andro telos, ale na savore kotora keren jekh buči,

⁵ avke the amen sam but džene jekh t'elos andro Kristus, ale sako hin aver kotor. No jekhetane sam oda jekh t'elos.

⁶ Ale o Del amen diña peskere lačhipnastar (milost'atar) sakones aver dari. Te hin varekas daros te prorokinel, mi kerel oda, pal oda keci les hin pačaben.

⁷ Te hin varekas daros te služinel, mi služinel. Te hin varekas daros te sikavel, mi sikavel.

⁸ Oda, kas hin daros te podhazdel andro pačaben, mi kerel oda. Oda, ko del, mi del ščirones. Ko lidžal vare-savi služba, mi kerel oda savore jileha. Ko kerel lačhipen avreske, mi kerel oda radišagoha.

Sar te dživel o dživipen le Devleha

⁹ O kamiben mi el čačo a na dujemujengero. Mi džungl'ol tumenge o nalačhipen; likerem tumen le lačhipnastar.

¹⁰ Jilestar pes kamen sar phrala-pheña a jekh avreske presikaven bareder pačiv.

¹¹ Keren sa prekal oda, hoj te služinen le Rajeske radišagoha andral calo jilo.

¹² Radisa'lon andro užaripen (nađej); andro pharipen likerem avri; andro modlitbi ma preačhen.

¹³ Sthoven tumen pre oda, so kempel le phralenge. Phundraven tumare khera prekal o cudze manuša a den len pačiv.

¹⁴ Žehñinen olenge, save pre tumende džan, žehñinen a ma košen.

¹⁵ Radisa'lon olenca, save radisa'lon, a roven olenca, save roven.

¹⁶ Mi el tumen jekh gondolišagos maškar peste. Ma hazden pes upre, ale ačal'lon the olen, ko hine slabeder. Ma aven godaver korkore ke peste.

¹⁷ Ńikaske ma den pale o nalačo vaš o nalačo. Ale keren oda, so hin lačo angle savore manuša.

¹⁸ Te pes oda del a te oda hin pre tumende, dživen savore manušenca andro smirom.

¹⁹ Mire lače phralale, ma visaren avrenge pale o nalačhipen, ale muk oda le Devleskera cho'ake. Se hin pisimen: "*Me dava pale, me počinava,*" phenel o Raj.

²⁰ Vašoda, te hino tiro Ńeprijatelj'is bokhalo, de les te chal; *te kamel te pijel, de les te pijel. Bo te kada kereha, labola bara ladžatar.*

²¹ O nalačhipen tut te na thovel tele, ale tu thov tele o nalačhipen le lačhipnaha.

Te poddel pes le autoritenge

13 Sako pes mi poddel le svetoskere autoritenge. Bo Ńiko na lidžal korkoro pestar, te leske oda o Del na domuk'lahas. Sako hino ačhado le Devlestar.

² Avke sako, ko pes ačhavel pro autoriti, ačhavel pes the pre oda, so o Del prikazind'a, bo ov le autoriten ačhađa. Ola, save na šunen, anen pre peste o sudos.

³ Ola džene, save keren o lačo, pes na mušinen te daral le autoritendar, ale ola, save keren o nalačo. Na kames tut te daral le autoritendar? Akor, ker o lačo a lašarena tut,

⁴ bo on hine le Devleskere služobñika tuke pro lačo. Ale te keres oda, so nane lačo, dara tut, bo na hijaba hordinen e šabl'a. On hine le Devleskere služobñika, save sikaven le Devleskeri cho'li olenge, ko keren o nalačo.

⁵ Vašoda pes igen kempel te poddel na ča vaš le Devleskeri cho'li, ale the vašoda, bo andro jilo džanes, hoj oda hin mištes.

⁶ Se vašoda počinen the o dañe, bo on hine le Devleskere služobñika, save keren ipen odi buči.

⁷ Den sakoneske oda, so leske kamen: Kaske o dañe, oleske o dañe; kaske o clo, oleske o clo; kaske e pačiv, oleske e pačiv; kastar kempel te daral, oleskar daran.

Pal o kamiben maškar o phrala

⁸ Ma ačhen Ńikaske Ńič te kamel, ča o kamiben jekh ke avreste, bo ko oda kerel, dol'ikerel calo zakonos.

⁹ Bo o prikazañja: "*Na kereha lubipen! Na murdareha! Na čoreha! Na džaha pal avreskero!*" – savore kala a mek the savore okla prikazañja hine andre kada jekh: "*Kameha avres avke, sar pes korkores.*"

¹⁰ Te varekas kames, šoha (ñikda) leske na kereha o nalačo. Vašoda te tut hin o kamiben, akor dol'ikerel calo zakonos.

O Džives le Kristoskero hino pašes

¹¹ A kada keren, se džanen, hoj imar av'la tumari ora, hoj te ušten andral o soviben. Bo akana hin amaro spaseñje pašeder, sar sas akor, sar pačand'i'lam.

¹² E rat imar oddžal a o džives hino pašeder. Vašoda preačas te kerel o skutki le kal'ipnaskere a las pre peste o zbrañi le svetloskere.

¹³ Vašoda likerem pes rajikanes sar o manuša, save dživen dživese – na andro mulatišagi the andro pi-jiben; na andro lubipen the kiñešagi; na andro vesekedišagi the andro hamišagos.

¹⁴ Ale uren tumen andro Raj Ježiš Kristus a ma gondol'inen pre oda, sar te kerel o nalače žadosci, so kamel te kerel amaro t'elos.

Te na odsudzinen peskere phralen

14 Prilen olen, ko hine slaba andro pačaben, a ma vesekedinen tumen lenca vaš oda, sar on gondol'inen, so hin lačo, abo nalačo.

² Jekh pačal, hoj šaj chal savoro, a vareko hino slabo andro pačaben a chal ča zeleñina.

³ Oda, ko chal savoro, te na dikhel tele oles, ko na chal. A oda, ko na chal savoro, te na sudzinel oles, ko chal. Se o Del les prii'la.

⁴ Ko sal tu, hoj sudzines avreskere sluhas? Ča leskero Raj rozsudzinel či ačhela, abo perela. Ale ačhela, bo o Raj dela les zor, hoj te ačhel.

⁵ Varesave manuša likerem varesavo džives bareder sar aver. Aver phenen, hoj savore dživesa hine jekh. Sako mi el zoralo andre oda, sar ačal'ol.

⁶ Ko dol'ikerel varesavo džives, dol'ikerel les le Rajeske. Ola, ko chan savoro, den pačiv le Rajes, bo pal'ik-

eren le Devleske vaš o chaben. Ola, ko na chan savoro, den tiš pačiv le Rajes, bo the on palikeren le Devleske.

⁷ Bo ňiko amendar na dživel korkoro peske a ňiko korkoro peske na merel.

⁸ Te dživas, le Rajeske dživas; te meras, le Rajeske meras. Avke či imar dživas, abo meras, sam le Rajeskere.

⁹ Bo vašoda o Kristus the muľa the obdžidila, hoj te avel Raj upral o džide the upral o mule.

¹⁰ Ale tu soske sudzines tire phrales? Abo tu, soske tele dikhes tire phrales? Se savore jekhvar ačhaha anglo Del pro sudos.

¹¹ Bo hin pisimen: *"Vašoda, hoj dživav, phenel o Raj, dojekh khoč anglal mande bandola a dojekh čhib viznavinela, hoj som o Del."*

¹² Avke sako amendar odphenela korkoro vaš peste le Devleske vaš oda, sar dživelas.

Ma ker avke, hoj tiro phral te perel

¹³ Vašoda preačas te sudzinel jekh avres. Ale sigeder gondolin pre oda, hoj te na keres vareso, pre soste o phral šaj perel andro pačaben.

¹⁴ Me džanav a pačav, hoj andro Ježiš Kristus korkoro pestar nane ňisavo chaben nažužo, ča oleske hin nažužo, ko pačal, hoj oda chaben hin nažužo.

¹⁵ Bo te dukhaves tire phrales vaš o chaben, imar akor na phires andro kamiben. Ma musar tire chabeneha oles, vaš kasko muľa o Kristus!

¹⁶ Te na pre tumende namištes vakeren vaš oda, so tumen džanen, hoj hin lačno.

¹⁷ Bo o krališagos le Devleskero nane o chaben the o pijiben, ale o spravodlišagos, o smirom the o radišagos andro Sentno Duchos.

¹⁸ Oda, ko le Kristoske avke služinel, hino pre dzeka le Devleske a o manuša les den pačiv.

¹⁹ Mušinas te džal pal oda, so anel o smirom a jekhetane amen bararel andro pačaben.

²⁰ Ma musar oda, so o Del kerđa, ča vaš o chaben. Se savoro hin žužo, ale nane mištes te chal oda, soha aver šaj perel andro binos.

²¹ Mištes hin te na chal mas, te na pijel mol, aňi te na kerel nič, pre soste šaj perel tiro phral.

²² O pačaben, so tut hin, liker andre tu anglo Del. Bachtalo hin oda, ko pes korkoro na odsudzinel andre oda, pal soste peske gondolinel, hoj hin lačno.

²³ Ale oda, ko pochibinel, sar vareso chal, hino odsudzimen, bo na kerel oda pačabnaha. A savoro, so keras bi o pačaben, hin binos.

Te keren oda, so anel lačno avreng

15 Te sam zorale andro pačaben, kampil amenge te lidžal o slabišagi olenge, ko hine slaba. Na kampil te avel ča korkore peske pre dzeka.

² Sako amendar mi el pre dzeka avreske pre leskero lačno, hoj te barol andro pačaben.

³ Se aňi o Kristus na rodela oda, so leske sas pre dzeka, ale avke sar hin pisimen: *"Pre mande avľa e ladž olendar, save tuke kerde e ladž."*

⁴ Se savoro, so sas varekana pisimen, sas pisimen prekal amende, hoj te sikluvas, hoj te liker avri, hoj te radisaľuvas a hoj avke amen te el o užaripen (nadej).

⁵ A o Del, kastar avel o avrilikeriben the o radišagos, mi del tumenge te gondolinel maškar peste pre oda jekh, hoj te keras avke, sar kerelas o Ježiš Kristus,

⁶ hoj savoredžene jekhetane te lašaras jekhe hango-ha le Devles the le Dades amare Rajeskere le Ježišoskere Kristoskere.

O evaňjelium hin the prekal o Nažidi

⁷ Vašoda prilen jekh avres avke, sar o Kristus tumen priiľa pre slava le Devleskeri.

⁸ Bo phenav, hoj o Ježiš Kristus sas o služobňikos le Židenge, vaš oda, hoj te sikavel, hoj o Del vakereľ čačipen; a te sikavel, hoj le Devleskere lava, so diňa lengere dadenge, hine čače,

⁹ a hoj o Nažidi vaš leskero lačhipen te lašaren le Devles. Avke sar hin pisimen:

"Vašoda tut lašarava maškar o Nažidi a giľavava tire naveske o chvali."

¹⁰ A pale phenel:

"Nažidale, radisaľon leskere manušenca!"

¹¹ A pale:

"Bararen le Devles savore narodi a lašaren les savore nipi!"

¹² O Izaiaš phenel:

"Avela o potomkos le Izajoskero, ov lidžala le pohanen

a pre leste pes zmukena o Nažidi."

¹³ A o Del, savo amen del o užaripen, tumen mi pherarel savore radišagoha the smiromoha andro pačaben, hoj te baron prekal e zor le Sentne Duchoskeri andro užaripen.

Le Pavloskeri buči

¹⁴ Phralale mire, the me pačav pal tumende, hoj the tumen san pherde le lačhipnaha a hin tumen savoro prindžaripen a tumen šaj sikaven jekh avres.

¹⁵ Me tumenge pisindom sikra zoraleder, bo kamľom tumenge pale te leperel varesave veci prekal o lačhipen (milost), so man diňa o Del.

¹⁶ Diňa, hoj me te avav o služobňikos le Ježišoskero Kristoskero le Nažidenge, hoj te služinav sar rašaj le Devleskere evaňjelioske, hoj o Nažidi te en e obeta, so šukares voňinel le Devleske a so hiňi sentňardi le Sentne Duchostar.

¹⁷ Vašoda man andro Ježiš Kristus šaj lašarav oleha, so kerav prekal o Del.

¹⁸ Darav man te vakereľ vareso aver. Vakereľ ča oda, so kerđa o Kristus prekal ma le lavenca the le skutkenca, vaš oda, hoj les o Nažidi te šunen.

¹⁹ O Kristus oda kerđa prekal o zorale zazraki the divi, andre zor le Devleskere Duchoskeri. Avke chudľom te

vakerel le Kristoskero evaňjelium andral o Jeruzalem, dži paš e phuv Illirikum.

²⁰ Furt kamavas te vakerel o evaňjelium pre ola thana, kaj mek na šunde pal o Kristus, hoj te na ačhavav pre avreskero zaklados.

²¹ Avke sar hin pisimen:
"Ola, kaske na sas vakerdo pal leste, dikhena les a ola, save pal leste na šunde, achalona."

O Pavol kamel te džal andro Rim

²² Vašoda mange na sas buterval domuklo te džal ke tumende.

²³ Ale akana imar andre kala phuva dokerdom miri buči a imar but berš kamav te džal ke tumende.

²⁴ A džava akor, sar man ela drom andre Špaňieliko, bo pačav, hoj tumen dikhava, sar predžava prekal tumaro foros, a hoj tumen mange palis pomožinena te džal dureder pro drom. Ale sigeder sar džava, kamav tumenca sikra te radisaľol.

²⁵ Akana džav andro Jeruzalem te služinel ode le Devleskere manušenge,

²⁶ bo e Macedonija the e Achaja pes rozgondolinde te kerel zbjerka prekal o čore maškar o phrala andro Jeruzalem.

²⁷ On oda kerde, bo dičholas pes lenge, hoj mištes hin lenge oda te visarel pale. Bo te o Nažidi dochudle le Židengero duchovno barvalipen, ta akor on oda kamen te visarel le Židenge, oleha, hoj lenge te služinen peskere telesne barvalipnaha.

²⁸ Sar kada dokerava a sar lenge dava savore love, so sas prekal lende skidle upre, džava ke tumende a odarik džava andre Špaňieliko.

²⁹ Džanav, hoj sar avava ke tumende, anava pherdo požehnaňje le Kristoskero.

³⁰ Prekal amaro Raj Ježiš Kristus the prekal o kamiben le Duchoskero, tumen mangav, phralale, hoj tumen jekhetane manca te maren vaš ma andro modľitbi anglo Del.

³¹ Modľinen tumen, hoj te avav avricirdlo andral o vasta ole manušendar andre Judsko, save na pačan. A modľinen tumen, hoj le Devleskere manuša andro Jeruzalem te prilen miri služba radišagoha.

³² A modľinen tumen, hoj le Devleskera voľatar te avav ke tumende pherdo le radišagoha, hoj mange maškar tumende te odpočovinav.

³³ O Del, savo del o smirom, mi el tumenca savorenc. Amen.

O posledna lava

16 Kamav tumenge te phenel pal amari pheň Feba, savi služinel andre khangeri andro foros Kenchrea,

² hoj la te prilen andro nav le Rajeskero, avke sar kempel le Devleskere manušenge. Te lake vareso kampa, andre savoreste lake pomožinen; se oj pomožinda but dženenge the mange korkoreske.

³ Pozdravinen la Priska the le Akvilas, save manca jekhetane služinen le Ježišoske Kristoske.

⁴ On kamenas te del the o dživipen vaš mange. Me lenge palikerav, no na ča me, ale the savore khangera le Nažidengere.

⁵ Pozdravinen the o zboros, so hin andre lengero kher. Pozdravinen the le Epainetos, mire lače phrales. Ov sas ešebno andre Azija, ko pačandila andro Kristus.

⁶ Pozdravinen la Maria, oj kerdā but phari buči prekal tumende.

⁷ Pozdravinen le Adronikos the le Junias, save hine Židi avke sar me a sas manca andre bertena. Len o apoštola len sar baren a on pačandile andro Kristus sigeder sar me.

⁸ Pozdravinen le Amplijatos, mire lače phrales andro Raj.

⁹ Pozdravinen le Urban, savo manca jekhetane kerel e buči le Kristoskeri, the le Stachys, mire lače phrales.

¹⁰ Pozdravinen le Appolo, savo presikađa peskero pačaben andro Kristus. Pozdravinen olen, save hine andro kher ko Aristobulos.

¹¹ Pozdravinen le Herodion, savo hino Židos avke sar me. Pozdravinen le pačabnaskeren andral le Narcisoskeri famelija.

¹² Pozdravinen la Tryfajna the la Tryfosa, save keren buči prekal o Raj. Pozdravinen la Persida, mira lača pheňa, savi kerdā igen but buči prekal o Raj.

¹³ Pozdravinen le Rufos, savo hino avrikidlo le Rajestar, the leskere da, savi hiňi the mange sar daj.

¹⁴ Pozdravinen le Asynkritos, le Flegon, le Hermes, le Patrobas, le Hermas the savore phralen, save hine lenca.

¹⁵ Pozdravinen le Filologos the la Julia, le Nereus the leskera pheňa, le Olympas the savore phralen andro Del, save hine lenca.

¹⁶ Pozdravinen tumen savore jekh avres le sentne čumibnaha. Pozdravinen tumen savore khangera le Kristoskere.

¹⁷ Phralale mire, mangav tumen, merkinen pre ola džene, save rozulaven o khangera a maren upre le manušen a džan pre oda sikaviben, so tumen priľan. Džan pašal lende!

¹⁸ Bo kajse manuša na služinen amare Rajeske le Ježišoske Kristoske, ale peskere teloskere žadoscenge. Peskere gule lavenca the šukare vakeribnaha odcirden le pačivale manušen, save hine slaba andro gondolišagos.

¹⁹ Se sako džanel pal tumende, sar šunen le Devles. Vašoda man hin tumendar o radišagos, ale kamav, hoj te džanen, so hin lačo, a te na domuken peske o nalačo.

²⁰ O Del, kastar avel o smirom, sig rozmarela le satan tel tumare pindre.

O lačhipen (milost) amare Rajeskero le Ježišoskero Kristoskero mi el tumenca.

²¹ Pozdravinel tumen o Timoteus, savo manca kerel jekhetane e buči, the o Lucius, o Jason the o Sosipatros, save hine Židi avke sar me.

²² Pozdravinav tumen andro Raj, me o Tercius, savo pisinda kada lil.

²³ Pozdravinel tumen o Gajos. Andre leskero kher pes zdžal e khangeri a the me ode akana bešav.

Pozdravinel tumen o Erastos, savo kerel buči le lovenca andro foros a mek the leskero phral o Kwartos.

²⁴ [O lačhipen (milost) amare Rajeskero le Ježišoskero Kristoskero mi el tumenca savorenca.]

O lašariben

²⁵ Slava le Devleske! Ov tumen šaj zorařarel andro pačaben, avke sar vakerav andre miro evaňjelium pal

o Ježiš Kristus; avke sar pes sikađa o garudipen, so sas garudo čirlastar.

²⁶ Ale akana oda avla avri prekal oda, so pisinenas o proroka; a prikazinda oda o večno Del, hoj oda te džanen savore narodi, hoj savore te pačan a te šunen les.

²⁷ Leske, le jekhe godavere Devleske, mi džal e slava prekal o Ježiš Kristus pro furt.

Amen.

1. KORINŤANENGE

O pozdravos

1 Me o Pavol, le Devleskera voľatar vičindo sar apoštolos le Ježišoskero Kristoskero, the o phral o Sostenes

² pisinas le Devleskera khangerake andro foros Korint, olenge, save hine vičinde te en le Devleskere sent-na manuša andro Ježiš Kristus, the savorenge, save bararen o nav amare the lengere Rajeskero le Ježišoskero Kristoskero pre dojekh than:

³ Mi del tumen o Del, amaro Dad, the o Raj, o Ježiš Kristus, peskero lačhipen (milost) the o smirom.

⁴ Na preačhav te palikerel mire Devleske vaš tumenge, vaš le Devleskero lačhipen (milost), so tumenge sas dino andro Ježiš Kristus.

⁵ Bo andre leste ačhilan barvale andre savoreste, andre dojekh lav the andre dojekh prindžaripen.

⁶ O svedectvo pal o Kristus hino zoralo maškar tumende,

⁷ vašoda na chibalinel tumenge nisavo duchovno daros, sar užaren pre amaro Raj Ježiš Kristus, hoj pes sikavela.

⁸ Ov tumen dela zor andro pačaben dži o agor. Likerela tumen avke, hoj na ela pre tumende so te phenel andro Džives amare Rajeskero le Ježišoskero Kristoskero.

⁹ Le Devleske šaj pačan. Ov tumen vičinda, hoj te dživen jekhetane leskere Čaha, le Ježišoha Kristoha, amare Rajeha.

Jekh le Pavloskero a jekh le Apolloskero

¹⁰ Phralale, mangav tumen andro nav amare Rajeskero le Ježišoskero Kristoskero, hoj savoredžene te vakeren jekh, hoj tumen te na veseke dinen maškar peste. Aven jekhetane andre savoreste, andre jekh gondolišagos, hoj oda jekh te kamen a te roden.

¹¹ Bo dodžanlom man la Chloakera famelijatar, phralale, hoj hin maškar tumende o veseke dišagi.

¹² Oleha kamav te phenel, hoj sako tumendar phenel: "Me som le Pavloskero," abo: "Me som le Apolloskero," a aver: "Me le Peteriskero," a mek aver: "Me le Kristoskero!"

¹³ Či hino o Kristus rozulado? Či sas o Pavol vaš tumenge ukrižimen? Abo san bolde andro nav le Pavloskero?

¹⁴ Palikerav le Devleske, hoj nikas tumendar na boldom – ča le Krispus the le Gajos –

¹⁵ hoj niko te na phenel, hoj sanas bolde andre miro nav.

¹⁶ No, mek boldom the le Štefan leskera famelijaha a buter imar na džanav, či mek boldom varekas avres.

¹⁷ Bo o Kristus man na bičhađa te bolel, ale te vakerele o evaňjelium, na andro manušengere godaver lava, hoj o kerestos le Kristoskero te na našavel peskeri zor.

O Kristus – le Devleskeri zor the godaveripen

¹⁸ Se o lav pal o kerestos hin diliņipen prekal ola, save meren, ale prekal amende, save avaha zachraņimen, hin le Devleskeri zor.

¹⁹ Bo hin pisimen: "Zņičinava o godaveripen le godavere manušengero a e godi le godavere manušengeri odčhivava."

²⁰ Kaj hino o godaver? Kaj o avrisikado? Kaj ola, save avke bares vakeren andre kada svetos? Či na visarda o Del o godaveripen kale svetoskero pro diliņipen?

²¹ Se o Del peskere godaveripnaha kerđa avke, hoj les o svetos te na sprindžarel peskere godaveripnaha. Ov kamla, hoj les te sprindžaren prekal o vakerdo lav, so lenge dičhol sar diliņipen, hoj te zachraņinel olen, save pačan.

²² Bo o Židi mangel o zazraki a o Greki roden o godaveripen.

²³ Ale amen vakeras pal o ukrižimen Kristus: O Židi pre oda rušen a le Grekenge oda hin diliņipen.

²⁴ Ale le Židenge the le Grekenge, saven o Del vičinda, hin o Kristus le Devleskeri zor the le Devleskero godaveripen.

²⁵ Bo oda, so dičhol sar diliņipen le Devleskero, hin godavereder sar le manušengero godaveripen. A oda, so dičhol sar o slabišagos le Devleskero, hin zoraleder sar le manušengeri zor.

²⁶ Se dikhen, phralale, save sanas, sar tumen o Del vičinda! Pal oda, sar dikhen o manuša, nane maškar tumende but avrisikade, abo zorale, vaj bare manuša.

²⁷ Ale o Del peske kidņa avri oda, so hin dilino andro svetos, hoj pes te ladžan o godaver, a so hin slabo andro svetos, o Del peske kidņa avri, hoj pes te ladžan o zorale.

²⁸ O Del peske kidņa avri oda, so nane baro andro svetos a hin odčhido – so o svetos na likerel nisoske – hoj te zņičinel oda, so o svetos likerel sar varesoske,

²⁹ hoj pes anglo Del niko te na lašarel.

³⁰ Ale o Del kerđa, hoj te aven andro Ježiš Kristus a hoj ov te el amaro godaveripen. Andro Kristus sam ospravedlņimen, sentņarde the avricinde.

³¹ Hoj te el avke, sar hin pisimen: "Oda, ko pes lašarel, mi lašarel pes le Rajeha."

O evaňjelium pal o ukrižimen Kristus

2 The me, phralale, sar avlōm ke tumende te vakerel le Devleskero garudo čačipen, na avlōm les te vakerel bare lavenca, abo bare godaveripnaha.

² Phendōm mange, hoj maškar tumende na vakerava nič aver, ča pal o Ježiš Kristus, savo sas primardo pro kerestos.

³ Sar avlōm ke tumende, avlōm andro slabišagos – daravas man the izdravas.

⁴ Mire lava the miri kazeň na sas andro godaver lava, so tumen kamlehas te prevakerel, ale andre le Devleskero Duchos, savo sikavelas peskeri zor,

⁵ hoj te na ačhaven tumaro pačaben pre le manuškero godaveripen, ale pre le Devleskeri zor.

Le Duchoskero godaveripen

⁶ Ale amen vakeras o godaveripen maškar ola, save imar podbarile andro pačaben, ale na o godaveripen kale svetoskero, abo le bare rajengero andral kada svetos, save našaven e zor.

⁷ Ale vakeras le Devleskero garudo godaveripen, so o Del diňa pre amari slava mek angloda, sar sas kerdo o svetos.

⁸ A űiko le rajendar pre kada svetos na prindžarel oda godaveripen. Bo te les prindžardehas, ta akor na ukrižindehas amare Rajes, saveske džal e slava.

⁹ Ale avke sar hin pisimen:

*"Aňi e jakh na dikhla,
aňi o kan na šunda,
mek aňi andro jilo le manuške na avla,
so o Del pririchtinda olenge, save les kamen."*

¹⁰ Ale amenge o Del oda sikađa prekal peskero Duchos, bo o Duchos arakhel avri savoro a džanel the le Devleskero garuđipen.

¹¹ Bo ko džanel, so hin andro manuš, te na o duchos le manuškero, so hin andre leste? Avke the le Devleskere veci na prindžarel űiko, ča o Duchos le Devleskero.

¹² A amen na chudlam le duchos kale svetostar, ale le Duchos, savo hin le Devlestar, hoj te prindžaras savoro, so amenge o Del diňa.

¹³ Pal oda the vakeras, ale na ajse lavenca, so hin le manuškere godaveripnastar, ale ole lavenca, so sikliam le Duchostar. Avke sikavas le Duchoskere čačipena olenge, kas hin o Duchos.

¹⁴ Ale o telesno manuš na achalol oda, so kamel le Devleskero Duchos, bo oda hin leske diliňipen. Našti oda sprindžarel, bo oda kampil te achalol andro Duchos.

¹⁵ O manuš, saves hin o Duchos, šaj rozsudzinel savoro, ale les našti sudzinel űiko.

¹⁶ Sar hin pisimen: "Se ko prindžarda e godi le Rajeskeri, hoj les te sikavel?" No amen hin e godi le Kristoskeri.

O služobňika le Devleskere

3 A me, phralale, našti tumenge vakerđom sar olenge, kas hin o Duchos, ale sar olenge, so mek hine telesne the čhavore andro Kristus.

² Karminavas tumen thudeha a našti tumen diňom o zoralo chaben, bo oda mek našti chaľan. Aňi akana našti chan,

³ bo mek furt san telesne. Bo te hin maškar tumende e zavist' the o vesekedišagos, či mek na san telesne a či na keren avke sar o nipi andro svetos?

⁴ Bo te vareko phenel: "Me som le Pavloskero!" a aver phenel: "Me le Apolloskero!" – či na keren avke sar o nipi andro svetos?

⁵ Se ko hin o Apollo? A ko hin o Pavol? On hine o služobňika, prekal save pačandil'an. A oda sako avke, sar leske diňa o Raj.

⁶ Me sadzinavas a o Apollo čhivkerelas o paňi, ale o Del diňa, hoj te barol.

⁷ A vašoda oda manuš, ko sadzinel nane nič, aňi oda, ko čhivkerel o paňi, ale o Del, savo del, hoj te barol.

⁸ No oda, ko sadzinel the oda, ko čhivkerel o paňi, hine jekh. Ale sako chudela peskero počiňiben pal oda, sar kerelas peskeri buči.

⁹ Bo amen keras e buči jekhetane le Devleha a tumen san le Devleskeri maľa the le Devleskeri stavba.

¹⁰ Le Devleskere lačhipnastar (milostatar), so mange sas dino, sar godaver stavitelis, thodōm o zaklados a aver dženo upre ačhavel. Ale sako mi dikhel, sar upre ačhavel.

¹¹ Bo űiko našti thovel aver zaklados sar oda, so imar hin thodo – a oda hin o Ježiš Kristus.

¹² Či vareko pre oda zaklados ačhavel o somnakaj, či o rup, o dragane bara, o kašt, o phus, či e šuki čar:

¹³ Sakoneskeri buči jekhvar dičhola. Bo andro Džives le Kristoskero dojekhe manuškere buči pes probalinelavri (skušinelavri) andre jag a odi jag sikavela, savi odi buči hiňi.

¹⁴ Te odi buči, so varesavo manuš kerd'a pre oda zaklados, likerela avri, chudela o počiňiben.

¹⁵ Ale te varesave manuške e buči zlabola, našavela o počiňiben, ale ov korkoro ela zachraňimen, no avke, sar te ulahas avricirdlo andral e jag.

¹⁶ So na džanen, hoj tumen san le Devleskero chramos a hoj o Duchos le Devleskero dživel andre tumende?

¹⁷ Te vareko musarel le Devleskero chramos, oles o Del musarela, bo o chramos le Devleskero hino sentno a oda san tumen.

¹⁸ űiko pes korkoro te na klaminel! Te peske maškar tumende vareko gondolinel, hoj hino godaver pre kada svetos, mi el dilino, hoj te el godaver.

¹⁹ Bo o godaveripen kale svetoskero hin diliňipen anglo Del. Bo hin pisimen: "O Del zachudel le godaveren andre lengero godaveripen."

²⁰ A pale: "O Raj džanel, hoj o gondolišagi le godav-erengere nane pre űisoste."

²¹ Vašoda pes űiko te na lašarel le manušenca. Bo savoro hin tumaro:

²² Či o Pavol, vaj o Apollo, abo o Kefas †; vaj o svetos, či o dživipen, vaj o meriben; či ola veci, so hine akana; abo ola, so mekča ena – savoro hin tumaro,

²³ ale tumen san le Kristoskere a o Kristus le Devleskero.

E služba le apoštolengeri

4 Tumen gondolinen pal amende avke, sar pal o služobűnika le Kristoskere the sar pal o spravci, savende hin le Devleskere garude čačipena.

² Le spravcendar pes užarel, hoj te aven pačivale peskere rajenge.

³ Mange na džal pal oda, či man sudzinen tumen abo o manušeskero sudos. Ale aűi korkoro man na sudzinav,

⁴ bo hin man žužo svedomje, ale oleha na kamav te phenel, hoj som bi e chiba. Se oda, ko man sudzinel, hin o Raj.

⁵ Vašoda ma sudzinen űič anglal, medik na avela o Raj a anela pro svetlos oda, so hin garudo andro kalipen, a sikavela, so peske gondolinenas o manuša andro jile. Palis chudela sako le Devlestar peskero lašariben.

⁶ Phralale, kada phendom prekal tumende a sikađom pre ma the pro Apollo, hoj amendar te siklon, oda so hin phendo: "Ma džan dureder sar oda, so hin pisi-men." Hoj pes űiko te na lašarel varekaha a avres te na dikhel tele.

⁷ Bo ko tutar kerel barederes avrestar? A so tut hin, so na chudlal? A te oda chudlal, soske tut lašares, sar te oda na chudlalas?

⁸ Hin tumen imar sa, so tumenge kempel? Imar barvaliűan? Imar kralinen, choc bijal amende? No kamlomas, hoj čačas te aven kraľa, hoj amen jekhetane tumenca te kralinas!

⁹ Bo avke pes mange dičhol, sar te amen, le apoštolen, diűahas o Del oda nekostatneder than: Sar olen, save hine odsudzimen pro meriben. Bo sam sar o đivadlos cale svetoske, le aűjelenge the le manušenge.

¹⁰ Amen sam diline vaš o Kristus a tumen san godaver andro Kristus; amen slaba a tumen zorale; amen tele dikhen a tumen lašaren.

¹¹ Dži akana sam bokhale, smedne a lange; sam marde a phiras than thanestar.

¹² Keras phares buči peskere vastenca; rakinen amenge, amen žehűinas; džan pre amende, amen zlidžas;

¹³ sar amen košen, amen lenge odphenas šukar lavenca. Ačhiľam sar o šmeci le svetoskere; sam odčhide savorendar dži akana.

¹⁴ Me na pisinav kada vaš oda, hoj tumen te anav andre ladž, ale hoj tumenge te dovakerav sar mire čhavege, saven kamav.

¹⁵ Choc te tumen ulahas deš ezera (10 000) manuša, save tumen sikadehas pal o pačaben andro Kristus, no

† O Peter

našti tumen avel but dada, bo me tumen andom pro svetos andro Ježiš Kristus prekal o evaűelium.

¹⁶ Mangav tumen: Keren avke sar me.

¹⁷ Vašoda tumenge bičhadom le Timoteus, mire čhas, saves kamav a savo hino pačivalo andro Raj. Ov tumenge leperela, sar me dživav andro Ježiš Kristus – oda, so sikavav všadzik andre dojekh zboros.

¹⁸ Varesave džene tumendar ačhile barikane, bo peske gondolinen, hoj na avava ke tumende.

¹⁹ Te oda o Raj kamela, avava ke tumende sig a palis sprindžarava e zor ole barikane manušengeri, a na ča lengere lava.

²⁰ Bo o krališagos le Devleskero nane andro lava, ale andre zor.

²¹ So kamen? Kamen, hoj te avav ke tumende la pacaha, vaj le kamibnaha a kovle duchoha?

Pal o lubipen andre khangeri

5 Šundom, hoj hin maškar tumende o lubipen a oda ajso lubipen, savo nane mek aűi maškar o napačabnaskere. Phenav pal oda, hoj vareko tumendar dživel peskere dadeskera romňaha.

² Tumen pes mek lašaren? Na ulahas feder, hoj te roven upral oda a ole dženes, savo oda kerđa, te čhiven avri tumendar?

³ Bo choc te na som maškar tumende, som tumenca andro duchos, sar te ode ulomas a imar sudzinđom oles, ko oda kerđa.

⁴ Sar tumen zdžana the mire duchoha, kempel andro nav the andre zor amare Rajeskeri le Ježišoskeri Kristoskeri

⁵ te del ole manušes le satanoske, hoj leskero telos te el zűičimen a leskero duchos te el zachraűimen andro džives amare Rajeskero.

⁶ Oda, soha tumen lašaren, nane lačo. So, na džanen, hoj frima droždđi anel upre calo chumer?

⁷ Odčhiven tumendar o purane binskere droždđi, hoj te aven nevo chumer, bo tumen san o maro bi o droždđi. Se the o Kristus, amaro Patradakero Bakroro, sas murdardo vaš amenge.

⁸ Vašoda te na likeras o inepos le purane droždđenca, andre save hin o bins the o nalačhipen. Ale likeras o inepos ole mareha, so hino bi o droždđi, andro žužipen the čačipen.

⁹ Pisindom tumenge andro ľil, hoj tumen te na chal űič le lubarenca,

¹⁰ ale na gondolínav pal o lubara andral kada svetos, abo pal ola, save hine izdrade pal o love, abo pal o živaňa, abo pal o modlara andro svetos. Bo te lenca tumen na ulahas űič, mušindanas te džal het andral o svetos.

¹¹ Ale pisindom tumenge, hoj tumen pes te na zdžan ole dženeha, savo pal peste phenel, hoj hino phral – ale hino lubaris, hino izdrado pal o love, abo modlaris, abo košel a pijel, abo hino živaňis. Aűi na chan kajse dženeha!

¹² Man nane vaš soske te sudzinel olen, save hine avri, ale andre khangeri mušinas te sudzinel o bins.

¹³ A olen, save hine avri, sudzinel o Del. "Čhiven ole nalačhe manušes tumendar avri!"

Pal o sudi maškar o phrala

6 Te varekas tumendar hin vareso avreha, sar pes šaj sudzinel anglal o napačabnaskere manuša a na anglal o pačabnaskere?

² Či so, na džanen, hoj o pačabnaskere manuša sudzinena o svetos? A te tumen sudzinena o svetos, ta na džanen te rozsudzinel aňi oda nekcikneder?

³ So na džanen, hoj sudzinaha le aňjelen? Oleha mek buter o veci kale džživpnaskere?

⁴ Sar džan pro sudos vaš o veci kale džživpnaskere, soske tumen den te sudzinel ajsenge, save nane nič andre khangeri?

⁵ Phenav oda, hoj tumen te ladžan! So, nane maškar tumende aňi jekh gođaver manuš, savo džanel te rozsudzinel o veci maškar peskere phrala?

⁶ Ale o phral pes sudzinel le phraleha a mek ke oda anglal o napačabnaskere?

⁷ Se imar ča oleha prekheldan, hoj tumen sudzinen maškar peste. Soske radeder na cerpinen o dukha? Soske radeder na zlidžan o nalačhipen?

⁸ Ale tumen keren o nalačo a dukhaven le phralen.

⁹ So na džanen, hoj o načačipnaskere na chudena le Devleskero krališagos? Ma klaminen pes korkoren! O binošna manuša na chudena le Devleskero krališagos: Aňi o lubara, aňi o modlara, aňi ola, ko keren lubipen pašal o rom vaj pašal e romňi, aňi o homoseksuala, aňi ola, ko lenca oda keren,

¹⁰ aňi ola, ko čoren, aňi ola, ko izdran pal o love, aňi o pijaka, aňi ola, ko košen, aňi o živaňa. Niko lendar na chudela le Devleskero krališagos.

¹¹ A varesave džene tumendar sanas ajse. Ale akana sanas olestar obžuzarde, sentňarde the ospravedlňimen andro nav le Rajeskero le Ježišoskero Kristoskero the andro Duchos amare Devleskero.

O tēlos hin o chramos le Duchoskero

¹² "Savoro šaj kerav, no na savoro mange hin pro lačo." "Savoro šaj kerav, ale me na avava ňisoske otrokos."

¹³ "O chabena hin prekal o per a o per hin prekal o chabena!" Ale o Del zničinel soduj. No o tēlos nane prekal o lubipen, ale prekal o Raj, a o Raj prekal o tēlos.

¹⁴ O Del uštađa le Rajes andral o meriben a the amen uštavela peskera zoraha.

¹⁵ So na džanen, hoj tumare tēla hine o kotora le Kristoskere tēlostar? Či šaj lav o kotora le Kristoskere tēlostar a kerava lendar o kotora la lubňakere? Šoha na!

¹⁶ Abo so na džanen, hoj oda, ko del peskero tēlos la lubňake, hino laha jekh tēlos? Se hin pisimen: "Ola duj džene ena jekh tēlos."

¹⁷ A oda, ko pes podel le Rajeske, hino leha jekh duchos.

¹⁸ Denašen het le lubipnastar! Aver binos, so kerđahas o manuš, na kerel peskere tēloske, ale ko kerel o lubipen, kerel binos korkoro peskere tēloske.

¹⁹ So na džanen, hoj tumaro tēlos hino o chramos le Sentne Duchoskero, savo hino andre tumende a saves tumenge diňa o Del? Tumen na san korkore peskere!

²⁰ Sanas avricinde bare počičibnaha. Vašoda lašaren le Devles tumare tēloha [the tumare duchoha, bo o duchos the o tēlos hin le Devleskero].

Pal o veradune

7 Akana pal oda, so mange pisindan. Mištes ulahas, te le muršes na ela nič la džuvľaha.

² Ale vaš oda, hoj pes te na kerel o lubipen, mi el dojekhe muršes leskeri romňi a dojekha džuvľa lakero rom.

³ O murš mi kerel oda, so kampil peskera romňake, a the e džuvľi mi kerel avke peskere romeske.

⁴ E džuvľi nane raňi peskere tēloske, ale lakero rom – aňi o murš nane raj peskere tēloske, ale leskeri romňi.

⁵ Ma odphenen pes jekh avreske, ča te sodujđzene oda kamena pre varesavo časos, hoj tumen te modlĭnen. Palĭs aven pale peha, hoj tumen te na pokušinel o satan, bo naštĭ bijal oda likerem avri.

⁶ No phenav, hoj oda šaj keren, ale oda nane prikazis.

⁷ Rado ulomas, hoj te en savore manuša sar me, ale sakones hin le Devlestar peskero daros: Jekhes kajso daros a avres aver.

⁸ Ale phenav olenge, save nane veradune, the le vdovenge, hoj feder prekal lende ela, te ačhenas korkore avke sar me.

⁹ Ale te pes na džanen te zľikerel, mi džan romeste, bo feder hin te džal romeste, sar žadoscaha pal oda te labol.

¹⁰ Prekal o veradune manuša dav prikazaňje, so nane mandar, ale le Rajestar: E džuvľi te na džal het peskere romestar.

¹¹ Ale choc te geľahas, mi ačhel bi o rom, abo pes mi sthovel pale peskere romeha. O murš te na omukel peskera romňa.

¹² A okleng phenav me, na o Raj: Te hin varesave phrales romňi, savi na pačal, a oj leha kamel te dživel, te na la omukel.

¹³ A te hin varesava džuvľa ajso rom, savo na pačal, a ov laha kamel te dživel, te na les omukel.

¹⁴ Bo o napačabnaskero murš hino sentňardo prekal peskeri romňi a e napačabnaskeri džuvľi hiňi sentňardi prekal peskero rom. Te oda na ulahas avke, ulehas tumare čhave nažuže, ale akana hine sentna.

¹⁵ Ale te o napačabnaskero kamel te džal het, ta mi džal. Andre kajse veci o pačabnaskero phral abo pheň nane phandle, se o Del amen vičinda ko smirom.

¹⁶ Bo sar šaj džanes, džuvľije, či zachraňineha tire romes? Abo tu, muršēja, sar šaj džanes, či zachraňineha tira romňa?

¹⁷ Sako tumendar mi dživel avke, sar leske oda diňa o Raj – sako avke, sar les o Del vičinda. Kada hin, so sikavav andre savore khangera.

¹⁸ Sas vareko vičimen sar občindo (obrezimen)? Te na oda garuvel andre. Abo sas vareko vičimen sar naobčindo? Te na pes del te občinel (obrezinel).

¹⁹ Bo na džal pal oda, či hino o manuš občindo abo nane, ale džal pal oda, či dolikerel le Devleskere prikazaňja.

²⁰ Sako mi ačhel andre oda, andre soste sas vičimen.

²¹ Salas vičimen sar otrokos? Ma trapin tut oleha! Ale te šaj kerđalas, hoj te aves slobodno, ker oda.

²² Bo o otrokos, savo sas vičimen le Rajestar, hino slobodno andro Raj a avke the o slobodno manuš, savo sas vičimen, hino otrokos le Kristoskero.

²³ Bares sas vaš tumenge počimen. Ma aven otroka le manušenge!

²⁴ Phralale, sako mi ačhel andre oda, andre soste sas paš o Del vičimen.

²⁵ Prekal o manuša, save nane veradune: Man nane le Rajestar prikazaňja. No phenava sar oda, ko hin pačivalo le Rajeskere lačhipnastar:

²⁶ Gondolínave mange, hoj mištes hin prekal o manuš vaš ola pharipena, so hin akana, hoj te ačhel bi e romňi.

²⁷ Sal veraduno? Ma kam tut laha te rozdžal. Na sal veraduno? Ma rode romňa.

²⁸ Ale te iľalas romňa, na kerđal binos. A te džala e pačivali čhaj romeste, na kerđa binos. Ale kajsen ela pharipen andro telos a me tumen kamav olestar te chraňinel.

²⁹ Ale kada tumenge phenav, phralale, hoj imar amen nane but časos. A akanastar ola, kas hin romňija, mi dživen avke, sar te len na ela romňija.

³⁰ Ola, save roven, mi dživen avke, sar te na rundehas; ola, save radisaľon, sar te na radisaľilehas; ola, save cinkeren, sar te len nič na ela; a ola,

³¹ save chasňaren kada svetos, sar te les na chasnalindehas. Bo kada svetos imar na ačhela but avke, sar hino akana.

³² Me kamľomas, hoj te aven bi o starišagi. Oda, ko hino bi e romňi, starinel pes pal oda, so hin le Rajeskero, hoj te avel pre dzeka le Rajeske.

³³ Ale oda, ko iľa romňa, starinel pes pal o veci le svetoskere, sar te avel pre dzeka la romňake.

³⁴ Akor hin leskero jilo rozulado. E pačivali džuvli vaj odi džuvli, sava nane rom, pes starinel pal o veci le Rajeskere, hoj te el sentno the le teloha the le duchoha. Ale odi, savi geľa romeste, starinel pes pal o veci le svetoskere, sar te el pre dzeka le romeske.

³⁵ Ale kada phenav na vašoda, hoj tumenge te phandav o šelo andre meň, ale pre tumaro lačho, hoj te dživen mištes a šukares tumen te likerel le Rajestar, hoj te na gondolínave pre aver.

³⁶ Te varesavo manuš phirel pačivala čhaha a našti pes zlíkerel a lake imar hin o berša, ta mi lel peske la romňake te šunel andro jilo, hoj mušinel avke te kerel. Oleha na kerela ňisavo binos.

³⁷ Te peske o manuš andro jilo phenel, hoj la na kamel te lel romňake a hino zoralo pes te zlíkerel a phenda peske andro jilo, hoj la mukela te ačhel pačivali, mištes kerel.

³⁸ O manuš, savo peske lel romňa, mištes kerel. Ko peske na lel romňa, kerel meksa feder.

³⁹ E džuvli hiňi phandli dži akor, medik dživel lakero rom. Ale te lake muľahas o rom, hiňi slobodno a šaj džal romeste, pal kaste kamel, ale ča pal oda, ko hino andro Raj.

⁴⁰ No me oda dikhav avke, hoj ela bachtaleder, te ačhela slobodno. A gondolínave mange, hoj the man hin le Devleskero Duchos.

Pal o chaben

8 A pal oda mas, so pes obetinel le modlence, džanas, hoj amen hin savoren o prindžaripen. No o prindžaripen lidžal andro baripen, ale o kamiben bararel avri.

² Oda manuš, ko peske gondolinel, hoj vareso džanel, ov mek na sprindžarda avke, sar kempel te sprindžarel.

³ Ale ko le Devles kamel, oles o Del prindžarel.

⁴ A pal oda chaben, so sas obetimen le modlence: Amen džanas, hoj ňisavi modla pro svetos nane nič – hoj nane aver del, bo hin ča jekh Del.

⁵ Bo choc hine “devla”, saven o manuša len sar devlen, či pro ňebos vaj pre phuv – a choc hin but ajse “devla” the “raja” –

⁶ ale amen hin ča jekh Del, o Dad. Lestar hin savoro a the amen dživas prekal leste. A hin ča jekh Raj, o Ježiš Kristus, prekal kaste hin savoro a the amen dživas lestar.

⁷ Ale na sako prindžarel kada čačipen. Vareko mek dži akana hine sikade te chal o mas avke, sar te oda mas uľahas čačes obetimen le modlence, a vaš oda, hoj lengero svedomje hino slabo, hino oleha meľardo.

⁸ Ale o chaben amen na anel pašeder ko Del, bo te na chaha, nič na našavaha, a te chaha, nič na dochudaha.

⁹ Ča dikhen pre oda, hoj kadi tumari sloboda le slaben te na anel andro binos.

¹⁰ Bo te hin tut prindžaripen, a vareko, saves hin slabo svedomje, tut dikhela te bešel pal o skamind andro modlakero chamos: Či ov na chala tiš ole masestar, so sas obetimen le modlence?

¹¹ A avke tiro slabo phral, vaš savo muľa o Kristus, ela zňičimen vaš oda, hoj tut hin o prindžaripen.

¹² Te kada binos keren le phralenge, kaleha dukhaven lengero slabo svedomje a hin tumen binos the ko Kristus.

¹³ Vašoda, šoha na chava oda chaben, so lidžal mire phrales andro binos, hoj ov oleha te na perel andro binos.

O pravos le apoštoloskero

9 Či na som slobodno manuš? Či na som apoštolos? Či na dikhlom le Ježiš, amare Rajes? Či na san tumen o ovocje mira bučakero andro Raj?

2 Te na som apoštolos avreng, no tumenge som. Se tumen san oda, so sikavel pre ma, hoj som apoštolos andro Raj.

3 Sar man o manuša sudzinen, me lenge phenav kada:

4 Či nane man pravos, hoj man te den o chaben the o pijiben vaš miri buči?

5 Či našti peha las pačabnaskera džuvľa avke, sar keren the okla apoštola the o phrala le Rajeskere a the o Peter?

6 Abo so, ča me the o Barnabaš mušinas te kerel buči, hoj te el amen so te chal?

7 Savo slugadīs peske korkoro počinel sa peskere lovendar? Ko sadzinel e viñica a na chal olestar, so upre barol? Abo ko pes starinel pal o bakre a na lel ole thudestar, so den o bakre?

8 Phenav oda ča sar manuš? Či na phenel oda the o zakonos?

9 Bo andro zakonos le Mojžišoskero hin pisimen: *“Na phandeha o piskos la gurumñake, savi kerel buči, hoj te na chal.”*

Či pes o Del starinel ča pal o gurumña?

10 Či oda na vakerel amenge? Se prekal amende sas pisimen:

“Oda, ko orinel e phuv, a the oda, ko marel avri o žužodiv (o zrnos), mi kerel peskeri buči andro užaripen (nađej), hoj olestar chudela peskero kotor.”

11 Amen maškar tumende sadzinahas oda duchovno. Avke nane amen pravos te lel tumendar o veci, so kampil le tēloske sar žatva?

12 Te aver džene tumendar oda šaj len, ta akor amen na? Ale amen na ačhahas vaš oda pravos. Savoro zlidžas vaš oda, hoj te na zaačhavas o evaňjelium le Kristoskero.

13 So na džanen, hoj ola, save služinen andro chramos, chan o chaben andral o chramos a ola, save keren buči paš o oltaris, šaj peske len kotor le obe-tendar?

14 Avke the o Raj prikazindā, hoj ole, save o evaňjelium kazinen, te dživen le evaňjeliostar.

15 Ale me na kerdom nič olestar. Añi kada na pisindom vaš oda, hoj oda pes avke te kerel paš mande. Bo feder mange ulahas te merel, sar oda, hoj mange vareko te musarel kada miro lašariben.

16 Bo sar vakerav o evaňjelium, nane man soha pes te lašarel, bo mušnav oda te kerel, ale vigos mange ulahas, te les na vakerdomas.

17 Te oda kerav ča vaš oda, hoj kamav, chudav vaš oda počiniben. Ale me mange našti kidav avri, bo o Del mange diña kadi sentñi služba.

18 So hin miro počiniben? Me na lav ñisave love vaš oda, hoj vakerav o evaňjelium le Kristoskero. Choc te

mange oda ola bučatar patrinel, me oda na lav, choc šaj ilomas.

19 Me som slobodno manuš a na som ñikaske otrokos, ale me mandar kerdom sakoneskero otrokos, hoj te dochudav so mek buter manušen.

20 Prekal o Židi ačhilom sar Židos, hoj te dochudav le Židen. Prekal ola, save hine tel o zakonos, ačhilom, sar te ulomas the me tel o zakonos – choc na som tel o zakonos – hoj te dochudav olen, save hine tel o zakonos.

21 Prekal ola, save hine bi o zakonos, ačhilom sar te bi o zakonos – choc na som bi o zakonos le Devleskero, ale som tel o zakonos le Kristoskero – hoj te dochudav olen, save hine bi o zakonos.

22 Prekal o slaba ačhilom slabo, hoj te dochudav le slaben. Prekal savorende ačhilom savoro, hoj te zachrañinav hojča varesaven.

23 Savoro kerav prekal o evaňjelium, hoj man andro evaňjelium te el miro kotor.

24 Se džanen, hoj but džene denašen pro pretēki, ale ča jekh lendar chudela e cena. Vašoda denašen avke, hoj la te dochuden.

25 Dojekh pretēkaris pes mušinel te zlíkerel savorestar. On oda keren vašoda, bo kamen te chudel e koruna, so našlola, ale amen chudaha ajsi, so ačhela pro furt.

26 Vašoda me denašav rovnones, hoj te dodžav andro cieľos, a demav avke, hoj te trañinav, a na ča avke andro luftos.

27 Marav man mire tēloha avke, hoj man te šunel, bo našti avreng pal oda kazinav, te me korkoro na dochudav e cena.

Te na lašaren le modlen

10 Kamav, phralale, hoj te džanen, hoj savore amare dada sas tel e chmara a savore pregele prekal o moros.

2 Savore sas bolde andre chmara the andro moros, hoj te en jekh le Mojžišoha.

3 Savore chanas oda jekh duchovno chaben

4 a savore pijenas oda jekh duchovno pijiben, bo pijenas andral e duchovno skala, so džalas pal lende – a odi skala sas o Kristus.

5 Ale buter džene lendar na sas pre dzeka le Devleske a mule pre pušta.

6 Kada pes ačhila savoro prekal amende, vaš oda, hoj te na kamas oda nalačhipen, avke sar on.

7 Añi ma aven modlara, sar varesave lendar sas. Avke sar hin pisimen:

“Bešle peske o nipi, hoj te chan the te pijen, a palis uštīle, hoj pes te zabavinen.”

8 Añi na keras o lubipen, sar varesave lendar kerenas a tel jekh džives lendar mule avri 23 000 manuša.

9 Añi te na pokušinas le Kristus, avke sar varesave lendar pokušinas a merenas le sapendar.

10 Añi ma dudrinen, bo varesave džene lendar dudrinenas a palis sas zñičimen le meribnaskere aňjelostar.

¹¹ Kada savoro pes ačhiŕa lenge a hin pisimen vaš oda, hoj amen pre oda te dikhas a te siklúvas olestar – amen, save dživas andro posledna časi.

¹² A avke oda, ko peske gondolinel, hoj ačhel, mi del pozora, hoj te na perel.

¹³ O pokušeňja, so pre tumende avle, hine ča ajse, so šaj zlidžal o manuš. Ale o Del hino verno. Ov na domukela, hoj te aven skušimen buter, sar birinen, ale andre proba (skuška) tumen dela the drom sar te avel andral avri, hoj oda te birinen te zlidžal.

¹⁴ Vašoda, mire lačhe phralale, denašen het, hoj tumen te na el nič le modlenca.

¹⁵ Phenav tumenge sar le godaverenge, hoj pes te zagondolinen upral oda, so phenav.

¹⁶ Či nane amen kotor andro rat le Kristoskero, sar pijas andral e kuči, vaš savi palíkeras? A či nane amen kotor andro telos le Kristoskero, sar chas o maro, so phageras?

¹⁷ Vaš oda, hoj hin ča jekh maro, amen but džene sam jekh telos, bo savore chas ole jekhe marestar.

¹⁸ Dikhen pro Izrael: Či nane olen, save chan o chaben le oltaristar, jekhetaňiben le oltariha?

¹⁹ So oleha kamav te phenel? Či oda mas, so hin obetimen le modlenge, hin vareso? Abo, hoj e modla hin vareso?

²⁰ Na! Ale so on obetinen, obetinen le demonenge a na le Devleske. A me na kamav, hoj tumen te el o jekhetaňiben le demonenca.

²¹ Našti pijen andral e kuči le Rajeskeri the andral e kuči le demonengeri. Našti chan pal o skamind le Rajeskeri the pal o skamind le demonengero.

²² Abo či kamas te chořarel le Rajes? Abo sam zoraleder sar Ov?

Te keren savoro pre slava le Devleskeri

²³ "Savoro šaj kerav" – ale na savoro hin pro lačo. "Savoro šaj kerav" – ale na savoro hin pre chasna.

²⁴ Ňiko te na dikhel pre peskero, ale sako mi rodel e chasna prekal aver.

²⁵ Savoro, so pes bikenel pro pľacos, chan a nič ma phučen vaš tumaro svedomje.

²⁶ Bo hin pisimen:

"Le Rajeskeri hiňi e phuv the savoro, so upre hin."

²⁷ Te tumen vičinela te chal vareko olendar, save na pačan, a tumen kamena te džal, chan ode savoro, so tumen dena, a nič ma phučen vaš tumaro svedomje.

²⁸ Ale te tumenge vareko phendahas: "Kada sas obetimen le modlenge!" Ma chan vaš o svedomje the vaš oda manuš, savo tumenge oda phendá.

²⁹ Me na vakerav pal tumaro svedomje, ale pal avre dženeskero svedomje.

Vareko šaj phučen: "So? Prekal o svedomje aver dženeskero te na avav slobodno?"

³⁰ Bo te me palíkerav le Devleske vaš o chaben, soske pre mande aver dženo te vakerel vaš oda chaben, vaš savo me palíkerdom?"

³¹ Savoro, so keren, či chan abo pijen, keren pre slava le Devleskeri.

³² Vašoda, líkeren tumen avke, hoj te na anen o pohoršeňje aňi le Židenge, aňi le Grekenge, aňi le Devleskera khangerake,

³³ avke sar the me kerav sa prekal oda, hoj te avav pre dzeka savorengre andre savoreste. Me na rodav oda, so hin mange pro lačo, ale so hin pre chasna but dženege, hoj te aven zachraňimen.

11 Keren sa pal ma, avke sar me kerav sa pal o Kristus.

O džuvľa mi zaučharen o šero andre khangeri

² Lašarav tumen phralale vaš oda, hoj furt man lep-eren a líkeren tumen olestar, so tumen sikado, avke sar tumenge oda podiňom.

³ Ale kamav, hoj te džanen, hoj o šero dojekhe muršeske hin o Kristus, o šero la džuvľake hin o murš a o šero le Kristoske hin o Del.

⁴ Dojekh murš, sar pes modľinel abo prorokinel a hin les vareso pro šero, tele dikhel peskero šero.

⁵ Dojekh džuvľi, sar pes modľinel abo prorokinel a nane la učardo andre o šero, tele dikhel peskero šero – a oda hin avke, sar te peske holíndahas o šero.

⁶ Te e džuvľi na učarel andre peskero šero, ta šaj pes the strihinel. Ale te peske e džuvľi ladžal te holínel o šero, abo te strihinel o bala, ta mi učarel peske o šero andre.

⁷ O murš peske na mušinel te učarel andre peskero šero, bo hino o obrazis the e slava le Devleskeri, ale e džuvľi hiňi e slava le muršeskeri.

⁸ Bo o murš nane la džuvľatar, ale e džuvľi le muršestar,

⁹ bo na o murš sas kerdo prekal e džuvľi, ale e džuvľi prekal o murš.

¹⁰ Vašoda mušinel te avel la džuvľa pro šero vareso, so sikavel, hoj hiňi tel e autorita le romeskeri, prekal o aňjela.

¹¹ Ale andro Raj hiňi e romňi jekh le romeha a o rom hino jekh la romňaha.

¹² Bo sar hiňi e džuvľi kerďi le muršestar, avke ulol the o murš la džuvľatar a sodujđzene hine le Devlestar.

¹³ Rozsudzinen korkore maškar peste, či oda hin šukares, hoj pes e džuvľi te modľinel ko Del bijal Ňisoste pro šero.

¹⁴ Abo či na siklúvas the andro dživipen oda, hoj te hin le muršes bare bala, hin leske oda pre ladž?

¹⁵ No te hin la džuvľa bare bala, lake oda hin pro šukariben. Bo o bare bala lake sas dine sar o šlajeris.

¹⁶ Ale te pes vareko vaš oda kamľahas te vesekedinel: Amen pre oda na sam sikade, aňi o khangeri le Devleskere.

Pal e večera le Rajeskeri

¹⁷ Andre kala veci, so akana phenava, tumen na lašarav, bo tumen pes zdžan na pro lačo, ale pro rosno.

¹⁸ Ešeb šundom, hoj tumen vesekedinen maškar peste, sar tumen zdžan andre khangeri – a me pačav, hoj oda hin sikra the čačo.

¹⁹ Bo mušinel maškar tumende te el the o vesekedišagi, hoj pes te presikaven maškar tumende ola, save džan pal o čačo drom.

²⁰ A oda, so tumen chan, sar tumen zdžan jekhetane, oda nane e večera le Rajeskeri.

²¹ Bo sar džan te chal, sako peske chal peskero chaben a avke hin vareko bokhalo a aver mato.

²² Abo či tumen nane tumare khera, kaj šaj chan the pijen? Abo či na dikhen tele la Devleskera khangeri a keren ladž olenge, saven nane nič? So kamen, hoj tumenge pre kada te phenav? Kamen, hoj tumen vaš oda te lašarav? Vaš kada tumen na lašarava.

²³ Bo oda, so me priilom le Rajestar, tumenge the phendom: O Raj o Ježiš andre odi rat, sar les dine andre, ila o maro

²⁴ a sar palikerđa, phagerelas a phendā: “Len, chan, kada hin miro tēlos, so pes vaš tumenge del. Kada keren pre miro leperiben!”

²⁵ Avke pal e večera ila the e kuči a phendā: “Kadi kuči hin e nevi zmluva andre miro rat. Kada keren, kecivar pijena pre miro leperiben.”

²⁶ Bo kecivar chaľanas kada maro a piľanas andral kadi kuči, lidžan o hiros pal o meriben le Rajeskero, medik na avela.

²⁷ Vašoda, te vareko chaľahas le Rajeskere marestar vaj piľahas leskera kučatar nažuže jileha, ela les binos pro tēlos the pro rat le Rajeskero.

²⁸ Ale sako pes ešeb (peršo) mi zagondolinel upral peskero dživipen a avke šaj chal ole marestar the šaj pijel ola kučatar.

²⁹ Bo te o manuš chal ole marestar the pijel ola kučatar bi e pačiv anglo tēlos le Rajeskero, akor oleha, hoj chal the pijel, anel upral peste o sudos.

³⁰ Vašoda hin maškar tumende but džene slaba, nasvale the mule.

³¹ Bo te pes korkore zagondolindāmas upral peste, či mištes dživas, akor na ulāmas sudzimen.

³² No oleha, hoj amen o Raj sudzinel, bararel amen avri, hoj te na avas odsudzimen le svetoha.

³³ A avke, phralale mire, sar tumen zdžana te chal, užaren jekh pre aver!

³⁴ Te hin vareko bokhalo, ta mi chal khere, hoj te na anel o sudos pre tumende, sar tumen zdžan. A okla veći prikerava, sar avava.

Pal o dari le Duchoskere

12 Phralale, kamav, hoj te džanen pal ola dari, so del o Duchos.

² Se džanen, hoj mek sar sanas pohana, phirenas ko ņeme modli, avke sar pes denas te lidžal.

³ Vašoda kamav hoj te džanen, hoj ņiko, kas lidžal o Duchos le Devleskero, našti košel le Ježiš. A ņiko našti phenel, hoj o Ježiš hino Raj, ča oda, kas lidžal o Sentno Duchos.

⁴ Bo hin ajse the kajse dari, ale o Duchos hino jekh.

⁵ A hin ajse the kajse službi, ale o Raj hino jekh.

⁶ A hin ajse the kajse buča, ale savoro kerel oda jekh Del andre savorende.

⁷ Ale andre sakoneste pes o Duchos presikavel avres pre chasna savorenge.

⁸ Bo jekheske hin dino le Duchostar te vakernel o godaveripnaskero lav; avreske hin dino o prindžaripnaskero lav ole jekhe Duchostar;

⁹ avreske o pačaben ole jekhe Duchostar; avreske o dari te sastarel ole jekhe Duchostar;

¹⁰ avreske te kerel o zazraki; avreske te prorokinel; avreske te rozprindžarel le dučen; avreske te vakernel andre aver čhiba; a avreske, hoj te achalol a te prethovel o čhiba.

¹¹ Ale savoro kerel oda jekh Duchos korkoro, savo rozdel sakoneske o dari avke, sar ov kamel.

Jekh tēlos, ale but kotora

¹² Bo avke, sar hin jekh tēlos a hin les but kotora a savore kotora hine jekh tēlos, choc te hine but: Avke hin the o Kristus.

¹³ Se amen savore samas bolde jekhe Duchoha andre jekh tēlos – či o Židi vaj o Greki, či o otroka abo o slobodne: Savore priilam ole jekhe Duchos.

¹⁴ Se aňi o tēlos nane kerdo jekhe kotorestar, ale but kotorendar.

¹⁵ Te avke phendahas o pindro: “Me na som le tēlostar, bo me na som o vast!” Ta imar na ela o pindro le tēloskero kotor?

¹⁶ A te phendahas o kan: “Me na som le tēlostar, bo me na som e jakh!” Ta imar na ela o kan le tēloskero kotor?

¹⁷ Te ulahas calo tēlos ča e jakh, sar palis o tēlos šaj šundahas? Te ulahas calo tēlos ča o kan, sar palis šaj voňindahas?

¹⁸ Vašoda sthođa o Del savore kotora pro tēlos avke, sar ov kamla.

¹⁹ Te ulahas savore kotora ča jekhe kotorestar, kaj ulahas calo tēlos?

²⁰ No akana hin but kotora, ale ča jekh tēlos.

²¹ Vašoda e jakh našti phenel le vasteske: “Mange tut na kampil!” Aňi o šero le pindrege: “Na kampil mange tumen!”

²² No ola kotora, so pes dičhol, hoj hine slabeder: Ipen len igen kampil pro tēlos.

²³ A presikavas bareder pačiv ole kotorenge, so peske amen gondolinas, hoj hine frimeder pačivale. A feder uraviben das ole kotoren, so hine garude.

²⁴ Ale amare pačivale kotorenge oda na kampil. O Del sthođa o tēlos avke, hoj olen, so hine slabeder, diňa bareder pačiv,

²⁵ hoj te na avel andro tēlos o vesekedišagi, ale hoj pes o kotora jekh pal aver te starinen.

²⁶ A te cerpinel jekh kotor, jekhetane leha cerpinen the okla kotora; a te lašaren jekhe kotores, jekhetane leha radisaľon savore kotora.

²⁷ Tumen san le Kristoskero tēlos a sako tumendar hin leskero kotor.

²⁸ A andre khangeri o Del ačhađa ešeb (peršo) le apoštolen, dujten proroken, triten učiteljen, olen, save keren o zazraki, olen, saven hin daros te sastarel, te pomožinel, te starinel pes, abo te vakerel andre aver čhiba.

²⁹ Či hine savore apoštola? Či hine savore proroka? Či hine savore učitelja? Či hin sakoneske dino te kerel o zazraki?

³⁰ Či hin savoren o dari te sastarel? Či savore vakeren andro čhiba? Či savore džanen te prethovel o čhiba?

³¹ Mi džal tumenge igen pal o feder dari. A me tumenge sikavava oda nekfeder drom.

Pal o kamiben

13 Te vakerđomas manušengere čhibenca abo le aňjelengere čhibenca, ale na ulahas man o kamiben, ulomas ča sar o zvonos, so harangozinel, abo sar o trast, so čerginel.

² Te man ulahas o daros te prorokinel a achaliřomas savore garudiřena, te man ulahas savoro prindžaripen, abo ajso pačaben, hoj o verchi prethodomas, ale na ulahas man o kamiben, nič na som.

³ A te rozdiřomas savoro miro barvalipen, abo te miro řelos diřomas te labarel, ale na ulahas man o kamiben, nane mange oda pre řisoste.

⁴ O kamiben likerel avri, o kamiben hino lačo. O kamiben na zavidzinel, na lařarel pes a na thovel pes upre.

⁵ O kamiben pes likerel rajikanes, na rodel peskero, na cholisařol, na leperel o nalačo,

⁶ na radisařol le načačipnaske, ale radisařol le čačipnaske.

⁷ O kamiben savoro zlidžal, andre savoreste pačal, andre savoreste užarel, savoro precerpinel.

⁸ O kamiben šoha (ňikda) na preačhel, ale o prorocva pes predžana, o čhiba preačhena a o prindžaripen našřola.

⁹ Bo ča varesavo kotor džanas a ča varesavo kotor prorokinas.

¹⁰ Ale sar avela oda, so hin dokonalo, akor našřola oda, so nane dokonalo.

¹¹ Sar somas čhavoro, vakeravas sar čhavoro, gondoliřnavas sar čhavoro a achaluřavas sar čhavoro, ale sar ačhiřom muřš, zamukřom o čhavorikane veci.

¹² Akana dikhas nažuřes, sar andro gendalos a sar prekal e molha, ale palis pes dikhaha muj-mujeha. Akana prindžarav ča frima, ale palis prindžarava dokonales, avke sar o Del prindžarel the man.

¹³ Avke akana ačhel kala trin: O pačaben, o užaripen (nađej) the o kamiben. Ale nekbarereder lendar hin o kamiben.

Te vakerel andre aver čhiba, abo te prorokinel

14 Keren sa prekal oda, hoj tumen te el o kamiben a igen džan pal o dari le Duchoskere, ale buter pal oda, hoj te prorokinen.

² Bo oda, ko vakerel andro aver čhiba, na vakerel le manušenge, ale le Devleske. Bo űiko lenge na achalol, bo vakeren o garudiřena prekal o Duchos.

³ No oda, ko prorokinel, vakerel le manušenge, hoj len te zorařarel, te podhazdel a lenge te anel o radiřagos.

⁴ Oda, ko vakerel andro čhiba, zorařarel pes korkores, ale oda, ko prorokinel, zorařarel e khangeri.

⁵ Me kamav, hoj savoredžene te vakeren andro čhiba, no ulomas radeder te prorokindanas. Bo bareder hin oda, ko prorokinel sar oda, ko vakerel andro čhiba, te na džanel o čhiba te prethovel. Ča akor, sar hin prethode o čhiba, e khangeri pes zorařarel.

⁶ Phralale, te me avřomas ke tumende a vakerđomas andro aver čhiba, savi chasna tumen mandar ulahas? Hin chasna ča te vakerđomas oda, so mange sikađa o Del, abo vareso, so mange diňa te prindžarel, varesavo prorocstvo, abo varesavo sikaviben.

⁷ Avke sar the o nadžide nastrojji, so den avri o zvukos, či e piřtařka vaj e harfa: Te na dinehas sako aver zvukos, sar pes džanlahas, sar řundol e piřtařka a sar e harfa?

⁸ Abo ko pes pririchtinela pro mariben, te e truba namiřtes řundola a na dela avri lačo hangos?

⁹ Avke the tumen: Te na phendřan la čhibaha ajso lav, so pes del te achalol, sar pes džanela, so pes vakerel? Bo vakerena andro luftos.

¹⁰ Andro svetos hin ajci but čhiba a řisavi lendar nane bi o lava.

¹¹ Ale te na prindžarav a na achaluřav odi čhib, so vareko vakerel, ov ela cudzincos mange a me leske.

¹² Avke hin the tumenca. Te igen kamen o dari le Duchoskere, dikhen hoj te džan pal o dari, save anena buter chasna la khangerake.

¹³ A avke oda, ko vakerel andro čhiba, pes mi modřinel, hoj oda te džanel the te prethovel.

¹⁴ Bo sar man modřinav andro aver čhiba, modřinel pes miro duchos, ale mira gođa olestar nane řiř.

¹⁵ Akor so te kerel? Modřinava man mire duchoha, ale modřinava man the mira gođaha. Lařarava le Devles le giřavipnaha andre miro duchos, ale giřavava le Devleske the mira gođaha.

¹⁶ Bo sar lařares le Devles andro duchos a te ela ode ča ajso manuř, sar řaj phenela "Amen" pre oda, sar tu palikeres, te ov na achalol, so vakeres?

¹⁷ Bo choc tu miřtes palikeres, no okleske oda na pomožinel te barol.

¹⁸ Palikerav le Devleske, hoj buter vakerav aver čhibenca sar tumen savore,

¹⁹ ale andre khangeri kamav radeder te phenel pandž ajse lava, so pes achalola, sar deř ezera (10 000) ajse lava andro čhiba, so pes na achalola – hoj te sikavav the avren oleha so vakerav.

²⁰ Phralale, ma aven sar čhavore andre tumaro gondoliřagos. Sar džal pal o nalačhipen, aven sar čhavore, ale andro gondoliřagos aven sar duchovne dospele.

²¹ Andro zakonos hin pisimen:
"Aver čhibenca

*the aver vuštenca
vakerava ke kala manuša,
no the avke man na šunena",
phenel o Raj.*

²² Vašoda hin o čhiba pro znameňje, no na olenge, save pačan, ale olenge, save na pačan. Ale o prorocstvo nane prekal ola, save na pačan, ale prekal ola, save pačan.

²³ Te pes calí khangeri zgelahas jekhetane a savore vakerdehas andro aver čhiba a avlehas andre aver manuša, abo napačabnaskere, či na phendehas pre tumende, hoj diliňalon?

²⁴ Ale te savore prorokindehas a avľahas andre vare-savo napačabnaskero, abo ča ajsa manuš, ta uľahas olestar, so šundahas, usvedčimen the sudzimen.

²⁵ Avke ena otkerde o garude veci andral leskero jilo, perela pro muj, bandola anglo Del a viznavinela, hoj o Del hino čačes maškar tumende.

Pal o poradkos andro khangera

²⁶ Akor so te kerel, phralale? Sar tumen zdžan, varekas hin varesavi chvala, varekas hin vareso te sikavel, abo vareso, so leske o Del sikađa, vareko vak-erel andre aver čhiba, abo vareko oda prethovel. Kada savoro pes mi kerel pre oda, hoj e khangeri te zoraľol.

²⁷ Te vakerele vareko andre aver čhiba: Mi vakeren jekh pal aver duj, abo nekbuter trin džene, a jekh dženo oda mi prethovel.

²⁸ Ale te nane ko te prethovel, mi el čhit andre khangeri a mi vakerele korkoro peske the le Devleske.

²⁹ Le prorokendar mi vakeren duj, abo trin džene a okla mi rozsudzinen oda.

³⁰ Ale te vareko aver, ko ode bešel, chudela vareso le Devlestar, oka ešebno mi el čhit.

³¹ Bo po jekh dženo šaj savore prorokinen, hoj dojekh te sikľol a te el podhazdlo.

³² A o duchi le prorokengere pes mušinen te poddel le prorokenge,

³³ bo o Del hino Del, savo kamel o šoros (poradkos) the o smirom. Avke sar hin andre savore sentne khangera.

³⁴ O džuvľa andro khangera mi en čhit, bo na domukel pes lenge te vakerele, ale mi podden pes avke, sar oda phenel the le Mojžišoskero zakonos.

³⁵ A te kamen vareso te sikľol, mi phučen oda khere peskere romendar. Bo la džuvľake nane šukares te vakerele andre khangeri.

³⁶ Abo so, tumendar avľa o lav le Devleskero? Abo ča ke tumende avľa?

³⁷ Te peske vareko gondofinel, hoj hino prorokos, abo hoj les hin daros le Duchostar, mi džanel, hoj oda, so tumenge pisinav, hin o prikazis le Rajeskero.

³⁸ Ale te vareko oda na šunel, aňi tumen les ma šunen.

³⁹ Avke, phralale mire, mi džal tumenge igen pal oda, hoj te prorokinen a ma zaačhaven o vakeriben andre aver čhiba.

⁴⁰ Ale savoro pes mi kerel šukares the andro šoros (poradkos).

Pal o Ježišoskero uštiben andral o meriben

15 Phralale, leperav tumenge o evaňjelium, so tumenge vakeravas, so priiľan a andre savo ačhen.

² Prekal oda evaňjelium san zachraňimen, te les dolikerena avke, sar tumenge les vakeravas. Te na, ta akor hijaba pačandľan.

³ Bo oda nekbareder, so tumenge diňom, hin oda, so the me priiľom: O Kristus muľa vaš amare bini, avke sar hin pisimen;

⁴ parunde les a pro trito džives uštľa andral o meriben, avke sar hin pisimen;

⁵ a sikađa pes le Peteriske a palis le dešudujenge.

⁶ Paloda pes jekhvareste sikađa buter sar pandž šel (500) phralenge, savendar buter džene mek dživen džakana, ale varesave imar the mule.

⁷ Paloda pes sikađa le Jakoboske a palis savore apoštolenge.

⁸ A pro ostatkos savorendar pes sikađa the mange, sar varekaske, ko namištes uľľa (pes narodzinda).

⁹ Bo me som nekcikneder le apoštolendar a na som hodno man te vičinel apoštolos, bo džavas pre le Devleskeri khangeri.

¹⁰ Ale le Devleskere lačhipnastar (milostatar) som oda, ko som, a leskero lačhipen (milost) mange na sas presikado hijaba. Se buter kerďom buči sar on savore – no oda na me, ale le Devleskero lačhipen (milost), so hino manca.

¹¹ Či me abo on: Oda jekh savore vakeras, a tumen oleske pačandľan.

Pal le manušengero uštiben andral o meriben

¹² Ale te vakeras pal o Kristus, hoj uštľa andral o meriben, sar oda, hoj varesave džene tumendar phenen, hoj nane uštiben andral o meriben?

¹³ Se te pes na del te uštľel andral o meriben, ta akor aňi o Kristus na uštľa andral o meriben.

¹⁴ Te o Kristus na uštľa andral o meriben, ta akor hijaba vakeras a tumaro pačaben nane pre űisoste.

¹⁵ Bo te o mule čačes nane uštade andral o meriben a te le Kristus o Del na uštadaahas andral o meriben, ta akor amen uľamas o falošna švedki le Devleskere, bo amen svedčinahas pro Del, hoj le Kristus uštada andral o meriben.

¹⁶ Bo te o mule na uštľen andral o meriben, ta akor aňi o Kristus na uštľa andral o meriben;

¹⁷ a te o Kristus na uštľa andral o meriben, ta tumaro pačaben nane pre űisoste a mek san andre tumare bini.

¹⁸ A palis the ola, save mule andro Kristus, hine našade.

¹⁹ Te pes pro Kristus šaj zmukas ča andre kada dživipen, ta akor sam neččoreder savore manušendar.

²⁰ Ale o Kristus sas uštado andral o meriben sar ešebno olendar, save mule.

²¹ Bo sar avľa prekal o manuš o meriben, avke avľa prekal o manuš the o uštiben andral o meriben.

²² Bo sar andro Adam savore meren, avke andro Kristus ena savore obdžidarde.

²³ Ale sako andre peskero šoros (poradkos): Ešeb o Kristus a palis ola, save hine le Kristoskere, sar ov avela.

²⁴ A palis avela o koñec, sar o Kristus oddela o krališagos le Devleske le Dadeske, sar prephagela o rajipen savore rajenge the savore vladarenge the zoreng.

²⁵ Bo ov mušinel te kralinel, medik leske na thovela tel o pindre savore ñeprijateľen.

²⁶ A sar o posledno ñeprijateľis ela zničimen o meriben.

²⁷ Bo hin pisimen: "*Savoro leske thoda tel o pindre.*" Ale te phenel, hoj savoro leske hin poddino, ta džanas, hoj o Del, ko leske thoda sa tel o pindre, nane leske poddino.

²⁸ A sar leske ela savoro poddino, akor pes the o Čhavo korkoro poddela Oleske, savo leske savoro poddiña, hoj o Del te el savoro andre savoreste.

²⁹ Bo akor so kerena ola, save pes den te bolet vaš o mule? Te o mule našti ušten andral o meriben, akor soske pes den vaš lenge te bolet?

³⁰ Akor soske sako džives predžas e dar pal amare dživipena?

³¹ Me sako džives merav, phralale, no andre tumende thovav baripen andro Ježiš Kristus amaro Raj!

³² Bo te oda sas mandar, hoj man andro Efezus maravas sar le dzive džvirencea, akor so man hin olestar? Te o mule na ušten andral o meriben, ta akor "*chas, pijas, bo tajsa meraha!*"

³³ Ma den tumen te klaminel: "Maškar o nalače manuša pes musarel o lačno karakteris."

³⁴ Strižbisaľon avri avke, sar kampil, a ma keren o bini! Bo varesave na prindžaren le Devles – phenav oda, hoj tumen te ladžan.

Sar uštena o mule

³⁵ Ale vareko šaj phučel: "Sar uštena o mule andral o meriben? A andre savo telos avena?"

³⁶ Tu nagodaŕaver! Oda, so thoves andre phuv, ela obdžidardo ča akor, te merela.

³⁷ Akor sar thoves andre phuv o zrnos la pšeñcakero, vaj varesavo aver, mek na dičhol avri avke sar odi rastlina, so lestar barola.

³⁸ A o Del les del o telos avke, sar ov kamel, a dojekhe semenos del peskero telos.

³⁹ Na dojekh telos hin jekh: Aver telos hin le manušen, aver le džvirinen, aver le čiriklen a aver le riben.

⁴⁰ Hin ñeboskere tela a hin phuvakere tela, ale aver šukariben hin le ñeboskeren a aver le phuvakeren.

⁴¹ Aver hin o šukariben le khameskero, aver hin o šukariben le čhoneskero a aver hin o šukariben le čerčeñengero; a e čerčeñ la čerčeñatar hiñi aver andro šukariben.

⁴² Avke oda ela, sar pes uštela andral o meriben. Thovel pes andre phuv ajsa telos, so kirňol, ale uštěl ajsa, so na kirňol.

⁴³ Thovel pes andre phuv andro našukariben – uštela andro šukariben; thovel pes andre phuv andro slabišagos – uštela andre zor;

⁴⁴ parunel pes o phuvakero telos, no uštela o duchovno telos. Te hin phuvakero telos, akor hin the duchovno telos.

⁴⁵ Avke hin the pisimen: "*Ešebno manuš o Adam ačhiľa džido manuš*"; o posledno Adam ačhiľa Duchos, savo del dživipen.

⁴⁶ Nane ešeb (peršo) o duchovno, ale o telesno, a palis o duchovno.

⁴⁷ Ešebno manuš hino la phuvatar, kerdo le prachostar; dujto manuš hin andral o ñebos.

⁴⁸ Savo sas oda phuvakero, ajsa hine the savore phuvakere; a savo oda ñeboskero, ajsa hine the savore ñeboskere.

⁴⁹ Sar pre peste urahas e podoba le phuvakere manušeskeri, avke pre peste uraha the e podoba le ñeboskere manušeskeri.

⁵⁰ Ale kada phenav, phralale, hoj o telos the o rat našti džal andro krališagos le Devleskero, añi amaro telos, so kirňol, našti chudela o večno dživipen.

⁵¹ Šunen, phenava tumenge o garudo čačipen: Savore na meraha, ale savore avaha čerimen –

⁵² jekhvareste, takoj, sar trubanela e posledno truba. Bo sar šundola e truba, o mule uštena andral o meriben a imar šoha (ñikda) pale na merena a amen avaha čerimen.

⁵³ Bo oda, so kirňol, mušinel pre peste te urel oda, so na kirňol; a oda, so merel, mušinel pre peste te urel oda, so imar našti merel.

⁵⁴ A sar kada, so kirňol, pre peste urela oda, so na kirňol; a kada, so merel, pre peste urela oda, so imar našti merel; akor pes ačhela oda, so hin pisimen: "*O meriben hin zničimen, imar hin ñerindo (zvitázimen)!*"

⁵⁵ "*Meriben, kaj hin tiro ñerindipen (vitázstvo) Meriben, kaj hin tiri zor te dukhavel?*"

⁵⁶ O meriben lel peskeri zor le binostar a o binos lel peskeri zor le zakonostar.

⁵⁷ Ale palikeras le Devleske, savo amenge del te ñerinel (te zvitázinel) prekal amaro Raj Ježiš Kristus.

⁵⁸ A avke, mire lačne phralale, aven zorale! Ma den tumenca te čhalavel! A ma preačhen te barol andre buči le Rajeskeri! Se tumen džanen, hoj tumari buči andro Raj nane hijaba.

O love prekal o Jeruzalem

16 Pal o love, so pes skidel upre prekal o sentna, keren avke, sar oda phendom the le khangerege andre Galacija.

² Kurke peske sako mi thovel pre sera ajci, keci šaj, hoj pes te na skidel upre o love ča akor, sar me imar avava.

³ Sar avava, dava lila olinge, kas tumen avri kidňan a bičhavava len tumare daroha andro Jeruzalem.

⁴ Te kampľahas, hoj te džav the me, on avena manca.

O mangipena le Pavloskere

⁵ Ke tumende avava, sar imar predžava e Macedonija, bo prekal e Macedonija ča predžava.

⁶ Ale ke tumende ačhava talam buter, talam the prekal o jevend, hoj mange te pomožinen te džal dureder všadzik, kaj kamava te džal.

⁷ Bo me tumen na kamav te dikhel ča avke, hoj ča sig pašal tumende predžava. Pačav, hoj ačhava ke tumende buter dživesa, te oda o Raj domukela.

⁸ Andro Efezus ačhava, medik na ela o Letňice (Turice),

⁹ bo ode pes mange phundrade o bare vudara te kerel e lačhi buči, the te ode hin but manuša, save pre ma džan.

¹⁰ Ale te avela o Timoteus, dikhen, hoj te el slobodno a hoj na mušinel pes te daral ke tumende, bo ov kerel le Rajeskeri buči avke sar me.

¹¹ Niko les te na dikhel tele. Pomožinen leske te džal dureder pro drom andro smirom, hoj te avel pal ma, bo užarav les le phralenca.

¹² Kamav te phenel pal amaro phral Apollo, hoj les igen mangavas te avel ke tumende le phralenca, ale na kamelas akana te džal. No sar pre oda ela feder časos, džala.

O posledna lava

¹³ Aven upre a ma zasoven! Ačhen zoraha andro pačaben! Aven murša a aven zorale!

¹⁴ Savore tumare veci pes mi keren andro kamiben!

¹⁵ Phralale, tumen džanen pal o kher le Štefanoskero, hoj hine ešebne andral e Achaja a dine pes andre služba le sentnenge. Vašoda mangav tumen,

¹⁶ hoj tumen lenge te podden radišagoha a the sakoneske, ko lenca služinel the kerel buči.

¹⁷ Radisaľuvav oleske, hoj avľa o Štefan, o Fortunatos the o Achajikos. Bo on mange kerde, so tumen naští kerđan, akor sar ade na sanas.

¹⁸ Bo on ande o radišagos andre miro the tumaro duchos. Kajse dženen den pačiv.

¹⁹ Pozdravinen tumen o khangeri andral e Azija. Igen tumen pozdravinen andro Raj o Akvilas the e Priska the e khangeri, so hin andre lengero kher.

²⁰ Pozdravinen tumen savore phrala. Pozdravinen tumen jekh avres le sentne čumibnaha.

²¹ Me, o Pavol, mire vasteha kada pisinav a pozdravinav tumen.

²² Te vareko na kamel le Rajes, mi el prekošlo! Maranatha! Av, Rajeja amaro!

²³ O lačhipen (milost) amare Rajeskero le Ježišoskero mi el tumenca!

²⁴ Miro kamiben mi el tumenca savorenca andro Ježiš Kristus.

Amen.

2. KORINŤANENGE

O pozdravos

1 Me o Pavol, le Devleskera volatar apoštolos le Ježišoskero Kristoskero, the o phral o Timoteus pisinās le Devleskera khangerake andro foros Korint the savore sentne manuŝenge andre cali Achaja:

² Mi del tumen o Del, amaro Dad, the o Raj, o Ježiš Kristus, peskero lačhipen (milost) the o smirom.

O Pavol paŝikerel le Devleske

³ Paŝikeras le Devleske, savo hin o Dad amare Rajeskero le Ježišoskero Kristoskero. Ov hin o lačhejleskero Dad the o Del, kastar avel savoro radiŝagos.

⁴ Ov amen del o radiŝagos andre savore amare pharipena. Avke paŝis the amen ŝaj das ole radiŝagostar, so chudŝam le Devlestar, avre manuŝen andre lengere pharipena.

⁵ Bo sar aven pre amende but pharipena le Kristoskere, avke aven the but radiŝagi le Kristostar.

⁶ Te amen avke cerpinas, oda hin prekal tumaro radiŝagos the zachrana. A te hin amen radiŝagos, ta the tumen hin o radiŝagos. Oda radiŝagos tumen del zor te ŝikerel avri a te zŝidŝal ola pharipena, so the amen zŝidŝas.

⁷ Amaro uŝaripen (nađej) pal tumende hiŝi zoralŝi, bo dŝanas, hoj sar san jekhetane amenca andro pharipena, avke avena jekhetane amenca the andro radiŝagos.

⁸ Amen kamas, phralale, hoj te dŝanen pal o pharipen, so amen sas andre Azija. O pharipen, so pre amende avŝa, sas ajsō baro – bareder sar amari zor – imar aŝi na pačahas, hoj oda predŝivaha.

⁹ Imar peske gondolŝnahas, hoj ode meraha. Ale oda pes ačhiŝa vaŝoda, hoj pes te na mukas korkore pre peste, ale pro Del, savo uŝtavel le mulen.

¹⁰ Choc sas oda avke, hoj ŝaj muŝam, o Del amen cirdŝa avri a mek amen the cirdela avri andral oda. Pre leste pes mukas, hoj amen furt pale cirdela avri,

¹¹ sar the tumen ke oda pomoŝinen tumare modlŝibenca vaŝ amenge. Vaŝ oda, hoj but dŝene pes vaŝ amenge modlŝinenas, but manuŝa paŝikerena vaŝ o lačhipen (milost), so chudŝam.

O Pavol naŝti avel andro Korint

¹² Bo amaro laŝariben hin kada: Amaro jilo amenge sikavel, hoj dŝivahas andro svetos sentnes the andro ŝuŝipen, so hin le Devlestar, a maŝkar tumende meksa

buter. Amen na dŝivahas le manuŝeskera gođaha, ale le Devleskere lačhipnaha (milostaha).

¹³ Se na pisinās tumenge vareso aver, ale ča oda, so genen abo imar miŝtes ačalŝon. A pačav, hoj mek ačalŝona savoro.

¹⁴ Choc akana amen ačalŝuven ča sikra, pačav, hoj ačalŝona amen andre savoreste, hoj pes amenca te laŝaren, avke sar the amen tumenca, andro dŝives amare Rajeskero le Ježišoskero.

¹⁵ Andre kada pačaben kamŝom te avel sigeder ke tumende, hoj te aven duvar poŝehŝimen.

¹⁶ Paŝis khatar tumende kamŝom te predŝal andre Macedonija a andral e Macedonija te avel pale ke tumende, hoj mange te pomoŝinen te dŝal andre Judsko.

¹⁷ Te oda me kamŝom, kerđom oda bi o gondolŝagos? Abo te man rozgondolŝinav, rozgondolŝinav man mandar, hoj jekhvarestē phenav the “He” the “Na”?

¹⁸ Sar čačes o Del vakerel o čačipen, avke the mire lava ke tumende na sas the “He” the “Na”.

¹⁹ Bo o Čhavo le Devleskero, o Ježiš Kristus, na sas the “He” the “Na”. Ov, pal savo tumenge vakerahas me, o Silvan the o Timoteus, hin le Devleskero “He”, bo furt kerel, so phenel.

²⁰ Bo savore lava, pal save o Del phendŝa, hoj amenge dela, hine andro Ježiš “He”, a vaŝoda andro Ježiš phenas “Amen” – le Devleske pre slava.

²¹ Ale o Del hin oda, ko zoralŝarel amaro the tumaro pačaben andro Kristus. Ov amen pomazindŝa

²² a zapečatiŝdŝa, hoj te avas leskere. A diŝa le Duchos andre amare jile, sar zaloha savorestar, so mek chudaha.

²³ O Del mange hin ŝvedkos – bo prindŝarel miro jilo – hoj na avŝom andro Korint vaŝoda, bo na kamŝom tumen te dukhavel.

²⁴ Se na sam o raja upral tumaro pačaben, ale amen sam ola, save tumenca keren prekal tumaro radiŝagos, bo ča andro pačaben ačhen zoraes.

2 Phendŝom peske, hoj na avava ke tumende avke, hoj tumenge anava pharipen.

² Bo te me tumenge kerava o pharipen, ko man paŝis dela o radiŝagos? Na oda, kaske me kerđom o pharipen?

³ A kada tumenge pisindŝom, hoj sar avava, te na avav smutno ole dŝenendar, kastar majindŝomas te radisaŝol. Bo pačav, hoj savoren tumen hin jekhetane manca radiŝagos.

⁴ Bo bare pharipnastar the phare jilestar a but apsenca tumenge pisinavas. Na vaŝoda, hoj te aven

smutne, ale hoj te sprindžaren miro baro kamiben ke tumende.

Te odmukel le binošneske

⁵ Ale te vareko kerđa varekaske pharipen, na ča mange kerđa pharipen, ale andre varesoste the tumenge savoreng. No na kamav ke oda mek me te prithovel.

⁶ Imar les hin dos, bo but tumendar les potrestinde.

⁷ Ale akana imar ela feder, te leske odmukena a podhazdena, hoj les oda smutnišagos te na odlel calkom le pačabnastar.

⁸ Vašoda tumen mangav, hoj leske te presikaven o kamiben.

⁹ Bo vašoda kada pisindom, hoj te dikhav, sar andre odi proba (skuška) obačhena a či kerena savoro avke, sar phendom.

¹⁰ Te tumen odmukena varekaske vareso, oleske odmukava the me. Bo oda, so me odmukom – te man sas so te odmukel – odmukom prekal tumaro lačo anglo Raj,

¹¹ hoj amen o satan te na klaminel. Bo amen prindžaras leskere plani.

Le Pavloskero pharipen andre Troada

¹² Sar avlom andre Troada te vakerel o evaňjelium le Kristoskero, choc te sas o vudar le Rajestar phundrado prekal ma,

¹³ mire duchos na sas smirom, bo na arakhlom ode mire phrales le Titus. Vašoda man lenca ode rozgeľom a geľom andre Macedonija.

¹⁴ Ale palikerav le Devleske, savo amenge del furt te ňerinel (te zvitazinel) andro Kristus a prekal amende del te sikavel pre dojekh than peskero prindžaripen sar odi šukar saga.

¹⁵ Bo amen sam le Devleske sar odi šukar saga le Kristoskeri maškar ola, save pes zachraňinen a the maškar ola, save ena zňičimen.

¹⁶ Prekal jekh oda hin e meribnaskeri saga pro meriben a prekal aver oda hin e dživipnaskeri saga pro dživipen. Ale ko oda šaj kerel?

¹⁷ Bo amen na šeftinas le Devleskere laveha, sar oda but džene keren. Ale vaš oda, hoj amen o Del bičhađa, vakeras pačivalones anglo Del sar služobňika le Kristoskere.

O služobňika la neva zmluvake

3 Či pes chudas korkore pale te lašarel? Abo či amenge kempel (sar varesave aver manušenge) o ľila prekal tumende – abo tumendar – so phenena, hoj ko sam?

² Se tumen san amaro ľil pisimen andre amare jile, so prindžaren a genen savore manuša.

³ Se pre tumende dičhol, hoj san le Kristoskero ľil, pririchtimen amara službaha, so nane pisimen la tinta, ale le džide Devleskere Duchoha. Oda ľil hin pisi-

men na pro barune tabli, ale pro masune tabli – pre tumare jile.

⁴ A kajso pačaben amen hin le Kristostar andro Del.

⁵ Amen našti kajso vareso keras korkore pestar, ale amari zor hin le Devlestar.

⁶ Ov amendar kerđa, hoj te avas služobňika la neva zmluvake – na le pismenenge andro zakonos, ale le Duchoske – bo o pismena murdaren, ale o Duchos obdžidarel.

⁷ E služba le meribnaskeri – o zakonos avrirandlo le pismenenca pro bara – sas ajsi slavňi, hoj o manuša andral o Izrael našti dikhenas le Mojžišoske pro muj, bo švicinelas la slavaha. Te e slava, so našľiľa, sas ajsi bari,

⁸ akor, keci bareder ela e slava, so hiňi pre služba le Duchoskeri?

⁹ Te e služba, so anel odsudeňje, sas ajsi slavňi, keci slavneder ela e služba, so anel o spravodľišagos?

¹⁰ Odi služba, so sas jekhvar slavňi, imar nane slavňi anglal odi služba, so hin akana, bo hin la bareder slava.

¹¹ Bo te oda, so našľol, sas slavno, ta akor, keci slavneder hin oda, so ačhel pro furt?

¹² Vašoda, hoj amen hin kajso užaripen (nađej), keras sa phundrades bi e dar.

¹³ Na avke sar o Mojžiš, savo thođa o khosno pro muj, hoj te na dikhen o Izraeliti o agor la slavakero, so našľiľa.

¹⁴ Ale lengere gođa sas zaphandle, a mek dži adadžives lenge ačhel oda khosno, sar genen o purano zakonos. Nane lenge otkerdo, bo ča andro Kristus pes otkerel.

¹⁵ Ale mek dži adadžives, kecivar genen le Mojžišoskero zakonos, ačhel o khosno pre lengere jile.

¹⁶ No, takoj soča vareko pes visarela ko Raj, o khosno pes odlela.

¹⁷ Oda Raj hin o Duchos a kaj hin o Duchos le Rajeskero, ode hin e sloboda.

¹⁸ No amen savore pes dikhas andre slava le Rajeskeri odučharde mujeha, sar andro gendalos. A odi slava, so avel le Rajestar, savo hino o Duchos, amen čerinel pre leskero obrazis – jekha slavatar andre aver.

O barvalipen andro čhikakere kuča

4 Vašoda, hoj amen hin kadi služba, so amenge sas diňi le Devleskere lačhipnastar, amen na slabisaľuvas.

² Diňam pestar het o garude ladžandutne veci, aňi na keras o veci vibitones, aňi na previsaras o lav le Devleskero. Ale sar sikavas o čačipen, savore manuša šaj džanen andre peskere jile, save sam amen manuša anglo Del.

³ A te hin amaro evaňjelium garudo, garudo hino olenge, save meren.

⁴ On na pačan vašoda, bo o del kale svetoskero lenge korarđa o gođa, hoj te na dikhen o svetlos, so avel andral o evaňjelium, pal e slava le Kristoskeri, savo hin o obrazis le Devleskero.

⁵ Bo amen na vakeras korkore pal peste, ale pal o Ježiš Kristus, hoj hin o Raj, bo amen sam ča tumare služobníka prekal o Ježiš.

⁶ Bo o Del hin oda, ko phenda: "Le kalipnastar avela o svetlos!" Ov labarda o svetlos andre amare jile a anda o vidnišagos, hoj te prindžaras e slava le Devleskeri, so dikhas pro muj le Ježišoske Kristoske.

⁷ Ale kada barvalipen hin andre amende sar andro čhikakere kuča, hoj te dičhol, hoj odi bari zor hin le Devlestar a na amendar.

⁸ Pal savore seri pre amende avel o pharipen, ale šoha (ňikda) na sam ispidle andro kutos; varekana na džanas, so te kerel, ale šoha pes na poddas;

⁹ džan pre amende, ale na sam omukle; sam čhide tele, ale na sam zničimen.

¹⁰ Furt las pre peskero tělos le Ježišoskero meriben, hoj o dživipen le Ježišoskero te dičhol pre amaro tělos.

¹¹ Bo amen, medik dživas, sam furt dine pro meriben vaš o Ježiš, hoj te el the o dživipen le Ježišoskero sikado pre amaro meribnaskero tělos.

¹² A avke andre amende kerel o meriben, no andre tumende o dživipen.

¹³ Hin pisimen: "*Pačandilom, vašoda vakerđom.*" Amen hin oda jekh Duchos pačabnaskero – amen tiš pačas, vašoda vakeras.

¹⁴ Bo džanas, hoj o Del, savo uštađa le Rajes le Ježiš andral o meriben, uštavela the amen andral o meriben le Ježišoha a ačhavela amen jekhetane tumenca anglal peste.

¹⁵ Kada savoro pes ačhel prekal tumende; a sar le Devleskero lačhipen (milost) rozbarol pro buter the buter manuša, on buter the buter palikerena pre le Devleskeri slava.

O dživipen andral o pačaben

¹⁶ Vašoda amen na slabisaľuvas, ale choc te amaro avruno manuš merel, o andruno manuš hino neveder džives so džives.

¹⁷ Bo kala loke pharipena, so akana predžas, na likerena but a anena amenge igen baro barvalipen – e večno slava.

¹⁸ Bo na dikhas pre oda, so dičhol, ale pre oda, so na dičhol. Bo ola veci, so dičhol, hine ča pre varesavo časos, ale ola, so na dičhol, hine pro furt.

Pal o večno kher andro ňebos

5 Bo amen džanas, hoj hin amen kher le Devlestar, sar ela čhido tele kada těloskero stankos, andre savo dživas kade pre phuv: Oda hin o večno kher andro ňebos, so nane kerdo le vastenca.

² Vašoda andre kada tělos le pharipnastar vzdichinas a igen kamas peske te urel peskero kher andral o ňebos,

³ hoj te avas arakhle urde a na lange.

⁴ Bo medik sam andre kada těloskero stankos, vzdichinas le pharipnastar, se amen na kamas ča te čhivel tele o phuvakero tělos, ale te urel pre peste oda

ňeboskero, hoj o meribnaskero te el zaučardo andre le dživipnaha.

⁵ No, o Del hin oda, ko amen pre oda pririchtinda a diňa amenge the le Duchos sar e zaloha.

⁶ Vašoda furt pačas a džanas, hoj medik sam khere andro tělos, sam dur le Rajestar.

⁷ Bo amen dživas le pačabnastar a na olestar, so dikhas.

⁸ Amen zoraha pačas a radeder omukľamas peskero tělos a gelamas te bešel khere ko Raj.

⁹ Vašoda, či sam khere vaj avri le kherestar, keras sa hoj te avas leske pre dzeka.

¹⁰ Bo savore pes mušinas te ačhavel anglo sudno tronos le Kristoskero, hoj peske sako te lel peskero počiňiben vaš oda, so kerdā, medik sas andro tělos – či lačo, abo nalačo.

Pal e služba, so anel o smirom

¹¹ Amen džanas, so oda hin te daral pes le Devlestar, a vašoda prevakeras le manušen. O Del amen prindžarel a pačav, hoj the tumen amen prindžaren andre tumaro jilo.

¹² Bo amen pes na kamas pale kaleha te lašarel, ale das tumen vareso, soha tumen šaj lašaren amenca. Hoj tumen te el so te phenel olenge, save pes lašaren le avruneha, so dičhol, a na oleha, so hin andro jilo.

¹³ Sam bi e godi? Oda hin prekal o Del. Sam paš e godi? Oda hin prekal tumende.

¹⁴ Bo o kamiben le Kristoskero amen ispidel, bo amen achaliľam oda, hoj te jekh dženo muľa vaš savore, ta akor savore mule.

¹⁵ A vašoda muľa vaš savore, hoj ola, save dživen, te na dživen buter peske, ale oleske, ko vaš lenge muľa a sas uštado andral o meriben.

¹⁶ Akana imar na dikhas ňikas avke, sar dikhen o manuša andro svetos. Bo choc amen dikhas le Kristus sar o manuša, akana les avke na dikhas.

¹⁷ Vašoda te hin vareko andro Kristus, hino nevo manuš. O purane veci našľile, dikh, savoro hin nevo!

¹⁸ Kada savoro hin le Devlestar, savo amen anda pale ke peste prekal o Kristus. A diňa amen e služba, so anel o smirom le manušenge le Devleha.

¹⁹ Bo o Del andro Kristus anda o smirom maškar peste the maškar o svetos. Na rachinelas imar le manušenge lengere bini a diňa amenge o lav, so anel o smirom.

²⁰ Sam bičhade te vakereľ vaš o Kristus, sar te o Del dovakerđahas prekal amende. Vaš o Kristus tumen mangas: Lačhuvan le Devleha!

²¹ Bo pre oda, ko na prindžarelas o binos, thođa o Del savore amare bini, hoj andro Kristus te avas anglo Del čačipnaskere.

6 Mangas tumen sar ola, save keras buči jekhetane le Devleha, hoj o lačhipen (milost) le Devleskero te na prilen hijaba.

² Bo phenel:

"Sar avľa o lačo časos, šundom tut;

andro džives sar kampelas e zachrana, tuke po-možindom."

Dikh, akana hin o džives te avel zachrañimen!

³ Amen na keras nič, pre soste vareko šaj rušlahas, hoj te na el len so te phenel pre amari služba.

⁴ Ale andre savoreste pes sikavas sar le Devleskere služobňika, save but likerem avri andro pharipen, andro čoripen the andro cerpišagi;

⁵ samas marde, samas andro bertení a but nipi pre amende igen džanas; phares kerahas buča, soviben amen na sas a samas bokhale.

⁶ Líkerahas pes andro žušipen, hoj te el amen prindžaripen, te likerem avri a te avas lače ke aver manuša prekal e zor le Sentne Duchoskeri le čače kamibnastar,

⁷ andro čačipnaskero lav the andre zor le Devleskeri. O spravodlíšagos amenge hin andre jekh vast sar zbraň pro utokos a andre aver pre obrana.

⁸ Sar le Devleskere služobňika predživas the o baripen the e ladž; vakeren pal amende the šukares the džungales. Phenem, hoj sam klamara, ale vakeras o čačipen.

⁹ Sam sar ola, kas na prindžaren a the avke amen mištes prindžaren; sam sar ola, save imar meren, a dikhen, the avke dživas; sam marde, ale na sam murdarde.

¹⁰ Sam sar smutne, ale furt radisaľuvav; sam sar čore a the avke but dženen barvaľaras; sam sar te amen nič na uľahas, ale hin amen savoro.

¹¹ Ó, Korinťanale, vakerahas tumenca andral o jilo a nič tumenge na garuďam andre.

¹² Amen na phandľam prekal tumende amare jile, ale tumen prekal amende.

¹³ Ale phenav tumenge sar le čhavenge: Phundraven the tumen tumare jile ke amende!

O chramos le džide Devleskero

¹⁴ Ma cirden o cudzo jarmo jekhetane olenca, save na pačan! Sar šaj el o lačhipen jekhetane le nalačhipnaha? Abo sar šaj el o svetlos jekhetane le kalipnaha?

¹⁵ Šaj o Kristus pes zdžal le bengeha †? So hin jekhetane oles, ko pačal, oleha, ko na pačal?

¹⁶ So hin jekhetane le Devleskere chramos le modlenca? Se amen sam o chramos le džide Devleskero, avke sar phendá o Del:

"Bešava the phirava maškar lende, me avava lengero Del a on ena mire manuša.

¹⁷ Vašoda aven lendar avri a odcirden tumen het, phenel o Raj, ma chuden tumen le nažužestar a me tumen prilava.

¹⁸ Me avava tumaro Dad a tumen avena mire čhave the čhaja, phenel o Raj, o Nekzoraleder."

7 Mire lače phralale, te amen o Del diňa kajse lava, žužaras pes savorestar, so meľarel o telos the

o duchos, hoj te avas andre savoreste sentna a te daras le Devlestar.

Le Pavloskero radišagos

² Prilen amen jilestar! Ňikaske na kerďam nič nalačo; Ňikah na dukhadam; Ňikaha na thoďam avri.

³ Na phenav oda, hoj tumen te odsudzinav. Se imar kada anglal phendom, hoj san andre amare jile, hoj jekhetane te meras a jekhetane te dživas.

⁴ Andre savoreste tumenge pačav a thovav andre tumende baro baripen! Andre savore amare pharipena som zoraľardo a pherardo le radišagoha.

⁵ Bo akorestar, sar avľam andre Macedonija, amare telos na sas Ňisavo odpočinkos. Všadzík amen sas pharipena: Avral sas o maribena a andre amare jile e dar.

⁶ Ale o Del, savo del o radišagos olen, save andro duchos na birinen, diňa o radišagos the amen oleha, hoj avľa o Titus.

⁷ No, na ča oleha, hoj ov avľa, ale the ole radišagoha, so les sas tumendar. Ov amenge vakereľas pal oda, sar igen man kamen te dikhel; sar pal ma roven a sar igen pes starinen pal ma. Olestar man sas mek buter radišagos.

⁸ A te le ľileha tumenge kerďom pharipen, imar mange oda nane pharo, choc te sas. Se dikhav, hoj tumenge oda ľil andá sikra pharipen,

⁹ ale akana radisaľuvav. No na vašoda, hoj tumen sas pharipen, ale vašoda, hoj oda pharipen tumen visardá le binendar. Oda pharipen sas le Devleske pre dzeka a oleha tumenge nič na kerďam nalačo.

¹⁰ Se te hin varekaske pharo, te hin oda le Devleskeri voľa, a visarel pes le binostar, zachrañinel les oda. Kajso pharipen na mušinas te bajinel. Ale te hin varekas o svetoskero pharipen, anel leske oda o meriben.

¹¹ Dikhen kaj tumen andá kada pharipen, so hin pal e Devleskeri voľa. Ča dikhen savi snaha the ochota! Savi dar, savi tužba a savi horľivost! Savi voľa te potrestinel oles, ko kerďa o nalačo! Aleha savoreha presikaďan, hoj san žuže andre kadi veca!

¹² A choc te tumenge pisindom, oda na sas vaš oda manuš, ko kerďa o nalačo; aňi na vaš oda, kaske sas kerdo o nalačhipen; ale vaš oda, hoj pes te sikavel anglo Del, sar čačes tumen amen kamen.

¹³ Olestar samas zoraľarde. A paš oda mek bareder radišagos amen sas le Titoskere radišagostar, bo leskero duchos sas tumendar savorendar zoraľardo.

¹⁴ Me man lašardom tumenca anglal leste a na ladžavas man vaš tumende. Amen tumenge furt vakerahas o čačipen a avke the amaro lašariben anglo Titus pes sikaďa sar čačipen.

¹⁵ Leskero jilo hino meksa pašeder ke tumende, sar peske leperel, sar les savore šunenav a sar les priiľan andre sentňi dar the pačiv.

¹⁶ Radisaľuvav, hoj tumenge šaj pačas andre savoreste.

† O Belial

O daros prekal o Jeruzalem

8 Kamas, phralale, hoj te džanen pal le Devleskero lačhipen (milost), so sas dino le khangerenge andre Macedonija.

2 Prekal o but pharipena sas probalimen avri (skušimen avri), ale lengero radišagos sas ajso baro, hoj choc te hine igen čore, the avke dine igen ščirones.

3 Čačas tumenge phenav, hoj korkore pestar dine ajci, keci šaj; a mek buter dine, sar sas hodne.

4 Igen amen mangenas vaš o lačhipen (milost), hoj the on te šaj pomožinen le pačabnaskere andre Judsko.

5 No, na kerde ča avke, sar lendar amen užarahas, ale ešeb (peršo) pes korkore oddine le Rajeske a palis the amenge, avke sar oda o Del kamel.

6 Vašoda manglām le Titus, hoj avke, sar chudlā tumenca te kerel kadi kamibnaskeri služba, avke la the te dokerel.

7 Avke sar san barvale andre savoreste – andro pačaben, andro lav the andro prindžaripen, andre oda, hoj igen kamen te del, the andro kamiben ke amende – aven barvale the andre kadi kamibnaskeri služba.

8 Na phenav oda sar rozkazis. Ale leperav, sar igen kamen te del avre džene, hoj te probalīnav avri, savo čačo hin tumaro kamiben.

9 Se prindžaren o lačhipen (milost) amare Rajeskero le Ježišoskero Kristoskero. Sas barvalo, ale prekal tumende ačhilā čoro, hoj tumen te barvalon prekal leskero čoripen.

10 Kadi hin miri rada tumenge: Oka berš tumen na ča diňan ešebne (perše), ale the ešeb kamenas oda te kerel.

11 No akana tumenge hin pre chasna oda te dokerel. Avke, sar oda kamenas te kerel, akana den olestar, so tumen hin.

12 Te kamen te del, le Devleske na džal pal oda, či tumen hin abo nane, ale pal oda, keci den olestar, so tumen hin.

13 Bo na džal pal oda, hoj avrenge te avel lokeder a tumenge phareder, ale hoj te el len avke sar the tumen.

14 Akana tumen hin buter a pomožinen lenge, bo len nane; a sar ela len buter, hoj on te pomožinen tumenge, te kampa.

15 Avke sar hin pisimen:

“Oleske, ko skidňa but, na ačhilā a oleske, ko frima, na chibalīnelas.”

O Titus le phralenca bičhade

16 Palīkeras le Devleske, hoj thođa le Titoske andro jilo kajso starišagos pal tumende.

17 Bo sar les mangahas, hoj te džal ke tumende, ov oda priiła. A na ča oda, ale korkoro kamelas igen te džal ke tumende.

18 Amen leha bičhadām the le phrales, saves lašaren andre savore khangerera vaš leskeri služba prekal o evaňjelium.

19 A na ča oda, ale o khangerera les kidle avri, hoj amenca te phirel andre kadi kamibnaskeri služba. Oda keras pre slava le Rajeske, hoj pes te sikavel, sar kamas te pomožinel.

20 Amenge džal pal oda, hoj ņiko amenge te na čhivel pro jakha oda, sar keras kale barvale daroha.

21 Bo kamas te kerel o lačo: Na ča anglo Raj, ale the anglo manuša.

22 A bičhadām lenca the avre phrales. Les buterval probalīndām avri a dikhlām, hoj hin igen horlivo. Ale akana mek buter kamel te pomožinel, bo hin les andre tumende baro pačaben.

23 A te džal pal o Titus: Ov kerel jekhetane manca andre odi služba maškar tumende; te džal pal okla phrala: On hine bičhade le khangerendar a anen e slava le Kristoske.

24 Vašoda lenge presikaven tumaro kamiben avke, hoj savore khangerera te džanen, soske pes tumenca lašarahas.

O daros prekal o phrala

9 Mange tumenge na kampil te pisinel pal e pomoca prekal le Devleskere manuša.

2 Se džanav pal tumende, sar oda kamen te kerel, a vašoda man tumenca šaj lašarav anglo Macedončana, hoj tumen – o phrala andral e Achaja – san imar okle beršestar pririchtimen. Oda, hoj tumen igen kamenas te del, podhazdňa but dženen.

3 Vašoda bičhadom le phralen, hoj te aven pririchtimen, sar tumenge oda phendom, a amaro lašariben tumenca andre kadi veca te na aven ča lava andro luftos.

4 Na kamav, hoj pes andre kadi veca te ladžas, sar manca avena o Macedončana a na arakhena tumen pririchtimen – bo sar tumen palis ladžana?

5 Vašoda dikhavas, hoj kampil igen te mangel le phralen, hoj te džan ke tumende anglal a te pririchtinen oda daros, so diňan lav, hoj dena. Te avel oda imar pririchtimen a te dičhol, hoj den ščirones a na vašoda, bo mušinen.

6 Oda hin avke: “Ko skupones sadzinel, skupones the kidela upre, a ko ščirones sadzinel, ščirones the kidela upre.”

7 Sako avke, sar peske phendā andro jilo, na avke, hoj musaj, abo hoj tut vareko andre oda ispidel, bo o Del kamel ole manušes, ko del radišagoha.

8 Bo le Devles hin zor te del tumen andre savoreste buter, sar tumenge kampil, avke hoj tumen furt ela savoro, so tumenge kampil pre dojekh lačhipen.

9 Avke sar hin pisimen: *“Rozčhivkerđa a diňa le čorenge, leskero spravodlišagos ačhel pro furt.”*

10 No, o Del hin oda, ko del o žužođiv (o zrnos) oles, ko sadzinel, a Ov del the o maro te chal. Dela a kerela

buter tumare semenostar a dela, hoj te barol tumaro čačipnaskero ulipen.

¹¹ Ov tumen barvalarela andre savoreste, hoj te aven ščire. A o manuša palikerena le Devleske vaš tumaro daros, so prilena amendar.

¹² Bo kadi sentni služba, so keras, na ča del le sentnen oda, so lenge chibalinel, ale the igen barol andre oda, hoj but manuša palikeren le Devleske.

¹³ Se oleha, hoj tumen andre kadi služba mištes presikaven, on lašaren le Devles. Bo tumen šunen le Kristoskero evaňjelium, podden tumen leske a ščirones tumen lenca the savorenca ulaven.

¹⁴ On pes vaš tumenge modlinen a igen tumen kamen, bo le Devleskero lačhipen (milost) upral tumende hin igen baro.

¹⁵ Palikeras le Devleske vaš leskero daros, so pes na del le lavenca te phenel avri!

O Pavol pal peskeri služba

10 Mangav tumen, me o Pavol, savo som "kovlejileskero", sar som tumenca, ale "zoralo" ke tumende, sar som tumendar dur! Mangav vaš o Kristus, savo hino lačo the kovlejileskero,

² hoj te na mušnav te el zoralo pre varesave džene tumendar, sar avava, so peske pal amende gondolinen, hoj keras avke sar o manuša andre kada svetos.

³ Bo choc dživas andro telos pre kada svetos, amen pes na maras avke sar o manuša andro svetos.

⁴ No amare zbraňi, savenca pes amen maras, nane le svetostar, ale hine le Devlestar, zorale te phagerel o pevnosti. Lenca phageras o nalačo gondolišagos

⁵ a savoro, so pes upre lidžal a hazdel pes upral le Devleskero prindžaripen. Ole zbraňenca phandas dojekh gondolišagos, hoj pes te podden le Kristoske.

⁶ A sam pririchtimen te potrestinel savoro našundipen, medik na šunena andre savoreste.

⁷ Tumen dikhen ča pre oda, so tumen hin anglo jakha. Te vareko tumendar pačal, hoj hino le Kristoskero, mi gondolinel pre oda, hoj avke, sar ov hino le Kristoskero, sam the amen.

⁸ Choc man but lašarava ola zoraha, so amen diňa o Raj, na avava andre ladž, bo odi autorita amenge sas diňi, hoj tumen te budinas a na te rozmaras.

⁹ Na kamav, hoj te dičhol avke, sar te tumen kamomas le lilenca te daravel avri.

¹⁰ Bo phenen: "Leskere lila hine zorale the phare, ale sar hino maškar amende, hino slabo a leskere lava ņikhaj ņič."

¹¹ Kajso manuš mi džanel, hoj oda, so pisinan andro lila, sar na sam tumenca, keraha the akor, sar avaha tumenca.

¹² No amen pes na opovažinas te prirovňinel abo te rachinel ke varesave džene, save pal peste but gondolinen a pes hazden upre. On oda keren sar bi e godi! Bo pes korkore peha merinen a korkore peha porovňinen.

¹³ No amen pes na lašaraha bi e mira buter, sar kampil. Lašaraha pes ča ola bučaha, so o Del amen diňa te kerel a tumen san kotor ola bučatar.

¹⁴ Amen pes na lašaras buter, sar kampil. Se dogelam dži ke tumende le Kristoskere evaňjelioha.

¹⁵ Nane mištes, hoj pes te lašaras avrengera bučaha, a avke na keras. Ale amen pačas, hoj sar barola tumaro pačaben, tumen amen lašarena furt buter vaš odi buči, so keras maškar tumende.

¹⁶ Palis šaj anaha o evaňjelium the avre phuvenge, so hine pal tumende, a na mušinaha pes te lašarel avreskera bučaha.

¹⁷ Ale avke sar hin pisimen: "*Oda, ko pes lašarel, mi lašarel pes le Rajeha.*"

¹⁸ Bo na oda, ko pes korkoro lašarel, hino lačo služobňikos, ale oda, kas o Raj lašarel.

O Pavol the o falošna apoštola

11 Šaj mek zlidžan man andre oda, hoj avava sikra nagodaŕer? Mangav tumen, hoj te zlidžan!

² Bo mange pal tumende igen džal, avke sar the le Devleske. Manglom tumen jekhe muršeha, le Kristoha, a dava tumen leske sar žuža, pačivala čha.

³ Ale darav man, hoj pes tumaro gondolišagos te na visarel het le čačipnastar the le žužipnastar ko Kristus, avke sar o beng cirdňa pro binos la Eva peskere klamišagoha.

⁴ Bo tumen šukares zlidžan te vareko avel ke tumende a zvestinel tumenge avre Ježiš, sar tumenge amen kazinahas, a prilen the avre duchos the aver evaňjelium sar oda, so priilan amendar.

⁵ Me mange gondolinav, hoj pal ola "bare" apoštola ņisoha na som palal.

⁶ Bo choc na som avrisikado andro vakeriben, andro prindžaripen som. Se amen tumenge oda savoro sikađam andre savoreste.

⁷ Či so, kerđom binos, hoj man korkoro tele dikhavas a tumen upre hazdavas, oleha, hoj bi o počiňiben tumenge vakeravas o evaňjelium le Devleskero?

⁸ Aver khangeras občoravas, bo lavas lendar o počiňiben, hoj tumenge te služinav.

⁹ The akor, sar somas ke tumende a chibalinelas mange vareso, na somas ņikaske pre meň. Se te mange vareso chibalinelas, pomožinenas mange o phrala, save avenas andral e Macedonija. Avke keravas, hoj tumen te na el manca ņisavo pharipen, a avke kamav dureder te kerel.

¹⁰ Avke sar hin o čačipen le Kristoskero andre mande: Kada miro lašariben ņiko našti ačhavela andre Achajakere phuva!

¹¹ Soske? Vaš oda, hoj tumen na kamav? O Del džanel, hoj tumen kamav.

¹² No oda, so kerav, kerava dureder, hoj te musarav o lašariben ole "apoštolenge", save kamen te sikavel, hoj hine ajse sar amen.

¹³ Bo on hine o falošna apoštola, klamišagoha keren buči a keren pestar apoštola le Kristoskere.

¹⁴ Na čudalinas pes, se korkoro o satan pes prekerel pro aňjelos le svetloskero!

¹⁵ Vašoda nane oda bari veca, te leskere služobňika keren pestar o služobňika le čačipnastar. Ale lengero koňec ela avke, sar peske zasogalinen (zaslužinen).

O cerpišagi le Pavloskere

¹⁶ Pale phenav: Ňiko peske pal ma te na gondolinel, hoj som nagoďaver. Ale te avke kerena, prilen man sar nagoďaverones, hoj man the me sikra te lašarav.

¹⁷ Oda, so phenav akana, na phenav le Rajestar, ale me man lašarav, sar o nagoďaver manuš.

¹⁸ Ale, te pes but džene lašaren avke, sar andro svetos, the me man avke lašarava,

¹⁹ bo te san ajse goďaver, ta radišagoha zlidžan le nagoďaveren!

²⁰ Se tumen zlidžan te tumendar vareko kerel otroken, te tumen vareko avri hasnalinel, te tumenca vareko thovel avri, te pes vareko hazdel upre prekal tumende a mek the oda, sar tumen vareko pal o muj demel.

²¹ Ladžaha phenav: Samas igen slaba oda te kerel tumenca! Te pes vareko šaj lašarel, the me man šaj lašarav. Phenav oda sar nagoďaver:

²² On hine Hebreja? The me som. Hine Izraeliti? The me som. Hine o potomki le Abrahamoskere? The me som.

²³ Hine o služobňika le Kristoskere? Phenav oda sar nagoďaver: Me meksa buter! Buter keravas buči sar on, buter somas andro berten, buterval man marde a buterval somas pašes paš o meriben.

²⁴ Le Židendar chudľom pandžvar le bičoha po tranda the eňa (39) rani,

²⁵ trival man marde la pacaha a jekhvar andre mande čivkerenas le barenca, hoj man te murdaren. Trival predžidľom oda, hoj e loďa rozpeľa a jekh džives the jekh rat somas andro paňi pro moros.

²⁶ Somas furt pro droma, somas andre dar pro paňa, andre dar le zbujňikendar the andre dar mire manušendar – le Židendar – a le Nažidendar. Somas andre dar andro foros, pre puštá, andro moros a the maškar o falošna phrala.

²⁷ Keravas phares buči a trapinavas man, buterval aňi na sovavas, somas bi o chaben the bi o paňi, but man poscinavas a somas andro šila the bi o gada.

²⁸ Mek paš oda savoro, aňi na phenav pal o starišagi, so man hin sako džives pal savore khangera.

²⁹ Te vareko hino slabo, the me som; te vareko perel andro binos, mange hin pharo.

³⁰ Te man mušinav te lašarel, me man lašarava mire slabišagoha.

³¹ O Del, o Dad le Ježišoskero Kristoskero – mi el požehňimen leskero nav pro furt – džanel, hoj na klaminav.

³² Sar somas andro foros Damaskus, o guverneris, savo sas tel o kralis Aretas, man kamľa te phandel andre a diňa te stražinel o brani le foroskere.

³³ Ale varesave manuša man mukle le košariha prekal e oblaka tele le muroha a denašľom leske andral o vasta.

Le Pavloskero videňje the leskero trňos

12 Mušinav man te lašarel, the te oda nane pre Ňisoste lačno. A phenava pal oda, so dikľom a so mange o Raj sikaďa.

² Prindžarav manušes andro Kristus, savo sas anglo dešuštar berš avricirdlo dži andro trito Ňebos. Na džanav, či oda sas andro ťelos vaj avri le ťelostar – o Del džanel.

³ A džanav, hoj oda manuš – či oda sas andro ťelos, vaj avri le ťelostar, me na džanav, o Del džanel –

⁴ sas avricirdlo andro rajos a šunďa ajse veci, so pes na den te prevakerel le lavenca, so našti o manuš phenel avri.

⁵ Kaleha man lašarava, no korkoro man na lašarava, ča mire slabišagenca.

⁶ Se choc te man kamľomas te lašarel, na ulomas nagoďaver, bo phenava ča o čačipen. Ale zľikerav man, hoj peske pal ma vareko te na gondolinel buter sar oda, so dikhel abo šunel mandar.

⁷ Ale vašoda, hoj man te na lidžav upre ole bare vecenca so dikľom, sas mange diňi o trňos andro ťelos – oda hin o poslos le satanoskero – hoj man te dukhavel, hoj man te na lidžav igen upre.

⁸ Vašoda trival man mangavas le Rajeske, hoj mandar oda te lel het.

⁹ Ale ov mange odphenda: “Dos tuke hin miro lačhipen (milost), bo miri zor pes presikavel andro slabišagos.” Vašoda man nekradeder lašarav mire slabišagenca, hoj te el andre mande e zor le Kristoskeri.

¹⁰ Vašoda radišagoha prilav oda, sar som slabo, sar mange keren ladž, sar som andro pharipen, sar pre mande džan a sar cerpinav vaš o Kristus. Bo sar som slabo, akor som zoralo.

O starišagos pal o Korintána

¹¹ Ačhilom nagoďaver, no tumen man ke oda li-gendčan. Se tumen man majindčan te lašarel; no choc me na som nič, andre Ňisoste na som cikneder ole “bare apoštolendar”.

¹² Se oda, hoj som apoštolos, dičholas maškar tumende akor, sar dživavas andro baro avrilikeriben a keravas o zazraki, znameňja the o zorale veci.

¹³ So keravas goreder maškar tumende sar andre okla khangera? Ča ipen ajci, hoj tumenge na somas pre meň. Mangav tumen, hoj mange te odmuken oda nalačhipen!

¹⁴ Akana som imar tritovar pririchtimen te džal ke tumende a na avava tumenge pre meň. Se me na rodav tumare veci, ale rodav tumen. Bo na o čhave mušinen te del o barvalipen le dajenge the le dadenge, ale on le čhavage.

¹⁵ Ale me radišagoha dava savoro, so man hin, a the man korkores, vaš tumare dživipena. Te me tumen kamav buter, tumen man kamena frimeder?

¹⁶ Se dikhen, me na somas tumenge pre meň. Ale vareko šaj phenel, hoj som godaver a thodom tumenca avri.

¹⁷ So? Či tumen viužindom avri varekaha olendar, saven ke tumende bičhadom?

¹⁸ Mangľom le Titus a bičhadom leha le phrales. Či o Titus tumen viužinda avri? Či na phirahas andre oda jekh duchos, ole jekhe dromeħa?

¹⁹ So? Calo časos tumenge gondolinen, hoj amen anglal tumende pes braňinas? Anglo Del andro Kristus phenas: Kada savoro, so keras, mire lačhe phralale, hin pre oda, hoj tumen te baron.

²⁰ Bo sar avava, darav man, hoj te na arakhav tumen ajsen, sar na kamav, a hoj aňi tumen man te na arakhen ajses, saves na kamen. Darav man, hoj tumen te na arakhav andre vika, andro hamišagos (žarľivost), andre choľi, andro vesekedišagi, andro pľetki, andro nalačhe vakeribena, andro baripen vaj andro nasmirom.

²¹ Bo sar avava pale ke tumende, na kamav man te ladžal anglo Del a na kamav te rovel upral ola but manuša, save kerde o bini, ale mek pes na visarde le nažuže vecendar, le lubipnastar the ole džungale vecendar, so kerde.

O posledna lava

13 Kada imar hin tritovar, so džav ke tumende. Hin pisimen: *"Dojekh lav ačhela pro duj abo trin švedki."*

² Phendom oda imar akor, sar somas dujtovar ke tumende. A akana – choc ode na som – pale phenav

olenge, save angloda kerde o bini, the savore okle dženge: Sar avava pale, na sajinava ňikas!

³ Se tumen kamen te dikhel či čačes prekal mande vakerel o Kristus, savo nane slabo ke tumende, ale hi-no zoralo maškar tumende.

⁴ Bo choc sas ukrižimen andro slabišagos, no dživel le Devleskera zoratar. Avke the amen sam slaba andre leste, ale leha dživaha prekal tumende le Devleskera zoraha.

⁵ Korkore tumen probalinen avri (skušinen avri), či dživen andro pačaben abo na; phučen oda korkore pestar. Či na prindžaren pre peste, hoj o Kristus dživel andre tumende? Te na, oda vašoda, bo na obačhilan andre proba (skuška).

⁶ Pačav, hoj džanena, hoj amen obačhilam.

⁷ Mangas pes ko Del, hoj te na keren nič nalačho. Na vašoda, hoj amen te dičhuvav lačhe, ale hoj tumen te keren o lačho, choc te amen na obačhilamas.

⁸ Se amen našti džas pro čačipen, ale ačas vaš o čačipen.

⁹ Radisaľuvav, sar sam slaba a tumen san zorale. Amen the vaš oda pes modľinas, hoj te dobaron.

¹⁰ Kada tumenge pisinav, sar mek na som tumenca, hoj te na mušinav te el prisno pre tumende, sar avava. Bo o Raj man na diňa autorita pre oda, hoj tumen te čhivav tele, ale hoj tumen te budinav.

¹¹ A mek kada, phralale: Radisaľon! Keren sa, hoj furt te baron; dolikeren oda, so tumenge phendom; gondolinen jekhetane a dživen andro smirom! A o Del le kamibnaskero the smiromskero ela tumenca.

¹² Pozdravinen jekh avres le sentne čumibnaha. Pozdravinen tumen savore phrala andro Del.

¹³ O lačhipen (milost) le Rajeskero le Ježišoskero Kristoskero, o kamiben le Devleskero the o jekhetaňiben le Sentne Duchoskero mi el tumenca savorenca!

GALAŤANENGE

O pozdravos

1 Me o Pavol, o apoštolos, savo nane bičhado le nipendar, aňi le manušestar, ale bičhado prekal o Ježiš Kristus the prekal o Del o Dad, savo les uštađa andral o meriben,

² the savore phrala, save hine manca, pisinās le khangerenge andre Galacija:

³ Mi del tumen o Del amaro Dad the o Raj o Ježiš Kristus o lačhipen (milost) the o smirom.

⁴ Ov pes diňa vaš amare bini, hoj amen te lel avri andral kada nalačo časos, andre savo dživas, bo avke oda kamelas o Dad amaro Del.

⁵ Leske mi džal e slava pro furt. Amen.

Aver evaňjelium nane

⁶ Čudalínāv man, hoj avke sig oddžan Olestar, ko tumen vičinda prekal o lačhipen (milost) le Kristoskero, a džan ke aver evaňjelium.

⁷ Nane aver evaňjelium, ale hine varesave džene, save tumen diliňaren andre, bo kamen te previsarel o evaňjelium le Kristoskero.

⁸ Ale te tumenge amen – abo o aňjelos andral o ňebos – vakerđamas aver evaňjelium sar oda, so tumenge imar vakerđam, mi el prekošlo!

⁹ Avke sar imar sigeder phendām the akana pale phenav: Te tumenge vareko vakerela aver evaňjelium sar oda, so imar priiľan, mi el prekošlo!

¹⁰ Me na kamav akana te vakerel oda, so kamen o manuša te šunel, ale oda, so o Del kamel. Abo kamav te el pre dzeka le manušenge? Bo te mek kamľomas te el pre dzeka le manušenge, ta imar na ulomas le Kristoskero služobňikos.

Sar priiľa o evaňjelium le Devlestar

¹¹ Kamav tumenge te phenel, phralale, hoj o evaňjelium, so tumenge vakeravas, nane le manušestar.

¹² Bo me o evaňjelium na priiľom le manušestar, aňi mange na sikađa o manuš, ale priiľom les prekal o Ježiš Kristus, savo mange oda sikađa.

¹³ Se tumen šundān pal miro dživipen, sar mek somas andre Židoviko pačaben. Šundān, sar džavas pre le Devleskeri khangeri a keravas sa pre oda, hoj la te rozmarav.

¹⁴ A andro Židoviko pačaben somas feder but Židenar, save sas andre mire berša, bo mange džalas buter pal o tradiciji amare dadengere.

¹⁵ Ale o Del peske man avri kidňa mek angloda, sar uliľom (pes narodzindom), a vičinda man peskere lačhipnaha (milostaha), akor sar kamľa

¹⁶ prekal mande te sikavel peskere Čhas a hoj pal leste te vakerav maškar o Nažidi. Akor na geľom ňikas-tar pal oda te phučel,

¹⁷ aňi na geľom andro Jeruzalem ko apoštola, save sas sigeder sar me, ale geľom andre Arabija a paloda avľom pale andro Damaskus.

¹⁸ Palis pal o trin berš geľom andro Jeruzalem, hoj te prindžarav le Kefas †, a ačhiľom ke leste dešupandž džives.

¹⁹⁻²⁰ Avre apoštolos na dikhľom, ča le Jakob, le Rajeskere phrales – o Del džanel, hoj oda, so tumenge pisinav, na klaminav.

²¹ Palis geľom andro phuva Sirija the Cilicija, ²² ale le Kristoskere khangeri andre Judsko man dži akor na dikhle a na prindžarenas.

²³ On ča šunde: “Oda, ko pre amende varekana džalas, akana kazinel pal o pačaben, so angloda kame-las te rozmarel.”

²⁴ A lašarenas vaš ma le Devles.

Le Pavol prilen andro Jeruzalem

2 Palis pal o dešuštar berš geľom le Barnabašiha pale andro Jeruzalem a iľom manca the le Titus.

² Geľom ode, bo o Del mange sikađa, hoj te džav. Sar man arakhľom korkoro le vodcenca, phendom lenge pal soste hin o evaňjelium, so kazinav maškar o Nažidi. Bo na kamavas te kerel hijaba miri buči, so kerđom a so mek kerav.

³ Ale aňi na ispidenas le Titus, savo sas manca, hoj pes te občhinel (obrezinel), choc hino Grekos.

⁴ Ča ola falošna phrala oda kamenas, bo amendar kamenas te kerel otroka. On pes sar špijona počoral ispidle andre, hoj te musaren amari sloboda, so amen hin andro Ježiš Kristus.

⁵ Amen lenge na pomukľam aňi sikra, aňi pes lenge na poddiňam, hoj o čačipen le evaňjelioskero te ačhel prekal tumende.

⁶ Ale ola, saven o manuša ľikerenas sar vodcen, paš oda evaňjelium nič buter na dothode – choc man andre oda nane nič, ko sas on, bo o Del peske na kidel avri le manušes pal o muj.

⁷ No, ale dine man čačipen, sar dikhle, hoj mange hin dino te kazinel o evaňjelium prekal o Nažidi, avke sar le Peteriske prekal o Židi.

† O Peter

⁸ Se oda, ko delas zor le Peter ke apoštoliko buči maškar o Židi, delas zor the man maškar o Nažidi.

⁹ Ola, save hine sar o slupi andre khangeri: O Jakob, o Peter † the o Jan sprindžarde o lačhipen (milost), so chudl'om le Devlestar. Avke podine mange the le Barnabašiske o čačo vast, hoj te keras jekhetane e buči: Amen maškar o Nažidi a on maškar o Židi.

¹⁰ Ča oda mangelas, hoj te na bisteras pro čore. Oda the me kamavas igen te kerel.

O Pavol pokarhinel le Peter

¹¹ Ale sar avla o Peter andre Antiochija, ačhadom man leske a phend'om leske andro jakha, bo namištes kerda.

¹² Bo mek sar ode na sas varesave džene le Jakobstar, chalas jekhetane le Nažidenca. Ale sar on avle, odcirdelas pes le Nažidendar, bo daralas pes olendar, save sikavenas pal o občhindipen (e obriezka).

¹³ The okla Židi kerenas avke, sar o Peter a mek le Barnabaš scirdle andre oda, hoj te avel dujemu-jengero.

¹⁴ Ale sar dikhl'om, hoj na džan rovnones pal o čačipen le evaňjelioskero, phend'om le Peteriske anglal savorende: "Se tu, savo sal Židos, džives sar o Nažidi a na sar o Židi. Soske kames, hoj o Nažidi te dživen avke sar o Židi?"

O Židi the o Nažidi spasimen le pačabnaha

¹⁵ Amen ulifam (pes narodzind'am) sar Židi a na sar o Nažidi.

¹⁶ Ale džanas, hoj pes o manuš našti ospravedl'inel oleha, hoj dolikerel o zakonos, ale ča prekal o pačaben andro Ježiš Kristus. The amen pačandil'am andro Ježiš Kristus, hoj te avas ospravedl'imen prekal o pačaben le Kristoskero a na oleha, hoj keras pal o zakonos. Bo le skutkendar andral o zakonos na ela ospravedl'imen nisavo manuš.

¹⁷ Te amen kamas te el ospravedl'imen andro Kristus a the avke dikhas, hoj sam binošna manuša, ta akor hin o Kristus služobnikos le binoskero? Šoha na!

¹⁸ Bo te oda, so čhid'om tele, pale ačhavava, sikavav, hoj som binošno manuš.

¹⁹ Bo me prekal o zakonos mu'om le zakonoske, hoj te dživav le Devleske. Som ukrižimen jekhetane le Kristoha

²⁰ a imar na dživav me, ale dživel andre ma o Kristus. A oda dživipen, so akana dživav andro telos, dživav pačabnaha andro Čhavo le Devleskero, savo peske man zakamla a diňa pes korkores vaš ma.

²¹ Na odčhivav mandar le Devleskero lačhipen (milost), bo te ulahas o manuš ospravedl'imen prekal o zakonos, akor o Kristus mu'la hijaba.

O zakonos vaj o pačaben

3 Ó, tumen nagod'aver Galat'ana! Ko tumen dil-iňard'a andre? Se avke žužes tumenge sas oda av-

riphendo, sar mu'la o Ježiš Kristus pro kerestos – avke sar te oda dikhl'anas tumare jakhenca!

² Ča oda tumendar kaml'omas te džanel: Či chudl'an le Devleskere Duchos, bo kerenas pal o zakonos? Abo vašoda, hoj šundan o evaňjelium a pačandil'an?

³ So, našadan e godi? Chudl'an te dživel le Duchoha, ale akana kamen te dokerel andre peskeri zor?

⁴ Kajci but precerpind'an hijaba? Ale oda čačas nane hijaba!

⁵ Se džanen, hoj o Del tumen del peskere Duchos a kerel maškar tumende o zazraki. Či oda kerel, bo dolik-eren o zakonos, abo vašoda, hoj šundan o evaňjelium a pačandil'an?

⁶ Dikhen pro Abraham: "*Pačandil'a le Devleske a rachinelas pes leske oda vaš o spravodlišagos.*"

⁷ Vašoda, džanen, hoj ola, save pačan, hine o čhave le Abrahamoskere.

⁸ Le Devleskero Lav džanelas imar anglal, hoj o Del pačabnaha ospravedl'inel le Nažiden, vašoda vakerda o evaňjelium angloda le Abrahamoske: "*Andre tu ena požehňimen savore narodi.*"

⁹ O Abraham pačandil'a a sas požehňimen; avke the savore, save pačan, hine požehňimen, sar sas ov.

¹⁰ Bo savore, save dživen pal o zakonos, hine tel o prekošiben. Bo hin pisimen: "*Prekošlo hin sako, ko na kerel savoro, so hin pisimen andro zakonos a na dolikerel oda.*"

¹¹ Kade dikhas, hoj anglo Del na ela ospravedl'imen nisavo manuš prekal o zakonos, bo "*o čačipnaskero manuš dživela le pačabnastar.*"

¹² Ale o zakonos nane le pačabnastar. Bo hin pisi-men: "*Ča oda, ko dolikerela o prikazaňja, dživela.*"

¹³ O Kristus amen cinda avri andral o prekošiben, so hin le zakonostar, bo ov korkoro ačhi'la prekošlo vaš amenge. Bo hin pisimen: "*Prekošlo hin sako, ko hino figimen pro kašt.*"

¹⁴ Vašoda, hoj le Abrahamoskero požehnaňje te avel prekal o Kristus pro Nažidi, a hoj te chudas le pačabnaha le Duchos, avke sar phenda o Del.

O zakonos the o lav, so diňa o Del

¹⁵ Phralale, phenava tumenge priklados: Te pes duj manuša pre varesoste dovakeren a keren e zmluva, ta ňiko imar oda našti čerinel, aňi našti ke oda vareso dothovel.

¹⁶ O Del diňa lav le Abraham the leskere potomkos. Na phenda "the leskere potomkenge ††," sar te vakerdahas pal o but džene, ale phenda pal jekh: "*The tire potomkos*"[‡], savo hin o Kristus.

¹⁷ Kamav oleha te phenel kada: O Del kerda le Abrahamoha zmluva a diňa les lav, hoj la dolikerela. O zakonos, so sas dino pal štar šel the tranda (430) berša, našti prephagel e zmluva the oda lav, so o Del diňa.

¹⁸ Bo te o dedictvos hin le zakonostar, na ulahas pal o lav, so diňa o Del. No diňa oda le Abrahamoske sar daros prekal peskero lav. ¹⁹ Akor pre soste sas o Zakonos? Sas dino prekal o aňjela the prekal le Mo-

† Abo: O Kefas

†† Grekengeri čhib: O semena ‡ Grekengeri čhib: O semenos

jžišoskero vast pre oda, hoj te sikavel o bini, medik na avela le Abrahamskero potomkos, pal savo o Del diña lav.

²⁰ Ale na kempel, hoj vareko te ačhel maškaral, te hin ča jekh dženo. A o Del hin jekh.

O otroka the o čhave

²¹ Ta akor, sar? Či o zakonos pes ačhavel pre le Devleskere lava, so diña? Na, šoha (ňikda) na! Bo te o manuša chudlehas ajso zakonos, so len šaj diňahas dživipen, ta akor sako, ko les dolikerđahas, ulahas ospravedlňimen.

²² Ale le Devleskero Lav phenel, hoj calo svetos hino tel e binoskeri zor; avke o daros, pal soste o Del diña lav, chudena ola, save pačan andro Ježiš Kristus – a ča prekal o pačaben.

²³ Ale angloda sar avľa o pačaben, o zakonos amen phandľa sar andre bertena, medik pes na sikada o pačaben.

²⁴ O zakonos sas sar oda, ko amen bararelas avri a avke amen lidžalas ko Kristus, hoj te avas ospravedlňimen prekal o pačaben.

²⁵ Ale kanastar avľa o pačaben, imar na kempel, hoj o zakonos amen buter te bararel avri,

²⁶ bo prekal o pačaben andro Ježiš Kristus san savore o čhave le Devleskere.

²⁷ Tumen savore, save san bolde andro Kristus, urđan pre tumende le Kristus.

²⁸ Imar akana nane aňi Židos, aňi Grekos; imar nane aňi otrokos abo slobodno; aňi murš vaj džuvli – bo tumen savore san jekh andro Ježiš Kristus.

²⁹ A te san le Kristoskere, akor san o potomki le Abrahamskere the o dđediča, a oda prekal o lav, so diña o Del.

4 Ale phenav: Medik hin o dđedičos terno, ņisoha nane aver le otrokostar, choc savoro hin leskero.

² Ov mek hino tel ola, save les lidžan a bararen avri, medik na avela oda džives, so diña leskero dad.

³ Avke the amen: Sar samas terne, samas otroka a služinahas ole duchenge, so lidžan kada svetos,

⁴ ale sar avľa oda časos, so majindā te avel, bičhađa o Del peskere Čhas, savo uliľa (pes narodzindā) la džuvľatar a dživelas tel o Židoviko zakonos,

⁵ hoj te cinel avri olen, save dživenas tel o zakonos, hoj te avas o čhave le Devleskere.

⁶ A vašoda, hoj san leskere čhave, bičhađa o Del le Duchos peskere Čhaskero andre amare jile – o Duchos, savo vičinel: "Abba, Dado!"

⁷ Akana imar na sal o otrokos, ale o čhavo; a te sal o čhavo, akor o Del tutar kerđa te o dđedičos.

O starišagos pal o Galašana

⁸ Ale akor, sar na prindžarenas le Devles, služinenas olenge, save nane čače devla.

⁹ No akana, sar prindžardan le Devles – abo sigeder phendomas, sar o Del prindžardā tumen – sar oda, hoj tumen pale visaren ke ola slaba the bazorakere veci, so

lidžan kada svetos? Soske lenge kamen pale te služinel sar otroka?

¹⁰ Soske pes pale likerem le dživesendar, le čhondenar, le časendar the le beršendar?

¹¹ Darav pal tumende, či na sas hijaba savori buči, so keravas prekal tumende.

¹² Mangav tumen phralale: Aven sar me, bo the me som sar tumen. ņisoha man na dukhadan.

¹³ Se tumen džanen, hoj sar tumenge ešebnovar (peršovar) vakeravas o evaňjelium, somas nasvalo.

¹⁴ Ale choc miro nasvaliben sas prekal tumende bari proba (skuška), na dikľan man tele a na odčhidan man. Priiľan man sar le Devleskere aňjelos – sar korkores le Ježiš Kristus.

¹⁵ So pes ačhiľa tumare radišagoha, so tumen sas? Bo phenav tumenge čačipen, te pes oda diňahas, ta the o jakha tumenge iľanas avri a diňanas len mange.

¹⁶ A so, akana som nalačo tumenge, bo phendom tumenge o čačipen?

¹⁷ Ola manuša tumen kamen te dochudel a sikaven, hoj lenge igen džal pal tumaro lačo. Ale on ča kamen tumen te odlel mandar, hoj te džan pal lende.

¹⁸ Hin mištes te tumenge furt džal pal o lačo, ale na ča akor, sar som tumenca.

¹⁹ Čhave mire, pale vaš tumenge igen cerpinav – sar o dukha paš o ločhiben – medik na avena ajse sar o Kristus.

²⁰ Akana kamľomas igen te el paš tumende, hoj tumenca te vakerav avres. Igen darav pal tumende.

E Sara the e Hagar

²¹ Phenen mange tumen, save kamen te dživel tel o zakonos: Na šunen, so vakerel o zakonos?

²² Bo hin pisimen, hoj le Abraham sas duj čhave – jekh la otrokiňatar a jekh la slobodnonatar, leskera romňatar.

²³ La otrokiňakero čhavo uliľa (pes narodzindā) le manušeskera volatar, ale la slobodna romňake o čhavo uliľa prekal o lav, so diña o Del.

²⁴ Oda, so pes ode ačhiľa, kempel te ačhalol sar podobnostvo. Kala duj džuvľija hine o duj zmluvi. Jekh zmluva hin pal o verchos Sinaj: Oda hin e Hagar, savake ulon o čhave andro otroctvo.

²⁵ Oj hiňi sar oda verchos Sinaj andre Arabija a oda verchos hin sar akanaskero foros Jeruzalem, so hino peskere čhavenca andro otroctvo.

²⁶ Ale o upruno Jeruzalem hin sar e slobodni, savi hiňi amari daj.

²⁷ Bo hin pisimen:

"Radisaľuv tu, savi tut naštĭ el čhave a naštĭ len anes pro svetos! Vriskin a vičĭn tu, savi na cerpines andro ulĭpnaskere dukha! Bo ola džuvľa, savi hiňi omukľĭ, ela buter čhave sar ola, sava hin rom."

²⁸ Ale phralale, tumen san čhave prekal o lav, so diña o Del, avke sar o Izak.

²⁹ Ale hin the akana avke sar akor, sar oda čhavo, savo uliľa (pes narodzindā) le telostar džalas pre oda, savo uliľa le Duchostar.

³⁰ Ale so phenel le Devleskero Lav?
"Trade avri la otrokiňa the lakere čhas, bo lakero čhavo na ela dedičos le čhaha", savo hino la slobodnatar.

³¹ Vašoda, phralale, amen na sam la otrokiňakere čhave, ale la slobodnakere.

E sloboda andro Kristus

5 O Kristus amen oslobodzinda, hoj te avas slobodne. Vašoda ačhen andre odi sloboda a ma visaren tumen pale andro otroctvo.

² Me, o Pavol, tumenge phenav, hoj te tumen dena te občhinel (obrezinel), akor tumenge o Kristus nane pre űisavi chasna.

³ Ale kamav te phenel dojekhe manušeske, ko pes del te občhinel, hoj mušinel te dolikerel calo zakonos.

⁴ Tumen, save kamen te el ospravedlűimen prekal o zakonos, imar na san le Kristoha. Peľan avri andral le Devleskero lačhipen (milost).

⁵ Ale amen pes mukas pre oda, hoj anglo Del avaha ospravedlűimen pačabnaha prekal o Duchos.

⁶ Bo te hin o manuš andro Ježiš Kristus, na džal pal oda, či hino občhindo (obrezimen), abo na. Džal pal o pačaben, so pes presikavel le kamibnaha.

⁷ Avke mištes denašenas! Ko tumen zaačhaďa, hoj te na šunen o čačipen?

⁸ Oda, ko tumen prevakerel, na sas Olestar, savo tumen vičinda.

⁹ *"Sikra droďdi anel upre calo chumer."*

¹⁰ Pačav andro Raj pal tumende, hoj tumen na gondolinena avres. Ale o Del marel a oles, ko tumen dilűarel andre, choc te ko oda ela.

¹¹ Phralale, te me mek vakerďomas, hoj pes kempel te občhinel (obrezinel), akor soske pre mande mek furt džan? Te oda ulahas čačo, ta akor o kerestos le Kristoskero imar lenge na andahas o rušiben.

¹² Ola manuša, save tumen upre maren, peske mi čhinen avri sa!

¹³ Ale phralale, tumen san vičimen pre oda, hoj te aven slobodne. No, ma len e sloboda prekal tumaro tēlos, hoj kerena oda, so kamen tumare žadosci, ale služinen jekh avreske andro kamiben.

¹⁴ Bo calo zakonos hin dokerdo andre jekh prikazaňje: *"Kameha avres avke, sar pes korkores!"*

¹⁵ Ale te jekh avres chan the danderen, den pozora, hoj te na aven jekh avrestar zachale!

O skutki le tēloskere

¹⁶ Ale phenav: Dživen pal o Duchos a na kerena o žadosci le tēloskere.

¹⁷ Bo o tēlos na kamel oda, so o Duchos, a o Duchos na kamel oda, so o tēlos.

¹⁸ Ale te tumen lidžal o Duchos, na san tel o zakonos.

¹⁹ O skutki le tēloskere igen dičhol a oda hin kala: Te kerel o lubipen, te kerel o nažužipen, te dživel bi e ladž,

²⁰ te služinel le modlenge, te čarinel, te džal jekh pre aver, te vesekedinel pes, te thovavel pes, te choľarel

pes, te marel upre jekh avres, te rozulavel pes, te roz-marel o khangera,

²¹ te zavidzinel, te murdarel, te mačol a te mulatinel. A mek hin but ajse veci. Pal kala veci tumenge imar anglal phenav, sar imar the sigeder phendom: Ola, save keren kala veci, na chudena le Devleskero kraliřagos.

O ovocje le Duchoskero

²² Ale o ovocje le Duchoskero hin o kamiben, o radiřagos, o smirom, o avriľikeriben, o lačhipen, o lačhejileskeriben, o pačivaliben,

²³ o kovlejileskeriben the o zľikeriben. Pre kala veci nane zakonos.

²⁴ Ola, save hine le Kristoskere, primarde pro kerestos peskere nalačhe binošne žadosci.

²⁵ Te dživas le Duchoha, mušinas the te phirel andro Duchos.

²⁶ Te na amenge džal pal oda, hoj amen o manuša te lašaren; te na pes jekh avres provokinas; te na zavidzinas jekh avreske.

Jekh avreske te pomožinas

6 Phralale, te varesave manušes arakhľanas paš oda, sar kerel varesavo binos, akor tumen, save san duchovne, pomožinen leske te avel andral oda avri, ale keren oda andre pokora. No, de pozora the pre peste, hoj the tu te na peres andro pokušeňje.

² Lidžan o pharipena jekh avreskere a oleha dolikere-na o zakonos le Kristoskero.

³ Bo te peske vareko gondolinel, hoj hino vareko a ov nane űiko, korkoro pes klaminel.

⁴ Sako mi dikhel pre peste, so kerel, a palis pes šaj lašarela korkoro andre peste, ale na anglal aver.

⁵ Bo sako lidžala peskero pharipen.

⁶ Oda manuš, savo sikľol o lav, mi del oles, ko les sikavel, savore lačhipnastar, so les hin.

⁷ Ma klaminen pes korkoren! Le Devlestar űiko na asala. Bo savoro, so o manuš sadzinel, oda the kidela upre.

⁸ Bo oda, ko sadzinel avke, hoj te el pre dzeka peskere tēloske, andral o tēlos kidela upre o kirňipen. Ale oda, ko sadzinel avke, hoj te el pre dzeka le Duchoske, andral o Duchos kidela upre o večno dživipen.

⁹ Choc te na birinas, ma preačas te kerel o lačhipen, bo avela jekhvar o časos, hoj kidaha upre o ulipen.

¹⁰ Vašoda, medik amen hin časos, keras o lačhipen savorengje a mek buter le phralenge the le pheňenge andro pačaben.

Te lašaras pes ča le Ježišoskere kerestoha

¹¹ Dikhen, save bare pismenena tumenge me mire vasteha pisinav!

¹² Ola, save kamen te el pre dzeka le manušenge, tumen ispiden, hoj tumen te den te občhinel (obrezinel),

ča vašoda, hoj pre lende te na džan vaš o kerestos le Kristoskero.

¹³ Bo aňi on, save hine občhinde (obrezimen), na dolikeren o zakonos. Ale kamen, hoj pes tumen te den te občhinel vašoda, hoj pes palis on te lašaren oleha, hoj kerde občhindipen (e obriezka) pre tumaro telos.

¹⁴ Ňisoha man na kamav te lašarel, ča le kerestoha, pre savo muľa amaro Raj o Ježiš Kristus. O svetos mange hin ole kerestoha ukrižimen a me som ukrižimen le svetoske.

¹⁵ Bo na džal pal oda, či hin o manuš občhindo abo nane, ale či hino nevo manuš.

¹⁶ A pre savorende, save pes kamen pal oda te likerel, mi avel o smirom the o lačhipen – a the pro Izrael le Devleskero.

¹⁷ A imar man dureder ňiko te na trapinel, bo me lidžav pre miro telos o jazvi le Kristoskere.

¹⁸ O lačhipen (milost) amare Rajeskero le Ježišoskero Kristoskero mi el tumare duchoha, phralale. Amen.

EFEŽANENGE

O pozdravos

1 Me o Pavol, o apoštolos le Ježišoskero Kristoskero le Devleskera voľatar, pisinav le Devleskere manuŝenge the olinge, save pačan andro foros Efezus.

² Mi del tumen o Del, amaro Dad, the o Raj o Ježiš Kristus, peskero lačhipen (milost) the peskero smirom!

Pal o duchovno požehnaňje andro Kristus

³ Lašarav le Devles le Dades amare Rajeskere le Ježišoskere Kristoskere, hoj andro Kristus amen požehnaňďa savore duchovne požehnaňjenca andral o ňebos.

⁴ Se mek sar aňi o svetos na sas kerdo, imar amen o Del avri kidňa prekal peste, hoj te avas andro Kristus sentna the bi e chiba a te dživas andro kamiben.

⁵ Ov oda avke kamelas a imar anglal oda kerďa, bo sas leske oda pre dzeka, hoj te avas leskere čhave prekal o Ježiš Kristus.

⁶ Aven lašaras le Devles vaš leskero baro šukar lačhipen (milost), so amen diňa hijaba andre peskero Čhavo, saves kamel.

⁷ Andre leste sam avricinde, prekal leskero rat amenge hin odmukle o bini. Igen baro hin le Devleskero lačhipen (milost),

⁸ so amen avke barvales diňa! Andre savoro peskero godaveripen the prindžaripen

⁹ amenge diňa o Del te džanel o garuďipen. Oda, so ov kamelas a so leske sas pre dzeka, the oda, so peske imar anglal phendă, hoj kerela prekal o Kristus.

¹⁰ Oda, so kamel o Del te kerel, hin, hoj sar avela oda lačo časos, kamel te sthovel sa jekhetane andro Kristus sar andro šero savoro, so hin pro ňebos the pre phuv.

¹¹ Andre leste ačhiľam the o dďediča, avke sar oda o Del imar anglal kamľa. Bo ov kerel sa avke, sar oda ov kamel,

¹² hoj te avas pro lašariben leskera slavake; amen, save imar sigeder pes mukahas pro Kristus.

¹³ The tumen, sar andre leste pačandilľan, sanas zapečatimen ole Sentne Duchoha, pal savo o Del diňa lav, hoj dela. Oda sas akor, sar šundľan o lav le čačipnaskero, o evaňjelium pal tumari zachrana.

¹⁴ O Sentno Duchos hino e zaruka prekal amende, hoj o Del amen dela oda, so phendă. Diňa lav, hoj cinela peskere manuŝen avri. Aven lašaras leskeri slava!

Le Pavloskeri modľitba

¹⁵ Vašoda the me, sar šundľom pal tumaro pačaben andro Ježiš, amaro Raj, the pal o kamiben, so tumen hin ke savore sentne,

¹⁶ na preačhav vaš tumenge te palikerel le Devleske. Leperav tumen andre mire modľitbi,

¹⁷ hoj o Del amare Rajeskero le Ježišoskero Kristoskero, o Dad la slavakero, tumen te del peskero Duchos. Bo o Duchos tumendar kerela godaveren a sikavela tumenge le Devles avke, hoj les prindžarena.

¹⁸ Mangav, hoj tumare jile te en phundrade te dikhel leskero svetlos, avke hoj te prindžaren o užaripen (naďej), andre savo ov tumen vičindă, a savo slavno the barvalo hin o dďedictvos, so phendă, hoj dela peskere manuŝenge.

¹⁹ Kamav, hoj te prindžaren, savi igen bari hiňi odi zor, so kerel andre amende, save pačas. Oda hin ipen odi bari zor le Devleskeri,

²⁰ savaha uštaďa le Kristus andral o meriben a thoďa les te bešel pal peskeri čači (pravo) sera andro ňebos.

²¹ Ov hino upral savorende pro ňebos; upral dojekh vladaris, autorita, zor, the rajipen; a mek upral dojekh nav, so hin na ča andre kada svetos, ale the andre oda svetos, so avela.

²² O Del thoďa le Kristoske savoro tel o pindre a diňa les šereske upral savoreste la khangerake.

²³ E khangeri hiňi leskero tľelos; hiňi pherardľi lestar, savo pherarel savoro andre savoreste.

Andral o meriben andro dživipen

2 The tumen sanas varekana mule, bo na šunenas le Devles a kerenas bini.

² Akor dživenas avke, sar pes dživel andro svetos a šunenas le benges, savo hino raj upral o nalače duchengere zora andro luftos, so akana kerel andre ola manuša, save na šunen le Devles.

³ The amen savore varekana lenca dživahas andro žadosci le tľeloskere a kerahas oda, so kamelas amaro tľelos the amari godľi. A oleha, hoj samas ajse sar savore okla manuša, majindľam tiš te cerpinel le Devleskeri cholľi.

⁴ Ale o Del hino ajso barvalo andre peskero lačhipen the baro andro kamiben ke amende,

⁵ hoj amen obdžidardďa le Kristoha, medik samas mule andre peskere bini. Le Devleskere lačhipnastar (milostatar) san zachraňimen!

⁶ Andro Ježiš Kristus o Del amen jekhetane leha uš-tađa andral o meriben, hoj leha jekhetane te bešas andro űebos.

⁷ Ov kerđa oda, hoj peskere lačhipnaha (milostaha) andro Ježiš Kristus amenge te sikavel peskero igen baro kamiben andre oda časos, so avela.

⁸ Bo le Devleskere lačhipnastar (milostatar) san zachrañimen prekal o pačaben. No oda nane tumendar, ale le Devlestar – oda hin leskero daros.

⁹ Na san zachrañimen le skutkendar, hoj pes űiko te na lašarel.

¹⁰ Se vašoda amen o Del stvorindā andro Ježiš Kristus, hoj te keras ola lačhe veci, so o Del imar anglal pririchtindā prekal amende.

Jekh andro Kristus

¹¹ Vašoda ma bisteren, hoj tumen varekana uliñan (pes narodzindān) sar o pohana a o űidi, save peske phenen "občhinde" (obrezimen), tumen vičinen "naobčhinde" a thoven baripen andre oda, so pes kerel le manuškere vastenca pro űelos.

¹² Ma bisteren, hoj andre oda časos sanas bi o Kristus, na sanas jekhetane le Izraeloskere manušenca a na sas tumen kotor andre le Devleskere zmluvi the lava, so phendā, hoj dela. Sanas andre kada svetos bi o užaripen (nađej) a dživenas bi o Del.

¹³ Tumen, save sanas varekana dur, san akana jekhetane le Ježišoha Kristoha pašes paš o Del prekal o Kristoskero rat.

¹⁴ Bo ča ov hino amaro smirom a sodujen le űiden the le Nažiden sthoda andre jekh. Čhida tele peskere űeloha oda muros, so len rozulavelas sar űeprijatēfen.

¹⁵ A zrušindā o űidoviko zakonos, so phenel, so mušinas a na mušinas te kerel, hoj andre peste te kerel ole dujendar jekhe neve manušes a avke te anel o smirom.

¹⁶ Prekal o kerestos andre jekh űelos sthoda sodujen le Devleha a aleha zñičindā oda, hoj naštī pes avri ačhenas.

¹⁷ A sar avļa, kazinelas o smirom tumenge le Nažidenge, save sanas dur le Devlestar, a o smirom the amenge le űidenge, save samas pašes.

¹⁸ Bo prekal leste šaj avas sodujdžene andre jekh Duchos ko Dad.

¹⁹ Avke akana imar na san sar cudzinci, abo sar ola, save bešen andre aver phuv, ale san ade khere jekhetane le sentne manušenca andre jekh famelija le Devleskeri.

²⁰ San sar kher, so hin ačhado pro zaklados le apoštolengero the le prorokengero, kaj hin o glavno bar korkoro o Ježiš Kristus.

²¹ Ov likerel cali stavba jekhetane a kerel, hoj te ačhel sentno chramos prekal o Raj.

²² Prekal leste the tumen, o Nažidi, san jekhetane upreačhade sar oda chramos, kaj o Del bešel prekal o Duchos.

Le Pavloskeri buči maškar o Nažidi

3 Vašoda som me, o Pavol, andre bertena, bo služnav le Ježišoske Kristoske vaš tumenge, save na san űidi.

² Se šundān pal oda, hoj o Del andre peskero lačhipen (milost) mange diña kadi služba, hoj la te kerav prekal tumende.

³ O Del mange sikađa, hoj te džanav leskero garudīpen, pal savo sikra pisindom.

⁴ Sar oda pregenena, šaj sprindžarena, sar me ačaluavav o garudīpen le Kristoskero.

⁵ Varekana oda na sas le manušenge dino te džanel, ale akana prekal o Duchos o Del diña te džanel peskere sentne apoštolenge the le prorokenge oda,

⁶ hoj the o Nažidi hine prekal o evaűjelium jekhetane le űidenca dēdiča a kotora andre jekh űelos a the prekal lende hine o lava, so diña o Del andro Kristus.

⁷ Me ačhiñom o služobñikos ole evaűjelioske prekal le Devleskero daros – leskero lačhipen – so zoraes kerel andre ma.

⁸ Mange, savo som nekcikneder maškar o phrala andro pačaben, sas dino kada lačhipen (milost), hoj le Nažidenge te vakerav o evaűjelium pal le Kristoskero barvalīpen, so pes na del te merinel,

⁹ a savorengenge te otkerav oda planos, so sas garudo čirlastar paš o Del, savo kerđa savoro.

¹⁰ O Del kamel, hoj pes akana prekal e khangeri te dodžanel dojekh űeboskeri zor the rajipen, savi bari hin le Devleskeri godī andre savoreste.

¹¹ Ov oda imar ešebnovarestar naplañindā, hoj pes te ačhel prekal amaro Raj Ježiš Kristus,

¹² hoj pačabnaha andro Kristus šaj avas slobodne the bi e dar anglo Del.

¹³ Vašoda tumen mangav, hoj tumen te na zaačhavel miro pharipen vaš tumenge, bo oda hin prekal tumaro lašariben.

O kamiben le Kristoskero

¹⁴ Vašoda mangav pro khoča le Dades,

¹⁵ savestar hin savore famelijen andro űebos the pre phuv peskere nava,

¹⁶ hoj prekal o Duchos tumenge andral peskeri barvalī slava te del igen te zorañol pro andruno manuš;

¹⁷ mangav les, hoj o Kristus prekal o pačaben te dživ-el andre tumare jile, hoj te aven zakoreñimen the zoraes zathode andro kamiben,

¹⁸ hoj te šaj ačhañon tumen – the savore le Devleskere manuša – savo hino buchlo, the džindardo, the učo, the igen baro o kamiben le Kristoskero;

¹⁹ a mangav, hoj te prindžaren oda kamiben le Kristoskero, so hin upral dojekh godī, hoj te aven pherarde andre savoro pherdīpen le Devleskero.

²⁰⁻²¹ Akana mi džal pal savore pokoleñja pro furt e slava andre khangeri the andro Kristus Ježiš le Devleske, ko peskera zoraha kerel andre amende a ko mek buter

šaj kerel savoro upral oda, sar lestar mangas the gondolinas! Amen.

Pal o jekhetañiben andre khangeri

4 Vašoda tumen mangav me, o bertenošis prekal o Raj, hoj te dživen mištes oda dživipen, andre savo san vičimen le Devlestar.

² Aven pokorna a kovlejleskere andre savoreste a avrilikeribnaha zlidžan jekh avres andro kamiben.

³ Keren sa prekal oda, hoj te dolikeren o jekhetañiben le Duchoskero, so tumen sphandel jekhetane andro smirom.

⁴ Hin jekh tělos a jekh Duchos, avke sar the sanas vičimen andre jekh užaripen (nađej) le Devlestar;

⁵ hin jekh Raj, jekh pačaben, jekh bolipen,

⁶ a hin jekh Del the Dad savorengi, savo hino upral sakoneste, prekal sakoneste a andre sakoneste.

⁷ Ale sakoneske amendar sas dino o daros le Devleskere lačhipnastar (milostatar) pal oda, keci amenge o Kristus merinđa avri.

⁸ Avke sar hin pisimen:

"Geľa upre pro nekučeder thana, iľa peha le zaphandlen; diňa le manušen o dari."

⁹ Akana, so hin oda, hoj "geľa upre"? Oda hin, hoj ešeb (peršo) geľa tele andro nekteluneder thana la phuvake.

¹⁰ Oda, ko avľa tele, hin oda jekh, savo geľa the upre upral savore ňebi, hoj te pherarel savoro.

¹¹ Ov ačhađa jekhen sar apoštolen, avren sar proroken, avren sar evaňjelisten, avren sar pastoren a avren sar učiteljen.

¹² Ačhađa len pre oda, hoj te pririchtinen le sentnen te kerel e služba, hoj te budinen le Kristoskero tělos,

¹³ medik na avaha savore jekhetane avriбарarde andre jekh pačaben the andro prindžaripen le Devleskere Čhaske a medik na avaha dospele manuša andro pačaben the andre savoreste sar o Kristus,

¹⁴ Avke imar na avaha buter sar čhavore, savenca upre tele čhivkerel sar le vlnenca dojekh balvaj: Oda hin dojekh nevo sikaviben le manušendar, save le klamišagoha lidžan avren pro nalačho drom, hoj te peren.

¹⁵ Vašoda vakeras o čačipen andro kamiben, hoj te baruvas a te avas andre savoreste sar o Kristus, bo ov hin o šero.

¹⁶ Ov sthovel savore kotora andro tělos a likerel calo tělos jekhetane. A kerel, hoj dojekh kotor te kerel e buči avke, sar kempel, hoj o tělos te barol a te zoraľol andro kamiben.

O purano the o nevo dživipen

¹⁷ Mangav tumen andro nav le Rajeskero: Imar ma dživen avke sar o bijedevleskere manuša, bo oda, so on gondolinen, nane lačho pre ňisoste

¹⁸ a lengere godľa hin andro kalipen. Na prindžaren le Devleskero dživipen, bo na achalon ňisoske a lengere jile hine barune.

¹⁹ Imar pes aňi na ladžan ňisostar, keren savoro džungipen a na džanen kana te preačhel.

²⁰ Ale tumen pal o Kristus avke na sikľiljan!

²¹ Te šundjan pal o Ježiš a sikľiljan o čačipen, so hin andre leste,

²² čhiven pal tumende tele le purane manušes leskere phurikane dživipnaha, savo pes korkoro musarelas le falošne the nalačhe žadoscenca.

²³ Domuken le Duchoske te čerinel tumaro gondoljšagos

²⁴ a uren pre tumende le neve manušes, hoj te el avke sar o Del andro spravodľišagos the andro sentno čačipen.

Sar te dživel andro nevo dživipen

²⁵ Savore sam jekhetane andre jekh tělos, vašoda preačhen te klaminel a chuden te vakereľ o čačipen jekh avreha.

²⁶ Te tumen ela cholĭ, ma keren binos a o kham te na zadžal upral tumari cholĭ.

²⁷ Ma den le benges ňisavo than!

²⁸ Oda, ko čoreľ, imar buter te na čoreľ, ale mi chudel te kerel buči peskere vastenca, hoj les te el so te del olen, kas nane.

²⁹ ňisavo džungalo lav te na avel avri andral tumaro muj, ale ča lačho lav, so zoraľarel avren avke, sar kampil a anel o lačhipen (milost) olenge, save šunen.

³⁰ Ma dukhaven le Sentne Duchos, saveha sanas zapečatimen pre oda Džives, sar avena zachraňimen.

³¹ Preačhen te likerel e kirko cholĭ andro jilo, te rušel, te vesekedinel pes a te kerel vika, o košiben the savoro, so hin nalačho.

³² Ale aven jekh ke aver lačhe a kovlejleskere – a odmuken jekh avreske avke, sar the o Del andro Kristus odmukľa tumenge.

Te dživel andro svetlos

5 O Del tumen kamel, bo san leskere čhave, vašoda dživen avke, hoj te aven ajse sar Ov.

² Dživen andro kamiben avke sar o Kristus amen kamelas a diňa pes korkores sar daros the sar obeta, so šukares voňinelas a hin pre dzeka le Devleske.

³ Avke sar kampil te el maškar o čhave le Devleskere, te na pes aňi leperel maškar tumende o lubipen, vaj o džungale veci, abo hoj vareko ela hamišno.

⁴ Ma vakeren džungale, diline, abo nalačhe lava, ale radeder palikeren le Devleske.

⁵ Bo mištes džanen, hoj ňisave manušes, ko kerel o lubipen, vaj o džungale veci, abo hino igen hamišno – bo o hamišagos hin sar modloslužba – nane ňisavo than andro kraljšagos le Kristoskero the le Devleskero.

⁶ Ma domuken, hoj tumenca vareko te thovel avri varesave diline lavenca, bo ipen vaš oda avel e cholĭ le Devleskeri pre ola manuša, save les na šunen.

⁷ Te na chal tumen nič kajse manušenca!

⁸ Bo varekana sanas andro kalipen, ale akana san o svetlos, bo san le Rajeskere. Dživen sar o manuša, save hine andro svetlos.

⁹ Se o ovocje le svetloskero hin savoro lačhipen, spravodlišagos the čačipen.

¹⁰ Roden, so hin le Devleske pre dzeka.

¹¹ Ma keren lenca ola veci, so pes kerel andro kalipen a nane lače pre nisoste, ale radeder anen ajse veci avri pro svetlos.

¹² Bo hin ladž ča te vakerel pal oda, so on počoral keren,

¹³ ale andro svetlos dičhola, save ola veci čačes hine.

¹⁴ Bo andro svetlos sa dičhola avri. Vašoda hin phen-do: "Preker tut, ko soves, ušti andral o meriben a švicinela tuke o Kristus."

¹⁵ Vašoda den tumenge baro pozoris pre oda, so keren – na sar o nagodaver, ale sar o godaver.

¹⁶ Kala dživesa nane lače, vašoda viuzinen dojekh ora pre oda, hoj te keren o lačo.

¹⁷ Ma aven nagodaver, ale achal'on, so tumendar o Raj kamel.

¹⁸ Ma mač'on la moľatar, bo o pijiben tumenge ča musarela o dživipen, ale pheraren tumen le Sentne Duchoha.

¹⁹ Vakeren jekh avreha le žalmenca, le chvalenca the le duchovne giľenca a andral o jilo giľaven the lašaren le Rajes.

²⁰ Vaš savoreske palikeren furt le Devleske le Dadeske andro nav amare Rajeskero Ježišoskero Kristoskero.

Pal o veradune

²¹ Podden tumen jekh avreske, hoj oleha te den pačiv le Kristus.

²² O džuvľa pes mi podden peskere romenge sar le Rajeske.

²³ Bo o murš hin o šero la džuvľake, avke sar hin o Kristus o šero la khangerake, peskere teloske, saveske hin o Spasitelis.

²⁴ Avke, sar pes e khangeri poddel le Kristoske andre savoreste, pes mi podden the o džuvľa peskere romenge.

²⁵ Tumen muršale, kamen le romňijen avke, sar the o Kristus kamelas peskera khangeri a diňa vaš lake pes korkores,

²⁶ hoj la te sentňarel a te žužarel andro paňi prekal o lav.

²⁷ Kamel te ačhavel la khangeri anglal peste andro šukariben a kamel, hoj te avel žuži a sentno, bi e chiba, bi o vraski the bijal aver nalačhipen.

²⁸ Avke kamlehas te kamel the o murša peskere romňijen sar pes korkoren. Ko kamel peskera romňa, korkoro pes kamel.

²⁹ Bo mek šoha (ňikda) ňiko na sas ajso, hoj te našti avri ačhilahas peskero telos. Ale sako les likerel a starinel pes pal leste avke sar the o Raj pal e khangeri,

³⁰ bo amen sam leskere teloskere kotora.

³¹ Avke sar hin pisimen:

"Vašoda omukela o murš peskera da the le dades, ela jekhetane la romňaha a sodujžene ena jekh."

³² Kada garudipen hin baro a me achaluvav, hoj oda vakerel pal o Kristus the pal e khangeri.

³³ Ale avke the tumen: Sako tumendar mi kamel peskera romňa avke sar pes korkores a e romňi mi del pačiv peskere romes.

Pal o čhave the dada

6 Čhavorale, tumen san le Rajeskere, vašoda šunen tumare dajen the tumare daden, bo oda hin mištes.

² "De pačiv tira da the le dades," – kada hin ešebno prikazaňje, paš savo o Del amen diňa lav:

³ "Hoj tuke te el mištes a but te džives pre phuv."

⁴ Tumen, dadale, ma choľaren tumare čhaven, ale bararen len mištes avri oleha, hoj lenge dovakeren a sikaven pal o Raj.

Pal o raja the otroka

⁵ Otrokale, šunen tumare phuvakere rajen žuže jilestar sar le Kristus, daraha the andro izdraňipen.

⁶ Ma služinen lenge ča anglo jakha sar ola, save kamen te avel pre dzeka le manušenge, ale sar le Kristoskere otroka, save keren jilestar oda, so hin le Devleske pre dzeka.

⁷ Služinen radišagoha sar le Rajeske, a na le manušenge.

⁸ Se džanen, hoj sako, ko kerela vareso lačo, chudela o počičiben le Rajestar, či hino otrokos abo slobodno.

⁹ Tumen, save san lengere raja, keren lenca tiš avke. Ma daraven len avri, bo džanen, hoj hin tumen jekh Raj lenca andro ňebos a ov na dikhel le manušeske pro muj.

E vizbroj le Devleskeri

¹⁰ A pro agor phralale, aven zorale andro Raj the andre leskeri zor.

¹¹ Uren pre tumende cali vizbroj le Devleskeri, hoj te šaj obačhen andro nalače plani le bengeskere.

¹² Bo amen pes na maras le manušenca, ale le duchovne zorenca, le uprune rajenca, save lidžan kada kalo svetos a le nalače duchenca andro luftos.

¹³ Vašoda uren pre tumende cali vizbroj le Devleskeri, hoj te obačhena andre oda nalačo džives a sar imar ňerinde (zvitazinde) upral sa, hoj mek te ačhen.

¹⁴ Vašoda ačhen! Prephanden tumenge pašal o klubi o čačipen sar o sirimos; uren pre tumende o spravodlišagos sar o trastuno pancjeris

¹⁵ a sar pro pindre uren o sandalki, hoj te džan varekaj, avke aven pririchtimen te džal te kazinel o smiromoskero evaňjelium.

¹⁶ A mek ke oda, len o pačaben sar o štitos, saveha šaj murdaren andre savore jagale šipi le nalačhestar.

¹⁷ Len o spaseňje sar e prilba pre tumare šere the e šabl'a le Duchoskeri, so hin o Lav le Devleskero.

¹⁸ Savoro keren prekal e modlitba a modlġinen tumen furt andro Duchos. Vašoda furt merkinen a modlġinen tumen vaš savore Devleskere manuša.

¹⁹ Modlġinen tumen the vaš ma, hoj mange te el dino o lav, sar prevakerava, hoj te vakerav bi e dar o garuđipen le evaňjelioskero.

²⁰ Me somas bičhado les te vakerel, a vašoda som akana andre bertena. Mangen tumen vaš ma, hoj bi e dar te vakerav o lav avke, sar mušinav.

O pozdravi

²¹ O Tichikus, amaro lačho phral the o pačivalo služobňikos andro Raj, dela tumenge te džanel, sar manca hin a so kerav.

²² Me les bičhado ke tumende, hoj te džanen pal amende a te anel tumenge o radišagos andro jile.

²³ O Del o Dad the o Ježiš Kristus, amaro Raj, mi del le phralen o smirom, o kamiben the o pačaben.

²⁴ Le Devleskero lačhipen (milost) mi el savorenca, save kamen amare Rajes le Ježiš Kristus le kamibnaha, so šoha na preačhel.

FILIPANENGE

O pozdravi

1 O Pavol the o Timoteus, o sluhi le Ježišoskere Kristoskere, pisinas savore sentnenge andro Ježiš Kristus, save hine andro foros Filipi, the le vodcenge upral o zbori the le dijakonenge.

² O lačhipen (milost) tumenge the o smirom le Devlestar, amare DadeStar, the le Rajestar le Ježišostar Kristostar.

Le Pavloskeri modlitba

³ Palikerav mire Devleske, kecivar mange ča pre tumende leperav;

⁴ andre dojekh miri modlitba man modlinav furt radišagoha vaš tumenge savorenge,

⁵ bo pomožinenas mange andre le evaňjelioskeri služba ešebne (perše) dživesestar dži akana.

⁶ Vašoda pačav, hoj o Del dokerela e lači buči, so andre tumende chudla te kerel, dži andre oda džives, sar o Ježiš Kristus avela pale.

⁷ Me mange oda šaj gondolinav pal tumende savorende. Se san mange andro jilo, bo tumen savoren hin kotor manca pre le Devleskero lačhipen (milost), či som akana andre bertena, vaj akor, sar brañinahas a zoraľarahas o evaňjelium.

⁸ O Del hino švedkos, sar mange hin pharo vaš tumenge savorenge le Ježišoskere Kristoskere kamibnahas.

⁹ A modlinav man vaš oda, hoj tumaro kamiben te barol buter a buter, hoj te prindžaren o čačipen a mištes te ačalon

¹⁰ a te džanen mištes te rozsudzinel, so hin nekfeder. Modlinav man, hoj te aven žuže the bi o binos andre le Kristoskero Džives

¹¹ a hoj te presikaven o dživipen, so hin pherardo le čačipnaha, so avel prekal o Ježiš Kristus – pre slava the pro lašariben le Devleskero.

Pal o Pavol andre bertena

¹² Phralale, kamav, hoj te džanen, hoj oda, so pes mange ačhiľa, pomožinda le evaňjelioske.

¹³ Savore slugađa andro palacis the savore aver džene pes dodžanle, hoj som phandlo andre vaš o Kristus.

¹⁴ Oda, hoj som andre bertena, zoraľarda but phralen andro Raj, hoj mek zoraleder a bi e dar te vakeren o Lav.

¹⁵ No varesave phrala kazinen pal o Kristus, bo hin len zavist' a ispiden pes anglal, ale aver džene kazinen pal o Kristus lače jilestar.

¹⁶ On oda keren kamibnastar, bo džanen, hoj kade som vašoda, hoj brañinav o evaňjelium,

¹⁷ no aver džene kazinen pal o Kristus, bo kamen pes te ispiden anglal a na keren oda žužes, bo peske gondolinen, hoj mange kerena buter pharipen andre bertena.

¹⁸ Ale so paloda? Či imar pes kazinel kavke abo kavke – či kamukeri vaj andro čačipen – pal o Kristus pes kazinel. Oleske radisaľuvav a mek radisaľuvava,

¹⁹ bo džanav, hoj oda hin mange prekal o spaseňje prekal tumare modlitbi the prekal e pomoca le Duchoskeri le Ježišoskero Kristoskero.

²⁰ Igen pre oda užarav a mukav man pre oda, hoj man andre ñisoste na ladžava. Pačav, hoj leske služina bi e dar, hoj o Kristus ela barardo andre miro telos avke, sar furt the akana – či imar dživava, vaj mera-va.

O dživipen hin o Kristus

²¹ Bo mange o dživipen hin o Kristus a te merel hin pre chasna.

²² Ale te dživava andro telos, oda ela pre chasna la bučake, vašoda na džanav te phenel, so mange kidňomas avri.

²³ Čirdel man pro soduj seri: Kamav te merel a te avel le Kristoha, bo ada mange uľahas nekfeder;

²⁴ ale prekal tumenge hin feder, hoj te ačhav andro telos.

²⁵ Aleske pačav a džanav, hoj ačhava a avava tumenca savorenca pre tumaro lačo the radišagos andro pačaben.

²⁶ Avke tumen mek buter šaj lašarena manca andro Ježiš Kristus, sar avava pale ke tumende.

Te ačhen zoraľes a jekhetane

²⁷ Ča dživen avke, sar oda tumenge phenel le Kristoskero evaňjelium. Či imar avava a dikhava tumen, vaj na avava, kamav te šunel pal tumende, hoj ačhen zoraľes andre jekh duchos a jekhetane pes maren vaš o pačaben le evaňjelioskero.

²⁸ Ma daran olendar, save pre tumende džan! Kada ela znameňje, hoj on ena zničimen a hoj tumen avena zachraňimen le Devlestar.

²⁹ Bo tumenge hin dino le Devleskere lačhipnastar (milostáatar), hoj na ča te pačan andro Kristus, ale hoj tiš te cerpinen vaš leske.

³⁰ Se the tumen san andre ajso mariben, sar dikhlan paš ma a pal savo the akana šunen, hoj man marav.

2 Te san zorale andro Kristus a leskero kamiben tumen hazdel upre; te san jekhetane le Duchoha; te san lačhejleskere a te hin tumenge pharo pal aver, sar cerpinen,

² pheraren miro radišagos: Mi el tumen jekh gondolišagos the jekh kamiben, aven jekh duchos the jekh godi.

³ Ma keren nič prekal tumaro baripen abo vašoda, hoj tumen o manuša te lašaren, ale andre pokora dikhen jekh avren bareder pestar.

⁴ Ma dikhen sako ča pre peskero, ale sako the pre oda, so hin avrengero.

Te el pokorno avke sar o Ježiš

⁵ Mi el andre tumende ajso gondolišagos, sar sas the andro Ježiš Kristus:

⁶ Ov, savo sas ipen ajso sar o Del, peske na gondolinelas, hoj mušinel te ačhel

andre le Devleskeri podoba,

⁷ ale korkoro savoro omukla

a priiła e podoba le sluhaskeri,

ačhiła ajso sar o manuš

a sikađa pes sar manuš.

⁸ Poňižinda pes

a sas poslušno dži o meriben

– dži o meriben pro kerestos.

⁹ Vašoda les o Del hazdňa upral savoreste

a diňa les nav, so hin upral dojekh nav,

¹⁰ hoj andro nav Ježiš

te bandol dojekh khoč andro ňebos,

the pre phuv the tel e phuv,

¹¹ hoj dojekh čhib te viznavinel,

hoj o Ježiš Kristus hino Raj,

pre slava le Devleskeri le Dadeskeri.

¹² Vašoda, mire lačhe phralale, sar furt man šunenas

– oda na ča akor, sar paš tumende somas, ale mek

buter akana, sar tumenca na som – andre sentňi dar the andro izdraňipen keren pre tumaro spaseňje.

¹³ Bo o Del hino oda, ko andre tumende kerel, hoj na ča te kamen, ale the te keren oda, so hin leske pre dze-ka.

¹⁴ Savoro keren bi o dudrišagos the bi o vesekedišagos,

¹⁵ hoj te aven bi e chiba, žuže čhave le Devleskere maškar kada falošno the previsardo pokoleňje, hoj te švicinen maškar lende sar o čercheňa pro ňebos.

¹⁶ Chuden tumen zorales le dživipnaskere lavestar, hoj mange oda te el andro Džives le Kristoskero pro lašariben, hoj na denašavas aňi e buči na keravas hijaba.

¹⁷ No choc te ulahas miro dživipen avričhordo sar obeta pre sentňi služba tumare pačabnaskeri, radisaľuvav jekhetane tumenca savorenca.

¹⁸ Avke the tumen radisaľon jekhetane manca.

O Timoteus the o Epafroditos

¹⁹ Ale mukav man andro Ježiš Kristus pre oda, hoj ke tumende sig bičhavava le Timoteus a sar man dodžanava, sar tumenge hin, radisaľuvava.

²⁰ Bo nane man ňiko ajso sar ov, ko avke pal tumende gondolinel a čačes pes pal tumende starinel.

²¹ Bo savore roden peskero a na le Ježišoskero Kristoskero.

²² Ale pal o Timoteus džanen, sar pes presikađa, hoj sar o čhavo le dadeha jekhetane manca služinelas andro evaňjelium.

²³ Pačav, hoj les bičhavava takoj, soča man dodžanava, so manca ela.

²⁴ Ale pačav andro Raj, hoj the me korkoro sig avava.

²⁵ Dičholas pes mange avke, hoj kempel ke tumende te bičhavel pale le Epafroditos, mire phrales – savo manca jekhetane kerel e buči a jekhetane pes manca the marel – saves tumen bičhaďan, hoj pes te starinel pal mande.

²⁶ Igen tumen kamelas te dikhel a na sas leske mištes olestar, hoj tumen šundán, hoj nasvaliła.

²⁷ Bo ov čačes pro meriben nasvaliła, ale o Del sas ke leste lačhejleskero, a na ča ke leste, ale the ke mande, hoj man te na el mek bareder pharipen.

²⁸ Vašoda les so neksigeder bičhaďom, hoj pale te radisaľon, sar les dikhena, a man hoj te el frimeder pharipen.

²⁹ Avke les prilen savore radišagoha andro Raj. Kajse manušen den pačiv,

³⁰ bo vaš e buči le Kristoskeri sas imar dži paš o meriben. A na darandiła te del the peskero dživipen, hoj te kerel prekal mande oda, so tumen našti kerďan.

O spravodlišagos prekal o pačaben

3 No akana mek phenav, phralale mire, radisaľon andro Raj. Nane mange phares tumenge pale oda te pisinel a tumenge oda hin pro lačho.

² Dikhen pro rikone, dikhen pro nalačhe manuša, dikhen pre ola, save čingeren o tēlos.

³ Bo amen sam čačes o občinde (obrezimen), amen, save le Duchoha lašaras le Devles a pes bararas andro Kristus a na mukas pes pre amaro tēlos,

⁴ choc me man šaj mukľomas the pre miro tēlos. Te peske vareko aver gondolinel, hoj pes šaj mukel pro tēlos, me mek buter:

⁵ Somas občindo pro ochtoto džives, andral o Izraeliko rodos, andral o kmeňos Benjamin, Hebrejis le Hebrejendar a pal o zakonos Farizejis;

⁶ bara choľaha andro jilo igen džavas pre khangeri; a dolikeravas sa, so kamel o zakonos.

⁷ Ale oda, so mange sas pre chasna, akana prekal ma hin sar nič vaš o Kristus.

⁸ Ale čačes dikhav savoro sar našadipen, bo vzacned-er mange hin, hoj te prindžarav le Ježiš Kristus, mire Rajes. Vaš leste oda savoro odčhidom a hin mange sar o šmeci, hoj te dochudav le Kristus

⁹ a te avav arakhlo andre leste sar ajso manuš, savo nane čačipnaskero korkoro pestar prekal o skutki le zakonostar. Hoj te avav čačipnaskero prekal o pačaben andro Kristus: Čačipnaskero le Devlestar prekal o pačaben;

¹⁰ hoj te prindžarav les the e zor, so les uštađa andral o meriben; hoj te lidžav leskere dukha a te avel ajso sar ov andre leskero meriben,

¹¹ hoj varesar te dodžav ke oda, hoj uščava andral o meriben.

Te džal pal e ņeboskeri odmena

¹² Na hoj imar te dogeľomas abo imar te uľomas dokonalo, ale denašav, hoj te dochudav oda, prekal soste man o Ježiš Kristus imar dochudľa.

¹³ Phralale, me mange na gondolĭnav pal mande, hoj imar oda dochudľom, ale kada jekh kerav: Bisterav pre oda, so hin pal ma, a kerav sa, hoj te dochudav oda, so hin anglal ma.

¹⁴ Denašav andro cieľos, hoj te ņerinav (zvitāzinav) e odmena, o ņeboskero dživipen, andre savo man o Del vičindā andro Ježiš Kristus.

¹⁵ Avke te gondolĭnas amen savore, save sam dospele andro pačaben. A te pal varesoste avres gondolĭnen, the oda tumenge mek o Del sikavela.

¹⁶ Ča dživas dureder andre oda, so imar priiľam.

¹⁷ Phralale mire, keren avke sar me. A dikhen mištes pre ola džene, save dživen avke, sar tumenge amen sikaďam.

¹⁸ Bo but džene, save avke dživen a pal save tumenge imar buterval phenavas a the akana rovbnaħa phenav, dživen sar ņeprijaťeľa le Kristoskere kerestoske.

¹⁹ Lengero agor hin o meriben, lengero del hin lengero per, lengeri slava hin e ladž a gondolĭnen ča pre oda, so hin pre kadi phuv.

²⁰ Ale amaro kher hin andro ņebos a odarik užaras the le Spasiťelis, le Rajes le Ježiš Kristus.

²¹ Ov peskere zoraha, savaha šaj thovel sa tel peskere pindre, čerinela amare slabe the pokorne tĕla pre ajse slavne tĕla, sar hin leskero.

4 Avke, mire lačhe phralale, saven kamav a save mange chibalĭnen, tumen san miro radišagos the miro lašariben! Vašoda, kamade phralale, ačhen zoraha andro Raj!

O Pavol zoraľarel le pačabnaskeren

² Mangav tut, Evodia, a mangav the tut, Syntycha: Mi el tumen jekh gondolišagos andro Raj!

³ Mangav the tut, miro čačo phrala, Sizigos, savo pačivalones manca keres e buči: Pomožin ole pheňenge, se the on manca phares kerenas buči vaš o

evaňjelium jekhetane le Klementoha the mek avrenca, savengere nava hine andro dživipnaskero zvitkos.

⁴ Radisaľon andro Raj furt a pale phenav: Radisaľon!

⁵ Tumaro lačhipen mi prindžaren savore manuša. O Raj hino pašes!

⁶ Pal ņisoste tumen ma starinen, ale andre savoreste, andro modľitbi the andro mangipena phenen le Devleske palikeribnaħa, so tumenge kempel.

⁷ A o smirom le Devleskero, so hin upral dojekh godi, chraňinela tumare jile the tumare gondolišagi andro Ježiš Kristus.

⁸ No akana pro ostatkos, phralale, phenav: Gondolĭnen pre oda, so hin čačo, pačivalo, čačipnaskero the žužo, so anel o lačo hiros, so hin igen lačo vaj pro lašariben a hin le Devleske pre dzeka.

⁹ Keren oda, so sikľiľan, so priiľan, šundān a dikľħan pre ma. A o Del, savo del o smirom, ela tumenca.

O palikeriben vaš o dari

¹⁰ Igen radisaľiľom andro Raj, hoj tumen pale chudľħan te starinel pal ma. Džanav, hoj tumen na preačhiľħan pal ma te starinel, ča na sas tumen sar mange oda te sikavel.

¹¹ Na vakerav kada vašoda, hoj mange vareso chibalĭnel, bo me sikľiľom te el spokojno oleħa, so man hin.

¹² Džanav te dživel, sar man hin frima the akor, sar man hin but. Andre savoreste the andre savore veci som avrisikado: Džanav te el spokojno, sar som čalo vaj sar som bokhalo, the sar man hin but the akor, sar som andro čoripen.

¹³ Savoro birinav andro Kristus, bo ov man del zor.

¹⁴ Ale mištes kerdān, hoj mange pomožindān andre miro pharipen.

¹⁵ The tumen, o Filipana, džanen, hoj kanastar chudľom te vakereľ o evaňjelium, sar odgeľom andral e Macedonija, aňi jekh zboros mange na pomožinelas andre oda, so mange kempelas, ča tumen korkore.

¹⁶ Bo the akor, sar somas andre Tesalonika, bičħadān mange buterval oda, so mange kempelas.

¹⁷ Na džal mange pal oda, hoj te chudav tumare dari, ale džal mange pal oda, hoj tumen oleħa te el chasna.

¹⁸ Chudľom savoro, hin man mek buter, sar mange kempel; hin man savoro pherdo olestar, so bičħadān mange le Epafroditoha. Oda hin sar e šukar voňavo saga, sar e kamibnaskeri obeta igen šukar le Devleske.

¹⁹ A miro Del tumen dela savoro, so tumenge kempel peskere barvalĭpnastar andre slava andro Ježiš Kristus.

²⁰ Le Devleske, amare Dadeske, mi džal e slava pro furt. Amen.

O pozdravi

²¹ Pozdravinen savore sentnen andro Ježiš Kristus. The o phrala, save hine manca, tumen pozdravinen.

²² Pozdravinen tumen savore sentna a nekbuter ola, save služinen andre le Cisariskero palacis.

²³ O lačhipen (milst) amare Rajeskero le Ježišoskero Amen.
Kristoskero mi el tumenca savorenca.

KOLOŠANENGE

O pozdravos

1 Me o Pavol, le Devleskera voľatar o apoštolos le Ježišoskero Kristoskero, the o phral o Timoteus, ² pisinas le sentnenge the le pačivale phralenge andro Ježiš Kristus, save hine andro foros Kolossi: O lačhipen (milost) the o smirom tumenge le Devlestar, amare Dadestar.

Le Pavloskero mangipen the palikeriben

³ Sar pes modľinas, furt palikeras vaš tumenge le Devleske, savo hino Dad amare Rajeskero le Ježišoskero Kristoskero.

⁴ Šundam pal tumaro pačaben andro Ježiš Kristus the pal o kamiben, so tumen hin ke savore sentne,

⁵ bo džanen o užaripen (naďej), so hin odthodo prekal tumende andro űebos. Šundam pal oda mek sigeder andre oda lav, so hin čačipen, andro evaňjelium,

⁶ so avľa ke tumende. Pal calo svetos oda evaňjelium anel ovcje a rozbarol avke sar the maškar tumende, ole dživesestar, kanastar šundam a prindžardam le Devleskero lačhipen (milost) avke, sar oda čačes hin.

⁷ Avke sar oda sikľifan le Epafrasistar, saves amen kammas, savo služinel jekhetane amenca a hino pačivalo služobňikos le Kristoskero prekal tumende.

⁸ Ov amenge vakerelas the pal tumaro kamiben andro Duchos.

Ko hin o Kristus a so kerel

⁹ Vašoda the amen ole dživesestar, sar oda šundam, pes na preačas vaš tumenge te modľinel. Mangas le Devles, hoj tumen te pherarel le prindžaripnaha pal peskeri voľa, hoj te el tumen savoro godaveripen the savori duchovno godi.

¹⁰ Mangas, hoj te phiren avke, sar tumendar oda o Raj kamel, a hoj leske te aven andre savoreste pre dzeka, a te anen o ovcje andre savore lačhe veci, so kere-na, a hoj furt buter the buter te prindžaren le Devles.

¹¹ A mek mangas, hoj tumen te del savori zor peskera slavakera zoratar, hoj te birinen te zľidžal a te ľikerel avri, a hoj le radišagoha

¹² te palikeren le Dadeske, bo kerďa, hoj amen šaj chudas o kotor olestar, so pes pririchtinel prekal o sentne andro krališagos le svetloskero.

¹³ Ov amen cirdňa avri andral e zor le kalipnaskeri a prethoda andro krališagos le Čhaskero, saves Ov kamel,

¹⁴ savo amen cindňa avri, hoj te en amare bini odmukle.

¹⁵ O Kristus hino obrazis le Devleskero, saves našti te dikhel. Ov hino ešebno čhavo, savo hino upral savoreste the anglal savoreste, so hin stvorimen.

¹⁶ Bo prekal o Kristus hin stvorimen savoro, so hin andro űebos a so hin pre phuv – oda, so dičhol a oda so na dičhol, či o troni, vaj o raja, či o kraľa, vaj o autoriti. Sa hin stvorimen lestar a prekal leste.

¹⁷ O Ježiš hin anglal savoreste a savore veci andre leste pes ľikeren jekhetane.

¹⁸ Ov hino o šero le tēloske, la khangerake, o ešebno, savo uštila andral o meriben, hoj te avel andre savoreste ešebno.

¹⁹ Bo le Devleske sas pre dzeka, hoj te dživel savoreha andre peskero Čhavo

²⁰ a prekal leste te lačhuvel savoreha, so hin pro űebos the pre phuv, sar lenge andňa o smirom prekal leskero rat, so čulila avri pro kerestos.

²¹ Tumen sanas varekana cudze a dur le Devlestar a sanas űeprijaťeľa le Devleskere ole nalačhe vecenca, so kere-na the gondolinenas.

²² No akana tumenca pale lačhila, sar leskero Čhavo muľa andro manušeskero tēlos vašoda, hoj tumen te ačhavel anglal peste sentnen, žužen the bi o binos.

²³ Oda ča akor, te ľikerena avri, te ačhena zoraha andro pačaben a te tumen na visarena het le užaripnastar (naďejatar), pal soste šundam andro evaňjelium, so pes vakerel savorenge tel o űebos. Me, o Pavol, ačhilom služobňikos ole evaňjelioske.

Le Pavloskeri služba prekal e khangeri

²⁴ Akana radisaľuvav, hoj šaj cerpinav vaš tumenge a šaj ľidžav the me pre miro tēlos vareso olestar, so o Kristus cerpinda vaš leskero tēlos, so hin e khangeri.

²⁵ Me ačhilom o služobňikos la khangerakero, avke sar oda o Del kamelas. A diňa man andre kadi buči prekal tumaro lačho, hoj te vakerav calo lav le Devleskero,

²⁶ o garuďipen, so sas but berša garudo angle savore manuša, ale akana sas sikado leskere sentnenge.

²⁷ Lenge o Del kamľa te del te džanel, savo hin barvalo the slavno oda garuďipen, so les hin prekal o Nažidi. Oda garuďipen hin o Kristus andre tumende – prekal leste chudena kotor le Devleskera slavatar.

²⁸ Pal leste vakeras avri a cale godaveripnaha dojekheske dovakeras a sikavas vašoda, hoj les te ačhavas anglo Del dokonales andro Kristus.

²⁹ Vašoda man marav a kerav sa leskera zoraha, so zorales kerel andre ma.

2 Bo kamav, hoj te džanen, sar kade kerav phares buči vaš tumenge the vaš ola, save hine andre Laodikea, the vaš savoreng, save mek man šoha (ňik-da) na dikhle,

² hoj te aven podhazdle lengere jile a te aven jekh andro kamiben the barvale andre oda, hoj achaluven savoreske a prekal oda te prindžaren le Devleskero garuđipen, so hin o Kristus.

³ Bo andre leste hin garudo savoro godaveripen the o prindžaripen, so hin baro barvalipen.

⁴ Ale kada phenav vašoda, hoj tumen ňiko te na od-cirdel le falošne vakeribnaha.

⁵ Bo choc na som tumenca andro tēlos, som tumenca andro duchos a radisaľuvav, sar dikhav tumaro zoralo pačaben andro Kristus a hoj ačhen jekhetane.

Pherdo dživipen andro Kristus

⁶ Sar priiľan le Ježiš Kristus, le Rajes, avke the dživen jekhetane leha.

⁷ Aven zakoreňimen the ačhade pre leste, zoralarde andro pačaben, avke sar sanas sikade; aven pherarde le palikeribnaha.

⁸ Dikhnen mištes pre oda, so sikavel o Kristus, hoj tumen vareko te na od-cirdel varesava falošne filozofijaha, so hin pre ňisoste a le manušengere tradicijendar the le svetoskere sikavibnastar, a na le Kristostar.

⁹ Bo andro Kristus dživel o Del savoreha andro manušeskero tēlos

¹⁰ a the tumen hin pherdo dživipen andro Kristus, savo hino upral savore rajipena the zora.

¹¹ Tumen san andre leste občhinde (obrezimen), na le manušeskere vastenca, ale o Kristus tumen občhinda (obrezinda) akor, sar tumendar iľa o binošno dživipen,

¹² sar sanas leha parunde andro bolipen a leha jekhetane the uštilan andral o meriben prekal o pačaben andre zor le Devleskeri, savo les uštađa andral o meriben.

¹³ Tumen, save sanas mule andre tumare bini the andre oda, hoj tumare tēla na sas občhinde, o Del jekhetane leha obdžidarda. Sar amenge odmukľa savore bini,

¹⁴ o Del khosľa avri oda dlžno ľil leskere zakonenca, so vakerelas pre amende. Khosľa avri oda ľil oleha, hoj les primarda pro kerestos.

¹⁵ Iľa e zor le duchovne rajendar the autoritendar a anda len avri anglal sakoneste pre ladž, akor sar pro kerestos upral lende ňerinda (zvitazinda).

¹⁶ ňiko tumen te na sudzinel vaš oda, so chan a pijen, vaš varesavo inepos, abo vaš o Inepos le neve čhoneskero the vaš o Šabbat.

¹⁷ Kada hin ča o ciños olestar, so avela, ale imar avľa a oda hin o Kristus.

¹⁸ Ma domuken, hoj kajse manuša, save pestar keren kamukeri pokorne a lašaren le aňjelen, tumenge te len het tumari odmena vaš o ňerindipen (vitaztvo). On pes ča furt ľidžan upre oleha, so dikhle, a lašaren pes

barikanes andre peskero manušeskero gondolišagos.

¹⁹ Kajse manuša pes na ľikeren le šerestar, so hin o Kristus. O šero ľikerel calo tēlos jekhetane prephandlo le šľachenca te le klubenca, hoj te barol avke, sar oda o Del kamel.

Nevo dživipen andro Kristus

²⁰ Te imar muľan le Kristoha kale svetoske, soske tumen den te phandel kajse zakonenca sar ola manuša andro svetos?

²¹ "Ma chude tut olestar! Ma koštoľin! Aňi ma le andro vasta!"

²² Oda hin ča le manušeskere prikazaňja the sikavibena pal o veci, so pes chal a pijel – hine ča jekhvar pre chasna a palis nane.

²³ No kala prikazaňja dičhon avri sar godaver, bo ola manuša korkore pestar keren pobožne the pokorne oleha, hoj peskere tēla den te cerpinel. Ale oda na pomožinel le manušeske, hoj te preačhel te kerel oda, so kamel o tēlos.

3 Avke, te imar uštilan le Kristoha andral o meriben, roden oda, so hin upre, kaj bešel o Kristus pal e čači (pravo) sera le Devleskeri.

² Gondolinen pre oda, so hin upre, a na pre oda, so hin pre phuv.

³ Bo imar muľan a tumaro dživipen hin garudo le Kristoha andro Del.

⁴ A sar pes sikavela o Kristus, savo hin tumaro dživipen, akor the tumen pes leha sikavena andre slava.

O purano the o nevo dživipen

⁵ Murdaren andre tumende o tēloskere žadosci: O lubipen, o nalačhipen, o nažužipen, e nalači žadosca the oda, hoj te aven izdrade pal o love, so hin e modloslužba.

⁶ Angle kala veci avel e choľi le Devleskeri [pre ola, save na kamen te šunel.]

⁷ The tumen varekana avke andre kada phirenas a dživenas.

⁸ Ale akana čhiven tumendar oda savoro het: E choľi, oda, hoj chučena avri choľaha, o nalačhipen, o nalače lava pal aver džene the o džungale lava andral o muj.

⁹ Ma klaminen jekh avreske, bo imar čhidan tele le purane manušes leskere skutkenca

¹⁰ a urďan pre tumende le neve manušes, saves o Del furt kerel neveder pal peskero obrazis, hoj furt feder te prindžarel Oles, ko les kerđa.

¹¹ Vašoda imar nane aňi Grekos aňi Židos, abo občhindo (obrezimen) vaj naobčhindo, aňi cudzincos vaj barbaris †, abo otrokos vaj slobodno, ale o Kristus hin savoro a andre savorende.

¹² Vašoda, hoj o Del tumen kidňa avri a kerđa sentnen, a vašoda, hoj tumen igen kamel, uren tumen andro lačhejileskeriben, lačhipen the pokora a aven kovle andro jile a ľikeren avri.

† O Skytos

¹³ Zlidžan jekh avres a odmuken tumenge, te hin varekas vareso pre varekaste. Avke, sar tumenge o Kristus odmučla, odmuken jekh avreske.

¹⁴ Ale upral savoreste uren tumen andro kamiben, bo o kamiben tumen sphandel čačes jekhetane.

¹⁵ O smirom le Kristoskero mi lidžal tumare jile, se sanas vičimen andre jekh t'elos, hoj te dživen andro smirom. A aven pherarde le palikeribnaha.

¹⁶ O lav le Kristoskero mi el barvales andre tumende. Bare godaveripnaha sikaven a dovakeren jekh avres. Gilaven le Devleske a palikeren leske le žalmenca, le chvalenca the le duhovne gil'enca andral o jile.

¹⁷ A savoro, so keren, abo vakeren, keren andro nav le Rajeskero le Ježišoskero a prekal leste palikeren le Devleske amare Dadeske.

Sar te dživel o nevo dživipen

¹⁸ Džuv'ale, podden tumen tumare romenge, avke sar oda kempel te kerel andro Raj.

¹⁹ Muršale, kamen tumare rom'nijen, ma vakeren zoraš pre lende a ma šulaven lenca sar la metlaha.

²⁰ Čavorale, šunen le dajen the le daden andre savoreste, bo ada hin le Rajeske pre dzeka.

²¹ Dadale, ma aven igen zorale pre tumare čhave, hoj te na pes phanden andre peste.

²² Tumen, o sluhi, šunen tumare rajen andre savoreste a ma služinen pačivales ča anglal lengere jakha sar ola, save kamen te avel pre dzeka le manušenge, ale služinen žuže jilestar a daratar le Devlestar.

²³ Savoro, so keren, keren andral o jilo sar le Rajeske, a na sar le manušenge.

²⁴ Se džanen, hoj le Rajestar chudena o d'edictvos sar o počiňiben, bo le Rajeske le Kristoske služinen.

²⁵ Oleske, ko kerel o nalačhipen, ela počimen vaš oda nalačhipen, so kerđa. Bo o Del peske na kidel avri ņisave manušes, sar sudzinel.

4 Tumen, o raja, den le sluhenge oda, so hin čačip-naskero a so peske zasogalinen (zaslužinen). Se džanen, hoj the tumen hin Raj andro ņebos.

Te modl'inen pes

² Ačhen andro modl'itbi, aven upre a ma soven, ale furt palikeren le Devleske.

³ Modl'inen tumen the vaš amenge, hoj amenge o Del te phundravel o vudar prekal o lav, hoj te vakeras le Kristoskero garuđipen, vaš savo som akana andre bertena.

⁴ Modl'inen tumen, hoj te sikavav oda žužes, avke sar kempel.

⁵ Dživen god'aha anglo napačabnaskere manuša a cinen tumenge avri o časos.

⁶ Vakeren šukares andro kamiben a džanen, sar kempel sakoneske te odphenel. Tumaro vakeriben mi el lačo sar o chaben le loneha.

O posledna lava

⁷ Miro lačo phral the pačivalo služobňikos, savo amenca jekhetane služinel le Rajeske, o Tichikus, tumenge dela te džanel sa, so hin manca.

⁸ Me les bičhađom ke tumende vašoda, hoj pes te dodžanen, sar hin amenge a so keras, hoj tumenge te anel o radišagos andro jile.

⁹ Džal leha o Onezimus, o pačivalo the lačo phral, saves igen kamas a hino jekh tumendar. On tumenge dena te džanel sa, so pes kade kerel.

¹⁰ Pozdravinel tumen o Aristarchos, savo hino manca jekhetane andre bertena, the o Marek, le Barnabašiskero stričnophral. (Pal leste tumenge imar pisindom, hoj te prilen les, te avela ke tumende.)

¹¹ Pozdravinel tumen the o Jesus, saves vičinen Justus. Le Židendar ča on korkore keren manca jekhetane buči prekal o krališagos le Devleskero a but mange pomožinde.

¹² Pozdravinel tumen o Epafras, savo hino tumendar, o sluhas le Ježišoskero Kristoskero, savo pes furt vaš tumenge marel andre peskere modl'itbi, hoj te ačhen zoraha andro pačaben, te aven dokonale a andre savoreste te keren le Devleskeri voľa.

¹³ Šaj phenav pal leste, hoj kerel bari buči vaš tumenge the vaš ola, save hine andre Laodikea the andro Hierapolis.

¹⁴ Pozdravinel tumen o Lukaš, o doktoris, saves rado dikhas, the o Demas.

¹⁵ Pozdravinen le phralen andre Laodikea the andre Nymfa the o zboros, so hin andre leskero kher.

¹⁶ A sar ela o l'il pregendo ke tumende, den, hoj les te pregenen the andro zboros andre Laodikea. A tumen pregenen o l'il andral e Laodikea.

¹⁷ A phenen le Archipaske: Merkin, hoj te dokeres odi buči, so priiľal le Rajestar.

¹⁸ Me, o Pavol, mire vasteha kada pisinav a pozdravinav tumen. Ma bisteren pre mire lanci! O lačhipen (milost) le Devleskero mi el tumenca savorenca!

Amen.

1. TESALONIČANENGE

Ašarel lengero pačaben

1 O Pavol, o Silvan the o Timoteus pisinas le manuŝenge andro foros Tesalonika, la khangerake, so hiñi andro Del amaro Dad the andro Raj Ježiš Kristus: O lačhipen (milost) the o smirom tumenge!

² Amen palikeras le Devleske vaš tumenge savoreng furt, sar tumen leperas andre amare modlitbi.

³ Na preačas te leperel anglo Del amaro Dad tumari buči, so keren le pačabnastar, tumari služba andro kamiben the oda, savo zoralo hin tumaro užaripen (nađej) andre amaro Raj Ježiš Kristus.

⁴ Amen džanas, phralale, hoj o Del tumen kamel a kidña peske tumen avri.

⁵ Bo amen anenas tumenge o evaňjelium na ča le lavenca, ale la zoraha the le Sentne Duchoha the andre bari istota. Se džanen, save samas maškar tumende prekal tumaro lačhipen.

⁶ A tumen kerđan avke, sar dikhľan amen te kerel, a the avke, sar o Raj kerelas. Priiľan o lav andro but cerpišagi radišagoha le Sentne Duchostar.

⁷ Vašoda san priklados savoreng, save pačan andre Macedonija the andre Achaja.

⁸ Bo tumendar geľa o lav le Rajeskero na ča andre Macedonija the andre Achaja – pre dojekh than pes rozľigenda tumaro pačaben andro Del. Vašoda amenge imar na kampil buter nič te vakerel,

⁹ bo on korkore vakeren pal oda, sar amen priiľan a sar tumen visarđan le modlendar ko Del, hoj te služinen le džide the čače Devleske.

¹⁰ Vašoda akana užaren leskere Čhas le Ježiš, saves o Del uštađa andral o meriben a savo amen zachraňinel andral odi cholí, so avela.

Pal e buči andre Tesalonika

2 Tumen korkore džanen, phralale, hoj amen na avľam ke tumende hijaba.

² Se džanen, hoj angloda but precerpindaľ andro Filipi a hoj amen ande avri pre ladž. Ale the avke arakhľam e zor andro Del te vakerel tumenge o evaňjelium le Devleskero bi e dar, choc but manuša džanas pre amende.

³ Bo oda, so amen tumenge vakerahas, na sas, hoj varekaha te thovas avri, a na sas aňi le klamišagoha, aňi le nažuže jilenca,

⁴ ale vašoda, hoj amen o Del dikhľa sar hodnen, diňa amenge o evaňjelium a avke les vakeras – na avke, hoj

te avas pre dzeka le manuŝenge, ale le Devleske, savo probaľinel (skušinel) amare jile.

⁵ Se tumen džanen, hoj šoha (ňikda) tumenge na vakerahas gule lava, aňi na samas izdrade pal tumare love andre amare jile – o Del hino amaro švedkos.

⁶ Aňi na rodahas e slava le manušendar – aňi tumendar, aňi űikastar avrestar.

⁷ Bo sar o apoštola le Kristoskere šaj tumendar užarđamas, hoj pes pal amende te starinen. No amen avke na kerđam, ale samas ke tumende kamibnaskere sar e daj, savi pes starinel pal peskere čhave.

⁸ Avke tumen kamahas, hoj anahas tumenge na ča o evaňjelium, ale dahas the peskere dživipena, bo igen peske tumen zakamľam.

⁹ Se leperen peske, phralale, pre amari phari buči. Rat-džives kerahas, hoj te na avas tumenge pre meň, medik tumenge vakerahas o evaňjelium le Devleskero.

¹⁰ Tumen the o Del san o švedki, sar pes likerahas sentne, čačipnaskere the žuže ke tumende, save pačan.

¹¹ Tumen džanen mištes, hoj dojekheha tumendar kerahas avke, sar o dad kerel peskere čhaha:

¹² Zoraľarahas tumen a priphenahas a dovakerahas tumenge, hoj te dživen lačo dživipen, so hin pre dzeka le Devleske, savo tumen vičinel andre peskero krališagos the slava.

¹³ Vašoda na preačas te palikerel le Devleske, hoj na priiľan sar o lav le manušeskero, oda lav, so šundľan amendar, ale sar le Devleskero lav. Bo ajsa čačas hin oda lav, so kerel andre tumende, save pačan.

¹⁴ Se tumen, phralale, ačhiľan ajse sar le Devleskere zbori andro Ježiš Kristus andre Judsko. Bo avke, sar on cerpinenas le Židendar, the tumen cerpinenas le manušendar tumare narodendar.

¹⁵ Ola Židi murdarde amare Rajes le Ježiš the peskere proroken a džanas the pre amende. On nane le Devleske pre dzeka a hine űeprijateľa savore manuŝenge.

¹⁶ Na domuken amenge te vakerel le Nažidenge, hoj te aven zachraňimen, a oleha mek furt buter dothoven ke peskere bini. Ale e cholí le Devleskeri imar avľa pre lende.

Kamel te avel pale ke lende

¹⁷ Phralale, choc amen geľam het tumendar pro sikra, na geľam het le jileha. Igen tumen kamahas te dikhel a kerahas sa prekal oda, hoj tumen te dikhas.

¹⁸ A kamahas te avel ke tumende – me, o Pavol, buterval kamavas – ale o satan amenge na domukľa.

¹⁹ Bo ko hin amaro užaripen (nađej), amaro radišagos, vaj amari baripnaskeri koruna? Či na san oda tumen angle amaro Raj Ježiš Kristus, sar avela?

²⁰ Tumen san amari slava the radišagos!

3 Vašoda, hoj imar buter našti likerahas avri, phendām peske, hoj ačhaha andro Ateni korkore, ² sar bičhadām le Timoteus, amare phrales the le Devleskere služobņikos, savo amenca kerel jekhetane e buči prekal o evaņjelium le Kristoskero, hoj tumen te zoraľarel a hoj te pomožinel tumare pačabnaske,

³ hoj űiko te na omukel o pačaben andre kala pharipena. Se tumen korkore džanen, hoj hin e voľa le Devleskeri prekal amende, hoj te cerpinas.

⁴ The sar samas ke tumende, phenahas tumenge imar anglal, hoj cerpinaha. A džanen, hoj avke pes the ačhiľa.

⁵ Vašoda, sar me imar buter našti likerđom avri, bičhadom les, hoj man te dodžanav pal tumaro pačaben, či tumen na pokušinelas o beng a amari buči palis na ulahas pre űisoste.

⁶ Ale akana, sar avľa o Timoteus tumendar ke amende, anda amenge o lačho hiros pal tumaro pačaben the kamiben. Phendā amenge, hoj pre amende furt gondoliĵnen andro lačhipen a igen amen kamen te dikhel – avke sar the amen tumen.

⁷ Vašoda, phralale, radisaľifam tumare pačabnaske, choc amen hin bare pharipena the cerpišagi.

⁸ Akana obdžidiľam, bo džanas, hoj tumen ačhen zoraha andro Raj.

⁹ Se soha šaj palikeras le Devleske vaš tumenge, vaš oda savoro radišagos, so amen tumendar hin angle amaro Del?

¹⁰ Rat-džives pes igen mangas, hoj tumen te dikhas a te dokeras oda, so mek kempel tumare pačabnaske.

¹¹ Ale ov korkoro, o Del amaro Dad the amaro Raj o Ježiš Kristus, mi lidžal amaro drom ke tumende.

¹² A mi kerel o Raj, hoj tumaro kamiben maškar tumende the ke savorende te el furt buter the barvaleder, sar the amaro kamiben ke tumende.

¹³ Mi zoraľarel tumen andro jile, hoj te aven sentna the bi o binos anglo Del amaro Dad, sar avela amaro Raj o Ježiš savore peskere sentnenca. Amen.

O dživipen, so hin le Devleske pre dzeka

4 No akana, phralale, mangas tumen a dovakeras tumenge andre amaro Raj Ježiš, hoj furt buter te baron andre oda, so amendar priiľan. Bo amen tumen sikađam, sar kempel te dživel a te el pre dzeka le Devleske a avke imar the dživen.

² Se džanen, save prikazaňja tumen diňam amare Rajestar le Ježišostar.

³ Bo kada hin, so o Del kamel, hoj te dživen sentnes a te zľikeren tumen le lubipnastar.

⁴ Dojekh tumendar mi džanel sar te dživel peskera romňaha andro sentņipen the andre pačiv

⁵ a na andre džungali žadosca, sar oda keren o pohana, save na prindžaren le Devles.

⁶ űiko te na thovel avri peskere phraleha avke, hoj kerela vareso leskera romňaha. Bo amaro Raj marela sakones, ko oda kerel, sar tumenge imar sigeder zoraha priphendām the dovakerđam.

⁷ Bo na vičindā amen o Del pre oda, hoj te dživas andro nažuzipen, ale andro sentņipen.

⁸ Ko kada na prilal, na prilal le Devles. Bo oda nane le manušestar, ale le Devlestar, savo tumen del peskere Sentne Duchos.

⁹ Pal o kamiben maškar o phrala tumenge na kempel te pisinel, bo tumen san korkore avrisikade le Devlestar, hoj jekh avres te kamen.

¹⁰ Bo imar sikaven oda kamiben savore phralenge andre cali Macedonija. Ale mangas tumenge, hoj oda te keren mek buter.

¹¹ Keren sa prekal oda, hoj te dživen andro smirom a sako mi starinel pes pal peskero a mi kerel peskere vastenca e buči, avke sar tumenge oda phendām.

¹² Bo oleha tumen likerena šukares anglal ola, save na pačan, a na avena űikaske pre meň.

Sar o Raj avela tele

¹³ Amen kamas, phralale, hoj te džanen, so ela ole manušenca, save imar mule. Bo na kamas, hoj tumen te trapinen avke sar okla džene, saven nane užaripen (nađej).

¹⁴ Bo te amen pačas, hoj o Ježiš muľa a uštila andral o meriben, ta akor pačas the oda, hoj o Del anela pale le Ježišoha olen, save mule pačabnaha andre leste.

¹⁵ Kada, so tumenge amen phenas, hin o lava le Rajeskere: Amen, save mek dživaha, sar avela o Raj, na predenašaha olen, save imar mule.

¹⁶ Bo sar šundola o zoralo rozkazis, le archaňjeloskero hangos the le Devleskeri truba, korkoro o Raj avela tele andral o űebos a ola, save mule andro Kristus, ušćena ešebne.

¹⁷ A palis amen, save avaha mek džide, avaha jekhvareste cirdle upre jekhetane lenca andro chmari, kaj pes arakhaha le Rajeha. A avke avaha le Rajeha pro furt.

¹⁸ Vašoda tumen zoraľaren jekh avren kale lavenca.

5 Phralale, pal o časi, kana oda avela, na kempel tumenge te pisinel,

² bo korkore mištes džanen, hoj o Džives le Rajeskero avela avke sar o živaňis prekal e rat.

³ Bo sar vakerena: “Smirom hin a na mušinas pes te daral,” akor e bari bibach, avela jekhvareste pre lende, sar o dukha pre khabňi džuvľi – na denašena a ena zňičimen.

⁴ Ale tumen, phralale, na san andro kalipen, hoj tumen oda Džives te zachudel sar o živaňis.

⁵ Bo tumen savore san o čhave le svetloskere the o čhave le dživeseskere. Amen na sam o čhave le kalipnaskere the la račakere.

⁶ Vašoda, te na sovas avke sar okla džene, ale te avas upre a te avas strižbe.

⁷ Bo ola, ko soven, rači soven a ola, ko mačon, hine rači mate.

⁸ Ale amen, save sam o čhave le dživeseskere, avas strižbe, uras pre peste o pancjeris le pačabnaskero the le kamibnaskero a sar e prilba o užaripen (nadej) pro spaseņje.

⁹ Bo o Del peske amen na kidņa avri pre peskeri choļi, ale pre oda, hoj te dochudas e spaseņje prekal amaro Raj Ježiš Kristus,

¹⁰ savo muļa vaš amenge, hoj te dživas jekhetane leha – či sam džide abo mule.

¹¹ Vašoda tumen zorafaren a podhazden jekh avres, avke sar oda the keren.

O pozdravi

¹² Mangas tumen, phralale, hoj tumenge te likerem olen, save maškar tumende keren e phari buči, save hine upral tumende andro Raj a sikaven tumen.

¹³ Le kamibnaha likerem len igen bares vaš lengeri buči. Mi el maškar tumende o smirom!

¹⁴ A mangas tumen, phralale: Dovakerem olenge, save na kamen te kerel buči, podhazden olen, save pes pomukle, pomožinen le slabenge a sakoneha likerem avri.

¹⁵ Dikhen, hoj ņiko varekaske te na visarel pale o nalačo vaš o nalačo, ale furt keren lačo jekh avreste the savorengje manušenge.

¹⁶ Furt radisaļon!

¹⁷ Ma preačhen tumen te modļine!

¹⁸ Andre savoreste palikerem, bo ada hin le Devleskeri voļa prekal tumende andro Ježiš Kristus.

¹⁹ Ma murdaren andre e jag le Sentne Duchoskeri a na zalikerem les.

²⁰ Ma dikhen tele o prorociva,

²¹ ale savoro probalinen (skušinen) a o lačo tumenge muken.

²² Ņič tumen te na chal le nalačhipnaha.

²³ A o Del korkoro, savo amen del o smirom, mi kerel tumendar sentnen andre savoreste a mi likerem tumen – calo tumaro duchos, duša the telos – bi e mel, medik na avela pale amaro Raj o Ježiš Kristus.

²⁴ Verno hino Oda, ko tumen vičinel: Ov oda the kerela.

²⁵ Phralale, modļinen tumen vaš amenge!

²⁶ Pozdravinen šukares savore phralen jilestar.

²⁷ Mangav tumen anglo Raj: Pregenen oda ļil savore sentne phralenge.

²⁸ O lačhipen (milost) amare Rajeskero le Ježišoskero Kristoskero mi el tumenca!

Amen.

2. TESALONIČANENGE

O pozdravos

1 O Pavol, o Silvan the o Timoteus pisinen la khangerake andro foros Tesalonika, la khangerake andro Del amaro Dad the andre amaro Raj Ježiš Kristus:

² O lačhipen (milost) tumenge the o smirom le Devlestar, amare Dadestar the amare Rajestar, le Ježišostar Kristostar.

Pal o sudos

³ Phralale, amen mušinas vaš tumenge te palikerel furt le Devleske a hin vaš soske, bo igen barol tumaro pačaben the tumaro kamiben jekh ke avreste.

⁴ Vašoda the amen korkore pes lašaras tumenca andro khangerale Devleskere, bo tumen likerem avri a pačan andre savore tumare pharipena the sar o manuša pre tumende džan.

⁵ Kada savoro sikavel pre le Devleskero čačipnaskero sudos, a vašoda avena hodne te džal andro krališagos le Devleskero, vaš savo the cerpinen.

⁶ Bo o Del hino čačipnaskero: Dela pale o pharipen olenge, save tumenge keren o pharipen,

⁷ ale tumenge, save san andro pharipen, dela smirom le pharipnastar avke, sar the amenge, akor sar pes andral o ņebos sikavela o Raj o Ježiš peskere zorale aŋjelenca.

⁸ Akor marela andro jagale plameňa olen, save na prindžaren le Devles, the olen, save na šunen o evaŋjelium amare Rajeskero le Ježišoskero.

⁹ Lengero trestos hin, hoj ena zničimen pro furt dur le Rajeskere mujestar the leskera slavakera zoratar,

¹⁰ andre oda Džives, sar o Ježiš avela, hoj les te el e slava savore leskere sentne manušendar the e bari pačiv savorendar, save pačandile. Tumen avena maškar lende, bo pačandilán amare svedectvoske.

¹¹ Vašoda pes furt vaš tumenge modlínas, hoj tumendar amaro Del te kerel hodnen te dživel oda dživipen, andre savo tumen vičinda, a hoj peskera zoraha te dokerel savoro lačo, so tumen kamen, a the dojekh pačabnaskeri buči.

¹² Modlínas oda, hoj te el barardo o nav amare Rajeskero le Ježišoskero Kristoskero andre tumende a tumen andre leste prekal o lačhipen (milost), so del o Del the amaro Raj, o Ježiš Kristus.

O znameňja le Rajeskere Dživeseskere

2 Te vakeras pal oda Džives, sar avela amaro Raj, o Ježiš Kristus, a sar amen lela ke peste, mangas tumen, phralale:

² Ma den tumen te daravel avri ņisave duchoha, aňi laveha, aňi lileha – so dičhol, hoj hin amendar – so phenen, hoj o Džives le Kristoskero imar avla.

³ Ma den tumen ņisoha a ņikaha te klaminel, bo o Džives le Kristoskero na avela, medik pes na ačhela oda, hoj but manuša oddžana le pačabnastar, a medik pes na sikavela o Manuš le Binoskero, oda, kas o Del zničinel andro peklos.

⁴ Ov džala pre savoreste a hazdela pes upral savoreste, so pes vičinel Del, abo pes lašarel, vašoda peske bešela andro chramos le Devleskero a kerela pestar, hoj ov hin o Del.

⁵ Bisterdžan, hoj pal oda imar vakeravas, sar somas ke tumende?

⁶ A tumen džanen, so les akana zlíkerel, hoj pes te sikavel ča andre oda časos, so hin dino prekal leste.

⁷ A e zor le nalačipnaskeri imar kerel počoral, bo mek hino zlíkerdo, no ča dži akor, medik na ela ilo het oda, ko les akana zlíkerel.

⁸ A palis pes oda Manuš le Binoskero sikavela, saves o Raj o Ježiš murdarela le dichoha andral peskero muj a zničinel peskera slavaha, sar avela.

⁹ Oda Manuš le Binoskero avela savora zoraha le satanostar a kerela falošna znameňja the zazraki,

¹⁰ hoj te cirdel andro nalačhipen olen, save ena zničimen, bo na priile a na kamle o čačipen, hoj te aven spasimen.

¹¹ Vašoda pre lende o Del bičhavel e zor, so len anela andro načačipen avke, hoj te pačan le klamišagoske.

¹² Avke ena odsudzimen savore, save na pačandile le čačipnaske, ale rado kamenas o nalačhipen.

Te ačhen zoraes

¹³ Ale amen mušinas furt te palikerel le Devleske vaš tumenge, phralale, kas o Raj kamel. Bo o Del peske tumen avri kidňa ešebnovarestar (peršovarestar) pre oda, hoj te aven spasimen andro sentňipen le Duchoskero the le pačabnaha andro čačipen.

¹⁴ Akor, sar amendar šundán o evaňjelium, vičinda tumen ke oda, hoj te prilen e slava amare Rajeskero le Ježišoskero Kristoskero.

¹⁵ Vašoda, phralale, ačhen zoraes a likerem oda, so siklilán, či amare lavestar vaj amare lilestar.

¹⁶ A korkoro amaro Raj, o Ježiš Kristus, the o Del, amaro Dad, savo peske amen zakamla a diña amen peskere lačhipnaha (milostaha) o večno radišagos the o lačo užaripen (nađej),

¹⁷ mi zorařarel tumare jile a mi del tumen zor andre dojekh lačo skutkos the lav.

Mangipen pal o modlitbi

3 Dureder, phralale, modlġnen tumen vař amenge, hoj te rozlġdřal o lav le Rajeskero a te el avrether barardo avke, sar the ke tumende.

² A modlġnen tumen, hoj te avas avricirdle andral e zor le nalače the napačivale manuřendar, bo nane sakones pačaben.

³ Ale o Raj hino pačivalo. Ov tumen dela zor a chraġinela le nalačestar.

⁴ Pačas tumenge andro Raj, hoj imar keren a the kerna, so tumenge amen prikazinas.

⁵ O Raj mi lġdřal tumare jile ko kamiben le Devleskero a hoj te lġkeren avri prekal e zor le Kristoskeri.

Sako te kerel buči

⁶ Prikazinas tumenge, phralale, andro nav amare Rajeskero le Ježiřoskero Kristoskero, hoj tumen te odcirden dojekhe phralestar, savo dřivel leġivones a na dřivel pal oda sikaviben, so amendar chudlan.

⁷ Tumen korkore dřanen, hoj kempel te kerel avke sar amen, bo amen na dřivahas mařkar tumende leġivones:

⁸ Na chahas o maro ġikastar hijaba, ale andre buči phares kerahas rat-dřives, hoj te na avas ġikaske tumendar pro stariřagos.

⁹ Amen kerđam oda, na vařoda, hoj amen na sas pre oda pravos, ale hoj tumenge te avas prikados, hoj te keren avke sar amen.

¹⁰ A sar samas ke tumende, prikazinahas: "Ko na kamel te kerel buči, aġi te na chal!"

¹¹ Bo řunas, hoj varesave dřene mařkar tumende pes namiřtes lġkeren – ġič na keren, ča pes thoven andre ola veci, so lenge na kempel.

¹² Ajsenge prikazinas a priphenas prekal amaro Raj Ježiř Kristus, hoj řukares te keren buči, a avke te chan peskero maro.

¹³ Ale tumen, phralale, ma preačhen te kerel o lačhipen

¹⁴ a te vareko na řunel amaro lav andre kada lġl, pre oda manuř tumenge den pozoris a ma dřřan tumen leha, hoj pes te ladřal.

¹⁵ Ma len les sar ġeprijařelis, ale dovakeren leske sar phraleske.

O posledno lav

¹⁶ Korkoro o Raj, savestar avel o smirom, tumen mi del o smirom andre dojekh časos the andre savoreste. O Raj mi el tumenca savorenca!

¹⁷ Me, o Pavol, pisinav mire vasteha kada pozdravos. Avke pisinav. Kada hin o znakos † andre savore mire lġla.

¹⁸ O lačhipen (milost) amare Rajeskero le Ježiřoskero Kristoskero mi el tumenca savorenca!

Amen.

† Abo: O odpisos

1. TIMOTEOSKE

O pozdravos

1 Pisinav me, o Pavol o apoštolos le Ježišoskero Kristoskero. Me som bičhado le Devlestar amare Spasitelistar the le Ježišostar Kristostar, savo hin amaro užaripen (nadej).

² Pisinav le Timoteoske, mire čače čhaske andro pačaben: Mi del tut o Del, o Dad, the o Ježiš Kristus, amaro Raj, o smirom, o lačhipen (milost) the o lačhejileskeriben!

Pal o falošno sikaviben

³ Mangav tut, sar tut imar mangavas, sar džavas andre Macedonija, hoj te ačhes andro Efezus a te dovakeres varesave manušenge, hoj te na sikaven falošno sikaviben.

⁴ Phen lenge, hoj pes te na zalen varesave bajkenca the le igen bare rodokmeñenca, bo kajse lava na služinen le Devleskera bučake, savi pes kerel le pačabnaha, ale sigeder anen o vesekedišagi.

⁵ O cieľos ole prikaziskero hin o kamiben, so avel andral o žužo jilo, andral o lačo svedomje the andral o čačo pačaben.

⁶ Kada varesave džene našade a visarde pes ko diline vakeribena.

⁷ On kamen te el o učitelja le zakonoske, ale aňi na ačhaľon, so vakeren, a aňi oda, pre soste avke ačhen.

⁸ Ale amen džanas, hoj o zakonos hino lačo – te les vareko lel avke, sar kampil.

⁹ A kada džanen, hoj o zakonos nane dino prekal o čačipnaskere, ale prekal ola, save na dolikeren o zakonos a save pes na podden – hino dino prekal o bijedevleskere the binošna, ola, ko hine nasentne the nažuže, the prekal o vrahi, ola, save murdaren le dajen the le daden.

¹⁰ O zakonos hino the prekal o lubara, the o murša, save soven le muršenca, prekal ola, save cinen the bikenen le manušen, prekal o klamara the ola, save den lav klamišagoha – prekal savore, save na keren pal o sasto sikaviben.

¹¹ Oda sikaviben šaj arakhas andro slavno evaňjeli-um, so mange diňa te vakerel o požehnano Del.

Palikerel le Devleske

¹² Palikerav le Ježišoske Kristoske, amare Rajeske, savo man diňa zor, bo dikhľa man sar lačhes a ačhada man andre služba –

¹³ man, savo pre leste verekana namištes vakeravas, džavas pre leste a dukhavavas. Ale o Del sas ke mande lačhejileskero, bo mek na somas andro pačaben a na džanavas, so keravas.

¹⁴ Ale o Raj čhorda avri peskero barvalo lačhipen (milost) pre ma a diňa man o pačaben the o kamiben, so hin andro Ježiš Kristus.

¹⁵ Kala lava, so phenav, hin čačipen a šaj len te prilel a te pačal: O Ježiš Kristus avľa pro svetos te spasinel le binošnen, savendar me som nekgoeder.

¹⁶ Ale o Del sas ke mande lačhejileskero vašoda, hoj pre ma ešebno (peršo) o Ježiš Kristus sikađa peskero baro avrilikeriben, sar prikados prekal ola, save pačana andre leste, a avke chudena o večno džživipen.

¹⁷ Le večne Kraliske the jekhe Devleske, savo furt dživel a saves našti te dikhel, mi džal e pačiv the e slava pro furt! Amen.

¹⁸ Timoteus, čhavo miro, ada prikazis, so tuke dav, hino zathodo pro prorocke lava, save tuke sas angloda phende. Te keres pal ola lava, mares lenca o lačo mariben

¹⁹ a ľikeres tuke o pačaben the o lačo svedomje! Varesave džene preačhile te šunel peskero svedomje, a vašoda lengero pačaben rozpeľa.

²⁰ Lendar hin o Hymeneos the o Alexander, saven diňom le satanoske, hoj te odsikľon pes te ruhinel.

Pal e modľitba

2 Mangav tut ešeb (peršo), hoj pes te keren o modľitbi, o mangipena the o modľitbi vaš avreng the o palikeribena vaš savore manuša.

² A modľinen tumen the vaš o kraľa the vaš savore autoriti, hoj te dživas andro smirom cicho džživipen andre savoro sentňipen the pačivaliben,

³ bo kada hin lačo the šukar anglo Del amaro Spasitelis,

⁴ savo kamel, hoj savore manuša te aven zachraňimen a te prindžaren o čačipen.

⁵ Bo hin ča jekh Del a hin ča jekh, savo ačhel maškar o Del the maškar o manuša, o manuš Ježiš Kristus,

⁶ savo počinda peskere džživipnaha, hoj te cinel avri savoren, a o Del amenge ada sikađa andro spravno časos.

⁷ Vašoda somas me ačhado sar o apoštolos the kazaťelis, o učitelis le Nažidenge, hoj lenge te vakerav pal o pačaben the čačipen. Vakerav čačo, na klaminav!

⁸ Vašoda kamav, hoj pes o murša te modlīnen pre dojekh than a te hazden o sentna vasta bi e cholī the vesekedišagos.

⁹ Avke the o džuvlā pes mi uren šukares, avke sar kempel, žužipnaha the zlikribnaha, jednoduche uchañbnaha, bi o somnakaj, perli abo barikane gada,

¹⁰ ale mi šukałaren pes le lačhe skutkenca, avke sar oda kempel te kerel le džuvlenge, save phenen, hoj lašaren le Devles.

¹¹ E džuvlī cichones mi siklōl savora pokoraha.

¹² La džuvlake na domukav te sikavel, añi te lidžal le muršes, ale mi avel čhit.

¹³ Bo o Adam sas stvorimen ešebno a palīs e Eva.

¹⁴ Añi o sap na klaminda le Adam, ale la džuvlā; oj kerđa o binos.

¹⁵ Ale e džuvlī ela zachrañimen prekal oda, hoj anela pro svetos le čhavoren, te ačhela andro pačaben, kamiben, sentñipen the zlikriben.

Pal ola, save lidžan e khangeri

3 Kala lava hin čačipen: Te vareko kamel te lidžal o zboros, mangel peske lači buči.

² Oda, ko lidžal o zboros, mušinel te dživel avke, hoj te na el pre leste so te phenel, murš jekha džuvlakero, strižbo, godaver the rajikano, savo presikavel e pačiv le hoscenge a džanel te sikavel avren.

³ Ajs o manuš nane pijakos, añi maribnaskero, ale kovlo, a nane ajs o, savo pes na cholarel sig añi na izdral pal o love.

⁴ Ov hin ajs o, savo mištes lidžal peskero kher a sikavel le čhaven, hoj les te šunen a te den pačiv.

⁵ Ale te vareko na džanel te lidžal peskero kher, sar pes palīs starinela pal e khangeri le Devleskeri?

⁶ Oda, ko lidžal e khangeri, naštī avel terno andro pačaben, hoj te na ačhel barikano a te el odsudzimen avke sar o beng.

⁷ Ale musaj pal leste te džal o lačo hiros the le manušendar, save na pačan, hoj te na perel andre ladž a pelahas le bengeske andre pasca.

Pal o dijakona

⁸ Avke the o dijakona mušinen te dživel pačivales a mušinen te dolikerel peskero lav. Naštī aven ajse, save pijen but mol, abo hine izdrade pal o love,

⁹ ale ajse, save o čačipen le pačabnaskero likerem andro žužo svedomje.

¹⁰ No the on mi aven ešeb (peršo) probalimen avri (skušimen avri) a palīs, sar pre lende na ela so te phenel, šaj keren e dijakonoskeri buči.

¹¹ Avke the lengere romñija te aven lačhe, na pletkar-ki, ale strižbe the pačivale andre savoreste.

¹² Le dijakonen mi el ča jekh romñi a mi džanen mištes te lidžal peskere čhaven the peskere khera.

¹³ Bo pal ola, save mištes keren e dijakonoskeri buči, džal o lačo hiros a šaj vakeren bi e dar pal o pačaben andro Ježiš Kristus.

O baro garudipen

¹⁴ Pisinav tuke kada līl, ale pačav, hoj sig ke tu avava.

¹⁵ No, te avlomas nasig, kamav, hoj te džanes, sar pes kempel te likerel andre le Devleskero kher, so hin e khangeri le džide Devleskeri, o slupos the o zoralo zaklados le čačipnaskero.

¹⁶ Savore viznavinen, hoj baro garudipen hin andre oda, so pačas:

O Kristus avlā andro tēlos,

o Duchos sikada pre leste, hoj hino le Devleske pre dzeka,

o añjela les dikhle,

sas vakerdo pal leste maškar o narodi,

andro svetos andre leste pačandile

a sas ilo upre andre slava.

Pal o falošna učiteľa

4 O Duchos phenel igen žužes, hoj andro posledna časi oddžana varesave džene le pačabnastar a likerena pes le klamišagoskere duchendar the le demonengere sikavibenendar.

² Kada sikaviben avel le dujemujengere manušendar, save klaminen a na šunen imar peskero svedomje, sar te ulahas avrilabardo.

³ Kala manuša sikaven, hoj nane mištes te džal romeste, a zakazinen te chal varesave chabena, so o Del kerđa, hoj len palikeribnaha te chan ola, save pačan a prindžaren o čačipen.

⁴ Ale savoro, so o Del kerđa, hin lačo a nič na kempel te odčhivel het, te pes prilē palikeribnaha.

⁵ Bo o chaben pes sentñarel le Devleskere laveha the la modlītaha.

⁶ Te kada sikaveha le phralen, aveha lačo služobñikos le Ježišoske Kristoske, avribarardo le pačabnaskere lavenca the le lačhe sikavibnaha, saves- tar tut dži akana likerahas.

O lačo služobñikos le Ježišoskero

⁷ Ale ola bijedevleskere paramisa ma prile, ale sigeder tut zorałar andro sentno dživipen anglo Del.

⁸ Bo te zorałares tiro tēlos, oda anel ča frima chasna, ale o sentno dživipen anel chasna the andre kada dživipen the andre oda dživipen, so avela.

⁹ Kala lava hin čačipen a šaj len te prilē a te pačal.

¹⁰ Vašoda keras buči a trapinas pes, bo mukas pes pro džido Del, savo hino Spasitēlis savore manušenge, no mek buter olenge, save pačan.

¹¹ Kada prikazin a sikav.

¹² Ma domuk, hoj tut vareko te dikhel tele vaš oda, bo sal terno. Ale av prikados, so mištes sikavel avrengē, sar pes kempel te likerel andro lav, dživipen, kamiben, pačaben the žužipen.

¹³ Medik me avava, gen o Lav, zorałar a sikav avren.

¹⁴ Ma zamuk oda duhovno daros, so hin andre tu a sas tuke dino le prorocke laveha, sar o starši pre tu thode peskere vasta.

¹⁵ Kala veci ker a muk tut andre oda, hoj savore manuša te dikhen, sar džas dureder andro pačaben.

¹⁶ Merkin pre tu the pre tiro sikaviben; ačh andre oda! Bo te kada kereha, zachrañineha tut a the olen, save tut šunen.

O vdovi, phuredere the otroki

5 Le phuredere manušeske ma dovaker zoraha, ale dovaker leske sar dadeske, le ternederenge sar phralenge,

² le phuredere džuvleng sar dajenge a le ternedere džuvleng sar pheñenge, andre savoro žužipen.

³ De pačiv le vdoven, save hine čačes vdovi.

⁴ Bo te hin varesava vdova čhave abo vnučata, on pes ešeb (peršo) mi sikaven te avel pobožna andre peskero kher oleha, hoj den pale o lačhipen le dajenge the le dadenge, bo oda hin šukares anglo Del.

⁵ E čači vdova, savi hiñi korkori a nane la ñiko, pes zmukel pro Del a rat-džives hiñi andro modlītbi the mangipena.

⁶ Ale ajsi vdova, savi dživel rozmukles, hiñi muli, choc dživel.

⁷ Prikazin lenge kada, hoj ñikas pre lende te na el so te phenel,

⁸ bo te pes vareko na starinel pal peskere pašutne a na mek pal peskeri famelija andral peskero kher, akor zaprinđa o pačaben a hino goreder sar o napačabnaskere.

⁹ Rachinel pes vdovake odi, savake hin buter sar šovardeš (60) berš a sas ča jekhvar veraduñi

¹⁰ a džal pal late o lačho hiros, hoj kerelas o lačhipen, bararda avri le čhaven, prilelas le hoscen, thovelas (omorelas) o pindre le sentnenge, pomožinelas olenge, save hine andro pharipen, a kamelas te kerel savoro lačhipen.

¹¹ Ale ma rachin le ternedere vdoven, bo sar len cirdela te džal romeste, šaj pes visaren le Kristostar

¹² a anen pre peste o sudos, bo na dolikerde oda ešebno lav, so les dine.

¹³ A mek ke oda ča siklōn nič te na kerel, ča te phirel kher kherestar a na ča, hoj na keren nič, ale paš oda vakeren pal oda, so lenge na kempel, keren o pletki a thoven pes andre savoreste.

¹⁴ Vašoda kamav, hoj o terneder vdovi te džan romeste, te el len čhave a te starinen pes pal peskere khera, bo oleha na domukena olenge, save pre amende džan, hoj pal amende te vakeren namištes.

¹⁵ Bo varesave vdovi pes imar visarde pale a džan pal o satan.

¹⁶ Te varesava pačabnaskera džuvla hin vdova andre lakeri famelija, mi starinel pes pal late, hoj te na el pre khangeri o starišagos, hoj e khangeri pes te starinel pal ola, save hine čačes vdovi.

¹⁷ Le staršen, save mištes līdžan e khangeri, kempel te del duvar ajci pačiv; no mek buter olen, save služinēn andro lav a sikaven.

¹⁸ Bo hin pisimen:

“Na phandeha o piskos la gurunñake, savi kerel buči, hoj te na chal”; a: “Oda, ko kerel buči, zasogalinel (zaslužinel) peske o počñiben.”

¹⁹ Te tuke phenela vareko vareso pre oda, ko līdžal o zboros, ma prile oda, te nane duj abo trin švedki.

²⁰ Olen, save keren bini, karhin anglal savoredženende, hoj pes te daran the okla džene.

²¹ Mangav tut anglo Del, anglo Ježiš Kristus the anglo avrikidle añjela, hoj tut te likerēs pal kada a te aves čačipnaskero ko dojekh a te na kides tuke avri ñikaskeri sera.

²² Ma thov pre ñikaste sig o vasta a te na chal tut nič avrengere binenca. Liker tut, hoj te aves žužo.

²³ Ma pi imar ča pañi, ale pi po sikra the mol, bo furt tut dukhal e džombra a furt sal nasvalo.

²⁴ Varesave džengere bini igen dičhol a džan anglal lende pro sudos, aver džengere bini pes sikavela, sar ela o sudos.

²⁵ Avke the o lačhe skutki igen dičhol a te len mek na dičhol, našti ačhena garude.

6 Savore manuša, save hine otroka, mi presikaven peskere rajenge savori pačiv, hoj ñiko te na dikhel tele o lav le Devleskero the amaro sikaviben.

² Ola manuša, kas hin pačabnaskere raja, te na sikaven lenge frimeder pačiv vašoda, hoj hine phrala. Mi služinen lenge mek feder, bo ola, kaske služinen, hine pačabnaskere a on len kamen. Kada sikav a prikazin.

O falošno sikaviben the čačo barvalipen

³ Te vareko sikavel avres a na likerel pes le saste lavendar, so phendā amaro Raj o Ježiš Kristus, añi le sikavibnastar pal o pačabnaskero dživipen,

⁴ ajsi manuš peske pal peste but gondolinel a na džanel nič – furt pes kamel te vesekedinel a kerel pes pro lava. Olestar avel e zavist, o vesekedišagi, o džungale vakeribena the o nalačho gondolišagos pal aver

⁵ a furt pes vesekedinen o manuša, save namištes gondolinen a savenge chibalinel o čačipen, a save peske gondolinen, hoj o dživipen le Devleha hin o drom ko love.

⁶ He, hin le manušes but barvalipen olestar, hoj služinel le Devleske, te hino spokojno oleha, so les hin.

⁷ Bo nič peha pro svetos na andām a nič peha pal o svetos añi našti las,

⁸ ale te amen hin o chaben the o uraviben, oleha avas spokojne.

⁹ Ola, save kamen te barvalol, peren andro pokušeñje, andre pasca the andro but nagodaver the nalače žadosci, so doanen le manušen andro meriben a zñičinen len.

¹⁰ Bo o kamiben ko love hin o koreñis savore nalačipnaske. Varesave džene andre oda pele, odgele le pačabnastar a kerde korkore peske but dukha.

Te marel pes o lačno mariben

¹¹ Ale tu, manušeja le Devleskero, denaš kajse vecendar a dža pal oda, so hin čačipnaskero, pal o dživipen, so hin le Devleske pre dzeka, pal o pačaben, kamiben the avrilikeriben a hoj te el kovlo ke aver džene.

¹² Mar tut o lačno pačabnaskero mariben a chude mištes o večno dživipen, andre savo salas vičimen akor, sar phendal o lačno viznañje anglo but švedki.

¹³ Prikazinav tuke anglo Del, savo del savoreske o dživipen, the anglo Ježiš Kristus, savo phenda avri o lačno viznañje anglo Pontsko Pilat:

¹⁴ Doliker oda, so tuke phendom pačivalones the žužes, medik pes na sikavela amaro Raj o Ježiš Kristus.

¹⁵ Ov pes sikavela andro časos, so diña o Del, savo hi-no korkoro požehñimen Raj, o Kralis le kralengero the o Raj le rajengero.

¹⁶ Jekh ov, o Del, šoha (ñikda) na merel a bešel andro svetlos, kaj ñiko našti džal; ñisavo manuš les šoha na dikhla a añi les našti dikhel. Leske mi džal e pačiv the e večno zor! Amen.

¹⁷ Le barvalenge andre kada svetos phen, hoj pes te na lidžan upre a te na pes muken pro barvalipen, so nane isto, ale hoj len te el o užaripen (nadej) pro džido Del, savo amen del barvales sa, so amenge kempel pro bachtalo dživipen.

¹⁸ Prikazin lenge, hoj te keren o lačhipen, te barvalon andro lačne skutki, te aven ščire a te džanen pes te rozulavel avrenca.

¹⁹ Kavke peske skidena o barvalipen, so hin o lačno zaklados andre oda časos, so avela, hoj te dochuden oda čačo dživipen.

²⁰ Timoteus, doliker oda, so tuke sas dino le Devlestar. Obdža a ma šun olen, save vakeren o bijedevleskere diline lava a phenen pre ola lava, hoj oda hin o prindžaripen.

²¹ Oda nalačno sikaviben zachudla varesave dženen a našade peskero pačaben.

O lačhipen (milost) tumenca!

Amen.

2. TIMOTEOSKE

O pozdravos

1 Le Pavlostar, savo hin o apoštolos le Ježišoskero Kristoskero le Devleskera volatar, savo hin bičhado te vakerel pal o dživipen andro Ježiš Kristus, pal savo angloda diña lav,

² Le Timoteoske, mire čhaske, saves kamav: Mi del tut o Del, o Dad, the o Ježiš Kristus, amaro Raj, o lačhipen (milost), o smirom the o lačhejileskeriben.

O pačivaliben andro evaňjelium

³ Palikerav le Devleske, saveske služinav andral o žužo jilo avke sar the mire dada, sar rat-džives andre mire mangipena na preačhav te gondolinel pre tu.

⁴ Na bisterav pre tire apsa a kamav tut te dikhel, hoj te avav pherardo le radišagoha.

⁵ Leperav mange pre tiro žužo pačaben, so sas ešeb (peršo) andre tiri baba Loida the andre tiri daj Eunika, no pačav oleske, hoj the andre tu.

⁶ Vašoda tuke leperav: Rozbarar le Devleskero daros, so hin andre tu akorestar, sar pre tu thođom mire vasta.

⁷ Bo o Del amen na diña darandutno duchos, ale Duchos, savo amen zorařarel a del kamiben the gođaveripen.

⁸ Vašoda tut ma ladža vaš o svedectvo le Rajeskero, aňi vaš ma, hoj bešav vaš leske andre bertena, ale jekhetane manca zlidža o cerpišagos vaš o evaňjelium andre zor le Devleskeri.

⁹ O Del amen zachraňidňa a vičindňa, hoj te avas leskere sentna manuša, na vaš amare skutki, ale pal leskero planos the lačhipen (milost), so amenge diňo andro Ježiš Kristus, kanastar hino časos,

¹⁰ so pes sikađa akana, sar pes sikađa amaro Spasitelis, o Ježiš Kristus. Ov zňičindňa o meriben a prekal o evaňjelium andňa pro svetlos o večno dživipen.

¹¹ Me somas ačhodo prekal kada evaňjelium sar o apoštolos, kazatelis the učitelis.

¹² Vašoda the cerpinav, ale na ladžav man, bo džanav, kaske pačandilom; a pačav, hoj les hin zor dži andre oda Džives te dolikerel oda, so mange sas dino.

¹³ Liker tut mištes ole saste lavendar, so mandar šundal, a mi el tuke sar o priklados andro pačaben the kamiben andro Ježiš Kristus.

¹⁴ Oda lačhipen, so amenge sas dino, doliker le Sentne Duchoskera zoraha, savo dživel andre amende.

¹⁵ Džanes, hoj pes mandar visarde savore, save hine andre Azija; maškar lende hin the o Fygelos the o Her-mogenes.

¹⁶ Mi el o Raj lačhejileskero ke Oneziforoskero kher, bo buterval man zorařarđa a na ladžalas pes vaš ma, hoj som andre bertena.

¹⁷ Ale sar avla andro foros Rim, igen man rodelas a arakhla man.

¹⁸ Mi del leske o Raj, hoj te arakhel o lačhejileskeriben le Rajestar andre oda Džives. Tu džanes nekfeder, keci pašal mande kerelas andro Efezus.

O lačno slugadis le Ježišoskero

2 Avke tu, čhavo miro, av zoralo andre oda lačhipen (milost), so amen hin andro Ježiš Kristus.

² Oda, so šundal mandar anglo but švedki, de avre pačivale manušenge, save džanena te sikavel the avren.

³ Zlidža manca o pharipen sar lačno slugadis le Ježišoskero Kristoskero.

⁴ Nisavo slugadis, savo džal andro mariben a kamel te el pre dzeka peskere veliteliske, pes na mišinel andre aver buča.

⁵ Oda, ko denašel, našti ňerinel (zvitazinel) e cena, te na dolikerela o pravidla.

⁶ O manuš, savo kerel phares buči pre maľa, šaj ešebno (peršo) lel andral o ulipen (e žatva).

⁷ Gondolin pal oda, so vakerav. O Raj tuke dela savoro te ačhalol.

⁸ Ma bister pro Ježiš Kristus, le Davidoskero čhavo, savo uštila andral o meriben, avke sar me vakerav andre miro evaňjelium.

⁹ Vaš oda evaňjelium cerpinav avke, hoj som phandlo le lancenca sar živaňis, ale o Lav le Devleskero nane zaphandlo.

¹⁰ Vašoda zlidžav savoro, vaš o avrikidle manuša, bo kamav, hoj the on te dochuden o spaseňje andro Ježiš Kristus the e večno slava.

¹¹ Čačipnaskere hin kala lava:

“Te leha jekhetane muľam, jekhetane leha the dživaha;

¹² te likeraha avri, jekhetane leha the kralinaha;

te les amen zaprinaha, the ov amen zaprinela;

¹³ te amen na sam verna,

ov ačhel verno furt, bo našti pes korkoro zaprinel.”

O lačno robotnikos

¹⁴ Kada lenge leper a mang len anglo Del, hoj pes te na vesekedinen pro lava, se oda nane pre nisoste lačno a musarel olen, save oda šunen.

¹⁵ Ker sa prekal oda, hoj tut te sikaves anglo Del sar manuš, savo pes na mušinel te ladžal vaš peskeri buči a savo mištes vakerel o čačipnaskero lav avke, sar kampil.

¹⁶ Liker tut dur le bijedevleskere the diline lavendar, bo kajse lava lidžan le manušen dur le Devlestar

¹⁷ a lengere lava rozdžana a barona sar e rakovina. Lendar hine the o Hymeneos the o Filetos.

¹⁸ Kala džene odgele dur le čačipnastar, sar vakeren, hoj o mule imar uštile andral o meriben a kaleha musaren varekaske o pačaben.

¹⁹ Ale o zoralo zaklados le Devleskero ačhel a hino za pečatimen kale lavenca: "O Raj džanel olen, save hine leskere"; a: "Mi oddžal le nalačhipnastar sako, ko lel o nav le Rajeskero!"

²⁰ Andro baro kher nane ča somnakune the rupune čare, ale the kaštune the čhikakere; oda jekh pre pačiv, ale dujte nane pre pačiv.

²¹ Te pes vareko obžuzarela ole vecendar, ela sar o čaro pre pačiv, sentno, so anel e chasna le Rajeske a hino pririchtimen ke dojekh lačni buči.

²² Ale le ternikane žadoscendar denaš het a dža pal oda, so hin čačipnaskero, pal o pačaben, kamiben the smirom jekhetane olenca, save andral o žužo jilo vičinen pro Raj.

²³ Ale o diline the nagodaver phučibena odmar, se džanes, hoj ole lavendar aven ča o vesekedišagi.

²⁴ Le Rajeskere slugaske pes na kampil te vesekedinel, ale kampil leske te el lačno ke sakoneste. Mušinel te džanel te sikavel a te zlidžal the o nalačno.

²⁵ Mušinel te džanel šukares the polokes te dovakerel olenge, save pre leste odvakeren, bo talam lenge o Del šaj del, hoj pes te visaren a te prindžaren o čačipen.

²⁶ Avke avena ke godi a denašena andral e bengeskeri pasca, andre savi sas zachudle, hoj te keren leskeri voľa.

Pal o manuša andro posledna dživesa

3 Ale kada te džanes, hoj andro posledna dživesa avena phare časi.

² Bo o manuša rado dikhena ča pes korkoren, igen kamena o love a ena lašarde the barikane; namištes vakerena pal aver, na šunena le dajen le daden, na palikerna a ena bijedevleskere,

³ ena bi o kamiben a sar bi o jilo, ena pletkošne a na džanena pes te zlikerel, no ena igen dzive a narado dikhena o lačhipen,

⁴ ena zradci, ena splašimen a igen pes lidžana upre. Radeder dikhena o mulatošno dživipen sar le Devles.

⁵ Kerena pestar, hoj hine pačabnaskere, ale e zor le pačabnaskeri na prindžaren. Chrašin tut kajse manušendar.

⁶ Bo varesave lendar džan andro khera a diliňaren andre le slabe džuvlen, saven hin but bini a hine li-gende všelijake žadoscenca;

⁷ džuvla, save furt siklon, ale šoha (ňikda) našti prindžaren o čačipen.

⁸ Sar o Jannes the o Jambres džanas pro Mojžiš, avke the kala džene džan pro čačipen, bo hin lenge o gondolišagos musardo a nane presikade andro pačaben.

⁹ Ale imar na džana dureder anglal, bo lengero diliňipen dikhena savore, avke sar pes sikača o diliňipen ole manušengero.

O posledna prikazaňja le Timoteoske

¹⁰ Ale tu pes mištes likerahas mire sikavibnastar a kerehas avke sar me andre miro dživipen, bo tu dikhehas miro pačaben, zlikeriben, kamiben the avrilikeriben,

¹¹ the oda, sar pre mande o manuša džanas. Dikhehas the o pharipena, so man sas andre Antiochija, Ikonija the andre Listra. Tu the džanes, sar igen pre mande o manuša džanas a soha pregelom. No andral savoreste man o Del iľa avri.

¹² A o manuša džana the pre savorende, save kamen te dživel o sentno dživipen le Ježišoha Kristoha.

¹³ Ale o nalače manuša the o podvodnika džana furt dureder andro nalačhipen. Diliňarena andre le manušen a the korkore ena andre diliňarde.

¹⁴ Ale tu ačh andre oda, so sikliľal, the andre oda, so pačandiľal, se džanes, kastar oda sikliľal.

¹⁵ Bo imar ciknovarestar prindžares le Devleskere lava, so tut den godi pre oda, hoj te aves zachraňimen le pačabnaha andro Ježiš Kristus.

¹⁶ Sa, so hin pisimen andre le Devleskero lav, avel andral le Devleskero muj a hino lačno pre oda, hoj le manušes te sikavel, te dovakerel andro dživipen, te karhinel a te bararel avri, hoj te prindžarel o čačipen,

¹⁷ hoj o manuš le Devleskero te el pririchtimen the vizbrojimen pre dojekh lačni buči.

4 Igen tut mangav anglo Del the anglo Ježiš Kristus, savo sudzinela le džiden the le mulen, sar avela leskero krališagos:

² Av pririchtimen te vakerel o Lav le manušenge andro lačno the andro nalačno časos, dovaker lenge, karhin, podhazde, sikav savore avrilikeribnaha.

³ Bo avela ajsos časos, hoj o manuša na zlidžana o čačo sikaviben, ale rodena peske le učitelēn, save len sikavena oda, so on kamena te šunel.

⁴ A visarena peskere kana le čačipnastar ko paramisa,

⁵ ale tu av strižbo andre savoreste, zliker savoro pharipen, ker e buči sar o evaňjelistas a doker mištes tiri buči.

⁶ Bo me som imar obetimen a imar avľa miro časos, hoj te džav pal kada svetos.

⁷ Maravas man mištes vaš o čačipen, o denašiben do-denašlom, o pačaben dolikerdom.

⁸ Imar mange hin pririchtimen o čačipnaskero počiňiben, e koruna, so man dela andre oda Džives o

Raj, o čačipnaskero Sudcas – no, na ča man, ale the savoren, save užaren kamibnaha pre leste, sar ov avela.

O lava le Timoteoske

⁹ Ker sa prekal oda, hoj te aves sig pal ma.

¹⁰ O Demas man omukľa, bo zakamľa pes andre kada svetos a geľa andre Tesalonika. O Krescens geľa andre Galacija a o Titus andre Dalmacija.

¹¹ Ča o Lukaš hino manca. An tuha le Marek, bo the ov mange but pomožinel andre buči.

¹² Le Tichikus bičhađom andro Efezus.

¹³ Sar aveha, an tuha o plaštós, so mukľom andre Troada ko Karpos. An tuha the o ľila, ale mek buter o zvitki, so sas pisimen pre cipa.

¹⁴ O kovačis Alexander mange kerđa but nalačho. O Del leske dela pale vaš oda, so kerđa.

¹⁵ The tu chraňin tut lestar, bo igen džalas pre amare lava.

¹⁶ Sar ešebnovar (peršovar) ačhavas pro sudos vaš mange, na sas űiko manca, ale savore man omukle. Te na pes lenge oda rachinel.

¹⁷ Ale o Raj ačhelas paš ma a zoraľardľa man, hoj te el prekal mande vakerdo o evaňjelium a hoj les te šunen savore narodi. Somas avricirdlo andral o piskos le levoske.

¹⁸ O Raj man the cirdela avri andral savoro nalačhipen a zachraňinela man a lela andre peskero űeboskero kraľišagos. Leske mi džal e slava pro furt! Amen.

¹⁹ Pozdravin la Priska, le Akvilas the le Onezi-foroskero kher.

²⁰ O Erastos ačhiľa andro Korint. Le Trofimus mukľom nasvales andro foros Miletus.

²¹ Ker sa, hoj te aves mek anglo jevend. Pozdravinel tut o Eubulos, o Pudens, o Linus, e Klaudija the savore phrala.

²² O Raj mi el tire duchoha. Le Devleskero lačhipen (milost) mi el tumenca!

Amen.

TITOSKE

O pozdravi

1 Pisinav me o Pavol, o služobnikos le Devleskero the o apoštolos le Ježišoskero Kristoskero, savo somas bičhado, hoj te vakerav pal o pačaben olenge, kas o Del avri kidlã, a te sikavav len te prindžarel o čačipen, so len lidžal andro pobožno dživipen

² the užaripen (nadej) pro večno dživipen, pal savo o čačipnaskero Del amen diña lav mek sigeder, sar sas stvorimen o svetos.

³ Andre peskero časos o Del amaro Spasitelis oda lav sikađa prekal oda, hoj mange les diña te kazinel.

⁴ Pisinav le Titoske, mire čače čhaske, andre amaro jekhetano pačaben: Mi del tut o Del o Dad the o Ježiš Kristus, amaro Spasitelis, o smirom the o lačhipen (milost).

Le Titoskeri buči pre Kreta

⁵ Vašoda tut muklòm pre Kreta, hoj ode te prikeres oda, so mek kempel, a hoj andre savore fori te ačhaves le staršen, avke sar tuke oda phendòm.

⁶ O manuš šaj el o starši, te nane pre leste nič nalačo te phenel a hin les jekh romni a leskere čhave pačan, ale nane ajse, pal save vakeren, hoj hine rozmukle a na šunen.

⁷ Bo oda, ko lidžal e khangeri, hino sar o spravcas le Devleskero a mušinel te dživel avke, hoj pre leste nane so te phenel. Našti el ajso, savo pes lidžal upre, aňi sig chofisaľol, aňi pijakos, aňi oda, ko kerel ča furt pal peskero, abo ko izdral pal o love.

⁸ Ale mi el ajso, savo prilel le hoscen, kamel o lačhipen, džanel pes te zlikerel a hino godaver, čačipnaskero a sentno.

⁹ Mušinel pes te likerel le čačipnaskere lavestar amare sikavibnastar, a te džanel te zoraľarel le manušen andro lačo sikaviben a te prikerel olen, save odvakeren pre oda sikaviben.

¹⁰ Bo hin but ajse, save pes na podden: But vakeren a diliňaren andre o goda, a oda keren nekbuter ola le Židendar.

¹¹ Lenge kempel te phandel o muja, bo cale fameliji maren tele pal o čačo drom, bo sikaven oda, so na kempel, a keren oda bi e ladž vaš o love.

¹² Jekh lengero prorokos lendar phenda: "O Kreťana hine furt klamara, o džungale džviri a stari-nen pes ča pal peskere džombra."

¹³ Kada, so pre lende phenen, hin čačipen. Vašoda lenge zoraha dovaker, hoj te sastón avri andro pačaben,

¹⁴ te na pes likerem le Židovike paramisendar the le prikazaňendar, so vakeren o manuša, save pes odvisarde le čačipnastar.

¹⁵ Le žuženge hin savoro žužo. Ale le melalenge the olenge, save na pačan, nane nič žužo a meľardĩ hin the lengeri godĩ the lengero svedomje.

¹⁶ On phenen, hoj prindžaren le Devles, ale oleha, so keren, sikaven, hoj les na prindžaren. Hine džungale, na šunen a andre nisavo lačhipen nane presikade.

O sasto sikaviben

2 Ale tu, Titus, vaker oda, so kempel andro sasto sikaviben.

² O phureder murša mi en strižbe, pačivalo, godaver, saste andro pačaben, kamiben the avrilikeriben.

³ A the o phureder džuvľa pes mi likerem avke, sar kempel le pobožne manušenge te dživel, te na vakeren o pletki, te na aven otrokiňi la moľake. Mi sikaven oda, so hin lačo,

⁴ a mi den le ternedere džuvľen godĩ, hoj te kamen peskere romen the peskere čhaven.

⁵ O terneder džuvľa mi en godaver the pačivale, mi starinen pes pal peskere khera, mi en lače a mi podden pes peskere romenge, hoj ñikas te na el so te phenel pro Lav le Devleskero.

⁶ A le terneder muršenge tiš dovaker, hoj te aven godaver andre savoreste.

⁷ Tu korkoro lenge presikav andre savoreste, sar kempel te kerel o lačhipen. Oda, so sikaves, mi el pačivalo the lačo.

⁸ Oda, so len sikaves, mi en čače lava, pre save ñiko našti nič phenela, hoj pes te ladžan ola, save pre tumende džan, bo na ela len pre tumende so te phenel.

⁹ O sluhi pes andre savoreste mi podden peskere rajenge, hoj lenge te en pre dzeka. Te na odphenen lenge

¹⁰ a te na čoren lendar, ale mi presikaven lenge andre savoreste o pačivaliben, hoj savoreha te šukaľaren o sikaviben pal o Del, amaro Spasitelis.

¹¹ Bo o Del sikađa savore manušenge peskero lačhipen (milost), so len šaj spasinel.

¹² Oda lačhipen le Devleskero amen sikavel, hoj te das o bijedevleskeriben the le svetoskere žadosci pestar het a pre kada svetos te dživas andro godaveripen, čačipen the sentňi dar anglo Del,

¹³ medik užaras pre oda bachtalo Džives – amaro užaripen (nađej) – sar pes sikavela e slava amare bare Devleskeri the le Spasiteliskeri, le Ježišoskeri Kristoskeri.

¹⁴ Ov diña korkoro pes vaš amenge, hoj amen te cinel avri andral savoro nalačhipen, a žužardā peske amen, hoj te avas leskere manuša, save igen kamen te kerel o lačhipen.

¹⁵ Kada len sikav, dovaker lenge a phen lenge pre godi savora autoritaha. Ma domuk, hoj tut vareko te dikhel tele.

Te šunel le autoriten

3 Leper le manušenge, hoj pes te podden le vladareng the autoritenge a te šunen len a mi en pririchtimen te kerel savore lačhe veci.

² Phen lenge, hoj pre űikaste te na vakeren pletki a te na pes vesekedinen, ale mi aven kovlejileskere a mi presikaven o lačhipen savore manušenge.

³ Bo the amen samas varekana nagodāver a na šunahas le Devles. Bludzinahas a samas otroka le chocsave žadoscenge the rozkošenge; dživahas andre cholī a zavidzinahas. Aver manuša amen narado dikhenas a the amen len.

⁴ Ale sar pes sikađa o lačhipen le Devleskero, amare Spasiteliskero, the leskero kamiben ko manuša,

⁵ ov amen zachrañinda. Oda na sas vaš űisave lačhe skutki, so amen kerđam, ale vašoda, bo ov hino lačhejileskero, a prekal o Sentno Duchos amen žužardā a kerđā, hoj pale te ulūvas (narodzinas pes) andro nevo dživipen.

⁶ Les o Del pre amende čhordā avri barvales prekal o Ježiš Kristus, amaro Spasitelīs,

⁷ hoj te avas čačipnaskere prekal leskero lačhipen (milost) a te chudas sar dēdiča o večno dživipen, pre savo pes zmukas the užaras.

⁸ Kada lav hin čačipen. A kamav, hoj te keres sa pre oda, hoj ola, save pačandīle andro Del, te avas oddine te kerel o lačhe skutki. Oda hin pro lačho the pre chasna le manušenge.

⁹ Ale obdža o diline phučibena the o vakeribena pal o rodokmeña, o vesekedišagi the o spričkišagi pal o zakonos, bo nane pre űisoste a na anen űisavi chasna.

¹⁰ Kajse manušeske, savo rozmarel e khangeri, phen pre godi jekhvar the duvar. Palīs tut leha te na chal buter űič.

¹¹ Tu džanes, hoj kajso manuš hino previsardo, kerel o bini a korkoro pes odsudzinel.

O prikazañja le Titoske

¹² Sar ke tu bičhavava le Artemas vaj le Tichikus, ker sa pre oda, hoj te aves pal ma andro Nikopolis, bo kamav ode te ačhel prekal o jevend.

¹³ Ker avke, sar nekfeder džanes, hoj te pomožines le pravņikoske le Zenaske the le Apolloske, hoj len te el sa, so lenge kempel pro drom.

¹⁴ The amare manuša mi siklōn te kerel o lačhe skutki ode, kaj kempel, hoj the on te anen chasna.

¹⁵ Pozdravinen tut savore, save hine manca. Pozdravin amare phralen andro pačaben, save amen kamen. Le Devleskero lačhipen (milost) mi el tumenca savorenca.

FILEMONOSKE

O pozdravos

1 O Pavol, o bertenošis vaš o Ježiš Kristus, the o phral o Timoteus pisinas le Filemonoske, saves igen kamas a savo amenca jekhetane kerel e buči.

² Pisinas the la pheňake la Apfijake the le Archipaske, savo amenca kerel jekhetane e buči, a the le zboroske, so pes zdžal andre tiro kher.

³ Mi del tumen o Del amaro Dad the o Raj o Ježiš Kristus o lačhipen (milost) the o smirom!

Le Filemonoskero kamiben the pačaben

⁴ Me palikerav mire Devleske furt, sar tut leperav andre mire modlitbi,

⁵ bo šunav pal o pačaben, so tut hin ko Ježiš amaro Raj the pal tiro kamiben ke savore pačabnaskere.

⁶ Modlinav man, hoj oda pačaben, so amen hin jekhetane, te zoralol andre tu a avke te prindžares savoro lačhipen, so amen hin andro Kristus.

⁷ Hin man igen baro radišagos tire kamibnastar, phrala miro, bo le Devleskere manuša chudle tutar e nevi zor andro jile.

Mangel vaš o Onezimus

⁸ Me tuke andro Kristus šmelones šaj rozkazindomas, hoj te kerel, so kempel,

⁹ ale vašoda, hoj tut kamav, mangav man tuke. Me, o Pavol, phureder manuš a akana the bertenošis vaš o Ježiš Kristus,

¹⁰ mangav tut vaš o Onezimus, savo ačhiľa miro duchovno čhavo andre bertena.

¹¹ Ov tuke varekana na sas pre chasna, ale akana hino the tuke the mange pre chasna.

¹² Bičhadom les pale ke tute a leha džal the miro jilo.

¹³ Kamľom mange les te mukel paš mande, hoj ov vaš tuke te kerel pašal mande, medik som andro lanci vaš o evaňjelium.

¹⁴ Ale na kamľom te kerel nič bijal oda, hoj te džanav, so pre oda tu phenes, bo na kamav pre tu te ispidel, ale kamav, hoj oda lačhipen te avel korkoro tire jilestar.

¹⁵ Talam tutar sikra odgeľa vašoda, hoj palis tuha te avel pro furt,

¹⁶ na sar otrokos, ale imar hino buter sar otrokos: sar lačo phral. Hino igen lačo mange, no mek buter tuke – the sar manuš, the sar phral andro Raj.

¹⁷ Te man likereres sar oles, ko tuha jekhetane kerel e buči, prile les avke sar man.

¹⁸ Te tuke kerđa vareso nalačo, abo te tuke kamel vareso, rachin oda mange.

¹⁹ Me, o Pavol, oda pisinav mire vasteha: Me počinava. Na kamav tuke te phenel, hoj mange kames mek the tut korkores.

²⁰ He, phrala, mi el man tutar chasna andro Raj. Ker mange radišagos andro jilo andro Kristus!

²¹ Pisindom oda avke, bo pačav, hoj sal šundo a kereha mek buter, sar tuke phendom.

²² A mek: Pririchtin mange o than pro soviben, bo pačav, hoj prekal tumare modlitbi o Del man dela tumenge pale.

O posledna lava

²³ Pozdravinel tut o Epafras, savo hino manca andre bertena vaš o Ježiš Kristus.

²⁴ Pozdravinen the ola, save jekhetane manca kerel e buči – o Marek, o Aristarchos, o Demas the o Lukaš.

²⁵ O lačhipen (milost) amare Rajeskero le Ježišoskero Kristoskero mi el tumare duchoha!

ŽIDENGE

O Del prevakerđa prekal peskero Čhavo

1 Varekana čirla o Del vakerelas ke amare dada buterval the but sposobenca prekal o proroka,
2 ale akana andre kala posledna dživesa prevakerđa prekal peskero Čhavo, saveha stvorinda sa, so hin pro ņebos the pre phuv, a ačhađa les sar d'edičos savoreske.

3 Le Devleskeri slava avel avri le Čhastar a hino ipen ajso sar o Del. Ov savoro likerel peskere zorale laveha. Sar dokerdā oda, hoj obžužardā le manušen le binendar, bešļa peske andro ņebos pal e čači (pravo) sera le Nekzoraledere Devleske.

O Čhavo hino bareder sar o aňjela

4 Ov ačhiľa bareder sar o aňjela, avke sar o nav, so les o Dad diňa, hin bareder sar lengero.

5 Se o Del šoha (ňikda) na phenda ņisave peskere aňjeloske:

"Tu sal miro Čhavo, adadžives ačhiľom tiro Dad."

A na phenda lenge:

"Me avava leskero Dad a ov ela miro Čhavo."

6 A sar o Del bičhađa andro svetos peskere jekhore Čhas, phenda:

"Savore aňjela mušinen anglal leste te bandol."

7 Pal o aňjela o Del phenel:

"Ov kerel peskere aňjelendar balvaja a peskere služobňikendar jagale jaga."

8 Ale pal o Čhavo phenda:

"Tiro tronos, ó, Devla, hino furt pro furt a kraliňeha čačipnaskere žezloha!"

9 Zakamlal tut andro čačipen a našti avri ačhes o nalačhipen, vašoda tut o Del, tiro Del, pomakhľa le olejoha pro radišagos buter sar olen, ko hine tuha."

10 Ov the phenda:

"Tu, Rajeja, anglal savoreste kerdal e phuv a tire vastenca kerdal o ņebos."

11 On našlona a sa phurona sar o uraviben, ale tu aveha furt.

12 Tu len zapačareha sar o plaštós a čerinena pes sar o gada, ale tu sal furt jekh a tire berša šoha na preačhena."

13 Se o Del na phenda ņisave aňjeloske:

"Beš tuke pal miri čači (pravo) sera, medik tuke na thovava tire ņeprijatelen tel o pindre."

14 Akor ko hine o aňjela? On savore hine o duchi, save služinen, a hine bičhade le Devlestar te služinel le manušenge, save prilena o spaseňje.

O baro spaseňje

2 Vašoda mušinas mek zoraleder te likerel oda, so šundam, hoj te na oddžas varekaj avrether.

2 Se o lav, so sas vakerdo prekal o aňjela, pes imar sikađa sar čačipen a sako, ko les na dolikerelas abo na šunelas, chudelas oda, so peske zasogalinelas (za-služinelas).

3 Akor, sar amen denašaha, te odčivaha kajso baro spaseňje? O Raj chudľa ešebno (peršo) te vakerel avri pal oda spaseňje a ola, save les šunde, amenge svedčinenas, hoj oda hin čačipen.

4 The o Del svedčinelas pal oda spaseňje avke, hoj kerelas všelijake zorale zazraki the znameňja a delas peskere Duchos avke, sar ov kamelas.

O Ježiš amen anel ko spaseňje

5 Bo o Del na diňa tel e zor le aňjelenge oda svetos, so avela a pal savo amen vakeras.

6 Vareko pal oda kavke svedčinelas andro Lav:
"So hino o manuš, hoj les leperes, abo o čhavo le manušeskero, hoj tut pal leste starines?"

7 Kerdal lestar pro sikra cikneder sar o aňjela, diňal les e slava the e pačiv sar koruna

8 a savoro thodāl tel leskere pindre."

Savore leske diňal a na mukľal nič, so leske na ulahas poddino. Ale akana mek na dikhas, hoj leske hin savoro poddino.

9 Akana dikhas, hoj o Ježiš – savo sas pro cikno časos kerdo cikneder sar o aňjela a muľa prekal o baro lačhipen (milost) le Devleskero vaš sakoneste – chudľa e slava the pačiv sar koruna vašoda, bo cerpinda the muľa.

10 Sas mištes, hoj o Del – ko stvorinda savoro a prekal kaste savoro hin – prekal o dukha kerdā dokonales Oles, kastar avel o spaseňje, hoj te lel but čhaven andre slava.

11 Bo the Ov, savo sentňarel le manušen, the on, save hine sentňardo, hine jekhe Dadestar. Vašoda pes o Ježiš na ladžal len te vičinel phralale,

12 sar phenel le Devleske:

"Vakerava pal tiro nav maškar o phrala a lašarava tut andre khangeri."

13 Pale phenel:

"Me man mukava pro Del."

A pale:

"Kade som le čhavenca, save man diňa o Del."

¹⁴ Sar le čhaven hin telos masestar the ratestar, avke the o Ježiš avla andre ajso telos sar manuš, hoj peskere meribnaha te zničinel le benges, saves sas zor upral o meriben.

¹⁵ Avke oslobodzindā olen, save calo peskero dživipen sas zaphandle sar otroka andre dar le meribnastar.

¹⁶ Se o Ježiš na avla te pomožinel le aňjelenge, ale le Abrahamoskere potomkenge,

¹⁷ vašoda mušindā te ačhel andre savoreste ajso sar leskere phrala, hoj te el lačhejileskero the verno Nekbareder Rašaj anglo Del, hoj len te cinel avri le binendar.

¹⁸ Akana, hoj korkoro cerpinelas, sar sas pokušimen, šaj pomožinel olenge, save hine pokušimen.

O Ježiš hino bareder sar o Mojžiš

3 Mire sentna phralale, save san vičimen le Devlestar, dikhen pro Ježiš – pro apoštolos the Nekbareder Rašaj amare pačabnaske.

² Ov hino verno Oleske, ko les andre oda ačhađa, avke sar o Mojžiš sas verno andre calo kher le Devleskero.

³ Le manušes, savo ačhavel o kher, hin bareder pačiv sar ole kheres, avke the o Ježiš peske zasogalinel (zaslužinel) bareder pačiv sar o Mojžiš.

⁴ Bo dojekh kher mušinel vareko te ačhavel a oda, ko ačhađa savoro, hin o Del.

⁵ The o Mojžiš sas verno andre calo kher le Devleskero sar služobňikos a svedčinelas pal o lava, so o Del pozneder kamla te vakerel.

⁶ Ale o Kristus hino verno sar o Čhavo upral leskero kher. A leskero kher sam amen, te dolikeraha zoraha o pačaben the užaripen (nađej), saveha pes lašaras.

O odpočinkos prekal le Devleskere manuša

⁷ Vašoda, avke sar phenel o Sentno Duchos:

“Adadžives, te šundanas Leskero hangos,

⁸ *ma phanden andre tumare jile, sar oda kerenas ola džene, save pes vzburinde andro džives, sar pokušinas le Devles pre pušta,*

⁹ *akor, sar tumare dada man furt probalinenas (skušinenas), choc saranda (40) berš dikhenas oda, so keravas.*

¹⁰ *Vašoda ačhilom cholamen pre oda pokoleňje a phendom: ‘Furt hine le jileha avrether a mire droma na prindžarde.’*

¹¹ *Avke andre choli diňom lav: ‘Čačes na džana andre miro odpočinkos!’”*

¹² Den pozora, phralale, hoj te na el varekas tumendar nalačo the napačabnaskero jilo a te na pes visarel le džide Devlestar.

¹³ Ale sako džives tumen zorařaren jekh avres, medik hin časos, so pes vičinel “adadžives”, hoj le klamišago-ha ňikaske o binos te na zaphandel andre o jilo.

¹⁴ Se amen keras e buči jekhetane le Kristoha, ale ča akor, te zoraha dolikeraha dži ostatkos oda pačaben, so amen sas anglunestar.

¹⁵ Hin phendo: *“Adadžives, te šundanas Leskero hangos, ma phanden andre tumare jile, sar oda kerenas ola džene, save pes vzburinde.”*

¹⁶ Ko sas ola manuša, save šunde le Devleskero hangos a vzburinde pes? Či na sas oda ipen ola džene, saven o Mojžiš ligenda avri andral o Egipt?

¹⁷ Pre kaste o Del chalas choli saranda (40) berš? Pro manuša, save kerenas o bini a lengere tela mule avri pre pušta.

¹⁸ Kaske o Del diňa lav, hoj na džana andre leskero odpočinkos? Či na olenge, save les na kamenas te šunel?

¹⁹ Avke dikhas, hoj našti gele andre, bo na pačanas.

4 Kampil amenge te del pozora, hoj te na vareko amendar zaačhel, medik likerel kada lav, so o Del amen diňa, hoj pes del te džal andre leskero odpočinkos.

² Se the amenge pes vakerelas o evaňjelium avke sar the lenge, ale lenge na pomožindā oda lav, so šunde, bo choc les šunde, na priile les pačabnaha.

³ Andro odpočinkos džas amen, save pačandilam, avke sar phendā:

“Avke andre choli diňom lav: ‘Čačes na džana andre miro odpočinkos!’”

Phendā oda, choc leskeri buči imar hiňi dokerdi akorestar, kanastar hin stvorimen o svetos,

⁴ bo pal o eftato džives hin varekaj pisimen kavke:

“O Del peske odpočovindā eftato džives savore peskere bučendar.”

⁵ A kade pale:

“Čačes na džana andre miro odpočinkos!”

⁶ Ola, save šunde ešebnovar (peršovar) o evaňjelium, na gele andro odpočinkos, bo les na kamenas te šunel. Avke hin ade aver džene, save šaj džan andre,

⁷ a o Del pale del aver džives a vičinel les “adadžives”, te pal o but berša phenel prekal o David, avke sar imar sas phendo:

“Adadžives, te šundanas Leskero hangos, ma phanden andre tumare jile!”

⁸ Bo te len o Jozua andahas andro odpočinkos, o Del imar na vakerdahas pal aver džives.

⁹ Avke mek ačhel o Šabbatoskero odpočinkos prekal le Devleskere manuša,

¹⁰ bo oda, ko geľa andre leskero odpočinkos, peske odpočovindā peskere bučendar, avke sar o Del peskerendar.

¹¹ Vašoda keras sa prekal oda, hoj te džas andre oda odpočinkos, hoj ňiko amendar te na doperel avke sar on, save les na kamenas te šunel.

¹² Bo o Lav le Devleskero hino džido the zoralo, ostreder sar e šabla, so čhinel pal soduj seri. Predžal dži ode, kaj pes rozulavel e duša le duchostar a o klubi le špikendar a sikavel oda, so peske gondolinas andro jilo a so kamas.

¹³ A nane nič stvorimen, so ulahas garudo anglal leste. Savoro hin le Devleske phundrado a sa dičhol anglo jakha Oleske, kaske jekhvar phenaha, sar dživahas, so kerahas a soske.

O Ježiš – o čačo Nekbareder Rašaj

¹⁴ Vašoda likeraz zoraha o pačaben, so viznavinas. Bo hin amen o Nekbareder Rašaj, savo geľa andro űebos dži paš o Del – o Ježiš, o Čhavo le Devleskero.

¹⁵ Bo nane amen Nekbareder Rašaj, savo na achalol amare slabišagenge, ale hin amen ajso, savo sas pokušimen andre savoreste avke sar amen, ale na kerđa űisavo binos.

¹⁶ Vašoda šaj avas pačabnaha anglo tronos le Devleskero, bo ode hin o lačhipen (milost). Ode chudaha o lačhejileskeriben a arakhaha o lačhipen (milost) ipen akor, sar amenge oda kampela.

5 Dojekhe nekbaredere rašas kidel avri o Del le manuendar a ačhavel les andre peskeri služba prekal o manuša, hoj te anel o dari the o obeti vaš o bini.

² Vašoda, hoj the les hin slabišagi, šaj el kovlejjleskero ke ola manuša, saven nane prindžaripen a hine odcircle avrether.

³ Vašoda ov mušinel te anel o obeti na ča vaš le manušengere bini, ale the vaš peskere.

⁴ űiko korkoro peske našti lel odi pačiv, bo ča o Del kidel avri le nekbareder rašaj, avke sar kidňa avri le Aron.

⁵ Avke aňi o Kristus peske na ila korkoro odi pačiv, hoj ačhela Nekbareder Rašaj, ale o Del leske phendā: *“Tu sal miro Čhavo, adadžives ačhilom tiro Dad.”*

⁶ A sar pre aver than phenel:

“Tu sal rašaj pro furt avke sar o Melchisedek.”

⁷ O Ježiš andre ola dživesa, sar dživelas pre phuv, le zorale hangoha the le apsenca anelas peskere mangipena the modlitbi Oleske, ko les šaj zachraňinda le meribnastar. A sas the avrišundo vašoda, bo sas poddino le Devleske.

⁸ Choc ov sas o Čhavo, prekal peskere cerpišagi sikliľa te šunel le Dades,

⁹ a vašoda, hoj ačhilā dokonalo, ov hin oda, kastar avel o večno spaseňje prekal savore, save les šunen,

¹⁰ a o Del pal leste phendā, hoj hino o Nekbareder Rašaj avke sar o Melchisedek.

Te ačhel andro pačaben

¹¹ Diňahas pes pal oda mek but te vakerel, ale phares oda hin te phenel avke, hoj te achalon, bo san leňive te šunel.

¹² Pal kajci časos tumen imar šaj ulanas učiteľa, ale pale tumenge kampil, hoj tumen vareko te sikavel ola ešebne zakladi le Devleskere lavendar. Bo mek furt san ajse, kaske kampil thud a na o zoralo chaben.

¹³ Bo kaske kampil thud, oda mek na achalol, so hin čačes lačo a so na, bo mek hino čhavoro.

¹⁴ O zoralo chaben hin prekal o dospele, save siklonas oleha, so pregele andro dživipen, te rozprindžarel, so hin lačo a so na.

6 Mukas akana ola ešebne čačipena, so sikliľam, a džas anglal andro dospelo sikaviben pal o Kristus. Na thovas pale o zakladi – o sikavibena pal o pokaňje andral o mule skutki, pal o pačaben andro Del,

² pal o bolipena, pal oda, sar pes thovel o vasta pro manuša, pal o uštiben andral o meriben the pal o večno sudos.

³ A the ada keraha, te amenge amaro Del domukela.

⁴ Bo ola, save omukle peskero pačaben našti aven pale ko pokaňje, ola, save imar sas varekana andre le Devleskero svetlos, koštoľinde o űeboskere dari a pri-ile le Sentne Duchostar,

⁵ a prindžarde o lačo lav le Devleskero a the o zora ole časoske, so avela,

⁶ a palis the avke odpele andral o pačaben. Olenge pes imar na del, hoj te aven pale ko pokaňje, bo on pale ukrižinen le Devleskere Čhas a anen les avri pre ladž.

⁷ O Del požehňinel odi phuv, so prilel furt o brišind a anel o ulipen, a del chasna olen, save pre late keren buči.

⁸ Ale te anel o koľaka the o kandre (o kraki), na mol nič a o Del pre late šaj del o košiben a pro ostatkos ela zlabardi.

⁹ Ale choc kavke vakeras, mire lačhe phralale, pal tumende pačas, hoj tumen san pre oda feder a san pašeder ko spaseňje.

¹⁰ Se o Del hino čačipnaskero a na bisterel pre tumari buči, aňi pre tumaro kamiben, so presikadān leskere naveske, sar služinenas le sentnenge a mek furt služinen.

¹¹ Ale amen igen kamas, hoj űiko tumendar te na preačhel te labol pal o Del, ale hoj peske oda te dolik-erel dži o ostatkos, hoj pes te ačhen ola veci, pre save pes tumen zmuken.

¹² Na kamas, hoj te ačhen leňive, ale hoj te aven ajse sar ola, save likerem avri a pačan, a oleha te dochuden oda, so tumenge o Del phendā.

O Del dofikerel peskere lava

¹³ Sar delas o Del le Abraham lav, na sas űiko bared-er, pre kaste ilahas vera, vašoda *ila vera korkoro pre peste.*

¹⁴ A phendā:

“Čačes tut igen but požehňinava a dava tut but potomken.”

¹⁵ O Abraham likerđa avri a dochudľa oda lav, so leske o Del phendā, hoj les dela.

¹⁶ Bo o manuša len vera pre varekaste, ko hin bared-er lendar, a e vera zaačhavel oda, pre soste pes našti dothovenas.

¹⁷ O Del paše thođa peskeri vera, bo kamľa te sikavel peskere manušenge, hoj na čerinela oda lav, so len diňa.

¹⁸ O Del našti klaminel! Kala duj veci, le Devleskero lav the leskeri vera, pes šoha (ňikda) na čerinena. Amen, save denašlam pes te garuvel paš o Del, las olestar bari zor, hoj pes mištes te chudel le užaripnashtar (nadejatar), so hin angle amende.

¹⁹ Oda užaripen hin prekal amaro dživipen sar e kotva, zoralo the isto, so džal prekal o pochtan le ňeboskere chamoskero dži andro Neksentneder Than.

²⁰ O Ježiš ode imar geľa anglal vaš amenge a ačhiľa o Nektbareder Rašaj pro furt avke sar o Melchisedek.

O Ježiš the o Melchisedek

7 Oda Melchisedek sas kralis andro foros Salem the rašaj le Nektbaredere Devleske. Sar o Abraham avelas pale andral o mariben, kaj domarđa štare (4) kralen, o Melchisedek geľa paš leste a požehňinda les.

² O Abraham les diňa đesiatka savorestar, so peske andľa andral o mariben. Leskero nav pes ešeb (peršo) prethovel "o Kralis le Čačipnaskero" a palis the "o Kralis le Salemoskero," so hin "o Kralis le Smiromoskero."

³ Nane pisimen, ko hino leskero dad či leskeri daj, ov hino bi o rodokmeňos a na džanel pes, aňi kana uliľa (pes narodzinda), aňi kana muľa, a sar o Čhavo le Devleskero ačhel rašaske pro furt.

⁴ Dikhen, savo baro hino: O Abraham, o dad amare narodoske, les diňa đesiatka savorestar, so peske andľa andral o mariben.

⁵ Le Leviskere čhavage, save prilen e rašajiko služba, sas prikazimen pal o zakonos te prilel o đesiatki le manušendar andral o Izrael – oda hin peskere manušendar – choc hine tiš o čhave le Abrahamostar.

⁶ Ale o Melchisedek, choc nane andral le Leviskero potomstvos, priiľa e đesiatka le Abrahamostar a požehňinda oles, kas o Del diňa o lava.

⁷ A džanas mištes, hoj o bareder požehňinel le ciknederes.

⁸ Ade anen o đesiatki le rašajenge, save meren, ale ode prilel o đesiatki o Melchisedek, pal savo hin svedectvo, hoj dživel.

⁹ Šaj te phenel, hoj prekal o Abraham tiš Levi diňa o đesiatki, choc korkoro đesiatki chudelas.

¹⁰ Se mek sas le Abrahamoske andro tēlos, sar avľa o Melchisedek ke leste.

¹¹ O zakonos sas dino le Izraelitenge prekal o Levitengere rašaja. Akana, te le Levitengere rašajiko služba ulahas dokonalo, avke le Aronoskeri rašajiko služba šaj ačhilahas a imar na kampľahas, hoj te avel aver rašaj, ajso sar o Melchisedek.

¹² Bo te pes čerinel o rašajipen, mušinel pes te čerinel the o zakonos.

¹³ A Oda, pal kaste pes akana vakerel, hino andral aver kmeňos, andral savo ňiko na služinelas paš o oltaris.

¹⁴ Se mištes džanas, hoj amaro Raj avel le Judaskere kmeňostar, no o Mojžiš šoha (ňikda) na phendľa, hoj o rašaj avela andral kada kmeňos.

¹⁵ A akana oda dikhas meksa feder, bo avľa aver rašaj, savo hin sar o Melchisedek.

¹⁶ Ov na ačhiľa rašaske prekal o prikazaňje le zakonoskero pal leskero rodokmeňos, ale prekal e zor le večno džživpnaskero.

¹⁷ Se pal leste hin pisimen:

"Tu sal rašaj pro furt avke sar o Melchisedek."

¹⁸ Oleha pes zrušinel o purano prikazaňje, bo hino slabo a nane pre chasna.

¹⁹ Se o zakonos našti kerđa ňikas dokonales. No akana amen hin feder užaripen (nadej), soha avas pašeder ko Del.

²⁰ A paš oda o Del diňa vera. Ole aver džene ačhile rašaja bi e vera,

²¹ ale sar o Ježiš ačhiľa rašaske, o Del diňa paše the e vera a phendľa leske:

"O Raj iľa vera a na lela oda pale: 'Tu sal rašaj pro furt.'"

²² A vašoda o Ježiš ačhiľa o ručitelis la feder zmluvake.

²³ Angloda sas but rašaja, bo o meriben lenge na domukelas te ačhel rašajenge pro furt,

²⁴ ale le Ježiš hin o rašajipen, so na predžal pre aver, bo dživel pro furt.

²⁵ Vašoda šaj dokonales zachraňinel olen, save aven ko Del prekal leste, bo dživel furt a šaj pes vaš lenge privakerel paš o Dad.

²⁶ Se oda the kampelas, hoj amen te el ajso Nektbareder Rašaj – sentno, bi o binos, bi e mel, ilo het le binošnendar, upre hazdlo a ačhado upral o ňebi.

²⁷ Leske na kampil sako džives te obetinel ešeb (peršo) vaš peskere bini a palis vaš le manušengere bini, avke sar oda keren o nektbareder rašaja. Se ov oda kerđa jekhvar a pro furt akor, sar obetinda pes korkores.

²⁸ Bo o zakonos ačhavel nektbareder rašajenge le manušen, save nane dokonale, ale e vera le Devleskeri, so avľa pal o zakonos, ačhavel le Čhas, savo hino dokonalo pro furt.

O Nektbareder Rašaj la neva zmluvake

8 Savorestar, pal soste vakeras, hin nekbuter kada: Hin amen ajso Nektbareder Rašaj, savo peske bešľa pal e čači (pravo) sera le Devleskere tronoske andro ňebos.

² Ov služinel sar o Nektbareder Rašaj andro Neksentneder Than, andro čačo Stanos, so ačhaďa o Raj, a na o manuš.

³ Dojekh nektbareder rašaj hino ačhado, hoj te anel o dari the o obeti, vašoda kampelas the leske vareso te obetinel.

⁴ Avke te ulahas pre phuv, aňi na ulahas rašaj, bo hin imar the ajse rašaja, save anen o dari pal o zakonos,

⁵ no on služinen andre ajso than, so ča dičhol avke sar oda, so hin andro ňebos, ale hino ča čiňos olestar. Vašoda, sar kamľa o Mojžiš te kerel o Stanos, phendľa leske o Del: *"Dikh, hoj te keres savoro pal o vzoros, so tute sas sikado pro verchos."*

⁶ No akana chudľa o Ježiš e rašajiko služba, so hiňi bareder sar lengeri, bo odi zmluva, so ov kerđa

maškar o Del the maškar o manuša, hiñi feder. Bo o lav, so o Del diña prekal odi zmluva, hin zoraleder.

⁷ Se te ulahas odi ešebno zmluva bi e chiba, ta akor na kampľahas e dujto.

⁸ Bo o Del lenge priphenel:

"Dikh, aven ajse dživesa, phenel o Raj, hoj kerava le Izraeloskere khereha the le Judaskere khereha e nevi zmluva.

⁹ Na ajsi zmluva, sar kerdom lengere dadenca andre oda džives, sar len ilom vastestar, hoj len te lav avri andral o Egipt, bo on na dolikerde miri zmluva a me len omuklom, phenel o Raj.

¹⁰ Kada hin e zmluva, so kerava le Izraeloskere khereha andre ola dživesa, so avena, phenel o Raj. Thovava mire zakoni andre lengeri godi a pisinava len pre lengere jile. Me avava lenger o Del a on ena mire manuša.

¹¹ A imar ñiko na mušinel te sikavel avres, añi o phral peskere phrales, le lavenca: 'Prindžar le Rajes!' Bo savore man prindžarena, le nekciknederestar dži o nekbarer,

¹² bo odrukava lenge o nalačhipen a imar buter lengere bini mange na leperava."

¹³ Sar vakerel pal e nevi zmluva, phenel, hoj e ešebno hiñi imar purañi a oda, so imar hin purano the phuro, na likerela but a sig našlola.

O lašariben pre phuv the andro ñebos

9 Andre ešebno zmluva sas o pravidla pre sentñi služba le Devleske a sas la pre phuv o Sentno Than.

² Sas kerdo o Stanos, so pes vičinelas o Sentno Than, a andre sas o momelaris the o skamind, kaj thovenas o mare anglo Del.

³ Pal o dujto pochtan sas o than, so pes vičinelas o Neksentneder Than,

⁴ a andre sas o somnakuno kađidloskero oltaris the e Zmluvakeri Archa, so sas obthodi pal savore seri le somnakaha a andre sas o somnakuno čaro la manaha, le Aronoskeri paca, so rozkvitñisalila, the o barune tabli la zmluvakere.

⁵ Upral e archa sas o cherubi la slavakere, so peskere kridli rozcirdle upral oda than, pre savo pes odmukel o bini. No akana na kampil te vakerel pal savore kala veci.

⁶ Sar oda savoro sas kerdo kavke, o rašaja džan furt andre ešebno than a ode služinen,

⁷ ale andre dujto than džal ča o nekbarerder rašaj jekhvar beršeste, no ča le rateha, so anel vaš peskere the le manušengere bini, so kerenas a na džanenas, hoj oda hin bini.

⁸ Oleha sikavel o Sentno Duchos, hoj nane phundrao o drom andro Neksentneder Than, medik ačhel o ešebno than.

⁹ Oda hin obrazis pre kada časos, so sikavel, hoj o dari the o obeti, so pes anen, našti keren dokonalo o jilo ñikaske, ko lašarel le Devles.

¹⁰ Bo oda hin ča pal o chaben, pijiben a sar pes te morel, so hin ča o avrone, telesne prikazañja, so likereren ča dži akor, medik na kerela o Del neve.

¹¹ Ale sar avľa o Kristus, avľa sar o Nekbarerder Rašaj ole lačhipnastar, so imar hino ade, prekal o bareder the dokonaleder Stanos, so na sas kerdo le manušeskere vasteha a nane andral kada svetos.

¹² Geľa korkoro peskere rateha – na le rateha le capendar vaj le gurumñorendar – jekhvar a pro furt andro Neksentneder Than a avke dochudľa o večno dživipen prekal amende.

¹³ O rat le capengero the le bikengero a o prachos le labarde gurumñorendar sentñarel olen, save hine melale a žužarel len pro telos.

¹⁴ Te oda hin avke, keci buter o rat le Kristoskero amenge žužarela o svedomje andral o mule skutki! Bo o Ježiš anda pes korkores sar dokonalo obeta le Devleske prekal e zor le večne Duchoskeri a avke šaj služinas le džide Devleske.

¹⁵ Vašoda kerđa o Kristus nevi zmluva maškar o manuša the maškar o Del, hoj savore, save sas vičimen le Devlestar, te chuden o večno dedictvos, pal savo len o Del diña lav – bo o Kristus muľa, hoj len te cinel avri le binendar, so kerde, medik sas e ešebno zmluva.

¹⁶ Ode, kaj hin pisimen e posledno voľa, pes mušinel te presikavel, hoj imar muľa oda, ko les pisinda.

¹⁷ Bo e posledno voľa nane pre ñisoste, medik dživel oda, ko la kerđa.

¹⁸ Vašoda añi e ešebno zmluva na sas kerđi bi o rat.

¹⁹ Sar o Mojžiš diña te džanel savore manušenge savore prikazañja pal o zakonos, iľa o rat le capengero the le bikengero a mišinda le pañeha, palis iľa e ľoli vlna the o konaricis pal o izopos a pokropinda o zvitkos the savore manušen

²⁰ a phenda: "Kada hin o rat la zmluvakero, so o Del tumenge prikazinda."

²¹ Avke pokropinda le rateha o Stanos the savore veci, soha pes kerelas e služba le Devleske.

²² Andro zakonos pes maj savoro obžučarel le rateha a te nane avričhordo o rat, nane odmukle o bini.

Le Ježišoskeri obeta odlel o binos

²³ Kampelas kavke te obžučarel ola veci, so hine ča obraza le ñeboskere, ale o ñeboskere veci kampil te obžučarel federe obetenca sar kala.

²⁴ Se o Kristus na geľa andro Sentno than, so sas kerdo le vasteha a hino ča o angluno obrazis le čačeske, ale ov geľa dži andro ñebos, hoj pes akana te sikavel anglo Del vaš amenge.

²⁵ Añi na vašoda, hoj pes buterval te obetinel, avke sar o nekbarerder rašaj džal sako berš andro Neksentneder Than le rateha, so nane leskero.

²⁶ Bo te sas avke, o Ježiš mušindaahas buterval te cerpinel, kanastar sas stvorimen o svetos. Ale ov pes sikađa akana andro posledna časi (idei) jekhvar a pro furt, hoj pes te obetinel a te žičinel o binos.

²⁷ Avke sar hin dino le manušenge jekhvar te merel a palis ela o sudos,

²⁸ avke the o Kristus pes jekhvar obetinda, hoj te odlel o bini but manuŝengere a sar pes dujtovar sikavela, oda imar na ela vašoda, hoj te odlel o binos, ale hoj te spasinel olen, save pre leste užaren.

10 O zakonos hino ča čiños ole lačhipnaskero, so avela, ale nane calo the čačo obrazis ole venge. Vašoda našti ole jekhe obetenca, so pes anel furt berš pre beršeste, te kerel dokonalen olen, save aven ko Del.

² Te o manuša, save lašaren le Devles, ulehas jekhvar a pro furt obžužarde peskere binendar, ta imar na šun-dehas andro jilo, hoj hine binošna, a preačhilehas imar te obetinel.

³ Ale ipen o obeti leperen berš pre beršeste le manuŝenge o bini.

⁴ Bo o rat le capengero the le bikengero šoha (ňikda) našti odlel o bini.

⁵ Vašoda, sar o Kristus avelas pro svetos, phenda: *"Obeti aňi dari na kamehas, ale diňal man telos."*

⁶ *Na sas tuke pre dzeka o labarde obeti, aňi o obeti vaš o binos.*

⁷ *Akor phendom: 'Dikh, avav te kerel oda, so tu kames, ó, Devla, avke sar pal ma hin pisimen andro zakonoskero zvitkos.'*

⁸ Ešeb phenel:

"Aňi obeti, aňi o dari, aňi o labarde obeti, aňi o obeti vaš o binos na kamehas a na sas tuke pre dzeka," – choc pes kala obeti anen avke, sar oda phenel o zakonos.

⁹ Palis phenda:

"Kade som, avlom te kerel, ó, Devla, oda, so tu kames."

Prephagel o ešebno, hoj te ačhavel o dujto.

¹⁰ Vašoda prekal le Devleskeri voľa sam amen savore obžužarde le binendar prekal e teloskeri obeta le Ježišoskeri Kristoskeri jekhvar pro furt.

¹¹ Dojekh Židoviko rašaj ačhel sako džives te služinel a anel buterval furt pale ola obeti, so šoha našti odlen o bini.

¹² No o Kristus anda jekh obeta vaš o bini pro furt a bešla peske pal e čači (pravo) sera le Devleske.

¹³ Akorestar užarel, medik leske na ena thode leskere ňeprijateľa tel o pindre.

¹⁴ Bo jekha obetaha kerđa dokonalen furt pro furt olen, save hine oleha sentňarde.

¹⁵ A the o Sentno Duchos amenge svedčinel pal oda, sar phenel:

¹⁶ *"Kada hin e zmluva, so lenca kerava pal ola dživesa, phenel o Raj. Thovava mire zakoni andre lengere jile a pisinava len andre lengere goda;*

¹⁷ *a pre lengere bini the nalačhipena mange imar buter na leperava."*

¹⁸ Te hin kavke odmukle o bini, na kempel imar buter vaše obeti.

Te džal pašeder ko Del

¹⁹ Phralale, akana šaj džas prekal o rat le Ježišoskero bi e dar andro Neksentneder Than,

²⁰ pal o nevo the džido drom, so amenge otkerđa prekal o pochtan, so hin leskero telos

²¹ a vašoda, hoj amen hin Nektbareder Rašaj upral o kher le Devleskero,

²² aven, džas paš o Del čače jileha, savore pačabnaha – le jilenca, so hine obžužarde andral o nalačo sve-domje, the le telenca, so hine thode (omorde) le žuže paňeha.

²³ Aven, chudas pes zoraha le užaripnastar (nade-jatar), so viznavinas, bo Ov, savo diňa lav, hino verno.

²⁴ Starinas pes jekh pal aver, hoj jekh avres te povzbudzinas andro kamiben the lače skutki.

²⁵ Na omukas amari khangeri, avke sar peske oda vareko sikliľa te kerel, ale zorafaren jekh avres buter a buter, se dikhen, hoj oda Džives le Rajeskero hino pašeder.

²⁶ Bo te amen kamas te dživel andro binos pal oda, sar imar prindžardam o čačipen, ta akor imar nane aver obeta vaš amare bini,

²⁷ ale šaj ča užaren andre dar o sudos the e bari jag, so zňičinela olen, save pes ačhaven le Devleske.

²⁸ Te vareko na dolikerela le Mojžišoskero zakonos a ela pre leste duj abo trin švedki, mušinel te merel a našti leske presikaven o lačhipen.

²⁹ No akana, gondofinen: Te vareko uštarel pro Čhavo le Devleskero a dikhel tele o rat la zmluvakero, so les obžužarda, a dophenel le lačhipnaskere (milostakere) Duchoske, keci bareder trestos peske zasogaľinel (zaslužinel)?

³⁰ Se prindžaras oles, ko phenda:

"Me dava pale, me počinava."

A pale phenda:

"O Raj sudzinela peskere manušen."

³¹ Igen bari dar hin te perel andro vasta le džide Devleske!

³² Ma bisteren pre ola ešebne (perše) dživesa, sar avľan andro svetlos a sar pregeľan baro mariben andro cerpišagi.

³³ Ande tumen andre ladž anglal o manuša a namištes tumenca kerenas a palis pre aver dživesa zľidžanas o pharipena avrenca, save cerpinenas avke sar tumen.

³⁴ Cerpinenas jekhetane le bertenošenca a sar tumenge ile o barvalipen, radišagoha oda zľidžanas, bo džanenas, hoj tumen hin vareso feder, so ačhela pro furt.

³⁵ Vašoda džan durededer bi e dar, bo te likerena avri, užarel tumen baro počihiben.

³⁶ Kempel tumenge te likerel avri, hoj te keren oda, so kamel o Del, hoj te chuden lestar o dedictvos.

³⁷ Bo hin pisimen:

"Imar ča sikra, sikrica a avela Oda, kaske kempel te av-el, a na avela nasig."

³⁸ *Miro čačipnaskero manuš dživela le pačabnastar, ale te džala palal, na ela mange pre dzeka."*

³⁹ Ale amen na sam o manuša, save džan palal a meren, ale o manuša, save pačas, a sam spasimen.

Pal o pačaben

11 O pačaben hin te avel peske isto pal ola veci, pre save pes mukas, a te avel presvedčimen pal ola veci, so pes na dikhel.

² Amare phure dada sas le pačabnaha pre dzeka le Devleske.

³ Le pačabnaha achaľuvas, hoj o űebos the e phuv sas stvorimen le Devleskere laveha avke, hoj olestar, so na dičhol, hino kerdo oda, so dičhol.

⁴ Le pačabnaha anda o Abel le Devleske feder obeta sar o Kain. Prekal o pačaben chudľa o svedectvo, hoj hino čačipnaskero, bo leskere dari sas le Devleske pre dzeka. A choc hino imar mulo, furt vakerel prekal o pačaben.

⁵ Le pačabnaha sas o Enoch ilo upre, hoj te na dikhel o meriben. Na arakhle les, bo o Del les iľa upre. Mek angloda, sar sas upre ilo, sas svedčimen pal leste, hoj hino le Devleske pre dzeka.

⁶ Bi o pačaben našti avas pre dzeka le Devleske, bo oda, ko avel ko Del, mušinel te pačal, hoj o Del hin a hoj počinela pale olenge, save les roden.

⁷ Sar leske o Del diňa te džanel oda, so mek pes na dičhol, o Noach le pačabnaha šundľa a ačhadľa o korabos, hoj te zachraňinel peskera famelija. Le pačabnaha odsudzinda o svetos a chudľa le Devlestar o spravodľišagos, so avel le pačabnastar.

⁸ Le pačabnaha o Abraham šundľa le Devles, sar les vičinda, hoj te džal avri andral peskeri phuv pre oda than, so leske o Del kamľa te del. Geľa bi oda, hoj te džanľahas, kaj džal,

⁹ a le pačabnaha dživelas sar cudzincos andre odi phuv, so o Del phendľa, hoj leske dela. Dživelas andro stani; avke sar o Izak the o Jakob, save tiš chudle oda lav le Devlestar.

¹⁰ Bo užarelas o foros le zorale zakladenča, so naplaňinda the ačhadľa o Del.

¹¹ Le pačabnaha the e Sara, sava našti ulľa čhave, chudľa zor te ačhel khabňi, choc sas imar phuri. Bo pačalas, hoj o Del šaj kerel oda, so lake phendľa.

¹² Vašoda jekhe muršestar, le Abrahamostar, savo imar sas maj mulo, ulľile (pes narodzinde) ajci but potomki, keci hin o čerčeňa pro űebos the e poši paš o moros, so pes aňi na del te zrachinel.

¹³ Kala savore mule andro pačaben bi oda, hoj te chudlehas le Devlestar oda, so lenge phendľa, hoj len dela, ale ča dural oda dikhenas a radisaľonas oleske. Viznavinenas, hoj ča predžan pal e phuv sar cudzinci a nane ade khere.

¹⁴ Ola, save avke vakeren, sikaven, hoj roden peskeri phuv.

¹⁵ Se te gondolindehas pre odi phuv, andral savi avle avri, mek šaj gelehas pale.

¹⁶ Ale on radisaľon pre feder phuv, pre űeboskeri phuv. Vašoda pes aňi o Del na ladžal te vičinel lengero Del, se pririchtinda lenge o foros.

¹⁷ Le pačabnaha obetinda o Abraham le Izak, sar sas probalimen (skušimen) le Devlestar. Sas pririchtimen

te obetinel peskere jekhore čhas, choc ov sas oda, kas o Del diňa lav,

¹⁸ sar leske phendľa: "Andral o Izak avela tiro potomstvos."

¹⁹ O Abraham achaľolas avke, hoj le Devles sas zor les te uštavel andral o meriben. A oda sas avke, sar te o Del diňahas pale le Abrahamoske le Izak andral o meriben.

²⁰ Le pačabnaha požehňinda o Izak le Jakob the le Ezav andre oda, so avela.

²¹ Le pačabnaha o Jakob, sar imar merelas, požehňinda savore Jozefoskere čhaven a zmukľa o šero pre paca, sar lašarelas le Devles.

²² Le pačabnaha o Jozef phendľa sigeder, sar merelas, hoj le Izraeloskere čhave džana avri andral o Egipt, a phendľa lenge so te keren leskere kokalenca.

²³ Le pačabnaha garuvenas le Mojžišoskeri daj the dad le Mojžiš trin čhon pal oda, sar ulľila (pes narodzinda), bo dikhenas, hoj o čhavoro hino šukar, a na daranas pes le Faraonoskere rozkazistar.

²⁴ Le pačabnaha o Mojžiš, sar bariľa avri, na kamľa, hoj les te vičinen čhavo le Faraonoskera čhakero.

²⁵ Radeder peske kidňa avri te cerpinel le Devleskere manušenca, sar te radisaľol pro cikno časos le binostar.

²⁶ Te el pre ladž vaš o Kristus sas prekal leste feder sar o barvalipen andral o Egipt, bo dikhelas anglal pre peskero počiniben.

²⁷ Le pačabnaha omukľa o Egipt a na daralas pes le kraliskera choľatar, ale ľikerďa avri avke, sar te dikhľahas le Devles, saves našti te dikhel.

²⁸ Le pačabnaha dolľikerďa e Patraďi a pokropinda o vudara le rateha, hoj te na murdarel o meribnaskero aňjelos le Izraelitengere ešebne (perše) čhavoren.

²⁹ Le pačabnaha pregele prekal o Lolo moros sar pal e šuki phuv a sar oda kamle te kerel the o Egiptána, takoj tašľile.

³⁰ Le pačabnaha pele o muri le Jerichoskere, sar pašal lende efa džives phirenas.

³¹ Le pačabnaha na muľa e lubňi e Rachab olenca, save na kamenas le Devles te šunel, bo priiľa šukares olen, save avle te predikhel e phuv.

³² A mek so te phenel? Se imar man nane kana te vakerel pal o Gideon, Barak, Samson, Jeftah, David a Samuel the pal o proroka,

³³ save le pačabnaha domarenas o krališagi, kerenas o spravodľišagos a dochudenas o lava, so len o Del diňa. Le pačabnaha le ľevenge phandenas andre o pis-ki,

³⁴ murdarde andre o bare jaga a zachraňinde pes le űeprijateľengere šablendar. Sas slaba, ale ačhenas zorale, zoraľonas andro maribena a roztradenas avre narodengere armadi.

³⁵ Le pačabnaha o džuvľa chudle peskere mule pašutenen uštaden pale andral o meriben. Aver manuša sas mučimen, ale na kamle te el premukle, bo kamenas te chudel feder uštiben andral o meriben.

³⁶ Aver sas asade avri, marde len le bičoha a ke oda sas andro lanci andre bertena.

³⁷ Murdarenas len le barenca the le šablénca a prečhingerenas len. Aver phirenas upre tele urde andro bakrane the kozakere cipi – na sas len sostar te dživel, džanas pre lende a dukhavenas len.

³⁸ On sas ajse manuša, saven peske o svetos na zasogalinda (na zaslužinda), save bludzinenas pro pušti, pro verchi, andro jaskiňi the andro cheva andre phuv.

³⁹ A on savore, choc pes presikade andro pačaben, mek na dochudle oda, so lenge o Del phendā, hoj len dela,

⁴⁰ bo o Del pririchtinda prekal amende vareso feder: Kamel, hoj on ča jekhetane amenca te ačhen dokonale.

O Del bararel avri peskere čhaven

12 Vašoda, te hin amen ajci but švedki, save hine pašal amende sar ajci bari chmara, čhivas pal peste tele savoro, so amen cirdel tele, the o binos, so amen phandel andre a likeraras avri andro denašiben, so hin angle amende.

² Dikhas pro Ježiš, ko zachudľa a dokerel amaro pačaben. Ov precerpinda o meriben pro kerestos a pregeľa bara ladžaha, bo džanelas, hoj pre leste užarel baro radišagos, a palis peske bešľa pal e čači (pravo) sera le Devleskere tronoske.

³ Gondolinen pre oda, ko zligendā kajci nalače lava le binošnendar, so džanas pre leste, hoj tumen te na podden a te na slabisaľon pro duchos.

⁴ Bo mek tumen na marenas le binoha dži andro rat.

⁵ Bisterďan pro lava, so tumen zoraľaren, a vakeren ke tumende sar ko čhave?

Čhavo miro, sar tut o Raj bararel avri, ma le tuke lokes oda, aňi ma slabisaľuv, akor sar tuke dovakerel.

⁶ *Bo kas o Raj kamel, oles bararel zoraha avri a marel sakones, kas prilal sar čhas.*

⁷ Likeren avri andre oda pharipen, so pre tumende avel vašoda, hoj tumen te bararel avri, bo o Del tumenca avke kerel sar peskere čhavenca. Bo savo dad na bararel zoraha avri peskere čhas?

⁸ Ale te na san avribararde avke, sar hine savore leskere čhave, akor san o kopirdana (kopiľaki) a na san leskere čhave.

⁹ The amare telesne dada amen zoraha bararenas avri a likerahas peske len, či pes na poddaha buter le duchovne Dadeske, hoj te dživas?

¹⁰ Amare dada amen zoraha bararenas avri, medik samas čhavore, avke sar peske on gondolinenas, hoj hin mištes. No o Del amen bararel avri pre amari chasna, hoj amen te el leskere sentňipnastar.

¹¹ Hin čačo, hoj te amen vareko zoraha bararel avri, akor pes amenge oda na dičhol sar vareso, so del o radišagos, ale o pharipen. Ale palis anel o smirom the o spravodlišagos, so hin pre chasna olenge, kas sikada avri.

¹² Vašoda rovňaren avri o vasta, so hine zmukle tele, the o khoča, so tel tumende izdran,

¹³ a tumare pindre mi phiren pal o rovne droma, hoj oda pindro, so hino bango, te na chučel avri, ale te sastol avri.

Te na odčhivas le Devleskeri milost'

¹⁴ Keren sa prekal oda, hoj tumen te el o smirom sakoneha a hoj te dživen o sentno džživipen, bijal savo ňiko na dikhela le Devles.

¹⁵ Dikhen mištes pre oda, hoj ňiko te na visaľol palal le Devleskere lačhipnastar (milostatar), hoj te na barol ňisavo kirko koreňis, so andahas pharipen a musarda-has but dženen.

¹⁶ ňiko te na el lubaris aňi bijedevleskero avke sar o Ezav, savo vaš jekh chaben bikenda peskero pravos, so les sas sar le ešebne (perše) čhas.

¹⁷ Se džanen, hoj choc palis kamelas te chudel le dadestar o požehnaňje, sas odčhido a imar pes oda na delas te visarel pale, choc rovibnaha oda kamelas.

¹⁸ Se tumen na avľan ko verchos, sostar pes o manuš šaj chudel, abo so labolas la jagatar, abo ko kalipen, ke rat abo ke burka,

¹⁹ aňi ko hangos la trubakero, aňi ko hangos, so vakereľ ajse lava, hoj ola, save les šunde, pes mangelas, hoj imar te na vakereľ dureder.

²⁰ Bo našti zľidžanas oda, so pes lenge prikazinelas: *"Te ča o džviros pes chudľahas le verchostar, mušinel te el murdardo le barenca."*

²¹ Oda, so dikhle, sas ajso strašno, hoj o Mojžiš phendā: "Izdrav a darav man!"

²² No tumen avľan ko verchos Sion the ko foros le džide Devleskero, ko ňeboskero Jeruzalem, the ko but ezera aňjela.

²³ Avľan ko radišagoskero zhromaždeňje le Devleskere ešebne čhavengero, savengere nava hine pisimen andro ňebos. Avľan ko Del, ke savorengero Sudcas, ko duchi le čačipnaskere manušengere, save imar chudle dokonalošť.

²⁴ Avľan ko Ježiš, savo anda e nevi zmluva the ko pokropimen rat, so vakereľ feder lav sar o rat le Abeloskero.

²⁵ Den tumenge pozora pre oda, hoj te šunen a te na odčhiven oles, ko vakereľ! On, save na kamenas te šunel oles, ko lenge pre phuv phenelas le Devleskeri voľa, na denašle, vašoda aňi amen našti denašaha, te pes visaraha Olestar, ko vakereľ andral o ňebos.

²⁶ Leskero hangos akor čhalada la phuvaha, no akana mek diňa lav:

"Me mek jekhvar čhalavava, na ča la phuvaha, ale the le ňeboha."

²⁷ Oda, hoj phenel "mek jekhvar", igen mištes sikavel pre oda, hoj ola stvorimen veci, so ena čhalade, ena ile het, hoj te ačhen ča ola veci, so pes našti čhalaven.

²⁸ Vašoda te amen prilas oda krališagos, so pes našti čhalavel, kampil amenge te palikerel a te lašarel le Devles andre bari pačiv the andre sentňi dar, avke sar ov kamel.

²⁹ Bo amaro Del hin e jag, so zlabarel.

E služba, so hin le Devleske pre dzeka

13 O kamiben maškar o phrala te na preačhel.
² Ma bisteren te prilil le hoscen a te presikavel lenge e pačiv, bo avke vareko priile le aňjelen, choc pal oda na džanenas.

³ Gondolinen the pro bertenoša, avke sar te tumen uľanas lenca andre bertena. A gondolinen the pre ola, save cerpinen, avke sar te the tumen cerpindanas lenca.

⁴ Sako peske mi likerel o manžestvo andre pačiv. O rom la romňaha peske mi en pačivale, bo le lubaren the olen, save pašlon avre romňijenca, sudzinela o Del.

⁵ Ma dživen avke, hoj tumen te zakamen andro love, a aven spokojne oleha, so tumen hin, bo o Del phenda:

"Na mukava tut, aňi tut šoha (ňikda) na omukava."

⁶ Vašoda bi e dar šaj phenas:

"O Raj mange pomožinel a na darava man. So man šaj kerel o manuš?"

⁷ Ma bisteren pre ola, save tumen lidžanas a vakernas tumenge o lav le Devleskero. Dikhen pre lengero dživipen, sar dživenas a sar mule, a keren andro pačaben avke, sar on kerenas.

⁸ O Ježiš Kristus hino oda jekh idž, adadžives the furt pro furt.

⁹ Ma den tumen te odlel všelijake avre sikavibenenca. Bo hin mištes, te o jilo hino zoraľardo le Devleskere lačhipnastar (milostatar) a na ole zakonendar pal o chabena, so nane pre chasna olenge, save oda dolikeren.

¹⁰ Amen hin o oltaris, pal savo našti chan aňi o rašaja, save služinen andro Stanos.

¹¹ O nekbareder rašaj lel o rat le džvirengero andro Neksentneder Than vaš o bini, ale lengere tĕla labaren avri le taboristar.

¹² Vašoda the o Ježiš cerpinelas avri pal e brana le foroskeri, hoj te sentňarel le manušen peskere rateha.

¹³ Aven džas pal leste avri andral o taboris a zlidžas leha leskeri ladž.

¹⁴ Bo pre kadi phuv amen nane foros, so ačhela pro furt, ale užaras pre oda, so avela.

¹⁵ Vašoda, aven, obetinas furt le Devleske e chvalakeri obeta prekal o Ježiš, oda hin o ovocje andral o muj, so viznavinel leskero nav.

¹⁶ Ma bisteren te kerel o lačhipen the te pomožinel jekh avreske, bo oda hin o obeti, so hin le Devleske pre dzeka.

¹⁷ Šunen olen, save tumen lidžan, a podden tumen lenge, bo on pes starinen pal tumare duši a ačhena vaš tumenge anglo Del. Šunen len, hoj oda te keren le radišagoha, a na le roviňaha, bo oda na ela tumenge pre chasna.

¹⁸ Modľinen tumen vaš amenge. Amen mištes džanas, hoj amen hin žuže jile, bo andre savoreste pes kamas mištes te likerel.

¹⁹ A mek buter tumen mangav, hoj pes te modľinen vaš ma, hoj sigeder pale te džav ke tumende.

E modľitba the o požeňnaňje

²⁰ O Del, savo del o smirom a uštaďa amare Rajes le Ježiš andral o meriben, savo hin o baro Pastjeris le bakrengero prekal o rat, so anda e večno zmluva,

²¹ mi kerel tumendar ajsen, save kamena te kerel savoro lačhipen, so ov kamel. Mi kerel andre tumende oda, so hin leske pre dzeka, prekal o Ježiš Kristus. Leske mi džal e slava furt pro furt. Amen.

²² Na pisindom tumenge but, phralale, no mangav tumen, hoj te prilen kala lava, so hin pre oda, hoj tumen te zoraľaren.

²³ Kamav, hoj te džanen, hoj amaro phral o Timoteus sas premuklo. Te avela sigeder, džava ke tumende jekhetane leha.

²⁴ Pozdravinen savore tumare vodcen the savore sentnen. O phrala andral e Italija tumen pozdravinen.

²⁵ O lačhipen (milost) le Devleskero mi el tumenca savorenca!

JAKOB

1 O Jakob, savo služinel le Devleske the le Rajeske le Ježišoske Kristoske, bičhavel pozdravi dešduje kmeňenge, save hine rozčhide pal o svetos.

² Phralale mire, len sar baro radišagos, te pre tumende avela e proba (skuška).

Pal o pačaben the godáveripen

³ Se džanen, te ela tumaro pačaben probalimen avri (skušimen avri), oda tumen dela avrilikeriben.

⁴ A tumaro avrilikeriben pes mi presikavel oleha, so keren, hoj te aven žuže andro jile a lače andre savoreste, hoj tumenge nič te na chibalinel.

⁵ Te varekasko tumendar kempel godi, mi mangel peske le Devlestar a ela leske diši. Bo ov del sakones a na čivkerel pro jakha.

⁶ Ale mi mangel andro pačaben a te na pochibinel. Bo oda, ko pochibinel, hino sar moroskeri vlna, so tradel e balvaj a ispidel pal jekh sera pre aver.

⁷ Te na peske gondolinel kajso manuš, hoj chudela vareso le Rajestar:

⁸ Kajso, savo na džanel, so kamel, perel pre savore peskere droma.

Pal o čoripen the barvalipen

⁹ O phral, savo hino čoro, pes mi lašarel oleha, hoj hino upre hazdlo andro Kristus,

¹⁰ ale o barvalo pal peste te na gondolinel but, bo našlola sar e kvitka la čarakeri.

¹¹ Bo sar avel avri o kham le tačipnaha, so labarel, šučarel avri e čar, lakeri kvitka perel tele a lakero šukariben našlol. Avke perela tele the o barvalo pre peskere droma.

Te zlidžal e proba

¹² Bachtalo murš, savo zlidžal e proba, bo te obačhela, chudela odi koruna le dživipnaskeri, pal savi o Raj diša lav, hoj dela olen, so les kamen.

¹³ Niko te na phenel, sar les cirdel pro binos: "Se oda o Del man cirdna!" Se le Devles našti te cirdel pro nalačo a aši nikas na cirdel andro binos.

¹⁴ Ale sako hin cirdlo andro peskera žadoscatar, so les cirdel a vabinel.

¹⁵ A palis e žadosca sar avel, khabňol a uľol (narodzinel pes) o binos a o kerdo binos anel o meriben.

¹⁶ Ma den tumenca avri te thovel mire lače phralale!

¹⁷ Savore lače veci a dojekh dokonalo daros avel upral le Dadestar, olestar, savo kerđa o ňeboskere švetli a savo hino furt jekh a na visarel pes avke sar o ciňos.

¹⁸ Peskera voľatar amen diša o dživipen prekal o čačipnaskero lav, hoj te avas ešebne savorestar, so kerđa!

Te šunel the te kerel

¹⁹ Mire lače phralale: Sako sig mi šunel, polokes mi vakerel a polokes andre cholí!

²⁰ Bo o manuš andre cholí na kerel avke, sar o Del kamel.

²¹ Vašoda čhiven tele savori mel the savoro nalačhipen a šukares prilen oda lav, so hin sadzimen andro jilo a šaj zachraňinel tumare dživipena.

²² Aven ola, save dživen pal le Devleskero lav, a na ola, save ča šunen a oleha pes korkoren klaminen.

²³ Bo te vareko hin ajsó, hoj ča šunel o lav a na dolíkerel les, hino sar o manuš, savo dikhel peskero muj andro gendalos,

²⁴ ale sar pes dikhľa, džal het a takoj bisterel, savo sas.

²⁵ Ajsó manuš ela požehňimen andre oda, so kerel: Oda, ko pes mištes zadikhel andro dokonalo zakonos, so del e sloboda, a ľikerel pes pal oda lav a ko na bisterel oda, so šundľa, ale dživel pal oda.

²⁶ Te peske vareko tumendar gondolinel, hoj hino pobožno, a na zľikerel peske e čhib, klaminel korkoro pes a oda, so kerel prekal o Raj, na anel chasna.

²⁷ Anglo Del amaro Dad hin kadi pobožnosť žuži the bi e mel: Te starinel pes pal o široti the pal o vdovi andre lengero pharipen a te na meľarel pes andre le svetoha.

Te na kerel rozđjelis maškar o manuša

2 Phralale mire, sar ola, save pačan andro Ježiš Kristus, andro Raj la slavakero: Ma dikhen pro manuš a ma keren rozđjelis maškar o manuša.

² Bo te avľahas andre tumari khangeri murš somnakuňa angrusaha, urdo andro šukar gada, a te avľahas the čoro murš andro melale gada,

³ a dikhľanas pre oda, pre kaste hin ola šukar gada a phendanas leske: "Tu tuke šukares beš kade," ale le čoreske phendanas: "Tu ačh kode," abo: "Beš tuke kade paš mire pindre,"

⁴ či na keren oleha rozđjelis maškar tumende? Či na ačhilan sudci, save namištes gondolinen a sudzinen?

⁵ Šunen, mire lače phralale! Či peske na kidňa o Del avri le čoren andral kada svetos, hoj te ačhen barvale andro pačaben a te prilen o krališagos, pal savo o Del diša lav olenge, save les kamen?

⁶ Ale tumen tele dikhlan le čores! Či nane oda ipen o barvale, save pre tumende zoraha ispiden a tumen cir-den pal o sudi?

⁷ Či nane oda on, save namištes vakeren pre oda lačo nav le Rajeskero, so tumenge o Del diña?

⁸ No, te dolikeren o zakonos le krališagoskero, avke sar hin pisimen:
"Kameha avre manušes avke sar pes korkores!" Ta akor mištes keren.

⁹ Ale te keren rozdjelis maškar o manuša, akor keren binos a o zakonos pre tumende sikavel sar pre ola, save namištes keren.

¹⁰ Bo oda, ko dolikerđahas calo zakonos, ale jekh prikazañje na dolikerđahas, hino vinovato andre savore.

¹¹ Se Oda, ko phendā: *"Na kereha lubipen"*, the phendā: *"Na murdareha."* No, choc na keres lubipen, ale murdares, na dolikeres o zakonos.

¹² Avke vakeren the keren sar ola, save ena sudzimen pal o zakonos so del o sloboda!

¹³ Bo o sudos na ela lačhejileskero ke oda, ko na sas lačhejileskero. No, o lačhejileskeriben ñerinel (zvítazinel) upral o sudos!

O pačaben the o skutki

¹⁴ So hin olestar, phralale mire, sar vareko phenel, hoj les hin o pačaben a nane les o skutki? Či šaj les oda pačaben zachrañinel?

¹⁵ A te le phrales abo la pheña na ulahas so te urel a na ulahas len o dživeseskero chaben,

¹⁶ a te lenge vareko tumendar phendāhas: "Džan andro smirom, tačaren tumen a chan," ale te len na diñanas oda, so kempel le teloske, so len hin olestar?

¹⁷ Avke the o pačaben, te les nane o skutki, hino mulo.

¹⁸ Ale vareko phenela: "Tut hin o pačaben a man hin o skutki." Sikav mange tiro pačaben bi o skutki a me tuke sikavava miro pačaben andral mire skutki.

¹⁹ Tu pačas, hoj hin jekh Del? Mištes keres. The o demona pačan a izdran.

²⁰ Kames, hoj tuke te sikavav, tu nagođaver manušeja, hoj o pačaben bi o skutki hino pre ñisoste?

²¹ Či na sas o Abraham, amaro dad, ospravedlñimen le skutkendar, sar andā peskere čhas le Izak te obetinel pro oltaris?

²² Akor dikhes, hoj o pačaben kerelas jekhetane leskere skutkenca a o skutki keren leskero pačaben dokonalo.

²³ A ačhila pes, so hin pisimen: *"O Abraham pačandila le Devleske a rachinelas pes leske oda vaš o spravodlišagos."* A sas vičimen le Devleskero prijatelīs.

²⁴ Avke akor dikhen, hoj o manuš hin ospravedlñimen the le skutkendar a na ča le pačabnastar.

²⁵ Avke sas the paš e lubñi Rachab: Či na sas ospravedlñimen le skutkendar, sar priiła olen, save sas bičhade, a phendā, hoj te džan het avre dromeha?

²⁶ Bo avke sar o telos hino mulo bi o duchos, avke hin mulo the o pačaben bi o skutki.

Pal e čhib

3 Phralale mire, ma keren tumendar savore učitelā. Se džanen, hoj avaha zoraleder sudzimen.

² Savoredžene but peras. Ale te vareko na perel andro lav, oda hin dokonalo murš, savo džanel te likerel calo peskere telos.

³ Te le grajeske thovas andro piskos o zubadla, šunel amen a avke visaras calo leskero telos, kaj kamas.

⁴ A dikhen, choc hine o lodī bare a traden len o zorale balvaja, oda, ko len lidžal, len šaj lidžal ciknore kormidloha ode, kaj kamel.

⁵ Avke the e čhib hiñi cikno kotor, ale šaj kerel bare veci. Dikhen, savo baro veš labarda e cikñi jagori!

⁶ E čhib hiñi sar jag, o načačipnaskero svetos. Hiñi oda, so šaj mefarel andre calo amaro telos. Rozlabarel calo manušeskero dživipen a korkori hiñi rozlabardi le peklostar.

⁷ O manuš šaj phandel a thovel tele savore dzive džviren the le čiriklen, le sapen a the le džviren andro moros,

⁸ ale e čhib ñiko le manušendar naštī phandel. Hiñi o nalačhipen, so naštī te lidžal, a hiñi pherdo meribnaskero jedos.

⁹ La čhibaha lašaras le Rajes, le Devles the le Dades – a ola čhibaha the košas le manušen, save hine kerde pre le Devleskeri podoba.

¹⁰ Andral oda jekh muj avel avri o lašariben the o košiben. Naštī oda avke el, phralale mire!

¹¹ Či šaj andral jekh chañig, andral jekh chev, avel avri gulo the kirko pañi?

¹² Či šaj barol, phralale mire, pro figovñikos o olivi, vaj pro viñičis o figi? Avke the ñisavi londī chañig naštī del gulo pañi.

O gođaveripen upral

¹³ Ko hin maškar tumende gođaver a kas hin gođi? Mi sikavel peskere dživipnaha o lače skutki a mi avel pokorno the gođaver andre savoreste, so kerel.

¹⁴ Ale te tumen hin andre tumare jile e kirko zavist' a kamen ča pes te hazdel upre, ma lašaren tumen a ma džan pro čačipen.

¹⁵ Odi gođi na avel upral, ale hiñi pal e phuv, telesno, benguñali.

¹⁶ Bo ode, kaj hin e zavist' a kaj sako ča pes kamel te hazdel upre, hino nasmirom the dojekh nalačhipen.

¹⁷ Ale e gođi le ñebostar hiñi ešeb (peršo) žuži, palīs ajsi, so sajinel avres a anel o lačo ovocje, na kerel rozdjela a nane dujemujengeri.

¹⁸ Ola, ko anen o smirom, sadzinen o điv (o zrnos) le smiromoskero a kidena upre o lačhipen.

Ko kamel o svetos, na kamel le Devles

4 Khatar aven o maribena a soske tumen maškar tumende pes vesekedinen? Či na andral tumare telesne žadosci, so pes vesekedinen andre tumende?

² Tumen kamen vareso a nane tumen, murdaren a zavidzinen a našti dochuden – ispiden tumen a vesekedinen pes, ale nane tumen, bo na mängen tumenge.

³ Tumen mängen a na len, bo namištes mängen, bo kamen oda prekal tumare nalače žadosci.

⁴ Ó, napačivale manuša, či na džanen, hoj oda, ko kamel te el lačo le svetoha, hino nalačo le Devleha? Oda manuš, ko kamlahas te el lačo le svetoha, ačhel nalačo le Devleha.

⁵ Abo gondofinen tumenge hoj ča avke phenel le Devleskero Lav: “O Duchos, saves diña andre amende te bešel, amen igen kamel, džiči e zavist’?”

⁶ Se o Del del bareder lačhipen (milost). Vašoda phenel le Devleskero Lav:

“O Del džal pro barikane, ale le pokornen del peskero lačhipen (milost).”

⁷ Vašoda podden tumen le Devleske. Ačhaven tumen le bengeske a denašela tumendar.

⁸ Aven pašeder paš o Del a ov avela pašeder paš tumende. Thoven avri o vasta, tumen binošne! A žužaren o jile, tumen, save na džanen, so kamen!

⁹ Zagondofinen tumen upral tumaro čoripen, aven andre žaľa a roven! Tumaro asaben pes mi visarel pro apsa a o radišagos pro rovipen!

¹⁰ Podden tumen le Rajeske a ov tumen hazdela upre.

Te na sudzinel le phrales

¹¹ Ma vakeren namištes jekh pre aver, phralale! Oda, ko vakerel namištes pro phral, abo sudzinel peskere phrales, vakerel pro zakonos a sudzinel o zakonos. A te sudzines o zakonos, na sal oda, ko dživel pal le Devleskero zakonos, ale sal leskero sudcas.

¹² Ča jekh o Del diña o zakonos a ov hin the o sudcas. Ov šaj zachrañinel a šaj zñičinel. Ale ko sal tu, hoj sudzines avres?

Te na pes lašaren

¹³ No akana tumen so phenen: “Adadžives abo tajsa džaha andre kada abo andre koda foros, ačhaha ode berš, keraha buči a ela amen.”

¹⁴ Se tumen na džanen so ela tajsa! A so hin tumaro dživipen? San sar e para, so pes pro sikra sikavel a paľis našľol.

¹⁵ Ale kempel tumenge te phenel kavke: “Te o Raj kamela, dživaha a keraha kada abo koda.”

¹⁶ Ale akana tumen lašaren tumare baripnaha. Dojekh kajso lašariben hino nalačo.

¹⁷ Binos hin oles, ko džanel mištes te kerel, ale na kerel oda.

O lav prekal o barvale

5 No akana, tumen barvale, roven a hikinen upral tumare čoripena, so pre tumende avena!

² Tumaro barvalipen kirñila a tumare gada chale o kirme.

³ Tumaro somnakaj the o rup hardzavisaľila a odi hardza sikavela pre tumende a chala tumare tela sar jag, bo skidñan o barvalipen pro posledna dživesa.

⁴ Le čore manušenge, save kerenas buči pre tumare maľi, na počindan! Vašoda, dikh, lengero počičiben vičinel pre tumende! O vičičiben olengero, save kidenas upre pal tumare maľi, avľa andro kana le Nekzoraledere Rajeske.

⁵ Dživenas pre kadi phuv andro kiňešagos the andro baripen a čalardan tumare jile avke sar ola bale, so pes pririchtinen, hoj len te začhinen.

⁶ Odsudzindan a murdardan le čačipnaskeres a na brañinelas pes.

Pal o avriľikeriben the modľitba

⁷ Phralale, vašoda ľikeren avri, medik na avela o Raj. Dikh, o manuš, savo kerel buči pre maľa, užarel, medik na avela o jaruno the o jesuno brišind a dela les o lačo ulipen andral e phuv.

⁸ Avke the tumen: Užaren a zoraľaren tumare jile, bo o Raj avela maj pale.

⁹ Phralale, ma vakeren jekh pre aver, hoj te na aven odsudzimen. Dikh, o sudcas ačhel anglo vudar!

¹⁰ Len tumenge, phralale, pal o proroka, save vakere nas andro nav le Rajeskero: Dikhen sar te cerpinel a te ľikerel avri.

¹¹ Dikhen, amen phenas pal ola, save ľikerde avri, hoj hine bachtale. Šundān, sar o Job ľikerďa avri, a dikhľan, sar o Raj pro agor pes starinelas pal leste! O Raj hino igen lačo the jileskero.

¹² Ale angle savoreste, phralale mire, ma len vera aňi pro űebos aňi pre phuv, aňi űisavi aver vera. Ale te phenen “He,” mi el oda čačes “He,” a te phenen “Na,” mi el oda “Na.”

¹³ Cerpinel vareko maškar tumende? Mi modľinel pes. Hin varekas radišagos andro jilo? Mi gilavel le Devleske.

¹⁴ Hin vareko maškar tumende nasvalo? Mi vičinel peske le phurederen andral o zboros. On pes vaš leste mi modľinen a mi makhen les le olejoha andro nav le Rajeskero.

¹⁵ A e modľitba andro pačaben sastarela le nasvales a o Raj les hazdela upre. Te kerďa bini, odmukela pes leske.

¹⁶ Vašoda, phenen avri jekh avreske o bini a modľinen tumen jekh vaš aver, hoj te saston avri. E modľitba le čačipnaskere manušeskeri šaj kerel but a hin la bari zor.

¹⁷ O Eliaš sas ajsa manuš sar the amen a modľinelas pes, hoj te na del o brišind a na diña o brišind pre phuv trin berš the šov čhon.

¹⁸ A pale pes modľinelas a o űebos diña o brišind a e phuv diña peskero ulipen.

¹⁹ Phralale mire, te vareko tumendar odgelahas le čačipnastar a te les vareko visardahas pale,

† Grekengeri čhib šaj el: “O duchos andre amende hino žarlivo.”

²⁰ mi džanel, hoj oda, ko visarel le binošnes pal
leskero nalačo drom, zachrañinela leskero dživipen
andral o meriben a učharel andre but bini.

1. PETER

O pozdravi

1 Me, o Peter, o apoštolos le Ježišoskero Kristoskero, pisinav tumenge, save san avrikidle le Devlestar – tumenge, save dživen sar o cudzinci a san rozčhide andro Pontus, Galacija, Kapadokija, Azija the Bitinija.

² O Del amaro Dad peske tumen angloda kidňa avri pre peskero planos a prekal peskero Duchos tumen sentňarda, hoj te šunen le Ježiš Kristus a te aven obžužarde leskere rateha. Mi del tumen o Del pherdo lačhipen (milost) the smirom!

O džido užaripen

³ Lašaras le Devles, savo hin o Dad amare Rajeske le Ježišoske Kristoske! Bo peskere bare lačhipnaha amen diňa o nevo dživipen the o džido užaripen (nađej), sar uštađa le Ježiš Kristus andral o meriben.

⁴ Oda užaripen hin, hoj chudaha sar đedictvos o barvalipen, so šoha (ňikda) na preačhela, na musaňola aňi na kirňola a hino garudo andro ňebos prekal tumende.

⁵ E zor le Devleskeri tumen ľikerel prekal o pačaben, hoj te aven zachraňimen. Odi zachrana hiňi pririchtimen a sikavela pes andro posledno časos.

⁶ Radisaľon olestar, choc akana pes tumenge kampil sikra te cerpinel andro všelijake probi (skuški),

⁷ hoj pes te sikavel, hoj hino probalimen avri (skušimen avri) tumaro pačaben, so mol buter sar o somnakaj, so našľol. Tumaro pačaben pes mušinel andre jag te probalinel, hoj te chuden vaš oda o lašariben, e slava the e pačiv andre oda džives sar pes sikavela o Ježiš Kristus.

⁸ Les šoha na dikhlán a the avke les kamen; aňi akana les na dikhen, ale pačan andre leste a san pherarde slavne radišagoha, so pes aňi na del avri te phenel le lavenca.

⁹ Bo dochuden oda, pal soste džanas andro pačaben: E zachrana prekal tumare duši.

¹⁰ O proroka, so prorokinenas pal le Devleskero lačhipen (milost) prekal tumende, igen rodenas a dophučenas pes pal kadi zachrana.

¹¹ A dophučenas pes pal oda, kana oda časos ela, the sar oda avela, a o Duchos le Kristoskero, savo sas andre lende, anglal phenelas avri pal o cerpišagi le Kristoskere the pal e slava, so avela palis.

¹² Lenge sas sikado, hoj na služinde peske, ale tumenge oleha, so tumenge hin akana vakerdo prekal

ola, save tumenge vakerenas o evaňjelium andre zor le Sentne Duchoskeri, savo sas bičhado andral o ňebos. The o aňjela pre oda igen kamen te dikhel, hoj te achalón.

Te aven sentna

¹³ Vašoda gondolinen pal oda, so keren. Aven strižbe a muken tumen igen pre le Devleskero lačhipen (milost), so tumenge ela dino, sar pes sikavela o Ježiš Kristus.

¹⁴ Aven sar ola čhave, save šunen le Dades a ma den tumen te ľidžal ole žadoscenge, so tumen sas varekana, sar mek na džanenas o čačipen.

¹⁵ Ale aven sentna andre savoreste, so keren, sar hino sentno Oda, ko tumen vičindňa.

¹⁶ Bo hin pisimen: *“Aven sentna, bo me som sentno!”*

¹⁷ A te vičinen *“Dado”* le Devles – savo na dikhel pro manuš, ale sudzinel pal oda, ko so kerel – ta dživen daraha anglo Del, medik san pre kadi phuv.

¹⁸ Oda purano dživipen, so sikľilán tumare dadendar, sas bi e chasna. No, džanen, hoj sanas cinde avri andral oda dživipen a na sas vaš tumenge počimen le somnakaha aňi le rupoha – so našľona –

¹⁹ ale le dragane (vzacne) Kristoskere rateha. Ov, sar o bakroro bi e chiba the bi o binos,

²⁰ sas pre oda imar anglal avrikidlo mek angle oda, sar o Del kerdňa o svetos, ale sas sikado andro posledno dživesa prekal tumende.

²¹ Prekal leste pačan andro Del, savo les uštađa andral o meriben a diňa les e slava, hoj tumaro pačaben the užaripen te el andro Del.

²² No, te imar žužardán tumare jile oleha, hoj kerenas oda, so phenel o čačipen a hoj kamenas le phralen čače kamibnaha, avke the akana kamen jekh avres žuže jileha.

²³ Se uliľan (narodzindán pes) mek jekhvar – na andral o semenos, so kirňol – ale andral o semenos, so na kirňol: Andral o džido the večno lav le Devleskero.

²⁴ Bo hin pisimen: *“Savore manuša hine sar e čar a cali lengeri slava hiňi sar e čarakeri kvitka. E čar šučilňa avri a lakeri kvitka peľa tele,*

²⁵ *ale o lav le Rajeskero ačhel pro furt.”*

Oda lav hin o evaňjelium, so pes tumenge vakerďa.

O džido bar a o sentno narodos

2 Vašoda odčhiven tumendar savori cholí, savore pľetki, dojekh klamišagos the zavist' a ma aven dumujengere.

² Sar o čhavore, save mekča akana ulile (pes narozinde), mangel tumenge o žužo duchovno thud, hoj lestar te baron a te aven zachrañimen,

³ te imar koštolindan oda, hoj o Raj hino lačo.

⁴ Aven ke leste, ko džido Bar, saves o manuša odčhide, ale hin avrikidlo the igen vzacno anglo Del.

⁵ The tumen, sar o džide bara, den pes te ačhavel andro duchovno kher, hoj te aven o sentno rašajipen a te anen o duchovne obeti, so hin pre dzeka le Devleske prekal o Ježiš Kristus.

⁶ Vašoda hin pisimen andro Lav le Devleskero: "Thovav pro Sion o glavno bar, o avrikidlo the igen vzacno bar; oda, ko andre leste pačal, na ladžala pes."

⁷ Oda bar hino vzacno tumenge, save pačan, ale olinge, save na pačan: "O bar, so odčhide o murara, ačhila pre stavba glavno, ⁸ o bar, pre savo pes demen, the e skala, pre savi peren." Ola, save na šunen oda lav, peren pre oda bar, bo o Del oda avke kamelas.

⁹ Ale tumen san o avrikidle manuša, o krališagos le rašajengero a o sentno narodos, hoj te vakeren avri ola bare veci, so kerel o Del – ov, ko tumen vičinda avri andral o kalipen andre peskero igen šukar svetlos.

¹⁰ Varekana na sanas narodos, no akana san o manuša le Devleskere; varekana na prindžarenas o lačhipen le Devleskero, ale akana les chudlan.

Te dživel sar le Devleskere služobnika

¹¹ Phralale mire, phenav tumenge sar olinge, so nane khere kade pre phuv a save ča pal kadi phuv predžan: Zlíkeren tumen le telesne žadoscendar, so pes maren la dušaha!

¹² Dživen mištes tumaro dživipen maškar ola, save na pačan – choc te pre tumende namištes vakeren sar pro živaña – hoj te dikhen tumare lače skutki a te lašaren le Devles andre oda Džives, sar avela.

¹³ O Raj kamel, hoj tumen te podden savorenge, save hine ačhade le manušendar: Či le kraliske sar le nek-baredereske,

¹⁴ abo le vladarenge. Bo ov len bičhavel te marel olen, so namištes keren, a te lašarel olen, so keren mištes.

¹⁵ Bo kada hin oda, so o Del kamel: Te keren o lačhipen a oleha te phanden o muja le nagodaver manušenge, save na džanen, so vakeren.

¹⁶ Dživen sar o slobodne, ale ma zagaruven tumaro nalačhipen la slobodaha; dživen sar o sluhi le Devleskere.

¹⁷ Savoren den pačiv: Le phralen kamen, le Devlestar daran the le kralis den pačiv.

Te zlidžal o pharipen sar o Raj

¹⁸ A tumen, o sluhi, podden tumen tumare rajenge a šunen len andre savoreste. Ale ma podden tumen ča le lačenge the le jileskerenge, ale the le nalačenge.

¹⁹ Bo o Del žehñinela oles, ko zlidžal o pharipen vaš oda, hoj kerel pal leskeri voľa a cerpinel, choc nič nalačo na kerđa.

²⁰ Bo so hin olestar, hoj líkeren avri, sar tumen dukhaven, te tumen keren o bini? Ale te mištes keren a the avke cerpinen bi e vina a líkeren avri, kada hin le Devleske pre dzeka. ²¹ Se pre oda sanas le Devlestar vičinde, bo the o Ježiš cerpinelas vaš tumenge a sikada tumenge sar te dživel, hoj te keren avke sar ov.

²² *Ov šoha (ñikda) na kerđa binos, aňi o klamišagos šoha na sas andre leskero muj.*

²³ Sar les košenas, na košelas pale, a sar cerpinelas, na daravelas avri, ale mukelas pes pre oda, ko čačipna-ha sudžinel.

²⁴ Ov korkoro ligenda amare bini peskere telo-ha pro kerestos, hoj te meras le binenge a te dživas le čačipnaske. Prekal leskere rani san avrisastarde.

²⁵ Bo sanas sar o bakrore, save na džanenas, kaj džan, ale akana san visarde ko Pastjeris the ke Oda, savo pes starinel pal tumare duši.

Pal o džuvľa the pal o murša

3 Avke the tumen o džuvľa, podden tumen tumare romenge. A te varesave lendar na pačan le Devleskere laveske, anen len bi o lava paš o Del, tumare dživipnaha,

² oleha, hoj on dikhena sar tumen dživen žužes the andre sentno dar.

³ Tumaro šukariben te na el avruno, hoj tumenge dena te kerel o bala pro šere, figinena pre tumende o somnakaj, abo urena tumen andro barvale gada.

⁴ Ale tumaro šukariben mi el andro jilo – o andruno manuš – kovlo the pokorno duchos, bo ada hin, so ačhel pro furt a hin le Devleske pre dzeka.

⁵ Bo kavke pes varekana šukaľarnas the o sentna džuvľa, save pačanas andro Del a poddenas pes peskere romenge,

⁶ sar e Sara, savi šunelas le Abraham a vičinelas les "rajeja". Tumen san lakere čhaja te keren o lačhipen a na daran tumen ñisostar.

⁷ The tumen o murša: Dživen jekhetane tumare romñenca avke, hoj te ačaluven, hoj hine slabeder. Presikaven lenge e pačiv, hoj tumare modlitbi nič te na zaačhavel, bo the on tumenca jekhetane chudena le Devlestar o dživipen.

Te líkerel avri andro cerpišagos

⁸ Pro ostatkos: Mi el tumen savoren jekh gondolišagos, kamen le phralen, mi el tumenge pharo jekh vaš aver, aven lačhejileskere the pokorna.

⁹ Ma den pale o nalačo le nalačipnaha abo o košiben le košibnaha, ale previsaren oda a žehñinen, bo pre oda san vičimen, hoj te chuden o požehnañje.

¹⁰ Bo hin pisimen:

"Oda, ko kamel, hoj les te el bachtalo dživipen, a kamel te dikhel o lače dživesa, mi zlíkerel peskeri čhib le nalačestar the peskere vušta, hoj te na vakerele o klamišagos,

¹¹ mi visarel pes le nalačestar a mi kerel o lačhipen a mi rodel o smirom andral calo jilo.

¹² *Bo le Rajeskere jakha dikhen pro čačipnaskere a leskere kana šunen pre lengero mangipen, ale o Raj džal pre ola džene, save keren namištes.*"

¹³ A ko tumenge kerela namištes, te labona pal o lačhipen?

¹⁴ Ale choc te cerpindanas vaš o čačipen, bachtale san. A ma daran tumen lendar, aňi ma izdran.

¹⁵ Ale den le Kristus pačiv sar le sentne Rajes andre tumare jile. Aven furt pririchtimen te odphenel sakoneske, ko tumendar phučlahas pal oda, so užaren andre tumaro jilo,

¹⁶ ale polokes a andro smirom. Mi el tumen žuže jile, hoj pes te ladžan ola džene, save namištes vakeren pal tumaro pačivalo dživipen le Kristoha.

¹⁷ Bo te o Del kamlahas, hoj te cerpinas, ta feder hin, hoj te cerpinen vaš o lačo sar vaš o nalačo.

¹⁸ Se the o Kristus jekhvar cerpinelas a muľa vaš o bini – o čačipnaskero vaš o načačipnaskere – hoj tumen te anel ko Del. Sas murdardo telesnones, ale obdžidar-do andro Duchos,

¹⁹ a andre leste geľa te vakerel le duchenge andre bertena,

²⁰ save verekana na šunenas, medik o Del likerelas avri a užarelas pre lende andro dživesa le Noachoskere, medik pes ačhavelas o korabos. A gele andre ča frima – oda hin ochto džene – a sas zachraňimen prekal o paňi.

²¹ Oda paňi sas angluno obrazis le bolipnaske. No o bolipen na thovel amari mel pal o telos, ale hin o mangipen ko Del vaš o žužo jilo. A o bolipen tumen akana zachraňinel prekal ada, hoj o Ježiš uštifa andral o meriben

²² a geľa andro ņebos a hino pal e čači (pravo) sera le Devleske a hin leske poddine o aňjela, o autoriti the o zora.

Sar te dživel o sentno dživipen

4 Te o Kristus avke cerpinda vaš amenge pro telos, ta the tumen pes zoraľaren ajse gondolišagoha, bo oda, ko cerpinda pro telos, preačhila te kerel o binos.

² Vašoda, medik dživen pre phuv, ma dživen buter pal o manuškere žadosci, ale pal oda, so kamel o Del.

³ Se imar dos dživenas avke, sar dživen o bijedevleskere manuša. ņisostar tumen na ladžanas, dživenas andro nalače žadosci, mačarenas tumen la moľaha, mulatinenas, pijenas a služinenas le džungale modlenge.

⁴ A sar imar lenca oda na keren a na dživen avke rozmukles sar on, čudalinen pes oleske a namištes pal tumende vakeren.

⁵ Ola manuša pes jekhvar ačhavana anglo Del, savo hino pririchtimen te sudzinel le džiden the le mulen.

⁶ Se vašoda pes vakerelas o evaňjelium the le mulenge, hoj te en sudzimen pal oda, sar dživenas andro telos, ale te dživen andro duchos avke, sar kamel o Del.

⁷ O agor savoreske hino pašes. Vašoda aven godaver the strižbe, hoj te aven pririchtimen pes te modľinel.

⁸ Ale anglal savoreste, mi el tumen jekh ke aver baro kamiben, bo o kamiben učharel andre but bini.

⁹ Presikaven e pačiv jekh avreske, bi o dudrišagos.

¹⁰ Sar o lače chulaja, saven o Del diňa všelijake dari, služinen jekh avreske, sako ole duchovne daroha, so chudľa.

¹¹ Te vareko vakerel, mi vakerel sar o lava le Devleskere; te vareko služinel, mi kerel oda andral e zor, so les del o Del, hoj te el andre savoreste barardo o Del prekal o Ježiš Kristus, bo leske hin e slava the e zor pro furt. Amen.

Sar te cerpinel sar o Krestános

¹² Mire lače phralale, ma čudalinen tumen la jagake, savi pre tumende avľa, hoj tumen te probalinel (skušinel), sar te pes tumenge ačhiľahas vareso čudno.

¹³ Ale radisaľon vašoda, hoj cerpinen vaš o Kristus, hoj te radisaľon bares the akor, sar pes sikavela leskeri slava.

¹⁴ Te tumenge keren ladž vaš le Kristoskero nav, bachtale san, bo o Duchos la slavakero, o Duchos le Devleskero, ačhel pre tumende.

¹⁵ Ale ņiko tumendar te na cerpinel sar vrahos, živaňis abo zbuňňikos, vaj sar oda, ko pes thovel andre savoreste.

¹⁶ Ale te cerpinel vareko sar Krestános, te na pes ladžal, ale mi bararel le Devles, hoj les hin kada nav.

¹⁷ Imar hin e ora, hoj o Del te chudel o sudos peskere manušendar. Ale te pes chudela ešeb (peršo) amendar, savo ela o agor ole džengero, save na šunen o evaňjelium le Devleskero?

¹⁸ A sar hin pisimen:

"Te o manuš, savo hino čačipnaskero, ča ajci-ajci pes zachraňinela, kaj ela o binošno the o bijedevleskero?"

¹⁹ Vašoda the ola džene, save cerpinen avke, sar kamel o Del, mi podden pes korkore le verne Stvoriteliske a mi keren o lačo.

Olenge, save lidžan o zboros

5 Mangav, sar o starši, le staršen maškar tumende – me, savo dikhľom le Kristoskero cerpišagos a som the o dđičoľola slavake, so pes sikavela:

² Lidžan o stados, so tumenge o Del diňa. Na vašoda, hoj tumen andre oda vareko ispidel, ale radišagostar avke, sar tumendar kamel o Del; na vaš o love, ale vašoda, hoj lenge kamen andral o jile čačes te služinel.

³ Aňi ma lidžan olen, saven tumenge o Raj diňa, sar te uľanas lengere raja, ale aven priklados le stadoske.

⁴ A sar pes sikavela o nekbareder Pastjeris, chudena e slavno koruna, so šoha (ňikda) na kirňola.

⁵ Avke the o terneder: Podden tumen le phuredrenge a savore tumen podden jekh avrenge. A uren tumen andre pokora, bo o Del pro barikane džal, ale le pokornen del peskero lačhipen (milost).

⁶ Podden tumen tel o zoralo vast le Devleskero, hoj tumen te hazdel upre andre peskero časos.

⁷ Savore tumare pharipena čhiven pre leste, bo ov pes pal tumende starinel.

⁸ Aven paš e godi a ma soven! Bo oda, ko pre tumende džal, o beng, phirel upre tele sar o choľamen ľevos, savo rodel kas te chal.

⁹ Ačhaven tumen leske, aven zorale andro pačaben a džanen, hoj tumare phrala avrether pal o svetos tiš predžan prekal ajse pharipena.

¹⁰ Te sikra cerpinena, o Del – savo presikavel peskero lačhipen (milost) andre savoreste a savo amen andro Ježiš Kristus vičinda andre peskeri slava – korkoro tumen sastarela, zoraľarela, thovela pro zoralo zaklados a kerela, hoj te na peren.

¹¹ Leske e slava the e zor pro furt. Amen.

O posledna pozdravi

¹² Ča sikra tumenge pisindom le Silasoha, saves me lav sar pačivale phrales. Bo kamav tumen te podhazdel andro pačaben a kamav te svedčinel, hoj kada hin oda čačo le Devleskero lačhipen (milost). Ačhen andre oda!

¹³ Miro čhavo Marek, the e khangeri andro Babilon †, tumenge bičhavel o pozdravi.

¹⁴ Pozdravinen šukares jekh avres le jilestar. Smirom tumenge savorenge, save san andro Ježiš Kristus. Amen.

† *E khangeri andro Rim*

2. PETER

O pozdravi

1 Me o Šimon Peter, o otrokos the apoštolos le Ježišoskero Kristoskero, pisinav olenge, save chudle ajso pačaben sar the amen amare čačipnaskere Devlestar the Spasitelistar le Ježišostar Kristostar.

² O lačhipen (milost) the smirom mi rozbarol maškar tumende, hoj čačes te prindžaren le Devles the le Ježiš, amare Rajes.

O Krestána vičimen the avrikidle

³ Le Devleskeri zor amen diňa sa, so amenge kampil, hoj te dživas avke, sar ov kamel. Diňa amenge oda akor, sar prindžardam oles, ko amen vičinda peskera slavaha the zoraha.

⁴ Aleha amen diňa oda baro the vzacno daros, pal savo amenge diňa lav: o kotor leskero devlipnaskero. Avke šaj denašaha het le svetoskere džungipnastar, kaj amen cirden o nalače žadosci.

⁵ Ipen vašoda keren sa pre oda, hoj te prithoven ko pačaben o žužipen a andro žužipen o prindžaripen,

⁶ andro prindžaripen o zlíkeriben, andro zlíkeriben o avrilíkeriben, andro avrilíkeriben o dživipen, so hin le Devleske pre dzeka,

⁷ andre oda dživipen o lačhipen ko phrala a andre oda lačhipen o kamiben.

⁸ Te kada savoro tumen hin a barol andre tumende, na avena ajse, save na keren nič, ale save anen e chasna, bo prindžaren amare Rajes le Ježiš Kristus.

⁹ Bo kas nane kala veci andre peskero dživipen, hino koro, na dikhel dur a bisterda pre oda, hoj sas obžužardo peskere binendar, so varekana kerelas.

¹⁰ Vašoda, mire phralale, keren sa prekal oda, hoj te aven zoraleder andre oda, pre soste san vičimen the avrikidle. Bo te kada kerena, šoha (ňikda) na perena

¹¹ a avke tumen igen šukares prilena andro večno krališagos amare Rajeskero, savo hin amaro Spasitelis, o Ježiš Kristus.

¹² Vašoda tumenge ada kamav furt te leperel, choc oda džanen a san zorale andro čačipen, so priiľan.

¹³ Medik som andre kada telos, dikhel pes mange oda mištes, hoj tumenge te leperav kala veci,

¹⁴ bo džanav, hoj imar kada teloskero stankos maj omukava, sar mange oda diňa te džanel amaro Raj o Ježiš Kristus.

¹⁵ A kerava sa prekal oda, hoj tumen peske te leperen kala veci, sar adarik džava het.

Le Kristoskeri slava

¹⁶ Sar tumenge vakerahas, sava zoraha avela amaro Raj o Ježiš Kristus, na gondolinahas peske avri vare-save paramisa. Bo korkore peskere jakhenca dikhlam leskeri slava.

¹⁷ Se chudla le Dadestar le Devlestar e pačiv the o baripen, sar avla pre leste andral e Bari Slava kada hangos: "Kada hino miro Čhavo, kas kamav! Lestar man hin o radišagos."

¹⁸ Amen šundam oda hangos, so avla tele andral o ňebos, sar leha samas pre oda sentno verchos.

¹⁹ Kada amen diňa mek buter pačaben andre oda, so vakerenas o proroka. A mištes keren, hoj tumen zadikhen pre oda prorocko lav, bo hino sar e momeli, so labol andro kalipen, medik na avela o džives a e tosaraskeri čercheň tumenge na anela o nevo svetlos andro jile.

²⁰ Mi el tumenge nekbuter pre godi, hoj aňi jekh proctvo andro pisimen Lav našti achalol manuš korkoro.

²¹ Bo o proctvo šoha na avla andral e voľa le manušeskeri, ale o manuša vakerenas vaš o Del avke, sar len lidžalas o Sentno Duchos.

Pal o falošna proroka the učiteľa

2 Ale sar maškar o nipi sas falošna proroka, avke ena the maškar tumende falošna učiteľa, save počoral anena o falošno sikaviben. A the le Bare Rajes, savo len cinda avri, zaprinena a avke korkore pre peste anena oda, hoj sigo ena zničimen.

² But manuša džana pal lengeru džungipen a vaš lende namištes vakerena pro čačipnaskero drom.

³ No ola falošna učiteľa kamena ča o love, vašoda tumenca thovena avri a phenena tumenge oda, so peske gondolinde avri. Le Devleskero sudos kale falošne učitelenge imar hino pririchtimen čirla a Oda, ko len zničinel, na sovel.

⁴ Se o Del na sajinda le aňjelen, save kerde binos, ale čida len andre bertena a zaphandla len andre le lancenca andro kalipen, andro peklos, hoj ode pes pre lende te stražinel dži o sudos.

⁵ O Del na sajinda aňi o phurikano svetos, sar anda e potopa pro binošna manuša. Ale le Noach the efa avre dženen o Del zachraňinda, bo ov le manušenge kazinelas pal o spravodlišagos.

⁶ The o fori Sodoma the Gomora sar priklados zlabarda la jagaha pro prachos, hoj pes o bijedevleskere manuša te daran olestar, ko avela.

⁷ Ale o Del zachrañinda le Lot, bo sas čačipnaskero a cerpinelas, sar dikhelas le bijedevleskere manušengero džungalo dživipen.

⁸ Oda čačipnaskero manuš bešelas maškar lende a džives so džives andre peskeri čačipnaskeri duša cerpinelas, sar dikhelas the šunelas, savo nalačhipen kerenas.

⁹ Avke o Raj džanel te cirdel avri le pobožne manušen andral o pharipena a te potrestinel le nalačhen, medik užaren o sudno Džives.

¹⁰ Mek buter marela olen, save džan pal o tēlos; save keren o džungale žadosci a na podden pes la autoritake. Ola manuša na daran ņikastar, hine barikane a bi e dar vakeren namištes pro ņeboskere bitostī.

¹¹ Ale o añjela, save hine bareder the zoraleder, na vakeren nalačhe lava pre ola bitostī anglo Raj.

¹² Ale kala hine bi e godī sar o dzive dživiri, save uřile (pes narodzinde) ča pre oda, hoj len te chuden a te murdaren. Vakeren namištes pre ola veci, so na achalōn, a ena zñičimen avke sar o dzive dživiri.

¹³ A vaš lengero nalačhipen pes lenge počinela pale. Imar andro parno džives keren rado o džungipen. On hine e mel the e ladž pre tumare hoscini, kaj pes presikaven peskere diliñipnaha.

¹⁴ Lengere jakha džan igen pal o lubipen a o bini lenge nane šoha (ñikda) dos; odcirden le slabe manušen a lengere jile hine avrisikade andro hamišagos (chamtivost) – hine prekošle manuša.

¹⁵ Ola falošna učiteľa omukle o čačo drom, našade pes a gele pal o drom le Bileamoskero, le Beoriskere čhaskero, savo kamelas o počičiben vaš o nalačhipen.

¹⁶ Ale vaš leskere bini leske sas phendo pre godī: O ņemo somaris ke leste prevakerđa manušeskere hangoha a zaačhada o diliñipen le prorokoskero.

¹⁷ On hine sar o chañiga bi o pañi; o chmari, saven tradel e zorali balvaj. Prekal lende hin pririchtimen o nekkaleder kalipen.

¹⁸ Bo vakeren bare lava, so na anen ņisavi chasna a cirden andro džungale tēlesne žadosci ajse manušen, save mekča akana denašle olendar, save dživen andro diliñipen.

¹⁹ On len den lav, hoj ena slobodne, ale korkore hine otroka le džungipnaske. Bo oleske sal otrokos, ko upral tu ņerinel (zvitāzinel).

²⁰ Bo te denašle le nalačhipnastar andral o svetos oleha, hoj prindžarde le Rajes the le Spasiťelis le Ježiš Kristus, a te len o svetos pale zachudľa a ņerinda upral lende, akor lenge ela goreder pro agor sar ešeb.

²¹ Bo feder lenge uřahas, te na prindžarel o čačipnaskero drom, sar te prindžarel a palis te visarel pes andral oda sentno prikazañje, so lenge sas dino.

²² Ačhiľa pes lenge avke, sar pes vakerel: "O rikono geľa pale paš oda, so čandľa avri," the: "O žužo balo pes geľa pale te melarel andre čhik."

Pal o Džives le Rajeskero

3 Kada řil imar hino dujto, so tumenge pisinav, mire lačhe phralale. Andro soduj řila tumenge leperav, hoj mištes te gondolinen.

² Kamav, hoj te na bisteren pro lava, so imar anglal phende o sentna proroka añi pro prikazañje le Rajeskero le Spasiťeliskero, so tumenge sas dino prekal o apoštola.

³ Ale anglal savoreste džanen oda, hoj andro posledna dživesa avena ajse manuša, save dživena pal peskere binošna žadosci. Asana tumen avri

⁴ a phenena: "Či na phenda, hoj avela? Kaj hino? Se kanastar mule o dada, sa hin avke, kanastar sas kerdo o svetos!"

⁵ Bo on narokom na kamen te džanel, hoj imar čirlastar o Del kerđa o ņebos the e phuv le laveha. Na kamen te džanel oda, hoj e phuv sas kerđi le pañestar a le pañeha

⁶ a hoj o čirlatuno svetos sas tašľardo a zñičimen ole pañeha.

⁷ Adadžives oda lav řikerel kada ņebos the kadi phuv la jagake. Řikerel len prekal oda džives, sar ena odsudzimen a zñičimen o bijedevleskere manuša.

⁸ Ale ma bisteren, mire lačhe phralale, hoj jekh džives hin ko Raj sar ezeros (1 000) berša a ezeros (1 000) berša sar jekh džives.

⁹ O Raj na avela nasig te kerel oda, so phenda, avke sar peske vareko gondolinel. Ov mek užarel, bo na kamel, hoj ņiko te na el odsudzimen andro meriben, ale kamel, hoj pes savoredžene te visaren ko Del.

¹⁰ A o džives le Rajeskero avela sar o živañis počoral. Andre oda džives o ņebos našľola bara vikaha a sa, so hin upre pro ņebos, zlabola andre jag a e phuv the sa, so pre late hin, ela zñičimen.

¹¹ Te kada savoro kavke našľola, save mušinen te el andre tumaro dživipen sentne the pobožne?

¹² Sar tumenge kempel te dživel, so igen užaren oda Džives le Devleskero, sar dikhena, hoj o ņebos našľola andre jag the sar savore aver veci rozdžala andro baro keradžipen?

¹³ No amen užaras pre oda lav, so amenge diňa: Pro nevo ņebos the pre nevi phuv, so ena pherde le spravodlišagoha.

¹⁴ Vašoda, mire lačhe phralale: Te užaren kala veci, keren sa, hoj te aven arakhle andro smirom le Rajeha, žužen the bi o binos.

¹⁵ Len sar tumari zachrana oda, hoj amaro Raj mek užarel. Bo avke tumenge pisinelas the amaro lačo phral, o Pavol, ola godaha, so leske sas diři.

¹⁶ Avke vakerel pal kala veci andre savore peskere řila. Andre ola řila hin varesave veci, so hin phares te achalol, vašoda len previsaren o manuša, save nane avrisikade a nane zorale andro pačaben. On previsaren the aver pisimen Lav a avke pes zñičinen korkore.

¹⁷ Ale te oda imar anglal džanen, mire lačhe phralale, chrañinen tumen, hoj tumen te na scirden o bijede-

vleskere manuša le klamišagoha a te na odperen andral tumaro zoralo pačaben.

¹⁸ Ale baron andro lačhipen (milost) le Rajeskero, hoj feder te prindžaren le Ježiš Kristus, amare Rajes the Spasitelis. Leske e slava the akana the pro furt!
Amen.

1. JAN

Pal o lav, so del o dživipen

1 So sas ešebnovarestar (peršovarestar), so šundam, so dikhlam peskere jakhenca, pre soste dikhahas a sostar pes amare vasta chudenas, pal oda vakeras, pal oda lav, so del o dživipen.

² A sar pes oda dživipen sikađa, dikhlam a svedčinas tumenge pal oda večno dživipen, so sas ko Dad a sikađa pes amenge.

³ Avke oda, so dikhlam the šundam, vakeras avri the tumenge, hoj tumen te aven amenca jekhetane. A amen sam jekhetane le Dadeha the leskere Čhaha, le Ježišoha Kristoha.

⁴ Kada tumenge pisinav vašoda, hoj amaro radišagos te avel pherardo.

O Del hin o svetlos

⁵ Kada hin oda, so šundam lestar a vakeras avri tumenge: O Del hin o svetlos a andre leste nane nisavo kalipen.

⁶ Te phenas, hoj sam leha jekhetane, ale phiras andro kalipen, klaminas a na keras o čačipen.

⁷ Ale te phiras andro svetlos avke, sar ov hino andro svetlos, akor sam jekhetane jekh avreha anglo Del a o rat le Ježišoskero, leskere Čhaskero, amen obžuzarel andral dojekh binos.

⁸ Te phenas, hoj amen nane bini, korkore pes klaminas a nane andre amende o čačipen.

⁹ Ale te viznavinas peskere bini, verno hino the čačipnaskero, hoj amenge te odmukel o bini a te žuzarel andral savore nalačhipena.

¹⁰ Te phenas, hoj na kerđam binos, keras lestar klamaris a nane andre amende leskero lav.

O Ježiš zaačhel vaš amende

2 Čhavorale mire, kada tumenge pisinav vašoda, hoj te na keren o bini. A te vareko kerđahas binos, hin amen vareko, ko paš amende ačhel anglo Dad: o Ježiš Kristus, o čačipnaskero.

² Prekal leste amenge hin odmukle o bini – no, na ča amenge, ale the cale svetoske.

³ Pal oda džanas, hoj les prindžaras: Te dolikeras leskere lava.

⁴ Oda, ko phenel: "Prindžarov les," ale leskere lava na dolikerel, hino klamaris a andre leste nane o čačipen.

⁵ Ale oda, ko dolikerel leskero lav, čačes kamel le Devles. Pal oda džanas, hoj sam andre leste.

⁶ Oda, ko phenel, hoj ačhel andre leste, mušinel te dživel avke, sar ov dživelas.

O nevo prikazañje

⁷ Mire lačhe phralale, na pisinav tumenge nevo prikazañje, ale o purano prikazañje, so tumende sas ešebnovarestar (peršovarestar). Oda purano prikazañje hin o lav, so imar šundam.

⁸ A the nevo prikazañje tumenge pisinav, bo oda čačipen dičhol andro Kristus the andre tumende, bo o kalipen džal het a o čačo svetlos imar švicinel.

⁹ Oda, ko phenel, hoj hino andro svetlos a našti avri ačhel peskere phrales, hino mek furt andro kalipen.

¹⁰ Oda, ko kamel peskere phrales, ačhel andro svetlos: Nane andre leste nič, pre soste vareko šaj perel.

¹¹ Ale oda, ko našti avri ačhel peskere phrales, hino andro kalipen a phirel andro kalipen. Añi na džanel, kaj džal, bo o kalipen korarda leskere jakha.

¹² Pisinav tumenge, čhavorale, hoj vaš leskero nav tumenge hin o bini odmukle.

¹³ Pisinav tumenge, dadale, hoj prindžardam oles, ko hin ešebnovarestar.

Pisinav tumenge, terne čhavale, hoj ñerindam (zvitazindam) upral o Nalačo.

¹⁴ Pisinav tumenge, čhavale, hoj prindžarenas le Dades.

Pisindom tumenge, dadale, hoj prindžarenas oles, ko hin ešebnovarestar.

Pisindom tumenge, terne muršale, hoj san zorale a le Devleskero lav ačhel andre tumende a ñerindam (zvitazindam) upral o Nalačo.

¹⁵ Ma kamen o svetos, añi o veci, so hin pro svetos. Te vareko kamel o svetos, na kamel le Dades.

¹⁶ Bo nič olestar, so hin pro svetos – e žadosca le teloskeri, e žadosca le jakhengeri, abo o barikano dživipen – nane le Dadestar, ale hin andral o svetos.

¹⁷ A o svetos the leskeri žadosca našlol, ale oda, ko kerel e voľa le Devleskeri, ačhel pro furt.

Pal o antikrist

¹⁸ Čhavale, hin ade e posledno ora. Šundam, hoj avela o antikrist, a avke imar akana avle but antikristi. Oleha džanas, hoj hin e posledno ora.

¹⁹ Avle avri maškar amende, ale na sas amendar, bo te ulehas amendar, ačhilehas amenca. Ale kada pes ačhilā, hoj pes te sikaven, hoj nane savore amendar.

²⁰ Tumen san pomazimen le Sentnonestar, vašoda tumen savore džanen o čačipen.

²¹ Na pisindom tumenge vašoda, hoj na džanen o čačipen, ale vašoda, bo les prindžaren a džanen, hoj nisavo klamišagos na avel andral o čačipen.

²² A ko hin klamaris, te na oda, ko zaprinel, hoj o Ježiš hino o Kristus? Oda, ko zaprinel le Dades the le Čhas, hin oda antikrist.

²³ Ole manušes, savo zaprinel le Čhas, nane aňi o Dad. Ale oda, ko viznavinel le Čhas, oles hin the o Dad.

²⁴ Vašoda mi ačhel andre tumende oda, so šundān ešebnovarestar. Te oda, so šundān ešebnovarestar, ačhela andre tumende, akor the tumen ačhena andro Čhavo the andro Dad.

²⁵ A oda hin o lav, so o Kristus diňa: O večno džživipen.

²⁶ Kada tumenge pisindom pal ola, save tumen cirden andro binos.

²⁷ No pre tumende ačhel o Duchos le Kristoskero, saves priiľan lestar, a vašoda na kempel tumenge, hoj tumen vareko te sikavel. Bo leskero Duchos tumen sikavel pal savoreste a oda, so sikavel, hino čačipen a na klamišagos – ačhen andre leste, avke sar tumen sikavelas.

Čhave le Devleskere

²⁸ A akana, mire čhavorale, ačhas andre leste, hoj akor, sar pes sikavela, te avas bi e dar a te na pes ladžas angle leste, sar avela.

²⁹ Te džanen, hoj ov hino čačipnaskero, akor džanen, hoj sako, ko kerel o spravodlišagos, uliľa (narodzinda) lestar.

3 Dikhen, savo kamiben amen diňa o Dad, hoj pes te vičinas le Devleskere čhave. A amen the sam! Vašoda amen o svetos na prindžarel, bo les na prindžarda.

² Mire lačhe phralale, akana sam le Devleskere čhave, ale mek pes na sikađa, so avaha. Ale džanas, hoj sar pes sikavela, avaha ajse sar ov, bo dikhaha les avke, sar hino.

³ Sako, kas hin kajso užaripen (nađej) andre leste, pes žužarel avke, sar ov hino žužo.

⁴ Sako, ko kerel binos, na dolikerel o zakonos; bo o binos hin oda, hoj pes na dolikerel o zakonos.

⁵ A džanen, hoj o Ježiš pes sikađa vašoda, hoj te lel amare bini, a andre leste nane binos.

⁶ Sako, ko ačhel andre leste, na kerel o bini a sako, ko kerel o bini, les na dikhľa, aňi les na prindžarel.

⁷ Čhavorale, ņiko tumenca te na thovel avri! Oda, ko kerel, so hin čačipnaskero, hino čačipnaskero, avke sar o Kristus hino čačipnaskero.

⁸ Oda, ko kerel o binos, hino le bengestar, bo o beng kerel o bini ešebnovarestar (peršovarestar). Vašoda pes sikađa o Čhavo le Devleskero, hoj te musarel le bengeskere buča.

⁹ Sako, ko uliľa (pes narodzinda) le Devlestar, na kerel bini, bo le Devleskero džživipen ačhel andre leste avke sar o semjenkos a aňi našti kerel bini, bo uliľa (pes narodzinda) le Devlestar.

¹⁰ Pal oda šaj džanen, ko hin le Devleskere čhave a ko le bengeskere čhave: Sako, ko na kerel oda, so hin

čačipnaskero, nane le Devlestar – aňi oda, ko na kamel peskere phrales.

Te kamas jekh avres

¹¹ Bo kada hin oda, so šundān ešebnovarestar: Hoj te kamas jekh avres.

¹² Na avke sar o Kain, savo sas le Nalačhestar a murdarda peskere phrales. A soske les murdarda? Bo oda, so o Kain kerelas, sas nalačo a oda, so kerelas leskero phral, o Abel, sas lačo.

¹³ Ma čudalinen tumen, phralale mire, te tumen o svetos našti avri ačhel.

¹⁴ Vašoda, hoj kamas le phralen, džanas, hoj pregeľam andral o meriben andro džživipen. Oda, ko na kamel le phrales, ačhel andro meriben.

¹⁵ Sako, ko našti avri ačhel peskere phrales, hino vrahos a džanen, hoj nisave vrahos nane andre peste o večno džživipen.

¹⁶ Pal oda prindžarda le Devleskero kamiben, hoj ov diňa peskero džživipen vaš amenge. Avke the amen mušinas te del peskero džživipen vaš o phrala.

¹⁷ Te varekas hin o barvalipen andre kada svetos a te dikhela, hoj le phrales nane vareso, ale phandela angle leste peskero jilo, sar šaj el le Devleskero kamiben andre leste?

¹⁸ Mire čhavorale, te na kamas ča le lavenca the la čhibaha, ale oleha, so čačes keras.

Te džas anglo Del bi e dar

¹⁹ Pal oda džanas, hoj sam le čačipnastar a hin amen anglo Del smirom andro jile,

²⁰ bo te šunas andro jilo, hoj namištes keras, o Del hino bareder sar amaro jilo a džanel savoro.

²¹ Phralale, te šunas andro jilo, hoj amen nane binos, šaj džas anglo Del bi e dar.

²² A chudas lestar savoro, so mangas, bo dolikeras leskere prikazaňja a keras oda, so leske hin pre dzeka.

²³ Kada hin leskero prikazaňje: Hoj te pačas andre leskero Čhavo – andro nav Ježiš Kristus – a hoj te kamas jekh avres, avke sar amenge diňa o prikazaňje.

²⁴ Ola, save dolikeran leskere prikazaňja, ačhen andre leste a ov tiš andre lende. A džanas, hoj ačhel andre amende, prekal o Duchos, saves amenge diňa.

Te na pačas dojekhe duchoske

4 Phralale mire, ma pačan dojekhe duchoske. Probalinen (skušinen) le duchen, či hine le Devlestar, bo but falošna proroka avle andro svetos.

² Pal kada prindžarena le Devleskere Duchos: Dojekh duchos, savo pridžanel, hoj o Ježiš Kristus avľa andro telos, hino le Devlestar.

³ A dojekh duchos, savo na pridžanel, hoj o Ježiš Kristus avľa andro telos, nane le Devlestar. Oda hin oda duchos le antikristoskero, pal savo šundān, hoj avela a akana imar hino pro svetos.

⁴ Čhavorale, tumen san le Devlestar a ňerindan (zvitazindan) upral lende, bo oda, ko hin andre tumende, hino bareder sar oda, ko hin andro svetos.

⁵ On hine andral o svetos, vaš oda vakeren avke sar o svetos a o svetos len šunel.

⁶ Amen sam le Devlestar a oda, ko prindžarel le Devles, šunel amen – ale oda, ko nane le Devlestar, na šunel amen. Pal oda prindžaras le čačipnaskere Duchos the le duchos, savo cirdel andro klamišagos.

O Del hin o kamiben

⁷ Phralale mire, kamas jekh avres, bo o kamiben hin le Devlestar a sako, ko kamel, ulifa (pes narodzinda) le Devlestar a prindžarel le Devles.

⁸ Oda, ko na kamel, na prindžarda le Devles, bo o Del hin o kamiben.

⁹ Le Devleskero kamiben ke amende pes sikađa avke, hoj o Del bičhađa peskere jekhore Čhas pro svetos, hoj prekal leste amen te el dživipen.

¹⁰ O kamiben nane oda, hoj amen kamahas le Devles, ale hoj ov kamelas amen a bičhađa peskere Čhas, hoj prekal leste amenge te el odmukle o bini.

¹¹ Phralale mire, te amen o Del avke kamelas, the amen mušinas te kamel jekh avres.

¹² Le Devles šoha (ňikda) ňiko na dikhľa, ale te kamas jekh avres, o Del ačhel andre amende a leskero kamiben hin dokerdo andre amende.

¹³ Pal oda džanas, hoj ačhas andre leste a ov andre amende, hoj amen diňa peskere Duchostar.

¹⁴ Amen dikhľam a svedčinas, hoj o Dad bičhađa le Čhas sar Spasiteľis le svetoske.

¹⁵ O Del ačhel andre dojekh, ko viznavinel, hoj o Ježiš hin o Čhavo le Devleskero, a ov andro Del.

¹⁶ Amen pačandilam a prindžardam o kamiben, so hin le Devles ke amende. O Del hin o kamiben a oda, ko ačhel andro kamiben, ačhel andro Del a o Del andre leste.

¹⁷ Avke hin o kamiben dokerdo andre amende, hoj te avas bi e dar pro sudno džives. Bo ajso sar ov hino andre kada svetos, ajse sam the amen.

¹⁸ Andro kamiben nane dar, bo o kamiben, so hino dokonalo, tradel avri e dar. Ko pes daral, daral pes le trestostar, vašoda nane dokonalo andro kamiben.

¹⁹ Amen les kamas, bo ov amen ešebno kamelas.

²⁰ Te vareko phenel: "Kamav le Devles," ale peskere phrales našti avri ačhel, hino klamaris. Bo te o manuš na kamel peskere phrales, saves dikhľa, sar šaj kamel le Devles, saves na dikhľa?

²¹ A kada prikazaňje amen hin le Kristostar: Oda, ko kamel le Devles, mi kamel the peskere phrales.

O pačaben ňerinel upral o svetos

5 Sako, ko pačal, hoj o Ježiš hin o Kristus, ulifa (pes narodzinda) le Devlestar; a sako, ko kamel le Dades, kamel the leskere čhas.

² Pal oda džanas, hoj kamas le Devleskere Čhaven, te kamas le Devles a dolikeras leskere prikazaňja.

³ Bo kada hin o kamiben le Devleskero, hoj te dolikeras leskere prikazaňja a leskere prikazaňja nane phare.

⁴ Bo savoro, so ulifa (pes narodzinda) le Devlestar, ňerinel (zvitazinel) upral o svetos. A amaro pačaben hin oda, so ňerinda upral o svetos.

⁵ Ko šaj ňerinel upral o svetos? Ča oda, ko pačal, hoj o Ježiš hin o Čhavo le Devleskero.

O svedectvo pal o Čhavo

⁶ O Ježiš Kristus hin oda, savo avľa prekal o paňi the prekal o rat. Na avľa ča le paňeha, ale le paňeha the le rateha. A o Duchos hin oda, ko svedčinel, bo o Duchos hin o čačipen.

⁷ Bo trin hine, save svedčinen:

⁸ o Duchos, o paňi the o rat. A on trin hine jekh andre oda.

⁹ Te prilas o svedectvo le manušengero, o svedectvo le Devleskero hino bareder. Le Devleskero svedectvo hin oda, so phenda pal peskero Čhavo.

¹⁰ Oda, ko pačal andro Čhavo le Devleskero, oles hin o svedectvo andre peste. Ko na pačal le Devleske, oda lestar kerđa klamaris, bo na pačandilľa ole svedectvoske, so phenda o Del pal peskero Čhavo.

¹¹ A kada hin oda svedectvo, hoj amen o Del diňa večno dživipen a oda dživipen hin andre leskero Čhavo.

¹² Kas hin o Čhavo, oles hin o dživipen; a kas nane o Čhavo le Devleskero, oles nane o dživipen.

Pal o večno dživipen

¹³ Kada pisindom tumenge, save pačan andro nav le Devleskere Čhaskero, hoj te džanen, hoj tumen hin o večno dživipen.

¹⁴ Hin amen kadi istota anglo Del, hoj ov amen šunel, sar mangas vareso pal leskeri voľa.

¹⁵ Te džanas, hoj amen šunel andre savoreste, so mangas, ta džanas, hoj pes amenge imar ačhilľa oda, so lestar mangľam.

¹⁶ Te vareko dikhľahas peskere phrales, hoj kerel binos, so na lidžal pro meriben, mi mangel vaš leske a o Del les dela dživipen – ale ča te na kerđa binos pro meriben. Te vareko kerđa ajso binos, so lidžal pro meriben, na phenav, hoj pes te mangel vaš ajso manuš.

¹⁷ Dojekh nalačhipen hin binos, ale hin the binos, so na lidžal pro meriben.

¹⁸ Džanas, hoj o manuš, savo ulifa le Devlestar, na kerel o bini. Ale oda, ko ulifa le Devlestar – o Ježiš – les chraňinel a o nalačo pes lestar na chudel.

¹⁹ Džanas, hoj sam le Devlestar a calo svetos hin andre zor le bengeskero.

²⁰ A džanas, hoj o Čhavo le Devleskero amen avľa te del godi, hoj te prindžaras le čače Devles. Amen dživas jekhetane le čače Devleha – andre leskero Čhavo, o Ježiš Kristus. Ov hin o čačo Del the o večno dživipen.

²¹ Čhavorale, chrañinen tumen le modlendar – le falošne devlendar. Amen!

2. JAN

O pozdravos

1 Me o phureder:
 La Raňake, savi hiňi avrikidňi le Devlestar, the lakere čhavege, saven čačas kamav – a na ča me kokino, ale the savore, save prindžarde o čačipen.
² Kamas tumen, bo o čačipen ačhel andre amende a ela amenca pro furt.
³ Mi del tut o lačhipen (o milost), o smirom the o lačhejileskeriben andro čačipen the kamiben amaro Del, o Dad, the o Ježiš Kristus, amaro Raj o Čhavo le Dadeskero.

O kamiben the o čačipen

⁴ Igen radisaľilom, hoj arakhlom tire čhavendar ajsen, save phiren andro čačipen avke, sar chudľam o prikazaňje le Dadestar.
⁵ Akana, Raňije, na pisinav tuke nevo prikazaňje, ale oda, so amen sas ešebnovarestar (peršovarestar). Mangav tut, hoj te kamas jekh avren.
⁶ A o kamiben hin oda, hoj te phiras andre leskere prikazaňja. A oda prikazaňje hin te phirel andro kamiben, avke sar šundľan ešebnovarestar.

⁷ Bo andro svetos avle but klamara, save na viznavinen, hoj o Ježiš Kristus avľa andro tēlos. Ajsno manuš hino klamaris the o antikrist.

⁸ Den pre tumende pozoris, hoj te na našaven oda, pre soste kerenas, ale hoj te chuden calo počičiben.

⁹ Ole manušes, ko džal dureder a na ačhel andro sikaviben le Kristoskero, nane o Del. Ale ko ačhel andro sikaviben le Kristoskero, oles hin the o Dad the o Čhavo.

¹⁰ Te vareko avel ke tumende a na anel kada sikaviben, ma prilen les andro kher, aňi les ma pozdravinen.

¹¹ Bo oda, ko les prilel, hino jekhetane leha andre leskere nalače skutki.

O posledna lava

¹² Hin man but so tumenge te pisinel, ale na kamav oda te kerel pro papiris la tintaha. Bo pačav, hoj avava ke tumende a vakeraha jekh avreha, hoj amaro radišagos te el pherdo.

¹³ O čhave tira pheňakere, savi hiňi avrikidňi le Devlestar, tut pozdravinen.
 Amen.

3. JAN

O pozdravos

- 1** Me o phureder pisinav le lače phraleske, le Gajoske, saves čačes kamav.
- 2** Miro lačo Gajona, mangav, hoj tuke te el mištes andre savoreste a hoj te aves sasto, avke sar hin mištes tira dušake.
- 3** Bo igen radisalilom, sar avenas o phrala a vakernas, hoj sal verno andro čačipen a sar džives andro čačipen.
- 4** Nane man bareder radišagos sar oda, hoj te šunav, hoj mire čhave dživen andro čačipen.

Ašarel le Gajos

- 5** Phrala miro lačo, presikaves tiri vernost' andre oda, sar pes likeris ko phrala the ko cudze.
- 6** On phende avri angle khangeri pal tiro kamiben. A sar len des oda, so lenge kempel pro drom, mištes keres, bo avke oda kamel o Del.
- 7** Se pes dine pro drom prekal o nav le Kristoskero a na lenas nič le manuendar, save na pačan.
- 8** Amenge kempel kajse phralen te prilel, bo avke keras jekhetane e buči prekal o čačipen.

O Diotrefes the o Demetrios

- 9** Pisindom imar le khangerake, ale o Diotrefes, savo kamel te el ešebno (peršo) maškar lende, amen na prilel.
- 10** Vašoda sar avava, leperava oda, so kerel: Hoj vakerele pal amende nalače lava. A aňi oda leske nane dos, ale mek korkoro na prilel le phralen. A olenge, save len kamlehas te prilel, na domukel a čhivel len avri andral e khangeri.
- 11** Phrala miro lačo, ma liker tut pal o nalačo, ale pal o lačo. Oda, ko kerel o lačo, hin le Devlestar, ale ko kerel o nalačo, na dikhla le Devles.
- 12** Sako – the korkoro o čačipen – vakerele mištes pal o Demetrios. The amen svedčinas a džanen, hoj amare lava hine čačipnaskere.
- 13** Uľahas man tuke but so te phenel, ale na kamav tuke te pisinel andro ľil.
- 14** Ale pačav, hoj tut sig dikhava a vakeraha jekh avreha.
- 15** Smirom tuke! O phrala tuke bičhaven pozdravi. Pozdravin mandar le phralen, dojekhes lendar.

JUDA

¹ Me o Juda, le Ježišoskero sluhas the le Jakobskero phral, pisinav tumenge, save san vičimen avri a kas o Del o Dad kamel a likerel andro Ježiš Kristus.

² O lačhipen, o kamiben the o smirom mi rozbaron maškar tumende.

Pal o falošna učiteľa

³ Phralale mire, igen tumenge kamavas te pisinel pal amari jekhetaňi zachrana, ale akana tumenge mušinav te pisinel a te priphenel, hoj te keren sa vaš o pačaben, so o Del diňa le sentnenge jekhvar a pro furt.

⁴ Bo varesave manuša pes avre dromenca ispidle andre počoral. Lengero sudos hin pisimen imar čirla anglal. On hine o bijedevleskere manuša, save čerinen o lačhipen (milost) amare Devleskero vaš o nažužipena a na pridžanen pes ke amaro jekh vladcas the Raj, Ježiš Kristus.

⁵ Kamav tumenge te leperel, choc imar savoro oda džanen, hoj o Raj ešeb (peršo) zachraňinda leskere manušen andral e Egiptsko phuv, ale palis merarda olen, save na pačandile.

⁶ The le aňjelen, save na zalikerde peskeri autorita, ale omukle peskere than, likerel andro kalipen andro večne puta, medik len na sudzinela andre oda Baro Džives.

⁷ Leperen peske the pre Sodoma the Gomora the pro fori pašal lende, so kerenas ajso baro lubipen, hoj džalas o murš le muršeha, a vašoda sas marde la jagaha, so šoha (ňikda) na preačhel. Oda hin dino prekal amende, hoj pal oda te džanas a te daras.

⁸ Avke hin the kale manušenca: Lidžan len o sune a meľaren andre peskere tela le binenca, na prilen e autorita a namištes vakeren pro aňjela andre slava.

⁹ Aňi o archaňelos o Michael, sar pes marelas le bengeha vaš o telos le Mojžišoskero, pes na opovažinda leske namištes te phenel. Ča phenda: "O Raj tut mi marel!"

¹⁰ Ale kala vakeren namištes pre savoreste, so na achalón; hine sar o dzive džviri, save keren ča avke, sar pes šunen, no ipen vašoda ena zničimen.

¹¹ Vigos lenge! Bo gele ajse dromeha sar o Kain. Vaš o love pes dine te cirdel andro diliňipen, avke sar o Bileam. A mule avke sar o Korach, bo pes vzburinde sar the ov.

¹² Sar tumen zdžan jekhetane te chal, on hine sar o melale fleki; chan tumenca bi e ladž a starinen pes ča pal peste. O balvaja len lidžan avrether a hine sar o

chmari bi o paňi; sar o jesutne stromi bi o ovocje: Duvar avrimule a avricirdle the le koreňenca.

¹³ Hine sar o dzive moroskere vlani, so anen avri peskero džungipen sar o peni. Ola manuša hine sar o našade čercheňa a prekal lende hin pririchtimen o nekkaleder kalipen pro furt.

¹⁴ Prorokinelas pal lende the o Enoch, o eftato murš pal o Adam, sar phenda: "Dikh, o Raj avela peskere but ezere sentnenca,

¹⁵ hoj te odsudzinel a te marel savore bijedevleskere manušen vaš savore bijedevleskere veci, so kerenas, the vaš savore džungale lava, so o binošna manuša pre leste phende."

¹⁶ Oda hin o dudroša, savenge nane nič pre dzeka; save dživen pal peskere žadosci. Lengere vušta vakeren bare zorale veci a le manušen lašaren ča vašoda, hoj lendar vareso te dochuden.

Te likerem avri

¹⁷ Ale tumen, mire lače phralale, ma bisteren pro lava, so tumenge sas anglal phende prekal o apoštola, saven bičhada amaro Raj, o Ježiš Kristus.

¹⁸ On tumenge phenenas, hoj andro posledna časi avena ajse manuša, save asana a dživena pal peskere binošna žadosci.

¹⁹ Oda hin ola, save tumen odcirden the rozulaven; telesne manuša bi o Duchos.

²⁰ Ale tumen, mire phralale, baron andre tumaro igen sentno pačaben a modľinen tumen andro Sentno Duchos.

²¹ Likerem tumen andre le Devleskero kamiben a užaren pro lačhipen, so tumen lidžala andro večno dživipen – o lačhipen, so tumen dela amaro Raj o Ježiš Kristus.

²² Aven lačhejileskere ke ola džene, save hine slaba andro pačaben.

²³ Cirden len avri andral e jag a zachraňinen len. Avrenge aven lačhejileskere, ale merkinen, hoj pes te na meľaren lengere binenca. The lengere gada, so sas meľarde le binenca, tumenge mi džungľol.

O lašariben le Devleske

²⁴⁻²⁵ Mi džal e slava, o baripen, e zor the o rajipen le jekhe Devleske, amare Spasiteliske, prekal amaro Raj Ježiš Kristus, anglal savore časi, the akana the pre savore časi. Ov hino zoralo a pomožinela tumenge, hoj te na peren, a šaj anel andre peskeri slava bare radišagoha a bi e mel.

Amen.

ZJAVEŇJE

O anglune lava

1 Kada hin o zjaveŇje le Ježišoskero Kristoskero, so les diŇa o Del, hoj te sikavel peskere sluhenge pal oda, so pes mušinela sig te ačhel. Ov bičhađa peskere aŇjelos, hoj oda te del te džanel peskere sluhaskle le Janoske.

² Ov vakerelas avri savoro, so dikhla – oda hin o lav le Devleskero the o svedectvo le Ježišoskero Kristoskero.

³ Bachtalo hin oda, ko genel, the ola, save šunen o lava andral kada prorocstvo a dolikeren oda, so hin andre pisimen, bo o časos hino pašes.

⁴ O Jan pozdravinel o eŇta khangera, so hine andre Azija: O lačhipen (milost) the o smirom tumenge Olestar, ko hin, ko sas a ko avela, the ole eŇta duchendar, save hine anglal leskero tronos,

⁵ the le Ježišostar Kristostar. Ov hin o verno švedkos, ešebno olendar, save sas uštade andral o meriben, a hin kralis upral savore kraľa pre phuv.

Leske, savo amen kamel a peskere rateha amen cinda avri amare binendar;

⁶ savo kerđa amendar kraľen † the rašajen le Devleske peskere Dadeske, e slava the e zor pro furt! Amen.

⁷ Dikh, avel le chmarenca a dikhela les dojekh jakh, the ola, save les predemade. Rovena upral leste savore nipi pre phuv. Avke hin. Amen!

⁸ "Me som e Alfa the Omega, o Ešebno the o Posledno," phenel o Raj, o Del, "oda, ko hin, ko sas a ko avela, oda Nekzoraleder."

O Jan dikhel le Kristus

⁹ Me o Jan, tumaro phral, jekhetane tumenca likerav avri o pharipen, so amen hin vaš o krališagos le Ježišoskero Kristoskero. Somas pro ostrovos Patmos vaš o lav le Devleskero the vaš o svedectvo pal o Ježiš.

¹⁰ Andre le Rajeskero džives somas andro Duchos a šundom pal mande zoralo hangos sar o hangos la trubakero,

¹¹ so vakerelas: "Oda, so dikhes, pisin andro zvitkos a bičhav le eŇta zborenge, so hin andre Azija: Andro Efezus, andre Smirna, andro Pergamos, andre Tijatira, andro Sardis, andre Filadelfia the andre Laodikea."

¹² Visaliřom palal, hoj te dikhav oles, ko manca vakere las. A sar visaliřom, dikhřom eŇta somnakune momelara

¹³ a mařkar ola eŇta momelara dikhřom varekas, ko marelas pro Čhavo le Devleskero. Sas urdo andro džindarde gada dži o pindre a somnakuno pasos les sas prephandlo prekal e brekh (o čuča).

¹⁴ Leskero řero the leskere bala sas igen parne – parne sar jiv – a leskere jakha sas sar o jagale plameňa.

¹⁵ A leskere pindre sas sar o bliřtaco trast rozlabardo andro bov a leskero hangos sas sar o hangos but paňengero.

¹⁶ Andro čačo vast les sas eŇta čerčeňa, andral leskero muj avelas avri ostro řablja, so čhinel pal soduj seri, a leskero muj sas sar o kham, so labol andre peskeri zor.

¹⁷ Sar les dikhřom, peřom leske paš o pindre sar mulo. Ov pre ma thođa peskero čačo vast a phendja mange: "Ma dara tut! Me som o Ešebno (Perřo) the o Posledno.

¹⁸ Me som the o Džido – somas mulo, ale dikh, som džido pro furt. Amen. Mande hin o kleji le peklostar the le meribnastar.

¹⁹ Vařoda pisin andre savoro, so akana dikhřal: Oda, so hin akana, the oda, so pes pal kada ačhela.

²⁰ Ola eŇta čerčeňa, so dikhřal andre miro čačo vast, the ola eŇta somnakune momelara hin o garuđipen. O eŇta čerčeňa hin o aňjela le eŇta khangerengere a o eŇta momelara hin o eŇta khangera."

La khangerake andro Efezus

2 "Le aňjeloske andre khangeri Efezus pisin: Kada vakere las, savo likerel o eŇta čerčeňa andre peskero čačo vast a phirel mařkar ola eŇta somnakune momelara.

² Džanav tire skutki, pal tiri buči the pal tiro avriřkeriben a the oda, hoj nařti zlidžas le nalačhen. Probalřindal (skuřindal) olen, save pal peste phenen, hoj hine apořtola, ale nane, a avřal pre oda, hoj hine klamara.

³ Likerđal avri, cerpindal but vaš miro nav a furt birines.

⁴ Ale hin man pre tu oda, hoj omukřal tiro ešebno (perřo) kamiben.

⁵ Ma bister pre oda, kaj salas a khatar peřal avri, visar tut ole binendar a ker oda, so ešeb kerehas. Ale te tut na visareha le binendar, avava pre tu a čhalavava tiro momelaris pal leskero than.

⁶ Ale jekh veka keres miřtes: Nařti avri ačhes oda, so keren o Mikulařenci ††, so the me nařti avri ačhav.

† Grekengeri čhib: O krališagos

⁷ Kas hin kana, mi šunel, so o Duchos phenel le khangerenge! Oles, ko ņerinel (zvitazinel), dava te chal pal o stromos le dživipnaskero, so hin andro rajos le Devleskero.”

La khangerake andre Smirna

⁸ “Le aňjeloske andre khangeri Smirna pisin:

Kada vakerel oda Ešebno the o Posledno, oda, ko sas mulo a obdžidila.

⁹ Džanav tiro pharipen the tiro čoripen, ale sal barvalo. Džanav the pal ola, save namištes pal tu vakeren a save phenen pal peste, hoj hine Židi, ale nane a hine e sinagoga le satanoskeri.

¹⁰ Ma dara olestar, so cerpineha! Dikh, o beng čhivela varesaven tumendar andre bertena, hoj te aven probalimen avri, a ela tumen pharipen deš džives. Av pačivalo dži o meriben a dava tut e koruna le dživipnaskeri!

¹¹ Kas hin kana, mi šunel, so o Duchos phenel le khangerenge! Oles, ko ņerinel (zvitazinel), o dujto meriben na dukhavela.”

La khangerake andro Pergamos

¹² “Le aňjeloske andre khangeri Pergamos pisin:

Kada vakerel oda, kas hin odi ostro šablā, so čhinel pal soduj seri.

¹³ Džanav, kaj bešes – ode, kaj hin o tronos le satanoskero. Ale likerens tut mire navestar a na preačhiľal andre ma te pačal, aňi andre ola dživesa, sar svedčinelas o Antipas, miro pačivalo švedkos, saves murdarde andro tumaro foros, kaj bešel o satan.

¹⁴ Ale hin man pre tu sikra vareso: Hin tut ode ajse džene, save likerens o sikaviben le Bileamoskero. Bo ov sikavelas le Balak sar te lidžal le Izraeloskere čhaven pro bini, hoj te chan oda, so hin obetimen le modlence a te keren o lubipen.

¹⁵ A the tut hin ajse džene, save likerens o sikaviben le Mikulašengero †.

¹⁶ Visar tut olestar! Bo sar na, avava pre tu sig a marava man lenca la šablāha andral miro muj.

¹⁷ Kas hin kana, mi šunel, so o Duchos phenel le khangerenge! Oles, ko ņerinel, dava andral e garuđi manna a dava les parno baroro, pre savo ela pisimen o nevo nav, so na džanel ņiko, ča oda, ko les chudel.”

La khangerake andre Tijatira

¹⁸ “Le aňjeloske andre khangeri Tijatira pisin:

Kada vakerel o Čhavo le Devleskero, saves hin o jakha sar o jagale plameňa the o pindre sar o blištāco trast.

¹⁹ Džanav tire skutki, tiro kamiben, tiri buči, tiro pačivaliben the tiro avrilikeriben. Džanav the oda, hoj akana keres buter sar akor, sar andre ma pačandilal.

²⁰ Ale hin man pre tu oda, hoj domukes la džuvľa Jezabel, savi phenel pal peste, hoj hiňi prorokiňa. Oleha,

so sikavel, odcirdel mire služobňiken, hoj te keren o lubipen a te chan oda, so hin obetimen le modlence.

²¹ Diňom la časos, hoj pes te visarel andral peskero lubipen, ale na kamel.

²² Dikh, me la thovav pro hađos, kaj cerpinela. A pre ola, save laha keren o lubipen, domukava baro pharipen, te pes na visarena olestar, so keren.

²³ Lakere čhaven marava the le meribnaha a dodžanena pes savore khangeri, hoj me som, savo prindžarav o jile the o gođa, a sakoneske tumendar počinava pal oda, so kerel.

²⁴ Ale phenav tumenge andre Tijatira, save pes na likerens ole sikavibnastar a save na prindžardan ‘o bare garuđipena le satanoskere’, hoj na thovav pre tumende aver pharipen.

²⁵ Ča likerens mištes oda, so tumen hin, medik me na avava.

²⁶ Oles, ko ņerinel a kerela dži o agor oda, so me kamav, dava zor upral o aver narodi –

²⁷ ‘Ov len lidžala la trastuňa pacaha a phagerela len pro kotora sar čhikakere čare’

²⁸ – avke sar the me priilom e zor mire Dadestar. A dava les the e tosaraskeri čerčeň.

²⁹ Kas hin kana, mi šunel, so o Duchos phenel le khangerenge!”

La khangerake andro Sardis

3 “Le aňjeloske andre khangeri Sardis pisin:

Kada vakerel oda, saves hin o ehta duchi le Devleskere the o ehta čerčeňa. Džanav tire skutki, hoj tut hin nav, hoj džives, ale sal mulo.

² Ušti a zoraľar savoro, so mek ačhiľa a so hin pašes paš o meriben. Bo na dikhav, hoj oda, so keres, hin mištes angle miro Del.

³ Ma bister pre oda, sar oda priilal the šundal, doliker oda a visar tut le binendar! Dikh, hoj te na zasoves, bo avava pre tu sar o živaňis a aňi na džaneha, savi ora pre tu avava.

⁴ Ale hin tut the andro Sardis vajkeci manuša, save peske na meľarde andre o gada. On peske phirena manca andro parne gada, bo on peske oda zasogalinen (zaslužinen).

⁵ Oda, ko ņerinel (zvitazinel), ela urdo andro parne gada a leskero nav na khosava avri andral o zvitkos le dživipnaskero. A pridžanova man ke leste anglal miro Dad the anglal leskere aňjela.

⁶ Kas hin kana, mi šunel, so o Duchos phenel le khangerenge!”

La khangerake andre Filadelfia

⁷ “Le aňjeloske andre khangeri Filadelfia pisin:

Kada vakerel o Sentno, o Čačipnaskero, kaste hin e kleja le Davidoskeri, oda, ko phundravel o vudar avke, hoj ņiko našti phandel a phandel avke, hoj ņiko našti phundravel:

†† Abo: O Nikolaiti † Abo: Le Nikolaitengero

⁸ Džanav tire skutki. Dikh, phundrađom anglal tu o vudar a űiko les naštűi phandel. Bo choc tut hin a sikra zor, dolűikeres miro lav a na zaprindal man.

⁹ Dikh, me kerava oda, hoj ola dżene andral e satanoskeri sinagoga – ola, save phenen pal peste, hoj hine Źidi, ale nane, bo klaminen – te aven a te bandon anglal tire pindre a te prindżaren, hoj me mange tut zakamłom.

¹⁰ Vašoda, hoj dolűikerđal miro lav a lűikerđal avri, the me pre tu zadikhava a lava tut avri ola oratar, sar avela o baro pharipen pre calo svetos, hoj te probalinel avri (skušinel avri) olen, save bešen pre phuv.

¹¹ Avava sigo! Lűiker oda, so tut hin, hoj tuke űiko te na lel tiri koruna!

¹² Oles, ko űerinela, kerava sluposke andro chramos mire Devleske a imar űoha (űikda) odarik na avela avri. Pisinava pre leste o nav mire Devleskero the o nav mire Devleskere forostar, ole neve Jeruzalemostar, so avel tele mire Devlestar andral o űebos. Pisinava pre leste the miro nevo nav.

¹³ Kas hin kana, mi űunel, so o Duchos phenel le khangerenge!"

La khangerake andre Laodikea

¹⁴ "Le aűjeloske andre khangeri Laodikea pisin:

Kada vakerele oda, ko pes viinel Amen, oda paivalo the aipnaskero űvedkos, kas hin autorita upral savoro, so o Del kerđa.

¹⁵ Džanav tire skutki, hoj na sal aűi űilalo aűi tato. Te a ułalas űilalo abo tato!

¹⁶ Ale vaš oda, hoj sal letno a na sal aűi űilalo aűi tato, hungarava tut avri andral miro muj!

¹⁷ Bo phenes: 'Som barvalo, barvalűlom a na kampil mange űikas,' ale tu na dżanes, hoj sal oro, pro roviben, bidno, koro the lango.

¹⁸ Dav tut godűi: Cin tuke mandar o somnakaj preżużardo andre jag, hoj te barvalos. Cin tuke the o parne gada, hoj tut te ures, hoj pes te na sikavel e ladż tire langipnaskeri. A cin mandar the e masca te makhel pro jakha, hoj te dikhes.

¹⁹ Me dovakerav a bararav avri sakones, kas kamav. Vašoda aes pes rozgondolűin a visar tut le binendar!

²⁰ Dikh, me ahav paš o vudar a durkinav. Te vareko űundahas miro hangos a phundrađahas o vudar, dżava andre ke leste a chava leha a ov manca.

²¹ Oleske, ko űerinela, dava te bešel manca pre miro tronos, avke sar the me űerindom a bešav mire Dadeha pre leskero tronos.

²² Kas hin kana, mi űunel, so o Duchos phenel le khangerenge!"

O lašariben andro űebos

⁴ Palűs dikhłom o phundrado vudar pro űebos. A oda ešebno hangos, so űundom sar o hangos la trubakero, manca vakerele a phendā: "Av kade upre a me tuke sikavava, so pes mušinela palűs te ahel."

² A takoj somas andro Duchos. Dikhłom tronos, so ahelas andro űebos, a pro tronos vareko bešelas.

³ Oda, ko bešelas pro tronos, diholas avri sar o bar jaspis the sardis a pašal o tronos sas e duha, so diholas avri sar smaragdos.

⁴ Pašal o tronos ahenas bišuštar (24) troni a pro troni dikhłom te bešel bišuštar (24) phurederen. Sas urde andro parne gada a pro űere len sas o somnakune koruni.

⁵ Andral o tronos avenas avri o bleski the o perumi a anglo tronos labonas efta jagale lampaša, so hin o efta duchi le Devleskere.

⁶ A anglo tronos sas ajso vareso sar cakluno moros, so diholas avri sar krištalos. A maškar o tronos the pašal o tronos sas űtar dżide bitostűi, saven sas pherdo jakha anglunestar the palunestar.

⁷ Ešebno (peršo) dżidűi bitostű diholas sar o levos; e dujto diholas sar e guruműori; la tritona bitostű sas ajso muj sar le manušes; a űtarto diholas sar orlos, so letinel.

⁸ Dojekha kale bitostendar sas po űov kridli a sas len pherdo jakha avrunestar the andrunestar. A rat a dżives na preahen te viinel:

"Sentno, sentno, sentno hin o Raj,
o Del, saves hin savori zor,
Oda, ko sas, ko hin a ko avela."

⁹ A furt sar den o dżide bitostűi o baripen, e paiv the o palűkeriben Oleske, ko bešel pro tronos a ko dżivel pro furt,

¹⁰ o bišuštar (24) phureder peren anglal Oda, ko bešel pro tronos, a bandon anglal Oda, ko dżivel pro furt. A hiven peskere koruni anglo tronos a phenen:

¹¹ "Tu sal hodno, Rajeja amaro Devla,
te lel o baripen, e paiv the e zor,
bo tu kerđal savore veci;
tira vołatar sas stvorimen a hine."

O Bakroro the o zvitkos

⁵ Dikhłom o zvitkos andre ao vast Oleske, savo bešelas pro tronos. Sas pisimen pal soduj seri a sas zaphandlo efta peatēnca.

² A dikhłom jekhe zorale aűjelos te vakerele zorale hangoha: "Ko hino hodno te phundravel o zvitkos a te prephagel leskere peatē?"

³ A űiko pro űebos, aűi pre phuv, aűi tel e phuv les naštűi phundrađa, aűi andre naštűi dikhła.

⁴ Me igen rovavas, hoj pes űiko na arakhłā hodno te phundravel o zvitkos a andre te dikhel.

⁵ Jekh le phurederendar mange phendā: "Ma rov! Dikh, űerinda (zvitazinda) o Levos andral o kmeűos le Judaskero, o Koreűis le Davidoskero, hoj te phundravel o zvitkos the leskere efta peatē."

⁶ A dikhłom te ahel le Bakrores maškar o tronos the maškar ola űtar dżide bitostűi the maškar ola phuredera. O Bakroro diholas avri sar murdardo a sas les efta rohi the efta jakha, so hine o efta duchi le Devleskere bihade pre całű phuv.

⁷ Ov avla a ila o zvitkos andral o čačo vast Olestar, sa-vo bešelas pro tronos.

⁸ Sar ila oda zvitkos, o štar džide bitostí the o bišuštar (24) phureder pele anglal o Bakroro. Sakones lendar sas jekh harfa the somnakuŃi kuči pherardi le kadídloha, so hin o modlŃbi le sentnengere.

⁹ Gilavenas nevi gilí a phenenas:

“Hodno sal te lel o zvitkos a te phundravel leskere pečate,

bo salas murdardo a cindal avri tire rateha le manušen le Devleske, andral savore kmeŃi, čhiba, nipi the narodi.

¹⁰ Kerđal lendar kraŃen the rašajen amare Devleske a on kraŃinena pre phuv.”

¹¹ Palis dikhŃom a šundom o hangos but aŃjelengero. Sas milioni milionengere the ezera ezerengere aŃjela pašal o tronos, pašal o džide bitostí the pašal o bišuštar (24) phureder.

¹² A on vičinenas zorale hangoha:

“Hodno hino o Bakroro, oda murdardo, te prilel e autorita, the o barvalipen, the o godaveripen, the e zor, the o rajipen, the e pačiv, the e slava a the o lašariben!”

¹³ Šundom te phenel savoro, so dživel andro Ńebos, pre phuv the tel e phuv, the pro moros a sa, so hin andre:

“Oleske, ko bešel pro tronos, the le Bakroreske o lašariben, e pačiv, e slava the e zor pro furt!”

¹⁴ O štar džide bitostí phende: “Amen,” a o bišuštar (24) phureder pele pre phuv a lašarenas les.

O pečate

6 DikhŃom, sar phundrađa o Bakroro jekh le eŃta pečatendar a šundom jekha le džide bitostendar the vakere perumoskere hangoha: “Av!”

² Me dikhŃom a ode sas jekh parno graj a oles, ko upre bešelas, sas jekh lukos. Sas leske diŃi e koruna. Ov imar buterval Ńerinda (zvitazinda) a geŃa, hoj te Ńerinel.

³ Sar phundrađa e dujto pečat, šundom sar e dujto džidi bitost vakere las: “Av!”

⁴ Aver graj avla avri, sas jagalo-lolo, a oleske, ko upre bešelas, pes diŃa, hoj te lel o smirom pal e phuv, hoj o manuša jekh avres te murdaren. A sas leske diŃi jekh bari šablá.

⁵ Sar phundrađa e trito pečat, šundom, sar e trito džidi bitost vakere las: “Av!” DikhŃom a ode sas jekh kalo graj a oda, ko upre bešelas, likerelas andro vast e vaha.

⁶ A maškar ola štar džide bitostí šundom vareso sar hangos, so phenelas: “Jepaš kilos žužodiv (zrnos) vaš jekhe dživeseskeró počiŃiben † a kilos the jepaš jačmeŃis tiš vaš ajci, ale o olejos the e mol ma musar!”

⁷ Sar phundrađa e štarto pečat, šundom, sar e štarto džidi bitost vakere las: “Av!”

⁸ DikhŃom a ode sas jekh šivo graj a oda, ko upre bešelas, pes vičinelas o Meriben a o peklos †† džalas

† Grekengeri čhib: jekh denaris †† Grekengeri čhib: Hades

jekhetane pal leste. DiŃa pes lenge e zor upral jekh štvrtina la phuvatar, hoj te murdaren la šabláha, la bokhaha, le meribnaskere nasvalibnaha the le dzive džvirenca pre phuv.

⁹ Sar phundrađa e pandžto pečat, dikhŃom tel o oltaris o duši ole manušengere, save sas murdarde vaš o lav le Devleskeró the vaš o svedectvo, so likerenas.

¹⁰ Vriskinenas zorale hangoha a phenenas: “Ó, Nek-zoraleder Rajeja, sentno the čačipnaskero, kana imar sudzineha a visareha pale le manušenge pre phuv vaš oda, hoj amen murdarde?”

¹¹ Dojekheske lendar sas dine džindarde parne gada a sas lenge phendo, hoj mek sikra te odpočovinen, medik na ena murdarde the lengere phrala, save lenca služinenas, a save mušinen te el murdarde avke sar on.

¹² Sar phundrađa e šovto pečat, dikhŃom, hoj e phuv chudla igen te razisalol, o kham kalíla andre a o čhon sas calo sar rat.

¹³ A o Ńeboskere čerčeŃa perenas pre phuv, avke sar pal o figovŃikos peren tele o zelena figi, te pre leste phurdel e zoralí balvaj a razinel leha.

¹⁴ O Ńebos pes scirdla andre sar zapačardo papiris a savore verchi the ostrovi pes čhalade pal peskere thana.

¹⁵ Akor o kraŃa pre phuv, o vladara, o generala, o barvale, o zorale, o otroka the o slobodne pes garude andro jaskiŃi the andro skali le verchengere

¹⁶ a phenenas le verchenge the le skalenge: “Peren pre amende a zaučharen amen anglal Oda, ko bešel pro tronos, the anglal e cholí le Bakroreskeri!

¹⁷ Bo avla oda baro džives lengera choŃakero a ko šaj obačhel?”

O manuša andral o Izrael zapečatimen

7 Palis dikhŃom štare aŃjelen, sar ačhenas pro štar agora la phuvakere a chudenas la phuvakere balvaja, hoj te na phurdel e balvaj pre phuv, aŃi pro moros, aŃi pre Ńisavo stromos.

² A dikhŃom avre aŃjelos, savo avelas upre pal o vi-chodos a saveste sas e pečat le džide Devleskeri. Ov vriskinelas zorale hangoha pro štar aŃjela, savenge sas dino, hoj te dukhaven e phuv the o moros,

³ a phenda lenge: “Ma dukhaven e phuv, aŃi o moros, aŃi o stromi, medik amen na daha e pečat pro čekata ole dženen, save služinen amare Devleske.”

⁴ Šundom, keci džene sas zapečatimen: 144 000 džene andral savore kmeŃi andral o Izrael.

⁵⁻⁸ Avke sas zapečatimen 12 000 manuša andral do-jekh kmeŃos: andral o Juda, Ruben, Gad, Ašer, Naftali, Menašše, Šimeon, Levi, Jissachar, Zebulun, Jozef the Benjamin.

Igen but manuša anglo tronos

⁹ Palis dikhŃom a sas ode pherdo manuša, saven Ńiko našti zrachinelas, andral savore narodi, kmeŃi, nipi the čhiba. Ola manuša ačhenas anglo tronos the anglo

Bakroro, urde andro džindarde parne gada a sas len andro vasta o palmi.

¹⁰ Vriskinenas zorale hangoha a phenenas:

“Amaro spaseŃje hin le Devlestar, savo bešel pro tronos, the le Bakrorestar!”

¹¹ Savore aŃjela ačhenas pašal o tronos the pašal o phureder the pašal o štar džide bitostī. Pele pro muj anglo tronos a lašarenas le Devles

¹² a phenenas:

“Amen! O lašariben, e slava, e godī, o paļikeriben, e pačiv, e zor the o rajipen amare Devleske pro furt! Amen!”

¹³ Jekh le phuredendar mandar phučļa: “Ko hine kala džene, save hine urde andro džindarde parne gada? A khatar avle?”

¹⁴ Me leske odphendom: “Rajeja, tu džanes.” A phendā mange: “Kala hine ola džene, save aven andral oda baro pharipen a rajbinde peskere gada a parŃarde len andro rat le Bakroreskero.

¹⁵ Vašoda hine anglo Devleskero tronos a služinen leske rat-džives andre leskero chramos. A Oda, ko bešel pro tronos, dživela maškar lende a chraŃinela len.

¹⁶ Imar na ena buter bokhale, aŃi smedne. O kham len imar buter na labarela aŃi Ńisavo aver tačipen.

¹⁷ Bo o Bakroro, savo hino maškar o tronos, ela lengero pastjeris a lidžala len paš o prameŃis, khatar džal o džido paŃi a o Del lenge khosela savore apsa pal o jakha.”

E eftato pečat’

8 Sar phundrađa o Bakroro e eftato pečat’, sas pro Ńebos čhit vaj pre jepaš ora.

² Dikhľom eŃta aŃjelen, save ačhen anglo Del a sas lenge dine o eŃta trubi.

³ Avľa jekh aver aŃjelos a ačhiľa paš o oltaris. Sas les somnakuno thuvalo čaroro a chudľa but kadidlos, hoj les te thovel le modľitbenca savore sentne manušen-gere pro somnakuno oltaris, so hin anglo tronos.

⁴ O thuv le kadidlostar avelas jekhetane le sentne manušen-gere modľitbenca andral o vast le aŃ-jeloskero upre anglo Del.

⁵ Paľis iľa o aŃjelos o thuvalo čaroro, pherardā les la jagaha pal o oltaris a čhida les pre phuv. Avle o perumskere hangi, herminelas, sas o bleski a e phuv razisaľolas.

O trubi

⁶ Ola eŃta aŃjela, saven sas o eŃta trubi, pes pririchtinde te trubinel.

⁷ Ešebno aŃjelos zatrubinda a o ľegi the e jag mišimen le rateha sas čhido pre phuv. A zlabiľa jekh tretina la phuvatar, jekh tretina le stromendar the savori zeleno čar.

⁸ Dujto aŃjelos zatrubinda a ajso vareso sar baro verchos, so labolas la jagaha, sas čhido andro moros. A jekh tretina le morostar pes čerinda pro rat

⁹ a muľa jekh tretina le moroskere džvirinendar a jekh tretina le lođendar sas zŃičimen.

¹⁰ Trito aŃjelos zatrubinda a andral o Ńebos peľa jekh bari čerčeŃ, so labolas sar e fakľa a peľa pre jekh tretina le paŃendar the pro chaŃiga.

¹¹ Odi čerčeŃ pes vičinel Palina. Jekh tretina le paŃendar kirkiľa a but manuša mule le paŃendar, bo kirkile.

¹² Štarto aŃjelos zatrubinda a sas zŃičimen tretina le khamestar, tretina le čhonestar the tretina le čerčeŃendar avke, hoj kalĩľa andre. A jekh tretina le dživesestar na sas svetlos a avke sas the prekal e rat.

¹³ Paľis dikhľom a šundom jekhe orlos, sar letinel upre a vičinelas zorale hangoha: “Jaj, vigos, vigos, vigos olenge, save bešen pre phuv, bo posledna trin aŃjela mek mušinena te trubinel!”

9 O pandžto aŃjelos zatrubinda a dikhľom e čerčeŃ, so peľa andral o Ńebos pre phuv a diŃa pes lake e kleja andral e chaŃig, andral e bari chev.

² Odi čerčeŃ otkerđa e chaŃig, odi bari chev, a andral odi chev avľa avri ajso baro thuv, sar andral o baro bov. Ole thuvestar kalĩľa andre o kham the o luftos.

³ Andral o thuv avle avri pre phuv o maľakere grajora a chudle ajso zor, sar hin le škorpijonen pre phuv.

⁴ A sas lenge phendo, hoj te na musaren e čar pre phuv, aŃi o stromi, aŃi Ńič, so hin zeleno, ale hoj te dukhaven ča le manušen, saven nane le Devleskeri pečat’ pro čekat.

⁵ Na sas lenge domuklo, hoj len te murdaren, ale hoj len igen te dukhaven pandž čhon. Lengeri dukh sas ajso bari sar le manušen, saves danderđa o škorpijonos.

⁶ Andre ola dživesa o manuša rodena o meriben, ale na arakhena les. Igen peske mangena te merel, ale o meriben lendar denašela.

⁷ Ola maľakere grajora dičhonas avri sar ajse graja, so hine pririchtimen te džal andro mariben. Pro šere len sas ajso vareso sar somnakune koruni a lengere muja sas ajse sar o muja le manušen-gere.

⁸ Lengere bala sas ajse sar džuvľikane bala a lengere danda sas ajse sar o danda le ľevengere.

⁹ Sas pre lende urde vareso sar trastune pancjera a o hangos lengere kridlendar šundolas avke, sar te o graja le verdanenca denašen pro mariben.

¹⁰ Sas len chvosti the žihadla sar le škorpijonen. A andro chvosti len sas zor te dukhavel le manušen pandž čhon.

¹¹ Lidžalas len o kralis, o aŃjelos andral e bari chev, so pes andre Hebrejiko čhib vičinel Abaddon a andre Grekengeri čhib Apollyon.

¹² Ešebno dukh pregeľa. Dikh, pal kada avena mek duj aver dukha!

¹³ O šovto aŃjelos zatrubinda a pašal o štar agora le somnakune oltaristar, so hin anglo Del, šundom o hangos,

¹⁴ so phenelas le šovtone aŃjeloske la trubaha: “Muk avri ole štare aŃjelen, save hine zaphandle andre paš o baro paŃi Euftrat!”

¹⁵ A sas mukle avri ola štar aňjela, save sas pririchti-
men pre kadi ora, džives, čhon the berš, hoj te mur-
daren jekh tretina le manušendar.

¹⁶ O slugađa pro graja sas duj šel milioni (200 000
000). Šundom, keci ode sas.

¹⁷ Andro videňje dikhlom le grajen the olen, save up-
re bešenas a sas len jagale lole pancjera, belave the
šarge. O šere le grajengere sas sar o šere le ľevengere
a andral o muj lenge avelas avri e jag, o thuv the e
sira.

¹⁸ Kale trine dukhendar, la jagatar, le thuvestar the la
siratar, so avenas avri andral lengere muja, sas mur-
dardđi jekh tretina le manušendar.

¹⁹ Bo le grajengeri zor hin andre lengere muja the
andro chvosti. Lengere chvosti hine sar o sapa, so
peskere šerenca dukhaven le manušen.

²⁰ Ola manuša, save na mule ole dukhendar, mek aňi
akor pes na visarde le binendar aňi le modlendar, so
keren lengere vasta. Na preačhile te bandol anglal o
demoni the anglal o somnakune, rupune, meďune,
barune the kaštune modli, so na dikhen, na šunen a
aňi naštđi phiren.

²¹ Aňi na preačhile te murdarel, te vražinel, te čarinel,
te kerel o lubipen vaj te čorel.

O aňjelos le cikne zvitkoha

10 Dikhlom avre zorale aňjelos te avel tele andral o
ňebos. Ov sas urdo andre chmara, pro šero les
sas e duha, leskero muj sas sar o kham a leskere pin-
dre sas sar jagale slupi.

² Andro vast les sas phundrado cikno zvitkos. Le čače
(prave) pindreha ačhelas pro moros a le balogneha
(ľaveha) pre phuv

³ a zvičinda zorale hangoha sar o ľevos. Sar zvičinda,
o ehta perumi prevakerde peskere hangenca.

⁴ Sar prevakerde o ehta perumi, kamľom te pisinel,
ale šundom andral o ņebos o hangos, so mange
phenda: "Garuv a ma phen avri oda, so vakerenas ola
ehta perumi, a ma pisin oda!"

⁵ O aňjelos, saves dikhlom te ačhel pro moros the
pre phuv, hazdňa peskero čačo vast ko ņebos

⁶ a ilľa vera andro nav le Devleskero, savo hino džido
pro furt a stvorinda o ņebos the oda, so andre hin, the
e phuv the oda, so upre hin, the o moros the oda, so
andre hin. A phenda: "Imar nane časos!"

⁷ Andre oda džives, sar o eftato aňjelos trubanela, pes
dokerela o garudo planos le Devleskero, avke sar oda
vakerelas peskere sluhenge le prorokenge."

⁸ Pale manca vakerelas oda hangos, so šundom an-
dral o ņebos, a phenda: "Dža a le o phundrado zvitkos,
so hin andro vast le aňjeloste, savo ačhel pro moros
the pre phuv."

⁹ Akor geľom ko aňjelos a phendom leske, hoj
mange te del oda cikno zvitkos. A ov mange phenda:
"Le, cha les. Kerela tuke andro per kirkiben, ale andro
muj tuke ela gulo sar medos."

¹⁰ Ilom oda cikno zvitkos andral o vast le aňjeloske a
chalom les. A sas mange andro muj gulo sar medos,
ale sar les preľigindom, kirkilľa mange andro per.

¹¹ A sas mange phendo: "Mušines pale te prorokinel
ko but manuša, narodi, čhiba the kraľa."

O duj švedki

11 Sas mange dino kaštoro, ajso sar paca, a sas
mange phendo: "Uštđi a merin o chramos le De-
vleskero the o oltaris a rachin olen, save andre
lašaren.

² Ale e avruňi chramoskeri dvora muk avri, ma merin
la, bo hiňi diňi Nažidenge a on uštarena pro sentno
foros saranda the duj (42) čhon.

³ A me dava mire duje švedkenge te prorokinel 1 260
džives a ena urde andro gone."

⁴ Kada hin ola duj olivi the o duj momelara, so ačhen
anglo Del, anglo Raj la phuvake.

⁵ Te len kamel vareko te dukhavel, avel lenge avri an-
dral o muj e jag a chal olen, save pre lende džan. Avke,
te len kamľahas vareko te dukhavel, mušinel te merel.

⁶ Len hin zor te phandel andre o ņebos, hoj te na del
o brišind andre ola dživesa, sar on prorokinen. A hin
len zor te čerinel o paňi pro rat a te marel e phuv sa-
vore dukhenca, kana ča on kamena.

⁷ Sar dovakerena peskero svedectvo, e šelma, so avel
avri andral odi bari chev, pes lenca marela, ņerinela
(zvitazinela) upral lende a murdarela len.

⁸ Lengere mule tĕla pašľona pre ulĭca andre oda baro
foros, kaj sas ukrižimen lengero Raj, o foros, so
duchovne hin sar e Sodoma the Egipt.

⁹ But manuša andral savore kmeňi, nipi, čhiba the
narodi dikhena lengere mule tĕla trin the jepaš džives,
ale na domukena te parunel lengere mule tĕla andro
hrobos.

¹⁰ Ola, save bešen pre phuv, radisaľona upral lende,
thovena baripen a jekh avreske bičhavena o dari, bo
kala duj proroka trapinenas le manušen pre phuv.

¹¹ Ale pal ola trin the jepaš dživesa o dživipnaskero
dichos le Devleskero avľa andre lende a uštĭle. A pre
ola džene, save len dikhle, avľa bari dar.

¹² Andral o ņebos šunde zoralo hangos, so lenge
phenda: "Aven kade upre!" Avke gele upre andro ņe-
bos andre chmara a lengere ņeprijaťeľa oda dikhenas.

¹³ Andre odi ora chudľa e phuv igen te razisaľol. Jekh
ďesatĭna le forostar peľa tele a ehta ezera (7 000)
manuša mule. Okla džene predarandĭle a dine e slava
le Devleske pro ņebos.

¹⁴ Dujto vigos pregeľa. Dikh, trito vigos avela maj!

E eftato truba

¹⁵ Eftato aňjelos zatrubinda a pro ņebos šundĭle zo-
rale hangi, so phenenas:

"O kraľišagos le svetoskero ačhiľa o kraľišagos le Ra-
jeskero the leskere Kristoskero a ela kraľis furt pro
furt."

¹⁶ O bišuštar (24) phureder, save bešen anglo Del pre peskere troni, pele sako pre peskero muj a lašarenas le Devles.

¹⁷ Phenenas:

“Palikeras tuke, Rajeja, Devla, o Nekzoraleder, ko sal a ko salas!

Bo preiřal tiri bari zor a chudřal te kraline!

¹⁸ O narodi pes chořarde, ale avřa tiri cholř the o řasos te sudzinel le mulen a te pořinel tire sluhenge, le prorokenge, le sentnenge the olenge, save pes daran tire navestar – le ciknenge the le barenge – o řasos, hoj te zničines olen, save ničinen e phuv.”

¹⁹ Pal ada pes phundrařa o chramos le Devleskero andro řebos a diřholas e Zmluvakeri Archa. Avle o bleski, řundřile o hlasi, demade o perumi, e phuv razisařolas a delas baro briřind le krupenca.

E džuvřli the o drakos

12 Pro řebos pes sikařa baro znaeņje: Jekh džuvřli sas urđi andro kham, o řhon lake sas tel o pindre a pro řero la sas e korona le deřduuje řercheņendar.

² Oj sas khabņi a vriskinelas andro lořhibnaskere dukha, bo sas o řasos te lořhol.

³ A sikařa pes the aver znaeņje pro řebos: Dikh, baro lolo drakos, saves sas eřa řere the deř rohi a pro řere les sas eřa koruni.

⁴ A le chvostoha cirdņa pal peste tele jekh tretřina le řeboskere řercheņendar a řhidř len pre phuv. O drakos pes thodřa te ařhel angle džuvřli, savi uřarelas te lořhol (te pařřol tele), hoj lake te chal le řhavores takoj, sar lořhola.

⁵ Uřiřa lake řhavo, murřoro, savo řidřala savore naroden la trastuņa pacaha. A lakero řhavoro sas ilo upre ko Del the ke leskero tronos.

⁶ E džuvřli denařřa pre puřřa, kaj o Del lake pririchřindř than, hoj pes pal late ode te starinen 1 260 džives.

⁷ Andro řebos pes chudle te marel. O Michael peskere aņjelenca pes marelas le drakoha the leskere aņjelenca,

⁸ save na řikerde avri a imar buter na sas prekal lende andro řebos than.

⁹ A sas avriřhido oda baro drakos, oda phuro sap, savo pes viřinel o beng the o satan. Ov, savo peskere klamiřagenca odcircel calo svetos, sas řhido tele pre phuv a leskere aņjela leha.

¹⁰ A řundřom te vakerel zoralo hangos andral o řebos:

“Akana avřa o spaseņje, e zor the o kraliřagos amare Devleskero

the o rajipen leskere Kristoskero.

Bo sas řhido tele oda, ko vakerelas pre amare phrala, oda, ko pre lende rat-dřives vakerelas angle amaro Del.

¹¹ A on řerinde (zvitřazinde) upral leste prekal o rat le Bakroreskero the prekal lengero svedectvo a sas pririchtimen te del peskero dživipen a te merel.

¹² Vařoda radisařuv, řebona, savorenca, save andre tu dživen!

Ale vigos olenge, save bešen pre phuv the andro moros,

bo avřa tele ke tumende o beng bara chořaha, bo džanel, hoj les hin frima řasos.”

¹³ Sar dikhřa o drakos, hoj hino řhido pre phuv, denařřelas pal e džuvřli, savake uřiřa oda murřoro.

¹⁴ Ale la džuvřla sas dine duj bare orloskere kridli, hoj te leřinel pre puřřa pre peskero than. Ode pes pal late starinena jekh řasos, duj řasi the jepař řasos, dur le sapestar.

¹⁵ O sap mukřa andral peskero muj baro paņi pre džuvřli, hoj la te odlidřal.

¹⁶ Ale e phuv pomořinda la džuvřake, bo phundrařa peskero muj a zřiginda oda paņi, so mukřa o drakos andral peskero muj.

¹⁷ O drakos chořisařiřa pre džuvřli a odgeřa pes te marel lakere avre řhavenca, save řunen le Devleskere prikazaņja a řikeren o svedectvo le Ježiřoskero.

¹⁸ Akor ařhelas pre poři pař o moros.

O duj řelmi

13 Dikhřom te avel avri andral o moros la řelma. Sas la eřa řere the deř rohi a pro rohi la sas deř koruni a pre dojekh řero la sas o nav, so džungřarelas le Devles.

² E řelma, sava dikhřom, diřholas sar leopardos. Lakere pindre sas sar le medvedřiskere a lakero piskos diřholas sar le řevoskero. O drakos lake diņa peskeri zor, the tronos, the autorita.

³ A dikhřom, hoj jekh lakere řerendar sas pro meriben mardo, ale lakeri meribnaskeri rana sastiřa avri. Calř phuv pes řudalřinelas a džalas pal e řelma.

⁴ Bandřonas anglal o drakos, savo diņa la řelma ajsi autorita, a bandřonas the anglal e řelma a phenenas: “Ko hin ajso sar e řelma a ko pes laha řaj marel?”

⁵ La řelmake sas dino muj, hoj te vakerel bare the nalaře veci pro Del a chudřa autorita pro saranda the duj (42) řhona.

⁶ Phundrařa peskero muj, hoj te vakerel namiřtes pro Del, pre leskero nav the pro than, kaj o Del beřel, the pre ola, save bešen andro řebos.

⁷ Sas lake diņi e zor, hoj pes te marel le sentnenca a te řerinel (te zvitřazinel), a chudřa e autorita upral savore kmeņi, nipi, řhiba the narodi.

⁸ A savore, save bešen pre phuv, bandřona anglal e řelma – ola, kaskere nava nane pisimen andro zvitkos le dživipnaskero, so hin o zvitkos le Bakroreskero, savo sas murdardo, kanastar sas kerdo o svetos. †

⁹ Kas hin kana, mi řunen!

¹⁰ *Te muřinel vareko te el phandlo andre bertena, ela phandlo andre bertena.*

Te muřinel vareko te el murdardo la řablřaha, ela murdardo la řablřaha.

Andre oda kampil le sentnenge te řikerel avri a te pařal.

† Abo: andro zvitkos le dživipnaskero Bakroreskero

¹¹ A dikhľom avra ŧelma, sar avelas avri andral e phuv. Sas la duj rohi, sar le Bakroreskere, ale vakerelas sar o drakos.

¹² Oj sa kerelas vaŧ e eŧebno ŧelma a andre lakeri autorita. Ispidelas zoraha pro manuŧa, save beŧen pre phuv, hoj savore te bandon anglal e eŧebno ŧelma, savake sastila e meribnaskeri rana.

¹³ Kerelas bare zazraki avke, hoj the e jag andral o Ńebos avelas tele pre phuv anglo jakha le manuŧenge.

¹⁴ A cirdelas pal peste le manuŧen pre phuv le zazrak-enca, so lake sas dine, hoj te kerel anglal e ŧelma. Rozkazinda le manuŧenge pre phuv, hoj te keren obrazis la ŧelmake, savi sas dukhadı la ŧablaha a ob-dŧidila.

¹⁵ Sas lake diŃi e zor, hoj te del duchos † andro obrazis la ŧelmakero, hoj oda obrazis te vakerel a te kerel, hoj te en murdarde savore, save na bandona anglal ŧelmakero obrazis.

¹⁶ Kerelas oda, hoj savore – o cikne the o bare, o barvate the o čore, o slobodne the o sluhi – te chuden o znakos pre peskero čačo vast abo pre lengero čekat,

¹⁷ hoj Ńiko aŃi te na cinel, aŃi te na bikenel, ča oda, kas hin o znakos, abo o nav la ŧelmakero, vaj o čislos lakere naveskero.

¹⁸ Andre kada hin o godaveripen: Kas hin godı, mi zrachinel o čislos la ŧelmakero, bo oda hin o čislos le manuŧeskero. A leskero čislos hin 666.

O Bakroro the leskere manuŧa

14 Palıs dikhľom, hoj o Bakroro ačhelas pro verchos Sion a leha 144 000 manuŧa, saven hin pisi-men leskero nav the o nav leskere Dadeskero pro čekat.

² ŧundom o hangos andral o Ńebos sar o hangos but paŃengero, sar o hangos le zorale perumoskero. Oda hangos, so ŧundom, sas ajso, sar kana o lavutara baŧaven pre peskere harfi.

³ A gilavenas nevi gili anglo tronos, anglo ŧtar dŧide bitostı the anglo phureder. Ńiko naŧı siklila odi gili, ča ola 144 000 manuŧa, saven peske o Del pal e phuv cinda avri.

⁴ Oda hine ola, save pes na melarde andre le dŧuvlenca, bo hine pačivale, a save dŧan pal o Bakroro vŧadzik, kaj dŧal. On sas cinde avri maŧkar o manuŧa sar oda eŧebno daros le Devleske the le Bakroreske.

⁵ Andre lengero muj na sas arakhlo Ńisavo klamiŧagos; on hine bi e mel.

O trin aŃjela

⁶ Palıs dikhľom maŧkar o Ńebos te letinel avre aŃjelos. Les sas o večno evaŃjelium, hoj les te vakerel olenge, save beŧen pre phuv, savore narodenge, kmeŃenge, čhibenge the nipenge.

⁷ A phenelas zorale hangoha: "Daran tumen le Devlestar a den leske e slava, bo avla leskeri ora, hoj te

† Abo: O dichos

sudzinel! Bandon anglal Oda, ko kerdıa o Ńebos, e phuv, o moros the o prameŃa!"

⁸ Pal leste avelas dujto aŃjelos a phenelas: "Peľa, peľa tele oda baro Babilon, so mačarelas savore naroden la molaha peskera lubikaŃa ŧadoscaha!"

⁹ Pal lende avelas trito aŃjelos a phenelas zorale hangoha: "Te bandola vareko anglal e ŧelma the anglal lakero obrazis a prilela o znakos pre peskero čekat abo pre peskero vast,

¹⁰ the ov pijela andral le Devleskeri choři e zorafi mol, so hiŃi čhidı andre kuči leskeri choľakeri. A cerpinela andre jag the andre sira anglo sentna aŃjela the anglo Bakroro.

¹¹ O thuv lengere cerpiŧagostar avela upre pro furt. A na ela smirom aŃi dŧivese aŃi rači olen, save bandon anglal e ŧelma the anglal lakero obrazis, a aŃi olen, save prilena o znakos lakere naveskero."

¹² Andre oda kempel te likerel avri le sentnenge, save ŧunen o prikazaŃja le Devleskere a hine verna le Jeŧiŧoske.

E bari ŧatva pre phuv

¹³ Palıs andral o Ńebos ŧundom o hangos, so mange phenelas: "Pisin! Bachtale hine ola, save akanastar meren andro Raj." "He, avke," phenel o Duchos, "hoj te odpočovinen peskere bučendar, bo lengere skutki dŧan lenca."

¹⁴ Dikhľom parŃi chmara a dikh, upre beŧelas vareko sar o Čhavo le Manuŧeskero. Pro ŧero les sas e somnakuŃi koruna a andre peskero vast ostro kosakos.

¹⁵ Aver aŃjelos avla avri andral o chramos a vičinelas zorale hangoha pre oda, ko beŧel pre chmara: "Le tiro kosakos a skide upre o ulipen, bo imar avla o časos pre ŧatva a dobarila oda, so kempel te skidel pal e phuv."

¹⁶ Oda, ko beŧelas pre chmara, chudla te koŧinel e phuv a o ulipen sas skidlo upre.

¹⁷ Pale aver aŃjelos avla avri andral o chramos, so hin andro Ńebos, a the les sas ostro kosakos.

¹⁸ A mek the aver aŃjelos avla le oltaristar. Les sas zor upral e jag a vičinda zorale hangoha pre oda, kas sas ostro kosakos: "Le tiro kosakos a obkide o hroznos andral e viŃica pre phuv, bo o hroznos imar hino lačo."

¹⁹ O aŃjelos chudla te obkidel le kosakoha a obkidla e phuvakeri viŃica. A čhida oda andre baruŃi chev, kaj pes pučinel avri e ŧtava, andre chev le Devleskera choľatar.

²⁰ O hroznos pes pučinelas avri le forostar a avla andral odi chev avri o rat dŧi upre ko zubadla le grajengere, dur pro trin ŧel (300) kilometri.

O eŧta aŃjela le posledne dukhenca

15 A dikhľom aver znameŃje pro Ńebos, baro the igen čudno: eŧta aŃjelen le eŧta posledne dukhenca, bo lenca pes dokerela e choři le Devleskeri.

² Dikhłom ajsa vareso sar cakluno moros mišimen la jagaha. Dikhłom the olen, save űnerinde (zvitazine) upral e űelma, upral lakero obrazis the upral o čislos lakere naveskero, hoj ačhenas pro cakluno moros. A sas len o harfi, so len diűa o Del.

³ A giłavenas e giłi le Mojžišoskeri, savo sluűinelas le Devleske, the e giłi le Bakroreskeri:

“Baro the igen űukar hin oda, so tu keres, Rajeja, Devla Nekzoraleder!

Čačipnaskere the lačhe hin tire droma, ó, Kralina le narodengero!

⁴ *Ko pes tutar na darandilahas, ó, Rajeja, a na lašardahas tiro nav?*

Bo ča tu jekh sal Sentno!

Savore narodi avena a bandona anglal tu, bo dičhol tire čačipnaskere sudi.”

⁵ Pałis dikhłom a phundrađa pes o chramos andro űebos, o sentno Stanos.

⁶ Andral o chramos avle avri eűta aűjela, saven sas o eűta dukha. Sas urde andro igen parne gada a prekal e brekh (o čuča) sas prephandle somnakune pasenca.

⁷ A jekh le űtare džide bitostendar diűa le eűta aűjenge o eűta somnakune kuča, pherde la chołaha le Devleskera, savo hino džido pro furt.

⁸ O chramos pes pherarđa le thuveha le Devleskera slavaha the zoraha a űiko naűti geła andro chramos, medik o eűta aűjela na čorde avri o eűta dukha pre phuv.

O eűta kuča le Devleskera chołatar

16 űundom andral o űebos zoralo hangos, so phenelas le eűta aűjelenge: “Džan a čhiven avri pre phuv le Devleskeri cholı, so hin andre ola eűta kuča!”

² Avke odgeła o ešebno a čhidá avri pre phuv oda, so les sas andre peskeri kuči. A čhide pes avri o džungale the dukhade vredi pro manuša, saven sas o znakos la űelmakero, the pre ola, save lašarenas lakero obrazis.

³ Dujto aűjelos čhidá avri peskeri kuči pro moros a o paűi andro moros pes čerinda pro rat. Sas ajsa sar le mule manušeskero rat a muła savoro, so dživelas andro moros.

⁴ Trito aűjelos čhidá avri peskeri kuči pro paűa the pro prameűa a čerinde pes pro rat.

⁵ A űundom sar o aűjelos, saves sar zor upral o paűa the phenel:

“Čačipnaskero sal, ó, Rajeja, tu, ko sal a ko salas, oda Sentno,

hoj oda avke rozsudzindal,

⁶ *bo on čhivenas avri o rat le sentnengero the le pro rokengero*

a diűal lenge te pijel rat. Zasogalinde (zasluűinde) peške oda!”

⁷ űundom, sar o oltaris vičinelas:

“He, Rajeja, Devla Nekzoraleder,

čačipnaskere the lačhe hin tire sudi!”

⁸ A űtarto aűjelos čhidá avri peskeri kuči pro kham a sas le khameske dino, hoj te labarel le manušen la jagaha.

⁹ A zlabile o manuša ole bare tačipnastar a košenas le Devleskero nav, saves hin zor upral ola dukha, ale na visarde pes le binendar, hoj leske te den e slava.

¹⁰ Pandžto aűjelos čhidá avri peskeri kuči pro tronos la űelmakero a lakero krališagos kałiła andre. A dukhatar peske danderenas o čhiba

¹¹ a košenas le Devles pro űebos, vaš peskere dukha the vredi, ale na visarde pes peskere skutkendar.

¹² űovto aűjelos čhidá avri peskeri kuči pro baro paűi Euftrat a űučiła avri leskero paűi, hoj pes te pririchtinel o drom le krałenge andral o vichodos.

¹³ Dikhłom, sar aven avri trin nažuže duchi, save dičhonas avri sar žabi, andral o muj le drakoske, andral o muj la űelmakero the andral o muj le falošne pro rokoske.

¹⁴ Oda hin o duchi le demonengere, save keren o zrazaki. On hine ola, save džan avri ko krała pal calo svetos, hoj len te sthoven andro mariben andre oda baro Džives le Nekzoraledere Devleskero.

¹⁵ “Dikh, avava avke sar o živaűis, hoj aűi na džaneha kana! Bachtalo oda, ko užarel, ko na sovel a starinel pes pal peskere gada, hoj te na phirel lango a hoj te na dikhen leskeri ladž.”

¹⁶ A ola nalačhe duchi len sthode pro than, so pes andre Hebrejiko čhib vičinel Harmagedon †.

¹⁷ Eftato aűjelos čhidá avri peskeri kuči pro luftos a le tronostar andro űeboskero chramos avla avri zoralo hangos a phendá: “Imar hin dokerdo!”

¹⁸ Avle o hangi, o perumi the o bleski a e phuv chudła te razisałol. Avke zorales razisałiła, sar mek űoha (űikda) na razisałiła, kanastar hino o manuš pre phuv.

¹⁹ Oda baro foros pes prečhinda pro trin kotora a o fori le narodengere pele. O Del na bisterđa aűi pre oda baro Babilon, hoj leske te del e kuči la mołaha peskera bara chołaha.

²⁰ A naűiłe savore ostrovi a aűi o verchi imar na sas.

²¹ Pro manuša perenas andral o űebos igen bare krupi, sar bare bara ††, a o manuša košenas le Devles vaš e dukh le krupengeri, bo odi dukh sas igen bari.

E džuvli the e űelma

17 Avla jekh ole eűta aűjelendar, saven sas ola eűta kuča, prevakerđa manca a phendá: “Av, sikavava tuke sar odsudzinava ola bara lubűa, savi bešel pro but paűa.

² Laha kerenas o lubipen o phuvakere krała a ola, save bešenas pre phuv, mačonas lakera lubikaűa mołatar.”

³ A liğenda man andro duchos pre pušća. Dikhłom jekha džuvla, savi bešel pre lołi űelma. Pre odi űelma sas pherdo nava, so pes ruhinenas le Devleske a sas la eűta űere the deš rohi.

⁴ E džuvli sas urdi andro fijalova the lole gada a sas avriűukałardi le somnakaha, le dragane barenca the le

† Abo: Har-Megiddo †† Abo: sar talentos – vaj 50 kili

perlenca. Andro vast la sas o somnakuno poharis, pherdo le džungipnaha the la mefaha lakere lubipnastar.

⁵ Pro čekat la sas pisimen nav, so hin o garuđipen:

O BARO BABILON,
E DAJ LE LUBŇENGERI

THE LE DŽUNGIPNASKERI PRE PHUV.

⁶ A dikhlom la džuvľa, hoj sas mači le Devleskere manušengere ratestar the le ratestar le Ježišoskere švedkengere. Sar la dikhlom, igen man čudalinas.

⁷ O aňjelos mange phenda: "Soske tut čudalines? Me tuke phenava o garuđipen la džuvľakero the la šelmakero, savi la lidžal a sava hin efa šere the deš rohi.

⁸ E šelma, sava dikhlal, sas, akana nane, ale avela avri andral e bari chev a džala andro večno našađipen. Ola, save bešen pre phuv a savengere nava nane pisimen andro zvítkos le dživipnaskero, kanastar sas kerdo o svetos, čudalinena pes, sar dikhena la šelma, hoj sas a akana nane, ale avela pale.

⁹ Pre kada kampil bari godi: O efa šere hin o efa verchi, pre save bešel e džuvľi. Hine the efa krafa:

¹⁰ Pandž lendar sas murdarde, jekh hin a jekh mek na avľa. Sar avela, mušinela te kralinel ča pro frima časos.

¹¹ E šelma, savi sas a nane, korkori hiňi ochtoto kralis. Hiňi the ole eftendar a džal andro našađipen.

¹² O deš rohi, so dikhlal, hine deš krafa, save mek na chudle o krališagos, ale chudena e autorita te kralinel pre jekh ora jekhetane la šelmaha.

¹³ Len hin jekh gondolišagos a peskeri zor the peskeri autorita dena la šelmake.

¹⁴ On pes marena le Bakroreha a o Bakroro upral lende ņerinela (zvítazinela), bo ov hino Raj le rajenge a o Kralis le kralenge. A leha ena the leskere vičimen, avrikidle the pačivale manuša."

¹⁵ O aňjelos phenda mange: "Ola paňa, so dikhlal, upral save bešel odi lubňi, hin o manuša, o nipi, o narodi the o čhiba.

¹⁶ E šelma the o deš rohi, so dikhlal, našti avri ačhena ola džuvľa, savi kerel o lubipen. Čhivena la tele, muke na la langa, chana lakero mas a zlabarena la jagaha.

¹⁷ Bo o Del lenge thoda andro jilo, hoj te keren pal leskero planos, hoj jekhetane te den peskero krališagos la šelmake, medik pes na ačhena o lava le Devleskere.

¹⁸ Odi džuvľi, sava dikhlal, hin oda baro foros, so kralinel upral savore krafa pre phuv."

O baro Babilon perel tele

18 Palis dikhlom te avel tele andral o ņebos avre aňjelos, saves sas bari zor. Leskera slavatar e phuv rozvidňisalila.

² A vriskinda zorale hangoha:

"Peľa, peľa tele o baro Babilon!

Ačhila lestar kher prekal o demona, o than prekal dojekh nažužo duchos the prekal dojekh nažužo the džungalo čiriklo.

³ Bo savore narodi pijenas andral leskeri zoralı lubikaňi mol.

O krafa pre phuv leha kerenas o lubipen a ola, so cinen the bikenen, barvalile leskere barikane barvalipnastar."

⁴ Andral o ņebos šundom aver hangos, so phenelas:

"Aven odarik avri, mire manušale,

hoj te na keren leha o bini

a te na chuden kotor leskere dukhendar!

⁵ Bo leskere bini doavle dži ko ņebos

a o Del peske leperda pre leskero nalačhipen.

⁶ Visaren lake pale avke, sar oj tumenge kerelas,

den lake duvar ajci pal lakere skutki.

Andre oda poharis, andre savo oj čhivkerelas, čhiven lake duvar ajci.

⁷ A keci pes lašarelas a lidžalas pes upre,

ajci la den cerpišagos the pharipen,

bo andro jilo peske phenel:

'Bešav mange sar e kralovna,

na som vdova

a šoha (ňikda) na dikhava o pharipen.'

⁸ Vašoda andre jekh džives avena pre late o dukha,

o meriben, e žala the e bokh

a ela zlabardi la jagaha,

bo zoralo hin o Raj, o Del, savo la odsudzinel.

⁹ O krafa la phuvakere rovena pre late a hikinena upral late, sar dikhena lakero thuv, hoj labol. Bo laha kerenas o lubipen a kiňešnones (mažlivones) dživenas andro barvalipen.

¹⁰ Ačhena dural, daratar lakere dukhendar a phenena:

'Jaj, vigos! Vigos tuke, ó, baro foros, zoralo foros Babilon,

bo andre jekh ora avľa pre tu o sudos!'

¹¹ The ola, save cinen the bikenen pre phuv, rovena a ena andre žala upral late, bo imar ņiko na cinela lengero tovaris:

¹² O somnakaj, o rup, o dragane bara, o perli, o kmentos, o purpur, o hodvab, o šarlat, o všelijaka voňava kašta, o všelijaka veci le slonoskere kokalostar, o dragane kašta, o međos, o trast, o mramoris,

¹³ e škorica, o voňavo amonos, o tymian, e myrha, o kadidlos, e mol, o olejos, o sano aro, o dřiv (zrnos), o gurmňa, o bakre, o graja, o verdana, o otroka the o duši le manušengere.

¹⁴ Našlila tutar o ovocje, pal savo igen džalas tiri duša, a the savoro, so sas vzacno the blištaco, a imar šoha oda na arakhena!

¹⁵ Ola, save cinen the bikenen kala veci a save lestar barvalile, ačhena dural daratar leskere dukhendar. Rovena, ena andre žala

¹⁶ a phenena:

'Jaj, vigos! Vigos, ó, baro foros,

so sas urdo andro šukar lole the fjalova pochtana

a sas učardo andre le somnakaha,

le dragane barenca the le perlenca!

¹⁷ Tel jekh ora sas zničimen kajso baro barvalipen!

Ačhela dural dojekh kormidelňikos the sako, ko odarik predžal la lođaha, o namorňika the savore, save dživen le morostar,

¹⁸ a vriskinena, sar dikhena o thuv, hoj labol o foros.

A phenena:

‘Savo foros sas ajso sar kada baro foros?’

¹⁹ Čhivkerenas peske o prachos pro šere a rovibnaha the pharipnaha vriskinenas:

‘Jaj, vigos! Vigos, ó, baro foros, andre savo savore, kas sas o lodí pro moros, bar-valíle.

Bo tel jekh ora sas zničimen!’

²⁰ Radisaŕon upral late savore andro ňebos! Radisaŕon the tumen, o sentna, o apoštola the o proroka! Bo o Del la odsudzinda vaš oda, so tumenca kerelas.”

²¹ A jekh zoralo aňjelos hazdňa igen baro bar, sar o bar andral o malmos, čhida les andro moros a phendá: “Avke zoraha ela tele čhido o Babilon, oda baro foros, a šoha pes imar na arakhela.

²² Imar šoha andre tu na šundŕola o bašaviben olengero, save bašaven pro harfi, pro flauti the pro trubi, the o hangos avre lavutarengero. Imar šoha pes andre tu na arakhela ňisavo majstros, savo kerel vare-savi buči, aňi andre tu na šundŕola o hangos le mal-moskero.

²³ Šoha imar na labola andre tu o svetlos la mo-meŕakero, aňi imar na šundŕola andre tu o hangos le terneskero the la terňakero. Ola manuša, save tutar cinenas the bikenenas, sas bare manuša pre phuv. Savore narodi sas andre diliňarde tire čarenca.

²⁴ A arakhŕa pes andre late o rat le prorokengero the le sentnengero the savore manušengero, save sas murdarde pre phuv.”

19 Paŕis šundŕom andro ňebos vareso sar zoralo hangos igen but manušengero, sar vičinenas: “Haleluja!

O spaseňje, e slava the e zor le Rajeske, amare Devleske!

² Bo lače the čačipnaskere hin leskere sudi, bo odsudzinda ola bara lubňa, savi musarelas e phuv peskere lubipnaha a diňa lake pale vaš o rat peskere služobňikengero.”

³ Phende the dujtovar:

“Haleluja! O thuv latar avela upre pro furt!”

⁴ O bišuštar (24) phureder the o štar džide bitostí pele a bandŕonas anglo Del, savo bešel pro tronos, a phende:

“Amen. Haleluja!”

⁵ Andral o tronos avŕa avri o hangos, so phendá:

“Lašaren amare Devles, savore leskere služobňika, tumen, save lestar daran, o cikne the o bare!”

Le Bakroreskero bijav

⁶ Paŕis šundŕom vareso sar hangos but manušengero the but paňengero the zorale perumengero, so vičinenas:

“Haleluja!

Bo chudŕa te kralinel o Raj, amaro Del Nekzoraleder!

⁷ Radisaŕuvas, khelas

a das leske e slava!

Bo avŕa o bijav le Bakroreskero

a leskeri terňi pes pririchtinda

⁸ a diňa pes lake, hoj pes te urel

andro žuže, igen šukar, blištáce gada.”

(Ola gada hine o čačipnaskere skutki le sentne manušengere.)

⁹ O aňjelos mange phendá: “Pisin: ‘Bachtale hine ola, save hine vičimen pro bijav le Bakroreskero.’” A phendá mange: “Kala hine o čačipnaskere lava le Devleskere.”

¹⁰ Me peŕom paš leskere pindre, hoj te bandŕuvav anglal leste. Ale ov mange phendá: “Ma ker ada! Me služinav le Devleske jekhetane tuha the le phralenca, save líkeren o svedectvo le Ježišoskero. Anglo Del bandŕuv! Bo olen, save vakeren le Ježišoskero svedectvo, hin o prorocko duchos.”

Oda, ko bešel pro parno graj

¹¹ Dikhŕom phundrado o ňebos a jekhvareste pes sikađa o parno graj a Oda, ko upre bešel, pes vičinelas Pačivalo the Čačipnaskero. Leskero sudos the mariben hino čačipnaskero.

¹² Leskere jakha sas sar o jagale plameňa, pro šero les sas but koruni. Sas pre leste pisimen nav, savo na džanelas ňiko, ča ov korkoro.

¹³ Urdo sas andro gada, so sas močimen andro rat a leskero nav sas: “O Lav le Devleskero.”

¹⁴ A o ňeboskere armadi džanas pal leste pro parne graja a sas urde andro žuže, parne gada.

¹⁵ Andral leskero muj avelas avri ostro šabŕa, hoj laha te marel le naroden. Ov len lidžala la trastuňa pacaha a ov pučinela avri andral o moŕakero lisos e mol – e choŕi le Nekzoraleder Devleskeri.

¹⁶ A pre leskere gada the pre leskero klubos les hin pisimen nav:

O KRALIS LE KRAL'ENGERO
THE O RAJ LE RAJENGERO.

¹⁷ Paŕis dikhŕom te ačhel jekhe aňjelos andro kham. Zorale hangoha vriskinda pre savore čirikle, save letinenas andro luftos: “Aven, zdžan tumen pre le Devleskeri bari hoscina,

¹⁸ hoj te chan o tĕla olengere, save mule: O kraŕa, o generala, o zorale, o graja the ola, save upre bešen, savore slobodne the otroka, o cikne the bare.”

¹⁹ Dikhŕom la šelma the le kralen pal e phuv the lengere slugađen, sar pes zdžan, hoj pes te maren oleha, ko bešel pre oda graj, the leskere slugađenca.

²⁰ A e šelma sas zachudňi a laha the o falošno prorokos, savo kerelas anglal late o zazraki, savenca od-cirdŕa andro klamišagos olen, save priile o znakos la šelmakero the olen, save bandŕonas anglal lakero obrazis. Soduždženen čhide džidonen andro jagalo jazeros, so labol la siraha.

²¹ Okla sas murdarde la šabŕaha, so avelas avri andral o muj Oleske, ko bešel pre graj. A savore čirikle čalile lengere tĕlendar.

O ezeros berša

20 Dikhľom aňjelos, savo avelas tele andral o űebos. Sas les e kleja andral odi bari chev a andro vast baro lancos.

² Chudľa le drakos, ole phure sapes, savo hin o beng the o satan, a phandľa les andre pro ezeros (1 000) berša.

³ Čhida les andre odi bari chev a zaphandľa a zapęatindľa la andre, hoj imar buter te na odčirdel le naroden le Devlestar, medik na predžana o ezeros (1 000) berša. Palis mušinel te avel premuklo pro cikno časos.

⁴ Dikhľom o troni a bešle upre ola, save chudle e autorita te sudzinel. Dikhľom the o duši ole dženengere, savenge sas odčhinde o šere vaš o svedectvo le Ježišoskero the vaš o lav le Devleskero. Oda sas ola, save na bandile anglal e šelma aňi anglal lakero obrazis a na priile o znakos pre peskero čekat aňi pre peskero vast. Obdžidile a kralinenas le Kristoha ezeros (1 000) berša.

⁵ Kada hin o ešebno (peršo) uštiben andral o meriben. Ale okla aver mule manuša na obdžidile, medik na predžala ezeros (1 000) berš.

⁶ Bachtalo the sentno hin oda, kas o Del uštaďa andro ešebno uštiben. Ole dženen o dujto meriben našti kerel nič, ale ena o rašaja le Devleske the le Kristoske a kralinena leha ezeros (1 000) berša.

O beng čhido andro jazeros

⁷ Sar predžana ola ezeros (1 000) berša, ela o satan premuklo andral peskeri bertena.

⁸ Avela avri, hoj le klamišagoha te scirdel le naroden, save hine pro štar phuvakere seri, o Gog the o Magog, hoj len te skidel andro mariben. Ena ajci but sar e moroskeri poš.

⁹ Gele pal calľ phuv a rozačhade pes pašal o taboris le sentnengero – o foros, so o Del kamel. Ale avľa tele e jag andral o űebos a zlabardľa len.

¹⁰ O beng, savo len le klamišagoha scirdľa, sas čhido andro jagalo the sirakero jazeros, kaj hiňi the e šelma the o falošno prorokos. Ode ena mučimen rat-džives furt pro furt.

O sudos anglo parno baro tronos

¹¹ Dikhľom baro parno tronos the Oles, ko upre bešelas. E phuv the o űebos anglal leste denašľa a na sas prekal lende than.

¹² A dikhľom le mulen, le ciknen the le baren, te ačhel anglo tronos le Devleskero. A phundrade pes o zvitki a phundraďa pes the aver zvitkos, o zvitkos le dživipnaskero. O mule sas sudzimen pal oda, so sas pisimen andro zvitki, pal lengere skutki.

¹³ O moros diňa avri peskere mulen, save sas andre leste, a o meriben the o peklos dine le mulen, save sas andre lende. A sako sas sudzimen pal peskere skutki.

¹⁴ Palis o meriben the o peklos sas čhide andre oda jagalo jazeros. Kada jagalo jazeros hin o dujto meriben.

¹⁵ Te varekaskero nav na sas pisimen andro zvitkos le dživipnaskero, sas čhido andro jagalo jazeros.

O nevo űebos the e nevi phuv

21 A dikhľom o nevo űebos the e nevi phuv, bo ešebno (peršo) űebos the ešebno phuv našľile a aňi o moros imar na sas.

² Dikhľom oda sentno foros, o nevo Jeruzalem, te av-el tele le Devlestar andral o űebos. Sas pririchtimen sar e terňi, savi hiňi šukares urďi prekal peskero rom.

³ Le tronostar šundom zoralo hangos, so phendľa: "Dikh, o Stanos le Devleskero hin maškar o manuša a bešela maškar lende. On ena leskere manuša a korkoro o Del ela lenca a ela lengero Del.

⁴ Ov khosela savore apsa pal lengere jakha a o meriben imar buter na ela. Aňi žaľa, aňi vika, aňi dukha imar buter na ena, bo o ešebne veci našľile."

⁵ Oda, ko bešelas pro tronos, phendľa: "Dikh, kerav savoro nevo!" A phendľa mange: "Pisin, bo kala lava hine pačivale the čačipnaskere."

⁶ Phendľa mange: "Imar hin dokerdo! Me som e Alfa the Omega, o Ešebno the o Posledno. Me dava oles, ko hino smedno, hijaba andral o prameňis, so del o džido paňi.

⁷ Oleske, ko űerinela (zvitžinela), ačhela savoro sar dęedictvos; me avava leskero Del a ov ela miro čhavo.

⁸ Ale ola, save daran, save keren o džungipen, save služinen le modlengę, the o napačivale, o vrahi, o lubara, o čarodejňika, the savore klamara ena čhide andro jazeros, so labol la jagaha the la siraha. Kada hin o dujto meriben."

O nevo Jeruzalem

⁹ Avľa ke ma jekh le efa aňjelendar, saven sas ola efa kuča pherarde le efa posledne dukhenca, a phendľa mange: "Av, sikavava tuke la terňa, la romňa le Bakroreskera."

¹⁰ A ľigęďa man andro duchos pro baro the učo verchos a sikada mange oda baro foros, o sentno Jeruzalem, sar avel tele le Devlestar andral o űebos.

¹¹ Sas les e slava le Devleskeri a švicinelas sar žužo krištalos, avke sar o igen dragano bar jaspis.

¹² Le foros sas učo the baro muros a dešuduj (12) brani a paš o brani dešuduj aňjela. Pre ola brani sas pisimen o nava le dešuduje kmeňengere le Izraeloskere manušengere.

¹³ Sas trin brani pal o vichodos, trin brani pal o severos, trin brani pal o juhos a trin brani pal o zapados.

¹⁴ Le foroskere muros sas dešuduj zakladi a pre lende dešuduj nava le dešuduje apoštolengere le Bakroreskere.

¹⁵ A oles, ko manca vakerelas, sas somnakuŃi paca, hoj te merinel o foros the leskere brani the leskero muros.

¹⁶ O foros hino ačhado andre štvorcov, hino džindardo ajci sar the buchlo. A merinda o foros la pacaha a sas džindardo 2 400 kilometri. Keci hino džindardo, ajci hino the buchlo the učo.

¹⁷ A merinda leskero muros a sas šovardeš the šov (66) metri. O aňjelos merinelas ajsa miraha sar o manuša.

¹⁸ A o muros sas ačhado le barestar jaspis a o foros le žuže somnakastar, so dičholas sar žužo caklos.

¹⁹ O zakladi le muroske pašal o foros sas avrišuķalarde savore dragane barenca. Ešebno zakladoskero bar sas jaspis, dujto sas zafir, trito chalcedon, štarto smaragd,

²⁰ pandžto sardonyx, šovto sardion †, eftato chryzolit, ohtoto beryl, eňato topas, dešto chryzopras, dešujekhto hyacint the dešudujto ametyst.

²¹ Dešuduj brani sas dešuduj perlendar, dojekh brana sas andral jekh perla. E ulica le foroskeri sas žuži somnakaj sar žužo krištalos.

²² O chramos andre na dikhľom, bo leskero chramos hino o Raj, o Nekzoraleder Del, the o Bakroro.

²³ Le foroske na kampil, hoj leske te labol o kham vaj o čhon, bo e slava le Devleskeri leske labol a leskeri lampa hin o Bakroro.

²⁴ O narodi phirena andre leskero svetlos a o kraľa pal e phuv anena andre leste peskero baripen.

²⁵ Leskere brani pes dživese na phandena andre, bo e rat ode na ela.

²⁶ Anena andre leste o baripen the e pačiv le narodengeri.

²⁷ A na džala andre leste šoha (ňikda) nič nažužo, aňi oda, ko kerel o džungipen the o klamišagos, ale ča ola, save hine pisimen andre le Bakroreskero zvitkos le dživipnaskero.

22 Sikada mange žužo baro paňi, o paňi le dživipnaskero, so blištisaľolas sar o krištalos a avel avri andral le Devleskero the le Bakroreskero tronos

² a džal maškar e ulica le foroskeri. A pal o soduj seri le paňeske sas o stromos le dživipnaskero, so anel dešudovar beršeste ovocje: Sako čhon del peskero ovocje a o prajti pal o stromos hin pro sastipen le narodenge.

³ Andro foros na ela nič, so hino prekošlo. Le Devleskero the le Bakroreskero tronos ela andre leste a leskere služobňika leske služinena.

⁴ Dikhena leskero muj a leskero nav ela pre lengere čekata.

⁵ E rat imar na ela, na kampela lenge o svetlos la lampatar aňi le khamestar, bo o Raj, o Del, ela lengero svetlos. A on kralinena furt pro furt.

O Ježiš avel sig

⁶ A phenda mange o aňjelos: "Kala lava hine pačivale the čačipnaskere. O Raj, o Del, savo del le proroken peskere Duchos, bičhada peskere aňjelos, hoj peskere služobňikenge te sikavel, so pes mušinela sig te ačhel."

⁷ O Ježiš phenel: "Dikh, avava sig! Bachtalo hino oda, ko doľikerel o prorocke lava kale zvitkoskere!"

⁸ Me, o Jan, oda dikhľom the šundom. Sar oda dikhľom the šundom, peľom paš o pindre le aňjeloske, savo mange oda sikavelas, hoj les te lašarav.

⁹ Ale ov mange phenda: "Ma ker ada! Bo the me služinav le Devleske avke, sar tu the tire phrala, o proroka the ola, save doľikeren o lava kale zvitkoskere. Anglo Del banduv!"

¹⁰ A phenda mange: "Ma zapečatin andre a ma garuv o prorocke lava andral kada zvitkos, bo e ora hiňi pašes!"

¹¹ Ko kerel o nalačhipen, mi kerel o nalačhipen dureder; o melalo mi ačhel dureder melalo; o čačipnaskero mi kerel dureder o čačipen a o sentno mi ačhel dureder sentno."

¹² "Dikh!" phenel o Ježiš: "Avava sig a miro počihiben hin manca, hoj te počinav sakoneske pal leskere skutki.

¹³ Me som e Alfa the Omega, o Ešebno the o Posledno, oda, ko savoro chudel te kerel a the savoro dokerel.

¹⁴ Bachtale hine ola, save peske rajbinen o gada. Len ela pravos ko stromos le dživipnaskero a šaj džana andro foros prekal o brani.

¹⁵ Ale avri ačhena o rikone, o čarodejňika the ola, save keren o lubipen, save murdaren, save služinen le sochenge, the sako, ko rado dikhel o klamišagos the savore klamara.

¹⁶ Me, o Ježiš, bičhadom mire aňjelos, hoj tumenge te vakerel avri kala veci pal o khangera. Me som o koreňis andral o pokoleňje le Davidoskero, e jasno tosaraskeri čercheň."

¹⁷ O Duchos the e terňi phenen: "Av!" Oda, ko šunel, mi phenel: "Av!" Ko hino smedno, mi avel; ko kamel, mi lel peske o džido paňi hijaba.

¹⁸ Me dovakerav sakoneske, ko šunel o prorocke lava andral kada zvitkos: Te na dothovel vareso ke kala lava, bo oleske o Del dothovela o dukha, so hin pisimen andre kada zvitkos.

¹⁹ A te vareko odlela kale prorocke lavendar andral kada zvitkos, oleske o Del odlela leskero kotor pal o stromos le dživipnaskero the le sentne forostar, pal save hin pisimen andre kada zvitkos.

²⁰ Oda, ko dosvedčinel kala veci, phenel: "He, avava sig!"

Amen! Av, Rajeja Ježiš!

²¹ O lačhipen (milost) le Rajeskero le Ježišoskero mi el tumenca!

Amen.

† Abo: Karneol